


**ROBERTI
BELLARMINI EX
SOCIETATE IESU ...
IN OMNES PSALMOS
DILUCIDA...**

Roberto Bellarmino









M

B V e 29



ROBERTI
BELLARMINI

EX SOCIETATE IESV

S. R. E. TIT. S. M A R I A E in via,
Presbyteri Cardinalis

IN OMNES PSALMOS

Dilucida Explanatio.

AD PAVLV M QVINTV M

Pontificem Maximum.



BRIXIAE, MDCXI.

APVD PETRVM MARIAM MARCHETTVM.

De Consensu Superiorum.

170. 102

170. 102

170. 102

170. 102

170. 102

170. 102

170. 102

170. 102

170. 102

170. 102

170. 102

170. 102

170. 102

170. 102

170. 102



Perillustri & Reuerendissimo

DOMINO

D. ANTONIO

ARBOREO

SACRAE THEOLOGIAE DOCTORI

Protonotario Apostolico

Canonico, & Vicario Generali Brixienfi.



*Joannes Baptista, & Antonius Bozzola
Felicitatem Perpetuam.*



Vlciloquam mitissimi Daudis Ci-
tharam, mysticis distentam chor-
dis, sacro fatidicoq; sono tempera-
tam, vix erat, qui aptè percurreret,
& ad suos (vt olim) numeros pulsa-
ret; cum Illustriss. CARDINALIS
BELLARMINVS manum admouit, feliciterque
(sicut in ceteris) erudita explicatione purumputum

a 2 eli-

elicit Regij Vatis concentum . Hanc ipsam Citharam tibi dicatam, tuę suspēdimus Arbori, ANTONI ARBOREE; non vt neglecta pendeat, qualem olim Panis fistulam Poetę fabulati sunt; sed vt post varias, quibus totum diem distineris, grauissimas curas, subseciuis, quod aiunt, horis, otium recrees tuum lectitādo. Erit illa tibi ad manum: Tu verò illi ad tutelam (quamuis tuta suo auctore triumphet) ne ab imperitorum turba in dissonā vocem distrahatur. Hoc facies; quia potes, & vis. Illud est auctoritatis: hoc probitatis. Illa polles: hac dītescis. Fuit illa tibi quondam apud Illustriss. IO. FRANCISCVM CARDINALEM MAVROCENVM cum consilio ū particeps Achateā fide: & grauissimę administrationis socius, Herculeo labore, tum Domi, tum foris in legationibus extitisti; nunc verò apud Illustrissimum MARINVM GEORGIVM Brixiensem Episcopū, qui ob res præclarè gestas altiori dignitatis apici proximus, ad maiora te vocare videtur: Hęc quōdam fuit, nunc est, & augetur in dies. Sed vtrumq; hoc & illud, est à tua in omni litterarum ac studiorum genere præstantia, quę tanta est, vt mirum sit, ni te aliquando publica marmora publicum disciplinarum patronum commendent. Nos sanè monumentum ære perennius tibi exegimus, quo æternū viuas. Tu librum excipe: Animum respice: vtrumq; amare habere, & fove. Vale.

Dat. Brix. ex Typographia nostra Kal. Maij 1611.



Beatissimo Patri, ac Domino
PAVLO QVINTO

PONT. MAX.

ROBERTVS S. R. E. CARDINALIS
BELLARMINVS.



Um primum ex Ordine Religioso ad Cardinalatum imperio Sanctæ Memoræ CLEMENTIS VIII. Pontificis Maximi vocatus sum: mecum ipse cogitare cœpi, Studium contemplationis rerum sacrarum, ob auctas publicas occupationes, non esse facile deferendum. Et cùm ambigerem, quid potissimum ex corpora sanctarum scripturarum mihi desumerem, in quo meditando, & explanando laborarem: obtulit se liber Psalmorū, quem Ecclesiastici omnes quotidie legunt, & pauci admodum intelligunt. Neque terruit me multitudo eorum, qui in Psalmis elucidandis egregiè desudarunt: quoniā tanta est Psalmorum obscuritas, ut nullius labor in ijs explanandis superuacaneus videri possit. Quare horas illas, quibus à publica functione vacabā, ac præsertim nocturna quietis tempora in meditatione Davidicorum Hymnorum non sine animi voluptate, & utilitate consumpsi. Et quamvis toto triennio, quo Capuæ Archiepiscopus fui, & Romæ postea

*in scribendis varijs opusculis occupatus, integris sæpè mensi-
 bus opus inchoatum intermiserim: tandem tamen hoc anno
 Psalmorum explanationem ad exitum Domino adiuuante per-
 duxi. Propositum vero meum non fuit, omnes aliorum expli-
 cationes, præsertim recentiorum, considerare, vel libros eo-
 rum euoluere, multò etià minus aliorum scripta in Com-
 mentarios meos transferre; sed breuitati, & perspicuitati stu-
 dere, vulgatam latinam editionem pro viribus defendere,
 & spiritali mentis refectiõni, ac pia deuotioni consulere.
 Inde factum est, ut omnes Psalmi satis dilucidè, nisi fallor,
 explicati; sed non omnes æquè fusè tractati à nobis sint: &
 fortasse non deerunt, quibus aliqui valdè breuiter, & ieiune,
 ut nonnulli ex primis; alij multo plenius, & uberius; pau-
 ci vero nimis copiosè expositi videbuntur. Sed non eadem
 semper adfuit spiritalis deuotio, non eadem semper mentis
 alacritas; & Psalmorum ego tractationem magis propria me-
 ditatione, quàm multa librorum lectiõne composui. Id quic-
 quid sit, sanctitati tuæ (Pater Beatissimè) offerendum cen-
 sui, tum ut tibi, qui Pater, & Dominus meus es, constet ra-
 tio temporis à me consumpti, non solum in publicis, & notis
 functionibus; sed etiam in priuatis, & secretis occupationi-
 bus: tum ut si quid fortè errati in hac meà postrema; ut
 arbitror, scriptiõne irrepserit; tu qui iudex, Christi loco, toti
 Ecclesia prasides, benignè corrigas. Ego vero Deum pre-
 cabor, ut det sanctitati tuæ diu viuere feliciter in terris, &
 felicissimè semper in cælis.*

P R A E-



P R A E F A T I O.



ANTEQVAM ad explanationem singulorum Psalmorum veniamus, pauca quædam explicanda esse videntur. Primo de excellentia Psalmorum. Secundo de vocibus Psalmi, & Psalterij. Tercio de diuisione, & ordine Psalmorum. Quarto de auctore. Ac excellentia quidem potest intelligi tum ex materia, tum ex forma, & genere scriptionis. Est enim liber Psalmorum quasi compendium, & summa totius veteris instrumenti: quicquid enim Moses vel in historia tradidit, vel in lege præcepit, & quicquid Prophetæ ceteri vel exhortando ad virtutes, vel prædicendo futura scripserunt, id totum in Psalmis David breuissimè comprehendit. Nam in Psalmo 8. 77. 103. 104. 134. & alijs, creationem Mundi, res gestas Patriarcharum, captiuitatem Aegyptiacam, plagas Aegypti, peregrinationem populi in deserto, ingressum in terram promissionis, & alia id genus, luculenter exponit. in Psalm. 118. legem diuinitus traditam miris laudibus effert, atque ad eam custodiendam omnes inflammat. in Psalm. 2. 15. 21. 44. 68. 71. & alijs, Christi Regnum, ortum, prædicationem, miracula, passionem, resurrectionem, ascensionem, Ecclesiæ propagationem ita manifestè prædicat, vt Euangelista potius, quàm Prophetæ fuisse videatur. Denique in Psal. 1. & sequentibus ferè omnibus hortatur ad virtutes, retrahit à vitijs, innitat, allicit, minatur, terret; atque hæc omnia non simplici narratione complectitur, sed vario carminum genere, phrasibus poeticis, & metaphoris plurimis, & admirabilibus, denique nouo quodam genere dicendi ita rapuit animos in amorem, & laudem Dei, vt nihil dulcius, nihil salutarius cani, audiriue possit. Itaque rectè Sanctus Basiliius scribit in explicatione primi Psalmi. Davidis Psalmos etiam ex corde lapideo lacrymas elicere: rectè etiam Sanctus Io. Chrysostomus in explicatione Psalmi centesimi trigesimi septimi, affix-

P R A E F A T I O.

affirmat, eos qui Psalmos ritè canunt, cum Angelis choreas ducere, & quasi cum eis de Dei laudibus, & amore contendere.

Venio ad voces Psalmi, & Psalterij. Psalterium apud nostros librum Psalmorum significat: sic enim Sanctus Augustinus hanc vocem accepit in epist. 140. ad Audacem, cum ait, Psalterium à S. Hieronymo translatum ex hebraeo non habeo: sic etiam Sanctus Hieronymus in epistola ad Sophronium de ordine, & titulis Psalmorum, Scio, inquit, quosdam putare Psalterium in quinque libros esse divisum. Sed in scripturis sanctis Psalterium est instrumentum musicum decem chordis instructum, quod hebraice dicitur, נבל nebel. Tradunt autem Sanctus Basilius in explicatione primi Psalmi, & Sanctus Augustinus in explicatione Psalmi trigesimi secundi, Psalterium hoc differre à cithara, & lyra, quòd cithara, & lyra reddunt sonum à parte inferiore, Psalterium à parte superiore. addit Sanctus Hilarius in prologo Psalmorum, Psalterium fuisse instrumentum rectum, sine vlla obliquitate. De hoc instrumento frequentissima mentio est in sacris literis, & de eo dicitur in Psalmo 32. In Psalterio decem chordarum psallam tibi. Psalmus hebraicè מִזְמוֹר mizmor, significat cantum, siue sonum: deducitur enim à verbo, זָמַר zamar, quod & canere, & citharam, siue Psalterium pulsare significat: eodem prorsus modo, quo verbum, ψάλλω, apud Græcos. De significatione psallendi manibus, videlicet pullando instrumentum, habemus illud 1. Reg. 16. Quærant hominem scientem psallere cithara, ut quando arripuerit te spiritus Domini malus, psallat manu sua, & leuius feras. Atque hoc idem habetur cap. 17. 18. & alibi. De significatione psallendi voce, videlicet canendo, habemus illud in Psalmo vigesimo secundo, Benè psallite ei in vociferatione: & apud Apostolum 1. Cor. 14. Psallam spiritu, psallam & mente, idest, psallam spiritu oris canendo voce corporali laudes Dei, & psallam spiritu cordis desiderando, & amando gloriam eiusdem Dei. Hoc autem interest, Sancto Hilario, & Sancto Ioanne Chrysostomo auctoribus in prologo Psalmorum, inter Psalmum, & Canticum, & Psalmum cantici, & canticum Psalmi: quod Psalmus est sonus organi solius sine vlla voce hominis cantantis; canticum est vox cantantis hominis absque organi modulatione: Psalmus cantici dicitur, cum cantico præcinente Psalmi sonus subsequitur; canticum Psalmi, cum sonitu præeunte, æmula vox canentis auditur. Porro Psalmi David non quemcunque cantum, vel sonum designant, sed eum, quo vel Dei laudes, vel preces ad Deum, vel cohortatio ad virtutem, non autem inanes fabulæ, vel lasciui amores, aut Principum adulationes concinnuntur. Hinc enim liber Psalmorum inscribitur hebraicè,

P R A E F A T I O.

עֵז, סֵפֶר תְּהִלִּים, sepher thehillim, id est, liber hymnorum, siue san-
dum diuinarum: & post finem Psalmi septuagesimi primi, quem vl-
timum omnium David cecinit, legimus, defecerunt תְּפִלֹּת thephillot
David, id est, orationes Davidis. Psalmi enim, vt plurimum conti-
nent vel Dei laudes, vel orationes ad Deum, vel vtrunque simul:
quamuis etiam nonnulli sint, qui in cohortandis hominibus ad vir-
tutem toti consumantur, vt primus, & secundus, & alij.

Iam verò quod attinet ad diuisionem, & ordinem psalterij par-
tiuntur habrei Psalterium in libros quinque, S Hieronymo teste tum
in prologo Galeato, tum in epistola ad Sophronium supra citata:
vbicunque enim ad finem Psalmi scribitur, Amen, Amen, ibi ter-
minari librum existimant: scribitur autem, Amen. Amen, ad finem
Psalmi quadragesimi, septuagesimi primi, octogesimi octauo, &
centesimi quinti: quibus quatuor libris addunt quintum à centesi-
mo sexto vsque ad centesimum quinquagesimum. Sed hæc Hebræo-
rum traditio non est conformis Scripturis sanctis, & ideo ab eodem
S. Hieronymo refutatur in epistola, quam supra notauimus ad So-
phronium, & à Sancto Hilario in prologo Psalmorum. Inscriptio
enim psalterij tum in biblijs hebraicis, tum in editione Septuagin-
ta Interpretatur, est, liber Hymnorum. & Luc 20 Dominus ipse lo-
quitur dicens, Dixit David in libro Psalmorum, Dixit Dominus Do-
mino meo. & 1 Cor. 14 primo loquitur Sanctus Petrus, & ait, Scri-
ptum est enim in libro psalmorum, fiat commemoratio eorum deserta,
&c Porro psalmorum ordo non est accommodatus tempori, quo
scripti sunt. Satis enim constat, Psalmum tertium scriptum fuisse,
quando David fugiebat persecutionem Absalonis filij sui: Psalmum
verò quinquagesimum multò antea fuisse scriptum, quando videli-
cet idem David reprehensus fuit à Nathan ob crimen adulterij, &
homicidij: Psalmum autem centesimum quadragesimum primum,
adhuc antea scriptum fuisse, quando nimirum idem David in spe-
lunca ob metum Saulis Regis delitebat: Psalmum quoque cente-
simum quadragesimum tertium scriptum fuisse longè antea, quando
scilicet David cum Goliath gigante pugnauit: denique probabile
est, ac ferè certum, Psalmum septuagesimum primum esse omnium
postremum ordine temporis, cum scriptus sit in Salomonem iam re-
gnare incipientem; & post eum Psalmum addatur, Defecerunt lau-
des David filij Iesse: & tamen videmus hunc psalmum non in ultimo
loco, sed ferè in medio constitutum. Cur ergo ita dispositi sint psal-
mi vt eos nunc habemus, non est facile diuinare. Non est tamen
reiicienda illorum opinio, vel suspicio, qui volunt, primos quin-
quaginta psalmos, quorum ultimus est, Miserere mei Deus; perti-
nere ad poenitentes, siue incipientes: alteros quinquaginta, qui de-

P R A E F A T I O.

finunt in Psalmum, Misericordiam, & iudicium cantabo tibi Domine, pertinere ad iustos proficientes: prostremos quinquaginta, quos concludit Psalmus, Laudate Dominum in sanctis eius; pertinere ad viros consummatos, atque perfectos; siue Psalmos, ita disposuerit Esdras, ut videtur sentire S. Athanasius in synopsi; siue Septuaginta Interpretes, ut S. Hilarius docet in, prologo Psalmorum.

Restat quaestio de auctore Psalmorum: duae sunt autem veterum Patrum sententiae: nam S. Athanasius in synopsi S. Hilarius in prologo Psalmorum, & S. Hieronymus in epistola ad Sophronium de ordine Psalmorum, & in epistola ad Cyprianum de expositione Psalmi octogesimo noni. varios esse censent Auctores Psalmorum, eos videlicet omnes, qui nominantur in titulis, Dauidem, Mosem, Salomonem, Asaph, Idithun, & alios. Contra verò S. Io. Chrysostomus, Theodoretus Euthymius, & Cassiodorus in praefatione commentariorum in Psalmos, & S. Augustinus lib. 17. de Civit. Dei cap. 14. Psalmorum omnium vnum Dauidem auctorem agnoscunt Nobis tria sunt certa Primum, auctorem primum omnium Psalmorum esse Spiritum sanctum: id enim testatur Apostolus Petrus Act. 1. & Apostolus Paulus ad Hebr. 3. & ipse Dauid. 2. Reg. 23. dicit, Spiritus Domini locutus est per me, & sermo eius per linguam meam. & in Psalm. 44. Lingua mea calamus scribae velociter scribentis. ergo siue Dauid, siue Moses, siue quis alius psalmos condiderit, ipsi quidem quasi calami fuerunt. sed Spiritus sanctus fuit, qui per eos scripsit. quid vero necesse est laborare de calamo, cum de scriptore constat? Secundo certum mihi videtur, maximam partem Psalmorum esse Dauidis: nam in fine Psalmi septuagesimi primi legimus, Defecerunt laudes Dauid filij Iesse. item lib. 2. Reg. cap. 20. dicitur, Dauid egregius psaltus Israel: denique in 2. Paralip. cap. 5. dicitur, cantores ordinatos fuisse, ut canerent psalmos, quos fecit Dauid. Tertio pro comperto mihi habere videor, eos psalmos, qui carent titulo, esse Dauidis, ut etiam omnes illos, qui nomen Dauid in titulo praefertunt, siue scriptum sit, ipsius Dauid, siue ipsi Dauid: nam psalmus secundus caret titulo, & tamen. Act. 4. Apostoli affirmant, eum psalmum à Dauide fuisse compositum: & psalmus nonagesimus quartus caret titulo apud Hebraeos; & Apostolus ad Hebr. 4. tribuit eum Dauidi, Deinde psalmi qui in Hebraeo Codice carent titulo, in Graeco textu adscribuntur Dauidi: proinde credibile est, excidisse, titulos ex Codice hebraeo, qui in eo aderant, cum Septuaginta Interpretes scripturas hebraicas in graecum idioma transferrent. Denique regula Hebraeorum, qui dicunt, psalmum, qui caret titulo esse illius auctoris, qui scripsit praecedentem, falsa esse convincitur: nam secundum meam regulam primus, & secundus psalmus nullius essent, cum

uterq;

P R A E F A T I O.

uterq; careat titulo: præterea psalmus octogessimus nonus adscribitur Mosis, & decem psalmi consequentes, qui titulo carent, eidem Mosis adscribi deberent. At id fieri non potest, cum in psalmo nonagesimo octavo mentio fiat Samuelis, qui satis longo tempore post obitum Mosis natus est. Vide plura de hac re in explicatione tituli psalmi octogessimi noni. quod autem non soli illi psalmi, Davidis sint, qui habent in titulo, ipsius David, sed etiam illi, qui habent, ipsi David, probat Sanctus Augustinus ex psalmo centesimo nono, qui habet *ps. David*, ipsi David: & tamen Dominus Matth. 24. dicit, Quomodo David vocat eum Dominum dicens, dixit Dominus Domino meo. Atque hæc quidem de auctore Psalmorum certa mihi esse videntur. De reliquis Psalmis, qui titulum præferunt Mosis, aut Salomonis, aut Asaph, aut Idithun, aut Ethan, aut filiorum Core: probabilem censeo sententiam S. Athanasij, Hilarij, & Hieronymi; sed probabiliorem Chrysostomi, Augustini, Theodoret; & aliorum, qui eos secuti sunt. Cur autem sententiam posteriorem præferendam putem, ratio est, quia est communior, & fuit etiam communior ante annos mille: id enim testantur S. Augustinus lib. 17. de *Civit. Dei*, cap. 14. & Theodoretus in præfatione psalmorum. Item, quia satis constat, Asaph, Idithun, Ethan, & filios Core fuisse cantores potius, quam Prophetas, & psalmos illis tribui in titulo, quia dabantur illis ad canendum, non quod ipsi eos composuissent quod ex eo intelligi potest, quod in eodem titulo aliquando ponitur nomen David, & Idithun, siue alterius, ut videre est in titulo Psalmi 38. 61. 64. 136. 137. & 138. Accedit postremo, quod Luc. 20. cum Dominus ait, Dixit David in libro Psalmorum; visus est totum librum Psalmorum Davidi tribuere.





Imprimatur.

Si videbitur R. P. M. Sac. Pal. Apost.

Cesar Fidelis Viceſſ.

Fr. Ludouicus Yſtella Magiſter Sacri Palatiꝝ Apo-
ſtolici.



Imprimatur.

Antonius Arboreus Vic. Gen.

Fr. Franciſcus Petraſanct. Inquiſit. Brixia.



INDEX PSALMORVM ALPHABETICVS.

Prior numerus indicat ordinem Psalmorum,
posterior paginas Commentarij.

119	A <i>D</i> Dominum cum tribularer, pag.	770
24	<i>A</i> Ad te Domine leuavi animam meam.	109
27	<i>A</i> Ad te Domine clamabo.	118
102	<i>A</i> Ad te leuavi oculos.	780
28	<i>A</i> fferte Domine filij Dei.	732
77	<i>A</i> ttendite popule meus legem meam.	467
48	<i>A</i> udite hac omnes gentes.	288
118	B <i>E</i> ati immaculati in via.	732
137	<i>B</i> <i>E</i> ati omnes qui timent.	797
31	<i>B</i> <i>E</i> ati quorum remissa sunt.	153
40	<i>B</i> <i>E</i> atus qui intelligit.	235
1	<i>B</i> <i>E</i> atus vir, qui non abiit.	1
111	<i>B</i> <i>E</i> atus vir, qui timet Dominum.	708
33	<i>B</i> <i>E</i> nedicam Dominum in omni tempore.	271
102	<i>B</i> <i>E</i> nedic anima mea Domino, & omnia.	639
103	<i>B</i> <i>E</i> nedic anima mea Domino, Domine.	646
143	<i>B</i> <i>E</i> nedictus Dominus Deus.	870
84	<i>B</i> <i>E</i> nedixisti Domine terram tuam.	513
91	<i>B</i> <i>O</i> num est confiteri Domino.	381
95	C <i>A</i> ntate Domino canticum nouum, cantate.	601
97	<i>C</i> <i>A</i> ntate Domino canticum nouum, quia.	612
149	<i>C</i> <i>A</i> ntate Domino canticum nouum, laus.	899
18	<i>C</i> <i>E</i> li enarrant gloriam.	79
74	<i>C</i> <i>O</i> nfitebitur tibi Deus.	451
9	<i>C</i> <i>O</i> nfitebor tibi Domine in toto corde meo narrabo.	35
110	<i>C</i> <i>O</i> nfitebor tibi Domine in toto corde meo, in consilio.	704
137	<i>C</i> <i>O</i> nfitebor tibi Domine in toto corde meo, quoniam.	839
104	<i>C</i> <i>O</i> nfitemini Domino, & inuocate.	657
105	<i>C</i> <i>O</i> nfitemini Domino, quoniam bonus. 1.	667
106	<i>C</i> <i>O</i> nfitemini Domino, quoniam bonus. 2.	679
117	<i>C</i> <i>O</i> nfitemini Domino, quoniam bonus. 3.	726
135	<i>C</i> <i>O</i> nfitemini Domino, quoniam bonus. 4.	839
15	<i>C</i> <i>O</i> nfirma nos Domine.	57
115	<i>C</i> <i>R</i> edidi propter quod.	722

Cum

I N D E X.

4	Cum inuocarem exaudivit me.	15
129	D e profundis clamaui.	803
43	Deus auribus nostris audiuitur.	248
49	Deus Deorum Dominus.	296
62	Deus Deus meus ad te.	361
21	Deus Deus meus respice in me.	91
69	Deus in adiutorium meum intende.	413
53	Deus in nomine tuo saluum me fac.	319
71	Deus iudicium tuum Regi da.	423
108	Deus laudem meam ne taceris.	687
66	Deus misereatur nostri.	383
45	Deus noster refugium & virtus.	271
82	Deus quis similis erit tibi.	502
59	Deus repulisti nos, & destruxisti.	348
81	Deus stetit in synagoga Deorum.	498
78	Deus venerunt gentes.	481
93	Deus ultionum Dominus.	588
114	Dilexi quoniam exaudiet.	719
17	Diligam te Domine fortitudo.	67
38	Dixi, custodiam vias meas.	218
109	Dixit Dominus Domino meo.	697
35	Dixit iniunctus, ut delinquat.	192
13	Dixit insipiens in corde suo. 1.	52
52	Dixit insipiens in corde suo. 2.	318
140	Domine clamaui ad te.	857
7	Domine Deus in te speravi.	26
87	Domine Deus salutis mea.	533
8	Domine Dominus noster.	32
101	Domine exaudi orationem meam, &.	619
142	Domine exaudi orationem meam, auribus.	865
20	Domine in virtute tua.	88
6	Domine ne in furore tuo. 1.	23
37	Domine ne in furore tuo. 2.	208
130	Domine non est exaltatum.	808
138	Domine probasti me.	843
3	Domine quid multiplicati sunt.	11
14	Domine quis habitabit.	55
89	Domine refugium factus es.	557
23	Domini est terra, & plenitudo eius.	105
26	Dominus illuminatio mea.	121
22	Dominus regit me.	102
92	Dominus regnavit decorem.	586


I N D E X.

<u>96</u>	Dominus regnavit, exultet.	<u>607</u>
<u>98</u>	Dominus regnavit, irascantur.	<u>616</u>
<u>133</u>	E cce nunc benedicite.	<u>813</u>
<u>132</u>	E cce quam bonum.	<u>821</u>
<u>58</u>	Eripe me de inimicis.	<u>342</u>
<u>139</u>	Eripe me Domine.	<u>852</u>
<u>44</u>	Eruſtauit cor meum.	<u>257</u>
<u>144</u>	Exaltabo te Deus meus.	<u>876</u>
<u>29</u>	Exaltabo te Domine.	<u>439</u>
<u>19</u>	Exaudiat te Dominus.	<u>85</u>
<u>60</u>	Exaudi Deus deprecationem.	<u>313</u>
<u>54</u>	Exaudi Deus orationem meam, &.	<u>322</u>
<u>63</u>	Exaudi Deus orationem meam, cum.	<u>366</u>
<u>16</u>	Exaudi Domine iusticiam meam.	<u>62</u>
<u>39</u>	Expectans expectavi Dominum.	<u>235</u>
<u>80</u>	Exultate Deo adiutori nostro.	<u>492</u>
<u>32</u>	Exultate iusti in Domino.	<u>162</u>
<u>67</u>	Exurgat Deus, & dissipentur inimici.	<u>386</u>
<u>86</u>	F undamenta eius in montibus.	<u>517</u>
<u>85</u>	I nclina Domine aurem tuam.	<u>519</u>
<u>125</u>	I n conuertendo Dominus.	<u>738</u>
<u>10</u>	in Domino confido.	<u>45</u>
<u>113</u>	In exitu Israel de Aegypto.	<u>714</u>
<u>30</u>	in te Domine <u>speraui.</u> 1.	<u>144</u>
<u>70</u>	in te Domine <u>speraui.</u> 2.	<u>415</u>
<u>65</u>	Iubilate Deo omnis terra, psalmum.	<u>377</u>
<u>99</u>	Iubilate Deo omnis terra, seruite.	<u>622</u>
<u>34</u>	Iudica Domine nocentes me.	<u>181</u>
<u>42</u>	Iudica me Deus, & discerne.	<u>246</u>
<u>25</u>	Iudica me Domine, quoniam.	<u>117</u>
<u>121</u>	L aceratus sum in his, quae dicta.	<u>775</u>
<u>145</u>	L auda anima mea Dominum.	<u>884</u>
<u>147</u>	Lauda Hierusalem Dominum.	<u>891</u>
<u>148</u>	Laudate Dominum de caelis.	<u>895</u>
<u>150</u>	Laudate Dominum in sanctis eius.	<u>905</u>
<u>116</u>	Laudate Dominum omnes gentes.	<u>725</u>
<u>146</u>	Laudate Dominum, quoniam.	<u>887</u>
<u>134</u>	Laudate <u>nomen</u> Domini.	<u>814</u>
<u>112</u>	Laudate pueri Dominum.	<u>711</u>
<u>110</u>	Leuavi oculos meos.	<u>773</u>

I N D E X.

47	M Agnus Dominus, & laudabilis.	381
131	Memento Domine David,	811
36	Miserere mei Deus, miserere.	334
35	Miserere mei Deus, quoniam.	330
30	Miserere mei Deus secundum magnam.	304
100	Misericordiam, & iudicium.	624
88	Misericordias Domini.	539
126	N isi Dominus adificauerit domum.	791
123	Nisi quia Dominus erat in nobis.	781
36	Noli amulari in malignantibus.	197
61	Nonne Deo subiecta eris.	356
75	Notus in Iudaa Deus.	454
46	O mnes gentes plaudite manibus.	277
107	P aratum cor meum Deus.	687
72	Q uam bonus Israel Deus.	432
83	Quam dilecta tabernacula.	507
2	Quare fremuerunt gentes.	5
41	Quemadmodum desiderat cervus.	340
124	Qui confidunt in Domino.	786
51	Quid gloriaris in malitia.	314
90	Qui habitat in adiutorio.	366
79	Qui regis Israel, intende.	485
228	S ape expugnaverunt me.	800
68	Saluum me fac Deus.	400
11	Saluum me fac Domine.	48
57	Si vere utique iustitiam.	338
136	Super flumina Babylonis.	834
64	T E decet hymnus Deus.	371
94	V enite exultemus Domino.	396
5	Verba mea auribus percipe.	19
76	Voce mea ad Dominum clamaui. 1.	419
141	Voce mea ad Dominum clamaui. 2.	862
12	Vsquequo Domine obliuisceris.	61
73	Vt quid Deus repulisti in finem.	441

F I N I S.



PSALMVS PRIMVS.

ARGVMENTVM.



Rimus Psalmus titulo caret apud Hebræos, nec defunt, qui putent eum esse Esdræ, qui Psalmos in ordinem digessit: sed communiter tribuitur Daudi ab Ambrosio, Hilario, Basilio, Augustino, & cæteris. Ipse etiã Sanctus Hieronymus, qui alioqui multos facit auctores Psalmorum, hunc primum Psalmum Davidis esse dicit in Epist. ad Paulinum de studio scripturarum. Denique in textu Græco additus est titulus siue à Septuaginta, siue ab alijs, Daud Prophetæ, & Regis melos. Aptissimè autem ponitur hic Psalmus in primo loco, quia de beatitudine tractat: beatitudo enim est fundamentũ, & principium doctrinæ moralis. Argumentum igitur Psalmi est ostendere beatitudinem siue in spe, siue in re non contingere, nisi hominibus iustis, proinde iustitiæ dandam esse operam, ut ad beatitudinem perueniamus.

EXPLICATIO

Psalmi primi.

- I. **B**Eatus vir, qui non abiit in cōsilio impiorum, & in via peccatorum non stetit, & in cathedra pestilentiae non sedit.

In primo, & secundo versiculo Prophetæ docet, beatitudinem, quatenus in hac vita haberi potest, non consistere in alia re, quã in verã iustitiã. Quod

Belarm. in Psal.

ipsum docet Apostolus Rom. 14. Regnum Dei non est esca, & potus, sed iustitia, pax, & gaudium in Spiritu sancto. Soli enim homines verè iusti, sunt amici Dei, inuõ & Filij, ac per hoc hæredes Regni, & spe beati, quod attinet ad perfectissimam felicitatem: & hic interim solido gaudio, & pace, quæ exuperat omnem sensum, perfruentes. Describit autem in primo versu hominem iustum per negationem, in secundo per affirmationem, ac si breuiter dixisset, illum esse iustum, ac per hoc beatum, qui declinat à malo, & facit bonum.

Illud autem hoc loco diligenter notandum, & memoriæ commendandum est, consuetudinem Davidis, & aliorũ Prophetarum esse, ut id ipsum bis repetant, ita ut vna pars versiculi sit repetitio, vel explicatio alterius. Exempli gratia Exod. 15. in Cantico Moysis, Ille Deus meus, & glorificabo eum, Deus patris mei, & exaltabo eum. Deuter. 32. Concresecat ut pluuia doctrina mea, fluat ut ros eloquium meum. Psalmo 33. Benedicam Dominum in omni tempore, semper laus eius in ore meo. Hæc frequentissimè occurrunt, cum sit hæc repetitio genus ornamenti proprium sanctorum Prophetarum. Prima igitur pars primi versiculi hanc sententiam continet, beatum esse illum, qui non præuaricatur legem Dei. Sed Poetico more Daud hanc sententiam expressit per metaphoram viæ, & ambulationis. Beatus, inquit, vir, qui non abiit in consilio impiorum, id est, ille beatus est, qui iustus est; ille autem ius-

A

stus

stus est, qui nō abiit in consilio impiorum, idest, qui in via vitæ nō est sequutus consilia, leges, sententiam impiorum, quæ sunt omnino contraria viæ Dei, idest, legi Dei. Altera pars eiusdē versiculi idipsum explicat alijs verbis idem significantibus. Nam eū dicit, & in via peccatorum non stetit, non significat, & in via peccatorum non substituit, sed, & in via peccatorum nō ambulauit. Stare enim in via, hoc loco, nō est quiescere, & non ambulare, sed est ambulando non recedere à via inchoata. Itaque idem est, nō abire in consilio impiorum, & non stare in via peccatorum; vtrumq; enim significat illum esse iustū, qui recedit à via, idest, lege, & consilij peccatorum. Et quoniam lex Domini soluitur non solum male viuendo, sed etiā male docendo, iuxta illud Matth. 5. qui soluerit vnum de mandatis istis minimis, & docuerit sic homines, minimus vocabitur in Regno caelorum; Ideo Propheta adiūgit, & in cathedra pestilentiz non sedet; idest, ille est iustus, ac per hoc beatus, qui neque operibus, neque doctrina legem Domini præuaricatur. Sedere enim in cathedra pestilentiz, est esse in confessu hominum pestilentium, siue assidere pestilentibus, & cum eis legem Domini despicere, quasi nihil conducatur ad beatè viuendum, idest, cum gaudio, & lætitia, sed vtilius sit carnis desideria perficere, sensibusq; in omnibus indulgere. Vox sedentium in cathedra pestilentiz describitur Malachiæ 3. illis verbis, Vanus est, qui seruit Deo, & quod emolumentum, quia custodiimus præcepta eius? Quod ad verba attinet, pro voce, beatus, in Hebræo habetur, ascrè, quæ vox habet formā numeri multitudinis, & ideo à nonnullis recētoribus vertitur, Beatitudines viri, &c. Sed probabilius est vocem illam esse indeclinabilem, & significare, tum beatum, tum beatitudinem. Nam non solum Septuaginta verterunt *μακάριοι*, idest, beatus vir, sed etiā sanctus Hieronymus vertit ex Hebræo, Beatus vir. Pro cathedra pestilentiz, in Hebræo habetur ad litteram, cathedra Lezim,

idest, derisorum. sed sensus est omnino idem. Nulla enim est pestilentia maior, quàm deridere legem Dei, & eos, qui iustè, ac piè viuere student. Ad extremū notat sanctus Basilius, per id quod dicitur beatus vir, non excludi feminas à beatitudine, sed includi, quoniā vir caput est mulieris, & in capite intelliguntur etiam membra.

Sed in lege Domini voluntas eius, & in lege eius meditabitur die, ac nocte.

In hoc secundo versiculo describitur iustus per affirmationē, & sunt hic etiam duæ partes, quarum vna est ferè alterius repetitio. Rectè autē dicitur is esse iustus, siue beatus, cuius voluntas est in lege Domini. quoniā non requiritur ad iustitiam huius vitæ, vt nulla in re offendamus, cū scriptum sit Iacob. 3. In multis offendimus omnes: sed satis est, si ita simus affecti erga legem Domini, vt cupiamus eam omnino perficere, & si forte labimur in aliquod peccatū, vt certè sæpe labimur, id sit præter voluntatem bonam, idest, præter charitatem, quam habemus ad Deum, & ad legem eius, non autē contra charitatem, proinde peccatum sit, non crimen, idest, veniale, non letale. Idem alijs verbis habetur in alio Psalmo, Lex Dei eius in corde ipsius. Nam & voluntas, siue cor iusti est in lege Dei, & lex Dei est in voluntate, siue corde iusti. Lex est in corde, vt in sede, & cor est in lege, vt in re amata, quæ semper cogitatur, & appetitur. Atque hoc est, quod sequitur, & in lege eius meditabitur die, ac nocte. Id enim est legem esse in voluntate, siue voluntatem in lege, perpetuò mente exerceri in ea cogitanda, & amanda, vt quicquid agendum sit, secundum eam regulam fiat. Itaque illud, die, ac nocte, non significat, non posse hominem iustum vacare, vel ad punctum temporis à contemplatione diuinæ legis, sed frequentissimè debere animum ad legis præcepta reuocare, eiusque memorem semper esse, dum aliquid cogitandum, dicendum, faciendum occurrit, in quo periculum.

culum sit, ne iustitia violetur. Porro, non solum Latina vox meditabitur, sed etiam Græca *μετάσσειν*, & Hebraica *יחנן* leghe, referri possunt ad exercitium siue cogitationis, siue vocis, siue operis. Psalm. 34. Lingua meditabitur iustitiam tuam. & Psalm. 36. Os iusti meditabitur iustitiam. Poeta quoque prophanus dixit, Meditabor arundine Mulam. Et exercitia militum, militares meditationes dicebantur. Itaque sensus est, & in lege Domini meditabitur die, ac nocte, idest, in lege Domini cogitanda, perficienda, docenda assidue exercebitur.

XII. Et erit tanquam lignum, quod plantatum est secus decursus aquarum, quod fructum suum dabit in tempore suo.

XIII. Et folium eius non defluet, & omnia quęcunque faciet prosperabuntur.

Declaravit Propheta, quis sit dicendus verè iustus: nunc declarat, talem iustum esse beatum, spe in hoc seculo, re in futuro. Sumitur autem declaratio à similitudine arboris, quę plantata iuxta riuos aquarum habet omnia, quę in arbore felicissima requiri possunt. Nam aliquę arbores sola folia producunt, & ea non diu retinent; alię folia producunt, & semper retinent, sed fructus earum, vel nimis præcoces sunt, vel nimis serotini; alię denique fructus edunt tempore suo, & folijs semper vestiuntur, sed non omnes fructus ad maturitatem perducunt: solę igitur illę arbores omni ex parte perfectissimę sunt, quę folia, fructusque producunt, & folia semper retinent, & omnes omnino fructus tempore suo maturos præstant. Tales arbores sunt Pini, Palmę, Oleę, quibus Scriptura iustos homines passim comparare solet. His igitur felicissimis arboribus similes esse dicit iustos hoc loco Propheta. Nam iusti fundati, & radicati, ut ait Apostolus, in charitate, propinqui sūt per amicitiam fonti viuo, vnde humo-

rem gratiæ semper trahunt; & opera bona tempore opportuno faciunt, & omnia eis cooperantur in bonum, & semper virēt gloria & honore. Quamuis enim interdum à carnalibus despiciantur, tamen à sapientibus, & quod maius est ab Angelis, & ab ipso Deo honorantur. Et hæc quidem in hoc seculo; sed præterea fructus faciunt in tempore suo, quia salutem veram operantur tempore congruo recipiendam, idest, post mortem; cū impij ante tempus, in hac vita felicitatem quærant, & sic temporalem, & sempiternam amittant. Et folia semper retinent, quia accipient, iuxta verbum Apostoli Petri, immarcescibilem glorię coronam, & in memoria æterna erit iustus. Et denique quęcunque faciunt, prosperabuntur, quia opera omnia usque ad calicem aquę frigidę datum in nomine discipuli plenam, ac perfectam mercedem accipient. Scio textum Hebraicum in Biblijs modernis vnum tantum versum ex his duobus facere, & priorem partem versus terminare ad illa verba, & folium eius non defluet. Ex qua distinctione adducti nonnulli, verba illa, & omnia quęcunque faciet prosperabuntur, non exponunt de arbore vera, sed solum de homine iusto. Sed nos sequimur lectionem Hebraicam, quę est in operibus sancti Hieronymi, cui concordant codices Græci & Latini. Et certè secundum nostram lectionem similitudo ab arbore sumpta est multo pulchrior & plenior. Illud etiam obseruandum est hoc loco, verbum prosperabuntur, in Hebræo esse, *יצלח*, quod propriè significat, prosperare faciet. In quo notatur virtus actiua arboris, quę concurrat ad maturandos omnes fructus, & pari ratione notatur in applicatione similitudinis virtus actiua liberi arbitrij, quę concurrat cum gratia Dei ad opera meritoria. Quod est aduersus dogmata Lutheranorum.

Non sic impij, non sic, sed tanquam pulvis, quę projicit ventus à facie terrę.

Ex cōparatione miseriz impiorum confirmat Propheta felicitatem iustorum. Ne quis enim existimaret, illa bona esse communia omnibus, & ex causis naturalibus tantum prouenire, & non præcipuè ex prouidentia Dei, addit, Non sic impij, idest, non eandem sortem, sed contrariam omnino recipient. Elegatissimè verò Propheta describit miseriam impiorum, eamq. opponit felicitati iustorū. Iusti ob humoris Diuini copiam virēt, & fructum faciunt, nec vnquam virorem suum, aut laborum fructū amittunt: Contra, impij diuino illo humore destituti aridi, & steriles instar leuissimi pulueris à vëto dispersi, ne vestigium quidem sui relinquant, nec solum omnem gloriam, opes, & voluptates perdunt, sed etiam ipsi pereunt in æternum. In textu Hebraico non habetur illa repetitio, non sic, neque illud, à facie terræ. Sed hæc addita sunt à Septuaginta Interpretibus explicandi, vel ornandi gratia. Vocabulū item pulueris, non est, haphar, quod propriè puluere significat in genere, sed est, mots, quod significat glumam, idest, speciem pulueris ex tritura paleæ, paleam videlicet minutissimè contritam, & quasi in puluerem redactam, qua leuissima est, vt eam modicus status procul abigere possit.

VI. Ideo non resurgent impij in iudicio, neque peccatores in concilio iustorum.

Rectè in editione Sixti V. & Clementis VIII. positum est non resurgent, cum in plerisq. Codicibus haberetur, non resurgunt. Nam ex Hebræo, Græco, Chaldaeo, & emendatioribus manuscriptis satis apertè colligitur, legendum esse, non resurgēt. Illud autem, in concilio iustorum, positum est ex Hebræo, nam in Græco, & manuscriptis Latinis constanter legitur, in consilio. Potuit quidem fieri vt ex similitudine nominum, fuerit in Latinis Codicibus positum, consiliū, pro concilio; sed potuit etiam fieri, vt in Hebraicis Codicibus irrepperit, hada, pro haza, idest, conciliū pro consilium. Certè Septua-

ginta Interpretes, qui eodē modo verterūt in primo versu, & in sexto, vtrouque ponētes ^{בזל}, videntur eandem vocem Hebraicam in vtroque loco legisse. Itaque vtraque lectio probanda videtur, vna ob auctoritatem vulgatæ editionis, quæ cum Hebræo cōcordat, altera ob auctoritatē Septuaginta Interpretum, quorum vocabulum, buli, vbiq. in ipsa vulgata Latina editione consilium, non cōcilium vertitur. Declarat igitur hoc loco Propheta, discrimen iustorum, & impiorum in nouissimo iudicio perspicuè manifestandum. Nam hoc tempore sæpè accidit, vt omnia confundantur. Ait igitur, ideò non resurgent impij in iudicio iustorum. Illud enim, iustorū, ad vtramq. partem versiculi pertinet, sicut etiam illud, nō resurgent, nō solum refertur ad illud, in iudicio, sed etiam ad illud, in concilio. & idem ferè est, non resurgent impij in iudicio iustorum, & non resurgent peccatores in concilio, vel consilio iustorum. Itaque cessat quæstio illa quam nonnulli hoc loco pertractant, cur dixerit Propheta, non resurgēt impij in iudicio. Pulchrè autē David coniunxit vltima primis. sicut enim dixerat in principio, iustos non abijsse in consilio impiorum, & in consessu eorū non sedisse; ita nunc dicit, in die iudicii impios non resurrecturos in iudicio, & concilio iustorum. Sensus igitur hic est, ideò non resurgent impij in iudicio iustorum, idest, longe aliud erit iudicium iustorum, quam impiorum. Quod explicatur sequentibus verbis, neq. peccatores in concilio iustorum, idest, cum resurgēt impij non erunt in consessu, & consortio iustorum, sed iudicati ad inferos in cētū damnatorum erunt. Quod si legamus, in consilio iustorū, poterit cōsiliū accipi pro loco consilij, & tunc in idem recideret cum voce concilio. Et quoniam illud, non resurgent, ex Hebræo commodè verti posset, non stabunt, siue non consiliet: erit etiam hic sensus, In iudicio, & cōcilio iustorum, quando videlicet Sancti cum Christo sedebunt iudices Mundi, tunc peccatores nō stabunt, sed cadet.

Iusti

fusti autem stabunt in magna constantia aduersus eos, qui se angustiauerunt.

VII. Quoniam nouit Dominus viam iustorum, & iter impiorum peribit.

Reddit rationem cur impij non sint in iudicio accepturi iustorum gloriam. Quoniam videlicet via iustorum approbatur à Deo, qui falli non potest, ac per hoc via est recta, & perducens ad Ciuitatem Dei; via impiorum non approbatur à Deo, & qui per eam ambulant, frustra laborant, quia nunquam peruenient. Illud, nouit, accipitur pro notitia approbationis; & cum dicitur, Deus nouit viam iustorum, nos certi reddimur, securos esse de vera felicitate, qui per eam viam incedunt. Illud autem, iter impiorum peribit, significat ambulationem impiorum frustra esse susceptam, quia per eam viam non peruenitur ad optatum locum. Itaque hoc loco, iter, non accipitur pro via materiali, in qua ambulatur, sed pro ipsa ambulatione, vt diximus. Per ambulationem autem intelligitur cursus totius vitæ, studia, labores, contentiones, quæ omnia nihil impijs proderunt. Hic Psalmus potest accommodari omnibus Sanctis, sed potissimum, & per antonomasiam Christo, qui præter omnes homines, & Angelos non præuariatus est legem Dei, sed eam perfectè impleuit factus obediens vsque ad mortem. Et ideo tanquam lignum plantatum iuxta riuos aquarum, habens animam coniunctam hypostaticè fonti viuo, qui est Verbum Dei fons Sapientiz in excelsis, gloria, & honore coronatus est, & fructus mirabiles edidit, & ad maturitatem perduxit, omnes videlicet electos vocauit, iustificauit, magnificauit.

PSALMVS SECVNDVS.

ARGVMENTVM.



IC Psalmus caret titulo, sed Dauidi tribuitur ab Apostolis Act. 4. Nonnulli Psalmum hunc non secundum, sed partem primi esse iudicant, propterea quod in Actis Apostolorum cap. 13. in quibusdam Codicibus citetur hic Psalmus sub nomine primi Psalmi. sed Codices plures, & meliores habent, sicut in Psalmo secundo scriptum est. & consonat editio Græca, τὸ δεύτερον. Est autem totus hic Psalmus prophetia de Regno Christi manifestissima, & explicata ab Apostolis Act. 4. cap. 13. & ad Heb. 1. & 5. vt omnino errare videantur, qui ad literam de Dauide hunc Psalmum explicare nituntur.

EXPLICATIO

Psalmi secundi.

Quare fremuerunt gentes, & populi meditati sunt inania?

Dauid in spiritu prænoscentis Messiam venturum, & persecutiones multas aduersus eum exorituras, & eum tamen felicissimè regnaturum, incipit ab increpatione persecutorum; & sensus est, frustra Gentiles, & Hæbreos, tum Principes, tum populos infremuisse indignatione contra Messiam, & cogitauisse rationem impediendi Regni eius. In Hebræo primum verbum est præteriti temporis, secundum futuri: sed quia de re eadem est sermo, Septuaginta Interpretes vtrumque verbum reddiderunt per tempus præteritum, & S. Hieronymus vtrumque reddidit per tempus futurum. Et quidem sententia semper est vera; nam res ipsa in se futura erat, sed Prophetæ quodammodo præterita, cum eam cerneret quasi præteritam. Tamen absolutè lectio Septuaginta interpretum, & vulgatæ editio-

nis præferenda est, tum quia in Actis Apostolicis cap. 4. legimus in præterito, fremuerunt, & meditati sunt; tum quia ratio exigit, vt significatio primi verbi sit regula significationis secundi, non contra. Nomine, gentium, cùm dicitur, quare fremuerunt gentes, videntur intelligendi Gentiles. Nam sic intellexerunt Apostoli Act. 4. & vox Hebræa *Goiym*, passim in scripturis accipitur pro Gentilibus, siue Ethnicis. Per populos autem, cùm subditur, & populi meditati sunt inania, intelligendi sunt Hebræi, vt constat ex eodem cap. 4. Act. Verba quoque valde propriè tum Gentilibus, tum populis Hebræorum accommodantur. Gentiles enim fremuisse dicuntur, quasi animantia rationis expertia, populi Iudaici meditati esse inania, quia ipsi consilium inierunt, vt Iesum perderent.

II. Astiterunt Reges terræ, & Principes conuenerunt in vnum aduersus Dominum, & aduersus Christum eius.

Dixerat in genere, Gentes, & Populos indignatos fremuisse, & inania meditados; nunc explicat in particulari quæ sint illæ gentes, & populi, & aduersus quem indignati sint, ac dicit, fremitum non cœpisse à plebe, sed à capitibus, id est, à Regibus, & Principibus. Primus enim qui infrenuit fuit Herodes Rex, vt habemus Matth. 2. qui quidem Herodes alienigena erat, vt inter gentes reputari potuerit. Eum sequuti sunt Principes, & populi Iudæorum. Nam Herode turbato, turbata est omnis Hierosolyma cum illo. Deinde tempore passionis Domini, iterum alius Herodes, & Pontius Pilatus cum Principibus, & populis Iudæorum in Christum insurrexerunt. Denique post Christi passionem, & Resurrectionem semper persecutiones à Regibus, siue Imperatoribus inchoabantur, & à populis Duces suos sequentibus fovebantur. Quâvis autem indignatio, & fremitus propriè contra Christum esset, non contra Deum, imò sub colore gloriæ Dei, & quasi ex zelo Diuini honoris; tamen re

vera, qui Christum oppugnabant, Deum verum oppugnabant. Christus enim operibus diuinis se veri Dei Filium ostendebat, & qui odit Filium, sine dubio odit & Patrem. Quod attinet ad verba, illud, astiterunt, propriè in Hebræo significat sese constituerunt, id est, quasi murum se statuerunt, vt resisterent venienti Messia. illud autem, conuenerunt in vnum, in Hebræo propriè significat, consultauerunt, siue ad capiendum consilium conuenerunt simul: quod in Euangelio Herodem, & Principes Iudæorum contra Christum fecisse legimus. Tam autem est aperta hæc Prophetia, vt non solum Apostoli Act. 4. intellexerint ad literam de Iesu Christo Domino nostro hunc locum, sed etiam veteres Rabini, teste R. Salomone in Commentario huius Psalmi, exposuerint hunc eundem locum de vero Messia, quem adhuc cæci, & insatiati expectant.

Dirumpamus vincula eorum, III. & proijciamus à nobis iugum ipsorum.

Explicat Propheta causam, cur Reges, & Principes cum gentibus, & populis fremuerint, & conuenerint aduersus Christum. Causa enim est, ne cogerentur seruare legem Christi contrariâ sensibus carnis, & humanæ prudentiæ. Itaque verba ista dicuntur in persona Regum, & Principum impiorum, quasi dicat, Astiterunt Reges terræ, & Principes conuenerunt aduersus Dominum, & aduersus Christum eius, dicentes inter se, Dirumpamus vincula eorum, id est, non sinamus nos subijci legibus, & imperio Messia. Pro, iugum ipsorum, S. Hieronymus vertit, laqueos eorum; verbum Hebraicum *hauoth*, significat funes; & videtur Propheta repetere voluisse idem ferè vocabulum, vt ordinariè solet id ipsum bis dicere. Itaque Septuaginta Interpretes, & S. Hieronymus non tam ad vocabulum, quam ad sensum respexerunt. Sunt autem omnia vocabula metaphorica, siue legem appelles vincula, siue funes, siue laqueos, siue iugum. Explicant autem istæ metaphora

חבלי

phoræ naturam legis, qualis est iudicio impiorum. Impiis enim lex Domini durissimum iugum, & laqueus lætalis videtur, cum viris sanctis eadem lex sit melius dulcior, & desiderabilior auro, & lapidibus preciosis, ut habemus in Psalmo 18.

IV. Qui habitat in cælis, irridebit eos, & Dominus subsannabit eos.

Hic iam Propheta demonstrat, frustra Principes, & populos laborare in oppugnanda Christi Religione, quod initio etiam dixerat. Nā Religio Christi à Deo est, & Deo nemo resistere potest. Rectè autem dicit, Qui habitat in cælis, ut ostendat Deum super omnes esse, & omnia cernere, & ideo nullo negotio dissoluturum omnia eorum consilia, & omnes molitiones dissipaturū. Quod autem dicit, Dominum irrisurum, & subsannaturum eos, significat, eos, diuino iudicio per signa, & prodigia, per Martyrum patientiam, per conuersionem gentium, & populorum, perque alios modos soli Deo notos, ita confundendos, ut omnium irrisioni, & subsannationi pateant. Id videmus impletum. Nam Sacerdotium Iudaicum, & idololatricum nunc ab omnibus irridetur. Carent enim Iudæi, & Gentiles templis, & sacrificijs. Reges quoque Gentilium, qui Ecclesiam persequabantur, omnes miserè perierunt.

V. Tunc loquetur ad eos in ira sua, & in furore suo conturbabit eos.

Explicat modum, quo Deus persecutores Christi irridendos exposuit, quia nimirum loquutus est ad eos, non verbis, sed verberibus, grauissimis pœnis illos admonens, ut patet de Herode ab Angelo percusso, de Maximino vermibus consumpto, & alijs. Non est propriè ira, nec furor in Deo, sed semper cum tranquillitate iudicat, sed dicitur per metaphoram irasci, & furere, quando seuerè punit, & tunc præsertim quando ea punitio non prodest illis ad salutem æternam. id enim facere solent,

qui irascuntur, & furunt, qui non nocent ut sanent, quomodo Medici faciunt, sed nocent, ut noceant. Itaque David, Domine, inquit, ne in furore tuo arguas me, neque in ira tua corripas me. Cupiebat enim argui, & corripi, sed paternè, non hostiliter, ad salutem, non ad interitum.

Ego autè constitutus sum Rex VI. ab eo super Sion montem sanctum eius, prædicans præceptum eius.

Hoc loco dicendum est aliquid de verbis, antequam veniamus ad sensum. Nam in Hebræo Codice sic habetur, Ego autem ordinaui Regem meum super Sion montem sanctum meum; & quamuis non multum referat, quo ad sensum, utrum Deus Pater dicat, se ordinasse Christum Regem, an ipse Filius dicat se ordinatum à Patre: ramen valde probabile est, Septuaginta Interpretes legisse paulo aliter, quàm nunc legimus. Habemus nunc, nassacht, ordinaui, sed ipsi legisse videntur mutatis tantum punctis, nissacht, ordinatus sum, quæ vox habetur Prouerb. 8. ubi legimus, ab æterno ordinata sum, & ubi legimus Malchi, Regem meum, ipsi legisse videtur Malcho Rex eius, & ubi nos legimus Chodsci sanctum meum, ipsi legisse videntur Chodscio sanctum eius. Et quoniam probabile est Septuaginta Interpretes habuisse Codices Hebræicos valde correctos, inde fit etiam probabile lectionem nostram vulgatam veriorem esse, quàm ea sit, quæ nunc legitur in codicibus Hebræicis. Veniamus nunc ad sensum. Dixerat Propheta aduersarios Christi tumultuatos, & posuerat verba ipsorum. Dirumpamus vincula eorum, &c. Ideo nunc introducit ipsum Christum loquentem, & quasi respondentem eis, quasi dicat, gentes, & populi, necnon Reges, Principes dicent, Dirumpamus vincula eorum: eos verò Deus irridebit, & Christus ipse ita eis respondebit: Ego ordinatus sum Rex non ab hominibus, sed a Deo, & ideo non timeo minas hominum: ordi-

נִסְכַּחְתִּי
נִסְכַּחְתִּי
מֶלְכִי
מֶלְכִי
קֹדֶשִׁי
קֹדֶשִׁי

natus autē sum Rex super Sion montē sanctum eius, id est, super Ecclesiā, quę est Ciuitas in mōte posita, & cuius typus fuit Hierusalem, cuius pars præcipua, & magis à Deo dilecta, & sanctificata est Sion, iuxta illud, Diligit Dominus portas Sion super omnia tabernacula Iacob. Hęc autē ordinatio mea in Regē, constat ex decreto Dei, quod ego prædicaturus sum. Quod .n. habemus in nostra vulgata editione, prædicans præceptū eius, & in textu Hebraico, enarrabo decretum eius, intelligitur de decreto, quo Deus statuit Christi Regnum in totum orbem propagandum. Vox Hebræa choc, significat præceptū decretum, statutum, ut patet ex multis locis, sed potissimū ex Psal. 104. Et statuit illud Iacob in præceptum, & Israel in testamentum æternum dicens, tibi dabo terrā Chanaam. Vbi præceptum Hebraicē est choc, & significat decretum Dei de donanda filiis Israel terra promissionis.

Dominus dixit ad me, Filius meus es tu, ego hodie genui te.

VII. Hoc est initiū, & fundamentum Decreti diuini. Nam Christo debetur omnis potestas in cœlo, & in terra, quia est verus, & naturalis filius Dei. Sunt autē tres huius loci expositiones, & omnes literales, & intentæ à Spiritu Sancto. Prima est de generatione æterna, quę colligitur ex Apostolo ad Hebr. 1. vbi sic ait, Tanto melior Angelis effectus, quanto differentius præ illis nomē hereditauit. Cui enim dixit aliquādo Angelorum, filius meus es tu, ego hodie genui te. Hic locus Apostoli nō potest intelligi de generatione aliqua creata, ut de Natiuitate, vel Resurrectione secundum carnem. Quia per generationem creatam sunt etiam Angeli filij Dei, ut patet ex 1. 2. & 3. capite libri Iob. & tamen Apostolus intendit probare, Christum esse filium, Angelos autem Ministros. Necesse igitur est verba Psalmi ab Apostolo citata, intelligi ad literam de generatione æterna, ut rectē exponit Sanctus Augustinus, cui expositioni fa-

uet tum vocabulum, hodie, quia æternitas est præsens duratio carens initio, & fine: tum vocabulum genui, Hebraicē Ialad, quod significat propriē parere. Deus enim in æterna generatione matris consortio non indiguit, sed ipse genuit, ipse peperit filium suum vnigenitum, iuxta illud Psalmi 109. Ex vtero ante luciferum genui te. Altera expositio est de Resurrectione Domini, quę colligitur ex eodem Apostolo Act. 13. vbi sic legimus. Et nos vobis annunciamus eam, quę ad Patres nostros re promissio facta est, quoniam hanc Deus adimpleuit filiis vestris, resuscitans Iesum, sicut & in Psalmo secundo scriptū est: Filius meus es tu, ego hodie genui te. Et quadrant optimē hęc verba in resurrectionem Domini, tum quia resurrectio est quædam regeneratio, ut habemus Matth. 19. in regeneratione cūm sederit Filius hominis; tum etiam quia resurrectio Christi fuit à solo Deo & ipse dicitur primogenitus mortuorū Coloss. 1. tum deniq; quia in die Resurrectionis cepit gloriosa exaltatio Christi, & manifestatio nominis supra omne nomen. Philipp. 3. Propter quod & Deus exaltauit illum; & ipse Dominus dixit Matt. vlt. Data est mihi omnis potestas in cœlo, & in terra, atque hęc est expositio Hilarij & Chrysostomi. Tertia expositio est de die Natalis Domini secundum carnem, quę est Sancti Cypriani lib. 2. cōtra Iudæos cap. 8. & colligitur ex introitu Missæ in nocte eiusdem Natalis. Ecclesia enim accommodat verba Psalmi huius ad mysterium Natiuitatis secundum carnem: quoniā generatio illa, singulare opus Dei fuit, ut etiā Angelus Gabriel dixerit Luc. 1. Ideoq; & quod nascetur ex te sanctum vocabitur Filius Dei. Et sancti Patres, non solum de diuina, sed etiam de humana Christi generatione intelligunt verba illa Isaia 53. Generationem eius quis enarrabit? Itaq; iuxta Theologos illos qui docent, in eadem sententia posse inueniri plures sensus litterales, existimamus sensum horum verborum esse, hodie, id est, in die æternitatis genui te Deus Deum; & hodie, id est, in die,

th.

die natalis tui secundum carnem, genui te, id est, feci ut esses Deus, homo sine semine viri, sine corruptione Matris, sine labe peccati, & item hodie, id est, in die resurrectionis tuæ genui te, id est, feci diuina mea virtute, ut redires ad vitam, eamque immortalē, & gloriosam.

VIII. Postula à me, & dabo tibi gentes hæreditatem tuam, & possessionem tuam terminos terræ.

Sententia est apertissima, ac si Deus Pater dicat: Quia tu Christe Filius meus es naturalis, & virtute mea incarnatus, & a mortuis excitatus, iure potes à me petere imperium in omnes gentes, tanquam hæreditatem, tuam, & omnem terram usque ad ultimos eius fines, tanquam possessionem tibi debitam. Sunt autem hic aliqua obseruanda. Primo, nomen hæreditatis in Scripturis accipi pro quacunque re, quæ possidetur, ut propria, etiam si propriè non sit relicta à patre defuncto: & ideo tamen populus Dei dicitur hæreditas Dei, quam ipse Deus hæreditas populi sui. Et quia hæreditas propriè dicta solebat diuidi inter fratres, & plerunque diuidebatur sorte, & partes diuisæ mensurabantur funiculis; ideo pro eodem accipitur hæreditas, pars, sors, funiculus, possessio; sæpe etiam iunguntur duo ex his. Nominibus; ut Dominus pars hæreditatis meæ, id est, Dominus est pars, quæ mihi hæreditate obuenit. & alibi, Iacob funiculus hæreditatis eius, id est, populus Israel est hæreditas Domini, quam ipse sibi elegit, & quasi funiculo mensus est, & diuisit ab hæreditatibus aliorum. Itaque hoc loco dicuntur omnes gentes hæreditas Christi, quia factus est Dominus totius mundi, quod exponitur per sequentia verba, & possessionem tuam terminos terræ. Secundo, obseruandum est hæc intelligenda esse præcipuè de spiritali Regno Christi, id est, de Ecclesia toto orbe propaganda, ut sanctus Augustinus sapientissime docet. Sensus igitur est, Christum esse constitu-

tum Regem super Sion, id est, super populum Domini, sed hoc Regnum non concludendum finibus Iudææ, vel Palestinæ, sicut Regnum Davidis, & Salomonis; sed extendendum per omnes gentes, & occupaturum omnia Regna mundi iuxta prophetiam Danielis, cap. 2. Nec tamen negandum est quin etiam intelligatur de potestate Christi in omnes gentes, etiam infideles. Data est enim ei omnis potestas in cælo, & in terra, & ipse qui constitutus est Iudex viuorum, & mortuorum. Act. 10.

Reges eos in virga ferrea, & tanquam vas figuli confringes eos. IX.

Hic significatur potestas Christi in Ecclesiam, & in omnes homines summa, & iustissima, ut possit tam facile bonos remunerare, & impios supplicijs afficere, quam facile potest figulus virga ferrea confringere vasa recentia, & lutea. In priore parte versus describitur summa potestas Christi ex parte virgæ ferreæ, id est, iudicij rectissimi, inflexibilis, & cui resisti non potest. in posteriore ex parte hominum subiectorum, qui erunt respectu Christi sicut vasa lutea recentia respectu figuli. Itaque illud confringes, non significat actum, sed potestatem, id est non significat Christum confracturum omnes gentes; sed subiectas ei futuras omnes gentes, ut possit eas pro arbitrio confringere, siue misericorditer (confringendo in eis infidelitatem, & peccata, & formando ex vasis contumeliæ, vasa honoris; siue iuste, & seuerè confringendo eos æternis supplicijs propter ipsorum demerita. Nam confringes ut vasa figuli, idem significare debet, quod reges in virga ferrea. illud autem, reges in virga ferrea, non refertur ad solam punitionem impiorum, sed ad regimen totius Ecclesiæ iustum, & potentissimum. Quod perspicuum est tum ex versione Septuaginta Interpretum, qui reddiderunt

παρισ, id est, pascas, quomodo etiam reddidit Græcè sanctus Ioannes in Apocalypsi cap. 2. & 19. tum ex Michæa cap. 5. ubi loquens apertissimè de Christo, qui ex Bethlehem egredietur, ut sit Dux super populū Dei, dicit, Reget eos in fortitudine, & utitur eadem voce, quæ habetur hoc loco, nimirum, raha.

רצה

X. Et nunc Reges intelligite, erudimini, qui iudicatis terram.

Hortatur nunc Propheta Reges terræ, à quibus populi dependent, ut quandoquidē frustra nituntur resistere Christo, vero, & supremo Regi omnium Regum, sponte illi subijciantur; & quia ordinariè, ex prauo iudicio sequitur prauus affectus, primum hortatur eos ut corrigant iudicium, intelligant veritatem, eruditionem suscipiant. (idē autem est, Reges intelligite, & erudimini Iudices terræ. Reges enim sunt Iudices supremi populorum, Deinde hortatur ut corrigant prauum affectū, & pro odio erga Christum, incipiant illi seruire, eumq. diligere, & reuereri, ideo subiungit.

XI. Seruite Domino in timore, & exultate ei cum tremore.

Mirè miscuit amorem cum timore, ac si diceret, timeate cū amore, & amate cum timore. nam illud, seruite, est proprium seruorum timentium, præcipue secundum vocē Hebræam hiudū.

עבדו

יראה

Illud autem in timore significat propriè reuerentiam filialem, seu pietatē: nam illa ipsa vox ijra, quæ hic habetur, habetur etiam Isaia 11. ubi dicitur de Christo, Requiescet super eum spiritus pietatis, & passim in Scripturis accipitur pro pietate, seu timore filiali. Itaque, seruire Domino in timore, secundum vim vocum Hebraicā, significat, seruite quidem Domino, sed seruitute liberali propria filiorum. Quod verò sequitur, Et exultate ei cū tremore, idem significat, sed ordine, & vocibus variatis. nam in priore parte versiculi posuit in verbo timorem seruilem, in nomine, pietatem filialem: in

posteriori parte, è contrario posuit in verbo, exultationē filij amantis, in nomine autem, tremorem serui timentis.

Apprehendite disciplinam, ne quando irascatur Dominus, & pereatis de via iusta. XII.

Hunc locum ex Hebræo alij reddunt, osculamini filium; alij, adorete filiū; alij adorete purē; posset etiam reddi, complectimini puritatem, ad quod facile posset reduci trāslatio Septuaginta Interpretum. nam apprehendere disciplinam idem est, quod complecti puritatem, doctrinæ videlicet. Sicut etiā osculari, siue adorare Filium Dei, idē ferè, quod apprehendere disciplinam eius. Sed cū Septuaginta Interpretes doctissimi fuerint, & textus optimos habuerint, & in translatione huius loci nulla sit apud Græcos varietas, & (quod magis est mirum) Chaldaus etiā Paraphrastes reddiderit, accipite doctrinam, suspicor omnino, vel in Hebræo aliquid mutatum vitio temporum, aut certè vocem Bar non solum filium, & puritatem, sed etiam disciplinam significare præsertim cum aliqua superaddita. Quemadmodum enim apud Græcos à voce παῖς id est, puer sit nomen παιδεία id est, disciplina, quod est in hoc loco Psalmi, ita fieri potest, ut à voce Bar id est, filius, fiat aliquod nomen, quod significet disciplinam, quæ maxime filiis à patribus debetur. Sensus autem horum verborū est, ut non solum Reges corrigant iudicium, & affectum; erudiantur, & seruiant, quod supra dictum est, sed etiā magno seruire, id faciant, ut perseueret in eis eruditio, ex qua pendet affectus. Nam verba tam Hebraicum נאסף secū, quàm Græcum ἀπαλαύξω non significāt simpliciter suscipere, sed magno affectu rapere, & complecti, & firmiter retinere, quomodo quis complectitur ad osculandum personam valde amatam. Reddit autem rationem, cur id necessarium sit, dicens, Nequando irascatur Dominus, & pereatis de via iusta. In Hebræo non habetur Dominus, nec, iusta. Sed simpliciter, ne quādo

בר

נאסף

do irascatur, & pereatis de via, sed Septuaginta addiderunt explicandi gratia. Subintelligebatur enim Dominus ex versu superiore, Seruite Domino in timore & exultate ei cum tremore. Sensus igitur est, Apprehendite disciplinam, ne quando irascatur in impios, & rebelles is, cui dixi seruiendum esse cum timore: & vos pereatis, siue exterminemini de via iustitiæ. Hæc est grauissima pœna Principum, quando Deus ob eorum peccata tradit illos in reprobū sensum, ut dicitur Rom. 1. & permittit, ut decipiantur à malis consiliarijs, & faciant multa mala, ob quæ tandem pereunt in hac vita, & futura, ut patet de Pharaone, Roboam, Achab, & similibus in quibus peccata grauissima fuerunt pœnæ aliorum peccatorum, ut disputat Sanctus Augustinus lib. 4. in Iulianum. hoc enim est non aliquantulum declinare à via recta, sed plane perire, & exterminari omnino à via iustitiæ.


XIII. Cū exarserit in breui ira eius, beati omnes qui confidunt in eo.

Hæc est conclusio totius Psalmi in qua Sanctus Propheta pronunciat, ex dictis posse colligi, quàm sit bonū, & utile diligere Dominū, & illi toto corde seruire. soli enim, qui eiusmodi fuerint, in die vltimi Iudicij, quod non lōge ab esse potest, fiduciam habere poterunt. Dicit, cū exarserit in breui ira eius, ut significet cito venturum diem illum terribilem, nam mille anni sicut dies hesternæ quæ præterijt, nec longum dici potest quod finem habet; dicit, exarserit ira eius, ut significet diem Iudicij fore diem solius vindictæ & iustitiæ, non autem misericordiæ. dicit, beati qui confidunt, non quod solum fiducia sufficiat: sed quia vera fiducia oritur ex vera amicitia.

PSALMVSTERTIVS.

Titulus, & Argumentum
Psalmi.

Psalmus David, cū fugeret à facie Absalon filij sui.



IC titulus habetur in omnibus Codicibus Hebraicis, Græcis, & Latinis, ex quo nō potest dubitari, quin ad literam Psalmus debeat intelligi de ipso Dauide, & sit oratio quzdam ipsius Davidis pro liberatione sua à persecutione Absalonis. Quia vero Dauid figura fuit Christi, adeo ut apud Prophetas Christus ipse nominetur Dauid, ut patet ex Hieremia cap. 30. Ezechiele c. 34. & Osea, cap. 3. ideo potest, ac debet Psalmus intelligi etiā de Christo. Imò sensus principaliter intētus à Spiritu sancto videtur esse de Christo. Obseruandum autē est nomen Dauid positum in titulo non esse casus genitiui, sed datiui: nam in Hebræo est articulus, le, qui potest genitiuum, & datiuum casum denotare: sed Septuaginta viri semper verterunt τῷ, qui est articulus solius datiui. & prudentissimè hoc Septuaginta viri fecerunt, ut significarent, auctorem Psalmorum præcipuè non esse Dauidem, sed Deū. Itaque sensus est, Psalmus Dauid, id est, Psalmus inspiratus à Deo ipsi Dauidi.

EXPLICATIO PSALMI TERTII.

Domine quid multiplicati sunt qui tribulant me? multi insurgunt aduersum me.

Queritur Dauid, & miratur, colloquens in oratione cū Deo, de multitudine persecutorū suorū. nam ut habetur 2. Reg. 15. vniuersus Israel toto corde sequebatur Absalonē. Idem Christo accidisse notum ex Euangelio, præsertim tempore passionis; tunc enim filius eius, id est, populus eius rebellauit.

uit ab eo, dicens, Non habemus Regē,
uit ab eo, dicens, Non habemus Regē,
nisi Cæsarē; & ipse recessit ab eis quasi
infirmus, & fugiens per mortem, sed
paulo post rediit per resurrectionem.
Absalon significat patris pax, quia, re-
uera bellum fuit filij; sed in patre sem-
per fuit pax, vt patet, tum de Dauide,
qui fleuit mortem filij, tum de Christo
qui orauit pro crucifixoribus; & quem
admodum in persecutione Absalonis,
Achitophel intimus consiliarius, & fa-
miliaris David prodidit eum, & postea
se ipse suspendio necauit, 1. Reg. 17.
Ita in passione Christi, Iudas vnus ex
intimis familiaribus prodidit eum, &
in fine laqueo se suspendit.

**II. Multi dicunt animę meę, non
est salus ipsi in Deo eius.**

Videtur hoc referendum ad internas
tērationes, quod Dæmones suggererēt
illi intus in animo cogitationes diffi-
dentiz, quasi frustra in Domino confi-
disset. Potest etiā referri ad sermones
hominum, qui ex hoc infortunio iudi-
cabant Dauidem à Deo derelictum, in
quo tamen confidere solitus esset: est
enim hoc ferē ordinariū, vt imperfe-
cti existiment viros bonos in graui æ-
rumna constitutos frustra sperasse in
Deo. sic Iob vxor eius dicebat, Adhuc
permanes in simplicitate tua. Iob. 2.
Sic Tobiz vxor quoq; dicebat, Mani-
festē vana facta est spes tua, & eleemo-
synę tuę modo apparuerūt. Tob. 2. sic
deniquē de Christo dicebant, Confidit
in Deo, liberet eum, si vult. Matt. 27.

**III. Tu autem Domine susceptor
meus es, gloria mea, & exaltans
caput meum.**

Vox iusti in tribulatione positi hęc
est, qualis fuit Dauid, sed prę omnibus
qui caput est omnium, Christus. Sensus
est, multi mihi dicunt, frustra me con-
fidisse in Deo, sed falluntur omnes. nā
tu Domine non deferis sperantes in te,
ideo susceptor meus es, id est, suscepisti
me protegendum contra omnia hostiū
tela. nā in Hebręo est, Clypeus meus;
nec solum me defendis, sed etiam

glorificas, ideo es etiam gloriā mea,
id est, causa glorię meę. Atque ex
his fit, vt sis exaltans caput meum, id
est, latificās me, vt qui prę mœrore de-
misso capite incedebam, nunc exultās
caput attollā. Est hęc phrasis Hebręis
familiaris, vnde & Hieremię vltimo
dicitur, Eleuauit Euilmerodāch Rex
caput Ioachim, & eduxit eum de car-
cere; & Dominus in Euangelio, Leua-
te capita vestra, quoniā appropinquat
redemptio vestra. Hęc vera esse docēt
exēpla nō solū Christi, & Davidis, sed
etiā Ioseph, Iob, Tobiz, Danielis, &c.

**Voce mea ad Dñm clamaui, &
exaudiuit de monte sancto suo.**

IV.

In Codice Hebræico legimus, clama-
bo, & exaudiet; in Græco, & Latino,
clamaui, & exaudiuit. Iuxta priorem
lectionem significat Dauid, se ex fidu-
cia, quam versu superiore expressit, in
præsenti tribulatione clamaturum ad
Dñm, & sine dubio more solito audiē-
dum. Iuxta posteriorem lectionem probat
exēplo, suo quod supra dixerat, q
videlicet Deus sit clypeus, & gloria ei-
us. Nā sæpe, inquit, alias afflictus cla-
maui ad Dñm, & sēper exaudiuit me.
Circa verba nota illud, voce clamaui,
habere emphasim ad exprimendū affe-
ctū; non orauit demissa voce: sed cla-
mauit, & clamaui voce sua, id est, non
per alium, sed per se, nō solū spiritu,
sed etiam corporali voce. Illud autem
de monte sancto suo, significare potest
montem Sion, vbi erat arca Domini,
in quo peculiari modo præsentia Dñi
residebat, & vnde responsa dabat; vel
etiam cælum, quod vocatur à Salomone,
firmum habitaculum Dei, 3. Reg. 8.
& ab Apostolo ad Hebr. 12. vocatur
mons Sion, & Hierusalem cœlestis.

**Ego dormiui, & soporatus sū, V.
& exurrexi, quia Dominus suscepit me.**

Obseruāda sunt aliqua circa verba,
antequam exponamus sententiā, ver-
bū, dormiui, tam Hebræicē, quā Græ-
cē significat propriē cubare, & iacere,
& quia omnes dormientes, cubant, &
iacent,

iacent, significat etiam dormire: verbum autem soporatus sum, in Hebræo, & Græco non significat nisi dormire. Itaque sensus est eorum verborum: Ego dormiui, idest, accubui, siue iacui, vt dormire, & re ipsa soporatus obdormiui, & postea euigilans surrexi. Obserua præterea illud, quia Dominus suscepit me, in Hebræo, & Græco esse futuri temporis, quia Dominus suscipiet me, vel vt sonat vox Hebræa, sustentabit me. Sed sciendum est moris esse linguæ sanctæ, vt ponat futurum pro præterito quando significatur quædā continuatio, vt Iob 1. Sic faciebat Iob cunctis diebus, illud faciebat in Hebræo futuri temporis est. rectè igitur Hieronymus, & vulgatus Interpres verterunt suscepit, siue sustentauit, & potuissent etiam reddere, suscipiebat, vel sustentabat. Veniamus ad sententiam. Dauid in illa persecutione filij dicit, Ego dormiui, seu iacui dormiturus, id est, declinaui, fugi, non restiti, & sic iacui quasi oppressus, & soporatus sum, idest, ita derelictus, quasi mortuus essem, vnde Absalon potitus est Regno, quasi Rex mortuus fuisset; & exurrexi, idest, paulo post recepi animum, & resistere cœpi, quoniam Dominus sustentauit me. Sed longè significantius hæc omnia Christo conueniunt. ipse enim verè dicere potuit, Ego dormiui, idest, spòte iacui in cruce, vt in ea morerer, quomodo se in lectum componit qui dormire volunt; Nemo, inquit ipse, tollit animam meam à me, sed ego pono eā. Et soporatus sum, idest, somno mortis verè consopitus sum, & hoc etiam sponte, non inuitus, vnde inclinato capite tradidit spiritum. Vocat autem mortem suam somnum, quia tam facile illi erat resurgere à mortuis, quàm alijs euigilare de somno; & exurrexi, quia Dominus suscepit, seu sustentauit me, idest, paulo post surrexi à mortuis, nō fretus vlllo humano auxilio, sed innixus potentia infinita diuinitatis. Et hoc modo probauit verum esse quod dixerat versu superiore, Voce mea ad Dominum clamaui, & exaudiuit me de monte sancto suo.

Non timebo millia populi cir VI.
cundantibus me: exurge Domine, saluum me fac Deus meus.

De Dauide clarissima sunt: ille enim dicitur exurrexisse, quando recepit animum, & parauit se ad resistendum inimicis; ideo nunc dicit, non timere se populum illum innumerabile, quia in Deo confidit, nō in suis viribus, aut armis sociorum: ac propterea rogat Deum, vt exurgat, ac saluum se faciat de manibus hostium. Dicitur Deus per metaphoram exurgere, quando incipit iuuare, quemadmodū dicitur dormire, quando non iuuat. Exurge, inquit alio loco, quare obdormis Domine? pulchrè autem cōiunguntur, exurrexi, & exurge, quasi dicat, ego te excitante per immixtam inspirationem exurrexi, & tu igitur me excitante per orationem exurge, & pugna pro me. Christo autem hæc omnia accommodantur rectissimè, non ratione capitatis, sed ratione corporis, idest, Christus hæc dicit post resurrectionem non pro persona sua, sed pro corpore suo, quod est Ecclesia, quæ in illis inijs innumerabiles habuit inimicos, sed Deo freta omnes vicit.

Quoniam tu percussisti omnes VII.
aduersantes mihi sine causa, dentes peccatorum contriuisi.

In Hebræo legitur sic, Quoniam tu percussisti omnes inimicos meos i maxilla dentes impiorum contriuisi: sed credibile est Septuaginta Interpretes legisse pro lechi, quod significat maxillam, lechinam, quod significat in vanum, & credibile etiam est, codices, quos habuerunt Septuaginta fuisse meliores ijs, quos nos habemus. Sed tamē vtraque lectio bonum sensum habet. Rogatur igitur Deus siue à Dauide pro se, siue à Christo pro Ecclesia sua, vt pugnet aduersus hostes, quoniam semper alias id fecerit, nimirum percussit omnes inimicos piorum. Et si quidem legamus sine causa, sensus erit, Deum semper punire illos qui sine causa

לחי
לחיים

sa persequuntur iustos, atque eorum dentes confringere, idest, efficere, vt mordere, idest, nocere non possint, sed latrare, ac terrere solum possint. Quātis enim aliquando videantur iusti ab impijs premi, tandem tamen omnia cooperantur in bonum, & impij persecutionis suæ pœnas luunt. Quod si legamus in maxilla, sensus erit Deum nō solum punire, sed etiam confundere, & pūefacere impios. Percussio enim maxillæ non solum ad dolorem, sed etiam ad contemptum fieri solet: & cohæret optimè cum percussione maxillæ, quod sequitur de confractione dentium: per quam confractionem significatur quod supra diximus, fieri videlicet per Dei gratiam, vt inimici iustorum, siue Dæmones, siue homines sint, latrare possint more canum, sed mordere, idest, verè nocere non possint.

VIII. Domini est salus; & super populum tuum benedictio tua.

Concluditur Psalmus per innocationem, & laudem Dei, quasi dicat, ex dictis concludere possumus Domini esse salutem, & illi acceptam esse referendam. Nam in Hebræo est, Domino salus, idest, Domino accepta referenda est salus, quæ salus est benedictio tua Domine super populum tuum. nam benedicere Dei, est benefacere.

De voce Selà.

In hoc Psalmo habetur tribus in locis, videlicet post secundum versum, post quartum, & post vltimum vox Hebræa, Selà, quæ habetur in alijs nōnullis Psalmis, non tamen in omnibus, habetur etiam in quibusdam locis Habachuc Prophetæ, & nusquam alibi. Scribit de hac voce sanctus Hieronymus epistolam ad Marcellam, in qua refert tres opinioes; primam quorundam, opinor, Rabinorum, qui volunt, ea voce significari mutationem, vel distinctionem rythmi, aut eleuationem vocis. Secundam Interpretum Septuaginta, necnon Theodotionis, & Symmachii, qui eam vocem Hebraicam interpretati sunt, diapalma, vocem æquē

obscuram. Tertiam Aquilæ, & quintæ, ac sextæ editionis, quod selà sit idem quod semper. Hanc sententiam postrema S. Hieronymus sequutus est in sua versione ex Hebræo. Et certè prima opinio videtur improbabilis, nā si vox illa significaret mutationē, aut distinctionem rythmi, aut vocis eleuationē, poneretur in omnibus Psalmis, ac præsertim in longioribus. Videmus autem in hoc breuissimo Psalmo haberi ter, vt etiā bis in Psalmo quarto, & in Psalmo quadagesimo sexto, qui breuissimi sunt, in longissimis quibusdam nunquam. Deinde non poneretur in fine Psalmorum, sed tantum in medio; quæ enim mutatio, vel distinctio, vel eleuatio significanda est Psalmo finito? Videmus autem haberi in fine Psalmorum, tertij, noni, vicesimi quarti, & quadagesimi sexti. Secunda opinio probabilis est propter auctoritatē Septuaginta Interpretum. Significat autem diapalma, interprete Augustino in commentario Psalmi quarti, interuallum psallendi, sed certè ratio vix reddi potest, cur istud interuallum notetur in Psalmis paucissimis, & breuissimis tantum. Tertia opinio fortasse probabilior est, nam præter S. Hieronymi auctoritatē, videmus illud semper, rectè poni vbicunq; selà, inuenitur. In hoc Psalmo in versu secundo, & quarto rectè, selà, potest exponi semper. Multi dicunt animæ meæ, non est salus ipsi in Deo eius semper, idest, esto Deus aliquando seruauerit Dauidem à periculis, at nō semper seruabit, nunc certè non seruabit. Respondet autem Dauid, voce mea ad Dominū clamaui, & exaudiuit me de monte sancto suo semper: idest, vos dicitis non semper me seruabit, ego contra dico, me semper exaudiri, & spero semper seruandum. Porro in fine Psalmorum sicut poni solet, Amen, vel in æternum, vel Alleluia, vt patet legentibus; ita rectè ponitur, semper, quod significat desiderium, vt sint firma & rata quæ dicta sunt. Ita hoc loco, super populum tuum benedictio tua semper; idest, semper sit, ac si diceret Amē, vel iugiter, vt alibi.

PSAL-

סלה

P S A L M V S I V.

Titulus, & Argumentum
Psalmi.

In fine in hymnis Psalmus David.



Hic est titulus Psalmi quarti, in quo varietas est inter lectionem Hebraicā, & Græcam. nā ex Hebræo, ut hodie habetur, vertit S. Hieronymus, Victori, pro eo, quod nos habemus ex Græco, in finem. & S. Hieronymum sequuntur omnes, qui vocem Hebraicā interpretantur ad verbum, nec potest aliter exponi vox illa, Lamnazeach. Nata est hæc varietas præcipuè ex additione punctorum, & ex litera, nī, quæ forte accessit vitio librariorum. Nam Septuaginta Interpretes videntur legisse, lannezach, quod significat in finem, ut patet ex primo versu Psalmi 12. Usquequo Domine obliuisceris me in finem. Et sanè magna est auctoritas Septuaginta Interpretum, quos, & doctissimos fuisse, & optimos codices habuisse dubitari non potest. Adde, quod & sententia est grauior secundum lectionem Septuaginta. Nam secundum Hebraicam lectionē significatur, hunc Psalmum datum esse Victori in hymnis, id est, Magistro cantorum, siue optimo cantori, qui præpositus est concinendis hymnis. Quæ res non videtur adeo grauis, ut debuerit extare in diuinis libris ad æternam rei memoriā. At secundum lectionem Septuaginta Interpretum, significatur, hunc Psalmum esse canendum vsque in finem, id est, perpetuò. siue frequētissimè, quod est signum, Psalmum esse vnum ex utilioribus. Accedit etiam intelligentia mystica, quod sit Psalmus ad Christū pertinens, qui est finis Legis & Prophetarum. Illud, in hymnis, posset etiam verti, in pulsatione instrumentorum musicorum. Siquidem, nagan, significat pulsare instrumentum, inde nomē Neghinā, pulsatio, sed accipitur etiam passim pro laude, siue carmine atque

hymno. Itaque sensus erit, Psalmus David inter hymnos canendus perpetuò, atque ipsum Christum propriè respiciens, atque hoc idem dicendum est de alijs, qui sequuntur eodem titulo inscriptis.

Explicatio Psalmi 4.

Cum inuocarem exaudiuit me Deus iustitiæ meæ, in tribulatione dilatasti mihi.

Hunc Psalmum canit David in persona Ecclesiæ, vel cuiuslibet animæ fidelis, quæ exemplo suo monet peccatores ut conuertantur, & fiduciā ponant in Domino, declinent à malo & faciāt bonum. Ponit igitur exemplum suum dicens, Ego cum inuocarem Deum tempore tribulationis, exauditus sum. exaudiuit enim me Deus iustitiæ meæ, id est, Deus, à quo est omnis mea iustitia, hoc est, cuius gratia me iustum facit. Ostendit autem quomodo sit exauditus dicēs, In tribulatione dilatasti mihi. Deus aliquando exaudit renouendo tribulationem: aliquando dando patientiæ virtutem; & hoc est maius beneficium: aliquando non solum patientiam, sed etiam gaudium in tribulatione dando, & hoc est beneficium maximum, & de hoc loquitur Psalmus. Tribulatio enim angustias facit, gaudium dilatat corda, sed qui gloriat in tribulatione, huic tristitia vertitur in gaudium, & tribulatio ei nō angustias, sed dilatationem affert. Mutatio verò personæ de tertia in secundam additur ad significandum unde veniat illa dilatatio; nimirum ex illapsu Dei in cor tribulati, iuxta illud, Cum ipso sum in tribulatione. Itaque sensus est, Cum inuocarem Deum tribulatione pressus, exaudiuit me; quod inde scio, quia tu Domine cordi meo dulcissimam tuam præsentiam exhibens miro modo angustias tribulationis in latitudinem conuertis lætitiæ. Superabundo gaudio, inquit Apostolus, in omni tribulatione nostra. Illud autem, dilatasti mihi, phrasis est Hebraica, pro, dilatasti me.

Mi-

למנצח
לנצח

נניח
נניח

II. Misere mei, & exaudi orationem meam.

Postulat continuationem gratiæ, ac si dicat, Ita Domine semper miserearis, semper exaudias, sicut adhuc fecisti. Nouit. n. sanctus Propheta nos in hac vita semper obnoxios esse periculis, nisi misericordia eius non solum præueniat, sed et comitetur, & subsequatur.

III. Filij hominum usquequo graui corde, ut quid diligitis uanitatem, & queritis mendacium?

Lectio Hebraica multum discordat à Græca, ex qua Latina nostra vulgata deriuatur, sic enim ad verbum legitur Hebraicè, Filij viri usquequo gloriosi mei ad ignominiam diligentes uanitatem, queritis mendacium. Sed facile apparet unde nata sit varietas; nam sublatis punctis, quibus carebant libri Hebraici ante Christi aduentum, & una litera in aliam similem commutata, existit lectio nihil discrepans à Græca. Verba Hebraica nunc ita sonant, **כבודי לגלמא כבודי לב למ** Cheuodi liclimma, gloria mea ad ignominiam. Sic autem legerunt Septuaginta, Cheuode leu lammà, graues corde usquequo. Ac ut sæpe diximus, credibile est emendatiores codices Hebraicos fuisse temporibus Septuaginta Interpretum, quam nunc sint. Itaque, lectio nostra vulgata omnino conseruanda est, quippe quæ cõformis reperitur lectioni Hebraicæ, quam Septuaginta Interpretes emendatiorem habuerunt. Neque tamè in sensu discordia est magni momenti, imò una lectio aliam adiuuare videtur. Sententia igitur hæc est, filij hominum usquequo graues corde, id est, quàm diu cor habetis lapideum, durum, ad terram inclinatum, non cogitantes nisi bona terrena? Corda enim ex sententia Domini grauantur crapula, & ebrietate, & curis huius mundi: & quia corda dura non recipiunt supernas cogitationes, sed solum terrenas, & transitorias; ideo non diligunt, nisi terrena, & transitoria: & quoniam ea sola quærimus diligenter, quæ ardentius diligimus; ideo subiungit Prophe-

ta, ut quid diligitis uanitatem, & queritis mendacium? Dicuntur autem bona terrena, uana, & falsa, quia nec solida sunt, nec stabilia, quamuis talia esse videantur, & propterea merito falsa, & fallacia dici possunt, præsertim si comparètur ad æterna. Additur in Hebræo, selà, id est, semper, quod rectè ponitur hoc loco. id enim valde mirum est, quod homines non tantum initio mundi, nec solum initio uitæ, sed in omni seculo, & in omni ætate post tam longam experientiam, res humanas, & fallaces tanto studio cõsecutentur. Lectio Hebraica Græcam, & vulgatam adiuuat. Nam iidem homines, qui propter naturæ corruptionem sunt filij hominum, & graues corde, iidem ex imagine Creatoris ad quam formati sunt, rectè dici possunt gloriosi, atque incliti, & ideo valdè ignominiosum illis est diligere, & querere bona temporalia uana, & falsa, quæ sub pedibus habent; & non diligere, neque querere sempiterna, solida, & vera, unde originem, atque imaginem trahunt. Magna est hæc increpatio, quæ non ab homine mendace, sed à spiritu veritatis procedit.

IV. Et scitote quoniam mirificauit Dominus sanctum suum: Dominus exaudiet me, cum clamauero ad eum.

Hæc est potissima ratio, cur deberet homines non amplius inherere temporalibus, quia uidelicet venit ad nos de cælo Sanctus Dei, id est, Filius Dei, qui solus inter omnes homines impecabilis fuit. Unde etiam Dominus in Euangelio clamabat, Scio qui sis, Sanctus Dei. Hic autem sanctus pertransijt beneficiendo, & mala tolerando, temporalia despiciens, & sempiterna prædicans, & tandem hoc nouo itinere gradiens ad summam felicitatem peruenit, sedens in cælo corpore, & animo in æternum beatus. Et quoniam ille Dux noster est, & præiuit parare nobis locum, sine dubio si per vestigia eius ambulamus ad veram, & sempiternam felicitatem perueniemus. Scitote igitur, quia Domi-

Dominus Deus sanctum suum Christum, quia temporalia despexit, mirabilem omnino reddidit, resuscitans ab inferis, & in cælo ad dexteram suam constituens. Et quoniam non solum Dux noster est, sed etiam aduocatus, & mediator; ideo subiungit Dauid, Dominus exaudiet me, cum clamauero ad eum, id est, nunc potissimum certo confido me semper exaudiendum, cum sciam esse in dextera Dei mediatorē, qui interpellat pro nobis.

V. Irascimini, & nolite peccare; quæ dicitis in cordibus vestris, in cubilibus vestris, cōpūgimini.

Post increpationem grauissimam, & admonitionem, ut resipiscant filij hominum, instruit eos Spiritus sanctus quid agere debeāt, ac docet, ut sancta quadam iracundia exardescant, & resistāt prauis desiderijs, & eo modo peccatā vitent: quod si forte peccauerint, continuo doleant, & compungantur, neque contenti sint declinare à malo, sed etiam sacrificent sacrificium iustitiæ faciendo bonum. Irascimini, inquit, & nolite peccare, id est, cum surgunt prauī, & rebelles motus, qui sunt initia, & radices omnium peccatorū, irascimini naturæ vestræ corruptæ, & resistite, ita ut non peccetis. Ad hoc enim nobis data est ira à Deo (ut docet S. Basilius in oratione de ira) ut sit eos virtutis. Vox Hebræa significat etiam, pauete, contremiscite, quod etiā rectè quadrat in hunc locum. Debemus enim statim tremere, & pauere cum apparet caput serpentis, id est, mala suggestio. Quæ dicitis in cordibus vestris, in cubilibus vestris, compungimini. In Hebræo legimus ad verbum, Dicite in cordibus vestris super cubilia vestra, & tacete; in Græco verò sic, Quæ dicitis in cordibus super cubilia vestra, compungimini: ex quibus intelligimus nostram lectionem sic esse ordinandam. Quæ dicitis in cordibus vestris in cubilibus vestris, de his cōpungimini tacentes. Sensus igitur est, tempore nocturno cum estis soli in cubili-

Bellarmin. in Psal.

bus, liberi ab omnibus alijs curis; tunc in cordibus vestris cogitate omnia vestra errata, & quæ dicitis, & confitemini apud vos in corde; de his corā Deo, tacentes præ verecundia, compungimini. Fuisse autem solitum Dauidem in cubilibus recogitare peccata, propter opportunitatem secreti, & silentij nocturni, potest intelligi ex illis verbis, Lauabo per singulas noctes lectum meum, lachrymis meis stratum meum rigabo. Itaque quod ipse faciebat, alios monet, ut faciant.

Sacrificate sacrificiū iustitiæ, VI. & sperate in Domino; multi dicunt, quis ostendet nobis bona?

Addit nūc alteram partem iustitiæ, videlicet, ut non solum declinent à malo, sed etiam faciant bonum. Vocat autem opera bona sacrificium iustitiæ, quia opera iusta placent Deo valde, & per ea Deus honoratur. Videant, inquit Dominus, opera vestra bona, & glorificent patrem vestrum, qui in cælis est. Et Apostolus loquens de eleemosyna, Accepi, inquit, quæ misistis in odorem suauitatis. Et de ieiunio, alijsq; bonis operibus corporalib; Obsecro vos, inquit, ut exhibeatis corpora vestra, hostiam beneplacētē. Addit autem, & sperate in Domino, ad tollendam præsumptionem, quæ bonis operibus insidiatur. bene operari nos oportet, sed ita tamen, ut non superbè cōfidamus de operibus nostris, ut Phariseus ille, qui dicebat, Gratias tibi ago, quia non sum sicut cæteri hominum, ieiunabis in sabbato, &c. Sed in Domino speremus, qui dabit peccata vitare, bona opera facere, & ad portū salutis peruenire. Sicut enim præsumptio est venenum corrūpens meritū operum honorum, sic humilitas de viribus proprijs diffidens, & in Dño spem reponens, est veluti sal condicens, & conseruans omnia rectè facta. Multi dicunt, quis ostendet nobis bona? In Hebræis codicibus incipit hoc loco nouus versus; sed in Græcis, & Latinis pertinet hæc verba

B ad

ad versum superiorem, sed non est varietas magni momenti. Ponit hoc loco Propheta communem carnalium hominum obiectionem; & quia stultorum infinitus est numerus, ideo ait, Multi dicunt, id est, cum predicamus cōtemp-
tum rerum temporalium, atq; ad innocentiam, & iustitiam exhortamur, plurimi dicunt, quis ostendet nobis bona, si hæc quæ videmus, & tāginus bona nō sunt? quis redijt ab inferis? quis ascendit in cœlum? Potest etiam per illud, bona, intelligi, iustitia, & probitas; quia enim dixerat sacrificium iustitiæ; obijciunt improbi, quid est hæc iustitia? quis nobis ostendet viam iustitiæ?

**VII. Signatum est super nos lumen vultus tui Domine: dedisti lætiti-
tiam in corde meo.**

Respondet Propheta viam iustitiæ nobis à Deo demonstratam esse, & nos habere magistrum intra nos, qui nos doceat verum bonum, lumen videlicet, rationis naturalis. hoc enim lumē signatum est, & impressum indelebilit-
ter super nos, id est, in suprema parte hominis. Habemus enim partem inferiorem, corpus, partem superiorem, animam: & in ipsa anima partem inferiorem, qua vivimus, & sentimus, & superiorem, qua ratiocinamur, & sapi-
mus. In hac igitur suprema parte est lumen, quò distinguimur à bestiis; estq; hoc lumē derivatum à vultu Dei, quia id nos facit esse ad imaginem, & similitudinem Dei. Et ex hoc lumine possumus intelligere primum viam iustitiæ. lex enim naturalis scripta in corde, quam ne ipsa quidem delet iniquitas, docet non faciendum alteri quod nobis ab alijs fieri nolumus; proinde non furandum, non mœchandum, &c. Possumus etiam intelligere adiuti gratia Dei, nostrum verum bonum consistere in assimilatione ad Deum. bonū enim imaginis est, quā simillimam esse ex-
plari. Ex hac autem cogitatione existit in voluntate ingens lætitia, spes, & amor erga Deum. Quid enim dulcius, quā cogitare se esse imaginem vivā

rei infinitæ pulchritudinis? & se exemplari suo omnipotenti esse charissimā? Qui verò non omnes hoc experiuntur, ideo David non ait, dedisti lætitiā in cordibus eorum, sed dedisti lætitiā in corde meo. quod idem omnes iusti, & pii dicere possunt. Parum autē refert, q̄ in Hebræo habetur, signa super lumē vultus tui; & nos habemus, signatum est super nos lumen vultus tui. nā literæ eadem mutatis punctis efficiunt, signatum est. Et hanc veram lectionem esse credimus, quia Septuaginta Interpretes melius nouerāt quomodo legendæ essent illæ literæ, quā Rabi-
ni posteriores, qui puncta addiderūt.

**A fructu frumenti, vini, & olei VIII.
sui multiplicati sunt.**

Addit Propheta aliud argumentum ex quo possunt homines intelligere Deum esse auctorem omnium bonorum, quia videlicet ipse est, qui temporibus suis multiplicat fruges, & producit fructus omnes. Sic etiam B. Paulus Act. 14. Non sine testimonio reliquit semetipsum dans pluuias, & tempora fructifera, replens cibo, & lætitia corda nostra. A fructu, inquit, frumenti, vini, & olei sui multiplicati sunt, id est, aucti sunt, siue creuerunt in bonis temporalibus ob illorum trium præcipuè fructuum abundantiam. Vox enim Græca, quam Interpres reddidit, multiplicati sunt, significat etiam, aucti sunt, siue creuerunt, & sic exponendam esse docet etiam textus Hebraicus, vbi ad verbum habemus, frumentum, & vinū eorum multiplicata sunt. Parum etiā refert quod in Hebræo non sit mentio olei. nam vel excidit ea vox, vel Septuaginta Interpretes eam addiderūt explicationis gratia. Scriptura enim passim hæc tria coniungere solet.

**In pace in idipsum dormiam, IX.
& requiescam.**

Concludit Psalmum David dicens, Quicquid sit de alijs, quos ad amicitiam cum Deo exhortatus sum, ego omnino in Deo confidere, ac penitus conquiescere volo. Ego, inquit, in pace, id est, cum

cum tranquillitate animi, in idipsum, idest, coniunctim, pariter, simul dormiam, & requiescam, idest, securus cubabo ad dormiendum, & re ipsa quietissime dormiam. Voces enim tam Hebraica, quam Graeca pro quibus habemus, dormiam, & requiescam, significant propriè iacebo, siue cubabo, & dormiam. Sed non malè noster interpretes vertit, dormiam, & requiescam, quia qui cubat, ut dormiat, dici potest dormire; & qui dormit, praesertim somno placido, dici potest quiescere. Possunt etiam hæc referri ad futuram requiem in cælo. tunc enim verè summa pax erit ex vnione cū Deo, & summa, ac verissima requies. Illud, in idipsum, quod frequentissime occurrit in Psalmis, in Hebræo est, *Iachdau*, quod Sanctus Hieronymus, & alij vertunt, pariter, siue simul, Septuaginta Interpretes vbiq; reddunt, *יחד*, idest, in idipsum: sed idem est sensus. nam in idipsum, idem est, quod coniunctim, & simul. Sanctus Augustinus per idipsum, intelligit Deum, qui solus est semper idem ipse, æternus, & immutabilis, iuxta illud, Tu autem idem ipse es. acuta, & pia interpretatio, sed mystica, non literalis.

X. Quoniam tu Domine singulariter in spe constituisti me.

Reddit causam, cur velit in Deum proijcere omnem sollicitudinem, siue, cur in futuro seculo in pace dormiturum, & quieturum se dixerit. Ratio enim est, quoniam Deus verissimis, & fidelissimis suis promissionibus eum in sola spe constituerit, idest, habitare fecerit. Id enim significat vox Hebræa, & Græca. Itaque vir iustus, & amicus Dei in sola spe diuina habitat, tamquam in tutissima domo; agit quod potest pro vita præsentī, & futura; at non confidit in proprijs viribus, neque in vlla re creata, sed in Deo solo, & ideo non confunditur, securus dormit, & securus dormiet in sæculo futuro.

PSALMVS V.

Titulus, & Argumentum.

In finem pro ea, quæ hereditatem consequitur, Psalmus David.

Hic titulus variè exponitur, propterea quod in Hebræo quædam vox est, *Nechilot*, quam Rabini, & qui Rabinos sequuntur, significare volūt instrumentum musicū. Sed à Catholicis omnino reiiciendi sunt, cū S. Hieronymus Hebræa linguæ peritissimus verterit, pro hereditatibus; & Septuaginta adhuc peritiores, & quibus lingua Hebræa patria erat, verterint, pro ea, quæ hereditatem consequitur. Et verba ipsa Hebraica has interpretationes omnino recipiunt, siquidem, *Nachal*, hereditare significat. *Nachalot*, hereditates; *Nochelet*, eam quæ hereditat. Credibile igitur est, textum Hebræicū diuturnitate temporis vna, vel altera litera immutatum peperisse has varietates: sed in re dubia Septuaginta Interpretibus fides habenda est magis, quam recentibus Rabinis, praesertim cum S. Hieronymi versio magis faueat Septuaginta, quam Rabinis. Igitur hic Psalmus compositus est in persona Ecclesiæ, quæ hereditatem salutis æternæ quotidie in suis membris consequitur, & in fine mundi tota consequetur. Quia verò ecclesia pro meliore sua parte, similis est colubæ, quæ perpetuo gemit, & innocentiam custodit; ideo in hoc Psalmo columbæ officiū exercens, partim orat, partim peccatum detestatur. Quod ipsum facere debēt omnes, qui pertinent ad columbam; sic enim vnimur Deo, in quo cōsistit hereditas, si oratione trahimus Deum ad nos, & puritate vitæ propinquamus ad Deū.

Explicatio Psalmi 5.

Verba mea auribus percipe Domine, intellige clamorem meum.

B 2

In-

II. Intende voci orationis meae Rex meus, & Deus meus.

Tribus modis fieri potest, ut aliquis non audiat ab aliquo: vel quia ille non percipit sonum verborum, vel quia non percipit significationem eorundem verborum, vel quia non attendit intentus alijs rebus. Deus quidem omnia percipit, & intelligit, & semper attendit: sed dicitur aliquando non percipere, vel non intelligere, vel non attendere, quia sic orantem contemnit, ac si non perciperet, vel non intelligeret, vel non attenderet. Ideo sanctus Propheta oraturus Deum, initio postulat, ut Deus percipiat, intelligat, & attendat. Porro Deus orantem contemnit, ac si non perciperet sonum verborum, quando is, qui orat, ita distrahitur, ut nec ipse verba sua percipiat; vel ita frigide orat, ut oratio sursum ascendere non possit. Tunc vero Deus ita se habet, ac si non intelligeret quid petatur, quando is, qui orat, nescit quid petat, petens ea, quae sibi non sunt utilia, etiam si attentè, & ferventer oret, atque adeo clamet. Tunc denique Deus similis non est attendenti, quando orans non est dignus, qui audiat, vel quod sine debita humilitate, fiducia, alijsque debitis circumstantijs oret, vel quod sit peccator, & de poenitentia nondum cogitare inceperit. Propheta igitur miro artificio à Spiritu sancto edoctus, orat Deum pro dono bene orandi, videlicet ut detur ei sic orare, ut opus est, ad hoc ut Deus non repellat orationem, sed percipiat sonum, intelligat clamorem, & intendat orationi. Addit autem, Rex meus, ut facilius impetret. Solet enim bonus Rex audire populum suum. adiungit verò, & Deus meus, ut ostendat se non solum esse populum Dei quasi Regis, sed etiam creaturam eius, & in omnibus ab eo pendere, & sine eo nihil posse.

III. Quoniam ad te orabo Domine: mane exaudies vocem meam.

Reddit rationem, cur petierit audiri à Domino; quoniam, inquit, ad te orabo, id est, quia studium meum praeci-

puum futurum est oratio, ideo tam sollicitus sum de auditione. Et quia studium orandi non solum est mihi praecipuum, sed etiam primum, ideo summo mane antequam aliud ullum opus aggrediar, tu Domine audies vocem meam. nulli enim loquar antequam tibi, tu labia mea aperies, & os meum annuntiabit laudem tuam.

IV. Mane astabo tibi, & videbo, quoniam non Deus volens iniquitatem tu es.

Non solum, inquit, mane orabo, sed etiam astabo tibi, id est, conabor me praesentem tibi exhibere; & contemplantur (id enim sonat vox Hebraea) in illo silentio matutino antequam irruat turba negotiorum huius vitae. Materia verò praecipua contemplationis meae erit considerare, nihil te magis odisse quam peccatum: innocentiam, & iustitiam tibi summopere gratam esse, cum tu sis lux, & iustitia, & ideo si tibi placere volo, innocentiam, & iustitiam mihi sectandam esse, & iniquitatem odio habendam.

V. Neque habitabit iuxta te malignus, neque permanebunt iniusti ante oculos tuos.

Non solum Deus non vult iniquitatem, sed neque vult homines iniquos: ideo non habitabit, inquit, iuxta te malignus, id est, non propinquabit tibi iure amicitiae: neque permanebunt iniusti ante oculos tuos, id est, non diu respicies oculo clementiae iniustos. Nunc enim Deus respicit etiam iniustos oculo clementiae, id est, eis concedit multa temporalia bona, sed hoc non diu durabit. Breui enim projiciet illos à facie sua in aeternum interitum.

VI. Odisti omnes qui operantur iniquitatem: perdes omnes, qui loquuntur mendacium.

VII. Virum sanguinum, & dolosum abominabitur Dominus.

Non solum Deus non vult iniquitatem; nec solum non vult amicitiam cum iniquis; sed illos odit, & perdere vult,

ac

ac re ipsa perdet : & quoniam peccata committuntur opere, verbo, & cogitatione, siue desiderio, ideo singula Psalmus enumerat, primo operantes iniquitatem, secundo loquentes mendacium, quod de pernicioso intelligitur, tertio virum sanguinum, idest, crudelem, sanguinis appetentem, & dolosum, idest, qui dolos meditatur, & struit.

VIII. Ego autem in multitudine misericordiarum tuarum introibo in domum tuam, adorabo ad templum sanctum tuum in timore tuo.

Dixerat Propheta matutino tempore, se contemplaturum quantum opere Deus peccatum, & peccatores auerferetur. Exponit nunc fructum contemplationis, ac dicit. Ego autem in multitudine misericordiarum tuarum, idest, confusus in multa misericordia tua, non in viribus meis, ut euitem omnia peccata, introibo in domum tuam, quae est domus orationis, & adorabo ad templum sanctum tuum, idest, prosternat coram tabernaculo tuo in timore tuo, timens, ac tremens implorabo auxilium tuum.

IX. Domine deduc me in iustitia tua, propter inimicos meos: dirige in conspectu tuo viam meam.

Hæc est oratio, qua orat in domo Dei, videlicet, ut Deus eum deducat in iustitia sua, idest, ut eum ducat per semitas iustitiarum faciendo illum implere omnia mandata diuina, & sic vitare omnia peccata, & quod idem est, dirigat in conspectu suo viam eius, idest, faciat eum ambulare per viam rectam, Deum semper præ oculis habendo. Id verò potissimum orat propter inimicos, siue (ut habetur in Hebræo) propter insidiatores suos. necessarium enim est diuinum auxilium dirigens, & protegens, præueniens, & subsequens propter multitudinem hostium, qui nobis insidiantur, & ad peccata pertrahere conantur, siue ij Dæmones sint, siue homines terrentes, vel allicientes. Vocat enim inimicos, omnes, qui impediunt viam salutis, etiam si aliqui amicissimi videantur. nam inimici hominis do-

— Bellarm. in Psal.

mestici eius. Parum autem refert, quod in Hebræo habetur, Dirige in conspectu meo viam tuam, quomodo etiam haberi in editione Septuaginta Interpretum, testatur S. Hieronymus in epist. ad Suniam, & Fretellam, & in nostro Græco, & Latino, Dirige in conspectu tuo viam meam. Nam sensus in idem recidit, siue dicas secundum Hebræos codices, Dirige in conspectu meo viam tuam, idest, fac ut inueniam, & videam viam tuam rectam: siue secundum Græcos, & Latinos, Dirige in conspectu tuo viam meam, idest, fac ut ambulem coram te per viam rectam. Semper enim petitur gratia incedendi per viam mandatorum Dei.

Quoniam non est in ore eorum X. veritas, cor eorum vanum est.

Sepulchrum patens est guttur XI. eorum. linguis suis dolose agebāt.

Reddit rationem, cur velit auxilium contra inimicos insidiates, quia videlicet illi nihil intedunt, nisi decipere, & difficile est infidias eorum vitare. Non est, inquit, in ore eorum veritas, quia si terrent, decipiunt persuadentes fugam exigui mali, ut inducant in maximum malum: si alliciunt, decipiunt, persuadentes prosecutionem exigui boni, ut adducant iacturam summi boni. Cor eorum vanum est intus, & extra peruersi sunt; non sapiunt, nec appetunt nisi vana, ideo non possunt loqui, nisi vana. Idem autem repetit in versu sequenti, sed ordine mutato. nam quod dixerat, Cor eorum vanum est, repetit, dicens, Sepulchrum patens est guttur eorum: & quod dixerat, Non est in ore eorum veritas, repetit, dicens, Linguis suis dolose agebant. Itaque cum dicitur, guttur sepulchrum patens, significatur guttur, seu os, & linguam, quæ sunt instrumenta loquendi, esse quasi os sepulchri, interiora verò sepulchri esse animam, siue cor, ubi sunt desideria, & cogitationes horridæ, & foetæ, quasi cadauera putrefacta, unde exhalat foetor verborum mortiferorum. Et ideo addit, linguis suis dolose agebant; hoc est, non solum falsa dicunt inimici

B 3 mei,



mei, quia non est in ore eorum veritas, sed etiam dolose, quia sub specie boni persuadent mala. In Hebræo est, linguis suis blandiuntur, quod in idem recidit.

- XII.** Iudica illos Deus, decident à cogitationibus suis; secundum multitudinem impietatum eorum expelle eos, quoniam irritauerunt te Domine.

Prophetia est potius quam imprecatio. significat enim Psalmus fore, ut inimici iustorum, non solum non admittantur ad hæreditatem, de qua in titulo Psalmi, sed condemnentur ad æternas penas, & nihil obtineant eorum, quæ moluntur. Iudica illos, idest, iudicabis, vel, ut significantius habent Hebræa, condemnabis illos; decident à cogitationibus suis, idest, frustrabuntur spe sua, qua sperabant se subuere posse electos: secundum multitudinem impietatum eorum expelle eos, idest, pro meritis suis expellentur ab hæreditate in tenebras æternas; quoniam irritauerunt te Domine, idest, quoniam, dum hominibus se nocere existimauerunt, non homines offenderunt, sed Deum, iuxta illud, Non te abiecerunt, sed me 1. Reg. 8. & Non es mentitus hominibus, sed Deo. Act. 5.

- XIII.** Et lætabuntur omnes qui sperant in te, in æternum exultabunt, & habitabis in eis.

- XIV.** Et gloriabuntur in te omnes, qui diligunt nomen tuum; quoniam tu benedices iusto.

- XV.** Domine, ut scuto bonæ voluntatis tuæ coronasti nos.

Hic prædicit felicissimam hæreditatem electorum, quibus titulus Psalmi iam promiserat. Ac primo inuitat iustos ad lætitiā ob spem bonam futurorum. Lætentur omnes, qui sperant in te, idest, & si nunc in labore certami-

nis, iusti reperiuntur, tamen lætentur in spe, qui non sperant in vanitatibus; sed in Deo vero, & in tempore suo in æternum exultabunt laudantes Deum, qui habitabit in eis, idest, super eos ad modum tentorii, ut in Hebræo legimus; proinde ipsi in Deo erunt, & Deus in eis: & erit Deus omnia in omnibus. Hæc autem exultatio, & laus, quasi exterior, nascetur ex interna immensa lætitia, & gloria. nam gloriabuntur in te, o Deus, omnes qui diligunt nomen tuum, idest, omnes verè iusti. Caritas enim est, quæ iustos & amicos, & filios Dei facit. Gloriabuntur autem, quoniam tu benedices iusto, idest, unicuique iusto benedices, & benedicendo benefacies, reddendo eis coronam gloriæ, quam merentur. Et quoniam radix omnium bonorum est beneuolentia Dei, qui nos elegit ante mundi constitutionem, cum ex illa procedat vocatio, iustificatio, merita bonæ, & ipsa glorificatio: ideo concludit, Domine, ut scuto bonæ voluntatis tuæ coronasti nos, idest, confitear tibi Domine, omnia nostra bona inde manare, quia beneplacitum tuum, siue gratia tua nos complexa est, & vndique protegit, ut scutum protegere solet milites. Cui simile est illud, Qui coronat te in misericordia, & in miserationibus.

Verbum Hebræum ambiguum est, quoad pronomem. nam verti potest coronasti eum, idest, iustum, cui bene-

dixisti, & sic vertit S. Hiero-

nymus. Potest etiam re-

cte verti, mutatis

punctis, co-

ronasti

nos,

ut verterunt Septuaginta,

sed sententia est om-

nino eadem.



P S A L M V S V I.

Titulus, & Argumentum.

*In finem in hymnis pro octava,
Psalmus David.*

Qvod dicitur, pro octava, vel ut habetur in Hebræo, super octauam, videtur esse genus citharæ habentis octo cordas, vel aliquid simile. nam in priore libro Paralip. cap. 19. ubi describuntur varia instrumenta, quibus canendi erant Psalmi, inter alia ponitur cithara super octauam. Non est tamen repudiandum, quod communiter dicitur, per octauam, hoc loco significari diem ultimi iudicii, quæ erit octava, quia sequetur post sex dies laboriosos huius vitæ, & post septimam quietis animarum. Hic enim Psalmus est primus illorum septem, qui ad penitentiam pertinent. Neque verisimile est, quod Rabini, & eorum sectatores dicunt, hunc Psalmum compositum fuisse à Davide pro sanitate corporis recuperanda, quam videlicet amiserat ob adulterium, & homicidium perpetratum. Scriptura enim satis declarat in 2. lib. Regum, quam penam exegerit Deus à Davide propter illius peccati reatum: neque usquam meminit morbi corporalis. Sed neque Ecclesia ab antiquissimis temporibus inter penitenciales hunc Psalmum, & primo etiam loco numerasset, nisi propriè, & ad literam ad penitentiam pertineret. Itaque argumentum huius Psalmi erit oratio peccatoris timentis diuinum iudicium, & ad reconciliationem suspirantis.

Explicatio Psalmi 6.

1. **D**omine ne in furore tuo arguas me, neque in ira tua corripas me.

Petitio est hæc verè penitentis, & contriti, qui super omnia peccatum

odit. Nam tunc Deus arguit, idest, accusat, & corripit peccatorem in ira, & in furore quando non castigat, ut saluet ex amore paterno; sed castigat, ut perdat, ac iustitiæ satisfiat. Quod facit in hac vita, quando percutit cæcitate, & obstinatione, ut sit peccatum pœna peccati: in alia vero quando perdit in gehennam. Iste igitur concussus horrore, & timens abyssum iudiciorum Dei non recusat flagellum pœnarum, quæ non separant à Deo, sed compellunt ad Deum; sed horret malum illud super omnia verè horrendum, idest, tradi in desideria cordis sui, in passionibus ignominia, obdurari, & excrucari, & tandem in æternum separari à facie Dei. Porro ira, & furor pro eodem hoc loco accipiuntur, sicut etiã argui, & corripì. est enim (ut alias adnotauimus) familiare Prophetis id ipsum bis repetere, explicandi, vel in culcandi gratia.

Miserere mei Domine, quoniã **IL**
infirmus sum; sana me Domine,
quoniã cõturbata sunt ossa mea.

Ad permouendum Deum, ut non in furore arguat, adducit penitens David aliquot argumenta; ac primum sumit ab infirmitate sua, quasi dicat, nõ respicias Domine peccata, ut offensas tuas, sed ut miseras, & ægitudines meas: proinde non punias, ut Iudex, sed cures ut Medicus, vre, & seca, si opus est; sed ex misericordia ad sanandum, non ex iustitia ad perdendum. Verè enim peccata miseriæ sunt, & quò sunt magis ex nialitia commissa, eò sunt maiores miseriæ, & quo minus nos ea cognoscimus, & timemus, eò miserieiores sumus. Ergo, inquit, misere re mei, quoniam infirmus sum, idest, respice misericorditer peccata mea quæ cunque illa sint, ut ægitudines, & morbos animæ meæ, quæ me debilem, & imbecillum reddiderunt. Sana me Domine, quoniam cõturbata sunt ossa mea. Idem repetit alijs verbis. Deus enim si misereatur, miseriam tollit, & proinde sanat, atque ita idem est, misere re mei, & sana me. Idem quoq; est,

B 4 quo-

quoniam infirmus sum, &, quoniam conturbata sunt ossa mea. per ossa enim significatur robur, ac fortitudo; & tunc dicuntur ossa conturbari, quando fortitudo nutat, & robur fragitur, ac debilitatur. Poterant autem verba Græca, & Hebraica sic etiā reddi, Tremuerūt, siue tremefacta sunt ossa mea.

III. Et anima mea turbata est valde, sed tu Domine usquequo?

Alterum argumentum ducit à cognitione proprii peccati, sicut in Plal. 50. Quoniam iniquitatem meam ego cognosco. Dicit igitur, non solum miser sum, sed etiam miseriam meam agnosco, ac propterea anima mea se ipsa tā deformem, ac miseram aspiciens, & horrens turbata est valde, & conterrita salubriter impatiens efficitur, & clamat, & tu Domine usquequo non misereris, non sanas? Habet vero magnā emphasim, illud, usquequo, sine alio verbo. Significat enim prolatum esse ab anima turbata, & non valente integram formare sententiam.

IV. Conuertere Domine, & eripe animam meam, saluum me fac propter misericordiam tuam.

Hoc est argumentum tertium, quod à misericordia Dei sumitur. Conuertere, inquit, idest, respice me. nam respectus Dei est causa omnium bonorum nostrorum, Conuertere faciem tuam, & salui erimus. Et alibi, Auertisti faciem tuam, & factus sum conturbatus. Respexit Dominus Petrum, & fleuit amare. Et Iacobus ideo vocat Deum Patrē luminum, quia sicut sol aspectu suo illuminat, calefacit, viuificat corpora; sic Deus respiciens oculo pietatis illuminat, accendit, viuificat animas; & eripe animam meam, idest, educ de fouea in quam cecidit; erue de laqueo ventantium, quo capta, & irretita teneatur; eripe de manibus inimicorum, qui bus tradita est, propter peccatum. Saluum me fac, idest, libera ab imminente damnatione ad infernum. nam pro-

prie saluare est liberare ab imminente mortis periculo. Notandus est autem ordo. Primo Deus conuertitur ad nos, ac nos respicit gratia sua. Secundo nos conuertimur ad illum, & sic anima eruitur à culpa. Tertio liberati à culpa saluamur à periculo imminētis damnationis. Hoc autem totum, quod fit in actu iustificationis, non fit per vllā nostrā merita præcedētia (quid enim meretur impius nisi pœnam?) sed per misericordiā Dei; ideo addit propter misericordiam tuam. quasi dicat, Audeo petere tam ingens donū, non quia dignus sum, sed quia tu misericors es.

V. Quoniam non est in morte qui memor sit tui, in inferno autem quis confitebitur tibi?

Est hoc argumentum quartum à gloria Dei desumptum. Peto, inquit, non argui in furore, quia si ita fieret, ad mortem æternam sine dubitatione dānarer; & sic periret ex parte memoria tua, & laus tua. Damnati siquidem ad gehennam non recordantur Dei, ut eū laudent; neque vllus est in inferno, qui confiteatur Domino, idest, laudet Dominum confitendo eius beneficia, & mirabilia. Qui hunc locum intelligūt de morte corporali, & per infernum intelligunt sepulchrum, & sensum esse volunt, quod mortui in sepulchris iacentes Deum non laudant, neque eius memores sunt, cum nihil sentiant; allegāt verba Ezechiae apud Isaiam c. 38. Quia non infernus confitebitur tibi, neq; mors laudabit te; & satis constat, Ezechiam petiuisse liberari à periculo mortis corporalis. Sed profecto locus etiam Ezechiae debet intelligi de morte æterna, ac de inferno damnatorum. Nam tametsi Ezechias timebat mori corporaliter: timebat etiam mori in æternum, & cantauit canticum illud gratias agēs Deo, quia intellexit ex dono corporalis sanitatis, tāquam ex signo diuinæ beneuolentiæ sibi remissa fuisse peccata, & liberatum se esse à periculo gehennæ, vnde ait: Tu autē eruisti ani-

animam meam, vt non periret; proie-
cisti post tergum tuum omnia peccata
mea, quia non infernus confitebitur ti-
bi, neque mors laudabit te; non expe-
ctabunt, qui descendunt in lacum ve-
ritatem tuam. Et sanè si de morte sola
corporali hæc intelligerentur, valde
exilia essent argumenta. Nam etsi mor-
tui corporaliter, & in sepulchro iacen-
tes non laudant Deum, tamen animæ
eorum viuunt, & Deum laudant: & ip-
sa etiam corpora in sepulchro expe-
ctant veritatem Dei, idest, fidelitatem
Dei de promissa resurrectione. Soli il-
li sunt qui descendunt in lacum æter-
næ damnationis, qui non expectant ve-
ritatem Dei, neque Dei recordantur
in bonum, neque laudant, aut vnquam
laudabunt: atque ita hunc locum Eze-
chiæ intelligit S. Hieronymus in com-
mentario Isaïæ, & alij Patres.

VI. Laboravi in gemitu meo, lau-
abo per singulas noctes lectum
meum, lachrymis meis stratum
meum rigabo.

Quintum Argumentum ducit Pro-
pheta à fructibus dignis poenitentiae.
Nam vt Apostolus dicit, Si nos ipsos
diiudicemus, nõ vtriq; iudicemur,
idest, si nos ipsos damnaremus & puni-
remus, non damnaremur, nec punire-
mur à Domino. Parcit enim Deus ijs,
qui sibi non parcent. Dicit igitur, se
non solum intelligere, & detestari pec-
catum suum, sed etiam pro viribus pu-
niri, & puniturum. Laboravi, inquit,
in gemitu meo, idest, tam ingenti fletu
peccata mea deploraui, vt fatigatus
sim, nec tamen adhuc cessio. Nam lau-
abo per singulas noctes lectum meum,
idest, singulis noctibus vice somni, &
quietis, vbertim peccata deflebo, & la-
crymis stratum rigabo. Notanda est hoc
loco abundantia & diuturnitas lacry-
marum. Nam pro verbo, lauabo, in He-
bræo est, asche, natate faciã, vt etiam
vertit S. Hieronymus: & ipsum etiam
Latinum, lauabo, nõ significat effusio-
nem paucarum guttarum, sed tantam
copiam, vt ijs lectus lauari posset. Vox
etiam, rigabo, insinuat ingentem co-

piam lacrymarum decurrētium instar
riui. Illud autem, per singulas no-
ctes, in Hebræo ambiguum est. Nam
significare potest, per totam noctem,
& sic vertit S. Hieronymus: potest etiã
significare, in omni nocte, & sic acce-
perunt Septuaginta: vtrumque mira-
bile est, & fortasse vtrumque verum si-
mul, idest, quòd longo tempore singu-
lis totis noctibus lacrymas copiosissi-
mas fuderit. In quo speculo intueri se
deberent, qui plurima, & grauißima
peccata committunt, & vix paucas la-
crymæ guttas emittere valent, cum re-
missionem à Deo querunt.

Turbatus est à furore oculus VII.
meus, inueteraui inter omnes ini-
micos meos.

Pertinent hæc ad effectum indican-
dum maximæ illius profusionis lacry-
marum. Nam in Hebræo pro turbatus
est, habetur caligauit, seu corrosus est
oculus meus, vt sensus sit, oculus meus
propter furorem, & indignationem
meam contra turpitudinem peccati, à
fletu nimio quasi corrosus caligauit,
& turbatus est. Quod autem sequitur,
inueteraui, in Hebræo refertur ad ocu-
lum, & est tertiæ personæ, inueterauit:
tamen quia non solum Septuaginta,
sed etiam S. Hieronymus vertit in pri-
ma persona, inueteraui, siue consump-
tus sum, credibile est lectionem He-
braicam nonnihil ab eo tempore immu-
tatam, vt in voce, atheca, desit vnum
Iod in fine, & loco n, debet esse n, &
legendum sit atachti, quæ mutatio fa-
cillimè accidere potuit. Sensus igitur
est, Turbatus est à furore oculus meus,
inueteraui inter omnes inimicos meos,
idest, quia inueteraui inter omnes ini-
micos meos: & clarius oculus meus ca-
ligauit præ fletu ex indignatione, quã
concepi, ex eo quòd tam diu in pecca-
tis hæserim vt inueterauerim inter om-
nes inimicos meos, quasi dicat, Non
possum non vehementer mihi ipse in-
dignari, quòd nullum vitium adhuc per-
fectè vicerim, nullumq; hostem animæ
meæ debellauerim, sed consenuerim
inter omnes hostes meos. Vocat autè
hostes,

ע.ת.ק.ח.
ע.ת.ק.ח.

א.ש.ח.

hostes, omnes qui eum ad peccandum impulerunt, siue Dæmones, siue homines, siue ipsa vitia, & habitus malos.

VIII. **Discedite à me omnes, qui operamini iniquitatē, quoniam exaudiuit Dominus vocem fletus mei.**

Quia tam grauitè ferebat se conuenisse inter hostes; ideò prorumpit in hanc vocem, Discedite à me, idest, nolo amplius consortium vestrum, non acquiescam tentationibus vestris, fretus diuino auxilio. Quoniam exaudiuit Dominus vocem fletus mei, idest, quia Dominus misericordia motus ob lacrymas meas non solum peccata dimisit, sed etiam virtutem auxit resistendi vobis.

IX. **Exaudiuit Dominus deprecationem meam, Dominus orationem meam suscepit.**

Explicat quod dixerat, se exauditum, & idem repetit bis, terve, ad significandam certitudinem exauditionis; & vt ipse sibi hoc modo animum adderet ad resistendum tentationibus.

X. **Erubescant, & conturbentur omnes inimici mei, conuertantur, & erubescant valde velociter.**

Concludit optans finē totalem bellorum spiritualium. Erubescant, & conturbentur, quia nihil profecerunt, sed in vanum laborauerunt; conuertantur in locum suum vnde venerunt, & erubescant, idest, confusi discedant velocissimè: quia nimirum nolo differre vitæ mutationem: sed ex hac hora, ex hoc momento aggredior viam Domini rectā, & perfectam. Potest etiam hæc conclusio esse oratio pro conuersione eorum hominum, qui vel persequendo, vel alliciendo causa peccandi illi fuerunt. Optat enim, & orat, vt illi erubescant, & conturbentur per veram cognitionem, & detestationem peccati: & sic ipsi quoque ad Deum velociter conuertantur. Potest denique esse imprecatio implenda in die Iudicii. Tunc enim verè omnes impij, siue Dæmones, siue homines, qui iustos ad

impatietiam, vel alia peccata inducere voluerunt confundentur, & erubescant, & conuertentur ad agnitionem veritatis, sed inutiliter. Tunc enim dicet, Ergo errauim⁹ à via veritatis, &c. Erit autē id celeriter valde, quia dies Domini non tardat, etiā si nobis nunc secus videatur. Sed cū venerit, & repentinus venerit, tunc sentietur, quā celeriter venerit. In Hebræo habetur, Erubescant, & conturbentur vehementer. Quæ vox, vehementer, non habetur hoc loco in nostris codicibus Græcis, & Latinis, sed fuisse in editione Septuaginta Interpretum, testatur sanctus Hieronymus in epist. ad Suniam, & Fretellam. Sed si quis rectè consideret, illa particula non deest in nostris codicibus, sed posita est paulò inferius. Nam vbi nos habemus, conuertantur, & erubescant valde velociter, in Hebræo non habetur valde, sed solum velociter. Ex quo intelligimus, non esse sensum, erubescant valde velociter, sed, erubescant valde, & erubescant velociter. Et hoc modo Codices omnes concordantes erunt.

P S A L M V S VII.

Titulus, & Argumentum
Psalmi.

Psalmus David, quem cecinit Domino pro verbis Chusi filij Iemini.



IN Hebræo non est Psalmus, sed, Sigaion, quod propriè ignorantiam significat; tamen quia Septuaginta, & S. Hieronym⁹ reddiderūt, Psalmus, dicendum erit, eam vocem esse ambiguum, & significare non solum ignorantiam, sed etiam genus aliquod cantici. Quis item fuerit Chusi, non est adeò certum. S. Augustinus, & alij qui non norunt linguam Hebraicam, existimant esse Chusi Arachitem amicum David, qui (vt legitur 2. Reg. 16.) misit nuncium ad Dauidem, ei⁹. significauit consilium Achitophel. Sed ille Chusi scribitur

שגיא

scribitur per literam Chet, iste de quo in hoc Psalmo, per literam Caph, neq; constat, an ille Chusi fuerit filius Iemini. Denique David in hoc Psalmo refellit calumniam cuiusdam filij Iemini, vt patet ex illis verbis, Si feci istud; Chusi autē Arachites nullam calumniā dixit contra David. S. Hieronymus existimat, titulum intelligendū esse de Saule, qui vocatur Chus, idest, Aethiops, ob nigredinem morum, & erat de Tribu Benjamin, seu (quod est idem) filius Iemini, vt patet ex lib. 1. Regum cap. 9. Saul enim lib. 1. Reg. c. 22. dixit coram omnibus seruis suis, Non est qui vicem meā doleat, eò quòd suscitauerit filius meus seruum meum aduersus me insidiantem mihi vsq; hodie. Hanc igitur calumniam refutat David in hoc Psalmo iuxta opinionē S. Hieronymi. Sed potest etiam æquē probabiliter dici, Chus hoc loco esse Semei, qui erat etiā filius Iemini, & maledixit Dauidi, cū fugeret persecutionē Absalonis, & ait: Egredere vir sanguinum, & vir Belial, reddidit tibi Dominus vniuersum sanguinem domus Saul, quoniam inuastisti Regnum pro eo, 2. Reg. 16. Ob hanc calumniam pessimam, & falsissimam videtur hunc Psalmum cōposuisse, orans Deum, vt defendat innocentiam, & iustitiam suam; & ideò vocatur Psalmus, Ignorantia David, quia verē ignorabat, se mala illa fecisse, de quibus accusabatur à Saule, siue à Semei. Ideò etiā dicit in principio Psalmi, Dñe Deus si feci istud, si est iniquitas in manibus meis, &c. Videtur igitur Psalmus scriptus esse tempore persecutionis Absalon, ob verba maledictionis Semei, vel tempore persecutionis Saul, ob verba supradicta. Prophetice autem David gerit personam Christi, & cuiuscūque iusti calumniam sustinentis.

Explicatio Psalmi septimi.

I. **D**omine Deus meus in te speraui, saluum me fac ex omnibus persequentibus me, & libera me.

In te, inquit, speraui, quia penē omnes deseruerunt me; ita vt etiam filius meus Absalō, vel socer meus Saul querat me occidere: non habeo cui fidam, nisi te Deum meum. Saluum me fac ex omnibus persequentibus me. Multi enim eū persequēbantur, alij consilio, alij maledictione, alij bello, & armis.

Nequando rapiat vt leo animam meam, dum non est qui redimat, neque qui saluum faciat. II.

Respicit ad Principē persecutionis, ne fortē, inquit, Saul, aut Absalon rapiat animam meam, idest, vitā meam, vt leo solet absq; vlla misericordia interficere animalia cetera; dum non est qui redimat, neque qui saluum faciat, idest, dum tu non redimis, neq; saluas. Sciebat enim David omnē industriam humanam sine Deo esse vanam. Vtitur Scriptura voce redemptionis pro quacunque liberatione, etiam si non fiat propriē per solutionem precij. Sicut enim dicitur Deus vendere, quos alienat quodammodo à sua misericordia, & tradit ministris suæ iustitiæ puniendos: ita dñs Deus redimere, quos iterum à ministris iustitiæ erutos misericorditer liberat. In Hebræo habetur paulō aliter, videlicet: Ne fortē rapiat vt leo animam meam, lacerans, & non sit saluus: sed in sententia non est varietas.

Domine Deus si feci istud, si est iniquitas in manibus meis. III.

Si reddidi retribuētibus mihi mala, decidam merito ab inimicis meis inanis. IIIL.

Reddidit causam, cur petierit liberari à Deo, quia videlicet Deus nouit innocentiam eius, & sic refellit calumniam Saulis, & Semei de insidijs in Saulē, & de inuasiōe Regni: nec solum dicit se non reddidisse malum pro bono, neque malum pro malo, sed reddidisse bonum pro malo. Primo igitur dicit se non reddidisse malum pro bono, Si feci, inquit, istud, idest, si insidiatus sum Regi, vel si inuasi Regnum fraude aliqua aut vi. si est iniquitas in manibus

bus meis, idest, si operatus sum iniquitatem reddens malum pro bono, idest, cum receperim à Saule honorem magnum, vt essem Gener eius, & Tribunus super milleviros, si reddidi pro his beneficijs malum insidiarum, vt ipse dicit. Addit, se non reddidisse malum pro malo, Si reddidi retribuētibus mihi mala, idest, cum Saul, siue Semei retribuerint mihi multa mala pro beneficijs à me acceptis, ita vt me occidere voluerint, si reddidi eis vicem procurando eorum mortem, & non potius abstinuerim semper à nece ipsorum, cum facile, & impunè inferre eam possem: decidam meritò ab inimicis meis inanis, idest, si non sunt falsę eorum calumnię, non recuso cadere in prælio penitus inanis, idest, sine vlla gloria militari, nullo damno hostibus illato, & maximo accepto. In Hebræo legitur hoc modo, Si reddidi retribuētibus mihi malum, & dimisi hostes meos vacuos: sed vox dimisi, potest significare etiam recedam, seu discedam, & tunc efficitur sententia quam reddiderunt Septuaginta. Idem enim est recedam ab inimicis inanis. Si autem legamus cum S. Hieronymo, Et dimisi hostes meos vacuos, tunc sensus erit, se reddidisse bona pro malis, ac si dicat, Si dimisi hostes meos nō affectos à me aliquo insigni beneficio, eueniat mihi hoc, aut illud malum.

V. Persequatur inimicus animam meam, & comprehendat, & conculcet in terra vitam meam, & gloriam meam in puluerem deducat.

Hęc sunt mala, quę sibi ipse imprecat, si sunt verę calumnię Saulis, aut Semei. Semper autem crescit oratio. Primo, inquit, persecutatur inimicus animam meam, idest, conetur me occidere. Secundo, comprehendat, idest, non possim effugere manus eius, quin capiat me ad interficiendum. Tertio, Conculcet in terra vitam meam, ignominiosè destruat vitam meam, quomodo destruuntur, quę pedibus minuta-

tim atteruntur. Denique, gloriā meam in puluerem deducat, idest, post mortem detrahatur gloria mea de loco sublimi, in quò nunc est, vsque ad puluerem, ita vt memoria mea cum infamia, & opprobrio viuat inter homines. Quinto additur in Hebræo, Selà, idest, semper, infamis maneam.

Exurge Domine in ira tua, & exaltare in finibus inimicorum tuorum. **VL**

Demonstrata innocentia sua petit à Deo iustam defensionem. Et quia Deus per metaphoram dicitur dormire, cū non adiuuat, surgere a somno, quando incipit adiuuare, iuxta illud, Exurge quare obdormis Domine? Ideo nunc dicit: Surge in ira tua, idest, irascere inimicis meis, eosque repelle, ac terre, ne mihi noceant. Illud autem, Et exaltare in finibus inimicorum tuorum, idem ferè significat; est enim sensus, Appare sublimis in finibus inimicorū, vt omnes te videant, idest, vt omnes præsentiam tuam sentiant. Parum autem refert, quod in Hebræo habetur, inimicorum meorum, in Græco, & Latino, inimicorum tuorum. Idem enim inimici erant Davidis, & Dei.

Et exurge Domine Deus meus in præcepto, quod mandasti, & synagoga populorum circumdabit te. **VII.**

Petierat simpliciter auxiliū Dei contra inimicos: nunc addit rationem cur deceat Deum hoc facere. Et ratio est, quia Deus præcepit Iudicibus terrę, vt liberent innocentes de manibus opprimentium. Ex quo sequitur, vt ipsum quoque id facere deceat, qui est Iudex supremus super omnes Iudices. Exurge, inquit, in præcepto quod mādasti, idest, iuxta præceptum quod mādasti. In Hebræo habetur, Iudicō, quod mādasti, & idem est sensus, nimirum, iuxta Iudicium, quod fieri præcepisti. Porò in Hebræo habetur: Exurge ad me, pro eo quod nos habemus: Exurge Domine Deus meus. Sed facile apparet unde nata sit diuersitas interpretationis.

nam

nam vox Hebræa potest legi, Eli, ac sic legerunt Septuaginta, & rectè vertèrunt, Deus meus: potest etiam legi, Elai, & sic legerunt, qui addiderunt puncta, & S. Hieronymus, & ideo reddidit S. Hieronymus, ad me, & sic reddunt omnes, qui recipiunt puncta. Sed ut sæpè dixi, in eiusmodi varietatibus, magna debet esse auctoritas Septuaginta virorum. Et synagoga populorum circumdabit te, idest, ex hac demonstratione præsentia tuæ in cohibendis inimicis meis, & in defensione mea, fiet ut multi alij agnoscant te, & cōfiteantur tibi, seq. laudēt, & sic circumdabūt te, quia ubi sunt aliqui congregati in nomine tuo, ibi tu es in medio eorum.

VIII. Et propter hanc in altum regredere: Dominus iudicat populos.

Quia dixerat, Synagoga populorum circumdabit te: ideo nunc adiungit, & propter hanc in altum regredere, idest, sicut propter me exaltatus es in finibus inimicorum meorum terrens eos ex iustitiæ tuæ solio: ita propter synagogam populorū laudantium te, quandoque opus erit, in altum solium iustitiæ iterum ascende, & appare conspicuus in finibus inimicorum eius. Quod sequitur, Dominus iudicat populos, in Hebræo cōiungitur cum versiculo sequenti, & verè cum illo optimè cohæret: sed optimè etiam cohæret cum versiculo præsentis, ut distinxerūt Septuaginta Interpretes. Est enim redditio rationis, quasi dicat Propheta, Domine pro synagoga populorum tibi adhærentium ascende in solium iudicij aduersus hostes eorum; quia Dominus iudicat populos, idest, quia Domini supremi, qualis tu es, propriū est iudicare populos. Neque refert si legamus, iudicat, cum Græcis, vel iudicabit, cum Hebræis, quia idem est sensus, nimirum, ad Dominum pertinet iudicare populos.

IX. Iudica me Domine secundum iustitiam meam, & secundum innocentiam meam super me.

Hæc est conclusio totius superioris

precationis. Quia enim conscius sibi erat, falsam esse calumniam Saulis, siue Semei, & conscientia suæ testem habebat Deum: rogat ipsum Deum supremum iudicem, ut iudicet causam suam iuxta iustitiam suam, & innocentiam quæ est super se: & det unicuique prout meretur.

Consummetur nequitia peccatorum, & diriges iustum: scrutans corda, & renes Deus.

Hæc est quasi pars altera Psalmi, in qua docet Propheta eos, qui male agunt, aduersus seipsos agere: ac per hoc hortatur omnes, ut conuertantur ab iniquitate ad iustitiam. Ait igitur, consummetur nequitia peccatorū, idest, perficiatur, & ad summum perueniat nequitia peccatorum, tamen iusto non nocebit; non enim eum inflectet ad dexteram, vel ad sinistram; quia tu diriges iustum, idest, per tuam providentiam aderis iusto, ne declinet ad dexteram, vel ad sinistram. Tu, inquam, hoc facies, qui solus nosti, qui sint verè iusti, cum scruteris corda, idest, cogitationes; & renes, idest, desideria. In Hebræo habetur verbum futuri temporis, igmar, idest, consummetur, siue consummabitur: sed Septuaginta Interpretes legerunt sine litera Iod, quæ minutissima est, & potest postea esse addita: sensus tamen in idem recidit. Si enim legas, Consummetur nequitia, sensus erit, nequitia peccatorū crescet usque ad summum, & tota consummetur in vexatione iustorum, & tamē eos non deiciet, neque inflectet; quia Deus eos diriget, & stabiliet: utrumque enim significat vox Hebræa, Theconen.

Iustum adiutoriū meum à Domino, qui saluos facit rectos corde.

Ex vniuersali sententia colligit in particulari, se meritò sperare adiutorium Domini. Iustum, inquit, adiutorium meum à Domino veniet, quia iustum est, ut Deus iustos adiuuet; quoniam eius proprium est, saluos facere rectos corde, idest, eos qui verè sunt iusti coram Deo, qui scrutatur corda. In Hebræo

י. מר.

ת. מר.

bræo coniūgitur prima vox huius versiculi, cum versu superiore, scrutans corda, & renes Deus iustus; & deinde incipit nouus versus, Adiutorium meū à Domino. Res non est magni momenti, & in rebus dubijs præferenda videtur auctoritas Septuaginta virorum, & Vulgatæ nostræ editionis.

XII. Deus iudex iustus, fortis, & patiens nunquid irascitur per singulos dies?

In hoc versiculo videntur dissidere codices Hebræi, Græci, & Latini. Nam ex Hebræo vertit S. Hieronymus, Deus iudex iustus, & fortis comminans tota die. Ex Græco reddit S. Augustinus, Deus iudex iustus, & fortis, & patiens non iram adducens tota die. Videntur autem planè contraria, comminans, siue irascens (vtrunque enim significat vox Hebræa) tota die; & non iram adducens per singulos dies, idest, non irascens omni die. Codex autem Latinus per interrogationem habet, numquid irascitur per singulos dies? sed facilis est concordia. Nam vox Hebræa si legatur El, vt legit S. Hieronymus, & vt nunc legitur secundum puncta Rabinorum, significat fortem. si autem legatur Al, vt potest legi cum alijs punctis, & vt legerunt Septuaginta Interpretes, significat, non. Et hanc lectionem veriore existimamus; & sic concordat Græcus codex cum Hebræo, vterque enim habet, non irascitur, siue non comminatur. Illud autem fortis, quod est in Græco, non est interpretatio vocis Hebræicæ El, sed est nomen superadditum à Septuaginta explicandi gratia, sicut etiam patiens. Nam in Hebræo ad verbum habetur, Deus iudex iustus non comminans, siue non irascens omni die, siue tota die. Latinus autē Interpres sequutus Græcam lectionem reddidit sensum, nō verba, cum per interrogationem posuit, nunquid irascitur per singulos dies? idem enim est, non irascitur, & nuquid irascitur? Sententia igitur huius versiculi est, Deum Iudicem iustū, qui simul est fortis, & patiens, non semper commi-

nari, vel irasci; sed aliquando re ipsa effundere iram suā grauissimè puniendo; id quod dicitur aduersus eos, qui videntes Deum sæpe minari multa mala peccatoribus, & tamen differre executionem, contemnunt minas Dei. Hunc autem sensum esse huius versiculi colligitur ex sequenti.

Nisi conuersi fueritis, gladium XIII. suum vibrabit: arcum suum tendit, & parauit illum.

Probat Propheta, Deum non semper irasci, vel minari, sed aliquando effundere irā, & inferre mala quæ comminabatur. Nisi cōuersi, inquit, fueritis, gladium suum vibrabit (sic enim legendum est, non vibrauit) idest, gladium agitabit cedendo, atq; ita splendere eum faciet. Nec solum gladio percutiet, sed etiā arcu. iam enim arcum tetendit, & parauit. Vtitur autem similitudine gladij, & sagittarum, vt significet Deum punire tā prope, quā longe. Quādo causa mali nobis illati proxima est, & manifesta, tunc Deus gladio ferit cominus. Quando causa mali remota, & occulta est, tunc videtur Deus eminus iaculari sagittas suas.

Et in eo parauit vasa mortis, XIII. sagittas suas ardentibus effecit.

Ne putaremus, sagittas Dei facile posse repelli, aut vitari, addit Propheta, eas sagittas esse vasa mortis, idest, instrumenta mortifera, & sagittas esse etas, siue fabricatas ardentibus, idest, ex ardenti materia, vt sint tela ignita, quæ velocissimè, & summa vi penetrāt omnia. Porro nomen vasis passim accipitur in Scriptura pro instrumento, vt Psal. 70. In vasis Psalmi. Isaia 22. Vasa musicorum. Hieremia 50. Vasa iræ, & cap. 51. Vasa belli.

Ecce parturijt iniustitiam, cō. XV. cepit dolorem, & peperit iniquitatem.

Tribus sequentibus versiculis ostendit Propheta sagittas Dei, vt verè ignitas velocissimè, & summa vi ferri, vt vitari nō possint. Nam illa ipsa actione, Dei

Dei prouidentia sic disponente, quā peccatores nocere parant iustis, seipsi occidunt. Hæc enim est mira Dei animaduersio in peccatores, cum facit, ut omnes eorum machinationes in ipsos conuertantur. Ecce, inquit, peccator concepit dolorem, & peperit iniquitatem, & foueam aperuit, ac profundè fodit, ut iustum, vel apertè, vel clam opprimeret; sed Deo sic operante, cecidit ipse peccator in suam foueam, & dolor quem conceperat, & iniquitas, quam pepererat in caput eius reciderunt. Sed singula explicemus. Ecce parturiit iniustitiam, peccator videlicet, iniustum aliquod opus aduersus iustū effecit. Porro hoc loco, parturiit, non est aliquid diuersum à voce peperit, sed omnino idē; explicat enim statim clarius, quo semine parturierit, siue peperit. Concepit, inquit, dolorem, & peperit iniquitatem. Concipitur enim semen, & paritur fœtus. Conceptio doloris, est conceptio inuidiæ, siue odij in proximum, quæ sunt semina malorum; & rectè conceptio inuidiæ, vel odij, dicitur conceptio doloris; quia inuidia, & odium torquent, & disrumpunt animum inuidentis, & odio habentis. Ex hoc malo semine concepto paritur opus iniquum, ut cædes, rapina, detractio, falsum testimonium, & similia. Quamuis autē videantur nonnullis tria distincta, parturiit iniustitiam, cōcepit dolorem, peperit iniquitatem, & verè parturitio sit quid medium inter conceptum, & partum: tamen dixi non esse hoc loco, nisi duorum quia duo sola respondent paulo infra, cum dicitur, Conuertatur dolor eius in caput eius, & in verticem ipsius iniquitas eius descendet; tum quia si, parturiit, hoc loco poneretur pro parturitione distincta a partu, poneretur post verbum, concepit, non ante illud. Igitur parturiit iniustitiam, dictum est in summa, & breuiter, deinde explicatum est per illa, concepit dolorem, & peperit iniquitatem.

XVI. Lacum aperuit, & effodit eum, & incidit in foueam, quam fecit.

Dixerat peccatorē peperisse iniquitatem contra iustum; addit aperuisse etiam lacum, siue cisternam, ut est in Hebræo. Significat autem his similitudinibus, peccatorem aliquando apertè, aliquando occultè moliri malum iustis; & quia tã partus, quàm fossio sunt opera valdè laboriosa, significatur, opera mala, non sine dolore, & labore fieri. Hinc illa vox perditorum, Sap. 5. Ambulauius vias difficiles. Et incidit in foueam, quam fecit. Incipit iam Propheta ostendere mala illa hominū peccatorum ipsis peccatoribus solum nocere, & hunc esse gladium, siue sagittas Dei; & incipit ab ultimo malo, quia in illo desierat. Aperuit, inquit, lacum, seu cisternam, ut iustus nesciēs ibi esse foueam, in eam caderet; sed ipse prior in eam incidit, qui eā foderat.

Conuertetur dolor eius in caput eius, & in verticem ipsius iniquitas eius descendet. XVII.

Non solum mala occulta, ut apertio foueæ, sed etiam manifesta, ut odium, siue inuidia concepta, quæ multis signis prodit exterius; & ipsa mala ex odio, & inuidia profecta, ut cædes, & rapinæ, & similia in auctorem, Deo sic disponente, recident. Exemplo sunt Saul, & David; Christus, & Iudæi; Martyres, & persecutores.

Confitebor Domino secundum iustitiam eius, & psallam nomini Domini altissimi. XVIII.

Concludit Psalmum cum laude Dei: Confitebor Domino, id est, laudabo Dominum. sic enim passim accipitur in Scripturis confessio pro laude, quis videlicet qui laudat confitetur, eum quem laudat dignum esse laude; secundum iustitiā eius, id est, laudabo, prout meretur eius iustitia, quæ tam admirandis modis liberat iustos, punit iniustos; & psallam nomini Domini altissimi; idem significatur alijs verbis; Hymnum dicam Domino altissimo, id est, summo Iudici, qui sedet in altissimo solo super omnes alios Iudices.

PSAL-

P S A L M V S V I I I.

Titulus, & Argumentum.

In finem pro torcularibus, Psalmus Dauid.

הַתִּירָת



VOX torcularibus, in Hebræo est, Haghittith, quæ nihil significare videtur, & ideo moderni, qui ita legunt, dicunt esse genus instrumenti musici nobis incogniti.

הַנְּתוּת

At Septuaginta, & S. Hieronymus, qui reddiderunt, torcularibus legerunt sine dubio, Hagattoth, quod significat torcularia, & hanc esse veram lectionem dubitare non possumus. Quid autem sit, pro torcularibus, difficile est diuinare. qui enim intelligunt Ecclesiam, vel martyria, vel Crucem Christi, mysticè exponunt. Animaduerti titulum, pro torcularibus, haberi in tribus Psalmis, qui ad amorem Dei precipuè pertinet, videlicet in hoc octauo, qui exorditur à magno affectu; Domine Dominus noster, quàm admirabile est nomen tuum in vniuersa terra? & in octogesimo, qui similiter hortatur ad iubilum spirituale, Exultate Deo adiutori nostro, iubilare Deo Iacob: sumite Psalmum, & date tympanum, psalterium iucundum cum cithara. Denique in octogesimo tertio, qui plenus est affectu ardētissimi amoris diuini, Quam dilecta tabernacula tua Domine, concupiscit, & deficit anima mea: Cor meum, & caro mea exultauerunt in Deum viuum. Itaque ex materia horum Psalmorum suspicor dici, pro torcularibus; quia sunt aptissimi ad exprimendum vinum diuini amoris ex cordibus hominum. vel quia cum lætitia, & cordis iubilo canendi sunt; quomodo latari, & canere solent, tempore vindemiæ qui de torcularibus ingentem vini copiam exprimunt. Fateor tamen me nondum assequi tituli huius, vt etiam aliorum multorum intelligentiam. est igitur argumentum huius Psalmi, laudatio potentia, sapien-

tia, & benignitatis Dei, ac precipuè erga genus humanum.

Explicatio Psalmi octauo.

Domine Dominus noster, quæ I. admirabile est nomen tuum in vniuersa terra?

Ex cōsideratione magnitudinis Dei, rapitur Propheta in admirationem, & tantus Deus tanti faciat hominem, qui est puluis, & cinis, vt eum visitare & ornare plurimis, & maximis beneficijs dignatus sit. Illud Domine, in Hebræo est nomen proprium Dei, quod scribitur quatuor literis, & deducitur ab esse, iuxta illud ego sum qui sum. quod nomen moderni exprimunt per vocem, Ieoua, sed Septuaginta Interpretes, & Sanctus Hieronymus, imò Christus ipse, & Apostoli pronunciare non solebant, sed loco eius dicebant, Domine. Illud autem, Dominus noster, est in Hebræo alia vox, Adonai, quæ propriè Dominum significat. Itaque sensus est, Deus qui es ipse fons essendi, vnde omnia quæ sunt, deriuantur, ac proinde Dominus noster, idest, Dominus rerū omnium es; quàm admirabile est nomen tuum in vniuersa terra? idest, gloria tua, siue bona fama nominis tui diffusa est per omnem terram, cum ingenti admiratione omnium, qui illam cōsiderare satagunt. Quod Isaias cap. 6. alijs verbis dicit, Plena est omnis terra gloria eius; Dicit autem nomen Dei esse admirabile, quia tametsi pauci re ipsa mirentur, cum pauci sint, qui cōsiderent opera Dei; tamen ipsum Dei nomen est admiratione dignissimum, cum omnes creaturæ assiduè laudent creatorē, vt omnia pulchra opera laudare dicuntur artificem. Et hoc modo plena est omnis terra gloria Dei; quia qui: quid est in terra, etiā si minimum quid videatur, potentiam, & sapientiam creatoris infinitam manifestat.

הוּא

יהוה

אדני

Quoniam eleuata est magnificen- II. tia tua super cælos.

Ratio redditur, cur sit tam admirabile nomen Domini in vniuersa terra. quia

quia videlicet magnificentia Dei est altior cælo, idest, non capitur cælo; tanta est, ut totus mundus eam capere non possit, Operuit cælos gloria eius, & laudis eius plena est terra, inquit Abachuc in cantico suo. Porro magnificentia virtus est magnorum Principum, qui magnis sumptibus, vel ingentia palatia, aut ciuitates ædificant, vel maximum numerum famulorum, aut etiam exercitus integros alunt, vel amplissima dona in alios conferunt. Deus autem ædificauit palatium huius totius mundi, cuius pauimentum est orbis terræ & tectum est cælum. Alit autem omnia viuientia, quæ sunt innumerabilia: denique donauit Angelis sanctis, qui sunt in maximo numero, & donaturus est hominibus iustis Regnum amplissimum, non temporale, sed æternum. Verè igitur magnificentia eius maxima est.

III.

Ex ore infantium, & lactentium perfecisti laudem propter inimicos tuos, ut destruas inimicum, & ultorem.

Respondet obiectioni quæ poterat fieri: si gloria Dei replet orbem terræ, & magnificentia eius eleuata est super cælos; unde fit, ut non omnes eam cognoscant, & laudent? Respondet, inde fieri, quod Deus non dignetur cognosci, & laudari à superbis, qui de sua virtute præsumunt; sed ab humilibus, & paruulis iuxta illud Matth. 12. Confiteor tibi Pater, quia abscondisti hæc à sapientibus, & prudentibus, & reuelasti ea paruulis. Et hinc valde crescit gloria, & magnificentia Dei, cum non cognoscatur, nisi à quibus ipse cognosci voluerit. Potest autem hic versiculus duobus modis intelligi. Primo, ut per infantes, & lactentes, intelligantur homines, qui re vera comparatione Angelorum sunt veluti infantes, & lactentes, præsertim circa intelligentiam rerum diuinarum. ergo, inquit, ex ore mortalium hominum perfecisti laudem, reuelans eis gloriam tuam, propter inimicos tuos, idest, ad confusionem superbiorum Angelorum; ut destruas inimicum, & ultorem, idest, ut perdas

Belar. in Psalm.

sapientiam primarij inimici tui, Diaboli, & defensoris, siue vltoris eius, idest, agminis Angelorum reproborum, qui illum sequuti sunt. Secundo, per infantes, & lactentes, possunt intelligi homines humiles, & paruuli in oculis suis, & imperiti scientiarum secularium, quales fuerunt multi Prophetæ, & Apostoli, & ingens numerus Monachorum, & Virginum sanctarum, nec non verè puerorum, qui in tenera ætate adeo perfectè cognouerunt gloriam Dei, & admirabile nomen eius, ut pro ipso mortem oppetere non dubitauerint. In hoc sensu allegauit Dominus hunc Psalmum in Euangelio, Nunquam legistis, quia ex ore infantium, & lactentium perfecisti laudem? Matth. 21. Inimici autem dicuntur Sapientes huius mundi, & defensores ipsorum, qui, quamuis Deum cognouerint, tamen non sicut Deum glorificauerunt, ideo insipientes facti sunt, ut Apostolus docet ad Rom. 1. Quod dicitur, ut destruas, in Hebræo est, ut quiescere facias; sed sensus est idem. Nam non loquitur Psalmus de destructione personæ, sed sapientiæ, iuxta illud Isaia, Perdam sapientiam sapientum; & illud Apostoli 1. Cor. 1. Stultam fecit Deus sapientiam huius mundi.

Quoniam videbo cælos tuos, I V. opera digitorum tuorum, lunam, & stellas, quæ tu fundasti.

Sanctus Dauid ponit se in numero infantium, & lactentium laudantium Deum; quasi dicat, Certè ex ore infantium, & lactentium perfecisti laudem. Nam ego vnus ex illis, quippe qui pastor ouium eram, tuas laudes perficiam, Quoniam videbo cælos tuos, idest, confiderabo attentè admirabile illud opus manuum tuarum, & inde laudabo te tanti operis creatorem. Illud, tuos, non est in Græco, tamen est in Hebræo, & inde in editionem nostram rectè translatus fuit. cur autem dixerit, tuos, declarat dicens, opera digitorum tuorum: nec dicit opera brachiorum, sed digitorum, tum ut ostendat summa facilitate cælos à Deo fuisse conditos;

C tum

tum quia digitis fiunt opera subtilia, & preciosa, ad quæ facienda ingenium, non labor requiritur: non meminit Solis, sed Lunæ tantum, & stellarum, quia tempore nocturno contemplari solebat David; quoniam tempus illud ob quietem contemplationi aptius est. Media nocte, inquit, surgebam ad confitendum tibi. Et alibi, In matutinis meditabor in te. Sicut etiam Isaias, Anima mea de sideraui te in nocte. Noctū autem cælum videtur Luna, & stellis ornatum; denique verbum, fundasti, significat cælum, Lunam, & stellas ex nihilo creata, quasi dicat Propheta, quæ tu à fundamēto fecisti, cum antea nihil eorum extaret.

V. Quid est homo, quod memores eius, aut filius hominis, quoniam visitas eum?

Ex magnitudine Dei iam declarata, accedit ad extollendam magnitudinē Dei erga homines. Quid est, inquit, homo, quod tu creator cæli, & terræ dignaris eius recordari? Quasi dicat, maximū est hoc beneficiū, quod altissimus Deus dignetur meminisse hominis, qui est pulvis & cinis. Quia verò istud, recordari in Deo nō est simplex memoria, sed est recordari ad benefaciendum; addit explicans, aut filius hominis, quoniam visitas eum? Homo, & filius hominis hoc loco idem significāt, nisi fortē ponatur hæc distinctio ad significandum beneficia Dei non esse collata in solū primum hominem, qui fuit homo, sed non filius hominis; sed etiam in omnes posterōs, qui ita sunt homines, ut sint etiā filij hominum. Visitatio autem significat specialem providentiam, quā Deus habet erga homines, sed præcipuē illā quam Deus ostendit, cum venit in hunc mundum, & assumpsit humanam naturam, & in terris visus est, & cum hominibus conuersatus est. Hæc est propriē visitatio; de qua Zacharias in Cantico Luc. 1. Benedictus Domin⁹ Deus Israel, quia visitauit, & fecit redemptionē plebi suæ: & infra, Visitauit nos oriēs ex alto. Hæc sanē visitatio maximē meretur illā admirationē, Quid est homo, &c.

Minuisti eum paulominus ab VII. Angelis, gloria & honore coronasti eum, & constituisti eum super opera manuum tuarum.

Hæc duplicem habent sensum, literalem, & allegoricum. Secundum literalem sensum commemoratur tria beneficia Dei erga naturam humanam, primo quod homo sit conditus à Deo tam nobilis naturæ, ut non sit inferior Angelis, nisi modicum: deinde, quod sit ornatus gloria, & honore præ omnibus alijs inferioribus creaturis; quia sit factus ad imaginem, & similitudinē Dei, ratione & libero arbitrio præditus. Denique quod acceperit potestatem, & dominium in omnia opera Dei, ac præsertim in animalia, ideo subiungit.

Omnia subiecisti sub pedibus eius, oues, & boues vniuersas, insuper & pecora campi.

Volucres cæli, & pisces maris, qui perambulant semitas maris.

Per oues, & boues intelliguntur omnia animantia domestica: per pecora campi, animantia syluestria, quæ libere vagantur per campos; per aues cæli, & pisces maris, non est dubium quid intelligatur. Illud est notandum, in Hebræo, post pisces maris, addi in singularem, perambulans semitas maris, & in Græco etiam mutari saltem genus: nam post pisces maris habetur in neutro, perambulantia semitas maris. Sensus igitur est, non solum pisces propriè dictos, sed omne perambulans, siue omnia perambulantia semitas maris, id est, quicquid mouetur in mari, siue sint pisces, siue monstra, siue quid aliud. Iam verò secundum allegoricum sensum, sed certum, & à Deo intentum, Apostolo teste. Heb. 2. & 1. Cor. 15. significatur, hominem in Christo post illam insignem Dei visitationem, id est, Verbi incarnationem, minoratum aliquantulum ab Angelis propter passionem; tūc enim Christus visus est aliquo modo minor.

VIII.

minor Angelis, cū ei apparuerit Angelus de cælo confortans eum; & cū Angeli sint impassibiles, & immortales; Christus autem eo tempore passus, & mortuus sit. Absolutè autem semper fuit Christus Angelis superior, & omni ex parte superior. Quod apparuit, quando gloria, & honore coronatus est, id est, per resurrectionem circumdatus vndique glorioso, & immortal corpore: & constitutus per admirabilem Ascensionem super omnia opera Dei, exaltatus videlicet ad ipsam Patris sui dexteram. Omnia quoque subiecta sunt ei, nulla re excepta, Præter illum, vt Apostolus ait 1. Cor. 15. qui subiecit ei omnia. Res autem illi præcipuè subiecta sunt, primo, homines, tam fideles, significati per oues, & boues; subditos, & Prælatos; minores, & maiores, quàm infideles, significati per animantia syluestria. Deinde Angeli hominibus superiores significati per aues cæli, quæ in sublime feruntur, & canunt assiduè laudes Dei. Denique Dæmones hominibus inferiores significati per pisces maris, qui in imis, & profundissimis locis habitant, & multi sunt ad laudes Dei, & luto, ac humoribus delectantur. Hæc omnia allegoricè varijs modis exponi posse docet S. Augustinus in hunc locum; vbi aliam ponit expositionem, quæ apud eum legi poterit. Vnum hoc loco addendum est, quod superius commemorandum fuisset; cū Psalmista dicit, Minuisti eum paulominus ab Angelis, non esse in Hebræo nomen Angelorum, quos Hebræi vocant, Malachim, sed Elohim, quod interpretari solet Deus, vel Dij; sed quia nomen Dei in Scripturis sæpe tribuitur Angelis, & ipsis etiam hominibus, qui alijs præfunt; rectè Septuaginta Interpretes respicientes sensum Prophetæ, posuerunt, ab Angelis; & eam interpretationem approbavit Apostolus Hebr. 2.

IX. Domine Dominus noster, quàm admirabile est nomen tuū in vniuersa terra?

Repetit primam sententiam, vt ostendat illam esse quasi conclusionem, quæ in toto Psalmo declarare & approbare intendebat, quæ si dicat, Iure igitur, ac meritò exclamaui Domine Dominus noster, quàm admirabile est nomen tuum in vniuersa terra?

P S A L M V S IX.

Titulus, & Argumentum.

In finem pro occultis filij Psalmus.
Dauid.



VNC titulum Hebræi legunt, Victori super mortē filij: & quidem verba Hebraica, vt modo leguntur, ita sonant. Sed quia Psalmus hic est Psalmus lætitiæ, & Dauid non lætitia, sed mœrore maximo affectus fuit ex morte filij, ideò aliqui volunt vocem illam, Laben, legendam esse ordine literarum conuerso, videlicet, Nabal, vt sensus sit, pro morte Nabal. Sed Psalmus non loquitur de morte vnius hominis tantum, sed etiā de interitu magni alicuius exercitus. Ideò alij dicunt in hoc Psalmo gratias agi Deo pro morte Goliath, & fuga totius exercitus Philistinorum. Sed Goliath non fuit filius Dauid, vt inscribere debuerit Psalmum, pro morte filij. Verissima est igitur lectio Septuaginta, & vulgatæ Latinæ editionis, pro occultis, siue arcanis filij. Voces enim illæ, almuth, possunt legi, alamoth, quod significat occulta, siue arcana, & credibile est excidisse præpositionem, al, & legendum, al alamoth, pro occultis, sicut legitur in titulo Psalmi 45. Certè Septuaginta Interpretes, qui vtrumque titulum eodem modo reddiderunt, videlicet, pro occultis, sine dubio eodem modo legerunt, videlicet, al alamoth, neque dubium esse potest, quin libri eorum emendatiores fuerint quàm nostri. Quia verò ponitur hoc loco nomen filij absolutè, &

C 2 præ-

מלאכים
אלהים

על מות
על סוף
על
על סוף

V. Increpasti gentes, & perijt impius: nomen eorum delesti in æternum, & in sæculum sæculi.

Post debellatum Diabolum per crucem, Dominus Christus per Apostolos increpauit gentes, arguens mundum de peccato, de iustitia, & de Iudicio (vt ipse Dominus futurum prædixit) & eo modo perijt impius, id est, perijt impietas idololatriæ, & homo de impio factus est pius. Nec solum perijt impius, qui tunc erat; sed deleuit Christus nomen eorum, id est, gentilitatis, & idololatriæ in æternum, vt nō amplius sint reditura, quasi stirpitus eradicatæ. Id quod iam videmus ita impletum, vt ne Iudæi quidem colant amplius idola: qui ad ea colenda propensissimi erant. Quod attinet ad verba, in Græco non est, nomen eorum, sed nomē eius, id est, impij: sed in Hebræo est, nomen eorū, & Latina interpretatio idem habet, vel quod olim in Græco ita legeretur, & postea sit mutatum vitio librariorū; vel quod Latino interpreti magis placuerit lectio Hebraica: sed in sententia non est diuersitas vilius momenti. Illud autem in æternum, & in seculum seculi, in Hebræo est in seculum, & in æternum, significatur autem ista additione vera æternitas, id est, nunquam finē da duratio, ne quis acciperet hoc loco æternum pro longo tempore, sed aliquando finem habituro.

V.I. Inimici defecerunt frameæ in finem, & Ciuitates eorum destruxisti.

Reddit causam cur non sit reditura idololatria; quia perierunt arma Diaboli, & ciuitates vbi habitabat, ita vt non habeat, nec vnde offendat, nec vbi se defendat. Illud inimici, est genitiui casus vt patet ex Græco: nam ex Hebræo posset etiam verti, O inimice. sed rectissima est versio Græca & Latina, & nō repugnat Hebraicæ. pro frameæ; in Hebræo nunc legitur solitudines, sed verbum Carabot, significat gladios, & Corabot, solitudines, vtrunque autem legi potest, solum mutatis punctis. Ita Belarm. in Psal.

que Septuaginta legerunt, Carabot, ideo recte verterunt frameæ, siue gladij, vt sensus sit, defecerunt gladij hostis nostri Diaboli, vsque in finem, id est, nullo remanente, siue in æternum. Illud etiam, Ciuitates eorum, in Hebræo, & Græco habetur sine pronomine, eorum, & Ciuitates destruxisti, nimirum inimici. quasi dicat inimicus amisit gladios, & Ciuitates. per gladios inimici intelligi possunt tentationes siue suggestiones, & quasi verba Diaboli, sicut gladium spiritus vocat Apostolus verbum Dei: vnde etiam idē Apostolus tentationes Diaboli dicit esse tela ignea, ad Ephes. 5. Dicuntur autem isti gladij defecisse, quia nihil nocere possunt armatis fide Iesu Christi. In quo sensu allegauit hunc locū Psalmi Sanctus Antonius apud Athanasium in vita ipsius, probare volens tentationes Diaboli signo crucis facillimē repelli. per ciuitates autem Diaboli intelligi possunt homines infideles in quibus Diabolus liberē regnat. Destruxit Christus has ciuitates, dum per totum mundum idola sustulit. De hac re Dominus loqui videtur, cū ait Luc. 11. Cū fortis armatus custodit atrium suum in pace sunt omnia quæ possidet, si autem fortior superueniens vicerit eum, vniuersa arma eius auferet, &c. Cū diabolus custodiebat atrium in pace erant omnia quæ possidebat, id est, cū infidelitatem conseruabat, securē possidebat omnia sua; quia dum homo est infidelis, semper est in manu Diaboli, etiam si moraliter bene viuere videatur, vt multi Philosophi alijque Ethnici faciebant. At atrio expugnato per Christum, id est, infidelitate sublata, & cognitione veri Dei introducta, omnia sua Diabolus perdidit.

Perijt memoria eorum cum sonitu, & Dominus in æternum permanet.

In Hebræo, vt nunc legitur, non habetur cum sonitu, sed, cum ipsis, vt sensus sit, perierunt impij, & cum ipsis perijt etiam memoria ipsorum. Cæterū

C 3 vox

חממ
חממ
vox Hebraica potest legi, Hemma, & significat cum ipsis, potest etiam legi, Hama, & significat sonitum; & sic legunt Septuaginta interpretes, & addiderunt perspicuitatis gratia propositionem, cum, & ideo verterunt, cum sonitu; sensus autem est, periisse memoriam idololatrarum; & ipsorum idolorum & totius Regni Satanæ cum magno strepitu, & sonitu. Repugnauit enim mundus totus, & ipsi summi Reges, & Imperatores totis viribus conati sunt idola defendere: sed quò magis mundus fremebat, eò magis idololatria cadebat, & memoria eius abolebatur. Denique finito strepitu persecutorum memoria quoque idololatriæ perijt: Dominus autem Christus, & eius memoria numquam peribit.

VIII. Parauit in iudicio thronum suum, & ipse iudicabit orbem terræ in æquitate iudicabit populos in iustitiâ.

Post Christi mortem, & resurrectionem data est ei omnis potestas in cælo, & in terra Matth. ultimo. Id hoc loco David commemorat, quasi dicat, post certamen cum Diabolo Dominus parauit, siue, vt sonat vox Hebræa, stabiluit thronum suum in iudicio, id est, ad iudicandum, & ipse qui est Princeps Regum terræ, iudicabit orbem terræ, id est, populos omnes totius mundi, in æquitate, & iustitiâ. Idem est autem hoc loco æquitas, & iustitiâ. nam tam in Hebræo, quàm in Græco pro, æquitate, habetur iustitiâ, pro iustitiâ habetur, rectitudo. Itaque Latinus interpres non accepit æquitatem propriè, sed vt poni solet aliquando pro iustitiâ; & sicut in Hebræo, & Græco res eadem bis repetitur diuersis vocibus, ita credendum est, Latinum interpretem idem intelligi voluisse per æquitatem, & iustitiâ. Dicitur autem Christus iudicare orbem terræ, quamuis multi sint in mundo Principes infideles, & impij qui contra Christum pugnant; quoniâ corda eorum in manu Christi sunt, nec faciunt, nisi quod ipse iustò iudicio facere eos sinit.

Et factus est Dominus refugium IX. pauperi, adiutor in opportunitatibus in tribulatione.

Ex eo quod deinceps regnabit Dominus Christus, & iudicabit iustè, colligit David magnam cōsolationem pauperum, qui alias à potentibus opprimi solent. quasi dicat, nò timeant amplius pauperes, quia Dominus in cælo sedes factus est refugium pauperum. & rursus id ipsum alijs verbis repetit, adiutor, inquit pauperum in opportunitatibus, id est, temporibus opportunis, quādo videlicet necessitas id requirit, nimirum in tribulatione. Tunc enim opportunè diuinum præbatur auxilium; quando tribulatione vrgemur, & deficit humana consolatio. Adimpletur autem hæc promissio in omnibus, qui Deum verè quærant, & timent, & ideo subiungit.

Et sperent in te qui nouerunt x. nomen tuum, quoniam non dereliquisti quærentes te Domine.

Mutatio persone frequens est in Psalmis, & sæpè nascitur ex affectu nouo, qui Dauidi inspirabatur, dum laudes Dei caneret. Merito, inquit, in te sperare possunt in angustijs suis omnes qui nouerunt nomen tuum, id est, qui non solum sonant voce nomen Dei; sed probe intelligunt, quàm magnam rem significet, & ex nomine isto rectè intellecto cognoscunt potentiam, & misericordiam Dei. Ideò merito in te sperare possunt amici tui, quoniam nò dereliquisti, id est, nunquam dereliquisti quærentes te. Dicuntur autem quærare Deum, qui cupiunt eius gratiam, & student toto corde placere illi.

Psallite Domino, qui habitat XI. in Sion, annunciate inter gentes studia eius.

Post apostrophem ad Deum; ex eodem seruire spiritus facit aliam ad homines, exhortans eos, vt ipsi quoque Deum laudent, & alios ad laudandum excitent. Dicitur Dominus habitare in Sion, quia ibi erat arca testamenti, & locus

IX.

eus orationis; & additur hæc periphrasis, vt distinguatur Deus verus, à Dijs falsis, qui habitabant in delubris, & fanis Ethnicorum. Illud autem, studia eius, significat cogitationes, consilia, molimina, adinventiones, opera Dei mirabilia, quæ relucet in redemptione generis humani. Nam idē vocabulum Hebraicum haliloth, quod hic vertitur, studia, in Psalmo 104. vertitur opera, & Isaia 11. in cantico Isaia vertitur adinventiones. Itaque sensus est, Cātate Deo vero Psalmum, laudantes eum, & annunciate inter gentes mirabiles cogitationes, & mirabilem industriam, atque adeo mirabilia opera eius, vt omnes gentes hæc audientes illum laudent.

עלילות

XII. Quoniam requirēs sanguinem eorum recordatus est: non est oblitus clamorem pauperum.

Redit Propheta ad id quod dicebat, Dominum iustum iudicem esse refugium pauperum in tribulatione: & respondet tacitæ obiectioni, quæ poterat fieri, quia videmus interdum pauperes pios opprimi à potentibus, & etiam innocentem occidi. Laudate, inquit, Deum, quoniam etiam si videatur aliquando obliuisci pauperum suorum; tamen non ita est, sed requirens, id est, inquirens in vitam hominum, & discutiens acta singulorum, recordatus est sanguinem innocentium iniuste effusum, & non est oblitus clamorem eorum, qui dum opprimerentur clamauerunt ad eum. Deum autem recordatum esse sanguinem suorum, patebit suo tempore, quando, & opprimentium poena, & oppressorum gloria manifestabitur.

XII. Misere mei Domine, vide humilitatem meā de inimicis meis.

Laudauit Deum de præteritis beneficijs: nunc implorat auxilium aduersus presentes, & futuras angustias. Est autem vox Ecclesiæ contra persecutores tum visibiles, tum inuisibiles. Misere, inquit, mei Domine, vide humilitatem meam, id est, abiectionem

meam (id enim sonat verbum Græcum) siue afflictionem meam (quod significare solet verbum Hebraicum) de inimicis meis, id est, ex inimicis meis prouenientem.

Qui exaltas me de portis mortis, vt annunciem omnes laudationes tuas in portis filia Sion. XIII.

Prima pars huius versiculi coniungitur cum superiore versu. Est enim sensus, Misere mei, & vide humilitatem meam, tu Domine qui exaltas me de portis mortis, id est, qui soles me longè facere à portis mortis: & quia portæ illæ intelliguntur esse in loco inferiori, & eadem cum portis inferi, quia non loquitur Propheta de morte corporis, sed de morte animæ per peccatum, siue de morte æterna; ideo exaltari se dicit, vt longè fiat ab illis. Per portas mortis, siue inferi videtur intelligenda multitudo infernalium hostium nostrorum. Quia enim multitudo populi ad portas conuenire solebat apud Hebræos, siue ad iudicium, siue ad alia publica negocia, ideo multitudo nomine portarum significatur. Matth. 16. Portæ inferi non præualebunt aduersus eam. Ecclesiastici ultimo, De portis tribulationum, quæ circūderunt me. Pulchrè autem opponuntur portæ mortis, portis filia Sion, id est, portis Hierusalem: quia portæ mortis, seu inferni in loco infimo sunt, portæ Hierusalem in monte excelso: in portis mortis congregatur populus infernalis, in portis Hierusalem, populus Dei. Portæ mortis tentationes, & bella emittunt, per quæ itur ad mortem; portæ Hierusalem in pace fundatæ sūt. Hierusalem enim posuit fines suos pacem, & ipsa visio pacis dicitur. Itaque exaltatur Ecclesia à portis mortis, vt annunciet laudem Dei in portis filia Sion, id est, liberatur à tentationibus ne cadat in mortē æternā, vt gratia liberatoris agnoscat, & laudet corā Angelis Dei, qui sunt in portis caelestis Hierusalem.

Exultabo in salutari tuo, in-

C 4 sunt

xx sunt gentes in interitu, quem fecerunt.

Exultabo, inquit, liberatus de portis mortis, in salutari tuo, id est, in salute à te mihi donata. Quoniam (id enim subintelligitur, ut sæpè alias in Psalmis) gentes, quæ mihi interitum fecerunt, id est, parauerunt, in ipsum interitum infixæ sunt, tanquam in luto tenacissimo, unde euadere nequibunt: hoc est, persecutio inimicorum non mihi nocuit, sed ipsis.

XVI. In laqueo isto, quem absconderunt comprehensus est pes eorum.

Nec solum aperta persequutio, sed etiam occulta, quæ veluti laqueus tendebatur, auctoribus perniciofa fuit, non mihi. Fortassè hic tanguntur persequutiones apertæ Diocletiani, & similitum, & occultæ Iuliani Apostatæ, & Imperatorum hæreticorum.

XVII. Cognoscetur Dominus iudicia faciens, in operibus manuum suarum comprehensus est peccator.

Ex hoc mirabili iudicio Dei, qui conuertit arma, & fraudes hominum impiorum in ipsos, colligit David fore, ut cognoscatur Deus. Cognoscetur Dominus iudicia faciens, id est, cognoscetur esse Deus verus, & summus; dum iudicia facit tam admiranda; nam per eius providentiam in operibus manuum suarum comprehensus est peccator; nimirum dum incidit in interitum quem alijs parauerat, & in laqueum quem alijs tetenderat. Similia habentur in Psalmo 7. versu 15. & eundem sensum habent. Post hunc versiculum in Hebræo additur, Higgsaion selà, quod verti potest, meditatio semper, quod significat, iudicia Dei supradicta, assidue, ac iugiter esse meditanda.

XVIII. Conuertantur peccatores in infernum, omnes gentes, quæ obliuiscuntur Deum.

Non imprecatio, sed prophetia est,

impios ad inferos descensuros: conuertantur, positum videtur pro reuertantur, ut vox Hebræa sonat, & reuertantur, pro, reuertentur. Dicuntur autem peccatores reuersuri ad inferos, quia inde venerunt, quia peccatores sunt. Deus enim fecit hominem rectum, sed Diabolus eum peccatorem fecit, Vos, inquit Dominus, ex patre Diabolo estis. Quod sequitur, omnes gentes, quæ obliuiscuntur Deum, declarat qui sint peccatores reuersuri in infernum; illi nimirum omnes, qui obliuiscuntur Deum. Obliuio enim Dei est radix omnium peccatorum; nam omnis qui peccat, auertitur à Deo, & conuertitur ad creaturam.

XIX. Quoniam non in finem obliuio erit pauperis, patientia pauperum non peribit in finem.

In Hebræo non habetur negatio in secundo membro, sed legitur, patientia pauperum peribit in æternum, sed negatio prioris membri ex phrasi Hebræica, trahitur etiam ad membrum posterius, & ideo Septuaginta Interpretes rectè verterunt, non peribit. Significat autem hic versiculus, id est peccatores, qui pauperes opprimere solent, in infernum deiiciendos, quoniam Deus vindictam aliquando sumet de oppressione pauperum suorum. Quamuis enim ad tempus videatur non recordari eorum; tamen non obliuiscitur eorum usque in finem; sed aliquando recordabitur, & proinde patientia, siue expectatio pauperum non peribit in finem, id est, in æternum, ut sonat vox Hebræa, Lahad. Dicitur autem patientia pauperum non peritura in æternum, non quoad se, sed quoad suum effectum; quasi dicat, non frustrabitur in æternum, sed aliquando effectum suum sortietur.

XX. Exurge Domine, non confortetur homo, iudicentur gentes in conspectu tuo.

Posteaquam prædixit interitum impiorum, rogat Deum ut incipiat coercere impios. Exurge, inquit, Domine ad con-

confortetur, id est, non praeualeat homo, qui pulvis est, contra Deum factorem suum. Iudicentur gentes in conspectu tuo, id est, iudicium contra eos à facie tua prodeat. Quod in alio Psalmo legimus, Iudica illos Deus.

XXI. Constitue Domine legislatorem super eos, ut sciant gentes quoniam homines sunt.

Iudicium contra gentes, quæ persequerentur Ecclesiam, manifestum fuit, quando subiectæ fuerunt Principi Christiano. Tunc enim intellexerunt Gentiles, se homines esse, infirmos videlicet, & contra Christum prævalere non posse. Id prædicit Propheta per modum precantis. Nomen Hebraicum, Morah, vel Morè, Doctorem significat, & etiā terrorem, ut vertit S. Hieronymus. Et quia Propheta loquitur de Doctore terribili, qui cum imperio præcipit, & docet, ideo rectè legislatorem dixerunt Septuaginta Interpretes. Multi per hunc legislatorem intelligunt Christum, multi Antichristum. In re obscurissima quisque in suo sensu abundet. Ego Constantinum intelligo, Iovinianum, Valentinianum, Theodosium, & similes.

XXII. Ut quid Domine recessisti longe, despicias in opportunitatibus, in tribulatione.

In hoc versu incipiunt Hebræi Psalmum decimum, sed hæc distinctio Septuaginta Interpretes non habuerunt: & credibile est à posterioribus excogitatum esse distinctionem, propterea quod materia huius partis Psalmi videatur diuersa omnino à materia prioris partis, cum in parte prior exultet Ecclesia pro victoria contra inimicos Dei, & suos; in posteriore gemat ob eorundem inimicorum prosperos successus aduersus Ecclesiam. Sed non tam est diuersa materia, quam diuersa sunt tempora, quæ David prophetando percurrit. In principio enim Psalmi exultabat David in spiritu ob occulta mysteria filij Dei, qui moriendo debellauit aereas potestates, & gentilitatem,

atque idola destruxit. Deinde in fine prioris partis, & in hac posteriore prædicit persecutiones Ecclesiæ tum à gentibus, tum ab alijs malis hominibus excitatas, quæ interdum ita crescunt, ut videatur Dominus oblitus esse populi sui, quem tam gloriôsè liberauerat. Et quia dixerat paulo ante, Factus est Dominus refugium pauperi, adiutor in opportunitatibus, in tribulatione; ideo nunc respiciens aliud tempus, quod, Deo permittente, pauperes opprimuntur à potentioribus, ait, Ut quid Domine recessisti longè, id est, ita permittis impios grassari in iustos, ac si non adesses, sed longè recessisses? Despicias, tuos pauperes videlicet, in opportunitatibus, quando opportunum esset eos iuuare, nimirum in tribulatione.

XXIII. Dum superbit impius, incenditur pauper, comprehenduntur in consilijs quibus cogitant.

Difficilis omnino versiculus. Videtur hæc esse sententia, dum superbit impius, id est, dum impius prosperè agit, & gloriosus apparet; tunc incenditur pauper, id est, scandalizatur, & vritur æstu cogitationum iustus pauper, comprehenduntur in consilijs quibus cogitant, id est, vterque, tam impius gloriosus, quam iustus pauper comprehenditur, & illaqueatur consilio, id est, cogitatione sua. Nam impius cogitat sibi deberi illam felicitatem, & ipse se decipit: iustus verò videns impium prosperè agere, cogitat quid hoc sibi velit, & magis ac magis se inuoluit. Quod ad Grammaticam attinet, cum dicitur in consilijs quibus cogitant, Græcismus est, & Latinus Interpres ad verbum vertere voluit. Nos enim diceremus in consilijs, de quibus cogitant, vel quæ cogitant. Per consilia vero cogitationes intelligimus. ut magis propriè significat vox Hebraica. Porro hæc videtur ratio versiculi superioris, ideo enim rogauit Propheta Deum, ut non despiceret pauperem in tribulatione, quia prosperitas impiorum, & impijs, & iustis nocet, dum illi superbiunt, isti scandalizantur.

Quo-

XXIV. Quoniam laudatur peccator in desiderijs animæ suæ, & iniquus benedicitur.

Hebraica lectio, ut nunc se habet, ad verbum sic vertenda esset, Quoniam laudavit impius desiderium animæ suæ, & avarus benedicens exacerbavit Dominum. Sed remotis punctis, & distinctionibus quæ tempore Septuaginta Interpretum non aderant, clarissime cernitur sententia, quam Septuaginta rectissime expresserunt. Verbum enim הלל hillel, quod significat laudavit; si legatur hullal, ut Septuaginta legerunt, significat laudatus est; & verbum berech, benedicens, si legatur, baruch, significabit benedictus est. Illud autem exacerbavit Dominum, pertinet ad versiculum sequentem, qui incipit, Exacerbavit Dominum peccator. Reddit igitur causam Propheta, cur ex prosperitate superbiat impius, & vratur pauper; quia videlicet, peccator male agit, & tamen quia dives est, & potens, laudatur à multis quasi bene agat, & desideria animæ eius, idest, desideria ipsius (est enim phrasis Hebraica, desiderium animæ meæ, pro desiderium meum) quamvis iniqua, & iniusta, approbatur, & hinc fit, ut iniquus benedicatur, cum maledici potius mereretur.

XXV. Exacerbavit Dominum peccator, secundum multitudinem iræ suæ non queret.

Pergit explicare malitiam peccatoris superbi. Exacerbavit, inquit, Dominum peccator, & cum deberet omni studio querere reconciliationem, secundum multitudinem iræ suæ non queret, idest, propter magnitudinem iræ suæ in pauperes afflictos, non queret Deum, vel reconciliationem cum Deo. Ira enim, & arrogantia excæcat mentem, ut non cogitet peccator quam magnū sit malum exacerbare Deum omnipotentem.

XXVI. Non est Deus in conspectu eius, inquinatæ sunt viæ illius, in omni tempore.

Excæcatus peccator nō cogitat De-

um. In Hebræo maiori emphasi legitur, Non est Deus in omnibus cogitationibus eius, idest, in nulla eius cogitatione est Deus, idest, cum tam multa cogitet, nunquam cogitationi eius occurrat Deus. Ita funditus Deus oblitus est. Inquinatæ sunt viæ illius in omni tempore. Hoc sequitur ex superiore, quia nunquam Deum cogitat, nullo tempore dirigit viam suam ad Deum; sed ad carnalia desideria explenda; & ideo omnes viæ, idest, omnia opera eius sunt inquinatæ sorde concupiscentiæ.

Auferuntur iudicia tua à facie eius, omnium inimicorum suorum dominabitur. XXVII.

Id quod cum cōvertere posset à viæ mala, cogitatio videlicet terribilium iudiciorum tuorum, longe est à corde ipsius; & ideo sine ullo timore Dei dominatur omnium inimicorum suorum, idest, tyrannicè opprimit omnes, quos inimicos suos putat.

Dixit enim in corde suo, non mouebo à generatione in generationem sine malo. XXVIII.

Confidētia vana impij hic notatur; cogitat enim apud se nihil sibi nocere posse. Dixit, inquit, in corde suo non mouebo; idest, nemo me commovere poterit, nec deicere à statu meo; à generatione in generationem sine malo, supple, ero. Nam & in Hebræo, & in Græco ponitur distinctio post verbum, mouebo, & in Hebræo clarè apparet sensus ille, à generatione in generationem sine malo ero, quomodo etiam vertit S. Hieronymus.

Cuius os maledictione plenum est, & amaritudine, & dolo; sub lingua eius labor, & dolor. XXIX.

Descripsit Propheta quale sit cor impij, quod videlicet non cogitet Deum, nec iudicia eius. & speret, nihil mali sibi euenturum: nunc describit, quale sit os, descripturus postea qualia sint opera. Dicit igitur, os impij esse plenum maledictione, amaritudine, & dolo. Ad maledictionem pertinent blasphemie

mix in Deum, & conuicia in homines; ad amaritudinem detractiones, murmurationes, contentiones, & alia odiū, & rancorem testantia: denique ad dolos calumnie, mēdacia, periuria. Quod additur, sub lingua eius labor, & dolor, significat effectum superiorum malorum. Eo enim tendunt omnia verba impij, vt laborem, & dolorem afflictis adferant. Sub lingua eius labor, & dolor, id est, id quod est sub lingua impij, id est materia in qua exercetur lingua impij, est labor, & dolor miserorum hominū, qui ei quoquo modo subiiciuntur.

XXVII

XXX. Seder in insidijs cum diuitibus in occultis, vt interficiat innocentem.

Hic iam describuntur mala opera, id est, oppressiones pauperum. Est autem oratio metaphorica, ducta similitudine ab ijs, qui latent intra vestibula domus, vt obseruent, quando transeant quos interficere cupiunt. Significat autem Propheta hac metaphora, viros impios, & potentes adiunctis sibi socijs alijs diuitibus, & potentibus varijs artibus, & dolis circumuenire pauperes, eosq. ad extremam perniciem adducere. In Hebreo non est, in insidijs cum diuitibus, sed, in insidijs atriorum, seu vestibulorum. Ceterum Septuaginta non legerunt chazerim, vt nunc habetur in codicibus Hebraicis, sed hasirim. Illud enim atria, hoc diuites significat. Itaque probabile est post tempora Septuaginta textum Hebraicum fuisse mutatum.

חזר

חזר

XXXVI.

Oculi eius in pauperem respiciunt, insidiatur in abscondito, quasi leo in spelunca sua.

XXXII.

Insidiatur, vt rapiat pauperem, rapere pauperem, dum attrahit eum.

XXIIIX.

In laqueo suo humiliabit eum, inclinabit se, & cadet cum dominatus fuerit pauperem.

Quod dixerat in versiculo tricesimo, exponit in his tribus versiculis, varians

metaphoras. Nam in 30. versiculo comparauit oppressorem pauperum homini insidianti alteri homini: in 31. comparat Leoni insidianti alijs bestijs debilioribus: in 32. & 33. comparat homini tendenti laqueos bestijs, & capientibus. Versiculi duo postremi sunt in Hebræo multo clariores. Sic enim ad verbum reddi potest lectio Hebraica, quomodo vertit S. Hieronymus, Insidiatur vt rapiat pauperem, rapiet pauperem cum attraxerit eum ad rete suū: & confectum subijciet, & irruet viribus suis valenter. Nostra verò lectio sic explicanda est: Insidiatur, vt rapiat pauperem, rapere autem pauperem insidiatur tunc, cum eum ad se attrahit: alliciendo incautum. In laqueo verò suo iam captum humiliabit, id est, opprimet, & inclinabit se super eum, atque in eum cadet, id est, super eum irruet cum dominatus fuerit pauperem, id est, cum ijs planè potitus fuerit. Et simul hæc verba pulchrè alludunt ad casum interiorem impij: tunc enim horrendè cadit in seruitutem Diaboli, cum dominari sibi videtur hominum miserorum.

Dixit enim in corde suo, oblitus est Deus, auertit faciem suā, ne videat in finem. XXXIV.

Repetit causam tantæ impietatis, nimirum, quia impius cogitat apud se, Deum non curare res humanas, nec vnquam esse curaturum.

Exurge Domine Deus, & exalteretur manus tua, ne obliuiscaris pauperum. XXXV.

Rogat Deum vt impios coerceat. Exurge, inquit, quasi à somno, & exaltetur manus tua ad percutiendum: manus enim dormientis, vel quieti hominis demissa, & sæpè complicata esse solent. In Græco adduntur duæ voces, post Domine Deus, additur, meus, & post ne obliuiscaris pauperum, additur, in finem. Sed in Hebræo non habetur, nec in Latinis emendationibus.

Propter quid irritauit impius Deum? XXXI.

XLI. Deum? dixit enim in corde suo, non requiret.

Iterum repetit, causam cur impius Deum irritet peccando, eam esse, quia cogitat Deum ista non requirere.

XXXVII. Vides quoniam tu laborem, & dolorem consideras, ut tradas eos in manus tuas.

Refellit Propheta illam causam, quasi dicat, Imò vides, o Deus, & requiris, quod ex eo apparet, quia tu laborem, & dolorem miserorum consideras, ut cum impleta fuerit mensura, tradas impios in manus tuas puniendos. In Hebræo, & Græco habetur, Quoniam tu laborem, & furorem consideras, & sic etiam legit Sanctus Augustinus, & Sanctus Hieronymus, & si ita legamus, sensus erit, Quoniam tu laborem oppressorum, & furorem opprimentium consideras.

XXXVIII. Tibi derelictus est pauper, orphanus tu eris adiutor.

Meritò ista consideras, quia tibi Patri omnium incumbit cura eorum, præcipue, qui sunt destituti omni alio auxilio.

XXXIX. Contere brachium peccatoris, & maligni, quæretur peccatum illius, & non inuenietur.

Contere brachium, id est, potentiam, & robur peccatoris, & sic humiliatus resipiscet, nec amplius peccabit: ideo quæres postea peccatum eius, & non inuenies. nam, ut ait Isaias, sola vexatio dabit intellectum auditui. & Dauid, Imple facies eorum ignominia, & quærent nomen tuum.

I. Dominus regnabit in æternū, & in seculum seculi, peribitis gentes de terra illius.

Prædicat futurum, quod ut fieret, orauerat. Dominus, inquit, semper regnabit, inuitis inimicis eius, imò ipsi inimici peribunt, & exterminabuntur de terra illius, id est, de orbe terrarum vniuerso, quia Domini est terra & ple-

nitudo eius.

Desiderium pauperum exaudiuit Dominus, præparationem cordis eorum audiuit auris tua.

Quod futurum est, ponit tanquam præteritum propter certitudinem. nec dicit orationem, sed desiderium pauperum, ut ostendat celerem exauditionem, quasi dicat, Deus qui scrutatur corda, non expectabit orationem, sed ipsum desiderium, quod orationem præcedere solet, exaudiet. Idem verò est, desiderium, & præparatio cordis; desiderium enim est præparatio ad orandum.

Iudicare pupillo, & humili, ut non apponat ultra magnificare se homo super terram.

Exaudiuit Dominus desiderium pauperum, iudicare pupillo, & humili, id est, ad hoc exaudiuit, ut iudicet causam pupilli, & humilis contra ipsos eorum oppressores, ne deinceps homo audeat superbire, homo, inquam, qui est super terram, contra Deum, qui est in cælo. In Hebræo significantius dicitur, Ut nequaquam ultra superbiat homo de terra, id est, homo ex terra compositus; quasi dicat, ut non superbiat signum contra factorem suum. Hæc omnia quæ dicuntur in hoc Psalmo aduersus impium oppressorem pauperum, attribuuntur Antichristo à S. Hieronymo & Augustino; & sine dubio illi conueniunt per antonomasiam omnia quæ dicuntur in genere de impijs: sed si ad literam dicantur hæc de oppressoribus pauperum in genere, ut nos

existimamus, certè manifestè apparet, quàm ingens crimen sit, quod tot verbis, & tam significantibus à Spiritu sancto reprehenditur.

XLI.

XLII.

P S A L M V S X.

Titulus, & Argumentum
Psalmi.

In finem Psalmus David.



DE titulo dictum est in præcedentibus. Argumentum huius Psalmi est cohortatio ad confidentiam tempore calumniarum, aliarumque persecutionum. Loquitur David in persona cuiuslibet Iusti, præuidens quodammodo illud Apostoli, Omnes qui pie vivere volunt, persecutiones patientur. 2. Timot. 3.

Explicatio Psalmi 10.

I. **I**N Domino confido, quomodo dicitis animæ meæ, transmigra in montem, sicut passer?

Vox Iusti, qui pulsatur tentatione desperationis, ut vocationem suam deferat ob multitudinem calumniatorum. In Domino, inquit, confido, qui ubique est, & omnipotens est; quomodo dicitis animæ meæ, id est, cur mihi persuadere conamini. Iam enim supra diximus, phrasim esse Hebraicam, animæ meæ, pro mihi. Alloquitur autem vel Dæmones tentantes, vel ipsas internas suggestiones, hoc est, cogitationes à Diabolo immittas; Transmigra in montem sicut passer, id est, desere vocationem, & hominum consortium, & abi ad locum ubi nulla sint pericula, nullæ tentationes. Passeres enim, cum timent aucupes, volant ad cacumina montium, ad quæ aucupes ascendere non possunt. Tales montes respectu tentationum nulli sunt, nisi in imaginatione hominum, qui cum tentantur grauiter, imaginantur mutatione locorum posse molestiā illam declinari; & qui desperant, ipsam etiam violentam mortem eligunt,

ad quam fugiunt, tãquam ad montem. Iustus autem constans est, & locum suum non deserit, sciens ubique tentationes Diaboli, & ubique adiutoriū Dei esse. In Hebræo habetur, Transmigra in montem vestrum passer, sed vocem, chem, quæ significat vestrum, Septuaginta legerūt, cha, quod est, sicut; & hæc sine dubio est lectio verior & clarior. Nam etiam S. Hieronymus sic vertit. Itaque post tempora S. Hieronymi videtur hic locus corruptus in Hebræo, librariorum vitio.

Quoniam ecce peccatores intenderunt arcum, parauerunt sagittas suas in pharetra, ut sagittent in obscuro rectos corde. II.

Hæc est ratio, cur sit fugiendum ad montem, id est, deserendum vocationem præ nimio timore, quem tentatio suggerit; videlicet, quia mali homines assidue persequuntur Iustos. siue calumnijs, siue alia ratione. Comparat autem calumnias, siue alias persecutiones sagittis, quæ iaciuntur in obscuro; ut significet eas calumnias, vel persecutiones non solum grauiter ferire, sed etiam vix posse caueri. In Hebræo habetur, Parauerunt sagittas suas in neruo; & secundum hanc lectionem, idem est intenderunt arcum, & parauerunt sagittas in neruo. At Septuaginta verterunt, Parauerunt sagittas in pharetra, ut significarent, non solum peccatores intendisse arcum, ut semel iacerent sagittam, sed etiam implere pharetram sagittis, ut sæpius iaculari possent. Quamuis autem vox Hebræa Ieter, neruum, & chordam significet, & in dictionarijs non inueniatur locus, ubi ponatur pro pharetra: tamen auctoritas Septuaginta Interpretum satis est, ut credamus etiam pro pharetra accipi posse. Quod Latinus codex habet, in obscuro, & Hebræus in caligine, in Græco est, in obscura luna; sed in re nulla est discrepantia. Nam obscura Luna significat noctem carentē Lunæ splendore, siue sit nebulis tecta Luna,

הרכם
כציפור

יתר

Luna, siue sit cum Sole coniuncta, aut Soli vicina. Possent hi duo versiculi etiam hunc sensum habere, In Domino confido, quomodo dicitis animæ meæ, transmigra in montem sicut passer, quoniam ecce peccatores intenderunt arcum, parauerunt sagittas suas in pharetra, vt sagittent in obscuro rectos corde. Id est, non licet iam esse recto corde, quoniam vndique tenduntur insidiæ rectis corde, ideo vel oportet in montem inaccessum extra homines recedere, quod fieri non potest, vel cedendum est consuetudini, & deserenda via iustitiæ. Sed huic tentationi respondet iustus: In Domino confido, & ideo nec in montem inhabitalem abibo, nec deseram viam iustitiæ.

III. Quoniam quæ perfecisti, destruxerunt, iustus autem quid fecit?

Confirmat Propheta per apostrophè ad Deum, verum esse, quod peccatores iniuste persequuntur Iustos. Quasi dicat, verum est, quod audiui de impietate peccatorum. Nam peccatores destruxerunt ea quæ tu perfecisti, id est, leges tuas perfectissimas, necnon consilia, & ordinationes omnes tuas, quas posuisti in populo tuo, dum non solum non reddunt bona pro malis, vt tu iubes, sed reddunt mala pro bonis, sine vlla causa calumniando, & persequendo Iustos; Iustus enim quid fecit? hoc est, Iustus non dedit illis vllam occasionem, sed ipsi oderunt iustos gratis. Vox Hebræa, quam Septuaginta verterunt, perfecisti, valde obscura est. S. Hieronymus vertit, leges, alij fundaméta, alij retia. Mihi verisimile videtur Septuaginta Interpretes non legisse, vt nunc habemus in Hebræo, hasciator, quod habet formam nominis pluralis, sed legisse hasciattota, quod significat posuisti, à verbo sciatur, in coniugatione hiphil, sunt enim eadem omnino literæ, & solum additur punctum vnum sub vltima litera. Nam ferè id obseruamus in Psalmis, vt Septuaginta legerint paulo aliter, quàm legerint ij, qui puncta addiderunt.

Do-

Dominus in templo sancto suo, IV. Dominus in cælo sedes eius.

Incipit rationem reddere, cur in Domino confidere se dixerit, & non timeat insidias hominum iniquorum; quia videlicet, Dominus omnium in cælo se deat iudex, vnde omnia videat, & omnes subiectos habeat. Dominus, inquit, in templo sancto suo, subintellige, sedet. Vocat autem templum sanctum Dei, summum cælum, quod est templum non manufactum. Idem significat clarioribus verbis, cum ait, Dominus in cælo sedes eius, hoc est, Dominus in cælo sedem, siue thronum habet. Est autem phrasis Hebraica, Dominus in cælo sedes eius, pro, sedes Domini est in cælo, vel Dominus in cælo sedem habet.

Oculi eius in pauperem respiciunt, palpebræ eius interrogant filios hominum.

Ex trono illo altissimo, cui nihil abscondi potest, respicit Deus pauperes, proinde nihil mali accidere potest hominibus Deo non sciente, aut non permittente, quæ est maxima consolatio Iustorum. Quod sequitur declarat magis prouidentiam Dei. Non solum enim Deus videt homines, sed videndo discernit, ac dijudicat bonos, & malos, & omnia eorum opera. In Hebræo non habetur, in pauperem, sed simpliciter, oculi eius respiciunt, sed Septuaginta addiderunt, in pauperem, explicandi gratia. Præterea, pro interrogant, habetur in Hebræo, probant, sed eadem sententia est. Metaphoricè enim dicitur Deus interrogare, siue probare, id est, tentare, siue examinare quâdo perfectè discernit ac dijudicat, quod homines non possunt se penumero facere, nisi interrogando, & examinando. Illud, palpebræ eius interrogant, nihil significat aliud, nisi oculi eius perfectè discernunt: quoniam enim Psalmi Poeticè scripti sunt; ideo figuris multis scitent. Itaque palpebræ ponuntur pro oculis, & oculi pro mente, & interrogare, pro exactè cognoscere, ac si exactis

simè

השתות
השתות
שתות

IV.

simè prius interrogasset, & examinasset.

VI. Dominus interrogat Iustum, & impium, qui autem diligit iniquitatem, odit animam suam.

Non solum Deus exactè cognoscit Iustum, & impium, sed etiam pro meritis eos remunerat, vel punit. Et idè qui diligit iniquitatem, odit animam suam, idest, se ipsum; quoniam propter iniquitatem grauissimè punitur. Ex Hebræo potest etiam reddi, diligentem iniquitatem odit anima eius, idest, Deus odit eos, qui amant iniquitatem, & sic vertit Sanctus Hieronymus. Vterque sensus est verus, & vtrunque patitur verba Hebraica. Mirà sententia est, & elegantissima. Qui diligit iniquitatem, odit animam suam. nam qui diligit iniquitatem videtur diligere animam suam, idest se ipsum, quia, vt sibi ipse satisfaciatur, peccat: & tamen re vera odit animam suam, ac perdit. Hoc est, quod Dominus ait, qui amat animam suam perdet eam, idest, qui malè se amat, verè se odit.

VII. Pluet super peccatores laqueos; ignis, & sulphur, & spiritus procellarum pars calicis eorum.

Hæc est ratio, cur iniqui oderint animas suas, quia Dominus pluet, siue, vt in Hebræo expressius legitur, plueret faciet super peccatores laqueos, idest in hac vita immittet laqueos in maxima copia, quasi guttas pluuiæ in peccatores, idest finet eos quotidie inuolui plurius, & maioribus peccatis percutiendo eos cecitate, & tradendo eos in reprobum sensum, quæ est pœna horrenda, & grauissima; deinde in alia vita, Ignis, & sulphur, & spiritus procellarum, idest, venti fridissimi, & vehemētissimi in gehenna erunt pars calicis, idest, portio, & hæreditas ipsorum. Obseruandum est hoc loco, nomine calicis intelligi hæreditatem, vt etiam alibi sæpè in scriptura, vt eo loco, Dominus pars hæreditatis meæ, & calicis mei. vbi idem intelligitur dictum duobus vocabulis, & idè addit, Tu es qui

restitues hæreditatem meam mihi. dicitur autem hæreditas calix, quia sicut calix in mensa, saltè in cœna paschali diuidebatur inter conuiuas, vnde est illud Lucæ 22. Accipite, & diuidite inter vos: ita hæreditas diuiditur inter filios eiusdè patris. Eadem quoque hæreditas interdum vocatur pars, vel portio, vt pars mea Dominus; & alibi portio mea Dominus; interdum pars hæreditatis, vt loco citato, Dominus pars hæreditatis meæ: vbi non significatur, Dominum esse partem hæreditatis, ita vt aliundè sit querenda alia pars, sed significatur Dominum esse partem, quæ sibi contingit ex hæreditatis diuisione, ita vt idè sit hæreditas, & pars hæreditatis; sic etiam idè est calix, & pars calicis, idest, portio illa, quæ vni debetur ex diuisione calicis. Pulchrè autem filijs Diaboli, quibus Dominus ait, Vos ex patre Diabolo estis, tribuitur hæreditas quæ Diabolus possidet, idest, pœna horribilis significata per ignem, & sulphur, & spiritum procellarum.

Quoniam iustus Dominus, & VIII. iustitiam dilexit, & equitatem vidit vultus eius.

Hæc vero ratio est, cur Deus tam atrociter impios puniat, quia iustus est ipse in se: Deus enim lux est, & tenebræ in eo non sunt vllæ. 1. Ioan. 1. l. t. diligit iustitias, idest, opera iusta in omnibus alijs, quos ad suam imaginem creauit. Id ipsum reperit dicens, Aequitatem vidit vultus eius. nam per æquitatem hoc loco intelligitur rectitudo, vt sonant vocabula Hebraicum & Græcum, rectitudo autem est quasi declaratio iustitiæ. Non enim hic agitur de iustitia, quæ est vna ex quatuor virtutibus Cardinalibus, quæ est iustitia particularis ponens medium in commercijs hominum; sed de iustitia vniuersali, quæ complectitur omnes virtutes, & est quædam rectitudo totius hominis, cuius quasi compendium est charitas Dei, & proximis; nam finis præcepti charitas. 1. Tim. 1. Et qui diligit, legem impleuit. Rom. 13. Illud autem, vidit vultus eius nō significat simplicem visionem, sed

sed visionem approbationis, iuxta illud Psalmi primi, Nouit Dominus viâ iustorum. Idem igitur est iustitiam dilexit, & æquitatem vidit, idest, rectitudinem approbavit vultus eius, idest, oculus eius.

P S A L M V S X I.

Titulus, & Argumentum.
Psalmi.

*In finem pro octaua Psalmus
David.*

DE hoc titulo dictum est in Psalmo Sexto. Argumentum huius Psalmi est, fidendum in Deo, & non in hominibus, quod verba hominum plerumq. sint fallacia, Dei autem semper verissima, & fidelissima.

Explicatio Psalmi I I.

I. **S** Aluum me fac Domine, quoniam defecit sanctus, quoniam diminutæ sunt veritates à filiis hominum.

Tu Domine à periculis omnibus salua me, quoniam non est alius in quo fidere possim: nam defecit sanctus; idest, vix inuenitur in mundo aliquis verè pius, & misericors (id enim propriè sonat vox Hebraica) nec solum defecit misericors, sed etiam verax. diminutæ sunt enim veritates à filiis hominum, id est, vix inuenitur, qui verum simpliciter dicat. Itaque perijt ferè de terra misericordia, & veritas. In Hebræo habetur, emunim, quod Sanctus Hieronymus, vertit fideles, ut hæc sit sententia, imminuti sunt fideles à filiis hominum. sed eadem vox significat etiam veritatem, seu veritates, & sensus est idem.

II. Vana loquuti sunt vnusquisq. ad proximum suum, labia dolosa in corde, & corde loquuti sunt.

Probat defecisse sanctum, idest, misericordem, quoniam homines, ut plurimum, nō loquuntur proximis vtilia, & bona; sed vana, quæ à periculis erueri non possunt, vnde etiam frustra loquuntur, quomodo vertit Sanctus Hieronymus: probat quoque defecisse veritatem, quoniam labia dolosa, idest, homines, qui labia dolosa dici possunt, in corde, & corde, idest, duplici corde loquuti sunt, vnum volentes loqui, & aliud volentes facere, & sic decipere. In Hebræo ad verbum est, labium diuisionum, idest, labium diuisum, vnum sonans, aliud significans. labium autem diuisum, seu duplex eo corde diuiso, seu duplici oritur. Quia vero quæ leniuntur, diuiduntur; ideo eadem vox significat in Scripturis labium blanditiarum, & adulationū, & quia omnis adulatio decipit, ideo rectè verterunt tam Septuaginta quam S. Hieronymus labia dolosa, siue subdola. In Græco additur, mala, in corde, & corde loquuti sūt mala, sed ea vox neq. in Hebræo, neque in Latinis emendationibus habetur.

Disperdat Dominus vniuersa labia dolosa, & linguam magni loquam. **III.**

Imprecatio prophetica est, per modum enim imprecationis prædicit, fore, ut omnes, qui decipiūt, decipiantur; & dum putant se multum lucrari suis fraudibus, perdant omnia, & ipsi etiam pereant in æternum. Illud, & linguam magni loquam, significat linguam se iactantem ob suos dolos & fraudes, ut patet ex versiculo sequenti. In Hebræo, & Græco non habetur coniunctio, & ex quo intelligimus, hic non reprehendi duo genera hominum, dolosos, & superbos, sed dolosos tantum, qui tamen confidunt in suis dolis, & ideo magnificiunt sua labia dolosa, & de illis magnificè loquuntur. Proinde editio Latina, quæ habet coniunctionem, ad eundem sensum reducenda est, & commodè reducitur, ut nos explicuimus.

Qui

IIII. Qui dixerunt, linguam nostrā magnificabimus, labia nostra à nobis sunt, quis noster Dñs est?

Explicat cur coniunxerit linguam magniloquam cum labijs dolosis. quia videlicet dolosi confidunt maxime in sua lingua; ita ut nulla re alia indigere se credant, nec ulli Domino subiecti esse debeant. Qui dixerunt, inquit, videlicet apud se in animo suo, linguam nostrā magnificabimus, idest, linguam nostram magnificemus, illi tribuentes omnia nostra bona; quæ per illam lucratur. ex Hebræo aliqui vertunt, linguam nostram roborabimus. **verbum enim Gabar, significat grauem, & robustum esse. sed accipitur etiam pro** **נביר** **quacūq; magnitudine, & ideo, nagbir,** **נביר** **quod habetur hoc loco, rectè vertitur magnificabimus. nam etiam apud Latinos vir grauis non solum refertur ad pondus molis, sed etiam ad magnitudinem virtutis. Labia nostra à nobis sūt. ambigū est in Latino, sed ex Hebræo & Græco constat, sensum esse, labia nostra nobiscum sunt, pro nobis faciunt, à parte nostra pugnant. Itaque pergit Propheta explicare cōfidentiam, quam habent dolosi in suis labijs, tanquam in instrumento optimo ad prævalendum alijs hominibus. Ideo subiungit, eos dicere, quis noster Dominus est? quasi dicat, non agnoscimus vllum superiorem cum per instrumentum, linguæ omnes alios subiiciamus.**

V. Propter miseriam inopum, & gemitum pauperum nunc exurgam, dicit Dominus.

Docuit Propheta non esse confidendum in hominibus: nunc docet esse confidendum in Deo, cuius promissa fidelissima sunt. docet autem hoc poeticè introducendo ipsum Deum loquentem, & promittentem auxilium suum humilibus, & afflictis. Propter miseriam, inquit, inopum, qui à dolosis decipiuntur, & affliguntur, vnde, & gemere necesse habent; non differam auxilium, sed nunc exurgam, quasi à somno, eisq. adero.

Belarm. in Psal.

Ponam in salutari, fiducialiter VI. agam in eo.

Explicat quid sit facturus cum surrexerit. Ponā, inquit, in salutari, idest, collocabo eos in salute, stabiliam illos in salute, ut semper salui consistent. Fiducialiter agam in eo, idest, nemo me impediet; audacter, & liberè agam in hac re. Exprimit vox Græca **παρρησια** hoc loco confidentiam, & libertatem atque audaciam. Ex Hebræo sanctus Hieronymus vertit, Ponam in salutari auxilium eorum. Sed nescio quid in hac re sequutus sit; nam vox Hebræa, Iaphiach lo, significare potest, sufflabit in eum, vel illaqueabit eum, vel aspirabit ei. Ceterum Septuaginta Interpretes, videntur legisse in prima persona, Aphiach lo, afflabo in eo siue aspirabo ei, idest, vnicuiq; pauperum aspirabo, & fauebo. & quia spiritus ubi vult spirat, & ubi spiritus Domini, ibi libertas, ideò fortasse verterunt fiducialiter agam, idest, liberè aspirabo, & fauebo.

**יִפְיַח לוֹ
אֶפְיַח לוֹ**

Eloquia Domini, eloquia casta, VII. argenti igne examinatum, probatū terræ, purgatum septuplum.

Docet iam Propheta promissionem Domini explicatam versibus duobus superioribus, nō esse similem promissionibus hominum doloſorum, sed esse verissimā, & fidelissimā. Eloquia Domini, inquit, casta, idest munda, & pura, ut sonat vox Hebraica, non fucata, non simulata, sincera, fidelia. Argentū igne examinatum, idest, sunt eloquia, siue promissa Dei veluti Argentum verissimum in sono, pondere, & candore, quale est argentum in igne probatum, nec solum probatum in igne, sed etiam probatū terræ, idest populis terræ, approbatum, videlicet ab hominibus peritis metallorum. denique purgatum septuplum, idest, non semel sed sæpius per fusionem (ut exprimit vox Hebræa) purgatum à scoria. In Hebræo illud, purgatum terræ, est valde obscuro.

D

obscuro

בְּעֵלִיל

obscurum; Sanctus Hieronymus vertit, separatum à terra; alij à Domino terræ, nimirum purgatum septuplum; alij in vase siue in camino. sed cū vox baalil, non habeatur nisi hoc loco, nulla est ratio cur non debeamus acquiescere interpretationi Septuaginta Interpretum, quibus lingua Hebraica notissima erat. Quicquid enim alij dicant, diuinitas potius erit quàm interpretatio.

VIII. Tu Domine seruabis nos, & custodies nos à generatione hac in æternum.

תִּשְׁמְרֵם

תִּשְׁמְרֵנוּ

Colligit ex dictis, Deum facturum quod promisit. Tu, inquit, iuxta promissa tua seruabis nos, idest, custodies nos. non enim hic est verbum saluandi, vel salutis neque in Græco, neque in Hebræo; sed simpliciter conseruandi, & custodiendi. In Hebræo habetur seruabis ea, nimirum eloquia tua, & custodies nos. sed Septuaginta legerunt, tismereanu; seruabis nos, & facillima fuit mutatio, quia maxima est similitudo inter, ε, quod significat ea, &, ν, quod significat nos, sed vterque sensus est optimus.

IX. In circuitu impij ambulant: secundum altitudinem tuam multiplicasti filios hominum.

Quasi quæreret aliquis, Quid de impijs fiet, dum tu seruabis nos? Responderet, impij interea, dum nos quieti sumus sub alis tuis, in circuitu ambulant, semper ambientes bona huius mundi, & nunquam ad finem desideriorum suorum peruenientes. semper autem erunt impij ambientes, dum hic mundus durat; quia secundum altitudinem tuam multiplicasti filios hominum, & stultorum infinitus est numerus. Videntur in fine huius Psalmi omnes editiones inter se diffidere. Hebræa ad verbum habet, In circuitu impij ambulabunt, dum exaltantur vilicates filiorum hominum, idest, dum exaltantur, & regnant homines vilissimi, tunc impij vbique discurrunt. Græca vero sic habet, In circuitu impij ambulant secundum

altitudinem tuam sollicitudinem gessisti de filiis hominum. sed Græca, & Latina facile cōcordantur. nam Deus secundum altitudinem suam maximam sollicitudinem gessit de specie humana, & ideo ne ea periret, præ omnibus alijs speciebus eā multiplicauit. proinde Latinus Interpretes reddidit sensum, cū ait multiplicasti. Et quia in magna multitudine, paucorum est perfectio, ideo stultorum, vt citauimus ex Salomone infinitus est numerus, & ideo impij semper, & vbique inueniuntur in circuitu ambulantes. Hebraica, & Græca non videntur posse concordari, nisi Septuaginta aliter legerint; & fortasse non est improbabile eos legisse, Dallota, vel Dillita, non zullor, vt nūc habemus: vnica enim litera mutata fit aliud verbum, quod exaltare significat, vel suscipere, vt Septuaginta verterunt in primo versiculo Psalmi vicesiminoni, Exaltabo te Domine, quoniam suscepisti me. Sensus tamen sēper est verus, & non contradicit vna lectio alteri, quamuis diuersa dicant.

דְּלוֹת
דְּלוֹת
זָלוֹת

PSALMVS XII.

Titulus, & Argumentum.

In finem Psalmus David.

DE hoc titulo nihil occurrit dicendum. Argumentum Psalmi est oratio ad Deum tempore tentationis.

Explicatio Psalmi 12.

Vsquequo Domine obliuisceris me in finem? vsquequo auertis faciem tuam à me?

Qui tentatur duo mala pati solet, praua desideria in voluntate, & tenebras in intellectu. Quando praua desideria valdè vrgent, tunc videtur Deus obliuisci, & deserere animam: quando tenebræ obscurant intellectum, videtur Deus auertere faciem suam ab anima. Ipse enim lux est, & ideo illuminat,

minat, cum conuertit faciem; in tenebris relinquit, cum auertit. Propter primum dicit homo in tentatione positus, Vsq̃uequo Domine obliuisceris me in finem? propter secundum dicit, Vsq̃uequo auertis faciem tuam à me?

II. Quamdiu ponam consilia in anima mea? dolorem in corde meo per diem?

Inuerso iam ordine queritur primo de tenebris quas patitur; secundo de prauis desiderijs, quæ inuitus tolerat. Quamdiu, inquit, propter obscuratiōnem intellectus ponam consilia in anima mea? idest, varia consilia excogitabo, vt à malo præsenti liberari possim? quamdiu rursus propter desideria instantia cor meum, ponam dolorem in corde meo? idest, assumam dolorem, ac tristis ero, ne fortè Deum meum offendam; atque id faciam per diem, idest, tota die sine intermissione vlla. In Græco additur, & per noctem. Sed hoc non habetur in Hebræo, neque legitur à S. Augustino, proinde rectè omissum est in editione Latina.

III. Vsq̃uequo exaltabitur inimicus meus super me? respice & exaudi me Domine Deus meus.

Prima pars huius versiculi completur vtrumque malum. tunc enim exaltatur inimicus super hominem, quando opprimit eum, tum ingerendo praua desideria, quæ homo non potest excutere, tum tenebras offundendo, quas non potest dissipare. Ideò quasi vim patiens clamat ad Deum, Vsq̃uequo exaltabitur inimicus meus super me? Deinde inuocat auxilium contra vtrumque malum, Respice, inquit, idest, conuerte faciem tuam; & exaudi me; idest, ne obliuiscaris, ne deseras, adiuua exoratus.

IIII. Illumina oculos meos ne vnquam obdormiam in morte, nequando dicat inimicus meus, præualui aduersus eum.

Iterum clarius eandem orationem repetit. Illumina, pelle tenebras alien-

tis conuertendo ad me faciem, meque respiciendo; nequando obdormiam in morte, idest, ne consentiens desiderijs, in mortem animæ incidam. Vocat scriptura passim somnum ipsam mortem, siue corporalem, siue spirituales: quia Deo tam facile est mortuum ad vitam reuocare, quàm nobis facile est dormientem à somno excitare. Præterea illud, ne vnquam obdormiam, significat, hominē cedendo tentationi quasi obdormiscere, nec amplius sentire cruciatū ex tentatione; sed quia ista quies non est salutifera, sed mortifera; ideò additur, in mortem. Itaque cum duobus modis homo liberetur à molestia tentationis, vel per gratiam Dei fugato tentatore, vel per consensum in peccatum satiata libidine: petit liberari primo modo, ne forte cum suo maximo detrimento liberetur secundo modo, videlicet, obdormiendo per consensum in peccatum. Addit deinde rationem, quare cupiat liberari à tentatione dicens, Nequando dicat inimicus meus præualui aduersus eum: idest, ne gloriatur Diabolus à se victum seruum Dei. quod etiam in iniuriam Dei cederet.

Qui tribulant me exultabunt V. si motus fuero, ego autem in misericordia tua speraui.

Explicat rationem superiorem, quasi dicat, non sine causa dixi nequando dicat inimicus, &c. nā exultabunt qui tribulant me si motus fuero, idest, non solum si planè cessero tãquam victus, sed etiam, si paulisper nutare cæpero. sicut enim gaudium est in cælo super vno peccatore pœnitentiam agente, quàm super nonaginta nouem iustis, qui non indigent pœnitentia: sic etiam magis Dæmones exultant, si virum aliquem perfectum ad inchoandum peccatum induxerint, quàm si multos peccatores in peccatis maximi volutari fecerint. exemplum est apud Sanctam Gregorium lib. 3. Dialog. cap. 7. Atque hinc apparet, Psalmum hunc scriptum esse pro liberatione Iusti à tentatione Diabolica, non, vt aliqui volunt, pro

liberatione Dauidis à persecutione Saulis. Dauid enim in illa persecutione quotidie loca mutabat. Itaque non dixisset si motus fuero, exultabunt inimici mei, quasi pro magno haberet, non moueri. Quod sequitur, Ego autem in misericordia tua speravi est altera ratio, cur deceat eum mutari à Deo, quia nimirum fretus misericordia Dei, & non viribus proprijs tentatori resistat.

VI. Exultabit cor meum in salutari tuo, cantabo Domino, qui bona tribuit mihi, & psallam nomini Domini altissimi.


Hac est vltima ratio qua Deum ad subueniendum flectere conatur, quia videlicet liberatus à tentatione non erit ingratus liberatori, sed corde, ore, & opere beneficium celebrabit. Ad cor pertinent prima illa verba, Exultabit cor meum in salutari tuo, idest, præ lætitia gestiet cor meum cum salutem obtinuerit, eam à te recognoscendo, teque ob eam laudando. Ad os pertinent sequentia, Cantabo Domino qui bona tribuit mihi. In Hebræo non habetur bona, sed solum verbum, tribuit, vel potius, retribuit. Sed Septuaginta declarauerunt illud retribuit, vertendo, benefecit mihi, & Latinus interpres adhuc clarius, qui bona tribuit mihi. sed sensus est idem. nam Deus, fiduciam retribuere solet protectionem; ideo Dauid Hebraica voce dixit, retribuit mihi, protectionem scilicet in se confidenti. & quia liberatio à tentatione, est liberatio à verissimi, & maximi mali periculo; ideo rectè Græcus, & Latinus addiderunt vocabulum, bona, nimirum veri, & maximi boni. Denique ad opera pertinent vltima verba: & psallam nomini Domini altissimi. nam psallere propriè est manu citharam pulsare. Dauid, inquit Scriptura, psallebat manu sua: & alibi, In psalterio decachordo, psallam tibi. Itaque promittit, se corde exultaturum, ore cantaturum, manu instrumentum musicum pulsaturum,

vt totus homo seruiat Dei laudibus. psallere autè nomini Domini, est psallere in gloriam Domini, idest, ad celebrandas eius laudes. In Hebræo non habentur hæc vltima verba, & psallam nomini Domini altissimi. sed fortasse diuturnitate tēporis exciderunt. Certè cum superioribus optimè cohererent, & sunt in Græcis codicibus, & citantur, atque explicantur à patribus Hieronymo, & Augustino, Theodoro, & Euthymio. Mysticè, psallere nomini Domini est opera consona cordi, & verbis efficere, vt videntes homines opera nostra bona glorificent Patrem nostrum, qui in cælis est.

P S A L M V S XIII.

Titulus, & Argumentum.

In finem Psalmus Dauid.



Titulus nihil habet noui: Argumentum verò est deploratio naturæ humanæ corruptæ, qualis præcipuè cernitur in infidelibus, in quibus nōdum cœpit sanari per gratiam,

Explicatio Psalmi 13.

Dixit insipiens in corde suo, 1.
non est Deus.

Ad tantam insipientiam deuenit humana natura in primo homine corrupta; vt inuentus sit aliquis, qui tametsi voce non sit ausus negare Deum esse; tamen in corde suo dixerit, non est Deus. Non significat Dauid, vnum certum hominem insipientem hoc dixisse, sed vult dicere, homines mente corruptos ad tantam cæcitatem peruenire, vt fiant insipientes etiam circa vltimum finem, & cogitent nullum esse Deum, qui res humanas curret, & cui rationem reddere teneantur. Dixit, inquit, insipiens, idest, homo ad summam insipientiam reductus,
dixit

dixit in corde suo non est Deus, idest, cogitare cœpit, nullum esse Deum.

II. Corrupti sunt, & abominabiles facti sunt in studijs suis: non est, qui faciat bonum non est vsque ad vnum.

Illud vsque ad vnum, non habetur in editione Hebræa, & Græca. In Latino habetur, & citatur, & exponitur à sanctis Hieronymo, & Augustino. Dixit Propheta, corruptam fuisse mentem, & insipientem factam: nunc addit, corruptam quoque fuisse voluntatem, ita ut plerunque homines peccent, bene autem nūquam faciant. aliud enim est non peccare, aliud benefacere, si loquamur de opere absolute, & perfecte bono. Homines enim fide, & gratia destituti, solis viribus corruptæ naturæ utentes, plerunque peccant; sed aliquando etiam faciunt opera quædam bona moralia, quæ peccata dici nō possunt: sed non sunt perfecte, & absolute bona, ut S. Augustinus disputat lib. 4. in Iulianum, cum ad summum bonum nō perducant. Ait igitur David, Corrupti sunt, & abominabiles facti sunt in studijs, idest, in desiderijs, siue affectibus suis: corrupta, & abominabilia desideria habent, unde ipsi quoque corrupti, & abominabiles sunt. Non est qui faciat bonum, non est vsque ad vnum. corrupti quidem sunt homines in desiderijs & iniquitate; sed non ita generatim, ut omnia desideria, & omnia opera sint corrupta, & iniqua. Certè enim cum infidelis ex humana inclinatione miseretur pauperis, vel curam gerit filiorum, nihil mali facit. At bonum perfecte, & absolute nullus omnino ex solis corruptæ naturæ viribus facit. Hinc habes veram huius loci intelligentiam nihil omnino facere pro hæreticis huius temporis, qui testimonio Psalmi huius abutuntur ad probandum, omnia opera hominis peccatoris siue non renati esse peccata.

III. Dominus de cælo prospexit super filios hominū, ut videat, si est intelligens, aut requirens Deum.

Belarm. in P sal.

Omnes declinauerunt, simul inutiles facti sunt, non est, qui faciat bonum, non est vsque ad vnum. **IIII.**

Dixerat, naturam humanam esse corruptam tum quo ad mentem, tum quo ad voluntatem: ostendit nunc, unde id cognouerit, nimirum ex reuelatione Dei. Deus enim qui omnia nouit, videt hoc ita esse, & Prophetis suis reuelauit. Describit more humano Deū quasi respexisse de cælo, idest, de sublimi specula sua, ut videret, an esset aliquis intelligens, idest, non corruptus, quo ad mentem; aut requirens Deum, idest, non corruptus quo ad voluntatem, qui proinde intelligeret, & amaret, atque adeo quæreret Deum, qui est summum bonum. Quid autem Deus cognouerit, idest, nos cognoscere fecerit, explicat illis verbis, Omnes declinauerunt, siue auersi sunt, idest, vidit omnes omnino declinasse à lumine sapientiæ, & à semitis iustitiæ, imò auersos esse, ac terga vertisse sapientiæ, & iustitiæ. Simul inutiles facti sunt, idest, vidit, omnes pariter inutiles Deo esse factos, quippe qui eum non colunt, neque ei seruiunt, neque tributum gratiarū actionis rependunt. Denique vidit, nullum esse, qui faciat opus perfecte, atque absolute bonum. Sanctus Hieronymus ex Hebræo pro illis verbis, Simul inutiles facti sunt, vertit, Pariter adhaeserunt, siue agglutinati sunt. Sed nescio quid sequutus sit. Nam vox Hebraica, ne alachu, significat, putrescere, & fætere: & verti potuisset, putrefacti sunt, ac proinde inutiles facti sūt. Res enim putrefactæ nulli vsui sunt.

Sepulchrum patens est guttur v. eorum, linguis suis dolose agebant: venenum aspidum sub labijs eorum.

Quorum os maledictione, & amaritudine plenum est, veloces pedes eorum ad effundendum sanguinem. **VI.**

D 3 Con-

VII. Contritio & infelicitas in vijs eorum, & viam pacis non cognouerunt, non est timor Dei ante oculos eorum.

Hi tres versiculi non sunt in Hebræo, neque in translatione Septuaginta Interpretum, vt sanctus Hieronymus testatur tum in Præfatione lib. 16. in Isaiam, tum in Commentario huius loci. Imò nec habentur in editione Latina Psalmi 52. qui est omnino idem cum hoc 13. Sed quia beatus Paulus ad Romanos 3. ex diuersis locis Scripturæ, videlicet Psalmo 5. Psalmo 139. Psalmo 9. Isaiæ 19. & Psalmo 35. hos omnes versiculos simul citauit, posteaquā allegauerat duos versiculos proximè explicatos, arbitrati sunt aliqui veteri, hos omnes versiculos ad hunc Psalmum pertinere, & casu aliquo excidisse; ideo eos ex Apostolo huc transtulerunt. Significatur autem his versiculis malitia hominum impiorum, qui verbo & opere nocent proximis suis. Sepulchrum patens est guttur eorum, idest, sicut ex aperto sepulchro exhalat fœtor corporum mortuorum, ita ex ore istorum prodeunt verba turpia testantia corruptionem cordis. Linguis dolosè agebant; idest, non solum verba turpia, sed etiam dolosa loquuntur. Venenum aspidum sub labijs eorum; idest, non solum turpia, & dolosa, sed etiam venenata, & inficientia, atque ad malum prouocantia verba effundunt. Quorum os maledictione, & amaritudine plenum est, veloces pedes eorum ad effundendum sanguinè; idest, homines isti perditissimi non solum maledicunt, & amaris contentionibus iurgantur, sed etiam malefaciunt, & re ipsa nocent. Nam quorum os plenum est maledictione, & amaris conminationibus, eorum pedes velocissimè currunt ad lædendum, & occidendum. Contritio, & infelicitas in vijs eorum, & viam pacis non cognouerunt, idest, omnia eorum studia ad cõterendum, vastandum, calamitate afficiendum spectant. Siquidem pacis viâ, idest, studia pacifica omnino igno-

rant. Non est timor Dei ante oculos eorum. Hic est fons omnium supradictorum malorum, quia timorem Dei planè abiecerunt, dicentes in corde suo, Non est Deus. Redeamus nunc ad versiculos huius Psalmi proprios.

Nonne cognoscent omnes, qui operantur iniquitatem, qui deuorât plebem meam, sicut escam panis? VIII.

Ex hoc versiculo manifestè colligitur, quæ supra dicta sunt de vniuersali corruptione generis humani, esse intelligenda de genere humano, quale est ex se, idest, secundum vires solius naturæ corruptæ. Nam per gratiam Dei homines vestigijs, & pij efficiuntur: & hos vocat hoc loco plebem suâ, quam impij illi persequuntur, & pro nihilo habent. Nonne cognoscunt, &c. vox est increpantis, quasi dicat; Nunquid semper erunt insipientes? nunquid non aperient aliquando oculos? nunquid tandem non incipient cognoscere? Qui deuorant plebem meam, sicut escam panis, significat impios, ex hoc tanto malo potuisse admoneri suæ iniquitatis. Sicut enim panis quotidie comeditur, & semper sapit: ita impij semper, & cum delectatione vexant pios, & nunquam satiantur.

Dominum non inuocauerunt, illic trepidauerunt timore, vbi non erat timor. IX.

Reddit Dauid rationem, cur impij tanta mala faciant, quia videlicet Deum non inuocauerunt, idest, spem suam in Deo vero non posuerunt, sed in rebus creatis, & ideo illic trepidauerunt, vbi non erat timor; idest, non cognoscentes in quo sit sperandum, & à quo sit timendum, trepidauerunt, ne incurrerent mala temporalia, vel ne amitterent bona temporalia, quæ non sunt materia iusti timoris, cum parua, & caduca sint; & etiam quia si sperarent in Domino, & quærerent regnum Dei, & iustitiam eius, hæc omnia adiicerentur eis.

Quo-

X. . Quoniam Dominus in generatione iusta est: consilium inopis confudistis, quoniam Dominus spes eius est.

Hic versiculus reddit rationem, cur impij amatores huius seculi timeant, vbi non est timor. Impij timuerunt vbi non erat timor, quoniam Dominus in generatione iusta est, siue iustorum (vt habet textus Græcus) idest, sicut impij Deum non inuocauerunt, nec in illo sperauerunt, ita Deus eos deseruit, & in generatione iustorum manet: deserti autem à Deo, à luce vera, ab ipsa veritate in tenebris ambulant; & ided timent etiam vbi non est causa timendi. Deinde facit apostrophem ad ipsos impios, dicens, Consilium inopis confudistis, quoniam Dominus spes eius est, quasi dicat, adeo vos excecatis estis, vt non solum non inuocetis Deum, sed irrideatis eos, qui id faciunt. Nam consilium inopis, qui totus à Deo pendet, vos confudistis, idest, irrisistis, vt inopem erubescere faceretis, quasi stultum sit in Deo spem ponere. Irrisistis autem inopis consilium, quasi stultum, quoniam Dominus spes eius est, idest, quia ille pauper in Domino spem posuit. Videtur enim stultum consilium hominibus huius mundi, sperare in Deo, qui non videtur, & non sperare in diuitijs, & alijs rebus, quæ videntur.

XI. Quis dabit ex Sion salutare Israel? cum auerterit Dominus captiuitatem plebis suæ, exultabit Iacob, & lætabitur Israel.

Hic versiculus postremus orat Deum pro celeri aduentu Saluatoris, qui liberet genus humanum à captiuitate diabolica, in qua erant omnes illi excecatis, & peruersi, quorum tenebras, & malitiam toto Psalmo descripserat. Quis dabit ex Sion salutare Israel? idest, vtinam cito veniat salus ex Sion ipsi Israeli. Salus enim ex Iudæis est, vt ait Dominus Samaritanæ; nec solum ex Iudæis, idest, ex tribu Iuda, sed ex familia Dauid, cuius ciuitas dice-

batur Sion. Itaque expectabatur, & desiderabatur salus, siue Saluator promissus ex Sion ciuitate Dauid, idest, ex stirpe Dauid, qui saluaret Israelem, idest, populum suum. Dicitur autem Christus Saluator Israelis populi sui, quia tametsi pro toto mundo venerit, tamen re ipsa non saluauit, nisi certos quosdam, qui dicuntur populus Dei, & spiritualis Israel. Cum auerterit, siue conuerterit captiuitatem populi sui, exultabit Iacob, & lætabitur Israel; idest, oro, ac peto salutem ex Sion, ac proinde Saluatorem, qui liberet à captiuitate, quia cum id factum fuerit, tunc verè & perfectè exultabit, & lætabitur populus Dei, qui dicitur spiritualiter Iacob, & Israel. vtrumque enim est nomē eiusdem hominis. Promissiones autem istas, & alias similes non pertinere ad solos carnales Israelitas, sed ad populum Dei partim ex Iudæis, partim ex Gentibus congregatum, docet Apostolus in epist. ad Romanos, & copiosius Augustinus in epistola 200. ad Afellicum.

PSALMVS XIII.

Titulus, & Argumentum
Psalmi.

In finem Psalmus Dauid.



Titulus nihil habet noui. Argumentum verò est scientia salutis: nam in hoc Psalmo describitur via ad vitam æternam.

Explicatio Psalmi 14.

Domine quis habitabit in tabernaculo tuo? aut quis requiescet in monte sancto tuo?

Ex Hebræo vertunt aliqui, Quis peregrinabitur in tabernaculo tuo, aut quis habitabit in monte sancto tuo. Sed vox Hebraica, gur, significat vtrū-

D 4 que,

127. que, peregrinari, & habitare; sicut etiam Sciacan, significat habitare, & quiescere. Itaque non potest reprehendi versio Græca, neque Latina. Alludit Propheta ad montem Sion, & ad tabernaculum Dei, quod in eo monte erat; sed re vera per hæc nomina significat cælestem Hierusalem, ubi est tabernaculum Dei non manufactum. Propheta enim prædicabant Regnum cælorum per huiusmodi figuras. Vnde beatus Paulus ad Hebræos 8. & 9. sæpius meminit tabernaculi cælestis, & cap. 12. vocat montem Sion, ipsum cælorum habitaculum, & beatus Ioannes in Apocalypsi c. 14. meminit montis Sion cælestis, & cap. 21. ait, Ecce tabernaculum Dei cum hominibus, & habitabit cum eis, &c. Quærit igitur Propheta, quis sit habitaturus, idest, stabili mansione potiturus in tabernaculo cælesti: aut requieturus in vertice montis altissimi, in quo finitur omnis labor ascensionis, cum supra illum nihil sit. Hic enim in terris, neque stabilis mansio, neque vera quies esse potest.

II. Qui ingreditur sine macula, & operatur iustitiam.

Hæc est compendiosa, & summaria responsio. quasi dicat, Qui declinat à malo, & facit bonum, siue, qui neque commissione culpæ, neque omissione iustitiæ Deum offendit. Dicitur ingredi sine macula, qui ambulat in via huius vitæ, idest, qui viuit sine culpa lethali. Veniale enim peccatum non propriè relinquit maculam. Dicitur operari iustitiam, qui facit omnia ad quæ tenetur non timore pænæ, sed amore iustitiæ.

III. Qui loquitur veritatem in corde suo; qui non egit dolum in lingua sua.

Explicat magis in particulari quīs habitaturus sit in tabernaculo Domini, ac dicit illum esse, qui neque corde, neque ore, neque opere malum operatur. De corde, dicit, qui loquitur veritatem in corde suo. Nam omnis, qui

res temporales pluris æstimat, quàm valeant, non loquitur veritatem in corde suo; & quicumque in peccatum aliquod consentit, loquitur falsum in corde suo, quia iudicat expedire sibi id quod re vera sibi non expedit. Ita omnia peccata cordis reduci possunt tanquam ad radicem ad falsum iudicium. De ore, dicit, qui non egit dolum in lingua sua; nam tam detractiones, quàm adulationes, & alia id genus peccata linguæ, ad dolum reuocari possunt. De opere, dicit in sequenti versiculo.

Nec fecit proximo suo malum, IIII. & opprobrium non accepit aduersus proximos suos.

Ad nihilū deductus est in conspectu eius malignus: timentes autem Dominum glorificat. V.

Non solum non fecit ipse malum, qui habitaturus est in tabernaculo Domini; sed nec permittit, quantum in se fuit, ut alij malum facerent. Ideò non accepit opprobrium aduersus proximos suos, idest, non admisit ad aures suas vituperationes, detractiones, sussurationes, calumnias contra proximos, & non fauit vnquam malignis; sed eos contempsit, & pro nihilo duxit: contra autem glorificauit, honorauit, iuuit viros bonos, qui Deum timeant. Magna est hæc laus, non solum in se odisse malum, sed etiam in alijs.

Qui iurat proximo suo, & non decipit, qui pecuniam suam non dedit ad usuram, & munera super innocentem non accepit. VI.

Exposuit in genere virtutes viri probi, nunc in particulari attingit vitium vnum, videlicet avaritiam, quo præcipuè carere debet, qui cupit hæres fieri Regni cælestis. Cur autem hoc particulare vitium attingat, causa est, vel quia radix omnium malorum est cupiditas, ut ait Apostolus ad Timotheum, & per cupiditatē intelligit avaritiam, quam vocat phylargiriam, idest, amorem pecu-

pecuniæ: vel quia hoc vitium semper fuit, & est familiare Iudæis. Porro auaritia locum habet vel in fraudibus, quæ committuntur in contractibus alioqui licitis; vel in contractibus genere suo illicitis, vel in muneribus. De primo genere dicit, Qui iurat proximo suo, & non decipit. De secundo dicit, Qui pecuniam suam non dedit ad vsuram. De tertio dicit, Et munera super innocentem, idest, ad opprimendum innocentem, non accepit. Ex Hebræo sanctus Hieronymus vertit, qui iurat, vt se affligat, pro eo quod nos habemus, qui iurat proximo suo; sed vox Hebræa potest legi, leharah, & significat ad faciendum malum, nimirum sibi, hoc est ad se affligendum, & sic legit Sanctus Hieronymus: potest etiam legi, lehareah, & significat, proximo, & sic legerunt Septuaginta, à quorum versione Latina editio vulgata profecta est, & certè magis cohæret cum superioribus verbis nostra lectio, quàm Sancti Hieronymi. Ex hoc versiculo apertè colligitur errare Iudæos, qui vsuram licitam esse existimant.

Qui facit hæc non mouebitur æternum.

Respondet quæstioni in primo versiculo propositæ; ac dicit, eos, qui ita viuunt, vt supra expositum est, habituros firmissimam in cœlesti tabernaculo mansionem. Itaque ait, Qui

facit hæc, quæ supra dicta sunt, non mouebitur in æternum, idest, habitabit securus in tabernaculo Dei, ac requiescet in

monte sancto eius sine ullo timore cadendi à tam felici loco.

P S A L M V S X V.

Titulus, & Argumentum
Psalmi.

Tituli inscriptio ipsi Dauidi.



IC Psalmus obscurissimus est, atque ab ipso titulo incipit eius obscuritas. Vox Hebræa, Miçtam, ignota est. S. Hieronymus vertit, humilis, & simplicis Dauid; fortè quia, mac, significat pauperem, ac per hoc humilem; & tam, significat simplicem, & perfectum. Alij volunt, miçtam, esse preciosum aliquid, quia, cherem, significat aurum. Mihi probabile est Septuaginta Interpretes nō legisse, miçtam, sed, miçtab, vltima litera paululum inmutata: nam à verbo, catab, scribere, fit nomen, miçtab, scriptura, siue inscriptio. Sed quia vox Græca *ὑπογραφία*, non significat simplicem inscriptionem, sed inscriptionem incisam in columna ad memoriam sempiternam; propterea intelligere debemus, inscriptionem hoc loco significare titulum memorabilem, dignum, qui nunquam aboleatur. Argumentum Psalmi est oratio Christi ad Patrem: & eadem accommodari potest membris Christi tum vniuersis, tum singulis: De Christo enim, & non de Dauide intelligendos esse quatuor versus postremos, ac præsertim illa verba, Non dabis sanctum tuum videre corruptionem, docet Apostolus Petrus Act. 2. & Paulus Act. 13. & quia totus Psalmus, est oratio quædam continuata, non possunt intelligi quatuor vltimi versus de Christo, quin totus Psalmus de Christo intelligatur.

Explicatio Psalmi 15.

Conserua me Domine, quoniam
niam speraui in te; Dixi Do-
mino, Deus meus es tu, quoniam
bonorum meorum non eges.

In

מִכְתָּם

מִכְתָּם

מִכְתָּם

מִכְתָּם

מִכְתָּם

מִכְתָּם

מִכְתָּם

להרע

להרע

אמרתי

אמרת

In Hebræo, vt nūc legitur, habetur, Dixisti: sed non est dubium, debere legi, amarti, non amarth: nam nō solum Septuaginta verterunt, dixi, sed etiam S. Hieronymus: si tamen vtraq; lectio defendi debeat. Illud dixisti, referendum erit ad animam, quia amarth est secunda persona generis feminini, & sensus erit, Dixisti o anima mea, & idē est, dixi ego, vel dixisti anima mea. Ait igitur Christus, & potest dicere quilibet Christianus, Conserua me Domine, idest, custodi, ac protege me ab imminente tribulatione, quoniam speravi in te solo, nō in vlla re creata. Quod autē in te solo sperauerim, & sperem, ex eo cognosci potest, Quoniam dixi Domino, idest, confessus sum tibi Domino, ac dixi ex corde, Deus meus es tu, idest, supremus Dominus meus es tu, vt clarius habet textus Hebraicus, & Græcus; nam Latinus posuit, Deus meus, pro, Dominus meus, vt variaret sermonem; quorum bonorum meorū non eges, sed ego bonis tuis indigeo; idest, tu nulla ratione à me dependes; sed ego à te in omnibus pendeo; ideò tu solus verus, & summus Dominus meus es: & quia ego hoc cognosco, & confiteor: ideò in te solo spero, & confido. Hæc verba Propheta scripsit in persona Christi pro eo tempore, quo Christus non solum homo erat, sed etiā passioni, & morti obnoxius. Quāuis enim in Christo homine, & passibili, non fuerit spes, quæ est virtus Theologica, & respicit beatitudinem animæ, vt S. Thom. docet 3. par. q. 7. art. 4. fuit tamen spes, vt significat fiduciam, & expectationem gloriæ corporis, & aliorum, quæ nondum habebat; & de hac spe loquitur Dauid in Psalmis.

II.

Sanctis qui in terra sunt eius, mirificauit omnes voluntates meas in eis.

In Græco legitur sic, Sanctis qui sunt in terra eius mirificauit Dominus omnes voluntates suas in eis. Itaq; dissentiunt Græcus, & Latinus, in illa voce, meas, & suas. Nam additio illa vocabuli, Dominus, non mutat sensum. In He-

bræo legitur ad verbum sic, Sanctis qui in terra ipsi, & magnificis omnis voluntas mea in eis. Quod ad Græcum attinet, S. Augustinus in epist. 59. ad Paulinum q. 2. dicit codices electiores habere, meas; quamuis alij habeant, suas. Itaque probabile est, in Græco vitio librariorum irrepsisse mendum: præsertim cum in Hebraico etiam habeatur, meas. Idem quoq; Aug. dicit, non esse dissonantiam alicuius momenti, cum opera Patris, & Filij, & Spiritus sancti sint indiuisa. Hebræus autē codex cum ait, Qui in terra ipsi, non differt à nostro codice, nisi quod omittit pronomen, eius. Cum autem dicit, Et magnificis, sciendum est vocem, ve addire, videri omnino corruptam. Est enim nomen numeri multitudinis, in regimine, idest, regens aliud nomen casus genitiui. Hebræi siquidem aliter formant nomen absolute positum, & aliter nomen regens post se aliud nomen casus genitiui. Hic autem non sequitur aliud nomen, quod regatur ab isto, magnificis: præterea si Septuaginta legissent, ve addire, non potuissent vertere, mirificauit, nisi imperitissimi fuissent. Itaq; existimo eos legisse, headdir, quod significat mirificauit. Illa verò, omnis voluntas mea in eis, non habent difficultatem, quia cum Hebræi non declinent nomina per casus, verti debet vocabula secundum exigentiam verborum. Recte igitur verti potest hic locus, sanctis qui sunt in terra mirificauit omnem voluntatem meam in eis. atq; ita in concordiam rediguntur omnes lectiones. Sententia autem hæc esse videtur. Quia Deus bonorum meorum non eget, ideò benefacere studeo electis eius. cuius meæ bonæ voluntatis ipse Deus mihi testis est, qui sanctis, qui sunt in terra eius, idest, sanctis, & electis suis qui sunt in terra eius, mirificauit, idest, mirabiles reddidit omnes voluntates meas in eis, idest, omnem beneuolentiam meam, omniaque studia mea erga illos. Dicitur autem Deus mirabilem reddidisse beneuolentiā Christi erga electos declarando illam tum per Prophetas, & per varias figuras testata-

ואדר

ואדר
האדר

stamenti veteris; tum etiam per miracula ipsius Christi, & Apostolorum. mirabilis verò fuit Christi beneuolentia erga electos, cum pro illis animam suam ponere voluerit.

III. Multiplicatae sunt infirmitates eorum, postea accelerauerunt.

In Hebræo habetur in futuro, multiplicabuntur, sed accipitur futurum pro præterito. Illud etiam, postea, vertitur communiter ex Hebræo, alienū, אחר sed Septuaginta non legerunt, acher, alienum, sed, achaz, quod significat, postea. Explicatur hoc loco effectus beneuolentiæ Christi in electos, qui antea debiles erant ob vulnera grauissima peccatorum; ita vt ambulare non possent. & postea sanati per gratiam currere cœperunt viam mandatorum Dei. Multiplicatae sunt, inquit, infirmitates eorum, idest, agitudines, ac morbi spirituales, vnde Apostol⁹ ad Ro. 5. Cùm adhuc infirmi essemus, Christus pro nobis mortuus est; & paulo post explicans infirmitates, Cùm, inquit, peccatores essemus. Ex Hebræo multi vertunt, idola, sed vox Hebræa propriè significat infirmitatem, & dolorem; & per figuram accipitur pro idolis, vel quia idola infirma sunt, & nullius potentia; vel quia peccatores, ac per hoc infirmos homines faciunt. Postea accelerauerunt, idest, antea infirmissimi erant multiplicatis peccatis vsq; ad summū; sed postea sanati per gratiam fortes effecti sunt, & ideò exultarunt ad currendam viā. Id apparuit in principio Ecclesiæ quando cōuersi homines ab idololatria, ad martyria festinabāt.

IV. Non congregabo conuenticula eorum de sanguinibus: nec memor ero nominum eorum per labia mea,

Ex Hebræo vertunt cōmuniter, non libabo libamina eorum de sanguine. & verè verbum, nasac, significat libare, & fundere: sed significat etiam tegere, & operire. & quia quæ teguntur cōgregantur, vt tegi possint; credibile est,

idem verbum significare etiam, cōgregare. sententia verò est eadem. nā quia ad sacrificia celebranda cœtus congregari solent; ideò perinde est, si dicatur non libabo libamina eorum de sanguine, idest, non placebunt mihi sacrificia eorum, quæ sanguinis effusione constant; & non congregabo conuenticula eorum de sanguinibus, idest, nō placebunt mihi cōgregationes eorum ad sacrificia cruenta celebranda proinde non ego illas congregabo, non ero auctor, vt eiusmodi cœtus fiant. Nec memor ero nominum eorum per labia mea, idest, non solum non ero auctor talium congregationum, & sacrificiorum; sed ea nē nominabo quidem. Cohæret autem hic versiculus cum superiore, quia rationem reddit, cur electi post multiplicata peccata, ac potissimum idololatriæ, accelerauerint currere viam Domini. ratio enim est, quia Dominus vehementer detestatur idola, & eorum venerationem, vt ne nominari quidem velit à suis, ideò quos elegit in Christo, mūdauit à peccato idololatriæ; & sic sanctos currere fecit viam mandatorum suorum.

Dominus pars hæreditatis V. meæ, & calicis mei, tu es qui restitues hæreditatem meam mihi.

Quia dixerat, se detestari idola, & peccata; addit pro ratione, omnia sua bona in vno Deo habere. Vox propria Christi, qui omnino segregatus à peccatoribus, & Deo Patri summe amicus omnia sua bona in Deo habet. Idem, & nos pro modulo nostro sentire debemus. Dicit igitur, Dominus pars hæreditatis meæ, idest, pars qua mihi ex diuisione hæreditatis contingere debet, hoc est, quicquid omninò expecto, mihi Domin⁹ est, ipse mihi est omnia; & calicis mei. repetitio est eiusdē sententiæ. nam & calix, qui diuidi solebat inter conuiuas, pro hæreditate accipitur. Nisi magis placeat, per partē hæreditatis intelligere opes, per partem calicis delicias, vt sensus sit, omnes meas opes, atque omnes meas delicias in solo Deo constitui. Tu es qui restitues

stitues hæreditatē meam mihi. hoc ad-
ditur, quia cū Christus ad huc mor-
talis hæc diceret, nondum plenē possi-
debat hæreditatem: & nos cū hæc di-
cimus, desiderio quidem omnia bona
in Deo habemus, sed nondum re ipsa
possidemus. possessio autem ista inte-
rim deposita est apud Deum, & ille no-
bis eam restituet in die nouissimo; sicut
Christo restituit in die resurrectionis
eius. huc alludit B. Paul⁹ cū ait, Scio
cui credidi, & certus sum, quia potens
est depositum meum seruare in illum
diem 2. Tim. 1. In Hebræo habetur, Tu
sustentas hæreditatem meam. & sen-
sus est idem. nam ideò restituet Domi-
nus hæreditatem, quia nunc eam sus-
tentat, & conseruat nobis; iuxta illud
B. Petri, In hæreditatem incorruptibi-
lem conseruatam in cælis. 1. Pet. 1.

**VI. Funes ceciderunt mihi in præ-
claris, etenim hæreditas mea
præclara est mihi.**

Similitudine ducta à terrena hære-
ditate, declarat præstantiam hæredita-
tis æternæ, quam habebunt, qui Deum
solum eligunt. Siquidem funiculis mē-
surari solebāt campi, qui ex hæredita-
tis diuisione obueniebant. & quia diui-
sio sorte fiebat, ideò dicebantur funi-
culi in præclaram partē cadere, quan-
do pars hæreditatis optima continge-
bat. Funes ceciderunt mihi in præcla-
ris, idest, optimam hæreditatem sorte
felicissima consequutus sum; etenim
hæreditas mea præclara est mihi; idem
dicit alijs verbis. Meminit autem for-
tis, quia principium huius hæredita-
tis à prædestinatione ducitur. prædesti-
nationis autem gratia respectu nostri
fors quædam est. vnde Paulus, Sorte vo-
cati sumus: & elegit nos in partem for-
tis Sanctorū, ad Ephes. 1. & ad Col. 1.

**VII. Benedicam Dominum, qui tri-
buit mihi intellectum, insuper, &
vsque ad noctem increpauerunt
me renes mei.**

Gratias agit Deo, qui inspirauit illi
consilium, & accendit in eo desiderium,

vt tam præclaram hæreditatem elige-
ret. Benedicam, inquit, Dominū, idest,
laudabo Deum auctorem mihi tāti bo-
ni, qui dedit mihi intellectū, idest, qui
me cognoscere fecit, & prudenter eli-
gere. vox enim Hebræa Iahaz signifi-
cat propriè dare consilium. Insuper, &
vsque ad noctem increpauerunt me re-
nes mei. per renes in scriptura intelli-
gitur affectus, & desiderium. vnde sunt
illa Scrutans corda, & renes Deus; &
Proba cor meū & renes meos, vbi per
cor intelligitur cogitatio, per renes af-
fectus; per noctem, intelligitur tempus
tribulationis; sicut per diem, tempus
prosperitatis. per verbum, increpue-
rūt, significatur potius eruditio, quam
reprehensio. nam, & in Hebræo, & Græ-
co est verbum significans eruditionē.
proindē verbum Latinum interpretā-
dum est pro increpatione hortatoria,
qualis est, Quare tristis es anima mea,
& quare conturbas me? spera in Deo,
quoniam adhuc confitebor illi. Deni-
que illud, Vsque ad noctem, in Hebræo
est, in noctibus, ex quo intelligimus si-
gnificari nō solum tota die, sed etiam
vsque ad noctem totam, quod vulgo
dici solet inclusiue. Itaque sensus hic
erit, Insuper, & vsque ad noctem, idest,
non solum tempore prosperitatis, sed
præterea vsque ad tempus aduersita-
tis, & in ipsa aduersitate affectus meus
in Deum accensus erudiuit me exci-
tans, & adhortans ad passionem æquo
animo subeundam ac semper de Deo
bene sperandum.

**Prouidebam Dominum in cō- VII.
spectu meo semper; quoniam à
dextris est mihi ne commouear.**

Ex intellectu, & affectu bono, de
quo in superiore versu Deū laudauit,
profectum est, vt semper Deum ante
oculos haberet. anima enim magis est
vbi amat, quàm vbi animat. In He-
bræo habetur, posui Dominum in con-
spectu meo semper. ex quo clarius de-
claratur, Christum studiosè egisse, vt
semper Dominum præsentē haberet.
Quoniam à dextris est mihi, ne cōmo-
uear.

near hoc est, nec falsa mea cogitatio fuit, qua Dominum mihi ante oculos cordis semper ponebam; nam verè à dextris mihi semper est, tanquam tegens latus meum, meque præcedens, ut adiutor fortis nè commouear de gradu meo, sed persistam, & perseuerem vsque in finem.

IX. Propter hoc lætatum est cor meum, & exultauit lingua mea, insuper, & caro mea requiescet in spe.

Explicat nūc tandem hæreditatem præclaram, quam Deus restituet sibi, & alijs, qui Dominum elegerunt. Propter hoc, idest, quia Dominus à dextris mihi est adiutor, & protector fidelissimus, lætatum est cor meum lætitia vera, & solida, de qua Dominus in Euāgelio, Gaudebit cor vestrum, & gaudium vestrum nemo tollet à vobis. & exultauit lingua mea, quia gaudium internum redundare solet etiam exterius. In Hebræo habetur, Exultauit gloria mea, quod in idem recidit. gloria enim interior, per linguam exultat exterius; Insuper, & caro mea requiescet in spe, hoc est, animus lætabitur, & caro obdormiet in morte placida, & segura, ob certam expectationem celerrimæ resurrectionis.

X. Quoniam non derelinques animam meam in inferno, nec dabis sanctum tuum videre corruptionem.

Hæc explicata sunt ab Apostolis Petro, & Paulo. Act. 2. & 13. & quamuis propriè de solo Christo hæc dicantur, cuius anima non est relicta apud inferos, in limbo videlicet, Sanctorum Patrum; neque caro in sepulchro experta est vllam putrefactionem: tamen nos omnes hæc dicere possumus, tum quia membra Christi sumus, & in illo, ut ait Apostolus, conresuscitauit nos Deus; tum quia animæ nostræ non relinquentur in inferno, idest, in Purgatorio; neque caro nostra videbit æternam corruptionem.

Notas mihi, fecisti vias vitæ, XI. adimplebis me lætitia cum vultu tuo: delectationes in dextera tua vsque in finem.

Hic exponit perfectam hæreditatis promissionem. Notas, inquit, mihi fecisti vias vitæ, idest, docuisti me modum redeundi ad vitam post mortem. meta phora est pulcherrima, per quam modus per se resurgendi dicitur via vsq; ad illam diem ignota, quia nullus vnquam per se resurrexit, Christo excepto. Nec solum, inquit, docuisti me resurgere ex mortuis, sed etiam adimplebis me lætitia cū vultu tuo, gloriosum, immortalem, & beatum faciēs me, vultum tuum mihi ostendendo. nam ex visione Dei in qua consistit beatitudo essentialis, redundat etiam gloria in corpus, qua sola Christus carebat. gloriā enim animæ à conceptione habuerat. Delectationes in dextera tua vsq; in finem, Nec solū gloriosum me faciēs, sed ad dexterā collocabis in cælis, vbi delectationes sunt sine vlllo fine. Quæ omnia etiā electis suo modo conueniunt, quibus Deus ostendit vias vitæ, cū legis obseruationem docuit esse viā ad Regnum cælorum. Eisdem adimplet lætitia cum vultu suo, cū eis se videndum exhibet facie ad faciem. & demū delectationes vsq; in finem eis præbet dextera sua, cū eos ad dexteram partē collocat, & cū dextera manu sua, tanquam inexhausto fonte bonorum eos indefinenter delectationibus replet. Ad finem huius Psalmi annotare placet incredibilem temeritatē Theodori Bezzæ, qui verba illa, Non derelinques animam meam in inferno, ex textu Græco. Act. 2. sic interpretari ausus est, Non relinques cadauer meum in sepulchro. quæ enim corruptio sacrarū literarum est, si hæc non est? Vide, si placet, refutationem huius paradoxī in nostris Controuersijs lib. de Anima Christi. c. 12. vbi demonstramus voces tum Hebræicas, tum Græcas, quæ in hoc Psalmo, & c. 2. Actorum habentur, nō cadauer, & sepulchrum; sed animam, & infernum propriè significare.

PSAL-

P S A L M V S X V I.

Titulus, & Argumentum.

Oratio David.

HIC Psalmus, ut ipse titulus indicat, est oratio Iusti persecutionem iniuste patientis, quā precatur à Deo liberationem; ducit autem argumenta primum ab innocentia sua, secundum à Iustitia Dei, tertium à misericordia eiusdem, quartum à malitia impiorum Iustos persequentium.

Explicatio Psalmi 16.

- I. **E**xaudi Domine iustitiam meam; intende deprecationem meam.
- II. Auribus percipe orationem meam, non in labijs dolosis.

Hi duo versiculi coniunguntur in unum apud Hebræos; sed apud Græcos, & Latinos distincti sunt. Res est parvi momenti, neque sententiam mutat. Primum igitur orat exaudiri iustitiam suam: nam apud iustum iudicem magis clamat causa, quàm persona. Addit deinde, ac postulat attendi etiam ad precationem suam, quia Deus non solum iustitiam, sed etiam Iustos diligit, & ut Sanctus Iacobus ait, Multum valet oratio iusti. Postremò coniungit utrumque iustitiam, & deprecationem, cum ait, Auribus percipe orationem meam. Non in labijs dolosis, hoc est, exaudi orationem meam, quæ nõ prodit ex labijs dolosis; sed in iustitia nititur. Itaque sensus est, Moueat te Domine iustitia, moueat deprecatio, moueat Iusti deprecatio.

- III. De vultu tuo iudicium meum prodeat, oculi tui videant æquitates.

Alterum argumentum petit à iusti-

tia Dei, quasi dicat, te appello Domine, à te iudicari volo, qui es Iudex iustissimus. De vultu tuo, idest, ab ore tuo iudicium meum prodeat, idest, sententia pronuntietur. Oculi tui videant æquitates, idest, noli claudere oculos, & dissimulare calumnias impiorum; sed aperi oculos, & considera quid iustitia exigit. Nam, ut alias monui, non ponitur hoc loco æquitas pro epicheia, sed pro ipsa vera iustitia, ut sonat vocabula Hebræa, & Græca. In Græco habetur, Oculi mei videant æquitatem; & sic legit S. Augustinus, & exponit de iudicio hominis Iusti, nõ de iudicio Dei, ut sensus sit, de vultu tuo, iudicium meum prodeat, idest, illumina mentem meam, ut iustè iudicem; oculi mei videant æquitates, idest, mens mea non aberret in iudicando; sed si debeat convenire sententia Græci codicis cum lectione Hebraica, & Latina, hic debet esse sensus, Oculi mei videant æquitates, quas tu videlicet exerces, idest, videant iusta iudicia tua. Et sanè lectio, quæ habet oculi tui, magis cohæret cum superioribus, & eandem approbat S. Hieronymus in epist. ad Suniam, & Fretellam.

Probasti cor meum, & visitasti nocte, igne me examinasti, & non est inuenta in me iniquitas. I I I I.

Reddit causam cur velit iudicari à Deo; quia videlicet ipse solus scrutatur corda, & perfectè nouit innocentiam seruorum suorum. Probasti, inquit, cor meum, idest, tentasti, qualis sim intus, ubi nemo videt præter te, experimentum de mea sinceritate fecisti. Quomodo autem id fecerit, declarat dicēs, Visitasti nocte, & igne me examinasti. Nam duo sunt tempora, quibus apparet quid sit in corde, occasio occulte agendi, & tempus tribulationis. Multi enim intus mali, exterius boni, si occasionem habeant peccandi in occulto, ubi nullum sit periculum, ne detegantur, tunc malitia se prodit. Sic etiam tempore prosperitatis non discernuntur mali à bonis, sed cum ignis persecutionis aduenerit, tunc aurum lucebit, & palea fumabit. De primo tempore dicit,

didit, Visitasti nocte, idest, cum in occulto occasiones peccandi habui. De secundo verò, igne me examinasti, id est, ardente tribulatione. Et nō est inuenta in me iniquitas. In Hebræo pro istis verbis, Non est inuenta in me iniquitas, ad verbum sic legitur: Non inuenistis cogitavi, nō transibit os meū. Quæ verba nullū sensum facere videntur. Sciendum igitur est Septuaginta Interpretes non legisse, zammothi, quod significat, cogitavi: sed zimmathi, mutatis tantum punctis, idest, iniquitatem meam. & coniunxerunt hoc nomen cum superiore verbo, & ideo reddiderunt, Nō est inuenta in me iniquitas, quod est idem cum eo, nō inuenisti iniquitatem meam, vt ad verbum est in Hebræo. Sequentia verba, nimirum, non transibit os meum, coniunxerunt Septuaginta Interpretes cum verbis sequentibus, in opera hominum, & verterunt, vt non loquatur os meum opera hominū. Idem enim est, non transibit os meum in opera hominū, & nō loquetur os meum opera hominum.

זמתי
זמתי

V. Vt non loquatur os meum opera hominum, propter verba labiorum tuorum ego custodiui vias duras.

Ostendit, vnde factum sit, vt Deus non inuenerit in eo iniquitatem: & dicit ex eo factum esse, quia custodierit vias duras iustitiæ propter præcepta Dei, non ob aliquam spem humanam. Nam qui ob spem humanā custodiunt viam iustitiæ, exterius id faciunt, vbi homines vident, ac per hoc inuenitur in eis latēs iniquitas, qui verò propter Dei mandatum viam iustitiæ non deserunt, id faciunt exterius, & interius, atque ideo nulla in eis iniquitas inuenitur. Ait igitur, Ego custodiui vias duras, idest, permansi in via iustitiæ, quāuis aspera, & dura, neq; me vlla tribulatio ab ea via declinari fecit. Permansi autem in hac via propter verba labiorum tuorum, idest, propter mandata tua, siue propter promissiones, & mi-

nas tuas. Vt non loquatur os meum opera hominum, idest, vt nō cogar implorare humanam opem, neque ab spe humana pendeam, neque laudem opera hominum. In Hebræo, pro eo quod nos legimus vias duras, habetur, vias pariz, idest, latronis, seu dissipatoris: sed mutatis punctis, illud, pariz, potest legi, perez, idest, ruptura, siue fractura; & sensus erit, custodiui vias præruptas, ac per hoc periculosas, & duras.

פרץ
פרץ

Perfice gressus meos in semitis tuis, vt non moueantur vestigia mea.

Agnosce non suis viribus, sed auxilio Dei se permansisse in angusta semita iustitiæ, rogat Deum, vt confirmet hoc beneficium; perfice gressus meos in semitis tuis, idest, confirma, & stabili gressus meos in hac via tua; ne forte declinem ab ea, si tuo adiutorio destituar. In Hebræo ad verbum est, sustenta gressus meos, ne labantur vestigia mea, vbi declaratur id ipsum per similitudinem ductam à via lubrica. Itaq; perfice gressus, significat, sustenta, & stabili; & ne moueantur vestigia mea, significat, ne labantur ob viæ lubricitatem. Verè enim infirmitas carnis, & illecebra mundi faciunt viam vitæ humanæ valde lubricam; & multi labuntur in ea.

Ego clamaui, quoniam exaudisti me Deus, inclina aurem tuam mihi, & exaudi verba mea.

Exposito argumento ab innocentia sua, & à iustitia Dei, iterum repetit orationem initio Psalmi propositā; quæ est quasi conclusio, quæ colligitur ex duobus illis argumentis. Sententia igitur hæc est. Ego clamaui ad te Domine, quoniam exaudisti me, idest, cum fiducia clamaui, quoniam semper aliàs exaudisti me. Et ideo pro solita benignitate nunc etiam inclina aurem tuā mihi, & exaudi verba mea.

Miri-

VIII. Mirifica misericordias tuas ,
qui saluos facis sperantes in te .

Hoc est argumentum tertium, quod sumitur à misericordia Dei; quasi dicat, exposui innocentiam meam, appellavi iustitiam tuam; inuoco nunc misericordiam, quoniam & si me innocentem existimem à crimine, ob quod tribulationem patior; tamen multa sunt alia fortasse peccata mea, ob quæ iuste puniri possem. Mirifica ergo misericordias tuas, idest, ita manifestè misericordias tuas exerce in me liberando, vt omnes mirentur. Tuum est enim saluos facere omnes, qui in tua misericordia spem suam repositam habent.

IX. A resistentibus dextere tuæ custodi me, vt pupillam oculi.

In Hebræo coniunguntur cum superiore versiculo illa verba, à resistentibus dextere, vt sensus sit, qui saluos facis à resistentibus dextere tuæ eos qui sperant in te. Sed cohærent etiam optime cum verbis sequentibus in hunc modum. Custodi me, vt pupillam oculi, id est maxima diligentia; à resistentibus dextere tuæ, idest, ab impijs hominibus qui resistent dextere tuæ, vel lædendo quos tu protegis, vel non ambulando quò tu dicis. Neque hoc est contrarium ei, quod legimus in lib. Esther cap. 13. Non est, qui possit tuæ resistere voluntati. Nam illud intelligitur de voluntate beneplaciti, quæ semper impletur; hoc autem de voluntate signi, quæ non semper impletur, quia Deus permittit impios multa facere contra leges à se positas: sed eos postea punit vt merentur. Idcirco S. Petrus hortatur, dicens, Humiliamini sub potenti manu Dei, vt vos exaltet in tempore visitationis. 1. Pet. 5. Similitudo illa, vt pupillam oculi, aptissima est; quoniam pupilla res est simul preciosissima, & infirmissima, & ideo diligentissimè custodiri solet, & ab ipsa natura munita est, tum varijs tunicis, tum etiam palpebris, & pilorum vallo.

Sub vmbra alarum tuarum pro X.
tege me à facie impiorum, qui me afflixerunt.

Idipsum repetit alia similitudine. Sicut enim pulli teguntur alis Gallinæ, & eo modo obumbratur, & securi delitescunt, vt lædi non possint à Miluis: sic optat Iustus protegi diuino auxilio à persecutoribus suis. Illud, à facie impiorum, significare potest, à conspectu impiorum; alæ siquidem dum pullos tegunt, faciunt, ne videantur à Miluis. Item à morsu impiorum, siue ab ira impiorum. Nam, & dentes in facie sunt, & ira in facie demonstratur. Illud, qui me afflixerunt, significat, Iustitiam expertum esse morsus impiorum, & ideo protectionem querere, ne si sæpius mordeatur, tandem consumatur. Familiaris est hæc similitudo diuinæ Scripturæ. In velamento, inquit, alarum tuarum sperabo. & rursus: Scapulis suis obumbrabit tibi, & sub penis eius sperabis. & ipse Dominus in Euangelio, Quoties volui congregare filios tuos, sicut gallina congregat pullos suos sub alas, & nolui. Matth. 23.

Inimici mei animam meam circumdederunt, adipem suum con-
cluserunt, os eorum loquutum est superbiam.

Est hoc argumentum postremum, quod sumitur a malitia inimicorum. Inimici mei, inquit, animam meam circumdederunt, idest, vitam meam, siue me ipsum vndique premunt, adipem suum concluserunt, idest, nulla misericordia mouentur, etiam si me videant ad extrema redactum; os eorum loquutum est superbiam, idest, non solum non misereantur, sed etiam insultant arroganter. Porro adipem concludere, significat viscera claudere, ac per hoc non misereri, iuxta illud S. Ioannis, Qui habuerit substantiam huius mundi, & viderit fratrem suum necesse habere, & clausit viscera sua ab eo; quomodo charitas Dei manet in eo?

1. Ioan. 3. Quia verò viscera claudi solent, cum adeps crescit, ideo maluit Propheta dicere, Adipem suum concluserunt, quàm viscera clauderunt, ut simul indicaret causam, unde viscera clauduntur, quæ est multiplicatio adipis, idest, opulentia temporalis. Sicut enim adeps naturalis claudit viscera carnalia: ita multiplicatio opum, facit superbè sapere, & contemnere proximos, & claudit viscera spiritualia.

XII. Projicientes me nunc circumdederunt me, oculos suos statuerunt declinare in terram.

Pergit narrare nequitiam inimicorum, & ait, eos modo vnam viam aggredi, modo contrariam, sic tamen ut semper noceant. Projicientes me nunc circumdederunt me, idest, antea projicientes à suo consortio, nunc circumdederunt me. In Græco sensus est clarior, quia illud, projicientes, est temporis præteriti, & significat; cum proiecis-
sent me. Itaque sensus est, cum antea proiecis-
sent me à suo consortio, ne fruerer communibus bonis: nunc iterum quæ-
runt me, & circumdant, ut malis afficiant. Huius autem malitiæ ipsorum causa est, quia statuerunt oculos suos declinare in terram, idest, firmiter decreuerunt non adspicere ad Deum, qui est in cælo, nec timorem vllum Dei admittere; sed solum terram intueri, & ea quæ in terra sunt bona sectari. In Hebræo pro illa voce, projicientes me, habetur, affurenu, quod aliqui vertunt, gressu meo alij incedentes in me, alij aliter. Sed Septuaginta Interpretes legisse videntur, horisuni, quod significat, expulerunt me. sunt enim literæ fere eadem, sed transpositæ.

XIII. Susceperunt me sicut leo paratus ad prædam, & sicut catulus leonis habitans in abditis.

Non solum, inquit, circumdederunt me, sed crudelissimè in me sauerunt. Susceperunt enim me ea auiditate, & sauitia, qua leo paratus ad prædam suscipit occurrentem sibi ouiculam. Dicitur autem leo paratus ad prædam, is,

Belarm. in Psal.

qui famelicus, & in prædam intentus est. Idem repetit per verba sequentia; & sicut catulus leonis habitans in abditis, idest, sicut leonis catulus latens in insidijs suscipit prædam sibi occurrentem. In Hebræo pro susceperunt me, habetur, dimiono, similitudo eius, videlicet, impij, quasi leonis desiderantis prædam. Cæterum Septuaginta legerunt paulo aliter, ut legi potest vox illa, si remoueantur puncta. nimirum videntur legisse, demauni, ab eodè verbo, dama, quod non solum similem esse, sed etiam succidere significat. Itaque intellexerunt hic significari succiderunt me, sicut leo succidere solet prædam oblatam. sed pro, succiderunt, nialuerunt vertere, susceperunt, nimirum ad succidendum, quia non succiderunt re ipsa, sed tantu voto. non enim Deus permisit, ut re ipsa succiderent; ut ex sequenti versiculo perspicuum est.

Exurge Domine, præueni eum, XIV. & supplantam eum: eripe animam meam ab impio, frameam tuam ab inimicis manustuar.

Explicata malitia persequentium, rogat Deum, ut adsit & liberet ipse, qui solus potest. Exurge Domine, non amplius differas auxilium; præueni eum, idest, impium, qui instar leonis me rapuit ad deuorandum, præueni dentes eius, ne eos in me infigat, & occidat. Et verè solus Deus præuenire potest actionem cuiuslibet causæ etiam velocissimè agentis, sicut præuenit dentes leonum, ne læderet Daniele inter ipsos famelicos iacentem; & sicut præuenit impetum ignis, ne combureret tres pueros in fornacem proiectos. ex quo magna consolatio oritur iustis, qui sciunt eam esse Dei sui potentiam, ut securos eos præstare possit inter dentes leonum, & inter flammam ignis ardentis. Supplanta eum, idest, decipe eum, mirabili prouidentia tua efficiendo, ut dum putat se dentes infigere in carnem iusti, infigat in carnem propriam. Eripe animam meam ab impio, idest, ne sinas me occidi ab impio sauiente more læonis, sed libera, & salua me.

E Fra-

רמיוני

רמיוני

אשורני

הורישוני

Frameam tuā ab inimicis manus tuæ .
 In Hebræo post, frameam tuam, finitur versiculus. & deinde incipit alius versus; & quia Hebræi non declinant nomina per casus, potest sic verti ea sententia, eripe animam meam ab impio framea tua, idest, vt vertit S. Hieronymus, ab impio qui est framea tua; vel, vt alij volunt, eripe animam meam ab impio framea tua, idest, per frameam tuam. sed versionem Septuaginta, & editionem vulgatam sequendo, sensus erit, eripe animam meam ab impio, ac vt hoc facias, eripe frameam tuam, id est, potestatem affigendi, ab inimicis manus tuæ, idest, ab ijs, qui ea non bene vtuntur, qui sunt inimici manus tuæ: ac per hoc nō sequuntur directionem manus tuæ, sed contra eam abutuntur potestate à te illis cōcessa. Omnis enim potestas à Deo est, siue, vt Apostolus loquitur, Non est potestas, nisi a Deo. Rom. 13. In Hebræo pro, inimicis manus tuæ, habetur à viris manus tuæ, siue, à mortuis manus tuæ. nam vox Hebræa, metim, & viros, & mortuos significat. Septuaginta Interpretes intellexerunt significari mortuos, & verterunt, inimici manus tuæ. quoniam inimici manus Domini, idest, qui nolunt sequi directionem manus Domini, mortui sunt manu Domini, quomodo omnes peccatores dicuntur mortui Deo, & inimici Dei. verterunt autem potius, inimici quàm mortui, quia, idest, multo clarius.

XV. Domine à paucis de terra diuide eos in vita eorum; de absconditis tuis adimpletus est venter eorum.

Imprecatio est Prophetica, idest, prædictio per modum imprecationis. prædicat enim futurum, vt diuidantur impij à iustis, & impijs quidem sola temporalia tribuantur, Iustis verò etiam æterna. Domine à paucis de terra diuide eos, idest, separa multitudinem impiorum à pusillo grege tuo. In Hebræo est eadem vox, metim, quæ in fine versiculi superioris. Dauid enim sicut inimicos Dei vocauerat mortuos Dei, ita

nunc amicos Dei vocat mortuos seculo, siue terræ. vox enim, cheled, significat terram, mundum, seculum, & similia. Itaque verti poterat, diuide eos à mortuis mūdo: sed maluerunt Septuaginta dicere à paucis de terra, quia verè mortui mundo sunt valde pauci, respectu amatorum mundi. Illud, diuide eos, est in Hebræo, pars eorum, sed mutatis punctis eadem voces significant, diuide eos. Quod sequitur, in vita eorum, posset rectè coniungi cū sequentibus, nisi obstarat particula, & de absconditis tuis, &c. quæ particula est in Hebræo, & in Græco, & in multis Latinis: nec scio, cur in editione vulgata ommissa sit. Sensus igitur est non solum in vita futura; sed etiam in præsentī, quæ propriè est vita ipsorum: quam ipsi videlicet solum agnoscunt, & amant, diuidendos à viris iustis, qui seculo mortui sunt. In hoc autem diuisio consistit, quòd de absconditis tuis adimpletus est venter eorum, idest, de bonis terræ à Deo creatis, & cōseruatis, & quæ veluri de thesauro abscondito singulis annis emanant, adimplent ventrē suū, & hanc partem suam esse dicunt.

XVI. Saturati sunt filijs, & dimiserunt reliquias suas paruulis suis.

Hoc est, filijs abundant, & ijs post mortem sua relinquunt bona, quæ ipsis supersunt. hæc enim censetur à filijs huius seculi perfecta felicitas, si & ipsi bonis terrenis circumfluant, & filios suos bonorum suorum relinquunt hæredes. Ex Græco Sanctus Augustinus vertit saturati sunt porcina; sed etiam verti posse dicit, saturati sunt filijs, ratio huius varietatis in promptu est, nam vox Græca si scribatur per simplex ipsilon *β*, significat, porcum, si scribatur per ipsilon, & iota *βι*, significat filios. sed ex Hebræo perspicuum est, legendum filijs, non porcina.

XVII. Ego autem in iustitia apparebo conspectui tuo, satiabor cū apparuerit gloria tua.

In hoc inquā, diuisio consistit, quòd illi saturati cupiant in hac vita bonis ter-

חל

terrenis: ego autem, ut etiam ceteri Iu-
sti in hac vita iustitiam esuriam; & in
alia gloria, & beatitudine satiabor. In
Iustitia apparebo conspectui tuo, id
est, iuste coram te vivere studebo; sa-
tiabor cum apparuerit gloria tua, id
est, sicut nunc tibi apparebit iustitia
mea; ita postea mihi apparebit gloria
tua, & tunc demum verè satiabor ni-
hil amplius expetens. In Hebræo pro
apparebit gloria tua, habetur, cum
excitabitur similitudo tua; & sensus
est idem, tunc enim apparebit nobis
gloria Domini, quando excitabitur in
nobis similitudo, de qua scriptum est.
1. Ioan. 3. Similes ei erimus, quia vide-
bimus eum, sicuti est. Quando enim
videbimus eum sicuti est, tunc erimus
ei similes in gloria nam, & ipse beatus
est, quia seipsum videt. Hæc est enim
vita, & gloria sempiterna, videre De-
um sicuti est.

P S A L M V S XVII.

Titulus, & Argumentum.

*In finem, Puero Domini David, qui
loquutus est Domino verba Can-
tici huius, in die, qua eripuit eum
Dominus de manu omnium inimi-
corum eius, & de manu Saul, &
dixit.*



IC titulus indicat, Psal-
mum hunc à Dauide com-
positum fuisse in gratia-
rum actionem, quando li-
beratus fuit ab omnibus
inimicis suis, & potissimum à Saule,
qui nominatim ea de causa exprimi-
tur. Habetur hic idem Psalmus in lib.
2. Regum cap. 22. paucis mutatis. Mu-
tatio autem illa incertum est, an ab ip-
so Dauide facta fuerit, an ab Esdra,
qui Psalmos collegit. Quia verò
David figuram Christi ges-
sit, potest Psalmus hic
etiam de Christo
rectè exponi.

Explicatio Psalmi 17.

Diligam te Domine fortitu-
do mea; Dominus firmamē-
tum meum, & refugium meum,
& liberator meus.

Diligam te Domine, id est, meritò te
diligere debeo, cum tot beneficijs me
tibi deuinxeris. Exponit deinde bene-
ficia à Deo accepta: ac primum vñico
verbo, tum pluribus nominibus, po-
stremo rerum gestarum enarratione.
Vñico verbo exponit, cum dicit, For-
titudo mea, id est, causa totius roboris
mei, quo de hostibus omnibus trium-
phauit. Quod autem vñico verbo dixit,
Fortitudo mea, explicat per partes, di-
cens, Firmamentum, refugium, & libe-
rator. Quasi dicat, meritò dixi, Deum
esse robur meum, quia ipse est firma-
mentum, refugium, & liberator meus.
Cum in tuto sum, ipse mihi est firma-
mentum, cum in periculo versor, ipse
mihi refugium præbet, cum fortè in
manus hostiū incido, ipse me liberat.
Itaque omnibus modis ipse mihi for-
titudo & robur est. In Hebræo pro vo-
ce, diligam, nō est verbum, ahab, quod אהב
simpliciter amare significat, sed ra-
cham, quod significat amare ex inti-
mis visceribus. Pro vocabulo, Firma-
mentum, est, Petra, id est, stabile, ac so-
lidum fundamentum. Pro, refugium,
est, arx, siue munitio, siue munitissima
arx, ad quam tutò quis confugere pos-
sit. Sed Septuaginta Interpretes meta-
phoras exponere voluerunt, idè non
petram, & arcem, sed firmamentum,
& refugium dixerunt. In 2. lib. Reg.
cap. 22. deest illud principium, Diligam
te Domine fortitudo mea. Inci-
pit enim Psalmus, Dominus petra
mea, &c. Sed pulcherrimum illud prin-
cipium videtur non ab alio, quàm ab
ipso Dauide fuisse additum.

Deus meus, adiutor meus, & II.
Sperabo in eo.

E 2 Pro-

III. **Protektor meus, & cornu salutis meæ, & susceptor meus.**

In his duobus versiculis, qui in Hebræo continuantur cum primo versiculo, ex vehementia affectus in Deum repetit Propheta, & inculcat epithera benefactoris sui. Respondent autem tria hæc, Adiutor, protektor, & cornu salutis, tribus illis, Firmamentum, refugium, & liberator. In Hebræo pro voce, adiutor, habetur petra, sicut pro voce Firmamentum, erat etiam petra, sed alia, & alia voce. Itaque vocat Deum adiutorem, quia præbet stabilimentum, ut non cadat, iuxta illud, Statuit supra petram pedes meos. Et merito adiungit, Sperabo in eo, tanquam in firmissimo fundamento. Pro voce, Protektor, habetur in Hebræo, scutum, siue clypeus, sicut pro voce refugium, erat arx. Vtrunque enim protegit, & defendit. Itaque voluerunt Septuaginta Interpretes explicare metaphoras nominum Hebraicorum. Cornu salutis est tam in Hebræo, quam in Græco, & significat robur ad saluandum. Metaphora sumpta ab animantibus cornigeris familiaris est Scripturæ diuinæ. Ps. 131. Producam cornu Dauid, idest, faciam, ut Dauid robustus sit, ac potens instar Tauri cornibus armati, non imbecillis, ac debilis more vituli nondum cornua producentis. Ezech. 29. In illa die pullulabit cornu domui Israel. Michæ. 4. Ponam cornu tuum ferreum. Luc. 1. Erexit nobis cornu salutis in domo Dauid. Dicitur igitur Deus cornu salutis Dauidi, & omnibus Iustis, quia Iusti robustissimi sunt contra omnes hostes; sed robur eorum non in viribus proprijs, sed in Dei adiutorio, & favore consistit. Omnia possum, dicebat Apostolus, in eo qui me confortat. Respondet autem cornu salutis meæ, particula illi, & liberator meus. Liberat enim Deus per cornu salutis, idest, per salutiferam potentiam suam. Denique illud, & susceptor meus, est nomen completens omnia alia, & respondet primo illi nomini, Fortitudo mea.

Quos enim Deus suscipit, liberat, protegit, confirmat.

Laudans inuocabo Dominum, IV. & ab inimicis meis saluus ero.

Est hæc quasi conclusio quædam superiorum verborum: quasi dicat, Ego deinceps assidue Deum laudabo pro tot acceptis beneficijs, & magna fiducia in tribulationibus meis, eundem Deum inuocabo, & sine dubio à quibuscunque hostibus liberabor. In Hebræo habetur, Mehullal, quod rectè S. Hieronymus vertit, Laudatum inuocabo Dominum. Sed si puncta mutantur, eadem litera faciunt, Mehallel, quod significat, laudans inuocabo, ut verterunt Septuaginta. Sententia semper est eadem, nimirum laudabo, & inuocabo, gratias agam pro præteritis, & inuocabo pro futuris.

מהלל

מהלל

Circumdederunt me dolores mortis, & torrentes iniquitatis conturbauerunt me. V.

Dolores inferni circumdederunt me, præoccupauerunt me laquei mortis. VI.

Incipit Propheta iam enarrare accepta beneficia. Ac primum dicit, se quodam fuisse in apertissimo periculo vitæ, quando videlicet, Saul eum quærebat, ut interficeret. Sed hoc periculum vitæ poeticè describit varijs metaphoris adhibitis. Circumdederunt me dolores mortis, idest, vndique talia pericula me oppresserunt, ut de salute corporali desperarem: & ideò tali dolore, idest, mœrore animi affectus fui, quali effici solent, qui mortem sibi imminere vident. Et torrentes iniquitatis conturbauerunt me; idest, inde periculum, & dolor de quo dixi, proficiscebantur, quod multitudo iniquorum instar torrentes me inuaserant, & conturbauerant, quomodo conturbari solent, qui à torrente aquarum deferuntur, & circumuoluuntur. Dolores inferni circumdederunt me: repetit quod dixerat, circumdederunt me dolores mortis. Idem enim est hoc loco, dolor mor-

mortis, & dolor inferni. Nam quia ante Christi passionem omnes, qui moriebantur ad infernum descendebant, quamvis non ad eandem partem inferni; ideo pro eodem accipiebatur, mori, & ad infernum descendere. Circumdederunt, inquit, me dolores inferni, id est, moror animi, qualem patiuntur, quibus imminet discessio ex hoc mundo ad locum mortuorum, qui est infernus. Præoccupauerunt me laquei mortis, reperit quod dixerat, torrentes iniquitatis conturbauerunt me. Sicut enim conturbatio ex multitudine iniquorum in eum insurgentium erat causa Davidi dolorum mortis: ita præoccupatio laqueorum mortis erat causa eidem Davidi dolorum inferni. Vocat laqueos mortis insidias iniquorum, quibus petebatur ad mortem. Itaque sensus horum duorum versiculorum est, Davidem occupatum fuisse ingenti dolore ob imminens mortis periculum, tunc ex inuasionem manifesta inimicorum instar torrentis violenter rapientis, & inuoluentis, tum ex insidijs eorundem inimicorum, instar laqueorum incautos capiendi. Quod attinet ad verba, pro, dolores, in Hebræo habetur, cheule, quæ vox dolores, & fines significare potest. Ideo S. Hieronymus vertit, Funes mortis, & funes inferni. At Septuaginta Interpretes verterunt, Dolores mortis, & dolores inferni: quæ lectio posterior clarior est. Pro, torrentes iniquitatis, in Hebræo habetur, torrentes belial, quod S. Hieronymus vertit, torrentes Diaboli, & Septuaginta Interpretes, torrentes iniquitatis. Verumque recte se habet; nam belial, ad litteram sonat, absque iugo, & in Scripturis sanctis passim inuenitur hæc vox usurpata ad significandos viros iniquos, qui excusserunt iugum legis; vel ipsam iniquitatem, quæ est contraria legi: & quia iniquorum caput est Diabolus; ideo Diabolum quoque hac voce significare solent Hebræi.

VII. In tribulatione mea inuocaui Dominum, & ad Deum meum clamaui.

Belarm. in Psal.

Et exaudiuit de templo sancto suo vocem meam, & clamor meus in conspectu eius, introiuit in aures eius.

Dixerat, se in maximo periculo constitutum fuisse: nunc dicit, se confugisse per orationem ad Deum, & exauditum. In tribulatione mea, id est, in illis magnis angustijs, in quas me coniecerat persecutio Saulis, & in alijs similibus multis, Inuocaui Dominum, in quo tota mea fiducia posita esse solet. Et ad Deum meum clamaui. Repetitio est David familiaris, Et exaudiuit de templo sancto suo vocem meam, id est, oratio mea peruenit usque ad summum celum, quod est templum Dei non manufactum, & verè sanctum, quod violari, polluique nulla ratione potest. Et clamor meus in conspectu eius, introiuit in aures eius. Repetitio est, & aliquo modo declaratio superioris versiculi: quasi dicat, clamosa oratio mea, id est, magno affectu prolata, & in conspectu eius effusa, id est, quam effudi Deum præ oculis habens, introiuit in aures eius, id est, exaudita est. In Hebræo habentur in futuro omnia verba, inuocabo, clamabo, exaudiet, introibit. Sed Septuaginta Interpretes recte verterunt in præterito, inuocaui, clamaui, exaudiuit, introiuit; quoniam lex Hebræica Grammatica id permittit, ut futurum ponatur pro præterito.

Commota est, & contremuit IX. terra: fundamenta montium conturbata sunt, & commota sunt, quoniam iratus est eis.

Incipit iam describere effectum exauditionis diuinæ, qui fuit auxilium de cælo aduersus inimicos suos, ex quorum interitu ipse tandem non solum pericula euasit, sed etiam Regnum adeptus est. Describit autem iram Dei aduersus hostes suos poetico more: sicut enim cum irascitur Rex aliquis, & bellum parat, totum eius Regnum turbatur; ita cum irascitur Rex totius

Mundi, totus Mundus turbatur, ac potissimum tria visibilia elementa, terra, aer, & aqua. Non significat hoc loco David re ipsa terram, & aerem, & aquam ita perturbata fuisse, ut verba sonare videntur: sed significat, talem esse Dei iram, ut possit continuò tremefacere terram usque ad ima fundamenta; & in aere continuò excitare ventos, nubesque tenebrosas, & tonitrua, atque fulgura: denique fontes, & flumina, & maria ita siccare, ut appareant caavernæ terræ, & fontium origines. Incipit ab elemento terræ, ac dicit, commota est, & contremuit terra, fundamenta montium commota sunt, quoniam iratus est eis; hoc est, quando Deus irascitur terræ, continuò tota mouetur, & contremiscit, non solum in superficie, sed usque ad ima montium fundamenta. Nec solum quando Deus irascitur, sed etiam quando præsentiam suam manifestat in terra, concussio terræ consequitur, quasi tremantis, & reuerentis Maiestatem Creatoris. Sic in Resurrectione Christi terræmotus factus est magnus; & cum idem Christus moriens infra terram descensus erat, terra mota est. Et David in alio Psalmo, A facie Domini mota est terra. In Hebræo non habetur, quoniam iratus est eis, sed, quoniam ira ei, idest, quoniam iratus est. Itaque secundum textum Hebraicum terra, & montes contremiscunt, non quia Deus ipsis montibus iratus est, sed quoniam absolutè iratus est. At Septuaginta vertentes, quoniam iratus est eis, significare voluerunt, iram Dei esse contra terram, & terræ montes, ratione hominum qui in terra habitant; alioqui nulla est ratio, cur Deus terræ, & montibus irascatur.

X. Ascendit fumus in ira eius, & ignis à facie eius exarsit, carbonēs succensī sunt ab eo.

Adhuc pergit explicare operationē Dei in terra, quando vult Deus ostendere in ea præsentiam suam. non enim solum terram tremere facit, sed etiam ardere, ac fumare, quod accidisse describitur Exod. 20. Hebr. 12. quando

Deus in monte Sion legem dedit. Ascendit, inquit, fumus in ira eius, idest, ira Dei excitavit in terra calorem vehementem, unde ingens fumus ascendit. Et ignis à facie eius exarsit; nec solum calorem, & fumum, sed etiam incendium magnum excitavit. Carbonēs succensī sunt ab eo, idest, ira Dei, siue facies Dei terram respiciens ita fecit eam ardere, ac si totam in carbonēs ardentes conuertisset. Alibi etiam dicit, Qui respicit terram, & facit eam tremere, qui tangit montes & fumigant.

Inclinavit cælos, & descendit, XI. & caligo sub pedibus eius.

Transit à terra ad aerem: & describit ea, quæ fiunt in aere, quando Deus iram, vel præsentiam suam demonstrare vult. dicitur Deus inclinare cælos, quando demittit nebulam, in qua ipse apparet. Videtur enim nebula, quasi pars cæli. ordinariè autem Deus per nebulam se ostendere solitus est, ut patet ex lib. Num. cap. 9. 3. Reg. 8. Matth. 17. & alibi. ait igitur, Inclinavit cælos, & descendit, idest, densa nebula, per eam se manifestavit. & caligo sub pedibus, idest, ita Deus in nebula habitavit, quasi caliginem sub pedibus haberet: sunt omnia Metaphorica, ex quibus intelligimus, Deum inuisibiliter præsentem nobis se facere.

Et ascendit super Cherubim, XII. & volavit, volavit super pennas ventorum.

Pergit describere operationem Dei in aere, quando iram suam manifestare hominibus vult. Ponit autem nobis ante oculos Deum, quasi hominem armatum insidentem curruī velocissimè discurrenti, & ex eo sagittas in hostes suos emittentem. Currus Dei sunt nubes, iuxta illud Psalmi 103. Qui ponis nubem ascensum tuum, qui ambulas super pennas ventorum. Equi velocissimi sunt venti, qui nubes huc illucque deferunt. Aurigæ sunt Angeli, quos Cherubim vocat. sagittæ sunt fulgura, & fulmina, quæ ex nubibus iaciuntur. Et verè mirabilis est ista descriptio.

Nulli

Nulli enim sunt currus agiliores nubibus, nulli equi velociore ventis, nulli aurigæ peritiores Angelis, nulla iacula, quæ cœlestibus fulminibus conferri possint. Et præterea currus isti ex loco superiore pugnant, ut lædere possint, & lædi non possint. Ascendit, inquit, super Cherubim, idest, nō solum Deus utitur nebula, quasi domo, vel tētorio; sed etiam utitur nubibus, quasi curribus; & Angelis Cherubim, quasi Aurigis; & ventis, quasi equis. dicitur autē ascendere super Cherubim, ut intelligamus, Deum non regi ab Auriga, sed ipsum præsidere Aurigæ, & principale esse tū ipsius currus, tū Aurigæ motorem, atque rectorem. Itaque dicitur Deus ascendere super Cherubim, & volare super pennas ventorum, quia utitur ministerio Angelorum in mouendis nubibus, quæ sunt veluti currus aerei, & velocissimi, quippe qui trahuntur a ventis, veluti equis pennigeris, ac per hoc non ambulant, sed volant, & volant celerius omni volucre.

XIII. Et posuit tenebras latibulum suum, in circuitu eius tabernaculum eius; tenebrosa aqua in nubibus aeris.

Ne putaretur Deus visibiliter in nubibus, tanquam in curru eminere, declarat Propheta Deū inuisibiliter adesse, & ea de causa tenebrosis nubibus uti, ut eo veluti symbolo inuisibilem se esse demonstret. Est etiam in his verbis elegantissima, & poetica metaphora. Posuit, inquit, tenebras latibulum suum, idest, latet Deus in tenebrosis nubibus, quasi in loco abdito; siue, effecit, ut nubes tenebrosa pro latibulo sibi deseruirent. In circuitu eius tabernaculum eius, idest, eadem nubes sunt quasi tabernaculum Deo, quo ipse undique tegitur. Tenebrosa aqua in nubibus aeris, idest, tabernaculum, de quo dixi, nihil est aliud, nisi nubes tenebrosa, qualis est, cum est disposita proximè, ut in aquam vertatur. Tunc enim est nubes valde densa, & aquea, ut non improprie aqua dici possit in nube existens.

Præ fulgore in conspectu eius XIV.
nubes transierunt, grando, & carbones ignis.

Declarat quomodo Deus ex nubibus, quasi ex curribus suis armatis pugnet, ac dicit, iubente Deo nubem scindi, & inde prodire grandinem, & fulgura, instar carbonum ignitorum. Elegantissimè autem dicit, præ fulgore in conspectu eius nubes transierūt, quasi scissura nubiū procedat a fulgore Dei intus latentis, quasi nubes ferre non possit Diuinum fulgorem, & ideo in conspectu Dei rumpatur, & dissolvatur, atq; ex ea parte evanescat, & transeat. Præ fulgore in conspectu eius nubes transierūt, idest, à fulgore Dei præsentis concussa nubes, in conspectu eiusdem Dei, transierunt disruptæ, & dissolutæ. Grando, & carbones ignis, supple, ex ea scissura processerunt grædines, & fulgura. Re ipsa hoc accidit tēpore Pharaonis, ut habemus in lib. Exod. cap. 9. Et grādo, inquit, & ignis mista pariter ferebantur. Similia in bello Iosue contra quinque Reges, Ios. 10. nec non in bello M. Antonini Imperatoris cōtra Germanos, de quo vide Tertullianum in lib. ad Scapulā, & in Apologetico cap. 5.

Et intonuit de cælo Dominus, XV.
& altissimus dedit vocem suam, grando, & carbones ignis.

Idē repetit alijs verbis, ex nubis dissolutione oritur fragor ingens, qui dicitur tonitrus, cum quò sæpè fulmina coniuncta esse solent. Fragorem illum eleganter vocat Propheta vocem Dei, nō solum quia Deus est causa fragoris illius, sed etiam quia tam ingens, & tā terrificus est sonus ille, ut soli Deo tribuendus videatur, quasi propria vox eius. Hinc est illud ipsius Dei ad Iob; Si habes brachium sicut Deus, & si voce simili tonas. Iob 40. Illud autem, grando, & carbones ignis, in nōnullis Græcis textibus nō habetur, in Hebræo habetur, & posset legi, grandinem, & carbones ignis, ut aliqui legūt; sed noster Interpres rectè vertit, grando, & car-

E 4 bones

bones ignis, quia sunt omnino eadem voces, quæ in versiculo superiore. Itaque oportet hic etiã aliquid subintelligere, ut sensus sit, Altissimus dedit vocem suam, ex qua voce processit etiam grãdo, & fulmina, quasi carbones igniti.

XVI. Et misit sagittas suas, & dissipavit eos, fulgura multiplicavit, & conturbavit eos.

Explicatio est superiorum, ac præsertim illius vocis carbones ignis, quasi dicat carbones ignis prodierunt ex nubium scissione, quia Deus misit sagittas suas, idest, fulgura, eaquæ multiplicavit, & eo modo ininucos suos dissipavit, & conturbavit.

XVII. Et apparuerunt fontes aquarum, & reuelata sunt fundamenta orbis terrarum.

Hic iã loquitur de operatione Dei in aquis, quæ operatio est mirabilis, & repentina exsiccatio aquarum, qualis facta est in mari rubro, & Iordane flumine, ut habemus Exod. 14. & Ios. 4. ex qua exsiccatione patuit profundũ Maris, & fluminum, quod profundum vocat Propheta fundamentum orbis terrarum, quia est pars infima totius terræ. Pro voce, Fontes, in Hebræo est, **פְּאִי** aphiche; Quod significat decursus, seu torrentes. Sanctus Hieronymus vertit, effusiones aquarum; sed cum sit nomẽ generale, rectè potuerunt Septuaginta Interpretes reddere, fontes. Sensus igitur est. Et apparuerunt fontes aquarum, idest, iussu Dei siccatis aquis apparuit fundum fontium, siue fluminũ, siue etiam Maris, & sic reuelata sunt, & discooperta fundamenta, idest, partes imæ orbis terrarum.

XVIII. Ab increpatione tua Domine, ab inspiratione spiritus iræ tuæ.

Explicat causã exsiccationis aquarum. Apparuerunt, inquit, fontes, seu decursus aquarum. Ab increpatione tua Domine, idest, quia tu Domine increpasti aquas, & illæ continuo disparuerunt. Quomodo autem increpaue-

rit, explicat, dicẽs, Ab inspiratione spiritus iræ tuæ. Mirabili metaphora, & planè poetica vocat Propheta ventũ, cuius ministerio siccatae sunt aquae, spiritum iræ Dei, & increpationem Dei. Nam vento vrẽte siccatas fuisse aquas maris rubri à Deo, testatur scriptura Exod. 14. Itaque quod propriè dici poterat, tu Domine immisso vento vehementi, siccasti aquas maris, dicit elegantissima metaphora, Tu Domine increpasti aquas; quia impediabant transitum populi tui, & spiritu iræ tuæ sufflasti in eas; & illæ continuo fugerunt; ut alibi dicit, Quid est tibi mare quod fugisti? Hunc versiculum cum superiore coniungunt codices Hebraici, quia sententia prioris ab hoc posteriore pendet. sed rectè Septuaginta Interpretes separauerunt, quia viderunt ex ratione metrica ita esse faciendum. neque enim absurdum est, ut sua sententia duobus versibus contineatur.

Misit de summo, & accepit me, **XIX.**
& assumpsit me de aquis multis.

Iam redit ad beneficium Dei enarrandum, idest, ad liberationem suam ab inimicis. Omnia enim quæ dicta sunt à versiculo nono, vsque ad hunc decimum nonum, pertinent ad declarationem potentiae Dei. Et quia dixerat initio, torrentes iniquitatis conturbauerunt me: & in versiculo præcedente dixerat, Deum spiritu suo siccare solitum aquas, & facere, ut appareat fundum fluminum, & maris; ideo in eadem metaphora persistens dicit, Misit de summo & accepit me, idest, misit manum suam ex alto loco vsque in profundum torrentis, & inde accepit me; & sic eduxit me de aquis multis, idest, oppressum tribulationibus, mirabiliter liberauit. In Hebræo habentur verba futuri temporis, mittet de summo, & accipiet me. sed, ut sæpè diximus, non ignorabant Septuaginta Interpretes tempora confundi secundum regulas linguæ Hebraicæ, & vnũ pro altero sæpè poni. Hic certè magis quadrat tempus præteritum.

Eri-

XX. Eripuit me de inimicis meis fortissimis, & ab his, qui oderunt me, quoniam confortati sunt super me.

Quod metaphoricè dixerat versu superiore, proprijs verbis dicit in hoc versiculo. Illud, quoniam confortati sunt super me, debet exponi per tempus imperfectum, idest, quoniam robustiores me erant, & sic vertit Sanctus Hieronymus. redditur enim ratio, cur necessarium fuit auxilium Dei potentius, quia videlicet inimici Davidis, ipso Davide fortiores erant. In Hebræo, & Græco codice habetur futurum, eripiet me. cæterum nostra lectio habetur etiam in antiquis libris, & eam exponunt Hieronymus, & Augustinus. Quare verisimile est in Græco fuisse olim in præterito. Hebraicum autem rectè potest accipi pro præterito.

XXI. Præuenerunt me in die afflictionis meæ, & factus est Dominus protector meus.

Inculcat alijs verbis beneficiû Dei. Præuenerunt me in die afflictionis meæ, idest, nulla iniuria à me lacerati, ipsi primi fuerunt ad nocendum; vel, antequam præcauere possem me adorti sunt, præueneruntq. incautum: sed Dominus pro me vigilauit, & fecit, ut eorum diligentia nihil mihi nocere posset.

XXII. Et eduxit me in latitudinem, saluum me fecit, quoniam voluit me.

Iterum atque iterum repetit liberationem suam, ut ostendat, sibi altè in memoria infixû Dei beneficium. Eduxit me in latitudinem, idest, de angustijs tribulationum liberatum quasi in latum campum eduxit, ut liberè iam spaciari possim sine metu vllò insidiatorum. Saluum me fecit, quoniam voluit me; idest, saluum me fecit à tot imminentibus periculis, ad id potissimum, quia complacuit ei, idest, ob immensam eius misericordiam, qua me dilexit. Nam etiam si paulo post allegabit merita sua, tamen ipsa merita

nostra dona Dei sunt, quod sanctus Propheta non ignorabat.

Et retribuet mihi Dominus secundum iustitiam meam, & secundum puritatem manuum mearum retribuet mihi.

Quia custodiui vias Domini, nec impiè gessi à Deo meo.

Quoniam omnia iudicia eius in conspectu meo, & iustitias eius non repuli à me.

Et ero immaculatus cum eo, & obseruabo me ab iniquitate mea.

Et retribuet mihi Dominus secundum iustitiam meam, & secundum puritatem manuum mearum in conspectu oculorum eius.

Laudauit Deum de beneficio liberationis ab inimicis. Nunc addit, etiam in futurum se perpetuo liberandum, neq. id ex sola misericordia, sed etiam ex iustitia futurum, propterea quod iuste vixerit, & viuere deinceps in animo habeat. Deus enim iustus est, & iustos amat, & adiuuat, ac protegit. Et retribuet mihi, inquit, secundum iustitiam meam, idest, retribuet mihi, ut hactenus fecit; multa bona, prout iustitia mea meretur. Et secundum puritatem manuum mearum retribuet mihi, idest, sicut ego iustitiam habeo, non solum in corde, sed etiam in manibus, idest, iustus sum interior, & exterior; iustum habeo cor, & iusta opera; ita Deus mihi bona retribuet coram se, & coram hominibus, interior, exteriusq. custodiet. At præsumptio videtur iustitiam suam prædicare. Non est præsumptio, quando sincerè id agitur, & agnoscitur Deus auctor bonorum nostrorum. Sic etiam merita sua coram Deo pronūciauit Nehemias 2. Esd. 5. Ezechias Isai. 38. Esther c. 14. At videtur falsum, quod David hoc loco dicit. Nam cum hæc diceret, Commiserat adulterium, & homicidium. Et præterea ipse alibi, dixit, Delicta quis intelligit? ab oculis meis munda me Domine. Et alibi:

Non

Non iustificabitur in cōspectu tuo omnis viuens. Aliqui propter hanc objectionem existimant, Dauidem non loqui de iustitia sua absolutè: sed de iustitia causæ, quam habebat cum aduersarijs. Alij existimant Dauidem loqui solum de iustitia Religionis, idest, quòd semper permanferit in vera religione, nec vnquam idolis cultum adhibuerit. Sed repugnant his opinionibus verba illa, Quia custodiui vias Domini. item, Omnia iudicia eius in conspectu meo. item, Ero immaculatus cū eo, &c. Dicendum igitur est, Dauidem commemorare iustitiam suam, quæ in eo sita erat, vt sincero corde Deum coleret; & propositum stabile haberet, nunquam præuaricandi legem Domini, & si fortè secus ageret, continuo resipisceret, & ex corde reuerteretur ad Deum. Illud autem, Delicta quis intelligit? de peccatis venialibus intelligi potest, quæ iustitiæ non repugnant. Illud verò, non iustificabitur in conspectu tuo omnis viuens, intelligitur de iustitia, quæ sine gratia Dei præueniente haberi credatur. Sic enim nullus coram Deo iustificabitur, quia quicumque iustus est, gratia Dei iustificatus est.

XXVIII. Cum sancto sanctus eris, & cū viro innocente innocens eius.

XXIX. Et cum electo electus eris, & cum peruerso peruerteris.

Reddit rationem, cur secundum iustitiam suam sibi retribuendum à Deo dixerit, quia nimirum Deus reddit vni cuique secundum opera sua. Alloquitur autē ipsum Deum, & ait, Cum sancto sanctus eris, idest, cum homine misericordi & pio, piè ac misericorditer ages, siue pium ac misericordem te præbebis. Nam vox Hebræa, chasid, pro qua nos habemus, sanctum, propriè misericordem significat. Et pro, sanctus eris, in Hebræo est verbum vnicum coniugationis hitpaël, quod propriè significat misericordem se red dere, vel exhibere. Itaque non est sensus, si nos erimus sancti, Deum quoque

fore sanctum: sed, si nos erimus sancti, Deum nobiscum sanctè, idest, misericorditer acturum. Eodem modo intelligenda sunt cætera, cum innocente innocens eris, idest, ei qui nemini nocet, Deus se innocentem præbebit, idest, non ei nocebit, neque noceri ab alijs sinet. Cū electo electus eris, idest, cum homine sincero & puro, id enim propriè significat vox Hebræa nabar, purum te exhibebis, idest, sincerè, & candidè ages. Et cum peruerso peruerteris, idest, ei, qui non est misericors, misericordiam non præstabis; ei, qui nocet, nocebis; qui non sincerè agit, sed callidè supplantat, eum tu callidè, idest, sapienter supplantabis. Est autem hic obseruandum, vbi dictum est, Cum sancto sanctus eris, cum innocente innocens eris, cum electo electus eris; eandem vocè Deo tributam fuisse: at vbi dictum est, cum peruerso peruerteris, in Hebræo non esse eandem vocem. De homine dictum est, hiches, quod propriè peruersum significat. De Deo autem, thipattel, quod significat luctari, & conari in contrarium. Itaque sensus est, si homo peruersus fuerit, Deus non erit in se peruersus, vel peruersè aget; sed contra peruersum hominem luctabitur magno molimine, vt illum planè euertat, & ab omni spe sua cadere faciat.

Quoniam tu populum humilè saluum facies, & oculos superbiorum humiliabis. XXX.

Explicat Propheta duos superiores versiculos, quasi dicat, Cum sancto sanctus eris, & cum innocente innocens, & cum electo electus, quia populum humilem saluum facies, idest, quia humilitas, quæ est custos omnium virtutum, tibi gratissima est, & omnibus humilibus das gratiam; cum peruerso autem peruerteris, quia oculos superbiorum humiliabis, idest, quia superbia, quæ est regina vitiorum, tibi summo perè displicet; & ideo superbis omnibus resistis, eosq. deijs, & humilias. Nominat autem oculos, præter cætera mem-

נָבַר

עָקַשׁ
תִּתְּפֹתֶל

חֲסִיד

תִּתְּפֹתֶל

membra, quia in oculis, ac potissimum in supercilijs arrogantia cernitur.

XXXI. Quoniam tu illuminas lucernam meam Domine: Deus meus illumina tenebras meas.

Quia Propheta Dauid videbatur satis magnifice de sua iustitia, & puritate loquutus, ostendit unde habuerit iustitiam, & alia dona; & hinc maxime Deum laudat, quod ab illo sit lumen, & fortitudo, & omnia bona. Quoniam, inquit, tu illuminas lucernam meam Domine, idest, à te habeo principium omnis boni, quod est lumen ad discernenda vera bona à falsis, & vera mala à falsis. Primum enim vulnus ex peccato originali naturæ inflatum est ignorantia veri boni; & ideò prima curatio à lumine Diuino incipit. Tu, inquit, illuminas lucernam meam, idest, oculum interiorum cordis mei tu solus illustras. Deus meus illumina tenebras meas, idest, tu pater luminum, tu lux vera, in quo tenebræ non sunt ullæ, sicut hactenus capisti illuminare interiores oculos cordis mei, ita perge illuminare tenebras meas, idest, expellere omnes tenebras meas. Nam sine gratia Dei illustrante, quod attinet ad supernaturalia mysteria, meræ tenebræ sunt in corde nostro. Nam non sumus sufficiens cogitare aliquid ex nobis tanquam ex nobis. In Græco habetur, illuminabis tenebras meas. In Hebræo, illuminabit tenebras meas. Nostra lectio, illumina tenebras meas, habetur in antiquis libris sanctorum Hieronymi, & Augustini; sensus autem semper est idem.

XXXII. Quoniam in te eripiar à tentatione, & in Deo meo transgrediar murum.

Particula, Quoniam, sæpe redundat in oratione Hebraica, sicut etiam particula, &, quæ sæpe ponitur initio versuum, vel etiam librorum. Id admonendum fuit, ne anxie nimis quæzatur ratio harum particularum. Dixerat Propheta, se à Deo habuisse lumen,

quod est principium operum bonorum, veræque iustitiæ: nunc addit, habuisse fortitudinem, & robur ad vitanda mala & facienda bona, quæ ex Diuino lumine cognouerit vitanda, vel facienda. In te, inquit, eripiar à tentatione, idest, fretus auxilio tuo, quo fortis efficior, superabo omnes tentationes, omniaque mala vitabo. & in Deo meo transgrediar murum, idest, eiusdem Dei confisus auxilio, atque ab eodem accepta fortitudine omnia potero, quantumuis difficilia, quale esset transcendere altissimum murum. In Hebræo pro illis verbis, eripiar à tentatione, habetur, aruz ghedud, idest, percurrā exercitum, siue (vt S. Hieronymus reddit) percurrā accinctus. Videntur Septuaginta Interpretes sensum reddidisse, non verba. Nam percurrere exercitum aduersariorum, & nullum vulnus accipere, idem est, quod eripi à iaculis hostium, quæ iacula, tentationes significant, vt Apostolus interpretatur, cum ait, In quo possitis omnia tela nequissimi ignea extinguere. Sic etiam percurram accinctus inter medios hostes illæsus, idem significat, quod eripiar à tentatione quando maxime opus erit.

אֲרֻז
גִּדּוּד

Deus meus impolluta via eius, **XXXIII.** eloquia Domini igne examinata, protector est omnium sperantium in se.

Reddit rationem euri à Deo acceperit lumen, & vires, & cur in eo tantopere confidat, quia Deus bonus, & verax protector est omnium in se confidentium, & quia idem ipse est solus verus Deus, & verus Dominus, à quo bona ista expectari possunt. Deus meus, impolluta via eius, idest, Deus meus, cuius via impolluta, idest, Deus, qui sanctissimus est, & viam impollutam ambulat, idest, operatur iustissime. Eloquia Domini igne examinata, idest, promissa Domini certissima, & probatissima, vt aurum igne examinatum: iste, inquam, Deus impollutus, & cuius promissio est certissima. protector est omnium sperantium in se. Ex Hebræo clarior

clarior sensus habetur, in quo textu legitur, eloquium in numero singulari, & pro voce, Protector, est scutum. Ex quo apparet, tam Deum, quam eius eloquium dici scutum confidentium in Deo. Sic enim ad litteram verti posset lectio Hebraica, Deus immaculatus in via sua, eloquium Domini igne examinatum, scutum est omnium sperantium in se. Sed quia Septuaginta Interpretes posuerunt eloquia in numero multitudinis, & pro voce, scutum, posuerunt, protector, inde obscurata est sententia, quæ ex Hebræo dilucidanda est.

xxxiiii. Quoniam quis Deus præter Dominum? aut quis Deus præter Deum nostrum?

Est altera ratio, ut paulo ante diximus, cur in Deo sit cōfidendum, & cur ab eo solo lumen, & robur expectandum sit; quia ipse solus est verus Deus. In Hebræo habetur, Quis Deus præter Dominum? aut quis petra, præter Deum nostrum? ex quo intelligimus, Deum nostrum solum esse verum Deum, & quia solus est verus Deus, solum ipsum esse veram petram, firmam, & stabilem, in qua tuto confidere, & quiescere possimus; & omnes, qui in re alia cōfidunt, necesse esse ut decipiantur, & confundantur.

xxxv. Deus, qui præcinxit me virtute, & posuit immaculatam viam meam.

Declarat nunc in particulari dona à Deo accepta, per quæ ab hostibus omnibus liberatus ad Regnum peruenit. Ac primum dicit, se à Deo accepisse robur, & innocentiam, quæ duorarissime coniunguntur. Viri enim robusti proni sunt in iniurias inferendas. David autem verè fortissimus, & innocentissimus erat, ut ne hostem quidem suum Saulem occidere vellet, cum facillimè posset. Deus, inquit, præcinxit me virtute, id est, viribus, ac robore me donauit, & posuit immaculatam viam meam, id est, simul probitatem vitæ mihi concessit.

Qui perfecit pedes meos, tanquam ceruorum, & super excelsa statuens me. xxxvi.

Qui docet manus meas ad prælium, & posuisti ut arcum & arcum, brachia mea. xxxvii.

Describit in particulari fortitudinem suam, de qua dixerat, qui præcinxit me virtute, ac dicit, se accepisse à Deo miram celeritatem in pedibus, & miram artem bellandi in manibus, & mirum robur in brachijs. Dicit sibi pedes ad currendum perfectos, quasi ceruorum, & super excelsa collocatum, id est, ea celeritate pedum facile montes altissimos conscendisse. Quod verificatum est, quando Saulem fugiens, habitabat in altissimis, & præruptis montium cacuminibus. Addit, se doctas manus ad prælium habuisse, & brachia quasi crea, in quibus robur, & ars militaris significatur. De quibus nemo dubitare potest, qui legerit primum, & secundum librum Regum. Nam de arte manuum testis esse potest lapis ex funda in fronte Goliath infixus: de viribus brachiorum testes sunt viri, & leones, quos sola vi brachiorum David interfecit. In Hebræo habetur, nichata, conteritur, ubi nos habemus posuisti. Sed Septuaginta Interpretes non legerunt, nichata, sed natatta, quod est, dedisti, siue posuisti. Itaque corrupta videtur casu aliquo lectio Hebraica moderna, neque enim dubitari potest, quin Septuaginta Interpretes emendatos codices habuerint, eosque rectissime intellexerint.

Et dedisti mihi protectionem salutis tuæ, & dextera tuâ suscepisti me. xxxviii.

Declarat nunc innocentiam, de qua dixerat, Posuisti immaculatam viam meam. Nam quia dono Dei innocenter David vivebat, ideo illum Deus assidue protegebat, ut nunc dicit, Dedisti mihi protectionem salutis tuæ. Patrum enim profuisset celeritas pedum, & robur brachiorum, & ars pugnandi aduer-

aduersum Regem, & regnum integrum exercitū, nisi adfuisset protectio salutis Dei, idest, protectio Diuina saluās, & dextera Dei suscipiēs, & sustentans.

XXXIX. Et disciplina tua correxit me in finem, & disciplina tua ipsa me docebit.

Hoc etiam pertinet ad innocentiam, siue immaculatam viam Davidis ostendendam. Non solum, inquit, protectio tua mihi adfuit, sed etiam disciplina tua me correxit, idest, eruditio, quæ ex lege tua habetur, illa me direxit, ne errarem, & si quando in periculo essem errandi, illa diligēter inspecta, & considerata, me correxit, idēq. perseveranter vsque in finem. Eadem quoque disciplina legis tuæ deinceps me docebit. Posset etiam hæc disciplina significare paternam castigationem, qua Deus per aliquas temporarias calamitates Davidem correxit, si quando ob humanam fragilitatem deliquit. In Hebræo non habetur hic versiculus, sed loco totius huius versiculi habentur hæc pauca verba, Et mansuetudo tua multiplicauit me. Fortasse idem est sensus. potest enim sic exponi lectio Hebraica, mansuetudo tua, idest, lenis, & paterna castigatio, multiplicauit me, idest, auxit me scientia. Nam

רַב־בָּ

XXXX. Dilatasti gressus meos subtus me, & non sunt infirmata vestigia mea.

Pergit narrare victorias suas, quæ sunt omnia beneficia Dei. Dilatasti, inquit, gressus meos subtus me, idest, fecisti me magnis passibus progredi, & non sunt infirmata vestigia mea, id est, nec propterea fatigatus destiti à cursu. In Hebræo habentur hæc in futuro, dilatabis, &c. sed ex more linguæ sæpe futurum ponitur pro præterito.

XXXI. Persequar inimicos meos, & comprehendam illos, & non conuertar donec deficient.

Confringā illos; nec poterunt stare, cadent subtus pedes meos. **XXXXII.**

Hæc non videntur propriè pertinere ad futurum tempus, sed ad præteritum, vt ex præcedentibus, & sequentibus colligitur. Et sicut Septuaginta Interpretes. Dilatabis gressus meos, verterunt, dilatasti gressus meos; ita potuissent reliqua vertere, & ex futuris præterita facere. Sed retinenda est lectio, vt facer, & subintelligendum verbum, dixi, vt sensus sit, Dilatasti gressus meos, & nō sunt infirmata vestigia mea, ideo magna spe concepta dixi apud me, persequar inimicos meos, &c.

Et præcinxisti me virtute ad bellum, & supplantasti insurgentes in me subtus me. **XXXXIII.**

Hinc apparet, Prophetam loqui de præterito. Sicut, inquit, dixi persequar inimicos meos, &c. ita factum est Deo adiuuante. Tu enim Deus præcinxisti me virtute, idest, robore ad bellum, & tu supplantasti, idest, cadere fecisti subtus me eos, qui in me insurgabant. Illud, præcinxisti virtute, est frequens in Scriptura; Accinctus potentia, qui conturbas profundum maris. Induere fortitudinem brachium Domini. Indutus est Dominus fortitudinem, & præcinxit se. Sedete in ciuitate, donec induamini virtute ex alto. Significat autem præcipua arma non consistere in gladio, & lorica, sed in viribus, & robore; & ideo non est auctor victoriæ, qui militē induit gladio, & lorica; sed qui viribus, & robore illum induit.

Et inimicos meos dedisti mihi dorsum, & odientes me disperdisti. **XXXXIV.**

Idem repetit alijs, & alijs verbis, vt magis declaret, & laudet beneficium Dei. Sensus versiculi perspicuus est, significat enim à Deo factum esse, vt inimici David fugerent, & eo modo dorsum feriendum præberent. Sed verba duriusculè sonant. Sanctus Hieronymus vertit, & inimicorum meorum dedisti mihi dorsum.

Clama-

XXXV. Clamauerunt, nec erat qui saluos faceret, ad Dominum, nec exaudiuit eos.

Reddit aliam causam victoriæ: quia non solum Deus exaudiebat orationes eius, sed nō exaudiebat orationes aduersariorum ipsius, quamuis ipsi quoque Dominum inuocarent.

XXXVI Et comminuam eos, vt puluerem, ante faciem venti, vt lutum platearum delebo eos.

Videtur de reliquijs inimicorū suorum loqui, quasi dicat, iam victoriam de inimicis meis retuli; sed si quæ fortè reliquæ supersunt, comminuam eas in minutissima frusta; & projiciam, vt projici solet puluis à vëto, & auferam eos de terra, vt sicari solet lutum platearum flante vento vehementi.

XLVII. Eripies me de contradictionibus populi, constitues me in caput gentium.

Iam hoc factum erat; nam antequam hunc Psalmum Dauid componeret, liberatus fuerat à varijs populi contradictionibus, & defectionibus, & constitutus erat in caput gentium, idest, in Regni solium eleuatus. Itaque vel exponenda sunt verba futuri temporis, pro verbis temporis præteriti, quod est vsitatum in lingua Hebraica: vel certè significatur continuatio beneficij. Quasi Propheta dicat, in posterum, vt hætenus fecisti, eripies me à rebellionibus, & constitues in folio meo, si fortè deijci ab eo contingat.

XLVIII. Populus, quem non cognoui, seruiuit mihi, in auditu auris obediuit mihi.

XLIX. Filij alieni mentiti sunt mihi, filij alieni inueterati sunt, & claudicauerunt à semitis suis.

Non sine causa postulat se eripi à contradictionibus populi sui; quia maiorem fidem, & obedientiam expertus erat in quibusdam Gentilibus; quàm in filijs populi Israel. Quæ est etiam

prophetia manifesta de Christo, cui Gentiles adhæserunt, & à quo Hebræi defecerunt. Populus, quem non cognoui, idest, Gabaonites, Geti, & alij, quos non cognoui pro fratribus, cum essent Gentiles, seruiuit mihi, in auditu auris obediuit mihi, idest, pròptissimè mox audito Imperio obedierunt. Filij autem alieni, idest, filij adulterini, quo ad mores, mentiti sunt mihi, idest, deceperunt me; ficto corde seruierunt; Inueterati sunt, idest, defluerunt à me tanquam folia arétia: Id enim significat vox Hebræa & claudicauerunt à semitis, idest, non rectè, & fideliter mecum inceserunt. Hæc significant rebelliones sub Absalon, sub filio Bochri, & alias. In Hebræo, pro, claudicauerunt à semitis suis, habetur, contrahetur in angustijs suis, vt vertit S. Hieronymus, vel, expauescent à carceribus suis, vt vertit Pagninus. Sed sciendum est, vocem, iachregu, non haberi, nisi in hoc Psalmo; & idè si licuit Pagnino vertere, expauescent, & S. Hieronymo, contrahentur multo magis licuit Septuaginta Interpretibus vertere, claudicauerunt. Imò mirū est cur posteriores ausi sint recedere à versione antiquissimorū Interpretū in ea voce, quæ non habetur alibi in Scripturis, præsertim cum interpretatio Septuaginta maxime cohareat cū reliquis partibus huius versiculi. Porro altera vox, Misgheroth, significat propriè locū angustum, vel clausum à verbo, sagar, quod est claudere; & propterea S. Hieronymus vertit angustias, Pagninus carceres, & Septuaginta semitas: nā semitæ sunt viæ angustæ. Itaq; sensus est, filios adulterinos, qui ficto corde seruiunt, claudicare à semitis, idest, declinare à semitis, per quas recto pede ambulandum fuisset.

Viuit Dominus, & benedictus L. Deus meus, & exaltetur Deus salutis meæ.

Concludit Psalmum laudans Deum. Viuit Dominus, idest, nunc apparuit Dominū viuere, & sicut viuit, ita semper viuat, & exaltetur Deus auctor salutis meæ.

Dens

יְהוָה

בְּסִגְרוֹת
סִגְר

LI. Deus qui das vindictas mihi, & subdis populos sub me, liberator meus de inimicis meis iracundis.

Exaltetur, inquit, Deus, qui vindicavit iniurias mihi factas, & subiecit mihi populos, qui rebellauerant, & liberavit me de insidijs, & impetu inimicorum furentium, quales fuerunt Saul, & Absalon. Pro voce, iracundis, habetur in Hebræo Af, quam moderni vertunt, & vel etiam. Sed cum ea vox sæpè significet nasum, & nasus in Scriptura passim ponatur pro iracundia, quæ ex nasi immutatione cognoscitur, rectè Septuaginta Interpretes verterunt, iracundis, idem est enim phrasi Hebraica, ab inimicis meis nasi, idest, iracundia, & ab inimicis meis iracundis.

LII. Et ab insurgentibus in me exaltabis me, à viro in quo eripies me.

Precatur sibi conservationem diuinorum beneficiorum, nimirum exaltari ab insurgentibus in se, ut frustra niantur, cum pertingere tam altè non possint, & liberari ab omni homine in quo. Particula, &, in principio versiculi potuisset omitti; nam in Hebræo, & Græco non habetur, nec eam habet S. Augustinus. Videtur in nostro textu hæsisse ex altera interpretatione vocis, Af, quæ nasum significat, & etiam particulam, &: & fortasse erat in margine: sed nihil officit sensui.

LIII. Propterea confitebor tibi in nationibus Domine, & nomini tuo psalmum dicam.

Hac de causa, inquit, confitebor, id est, laudabo confitens beneficia tua, idque non clam, sed palam, & coram multitudine populi ut omnes discant confidere in Domino.

LIIII. Magnificans salutes Regis eius, & faciens misericordiã Christo suo David, & semini eius usque in sæculum.

Hæc conclusio per se manet, & sensus est, sit Dominus magnificans salutes Regis sui, idest, augeat, & multiplicet salutem corporis, & animæ, & omnium rerum Regis, quem ipse Deus sibi elegit: & faciat perpetuam misericordiam Davidi, quem vngi iussit in Regem, & omnibus successoribus eius usque in æternum. Quæ precatio impleta est in Christo Iesu Domino nostro, qui regnat, & regnabit in omnem æternitatem.

PSALMVS XVIII.

Titulus, & Argumentum
Psalmi.

In finem Psalmus David.

Titulus nihil habet noui. Argumentum Psalmi est laudatio diuinæ legis. Comparat Propheta legem diuinam cum cælesti corpore, quo nihil videtur esse in rebus corporalibus pulchrius, vtilius, potentius. Potest idem Psalmus exponi de Christo, & Apostolis, ut S. Augustinus facit.

Explicatio Psalmi 18.

Cœli enarrant gloriam Dei, I. & opera manuum eius annunciat firmamentum.

Comparaturus legem cum cælo, atque inde eam mirificè celebraturus, dicit, tantam esse maiestatem cæli, ut inde maximè eluceat gloria Dei, qui cælum fecit. Cæli enarrant gloriam Dei, idest, præ cæteris operibus Dei, quæ omnia artificem laudat, cæli sunt, qui sua magnitudine & pulchritudine gloriam Dei manifestam faciunt. Et opera manuum eius annunciat firmamentum. idem repetit alijs verbis; idem enim hoc loco significant cæli & firmamentum, videlicet totum illud cæleste corpus, in quo sunt stellæ, & ipse etiam

etiam Sol, & Luna. Nam in 1. cap. Geneseos, Deus vocavit firmamentum celum, & in eo posuit Solem, Lunam, & Stellis. Nihil autem refert, siue celum, siue celos dicamus. Nam apud Hebræos nomen est habens formam numeri multitudinis, & cōiungitur cum verbis numeri multitudinis. Sed Interpretes modò vertunt celum in numero singulari, modo celos in numero multitudinis. Firmamentum igitur in quo, secundum modum loquendi Scripturæ sanctæ, sunt omnia cælestia lumina, annunciat & declarat hominibus opera manuum Dei, idest, primaria & nobilissima opera manuum Dei, ex quibus ingens colligitur gloria Conditoris.

II. Dies diei eructat verbum, & nox nocti indicat scientiam.

Admirabilis planè est prædicatio, qua cæli enarrant gloriam Dei. Id quod ostenditur tribus modis: primo, quia sine intermissione celum prædicat. secundo, quia prædicat verbis omnium idiomatum. tertio, quia prædicat toti orbi terrarum. In hoc versiculo declaratur prædicatio sine intermissione: & quia celum prædicat per dies & noctes, cum interdiu conspiciatur pulchritudo Solis, & noctu pulchritudo stellarum; & quia dies ac noctes non permanent, sed labuntur, ac sibi inuicem succedunt; idèò poetico artificio fingit Propheta, vnum diem peracto cursu & prædicatione sua, tradere diei sequenti verbum prædicationis, & noctem quoque peracto cursu, & quasi hymno cantato, tradere nocti sequenti munus canendi. Dies, inquit, diei eructat verbum, idest, dies cum finitur, tradit alteri diei verbum laudis diuinæ. Et nox nocti indicat scientiam, idest, & nox similiter cum finitur, indicat, idest, annunciat nocti succedenti scientiam laudandi Deum, atque ita iugiter, & sine vlla intermissione dies, & noctes quam breues ducunt, & Deum laudibus celebrant.

Non sunt loquelæ, neque sermones, quorum non audiantur voces eorum. III.

Hic iam demonstrat Propheta prædicationem celorum fieri omnibus linguis, idest, intelligi ab omnibus nationibus, ac si cæli omnium nationum linguis loqueretur. quia videlicet omnes videt pulchritudinem, & præstantiam cæli, & inde venire possunt in cognitionem pulchritudinis, & excellentiæ Conditoris. Non sunt loquelæ neque sermones, idest, nulla sunt idiomata, quorum idiomatum non audiantur voces eorum, idest, celorum, idest, quæ idiomata non exprimantur vocibus eorum.

In omnem terram exiit sonus eorum, & in fines orbis terræ verba eorum. IIIL.

Explicatur tertia laus eloquentiæ celorum, quod non solum sine intermissione, & omnibus linguis, sed etiã in vniuersa terra audiantur cæli enarrantes gloriam Dei. Per sonum, non intelligitur concentus aliquis corporalis, quale in cælis Philosophi aliqui posuerunt; sed prædicatio illa gloriæ, quæ oritur ex pulchritudine cæli considerata ab hominibus. Idem quoque est, in omnem terram, & in fines orbis terræ. sæpissimè enim Prophetæ rem eadem bis repetunt. In Hebræo legitur pro, sonus eorum, *kauan*, quod significat linea, siue regula eorum. At videntur Septuaginta legisse, non *Kauam*, sed *Kolam*, vnica litera addita, quod est sonus eorum. Nam si legisset *Kauam*, nunquam vertissent, *ὁ δὲ ὤνους αὐτῶν*, idest, sonus eorum, nisi imperitissimi fuissent. Adde, quod S. Hieronymus quoque ex Hebræo vertit, sonus eorum. Et sic etiam citauit Apostolus ad Rom. 10. & congruit sonus eorum, cum eo quod sequitur, verba eorum, vbi id ipsum alijs verbis repetitur. Ex quo intelligimus textum Hebræicum esse corruptum vitio scriptorum, id quæ post sancti Hieronymi tempora. Porro S. Paulus citat hunc locum ad Rom. 10. probare volens, prædicationem Christi ad omnes gentes perue-

ויק
קול

peruenisse. Ex quo intelligimus per cælos exponi debere Apostolos, saltem in sensu allegorico. Et re vera SS. Apostoli, ut etiam alij sancti prædicatores, rectissime comparantur cælis, quod eleuati à terra per contemplationem, ampli per charitatem, splendidi per sapientiam, semper sereni per animi tranquillitatem, celerrime moti ab intelligentia per obedientiam, pluentes per instructionem, tonantes per obiurgationes, fulgurantes per miracula, multa bona terris largientes, & nihil ab eis quærentes per veram liberalitatem, purissimi ab omni sorde per vitam sanctitatem, denique habitaculum summi Regis per iustitiam perfectam sint. Nam anima Iusti sedes est Sapientiæ.

V. In sole posuit tabernaculum suum, & ipse tanquam sponsus procedens de thalamo suo.

Quamuis totum cælum enarret gloriam Dei, tamen præcipue id facit pars nobilissima cæli, quæ est Sol. Proinde in Sole tanquam in parte totius mundi præstantissima, Deus posuit tabernaculum suum. Rectè autem dicit tabernaculum, non domum, quoniam in Sole commoratur Deus tempore peregrinationis nostræ, quod eum videmus per speculum creaturarum; inter corporales autem creaturas Sol, ut diximus, obtinet principatum. Sed cum peruenierimus ad patriam, non in tabernaculo Solis Deum videbimus, sed in propria eius domo, quæ videlicet æternitas eius est. In Hebræo habetur, Soli posuit tabernaculum in eis, id est, Deus posuit in cælis tabernaculum Soli, constituit Solem in cælo tanquam in tabernaculo. Posset quidè utcumque lectio Græca reuocari ad Hebræum, si cum dicitur, *ἐν τῷ ἡλίῳ ἐθετο, τὸ σκηνώσας αὐτοῦ*, illud αὐτῷ accipiat pro αὐτοῦ, id est, illic, quod non est inusitatum. Tunc enim sensus esset, in Sole, id est, Soli, posuit tabernaculum illic, id est, in cælis. Sed dura est interpretatio, in Sole, id est, Soli. Quia verò non apparet in textu Hebræo vlla verborum ambiguitas, vel obscuritas, & tamen cer-

Bellarm. in Psalm.

tum est Septuaginta Interpretes viros doctissimos, non potuisse reddere id quod reddiderunt, si legissent verba, quæ in Hebraicis codicibus habentur, cogimur dicere eos aliter legisse. Vtraque sententia vera est, Deum videlicet in Sole posuisse tabernaculum suum, & Soli posuisse tabernaculum in cælis. Probat autem Propheta Deum in Sole posuisse tabernaculum suum, tanquam in excellentissima creatura, tribus rationibus, quarum prima ducitur à pulchritudine, altera à robore, tertia à beneficentia. Et ipse, inquit, tanquam sponsus procedens de thalamo suo. Hæc est ratio ducta à pulchritudine: ipse, inquit, decorus, nitidus, ornatus exoritur tanquam si sponsus aliquis esset, qui de thalamo nuptiali procederet; & verè nihil pulchrius, & lucidius Sole inter omnia corpora reperitur.

Exultauit ut gigas ad currendam viam, à summo cælo egressio eius. VI.

Et occursum eius usque ad summum eius, nec est qui se abscondat à calore eius. VII.

Altera ratio ducitur à robore, & viribus, quod sine fatigatione, summa celeritate decurrat viam propè immensurabilem. Exultauit ut gigas, vel ut fortis & robustus (ut ad verbum in Hebræo legitur) ad currendam viam. Exultatio alacritatem significat, quam habere solent, qui sine labore, imò cum voluptate aliquid faciunt. Itaque significatur hoc loco, Solem immensum cæli spacium, velocissimo cursu, sine vlla fatigatione, vel labore peragere. A summo cælo egressio eius, & occursum eius usque ad summum eius. Per summum cælum oriens designatur. Non enim hoc loco per summum intelligitur altum, sed extremum, ut verbum Hebraicum *kex*, & Græcum *ἄκρος* significant. Dicitur autem extremum, vbi res incipit, & vbi desinit. Incipit autè cælum ab oriente, quia

F inde

rp.

inde surgit eius motus, & ibidem etiam definit. Sensus igitur est, Solem exoriri ab oriente, & per occidentem toto cæli ambitu decurso, ad orientem reuerti. Parum refert quod in Hebræo & Græco habetur in futuro exultabit, ubi nos habemus, exultauit, nam tempus futurum sæpè accipitur pro præterito. Itaque S. Hieronymus vertit ex Hebræo exultauit; & sic etiam legunt in Commentario tam ipse, quàm S. Augustinus. Nec est qui se abscondat à calore eius. Hæc est postrema ratio ducta ab utilitate, quam capiunt omnia inferiora à Sole. Siquidem ita fouet Sol omnia calore suo viuifico, ut dici possit communis quidam parens omnium rerum, quæ nascuntur in terra, & in mari. Et ea causa est, cur Sol tam assidue & tam sollicitè totum orbem circumuehat, & uisitet, ut res nulla se abscondat, idest, excludatur à participatione tam insignis beneficij.

VIII. Lex Domini immaculata conuertens animas, testimonium Domini fidele, sapientiam præstans paruulis.

Applicat nunc Propheta comparisonem, quasi dicat, pulchrum est cælum, pulcherrimus Sol, sed lex Domini multò pulchrior: lucidum cælum, lucidissimus Sol, sed lex Domini multò lucidior: utile cælum hominibus, utilissimus Sol, sed lex Domini multò utilior. Ponit autem ordine sex encomia legis diuinæ. Primum est, Lex Domini immaculata conuertens animas, idest, lex Domini pulcherrima est, ut potè sine vlla macula vel fæditate, cum nullum peccatum permittat, sicut permittunt leges humanæ. & ideo ubi lex Domini considerata, & perspecta fuerit, conuertit animas, idest, conuertit ad se amandam animas, easque rapit consequenter ad Deum, tam pulchræ legis auctorem. Ad illud, Conuertens animas, subintelligitur, est, & ideo explicuimus, conuertit. Alterum encomium est in illis verbis, Testimonium Domini fidele, sapientiam præstans paruulis, ubi per testimonium, intelli-

gitur eadem lex. Siquidem in Scripturis, & potissimum in Psalmis, lex Domini non solum vocatur lex, præceptum, mādātū, statutum, & similia, quæ apud alios quoque scriptores legem significant; sed etiam vocatur testimonium, iustitia, vel iustificatio, & iudicium, ut perspicuū est præcipuè ex Psalmo 118. Dicitur lex Domini testimonium, quia testificatur hominibus quæ sit voluntas Dei, quid à nobis requirat Dominus, quas pœnas præuaricantibus, & quæ præmia obseruantibus præparauerit. Ait igitur, Testimonium Domini fidele, idest, lex Domini, quæ certissimè bonos præmijs, & malos pœnis afficiet. Sapientiam præstans paruulis, idest, præstans est, siue præstat sapientiam paruulis, hoc est, hominibus paruulis sensu dat lumen prudētiæ, ut sciant bona opera facere, & peccata vitare. Paruulos enim hoc loco vocat Propheta homines, qui non pollent iudicio spirituali, quales sunt omnes amici huius sæculi. Et per sapientiam intelligit prudentiā spiritualem, quæ corrigit mores, & format ad præscriptum diuinæ legis.

Iustitiæ Domini rectæ, lætificantes corda, præceptum Domini lucidum, illuminans oculos.

Tertium encomium diuinæ legis est, quod posteaquam cœpit amari, ut habet primum encomium, & obseruari, ut habet secundum, mirabili lætitia perfundit hominem: nihil enim iucundius bona conscientia. Iustitiæ, inquit, Domini, idest, lex Domini, siue præcepta Domini, quæ dicuntur iustitiæ, quia iustissima sunt, & quia iustum faciunt obseruatore, ista, inquam, præcepta, cum recta sint, lætificantia sunt, idest, lætificant corda: corda enim recta valdè bene conueniunt cum rectis præceptis, & ideo lætantur & gaudent, cum obseruandorum præceptorum occasio venit. Quartum encomium est, præceptū Domini lucidum, illuminans oculos, idest, Lex Domini lucida luce diuinæ Sapientiæ, illuminat oculos mentis, quia facit intelligere voluntatem Dei, &

& quæ sint vera bona, & vera mala. Docet etiam ceremonias Dei plenas diuinis mysterijs. Illuminat etiam lex Domini per modum dispositionis; nam in maleuolam animam non introibit sapientia. nihil enim magis impedit cognitionem Dei, in qua vera sapientia consistit, quàm impuritas cordis. Beati enim mundo corde, quoniam ipsi Deum videbunt.

X. Timor Domini sanctus, permanens in sæculum sæculi, iudicia Domini vera, iustificata in semetipsa.

Quintum encomium est, quod superiora bona non temporalia, sed æterna facit esse lex Domini. Nam timor Domini sanctus, idest, timor Domini, quo quis Deum offendere trepidat, qui alio nomine pietas dicitur, manet in sæculum sæculi, quoad præmium suum. non terminantur in morte bona quæ producit observatio legis, siue timor castus legem observare faciens, sed manent in æternum. Quo modo alibi dicitur, Patientia pauperum non peribit in finem. In Hebræo est, timor Domini theora, idest, mundus; & in Græco similiter est *θεωρα* non *θεωρεω*. Itaque significatur timor filialis, qui non habet admixtam seruitutem, de quo dicitur in alio Psalmo, Beatus vir qui timet Dominum, in mandatis eius cupit nimis. Nam qui timet timore serui, seruat mandata non volens, sed inuitus: at qui timet timore filiali, in mandatis eius cupit nimis, idest cupit valde, & vult omnino ea seruare. Vltimum encomium est, quod lex Domini sit vera, & iusta per seipsam, non egens aliundè iustificari. Iudicia Domini vera iustificata in semetipsa, id est, mandata Domini, quæ dicuntur iudicia, quia per ea Deus iudicat homines, & quæ sunt norma ac regula discernendi virtutes à vitijs, & opera bona à malis, ista, inquam, mandata verissima, iustificata sunt in semetipsa; idest, non egent vt ab aliquo demonstrantur iusta. hoc enim ipso quod sunt mandata Dei, iusta esse probantur.

Et præterea decem præcepta, de quibus potissimum David loquitur, cum sint prima principia iuris naturalis, continent in se talem iustitiam, vt in omni loco, & tempore, & casu particulari, sint iusta, & nullam admittant dispensationem; cum aliæ leges sæpè indigeant circumstantijs loci, temporis, & personarum, vt iustæ sint. Itaque sola lex Domini iustificata est in se metipsa. In Hebræo habetur iudicia Domini veritas, idest, verissima, iusta sunt, siue iustificata sunt, iacdaui, quod significat pariter, simul, in idipsum: sed rectè noster Interpres vertit, in semetipsa. Hoc enim loco, iustificari simul, vel pariter, nihil est aliud, nisi non egere, vt aliundè iustificetur.

יְהוָה

Desiderabilia super aurum, & lapidem preciosum multum, & dulciora super mel & fauum. XI.

Hæc est conclusio ex superioribus, quasi dicat Propheta, Cum tam bona sint præcepta Domini, certè præponenda sunt omnibus diuitijs, & delicijs huius mundi: nam desiderabilia sunt super aurum & lapidem preciosum multum, idest, in maxima copia habitum; & dulciora super mel & fauum, idest, non solum super mel quodcunque, sed etiam super fauum plenum, & redundans melle purissimo. Positum est enim illud, & fauum ad significandam copiam, vt correspondeat, ei, quod dictum erat, lapidem preciosum multum. In Hebræo est, super aurum & topazion multum, & super mel & redundantiam fauorum; sed Interpretes sensum verterunt. Est autem topazius species lapidis preciosi: sed Propheta posuit speciem pro genere. Quàm longè remota est hæc veritas à sensu carnalium hominum? quotusquisque carnalium est, qui pro paruo lucro, vel exigua delectatione non contemnat omnia diuina præcepta? & tamen verissimum est, vtiliorem & iucundiorum esse legis observationem omnibus thesauris, atque omni voluptate.

XII. Etenim seruus tuus custodit ea, in custodiendis illis retributio multa.

Probat exemplo, siue experientia sua, verum esse quod dixit. Nam, inquit, seruus tuus custodit ea præcepta, & in custodiendis illis retributio multa illi contingit, idest, experimento probauit seruus tuus, se multa bona percipere, dum præcepta custodit. Ex Hebræo S. Hieronymus vertit, Seruus tuus docebit ea. Pagninus autem vertit, Seruus tuus illustratur in eis. Sed Septuaginta rectissimè verterunt, custodit ea. Nam vox Hebræa, nizhar, tametsi in alijs coniugationibus, docere, vel splendere significet, tamen in passiva coniugatione, qualis est hoc loco, significat custodire se, siue cauere, vel seipsum admonere. Itaque ad verbum sic verti potuisset, seruus tuus custodit se in eis, idest, abstinet à peccando, præcepta tua custodiens, quod est idem cum eo, seruus tuus custodit ea, idest, præcepta.

XIII. Delicta quis intelligit? ab occultis meis munda me, & ab alienis parce seruo tuo.

Dixerat se custodire mandata Dei, corrigit se, atque excipit peccata ex ignorantia, quæ vix caueri possunt. Quasi dicat, Seruus tuus cauet à peccatis, legem tuam seruando, non omnino, sed quantum patitur humana fragilitas. Pulchrè in Hebræo legitur ad verbum, ignorantias qui intelligit? ubi opponit ignorantiam intelligentiæ, demonstrare volens, esse difficillimum cauere peccata, quæ ex ignorantia committuntur; & tamen quia verè peccata sunt, & caueri potuerunt, addit orationem, ab occultis meis munda me. Quod sequitur, & ab alienis parce seruo tuo, non significat, vt Deus nobis ignoscat peccata aliena, vt vulgo hic locus citari solet, sed vt Deus custodiat nos à sodalitate peruersorum hominû. Homines enim bonæ voluntatis, qualis erat sanctus Dauid, ab ignorantia priorum delictorum, & à seductione

prauorum sodalium in primis cauere debent. Pro voce, alienis, habetur in Hebræo, zedim, quod superbos significat. S. Hieronymus vertit, à superbis libera seruum tuum. Sed Septuaginta legerunt zarim, non zedim: significat autem, zarim alienos. Sensus est ferè idè, nisi quod secundum Hebræum, vt nunc se habet, significatur liberatio ab vno genere malorum, idest, à superbis: at secundum Græcum textum, & veram Hebraicam lectionem, significatur liberatio generalis ab omnibus peruersis amicis. Nostra igitur lectio sic exponenda est, ab alienis, idest, ab ijs, qui alienis moribus sunt, parce seruo tuo, idest, parcendo remoue illos ab amicitia serui tui.

זדים

זרים

זרים

XIV. Si mei non fuerint dominati, tunc immaculatus ero, & emundabor à delicto maximo.

Reddit rationem, cur tantopere timeat improborum familiaritatem. Nam, inquit, si isti alienis moribus præditi, non fuerint dominati mei, idest, si per nimiam familiaritatem, non me sibi subiecerint, & ad suam voluntatem me non redegerint; tunc immaculatus ero, & emundabor, idest, mundus ero à delicto maximo, idest, à peccato graui & mortali. omne enim mortale crimen maximum dici potest, cum à Deo bono maximo auertat, & ad pœnam gehennæ planè maximam perducatur. S. Augustinus legit, à delicto magno, vt habetur in Græco, sed parum refert.

XV. Et erunt vt complacent eloquia oris mei, & meditatio cordis mei, in conspectu tuo semper.

Non solum tunc immaculatus ero, sed etiam tunc erunt vt complacent, idest, fiet vt complacent eloquia oris mei, & meditatio cordis mei in conspectu tuo semper, idest, hymni, quos in laudem tuam corde & ore decanto, placebunt tibi semper, quia de mundo corde, & simplici ore prodibunt.

Dq-

Domine adiutor meus, & redemptor meus.

Placebunt, inquam, tibi cātica mea ex gratia tua, non ex meritis meis: quia ut sim immaculatus, mundus à delicto máximo, & proinde placeant tibi verba mea, dono tuo habeo, qui es adiutor meus & redemptor meus, adiutor in bonis, & redemptor à malis.

PSALMVS XIX.

Titulus, & Argumentum
Psalmi.

I *In finem Psalmus David.*

PSALMVS hic videtur cantatus à Davide prauidente Christi aduentum ad debellandas aereas potestates, quò etiam pertinent duo Psalmi sequentes.

Explicatio Psalmi 19.

I. **E**Xaudiat te Dominus in die tribulationis, protegat te nomen Dei Iacob.

Cùm David nullius hominis nomen exprimat, alloquitur sine dubio illum, in què omnia iustorum desideria, & omniuin Prophetarum vaticinia respiciebant. Ac quasi Christum videret in bellum aduersus Diabolum prodeuntem, & oratione se armantem, imminente passionis tribulatione, acclamat illi, Exaudiat te Dominus in die tribulationis, idest, passionis, in qua, ut dicit Apostolus ad Hebr. 5. cū clamore valido & lacrymis preces, supplicationesq. offerens, ad eū, qui posset illum saluum facere à morte, exauditus est pro sua reuerentia. Exauditus est autem, non ut mortem euaderet, sed ut mortem moriendo destrueret, & vitam resurgendo repararet, & confusio in gloriam, mortalitas in immortalitatem vertere-

Bellarmin. in Psalm.

tur, sicut ipse ait Ioan. 17. Pater venit hora, clarifica Filium tuum. De hac exauditione loquitur Propheta. Quò etiam pertinet quod sequitur, Protegat te nomen Dei Iacob. Per nomen intelligi potest inuocatio, sicut in eo loco, In nomine meo Daemonia eiciunt, Marci ult. Potest etiam intelligi potestas, siue auctoritas, ut Ioan. 5. Ego veni in nomine patris mei. Potest denique simpliciter per nomen Dei, Deus intelligi: sæpè enim in Scripturis ponitur nomen pro persona cuius est nomen, ut cū dicit B. Petrus Act. 4. Non est aliud nomen sub cælo, in quo oporteat nos saluos fieri: & cū S. Lucas ait in Actis, in Græca editione, cap. 1. Erat autem turba hominum simul ferè centum viginti. Addidit Propheta nomen Iacob, quia Iacob significat populum Dei, cuius populi Christus est caput: quasi diceret, protegat te Deus populi sui, ut protegendo te, qui es caput eius populi, consequenter totus populus saluus fiat. Protectio verò petitur à telis inimicorum, ut non noceant: tunc autem verè nocuissent, si vel Christi resurrectionem, vel Christi fidem, nomen, vel Ecclesiæ propagationem impedire potuissent.

Mittat tibi auxilium de sãcto, & de Sion tueatur te. **II.**

Per sanctum, intelligit montem sanctum, qui dicitur Sion, ut explicatur in secunda parte versiculi. Dicebatur autem sanctus mons ille, propter præsentiam arcæ Testamenti. Sed hoc loco videtur accipiendus mons Sion cælestis, de quo loquitur Apostolus ad Hebræos 12. Accessistis ad Sion montem, & ciuitatem Dei viuentis, Hierusalem cælestem, &c. Nam meminit hoc loco Propheta montis Sion, ut ostendat Deum ex altissimo monte suo omnia speculari (nam & Sion specula interpretatur) ac proinde posse commodè Christum præliantem videre, atque inde illi suppetias mittere; locus autem tam altus, ut inde omnia videantur, non est mons Sion terrestris,

F 3 sed

sed celestis. Itaque ait, mittat tibi auxilium de sancto monte, idest, de cel-
fissimo calorum habitaculo, unde om-
nia cernit; & tueatur te de Sion, idest,
de altissima illa specula, unde omnia
prospicit.

III. Memor sit omnis sacrificij tui, & holocaustum tuum pingue fiat.

Quia Dominus præliaturus cum ho-
ste generis humani, non solum orauit,
sed etiam sacrificauit, idest, non solu
obtulit orationem verbalem, vt sic lo-
quar, sed etiam realem, quæ est sacrifi-
cium, idest, Propheta sicut de oratione
verbali dixerat, Exaudiat te Dominus;
ita nunc dicit de oratione reali, Memor
sit omnis sacrificij tui, idest, non con-
temnat, sed sæper in memoria habeat,
& respiciat omnia sacrificia tua. Et ho-
locaustum tuum pingue fiat, idest, ac-
ceptetur, vt solent acceptari holocau-
sta ex animalibus pinguibus. Eod siqui-
dem holocaustum est gratius, quo ani-
mal immolatum est melius, & perfe-
ctius. Hinc est illud Danielis cap. 3.
Sicut in millibus agnorum pinguium,
sic fiat sacrificium nostrum in conspe-
ctu tuo, vt placeat tibi. Porro Chri-
stus obtulit multa sacrificia, & ad ex-
tremum, holocaustum, idest, dicit Pro-
pheta, Memor sit omnis sacrificij tui,
& holocaustum tuum pingue fiat. Sa-
crificia multa, sunt passionum multa,
quas pertulit Dominus pro gloria Dei,
dum viueret; holocaustum quo se ipse
totum obtulit, est ipsa mors crucis. Ad
ditur hoc loco Selà, in Hebræo textu,
quod significat, semper. Itaque sen-
sus est, memor sit Dominus semper om-
nium passionum, & ipsius mortis Chri-
sti, Videtur autem precatio Dauidis,
prophetia potius, quam precatio: verè
enim semper viget, semperque vigeat
coram Deo, passio Christi, imò etiam
ab initio mundi semper viguit, ac per
eam nobis omnia bona donantur.

IIII. Tribuat tibi secundum cor tu- um, & omne consilium tuum con- firmer.

Declarat finem orationis & sacrifi-
cij, quasi dicat, ad hoc te Deus exau-
diat, & sacrificium tuum accipiat, vt
peruenias quò peruenire cupis, & finè
tibi propositum consequaris; nemoq;
sit qui te ab illo prohibere valeat. Tri-
buat tibi secundum cor tuum, idest, det
tibi quod est secundum cor tuum, id
est, quod cupis. Et omne consilium
tuum confirmet, idest, & omne quod
deliberaſti stabiliat, ratum esse velit, &
executioni mandari permittat & con-
cedat. In Hebræo habetur, omne con-
siliū tuum impleat, quod est idem.
Itaque sensus est, Exaudiat te Deus, &
accipiat sacrificium tuum, vt destruas
opera Diaboli, vt hominem de capti-
uitate liberes, vt vitam æternam in te
credentibus præbeas, &c. Hoc enim
fuisse desiderium cordis Christi, & con-
siliū, & deliberationem, docent sa-
cræ literæ. Filius Dei, inquit Ioannes,
venit, vt dissoluat opera Diaboli 1.
Ioan. 3. Et B. Paulus, Christus venit in
hunc mundum peccatores saluos face-
re 1. ad Timoth. 1. Et ipse Dominus,
Venit Filius hominis querere, & sal-
uum facere quod perierat. Luc. 19.

Latabimur in salutari tuo, & V. in nomine Dei nostri magnifica- bimur.

Cum id factum erit quod petimus,
videlicet, vt tu Rex noster victoriā de
inimicis reportaueris, tunc latabimur
non solum corde, sed etiam voce (id
enim significat vox Hebræa, ranan) in
salute tua, idest, ob salutem tuam, id-
est, quia incolumis ex bello redieris,
quæ salus & incolumitas in nos redun-
dabit: Et in nomine Dei nostri, à quo
tanta victoria processit, magnificabi-
mur, magnos, videlicet, nos esse duce-
mus & dicemus, non propter magni-
tudinē, quæ in nobis sit, sed propter ma-
gnū Dominū, quem habemus. In
Hebræo est, Nidgal, idest, vexillum cri-
gemus: sed Septuaginta legerunt, Nig-
dal, vna litera transposita, idest, magni-
ficabimur. Itaque in Hebræo irrepsit
error vitio scriptorum, tametsi illa etiā
lectio optimum sensum habeat.

Im-

VI. Impleat Dominus omnes petitiones tuas, nunc cognoui quoniam saluum fecit Dominus Christum suum.

Iterum repetit faustam precatiónē, quasi dicat, impleat ergo Dominus omnes petitiones tuas, ex quibus tam multa bona sequutura sunt. Nunc cognoui quoniam saluum fecit Dominus Christum suum, idest, ideo audacter repetito, ut Dominus exaudiat te, & impleat petitiones tuas, quia nunc Domini illustratione cognoui omnino fore implendas. Cognoui enim, quod Dominus saluum fecit, idest, certissimè saluum faciet Christum suum, & iam in prædefinitione sua saluum illum fecit, a morte excitauit, in cælo collocauit, hostes sub pedibus eius subiecit.

VII. Exaudiet illum de cælo sancto suo, in potentatibus salus dexteræ eius.

Quia dixerat, saluum fecit, declarat illud esse dictum de salute in prædefinitione, non in exequutione. Nam ut quod prædefinitum est, tempore suo impleatur, exaudiet illum de cælo sancto suo, & sic saluum faciet Dominus Christum suum. Illud, In potentatibus salus dexteræ eius, potest habere duplicem sensum: potest enim accipi potentatus, pro potentia & robore, & hoc magis propriè sonat vox Hebræa, ghebura, & tunc sensus erit, in potentijs, idest, in magna potentia aderit Christo salus dexteræ Dei. Et quamuis verbum Græcum, dynastia, & Latinum potentatus, propriè significant imperium siue principatum; tamè possunt accipi pro potentia & robore, quomodo accipiuntur eadem vocabula in Psal. 89. Si autem in potentatibus octoginta anni, &c. & in Psalmo 20. versu ult. Cantabimus, & psallemus virtutes tuas. ubi in Græco est δυναστας. Potest etiam accipi potentatibus, pro principatu & imperio, ut verbum Græcum dynastia, & Latinum potentatus propriè significant, & tunc sensus erit, Exaudiet illum de cælo sancto suo, &

in potentatibus, idest, quia in principatibus nimirum constituendis, vel conservandis, præcipuè necessaria est salus dexteræ eius. Quamuis enim multa præsidia ad salutem Principes habere videantur, ut eqnos & currus, arma & milites, arces & munitiones, tamen ista omnia nihil sunt, si absit salus dexteræ Dei: ideo rectè subiungit.

Hi in curribus, & hi in equis, VIII.
nos autem in nomine Domini Dei nostri inuocabimus.

Pergit explicare victoriam Christi, quam futuram præuidebat, & ait, Hi in curribus, & hi in equis, idest, alij aduersariorum in curribus armatis confident, alij in equis ferocibus; & per hæc duo nomina, intelligi vult omnia alia humana præsidia, quibus olim in bellis, tum ad prælium, tum ad fugam utebantur. Nos autem cum capite nostro & rege Christo, non tam in curribus & in equis, quàm in nomine Dei omnipotentis, per deuotam precem inuocato, fiduciam nostram collocabimus. Porro idem est, nomen Domini inuocare, & in nomine Domini inuocare, secundum Scripturæ sanctæ phrasim. Neque multum refert, quod in Hebræico textu habetur, nazchir, cōmemorabimus: non enim loquitur Dauid de qualicunque Dei commemoratione, sed de ea quæ fit ab ijs, qui eius nomen implorant, ab eoque auxilium petunt.

Ipsi obligati sunt, & ceciderunt, IX.
nos autem surreximus, & erecti sumus.

Ostendit, quanto sit vtilius in nomine Domini, quàm in curribus, equis vè confidere. Illi, qui in curribus, vel in equis confidebant, obligati sunt & ceciderunt, nos autem, qui in Deo confidimus, surreximus, & erecti sumus. Et simul indicat niram rerum conuersionem. Nam ante Christi victoriam, hostis humani generis sublimis, quasi in curribus & equis, minabatur deictis hominibus ob originale peccatum; & similiter Principes Iudæorum,

F 4 Hero-

Herodes & Pilatus, alijque visibiles Christi hostes, quasi erecti insultabant Christo patienti, humilibusq. eius discipulis: sed paulò post illi omnes colligati & impediti corruerunt, isti verò surrexerunt, atque erecti in æternum stabunt. In Hebræo habetur, carehu, incuruati sunt: vnde aliqui putant Latinam vocem esse corruptam, & legendū, obliquati sunt, & nō obligati sunt, sed falluntur. Nam Latina lectio Græcam imitatur; in Græco autē est *συνδεδεμένοι*, idest, colligati sunt, quasi compedibus, quod noster rectè vertit, obligati sūt, idest, ligati & impediti, ne pugnare vel consistere possent, ceciderunt. Itaq. Septuaginta nō tam ad verba, quàm ad sententiam respexerunt.

כָּרַעוּ

- X. Domine saluum fac regem, & exaudi nos in die qua inuocauerimus te.

Concludit coniungendo finem cum principio. Initio dixerat, Exaudiat te Dominus in die tribulationis, nunc idē confirmat conuertendo orationem ad Deum, Domine saluum fac Regem de tribulatione sua; & eodē modo exaudi nos, & saluos fac in die qua inuocauerimus te, idest, in die tribulationis nostræ, in qua non alium quàm te inuocabimus. In Hebræo sunt eadem verba, sed interpunctio est alia. Itaque S. Hieronymus, & moderni ita legunt, Domine salua, Rex exaudi nos in die qua inuocauerimus te. Sed cū nomen, ham melech, possit verti, Rex, & Regē, quia Hebræi non declinant nomina per casus, & Septuaginta Interpretes vertierint, *ὁ βασιλεὺς*, idest, Regem, & sic legerint omnes veteres Patres; non est magni faciēda lectio modernorum Hebræorum, cui post tempora Septuaginta Interpretum interpunctio addita est. Porro S. Hieronymus fideliter vertit, sed textam habuit minus emendatum. Posset hic Psalmus commodè recitari, quando Christiani Principes proficiuntur ad bellum contra infideles.

הַמֶּלֶךְ

P S A L M Y S XX.

Titulus, & Argumentum.

In finem Psalmus David.



PSALMVS vigesimus, connexus est cum præcedente decimonono. Ille petebat à Deo, vt Christum Regem cum hoste generis humani præliaturum, protegeret. Iste gratias agit, quòd protexerit, exaltauerit, & coronauerit.

Explicatio Psalmi 20.

Domine in virtute tua lætabitur Rex, & super salutare tuum exultabit vehementer. I.

Adepta victoria, Rex noster Christus lætabitur in virtute tua, idest, ob virtutem, potentiamq. tuam, per quàm de hostibus suis scèliciter triumphauit. Et super salutare tuum, idest, de salute à te illi præstita, gaudebit, & voce etiā exultabit vehementer. Itaque vna pars versiculi aliam declarat.

Desiderium cordis eius tribuisti ei, & voluntate labiorum eius, non fraudasti eum. II.

Respondent hæc verba ijs, quæ in Psalmo superiore dicta fuerant, tribuat tibi secundum cor tuum, &c. phrasis Hebraica est, dare petitionem, pro, eo quod est dare rem petitam, quomodo in 1. lib. Regum cap. 2. dicit Heli Sacerdos Annæ, Deus Israel det tibi petitionem tuam, quam rogasti eum. Sic igitur hoc loco dicitur, Desiderium cordis eius tribuisti ei; idest, id ei tribuisti, quod desiderabat. Et voluntate labiorum eius non fraudasti eum, id est, non fraudasti eum ea re, quam volebant labia eius, idest, quam se velle & de.

& desiderare, labijs orationem fundendo, demonstravit. In summa dicit, datum fuisse Christo quod corde desideraverat, & labijs expetiverat.

III. Quoniam præuenisti eum in benedictionibus dulcedinis, posuisti in capite eius coronam de lapide precioso.

Magna verè fuit Christo causa lætandi, quòd non solum habuerit quod petijt, sed quòd Deus præueniret eius desideria, & dederit ei maxima dona ante quam peteret. Præuenisti, inquit, eum in benedictionibus dulcedinis, in Hebræo est bonitatis, & similiter in Græco. Itaq. sensus est, Christum fuisse præuentum donis bonitatis Dei, quæ fuerunt conceptio de Spiritu sancto, unio ad personam Verbi, infusio omnium scientiarum, & virtutum, & ipsa Dei visio: quæ omnia in primo instanti conceptionis illi data fuerunt; proinde præuentus fuit benedictionibus dulcedinis. Quòd verò sequitur, posuisti in capite eius coronam de lapide precioso, vel, ut habetur in Hebræo, de auro perfecto, videtur referendum ad Regnum & Sacerdotium, quod etiam ab ipsa conceptione habuit, propter quæ Christi cognomen accepit: corona enim aurea, insignis est regium, & Sacerdotale.

IV. Vitam petijt à te, & tribuisti ei longitudinem dierum in sæculum, & in sæculum sæculi.

Beneficia superiora præuentus accepit: at corporis gloriam, & immortalitatem, & alia deinceps petijt, & obtinuit. petijt vitam, cum imminente passionis preces & supplicationes obtulit ei, qui posset eum saluum facere à morte, ut dixit Apostolus ad Hebræos. 5. Deus autem tribuit ei longitudinem dierum in sæculum, & in sæculum sæculi, idest, vitam sempiternam, ut resurgens à mortuis, iam non moriatur, & mors illi ultra non dominetur: Ex hoc loco manifestè conuincuntur, qui hunc Psalmum ad literam exponunt de Dauide, quod facit Iansenius, vel de Ezechia, quod facit Euthymius, &

ante eum Theodoretus, nam nec Dauid, nec Ezechias habuit longitudinem dierum in sæculum, & in sæculum sæculi.

V. Magna est gloria eius in salutari tuo, gloriam, & magnum decorem impones super eum.

Non solum vitam in sæculum sæculi dedit ei Deus, sed etiam exaltauit illum & dedit illi nomen, quod est super omne nomen. Hæc enim est verè magna gloria, quam habuit in salutari Dei, id est, in salute, qua illum saluum fecit Deus: & hinc gloriam & magnum decorem, idest, immensum honorem impones super eum, pro eo quòd imposita illi fuit ab inimicis spinea corona tantæ ignominie, ut eo tempore, non esset species ei, neque decor, ut cecinit Isa. cap. 53.

VI. Quoniam dabis eum in benedictionem in sæculum sæculi, lætificabis eum in gaudio cum vultu tuo.

Post exaltationem ad dexteram Patris, & nomen super omne nomen, sequetur vniuersalis benedictio celestium, terrestrium, & infernorum; quæ nunquam deficiet, de qua loquitur B. Paulus ad Philipp. 2. & Ioannes Apocal. 5. Verba illa, dabis eum in benedictionem, significant, ponere eum ut communem benedictionis materiam, idest, facies ut omnes illi benedicant. Græcus codex clarius est, habet enim dabis ei benedictionem, sed in Hebræo, habetur ponere eum benedictionem, sensus est idem. Quòd autem additur, lætificabis eum in gaudio cum vultu tuo, significat lætiam consequentem illa omnia bona iam dicta. semper enim lætitia sequitur ademptionem boni. Illud, cum vultu tuo, significat, coram te, & in præsentia tua.

VII. Quoniam Rex sperat in Domino, & in misericordia altissimi non commouebitur.

Bona iam dicta prædicit fore omnino, stabilia, & firma in æternum. Quoniam, inquit, rex sperat in Domino, idest,

id est, confidit in potentia infinita Dei, nō in viribus humanis; Et in misericordia Altissimi, id est, in bonitate illius, qui super omnes est, & cui subijciuntur omnia, idē non commouebitur, siue non nutabit; sed permanebit securus in æternum.

VIII. Inueniatur manus tua omnibus inimicis tuis, dextera tua inueniat omnes, qui te oderunt.

Probat non commouendum Christum, neque regnum eius, quoniam inimici eius omnes peribunt. Inueniatur manus tua omnibus inimicis tuis; id est, inuenietur manus tua super omnes inimicos tuos, ut eos videlicet punias. Idem repetit dicens, Dextera tua inueniat, pro inueniet, omnes qui te oderunt. Textus Hebræus clarissimus est, Inueniet manus tua omnes inimicos tuos, dextera tua inueniet odientes te: Sed Interpretes variare voluerunt. Videtur autē Propheta nūc alloqui Christum, non Patrem. Christus enim propriē est, quē Iudæi, aliq. persecutores oderūt, & de eo dicitur in Psalmo 109. Sede à dextris meis, donec ponam inimicos tuos scabellum pedum tuorum.

IX. Pones eos ut clibanum ignis in tempore vultus tui, Dominus in ira sua conturbabit eos.

Describit pœnam inimicorum: Pones, inquit, eos, tuos videlicet inimicos, ut clibanum ignis, id est, facies eos undique æstare, quomodo æstuat clibanus ardens; in tempore vultus tui, id est, in die iræ tuæ, quæ in ultimo iudicio manifestabitur. Idem repetit in tertia persona, quasi dicat, verē dixi, pones eos ut clibanum ignis, in tempore vultus tui. Nam Dominus Christus, in ira sua conturbabit inimicos suos, & tunc ad imperium Christi, deuorabit eos ignis æternus, & sic efficietur quasi clibanus ardens. Verbum Hebræum, balag, significat propriē deglutire vel perdere, ac dissipare. Idē Hieronymus vertit, Dominus in furore suo præcipit eos. Fortasse, conturbabit eos, positum est, pro, exturbabit

eos, videlicet à facie sua in gehennam, & ibi deuorabit eos ignis. Sic enim cohererebitchetno Hebraica, cum Græca & Latina Fortasse etiā vox Hebraica balag, significat nō solum deglutire & perdere, sed etiam conturbare. nota enim erat Septuaginta Interpretibus vis Hebraicæ vocis magis, quàm posterioribus Rabinis. Sensus autē sēp est bonus.

X. Fructum eorum de terra perdes, & semen eorum à filiis hominum.

Ne fortē obijceret aliquis, posteros inimicorum Christi aliquando pro patribus surrecturos, & molestiam Christo illaturos, addit Propheta, nō solum inimicos Christi, sed omnes eorum filios ac nepotes, atque adeo omne semē eorum periturum. Fructum, inquit, eorum, id est, filios & posteros de terra perdes, & eliminabis, & semen eorum à filiis hominum, nimirum, perdes.

XI. Quoniam declinauerunt in te mala cogitauerunt consilia, quæ non potuerunt stabilire.

Iustē punies eos, quoniam illi iniustē tibi nocere conati sunt. Videtur Dauid valde propriē, & subtiliter dixisse, declinauerunt in te mala, quoniam mala pœnæ directē ad Christum non pertinebant, in quo nulla fuit culpa, sed iniqui homines detorsērunt & declinauerunt mala, id est, contumelias, vulnera, plagas, mortem ipsam, à suo quasi itinere in Christum innocentem. Cogitauerunt consilia, quæ non potuerunt stabilire, id est, mala voluntas in ipsis fuit perdendi Christum, & impediendi regnum eius, sed non potuerunt perficere, quia Deus mala omnia conuertit in bonum ipsius Christi, & fidelium seruorum eius.

XI. Quoniam pones eos dorsum, in reliquijs tuis præparabis vultum eorum.

Hic describitur summa impiorum calamitas, quod videlicet sūt destinati ad sola flagella, & ad maiorem calamitatē visuri sūt electos Dei in summa gloria

ria & felicitate. Pones eos dorsum, id est, facies ut nihil sint nisi dorsum, pars videlicet flagellis exposita: sic minurū totos flagellabis, quasi toti sint dorsum. In reliquijs tuis preparabis, seu diriges (vt sonat vox Hebræa) vultum eorum, id est, diriges vultum eorum in reliquijs tuis, hoc est, ad considerādos electos tuos, quos tibi reliquisti, de quibus scriptum est, reliquæ saluæ fient.

מִיתָרֶיךָ.

Voce Hebræa metarêch; S. Hieronymus vertit, funes tuos; sed Septuaginta Interpretes rectè verterunt, reliquijs tuis, quia vox illa vtrumque significat, Locus hic obscurus est admodū; si cui nostra Interpretatio minus placeat, audiat alias. Theodoretus & Euthymius sic exponunt, Pones eos dorsum, id est, in fugam eos conuerteres, faciens vt terga vertant. In reliquijs tuis preparabis vultum eorum, id est, in reliquias eorum, hoc est, in filios eorum preparabis vultum tuum, id est, iram tuam. Volunt enim isti auctores hyperbaton esse in verbis Prophetæ, & propterea inuertenda esse verba eo modo quo diximus. An hæc interpretatio literæ & verbis inhæreat, lectores iudicent. Sanctus Hieronymus, & S. Augustinus, nec non moderni, quisque suam interpretationem excogitauerunt.

XIII. Exaltare Domine in virtute tua, cantabimus & psallemus virtutes tuas.

Concluditur Psalmus sancta acclamatione ad Christum Regem, & simul predicatione eorum, quæ futura sunt post vltimum exitum omnium impiorum. Exaltare Domine in virtute tua, id est, qui aliquando apparuisti humilis, & tanquam infirmus crucifigi passus es, nunc in fortitudine & potentia deuictis hostibus, & in gehennam detrusis, exaltare vsque ad summum cælum; interim nos electi tui cantabimus voce, & instrumentis musicis resonabimus potentiam tuam, vt aliquando ad te perueniamus, & in sæculum sæculi te laudemus. Hic solum est, obseruandum, per virtutem in vtraque parte versiculi, non intelligi virtutes mora-

les, sed potentiam & robur, vt ex verbis Hebraicis & Græcis manifestè colligitur.

PSALMVS XXI.

Titulus, & Argumentum
Psalmi.

*In finem, pro susceptione matutina,
Psalmus David.*



SALMVS hic de passione, & resurrectione Domini tā apertè loquitur, vt planè temerarium sit, ad alium sensum eum velle detorquere.

Titulus respicit resurrectionem, quæ significatur in illa voce, susceptio matutina. Resurrectio enim facta est tempore matutino, & per virtutem Dei susipientis quodammodo Christum de sepulchro, & educens eum ad auram vitalem, iuxta illud Psalmi tertij, & exurrexi, quoniam Dominus suscepit me. Vox Hebræa aieleth, significat ceruum, vel, vt alij volunt, stellā. Sed Septuaginta Interpretes rectè verterunt susceptionem, quoniam apud ipsos verbum, aial, suscipere significat. Quod planum est ex Psalmo 106. vers. 17. vbi vocem, auilim, ipsi legerūt, aialem, & verterunt suscepit eos. Neq. longe absunt ab eodem sensu lectiones ex Hebræo, pro cerua matutina, siue pro stella matutina. Sensus enim est, pro Christo resurgente. Ipse enim resurgens rectè comparatur stellæ, quia surrexit plenus gloria, accinctus lumine, sicut vestimento; & de se ipse dicit Apocalyp. vlt. Ego sū stella splendida, & matutina. Ipse quoque similis est ceruo, siue ceruæ, tū quia ceruo nihil nocent animātia venenata, imò ipse halitu suo serpentes de cauernis educit, & occidit, vt S. Hieronymus in hunc locum, & Basilii in Psalm. 28. scribunt. Christus autem spiritu oris sui interficiet impium, & nihil ei nocere potuerunt omnes impiorum persecutiones.

אֵילָת

אֵיל

אֵילִים

אֵילִים

tiones. Tum etiam quia ceruus velocissimè salit in altissimos montes, vnde in Canticis sapè cōparatur Christus hinulo ceruorū salienti in montes. Ipse enim in die resurrectionis velocissimo saltu ab inferis, & à morte ad vitam immortalem & gloriosam ascendit. Tū denique quia ceruus dicitur arte quadam naturali à senio se defédere, & vergentem in defectum vitam rediuiua nouitate ab interitu reuocare, vt scribit Gilbertus serm. 14. in Cantica; Christus autē in die resurrectionis artē omnipotentiz, & infinitæ sapientiz suæ verè corpus suum iam mortuum rediuiua nouitate ab interitu reuocauit. Cerua verò potius, quàm ceruus dicitur, quia resurrectio propriè ad carnē pertinet. Sicut enim Christus in carne passus est, ita & in carne resurrexit.

Explicatio Psalmi 10.

I. **D**EUS Deus meus, respice in me, quare me dereliquisti? longe à salute mea verba delictorum meorum.

Loquitur Dauid in persona Christi pendentis in Cruce, & in summo passionis dolore constituto, vt patet ex Euangelio, Matth. 27. in quo legimus, Christum morti proximum dixisse, Deus meus, Deus meus, vt quid dereliquisti me? quæ sūt prima verba Psalmi huius. Illud enim respice in me, non habetur in Hebræo, sed fuit additū à Septuaginta Interpretibus declarationis causa. Quod autem Christus queritur, se derelictum à Deo, non significat, eum fuisse derelictum à persona Verbi, qua si esset dissoluta vniō hypostatica; vel destitutum à gratia, & beneuolētia Patris; sed significat, permissum fuisse à Deo, vt ipse in humana natura pateretur horribilia illa tormenta, & mortem ignominie plenam; à qua si Deus voluisset, eum facillimè liberare potuisset. Neque orta est querimonia illa ab impatientia, vel ab ignorantia, quasi Christus ignoraret causam suæ passionis, aut non li-

benter ferret, se à Patre in illis doloribus derelictum; sed fuit querimonia illa; protestatio quadam acerbissimæ passionis. Quia enim in toto progressu passionis tanta animi æquitate Dominus omnia pertulerat, vt ne gemitus quidem exaudiretur; potuissent homines credere, illum superiore aliqua virtute impassibilem redditum, dolores non sensisse. Ideo igitur vicinus morti protestatur, se verum esse hominem, vereque passibilem, & à Patre derelictum in doloribus, passionis acerbitatem sensu doloris intimo, & maximo hausisse. Ait igitur, Deus Deus meus. Christus in forma serui vocat Patrem Deum suum, quia in illa hora propriè eum colebat, vt verum Deum sacrificans illi sacrificium corporis sui, sacrificium omnium, quæ vnquam facta fuerant, præstantissimum. Respice in me, rogat vt videat, vbi pro honore suo constitutus sit, recognoscat obedientiam Filij sui, acceptet sacrificium pro genere humano oblatum. Quare me dereliquisti? non solum protestatio veræ passionis, vt diximus, sed etiam admiratio quadam esse videtur, quasi dicat, fieri nē potest, vt dilectissimum, & vnigenicum filium in hunc doloris abyssum deuenire permiseris? Similia sunt illa, Sic Deus dilexit mundum, vt filium suum vnigenitum daret Ioan. 3. & illa, Proprio filio suo non pepercit, sed pro nobis omnibus tradidit illum. Longe à salute mea verba delictorum meorum. Multi timentes, ne Christo peccati notam inurant, coactè exponunt. Aliqui legunt cum interrogatione, Longè à salute mea verba delictorum meorum? Sed talis interrogatio gratis fingitur, cum in nullo textu inueniatur. Alij exponunt, Peccata mea, cum nulla sint, longe sunt à salute mea, id est, non impediunt salutem meam. Sed facilius dixisset Propheta, Longè à morte mea verba delictorum meorum, si delicta non fuissent causa mortis Christi. Alij coniungunt cum superioribus partem huius sententiæ, sic Deus meus, quare me dereliquisti longe à salute mea.

Sed

Sed omnes textus habent interpunctio-
nem aliam. Et deinde quid significa-
bit illud, verba delictorum meorum?
Alij denique considerant verbum He-
braicum, Sciaagathi, significare rugi-
tum, non delictum, & interpretantur,
Longe à salute mea verba rugitus mei,
idest, rugitus meus, siue clamor meus,
quo auxilium imploro, longe est à sa-
lute mea, idest, non potest impetrare
mihi salutem. Cæterum Septuaginta
Interpretes sine dubio non legerunt
Sciaagathi, sed Sciagaathi, vnica lite-
ra transposita, & recte verterunt, de-
licta, non rugitum. Sententia igitur
simplex, & vera hæc est, longe à salu-
te mea verba delictorum meorum, id
est, meritò me dixi derelictum in dolo-
ribus, quia delicta totius mundi, quæ
in me suscepi, non possunt coniungi
cum mea salute. Necessè enim est, vt
patiar, & moriar, si ea purgare volo.
Christum autem sibi tribuere posse no-
stra peccata, ac si sua essent, Scripturæ
passim docent. Ioan. 1. Ecce Agnus
Dei, ecce qui tollit peccata mundi. 1.
Pet. 2. Peccata nostra ipse pertulit in
corpore suo super lignum. Ilai. 53. Po-
suit Deus in eo iniquitates omnium no-
strum. 2. Cor. 5. Eum, qui non no-
uerat peccatum, pro nobis peccatum
fecit, idest, hostiam, pro peccata. Si-
cut igitur hostia pro peccato non po-
test non immolari, si peccata purgari
debeant: ita Christus hostia pro pec-
catis totius mundi factus, rectè dicit,
Longè à salute mea sunt verba delicto-
rum meorum, idest, non possum mor-
tem euadere, cum peccata totius mun-
di in me sint posita, vt pro eis pœnas
luam. Porro, verba delictorum, phra-
sis est Hebraica. Hebræi enim vtuntur
nomine, verbi, ad rem, siue negotium
in genere significandum. Itaque sen-
sus est, verba delictorum meorum, id
est, hæc ipsa res, quòd tot peccata su-
per me acceperim, pro quibus satisfac-
ciam, longe est à salute mea, idest, non
potest coniungi cum salute mea, ac per
hoc, in causa est, vt mortem non eua-
dam.

Deus meus clamabo per diem, II.
& non exaudies; & nocte, & non
ad insipientiam mihi.

Iterum alia ratione se derelictum o-
stendit sine spe salutis temporalis. Cla-
mabo, inquit, per diem, & non exau-
dies; & nocte, supple, clamabo, & non
exaudies. Est autem sensus, Etiam si
clamem die, ac nocte, nō exaudies me,
vt liberer à morte corporali. Videtur
alludere ad duas orationes, quas fecit,
vnā de nocte in horto, alterā de die
in Cruce, sed non seruat ordinem, quia
sensus est ille, quē dixi, etiam si clamē
die, & nocte, non exaudies. Quod sequi-
tur, & non ad insipientiam mihi, in He-
bræo est, & non silentium mihi; sed Se-
ptuaginta nō videntur per, dumija, vn-
quam intellexisse, silentium. Nam in Ps.
61. ver. 1. vertunt, subiecta in Ps. 64.
vers. 1. vertunt, decet. hoc loco, insi-
pientiam. Igitur vel aliquid aliud lege-
runt, vel nouerunt hanc vocem recipere
omnes istas intelligentias. Sensus au-
tem hic esse videtur, Clamabo die, &
nocte, & non exaudies; & tamen hoc
mihi ad insipientiam adscribi non po-
terit. quia licet, sciam me non exau-
diendum, vt mortem temporalem eua-
dam; tamen prudenter clamo, quia
scio me exaudiendum quo ad principa-
lem intentionem meam, quæ est, vt
genus humanum redimatur, & ego nō
detinear in morte; sed resurgam ad vi-
tam immortalē. Occurrit mihi alia ex-
positio, in qua per, diem, intelligatur tē-
pus vitæ, per noctem tempus mortis, &
hic sit sensus, Clamabo per diem, & nō
exaudies, idest, clamabo dum viuo, vt
à morte liberer temporali, & hunc cla-
morem non exaudies; & nocte clama-
bo, & non ad insipientiam mihi, idest,
clamabo postea, cum mortuus fuero,
vt resurgam, & non ero insipiens, quia
clamorem hunc nocturnum exaudies.
in quem sensum recidit etiam lectio He-
braica, Et noctu, & non silentium mi-
hi, idest, clamabo de nocte, & tunc
non filebis, sicut siluisti ad clamorem
diurnum; sed respondebis mihi, ac
per hoc exaudies me. Et quia illud,
non

ש אנת

ש אנת

ש אנת

תת

ענה

non exaudies, potest etiam reddi, non respondebis, vtrumque enim significat verbum, hanc, clarissime verti potuisset versiculus in hunc modum, Clamabo per diem, & non respondebis mihi, clamabo per noctem, & tunc respondebis mihi. vel secundum Septuaginta, Clamabo per diem, & non exaudies, clamabo per noctem, & non ero insipiens, quia tunc exaudies.

Tu autem in sancto habitas, laus Israel.

Probat se non insipientem de nocte clamaturum, etiam si de die non sit exauditus, & se omnino exaudiendum; idque quatuor rationibus. primo, quia Deus sanctus, & misericors sit. secundo, quia soleat inuocantes se benigne audire. tertio, quia ipse in maxima pressura sit. quarto, quia in Deo ab ipsa sua natiuitate confusus sit, ei que soli adhererit. Prima ratio est in presenti versiculo, Tu, inquit, Domine omnino exaudies me, quia in sancto, id est, in sanctitate habitas, totus sanctus, & pius es, & ad te malitia, vel crudelitas accedere non potest; & ideo tu es laus populi tui Israel, tum quia te laudat populus tuus Israel, tum quia propter te laudatur populus tuus Israel. Hæc enim est maxima laus populi tui, quod habeat Deum omni ex parte sanctissimum. In Hebræo habetur sic, Tu autem sancte, inhabitas laudes Israel, id est, tu sanctus es, & ideo versaris assidue in ore populi tui te laudantis. Sed credibile est Septuaginta interpretes non legisse, chados, sanctus, sed, chodes, sanctitas, vna littera transposita; & tunc verti debet, Tu autem sanctitatis habitator, quod est idem, cum eo quod nos habemus, Tu autem in sancto habitas. Laudes Israel, in numero multitudinis est in Hebræo; sed quia id coniungitur cum Deo, ut sententia esset clarior, maluerunt Septuaginta vertere, laus Israel, quam, laudes Israel.

VI. In te sperauerunt patres nostri, sperauerunt, & liberaſti eos.

Ad te clamauerunt, & salui facti sunt. V. Et si sunt, in te sperauerunt, & non sunt confusi.

Hæc est altera ratio ab exemplis; & sententia perspicua est. Habentur autem multa eiusmodi exempla in libro Iudicum. Quotiescumque enim filij Israel clamauerunt ad Dominum, misit eis Dominus saluatorem vnum ex Iudicibus, ut Gedeonem, Sampsonem, Samuelem, &c.

Ego autem sum vermis, & non homo, opprobrium hominum, & abiectio plebis.

Omnes videntes me deriserunt me, loquuti sunt labijs, & mouerunt caput. VII.

Sperauit in Domino, eripiat eum; saluum faciat eum, quoniam vult eum. VIII.

Hæc est tertia ratio ducta à pressura Christi crucifixi. Ego autem, inquit, sum vermis, & non homo, id est, in tali statu sum hoc tempore, ut non solum minoratus ab Angelis, sed ab hominibus minoratus videar; nimirum nouissimus virorum, ut dixit Isaias, imò infra omnes homines factus, cum & Barabbæ, & latronibus postpositus sim. Itaque adeo factus sum vilis, ut vermis potius videar esse, quam homo. Opprobrium hominum, de quo videlicet, homines erubescunt, quasi de homine dedecoroso. quod impletum est, quando Petrus ipse iurauit, se non nosse hominem illum. Et abiectio plebis, id est, quem etiam plebs vilissima populi pars, ita abiicit, ut diceret, non hunc, sed Barabbam. Omnes videntes me deriserunt me, id est, qui me in eo statu viderunt, irriserunt omnes, omnia videlicet hominum genera, nobiles, ignobiles, sacerdotes, laici, Hebræi, Gentiles. quod impletum est, quando, ut scribit S. Lucas cap. 23. Stabat populus spectans, & deridebant eum Principes cum eis. & infra, Illudebant autem ei & milites. Loquuti sunt labijs, & mouerunt

קדש

קדש

uerunt caput; hoc etiam impletum fuisse docet S. Matthæus cap. 27. Blasphemabant eum, mouentes capita sua, & dicentes, Vah qui destruis templum Dei. Sperauit in Domino, eripiat eum, saluum faciat eum, quoniam vult eum. Eisdem voces Iudæorum fuisse, testatur S. Matthæus in eodem loco, Confidit, aiebant, in Deo, liberet nunc eum, si vult. Nec multum refert, quod Propheta dicit, quoniam vult eum, & Euāgelista refert eos dixisse, si vult. Nam cum Propheta dicit, saluum faciat eum, quoniam vult eum, subintelligitur, ut ipse dicit, quod perinde est, ac si dixisset, liberet eum, si vult eum, idest, si amat eum, ut ipse dicit, liberet eum vel, quandoquidem vult eum, ut ipse dicit, liberet eum. Admiranda prorsus Prophetæ illustratio, qui non solum res gestas, sed etiam verba prænouit, & prædixit, quæ Iudæi in passione Christi dicturi fuerant. Pro, sperauit in Domino, habetur nunc in Hebræo, gol, idest, volue ad Dominum. Sed Rabini male collocarunt puncta. Debet enim legi, gal, idest, voluit, ut legit S. Hieronymus, qui vertit, confugit ad Dominum, quod est idem cum, eo quod verterunt Septuaginta, Sperauit in Domino. Idem enim est, voluit, siue reuoluit se ad Dominum, confugit ad Dominum, & sperauit in Domino.

XI. Quoniam tu es, qui extraxisti me de ventre, spes mea ab vberibus matris meæ.

X. In te proiectus sum ex vtero, de ventre matris meæ Deus meus es tu, ne discefferis à me.

Hæc est ratio postrema ducta ab innocentia perpetua ipsius Christi. Illud, quoniam, non est vbique nota causæ, sed sæpè ponitur loco coniunctionis, & vel autem. Aliquando etiam nihil significat, sed additur ornatus gratia. Tu es, qui extraxisti me de ventre, idest, à natiuitate tuus sum, præsertim cum re vera non naturali modo, sicut ceteri homines, sed virtute tua singulari natus sum non reſeratis claustris pudoris,

sicut etiam absque virili semine in vtero Virginis conceptus fui. S. Hieronymus vertit ex Hebræo, Tu autem propugnator meus ex vtero. Sed verbum, gochi, à radice guach, propriè nihil significat aliud, nisi, educator meus ex vtero. Quid S. Hieronymus sequutus sit, fateor me nescire. Spes mea ab vberibus matris meæ, idest, sicut tu me eduxisti ex vtero, ita tu es, qui præcipuè me aluisti: vbera quidem matris suxi, sed intelligo lac de cælo matri subministratum, & ideo in te ab vberibus matris confidere, & sperare didici. In te proiectus sum ex vtero, idest, prodiens ex vtero in sinum tuum cecidi, qui singulari prouidentia curam mei geris. De ventre matris meæ Deus meus es tu, idest, sicut ab incipiente vita mea tu mihi singulari prouidentia adstitisti, ita & ego ab exordio vitæ meæ te colere capi, ut Deum meum. Ne discefferis à me, hæc verba sūt apud Hebræos initium sequentis versiculi. Sed rectè etiam ponuntur in textu Græco, & Latino in fine superioris versiculi. Sunt enim veluti conclusio superioris rationis, ac si Christus diceret, Quādoquidem in te proiectus sum ex vtero, & ab eo tempore Deus meus es tu; ideo iure à te requiro, ut non disceñas à me, præsertim cum iam instet grauissima, & vltima tribulatio mea, idest, mors corporis mei.

Quoniam tribulatio proxima IX. est, quoniam non est, qui adiuuet.

Possset fortasse hic versus exponi de propinquantē passione, ac de mærore, & timore, quem Dominus in horto pati voluit. Sed certè multo probabilius est, totum hunc locum de propinquantē morte esse intelligendum, tum quia Dominus in præterito statim adiūgit, Foderunt manus meas, & Diuiserunt sibi vestimenta mea: tum etiam quia paulò ante voces Iudæorum expressit, quas in se iam cruci affixum iactauerunt: tum denique quia primum Psalmi versiculum Dominus in cruce pendens, ac morti proximus recitauit.

Igitur

ג'ח
ג'ח

Igitur iuxta id, quod dixerat, non ad insipientiam mihi, nimirum clamabo ad te, precatur nunc, ut Deus sibi adsit in ultima tribulatione, non ut liberetur à morte, sed ut non detineatur in morte. Peto, inquit, ut non discedas à me, quoniam tribulatio, videlicet ultima, & grauissima, proxima est, & quoniam non est alius, qui adiuuare me possit, ut sic moriar, ut mortem occidam.

XII. Circumdederunt me vituli multi, tauri pingues obsederunt me.

Narrat crudelitatem hostium suorum, quos comparat tauris, leonibus, & canibus. Intelligit per inimicos Pontifices, & Phariseos, qui veluti tauri insultabant ei, quasi cornibus eum peterent, dicentes, Vah qui destruis templum Dei, &c. & qui veluti leones aperto ore famem suam demonstrabant, idest, desiderium ingens perdendi eum, unde, & rugiebant dicentes, Tolle, tolle, crucifige eum. Et qui veluti canes mordebant eum, detrahentes videlicet ei, cum dicerent, Hunc inuenimus subuertentem gentem nostram. Et, Si non esset hic malefactor, non tibi tradidissemus eum. Ex quibus detractionibus, falsisque calumnijs tandem factum est, ut Dominus crucifigeretur; ideo statim subiungit, Foderunt manus meas, &c. sed Angula videmus. Circumdederunt me vituli multi: per vitulos non intelligit hoc loco vitulos quoscunque, sed vitulos grandiores, & cornigeros, qui etiam tauri dici possint. Nam quod sequitur, Tauri pingues obsederunt me, est explicatio, siue repetitio; præsertim cum in Hebræo ad verbum habeatur, fortes Basan obsederunt me. Vocat vitulos, fortes Basan, quia erant robusti, & pingues; nam Basan erat regio abundans optimis pascuis, unde pinguisissimi tauri, & arietes prodibant. Dicuntur autem Pontifices, & Pharisei fortes, & pingues, quia erant potentes, & diuites. Aliqui distinguunt vitulos à tauris, & per vitulos intelligunt plebem indisciplinatum, & imbellem; per tauros, Pontifices, & Phariseos. Non est im-

probabilis expositio, sed probabilius arbitror id quod dixi.

Aperuerunt super me os suum, sicut leo rapiens, & rugiens. XIII.

Eisdem significat Pontifices, & Phariseos, qui miro desiderio inhiabant morti eius, ut supra diximus.

Sicut aqua effusus sum, & dispersa sunt omnia ossa mea. XIV.

Factum est cor meum tanquam cera liquescens in medio ventris mei. XV.

Aruit tanquam testa virtus mea, & lingua mea adhæsit faucibus meis, & in puluerem mortis deduxisti me. XVI.

In his versiculis declarat, quo modo se gesserit contra inimicorum suorum crudelitatem; ac dicit, se non restitisse illorum violentiæ, sed in omnibus humilitatem, patientiam, & mansuetudinem seruasse, iuxta illud Isaïæ, Faciem meam non auerti ab increpantibus, & conspuentibus in me: & illud S. Petri, Cum malediceretur non maledicebat, cum pateretur non comminabatur, tradebat autem iudicanti se iniuste. Itaque, inquit, sicut aqua effusus sum, idest, non restiti villo modo, sed instar mollissimæ aquæ me præbui versandum, & impellendum in omnem partem. Et dispersa sunt omnia ossa mea, idest, omnis fortitudo mea dilapsa est à me, non quod verè potentiam amiserim, sed quod ea uti noluerim, & aduersarijs meis potentia sua uti permiserim, iuxta illud, Hæc est hora vestra, & potestas tenebrarum. Itaque debilem, atque imbecillum me præbui ad resistendum, quasi solam carnem sine ossibus haberem. Factum est cor meum tanquam cera liquescens in medio ventris mei, idest, non solum exterius patientem, & mitem me præbui, sed etiam interius humilis corde fui, non intumuit, neque obduruit cor meum contra persequutores nolens ignoscere, & vlcisci parans; sed contra potius factum est

est sicut cera liquecens ex affectu pio erga illos, miserās illorum cecitatem, & pro eis rogans, Pater ignosce illis, quia nesciunt quid faciunt. Illud, in medio ventris mei, significat, in medio viscerum meorum. Sumitur enim in Scriptura, venter, pro interioribus, vt Ioan. 7. Flumina de ventre eius fluent aquę viuę. & Cant. 5. Vēter meus contremuit ad tactum eius. Aruit tāquam testa virtus mea, idest, robur meū quasi exaruit omni virore exhausto, quia videlicet ita me ligari, & vulnerari permisi, quasi impotens essem ad resistendum. Et lingua mea adhęsit faucibus meis, idest, ne verbis quidem aduersarios lādere, aut de ipsorum iniustitia conqueri volui. Et in puluerem mortis deduxisti me, idest, & sic tandem illis persequentibus, & me non resistente, tu Deus meus, sine cuius permissione nihil fieri potest, in mortem, & sepulturam adduxisti me. Vocatur enim puluis mortis ipsa sepultura, quia mortui puluere tegi solent.

XVII. Quoniam circumdederunt me canes multi, concilium malignantium obsedit me.

XVIII. Foderunt manus meas, & pedes meos, dinumerauerunt omnia ossa mea.

Declarat modum, quo in puluerem mortis deductus est. Quoniam, inquit, circumdederunt me canes multi, idest, detractores multi, Pōtīfices videlicet, & Pharisei, qui falsis criminationibus subuersionis populi, tributi denegati, Regni affectati, & similibus Pilatum coegerunt, vt me crucifigendum militibus traderet. Concilium malignantiū obsedit me. Declaratio est verborum superiorum. Canes enim multi nihil sunt aliud, nisi concilium, idest, cœtus malignantium. Isti, inquam, malignantes foderūt manus meas, & pedes meos, non quidem manibus, sed auctoritate sua. In Hebræo legitur, caari, quod significat, quasi leo, sed Septuaginta legerunt, caarū, quod est, foderunt. Et sic omnino esse legendum non

Belarm. in Psal.

dubium est, quia Septuaginta nūquam vertissent, foderunt, si legissent, caari. Sanctus quoque Hieronymus ex Hebræo vertit, foderūt, ac per hoc legisse credendus est, caarū. In ipso etiam libro Massorēth ad cap. 24. Numeri, disferentes Rabbini de illis verbis, Accubuit vt leo, quod est Hebraicē caari, monent in Psalmo hoc legendum quidem esse caari, sed iuxta codices emendationes scribendum, caarū. Quamuis enim ex p̄fidia sua legere velint, quasi leo, tamen fatentur, scriptum esse, caarū, idest, foderunt. Denique sententia multō est clarior, foderunt manus meas, quā, quasi leo manus meas. Neque multum refert, quōd, foderunt, Hebraicē scribendum esset, carū, non caarū, quoniam litera, aleph, sæpē redundat, & ideo paragogica vocatur ab Hebræis. Dinumerauerunt omnia ossa mea, idest, ex corporis extensione in cruce factum est, vt omnia ossa numerari possent. Addidit verō Dauid hoc de extensione, & numeratione ossium, vt intelligeremus crucifixionem. Alioqui enim per fissionem manuum, & pedum potuissēt intelligi vulnera gladio facta, non clauis. In Hebræo habetur in prima persona, numeravi omnia ossa mea. Sed facilē est vnius, vel alterius literę mutatione contigisse errorem. Certē sensus est clarior, si legamus, numerauerunt, quo modo sine dubio legerunt Septuaginta Interpretes, & lectionem illam sequuti sunt S. Hieronymus, S. Augustinus, Theodoretus, & Euthymius in expositione huius loci.

Ipsi verō considerauerunt, & XIX. inspexerunt me; diuiserunt sibi vestimenta mea, & super vestem meam miserunt sortem.

Addit ad supplicium Crucis, ignominiam nuditatis. Ipsi, inquit, curiosē inspexerunt totum corpus meum, quoniam nudatum erat omnibus vestibus. Siquidem eas vestes diuiserunt milites inter se, & super tunicam, quę supererat, sortem miserunt. Quę omnia impleta esse ad literam Ioannes Euangelista testatur.

G

Tu

כר

כאר

כאר

כאר

XX. Tu autem Domine ne elongaueris auxilium tuum à me, ad defensionem meam conspice.

Reuertitur ad orationem, quam inchoauerat in principio Psalmi, & rursum repetierat versiculo decimo, & vñ decimo. Itaque iam tota passione sua exposita, rogat Deum pro celeri resurrectione: nam per eam perfectè liberabitur ab omni persecutione, & iniuria aduersariorum. Tu autem Domine ne elongaueris auxilium tuum à me, idest, aduersarij mei ad summum malitiæ peruenerunt, atque in me omnes vires suas exercuerunt; iam tuum est nō differre amplius auxilij, sed meam defensionem paternè suscipere. In Hebræo ad verbum sic legitur, Et tu Domine ne longè fias, fortitudo mea ad auxilium meum festina. Possent aliquo modo paucis mutatis concordari hæc ipsa verba cum verbis Græcæ, & Latinæ editionis, sed non videtur operæ precium in hac re laborare, cum sensus omnino sit idem.

XXI. Erue à framea Deus animam meam, & de manu canis vnicam meam.

XXII. Salua me ex ore leonís, & à cornibus vnicornium humilitatem meam.

Declarat, in quo velit auxilium sibi adesse. Erue, inquit, à framea, siue gladio animam meam, idest, libera ab instrumento mortis vitam meam. Pōnit enim gladiū, qui mortis est instrumentum, pro quolibet instrumēto mortis, quod in Scriptura frequens est. 2. Reg. 12. non recedet gladius de domo tua. Ezech. 33. Si viderit gladium venientem super terram, &c. Roman. 8. Quis nos separabit à charitate Christi, tribulatio? an angustia? an fames? an gladius? ponit verò animā pro vita, quod similiter in scriptura vñtatiſſimum est. Et de manu canis vnicam meam. Per canem intelligit canes illos, de quibus supra dixerat, sed vñtur numero singulari, vel per figuram intellectiōis, vel

ad significandam vñionem in malum inimicorum suorum. Per vnicam verò intelligit eandem vitam suam, quam vnicè diligebat, sicut par erat diligere vitam Verbi incarnati. Salua me ex ore leonís, illius, de quo supra dictum est, Aperuerūt super me os suum, sicut leo rapiens, & rugiens. Et à cornibus vnicornium humilitatem meam. Antea dixerat, Tauri pingues obsederunt me, nunc loco taurorum ponuntur vnicornes, qui sunt indomite bestię, & tauris etiam ferociōres, vt significet, nequitiam, & crudelitatem inimicorum suorum non imminutam tot supplicijs fuisse, sed auctam. Porro his omnibus verbis non petit Dominus vitam temporalem suam saluari; sed (vt sæpè diximus) petit, vitam suam celeriter reparari, & ita reparari, vt non amplius pateat morsibus canū, vel vnguibus leonum, vel cornibus vnicornium, aut taurorum. Illud, humilitatem meam, in Hebræo est, hanithani, quod Sanctus Hieronymus vertit, Exaudi me; Pagninus autem, respondisti mihi. Sed Septuaginta Interpretes non legerunt, hanithani, sed honithi, vna litera deſecta, idest, humilitatem meam.

XXIII. Narrabo nomen tuum fratribus meis, in medio Ecclesiæ laudabo te.

Iam incipit narrare fructum resurrectionis suæ, qui est conuersio mūdi ad Deum. Narrabo, inquit, nomen tuum fratribus meis, idest, postquam resurrexero mittam Apostolos in mundum vniuersum, & per eos narrabo nomen tuum, idest, notitiā diuinitatis tuæ manifestam faciam omnibus hominibus, qui fratres mei sūt propter assumptam carnem, & sic in medio Ecclesiæ laudabo te, idest, non amplius in angulo Iudææ, sed in medio Ecclesiæ magnæ ex Iudæis, & Gentibus adunatæ laudabo te, per ministros meos videlicet. Hunc locum adducit Apostolus ad Hebræos 2. Propter quod, inquit, non confunditur fratres eos vocare, dicēs: Nūciabo nomen tuum fratribus meis, in medio Ecclesiæ laudabo te.

Qui

XXIII. Qui timetis Dominum laudate eum, vniuersum semen Iacob glorificate eum.

XXV. Timeat eum omne semen Israel, quoniam non spreuit, neque despexit deprecationem pauperis.

Quia dixerat, in medio Ecclesie lau-
dabo te, quod erat implendum per fideles suos, ideo nunc ipsos fideles hortatur, ut Deum laudent. Qui timetis Dominum, id est, qui Dei notitiam habetis, eumque colitis. Timere enim Deum in Scriptura accipitur pro colere. Ita Iona 1. Ionas interrogatus de populo suo: Ego, inquit, Hebraeus sum, Deum qui fecit caelum, & terram ego timeo. & Danielis 6. Paueant omnes Deum Danielis; & Iudith 1. dicitur de Iudith, quod timebat Dominum valde. Itaque sensus est, Vos qui Deum verum cognoscitis, & colitis, laudate eum. Et ne putemus fideles, quos alloquitur, esse paucos, utpote vnam gentem Iudaeorum, addit, Vniuersum semen Iacob glorificate eum, & timeat eum omne semen Israel, id est, glorificet, & timeant Deum omnes Israelitae, non tantum iij, qui sunt Israelitae secundum carnem, sed etiam qui sunt Israelitae secundum promissionem, quales sunt omnes gentes ad Christum conuersi. Vide sanctum Augustinum in epistola 200. alias 197. ad Asellicum, ubi demonstrat, christianos esse veros Israelitas, non carne, sed spiritu, fide, & promissione. Verba sequentia, quoniam non spreuit, neque despexit deprecationem pauperis, Hebraei faciunt nouum versiculum, ei que adiungunt totum versiculum sequentem. Sed Septuaginta aliter interpunxerunt. Reddit igitur rationem Dominus, cur velit ab omnibus laudari Deum, quia videlicet exaudiuit orationem quam fuderat pro resurrectione, & gloria sua; pro victoria contra Diabolum, & redemptione generis humani. Vocatur autem se pauperem, quia talis erat tempore passionis, cum nudus, ac derelictus, fame, sitique laborans, penderet

in Cruce. In Hebraeo pro, deprecationem pauperis, habetur, henuth, quod sanctus Hieronymus vertit, modestiam, & posset etiam verti, afflictionem, humilitatem, clamorem, &c.

Nec auertit faciem suam a me, **XXVI.**
& cum clamarem ad eum exaudiuit me.

Idem repetit alijs verbis. In Hebraeo legitur, nec auertit faciem suam ab eo, & cum clamaret ad eum, exaudiuit. Verisimile est, Septuaginta legisse Iod, ubi nunc habetur Vau, cum sint litterae similes, & Iod sit nota pronominis primae personae, Vau autem tertiae. Sed sententia est omnino eadem. Nam si dicatur, Nec auertit faciem suam ab eo, per illud, ab eo, intelligitur, a paupere, de quo dictum est, non despexit deprecationem, siue afflictionem pauperis: pauper autem ille, Christus ipse est.

Apud te laus mea in Ecclesia **XXVII.**
magna, vota mea reddam in conspectu timentium eum.

Hortatus fuerat fideles suos, ut Deum laudarent, nunc praedicat, id omnino futurum. Apud te laus mea in Ecclesia magna, id est, laus, quam ego tibi canam per fideles meos erit apud te, siue coram te in Ecclesia magna, non in caetu paucorum Hebraeorum, sed in Ecclesia omnium gentium. Posset etiam hic locus exponi de laude, qua laudatur Christus in Ecclesia coram Deo. Euthymius legit, a te laus mea, unde videtur legisse *אני לך*, sed in textu nostro habetur *אני לך*, apud te, & sic legunt Hieronymus, Augustinus, Theodoretus, & alij. Hebraica vox, metheca, vertitur a sancto Hieronymo, apud te, ab alijs, a te. Vtramque enim expositionem recipit. Vota mea reddam in conspectu timentium eum: per vota intelligenda videntur hoc loco vota sacrificiorum, & oblationum, iuxta illud Isaiae 19. Colent eum in hostiis & muneribus, vota vouebunt Domino, & reddent. Christus enim cum videret holocaustum mortis suae gratissimum Deo fuisse, videtur quodammodo

do promississe, se holocaustum illud per ministros suos frequentissimè oblatum eo quo deceret modo, atque hoc est, quod nunc dicit, Vota mea reddam in conspectu timètiū eum, idest, per ministros meos Sacerdotes noui Testamenti assidue immolabo sacrificium Deo gratissimum, idque in conspectu timentium, idest, colentium eum, ac per hoc verorum fidelium. Non enim licet hoc sacrificium coram infidelibus immolare.

XXVIII. Edent pauperes, & saturabuntur, & laudabunt Dominum, qui requirunt eum, viuent corda eorum in seculum seculi.

De hoc sacrificio edent pauperes, qui suam paupertatem, & egestatem spiritualem agnoscunt, & saturabuntur, quia gustabunt bonum, quod est super omne bonum, & laudabunt Dominum gratias agentes Deo pro tam insigni beneficio illi omnes, qui quærunt eum, qui esuriunt, & proinde auidè requirunt Dominum, viuent corda eorum in seculum seculi. Hic erit fructus illius refectionis, ut corda tam nobili cibo resecta viuant vita spiritali, vita gratiæ interim, ac postea vita gloriæ in seculum seculi. Sic enim Veritas ait Ioan. 6. Qui manducat hunc panem, viuet in æternum. Sicut enim cibus corruptibilis vitam conseruat ad tempus, ita cibus incorruptibilis vitam æternam præbet. In Hebræo habetur, viuet cor vestrum in æternum. sed vna litera mutata, ex leuauchem, cor vestrum, fit, leuauam, cor eorum.

XXIX. Reminiscentur, & conuertentur ad Dominum vniuersi fines terræ.

Reddit causam, cur in Ecclesia magna sit laudaturus Deum, quia videlicet conuertentur ad Deum merito sacrificij crucis, omnes gentes. Reminiscentur, inquit, principij vnde prodierunt, idest, recordabuntur, se olim à Deo in primo parente conditos, quod per originale peccatū iam dudum obliuioni mandauerant; & ideo ligno, &

lapidi dixerant, Pater meus es tu: reminiscentur, inquam, primæ creationis, & conuertentur ad Dominum vniuersi fines terræ, idest, omnes gentes, quæ habitant orbem terrarum, vsque ad vltimos eius fines. Significantur autem per omnes gentes, non singuli homines totius mundi, sed ex omnibus gentibus aliqui.

Et adorabunt in conspectu eius vniuersæ familiæ gentium. XXX.

Declaratio est versiculi superioris. Id est enim conuerti ad Dominum omnes fines terræ, adorare Dominum, relictis idolis, omnes familias gentium, quæ vsque ad fines terræ propagatæ inueniuntur. Porro adorare coram Domino, idem est quod adorare Dominum, quoniam vox Hebræa, quam nos verimus adorare, propriè significat, incuruari. Incuruari autem coram Domino, idem est, quod adorare Dominum.

Quoniam Domini est regnū, XXXI. & ipse dominabitur gentium.

Meritò conuertentur ad Dominum, & adorabunt eum omnes gentes, quoniam ipse est verus, & naturalis Rex omnium gentium, idè ipse deinceps, non Dæmones, dominabitur gentium.

Manducauerunt, & adorauerunt omnes pingues terræ, in conspectu eius cadent omnes, qui descendunt in terram. XXXII.

Quia dixerat, edent pauperes, & saturabuntur, & laudabunt Dominum, & adorabunt eum vniuersæ familiæ gentium: ne quis putaret, solos pauperes, & plebeios conuertendos ad Dominum, adiungit de diuitibus, & potètatibus, Manducauerunt, & adorauerunt omnes pingues terræ, idest, ipsi etiam pingues terræ, qui abundant terrenis bonis, ipsi Principes, Imperatores, Reges manducabunt de mensa Domini, & adorabunt, ac laudabunt communem Dominum, cuius est Regnum super omnes gentes. Ponitur autem more prophetico præteritum pro futuro, manducauerunt, & adorauerunt, pro, mandu-

manducabunt, & adorabunt. Et denique omnes, qui descendunt in terram, siue, vt sonat vox Hebræa, qui descendunt in puluerem, idest, omnes mortales, qui tandem per mortem resoluuntur in puluerem, omnes, inquam, cadet in cōspectu eius, idest, genua flectent, & adorabūt. Atque ita verè generalis erit conuersio gentium, quæ est fructus Dominicæ passionis & resurrectionis.

XXXIII. Et anima mea illi viuet, & semen meum seruiet ipsi.

Concludit Psalmum dicens, se deinceps perpetuo victurum ad gloriam Dei, & eidem Deo posteritatem suam fideliter seruituram. Poni autem animam pro toto homine, quod in Scripturis, & præsertim in Psalmis est frequens. Anima mea, idest, ego illi viuam, & semen meum, idest, posteritas mea regenerata per aquam, & Spiritum sanctū seruiet illi. In Hebræo habetur, & anima eius non viuet; sed manifestè apparet, Septuaginta nō legisse, naphscio, anima eius, sed naphsci, anima mea. Solū enim extendenda est particula vnus literæ, vt ex vna voce fiat alia. Sic etiam certū est, Septuaginta non legisse lo, non, sed lo, ei. Et cū sententia lectionis, quam habuerūt Septuaginta longè clarior sit; imò cū sententia lectionis modernorum Hebræorum nihil planè significet, non videtur posse dubitari, quin textus Hebraicus sit corruptus vitio librariorū.

XXXIII. Annunciabitur Domino generatio ventura, & annuntiabunt cæli iustitiā eius, populo qui nascetur, quem fecit Dominus.

Declarat, quod dixit, semen meum seruiet ipsi, dicens: Generatio ventura, idest, populus noui Testamenti suscipiet bonum nuncium de Domino, & de iustitia eius, quæ est iustitia fidei. Illud, annuntiabitur generatio ventura, significat, annūciabitur generationi venturæ, siue nuncium accipiet generatio ventura. Est enim phrasis Græca, qualis habetur etiam Matthæi 11.

Belarm. in Psal.

Pauperes euangelizantur, idest, pauperibus euangelizatur. & 1. Timot. 1. Secundū Euangelium, quod creditum est mihi; nam in Græco ad verbum est, quod creditus sum, sed Interpres mutauit phrasim Græcam, quam reliquit Matth. 11. Itaq; non est sensus, annuntiabitur Domino generatio ventura, idest, ad scribetur Domino generatio ventura, sed annuntiabitur de Domino, siue Dominus generationi veturæ. Quod colligitur tū ex Hebræo, vbi habetur, laddor, idest, generationi; tum quia idem repetitur, vel declaratur in sequentibus verbis, de more Davidis, Annuntiabunt cæli iustitiam eius populo, qui nascetur. Idem enim est, generatio ventura, & populus qui nascetur. Annuntiabitur ergo Dominus generationi veturæ, quia annuntiabunt cæli, idest, cælestes homines iustitiam Dei populo, qui nascetur. Vocatur autem iustitia Dei, iustitia Fidei, quam Deus donat gratis credentibus in Christum, quæ verè facit homines iustos. Hoc enim præcipuè docuit Euangelium, omnes esse peccatores, nec posse viribus proprijs iustificari, sed à solo Deo per Christi fidem veram iustitiam expectandam. In Hebræo non habetur generationi venturæ, sed post nomen generationi, habetur interpunctio, ac deinde verbum, venient, quod coniungitur cum sequenti, & annuntiabunt. Cæterum Septuaginta Interpretes non habuerunt illam interpunctionem post nomen, generationi; & verbum, venient, legerunt in singulari, veniet, ac proinde rectè legerunt; generationi quæ veniet, idest, generationi venturæ. Nomen, cæli, cū dicitur, annuntiabunt cæli, non habetur in Hebræo, neque in Græco textu, sed Latinus interpres addidit explanationis gratia. Et legitur hæc vox, cæli, apud S. Hieronymum, & S. Augustinum in commérario huius Psalmi, sed non legitur à Theodoro, & Euthymio Græcis scriptoribus, quia (vt diximus) vetus Latinus Interpres eam addidit. Illud, quod habetur in fine, quæ fecit Dominus, significat, populum

לדור

G 3 istum

istum noui Testamenti, peculiarem esse Dei populum, ab ipso Deo propriè regeneratum, & creatum in Christo in operibus bonis, vt dicit Apostolus ad Titum. Similis est sententia in Psal. 117. Hac dies, quam fecit Dominus.

PSALMVS XXII.

Titulus, & Argumentum.
Psalmi.

Psalmus David.



ITVLVS. indicat auctorem Psalmi fuisse Dauidem: Argumentum. verò Psalmi est eximia Dei beneuolentia erga Electos.

Explicatio Psalmi 22.

1. Dominus regit me, & nihil mihi deerit, in loco pascuæ, ibi me collocauit.

In hoc Psalmo describitur felicitas electorū Dei per similitudinem ouium, quæ ab optimo aliquo pastore reguntur. In eorum persona Dauid, qui vnus erat ex illis, dicit, Dominus regit me, nihil mihi deerit, quasi dicat, ouicula Dei sum, & quia Deus pastor est potentissimus, sapientissimus, & optimus; ideò confidenter dico, nihil mihi deerit. Hac vox est hominis felicissimi in via, & in spe. Nam beati in patria, & in re, non dicunt, nihil mihi deerit, sed nihil mihi deest. Siquidem fugit ab eis labor, & dolor, & iam intrauerunt in gaudium Domini sui. At Beati in via, & in spe non possunt dicere, nihil mihi deest; cum sint obnoxij multis passionibus; sed rectè dicunt, nihil mihi deerit, quia si esurierint, non deerit panis; si agrotauerint, non deerit medicus; & sic de cæteris. Porro vox illa, regit, in Hebræo, & Græco textu propriè significat, pascere, & idcirco sèius est, Dominus regit me pastoralis modo, sicut pastor regit ouiculas suas. Quod

autem dixit in summa, nihil mihi deerit, declarat per partes in sequentibus verbis. Videntur autem hæc esse, quibus ouicula egere solèt; primo, pascua pingua, secundo, aqua pura; tertio, vt reducantur, si forte errauerint; quarto, vt ducantur per commodas vias; quinto, vt à lupis, alijsque feris defendantur; sexto, vt fatigata sustentètur; septimo, vt si per tribulos, & saxa incedentes lædantur, refocillentur, & recreentur; denique, vt euoluto die, confectoque itinere, domum habeant, vbi requiescant. Hæc omnia præstat abundè Deus electis suis, ac per hoc rectè dicunt, nihil mihi deerit. Incipit Dauid à primo cum subiungit. In loco pascuæ, ibi me collocauit, idest, non collocauit me in loco arido, vel deserto, sed in pascuis vberissimis, vbi salubriū herbarum maxima copia est. Particula, ibi, non habetur in Hebræo, neque est necessaria: addita est ab interprete Græco, & inde translata in Latinam editionem, sed redundat. Porro pabula, siue pascua spiritualia rationabilium ouium Dei, quibus Electi abundant, nihil sunt aliud, nisi notitia Dei, Eucharistia, panis verbi Dei, Veritas ipsa. Hæc enim est, quæ vitam spiritualem sustentat, & auget.

Super aquam refectionis educauit me. animam meam conuertit.

Attingit secundum, & tertium bonum ouiculis necessarium. Super aquam refectionis educauit me, idest, non solum in loco herbis affluente collocauit me; sed etiam in loco vicino salubribus aquis, atque ita educauit, & aluit me optimo pabulo super riuos: aquarum sito, vt possim ab æstu, & sitis ardore refrigerari. Parū refert, quod vox Hebræa, *menuchot*, & Græca *diapausis*, non tam refectionem, quam requiem significat. Idem enim est sensus. Qui enim salubribus aquis ardorem sitis extinguit, & requiescit, & reficitur: Spiritualis aqua, quæ concupiscentiæ ardorem rationabilium ouium refinguit, gratia Dei est, de qua Dominus in Euangelio, Ioan. 4. Qui biberit ex aqua,

מן מנוחה

aqua, quam ego dabo ei, non sitiet in æternum. Nihil enim æquè reprimat carnalia desideria, quàm gustus amoris Dei. Gustato enim spiritu desipit omnis caro. Animam meam conuertit. hoc est tertium bonum, reductionis videlicet. Neque enim potest homo suis solis viribus reuerti ad Deum, sicut potest suis solis viribus auerti. ait igitur, Bonus pastor errantem me quesituit, & reduxit. quod est beneficium magnum, atque Electorum proprium, ut non sinantur errare perpetuo.

III. Deduxit me super semitas iustitiæ, propter nomen suum.

Quartum bonum commemorat. Deduxit, inquit, me super semitas iustitiæ, idest, ingredi fecit me per viam angustam præceptorum suorum, ut iuste viuerem. Id verò fecit remouendo occasiones peccandi, minuendo vires tentatoris, augendo charitatem, dulcescere faciendo iustitiam, illustrando, inflammando, alliciendo, terrendo, alijsq. innumerabilibus modis. Quos modos si aduerteremus, non cessaremus omnibus momentis tam dulci Pastori gratias agere, præsertim cum id faciat non propter merita nostra præcedentia, sed propter nomen suum, idest, ut notas faciat diuitias misericordiæ suæ in laudem gloriæ gratiæ suæ, ut dicit Apostolus ad Ephesios. 1.

IIII. Nam & si ambulauero in medio vmbre mortis, non timebo mala, quoniam tu mecum es.

Hoc est bonum quintum, defensio videlicet à lupis, alijsque syluestribus feris. Nam & si ambulauero in medio, siue, ut habet Hebræus textus, in valle vmbre mortis, idest, per loca tenebrosa, & periculis omnibus exposita ferarum, latronum, præcipitiorum, non timebo mala, quoniam tu mecum es. Nā si Deus pro nobis, quis contra nos? Et verè incredibilis securitas est in corde diligentis Deum, dum recogitat, secū esse illum, cui nihil resistere potest. Frequentissima est in libris Prophetarū commemoratio vmbre mortis, quæ

propriè significat tenebras dæsas, quales adfert mors, quæ priuat omni lumine. Dicuntur enim cæci esse in tenebris, quia nihil vident, & multo magis mortui dicuntur esse in tenebris, quia nihil sentiunt. Hinc videlicet Poetæ loca mortuorum vmbrosa, ac tenebris obfusa esse dicunt. Hinc etiam Scripturæ sanctæ passim coniungunt vmbra mortis cum tenebris, ut vnum per aliud explicetur. Iob 3. Obscurent eum tenebre, & vmbra mortis. & cap. 10. Ad terram tenebrosam, & opertam mortis caligine. Isaia 9. Populus, qui ambulabat in tenebris, vidit lucem magnam, habitantibus in regione vmbre mortis, lux orta est eis. vbi pro eodem accipitur, habitare in tenebris, & habitare in regione vmbre mortis. Quia verò loca tenebrosa multis periculis sunt exposita, & non sine ingenti pauore per ea iter facere solemus; ideo Dauid hoc loco dicit, Et si ambulauero in medio vmbre mortis, idest, in medio ingentiū tenebrarum, vbi multa vndique pericula circumstant, nihil timebo, quoniam tu mecum es.

Virga tua, & baculus tuus, ipse. V. sa me consolata sunt.

Sextum bonum explicatur, quod est sustentatio fatigati. Iam enim Propheeta, omiſſa similitudine ouium, loquitur propriè de hominibus, neque enim oues lassæ sustentantur baculo, sed deferuntur in humeris pastoris. Et quamuis possent hæc verba referri ad castigationem paternam, ut S. Augustinus facit, tamè probabilius est ad literam esse referenda ad sustentationem, ut ea referunt Theodoretus, & Euthymius. Nam vox Hebraica, mishanteca, significat propriè, fulcrum; idest, baculum fulcientem: sicut etiam vox Græca βακτηρία, à sustentando deducitur, vnde βακτηριον, est baculo inniti. Nisi placeat fortasse, virgam referre ad castigationem, & baculum ad sustentationem. Deus enim cum videt suos in via fatigari, lentiusq. progredi, quàm par esset, vtrumque adhibere solet, & verbum increpatorium, & cōsolatorium,

משענתך

ut altero excitet, altero sustentet. Sed utrumque tandem consolationem adfert, quoniam lætatur anima, cum videt profectum suum curæ esse Deo.

VI. Paraſti in conſpectu meo menſā aduerſus eos, qui tribulant me.

VII. Impinguāſti in oleo caput meum, & calix meus inebriās, quā praeclarus eſt?

Hoc eſt bonum ſeptimum, quod videlicet Deus electos ſuos in tribulationibus, quas in hac vita non poſſumus euadere, mirificè conſoletur. Quare non eſt ſenſus horum verſiculorum, quod Deus parauerit electis menſam, oleum, & vinum aduerſus hoſtes, quaſi hæc ſint arma, quibus contra hoſtes pugnandum ſit: ſed ſenſus eſt, Deum opponere tribulationibus magnis magnas conſolationes; & ſicut ingeruntur ab hoſtibus amaritudines, ſic ingeri à Deo ſuauitates, quæ deſcribuntur more humano per ſimilitudinem cōuiuij, in quo ſit menſa referta cibis optimis, adſit etiam vnguētum precioſum, quo aſpergatur caput, nec deſit vinū egregium, atque ad inebriandum, ideſt, exhilarādum aptiſſimum. Solebant enim veteres in magnis conuiuijs adhibere inter præcipuas delicias vnguenta precioſa, quod etiam ſeruatum videmus in Euangelio Matth. 26. à ſancta Maria Magdalena erga Dominum. Porro illa verba, aduerſus eos, qui tribulant me, clariora ſunt in textu Græco, & Hebraico. Nam *יְהוּרִי* Græcum, &, neged, Hebraicum, ſignificant, è regione, ſiue ex aduerſo, ut vertit S. Hieronymus. Proinde ſenſus eſt, è regione tribulationum, quas mihi ingerunt hoſtes mei ſpirituales, tu paraſti, ſiue ordināſti, ut ſonat verbum Hebraicum, conſolationem ingentem, menſam videlicet opiparam. Impinguāſti caput meum oleo, ideſt, vnguento precioſo caput meum perfudiſti, & ſic exhilarāſti faciem meam in oleo, & nō deeſt ex gratia tua calix vini inebrians, & præclarus, qui lætificet cor meum. Similis eſt ſentētia in alio Pſalmo, Secundum

multitudinem dolorū meorum in corde meo conſolationes tuæ lætificaerunt animam meam. Et in Apoſtolo 2. Cor. 7. Repletus ſum conſolatione, ſuperabundo gaudio in omni tribulatione noſtra. Illud, calix meus, in textu Græco eſt, calix tuus, & ſic legunt Auguſtinus, & Euthymius, ſed in Hebræo habetur, coſi, calix meus, & ſic etiam vertit S. Hieronymus. Probabile eſt, emēdatiores codices Græcos habuiſſe, calix meus, quo modo legit S. Hieronymus in Commentario, ubi exponit verſionem Septuaginta, & ſic videtur legiſſe Theodoretus. Imò S. Hieronymus in epiſt. ad Suniam, & Fretellam dicit, in editione Septuaginta haberi, calix meus: & ex errore haberi in quibuſdam codicibus, calix tuus. Proinde noſtra lectio Latina omnino retinēda eſt. Senſus verò ſemper eſt idem. Calix enim ille & meus eſt, quia mihi datus, & Dei eſt, quia à Deo datus.

Et miſericordia ſua ſubſequetur VIII. me omnibus diebus vitæ meæ.

Et ut inhabitem in domo Domini IX. in longitudinem dierum.

Hoc eſt vltimum bonum, quod perducit ad ſummum bonum. Miſericordia tua ſubſequetur me, nō ad tempus, ſed perſeueratèr uſque in finem; quod eſt donum proprium Electorum. Et ut inhabitem, ideſt, & ſubſequetur me, ut inhabitem in domo Domini in longitudinem dierum, ideſt, in æternum. In Hebræo, & Græco textu non habetur, ut, ſed ſolum, &: contra autem nonnulli veterū, ut Auguſtinus, Hieronymus, Theodoretus in Commentarijs non legunt, &, ſed ſolum, ut, & certè ſine alterutro eſſet clarior lectio, nimirum ſic, Miſericordia tua ſubſequetur me omnibus diebus vitæ meæ, ut inhabitem in domo Domini, quomodo legunt Patres: vel ſic, Miſericordia tua ſubſequetur me omnibus diebus vitæ meæ, & inhabito in domo Domini, quo modo vertit ex Hebræo Sanctus Hieronymus. In hiſ enim lectionibus nihil ſubaudiendum eſt. Tamen lectio noſtra non eſt adeo obſcura, ut non poſſit

כֹּפִי

גג
vv

possit satis facile intelligi. Subauditur enim illud, subsequetur, quod paulo ante praecedit. nimirum, Misericordia tua subsequetur me, dum uiuo, ut recte uiuam, & subsequetur post hanc vitam, ut in aeternum uiuam. Quare S. Augustinus licet in textu non legerit, & tamen in Commentario addit, etiam, ut videatur illud subintellexisse. Porro pro voce, inhabitem, in Hebræo habetur, Sciauri, quod significat, redibo. Cæterum Septuaginta legisse videtur, Iasciauti, vna literula addita, & sic recte verterunt, ut inhabitem. Quomodo etiam legit S. Hieronymus, qui non vertit, redibo, sed, inhabita- bo. Quare lectio Hebraica post sancti Hieronymi tempora deprauata fuisse videtur.

Explicatio Psalmi 23.

Domini est terra, & plenitudo eius, orbis terrarum, & vniuersi, qui habitant in eo. I.

Propositum Dauidis est, ostendere ex innumerabili hominum multitudine solum Christum, & paucos alios, paucos, inquam, si ad multitudinem aliorum conferantur, in domum Domini coelestem, & beatissimam intraturos; quare ne forte crederentur cæteri homines ad Deum non pertinere; sed ab alio aliquo principio creatos esse: quod postea Marcionistæ, Manichæi; senserunt; præmittit hos duos versiculos, quibus docet, Deum Creatorem, ac Dominum esse totius orbis terrarum, & omnium rerum, quæ in eo sunt. Domini est terra, & plenitudo eius, idest, & omnia quæ in ipsa sunt, quæque ipsam replent. Quod explicatur per alteram partem versiculi, orbis terrarum, & vniuersi qui habitant in eo. Declarat enim se, cum dixit Domini est terra, intellexisse potissimum de terra habitabili, quæ proprie dicitur, tebel, Hebraicè, & εἰς αὐτὴν Græcè, idest, orbis terræ habitabilis; & cum dixit, omnis plenitudo eius, declarat, se intellexisse præcipue de hominibus, qui habitant in eo, non de cæteris rebus, quæ in ipso sunt.

Quia ipse super maria fundauit eum, & super flumina præparauit eum. II.

Probat Deum, Dominum esse orbis terræ, & omnium habitantium in eo; quoniam ipse fecit terram, & fecit eam supereminere aquis, ut esset habitabilis. Nam si vel aquis omnino caret, vel esset aquis vndique cooperta, inhabitabilis esset. Quia ipse, inquit, super maria fundauit eum, idest, à fundamētis fecit orbem terræ, ac per hoc ex nihilo fecit, & fecit super maria, idest, ut superficies terræ esset altior superficie maris, & similiter super flumina

PSALMVS XXIII.

Titulus, & Argumentum.

Psalmus Dauid, prima Sabbathi.

IN hoc titulo pars illa, prima Sabbathi, non habetur in Hebræo, sed addita est à Græcis, fortasse quia in principio Psalmi fit mentio creationis terræ, quæ prima Sabbathi, idest, die Dominico facta est; vel quia solerent hunc Psalmum die Dominico recitare. Quod quidam volunt, additum esse, prima Sabbathi, quia illo die Dominus resurrexerit; non mihi videtur probabile, cum hic Psalmus, non resurrectionem, sed ascensionem Domini manifestè prædicet: ascensionem autem non prima Sabbathi, sed quinta factam esse, notissimum est. Quod ad Ascensionem hic Psalmus proprie pertineat, testantur Cyprianus serm. de Ascens. Hieron. epist. 142. ad Damasum, Ruffinus in expositione Symboli, Greg. Nyssenus, Ioan. Chrysostomus, Augustinus, Leo, & alij in serm. de Ascensione.

שְׁבַתִּי
יְשַׁבְּתִי

תֵּבֵל

mina præparauit eū, idest, præparauit orbem terræ ad habitationem hominum, & ideo fecit superiorem, & altiorē fluminibus; alioquī enim mare, & flumina terram obruerent, si altiora essent. Ex hoc autem quod Deus terram habitabilem fecit, sequitur, ut sit etiam Dominus omnium hominum, tū quia homines ex terra facti sunt, & in terram reuertuntur; tum quia terram incolunt, non ut Domini, sed ut coloni à Deo constituti, ut terram colant.

III. Quis ascendet in montem Domini, aut quis stabit in loco sancto eius?

Cum omnes homines coloni, & serui Dei sint, & omnes pariter terram, quæ Dei possessio est, incolant: Quis ascendet in montem Domini? idest, eritne aliquis ex tanto numero, & quis ille erit, qui dignus sit ascendere ad locum, ubi propriè habitat Deus? Vocatur mons Domini (ut aliàs sæpe diximus) domus cælestis, quæ est verè sublimis, & sancta, de qua dicitur in alio Psalmo, Cælum cæli Domino, terram autem dedit filiis hominum. Qui hunc locum exponunt de monte Sion, qui erat in Hierusalem ciuitate Iudeæ, videntur nullo solido fundamento nitī posse, cum constet, mōtem illum plenū fuisse hominibus omnis generis, ut planè ridiculum videatur de illo dicere, Quis ascendet in montem Domini?

III. Innocens manibus, & mundo corde, qui non accepit in vano animam suam, nec iurauit in dolo proximo suo.

Respondet, quatuor conditiones requiri in eo, qui sit ascensurus montem Domini. Prima est, ut sit innocens manibus, idest, nihil mali perpetraverit: altera, ut sit mundus corde, idest, nihil mali cogitauerit, aut cupiuerit: tertia, ut non acceperit in vano animam suā, idest, ut non frustra vitam à Deo acceperit, idest, non solum nihil mali fecerit, vel cogitauerit; sed etiam ea omnia

bona cogitauerit & fecerit, quæ ad finem sibi à Deo constitutum obtinendum requiruntur: quarta, ut non iurauerit dolosè. Illud, qui non accepit in vano animam suam, aliqui detorquent ad iuramentum, ut sequens particula sit explicatio superioris. Volūt autem legi, qui non accepit in vano animam eius, idest, Dei; vel iuxta pñcta Rabinorum, qui non accepit in vano animam meā, ut Deus loqui intelligatur. Verum hæc expositio nō videtur probabilis; tum quia sine causa Rabini legi volunt, animam meam, cum vox Hebræa habeat pronomen tertiæ personæ, non primæ, & in tertia persona verterit S. Hieronymus; tum quia lectio illa, animam eius, est omnino noua, & inaudita, cum Latini, & Græci hætenus in ea voce intellexerint relatiuum reciprocum, nimirum animam suam; tum denique, quia nomen Dei in vanū accipere, pro eo quod est, falso iurare per Deum, habetur in Scripturis sanctis, sed animam propriam, vel animā Dei in vanum accipere, pro falso iurare, nusquam legitur. Alij volunt animā suā in vano accipere, nihil esse aliud, nisi vana, idest, temporalia, & caduca cogitare, & concupiscere: sed hoc iam comprehensum erat in illo, Mundus corde, & videtur coactum, & durum. Addidit verò Propheta quartam illā conditionem, de iuramento doloso, ut in eo peccato, quod est vnum ex maximis, cum sit pariter contra Deum, & contra proximum, comprehenderet omnia alia peccata, quæ per instrumentum linguæ committuntur. Itaque is, qui dignus sit in montem Dei, idest, in cælum conscendere, debet vnde quaq; esse perfectus, ita ut neq; corde, neque voce, neque opere vnquam deliquerit, & contra, bona omnia fecerit, quæ ad eius officium pertinebant. Hæ verò conditiones non in alium, quàm in Christum conueniunt. Is enim vnus est, qui peccatum non fecit, nec inuentus est dulus in ore eius, ut dicitur 1. Pet. 2. De reliquis non est qui faciat bonum, non est vsque ad vnum, ut loquitur David in Psal. 13. Et omnes nos quasi oues errau-

נפש
נפש

rauius, inquit Isaias cap. 53. Et Apostolus Paulus ad Rom. 3. Omnes peccauerunt, & egent gloria Dei. Proinde rectè Dominus ipse ait Ioan. 3. Nemo ascendit in cælum, nisi qui descendit de cælo Filius hominis, qui est in cælo. Reliqui sunt de terra terreni, ille solus de cælo cælestis, sanctus, innocens, impollutus, segregatus a peccatoribus, excelsior cælis per Ascensionem factus. Nec tamen sola persona Christi ascensura erat in montem Domini, sed ipse, & corpus eius, quod est Ecclesia, quam lauit sanguine suo, ut exhiberet ipse sibi gloriosam Ecclesiam, non habentem maculam, neq; rugam, ad Ephes. 5. propterea sequitur.

V. Hic accipiet benedictionem à Domino, & misericordiam à Deo salutari suo.

Hic, videlicet Christus, accipiet benedictionem à Domino, idest, copiosissimam bonam pro se, & misericordiam à Deo salutari pro corpore suo, quod est Ecclesia, cuius etiam respectu dicitur Deus salutaris eius. Siquidem vita æterna in Regno cælorum, Christo iustitia, fidelibus eius misericordia est. nam etiam si iusti merentur ex condigno vitam æternam, tamen ipsa eorum merita ex misericordia Dei nascuntur, & dona Dei verissimè appellantur. Vnde in Psalmo 102. dicitur, Qui coronat te in misericordia, & miserationibus. & ad Rom. 6. Stipendium peccati mors, gratia Dei vita æterna. In Hebræo habetur, iustitia à Deo salutari suo, & sic vertit S. Hieronymus, secundum quam lectionem totus hic versiculus Christo propriè conueniret. Tamen Septuaginta, qui verterunt misericordiam, videntur considerasse, iustitiam in Scripturis aliquando accipi pro bonitate, imò etiam expressè pro misericordia, ut in Psal. 111. Disperdit, dedit pauperibus, iustitia eius manet in sæculum sæculi. Vnde est illud in Euangelio Matth. 6. Attendite, ne iustitiam vestram faciatis coram hominibus, ut videamini ab eis. Et mox, Te igitur faciente eleemosynam, ne sciat sinistra

tua quid faciat dextera tua. Itaq; Septuaginta hoc loco non tam ad vocè, quàm ad rem significatam respexerunt.

Hæc est generatio quærentium eum, quærentium faciem Dei Iacob. VI.

Hic iam manifestat Propheta illum vnum innocentem manibus, & purum corde, qui ascendet in montem Domini, & accipiet benedictionem, & misericordiam à Deo, nò esse solum caput, sed caput cum corpore, Christum cum Ecclesia. Hæc, inquit, est generatio quærentium eum, idest, iste qui ascendet in cælum, est generatio quædam hominum regenerantium in Christo, quorum præcipuum studium est Deum quærere, ad faciem Dei videndam anhelare, ad montem denique sanctum totis viribus nitì. Et verè vnū est, ac fortè præcipuum signum electorum Dei, suspirare ad patriam. Generatio enim filiorum huius sæculi nihil minus, quàm Deum quærere, nihil magis quàm mortem horret, & si optio daretur, mallèt in hoc sæculo semper viuere, quàm dissolui, & esse cum Christo. In textu Græco habetur, Hæc est generatio quærentium Dominum, & sic legunt in Commentario Hieronymus, Augustinus, Euthymius, & alij: tamen in Hebræo habetur, quærentium eum, ut habet nostra editio Latina. Sensus omnino est idem; nam illud, eum, refertur ad Dominum, de quo dictum erat, accipiet benedictionem à Domino. Itaque Septuaginta videntur explicasse pronomèn, eum, quod est in Hebræo. Quod sequitur, quærentium faciem Dei Iacob, in Hebræo est, quærentium faciem tuam o Iacob. Quo etiam loco Septuaginta explicuerunt sententiam obscuram textus Hebraici, in quo subintelligitur, Deus, ut sensus sit, quærentium faciem tuam, Deus Iacob: nisi fortè per Iacob, in textu Hebraico intelligatur cætus Beatorum siue cælestis Hierusalem, & tunc in idem recideret, quærere faciem Dei, & quærere faciem Iacob. Quia nemo videt faciem Iacob, idest, cælestis patriæ, qui non videat faciem

סלח

faciem Dei Iacob; cū totum negotium, totaque felicitas illius beatissimi Iacob sit contemplari faciem Dei. Additur in Hebræo selà, idest, semper, quia non solum generatio hæc Deum quærit, sed semper Deum quærit, idest, non fatigatur Deum quærendo, neque finit se abduci à quærendo Deo, ut quærat aliquid infra Deum.

VII. Attollite portas Principes vestras, & eleuamini portæ æternales, & introibit Rex gloriæ.

Cū prauidisset sanctus Propheta, inuentum esse vnum, qui ascendere dignus esset in montem Dei, idest, Christum; prædicit iam illum re ipsa ascensurum, & portas cæli æternas illi aperiendas. Sed more Poetico utitur prosopopeia, & alloquitur tum Principes cæli, idest, Angelos, tum ipsas portas, ac iubet Angelis, ut aperiant, & portis, ut finant se aperiri, imò sponte patefiant aduenienti Regi gloriæ. Euthymius notat portas non aperiri, sed tolli, quia adueniente Rege solent portæ ciuitatis auferri, & deponi in signum subiectionis. At non dicit Dauid auferre portas, sed attollite, & non dicit portis, exite de medio, sed eleuamini. Dicit igitur, attollite, & eleuamini, quia portæ cæli non sunt quasi in pariete, ut ad latera moueri debeant, sed quasi in tecto, vel laqueari, ut sursum versus aperiendæ sint. Vnde etiam refellitur opinio eorum, qui volebant, Prophetam loqui de domo aliqua in monte Sion terrestri, in quam introducenda erat Arca. In Hebræo ad verbū, ut vertit S. Hieronymus, alloquitur Propheta solas portas, ac dicit, Attollite portæ capita vestra, & eleuamini ianuz sæpiterne, & introibit Rex gloriæ. Dicuntur autem portæ attollere capita, quando eleuantur sursum versus, quia tunc attolluntur extreme partes earum, quæ sunt in eis veluti capita. Et quamuis vox Hebræa, rascim, significare possit non solum capita, ut vertit S. Hieronymus, sed etiam Principes, ut verterunt Septuaginta; tamen

pronomen additum, quod Hebræi dicunt affixum, secundum communem Phrasim Hebraicam solet coniungi cum nomine immediatè præcedente, & ideò illud, rascem, deberet verti capita vestra, ut vertit S. Hieronymus; vel Principes vestros, quod hoc loco non est ad propositum. Tamen quia Septuaginta Interpretes satis apertè per, rascim, intellexerunt Principes, cū verterint, & pronomen coniunxerunt cum nomine portas, dicendum est, vel in textu ipsorum pronomen affixū fuisse nomini, scēharim, quod significat portas, non autē, nomini rascim, quod significat Principes; vel posse pronomen affixum vni nomini, referri ad aliud nomen, quamuis rarissimè, & præter regulam.

ראשיכם

ראשים

שערים

ראשים

Quis est iste Rex gloriæ? Dominus fortis, & potens, Dominus potens in prælio.

Introducitur Principes cælestis Hierusalem interrogantes, qui sit ille Rex gloriæ, non quod Angeli in die Ascensionis Domini, ignorarent, Christum esse Regem gloriæ: sed ut exprimat admirationem, quam secum adferbat nouitas illa, quod cerneretur verus homo corporalis ascendere super cælos, non tanquam hospes, sed tanquam Dominus gloriosus, ac sempiternæ ciuitatis. Respondet autem Propheta, Regem gloriæ esse Christum, Dominum fortissimum & potentissimum, qui potentiam suam ostendit in prælio contra Principem tenebrarum, quem deuicit, spoliavit & alligauit.

Attollite portas Principes vestras, & eleuamini portæ æternales, & introibit Rex gloriæ.

Quis est iste Rex gloriæ? Dominus virtutū, ipse est rex gloriæ.

Fingit Propheta Angelos, qui cælo præsumunt, quasi cunctari in aperiendis portis; & ideò rursus intonat, Attollite portas, &c. quæ non significant aliud, nisi

ראשים

nisi ingentem rei nouitatem, quod corpus terrenum supra corpus celeste, & caro humana supra ipsos Angelicos spiritus, cum incredibili totius naturæ admiratione, & quasi stupore conscendat. Rursus igitur introducit Angelos interrogantes, Quis est iste Rex gloriæ? quibus ipse respondet: Dominus virtutum ipse est Rex gloriæ. Audito autem nomine sibi notissimo, nimirum Dominus virtutum, continuo aperiunt, & Regem gloriæ lati suscipiunt. Dominus virtutum, in Hebræo est, Dominus, zebaoth, quod S. Hieronymus vertit, Dominus exercituum. Quod nomen in Prophetis frequentissime tribuitur Deo, neque est commune Dijs per participationem, sed proprium soli Deo propriè dicto, tum quia continet nomen quatuor literarum, proprium soli Deo vero; tum quia solus sit verè Dominus exercituum, quia præest exercitibus Angelorum, qui sunt penè innumerabiles, & potentissimi; & etiã quia soli Deo vero militant omnes creaturæ. Nam ut habemus in Psalmo 148. Ignis, grando, nix, glacies, spiritus procellarum faciunt verbum eius, idest, pugnant ad imperium eius. Expertus est quidem Pharaon Deum esse Dominum exercituum, cum non solum per Angelos, sed etiam per minutissima animalia contra eum pugnauerit, videlicet per ranas, muscas, & culices; nec solum per animalia, sed etiam per res inanimatas, grandinem, ignem, tenebras, morbos, & similia. Porro translatio Septuaginta, qui vertunt, Dominus virtutum, in idem recidit. Nam per virtutes non intelliguntur virtutes morales, quæ dicuntur *ἀρεταί*, sed vires, & potentia, quæ dicuntur *δυναμεις*. Itaque Dominus virtutum, est Dominus virium, & potentiarum, quales præcipuè sunt castrorum acies ordinatæ. In vulgari etiam sermone exercitus armati dici solent, le forze. Ex his habemus, Christum Dominum verè, ac propriè esse Deum, non creaturam, ut Ariani, alijque permulti hæretici voluerunt. Nam in hoc Psalmo dicitur, Dominus virtutum, siue exercituū, quod


nomen in tota Scriptura sacra soli Deo tribuitur; necnon Rex gloriæ, idest, Rex celestis Hierusalem, quæ est regio lucis, & summæ, æternæque claritatis, quod sine dubio soli Deo vero conuenire potest. Additur in Hebræo *סלה*, semper, ut significetur, Christum Regem esse gloriæ, non ad tempus, sed in omnem æternitatem.

סלה.

PSALMVS XXIV.

Titulus, & Argumentum.

In finem, Psalmus David.



N Hebræo non habetur, in finem, sed solum, Psalmus David; non multum refert siue Septuaginta addiderint illud, in finem, siue exciderit ex textu Hebraico. Hic Psalmus est primus ex alphabeticis, habet enim tot versiculos quot sunt literæ alphabeti, nimirum viginti duos, & incipit primus versiculus à prima litera Alphabeti, secundus à secunda, & sic deinceps. Vna duntaxat litera est, à qua nullus versus incipit, videlicet Coph, sed ut damnum hoc refarciatur, in fine Psalmi post ultimam literam ponitur alius versiculus incipiens à litera phè; atque ita duo versiculi incipiunt à litera phe. Quid huius rei causa fuerit, difficile esset diuinare. Similes Psalmi alphabetici sunt 33. 35. 110. 111. 118. & 144. Cur alphabetici scribantur Psalmi, nulla melior occurrit ratio, quam ut consulatur memoriæ. Argumentum Psalmi est oratio deuotissima, qua petitur remissio peccatorum, & gratia benè viuendi. Conuenit autem hæc oratio homini incipienti despicere temporalia, qui sic tenetur desiderio placendi Deo, ut tamen laboret in concupiscentijs superandis.

Explicatio Psalmi 24.

- I. **A**d te Domine leuavi animam meam, Deus meus in te confido non erubescam.

In hoc versiculo, qui est vnus apud Septuaginta, quia continet integram sententiam, sunt duo secundum Hebræos; incipit enim secundus ab illis verbis, in te confido, quia ibi ponitur secunda litera alphabeti. Ad te Domine leuavi animam meam, idest, non inueniens in creaturis vllis quietem, sed vbique spinas, & tribulos, pertæsus vitæ prioris, animam meam abstractam ab affectu quo inhærebat terræ, ad te leuavi; tibi per cogitationem assiduam, & amorem à te inspiratum inhærere cœpi; à te auxilium contra tétationes expecto, & quia in te confido non erubescam, idest, non recedam à te confusus, auxilio non impetrato; ita vt cogar erubescere coram inimicis meis. In textu Græco additur in æternū; sed id non habetur in Hebræo, neq; legitur à S. Hieronymo, S. Augustino, & Theodoro in commentarijs, sed à solo Euthymio ex veteribus. Itaq; rectè non est receptum in editione Latina.

- II. Neque irrideant me inimici mei, etenim vniuersi, qui sustinent te non confundentur.

Explicat, quod dixerat, non erubescam; quia tunc erubesceret, si irrideret ab inimicis, tãquam qui frustra sperasset in Deo. In Hebræo habetur, Neque exultent de me inimici mei. Sed idem sensus est. Siquidem exultatio inimicorum species irrisionis est. Per inimicos autem intelligi possunt tum homines mali, tum etiam Dæmones, quorum exultatio, & irrisio intolerabilem confusionem pareret, si eam seriò cogitarem. Reddit postea causam, cur omninò confidat se non confundendum, quoniam, inquit, vniuersi, qui sustinent te non confundentur; idest, quia longo experimento, exemplis no-

strorum maiorū, & ex ipsis verbis tuis didicimus neminem confundi, neque à spe sua excidere ex ijs, qui te sustinent, idest, qui in te confidentes patienter auxilium tuum expectant. Sustinere Dominum in Scripturis frequentissimum est, & significat expectare Dominum cum certa spe auxiliij.

- Confundantur omnes iniqua III. agentes, superuacue.

Duplicem sensum hic versiculus habere potest; primo enim sensus esse potest, vt significetur, confundendos eos, qui sine causa peccant, idest, qui non peccāt ex ignorantia, vel infirmitate; sed ex malitia. Isti enim non cogitant de pœnitentia, neque de peccato abijciendo; & ideo, si fortè sperāt aliquid à Deo, spes eorum præsumptio est. Ita Theodoretus, & Euthymius. Potest etiam esse alius sensus, fortasse magis literalis, vt significetur, confundendos inimicos iustorum tum visibiles, tum inuisibiles, quia frustra iniquè agunt dum vexant homines iustos; non enim consequuntur finem sibi propositum, nimirum vt iustos perdant, & ad gehennam perducant; cum è contrario illa vexatio sit eis virtutis exercitatio, & meritum gloriæ sempiternæ. Retorquet igitur Propheta confusionem in hostes, quasi dicat, ne finas Domine, vt ego confundar, quod fieret, si inimici mei me irriderēt, & de perditione mea exultarent; sed contra confundantur ipsi, dum cernunt, se superuacue, ac frustra iniquè egisse, vt me ad impatentiam prouocarent.

- Vias tuas Domine demonstra IV. mihi, & semitas tuas edoce me.

Per vias Domini intelligimus legem Domini, quæ verè est via, qua itur ad Deum. Nam si vis ad vitam ingredi, Dominus ait, serua mandata. Cum itaque postulasset Propheta auxilium Domini contra tétationes, explicat quod auxilium potissimū habere desideret, atque ait, Vias tuas Domine, demonstra mihi, idest, fac me ambulare per vias

vias præceptorum tuorum; & semitas tuas edoce me, idest, ostende mihi angustū iter iustissimæ legis tuæ. sic enim euadam omnes irrisiones inimicorum, & non ego confundar, sed confundentur ipsi, qui frustra me suis tentationibus exagitant. Porro cupit doceri legem Domini, non quo ad intelligentiā speculatiuam, sed quo ad praxim, id est, cupit gratiam, quæ persuadeat voluntati, vt libeat implere mandata.

V. Dirige me in veritate tua, & doce me, quia tu es Deus saluator meus, & te sustinui tota die.

Idem repetit, & addit rationem. Dirige me, inquit, in veritate tua, idest, ex me facile declino ad dexteram, vel ad sinistram, deferens viam mandatorum tuorum, propter temporales prosperitates, vel aduersitates; ideo tu dirige me ducēs auxilio gratiæ tuæ per viam rectā in veritate tua, idest, in lege tua, quæ verissima via est. Nam omnia mandata tua veritas. Quia tu es Deus Saluator meus, idest, ideo à te auxilium hoc peto, quia tu solus, qui Deus es, potes saluare animam meam. Non est enim alius medicus, qui nouerit curare morbos animarum, & multo minus qui possit sanitatem perfectam reddere, nisi Deus. Et præterea hoc à te peto, & spero impetraturum, quia te sustinui tota die, idest, perseveranter, & patienter expectaui medicinam tuam, neque aliundè consolationem accipere volui. Magni meriti est apud Deum, tempore tentationis nō deficere a spectælestis auxilij, neque humanas consolationes requirere.

VI. Reminiscere miserationū tuarum Domine, & misericordiarum tuarum, quæ à sæculo sunt.

Quando Deus finit animam tentationibus agitari, vel in peccatis hære, videtur oblitus misericordiæ suæ; ideo iustus diu luctatus cum tentatione, vel videns se non posse liberari à lapsu in peccata, quod sunt opere cu-

pit, clamat ad Deum, vt recordetur miserationum, & misericordiarum suarum antiquarum. Inter miserationem, & misericordiam hoc interest, quod misratio significat actum miserendi, misericordia habitum virtutis, & idē ferē discrimen inuenitur in verbis Hebraicis, quamuis sint magis dissimilia inter se, quàm Latina. Quod hic habemus, miserationes, in Hebræo est, rachameca, quod amorem, & viscera paterna propriè significat, vnde est illud Psal. 102. Sicut miseretur pater filiorū. Quod autem hic habemus, misericordias, in Hebræo est, chasadecha, quod pietatem, & probitatem, ac misericordiæ virtutem significat. Itaque sensus est, recordare Domine, te ab æterno misericordem fuisse, nec solum misericordem, sed etiam misereri solitum, & viscera paterna exhibere erga filios tuos. Proinde hoc tibi esse propriū & naturale. Illud, quæ à sæculo sunt, in Hebræo, & Græco est, quia à sæculo sunt, & sic legūt S. Augustinus, & Theodoretus. Tamen S. Hieronymus in commentario, & Euthymius legunt, vt nos habemus, quæ à sæculo sunt; ex quo apparet, textus Græcos, & Latinos olim fuisse varios. Sensus est idem, siue dicamus, reminiscere, quod ab æterno misericors es, siue reminiscere misericordiæ tuæ, quæ ab æterno est.

רחמים

חסדך

VII. Delicta iuuentutis meæ, & ignorantias meas ne memineris.

Pulchrè opponit reminiscentiæ obliuionem, quasi dicat, reminiscere misericordiæ tuæ, & obliuiscere peccatorum meorum. Nam vnum est causa alterius; tūc enim Deus reminiscitur misericordiæ suæ, quando non vult amplius reminisci peccatorum nostrorū: sed ea remittit, ac delet, ac si æternæ obliuioni mandentur. Commemoratur autem peccata iuuentutis, & ignorantias, idest, delicta commissa ex infirmitate, & ignorantia; tum quia istis magis quàm alijs conuenit misericordia, iuxta illud Apostoli 1. Timot. 1. Misericordiam consequutus sum, quia ignorans

rans feci; tum quia forte David nō alia peccata habebat: & hæc oratio iusti hominis est, cui cum peccatis leuibus cērtamen est; tum etiam quia, vt notat Euthymius, peccata ex malitia non remittuntur per solam orationem, sed dignis pœnitentiæ fructibus indigent.

In Hebræo non habetur, ignorantias meas, sed, Peseiagai, idest, scelera mea.

פֶּשַׁעַי

Quia verò Septuaginta verterunt, *dyvrias*, idest, ignorantias, & de eorum eruditione, & fide dubitare non possumus, & re vera magis congruit cū peccatis adolescentiæ ignorantia, quàm scelus; cogimur dicere vocem Hebraicam generalem esse, & tam scelera, quàm peccata leuiora significare.

VIII. Secundum misericordiam tuam memento mei tu, propter bonitatem tuam Domine.

Declarat quod dixerat, reminiscere misericordiæ tuæ, & obliuiscere delictorum meorum. Hoc enim totum fit, cum Deus recordatur hominis peccatoris secundum misericordiam suam.

IX. Dulcis & rectus Dominus, propter hoc legem dabit delinquentibus in via.

Confirmat ipse se in spe impetrandi, affirmans, Dominum bonum, & iustum esse; & ideo libenter corrigere solere delinquentes. Sic enim exercet misericordiam erga hominem, & iustitiā erga peccatum. Pro, dulcis, in Hebræo est, *tob*, quod propriè bonum significat: & in Græco quoque *καλός*, bonum potius, quàm dulcem significat.

טוֹב

יִרְחַם

Proinde illud, dulcis, quod est in nostra editione Latina, pro bono, accipiendum est. pro, legem dabit, in Hebræo est, *iara*, idest, docebit, & in Græco *νομοθετησά*, idest, legislatorem, seu præceptorem se exhibebit. Itaque nō est sensus, Deum legem dare quomodocunque, sed legem dare eam docendo, & persuadendo, ac per hoc faciendo, vt obseruetur. Respondent enim hæc verba verbis superioribus, vias tuas demonstra mihi, & semitas tuas

edoce me, dirige me in veritate tua, & doce me. Quod enim tunc petebat, nunc affirmat, Deum concedere solitum esse. Hic igitur est sensus, Dulcis & rectus Dominus est, & ideo amat homines, & odit peccata; ac propterea legem suam demonstrat, ac persuadet delinquentibus in via huius vitæ, vt ipsi etiam ex iniquis, & malis, iusti & boni efficiantur.

Diriget mansuetos in iudicio, X. docebit mites vias suas.

Declinat quod dixerat, legem dabit delinquentibus, ac dicit non de omnibus delinquentibus id esse intelligendum, sed solum de mansuetis, & mitibus, qui non resistunt Domino docenti, imò cupiunt doceri. Diriget, inquit, mansuetos in iudicio, idest, ducet per viam rectam legis suæ (quæ iudicium etiam in Scripturis appellatur, vt diximus in explanatione Psalmi 18.) homines humiles, & mites. Deinde hoc ipsum declarat alijs verbis, dicens, Docebit mites vias suas, idest, mitibus dabit gratiam cognoscendæ & amandæ, ac per hoc implendæ legis. Hoc loco annotandum est, nō excludi superbos omnino à gratia Dei, sed ordinem assignari. Superbi siquidem non sunt perfectionis capaces, de qua propriè agitur in hoc Psalmo, nisi prius timore cōcepto pœnitentiam agant, & timore deposito, mites, humilesq, reddantur. Itaq; primum gratia Dei superbos, atque obstinatos emollit, & cōterit, deinde contritis, & humiliatis demonstrat vias suas, & dirigit eos in iudicio.

Vniuersæ viæ Domini misericordia & veritas requirētibus testamentū eius, & testimonia eius. XI.

Addit ad id quod dixerat, nō solum à Deo dirigi mansuetos, sed omnia opera Dei erga tales homines esse misericordiam, & veritatem, idest, misericordiam, & iustitiam, quatenus iustitia accipitur pro fidelitate, & veritate, quæ quod promittitur implere facit. Viæ Domini hoc loco vocantur opera Dei,

Dei, quibus Deus ad nos quodammo-
do venit; nisi fortè magis placeat, per
vias Domini intelligere morem Dei,
siue regulam, & quasi legem, qua Deus
utitur. Itaq; via Domini semper signi-
ficat legem, sed aliquando legem, quā
nobis dat, ut per eam, quasi per viam
rectam ascendamus ad ipsum; aliquan-
do legem qua ipse utitur, cum per ope-
ra descendit ad nos. Et quia iam mul-
ta dixerat Dauid de via Domini prio-
re, idest, de lege nobis data: nūc adiun-
git aliquid de via Domini posteriore,
idest, de lege, quam ipse sibi posuit, &
quā seruat erga nos. Ergo, inquit, vni-
uersæ viæ Domini, misericordia, & ve-
ritas, idest, lex, siue regula, siue modus
procedendi Dei consistit in misericor-
dia, & veritate, ut misericorditer pro-
mittat, & fideliter impleat quod pro-
misit. At cum quibus utitur Deus hac
lege? cum requirentibus testamentum
eius, & testimonia eius. Vocat testamē-
tum Dei pactum illud, quod fecit cum
hominibus, quādo legem dedit, ut ipsi
sint populus eius, & ipse Deus eorum.
Quod quidem pactum vocatur etiā in
Scripturis testamentum, quia continet
promissionem hereditatis, & quia mor-
te testatoris confirmandum erat, sicut
re vera cōfirmatum est in morte Chri-
sti, in cuius rei signum Moyses asperxit
sanguinem in populum dicens, Hic est
sanguis Testamenti, quod mādauit ad
vos Deus. Exod. 24. & Heb. 9. Vocat au-
tem testimonia Dei, ipsam legem, quā
Deus dedit, quoniam, ut aliās diximus
per legem testificatur nobis Deus vo-
luntatem suam. Cum illis igitur Deus
utitur lege misericordiæ, & veritatis,
qui requirūt pactum cum Deo initum,
ut illud obseruent, & similiter requi-
runt legem Dei, ut eam impleāt, idest,
cum hominibus bonæ voluntatis, Deū
timentibus, & diligētibus. In Hebræo
habetur pro voce, testamētū, berith,
quod propriè pactum significat. Sed
Septuaginta vertere solent *διαθήκη*,
idest, testamentum; propter rationem
iam dictam. Sic etiā pro voce, requirē-
tibus, in Hebræo est, nozere, custodien-
tibus: sed idem est sensus. Qui enim re-

ברית

נצרי

Belarm. in Psal.

quirunt pactum, quod fortè iam obli-
erant, ad hoc requirunt, ut custodiant.

Propter nomen tuum Domi- **XII.**
ne propitiaberis peccato meo,
multum est enim.

Ex vniuersali lege, qua Deus utitur
erga timentes se, colligit Propheta bo-
nam spem se habere posse de remissio-
ne suorum peccatorum. Propter nomē
tuū Domine, idest, ut manifestetur mi-
sericordia, & veritas tua, propitiabe-
ris peccato meo, quod multum est. Po-
test autem dici multū, vel propter mul-
titudinem, sicut dicitur multus popu-
lus, iuxta illud Apostoli Iacobi, In mul-
tis offendimus omnes; vel propter ma-
gnitudinem, & grauitatem; quia viri
sancti etiam parua peccata, magna exi-
stimant: & verè magna sunt, si magni-
tudo eius qui offenditur consideretur.

Quis est homo, qui timet Do- **XIII.**
minum? legem statuit ei in via,
quam elegit.

Facit Propheta more amātium, qui
nunc suspirant ad rem amatam, nunc
eam laudant, nunc iterum suspirant.
Amabat vir iustus gratiam Dei, cupie-
bat remissionem peccatorum, donum
rectè viuendi, & placendi Deo: ideò
nunc hoc ipsum petit; nunc laudat gra-
tiam istam, & felicitatem enarrat ti-
mentium Deum, idest, eorum, qui gra-
tiam istam cōsequuti sunt; nunc reuer-
titur ad hoc ipsum desiderādum, & po-
stulandum. Itaque in hoc versiculo, &
duobus sequentibus narrat bona, quæ
assequuntur timentes Deum. Quis est,
inquit, homo, qui timet Deū? quasi di-
cat, prodeat in medium homo verè ti-
mens Deum, & audiet ex me suam feli-
citatem. Quod sequitur, legem statuit
ei in via, quam elegit; multi volunt esse
initium felicitatis, quā Propheta enar-
randam suscepit, quasi dicat, iste timēs
Deum, hoc in primis habebit, quod
Deus eum instruet de lege sua in via,
quam elegit, idest, in statu vitæ, quem
elegit. Ita Theodoretus, & Euthy-
mius. Non reiicio expositionem;
H sed

sed magis literalem puto aliam, quam insinuant Hieronymus, & Augustinus. Est enim consuetudo Prophetæ idipsum in eodem versiculo bis repetendi, vel declarandi in vna parte versiculi, quod in altera dictum est. Hunc igitur sensum esse existimo, Quis est homo, qui timet Deum? Quis, inquam, est ille, quem Deus instruxit de lege sua in via, quam ipse homo elegit, idest, in recto itinere bene viuendi, & eundi ad Deum, quod ipse voluntariè iam elegit. sic enim vna pars versiculi declarat alteram. Ille enim est homo timens Deum, qui dono Dei elegit viam, quæ itur ad Deum, quæ est observatio mandatorum. Illa verba, Legem statuit ei, in Hebræo, & Græco vnicum tantum verbum est, quod significat docere, instruere, præcipere, præceptorem se exhibere, & similia. Itaque verti poterat, quis est ille, quem Deus docuit? proinde legem statuit ei, significat, legem dedit in corde eius, idest, instruxit, & docuit eum. Et pronomen, ei, explicandum est (vt sanctus Hieronymus fecit) per relatiuum, quem, vel cui, idest, quem docuit de lege, vel cui dedit legem in corde. Hæc enim est recta interpretatio verbi Hebraici.

XIV. Anima eius in bonis demorabitur, & semen eius hæreditabit terram.

Hæc est felicitas timentis Deum, quod anima eius, idest, ipse timens Deum in bonis demorabitur, idest, bonis fruetur non ad breue tempus, aut per transitum, sed permanenter, & stabiliter. Quæ sententia verissima est, nam diligenter Deum omnia cooperantur in bonum. Proinde timens Deum semper fruetur bonis, quia si res bene cedent, fruetur bono prosperitatis; si contra, fruetur bono patientiæ, & spe magni præmij in Regno cælorum. Ita semper erit latus. Nec ipse solum in bonis morabitur, sed etiam filij eius propter ipsum, hæreditabunt terram, idest, terram possidebunt. In Scripturis enim, vt exposuimus in Psal. 15. pro eodem

accipitur hæreditare, & possidere. Dicuntur autem filij timentium Deum possideri terram, quia pacificè habitabunt in terra, & nemo eis nocebit, in eo sensu, quem attigimus, quia bonis omnia cooperantur in bonum, & ipsæ tribulationes conuertentur in gaudium.

Firmamentum est Dominus timentibus eum, & testamentum ipsius, vt manifestetur illis.

XV.

Hæc est ratio, cur timentes Deum in bonis semper morentur, quoniam non innituntur rebus caducis, & perituris, sed Deus ipse est firmamentum eorum, idest, in Dei amicitia, & auxilio fundatas habent spes suas. In Hebræo est, Sod, quod secretum significat, & ideo S. Hieronymus vertit, secretum Domini timentibus eum, supple, reuelatur. Sed Septuaginta videtur legisse iesod, fundamentum, vna literula addita, quæ facili negotio ex textu Hebraico temporis progressu excidere potuit. Et sine dubio melius congruit hoc loco fundamentum, siue firmamentum, quàm secretum. Cur autem timentes Deum iure innitantur Deo, vt solidissimo fundamento, ratio est, quia testamentum, idest, pactum Domini, hoc eis manifestat; quia enim timentes Deum optimè norunt, & sæpè recogitant, Deum pepigisse fœdus cum hominibus, vt sit eorum Deus, & quasi amantissimus parens, si ipsi leges eius seruauerint; ideo ex hoc pacto intelligunt se in Deo, tanquam in firmissimo fundamento, quiescere posse. Hæc est sententia huius loci, sed verba Latine editionis obscura sunt, & ex verbis Græcis dilucidanda erunt. Vox illa testamentum, nominatiui casus est in Græco, videlicet *διαθήκη*, & sic etiam intelligi debet in Hebraico, & Latino. Illud, vt manifestetur eis, in Græco *ἀποκαλύψεται*, manifestabit eis, idest, pactum Domini manifestabit timentibus Deum, quod Dominus firmamentum eorum sit, idest, ex pacto illo cognoscent, Dominum esse firmamentum timentium se. In eundem sensum exponi possunt verba

710

710'

verba Hebræica, Et pactum eius ad docendum eos. sic enim est ad verbum, & sensus est, & pactum Domini erit ad docendum eos, idest, docebit eos, quod Dominus firmamentum sit timentium se. In eundem igitur sensum oportet etiam accommodare verba Latina, Et testamentum ipsius ut manifestetur illis, idest, & testamentum, siue pactum eius, supple faciet, ut manifestetur illis id, quod paulò ante dictum est, videlicet, Deum esse firmamentum timentium se.

XVI. Oculi mei semper ad Dominum, quoniam ipse euellet de laqueo pedes meos.

Laudata paulisper felicitate timentium Dominum reuertitur ad eam optandam & petendam: oculi mei semper ad Dominum, idest, assidue respicio mentis oculis Deum tanquam ab illius auxilio totus pendens. Efficacissimum orandi genus est, habitu miserabili respicere eum, à quo auxilium speres, & magis inopiam ostendendo, & modestè tacendo, quàm odioso clamore benignitatem diuitis implorare. Sicut oculi ancillæ, ait idem Propheta alio loco, in manibus Domine suæ, ita oculi nostri ad Dominum Deum nostrum, donec misereatur nostri. Quoniam ipse euellet de laqueo pedes meos, idest, idè tam intentè in Deum respicio, quoniam ipse tandem, ut spero, liberabit me ab omni periculo tentationum, quæ veluti laquei vbique nobis in hac vita insidiantur. Posset etiã illud, oculi mei semper ad Dominum, referri ad intentionem semper Deo placendi, neq; vilo modo aliquid admittendi contra ipsius voluntatem. posset quoque referri ad contemplationem diuinæ pulchritudinis, quam semper ob oculos habent, qui seriò diligunt Deum. Sed prima explicatio videtur maximè literalis.

XVII. Respice in me, & miserere mei, quia vnicus, & pauper sum ego.

Quia ipse Deum semper respicit, me

ritò petis, ut respiciatur à Deo. Hoc enim est, quod tacitè petebat, cum oculos intentos in Deum habebat, nimirum ut misericorditer respiceretur eius solitudo, & paupertas. Dicit se vnicum, idest, solum & desolatum, vel quia re vera destitutus fuisset ab amicis, & cognatis; vel, quod magis probò, quia ipse se animo ab alijs omnibus separauerat, & in Deo solo spem omnem posuerat. Dicit autem pauperem, quia humilis erat, & se virtutibus, ac meritis vacuum arbitrabatur.

XVIII. Tribulationes cordis mei multiplicatæ sunt, de necessitatibus meis erue me.

De tentationibus peccatorum hunc locum intelligo potius, quàm de temporalibus aduersitatibus. Erat enim & hic vnus ex illis, qui cum Apostolo gement, & dicunt, Sentio aliam legem in membris meis repugnantem legi mentis meæ, &c. & miser ego homo, quis me liberabit de corpore mortis huius? Necessitates autem à quibus liberari cupit, videntur esse molestissima illæ concupiscentiæ, quæ velimus, nolimus nos vexant, & aliquando in peccatum pertrahunt. Multiplicatæ sunt, in Hebræo habemus, hirciuv, dilatatæ sunt. Sed quoniam verbum Hebraicum, tsaroth, angustias propriè significat, pro quo nos habemus tribulationes, & angustia cum dilatantur desinunt esse angustia, ideo ad tollendam ambiguitatem, Septuaginta prudenter verterunt, nò ut verba sonant, angustia dilatata sunt, sed, ut sensus erat, tribulationes multiplicatæ sunt. Siquidem hoc loco dicuntur angustia dilatata, non quia perierunt, sed quia creuerunt. Quod enim dilatatur, utiq; crescit. Posset etiam fieri, ut Septuaginta non legissent, hirciuv, dilatata sunt, sed hirciuv, multiplicata sunt vnica litera mutata. Sanctus etiam Hieronymus eodem modo vertit, tribulationes multiplicatæ sunt; proinde si corrupta sit Hebraica lectio, post tempora S. Hieronymi corrupta est.

H 2 Vide

הרחיב

צרות

הרחיב

הרחיב

XIX. Vide humilitatem meam, & laborem meum, & dimitte vniuersa delicta mea.

Pergit in oratione, ac petit sibi remitti peccata, in quæ aliquando tentatione vincente prolabitur. Quamuis enim affligatur timens Deum, & multum laboret resistendo concupiscentijs, tamen septies in die cadit iustus; sed hinc etiam iustus esse probatur, quod sordes, quas minus cautè ambulando contrahit, studiose flendo, & orando abluit. Per humilitatem hoc loco non intelligit virtutem humilitatis, sed abiectiōem, & vilitatem. vilesce enim sibi vir iustus vehementer, cum immaculatus esse cupit, & tamen sordes non euadit. pro verbo, dimitte, in Hebræo est, sa, quod Sanctus Hieronymus rectè vertit, porta. porta, inquit, omnia peccata mea. & quamvis sensus sit idem, tamen habet nescio quam vim illud, porta. significat enim timorem quendam, siue sollicitudinem hominis amantis Deum, ne fortè Deus multitudine peccatorum offensus ad iram prouocetur; ideo clamat, porta omnia peccata, quasi dicat, & si multa sint, tamen non fatigeris ignoscere, supporta imbecillitatem meam.

XX. Respice inimicos meos, quoniam multiplicati sunt, & odio iniquo oderunt me.

Ab alio loco ducit argumentum, videlicet à multitudine, & crudelitate hostium. Quasi dicat, vidisti Domine humilitatem, & laborem meum, vide etiam hostium meorum spiritualium multitudinem, & crudelitatem, atque iniquitatem. Hostes qui nos ad peccata pertrahere tentant, & ignitis iaculis concupiscentiam accendere nō cessant, Dæmones sunt, quos spirituales nequitias Apostolus vocat: eos innumerales esse notum est, nec minus est notum, odio iniquitatis, idest, odio iniquissimo in nos ardere. Dicitur odium iniquum, siue iniquissimum, cum quis alium sine causa odit, à quo videlicet

nullam accepit iniuriam. Potest etiam dici odium iniquum, vel iniquissimum, cum quis alteri nocere studet, solo studio nocendi, non vt ipse inde aliquid lucretur. Tale omnino est odium diaboli erga genus humanum, ac potissimum erga electos, neque enim homines diabolo iniuriam vllam fecerunt, sed ille ab initio inuidia excaecatus, hominem perdidit. Inuidia diaboli, inquit Sapientis cap. 2. mors intrauit in orbem terrarum. Et nunc fideles tentationibus exagitat, non vt ipse commodum reportet, sed quia delectatur in perditione iustorum.

Custodi animam meam, & erue me, non erubescam, quoniam speraui in te. **XXI.**

Cum tot hostibus, ac præsertim inuisibilibus circumdatus sim, non sufficio, meis viribus illis resistere; ideo ad te recurro, vt tu custodias animam meam, & custodiendo liberes, & eruas de manibus eorum. Nam non solum dicuntur liberari, & erui de manibus hostium, qui iam capti sunt; sed etiam qui nuntiuntur ne capiātur; & qui sine dubio caperentur, nisi adiuuarentur. Eruisti me, inquit, idem Propheta, ex inferno inferiore, idest, fecisti ne caderem in infernum inferiorem. Potest etiam sensus esse, Custodi animam meam in hoc carcere corporis, in quo captiuis detineor, nam lex membrorum captiuum me ducit in lege peccati, Rom. 7. & postea, suo tempore erue me.

Innocentes, & recti adhæserunt mihi quia sustinui te. **XXII.**

Quia dixerat in præcedenti versiculo, non erubescam, quoniam speraui in te: adiungit rationem; cur timeat erubescere, si à Deo deseratur. Et ratio hæc est, quoniam multi viri innocentes & recti, exemplo ipsius commoti adhærebant illi, ob id potissimum quod videbant eum sperare in solo Deo. Qui certè cogerent eum erubescere, & confundi, si à spe sua frustraretur. Quare illud, non erubescam, aliter accipitur in principio Psalmi, aliter hoc loco. Nam

in

in principio Psalmi sensus erat, non erubescam coram inimicis iridentibus; hoc loco sensus est, non erubescam coram amicis diligentibus, & dolentibus. In Hebræo habetur ad verbum, innocentia, & rectitudo conseruabunt me; sed non est inusitatum, ut abstractum sumatur pro concreto, & futurum pro præterito, idest, innocentia, & rectitudo, pro innocentibus, & rectis; & conseruabunt, pro conseruauerunt. Sed pro voce hebraica, izzeruni, quæ significat conseruabunt me, siue conseruauerunt me, videntur legisse Septuaginta izroruni, vnico puncto mutato, quæ vox deducitur à, zarar, & significat, alligabunt, siue alligauerunt se mihi, quod est idem cum eo, quod Septuaginta verterunt, adheferunt mihi. Recta igitur est interpretatio Græca, & Latina, sed Rabini non rectè legerunt dictionem Hebraicam, & ideo non rectè puncta omnia subiecerunt.

יִצְרוּנִי

יִצְרוּנִי

צָרָר

XXIII. Libera Deus Israel ex omnibus tribulationibus suis.

Quoniam Dauid non solum vnus erat de populo Dei, sed erat etiam Princeps, & caput aliorum: ideo posteaquam orauit satis diu pro se, adiungit orationem pro toto populo suo, & orationem generalem, quoniam non facile poterat descendere ad singularum personarum necessitates, & angustias. Libera, inquit, Deus Israel ex omnibus tribulationibus; Vbi vox illa Israel, est in casu accusandi, ut cognoscitur ex articulis additis in Codicibus Hebraicis, & Græcis. Sensus igitur

est, non mihi satis est, si solus

ab angustijs meis liberer,

sed peto etiam

ut liberes Is-

raelem,

po-

pulum scilicet Israeliticum

ab omni genere tribu-

lationum.



Belarm. in Psal.

PSALMVVS XXV.

Titulus, & Argumentum
Psalmi.

In finem, Psalmus Dauid.



N Hebræo nō habetur pro titulo nisi simplex nomē Dauid, seu potius Dauidi. Argumentum verò idem est quod Psalmi septimi.

Cum enim Dauid grauissimis calumnijs accusaretur, quasi regnum inuadere appeteret, & propterea exulare, & latibula querere cogeretur: scripsit hunc Psalmum, in quo Deum innocentia suæ testem adducit, eundemque Deum pro liberatione sua precatur.

Explicatio Psalmi 25.

Iudica me Domine, quoniam I. ego in innocentia mea ingressus sum, & in Domino sperans, non infirmabor.

Dauid cum Rege causam habens, Deum quodam modo appellat, qui Rex Regum est: neque enim alius erat tunc in terris, quem appellare posset. Iudica me Domine, idest, sis tu Domine Iudex meus, non sinas à Saule me iudicari, sed assume tu hoc iudicium. Quoniam ego in innocentia mea ingressus sum, idest, audacter prouoco ad iudicium Dei, quoniam conscientia mea, quam solus Deus videt, me non apprehendit, nam in innocentia ambulaui, idest, innocenter vixi. Et in Domino sperans non infirmabor, idest, in Dei iustitia confidens, non deficiam in hoc iudicio, sed praualebo. Illud, non infirmabor, Hebraicè est, non deficiam, siue, non vacillabo; proinde, non infirmabor, significat, non ero infirmus ac debilis, ut causa cadam.

H 3

Pro

II. Proba me Domine, & tenta me, v're renes meos, & cor meum.

Quia dixerat se innocenter vixisse, probat hoc Dei testimonio, qui falli & fallere nequit: non enim Deo dicitur, proba & tenta, quasi ipse aliquid ignoret, sed ut alijs nota faciat, quæ ipse solus videt. Itaque S. David fretus bona conscientia, & sinceritate cordis sui, dicit Domino, Proba me, & tenta me, idest, explora diligenter an ita sit, inspicere intimos & profundissimos recessus cordis mei; quia etiam, v're renes meos, & cor meum, idest, examina cogitationes & appetitiones meas, ea diligentia qua probatur aurum, cum igne examinatur. Non enim hoc loco, ut ego quidem existimo, petit David probari se, ac tentari per aduersitates, vel renes suos, & cor suum aduri igne tribulationum, cum potius contra, liberationem ab aduersis in hoc Psalmo petat; sed postulat, ut dixi, probari se ac tentari per exactam explorationem & inspectionem: & quia Deus omnia exactissime videt & perspicit, sententia huius loci est, ut Deus notam faciat hominibus innocentiam serui sui, & calumnias inimicorum re ipsa, & factis refellat.

III. Quoniam misericordia tua ante oculos meos est, & complacui in veritate tua.

Reddit causam, cur velit probari & tentari, quoniam conscientia eius bonum illi testimonium dabat. quasi dicat, peto, ut probes me, quoniam per vias tuas ambulavi. nam omnes viæ tuæ misericordia & veritas. Et misericordia tua ante oculos meos est, idest, semper aspicio & considero misericordiam tuam, ut illam imiter, & iuxta eam cum proximis viuam; & similiter, Complacui mihi in veritate tua, siue, placuit mihi veritas tua, & ideo iuxta illam ambulavi. In Hebræo est, hithalla ethi, idest, ambulavi in veritate tua; proinde Septuaginta non tam verbū, quam sensum inllexerunt, quod etiam fecerunt in Psalmo 34. num. 17.

Non sedi cum concilio vanitatis, & cum iniqua gerentibus non introibo.

Odiui Ecclesiam malignantiū, & cum impijs non sedebo.

Rectè, meo iudicio, Theodoretus hæc exponit de conuentibus Gentiliū Idololatrarum in suis profanis tēplis, à quibus David semper abhorruit, dū exulauit apud Regem Philistinorum. Hæc enim opponuntur ijs, quæ postea in eodem Psalmo habentur, Domine dilexi decorem domus tuæ: & paulò ante, Circumdabo altare tuum Domine: & infra, In Ecclesijs benedicam te Domine. Vocat cœtum idololatrarum cōcilium vanitatis, quia nihil inanius idolis, quæ sunt falsæ imagines. Quod significat Apostolus, cum ait, Scimus, quia idolum nihil est in mundo, 1. Corinth. 8. & passim in Scripturis, idola vocantur vana, vel vanitates, ut Deuter. 32. Ipsi me prouocauerunt in eo qui non erat Deus, & irritauerunt in vanitatibus suis. 1. Reg. 12. Nolite declinare post vana, quæ non proderunt vobis, neque eruent vos, quia vana sunt: vide etiam 3. Reg. 16. 4. Reg. 17. Hierem. 2. & alibi. Idem idololatram rectè dicuntur iniqua agentes, quia summa iniquitas est, cultum soli Deo debitum rebus creatis exhibere. Quod autem dixerat concilium vanitatis, in sequenti versiculo dicit Ecclesiam malignantium, & quos vocauerat iniqua agentes, vocat impios, quod vocabulum propriè in idolorum cultores conuenit. In Hebræo, pro, iniqua gerentibus, est nahalamim, quod significat, occultis, vel, pueriliter ludentibus: nam halā, est, occultari, & helem, est, puer. Dicuntur autem occulti, hypocritæ, simulatores, derisores, & in genere, omnes iniqua agentes, ut Septuaginta rectè verterunt, quia omnis qui malè agit, odit lucem. Sed idololatram rectissime etiam dici possunt pueriliter ludentes, quia quomodo pueri fingunt ex argilla domunculas, & varia animantia: sic idololatram, ex varia materia fingunt Deos.

נעלמים
על
על

התחלתי
לכתוב

Deos. Propterea Moses idololatriam lusum vocauit, Sedit populus manducare, & bibere, & surrexerunt ludere, Exo. 32. quem lusum, idololatriam fuisse, docet Apostolus, 1. Cor. 10. nu. 7.

VI. Lauabo inter innocentes manus meas, & circumdabo altare tuum Domine.

Posteaquam dixerat se odisse conuenticula infidelium idololatrarum, inter quos tunc versabatur, adiungit se è contrario summo amore prosequi tabernaculum Domini, & conuentum Sanctorum, ac breuiter describit, quid sit facturus, cum Deo adiunante ab exilio in patriam reuocatus fuerit. Lauabo, inquit, inter innocentes manus meas, & circumdabo altare tuum Domine, id est, lauabo manus ante ingressum tabernaculi, ut homines pii facere solent, & circuibam cum psallentibus altare tuum. In Hebræo habetur, Lauabo in innocentia manus meas, sed idem est sensus: nam lauare manus in innocentia, est hoc loco, lauare manus more innocentium, siue, ut innocentes facere solent, quod idem significat, lauare manus inter innocentes, siue cum innocentibus. Quod autem ad sententiam attinet, aliqui volunt allusisse Dauidem ad lotionem manuum, quæ fit aliquando in signum innocentiae, quomodo Pilatus lauit manus coram Iudeis, dicens, Innocens ego sum à sanguine iusti huius, quasi diceret, Ecce laui manus, nolo eas inquinare sanguine iusti huius, ideò non audeo illum condemnare. quod & nos vulgo dicimus, cum nolumus admisceri negotio, in quo sit periculum peccandi, Io me ne lauo le mani. Cæterum probabilius, & magis consentaneum ad sequentia esse iudico, si dicamus, Dauidem loqui de ritu Hebræorum, qui ante ingressum tabernaculi tum se ipsi, tum hostias purificabant. quas lotiones, Apostolus ad Hebr. 9. vocat varia baptismata, & iustitias carnis. & quoniam lotio illa externa, signum esse debebat internæ puritatis; ideò Dauid ait, La-

uabo inter innocentes manus meas, id est, lauabo manus in signum veræ puritatis internæ, ut innocentes faciunt, non autem lauabo manus cum hypocritis, qui manus puras, & cor sordidum gerunt. Illud autem quod sequitur, Et circumdabo altare tuum, referunt aliqui ad multitudinem victimarum, quibus vndique altare implendum esset. Sed verius mihi videtur, ut referatur ad choros canentium in circuitu altaris: nam in Psalmo sequenti habetur, circuiui & immolaui hostiâ vociferationis. &c. & hoc loco statim subiicitur, ut audiam vocem laudis & enarrem vniuersa mirabilia tua.

Vt audiam vocem laudis, & enarrem vniuersa mirabilia tua. VII.

Explicat, ad quid altare Domini circumdare velit, nimirum, inquit, ut choris canentium immixtus, audiam laudes Domini, & ipse etiam eas canam. In Hebræo habetur, si puncta recipiamus, ut audire faciam vocem laudis: sed si puncta matentur legi potest, ut legerunt Septuaginta, & sanctus Hieronymus, ut audiam vocem laudis. Sanctus Augustinus acutè & piè docet hoc loco aduersus Pelagianos, eos tantum audire vocem laudis Dei, qui intimo sensu percipiunt, quidquid habent, donum esse Dei. in cordibus enim istorum, qui habent aures audiendi, omnia ipsorum bona merita, omnesque virtutes, laudem gratiæ sonant: contra autem, qui de iustitia sua præsumunt, deque suis meritis tument, quasi illa à se ipsi, non à Deo acceperint, non audiunt vocem laudis Dei, sed vocem laudis propriæ.

Domine dilexi decorem domus tuæ, & locum habitationis gloriæ tuæ. VIII.

Ostendit Propheta, nulla alia de causa magis sibi molestum fuisse exilium, nisi quia tabernaculum Domini videre non poterat. animus enim erga Dei

amorem vehementer incensus, nihil pulchrius in terris iudicat eo loco, in quo præsentia Domini clarius se ostendit. Vocatur autem tabernaculum in quo erat arca fœderis, domus Dei, & locus habitationis gloriæ eius, quoniam sæpè in eum locum descendebat nubes lucida, in signū præsentiæ Dei, qui lucem habitat inaccessibilem, ut Apostolus dicit; & quia in eodem loco, erat oraculum, ex quo Deus responsa dare solitus erat. In Hebræo habetur, Dilexi habitaculum domus tuæ, pro eo quod nos habemus, dilexi decorem domus tuæ: fortasse Septuaginta non legerunt, mahon, habitaculum; sed noham, literis inuersis, quod significat decorem.

מִיִּי
מִיִּי

IX. Ne perdas cum impijs Deus animam meam, & cum viris sanguinum vitam meam.

Quoniam Deum iudicem initio appellauit, & innocentiam suam, cuius idem Deus testis erat, exposuit, concludit, orans, ut pro se sententia proferatur. Ne perdas, inquit, cum impijs animam meam, idest, non me condemnes, quemadmodum impios condemnare soles. posuit animam, pro vita, siue pro tota persona sua, ut alias sæpè. per viros sanguinum, intelligit homicidas, quales erant, qui eum persequébantur. porro vox illa, Deus, non habetur in Hebræo, neque in Græco, neque legitur à Hieronymo & Augustino; tamen legitur à Theodoro, & Euthymio. ex quo intelligimus, in Græcis eorum codicibus non defuisse.

X. In quorum manibus iniquitates sunt, dextera eorum repleta est muneribus.

Declarat qui sint impij, & viri sanguinum, de quibus dixerat versu superiore, ac dicit eos esse, qui peruersè iudicāt ob accepta munera: notat enim peccata Principum, qui sunt iudices populorum. Pulchrè autem dicit, In quorum manibus iniquitates sunt, sic

enim in ea parte corporis ponit iniquitatem, per quam accipiuntur munera, ut ostendat acceptionem munerum causam fuisse iniquitatis.

Ego autem in innocentia mea XI. ingressus sum, redime me, & miserere mei.

Repetit causam, cur non debet condemnari cum impijs, quia videlicet in innocentia ingressus sit, idest, innocenter vixerit. Redime me, & miserere mei, idest, libera me à præsenti calamitate, & deinceps miserere, ne iterum in eandem incidam. passim enim in scripturis, ponitur redimere, pro liberare, idest, species pro genere. nisi forte Spiritus sanctus insinuare voluerit, omnem liberationem electorum de quacunque tribulatione, dici posse redemptionem, quia precio sanguinis Christi nostri redemptoris acquiritur.

Pes meus stetit in directo, in XII. Ecclesijs benedicam te Domine.

Respiciunt hæc verba particulam ultimam superioris versiculi, videlicet, Et miserere mei, quasi dicat, petij liberationem à præsenti calamitate, quia innocenter vixi, peto etiam ut misereris in futurum, quia pes meus stetit, idest, stabilitus & fixus est in rectitudine, ac per hoc non facilè recedam à recto itinere legis tuæ: & pro gratiarum actione benedicam & laudabo te hymnis, & Psalmis in Ecclesijs, idest, in piorum conuentibus. Est au-

tem hæc, ut Euthymius notat, prophetia, quod re vera tempore noui testamenti, in omnibus

Ecclesijs, Psalmi Daudici assidue concinendi essent.

PSALMVS XXVI.

Titulus, & Argumentum
Psalmi.

*Psalmus David, priusquam
liniretur.*



PN Hebræo nõ habetur pro titulo, nisi Dauid, reliqua sunt addita à Septuaginta, vt intelligeremus hũc Psalmum compositum fuisse à Dauide antequam regnare inciperet, durante videlicet persecutione Saulis. Nam tametsi Dauid linitus oleo fuisset à Samuele, cum adhuc puer esset; tamen illa vnctio fuit priuata, non publica, & adhibita potius ad designandum, quàm ad consecrandum Regem. Postea verò Saule occiso, vnctus fuit Dauid in Regem publicè ac solènniter, vt constat ex libro 2. Regum cap. 2. Et de hac posteriore vnctione, intelligendus est titulus huius Psalmi. Videtur autè hic Psalmus scriptus fuisse proximè post superiorem, Dauide adhuc in exilio & tribulatione constituto: sed quia post orationem Psalmi præcedentis magna consolatione spiritus affectus fuerat, & Deo reuelante cognouerat, ad maius quoddam regnũ, quàm sint regna terrena, se vocari; ineffabili desiderio ad cæleste regnum suspirare, ac temporalia omnia, siue aduersa, siue prospera continere cæpit. Conuenit idem Psalmus omnibus electis, qui iam inuncti sunt vnctione gratiæ, atque ad regnum cæleste designati, & ad vnctionem gloriæ, per quã verè regnare incipient, tota animi deuotione suspirant.

Explicatio Psalmi 26.

I. Dominus illuminatio mea, & salus mea, quem timebo?

Tribulatio tenebras adducit, prosperitas lucem & serenitatem: perturbabat enim & confundit animum tribu-

latio, vt non facilè videat, quid facto opus sit, atque inde ad impatientiam, vel aliquod aliud peccatum prouocatur. Sed si Deus lumine diuinitus immisso tenebras disijciat, continuo cernit animus momentaneam & leuem esse tribulationem, quæ in vmbra noctis magnum horrorem incutiebat, & simul cernit protegente se Deo, tribulationem non solum non posse nocere, sed etiam mirificè profuturam. Hoc Dei beneficium expertus Dauid in persona sua & omnium electorum canit, Dominus illuminatio mea, & salus mea, quem timebo? quasi dicat, Ignorantia & infirmitas timidum me in tribulatione reddebant, sed cum Dominus illustrauerit iam mentem meam, meque apertè cernere fecerit, nullam temporalem calamitatem grauem aut diuturnam esse, & amoris diuini vnguento sanauerit infirmitatem meam, neminè timeo: veritas enim tenebras, & charitas foras mittit timorem.

**Dominus protector vitæ meæ, II.
à quo trepidabo?**

Addit aliud argumentum, quo sibi ipse persuadeat, nullum timorem deinceps esse admittendum. Dominus, inquit, non solum illuminat & sanat, sed illuminatum & sanatum non deserit, sed protegit assiduè scuto prouidentiae & beneuolentiae suæ, à quo igitur trepidabo? Si Deus pro nobis, quis contra nos? si Rex cohorte mortalium militum stipatus non timet, cur timeat seruus Dei stipatus protectione omnipotentis & immortalis Imperatoris? Sæctus Martinus, apud Sulpitium, ego, inquit, signo crucis, non clypeo protectus, aut galea, cuneos hostium penetrabo securus. nimirum ex ijs erat. qui dicere poterant, Dominus protector vitæ meæ à quo trepidabo?

**Dum appropiant super me nobiles, III.
centes, vt edant carnes meas.**

**Qui tribulant me inimici mei, IIIL.
ipsi infirmati sunt, & ceciderunt.**
Descri-

Describit effectum protectionis Dei, & præteritum pro futuro ponit, more prophetarum ad designandam rerum certitudinem. Sensus igitur est. Ex protectione Dei fiet, ut cum appropinquabunt super me, quasi prostratum & deiectum, ij qui nocere mihi cupiunt, & quasi canes, aut leones famelici carnibus meis saturari desiderant; tunc isti ipsi, qui tribulant me, & inimici mei sunt, debiles fient, & corruent; ita conatu suo, non mihi, sed sibi nocebunt. Hoc verissimum esse, non solum Davidis, sed Christi, & Martyrum, atque adeo Sanctorum omnium exempla demonstrant. In Hebræo & Græco habetur, tribulantes me, & inimici mei, Latinus interpretes omittit illud, & sed res est parui momenti. pro, infirmati sunt, Sanctus Hieronymus vertit, impegerunt, sed verbum hebraicum utrumque significat.

V. Si consistent aduersum me castra, non timebit cor meum.

VI. Si exurgat aduersum me prælium, in hoc ego sperabo.

Addit ad ea quæ dixerat, ut spem & fiduciam plenissimam se in Deo habere demonstret, non solum se non time-
re singulos hostes, sed neque integra castra, & ea non in tentorijs quiescentia, sed in acie præliantia. Illud, In hoc ego sperabo, variè exponitur, propterea quod, tum in Hebræo, *zoth*, tum in Græco *ταυτη*, vox est generis feminini. Sanctus Augustinus exponit, in hac petitione. Theodoretus, in hac spe: Euthymius, in hoc meo corde: nam cor Græcè est generis feminini, sed videtur Latinus interpretes rectissime vertisse, in hoc ego sperabo. Considerauit enim Hebræos carere neutro genere, & pro eo uti genere feminino: proinde, illud, *zoth*, non significare, in hac spe, vel in hac petitione, vel in hoc corde, sed absolute, in hoc, idest, in hac re, videlicet quod Deus sit illuminatio, & salus, & protectio mea, ut supra dictum est. Itaque Græci posuerunt *ἐν ταυτη*, non quod careant neutro genere, sed quia voluerunt ad verbum reddere, quod

erat in Hebræo; sed Latinus non tam vocem, quam significationem respexit.

Vnam petij à Domino, hanc requiram, ut inhabitem in domo Domini omnibus diebus vitæ meæ. VII.

Mirum est cur Latinus interpretes non verterit, Vnum petij à Domino: nam hoc etiam loco in Hebræo habetur genus femininum, pro neutro. Voluit igitur in hac voce reddenda imitari Græcum interpretem, & vertere ad verbum. Sensus tamen est, Vnam petij, idest, vnum petij, siue, vnam rem petij. Plerique intelligunt hunc locum de domo Domini, ubi erat arca Dei & propitiatorium, & volunt hunc esse sensum, vnum petij à Domino, hoc requiram, ut de hoc exilio reuertar, & liceat mihi assidue versari in tabernaculo Domini, ubi est arca Dei, & propitiatorium, &c. Sed certe mihi sententia S. Augustini, qui exponit de domo cælesti, non solum vera, sed etiā literalis esse videtur. Nam non dicit David, cupere se habitare prope domum Domini, sed in ipsa domo Domini: notum autem est, non habitasse vnquā Davidem in domo Domini, sed in palatio proprio, quod longè aberat à tabernaculo, præsertim antequam arca deferretur in montem Sion: & potuisset utique si voluisset, quando Rex erat, habitare iuxta tabernaculum Domini. Præterea similis est hic locus illi, qui habetur in Psal. 83. Beati qui habitant in domo tua Domine, in sæcula sæculorum laudabunt te, quod certe non cōuenit nisi habitatoribus domus Dei, quæ est in cælo. Denique nunquam David, vir sanctus & perfectus, rem aliquam temporalem tanto affectu peteret, ut diceret, vnam petij, hanc requiram, quasi nihil aliud petendum sit. Explicat igitur hoc loco Propheta radicem veram confidentiæ in Deum, & cur non timeat malum aliquod temporale: Radix enim est ardens charitas in Deum: qui enim ardens diligit summum atque æternum bonum, nihil facit omnia temporalia. Vnam, inquit, petij à Domino, hanc requiram, idest, nihil

nihil temporale appetere, nō magni facio iacturam omnium aliarum rerum, modo vnam rem habere merear; ideo de hac vna sollicitus sum, hanc vnam petij, hanc vnam petam, vt videlicet inhabitem in domo Domini, non ad tēpus, sed, omnibus diebus vitæ meæ, idest, quamdiu durabit vita sanctorum cum Deo, quæ sine dubio non habebit finem. Valde propriè dictum est, vt inhabitem in domo Domini: nam hic in terris, quamuis amici, imò filij Dei simus; tamen non habitamus, sed ambulamus cum Deo; nec in domo, sed in tentorio requiescimus.

VIII. Vt videam voluptatem Domini, & visitem templum eius.

Docet, cur in domo Domini habitare desideret, quia videlicet ibi perfecta felicitas est. Multi latini Codices habent, Vt videam voluntatem Domini: sed rectè correcti sunt in editione Sixti V. & Clementis VIII. & positum, vt videam voluptatem Domini, vt habebant emendatissimi codices manuscripti. Per voluptatem autem hoc loco non est accipiēda actio delectationis, sed obiectum, idest, pulchritudo, venustas, suauitas. Nam vox Hebræa, וַיֵּד noham, propriè pulchritudinē significat: vox autem Græca τὸ καλόν potest delectationem & voluptatem significare, quam vocem Latinus interpres accepit, sed significat etiam venustatem & pulchritudinem, & pro pulchritudine hoc loco vocem illam Theodoretus accepit. Quare vox Latina voluptas, si cū Hebræa & Græca conuenire debeat, accipienda est, pro voluptate obiectiua, idest, pro pulchritudine & venustate. Quod ipsum etiam verbum videndi, siue contemplandi requirit: non enim propriè videmus actionem delectationis, sed rem delectabilem. Itaq; S. Hieronymus vertit, Vt videam pulchritudinem Domini; & S. Augustinus legit, vt contempler delectationem Domini, & exponit per delectationem, speciem delectabilem. Si quis tamen omnino vellet, voluptatem hoc

loco accipere pro ipsa actione capiendi delectationem, non deberet intelligere per voluptatem Domini, delectationem, qua fruitur Dominus, sed quæ percipitur ex Domino, idest, ex visione pulchritudinis Domini, atq; ita sensus in idem recideret. Porro S. David hoc loco omnino propriè felicitatem expressit; quæ ex sententia solidioris scholæ in actione nobilissima potētiae omnium præstātissimæ erga summum obiectum, idest, in intellectu Dei visione consistit, ex qua ineffabilis voluptas & delectatio sequitur. Illud autē quod additur, Et visitem templū eius, S. Augustinus legit, & protegar à templo eius. In qua lectione, nescio quos codices sit sequutus: Hebræus enim & Græcus nihil habent, quod ad protectionem referri possit. Vox Hebræa, בַּיִת ba cher, significat propriè querere, inspicere, oculis perlustrare, præsertim illucescente die: vnde bocher, Hebræis significat mane, quia tunc primum depulsis tenebris, requirim⁹ & perlustramus ea quæ latebant. Sic etiam vox Græca ἐπισκεψάμεθα, significat considerare, attēdere, visitare. Sensus igitur est, vt videam pulchritudinem Domini, & deinde ad nouam illam lucē, visitem, idest, oculis perlustrem & requiram totum illud cæleste Dei templum, & omnia quæ in eo sunt. Nam re vera post visionē Dei, nihil iucundius occurrere potest, quàm spectaculū illius cælestis patriæ, & diuinæ illius domus, in qua sunt omnes Beati, quæ meritō templū dicitur, cū non sit domus aut ciuitas profana, sed sacratissima, cū in ea nihil profanum agatur, sed assiduè sacrificetur hostia laudis & iubilationis.

Quoniam abscondit me in tabernaculo suo, in die malorum protexit me, in abscondito tabernaculi sui. IX.

Reddit rationem, cur tam audacter petat habitare in domo Domini, & videre pulchritudinem eius; quia gustare iam capit, quia dulcis est Dominus, & pignus amoris eius iam tenet. quasi bre-

breuissimè diceret, audeo petere gloriam, quoniam percepi gratiam. Sunt autem verba omnia metaphorica. non enim propriè absconditus fuit Dauid in tabernaculo Domini, cum quæretur à Saule, sed sensus horum verborum est, tempore præsentis vitæ, in qua dies mali sunt, tam singulari prouidentia Deus me defendit ac protegit, ac si in intima & abditissima parte tabernaculi sui, me collocasset. Ex hac autem tanta Dei gratia & beneuolentia, spem concipio, me aliquando ad domum Domini peruenturum, quod vnum peto & requiro. Idem verò significatur in vtraque parte versiculi: nam abscondi in tabernaculo, non est poni in quacunque parte tabernaculi, sed in abscondito tabernaculi collocari, vbi à malis omnibus protegatur. In Hebræo & Græco, illud, in die malorum, coniungitur cum prima parte versiculi, abscondit me in tabernaculo suo in die malorum. Sed in codice Latino coniungitur cum secunda parte, hoc modo, in die malorum protegit me in abscondito tabernaculi sui. Perinde est, vbi ponatur interpunctio, cum sensus sit idem: tamè prior interpunctio habetur etiam in libris Patrum Augustini & aliorum; & fortasse in Latino codice interpunctio non tam deservit intelligentiæ, quam cantui.

x. In petra exaltauit me, & nunc exaltauit caput meum super inimicos meos.

Alia metaphora idem significat, nimirum se à Deo singulari prouidentia protectū ac defensum; ac si in arce munitissima & altissima collocatus fuisset. Similis metaphora est apud Isai. c. 33. Iste, iustus videlicet, in excelsis habitabit, munimenta saxorum sublimitas eius. Itaque sensus est, In petra exaltauit me, idest, posuit me in loco sublimi & munito. Et nunc exaltauit caput meum super inimicos meos, idest, ex eo quod in loco tutissimo & altissimo iam cōsisto, factum est vt caput meum sit exaltatum super inimicos meos, id

est, sim superior & victor inimicorum meorum. Porro per has metaphoras, non solum describitur protectio & defensio hominis iusti, cui nihil nocere possunt omnium aduersariorū machinationes, iuxta illud S. Petri, Et quis est qui vobis noceat, si boni æmulatores fueritis? Sed etiam indicatur modus, quo vir iustus ad hanc securitatem peruenit: modus enim est ascensio mentis per contemplationem in Deum, & res æternas. Qui enim serio meditatur æterna, & ardentè Deum amat, iam est in altissima & munitissima petra constitutus, vt nihil ei nocere possit, cum terrena omnia iam illi viluerint.

Circuiui & immolaui in tabernaculo eius hostiam vociferationis, cantabo & psalmum dicam Domino.

In Hebræo coniungitur prima vox huius versiculi cum superiore, & pro circuiui, legitur, circuitibus meis, vt sit integra sententia, Exaltauit caput meū super inimicos meos, circuitibus meis: vel, vt vertit S. Hieronymus, qui sunt in circuitu meo. Sed Septuaginta Interpretes non legerunt, sebibothai, vt nunc est in Hebræo, & significat circuitibus meis; sed, sabbothi, idest, circuiui, vnica literula dempta, & pūctis mutatis. Igitur Propheta per contemplationem supra terrena omnia exaltatus, erumpit in admirationem operum Dei, & laudem opificis omnipotentis. Circuiui, inquit, idest, mente perlustraui omnia opera Dei, quæ sunt in cælo & in terra. Et immolaui in tabernaculo eius hostiam vociferationis, idest, in hoc ingenti tabernaculo Dei, quod est cælum, quò per contemplationem ascēdi, magna voce, ex magna admiratione procedente, laudaui Deum, quæ laus sacrificium est illi gratissimum. Sic enim alibi legimus, Immola Deo sacrificium laudis: & rursum, Sacrificium laudis honorificabit me. Nec solum, inquit, immolaui hostiam vociferationis, sed & deinceps pergā assiduè idem facere, cantabo, & psalmum dicam Domino.

Exaudi

סבבתי
סבבתי

XII. *Exaudi Domine vocem meā, qua clamaui ad te, miserere mei, & exaudi me.*

Redit ad id quod dixerat, Vnam petij à Domino, hanc requiram. Atque in hac vna petitione se exaudiri postulat, flagrans nimirum ardenti desiderio videndi dilectum. Exaudi, inquit, Domine vocem meam, qua clamaui ad te, videlicet vocem illam, qua clamaui vnam petij à Domino, hanc requiram, &c. Miserere mei hoc exilium a grē ferentis, & exaudi me.

XIII. *Tibi dixit cor meum, exquisiuit te facies mea, faciem tuam Domine requiram.*

XIII. *Ne auertas faciem tuam à me, ne declines in ira à seruo tuo.*

Hæc non tam egent explicatione, quam pia meditatione, & imitatione. Tibi dixit cor meum, idest, tibi loquitur desiderium meum: Exquisiuit te facies mea, idest, oculi mei interiores, qui sunt in facie animæ meæ, tuam pulchritudinem requirunt, cætera omnia fastidiūt. Faciem tuam Domine requiram, idest, hoc semper erit studium meum, vt conspectum tuum quæram, non solum vt in alio sæculo reuelata facie vultum tuum videam; sed etiam in hoc sæculo, hoc vnum satagam, vt me respicias, & respiciendo illumines & accendas. Ne auertas faciem tuam à me, idest, noli quæso cessare à me respiciendo, ne simul lumen obscuretur, & charitas refrigescat. Ne declines in ira à seruo tuo, idest, ne finas me in peccata labi, ne fortè iratus à me recedas. Rectè hoc loco Sæctus Augustinus obseruat, timorem castum, non seruilem exprimi in his verbis: Timor enim seruilis cupit abesse dominum, ne puniat, ac ideo non diceret, ne declines, sed abi & declina: timor autem castus, qui dilectum verè amat, nihil magis timet, quàm ne dilectus recedat. In textu Græco, post illa verba, Tibi dixit cor meum, additur, Dominum requiram; sed ea verba non habentur in He-

bræo, nequē leguntur à Hieronymo, & Augustino, quamuis à Theodoro, & Euthymio legantur. In Hebræo non habetur pronomen, te, vbi legimus, exquisiuit te facies mea, sed absolutè, exquisiuit facies mea: cæterum subintelligitur, & ideo additum est ab Interpretibus Græcis & Latinis.

XV. *Adiutor meus esto, ne derelinquas me, neque despicias me Deus salutaris meus.*

Quia dixerat, ne declines in ira à seruo tuo, considerans se suis viribus non posse cauere peccata, ob quæ in iram incurrimus, clamat ad Deum, vt adiuuare non cesset. In Hebræo habetur, Adiutorium meum fuisti, sed Septuaginta Interpretes non videntur legisse, habita, idest, fuisti, sed hehie, quod significat, esto: nam est similitudo maxima inter has voces si remoueantur puncta, quæ tempore Septuaginta Interpretum, nondum erant apposita. Sensus autem semper est verus, & ad rem faciens: nam si legamus, adiutor meus fuisti, ne derelinquas me; sensus erit, quoniā hactenus me semper adiuuisti, deinceps quoque me adiuua: si verò legamus, Adiutor meus esto, ne derelinquas me, erit repetitio eiusdem orationis, quæ magnum affectum exprimit. Porro in verbis illis, Ne derelinquas me, neque despicias me, videtur Latinus Interpres inuertisse ordinem: Nam in Hebræo & Græco textu prius est, ne despicias, siue ne abijcias me, quàm, ne derelinquas me. Pro illo autem, ne despicias Græci habent vocem valdè significantem, ἀπορριψάντων, quæ apud Euthymium deducitur, vel à scoria, vel à coruis, & significat proijci, quomodo proijcitur icoria, vel quomodo proijciuntur ad coruos cadauera. Petit igitur iustus auxilium Dei, ne peccet, & si fortè peccauerit, nō proijci a facie Dei, quomodo proijcitur scoria, vel non proijci ad infernales coruos, & non solum non proijci, siue despici, sed neque absolutè relinqui, & dimitti; sed benignè curari & sanari: ideo

הִי־הָיָה
הִי־הָיָה

ideo enim addit Deus salutaris meus. Saluatoris enim, non est despicere, ac deferere miserū, sed saluare, & curare.

XVI. Quoniam pater meus, & mater mea dereliquerunt me, Dominus autem assumpsit me.

Magna ratio redditur, cur æquum sit, Deum adiuuare, quia videlicet, nemo sit illo amantior. Notanda est phrasis Hebraica, qua Deum in tertia persona reuerentiæ causa Propheta alloquitur: non enim dicit, Tu autem assumpisti me, sed, Dominus autem assumpsit me. Similis est phrasis in Genesi c. 31. n. 35, ubi Rachel dicit patri suo, Ne irascatur Dominus meus, quod coram te assurgere nequeo: & lib. 3. Regum cap. 1. nu. 27. dicit Nathan Dauidi, Nunquid à Domino meo Rege exiit hoc verbum, & mihi non indicasti seruo tuo, quis sessurus esset super thronum Domini mei Regis post eum? Illud igitur, Dominus autem assumpsit me, idem est, ac si dictū esset, Tu autem Domine assumpisti me, siue collegisti me, ut propriè significat vox hebraica. Est autem in his verbis quædam figura aptissima, ad explicandum beneficium Dei, non enim puer erat Dauid, ut egeret parentum auxilio, neq; magnum erat in illa ætate relinqui à parentibus, qui oneri potius quam auxilio esse potuissent. Sensus igitur horum verborum est, Ego sum instar infantis recens nati, quem pater & mater dereliquerunt humi iacentem, atque omni iniuriæ expositum: Tu autem Domine, ita abiectum & desolatum, benignissimè collegisti & fouisti. verè enim si quis fragilitatem naturæ humanæ consideret, & hostium inuisibilium potestatem, & quantopere Dei gratia in omnibus actionibus egeamus, nullo modo negare poterit, nos infantibus à parentibus neglectis rectissimè comparari. Porro sanctus Ezechias, usque adeo rem hanc intelligebat, ut non infanti, sed pullo hirundinis se ipse comparauerit, Isai. 38. Sicut pullus, inquit, hirundinis, sic clamabo.

Legem pone mihi Domine in via tua, & dirige me in semitam rectam propter inimicos meos.

Quia se comparauerat infantulo, quem Deus collegerat, rectè iam petit, ut se ambulare doceat. petit igitur gratiam implendi mandata diuina, quam gratiam in toto psalterio frequentissimè petere solet; nec immerito, cum ea sit via ad illam caelestem domum Dei, quam vnā se toto corde desiderare paulo ante professus est. pro, Legem pone mihi Domine in via tua, in Hebræo est, doce me viā tuā, siue, ut vertit Sanctus Hieronymus, ostende mihi viam tuam. In Græco, est vnum verbum, *ημεροδωρο*, quod secundum etymologiam significat, legem ponere, ut Latinus Interpres reddidit. Cæterum accipitur etiam, pro docere, erudire, præceptorem se exhibere. proinde hoc loco, legem pone mihi in via tua, significat, erudias me circa viam, idest, circa legem tuam: quod in alio Psalmo legimus, Vias tuas Domine demonstra mihi, & semitas tuas edoce me, Ac ut alibi diximus, nō postulat Propheta notitiam solam legis, sed internam vnctionem, qua sibi à Spiritu sancto intimè persuadeatur, seruandam esse Dei legem. Idem ferè significant verba sequentia, & dirige me in semitam rectam, idest, duc me per viam mādatorum tuorum, quæ est verè semita recta, idest, iustissima, sed angusta. nisi magis placeat, per illud, doce me viam tuam, postulari lumen internum: per illud, & dirige me in semitam rectam, postulari pium affectū implendi mandata diuina: quod additur propter inimicos meos, vel, ut Sanctus Hieronymus vertit, propter insidiatores meos, significat, valde necessariam esse gratiam Dei, in hac peregrinatione, propter multitudinem hostium, tum visibilium, tum inuisibilium, qui nobis vbique insidiantur, ut à recta via legis diuinæ nos deducant, & ad inuia & prærupta vitiorum nos perducant.

Ne

XVIII. Ne tradideris me in animas
tribulantium me, quoniam insur-
rexerunt in me testes iniqui, &
mentita est iniquitas sibi.

Pergit in eadē petitione. petit enim
non tradi in animam, idest, volūtatem
& desiderium hostium, præcipuè inui-
sibilem. Similis phrasis est; Lucæ 23.
Iesum verò tradidit voluntati eorum:
idem enim est voluntati eorum, & in
voluntatem eorum, sed illa, est phrasis
Latina, hæc, hebraica. Itaque sanctus
Hieronymus vertit, Ne tradideris me
animæ tribulantium me. Sequētia ver-
ba, Quoniam insurrexerunt in me tes-
tes iniqui, à multis referuntur ad falsa
testimonia, quæ dicebantur aduersus
Dauidem: quod quidem hō improbo,
sed videtur mihi sensus magis cohere-
re cum præcedentibus, & sequentibus
verbis, & cum argumento totius Psal-
mi, si referamus hæc verba ad tētatō-
nes Daemonum, siue hominum, qui fal-
sis promissis, vel minis hominem iustū
ad impatientiam, vel alia peccata de-
ducere conantur, iuxta illud Psal. 118.
Narrauerūt mihi iniqui fabulationes,
sed non, vt lex tua. In Hebræo habe-
tur, Insurrexerunt in me testes falsita-
tis, siue mendacij; proinde illud, testes
iniqui, accipiendum est, pro, testes fal-
si, qui iniquè agunt, dum falsa pro ve-
ris obtrudūt, vt ad iniquitatem impel-
lant. Quod additur, & mentita est ini-
quitas sibi, non tam est interpretatio,
quàm explicatio verborum Hebraico-
rum; in Hebræo enim non habentur,
nisi duæ voces, vifeach, chamas, quas
voces S. Hieronymus vertit, & aper-
tum mendacium. Alij reddunt, & lo-
quēs rapinam. Sed Septuaginta Inter-
pretes acutissimè, & verissimè translu-
lerunt: nam illud vifeach, tametsi à ver-
bo iafach, significet loqui, vnde Neo-
terici vertunt, loquens: tamen potest
deduci à verbo, fuach, quod significat,
illaqueari, vnde est nomen fach, la-
queus. Et vox illa, chamas, licet signifi-
care possit rapinam & mendacium, ta-
men frequentissimè accipitur pro ini-
quitate. Intellexerunt ergo Septuagin-

ta Interpretes, hic significari ipsam ini-
quitate, à seipsa illaqueatam, dum vi-
delicet, homines vel Dæmones iniqui,
in propriam perniciem, falsitatis la-
queos iusto tetenderunt. Quod alijs
verbis dixit Daniel, iniquis illis senio-
ribus Susannæ accusatoribus, Et tu me
titus es in caput tuum. Ait igitur Da-
uid, insurrexerunt in me testes iniqui,
falsitatem & mendacia obtrudentes,
& illaqueata est iniquitas, idest, sed ini-
quitas mentita est sibi, idest, nemini
nocebit, nisi proprio auctori.

Credo videre bona Domini, in XIX.
terra viuentium.

Reddit rationem, cur mentita sit ini-
quitas sibi. Ego enim, inquit, inuitis
omnibus inimicis meis, credo, idest,
certò confido, me visurum bona Domi-
ni, idest, illa bona, quæ ipsi etiam Do-
mino bona sunt, quæ illum beatum red-
dunt, quæ sola sunt vera bona, idq. in
terra viuentium, idest, in regione illa
vbi mors locum non habet. In Hebræo
habetur initio versiculi vna vox, lule, לולא
quam aliqui vertunt, nisi, & melius.
S. Hieronymus, autem, Ego autem cre-
do videre, &c. A Septuaginta Inter-
pretibus fuit omissa, quia non erat ma-
gni momenti quantum ad sensum.

Expecta Dominum, viriliter XX.
age, & confortetur cor tuum, &
sustine Dominum.

Concludit per apostrophē ad seip-
sum, sectandam esse patientiam & fidu-
ciam in Deum. quasi dicat, Ergo ani-
ma mea, quia desideras in domo Dei
habitare, quia tam multa pignora di-
uini amoris habes, quia credis videre
bona Domini in terra viuentium, noli
deficere in tribulationibus, neque ter-
renas consolationes respicias, sed pa-
tienter expecta, confortare in Domi-
no, viriliter age, dum transeant dies
mali, & adueniant dies boni. In He-
bræo ad verbum habetur vt vertit san-
ctus Hieronymus, expecta Dominum,
confortare, & roboretur cor tuum, &
expecta Dominum. Similiter in Græco
sunt

ויפח

חמס

ויפח

יפח

פוח

פח

חמס

sunt eadem voces in principio, & in fine. Sed Latinus Interpres varietate gaudet. ideo initio posuit, expecta Dominum, & in fine, sustine Dominum. Patientia cum fiducia coniuncta vires addit, & vires additæ patientiam & fiduciam augēt. Ait igitur, Expecta Dominum, id est, patienter, & cum fiducia expecta auxilium, & consolationem Domini: Hinc viriliter age, seu roborare: roborare autem non armis exterioribus, sed confortetur cor tuum, excita animum, audacter perge. Hinc verò, multo magis confide, & cum patientia expecta consolatorem, & adiutorem Dominum, qui sine dubio, cum sit fidelis & iustus, veniens veniet, & non tardabit.

PSALMVS XXVII.

Titulus, & Argumentum.

Psalmus, ipsi David.



VNC Psalmum de Dauide fugiente Saulis persecutionem, exponunt Theodoretus, & Euthymius. Sed repugnant multa. primo quod in titulo id non indicetur, sicut alias ferè semper fieri solet, cum ad historiam Psalmus respicit. Secundo, quod in hoc Psalmo, is, qui loquitur appellat se Regem; David autem eo tempore nondum Rex erat. Tertio, quod in eodem Psalmo dicit is qui loquitur, se exauditum, & restoruisse carnem suam: quod certè Dauidi pro eo tempore, quo Saulem fugiebat, conuenire non potest. Recentiores aliqui exponunt de Dauide iam Rege, & perfectè liberato à persecutione Saulis. Sed si ita esset, non diceret, Ad te Domine clamabo, ne fileas à me: sed diceret, Ad te Domine clamaui, &c. Videtur igitur præferenda Sancti Augustini, & Sancti Hieronymi expositio, qui in persona Christi Psalmum à Dauide cantatum fuisse volunt: David enim qui simul præuidebat passionem, & glorificationem

Christi, conuenièter ea coniungere potuit, sicut etià fecit in Psalmo 21. cuius Psalmi longissimi & pulcherrimi, hic, quem explicandum in manibus habemus, videtur esse quasi compendium.

Explicatio Psalmi 27.

AD te Domine clamabo, De- I.
us meus ne fileas à me, ne quando taceas à me, & assimilabor descendantibus in lacum.

Verba sunt Christi in cruce pendentis, ac postulantis celerem resurrectionem. Pro illo, Deus meus, in Hebræo est, petra mea, siue fortis meus: & quamquam hoc ipsum nomen ponitur ad significandū Deum, & rectè Septuaginta verterunt, Deus meus, tamen ex vi Hebraicæ vocis, intelligimus hoc loco inuocari Deum, qua potentissimus est, & potest morti ipsi imperare, vt Christum cito restituat. Pro, ne fileas à me, S. Hieronymus vertit, ne obsurdescas mihi. Sed scièdum est, verbum, charas, חַרָּשׁ significare tacere, fileres; surdū se ostendere. Itaque sensus est, ne fileas, quasi non audieris vocem meam, ne veluti surdum te mihi exhibeas. Illud, à me, id est, quod mihi, ex hebraica phrasi. Breuiter petit exaudiri se, & responderi sibi, facturum Deum, quod petitur. Quod sequitur, ne quando taceas à me, & assimilabor descendantibus in lacum, continet causam, cur velit sibi responderi, quia videlicet, nisi Deus exaudiat & respondeat, erit ipse similis alijs hominibus mortalibus, qui per mortem dissoluuntur, atque ad inferos descendunt, non redituri. Ne quando taceas à me, id est, ne fortè tu non exaudias, & hinc fiet, vt ego per omnia similis fiam descendantibus in lacum, id est, ijs, qui moriuntur, & ad inferos descendunt, sine spe resurgendi, nisi in die nouissimo. Posset etiam sensus esse, si non exaudias, ero similis hominibus mortuis: sicut enim mortui nihil omnino possunt, ita homo sine Dei adiutorio nihil omnino potest. Vox Hebræa, bor, significat cisternam, כּוּר lacum,

lacum, profundam foueam : potest igitur accipi pro sepulchro, sed melius pro loco subterraneo animarum; sicut Isaia 14. Verumtamen ad infernum detraheris in profundum laci; & cap. 38. Non expectabunt qui descendunt in lacum veritatem tuam : quomodo etiam accipitur in illa oratione Ecclesiastica, Libera animas omnium fidelium defunctorum de pœnis inferni, & de profundo lacu, libera eas de ore leonis, &c.

II. Exaudi Domine vocem deprecationis meæ, dum oro ad te dum extollo manus meas ad templum sanctum tuum.

Quod antea dixerat, ne fileas, & ne taceas, nunc clarius dicit, Exaudi Domine vocem deprecationis meæ: volebat enim Deum respondere, ut id signum esset exauditionis. Illud, Domine, non est in Hebræo, sed solum, exaudi vocem deprecationis meæ. S. Hieronymus in epist. ad Suniā & Fretellam, existimat esse additum ab aliquo explicationis gratia: fortasse etiā excidit ex nostris codicibus, quibus Septuaginta vsi sūt, aderat. Illud, dum oro ad te, in Hebræo significantius habetur, dum clamo ad te, id est, dum oro cum clamore valido, ut Apostolus loquitur ad Hebr. 5. Illud, dum extollo manus meas, significat à signo, eandem ipsam orationem: solebant enim Hebræi manus in altum tollere, cum orabant, cuius ceremoniæ pleni sunt libri sacri: sed & Gentiles eundem ritum imitabantur. Itaque idem est, dum oro ad te, & dum extollo manus meas ad templum tuum. Alludit verò interim Propheta, ad manus Domini in Cruce extensas, & ad celum sublatas. tunc enim verissimè dicere potuit Dominus, dum clamo ad te, & dum extollo manus, &c. quando de Cruce orauit. Pro voce, ad templum, in Hebræo est, denir, quod propriè oraculum significat, unde Deus responsa dabat. Sed hoc loco, siue templum, siue oraculum, pro cælesti templo, & oraculo accipitur.

Bellarm. in Psalm.

Ne simul trahas me cum peccatoribus, & cum operantibus iniquitatem, ne perdas me. **III.**

Solus Christus id verè dicere potuit: ipse enim solus fuit omnibus modis segregatus à peccatoribus, ut dicit Apostolus ad Hebr. 7. Et sicut solus fuit, in quem peccatum cadere non potuit, ita iustissimè petit, ut non iudicetur, & nō pereat cum peccatoribus, sed ipsam potius mortem occidat, & resurgens ex mortuis, de mortis Principe, & de ipsa morte gloriosè triumphet. Rectè in editione Sixti V. & Clementis VIII. emendatum est, ne trahas, quod antea legebatur, ne tradas: nam cum tā vox Hebraica, quàm Græca, significet trahere, verisimile est ob literarum similitudinem, vitio librariorum, irrepsisse in editionem Latinam, ne tradas. Illud, ne perdas, non habetur in Hebræo, sed additum est, explicationis gratia. Itaque sensus est, ne trahas me ad interitum cum cæteris hominibus, qui peccatores sunt, cum ego peccator non sim.

Qui loquuntur pacem cum proximo suo, mala autem in cordibus eorum. **III.**

Describit peccatores ab eo peccato quod vniuersalius est, & communius: Nā idcirco in alio Psalmo dicitur, Omnis homo mēdax; & in alio, Ab homine iniquo & dolofo eripe me: & de Christo dicit Apostolus Petrus, Qui peccatum non fecit, nec inuentus est dolus in ore eius. quasi dolus, ferè tam latè pateat, quàm peccatum. Certè pluri sunt, qui volunt videri amici, benè velle proximis, & tamen ab amore proprio excæcati, malum habent in corde, id est, odio, vel inuidia erga eosdem proximos afficiuntur.

Da illis secundum opera eorū, v. & secundum nequitiam ad inuentionem ipsorum.

Secundum opera manuum eorū

I tri-

tribue illis, redde retributionem eorum ipsis.

Hæc non imprecatio, sed prophetia est, ut aliàs sæpè monuimus: significatur enim his verbis, id omnino futurum, ut mali malè pereant, nisi videlicet, ex malis boni fiant. Sensus igitur est, Dabis peccatoribus secundum opera eorum, idest, afficies ea pœna, quam merentur opera eorum. Et secundum nequitiam adinventionum ipsorum, supple, dabis eis, idest, sicut ipsi ex malitia sua excogitauerunt, & adinuenerunt varios modos vexandi iustos; ita tu per sapientiam inuenies varios modos cruciandi peccatores; & denique, reddes eis retributionem suam, idest, ipsi retribuuerunt iustis mala pro bonis, sed tu eam retributionem conuerteres in caput ipsorum, facies enim ut illis noceat, non iustis.

VII. Quoniam non intellexerunt opera Domini, & in opera manuum eius destrues illos, & non ædificabis eos.

Hinc apparet fuisse prophetiam, non imprecationem id, quod duobus superioribus versiculis continetur: non enim dicit, Destruere eos, sed destrues eos, vel ut habetur in Hebræo, destruet eos. Significatur his verbis radix omnium malorum: radix enim est, nolle intelligere opera Domini, non applicare animum ad considerata, & cognoscenda mirabilia opera Dei, quæ fecit creatione, in redemptione, in gubernatione generis humani: si quis enim ista consideret vix fieri potest, quin in Dei amorem mirificè exardescat. Hinc 1. Cor. 1. B. Paulus ait, Si cognouissent, nunquam Dominum gloriæ crucifixissent: & ipse Dominus Lucæ 19. Quia si cognouisses & tu, & quidem in hac die tua quæ ad pacem tibi: & infra, Non relinquent in te lapidem super lapidem, eo quod non cognoueris tempus visitationis tuæ. Quod attinet ad verba, in Latina editione est aliqua obscuritas, quæ non est in Hebraica, neq. in Græca: nam in his editionibus legitur,

Quoniam non intellexerunt in opera Domini, & in opera manuum eius, vel, ut S. Hieronymus reddit, Quoniam non intellexerunt opera Domini, & opus manuum eius: illa enim præpositio, in, adiungitur utrique nomini ex phrasi hebraica, sed secundum vsum linguæ Latinæ, ex utroque loco tolli potuisset. Latinus autem Interpretes ex priori loco sustulit, in posteriore reliquit; idè sententiā obscuriorem reddidit. Cura autem Propheta cum dixisset, Non intellexerunt opera Domini, adiunxit, & opera manuum eius, ratio esse videtur, ut explicaret, se loqui præcipuè de illo opere, quod ipse facit per se, non per secundas causas, quale opus fuit creatio cæli & terræ, incarnatio Verbi, miracula Christi, Resurrectio, & Ascensio Domini, & similia. Ait igitur, quoniam peccatores non intellexerunt opera Domini, & præcipuè opera illa, quæ manibus suis, idest, per se immediate fecit; idè tu Domine destrues illos, & non ædificabis, idest, destrues illos, & cum destruxeris, non te pœnitebit destruxisse, idè nunquam amplius ædificabis eos. Alludit Propheta ad vocem operis manuum Domini, quod opus est quasi ædificatio quædam, quasi diceret, quia non intellexerunt ædificationem Dei, Deus illos destruet, & nunquam amplius ædificabit. Id optimè quadrat in ciuitatem, & templum, & ipsum Regnum Iudæorum, quæ omnia Deus ob Iudæorum infidelitatem destruxit, nec unquam amplius ædificabit. Quadrat etiam in singulos peccatores, qui non intelligunt se esse ædificationem Domini, & ad imaginem eius conditos, & precio sanguinis Domini redemptos, & tam multa beneficia naturæ & gratiæ in se collata; idè tandem ita destruentur, nunquam amplius reædificandi, ut nihil remaneat, nisi ruina ædificij, idest, unde pœnam sentire perpetuo possint. In Hebræo habetur in tertia persona, destruet, & non ædificabit; fortasse librariorum vitio, prima littera hebraica, quæ indicat personam, mutata est, fortasse vltima lit-

ra Græca, ex qua persona intelligitur, vitio librariorum addita est; fortasse Interpretes, nō tam ad verbum, quā ad sensum respexerunt.

VIII. **Benedictus Dominus, quoniam exaudiuit vocem deprecationis meæ.**

Transit Propheta ad gloriam resurrectionis Domini prædicendam, & in persona Christi gratias agit Deo, dicens, **Benedictus Dominus, idest, benedicatur ab omnibus Dominus, quoniam exaudiuit vocem deprecationis meæ.**

IX. **Dominus adiutor meus & protector meus, in ipso sperauit cor meum, & adiutus sum.**

Explicat, in quo exaudita sit oratio sua, ac dicit, **Dominus adiutor meus & protector meus, supple, solet esse.** Ideo in ipso sperauit cor meum, idest, fretus auxilio & protectione Dei, non recusavi prælium subire cum Diabolo, & cum ipsa morte, nec spe mea frustratus sum, quoniam adiuuit me Deus, ut planè victor euaserim. In Hebræo, pro, adiutor & protector, habetur, fortitudo & scutum. Ex quo intelligimus, accepisse à Deo auxilium internī roboris, & protectionem externī præsidij.

X. **Et reffloruit caro mea, & ex voluntate mea confitebor ei.**

Describit effectum auxilij & protectionis, qui fuit gloriosa Resurrectio, ob quam toto corde laudaturum se dicit Deum. **Reffloruit caro mea, idest, caro mea, quæ per mortem exaruerat, non solum redijt ad vitam, sed ad florem ætatis, sanitatis, lætitiæ, venustatis maximæ redijt.** Et ideò, ex voluntate mea, idest, ex corde, confitebor ei confessionem laudis, & gratiarum actionis. In Hebræo nunc legitur, **Gauisum est cor meum, & in cantico meo confitebor ei.** Itaque pro, caro mea, legitur, cor meum; pro, voluntate mea, legitur, cantico meo. Nam quod pro, reffloruit, legatur, gauisum est, ut S. Hieronymus vertit, non mul-

tum refert: nam verbum *halaz*, significat lætari, exultare, & per metaphoram, refflorere, ut rectè verterunt Septuaginta, quia dum arbores refflorescunt, suo modo exhilarari & exultare videntur. Cur autem viri illi doctissimi verterint, caro mea, vbi nunc est, libbi, & voluntate mea, vbi nunc est, mesciri, quæ non significant nisi cor meum, & canticum meum, non potest reddi alia ratio, nisi quia non ita legerint, ut nunc habemus in nostris codicibus, sed verba transposita, & mutata postea fuerint: nam si pro, mesciri, legatur, besciari, quod significat, caro mea, & illud, libbi, transferatur paulò vltius, efficietur lectio, quam habuerunt Septuaginta, & quæ rectè interpretati sunt; nimirum hæc erit lectio, *vaialoz besciari, vel libbi ahodennu, idest, & reffloruit caro mea, & corde meo, siue voluntate mea, confitebor ei.*

Dominus fortitudo plebis sue, XI. & protector saluationum Christi sui est.

Hæc est materia confessionis, de qua dixit, confitebor ei, quod videlicet Dominus fortitudo plebis sue, quod ostendit dum tam potenter protexit salutem Christi sui, qui est caput totius plebis, & à quo fortitudo & salus totius populi dependet. Ex Hebræo S. Hieronymus vertit, Dominus fortitudo mea; alij vertunt, Dominus fortitudo eis, & hoc sonant verba, quæ nunc sunt in biblijs: sed Septuaginta non videntur legisse, *lamo* quod est, eis, sed *lamo*, idest, plebis sue. Dicit autem, protector saluationum, non protector saluationis, fortasse, quia protector fuit ad multiplicem salutem, videlicet, ut caro mortua non corrumpetur, ut sanguis effusus non periret, ut non solum anima corpori, & sanguis venis restitueretur, sed ut adderetur immortalitas, impassibilitas, agilitas, splendor, & si quæ sunt alia, quæ ad corpus gloriosum requiruntur.

Saluum fac populum tuum Domine, & benedic hereditati tuæ, & rege eos, & extolle illos usque in æternum.

Christo, qui caput est Ecclesiæ, glorificato, hoc superest, ut corpus eius, idest, populus Dei, qui est peculiaris hereditas Dei, quam acquisiuit sanguine suo, pariter glorificetur. Dicit igitur Christus ad Patrem, vel Propheta ad Christum, Saluum fac populum tuum. Ut autem saluum facias, benedic iustificando, rege conseruando, & protegendo in via, exalta glorificando, quæ glorificatio usque in sæculum duret.

PSALMVS XXVIII.

Titulus, & Argumentum.
Psalmi.

Psalmus David, in consummatione Tabernaculi.

HIC titulus non habetur in Hebræo, sed solum, Psalmus David: reliqua addita sunt, vel à Septuaginta Interpretibus, vel ab alijs. & duobus modis legitur, & intelligitur titulus huius Psalmi. Nam S. Basilius, Theodoretus, & Euthymius legunt, Psalmus David in exitu tabernaculi, & significari volunt, præcipi Sacerdotibus & Leuitis exeuntibus de tabernaculo, ut præparent quæ necessaria sunt ad cultum Dei. S. Hieronymus & Augustinus legunt, ut nos habemus in editione vulgata, Psalmus David in consummatione tabernaculi: & sensum esse vult S. Hieronymus, hunc Psalmum compositum fuisse, quando David perfecit tabernaculum, & collocauit in eo Arcam Domini. Quod attinet ad argumentum, volunt nonnulli ad literam in toto ferè Psalmo agi de potentia Dei, & velle Dauidem hortari populum ad laudandum Deum, qui poten-

tia suam solet manifestare admirandis operibus, quæ solo verbo, siue imperio facit. Alij quorū sublimior interpretatio, & dignior Dauidico spiritu esse videtur, volunt, in hoc Psalmo celebrari Euangelicā prædicationē. Congruit verò titulus, in consummatione tabernaculi: nam cum David tabernaculum feceris intelligeret figurā esse Ecclesiæ, quæ tabernaculū Dei cū hominibus dicitur in Apocalypsi, & simul etia spiritu reuelante cognosceret, instrumentum, quo tabernaculū hoc nouum perficiendum erat, fore prædicationē Euangelicā, ideò in consummatione tabernaculi illius umbratici, Spiritu sancto inspirante, cantauit præconia vocis Domini, qua tabernaculum verum constituitur. Nos vtramque explicationem breuiter persequemur.

Explicatio Psalmi 28.

Afferte Domino filij Dei, afferte Domino filios arietum.

Canstaturus Propheta laudes potentiae diuinæ, excitat filios Dei, idest, populum Dei peculiarem, cui notus erat Deus (nam notus in Iudæa Deus, in Israel magnum nomen eius) ut potentiam illam honorent, victimis eo tempore consuetis, & etiam prædicatione vocis, & inclinatione corporis. Sed iuxta posteriorem intelligentiam, cantaturus laudes vocis diuinæ, per quam perficitur tabernaculum, idest, Ecclesia, quæ est mater omnium filiorum Dei, inuitat ipsos filios Dei, ipsos vocatos illa voce caelesti, ut Deo sacrificent sacrificium laudis. Afferte, inquit, filij Dei filios arietum, idest, vos per sanguinem agni immaculati effecti filij Dei, afferte agnos, offerre sacrificium gratiarum actionis, & laudis: sic enim explicat ipse idem Propheta in sequenti versiculo, Afferte Domino gloriam, &c. In Hebræo non habetur, Afferte Domino filij Dei, sed solum,

hum, Afferte Domino filios arietum. Fortasse in editione quam habuerunt Septuaginta Interpretes erat vtrique pars versiculi, & postea successu temporis excidit pars prior; fortasse etiam non erat nisi pars posterior, sed ea duobus modis interpretata est, & altera interpretatio, quæ erat in margine irrepsit in textum, & hinc nata est lectio, quam nos habemus. Nam si vox Elim, legatur ut modo se habet, significat arietes; si legatur vnica litera addita Eloim, significat Deum: proinde eadem sententia reddi potuit, Afferte Domino filij Dei: & etiam, Afferte Domino filios arietum. Neque desunt in editione vulgata alij loci, in quibus duæ interpretationes eiusdem sententiæ simul inveniuntur in textu. Certè S. Basilii in Commentario huius Psalmi scribit, in multis exemplaribus addita esse hæc verba, Afferte Domino filij Dei. Ex quo intelligimus, non fuisse hæc verba in omnibus exemplaribus Græcis, sed solum in aliquibus. Sed vndeunque hæc verba in editione nostra accesserint, satis bene cum sequentibus cohererent, & habentur in omnibus Latinis codicibus, etiam antiquissimis.

II. Afferte Domino gloriam & honorem, afferte Domino gloriam nomini eius: adorete Dominum in atrio sancto eius.

Hæc est declaratio sacrificij, quod ut offeramus Domino Propheta nos admonet. Afferte, inquit, Domino gloriam & honorem, idest, voce & opere glorificate Dominum: nec solum voce, & opere Deum laudate, sed etiā corporis inclinatione illum veneramini, & per veram adorationem supremum Dominum agnoscite, ac protestamini. In Hebræo pro voce, honorem, habetur, hoz, quod propriè fortitudinem, potentiam, siue imperium significat. Ex quo intelligimus, honorem, quem iuxta editionem Græcam & Latinam Deo debemus, esse honorem confessionis potentiae, & imperij Domini: tunc enim Deum verè honoramus, cum

Bellarmin. in Psalm.

eius potentiam & imperium agnoscimus, & confitemur. Et est valde ad propositum hoc loco honor potentiae, cum in toto Psalmo Dei potentia laudetur. Pro, nomini eius, in codicibus hebraicis cum punctis Rabinorum habetur, nomini eius: quæ lectio faciliorem sensum habet, quam nostra. Sed quia editio græca habet, nomini eius, & eodem modo ex Hebræo vertit S. Hieronymus, oportet Septuaginta Interpretes, & S. Hieronymum aliter legisse, quam Rabini legerunt. Nimirum ille legerunt, chauod scemò, gloriam nominis eius. Sensus igitur est, Afferte Domino gloriam nomini eius, idest, afferte gloriam Domino, idest, nomini eius, celebrantes videlicet, nomen famam, notitiam Domini. Pro voce, atrio in Hebræo est, hadrat, decore, seu pulchritudine, in Græco est, αὐλῆς: vnde S. Augustinus, & alij legunt, aula. Cæterum facile est videre, Septuaginta Interpretes non legisse hadrat, sed chadrat, vnica litera simillima immutata: illa enim vox, si legatur per ה significat decorem, si per ח significat atrium, & hanc esse veram lectionem dubitare non possumus, nisi Septuaginta viros, qui omnium iudicio sapientissimi erant, imperitiæ arguere velimus; ut omittam quod magis conuenit cum verbis, Adorate Dominum, in atrio sancto eius, quam in decore sancto eius. Porro vox Græca αὐλῆς, non significat id, quod nos Latine dicimus aulam, sed vestibulum, siue atrium subdiale; proinde qui legunt, in aula, retinent sonum vocis græcæ: qui legunt, in atrio, retinent veram tam hebraicæ, quam Græcæ vocis significationem. Per hoc atrium sanctum, in quo Deum adorare iubemur, intelligitur tum ipsum tabernaculi iudaici vestibulum, ad quod omnibus promiscuè aditus erat, cum in tabernaculum soli Sacerdotes intrare permitterentur: tum potissimum Ecclesia Catholica, quæ est velut atrium, seu vestibulum tabernaculi cælestis. nam in Ecclesiam & boni & mali passim admittuntur,

I 3 sed

אלים
אלהים

שמ
כבוד
כבוד
שמ
הדרה
הדרה
הדרה

ע.י.

sed in tabernaculum cæleste illi soli ingredientur, qui dicere poterunt Christo, vt in Apocalypsi legimus, Fecisti nos Deo nostro regnum, & sacerdotes, Apocal. 5.

III. Vox Domini super aquas, Deus maiestatis intonuit, Dominus super aquas multas.

Hic iam incipit explicare Propheta, cur nos inuitauerit ad laudandam, & celebrandam potentiam Dei. Causa enim est, quia vox Domini mirabilia operatur, tum in corporalibus elementis, tum in spiritali fabrica Ecclesiæ. Describit primùm operationem Dei in aquis, deinde in aere, tum in igne, postremò in terra, quæ sunt partes principales mundi huius inferioris nobis maximè noti. Prima operatio Dei in aquis describitur in primo cap. Genesis, cum dicitur, Spiritus Domini ferebatur super aquas: & ibidè, dixit Deus, Fiat firmamentum in medio aquarum, & diuidat aquas ab aquis: & ibidem, dixit Deus, congregentur aquæ, quæ sub cælo sunt in locum vnum, & appareat arida. Tunc igitur facta est vox Domini super aquas, cum Deus imperauit vt aquæ diuiderentur, & diuisæ congregarentur in locum vnum, idest, in cauernas terræ, & terra habitabilis fieret. Hæc ipsa vox dicitur tonitruum, Deus maiestatis intonuit, quia quomodo tonitruum nos continuo prostermit, & obedire cogit: sic ad imperium Domini, continuo aquæ recesserunt, & in loca humiliora se receperunt. Fuit autem hæc vox, & hoc tonitruum Dei super aquas multas, quia tunc aquæ vndique totam terram cooperiebant, proinde erat quasi immensa aquarum abyssus super terram. Hoc ipsum clarius describit idem Dauid in Psal. 103. Abyssus sicut vestimentum amictus eius, super montes stabunt aquæ, idest, immensas aquarum vndique terram vestiebat, ita vt super omnes montes starent aquæ. Ab increpatione tua fugient, à voce tonitruui tui formidabunt: Ascendunt montes, & descendunt campi, in locum quem fundasti eis, idest, ab im-

perante Deo aquæ recesserunt, quasi à tonitruo fugerent, & tunc apparuerunt montes editi, & campi depressi. Terminum posuisti quem non transgredientur, neque conuertentur operire terram, idest, non solum aquæ ad vocem Domini recesserunt, & terram aridam atque habitabilem reddiderunt, sed ab eadem voce Domini terminum acceperunt, quem transgredi nunquam audebunt. Iam verò secundum alteram expositionem, describitur initium Euangelicæ prædicationis, quæ capit, cum Deus ipse per se, Christo in aquis Iordanis baptizato, euangelizauit totum mundo, Iesum Christum esse filium suum, quod est quasi compendium totius Euangelij. Igitur vox Domini super aquas, est illa magnifica Dei vox in Baptismo Christi audita, Hic est Filius meus dilectus, in quo mihi bene complacui. Matth. 3. Tunc enim Deus maiestatis intonuit, & intonuit super aquas multas, quia tunc institutum est Baptisma, & data virtus omnibus aquis totius mundi ad filios Dei regenerandos. S. Augustinus, per vocem Domini super aquas, intelligit vocem Christi super populos, quia dicitur in Apocalypsi cap. 17. Aquæ multæ populi multi sunt: & addit, idè dictum esse, Deus maiestatis intonuit, quia maiestas diuina erat in carne humana Christi tanquam in nube, & proinde vox Domini ex humana carne, erat quasi tonitruum ex nube. Elegans & vera expositio: sed superior, quæ est Patrum Græcorum, videtur magis literalis.

Vox Domini in virtute, vox Domini in magnificentia. IV.

Vtrique interpretationi, laus hæc vocis Dominicæ optimè quadrat. Nam vox Domini iubentis, vt aquæ in principio creationis rerum omnium diuiderentur, & aquæ inferiores in cauernas terræ sese reciperent, & non reuerterentur operire terram, non fuit inanis & sine effectu, vt pleraque tonitrua esse solent, quæ nihil præter ingentem sonitum habent; sed fuit vox plena virtute & gloria, atque ad eam continuo est

est consequutus effectus. Sic etiam vox Evangelicæ prædicationis ab ipso Deo inchoatæ, & à Christo & Apostolis propagatæ, non fuit inanis verborum strepitus, qualis multorum Oratorum, & Philosophorum est; sed fuit vox efficacissima, & signis atque prodigijs confirmata. Ad efficaciam verbi pertinet illud, in virtute; ad gloriam miraculorum, illud, in magnificentia, siue splendore & decore, ut sonat vox hebraica, **הדר**. Apostolus Paulus 1. Cor. 2. Prædicationis mea, inquit, non in persuasibilibus humanæ sapientiæ verbis, sed in ostensione spiritus, & virtutis: & 1. Thessalonic. 1. Euangelium meum non fuit ad vos in sermone tantum, sed in virtute, & Spiritu sancto.

V. Vox Domini confringentis cedros, & confringet Dominus cedros Libani.

Iuxta priorem interpretationem transit Propheta ab operatione Dei in aquis, ad operationem in aere. Significat autem his verbis, vocem Domini, idest, imperium Domini, excitare ventos ac tempestates, quas in Psalmo 148. vocat spiritum procellarum, quæ faciunt verbum eius. Et sanè mirabilis est potentia Dei, quæ rei tam exili, ac tenui tantam virtutem attribuit, ut etiam maximas arbores in momento confringat, & prosternat, quod multi homines magna vi, & longo tempore vix facerent. Nominat autem Propheta cedros, & cedros Libani, quia cedri sunt arbores durissimæ & maximæ, & ex nusquam maiores inveniuntur, quàm in Libano monte. Iam verò iuxta posteriorem interpretationem, cedri Libani ratione sublimitatis sūt homines excelsi, siue magnitudine potentia, siue splendore sapientiæ, siue gloria eloquentiæ: ratione boni odoris, quem cedri spirant, sunt homines delicijs & voluptatibus dediti. Denique ratione densitatis & duritiei, qua mirum in modum cedri pollent, sunt homines obstinati & pertinaces in paternis erroribus. Has omnes cedros, Evangelica prædicationis magnificè confre-

git, & ad humilitatem & mansuetudinem Christianam, necnon ad fructus dignos penitentia faciendos perduxit. Exemplorum plenæ sunt historia.

Et comminuet eas tanquam vitulum Libani, & dilectus quemadmodum filius vnicornium. **VL**

Ex Hebræo iuxta priorem intelligentiam, habetur sensus facilis & pulcherrimus. Sic enim legimus in Hebræo, & saltare faciet eas, sicut vitulum, Libanum, & sarion, sicut filium vnicornium. & sensus est, non solum vox Domini confringet cedros Libani, sed etiam integras cedros radicitus euellet, & exilire faciet ea facilitate, qua vituli saliant. Nec solum cedros Libani, sed ipsos etiam montes, Libanum, & Sarion saltare faciet ea facilitate, qua filius vnicornium salit. Cui sententiæ similis est illa in Psalmo 113. Montes exultauerunt ut arietes, & colles sicut agni ouium. Iuxta posteriorem intelligentiam, sensus erit, vox prædicationis Evangelicæ non solum confringet cedros Libani, idest, viros quamuis excelsos & obstinatos ad humilitatem Fidei Christianæ in flectet, sed etiam easdem cedros eradicabit, & in alium locum exilire faciet, idest, ab affectibus terrenis penitus abstrahet, & ad vitam penè Angelicam transferet: quod Apostolis & Apostolicis viris conuenit, qui non solum fideles, sed religiosissimi & perfectissimi euaserunt, ut non tam homines, quàm terrestres Angeli viderentur. Nec solum cedros singulas, sed integrum montem cedris plenum, siue integras cedrorum sylvas exilire faciet Evangelica prædicationis, idest, non solum hunc, aut illum virum, sed ingentem hominum multitudinem, cateruasque integras, ad Fidem, & religionem, vitamque perfectam adducet. Sed videndum est, quid Græca, & Latina editio habeat, inter quas hoc solum interest, quod in Græca legitur, & comminuet eas tanquam vitulum Libani;

in Latina verò, & comminuet eas tanquam vitulum Libani. Quamvis autem Sanctus Basilius & Euthymius legant, Libanum, tamen probabile est, in editionibus Græcis emendatioribus fuisse Libani, ut legunt SS. Hieronymus, & Augustinus, & Codex antiquissimus quo utitur in Psalmis canendis Ecclesia S. Petri Romæ. Et quidem verba illa priora, & comminuet eas tanquam vitulum Libani, possunt non difficulter concordari cum verbis hebraicis: nam dum Cedri magno impetu confringuntur, & comminuuntur, certè fragmenta exiliunt, & sparguntur in varias partes. Itaque sensus erit, & comminuet eas, Cedros videlicet, ac per hoc per fragmenta, & frustra exilire faciet, quomodo vituli montis Libani exilire & saltare solent. Sed verba sequentia, & dilectus quemadmodum filius vnicornium, difficilius cum hebraicis vocibus, quæ nunc habentur in biblijs, concordari possunt: nam Sirion, pro quo nos habemus, dilectus, significat montem Hermon, Deuter. 3. & loricam, 1. Reg. 17. & 3. Reg. 22. Oportet igitur ut Septuaginta Interpretes, vel aliquid aliud legerint, vel certè intellexerint vocem illam, quæ significat montem Hermon, & loricam, res videlicet tam dissimiles, significare etiam dilectum, quibus habenda fides est, cum ipsi doctissimi essent, & linguæ hebraicæ peritissimi. Posita autem hac lectione, iuxta priorem intelligentiam, hic erit sensus: Et comminuet eas, nimirum cedros, & comminuendo exilire faciet fragmenta cedrorum, sicut vitulum Libani, id est, sicut salit vitulus per montem Libani, & dilectus quemadmodum filius vnicornium, id est, ut salit dilectus filius vnicornium. Dicitur autem dilectus filius vnicornium, quod sit speciosum & amabile animal, præsertim quando iuenculus vnicornis est. Alij sic exponunt, & comminuet Cedros durissimas, quomodo comminui possunt tenerrimi vituli, & tenerrimi filij vnicornium: sed nostra expositio magis accedit ad lectionem hebraicam.

Iuxta posteriorem intelligentiam sensus erit, prædicatio Evangelica non solum confringet cedros Libani, id est, homines potentes & sapientes humiliabit, sed etiam comminuet ut vitulum Libani, id est, rediget altissimas Cedros ad paruitatem exigui vituli, qui pascitur in monte Libano. Per vitulum autem rectè intelligitur Christus, qui non solum humilis & mansuetus fuit, more lactentis vituli, sed etiam immolatus in sacrificium Deo: Et dilectus quemadmodum filius vnicornium, id est, & tunc quando cedri Libani contractæ fuerint, apparebit dilectus, qui est Christus dilectissimus Patri, & desideratus cunctis gentibus: apparebit inquam, non amplius ut inermis vitulus, sed ut filius fortissimi vnicornis. Maiestas enim diuina, & omnipotentia Christi tunc primum apparere cæpit, cum per Evangelicam prædicationem piscatorum, Oratores & Philosophi, & ipsi etiam Principes mundi credere ceperunt in Christum. De viribus vnicornis, siue rinocerotis, vide Job. 39.

Vox Domini intercidentis flā VII.
mam ignis, vox Domini concu-
tientis desertum, & commoue-
bit Dominus desertum Cades.

In prima parte huius versus, quæ apud Hebræos est versus integer, transit Propheta ab operatione Dei in aere ad operationem in igne, ac dicit, Vocem Domini, id est, imperium & potentiam Domini, intercidere, id est, diuidere flammam ignis, quod fit, quando imperante Domino, varia mittuntur e nubibus, quasi e caelestibus caminis, fulmina in terras, quibus nihil terribilius & formidabilius mortalibus accidere solet: potest etiam illa intercisio, siue diuisio flammarum, non solum referri ad multitudinem, & varietatem fulminum, sed etiam ad subtilitatem, & acumen ipsorum fulminum: quæ enim accuuntur diuiduntur, ac interciduntur, ut ad subtilitatem redigan-

gatur. porro nihil est omnino in rebus corporalibus acutius, subtilius, penetrabilius caelesti fulmine: vnde est illud in cantico Mosis, Deuter. 32. Si acuerro, vt fulgur gladium meum. Iuxta alteram intelligentiam, vox Domini, id est, Euangelica prædicatio diuidit flammam ignis, dum per eam Spiritus sanctus in cordibus hominum iaculatur ignem diuini amoris, multis & varijs modis: in cuius rei signum apparuerunt in die Pentecostes super credentes dispartitæ linguæ tanquam ignis, Act. 2. In altera parte versus celebrat Propheta potentiam Dei operantis in terra, ac dicit, Vocem Domini concutere & commouere desertum. Verbum Hebraicum, *יחי*, iachil, significat, pariturire faciet. ex quo intelligimus, concussionem & commotionem, quæ in Græca & Latina editione exprimitur, non esse simplicem terræ motum, aut concussionem ex fragore tonitru in deserto peculiariter resonantis, vt aliqui volunt; sed esse concussionem, & commotionem ad parturiendum. Itaque significatur hoc loco mirabilis potentia Dei, quæ sicut montem Libani potest cum voluerit Cedris omnibus spoliare, & desertum facere: ita e contrario potest ipsum desertum Cades, vbi nihil nasci solet, vnica concussionem pariturire facere, & continuo arboribus & animalibus replere. Simile est, quod dicitur in Psalmo 106. Posuit flumina in desertum, terram fructiferam in saluginem. & paulò post: Posuit desertum in stagna aquarum, & collocauit illic esurientes, & constituerunt ciuitatem habitationis, & seminauerunt agros, & plantauerunt vineas. Sed iuxta alteram intelligentiam significatur, ad Euangelicam prædicationem conuertendas esse etiam Barbaras nationes, quæ antea caruerant cultura spirituali, & irrigatione gratiæ Dei, vt comparatione aliarum nationum, desertæ dici possent. Quid si etiam hic significari dicamus, vera deserta paritura fuisse infinita agmina Monachorum, ac per hoc, vt loquitur Sanctus Hieronymus in Epist. ad Heliodorum,

futura deserta vernantia floribus Christi? Nam in hoc ipso deserto Cades, fuisse plurima Monasteria tempore Sancti Hieronymi, testatur ipse in vita Sancti Hilarionis.

**Vox Domini præparantis cer-
uos, & reuelabit condensa, & in
templo eius omnes dicent glo-
riam.** VIII.

Iuxta priorem intelligentiam Propheta, qui Dei potentiam laudauit in elementis omnibus, aqua, aere, igne, & terra: nunc laudat in animantibus, & plantis, paulò post laudaturus in hominibus. Dicit igitur, Vox Domini præparantis ceruos, vbi ponit loco exempli, operationem Dei in ceruis. Nam vt habemus in lib. Iob. cap. 39. ceruæ summa difficultate pariunt, & causa videtur esse, quia tam perfectos fœtus edunt, vt illi statim ad pastum pergant, nec redeant ad matrem; vt in eodem loco dicitur. Mira igitur Dei potentia in eo cernitur, vt ceruas parere faciat. In Hebræo habetur, Vox Domini parere faciens ceruas, vel vt Sanctus Hieronymus vertit, Vox Domini obstetricans ceruis. Idem significant verba Græca & Latina. Nam præparare ceruos, nihil est aliud hoc loco, nisi præparare ad parandum. Nomen, ceruos, commodius legeretur, ceruas: nam in Hebræo est nomen fœmininum, & in Græco, est nomen commune. Sed rectè etiam potest intelligi, præparantis ceruos, nam ponitur nomen masculinum ad exprimendum ceruos in genere non distinguendo sexus: quasi diceretur, Vox Domini præparat ceruos, id est, speciẽ ceruinam ad partum, quæ species sine peculiari prouidentia Dei parere nõ posset. In verbis sequentibus, Et reuelabit condensa, siue, vt in Hebræo aperitius legitur, aperiet syluas; significatur operatio Dei in arboribus, & sc̃us est, Deo nihil esse clausum, sed omnia peruia; ipse enim omnia penetrat, etiam densissimas syluas, & vbiq. operatur;

&

& ideo, In templo eius omnes dicunt gloriam, idest, omnes creaturæ Deum laudant, & glorificant in hac rerum vniuersitate, quæ est veluti templum eius. In Hebræo est omne ipsum, totum hoc dicet gloriam: ideo exposuimus, omnes, idest, omnes creaturæ: non enim loquitur solum de hominibus, sed de toto eo, quod dictum erat, idest, aqua, igne, &c. Iuxta alteram intelligentiam sublimiorem, vox Domini præparat ceruos cum Euangelica prædicatio præparat homines spirituales, alta petentes, & venenatos serpentes spiritu suo occidentes, ad partum mirabilium operum. quid enim maius & mirabilius, quam vt homo infirmus, operetur opera meritoria vitæ perpetuæ? Et cum vox Domini ceruos omnes parere fecerit, tunc demum reuelabit condensæ, idest, vt exponit Sanctus Basilius in secunda expositione huius Psalmi, reuelabit abscondita tenebrarum, & manifestabit consilia cordium in extremo iudicio, iuxta Apostolum 1. Cor. 4. & tunc, tamen erit euidentis iustitia Dei, vt in magno illo theatro, & templo omnes omnino, tam boni, quam mali sint glorificaturi Deum. Tunc enim curuabitur Christo omne genu, & omnes vel inuiti, vel libenter dicent, iustus es Domine, & rectum iudicium tuum. sic in templo eius, omnes dicent gloriam. Sanctus Augustinus per illud, reuelabit condensæ, intelligit reuelationem Sacramentorum, & arcanorum Scripturæ sanctæ, quæ viris sanctis & perfectis, quasi ceruis alta petentibus, aperiuntur.

IX. Dominus diluuium inhabitare facit, & sedebit Dominus Rex in æternum.

In Hebræo est, Dominus diluuium inhabitat, & sic etiam ex Græco legunt Basilius, & Augustinus: tamen Hieronymus in epist. ad Sumiam & fretellam magis probat nostram lectionem, nimirum, inhabitare facit, & sic dicit se transtulisse. Eodem modo legit Eutymius. Et certè græca vox vtrumque significat, inhabitare, & collocare;

idest, habitare facere. vna mutatione facta in ectionem adduci potestur nostra lectione, intelligentiam, redditur, nam dicant gloriam Deo est, quia Deus diluuium cit, idest, copiosum imbrem per terram, ex quo recrementum producit & tur, & ipse idem Deus Dominus in æternum, regens, omnia gubernans. At iuxta posteriorem intelligentiam, Dominus cum in extremo iudicio reuelauerit condensæ, & ab omnibus iustitia eius laudata fuerit, tunc diluuium inhabitare faciet, effundens omnia genera bonorum in bonos, & omnia genera malorum in malos, & sic nullo penitus resistente, sublato de medio omni alio principatu, & regno Demonum, atque hominum impiorum, sedebit Dominus Rex in æternum. Referunt hoc diluuium alij ad diluuium Noe, alij ad Baptismum, & quia sunt auctores graues & magni nominis, non audeo improbare.

Dominus virtutem populo suo dabit, Dominus benedicet populo suo in pace.

Hæc est conclusio Psalmi, in qua, iuxta priorem intelligentiam, Propheta, qui laudauit Dei potentiam in omnibus alijs rebus mundi huius inferioris, laudat postremo in hominibus, idest, in populo suo, cui dandam esse dicit a Deo virtutem, idest, robur & vires contra omnes aduersarios, & ijs omnibus superatis, dulcissimam quietem & pacem. At iuxta posteriorem intelligentiam, concludit Psalmum promittens populo Dei virtutem, idest, potentiam & robur in hac peregrinatione ad resistendum tentationibus, & benedictionem ac pacem sempiternam in æterna vita. Non videtur hoc loco prætereunda pia quorundam observatio, qui vocem Domini septies in hoc Psalmo repetitam, septem Ecclesiæ Sacramentis ita accommodant, vt vocem Domini su-

super aquas, Baptismo; vocem Domini in virtute, Confirmationi; vocem Domini in magnificentia, Eucharistiæ; vocem Domini confringentis cedros, Pœnitentiæ; vocem Domini concutientis desertum, Ordini; vocem Domini intercidentis flammam ignis, Matrimonio; vocem Domini præparantis ceruos, vnctioni Extremæ conuenire velint.

PSALMVS XXIX.

Titulus, & Argumentum.

Psalmus cantici, in dedicatione domus David.

HIC titulus, indicat Psalmū & voce, & instrumentis musicis cantatum, quod in præfatione annotamus ex B. Hilario, & idipsum docet in Commentario huius Psalmi S. Basilii. Ex eodem titulo colligimus, hunc Psalmum compositum fuisse à Dauide, quando domus eius in Hierusalem magnificentissimè extructa, dedicata fuit. Tunc enim intellexit David regnum suum à Deo confirmatum, & stabilitum fuisse; & ideò in gratiarum actionem hunc hymnum cecinit Deo. Habetur hæc historia lib. 2. Reg. 5. & lib. 1. Paralip. 14. Videtur autem hic Psalmus duplicem sensum habere, vt Psalmus superior, vnum historicum, alterū propheticum, vtrumque literalem. Et quidem rectè post consummationem tabernaculi, quod est Ecclesia militans in terris, sequitur dedicatio domus, quæ est Ecclesia stabiliter quiescens in cælis, cuius fundamentum, quod est Christus iam dedicatum est, cum ad vitam immortalem & gloriosam peruenit.

Explicatio Psalmi 29.

Exaltabo te Domine, quoniam suscepisti me, nec delectasti inimicos meos super me.

David confirmato Regno, arce Sionis munita, & de nomine suo ciuitate David appellata, denique domo regia magnificentissimè extructa, Deū agnoscens tantorum beneficiorum auctorem, tributum illi offert gratiarum actionis, ac dicit, Exaltabo te Domine, idest, quamuis tu Domine altissimus sis, vt re ipsa altior fieri non possis; tamen apud eos, qui altitudinem tuam minùs agnoscunt, exaltabo te prædicatione mea, & faciam, quod in me est, vt te altissimum esse omnes agnoscant. Quoniam suscepisti me, de imo videlicet, ac de profundo humilitatis suscepisti, & exaltasti in solum Regni. Nam vox hebræa, dalà, exaltare significat. Itaque ait, tu exaltasti me, & ego exaltabo te, non tribuens meis viribus exaltationem meam, sed magnificentiæ tuæ: tu exaltasti me, & ego humiliabo me, vt exaltem te. Nec delectasti inimicos meos super me: hoc ex illa exaltatione consecutum est, vt inimici David, qui plurimi fuerunt, & eum longissimo tempore ad necem quæsierunt, non habuerint materiam gaudendi ex eius interitu, quem audissimè expetebant, sed contra dolendi ex illa exaltatione, quam impedire totis viribus conabantur. Iam verò prophetico sensu, loquitur David in persona Christi, & Electorum, tum omnium, tum singulorum, quos in cælesti Regno quasi exaltatos præuidebat, è quorum numero ipse quoque futurus erat. Exaltabo te Domine, quoniam suscepisti me, idest, nunc verè te Domine cogitatione & voce exaltabo, cum ex mea exaltatione cognoscam sublimissimam altitudinem tuam. nam ex ima terra, & profundo miseriarum, ex ipsa mortalitate suscepisti & exaltasti me ad gloriam resurrectionis & immortalitatis, atque adeò ad Regnū cæle-

cæleste & sempiternum. Nec delectasti inimicos meos super me, quia non permisisti ut potirentur desiderio suo, quo in sempiternum interitum meum anhelabant Dæmones, & homines mali. Gauisi sunt quidem impij Iudæi, cum à Pilato extorserunt sententiam mortis in Christum, & non rarò lætantur mali, cum bonos, vel opibus, vel etiam vita spoliare possunt; sed eorum lætitia tam brevis est, & tam longum adducit dolorem, ut meritò somnium potius lætitia, quàm vera lætitia dici debeat.

II. Domine Deus meus clamaui ad te, & sanasti me.

III. Domine eduxisti ab inferno animam meam, saluasti me à descendētib; in lacum.

Reuocat Propheta ad memoriā angustias suas, quas ante Regnum adeptum, passus est, ut ostendat verum esse, quod paulò ante dixit, Nec delectasti inimicos meos super me. Domine Deus meus clamaui ad te, cum in periculis mortis tam sæpè versarer, & ob id ægritudine animi contabescerem: sed tu Domine sanasti ægritudinem illam meam, & à morte propinqua, ita me liberaisti, ac si ex ipso inferno me eduxisses. Illud autem, saluasti me à descendētib; in lacum, idem significat, sed est loquutio paulò obscurior. Sensus est, saluasti me, vel, ut habetur ad verbum in Hebræo, viuificasti me à descendētib; in lacum, idest, excitasti me à mortuis. Nam per descendentes in lacum intelliguntur mortui. Dicitur autem Dauid excitatus à mortuis, quia à morte propinqua & certissima liberatus fuerat. At iuxta propheticam intelligentiam, Christus planè ad literam dicere potest, sanasti me, idest, vulnera mea in cruce accepta; & eduxisti ab inferno, idest, à Limbo animam meam, & viuificasti me per resurrectionem, atque ita à mortuis excitasti. Denique Sancti omnes dicere potuerunt, cum domus æterna dedicabitur, sanasti me perfectissi-

ma sanitate corporis & animæ; & eduxisti ab inferno animam meam, quia non permisisti ut in infernum damnatorum descenderem, & saluasti, seu viuificasti me à descendētib; in lacum; quia vitam & salutem æternam mihi donasti. Idem habetur in Psalmo 102. Qui sanat omnes infirmitates tuas, qui redimit de interitu vitam tuam.

Psallite Domino sancti eius, & IIII. confitemini memoriæ sanctitatis eius.

Et Dauid acceptis temporalibus beneficijs, & vnusquisque sanctorum acceptis beneficijs æternis, parum esse iudicans, si ipse solus Deo gratias agat, hortatur alios, qui similia beneficia perceperunt, ut Deum laudare non cessent. Illud, Confitemini memoriæ sanctitatis eius, hunc sensum habet, confitemini confessione laudis, idest, laudate memoriā sanctam eius, quòd videlicet si memor fuerit memoria sancta, memoria pia, memoria paterna, non ad puniendum, sed ad sanctificandum. passim enim in lingua hebraica ponitur nomen substantiuum in secundo casu, pro adiectiuo in primo casu. Quod enim frequenter legimus, in monte sancto eius, vel in templo sancto eius, in Hebræo est, in monte, vel, in templo sanctitatis eius. Itaque Sanctus Hieronymus, qui hoc loco posuit, memoriæ sanctitatis eius, in Psalmo 97. versu ultimo, posuit, memoriæ sanctæ eius. Et verò magnum est hoc Dei beneficium, & memoria gratissima recolendum, quòd cum nos, qui Dei ope semper indigemus, sæpè obliuiscamur illius; ille, qui bonorum nostrorum non eget, semper recordetur nostri, & præcipuè recordatus sit cum misit ad nos filium suum, Salvatorem mundi, quod ipsum idem Dauid in Psal. 8. miratur, cum ait, Quid est homo, quia memor es eius?

Quoniam ira in indignatione v. eius, & vita in voluntate eius.

Reddit rationem, cur dixerit, laudandam esse memoriā sanctam, quā de nobis

nobis habet Deus. Ratio enim est, quia Deus, si nos punit, id facit ex indignatione, quam peccata nostra prouocant; id est, ex iusto iudicio; sed alioqui in voluntate, & electione eius non est poena, sed vita. Itaque per iram intelligitur poena & castigatio, quae dicitur ira, quia est effectus irae: per indignationem, intelligitur iustum Dei iudicium, ut Sanctus Basilus & alij exponunt. In Hebræo habetur, quoniam momentum est in indignatione eius, & vita in voluntate eius. Sed Septuaginta Interpretes non videntur legisse, regah, quod significat, momentum, sed regaz, quod significat iram. fortasse etiam legerunt, regah, & verterunt iram, quia vox illa, non solum significat momentum, sed etiam scissionem, proinde intellexerunt, sensum esse, in indignatione Dei esse scissionem, id est, occisionem & mortem, sed in voluntate Dei esse vitam: sed pro scissione posuerunt iram, quia saepissime in scriptura ponitur ira pro poena. Caterum sensus etiam, quem ex Hebræo exprimit Sanctus Hieronymus, non est contemnendus: verè enim respectu electorum, de quibus in hoc Psalmo agitur, momentum est in indignatione Dei, id est, breuissima & momentanea est indignatio Dei in electos peccantes, quia statim poenitentibus ignoscit, nam in voluntate eius non est ira, sed vita. Porro hæc omnia in Christum caput electorum mirifice quadrant. Nam pater filio suo non pepercit, sed tamen ira, id est, punitio fuit in Christo ex indignatione contra peccata nostra, & fuit castigatio illa breuissima, sed vita & resurrectio Christi fuit planè ex voluntate & electione Dei.

VI. Ad vesperum demorabitur fletus, & ad matutinum lætitia.

Sanctus Hieronymus vertit, in matutino laus, sed vox hebræa, rinna, significat propriè iubilationem, siue exultationem, in qua est coniuncta laus cū lætitia. proinde non est discrepantia inter versiones. Sensus igitur est, inde probari: iram siue momentum, esse in

indignatione Dei; sed in voluntate & beneplacito eiusdem esse vitam electorum suorum; quia post fletum ex castigatione & poenitentia natum, statim succedet lætitia, & laus iubilationis ex remissione & reconciliatione: Nam inter vespere & mane, id est, inter noctem & diem nihil est medium: Rectè autem tribuitur tempus nocturnum fletui, & diurnum lætitiae, tum quia cū peccamus recedit à nobis lux gratiae diuinæ, cū reconciliamur, redit; tum quia tempus huius vitæ, in quo peccata deflemus, & præ desiderio patriæ gemimus & suspiramus, tempus est nocturnum; quia nō videmus Deum, qui est sol iustitiae: tempus autem vitæ futuræ, in quo exultabimus lætitia inenarrabili & glorificata, ut loquitur Sanctus Petrus, tempus erit diurnum, quia videbimus Deum sicuti est. Sed in Christo ad litteram impletum est hoc vaticinium. nam ad vespere cum dolore mortuus est, & in matutino cum lætitia resurrexit.

VII. Ego autem dixi in abundantia mea, non mouebo in æternum.

Vicissitudinem iræ & vitæ, fletus & lætitiae, quam demonstrauit Propheta superioribus versiculis generatim, nunc demonstrat in particulari, loquens tum in persona sua, tum in persona electorum Dei. Ac primum in persona sua dicit, se antequam in regnum exaltaretur, aliquando tanta pace, & bonorum temporalium copia abundasse, ut existimaret, sibi illa perpetuò adfutura. Videtur autem respicere ad illud tempus, in quo post eadem Goliath Philistæi, ut habetur 1. Reg. 18. diligebatur à Rege, à filio Regis, atque ab omni populo, ita ut paulò post fieret tribunus, & gener Regis. De hoc igitur tempore dicit, Ego autem dixi in abundantia mea, id est, dum bonis omnibus abundarem, Non mouebo in æternum, id est, tam bene fundata est hæc felicitas mea, ut semper duratura videatur.

Do-

VIII. Domine in voluntate tua præstitisti decori meo virtutem.

Reddit rationem, cur dixerit, non mouebor in æternum, atque id facit per apostrophem ad Deum, quasi dicere, ideo dixi, non mouebor in æternum, quia tu Domine præstitisti virtutē, idest, robur ac vires decori meo, idest, felicitati meæ, idque, in voluntate tua, idest, in beneplacito tuo, quia ita placuit tibi, ita voluisti, & decreuisti. In Hebræo habetur, monti meo, pro decori meo. sed Septuaginta non legerunt, haretri, idest, monti meo, sed hadari, decori meo, vnica litera, eaque simillima mutata: & vt sæpè diximus, in eiusmodi vocum ambiguitatibus, videtur omnino præferenda lectio Septuaginta Interpretum, & editionis vulgatæ.

IX. Auertisti faciem tuam à me, & factus sum conturbatus.

Hic iam declarat rerum vicissitudinem, quæ tamen ex Dei prouidentia pedit. Auertisti, inquit, faciem tuam à me, idest, paulò post, in medio cursu felicitatis destituiisti me fauore tuo, & permisisti, vt in odium Regis inciderem, Et factus sum conturbatus, inde enim exilium, fuga, mortis periculum, & alia mala exorta sunt. Sed hæc omnia longè adhuc melius conueniunt in vicissitudines, quas patiuntur Electi, cum peregrinantur in terris. Ego autem, inquit Electus quilibet, in abundantia mea, idest, dum gratia Dei, & spirituali consolatione abundabam, dixi, non mouebor in æternum, etiam si oportuerit me mori tecum, non te negabo, dixit vnus ex primarijs electis. Domine in voluntate tua præstitisti decori meo virtutem, idest, robur meum non ex me erat, sed ex te, quia tu præstiteras virtutem decori meo, idest, pulchritudo animæ meæ, quæ ex luce sapientiæ, & iustitiæ oritur, à tuo adiutorio conseruabatur. Auertisti faciem tuam à me, & factus sum conturbatus, idest, vt punires præsumptionem meā,

dimisisti meipsum mihi, & continuo cecidi, & conturbatus sum. Quod attinet ad Christum, possunt hi tres versculi tribui Christo, pro corpore eius, quod est Ecclesia, idest, vt ea omnia dicat in persona membrorum suorum. Possunt etiam Christo tribui in persona propria. Nam quemadmodum ipse dixit in Cruce, Deus meus vt quid dereliquisti me? ita dicere potest, Auertisti faciem tuam à me, non auersione inimicitia, sed auersione defensionis & auxiliij tempore passionis. Itaque sensus erit, Ego autem dixi in abundantia mea, non mouebor in æternum, idest, humanitas mea inuncta præ omnibus consortibus suis abundantissima gratia, ipsi nimirum fonti gratiarum Deo hypostaticè vnita, dixit, non mouebor in æternum, idest, nihil mihi nocere, nihilque me perturbare poterit. Domine in voluntate tua præstitisti decori meo virtutem, idest, quia tu Domine pulchritudini & excellentiæ meæ, qua præsto omnibus hominibus, & Angelis, addidisti robur & potentiam, nodum videlicet insolubilem hypostaticæ vnionis, idque ex voluntate tua, cui nemo resistere potest. Auertisti faciem tuam, & factus sum conturbatus, idest, nihilominus tamen manente vinculo hypostaticæ vnionis, & illæsa pulchritudine gratiæ, auertisti ad tempus pro salute hominum faciem tuam à defensione mea: voluisti, vt calix amarissimæ passionis non transiret à me, sed biberem illum: ideo conturbatus sum, capi pauere, tædere, & mæstus esse, & dixi, tristis est anima mea usque ad mortem. Neque hinc colligi debet, Christi animam aliquid ignorasse, vel aliquid inopinatum ei contigisse: nam verum est, nihil ei nocere, vel eā turbare potuisse, nisi ipsa voluisset; sed admisit in se furentium manus, & turbauit semetipsum. Et sicut Christus dixit ad Patrem, Auertisti faciem tuam à me, ita dicere potuisset, auerti faciem diuinitatis meæ ab auxilio humanitatis meæ, & sciens, & volens conturbatus sum.

Ad

- X. — Ad te Domine clamabo, & ad Deum meum deprecabor.
- XI. Quæ utilitas in sanguine meo, dum descendo in corruptionem?
- XII. Nunquid confitebitur tibi pulvis, aut annuntiabit veritatem tuam?

Hæc omnia videntur accipienda pro tempore præterito, neque est insolitum, ut apud Hebræos futurum ponatur pro præterito. Itaque David in sensu historico dicit, se tempore tribulationis & periculi, clamasse ad Dominum, atque inter cætera allegasse, non esse utilem Domino mortem suam, quia mortuus non posset Deum laudare. Ad te Domine clamabo, id est, cum te auertente faciem factus sum conturbatus, non deseraui de misericordia tua: sed ad te clamaui, & te deprecatus, dixi, Quæ utilitas in sanguine meo, dum descendo in corruptionem, id est, quid tibi Domine proderit effusio sanguinis mei, dum ego ab inimicis occisus, putrescam in sepulchro? Certè pulvis non confitebitur tibi confessionem laudis. Iuxta sensum altiore & propheticum, Christus in passione ad Dominum clamasse, & orasse se dicit, quod impletum fuit, quando, ut Apostolus loquitur ad Hebr. 3. cum clamore valido & lachrymis, preces obtulit ad eum, qui posset eum saluum facere à morte. Tunc igitur ait, Quæ utilitas in sanguine meo, dum descendo in corruptionem? id est, quæ utilitas erit gloriæ Dei, & saluti humani generis in sanguine meo in cruce effuso, dum cæterorum hominum more, corpus meum in sepulchro putrescit & corrumpitur? Nam nisi Christus resurrexisset, inanis esset fides nostra, ut dicit Apostolus 1. Corinth. 15. & neque ipse reddidit annunciasset Apostolis veritatem Dei, neque homines mortales, qui sunt ex se pulvis & cinis, facti essent spirituales, & filii Dei, qui Domino confiterentur, & annuntiarent alijs hominibus veritatem, id est, fidelitatem, & iustitiam Dei. Denique possunt hæc eadem verba tribui singulis Electis, qui post lap-

sum in culpam, pœnitentia ducti, clamauerunt ad Deum pro remissione peccati, ut possent Domino confiteri, & annuciare alijs peccatoribus veritatem promissionum Dei.

Audiuit Dominus, & misertus est mei, Dominus factus est adiutor meus. XIII.

Ex hoc versiculo perspicuum est, verba versiculi decimi rectè explicata fuisse pro tempore præterito. Affirmat igitur Propheta tum in persona sua, tum in persona Christi, & Electorum, clamorem suum à Deo fuisse exauditum. In Hebræo legitur, Audi Domine, & miserere mei, Dominus esto adiutor meus. Sed eadem voces hebraicæ sub alijs punctis reddunt lectionem, quam nos habemus. Proinde certum est, Septuaginta Interpretes aliter legisse, quàm S. Hieronymus, & Hebræi posteriores legerint: neque dubitandum est, Septuaginta Interpretum auctoritatem in iisdem vocibus legendis prævalere debere.

Conuertisti planctum meum in gaudium mihi, conscidisti saccum meum, & circumdedisti me lætitia. XIV.

Hic est effectus exauditionis. David ex misero exule Rex potens effectus; Christus ex mortuis resurgens, & de ipsa morte triumphans; Electus quisque ex valle lacrymarum ad patriam caelestem perueniens iustissimè dicit, Conuertisti planctum meum in gaudium mihi. In Hebræo, pro, in gaudium, est in chorum, sed per chorum hebraicè, machol, intelligitur instrumentum musicum. Sensus est idem: sed vox hebræa videtur paulò elegantius respondere voci præcedenti, ac si latinè diceretur, Conuertisti planctum in cætum. Quod sequitur, conscidisti saccum meum, & circumdedisti me lætitia, significat mutationem vestis lugubris in vestem lætitiæ conuenientem. Dicit autem Propheta, conscidisti, & nō, exuisti, vel spoliasti, quia quod exuitur, remanet integrum, quod scinditur, destruitur, ut
vlti

hinc.

vsui deinceps esse non possit. Itaque significatur hoc loco, fœcus miseriæ, vel mortalitatis, & passibilitatis planè destructus, vt nunquam amplius vsui sit futurus in Sanctis, ac multo minus in Christo, qui resurgens à mortuis, iam non moritur.

XV. Vt cantet tibi gloria mea, & non compungar, Domine Deus meus in æternum confitebor tibi.

Hic est vltimus finis gloriæ Christi, & Sanctorum omnium, laus Dei. Beati qui habitant in domo tua Domine, in sæcula sæculorum laudabunt te. Illud, & non compungar, in Hebræo est, & non taceat, vt sensus sit, vt gloria mea cantet tibi laudem, & gratiarum actionem, & nunquam taceat, nunquam cesset à laude; cui rectè subiungitur, in æternum cōfitebor tibi, id est, semper laudabo, nunquam silebo. Sed quanquam hæc lectio satis cohzreat cum reliquis verbis, tamen idem vocabulum hebraicum, *iddōm*, significat flere, & excidere siue succidere: & hanc significationem elegerunt Septuaginta Interpretes, & legerunt in prima persona, & non compungar, quod est idem cum eo, & non luccidar. Est au-

tem sensus, cantet tibi gloria mea, & non gemitus meus, ex timore mortis, vel peccati:

vel,
cantet tibi gloria mea, & non amplius compungar aculeo mortis, vel peccati.

PSALMVS XXX.

Titulus, & Argumentum.

In finem, Psalmus David, pro Ecstasi.



N hoc titulo nihil est novi, nisi illa vox Ecstasis, quæ non habetur in Hebræo, & fortasse non est addita à Septuaginta Interpretibus, sed ab aliquo alio Interprete: nam in quibusdam solùm exemplaribus illam se inuenisse Theodoretus testatur. Sanctus quoque Hieronymus eam non habet, neque in versione sua ex Hebræo, neque in commentario, vbi exponit versionem Septuaginta Interpretum. Qui cunque illam particulam addidit, eam accepit ex versiculo 28. huius Psalmi, Ego autem dixi in excessu mētis meæ. Significat autem ecstasis mentis excessum, cum animus ita intendit in rem aliquam, vt quasi corpus proprium deseruisse videatur. Oritur autem iste excessus, vel ex diuina aliqua reuelatione, quæ rapit mentem in arcanum aliquod intuendum; vel ex vehementi passione timoris, vel amoris. Hoc autem loco, videtur intelligenda ecstasis ex timore repentino & maximo, quo Dauid correptus fuit, cum audiuit Absalonem filium & omnem populum contra se cōspirasse. Quæ historia habetur 2. Reg. 15. Videtur autem ad literam Psalmus de Dauide fugiente persecutionem Absalonis intelligendus, vt Theodoretus, & Euthymius volunt. Sed potest etiam ad Ecclesiam inter persecutionum angustias gementem, accommodari.

Explicatio Psalmi 30.

IN te Domine speraui, non confundar in æternum, in iustitia tua libera me.

Dauid Rex fugiens persequētē Absalonem,

lonem, omni humano auxilio destitutus ad Deum recurrit, ac dicit, in te speravi, & ideo confido, quod nunquam frustrandus mea spe sim, quia tu omnipotens, & fidelissimus es. Igitur iuxta hanc spem meam, libera me in tua iustitia, idest, ob iustitiam tuam, qua impios punire soles, & innocentes liberare.

II. Inclina ad me aurem tuam, ac celera, ut eruas me.

Quia persecutio vrgebat, & amici David 2. Reg. 17. per nuncios ei significauerant, ut non quiesceret, sed fugere perseveraret, nisi opprimi vellet; ideo petit velociter exaudiri, & de imminenti periculo erui.

III. Esto mihi in Deum protectorem, & in domum refugij, ut saluum me facias.

Verba sunt clara, quia Septuaginta Interpretes exposuerunt verba metaphorica, quae sunt in codice hebraico: sic enim legitur ad verbum, Esto mihi in petram fortissimam, & in domum munitissimam ad saluandum me. Vocatur autem hoc loco petra fortissima, vel saxea rupes in sublimi posita, vel domus siue arx ex fortissimis lapidibus constructa; & tunc verba sequentia erunt explicatio praecedentium, ut sensus sit. Esto mihi, o Deus, instar petrae durissimae, idest, instar domus, siue arcis munitissimae, in quam tuto confugere possim. Dicuntur autem haec omnia plane ad rem propositam aptissime. Nam David fugiebat per campestria deserti, vbi nulla erat arx, in quam confugere posset.

IIII. Quoniam fortitudo mea, & refugium meum es tu: & propter nomen tuum deduces me, & enutries me.

Hic etiam exposuerunt Septuaginta metaphoras vocum hebraicarum: sic enim legimus in Hebræo, Quoniam petra mea, & munitio mea tu es, idest, sis tu mihi loco arcis lapideae, & munitae, quoniam munitionem aliam ha-

Belarm. in Psal,

bere non possum. Quod sequitur, Et propter nomen tuum deduces me, & enutries me, optimè respondet historiarum. David enim ob repentinam fugam, neque quò iturus esset sciebat, neque vnde alimenta conquireret. vnde diuina prouidentia factum est, ut ei Si-ba occurreret cum ducentis panibus, & centum alligaturis vuae passae, & duobus vtribus vini. Itaque ait, propter nomen tuum, idest, in gloriam nominis tui deduces me ad locum tutum, & ad nutrimentum cibos prouidebis. Recentiores aliqui vertunt, duces me & deduces me, Quod mirum est, cum vocem hebraicam, nahal, non solum Septuaginta, sed etiam Sanctus Hieronymus, tum hoc loco, tum in Psalmo 23. significare velint, enutrire, vel sustentare.

Educes me de laqueo hoc, què V. absconderunt mihi, quoniam tu es protector meus.

Non solum, inquit, duces me ad locum tutum, & ibi enutries, sed etiam liberabis de insidijs, quas veluti laqueum absconditum tetenderunt mihi: vocat enim laqueum, occultam coniurationem factam cum Absalone in Hebron contra se, nihil tale metuentem, neque cogitantem. Ad illud, quoniam tu es protector meus, additur, Domine, in textu Græco, sed superuacaneum esse affirmat sanctus Hieronymus in epist. ad Suniam & Fretellam.

In manus tuas commendo spiritum meum, redemisti me Domine Deus veritatis. VI.

Quamuis bona spe dixerit, educes me de laqueo hoc, tamen quia de vita nondum securus erat, addit, in manus tuas commendo, vel, ut habetur in Hebræo & Græco textu, commendabo spiritum meum, idest, curam tuam commendabo vitam meam. Quoniam tu saepe alias redemisti me de morte: Tu, inquam, Domine, qui es Deus veritatis, idest, Deus verissimus, vel Deus fidelissimus. Propter hunc locum suspicantur,

K aliqui

aliqui totum Psalmum intelligendum esse de Christo: ipse enim in cruce pendens dixit, Pater in manus tuas commendo spiritum meum. Sed etiam si Psalmus nō intelligatur ad literam de Christo, tamen potuit Dominus hæc verba de hoc Psalmo accipere, cum spiritum suum Deo Patri commendare vellet: Quomodo etiam sanctus Nicolaus moriens, hunc Psalmum vsque ad verba, quæ nunc exponimus, pronunciauit; & nos frequentissime iisdem verbis utimur. Certè verba illa eiusdem versiculi, redemisti me Domine Deus veritatis, non rectè tribuuntur Christo, cum sit ipse Redemptor, non redemptus. Sanctus Augustinus Christo tribuit priora verba, In manus tuas commendo spiritum meum: posteriora tribuit populo Christiano, redemisti me Domine Deus veritatis; vult enim sanctus Augustinus in hoc Psalmo frequenter mutari personas, & nūc loqui Prophetam, nunc verò Christum, nūc autem populum. Quod quidem rectè & piè dicitur, cum mystica explicatio quæritur: sed cum sensus literæ inuestigatur, non videntur mutationes personarum intelligendæ, ubi non est distinctio, siue interpunctio, quæ notet finitam sententiam; hoc autem loco sine tali interpunctione continuantur verba totius versiculi in omnibus codicibus, Hebræo, Græco, & Latino.

VII. Odisti obseruantes vanitates superuacue.

VIII. Ego autem in Domino speravi, exultabo & lætabor in misericordia tua.

Reddit aliam rationem, cur in manibus Dei commēdauit vitam suam: quia videlicet Deus odio habere solet eos, qui non sperant in suo adiutorio; sed in rebus vanis, quæ nullum auxilium adferre possunt. Odisti, inquit, obseruantes vanitates, id est, somnia, vel auguria, vel responsa Dæmonū, quod fecit Saul, qui consuluit pythonissam. Potest etiam nomine vanitatis intelligi industria, vel astutia hu-

mana, siue quodcunque consilium, & auxilium hominum, quod sine Deo, vel contra Deum nullas vires habet, ideo additur superuacue, quia frustrantur homines in rebus vanis. Ego autem, inquit, non obseruaui, neque aspexi res vanas, ut in illis cōfiderem; sed speravi in Domino, & ideo exultabo & lætabor in tua misericordia, quia nimirū sperantes in Domino misericordia diuina non deserit. Ex Hebræo legunt recentiores, odiui obseruantes vanitates: & verè vox hebræa, sanethi, significat odiui: sed Septuaginta, & sanctus Hieronymus legerūt, sanetha, quod significat, odisti; proinde mutatio textus facta est post tempora sancti Hieronymi. Sensus semper est verus, sed melius cohæret cum sequentibus nostra lectio: non enim rectè coniungitur, odiui vanitates, cum illo, ego autem speraui.

Quoniam respexisti humilitatem meam, saluasti de necessitatibus animam meam. **IX.**

Nec conclusisti me in manibus inimici, statuisti in loco spatioso pedes meos. **X.**

Allegat præterea beneficia, ut gratū se ostendens, pronocet Deum ad similia concedenda. Sensus est, exultabo, & lætabor in tua misericordia, quoniam pignus habeo misericordiæ, liberationem ex persecutione Saulis: tunc enim respexisti humilitatem meam, id est, abiectiōem & afflictionem meam. hæc enim omnia significat vox hebræa; saluasti etiam tunc animam meam, id est, de angustiis, in quibus necessario hærebam, neque inde me eximere poteram. In Hebræo ad verbum est, Sciuit angustias animæ meæ, sed sensus est idem. voluerunt enim Septuaginta non verbum verbo reddere, sed utcumque sententiam explicare. Id ipsum repetitur, vel explicatur sequenti versiculo: Nec conclusisti me in manibus inimici, id est, non permisisti, ut Saul, qui me quærebat ad necem voto suo potiretur, sed Statuisti in loco spatio-

שנאתי
שנאת

so pedes meos, idest, fecisti, ut ex angustijs in quibus hærebam liberatus, ambulare possem quocunq; vellem, quasi in aperto & libero campo constitutus.

XI. Miserere mei Domine, quoniam tribulor: conturbatus est in ira oculus meus, anima mea, & venter meus.

Ex recordatione præteritorum beneficiorum orat pro futuris, & narrat calamitates suas. Miserere mei Domine, quoniam tribulor, idest, sicut alias cum tribularet miseratus es mei, ita & nunc miserere mei, quoniam iterum me tribulatio inuasit. Incipit deinde tribulationes præsentis enumerare, Conturbatus est in ira oculus meus. Illud, in ira, est ambiguum. nam potest intelligi de ira Dei, & de ira Davidis. Malim cum S. Augustino intelligere de ira Dei. constat enim ex lib. 1. & 2. Regum. Dauidem in persecutione Absalonis, & in omnibus alijs persecutionibus nunquam excidisse, sed mitissimum & patientissimum semper fuisse. Itaque sensus erit, in ira tua, qua peccatum meum punis, conturbatus est oculus meus, idest, oculus corporalis præ lacrymis caligauit, vel, oculus interior obtenebratus est. conturbata est etiam anima mea, dum timore magno concussa est; & denique conturbatus est venter meus, venter, inquam, interior animæ meæ, idest, memoria, quæ est receptaculum cogitationum. Ita breuiter sanctus Propheta omnium trium animæ partium meminit, dum per oculum, intellectum, per animam, voluntatem, per ventrem, memoriam intelligi voluit.

XII. Quoniam defecit in dolore vita mea, & anni mei in gemitibus.

Ad senium iam David peruenerat, & verè dicit defecisse vitam suam in dolore, idest, ætatem consumptam in continuo mœrore, & annos in gemitibus. Nam primis triginta annis persecutiones ferè continuas passus est: deinde ad Regni gubernacula admotus, primis septem annis bellum gessit cum pro-

genie Saulis: postea multa bella gessit cum vicinis nationibus, tum cum proprio filio. Denique ipsa gubernandi sollicitudo, si quis non perfunctoriè, sed cum timore Dei seriò fungi velit officio, gemere facit sub onere.

Infirmata est in paupertate virtus mea, & ossa mea conturbata sunt.

Præter afflictiones totius vitæ præteritæ, accessit hæc vltima tribulatio, in qua propter inopiam debilitatus vires pristinas amisit. Idem enim significat, virtus infirmata est, & ossa mea conturbata sunt. nam per ossa intelligitur robur, sicut etiam per virtutem. Hæc ad literam verissima esse, historia lib. 2. Reg. cap. 15. 16. & 17. apertè docet. Fugit enim David sine vlllo com meatu, & perrexit ad loca deserta, nec solum pedibus, sed etiam nudis pedibus iter fecit: vnde postea ab amicis com meatu adiutus fuit. In Hebræo pro paupertate, legitur, iniquitate, & sic vertit S. Hieronymus, infirmata est in iniquitate virtus mea: sed Septuaginta non legerunt, hauoni, ut legit S. Hieronymus, sed, honi, in qua voce sunt eadem literæ, vna dempta, sed puncta diuersa, & illud iniquitatem, hoc paupertatem significat. Vterque sensus est verus. nam etiam si debilitas ex inopia alimentorum nata erat, tamen inopia illa ex iniquitate persequentium, & iniquitas persequentium ex peccato Davidis, quod eo modo puniebatur à Deo, sine dubio procedebat.

Super omnes inimicos meos factus sum opprobrium, & vicinis meis valde, & timor notis meis.

Explicat aliam calamitatem suam ex nouissima persecutione exortam, quod videlicet ceperit despici à vicinis populis, qui audierunt tam turpem eius fugam: & notis eius, atque amici ceperint timere, ne si illi adhærerent, de vita periclitarentur apud Absalonem; si fortè is victor euaderet. Quod attinet ad verba, illud super omnes

K 2 inimicos

מִבְּלִי
צָרָיִי
צָרָיִי
inimicos meos, in Hebræo est, miccol
zoreraù, sed Septuaginta, & sanctus
Hieronymus legerunt per iora, zore-
rai, quod potest exponi, ab omnibus
inimicis meis, item, apud omnes ini-
micos meos: quæ vltima expositio pla-
cuit sancto Hieronymo, qui vertit ex
Hebræo, apud omnes hostes meos: &
videtur etiam placuisse Septuaginta
Interpretibus, nam verterunt παρά πάν-
τας τοὺς ἐχθρούς μου, quod significat, ad
ad omnes, siue apud omnes. Sed lectio
Latinę editionis cōcordat cum secun-
da intelligentia vocis hebraicę, quæ
est valde propria. idem enim est, præ
omnibus, & super omnes. Prima in-
telligentia placuit quibusdam recen-
tioribus, qui exponant, ab omnibus,
idest, propter omnes. Omnes intelli-
gentiæ habent rectum sensum; itaque
si legas, super omnes inimicos meos,
sēsus erit, ego factus sum opprobrium
vicinis, & timor notis, magis quàm
vnquam has misérias passi sint vlli ini-
mici mei, quamuis impij & iniusti; &
sic exponit sanctus Augustinus. Si le-
gas, apud omnes inimicos meos, sen-
sus erit, scientibus & ridentibus ini-
micis meis factus sum opprobrium vi-
cinis meis, & timor notis meis; & hanc
expositionem sequitur Theodoretus. Si
legas, ab omnibus inimicis meis, sen-
sus erit, multitudo & sauitia inimico-
rum meorum effecit, vt essem oppro-
brium vicinis, & timor notis. Illa con-
iunctio, & cum dicitur, & vicinis, re-
ctē restituta est vulgatę editioni. nam
adeſt in Hebræo, & Græco, & legitur
ab antiquis Patribus.

xv. Qui viderunt me foras fuge-
runt à me, obliuioni datus sum,
tanquam mortuus à corde.

Declarat id quod dixerat, & timor
notis meis, quasi dicat, multi ex notis
meis, qui viderunt me ita fugientem
& afflictum, foras fugerunt, idest, lon-
gè à me recesserunt, timentes vitæ suæ
si mihi iungeretur. Atque ita obliuio-
ni datus sum à corde, idest, cor eorum
non recordatur mei, neque de me co-

gitat, non secus ac si mortuus & sepul-
tus essem. existimant enim de me iam
actum esse. In hebræo habetur inter-
pūctio post particulam foras, hoc mo-
do, qui viderunt me foras, fugerunt à
me; & ideo quidam legi volunt, foris,
nō foras (vox enim hebræa vtrumque
significat) & sensum esse volunt, qui vi-
derunt me foris, idest, extra palatium
nudis pedibus, capite cooperto, sine
vllō insigni regio, fugerunt à me. Sed
quamquam hæc etiam intelligentia re-
cta sit, tamen non cogimur admittere
interpūctionē Codicis hebraici, quæ
addita est à Rabinis, cum in græco nul-
la sit interpunctio, & Patres constan-
ter legant, foras non foris.

Factus sum tanquam vas per- **xvi.**
ditum, quoniam audiui vitupe-
rationem multorum commoran-
tium in circuitu.

Nec solum, inquit, amici & noti obli-
ti sunt mei, & me dereliquerunt: sed
etiam apud vicinos, qui in circuitu ha-
bitant contemptui habitus sum; quasi
vas perditum, idest, confractum, ad
omnia inutile, quod vel inde patet,
quia ego ipse vituperantes me audiui.
Videtur autē hoc loco Propheta men-
tionem facere vituperationis Semei,
qui in faciem illi maledicere, & in eum
lapides iacere ausus est; nimirum exi-
stimauit Semei, Dauidem à Regno eie-
ctum nullius potentie deinceps futu-
rum, sed tanquam vas inutile in cloa-
cam projiciendum. Maledictio hæc de-
scribitur lib. 2. Reg. cap. 16. Et quam-
uis in loco illo 2. Regum solius Semei
maledicentis mentio fiat; tamen cre-
dibile est plures alios eodem tempo-
re male loquutos fuisse de Dauide, vt
verum sit, quod hic dicitur, vitupe-
rantium multorum. In Hebræo, pro,
commorantium, est, magor, quam vo-
cem sanctus Hieronymus vertit con-
gregationem, alij vertunt pauorem:
sed potest commodè etiam verti com-
morationem; nam verbum, gur, vnde
fit magor, significat commorari, in-
colere, peregrinari, &c. itaque sensus
erit, audiui vituperationem multorū,
commo-

מִנּוֹר
נִוֵּר

commorationem in circuitu, idest, qui habent commorationem in circuitu: sed Septuaginta sententiā clarius vertere voluerunt, ideo posuerunt, multorum commorantium in circuitu.

XVII. In eo dum conuenirent simul aduersum me, accipere animam meam consiliari sunt.

Narrat historia 2. Regum cap. 17. post maledictionem Semei, consilium initum coram Absalone de Davide occidendo, atque hoc est, quod in hoc versiculo commemoratur, quasi dicat Propheta, dum in præsentia maledicor, & vituperantes me audio; in absentia consilium de me necando in Hierusalem initur.

XVIII. Ego autem in te speravi Domine, dixi, Deus meus es tu, in manibus tuis sortes meæ.

Ostendit vir Sanctus, inter tot angustias, se non despondisse animum; propterea quod spem suam non posuisset in auxilio fallaci hominum, sed in Deo omnipotente, cui nemo resistere potest. Ego autem in te speravi Domine, quare? quia dixi in corde meo, Deus meus es tu, magnum habeo protectorem, sine cuius nutu nemo mihi vitam eripere potest. Nam, in manibus tuis sortes meæ, idest, sortes vitæ, vel mortis meæ non pendent à sorte, sed à manu tua, idest, à potentia & voluntate tua. In hebræo habetur, in manibus tuis tempora mea; & fortasse quod nunc legimus in græco, *καιρος*, quod significat fortes, legendum esset, *καιρα*, quod significat tempora. nam non desunt antiquæ versiones ex græco, quæ habeant, tempora mea. Sic certè legitur in officio Missæ non semel, & in Psalterio Ecclesiæ sancti Petri Romæ. Sensus autem est idem. nam, in manibus tuis tempora mea, nihil est aliud, nisi à tua voluntate pendent tempora vitæ, & mortis meæ, non viuam, nisi quando tu volueris, neq; moriar, nisi quando tu volueris.

Belarm. in Psal.

Eripe me de manu inimicorū XIX. meorum, & à persecutibus me.

In hoc versiculo nulla est difficultas, & concordant omnes editiones.

Illustra faciem tuam super seruum tuum, saluum me fac in misericordia tua, Domine non confundar, quoniam inuocaui te. XX.

Eandem petitionem inculcat, sed additis argumentis ad Deum flectendum apponitis. Illustra faciem tuam super seruum tuum, idest, ostende faciem tuā, siue respice in me. hæc enim omnia idem significant. Sicut enim propter peccata Deus nobis irascitur, & auertere dicitur faciem, siue nubem opponere, & nos non respicere: ita è contrario quando reconciliatur, dicitur conuertere faciem, nosque respicere, & illuminare vultum suum super nos, ut nos luminosos efficiat. Petit igitur primū reconciliationem cum Deo si forte auersus sit; & addit pro argumento, se seruum eius esse promptum ad eius obsequium & obedientiam. Addit deinde, saluum me fac; hoc enim sequitur post reconciliationem, ut saluum faciat, & liberet eum cui reconciliatus sit. & adiungit argumentum, dicens: In tua misericordia, idest, non ob merita mea, sed ob misericordiam tuam. Addit postremo tertium argumentum, non confundar, quoniam inuocaui te. pertinet enim ad bonum & fidelem Dominum, qui promisit auxilium confidentibus in se, ut non confundat eum qui tanta fiducia ipsum inuocare non cessat.

Erubescant impij, & deducantur in infernum, muta fiant labia dolosa. XXI.

Prophetica imprecatio est, & continuo adimpleta. Nam Achitophel, qui erat precipuus consiliarius Absalonis, & cōsiliū dederat perniciosissimum aduersum Dauid, dissipante Deo con-

K 3 filium

filium eius, confusus est, & non ferens
confusionem suam laqueo se suspēdit,
& sic ad infernum deductus est impius
& muta facta sunt labia dolosa. Habetur
historia lib. 2. Reg. cap. 17. Vocatur
autem Achitophel impius, quia filium
ad necem patris concitabat: & labia
eius rectē dicuntur dolosa, quia simu-
lauerat longo tempore se amicum &
fidelem Dauidi, & postea oblata occa-
sione perfidiam suam prodidit. In He-
bræo, pro deducatur, habetur iddemū,
quod S. Hieronymus vertit, taceant:
sed Septuaginta non videntur legisse
iddemū, sed iddecū, quod significat
expellantur, à verbo nadach.

XXII. Quæ loquuntur aduersus iu-
stum iniquitatem in superbia &
in abusione.

Hæc verba coniunguntur in Hebræo
cum superioribus in eodem versiculo:
in nostra editione constituunt nouum
versum, sed quoad sensum pendent à
superioribus. Declarant enim labia il-
la dolosa Achitophelis iustē obmute-
scere debuisse; quia loquebantur con-
tra iustum, id est, contra Dauidem, qui
nullam iniuriam fecerat neque ipsi A-
chitopheli, neque Absaloni; & loque-
bantur iniquitatem, id est, consilium
iniquitate plenum, & hoc in superbia
& abusione, id est, cum maxima arro-
gantia & contemptu. Pro abusione,
tam in Hebræo, quā in Græco est vox
significans contemptum; & sic legunt
sanctus Augustinus, & Psalterium san-
cti Petri. Proinde abusio in Latina edi-
tione, non est accipienda pro simplici
abusione, sed pro ea quæ nascitur ex
contemptu, siue pro ipso contemptu:
dicitur enim Achitophel, hoc loco, lo-
quutus esse in superbia & abusione,
quia superbē contemnebat Dauidem,
& sic abutebatur eius nomine.

XXIII. Quam magna multitudo dul-
cedinis tuæ Domine, quam ab-
scondisti timentibus te?

XXIII. Perfecisti eis, qui sperant in te,
in conspectu filiorum hominum.

Iam sanctus Propheta exauditum se
sentiens, ac diuina consolatione perce-
pta, exclamat præ admiratione, quā
magna multitudo, &c. In Hebræo so-
lū habetur, quā multa bonitas, siue
dulcedo: sed Septuaginta explicare vo-
luerunt admirationem Prophete, idē
dixerunt, quā magna multitudo dul-
cedinis, &c. Sed quia videtur quædam
contradictio in his verbis, cum primō
dicat, quam abscondisti, & deinde,
quam perfecisti in conspectu filiorum
hominū, idē sanctus Augustinus con-
iungit illud, In conspectu filiorum ho-
minum, non cum verbo, perfecisti, sed
cum verbo, qui sperant, ut sensus sit,
Deus abscondit multam dulcedinem
timentibus se, quam eis daturus est in
alia vita, nunc interim sinens eos an-
gustijs premi: eam verō dulcedinem
perfecit sperantibus in se in conspe-
ctu filiorum hominum, id est, ijs qui li-
berē ostendunt hominibus, se esse Dei
seruos, & sperare in Deo, & non timēt
confiteri id quod sunt. Theodoretus,
& Euthymius volunt coniungi illud,
In conspectu filiorum hominum, cum
verbo, perfecisti, & hunc sensum tra-
dunt, Deus tempore tribulationis ab-
scondit à timentibus se magnam dul-
cedinem, id est, mercedem & præmia,
ut eos exerceat: sed paulō post eandem
mercedem; & eadem præmia palam
ostendit in conspectu filiorum homi-
num, ut seruos suos bene sperare iu-
beat. Sic ad tempus Dauidi abscondit
dulcedinem, cum videlicet is fugeret
filijs persecutionem; sed paulō post per-
fecit illi suam bonitatem, cum eum re-
duxit in Regnum cum maxima gloria.
Id ipsum accidet omnibus iustis, qui-
bus nunc absconduntur præmia, sed
in die iudicii palam apparebunt. Po-
test adferri etiam alius sensus: Quam
magna multitudo dulcedinis tuæ Do-
mine, quam abscondisti timentibus
te, id est, verē multiplex est consolatio
tua Domine, quam infundis intus in
abscondito cordis timentium te, id est,
eorum qui te colunt & diligunt, & fi-
liali timore venerantur. Hoc est enim
manna absconditum, quod nemo scit,
nisi

nisi qui accipit, ut in Apocalypsi legimus. Hoc experiebatur qui dicebat, Secundum multitudinē dolorum meorum consolationes tuas lætificauerunt animam meam; & ille, Repletus sum consolatione, superabundo gaudio in omni tribulatione nostra. Et si tempore tribulationis tāta est multitudo dulcedinis in corde militantis, quanta erit tempore gloriæ in corde triumphantis? Perfecisti eis qui sperant in te, in conspectu filiorū hominum, idest, eam dulcedinem perfecisti, perfectam, cumulatam, copiosissimam infudisti in corde sperantium in te, qui videlicet reuolunt consolari nisi in te: hoc autem totum fecisti in conspectu filiorum hominum, idest, ex aduerso, siue ex opposito filiorū hominum, idest, quanto illi magis multiplicant dolores exterius, tāto tu magis multiplicas consolationes interius. Nā vox hebræa *neghed*, & græca *ἐναντίος*, propriè significat e regione, siue ex opposito, ut etiam notauimus in Psal. 23. proinde, ut verbum hebraicum concordet cum latino, & græco, illud, in conspectu, non tam referendum est ad visionem, quàm ad oppositionem. illa enim dicuntur esse inter se in conspectu, quæ e diametro opposita se respiciunt. Sed & illud præterea verum est, hanc dulcedinem infundi in cordibus timentium Deum, in conspectu filiorū hominum, idest, videntibus & stupentibus filiis huius sæculi, qui filios Dei suis persecutionibus vexant: nam quamuis filij hominum, idest, carnales homines non norint illam dulcedinem; imò ne suspicari quidem possint qualis sit, cum palatum animæ nimis infectum habeant; tamen vident effectum eius, dum intuentur, & obstupescunt patientiam, mansuetudinem, hilaritatem, & pacem Sanctorum. Sic igitur miro modo datur Sanctis abscondita quædam dulcedo in conspectu filiorum hominum; dum ea dulcedo in se latet, & in effectibus patet.

XXV. Abscondes eos in abscondito faciei tuæ à conturbatione hominum.

Proteges eos in tabernaculo tuo à contradictione linguarum.

Declarat modum, quo sancti viri dulcedinem Dei in tribulatione percipiunt: id enim fit cum Sancti per amorem & contemplationem rapiuntur in Deum, & in ipso Deo inueniunt domum refugij: iuxta id quod in hoc eodem Psalmo dicitur, Esto mihi in Deum protectorem, & in domum refugij. qui enim in Deo delitescere norunt, nihili faciunt omnes tribulationes, ac si ad eos minimè pertinerent. Abscondes, inquit, eos, videlicet timētes te, in abscondito faciei tuæ, idest, in loco abditō, quod est in facie tua: nam qui raptus est ad contēplandam faciem Dei, & qui se à Deo videri attentissimè cogitat, quique obseruat nutus Dei, & pulchritudinem eius considerans accenditur in eius amorem, iam habitat in latibulo tutissimo à conturbatione hominum, idest, ab omni malo, quod homines conturbare solet. Proteges eos, idest, eosdem timentes te, in tabernaculo tuo, idest, in teipso, in quo & tu habitas. Deus enim non habet aliam domum, siue aliud tabernaculum in quo capi possit, nisi seipsam; & qui per amorem & contemplationem in Deo habitant, altissimum posuerunt refugium suum, non accedet ad eos malum, neque flagellum appropinquabit tabernaculo eorum, ut dicitur in Psalmo 90. Proteguntur autem in hoc tabernaculo ab omni malo, non solum factorum, de quo dictum est in superiori versiculo, sed etiam verborum, quod hic dicitur à contradictione linguarum, quia nihil curant sermones hominum, qui Deum testem habent. Quod si facies Domini tam insigne latibulum siue tabernaculum est hominibus timentibus Deum, dum per speculum & in ænigmate cernitur: quid erit quando videbitur sicuti est? tunc verè habitatio nostra erit in Hierusalem, quæ est visio pacis, de qua dicitur, Qui posuit fines tuos pacem.

K 4 Bene-

XXVII. **Benedictus Dominus, quoniam mirificauit misericordiam suam mihi in ciuitate munita.**

Quæ dixerat generatim de consolatione diuina, quam viri iusti in tribulatione percipiunt; applicat ad se, qui vnus est ex illis, & inde gratias agit Deo. Benedictus, inquit, sit Dominus, quoniam mirificauit, idest, mirabilem misericordiam erga me ostendit, in ciuitate munita, idest, abscondens me in abscondito faciei suæ, quod est veluti ciuitas munitissima, vt iam mihi nihil nocere possit. Sanctus Augustinus legit, in ciuitate circumstantiæ; in quo, nescio quos latinos codices sit sequutus. nam vox hebræa מִצּוּר, munitionem significat: vox græca περιχθῆς, ambitum designat; atque inde sanctus Augustinus circumstantiam accepit: sed Theodoretus & Euthymius Græci auctores, intelligunt per ambitum, mœnia, siue aggeres, quibus ciuitates muniuntur, vt sensus sit, in ciuitate ambitus, idest, in ciuitate mœnijs, vel aggeribus munita. Et sanctus Hieronymus non solum in versione ex hebræo, sed etiam in commentario, vbi exponit versionem Septuaginta, legit, in ciuitate munita.

XXVIII. **Ego autem dixi in excessu mentis meæ, proiectus sum à facie oculorum tuorum.**

Accusat ipse se diffidentiae, quam passus fuerat initio persecutionis. Ego autem dixi in excessu mentis meæ, id est, eo tempore, quo præ nimio terrore quasi mentis inops factus eram, dixi apud me, Proiectus sum à facie oculorum tuorum, idest, non placet tibi vt amplius regnem, vel vt diutius viuam, ideò abiecasti me à benigno aspectu tuo & fauore, atque auxilio tuo solito me destituisti. Extat dubitationis huius vestigiū in lib. 2. Regum cap. 15. Si inuenero gratiam, inquit, in conspectu eius, reducet me; si dixerit mihi, non places, præsto sum, faciat mihi quod bonum est coram se: Pro voce,

in excessu mentis, in Hebræo est, בְּעֵצָה מִן הַדָּמַי, chophzi, quod ad verbum significat, in festinando me, idest, dum festinarem, siue, in obstupescendo & pauendo me, idest, dum obstupescerem & puerem: nam verbum, chaphaz, significat festinare, & obstupescere ac puerere, & omnia sunt vera; nam Dauid illud dixit, cum festinaret egredi ex Hierusalem, & pauore ac stupore correptus esset. Hunc stuporem Septuaginta verterunt, ecstasim, & Latini excessum mentis.

Ideò exaudisti vocem orationis meæ, dum clamarem ad te. XXIX.

Sententia perspicua est, ideò, inquit, ne diffiderem de bonitate tua, cum me in tanta consternatione videres, continuo exaudisti vocem orationis meæ dum clamarem ad te. Illud, ideò, posset etiā verti, verè, siue certè. est enim aduerbium multa significans.

Diligite Dominum omnes sancti eius, quoniam veritatem requirit Dominus, & retribuet abundanter facientibus superbiam. XXX.

Viriliter agite, & confortetur cor vestrum, omnes qui speratis in Domino. XXXI.

Horratur in fine Psalmi homines pios, qui similia patiuntur, vt non cessent diligere Dominum, atque in eo sperare; quoniam etiam si ad tempus impij videantur impunè grassari, tamen breui penas acerbissimas dabunt. Illud, veritatem requirit Dominus, Sanctus Hieronymus vertit, fideles seruat Dominus: vox hebræa, vtrumque significat, veritatem, & fidelitatem, & etiam fideles, & sensus in idem recidit. Illud, abundanter, in hebræo & latino, ambiguum est, vtrum coniungi debeat cum verbo, retribuet, an cum verbo, facientibus: sed ex græco apparet, coniungendum esse cum verbo facientibus; & eodem modo S. Hieronymus

nymus vertit ex hebræo: retribuet, inquit, his qui satis operantur superbiam: & Sanctus Augustinus, retribuatur his, qui multum superbiunt: eodem modo Theodoretus, & alij veteres.

PSALMVS XXXI.

Titulus, & Argumentum.

Ipsi David Intellectus.



HIC titulus, indicat David post commissum peccatum, per Dei gratiam apertos fuisse oculos mentis, ut intelligeret quàm graviter deliquisset, quòd antea carnali delectatione occæcatus, intelligere non potuerat. Indicat etiam idem titulus, Psalmum esse obscurum, atque ad eum penetrandum dono intelligentiæ opus esse. Iure hic idem Psalmus à S. Gregorio & alijs inter septem pœnitentiales numeratur, cùm totus consumatur in peccato proprio deflendo, & in cohortandis hominibus ad pœnitentiã.

Explicatio Psalmi 31.

- I. **B**Eati quorum remissæ sunt iniquitates, & quorum tecta sunt peccata.
- II. **B**eatus vir cui non imputavit Dominus peccatum, nec est in spiritu eius dolus.

Nemo melius novit quàm dulcis sit sanitas, quàm is, qui anxiã deflet. Propheta David tunc primum verè cognovit, quàm dulce sit carere peccatis, quando amaritudinem peccati gustavit. Hæc est causa cur Psalmum pœnitentiæ ordiatur à laude indulgentiæ, & innocentiam: hæc enim sanam reddunt animam, & opponuntur agrotationi, quæ contrahitur ex peccatis. Incipit ab indulgentia, tum ut à minoribus ad maiora progrediatur,

tum quia illa erat recentissima eius sanitas. Beati quorum remissæ sunt iniquitates. Exclamatio est, & prædicatio boni, quod est in indulgentia, quasi dicat. O quam sunt illi felices, qui posteaquam peccaverunt, non despiciuntur à Deo, sed per gratiam eius excitati convertuntur ad pœnitentiã, & perveniunt ad indulgentiam. Et quorum tecta sunt peccata, idem repetitur alijs verbis; nam peccata cùm remittuntur, absconduntur & teguntur, ut nusquam appareant; sed de hac voce paulò post plura dicentus. Beatus vir cui non imputavit Dominus peccatum. Transiit ab indulgentia, quæ est multorum, ad innocentiam, quæ est paucissimorum, ac dicit, Overè beatus ac felix quicumque ille est, qui nihil fecit, quod in peccatum reputari potuerit, cui proinde Dominus, cuius rectissimum iudicium est, nihil omninò ad peccatum imputavit. Nec solum factò non peccavit, sed nec dolus inventus est in spiritu eius, idest, neque verbo, neque cogitatione peccavit. Spiritus enim ad utrumque spiritum referri potest, ad illum, quo sapimus, & dicitur cor, aut mens, & ad illum quo loquimur, & dicitur spiritus oris, siue labiorum. De priore dicit Apostolus 1. Corinth. 2. Quis enim scit, quæ sunt hominis, nisi spiritus hominis, qui in ipso est? De posteriore 1. Corinth. 14. Orabo spiritu, orabo & mente, psallam spiritu, psallam & mente. Porro innocentiam hoc loco intelligimus, non naturalem, vel operibus proprijs sine dono Dei acquisitam, quæ nulla est, sed eam, quam Deus paucis quibusdam singulari gratiæ suæ dono impertiuit, quibus ita remisit peccatum aliena voluntate contractum, idest, originale, ut non permiserit eos peccatum mortiferum propria voluntate committere: quod est genus excellentius remissionis. Proinde omnis innocentia annexam habet remissionem aliquam peccati, & de omnibus, Christo excepto, dici potest, omnes peccaverunt, & egent gloria Dei.

Itaque

Itaque Apostolus ad Rom. 4. hūc Psalmi locum adducit, ad probandum, neminē iustificari ex operibus præcedentibus gratiam; & ait, Ei qui non operatur, credēti autem in eum, qui iustificat impium, reputatur fides eius ad iustitiam, secundū propositum gratiæ Dei: sicut & David dicit, beatitudinē hominis, cui Deus accepto fert iustitiā sine operibus, beati quorum remissæ sunt iniquitates, & quorum testā sunt peccata: beatus vir cui non imputavit Dominus peccatum. Quibus verbis Apostolus Prophetam exponit, ac dicit, Davidem non vocare beatos eos, qui proprijs operibus iustitiā adepti sunt; sed eos quibus Deus per gratiam peccata remisit, iustitiāq; donavit. Porro videtur mihi Propheta singulares quosdam homines respexisse, cum ait, Beatus vir cui nō imputavit Dominus peccatum, &c. videlicet Sanctum Iob, qui de se ait cap. 27. Non recedam ab innocentia mea: iustificationem meam, quam cœpi tenere non deferam. neque enim reprehendit me cor meum in omni vita mea. Itē Abelem, Henoch, Noe, Abraham, Isaac, Iacob, quorum nulla peccata in scripturis leguntur. Fortasse etiam in spiritu prævidebat Hieremiam, & Ioannem Baptistam in vtero sanctificatos, & ipsam Deiparam Virginem excellentiori priuilegio, à peccato Originali, & ab omni actuali præseruatam. Quod attinet ad verba, in Hebræo habetur in singulari, Beatus, cui remissa est iniquitas, & cuius testū est peccatum: sed mutatis punctis, potest legi, beati quorum remissæ sunt iniquitates; quam lectionem esse verissimam, satis magno argumento nobis est, editio Septuaginta ab Apostolo cōfirmata. Rursus in codice græco habetur, in ore eius, pro eo quod est in Hebræo, & in Latino, in spiritu eius: sed S. Hieronymus in epist. ad Suniam & Fretellam testatur. illud in ore eius, esse ex translatione Symmachī; Septuaginta verō, & omnes alios Interpretes vertisse, in spiritu eius, ut est in Hebræo. Heretici huius temporis, tria falsa dogmata ex his versiculis statuere

conantur: ac fortasse Spiritus sanctus, ideō titulum fecit huic Psalmo, intellectus, quia prævidebat à multis peccatam intelligendum. Dicunt igitur illi, iustificationem in sola peccatorum remissione, non in iustitiæ infusione consistere. David enim absolute dicit, beatos, id est, iustos, quibus sunt remissa peccata. Addunt præterea, hanc ipsam remissionem peccatorum, non esse remissionem peccatorum veram, sed imputatitiam, quia videlicet Deus nō tollat peccata, sed tegat, & non imputet. Deniq; colligunt ex hoc loco, nullam esse necessariam satisfactionē post remissionem culpæ: quia si pœnam quāuis temporalem exigeret Deus ab homine iustificato, non verè diceret se non imputare peccatum: quomodo enim non imputat, si punit? Sed Propheta Sanctus, qui in titulo posuit, intellectus David, intelligebat omnino remissionem peccati non fieri à Deo sine infusione iustitiæ, ac per hoc intelligebat per iustificationis gratiam, homines fieri ex impijs, non solum non impios, sed etiam verè iustos: sicut enim sol corporalis nō expellit tenebras nisi lucem infundat; sic etiam sol iustitiæ, & Pater luminum non remittit peccata, nisi per gratiam, sine iustitiā quā infundit. Quare S. Paulus ad Rom. 4. citans hūc locum Psalmi, Beatus vir cui nō imputavit Dominus peccatum, ita loquitur, Sicut & David dicit, beatitudinem hominis, cui Deus accepto fert iustitiā sine operibus: quibus verbis Apostolus indicavit, in remissione seu non imputatione peccati verè includi iustitiā. Sed tam prior, quàm posterior error adhuc apertius refelletur, declaratione vocum, tegi, & non imputari. Dicuntur enim peccata tegi hoc loco, non quòd sint, & non videantur, sed quod abolita sint, & eorum loco iustitia successerit: & ideō verè testā sint, & abscondita etiam oculis Dei, cui nihil regi vel abscondi potest eorum, quæ vsquam extant. Quocirca idem Propheta varijs metaphoris vtitur ad remissionem peccatorum significandam, ut quod vni deest per alterā sup-

suppleatur. Sed illa præter cæteras insignis est in Psalmó 50. Asperges me Domine hyssopo & mundabor, lauabis me, & super niuem dealbabor. Quo loco dicitur peccatorum remissio non solum tegere maculam, sed verè abluere, & non solum verè abluere, sed addere nitorem: nec solum tollere nigredinem, sed addere albedinem tam veram, ut niuis candorem superare dicatur. quid est autem tollere maculam, & addere nitorem, nisi tollere peccatū, & infundere gratiam? quid auferre nigredinem, & ponere candorem, nisi auferre iniustitiam, & donare iustitiam? Quod idem legimus in primo cap. Isaia, Si fuerint peccata vestra sicut coccinum, quasi nix dealbabuntur, & si fuerint rubra sicut vermiculus, velut lana alba erunt. Porro Sancti Patres, Gregorius Nazianzenus oratione in sanctum lauacrum, Augustinus, & Gregorius Papa in commentario huius Psalmi, ut ostendant peccata tegi, non esse manere, & non videri, sed planè tolli, ut idè non videantur quia non sunt; dicunt, peccata tegi à Deo in iustificatione quo modo vulnera teguntur emplastro à medico, per quod emplastrū ita verè curantur, & tolluntur, ut nusquam appareāt. Origenes quoq; lib. 4. in epistola ad Rom. & Theodoretus in hunc locum, dicunt his vocibus significari, peccatum ita funditus eradicari, ut ne vestigium quidem remaneat. Iam verò quod attinet ad vocem imputationis, toto cælo aberrant aduersarij. Peccata enim non imputari in Scripturis sanctis est, non adscribi ad reatum, siue non referri in rationes, quod vulgò italicè dicimus, Nō si mettere à conto. Sap. 12. Quis tibi imputabit si perierint nationes, quas tu fecisti? idest, quis exiget à te rationē, si perierint omnes homines? vel quis te ob hoc reum faciet? & Ezechielis 33. de peccatore pœnitente, dicit Deus, Omnia peccata quæ peccauit non imputabuntur ei, idest, non reddet rationem de eis. 2. Paralip. 30. Dominus bonus propitiabitur cunctis, qui in toto corde requirūt Dominum Deum Patrum

suorum, & non imputabit eis quòd minus sanctificati sunt, idest, facilè condonabit, nec re vera exiget rationem, de eo quòd minus parati sint. Iob 42. Ut non imputetur vobis stultitia. 2. Timoth. 4. Omnes me dereliquerunt, nō illis imputetur. & in epist. ad Philemonem, Si aliquid nocuit tibi aut debet, hoc mihi imputa, ego reddam, idest, adscribe rationibus meis, ego debitor tuus esse volo. Cæterum duobus modis potest non imputari peccatū. Primo, si reuera aliquis non peccauerit, & proinde nihil debeat: & hoc modo intelligitur, id quod ex libro Sapientia citauimus, Quis tibi imputabit si perierint nationes quas tu fecisti? Nam etiam si perirent omnes homines, nō culpa Dei perirent, proinde non posset hoc imputari Deo. Et eodem modo nos supra exposuimus verba Davidis, Beatus vir cui non imputauit Dominus peccatū, idest, qui nihil mali propria voluntate fecit, ob quod reus, ac debitor sit coram Deo. Secundo, si peccatum remissum & condonatum fuerit, ut iam non sit quod imputetur. & sic intelliguntur omnes aliæ sententiæ supra citatæ: & sic etiam multi intelligunt locum Psalmi, Beatus vir cui non imputauit Dominus peccatū, idest, Beatus vir, à quo Deus non vult exigere rationem peccati, quia iam illud remisit & donauit; & hanc expositionem non reiicimus, sed superiorem anteponendam existimamus, quia melius continuatur cum verbis sequentibus, Nec est in spiritu eius dolus. Tertius modus imputationis, quem finxerunt hæretici, ut nō imputari peccatum, sit, peccatum quidē hære in anima peccantis, sed non reputari peccatum a Deo; nullo exemplo scripturæ probari potest, sed apertissimè potius improbatur, cum scriptura dicat, tum alibi, tum Psalmo 5. Odisti omnes, qui operantur iniquitatem, perdes omnes qui loquuntur mendacium. nam si Deus odit, & vult perdere iniquos, certè dum manet in eis iniquitas, imputatur eis peccatum. Et quis credat Deum iustum iudicem, & qui non accipit personas, non imputa-

re

re peccatum, sed imputare iustitiam eo tempore, quo homo adhuc in sordibus peccati versatur, & quidquid agit, ex Lutheranorum placitis, peccatum est? Pulchrè Sanctus Iustinus Martyr in dialogo cum Triphone refellens errorem similem errori Lutheranorum, ait, Beatus vir cui non imputavit Dominus peccatum, idest, cui pœnitenti Deus peccata remittet, non sicut prædicatis vosmetipsos fallentes, & alij quidam vestri similes asseuerant, etiâ si peccatores fuerint, modo Deum nouerint, non imputabit eis Dominus peccata. hæc ille. Hoc quod diximus de non imputatione peccati, potest ostendi ex contrario, ex imputatione iustitiæ. Nam imputari iustitiam in scripturis, non est, reputari hominem iustum, cum re vera iustus non sit; sed est reputari iustum diuino iudicio, quod falli nequit, eum, qui verissimè iustus sit. Si quidem illud Genesis 15. Credidit Abraham Deo, & reputatum est ei ad iustitiam, quod allegatur ab Apostolo Paulo ad Rom. 4. & ab Apostolo Iacobo cap. 2. nihil aliud significat, nisi, actum illum credendi fuisse in Abrahamo opus iustum & pro tali reputatum à Deo. Et illud Psalmi 105. Stetit Phinees, & placauit, & cessauit quassatio, & reputatum est ei ad iustitiam in generatione & generationem vsque in sempiternum, quid aliud significat, nisi zelum illum Phinees, quo interfecit impios quosdam, fuisse opus iustissimum, & a Deo pro tali habitum, ut propterea confirmauerit filijs & nepotibus Phinees Sacerdotium in longissima tempora. Eodè pertinet illud quod est in cap. 4. ad Rom. Ei qui operatur, merces non imputatur secundum gratiam, sed secundum debitum. Quid enim hoc est, nisi mercedem iuste deberi ei, qui operatur opus dignum mercede? non igitur imputari est reputari ac si esset, sed reputari sicuti est. Et quod in eodem loco sæpius repetit Apostolus, fidem reputari ad iustitiam, non significat, fidem non esse, sed reputari iustitiam: sed significat fidem per charitatem operantem verissimam esse iustitiam,

non ex operibus gratiam præcedentibus acquisitam; sed à Deo donatam & infusam, & ideò pro vera iustitia à Deo reputari & acceptari. Sic igitur peccatum non imputari, non significat, peccatum manere, sed non puniri: sed significat, nihil esse in homine iustificato, quod in peccatum reputari possit. Ex his facillè intelligitur vnicuique verbo solui posse, quod Lutherani obijciunt de satisfactione. nam si non imputetur peccatum, quia innocentè aliquis vixit, non mirum erit si nulla satisfactio requiratur ab eo cui hoc modo peccatum non imputatur: sin autem non imputatur quia remissum est per gratiam, tunc si remissum fuerit quoad culpam & pœnam æternam, non imputabitur ad culpam & pœnam æternam, sed adhuc imputabitur ad pœnam temporalem: sicut factum videmus in Dauide, cui dictum est à Propheta, Dominus transtulit peccatum tuum à te, non morieris; sed quia blasphemare fecisti inimicos nomen Domini, filius qui natus est tibi, morietur. Vbi videmus non imputari peccatum quoad mortem propriam, & imputari quoad mortem filij; & Dauidem fuisse iustificatum, & tamen debuisse dolorem magnum de morte filij tolerare, in pœnam peccati commissi. Quod si aliquando peccatum remittatur omnino quoad omnem pœnam, tunc etiam non imputabitur ad vllum reatum, vel debitum.

Quoniam tacui, inueterauerunt ossa mea, dum clamarem tota die. III.

Proposita beatitudine iustificatorum, deflet miseriam suam, quasi dicat: Illi quidem sunt beati; sed ego miser sum, qui non solum innocentiam non seruaui, sed longo tempore distuli perper confessionem peccati indulgentiam quærere; & ideò post agnitam culpam meam, corpi tam assidue clamare, & rigitu me ipse niacerare, ut debilitata sint, & attrita ossa mea, idest, ferè consumptum omne robur meum. Quoniã
tacui.

777 tacui: reuera longo tēpore Dauid peccatum adulterij tacuit, imò multis artibus occultare conatus est. primo enim Vriam multis modis inducere tentauit, vt cum vxore propria dormiret; vt filius ex adulterio conceptus, ipsius Vrie proprius putaretur. Et cum Vriam ad domum propriam accedere nollet, adiecit Dauid crimen homicidij; vt Vria sublato, & illius vidua in vxorem cōtinuo ducta, partus qui post nouem menses expectabatur, crederetur esse Dauidis non adulteri, sed mariti. Nec tamen vidua illa in vxorem assumpta continuò Dauid peccatū confessus est: sed expectauit vt filius nasceretur. Et ne tunc quidem peccatum deslere cōpisset, nisi à Propheta Nathan admonitus fuisset. Itaq; annum ferè integrū, & fortasse etiam diutius Dauid in cōno peccati iacuit, & confessionem distulit. Propterea dicit, quoniam tacui, & non continuò peccatum confessus sum, sed abscondere & occultare volui; ideo Inueterauerūt ossa mea, dum clamarem tota die, idest, post agnitū peccatum tota die pro indulgentia clamare cōpi, & tam diu, ac tāto affectu clamaui, vt ossa mea debilia & verusta facta sint. Vox hebræa balù, significat inueterauerunt, & etiam consumpta sunt, siue attrita sunt, vt vertit Sanctus Hieronymus. proinde illud, inueterauerunt, non est referendum ad tempus, sed ad debilitatem: quomodo accipitur illud Thren. 3. Vetustam fecit pellem meam, idest, attritam, nigram, &c. Illud etiam, dum clamarem, in Hebræo ad verbum est, dum rugirem: Ex quo intelligimus, clamorem illum fuisse clamorem doloris & compunctionis, qui rectè rugitus dici potest; non autem clamorem exultantis in peccato, vel superbè iactantis peccata sua, vt aliqui exponunt. Neq; putamus fuisse rugitum ex corporali morbo, vt alij volunt: non enim scriptura prodit Dauidem ægrotasse illo tempore: & aliquid sine scripturæ testimonio affirmare, diuinare est; sed rugitum pœnitentiæ, vt cum Theodoro nos exposuimus.

Quoniam die ac nocte grauata est super me manus tua, conuersus sum in ærumna mea dum configitur spina.

Multa mala propter peccatū Dauidi contigerunt. nam filius natus ex adulterio infans mortuus est; & filia nomine Thamar ab Amon fratre per incestū polluta est; & idem Amon ab Absalone fratre occisus est, & Absalon aduersus patrem dimicans & ipse cæsus est: quæ omnia summos dolores Dauidi attulerunt, vt 2. lib. Reg. narrat historia. De his igitur diuinis flagellis dicit. Quoniam die ac nocte grauata est super me manus tua, idest, assidue, sine intermissione flagella super me ingeminare non cessas. dicitur enim grauare manus super aliquem, qui non leuiter eum, sed grauiter percutit. Conuersus sum in ærumna mea, dum cōfigitur spina, idest; propter huiusmodi flagella conuersus sum ad agnitionem grauitatis peccati mei in ærumna mea, dū spina tribulationis configitur mihi, idest, tribulatio atque ærumna mentis oculos aperuerunt, quos carnis illecebra, & voluptas clauferant. Posset etiā per spinam intelligi cum S. Hieronymo stimulus conscientie, vt sensus sit, conuersus sum in ærumna mea, dum stimulus conscientie pungit. In Hebræo, & Græco additur, mihi, dum configitur mihi spina: ideo in Latino subintelligi debet. In Hebræo habentur alia verba atque alius sensus, conuersus est viror meus in siccitates æstatis, idest, omnia mea bona perierunt, quomodo viror & humor in æstate solis ardore siccat & perit. Sed Septuaginta legerunt aliter, quàm nunc habeatur in codicibus hebraicis. nam pro, ne hephac le saddi, conuersus est viror meus, legerunt, ne hephacti le soddî, quod est, cōuersus sum in ærumna mea; & sic etiam legit S. Hieronymus, qui vertit ex Hebræo; versatus sum in miseria mea. Illud verò quod sequitur, be carboni Kaitis, in siccitates æstatis, legunt Septuaginta, be carboni Kots, dum adurit me spina, quod idem est cum eo, quod nos habemus.

נהפך
לשרי
נה פכתי
לשרי
בחרבוני
ק"י
בחרבוני
ק"י

habemus, dum configitur spina. dum enim configitur spina, certè adurit & vastat, quod significat verbum, charab, Itaque minima mutatione punctorum, & vnius vel alterius literæ similis, videmus inueniri posse lectionem, quam Septuaginta Interpretes habuerunt. veriolem autem esse lectionem quæ erat in codicibus Septuaginta Interpretum, ea, quæ nunc est in codicibus nostris, quibus Rabbinii pûcta addiderunt, dubitare non possumus.

v. Delictum meum cognitum tibi feci, & iniustitiam meam non abscondi.

Ex conuersione ad cognoscendam peccati magnitudinem, de qua dixit in versiculo superiore, factum est, vt peccatum suum non amplius taceret, neque occultaret, sed palam confiteretur Deo, & hominibus. In Hebræo habetur in futuro, cognitum faciam, sed ponitur futurum pro præterito, cuius temporis est verbum quod sequitur, abscondi. In græco non habetur, tibi, sed in Hebræo habetur, & in græco subintelligitur. Porro illud, cognitum tibi feci, non significat Deo fuisse ignotum, antequam Dauid illud confiteretur: sed loquitur more humano. Iudex enim etiam si sciat delictum Rei, quia ipse vidit fortasse illud committit, tamen non dicitur scire iuridicè, nisi Reus ex testimonio plurium testium sit conuictus, aut ipse Reus apertè confiteatur, adactus fortasse ad confessionem per tormenta. Sic igitur Deus viderat quidem Dauidem peccantem; sed volebat eum apertè confiteri; ideo flagella quasi quæstionem adhibuit. Tum verò Dauid confiteri cæpit, nec ait solum peccaui Domino, quod ante flagella dixit priuatim ad Nathan Prophetam, sed publicè notum fecit Domino peccatum suum, idest, iuridicè confessus est, & per scripturam Psalmodum toti mundo peccatum suum manifestauit: ideo verissimè addit, & iniustitiam meam non abscondi.

Dixi, confitebor aduersum me VI. iniustitiam meam Domino, & tu remisisti impietatem peccati mei.

Ad solatium pœnitentium declarat ineffabilem Dei misericordiam, quam in se ipse expertus est. Quamuis enim Deus, qui lux est, & tenebræ in eo non sunt vllæ, summo odio prosequatur tenebras peccatorum; & nisi peccator resipiscat, paratus sit eum proicere in tenebras exteriores ad summum & sempiternum cruciatum: tamen ita propensus est ad ignoscendum, si quis ex corde pœnitentiam agat, vt ipsam etiam confessionem miserendo, & parcendo præueniat. Videtur respicere tempus illud, quo Nathan Propheta Dei nomine exprobrauit illi peccatū suum; & ipse continuo compunctus, dixit, Peccaui Domino; & Nathan subiunxit, Dominus quoque trāstulit peccatum tuum, non morieris. Videns enim tam subitam indulgentiam, cogitauit quod erat verum, remissionem peccati priorem fuisse ipsa cōfessione, sed non priorem interna contritione, in qua simul fuit odiū peccati, amor Dei, propositum confitendi, & satisfaciendi. Ait igitur, Dixi confitebor, idest, cōpunctus corde statui continuo confiteri aduersum me iniquitatem meam, meque Reum & peccatorem apertè fateri; & tu non expectasti vocem illam, qua dixi peccaui Domino, sed ex paterna & ineffabili benignitate remisisti impietatem peccati mei: quod ex Propheta tuo Nathā cognoui, qui ait, Dominus transtulit peccatum tuum à te. In Hebræo habetur, iniquitatem peccati mei, in græco, impietatem cordis mei, & sic legunt veteres in commentarijs, Augustinus, Theodoretus, Euthymius. Latinus Interpres videtur accepisse, impietatem, ex græco, & peccati mei, ex hebræo. Sed omnia in idem recidunt. nam impietas cordis dicitur, quia corde concipitur: impietas peccati dicitur, quia peccando committitur. Idem etiam Davidis peccatum, & fuit iniquitas respectu Vriæ, & fuit impietas respectu Dei.

Pro

- VII. Pro hac orabit ad te omnis sanctus, in tempore opportuno.
- VIII. Verumtamen in diluuiis aquarum multarum, ad eum non appropinabunt.

Exemplo suo dicit Propheta multos futuros, qui discant orare Deum pro indulgentia peccatorum, ut hoc modo liberentur à magnis malis, quibus aliquando peccatores inuoluendi sunt. Pro hac, Græci interpretes, Theodoretus, & Euthymius, & cum eis Sanctus Augustinus, exponunt, pro hac impietate, quia impietas græcè & latinè, est generis feminini: sed vox hebræa est generis masculini, & non concordat cum ea, illud, pro hac, quod etiam in hebræo est generis feminini; ideo cogimur dicere, pro hac, significare, pro hac re, siue pro hoc: nam Hebræi vtuntur genere feminino pro neutro. Et posset etiam rectè verti, propter hoc, siue, super hoc. Itaque sensus erit, hac de causa, idest, quia tu tam clementer ignoscis pœnitentibus, orabit ad te, idest, fiduciam te orandi sumet omnis sanctus, idest, omnis pius, omnis verè pœnitens, qui incipiens odisse impietatem suam, incipit induere pietatem tuam. Orabit autem, in tempore opportuno, idest, antequam tempus misericordiae finiatur, dum hæc vita durat, dum ad pœnitentiam Deus inquit. Quærite Deum, inquit Isaias, dum inueniri potest, inuocate eum dum prope est. Isaiæ 55. Quod sequitur duplicem habet sensum; vnus est, orabit ad te omnis sanctus in tempore opportuno, ut in diluuiis aquarum multarum, quæ illæ ad eum non appropinquent, idest, ut in die nouissimo, quando veluti diluuium quoddam inundabunt super impios omnia genera pœnarum, & præterierit tempus opportunum orationis, & pœnitentiæ, tunc ipsi salui sint ab eiusmodi pœnis. Hic sensus in hebræo clarissimus est: sic enim ad verbum Sanctus Hieronymus vertit, pro hac orabit ad te omnis misericors tempus inueniens, ut cum inundauerint

aquæ multæ, ad illum non accedant. Et hūc sensum sequitur Theodoretus, quamuis paulò aliter exponat, nimirum sic, pro hac orabit ad te omnis sanctus, in tempore opportuno, ut cum inundauerint aquæ multarum tribulationum, ad illum non accedant, idest, illum non perturbent, sed illis omnibus superior sit, easque imperterritus perferat. Alter sensus est, orabit ad te omnis sanctus in tempore opportuno, & rectè ac sapienter faciet. nam in diluuiis aquarum multarum, cum inundauerint mala super omnes impios in die nouissimo, sicut inundauerunt aquæ diluuii temporibus Noe, tunc impij ad eum, idest, ad Deum non appropinquant: non enim erit amplius tempus opportunum: ideo Isaias ait, Inuocate eum dum prope est. nam aliquando procul erit ut ad eum appropinquare non possitis. Sic exponunt Sanctus Augustinus, & alij. Vterque sensus verus est, sed prior videtur magis literalis; nam illud, ad eum non appropinquant, non videtur posse secundum litteram referri ad Deum, cum nulla sit facta mentio Dei in verbis præcedentibus. Itaque illud, verumtamen, pro copulatiua particula accipiendum est, ut Euthymius rectè monet; & vox hebræa, rac, non solum significat, verumtamen, sed etiam certè, verè, &c.

P7

Tu es refugium meum à tribulatione quæ circumdedit me: exultatio mea erue me à circumdantibus me. IX.

Accepta indulgentia, quoad culpam, petit etiam indulgentiam quoad pœnam, liberationem videlicet à tribulatione, in quam incidit propter peccatum. Videtur autem loqui de persecutione, quam patiebatur ab Absalone filio, de qua in toto Psalmo superiore loquutus est. Fortasse etiam loquitur de tentationibus Dæmonum, quæ perpetuò nos circumdant & tribulant. Tu es refugium meum à tribulatione, quæ circumdedit me. Quasi dicat, non ha-

habeo tutum refugium nisi in misericordia tua, quoniam undique deficiunt amici, & undique cingor ab inimicis: ideo tu qui solus es exultatio mea, id est, causa omnis meae laetitiae, erue me ab hostibus circumdantibus me. In hebræo habetur, tu es refugium meum ab angustia, vel ab hoste, custodies me: exultationibus liberandi circumdabis me. Sed manifestè apparet puncta Rabinorum, & aliquam literarum mutationem totum hunc locum perturbasse. Septuaginta Interpretes non legunt, tizzereni, custodies me, à nazar; sed izzereni, obfidebit me, siue circumdabit me à zur, & futurum ponitur pro præterito, ideo verterunt, quæ circumdedit me. Neque legerunt, ronnet pallet, exultationibus liberandi, sed, ronnet pallet, exultatio mea libera, siue erue. S. quoque Hieronymus ex hebræo vertit, laus mea, unde legit, ronnet, non ronnet, ut hodie habetur in bibliis hebraicis. Denique non legerunt Septuaginta, tesobebeni, circumdabis me, sed, misobebeni, à circumdante me.

תצריני

נצר

יצריני

צור

רני פלט

רני

פלט

תסובבני

מסובבני

X. Intellectum tibi dabo, & instruam te in via hac qua gradieris, firmabo super te oculos meos.

Respondet Dominus orationi serui sui, ac pollicetur auxilium quod petebatur. Tria promittit. primo, prudentiam internam, ut possit cauere insidias hostium, & discernere amicos ab inimicis, dum dicit, Intellectum tibi dabo, id est, intelligentem & prudentem te faciam. Secundo, auxilium externum singularis prouidentiae Dei, sine quo in multis periculis homines etiam prudentissimi versantur, & hoc significat illud, instruam te in via hac qua gradieris: nam in hebræo est, ostendam tibi viam, per quam ambules; in græco vero, comitabor te in via, siue, simul tecum gradiar. Ex quibus omnibus intelligimus illud, instruam te in via, significare directionem, & ducatum in omnibus actionibus. Dicitur enim Deus ostendere viam, & comitari nobiscum, ut dux itineris, quando auxilio gratiae

sua facit, ne erremus in via morum, & ne in pericula, & insidias hostium, precipue inuisibilium incidamus. Tertio, perseverantiam in gratia, quod est maximum beneficium, & proprium electorum Dei. Firmabo, inquit, super te oculos meos; non auertam oculos à te, sed perseveranter & stabiliter oculo benignitatis te aspiciam; proinde auxilium internum prudentiae, & externum prouidentiae semper tibi aderit. In hebræo habetur, deliberabo super te oculo meo, siue, ut vertit S. Hieronymus, cogitabo de te oculo meo: sed mutatio vnius puncti, ex oculo meo, reddere potest, oculis meis, vel, oculos meos; itaque in illa voce nulla est difficultas. Suspicio autem pro voce, ihaza, cogitabo, vel deliberabo, Septuaginta legisse, chatom, firmabo, vel roborabo: quo modo enim fieri potest, ut viri doctissimi per verbum, iahaz, quod significat deliberare, consilium inire, cogitare, intellexerint firmare, & roborare? Si tamen lectio hebraica, ut modo se habet, cum græca & latina concilianda sit, oportebit subintelligere vocem, semper, ut sensus sit, cogitabo semper de te oculo mentis meae, quod est idem cum illo, firmabo super te oculos meos.

איעצור

אעצור

יעזר

XI. Nolite fieri sicut equus & mulus, quibus non est intellectus.

Hortatur nunc demum Propheta fideles omnes tam bonos, quam malos, ut ab exemplo suo discant mala, quæ consequuntur peccatum, & bona, quæ consequuntur poenitentiam & virtutem: ipse enim omnia expertus erat. Ac primum ad malos conuersus dicit, nolite fieri sicut equus & mulus, quibus non est intellectus, id est, nolite duci solis sensibus, cum ratione præditi sitis: nolite sicut equi & muli hinnire ad uxores proximi vestri, sicut ego feci: nolite tanquam indomiti & feroces equi vel muli, pauperes, atque humiles morsu, & calcibus impetere, ut ego aduersus Vriam feci.

In

XII. In camo & fræno maxillas eorum constringe, qui non approximant ad te.

Prædicat mala quæ eos sequentur, qui equos & mulos imitari voluerint: cogentur enim tribulationibus, vel ad Deum conuerti, vel certè impediuntur ne noceant alijs quantum vellent. Sed more Prophetico hanc prædictionem exprimit Dauid per modum imprecationis. In camo, inquit, & fræno maxillas eorum constringe, qui non approximant ad te; id est, capistro & fræno quasi equos & mulos coercebis, qui recusant, ut homines ratione præditi spò te accedere ad te per obedientiam. Ridiculè Calvinus contendit, non esse legendum, in camo, sed in lupato, quasi multum intersit inter hæc vocabula, & quasi ipse sapientior sit Septuaginta Interpretibus, qui verterunt *in lupato*, unde est nostrum in camo, & S. Hieronymo, qui ex Hebræo vertit in camo, & S. Augustino, Theodoro, & alijs verteribus, qui omnes legunt in camo. Porro camus funem significat, siue capistrum, quo alligantur equi. Sed hoc loco metaphorica vocabula sunt camus & frænum, & ponuntur ad significandas calamitates & ærumnas, quibus Deus utitur ad coercendos homines à peccatis, id quod exponitur sequenti versiculo. In hebræo habetur in singulari, maxillam eius, sed non solum Septuaginta, sed etiam Sanctus Hieronymus vertit in numero multitudinis, maxillas eorum. Ex quo intelligimus puncta non rectè in nostris biblijs ubique esse collocata: nam secundum alia puncta, eadem vox significat maxillas eorum.

XIII. Multa flagella peccatoris, sperantem autem in Domino misericordia circumdabit.

Hæc est declaratio cami & fræni, quasi dicat Propheta, peccator impetens, & qui complacet sibi in peccato, multis flagellis atteretur, tū in hac vita, tum in futura. Quamuis enim interdum peccatores florere videantur, Belarm. in Psal.

tamen ipsum peccatum est grauissima pœna, quæ parit alias pœnas sine numero, sollicitudines, anxietates, timores, pericula, remorsum conscientia, & similia: neque his contentus Deus iustus Iudex, multa alia flagella adiungit, & nisi peccator resipiscat, & oret ad Deum in tempore opportuno, sine dubio ad flagella sempiterna perueniet. Cōtra, iustus, qui speret in Domino, & non cōfidit in vanitate mortalium, ab ipsa misericordia diuina vndiq; circumdabitur, ut à nulla parte flagellum ad eum accedere possit. Porro misericordia diuina fons est omnium bonorum; ideo cum dicitur, misericordia circumdabit sperantem in Domino, significatur cumulus omnium bonorum, quo abundantissime fruuntur qui vni Deo adherent. Nam, ut sæpè diximus, quid nocere potest ei, cui omnia cooperantur in bonum? & cuius omnes passionibus conuertuntur in gloriam? Ideo rectè concluditur Psalmus illis verbis.

XIV. Lætamini in Domino & exultate iusti, & gloriamini omnes recti corde.

Sicut in principio beatos dixit iustos, ita nunc in fine eosdē hortatur ad lætitiā, quæ est etiā quasi ex obliquo cohortatio ad perseuerandum in iustitia, ut perseuerare possint in lætitiā. Lætamini in Domino & exultate iusti, id est, magnam habetis o iusti materiam gaudendi, & exultandi, sed in Domino, qui vobis est causa tātorum bonorum quibus affluitis: non est cur tristemi ob temporalia detrimenta, pro quibus rependetur vobis in æternitate mensura bona, conferta, coagitata, & super-effluens, & hinc interim spiritualis consolatio non vos deferet. Et gloriāmini omnes recti cordes, idem alijs verbis repetitur, Nam gloriari, hoc loco, nō est efferre seipsum laudibus, ut sonat vox latina, sed est iubilare, ut sonat vox hebræa, id est, cum lætitiā laudare Deum. & non semel in Scripturis gloriari accipitur pro lætari & exultare, ut cum dicit Apostolus ad Roman. 5.

L Sed

Sed & gloriamur in tribulationibus. Verbum quod propriè significat in hebræo gloriari, habetur Psalmo 51. in principio, Quid gloriaris in malitia? Hoc autem loco nõ est idem verbum, sed aliud, quod significat iubilare. Per, rectos corde, intelligimus iustos; nam ex rectitudine cordis oritur rectitudo verborum, & operum: illi autem sunt iusti, quorum corda, voces, & opera, conformia sunt rectissimæ regulæ quæ est lex diuina: ex qua rectitudine fit, vt Deus placeat homini, & homo placeat Deo: & quidquid tandem volente, vel permittente Deo accadat homini, æquo animo accipiat: atq; ita fit in corde non solum iustitia, sed etiã pax & gaudium in Spiritu sancto, id est, Regnum Dei, vt Apostolus interpretatur ad Ro. 14. proinde rectissimè Dauid ait, Beati quorum remissa sunt iniquitates, &c. &, Latamini in Domino, & exultate iusti, &c. quia soli iusti sunt beati, & verò solidoque gaudio perfruuntur.

PSALMVS XXXII.

Titulus, & Argumentum.

Psalmus David.

HIC Psalmus caret titulo apud Hebræos. Illud autem, Psalmus David, positum est à Septuaginta Interpretibus, qui tamen disertis verbis admonuerunt, nullum se titulum in hebraicis codicibus reperisse. Argumentum Psalmi est exhortatio ad iustos homines, vt Deum laudent, ob eius maximam potentiam, providentiam & bonitatem; hortatur autem iustos, tum quia non est speciosa laus in ore peccatoris; tum quia potentia, providentia, & bonitas Dei ipsis potissimum iustis utilissima est.

Explicatio Psalmi 32.

EXultate iusti in Domino, re- I.
ctos decet collaudatio.

Exultatio, quæ hic ponitur, significat laudem cum lætitia. S. Hieronymus vertit, Laudate iusti Dominum: sed vox hebræa vtrumque significat; ideo plenus sensus est, laudate cum exultatione, id est, laudate non inuiti, non tristes, non negligenter, sed ex magno affectu iubilantes, & exultantes in cordibus vestris, laudate Dominum non solum animo, sed etiam voce. Reddit rationem cum addit, rectos decet collaudatio, quasi dicat, vos iustos inuito potissimum ad laudandum Deum, quia vobis potissimum convenit laudare Deum: per rectos intelligit iustos, vt etiam diximus in fine Psalmi superius. Sed congruit hoc loco, vt iusti dicantur recti, quia rectis placet Deus, qui est ipsa rectitudo, & quod placet libenter laudatur. Distortis non placet Deus, cuius opera & iudicia rectissima sunt, & ideo non quadrant voluntatibus iniquorum: inde iniqui & distorti non libenter Deum laudant, sed reprehendunt & blasphemant. Pro verbo, decet, in hebræo est nomen speciosa, & sensus est, in ore rectorum speciosa est laus Dei: atque huc alludit Ecclesiasticus cap. 15. cum ait, Non est speciosa laus in ore peccatoris. Pro voce, collaudatio, in hebræo & græco est, laus: sed latinus Interpres posuit collaudationem, vt significaret debere iustos, non solum singillatim, sed etiam coniunctim laudare Deum.

Confitemini Domino in cithara I. I.
ra, in psalterio decem cordarum
psallite illi.

Hortatur rursus iustos, vt confiteantur Domino confessionem laudis, non solum voce, sed etiam instrumentis musicis, quæ erant in usu illius gentis. Mysticè autem significatur vt Deum laudemus non solum verbis, sed etiam operibus,

ribus, ac præfertim perfecta obseruatione decalogi significati per psalterium decem chordarum, vt videntes cæteri homines opera nostra bona glorificent Patrem nostrum, qui in cœlis est. Notant hoc loco Basilii & Augustini, citharam resonare ex parte inferiore, psalterium ex parte superiore. Vnde colligitur Deum esse laudandum ex cognitione Dei, quæ habetur ex creaturis, vnde existit sonus citharæ; & ex ea quæ habetur ex reuelatione diuina in Scripturis sanctis, vnde existit sonus Psalterij.

III. Cantate ei canticum nouum, bene psallite ei in vociferatione.

Coniungit quasi per epilogum quæ dixerat in duobus versiculis superioribus. Dixerat, vt voce laudaremus & instrumentis psalleremus: vtrumque coniungit, & monet, vt omnia accurate & diligenter fiant. Cantate ei canticum nouum; hoc pertinet ad illud, Exultate in Domino, &c. Iubet autem vt exultantes laudemus Deum cantico aliquo non vtitato & veteri, sed recens composito accommodatè ad rem præsentem. Bene psallite in vociferatione; pertinet ad id quod subiunctum est, Confitemini in cithara, &c. & iubet, vt hoc ipsum bene & accurate fiat, & non frigidè ac summissa voce, sed magno cum sonitu, quo magnitudo affectus significetur. Itaque illud, in vociferatione, non debet referri ad voces humanas, sed ad voces instrumentorum musicorum. Sanctus Hieronymus vertit, in iubilo; & Sanctus Augustinus legit, in iubilatione. vox hebræa significat iubilationem: vox græca, geminatum clamorem. Rectè monent sancti Patres Basilii & Augustini, canticum nouum opponi cantico veteri. Canticum vetus est, quod solet canere homo vetus, qui natus ex carne caro est, & terrena sapit, ac in terrenis delectatur, & hic Deum laudat, cum bona temporalia ab eo recipit: at canticum nouum canit homo nouus, qui renouatus spiritu mentis suæ, cœ-

lestia sapit, & in æternis delectatur, & Deum semper laudat, etiam cum flagellatur, quia nouit illa etiam cooperari in bonum. Sic etiam per illud, bene psallite ei in vociferatione, admonemur dum psallimus, bene facere hoc diuinum opus, attentè, deuotè, magno cum affectu & cordis iubilo. Sanctus Benedictus in regula sua monet, psalmodiam esse opus Dei, & ideo cæteris omnibus operibus anteponendum. Et S. Bernar. serm. 47. in Cantica, Vos, inquit, moneo dilectissimi, purè semper, ac strenuè diuinis interesse laudibus. Strenuè quidem, vt sicut reuerenter, ita & alacriter Domino assistatis, non pigri, non somnolenti, non oscitantes, non parcentes vocibus, non præcidentes verba dimidia, non integra transilientes, non fractis & remissis vocibus muliebri quidquam balba de nare sonantes, sed virili, vt dignum est, & sonitu & affectu voces sancti Spiritus depromentes.

Quia rectum est verbum Domini IV. ni, & omnia opera eius in fide.

Incipit explicare rationes, cur Deus sit tanto affectu laudandus, quæ sumuntur, vt diximus, à bonitate, potentia & sapientia eius. De bonitate dicit, Rectum est verbum Domini, & omnia opera eius in fide, id est, quia verba & facta Domini iustissima, fidelissima, & sanctissima sunt: hoc est quod Psalm. 144. alijs verbis dicitur, Fidelis Dominus in omnibus verbis suis, & sanctus in omnibus operibus suis. Verbum Domini intelligitur mandatum, prohibitio, promissio, comminatio, & hæc omnia rectissima & fidelissima sunt: nihil enim iubet Deus nisi bonum, nihil prohibet nisi malum, & quod promittit vel comminatur fidelissime præstat. Ideo rectum est verbum Domini, & fidelis Dominus in omnibus verbis suis: opera verò Domini verbis conformia sunt, ideo dicuntur esse in fide, id est, fidelia, iusta, sancta, & dicitur Deus sanctus in omnibus operibus suis. Sanctus Basilii, &

L 2 San-

Sanctus Augustinus in commentario huius Psalmi, per fidem intelligūt hoc loco fidem Catholicam, & exponunt, opera Dei dici esse in fide, quia ex operibus Dei, vt ex fabrica cœli & terræ inspecta homines mouentur ad fidem, vt videlicet credant in Deum opificem tanti operis; vel dicunt opera omnia esse in fide, quia omnia opera bona, quæ Deo placent, sunt in fide tanquam in semine vel radice. non enim placent Deo quæ fiunt ante fidem, sed quæ nascuntur ex fide. Ambæ sunt pię, veræque sententiæ, sed non videntur literales explicationes.

V. Diligit misericordiam & iudicium: misericordia Domini plena est terra,

Sanctitas verborum & operum Domini nascitur ex sanctitate volūtatis. Deus enim diligit misericordiam & iudicium, idest, amat primū largiri dona gratiæ suæ, & postea secundum opera vniuscuiusque reddere præmia vel supplicia, atq; ita omnes viæ Domini misericordia & veritas. In hebræo habetur, diligit iustitiam & iudiciū: sed Septuaginta Interpretes, scientes confundi duas illas voces, zedech, & chesed, idest, iustitiam & misericordiam, sæpè vertunt iustitiam, vbi legunt chesed, & aliquando (vt hoc loco) vertunt misericordiam, vbi legunt zedech. Quod si interpretari velimus verbum hebraicum vt sonat, dicendum erit in prima parte versiculi declarari bonitatem volūtatis diuinæ ex parte iustitiæ: in altera parte, nimirum misericordia Domini plena est terra, declarari eandem bonitatem ex parte misericordiæ. Sed iuxta nostram lectionem dicendū est, in prima parte declarari bonitatem ex parte misericordiæ & iustitiæ: in secunda, doceri misericordiam latius patere quàm iustitiam, & esse, vt alibi dicitur, super omnia opera eius. nam ad misericordiam pertinet tollere miseriam & defectum: nihil autē est quod non indigeat misericordia Dei, cum omninò creata defectum aliquem patiantur. Sed res corruptibiles quæ sunt

infra Lunam, tanto plures & maiores defectus patiuntur, quàm res incorruptibiles quæ sunt supra Lunam, vt respectu corruptibilium non videantur incorruptibilia vllum habere defectū, idē dicit Propheta, Misericordia Domini plena est terra: nam per terram intelliguntur omnia corruptibilia. terra enim sedes est non solum hominū mortalium, & animalium terrestriū, & omnium plantarum, sed etiam piscium, & auium. quamuis enim aues volitent in aere, & pisces perambulēt semitas maris; tamen & illa, & isti quiescūt in terra. Porro omnia corruptibilia egent multiplici misericordia Dei, creante, conseruante, mouente, nutriente, repa-
rante. Sed homines mortales, præter ista omnia, egent misericordia præueniente, comitante, subsequente, indulgente peccata, armante contra Dæmones, dirigente, protegente, &c. Itaque rectissimè dicitur, misericordia Domini plena est terra. Hoc loco illud etiā considerandum est, misericordiā perfectam, ad quam pertinet tollere omnes defectus, esse propriam solius Dei, quia nō potest tollere omnes defectus, nisi qui caret omni defectu, ac per hoc est infinitæ pfectionis, actus purus, æternus, omnipotēs: itaq; rectē Ecclesia canit, Deus cui proprium est misereri.

Verbo Domini cœli firmati VI. sunt, & spiritu oris eius omnis virtus eorum.

Transit à laude bonitatis ad laudem potentiæ, cuius primarius, & maximè conspicuus effectus, est fabrica cœli. Auget autem potentiam Dei, quod tantam molem non solum fecit, sed sine labore, sine mora temporis, sine ministris, sine machinis, solo verbo fecit, & eis æternam stabilitatem attribuit. Aludit autem Propheta ad creationem mundi, quæ describitur in primo cap. Gen. per ea verba dixit Deus, Fiat firmamentum, & factum est firmamentū, & vocauit firmamentum cælum. In hebræo habetur, Verbo Domini cœli facti sunt, sed Interpretes verterunt, firmati sunt, vt declararent cœlos factos,

צדק חסד

ONJY

nos, esse incorruptibiles. Quod sequitur, & spiritu oris eius omnis virtus eorum, posset videri repetitio quædam. nam verbum, & spiritus oris idem ferè sunt, & firmitas cœlorum pro eodem accipi posset, nisi in Hebræo esset vox, Zeuaam, quæ significat exercitus eorum, siue ornatus eorum, ut vertit Sanctus Hieronymus. Septuaginta Interpretes, pro eodem accipiunt virtutem & exercitum, quia re vera exercitus militum est virtus, idest, potètia, & robur Principis. Per virtutem, siue exercitum, siue ornatum cœli intelliguntur stellæ, quæ sunt veluti castrorum cœlestium acies ordinata, & simul mirificè cœlum ornant, & virtutes suas varioque influxus in hæc inferiora diffundunt. Quamuis autem per verbum Domini, & spiritum oris eius possit, imperium Domini simpliciter accipi: tamè sine dubio Spiritus sanctus insinuare voluit per hæc verba mysterium sanctissimæ Trinitatis, quod tempore noui Testamenti reuelandum erat. Neque mouere nos debet, quòd videatur Propheta creationem cœli tribuere Verbo, & creationem stellarum Spiritui sancto, quasi Dominus Pater per Verbum cœlos fecerit, per Spiritum sanctum stellas. Nam propter vnitatem essentia, quæ est virtus operatrix, indiuisa sunt opera Trinitatis; & ideo cum dicitur Deus Pater per Verbum creasse cœlos, intelligitur non sine Spiritu sancto id fecisse: & cum dicitur Virtus, siue exercitus cœlorum esse à Spiritu oris Domini, intelligitur esse etiam à Verbo, quod ab eiusdem Patris ore procedit, & à quo Verbo Spiritus ipse procedit.

VII. Congregans sicut in vtre aquas maris, ponens in thesauris abyssos.

Pergit explicare potentiam Dei, qui non solum cœlos & stellas Verbo fecit, sed etiam ea facilitate omnes aquas, quæ initio creationis mundi operiebant vndiq; terram, coegit in loca inferiora & profundiora terræ, qua faci-

Belarm. in Psal.

litate implet homo vtre vnum aqua, vel recondit pecunias in arca vel loculis. Congregans sicut in vtre aquas maris, idest, congregans est, siue congregat Deus aquas maris in locum vnum, ac si vtre impleret, idest, facillimè, nulloque negocio. Idem repetitur sequentibus verbis, Ponens in thesauris abyssos, idest, ponit Deus abyssos, multitudinem videlicet & profunditatem aquarum, quæ erant super terram, & pertingebant vsque ad cœlum, ponit, inquam, omnem illam aquarum immensitatem in angustis terræ cauernis, ac si recondere pecunias in thesauris. Abyssum, esse aquarum multitudinem, quæ initio creationis erat super terram, perspicuum est ex primo capite Genesis. Et tenebræ erant super faciem abyssi. per thesauros, significatur aliquando copia rerum pretiosarum, auri, argenti lapidum pretiosorum, ut eo loco, Simile est regnum cœlorum thesauro abscondito in agro; aliquando significatur per thesaurum, locus eiusmodi rerum pretiosarum, ut arca, vel loculi, ut in verbis illis, Omnis scriba doctus in regno cœlorum profert de thesauro suo noua & vetera. & de Magis legimus, apertis thesauris suis obtulerunt ei munera, aurum, thus, & myrrham. In hac posteriore significatione accipitur hoc loco thesaurus. Dicit autem Propheta in tempore præsentis, congregans, & ponens, cum tamen ab initio hæc facta sint, quia Deus ita semper conseruat quod initio fecit, ut verè dici possit semper id facere. In Hebræo pro, vtre, habetur, ned, quod aceruum significat: sed Septuaginta & Sanctus Hieronymus legerunt, nod, quod vtre, significat. & hæc est verior lectio, & melius explicat congregationem aquarum in locum vnum, idest, in cauernas terræ, quam Propheta significare volebat. In Hebræo & Græco deest præpositio, in, & legitur, congregans sicut vtre aquas maris: sed omnino subintelligitur, & rectè habet nostra editio, sicut in vtre. & non deerant olim græca exemplaria, quæ haberent,

L 3 in

in virem, ut notat Sanctus Basilius; & Sanctus Augustinus semper legit in virem. Qui legunt, sicut virem, existimant significari nubes, quæ intumescunt sicut vtres, & postquam aquam effuderint, detumescunt: sed literalis sensus est is, quem supra posuimus.

VIII. Timeat Dominum omnis terra: ab eo autem commoveantur omnes inhabitantes orbem.

Ex ijs, quæ dicta sunt de potentia Dei, occasione accepta, David hortatur homines, ut Deum timeant, eiusque mandata prævaricari formident. Timeat igitur, inquit, omnis terra Dominum tantæ potentiae & maiestatis: & mox explicat id ipsum, dicens, Omnes inhabitantes orbem (hoc est enim omnis terra) commoveantur, id est, contremiscant ab eo, à Domino videlicet, aliquid iubente.

IX. Quoniam ipse dixit, & facta sunt, ipse mandavit, & creata sunt.

Quoniam ipse dixit, & facta sunt, ipse mandavit, & creata sunt. Optima ratio, cur solus Deus timendus sit, quia videlicet quidquid est extra Deum, nihil nobis nocere potest, nisi Deus permiserit: & contra, nihil est extra Deum, quod nos ab eius ira defendere possit: omnia enim ab eius nutu dependent, a quo habent ut sint. Ratio autem, cur Deus omnia fecerit Verbo, est, quia Verbum eius plenum est potestate & auctoritate, ita ut sit mandatum atque imperium, cui nihil resistit: ideo adiungitur, ipse mandavit, & creata sunt. In Hebræo habetur ad verbum, ipse dixit, & fuit, ipse mandavit, & stetit. Sed sensus est idem. significant enim verba hebraica, ipse dixit, & omnis creatura facta est: ipse mandavit, & omnis creatura existere cœpit.

X. Dominus dissipat consilia gentium: reprobatur autem cogitationes populorum, & reprobatur consilia principum.

Venit tandem Propheta ad Sapientiam, ut ostendat omni ex parte Deum esse laudandum. Dominus dissipat consilia gentium, id est, ita supereminet sapientia Dei supra omnem omnium hominum sapientiam, ut quidquid homines consultando deliberant, quamvis consilia eorum sapientissima, & prudentissima videantur, Deus in momento infatuare, dissolvere, irritum facere possit. Idem repetitur sequentibus verbis cum dicitur, Reprobat autem cogitationes populorum, id est, Deus reprobatur tanquam stultas, cogitationes populorum omnium: nec solum populorum, sed etiam ipsorum Principum, qui consiliarijs in omni doctrinarum genere abundant, consilia, deliberationesque, ut planè insipientes & inutiles reprobatur. Et verè mirabilis est sapientia Dei, quæ sapientes in astutia sua comprehendit, & ineffabili ratione ita nonnumquam consilia illorum infatuat, ut quæ utilissima sibi esse iudicant, & perniciem & interitum illis adferant. In Hebræo non habetur illud, & reprobatur consilia Principum, fortasse excidit iniuria temporum, vel incuria librariorum.

Consilium autem Domini in æternum manet, cogitationes cordis eius in generatione & generationem.

Dominus quidem inscrutabili sapientia sua dissolvit humana consilia, ut finem sibi propositum non assequantur. Contra autem, humana prudentia nihil omnino potest adversus consilium Dei: quidquid enim semel decrevit Deus, stabile in æternum erit. Omne consilium meum stabit, & omnis voluntas mea fiet, dicit Dominus Isaia 45. Non est autem consilium Dei consultatio quædam præcedens electionem; neque sunt in Deo multæ cogitationes, sed unico & simplicissimo actu ab æternitate decrevit Deus, quidquid unquam facturus est. Sed scriptura accommodat se nostræ imbecillitati, nostrisque verbis utitur, ideo dicit, Consilium Domini

ni in æternum manet, idest, quod Deus quasi consultando decreuit, nullo modo dissolui potest, nec impediri quominus executioni mandetur. Idem repetitur alijs verbis, cum additur, Cogitationes cordis eius in generatione & generationem, idest, quæ Dominus cogitauit facere, nullo tēpore impediuntur, sed fient prorsus eo modo, quo ipse fieri voluit. Nec tamen ita se accomodat Scriptura nostræ infirmitati, ut non sit veritas in eius verbis: nam etiā si non est in Deo consilium præcedens electionem, tamē est in Deo quidquid perfectionis reperitur in consilio, cognitio videlicet omnium mediorum ad assequendum finem vtilium. & quāuis in Deo vna sit & simplicissima cogitatio, ea tamen æquiparatur innumerabilibus cogitationibus, quas in se eminentissimo modo continet.

XII. Beata gens, cuius est Dominus Deus eius, populus, quem elegit in hæreditatem sibi.

Ex ijs, quæ dicta sunt de potentia, sapientia, & bonitate Dei, colligit Propheta, beatum esse populū, cuius Deus non est aliquod idolum inutile, sed ille potentissimus, sapientissimus, & optimus Dominus, cuius laudes explicatæ sunt; tunc autem verè perfectæq; felices, ac beati sumus, quando & nos magnū illum Dominum pro Deo habemus, & ipse nos pro peculiari suo populo habet: ideō Propheta vtrumque coniungit cūm dicit, Beata gens, cuius est Dominus Deus eius, idest, beati sūt illi homines, qui pro Deo non agnoscunt, nisi vnum illum Dominum, cuius verbo cæli firmati sūt &c. & simul, beatus populus, quem elegit Dominus in hæreditatem sibi, idest, beati sunt illi homines, quos ille idem magnus Dominus elegit in populum peculiarem, & quasi propriam possessionem & hæreditatem. Sunt autem ista duo ita cōnexa, ut separari non possint, illi enim soli Deum verum pro Deo suo habent, qui illum fide, & spe, & charitate colunt: illi autem soli Deum fide, & spe, & charitate colunt, quos ipse elegit in

hæreditatem sibi, quos per gratiā præordinauit, vocauit, & iustificauit. Vera prorsus & in imo corde recondenda sententia: nam quidquid homo habeat, etiam si totum mūdum lucretur, egenus & miser est, si Deo careat, qui solus totum animæ sinum replere potest: & contra, qui Deum habet, etiam si alijs careat, beatus & diues est, quia in Deo sunt omnia. præterea, imago Dei est homo; imaginis bonum totaq; perfectio est, exemplari suo simillimū esse: tunc autem verè similes Deo, ac per hoc beatissimi erimus, quando videbimus eum sicuti est. nā & ipse Deus ideō beatus est, quia videt se sicuti est: Itaque qui Deum nunquam videbunt, semper Deo dissimiles, ac per hoc semper miserrimi erunt. Deniq; quidquid infra Deum est, vel est homine vilius, ut omnia corporalia, vel par, ut Angeli quibus in resurrectione æquales erimus: nihil autē nos perficere, felicesq; ac beatos reddere potest, nisi quod est nobis melius atque perfectius: igitur illi soli verè beati sunt, qui adhærent Deo, & vnus spiritus fiunt cum eo, id est, qui diligunt Deum, & diliguntur à Deo; qui quidem hic interim spe beati sunt, sed re ipsa beati erunt, quando tam felici vinculo inhærebunt Deo, ut ab eo excidere nulla ratione possint.

De cælo respexit Dominus, vidit omnes filios hominum. XIII.

De præparato habitaculo suo respexit super omnes, qui habitant terram. XIV.

Probat quod dixit, beatam esse gentem cuius Deus est Dominus ille, qui fecit cælum; probat autem ex eo quod cūm Dominus de cælo, tanquam altissima specula, videat omnes homines, & cognoscat, non posse vllum hominē proprijs viribus saluum fieri, quamuis alioqui fortissimus aut potentissimus videatur; tamen Deus oculo paterno peculiariter populum suum respicit, & illum adiuvat ac saluat, ut meritō dictum sit initio Psalmi, exultate iusti in Domino. Ait igitur, De cælo respexit

Dominus, vidit omnes filios hominū, siue (vt est in Hebræo) vidit omnes filios Adam, idest, Dominus de cælo à quo nihil occultari potest, non solum videt populum suum, sed videt omnes homines, & intelligit quid quisque possit. Idem verò significant verba sequentia, De præparato habitaculo suo, id est, de sede, quam sibi ipse parauit, & stabilivit (nam cælum cæli Domino, terram autem dedit filiis hominum) respexit ac respicit omnes habitatores terræ. Sanctus Hieronymus ex Hebræo vertit, de firmissimo solio suo, pro eo quod nos habemus, de præparato habitaculo suo: sed verba hebraica ytramque significationem recipiunt.

XV. Qui finxit singillatim corda eorum, qui intelligit omnia opera eorum.

Declarat Propheta, Deum non vidisse de cælo filios hominum, eo modo, quo nos videmus ea que sunt longè posita, confuso videlicet & crasso modo: sed vidisse distinctè & subtilissimè omnia opera eorum, idest, quid possint operari, vel operentur, vel mente, vel corpore. Itaque vidit omnes cogitationes, omnia desideria, omnia dicta, omnia facta, præterita, præsentia, & futura omnium & singulorum hominum. Et probat Deum hæc videre potuisse, quia ipse formauit corda singulorum, idest, creauit animas singulorum hominum, ac per hoc etiam creauit corda, hoc est, mentes & voluntates, à quibus omnia hominum opera oriuntur: qui enim corda fingere potuit; idem sine dubio corda scrutari potest. In hebræo habetur, qui finxit, iachad, idest, pariter corda eorum: sed illud, pariter, non significat eodem tempore, vt Origenes, & alij, errantes crediderunt. Nam Sanctus Leo in epistola ad Turbium Asturiciensem Episcopum c. 10. docet, fidem Christianam habere, animas ante corpora non fuisse. Igitur illud, pariter, non refertur ad idem tempus, sed ad eundem auctorem; ac si Propheta dixisset, qui finxit omnia corda

nullo excepto: non enim vnum cor ipse formauit, alia verò alijs formanda reliquit, sed ipse pariter omnia, ipse vnus finxit omnia. In græco habetur, *κατὰ μέρος*, idest, seorsim, siue solitariè: quod Sanctus Basilius refert ad cordis puritatem & simplicitatem, vt sensus sit, qui finxit corda separata ab omni impuritate; siue, vt Euthymius addit, separata ab aliorum animantium natura. Sed videtur rectius intellexisse antiquus latinus Interpres, qui vertit, singillatim, idest, seorsim singula. id enim magis congruit cum lectione hebraica, & cum verbis sequentibus. dicit enim Propheta, Deum formasse omnia corda, vt inde colligat, Deum intellegere omnia opera eorum. hac autem ratio id requirit, vt Deus formauerit omnia, & singula corda, non vt separauerit ab impuritate, vel ab alijs animalibus. Ex hoc etiam loco colligitur aliud dogma Ecclesiasticum, quod videlicet Deus non creauit quasi in confuso omnes animas, cum creauit animam primi hominis, quasi in illa fuerint omnes, & ex illa fiant omnes, sicut re vera tunc creauit quodammodo omnes homines; quia in vno erant omnes, & ex vno fiunt omnes, quantum ad generationem carnis: sed creauit Deus singillatim omnes animas, non vnā ex alia, sed ipse singulas ex nihilo distinctè, ac separatim. Scio Sanctum Augustinum in epist. 28. non existimare, ex hoc loco solidè probari creationem animarum, quia in Psal. 50. dicitur, Cor mundum crea in me Deus. responderi potest, in Psal. 50. tractari de sanctificatione, nō de naturali creatione: hunc autem locum requirere, vt verba proposita de naturali creatione intelligamus; cum inde colligatur Deum omnia corda scrutari, quia omnia ipse formauit.

Non saluatur Rex per multam virtutem, & Gigas non saluabitur in multitudine virtutis suæ. XVI.

Explicat quid viderit ille, qui omnia videt, videlicet hoc vidit, neminem pro-

propria virtute liberari posse à malis, quæ nos circumstant; sed egere omnes misericordia Dei. ponit autem exemplum in ijs, qui videntur maximè de suis viribus posse gloriari, quasi dicat, vidit Deus quod non saluatur Rex per multam virtutem, idest, non sufficit Regi ad propriam salutem, seu vitam tuendam, multa virtus, idest, multa potentia, multus exercitus, multa vis pecuniarum. Et Gigas non saluabitur in multitudine virtutis suæ, idest, sicut Regi non sufficit robur aliorum, qui illi seruiunt; ita fortissimo viro non sufficit robur proprium. Non est in hebræo nomen gigantis, sed in genere nomen robusti & fortis viri: sed Septuaginta Interpretes posuerunt nomen gigantis, quia illi solent esse fortissimi, & cæteris hominibus formidabiles, vt de gigante Goliath legimus in primo libro Regum.

XVII. Fallax equus ad salutem; in abundantia autem virtutis suæ non saluabitur.

Tria sunt, quæ possunt hominem eripere ab instanti periculo, vires alienæ, vt custodiæ militares, vires propriæ, velocitas equi: illæ, si resistendum sit; ista, si fugiendum. Docuerat Psalmista, non sufficere duo priora, nunc addit neque tertium sufficere, & habemus exemplum omnium in libris Regum; Saulem enim Regem non potuerunt à nece defendere ingentes copię militares: Goliath gigantem robustissimum David puer occidit: Ioram filium Achab veloci curru fugientem, sagitta velocior interemit. Fallax equus ad salutem, idest, fallitur qui confidit salutem suam velocitati equorum; velocitas enim illa multis modis impediri, vel præueniri potest, ideoque fallax est. In abundantia virtutis suæ non saluabitur, idest, equus in virtute sua qua abundat, vel si ea maximè abundet, quæ virtus in velocitate consistit, non saluabitur cum sessore suo, idest, neque se, neque sessorem à periculo liberabit. In hebræo habetur actiue, non saluabit, nimirum sessorem suum;

sed idem verbum hebraicum mutatis punctis fieri potest coniugationis passivæ, & eo modo legerunt Septuaginta Interpretes, quos Interpres latinus sequutus est. Et quidem lectio, non saluabit, quam habet S. Hieronymus, clarior est. Lectio verò nostræ editionis, non saluabitur, requirit vt subintelligatur aliquid, videlicet, nō saluabitur cum sessore suo. neque enim dubium esse potest, quin de salute hominis potius, quàm de salute equi hoc loco agatur. Porro quæ dicta sunt de salute corporali, multo magis intelligenda sunt de salute spirituali, ad quam obtinendam nemo sufficiens est, sine præueniente, comitante, & subsequente gratia Dei.

Ecce oculi Domini super me. XVIII.
tuentes eum, & in eis qui sperant
super misericordia eius.

Vt eruat à morte animas eorum. XIX.
& alat eos in fame.

Concludit Propheta ratiocinationem suam, qua, vt supra diximus, probat beatam esse gētem, cuius Deus est Dominus. Nam videt quidem Deus omnes homines, & intelligit quàm parum possint, nisi ipse adiuvet: sed tamen peculiariter in homines iustos dirigit oculos suos, vt eis de celo auxilium præbeat, tum vt à mortis periculo liberentur, tum vt commodè sustententur in vita. Ecce oculi Domini super timentes eum, & in eis qui sperant super misericordia eius. Per timentes & sperantes, pulchrè describuntur ij, qui verè sunt iusti & amici Dei. Nam timor sine spe, timor servilis est, spes sine timore præsumptio est. Timor cum spe charitatem veram declarat, idest, amorem liberalem quo diligitur Deus, vt amicus, vt Pater, vt sponsus: qui enim tali amore flagrat, & vehementer timet, ne dilectum offendat, & securè confidit ac sperat, misericordiam dilecti sibi nunquam defuturam. Vt eruat à morte animas eorum, & alat eos in fame. Hæc est causa cur Dominus respicit oculo paterno timentes, & spe-

& sperantes in se, ut videlicet hæc duo beneficia illis tribuat, liberationem à periculo mortis, & alimenta dum viuunt. Quia iusti timent Deum offendere, liberat illos Deus à timore ne offendantur, præsertim circa vitam, quæ est fundamentum omnium bonorum: quia sperant in misericordia eius, præstat illis perpetuam misericordiam, dum alit eos in fame. Quæ duo beneficia possunt intelligi tam de salute corporali & temporali, quam de spirituali & sempiterna. Eruit Dominus à morte animas, id est, vitam timentium se, dum singulari prouidentia liberat eos à varijs mortis periculis, à quibus propria virtute sua, vel suorum liberari non potuissent. Deinde sic liberatos sustentat in vita, prospiciens eis de omnibus ad vitam necessarijs, & præsertim tempore famis, quo multi alij rerum omnium penuria laborant. Sed spiritualiter eruit animas eorum à morte, dum vel non sinit eos labi in peccatum, quod est mors animæ; vel si fortè peccauerint, mox illos per salubrem poenitentiam ad gratiam, quæ est vita animæ reuocat; & utroque modo animas eorum à morte sempiterna liberat. Viuentes autem Deo per inhabitantem Spiritum sanctum, alit in fame, dum in hoc deserto, per quod ad terram promissionis tendimus, deserto planè sterili & inaquoso alit manna plente de cælo, & potat aqua de petra scaturiente, id est, cælestibus consolationibus reficit ac sustentat: alit autem, non satiat, & sitim temperat non extinguit; quia saturitas seruatur in aliâ vitam, in qua satiabimur dum apparuerit gloria Domini, & inebriabimur ab ubertate domus Domini, & voluptatis torrente potabimur.

XX. Anima nostra sustinet Dominum, quoniam adiutor & protector noster est.

Hactenus Propheta iustos Dei seruos allocutus est, eosque ad exultandum in Domino, & laudandum Deum, patrem indulgentissimum & misericor-

disimum exhortatus est. Nunc introducit iustos respondentes, ac dicentes. Anima nostra sustinet Dominum: intelligunt iusti quid spiritus sibi velit, cum eos ad exultandum & laudandum inuitat, nimirum intentionem Spiritus sancti esse, ut per hoc ipsi animentur ad perseuerandum in iustitia, & ad inhærendum Deo, neque ab eo recedendum ob quantascunque persecutiones, ac denique ad Deum laudandum, magis opere, quam verbis. Itaque respondent se tot beneficijs Dei confirmatos, constantissimè in eius timore, ac amore permansuros. Anima nostra, inquiunt, sustinet Dominum, id est, quidquid acciderit, non nos separabit à charitate Dei, neque ad alium consolatorem respiciemus, sed expectabimus patienter consolationem de cælo, scientes scriptum esse, si moram fecerit expecta eum, quia veniens veniet & non tardabit. Dicitur autem, anima sustinere Dominum, hebraica phrasi, qua tribuitur animæ id, quod toti homini cōuenit, præsertim quando agitur de re spirituali. Sic dixit Isaias cap. 26. Nomen tuum, & memoriale tuum in desiderio anime: anima mea desiderauit te in nocte. Et Hieremias Thren. 3. Bonus Dominus sperantibus in se, anime querenti illum. Et beatissima Virgo Lucæ 1. Magnificat anima mea Dominum. Quoniam adiutor & protector noster est. Reddunt iusti rationem, cur tam constanter Dominum expectare decreuerint, quia videlicet sciunt & experimento cognouerunt à Domino in bonis se adiuuari, & à malis proteggi potentissimè, & fidelissimè.

Quia in eo lætabitur cor nostrum, & in nomine sancto eius sperauimus. XXI.

Posteaquam responderunt iusti primariæ intentioni Spiritus sancti, respondent nunc secundariæ, quæ erat ut exultarent in Domino, sicut in primis Psalmi verbis dictum est. Dicunt igitur se id facturos libentissimè, In eo lætabitur cor nostrum, id est, exultabimus

mus in Domino, & in nomine sancto eius sperauimus, idest, quia in nomine sancto eius sperauimus. Nam quia sperauerunt in Domino, adiuti ab eo, atque protecti sunt, & ideo experimento proprio edocti, quam bonus & potens Dominus sit, exultant in eo, & confitentur nomini eius. Quod attinet ad verba, in hebræo habetur, quia in eo latabitur cor nostrum, quia in nomine sancto eius sperauimus: sed primum, quia, positum est pro, & vel pro, certè, vel vacat. Sicut contra in latina editione, illud, & cum dicitur, & in nomine sancto eius sperauimus, positum est pro, quia. Itaque clarissima lectio esset, & in eo latabitur cor nostrum, quia in nomine sancto eius sperauimus. Porro sperare in nomine Domini, non est sperare in literis, aut sono nominis, sed sperare in Domino per nomen significato: & habere videtur vim quandam maiorem hic loquendi modus, quam si dicatur simpliciter, sperare in Domino. nam sperare in nomine Domini, est sperare in ipso Domino nominatim & propriè appellato; dicitur verò nomen Domini sanctum, quia dignum est vt ab omnibus honoretur, & ideo summū scelus committitur, cum blasphematur.

XXII. Fiat misericordia tua Domine super nos, quemadmodum sperauimus in te.

Concluditur Psalmus per orationem, vt sæpè aliàs, & est oratio aptissime coherens cum superioribus verbis, & cum toto Psalmo; quia enim aliquoties dictum est, Deum misereri sperantium in se, & iusti dicunt se in Domino sperauisse, & egent semper noua misericordia propter continua pericula, ideo concludunt, Fiat misericordia tua Domine super nos, idest, non cesset, sed perseueret, imò addatur semper noua misericordia super nos; quemadmodum sperauimus in te, idest, sicut de tua bonitate futurum sperauimus, & nobis ipsi promissimus.

PSALMVS XXXIII.

Titulus, & Argumentum.

Dauid, cum immutauit vultū suum coram Abimelech, & dimisit eum, & abiit.



Ita titulus ad duas historias referri potest, quæ habentur libro 1. Regum cap. 21. prior historia narrat, Dauidem fugientem à facie Saul Regis venisse ad Achimelech sacerdotem, atque ab eo panes & arma postulasse, neque ei indicasse fugam suam, sed simulasse secretum Regis negocium se habere, ob quod tantopere festinaret. Posterior historia refert Dauidem confugisse ad Achis Regem Philisthæum, sed cum serui eius Regis incitare cepissent dominum suum in necem Dauidis, tum Dauidem insaniam & fatuitatem simulare cepisse, atque ea ratione mortem euasisse. Theodoretus ad priorem historiam titulum refert: sed sanctus Basiliius, sanctus Augustinus, sanctus Hieronymus, & Euthymius, referunt ad posteriorem. Et hæc est verior sententia, primo, quia in priore non immutauit Dauid vultum, sed officium: in posteriore verò vultum immutauit, vt videretur esse qui non erat: secundo, quia vbi nos legimus, & dimisit eum, in hebræo est, naigarescehu, quod significat, & expulit eum, siue, & proiecit eum, vel, & repudiavit eum, quod nullo modo conuenit cum priore historia, sed tantum cum posteriore: non enim Achimelech sacerdos expulit Dauidem, sed Achis Rex eum expulit vt insanum & furiosum. Ex quo etiam refellitur sententia eorum, qui, dimisit eum, sic intelligunt, dimisit Dauid Regem Achis, vel sacerdotem Achimelech: non enim Dauid dimisit, idest, expulit, sed expulsus fuit & dimissus. Tertio, quia in hoc Psalmo Dauid gratias agit Deo, quòd ex magno periculo liberauerit eum: nullum

ניגרשח

nullum autem periculum passus est David apud Achimelech, sed maximum apud Achis. Quarto, quia in titulo huius Psalmi iuxta Codicum hebraicorum & graecorum fidem non habetur Achimelech, ut haberi deberet, si titulus priorem historiam respiceret: sed Abimelech. Et sic legunt & exponunt Basilii, Augustinus, & alij veteres, excepto Theodoro. Latini etiam codices vulgatae editionis, quos vidi, habent Abimelech, excepta editione Sixti Quinti in qua habetur Achimelech, quod vitio librariorum, vel impressorum factum videtur, cum repugnet omnibus codicibus, & facile fuerit errare ob vocum similitudinem. Cur autem Achis dictus fuit Abimelech, rationem reddit sanctus Basilii, quia Abimelech erat nomen commune Regibus Philistinorum, sicut Pharaon erat nomen commune Regibus Aegyptiorum, & Caesar Imperatoribus Romanorum. Probat autem S. Basilii Abimelech fuisse nomen commune Regibus Philistinorum, ex cap. 20. & 26. Genes. Porro quod in hoc titulo dicitur, immutavit vultum suum, in hebreo est, immutavit sensum suum, quod in idem recidit; nam immutare sensum, est hoc loco simulare stultitiam, & de viro sensato facere se insensatum, quod fecit David torquendo os & oculos, & collabendo & impingendo in ostia domus more ebriorum, & saluam copiam emittendo ad similitudinem epilepticorum: haec enim narrantur in primo libro Reg. cap. 21.

Argumentum Psalmi, est gratias agere Deo pro beneficio liberationis à periculo illo mortis imminenti, & hac occasione exhortari omnes ad amandum Deum, & sperandum in eo. Intelligebat enim vir pius, suam illam omnem industriam, quam adhibuit simulando stultitiam, parum fuisse profuturam sine adiutorio, & favore diuino.

Explicatio Psalmi 33.

1. **B**enedicam Dominum in omni tempore, semper laus eius in ore meo.

Psalmus est Alphabeticus: incipit enim primus versus à prima litera Alphabeti, secundus à secunda, & sic de cæteris: quod videtur idè factum, ut facilius memoriae mandaretur, & sæpè à fidelibus cantaretur. Incipit igitur magno affectu gratias agere, quasi diceret: Nullo vnquam tempore obliuiscar beneficium hodiernum, sed pro eo, Benedicam Dominum in omni tempore, id est, quamdiu vixero: & idipsum repetens: Semper, inquit, laus eius in ore meo. Itaque illud, semper, non significat omni momento, omni die, omni nocte, quasi nihil aliud agendum sit: sed significat id esse faciendum suo loco & tempore, sed vsque ad finem vitae; imò etiam vsque ad finem sæculi cantabuntur Psalmi isti, & sic per alios benedicet Deum David in omni tempore. Potest etiam hic locus spiritualiter intelligi, quod iusti semper Deum laudant, & cum beneficia recipiunt, & cum flagella patiuntur, iuxta illud S. Iob, Dominus dedit, Dominus abstulit, sit nomen Domini benedictum.

In Domino laudabitur anima mea, audiant mansueti, & lætentur.

Nec solum, inquit, ego benedicam Dominum ob hoc beneficium in omni tempore, sed etiam alij benedicent: quicunque enim hoc audierint laudabunt me, quod tam mirabili arte eluserim illum Regem, & simul Deum laudabunt ac benedicent, qui me per illam artem de mortis periculo liberauit. **In Domino laudabitur anima mea**, id est, ego laudabor ab omnibus, ad quos huius rei fama perueniet; sed laudabor in Domino, ac per hoc laus præcipua referetur ad Dominum, qui singulari prouidentia sua mihi bonum consilium inspirauit, & iuuuit ut felicem sortiretur effectum. In hebreo verbum laudabitur, est cuiusdam coniugationis, quæ significat actionem in se ipsum; itaque secundum proprietatem vocis hebraicæ, laudabitur anima mea, significat, anima mea laudabitur

bitur à se ipsa, idest, gloriabitur; & quia ponitur anima pro toto homine, sensus erit, ego ipse ob hoc factum mirificè gloriabor, non in me, sed in Domino, quo protegète & adiuuante periculum euasi. Admonemur ex hoc loco, non semper esse vitium gloriari, & facta propria laudare, sed tunc solum, cum vel gloriamur de re quæ laudem non meretur, vel non agnoscimus auctore primarium omnium bonorum, Deum: Qui gloriatur, inquit Apostolus, in Domino gloriatur, nõ enim qui seipsum commendat ille probatus est, sed quem Deus commendat. Quod sequitur, audiant mansueti & lætentur, significat ad eos propriè pertinere communicationem huius lætitiæ, quibus similia pericula solent esse communia, quales sunt homines mites & patientes: qui enim eiusmodi sunt, & sæpè à potentioribus opprimuntur, & facillè Deum experiuntur adiutorem. Audiant, inquit, mansueti, humiles, Deum timentes, mei similes quod mihi accidit, & lætentur, ac Dominum benedicant. In hebræo sunt hæc verba temporis futuri, audient & lætābuntur. sed quia imperatiuus apud Hebræos caret tertia persona, ad eam exprimendam vtuntur Hebræi tertia persona futuri: proinde rectè vertērent Græci & Latini Interpretes, audiant, & lætentur.

III. Magnificate Dominum mecū, & exaltemus nomen eius in idipsum.

Conuertit sermonem ad ipsos mansuetos, quos iusserat audire & lætari, atque illos hortatur, vt non solum singuli apud se Deum laudent, sed cum ipso coniuncti, pariterque vniti Dominum glorificent. Magnificate Dominū mecū, idest, Dominum, qui solus verè magnus est, magnum esse confiteamur: & eum, qui verè solus altissimus est, voce etiam nostra altissimum esse prædicemus, & eius nomen, idest, notitiam & famam, vel potentiam & maiestatem corā hominibus extollamus.

Placet enim Deo valde, vt fideles non solum seorsim in cubiculis, sed etiam coniuncti in Ecclesijs vnanimēs, vno ore ipsum honorificent, vt Apostolus monet ad Rom. 15. Illud, in idipsum, sæpè iam diximus nihil significare aliud, nisi pariter, vna, coniunctim, &c.

Exquisiui Dominum, & exaudiuit me, & ex omnibus tribulationibus meis eripuit me. IIII.

Explicat nūc Propheta causam, cur benedicere velit Dominum omni tempore: quia videlicet expertus sit eum liberatorem optimum, & potentissimum. Exquisiui Dominum, idest, cum angustijs premerer, ad Dominum cōfugi, eius auxilium quæsiui, ad eū cum fiducia accessi, & exaudiuit me, solita sua benignitate & misericordia; & effectus exauditionis in eo se prodidit, quod liberauit me ex omnibus tribulationibus meis, quasi dicere velit: conatus est me Saul Rex, & manu sua, & per satellites suos occidere, & protegente Domino manus eius effugi: fugiens autem præ festinatione neque arma neq; cibum capere potui, & continuo adfuit misericordia Domini, quæ mihi per Achimelech Sacerdotem panes & arma prouidit: paulò post per imprudentiam incidi in manus Achis Regis Philistæorum, sed eodem inspirante, adiuuante, & protegente Deo, mirabili & insolita arte periculum declinaui. Itaque ab omnibus tribulationibus, quæ hucusque mihi acciderunt, eripuit me benignissimus Dominus, & amantissimus pater, Deus.

Accedite ad eum, & illuminamini, & facies vestræ non confundentur. V.

Hic iam incipit exhortatio pulcherrima & efficacissima ad amorem & timorem Dei, & ad proijciendam in eum omnem sollicitudinem nostram. Accedite ad eum, vel, vt sonat vox hebræa, respicite in eum, idest, quotquot in tribulatione estis, accedite per fidem & ora-

& orationem ad Deum, respicite in auxilium eius, & illuminamini, id est, percipite lumen consolationis & lætitiæ, reiecta tristitia obnubilante: lux enim lætitiæ significat, iuxta illud, Lux orta est iusto, & rectis corde lætitia. Potest autem altiore & mystico sensu hic locus ita exponi. Accedite ad eum per conuersionem, & illuminamini per gratiam iustificationis: nam illuminatio diuina vitam spiritualem confert; unde dicit Apostolus ad Ephesios 5. Surge qui dormis, & exurge à mortuis, & illuminabit te Christus: & Christus ipse ait, Ioannes 8. Qui sequitur me non ambulat in tenebris, sed habebit lumen vitæ: & in Psal. 35. legimus, Apud te est fons vitæ, & in lumine tuo videbimus lumen; ubi pro eodem ponitur, Fons vitæ, & fons luminis. Denique ideò Baptismus apud veteres dicitur illuminatio, quia per eum homines mortui peccato regenerantur, & de tenebris mortis veniunt ad lumen vitæ. Accedite igitur ad eum per conuersionem & penitentiam, & ipse conuertetur ad vos, & vultu suo lucidissimo, & maxime vitali, quippe qui Sol est increatus, & fons vitæ, illuminabit & viuificabit vos. Et facies vestra non confundentur, id est, accedite securi, nolite timere repulsam, exaudiet & excipiet vos, neque patietur rubore confundi facies vestras. Dicitur enim confundi facies, quando qui petit non impetrat, & ideò cum rubore discedit. Sic lib. 3. Regum cap. 2. dicit Bethsabee Regi Salomoni, Petitionem vnā paruulam ego deprecor à te, ne confundas faciem meam. In hebræo, pro accedite ad eum, & illuminamini, & facies vestra non confundentur, habetur, respexerunt ad eum & illuminati sunt, & facies eorum non confundentur; sed facile est videre quid Septuaginta legerint: nam illud, habitu, respexerunt, legerunt, habitu, respicite, quomodo etiam legit sanctus Hieronymus: quia verò accessus ad Deum per conuersionem, est accessus oculorum interiorum, non pedum, ideò idem est accedite, & respicite, nimirum accedite oculo Fidei, con-

uertite faciem, respicite in Deum. Sic etiam illud, naharu, potest esse præteritum indicatiui modi, & etiam imperatiui: sæpè enim defectiua inflectuntur more perfectorum. Certè non solum Septuaginta, sed & sanctus Hieronymus vertit eam vocem per modum imperandi: & quidem sanctus Hieronymus vertit, confluite, & Septuaginta, illuminamini, quia verbum, nahar, & confluere, & illuminari significat; sed illuminamini magis cohæret cum præcedenti verbo, respicite, & ideò communiter est recepta versio Septuaginta Interpretum. Denique Septuaginta, & sanctus Hieronymus non legerunt, penehem, facies eorum, sed penechem, facies vestra. Itaque tota discordia Codicum hebræorum à grecis & latinis nascitur ex punctis male collocatis à Rabinis, vel ex libris minus correctis, quos nunc habemus.

Iste pauper clamauit, & Dominus exaudiuit eum: & de omnibus tribulationibus eius saluauit eum.

Probat exemplo suo, securè accedendum esse ad Deum tempore tribulationis, Nam, inquit, iste pauper, Dauid videlicet, omni ope destitutus, ita vt etiam panem à sacerdote mendicaret, clamauit cum fide & fiducia, pulsauit ardenti prece ad ostium diuinæ clementiæ, & Dominus continuo exaudiuit eum, & ab omni tribulatione liberauit eum.

Immittet Angelus Domini in circuitu timentium eum, & eripiet eos.

Probauit exemplo, nunc probat ratione, accedendum esse ad Deum cum omni fiducia. Ratio est, quoniam Angelus Domini, cui Deus ipse mandauit vt custodiat homines iustos, vt dicitur in Psalmo 90. cum videt hominem in periculo, continuo adest, & more castrorum circumdat protectione sua hominem illum, vt nihil ei nocere possit.

Immit-

נָהָר

נָהָר

פְּנֵיהֶם

פְּנֵיהֶם

הַבִּיטוּ

הַבִּיטוּ

Immittet Angelus Domini, subintelligitur, ipse se, in circuitu timentium eum. In hebræo sensus clarior est: sic enim ad verbum legimus, castrametatur Angelus Domini in circuitu timentium eum, & eripiet eos. Mira potentia Angelorum, ut vnus Angelus vicem exercitus suppleat. Ex quo sequitur, ut maxima securitas & pax esse debeat in corde timentium Deum, qui tali custodia muniuntur.

VIII. Gustate & videte, quoniam suavis est Dominus: beatus vir qui sperat in eo.

Pergit in exhortatione, & quia dixerat, accedite ad eum, & probauerat exemplo & ratione, esse accedendum ad Deum tempore tribulationis: nunc hortatur ad experiendum, ut etiam ipsi proprio experimento discant rem ita se habere. Gustate, inquit, & videte, quoniam suavis est Dominus, idest, experimentum sumite, facite periculum, incipite re ipsa iactare in Deum omnem sollicitudinem vestram, inhærendo illi, dimissis omnibus consolatoribus alijs: & videte, idest, cognoscite, quoniam dulcis est Dominus omnibus inhærentibus sibi. Et verè quid suauius fingi potest, quàm animū præditū charitate, conscientia bona, corde puro, fide non ficta requiescere in sinu summi boni? verè beatus vir, qui sperat in eo, idest, qui pacem habet ad Deum, & certa spe recumbit in eo. Sicut autem illud, accedite & illuminamini, exposuimus altiore quodam sensu de incipientibus, qui illuminantur per iustificationem: ita quod hic dicitur, gustate, & videte, potest exponi de proficientibus, qui post regenerationem spiritualem incipiunt nutriri & crescere, iuxta illud sancti Petri in epist. 1. cap. 2. Sicut modo geniti infantes lac concupiscite, ut in eo crescatis in salutem: si tamen gustatis quoniam suavis est Dominus; ubi sanctus Petrus hunc locum Psalmi citat in eum sensum, quem nos modo persequimur. Sanctus etiam Paulus cap. 6. ad He-

bræos, coniungit illuminationem cum gustatione cum ait, Impossibile est eos qui semel sunt illuminati, gustauerunt quoque bonum Dei verbum, &c.

Timete Dominum omnes sancti eius, quoniam non est inopia timentibus eum. IX.

Post exhortationem ad experiendum quàm dulcis sit Dominus, hortatur Propheta ad timorem Domini, id est, ad obseruantiam mandatorum, siue, quod est idem, ad perseuerandum in iustitia & charitate Dei, quæ est fundamentum fiduciæ, per quam accedimus ad Deum, & gustamus beneficiorum eius suauitatem. Rectissimè etiam coniunguntur hæc verba superioribus secundum altiore alium sensum: nam sicut accedendo incipimus, & gustando proficimus, ita timèdo perficimur: non enim hic agitur de timore seruili, sed de timore casto & filiali, qui conuenit sanctis & perfectis. Timete, inquit, Dominum omnes sancti eius: timor enim iste includit perfectam charitatem, quia qui perfectè diligit, vehementissimè timet, ne in aliquo dilectum offendant, & idè diligentissimè conformat se voluntati Dei, & seruat in omnibus verbū eius: qui autem sic seruat verbū eius, in hoc charitas Dei perfecta est, ut ait sanctus Ioannes in 1. epist. cap. 2. De hoc timore dicitur Iob 28. Ecce timor Domini ipsa est sapientia: & Ecclesiastici 1. Plenitudo sapientiæ est timere Deum: & cap. 25. Timor Domini super omnia: & Isaia 11. dicitur de Christo, Et repleuit eum spiritu timoris Domini. Denique Ecclesiastes vltimo, Time Deum & mandata eius obserua: hoc est enim omnis homo, quasi dicat, in hoc consistit tota perfectio hominis, & omne eius bonum in hac vita, ut timendo Deum custodiat omnia mandata eius; & hoc significant verba sequentia in altiore sensu, quoniam non est inopia timentibus eum, siue, ut propriè significat vox hebraica, non est defectus timentibus eum, idest, nihil deficit timentibus eum: hoc

hoc enim est esse perfectum, nihil ei deesse. Et verè quid potest deesse amico Dei, cuius sunt omnia; cum amicorum omnia sint communia? Quòd si aliquando iustissimis viris deesse videntur temporalia, verè tamen eis nihil deest, cum eis detur patientia, quæ longè melior est diuitijs: neque dicitur propriè carere diuitijs, qui diuitias non desiderat. animus enim diues debet esse, non arca. Sed tamen idem Propheta, siue potius idem Spiritus sanctus, qui verbis suis instruit sapientes, iisdem verbis humiliore sensu acceptis, instruit etiam insipientes, eosque hortatur, vt Deum timeant, quoniam non est inopia timentibus eum, idest, quoniam Deus temporalia subministrat seruis suis, neque eos destituit tempore necessitatis. Et sunt in scripturis, & in historijs de vitis Sanctorum exempla sine numero; quibus probatur Deum mirabili prouidentia prospicere solitum esse seruis suis ea, quæ ad vitam necessaria sunt.

X. Diuites eguerunt & esurierunt: inquirentes autem Dominum non minuentur omni bono.

Idipsum explicat comparando impios cum timentibus eum. quasi dicat Propheta, non solum non erit inopia timentibus Deum, sed còtra, erit inopia magna non timentibus eum, etiam si diuites antea fuerint. In hebræo, pro diuites, est, leones, siue leunculi: vocat enim Propheta diuites impios, metaphoricè leones, quòd aliena rapiant. Dicit igitur diuites impios non semel, Deo ipsos puniente, ad extremam inopiam esse redactos. Diuites eguerunt & esurierunt, idest, qui diuites fuerunt, egere & esurire cæperunt, quia diuitiæ instabiles sunt & fallaces, & multis, varijsq. periculis expositæ. Timentes autem Dominum non minuentur omni bono, idest, qui non in diuitijs, sed in Deo spem suam positam habent, quales sunt qui Deum timeant, illi etiam si pauperes sint, non minuentur omni bono, idest, nõ deerit illis vllum bonum:

est enim phrasis hebraica, & in scripturis frequentissima, vt ponatur in propositione negante non omne, pro, nullo. Nos diceremus, nullo bono minuentur, pro eo quod Hebræi dicunt, non minuentur omni bono. Sic in Psalmo 48. Cum interierit non sumet omnia, idest, cum interierit nihil sumet: sic in Apocalypsi cap. 22. Et omne maledictum nõ erit amplius, idest, & nullo maledictum erit amplius. Porro illud, diuites eguerunt, & esurierunt, habet etiam alium sensum magis reconditum, quòd videlicet ij, qui diuitias temporales amant, quantumuis diuitijs abundant, semper egent & esuriunt; quia semper appetunt plura quàm habeant: inquirentes autem Dominum, quia rem infinitam quærunt, quæ maior est ipsorum desiderio, iuxta illud sancti Ioannis, Maior est Deus corde nostro: ij non minuentur omni bono, quia summo bono inhaerentes, in eo habent omnia bona.

**Venite filij audite me, time- XI.
rem Domini docebo vos.**

Posteaquam Propheta hortatus est homines ad timorem Domini: docet quæ sit vtilitas huius timoris, & in qua re timor iste sit positus. Venite, inquit, ad me, venite ad scholam Spiritus sancti, qua nulla vtilior inueniri potest: audite me, vel potius Spiritum Domini per linguam meam loquentem. Sic enim David ipse loquitur lib. 2. Regum c. 23. Spiritus Domini loquutus est per me, & sermo eius per linguam meam. Timorem Domini docebo vos, idest, docebo quanta sit vtilitas timoris Domini, & quid sit iste timor Domini, ad quem, tanquam ad summum omnium bonorum tam sæpè vos in Psalmis, & tam vehementer exhortor.

**Quis est homo qui vult vitam: XII.
diligit dies videre bonos.**

Explicat his verbis Propheta vtilitatem, & finem timoris Domini, quòd videlicet timor Domini pariat veram vitam

vitam & dies bonos, idest, vitam felicissimam, quam iusti præstant in hoc sæculo, dum Regnum Dei quod est iustitia, pax, & gaudium in Spiritu sancto, in corde suo habent, & in alio sæculo perfectè possidebunt, quādo absorpta erit mors in victoria. Quis, inquit, est homo qui vult vitam? quasi dicat, promisi me timorem Domini esse docturum; nunc igitur adimpleo promissionem meam, ac dico, finem timoris Domini esse id quod omnes cupiunt, sed pauci assequuntur, videlicet, veram atque beatam vitam. Sed qui hunc finem assequi volunt, debent media assumere, quæ mox subiungam. Quis igitur est qui vult vitam? idest, qui dicunt se velle vitam beatam, & tamen non ingrediuntur viam quæ ad illam ducit, non videntur verè ac seriò velle vitam beatam, sed umbram solùm & imaginem vitæ: ideò interrogo, quis est, qui verè ac seriò vult vitam veram? quis verè diligit videre dies bonos, dies felices ac beatos? In hebræo habetur paulò aliter, diligit dies ad videndum bonum; & quamvis sensus idem sit, tamen potest fieri ut in Codicibus antiquis quis fuerit in numero multitudinis, tobim, bonos, quod nunc est, tob, bonum: & quod legerint veteres, non per gerundium, sed per infinitivum illud, ad videndum: eadem enim vox apud Hebræos facit infinitivum & gerundium, vnica litera superaddita in principio. Nam non solùm Septuaginta Interpretes, sed etiam S. Hieronymus, & ipse S. Petrus in epist. 1. cap. 3. legit, dies videre bonos, non autem dies ad videndum bonum.

XIII. Prohibe linguam tuam à malo, & labia tua ne loquantur dolum.

XIV. Diuerte à malo, & fac bonum: inquire pacem, & persequere eam.

Docet iam Sanctus Propheta, quibus modis timor Domini perducatur homines ad vitam, & dies bonos, ac dicit, perfectam observationem mandatorum

Psal. in Bellarm.

Dei, siue abstinentionem ab omni peccato verborum, operum, & cordis, esse rectam viam ad vitam, iuxta illud Domini, Si vis ad vitam ingredi, serua mandata. hæc autem legis observatio, & fuga omnis peccati à Dei timore proficiscitur; proinde timor Domini est, qui per legis observationem ad veram vitam, diesque bonos peruenire nos facit. Prohibe linguam tuam à malo, idest, caue ne Deum offendas peccato linguæ, mentiundo, peierando, detrahendo, rixando, &c. Incipit autem à peccatis linguæ, quia sunt frequentiora, & difficilius cauentur: propter quod S. Iacobus ait, Qui non offendit verbo, hic perfectus est vir. Et labia tua ne loquantur dolum. prohibuit generatim omnia peccata linguæ, sed voluit etiam in specie prohibere perniciofa mendacia; quia sunt multo grauiora cæteris, & ex quibus multa alia mala oriuntur. Diuerte à malo, & fac bonum: à peccato lingue trāsit ad peccata operis, & primum monet ut vitentur peccata commissionis, cum ait, Diuerte à malo, quale est homicidium, adulterium, &c: Deinde addit, & fac bonum, ut vitentur etiam peccata omissionis, qualia sunt, cum parentes non honorantur, cum Deus tempore suo non colitur, cum omittuntur eleemosinæ, orationes, ieiunia, & similia bona opera. Inquire pacem & persequere eam. Hic tandem adiungit, ut caueantur peccata cordis, iræ, odia, inuiditiæ, & cæteræ prauæ animi affectiones: ut vera pax, & tranquillitas in omni negotio procuretur, & teneatur. Rectè autem dicit Propheta inquire pacem, quia boni viri officium est, non tam pacem cum omnibus habere, quàm optare & querere: sæpe enim aliorum culpa pax obtineri non potest; ideò & Apostolus ait ad Rom. 12. Quod in vobis est cum omnibus hominibus pacem habentes. Et Propheta David in alio Psalmo, Cum his qui oderunt pacem, eram pacificus. Nec solum cum alijs, sed etiam nobiscum ipsi perfectam pacem habere non possumus in hac valle miseriarum. Video enim, ait Apostolus ad Rom. 7. aliam legem in membris meis.

M repu

repugnantem legi mentis meæ. Quamuis autem perfectam pacem nobiscum ipsi habere non possimus, tamen inquirenda pax est, domando membra ieiunij, & carnem spiritui subiiciendo, ut aliquando discat non repugnare, vel minus repugnare imperio mentis. Denique inquirenda illa pax est, totis animi viribus, quæ nos manet in caelesti Hierusalem: qui enim ad pacem illam, ut par est, toto corde anhelant, facile contemnunt bona & mala temporalia omnia, ac per hoc habent etiam in hoc mundo pacem ad Deum, quam vnam respicit timor Domini filialis.

XV. Oculi Domini super iustos, & aures eius in preces eorum.

Probat quod dixerat, obseruantes mandata Dei, & cauentes peccata, habere vitam, & dies bonos. Ratio autem est, quia Dominus perpetuò respicit viros iustos, & semper exaudiet preces eorum; quo modo enim non habebunt dies bonos, qui sub omnipotente custode vitam degent? Nam si iusti cognoscunt mala imminencia, & clamant ad Deum, inueniunt apertas & intentas aures eius: si forte non cognoscant, Deus pro illis vigilat, & liberat à malis plurimis, quæ iusti ipsi nec vident nec intelligunt: ad hoc enim sunt oculi Domini super iustos, ut custodiat eos à malis, ad quæ ipsorum oculi non pertingunt. Mira Dei bonitas: quem non debet tam bonum Dominum toto corde diligere, & filiali affectu timere? quis ista considerans, non clamet cum Propheta, cõfite timore tuo carnes meas? & in alio Psalmo, Latetur cor meum, ut timeat nomen tuum? At non semper iusti exaudiuntur à Deo. imò semper exaudiuntur: sed si non facit Deus, quod ipsi petunt, idèò non facit, quia non expedit eis. Medicus est, & si non exaudit, ut amara potio non sumatur, exaudit, ut per eam potionem morbus curetur.

XVI. Vultus autem Domini super facientes mala, ut perdat de terra memoriam eorum.

Ex comparatione impiorum auget Propheta beneficium iustorum: nam sicut oculi Domini super iustos vigilant, ut eos custodiat: ita etiam vultus Domini, idest, oculus Domini (nam vultus in hebræo dicitur, penim à verbo, pana, quod est aspicere) vigilat, super facientes mala, idest, super iniquos, nõ ut eos custodiat, sed, ut perdat de terra memoriam eorum, idest, ut funditus exterminentur & pereant, non ipsi solum, sed filij & nepotes, & posterij omnes, donec eorum memoria penitus aboleatur. Hoc nõ semper fieri videmus, quia vel ipsi impij prius resipiscunt, quàm tempus ultionis adueniat; vel filij & nepotes non imitantur peccata patrum; vel alia de causa, iusto Dei iudicio differuntur eiusmodi pœnæ: sed Psalmus cantat id, quod ut plurimum fieri solet, & quod habetur in primo capite decalogi, Ego sum Deus tuus, fortis, zelotes, qui visito iniquitates in tertiam & quartam generationem in his qui oderunt me. Exod. 20.

XVII. Clamauerunt iusti, & Dominus exaudiuit eos, & ex omnibus tribulationibus eorum liberauit eos.

Probat, quod dixit, Oculi Domini super iustos &c. exemplis Patrum quæ in sacris historijs leguntur, ut Abraham, Isaac, Iacob, Ioseph, Moyses, Iosue, Gedeonis, & aliorum. & forte etiam spiritu prauidebat & canebat liberationem Danielis de lacu leonum, Trium puerorum de fornace ardente, Susannæ de morte ad quam ob falsum crimen damnata erat, & aliorum plurimorum. Neque repugnant huic versiculo exempla Machabæorum, qui de tormentis & morte liberati non fuerunt, sicuti nec exempla Apostolorum, & Martyrum & ipsius Christi, qui ab inimicis & persecutoribus iniuste supplicia grauissima pertulerunt. Isti enim verissimè de omni tribulatione liberati sunt; qui, ut Ecclesia canit, compendio mortis sacræ vitam beatam possident. Verissimè etiam isti clamantes ad Deum exauditi sunt. quia dedit illis

פנים.
פניה.

Is Deus aliquid melius, quàm sit liberatio de temporali calamitate: dedit enim eis preciosum patientiæ donum, & pro eadem patientia coronam gloriæ sempiternæ.

XVIII. Iuxta est Dominus ijs, qui tribulato sunt corde, & humiles spiritu saluabit.

Declarat modum Propheta, quo Deus iustos de tribulatione liberat; & videtur pluribus verbis explicare quod breuissimè dixit in Psal. 90. Cum ipso sum in tribulatione, eripiam eum, & glorificabo eum, idest, cum ipso sum per patientiam in hac vita, eripiam eum per mortis soporè, & glorificabo eum per gloriosam resurrectionem. Ita nunc dicit, Iuxta est Dominus ijs, qui tribulato sunt corde, idest, iustos qui ob angustias & persecutiones corde afflicto & tribulato sunt, Deus non deserit; sed prope adest patientiam subministrans, & consolationem cælestem admiscens, ut fortiter sustinere possint: neque hoc diudurabit, nam paulò post humiles spiritu saluabit, idest, illos ipsos humiliatos & afflicto corde & spiritu (nam in hebræo est contritos spiritu) ob grauitatem tribulationis eruet de omni angustia.

XIX. Multæ tribulationes iustorum, & de omnibus his liberauit eos Dominus.

Hoc pertinet ad illa postrema verba versiculi superioris, humiles spiritu saluabit: est enim ac si dixisset, humiles spiritu saluabit, & ita saluabit, ut etià si plurimæ sint eorum tribulationes, tamè de omnibus omnino liberabit eos. Absterget enim Deus omnem lachrymam ab oculis eorum, ut in Apocalypsi dicitur cap. 21. Hinc admonemur, non promitti fidelibus in hac vita carentiam inopiæ, morborum, ignominie, persecutionum, calumniarum, oppressionum; sed promitti consolationem spiritualem præsentis tempore, & plenam atque perfectam liberationem in futuro. In hebræo habetur in singulari numero, multæ tribulationes iusti, &

de his omnibus liberauit eum Dominus: sed in sensu nulla est discordia: non enim Propheta significare voluit, vnius tantum iusti multas esse tribulationes; sed vniuscuiusque iusti, ac per hoc omnium iustorum.

Custodit Dominus ossa eorum, **XX.** vnum ex his non conteretur.

Videntur hæc ad resurrectionis gloriam pertinere, ad quã sine dubio pertinet quod in Euangelio Luc. 21. Dominus dicit, Et capillus de capite vestro non peribit: rectè enim dici potest non esse confectum, quod statim post confectionem integrum, & fortius ac pulchrius repræsentatur. Quamuis igitur iustorum ossa, & membra omnia dissipentur; & vel à feris deuorentur, vel in mare proijciantur, vel ab igne consumantur, custodit tamen Dominus omnia illa in sinu prouidentie sue, & nihil omnino ex eis peribit, sed integra omnia, & gloriosa in resurrectione restaurabuntur. Alij tamen exponunt hunc locum de ossibus interioribus, id est, de fortitudine animi, quæ in sanctis, in maximis etiam persecutionibus, Domino custodiente, non deficit.

Mors peccatorum pessima, & **XXI.** qui oderunt iustum, delinquent.

Ne putarent impij, suos quoque cruciatus & miseras in morte finire: quod Athei, vel qui Dei prouidentiam, aut animæ immortalitatem non credunt, sibi falsò persuadent; adiungit Propheta, Mors peccatorum pessima, quia videlicet initium erit cruciatuum æternorum, sicut mors Sanctorum preciosa est, quia requiem & gloriã inchoat sempiternam. Et qui oderunt iustum, delinquent, idest, & ij qui iustum vexant & odio habent, omnes videlicet iustorum persecutores, qui existimant se victores esse, & multum lucrari cum iustos deprimunt, spoliunt, occidunt; tandem delinquent, idest, aberrabunt à via veræ felicitatis, & dicent id quod legimus in lib. Sapientie, cap. 5. Ergo errauimus à via veritatis, & iustitiæ lumen non luxit nobis, lassati sumus in

M 2 via

via iniquitatis & perditionis, ambulauimus vias difficiles, viam autem Domini ignorauimus, quid nobis profuit superbia? aut diuitiarum iactantia? transierunt illa tanquam umbra, &c. In hebræo pro illis verbis, mors peccatorum pessima, habetur ad verbum, interficiet impium malitia. Et quamuis sensus sit idem, cum sine dubio pessima sit mors eorum, quos malitia interficit, quia malitia non mortem solum temporalem, sed etiam sempiternam adducit: tamen omnino credibile est Septuaginta Interpretes aliter legisse, & ideo aliter transtulisse Illud igitur, themuth, quod est verbum, & significat, interficiet, ipsi legerunt, themutha, quod est nomen in regimine, & significat, mors. Nam in hebræo sunt liberae omnes eadem, & sola puncta mutari debent, quæ à Rabinis addita sunt, & sæpe non rectè. Posito autem nomine, themuthath, sequens vocabulum non potest verti impium, sed impij, siue peccatoris: & tertia vox non potest reddi malitia, sed mala vel pessima, quamuis verbum hebræum, vtrumque significet. Itaque rectè Septuaginta verterunt, Mors peccatorum pessima. Quod sequitur, & qui oderunt iustum, delinquent, ex hebræo multi vertunt, & qui oderunt iustum, desolabuntur: sed vox hebraica vtrumque significat, delinquere, & desolari, & refertur tam ad poenam, quam ad culpam; sed quia Septuaginta verterunt, *αὐτοὶ ἁμαρτήσουσιν*, quod verbum delinquere, peccare, errare significat: & Sanctus Hieronymus ex hebræo reddidit, culpabuntur, non debemus ab hac posteriore significatione recedere. Quia tamen delinquere potest accipi, pro eo quod est delinquere in alium, siue ledere, & nocere: & pro eo, quod est delinquere in seipsum, idest, errare à scopo, siue deficere in cursu & amittere brauium; hoc posteriore modo nos paulò ante accepimus, & exposuimus. Siquidem dubium esse non poterat, quin impij delinquerent in homines iustos, sed dubium esse poterat, an lædendo iustos, læderent magis seipsos; & hoc Propheta affirmat dicens, Odien-

tes iustum, delinquent, idest, nocentes iustis, sibi ipsi magis nocebunt, quia errabunt à fine ultimo, quem omnes homines desiderant, & qui solus beatos ac felices reddit possessores suos; & in hoc sensu, delinquent, idem est, quod desolabuntur: nulla enim est desolatio maior, quam amittere vitam æternam.

Redimet Dominus animas ser uorum suorum, & non delinquēt omnes qui sperant in eo. XXII.

Concluditur Psalmus prædicando iustis contrariam sortem ei, quæ prædicta est impij. Redimet Dominus ab omni seruitute, atque adeò ab omni malo animas seruorū suorum, cum eas de carcere corporis eduxerit, & ideo mors iustorum optima, vt meritò dixerit Balaam, Moriatur anima mea morte iustorum, & sint nouissima mea horum similia, Num. 23. Et non delinquent omnes, qui sperant in eo, idest, & nō errabunt à scopo, non deficient in cursu, peruenient omninò ad brauium supernæ felicitatis, omnes, qui non in suis viribus, sed in Deo confidunt. Est autem hoc loco aduertendum, non satis esse, spem qualemcunque, sicuti nec fidem mortuam, ad vitam æternam obtinendam: sed hoc loco tribui spei adeptiōnem beatitudinis, quia sermo est de spe iustorum, timētium & diligentium Deū, quam Apostolus Petrus vocat spem viuam 1. Petri. 1. Hæc planè spes & fiducia quæ nascitur ex patientia, ex bonis operibus, ex testimonio conscientie bonæ, iuxta illud, Patientia probatione operatur, probatio verò spēs, Rom. 5. & illud, Qui bene ministrauerint gradum bonum sibi acquirunt, & multam fiduciam in fide, quæ est in Christo Iesu 1. Timoth. 3. & illud, Si cor nostrum non reprehenderit nos, fiduciam habemus ad Deum. 1. Ioan. 3. Hæc, inquam, spes viua & perfecta recta perducit ad rem, idest, ad gloriam sempiternam, vt quod sperauimus, aliquando possideamus.

PSAL-

PSALMVS XXXIV.

Titulus, & Argumentum.

Ipsi David.



ITVLVS nihil habet noui. Argumentum Psalmi videtur esse Oratio Christi ad Patrem aduersus persecutores suos, & corporis sui, quod est Ecclesia. Fortasse etiam, ut Theodoretus, Euthymius, & alij volunt, orat ipse David pro liberatione sua, & contra Saul Regem, aliosq. persecutores suos. Sed quia Propheta erat, & de Christo, ut plurimum loquebatur in Psalmis, ut colligitur ex verbis Domini Luc. ult. idè cum S. Augustino, & S. Hieronymo, sensum principalem ad Christum pertinere censemus.

Explicatio Psalmi 34.

Iudica domine nocentes me, expugna impugnantes me.

רִיבָה

Propositio generalis est, qua petitur auxilium contra persecutores. Sed ex hebræo textu sententia explicanda est. Siquidem in hebræo habetur ad verbum, Iudica Domine iudicantes me, siue, litiga cum litigantibus mecum. Nam ab eadem voce formatur verbum & participium, seu nomen verbale: & quamuis hebræa vox, riuah, sit ambigua, & possit referri tum ad iudicium, tum ad litem: tamen græca, & latina editio declarauerunt esse referendam ad iudicium. Itaque sensus erit, Iudica iudicantes me, idest, iusto iudicio condemna eos, qui me iniusto iudicio condemnarunt, quales fuerunt Principes Hebræorum, Annas, & Caiphas, & Principes Ethnici, Pilatus, & Herodes, qui Christum iniuste iudicauerunt, & multi Principes, qui sanctos Martyres iniquissimo iudicio cōdemnarunt.

Bellarmin. in Psalm.

Quod autem nos legimus, iudica nocentes me, eundem sensum habet: quoniam enim iniuste iudicat, sine dubio nocet. Et quia persecutores Christi, & Ecclesiæ videri volebant, quasi secundum leges, atque ex zelo iustitiæ Christum, & seruos eius morti adiudicare; re vera autem non iudices, sed hostes erant; & cum vera pietate pro superstitionibus suis bellum gerebant; idè subiungit Psalmus, Et expugna impugnantes me: vel, ut clarius habetur in textu hebræo, & græco, ubi est similis allusio verbi, & participij, pugna contra pugnantes mecum, idest, suscipe causam meam, & bellum meum, ut expugnante te inimicos meos, ego manus eorum effugiam, & victoriam referam.

Apprehende arma & scutum, II.
& exurge in adiutorium mihi.

Declarat illud, expugna impugnantes me; & quia qui pugnat debet instructus esse armis, tum quibus repellat ictus aduersarij, tum quibus aduersarium feriat; idè in hoc versiculo meminit armorum, prioris generis, in sequente verò posterioris. Nam pro eo quod nos legimus, apprehende arma & scutum, in hebræo est aduerbum, apprehende clypeum, & scutum: sed græci, & latini Interpretes pro prima voce verterunt, arma, ne rem eandem bis ponerent, sed per arma intellexerunt arma defendentia, & protegentia, id enim omnium consensu significat, maghen, à verbo, ghauan, quod est, protegere. Porro clypeus, & scutum Dei est bona eius voluntas, iuxta illud Psal. 5. Domine, ut scuto bonæ voluntatis tuæ coronasti nos. Item æquitas, siue iustitia, Sap. 5. Sumet scutum inexpugnabile æquitatem. Et quidem beneuolentia Dei clypeus est, quo Deus nos protegit. Planè enim securus est, quem Deus amat, & de illo dici potest, scuto bonæ voluntatis tuæ coronasti eum. Iustitia Dei, quæ in Scripturis vocari solet æquitas, scutum est, quo Deus seipse protegit à iu-

M 3 di-

dicijs, & calumnijs hominum impiorum; quantumvis enim Deus seuerè, & atrociter impios puniat, semper iustissimè punit, & ideo non timet Deus iacula linguarum, vel iudiciorum; iuxta illud, vt iustificeris in sermonibus tuis, & vincas cum iudicaris, Psal. 50. Et de hoc dicitur, Sumet scutum inexpugnabile equitatem, quando videlicet Deus ad iudicium nouissimum veniet, & armabitur in ultionem inimicorum. Quare non sine causa bis hoc loco ponitur nomen clypei, siue scuti, quoniam vtroque simul Deus armatur, cum & nos misericorditer protegit, & iuste se ipse defendit.

III. Effunde frameam, & conclude aduersus eos, qui persequuntur me: dic animæ meæ, salus tua ego sum.

Hic iam loquitur de armis ad lædendū aptis, & per frameam intelligit gladium, vt S. Hieronymus vertit, & sensus est, euagina gladium, & stringe illud contra persecutores meos. Illud, enim effunde frameam, significat facilem, & promptam gladij euagationem, qualis est cum gladius politus, & læuis est; tūc enim nullo labore eximitur, & quasi funditur ē vagina: contra autem gladius rubigine confectus, vis magno labore nudari potest. Illud autem, & conclude, intelligitur de conclusionē gladij, qui manu acriter stringi debet, vt firmiter teneatur, & fortius feriat. Verbum enim hebraicum claudere, & stringere significat. Sed quia framea, & vox

חנית

hebraica, chanith, & græca, romphea, non propriè gladium, sed spiculum, vel lanceam significat: ideo potest etiam sic expōni hic locus, Effunde frameam, id est, racc spiculum, seu lanceam in hostes, & conclude aduersus eos qui me persequuntur, id est, claudere viam, pone obstaculum, ne hostes accedant. Porro gladius, & lancea Dei est ira ipsius, id est, iustitia vindicatiua, qua impios punit. Sic enim legimus Deuteronomio 32. Si acvero vt fulgur gladium meum, & arripuerit iudicium manus mea, reddam ultionem hostibus meis, & Sap. 5.

Acuet diram iram in lanceam. Nam & gladius, & lancea arma sunt offensiva. Mirabile prorsus spectaculum animæ fidei obijcitur, cum cogitat Deum pro se stare armatum scuto, & gladio, siue lancea, & audit illum in corde dicentem, Salus tua ego sum. Quamuis enim satis sit ad omnem securitatem, id quod Apostolus dicit, Si Deus pro nobis, quis contra nos? tamen Spiritus sanctus, vt adhuc potentius infirmitatem nostram sustentaret, describit Deum, non quomodocumque, sed armatum omni armorum genere; pro Ecclesia, & singulis fidelibus suis, aduersus hostes visibiles, & inuisibiles pugnantem. Dic animæ meæ, salus tua ego sum. Non satis est ad animi tranquillitatem, vt Deus pugnet pro nobis, sed necesse est, vt id nobis innotescat, ideo petit Christus pro corpore suo, vt id reueletur, & loquente Spiritu sancto ad cor fiducia oriatur. Quamuis autem magis propriè Deus medicus dici possit, quam salus; rectissimè tamen salus dicitur, quia medici & medicamenta non semper sanant, nec intimè penetrant substantiam rei, quam sanare cupiunt: Deus autem sanat semper, & intimè illabitur animæ; & sicut fieri non potest, vt sanitate præsentē homo non sit sanus, etiam si omnia alia absint: ita fieri nequit, vt Deo volente sanare, & per gratiam suam præsentē, anima non sit sana, etiam si omnia alia desint.

IV. Confundantur, & reuerentur querentes animam meam.

Describit exitum impiorum, aduersus quos Deus arma capit: ac primum dicit, Confundantur & reuerentur, id est, erubescant ob amissam victoriam qui querunt me interficere; idem enim significant illa duo vocabula, confundantur, & reuerentur. Non enim hic agitur de reuerentia erga alium, sed de pudore, quo suffundi solet, qui cadit causa. Illud, qui querunt animam meam, ambiguum est. Aliquando enim accipitur in bonam

par-

partem, vt in eo loco, Perijt fuga à me, & non est qui requirat animam meam, idest, non habeo refugium vllum, neque est qui me nouerit, & requirat, vt defendat. Aliquando in malam partem accipitur, vt hoc loco, & alibi sapius: vbi querere animam, est conari ad tollendam animam, idest, vitam.

V. Auertantur retrorsum, & confundantur cogitantes mihi mala.

Non solum igitur confundantur, & pudore afficiantur, sed etiam auertantur retrorsum, idest, recedant victi, & confusi, qui cogitant mihi mala, idest, qui meditantur necem meam.

VI. Fiant tanquam puluis ante faciem venti, & Angelus Domini coarctans eos.

Addit tertio, vt non solum erubescant, nec solum recedant, sed celeriter fugere cogantur, & dispergantur in varia loca. Puluis enim à vento in varias partes magno impetu, velociterque dispergitur. Augetur autem hoc loco celeritas fugæ, & dispersio, tum ex parte pulueris, tum ex parte venti. Nam pro puluere in hebræo est, mors, quod significat glumam, vt diximus in explicatione primi, Psalmi, idest, puluerem leuissimum, ex minutissimis, & aridissimis paleis conflatum, Et pro vento corporali, hic ponitur Angelus Domini, qui Spiritus est viuens, & longè potentior, & efficacior omni vento. Fiant igitur sicut puluis leuissimus, qui ab omni vento facile rapi potest, & tamen non levis ventus, sed Angelus Domini sit coarctans, & impellens eos.

VII. Fiat via illorum tenebræ, & lubricum, & Angelus Domini persequens eos.

Addit vltimo, vt non solum dispergantur, & fugere cogantur; sed etiam sine vlllo remedio in exitium præcipitentur. Fugientes enim iuuari solent scientia viarum, itinere tuto & stabili,

aut certè si via sit lubrica, tarditate ambulationis. Hic autem ista omnia remedia cessant, imprecatur enim Propheta impijs, vt fugere cogantur in tenebris, & per viam lubricam, vt neque oculi, neque pedes officio suo fungi possint, & instante post eos, ac vehementer urgente Angelo Domini, vt necesse sit eos in præcipitium, & exitium rueri. Hæc omnia implentur hoc tempore in Iudæis, alijsque persecutoribus Christi, & Ecclesiæ, qui iusto Dei iudicio versantur in tenebris ignorantia, & in lubrico concupiscentiæ, & persequente eos ira Dei, quotidie labuntur in maiora peccata, & ad sempiternam mortem summa velocitate festinant. Sed manifestius implebuntur in die iudicii; tunc enim impij confundentur, & pudefient confusione ineffabili, & auertentur retrorsum in præcipitium gehennæ diuina potestate coacti, idq. absque vlllo remedio, quomodo sine remedio ruit, & corrui in exitium, qui in tenebris per lubricum, alio persequente festinare compellitur.

Quoniam gratis absconderunt mihi interitum laquei sui: superuacue exprobrauerunt animam meam. VIII.

Veniat illi laqueus, quem ignorat, & captio, quam abscondit apprehendat eum, & in laqueum cadat in ipsum. IX.

In primis septem versiculis loquutus est Propheta in persona Christi, & omnium iustorum de persecutionibus generatim: in sequentibus versiculis explicat tria genera persecutionum, quas pati solent iusti ab impijs. Nam primum fraudibus, & insidijs iustos vexant, deinde falsis testimonijs eosdem appetunt; postremo aperta vi non verbi tantum, sed etiam factis iustos opprimunt. Dicit igitur de primo genere, Quoniam gratis absconderunt mihi interitum laquei sui, idest, quoniam quidem nulla iniuria à me lacerati, mihi insidias struere non cessant; ideo precor Deum, vt prouidentia sua faciat

ut insidiæ illæ in perniciem ipsorum cōuertantur. Quæ imprecatio, ut aliàs meminimus, non tam imprecatio, quàm prophetia est. Verè enim providentia Dei hoc agit, ut insidiæ, vel solis noceant insidiatoribus, vel prius & magis illis quàm alijs: quomodo fax accensa, ut comburat domum, se ipsa prius incipit comburere, & consumere, quàm domum; & sæpè domui nihil nocet, ita malitia insidiantium, statim incipit animum insidiantis vastare; alijs autem, vel nihil nocet, vel longè minus; quia minus est malum pœne, quàm malum culpæ. Quod attinet ad verba, illud, absconderunt mihi interitum laquei sui, S. Augustinus legit, Absconderūt mihi laqueum corruptionis suæ, sed hebræi, græcique, codices cum nostra editione concordant. Sensus autem idem est. Dicitur enim interitus laquei, mors, quæ paratur per instrumentum laquei. & dicitur laqueus interitus, siue corruptionis, laqueus, qui paratur, siue tenditur ad capiendum, & occidendum. In hebræo habetur rete, non laqueus, sed parum refert, utrumque enim instrumentum est ad capiendum aptum. Illud, superuacue, in hebræo est, chinnam, idest, gratis, sicut paulò antè; sed Interpres variare voluit. Itaque sensus est, superuacue, idest, sine causa, cum nullam à me iniuriam acceperint, exprobrauerunt animam meam, idest, probro me affecerunt, tendentes mihi laqueos, & retia quasi feræ sylvestri. In hebræo nunc habetur, chapheru, idest, foderunt, sed Septuaginta legisse videntur, charephu, vna litera transposita; id enim significat, exprobrauerūt. Quamuis si legamus, foderunt animæ meæ, idem erit sensus, nimirum sine causa foderunt foueam deceptionis vitæ meæ, ac per hoc pudore me affecerunt. Illud autem, veniat illi laqueus, quem ignorat, & captio, quam abscondit, apprehendat ipsum, & in laqueum cadat in ipsum: multò clarius est in hebræo, videlicet sic, Veniat illi, nimirum insidiatori, calamitas quam ignorat, idest, calamitas insperata, & inopi

nata. Et declarat quæ sit ista calamitas, addens, rete suum, siue laqueus suus, quem abscondit mihi, capiat ipsum, & sic incidat in ipsam calamitatem, quam mihi parauerat. Sententia tamen eadem est, nisi quòd Septuaginta pro calamitate in utroque loco ponere maluerunt instrumentum calamitatis, videlicet laqueum; & pro rete, siue laqueo, posuerunt captionem, quæ est effectus laquei; illa repetitio, in ipsum, est hebraismus, pro eo quod nos latini dicimus, in ipsum eundem laqueum cadat.

Anima autem mea exultabit X.
in Domino, & delectabitur super saluari suo.

Omnia ossa mea dicent, Domine quis similis tibi? XI.

Eripiens inopem de manu fortiorum eius, egenum, & pauperem à diripientibus eum. XII.

In his tribus versiculis Propheta explicat lætitiā inenarrabilem, quæ perfundetur iustus, cum se perfectè liberum esse cernet ab omnibus insidiantibus. Sunt autem phrasæ poeticæ, metaphorica, admirabiles: est autem hæc sententia. Cum id acciderit, quod precatus sum, Anima mea, quæ vivo, & sapio, præ lætitiā exultabit in Domino Deo, videlicet laudans, & magnificans; & simul delectabitur super salute sua, quam se adeptam esse videbit, vel potius super ipsum Dominum, qui est salus eius, non solum anima, sed etiam corpus, imò omnes partes corporis, etiam intimæ, & abiectissimæ, quales sunt ossa, quæ sensum non habent: nec solum ossa, sed omnia ossa, etiam minima gestiant præ voluptate, & si sensum & vocem haberent exclamarent utique & dicerent, Domine quis similis tibi? nihil enim est in terra, neque in celo te fortius, benignius, sapientius, amabilius: quippe qui tam potenter, & misericorditer eripis pauperem de manu hostis multo fortioris ipso, qui violenter eius bona, & ipsam vitam rapere cupiebat.

S. Au-

S. Augustinus more suo allegoricum sensum persequens, per ossa intelligit viros perfectos, qui sunt in Ecclesia, per carnem verò homines infirmos, ut sensus sit, quamvis tempore tentationis, vel persecutionis caro mystici corporis Ecclesie cedat, ossa tamen non cedent, sed resistent, ac dicent, Domine quis similis tibi? Quod attinet ad verba, illud salutare suo, in hebræo est salutem suam. Sed quia secunda pars versiculi, ut plurimum repetit, & explicat primam, & in prima dictum est, exultabit in Domino, rectè S. Augustinus per salutare intelligit ipsum Dominum, qui supra dixit, Salus tua ego sum. Illud autem, omnia ossa mea dicent, simile est illi, quod habetur in Psal. 102. Benedic anima mea Dominum, & omnia quæ intra me sunt, nomini sancto eius. Significatur autem hac phrasi perfecta quædam lætitia, quæ totum hominem repleat. Aliquando enim animus gaudet, sed corpus dolet; & tunc non est plena perfectaq; lætitia: sed quando sanabit Dominus omnes languores nostros, & replebit in bonis omne desiderium nostrum; tum demum totus homo inenarrabili voluptate perfusus exultabit in Domino, & omnes partes eius usque ad ossa insensibilia dicent Domino, quis similis tibi? sicut enim res insensibiles sitire dicuntur, quando carent necessarijs adiuventis, iuxta illud, Sitiuit in te anima mea, quæ multipliciter tibi caro mea; sic etiam eadem res insensibiles, quando defectus earum tolluntur, exultare & gestire dici possunt. Illud, Domine quis similis tibi? in græco geminatur Domine Domine, sed neque geminatio habetur in hebræo, neque legitur ab Augustino, vel Theodoro, vel Euthymio. Illud, eripiens inopem, in hebræo facilius connectitur cum superioribus, sic enim ad verbum legitur, Domine quis sicut tu, quis eripis inopem; est itaque sic connectenda sententia, Domine quis similis tibi, qui es eripiens inopem de manu fortiorum eius? Illud quoque, de manu fortiorum eius, in hebræo clarius est. Sic

enim legimus, eripiens, inopem à robusto præ ipso, idest, ab hoste robustiore, quàm ipse sit. Sed latinus Interpretes reddidit ad verbum quod inuenit in græco. Denique pro illis verbis à diripientibus eum, in hebræo solum est à violento. sed Interpretes explicare voluerunt latius, quod unico verbo continnebatur in textu originali.

Surgentes testes iniqui, quæ XIII.
ignorabam interrogabant me.

Retribuebant mihi mala pro XIV.
bonis, sterilitatem animæ meæ.

Pergit nunc Propheta ad secundum genus persecutionum, quo impij testimonijs falsis, non ex insidijs, sed palam iustos persequuntur, & mirè exaggerat nequitiam horum testium: primo dicit, surgentes, ut significet eos non expectasse citationem, sed per se venisse. Secundo addit quæ ignorabam, ut ostendat accusari iustum ab iniquis testibus, de eo quod nec fecerat, nec cogitauerat. Dicimur enim ignorare, quæ non probamus, nec vnquam fecimus, ac si facere nesciremus. Sic de Christo dicit Apost. 2. Cor. 5. Eum qui peccatum non nouerat, pro nobis peccatum fecit. Tertio addit, interrogabant me, ut ostendat audaciam, ac impudentiam testium, qui non contenti falsum testimonium dixisse coram Iudice, ipsum etiam virum iustum coram arguere, & interrogare audent. Quarto addit, retribuebant mala pro bonis, ut ostendat falsos illos testes nulla iniuria laceratos, sed contra beneficijs affectos, ex mera malitia ad calumniandum adductos. Addit vltimo sterilitatem animæ meæ, ut ostendat per falsa testimonia impios illos non querere leue aliquod malum, sed omnium maximum. Potest enim sterilitas hoc loco posita duobus modis accipi, primo generatim pro desolatione, & vastitate vniuersali, qualis accidit sancto Iob, qui vna die amisit opes, filios, sanitatem. Et huc pertinet expositio Theodreti, & Euthymij, qui accipiunt sterilitatem

tatem pro obliuione, idest, tali desolatione, vt ipsum etiam nomen obliuioni tradatur. Potest secundo accipi sterilitas pro vno genere mali, sed maxime astinationis, tum apud Diabolum, qui illud per ministros suos inferre conatur, tum apud hominem iustum, qui illud cogitur pati. Id malum est, vt homo iustus infamia per falsa testimonia notatus, sterilis, & orbus maneat, vt nec fructum facere possit, & quod iam fecit, pereat. Sic S. Augustinus exponere videtur.

XV. Ego autem cum mihi molesti essent induebar cilicio.

XVI. Humiliabam in ieiunio animam meam, & oratio mea in sinu meo conuertetur.

Antequam Propheta de tertio genere persecutorum loqui incipiat, exponit quid egerit aduersus persecutores secundi generis, ac dicit se non reddidisse malum pro malo, neque de vindicta cogitasse, sed ad Deum orandum cum magna humilitate se conuertisse. Cum, inquit, aduersarij mihi molesti essent, non superbe illis insultaui, sed sacco indutus, ieiunare cepi, vt oratio mea Deum facilius placaret. Saccus enim, & ieiunium sunt ala orationis. Sic Rex ille Niniuitarum cum sacco, & ieiunio orans exauditur, *Ionæ* 3. Quod idem legimus de Rege Achab, *3. Reg. 25.* Vnde, & Sapiens dicit, Oratio humiliantis se nubes penetrabit. Addit verò, & oratio mea in sinu meo conuertetur, vt ostendat se fructum orationis non dubium expectare. Ponitur enim, in sinu meo, pro, in sinum meum, vt habetur in textu hebræo & græco; quasi dicat, oratio ex tanta humilitate profecta non reuertetur ad me vacua, sed sinum meum cælesti consolatione implebit. Possumus etiam, si velimus illud, in sinu meo, accipere vt iacet, in casu auferendi, exponere hunc locum de frequentia orationis, vt sensus sit, oratio mea in sinu meo existens, sæpius reuertetur, & recurreret, vt quod semel, aut iterum quarens

non inuenit, perseverando, idest, sæpius reuertendo inueniat. Et quamuis ad literam ad hæc non videantur conuenire Christo, quem in Euangelio non legimus indutum cilicio ieiunasse, & orasse, dum persecutiones pateretur: conueniunt tamen eidem Christo, prout est in membris suis; hoc est enim proprium membrorum Christi, dum aduersa patiuntur, non cum aduersarijs contendere; sed ad cor suum redire, & Deum humiliter deprecari. Quod ad verba attinet, illud, cum mihi molesti essent, in hebræo est; cum ipsi infirmarentur, *bachalotham*. Sed verisimile est, Septuaginta Interpretes legisse cum alijs punctis, vel cum additione alicuius alterius literæ, in coniugatione Piel, vel Hiphil. Tunc enim accipi debet actiue illud verbu, vt non solum Septuaginta, sed etiam S. Hieronymus ex hebræo vertit. Sic enim legimus apud Hieronymu, Cum infirmarer ab eis, idest, cum ipsi me agrotare facerent, quod est idem cum eo, quod legunt Septuaginta, cum mihi molesti sunt. Potest etiam dici, Septuaginta, & S. Hieronymus legisse, cum infirmarentur ipsi, vt nunc legimus in hebræo; sed altius cogitasse, Prophetam loqui de illa agrotatione animi, quæ semper coniuncta est cum iniusta persecutione; quicumque enim aliu iniuste persequitur, se ipse lædit, & vastat; & dum alium agrotare facit morbo pænæ, ipse agrotat morbo culpæ. Recte ergo sententiam reddiderunt Septuaginta, & S. Hieronymus. idem enim est quo ad sensum, cum mihi molesti essent; & cum morbo iracundiæ, vel odij, vel inuidentiæ aduersus me agrotarent. Illud autem induebar cilicio, in textu hebræo & Græco est, induebar sacco. Ex quo intelligimus per cilicium non esse intelligendum indumentum ex pilis animalium, quod interius adhiberi solet, vt legimus de Rege Ioram *4. Reg. 6.* sed vestem sacceam, qua exterius etiam ad significandam humilitatem aliqui vtuntur, vt de Rege Niniuitarum *Ionas* testatur. Illud, humiliabam in ieiunio

ani-

בְּחִלּוֹתַי

animam meam, phrasis est hebraica, passim enim Hebræi animam ponunt pro toto homine.

XVII. Quasi proximum, & quasi fratrem nostrum sic complacebam: quasi lugens, & contristatus, sic humiliabar.

Hic versiculus multò clarior est in textu hebræo, quàm in græco, vel latino. Sic enim ad verbum reddi potest cum S. Hieronymo, Quasi ad amicum, quasi ad fratrem meum, sic ambulabam: quasi lugens mater tristis, sic incuruabam: & sensus est, ego non solum in tribulatione positus non reddidi malum pro malo, sed reddidi bonum pro malo: sic enim affectus fui erga vnumquemque aduersariorum, ut amicus erga amicum, imò ut frater erga fratrem, vel potius, ut mater erga filium paruulum, & languentem. Sicut enim mater videns filium egrotantem, incuruat se tristis, & gemens ad eum suscipiendum: sic, & ego me cum aduersariis meis gessi. Non potuit grandius, & luculentius exprimi pius affectus erga inimicos. Et quidem Propheta David opere præstitit, quod hoc loco in persona Christi, & sua, & omnium perfectorum virorum expressit. David enim Saulem, quem ut fratrem, dum viueret dilexit, mortuum ut filium defleuit. Idem fecit multò excellentius Christus, qui videns Ciuitatem fleuit super illam, Luc. 19. seque gallinæ pullos sub alas congregare satagenti comparauit, Matth. 23. Lectio latinæ editionis eundem sensum habet; sed obscura est, quia verba græca totidem verbis latinis reddidit. Sed ex hebraica lectione illustranda, & supplenda est. Hic igitur erit sensus, quasi proximum, quasi fratrem nostrum sic complacebam, id est, complacebam mihi, siue affectus eram erga vnumquemque aduersariorum, quasi erga proximum, siue socium, & amicum, imò etiam erga fratrem nostrum. Quasi lugens, & contristatus sic humiliabar, id est, non solum affectus eram ad persecutorem meum, ut ad proximum & fratrem;

sed humiliabar, & inclinabam me ad eum, ex compassione dolens, & contristatus de malis, quomodo pia mater inclinatur tristis ad filium languidum, & iacentem.

Et aduersum me lætati sunt, & conuenerunt, congregata sunt super me flagella, & ignorauit. **XVIII.**

Docet consequenter Psalmus, persecutores iustorum reddere mala pro bonis, & simul transit ad tertium genus persecutionum, quo non contenti impij fraudibus, & calumnijs iustos vexasse, flagellis quoque eos, aggrediuntur. Et aduersum me lætati sunt; ego de malis eorum dolebam, ipsi de malis meis lætabantur: neque hac impietate contenti, conuenerunt aduersum me flagellis armati, ut me, si possent, occiderent; & ignorauit, id est, ignorauit eorum consilia, & ideo præcauere non potui, vel ita me patienter gessi, ac si quid facerent ignorarem. Quod attinet ad verba, pro, & aduersum me, S. Hieronymus, vertit, & in infirmitate mea. vox enim hebraica, tsalgi, potest significare, latus meum, & infirmitas mea. Priorem significationem sequuti sunt Septuaginta, & ideo verterunt, aduersum me, quod ferè est idè quod, ad latus meum. Posteriores sequutus est S. Hieronymus. Sed in sententia non est varietas. Illud autem, congregata sunt super me flagella, in hebræo est, congregati sunt super me flagellantes, sed idem est sensus. Denique pro, ignorauit, S. Augustinus legit, ignorauerunt, & refert ad persecutores, qui verè ignorauerunt, quàm magnos viros percuterent, cum Christum, vel sanctos flagellarent. Sed quamuis vox græca sit ambigua, tamen hebraica nō est ambigua, nec potest reddi in prima persona: proinde rectè habet latina vulgata editio, & ignorauit; ut etiam legunt Theodoretus, & Euthymius Græci.

Dissipati sunt, nec compuncti tentauerunt me: subsannauerunt

me

me subsannatione, frenduerunt
super me dentibus suis.

Pergit explicare malitiam aduersa-
riorum, ac dicit, eos non potuisse im-
plere quod cupiebant, diuina proui-
dentia protegente suos, ne ab iniquis
persecutoribus læderentur. Sed ne sic
quidem quieuisse eos: nam quos non
potuerant flagellis verberum mouere,
tentabant flagellis verborum, irrisioni-
bus, & comminationibus terrere. Dis-
sipati sunt, inquit, idest, qui conue-
nerant in vnum, vt nocerent, & flagel-
larent; diuisi sunt ab inuicem, Deo
dissipante eorum conuenticulum: sed
non propterea compuncti sunt, idest,
non resipuerunt; vel, vt propriè sonat
vox hebræa, damu, non siluerunt &
quieuerunt, vt par erat. Sed potius
tentauerunt me, nimirum ad iracun-
diam prouocare, quia subsannauerunt
me subsannatione irrisoria, & frendue-
runt contra me dentibus suis, minas
crudeles intentantes. Quod attinet ad
verba, quæ in græco, & latino legi-
mus, tentauerunt me, subsannauerunt
me subsannatione: S. Hieronymus ex
hebræo vertit, in simulatione verbo-
rum fictorum. Sed verba ipsa hebrai-
ca, neque hunc sensum, neque illum
recipere videntur: sic enim legimus,
bechanphe laage maog, idest, in hypo-
crisi, siue simulationibus subsannatio-
num verbi ociosi. At profectò omnino
credibile est Septuaginta Interpretes
aliter legisse, & libros optimos habuisse,
præsertim cum verba hebraica, vt
nunc leguntur cum punctis Rabino-
rum, nihil significare videantur. Exi-
stimo igitur mutanda esse puncta, &
ex nomine, in simulationibus, facien-
dum esse verbum modi infiniti cum af-
fixo primæ personæ, quod reddendum
erit, in tentando me. Nam etsi, cha-
naf, simulare, & hiprocritam esse si-
gnificet, tamen tentare proprium est
hypocritarum, iuxta illud Domini, quid
me tentatis hypocritæ? & idem est in
tentando me, quod, in hypocrisi agen-
do mecum, & similiter ex nomine sub-
sannationum faciendum erit verbum

temporis præteriti, cum affixo primæ
personæ, & tunc sensus erit, subsanna-
uerunt me; illud autem maog, signifi-
cat quidem verbum ociosum, sed signifi-
cat etiam subsannationem. Proinde
integer sensus erit, in tentando me sub-
sannauerunt me subsannatione, quod
est idem, cum eo, quod nos habemus,
tentauerunt me, subsannauerunt me
subsannatione.

Domine quando respicies? re- XX.
stitue animam meam à maligni-
tate eorum, à leonibus vnicam
meam.

Expositis persecutionibus, reuertit-
ur Propheta in persona iustorum om-
nium, qui persecutionem patiuntur,
ad orandum Deum, vt finem cum prin-
cipio coniungat. Et quoniam videtur
Deus non respicere quid in terris fiat,
quando non punit iniustos, idè dicit,
Domine quando respicies? idest, quan-
do te videre mala impiorum puniendo
demonstrabis? Restitue animam meam
à malignantate eorum, idest, eripe vi-
tam meam de periculo in quo versa-
tur, dum est in potestate malignorum,
& restitue illam in pristinam securi-
tatem, siue, restitue mihi vitam, quam
penè amisi, dum est in manibus mali-
gnorum. Quod ipsum repetit, & cla-
rius explicat dum adiungit, à leoni-
bus vnicam meam, idest, restitue mi-
hi animam, quæ est mihi vnica, ac per
hoc dilectissima, quod facies cruen-
do eam à potestate inimicorum, qui
crudelitate, & ferocitate leones dici
possunt, & frendent, vt supra dictum
est, dentibus suis. Quod ad verba at-
tinet, illud à malignantate, S. Augusti-
nus legit, ab asturijs. S. Hieronymus
autem vertit, à calamitatibus. Causa
diuersitatis fuit, quia vocem hebrai-
cam, missoethem, deduxerunt Septua-
ginta à verbo, uafa, quod est decipe-
re, & idè S. Augustinus legit, asturijs:
& noster Interpres, à malignantate: at
S. Hieronymus deduxit ab alia radice,
nimirum à faa, quod est desolari, &
idè vertit à calamitatibus, sed idem
est sensus, vt patet. Per vnicam S. Au-
gusti-

מעג

רמי

ב חנפי

לעני

מעג

חנף

מס איתם

נאנ

סאה

Augustinus intelligit Ecclesiam, quā Christus erui vult à persecutoribus. Quod quidem verum est, sed ad literam videtur omnino referendum ad animam, seu vitam. Sicut etiam illud Psal. 21. Erue à framea Deus animam meam, & de manu canis vnicam meam. Anima enim rectè dicitur vnica, quasi vnicè dilecta. Vita enim temporalis est fundamentum omnium bonorum temporalium; & vita æterna omnium bonorum simpliciter. Itaque & Dominus ait in Evangelio Matth. 16. Quid prodest homini si vniuersum mundum lucretur, animæ verò suæ detrimentum patiatur? aut quam dabit homo commutationem pro anima sua? & tamen multi ita desipiunt, vt pro nihilo libenter perdant animam, quam vnicè amare debuissent.

XXI. Confitebor tibi in Ecclesia magna, in populo graui laudabo te.

Promittit se non fore ingratum, si liberationem ab aduersarijs obtineat. Confitebor tibi, inquit, in Ecclesia magna, idest, non abscondam beneficium tuum, sed publicè coram omnibus prædicabo: & idem repetit alijs verbis, in populo graui laudabo te. Idem enim est confiteri & laudare, idem quoque Ecclesia magna, & populus grauis. Dicitur enim Ecclesia magna ratione multitudinis, quod propriè significat vox hebræa, rab, idest, Ecclesia multa; & similiter dicitur populus grauis, siue vt significantius habetur in hebreo, hazum, robustus, ratione multitudinis. Tunc enim robustus est populus; cum tam multis vigis abundat, vt hostes nō timeat. Videtur etiam Propheta ad Ecclesiam Christianam respicere, in qua laudatur assidue Deus ob piorum liberationem. Est enim Ecclesia Christiana verè multa, & magna cum totū orbem terrarum obtineat; & verè grauis & robusta; cum portæ inferi aduersus eam præualere non possint. Ecclesia quoque triumphans, Ecclesia magna erit, cum de ea scriptum sit Apoc. 7. Vidi turbam magnam, quam diu-

merare nemo poterat; & populus robustus; cum ibidem additum sit, & palma in manibus eorum.

Non supergaudeant mihi, qui aduersantur mihi iniquè, qui oderunt me gratis, & annuunt oculis.

Reddit ad orationem quam inchoauerat, & petit liberari à persecutoribus præsertim hypocritis, qui simulant se amicos, cum nihil minus sint. Non supergaudeant mihi, idest, non gaudeant super me, siue non latentur de interitu meo, qui aduersantur mihi iniquè, idest, qui me persequuntur fingentes amicitiam; nam in hebreo habetur, scecher, quod mendacium propriè significat. vnde S. Hieronymus vertit, inimici mei mendaces: & hæc ipsa est maxima iniquitas, persequi hominem, & decipere specie amicitiae. Hoc idem declaratur, & repetitur in sequentibus verbis, qui oderunt me gratis, & annuunt oculis, idest, qui sine causa me oderunt, cum nihil mali illis attulerim, & tamen fingunt amicitiam annuendo oculis, salutantes, blande aspicientes, & approbantes quæ dico. Quid est, inquit Augustinus, annuere oculis? pronunciantes vultu, quod in corde non gerunt.

שקר

Quoniam mihi quidem pacificè loquebantur, & in iracundia terræ loquentes dolos cogitabant.

Declarat Propheta, cur dixerit de inimicis suis, & annuunt oculis, & dicit, quoniam ipsi quidem mecum verbis exterioribus pacificè loquebantur, quasi amici essent; sed interius præ iracundia disrumpebantur, & cogitabant dolos, quibus me perderent. hæc de sensu. In verbis magna difficultas est. Nam hebraicus codex ad verbum sic habet, quoniam non pacem loquebantur, & super scissuras terræ verba dolosa meditabantur. Et sic etiā vertit S. Hie-

S. Hieronymus, nisi quod pro, scissuras terræ, ponit, in rapina terræ. Græcus verò codex sic habet, quoniam mihi quidem pacifica loquebantur, & super iracundiam dolos cogitabant. Et sic legunt, & interpretantur S. Augustinus, Theodoretus, & Euthymius. Sed obseruandum est, vocem hebraicam lo, quæ significat, non, à Septuaginta Interpretibus lectam fuisse, li, quæ significat mihi, & omnino credibile est, Septuaginta Interpretes habuisse libros hebraicos emendatiores; proinde non videtur ambigendum, meliorem esse lectionem latinam vulgatæ editionis, quæ respondet voci, quam in suis libris habuerunt Septuaginta, quàm ea sit, quam nunc habemus in hebræo. Quod autem in hebræo habetur, super scissuras terræ, verterunt Septuaginta super iracundiam, quia intellexerunt sermonem Prophetæ esse metaphoricum, & per scissuras terræ significatam esse iracundiam, quæ est quædam scissura cordis terreni, & animalis. Qui enim irascuntur, interdum punitur interius, & quietem, ac pacem amittunt: & quidem latinus Interpretes addere voluit vocem illam terræ, quam inuenit in hebræo; sed græcus Interpretes, satis esse putauit, eam sub intelligi in voce iracundiæ, quæ est feruor circa cor. Explicanda igitur est vox illa, terræ, vt accipiatur pro corde terreno, & animali, vt diximus. Cur autem S. Hieronymus vertit, rapinam terræ, nõ assequor, nisi per scissuras metaphoricè intellexerit rapinam, aut fortè vox hebraica hoc etiam significare possit. Sed absolutè præferenda est interpretatio Septuaginta Interpretum, quam Ecclesia in latina editione sequitur. Quod autem in latina editione nos habemus, loquentes dolos cogitabant, non differt in sensu à verbis hebraicis, verba dolosa cogitabant. Idem enim est verba dolosa cogitare, &, loquendo intra se dolos cogitare. Neq. multum refert, quòd Septuaginta non habeant verba, aut, loquentes, sed simpliciter, dolos cogitabant; quia in ipsa cogitatione satis intelligitur interna locutio.

Et dilatauerunt super me os XXIV. suum: dixerunt, Euge, euge viderunt oculi nostri.

Quàm sit verum, quod supra dixit de inimicis suis, quod simulato corde pacificè loquerentur, ostendit Propheta in persona iustorum in hoc versiculo, vbi dicit, eosdem inimicos qui aliquando blandiebantur & annuebant oculis: postea cum in eas calamitates incidisset, quas illi fraudulenter cõcinauerant, dilatato ore capisse apertè insultare, & inter se gratulari, ac dicere, vidimus tandem quod tantopere cupiebamus. Hoc totum in Christo, qui caput iustorum est, impletum legimus in Euangelio: aliquando enim pacificè loquebantur inimici dicentes, Scimus, quia verax es, & viam Dei in veritate doces: sed interim dolos meditabatur, vt caperent eum in sermone. Cum autem illum cruci affixum viderunt, dilatauerunt os suum insultantes, & dicentes, Vah qui destruis templum Dei, &c. Quod ad verba attinet conueniunt cõdices omnes, eo excepto, quod interiectionem hebraicam, heah, Septuaginta reddiderunt, Euge, S. Hieronymus, vah; & Euge est latantis, vah, insultantis: sed parum refert, nam vtraque est exultantis, & exultatio inimicorum quædam insultatio est.

Vidisti Domine ne fileas, Domine ne discedas à me. XXV.

Exurge Domine, & intende in iudicio meo, Deus meus & Dominus meus in causam meam. XXVI.

Iudica me Domine secundum iustitiam tuam; Domine Deus meus non supergaudeant mihi. XXVII.

Redit Propheta ad orationem, id ipsum alijs, & alijs verbis repetens ad inuoluendum affectum. Vidisti, inquit, Domine, quanta videlicet sit oppressio pauperis serui tui, ne fileas, quasi non videas, aut non possis, aut non velis defendere sperantes in te. Ne discedas, vel, vt habet vox hebraica, ne elongeris

ris

ris à me ; idest , ne deferas me in tribulatione positum , quo modo faciunt qui procul abeunt . Nec solùm non fileas , & non discedas , sed nec sedeas , quasi ociose spectans , vel dormitās ; sed exurge , & quasi iudex iustus & potens intende diligenter animum ad iudicium meum , idest , ad litem , quam cum persecutoribus habeo ; intēde , inquam Deus meus in causam meam , & iudica me secundum iustitiam tuam Domine , idest , si iustitia tua , quæ rectissima est , iudicat me iniuste ab aduersarijs opprimi , libera me de manibus eorum , vt non amplius gaudeant super miserijs meis .

XXVIII. Non dicant in cordibus suis , euge , euge animæ nostræ , nec dicant , deuorauimus eum .

XXIX. Erubescant , & reuereantur simul , qui gratulantur malis meis .

XXX. Induantur confusione & reuerentia , qui magna loquuntur super me .

Explicat id quod dixerat , non super gaudeant mihi , non dicant , inquit , in cordibus suis , Euge , euge , animæ nostræ , idest , nō exultent in cordibus suis super vitam meam , quasi iam extinctā . Sicut enim illud , non supergaudeant mihi , significat nō gaudeant super me : sic etiam hoc , non dicant euge animæ nostræ , debet exponi , non dicant euge super animam nostram , & explicat , in verbis sequentibus , Nec dicant , inquit , deuorauimus eum , idest , non possint iactare , ab eis , quasi à leonibus me deuoratum . Sed contra potius amissa spe victoriæ erubescant , & reuereantur , idest , verecundentur simul omnes inimici mei , qui nunc spe victoriæ gratulantur sibi de malis meis , idest , mihi imminetibus . Nec solùm leuiter erubescant , & verecundentur , sed induantur confusione , & erubescencia , idest , toti cooperiantur confusione , qui magna loquuntur super me , idest , qui magnifice iactabant potentiam suam super me . Aliqui legunt maligna , pro , ma-

gna : sed nostra lectio consentit græcæ , & hebraicæ veritati .

Exultent & latentur , qui volunt iustitiam meam , & dicant semper magnificetur Dominus , qui volunt pacem serui eius .

Et lingua mea meditabitur iustitiam tuam , tota die laudem tuam .

Quemadmodum precatus est Propheta , vt iniqui confundantur ; sic etiā nunc precatur , vt iusti exultent , & latentur , qui bene sibi volunt , & amant innocentiam suam , vel cupiunt iustitiam suam palam apparere . Excitat quoque ad laudem Dei omnes qui cupiunt pacem suam , quæ secutura erat ex liberatione sua ab omnibus malis . In hebræo habetur , qui vult pacem serui sui ; Septuaginta Interpretes videntur legisse verbum in numero multitudinis , quod in nostris libris est in numero singulari : sed vterque sensus optimus est . Claudis Psalmum David , promittens gratiarum actionem pro accepto beneficio . Lingua mea , inquit , meditabitur iustitiam tuam , idest , exercebitur in prædicanda iustitia tua : & hoc ipsum repetit , & repetendo declarat , dicens , Tota die laudem tuam , id est , lingua mea tota die meditabitur laudem tuam , idest , exercebitur in prædicanda laude iustitiæ tuæ . Quod autem dicit , tota die , significat , frequenter , & assidue ita , vt nunquam tanti beneficij subrepat obliuio .

Sanctus Augustinus hoc loco piè monet , eum semper Deum laudare , qui semper bene agit .



PSALMVS XXXV.

Titulus, & Argumentum
Psalmi.

In finem seruo Domini Dauid.

DE hoc titulo dictum est in explicatione Psalmi Quarti, ubi primum legitur, in finem. Sensus igitur est, Psalmus inspiratus seruo Domini Dauidi, qui canendus est iugiter usque in finem, quique ad Christum pertinet, qui legis, & Prophetarum est finis. Argumentum est, immensam ferè esse quorundam hominum malitiam, sed multò maiorem Dei misericordiā, & iustitiam.

Explicatio Psalmi 35.

I. **D**Ixit iniustus, ut delinquat in semetipso: non est timor Dei ante oculos eius.

Describit Propheta duas primas peccati radices, quarum altera est in voluntate, quæ decernit male agere; altera in intellectu, qui non cogitat timorem Domini prohibentis peccatum. Dixit, inquit, iniustus, ut delinquat in semetipso, idest, apud se, in corde suo; decreuit iniustus delinquere, idest, corde suo in peccatum consensit. Non est timor Dei ante oculos eius, idest, ideo corde peccatum elegit, quia oculis mentis non cogitauit timorem Domini omnia videntis. Vbi timor ponitur pro obiecto timoris, idest, nō cogitauit Deū iustum, fortem, videntem omnia: ex qua cogitatione timorem tantæ potestatis sine dubio cōcepisset. Sicut enim qui timet hominem, non audet in conspectu eius malum exterius facere; ita qui timet Deum, non audet interius cogitare: quoniam Deus etiā corda scrutatur. Quod attinet ad verba, tres primæ hebraicæ voces sic ad litteram ver-

ti possent: Dictum prauaricationis impij, sed vox illa, neum, quāuis propriè dictum, significet: tamen accipitur passim pro verbo, dixit. Illud autē, pelah, quod significat prauaricationem, mutatis punctis, quæ à Rabinis appositæ sunt, legi poterit, poseah, idest, prauaricator, siue iniustus: sic etiam illud, larsah, quod Sanctus Hieronymus vertit, impij, mutatis punctis significabit ad delinquendū, siue ut delinquat, ut graeci, & latini codices habent. Et hæc sine dubio vera lectio est, quod confirmat littera, lamed, quæ signum est verbi modi infiniti, non autem nominis ex casu genitiuo. Illud autem, in semetipso, in hebræo est, in medio libbi cordis mei, sed corrupta videtur littera hebraica mutatione vnius literæ, nam ipse etiam Sanctus Hieronymus vertit cordis eius, non cordis mei. Itaque legendum videtur, libbo, idest, corde suo.

Quoniam dolosè egit in conspectu eius, ut inueniatur iniquitas eius ad odium.

Demōstrat in hoc versiculo Propheta quod dixit, iniustum non habere timorem Domini. Nam, inquit, in conspectu ipsius Dei dolosè egit cum ipso Deo & omnibus hominibus adeo grauiter, ut iniquitas eius non inueniatur apud Deum ad veniam, sed ad odium: quod certè nunquam fecisset si Deum timuisset. Quis enim delinquere audeat in conspectu Iudicis, si Iudicem timeat? Verba hebraica, & græca possunt alium sensum facere, nimirum, quod iniustus dolosè agit, cum videtur velle redire ad eor, & confitemi peccata. nam non quærit peccata sua, dum conscientia suæ secreta rimatur, ut verè illa odio habeat, sed tātum ut fallat Deum, vel homines. & hūc sensum persequitur Sanctus Augustinus. Verba hebraica sic sonant: Quoniam dolosè egit aduersus eum in oculis eius ad inueniendam iniquitatem eius, ad odiendum. Græca vero sic habent: quoniam dolosè egit in conspectu eius, inuenire iniquitatem suam, & odire. Quamuis autem

tē sensus posterior verus sit, & verbis Prophetæ aptari possit: tamen prior sensus est magis vniuersalis, & melius connectitur cum superioribus, & magis conuenit cum vulgata latina editione: & non difficulter accommodari potest verbis hebraicis, & græcis. Quod enim dicitur in codice hebraico, ad inueniendum iniquitatem eius ad odiū, hunc sensum facit, Vt inueniat Deus iniquitatem eius ad odiendum; idest, non ad parcendum, sed ad puniendum. Quod autem dicitur in græco codice, inuenire iniquitatem suam, & odisse; potest etiam legi inuenire iniquitatem eius, & odisse, idest, vt Deus inueniat iniquitatem eius, & non ignoscat, sed odio habeat, & puniat. neque enim græci habent discrimen inter eius, & suam, vt nos Latini habemus, proinde illud *ἐν τῷ*, quod sanctus Augustinus legit, suam, noster Interpretes legit, eius.

III. Verba oris eius iniquitas, & dolus, noluit intelligere, vt bene ageret.

Dixit Propheta hominem impium dolosè agere, nunc addit etiam dolosè loqui, additurus postea etiam dolosè cogitare, vt vndique manifestetur insignis perversitas eius, qui Deum non timet. Verba, inquit, oris eius sunt cōformia factis, nimirum iniusta, imò tam iniusta, vt nō sit aliud nisi iniquitas, & dolus. quidquid loquitur eò tendit, vt vel lædat apertè, vel decipiat. Noluit intelligere, vt bene ageret, id est, neq; potest excusare culpam suam prætexendo ignorantiam. voluntariè enim ignorauit cum non curauerit discere legem iustitiæ, vel per se inuestigando, vel ab alijs querendo; quoniam decreuerat male agere: & vt male ageret, scientiā bene viuendi contempsit.

IIII. Iniquitatem meditatus est in cubili suo; astitit omni viæ nō bonæ: malitiam autem non odiuit.

Ordine retrogrado descripsit primo opera iniusta, deinde verba iniqua, nūc tandem cogitationes, & affectio-

Belarm. in Psal.

nes malas describit. quamuis enim ex corde, vt est in Euangelio, procedant verba, & opera mala: nos tamē ex operibus, & verbis malis, quæ videmus & audimus, cognoscimus cogitationes, & voluntates malas, quas videre, & audire non possumus. Iniquitatē, inquit, meditatus est in cubili suo, idest, opera, & verba iniqua, non casu aut imprudenter patrauit, vel effudit, sed in secreto cubilis sui multo ante meditatus est. Astitit omni viæ non bonæ, malitiam autem nō odiuit; idest, dum meditaretur in corde suo, & varia consilia occurrerent, quasi viæ ad operandum, adprobauit omnia mala consilia, & sic ingredi capit omnem viam non bonam. quia corrupta est eius voluntas, & ideò malitiam non odiuit, sed amauit potius, non quia mala est, sed quia utilis visa est. Illud, omni viæ non bonæ, positum est, pro omni viæ malæ, ac si diceret, non placuit illi vllum consilium bonum; sed è contrariò elegit sequi omnia mala consilia, & sic astitit viæ non bonæ, idest, stetit in via non bona.

Domine in cælo misericordia tua: & veritas tua vsque ad nubes.

Iustitia tua sicut montes Dei, VI. iudicia tua abyssus multa.

Trāsit Propheta ad alteram partem Psalmi, atq; ostendit magnam quidem esse aliquorum hominū malitiam; sed maiorem esse in Deo bonitatem, quæ in misericordia, & iustitia eius consistit. Ac de misericordia dicit, In cælo: misericordia tua, idest, tam magna est misericordia tua, vt à terra ad cælum pertingat, & omnia repleat: quod clarius habetur in Psalmo 107. Magna est misericordia tua super cælos. Misericordiæ adiungit veritatem, idest, fidelitatem, quæ facit obseruari, quod misericorditer promittitur; de qua dicitur in Psalmo 144. Fidelis Dominus in omnibus verbis suis. Et veritas tua vsque ad nubes, idest, misericordia ad cælum vsque pertingit cum sua comi-

N te

te veritate, quæ ipsa quoque extenditur usque ad nubes, idest, usque ad cælum in quo sunt nubes. Neque minor est in Deo iustitia, qua reddit unicuique secundum opera sua. Nam iustitia tua, inquit, sicut montes Dei, id est, magna est instar montium altissimorum, qui nubes aliquando superat. Dicuntur enim res magnæ res Dei, ut alio loco Psalmo 79. Sicut cedros Dei. Adiungit iustitiæ iudicia, quæ sunt actus iustitiæ, ac dicit, Iudicia tua abyssus multa, idest, profunda, & inscrutabilia, quomodo profundissima vorago, quæ abyssus dicitur, oculis penetrari non potest. His omnibus corporalibus similitudinibus altitudinis, & profunditatis diuinæ misericordiæ & iustitiæ, necnon veritatis, & iudiciorum, nihil significatur aliud, nisi, misericordiam & iustitiam Dei maiora esse, quam ut à nobis perfectè intelligi possint; quemadmodum oculis corporalibus non pertingimus ad ea, quæ superant nubes, vel quæ sunt infra terram.

VII. Homines, & iumenta saluabis Domine, quemadmodum multiplicasti misericordiam tuam Deus.

Ostendit nunc Propheta, misericordiam Dei maximam esse, quoniam saluat homines, & iumenta, idest, conseruat, nutrit, replet corporalibus bonis, non solum homines, idest, eos qui ratione utuntur, sed etiam iumenta, idest, eos qui instar iumentorum, solo sensu & appetitu ducuntur, quorum malitiam supra explicauit. Et verè infinita, & stupenda est misericordia, & benignitas Dei, qui cum posset impios, & blasphemos iustissimè perdere, & ad nihilum redigere; tamen illo ipso tempore, quo blasphemant, & maledicunt Deo, & mandata omnia Dei præuaricantur, Deus illos quasi manibus proprijs sustentat, portat, & alit, delectationibus replet, solem suum oriri super eos facit, & pluuijs de cælo agros eorum, & hortos rigat. Illud autem, quemadmodum multiplicasti miseri-

cordiam tuam Deus, admirantis est, ac si dicat, O quomodo multiplicasti misericordiam tuam Deus! Nam in hebraico codice habetur, Quam preciosa est misericordia tua Deus. Neque dissentiunt codices græci; & nostra latina editio hunc sensum facile recipit. Est autem optimus commentarius textus originalis, quando ex eo versio nostra explicari potest.

Filij autem hominum in tegmine alarum tuarum sperabunt. VIII.

Dixit de misericordia erga impios, & carnales, quos nomine iumentorum appellandos censuit. Nunc dicit de misericordia erga pios, & spirituales, quos filios hominum vocat: quæ etiam iustitia dici potest respectu impiorum, quos tam eximijs bonis iustè priuandos esse decreuit. Ait igitur, Filij autem hominum in tegmine alarum tuarum sperabunt, idest, iumenta quidem corporali salute contenta esse debent, quam etiam solam nouerunt, & solam appetuerunt. At filij hominum, quasi pulli sub alis gallinæ, ita ipsi sub alis tuis, Deus, amantissimè collecti, & quiescentes, omnia bona à te vno sperabunt. Quibus verbis significatur præcipua quædam prouidentia, & singularis beneuolentia Dei erga pios homines; & contra, summa quædam, & securissima fiducia piorum ad Deum; qualis est gallinæ sollicitudo in fouendis pullis, & pullorum fiducia sub alis gallinæ. Qua similitudine quoniam aptissima est, sæpe utitur idem Propheta, ut Psal. 62. In velamento alarum tuarum sperabo, adhæsit anima mea post te, & Psal. 90. Scapulis suis obumbrabit tibi, & sub pennis eius sperabis. Quam autem dulce sit, & quam anteponendum omnibus humanis delicijs, sub alis Dei foueri, & paternam, vel maternam pietatem ipsius experiri, nemo scit, nisi qui accipit.

Inebriabuntur ab vbertate domus tuæ; & torrente voluptatis tuæ porabis eos. IX.

Pro-

Profectio sub alis Dei in hoc mundo habetur, ubi periculum est à moribus miluorum, & ferarum: at quod sequitur, in cælesti patria nobis dabitur. explicat autem Propheta bona illa ineffabilia eo modo quo potest, id est, corporalibus similitudinibus; & quidem primùm sumit similitudinem ab ipso recipiente: deinde ab ea re, quæ recipitur. Ipse quidem recipiens tunc est contentus, cum est plenus, ut nihil amplius appetat. Ista plenitudo satians omnem appetitum describitur hoc loco aptissimè per ebrietatem.

Qui enim est auidus vini, tum demum est verè satur, cum est ebrius; tunc enim non amplius sitit vinum, sed in somnum resolvitur. Ita igitur & nos, qui in hac vita nunquam satiamur, neque quiescimus, quantumlibet bona temporalia crescant; tum demum pleni, & saturi, ac per hoc beati erimus, cum inebriabimur ab vbertate bonorum, quæ sunt in domo Dei; quia tunc omni appetitu satiato, resolvemur in somnum sempiternæ quietis. Dicit autem inebriabuntur ab vbertate, & non dicit inebriabuntur à vino, quia vult nos intelligere, non accipi hoc loco ebrietatè propriè, sed ut significat plenam satietatè. Deinde adducit similitudinem ab ipsa re, quæ datur, & recipitur, dicens: Et torrente voluptatis tuæ potabis eos. In torrente tria sunt, multitudo maxima aquarum ex montibus descendentium; repentina inundatio, ubi enim paulò ante nihil erat aquæ, repète conspicitur flumen ingens; denique impetus aquarum decurrèntium, & secum omnia obuia rapièntium. Sic erit cælestis beatitudo; aderit multitudo sapientiæ, & scientiæ ex illo monte descendens, de quo dicitur Eccles. 1. Fons sapientiæ Verbum Dei in excelsis, id est, in excelsa monte diuinitatis est fons sapientiæ Verbum Dei: ex quo monte & fonte repentina oritur inundatio in Beatis. Nam qui in hac vita magno labore, & multo tēpore, quasi guttatim sapientiam hauriebamus, ibi repente, & in momento Deo clarè viso affluemus omni scientia, non solum

rerum creaturarum, sed etiam omnium attributorum ipsius Creatoris; quæ abundantia sapientiæ, & scientiæ rapiet animum magno impetu ad amorem & fruitionem summi boni. Neque enim in patria liberum erit diligere, vel non diligere Deum; frui, vel non frui bono tam magno; sed erit felicissima necessitas adhærendi summo bono, & per complexum intimum infinita suauitate fruendi.

Quoniã apud te est fons vitæ, & x. in lumine tuo videbimus lumen.

Reddit rationem, cur ex visione Dei, sit futura in Beatis tanta sapientiæ, & scientiæ inundatio: quia videlicet apud Deum est fons vitæ, qui idem est cum fonte sapientiæ. Deus igitur, qui fons est sapientiæ, hoc ipso fons est vitæ, quia sapere sapientibus est viuere: & quia fons est vitæ, hoc ipso fons est essendi, quia viuere viuèntibus est esse. Dicitur autem fons sapientiæ, vitæ, & essentiæ, quia non habet ab alio, ut sapiat, aut viuat, aut sit; sed ipse est sapientia, est vita, est esse; & omnia alia, quæ vtcunque sapiunt, viuunt, aut sunt, ab illo id habent. Vtitur autem David nomine fontis, ut persistat in metaphora torrentis, quasi dicat, torrente nos potabis, quia apud te est fons unde torrens ille descendit. Dicit autem, apud te est fons vitæ, cum videretur dicere debuiffe, fons sapientiæ; quia voluit ostendere, vitam æternam iustis promissam, atque ut summum bonum ab omnibus desideratam, in hac summa sapientia consistere, iuxta verbum Domini, Ioannis 17. Hæc est autem vita æterna, ut cognoscant te solum verum Deum, & quem misisti Iesum Christum. Addit verò, in lumine tuo videbimus lumen, ut tandem verbis clarioribus explicet quod per metaphoras adumbrauerat. Nam in lumine tuo videbimus lumen, nihil aliud significat nisi in te ipso, qui lux, & fons luminis es, videbimus te lumen inaccessibile, & indeficiens. Nunc enim videmus Deum, sed in speculo creaturarum; in mente nostra, quæ est imago Dei, ratiocinan-

.N 2 do,

do, & discurrendo ab operibus ad opificis notitiam; denique in fide non in specie: tunc autem videbimus Deum in seipso, & ut dicit Apostolus Paulus facie ad faciem, & ut loquitur beatus Ioannes, Videbimus eum sicuti est, non sicut in imagine representatur. Et quoniam, ut idem Ioannes dicit 1. Ioan. 1. Deus lux est, & tenebræ in eo non sunt ullæ, ideo rectè dicitur, in lumine tuo, idest, in ipsa tua diuinitate, quæ lux est non in figuris, & ænigmatibus, videbimus lumen, idest, te ipsum, qui es lux vera, quæ illuminat omnem hominem venientem in hunc mundum. Rectè quoque Theologi ex hoc loco colligunt lumen gloriæ, quod necessarium esse volunt ad Deum videndum. Nam Deus lux quædam est, sed inaccessibleis, ut dicit beatus Paulus 1. Timoth. 6, & ideo nisi mens eleuetur, & confortetur quodam dono Dei, quod vocant lumen gloriæ, non potest obtutum fingere in lucem illam increatam: proinde videbimus quidem lumen, quod est ipse Deus, sed in lumine ipsius, idest, adiuti lumine gloriæ, quod ipse donat ijs, quos ad sui visionem dignatur admittere. Sed prior explicatio videtur magis literalis.

XI. Præ tende misericordiam tuā scientibus te: & iustitiam tuam his qui recto sunt corde.

. Docet nunc Propheta magna ista bona, de quibus hæcenus locutus est, ad solos iustos pertinere, quos paulò ante filios hominis appellavit, cum impios iumentorum nomine vocasset. Vritur quidem Propheta forma loquendi imperatiui modi, sed vim habet apud prophetas ea forma modi indicatiui, ut sæpè diximus. Præ tende, inquit, misericordiam tuam scientibus te, idest, extende hanc magnam misericordiam tuam scientibus, idest, illis tantum, qui te cognoscunt notitia familiaritatis, & amicitia; qui tecum versantur, te inuocant, qui audiunt te in præceptis tuis, & quos tu audis in precibus eorum. Quo modo loquendi dicitur in

Euangelio Matth. 5. Amen dico vobis, nescio vos: Et iustitiam tuam his qui recto sunt corde, idest, extende, siue porrige hæc misericordiam, quæ simul est corona iustitiæ, his qui recto sunt corde, idest, iustis, & pijs, qui cor habent rectum, & conforme rectitudini tuæ, & ideo placent illis omnia mandata tua, & iudicia tua. Idem enim repetit Propheta more suo diuersis vocabulis; nam scientes Deum notitia amicitia, ipsi sunt recti corde, & felicitas æterna misericordia, & iustitia est; misericordia quidem, quia ex dono gratiæ facti sumus iusti ex impijs, & amici ex inimicis, & recti corde ex distortis, & obliquis, & operarij bonorum operum, ex operarijs iniquitatis: sed tamen eadem felicitas est etiam corona iustitiæ, & merces bonorum operum. Nam ut habetur in Concilio Arausicano 1. can. 16. Debetur merces operibus bonis, si fiant; sed misericordia, quæ non debetur, præcedit ut fiant.

Non veniat mihi pes superbia, & manus peccatoris non moueat me. **XII.**

. Sollicitus iam de se Propheta, ne à tanto bono fortè excidat, precatur Deum pro dono perseverantiæ, ac præsertim contra vitium superbiæ, cui obnoxij sunt magni viri, qualis ipse erat. Non veniat, inquit, mihi pes superbiæ, idest, ne quæso finas, ut mihi appropinquet pes superborum, ne fortè manus ipsorum moueat me verbo, vel exemplo, vel alia tentatione, & deiciat de statu gratiæ in foueam peccati. Nomine superbi, & peccatoris, cuius pedem, & manum, idest, cuius accessum, & potentiam timet, intelligitur præcipue Diabolus, qui est Rex super omnes filios superbiæ; & deinde etiam ministri, & satellites eius. Posset etiam cum sancto Augustino ita exponi, Non veniat mihi pes superbiæ, idest, non contingat mihi, ut incipiam habere pedem superbiæ, idest, affectum superbiæ; & manus peccatoris non moueat me, idest, & operatio peccatoris non inducat me ad consensum peccati, & sic

& sic vel ex meo vitio, vel ex tentatione aliorum deijciar de statu meo, & cadam.


XLIII. Ibi ceciderunt qui operantur iniquitatem, expulsi sunt, nec potuerunt stare.

Reddit rationem cur tantopere timeat sibi à superbia; quoniam, inquit, ibi ceciderunt, qui operantur iniquitatem, idest, in superbia initium sumpsit omnis perditio, vt ait Tobias c. 4. nam & primus Angelus cū socijs suis, & primus homo cum vxore sua, ob superbiam ceciderunt, & per eos peccatum in mundum intrauit. Et postquam ceciderunt à iustitia ad iniquitatem, expulsi sunt à Deo à loco felicitatis, & deiecti in profundum miserationum. Nam Deus superbis resistit, humilibus autem dat gratiam, vt dicunt Apostoli Petrus in epist. 1. cap. 5. & Iacobus cap. 4. Nec potuerunt stare in loco illo felicitatis, in quo posuerat illos Deus, vt ad maiora prouheret, si in bono perseuerarent.

PSALMVS XXXVI.

Titulus, & Argumentum.

Psalmus ipsi David.



No titulo nihil est noui. Continet autem hic Psalmus pharmacum saluberrimū ad curandos animos pusillorum, qui facilè scandalizantur, cū vident in hoc mundo impios prosperari, & inde dubitare incipiunt de prouidentia Dei, & animari ad imitanda opera impiorum. Non est in hoc Psalmo continuata quædam oratio, sed collectio quædam sententiarum, quasi aphorismorum, & ideo vt facilius memoria custodiretur, per Alphabetum digestus est, ita vt primus, quasi aphorismus continēs duos versiculos, incipiat à prima litera; secundus à secunda, & sic de alijs. Quas Belarm. in Psal.

litteras notabimus, vt appareat distinctio sententiarum.

Explicatio Psalmi 36.

Noli æmulari in malignantibus, neque zelaueris facientes iniquitatem. *Aleph: I.*

Quoniam tanquam fenum vel lociter arescent; & quemadmodum olera herbarum cito decident. *II.*

Admonet Propheta, tanquam spiritualis medicus, fideles, vt si videant impios prosperè agere, non prouocentur ad eos imitandos, neque irascantur, aut indignantur aduersus Deum, quasi iniustum: quoniam prosperitas impiorum non diu durabit, imò velocissimè transibit; & tunc apparebit iustitia, & prouidentia Dei, quæ impios non finit diu exultare, & lætari. Verba tamen sunt obscuriora, propter constructionem verborum cum præpositionibus, quæ hebraismum, vel græcismum redolent; sed conabimur perspicuam sententiam reddere. Noli æmulari in malignantibus, idest, noli prouocari ad æmulationem, siue, noli fieri æmulus, & rivalis malignorum. In hebræo est, ne irascaris, vel vt sanctus Hieronymus reddit, ne contēdas cum malignantibus. Sed idem est sensus. Loquitur enim non de contentione, & pugna, quæ fit gladio, vel hasta; sed de ira, & contentione æmulationis, quomodo quidam certant in theatro carminibus canendis, alij in agone cursu equorum, vel currum, & irascuntur, nisi vincant. Itaque sensus est, ne contendas cum malignantibus in temporalibus bonis per fas & nefas acquirendis, neque irascaris si minus bene æmulatio ista succedat. Quod sequitur, Neque zelaueris facientes iniquitatem, idem est ac si dictum fuisset, neque indigneris succensus zelo super operantibus iniquitatem, iniustum videlicet iudicans, vt Deus tantis bonis afficiat iniquos. Clarius id habetur in Psal. 71. Quam bonus Israel

Deus his, qui recto sunt corde: mei autem penè moti sunt pedes, penè effusi sunt gressus mei, quia zelavi super iniquos pacem peccatorum vident, idest, Deus quidè bonus videtur his qui conformes sunt voluntati ipsius: sed ego, qui non tanta rectitudine polleo, penè cecidi in scandalum, & dubitationem, dum zelo succendor quasi pro iustitia, & irascor super impiorum prosperitate, dum cogito pacem, & reliqua bona, quæ possident, cum tormentis & pœnis dignissimi sint. Sequitur, Quoniam tanquam fœnum velociter arescent, & quemadmodum olera herbarum cito decident. Aptissima similitudo ad ostendendam breuitatem temporalis prosperitatis. Fœnum siquidem, & olera non habent profundas radices, ut cedri, & palmæ, quibus comparari solent iusti. Iustus, inquit, ut palma florebit, sicut cedrus libani multiplicabitur. Inde fit ut fœnum, & olera continuo arescant, & putrescant; at palmæ, & cedri diutissimè perseuerant. Neque dixit Propheta, prosperitatem impiorum cito perituram, sed ipsos impios citissimè perituros: ipsis autem pereuntibus, dubium non est quin omnis eorū gloria & prosperitas pereat. Et quamuis nonnumquam impij multos annos vivant, & prosperè illis omnia succedant; tamen multitudo illa annorum nihil omnino est, si ad diuturnitatem iustorum, & felicitatis ipsorum comparetur. Nam iusti in perpetuum viuent, & In memoria æterna erit iustus, & nihil est diuturnū quod habet finem. vide Sapientiæ 3. si vis ad viuum depictam videre velocitatem, & breuitatem rerum omnium temporalium. Transierunt, inquit, omnia tanquam umbra, & tanquam nūcius præcurrens, & tanquam naus, quæ pertransit fluctuantem aquam, quæ, cum præterierit, non est vestigium inuenire; aut avis, quæ transuolat in aere, eius nullum inuenitur argumentum itineris, sed tantum sonitus alarum verberans leuem ventum; aut tanquam sagitta emissa in locum destinatum, diuisus aer in se continuo reclusus est, ut

ignoretur transitus illius, sic & nos nati continuo desuimus esse, &c.

Spera in Domino, & fac bonitatem, & pascaris in diuitijs eius. *Beth. III.*

Delectare in Domino, & dabit tibi petitiones cordis tui. *IIII.*

Absterruit nos à malo David in primo aphorismo: nunc in secundo incitat ad bonum, quasi dicat, Si vis beatus & felix esse, intellige quis sit auctor omnis felicitatis, & ab eo expecta, ab illo spera, non ab alijs. Spera, inquit, in Domino. Ipse enim, qui Dominus rerum omnium est, ipse solus res suas verè dare potest. Sed ut spes firma sit, & non confundaris, fac bonitatem bene operando, iuxta Dei mandata. Quis enim facile sperare audeat in eo quem se it inimicum sibi esse? & tum demum securus inhabitare terram; quis enim te expellet, si amicus eius fueris, cuius est terra, & plenitudo eius? quin etiam pascaris in diuitijs eius; terra enim ad te alendum abundè proferet fructus suos. Sanctus Hieronymus ex hebræo legit, fide, pro diuitijs. Et verè in textu hebraico est emuna, quod fidem, aut veritatem significat. Sed Septuaginta Interpretes non videntur in suo textu habuisse, emuna, sed, hamona, quæ vox diuitias significat, & patet ex hoc eodem Psalmo versu 16. vbi legitur, Melius est modicū iusto super diuitias peccatorum multas. Quamuis etiam si legamus, pascaris fide, aut veritate erit sensus, pascaris in terra fide idest, fideliter, & verè, quod est ferè idem, cum, pascaris in diuitijs eius. Ille enim fideliter, & verè pascitur in terra, cui nō deest abundantia fructuum terræ, quæ sunt eius diuitiæ. Sed ut quis bene operetur, & sit amicus Dei, ita ut in illo securè confidat, necessaria est charitas, ideò dicit, Delectare in Domino, idest, amare Deum ex corde, & ille sit deliciæ tuæ; & tunc securus eris, quia dabit tibi petitiones cordis tui, idest, quicquid cor

אמונה
אמונה

tuum desiderabit. At, inquires, multos nouimus, qui sperabant in Deo, & faciebant bonitatem, & delectabantur in Domino; & tamen non sinebantur habitare in terra, nec pascebantur in diuitijs eius, nec dabat illis Deus petitiones cordis eorum. Nam, ut omit- tam multitudinem propè infinitam fide- lium, quos videmus quotidie in sum- ma egestate vitam degere: certè bea- tus Paulus sperabat in Domino, & fa- ciebat bonitatem, & tamen, ut ipse te- statur 1. Cor. 4. ut purgamentum mun- di, & peripsoma eiciebatur, & esurie- bat & sitiebat, & nudus erat. Et cum delectaretur in Domino, non dabat ei Dominus petitiones cordis sui, cum ter rogauerit, ut auferretur ab eo sti- mulus carnis, & non impetrauerit, 2. Corinth. 12. Respondeo, maximam partem illorum, qui in summa egesta- te versantur, non sperare in Domino sicut oportet, nec obseruare mandata eius, ut ipse iubet; multo etiam minus delectari in Domino: nam præter pro- missiones huius Psalmi, Christus ipse Matth. 6. apertissimè dicit, Respicite volatilia cæli, quæ non serunt, neque metunt, neque congregant in horrea, & Deus pascit illa: nonne vos magis pluris estis illis? & infra, Quærite pri- mum Regnum Dei, & iustitiam eius, & hæc omnia adiciet vobis. Itaque dubium esse non potest, Deum proui- surum suis omnia necessaria, si seriò illi confidant in Deo, & mandata eius obseruent. Quod si aliquando id non fiat, ut dicebatur de Apostolo, ratio est, quia Deus dat illis aliquid melius, & quo illi magis contenti sunt, idest, meritum ingens patientiæ. Idem enim beatus Paulus, qui scripsit suam egesta- tem, aliasque tribulationes; scripsit etiam, Repletus sum consolatione, su- perando gaudio in omni tribulatione nostra, 2. Corinth. cap. 7. Et si non de- dit ei Dominus petitionem cordis sui, ut auferret stimulum carnis; dedit ei gratiam abundantem, per quam sti- mulus ille conuerteretur in instrumen- tum triumphii. Itaque non dedit rem paruum, ut daret rem magnam, quam

sciebat esse veram petitionem cordis ipsius.

Reuela Domino viam tuam, *Gimel.*
& spera in eo, & ipse faciet. *V.*

Et educet quasi lumen iusti- *VI.*
tiam tuam, & iudicium tuum
tanquam meridiem.

Propinavit Propheta, ut bonus me- dicus, pharmacum contra morbum interiorem famis, sitis, & similium ma- lorum: nunc proponit aliud contra morbum externum persecutionum, & calumniarum. Quando enim ista no- bis eueniunt, non prohibemur nos de- fendere, & calumnias propulsare, sed præcipuum remedium esse debet ora- tio ad Deum, & fiducia in Deo: quod obseruauit Susanna, quæ condemnata ad mortem per calumniam, flens sus- pexit ad cælum, inquit Scriptura Da- nielis 13. Erat enim cor eius fiduciam habens in Domino. Reuela, inquit Da- uid, Domino viam tuam, & spera in eo, idest, aperi in oratione coram Deo opera tua, & confide in Domino, com- mittens illi causam tuam; & ipse fa- ciet, nimirum iudicium, & iustitiam. Ipse inueniet rationem, qua detega- tur falsitas testium, qui aduersus te di- xerunt testimonium; & qua innocen- tia tua manifesta fiat. Id quod clarius habetur in sequenti versiculo. Et edu- cet quasi lumen iustitiam tuam, idest, Deus admirabili prouidentia suafaciet, ut iustitia tua, idest, ius tuum, quod erat quasi in tenebris sepultum pro- pter calumnias persecutorum, emer- gat & clarissimè conspiciatur. quo mo- do lumen cernitur, cum candela ac- cenditur, vel cum profertur ex clausa & obscura laterna. Et repetens idem alijs verbis, addit, Et iudicium tuum tanquam meridiem, idest, producet in apertum & clarum idem ius tuum, ut luceat, & conspiciatur ab omnibus, ut conspicitur Sol meridianus. Quod quidem in Susannæ iudicio manifestè apparuit. Nam sicut initio iustitia, & innocentia Susannæ in tenebris erat, quando à duobus testibus, contesti-

bus, & omni exceptione maioribus conuicta erat; ita paulò post, prouidentia Dei excitante spiritum Danielis, & per eum demonstrata falsitate testium ex ore proprio ipsorum, tam clarè apparuit innocentia Susannæ, & iniquitas testium, ut continuo, & ipsa liberata fuerit, & illi damnati à populo mala mortè perierint. Quod attinet ad verba, illud, reuela, Sanctus Hieronymus, & Iudæorum magistri ex hebræo vertunt, volue, siue reuolue, ut sésus sit rei iuce in Deum causam tuam; iuxta illud, iacta cogitatum in Dominum. Sed reuela, quod nos habemus ex versione Septuaginta Interpretum, hij nò repugnat hebraicæ voci, gol, quod significat reuolue; nam & reuoluitur, quod in alium reijcitur; & reuoluitur etiam quod aperitur, & explicatur, ut cernatur: quod coincidit cum reuela, siue aperi. Vtraque expositio vera est, sed nos latinam editionem, & commentarios Græcorum, & Latinorum Patrum sequi debemus, qui, reuela, nò rei iuce, exposuerunt. Porro cum reuelare aliquid iubemur Deo, non ideo iubemur, quia Deus aliquid nesciat; sed quia vult orari à nobis, & per orationem explicari quæ volumus, ut nos ipsi intelligamus, qua de causa diuino auxilio egeamus. De vocibus, iustitia, & iudicium, notum est illa variè in varijs locis accipi. Sed hoc loco, iustitiam certum est accipi, pro iure; iudicium autem vel accipiendum est etiam pro iure; cum eadem res agatur; vel pro iusta sententia, quæ iuri debetur, iudicium enim actus iustitiæ est.

Daleth. Subditus esto Domino, & ora eum.

VII. Noli æmulari in eo, qui prosperatur in via sua, in homine faciente iniustitias.

Verba illa, subditus esto Domino, & ora eum, in editione græca & latina pertinent ad versiculum superiorem: in hebræo verò codice sunt initium versiculi, ut manifestè apparet

ex litera quarta Alphabeti, quæ hic habetur. Nos, ut ostenderemus Psalmum esse Alphabeticum, posuimus ea verba sub litera Daleth, & tamen non adiunximus illi numerum versiculi septimi, ne mutaremus distinctionem versiculorum, quam in editione latina habemus, & iuxta quam distinctionem Psalmi canuntur in Ecclesia. Sensus huius sententiæ, quæ quartus aphorismus spiritualis numerari potest, hic est. Vide, ut sis semper Deo ad nutum obediens, & ora eum assidue; ne fortè si videris hominem felicem in seculo, & simul iniustum, eius felicitas tentet te, & inducat ad iniustitiam. Verè enim magna tentatio est felicitas iniquorum; sed facile superatur, cum quis habet Deum semper ante oculos cordis, & illi per obedientiam, & orationem adhæret. Nam qui Deo ita adhæret, respicit quasi ex alto felicitatem iniquorum, & videns eam modicam & fugacem, facile contemnit, ac despicit. Ait igitur, Subditus esto Domino, & ora eum, id est, exhibe Deo puram, ac simplicem obedientiam, & cum illo per orationem frequenter versare, & colloquere. Sanctus Hieronymus ex hebræo vertit, tace Domino, & expecta eum. Sed idem est sensus, quem Septuaginta Interpretes pluribus verbis explicare voluerunt. Illud igitur, tace Domino, quod est in hebræo, significat non murmures contra Deum, etiam si nescias cur ille aliquid iubeat, vel faciat, sed, ut subditum decet, silens obedias in omnibus. Illud autem, expecta eum, significat, pete in oratione, & patienter expecta. Dabit enim Dominus, quod petis, sed quando opportunum iudicabit. Noli æmulari in eo qui prosperatur in via sua, in homine faciente iniustitias; id est, noli fieri æmulus, & quasi rivalis hominis, qui in via sua, id est, in actionibus suis prosperatur, hominis, inquam, iniusti, & iniqui, qui malefaciendo prosperatur. S. Hieronymus ex hebræo vertit, qui facit quæ cogitat, pro eo quod nos ex græco habemus,

He. VIII. bemus, faciente iniustitias. Sed vox, **mezimoth**, quamvis descendat à verbo, **zamma**, quod est cogitare: tamen significat etiam, scelera, ut idem Sanctus Hieronymus eandem vocem interpretatur in Psal. 25. vers. 12. & Hierem. 11. vers. 15.

He. VIII. Define ab ira, & derelinque furorem, noli æmulari, ut maligneris.

IX. Quoniam qui malignantur exterminabuntur, sustinentes autem Dominum, ipsi hæreditabunt terram.

Hæc sententia est quasi repetitio, & declaratio primæ sententiæ; in toto enim Psalmo res eadem sæpè repetitur, & inculcatur, ut illustrior fiat, & memoriæ magis inhæreat. In primo versu dixerat, Non zelaueris facientes iniquitatem: id ipsum nunc dicit clarius, cum ait, Define ab ira, & derelinque furorem, id est, cum videris impiū in terra florere, non irascaris, neq; incipias furere, & dicere, Quare iste iniquus prosperatur? ubi est iustitia Dei? ubi prouidentia illius? Item in primo versu dixerat, Noli æmulari in malignantibus: hoc ipsum repetit, & explicat dicens, Noli æmulari, ut maligneris, id est, noli æmulando malignos fieri socius malignantium. Noli imitari opera iniusta eorum, quorum felicitati inuides. & addit, Quoniam qui malignantur, exterminabuntur; ut declaret quod antea dixerat, quoniam tamquam scœnū velociter arescent. Adiungit postea, sustinentes autem Dominum, ipsi hæreditabunt terram, ut repetat, & declaret, quod ibi dixerat, Spera in Domino, & inhabita terram. Sustinent enim Dominum, qui patienter expectant promissiones eius, & securi expectant; quoniam fidelis & potēs est Dominus, qui promisit. Et ideo sine ullo dubio, qui malignantur, etiam si ad tempus florere videantur, nō diu florebut, sed exterminabuntur de terra, & in gehennā ad æternam infelicitatem detrudētur:

qui autem sustinent se ab iniquitate, & à Domino mercedem suam sperant, ipsi hæreditabunt terram, id est, ipsi stabili possessione terram obtinebunt, quasi propriam hæreditatem, quæ ab eis nunquam auferetur. Verè enim homines pii cum migrant ad Deum, non amittunt possessionem terræ, sed acquirunt cælum, & terram, cum dicatur de eis, Super omnia bona sua constituet eos, Matth. 24.

Et adhuc pusillum, & non erit peccator, & quæres locum eius, & non inuenies. **Van. X.**

Manfueti autem hæreditabunt terram, & delectabuntur in multitudine pacis. **XI.**

Quia dixerat, malignantur exterminabuntur, addit hoc breui futurum. Et adhuc, inquit, pusillum temporis pertransibit, & peccator, qui videbatur felix, nō apparebit in terra: & quæres locum eius inter homines, & non inuenies, quia videlicet periit omnino, & quasi arbor infructuosa radicitus euulsus est. Manfueti autē, id est, illi qui non indignantur, nec irascuntur Deo, cum vident impios prosperari; sed patiēter ferunt, & tolerāt id quod Deo placet, hæreditabunt terram, non solum hanc ubi peregrinantur, sed etiam illam viuentium, quæ sola propriè terra est, id est, firma, & stabilis, unde & Dominus ait Matth. 5. Beati mites, quoniam ipsi possidebunt terram: & quia terra illa dicitur Hierusalem, id est, visio pacis, cum omnes inimici longissimè ab illa absint; ideo delectabuntur in multitudine pacis, id est, fruentur pace multa, quia pax illa erit cum multitudine magna incolentium terram illam, & durabit multo tempore, vel potius æterno tempore, & sic delectationem habebunt, quam pax adferre secum solet.

Observabit peccator iustum, & stridebit super eum dentibus suis. **Zain. XII.**

Do-

XIII. Dominus autem irridebit eum: quoniam prospicit quod veniet dies eius.

Monet S. Propheta iustum, vt non multum formidet insidias iniquorum, quia Deus vigilat ad custodiam eius. Obseruabit, inquit, peccator iustum, idest, attentè respiciet peccator omnes actiones iusti, vt inueniat aditum ad eum perdendum. Et stridebit dentibus suis super eum, idest, instar famelici canis desiderabit interitum eius, ac præ iracundia, & indignatione dentibus frendebit. Dominus autem irridebit eum, idest, Dominus qui omnia prospicit, & in cuius manu sunt omnia, ita vt non cadat folium in terram nisi ipso iubente, vel permittente, irridebit eum. Quoniam prospicit, quod veniet dies eius, idest, irridebit eum, quoniam videt instare diem interitus eius, & illum ante rapiendum, quàm iusto nocere potuerit. Nam etiam si fortè Deus permittat iustum à peccatore occidi; tamen prius peccator animam suam occidit, quàm iusti corpus occidat: & quoniam mors iusti preciosa est in conspectu Domini, & lucrum est nõ detrimentum; mors autem peccatorum pessima, & ad mortem sempiternam peccatorem detrudit, ideo semper ante rapitur peccator, quàm iusto nocere potuerit. Proinde irridendus meritò est, quia dum alterius interitum procurat, imminentem interitum suum non videt.

Chet. Gladium euaginauerunt pec-

XV. catores, intenderunt arcum suum.

XVI. Vt deiciant pauperem & inopem, vt trucident rectos corde.

XVII. Gladius eorum intret in corda ipsorum, & arcus eorum confringatur.

Declarat hic Propheta, quod obscurius dixerat in superioribus versiculis literæ Zain. Quod enim ibi dixit, obseruat peccator iustum, hic declarat,

dicent, Gladium euaginauerunt peccatores, intenderunt arcum suum, idest, stant peccatores armati districtis gladijs, & arcubus extensis, obseruantes quando sit tempus occidendi iustum; vt videlicet tunc deiciant arcu, & trucident gladio iustum, qui pauper & inops est, & rectus corde. Sed Deus, qui prospicit omnia ex alto, facit vt gladius cõuertatur in corda ipsorum, & arcus eorum conterantur, & ipsis solis noceant, & sic irridebit eos. Obseruandum hoc loco est, quod hic dicitur de gladio & arcu, posse intelligi tum de arcu, & gladio ferreo, tum de gladio, & arcu linguæ. Sæpè enim peccatores occidunt iustos, vel certè conantur occidere calumnijs, & falsis testimonijs, sæpè etiam vero gladio, & arcu. Item notandum est, verbum illud, vt deiciant, rectè sic positum esse in editione Sixti V. Pontificis, cum antea haberetur in codicibus vulgatis, vt deicipiant: nam cum in hebraico, & græco codice habeatur, vt deiciant, & sic legerint veteres Patres, & hoc requirat coniunctio cum arcu, & gladio, & denique non deessent codices antiqui latini manuscripti, qui haberent, vt deiciant, facile iudicari potuit, errore librariorum, ob literarum similitudinem, irrepsisse, decipiant, pro, deicipiant. Rursum considerandum est, iustum hoc loco dici rectum corde, vel vt est in hebræo rectum via, quia iustus cor habet conforme legi Dei, quæ est rectissima; & quia eadem lex est via recta, per quam ambulare debemus dum operamur, ideo rectus corde dicitur etiam rectus via, quia nunquam aberrat à recta via, quæ est lex Domini. Præterea notandum hoc loco, iustum dici pauperem, & inopem, vel quia omnes iusti sunt pauperes spiritus; & licet interdum diuitijs abundet, intelligunt eas diuitias non esse propriè suas, cum de eis rationem reddituri sint Deo; vel certè non loquitur Dauid de omnibus iustis, sed solum de pauperibus, & abiectis, qui à potentibus opprimuntur. Porro inter pauperem & inopem hoc interest quod ad voces

עני mus pauperem, significat humilem afflictum, mitem; ebion, pro qua voce habemus, inopem, significat propriè egenum, qui omnia desiderat, quia omnibus caret. Deniq; illa imprecatio, gladius eorum intret in corda ipsorum, est prædictio potius, quàm imprecatio. Tunc autem gladius peccatoris extensus aduersus iustum, intrat in corda peccatoris, quando peccator dum nocere intendit iusto, sibi ipse magis nocet: dum enim fortè spoliat iustum pallio, se ipse spoliat fide, & charitate: & dum iustum priuat vita carnis, se ipse priuat gratia Dei, qui est vita animæ: & dum iustum calumnijs suis trahit in carcerem, se ipse præcipitat in gehennam.

Teth. Melius est modicum iusto super diuitias peccatorum multas.
XVII.
XVIII. Quoniam brachia peccatorum conterentur, confirmat autem iustos Dominus.

Ne iusti pauperes iniquis diuitibus inuideant, & dimissa iustitia ad perpetrandam iniquitatem accedant, munit eos David his duobus versiculis. Melius, inquit, est modicum iusto super diuitias peccatorum multas, idest, plus prodest iusto modica substantia, quàm peccatori ingentes diuitiæ: proinde felicior est iustus tenuis, quàm peccator locuples; & ideò magis expetenda est iustitia cum paruis opibus, quàm multæ copiæ cum iniustitia. Ratio est, quia iustus dirigitur à Deo, ut sciat uti diuitijs, non est auarus, non est prodigus, ac propterea non eget, neque grauatur arte alieno, neque retinet ociosas opes, vnde vel in superbiam erigatur, vel ad luxuriam prouocetur. Peccator autem superbus, & prodigus est, nec scit uti diuitijs; inde semper eget, semperque debet, nec diu statum suum conseruare potest. Atque hoc est quod sequitur, Quoniam brachia peccatorum conterentur, confirmat autem iustos Dominus, idest, potentia, &

fortitudo peccatorum facile deficiet, quia nititur brachio carnis, nec diuitiæ illum iuuare poterunt. Iusti autem fortitudo & potentia non potest deficere, quia nititur brachio Dei, Deus etiam, qui amicus iustorum est, illum confirmat, vel ut clarius rem explicat vox hebraica, illum sustentat. Deniq; peccator non obstaculis maximis suis diuitijs, non effugiet æternum interitum, quia cùm morietur nihil secum asportabit, neque descendit cum eo gloria eius. Iustus autem, qui non in diuitijs terrenis, sed in Deo confidit, in sempiternum viuet.

Nouit Dominus dies immaculatorum, & hæreditas eorum in XIX. æternum erit.

Non confundentur in tempore malo, & in diebus famis saturabuntur. XX.

Confirmat Propheta quod paulò ante dixit de felicitate iustorum, etiam si modicas opes habeant. Nouit, inquit, Dominus dies immaculatorum, idest, approbat Dominus vitam iustorum, ei que fauet, & benedicit, & ideò dies eorum diuturni erunt, & hæreditas eorum cum ipsis diutissime conseruabitur. Non confundentur in tempore malo, idest, tempore sterilitatis, & penuriæ non confundentur, quia non cogentur erubescere mendicando panem; & in diebus famis saturabuntur, idest, non solum non erubescunt mendicando tempore communis famis, sed etiam habebunt ex suis copijs, vnde comedant ad satietatem. Sed hæc interdum implentur in hoc seculo, semper autem implebuntur in futuro. Ventura enim est post hanc vitam incredibilis quædam sterilitas, quando nemo poterit ferere, vel metere, & diues in inferno guttam aquæ desiderabit, nec obtinebit. Tunc igitur immaculati, qui nihil dimiserunt in terra, sed in cælum omnia transtulerunt, inuenient æterpam hæreditatem; neque con-

confundentur mendicando cum stultis virginibus, date nobis de oleo vestro; sed satiabuntur cum apparuerit gloria Domini.

Quia peccatores peribunt.

Caph. Inimici verò Domini mox vt
XXI. honorificati fuerint & exaltati,
deficientes quemadmodum fumus deficient.

Tres primæ dictiones pertinent ad versiculum superiorē in editione græca & latina: sed voluimus eas hoc loco ponere, vt appareat artificium Prophetæ, qui per literas alphabeti psalmum digessit. Nam in illa particula, quia, posuit literam Caph, quæ in alphabeto sequitur; & inde incipit in hebræo nouus versus. Ergo illa verba, Quia peccatores peribunt, reddunt rationem, cur immaculati pacificè possidebunt hereditatem in terra; & in tempore famis saturabuntur. Id enim fiet, quia peccatores, qui eos perturbare, eisque bona sua diripere solebant, peribunt. Quod autem sequitur, Inimici verò Domini mox vt honorificati fuerint, & exaltati, deficientes quemadmodum fumus deficient; respondet duobus versiculis superioribus, vt hic sit sensus. Immaculati homines, tanquam amici Dei, habebunt æternam hereditatem, & in tempore malo non confundentur: inimici verò Domini, quales sunt omnes peccatores, è contrario habebunt breuissimam felicitatem; statim enim atque exaltari cœperint, euanescent instar fumi, qui dum exaltatur consumitur, neque vestigium ullum post se relinquit. Illud verbum, exaltati, à S. Hieronymo legitur, Sicut Monocerotes, ab alijs, Agni, quæ sunt res diuersissimæ. In hebræo nunc habetur Carim, quod propriè Agnos significat, & ad sententiam huius loci nihil facit. Sanctus Hieronymus videtur legisse Carem, & ideo vertit, sicut Monocerotes; nam Monocerotes in libro Num. cap. 23. & 24. dicitur, reem, & in lib. Iudic. cap. 38. dicitur, rem, & tunc

sensus est, quod inimici Domini cum honorificati, & gloriantes fuerint sicut Monocerotes, tanquam fumus consumuntur. Sed Septuaginta Interpretes non legerunt Carim, neque Carem, sed Caru; & ideo rectè verterunt, Cum exaltati fuerint. quæ lectio optima est, eamque noster Interpres etiam sequutus est, & tota frequentat Ecclesia.

כרים

Mutuabitur peccator & non
soluet: iustus autem miseretur,
& tribuet.

Lamed.
XXII.

Quia benedicientes ei hereditabunt terram, maledicientes autem ei disperibunt.

XXIII.

Confirmat quod supra dixerat, Melius est modicum iusto super diuitias peccatorum multas. Nam sapissimè accidit, vt peccator quamuis ditissimus, mutuo accipiat pecuniam, & tamen non restituat: quia volunt diuites peccatores supra censum lautè viuere, vel superbè vestire, aut habitare; inde semper laborant ære alieno grauati: Iustus autem, qui vt supra diximus, scit vt diuitijs, etiam si modicum habeat, tamen ex modico illo habet, vnde miseretur pauperum, & tribuat sine spe recuperandi. Quia benedicientes ei, Deo videlicet, vt Sanctus Augustinus exponit, hereditabunt terram, & sic semper habebunt, vnde tribuant: maledicientes autem ei, tanquam blasphemii, & ingrati, disperibunt, vt etiam si velint tribuere, non possint. Sanctus Hieronymus legit passiuè, quia benedictio ab eo, nimirum à Deo, hereditabunt terram, maledicti ab eo disperibunt. Et quidem verba hebraica modica facta mutatione punctorum, tam actiuè, quam passiuè exponi possunt, & vna sententia aliam infert. Qui enim Deum in omnibus rebus benedicunt, ab eo quoque benedicuntur; & qui Deo maledicunt, maledictionem em ipsius consequuntur.

Apud Dominum gressus hominis
dirigentur, & viam eius voluet.
Mem.

XXIV.

Cum

כרים

כרים

כרים

כרים

XXV. Cum ceciderit non collidetur,
quia Dominus supponit manum
suam.

XXV

Incipit hoc loco Propheta exponere singularem providentiam erga iustos, ut tanto magis eos confirmet, ne forte prosperitas impiorum eos alliciat ad peccandum. Dicit igitur, vitam iustorum à Domino dirigi, & custodiri. Apud Dominum, inquit, gressus hominis iusti, ille diriget actiones, & opera iusti, qui iustum fecit. Et vitam eius volet, idest, hinc fiet, ut iustus viam Domini velit, diligat, libenter sequatur: vel, Deus volet viam iusti, idest, approbabit actiones, & opera eius. Prior explicatio Sancti Augustini, posterior Euthymij est. Illud, apud Dominum, in textu originali est, à Domino, & sic legit Sanctus Augustinus, & Græci Interpretes. sed verba nostræ editionis, ut non dissentiant a textu originali, sic explicanda sunt, Apud Dominum, idest, in secreto consilio Domini dirigentur, quod est idem cum illo, à Domino dirigentur. Sequitur, Cum ceciderit non collidetur, quia Dominus supponit manum suam. Potest hoc referri ad miseras corporales, & etiam ad miseras animæ. Nam si iustus ceciderit in aliquam afflictionem, & tribulationem, quæ sunt quasi foueæ, vel saxa, vel lulum in via vitæ huius, non collidetur, idest, non omnino succumbet, aut opprimetur, quia Dominus supponit manum suam ne lædatur, vel, ut est in hebræo, quia Deus sustentat eum manu sua, idest, auxilio, & providentia sua. Et si forte ceciderit in tentationem peccati, non collidetur, idest, non perveniet ad consensum culpæ lethalis, nec amittet patientiam, aut fidem, aut aliam virtutem, quia Dominus auxilio gratiæ suæ sustentabit eum.

Nun.

XXVI.

Junior fui etenim serui, & non vidi iustum derelictum, nec semē eius quærens panem.

XXVII. Tota die miseretur & commodat, & semen illius in benedictione erit.

: Probat ab experientia sua, quod supra dixerat, iustos, in tempore malo non confundendos, & in diebus famis saturandos. Junior fui, inquit, vel, ut expressius habetur in hebræo, puer fui, & postea senui, & in tam longo tempore numquam vidi iustum derelictum à Deo, ita ut gravi inopia premeretur, nec vidi semen eius, idest, filios eius quærentes, & mendicantes panem. Sed contra potius vidi, quod iustus tota die miseretur, & commodat, idest, omni tempore ita abundat, ut vel ex misericordia donet, vel certè mutuo, aut commodato det proximis de facultatibus suis. Quare semen illius, idest, filij eius non solum non mendicabunt panem, sed in benedictione erunt, idest, benedicti à Deo copijs abundabunt, vel ab omnibus benedicentur, tanquam filij optimorum parentum. Obserua circa verba, illud, etenim, in hebræo esse, gam, quod significat, etiam, ut sensus sit, puer fui, & etiam senui. In græco quidem habetur γὰρ, etenim, sed accipi potest, pro, etiam. Obserua præterea non repugnare hanc sententiam veritari, etiam si videamus in Ecclesia multos fideles mendicantes panem. Nam mendicantes religiosi spontè mendicant amore paupertatis, non necessitate inopiæ, neque derelicti dici possunt, cum Deus eos mirabili providentia sua aliat, & sustentet. Cateri mendicantes, ut plurimum non sunt filij eorum, qui consueverint misereri aliorum, & donare: ad hos enim propriè hæc promissio pertinet. Sæpè etiam neque iusti sunt ipsi, neque filij iustorum: denique ut supra diximus, si qui verè iusti, & sperantes in Domino derelicti videntur, & quærentes micas panis, ut Lazarus de Euangelio: ij melius aliquid à Domino acceperunt, quàm sit copia rerum temporalium: neque mutarent meritum patientiæ cum omni temporali felicitate.

De-

Samech. Declina à malo & fac bonum,
XXVIII. & inhabita in seculum seculi.

XXIX. Quia Dominus amat iudiciū,
& non derelinquet sanctos suos:
in æternum conseruabuntur.

Ex ijs, quæ dixit paulo ante, se fuisse expertum à pueritia vsque ad senectutem; concludit per modum adhortantis, ac dicit, Declina à malo, & fac bonum, quæ sunt duo prima præcepta iustitiæ, & inhabita in seculum seculi, id est, vide ut iustus sis, & securus inhabitaabis terram vsque in sempiternum. Et reddit rationem; cur iusti terram perpetuò habitaturi sunt. Quoniam, inquit, Dominus amat iudicium, id est, iustissimus est, & iuste iudicat, & ideo non derelinquet sanctos suos, id est, iustos seruos; ideo affirmo, quòd in æternum conseruabuntur. Hæc promissio pertinet quidem aliquo modo ad hanc vitam, in qua per varias successiones iusti longo tempore terram inhabitare solent: sed absolutè, & propriè pertinet ad vitam futuram, quæ in terra viuentium sempiterna erit.

Aijn. Iniusti punientur, & semen im-
XXX. piorum peribit.

XXXI. Iusti autem hæreditabunt ter-
ram, & inhabitabunt in seculum
seculi super eam.

Hoc loco defunt in Hebræo duæ primæ dictiones, videlicet, Iniusti punientur, quæ apertissimè leguntur in textu Græco: & hinc factum est, ut non appareat litera Aijn, initio horum duorum versiculorum; ut numerus, & ordo literarum alphabeti postulabat. Sed vox, iniusti, quæ est apud græcos, & latinos, apud hebræos esset, auilim, quæ incipit per Aijn. Itaque si addatur ad hebræum textum, Iniusti punientur, vocibus hebraicis, constabit ratio alphabeti. Sententia autem horum duorum versiculorum clarissima est, ut explicatio-
ne non egeat.

Phe. Os iusti meditabitur sapien-
XXXII. tiam, & lingua eius loquetur iudicium.

Lex Dei eius in corde ipsius,
XXX III. & non supplantabuntur gressus eius.

Dixit paulò ante diuinam providentiam vigilaturam, ne iusti ab impijs opprimantur: nunc addit, iustos quoque per sapientiam suam, quæ est etià Dei donum, effecturos, ut non supplantentur à malitia iniquorum. Os iusti meditabitur sapientiam, id est, iustus sapienter loquetur, ut non possit capi in sermone: meditari enim sapientiam ore nihil est aliud, nisi exercere sapientiam inter loquendum, ut alibi diximus: & hoc ipsum repetit David cum addit, Et lingua eius loquetur iudicium, id est, lingua iusti non temerè profundet verba, sed loquetur quod iustum est, & quod pro tempore dici debet, quod est sapienter loqui. Addit rationem, dicens, Lex Dei eius in corde ipsius, id est, sermo iusti scilicet sapientiæ conditus erit, quia iustus habet in corde legem Dei, & propterea dum loquitur cogitat mandata Dei, ut non delinquat in lingua sua: & propterea lex est lux, ut ait Salomon Prouerb. 6. & ut idem David ait Psalm. 18. Lex Domini illuminat corda, & sapientiam præstat paruulis; & ideo non est mirum, si iustus qui habet legem in corde, eamque cogitat & diligit, sapienter loquatur. Ex his colligit Propheta, Et non supplantabuntur gressus eius, id est, quia iustus semper loquitur sapienter, nemo illum supplantando impellet ad casum. Supplantare dicitur, qui plantam alterius tenendo, vel impediendo cadere illum cogit, præsertim quando id astutia potius, quàm violentia fit. Ergo non supplantabuntur pedes eius, ac per hoc non impelletur iustus ad casum dolo alicuius iniqui circumuentus.

Considerat peccator iustum;
XXXIV. & quærit mortificare eum.

Do-

ויילי

XXXV.

Dominus autem non derelinquet eum in manibus eius: nec damnabit eum, cum indicabitur illi.

Declarant hi duo versiculi versiculos duos superiores. Considerat, inquit, peccator iustum, nimirum observans diligenter quid loquatur, & quid agat, ut supplantet eum; & querit mortificare eum, idest, querit supplantando illum occidere. Quod quidem precipue fieri solet in iudicijs, cum iudex, vel accusator iniquus innocentem aliquem circumvenire, & perdere cupiunt. Dominus autem non derelinquet eum in manibus eius, idest, Dominus non permittet, ut peccator habeat iustum in potestate, & ideo inspirabit illi sapientiam, ut cognoscat fraudes inimicorum, & sapienter loquendo euitet supplantationes eorum. Nec damnabit eum, cum indicabitur illi, idest, Iudex non damnabit iustum, cum tempus iudicii eius advenierit, quia Deus non permittet obscurari iustitiam. Verba illa, cum indicabitur illi, clariora sunt in textu originali, & nihil aliud significant, nisi cum ille, iustus videlicet, iudicandus erit; siue cum fiet ei iudicium; siue, cum indicabitur. Habentur eadem ferè verba versu duodecimo, Observabit peccator iustum, & stridebit dentibus in eum, &c. sed ibi de violentia agitur, hic de astutia.

Psalm.
XXXVI.

Expecta Dominum, & custodi viam: & exaltabit te, ut hæreditate capias terram, cum perierint peccatores videbis.

Hortatur Propheta iustum, ut speret in Deo, & perseveret in iustitia. Expecta Dominum, idest, spera in Deo, si forte differri tibi videtur promissio eius: & custodi viam eius, idest, observa legem eius, & non declines a via iam inchoata sanctitatis, & iustitiæ, ut hæreditate capias terram, idest, ut cum implebitur promissio eius, possideas quasi propria hæreditate, terram viven-

tium. Cum perierint peccatores videbis, idest, cum peccatores omnes iudicio diuino condemnati perierint, tunc videbis quod nunc speras.

Vidi impium superexaltatum, Res. & eleuatum sicut cedros libani. XXXVII.

Et transiui, & ecce non erat, XXXVIII. quasiui eum, & non est inuentus locus eius.

Quia dixerat, Cum perierint peccatores, videbis; poterat iustus querere, quando hoc erit? Ideo nunc addit, breui hoc futurum esse. Nam vidi, inquit, impium superexaltatum, & eleuatum sicut cedros libani, idest, positum in altissimo gradu dignitatis & potestatis, & radicum, ac fundatum opibus, clientelis, & similibus rebus, ut videretur æterna futura eius felicitas: & tamen vix pertransiui, & ecce non erat, idest, transiens vidi hominem illum eleuatum, & radicum ut cedros Libani, & vix illum pertransiui, & ecce respicio post me, & euauerat, quasiui ubi fuisset, & an vestigia remanerent tantæ magnitudinis, & non est inuentus locus eius, quasi nunquam ibi fuisset. Hæc verissima esse quotidiana experientia docet. Vbi enim nunc sunt potentissimi illi Monarchæ, ut de minoribus taceam, Assyriorum, Persarum, Græcorum, & Romanorum? certe nisi aliquid in libris historicorum legeremus, ignoraremus illos unquam fuisse. Ita nulla supersunt vestigia tantæ potentiae; & tamè humana superbia, ita mortalibus oculos perstringit, ut videre non possint quæ tangunt manibus; & credere nolint quæ vel inuiti sentire, & experiri coguntur. Quod attinet ad verba, in hebræo habetur, Vidi impium robustum, fortissimum, sicut indigenam virentem. Sed Septuaginta Interpretes respicientes ad similitudinem cedri, ut rem magis explicarent, dixerunt, superexaltatum, & eleuatum; ex quo tamen sequitur, ut robustus, & fortissimus esset: cedri enim altissimæ, & robustæ, & fortissimæ sunt. Et pro illo, sicut indigenam virentem, verterunt Septua-

כאר זה
כארה

Septuaginta; sicut cedros Libani, quia non legerunt ut nunc habemus, ceerza, sicut indigenam, sed una litera transposita, certa, sicut cedrus: & quia cedri virentes in monte Libano potissimum inveniuntur, ideo pro cedris virentes, posuerunt, cedros Libani. Porro ubi nos legimus, & transiui, in hebraeo est, & transiuit; sed credibile est hebraicam vocem incuria librariorum esse corruptam unius literae mutatione. Nam non solum Septuaginta Interpretes verterunt in prima persona, sed etiam S. Hieronymus.

Schin.
XXXIX.

Custodi innocentiam, & vide æquitatem, quoniam sunt reliquiae homini pacifico.

XL.

Iniusti autem disperibunt simul, reliquiae impiorum interibunt.

Pergit Propheta in adhortatione, & ait, Custodi innocentiam, & vide æquitatem, id est, conserva innocentiam erga te ipsum, & vide æquitatem, id est, iudica quod rectum est, erga proximos. Quoniam sunt reliquiae homini pacifico, id est, quia dabit Deus in primum homini pacifico, ut relinquat filios post se. Vel altiore sensu, Quia multa bona reliqua sunt homini pacifico post mortem eius. Opera enim bona sequuntur illos, qui in Domino moriuntur, ut dicitur Apoc. 14. Iniusti autem e contrario, peribunt ipsi simul omnes nullo excepto, & reliquiae peribunt cum eis; quia nec filios in hoc saeculo relinquunt, nec boni aliquid eis reliquum erit; cum omnia in concupiscentiis suis, sceleribusque consumpserint.

Than.

XL. Salus autem iustorum à Domino, & protector eorum in tempore tribulationis.

XLII.

Et adiuuabit eos Dominus, & liberabit eos, & eruet eos à peccatoribus, & saluabit eos, quia sperauerunt in eo.

Hæc est quasi recapitulatio Psalmi totius, & satis aperta, & perspicua.

PSALMVS XXXVII.

Titulus, & Argumentum
Psalmi.

Psalmus David, in rememorationem de Sabbato.



Titulus huius Psalmi in hebraeo codice, non facit mentionem Sabbati, sed solius rememorationis; tamen placuit Interpretibus Septuaginta viris grauissimis, explicandi gratia, addere vocem sabbati. Videretur autem satis apta esse explicatio Sancti Augustini, quam etiam sequitur Sanctus Gregorius, ut hic Psalmus, qui unus est ex ijs, qui proprie ad penitentiam pertinent, compositus sit à penitente Davide, in rememorationem Sabbati, id est, quietis amissae in statu innocentiae, vel promissae in resurrectione iustorum. Posset etiam intelligi de Sabbato, quod agit bona conscientia, dum gratia Dei fruitur; & quod amittit qui peccat, & cuius cum gemitu recordatur, qui veram penitentiam agere incipit. Argumentum Psalmi est oratio penitentis, similis illi, quae habetur in Psalmo sexto, qui idem omnino principium habet, & valde probabile est, compositam fuisse hanc orationem eo tempore, quo David fugit de Hierusalem ob persecutionem Absalonis.

Explicatio Psalmi 37.

Domine ne in furore tuo arguas me, neque in ira tua corripas me.

Precatur David penitens, ut Deus eum non puniat in ira, & furore suo, ut Iudex cum reis facit, sed in misericordia, ut medicus cum ægrotis se gerit. Vide quae diximus ad initium Psalmi sexti; ubi ostendimus nihil interesse hoc

hoc loco inter furorem, & iram; & inter arguere, & corripere. Si tamen placet discrimen admittere, poteris cum Sancto Augustino, & Sancto Gregorio dicere, illos argui in furore, qui damnantur ad gehennam; illos in ira corripi, qui post mortem in igne purgatorii cruciantur: Prophetam autem precari Deum, ut hic illum puniat pro peccatis admissis, non in purgatorio, vel gehenna. Monet autem Sanctus Augustinus, non esse contemnendum ignem purgatorii, quoniam grauior est ille ignis, quam quicquid pati potest homo in hac vita. Illud quoque addendum est, quamuis hoc loco, & in Psal. 2. vers. 5. & Psal. 6. vers. 1. accipiat ira Dei pro damnatione ex iustitia: tamen alibi accipi aliquando pro zelo patris, qui irascitur filiis, non ut perdat, sed ut custodiat.

II. Quoniam sagittæ tuæ infixæ sunt mihi, & confirmasti super me manum tuam.

Quia nouerat Propheta, nihil esse utilius ad veniam peccatorum impetrandam, quam plenè cognoscere miseriam peccati, & eam coram Domino deplorare; deslet in hoc versiculo, & aliquot sequentibus infelicitatem, quam secum adfert lethale peccatum. Ait igitur, Non arguas me in ira tua, quoniam ea grauissima est, ut iam experientia didici. Siquidem sagittæ tuæ infixæ sunt mihi, idest, multæ tribulationes, te puniente peccatum meum, acciderunt mihi; & confirmasti super me manum tuam, idest, idè sagittæ tuæ infixæ sunt mihi, & non leuiter tantum tetigerunt, quia tu manum tuam aggrauasti super me, ut sagittæ profundius penetrarent. Videtur autem per has tribulationes, & supplicia intelligere mortem filij ex Bethsabea suscepti, stuprum filiz à proprio eius fratre allatum, cædem Ammonis filij, incestum, & adulterium vxorum suarum à proprio filio patratum, expulsionem suam à Regno, & alia id gen^o, quæ propter peccatum suum, Domino

Belarm. in Psalm,

vlciscēte, perpeffus est. Fortasse etiam sagittas vocat verba illa increpatoria, & comminatoria, quæ a Nathan Dei nuncio audiuit, 2. Reg. 12. Hæc dicit Dominus Deus Israel, Ego vnxi te in Regem super Israel, & ego erui te de manu Saul, & dedi tibi domū domini tui, & vxores domini tui in sinu tuo, dedi que tibi domum Israel & Iuda. Quare ergo contempsisti verbum Domini, ut faceres malum in conspectu meo; Vriam Ethæum percussisti gladio, & vxorem illius accepisti in vxorem tibi. Quamobrem non recedet gladius de domo tua vsq; in sempiternum, &c. Certè ista exprobratio beneficiorum, & comminatio pœnarum pupugit sine dubio grauissimè animū Dauidis, & verecundia, timore, & dolore vehementissimo illum affecit.

Non est sanitas in carne mea à facie iræ tuæ: non est pax ossibus meis à facie peccatorum meorum.

Describit effectum sagittarum Domini, ac dicit, se vehementer conturbari, nec requiescere posse, dum iram Dei & peccata sua recogitat, quæ iram illam meruerunt. Nō est sanitas, inquit, in carne mea a facie iræ tuæ, idest, aspectus iræ tuæ, quæ mihi semper ante oculos mentis versatur, carnem meam mædere, & tabescere facit. Dolor enim animi carnem quoque affligit, & extenuat; pallere, & languere cogit. Non est pax ossibus meis à facie peccatorum meorum, idest, aspectus deformitatis, & grauitatis culpæ meæ ita me conturbat ut nulla sit requies, & ipsa etiam ossa contremiscant.

Quoniam iniquitates meæ supergressæ sunt caput meum: & sicut onus graue grauata sunt super me.

Reddit rationem, cur tantopere conturbetur, dum respicit peccata sua, & dicit rationem esse, quia peccata sunt multa & magna: de multitudine dicit,

O Quo-

Quoniam iniquitates meæ supergressæ sunt caput meum, idest, in tantum cumulum creuerunt, vt me quasi obruant; quo modo obruitur aquis, qui ita profundum fluuium ingreditur, vt aquæ supergrediantur caput eius: de magnitudine dicit, Et sicut onus graue grauata sunt super me, idest, peccata mea quasi pondus importabile grauant humeros animæ meæ, quia super vires meas est, pro tam graui debito satisfacere. Id clarius est in textu hebraico, vbi illud, super me, significat propriè, super vires meas, siue, grauius quàm ferre possim. Peccatum Dauidis fuit adulterium cum homicidio cōiunctum, sed verus pœnitens multas valdè deformitates in eo considerat. Nam offendit Dauid seruum fidelem, cui vxorem, & vitam eripuit: offendit Betsebeam, quam ad peccandum induxit, & spiritualiter interfecit: offendit vxores proprias, quibus fidem non seruauit: offendit populum suum; imò etiam infideles ipsos malo exemplo, vnde Nathan dixit 2. Reg. 12. Blasphema re fecisti inimicos nomen Domini: offendit denique Deum, cuius leges aperte prauaricatus est. Itaque si numerentur tot offensiones, & tot delicta, quot personas illo suo peccato Dauid offendit, non sine causa dicere poterit idem Dauid, Iniquitates meæ supergressæ sunt caput meum. Deinde grauitas peccati ex circumstantijs cognosci potest; nam occidit Dauid Vriam, primo innocentem, secundo fidelissimum, tertio qui tùm Dauidi militabat, quarto quia vxorem eius polluerat per adulterium, quasi vellet, quia iniuria illum affecerat, maiori adhuc iniuria afficere, quinto quia ipsum eundem ministrum suæ mortis esse voluit, sexto quia cùm scripsit ad Ioab, vt Vriam occideret, credi voluit, illum magni alicuius criminis reum esse, & eo modo famam eius maculauit. Sed ingratitude erga Deum præcipua causa est grauitatis peccati Dauidis. Deus enim in vnum Dauidem omnia ferè dona temporalia, & spiritualia abundantissimè contulit. Illum enim Regē

magnum, Prophetam eximium, Imperatorem fortissimè fecit, donauit prudentia, robore, pulchritudine, diuitijs, omnibus bonis, quæ ab hominibus expecti possunt; quæ certè omnia grauissimum reddebant peccatum eius, quod cùm ipse appenderet in statera diligentissimæ considerationis, meritò dicebat, iniquitates meæ sicut onus graue grauata sunt super me. Atque hæc est causa cur sensum doloris, quem par esset, ex peccatis suis pauci percipiant; quia peccati magnitudinem pauci in statera seriæ considerationis appendunt.

Putruerunt, & corruptæ sunt v. cicatrices meæ, à facie insipientiæ meæ.

Hæc pertinet ad tempus illud, quod intercessit inter peccatum adulterij, & admonitionē Nathan Prophetæ, quod fuit plusquam nouem mensium. Siquidem Nathan Dauidem corripuit, postquam natus fuerat puer ex adulterio illo conceptus, vt dicitur 2. Reg. 12. Toto igitur illo tempore distulit Dauid curare vulnera peccati sui per pœnitentiam. Interim autem obducta erat quædam quasi cicatrix obliuionis, quæ non sinebat vulnus agnosci, sed re vera cicatrices illæ putrescebant, & vulnera grauiora, magisque incurabilia fiebant, atque hoc est quod nunc deplorat, dicens, Cicatrices meæ non ex arte medici curantis, sed ex negligentia, & obliuione superinductæ, putruerunt, & corruptæ sunt à facie insipientiæ meæ, idest, insipientiæ meæ, quæ causa fuit, vt vulnera mea non aduerterè, eadem fuit etiam causa, vt ipsa vulnera putrefacta fortorem scandali latius, longiusq; diffunderent. Per cicatrices hoc loco non intelliguntur signa, quæ remanent post curationem plagæ, sed intelligitur plaga nō curata, quæ solet claudi ad modū cicatricis; & quia non est expressus sanguis corruptus ex ea, neq; ipsa fota oleo, aut circumligata, vt dicitur Isa. 1. idèò putrescit, & corrumpitur. Id colligitur ex textu originali, vbi habetur vox Chaburoth, quæ

חבורות

non

nō significat cicatrices propriè dictas, sed liuorem & plagam tumontē: quare vel in latīna editione accipiuntur cicatrices pro plagis, vel vt diximus, pro cicatritibus, quæ per se fiunt, dum vulnus non curatur, sed per se clauditur, & plaga negligitur, & corrumpitur.

VI. Miser factus sum, & curuatus sum vsque in finem: tota die contristatus ingrediebar.

Ex corruptione illa factū est, vt Dauid miser, & curuus fieret; quod potest intelligi duobus modis, primo de culpa, secundo de pœna. Nā qui grauiter peccat, præsertim peccato luxuriæ, hoc ipso fit miser, & curuus, quia relicto Deo, in quo est nostra beatitudo, curuatur ad terram, & fit inuētis similis, ac per hoc miser, & miser valde: & hoc significat illud, vsq; in finem, nimirum miser, & curuatus sum adeo, vt miserior, & magis curuatus fieri non potuerim, cū à delectatione Angelorū curuatus sim ad voluptates pecorū. Id colligitur ex textu hebraico, vbi habetur, miser, & curuatus sum vsq; valdē. Proinde illud, in finem, non significat, vsq; ad finem vitæ, vel vsque ad finem temporis, vel vsq; in æternum, sed vsq; ad finem curuationis, vt magis curuari nequeat. Nam versu octauo vbi legimus, Humiliatus sum nimis, eadem est vox hebraica, quam Interpres nūc vertit, vsque in finem, nunc, nimis, aut, valdē. Potest etiam intelligi de pœna, nā qui peccat peccato luxuriæ, miser efficitur, & curuatus valde propter conscientia remorsum, timorem iræ diuinæ, & verecundiam humiliantem, & confundentem, vt non audeat talis homo ad cælum oculos leuare. Sed potest etiam vtraque intelligentia simul coniungi, vt sensus sit, Miser factus sum miseria culpæ & pœnæ, & curuatus valdē, tum quia faciem animæ, quam desideram in Deo habere debui, conuertit ad carnales & infimas voluptates: tum quia præ pudore cælum aspicere non possum, & humilis, atq; abiectus terrā aspicere cogor: & propter hæc omnia, tota die contristatus ingrediebar, id

est, semper conscientia mordente, & accusante, tristis, ac mærens incedebā: quæ enim lætitia esse potest homini misero, si miseriam suam agnoscat?

Quoniam lumbi mei impleti sunt illusionibus: & non est sanitas in carne mea. VII.

Afflictus sum, & humiliatus sum nimis: rugiebam à gemitu cordis mei. VIII.

Transit Propheta à peccato suo particulari ad corruptionem generalem, quā in carne sua experiebatur ex peccato primi parentis, vnde peccatum illud suum particulare tanquam ex fonte manauerat: & ex ea corruptione dicit se affligi, & humiliari, & continuo gemere, & rugire. Quoniā, inquit, lumbi mei, hoc est, pars illa bestialis, & concupiscens disrupto frano iustitiæ originalis parit perpetuū desideria ignominiosa, & turpia, & ideo repletur illusionibus spirituum malignorum: & non est sanitas in carne mea, quia non habitat in ea bonum, sed malum passionum variarum, quæ illam infirmam reddunt; ideo afflictus sum, & humiliatus nimis, quia pudet me hominem ratione præditum, eiusmodi bestialibus motibus non posse carere; & ideo rugiebam præ dolore à gemitu interiore cordis mei prouocatus ad rugitum, & clamorem exteriorem. Scio Rabinos, & qui eos sequuntur, fabulari nescio quid de morbo corporali, & fatente, quo Dauid laborauerit in partib⁹ corporis pudendis; sed sancti Patres nostri Ambrosius, Hieronymus, Augustinus, & Gregorius in commentarijs huius loci referunt hos versiculos ad carnalem concupiscentiam, vt similis sit hæc Dauidis querimonia illi, quæ legitur apud Apostolum Rom. 7. Video aliam legem in membris meis repugnātem legi mentis meæ, & captiuantem me in legem peccati. Infelix ego homo, quis me liberabit, &c. S. Ambrosius, & S. Augustinus legūt, anima mea impleta est illusionibus, vbi nos legimus, lumbi mei impleti sunt illusionibus.

bus. Sed accidit hoc, quia apud græcos, lumbi dicuntur *ῥυα*, & animæ dicuntur *ψυα*, vnica litera addita. Proinde facile fuit corrumpi græcum textum, ob literarum similitudinem; quæ nulla est in textu hebraico. Itaque vera lectio ea est, quæ cum textu hebraico, & latino concordat. Quod autem vox hebraica, pro qua habemus, illusionibus, significare videatur propriè ignominiam, vt S. Hieronymus vertit, non variat sensum: nam qui repletus est ignominia, ille derisioni expositus est. Quod vero S. Hieronymus vertit, euigilaui, pro eo quod nos habemus, afflictus sum, non video quid sequutus sit. Vox enim quam nunc habemus in textu hebraico, debilitari propriè significat, debilitari autem, & affligi, pro eodem accipi possunt.

IX. Domine ante te omne desiderium meum, & gemitus meus à te non est absconditus.

Quia dixerat, gemitum cordis sui excitare rugitum; declarat ad quæ gemat corde, ac dicit gemere se ad illū, qui scrutatur corda, & scit quid desideret spiritus. Domine, inquit, ante te omne desiderium meum, id est, tu Domine solus vides omne desiderium meum, quod non est aliud, nisi vt aliquando liberer à concupiscentia mala, & perueniam ad Sabbatum perfectæ quietis; & de hac re gemitus meus interior tibi non est absconditus. Simile quid Apostolus dicit, cum ait Ro. 8. Et ipsi intra nos gemimus adoptionem filiorum Dei expectantes redemptionem corporis nostri.

X. Cor meum conturbatum est, dereliquit me virtus mea, & lumen oculorum meorum, & ipsum non est mecum.

Pergit describere corruptionem naturæ humanæ, ac dicit, Cor meum conturbatum est, quod significat bellum intestinū ex rebellionē partis inferioris à superiore; & addit, Dereliquit me

virtus mea, quia nata est ex illa rebellionē tanta infirmitas, vt homo velit, nolit, patiatur desideria mala, & dicat cum Apostolo, Velle adiacet mihi; perficere autem non inuenio. Addit postremò, Et lumen oculorum meorum & ipsum non est mecum, quia nō solum infirmitas in voluntate, sed etiā ignorantia in mente ex eadem rebellionē orta est. Sæpè enim de rebus iudicamus, non vt sunt, sed vt nobis malè affectis videntur: quomodo febricitantes, quod dulce est, amarum iudicant, & quod amarum dulce. Itaque non ait, Lumen oculorum meorum extinctum est, sed non est mecum; nam lumen intelligentiæ, & rationis est quidem semper in anima rationali; sed quia corpus quod corrumpitur, aggruat animam, sæpè impediti carnalibus passionibus illo non possumus vtī; & idè dicit, & lumen oculorum meorum, & ipsum, inquam, lumen oculorum meorum, interiorum videlicet, non est mecum dum operor, licet in me sit. Proinde est in me quoad essentiam, non est mecum quoad vsum.

Amici mei, & proximi mei aduersum me appropinquauerunt, & steterunt. **XI.**

Posteaquam descripsit bellum intestinum, quod intra hominem cōtinuo geritur; describit etiam bella externa, persecutiones, & detractiones, quæ omnia peccatorum pœnæ sunt. Ac primum quæritur, quod amici, & proximi facti sint illi inimici, quod accidit præcipuè in rebellionē Absalonis filij, cum quo multi amicorum, & proximorum Dauidis aduersus eum conspirauerunt. Sed moderni expositores ex textu hebraico longè aliter exponunt, quàm veritas vulgatæ editionis habeat. textus hebraicus nunc habet, Amici mei, & proximi mei è regione lepræ mee steterunt. Quomodo etiam ferè vertit S. Hieronymus, ex quo multi colligunt, hoc loco tantum significari amicos, & proximos Dauidis, non quidem factos esse illi inimicos; sed

sed non faisse ausos accedere ad eum iuuandum, vel consolandum; & ideo è regione procul stetisse. At cum versio Septuaginta Interpretu habeat *ἡρώδης*, & Latinus Interpres antiquus reddiderit, appropinquauerunt, certè nimis durum videtur dicere, non appropinquauerunt, sed longè steterunt. neque obstat vox hebraica; nam illud, *nighi*, quod verè significat, lepra meæ, vel plagæ meæ, Septuaginta Interpretes, qui habuerunt codices correctiones, legerunt, *nagehu*, appropinquauerunt. Sunt enim literæ eadem, excepta vltima, quæ facillimè mutatur in alteram, cum non differant, nisi quod vna est paulò maior quàm altera. Iod enim si paulum extendatur, efficitur *vau*, & ideo vitio librariorum facillimè cōtingit, vt vna ponatur pro alia. At, inquit, in versiculo sequenti dicitur, de longè steterunt. Verum est, sed non est sermo de iisdem personis, vt iam dicemus.

XII. Et qui iuxta me erant de longè steterunt, & vim faciebant, qui quærebant animam meam.

Dixit amicos & proximos, vt Absalonem, & socios eius factos esse inimicos, & aduersum se appropinquasse, & stetisse, vt nocerent: nunc dicit alios, qui iuxta eum esse solebant, vt milites, aut seruos, longè recessisse, nec adesse voluisse tempore persecutionis; & interim inimicos vi magna conatos esse vitam illi adimere. Neque solum habuit Dauid, qui quærerent animam eius, id est, qui quærerent eum occidere, vt milites Absalonis, sed habuit etiam, qui detraherent honori, & famæ eius, vt Semei, qui maledixit ei maledictione pessima, & alios qui consilia dolosa contra eum dabant, vt Achitophel, & alios, ideo subiungit.

XIII. Et qui inquirebant mala mihi loquuti sunt vanitates, & dolos tota die meditabantur.

XIIII. Ego autem tanquam surdus Belarm. in Psal.

non audiebam, & sicut mutus nõ aperiens os suum.

Et factus sum sicut homo non audiens, & non habens in ore suo redargutiones. XV.

Hæc perspicua sunt, & verissima, quod præcipuè intelligi potest ex lib. 2. Reg. cap. 16. vbi cum Semei malediceret Dauidi, eumque virum Belial appellaret, & Regni inuasorem; Dauid incredibili patientia eum sustinuit, neque permisit, vt vilius ei noceret, eumve reprehenderet; sic factus est quasi surdus, & non audiens; & tanquam mutus, & non habens in ore suo redargutiones.

Quoniam in te Domine speravi, tu exaudies me Domine Deus meus. XVI.

Reddit tres rationes, cur ita obsurderit, & obmutuerit: prima est, quia vtilius sibi existimauit sperare in Domino, quàm in sua propria defensione. Ait igitur, obsurui, & obmutui, quoniam in te Domine speravi: non attendi quanta illi falsa, & vana in me iactarent; quoniam sciebam à te omnia audiri, & cognosci, in quo semper speravi, qui es iudex iustus, & reddes vnicuique secundum opera sua; & quia in te speravi, tu exaudies me Domine Deus meus, & liberabis à labijs iniquis, & à lingua dolosa.

Quia dixi, ne quando supergaudeant mihi inimici mei: & dum commouentur pedes mei, super me magna loquuti sunt. XVII.

Hæc est altera ratio, cur elegerit obsurdescere, & obmutescere, Quia dixi, inquit, apud me, ne quando supergaudeant mihi inimici mei, id est, bonum est mihi patientiam habere, & sperare in adiutorio Domini, ne fortè si impatiens fuero, & reddam maledictum pro maledicto, Deus derelinquat me, & gaudeant inimici mei super me, id est, super

ruina mea latentur. Et dum commouentur pedes mei super me magna loquuti sunt, idest, nō sine causa metuo, ne de exitio meo latētur inimici: nam dum commouentur pedes mei, idest, dum incipiunt nutare pedes mei, & ego inclino ad casum (quod factum est, quādo fuit in periculo Regni amittēdi) inimici mei magna loquuti sunt super me, comminantes mihi, & prädicantes extremum exitium. Est autem hoc loco obseruandum particulā, &, sapē in Scripturis poni pro, quia, vt Isaiā 63. Tu enim Pater noster es, & Abraham nesciuit nos, & Israel ignorauit nos; idest, tu solus Domine Pater noster es: nam Abraham, & Iacob, qui videbantur patres nostri esse, non agnoscunt nos pro filijs. Sic etiam c. 64. Tu iratus es, & peccauius tibi, idest, quia peccauius tibi. Ita igitur hoc loco cū dicitur, Et dum commouentur pedes mei, illud, &, ponitur pro, quia, vt sensus sit, ne quando glorientur super me inimici mei. & dum commouentur pedes mei, idest, quā dum commouentur pedes mei, &c. Illud etiam, dum commouentur, positum est pro, dum commouerentur. Siquidem in hebraico, & græco textu habetur per infinitiuum, in commoueri pedes meos, quod potest verti, dum commouentur, & dum commouebantur, & dum commouerentur; proinde debet exponi iuxta exigentiam verbi sequentis, vt oratio cohereat.

XVIII. Quoniam ego in flagella paratus sum, & dolor meus in conspectu meo semper.

Addit tertiam rationem, cur voluerit obsurdescere, & obmutescere coram aduersarijs, Quoniam, inquit, ego propter peccata mea paratus sum flagellari non solum flagellis verborum, & detractionum, sed etiam flagellis verberum, & plagarum. Non dolor, quem merni, semper ante oculos mentis meæ versatur, vel, quia dolor meus, idest, peccatum meum, quod mihi doloris continui causa est, nunquam ab

oculis cordis mei recedit. In hebræo est vox, zelag, quam aliqui vertūt claudicationem. Alij putant legi debere, zerag, idest, lepram; nos habemus flagella ex græco, sed nulla est difficultas: nam vox illa zelag, communiter significat latus, siue costam; sed traducitur ad significandam claudicationem, quia claudi dum ambulant, declinant ad vnum latus, & non recti incedunt. Traducitur etiam ad significandam plagam, vel attritionem, ac per hoc etiam flagellum; quia flagellis accipiuntur plagæ. Itaque Sanctus Hieronymus vertit, Ego ad plagas paratus sum, & Septuaginta Interpretes, Ego autem in flagella paratus sum.

XIX. Quoniam iniquitatem meam annuntiabo, & cogitabo pro peccato meo.

Reddit rationem, cur in flagella paratum se dixerit, Quoniam, inquit, iniquitatem meam annuntiabo, idest, quoniam agnosco, & confiteor me peccasse, & flagella commeruisse: & cogitabo pro peccato meo, expiando videlicet. Significantius ex hebræo vertit S. Hieronymus, Et sollicitus eo pro peccato meo, idest, diligenter, & anxie cogitabo, quo modo possim Domino satisfacere, ac plenam indulgentiam obtinere. Quod quidem salutare documentum est pœnitentibus, vt solliciti sint pro expiatione peccati, & libenter accipiant occasiones à Deo oblatas patientiam exercendi.

XX. Inimici autem mei viuunt, & confirmati sunt super me, & multiplicati sunt, qui oderunt me inique.

Posteaquam Propheta exposuit rationes, cur obsurduerit, & obmutuerit coram aduersarijs suis, vt per patientiam Deum placaret; opponit patientiæ suæ contrariam aduersariorum malitiam. Cū enim ipse non redderet malum pro malo, illi è contrario retribuebant mala pro bonis: & tamen viu-

צלע
צרע
צלע

uebant, & exultabant, & roborabantur. Quæ ad eum finem commemorantur à Dauide, vt facilius Deum ad misericordiam inclinent. Inimici autem mei viuunt, & confirmati sunt super me, idest, ego quidem humiliatus sum, & afflictus, & tamen patiétiam seruo, ac si surdus, & mutus essem: interim autem inimici mei viuunt, idest, alacres sunt, & exultant, & confirmati sunt super me, idest, robustiores, & fortiores euaserunt. & multiplicati sunt, idest, & creuerunt etiam quo ad numerum, qui oderunt me iniquè, idest, illi viuunt, & roborati sunt, & multiplicati, qui oderunt me sine vlla iusta causa. In herbo est, qui oderunt me mendaciter, idest, ob causam falsam, & e mentitam. Videntur enim hæc referri ad coniurationem Absalonis, qui mendacio suo persuaserat populis Regem non constituisse aliquos, qui iustè iudicaret; se autem iustissimè iudicaturum, si Rex constitueretur. Hinc enim factum est, vt populus rebellaret, & toto corde sequeretur Absalonem, vt dicitur lib. 2. Reg. cap. 15.

XXI. Qui retribuunt mala pro bonis, detrahebant mihi, quoniam sequebar bonitatem.

Probat quod dixit, sine iusta causa se odio habitum fuisse ab inimicis, dicens, Qui retribuiebant mala pro bonis detrahebant mihi, quasi dicat, verè oderunt me iniquè inimici mei: nam illi detrahebant mihi, qui retribuunt mala pro bonis, quales fuerunt Absalon filius, & Achitophel consiliarius. Absalon enim plurima bona à Dauide acceperat, & paulò ante obtinuerat indulgentiam fratricidij, & tamen detrahebat Dauidi patri suo tãquam negligenti, & iniusto dicens ijs, qui veniebant ad iudicium Regis, Videntur mihi sermones tui iusti & boni, sed non est qui te audiat constitutus à Rege. 2. Reg. 15. Sic etiam Achitophel acceperat à Dauide magnum honorem, vt esset principalis Regni Consiliarius, & tamen oblitus beneficij defecit à Da-

nide ad Absalonem, & consilia iniquissima, contra eundem Dauidem, Absaloni dedit, 2. Reg. 16. & 17. Nec solùm detrahebant mihi, qui retribuunt mala pro bonis, sed etiam (quod grauius est) detrahebant mihi, quoniam sequebar bonitatem, idest, quia sincero corde, & bona voluntate cum omnibus agebam, & eo modo contrarius eram iniquis eorum desiderijs, & operibus.

Ne derelinquas me; Domine XXI. Deus meus, ne discefferis à me.

Intende in adiutorium meum XXII. Domine, Deus salutis meæ.

Concludit ex ijs, quæ dixit, Deumq; precatur, vt protectione sua illi adsit, & quasi idem repetit, quod in principio Psalmi dixit. tunc enim Deus in ira, vel furore suo grauissimè punit aliquè, cum illum gratia sua destituit, & tanquam ab inimico recedit, & inter hostes nudum adiutorio suo constituit. Sicut igitur dixerat initio Psalmi, Domine ne in furore tuo arguas me, ita nunc in fine concludit, Ne derelinquas me Domine Deus meus, idest, ne deferat me gratia tua, quandoquidem tu es Dominus meus, qui me condidisti, & Deus meus, qui ad te summum bonum me fecisti. Ne discefferis à me, tanquam ab inimico; sed potius vt Pater intende in adiutorium meum, idest, diligenter incumbe in auxilium meum, tu Domine Deus salutis meæ, idest, tu qui auctor es salutis meæ, à quo solo salutem expecto, & in quo solo confido. Et hic quidè mihi visus est huius Psalmi sensus literalis: tamen quoniam sancti Patres Chrysostomus, Augustinus, Hieronymus, & Gregorius vel totum Psalmum, vel certè à medio vsque ad finem de Christo exponunt: sciendum est, posse totum Psalmum de Dauide explicari, primùm, vt Davidis personæ propriè cõuenit; deinde vt David personam Christi gerebat. Spiritus enim sanctus plura simul intèdere potest in verbis ijsdem, nimirum narrare tribulationes Davidis, & simul prædicere Christi passiones, qui Davidis filius se-

cundum carnem futurus erat. Cum igitur de persona Davidis Psalmum exposuerimus, indicemus etiam breuiter, quemadmodum ad Christum idem Psalmus applicari possit.

Alia explicatio eiusdem Psalmi.

I. **D**omine ne in furore tuo arguas me, neque in ira tua corripas me.

Christus pro corpore suo loquitur, quod est Ecclesia, ei que postulat liberationem.

II. Quoniam sagittæ tuæ infixæ sunt mihi, & confirmasti super me manum tuam.

Dicit iuste se petere Ecclesie liberationem; quoniam sagittæ iræ Dei, quæ ad illam pertinebant, in se suscepit.

III. Non est sanitas in carne mea à facie iræ tuæ, non est pax ossibus meis à facie peccatorum meorum.

Describit passionem suam generatim, ob quam à planta pedis usque ad verticem capitis non fuit in eo sanitas. Quod autem dicit à facie peccatorum meorum; intelligitur de peccatis, non quæ ipse fecit, sed quæ in se puniendi suscepit.

IIII. Quoniam iniquitates meæ supergressæ sunt caput meum, & sicut onus graue grauata sunt super me.

Dicit, ideò in carne sua non fuisse sanitatem à planta pedis usque ad verticem capitis; quoniam peccata, quæ suscepit expianda, tam multa sunt, & tam graua, ut supergressa sint caput eius multitudine sua, & instar plumbi fuerint ob grauitatem suam.

V. Patruerunt, & corruptæ sunt cicatrices meæ à facie insipientiæ meæ.

Miser factus sum, & curuatus sum usque in finem, tota die contristatus ingrediebar.

VI. Quoniam lumbi mei impleti sunt illusionibus, & non est sanitas in carne mea.

Hæc dicit pro corpore suo, deplorans corruptionem generis humani: quomodo quando quis dicit, doleo pedes, vel manus, vel stomachum; caput est quod loquitur, sed non loquitur de dolore, quod in se patitur, sed quod in membris, & in corpore suo habeat.

VII. Afflictus sum, & humiliatus sum nimis, rugiebam à gemitu cordis mei.

Hic incipit ordine recensere passionem suam. Pertinent enim hæc verba ad orationem in horto habitam.

VIII. Domine ante te omne desiderium meum, & gemitus meus à te non est absconditus.

IX. Cor meum conturbatum est, dereliquit me virtus mea, & lumen oculorum meorum, & ipsum non est mecum.

Ad eandem orationem pertinent, in qua desiderauit calicem transire, & cepit turbari, pauere, tædere, & mortuus esse. Et ut experiretur amaritudinem imminenti passionis, noluit virtutem, & lumen diuinæ consolationis in partem inferiorem influere; ita ut etiam Angelus de cælo apparuerit confortans eum.

X. Amici mei, & proximi mei aduersum me appropinquauerunt, & steterunt.

XI. Hoc impletum est in Iuda amico, & Iudæis proximis, quando comprehenderunt eum.

Et

XII. Et qui iuxta me erant, de longe steterunt.

Hoc impletum est in Apostolis, qui fugerunt, & in Petro, qui sequebatur à longe.

Et vim faciebant qui quærebant animam meam.

Impletum est in concilio Sacerdorum, sollicitè quærentium falsa testimonia, ut eum perderent.

XIII. Et qui inquirebant mala mihi, loquuti sunt vanitates, & dolos tota die meditabantur.

Ad idem concilium pertinent.

XIIII. Ego autem tanquā surdus non audiebam, & sicut mutus non aperiens os suum.

XV. Et factus sum sicut homo non audiens, & non habēs in ore suo redargutiones.

Ad litteram impleta sunt in Christo, qui coram Caipha primū, deinde coram Pilato, & Herode nullam attulit defensionem, sed sicut agnus coram tondente se obmutuit, ut etiam prædixit Isaias cap. 53.

XVI. Quoniam in te Domine speravi, tu exaudies me Domine Deus meus.

Ad idem silentiū pertinet; ideō enim siluit coram hominibus, quoniam non tacebat coram Deo, à quo expectabat remunerationem, salutem populi sui.

XVII. Quia dixi, nequando supergaudeant inimici mei, & dum commouentur pedes mei, super me magna loquuti sunt.

Seruauit Christus inuictam patientiam, ne de impatientia gauderent inimici, qui, dum commouebantur pedes eius, id est, dum infirmitas eius ad tempus ostendebatur, magna loqueban-

tur super eum, dicentes: Si non esset hic malefactor, non tibi tradidissemus eum, & Hunc inuenimus subuertentem gentem nostram, &c.

Quoniam ego in flagella paratus sum, & dolor meus in conspectu meo semper.

Ad litteram impletum scimus in flagellatione, & colaphizatione, & spinarum coronatione.

Quoniam iniquitatem meam **XIX.** annūciabo, & cogitabo pro peccato meo.

Dicit se annunciaturum peccatum suum, quod, ut dictum est, non fecit; sed expiandum suscepit: & cogitaturum, id est, sollicitum futurum pro eo penitus delendo; quod fecit cum peccata nostra pertulit in corpore suo super lignum, ut Sanctus Petrus scribit in epistola prima cap. 2.

Inimici autem mei viuunt, & **XX.** confirmati sunt super me, & multiplicati sunt, qui oderunt me iniquē.

Hoc impletum est, cum Principes, & Sacerdotes existimantes se iam victoriam obtinuisse exultabant, & crucifixo insultabant.

Qui retribuunt mala pro bonis detrahebant mihi, quoniam sequebar bonitatem. **XXI.**

Quando videlicet pendenti in cruce dicebant, Vah, qui destruis templum Dei, & descendat nunc de cruce, &c.

Nē derelinquas me Domine **XXII.** Deus meus, ne discefferis à me.

Hoc disertis verbis in cruce Dominus loquutus est, cum ait, Deus meus, Deus meus, ut quid dereliquisti me. quasi dicat, si dereliquisti ad tempus, quo ad consolationem, non derelinquas quo ad resurrectionem.

Intende in adiutorium meum **XXIII.** Domine Deus salutis meæ.

Non derelinquas in inferno animam meam,

meam, neque des sanctum tuum videre corruptionem: sed intende in adiutorium meum, ostendens mihi vias vite, & adimplens me lætitia cum vultu tuo.

PSALMVS XXXVIII.

Titulus, & Argumentum
Psalmi.

*In finem, ipsi Idithum, canticum
David.*



ITVLVS demonstrat Psalmum compositum esse à Davide, sed datum ipsi Idithum ad canendum. Erat enim Idithum vnus ex tribus principibus cantorum, vt habemus lib. 1. Paralipomenon cap. 16. & lib. 2. cap. 5. Quid autem sit, in finem, vel, pro victoria, vt ex hebreo sanctus Hieronymus vertit, diximus in explicatione Psalmi quarti. Sed hoc loco conuenit materiam de qua agitur, tum in finem, tum pro victoria. Quamuis enim Rabini, & recetiores aliqui doceant, Dauidem ægrotum corporali morbo optasse finem vite, & miseriam, & hæc à Domino petere in presenti Psalmo: nos tamen sequuti veteres Patres, existimamus longè altiore doctrinam in hoc diuino Spiritus sancti cantico per Prophetam edito contineri. Nimirum censemus, hic describi breuitatem, & vanitatem præsentis vite, vt intelligamus spem nostram non in hac vita, sed in Deo, in quo vita æterna est, esse ponendam; & ideo dandam esse operam patientiæ, & paci cum omnibus hominibus, & præcipuè linguam esse custodiendam ab omni rixa, & iurgio, & contentione, vt non impediamur à cursu ad brauium supernæ vocationis. Certè enim qui ad brauium maximi precij currit, si in medio cursu videret sibi litem pro pallio moueri, pallium potius dimitteret, quàm se à cursu impediri pateretur. Neque litigat, aut contendunt homines in terris, nisi pro temporali-

bus rebus. Itaque Psalmus præsentis doctrinam euangelicam, & apostolicam continet. Nam & Dominus docuit, vt percutienti maxillam, præbeamus etiam alteram; & volenti pallium nobis eripere, demus illi & tunicam, Matt. 5. & Apostolus dicit, Delictum est in vobis, quod lites habetis inter vos, cur non magis fraudem patimini? 1. Corint. 6. Hic igitur Psalmus, propter doctrinam tam sublimem, cani debet in finem, idest, semper, vsque ad mundi finem; & non solum tempore illo Dauidis, & Idithum. Idem etiam Psalmus rectè inscribitur, pro victoria, quia nulla esse potest victoria nobilior, quàm per patientiam vincere in bono malum, & sibi ipsi hominem imperare.

Explicatio Psalmi 38.

Dixi custodiam vias meas, vt
non delinquam in lingua mea.

Sollicitus erat Dauid de vero bono non amittendo; ideo deliberauit, ac firmiter apud se constituit, magna circumspectione vt in omnibus actionibus suis, vt si fieri posset, ne in verbo quidè offenderet. quasi audiuiisset ab Apostolo, Videte quomodo cautè ambuletis, Ephes. 5. & à beato Iacobo, Qui non offendit verbo, hic perfectus est vir, Iacobi 3. Ait igitur, Dixi, nimirum apud me statui, decreui, legem mihi ipse posui, vt custodiam vias meas, vt cantissime ambulem in via vite huius, & diligenter attēdam, vbi gressum pono, ne fortè in foueam cadam, vel offendam ad lapidem, vel lutosam viam pro munda eligam, vel certè deuiem ab itinere recto, idest, deliberaui, & statui considerare omnes actiones meas. Et quoniam nihil est facilius, neque periculosius, quàm verbo offendere, cum ex verbis inconsideratè prolatis, oriantur rixæ, contentiones, iurgia, & alia mala tam multa, vt sanctus Iacobus dixerit, linguam esse vniuersitatē iniquitatis, Iacobi 3. ideo singulariter addit Prophetæ, Vt non delinquam in lingua mea, idest,

ideſt, ad hoc potiffimum cuſtodiam vias meas, vt non delinquam in lingua mea: ſic enim infinita mala effugiam.

II. Poſui ori meo cuſtodiam, cum cōſiſteret peccator aduerſū me.

Nunquam eſt periculum maius delinquendi per linguam, quā cum aliquo detractore, vel contumeliam faciente prouocamur; ideo dicit Propheta, Poſui ori meo cuſtodiam, cum cōſiſteret peccator aduerſum me, id eſt, cum aliquis iniquus fortē irritaret me conuitio, aut detractio, aut alio iniurioſo verbo, tum maximē cuſtodiu os meum, ne prorumperet in aliquod verbum, cuius poſtea pœnitentiam agere deberem.

III. Obmutui, & humiliatus ſum, & filii à bonis, & dolor meus renouatus eſt.

Declarat, quam cuſtodiam ori ſuo adhibuerit, dicens, obmutui, ideſt, filii omnino, ac ſi mutus eſſem; & humiliatus ſum, ideſt, humiliter patientiam habui; & filii à bonis, ideſt, abſtinui etiam à iuſta deſenſione, & à debita re prehenſione: & dolor meus renouatus eſt, propter hoc ipſum quod filii à bonis. Nam dolueram primò propter acceptam iniuriam, ſed mitigauerat dolo rem primum patientiæ: iterum ergo dolor renouatus eſt, quia filii à bonis, & proximum meum debita correptione fraudari. Ita ſanctus Auguſtinus ſed poſſet etiam ita exponi, Dolor meus renouatus eſt, quia dolueram ex paſſione mea, ſed dolor renouatus eſt ex compaſſione fratris, quem vidi tam grauiter ægrotare, vt medicina correptionis nihil ei profutura videretur, propter quod etiam filii à bonis.

III. Cōcaluit cor meum intra me, & in meditatione mea exardeſcet ignis.

Exponit quid ille dolor renouatus effecerit, ac dicit, concaluit cor meum

intra me, ideſt, ex dolore illo compaſſionis calefactum eſt cor meum dilectione, & inde meditari cœpi de miſeria humana, de miſericordia Dei, de ingratitudine hominum, de abundantia charitatis Dei erga ingratos & malos, & alia id genus multa. Et in meditatione mea exardeſcet ignis, ille, inquam ignis, de quo dicebant duo illi Diſcipuli apud Lucam cap. 24. Nonne cor noſtrum ardens erat in nobis dum loqueretur in via, & aperiret nobis Scripturas? Diligens enim, & attenta meditatio rerum cœleſtium ordinaria via eſt ad accendendum ignem actus charitatis Dei. Scio alios aliter exponere iſtum ignem ex meditatione exardeſcentem; de igne videlicet iracundiæ, & indignationis: ſed nos S. Ambroſium ſequuti ſumus, & rationem cōnexionis, & lectoris ædificationem.

Loquutus ſum in lingua mea; V. notum fac mihi Domine finem meum.

Et numerum dierum meorū, VI. quis eſt, vt ſciam quid deſit mihi.

Ex illo æſtu interiore loquutus ſum, inquit, in lingua mea, ideſt, non ſum loquutus in lingua, quam omnes intel ligunt, ſed in lingua mihi nota, quaſi dicat, Ego ſcio quid voluerim dicere. Notum fac mihi Domine finem meum, &c. videtur ſenſus eſſe, quod cupiat ſcire finem vitæ ſuæ, ideſt, numerum annorum, & dierum quibus victurus ſit ſuper terram, vt ſciat quantum ei temporis ſuper ſit uſque ad mortem; ſed non hoc voluit dicere: iſta enim curioſitas vitioſa, & temeritas quædam fuiſſet; ideo præmiſit, Loquutus ſum in lingua mea, in ſenſu meo, ſermone mihi noto. Illud igitur ſignificare voluit, vitā humanam eſſe breuiſſimam, & quaſi quoddam nihil. Sed quoniam hanc veritatem, quanuis alioqui clariffimam, & experimento notiſſimam, pauci bene norunt; ideo precatur Deum, vt non finat ſe decipi, vt pluri mi decipiuntur, vt exiſtimet diuturnum quod eſt breuiſſimum. Cur enim

maxima pars hominum tota intenta est in cumulâdis opibus terrenis, proque ijs pugnat, & contendit acerrimè, & bonâ futura contemnit, & negligit, nisi quia non cogitat, vel non credit, vitâ præsentem fugere velut umbram. Ait igitur, Notum fac mihi Domine finem meum, idest, fac Domine per gratiam tuam, vt illustrentur oculi mentis meæ, & apertè cognoscâ finem vitæ meæ iam propo adesse. Et numerum dierum meorum, quis est, vt sciam quid desit mihi, idest, fac, vt attenta cogitatione penetrem quàm sit brevis numerus dierum meorum, & sciam quàm parum temporis mihi superfit. Hanc esse verâ expositionem, sequentes versiculi docebunt. Nam ex auditu à Domino non refert præcisè numerum annorum, qui sibi supererant, sed varijs modis ostendere nititur tempus humanæ vitæ breuissimum esse, præsertim si ad æternitatem Dei, & futuri sæculi conferatur.

VII Ecce mēsurabiles posuisti dies meos, & substantia mea tanquam nihilum ante te.

Edoctus à Domino quod postulauerat, dicit, mensurabiles esse dies suos, idest, tam breuem esse durationem vitæ suæ, vt facillimè mensurare possit. Sed obseruandum est, sanctum Hieronymum ex hebræo vertisse, Ecce breues posuisti dies meos. Sanctum Augustinum cum alijs legisse, Ecce palestras posuisti dies meos. Denique Chrysostomum, & alios legisse, Ecce palmares posuisti dies meos. Sed hæc omnia in idem recidunt. vox hebraica tephacoth, significat res palmares, idest, palmo vno mensurabiles: nam, taphach, significat mensuram palmi quatuor digitorum; quod idem significat vox græca παλαιστή, quàm habemus in editione Septuaginta Interpretum. Igitur sanctus Hieronymus rectè vertit, breues dies; breues enim sunt, qui mensura breuissima mensurari possunt. Sanctus Augustinus, & alij, qui legerunt, veteres dies, fortasse habuerunt in græco

textu παλαιστές, pro, παλαιστές; sed tamen dies veteres, rectè dicuntur dies vitæ nostræ; quoniam, vt Apostolus ait ad Hebræos 8, Quod antiquatur & senescit propè interitum est. Et nosimus vestes veteres, & domos veteres, & similia vetera non diu durare. Sanctus Ambrosius vocem græcam non à mensura, sed à palestra deduxit, & tamen aptissima similitudine explicuit cursû velocissimum, & breuissimum, & simul laboriosissimū vitæ nostræ. Qui enim in palestra currunt, vel dimicant tempus habent breuissimum, sed laboriosissimum, vt notum est. nostra editio rectè posuit, mensurabiles dies, idest, qui tam breues sunt, vt nullo negotio mensurari possint: quod idem significant dies palmares, vt Chrysostomus ex interpretatione Simmachii legit. Sed Propheta non contentus dixisse, dies suos breues & mensurabiles esse, addidit quasi corrigendo, Et substantia mea tanquam nihilū ante te: quasi dicat, parū dixi, dies breues esse, nam substantia mea, idest, subsistentia mea, hoc ipsum quod sum & subsisto, nihil est ante te. Est quidē aliquid ante oculos hominum, qui non vident nisi præsentia, sed ante te, qui vides futura, & intueris æternitatem, quæ omni caret mēsurâ, nihil omnino est. Quid enim sunt pauci anni, qui velocissimè transeunt, ad infinitam durationem? Non mentis substantiæ hoc loco non significare aliud, quam subsistentiam, & spaciū vitæ; intelligi potest ex voce hebræa, cheldi, quæ significat propriè tempus, siue seculum; vt sensus sit, tempus meum, vel, vt sanctus Hieronymus reddidit, vita, nihil est coram te.

VIII Verumtamen vniuersa vanitas omnis homo viuens.

Adhuc magis declarat, & nobis persuadere nititur quod ipse planè perspexit. Non solum, inquit, tempus vitæ nostræ breuissimum est, sed omnis homo, quicumq; ille sit, etiam Rex & Monarcha, quem omnes mirantur, & ceteri omnes invident, ille, inquam, etiā dum viuit, idest, dum viget, & floret,

ret, & in optimo statu est, vel, ut est ad verbum in hebræo, dum stat, dum firmiter consistit, & radicans videtur in terra, nihil est aliud, nisi vniuersa vanitas, siue vniuersitas vanitatis. Quicquid enim in illo est, siue sanitas, siue robur, siue pulchritudo, siue diuitiæ, siue dignitas, siue potentia, totum fragile, & momentaneum est.

IX. Verumtamen in imagine pertransit homo, sed & frustra conturbatur.

Videbat Propheta tam alto sopore depressum esse genus humanum, ut non contentus tonitruiis verborum, quibus hactenus usus est ad homines excitandos: addat aliud adhuc vehementius percellens humanas mentes, si forte somno discusso vigilare incipiant. Quoniam igitur poterat aliquis dicere, non videri verum, vitam hominum nihil esse, cum videamus tam multis bonis vitam hominum circumfluere, opibus, honoribus, sanitate, robore, & similibus, ideo nunc dicit Propheta, ista non esse vera bona, sed imagines, & umbras rerum bonarum; & ideo frustra turbari homines, cum ista vel non possunt acquirere, vel acquisita coguntur amittere: Quomodo frustra Rex conturbaretur ob amissam imaginem ligneam, vel papiraceam Regni, quando Regnum verum illi maneret. Verumtamen, inquit, in imagine pertransit homo, idest, homo pertransit, & perambulat viam vitæ huius in imagine rerum, non in rerum veritate, habens videlicet ante oculos in toto hoc itinere non res veras, sed rerum umbras atque imagines. Vita enim quam hic habemus, imago est vitæ beatæ, quæ sola vera est vita; sanitas huius temporis imago est immortalitatis, quæ sola vera est sanitas; pulchritudo, quam hic videmus, vix umbra quædam est pulchritudinis illius, quam habebimus, cum iusti fulgebunt sicut Sol in Regno Patris eorum; diuitiæ terrenæ non sunt diuitiæ, sed illarum diuitiarum imagines, quas habebimus, cum nulla omnino re indulgebimus, sed

erit Deus omnia in omnibus. Idem dici potest de sapientia, de gloria, de celsitudine, & de cæteris, quæ hic dicuntur bona. Porro phrasis illa, in imagine pertransit, siue perambulat homo, similis est illis phrasibus in Scriptura sacra frequentibus, ambulare in luce, in tenebris, in fide, in timore, in dilectione, & quæ est bis, terve, in secunda & tertia epistola Apostoli Ioannis: ambulare in veritate; cui potest opponi, ambulare in imagine, quatenus imago opponitur veritati. Sed & frustra conturbatur, idest, sine vlla causa conturbatur homo in rebus temporalibus anxie quærendis, vel conseruandis: frustra lætatur in earum lucro, & frustra plorat in earum iactura; quasi res solidæ, & veræ, ac permanētes essent: cum imaginariæ, fragiles, & caducæ sint. S. Ioannes Chrysostomus, quem Theodoretus, & Euthymius sequuntur, exponit illud, in imagine pertransit homo, ac si dictum esset, instar imaginis pertransit homo, ut non solum res humanæ sint imagines rerum verarum; sed ipse etiam homo non tam sit homo, quā hominis imago in tabella depicti.

X. Thesaurizat, & ignorat cui congregabit ea,

Probat vnico exemplo, frustra conturbari homines in opibus quærendis, augendis, conseruandis: quoniam nesciunt cui laborēt. Existimant illi quidem se filijs, aut nepotibus, qui grati memoriæ parentum futuri sint, thesaurizare: sed accidit sapissimè, ut filij, vel nepotes continuo moriantur, & hæreditas ad ignotos, vel inimicos perueniat: vel certè ut filij, vel nepotes dissipent breuissimo tempore, quæ pater, vel auus magno labore, & longissimo tempore acquisiuit: vel denique ut hæredes ingrati sint, & reddāt mala pro bonis, detrahentes industriæ, & laboribus maiorum suorum; quæ si præuidere homines illi potuissent, thesaurizassent potius sibi thesauros in cælo, & sine turbatione vitam istam traduxissent. Vide similes sententias in Ecclesiaste cap. 2. 4. 5. & 6.

Et

XI. Et nunc quæ est expectatio mea? nonne Dominus? & substantia mea apud te est.

Ex breuitate & vanitate vitæ præsentis tam clarè perspecta, concludit, se quidem spem suam in solo Deo ponere constituisse. Et nunc, inquit, his ita se habentibus, quæ est expectatio mea? quid spero? quid quero? quid opto? nonne Dominus expectatio, & spes mea est? Deinde conuersus ad ipsum Deum dicit, Substantia mea apud te est, id est, vita mea, & opes meæ apud te sunt, nihili facio cunctas res creatas, te vnum pro rebus omnibus habere cupio; quia in te sunt omnia. In hebræo ad verbum habetur, Et nunc quid expecto Domine? expectatio mea tibi ipsa? Ex quo intelligere possumus hebraicæ lectioni respondere illa tantum, Et nunc quæ est expectatio mea? nonne Dominus? Illa verò, & substantia mea apud te est, videntur addita explicandi gratia à Septuaginta senioribus, quæ à nostro Latino Interprete fideliter reddita sunt. Itaque non oportet querere, ut multi faciunt, cur substantiam latinus Interpres posuerit pro voce hebraica, quæ spem, vel expectationem significat. Latinus enim Interpres, non substantiam pro expectatione posuit, sed addidit ad verba hebraica, id quod Septuaginta Interpretes addiderunt. Simile est in Psalmo 21. vbi legimus, Deus Deus meus respice in me, quare me dereliquisti? Illud enim, respice in me, non habetur in hebræo codice, sed additum est à Septuaginta Interpretibus, & inde translatum est ab Interprete latino in editionem vulgatam.

XII. Ab omnibus iniquitatibus meis erue me, opprobrium insipienti dedisti me.

Quoniam dixit se terrena contemnere, & solum Deum expectare, & in eo spes suas omnes collocasse: consequenter adiungit, de peccatis in Deum sollicitum se esse, non autem de opprobrijs hominum. Ab omnibus, inquit,

iniquitatibus meis erue me, id est, quia sola peccata sunt, quæ mihi ad te viam impedire possunt, & quæ sola vera sunt mala; ideo precor, ut ab illis me liberares, & quidem omnibus, non præteritis tantum, sed etiam futuris, illa delendo, ista impediendo. Quo loco notandum est, viros etiam perfectos, qui terrena despiciunt, & ad Deum toto corde anhelant, habere sæper aliquid, quod sibi petant ignosci; & sollicitos esse debere pro quotidianis peccatis quotidianas Deo pces offerre. Opprobrium insipienti dedisti me. Hæc pars versiculi coniungitur cum sequentibus hoc modo, Tu quidem opprobrium insipienti dedisti me; ego autem obmutui, & non aperui os meum. Significat autem, se propterea quod diceret, vana esse & contemnenda præsentia, & in solo Deo spem esse ponendam: derideri solitum ab insipientibus, qui non capiunt quæ Dei sunt. Quomodo etiam dicit Euangelium de Christo Domino Luc. 16. Audiebant hæc omnia Pharisæi, qui erant auari, & deridebant illum. In hebræo habetur contraria sententia, nimirum, opprobrium insipienti non pones me. Sed anteponenda est lectio Septuaginta Interpretum, ut sanctus Ambrosius admonet: quoniam sequentia verba; Obmutui, & non aperui os meum, manifestè docent, Dauidem auduisse opprobria insipientium, & sic etiam legunt, & exponunt Augustinus, Chrysostomus, & alij veteres Patres. Ipse etiam sanctus Hieronymus, qui in versione ex hebræo posuit particulam negantem, tamen in commentario legit, & exponit hunc locum sine tali particula. Proinde videtur ea particula irrepsisse in textum hebraicum post tempora Septuaginta Interpretum.

Obmutui, & non aperui os meum, quoniam tu fecisti, amoue à me plagas tuas. **XIII.**

Cum opprobria ab insipientibus audiui, non respondi, neque defendi me, sed obmutui, id est, ita me gessi, ac si nuntus fuisset: imò etiam non aperui os meum, sed ita me gessi ac si surdus fuisset.

fuissem, neque opprobria illa audiuissem. Qui enim muti sunt, & non surdi, aperiunt os suum, & conantur respondere, cum aliquid audiunt; qui autem surdi sunt, & muti, neque loquuntur, neque aperiunt os suum. Reddit autem rationem, cur obmutuerit, & non aperuerit os suum, Quoniam, inquit, tu fecisti, nimirum, ut opprobria in me iacerentur: tu enim es, qui posuisti me opprobriū insipientibus. Et hanc eandem rationem reddidit idem David, quando obmutuit ad maledictiones Semei, 2. Reg. cap. 16. Sinite, inquit, illum ut maledicat, Dominus enim praecepit ei, ut malediceret David, & quis est, qui audeat dicere, quare sic fecerit? Vbi tamen obseruandū est, Deum non praecepisse Semei, ut malediceret Davidi praecepto eiusmodi, ubi obedientia laudaretur; scimus enim Semei grauius peccasse maledicendo Dauidem; & propter hoc postea fuisse à Salomone punitum: sed dicitur Deus praecepisse Semei, ut malediceret, quoniam videns malam Semei voluntatem, vsus est illa mala voluntate, quam ipse non fecerat, ad humiliandum, & corripiendum Dauidem. De qua re vide sanctum Augustinum lib. de gratia & libero arbitrio cap. 20. & sequentibus, vel si vis fusius aliquid tractatum legere, vide in Controuersijs nostris lib. 2. de amissione gratiae, & statu peccati cap. 13. & sequentibus. Amoue à me plagas tuas, quasi dicat, libenter accipio contumelias, & opprobria insipientium, quae tu ad meam humiliationem paterna seueritate ordinasti; sed plagas tuas ferre non possum, ideo precor, ut eas à me omnino remoueas. Vocat enim plagas Dei, flagella & supplicia, quae Deus iratus inmittit, ut non pater, aut medicus, sed ut Iudex, de quibus in Psalmo superiore dixit: Domine ne in furore tuo arguas me. Tales plagae sunt excæcatio, obduratio, sensus reprobis, & ipsa damnatio ad ignem sempiternum.

XIIII.

A fortitudine manus tuae ego defeci in increpationibus, pro-

pter iniquitatem corripuisti hominem.

Et tabescere fecisti sicut araneam animam eius, verumtamen vanè conturbatur omnis homo. XV.

Explicat, cur tantopere cupiat à se remoueri plagas Dei, & dicit causam esse, quoniam expertus est in seipso, & in alijs quàm intolerabiles sint eiusmodi plagae: de se primum ita dicit, A fortitudine manus tuae ego defeci in increpationibus, idest, ego ipse fortitudinem, & potentiam, siue grauitatem manus tuae percutientis expertus defeci, & planè consumptus sum, & perij in increpationibus, idest, in illa crude li increpatione, quando in furore tuo arguisti me. Hoc autem Davidi contigit, quando ob peccatum adulterij commissum, Deus in pœnam huius peccati, permisit illum cadere in peccatum homicidij, quod est grauius, & in tantam cæcitatem, ut per multos menses non redierit ad se, neque statum suum, idest, mortem animae suae cognouerit: nullum enim est supplicium grauius, quàm, quando pœna peccati est aliud peccatum. Quod enim peccatum sit aliquando pœna peccati, & quidem pœna horribilis, & timenda super omnes pœnas, docet Apostolus Roman. 1. Qui cum cognouissent Deum, non sicut Deum glorificauerunt, propterea tradidit illos Deus in desideria cordis eorum, in immunditiam, ut contumelijs afficiant corpora sua; & infra, Propterea tradidit illos Deus in passionem ignominiae; & infra, Et sicut non probauerunt Deum habere in notitia, tradidit illos Deus in reprobum sensum, ut faciant ea, quae non conueniunt. Vide de hoc flagello sanctum Augustinum lib. 5. in Iulianum cap. 3. Deinde addit Propheta de alijs peccatoribus, hac plaga crudeli à Deo punitis, Propter iniquitatem corripuisti hominem, & tabescere fecisti sicut araneam animam eius, idest, propter peccata praecedentia corripuisti in furore tuo hominem peccatorem, & fecisti ut anima

ma eius contabesceret instar aranæ, quæ laborat in texenda tela, ut capiat muscas, & interim ipsa exsiccat, & consumitur. Sic enim animæ hominum carnalium iusto Dei iudicio perpetuo laborant in rebus temporalibus acquirendis, & in eo labore consumunt ingenium, & mentem, & inde anima exsiccat omni humore gratiæ, ut ne cogitent quidem de salute sua, neque ullo desiderio tangantur veræ felicitatis. Contra quam animæ ariditatem desiderabat in alio Psalmo idem Propheta adipem, & pinguedinem spirituales dicens: Sicut adipe, & pinguedine repleatur anima mea. Concludit Propheta, Verumtamen vanè conturbatur omnis homo, idest, omnis homo, cuius anima tabescit sicut aranea, vanè conturbatur, frustra laborat, sine ulla causa tot contentionibus agitur. Quid enim prodest homini, si vniuersum mūdum lucretur, animæ verò suæ detrimentum patiat? Sed hoc loco multa obseruanda sunt: primo verba illa in increpationibus, in textu hebraico & græco, & apud Ambrosium & Hieronymum coniungi cum verbis sequentibus, nimirum sic, In increpationibus propter iniquitatem corripuisti hominem: tamen apud Augustinum, & in nostris communibus libris, coniungi cum superioribus, nimirum cum illis, A fortitudine manus tuæ ego defeci in increpationibus; sed utroque modo sensus constat. Secundo nota, sanctum Hieronymum ex hebræo non vertere, araneam, sed tineam: sed credibile est vocem hebraicam utrumque significare. Certè similitudo magna est inter araneam, & tineam; ut enim aranea texendo telam se exiccat, ita etiam tinea rodendo pannum se ipsa interimit. Tertio nota, ubi nos habemus ex græco textu, animā eius, in hebraico haberi, desiderabile eius; proinde Septuaginta Interpretes non tam verbum reddiderunt, quam exposuerunt. Verè enim anima ratione prædita est id quod in homine est maxime pulchrum, preciosum, & desiderabile: ipsa enim imago Dei est, ipsa æterna

est, ipsa capax est æternæ felicitatis, & per illam communicamus cum Angelis, ut per carnem communicamus cum bestiis; proinde incredibilis cæcitas est, propter explendas carnis appetitiones, perdere quod in nobis est summe preciosum, & desiderabile. Quarto nota, non haberi in hebræo, vel græco textu verbum, conturbatur, sed solum, vanè omnis homo, siue vanitas omnis homo. Cæterum latinus Interpretes addidit verbū explicationis gratia, & addidit illud, quod supra habetur versu 9. Nota ultimo, non deesse, qui hos duos versus exponant vel de flagello temporalis calamitatis, vel de paterna correptione, quæ facit homines, qui antea dura ceruice erant, molles, ut araneas, idest, humiles, & contritos. Sed in his, quæ non sunt contra fidem, & obscurissima sunt, licet unicuique abundare in sensu suo. Nobis illa verba, Amoue à me plagas tuas, facile persuaferunt, hic non agi de flagello temporali, cum Psalmo superiori dixerit idem David, Ego in flagella paratus sum: neque de paterna correptione, sed de correptione illa terribili, quam Iusti maxime horrēt; paternam enim correptionem, quæ humiles, & contritos reddit, Iusti diligunt, & expetunt, non horrent, aut fugiunt. Similitudo quoque aranæ tabescentis nihil boni nobis significare visa est. Non tamen reprehendimus, sed laudamus potius explicationes aliorū, quæ prosunt ad ædificationem, quamuis non videantur nobis literales.

Exaudi orationem meam Domine. XVI.
& deprecationem meam;
auribus percipe lacrymas meas.

Magno affectu Psalmum concludit orans Deum; quid autem oret paulo post explicabitur. Interim illud sciendum est, per orationem intelligi simplicem petitionem, per deprecationem autem vehementem clamorem, ut vox hebraica demonstrat, per lacrymas autem affectum, cuius vox magis resonat coram

eoram Deo, quàm vlla verba. In hebræo & græco, vt nunc se habent, continuantur cum hoc versiculo verba illa, ne fileas, quæ nos habemus in sequenti versu, & eo modo tribus nominibus tria verba respondent hoc modo, Exaudi orationem meam, deprecationem meam auribus percipe, & ad lacrymas meas ne fileas. Cæterum nostram lectionem habent veteres Patres, Ambrosius, Hieronymus, & Augustinus in commentarijs huius loci, & verba hebraica remotis distinctionibus, quas Rabini addiderunt, optimè distinctionem librorum nostrorum recipiunt.

XVII. Ne fileas, quoniã aduena ego sum apud te, & peregrinus, sicut omnes patres mei.

Adhuc postulat exauditionem, & nõ dum explicat petitionem; sed loquitur ad eum, qui scit, quid desideret spiritus. Ne fileas, inquit, idest, responde petenti, ne despice clamantem, qui enim filet audita petitione, idem facit, ac ille, qui non vult concedere quod petitur. Reddit autem causam, cur debeat audire, dicens, Quoniam aduena sum apud te, & peregrinus sicut omnes patres mei, idest, quoniam tu nosti, & apud notitiam tuam est, quod ego non sum ciuis huius mundi, sed aduena & peregrinus, ac per hoc ciuis ciuitatis supernæ Hierusalem, quamuis hic interim degam; decet autem vt audias ciuem ciuitatis tuæ in exilio positum, & ex peregrinatione sua ad te clamantem. Notat hoc loco S. Ioannes Chrysostomus, magnum virum & spirituales fuisse Dauidem, qui cum Regni gloria & opibus terrenis abundaret, tamen verè agnouerit se aduenam, & peregrinum in terra.


XVIII. Remitte mihi vt refrigerer priusquam abeam, & amplius non ero.

Hic iam exponit petitionem suam, & est illa, de qua dicitur in Psal. 31. Pro hac orabit ad te omnis sanctus in tempore opportuno. Petit igitur cum clamore, & lacrymis veniam peccatorum, vt pacata conscientia, de peregrinatione ad patriam latus perueniat, atque in summa gratiam & gloriam petat, quæ est illa petitio, quam soli, & omnes illi toto corde Deo proponunt, qui mundi vanitatem agnoscunt. Ait igitur, Remitte mihi, vel vt S. Hieronymus vertit, Parce mihi, vel vt ad verbum ex hebræo verti posset, Desine à me, id est, ne sis durus exactor, non instes pro solutione debitorum, desine à me repetere, quæ male dissipauit. Vt refrigerer priusquam abeam, idest, vt ante discessum ex hac vita refrigerer, intelligens mihi peccata esse remissa: nisi enim hic remiseris, non ibo ad requiem, sed ad carcerem. Dic igitur animæ meæ, salus tua ego sum, antequam de corpore egredi iubeatur. Et amplius non ero, aduena videlicet, & peregrinus, sed ciuis Sanctorum, & domesticus Dei. Vel, antequam abeam, & amplius non ero, idest, antequam discedam ex hac vita, & amittam omnem vitam: qui enim post hanc vitam, non habet æternam vitam, consequenter habet æternam mortem, & quoddam non esse, cum longissimè absit ab eo qui est. Sunt enim & viuunt, qui damnati sunt ad inferos, sed dicuntur non esse, nec viuere, quoniam ideò solùm habent esse, & viuere, vt semper moriantur, & non esse desiderant. Posteriores sensum habet S. Augustinus, vtrumque autem attingit S. Ambrosius.

PSALMVS XXXIX.

Titulus, & Argumentum.

In finem, Psalmus Dauid.



N titulo nihil est noui. Psalmum hunc nonnulli ex recentioribus nimis humiliter exponunt, referentes eum ad morbum corporalem Dauidis; de quo morbo nihil legimus in Scripturis, sed tantum in fabulis Rabinorum. Beatus Paulus ad Hebr. 10. de Christo exponit nonnulla, quæ

P

quæ in hoc Psalmo dicuntur, quæ Dauid non conueniunt vlllo modo. Quædam etiam alia sunt, quæ ad Dauidem accommodari non possunt, vt illa, In capite libri scriptum est de me; & illa, Ego autem mendicus sum, & pauper. Rectè igitur S. Ambrosius, S. Hieronymus, S. Augustinus, & Euthymius Psalmum hunc totum de Christo, & Ecclesia exponunt, idest, de capite, & corpore, ita vt Christus semper loquatur, sed primò in persona corporis sui, deinde in persona sua.

Explicatio Psalmi 39.

I. Expectans expectaui Dominum, & intendit mihi.

Christus in persona populi sui exponit longam expectationem redemptionis. Expectauit enim supra quatuor annorum millia, dum interim per Patriarchas, & Prophetas, partim figuris, partim oraculis promitteretur liberatio à miserijs, in quas per peccatum primi hominis genus humanum ceciderat. Expectans, inquit, expectaui Dominum, idest, longo tempore, sine intermissione expectaui Dominum miserantem, visitantem, & liberantem populum suum. & intendit mihi, idest, & tandem à mea spe fraudatus non fui: nam ad me audiendum intendit aures suas. Ex hebræo colligitur illud, intendit mihi, propriè significare, inclinauit se ad me, siue, extendit se ad me, nimirum, audiendum.

II. Et exaudiuit preces meas, & eduxit me de lacu miseriarum, & de luto facis.

Explicat quod dixit, intendit mihi, dicens, intendit mihi; nam exaudiuit preces meas: & effectus exauditionis fuit, quando eduxit me de lacu miseriarum, & de luto facis. Per lacum miseriarum intelligitur profunda fouea; nam vox hebraica, bor, significat cisternam, & vox hebraica saon, significat tumultum, confusionem, desolationem, &

similia. Describitur igitur locus profundus carens lumine, & luto putrido plenus, in quem multi deciderint, ex quorum motu, & eiulatu existat tumultus, & confusio magna, quam Septuaginta Interpretes generatim miseriam appellarunt. Hic status est impiorum, qui carent lumine notitiæ Dei, & mandatorum eius, & infixi sunt in limo carnalium cupiditatum; ex quibus non solum fit, vt nò possint ambulare ad æternam felicitatem, sed perpetuò inter se tumultuentur, & contendant. Ab hoc profundo liberat nos gratia Redemptoris, cum incipimus per fidem cognoscere verum Deum, & vera, ac sempiterna bona, & per spem, & charitatem liberari à cupiditatibus terrenis, & pacem Dei, atque animæ tranquillitatem possidere. Illud autem obseruandum est cum S. Augustino, eum qui exauditus dicitur, vt educeretur de lacu, iam caput sustulisse, & agnouisse miseriam suam, & ideò de profundo clamare coepisse. Dens enim inspirat electis suis, adhuc in peccato manentibus, spiritum fidei, & timoris, & inuocationis, sine qua præueniente gratia nemo vnquam de profundo clamaret; sed contemneret potius Deum, & salutis monita, iuxta illud Prouerbiorum 18. Impius cum in profundum malorum venerit, contemnit.

Et statuit supra petram pedes III. meos, & direxit gressus meos.

Ille qui ceciderat in lacum miseriarum, de via ceciderat in qua posuerat eum Deus initio creationis, vt per eam recto, & facili tramite perueniret ad Regnum: ideò qui postea illum eduxit de lacu miseriarum, & luto facis, in viam restituit, & viam stabilem, ac firmam, nec minus rectam, & planam. atque hoc est quod ait, Et statuit supra petram pedes meos, idest, pedes meos, quos de profundo, & luto lacu eruit, statuit supra altam, & firmam petram: petra autem erat Christus, qui de se ait, Ego sum via, veritas, & vita. itaque statuit supra fidem, & doctrinam, atque exempla Christi, pedes iustificatorum.

vt

ut sequantur vestigia eius. Et direxit gressus meos, idest, non solum constituit pedes meos in via lapidibus strata, sed etiam in via recta, & sic direxit gressus meos in viam pacis.

IIII. Et immisit in os meum canticum nouum, carmen Deo nostro.

Ex eo quod constituit Deus me in via firmissima, & rectissima, factum est ut cœperim cantare canticum nouum; antea siquidem, ut eram homo vetus, ita cantabam cantica vetera de amoribus mundi; sed renouatus spiritu mentis meæ cœpi cantare canticum nouum de amore Dei: quod canticum ipse Deus immisit in os meum: & ipsum idem est carmen Deo nostro iucundissimum. In hebræo pro illo, carmen Deo nostro, habetur, laudem Deo nostro. Itaque carmen Deo nostro debet intelligi, carmen laudis Dei nostri; & hoc est canticum nouum, de quo diximus supra: qui enim canit amores mundi, mundum sine dubio laudat; & qui canit amores Dei, Deum sine dubio laudat.

V. Videbunt multi, & timebunt & sperabunt in Domino.

Populus Dei iam liberatus à lacu miseriæ, siue idem Christus in persona populi iam liberati, prædicit multos ad eorum exemplum liberandos. Multi, inquit, videbunt lacum miseriæ, & liberationem aliquorum, & timebunt, & sperabunt in Domino, idest, timebunt lacum, & sperabunt in liberatore. Hoc enim est initium salutis, cum Deus per gratiam suam incipit aperire oculos interiores hominibus peccatoribus, ut videant statum peccati miserum, & simul cognoscant à quo liberari possint, & inde timere, & sperare incipiant.

VI. Beatus vir, cuius est nomen Domini spes eius, & non respexit in vanitates, & insanias falsas.

Hæc est quasi adhortatio, & laudatio inuitans homines ad imitandos liberatos. Beatus vir, cuius est nomen

Domini spes eius, idest, ille verè felix est, qui spem suam verè ponit in Domino, qui solus omnipotens, & misericors est, & ideo potest, & vult de omni miseria liberare eos, qui sperant in se. Illud, nomen Domini, significare potest inuocationem, siue notitiam familiaritatis, siue potentiam, & auctoritatem, siue simpliciter ipsum Deum. Addit ad maiorem explicationem, & non respexit in vanitates, & insanias falsas, idest, non respexit ad auxilium alicuius alterius, ac præsertim non respexit ad auxilium rerum vanissimarum, & fallaciarum, quæ saluare non possunt, ut respiciunt homines vani, & stulti. Nonnulli, ut Euthymius, & aliqui moderni, referunt vanitates ad idola gentium, & insanias falsas, ad vaticinia oraculorum gentilium. S. Hieronymus vertit ex hebræo, Ad superbias & pompas mendaciarum; sed communis explicatio Sanctorum Ambrosij, Hieronymi, Augustini, & Chrysostomi in commentario huius loci, generalis est, ut per vanitates intelligantur omnia vana auxilia, siue in hominibus, siue in rebus alijs creatis; & per insanias falsas intelligantur eadem falsa, siue fallacia auxilia, quæ etiam insanis dici possunt, idest, res insanæ, quæ non eligerentur nisi ab insanis. Eiusmodi sunt præter cætera, prædictiones Astrologorum, vel incantationes Necromanticorum, vel obseruationes, & auguria, quibus multi credunt, & confidunt, sed vanissimi, ac stultissimi sunt.

VII. Multa fecisti tu Domine Deus meus, mirabilia tua, & cogitationibus tuis, non est qui similis sit tibi.

Transit nunc ad explicandum mysterium altissimum redemptionis humanæ, per quod educti sunt, & educuntur plurimi de lacu miseriæ, & luto facis: & primo generatim significat mirabilia esse opera Dei. Multa, inquit, fecisti tu Domine mirabilia tua, idest, multiplicasti mirabilia tua, & cogitationibus tuis non est qui similis sit tibi, idest, & in cogitationibus siue, in adin-

uentionibus sapientiæ tuæ non est qui tibi perfectè similis sit, ita vt tibi comparari possit. Sanctus Hieronymus ex hebræo vertit, Non inuenio ordinem coram te, pro eo quod nos habemus, non est qui similis sit tibi; sed Septuaginta Interpretes clarius interpretati sunt verba hebraica: nam verbum *hac*, non significat solum ordinare, sed etiam æstimare, æquare, cōparare. Itaque rectè ad verbū sic verteremus, Nō est, qui tibi cōparari, vel æquari possit; quod idē est cū eo, quod nos habemus in græco, non est qui similis sit tibi.

772

VIII. Annunciaui, & loquutus sum: multiplicati sūt super numerum.

Reddit rationem, cur nemo possit cum Deo comparari, quo ad opera mirabilia, & cogitationes profundas, & ait, Annunciaui & loquutus sum, idest, manifestaui aliqua eiusmodi opera per Prophetas, per sapientes homines, per ipsa elementa mundi: nam cæli enarrant gloriam Dei, & opera manuum eius annunciat firmamentum; sed multiplicata sunt super numerum, idest, tam multa sunt, vt numerari non possint, proinde neque annuntiari, & manifestari omnia possunt. Ex hebræo posset etiam hic esse sensus, Maiora sunt, quam vt enarrari queant: nam ad verbum sic habetur, Roborata sunt præ enarrari, siue, præ numerari, idem enim verbum significat numerare, & narrare; & fortasse de industria posuit Propheta verbum ambiguum, vt ad vtramque significationem referretur. Verè enim opera Dei, etiam si solum naturalia respiciamus, roborata sunt, siue creuerunt tam quoad magnitudinem, quàm quoad multitudinem, vt neque enarrari, neque numerari possint: nam in singulis rebus etiam minimis, vt in vna arbuscula, in vno animalculo, in vno flosculo tot sunt mirabilia, vt ne summi quidem Philosophi eorum rationē inuestigare potuerint. Sed hoc loco illud est obseruandum, quod cū hæc verba referuntur ad Christum, intelligendum est mirabilia Dei non esse inenarrabilia, vel innume-

rabilia respectu ipsius Christi, sed respectu nostri: ipse enim, qui fecit opera illa mirabilia nouit exactissimè magnitudinem, & multitudinem ipsorum; sed mortales homines capaces non sūt tantæ scientiæ. Sancti Patres Ambrosius, Hieronymus, & Augustinus in commentarijs; quia legerunt vt nos nunc habemus, multiplicati sunt super numerum, retulerunt hunc totum versiculum ad conciones Christi, & audientium persuasionem, vt sensus sit, Annunciaui, & locutus sum mirabilia tua, & multiplicati sunt ij, qui crediderunt super numerum, idest, innumerales crediderunt; posito numero infinito pro finito per hyperbolem, vel, crediderunt multi super numerum præordinatorum ad vitam æternam, quia multi reprobi cum Electis in arcam Domini, siue in rete dominicum intrauerunt. Et potest ad hunc sensum non difficulter accommodari codex hebraicus: nam vbi habemus præ numerari, mutatis punctis, potest fieri, præ numero, vt notum est intelligentibus. Et quidem hæc explicatio vera est, sed non ita perfectè respondet textui originali, neque tam aptè connectit hunc versiculum cum superiori, vt expositio prior, quæ est Euthymij, & aliorum, & est conformis versioni S. Hieronymi, neque contraria est editioni nostræ vulgatæ: illud enim multiplicati sunt, vel est error librorum, vt multi suspicantur; & scriptum est, multiplicati, pro, multiplicata, idest, cogitationes, aut multiplicata, idest, opera mirabilia: vel certè ipse Interpres posuit genus masculinum, dicens, Multiplicati sunt, quia respexit ad nomen græcum, quo significantur cogitationes, quod est generis masculini, videlicet *διανοησις*. Simile quid habemus Sap. 1. Spiritus Domini repleuit orbem terrarum, & hoc quod continet omnia scientiam habet vocis. Vbi, illud, hoc, &, illud, quod, referuntur ad spiritum Domini, & debuisset scribi, Et hic qui continet omnia, secundum gramicam latinam; sed Interpres posuit genus neutrum, quia spiritus græcè, est generis neutri, videlicet *πνεῦμα*.

IX. Sacrificium, & oblationem noluiſti, aures autem perfeciſti mihi.

X. Holocauſtum & pro peccato non poſtulaiſti: tunc dixi ecce venio.

Mirabilia verè ſunt omnia, quæ fecit Deus, & in omnibus relucet profundiffimæ cogitationes eius, ſed omnibus alijs quaſi in infinitum excellunt opera redemptionis humanæ. Quid enim maius cogitari poteſt, quàm Deum deſcendere ad formam ſerui, & fieri mendicum, & pauperem, vt homo educatur de lacu miſeriæ, & ad ſummum cælum euehatur? Eundem etiam Deum in forma ſerui virgis cædi, atque inter latrones crucifigi, vt ſeruos exaltet inter Angelos ad conſortium Regni ſempiterni? & hæc omnia iuſtiſſimè, ſapienſiſſimèq. ſine vlla iniuria, imò verò cū ſumma gloria Diuinitatis fieri? Hoc igitur admirabile myſterium in ſequentibus verſiculis, Chriſtus ipſe per linguam, & calamum Dauidis exponit. Sacrificium, inquit, & oblationem noluiſti, hoc eſt, non voluiſti placari ſacrificio pecorum, neque oblatione panū, vel thuris; ſed victima infiniti precij; ideò corpus mortale assumere me voluiſti, vt per obedientiam vſq. ad mortem, expiarè primi hominis inobedientiam: & quoniam holocauſtum pecorum, & ſacrificium pro peccato non admiſiſti, idcirco dixi, ecce venio, vt ego ipſe ſiam ſacerdos, & ſacrificium, quo placatus humano generis, educas homines de lacu miſeriæ, & de luto feciſ. Multa ſunt hoc loco notanda, primo per ſacrificium, & oblationem non intelligi hoc loco actionem ſacrificandi, vel offerendi, ſed hoſtiam mactandam, vt agnum, aut vitulum, & donum offerendum, vt panem, vel quid aliud: nam in hebræo eſt zebach, & mincha; & S. Paulus Hebr. 10. legit, hoſtiam, pro eo quod nos habemus ſacrificium. Notandum ſecundo, non eſſe contrarium quod hic dicitur, ſacrificium, & oblationem noluiſti, tot præceptis Domini

Belarm. in Pſal.

de ſacrificijs offerendis, quæ habentur in Leuitico: nā voluit quidē olim Deus ſacrificia, oblationes, & holocauſta, & victimas pro peccato, ſed voluit ad ſignificandam, non ad faciendam expiationem: nā vt docet Apoſtolus in epiſt. ad Hebr. cap. 10. Impoſſibile erat ſanguine hircorum, & vitulorum auferri peccata. Tercio notandum vulgatam latinam editionem, quæ habet, Aures autem perfeciſti mihi; non conuenire cum hebraico textu, neque cum græco: nam in hebræo habetur, Aures autem fodiſti mihi; in græco verò, Corpus autem perfeciſti mihi. Sed lectio illa, quæ habet, corpus autem perfeciſti mihi, nullo modo reiſci poteſt, quia non ſolū habetur in textu græco, & recipitur à Patribus latinis, & græcis, vt Ambroſio, & Auguſtino, Chryſoſtomo, & Theodoro; ſed etiam approbatur ab Apoſtolo ad Hebr. 10. & fortaſſe in textu hebraico antiquo, quem habuerunt Septuaginta Interpretes, erat vox aliqua, quæ corpus ſignificaret. Lectio quoque latinæ editionis, Aures autem perfeciſti mihi, reiſci non poteſt, tum quia lectio illa eſt etiam antiquiſſima, vt perſpicuum eſt ex Chryſoſtomo in ſecunda expoſitione huius Pſalmi, & Hieronymo in commentario huius Pſalmi; tum quia latina vulgata editio approbata eſt in Concilio Tridentino, & poteſt facilè concordari cum lectione græca & hebraica. Nā verbum hebraicum, carà, non ſolū

כרה

זבח
מנחת

P 3 qui-

quibus debetur obedientia, iuxta illud Psal. 17. In auditu auris obediuit mihi. Christus autem od id potissimum corpus humanum accepit, vt Patri Deo per obedientiam in forma serui obedi- ret, & obediendo pro peccatis totius mundi satisfaceret. Ego veni, inquit ipse Ioan. 5. & 6. non vt faciam voluntatem meam, sed eius qui misit me. & Ioan. 4. Cibus meus est, vt faciam voluntatem eius, qui misit me. & Ioan. 8. Quae placita sunt ei facio semper. Sola restat illa lectio, Aures autem fodisti mihi, quae non videtur recipienda, vt neque expositio illorum, qui verba illa, Aures autem perfecisti mihi, significare volunt, aures purgasti, siue, aperuisti, vt idem sit, quod fodisti, idest, aperuisti. Hac enim lectio non habetur in commentarijs vllius veteris Patris, quod ego sciam; & videtur repugnare veritati mysterij: qui enim dicit, Aures fodisti, vel purgasti mihi, significat se habuisse aliquando aures clausas, vel immundas. Christus autem, qui hic loquitur, semper habuit apertas, & purgatissimas, vt nunquam verè potuerit dicere, Aures fodisti, vel aperuisti, vel purgasti mihi. Notandum quarto, illa verba, Holocaustum, & pro peccato, non significare, holocaustum esse sacrificium pro peccato; distinguuntur enim eo loco duo genera sacrificiorum, videlicet holocaustum, & sacrificium pro peccato: nam in hebraeo est, holocaustum, & peccatum; sed nomine, peccati, intelligitur sacrificium pro peccato, vt etiam apud Apostolum 2. Corinth. 5. Qui peccatum non nouit, pro nobis peccatum fecit. Igitur sensus est, holocaustum, & sacrificium pro peccato non postulasti. Meminit autem in his duobus versiculis omnium generum sacrificiorum veterum, vt ostendat omnia fuisse figuras sacrificij Christi. Nam, vt scribit S. Leo serm. 8. de passione Domini, omnes differetias hostiarum vna corporis & sanguinis Christi implet oblatio. Notandum quinto illud, Tunc dixi, ecce venio, referri ad tēps, quo Deus decreuit, nolle admittere sacrificia veteris Testamē-

ti pro expiratione: tunc enim vbi Deus hoc decreuit, dixit filius Dei, Ecce venio ego, vt per sacrificium corporis, & sanguinis mei reconciliato impleatur.

In capite libri scriptum est de xī. me, vt facerem voluntatem tuā: Deus meus volui, & legem tuam in medio cordis mei.

Exponit iam ad quid veniat, cum dixerit, Ecce venio, & ait, venio vt faciā voluntatem Dei, sicut de me scriptum est. Voluntas autem Dei erat, vt per oblationem corporis sui ad passionem, & mortem sanctificaret nos. Sic enim hunc locum exponit Apostolus ad Hebr. 10. vbi postea quam citauit hunc locum Psalmi, addit, In qua voluntate sanctificati sumus per oblationem corporis Iesu Christi semel. In capite libri scriptum est de me. S. Ambrosius intelligit per caput libri, initium libri Geneseos, vbi scriptum est, Hoc nunc os ex ossibus meis, & relinquet homo patrem & matrem, & adhærebit uxori suae. Quod exponit Apostolus ad Ephes. 5. Sacramentum hoc magnum est, ego autem dico in Christo & in Ecclesia. S. Augustinus exponit, hoc dictum esse de principio libri Psalmorum, vbi dicitur de Christo, In lege Domini voluntas eius. S. Ioannes Chrysostomus, Euthymius, & Theodoretus, intelligunt generatim de libris Prophetarum, in quibus plurima de Christi passione scripta sunt: neq. putant vim esse faciendam in illa voce, in capite, quoniam in hebraeo non habetur, in capite, sed in volumine libri. S. Hieronymus in commentario, vt etiam Chrysostomus in secunda expositione, intelligit per caput libri, initium Euangelij secundum Ioannem, vbi scriptum est, In principio erat Verbum, &c. & infra, Et Verbum caro factum est. Non desunt, qui per caput libri, intelligunt initium libri vitae, de quo libro vitae multa dicuntur in Psalmo 68. Daniel 12. Luc. 10. Philip. 4. & Apoc. 20. & 21. & quadrat in hunc librum, quod dicitur hoc loco secundum hebraicas voces in volumine libri, siue, in libro inuolu-

noluto, & clauso. Liber enim vitæ, in quo scripta sunt nomina prædestinatorum, clausus est, quia non potest hoc tempore legi, sed constat tamen in capite eius libri, Christum scriptum esse, eiusque passionem, & mortem. Hæc omnia probabilia sunt; sed videtur simplicissima, & maxime literalis expositio, si nomine capitis intelligatur summa totius libri diuinarum Scripturarum. Siquidem in textu hebraico, ideo non habetur in qua parte libri hoc scriptum sit, sed dicitur, In volumine libri scriptum est de me, quasi dicat, in toto volumine, quia summa totius Scripturæ Christum loquitur: Dominus enim dixit Luc. ultimo, Oportet impleri, quæ scripta sunt in lege Moysi, & Prophetis, & Psalmis de me, & ibidem, Interpretabatur duobus discipulis in omnibus scripturis, quæ de ipso erant, incipiens à Moyse, & omnibus Prophetis. Et Ioan. 5. idem Dominus dixit in genere, Scrutamini Scripturas, quia illæ sunt, quæ testimonium perhibent de me. Et quod habetur in textu græco, & latino, In capite libri, aptè exponi potest, in summa libri: nam & græcè & latinè, dicitur caput non solum initium libri, sed etiam id quod omnia referuntur. Nam & recapitulare, est in summam redigere, & capita librorum distingui solent iuxta ea, ad quæ reuocantur partes principales librorum. Et hoc modo accipitur quod ait Apostolus ad Hebr. 8. Capitulum super ea, quæ dicuntur, talem habemus Pontificem, idest, summa eorum quæ dicuntur, est, quod talem habemus Pontificem, &c. Quoniam igitur non ait hoc loco Dominus, In capite primi libri, vel in capite primo libri, sed generatim in capite libri, rectè dixerunt Chrysostomus, Theodoretus, & Euthymius hoc loco, In capite libri, significare totum volumen diuinarum Scripturarum: id enim coincidit cum eo quod nos dicimus, summam totius Scripturæ ad Christum pertinere: ipse enim est finis legis ex Apostolo ad Rom. 10. Dicit igitur Dominus, In capite libri scriptum est de me, vt facerem volun-

tatem tuam, idest, Scripturæ omnes testantur me ad hoc venturum fuisse in mundum, vt facerem voluntatem tuam, tibi per omnia accuratissime obediendo. Deinde conuersus ad Patrem addit, Deus meus volui, idest, libentissime acceptaui decretum tuum, & legem tuam in medio cordis mei, supple, posui, idest, nihil maiori affectu desiderauit, quam implere legem tuam. De iustis dicitur in Psal. 36. Lex eius in corde ipsius: sed de capite iustorum, legem tuam in medio cordis mei posui. Et qui sunt Christi, spiritum hunc Christi habere debent, vt legem Domini rebus omnibus anteponant, eamque in medio memoriæ, in medio intelligentiæ, & in medio voluntatis semper habeant. Non multum refert quod in hebraeo, & græco est, In medio ventris mei: agitur enim de ventre animæ, non corporis; in anima verò cor, & venter idem omnino sunt,

Annunciaui iustitiam tuam in XII.
Ecclesia magna, ecce labia mea
non prohibebo Domine tu scisti.

Quamuis diuinæ voluntatis finis precipuus fuerit, vt Christus pro humano genere moreretur; voluit tamen Deus Pater, vt Christus antea assidue prædicaret, & prædicatio veritatis esset quasi via ad passionem; & ipse non solum Redemptor, sed etiam Doctor, & Magister esset generis humani: ideo nunc dicit, Annunciaui iustitiam tuam, idest, prædicaui legem tuam iustissimam, & etiam opera veræ iustitiæ, quæ tu ab hominibus requiris: & hoc prædicaui palam, & publicè audientibus innumerabilibus populorum turbis: & tu Domine testis esse potes, quia id feci, & faciam deinceps. Et verè tota vita sua Christus prædicaui, ab infantia prædicare cœpit exemplo suo contemptum rerum visibilium, modestiam, temperantiam, humilitatem. Deinde à Baptismo, in quo dictum est à Patre, Ipsum audite; prædicare cœpit etiam verbo, neque cessauit vsque ad

mortem per se prædicare, & prædicationem postea per Apostolos continuauit, & continuabit usque ad mundi con summationem per Apostolorum succes sores.

XIII. Iustitiam tuam non abscondi in corde meo: veritatem tuam, & salutare tuum dixi.

Multi prædicant, dū spes lucri adest, vel timor damni non terret; sed cessante spe, vel urgente timore, abscondunt in corde suo prædicationem veritatis, neque eam foris erumpere sinunt. Ab ijs vitijs longissimè Christus abfuit, & nos exemplo suo docet, vt idem faciamus: ideo dicit, Annunciaui iustitiam tuam, & neque per negligentiam, neque per vllum timorem illam vnquam abscondi in corde meo. Quod autem dixit de iustitia, quam à nobis Deus exigit, videlicet quod eam annunciauerit, & non absconderit, idem nunc subiungit de iustitia, & misericordia, quæ est in ipso Deo: nam iustitiam vocat veritatem, idest, fidelitatem, per quam fideliter reddit vnicuique secundum opera sua; & misericordiam vocat salutare, idest, salutem, quam misericorditer præbet sperantibus in se. Ait igitur, Veritatem, & salutare tuum dixi, idest, Annunciaui quoque veritatem, quæ in te est, manifestans omnibus quam fideliter reddas ineffabilia præmia iustis, & horrenda supplicia iniustis; & simul annunciaui salutare tuum, idest, quam misericorditer salues omnes, qui in te spem suam constituunt.

XIV. Non abscondi misericordiam tuam, & veritatem tuam à concilio multo.

Quam paulò ante vocauerat salutare, nunc expressius vocat misericordiam, & cum veritate, idest, cum iustitia coniungit. Dicit, igitur, Non abscondi propter vllum timorem, à concilio multo, idest, à multitudine populorum misericordiam, & iustitiam, quæ in te sunt; sed eas publicè, & liberè prædicaui. Hac verissima esse

manifestè colligimus ex Euangelio: nam Matth. cap. 5. 6. & 7. prædicaui Dominus iustitiam, quam nos facere debemus: & in varijs parabolis Matth. 13. 24. & 25. prædicaui iustitiam, & misericordiam Dei.

Tu autem Domine ne longè facias miserationes tuas à me: misericordia tua, & veritas tua semper susceperunt me.

Transit nunc à prædicatione ad passionem: Et sicut ipse manifestauit hominibus iustitiam, & misericordiam Patris, ita nunc precatur Patrem, vt non differat misericordiam, & veritatem suam in ipso, per resurrectionem celerem ab omni passione, & morte liberando. Tu autem Domine, inquit, non longè facias miserationes tuas à me, id est, vides Domine Pater in quàm acerbam passionem incidi, quia non tacui manifestare hominibus iustitiam, & misericordiam tuam: ideo tu quoque non longè facias miserationes tuas à me, celeriter resuscitando: sicut hactenus misericordia tua, & fidelitas tua semper susceperunt me.

Quoniam circumdederunt me mala, quorum non est numerus: comprehenderunt me iniquitates meæ, & non potui, vt viderem.

Multiplicatæ sunt super capillos capitis mei, & cor meum dereliquit me.

Reddit rationem, cur dixerit, ne longè facias miserationes tuas à me; & ait, Quoniam circumdederunt me mala, quorum non est numerus. Verè enim passionem Christi plurimæ fuerunt, & simul omnes quasi agmine facto in eum irruerunt. Cur autem tot fuerint eius passionem, causa fuit, quoniam peccata nostra, quæ ipse super se accepit, innumerabilia sunt. Comprenderunt me, inquit, iniquitates meæ, idest, iniquitates omnium hominum, quas Pater

ter super me posuit, ut dicitur Isaia 53. & quas proinde meas fecit, ut super lignum in corpore meo illas portarem, illa, inquam, omnes comprehenderunt me, Et non potui ut viderem, id est, tot sunt iniquitates quæ me comprehenderunt, ut non prævaluerim videre quot sint. Nam multiplicatæ sunt super capillos capitis mei, id est, superant multitudine sua numerum capillorum; capilli enim capitis tot sunt, ut numerari non possint: & ideo quasi obrutus multitudine tanta malorum defeci, & cor meum dereliquit me, id est, vigor ipse, & ipsa vita dereliquit me. Porro quod hic dicit Christus, Non potui ut viderem, non est accipiendum propriè, quasi re vera non potuerit Dominus videre numerum peccatorum, ob nimiam eorum multitudinem: nam sine dubio nouit accuratissimè numerum peccatorum præteritorum, præsentium, & futurorum; sed loquitur more humano, & solum significare voluit peccata, quæ expiando suscepit, esse innumerabilia. Simile est quod dicitur Marci cap. 6. Et non poterat ibi virtutem ullam facere, & mirabatur propter incredulitatem eorum: poterat enim, si voluisset, virtutes in eo loco facere; sed dicitur non potuisse, ut significaretur incredulitas illius populi, ob quam non volebat in eo loco miracula facere. Sicut etiam non propriè mirabatur, quia admiratio nascitur ex ignorance, quæ in Christo locum non habebat; sed dicebatur mirari, quia signum admirantis edebat, ut ostenderet, mirum esse, quod populus ille tanta incredulitate teneretur. Sanctus Augustinus versiculum hunc, & duos superiores vult accipiendos esse in persona membrorum infirmorum Christi, id est, fidelium imperfectorum: eius nos sententiam non rejicimus, sed ostendere volumus, quomodo sint exponendi tres isti versiculi, si accipiantur scripti in persona Christi, ut verè in persona Christi scripti sunt versiculi præcedentes, quos Apostolus allegauit ad Hebr. 10. cum quibus isti continuari videntur.

Complaceat tibi Domine, ut XVIII. eruas me, Domine ad adiuuandum me respice.

Redit ad orationem, quam inchoauerat in versiculo quintodecimo, ac petit liberationem à tantis malis per celerem resurrectionem, ut supra diximus. Complaceat, inquit, tibi Domine, id est, placeat tibi Pater, quem etiam Dominum agnosco propter formam serui, quam accepi, placeat, inquam, ut eruas me de tot doloribus, qui circumdederunt me. Domine ad adiuuandum me respice, id est, videris quidem ad tempus me dereliquisse, & à me faciem auertisse, dum finis me crucis tormenta sine ulla consolatione perpeti, sed iam respice ad me adiuuandum, ut breui repleas me lætitia gloriosæ resurrectionis.

Confundantur, & reuerentur XIX. simul qui quærunt animam meam, ut auferant eam.

Ex Christi resurrectione sequuta est maxima confusio aduersariorum, qui eum planè à se extinctum existimabāt. Id nunc prædicit per modum imprecationis: quæ forma loquendi frequens est apud Prophetas. Confundantur, inquit, & reuerentur, id est, confusi erubescant, qui quærunt animam meam, ut auferant eam, id est, qui quærunt vitam meam auferre, me occidendo, & penitus extinguendo: hoc enim erat votum Iudæorum, & hoc se assequutos crediderunt, cum Christum cruci affixum viderunt; sed paulò post cum eum resurrexisse audierunt, & signis ac prodigijs maximis resurrectionem eius confirmari, & à populis credi viderunt, confusione, & erubescencia repleti sūt; sed multo maiore confusione, & verecundia replebuntur in die nouissimo, cum eum Iudicem suum iustissimum esse videbunt, quem in concilio suo, falsis testibus inductis, iudicare præsumperunt.

Con-

XX. Conuertantur retrorsum, & reuereantur, qui volunt mihi mala.

Idem repetit ad rem magis explicandam, vel confirmandam. Conuertantur, inquit, retrorsum, idest, confusi recedant, & reuereantur, idest, verecundentur, & erubescant, qui volunt mihi mala, idest, non ij solum, qui quærunt me interficere, sed etiam omnes alij, qui cupiunt confusionem, & ignominiam meam. S. Augustinus exponit hunc versiculum in bonam partem, quasi Dominus precetur aduersarijs suis conuersionem à peccatis ad Deum, ut iam non amplius superbè præcedant, sed humiliter subsequatur Dominum suum. Pia expositio; sed prior videtur magis literalis, & facilius cum superiori versiculo continuatur.

XXI. Ferant confestim confusionem suam, qui dicunt mihi, euge, euge.

Idipsum tertio repetit, dicens, Ferant confestim confusionem suam, idest, non in longum tempus differatur eorum confusio; sed statim, post tridui videlicet breuissimum spacium, confusionem suam experiantur, qui dicunt mihi, euge, euge, idest, qui de me quasi victo inter se gratulantur dicentes, euge, euge. Sanctus Hieronymus ex hebræo vertit, qui dicunt mihi, vah, vah, quam vocem fuisse Iudæorum deridentium Christum in cruce pendentem, in Euangelio legimus. Sed Septuaginta verterunt, euge, euge, & non dubium est quin ipsi quoque rectè intelligerent vim hebraicæ vocis. Proinde illud pronomen, mihi, non ita accipiendum est, quasi aduersarij Christo blandiri vel lent, aut eum laudare, vel hortari, ut nos solemus cum alicui dicimus, euge, euge, sed intelligendum est, aduersarios inter se exultantes super Christi passione dixisse, euge, euge, ita ut illud, mihi, accipiatur pro, de me, vel, super me. Paulo clarius idem legimus in Psalmo 34. Non dicant in cordibus suis, euge, euge animæ nostræ, nec dicant, deuorabimus eum. vbi apparet illud, euge, dictum esse in cordibus eo-

rum, qui putabant se Christum iam deuorasse. Quod autem nos habemus ex græco, ferant, S. Hieronymus ex hebræo vertit, pereant. Sed credibile est Septuaginta non legisse, iassom, à verbo, iasam, quod est desolare; sed issehu, vnica litera mutata à verbo, nasa, quod est ferre. Denique quod nos habemus, confestim, sanctus Hieronymus vertit ex hebræo, post. Cæterum verba hebraica significant propriè ad calcaneum, siue ad vestigium, idest, immediatè, siue confestim, quod est idem: & ipse idem sanctus Hieronymus hanc eandem vocem in Psalmo 69. vertit ad vestigium. Rectè igitur Septuaginta Interpretes reddiderunt verba hebraica: & latinus interpres fideliter reddidit verba græca.

יָשָׁם.
יָסַם.
יָסַח.
נָסַח.

XXII. Exultent, & lætentur super te omnes quærentes te, & dicant semper, magnificetur Dominus, qui diligunt salutare tuum.

Sicut prædixit per modum imprecationis confusionem persecutoribus suis: ita nunc per modum precatationis bonæ prædicit lætitiā sectatoribus suis. Exultent, inquit, & lætentur super te, idest, exultabunt, & lætabantur in Deo, diuino videlicet & inenarrabili gaudio, omnes, qui quærunt te, idest, omnes qui quærunt gloriam Dei, & qui diligunt Deum, & in eo spem suam ponunt. Et dicant semper, magnificetur Dominus, idest, & non sibi tribuāt, nec suis viribus, aut virtutibus bonum quod habent; sed dicant, magnificetur Deus ab omnibus, qui diligunt salutare tuum, idest, qui diligunt saluatorem, quem misisti ad homines, Christum videlicet Iesum. siue, qui diligunt salutem, quæ abs te est, idest, qui cupiunt veram, atque æternam salutem, quam tu solus dare potes.

XXIII. Ego autem mendicus sum & pauper, Dominus sollicitus est mei.

Reuer-

אביון
עני

Reuertitur ad statum suum, in quo erat tempore passionis, ac dicit, Ego mendicus sum, & pauper, idest, egenus & destitutus humano auxilio. Sunt enim in hebræo duo vocabula, ebion, & ani, prius significat egenum, inopē, mendicum; posterius, significat afflictum, humilem, destitutum: quæ omnia conueniebant Christo toto tempore suæ mortalitatis; sed præcipuè quando nudus pendeat in cruce. Sed quamuis egenus, & pauper esset, quantum ad temporalia bona; tamen dirissimus erat protectione paterna: ideo subiungit, Dominus sollicitus est mei, vel, ut est in hebræo, Dominus cogitat pro me. Vocat autem Patrem Dominum, quoniam loquitur in forma serui, idest, ut filius hominis, secundum quam naturam pendeat in cruce.

XXIV. **Adiutor meus, & protector meus es tu, Deus meus, ne tardaueris.**

Quod vnico vocabulo dixerat, Dominus sollicitus est, idest, nunc duobus vocabulis exponit, dicens, Adiutor meus & protector meus es tu. Deus enim Pater sollicitus erat filij sui, illum adiuuando, & protegendo; adiuuando in superandis malis præsentibus, & protegendo in remouendis futuris. Concludit postremo, Deus meus ne tardaueris, nimirum eripere me ab omnibus malis per celerem resurrectionem.

PSALMVS XXXX.

Titulus, & Argumentum.

In finem, Psalmus ipsi David.



NIDETVR hic etiam Psalmus, ut præcedens, ad Christi passionem totus pertinet. Sic enim eum Patres accipiunt Ambrosius, Hieronymus, Augustinus, & Chrysostomus, qui addit, temerarium esse aliter expo-

nere, cum citetur ab ipso Christo, Ioā. 13. vnus versiculus ex hoc Psalmo ad demonstrandum Iudæ proditiōē fuisse multo ante prædictam. De titulo nihil dicimus, quia nihil noui continet.

Explicatio Psalmi 40.

BEatus, qui intelligit super egenum & pauperem; in die mala liberabit eum Dominus.

Beatus, qui intelligit super egenum, & pauperem, idest, beatus qui attentè considerat Christum pauperem: inueniet enim esse pauperem, non necessitate, sed voluntate; & pauperem voluntate, ut nos sua inopia locupletaret. Item inueniet pauperem foris, sed intrus diuitem; in eo enim abconditi sunt omnes thesauri sapientiæ, & scientiæ Dei. Denique inueniet pauperem in carne, ut dicit S. Ambrosius, sed diuitem in Regno: idem enim pauper erat, cum non haberet vbi caput reclinaret; & simul hæres erat vniuersorum, Rex Regum, & Dominus dominantium. Præterea, beatus est, qui intelligit super Christum pauperem, nudum videlicet in cruce pendentem, idest, qui attentè cogitat passionem eius: nam & Hieremias antea dixerat, Attendite, & videte si est dolor similis, sicut dolor meus, Thren. 1. Et Apostolus postea idem repetiuit, Recogitate eum, qui talem aduersus semetipsum à peccatoribus sustinuit contradictionem, Hebr. 12. Infinitus enim thesaurus paratus est Christi passionem, ut par est, intelligentibus, & diligenter meditantibus. Denique beatus quoque est, qui intelligit super egenum & pauperem Christum in membris suis, de quibus dicturus est, Quod vni ex minimis meis fecistis, mihi fecistis. Sed non dicit Psalmus, beatus, qui dat eleemosynam pauperi, sed, qui intelligit super egenum, & pauperem, idest, qui prudenter considerat pauperum necessitates, & dat cui, quando, quantum oportet, ex pura charitate, & liberalitate, non

מַשְׁכִּיל

ex inani gloria, vel spe retributionis. Hanc enim vim habet verbum hebraicum, maschil; significat enim attentè cogitare, siue prudenter considerare. Sequitur, In die mala liberabit eum Dominus. Hæc est ratio, cur sit beatus dicendus qui intelligit super egenum, quia videlicet ipse ab egestate liberabitur: dies enim mala est dies penuriæ, & sterilitatis. Sed hoc loco præcipuè dicitur dies mala, dies vltimi iudicii, quæ erit dies solius iustitiæ, ac per hoc erit in illa summa penuria miserationis, & gratiæ. In illa igitur die securi erunt, qui Christi crucem amauerint, & qui propter Christum pauperibus beneuoli fuerint: dicetur enim illis, Venite benedicti Patris mei, possidete paratum vobis Regnum. Esuriui enim, & dedistis mihi manducare, &c. Sed etiam in hoc sæculo liberabit Deus viros misericordes in die mala, vt Psalmus trigessimus sextus antea nos docuit, dicens, Non confundentur in tempore malo, & in diebus famis saturabuntur. Mirificè enim delectatur Deus, cum videt filios suos, ad patris imitationem, quæ ab illo liberaliter accipiunt, cum alijs quoque liberaliter communicare: Et ideò cum fœnore reddit, quod pauperibus datur, iuxta illud Prouer. 19. Fœneratur Domino, qui miseretur pauperis.

II. Dominus conseruet eum, & viuificet eum, beatum faciat eum in terra, & non tradat eum in animam inimicorum eius.

Declarat quod dixit, In die mala liberabit eum Dominus; & per modum bonæ imprecationis prædicat bona, quæ dabuntur intelligenti super egenum, & pauperem. Dominus, inquit, conseruet eum, idest, custodiat dum viuit; & viuificet eum, idest, post mortem iterum viuere faciat, resuscitando eum cum iustis. Et beatum faciat eum in terra, idest, & tunc verè, perfectèque beatum reddat in terra viuentium. Et non tradat eum, in animam

inimicorum eius, idest, & neque in hoc sæculo, neque in futuro sinat eum subijci voluntati inimicorum, siue homines, siue Dæmones sint. Vocat enim animam, voluntatem, siue desiderium. Codices græci variant hoc loco; nam alij habent, in manus inimicorum, alij in animam inimicorum, vt sanctus notauit Ambrosius; sed sensus est ferè idè, nisi quod videtur esse aliquid amplius tradi in animam, idest, in voluntatem, siue arbitrium, siue libidinem, quàm tradi in manus, idest in potestatem: nam qui supplicio afficiendi sunt, traduntur in manus carnificum, sed non in voluntatem: quia possunt carnifices eos interimere, non tamen eo modo quo voluerint, sed eo tantum modo, quo leges præscribunt.

Dominus opem ferat illi super lectum doloris eius: vniuersum stratum eius versasti in infirmitate eius.

Quoniam tã multa bona pollicitus fuerat misericordibus intelligentibus super egenum, & pauperem; poterat aliquis suspicari, nullam tribulationem passuros in terris eiusmodi pios homines: ideò nunc subiungit, passuros quidem in hoc exilio pios homines varias tribulationes, seu tentationes, sed non absque diuina consolatione. Dominus, inquit, opem ferat illi, super lectum doloris eius, idest, si quando pius ille inciderit in lectum doloris, siue dolor sit corporalis, siue spiritualis, siue sit propriè in lecto agrotus, siue metaphoricè decumbat quasi in lecto, afflictus quacunque tribulatione: Dominus opem feret illi, atque ita consolabitur eum, vt patienter ferat, & ex ipsa patientia probari se intelligat, & ex probatione spem magnam concipiat, & ex illa spe gaudium tale inueniat, vt gloriatur in tribulationibus, & cum Apostolo dicat, Repletus sum consolatione, superabundo gaudio in omni tribulatione nostra, 2. Corinth. 7. Adiungit deinde ad probandum id ita esse futurum exemplum de præterito, dicens,

dicens, Vniuersum stratum eius versasti in infirmitate eius, id est, tu Deus suavis, & mitis, ita soles facere cum fidelibus tuis; nam si quando vidisti piū aliquem grauari tentationibus, vel afflictionibus, ita illum consolari consueuisti, quomodo consolatur ægrotum, qui totum stratum eius versat, & reuerlat, ut mollius cubet, & quiescat. S. Ambrosius, & S. Ioannes Chrysostomus ita exponunt, ut velint versari stratum in infirmitate, esse mutari stratum ægroti in statum sanitatis. S. Hieronymus, & S. Augustinus contrario modo exponunt, sed egregiè omnino, & utilissimè: volunt enim hunc sensum esse. Quia dixerat Propheta, Dominus opē ferat illi super lectum doloris eius; poterat pius homo respondere, si Deus fert opem, unde tot scandala, & tribulationes hominibus pijs? Respondet Propheta, quia idem Dominus vniuersum stratum, id est, eas res terrenas, in quibus etiam pijs acquiescunt, & delectantur, versat, & remouet, ut pius peregrinus non diligat stabulum pro domo; sed ex amissione temporalium, quā uis licitarum consolationum, discat in solo Deo delectari, illum vnum quærere, ad illius visionem anhelare, & suspirare. Hæc enim est causa, cur Sancti homines nō solum tribulationes, aliundè aduenientes amauerint; sed ipsi etiam eas sibi accersierint, ieiunijs, vigilijs, humi cubationibus, nuditate, & flagellis carnem propriam atterendo; quoniam intelligebant, animum non omnino erigi posse ad quærendum Deum, dū aliquid habet in terra, quod amet, vel in quo delectetur, & quiescat. Vtraque expositio amplectenda est, quamuis prior videatur nobis magis literalis.

IV. Ego dixi, Domine miserere mei, sana animam meam, quia peccaui tibi.

Hic iam incipit Christus declarare, se esse egenum illum & pauperem, de quo initio dixerat, beatus, qui intelligit super egenum, & pauperem. Ego,

inquit, dixi, Domine miserere mei, id est, miserere corporis mei mystici, infirmorum membrorum meorum. Sana animam meam, quia peccaui tibi, id est, ad hoc misericordiam tuam implo ro, ut sanes languores fidelium meorū, quorum peccata mihi ipse imputo, quasi ego illa fecissem. Potest etiam sic exponi, ut Christus ipse de passione sua loquatur, dicens, Miserere mei in tribulatione positi, ut celeriter resuscitando ab omni passione me liberes: sana animam, quæ tristis est usque ad mortem, & isto tristis est & languet, pauens, mœrens, & tædens, quia peccaui tibi, id est, peccata totius mundi in me recepi. Nam quod non loquatur de peccatis à se commissis, perspicuum est ex versiculo decimotertio, ubi dicit, Me autem propter innocentiam suscepisti. Itaque is, qui loquitur in Psalmo non est Dauid, vel quiuis alius, sed ille solus, qui & innocens erat quoad actiones proprias, & peccata aliorum portabat.

Inimici mei dixerunt mala mihi, quando morietur, & peribit nomen eius.

Hæc manifestè pertinent ad Phariseos, & Sacerdotes Iudæorū, qui auidissimè Christi mortem sitiebant, & de ipso interficiendo sæpè inter se colloquebantur. Illud autem mihi, positum est pro, de me, ut in Psalmo superiore, Qui dicunt mihi, id est, de me, euge, euge, vel abundat, ut in hoc ipso Psalmo, Aduersum me cogitabant mala mihi, & alibi sæpè.

Et si ingrediebatur, ut videret; vana loquebatur, cor eius congregauit iniquitatem sibi.

Transit à Iudæis ad Iudam, quasi dicat, & si aliquis eorum, ut Iudas proditor, ingrediebatur, ut videret, id est, & exploraret, & quæreret opportunitatem prodendi, vana loquebatur, id est, falsi aliquid fingeat, ne animus eius detegeretur. Posset etiam hoc referri ad alios, qui ad Christum accedebant, tentantes eum, ut caperent eum in ser-

sermone. Sed iste vana quidem loquebatur ad Christum, sed interim cor eius congregabat iniquitatem sibi, id est, corde meditabatur dolos, & proinde multiplicabat, & congregabat iniquitates sibi, ad suam videlicet æternam perditionem. Hæc nimirum iusta merces est mendacium & dolosum, ut dum alios decipere tentant, ipsi decipiantur à Satana, & dum alijs moliuntur interitum, ipsi sibi interitum parent.

VII. Egrediebatur foras, & loquebatur in idipsum.

De eodem Iuda Patres hæc etiam accipiunt, qui cum explorasset opportunitatem prodendi Dominum, egrediebatur, & loquebatur simul cum ijs, quibus Dominum proditurus erat. Illud, in idipsum, hebræi codices coniungunt cum sequenti versiculo; sed nos sequimur distinctionem antiquam Septuaginta Interpretum, qui maiori fide digni sunt, quam recentiores Rabini, qui puncta, & distinctiones, quas nunc habemus, biblijs addiderunt.

VIII. Aduersum me susurrabant omnes inimici mei, aduersum me cogitabant mala mihi.

Audito Iuda proditore, cœperunt inter se susurrare, ne fortè sermo innotesceret, si alta voce loquerentur, de pecunia danda, & ratione inuenienda Christum capiendi, atque perdendi. Aduersum me, inquit, susurrabant, id est, summissa voce loquebantur omnes inimici mei: aduersum me cogitabant mala, id est, susurrando deliberabant de morte mihi inferenda. Iam supra dixi illud, mihi, redundare, ex phrasi hebraica.

IX. Verbum iniquum constituerunt aduersum me: nunquid qui dormit, non adjiciet ut resurgat?

Ex illa susuratione inimicorum hoc sequutum est, ut firmiter constituerent Iudæi Christum occidere, & hoc est,

quod subiungit dicens, Verbum iniquum constituerunt aduersum me, id est, decretum iniquum statuerunt contra me, ut videlicet me, quamuis innocentem, morti traderent. Addit verò continuo, nunquid qui dormit, non adjiciet ut resurgat? id est, quamuis illi tam iniustum decretum fecerint, nunquid mihi potestatem resurgendi auferent? quin potius ideò mortem suam somnum vocauit, quia quàm facile est homini dormientem socium suum excitare à somno, tam facile est Verbo Dei carnem suam mortuam ad vitam reuocare. Id quod multo ante prædixit, cum ait, nemo tollit animam meam à me, sed ego pono eam: potestatem habeo ponendi eam, & potestatem habeo iterum sumendi eam Ioan. 10. In hebræo codice longè aliter habetur, sic enim ad verbum verti potest, Verbum belial infusum sibi, & qui dormiuit, non adjiciet, ut resurgat; sed Septuaginta Interpretes, qui & doctissimi erant, & codices correctissimos habebant, per verbum, belial, rectè verterunt, verbum iniquum; nam belial significat, absque iugo, & accipitur etiam pro Diabolo; sed passim viri belial dicuntur viri iniqui, quasi qui iugum legis excusserint, & Diabolum ducem sequantur: & sicut viri belial, sunt viri iniqui, ita verbū belial, est verbum iniquū. quod sequitur, infusum hebraice iazuch, legerunt Septuaginta iazzichu, quod est constituerunt; & pro bo, quod est ei, vel sibi, legerunt bi, quod est mihi, siue in me, aut contra me: hebraice enim sibi & mihi simillima sunt. Denique pro, vaaser, quod significat, & qui, legerunt Septuaginta haaser, quod significat, numquid? Viderint autem hebræi, utrū negligentia, an malignitate hunc locum corruerint. Certe vulgata nostra editio cum græca editione concordat, & græca cum vera hebraica omnino consentit: necesse enim est, ut, vel hebraica lectio, qualis nunc est, ob literarum similitudinē corrupta sit, vel Septuaginta Interpretes imperitissimi fuerint. Non desunt qui hunc versiculum ad Dauidem & grotantum, & ad sermones

יָצִיק בּו
יָצִיקוּ בִּי

וְאֶשֶׁר
הָאֶשֶׁר

mones hominum de eius valetudine dispu-
tantium referant. Sed ij cum Pa-
tribus omnibus repugnant, tum nimis
humiliter Spiritus sancti oracula expo-
nunt.

X. Etenim homo pacis meæ, in
quo speravi, qui edebat panes
meos, magnificavit super me sup-
plantationem.

Reddit rationem, cur inimici ver-
bum iniquum aduersum se constitue-
rint; & dicit, fuisse causam eius iniqui
decreti Iudæ proditionem. Etenim,
inquit, homo pacis meæ, idest, verbum
iniquum aduersum me constituerunt
inimici mei; quoniam homo pacis meæ,
idest, cum quo pacem habebam, vt Ma-
gister cum discipulo, & cum seruo Do-
minus; & homo in quo speravi, idest, in
quo tamquam in amico, & familiari
confidere poteram. Qui edebat panes
meos, idest, qui in mensa mea, vt do-
mesticus, mecum vellebatur. Magni-
ficavit super me supplantationem, idest,
mirifice me supplantavit, cum per in-
fidias inimicis me tradidit. Hunc lo-
cum Dominus ita citauit Ioan. 13. Non
de omnibus vobis dico, ego scio quos
elegerim; sed vt adimpleatur scriptu-
ra, qui manducat mecum panem, leua-
bit contra me calcaneum suum. In he-
breo ad literam est, eleuauit contra
me calcaneum; sed Septuaginta expli-
cauerunt sensum: nam leuare calca-
neum contra aliquem, & illum supplan-
tare, idem est. Quo loco notandum est,
cum dicitur, vt impleatur scriptura, si-
gnificari, proditionem Iudæ fuisse præ-
dictam, & adimpletam, vt prædicta
fuerat; & ideo hunc locum psalmi non
fuisse citatum à Christo, vt aliquid simi-
le, vel commune, sed vt propriè ad
hanc rem pertinentem, vt notauit San-
ctus Ioannes Chrysostomus; & ideo
non recte facere, qui hæc verba psalmi
ad alios sensus detorquere conantur.
Secundo notandum est cum Sancto Au-
gustino, vocatum fuisse Iudam homi-
nem pacis, quoniam præuidit Prophe-
ta, Christum à Iuda per signum pacis,
idest, per osculum fuisse tradendum:

quod etiam Dominus significauit, cum
illi ait, Amice ad quid venisti? & Iu-
da osculo filium hominis tradis? Item
dictum esse à Propheta, qui edebat pa-
nes meos; quoniam præuiderat per bu-
cellam Iudæ proditionem fuisse mani-
festandam. Addi potest dictum fuisse,
ab eodem Propheta, in quo speravi,
quoniam præuiderat, Christum credi-
turum fuisse Iudæ marsupium, quod
erat confidentiæ signum; itaque præ-
dictio cum euentu rei optimè conue-
nit. Tertio notandum, exprimi à Pro-
pheta miro modo huius proditionis in-
dignitatem: primo enim vocat Iudam
hominem pacis Christi, vt ostendat nul-
lam intercessisse inimicitiam, nullam
iniuriam, nullam odij causam inter Chri-
stum, & Iudam: deinde addit, non so-
lum non intercessisse causam odij, sed
intercessisse causam beneuolentiæ, cum
addit, in quo speravi; quia Dominus
credens Iudæ loculos, signa confiden-
tiæ, vt diximus illi ostendebat. Deni-
que addidit, non solum non fuisse ini-
micum, nec solum fuisse amicum, sed
etiam fuisse intimum familiarem, &
maximis beneficijs affectum: nam illa
ipsa nocte, qua Christum tradidit, non
solum panem communem in mensa
Christi comederat, sed etiam panem
caelestem, ac diuinissimum; & ante cœ-
nam idem Christus pedes illi humili-
ter lauerat; & per hoc exempla sum-
mæ charitatis, atque humilitatis osten-
derat.

Tu autem Domine miserere XI.
mei, & resuscita me, & retribui-
eis.

Precatur nunc Patrem, & per mo-
dum precationis prædicit, quod futu-
rum erat: verè enim post resurrectio-
nem suam retribuit Iudæis excidium,
quod merebantur. Tu autem Domine,
inquit, miserere mei, & resuscita me,
idest, illi quidem verbum iniquum sta-
tuerunt contra me, & discipulo meo
supplantante, & prodente, interficient
me; sed tu Domine miserere mei in cru-
ce morientis, & paulò post resuscita

me

me: & tunc retribuam eis quod merentur. Precatur autem filius Patrem, non quod ipse ut Verbum Patris carnem suam resuscitare non posset; sed quia loquitur in forma serui, desert Patri, cui in forma Dei æqualis erat. alioqui ipse idem dixit Ioan. 2. Soluite templum hoc, & ego in triduo excitabo illud: hoc autem dixit de templo corporis sui. & Ioan. 10. Potestatem habeo ponendi animam meam, & potestatem habeo iterum sumendi eam. Quid verò Christus Iudæis retribuerit post resurrectionem suam, notum est omnibus, qui ab eo tempore vident Iudæos de terra sua eradicatos, dispersos esse inter gentes, sine Rege, sine Sacerdote, sine Deo vagari. Quod illis prædixerat Dominus, quando ait, Auferetur à vobis Regnum Dei, & dabitur genti facienti fructum eius. & alibi, Relinquetur vobis domus vestra deserta. & alibi, Non relinquent in te lapidem super lapidem. Matt. 21. & 23. & Luc. 19.

XII. In hoc cognoui, quoniam voluisti me, quoniam non gaudebit inimicus super me.

Exauditam orationem suam fuisse dicat, idque inde posse cognosci, quod non gauderet inimicus de morte eius. Quod quidem in Iuda impletum est, qui ante se ipse suspendio necavit, quam Christus moreretur, & quam ipse precio prodicionis suæ frui posset. Potest tamen hoc etiam referri ad reliquos inimicos eius, qui tam breui tempore gauisi sunt, ut dici possint non esse gauisi.

XIII. Me autem propter innocentiam suscepisti, & confirmasti me in conspectu tuo in æternum.

Docet, inimicos non diu gauisuros de morte sua; quoniam à Deo susceptus, & exaltatus ob innocentiam suam fuerit. Me autem, inquit, propter innocentiam tibi optimè notam, suscepisti de manibus eorum, & confirmasti in conspectu tuo in æternum, id est, humiliasti me ad horam in conspectu homi-

num, sed suscepisti, & confirmasti me in conspectu tuo, id est, stare fecisti ante conspectum tuum in cælo usque in æternum: vox enim hebræa significat, statuisti ante conspectum tuum; quod factum est per exaltationem, & assumptionem in cælum.

Benedictus Dominus Deus XIV.
Israel à seculo, & usque in seculum, fiat, fiat.

Ista conclusio, siue Christi sit, siue Prophetæ, nihil aliud significat, nisi propter exaltationem Christi, & confusionem inimicorum eius, deberi honorem, & gloriam, & benedictionem Deo ab æterno, & usque in æternum, id est, sine fine. Illud autem, fiat, fiat, hebraicè autem Amen, Amen, confirmatio est dictorum, ut sensus sit, verè, seu fideliter ita sit, siue ita fiat, ut semper Deo laus & gloria deferatur. Atque hic est finis primi libri secundum hebræos, qui Psalterium in quinque libros distribuerunt.

יְהוָה יְהוָה

PSALMVS XXXXI.

Titulus, & Argumentum.

In finem, intellectus filijs Core.



Titulus admonet filios Core, quibus dabatur Psalmus cætantus, ut intelligant quæ canunt, ut & auditores intelligere faciant: quæ admonitio cantoribus Ecclesiasticis memorie commendanda est: cantus enim in Ecclesia spiritui deferuire debet, & non soli aurium oblectationi. & sicut qui intelligenter, & deuotè canunt, animos audientium rapiunt in Deum, ita qui theatrales modulos in Ecclesiam inuehunt, de domo Dei scenam Mundi faciunt. Vide S: Hieronimum in caput quintum ad Ephesios. Argumentum Psalmi aliqui esse volunt, quod Dauid exul tempore Saulis queratur, se

se non posse ter in anno in Hierusalem ad festa Domini accedere. Sed tempore Saulis non erat tabernaculum Domini in Hierusalem, sed in Silo, & ad eum locum ibant ter in anno Israelitæ. Præterea tam ingens desiderium, quare hoc loco exprimitur, non videtur posse referri ad tabernaculum manufactum, & arcam ligneam. Propterea Psalmi argumentum esse putamus, ut sancti Patres, Hieronymus, Augustinus, & Chrysostomus docent, quod David amore diuino succensus, exprimere conatur vehemens desiderium, quo tenebatur perueniendi ad visionem Dei, quæ est vera, & sempiterna felicitas, cum tamen inter tētationes, & pericula peregrinationis viueret. Sed dum ipse desiderium suum exprimit, simul docet, quæ sint argumenta, unde verus Dei amor possit agnosci.

Explicatio Psalmi 41.

I. **Q**uemadmodum desiderat ceruus ad fontes aquarum, ita desiderat anima mea ad te Deus.

Amor res est igneæ naturæ, ac per hoc intus retineri non potest, sed per verba, & suspiria foras erumpit. David igitur, ut amorem suum aliquo modo exprimat, comparat se Ceruo sitiundo, dicens: Quemadmodum desiderat ceruus ad fontes aquarum, videlicet, peruenire; ita desiderat anima mea peruenire ad te Deus; quæ aptissima similitudo est: ceruus enim quatuor habet qualitates: primum inimicissimus est serpentibus, atque cum eis perpetuum bellum gerit: deinde, cum a venatoribus quæritur, ad montes altissimos velocissimo cursu confugit: tum, mandatum illud Apostoli, Alter alterius onera portate, ab instinctu quodam naturæ obseruat: nam, ut scribit sanctus Augustinus, tum hoc loco, tum Sermon. 21. de verbis Apostoli, traduntur cerui, vel quando in agmine suo ambulant, vel quando natando

Card. Belarm. in Psal.

alias terrarum partes petunt, onera capitum suorum super se inuicem ponere: denique si quando vel ex pugna cum serpentibus, vel ex fuga ad montes, vel ex deportatione oneris ambulando, vel natando fatigatur ardentissimè sitire solet aquas, neque ab eis inquirendis vlla vel tenetur amenitate pratorum, vel terretur difficultate viarum. Talis omnino est amator Dei; nam & cum serpentibus carnalium cupiditatum bellum perpetuo gerit; & cum tentationibus, vel persecutionibus premitur, ad montem contemplationis fugit, & infirmorum molestias patienter tolerat; sed præcipuè summo desiderio Deum sitit, neque vlla terrena felicitate, vel aduersitate impeditur, quominus ad Deum semper anhelet. Talis erat David, quamvis vxoratus, quamvis Rex, quamvis miles, talis Paulus, talis Petrus, tales Apostolice ceteri, & Martyres, tales omnes, qui exilium agnoscentes, siue per prospera, siue per aduersa gradientes cursum ad patriam nūquam relaxabant.

Sitiuit anima mea ad Deum II. fortem viuum: quando veniam, & apparebo ante faciem Dei?

Declarat apertius, quid sit desiderare Deum, & simul aperit, cur tanto opere desiderandus sit Deus. Tria sunt, ut Chrysostomus annotauit, quæ amorem, ac per hoc sitim, & desiderium accendere solent; pulchritudo, beneficia, & amor: nam & res pulchræ amari se quodam modo cogunt, & qui beneficia præstant ad se amandos prouocant, & qui amant redamari merentur. Sed si hæc tria in vnum conueniant, id est, si persona aliqua pulcherrima, & nobilissima, te summis & quotidianis afficiat beneficijs, & eundem te maximi faciat, teq. ardentissimè amet, quo modo non vehementissimam in tuo petore flammam amoris accendet? Hæc igitur tria in Deum conuenire David hoc loco docet, & ideò sitire se Deum, id est, amore, & desiderio eius ardere se dicit. Sitiuit, inquit, anima mea

Q ad

ad Deum, id est, ad rem pulcherrimam, nobilissimam, præstâtissimam, quæ bona omnia in se vna complectitur. Fortem, id est, ad rem non fluxam, & caducam; sed stabilem, permanentem, æternam. Viuum, id est, ad rem operantem, intelligentem, amantem, quæ nos continuis beneficijs afficit, quæ nos magnificat, quæque nos incredibili amore diligit. Hæc ergo sitis in rem tam bonam, tam beneficam, tam mei amantem, cogit ex toto corde dicere, Quando veniam, & apparebo ante faciem Dei? id est, quando finis erit peregrinationis? quando initium fruitionis? Ex hebræo clarius verti posset, Quando veniam, & videbo faciem Dei? Id enim solum est, quod sitim animæ rationalis explere potest.

III. Fuerunt mihi lacrymæ meæ panes die, ac nocte, dum dicitur mihi quotidie, vbi est Deus tuus?

Qui verè, & intimè cogitat tria quæ diximus, videlicet, Deum esse supra omnem speciem pulchrum, & omnia quæ nos habemus ab illo, vt à fonte manare, & eundem ipsum tanti nos æstimare, atque ita nos diligere, vt filium suum vni genitum pro nobis dederit: fieri non potest, quin lacrymis desiderij opprimatur, dum visio tanti boni differtur. Dauid igitur, qui ista ferio contemplabatur, rectè adiungit, Fuerunt mihi lacrymæ meæ panes die, ac nocte, id est, lacrymis, quasi panibus, sustentabar assidue per dies, & noctes, id est, toto tempore huius peregrinationis, vel, per dies prosperitatis, & noctes aduersitatis: nam renuit anima mea consolari terrena felicitate, nec minus renuit contristari terrena aduersitate; sed vtroque tempore lacrymæ meæ fuerunt mihi cibus, & potus, dum dicitur mihi quotidie ab impijs, & incredulis, vbi est Deus tuus? ad quem sitis? cui suspiras? cur diligis quem non vides? Sed posset etiam sic exponi, Dum dicitur mihi quotidie, vbi est Deus tuus, id est, dum quotidie per circuitum omnia lustrò quærens

quæ diligit anima mea, & dicitur mihi à spiritu meo, à cogitatione mea, vbi est Deus tuus? hæc enim omnia, quæ contemplando perlustrasti, opera sunt Dei, pulchra quidem omnia, sed non sicut Deus tuus: vbi est igitur Deus tuus? vbi quæres, vt inuenias? quando venies, & videbis faciem Dei tui?

Hæc recordatus sum, & effudi in me animam meam; quoniam transibo in locum tabernaculi admirabilis, vsque ad domum Dei.

Pergit in explicando desiderio suo. Hæc, inquit, recordatus sum, quæ dicta sunt de inquisitione Dei, & effudi in me animam meam. Hæc effusio tribus modis accipi potest. Primo, vt sensus sit, effudi in me animam meam, id est, euacuauit apud me animam meam omni terrena delectatione, vt intraturus tabernaculum admirabile, & ipsam domum Dei, implem eam delectationibus Domini mei. Secundo, vt sensus sit, effudi in me animam meam, id est, dilataui animam meam, extendi desiderium meum, vt capax esset tanti boni, quantum inueniet in tabernaculo illo admirabili, vbi est vbertas indeficiens domus Domini. Tertio, vt sensus sit, effudi in me animam meam, id est, effudi super me animam meam, transcendendi contemplando ipsam animam meam, quo modo dicitur Thren. 3. Sedebit solitarius, & tacebit, quoniam leuauit se supra se. Verè enim nulla est in hac peregrinatione scala aptior ad attingendum aliquo modo tabernaculum admirabile, & ipsam domum vbi videtur Deus, quàm anima nostra, quæ est imago Dei: ipsa enim est sublimior celo, & profundior abyssò; & qui animam suam contemplari nouit, ac deinde eam transcendere, & per eam ad exemplar ascendere didicit, is pertransibit ad locum tabernaculi admirabilis vsque ad domum Dei. Ac vt breuiter hunc ascensum attingamus: Anima spiritus est, ac per hoc longè transcendit omnia corpora: sic igitur & Deus spiritus est, & spirituum, corporum-

sumque creator; proinde longè transcendit, non solum corpora, sed etiam spiritus. Deinde, Anima simplex, & indiuisibilis cum sit; tamen in toto corpore est, & in singulis partibus tota, omnia membra replens, & nullum occupans locum: sic igitur & Deus, vnus, & simplicissimus, atque indiuisus est; & tamen mundum totum, & res creatas omnes replet, vbique totus, vbique præsens, nusquam inclusus. Tertio, anima non mouetur in corpore, & totum corpus portat, mouet, regit, viuificat, atque sensificat; quod in morte cognoscitur: anima enim recedente, corpus continuo cadit, & motum, sensum, speciem, & quicquid habebat boni, in momento amittit: quod autem est anima corpori, id est, rerum vniuersitati Deus, non quod propriè Deus sit anima mundi, vt Philosophi quidam sensisse videntur; sed quod similitudinem animæ habere videatur: ipse enim immobilis in se manens, portat omnia verbo virtutis suæ, & in eo viuimus, mouemur, & sumus. Quarto, anima intelligens est, & tota intellectus quidam est, eminenter continens cognitiones omnium sensuum, & multa præterea cognoscit, ad quæ sensus corporis nullus attingit: sic Deus totus intellectus est, eminenter continens cognitiones omnium hominum, & Angelorum, & infinita præterea, quæ intelligentiam nostram superant. Quinto, anima non solum theoricè multa intelligit, sed etiam practicè, atque inde existunt opera ingenij humani planè admirabilia in varijs artibus, in ædificijs, hortis, fontibus, alijsque id genus plurimis, vt sæpè opera artis humanæ cum operibus naturæ contendere videantur: sic etiam Deus non solum theoricè, sed etiam practicè intelligit, & sine instrumentis, sine labore, & sine spacio temporis, solo nutu, atque imperio voluntatis condidit vniuersa. Sexto, anima liberum habet arbitrium, atque inde ad nutum mouet corporis membra: sic Deus liberrimè dominatur rebus omnibus creatis: vnde Dauid ait, Omnia seruiunt tibi. Neque solum ani-

ma imago Dei est, quo ad essentiam, sed etiam (quamuis obscurius) quoad personarum trinitatem: nam in anima est mens intelligens quasi Pater, est notitia producta, quasi Verbum Patris, est & amor à mente per notitiam productus, quasi Spiritus. Est etiam in anima fecunditas memoriæ, est intellectus & voluntas, quæ tres diuinas personas vteunque repræsentant. Anima igitur supra seipsam effunditur, seque ipsa transcendit contemplando, vt transire possit ad tabernaculum admirabile; ideò subiungit Propheta, Quoniam transibo in locum tabernaculi admirabilis vsque ad domum Dei. Per locum tabernaculi admirabilis, intelligimus cælestem Hierusalem, quæ est tabernaculum non manufactum, æternum in cælo, vbi est domus Dei, de qua dixit in alio Psalmo, Vnam petij à Domino, hanc requiram, vt inhabitem in domo Domini omnibus diebus vitæ meæ. Sanctus Hieronymus ex hebræo vertit, tacebo, pro eo quod nos habemus admirabilis. Sed Septuaginta Interpretes non legerunt, edaddem, vt nunc habetur in codicibus hebraicis, quod significat, tacebo, sed legerunt, adderet, quod significat, admirabilis: & differentia solum est in duabus literis similibus, vt ex figura characterum intelligi potest. Facile autem fuit librarijs mutare duas literas in alias similes; & credendum est Septuaginta Interpretes habuisse codices hebraicos meliores quàm nos habeamus. Alioqui non potuissent vertere admirabilis, pro, silebo, nisi imperitissimi fuissent.

אֲרָם
אֲרָם
אֲרָם

In voce exultationis, & confessionis sonus epulantis. v.

Declarat Propheta, in illa sua ecstasi, qua effudit supra se animam suam, & contéplando pertransiuit ad locum tabernaculi admirabilis, vsque ad domum Dei, non pertransiuisse tacitum, sed exultabundum, & laudabundum ex admiratione. Ideo, inquit, exultationis, & confessionis, addit, pertransibo in locum tabernaculi admirabilis, id est, pertransibo admirans gloriam

Q. 2. taber-

tabernaculi illius, & ex admiratione prorumpam in vocem exultationis, & confessionis, laudis videlicet Conditoris illius tabernaculi, quæ vox erit sonus epulantis, idest, vox læta, & festiua, quales audiuntur in solemnibus, & festiuis, ac nuptialibus epulis. Neque enim potest animus contemplantis erigi ad considerandam gloriam cælestis Hierusalem, sine admiratione, & exultatione maxima. Quod attinet ad verba, illud, sonus, in græco est casus genitiui, & sanctus Augustinus legit, soni, ex quo fieri potest, vt noster Interpres posuerit, sonus, pro, sonitus, genitiui casus, sed potest etiam fieri, vt significare voluerit, vocem exultationis & confessionis fuisse sonum epulantis. In hebræo, pro, sono, habetur, **המון** ^{המון} quod sanctus Hieronymus vertit multitudinis; sed vox illa hebraica vtrunque significat, sonitum, & multitudinem. Illud autem, epulantis, tam in hebraico textu, quam in græco, est festa celebrâtis; & sic etiam legunt Augustinus, & Euthymius. Sed videtur latinus Interpres declarare voluisse, quale festum illud esset, & dixisse epulantis, idest, festum conuiuij solemnus, quale est nuptiale, in quo multa adhibentur instrumenta musica, & cantica amatoria: & habetur vox, epulantis, in commentario Sancti Hieronymi in hunc locum, ne quis existimet recens irrepisse in editionem vulgatam.

VI. Quare tristis es anima mea, & quare conturbas me?

VII. Spera in Deo, quoniam adhuc confitebor illi salutare vultus mei, & Deus meus.

Ex illa mentis eleuatione, & gaudio spiritali consolatur lacrymas suas, dicens, Quare tristis es anima mea? idest, quare lacrymæ tuæ sūt tibi panes die, ac nocte, dum dicitur tibi, vbi est Deus tuus? quare tam incessabili fletu conturbas me? Spera in Deo, idest, quamuis Deum non videas, quem tu ardentius videre cupis, tamen spera in eo;

quoniam adhuc confitebor illi, idest, quia nondum tempus præterijt, adhuc erit, quando præsens laudabo Deum, & confitebor misericordias eius, & dicam illi, Salutare vultus mei, & Deus meus, idest, tu salus es vultus mei, dum illuminas fulgore tuo vultum meum, & facis vt videat facies mea faciem tuam, & cognoscam sicut & cognitus sum, & ex clara notitia dicam, Tu es Deus meus. In hebræo habetur, vt etiā S. Hieronymus vertit, Salutes vultus eius, Deus meus ad meipsum, &c. sed manifestè corruptus est hoc loco textus hebraicus, & vna litera, videlicet, vau, non suo loco posita totam hanc confusionem peperit. Id quod ex repetitione horum verborum, quæ habentur in fine huius Psalmi, & in fine Psalmi sequentis perspicuum est. Itaque non est legendum, panau helohai, vt hic legitur, sed panai vehelohai, vt legitur in repetitione: & vera lectio hebraica ad verbum hæc est, Salutes vultus mei, & Deus meus. Dicit autem salutes in numero multitudinis, non salus, vel salutare; quia licet vna sit salus nostra, tamen ea multa bona continet, quæ etiam salutes dici possunt.

Ad meipsum anima mea conturbata est, propterea memor ero tui de terra Iordanis, & Hermonijm à monte modico. **VIII.**

Exponit vicissitudines tristitiæ, & consolationis suæ; tristitiæ ex metu, & periculis huius vitæ; consolationis ex spe, & promissione futuræ. Dicit igitur, Ad me ipsum anima mea conturbata est, idest, quamuis dixerim anime meæ, Spera in Deo; tamen anima mea ad me ipsum respiciens, ad infirmitatem meam, ad modicum lumen, & modicas vires, quæ in me sunt, timore magno concutitur, & eo terrore conturbat me: propterea memor ero tui de terra Iordanis, & Hermonijm à monte modico, idest, propterea vt huic terrori, & conturbationi medicinam faciam, remouebo oculos à me ipso, & ad

פני
אלהי
פני
ואלהי

& ad te conuertam; & ab hoc Iordane, quem video in hac terra, memor ero tui, idest, memor ero fluminis, quod laticat ciuitatem tuam, & torrentis voluptatis tuæ, quo potantur qui apud te sunt; & ab hoc monte modico, qui dicitur Hermonijm, quem ante oculos habeo, memor ero montis sancti tui, in quo habitas cum sanctis Angelis tuis, & ex hac memoria consolabor animum meum, & desiderium meum. Quis propriè sit mons Hermonijm, & an diuersus sit à monte Hermon, non omnino liquet: tamen verisimile est, esse montes diuersos, & in diuersis locis sitos. Nam & Sanctus Hieronymus in vita Sanctæ Paulæ distinguit hos duos montes, & constat montem Hermon esse montem amplissimum, & Hermonijm hoc loco dicitur esse modicus. Fortasse igitur Hermonijm erat mons aliquis in Galilæa non longè à Iordane, cum Dauid hæc duo coniungat.

IX. Abyssus abyssum inuocat in voce cataractarum tuarum.

X. Omnia excelsa tua, & fluctus tui super me transierunt.

Pergit narrare tentationes, & afflictiones huius vitæ, & vtitur metaphora inundationis aquarum, alludens ad magnum diluuium, quod fuit tempore Noe. Abyssus, inquit, abyssum inuocat, idest, maxima aquarum inundatio, & profunditas super me venit, & illa transeunte alia superuenit, quasi à priore vocata; venerunt autem istæ magnæ inundationes in voce cataractarum tuarum, idest, in strepitu, & sonitu apertionis cataractarum cælestium, vnde aquarum inundatio descendebat. Et omnia excelsa tua, idest, omnes gurgites altissimi, & omnes fluctus tui, super me transierunt, idest, omnis illa inundatio, & vniuersum diluuium super me venit. Alludit, vt dixi, ad diluuium generale, in quo cataractæ cæli apertæ sunt, idest, tam ingens pluuia descendit, ac si cataractæ

Belarm. in Psal.

aliquæ in cælo apertæ fuissent, & inde tota illa aqua magno cum impetu descendisset: & ex ea inundatione facta est abyssus, idest, maxima aquarum altitudo, & profunditas. Sed hæc metaphora nihil aliud significat, nisi ingentes tentationes, & pericula, quibus diuina providentia finit exerceri electos suos. Horum autem periculorum magnitudinem soli spirituales viri, qualis erat Dauid, intelligunt, qui norunt multiformes insidias Diaboli, & sciunt quanti referat excidere à gratia Dei: atque hæc videtur esse literalis expositio. quamuis repudiandæ non sint piæ nonnullorum expositiones, qui volunt, abyssus abyssum inuocat, significare, abyssus miseriæ inuocat abyssum misericordiæ diuinæ. Item, abyssus humanæ malitiæ inuocat abyssum diuinæ iustitiæ. Item, abyssus secretorum testamenti veteris, inuocat abyssum arcanorum testamenti noui. Item, abyssus cordis humani, quod inscrutabile est, inuocat abyssum scientiæ Dei, qui scrutatur renes & corda. Illud solum addendum est, per vocem, inuocat, non significari, implorat, sed, vocat, vt ex hebræa voce colligitur: est enim sensus, abyssus abyssum vocat.

In die mandauit Dominus mihi **XI.**
seruicordiam suam, & nocte canticum eius.

Redit ad vicissitudinem consolationis, post narratam, & miro modo amplificatam magnitudinem tentationis. In die, inquit, mandauit Dominus misericordiam suam, idest, posteaquam transierunt inundationes aquarum, & horrendæ illæ abyssi, in die prosperitatis mandauit, idest, misit Dominus misericordiam cōsolantem, & visitantem. Et nocte canticum eius, idest, sed tempore nocturno, tempore, videlicet, tentationis, & tribulationis, non cessabit canticum eius, idest, oratio, & gratiarum actio illi oblata. Id quod clarius explicatur in sequenti versiculo.

Q 3 Apud

XII. Apud me oratio Deo vitæ meæ, dicam Deo, susceptor me-
tus es.

Hoc videlicet est canticum nocturnum, oratio secreta, & cordis potius quam oris. Apud me, inquit, oratio Deo vitæ meæ, id est, in sinu meo est iugis oratio ad Deum, auctorem vitæ meæ, cui cum fide, & fiducia dicam, Susceptor meus es, id est, in te confido, ad te confugio, tu me labentem suscipies, tu lapsum eriges.

XIII. Quare oblitus es mei, & quare contristatus incedo, dum affligit me inimicus?

Miratur vicissitudines diuinæ prouidentię in seruis suis gubernandis, quasi dicat, Cū tu Deus verē susceptor meus sis, quare oblitus es mei? id est, vnde hoc accidit, vt tentationes, & tribulationes ita me obruant, vt me dereliquisse videaris, cū tu spes mea sis, & fortitudo mea? Vnde, inquam, accidit, vt contristatus incedam, dum affligit me inimicus, cū tu sis protector meus, & adiutor meus?

XIIII. Dum confringuntur ossa mea, exprobrauerunt mihi qui tribulant me inimici mei.

XV. Dum dicunt mihi per singulos dies, vbi est Deus tuus? quare tristis es anima mea, & quare conturbas me?

XVI. Spera in Deo, quoniam adhuc confitebor illi, salutare vultus mei, & Deus meus.

Non solum, inquit, affligit me inimicus, te vidente, & spectante, qui susceptor meus es; sed etiam dum confringuntur ossa mea, id est, dum ad summam debilitatem, & infirmitatem deuenio, vt tentationes vix iam ferre possim. Exprobrauerunt mihi inimici mei, qui tribulant me, dum assidue mihi dicunt, vbi est Deus tuus? id est, illi ipsi, q. me

persequuntur, & tribulant, exprobrauerunt mihi fiduciam, quam in te habeo, quasi frustra in te sperauerim: dicunt enim, vbi est Deus tuus, quem tu adiutorem, & protectorem tuum esse iactabas? sic legimus exprobratum Tobię, vbi est spes tua, pro qua elemosynas & sepulturas faciebas? & infra, Manifeste vana facta est spes tua, & elemosynę tuę modo apparuerunt, Tob. 2. Sic etiā Christo exprobratum legimus Matth. 27. Confidit in Deo, liberet eum, si vult. Sic igitur, & Dauidi in tribulatione posito, exprobrabant increduli hostes eius; sed is tamen, quamuis ad horam turbatus, & contristatus, se ipse reprehendebat, & dicebat, Quare tristis es anima mea, & quare conturbas me? Spera in Deo, quoniam adhuc confitebor illi, salutare vultus mei, & Deus meus; quę sunt explicata in expositione versiculi sexti, & septimi.

PSALMVS XLII.

Titulus, & Argumentum.

Psalmus David.



VNC Psalmum, qui sine titulo est apud Hebręos, & apud Gręcos, & Latinos nihil habet in titulo, nisi Psalmus David, & est quasi appendix, vel potius epitome Psalmi superioris, breuissimē declarabimus. Precatur igitur Dauid à Deo liberationem ab inimicis, & simul consolatur se spe futurę beatitudinis.

Explicatio Psalmi 42.

IVdica me Deus, & discerne i. causam meam de gente non sancta, ab homine iniquo & doloso erue me.

Videtur Dauid oppressus fuisse, vel à Rege Sanch, vel tentatus graviter à Daemonibus, à quibus cū non posset resu-

refugium habere ad homines, Deum Iudicem appellat: ait igitur, Iudica me Deus, id est, tu Deus esto Iudex meus; non enim habeo ad quem pro iustitia confugiam, nisi ad te. In græco habetur clarius, Iudica mihi, id est, sis mihi Iudex. Et discerne causam meam de gente non sancta, id est, diiudica causam, quæ mihi intenditur à gente non sancta. In hebræo, & græco est pulchra allusio nominis ad verbum; hebraicè enim habetur, ריבתי, ריבתי, græcè autem διώκων τὸν δίκαιον, quo modo si nos diceremus, litiga litem meam, vel, iudica iudicium meum: & quia verba sunt generalia, duplex sensus esse potest in his verbis: vnus vt petat à Deo, vt non solum sit Iudex, sed etiā patronus; quasi dicat, Iudica me, & litiga litem meam: alter, vt declarer quod dixit, Iudica me, per verba sequentia, discerne causam meam, id est, cognosce causam, & iudica iudicium meum, proferens iustam sententiam ad meum fauorem. Vocat autem gentem non sanctam, homines iniquos, crudeles, & sine misericordia, vt vox hebraica manifestat, quæ propriè significat hominem sine misericordia, & patet etiam ex sequentibus. Ab homine iniquo, & dolofo erue me: id est, sic iudica causam meam, vt per hoc iudicium liberer me ab homine iniquo, & dolofo, id est, à quouis homine iniquo, & dolofo, vel certè ab aliquo certo homine iniquo, & dolofo, qui erat Princeps gentis non sanctæ, à quo ipse affligebatur.

II. Quia tu es Deus fortitudo mea; quare me repulisti, & quare tristis incedo, dum affligit me inimicus.

Hic versiculus est ferè idem cum versiculo duodecimo Psalmi superioris, & eundem habet sensum, id est, cum tu Deus sis fortitudo mea, & ego in tuo adiutorio vnicè confidam, vnde fit, vt me repulisse videaris, & ego tamquam à gratia repulsus tristis incedam, dum affligit me inimicus? Itaq; est hæc quædam familiaris, & ex fiducia in Deum

procedens expositio, qua queritur se ita à Deo affligi permissum, quasi Deus repulisset eum ab amicitia sua.

Emitte lucem tuam, & veritatem tuam: ipsa me deduxerunt, & adduxerunt in montem sanctum tuum, & in tabernacula tua.

Ex hoc versiculo intelligimus, Dauidem spirituales virum fuisse, vt dictum est in Psalmo superiore, & sollicitum fuisse de liberatione, non tam à malis temporalibus, quàm à periculis peccatorum, & amissionis æternæ vitæ. Ait enim, Emitte lucem tuam, & veritatem tuam, id est, concede mihi lucem gratiæ, & misericordiæ tuæ, & veritatem, ac fidelitatem tuam: ipsa enim me deducunt in hac periculosa peregrinatione, & adducunt in montem sanctum tuum, vbi celestis est Hierusalem, & in tabernacula tua, id est, in ipsam domum tuam, vbi sunt multæ mansiones, & multa tabernacula, pro electis tuis. Per lucem, & veritatem Sanctus Augustinus intelligit Christum, qui est lux, & veritas. Sed videtur ob stare illud pronomen, ipsa, cum dicitur, ipsa me deduxerunt. Quod habetur expressè in textu hebraico, & græco in numero multitudinis. Præterea similis est hæc loquutio ei quæ habetur in Psalmo 56. Misit Deus misericordiam suam, & veritatem suam: & familiare est Dauidi per lucem intelligere gratiam, siue misericordiam, vt Psalmo 66. Deus misereatur nostri, & benedicat, illuminet vultum suum super nos, & misereatur nostri. Illa verò, ipsa me deduxerunt, & adduxerunt, in hebraico codice habentur in futuro, ipsa me deducunt, & adducunt; & quamuis Septuaginta Interpretes, & vulgata editio habeant in præterito, tamen videtur esse positum tempus pro tempore, vt Euthymius annotauit. Sæpè enim Scriptura prophetica quæ futura sunt, explicat per tempus præteritum, ad certitudinem rerum indicandam.

IIII. Et introibo ad altare Dei, ad Deum qui lætificat iuuentutem meam.

Explicat quid facturum sit in monte sancto, & in tabernaculo Dei, nimirum se facturum, quod ceteri faciunt, qui in domo Dei habitant, quorum munus est sacrificare sacrificium laudis: beati, inquit, qui habitant in domo tua Domine, in secula seculorum laudabunt te. Introibo, inquit, ad altare Dei, sacrificaturus videlicet sacrificium laudis: omnes enim, qui domum illam ingrediuntur, continuo Sacerdotes fiunt, ut ex illis eorum verbis intelligi potest, Fecisti nos Deo nostro Regnum, & Sacerdotes. Apoc. 5. Nec solum ad altare introibo, inquit, sed etiam introibo ad ipsum Deum, idest, coram ipso Deo apparebo, quasi in intimum eius cubiculum introductus, ad Deum, inquam, qui lætificat iuuentutem meam, idest, qui lætificat nouam meam iuuentutem. Nam in patria renouabitur sicut aquilæ iuuentus nostra, ut dicitur in Psalmo 102. & ut Apostolus ait ad Ephesios 4. Occurremus omnes in virum perfectum, in mensuram ætatis plenitudinis Christi. Sanctus Hieronymus vocem, ghil, vertit, exultationem, pro qua Septuaginta verterunt, iuuentutem. Sed vocabulum hoc rarissime inuenitur in Scripturis: & sicut ex auctoritate Sancti Hieronymi credere possumus significare exultationem: ita ex auctoritate Septuaginta Interpretum credere possumus significare iuuentutem. Quod autem habetur Danielis 1. ghilchem, non significat, ut quidam scripserunt, iuuentutem, sed similitudinem ætatis. Sanctus enim Hieronymus pro illa voce posuit, coruis vestris; & ex eius auctoritate Sanctus Pagninus in Dictionario suo docuit, ghil, significare similitudinem. Nemo igitur reprehendere potest Septuaginta Interpretes, vel editionem vulgatam.

V. Confitebor tibi in Cithara Deus Deus meus: quare tristis es

anima mea, & quare conturbas me?

Spera in Deo, quoniam adhuc ut confitebor illi, salutare vultus mei, & Deus meus.

Explicat clarius quod sacrificium oblaturus sit ad altare Dei, cum venerit in tabernaculum non manufactum, æternum in cælis. Confitebor, inquit, tibi in cithara, idest, laudabo te confitendo misericordias tuas, iustitias tuas, omnia denique mirabilia tua, & laudabo non solum ore, sed etiam opere; tunc enim optimè, & sine ulla discordia, vel repugnantia concordabunt cantus, & cithara, idest, voces, & opera, quæ duo in hac peregrinatione raro perfectè concordant. Porro citharæ meminit etiam Apocalypsis, cum describit laudes Sanctorum in cælo, Apocalypsis 5. Habentes singuli citharas in manibus; & cap. 14. Et vocem quam audiui, sicut citharedorum citharizantium in citharis suis. Quæ sequuntur, explicata sunt in fine Psalmi superioris.

PSALMVS XLIII.

Titulus, & Argumentum
Psalmi.

In finem filijs Core ad intellectum.



ITVLVS huius Psalmi nihil differt à titulo Psalmi quadragesimi primi, nisi quod in eo vox, intellectus, præponebatur, hic postponitur. Ibi erat intellectus filijs Core, hic est, filijs Core intellectus, ut est in hebræo, vel, ad intellectum, ut est in græco, & latino. Et fortasse nullum est in hac transpositione mysterium. Fortasse etiam vox, intellectus, præposita significabat in eo Psalmo deplorari calamitates præteritas, vel præsentis: in hoc autem postponitur, quia deploratur calamitates futuræ longè post tempora Davidis:

Davidis: conueniunt enim S. Patres hunc Psalmum continere prædictionem rerum, quæ post tempora Davidis contigerunt; & Græci quidem, ut Chrysostomus, Theodoretus, & Euthymius docent, Psalmum hunc cantari in persona Machabæorum, qui grauissimas calamitates ab Antiocho, alijsque Regibus Syriæ, vel Aegypti passi sunt. Latini verò, ut Ambrosius, Hieronymus, & Augustinus, volunt in hoc Psalmo exprimi voces Sanctorum Martyrum, qui crudelissimas persecutiones à Romanis Imperatoribus pertulerunt. Sed conciliari possunt hæ Patrum sententiæ, si dicamus Psalmum præsentem ad utrosque pertinere, ad Machabæos, & ad Christianos: similes enim persecutiones utriusque passi sunt, & propter causam eandem, propter confessionem videlicet, & legem eiusdem veri Dei. Sicut enim hic Psalmus non solum pertinet ad Martyres, qui tempore Neronis passi sunt, sed etiam ad eos, qui tempore Diocletiani, qui plus ducentis annis fuit Nerone posterior; sic etiam pertinere potest ad Martyres, qui sub Antiocho Epiphane decertarunt, qui ducentis circiter annis Neronem præcessit.

Explicatio Psalmi 43.

- I. **D**eus auribus nostris audiui-
mus, Patres nostri annuncia-
uerunt nobis.
- II. Opus quod operatus es in die-
bus eorum, & in diebus antiquis.

Incipit populus Dei in persecutione positus, & pro afflictione gemens commemorare magnalia, quæ Deus pro fidelium suorum defensione aliquando fecit; & mirari, cur nunc eosdem fideles suos dereliquisse videatur, ut hac commemoratione, & admiratione Deum ad misericordiam flectat. Sed ideo præmisit in titulo David hic intellectu opus esse; quoniam Deus non mutatur, sed medicinam pro tempore mutat, prout populo suo agro-

tanti conuenire iudicat. Deus, inquit Propheta in persona Ecclesiæ, vel Martyrum utriusque testamenti, auribus nostris audiuius. Dicit autem, auribus nostris, cum satis fuisse videretur dicere, audiuius, vel auribus audiuius, ad maiorem certitudinis expressionem: quo modo Sanctus Ioannes scribit initio primæ epistolæ, Quod vidimus oculis nostris, & manus nostræ contrectauerunt: videbatur satis fuisse dicere, quod vidimus, & contrectauimus; sed magnam habet vim ad significandam certitudinem exploratam, illud, oculis nostris, manibus nostris. Ita igitur hoc loco dicunt, auribus nostris audiuius, id est, nos ipsi audiuius. Addunt continuo, unde audierint; ac dicunt, Patres nostri annunciauerunt nobis, id est, non accepimus incerto rumore ab hominibus ignotis; sed ipsi Patres nostri, viri fide dignissimi, qui nos filios suos nunquam decepissent, ipsi, inquam, annunciauerunt nobis. Quid autem audierint à Patribus, explicant, cum addunt, Opus, quod operatus es in diebus eorum, & in diebus antiquis; id est, annunciantibus Patribus audiuius mirabile opus, quod fecisti in diebus eorum, ipsis videlicet videntibus; & etiam opus, quod fecisti in diebus antiquis, quod Patribus suis narrantibus ipsi Patres nostri audierunt. Non multum refert, quod in hebræo non habetur, & unde aliqui exponunt, in diebus eorum, qui sunt dies antiqui.

Manus tua gentes disperdidit, IV.
& plantasti eos, affixisti populos, & expulisti eos.

Explicat in particulari vnum ex operibus mirabilibus, quod Deus fecit pro fidelibus suis in diebus Patrum, ac dicit. Manus tua gentes disperdidit, id est, potentia tua disperdidit ex terra promissionis gentes Chanaanorum, & Iebuseorum, quæ in illa habitabant. & plantasti eos, id est, & gentibus illis eiectis, plantasti Patres nostros in illa ipsa terra. Affixisti populos, & expu-

expulisti eos, idest, disperdidit illos manus tua, quia afflixisti grauissimis prælijs populos illarum gentium, & tandem deuictos expulisti, vt locum darent populo tuo. Ex hoc loco intelligimus, quod supra dictum est, Patres nostri annunciauerunt nobis opus quod operatus es in diebus eorum; non esse accipiendum de narratione immediata, sed mediata, idest, mediante successione filiorum: quod enim hoc loco narratur, factum est tempore Moysi, & Iosue; non potuit autem Moses, vel Iosue id narrare per se Machabeis, aut Apostolis, sed neque Dauidi, qui Psalmum scripsit, sed narrauerunt per successores suos. Illud autem, plantasti eos, continet infignem metaphoram: significat enim ita constitutos, & stabilitos fuisse in terra promissionis Hebræos, vt nonnisi difficulter expelli possent; quomodo ponuntur arbores in terra, quando plantantur, & firmiter radicanter, vt non facile auelli possint. Præterea quæ plantantur, non solum firma consistunt, sed etiam crescunt, & multiplicantur: quam metaphoram explicat clarius Psalmus 79. Plantasti radices eius, & implenit terram, operuit montes vmbra eius, & arbusta eius cedros Dei.

IV. Nec enim in gladio suo possederunt terram, & brachium eorum non saluauit eos.

V. Sed dextera tua, & brachium tuum, & illuminatio vultus tui, quoniam complacuiisti in eis.

Probat, quod dicit, Manus tua disperdidit eos, &c. Nam, inquit, non in gladio suo possederunt terram, idest, Patres nostri tempore Moysi, & Iosue pugnauerunt quidem cum Chanaanais; sed nisi adiutor, & protector eorum tu fuisses, neque terram possederent, neque euadere potuissent de manibus hostium suorum: ipsi enim pauciores erant, & minus in bello exercitati, & pugnaturi erant aduersus vrbes munitissimas. Nō igitur in gladio suo, idest,

virtute armorum suorum possederunt terram promissionis. Neque brachium eorum saluauit eos, idest, neque robur eorum tantum erat, vt in prælio captiuitatem, vel mortem euadere possent; sed dextera tua, & brachium tuum, & illuminatio vultus tui, dedit eis terram possidendam, & saluauit eos à morte, vel captiuitate, quando cum Chanaanais pugnabāt: & hoc ideo, quia complacuiisti in eis, idest, non propter eorum virtutes, aut merita, sed quia tibi placuit eligere eos in populum tuum. Illud, illuminatio vultus tui, significat propriè benignum aspectum, siue gratiam & fauorem, vt diximus in Psalmo superiori versu tertio. Dicitur enim Deus illuminare vultum suum super aliquem, quando illum sereno vultu respicere dignatur, idest, cū eius miseretur, ei que gratiam suam impertit. Esse autem verissima quæ hoc loco dicuntur, perspicuum est ex libro Iosue cap. 6. vbi legimus muros vrbs Hierico ad soluni clamorem filiorum Israel funditus corruisse. & ex cap. 10. vbi legimus, pugnante Iosue, Deum immisisse de cælo lapides grandinis super hostes, & ait Scriptura, Et mortui sunt multo plures lapidibus grādinis, quā quos gladio percusserant filij Israel.

Tu es ipse Rex meus, & Deus VI. meus, qui mandas salutes Iacob.

Exponit nunc admirationem suam populus Dei, dicens, Tu es ipse Rex meus, & Deus meus, qui mandas salutes Iacob, idest, tu ipse, qui Patres nostros adiuuabas, & protegebas, quia Rex, & Deus eorum eras, tu inquam, ipse es etiam Rex meus, & Deus meus, & ille idem, qui mādas salutes Iacob, idest, qui consueuisti saluare populum tuum, qui à parente suo nominatur Iacob. Hoc loco nonnulli volunt superuacaneum esse illud, & cū dicitur, & Deus meus, & exponunt, tu es Rex meus Deus meus. Ratio eorum est, quia illud, & non habetur in textu hebræico. At Septuaginta Interpretes habent, & sic legunt, & exponunt om-

omnes veteres græci, & latini, Ambrosius, Hieronymus, Augustinus, Chrysostomus, Theodoretus, Euthymius, & sensus est sublimior: nam significat Scriptura, Deum non solum esse Regem populi sui, sed etiam Deum, id est, Iudicem totius mundi, æternum & omnipotentem, qui possit non solum protegere populum suum, quem regit, sed etiam punire omnes aduersarios eius. Itaque retinendum est illud, & credendum, vel excidisse ex hebræo textu, vel Septuaginta seniores addidisse illud, ut declararent vocem, Deus, non esse vocatiui casus, sed nominatiui, & aliquid amplius eo nomine significari, quam nomine Regis. Est etiam hoc loco obseruandum, illud, qui mandas salutes Iacob, non significare, qui mittis salutes, sed qui præcipis, siue iubes: vox enim hebraica, & græca hoc significant, & ex illis declaranda est ambiguitas vocis latinæ. Itaque sensus est, qui mandas, id est, qui iubes, & præcipis saluari populum suum, id est, qui solo imperio, & nutu potes, & soles salutem dare populo tuo: quasi dicat, tu es Rex meus, sed non ut alij Reges, qui bellando protegent; sed es etiam Deus meus, qui solo verbo, solo imperio, solo nutu uales saluare Iacob.

VII. In te inimicos nostros ventilabimus cornu, & in nomine tuo spernemus insurgentes in nobis.

Ostendit nunc, non solum Deum esse eundem Deum, qui erat tempore Patrum; sed etiam populum esse eundem, & eandem spem in Deo habere, quam Patres habuerunt: hinc enim oritur admiratio, cur idem Deus cum eodem populo ita contrario modo se gerat, ut quem antea victorem nullo negotio faciebat; nunc vinci, & debellari sinat. In te, inquit, inimicos nostros ventilabimus cornu, id est, nos quoque, si adiutor, & protector noster fueris, inimicos nostros vincemus in te, id est, in tuo auxilio confidentes. Et in nomine tuo spernemus insurgentes in no-

bis, id est, & inuocato nomine tuo, non timebimus, nec magnificiemus imperium hostium insurgentium in nos. Illud, ventilabimus cornu, est metaphoricum, ducta similitudine à tauris, qui cornibus proijciunt in ventum, & in auras quicquid illis obijcitur. Nos, inquit, tua potentia freti, ea facilitate hostes nostros abigemus, & fundemus, qua solet ferocissimus taurus cornibus ventilare paleas.

VIII. Non enim in arcu meo sperabo, & gladius meus non saluabit me.

Pergit in demonstranda similitudine inter populum Dei præsentem, & antiquum. Sicut enim antiquus populus non in gladio suo possedit terram, ita, inquit, & ego populus tuus præsens non in arcu meo sperabo, id est, non confidam in viribus, & armis meis. Et gladius meus non saluabit me, id est, scio, & confiteor, quod si salutem consequar, eam mihi non dabit gladius meus, sed auxilium tuum.

IX. Saluasti enim nos de affligentibus nos; & eos qui nos oderunt confudisti.

Declarat quod dixit, Gladius meus non saluabit me, dicens, saluasti enim nos de affligentibus nos, id est, confiteor salutem meam non à viribus meis pendere; quoniam quotiescunque saluus factus sum à quacunque tribulatione, tu saluasti nos ab affligentibus nos, & tu es qui inimicos nostros, qui nos oderant, & perdere cupiebant confudisti, efficiens protectione tua, ut conatus eorum frustraretur, & ipsi confusi ab oppugnatione nostra recederent.

X. In Deo laudabimur tota die, & in nomine tuo confitebimur in seculum.

Concludit ex ijs, quæ dixit, populum Dei, quotiescunque liberabitur à tribulatione, id beneficium Deo acceptum relata-

relaturum, & gloriam omnē ipsi Deo daturum esse. In Deo, inquit, laudabimur tota die, id est, non in nobis, sed in Deo gloriabimur omni tempore, quod de hostium manibus liberabimur: & nomine Domini inuocato, ipsi confitebimur laudem, & gloriam usque in æternum. Quibus verbis confirmat quod demonstrare volebat, populum esse eundem, qui antea fuerat, id est, confidentem in Dei auxilio, nō in suis viribus; ut populus antiquus non in viribus suis, sed in adiutorio Domini cōfidebat. Illud, laudabimur, phrasī est hebraica significans gloriari, nō propriē laudari. Similis est phrasī Italica, quando dicimus, Mi lodo del tale, & habetur hæc phrasī in alijs locis multis, ut in Psalmo 33. In Domino laudabitur anima mea. Psal. 104. Laudamini in nomine sancto eius, & alibi sæpe. Illud autem, Et in nomine tuo confitebimur, clarius est in hebræo, & nomini tuo confitebimur. Sanctus Augustinus hos versiculos à septimo usque ad decimum, vult continere prophetiam futuræ victoriæ Christi, & Christianorum, quando Ecclesia de omnibus hostibus triumphabit. Sed superior expositio, quæ est Chrysostomi, videtur magis literalis: nō enim hic loquitur Propheta, sed populus Dei, qui miratur se à Deo non iuvari, cū sit idem populus cum eo, quem Deus tam manifesto auxilio protegebat. Sequitur igitur.

XI. Nunc autem repulisti, & confudisti nos, & non egredieris Deus in virtutibus nostris.

Hic iam incipit admiratio, & conquestio miserabilis populi grauitè afflicti ab inimicis. Nunc autem, id est, olim tanto fauore nos prosequeris, nunc autem repulisti, & cōfudisti nos: nam & tempore Antiochi opprobriū erat vocari Iudæum, & tempore Tyrannorum infame erat Christianorum nomen, & videbantur fideles derelicti à Deo. Et non egredieris Deus in virtutibus nostris, id est, si velimus hostibus repugnare, qui nos affligunt, tu non

egredieris nobiscum, ut olim egrediebaris, ut pro populo tuo pugnares. Per virtutes intelliguntur exercitus, ut clare habetur in hebræo: sunt enim exercitus armati vires, & robora populis; & virtus hoc loco nō virtutem moralem, sed potentiam, & robur significat. Porro tempore persecutionum tam Antiochi, quàm Imperatorum gentilium tanta erat debilitas in populo Dei, ut non auderent vlllo modo resistere; & ideo patiendo & tolerando solūm pugnant. Sed quamuis ab hoste visibili fugarentur, & caderentur, tamen de hoste inuisibili gloriosissimè triumphabant: & quamuis in conspectu hominum derelicti viderentur à Deo, tamen in occulto maxima Dei gratia iuuabantur. Sed hoc loco de eo tantum agitur, quod foris agebatur, & relinquitur filiis Core intelligendum, quod agebatur in occulto.

XII. Auertisti nos retrorsum post inimicos nostros, & qui oderant nos diripiebant sibi.

Pergit in explicanda persecutione. Auertisti nos retrorsum post inimicos nostros, id est, fecisti, ut qui in primo loco eramus, iam in postremo essemus, & tamquam victi, & captiui sequeremur inimicos nostros: & iidem inimici nostri, qui nos odio habebant, pro arbitrio suo, & nos & nostra diripiebant, & sibi, id est, in vsum suum conuertebant. Sanctus Hieronymus ex hebræo reddidit, vertisti terga nostra hosti: quem sensum verba hebraica facillè admittunt, quæ ad verbum sic sonant, auertisti nos retrorsum ab inimicis nostris. sed versio græca, & latina, quæ habet, post inimicos nostros, non facile sensum illum ferre possunt; qui enim terga vertunt, & fugiūt, non terga vertunt, post inimicos, sed ante inimicos. Ideo sensum aliū nos supra posuimus ex Chrysostomo, & Augustino: neque repugnat nostra expositio verbis hebraicis; nā pro eo quod haberi diximus, ab inimicis nostris, potest etiam legi, præ inimicis nostris, ut legit S. Augusti-

gustinus, & secundum eam lectionem optimè constat explicatio, quam attulimus: siue enim legas, auertisti nos retrorsum post inimicos nostros, siue legas, auertisti nos retrorsum præ inimicis nostris, semper significatur, nos reductos esse ad locum inferiorem, & posteriorem, & in hostium potestatem miserè deuenisse.

XIII. Dedisti nos tamquam oues escarum, & in gentibus dispersisti nos.

Mirè describit Martyria Sanctorum. Dedisti, inquit, nos tanquam oues escarum, idest, permisisti nos tam facile trucidari, & in tanta multitudine, ac si essemus oues destinatae ad macellum, quæ in magna copia, & sine vlla resistantia occiduntur. Et in gentibus dispersisti nos, idest, & eos ex nobis, quos occidere hostes noluerunt, permisisti dispergi inter gentes. ubi notantur exilia in loca remotissima, ad quæ frequenter Sancti ablegabantur.

XIV. Vendidisti populum tuum sine precio, & non fuit multitudo in commutationibus eorum.

Aliud supplicium describit, quo sancti Martyres tamquam vilissima mancipia deputabatur ad secunda marmora, vel ad curandas bestias, vel ut in theatris laniantur à feris, ut eo spectaculo oblectarentur spectantium oculi. Vendidisti, inquit, populum tuum sine precio, idest, tradidisti populum tuum potestati inimicorum, & nihil precij accepisti. Et non fuit multitudo in commutationibus eorum, idest, & cum hostes quibus eos tradideras, vellent eos vendere in mancipia, & pro pecunia commutare, non fuit multitudo pecuniarum in commutationibus eorum, idest, tamquam vilissima mancipia ferè pro nihilo vendebantur, & ad opera abiectionissima deputabantur. Sanctus Augustinus legit, Non fuit multitudo in iubilationibus eorum; & exponit, non remanserunt multi in Ecclesijs, qui Domino iubilarent in officijs diuinis cele-

brandis; sed codices graeci variant: emendatiores autem habent, ut nos in vulgata legimus, quæ lectio concordat cum textu hebraico, & sic etiam legunt, & exponunt Ambrosius, Hieronymus, & Chrysostomus.

XV. Posuisti nos opprobrium vicinis nostris, subfannationem, & derisum his, qui sunt in circuitu nostro.

Ad supplicia corporalia adiungit irisiones, & opprobria. Posuisti, inquit, nos opprobrium vicinis nostris, idest, ex eo quod permissione tua deuenimus in calamitates, quas paulò ante descripsimus, inde factum est, ut iam simus opprobrio vicinis nostris, & subfannemur, ac irideamur ab iisdem vicinis, qui sunt in circuitu nostro.

XVI. Posuisti nos in similitudinem gentibus, commotionem capitis in populis.

Per similitudinem, intelligitur prouerbum, siue parabola, ut clarius dicitur in Psal. 68. Factus sum illis in parabolam. Ait igitur, posuisti nos in similitudinem gentibus, idest, fecisti, ut gentiles de nostra calamitate parabolam, siue prouerbum sibi facerent, & cum vellent inter loquendum exemplum proponere rei valde detestandæ, nostram miseriam in medium adferrent. Posuisti etiam nos commotionem capitis in populis, idest, fecisti, ut populi gentium non solum irrisione verborum, sed etiam capitis agitatione nos detestarentur, vel irriderent.

XVII. Tota die verecundia mea contra me est, & confusio faciei meae cooperuit me.

XVIII. A voce exprobrantis, & obloquentis, à facie inimici, & persequentis.

Explicat effectum irrisionum, qui sine dubio ingens confusio, & verecundia erat. Tota die, inquit, verecundia mea contra me est, & confusio faciei meae cooperuit me, idest, omni tempore hu-

re huius persecutionis verecūdia mea in conspectu meo est, semper video cōfusionem meam, quæ confusio faciei meæ totum me quasi velo quodam operuit. Oritur autem hæc tota confusio à voce exprobrantis, & obloquentis, idest, ab ijs qui mihi exprobrant stultitiam, quod Crucifixum colam, exprobrant impietatem, quod Deos non venerer, exprobrant falsa crimina, infanticidia, incestus, & similia, & de his inter se obloquuntur. Explicat autem qui sint isti exprobrantes, & obloquentes, cum addit, à facie inimici & persequentis. Sed videtur hæc verecundia, & confusio non conuenire sanctis Martyribus, cum scriptum sit, Qui erubuerit me, hunc filius hominis erubescet cum venerit in maiestate sua, & Patris, Luc. 9. Et, qui me confessus fuerit, & filius hominis confitebitur eū, cum venerit in gloria Patris sui cum Angelis sanctis, Marci 8. Cæterum Dominus non prohibet quacumque verecundiam, & confusionem; sed eam, quæ impedit confessionem. Illi enim reprehenduntur, qui ab huiusmodi verecundia superati, Christum confiteri non audebant, vel etiam ad negandum adigebantur: Istos autem de quibus in hoc Psalmo agitur, non fuisse a verecundia victos, docent verba sequentia.

XIX. Hæc omnia venerūt super nos, nec obliti sumus te, & iniquè nō egimus in testamento tuo.

Post explicata beneficia Dei erga Patres antiquos, & destitutionem, ac derelictionem populi iunioris; subiungit Propheta in persona eiusdem populi, causam huius desertionis non posse tribui peccatis suis: vnde colligitur ratio admirationis, & querimonie. Sic igitur loquitur, Hæc omnia venerunt super nos, idest, has angustias, & tribulationes passi sumus; & tamen non obliti sumus te, idest, non dimisimus te, vt coleremus Deos alienos: solet enim Scriptura coniungere obliuionem Dei cum idololatria. Psal. 105. Mutauerunt gloriam suam in similitudinem vituli

comedentis fœnum, obliti sunt Deum, qui saluauit eos. & Deuter. 32. Immolauerunt Dæmonibus, & non Deo: Deum, qui te genuit dereliquisti, & oblitus es Domini creatoris tui. Et in hoc ipso Psalmo, Si obliti sumus nomen Dei nostri, & si expandimus manus nostras ad Deum alienum. Isti igitur affirmant, se non coluisse Deos alienos; ideò aiunt, obliti non sumus te, & iniquè non egimus in testamento tuo, idest, non solum non adhæsimus Dijs alienis obliuiscens te Deum verum; sed neque iniquitatem fecimus contra pactum, quod pepigimus tecum in Sina, vt seruaremus legem tuam: nam testamentum hoc loco, vt est clarius in hebræo, pactum significat. Itaq; protestantur, se Deum non reliquisse, neque in legem eius peccasse.

Et non recessit retro cor nostrum, & declinasti semitas nostras à via tua. **XX.**

Idem repetunt alijs verbis, vt magis innocentiam suam declarent. Et non recessit retro cor nostrum, idem est quod; obliti non sumus te, idest, cum tecum ambularem ex corde adhærentes tibi, non recessimus retro, neque te deseruimus. Illud autem, & declinasti semitas nostras à via tua, requirit repetitionem præcedentis negationis, vt sensus sit, non recessit retro cor nostrum, & non declinasti semitas nostras à via tua, idest, non permisisti, vt gressus nostri declinarent à via tua, idest, à lege tua, quod est idem cum illo, & iniquè non egimus in testamento tuo. Sanctus Hieronymus clarissimè vertit ex hebræo, Et non declinauerunt semitæ nostræ a via tua; quæuis enim in hebræo non habeatur negatio, & verbum, declinasti; sit in secunda persona singulari: tamen voluit Sanctus Hieronymus sententiam reddere, non verba. Alij quoque interpretes, vt notat S. Ioānes Chrysostomus, addiderunt negationem. Septuaginta Interpretes, quos sequitur editio vulgata, non posuerunt in textu suo negatio-

gationem, quia non inuenerunt in originali, sed tamen ea subintelligenda est, ut in multis alijs locis. Quod si quis omnino velit affirmatiue exponere illud, & declinasti semitas nostras a via tua; poterit per, viam Domini, intelligere viam misericordiae, & gratiae, nam vniuersa via Domini misericordia, & veritas, ait alibi idem Propheta. Itaque sensus erit, declinasti semitas nostras a via misericordiae tuae, a fauore, a gratia, ab auxilio tuo in tribulationibus nostris, cum qua expositione satis conueniunt quae sequuntur.

XXI. Quoniam humiliasti nos in loco afflictionis, & cooperuit nos umbra mortis.

Si sequamur posteriorem expositionem versiculi superioris, versiculus praesens declarabit quomodo declinauerit Deus semitas populi sui, a via sua; quoniam videlicet, humiliauit eum in loco afflictionis: si vero sequamur priorem expositionem, particula, quoniam, vel redundabit, ut non semel in Scriptura sacra redundat, vel reddet causam sententiae sequentis, non praecedentis, hoc modo, Quoniam humiliasti nos in loco afflictionis, ideo & cooperuit nos umbra mortis. Porro humiliare aliquem in loco afflictionis, est deijcere illum in profundum miseriae: ponitur enim, in loco, pro, in locum. Sanctus Hieronymus vertit ex hebraeo, in locum draconum. Et verè vox, tannim, quae est in textu hebraico, dracones significat. Sed videntur Septuaginta sensum vertisse, non verbum. Loca enim draconum sunt loca cauernosa, deserta, horrentia, ac per hoc loca afflictionis: & quoniam loca afflictionis obscura sunt, & tenebricosa, ut cauernae, putei, tetrici carceres; ideo addit, & cooperuit nos umbra mortis, id est, operuerunt nos tenebrae, & ingens obscuritas. Quae omnia, metaphorae sunt, quibus tribulationis, & persecutionis magnitudo significatur. Vocabulum, umbrae mortis, frequentissimum est in Scripturis vtriusque Testamenti, & ut plurimum

coniungitur cum vocabulo, tenebrae, ut est videre Iob 3. Psal. 87. & 106. Isaia 9. Matth. 4. Luc. 1. & nihil aliud significat, nisi magnam obscuritatem. Dicitur autem obscuritas umbrae mortis, quoniam in morte extinguitur vita, quae est quasi lumen quoddam, unde extincta vita solum tenebrae relinquuntur. Sanctus Augustinus dicit, mortalitatem esse umbram mortis, id est, imaginem mortis; mortem autem veram esse damnationem cum Diabolo, quae dicitur mors aeterna.

Si obliti sumus nomen Dei nostri, & si expandimus manus nostras ad Deum alienum. **XXII.**

Nonne Deus requireret ista? ipse enim nouit abscondita cordis. **XXIII.**

Probant, qui in hoc Psalmo loquuntur, testimonio Dei, se re vera non esse oblitos Domini, ut supra dixerunt. Dicunt enim, Si obliti sumus nomen Dei nostri, & si expandimus manus nostras ad Deum alienum deprecandum, nonne Deus requireret ista? quasi dicant, certè requireret, & inueniet an ita sit. Ipse enim nouit abscondita cordis. Sed profectò inueniet, nos oblitos non esse nomen ipsius.

Quoniam propter te mortificamur tota die, aestimati sumus sicut oves occisionis. **XXIV.**

Exurge, quare obdormis Domine? exurge, & ne repellas in finem. **XXV.**

Concludit populus Dei petès à Deo finem persecutionis. Quoniam, inquit, propter te mortificamur tota die, id est, quoniam propter confessionem nominis tui, quotidie morti tradimur, multi quotidie occiduntur ex nobis. Estimati sumus sicut oves occisionis, id est, similes facti sumus ouibus destinatis ad maculationem, quae sine resistentia, vel misericordia iugulantur. Exurge, quare obdormis Domine? id est, cum causa tua hic agatur, & serui tui tanta patiantur, cur tu files, quasi dor-

תנין

dormiens non aduerteres? Exurge à somno, idest, fac quod illi faciunt, qui surgunt à somno, & incipiunt videre quod antea non videbant. Exurge in auxilium nostrum, & ne repellas nos ab adiutorio tuo in finem, idest, usque ad consummationem, finiat tandem te opem ferente persecutio. Hunc locum adduxit Apostolus ad Rom. 8. Quis, inquit, nos separabit à charitate Christi? tribulatio? an angustia? an fames? an nuditas? an periculum? an persecutio? an gladius? sicut scriptum est, quia propter te mortificamur tota die, æstimati sumus sicut oves occisionis.

XXVI.

Quare faciem tuam auertis, obliuisceris inopiæ nostræ, & tribulationis nostræ?

Pergit in eadem oratione, & utitur duabus alijs metaphoris: nam in versu superiore sumpsit similitudinē à somno, nunc sumit ab auersione faciei, & ab obliuione, quorum neutrum cadit in Deum. Dicitur tamen Deus auertere faciem, quando non iuuat, quasi nō videret miseriam nostram: & dicitur etiam obliuisci, quando non succurrit egentibus auxilio, & tribulatis, quasi esset oblitus eorum.

XXVII.

Quoniam humiliata est in puluere anima nostra, conglutinator est in terra venter noster.

In eadem oratione persistens, & sciens, orationem humiliantis se gratissimam esse Deo, dicit, se humiliatum usque ad summum, ut magis humiliari non possit. Qui enim stans orat, potest humiliari flectendo genua; & qui genibus flexis orat, potest adhuc humiliari prosternendo se totum ad terram; sed qui humi prostratus orat, non habet quō descendat, ut magis humilietur. Porro humiliari potest homo corde, & corpore usque ad terram; corde si verē cogitet, & intelligat, & fateatur se puluerem esse, quo modo orabat Abraham cum diceret, Loquar ad Dominum meū, cum sim puluis & cinis, Gen. 18. corpore autem si ad terram prostratus oret, quod de Christo Domino referūt

Matthæus cap. 26. & Marcus cap. 14. Procidit, inquiunt, in faciem suam super terram dicens, &c. neque obstat quod Lucas cap. 22. dicat, Positis genibus orauit: nam positis genibus orare cœpit, deinde procidit in terram. Vtramque humilitatem præferunt, qui in hoc Psalmo dicunt, Quoniam humiliata est in puluere anima nostra, conglutinator est in terra venter noster, idest, cognoscimus nos puluerem esse, & verē adhæsit in terra venter noster dū toto corpore prostrati oramus te. Possunt etiam hæc omnia referri ad magnitudinem persecutionis, per quam redacti erant ad extremam, & summam ignominiam, & cōtemptum.

Exurge Domine adiuua nos, & redime nos propter nomen tuum. XXVIII.

Addunt vltimam, & efficacissimam rationem, cur Deus moueri debeat ad misericordiam erga populum suum; ne videlicet blasphemetur amplius nomen ipsius. Exurge, inquiunt, adiuua nos in hac tribulatione, & redime, id est, libera nos propter nomen tuum, id est, ut non blasphemetur, sed glorificetur nomen tuum: & sicut sine precio vendidisti nos, ita sine precio redime, non ob nostra merita, sed propter nomen tuum, propter misericordiam, & benignitatem tuam. Ad maiorem intelligentiam huius Psalms videntur explicandæ questiunculæ quædam, quæ lectori faciliē possent occurrere.

Prima quæstio est: Cur ij, qui in hoc Psalmo loquuntur, querantur se sine culpa sua puniri; cum alij Sancti persecutiones peccatis suis imputare soleant; nam Dan. c. 9. loquens de captiuitate babylonica dicit, Peccauimus, iniquē fecimus, impiē egimus, & recessimus, & declinauimus à mādatis tuis, & iudicijs tuis. Et tres pueri sancti in fornacem ignis coniecti, & à Deo mirabiliter liberati, confitentur hoc modo Daniel 3. Iudicia vera fecisti iuxta omnia, quæ induxisti super nos, & super ciuitatem sanctam Hierusalē; peccauimus enim, & iniquē egimus receden-

dentes à te, deliquimus in omnibus. Eadem est vox Sactorum Machab. lib. 2. cap. 7. Nos, inquiunt, propter nos ipsos hæc patimur, peccantes in Deum nostrum. Eadem dicit de persecutionibus Christianorum S. Cyprianus in ser. 5. qui est de lapsis. Respondeo, negari non posse, quin ob peccata populi Deus persecutiones excitari permittat. Cæterum Sancti Viri varijs modis loquuntur: aliquando enim suscipiunt personam membrorum infirmorum (vnum enim corpus sumus, alter alterius membra,) & peccata fratrum suorum sibi tribuunt: quo modo sæpe lingua confitetur quasi peccata sua, quæ tamē à membris alijs patrata sunt: aliquando verò induunt personam perfectorum, & sanctorum, qui re vera puniuntur in communi persecutione sine propria culpa. Sic igitur scripturæ allatæ inter se non pugnant: nam Daniel, tres pueri, & Sancti Machabæi loquebantur in persona membrorum infirmorum; isti verò qui in hoc Psalmo loquuntur, personam innocentium, & Sanctorum induerunt.

Secunda quæstio: Cur Deus innocentem puniri sinit, cum propter iniquos persecutionem excitari permittat? Respondeo, Innocentes in persecutione, non propriè puniri, sed probari: vult enim Deus per atrocitatem persecutionis, quasi per ignem cōflatorij, vel per ventilabrum aræ, purgare Ecclesiam suam, & efficere, vt appareant qui sint veri, qui ficti fideles; qui sint aurum, qui aurichalchum; qui frumentum, qui palea. Tribulatio, inquit Apostolus Rom. 5. probationem operatur. & in lib. Sap. cap. 3. Deus tentauit eos, & inuenit eos dignos se: tanquam aurum in fornace probauit illos.

Tertia quæstio: Cur ergo Sancti queruntur de persecutione, & eam cito finiri precantur? Respondeo, quia tribulationem tolerare iubemur, non amare, & nemo quod tolerat amat, etsi tolerare amet: quamuis enim gaudeat se tolerare; tamen mauult non esse quod toleret; vt scripsit Sanctus Augustinus in lib. 10. Confess. cap. 28. Deinde, quia persecutio, atque tentatio pe-

Card. Belarmin. in Psal.

riculosa est; cum sit incerta victoria, & Sancti de se non præsumant.

Quarta quæstio: Cur Deus, vt in hoc Psalmo dicitur, aliquando populo suo tribuit temporalia bona, & victoriam de inimicis; aliquando è contrario auferit eadem temporalia bona, & populum suum ab hostibus vinci, ac debellari finit? Respondeo, vt omnes intelligant bona temporalia à Deo dari non à Dæmonibus, vel à fato, aut fortuna; ideò tribuit illa amicis suis, quādo ita expedire iudicat. Vt autem amici Dei non hæreant temporalibus bonis, neque amet stabulum pro domo, & exilium pro patria; sæpè illis eripit eiusmodi bona: vt in explicatione Psalmi quadragesimi, versu tertio fusius explicauimus.

PSALMVS XLIV.

Titulus, & Argumentum
Psalmi.

*In finem, pro ijs, qui commutabuntur, filijs Core ad intellectum,
Canticum pro dilecto.*



Summa consensione docent omnes expositores Latini, Græci, Hebræi, Psalmum hunc continere laudes Messie, & sponsæ eius Ecclesiæ, vt sit quasi spirituale epithalamium; & huic argumento titulus satis aptè respondet: nā per eos, qui commutabuntur, intelligit Propheta fideles populos, qui Ecclesiā faciunt; dicuntur autem commutandi, quia mutandi erant per iustificationem in hoc seculo, & per resurrectionem in alio: qui enim adorabant idola, adoraturi erant Deum verum; & qui miseram & mortalem ducebant vitam in terris, acturi erant felicem, & sempiternam in cælis. Per dilectum, intelligunt omnes Christum, de quo non semel Pater cælestis ait, Hic est Filius meus dilectus; & quem nemo nouit, qui non ardentissime diligit; cum totus sit suauis, & pulcher, quippe speculum sine macula, & candor lucis æternæ. Sen-

R sus

פְּשִׁימִים

sus igitur tituli hic erit, Canticum datum filiis Core ad intelligenter, & sapienter canendum usque in finem, cuius materia est, pro ijs, qui commutabuntur, & pro dilecto, idest, pro Ecclesia, & pro Christo, pro Sponsa, & Sponso. In hebræo legitur, pro lilijs, ubi nos habemus, pro ijs, qui commutabuntur; sed vox hebraica, *sofannim*, utrumque significare potest, videlicet lilia, & qui commutabuntur, ut S. Hieronymus fatetur in epistola ad Principiam Virginem, in qua totum hunc Psalmum diligenter explanat: & satis commodè, qui commutandi sunt, lilia dici possunt; cum de Ecclesia, quæ est multitudo commutandorum, dicat Sponsus in Canticis, Sicut lilium inter spinas, sic amica mea inter filias.

Explicatio Psalmi 44.

- I. **E**ruçtauit cor meum verbum bonum, dico ego opera mea Regi.
- II. **L**ingua mea calamus scribæ velociter scribentis.

Hi duo versiculi continent præfationem totius Psalmi; in qua præfatione Propheta docet, hunc Psalmum esse meram prophetiam à Spiritu sancto dictatam, nihilque hic esse ab ingenio suo elaboratum: quamvis enim omnis diuina Scriptura sit verbū Dei, & à Spiritu sancto inspirata: tamen multum interest inter prophetias, & historias, vel epistolas: nam in edendis Prophetijs sancti scriptores non laborabant cogitando, & discurrendo, & ad memoriam aliquid reuocando; sed simpliciter loquebantur, vel scribebant quæ Deus illis ostendebat: quod de Hieremia testatur Baruch, Hierem. 36. quod videlicet ita loqueretur, ac si in libro aliquo legeret quod dicebat. Sed cum Sacri scriptores scribebant historias, vel epistolas; inspirabat quidem illis Deus scribendi voluntatem, eosque dirigebat, ut rectè, & sine erro-

re villo scriberent; sic tamen ut etiam ipsi memoriam exercerent, & ingenium, ut recordarentur res gestas, & cogitarent rationem, & ordinem scribendi: quod de se testatur auctor libri secundi Machabæorum cap. 2. Dauid igitur cum in Psalmis cantabat historias beneficiorum Dei, vel calamitatum suarum, aut etiam totius populi, memoriam, & ingenium exercebat, & non sine proprio labore Psalmos componebat; quamvis à Deo semper excitaretur, & dirigeretur: cum autem meras prophetias caneret, vel scriberet, ut in hoc Psalmo fecit, nihil suum agnoscebat, nisi simplex linguæ, vel manus ministerium. Hoc igitur est quod in hac præfatione dicit, quod ipse idem clarius explicuit in 2. lib. Reg. cap. 23. cum ait, Spiritus Domini loquutus est per me, & sermo eius per linguam meam. Ait igitur, Eruçtauit cor meum verbum bonum, idest, mens mea ex plenitudine, & copia illustrationis diuinæ, & cælestium reuelationum protulit foras ad aures hominum Psalmum hunc, qui continet verbum bonum, sermonem videlicet gratum, & salutarem omnibus. Sed ad maiorem explicationem notanda sunt aliqua. Primo, usum esse Prophetam vocabulo eruçtandi, ut ostenderet, se non propria voluntate, & propria inuentione in hoc Psalmo loqui: ructus enim non emittitur voluntariè, & ex electione, sed velit, nolit homo, ex plenitudine stomachi erumpit. Secundo, voluisse etiam Prophetam ostendere, se non omnia, quæ Deo illustrante cognouit, in hoc Psalmo expressisse; sed modicum quid ex illa plenitudine protulisse: ructus enim signum est repletionis, sed est exiguus status ab illa repletionem foras erumpens. Multa enim Prophetæ vident, quæ non licet homini loqui. Unde, & Isaïas dicebat, Secretum meum mihi. Isaïa 24. Et qui reuelationes à Deo percipiunt, id ut plurimum fateri solent, se non habere vocabula, quibus eas reuelationes ita explicent, ut ipsi eas vident: & fortasse hac de causa Pro-

sa Pro-

sa Propheta dixit, verbum bonum eructasse cor suum; non verba bona, in numero multitudinis. Tertio, verbum bonum vocari hunc Psalmum, quia non continet prophetiam rerum malaram, ut exitij ciuitatis, captiuitatis populi, & similia, quæ passim à Prophetis prædici solebant; sed prædictio nem rerum secundarum, & felicium, quæ magnam lætitiā, & voluptatem fiant allaturæ. Quarto, Deum in his verbis ita descripsisse emanationem huius verbi ex corde Dauidis, ut alluserit ad productionem Verbi æterni, & voluerit nos quasi manu ducere ad intelligentiam generationis æternæ Verbi diuini: verè enim Pater æternus non eguit auxilio coniugis ad filium producendum; neque eum ex electione producit; neque plures filios genuit; sed ex plenitudine cordis, siue ex perfectissima intelligentia Verbum mentis, & verbum vnicum, idque summè bonum naturaliter produxit, ut propriè dicere potuerit, Eructauit cor meum verbum bonum. Sequitur, Dico ego opera mea Regi: non desunt, qui ista verba sic exponant, dico ego opera mea Regi, id est, confiteor peccata mea Deo: vel, dico carmina ista de Rege; vel, consecro opus meum Regi; vel alloquor in hoc Psalmo Regem; quas expositiones, ut non reprehendo, sic existimo nostram explicationem melius connecti cum verbis præcedentibus, & sequentibus: nostra enim opinione hæc pars secunda primi versiculi, reddit rationem, cur Dauid dixerit, Eructauit cor meum verbum bonum; est enim ac si diceret, Ego simpliciter confiteor Regi meo, qui est Deus, omnia opera mea; & non mihi tribuo, quod non est meum; ideo non dixi, Ego Psalmum istum scripsi, sed, eructauit cor meum verbum bonum, id est, non ex electione mea prodiit, sed ex plenitudine illustrationis tuæ. Quod clarissimè explicatur in sequenti versiculo, cum dicitur, Lingua mea calamus scribæ velociter scribentis, id est, lingua mea protulit hunc Psalmum, sed id fecit, non ut lingua mea,

non ut membrum corporis mei, quod ad imperium voluntatis meæ mouetur; sed ut calamus Spiritus sancti, tamquam scribæ velociter scribentis. Dicit autem, linguam suam esse calamum scribæ velociter scribentis, & non dicit, linguam suam, esse linguam spiritus velociter loquentis; quia vult ostendere linguam suam in prophetia edenda esse instrumentum separatum, ut re vera est calamus; & non instrumentum coniunctum, ut sunt membra corporis; vel, significare voluit, prophetiam hanc non abituram in ventum, ut quæ ore pronunciantur; sed perpetuo mansuram, ut quæ calamo exarantur. Illud autem, velociter scribentis, significat, Spiritum sanctum non egere tempore ad considerandum quid, & quomodo scribendum sit; illi enim tardè scribunt, qui inter scribendum cogitant quam sententiam, & qui bus verbis scribere debeant.

Speciosus forma præ filiis hominum, diffusa est gratia in labijs tuis, propterea benedixit te Deus in æternum. III.

Incipit Christum laudare, ac primum à pulchritudine laudat, deinde ab eloquentia, tum à fortitudine & robore, tertio à virtutibus animi, postremo à diuina & regia dignitate, & potestate, quibus addit etiam exteriora, videlicet vestimentorum, & palatij nobilitatem. Incipit autem à pulchritudine, vel quia describit Sponsum, & in Sponso pulchritudo eloquentiæ cedit, eloquentia robori, robur virtutibus, virtutes diuinitati. Ait igitur, speciosus forma præ filiis hominum. Videtur abrupta sententia, & obscura, cum nō addiderit quis sit iste speciosus; sed, ut supra notauimus, ideo dictum est, eructauit cor meum verbum bonum, id est, ex plenitudine contemplationis aliquid foras emanauit, non omnia. Sensus igitur est, Non mirum est, si tu Christe dilectus dicaris, nam speciosus forma es præ filiis hominum: dicit autem, præ filiis hominum, & non addit præ

R 2 spi-

spiritibus angelicis; quoniā Deus Verbum nō Angelus, sed homo factus est, ac si dicat, tu dilecte homo es, sed speciosus forma supra homines. Et verē Christus supra homines formosus est: nam si respicias diuinitatem, infinita pulchritudine præditum videbis; si respicias spiritualement animæ pulchritudinem, speciosus Christus est præ omnibus spiritibus creatis; si respicias splendorem corporis eius glorificati, pulchrior sole est, & pulchritudinem eius sol, & luna mirantur. Sequitur, Diffusa est gratia in labijs tuis. quibus verbis laudat eundem Christum à gratia sermonis, quæ mirum in modum pulchritudinem ipsam commendat. Dicitur autem diffusa gratia in labijs, vt ostendatur permanens, & naturalis fuisse Christo gratia sermonis, non acquisita per studium, aut exercitationem. In Euangelij legimus Luc. 4. Mirabantur in verbis gratiæ, quæ procedebant de ore ipsius. Et Ioan. 7. Numquam sic loquutus est homo, sicut hic homo. Experti sunt Sanctus Petrus, Sanctus Andreas, Sanctus Iacobus, Sanctus Ioannes, Sanctus Philippus, sed præcipue Sanctus Matthæus vim verborum eius, & energiam in sermone eius latentem, qui ad simplicem vocationem subito efficacissimè tracti, & persuasi relictis omnibus sequuti sunt eum. Sed mirabilius est, quod voci eius venti, & mare, & ipsæ febres, ac denique mortui obediebant: quamquam nec mirabile videri debet, si Verbum substantiale, & diuinum, per carnem assumptam verba gratiæ efficacissima, & suauissima loqueretur. sequitur, Propterea benedixit te Deus in æternum. Possunt hac duplicem sensum facere, & vtrumque rectum: potest enim accipi illud, propterea, pro quia, siue, propterea quod, vt sensus sit, speciosus es præ filiis hominum, & diffusa est gratia in labijs tuis, propterea quod benedixit te Deus in æternum; vt benedictio Dei æterna sit causa tantæ pulchritudinis, & tantæ gratiæ. Significatur autem per benedictionē hoc loco gratia vnionis hypostaticæ, quæ in æter-

num duratura est; inde enim tamquam ex fonte manauerūt omnia dona, quæ in Christi humanitatem copiosissimè fusa sunt. Sed potest etiam, vt Chrysostomus, & alij exponunt, simpliciter accipi, propterea, pro particula significante effectum, vt sensus sit, quia speciosus es præ filiis hominum, & diffusa est gratia in labijs tuis, propterea benedixit te Deus in æternum, idest, quia amabilis, & graciosus es præ omnibus dilexit, & benedixit in æternū. Ex quibus verbis non debet colligi, Christum non fuisse amatum, & benedictum à Patre antequam appareret eius pulchritudo, & gratia sermonis; sed hæc fuisse meritum, siue titulum nouum amoris. quo modo dicit ipse Christus Ioan. 10. Propterea diligit me Pater, quia ego pono animam meam, vt iterum sumam eam. Et Apostolus Philipp. 2. Humiliauit semetipsum vsque ad mortem, mortem autem Crucis; propter quod, & Deus exaltauit illum, & donauit illi nomen, quod est super omne nomen. Videtur tamen prior expositio anteponeunda.

**Accingere gladio tuo super te IV.
mur tuum potentissime.**

Transit à laude pulchritudinis, & facundiz ad laudem fortitudinis militaris, & poetico more nō simpliciter narrat; sed per modum precantis, siue inuitantis dicit, Accingere gladio tuo super femur tuum potētissimè, idest, Eia dilecte Deo, qui non solum speciosissimus, & gratiosissimus, sed etiam potentissimus, & robustissimus es, accingere armis tuis, & veni libera populum tuū. Quæ sint autem arma eius explicat in sequenti versiculo, dicens.

**Specie tua, & pulchritudine v.
tua, intende, prosperè procede,
& regna.**

Verba illa, Specie tua, & pulchritudine tua, coniungi possunt cum præcedentibus, vt sit sensus, Accingere gladio tuo potentissime specie tua, & pulchri-

chritudine tua. Possunt etiam coniungi cum sequentibus, ut sensus sit, Specie tua, & pulchritudine tua intende, prosperè procede, & regna: sed utroque modo significatur, arma Christi esse speciem, & pulchritudinem ipsius. Quod ut intelligatur, considerandum est, pulchritudinem veram, & summam, ut Augustinus loquitur, esse pulchritudinem spiritualem, quæ nunquam marcescit, & quæ placet oculis, non hominum solum, sed etiam Angelorum, & ipsius Dei, qui falli non possunt. Potest autem pulchritudo spiritualis cognosci ex pulchritudine corporali. Sicut enim corporum pulchritudo consistit in proportionem membrorum, & suauitate coloris; ita pulchritudo spiritualis consistit, in iustitia, quæ est proportio quædam; & sapientia, quæ splendet instar lucis, vel potius, ut Sapiens loquitur, luci comparata inuenitur prior. Illa igitur est anima pulcherrima, quæ habet in voluntate iustitiam, in intellectu sapientiam. Hæc autem duo, & pulchram reddunt animam, ac per hoc amabilem Deo; & simul arma tunc potentissima; quibus Christus Diabolum superauit: pugnavit enim cum Diabolo Christus, non sua omnipotentia, ut poterat, sed sapientia & iustitia, sapientia vincens astutiam, & iustitia vincens malitiam. Diabolus enim astutia sua primum hominem impulit, ut per inobedientiam Deum irritaret, & Deo quidem honorem, sibi autem, & toti humano generi vitam beatam detraheret: cum hac autem astutia, malitia, siue invidia coniuncta fuit; id enim fecit Diabolus, quia torquebatur invidia, quod homo ad cælum aliquando ascensurus videretur, unde ipse deciderat. Sed Christi sapientia vicit astutiam, quoniam per obedientiam suam in natura humana Deo exhibitam, reddidit honorem Deo multo maiorem, quam per inobedientiam Adam amiserat: & simul per eandem obedientiam exaltauit genus humanum ad gloriam multo sublimiorem, quam ea futura esset, ex qua exciderat. Christus præterea

Card. Belarm. in Psal.

charitate sua, quæ est vera, & perfecta iustitia, vicit invidiam, & malitiam Diaboli; quoniam inimicos dilexit, & in ipsa cruce pro persecutoribus oravit, & pati, ac mori voluit, ut inimicos suos Deo reconciliaret, & ex inimicis amicos & fratres, & cohæredes suos efficeret. Hoc est igitur quod nunc dicit, Specie tua, & pulchritudine tua, id est, decore tuo, qui in specie sapientiæ, & pulchritudine iustitiæ consistit, quasi gladio, & arcu accinctus, & instructus intende, prosperè procede, & regna, id est, dirige cursum tuum ad prælium contra Diabolum, prosperare in prælio, & deuictò, ac debellato Principe huius mundi, acquire tibi Regnum, ut tu deinceps in cordibus hominum per fidem, & charitatem regnes. Per verbum, intende, Sanctus Ioannes Chrysostomus exponit, intende sagittas, quæ expositio probabilis est, quia paulo post dicitur, sagittæ tuæ acutæ. Illud est certum, ex textu originali, per, intende, non posse rectè exponi, attende, vel considera: sed solum, intende sagittas, aut intende seu dirige iter. Quod attinet ad verba, ex hebræo Sanctus Hieronymus sic reddit, gloria tua, & decore tuo: & decore tuo prosperè ascende. Sed Septuaginta Interpretes aliter acceperunt, vel aliter legerunt easdem voces hebraicas, iisdem literis seruatis. Vbi enim hebræi repetunt, decore tuo, quia legunt, va adarecha, Septuaginta legerunt, va adrech, quod significat, & intende, siue dirige, à voce, darach. Et vocem, tselach, quam Sanctus Hieronymus accepit pro aduerbio, & reddidit, prosperè: Septuaginta acceperunt pro verbo imperatiui modi, & verterunt, prosperè procede, siue prosperare. Et verè vox illa utroque modo accipi potest. Denique, vocem, recab, quam Sanctus Hieronymus rectè vertit, ascende; Septuaginta verterunt, regna; quia sensum potius respexerunt, quam verbum: nam per ascensionem, regnū interpretati sunt. Potest etiam eadem vox hebraica, & magis adhuc propriè significare, sede in curru, vel in equo, quæ ad regnum

R 3 referri

וְהִדְרֵךְ

וְהִדְרֵךְ

דָּרַךְ

עָלָה

רָכַב

referri possunt. Nam cum Reges inaugurabantur, equum regiuni, vel mulam regiam equitabant, ut colligitur ex primo capite libri tertij Regum: & sedere in curru triumphali proprium est Regum, qui hostes praelio vicerunt.

VI. Propter veritatem, & mansuetudinem, & iustitiam, & deducet te mirabiliter dextera tua.

Explicat rationem, cur Christus merito regnare debeat; quia videlicet habet virtutes regias: ac si diceret, prosperè procede, & regna, propter veritatem, & mansuetudinem, & iustitiam, id est, quia non desunt tibi regie virtutes. Hebræus codex clarius explicat hunc locum, ut possit esse vice commentarij. sic enim habet: propter verbum veritatis, & mansuetudinem iustitiæ. Ex quibus verbis docemur, duo esse necessaria Regi, ut sit verax, siue fidelis in verbis suis, & iustus in operibus suis: quod etiam de Deo summo Rege dicitur in Psalmis, fidelis Deus in omnibus verbis suis, & sanctus in omnibus operibus suis. Sed quia iustitia iudicis solet habere annexam asperitatem, quæ est quasi naus iustitiæ; ideo Christi iustitiæ, quæ perfectissima est, adiungitur mansuetudo. Est enim Christus mansuetè iustus, id est, iustissimè iudicat, sed sine morositate, sine asperitate, sine arrogantia; non absterret, sed conciliat sibi subditos. Sic igitur verba nostræ editionis explicanda sunt, regna propter veritatem, quam in verbis, & promissis tuis semper observas: & mansuetudinem, & iustitiam, id est, & propter mansuetudinem, quam iustitiæ semper admisces. Et deducet te mirabiliter dextera tua, id est, & cum his virtutibus regnans, mirabiles progressus regni tui videbis, neque egebis auxilio aliorum; sed ipsa dextera tua, virtus, & potentia tua per se sufficiet, ut mirabiliter te deducat, & progredi faciat in Regno amplificando, donec ponas omnes inimicos tuos sub scabellum pedum tuorum. In hebræo legitur paulo aliter quoad verba, sed sensus est idem. Sic enim S. Hieronymus ver-

tit, Et docebit te terribilia dextera tua, id est, dextera tua vincens, ac sternens hostes docebit te, id est, ostendet tibi, ac cernere te faciet terribiles eventus, strages videlicet, inimicorum tuorum.

Sagittæ tuæ acutæ (populi sub te cadent) in corda inimicorum Regis. **VII.**

Explicat modum, quo dextera Regis Christi deductura sit ipsum in amplificando imperio, dicens, id fiet, quia sagittæ, quas iaculaberis dextera tua, acutissimæ sunt, & ideo penetrabunt inimicorum tuorum corda, & populi ipsi inimici sub te cadent, & tuæ subiciantur potestati. Nomine sagittarum intelliguntur verba Dei, siue prædicationis verbi Dei: hoc enim est generale instrumentum, quo Christus utitur ad Regnum suum propagandum; hinc enim ipse dicit in Psal. 2. Ego autem constitutus sum Rex ab eo super montem sanctum eius prædicans præceptum eius. Dicitur autem verbum Dei & gladius, & sagitta, & malleus, & similia, quia cum omnibus armis similitudinem habet. Dicitur autem, sagitta acuta, quia magnam habet efficaciam penetrandi corda, & multo maiorem, quam habet humana cuiusvis magni oratoris eloquentia. Vivus est enim, ut Apostolus ait ad Hebr. 4. sermo Dei, & efficax, & penetrabilior omni gladio ancipiti. Illud autem, populi sub te cadent, per parentem legendum est: & dicuntur populi sagittis vulnerati cadere sub isto Rege, quia non vulnerantur, ut omnino extinguantur, sed ut moriantur peccato, & vivat iustitiæ, & eo modo subiecti Regi Christo remaneant, eique serviant, cui servire regnare est. Illud denique, in corda inimicorum Regis, in hebræo, & græco codice, & in multis latinis manuscriptis, legitur, in corde, non in corda: sed parum refert, utrum legatur in corde, vel in corda: nam & verum est sagittas verbi Dei penetrare corda peccatorum, & verum est easdem sagittas semel in corde infixas ibidem hære, & vulnus amo-

amoris alere, & conseruare, & eo modo ex inimicis, & peccatoribus; amicos, & sanctos facere. In græcis codicibus legitur, sagittæ tuæ acutæ potentissime: sed illud, potentissime, non habetur in hebræo. Ex quo intelligimus, auctorem latinæ vulgatæ editionis codicem græcum emendatiorem habuisse, quàm sint ij, qui nunc circumferuntur; vel certe animaduertisse illam vocem non esse à Septuaginta Interpretibus in textu positam, sed aliunde irrepsisse.

VIII. Sedes tua Deus in sæculum sæculi, virga directionis virga Regni tui.

Venit tandem ad supremam dignitatem Messia, & apertissimè vocat eum Deum, & sedem Regni eius eternam esse dicit; quem locum Sanctus Paulus ad Hebr. adduxit ad probandum Christum tantò esse Angelis maiorem, quàm maior est dominus seruis, & Deus rebus creatis. Ait igitur, Sedes tua ò Christe Deus, non temporalis erit, vt fuit Dauidis, & Salomonis; sed manebit in seculum seculi. Et virga regni tui, id est, sceptrum tuum, erit semper rectissimum, atque iustissimum: phrasis enim hebraica est, virga directionis, pro virga rectissima; sicut etiam, Deus scientiarum, pro, Deo scientissimo.

IX. Dilexisti iustitiam, & odisti iniquitatem, propterea vnxit te Deus Deus tuus oleo lætitiæ præ consortibus tuis.

Hunc etiam locum dupliciter possumus intelligere, vt illum versiculi tertij, propterea benedixit te Deus in æternum. Nam illud, propterea, potest significare effectum, vt sensus sit quia dilexisti iustitiam, & odisti iniquitatem, obediendo vsque ad mortem, & mortem crucis; propterea Deus vnxit te oleo lætitiæ, id est, glorificauit te, & exaltauit ad dexteram suam, & dedit tibi nomen, quod est super omne nomen, vt in nomine tuo omne genu flectatur, cœlestium, terrestrium, & in-

fernorum. Quæ glorificatio rectè dicitur vnctio lætitiæ, quia per eam finem accepit omnis dolor. Rectè etiam dicitur, præ consortibus tuis; quoniam etiam si Angeli quoque glorificati sint, & homines glorificandi sint; tamen nemo exaltatus, vel exaltandus est ad dexteram Patris, & nemo accipit, vel accepturus est nomen super omne nomen, vno Christo excepto, qui est caput hominum, & Angelorū, & est simul Deus, & homo. Sed rursus illud, propterea, significare potest causam, & positum esse pro, quia, siue propterea quòd, vt sensus sit, dilexisti iustitiam, & odisti iniquitatem, propterea quòd Deus vnxit te oleo gratiæ spiritualis præ consortibus tuis, quia videlicet vnxit te gratia vnionis hypostaticæ, & inde factum est, vt in te spiritus sine mensura effunderetur, ceteri autem omnes de plenitudine tuæ mensuram spiritus acceperunt; quam expositionem sequitur Sanctus Augustinus, & videtur eandem sequi Sanctus Basilius, qui hunc locum exponens, dicit, Christo fuisse naturalem dilectionem iustitiæ, & auersionem ab iniquitate: quoniam illam habuit à natiuitate, siue potius à conceptione, & à principio interno: ceteros autem exercitio, & labore virtutes acquirere. Obseruat autem Sanctus Augustinus aduersus Hebræos, & Hæreticos negantes Christi diuinitatem, in illa repetitione, Deus, Deus tuus; priorem vocem esse casus vocatiui, posteriorem nominatiui, quomodo etiam hunc locum intelligendum esse docet Sanctus Hieronymus in epist. ad Principiam: Itaque sensus est, vnxit te ò Christe Deus, Deus Pater tuus oleo lætitiæ; & affirmat idem Augustinus id clarissimè apparere in textu græco; proinde existimandum est, in textibus græcis, quos nunc habemus, incuria librario- rum, mutatum esse omega in omicron. Cum autem dicitur, Deus Deum vnxisse, non intelligimus Deum ratione diuinitatis vnctum, sed ratione humanitatis; vnxit Deus Pater Deum Filium, quia Deus Filius homo factus est, & ra-

tione humanitatis gratiam vnctionis accepit, ipse tamen Deus Filius vnctus dicitur, quia ille homo, qui vnctus est, Filius Dei, & Deus est.

- X. Myrrha, & gutta, & casia à vestimentis tuis, à domibus eburneis; ex quibus delectauerunt te filiae Regum in honore tuo.

Hic versiculus obscurissimus est: explicemus igitur primum vocabula, deinde sententiam. Myrrha succus est notus, amarus, & odoratus: gutta nomen est genericum, sed in græco habetur γάρυ, quæ apud Basilium in explicatione huius loci, est gutta distillata ex myrrha, ita vt sit quasi flos myrrhæ, idest, pars subtilissima myrrhæ. Sed non videtur verisimile, Prophetam dicere voluisse, Myrrha, & gutta myrrhæ subtilissima: in hebræo est, ahalot, quæ Aloe latine dicimus. Est autem Aloe succus item amarus, & odoratus; sed specie distinctus à myrrha; vnde in Euangelio legimus, ad Christi sepulturam emisse Nicodemum Myrrhæ, & Aloes quasi libras centum. Quod igitur noster Interpres dixit, guttam, intelligere debemus, guttam esse Aloes, vt Sanctus Hieronymus scribit in Epistola ad Principiam; vel myrrhæ distillatæ, vt Sanctus Basilius in commentario docet. Casia denique frutex est, vnde cortex odoratus desumitur, & inter aromata numeratur, quemadmodum & cinnamomum. Per domos eburneas, intelliguntur palatia, siue templa sumptuosa, quorum parietes recti sint ebore: nam in hebræo non est, baith, quæ propriè domum significat, sed hechal, quod palatium, basilicam, & templum significat. Nomen etiam græcum magna palatia significat, vt dicit Sanctus Basilius. Itaque improbable est quod aliqui volunt, domos eburneas esse cellas aromatum, & magis improbable quod alij volunt, esse thecas, siue arcas, in quibus vestimenta, vel aromata conseruantur. At, inquiunt, thecæ sunt ex ebore, non autem palatia: verum

est, sed non dicuntur hoc loco domus eburneæ, quasi totæ sint ex ebore, sed quod rectæ sint ebore: quomodo domus Neronis dicebatur domus aurea, & porta Constantinopolis porta aurea, quod essent deauratæ, vel auri laminis coopertæ, non quod totæ essent aureæ: & sic intelligimus illud 3. Reg. 22. Domus eburnea, quam ædificauit Achab. & Amos 3. Peribunt domus eburneæ. S. Gregorius lib. 35. Moralium cap. 13. legit, à gradibus eburneis: sed id natum esse ex ambiguitate vocabuli, colligitur ex S. Hieronymo in epist. ad Principiam. Scribit enim vocem græcam βασιαν, ambiguam esse, & significare posse grauibus, & palatijs, siue domibus; inde aliquos latinorum hac ambiguitate deceptos, vertisse, à grauibus eburneis: sed quia hoc nihil significat, credibile est, mutatum fuisse, & scriptum, à gradibus eburneis. Per filias Regum, intelligi possunt multitudines variorum Regnorum. Scriptura enim passim vocat filiam Hierusalem, filiam Babylonis, filiam Assyriorum, filiam Tyri, pro multitudine populi illarum ciuitatum, vel gentium. Possunt etiam intelligi, vt verba sonant, filiae Principum, per quas figuratè significantur animæ excelsæ, vt dicit Sanctus Basilius, totus enim hic sermo figuratus est. His expositis, vt ad sensum veniamus, per aromata, intelligimus virtutes, siue dona Spiritus sancti, quæ spirituales odorem spirant: & quia paulò ante dixerat Propheta Christo, Vixit te Deus Deus tuus; rectè subiungit nunc, Myrrha, & gutta, & casia, explicans odores aromaticos, qui ex illa vnctione emanarunt: de quo odore B. Paulus loquitur, cum ait 2. Corinth. 2. Christi bonus odor sumus. Et quonià in passione sua Christus præcipuè spirauit odores maximos virtutum, præcipuè fortis patritiæ, humilis obedienciæ, & ardentis charitatis: ideò nominauit Myrrham aniam, sed odoratam, quæ conuenit patientiæ, Aloem quoque similiter amarum, & odoratam, qui conuenit humilitati obedienciæ, de qua Beatus Paulus, Humiliauit semetipsum tactus

אהלות

בית
היכל

factus obediens vsque ad mortem, Philippiens. 2. denique, casiam calidam, & odoratam, quæ conuenit ardentissime charitati, qua etiam pro crucifixoribus orauit. Hæc autem aromata manabant à vestimentis, & domibus eburneis Christi. Myrrha, inquit, gutta, & casia à vestimentis tuis, à domibus eburneis, supple, manant, vel, manabant. Per vestimenta, intelligitur humanitas Christi, quæ quasi veste, aut velo diuinitatem tegebat: per domos eburneas, intelligitur eadē humanitas, quæ erat quasi templum, siue palatium candidissimum ob puritatem, in quo diuinitas habitabat. Neq; mirum videri debet, si res eadem, vestis, & domus dicatur: nam & Apostolus 2. Corint. 5. hæc duo simul coniungit, cum sic loquitur, Scimus, quoniam si terrestris domus nostra huius habitationis dissoluatur, quod ædificationem ex Deo habemus domum non manufactam, æternam in cælis: nam & in hoc ingemiscimus habitationem nostram, quæ de cælo est, superindui cupientes; si tamen vestiri, & non nudi inueniamur: nam qui sumus in hoc tabernaculo, ingemiscimus grauati, eo quod nolumus expoliari, sed superuestiri, vt absorbeatur quod mortale est à gloria. Vbi vides corpus mortale dici domum, & tabernaculum, & simul vestimentum, quo nollemus expoliari, sed superuestiri: & similiter domum cælestem dici vestem & habitationem. Sic igitur Christi humanitas, vnde suauissimi odores virtutum spirabant, vestimentum dici potest, & domus eburnea; nisi quis velit, vestimentum referri ad animam, domum eburneam ad corpus, quod ipse Christus Ioan. 2. téplum vocauit, cum ait, Soluite templum hoc, & ego in triduo reædificabo illud. Neque mouere debet, quod in numero multitudinis dicat Propheta, à domibus eburneis: nam domus magna est vna, & multæ propter multitudinem cubiculorum, & cellarum; vnde etiam de domo vna dicimus in numero multitudinis, ædes nostræ. Sequitur, Ex quibus delectauerunt te filia Regum in honore tuo,

idest, ex quibus aromatibus, quæ à vestimentis, & domibus eburneis humanitatis tuæ spirant, filia Regum, siue, animæ regiæ, & excelsæ, siue multitudines populorum ex varijs Regnis, delectauerunt te, dum currunt in odorem vnguëtorum tuorum. Valde enim delectatur Christus, cum videt multitudines Sanctorum excitatas, & tractas ab odore suo, currere post eum odorem. Et verè, qui spirituali sensu odoratus sentire incipit suauissimum odorem, qui spirat ex patientia, humilitate, & charitate Christi, non potest non currere post eum, & quælibet tormenta pati potius, quàm se ab illo separari patiatur: dicit enim cum Apostolo, Quis nos separabit à charitate Christi? Rom. 8. Sed ideò potissimum Christum delectant filia Regum currentes post odorem vnguëtorum ipsius, quia id faciunt in honore eius, idest, ex pura intentione glorificandi Deum. Martyres enim passione sua currentes post Christum, Deum valde glorificabant. vnde dicit Ioannes de passione S. Petri à Christo illi p̄dicta: significas, inquit, qua morte clarificaturus esset Deum.

Astitit Regina à dextris tuis **XL.**
in vestitu deaurato, circumdata
varietate.

Prophetauit hætenus Dauid de sponso: nunc de sponsa prophetare aggreditur. per sponsam autem intelligunt omnes ferè expositores Ecclesiam; quoniam Apostolus ad Ephes. 5. apertissime docet, Ecclesiam sponsam Christi esse. Hic igitur est principalis sensus, vt per sponsam intelligatur Ecclesia. Sed possunt etiam hæc omnia, quæ dicuntur de sponsa accommodari vnicuique animæ perfectæ, & potissimum Beatæ Virgini Mariæ, quæ licet Mater Christi sit secundum carnem; tamen est etiam sponsa secundum spiritum, & inter membra Ecclesiæ primum locum tenet. Itaque non sine ratione hic Psalmus canitur in festis Beatæ Virginis, & aliarum etiam Virginum: nec sine ratione de singulis dicitur, Veni sponsa Christi. Ait igitur Dauid Christum alloquens,

alloquēs, Astitit Regina à dextris tuis, idest, assistet sponsa tua, quæ Regina etiam est, cum sit sponsa tua, qui Rex es: à dextris tuis, idest, proxima tibi, & in loco summi honoris infra regalem thronum: assistet autem in vestitu deaurato circumdata varietate, idest, in veste præciosa qualis decet Reginam. Sed verba singula consideranda sunt. Astitit, ponitur pro assistet, more prophetico, qui vident futura, quasi iam facta sint. Præterea notat Chrysostomus, non dici, sedit; sed astitit, quia sedere conuenit æquali, & ideo filius sedet ad dexteram Patris, ut æqualis: Ecclesia autem, ut inferior, assistit cum cælestibus potestatibus, quæ assistere dicuntur coram Deo. Verbum hebraicum propriè significat, stetit, & denotat firmitatem, quasi dicat Propheta, sponsa tua firmiter tibi adhæsit, & ita constituta, & cōfirmata est, ut nullum sit ei periculum repudij. Regina in hebræo est, scegal, quod uxorem, & concubinam significat, inde nata sunt variaz interpretationes; nam alij verterunt, Astitit uxor; alij astitit concubina; sed Septuaginta Interpretes, ut explicarent eam vocem esse intelligendam de vera coniuge, non de concubinis, vertere maluerunt Reginam; neque enim concubinæ Regum, sed solæ legitimæ coniuges appellantur Regina. A dextris tuis. hæ voces non significant, sponsam ita esse à dextris sponsi, ut sponsus intelligatur esse à sinistris; sed sponsum collocant in medio, & solo altiore, à dextris eius Reginam, à sinistris autem alios Principes. Et fortasse voluit Spiritus sanctus per has voces significare incredibilem dignitatem Ecclesiæ, quæ non solum admittitur ad Regnum cælorum, & ut assistat cum Angelis ante thronum Dei; sed etiam præcedat Angelos, ita ut ipsa Ecclesia ex hominibus sit à dextris, cætus autem Angelorum à sinistris. Nam etiam si intermixti sint homines sancti Angelis sanctis, & vnam ciuitatem faciant: tamen multi sancti homines multos Angelos in Regno cælorum præcedunt: & est in Ecclesia hominum Bea-

ta Virgo, quæ omnes Angelos præcedit; & caput hominum, & Angelorum Christus est, qui non Angelus sed homo est. Hinc autem rectè monet sanctus Ioannes Chrysostomus, ut cogitent homines quàm ingrati sint tantæ Dei beneuolentiæ, quando peccant: Deus enim genus humanum, & præcipuè Ecclesiam ex gentilitate, & idololatria assumptam, ex profundo peccatorum, & verè ex luto fecit, exaltauit ad summam dignitatem, ut cum Angelis in Regno cælorum assistat, & sponsæ Dei nomen obtineat. Idque totum ex sola charitate sponsi cælestis, qui dilexit eam, & tradidit semetipsum pro ea, ut eam sanctificaret, & mundaret, & exhiberet ipse sibi gloriosam Ecclesiam non habentem maculam, neque rugam, ut scribit Apostolus ad Ephes. 5. In vestitu deaurato, circumdata varietate. pro his omnibus verbis non sunt in textu hebraico, nisi hæc duo verba, becheté ophir, idest, in auro de ophir, quæ verba sanctus Hieronymus vertit in diademate aureo; alij alijs modis. sed Septuaginta Interpretes explicare voluerunt quid includeretur in illa generali voce hebræica, & rectè dixerunt significari vestem preciosam, & omnia alia ornamenta sponsæ, quæ pro varietate membrorum varia sunt, ut diadema, monile, cingulum, calcei, & similia. quæ explicatio desumpta videtur ex eo, quod paulò infra dicitur, In fibrijs aureis circumamicta varietatibus. Quid autem hæc significant spiritualiter, Patres non vno modo exponunt, Sanctus Augustinus per aurum intelligit, sapiētiam; per vestem, doctrinam; per varietatem linguas varias, quibus hæc eadem doctrina ecclesiastica prædicatur. Sanctus Basilii intelligit qui denique per vestem auream doctrinam ecclesiasticam; sed per varietatem, variedogmata, moralia, naturalia, theoretica, practica, &c. Sanctus Hieronymus, & S. Chrysostomus intelligunt per vestem auream gratiam iustificationis; per varietatem varias virtutes, fidem, spem, dilectionem, humilitatem, & alias. Quæ explicatio confirmari potest

בְּחֶמֶת
אֹפִיר

test ex cap. 19. Apocalypsis, vbi dicitur, Sponsa ornata byssino splendenti, & candido: & exponens sanctus Ioannes dicit, byssinum enim iustificationes sunt Sanctorum. Posset addi, non solum varietatem ornamentorum sponsae consistere in varijs virtutibus, quae singulis necessariae sunt, sed etiam in varijs donis, quae pro varietate membrorum Ecclesia possidet: alia enim sunt dona Apostolorum, alia Martyrum, alia Virginum, alia Doctorum, alia Confessorum, & alia aliorum.

XII. Audi filia, & vide, & inclina aurem tuam; & obliuiscere populum tuum, & domum patris tui.

Alloquitur nunc ipsam Ecclesiam, eamque fideliter, & pie monet. Vocat autem filiam, vel quia loquitur in persona Dei Patris, vt sanctus Hieronymus dicit, vel quia loquitur, vt vnus ex Patribus Ecclesiae, vt dicit sanctus Augustinus. Sed quando sponsa intelligitur Beata Maria Virgo, tunc omnino proprie, filiam vocat Dauid, quia ex eius carne propagata est. Audi filia, inquit, idest, audire vocem sponsi tui, & vide, idest, considera diligenter quae audis, & inclina aurem tuam, idest, humiliter obedias praeceptis eius, & obliuiscere populum tuum, & domum patris tui, idest, vt facilius sponso seruias, obliuiscere mundum, & quae in mundo sunt: nam ex mundo electa est Ecclesia, & ex mundo exiuit; & quamuis adhuc in mundo sit, tamen de mundo esse non debet, sicut, & sponsus de mundo non est: mundus autem recte dicitur populus eorum, qui diligunt mundana bona, & idem mundus est domus patris nostri veteris Adami, qui de Paradiso eiectus fuit in hunc mundum; nisi magis placeat, per patrem intelligi diabolum, qui est pater omnium iniquorum, iuxta illud Ioan. 8. Vos ex patre Diabolo estis. Et certe, qui cogitabunt quae supra diximus de ineffabili amore Sponsi, qui tradidit semetipsum, vt nos de profundo lacu erueret, & in summum caelum transferret, & faceret

nos gloriosam sponsam suam: non difficile amorem suum a mundo abstrahent, vt totum in sponsum transferant. Vox autem illa, obliuiscere, magnam emphasim habet; significat enim radicatus a mundo amorem abstrahendum, vt non solum a desiderio, & cogitatione; sed etiam a memoria omnium recedat, ac si numquam fuisset.

Et concupiscet Rex decorem **XIII.** tuum: quoniam ipse est Dominus Deus tuus, & adorabunt eum.

Reddit rationem, cur debeat Sponsa obliuisci populum suum, & domum patris sui, vt tota sit amori, & obedientiae Sponsi caelestis intenta; quia videlicet sic fiet, vt Rex concupiscat pulchritudinem tuam videre, & apud se habere. Et quoniam vera sponsae pulchritudo interior est, vt paulo infra clarius explicatur, vbi dicitur, omnis pulchritudo filiae Regis ab intus; & in virtutibus consistit, ac praecipue in obedientia mandatorum eius, siue in charitate a qua dependent omnia mandata: ideo addit, Quoniam ipse est Dominus Deus tuus, idest, ideo diligit pulchritudinem tuam, quae in obedientia ipsius posita est, quoniam ipse est Dominus Deus tuus. Nihil enim magis requirit a seruis Dominus, neque Deus a creaturis, quam obedientiam. Et vt intelligamus hunc sponsum esse Dominum absolutè, & Deum verum, addit, & adorabunt eum, idest, sponsus tuus non est talis, vt cum eo praeterire possis aequalitatem, sed est quidem sponsus tuus per gratiam, sed Dominus tuus, & omnium creaturarum per naturam, & illi ab omnibus debetur adoratio. In hebraico textu non habetur, Deus, sed solum Dominus, vbi nos habemus, Quoniam ipse est Dominus Deus tuus. Sed non solum Septuaginta, verum etiam sanctus Hieronymus, verterunt, Dominus Deus tuus: & ex adoratione illi debita colligitur, eum esse non Dominum tantum, sed etiam Deum, idest, non Dominum qualemcumque, sed supremum Dominum. In eodem hebraico

co textu, vt etiam in græco habetur, Et adorabis eum : sed in sensu non est discrepantia : Deum enim adorare debēt omnes creaturæ, proinde ipsa etiam Sponsa debet adorare; neq; lectio ista, adorabunt eum, recens est : nam inuenitur apud sanctum Augustinum, sanctum Basilium, sanctum Chrysostomum, & alios; imò sanctus Hieronymus in epist. ad Principiam dicit, Septuaginta vertisse, adorabunt eum. Proinde lectio græca, quæ nunc habet, adorabis eum, non est ex editione Septuaginta Interpretum, vel corrupta est. Et quia vt sepè diximus, Septuaginta Interpretes habuerūt optimos codices hebraeos, credendum est, lectionem hebraicam ab eo tempore librariorum errore fuisse mutatam, quod facillimè fieri potuit, cū voces hebraicæ, adorabunt, & adorabis, non differant nisi in vltima litera, quæ facile variari potuit propter summam inter eas similitudinem.

XIIII. Et filia Tyri in muneribus, vultum tuum deprecabuntur, omnes diuites plebis.

Quia dixerat, Et adorabunt eum, Sponsum videlicet; addit, ipsam etiam Sponsam, vt Reginam, muneribus, & supplicationibus honorandam. Et filia Tyri, inquit, in muneribus vultum tuum deprecabuntur, id est, & filie gentilium, inimicorum antea Sponsi tui, subijcientur imperio eius, & venient ad te, ac faciem tuam deprecabuntur, non solum precibus verborum, sed etiam donis, & muneribus. Omnes diuites plebis, id est, quod dixi de filiabus Tyri, intellige potissimum de potentioribus, quales in primis diuites esse solent. Hoc etiam loco singula ferè verba explicationem propriam desiderant. Et filia, in hebræo est, Et filia, & sic legunt sancti Basilium, & Chrysostomum, & græcus codex nunc ita habet: sed tamen sanctus Hieronymus, & Augustinus, in commentario legunt, Et filia. Si legamus, Et filia Tyri, significabitur ciuitas, siue populus Tyri, quo modo dicimus filia Babylonis, filia Hie-

rusalem : si legamus, Et filia, significabuntur feminae ciuitatis Tyri: meminit autem feminarum potius quàm virorum, quia sponsam alloquitur; solent enim ad Reginam familiarius feminae accedere, ad Regem viri. Sed sicut per sponsam non intelligimus hoc loco veram mulierem, sed Ecclesiam, quæ viros, feminasq. complectitur: sic etiam per filias Tyri intelliguntur omnes gentiles, siue masculi, siue feminae sint. Tyri, vox hebræa, tior, ambigua est: nam & robustum, siue potentem significare potest, & simul etiam ciuitatem, quæ dicitur Tyrus. Sed Septuaginta Interpretes Tyrum interpretati sunt, & eam interpretationem sequutus est latinus Interpres; & omnes Patres græci, & latini eam exponūt, excepto sancto Hieronymo in epist. ad Principiam, qui, filiam fortissimam, & legere maluit, & exponere. Porro Tyrus ciuitas erat gentilium magna, & celebris, & in finibus terræ promissionis, & ideo à vicina ciuitate denominauit Propheta omnes gentiles. In muneribus, munera vocat oblationes, quas gētiles conuersi ad fidem obtulerunt in ædificationes, vel ornamenta Ecclesiarum, in alimoniam pauperum, & similia opera bona. Vultum tuum deprecabuntur. Sanctus Basilium, & quidam alij per vultum Sponsæ, intelligunt caput Ecclesiæ, id est, Christum; sed simplicior expositio est, vt, per vultum Sponsæ, ipsa Ecclesia intelligatur: est enim phrasis hebraica, deprecari vultum alicuius, pro eo quod est, deprecari aliquem, vt 1. Regum 13. Faciem Domini non placui. & Psalm. 61. Præoccupemus faciem eius in confessione. & Psalm. 118. Deprecatus sum faciem tuam. Dicimur autem deprecari faciem, quia cū precamur aliquem faciem eius aspicimus, & ex faciei tristitia, vel hilaritate intelligimus, an ille sit nobis propitius vel iratus, quem precamur. Omnes diuites plebis, Hæc est appositio, quasi dicat, Filia Tyri in muneribus vultum tuum deprecabuntur; non omnes in muneribus, sed diuites tantum.

Omnis

XV. Omnis gloria eius, filia Regis ab intus in fimbrijs aureis, circumamicta varietatibus.

Quia sæpè Dauid de pulchritudine, & ornatu Sponsæ loquutus est; ne quis fortè putaret, ea corporalia esse, occurrat hoc loco eiusmodi carnalibus cogitationibus, ac dicit, Omnis gloria, siue decoris faciei, siue preciosarum vestium, huius Reginae, ab intus est, & si fimbrijs aureis ornata, & circumamicta dicitur variegata veste, ista omnia spiritualia sunt, interna sunt, in corde requirenda sunt. Hinc sanctus Petrus monet christianas mulieres, ut ad similitudinem huius Sponsæ ornatum interiorem adhibeant. Quarum, inquit, non sit extrinsecus capillatura, aut circudatio auri, aut indumenti vestimentorum cultus; sed qui absconditus est cordis homo in incorruptibilitate quieti, & modesti spiritus. Neque tamen reprehendendus est exterior cultus Ecclesiarum in Sacramentorum celebratione, in ornatu altarium, in sacris solemnitatibus: non enim hic agitur de materiali Ecclesia, sed de hominibus, qui populus Dei, & Christi membra sunt, quorum præcipua pulchritudo, & ornatu in virtutibus consistit, ut supra diximus; ex quibus tamen virtutibus nasci debent extrinsecus opera bona, ut qui ea vident, glorificet Patrem nostrum, qui in cælis est, ut Saluator docet, Matthæi 6. Porro per fimbrias aureas, nihil aptius intelligi posse videtur, quàm ipsa charitas, quæ comparatur auro, quia preciosissima, & præstantissima virtutum omnium est, & similis fimbrijs dici potest; quia sicut à fimbrijs definunt vestimenta, & ab iisdem fimbrijs fulciuntur: ita finis omnium mandatorum & virtutum est charitas, & à charitate dependent omnia mandata, & ab eadem formantur, & perficiuntur omnes virtutes. Quid sit autem vestis variegata, supra diximus. De hac autem variegata veste loqui videtur Apostolus cum ait, Induimini viscera misericordiæ, benignitatem, humilitatem, modestiam, patientiam, &c.

Colossenses 3. Quod attinet ad verba, illud pronomen, eius, non habetur nunc in hebraico, vel græco textu; tamen legitur à Sancto Hieronymo in epist. ad Principiam, & in commentario Psalmorum, tamquam ex versione Septuaginta, & legitur etiam à sancto Augustino; & vox hebraica, si legatur cum puncto in ultima litera, significabit, gloria eius. Verum tamè est, illud, eius, esse referendū ad phrasim hebraicam, & secundum latinam phrasim redundare. Quod autem sponsa dicatur filia Regis, mirum esse non debet; nam sponsa filij Regis, vstitutè dicitur filia Regis patris, quia sponsus, & sponsa sunt duo in carne vna. Non ignoro in textu hebraico diuersam esse interpunctionem à græca, & latina interpunctione, sed non multum curanda est interpunctio, quæ à Rabinis adiuncta est codici hebraico, & magis credendum est Septuaginta Interpretibus, quàm omnibus Rabinis posterioribus.

Adducetur Regi virgines post eam, proximæ eius afferentur tibi.

Quamuis vnica sit sponsa Christi, eaq. vnicè dilecta, idest, Ecclesia vniuersalis, tamen post eam sunt etiam Christi sponsæ, præcipua quadam prærogatiua præter ceteros fideles, illæ animæ, quæ in carne virginitatē suam Deo vouerunt, & ipsi soli placere studuerunt. De quibus dicit Apostolus 1. Corinth. 7. Qui sine vxore est, sollicitus est, quæ Domini sunt, quomodo placeat Deo: qui autem cum vxore est, sollicitus est quæ sunt mundi, quomodo placeat vxori, & diuisus est: & mulier innupta, & virgo cogitat, quæ Domini sunt, ut sit sancta corpore, & spiritu: quæ autem nupta est cogitat quæ sunt mundi, quomodo placeat viro. De his loquitur nunc Propheta, & virginitatem, quæ Christo virgini mirificè placet, quippe qui pascitur inter lilia, his duobus versiculis commendat. Adducentur, inquit, Regi Christo virgines post eam, idest, post principalem sponsam

Sponsam Ecclesiam, adducentur etiam ad nuptialem thalamum sponſi cælestis omnes illæ animæ, quæ virginitatem suam Deo dicarunt. Proximæ eius afferentur tibi, idest, illæ virgines solæ afferentur tibi Sponſo, quæ principalis sponsæ tuæ Ecclesiæ proximæ fuerint, idest, quæ illi coniunctæ, atq; unitæ fuerint, quod dicitur, vt sancti Patres Basilius, & Augustinus, & alij exponunt, ad hæreticos, & schismaticos excludendos: virginitas enim extra Ecclesiam non habet sponsæ prærogatiuam. Et quoniam initio diximus, quæ in hoc Psalmo legimus de Sponsa, posse intelligi etiam de B. Mariæ matre Domini, quæ Virginum Regina iure appellatur: possumus etiam quæ sequuntur de illa exponere, vt sensus sit, adducendas esse ad Christum omnes veras Virgines, post eam, idest, post matrem Domini: & proximas eius, idest, quæ illi per imitationem æternæ integritatis propinquarent, adferendas esse ad nuptias eiusdem sponſi, & Regis Christi.

XVII. Afferentur in lætitia, & exultatione, addcentur in templum Regis.

Explicat gaudium tam multiplicitum nuptiarum: Afferentur, inquit, in lætitia, & exultatione, idest, afferentur virgines ad nuptias cum magno plausu, & iubilo totius cælestis Hierusalem. Fortasse etiam notatur hoc loco canticum illud, quod soli Virginum choro in cælesti Regno cantare licet: de quo sic legimus in Apocalypsi 14. Et cantabant quasi canticum nouum ante sedem, & ante quatuor animalia, & seniores: & nemo poterat dicere canticum, nisi illa centum quadraginta quatuor millia, qui empti sunt de terra: hi sunt, qui cum mulieribus non sunt co-inquinati: virgines enim sunt, hi sequuntur Agnum quocunque ierit. Felices animæ, quæ sequuntur Agnum itinere virginali gradietem, & in lætitia & exultatione dicunt canticum nouum, ignotum videlicet antiquis Patribus, quod nemo alius dicere potest; & cum

hoc iubilo adducentur in templum Regis, idest, in cæleste tabernaculum, quod & palatium propter magnificentiam, & templum propter sanctitatem dici potest.

Pro patribus tuis nati sunt tibi filij, constitues eos Principes super omnem terram.

Exposuit hætenus Propheta dignitatem, & ornamenta Sponſi, & Sponsæ: nunc fructum nuptiarum exponit, dicēs, nascituram ex hoc matrimonio felicissimam prolem, quæ toti orbi terrarum imperatura sit. Dubium autem est, ad quem loquatur Propheta, ad Sponsum, an ad Sponsam: ad Sponsum loqui dicunt aliqui recentiores, ea ratione ducti, quod in hebræo illa pronomina, tuis, & tibi, sint generis masculini: ad Sponsam autem hunc sermonem dirigi, docent sancti Patres Basilius, Chrysostomus, Hieronymus, Augustinus, & cum ijs Euthymius in commentarijs. Sanctus Hieronymus in epistola ad Principiam utroque modo exponi posse affirmat: quod quidem verum est; sed Patrum communis sententia præferenda est: neq; repugnat huic sententiæ textus hebraicus, si puncta remoueantur, vel mutantur, vt periti facile intelligunt. Quoniam igitur monuerat Sponsam Propheta, vt obliuisceretur populi sui, & domus patris sui, idest, maiorum suorum; nunc eam consolatur, promittens copiam filiorum loco patrum, quos reliquit, & quorum obliuisci iussa est; & simul, vt diximus, prædicat fructum nuptiarum Sponſi cælestis, & Ecclesiæ sponsæ felicissimum fore. Pro patribus tuis nati sunt tibi filij, idest, pro patribus, quos habuisti, & iam mortui sunt, idest, pro Patriarchis, & Prophetis, & pro Patribus, quos reliquisti in gentilitate, & quorum obliuisci iussa es, nati sunt tibi filij, idest, Apostoli, & Discipuli Christi, qui tantæ excellentiæ erunt, vt toti orbi leges dare possint, ideo constitues eos Principes super omnem terram. Verè enim Apostoli, primi Ecclesiæ filij,

lij, toti orbi terrarum leges dederunt, quod nullus temporalis Monarcha facere potuit. Nam, vt S. Ioannes Chrysostomus notat, Monarchæ Romanorum non potuerunt Persis leges dare, neque Persæ Romanis: Apostoli verò & Romanis & Persis, & omnibus alijs gentibus leges dederunt. Et sicut in prima ætate Ecclesia, pro patribus Patriarchis, filios Apostolos habuit: ita etiam in sequenti ætate pro patribus Apostolis filios Episcopos habet, qui si non singuli, omnes tamen Principes sunt super omnem terram; & hoc modo per successiones Episcoporum, semper Ecclesia pro patribus filios habet, quos in patrum sedibus, & dignitate constituat.

XI X. Memores erunt nominis tui Domine in omni generatione, & generatione.

Concludit Psalmum, dicens, spirituales has nuptias in Psalmo decantatas, & fructum nuptiarum, idest, nobilissimam prolem ex hoc sancto conubio nascituram, non alium finem habituram, nisi perpetuam Dei laudem. Nam, inquit, filij isti, qui patribus substituentur, & ipsi quoque patres filiorum euadent; memores erunt nominis tui, idest, cantabunt potentiam, & gratiam tuam in omni generatione, & generatione. In hebræo, & græco codice habetur in singulari, Memor ero nominis tui, & sic legunt Græci Patres, & sic etiam habetur in plurimis latinis codicibus manuscriptis: sed quoniam sanctus Hieronymus, & sanctus Augustinus in commentarijs legunt, Memores erunt nominis tui; & Ecclesia in officio Ecclesiastico, cum festos dies Apostolorum celebrat, hos versiculos ita canit: non visum fuit expedire, vt in Biblijs recognitis tempore Sixti V. & Clementis VIII. hic locus mutaretur, præsertim cum in sensu nulla sit diuersitas. Qui enim legunt, memor ero nominis tui, volunt hoc dici à Propheta, qui pollicetur Deo, se omni tempore cantaturum Dei laudes, ob tam in-

gentia beneficia humano generi præstita, quæ in hoc Psalmo explicata sūt. Caterum quia Dauid moriturus erat, & non poterat ipse per se in omni generatione, & generatione canere laudes Dei, dicunt, illum significare voluisse, se cantaturum per alios, qui sibi inuicem succedentes vsque ad mundi consummationem Psalmos istos cantaturi erant. Hæc autem expositio non est diuersa à superiore: idem enim est dicere, ego memor ero nominis tui, & cantabo laudes tuas per memoriam; & linguam aliorum, qui sibi inuicem succedunt; &, filij tui, qui sibi inuicem succedent, memores erūt nominis tui, & has laudes tuas à me cōscriptas perpetuo decantabunt. Notat autem sanctus Ioannes Chrysostomus, Dauidem Prophetā præter alia multa, quæ præuidit, & prædixit, hoc etiam de suorum carminum æternitate præuidisse, & prædixisse, quod videlicet, nullo vnquam tempore ipsorum celebratio intermittenda esset; quam prophetiam impletam esse, & quotidie impleri cernimus.

Propterea populi confitebuntur tibi in æternum, & in sæculum sæculi. XX.

Ex eo quod Apostoli, & eorum successores Episcopi semper memores futuri erunt nominis Domini, & laudes eius cantaturi, & prædicaturi: rectè colligit Propheta, id etiam futurum esse, vt populi fideles ab Episcopis instituti, confiteantur Domino laudes eius vsque in æternum, & in sæculum sæculi, in hac vita, & in futura: quamuis enim in patria cessabunt preces, & lacrymæ; tamen laudatio, & glorificatio non cessabit.

P S A L M V S XLV.

Titulus, & Argumentum
Psalmi.

In finem filijs Core pro arcanis.



Ecetiores Interpretes nonnulli Psalmum hunc scriptum esse volunt in gratiarum actionem, pro victoria Davidis ab inimicis suis Dei auxilio reportata; sed mirum est nulli veterum Patrum venisse in mentem eiusmodi argumentum. Nam sanctus Ambrosius, sanctus Hieronymus, sanctus Augustinus, sanctus Basilius, sanctus Ioannes Chrysostomus, Theodoretus, & Euthymius magno consensu docent, Psalmum esse intelligendum de liberatione Ecclesiae Christianae à persecutionibus infidelium. Et confirmari potest hæc explicatio ex titulo Psalmi; illud enim, pro arcanis, satis apertè demonstrat, Prophetam non loqui de re præterita, sed de futura, & eiusmodi, ut tempore Davidis occultissima esset, & nonnisi Deo reuelante sciri posset. Igitur Psalmus præsens rectè subiungitur Psalmo superiori: In illo enim prædicta est Ecclesiae exaltatio ob nuptias spirituales cum Rege Christo Domino: in hoc autem prædicatur persecutio, & liberatio à persecutione; quæ liberatio potissimum futura est, ut sanctus Basilius arbitratur, in consummatione seculi.

Explicatio Psalmi 45.

- I. **D**eus noster refugium, & virtus, adiutor in tribulationibus, quæ inuenerunt nos nimis.

Milites Christi non minus vincunt fugiendo tentationes, quàm tolerando. Quando fugiendum est, Deus refugium tutissimum est: quando tolerandum est, Deus virtus, & fortitudo est:

utroque autem tempore adiutor est in tribulationibus: nam & adiuuat præbendo refugium, & adiuuat præstando victoriam. Illud autem, quæ inuenerunt nos nimis, significat, tribulationes grauissimas fuisse, quæ initio exortæ sunt aduersus Ecclesiam, & repente ac inopinato irruisse: nam ut legitur in Actis Apostolorum ca. 2. & 3. post Ascensionem Domini, & aduentum Spiritus sancti, Ecclesia ædificabatur & crescebat in Hierusalem magna cum pace, & tranquillitate. Quotidie, inquit sanctus Lucas, perdurantes vnanimiter in templo, & frangentes circa domos panes, sumebant cibum cum exultatione, & simplicitate cordis, collaudantes Deum, & habentes gratiam ad omnem plebem, & Dominus augebat qui salui fierent quotidie in idipsum. Sed paulò post capit vehementissima persecutio, flagellatis Apostolis, Stephano lapidato, & omnibus discipulis dispersis, præter Apostolos. In hebræo textu legitur, Adiutor in tribulationibus inuentus est nimis, idest, Deus in tribulationibus inuentus est auxiliator valdè potens. Vterque sensus optimus est; sed quod attinet ad veritatem lectionis, adhæréndum est Septuaginta Interpretibus, qui sine dubio vocem illam hebraicam, nimpfa, paulò aliter legerunt; alioqui nunquam vertissent, inuenerunt, nisi valdè imperiti fuissent. Notat sanctus Basilius, multos habere in ore versiculi huius verba, Deus refugium nostrum & virtus, sed paucissimos ex vero affectu ista pronunciare; quod inde colligitur, quoniam ad superandas tribulationes tanto ardore confugiunt ad humana præsidia, vel etiam ad artes diabolicas, quasi Dei auxilium pro nihilo haberent. Contra autem sanctus David ideò dicit, Deus noster refugium, & virtus; quia parum omnino in hominum robore, vel armis, vel industria confidebat.

Propterea non timebimus, dum turbabitur terra, & transferentur montes in cor maris.

Sonue-

נמצא

III. Sonuerunt, & turbatae sunt aquae eorum, conturbati sunt montes in fortitudine eius.

Hi duo versiculi obscurissimi sunt, sed nos sanctos Patres Basilium, & Chrysostomum sequimur. Igitur ex eo quod dixit populus Dei, Deus refugium nostrum, & virtus; concludit, se impavidum fore, etiam si terra, & mare sursum, ac deorsum moueantur, & sedes suas horribili cum sonitu mutant. Propterea, inquit populus Dei, non timebimus, dum turbabitur terra, idest, dum forte turbabitur terra, siue, etiam si maxime turbetur terra, & transferantur montes in cor maris, idest, etiam si ipsi montes, qui à Deo fundati, & radicati videntur, ut immobiles esse censeantur, agitentur, & fluctuent, & in profundum mare precipitentur, idest, si ita sit, si ista fiant, non timebimus, quia Deus omnipotens refugium nostrum, & virtus nostra est. Sonuerunt, & turbatae sunt aquae eorum, idest, non timebimus, etiam si ex translatione montium in cor maris, resonent, & turbentur aquae maris. Dicit autem, eorum, idest, marium, quia ubi nos habemus, in cor maris, in textu hebraico, & graeco est, in cor marium: noster autem Interpres mutauit numerum multitudinis in numerum singularem in voce, maris, & reliquit numerum multitudinis in pronomine, eorum, & inde nata est obscuritas. Et conturbati sunt montes, idest, etiam si ipsi montes translati de terra in mare conturbentur, amissa videlicet stabilitate sua, in fortitudine eius, in potentia, & robore Dei. Deus enim est, qui solus potest conturbare terram, & transferre montes in cor maris, & ipsum mare, montesque tremefacere, iuxta illud Psal. 76. Viderunt aquae Deus, & timuerunt, & turbatae sunt abyssi; & Psal. 103. Qui respicit terram, & facit eam tremere. & Isaïa 51. Ego sum Dominus Deus tuus, qui conturbo mare, & intumescunt fluctus eius. Itaque in his versiculis declaratur maxima fiducia populi Dei, qui non timebit, etiam si mundus

Card. Belarm. in Psal.

ruat; & simul insinuat maxima Dei potestas, qui potest elementa omnia conturbare, & mouere: sicut re vera conturbabit, & mouebit in consummatione seculi, quando erunt terrae motus maximi per loca, & praefusione sonitus maris, & fluctuum arescent homines praetimore; & tunc populus Dei non solum non timebit, sed aspiciet, & leuabit caput suum, ut in Euangelio dicitur, quoniam appropinquabit redemptio eius. Possunt haec omnia figurate intelligi, ut per terram intelligantur homines terreni; per montes vero, non solum terreni, sed etiam potentes, & superbi, quales erant Reges magni, Ecclesiae inimici; per mare autem, amaritudo tribulationis, & praenarum, quibus in nouissima die inuoluentur omnes impij. Itaque turbabitur terra, quando impij terrae amatores turbabuntur timore horribili, ut dicitur Sap. 5. & montes transferrentur in cor maris, quando magni quondam Reges, qui Ecclesiam persequabantur, demergentur in profundum abyssi: & tunc sonabunt, & turbabuntur aquae marium, quando futura vltima tribulatio horrendum in modum turbabit impios, & Reges eorum, in fortitudine Dei, quoniam tunc apparebit quanta sit potestas irae Dei in peccatores.

IV. Fluminis impetus laetificat ciuitatem Dei, sanctificauit tabernaculum suum altissimus.

V. Deus in medio eius non commouebitur, adiuuabit eam Deus mane diluculo.

Ostendit nunc, quare non timebit populus Dei, quando turbabitur terra, & montes transferrentur in cor maris: & rationem esse dicit, quoniam pro amaritudinis abundantia, quae turbabit impios, dabitur Ecclesiae abundantia voluptatis, quae eam laetificabit: & pro instabilitate montium, qui transferrentur in cor maris, dabitur Ecclesiae stabilitas perpetua, quia Deus erit in medio eius. Fluminis, inquit, impetus

S laeti-

lætificat ciuitatem Dei, idest, non timebit populus Dei, quādo turbabitur terra, quia non irruent in Ecclesiam flus maris amari; sed fluminis aque dulces, & claræ magno impetu, magna videlicet copia, & abundantia voluptatis lætificabunt eam. In hebræo habetur fluminis riui, siue diuisiones, pro eo quod nos habemus ex græco, fluminis impetus. Sed non sunt contraria; nam riui aquarum possunt & cum impetu, & sine impetu fluere: voluerunt autem Septuaginta Interpretes declarare, riuos illos non remissè, & tenuiter fluere, sed cum magna plenitudine, & impetu, ad significandam vehementiam dulcedinis, quæ redundat, in ciuitate Dei; sicut in alio Psalmo dicitur, Torrente voluptatis tuæ potabis eos. Addit Propheta, Sanctificauit tabernaculum suum altissimus, quasi dicat, idèo lætificat ciuitatem suam Deus, quia eam elegit, & sanctificauit in tabernaculum sibi eamq. esse voluit propriam suam habitationem, iuxta illud Apocalyp. 21. Ecce tabernaculum Dei cum hominibus, & habitabit cum eis, & ipsi populus eius erunt. Deus in medio eius non commouebitur: hoc opponitur instabilitati terræ, & montium, quasi dicat, non timebit ciuitas Dei, ne fortè transferatur in cor maris: nā Deus est in medio eius, idest, Deus non recedit ab ea, sed præsentissimus illi adest, vtpotè in medio, in intimis, in corde eius, & idèo ista ciuitas nō commouebitur, sed æterna stabilitate solidabitur. Et concludit ostendens, vnde, & quando ista erunt, dicens, Adiuuabit eam Deus mane diluculo, idest, lætitia, & stabilitas dabuntur ciuitati Dei; quoniam Deus adiuuabit eam in exortu diei, idest, incipiente die felicitatis æternæ. Scriptura enim comparat infidelitatis tempus tenebris noctis, tempus fidei auroræ, visionem Dei claritati diei. B. Paulus ad Rom. 13. Nox præcessit, dies autè appropinquauit. Et B. Petrus in 2. epist. cap. 1. Habebitis firmiorem propheticum sermonē, cui benefacitis attendētes, quasi lucernæ lucēti in caliginoso loco, donec dies illucescat, & lucifer oriatur in cordi-

bus vestris. Et Sponsa in Canticis cap. 2. Donec aspiret dies, & inclinētur vmbra. Et Propheta Malachias cap. 4. Vobis timentibus nomen meū orietur Sol iustitiæ. Et cum hac sententia satis aptè cohæret antiqua lectio, quam habet S. Augustinus, & cuius meminit S. Ambrosius, & quam amplectitur Ecclesia in officio Ecclesiastico. Adiuuabit eam Deus vultu suo, idest, adiuuabit eā adiutorio omnium maximo, & potentissimo, quando ostendet ei vultum suum, quod tunc erit, quando Sol iustitiæ manifestè se illi ostendet, & inchoabit diem illū ab initio mundi à Sanctis omnibus desideratum, & expectatum: de quo dicit Apostolus, Scio cui credidi, & certus sum, quia potens est depositum meum seruare in illum diem, 2. Timoth. 1.

Conturbatæ sunt gentes, & inclinata sunt Regna: dedit vocem suam, mota est terra. VI.

Prædicit verbis proprijs, quod figuratis ante prædixerat, destructionem videlicet, inimicorum Ecclesiæ; vnde pax vniuersalis, & perpetua consequetur. Quod igitur antea dixerat de terra, & montibus, nunc dicit apertius de gentibus, & Regnis. Conturbatæ sunt, inquit, gentes, quia propinquat interitus earum; & inclinata sunt Regna, idest, deiecta ab altitudine sua, & vsque ad terram prostrata. Dedit vocem suam, Deus videlicet intonuit de cælo, & mota est terra, idest, contremuit, vel liquefacta, & desolata est terra: nam vox hebraica, mug, liquefcere & dissolui est. Quod autem hic dicitur de Regnorum terrenorum destructione, prædictum fuit clarius à Daniele ca. 2. vbi dicitur, Regnum Christi consumpturum omnia Regna, & ipsum mansurum in æternum. & explicatum fuit ab Apostolo 1. Corinth. 15. illis verbis, Deinde finis cum tradiderit Regnum Deo, & Patri, cum euacuauerit omnem principatū, & potestatem, & virtutem.

Dominus virtutum nobiscum, VII.
susceptor noster Deus Iacob.

In

In his omnibus ruinis gentium, & Regnorum non timebit populus Dei, quoniam dicere poterit, Dominus virtutū, idest, exercituum, nobiscum est. Susceptor noster, idest, qui nos tuendos suscepit Deus Iacob est. Dicitur autē, Dominus virtutum, idest, exercituum, quoniam omnes Angeli, qui plurimi, & potentissimi sunt, ad nutum illi obediunt, iuxta illud Psalmi 102. Potentes virtute facientes verbum illius. Nec solum Angeli sunt milites Dei, sed omnes omnino res creatæ: nam ignis, grando, nix, glacies, spiritus procellarum faciunt verbum eius, ut dicitur in Psal. 147. & ut dicitur in Psal. 118. Omnia seruiunt ei. Itaque duo argumenta proponuntur in hoc versiculo, quibus apertissime demonstratur, posse, ac debere populum Dei nihil timere: primum est, quia Dominus potentissimus, cui omnia militant, huius populi adiutor est. Alterum, quia hic idem Dominus, non solum potest, sed etiam vult populum suū iuuare, cum dici velit Deus Iacob, idest, Deus populi huius, qui dicitur Iacob a patriarcha illo sancto, & Dei amicissimo, ex cuius progenie carnem sumere dignatus est.

VIII. Venite, & videte opera Domini, quæ posuit prodigia super terram, auferens bella, usque ad finem terræ.

Hortatur omnes gentes, ut cogitent mirabilia opera Dei, atque illud in primis, quod erit in nouissimo tempore, quando sublati omnibus inimicis, vel potius subiectis omnibus sub scabellum pedum Christi, finis erit omnium bellorum, & solus regnabit Deus, nullo amplius resistente, vel rebellante. Quod Regnum expectamus, & petimus, cum quotidie dicimus in oratione Dominica, Adueniat Regnum tuum. Venite, inquit, & videte, idest, accedite per fidem, & mentis oculis contemplantini, & considerate opera Domini, quæ posuit prodigia super terram, id est, considerate opera, quæ Deus po-

net (nam præteritum ponitur profuturo more prophetico) super terram tam admiranda & stupenda, ut prodigia nominari possint. Ponet autem hæc prodigia auferens bella, usque ad finem terræ; verè enim mirabile est, potuisse ex tota terra usque ad vltimos eius fines auferri bella, & ita auferri, ut in aeternum renouari non possint. Ex hebræo Sanctus Hieronymus vertit, Quantas posuerit desolationes in terra, pro eo quod nos legimus, quæ posuit prodigia super terram: & sensus idem est: nam ex desolatione totius terræ translatis iustis in cælum, & detrusis impijs in infernum, orietur cessatio bellorum in vniuersa terra. Verbum tamen hebraicum, sammoth, utrumque significat, desolationes, & admirationes, siue prodigia: nam vox, samam, significat admirari, & desolari, proinde Septuaginta Interpretes rectè verterunt, prodigia, cum vox hebraica id significet; quamuis etiam desolationes significare possit.

שמות

שם

Arcum conteret, & confringet IX. arma, & scuta comburet igni.

Declarat quod dixit, auferens bella; ac dicit id futurum esse, quia Dominus destruet omnia arma, tam quibus usus est in feriendo, quales sunt arcus, & lanceæ, quam quibus vtuntur milites ad sui defensionem, qualia sunt scuta: sine armis autem bella geri non possunt. In hebræo pro voce, arma, habetur in specie hasta, siue lancea; sed Septuaginta maluerunt vertere arma, quia sine dubio Propheta nomine arcus, & lanceæ significare voluit omnia arma offensiva; itaque sensus est, arcum conteret, & confringet reliqua arma. Pro voce verò, scuta, est in hebræo, currus. & quidem sensus est idem, quia & scuta, & currus militares, & omnia similia instrumenta belli cremanda prædicuntur: tamen sciendum est, vocem hebraicam, hagalth, significare currus, quia currus rotundi sunt; propriè enim vox illa, rotunditatem significat. Quoniam igitur scuta etiam rotunda sunt, & melius coniunguntur scuta

עגלות

S 2 cum

cum lanceis, & arcubus, quàm currus; ideò Septuaginta prudèter verterunt, scuta. Hos duos versiculos aliqui exponunt de pace temporali, quæ fuit tempore Augusti, vel Constantini; sed longè melius conueniunt in æternam pacem, quæ erit in fine seculi, quando Ecclesia desinet esse militans, & incipiet esse triumphans, omnibus videlicet hostibus vndique debellatis.

X. Vacate, & videte, quoniam ego sum Deus, exaltabor in gentibus, & exaltabor in terra.

Dixerat paulò ante Propheta, Venite & videte opera Domini. Nunc vt ostendat, quomodo venire oporteat, si quis opera Domini intelligere velit, dicit, Vacate, & videte: ac vt magis persuadeat, inducit Deum ipsum loquentem, & exhortantem, Vacate & videte, quoniam ego sum Deus. Nam contemplatio rerum diuinarum requirit animum liberum à tumultu perturbationum secularium; radix autem omnium perturbationum est cupiditas: ex desiderio enim diuitiarum, deliciarum, honorum, & similium rerum, oriuntur occupationes molestissimæ, quæ nullam omnino quietem homini sic affecto relinquunt. Hinc Hieremias de vero contemplatiuo dicit, Sedebit solitarius, & tacebit, quoniam leuauit se supra se, Thren. 3. & Dominus præcepit Matth. 6. Tu autem cum oraueris, intra in cubiculum tuum, & clauso ostio ora Patrem tuum. Quid sit enim clauso ostio Patrem orare, exemplo suo nos docuit, qui vt plurimum oraturus, ascendebat in montes, & solus orabat, remotus videlicet, ab omni strepitu curarum, & negotiorum. Sed, vt diximus, præcipua vacatio debet esse à concupiscentia rerum terrenarum: nam qui nihil desiderat eorum quæ videntur, etiam si multum occupetur in auxilio proximorum; facilè colliget animum, cum voluerit, & vacabit, & videbit, quoniam Dominus ipse solus est Deus; ipse principium & finis, ipse spes tota fidelium in terris, & vera felicitas eorum in cælis: nam & David

occupatissimus erat in Regno administrando; & sanctus Gregorius (vt etiam plurimi alij sancti Pontifices) in administrando Pontificatum; & tamen altissimis contemplationibus suspendebantur, eo quòd alas mentis à luto concupiscentiæ liberas gererent. Ipse etiam Apostolus sollicitudine omnium Ecclesiarum premebatur, & labore manuum ad victum quærendum exercebatur; & tamen quia à desiderijs secularibus liberrimus erat, non solum vacabat, & videbat, sed etiam vsque ad tertium cælum rapiebatur, & audiebat arcana verba, quæ non licet homini loqui. Contra verò multi sunt homines ociosi, quod attinet ad occupationes negotiorum; sed quia carnales sūt, & secularibus desiderijs implicati, Deo vacare non norunt. Ait igitur, Vacate, idest, ocium sanctum quærite, & animum purum, & tranquillum afferre, & videte attentissimè cogitantes, quoniam ego sum Deus, idest, ego sum Deus solus, & nulla res creata, quamuis magna, & sublimis videatur, est Deus; ego solus sum id quod est; ego solus, ex quo omnia, per quem omnia, & in quo omnia; ego solus, sine quo nihil potestis, & nihil estis, & in quo omnia potestis, & verè estis. Exaltabor in gentibus, & exaltabor in terra, idest, ego cum mirabilia fecero, quæ supra dicta sunt, apparebo sublimis coram omnibus gentibus, & coram omni orbe terrarum, ita vt omne genu flectatur, cælestium, terrestrium, & infernorum. Nam in fine seculi nullus omnino erit, qui Deum contemnere audeat; sed omnes vel volentes, vel inuiti agnoscent supremum eius imperium, illique subiciantur. Sanctus Basilius, & aliqui alij mysticè interpretantur hanc exaltationem de exaltatione Christi in cruce: vt sensus sit, Vacate, & videte, quoniam ego, qui homo esse videor, sicut homines cæteri, verè tamen sum Deus; & exaltabor inter gentes, & in terra suspensus in cruce ad ignominiam, & supplicium in oculis impiorum. Verè autem per hanc ipsam crucem exaltabor

in

in omnibus gentibus, & in omni terra, quia omnia traham ad me ipsum, & iugo fidei, atque obedientiae meae, ipsi etiam summi Reges cum populis colla submittent. In hebræo est, cessate & videte; quod potest intelligi de cessatione à negotiis & desideriis secularibus, ut diximus, & eam literalem, & propriam expositionem esse censemus: tamen non est improbanda sententia illorum, qui volunt, in his verbis exhortationes contineri ad impios, ut sensus sit, Cum ea futura sint, quae sunt paulò ante explicata, cessate iam tandem à peccato infidelitatis, & à persecutionibus piorum, & videte oculis fidei, quoniam ego sum Deus, & idola vestra non sunt Dij; ego enim solus in fine seculi exaltabor in gentibus, & in omni terra.

XI. Dominus virtutum nobiscum, susceptor noster Deus Iacob.

Concludit Psalmum repetitione verborum septimi, ut affectum piorum, exhortatione illa Dei, rursus excitatum, & renouatum fuisse demonstret.

PSALMUS XLVI.

Titulus, & Argumentum.

In finem pro filiis Core, Psalmus.

TITVLVS nihil continet noui, sed de argumento quæstio esse potest: non enim defunt ex recentioribus, qui Psalmum ad literam exponendum esse censeant de asportatione arcæ fœderis in montem Sion à Dauid. Mouentur autem ea ratione, quòd sicut in hoc Psalmo scriptum est, Ascendit Deus in iubilo, & Dominus in voce tubæ: ita scriptum sit 2. Reg. 6. Ducebant arcam Testamenti Domini in iubilo, & in clangore buccinæ; & pro verbo, ducebant, in hebræo est, mahalim, idest, ascendere fecerunt. Card. Belarm. in Psal.

Ceterum sancti Patres, ut Chrysostomus, Hieronymus, Augustinus, & cum eis Theodoretus, & Euthymius, nullam arcæ mentionem fecerunt, & simpliciter totum Psalmum de victoria, & Ascensione Christi exposuerunt. Eorum sententia nobis sequenda esse videtur, tum propter ipsorum auctoritatem, tum quia fide sola arcæ asportatione ad literam ageretur, non esset opus omnes gentes ad lætitiā inuitare: neque similia sunt quæ dicuntur in 2. lib. Reg. cap. 6. ijs quæ dicuntur in hoc Psalmo: ibi enim dicitur, ascendere fecerunt arcam; hic dicitur, Ascendit Deus, & rursus repetitur, & Dominus in voce tubæ: sunt autem valde diuersa, ascendere fecerunt arcam, & ascendit Deus; illud enim rectè redditum est per verbum, ducebant, quod propriè conuenit arcæ lignæ, quæ non mouetur nisi ab alio deferatur, at, ascendit Deus, ad eum refertur, qui propria virtute sursum abiit.

Explicatio Psalmi 46.

Omnes gentes plaudite mani-
bus, iubilare Deo in voce exultationis.

Inuitat Propheta sanctus omnes gentes, ut voce, & gestibus lætitiā animi ostendant: omnes gentes inuitat, quia gloria capitis toti corpori communis est; corpus autem non solos Iudæos, sed etiam gentes comprehendit: Ecclesia enim, quæ corpus Christi est, toto terrarum orbe diffunditur. Quod autem ad plaudendum manibus inuitat, non significat strepitum corporale edendum, ut rectè S. Chrysostomus admonuit, sed metaphorica loquutio est, quæ indicat gaudendum, & lætandum esse, ut ij faciunt, qui præ gaudio exiliunt, & manibus strepitum, & voce clamores excitant: nam idem Propheta non solos homines ad plausum, & exultationē inuitare solet, sed etiam cælum, & terram, & flumina, & montes, &

S ; ar-

arbores, Psal. 95. Latentur cæli, & exultet terra, commoueat mare, & plenitudo eius, gaudebunt campi, & omnia quæ in eis sunt: tunc exultabunt omnia lingua silvarum à facie Domini, quia venit. & in Psal. 97. Flumina plaudent manu, simul montes exultabunt à conspectu Domini; quæ omnia metaphorica sunt, neque aliud significant, nisi ingentem animi lætitiā hominis cupientis, si fieri posset, ut omnia sibi congauderent. Neque omittendum est, quod monet S. Augustinus, illorum dū taxat gaudium Deo gratum esse, qui manus plaudunt, & voce exultant, id est, qui operibus bonis, & voce laudis testantur se in Domino gaudere.

II. Quoniam Dominus excelsus, terribilis, Rex magnus super omnem terram.

Reddit rationem Propheta, cur omnes gentes ad plaudendum, & exultandum inuitauerit: ac primum rationem ducit à magnitudine Christi, quem dicit esse excelsū ratione diuinitatis, terribilem ratione potentie, & Regem magnum ratione prouidentie, & gubernationis. Quoniam, inquit, Dominus excelsus, id est, cum plausu, & exultatione iubilate Deo gētes omnes, quoniam Deus, & Dominus noster Christus excelsus est, siue altissimus (ut vertit S. Hieronymus) quo ad naturam diuinam, ratione cuius longe excellit omnibus rebus creatis. Item, quoniam terribilis est, quo ad potentiam, cum verē sit omnipotens, & nihil ei resistere possit. Denique, quia Rex magnus est super omnem terram, quoad gubernationē, cum ipse sit supremus, & absolutus, & vniuersalis rector orbis terræ.

III. Subiecit populos nobis, & gentes sub pedibus nostris.

Alteram rationem ducit à beneficio, quod Ecclesiæ suæ contulit in principio, quando eam eduxit de terra Aegypti; tunc enim Deus, siue Christus secundum formam Dei introduxit populum in terram promissionis, & popu-

los, ac gentes, quæ loca illa possidebant, subiecit populo suo, & fecit, ut re ipsa pedibus conculcarent colla Regum illarum gentium, ut scribitur in libro Iosue cap. 10.

Elegit nobis hæreditatem suā, IV. Speciem Iacob, quam dilexit.

Tertiam rationem ducit ab alio beneficio, quo idem Deus Christus, post eiectos Chananæos, & populum suum in eorum terram introductos, elegit sibi in peculiarem, & propriam hæreditatem, primitiuā Ecclesiam, ex Iudæis credentibus, id est, Apostolis, cæterisq. discipulis. Elegit, inquit, nobis, id est, in nobis, siue ex nobis, hæreditatem sibi, populum videlicet peculiarem; Speciem Iacob, quam dilexit, id est, elegit pulchritudinem quādam eximiam populi Iudaici, qui dicitur Iacob, quā pulchritudinem meritō adamauit, & idē ex eo populo Ecclesiam, quasi propriam hæreditatem sibi ipse constituit. Obseruandum est hoc loco, in populo Iudaico plurimos fuisse duræ ceruicis, & idololatriæ addictos, ac per hoc tantem reprobos: sed fuisse etiam sanctissimos Patriarchas, quorum spiritualem pulchritudinem Fidei, ac morum Deus valdē dilexit. Vnde & Apostolus dicit Rom. 11. Iudæos fuisse Deo charissimos propter Patres, & Ecclesiam ex Iudæis esse bonam oliuam, cuius aliqui rami fracti sunt ob incredulitatem, & in eorum locum insertos esse Gentiles conuersos ad fidem, quos oleastros appellat. & iisdem Gentilibus iam fidelibus dicit, Quod si aliqui ex ramis fracti sunt, tu autem cum oleaster es, insertus es in illis, & socius radices, & pinguedinis oliuæ factus es, noli gloriari aduersus ramos: quod si gloriaris, non tu radicem portas, sed radix te. Hæc igitur est species Iacob, quā Deus dilexit, & propter quam elegit sibi hæreditatem ex populo Iudæorum, cui postea adiunxit multitudinem gentiū. In hebræo codice nunc habemus, Elegit nobis hæreditatem nostram; sed Septuaginta Interpretes, qui vertunt,

נחלתנו
נחלתו
נחלתו

tunt, hæreditatem sibi, sine dubio non legerunt, nachalatenu, quod significat, hæreditatem nostram, sed, nachalato, vel, nachalalo, quod est, hæreditatem sibi. Et facile fuit post tempora Septuaginta Interpretum mutari textum ob literarum similitudinem. Certè sententia multò clarior est, quam reddiderunt Septuaginta Interpretes, quàm ea sit, quam nunc recentiores colligunt ex hebræo. Quid enim sit, elegit nobis hæreditatem nostram, vix intelligi potest, at, elegit in nobis hæreditatem sibi, facillimè intelligitur.

V. Ascendit Deus in iubilo, & Dominus in voce tubæ.

Hæc est quarta ratio, cur oporteat plaudere, & exultare, quia videlicet, posteaquam Dominus, elegit sibi hæreditatem in populo hebræorum, idest, inchoavit Ecclesiam suam in Apostolis, & Discipulis, qui omnes hebræi erant, ascendit in cælum, & naturam nostram personæ suæ indissolubiliter unitam euexit supra omnes cælos, super omnes Angelos, & super omnes creaturas. Quamvis enim in hoc Psalmo non exprimat, quò ascenderit; exprimitur tamen in Psal. 67. ubi dicitur, Ascendit in altum, captivam duxit captivitatem. & ibidem, Ascendit super cælos cælorum ad orientem. Ait igitur, Ascendit Deus, idest, Christus ascendit in cælum, sed ascendit propria virtute, quia Deus erat, idè enim dicit, ascendit Deus. Illud, in iubilo, & in voce tubæ; de spiritali iubilo, & sono Angelorum intelligendum est: nam ut Chrysostomus notat, quod ad corporalem strepitum attinet, ascendit in silentio Apostolis aspicientibus, & mirantibus; & fortasse non sunt visi, neque auditi chori Angelorum, ut in natiuitate, ut Apostoli nulla alia re distraherentur, sed toti essent intenti ad cogitandum mysterij magnitudinem, dum viderent, naturam humanam, cui dictum erat, pulvis es, & in puluerem reuerteris, iam cum ingenti gloria & immortalitate indutam ascendere su-

per omnes cælos: Sed tamen dubitari non potest, quin adessent Angelorum legiones ineffabili iubilo deducentes Dominum gloriæ in gloriam suam.

Pfallite Deo nostro, pfallite: VI. pfallite Regi nostro, pfallite.

Quoniam Rex omnis terræ VII. Deus pfallite sapienter.

Antequam subiungat quintam rationem, ex admiratione ascensionis, provocat omnes ad laudandum Deum, & ad affectum suum significandum non semel hoc dicit, sed iterum, atque iterum repetit. Pfallite, inquit, Deo nostro, pfallite: pfallite Regi nostro, pfallite; idest, pfallite Domino, quia Deus noster est, iterum pfallite, quia Rex noster est, & tertio pfallite, quia non solum Rex noster est, sed quia omnis terræ Rex est. Nec solum pfallite frequenter, sed etiam sapienter, idest, attentè, & consideratè, ut nulla in re fiat error; oportet enim officium, quod summò Regi præstatur, cum omni diligentia præstari. Vide de hac re S. Bernardum serm. 7. & 47. in Cantica. Significatur etiam per vocem, sapienter, ut Chrysostomus, & Augustinus admonent, ut qui Psalmos canit, intelligat quod canit, & ex intelligentia mysteriorum moveatur affectus pietatis in Deum. In qua re videtur hoc tempore non leuiter peccari ab ijs, qui officium canendi in Ecclesia susceperunt.

Regnabit Deus super gentes: VIII. Deus sedet super sedem sanctam suam.

Quinta ratio ponitur hoc loco, cur oporteat pfallere, & iubilare Deo in voce exultationis; quia, videlicet, Christus posteaquam in cælum ascendit, per Apostolos suos toti orbi terrarum prædicavit Euangelium, atque ad Regnum suum gentiles adduxit. Regnabit, inquit, Deus super gentes, idest, non contentus Christus Deus hæreditate, quam sibi acquisiuit ex populo Iudæorum, regnabit etiam super gentes, dum per Apostolorum prædicationem gentes omnes Iugo Fidei col-

la subijcient. Sed interim sedet super sedem sanctam suam, idest, sedet ad dexteram Patris, quæ est sedes Regni Dei sanctissima, idest, iustissima, & in qua nulla cadere potest iniquitas. Vocatur etiam sedes Dei sancta, quoniam anima iusti sedes est sapientia, & Deus sedet super Cherubim, qui sunt sanctissimi, & beatissimi spiritus.

IX. Principes populorum congregati sunt cum Deo Abraham: quoniam Dij fortes terræ vehementer eleuati sunt.

Declarat quod dixit, Regnabit Deus super gentes. Id enim futurum erat, quia per Apostolorum prædicationem Principes populorum cum ipsis suis populis fideles futuri erant, & dimissis Dijs Patrum suorum, cum Deo Abraham, qui solus verus est Deus, congregandi erant. Hoc igitur est, quod dicit, Principes populorum, gentilium videlicet, cum Deo Abraham congregati sunt, idest, cum Deo Abraham conuenerunt, ut ipse esset eis in Deum, & ipsi populus eius essent. Nominat autem Deum Abraham, ad differentiam Deorum, quos sibi variæ gentes adoptarunt, cum in Mundum ingressa est idololatria, quo tempore apud familiam Abrahami veri Dei cultus relictus est. In hebraico textu legitur, populus Dei Abraham, pro eo quod nos habemus, cum Deo Abraham; sed Interpretes Septuaginta non legerunt, ham, sed, him, eadem enim literæ cum vno puncto, significant, cum, cum alio significant populus. Et vel ex hoc loco intelligi potest, puncta non esse ubique collocata: nam si legamus ut legerunt Septuaginta Interpretes, sensus est clarissimus: si verò legamus, ut nunc est in hebræo, sensus nullus, aut obscurissimus erit. Quid enim est, Principes populorum congregati sunt populus Dei Abraham? hæc enim lectio nunc habetur in textu hebraico. Quod autem sequitur, Quoniam Dij fortes terræ vehementer eleuati sunt; S. Augustinus exponit de superbis hominibus, qui non

conuenerunt cum Deo Abraham, sed reprobifacii sunt ob eorum superbiam. S. Ioannes Chrysostomus exponit de Apostolis, per quos Principes populorum conuersi sunt ad Deum Abraham, ut sensus sit, Principes populorum congregati sunt cum Deo Abraham, quoniam Dij fortes terræ, idest, Apostoli, vehementer eleuati sunt, cum pleni fuerint donis sapientia, & fortitudinis, & miraculorum in tantam eminentiam, ut Principes populorum eis residere non potuerint. Verè enim Apostoli Spiritu sancto repleti tam fortes fuerunt, ut omnia pericula, omnia tormenta, omnem potentiam Diaboli, & omnem mundi sapientiam superauerint. Sed potest etiam satis commodè ad literam intelligi de iisdem Principibus populorum, ut iisdem sint Principes populorum, & Dij fortes terræ, & sensus sit, Principes populorum cum Deo Abraham congregati sunt, quoniam ipsi, qui sunt quasi Dij quidam, & potentes in terra, vehementer eleuati sunt, cum antea essent per idololatriam serui dæmoniorum, & nunc sint facti per fidem filij Dei veri, & viui. In hebræo est alia lectio, Quoniam Dei scuta terræ valde eleuatus est. Et quidem vox, Dei, in græco etiam habetur in genitiuo τοῦ Θεοῦ. ex quo putat aliqui in latino textu legendum esse, Dei; & errore librariorum positum esse, Dij, pro, Dei. Sed cum S. Augustinus, & S. Hieronymus in commentario legant, Dij, & sensus sit longè clarior, credibile est, varias fuisse lectiones græcas; & nostram latinam translatam esse ex græca emendatiore, præsertim cum nulla inueniatur varietas in codicibus latinis manuscriptis, sed in omnibus legatur, Dij. Illud autem, scuta terræ, potest etiam ex hebræo verti protectores, siue Magistratus terræ, ut periti facile intelligunt ex cap. 4. Osee vers. 18. ubi hæc eadem vox, maginne, quam hoc loco S. Hieronymus vertit, scuta, vertitur ab eodem Hieronymo, protectores. Et quoniam protectores siue Magistratus, potestatem habent super alios, non debet mirum videri, si Septuaginta Interpretes, & Interpres latinus potuerint,

oy. oy.

sint, fortes. Itaque Dij fortes terre sunt Principes, qui instar Deorum fortiter protegere debent terram ipsis subiectam. Denique illud, eleuatus est, uerterunt Septuaginta in numero multitudinis, ad sensum potius, quam ad uerbum respicientes. Sensus enim est, Dij fortes terræ eleuatus est, id est, unusquisque eorum eleuatus est, quod clarius uertitur, eleuati sunt. Neque est hoc nouum in lingua hebraica, sed uisitatū, ut Gen. 1. ubi nos habemus, Sint luminaria, in hebræo est, Sit luminaria. & Eccles. 10. ubi legimus, Muscæ morientes perdunt suauitatem unguenti: in hebræo legitur, Muscæ morientes perdit suauitatem unguenti. Et Gen. 49. ubi inuenitur, Filiz discurrerunt super murum, in hebræo inuenitur, Filiz discurret. Sicut etiam è contrario non rarò in hebræo inuenitur nomen singularis numeri, cum uerbo numeri multitudinis; ut Aegzai 2. pro eo quod nos legimus, Et ueniet desideratus cunctis gentibus; in hebræo habetur, Et uenient desiderium gentium: & Iob. 15. ubi nos habemus, Numerus annorum incertus est, legitur in hebræo, Numerus annorum reconditi sunt. Igitur uerba huius postremi uersiculī, quæ iuxta litteram hebraicam nullum sensum

habere videntur, sapientissimè à Septuaginta Interpretibus, & à nostro latino Interprete reddita sunt.



PSALMVS XLVII.

Titulus, & Argumentum.

Psalmus Cantici filijs Core secunda Sabbati.

TITVLVS notus est ex ijs, quæ alibi dicta sunt, exceptis illis uerbis, secunda Sabbati, quæ non habentur in hebræo, sed à Græcis addita sunt. Significatur autem illis uerbis, Psalmum traditum filijs Core, ut eum cantarent secunda Sabbati, id est, secunda die hebdomadæ. Quæ sit autem secunda dies, & cur secunda die canendus esset, inter Auctores non conuenit. S. Ambrosius existimat, secundam Sabbati, esse diem Dominicum, quia est secundus à Sabbato, quod erat principale festum Iudæorum: & quoniam in Euangelijs legimus Christum resurrexisse in prima Sabbati, respondet S. Ambrosius, diem Dominicum apud Iudæos fuisse secundam Sabbati, & idè sic nominari in titulo huius Psalmi, sed propter dominicam resurrectionem, diem Dominicum esse cøpisse primam Sabbati, & idè in Euangelijs uocari primam Sabbati. Sanctus Hieronymus, & S. Augustinus intelligunt hoc loco per secundam Sabbati, diem sequentem post Dominicum, qui est prima Sabbati, non solum in Euangelijs, sed etiam in titulo Psalmi vigesimi tertij: & hæc est uerior sententia: Sabbathum enim apud Iudæos, erat quidem festus & sollemnis dies; at non dicebatur primus, sed ultimus dies hebdomadæ. Quia uerò prima die facta est lux, secunda factum est firmamentum, S. Hieronymus, & Augustinus uolunt, Psalmum præcedentem pertinuisse ad Christum, qui est lux uera; hunc autem pertinere ad Ecclesiam, quæ est firmamentum spirituale, in quo sunt stellæ innumerabiles, id est, homines plurimi sapientiæ, & sanctitatis gloria

ria rutilantes. Argumentum Psalmi est laudatio Dei ob ædificium ciuitatis sanctæ Hierusalem, & quidem Græci, Chrysostomus, Theodoretus, & Euthymius existimant ad literam tractari de reedificatione Hierusalem, post reuersionem à captiuitate babylonica: Latini, Ambrosius, Hieronymus, & Augustinus, per Hierusalem Ecclesiam simpliciter intelligunt, sed fieri potest, ut vtrumque sensum Spiritus sanctus intenderit, sed magis posteriorem: constat enim ciuitatem sanctam Hierusalem, Ecclesiæ Christi gessisse figuram.

Explicatio Psalmi 4.

I. **M**agnus Dominus, & laudabilis nimis, in ciuitate Dei nostri, in monte sancto eius.

Laudaturus Propheta ædificium, incipit à laude architecti; ac dicit, in ædificio sanctæ ciuitatis mirificè splendere artem, & sapientiam Dei, qui illam ædificauit. Magnus, inquit, Dominus, & laudabilis nimis. Magnus Dominus est, siue spectes essentiam eius, siue potentiam, siue sapientiam, siue iustitiā, siue misericordiam; omnia enim infinita, æterna, incomprehensibilia sunt; & inde idem Dominus laudabilis est nimis, ut non sufficiant omnes Angeli, & omnes homines, omnia opera eius satis eum laudare. Sed ex ijs, quæ nobis reuelata sunt, nihil ferè maius habemus, vnde Domini magnitudinem melius cognoscamus, & vnde magis eum laudare possimus, quàm Ecclesiæ Catholicæ ædificationem, & ideo dicit Propheta, Magnus Dominus, & laudabilis nimis in ciuitate Dei nostri, in monte sancto eius, idest, magnitudo Dei, vnde laudandus est valde, conspicitur in Ecclesiæ fundatione, & constructione, quæ est ciuitas Dei nostri, quæ in monte sancto, idest, in excelsa perfectionis posita est. De hac enim dicitur Isaia 2. Erit mons domus Domini præparatus supra verticem montium. & Matth. 5. Dominus ipse vocat Ec-

clesiam suam, ciuitatem supra montem positam. Atque ut huius ædificij miracula breuissima attingamus: primo, cogita incredibilem varietatem gentium, linguis, moribus, ritibus, legibus dissitarum ita conuenisse in vnius fidei, & sacramentorum vnitatem, ut vnum populum, imò vnā familiam efficiant. Secundo, cogita Ecclesiam fundatam fuisse super Petrum, ut Matthæi 16. apertè dicitur, idest, super hominem piscatorem, vilem, indoctum, & pauperem; & tamen ita solidè fundatam, ut portæ inferi aduersus eam præualere non possint: velit enim nolit mundus, in quo Christi Ecclesia peregrinatur; & fremant quantum volunt, & possunt omnes immundi spiritus, & persecutiones moueant omnes Reges terræ; tamen ad terram promissionis secura perueniet, & supra omnes cælos aliquando constituta felicissimè in æternum regnabit. Hæc certè fieri non possunt, nisi à magno Domino, idest, à potentissimo, & sapientissimo architecto, qui propterea laudabilis est nimis, idest, omni laude maior est.

Fundatur exultatione vniuersæ terræ mons Sion, latera Aquilonis, ciuitas Regis magni. II.

Explicat Propheta, cur Deus sit laudabilis valde in Ecclesia, quæ significatur per montem Sion, & ciuitatem Hierusalem: & causam esse dicit, quoniam à Deo fundatur Ecclesia cū exultatione vniuersæ terræ: & non dicit, fundata est, sed fundatur, quoniam semper in varijs locis fundatur Ecclesia, vbi antea non erat. Non enim Ecclesia est vna parua domus, quæ statim fundari potest, sed est ciuitas magna totum orbem terrarum occupans; & varijs temporibus in varijs locis fundatur per Architectos spirituales, qui succedentes Apostolis, Christum, lapidem fundamentalem prædicando iaciunt, ac deinde lapides viuos super ædificant. Porro fundatio ista, fit cum exultatione vniuersæ terræ; quoniam

in

in vniuersa terra fundatur Ecclesia per Euangelij prædicationem, quæ prædictio incredibilem lætitiæ spiritua- lem adfert illam recipientibus: nam ideo comparata est à Domino notitia Regni cælorum thesauro abscondito in agro, quem qui inuenit cum gaudio vendit omnia quæ habet, & emit agrum, in quo thesaurum absconditum esse no- uit, Matt. 13. & in Actis Apostolorum cap. 2. cum fundaretur Ecclesia in Hie- rusalem, dicitur, Sumebant cibum cū exultatione. & cap. 8. prædicante Phi- lippo, & fundante Ecclesiam in Sama- ria, factum est gaudium magnum in illa ciuitate. & Eunuchus Reginae Can- dæ cum audiisset fidem ab eodem Philippo, & baptizatus fuisset, ibat per viam suam gaudens. & cap. 13. cum B. Paulus Gentibus prædicare cæ- pisset, & Ecclesiæ fundamenta iacere, gauisæ sunt gentes, & glorificabant ver- bum Domini. Dicitur autem fundari mons Sion, vt intelligamus hic non agi de monte Sion corporali, ille enim fundatus fuit ab initio mundi, sed de monte spirituali, cuius ille figura erat. Est igitur hoc loco mons Sion Ecclesia Christi, quæ dicitur mons Sion propter eminentiam doctrinæ, & perfectione vitæ, quæ est in Ecclesia. Eadem quo- que Ecclesia dicitur, latera Aquilonis; quoniam sicut mons Sion corporalis situs est in terra promissionis ad par- tem borealem, & est quasi murus qui- dam defendens eam regionem à vento illo frigido, & furiolo, qui dicitur A- quilo: sic etiam Ecclesia Christiana est quasi murus oppositus Aquiloni spiri- tuali, idest, flatibus spirituum immun- dorum: qui enim requiescunt in sinu Ecclesiæ, idest, acquiescunt doctrinæ, quæ docetur in Ecclesia, & obediunt legibus eiusdem Ecclesiæ, non facile læduntur ab Aquilone spirante perni- ciosa dogmata, vel exempla. Denique eadem Ecclesia dicitur Ciuitas Regis magni, quod ad eius nobilitatem ma- xime facit: Ecclesia enim Christiana proprium Regem habet Christum, qui est Princeps Regum terræ, & Rex Re- gum, ac Dominus dominantium. Cæ-

teri enim, qui Ecclesiæ præsumt, Mi- nistri Christi sunt, vt Apostolus loqui- tur 1. Cor. 4. Sic nos existimet homo, vt ministros Christi, & dispensatores mysteriorum Dei. Et ille, qui supre- mam in Ecclesia potestatem habet, Vicarium Christi se dicit, nec solum ser- uum Dei, sed etiam seruorum seruorum Dei ipse se nominat. Quod ad verba attinet, difficultas est solum de voce illa, fundatur: nam sancti Ambrosius, & Augustinus legunt, dilatans. S. Hieronymus vertit ex hebræo, specioso germine. S. Ioan. Chrysostomus le- git, benè radicans. Alij vocem he- braicam significare volunt terminum, aut clima, aut regionem, aut ramum. Sed sancti Ambrosius, & Augustinus videntur legisse in græco textu *ἐπισημαίνω*, quod significat bene dilatans, pro *ἐπισημαίνω*, quod significat benè radicans. Et certè lectio posterior est verior, quia concordat, cum vulgata latina antiquis- sima editione: nam vt Chrysostomus exponit, idem est, radicare, & funda- re. Et idem est, fundatur à Deo mons Sion, & fundat Deus montem Sion: hoc solum interest, quod græca vox ha- bet adiunctum aduerbium, benè, quo caret vox latina. Sed in latina voce subintelligitur, benè, siue pulchrè, vt est in hebræo. Et ex eo quod subiun- gitur, exultatione vniuersæ terræ, fa- cilè colligitur, non solum fundari, sed etiam pulchrè, & benè fundari mon- tem Sion. Ideo enim exultat vniuersa terra, quia videt hoc ædificium tam pulchrè, & tam solidè fundari. Ver- sio S. Hieronymi, fundamentum ha- bet in voce hebraica, *יעפה נופ*, quæ potest reddi, specioso germine, siue pul- chris ramis, & sensus erit, montem Sion ornatum esse pulchris ramis, siue pulchris arboribus, sed vox illa *noph*, quæ tam multa, & tam diuersa signi- ficat secundum opiniones recentio- rum, vt etiam ad regiones, & terminos, & climata referatur, cur non po- terit etiam referri ad fundationem, & radicationem, vt Septuaginta senio- res antiquissimi, & doctissimi censue- runt? Itaque censemus verba hebraica

con-

יעפה נופ

נופ

consentaneè ad versionem Septuaginta Interpretum, & ad expositionem Chrysostomi, Theodoret, & S. Hieronymi in commentario Psalmorum, reddi posse, benè fundatur.

III. Deus in domibus eius cognoscetur, cum suscipiet eam.

Addit secundam rationem, cur magnus sit Dominus, & laudabilis valdè in ciuitate sua Hierusalem: quia non solum benè fundauit eam, sed etiam còtinuo protegit, & exaltat. Deus, inquit, qui fundauit Ecclesiam instar regie ciuitatis, tunc potissimum cognoscetur in domibus eius, id est, tunc cognoscetur ab omnibus habitantibus in domibus eius, siue, tunc cognoscetur habitare in domibus eius, quando in tempore persecutionum suscipiet eam protegendam, atque exaltandam. Pro voce domibus, in hebræo est vox, **אַרְמֻנֹת**, quæ significat non quaslibet domos, sed palatia, basilicas, templa. Itaque hinc intelligimus, Deum habitare potissimum in domibus ipsi Deo sacris, quales sunt basilicæ, ac templa, quæ Deo propriè dedicantur. Pro vocibus autem, cum suscipiet eam, est in hebræo, **לְמִשְׁגָּב**, quod significat, in refugium, siue, in auxilium, siue, in exaltationem. Proinde illud, cum suscipiet eam, explicandum est, cum suscipiet defendendam, & exaltandam, siue, cum susceptor eius erit, id est, auxiliator, & defensor: nam in Psal. 45. ubi legitur, susceptor noster Deus Iacob, pro, susceptor, in hebræo est, **מִשְׁגָּב**, ut hoc loco.

IV. Quoniam ecce Reges terræ congregati sunt: conuenerunt in vnum.

V. Ipsi videntes sic admirati sunt, conturbati sunt, commoti sunt, tremor apprehendit eos.

VI. Ibi dolores vt parturientis, in spiritu vehemente conteres naues Tharsis.

Hos tres versiculos diuerso modo exponunt latini, Ambrosius, Hieronymus, Augustinus; & græci, Chrysostomus, Theodoretus, Euthymius: latini enim Patres exponunt de gentilibus conuersis ad fidem: Græci verò de gentilibus oppugnantibus fidem. Vtraque expositio vera est, & vna cum altera nò pugnat. Itaque iuxta latinos hic erit sensus. Deus cognoscetur esse in Ecclesia ex conuersione gentilium: quoniam ecce Reges terræ, & populi eorum cum eis ex potentia verbi Dei per Apostolos prædicati, & virtute signorum, & prodigiorum per eosdem patratorum conuersi, congregati sunt & conuenerunt in vnum, id est, ex varijs sectis, ac superstitionibus conuenerunt in vnitatem fidei, & congregati sunt in vnam Ecclesiam, quasi in populum vnum, imò vt efficerentur cor vnum, & anima vna, vt dicitur de primis Christianis in Actis Apostolorum cap. 4. Conuersio autem eorum sic fuit, quoniam ipsi videntes signa, & prodigia, sic admirati sunt; & cognoscentes magnitudinem erroris, & peccatorum suorum, dum idola pro Deo colerent, conturbati sunt, & commoti sunt per veram pœnitentiam: vnde etiam tremor apprehendit eos, considerantes periculum æternæ damnationis, in quo tam diu fuerant. Tremor autem non levis, sed grauissimus apprehendit eos, qualis est dolor parturientis, qui tamen in gaudium magnum definit. Cum enim parturiens parit filium, iam non meminit pressuræ propter gaudium, quia natus est homo in mundum: sic & dolor pœnitentis definit in lætitiā inenarrabilem, cum adoptionis gratia, quæ salutis æternæ semen, & pignus est, cordi pœnitentis infunditur: & tunc impletur quod sequitur, In spiritu vehementi còteres naues Tharsis; Spiritus enim sanctus hominem iustificatum inhabitans, & vehementi ardore charitatis inflammans confringit naues Tharsis, per quas superbia, luxuria, & auaritia significatur: naues enim tumentibus velis per fluctuantes vndas in Tharsis properantes aurum, & argentum ad-

adducebant, vt dicitur 3. Reg. cap. 10. & 2. Paralipom. 9. tumor velorum superbiam, fluctuatio nauis luxuriam, aduectio auri, & argēti auaritiā designat. At iuxta expositionem Græcorum sensus est, Deus in Ecclesia cognoscitur ex admirabili victoria Christianæ religionis aduersus impios persecutores. Ecce enim Reges terræ audita fama Christianæ religionis, congregati sunt, conuenerunt in vnum, idest, ex varijs locis, & ex varijs superstitionibus conuenerunt aduersus Christi Ecclesiam, vt eam persecutionibus suis opprimerent, & extinguerent. Sed videntes fortitudinem Sanctorum Martyrum, & mirabilem constantiam, in sexu etiam fragili, & in ætate tenera; necnon signa, & prodigia, quæ per eos Deus faciebat, & quod numerus Christianorum persecutionibus, & mortibus augebatur; admirati sunt, conturbati sunt, commoti sunt, partim indignatione, partim dolore: & tremor apprehendit eos, sicut dolor parturientis, cum viderent templa idolorum deferri, & Christi Regnum ipsis inuitis, & totis viribus repugnantibus crescere. Hoc autem accidit, quia Dominus in spiritu vehemēti, cum admirabili manifestatione potētiae suæ contriuit idolatriam, quomodo solet tempestas venti breuissimo tempore dissipare, & cōterere naues in mari. Quod attinet ad verba, vox illa, terræ, cum dicitur, Reges terræ, non habetur in hebraico codice, sed Septuaginta Interpretes explicandi gratia addiderunt. Illa autem particula, sic, iungenda est cū verbo sequenti, non cum præcedenti: est enim sensus, ipsi videntes, sic admirati sunt, idest, viderunt, & sic admirati sunt. Vox illa, cōmoti sunt, ex hebræo à sancto Hieronymo vertitur, admirati sunt. Sed vox hebræa chaphaz, significat quidem admirari, sed significat etiam commoueri. Et quoniam iam dictum erat, admirati sunt, conturbati sunt, rectè Septuaginta verterunt verbum sequens, commoti sunt; tum ne idem bis repeteretur, tum quia hic est ordo naturalis, vt inopinato malo ad-

ueniente primū oriatur in nobis admiratio, deinde turbatio, postremo commotio, siue fuga. Cum dicitur, in spiritu vehemēti conteres naues Tharsis, subintelligitur, quia, vel alia similis particula: redditur enim ratio, cur ibi fuerint dolores, vt parturientis. Potest autem duobus modis intelligi cōtritio nauium: primum, vt subintelligatur particula similitudinis hoc modo, In spiritu vehemēti conteres eos, quo modo ventus validus confringit naues: secundò, vt sensus sit, in spiritu vehemēti cōteres naues Tharsis, idest, non solum terrestres copias, sed etiam classes instructas aduersariorum dissipabis. Sicut enim impij terra, marique Ecclesiam oppugnant, sic etiam Deus terra, marique pro Ecclesia pugnabit. De voce Tharsis, quam græci, & latinus Interpres relinquerunt, vt in hebraico textu inuenerant; magna questio est, alijs volentibus significare Ciliciam, alijs Carthaginem, alijs Indiā, alijs ipsum mare. Sed hoc postremum improbabile est, quoniam Ionas ascendit nauē, vt iret in Tharsis, vt legimus Ion. 1. Si autem Tharsis mare significaret, iam fuisset Ionas in Tharsis, quando erat in naui, quorsum igitur nauigabat, vt iret in Tharsis? ex alijs significationibus, illa videtur verior, quæ pro Tharsis India designatur, cum ex Tharsis adferret Salomoni tertio quoque anno magna copia auri, & argenti, & eboris, vt dicitur 3. Reg. cap. 10. & 2. Paralip. 9. At qui ex Cilicia, vel Carthagine non adducuntur eiusmodi metalla, neque est opus triennio, vt ex Hierusalem nauigetur in Ciliciam, vel Carthaginem. Sed hoc loco dicuntur naues Tharsis naues magnæ, quales esse solebant eæ, quibus nauigabatur in Tharsis, idest, in Indiā.

Sicut audiuius, sic vidimus VII. in ciuitate Domini virtutum, in ciuitate Dei nostri: Deus fundauit eam in æternum.

Verba sunt filiorum Ecclesiæ, qui lætantur se experimento iam discere de Eccle-

iudicia tua Domine, videntes scilicet iustitiam, quam exercuisti in protegendis fidelibus, & perdendis infidelibus: Fortasse etiam per montem Sion intelliguntur perfecti, & fortes; per filias Iudæ, imperfecti, & debiles. Vel, per montem Sion, intelligitur arx, & caput Religionis, qualis erat Hierusalem apud Iudæos; per filias Iudæ, intelliguntur reliqua membra Ecclesiæ, qualia erant oppida subiecta Hierosolymæ: scpe enim in scripturis, ac præsertim in libro Iosue, per filias, intelliguntur castella, siue oppida subiecta maioribus ciuitatibus.

XI. Circumdate Sion, & complectimini eam, narrate in turribus eius.

XII. Ponite corda vestra in virtute eius, & distribuite domus eius, vt enarretis in progenie altera.

Hortatur in fine Psalmi ad ædificationem, & munitionem sanctæ ciuitatis, de qua dixerat, Fundatur exultatione vniuersæ terræ mons Sion ciuitas Regis magni. Hæc enim ciuitas non est similis materiali ciuitati, quæ semel fundatur, & ædificatur, sed vsque ad finem mundi fundanda, & ædificanda, & munienda est, ex lapidibus viuis, qui quotidie inferendi sunt, donec ciuitas perfecta in die nouissimo dedicetur. Sic enim Apostolus loquitur ad Ephes. 2. In quo & vos coædificamini in habitaculum Dei in spiritu sancto. & cap. 4. Et ipse dedit quosdam quidem Apostolos, quosdam autem Prophetas, alios verò Euangelistas, alios autem Pastores, & Doctores ad consumationem Sanctorum in opus ministerij, in ædificationem corporis Christi. Et S. Petrus in epist. 1. cap. 2. Ad quem accedentes lapidem viuum, ab hominibus quidem reprobatum, à Deo autem electum, & honorificatum, & ipsi tamquam lapides viuui superædificamini domus spirituales. Ait igitur, Circumdate Sion, & complectimini eam, idest,

muris cingite sanctam ciuitatem, vbi fortè desunt. Dicuntur autem muri ciuitatis viri perfecti, qui reliquum populum defendunt ab inimicis. Narrate in turribus eius, idest, ex edito loco publice prædicate: nam (vt supra diximus) prædicatio Euangelij est instrumentum, quo ciuitas fundatur, & ædificatur. Ponite corda vestra in virtute eius, idest, seriò cogitate de munitione, & robore ciuitatis, ne pateat hostium incurfibus: & distribuite domos eius, idest, post fundata, & ædificata mœnia, fundentur, & ædificentur domus: & quoniam ad hoc opus multi requiruntur, distribuite varijs operarijs partes suas, vt domos ædificent, & sic ciuitas paulatim repleatur, & crescat: & sic fiet, vt enarretis in progenie altera, idest, vt per vos multiplicato populo Dei, ad posteros transmittatis notitiam Dei.

XIII. Quoniam hic est Deus, Deus noster in æternum, & in sæculum sæculi, ipse reget nos in secula.

Hoc est quod narrandum est posteris, quod videlicet, hic Deus, qui fecit mirabilia in ciuitate sancta Hierusalem, ipse est Deus noster in æternum, nec vnquam recedemus ab eo, nec ipse recedet à nobis; nos erimus in æternum populus eius, & ipse Deus noster erit in æternum, & reget nos in secula. S. Hieronymus vertit ex hebræo vltima verba, Ipse reget nos in morte. Sed facile est videre, vnde orta sit varietas lectionis; nam vox hebraica si legatur, holamoth, significat sæcula, & sic legerunt Septuaginta Interpretes; si legatur cum alijs punctis, halmuth, significat ad mortem, & sic legit S. Hieronymus, & legunt hodie Rabini. Vterque autem sensus verus est, & in idem recidit: nam si Deus regat nos vsque ad mortem, reget sine dubio in sæcula: non enim post mortem ab illo excidere poterimus. Qui exponunt hunc Psalmum de terrena Hierusalem, valde laborant in explicatione vndecimi,

&

עלמות
עלמות

ex alio duplici capite, ex dignitate materiæ, & ex dignitate docētis. Dignitas materiæ ostenditur ex eo quod sermo futurus est de sapientia, & prudentia, & sermo non simplex, sed parabolicus, & ænigmaticus, qualem decet esse sermonem de rebus grauissimis, ut non contemnatur, neque intelligatur, nisi a diligentibus, & attentis auditoribus. Os meum, inquit, loquetur sapientiam, id est, docebit ea, quæ faciunt hominem sapientem: & meditatio cordis mei, prudentiam, id est, & meditatio cordis mei, quæ per os foras erumpit, docebit ea, quæ faciunt homines prudentes; declarat enim priorem versiculi partem per posteriorem: cum enim dixisset, Os meum loquetur, ne putaremus eum temerè loquuturum quicquid in bucam venerit, addit, & meditatio cordis mei, supple, loquetur, id est, os meum pariet quod cor meum diuturna meditatione conceperit. Et quia dixerat se loquuturum sapientiam; ne quis existimaret, sermonem futurum de rebus speculatiuis, & ad actiones humanas parum pertinentibus, addidit, prudentiam. Itaque significat sermonem habendum de rebus, quæ sapientiam simul & prudentiam contineant, quæque faciant hominem sapientem in altissimis causis contemplandis, & prudentem in vita rectissime instituenda. Attingit deinde magnitudinem Doctōris cum addit, Inclinabo in parabolam autem meam, aperiā in psalterio propositionem meam; quasi dicat, nō ego loquuturus sum, quæ mox audietis, sed spiritus Domini per me loquetur: ego enim attentè primum audio internum Doctorem meum, deinde quæ audiui loquor. Inclinabo in parabolam aurem meam, id est, subijciam aurem meam spiritui loquenti, & obediēter audiam; & sic aperiā in psalterio propositionem meam, mihi videlicet a Deo inspiratam, & communicatam. Per parabolam, hoc loco intelligitur ænigma, id est, propositio obscura, quæ attentionem, & studium requirit ut intelligatur. Id patet ex verbis hebraicis, quæ significant prouerbiū, & ænigma: & similia habentur Iudic. 14. vbi Sam-

Bellarm. in Psalm.

pson proposuit explicandam illam sententiam, De comedente exiuit cibus, & de forti egressa est dulcedo; quam sententiam vocat problema, & propositionem: & habentur eo loco eadem verba hebraica, quæ hic habentur. Quod autē additur, in psalterio, siue in cithara; ut propriè sonat vox hebraica, pertinet etiam ad præparationem auditorum: significat enim David se propositurum doctrinam suam grauissimam cum cantu, & sono, ut suauitas musicæ temperet grauitatem doctrinæ, & præcepta utilissima iucundiùs, & auidius suscipiantur.

Cur timebo in die mala? iniquitas calcanei mei circumdabit me.

Hoc est prouerbiū, siue ænigma, quod præmissa tam accurata præfatione toti humano generi Propheta proponit, & soluit. Sed solutio non minus est obscura, quàm propositio, ut tam propositio, quàm solutio ænigmatica dici possit. Sed tamen ænigmata sunt hæc verba hominibus huius seculi amore præoccupatis: nam viris spiritualibus, & veris Dei seruis apertissima sunt. Ait igitur, Cur timebo in die mala? quasi dicat, propono vobis omnibus, qui habitatis orbem terrarum, hanc quæstionem soluendam. Quid est, quod me terere poterit in die mala, id est, in die iudicii diuini, quæ dicitur, Sophoniæ 1. dies iræ, dies tribulationis, & angustiarum, dies calamitatis, & miseriæ, dies tenebrarum, & caliginis, dies nebulæ, & turbinis, dies tubæ & clangoris? Siue (quod est idem.) Quid me securum reddere poterit in die illius iudicii, a quo summa bonorum omnium, & malorum meorum dependet? Magnū profectò problema, & quod omnes omnino contingit. Soluit autem Propheta suum ænigma cum dicit, Iniquitas calcanei mei circumdabit me, id est, quod me timere faciet in die illa mala, nō est paupertas, quia Iudex non corrumpitur donis; non est humilitas generis, aut status, quia Iudex non respicit personas;

T non

non est malitia testium, aut Aduocatorum, quia Iudex omnia nouit; non est potentia aduersariorum, quia Iudex ne minei timet; denique nihil est aliud, nisi iniquitas; & non quæuis iniquitas, sed sola iniquitas calcanei mei, id est, iniquitas extremæ vitæ meæ, iniquitas perseverans vsque ad finem vitæ: illa enim si inueniatur in illa die in me, omnino circumdabit me instar aggeris, aut muri, vt nullo modo euadere possim; quia tunc non erit amplius locus pœnitentiæ, vel indulgentiæ. Et contra, quod me securum, & impavidum in die mala facere poterit, non erunt diuitiæ, aut nobilitas, aut Aduocatorum diligentia, vel amicorum potentia, sed sola iustitia; & non quæuis iustitia, sed iustitia calcanei mei, id est, extremæ vitæ meæ; siue innocentia perseverauerit mecum vsque ad mortem, siue per veram pœnitentiam iniquitate deleta, in eius locum successerit verâ iustitia. Scio multis alijs modis hos versiculos ab alijs exponi: sed ego breuitati studeo; & de varijs sententijs Lectori iudicium relinquo.

VI. Qui confidunt in virtute sua, & in multitudine diuitiarum suarum gloriantur.

Posteaquam dixerat Propheta, nihil esse timendum, nisi peccatum, vt quis in die mala securus sit: addit nunc multos esse, qui hoc non intelligentes, confidunt in viribus suis, ac per hoc gloriantur in diuitijs, quas magno studio parauerunt, existimantes hac ratione, se tutissimos fore in qualibet mala die; & simul demonstrat illos omnino falli, & problema suum, eiusque solutionem esse verissimum. Ait igitur, Qui confidunt in virtute sua, id est, qui non timeant diem malam, freti potentia, & viribus suis, vt sunt plurimi ex filiis huius seculi, illi etiam consequenter gloriantur in multitudine diuitiarum suarum: existimant enim pecunijs omnia vinci, & expugnari posse. Et verè in hoc seculo magna vis est in opibus, &

diuitijs, vt verè dixerit Sapiens, Pecuniæ obediunt omnia, Ecclesiast. 10. Sed in die mala nullæ amplius inueniuntur pecuniæ, neque si inuenirentur prodesse possent. Ideò subiungit Propheta.

Frater non redimit, redimet VII. homo non dabit Deo placationem suam.

Ostendit vanam esse fiduciam confidentium in pecunijs. Ait enim, frater non redimit, id est, nemo poterit quamlibet magnis diuitijs in die mala redimere fratrem suum. Redimet homo? hoc legendum est cum interrogatione, vt monet sanctus Basilii, frater non redimit, redimet homo? vel repetenda est negatio de more Scripturæ sanctæ. Frater non redimit, non redimet homo. Est enim sensus, frater non redimit, multo minus alius homo redimet. Non dabit Deo placationem suam, id est, neque alium, neque seipse liberare poterit; quamuis enim pecunijs maxime abundet, & eas omnes offerat ad placandum Deum in die mala, nihil ei proderit. Nam vt Dominus in Euangelio loquitur, Quam dabit homo commutationem pro anima sua? superat enim precium animæ humanæ omnia bona huius mundi, & ideò solus sanguis vnigeniti Dei, qui infiniti valoris erat, precium animarum esse poterit. Itaque qui hoc magno precio neglecto in diabolica captiuitate detentus perueniet ad diem malam, non dabit Deo placationem suam.

Et precium redemptionis animæ suæ, & laborabit in æternum, & viuet adhuc in finem. VIII.

Declarat quod dixerat, Non dabit Deo placationem suam: placatio enim Dei est precium redemptionis, quod solus vnigenitus Dei dare potuit: de quo intelligit S. Basilii verba sequentia, Laborabit in seculum, & viuet adhuc in finem,

finem, id est, laborabit in hoc mundo ad tempus, & viuet postea in æternū. Sanctus autem Ambrosius, & Chrysostomus exponunt hæc eadem verba de viro pio, & sapiēte quocumque, quem opponunt viro stulto, & impio confidente in multitudine diuitiarum suarum: Vir enim pius, & sapiens laborat ad tempus in seruandis præceptis, sed viuet in æternum. Sanctus verò Augustinus exponit de illo eodem, de quò dictum est paulò ante, non dabit Deo placationem suā; & vult hunc sensum esse: ille, qui confidit in multitudine diuitiarum suarum, laborabit in æternum, quia labore eius non habebit finem, & viuet modico tēpore quia vita eius erit vsque in finem, & non vltra. Et videtur secundum hanc expositionem melius continuari textus Prophetæ, & magis propriè exponuntur verba, in seculum, & in finem: nam laborare in seculum, non est laborare in hoc mundo, vel laborare modico tempore, sed est laborare in æternum: & viuere in finem, non est viuere sine fine, sed est viuere vsque ad finem statutum, & definitum; ita vt finis naturalis vitæ non præueniatur, neque extendatur. Verba hebraica, pro, laborabit in seculum, videntur habere, quiescet in seculum: nam chadal, quiescere significat. Sed non est verisimile, Septuaginta Interpretes reddidisse omnino contrariū sensum, ideò suspicor illos legisse, charal: nam literæ ח, & כ, simillimæ sunt. Verbum autem charal, significat, angustari, & cruciari, & quasi vrticis pungi: quod satis propriè cōuenit amatoribus diuitiarum, quas Dominus in Euangelio Matt. 13. spinis comparauit. Itaque qui in diuitijs suis confidunt, non solum nō dabunt precium redemptionis animæ suæ, sed laborabunt in tormentis cum diuite Epulone vsq; in æternum; & viuent vitam voluptariam, quæ illis sola videtur esse vita, vsq; in finem a Deo constitutum. De varia interpunctione textus hebraici non laboro; quoniam illa posita est ad arbitrium Rabinorum quibus iniuriam non facimus, cū eis Septuaginta Interpretes antiquiores, & doctiores anteponimus.

Non videbit interitum, cum viderit sapientes morientes: simul insipiens & stultus peribunt.

Quia dixerat, impium victurum vsq; in finem, cursu videlicet naturali: addit confirmans hoc ipsum, Non videbit interitum, cū viderit sapientes morientes, id est, continuabit cursum vitæ suæ vsque ad vltimam senectutem, etiam si videat aliquos sapientes, & iustos rapi ante tempus, & non continuare cursum vitæ vsque in finem naturalem; sæpè enim Deus ijs, quibus daturus non est vitam æternam, dat vitam temporalem diuturnam, quomodo Lazarus in Euangelio mortuus legitur ante Epulonem. Sed quamuis vita hæc temporalis aliquando impijs satis longa contingat: tandem tamen finitur, & fit quod sequitur in Psalmo, simul insipiens, & stultus peribunt. Itaque sensus totius versiculi est, Non videbit interitum, id est, non morietur stultus, confidens in diuitijs ante tempus, cū viderit aliquos sapientes ante tempus morientes: tandem tamen simul cum sapientibus etiam stultus, & insipiens ad vitæ tēporalis finem peruenient. S. Augustinus paulò aliter exponit illud, non videbit interitum: vult enim sensum esse, non intelliget, quis sit verus interitus: non enim verus interitus est mors corporis, sed mors animæ. Posset etiam dici, non videbit interitum, id est, non cogitabit se quoque moriturum, quando sapiētes viderit morientes: quæ sententia verissima est; hæc enim cæcitas humana, vt cū quotidie videamus morientes homines, nobis etiam meliores, & iuniores; tamen vix adduci possimus, vt seriò cogitemus, nos quoque morituros esse: tamen ad literam in scripturis sanctis, non videre interitum, est; non corrumpi, Psalm. 15. Non dabis sanctum tuum videre corruptionem. & Ioan. 8. Si quis sermonem meum seruauerit, mortem non videbit in æternum. Quid autem intersit inter stultum, & insipientem, docet S. Basilii: dicit enim insipientem

esse, qui ad humana, & cōmuni inceptus est, qui videlicet, humana sapientia, siue prudentia caret: stultum autem vocari eum, qui caret notitia rerum diuinarū, & solis terrenis intentus est: & videtur S. Basilii non tam ad græcas, quàm ad hebraicas voces respexisse. Verè enim **כסיל**, vox hebraica, significat eum, qui sapientia etiā humana caret: vox autē, **בקר**, significat hominem pecori similē: pecora enim sola terrena cogitant: unde etiam paulo post dicit Psalmus, Homo cum in honore esset non intellexit, comparatus est iumentis insipientibus.

X. Et relinquent alienis diuitias suas, & sepulchra eorum domus illorum in æternum.

Confidentes in diuitijs stultos, & insipientibus vocauerat sanctus Propheta, quomodo vocat etiam Dominus in Euāgelio, Luc. 12. cū dicit cuidam diuiti, Stulte hac nocte repetent a te animam tuam, & quæ parasti cuius erunt? Ideo probat eos verè stultos esse, ex eo quod diuitijs uti nesciunt, easque relinquunt ijs, quos ignorant. Peribunt, inquit, insipientes, & stulti, quales sunt confidentes in diuitijs, & ut stultitiam suam manifestè prodant, relinquent alienis diuitias suas. Vbi rectè notat S. Augustinus, per alienos, intelligi posse etiam filios, & nepotes hominum impiorum: nam etiam isti, tamquam alieni cito obliuiscuntur eorum, quorum opes obtinuerunt: & quamuis etiam non obliuisceretur, tamen mortuos impios iuuare non possent: quomodo diues ille de Euangelio quinque fratres habebat in seculo, & tamen ab eis iuuari non poterat, quominus arderet in gehenna, Luc. 16. Proinde quinque illi fratres inter extraneos deputabantur: vnus autem Lazarus, qui eum iuuare potuisset, verè proximus, & non extraneus fuisset, si misericordiam in illum facere voluisset. Adiungit Propheta, Et sepulchra eorum domus illorum in æternum, id est, ipsi quidem morientes reliquerunt alienis diuitias suas, sibi autem nihil retinuerunt,

nisi angustissimam domum, id est, sepulchrum, in quo iacere debent in æternū, id est, ad finem vsque seculi: sæpè enim, æternum, in Scripturis, significat integram durationem alicuius temporis, vel status: & declaratur hæc phrasis in verbis sequentibus, Tabernacula eorum in progenie, & progenie. Quod enim vocauerat sepulchrum, & domum æternam, id ipsum nunc vocat tabernaculum in progenie, & progenie, id est, habitaculum, vbi manebunt corpora eorum, donec generationes, & generationes peragentur: quod sine dubio erit vsque ad mundi cōsummationem. In hebræo non habetur sepulchra, sed interiora: ceterum credibile est Septuaginta Interpretes non legisse Kirbam, ut modo legitur, & significat interiora eorum; sed literis transpositis Kibram; & significat sepulchra eorum.

Tabernacula eorum in progenie, & progenie, vocauerunt nomina sua in terris suis. XI.

De priorē parte versiculi dictum est in explicatione versiculi superioris. Quod autē additur, significat, post mortem hominum insipientium, nihil superesse in terris, præter nomina ipsorum: multis enim modis conantur mortales, qui hanc solam vitam nouerunt, nomina sua æternitati cōmendare: vel enim nomina sua inscribunt parietibus, vel ea ciuitatibus indunt; vel in libris a se scriptis apponūt; vel denique filios, aut nepotes ad memoriam perpetuandā nomina sua gerere curant. Ita filij huius seculi nomina sua scribunt in terris, quoniā scripta esse non sperant in cœlis.

Et homo cū in honore esset nō XII. intellexit: comparatus est iumentis insipientibus, & similis factus est illis.

Occasione insipientis, atque in diuitijs confidentis, digreditur Propheta ad ipsum genus humanum coarguendum, quasi

קרבם
קרבם

quasi dicat, Et sic homo cum in honore esset non intellexit, id est, homo præter cætera animalia honoratus a Deo intelligentia, & ratione, libero arbitrio, imagine diuinitatis, immortalitate animæ, imperio super omnia, quæ in terris sūt, non intellexit hūc honorem suum: sed

comparatus est iumentis insipientibus, quibus non est intellectus. Et similis factus est illis, dum more pecudum, non prospicit in futurum, sed præsentibus solum inhæret; & subiicit se corporalibus passionibus, quibus imperare debuerat: ac denique vera, & sempiterna bona contemnit, ut falsis, & caducibus fruatur; cum è contrario temporalia omnia despiciere debuisset, ut sempiternam vitam sibi compararet. In hebræo codice non habetur, intellexit, sed, ialin, commorabitur: cæterum Septuaginta Interpretes non legerunt, ialin, sed iauin, quod est intellexit. Facile autem fuit progressu temporis vnam literam in alteram mutari.

יִלִּין

יִלִּין

XIII. Hæc via illorum scandalum ipsi, & postea in ore suo complacent.

Pergit explicare, vel deplorare miseriam generis humani. Hæc via, inquit, illorum scandalum ipsi, id est, hæc vita, quam ducunt similem vitæ brutorum, siue, hæc via, quam sequuntur dum viuunt more bestiarum, hæc lex, hi mores, hoc institutum, scandalum est ipsi, id est, offendicula multa illis præbent, & ruinæ magnæ causa sunt illis, qui tamen postea in ore suo complacent, id est, placebunt ipsi sibi in sceleribus, & gloriabuntur, cum malè fecerint; quod ad summam miseriam, & calamitatem pertinet. In hebræo non est, scandalum, sed, insipientia: sed facile est videre, unde nata sit discrepantia; siquidem Septuaginta Interpretes in suis codicibus hebraicis non habuerunt, chesel, quod insipientiam significat, sed, chesel, quod significat scandalum. Veteriores autem fuisse codices, quos habuerunt Septuaginta, ijs, quos posteriores habuerunt, non credimus posse negari.

כֶּסֶל

כֶּסֶל

Sicut oues in inferno positi XIV. sunt, mors depascet eos.

Quoniam dixit, homines factos esse per peccatum similes bestiis insipientibus, addit finem illorum fore, ut more ouium insipientium macentur: vbi demonstratur tum multitudo, tum imbecillitas hominum, qui post mortem ad inferos detruduntur: oues enim gregatim coniiciuntur in stabula, & sine vlla resistentia ducuntur ad macellum. Itaque minori labore Deus multitudinem impiorum, quamuis in mundo ditissimi, & potentissimi fuerint, detrudet in infernum ad mortem sempiternam, quam soleat pastor ouiculas simplices, & inermes vel trudere in stabulum, vel educere ad eandem. Quod autem dicitur, mors depascet eos, duplicem sensum habere potest; vnum, ut significetur, mortem instar pastoris futuram, & homines instar ouium ductarum ad pascua squalida, & arentia, vbi nihil inueniat præter gemitus, & dolores: alterum, ut significetur, mortem instar lupi famelici, depasturam, & consumpturam homines impios instar ouium destinatarum ad escam. Prior sensus conuenit voci græcæ τροφή, posterior voci latinæ, depascet: vtrumque autem optimè recipit vox hebraica, raha, sed in re nulla videtur esse discrepantia. Hæc enim tandem recidit vterque sensus, ut significetur mors impiorum nunquam finienda.

רָעָה

Et dominabuntur eorum iusti XV. in matutino, & auxilium eorum veterascet in inferno a gloria eorum.

Pergit narrare miseriam impiorum ad inferos descendentium, ac dicit eos in matutino, id est, in principio noui, ac futuri seculi, quod incipiet in resurrectione vniuersali, futuros omnino iustis subiectos: iusti enim in die nouissimo, qui etiam erit principium futuri seculi, iudices erunt impiorum, eisque in æternum dominabuntur; & nihil erit, quod impios eo die aduersus iustos inua-

re possit: omne enim auxilium eorum, quod in robore, & potestate situmerat, veterascet, ac marcescet, atque inutile fiet in inferno, a gloria eorum, id est, post gloriam eorum, quam in hoc mundo habuerunt, dum gloriosa palatia inhabitarent. Illud, in matutino, demonstrat tempus huius seculi totum esse noctem quandam. Vnde dicit Apostolus, Rom. 13. Nox præcessit, dies autem appropinquavit. In nocte huius seculi videtur sæpè iniustitia prævalere, sed in matutino apparebit, ubi sint iusti, & ubi sint iniusti. In hebræo secunda pars versiculi longè aliter haberi videtur: sic enim vertit Sanctus Hieronymus. Et figura eorum conteretur in inferno post habitaculum suum: aliud est enim auxilium, aliud figura, & aliud, gloria, aliud habitaculum. Sed de prima voce non est magna difficultas: vox enim hebraica, **צור**, quamvis figuram significare possit a verbo, **יָצַר**, quod est formare: tamen propriè, **צור**, quæ vox hoc loco habetur, significat, petram, & metaphoricè robur ac potentiam. Itaque rectè Septuaginta Interpretes verterunt auxilium, quod in viribus, & potentia consistit. Altera vox, quæ hebraicè dicitur, **זבול**, videtur propriè significare, habitaculum, non quodcunque, sed gloriosum, quale est cælum: habetur enim hæc vox in duobus tantum locis. Isaia 63. vers. 15. Aspice de cælo de habitaculo sancto tuo, & gloriæ tuæ. Et Habach. 3. vers. 11. Sol, & Luna steterunt in habitaculo suo. Hoc igitur locus sanctus Propheta opponit infernum, habitaculum videlicet obscurissimum, & vilissimum, domibus gloriosis, & splendidis, quas in hoc mundo impij possidebunt. Septuaginta verò Interpretes verterunt a gloria ipsorum, volentes per gloriam significare gloriosas domos, quas impij cum inferno commutant: hic igitur totius versiculi sensus erit. Et dominabuntur eorum, impij videlicet in inferno positorum, iusti in matutino, id est, cum illucescet dies resurrectionis, atque initium seculi futuri. Et auxilium eorum, id est, robur, & potentia impij veterascet, id est, conteretur, &

inutile erit, instar vestis consumptæ, & laceræ. In Inferno a gloria eorum, id est, quando post gloriam splendorum habitaculorum, infernum teterrimum, & vilissimum habitaculum etiam corporaliter habere incipient.

Veruntamen Deus redimet a. XVI.
animam meā de manu inferi, cum acceperit me.

Addit nunc, quæ sit futura sors piorū, in quorum numero seipse ponit: quasi dicat, impij quidem accidet id quod dixi: verū mihi, meisque similibus contrarium eveniet. Deus enim redimet animam meam de manu inferi, id est, liberabit me, ne ab inferno detinear; quando veniens assumet me. Videtur hoc loco prædicere redemptionem, quæ est in Christo Iesu, & descensum eiusdē Christi ad inferos: tunc enim persoluto precio sanguinis redemit de manu inferi animas iustorum; cum descendens ad inferos accepit eas, & ad se assumpsit. Sic veteres Patres Basilii, Augustini, Ambrosii, Hieronymus, & Enthyimius. Potest tamen cum Chrysostomo hic locus intelligi de inferno inferiore, ubi torquentur animæ impiorum, ut sensus sit, Deus redimet animam meam de manu inferi, id est, non patietur Deus animam meam rapi a manu inferi, nec deduci ad loca pœnarum, cum de hoc mundo per corporis mortem accipiet me.

Ne timueris cum dives factus XVII.
fuerit homo, & cum multiplicata fuerit gloria domus eius.

Quoniam cum interierit non XVIII.
sumet omnia, neque descendet cum eo gloria eius.

Ex dictis concludit per modum exhortationis, non esse timendam potentiam divitum huius mundi, quoniam brevissima est: alloquitur autem iustos pauperes, atque a divitibus huius mundi oppressos. Ne timueris, inquit, cum
dives

diues factus fuerit homo, id est, ne formides potentiam eius, ne ob timorem temporalis potentiae fortè offendas aeternam omnipotentiam Creatoris: neque etiam timeas, si fortè videris, non solum hominem inimicum tuum diuitem esse factum, sed etiam multiplicatam gloriam domus eius. Quoniam cum interierit, per mortem videlicet, quam nemo effugere potest, & quæ diuitibus, & pauperibus communis est, non sumet omnia, id est, nihil sumet, nihil secum asportabit eorum, quæ in hoc mundo possidebat: neque descendet cum eo gloria eius, id est, non comitabuntur eum ad inferos descendentem propinqui, vel famuli, & multò minus honores & dignitates. Itaque diuitiæ, & gloria impiorum ad breuissimum tempus durant; paupertas, & confusio sempiterna sunt. Contra verò paupertas, & confusio piorum momentanea sunt; opes, & gloria manet in seculum seculi: quod Apostolus pulchrè expressit, cum ait 2. Corinth. 6. Quasi tristes, semper autem gaudentes. Tristitia enim piorum non est tristitia, sed quasi tristitia: qualis est ea, quam somniantes aliquando patimur: lætitia verò non quasi lætitia, sed vera, solidaque lætitia est, nunc quidem in spe, postea verò in re: & contra, lætitia impiorum de carnali voluptate, vel gloria, non est lætitia, sed quasi lætitia, quali fruuntur dormientes, dum se possidere quæ diligunt, somniant. Tristitia autem in gehenna non erit quasi tristitia, sed verissima, certissima, ac sempiterna tristitia.

est, anima impij, siue ipse impius in hac solum vita benedicetur tum a Deo per beneficiorum temporalium collationem, tum ab hominibus per laudationes, siue potius adulationes. Confitebitur tibi, id est, & ipse vicissim confitebitur tibi, hoc est laudabit te, tibi que gratias aget cum benefeceris ei: sin autem aliquid mali illi euenire permiseris, continuo blasphemabit te: non enim ex illis est, qui dicunt, Benedicam Dominum in omni tempore, semper laus eius in ore meo: vel, Dominus dedit, Dominus abstulit, sit nomen Domini benedictum. In hebræo habetur actiue, benedicet, pro quo habemus in græco, & latino, benedicetur: sed idem est sensus. Sic enim legi debent verba hebraica: Quia animam eius in vita ipsius benedicet: ex quo intelligimus, illud, benedicet, referri ad Deum, ac per hoc etiam, illud, benedicetur anima eius, referri debet ad Deum, ut nos supra exposuimus. Idem autem sensus est, siue legas, anima eius benedicetur a Deo in vita ipsius, siue, animam eius benedicet Deus in vita ipsius. Quod autem sequitur, confitebitur tibi, cum benefeceris ei, in hebræo legitur, cum benefeceris tibi: sed ex literarum similitudine corruptus videtur textus hebraicus: nam Septuaginta Interpretes non legerunt, lac, quod est tibi, sed, lô, quod est ei, & hoc modo posteriore legitur in omnibus codicibus græcis, & latinis, & est sensus multò facilior, & clarior.

XIX. Quia anima eius in vita ipsius benedicetur: confitebitur tibi cum benefeceris ei.

Reddit rationem, cur gloria impiorum non comitetur eos ad inferos. Quoniam, inquit, sicut ipsi Deum laudare consueverunt, quando eis beneficia temporalia tribuit: ita Deus in hac solum vita eis benedicere solet. Anima eius in vita ipsius benedicetur, id

Introibit usque in progenies **XX.**
Patrum suorum: & usque in aeternum non videbit lumen.

Impius in hac vita in luce bonorum, & gloriæ viuit, Deo illum beneficijs temporalibus replente, ut vel remuneret aliqua bona opera eius, vel alliciat ad rescipiscentiam, & conuersionem. Sed in alia vita apponitur (ut Scriptura loquitur) ad patres suos, ut eos sequatur in supplicijs, quos sequutus est in flagitijs.

gitijs. Introibit; impius videlicet, post hanc vitam, vsque in progenies Patrum suorum, id est, introibit ad ea loca, ad quæ illum præcessit progenies Patrum suorum, & vsque in æternum non videbit lumen, quia iusto iudicio manebit in æternis tenebris, qui nimirum delectatus est luce honorum, & gloriæ temporalis, & lucem gloriæ cælestis non quæsiuit.

XXI. Homo cum in honore esset nō intellexit: comparatus est iumentis insipientibus, & similis factus est illis.

Repetit Propheta versiculum duodecimum, tum vt ostendat præcipuam causam miseræ hominum esse insipientiam; & meritò homines plurimos in æternum lumine carituros, atque in tenebris futuros, quia lumine rationis vt non voluerunt: tum etiam, vt non miremur si pauci omnino ænigma propositū in hoc Psalmo intelligant. Id enim accidit, quia homo propter peccatum comparatus est iumentis insipientibus, & similis factus est illis.

PSALMVS XLIX.

Titulus, & Argumentum.

Psalms Asaph.

IN priore libro Paralip. capit. 16. legimus, Asaph fuisse Principem cantorū a Dauide constitutum. Vtrum autem ipse Psalmos composuerit, qui inscribuntur nomine eius, an solū cecinerit, vel canenti præfuerit, non est omnino certum, vt in præfatione diximus. Argumentum Psalmi est duplex Domini aduentus, vnus ad prædicandum, alter ad iudicandum; vnus occultus & in humilitate, alter manifestus & in maiestate. Et quo-

niam in vtroque aduentu Christus congregat homines, vel ad fidem, vel ad iudiciū: rectè Psalmus inscribitur, Asaph, qui interpretatur congregans. Addit, & declarat Propheta, quibus de rebus potissimum reddiduri simus rationem in die iudicii: proinde Psalmus vtilissimus est.

Explicatio Psalmi 49.

DEus Deorum Dominus locutus est, & vocauit terram.

Incipit a primo aduentu, ac dicit, Dominum locutum esse ore proprio, qui per ora Prophetarum antea loquebatur: & ad concionem suam vocasse non Iudæos tantum, sed omnem terram, id est, omnes inhabitantes terram: quod per Apostolos suos fecit, siquidem, in omnem terrā exiuit sonus eorum. Dicitur autem hoc loco Dominus esse Deus Deorum, vt intelligamus, Christum esse Deum verum, veri Dei filium, qui eandē cum Patre diuinitatem habet: vna enim, & sola esse potest vera diuinitas. multi autem sunt Dij, vel per errorem, & ex imitationem, vt Dij gentium, qui Dæmonia sunt, vt dicitur in Psalmo 95. vel per gratiam adoptionis, vt sancti Angeli, & sancti homines; vel per similitudinem, vt Principes, & Iudices terræ. Sed omnes isti Dij subiecti sunt vni, & soli Deo vero, qui ideo dicitur Deus Deorum, Ex hebræo sanctus Hieronimus vertit. Fortis Deus Dominus locutus est; sed voces hebraicæ vtramque versionem patiuntur, & sensus vtriusque lectionis est verus, ad propositum rerum dicendarum. Nam si respiciamus primum aduentum, Christus Dominus Deum Deorum se ostendit, cum terribilis fuerit Dæmonibus, qui sunt Dij gentium; & ipse per adoptionis gratiā multos fecerit Deos: & ipse idem fortis Deus fuit, cum hostē generis humani per crucem deuicerit, & vasa eius diripuerit. Si respiciamus secundum aduentum, Deus Deorum rectissime dicitur, quoniam Iudex Iudicium omnium erit; nec minus propriè conueniet

niet ei titulus fortis Dei, cū Diabolū, & omnes asseclas eius, siue Dæmones, siue homines in gehennam verbo detru- det, & vestibulis sempiternis portas in- ferni claudet. Ait igitur, Deus Deorum Dominus locutus est, id est, Dominus Christus, qui est Deus Deorum in hunc mundum adueniens, locutus est verba Euangelij sui: Et vocauit terram, id est, & ad sermones suos audiendos, terram vniuersam conuocauit, dicens, Venite ad me omnes, qui laboratis, & onerati estis, & ego reficiam vos, Matth. 11.

II. A Solis ortu vsque ad occa- sum: ex Sion species decoris eius.

Declarat se per terram, non intellexisse terram Palestinæ, vel aliquam aliā particularem, sed omnem omnino terram: & simul explicat locum, vnde Dominus loqui cœperit. Cœpit enim ex Sion, siue ex Hierusalem, iuxta illud Isaia 2. de Sion exibit lex, & verbum Domini de Hierusalem. & illud Luc. vlt. Oportebat Christum pati, & resurgere a mortuis tertia die, & prædicari in nomine eius pœnitentiam, & remissionem peccatorum in omnes gentes, incipientibus ab Hierosolyma. A Solis ortu, inquit, vsque ad occasum, vocauit terrā, id est, omnes homines, qui habitant terram a principio vbi Sol oritur, vsque ad finem, vbi Sol occidit. Ex Sion species decoris eius, id est, locutus est Dominus, & vocauit terram ex Sion, quæ est species decoris eius, id est, ex Sion orta est prædicatio Euangelica, quæ est species decoris eius. Porro species decoris significat speciem pulcherrimam, siue perfectam pulchritudinem, vt magis sonant verba hebraica. Erat autem Hierusalem, iuxta priorem sensum, perfecta decoris, vt dicitur Thren. 1: quia erat ciuitas nobilissima, antiquissima, frequentissima, ornata sede regia, & pontifice, necnon tabernaculo, arca fœderis, & cæteris, quæ eam caput Religionis, & Regni faciebant: vnde etiam typus erat celestis, ac diuinæ ciuitatis. Sed, iuxta posteriorem sensum, erat euangelica præ-

dicatio perfecti decoris, quia cōtinebat mysteria redemptionis, notitiam sanctissimæ Trinitatis, sacramenta efficacissima, legem perfectam, & innumerabilibus signis, & prodigijs comitata veniebat; atque audientes, & credentes renouabat, & iustificabat; & ex ima terra ad summum cœlorum exaltabat.

Deus manifestè veniet: Deus III. noster, & non filebit.

Hic iam prædicit secundum aduentum; quasi dicat, Deus Deorum venit, & vocauit terram, sed occultè venit, quia in forma serui, in humilitate, in mansuetudine, vt esset locus redemptioni per passionem, & mortem; sed postea manifestè veniet in potestate, & maiestate magna, non in præsepe speluncæ, sed in nubibus cœli; non cruci affixus inter latrones, sed in sede Iudicis cum omnibus Angelis suis. Neque solum manifestè veniet, sed etiam non filebit, sicut in primo aduentu, quando vt agnus mansuetus ductus ad occisionem non aperuit os suum: & sicut hoc tempore filet, dum peccata fieri videt, & tacet; sed veniet cum tuba, & clamore horribili. Media nocte clamor factus est, ecce sponsus venit, Matth. 25. Et mittet Angelos suos cum tuba, & voce magna, & congregabunt electos eius a quatuor ventis, Matth. 24. &, Ipse Dominus in iussu, & voce Archangeli, & in tuba Dei descendet de cœlo. 1. Thessalon. 1. &, In nouissima tuba, canet enim tuba, & mortui resurgent incorrupti. 1. Cor. 15. In hebræo prima illa verba, Deus manifestè, coniunguntur cum versu superiore, hoc modo, Ex Sion species decoris eius Deus manifestabitur: & deinde subiungitur nouus versiculus, Veniet Deus noster, & non filebit. Sed non tenemur sequi distinctionem hebraicam, quæ a Rabinis excogitata est: illud autem verbum, manifestè, in textu hebraico ambiguum est, vt possit esse aduerbium, manifestè, & verbum, manifestabitur; proinde non errauerunt Septuaginta Interpretes, qui per aduerbium expresserunt.

וְיָבִין ferunt. Quod si Rabini contendant, vocem hebraicam, hophiag, non posse accipi aduerbialiter; dicemus Septuaginta Interpretes reddidisse non verba, sed sensum; idem enim est, Deus manifestè veniet, Deus noster, & non filebit: & Deus manifestabitur, veniet Deus noster, & non filebit.

IV. Ignis in conspectu eius exardescet, & in circuitu eius tempestas valida.

Hæc accipiuntur communiter pro conflagratione mundi, id est, eorum omnium, quæ sunt in terra, ciuitatum videlicet, hortorum, vinearum, palatiorum, animantium, & similibus rerum corruptibilium, de quibus dicit S. Petrus in epistola 2. cap. 3. Adueniet autem dies Domini, ut fur, in qua cœli magno impetu transierint, elementa verò calore soluentur, terra autem, & quæ in ipsa sunt opera, exurentur: de qua conflagratione disputat S. Augustinus lib. 20. de Ciuitate Dei, cap. 18. & Scholastici in 4. Sentent. dist. 47. sensus igitur est, Ignis in conspectu eius exardescet, qui exuret omnia, quæ in terris inueniet. Et in circuitu eius tempestas valida, id est, commotio maxima ex omni parte mundi, tum in terra, tum in mari, tum in aere, tum in cœlo, arescentibus hominibus præ timore, & expectatione, quæ supervenient vniuerso orbi. Tamen S. Augustinus hunc locum Psalmi exponens, per ignem, intelligit iudicium diuinum, per tempestatem verò ventum separantem grana a paleis, id est, discretionem bonorum a malis. Alij non malè, per ignem, & tempestatem, describi volunt iram Iudicis æterni, cum qua adueniet in nouissimo die; vel certè hæc omnia signa esse maiestatis Dei omnipotentis: nam & quando descendit Deus in monte Sinai daturus legem, mons totus ardere videbatur, & audiebantur tonitrua, & conspiciuntur fulgura, & omnino tempestas ingens, & terror maximus. Exod. capite 9.

Aduocabit Cœlum desursum, V. & terram discernere populum suum.

Describit frequentiam eorum, qui in illo quasi theatro interentur, atque ad spectaculum omnium maximum conuenient. Aduocabit inquit, cœlum desursum, id est, ex parte mundi superiore aduocabit Iudex ipsum cœlum, id est, omnes Angelos cœli habitatores: sic enim Dominus ait Matth. 25. Cùm venerit filius hominis in maiestate sua, & omnes Angeli eius cum eo. Ex parte inferiore aduocabit terram, id est, omnes homines qui ab initio mundi vsque ad finem per successiones generationum incoluerunt terram. Aderunt ergo omnes Angeli, & omnes homines. Aduocabit autem hunc tam magnum conuentum, discernere populum suum, id est, ad iudicandum populum suum, & segregandos electos a reprobis: nam, ut dicitur Matth. 13. in consummatione seculi exhibunt Angeli, & separabunt malos de medio iustorum. Et Matth. 25. Separabit oves ab hædis, id est, ea facilitate Iudex cœlestis secernet omnes electos ab omnibus reprobis, quamuis propè innumerales sint futuri, qua Pastor separare potest paucas oves a paucis hædis. Alij existimant aduocari cœlum, & terram in testes diuinæ sententiæ, tamquam im mobilis, quomodo alibi sæpè in diuinis literis. Prior expositio est S. Augustini, posterior S. Ioannis Chrysostomi, quæ sequuntur Theodoretus, & Euthymius. Vtraque est vera, & vna alteri non repugnat.

Congregate illi sanctos eius, VI. qui ordinant testamentum eius super sacrificia.

Quamuis omnes omnino homines ad iudicium vocandi sint, tamen peculiari ratione iudicium ad fideles pertinebit, qui enim non credunt iam iudicati sunt Ioan. 3. Vnde etiam Matth. 25. soli fideles

les iudicandi introducuntur, & de operibus, non de fide discutiuntur. Itaque nomine Sanctorum intelligendi sunt fideles, qui ad populum Dei pertinent, qui per circumcisionem olim Deo consecrabantur, & nunc per baptismum consecrantur: sic David in Psalm. 85. dicit, Custodi animam meam, quoniam sanctus sum. & Apostolus in epistolis suis omnes Christianos vocat sanctos. Alloquitur igitur Angelos, & dicit, Congregate illi sanctos eius, id est, adducite ad iudicium populum Dei peculiarem, quem sibi per sacramenta sanctificavit: quod enim id per Angelorum ministerium faciendum sit, perspicuum est ex cap. 13. Matthæi, Exhibunt Angeli, & separabunt malos de medio iustorum: & cap. 24. Et mittet Angelos suos cum tuba, & congregabunt electos eius. Quod sequitur, Qui ordinant testamentum eius super sacrificia, est declaratio vocis Sanctorum, illi enim dicuntur Sancti, qui ordinant testamentum super sacrificia: quæ sententia clarior est in textu hebraico, ubi ad verbum legitur, Qui feriunt pactum eius super sacrificio, id est, qui pactum cum Deo faciunt, ut sint populus eius, & ipse sit Deus eorum, quod pactum est super sacrificio, id est, super cultu diuino, qui præcipue in sacrificijs offerendis consistit. Lectio nostra est paulò obscurior, sed eundem sensum facit: nam per, testamentum, intelligitur pactum, & per ordinare, significatur disponere. Disponere testamentum, & ferire pactum idem sunt, ut perspicuum est ex varijs locis Scripturæ, sed præcipue ex lib. 1. Machab. cap. 1. Eamus, & disponamus testamentum cum gentibus, quæ circa nos sunt: nam ex quo recessimus ab eis, inveniunt nos multa mala. Igitur sensus huius versiculi est, congregandos esse ad iudicium sanctos Dei, id est, homines Deo dicatos, qui ordinant testamentum eius super sacrificia, id est, qui testamentum disponunt, & pactum feriunt cum Deo, ut ipsi colant Deum sacrificijs, & Deus sit eorum Deus, eosque beneficijs semper afficiat. In hebræo codice habetur pronomen primæ personæ, hoc mo-

do, Congregate mihi sanctos meos, qui feriunt pactum meum super sacrificio. Sed Septuaginta Interpretes in omnibus his vocibus legerunt literam, vau, ubi nunc est litera, iod; facile autem fuit mutari literam, vau, in literam, iod, cum non differant, nisi quòd vna est paulò longior altera posita autem in textu litera, vau, efficitur pronomen tertiæ personæ, & rectè Septuaginta verterunt, congregate illi, & sanctos eius, & testamentum eius.

Et annnnciabunt cœli iusti- VII.
tiam eius, quoniam Deus Iudex est.

Congregatis omnibus ad iudiciũ, tum demum annunciabunt cœli iustitiã eius, id est, de cœlo proferetur sententia in bonos, & malos, & inde apparebit omnibus quanta sit iustitia Dei, quæ nunc sæpè non apparet, cū permittente Deo iusti opprimantur ab iniquis: tunc igitur annunciabunt cœli iustitiam eius, quia de cœlo veniet, qui iustissime iudicabit, & in cœlo aereo sedens sententiã iustissimam proferet, & totum cœlum, id est, omnes cœlites assensu, & laudibus confirmabunt iustam sententiam, ac dicent, Iustus es Domine, & rectum iudicium tuum. Neque poterit esse falsa hæc cœli annunciatio, quoniam Deus Iudex est, id est, quoniam, qui iudicabit Deus est, in quem iniustitia cadere non potest.

Audi populus meus & loquar: VIII.
Israel, & testificabor tibi, Deus
Deus tuus ego sum.

Transit nunc Propheta ad eruditionem populi, ac docet quæ sit futura materia iudicij, id est, quibus de rebus reddenda sit ratio in iudicio, ut unusquisque parare se possit. Atque ut admonitio maiorem fidem habeat, Deum ipsum loquentem, & paternè admonentem inducit. Audi, inquit Deus, populus meus, & loquar: nisi enim audieris, non tibi loquar, sed alijs, qui habent aures audiendi:

diendi: nam non sine causa Dominus in Euangelio dicit, Qui habet aures audiendi audiat: sicut enim qui surdi sunt habent aures ad ornamentum corporis, sed non ad audiendum: sic etiam qui mentem habent, sed non attendunt ad doctrinam Dei, habent aures interiores, quasi non haberent. Oportet igitur attentè cogitare, & considerare quid dicat Deus, si volumus, ut nobis loquatur. Explicat deinde clariùs, dum addit, Israel, & testificabor tibi, id est, audi populus meus Israel, & loquar testificando, & notum faciendo tibi quod tua maxime interest. Per Israelem autem non intelligitur solum populus, qui secundum carnem ab Israele descendebat, sed etiam populus Christianus, qui fidem Israelis imitatur. Imò hic maxime per Israelem intelligendus est, cum Apostolus dicat Rom. 9. Non omnes, qui ex Israel, hi sunt Israelitæ, neque omnes qui semen Abraham, hi filij: sed qui filij sunt promissionis æstimantur in semine. Quod autem sequitur, Deus Deus tuus ego sum, est ratio cur nos oporteat audire, quia videlicet qui loquitur, est Deus, & peculiariter Deus noster: ac per hoc certò scimus, illum scire, & velle nobis utilissima præcepta tradere: nam si Deus est, omnia nouit, si noster est, amat nos, ac propterea vult utilia nos docere.

IX. Non in sacrificijs tuis arguam te: holocausta autem tua in conspectu meo sunt semper.

Summa doctrinæ diuinæ est, Deum non requirere a nobis munera, qualia sacrificia sunt, quasi illis indigeat, vel quasi hæc illi præcipue placeant: sed requirere internas virtutes, fidem, spem, dilectionem, obedientiam, propter quas virtutes munera placent, & sine quibus non placent. Id conforme est verbis Samuelis. 1. Reg. 15. Numquid vult Deus holocausta, & victimas, & non magis ut obediatur voci Domini? & Isaia cap. 1. Quo mihi multitudinem victimarum vestrarum dicit Dominus? plenus sum,

&c. & infra, Lauamini, mundi estote, &c. & Christi ipsius Matth. 23. Vae vobis Scribæ, & Pharisei hypocritæ, quia decimatis mentam, & anethum, & cuminum, & reliquistis quæ grauiora sunt legis, iudicium, misericordiam, & fidem. Et denique ipsius Davidis in Psalm. 50. Si voluisses sacrificium dedissem utique holocaustis non delectaberis. Sacrificiū Deo spiritus contribulatus, cor contritum & humiliatum Deus non despiciet. Ait igitur, Non in sacrificijs tuis arguam te, id est, non accusabo, vel damnabo te in iudicio, quod pauca mihi sacrificia obtuleris; deinde reddit huius rei multas rationes: quarum prima est in secunda parte huius versiculi, quia videlicet, satis multa holocausta sibi quotidie offerantur: nam cum dicit, holocausta autem tua in conspectu meo sunt semper, illud, autem, ponitur pro, enim: nam in hebræo est particula, &, quæ frequentissime ponitur pro, enim. Sensus igitur est, non arguam te de defectu sacrificiorum, quoniam holocausta tua semper inveniuntur in altari meo.

Non accipiam de domo tua vitulos, neque de gregibus tuis hircos. X.

Quoniam meæ sunt omnes feræ sylvarum, iumenta in montibus, & boues. XL

Cognoui omnia volatilia cæli, & pulchritudo agri mecum est. XII.

Hæc est secunda ratio, cur Deus nos magnopere requirat nostra sacrificia, quoniam ipse est rerum omnium Dominus, & ideo si velit oues, aut boues, aut aues, aut aliquid aliud, nullo negotio potest habere, cum ipse omnia nouerit, omnia possideat. Non accipiam, inquit, de domo tua vitulos, neque de gregibus tuis hircos, id est, non opus est mihi, si velim vitulos, aut hircos, ut illos tibi eripiam, vel a te petam. Quoniam meæ sunt omnes feræ sylvarum, id est, mea sunt omnia animantia syluestria, ut cerui, caprea,

præ, apri, & similia. Iumenta in montibus, & boues, id est, mea sunt etiam omnia animalia, quæ pascuntur in montibus, ut oues, capræ, arietes, hirci, boues, & vituli. Cognoui omnia volatilia cœli, id est, non solum animalia quadrupedia mea sunt, sed etiam omnes volucres cœli, quos ego noui ubi sint, & ad quid prosint. Et pulchritudo agri mecum est, id est, non solum animalia, sed etiam omnes fructus terræ, ex quibus agri pulchri, & diuites redduntur, apud me sunt, ad ius meum pertinent, & omnibus uti possum, ut mihi placet. vel apud me est, id est, omnis perfectio agri, cum omnibus frugibus, arboribus, animantibus, fontibus, & cæteris rebus, mecum est ab æterno eminenter in essentia mea consistens, ut mihi opus non sit ad ista exteriora descendere. In hebræo pro illa voce, iumenta, est vox, behemoth, quæ vox significat animalia generatim, & non sola iumenta, proprie dicta: nam Psal. 8. eadem vox habetur, ubi noster Interpres vertit, pecora campi: & Psal. 148. ubi legimus, vniuersa pecora, eadem etiam vox reperitur. Illud autem, in montibus, & boues; ex hæbreo verti posset, in montibus mille: nam vox hebraica, eleph, quæ hic habetur, significat, & bouem, & mille. Itaque Septuaginta Interpretes non malè verterunt, boues; quamuis S. Hieronymus verterit, millium: sed vtraque lectio verum sensum habet: nam secundum lectionem S. Hieronymi sensus est, Dei esse animalia innumerabilia, quæ in montibus mille, id est, plurimis inueniuntur. Secundum lectionem Septuaginta, sensus est, Dei esse animalia, quæ liberè vagantur in montibus, & etiam boues, qui in præsepibus deinentur: & quoniam in textu hebraico, ut nunc legitur, illud, in montibus, regit post se genitium, & legi debet, in montibus bouis, quæ verba non videntur aptum sensum reddere; suspicor Septuaginta Interpretes non legisse, be harere heleph, in montibus bouis: sed, be erer ve heleph, in monte, & hos, vnica litera paululum immutata, id est, iod, mutata in, vau, quæ sunt litteræ simillimæ; quod facile contingere

potuit vitio librariorum: sed explicandi gratia Septuaginta posuerunt numerum multitudinis, pro, singulari, & pro in monte, & bos, posuerunt in montibus, & boues. Illud autem, cognoui omnia volatilia cœli, S. Hieronymus ex hebræo vertit, cognoui oēs aues montium: & verè vox hebræa non cœlū, sed montes significat, neque est similitudo literarum inter vocabula, ut errorem librariorum suspicari possimus. Sensus tamen idem est, nam volatilia cœli, & aues montium idem sunt, dicuntur enim volatilia cœli, quia per cœlum aereum discunt, & oues montium, quia in arboribus montium, ut plurimum nidificant. Illud denique, & pulchritudo agri, vertitur à S. Hieronymo, & vniuersitas agri: vox autem hebraica, ziz, est omnino ambigua: nā Septuaginta hoc loco reddiderunt, pulchritudo, in Psal. 79. reddiderunt eandem vocem, singularis ferus. Isaia 66. eandem vocem transfulerunt, introitus. Sanctus autem Hieronymus hoc loco reddidit, vniuersitas: in Psal. 79. Omnes bestie, Isaia 66. omnimoda. In hac tanta varietate tutissimum est auctoritatem Septuaginta Interpretum sequi, à quibus quoad sensum Sanctus Hieronymus non dissentit. Siquidem pulchritudo agri ex vniuersitate agri, id est, ex vniuersis fructibus agrorum consurgit.

Si esuriero non dicam tibi: XIII.
meus est enim orbis terræ, & plenitudo eius.

Numquid manducabo carnes XIV.
taurorum? aut sanguinem hircorum potabo?

Hæc est tertia ratio, cur Deus non requirat nostra munera propter suam necessitatem, vel vtilitatem, quia videlicet, non esurit, neque sitit: & consequenter non calet, neque friget, neque villa re indiget: & si indigeret, omnia illi præsto essent, quia Dominus est omnium rerum. Si esuriero, inquit, non dicam tibi, ut cibum videlicet mihi prouideas: quia meus est orbis terræ, & plenitudo eius. XV.

בהמות

אלף

בהררי

אלף

בהרר

ואלף

eius. Nunquid manducabo carnes taurorum? aut sanguinem hircorum? id est, non vescor ego eiusmodi rebus, qui substantia sum spiritualis, & immortalis.

XV. Immola Deo sacrificium laudis, & redde Altissimo vota tua.

XVI. Et inuoca me in die tribulationis, eruam te, & honorificabis me.

Docuit haecenus, non esse spem ponendam in externis sacrificijs, quasi illa sine interiori cognitione, & amore sufficiant: nunc docet, in internis actibus virtutum consistere sacrificium, quo delectatur Deus, & quod nos in Iudicio ultimi seculos prestare poterit. Sed observandum est, aliud esse laudem Dei, aliud sacrificium laudis. Potest enim laudari Deus ab ijs, qui labijs solis Deum honorant, sed non potest sacrificari laus, nisi ab ijs, qui in ara cordis, & cum igne charitatis thus laudis offerunt, id est, nisi ab ijs, qui credunt, & aliquo modo apprehendunt Deum esse summum bonum; quiq. Deum sic creditum, & cognitum: toto corde diligunt, & tanquam pulcherrimum, optimum, sapientissimum, admirantur, & laudant. Itaque sacrificium laudis, signum, & effectus est cognitionis, & amoris: & quia beati in caelo semper Deum vident, & amant, ideo de illis dicitur Psalm. 83. Beati qui habitant in domo tua Domine in secula seculorum laudabunt te. Ait igitur, Immola Deo sacrificium laudis, id est, non solis labijs, sed ex intima cognitione, & amore Deum lauda. Et redde altissimo vota tua, id est, posteaquam Deum, ut est in se, laudasti, respice illum, ut est auctor, & fons omnium bonorum tuorum, qui ex te nihil es, & redde illi gratiarum actionem, & solue tributum obedientiae, quod est praecipuum votum inter omnia vota tua: hoc enim promissisti cum ad populum, & familiam eius admissus & hoc ipse requirit magis, quam externa sacrificia; melior enim est obedi-

tia, quam victimae. Denique inuoca me in die tribulationis, id est, sicut in die prosperitatis agnoscere debes omnia bona tua a me fonte bonorum omnium descendere; sic etiam in die tribulationis ad me confugere, & in me spem tuam totam collocare debes: ego enim eruam te de omni tribulatione, & tu vicissim honorificabis me sacrificio laudis, & gratiarum actionis.

Peccatori autem dixit Deus, XVII. quare tu enarras iustitias meas, & assumis testamentum meum per os tuum?

Post instructionem iustorum, pergit Psalmus ad eruditionem iniquorum, sed fidelium. Peccatori, inquit, dixit Deus, id est, peccatorem Deus per me admonitum voluit, quare tu enarras iustitias meas, & assumis testamentum meum per os tuum? id est, quare profiteris te scire legem meam, ut enarres praecepta mea, in quibus omnis iustitia continetur, & profiteris etiam ad te pertinere testamentum, siue pactum meum, dum te filium Abraham esse gloriaris; cum neque legem meam serues, neque pactum custodias, neque vestigia Abraham imiteris?

Tu vero odisti disciplinam, & XV III. proiecisti sermones meos retrorsum.

Describit primum interna vitia iniquorum, deinde in sequentibus versiculis enumerat peccata operis & oris. Tu, inquit, odisti disciplinam, id est, auersaris animo eruditionem diuinæ legis. Et proiecisti sermones meos retrorsum, id est, & factus es quasi oblitus esses praecepta mea, eaque post tergum haberes.

Si videbas furem, currebas cum XIX. eo, & cum adulteris portionem tuam ponebas.

Ex

Ex obliuione, & odio diuinæ legis nascuntur peccata operis, qualia sunt furta, & adulteria, quo nomine fornicationes quoque intelliguntur. Sunt autem hæc duo peccata frequentissima, quæ ex auaritia & luxuria oriuntur; ideo horum duorum meminit Propheta: dicit autem, Si videbas furem, currebas cum eo, & cum adulteris portionem tuam ponebas, & non dicit, furabaris, vel fornicabaris; quoniam minus est furari, vel merchari, quod occultè, & libidine stimulante fieri solet, quàm cum furibus concurrere, vel cum adulteris portionem ponere, quia ista fiunt palam, & promptè, & ex animi peruersitate potius, quàm ex inopia vel libidine.

XX. Os tuum abundauit malitia, & lingua tua concinnabat dolos.

Transit ad peccata oris, ac dicit, os tuum abundauit malitia, id est, abundanter ex ore tuo, tamquam ex fonte scaturiuit maledicentia: nam verbum hebraicum, scialach, significat dimittere, quasi dicat, dimisisti linguam tuam quasi ruptis habenis in omnem maledicentiam: sed Septuaginta Interpretes declarauerunt metaphoram. Et lingua tua concinnabat dolos, id est, loquebaris appositè ad fallendum adhibens artificium dissimulationis, vel mendaciorum.

XXI. Sedens aduersus fratrem tuum loquebaris, & aduersus filium matris tuæ ponebas scandalum: hæc fecisti, & tacui.

Addit ad peccatum oris, quod non solum aduersus extraneos, sed etiam proprios fratres per linguam deliquerit. Sedens, inquit, aduersus fratrem tuum loquebaris, id est, non obiter, & per iram, sed sedens ociosus, & pacato animo, studiosè, & longo tempore detrahebas fratri. Et aduersus filium matris tuæ, id est, aduersus eundem fratrem scandalum ponebas calumnias struendo, vn-

de ille offenderetur, & ruinæ occasionem haberet. In textu hebraico habetur vox, dophi, quæ propriè opprobrium, siue probrum, aut conuicium significat. Sed Septuaginta Interpretes scandalum verterunt, aut quia vox illa scandalum etiam significat, aut quia probrum iactatum in alium, scandalum illi sit. Quod sequitur, Hæc fecisti, & tacui, apud hebræos ad sequentem versiculum pertinet. Sed non est magnificiendæ interpunctio hebraici textus, cum a Rabinis excogitata sit: significant autem illa verba Deum hoc tempore omnia videre, sed non omnia statim punire, vt det locum penitentiae. Itaque videt, & tacet, ac si non videret; cæterum veniet breui dies iudicii, in quo, vt supra dictum est versu 3. Deus manifestè veniet, & non filebit; & hoc idem subiungit, cum ait.

Existimasti iniquè, quod ero tui similis, arguam te, & statuam contra faciem tuam. **XXII.**

Dum sine timore Dei peccant impij, videtur existimare Deo non displicere peccata: sed in Iudicio intelligent quod in hoc Psalmo dicitur. Existimasti, inquit, quod ego essem tui similis, id est, quod iniquus essem, & peccatorum amicus, sed non ita est; imò arguam te in die iudicii, & statuam contra faciem tuam peccata tua, id est, faciam, vt videas gravitatem, & multitudinem peccatorum tuorum, & negare non possis sententiam contra te latam esse iustissimam. In hebræo habetur, Statuam te contra faciem tuam; sed idem est sensus: nam, statuam te contra faciem tuam, nihil est aliud, nisi, statuam vitam tuam, actiones tuas, peccata tua, ante oculos tuos, vt non possis ea non videre.

Intelligite hæc qui obliuiscimini Deum, ne quando rapiat, & nō sit qui eripiat. **XXIII.**

Hæc

Hæc exhortatio est Prophetæ ad impios, qui obliuiscuntur Deum esse Iudicem iustum, & omnipotentem; ut intelligant attenta consideratione cogitantes, quæ dicta sunt. Ne quâdo Deus rapiat eos, dum nihil minus cogitant, & ad iudicium adducat, & pro meritis damnet; & non sit, qui de manu eius eripere possit. In hebræo habetur in prima persona, ne quando rapiam, & secundum hanc lectionem continuantur verba Dei: sed Septuaginta Interpretes videntur legisse in tertia persona; & sensus est idem.

XXIV. **Sacrificium laudis honorificabit me, & illic iter quò ostendam illi salutare Dei.**

Concludit Deus verba sua docens, viam salutis ad vnum sacrificium laudis reduci, ita ut illi in die Iudicii salui futuri sint, qui hoc sacrificium iugiter obtulerint; illi reprobi, & condemnandi, qui hoc sacrificiū offerre neglexerint. Sacrificium laudis, inquit, honorificabit me, & illic iter quò ostendam illi salutare Dei, id est, qui sacrificauerit laudē mihi, ille mihi acceptus erit, nam ab eo me honorificatum esse confitebor, & illic, id est, in eo sacrificio, iter erit ad salutem: nam per illud iter perueniet ad locum, in quo ostendam illi salutare Dei, diuinam videlicet, plenam, atque perfectam salutem. In hebræo est


□ vox ambigua, sam, quæ significat, illic, **□** si legatur cum puncto in dextro cornu, ut Septuaginta Interpretes legerūt: sed si legatur cum puncto in sinistro, ut Sanctus Hieronymus legit, significat, posuit, siue, disposuit: sed in re ambigua non est, quod à communi, & recepta lectione recedamus. At vnde est, quod summa salutis ponitur in oblatione sacrificij laudis? S. Augustinus respondet, ex eo esse, quòd nemo verè laudat Deū, nisi pius sit: impij enim si verbis laudant, vita non laudant; ac per hoc non verè laudant, cum verbis eorum vita contradicat. Potest etiam dici, ut nos supra monuimus, sacrificium laudis,

non esse simplicem laudem, sed laudem ex ara cordis, & igne charitatis procedentem: quare cum sacrificium laudis includat charitatem, & sit inchoatio sacrificij, siue officij, quod in secula seculorum in cælo à beatis omnibus exercetur, mirum non est, si in eo summa salutis includitur.

P S A L M V S L.

Titulus, & Argumentum.

In finem Psalmus David, cum venit ad eum Nathan Propheta, quando introiit ad Bethsabea.



Titulus docet, qua occasione compositus fuerit Psalmus iste à Davide: historia verò fusiùs narratur lib. 2. Reg. cap. 12. summa historia hæc est. David ex palatio suo vidit mulierem formosissimam, nomine Bethsabea, se lauātem. captus amore adulterium cum ea commisit: quod ut facilius celaretur, maritum eius Uriā neci dedit; sic viduam coniugio sibi copulauit, & filium ex ea suscepit. postea Dei monitu venit Nathan Propheta ad Davidem eumque de perpetrato flagitio, & cæde corripuit. David in se reuersus pœnitentiam seriò egit, atque hunc Psalmum, in quo peccatum suum desset, ea occasione composuit. Sensus igitur tituli hic est, Psalmus in finem usque mundi canendus, quem David composuit, quando venit ad eū Nathan Propheta, qui tunc ad eum increpandum venit, quando intrauit idem David ad Bethsabeam uxorem Uriæ, atque adulterium cum ea patrauit. Ad hunc titulum pauca quædam annotanda videntur circa personas, quæ in eo nominantur, videlicet Davidem, Nathan, & Bethsabeam. Primo peccatum Davidis iustis hominibus magnum timorem incutere

tere posse: si enim tantus amicus Dei tā facile corrui, quis non timebit casum? Secundo, eiusdem Davidis pœnitentiam omnibus peccatoribus spem salutis adferre: peccatum enim eius omni ex parte grauissimum fuit, & tamen per veram pœnitentiam facilē inuenit indulgentiam. Tertio, Nathan fuisse quidem Prophetam, sed Dauide inferiore non solum dono prophetiæ, sed etiam potestate, sapientia, alijsque donis Dei: & tamen placuisse Deo, ut is Dauidem corripere, & ad pœnitentiam adduceret. Quo exemplo admonentur homines magni, ut non contemnant ministros Verbi Dei, sed ad eos audiendos accedant, etiam si sint ipsi fortē sapientiores, & maiores illis. Quarto, hinc cognosci, quantorum malorum causa sit pulchritudo mulieris cum imprudentia, & facilitate coniuncta. Si enim Bethsabea mulier speciosissima in loco vnde videri posset, corpus suum non nudasset; aut non tanta facilitate Dauidi consensisset, certē vir tantus in tam grāua seclera non cecidisset. Quinto, Nathan non intrasse ad monendum Dauidem statim post ingressum eius ad Bethsabeā, ut titulus indicare videtur, sed multo postea: iā enim natus erat filius David ex Bethsabea, quādo venit Nathan. Itaque quod dicitur in titulo intelligitur potius de occasione, quā de tempore, & sensus est Psalmum scriptum esse, quando, Nathan intrauit ad Dauidem ex occasione, quia intrauerat Dauid ad alienā conjugem, nomine Bethsabeam.

Explicatio Psalmi 50.

I. **M**iserere mei Deus secundū magnam misericordiam tuam.

Incipit Propheta Psalmum ab oratione, qua remissionem peccati petit; & simul explicat primam rationem, qua mouetur ipse ad petendum; & Deum moueri posse credit ad indulgendum; Bellarm. in Psalm.

alias deinde rationes in sequētibz versiculis explicaturus. Ait igitur, Miserere mei Deus; miserum se agnoscit, & confitetur Dauid ob iniquitatem admīsam, quamuis alioqui naturæ, & fortunæ bonis omnibus abundaret; ut ē contrario beatos dicere solet eos, qui timēt Dominum, non qui diuitijs, aut honoribus abundant: ex quo intelligimus, quā peruersē de miseria, & felicitate iudicent filij huius seculi. Addit, secundū magnam misericordiam tuam; quasi dicat, ideo misericordiam tuam implorare audeo, quia miser sum: misericordia enim miseriam respicit, ut eam tollat: quamuis autem in hebræo codice non sit vox illa, magnam, tamē Septuaginta Interpretes eam vocem in sua versione posuerunt, vel quod in codicibus hebraicis emendacioribus illam inuenerint: vel quod hunc locum voce illa addita explicare voluerint. Vocatur autē magna misericordia, quā peccata remittuntur, tum quia peccatum magna miseria est, tum quia comparatione huius misericordiae, parua misericordia dici potest ea, per quam Deus bona temporalia tribuere solet: bona enim temporalia Deus inimicis etiam suis, atque ijs, quos in fine reprobaturus est, præbet; gratiam verō remissionis peccatorum illis tantum donat, quos in filios, & hæredes æterni Regni adoptare dignatur. Dauid igitur non contentus parua illa misericordia, qua Regni gloriam, & opes copiosas, ac filiorum multitudinem, & victoriam de hostibus, atque alia id genus acceperat: petit misericordiam magnam, quam in peccatorū remissione, & gratiæ restitutione positam esse sciebat.

Et secundū multitudinē miserationum tuarum dele iniquitatem meam

Idem repetit, & declarat: quod enim dixit, Miserere mei, declarat, dicens, Dele iniquitatem meam; & quod ait, secundū magnam misericordiam tuam declarat cum dicit, secundū multitudinē miserationum tuarum. Sed ordinem

V nem

nem Prophetæ non inuertamus: ipse enim eleganter in hoc secundo versiculo incepit ab eo, quod erat postremum in primo versiculo, ut hac veritate pulchriorem Psalmum efficeret. Illæ igitur voces, secundum multitudinē miserationum tuarum, explicant quid sit magna misericordia Dei, quæ filiis dilectis exhibetur. Significat autem multitudo miserationum affluentiam pietatis Dei: nam vox hæbraica, ut notauimus in primo versiculo Psal. 17. significat propriè paternam, ac tenerum amorem, quem Scriptura explicare solet, per, viscera misericordiæ. Ecclesia quoque rectissimè id expressit in collecta Dominicæ xj. post Pentecosten, cum ait, Qui abundantia pietatis tuæ, & merita supplicum excedis, & vota. Verè enim pietas diuina tanta est, ut multò plus donet non solum quàm mereamur, sed etiam quàm optare audeamus. Quod ostendit etiam Dominus in parabola de filio Prodigio. Pater enim filium poenitentem, non solum admisit ad gratiam: sed etiam continuò amplexatus, & osculatus est, & iussit illi dari stolam primam, & anulū preciosum, & occidi in gratiam eius vitulum saginatum, ac denique tanta signa beneuolentiæ erga filium, qui vniuersa bona sua dissipauerat, ostendit: ut plura non posset erga eum, qui victor, ac triumphator de hostibus redisset. Quod sequitur, Dele iniquitatem meā, refertur tum ad reatum, tum ad maculam peccatorum: sciebat enim David, ex actione peccati relinqui in anima reatum mortis æternæ, qui scribitur in conscientia: & maculam priuationis gratiæ, quæ reddit animam deformem, tenebrosam, Deo inuisam: ad utrumque refertur vocabulum delendi: nam Scripturæ deleri solent, cum remittitur debitum: & maculæ etiam delentur, cū abluitur quod maculatum erat. Petit igitur David, ut Deus non agat secum ex rigore iustitiæ: sed ex paterna misericordia remittat debitum peccati, & lauet maculam restituendo nitorem gratiæ.

Amplius laua me ab iniquitate mea; & à peccato meo munda me. III.

Post culpam remissam, & gratiam restitutam, adhuc remanent in homine mali habitus vitiorum, & ipsa concupiscentia carnis, quæ hominem reddunt infirmum, & debilem, quales sunt qui recens ex graui morbo conualuerunt: & quidē mali habitus paulatim exterminantur exercitatione virtutum: concupiscentia verò potest quidē minui, sed ordinariè non eradicatur, nisi in morte: quamuis autem ad vitiorum exterminationem, & concupiscentiæ diminutionem multum valeat studium, & diligentia nostra: tamen precipuæ partes sunt gratiæ Dei, sine qua nihil possumus, & cum qua omnia possumus. Ideò Prophetæ David, qui hæc nouerat omnium optimè, in Psal. 102. scripsit, Benedic anima mea Domino, & noli obliuisci omnes retributiones eius, qui propitiatur omnibus iniquitatibus tuis, qui sanat omnes infirmitates tuas. Et hoc loco posteaquam petijt deleri peccatum suum, & audiuit à Nathan Propheta, Deus transtulit peccatum tuum, non morieris: iterum petijt lauari, & munda ri, id est, magis, & magis iustificari per maiorem gratiæ infusionem, ut malis habitibus sublati, & concupiscentia mortificata, anima cādidior, & pulchrior fiat, & per hoc etiam ad resistendum tentationibus fortior. Amplius, inquit, laua me ab iniquitate mea, & à peccato meo munda me, id est, spero peccatum meum per gratiam tuam esse deletum, & animam meam lotam: & mundatam à reatu, & macula per actionem peccati contractam: sed cupio, & peto iterum, atque iterum lauari per gratiæ incrementum, ut anima mea cādidior, & fortior euadat. Posset etiam simplicius exponi, ut hæc secunda petitio pertineat ad magnitudinem peccati declarandam, quasi dicat, si macula peccati mei leuis esset, sufficeret simplex ablutio: sed quia macula ingēs, & multiplex est, ideò

ideo multum, valde, amplius atque amplius lauari desidero, ut tantæ maculæ vestigium nullum supersit,

IV. Quoniam iniquitatem meam ego cognosco, & peccatum meum contra me est semper.

Hæc est secunda ratio, unde persuadere Deo conatur, ut indulgeat peccanti: quia videlicet confitetur peccatum suum, & illud in seipso punit continua cogitatione, & recordatione. Ignosce, inquit, quia ego peccatum meum agnosco, non excuso, non nego, nec solum agnosco, sed perpetuo de illo cum dolore animi cogito: nam contra me est semper, id est, in conspectu meo positum, me quasi iaculum fodere, & cruciari non cessat. Hoc exemplum imitari debemus, qui Psalmos Pœnitentiales recitamus: ut verè dicere possimus, peccatum meum contra me est semper: quod fiet si peccatum semel admissum, & per gratiam Dei fortè deletum, in memoria nostra vivat, & ingritudinis nostræ erga tam magnum benefactorem nos semper admoneat.

V. Tibi soli peccaui, & malum coram te feci, ut iustificeris in sermonibus tuis, & vincas cum iudicaris.

Tertia hæc est ratio, cur à Deo indulgentiam postulet: quoniam non alium Iudicem timet. Tibi, inquit, soli peccaui: non dicit, contra te solum peccaui: peccaverat enim etiam contra Uriam, quem occiderat, & contra Bethsabeam quam adulterauerat, & contra populum, quem scandalizaverat: sed dicit, Tibi soli peccaui, nimirum ut Iudici, apud quem solum conuinci poterat: nam nec alium Iudicem habebat, & si habuisset, conuinci non potuisset: quoniam factum erat sine teste: & quamvis ex suspitione fama peccati manasset in vulgus, tamen legitime peccatum probari non poterat: sed apud Deum Iudicem conuictus erat, tum quia Deus viderat, tum quia

conscientia ipsius testis erat apud Deum, qui scrutatur renes, & corda; & ideo subiungit declarans, & malum coram te feci: quamvis enim David occultè peccaverit, in tenebris clausi cubiculi, tamè oculos Dei excludere non potuit. Ut iustificeris in sermonibus tuis. illud, ut, non significat causam, sed consequentiam, ut Theodoretus hoc loco notauit, & sensus est, Tibi soli peccaui, & malum coram te feci, ex quo secutum est, ut tu iustificeris in sermonibus tuis, dum me peccatorem, & iniustum esse pronuncias: vel certè subintelligitur verbum aliquod, ut hic sensus sit. Dico, tibi soli peccaui, dico, malum coram te feci, confiteor me iniustum, ut tu iustus, & verax inueniaris in sermonibus tuis, quibus per Nathan Prophetam me adulterij, & homicidij reum esse pronunciasti. Et vincas cum iudicaris: repetitio est eiusdem sententiæ: ac si dicat; & si iudicium inter te, & me instituatur, & ego negare velim crimen, cuius tu reum me esse dixisti, tu omnino vincas causam, & ego causa cadam, cum mecum iudicaris. Hunc existimo literalem esse sensum huius obscuræ sententiæ, qui sensus valde confirmatur ex verbis Apostoli Rom. 3. Est Autem Deus verax, omnis autem homo mendax, sicut scriptum est, ut iustificeris in sermonibus tuis, & vincas cum iudicaris. Sed non rejicio quod alij dicunt, Deum iustificari in sermonibus suis, & vincere cum iudicatur, si pœnitentibus ignoscat, quoniam veritatem pœnitentibus repromisit. Sanctus Augustinus refert ad Christum hunc versiculum, quia solus ipse est sine peccato, & ideo illi soli iusto nos iniusti peccamus, & ille solus vicit, cum iudicatus est iniuste ab iniustis.

VI. Ecce enim in iniquitatibus conceptus sum, & in peccatis concepit me mater mea.

Quarta ratio ducitur à prima origine, & primi hominis peccato in nos transfuso per generationem, ex quo facti sumus infirmi, & proclives ad peccandum,

V 2 & ob

& ob hanc quasi naturalem miseriam misericordia digni sumus. Quod autem hic locus non intelligatur de peccatis parentum, sed de ipso peccato originali, quod ex conceptione trahimus; probat hoc loco S. Augustinus, quia David non est natus ex adulterio, sed ex casto coniugio piorum parentum. Sed hoc ipsum probare possumus ex proprietate verborum hebraicorum: illud enim, conceptus sum, est in hebræo, holalhti, quod non significat actum gignendi, qui ad parentes pertinet, sed actum formationis membrorum, quæ conformatio in utero fit satis diu post concubitum parentum. Et videtur Spiritus sanctus diuina prouidentia non voluisse scribi hoc loco, genitus sum, sed conceptus, siue formatus sum, ut præueniret hæreticorum peruersas interpretationes. Illud est, concepit me mater mea, in hebræo est, iechematni, quod proprie significat, calescit me, siue fouit me: proinde non refertur ad actum concubitus, in quo peccant parentes, quando fornicantur, vel mæchantur: sed ad actionem confoendi foetum in utero, dum formantur membra, ut anima infundatur. quamuis autem sanctus Hieronymus verterit, peperit me mater mea; & sanctus Augustinus legat, aluit me mater mea; & nos cum Septuaginta legamus, concepit me mater mea: tamen proprietas verbi est, quam diximus, cum qua non pugnant illæ variae lectiones: mater enim rectè dicitur concipere, quando foetus in utero eius formatur, & fouetur; sic etiam dicitur alere, non solum quando lacte nutrit iam editum, sed etiam quando in utero conseruat, & auget: denique non male S. Hieronymus vertit, In peccato peperit me mater mea, quia peccatorem peperit, quem in peccato conceperat. Adde etiam quod in textu originali, dicitur in singulari, in peccato conceptus sum, & in peccato concepit me mater mea. Verè enim peccatum originale, quod in conceptione contrahimus, vnum est, non plura. Sed Septuaginta Interpretes verterunt in numero multitudinis, in iniquitatibus conceptus sum, & in peccatis concepit me-

mater mea; quia vnum illud peccatum est quasi fons omnium aliorum peccatorum, & in illo includuntur omnia.

Ecce enim veritatem dilexisti, VIII. incerta, & occulta sapientiae tuæ manifestasti mihi.

Hæc est ratio quinta, quæ ducitur a veritate, & simplicitate cordis; quæ semper fuit in Dauide: & quæ Deus maxime diligere solet, propter quæ etiam Deus, qui veritas est, Dauidi multa mysteria futura reuelauit: nam, ut sanctus Ioannes Chrysostomus hoc loco copiose docet, nullum est fere mysterium Christi, & Ecclesiæ, quod David non præuiderit, & in Psalmis prædixerit. Igitur David hanc veritatem commemorat, propter quam tot mysteria diuina cognouit, & quia in eadem veritate perseverat, simpliciter peccatum suum confitendo, inde petit a Deo remissionis donum. Ecce, inquit, veritatem dilexisti, id est, tu Deus veritatem, & sinceritatem cordis semper amasti; sicut etiam contra duplicitatem, & peruersitatem semper odisti. Incerta, & occulta sapientiae tuæ manifestasti mihi, id est, quia veritatem amas, & in me veritatem, & relicitudinem cordis inuenisti, ideo tam multa mihi patefecisti mysteria diuina secretissima, & occultissima, quæ signa sunt infinitæ sapientiae tuæ. Illud, incerta, non significat mysteria diuina esse incerta, id est, dubia in se, quasi possit non fieri: sed incerta, & dubia nobis; quomodo dicimus, incertus est hominibus dies Iudicii, non quod non certum sit, futurum esse diem Iudicii, sed quia incertum est nobis quando fit futurus. In textu originali vox hebraica significat absconditum, & coopertum. Itaque incerta, & occulta sapientiae diuinæ dicuntur illa, quæ Sapientia diuina ordinauit ab æterno, ut fiant temporibus suis, sed abscondita, & occulta sunt, antequam fiant, nisi speciali privilegio reuelentur.

Asper

VIII. Asperges me hyssopo, & mundabor: lauabis me, & super niuem dealabor.

Aperit hic vnum ex incertis, & occultis mysterijs diuinæ sapientiæ, quod videlicet tempore noui testamēti aspergendi essent homines aqua munda in Baptismo, & perfectissime iustificandi: alludit autem ad cerimoniam, quæ describitur Num. 19. vbi ad expiationem tria necessaria esse dicuntur, cinis vaccæ rufæ immolatæ in holocaustum; aqua cineribus mixta: & hyssopus, quæ aqua aspergebatur: per cinerem vaccæ rufæ significatur Christi mors: per aquam, Baptismus; per hyssopum fides: hyssopus enim herba est humilis, radices habens in petra. Sicut enim in illa expiatione typica, aqua mundabat, sed vim habens ex cineribus vaccæ occisæ, & per hyssopum aspersa: sic etiam in Baptismo aqua mundat, sed vim habens ex morte, & merito Christi, & per fidē applicata. Ad has igitur expiationes tum figurantem, tum figuratam respicit David cum dicit, Asperges me hyssopo, & mundabor: petit enim illam purificationem, quam nouerat figuratā, per expiationem aquæ hyssopo aspersæ, & quam implendam præuidebat, & prædicabat in Baptismo: & vt ostendat illius expiationis primum auctorem esse Deum, dicit, Asperges me hyssopo, & non dicit, asperget me Sacerdos hyssopo, & vt demonstrat, expiationē Baptismi fore perfectissimam, ita vt verè tollat peccata, vt non solum non imputentur, sed vt non sint: & non solum tollat peccata, verum etiam infundat

copiosam gratiam, addit, Lauabis me, & super niuem dealabor. Vide S. Augustinum in libro Quæstionum super Numeros cap. 33. & Theodoretum in hunc locum Psalmi.

IX. Auditui meo dabis gaudium, & lætitiā, & exultabunt ossa humiliata.

Effectus, & signum perfectæ iustificationis est, cum spiritus reddit testimonium spiritui nostro, quod filij Dei sumus. Hoc testimonium in se aliquando Propheta expertus, iterum illud petit, dicens, Auditui meo dabis gaudium, & lætitiā, id est, cum me perfecte laueris, addes, & hoc beneficium, vt interiore quodam gaudio tanquam signo remissi peccati me mirabiliter afficias: quod gaudium erit veluti bonus nuncius, quæ cordis aure iucundè percipiam. In hebraico textu est vnicum verbum, pro eo quod nos habemus, auditui meo dabis, & significat propriè, audire me facies. Itaque sensus est, audire me facies internam vocem Spiritus sancti, qui me gaudio, lætitiāq. perfundet. Et nunc exultabunt ossa humiliata, id est, tunc animus spiritu timoris contractus, & dissolutus, resumptis viribus exultabit. In hebraico textu habetur, Et tunc exultabunt ossa, quæ tu confregisti. Ex quo intelligimus, spiritum timoris, quo cor conteritur, & humiliatur, à Deo esse, & disponere ad spiritum dilectionis, quo anima iustificatur. Per ossa intelliguntur vires animi, non ossa corporis, nam, & paulò post dicitur, Cor contritum, & humiliatum Deus non despicies.

שמעני

X. Auerte faciem tuam à peccatis meis, & omnes iniquitates meas dele.

Quod prædixit futurum, in præsentisibi postulat: dixerat enim, Asperges me hyssopo, & mundabor, lauabis me, & super niuem dealabor: Auditui meo dabis gaudium, &c. nunc ista ipsa postulat. Ac primum petit remitti peccata, sicut antea dixerat, Asperges me hyssopo, & mundabor. Auerte, inquit, faciem tuam à peccatis meis, id est, ne consideres peccata mea, vt ea punias: quo

V 3 modo

modo alius Sanctorum dixit, Ne remiscaris Domine delicta mea. Sūt tamē iux omnes loquutiones metaphoricæ: neque enim fieri potest, vt Deus, quem nihil latet, auertat faciem à peccatis, vel obliuiscatur eorū; sed dicitur auertere faciē, vel obliuisci, qñ facit id quod faciunt, qui non considerant, aut non recordantur: qui enim non considerāt, aut non recordantur, non puniunt. Addit autem, Et omnes iniquitates meas dele, vt non solum ad tempus Deus nō puniat, sed nunquam omninō puniat: qui enim auertit faciem à scriptura aliqua, potest iterum conuertere faciem, & considerare quod scriptum est: sed qui deleuit scripturam, non potest amplius legere. Facit hoc aduersus hæreticos, qui docent, peccatū in iustificatione non imputari, sed manere tamē; quā si Deus auertat quidem faciem à peccatis, sed ea nunquam omninō debeat.

XI. Cor mundum crea in me Deus, & spiritum rectum innoua in visceribus meis.

Hoc respondet illis verbis, lauabis me, & super niuem dealbabor: petit enim, vt non solum peccata debeat, sed etiam iustitiam infundat, quæ animam renouet & formosam, ac splendidā reddat; quod etiam est contra hæreticos, qui iustificationem in sola peccatorum remissione constituunt. Quod autem dicit, Cor mundum crea in me Deus, intelligitur formaliter, vt scholæ loquuntur, id est, de creatione munditiei, nō de creatione cordis: per peccatum enim non perit substantia cordis, sed mundities. Itaque sensus est, crea munditiem in corde meo: & satis propriè dicit, crea, quoniam nihil inuenit Deus in corde peccatoris, vnde munditiem in illo efficiat, sed ex magna misericordia sua sine vllis meritis homines iustificat: nā etiam si disponantur peccatores per fidem, & pœnitentiam ad iustificationē: tamen fides, & pœnitentia, & alia omnia similia dona Dei sunt. Et spiritum rectum innoua in visceribus meis. Ex-

plicatio est verborum præcedentium: vt enim intelligere mus, creari communem, esse, creari munditiem in corde; addit, & in visceribus meis innoua spiritum rectum, non autem, innoua mihi viscera. Per viscera intelliguntur interiora animi, id est, voluntas ipsa, quæ paulò ante cor dicta est. Per spiritum rectum intelligitur recta affectio, quæ nihil aliud est, nisi charitas: per cupiditatem enim affectus cordis distortus efficitur dum conuertitur ad inferiora, ac præcipuè ap seipsum; sed per charitatē dirigitur, dum conuertitur ad superna, ac potissimum ad Deum. Innouatur igitur spiritus rectus in visceribus, quando corde mundato per gratiam, renouatur in anima pia affectio in Deum, quæ per peccatū amissa erat, & in cuius locum cupiditas distorta successerat.

Ne proijcias me à facie tua: & XIII. Spiritum sanctum tuum ne auferas à me.

Hic iam perseuerantiā postulat, memor videlicet fragilitatis suæ, ne fortè per gratiam erectus, iterum labi contingat. Dicitur in Scriptura, proijci à facie Dei, qui dimittitur, ac deseritur non amplius recipiendus in gratiam. 1. Reg. 16. Dixit Dominus ad Samuel, Viquequo tu luges Saul, cum ego proiecerim eum? & 2. Reg. 7. Misericordiam meam non auferam ab eo, sicut abstuli à Saul, quem amoui à facie mea. & 4. Reg. 24. Irascebatur Dominus contra Hierusalem, & contra Iudam, donec proijceret eos à facie sua. Ait igitur, Ne proijcias me à facie tua, id est, ne finas me iterum labi in peccatum, ne fortè in perpetuum à gratia tua me remoueas: parum enim mihi prodesset, lauari, & super niuem dealbari, & spiritum rectum in me innouari, si tandem à facie tua cum reprobis proijciendus essem. Vt autem me non proijcias à facie tua Spiritum sanctum tuum ne auferas à me, id est, donum perseuerantiæ mihi tribue, efficiendo per gratiam tuam, vt Spiritus tuus sanctus iugiter in me

ma-

manēs, spiritum rectum in visceribus meis conferuet. Hoc loco notandum est, verum esse dogma Ecclesiasticum Conc. Trid. sess. 6. cap. 13. S. Augustini tract. 2. in Ioannē, & S. prosperi resp. 7. ad obiectiones Vincentianas, Neminē à Deo deferri, nisi prius ipse deferat Deū id est, non auferri Spiritum sanctum à iustis, nisi ipsi peccādo spiritum in se extinguant; tamen, vt homo non peccet, & spiritum non extinguat, ad donum perseverantiæ pertinere, de quo dicit Apostolus, Oramus, vt nihil mali faciat, 1. Cor. 13. De hoc dono hunc locum Psalmi intelligimus: cum enim dicit David, Spiritum sanctum tuum ne auferas à me: non significat, nō auferas, si peccaueris: sed ne auferas, vt non peccem.

XIII. Redde mihi lætitiā salutaris tui, & spiritu principali confirma me.

Respondet hic versiculus illis verbis Auditui meo dabis gaudium, & lætitiā: sicut enim prædixit, post veram, perfectamque iustificationem securum in homine internum gaudium, ex testimonio spiritus intus loquentis: ita nūc posteaquam petijt remissionē peccati, & infusionem gratiæ cum dono perseverantiæ, petit signum, & effectum iustificationis, dicens, Redde mihi lætitiā salutaris tui. id est, per peccatum amisi gratiam, & lætitiā consequentem: ideo sicut petijt reddi mihi gratiam amissam, ita consequenter peto reddi lætitiā salutaris tui. id est, lætitiā quæ nascitur ex donata à te mihi salute: ac ne fortē lætitiā extollat, & periculosam securitatem inducat, adiungit, Et spiritu principali confirma me, id est, peto, vt stabilis, & confirmes me in bono per spiritum principalem mihi à te inspiratum. In hebraico textu est vox, nediua, quæ significat principem, & spontaneum, siue liberalem; & potest referri tum ad Spiritum sanctum, qui verē princeps est omnium spirituum, & liberalissimus, ac munificentissimus, cum sit fons omnium donorum: tum ad spiritum, id

est affectum ipsius Davidis, qui petitur à Deo talis, qualis decet optimum principem, qui debet esse spontaneus erga Deum, & liberalis erga populum, S. Augustinus, & S. Hieronymus in commentario, & S. Bernardus serm. 3. de Pentecoste scribunt, posse per spiritum principalem intelligi Deum Patrem: per Spiritum rectum, Deum Filium; per Spiritum sanctum, Deum Spiritum sanctum. Sed videtur hæc pia, non tamen literalis expositio.

XIV.

Docebo iniquos vias tuas, & impij ad te conuertentur.

Exponit fructum iustificationis suæ, quæ redundabit in gloriam Dei, & multorum utilitatem. Ego, inquit, à te receptus in gratiam, post tam graues offensiones, docebo, & verbis, & exemplo vias tuas, misericordiam videlicet, & iustitiam: nam omnes viæ Domini misericordia, & veritas: & inde sequetur, vt impij exemplo meo edocti ad te conuertantur. Fuit autem David omnibus posteris insigne exemplum misericordiæ, & iustitiæ diuinæ: misericordiæ quidē, quia post tā graua scelera, mox vt ex corde dixit, Peccaui Domino, remissum fuit ei peccatum: iustitiæ autem, quoniam grauissimas temporales pœnas de eo Dominus sumpsit, vt non solum statim moreretur filius ex adulterio natus, sed etiam paulò post ipse eijceretur à solio Regni, vxores eius publice violarentur à proprio filio, duo eius filij Amon, & Absalon interficerentur. Hoc autem exemplum non solum profuit hominibus, illius seculi: sed etiam cæteris omnibus vsque ad mundi cōsummationem: nam Psalmus de hac re ab ipso compositus vbique frequentatur, & frequentabitur, quamdiu Ecclesiæ militantis status permanebit. Itaque impleuit David quod promisit cum hunc Psalmum edidit: docuit enim iniquos vias Domini, & multi peccatores ad Deum conuersi sunt, & alij deinceps sine dubio conuertentur. Verisimile quoque est, Dauidem post repara-

V 4 tio-

דִּבְרָה;

tionem suam multis prædicasse diuinā indulgentiam, atque eius exhortatione non paucos peccatores ad Deum fuisse conuersos.

XV. Libera me de sanguinibus Deus, Deus salutis meæ, & exultabit lingua mea iustitiam tuam.

Oravit paulò ante David pro ablutione peccati, & promittit, se docturum peccatores vias Domini: nunc orat pro liberatione à pœna, siue à vindicta, quā expebat sanguis Vriæ iniustè fusus, & promittit, se laudaturum Dei iustitiam. Cur autem dicat, de sanguinibus, & non potius, de sanguine, vt requirebat phrasis latina, rationē reddit S. Augustinus, quia voluit Interpres seruare numerum, quem inuenit in textu hebraico: in textu autem hebraico ponitur numerus multitudinis ad significandam magnam effusionē sanguinis, vt Gen. 4. Vox sanguinis fratris tui clamat ad me de terra. In hebræo est vox sanguinum, id est, vox multi sanguinis effusi. Sic igitur hoc loco dicitur, Libera me de sanguinibus, id est, libera me à voce multi sanguinis Vriæ, qui à me iniustè fusus clamat ad te, & vindictam contra me exposcit: & dicit, Libera me, quoniam videbat sanguinem illum, quasi militem armatum contra se stare: propiè etiam addit, Deus Deus salutis meæ: nam proprium est Saluatoris liberare ab imminente periculo. Et hæc etiā ratio est, cur adiungat, & exultabit lingua mea iustitiam tuam: nam liberatio, & saluatio vera per meritum Christi præiūsi fiebat, & nunc fit per meritum Christi re ipsa exhibiti. Meritum autem Christi exquisitissimè iustitiam continet, & talem, vt toto corde, & maxima vocis contentione laudari mereatur.

Atque hoc significat verbum hebraicū, תרנן therannen, pro quo nos habemus, exultabit, id est, exultando, & vociferando laudabit. S. Augustinus, & alij, per sanguines, intelligunt peccata: sed, vt benè notauit Euthymius, literalis sensus ad verum sanguinem Vriæ referendus

est; spiritualiter autem per, sanguinem; peccata intelligi possunt, quoniam peccata, ex praua concupiscentia oriuntur in concupiscentia verò præcipuè sanguis dominatur.

Domine labia mea aperies: & os meum annuntiabit laudem tuam.

XVI.

Hoc iam sequitur ex perfecta iustificatione, & liberatione peccatoris, vt labia solita Deum laudare; quæ per peccatū clausa fuerant, iterum per indulgentiam aperiantur ad gratiarū actionem, & laudem Redemptoris. Ait igitur, Domine labia mea aperies, id est, tu qui dem indulgendo, & condonando peccata, & fiduciam, & lætitiā restituendo, aperies labia mea, & tunc os meum annuntiabit laudem tuam prædicando misericordiā, & iustitiam, non solum præsentibus, sed etiam futuris hominibus.

Quoniam si voluisses sacrificiū dedissem, utique holocaustis non delectaberis.

XVII.

Reddit rationem, cur sacrificiū laudis offerre velit, quoniam videlicet, sacrificia pecorum Deo non placent, ac si dixisset, Os meum annuntiabit laudem tuam, quoniam sacrificiū laudis delectari rescio, non sacrificijs animantium brutorum: nam si ea tibi placerent, non distulisses ea offerre. Non est autem sensus, sacrificia pecorum nullo modo placere Deo, cum satis constet ex libro Leuitici à Deo illa esse instituta, & offerri iussa. Sed dicuntur non placere ex seipsis, quasi mactatio pecorum sit ex se opus Deo gratum vel vtile, aut necessarium: item dicuntur nō placere, si conferantur cum sacrificio Eucharistiæ, vt patet ex primo capite Malachiæ, vbi sacrificia vetera dicuntur cessatura, quando oblatio munda in omnibus gentibus offerretur, dicuntur etiam non placere, quando offeruntur à peccatoribus, vt dicitur Isaia primo: cū Deo ma-

gis

gis obedientia placeat, quàm victima-
runt oblatio. 1. Reg. 15. Denique dicun-
tur non placere ad expianda peccata;
quoniam impossibile est, vt dicit Apo-
stolus ad Hebr. 10. sanguine taurorum,
& hircorum auferri peccata: & in hoc
sensu dicit hoc loco Dauid, si voluisses
sacrificium pro remissione peccati mei,
dedissem utique: sed quia holocaustis
non delectaberis, ita vt eorum gratia
mihi peccata condones; ideò os meum
annunciabit laudem tuam: nam, vt dixi-
mus, in explicatione Psalmi superioris,
sacrificium laudis Deo gratissimum est,
quoniam in ara cordis igne charitatis
succenditur in hebræo videtur paulò a-
lièr haberi. Sic enim ad verbum legi-
tur, Quoniam non voles sacrificium, &
dabo: holocaustum non placebit. Sed
videtur repetenda negatio, cùm dicitur,
& dabo, vt sensus sit, quoniam non
voles sacrificium, ego quoque non da-
bo. Vel fortè Septuaginta Interpretes
loco negationis legerunt particulam
conditionalem: nam ea posita potest li-
tera hebraica sic legi, Quoniam si velles
sacrificium, & darem; quod est idem cū
eo quod nos habemus ex versione Sep-
tuaginta, Si voluisses sacrificium, dedis-
sem utique.

XVIII. Sacrificium Deo spiritus con-
tribulatus, cor contritum. & hu-
miliatum Deus non despicias.

Explicat clariùs quod sacrificium lau-
dis Deo placeat, illud videlicet, quod
ex corde contrito, & humiliato procedit,
quando videlicet homo agnoscens
miseriam suam, & misericordiam Dei,
humiliatur sub potenti manu eius, & il-
li honorem, & gloriam, sibi autem igno-
miniam, & confusionem tribuit. Dan. 9.
Tibi Domine iustitia, nobis autem con-
fusio faciei. & paulò post, Domine no-
bis confusio faciei, Regibus nostris, &
Principibus nostris, & Patribus nostris,
qui peccauerunt: tibi autem Domine
Deo nostro misericordia, & propitiatio.
Spiritus contribulatus idem est, quod,
cor, contritum: nam in codice hebraico,

& græco codice eadem vox repetitur,
spiritus contritus, & cor contritum; sed
Interpres maluit variare vocabula; &
sensus idem est: dicitur enim spiritus cō-
tribulatus, anima dolore affecta, ac per
hoc in tribulatione posita ob peccatum
in Deum commissum: sic etiam spiritus
contritus, dicitur anima ex dolore con-
cepto ob admissum peccatum, quasi scis-
sa, & in puluerem redacta, non amplius
retinens lapideam duritiem, & resiten-
tiam. Hæc autem contritio spiritus est
gratissimum Deo sacrificium; quia quæ-
admodum peccatis Deus offenditur, ita
pœnitentia placatur: & ideò rectè sub-
iungitur, Cor contritum, & humiliatum
Deus non despicias: quoniam despicit
Deus superbos, illisque resistit; sed hu-
milibus, qui se illi libenter subiiciunt,
semper dat gratiam.

Benignè fac Domine in bona **XIX.**
voluntate tua Syon, vt ædificetur
muri Hierusalem.

Hæc est vltima ratio, qua Dauid vti-
tur ad placandum Deum, & impetran-
dam perfectam iustificationem, & repa-
rationem, post tam grauem lapsum. Di-
cit enim hanc suam reparationem toti
populo profuturam, sicut toti populo
noceret eius ruina. Itaque rogat, vt præ-
stet hoc beneficium ipsi ciuitati Sion,
& Hierusalem. Benignè fac Domine
in bona voluntate tua Syon, id est, si ego
dignus non sum, qui exaudiar, respice ci-
uitatem, cuius ego sum caput, & illi be-
nefac sanando caput illius, in bona vo-
luntate tua, id est, iuxta beneplacitum
tuum, quo tibi complacuit, hanc ciuita-
tem tibi eligere in propriam, & peculia-
rem sedem. Vt ædificentur muri Hieru-
salem, id est, vt sic muri Hierusalem,
qui corruerunt, iterum ædificentur. Vo-
cat muros Hierusalem seipsum, qui in-
star murorum totum populum custodie-
bat, & defendebat; qua metaphora dici-
tur etiam de Rege Christo, Saluator pon-
etur in ea murus, & antemurale, Isai.
26. & Dabo te populo huic in murum
æneum, Hierem. 15. In hebræo legitur,
ædifica

ædifica muros Hierusalem, qui per lapsum meum ceciderunt: restitue mihi spiritum copiosum, & gratiam abundantē, vt populum tuum instar murorum defendere, & custodire valeam.

XX. Tunc acceptabis sacrificium iustitiæ, oblationes, & holocausta: tunc imponent super altare tuum vitulos.

Effectus iustificationis sunt opera iustitiæ, quæ placent Deo, vt vera sacrificia spiritualia, iuxta illud Apostoli ad Hebr. 13. Beneficentiæ, & communionis nolite obliuisci: talibus enim hostijs promeretur Deus, & 1. Pet. 2. Offerre spirituales hostias acceptabiles Deo, per Iesum Christum. Tunc, inquit, id est, cū ego perfectē reparatus, & iustificatus fuero, acceptabis sacrificium iustitiæ, bona videlicet opera mea, & populi mei; oblationes, & holocausta, id est, quæ bona opera, vel erunt spirituales oblationes, vel spiritualia holocausta. Oblationes spirituales sunt, cū quis ex charitate donat bona sua, eleemosynas erogande: holocausta verō, cū donat se totum in Dei obsequium, iuxta illud, Rom. 12. Obsecro vos fratres, vt exhibeatis corpora vestra, hostiam viuentem, sanctam, &c. tunc imponent super altare tuum vitulos, id est, cū viderint homines ista sacrificia iustitiæ acceptissima tibi esse, accurrent multi, & certatim imponent super altare tuum sacrificia, non quæcunque, sed omnium optima: sacrificium enim vituli erat omnium sacrificiorum præstantissimum: ac per hoc vitulos super altare imponere, nihil est aliud nisi opera iustitiæ perfectæ Domino Deo offerre. S. Augustinus more suo exponit hūc locum de ædificatione cœlestis Hierusalem, vbi sacrificia iustitiæ vndequaque perfectæ ab omnibus offerentur. Theodoretus, & Euthymius exponunt etiam mysticē de ædificatione Ecclesiæ Christianæ, quæ versatur in terris: iidem quoque addunt, posse intelligi hos duos versiculos de re ædificatione Hierosolymæ, quæ facta est tempo-

re Nehemiæ, vt videlicet Dauid in spiritu post desletum peccatum suum, & impetratam remissionem præuiderit peccatum commune totius gentis, ob quod euertenda esset Hierusalem, & simul orauerit pro remissione illius peccati, & restauratione Ciuitatis.

P S A L M V S L I.

Titulus, & Argumentum
Psalmi.

In finem intellectus Dauid, cū venit Doeg Idumæus, & nuntiavit Sauli: venit Dauid in Domum Achimelech.



Titulus Psalmi notissimus est ex historia libri primi Regum cap. 22. Argumentum autem est reprehensio Doeg Idumæi, qui calumniatus est Dauidem, & Achimelech Sacerdotem apud Regem Saul, & causa fuit perditionis multorum hominum.

Explicatio Psalmi 51.

Quid gloriaris in malitia, I. qui potens es in iniquitate?

Orditur Dauid ab interrogatione, vt efficacior sit reprehensio, quomodo M. Tullius aduersus Catilinam incepit, Quousque tandem abutere Catilina patientia nostra? Quid gloriaris, inquit, in malitia, qui potens es in iniquitate? gloriabatur enim Doeg Idumæus, quod accusatione sua perdidisset Sacerdotem Domini, & omnem familiam eius. Saul enim cū audiisset ab isto Doeg Idumæo, Dauidem fuisse receptum hospitio ab Achimelech Sacerdote, in tantam iram exarsit, vt non solum occidi iusserit

rit ab ipso Doeg Sacerdotē Achimelech
sed etiam octoginta quinque alios Sa-
cerdotes, qui erant cum eo: & deinde
percussit in ore gladij ciuitatem sacerdo-
talem, occidens omnes viros, & mulie-
res, paruulos, & lactentes, oues quoque
& boues, & asinos. Ecce quanta mala
nata sunt ex calumniatore illo, vt verē
dictus sit potens in iniquitate. Sed oc-
currit difficultas ex discordia codicum
hebraicorum, græcorum, & latinorum.
Nam S. Hilarius, & S. Augustinus legūt,
Quid gloriatur. Sed nostræ lectioni,
Quid gloriaris, fauēt textus hebraicus,
& S. Hieronymus, non solum in versio-
ne, sed etiam in commentario. Præterea
in textu hebraico, & græco constituitur
punctum post vocabulum, potenses,
Quid gloriaris in malitia, qui potens es.
Sed nostræ lectioni fauent S. Hilarius, &
S. Hieronymus in commentario, quam-
uis S. Augustinus, & Euthymius legant,
vt nunc habetur in hebraico, & græco
textu. Apparet igitur apud veteres fuisse
varias interpunctiones. Denique in
hebraico codice habetur, misericordia
Dei, pro eo quod est in græco, iniquitas:
sic enim ad verbum legitur in hebraico,
Quid gloriaris in malitia, qui potens es
misericordia Dei. Sed vox hebraica,
707 חֶסֶד, non significat solum misericor-
diam, sed etiam opprobrium, vt perspi-
cuum est ex Leuitico cap. 20. vers. 27. &
ex Prouerbijs, cap. 14. vers. 37. Igitur
hoc loco non debuisset verti, misericor-
dia Dei, sed, opprobrium Dei, quia occidit
multitudinem Sacerdotum, quod in op-
probrium Dei redundauit. Septuaginta
Interpretes verterūt, iniquitatem, quia
factum illud Doeg Idumæi iniquissimū
fuit: nam, vt legitur i. Reg. 22. nulli alij
ausi sunt mittere manus suas in sa-
cerdotes, etiam Rege iubente,
præter istum Doeg
Idumæum; qui ta-
men omnium
optimē
nouerat innocentiam Sacerdo-
tum, vt testis oculatus
omnium rerum.

Tota die iniustitiam cogitauit II.
lingua tua, sicut nouacula acuta
fecisti dolum.

Exaggerat miris modis calumniosa
illam delationem Doeg Idumæi: ac pri-
mum dicit, non fuisse repentinam dela-
tionem, sed diu meditatam, Tota die, in-
quit, iniustitiam cogitauit lingua tua. i.
assidue cogitabas quo modo iniuste de-
ferres; & tandem oblata occasione lin-
gua tua perfecit, quod diu antea partu-
riebat: quamuis enim cogitatio ad men-
tem pertineat, tamen David poeticè tri-
buit hoc linguae, quasi ipsa lingua tam
mala fuerit, vt etiam silens apud aures
hominum, tamen apud se ipsa cogitatio
loqueretur. Deinde addit deceptionem
ab ipso celerrimè factam esse, quomo-
do nouacula acuta expeditissime, & fa-
cillimè scindit: coniungit enim Prophe-
ta eleganter tarditatem meditationis
cū celeritate executionis. Verè enim
Doeg Idumæus quod diu antea cogita-
uerat, celerrimè data occasione perfec-
cit. Si quidem pauci sinis verbis omni-
no Sauli persuasit, Achimelech sacerdo-
tem cum Dauide coniurasse, qui fuit do-
lus & impostura grauissima: ait igitur, Si-
cut nouacula acuta fecisti dolum, id est,
sicut nouacula acuta facillimè scindit
capillos, ita tu facillimè Saulem decepi-
sti. Potest etiam per dolum, intelligi do-
losa, & fraudulenta occisio Sacerdotū,
quam Doeg effecit interficiendo totam
progeniem Sacerdotum vsque ad par-
uulos, & lactentes, quomodo nouacula
abradit pœnitius omnes pilos, quamuis
renuissimos. Dicitur autem dolosa occi-
sio, quia Sacerdotes non fuerunt vocati
ad Regem tanquam inimici, vt timere
potuerint se occidendos, sed circumuē-
ti sunt, & de improviso perierunt.

Dilexisti malitiam super beni- III.
gnitatem, iniquitatem magis,
quàm loqui æquitatem.

Declarat ex qua radice prodierit illa
calumniosa delatio; ac dicit, illam non
prodixisse

prodiisse ex ignorantia, vel casu aliquo, sed ex mala voluntate ipsius, qui dilexit semper malum potius quam bonum, & mendacium potius quam veritatem. Dilexisti, inquit, malitiam super benignitatem, id est, delectaris potius nocere proximo, quam illi benefacere. Iniquitatem magis, quam loqui æquitatem, id est, mendacium potius loqui te delectat, quam veritatem: nam verbum hebraicum, שקר, proprie mendacium significat: sed quia mendacium preciosum iniquitas quædam est; ideo Septuaginta Interpretes verterunt, iniquitatem, ut delcararet hic agi de mendacio pernicioso: sic etiã ipse David cum deberet mendacio opponere veritatem, opposuit tamen iustitiam, dicens, quam loqui æquitatem: quoniam voluit indicare mendacium illius Doeg Idumæi, non fuisse mendacium ociosum, vel officiosum, sed planè perniciosum, & iniustum. Porro per, æquitatem, intelligenda est iustitia, ut sonat vox hebraica, non autem id quod apud latinos proprie sonat vocabulum, æquitas. At non videtur Doeg mendacium aliquod protulisse, cum ait, Venit David in domum Achimelech. Respondeo, mendacium fuisse in verbis illis iuxta intentionem dicentis, & audientium: ipse enim significare voluit, Achimelech fuisse socium coniurationis David: & in eo sensu accepta sunt verba eius a Rege Saul.

III. Dilexisti omnia verba præcipationis lingua dolosa.

Explicat adhuc magis quod dixerit mendacium, & iniquitatem: & ait, fuisse mendacium verè perniciosum, cum fuerit causa perditionis plurimorum hominum innocentium. Dilexisti, inquit, omnia verba præcipationis, id est, dilexisti omnia verba, quibus possent homines innocentes præcipitari in ruinam, & perditionem: vox hebraica, בלע, significat deglutire, absorbere, perdere, & similia. Itaque illud præcipationis, exponi debet, præcipationis in mare, vel in foueam, ut absorbeantur, vel deuorentur, vel, positum est, præcipationis, pro,

ruinæ, & perditionis: constat autem ex lib. 1. Reg. cap. 22. propter verba Doeg Idumæi integram ciuitatem periisse. Illud autem, lingua dolosa, variè legitur ab auctoribus: nam S. Hilarius, & S. Augustinus legunt, linguam dolosam, ut etiam legit Theodoretus, & nunc habet græci codices; & si ita legatur, sensus erit, Dilexisti omnia verba præcipationis, linguam dolosam, id est, dilexisti omnia verba præcipationis, dilexisti, inquam, linguam dolosam. At S. Hieronymus quamuis ex hebræo vertat, linguam dolosam, tamen in commentario Psalmorum legit, in lingua dolosa, ut etiam legit Euthymius, licet non taceat varietatem codicum græcorum, in quorum nonnullis sit in accusatiuo linguam dolosam: & si quis ita legat, sensus erit, dilexisti omnia verba præcipationis in lingua dolosa, id est, per instrumentum lingue dolosæ. Nostri codices videntur accipiendi in vocatiuo, ut sensus sit, o lingua dolosa tu dilexisti omnia verba præcipationis, id est, delectaris semper loqui verba perniciosa: & videtur nostra lectio satis concordare cum textu hebraico, ubi simpliciter ponitur vocabulum sine villo signo casus obliqui.

Propterea Deus destruet te in v. finem, euellet te, & emigrabit te de tabernaculo tuo, & radicem tuam de terra viuentium.

Prædicit non fore impunitum peccatum Doeg Idumæi; sed pro temporali destructione Sacerdotum, cuius ipse causa fuit, retribuendum ei exitium sempiternum. Propterea, inquit, Deus destruet te in finem, id est, propter hoc tuum peccatum Deus te radicitus destruet in hoc seculo, & in futuro, ita ut in æternum destructus maneat: quibus significari videtur æterna desolatio in hoc seculo, & æterna damnatio in futuro. Atque hæc est iusta retributio impiorum, ut qui alios perdunt, ipsi quoque malè pereant. Deinde quod generatim dixerat, explicat per partes dicens, Euellet te, & emigrabit te de tabernaculo tuo, & radicem tuam

tuam de terra viuentium, id est, hoc modo te penitus destruet, quia puniet te exilio, & orbitate, ita vt primum amittas opes, & patriam, deinde in exilio; & sine liberis moriaris. Euellet, inquit, te, & emigrabit, id est, migrare faciet de tabernaculo tuo, & sic exul, & vagabundus errabis: & radicem tuam euellet de terra viuentium, id est, te cum omni posteritate tua de terra eradicabit: filij enim similes sunt radicibus, quia per eos Pater radicatur, & stabilitur in terra. Et quoniam per terram viuentium significari potest patria cœlestis, indicatur hoc loco, vt supra diximus, etiam damnatio sempiterna. In hebraico textu, pro, euellet te, habetur, iac̄theca, quam vocem. S. Hieronymus vertit, terreat te. Sed S. Hieronymus deduxit eam vocem, a chathat, quod est terrere. Cœterum Septuaginta Interpretes deduxerunt a chatha, quod est capere siue carpere, quod idē est cum euellere.

יחד
חתת
חתת

VI. Videbunt iusti, & timebunt & super eum ridebunt, & dicent, Ecce homo qui non posuit Deum adiutorem suum

VII. Sed sperauit in multitudine diuitiarum suarum, & præualuit in vanitate sua.

Ex pœna impij delatoris id sequetur, vt multi erudiantur. Videbunt iusti, & timebunt, id est, casum istum considerabunt viri iusti, & cordati, & horrebunt: Et super eum ridebunt, dicentes, Ecce homo, &c. id est, & illum irridebunt, quod stultissimē egerit, cum in Deo, qui potentissimus est, sperare noluerit, & in diuitijs fragilibus, quæ facillimē amittuntur, spem suam posuerit. Et præualuit in vanitate sua, id est, eundem irridebunt, quod præualere studuerit nō in vero robore, verāq. virtute, sed in insidijs, & mendacijs vanitate plenissimis: illud enim, præualuit, non significat, quod verē tādē præualuerit, sed quod opinione sua præualere se posse crediderit: nā etiam si ad tempus aduersus innocentes præua-

lere visus est: tamen exitus demonstrabit, eum succubuisse, non præualuisse; quando iusti stabunt in magna constantia aduersus eos, qui se angustiauerunt.

Ego autem sicut oliua fructifera in domo Dei; speraui in misericordia Dei in æternum, & in seculum seculi. VIII

Concludit Psalmum ostendens se omnino contrariam viam ingressum esse. Ego, inquit, similis sum oliuæ fructiferae in domo Dei, id est, non euellar, neque eradicabor, vt Doeg lignum aridum, sed radicabor magis & magis, vt oliua speciosa, semper virens, & fructum adferēs & quia talis sum, ideō speraui in misericordia Dei in æternum, & in seculum seculi, id est, speraui, me adiutum iri a Deo in æternum, & in seculum seculi. Vbi mirē opponit se Doeg Idumæos; illum comparat ligno arido; se verō oliuæ virenti: illum dicit euellendum etiam de tabernaculo suo; se dicit radicandum in domo Dei: illum dicit, sperasse in diuitijs suis, se autem in misericordia Dei.

Cōfitebor tibi in seculum, quia IX. fecisti: & expectabo nomen tuū, quoniam bonum est in cōspectu sanctorum tuorum.

Gratias agit pro re futura, quasi præterita, quoniam futura apud Deum, & in cognitione Prophetarū certissima sunt. Cōfitebor, inquit, tibi in seculum, id est, laudabo te semper, quia fecisti iudiciū hoc, vt sperantem in diuitijs suis cōfunderes, & destrueres; sperantem in te consolares, & ædificares. Et expectabo nomen tuum, id est, & semper deinceps sperabo in te: idem enim est sperare in Deo, & expectare Deum, & nomē Dei pro ipso Deo ponitur. Quoniam bonum est in cōspectu Sanctorum tuorum, id est, meritō sperabo in nomine tuo, quoniam nomen tuum dulce est Sāctis tuis, qui eius dulcedinem gustauerunt.

PSAL.

P S A L M V S LII.

Titulus, & Argumentum.

In finem pro Machelet intelligentia David.

Id titulus habet unam vocem non interpretatam, videlicet pro Macheleth. Et sanctus Hieronymus vertit, per chorum. Sed per chorum, videtur

intellexisse instrumentum musicum, ut ipse idem testatur in epistola ad Dardanum (si tamen ea epistola ipsius est) de musicis instrumentis; quo modo nonnulli accipiunt vocabulum chori in Psalmo ultimo, in illis verbis, in tympano, & choro, in chordis & organo. Neque improbabile est per chorum posse intelligi cœtum cantorum canentium, ut sensus sit, Psalmum esse compositum pro choro, ut videlicet canatur a multis simul. Fateor tamen priorem expositionem videri veriore; quoniam Septuaginta Seniores non reliquissent eam vocem non interpretatam, nisi existimassent ea voce significari nomen proprium alicuius instrumenti musici. Quod additur, intelligentiæ David, significat, in hoc Psalmo aperiri intelligentiam, siue eruditionem David, ut vertit S. Hieronymus: ex quo titulo colligitur argumentum Psalmi, quod est, deploratio insipientiæ generis humani: ideo enim fit mentio intelligentiæ David, quia per ipsum conarguenda erat cæcitas, & insipientia generis humani.

Explicatio Psalmi 52.

- I. **D**ixit insipiens in corde suo, non est Deus.
- II. Corrupti sunt, & abominabi-

les facti sunt in iniquitatibus suis, non est qui faciat bonum.

Deus de cœlo prospexit, ut vi- III. deat si est intelligens, aut requirens Deum.

Omnes declinaverunt, simul IIII. inutiles facti sunt, non est qui faciat bonum, non est usque ad vnum.

Nonne scient omnes, qui operantur iniquitatem, qui deorant plebem meam, ut cibum panis?

Deum non inuocauerunt, illic VI. trepidaverunt timore, ubi non erat timor.

Quoniam Deus dissipavit ossa VII. eorum, qui hominibus placent: confusi sunt, quoniam Deus spreuit eos.

Quis dabit ex Sion salutare Is- VIII. rael? cum converterit Deus captivitatem plebis suæ, exultabit Iacob, & lætabitur Israel.

Hic Psalmus idem ferè est cum Psalmo tertio decimo, inde igitur petatur explicatio: satis enim erit hic annotare diuersitatem vtriusque Psalmi.

Primus versiculus est omnino idem.

Secundus versiculus est etiam idem, nisi quod in isto habetur, in iniquitatibus, in illo, in studiis: sed idem est sensus: studia enim illa sunt affectus, & desideria mala, quæ omnia iniqua sunt, & peccata, ac per hoc iniquitates.

Tertius versiculus idem est, nisi quod hic dicitur, Deus, ibi dicitur Dominus.

Quartus versiculus idem omnino est.

Quintus versiculus, sextus, & septimus, qui habentur in Psalmo tertio decimo, in hoc non habentur: sed, ut ibi admonuimus, illi tres versiculi additi sunt ex diuersis Scripturæ locis, & ad Psalmum propriè non pertinent.

Quintus versiculus, qui responder octauo

octauo in Psalmo tertiodécimo, idem cum illo est, nisi quòd hic dicitur, Nonne scient; ibi dicitur, Nonne cognoscent.

Sextus versiculus, qui respondet nono, idem est cum illo, nisi quòd hic dicitur, Deum, ibi Dominum.

Septimus versiculus, qui respondet decimo, planè diuersus est. Ibi enim dicitur, Quoniam Dominus in generatione iusta est: consilium inopis confudistis, quoniam Dominus spes eius est: hic verò dicitur, Quoniam Deus dissipauit ossa eorum, qui hominibus placent, confusi sunt, quoniam Deus spreuit eos. Hic igitur versiculus, qui solus explicandus est, reddit rationem, cur impij trepident timore, vbi non est timor; & dicit, causã esse, quoniam Deus dissipat omnia ossa eorum, id est, debilitat omne robur eorum, vt etiam leuissima quæque fornicent: id verò facit admirabili prouidentia sua infatuando consilia eorum, impediendo conatus eorum, & ad nihilum redigendo omnes machinationes eorũ: ossa enim in scripturis pro fortitudine passim accipiuntur. Addit Propheta, qui hominibus placent; quoniam eiusmodi homines pleni sunt timore humano, siue, mundano, & totum studium eorum est hominibus placere. Apostolus autè è contrario dicit, si hominibus placerem, Christi seruus non essem. In hebræo nõ habetur, Qui hominibus placent, sed, Circundantium te: sed Septuaginta Interpretes non legerunt, chonac, quod est, circundantium te, sed, chonaph, quod significat hypocritam, simulatorem adulatorem, quam vocem rectissime interpretati sunt, *ἡ ὑποκριτικὴ*, id est, eorum, qui hominibus placent: eiusmodi enim sunt adulatores, & hypocritæ. Adiungit Propheta, Confusi sunt, quoniam Deus spreuit eos: quibus verbis videtur alludere ad versiculum decimum Psalmi decimitertij, Consilium inopis confudistis, quoniam Dominus spes eius est. Quasi dicat, vos impij confudistis consilium inopis confidentis in Deo: & Deus confundet vos, vt sæpè erubescere cogamini videntes irrita consilia vestra, quoniam in Deo non sperastis, & Deus spre-


uit vos, ac per hoc non adiunxit vos. Possent etiam hæc referri ad nouissimum iudicium, in quo omnes impij confundentur, quoniam Deus Iudex omnium spernet eos, dicens, Non noui vos, ite in ignem æternum.

Octauus versiculus, qui & postremus, idem est cum postremo versiculo Psalmi tertijdecimi, nisi quod ibi dicitur, Cum auerterit Deus captiuitatem. Sed quamquam auertere, & conuertere videntur esse contraria: tamen hoc loco sensum eundem faciunt: dicitur enim Deus auertere captiuitatem, cum tollit e medio, & ad nihilum redigit ipsam captiuitatem; quod fit cum captiuis liberatis, captiuitas esse desinit. Dicitur autem idem Deus conuertere captiuitatem, quando captiuos reuocat, & reducit in patriam. Denique cum dicitur auertere captiuitas, sumitur captiuitas pro forma, id est, pro ipsa vera captiuitate: cum dicitur conuertere captiuitas, sumitur captiuitas pro personis, quæ erant captiuæ.

PSALMVS LIIL

Titulus, & Argumentum.

In finem in carminibus intellectus Dauid, cum venissent Ziphai, & dixissent ad Saul, nonne Dauid absconditus est apud nos?



Ex titulo colligitur argumentum. Scribitur li. 1. Reg. cap. 23. Ziphæos proditores fuisse Dauidis, qui apud eos tamquam apud amicos manens, declinabat persecutionem Saulis. Ipsi enim Sauli patefecerunt Dauidem apud se latere: vnde factum est, vt Saul cum maximo exercitu ad eos accederet, & quasi

in modum coronæ totum locum cingeret, vt David penè de vita desperaret. Occasione igitur tam imminentis periculi David ad Deum per orationem confugit, & nunc Psalmum, Domino inspirante, composuit. Theodoretus, & Euthymius, quem aliqui recentiores sequuntur, existimant Psalmum compositum fuisse post liberationem; & esse hymnum gratiarum actionis. S. Hieronymus, & S. Augustinus, quamuis mysticè solum exponant, tamen indicant Psalmum compositum fuisse instante persecutione, quod clariùs tradit S. Hilarius exponens ad literam & mysticè. Hanc sententiam veriore esse, & ipse titulus, & totus Psalmi contextus ostendit. Illud, intellectus David, significat, hanc fuisse sanctam prudentiam Davidis, vt intelligeret in tam magno periculo ad Deum esse recurrendum, & in illo sperandum. In qua oratione intellexit etià inspirante Domino, se de omni periculo liberandum.

Explicatio Psalmi 53.

I. **D**eus in nomine tuo saluum me fac, & in virtute tua iudica me.

Orat Deum, vt quando defecerant omnia humana remedia, ipse per se ad inuandum accederet. Deus, inquit, in nomine tuo, id est, potestate tua, cui omnia cedunt, saluum me fac: & per alia verba idem significans, addit, & in virtute tua, id est, potentia, & robore tuo, iudica me, id est, sis Iudex meus, & pro meritis retribue mihi defensionem; & aduersario meo ultionem: non enim habebat tunc David ad quem appellaret ab iniustitia Regis, nisi solum Deum. Quo exemplo admonemur, nunquam esse desperandum de auxilio Domini, etiam si mors euidentissimè imminere videatur; Deus enim vbique est, & omnia in manibus habet, & cultores suos ad se confugientes non despicit.

Deus exaudi orationem meam. II.
am, auribus percipe verba oris mei.

Iam confessus fuerat potentiam Domini: nunc orat, vt Dominus ad potentiam adiungat voluntatem. Deus, inquit, exaudi orationem meam, quasi dicat, scio te omnia posse; sed oro, vt velis; idè peto vt exaudias orationem meam, qua te rogavi, vt potestate tua saluum me faceres. Idem repetit sequentibus verbis, Auribus percipe verba oris mei, id est, ne auertas aures tuas, neque despicias orationem meam.

Quoniam alieni insurrexerunt III.
aduersum me, & fortes quæsierunt animam meam & non proposuerunt Deum ante conspectum suum.

Explicat pericula a quibus liberari desiderat, dicens, Quoniam alieni insurrexerunt aduersum me, id est, Ziphei, qui proximi videbantur, sed corde alieni erant a me: insurrexerunt contra me, irritantes Saulem ad me persequendū; & fortes quæsierunt animam meam, id est, & Saul cum armato exercitu, quæsierunt vitam meam ad extinguendum eam: hæc enim erat tota ratio persecutionis: quia enim timebat Saul, ne aliquando David regnaret, cupiebat eum de medio tollere: quamuis enim David innocentem esse Saul non ignoraret, tamen cupiditas retinendi in propria familia Regnum, quam rationem status nunc vocant, faciebat, vt iustum videretur quod iniustissimum erat. Et non proposuerunt Deum ante conspectum suum, id est, & neque illi, neque isti timorem Domini præ oculis habuerunt: illi enim, Ziphei videlicet, gratiam Regis, legi Domini; & isti, Saul, & satellites eius, regnandi cupiditatem iustitiæ, quā Deus imprimis obseruari iubet, anteposuerunt. Verè enim initium omnium malorum

rum est auertere oculos mentis a Deo, & eius lege naturali omnibus nota. vide S. Thomam quæst. prima de Malo, artic. 3.

III. Ecce enim Deus adiuuat me, & Dominus susceptor est animæ meæ.

Illi, inquit, non habuerunt Deum ante oculos suos: sed Deus habuit illos ante oculos suos, & vidit quid molirétur, & non permisit, ut malam suam voluntatem implerent. Illud, ecce, significat repentinam illustrationem Prophetæ, qua præuidit auxilium Dei sibi non defuturum, & tam certo præuidit, ut tamquam de re præsentē dicat, Ecce Deus adiuuat me. particula, enim, vel ponitur pro, autem, vel subintelligitur aliquid, hoc modo, Illi non proposuerunt Deum ante conspectum suum, ut facere debuissent: ecce enim Deus adiuuat me. Et Dominus susceptor est animæ meæ, id est, ecce, video Deum me adiuuantem, & susipientem quasi in sinu suo custodiendam vitam meam, quā isti quærunt mihi eripere. Et verè repentinum, & inopinatum fuit auxiliū Dei: nam cum vndique circumdedisset Saul exercitu suo Dauidem, ut euadere non posset: repente venit nunciū ad Saulē, qui diceret Philisthæos magno agmine se infudisse in regionem Saulis. quo nūcio coactus est Saul recedere a persequendo Dauidem; & fortasse orante Dauid venit ille nunciū, & Dauid, qui eum in spiritu præuiderat, dicit, Ecce Deus adiuuat me, & Dominus susceptor est animæ meæ.

V. Auerte mala inimicis meis, & in veritate tua disperde illos.

Per imprecationem intelligitur prædictio, ut sæpè monuimus; & in hebræo legitur per modum prædictionis. sic enim ad verbum reddi possunt verba hebraica, Reuertetur malū inimicis meis. nostra autem lectio faciliior esset si ita

Bellarm. in Psalm.

legeremus, Auerte mala a me ad inimicos meos. Sed in eundem sensum verba explicanda sunt. Auerte mala, quæ mihi impendent, a me, & conuerte illa ad inimicos meos. Quod quidem ita factū est, nam Saul Dauidem persequabatur: & continuò factum est, ut Philisthæi persequerentur Saulem. Ita pericula, quæ imminabant a Saule Dauidi, cœperunt imminere a Philisthæis Sauli. Illud autem, & in veritate tua disperde illos; impletum est non diu postea. nam in montibus Gelboe periit Saul cum exercitu suo, in quo exercitu credibile est adfuisse, & similiter periisse illos, qui Dauidem persecuti fuerant: disperdere enim hoc loco non significat, dissipare, sed omnino delere, & extinguere, si vox hebraica consideretur. Vide lib. i. Reg. cap. vlt. Illud in veritate tua, significat, iuxta promissiones tuas, siue secundum iustitiam tuam, qua reddis unicuique secundum opera sua.

Voluntariè sacrificabo tibi, & VI confitebor nomini tuo Domine, quoniam bonum est.

Videns Propheta, se continuò exauditum, siue ex prænotione futuræ liberationis, siue ipso orante discesserit Saul propter pericula Philisthinorum sibi denunciata; gratias agit Deo, ac dicit, Voluntariè sacrificabo tibi, id est, promptissimo animo offeram sacrificium laudis: & idem alijs verbis repetens ait, & confitebor nomini tuo, id est, confessionem laudis offeram tibi (nomen enim Dei pro ipso Deo ponitur) quoniam bonum est. Siquidem nomen Dei, pro re significata sumptum, id est, pro ipso Deo, res est omnium optima; ita ut Christus ipse dixerit, Nemo bonus, nisi solus Deus. Matth. 19. Luc. 18. Marci 10. sanctus Augustinus rectè monet, occasione aduerbij, voluntariè, Deum esse diligendum propter seipsum, amore puro, non tam propter præmij aliquod, quàm propter ipsius Dei summā, & inefabilem bonitatem; quam dilectionem, qui habet, non minus Deo sacrificat,

X

ei que

ei que confitetur in prosperis, quàm in aduersis: siquidem Deus non minus bonus est, cùm nos flagellat, quàm cùm pa- scit & recipit.

volunt in Christo Iesu, persecutio- nes assiduè patientur.


VII. Quoniam ex omni tribulatio- ne eripuisti me, & super inimicos meos despexit oculus meus.

Ostendit ex effectu Deum esse bonũ; quoniam tam cito exaudiuit seruum suum. Quoniam, inquit, ex omni tribula- tione eripuisti me, id est, quoniam reue- lans mihi meam certam liberationem, iam in spe ex omni tribulatione libera- sti me, & super inimicos meos despexit oculus meus, id est, & in eadem præno- tione iam oculus meus vidit inimicos meos prostratos, & consumptos: refer- tur enim hoc ad id, quod antea dixerat, in virtute tua disperse illos. Nisi fortè placeat, vt supra indicauimus, ipso Pro- pheta orante incœpisse eius liberatione recedente videlicet Saule propter nun- cium allatum de aduentu Philisthino- rum; tunc enim sensus erit, Quoniam ex omni præsentī tribulatione eripuisti me, & oculus meus vidit inimicos meos recedentes cum Saule Duce ipsorum. Nam vox illa, despexit, non significat contemptum, sed simplicem visionem, vt perspicuum est ex hebraica voce, *רחמתי*, *rahatha*; verti enim potuisset, Super ini- micos meos respexit oculus meus, id est, oculus meus liberè, & sine timore respexit inimicos meos. Vulgatus Inter pres posuit, despexit, vt significaret Da uidem ex alto loco vidisse inimicos pro- stratos, aut recedentes, iuxta duas expo- sitiones indicatas. Verè enim Dauid des- pexit, id est, deorsum aspexit inimicos suos, siue quia tunc erat in monte edito corporaliter, siue quia spiritus prophe- tiæ in altum illum euexerat, & ex alto diuinæ reuelationis inimicos suos vidit quasi iacētes in imo. Porro hic Psalmus quotidie in Ecclesia frequentatur ad ho- ram primam, vt exemplo Davidis disca- mus aduersus omnes persecutores ar- mis orationis ad initium diei communi- ri, scientes quod omnes qui piè viuere

PSALMVS LIIII.

Titulus, & Argumentum.

*In finem, in carminibus intellectus
David.*



N titulo nihil est, quod non sit alias explica- tum. Argumentum ef- se volunt Sancti Pa- tres Hilarius, & Hie- ronimus de passione Christi: Euthymius, &

Theodoretus Psalmum exponi volunt de Dauid fugiente persecutionem Sau- lis vel potius Absalonis: S. Augustinus de homine iusto in tribulatione posito, siue de corpore Christi, quod est Eccle- sia. Sed omnes expositiones admitti de- bent, aut certè possunt: nam quod de Dauid Psalmus ad literam rectè expo- natur, intelligi potest ex præcedente, & sequente, & ex alijs multis, vbi disertis verbis ponitur in titulo, Psalmum esse compositum occasione talis, vel talis persecutionis, quàm Dauid patiebatur: quod etiam Dauid figuram Christi gesse- rit, & quod Psalmi ferè omnes ad Chri- stum principaliter pertineant, dubitari non potest, cùm ipse Dominus aliquo- ties Psalmos de se scriptos allegauerit, & Lucæ vltimo dixerit, Necesse est im- pleri omnia, quæ scripta sunt in lege Mo- sis, & Prophetis, & Psalmis de me. Denique quod exemplo

Davidis omnis iustu-
eodem modo orare
possit, dubium
esse non po-
test.

Expli-

Explicatio Psalmi 54.

I. **E**Xaudi Deus orationem meā, & ne despexeris deprecationem meam: intende mihi, & exaudi me.

Incipit David, quasi a proemio, quo captatur benevolentia Iudicis, ac petitur, ut benignè, & attentè audire velit: ac primùm dicit, Exaudi Deus orationem meam. Deinde ne fortè oratio, vel persona orantis displiceat, vtrunque commendat, ac de oratione dicit, Ne despexeris deprecationem meam, id est humilem, & supplicem precem meam: id enim propriè significat vox hebraica hoc loco posita: de persona verò orantis addit, Intende mihi, & exaudi me, id est, benignè me respice, & benignam aurè mihi porrage. Fortasse etiam ter eandè orationem repetit, quia nouerat Deum esse Trinitatem, & orationem dirigit ad Patrem, deprecationem ad Filium, personam orantis ad Spiritum sanctum. Denique tertio idem alijs verbis orat, ut affectum, & desiderium ostendat: quo modo & Christus in horto eandem orationem tertio repetiuit, Matth. 26. & Apostolus ter Dominum rogauit. 2. Corinth. 12.

II. **C**ontristatus sum in exercitatione mea, & conturbatus sum à voce inimici, & a tribulatione peccatoris.

Exponit nunc materiam orationis suæ, quæ est vehemens persecutio inimicorum, ob quam contristabatur, & conturbabatur, & a qua liberari desiderabat. In hebræo, pro voce, Contristatus, est verbum, arid, quod significat flebo, siue ululabo; sed futurum ponitur pro præterito, ut ex versione Septuaginta, & S. Hieronymi perspicuum est. & pro uoce, in exercitatione mea, est, Sichi, quod significat, meditationem, & sub-

missa voce loquutionem. Itaque sensus est, fleui dum exercerer cogitando, & necum ipse conferendo misérias meas: quod idem est cum eo, quod nos habemus, Contristatus sum in exercitatione mea. Sed verba hebraica clariora sunt. sequitur, Et conturbatus sum a voce inimici, & a tribulatione peccatoris, id est, non solum tristis fui, & fleui ob præsentis misérias, sed etiam timui futuras, conturbatus a voce inimici cōminantis longè peiora, & a tribulatione, quam minabatur peccator inimicus meus. Idem enim est a voce inimici, & a tribulatione peccatoris: nam inimicus peccator voce sua tribulationem minabatur innocentem. Istum autem inimicum peccatorem intelligere possumus, tum Saulè, aut Absalonem respectu Davidis; tum Caipham, & Annam respectu Christi; tum quemlibet persecutorem respectu hominis probi,

Quoniam declinauerunt in me iniquitates, & in ira molesti erant mihi.

Ostendit, non vanam fuisse turbationem seam. Quoniam inimici declinauerunt, inquit in me iniquitates, id est, proiecerunt in me falsa crimina, conuicia, calumnias, opprobria, ut exponunt SS. Patres Hilarius, & Augustinus: ex quo intelligimus, vocem, iniquitates, esse in casu accusandi, non in casu nominandi, ut nunc habent codices græci communiter: & in ira molesti erant mihi, id est, & ob iram in me conceptam molesti erant non verbis tantum calumniantes, sed etiam factis me persequentes.

Cor meum conturbatum est in me: & formido mortis cecidit super me.

Explicat magis in particulari, quod dixerat, conturbatus sum. Conturbatō, inquit, est cor meum in me, id est, in intimis meis, ubi sedes cordis est, conturba-

tus sum. In hebræo habetur clariùs, cor meum doluit in medio mei. Et subiūgit rationem dicens, & formido mortis cecidit super me: nulla enim res facilius ad intima descendit, & magis totum hominem turbat, quàm mortis imminenti periculum: hoc impletum fuisse in Dauid, cùm plorans fugeret a facie Absalō, & in Christo cùm in horto paueret, & sudorem sanguineum funderet, notissimum est.

v. Timor, & tremor venerunt super me, & contexerunt me tenebræ.

Idem alijs verbis dicit, & quasi summam omnia comprehendit: nam timor in anima erat, tremor in corpore, tenebræ autem mœroris totum hominem operuerant: sicut enim lætitia exhilarat & dilatat cor, sic etiam mœstitia cōstringit, & obducit, ac per hoc tenebras facit. vnde etiam qui mœrent, tenebras quærunt, in cubicula se abdūt, fœnestras claudunt.

VI. Et dixi quis dabit mihi pēnas, sicut columbæ, & volabo, & requiescam?

Verba sunt iusti suspirantis ad patriā cœlestem, neque enim alibi vera requies inuenitur. quasi dicat, o si nunc possem ad altissimos montes cœlestis Hierusalem confugere, quo modo columba potest pernecitate sua ungues accipitris euadere, vel quo modo columba tempore diluuij cùm non inueniret, vbi requiesceret pes eius, ad manus Noe, atq. ad arcam redijt. Propriè autem iustus columbæ comparatur, quæ innoxium est animal, fœcundum, & simplex, & nō pugnando; sed fugiendo vincit: sic enim & vir iustus aduersus tentationes accipitris Tartarei fugiendo potiùs, quàm disputando, vel altercando vincere solet.

Ecce elongaui fugiens, & māsi VII. in solitudine.

Hæc satis appositè Dauidi conueniūt qui fugiens Saulem, & postea Absalonē ad desertum se contulit. quasi dicat, quia non datur mihi, vt instar columbæ ad locum veræ quietis ascendam, feci quod potui: nam elongaui fugiens, & mansi in solitudine. Idem conuenit cuiuslibet viro iusto in tribulationibus posito, qui cùm non possit ad patriam commigrare, elongat se cogitatione a tumultibus seculi, quantum potest, & ad solitudinem cordis, & conscientię se transfert, vbi solus cum solo Deo colloquens aliquantulam quietem inuenit.

Expectabam eum, qui saluum VIII. me fecit à pusillanimitate spiritus, & tempestate.

In ea solitudine expectabam Deum, id est, auxilium eius, qui me saluum fecit; id est, qui alias saluum fecit, & saluum facere solet a pusillanimitate spiritus, & tempestate, id est, a paruo animo ad tolerandum, & a magna tentatione. Vbi coniunguntur duo, quæ mirum in modum amplificanc necessitatem auxilij diuini: nam si paruitati animi contingat parua tentatio, vel magno animo magna tentatio, æquale erit certamen; sed si cum paruitate animi iungatur magna tentatio, intolerabilis erit. Hoc igitur nunc dicit, sibi accidisse, ac proindè petit a Deo vel vt sibi addat vires, vel diminuat tentationem, vel (quod magis optandum est) vtrunque faciat. Sed Codices hoc loco sunt admodum varij: nam hebraicus habet ad verbum, Festinabo, vt saluer a spiritu concitato, a tempestate. Græcus autem habet, Expectabam Deum, qui me saluum faceret a pusillanimitate, & tempestate. Noster autem interpretes videtur aliquid ab hebræo, aliqd a græco accepisse. prima vox hebraica achisa significat, אחיסא Festinabo, nec video quid legere poterint

rint Septuaginta, vt verterent, expectabam; ideo existimo illos vertisse non verba, sed sensum: nam, festinabo vt saluer, bene cohæret cum, expectabam salutem Deum: siquidem expectabat salutem ex festinatione per orationem ad Deum. quo modo, qui in fuga spem ponit, dicere potest, expectavi salutem ex festinatione in currendo, & fugiendo. Sic igitur vir iustus festinans ad Deum feruenti desiderio, orando, & pulsando, expectabat auxilium, quo saluus fieret. Illa vox, Deum, quæ est in græco, non est in hebræo, neque in Patribus, Hilario, Hieronymo, Augustino. Itaque videtur addita a posterioribus explicandi gratia. Illud autem a pusillanimitate spiritus; facile colligitur ex hebræo, & concordatur cum græco: nam vox hebræa Soa, non habetur, nisi hoc loco, & communiter dicitur significare concitationem; vnde sanctus Hieronymus vertit, a spiritu tempestatis, id est, a spiritu concitato: sed quia sequitur, a turbine, siue a tempestate: rectius dicemus, spiritum concitatum hoc loco significare spiritum hominis metu concitatum, & turbatum, quod idem est cum pusillanimitate spiritus. nam qui magno spiritu, vel animo sunt, non facile turbantur, & concitantur; sed firmi, ac stabiles permanent. Itaque sensus erit in hebræo, festinabo, vt saluer a spiritu concitato, a tempestate, id est a paruitate animi, & a tempestate tribulationis. In græco non nominatur spiritus, quia intelligitur in voce pusillanimitatis, idem est enim pusillus animus, & pusillus spiritus.

IX. Præcipita Domine, diuide linguas eorum: quoniam vidi iniquitatem & contradictionem in ciuitate.

Qui expectabat salutem a Domino per orationem, orat Deum, vt impediat consilia hostium suorum. Præcipita, inquit, Domine, id est, præcipita in profundum, inimicos meos: hoc enim significat vox hebræa, & græca. Vnde legit Augu-

stinus, demerge eos: deinde addit modum, quo velit illos præcipitari in exitum. Diuide, inquit, linguas eorum, id est, fac vt qui contra me conspirarunt, non conueniant in consilijs; sed vnus hoc, alius aliud iudicet, & loquatur. & verè sic accidit inimicis Dauid: nam cū Absalon capta ciuitate consuleret de modo perdendi Dauidem, varij varia consilia dederunt: infatuauit autem Deus consilium Achitophelis, quia inspirauit Absaloni, vt consilium eius non sequeretur; inde deteriore consilio electo rem malè gesserunt, & plurimi eorum perierunt. Itaque ex diuisione linguarum in præcipitum acti sunt. vide lib. 2. Reg. cap. 17. & 18. sequitur, Quoniam vidi iniquitatem, & contradictionem in ciuitate. Hæc etiam satis appositè exponuntur de Dauid, qui viderat in ciuitate sua Hierusalem prodicionem iniquissimam aduersus personam suam, & rebellionem manifestissimam, quæ significata est nomine contradictionis; quia contradicebant eius imperio, cū Absalonem in Regem elegissent. Possunt etiā exponi hæc omnia de Christo, vt exponit sanctus Hilarius: necnon de viro iusto, qui persecutionem iniustam patitur & contradictionem a ciuibus Babylonix, id est, ab amatoribus Mundi, qui semper persequuntur, & odio habent eos, qui de Mundo non sunt: sed vt hospites, & peregrini in Mundo sunt.

Die ac nocte circundabit X.
eam super muros eius iniquitas:
& labor in medio eius, & iniustitia

Et non defecit de plateis eius XI.
vsura, & dolus.

Pergit describere iniquitatem ciuitatis, a qua ipse persecutione patiebatur; ac mirabili modo loquendi dicit, iniquitatem, quasi armatum militem obtinuisse muros eius, vt iniustitia non posset accedere. Die, inquit, ac nocte, id est, semper, circundabat eam super muros eius iniquitas, id est, iniquitas super muros

X 3 eius

eius consistens circumdabat eam, instar custodiæ militaris; & labor in medio eius, & iniustitia, id est, & interim intus in ipsa ciuitate nihil aliud erat, nisi labor miserorum, & iniustitia potentiorum; dum secure, & liberè iniusti diuites, & potentes opprimerent pauperes, & imbecilles. Et nō defecit de plateis eius usura, & dolus, id est, & oppressio illa partim erat manifesta, dum in ipsis plateis exigenter usuras diuites a pauperibus: partim occulta, dum varijs donis, & insidijs eos circumueniebāt, & vexabāt. Hæc conueniebant quidem Hierosolymæ tempore Dauidis, sed multo magis tempore Christi; & multo maximè conueniunt Babylonæ, id est, amatoribus Mundi huius, in quo regnat concupiscentia carnis, concupiscentia oculorū, & & superbia vitæ.

XII. Quoniam si inimicus meus maledixisset mihi, sustinuissem utique,

XIII. Et si is, qui oderat me, super me magna loquutus fuisset: abscondissem me forsitan ab eo.

XIIII. Tu verò homo vnanimis, Dux meus, & notus meus.

XV. Qui simul mecum dulces capiebas cibos, in domo Dei ambulauimus cum consensu.

Postea quam conquestus est Dauid de tota ciuitate, & populo; conqueritur nunc de vno particulari proditore, qui videtur fuisse Achitophel, si Psalmus exponatur de Dauid: Iudas autem, si exponatur de Christo: quis alius talis amicus, si de homine iusto generatim accipiatur. Ait, igitur, Si inimicus aliquis manifestus maledixisset mihi, æquo animo tulissem; quia inimicus solet id facere, & non est mirum, si faciat. Et si is, qui oderat me, ita ut profiteretur manifestam inimicitiam mecum, magna aliqua contumelia, vel magnas calumnias de me loquutus fuisset: ego forsitan abscondissem me ab eo, ut eius iracundiam mitigare,

& ne darem occasionem maiorum conuiciorum. Sed a te abscondi non poterā, neque vnquam eiusmodi prodicionem a te expectassem, quoniā tu homo vnanimis videbaris, id est, amicissimus meus, & vnum cor, & vnā animam mecum habens. Item Dux meus, id est, consiliarius meus primarius, cuius ego sententiam in rebus agendis semper sequebar. (erat enim Achitophel consiliarius Dauidis, & talis consiliarius, ut consulere Achitophelem idem ferè esset, ac Deum consulere, ut dicitur. 2. Reg. 16.) Sed si exponatur Psalmus de Iuda, dicetur Iudas Dux Christi, quia a Christo Dux fuerat constitutus populorum cum Alijs Apostolis, iuxta illud Psalm. 44. Constitues eos Principes super omnem terrā. Item notus meus, id est, familiaris, & commensalis, qui simul mecum dulces capiebas cibos, dicuntur autem dulces cibi, quia amicitia conuiuarum eos facit dulciores: nam in hebræo ad litteram habetur, qui simul dulces faciebamur cibos. Sed S. Augustinus dulces cibos intelligit, Eucharistiam, quam Iudas cum Christo in vltima cœna gustauit, qui cibis omnem habet saporum suauitatem. Denique non solum vnanimis, & notus, & commensalis in rebus poliucis, & domesticis; sed eiusdem religionis, & eiusdem sententiæ in sacris ceremonijs: ambulauimus enim in domo Dei cum consensu id est, non fuit inter nos vlla dissensio in actionibus, quæ ad cultum Dei pertinebant. In hebræo pro, cibos, est sod, quod secretum, non cibum, significat. Sed credibile est Septuaginta Interpretes non habuisse in suis Codicibus, sod, sed, zed, quod escam significat: & magis cohereret dulcedo cum cibis, quam cum secreto: capere enim dulces cibos, rectius dicitur, quam capere dulce secretum. Illud etiam, cum consensu; ex hebræo sanctus Hieronymus vertit, in terrore. Sed fortasse S. Hieronymus nō habuit in suo Codice, raghes, ut nos habemus, quod significat, coniunctim, sed habuit raghez, quod terrorem significat: nostra lectio conuenit cum hebraico, & græco Codice.

סוד

סוד

ציר

רגש

רגש

רגש

Venit

XVI. Veniat mors super illos, & descendant in infernum viuentes.

Imprecatur, seu potius prædicit per formam imprecationis, eam pœnam, quàm iustè dederunt Dathan, & Abyron. num. 16. Qui seditionem, & schisma facientes viui a terra dehiscente absorpti sunt: qui quidem viuentes perierunt. Hoc impletum est in ijs, qui Dauidem, Absalone duce, persequiebantur: nam plurimos eorum saltus consumpsit non gladius, vt dicitur. 2. Reg. 12. Impletum quoque est in Iudæis, qui in obsidione Hierosolymæ viuentes, & videntes peribant, vel fame cadentes in plateis, vel ex muris se deiicientes, vel in foueis delitescētes: denique impletur in plurimis impijs, qui vident apertissimam veritatem, & sponte oculos claudunt; vel non ignorant in eo statu, in quo versantur, se saluos esse non posse, & tamē sciētes, & volentes in eo ad mortem vsque perseverant.

XVII. Quoniam nequitia in habitaculis eorum, in medio eorum.

Hæc est ratio tam seueræ imprecationis; iustè enim absorbentur viuentes a terra, vt perpetuò habitent cum pœnis, qui elegerunt habitare cum vitijs: nam nequitia in habitaculis eorum, & non in habitaculis vacuis; sed in medio eorū, id est, cum ipsis in eisdem habitaculis commoratæ sunt.

XVIII. Ego autem ad Deum clamaui, & Dominus saluabit me.

XIX. Vespere, & mane, & meridie narrabo, & annuntiabo, & exaudiet uocem meam.

Prædixit interitum inimicis: nunc sibi salutem prædicit. Ego, inquit, clamaui ad Dominum ardenti oratione; & ipse saluabit me a periculo, in quo versor.

& deinceps clamabo non semel: sed etiā secundo, & tertio, videlicet vespere, mane, & meridie, narrando, & annuntiabo ærumnas meas, & misericordias Domini, & ipse Dominus exaudiet me. Consuetudo ter in die orandi, legitur etiam apud Danielem, cap. 6. Fortasse in honorem sanctissimæ Trinitatis, cuius mysterium Prophetis non erat incognitum. Cur autem dicatur vespere, mane, & meridie, & non potius mane, meridie & vespere; ratio esse videtur, quoniam secundum legem festa celebrabantur a vespere ad vespem, vt dicitur Leu. 23. proinde primum tempus orationis erat vespertinum: quod etiam nunc obseruat Ecclesia, quæ incipit officia Diuina a primis vespers.

Redimet in pace animam meā **XX.**
ab his qui appropinquant mihi: quoniam inter multos erant mecum.

Explicat, in quo sit exaudiendus a Deo. Redimet in pace, id est, ad pacem restituet animam meam, id est, vitam meam ab his, qui appropinquant mihi, id est, qui de propinquo aduersus me dimicant: quoniam inter multos erant mecum, id est, quoniam multi erant dimicantes mecum, siue multi erant aduersum me vnum, siue in magna multitudine erant, qui mecum pugnabant. Hunc existimo sensum esse huius obscurissimi loci cū sancto Hieronymo in versione sua ex hebræo. Itaque sententia erit, Deus liberabit vitam meam, transferendo eam a prælio appropinquantium contra me, ad optatam pacem. & id faciet ea ratione, quoniam iniquum erat, vt multi contra me vnum pugnarent: Quod si hoc duriusculum videatur, poterit cum Euthymio ita exponi, Redimet in pace, id est, sine labore meo, animam meam, id est, vitam meam, ab his, qui appropinquant mihi, vt mihi noceant: quoniam isti ipsi antea inter multos alios erant mecum: proinde proditorie, & iniuste contra me pugnant, qui paulò antea in meis castris militabant. Impletum est

X 4 hoc

hoc in Dauide, qui in prælio contra Ab-
salonem sine labore vicit, quia domi re-
mansit, vt dicitur. 2. Reg. 18. Impletum
quoque est in Christo, qui liberatus est
a morte per resurrectionem omnino in
pace, & sine labore.

**XXI. Exaudiet Deus, & humiliabit
illos qui est ante secula.**

Exaudiet, inquit, me, qui oppugnor
iniuste, & humiliabit eos, qui me oppu-
gnant, is qui est ante secula, id est, Deus
creator seculorum. In hebræo signifi-
catus habetur, Qui sedet ab initio, id est,
qui ab initio mundi Iudex sedet omniū
hominum, is iudicabit pro me, & con-
demnabit aduersarios meos.

**XXII. Non enim est illis commuta-
tio, & non timuerunt Deum: ex-
tendit manum suam in retri-
buendo.**

Merito, inquit, humiliabit illos iustus
Iudex, quia non est illis commutatio:
obdurati enim sunt, neque poenitet eos
sceleris sui? & non timuerunt Deum:
sed magis homines reueriti sunt; ideo
Deus extendit manum suam in retri-
buendo singulis, prout merebantur.
Non desunt, qui illud (non est illis com-
mutatio) volunt debere exponi, non
est illis redditio vicissitudinis, & hanc
esse vim græcæ vocis. Sed vox hebraica
non potest accipi pro redditione vicissi-
tudinis; nam sanctus Hieronymus recte
vertit, non mutantur, & similiter reddi-
dit Symmachus, Theodoretus teste: pro-
inde si velimus concordare Codicem
Græcum cum Hebraico: oportet vocem
illam *αὐτῶν* accipere hoc loco
pro commutatione hominis a vitio ad
virtutem, non pro permutatione vnius
rei cum altera: & potest ita accipi, vt
communiter accipiunt Interpretes
tum græci, tum latini, quia vox illa ge-
neralis est.

**Contaminauerunt testamen- XXIII.
tum eius, diuisi sunt ab ira vul-
tus eius, & appropinquauit cor
illius.**

Hic versiculus obscurissimus est pro-
pter mutationes numeri singularis in
numerum multitudinis. In hebræo ha-
betur in singulari, contaminauit testa-
mentum eius, diuiserunt, siue molliue-
runt præ butyro os suum, vel os eius:
sed cum dicitur, contaminauit, potest
exponi, contaminauit vnusquisque te-
stamentum eius, quod est idem cum il-
lo, contaminauerunt testamentum eius.
Illud etiam, præ butyro, si legatur vox
hebraica, chamaoth, per, n non per, n
significabit præ ira, vel ab ira, vt verte-
runt Septuaginta Interpretes. Illud
etiam, diuiserunt, potest etiam significa-
re, diuisi sunt: nam vtrunque significa-
tionem habet vox, chalecu. sensus igitur
hic erit, Deus iuste extendit manum
suam in retribuendis suppliciis inimicis
meis, quoniam illi non solum non vo-
luerunt mutari de vitio ad virtutem;
sed magis, ac magis contaminauerunt te-
stamentum, siue pactum eius, malis suis
operibus præuaricando leges eius: pro-
pterea diuisi sunt, hoc est, dispersi, ac
dissipati sunt ab ira vultus Dei; quia ap-
propinquauit cor illius, Dei videlicet,
ad eos puniendos.

**Molliti sunt sermones eius su- XXIV.
per oleum, & ipsi sunt iacula.**

Redit ad malitiam præcipui prodito-
ris, qualis fuit Achitophel respectu Da-
uidis, & Iudas respectu Christi. Molliti,
inquit, sunt sermones eius super oleum,
id est, præ oleo; & tamen ipsi sermones
eius non sunt verba: sed iacula, siue lan-
cæ: delectant aures, feriunt corda: tales
sunt omnes occultæ detractiones, om-
nes blanditiæ meretricum, omnes per-
suasiones hæreticorum, omnes prodito-
rum simulationes.

xxv. **Iacta super Dominum curam tuā & ipse te enutriet : non dabit in æternum fluctuationem Iusto.**

Consolatur Propheta in fine Psalmi se, & sui similes, atque exhortatur ad fiduciam totam in Domino collocandā, qui sine dubio sollicitus est pro seruis, & amicis suis, ut S. Petrus admonet in epistola prima cap. 5. Omnem sollicitudinem vestram proijcientes in eum, quoniam ipsi est cura de vobis: quod ipsum copiosè, & multis exemplis allatis Christus ipse monet, Matth. 6. Quæ nō eō pertinent, ut ociosè viuamus, & de victu quærendo solliciti nullo modo simus: sed ut non anxie, & perturbatè viuamus, ac ut præcipuam spem, & fiduciam nō in nostris viribus, vel industria, sed in Dei misericordia, & providentia collochemus. Iacta, inquit, o anima mea, & quisquis es timens Deum, in Dominum curam tuam, id est, relinque providentiæ divinæ curam eorum, quæ tibi necessaria sunt ad vitam, siue sustentandam, siue protegendam: & ipse te enutriet, ipse tibi de necessarijs omnibus providebit, benedicens laboribus manuum tuarum, & prosperans omnia opera tua. nec solum enutriet te, sed etiam defendet ab inimicis, & si aliquā diu fluctuari iustum permiserit ad probandam patientiam, siue defectu rerū necessariarū ad vitam, siue persecutionibus impiorum: tamen hæc non diu durabunt, quia non permittet Deus Iustum in æternum æruinarum fluctibus agitari: æterna enim tribulatio solis impijs reservatur, ut dicitur in sequenti versiculo.

xxvi. **Tu verò Deus deduces, eos in puteum interitus.**

Impios videlicet, tu Deus Iudex deduces in puteum mortis: unde nunquā emergere poterunt. Vocatur autem puteus interitus ipsa gehenna ignis æterni, in quā qui decidunt, perpetuò moriū-

tur: viuunt enim semper in pœnis, ut semper moriantur, & mortis finem, quē cupiunt, nunquam inueniant.

Viri sanguinum, & dolosi non dimidiabunt dies suos: ego autem sperabo in te Domine. xxvii.


Non solum viri, qui insidiantur sanguini, præcipitabuntur in puteum mortis æternæ, sed etiam hic in terris nō diu viuent: iustum enim iudicium est, ut qui vitam eripiunt, vitam perdant. Sic enim Deus ait Gen. 9. Quicumque effuderit humanum sanguinem, fundetur sanguis illius. & Dominus Matt. 26. Omnes, qui acceperint gladium, gladio peribunt. Sed hæc omnia testimonia tum Psalmi huius, tum Genesis, & Evangelij, non significant, omnes omnino, qui occidunt esse occidendos: sed eos tantum qui iniuste occidunt, & eos præcipue, qui ex insidijs occidunt: illi enim propriè sunt viri sanguinum, & dolosi. Deinde neque significant omnes omnino qui ex insidijs occidunt, gladio perituros: sed ut plurimum fieri, ut occidantur, vel à Iudice, vel ab hostibus, vel a seipsis, vel à casu aliquo, qui tamè respectu Dei non sit casus, sed dispositio providentiæ ipsius. Denique illud, non dimidiabunt dies suos; non est accipiendum mathematicè, id est, nimis subtiliter: sed est modus loquendi, quo vitæ breuitas significatur. Quod autem qui dam obijciunt ex Psal. 72. Et dies pleni inuenienter in eis: non impedit veritatē huius versiculi: nam S. Hilarius hoc loco scribit, verba illa intelligi de iustis, hæc de iniquis. quod si etiam quis contendat, utraque intelligi de peccatoribus, responderi poterit, illud non dici de viris sanguinum, & dolosis: sed de alijs peccatoribus, vel de paucis quibusdam, qui interdum extra communem regulā diu vivere permittuntur. Cōcludit Propheta illis verbis sibi valde familiaribus, Ego autem sperabo in te Domine: quæ videntur referenda ad oīa supra dicta, ut sensus sit, Ego autē tui ut liberer à proditoribus, qui sunt hostes occulti: tum

tum vt euadam inimicos manifestos ;
tum vt non incidam in pœnas inpio-
rum: vt non cadam in puteum interitus:
vt dies mei in medio cursu non defici-
ant: sperabo in te Domine, non in vi-
ribus meis.

PSALMVS LV.

Titulus, & Argumentum.

*In finem pro populo, qui à Sanctis
longè factus est. Dauid in titu-
li inscriptionem, cum te-
nuerunt eum Allo-
phyli in
Geth.*



In hoc Titulo habetur pri-
mo materia, siue argumē-
tum Psalmi: deinde au-
ctor, & excellentia Psal-
mi. Sed hæc omnia pen-
dent ex historia, quæ ha-
betur lib. 1. Reg. cap. 21. vbi scribitur,
Dauidem fugisse à Saule, qui eum quæ-
rebat ad necem: & peruenisse ad Achis
Regem Geth Philistæum sed cum à
Philistæis agnitus fuisset, & detentus
tanquam hostis ipsorum: simulasse in-
saniam, & furorem, & eo modo è mani-
bus eorum elapsus venisse in speluncā
quandam, ibiq. ad eum congregatum
fuisse populum quadringentorum ho-
minum exulum, & miserorum. Ex hac
historia colligimus, populum elongatū
à Sanctis, pro quo scribitur Psalmus, ef-
se populum illum quadringentorū exu-
lum, qui ad tabernaculum Dei accede-
re non poterant, sed cum Dauide huc
atque illuc vagabantur: & hoc est argu-
mentum Psalmi, deploratio miseriarū
Dauidis, & populi eius. Auctor, & ex-
cellentia Psalmi continetur in illis ver-
bis, Dauid in tituli inscriptionem: nam
tituli inscriptio, vt intelligi potest ex
voce græca *ἐπιγραφία*, est inscriptio

incisa in columna ad æternam memo-
riā. Sensus igitur est, Psalmus Dauidis
scriptus ab eo, quasi incisus in colum-
na, ad memoriā sempiternam. deniq.
ocasio scribendi fuit illa euasio de ma-
nibus Philistinorum per simulatam stul-
titiā, quando tenuerunt eum Allo-
phyli, id est, Philistæi in Geth. S. Hiero-
nymus ita vertit hunc titulum, Pro co-
lumba muta, eo quod procul abierit Da-
uid simplex, & humilis quando tenuerunt
eum Philistæi in Geth. Quæ ver-
sio satis conuenit cum verbis hebraicis,
vt nunc habentur in Biblijs: & pro co-
lumba muta, intelligitur idem Dauid,
qui obmutuit, quādo stultum se finxit.
Ceterum Septuaginta Interpretes viri
doctissimi, sine dubio rectè verterunt qđ
in libris hebraicis inuenerunt. Ideo di-
cendum est, per columbam, quæ legi-
tur in hebræo, illos intellexisse populū,
& vertisse sensum, nō verba. Sepē enim
in Scripturis populus per columbam si-
gnificatur: per vocem, ellein, quod si-
gnificat mutam, illi verterunt, à San-
ctis, quia habuerūt in suo codice inuer-
so modo easdem literas, meel, quod est
à Deo, & per Deum intellexerunt ar-
cam Dei, & vt clariorem sensum redde-
rent, verterunt, à Sanctis, id est, à san-
ctuario ubi erat arca Dei: per vocem,
miētā, quam S. Hieronymus vertit,
simplicem, & humilem, ipsi verterunt
inscriptionem tituli, quia legerunt, mi-
ētāb, quod inscriptionem significat.
S. Hilarius, & S. Augustinus totum Psal-
mum de Christo exponunt, qui per Da-
uidem figuratus est: & per tituli inscrip-
tionem S. Augustinus titulum Crucis
intelligit.

אלל

מאל

מכתם

מכתם

Explicatio Psalmi 55.

Miserere mei Deus, quoniā
conculcauit me homo: to-
ta die impugnans tribulauit me.

Incipit ab oratione, & misericordiā
postulat: quoniam miseriam suam agno-
scebat: patiebatur enim indignam per-
secutionem Saulis, & cum ab ea decli-
nare

nare vellet, incidit in grauiorem Philistinorum: & ab vtraque ad tempus liberatus, in spelunca interim exul, & in ops delitescere. Miserere, inquit, mei Deus, qui miserorum vnicum soles esse refugium, Quoniam conculcauit me homo, id est, Saul: dicit autem, homo, potius quam Saul, vt opponat hominem Deo, quasi dicat, Tu Deus miserere, quādoquidem homo est qui tribulat: cōlū aspicio, dum à terra despicior: ad Dominum confugio, dum conseruus me persequitur. Tota die impugnans tribulauit me, hoc est, non semel mihi nocuit, sed omni tempore mihi molestus fuit: neque me vnquam quiescere passus est. Hæc verissima esse intelliget, qui legerit primum librum Regum. Neque difficile erit hæc omnia ad Christum applicare, qui propter nos factus est homo, & tamen homo semper cum impugnavit, & tribulauit à natiuitate vsque ad sepulturam: & postea corpus eius, quod est Ecclesia, impugnare, & tribulare non cessat, neque ad diem vsque iudicii cessabit. Significatur autem nomine hominis, cum dicitur, cōculcauit me homo, vel Diabolus, qui in Evangelio Matth. 13. dicitur inimicus homo; vel ipsum genus humanum, quatenus spiritui Dei caret, & nihil est nisi homo, iuxta illud 1. Corinth. 2. Cum enim sit inter vos zelus, & contentio, nonne carnales estis, & secundum hominem ambulatis? & paulò infra, Nonne homines estis? vnde, & Dominus, Matth. 16. distinguit Apostolos ab hominibus, cum dicit, Quem dicunt homines esse filium hominis? & vos autem quem me esse dicitis?

II. Conculcauerunt me inimici mei tota die: quoniam multi bellantes aduersum me.

Non solus Saul, sed omnes serui eius Davidem persequerebantur, & cōterere nitebantur. Nec solus Diabolus, sed omnes ministri eius aduersus Christum, & Ecclesiam bella gerebant, & gerunt.

Ab altitudine diei timebo: ego in verò in te sperabo.

Hic variant hebræa. & græca: nam in hebræo coniungitur altitudo cum versiculo superiore, hoc modo, Multi bellantes aduersum me altissime: & deinde sequitur alter versiculus, Diem timebo, ego in Deo confidam. Sed de hac distinctione Iudæorum parū laboramus: quoniam in textu antiquo nulla erat distinctio. In græcis codicibus additur negatio, hoc modo, Ab altitudine diei nō timebo: & sic legit etiam S. Hilarius. Sed nostrā lectionē approbat S. Hieronymus in epist. ad Suniam, & Fretellam, vbi dicit, negationem esse superadditā: & in Commentario huius Psalmi vtranque lectionem explicat. Igitur sensus est, Ego tamen tam multos habeam inimicos: tamen non ab illis timebo, sed ab altitudine diei timebo, id est, à diuinis iudicijs timebo, quæ procedunt ab altissimo lumine, quale est in meridie, quod lumen omnia penetrat etiam intima cordium: sed cum timore spern quoque adiungam, ego enim, qui timebo ab altitudine luminis tui, simul etiā in tuā misericordia, & bonitate confidam.

III.

In Deo laudabo sermones meos, & in Deo speravi: non timebo, quid faciat mihi caro.

Explicat clariùs fiduciam suam, & rationem fiduciæ. Deus enim per Samuellem olim promiserat Dauidi Regnum: nam lib. 1. Reg. cap. 13. dicit Samuel de Dauide, Quæsiuit sibi Dominus virum secundum cor suum, & præcepit ei, vt esset Dux super populum suum: ac deinde eod. lib. cap. 16. iussit eum ingredi in medio fratrum eius. Hæc igitur promissio erat causa fiduciæ, & de hac dicit, In Deo laudabo sermones meos, id est, fretus auxilio Dei laudabo aliquando promissiones mihi factas à Deo, tamquam verissimas, quando videlicet cōpla-

pletæ fuerint. In Deo speraui, adimplēdas scilicet eius promissiones; & ideo non timebo quid faciat mihi caro, id est, non timebo minas, & persecutiones inimicorū meorum, qui caro sunt, id est, infirmi, & fragiles: si cū Deo, qui mihi salutem, & Regnum promisit, cōparentur. In hebræo habetur, laudabo verbum eius; sed non repugnat nostræ lectioni, quæ habet, sermones meos. si quidem illæ promissiones erāt Dei, quia ille promiserat, & erant Dauidis, quia illi promiserat. Potest etiam fieri, vt Septuaginta Interpretes non legerint, deuarō, verbum eius; sed, deuari, verbū meum. sola enim differentia consistit in vna media litera. Non erit difficile de Christo exponere hunc versiculū, siquidem Angelus promittens Virgini, ait, Dabit ei Dominus sedem Dauid Patris eius, &c. & ipse Christus verissime dicere potuit, Non timebo quid faciat mihi caro.

דבר
דבר

V. Tota die verba mea execrabātur, aduersum me omnes cogitationes eorum in malum.

Redit ad explicandam malitiam aduersariorum suorum, ac dicit ex toto tempore, quo apud illos fuit, non cessasse vituperare omnia verba, & facta eius: & excogitare, quomodo eum perderent. quod non minus conuenit in Scribas, & Phariseos calumniantes verba, & opera Christi, & consilia agitan-tes de morte eius, quā in Saulem, & ministros eius erga Dauidem. dixi autem verba, & opera, quia vocabulū verbi apud Hebræos, & verba, & opera significat.

VI. Inhabitabunt, & abscondent: ipsi calcaneum meum obseruabunt.

Addit aliam malam aduersariorum suorum qualitatem. Inhabitabunt, inquit, & abscondent, id est, simul habitare solebant mecum, tanquam amici, &

contubernales: & interim abscondebāt se, & tectē atque occultē machinabantur dolos. Et calcaneum meum, id est, gressus meos, actiones meas obseruabant, vt me ad casum impellerent. Hæc enim erga Dauidem ministri Saulis, & erga Christum Iudæi faciebant. Quamuis autem verba, inhabitabunt, & abscondent, sint futuri temporis, tamen apud hebræos pro præterito, ac præsertim pro imperfecto præterito frequenter accipiuntur. S. Hieronymus ex hebræo vertit congregabuntur sed vox hebraica, iagudu, à Septuaginta lecta est, iaguru, per, r, non per, d.

יטו
יטו

Sicut sustinuerunt animam meam, pro nihilo saluos facies illos: in ira populos confringes.

VII.

Prædicat nunc ruinam aduersariorū suorum, iusto Iudice Deo illis reddente, quod proximo suo facere cogitauerunt. Sicut inquit, sustinuerunt animam meam, id est, sicut in abscondito obseruantes expectauerunt vitam meam, vt eam perderent: ita tu Deus pro nulla re eos saluos facies, id est, nullo modo saluabis, sed in ira tua populos illos confringes, & ad interuentionem persequeris. Hoc impletum est in hostibus Dauidis, qui cum Saule Rege simul interierunt in mōtibus Gelboe, vt dicitur li. 2. Reg. cap. vlt. Impletum est quoque in hostibus Christi, qui consumpti fuerūt in obsidione Hierosolymæ à Romanis, & reliquæ dispersæ inter gentes: sed multo magis implebitur in die vltimi Iudicij. Hoc loco in Codice hebraico, & græco est manifesta corruptio: nam in hebraico vbi nos habemus, pro nihilo, est, al auen, quod significat, pro iniquitate: sed legendum est, al ain, pro nihilo: sic enim legunt Septuaginta, & ipse etiam sanctus Hieronymus, sanctus Hilarius, sanctus Augustinus, & alij. In græcis quibusdam Codicibus ~~non~~ expelles, & sic legunt, & exponunt Theodoretus, & Euthymius. Sed vera lectio est ~~non~~ saluabis: quæ respondet hebraicæ, & exponitur ab omnibus ferè inter-

על און
על אין

interpretibus. Porro illud, pro nihilo saluos facies illos, sanctus Hilarius exponit, resurgent quidem impij, sed pro nihilo siue ad nihilum, quia non proderit illis resurrectio. Sanctus verò Augustinus in bonam partem explicat, pro nihilo, id est, sine meritis proprijs, ex pura gratia saluabis illos. Sanctus Hieronymus tum in versione, tum in Commentario, impios non saluandos dicit: quod magis cohæret cum sequentibus, in ira populos confringes.

VIII. Deus vitam meam annunciaui tibi: posuisti lacrymas meas in conspectu tuo.

Postea quam de supplicio inimicorū loquutus est; reuertitur ad precandum pro se, ac dicit, Deus vitam meam annunciaui tibi, id est, narraui in oratione cursum vitæ meæ, transmigrations, varietates, labores: vox enim hebraica, nodi, significat mutationem, & migrationem: sed Septuaginta Interpretes verterunt, vitam meam, vt breuissimè omnia comprehendere. Itaque per vitam intellexerunt cursum vitæ. Et tu posuisti in conspectu tuo lacrymas meas, id est, ego flens coram te exposui cursum afflictissimæ vitæ meæ, & tu misericors, & pius Pater non auertisti faciem tuā; sed aspexisti cum misericordia lacrymas meas. In hebræo hebetur pro, in conspectu tuo, nodi, quod vtræq; hebræi significare dicunt. Sed nō solum Septuaginta verterunt in conspectu tuo, sed etiam sanctus Hieronymus ex hebræo reddit, in conspectu tuo: & sic habent omnes latini, & græci Codices. Quare vel vox illa significat conspectum, vel aliquid aliud legerunt, tum Septuaginta, tum sanctus Hieronymus. Parum autem refert, quod in hebræo habetur numerasti, pro eo, quod nos habemus annunciaui: nam facile potuit mutari persona secunda in primam addendo vnā, vel alteram literam hebraicam: & sensus est idem: nam, & Propheta narrauit suæ vitæ miseras, & Deus eas numerauit: idem autem verbum saphar, narrare, & numerare significat.

Sicut, & in promissione tua; IV. tunc conuertentur inimici mei retrorsum.

Prima pars huius versiculi pertinet ad versiculum superiorem: nam non solum in Codice hebraico coniunguntur hæc verba, sicut, & in promissione tua, cum superioribus, sed etiam sic exposuit Hilarius, Hieronymus, Augustinus, Euthymius, & alij. Itaq; sensus est, posuisti lacrymas meas in conspectu tuo sicut, & in promissione tua: id est, sicut promisisti, te exauditurum deprecâtes cum lacrymis, ita fecisti, quia posuisti lacrymas meas in conspectu tuo, vt eas exaudires. Et cum exaudieris, tunc conuertentur inimici mei retrorsum, id est, fusi fugatiq; dissipabuntur, & peribunt. Sanctus Augustinus exponit more suo in bonam partem, vt sensus sit, inimici, qui antea præire nos volebant, & ad interitum ducere, conuertentur per penitentiam, & nos sequetur ad vitā, quo modo dixit Dominus Petro Matth. 16. Vade post me Satana, scandalū es mihi, quia non sapis; quæ Dei sunt, id est, nō li me præire, sed post me ambula; quoniam dum præire tentas, scandalum es mihi. Euthymius non minus vtiliter exponit de Dæmonibus, qui nos præire, & ducere cupiebant ad gehennā: sed per gratiam Dei nostras preces audiētis coguntur retrocedere, & nos oblatrantes sequi, dum properamus ad Regnum, vnde illi exciderunt.

In quacunque die inuocauero te, ecce cognoui, quoniam Deus meus es.

Concludit gratias agendo, & laudando Deum. Ecce, inquit, experimento cognoui, quod in quacunque die inuocauero te, tu Deus meus es, id est, tu declarabis exaudiendo, te meum esse Deum.

In

XI. In Deo laudabo verbū in Domino laudabo sermonem in Deo speraui non timebo quid facit mihi homo.

Hunc versiculum supra exposuimus, est e nim omnino idem cum versiculo quarto, eo excepto quod hic bis repetitur, in Deo laudabo verbum: quāuis enim interpres primo verbum dixerit, deinde sermonem: tamen in hebræo, & græco est eadē vox utrobique quare poterat verti, in Deo laudabo verbum, in Domino laudabo verbum: cur autem primo dixerit, in Deo, deinde in Domino; ratio esse videtur, ut ostendat se cōfidere in Deo, ut Iudice, quod significat nomen, Dei, & ut executore iustitiæ: quod significat nomen, Domini, cui omnia seruiunt: addit, non timebo quid faciat mihi caro: ut declaret quod ibi dixerat: per carnem videlicet, hominem intelligi debere.

XII. In me sunt Deus vota tua, quæ reddam laudationes tibi.

Pro his omnib. beneficijs pollicetur se persoluturum vota laudum in tribulatione concepta. In me sunt, inquit, vota tua, id est, in memoria mea sunt, siue in intimis præcordijs apud me conseruantur, ut non excidāt, vota tua, id est, promissiones tibi factæ à me. Quæ reddam laudationes tibi, id est, quæ vota reddam; vota videlicet laudum, & gratiarum actionis. siue, quæ vota continent laudationes tibi assidue à me concinendas.

XIII. Quoniam eripuisti animam meam de morte, & pedes meos de lapsu; ut placeam coram Deo in lumine viuentium.

Hæc est summa beneficiorum diuinorum. Quoniam eripuisti animam meam de morte, id est, vitam meam conserua

sti ab imminente morte, siue à Saule, siue ab Achis Rege Philistinorum: & pedes meos de lapsu, id est, & conseruasti me ne laberer in peccatum inter tot, & tantas tentationes, quibus prouocabar, ut Saulem interficerem, vel ei maledicerem: conseruasti autem me à morte, & à peccato, à morte videlicet corporali, & spirituali. Ut placeam coram Deo, siue ut ambulem (ut habet vox hebraica) placēs Deo in lumine viuentium, id est, in lumine vitæ huius temporalis, quo carent, qui mortui sunt: itē in lumine fidei, & gratiæ, quo carent infideles, & peccatores, ut tandem perueniam ad lumen gloriæ cælestis, quo fruuntur illi, qui soli verē, propriēq. viuentes dici possunt. Possunt hæc etiam de Christo exponi, qui per resurrectionem liberatus est à morte carnis, & ab omni periculo subiacendi vlli passioni, & viuit, & regnat à dextris Patris in lumine viuentium. Amen.

P S A L M V S LVI.

Titulus, & Argumentum.

In finem. ne disperdas, David in tituli inscriptionem, cum fugeret a facie saul in speluncam.



Historia, cuius occasione Psalmus iste conscriptus fuit, habetur lib. 1. Reg. cap. 24. tunc enim David Saulem fugiens absconditus est cū aliquot ex suis in speluncam Engaddi. & cū Saul casu ad eam speluncam deuenisset, & solus in eam intraisset, ut purgaret ventrem; David, qui in parte interiore latebat, incitatus à suis, ut interficeret Saulem, noluit, id facere. ex qua historia colligitur argumentum huius Psalmi simile esse argumento Psalmi superioris.

In

In titulo nihil est noui, præter illa duo verba, ne disperdas, quæ quid significant, incertum est. Sanctus Hilarius id refert ad Christi resurrectionem, per quam factum est, ne caro Christi in sepulchro corrumpetur: nam alia lectio habet, ne corrumpas. Sanctus Augustinus, & sanctus Hieronymus interpretantur de titulo crucis Christi, quæ Pilatus noluit corrumpere ad petitionem Iudæorum, quasi id prædixerit Dauid hoc loco. Theodoretus, & Euthymius exponunt de Dauide, qui noluit occidere Saulem, cum impune posset. Itaque volunt ad æternam rei memoriæ scriptum, ne disperdas, siue ne perdas, quia Dauid non perdidit Saulem. Sed quamuis hæc expositio in hunc Psalmum quadret, tamen in Psalmum. 57. & 58. & 74. Vbi est eadem sententia in titulo, non videtur quadrare. Alij volunt Dauidem pro se rogare Deum, ut non sinat eum occidi, & perdi. Alij denique arbitrantur, illis verbis significari instrumentum musicum, in quo Psalmi isti cōtinendi erant.

Explicatio Psalmi 56.

I. **M**iserere mei Deus, miserere mei: quoniam in te cōfidit anima mea.

II. Et in vmbra alarum tuarū sperabo, donec transeat iniquitas.

Dauid in spelunca precatur Deum pro liberatione à persecutione Saulis. & in hoc figura Christi est, qui latens in spelunca formæ serui, cum esset Dominus omnium, orat pro liberatione corporis sui, quod est Ecclesia à persecutione Satanae, & ministrorum eius. Miserere, inquit, mei Deus, id est, tu Deus misericors tolle miseriam, quam patior ob periculum vitæ, cui Saul insidiatur, Miserere mei, quoniam in te cōfidit anima mea. confidentia in Deo est optima ratio, quæ allegari potest ad impetrandam misericordiam, cum Deus

promiserit auxilium confidentibus in se. Et in vmbra alarum tuarū sperabo: id est, non solum hætenus in te cōfidit anima mea: sed etiam perseuerabo in hac confidentia toto tempore, quo protectione indigebo, quod erit, donec transeat iniquitas, id est, donec finem habeat hæc nostra peregrinatio, & exilium à patria cœlesti: tamdiu enim durabit iniquitas, quam diu durabit peregrinatio, in qua mali bonis admixti sunt. Porro metaphora illa de vmbra alarum Dei familiaris est scripturæ sanctæ: nā in Psalmo. 16. dicitur, sub vmbra alarū tuarum protege me. in Psalmo. 62. In velamento alarum tuarum sperabo: & in Psalmo. 90. sub pennis eius sperabis: & Dominus Matt. 24. Quoties volui congregare filios tuos, quemadmodū Gallina congregat pullos suos sub alas, & noluit? sensus autē est, sperabo in protectione tua, quo modo sperant pulli in protectione Gallinæ, quæ sub alas suas colligit eos, & mirabili zelo à Miluo defendit. Significatur hac metaphora ingens amor Dei erga suos electos, quos fouet, & protegit, ut res sibi vnice charas.

**Clamabo ad Deum altissimū, .III.
Deum qui benefecit mihi.**

Ex hac fiducia, qua sub vmbra alarū Dei sperabit, prodibit clamor ad Deum altissimum, id est, ad supremum Iudicē, qui super omnes alios Iudices in altissimo throno residet: & ratio clamandi erit experimentum proprium: iam enim expertus erat Dauid clamando ad Deum, se multum profecisse. Clamabo, inquit, ad Deum qui benefecit mihi, id est, qui vltus me est de inimicis meis: vox enim hebraica hoc loco non significat benefacere absolutē, sed vlcisci, ac per hoc benefacere vlciscendo innocentium iniurias. vnde sanctus Hieronymus vertit ex hebræo, inuocabo Deum altissimum, Deum vltorem meum. Qualis autem fuerit hæc vltio, habetur. lib. 1. Reg. cap. 23. Nam cum Saul cinxisset exercitu suo montem, ad quem Dauid

con-

confugerat, vt iam de vita sua penè desperaret: prouidentia diuina fecit, vt nū eius veniret ad Saulem, qui referret, Philistæos cum magnis copijs in terram Israelitarum se infudisse, quo nuncio accepto coactus est Saul recedere à persequendo Dauide, cum magno suo opprobrio, & dolore. & hoc breuiter attingitur in sequenti versiculo.

IV. Misit de cœlo & liberauit me, dedit in opprobrium conculcantes me.

V. Misit Deus misericordiā suā, & veritatem suam: & eripuit animam meam de medio catulorum Leonum: dormiui conturbatus.

VI. Filij hominum dentes eorum arma, & sagittæ, & lingua eorum gladius acutus.

Misit de cœlo, auxilium videlicet, & liberauit me, quando cinctus legionibus hostium iam iam capiendus, & occidendus eram, Dedit in opprobrium conculcantes me, id est, exposuit probris Saulem, & milites eius, qui me vt puluerem conculcabant, & contemnebāt, qñ re infecta coacti sunt recedere, & Philistæis occurrere, vt supra diximus ex cap. 23. lib. 1. Reg. Misit, inquam, de cœlo misericordiam, & veritatem quasi duas manus suas, misericordiam, qua liberaret me, & veritatē, id est, iustitiā, qua hostes meos pudore, & dolore afficeret. Et eripuit animā meā, hoc est, vitam meam de medio catulorum leonū, id est, Saulis, & militum eius, qui ferocia leones iuuenes, ac per hoc, fortissimos referebant. Sed etiā sic liberatus ab imminente morte, tñ dormiui conturbatus, quia timui detractiones, & calumnias inimicorum meorū, quorū dentes, & linguæ feriunt instar lancearū, & gladiatorum acutorum. In hebræo deest verbum, eripuit, & sic vertit sanctus Hieronymus, Anima mea in medio leonū dormiuit ferocientium. Sed in hebræo Codice non est, dormiuit, sed dormiui, in prima persona. Quare vel excidit ver-

bum, eripuit, vel subintelligi debet; & quia hebræi non habēt casus, rectè possumus vertere, tam, anima mea, quam animam meam: denique illud, conturbatus, quod Hieronymus vertit, ferocientium, videlicet leonum: in hebræo propriè significat, ardentem, vel inflammatum, quod satis aptè conuenit cū voce, conturbatus: qui. n. conturbati sunt, æstare, & ardere solent. Itaq. lectio hebraica non difficulter cū nostra, græca, & latina concordari potest, & hunc sensum facere, Animam meam eripuit de medio leunculorū, dormiui æstans, & conturbatus. cur aut dormierit conturbatus, qñ iam liberatus erat; exponit cum addit, Filij hominum, dentes eorū arma, & sagittæ, & lingua eorū gladius acutus, id est, dormiui conturbatus, qñ et si Saule recedente liberatus eram à morsu leonum, qui de propinquo mordent: tñ sciebam non deesse detractores, & calumniatores, qui et longè feriunt, instar iaculorum, & sagittarū. multi. n. erant, qui calumnijs suis incitabāt Saule aduersus Dauidē, vt ipse testatur li. 1. Reg. ca. 24. Quare, inquit, audis verba hominū loquentium, quærit Dauid malū aduersum te Porro phrasis illa, filij hominum dentes eorū arma, & sagittæ, est hebræorum propria: sensus aut est, filij hominum tales sunt, vt dentes eorū sint veluti lanceæ (hoc. n. sonat vox hebraica, pro qua Septuaginta reddiderūt arma) & sagittæ; & lingua eorū veluti gladius acutus: quibus verbis significatur detractio, quæ per instrumenta dentium, & linguæ formatur, & non minus nocet, & interimit, quàm lancæa, sagitta, & gladius, cum incitet ad iracundiā, & sit causa malorum plurimorum.

VII. Exaltare super cœlos Deus, & in omnem terram gloria tua.

Exposito timore suo precatur Deū, vt exercēdo iustitiam in impios hostes suos, manifestet gloriam suam. Exaltare, inquit, super cœlos Deus, id est, sede in altissimo throno, qui est super oēs cœlos, vt iudices: vel, exaltet nomen tuum

tuum super cœlos coram Angelis, & in omnem terram coram hominibus dilatetur gloria tua; ita omnes intelligent, & laudent iustitiam tuam

VIII. Laqueum parauerunt pedib. meis, & incuruauerunt animam meam

IX. Foderunt ante faciem meam foueam, & inciderunt in eam.

Reddit causam, cur iudicium Dei aduersus hostes suos impleret. Nam præter alia, inquit, laqueum parauerunt pedibus meis, id est, insidias mihi tetenderunt, ut me quasi feram de improviso caperent. Et incuruauerunt animam meam, id est, atque his insidijs me afflixerunt, ut præ cõtina sollicitudine incuruus, ac mœstus incederem. Deinde idipsum repetit alia metaphora, Foderunt, inquit, foueam ante faciem meam, id est, foderunt foueam in itinere, quo iturus eram, ita ut fouea ante me esset, quamuis eam à me conspici non existimarët: illud enim, ante faciem meam, non significat, me aspiciente, & vidente; sed in loco, qui ante me erat, & per quem transurus eram. Et inciderunt in eam: id est, parauerunt mihi periculum vitæ, & ipsi in illud inciderunt; nam ut dicitur est supra ex cap. 23. lib. 1. Reg. Saul insidiabatur vitæ Davidis, & illo ipso tempore incidit in spelunca in manus Davidis, a quo poterat occidi, si David voluisset.

y. Paratum cor meum Deus, paratum cor meum, cātabo, & psalmum dicam.

Iam in fine Psalmi excitat Propheta spiritum suum in Deum, ac dicit, Paratum cor meum, paratum cor meum, id est, paratus sum viuere, paratus sum mori paratus conculcari, paratus regnare; & quicquid acciderit de manu tua accipiam: cantabo, & psalmum dicam, laudabo misericordiam, laudabo iustitiā; & voce, & instrumento musico.

Bellarm. in Psalm.

Exurge gloria mea, exurge XI. psalterium, & cithara: exurgam diluculo

Quia dixerat cantabo: & psalmum dicam: nunc ut id rectè fiat, non inuocat Musas ut prophani poetæ faciunt, sed inuocat spiritum prophetiæ, ut Theodoretus exponit. Exurge inquit, gloria mea, id est, donum spiritus, quo afflante canere soleo mysteria diuina, exurge psalterium, & cithara, id est, exurge spiritus meus, & lingua mea: spiritus enim per psalterium intelligitur quod ex parte superiore sonum edit, & lingua per citharam, quæ ex parte inferiore sonat. Exurgam diluculo, id est, summo mane, quod est aptissimum tempus contemplandi diuina, & canendi Deo, ego spiritus Dei exurgam, & excitabo spiritum tuum & linguam tuam ad canendum. Potest et cum S. Hieronymo, & S. Augustino hic locus intelligi de resurrectione Christi: David. n. qui satis intelligebat, se in passionibus suis Christi patientis, & morientis figuram gerere, Spiritu sancto afflatus ad Christum loquitur, ac dicit, Exurge gloria mea: nullam. n. maiorem gloriam David habere potuit, quam ut Pater Christi diceretur. Exurge inquit, gloria mea, Christe redemptor, filius meus & Dominus meus: exurge, psalterium, & cithara, id est, exurge caro Christi, quæ psalterium fuisti, dum diuina miracula operando ex parte superiore sonuisti; & cithara, dum humana patienti ex parte inferiore sonitum dedisti. Deinde inducit ipsum respondentem, exurgam diluculo: satis enim constat, Christum à mortuis diluculo surrexisse.

Confitebor tibi in populis Domine XII. mine, & psalmum dicam tibi in gentibus.

Surgens diluculo David ad canendum Deo, dicit, confitebor tibi, id est, laudabo te in populis Iudæorum, & psalmum dicam tibi in gentibus. Nouerat enim sanctus Propheta psalmos suos toto terrarum orbe canendos à fidelibus,

Y tum

tum ex Iudæis, tum ex gentibus in Ecclesia congregatis. Potest etiam sic exponi, vt Christus, qui dicit, Exurgam de luculo, addat, etiam, se per corpus suū, quod est Ecclesia Deum semper, & ubique laudaturum.

reprehensio est genetalis, & vt monuit S. Augustinus, concionatur Spiritus sanctus per os Prophetæ ad vniuersum genus humanum.

Explicatio Psalmi 57.

X III. Quoniam magnificata est vsq; ad cœlos misericordia tua, & vsque ad nubes veritas tua.

Hæc est materia laudis apud omnes gentes, quod misericordia Dei magna effecta sit, & creuerit vsque ad cœlos, non in se, quomodo semper est infinita, sed in operibus suis: & pari ratione veritas Dei, siue pro fidelitate, siue pro iustitia accipiat; repleuerit omnia vsque ad nubes, id est, vsque ad cœlos; accipit enim Propheta pro eodem vsque ad cœlos, & vsque ad nubes, quæ ideo dicuntur in scripturis nubes cœli. Matth. 26. Videbis filium hominis sedentem à dextris virtutis Dei, & venientem in nubibus cœli.

XIIII. Exaltare super cœlos Deus, & super omnem terram gloria tua.

Quomodo, Misericordia, & veritas Domini pertingunt vsque ad cœlos: sic etiam par est, vt gloria, & laus eius, & cœlum, & terram repleat.

PSALMVS LVII.

Titulus. & Argumentum
Psalmi.

In finem, ne disperdas David in tituli inscriptionem.



Titulus nihil habet noui Argumentum est acris reprehensio hominū iniquorum: quamuis enim occasio scribēdi nata sit ex iniquitate Saulis, & ministrorum eius persequentium Dauidem: tamen

SI verè utique iustitiam loqui. I. mini, recta iudicate filij hominum.

Non desunt ex recentioribus, qui velint totum versiculum legi per interrogationem, hoc modo, Num verè iustitiā loquimini? num recta iudicatis filij hominum? Sed veteres oēs Hilarius, Hieronymus, Augustinus, Theodoretus, Euthymius, & alij, legunt vt nos in textu nostro habemus. Sanctus autē Hieronymus non solū in expositione Psalterij, sed etiā in versione ex hebræo vertit, Si verè utique iustitiam loquimini, recta iudicate filij hominum. Quamuis .n. in prima parte versiculi adsit in hebræo litera, he, quæ est signum in interrogationis: tamen in secunda nō habetur: proinde ad verbū sic vertendum esset, Num verè iustitiā loquimini? recta iudicabitis filij hominum: quæ sententia eadem est, cum ista, si verè iustitiā loquimini, recta iudicate filij hominum. Igitur sententia Prophetæ hæc est, Cum oēs homines interrogati, an sit bonum furari, mæchari, decipere, & similia; rectè respondeant, non esse bonum; quia lex scripta in corde docet, ista non esse bona; cum nemo velit talia sibi fieri: cōuincuntur omnes iniqui non verè loqui iustitiam; sed fictè, ac simulatè, quia in corde suo iudicant, sibi esse bonū furari, mæchari, decipere, & similia: non .n. facerent, nisi bonum sibi esse crederēt. Nec solūm conuincuntur esse mendaces, dum falsò loquuntur iustitiam, & dicunt, non est bonum furari, mæchari, decipere, & similia: sed etiam conuincuntur mirabili cæcitate laborare, cum negare non possint, malum esse furari, cū videant se non posse pati fures: & tamē iudicent, sibi bonum esse furari, & facere alteri, quod sibi fieri, nolunt. nam si bonum

bonum est furtum, quare nolunt sibi fieri? si non est bonum quare volunt alteri facere? Aduersus istam voluntariam, & inexcusabilem cecitatem clamat Spiritus sanctus, si verè utique iustitiā loquimini, dum dicitis, malum est furari, mœchari, & similia: recta iudicate filij hominū, ist est, iudicate in corde vestro non esse facienda, ac per hoc nolite facere, quæ mala esse confessi estis.

II. Etenim in corde iniquitates operamini: in terra iniustitias manus vestræ concinnant.

Ostendit, non sine causa se admonuissē, ut recta iudicent, si iustitiam verè loquuntur: nam apparet contraria illos facere, ac per hoc non verè iustitiam loqui, sed fictē, ac mendaciter. Etenim, inquit, in corde iniquitates operamini, id est, in corde iudicatis, ac decernitis mala: neque ibi sistitis: sed in terra manus vestræ cordis mandata exequentes concinnant iniquitates. Illud, in terra, significat Peccata operū non posse fieri, nisi dum hic in terris viuimus: nam in inferno erunt quidem mala desideria: sed facultas exequendi non erit. Illud concinnant, in hebræo est, appēdunt, in græco, connectunt. Sed oīa idem significant, nimirum peccata peccatis aptē coniungi, & appendi vnum alteri, sed admixta sæpē specie aliqua virtutis, ut turpitudine iniquitatis aliquo modo tēgatur, exēplo esse pōt Davidis adulteriū: nam adulterio perpetrato, concinnauit David dolum, quo adulterium tēgeretur, aduocato videlicet Vria marito, atque ad vxorem misso, ut ex eo cōcepisse videretur: & quia hoc non successit, adiunxit adulterio homicidium, atque hoc etiam dolo alio concinnato, ut in prælio perijsse dici posset vide alia

III. exempla apud S. Augustinum.

Alienati sunt peccatores à vulua, errauerunt ab vtero, loquuti sunt falsa.

Hæc est alia peccatorū miseria, quod non post multos annos vitæ peccare in-

cipiunt; sed ab ipsa natiuitate, vix in lucem editi à recto tramite deflectunt. Alienati sunt peccatores à vulua, id est, ab ipso exitu de vulua alienati sunt à recto tramite, à via veritatis, à beata vita. errauerunt ab vtero. hæc est repetitio, & declaratio eius quod dictū erat, alienati sunt à vulua, loquuti sunt falsa: hoc enim est primum ordinariè peccatum actuale, quod pueri committūt, mendacium videlicet; inde se primum prodit naturæ corruptio.

Furor illis secundum similitudinem serpentis, sicut aspidis surdæ, obturantis aures suas.

Quæ non exaudiet vocem incantantium: & venefici incantantis sapienter.

Docuit morbum peccati ab ipsa infantia incipere: nunc addit, non solum hunc esse morbum diuturnum, sed etiā grauissimum, quia nonnunquam peccatores tanto furore, & tanta obstinatione grassantur in perniciem aliorum hominum, ut similes efficiantur serpentibus illis, qui surdi dicuntur, quia incantationibus nullis cedunt. Furor illis, id est, grauissimis peccatoribus, qualis tunc erat Saul, est secundum similitudinem serpentium, qui nulla arte mansuescieri possunt: imò secundum similitudinem Aspidis surdæ, quæ obturat cauda aures suas, ut non exaudiat vocem incantantium, nec venefici incantantis sapienter, id est, valdè periti in arte sua. Vtrum sit verum, an fabulosum, quod dicitur de Aspide claudētis sibi aures, ne audiat maleficum incantantem: nō multum refert ad huius Psalmi explicationem. David enim similitudinem ducit ab eo quod vulgo fertur. Monet etiā S. Augustinus non idē approbari incantationes veneficorum, quia David inde similitudinem accepit: nam, & Dominus in Euangelio similitudines duxit à Iudice iniusto, qui nec Deum timet, nec hominem reueretur: & à villico iniquitatis, qui donando bona Domini

Y : sui,

fui, amicos multos sibi conciliauit: & ab illo, qui inuento thesauro in agro alieno, continuò emit agrum illum, vt thesauro solus potiretur; nec tamen approbavit iustitiam Iudicis, neque fraudes seruorum, nec astutiam cupidorum.

VI. Deus conteret dentes eorum in ore ipsorum, molas leonum confringet Dominus.

Descripta grauitate peccati aliquorum hominum, inter quos Saulem Dauid numerabat in primis: describit nunc pœnas eorundem peccatorum aptissimis similitudinibus. Prima similitudo continetur in hoc sexto versiculo, & summa eius est, à Deo auferri potentiâ hominum peccatorum, quantumuis magni, robusti, & feroces esse videâtur: nihil enim robustius, & terribilius leone, & in ipso leone nihil durius, acutius, horribilius dentibus molaribus. Deus igitur dentes leonum confringet, id est, robur, & potentiam peccatorum quamuis potentissimorum auferet. Deus, inquit, conteret dentes eorum, peccatorum videlicet, qui instar leonum discerpunt, & dilaniant innocentes. In ore ipsorum, id est, dum adhuc sunt in ore ipsorum viuentium, & rugientium: nam contere dentes leonum iam euulsos facile est. Declarat, vel repetit more suo Propheta, quod dixit, dum addit, Molas leonum confringet Dominus, id est, non solum dentes minores, sed et molares, qui sunt omnium maximi, & durissimi, confringet Dominus.

VII. Ad nihilum deueniēt, tanquā aqua decurrens: intendit arcum suum, donec infirmentur.

Hæc est altera similitudo, quæ docet potentiam impiorum fore breuissimā, & post modicum ita redigendam esse ad nihilum, vt tota progenie extincta, ne vestigium quidem eius remaneat. Similitudo autem ducitur, vel à torrentibus

secundum Augustinum, qui ita interdum intumescunt, & omnia secum rapiunt, vt flumina maxima esse videantur, & tamen post vnam, vel alteram horam omnino siccantur, & euanescent, vt ne gutta quidem aquæ remaneat in alueis torrentium. vel ducitur similitudo ab ingenti pluuia hiemali, vt exponit S. Hieronymus, quæ per loca decliua ita statim decurrit, vt post modicum cessante pluuia, nusquam aqua ipsa compareat. Exempla innumerabilia adduci possunt tum potentissimorum tyrannorum, vt Saulis, Achab, & Hieroboam, vel Neronis, Caij, Domitiani, & similibus: tum Hæresiarcharum magni nominis, vt Arii, Nestorii, Dioscori, & cæterorum. Ad nihilum, inquit, deuenient tanquam aqua decurrens, torrentis, vel pluuia, quæ velocissimè transit, & vestigium non relinquit. Ac ne putaremus casu fieri, vel ex naturalibus causis, vt potentissima Regna Tyrannorum, aut famosissimæ hæreses tam cito finem accipiant; subiungit Propheta, Intendit arcum suum, donec infirmentur, id est, impiorum potentia tum celerè finem habebit, quia Deus omnipotens intendit arcum suum aduersus eos; neque arcum remittet, donec illi infirmetur, ac debilitetur, & viribus amissis deficient, & pereant.

Sicut cera, quæ fluit auferentur: supercecidit ignis, & non viderunt solem. VIII.

Tertia est hæc similitudo, quæ demonstrat, non minus facile esse Deo potentiam tyrannorum, atque aliorum impiorum ad nihilum deducere, quam facile sit soli, aut igni ceram liquefacere: cera enim quantumuis indurata, calori solis vel ignis nullo modo resistit; sed continuò liquefit, diffluit, & petit. Sicut cera, inquit, quæ fluit tangente illam sole, vel igne, ita auferentur de medio homines peccatores. Nam supercecidit ignis ira Dei in illos, & ipsi tanquam cera continuò liquefacti perierunt, & non vident amplius solem, quem

quem soli viuentes videre possunt. In Codice hebræo hic versiculus lō ge aliter habetur. sic enim vertit sanctus Hieronymus, Quasi vermis tabefactus per transeant, quasi abortiuum mulieris, qđ non vidit solem. Sed quod attinet ad vocabulum, sciabbelul, non possunt reprehendi Septuaginta, quod verterint, ceram, quia vox illa non habetur, nisi hoc loco, & aliqui volunt significare vermiculum, aliqui limacem, alij alia. Inter tot opiniones de obscurissima voce cur non magis credemus Septuaginta Interpretibus antiquioribus, doctoribus, & pluribus? Quod verò pertinet ad illam vocem, themes, nulla est difficultas: nam propriè significat liquefactionē, & Septuaginta rectè verterunt, ceram, quæ fluit, hoc est, liquefcit: & sanctus Hieronymus, qui vertit, tabefactum, sensum expressit, non verbum. Denique illa verba, nephel effeth, sanctus Hieronymus rectè vertit, abortiuum mulieris: sed Septuaginta rectè et verterunt, supercecidit ignis, quia remotis punctis Rabinorū illud, nephel, potest legi, nephel, quod significat, cecidit. & illud, effeth, legerunt sine vltima litera, & verterunt, ignis, quæ, es, ignē significat.

IX. Priusquam Intelligerent spinæ vestræ rhamnum, sicut viuentes, sic in ira absorbet eos.

Hæc est vltima similitudo, qua docet Propheta, Impios succidendos, & perdendos à Deo, antequā implere possint mala, quæ aduersus iustos meditati sūt, vt nō habeant gaudium de exterminio iustorum, quod maximè cupiebant: quo modo Saul antea male periit, quā de morte David latari potuerit: & Diocletianus, & Maximianus, alijque persecutores Ecclesiæ prius perierunt, quā vltimum exitium Christianorum viderint, ad quod totius viribus inhiabant, Similitudo autem desumpta est à spinis quæ ab agricola succiduntur dum teneræ sunt, antequam ad robur rhamni, quod est lignū magnis, & durissimis spi-

nis instructum, crescendo perueniant. Priusquam intelligerent spinæ vestræ rhamnum, sanctus Hieronymus ex hebræo vertit, Antequam spinæ vestræ crescant in rhamnum. Sanctus Hilarius, & Sanctus Augustinus legunt, antequam producat spinas vestras rhamnus. Nostra lectio concordat ad verbum cū hebraica, & cum græca. Porro lectio sancti Hilarij, & sancti Hieronymi in sensu conueniunt: nam spinas crescere in rhamnum, est spinas teneras, quæ ferire non possunt paulatim crescere, & fieri rhamnum, qui duris aculeis suis pungat, & feriat. sic et rhamnum producere spinas, est rhamnum tenerum, & qui nocere nō pōt, crescere, & induere aculeos, vt maximè nocere valeat. Oportet igitur ad eundem sensum reducere verba obscura nostræ lectionis: id quod fiet, si per vocem, intelligere, quæ est in hebraico, & græco Codice, interpretemur, crescere ad perfectum robur: quod quidem hominibus conuenit, qui tūc ad perfectam ætatem peruenerūt, quando sapere, & intelligere incipiūt: sed per metaphoram tribuitur et alijs rebus. Itaque sic exponi potest versiculus, Priusquam intelligerent spinæ vestræ rhamnum, id est, priusquā ad perfectionem suam spinæ teneræ crescendo peruenirent, vt ad instar rhamni pungere, ferire, & lacerare possent: sicut viuetes, sic in ira absorbet eos, id est, Deus absorbebit (absorbet enim hoc loco positum est pro absorbebit, sicut in Evangelio, ardet pro ardebit) Deus, inquam, absorbebit eos sic in ira sua, sicut viuentes absorbere solet terra, aut mare: mutatio autem illa personæ familiaris est Prophetis, vt cū loqueretur ad ipsos impios in secunda persona dicēs, spinæ vestræ, mox transeat ad tertiam dicēs absorbet eos, pro, absorbebit vos.

X. Latabitur iustus cū viderit vindictam, manus suas lauabit in sanguine peccatoris,

Cū hæc facta fuerit, quæ supra dicta sunt de perditione impiorum: tunc

lætabitur iustus, cum viderit vindictā; non autem amore vindictæ lætabitur, sed amore iustitiæ, & quia videbit se Dei gratia custoditum non esse lapsum in ea peccata, vnde tam seuerè puniri mereretur: nec solum lætabitur, sed etiā manus suas lauabit in sanguine peccatorum, id est, opera bona ipsius magis elucebunt ex comparatione malorum operum peccatorum: nam opposita iuxta se posita magis splendent. per sanguinem enim in scripturis, peccatum intelligi solet. Vel dici potest cum sancto Augustino, Iustum hic in terris lauare manus suas, id est, mundare opera sua, & in benè operando fieri diligentiorē, dum cernit sanguinem, id est, mortem, ac supplicia impiorum. In hæbreo habetur, pedes suos lauabit. Sed omnes alij Codices græci, & latini, & omnes tractatores legunt, manus.

ad gehennam. Vnde dicitur Deus iudicaturus orbem terrarum in æquitate. In hebreo Codice non habetur conditionalis, si, cum dicitur, si est fructus iustus; sed, verè est fructus iusto, verè est Deus iudicans eos in terra. Illud igitur, si, quod ex græco transijt in Codices latinos, non est conditio, vel particula dubitationem significans: sed explicanda est, vt nos paulò ante explicuimus, si est aliquis fructus iusto, vt sine villo dubio est, ille est, quod Deus iudicabit accuratissimè omnia opera bona, & mala, & non sinet iustos in perpetuum opprimi ab impijs, sed impijs condemnatis iustos coronabit. Quæ certè magna est consolatio iustorum afflictorum, qui ex fide viuunt, & expectant beatam spem, & aduentum magni Dei, & Saluatoris nostri Iesu Christi, cui sit laus, & gloria in secula.

XI. Et dicet homo si utique est fructus iusto: utique est Deus iudicans eos in terra.

Cum impij punientur, & iustus lætabitur; tunc dicet homo, id est, tunc homines, qui ista videbunt dicent, si iustitia fructum aliquem adfert, vt verè adfert, illa maximus est fructus, quod Deus summus omnium Iudex non finit peccatores impunitos, neq; iustos irremuneratos; sed retractat omnia iniusta iudicia, & iudicat eos, id est, tam malos, quā bonos, tribuens iustis debita præmia pro omnibus bonis operibus, quæ fecerunt, & pro omnibus malis, quæ pertulerunt: & impijs debita supplicia, pro omnibus malis, quæ fecerunt, & pro omnibus delicijs, in quibus lasciuiuerunt. Et sic impletur illud, Apoc. 18. Quantum se glorificauit, & in delicijs fuit; tantū date illi tormentum, & luctum. Iudicium autem hoc dicitur fieri in terra; quia fit pro his actionib. quæ factæ sūt in terra; & quia sæpè inchoatur in hac vita, licet perficiendum sit in altera; denique quia vltimum ēt iudicium fiet de hominibus, qui adhuc erunt in terra, & inde transaturi erunt, vel ad cælum, vel

PSALMVS LVIII.

Titulus, & Argumentum.

Ne disperdas, David in titulū inscriptionem, quando misit Saul, & custodiuit domum eius, vt eum interficeret.



X hoc titulo colligitur occasio scribendi Psalmum præsentem. Scribitur enim lib. 1. Reg. cap. 19. Missos fuisse satellites à Saule, qui custodirent domū David, ne forte noctu effugeret, vt eum mane factō interficerent: sed Dauidē coniugis suæ consilio & auxilio per fenestram noctu demissū aufugisse. Scribit igitur in hoc Psalmo David orationem, quam imminente tā ingenti periculo fudit ad Deū: & simul prædicit, vt solet, perditionem inimicorum suorum. Sanctus Augustinus, & Theodoretus volunt, Dauidem figurā Christi

Christi fuisse: Christus enim in sepulchro, quasi in domo, custodiebatur à satellitibus, ut impediretur eius resurrectio; & proinde etiam prædicatio Apostolorum, & ædificatio Ecclesiæ, quæ corpus est Christi. Sed Christus resurrexit non aperto sepulchro, relictis sindonibus, & David euasit relictis in lecto pellibus caprinis. Potest etiã totus Psalmus cõmodè explicari generatim de impijs persequentibus iustos, & impiorum exitio, ac iustorum liberatione. Solet enim David occasione afflictionum suarum concionari in vniuersum de afflictionibus, & consolatione iustorum, & malitia, ac supplicijs iniquorum. Quæ et causa est, cur Ecclesia frequentet assidue Psalmum; quod non tam accuratè faceret, si de solo Dauide plerique Psalmi intelligendi essent.

Explicatio Psalmi 53.

- I. **E** Ripe me de inimicis meis Deus meus, & ab insurgentibus in me libera me.

Vox est Davidis in propria domo, quasi in carcere detenti, obsidentibus eum satellitibus Saulis: vox itè est Christi in sepulchro iacentis, custodib. adhibitis: vox denique est cuiuscunque iusti in mortis periculo constituti.

- II. **E**ripe me de operantibus iniquitatem, & de viris sanguinum salua me.

Hæc est explicatio versiculi superioris: quos enim dixit ibi inimicos suos, hic dicit operantes iniquitatem: iusti enim non alios habent inimicos, nisi iniquos; neque alia est causa inimitiæ, ipsorum, nisi quia illi iniqui sunt, isti iusti. & quos ibi dixit, insurgentes in se, hic dicit viros sanguinum, id est, viros homicidas, & qui insurgunt in proximum, ut eius sanguinem fundant.

Quia ecce cœperunt animam meam irruerunt in me fortes.

Reddit ratione, cur dixerit, salua me, vel eripe me: quia videlicet in maximo discrimine vitæ amittendæ versabatur. Erat enim quasi fera intra rete cõclusa, & comprehensa, & iam iam interficienda: quod explicat clarius vox græca *ἐπιβουλεύοντες*, id est, venati sunt animam meam, quod etiam satis cõgruit cum voce hebraica, quâ sanctus Hieronymus vertit insidiati sunt animæ meæ. Ergo illud, quod in nostra editione legimus, cœperunt animam meam, non significat, acceperunt vitam meam, neque occiderunt; sed comprehēderunt me siue captiuum me cœperunt. Et irruerunt in me fortes, id est, Viri potentes, qualis erat Rex Saul, Abner Dux militiæ, & similes, in me impetum fecerunt: quod dicit, ut ostēdat persecutionē suā non esse paucorum satellitum à quibus tunc obsidebatur, sed Regis potētissimi, qui alios, & alios satellites, ac milites ad eum occidendū mutere poterat.

Neque iniquitas mea neque III. peccatum meum Domine: sine iniquitate cucurri, & direxi

Si ad personam Davidis hæc referatur, non significat, nullum fuisse in Dauide peccatum absolutè, sed non fuisse peccatum aduersus Regem, ut æmuli eius calumniabantur. At si referantur ad Christum, absolutè verissima sunt: Christus enim peccatum non fecit, nec inuentus est dolus in ore eius. Ait igitur, Neque iniquitas mea, neque peccatum meum Domine, id est, irruerunt in me fortes, & tamen, nulla est iniquitas, nulla iniustitia, neque peccatum aliud aduersus eos à me patratum, ut causam persequendi me habeant. Ego enim sine iniquitate cucurri, id est, cursum vitæ hucusque peregi sine vlla ipsorum offensione. Et direxi, id est, rectum cursum institui, non declinaui ad dexteram ad aucupandos fauores potentiorum;

neque ad sinistram, ut oprimeret pauperes, & humiles. In hebræo habetur in tertia persona: cucurrerunt, & direxerunt, id est, inimici mei cucurrerunt aduersum me, & direxerunt acies suas, ut me occiderent. Sed Septuaginta Interpretes aliter legerunt verba hebraica, & facilis fuit mutatio, cum prima persona, & tertia non differant, nisi in vltima terminatione. Sed res non est magni momenti.

V. Exurge in occursum meum, & vide: & tu Domine Deus virtutum, Deus Israel.

VI. Intende ad visitandas omnes gentes; non miserearis omnibus, qui operantur iniquitatem.

Dixerat, cucurri, & direxi: qui autem dirigit cursum suum, sine dubio ad Deum currit, ad quem omnia bona, ut ad finem vltimum diriguntur. Ait igitur, Ego bene operando ad te cursum meum direxi: tu igitur vicissim me protegendo, mihi occurre, atque ad me cursum auxilij tui dirige, & vide de proximo periculum meum, considera afflictionem meam: neque potes excusare impotentiam, vel ignorantiam; nam Dominus, & Deus virtutis es; atque ut Dominus, omnia potes, ut Deus, omnia vides, ut Deus virtutis, id est, exercituum, non solum per te, sed etiam per Angelos, & quolibet alias creaturas me iuuare potes; quia tibi omnia militant: denique tu es Deus Israel, proinde Israelita, ut proprius eorum Deus ex fœdere cum patribus nostris inito, protegere debes. Intende ad visitandas omnes gentes, id est, adueniat aliquando dies vniuersalis Iudicij tui, & tunc non miserearis omnium operantium iniquitatem, id est, nullius operantis iniquitatem miserearis; sed omnes pro meritis punias. Hæc videntur accipienda prophetice potius, quam per modum imprecantis, ut sensus sit, Veniet aliquando magna illa visitatio omnium gentium, in qua reddent omnes Deo summo Iudici rationem factorum

suorum; & tunc Deus nullius impij miserebitur, sed omnes malos male perdet. Atque ex hac explicatione cessat questio, quæ S. Augustinus mouet, quo modo verum sit, quod hic dicitur, non miserearis omnibus qui operantur iniquitatem: cum constet, Deum misertum esse se ipsius Davidis operantis iniquitatem adulterij, & homicidij; & S. Petri ipsum Christum negantis; & S. Pauli Ecclesiam persequentis. Cessat, inquam, ista questio, quoniam Deus misereatur operantium iniquitatem, non ut Iudex, sed ut Pater misericordiarum, dum operantes iniquitatem misericorditer conuertit ad poenitentiam. David autem hoc loco loquitur de Deo, ut Iudex est, qui reddet unicuique secundum opera sua, ac præsertim in vltimo Iudicio nullius impij, vel iniqui miserebitur.

VII.

Conuertentur ad vespèram, & famem patientur ut canes: & circuibunt ciuitatem.

Pergit explicare miseram conditionem iniquorum in nouissimo die. Ipsi. n. conuertentur ad vespèram, id est, finito die, in quo fructuose conuerti licebat, nimisque sero sapere incipient, & poenitentiam agere nihil eis profuturam. de quibus dicitur Sap. 5. Poenitentiam agentes, & præ angustia spiritus gementes. Et famem patientur, ut canes, famem vtriusque iustitiæ, quam esurire nescierunt quando tempus erat: vel famem qualescunque consolationis, & quietis; & circuibunt, ut canes famelici, ciuitatem Dei, id est, electorum cœtum: respicient enim ad omnes, si quo modo apud aliquem misericordiam inuenire possint, sed non inuenient. nemo enim Sanctorum in illa die miserebitur operantium iniquitatem: Erit autem hæc digna retributio, quoniam in hac vita viri iniqui conuersi sunt ad vespèram, id est, ad tenebras noctis, non ad lucem diei: & famem passi sunt, ut canes, id est, famelici fuerunt carnalium delectationum, quæ si comparentur ad spiritualia, cibi sunt corrupti, ac putridi, &

canum proprij; & ideo circumierunt ciuitatem: nā extra ciuitates in foiss murorum proijci solent cadauera equorū, aliorumque animantium immundorū, quæ non ab hominibus, sed a canibus deuorantur. Hunc locum alij exponunt de reuersione satellicum ad vesperam, vt noctu Dauidem in domo sua raperent, & instar canum vitam eius deuorarent. Alij de conuersione Iudæorum circa finem Mundi, iuxta illud Apostoli Rom. 11. Cæcitas ex parte cecidit in Israel, donec plenitudo gentium intraret, & sic omnis Israel saluus fieret. Alij de conuersione eorundem Iudæorum ad vesperam, id est, post mortem Christi, qui famem passi sunt, sicut canes, id est, sicut gentiles, & simul saturati sunt ad prædicationem Apostolorum, & tū ipsi quoque circumierunt ciuitatem docendo, & prædicando; quæ est expositio S. Augustini. Alij de reuersione Iudæorum in Palæstinam post euerfionem ciuitatis suæ Hierusalem, qui famem patiebantur pristinae felicitatis, & ceremoniarum legalium, & circuibant euerfam ciuitatem, si quò modo eam reedificare possent. Nos Lectori iudicium relinquitur.

Illi putant se non audiri, quando inter se secretò consultant, & putant se magna facturos: sed tu Domine, cui nihil est occultum, deridebis eos, tamquam vanos, qui nosti eorum consilia, & impedire conatus ipsorum nullo negotio potes; nec solum inimicos meos deridebis, sed etiam si omnes gentes cū illis coniungerentur, eas quoque contemneres, & nihili faceres. Vbi illud, Ad nihilum deduces, in hebræo est subfannabis, vt sit ferè idem cum, deridebis. In græco est, pro nihilo duces, quod in idem recidit. Itaque vt nostra latina editio cum textibus originalibus conueniat, sic explicandum est illud, Ad nihilum deduces, id est, pro nihilo habebis, siue ad nihilum deduces in mente tua, quia tamquam nihilum existimabis. Clarior id habetur in Psalm. 14. vbi dicitur, Ad nihilum deductus est in conspectu eius malignus. vbi illud, in conspectu eius, demonstrat, deduci ad nihilum, nō esse extingui penitus, ac deleri, sed pro nihilo reputari. Quomodo dicitur Isaie 40. Omnes gentes quasi non sint, sic sūt coram eo, & quasi nihilum & inane reputatae sunt ei.

V III. Ecce loquentur in ore suo. & gladius in labijs eorum. quoniam quis audiuit?

Reuertitur ad malitiam iniquorum: vicissim enim loquitur Propheta nunc de culpa, nunc de pœna impiorum. Ecce, inquit, qui me quarunt ad necem, loquentur in ore suo, id est, submissa voce inter se loquentur, vt vix ex ore sonus egrediatur. Et gladius in labijs eorum, id est, & verba ipsorum quasi gladius erunt, quoniam de nece inter se consultabunt. Securè autem inter se loquentur, quoniam dicent, quis audiuit? id est, nemo audiuit, secretus erit sermo.

IX. Et tu Domine deridebis eos, ad nihilum deduces omnes gentes.

Fortitudinem meam ad te custodiam, quia Deus susceptor meus es, Deus meus, misericordia eius præueniet me.

Quia meminit omnipotentia Dei, coram quo oēs gentes pro nihilo reputantur, humiliat se sub potētī manu Dei, vt gratiā mereatur. Fortitudinē, inquit, meam ad te custodiā, id est, ego robur meū non ex me habeo, sed a te accepi, ideo non in meis viribus est illud conseruare sed ad te, id est, apud te custodiā: tu qui dedisti, cōseruabis: quia susceptor meus es, Deus meus; id est, nō sine causa confido in protectione tua, quia tu Deus suscepisti me protegendū ab infātia meā, quia tu es propriè Deus meus, quē solū colo. Misericordia eius præueniet me, id est, non frustra hæc loquor, quia misericordia Dei præuenit me olim, & (vt confido) semper præueniet, vt nō finat me

me opprimi ab hostibus meis. Hæc iustissime David dicit, qui in pueritia præuentus fuit gratia Dei, & robur diuinitus accepit, ut vrsus, & leonem, ac deinde Goliath gigantem armatum ipse inermis occideret, & in Regnum item adhuc puer a Samuele unctus fuit. Quod si hæc referantur ad Christum, multo magis verificantur, cum ipse non a pueritia, aut infantia, sed a conceptione unctus fuerit Spiritu sancto, & virtute, ut loquitur S. Petrus Apost. Act. 10. In hebræo legitur, Dei misericordia eius præueniet me. Sed Septuaginta Interpretes non legunt, *elohe*, sed *eloha*, Deus meus. Itaque Rabbini non recte puncta collocauerunt.

אלהי
אלהי
XII.

Deus ostēdet mihi super inimicos meos, ne perda eos, ne quando obliuiscantur populi mei.

Disperge illos in virtute tua: & depone eos protector meus Domine.

Reuertitur Propheta ad inimicos suos ac prædicit penam ipsorum: sed hæc omnia magis loquitur in persona Christi, quam in persona propria. Deus, inquit, ostēdet mihi super inimicos meos, id est, demonstrabit mihi supplicium, quod patientur inimici mei. quasi dicat, iam reuelauit mihi Deus quid euenturum sit inimicis meis, sed etiam re ipsa ostendet euentum, & tunc videbo supplicium, quod iustissime patientur. Ego autem precor Deum, ut non occidat eos, id est, non omnino extinguat gentem Iudaicam: nequando homines obliuiscantur populi mei. vult enim Christus agnoscere populum suum, unde originem secundum carnem ducit. Rogo igitur, inquit, ut Deus in virtute sua, in potentia sua, cui nemo resistere potest, dispergat illos per orbem terrarum, & deponat eos de altitudine gloriæ, in qua positi erant, cum essent populus Dei peculiaris, & Regnum ac Sacerdotium obtinerent. Quæ omnia in Iudæis videmus ad literam adimpleta. In græcis codicibus habetur, ne quando obliuiscantur legis tuæ: & sic

legunt Hilarius, & Augustinus, Euthymius, & alij. Sed nostra lectio concordat cum hebraico codice; & credibile est sic etiam vertisse Septuaginta Interpretes, sed græcum textum postea fuisse mutatum: testatur enim S. Hieronymus in epist. ad Suniam, & Fretellam, in Septuaginta Interpretibus haberi populi mei, ut habetur in hebræo,

Delictum oris eorum, sermonem XIII. labiorum ipsorum, & comprehendantur in superbia sua.

Explicat causam dispersionis Iudæorum, quasi dicat, hæc illis eueniant, propter delictum oris eorum, id est, propter sermonem labiorum ipsorum, quod dixerunt, non habemus Regem, nisi Cæsarem; & Sanguis eius super nos, & super liberos nostros: Deus enim iuste illis tribuit, quod sibi imprecati sunt, iuxta illud Dan. 9. Et non erit eius populus, qui eum negaturus est. Et comprehendantur in superbia sua, id est, captiui fiant a Romanis, & humiliantur, ac deiciantur ob superbiam suam, qua gloriabantur se filios esse Abraham, & liberos, & nemini usquam seruiuisse, ut perspicuum est ex cap. 8. Ioannis. Verè enim propter superbiam, & contumaciam suam Romanorum indignationem in se prouocauerunt, ut patet ex libris Iosephi de bello Iudaico. Sed illa occasio fuit exitij: vera autem causa fuit superbia, qua Dei filium contempserunt.

Et de execratione, & mendacio XIII. annuntiabuntur in consummatione in ira consummationis, & non erunt.

Per execrationem, & mendacium intelligo verba illa supra dicta, Sanguis eius super nos: & Non habemus Regem nisi Cæsarem. illud enim, Sanguis eius super nos, fuit horrenda execratio, qua sibi imprecati sunt Iudæi penam debitam immanissimi omnium scelerum. Illud autem, Non habemus Regem, nisi Cæsarem, men-

mendacium, & simulatio fuit: constat. n. illos noluisse dare Cæsari censum, & iactasse se liberos, & nemini vnquam seruuisse, cum tamē hoc ipsum esset insigne mendacium: seruierunt enim Pharaoni in Aegypto, Nabuchodonosor in Babylonia, Philisthæis in terra promissionis, & tunc cū hæc dicerent, Romanis manifestissimē seruiebant. Prædicat ergo Propheta, quōd de hac execratione, & mendacio, id est, propter hæc delicta oris ipsorum, propter eam horrendā execrationem, & tam superba mendacia, annuntiabuntur in consummationē, id est, diuulgabuntur, & infames erūt toto orbe terrarum, quando euerfa ciuitate consummaretur, ac destrueretur omnis potentia, omnis gloria, omnis status Rei publicæ Iudæorum. In ira consummationis, hoc est, in illa consummatione, quæ non casu accidet, sed ab ira, & indignatione Dei proueniet, & idēd erit perfecta, & absoluta consummatio, vt nunquam deinceps Iudæi Regnum, & ciuitatem Regiam sint habituri: idēd additur, & non erunt, id est, & sic peracta cōsummatione, non amplius subsistent Iudæi, id est, non erunt populus, nec Regnum, sed dispersio, & dissipatio miserabilis, vt hodie cernimus oculis nostris. In codice hebraico legitur, De execratione, & mendacio annuntiabunt: sed verba hebraica facillē mutant significationes: propterea Septuaginta Interpretes, qui peritissimi erāt hebraicæ linguæ verbum actiuum in passiuā significatione interpretati sunt. In eodem codice legitur, Consume in ira consume, vt non subsistant. Verū Septuaginta Interpretes, vel acceperunt vocem, calle, pro nomine, non pro verbo, id est, pro consummatione, non pro imperatiuo, cōsumes vel certē sensum expresserunt, non verbum verbo reddiderunt.

בלה

XV. Et sciant, quia Deus dominabitur Iacob, & finium terræ.

Et cū fuerint dispersi Iudæi per omnes terras; tunc sciēt, & apertē videbūt, Deum verū, non solū Dominum esse

Iacob, id est, populi Israelitici, sed etiam finium terræ, id est, omnium gentium vsque ad vltimos fines terræ. Antea siquidē notus erat in Iudæa Deus, & in Israel magnum nomen eius; & dicebatur, Effūde irā tuā in gentes, quæ te non nouerunt, & in Regna, quæ nomen tuum nō inuocauerunt: sed post euerfionem Hierosolymæ, Euangelio Christi per orbē terrarum prædicato, dispersi Iudæi viderunt vbiq. Deum verum colī, Idola confringi, Psalmos Dauidicos canita didicerunt, Deum non solū Iudæorū Deū esse, sed etiam gentium.

Conuertentur ad vesp̄eram, & XVI. famem patientur vt canes: & circuibunt ciuitatem.

Sed nūquā apertius scient, Deū dominari Iacob, & finium terræ, quā in nouissimo die, quando stabimus omnes ante tribunal Christi, & illi flectetur oē genu: tunc conuertentur ad pœnitentiam, sed ad vesp̄eram, finito tempore misericordiæ; & famem patientur vt canes, & circuibūt ciuitatem electorum, vt cibū consolationis inueniant.

Ipsi dispergentur ad manducā XVII. dum: si verō non fuerint saturati, & murmurabunt.

Ijdē Iudæi dispergētur ad māducādū recurrendo ad Patriarchas suos, & Prophetas, atq; ad eos clamādo vt canes famelici; & qā nihil cōsolationis accipiet, neq; ab illis pro filiis agnoscat, murmurare incipiet, & queri de infelicitate sua. Quod si hæc nostra explicatio non probetur, iam indicauimus alias multas, dum versiculū septimum explicaremus.

Ego autem cantabo fortitudinem tuam, & exultabo mane misericordiam tuam. XVIII.

Hactenus de impijs persecutoribus; nunc Dauid siue in persona propria, siue potius

potius in persona Christi, & Ecclesie, quæ corpus eius est, explicat lætitiā, & exultationem suam, necnon laudē Dei, & actionem gratiarum. Ego autem, inquit, cantabo fortitudinem tuam, id est, miseri illi latrabunt, & murmurabūt; ego autē ē contrario cantabo, & laudabo fortitudinem tuam, id est, magnam potētiā tuam, quam ostendisti in debellatōne, & perditione iniquorum. Et exultabo misericordiam tuā, id est, exultans laudabo misericordiam, quam ostēdisti in liberatione, & glorificatione iustorum: id autem faciam summo mane, id est, primo quoque tempore, ante omnia alia negocia; vel mane, id est, inchoante die sempiternæ fœlicitatis, transacta iā nocte terribilis Iudicii; vniuersalis. Pro, exultabo, multi Latini Codices habent, exaltabo: sed lectio nostra concordat cum textu hebraico, & græco; & sic legunt Patres.

XIX. Quia factus es susceptor meus & refugium meum in die tribulationis meæ.

Declarat effectum misericordiæ, quā exultando decantaturum se promittit: quod videlicet Deus susceptor eius fuerit, id est, protegendum suscepit, & refugium illi præstiterit in omni tribulatione sua.

XX. Adiutor meus tibi psallā, quia Deus susceptor meus es Deus meus misericordia mea.

Idem alijs verbis repetit, ut affectum suum, & gratum animum erga tantū benefactorem ostendat. Illud, Adiutor meus, in hebræo est, fortitudo mea, ex quo intelligimus, significari adiutorē robustum, & potentissimum: proinde laudatur ea voce potentia Dei. Per illud autē, Susceptor meus, laudatur bonitas Dei, quæ sub alas suas protegendos suscipit electos. Per illud, Deus meus, significatur summū bonum nostrum, ac finis vltimus omnium desideriorū. quamvis autē


in hebræo sit, Deus misericordiæ meæ: tamen rectē Septuaginta, & latinus Interpretres verterunt, Deus meus, misericordia mea, quia vox hebræa vna, & eadem si legatur, Elohe, significat Deus, si legatur, Elohai, significat, Deus meus: & sic legerunt Septuaginta, & hæc est vera lectio, quicquid Rabini dicant. Denique illud, Misericordia mea, significat in compendio omnia beneficia Dei, quibus ad ipsum Deum, id est, ad summum bonum peruenimus: rectē. n. obseruat S. Augustinus, multo ampliùs esse misericordia mea, quā sal⁹ mea, vita mea, spes mea, & similia. Misericordia. n. fecit, ut essemus, ut viueremus, ut liberaremur a malo, ut proficeremus in bono: misericordia Dei prædestinati sumus, vocati sumus, iustificati sumus, glorificati tandem erimus: nam etiam si glorificatio ex meritis detur, tamen ipsa merita nostra, dona sunt Dei, quia sine gratia præcedente nulla essent. Merito igitur idem Prophetam in psalm. 102. dicit, Qui coronat te in misericordia, & miserationibus.

אלהי
אלהי

P S A L M V S LIX.

Titulus, & Argumentum.

In finem pro his, qui immutabuntur. In tituli inscriptionem ipsi Dauidi in doctrinam, cum succendit Mesopotamiam Syria & Sobal, & conuertit Ioab, & percussit Idumæam in valle Salinarū duodecim millia.



Occasio scribendi psalmi præsentis fuit ea victoria, quæ narratur in Titulo, & fusius lib. 2. Reg. ca. 8. & 10. & 1. Paralip. 18. Occasione, inquam, huius victoriæ canit Prophetam præteritas afflictiones suas, & totius populi, & præsentem, ac futuram fœlicitatem. Quæ omnia possunt etiam applicari Ecclesie, quæ

quæ post multas persecutiones mirum in modum dilatarî, & crescere cœpit, vt etiam Imperatores, & Reges, eorumque Imperia, & Regna sceptro suo subijceret. Non legitur quidem in libris Regum, quod David succenderit Mesopotamiam, & Sobal, sed tantum quod cœperit: cœterum non omnia scripta sunt in libris Regum, neque pugnat hic titulus cum ea historia, cum vtrunque fieri potuerit. Videtur etiam hic titulus dissentire ab historia, quod hic dicantur cæsa a Ioab duodecim millia Idumæorum: in lib. autem 1. Paralip. 18. dicatur cæsi Idumæi ab Abisai fratre Ioab, ad decem & octo millia. Sed non est necesse vt de eadem cæde intelligamus titulum huius Psalmi, & locum Paralip. Potest enim fieri, vt & Ioab interfecerit duodecim millia, & Abisai alio tempore decem & octo millia.

Explicatio Psalmi 59.

- I. **D**eus repulisti nos, & destruxisti nos: iratus es, & misertus es nobis.

Incipit narrare præteritas afflictiones populi Israelitici, Deus, inquit, repulisti nos a paterna cura, & protectione, & destruxisti nos, permittens nos destrui, opprimi, & vexari a Philisthæis, Idumæis, Moabitis, alijsque populis inimicis nostris. Iratus es, & misertus es nobis, id est, iratus es nobis ob peccata, quibus te ad iracundiam prouocauimus, & ideo tradidisti nos in manus hostium nostrorum: sed tamen paulo post misertus es nobis, dum nos per gratiam tuam ad pœnitentiam reuocasti, & post pœnitentiam a captiuitate, & persecutione liberaſti. Hæc verissima esse intelliget, qui leget librum Iudicium, & librum primum Regum: Vicissim enim Iudæi nunc ob peccata tradebantur in manus hostium, nunc ob pœnitentiam liberabantur. Eadem contigerunt Ecclesiæ Christi: persecutionum enim causa tribuitur peccatis Christianorum a S. Cypriano

in serm. de lapsis, ab Eusebio lib. 8. hist. Ecclesiasticæ, a Victore Africano lib. 1. de persecutione Vandalica, & ab alijs. Tanta autem erat interdum vis persecutionis, vt Ecclesia verissimè dicere posset, Deus repulisti nos, & destruxisti nos: iratus es, & misertus es nobis. Istud autem, misertus es nobis, potissimum tribui debet fortitudini Sanctorum Martyrum. quamuis enim Deus iratus peccatis Christianorū persecutiones permitteret: tamen valdè miserebatur Ecclesiæ, dum insigni dono fortitudinis armaret plurimos Christianorum; vt maior esset Ecclesiæ gloria ob coronas innumerabilem Martyrum, quàm depreſſio & vastatio ob rapinas honorum, & ruinas ædificiorum sacrorum.

Commouisti terram, & conturbasti eam, sana contritiones eius, quia commota est. IL

Explicat magnitudinem persecutionis. Comouisti, inquit, terram, id est, non vnum, aut alterum populum, non vnā, aut duas ciuitates, sed orbem terræ comouisti. Et quidem si respiciamus persecutiones Iudaicas, sensus erit, Comouisti totam terrā promissionis; si verò cogitemus persecutiones Christianas, quæ sæpè vniuersales erant, sensus erit, Comouisti terrā vniuersam, id est, Ecclesiā toto orbe diffusam: & conturbasti eam, id est, dirupisti (id. n. propriè sonat vox hebraica, pazam) siue scidisti, aut vulnerasti eam, multis Ecclesiæ membris amputatis, ac per hoc valdè conturbasti eā. Magna. n. turbatio erat in Ecclesia, quando membra principalia, Episcopi, & Doctores trucidabantur. Sana contritiones eius, quia commota est, id est, tu Deus, qui non vt hostis, sed vt Medicus Ecclesiam ferro, aut igne vexasti, sana etiam scissiones, & vulnera eius; quoniam bona commotione mota est, admonita videlicet hoc flagello, conuersa est ad pœnitentiam, & ad currendam deinceps viam mandatorum tuorum, quæ diuturna prosperitate languere, ac in via subſistere cœperat.

Osten-

III. Ostendisti populo tuo dura, potasti nos vino compunctionis.

Perfistit in eadem narratione, ac dicit Ostendisti populo tuo dura, id est, fecisti, ut populus tuus videret, & experiretur duras persecutiones, & afflictiones. Potasti nos vino compunctionis, id est, occasione huius flagelli, fecisti, ut rediremus ad cor, & biberemus calicem amarum, sed salubrem sanctae compunctionis. In verbo, ostendisti, insinuatur benignitas Dei, qui tribulationes nobis, non tam immittit, quam ostendit, ut terreat, non ut noceat: unde multo sunt minores, quam carnalibus videantur: ideo dicit Apost. 2. Cor. 4. Momentaneum hoc, & leue tribulationis nostrae, &c. In verbo autem, potasti nos, insinuatur eadem benignitas Dei, qui donum saluberrimum poenitentiae, non ostendit, sed intra nos, atque adeo in immum cordis infundit: quomodo vinum epotum ad viscera calefacienda descendit. Non desunt, qui legant, vinum soporis, & sic in hebraeo haberi contendunt. Sed vox hebraica, targhela, ambigua est, & sicut soporem secundum aliquos significat, ita secundum alios tremorem, vel fletum, vel, ut Septuaginta viri peritissimi transtulerunt, compunctionem. S. Augustinus legit, vino stimulationis, quod est idem, cum vino compunctionis, stimulus enim ad pungendum fieri solet.

תרנלה

III. Dedisti metuentibus te significationem, ut fugiant a facie arcus.

Per illa omnia dura, (persecutiones videlicet, & afflictiones,) quibus in hoc mundo Iusti vexantur, Deus signum dat electis suis metuentibus eum, ut fugiant a facie arcus, qui sagittas lethiferas iaculabitur in omnes impios tempore suo, id est, in nouissimo die: tribulationes. n., quibus nunc purgantur electi a venalibus maculis, signa sunt grauissimarum poenarum, quas luent impij post hanc vi-

tam. atque hoc est, quod scribit Apostolus Petrus in priore epistola cap. 4. Tempus est, ut incipiat iudicium a domo Dei si autem primum a nobis, quis finis eorum qui non credunt Dei Evangelio? Et coapostolus eius Paulus 1. Cor. 11. Cum iudicamur a Domino corripimur, ut non cum hoc mundo damnemur. Deus igitur dum purgat electos, significat illis, ut a temporali sua tribulatione admoniti, intelligant, quae supplicia maneant impios; & ideo iuste, & pie viuentes fugiant a facie arcus diuini, qui extensus nunc manet; sed in die nouissimo cum tanto impetu laxabitur, ut impios in aeternum perdat.

Vt liberentur dilecti tui saluum V.
fac dextera tua, & exaudi me.

Concludit orationem suam, ac si diceret, Vt ergo liberentur dilecti tui a persecutionibus, & angustiis, in quibus tam diu versati sunt: saluum fac dextera tua me Regem populi, & exaudi me pro vniuerso populo deprecantem.

Deus locutus est in sancto suo: VI.
laetabor & partabor Sichimam, & conuallem tabernaculorum meibor.

Meus est Galaad & meus est VII.
Manasses: & Ephraim fortitudo capitis mei.

Iam incipit ostendere, exauditam fuisse orationem suam, & se victoriam obtinuisse de omnibus ferè hostibus suis, ac dilataste vehementer imperium suum. Deus, inquit, locutus est in sancto suo, id est, Deus locutus est per me sanctum Prophetam suum, & aperte prae dixit quae futura erant, & iam magna ex parte completa sunt. In textu hebraeo iuxta puncta Rabinorum legitur, Deus locutus est in sanctitate sua, siue in sanctuario suo. Sed eadem vox hebraica cum alijs punctis significat, in sancto suo; nam, codscio, est, in sanctitate sua, &

קדשו

1077 & chedofcio, est in sancto suo, & sic legerunt Septuaginta Interpretes, & oēs veteres, excepto S. Hieronymo, qui in versione ex hebræo legit cum Rabinis, in sanctuario suo: sed in Commentario legit, & interpretatur, in sancto suo, id est, in Christo, cuius typum Dauid gerebat. Erat autem notissima hæc prædictio toti populo: nam Abner Dux militiæ Saulis lib. 2. Reg. capit. 3. dicit populo, Dominus locutus est ad Dauid, dicens, In manu serui mei Dauid saluabo populum meum Israel de manu Philistinum, & omnium inimicorum eius. Lætabor, & partibor Sichimam: post mentionem factam prophetiæ, incipit demonstrare, eam prophetiam magna ex parte esse adimpletam. Lætabor, inquit, tamquam victor Imperio acquisito, & mirificè dilatato: ac primùm partibor Sichimam, id est, Samariam, tamquam Dominus eius in partes suas diuidam, numerabo vrbes, oppida, pagos, constituam in eis iudices, & magistratus. Et conuallem tabernaculorum metibor, id est, & idem faciam in regione proxima, quæ dicitur conuallis tabernaculorum. Lege cap. 33. Gen. ibi enim dicitur regio illa appellata Sohot, id est, tabernacula, quia ibi primùm Iacob fixit tabernacula, & emit partem agri in terra Sichimorum. Notandum hoc loco est, Dauidem enumeraturum provincias Regni sui, cœpisse a Sichima, quæ in Samaria est, & pro ipsa Samaria accipitur, & a valle tabernaculorum; quia ibi fuit initium possessionis Iacob, & filiorum eius in terra promissionis. Notandum etiam, Dauidem non meminisse hoc loco nisi Sichimæ, Sohot, Galaad, Manasse, & Ephraim, quæ omnia pertinebant ad tribum Ioseph; quia illa erat omnium maxima, & ideo sub nomine eius intellexit provincias omnium decem tribuum, quæ pertinebant ad Regnum Israel. Seorsim postea meminit tribus Iuda, cum qua coniungebatur tribus Benjamin, & dicebatur Regnum Iuda, post diuisionem factâ sub Roboam. Addit igitur, Meus est Galaad, & meus est Manasses, id est mea est regio, quæ dicitur Galaad, a viro sic nominato, & mea est regio, quæ dicitur

Manasses a Manasse filio Ioseph. Et Ephraim fortitudo capitis mei, id est, & mea est regio, quæ dicitur Ephraim, ab altero filio Ioseph; quæ quidem regio plena est virorum fortium, vt dici possit fortitudo capitis mei, id est, in qua consistit præcipuum robur, & defensio capitis mei, seu vitæ meæ, & Regni mei.

Iuda Rex meus: Moab olla spei VIII. meæ.

Post enumeratas provincias decem tribuum sub nomine Manasse, & Ephraim: nunc addit tribum Iuda, cum qua, vt dixi, coniungebantur tribus Benjamin. Iuda, inquit, Rex meus, id est, mea quoque est tota regio, quæ dicitur Iuda a Iuda filio Iacob, quæ tribus Iuda est tribus Regia: nam vt dixit idem Dauid lib. 1. Paralipom. cap. 28. Deus de Iuda elegit Principes: & ipse etiam Iacob moriens, & benedicens filiis, dixit de Iuda Gen. 49. Non auferetur sceptrum de Iuda, & Dux de scemore eius, &c. ad quam promissionem hoc loco Dauid alludens vsus est eadem voce hebraica, qua vsus fuerat Iacob. nam in hebræo est vtrobique vox, mechohec, pro qua hoc loco habemus, Rex, & in Genesi, Dux, significat autem propriè, mechohec, legislatorem. proprium enim Principis, siue Regis, siue Ducis est leges dare subiectis populis. Dicit igitur, Iuda Rex meus, id est, tribus Iuda, quæ principatum gerit in populo meo, vel ex qua prodierunt Principes, patres mei, & prodibunt principes filij mei. Post enumeratas provincias Regni proprii, enumerat provincias hostium debellatorum, quæ tributariæ factæ erant: ac primo loco ponit provinciam Moabitaram, quæ dicebatur Moab a Moab filio Loth nepote Abraham. Moab, inquit olla spei meæ, id est, provincia Moab mihi iam subiecta, est mihi instar ollæ plenæ carnibus, in cuius abundantia, & vbertate sperare possum. In hebræo legitur, Moab olla lotionis meæ; & sensum esse volunt, qui ita legunt, Moabitas coactos fuisse ab Israelitis victoribus seruire in humili-

ministerio seruiuisse Hebræis. Deinde, quamuis verbum, rachaz, quod hic habetur, significet lauare, tamen Septuaginta Interpretes non erant tam imperiti, ut verterent olla spei meæ, si vox hebræa solam lotionem significaret. Itaque credibile est, aut Septuaginta Interpretes aliquid aliud legisse, aut eam vocem significare non solum lotionem sed etiam spem, ac fiduciam, quemadmodum apud Chaldaeos significat.

IX. In Idumæam extendam calceamentum meum, mihi alienigenæ subditi sunt.

Pergit referre quas aliàs provincias hostium debellauerit, aut debellare cupiat. In Idumæam, inquit, extendam calceamentum meum. Idumæa est regio, quam possidebant, qui ab Esau fratre Jacob ortum ducebant. Et quamuis cum hic Psalmus scriberetur, iam obtinisset David vnā victoriam aduersus Idumæos, & occidisset ex ipsis duodecim millia, ut dicitur in titulo Psalmi: tamen nondum totam Idumæam sibi subiecerat: quod postea factum est, ut patet ex illis verbis. 2. Regum 8. Et facta est vniuersa Idumæa seruiens David. Ait igitur, In Idumæam extendam calceamentum meum, id est, pergam ad debellandam, & pedibus conculcandam Idumæam. Mihi alienigenæ subditi sunt, hoc est, iam enim Philisthæos, qui alienigenæ sunt, debellauī. Philisthæi dicuntur alienigenæ, quia nullam affinitatem habebant cum Israelitis. Idumæi enim, Ammonitæ, & Moabitæ, quamuis non essent filij Iacob, tamen erant affinitate aliqua illis coniuncti. siquidem Idumæi descendebant ab Esau, siue Edom, qui erat frater Iacob: Ammonitæ, & Moabitæ descendebant a Loth nepote Abrahami. Ex hebræo S. Hieronymus vertit, Alienigenæ mihi confederati sunt: & nostra vulgata editio in Psalmo 107. vbi repetuntur hi versiculi, sic habet, Alienigenæ mihi amici facti sunt. Vox hebraica ambigua est, potest enim deduci a verbo, ragag,

quod significat subijcere, & contere, & hanc significationem sequuti Septuaginta dixerunt, Mihi subditi sunt. Potest etiam deduci a verbo, raha, quod significat pascere, & societatem, atque amicitiam contrahere: & hanc significationē amplexus est S. Hieronymus, & noster Interpres in Psalmo 107. qui dixerunt, confederati sunt, vel amici facti sunt: sed vterq. sensus est verus. Siquidē Philisthæi deuicti bello, & tributarij effecti, ac per hoc subditi ad fœdus & amicitiam admissi sunt.

Quis deducet me in ciuitatem X. munitam? quis de ducet me vsque in Idumæam.

Quoniam hæc sola gens restabat omnino subijcienda, quæ habitabat in locis munitissimis, ideo David nunc dicit, Quis deducet me in ciuitatem munitā? id est, quo Duce, quo auxiliante ingredi potero victor in Regiam Idumææ, quæ est ciuitas valdè munita? De munitione Regis Idumæorum scribit Abdias Propheta, Superbia cordis tui extulit te habitantem in scissuris petrarum, exaltantem solium tuum, qui dicis in corde tuo quis detrahet me in terram? si exaltatus fueris ut Aquila, & si inter sydera posueris nidum tuum: inde detraham te, dicit Dominus. Declarat autem David de qua ciuitate munita loquatur, cum addit, Quis deducet me vsque in Idumæam? id est, quis faciet, ut capiam Idumæam, & in eam victor ingrediar? Hæc omnia ad Christum & Ecclesiam mirifice accommodantur: nam Regnum Iuda est ipsa Ecclesia fidelium. Sichimitæ, siue Samaritani significant hæreticos, qui magno cum labore, sed tandem aliquando vincentur, & subijcientur omnes. Ephraim, & Manasse significant schismaticos, siquidem Hieroboam separauit eos a Hierosolyma, & templo Domini, & erexit aliud altare: & isti quoque tempore suo subijcientur. Moabitæ, & Philisthæi significant Gentiles, qui & ipsi ab Ecclesia superabuntur. Denique Idumæi significant Iudæos, qui in Christum

sum credere noluerunt, qui omnium obstinantissimi in fine mundi conuertentur ad Christum. Quamuis enim Iudæi recentiores, nos Christianos, Idumæos vocent se autem Israelitas: tamen Apostolus ad Roma. 9. satis apertè declarauit, carnales Israelitas secundum spiritum Idumæos esse, non Israelitas: Christianos autem secundum spiritum veros esse Israelitas: de qua re vide sanctum Augustinum in epist. 197. quæ est ad A-fellicum, alias 200.

mus exercitum, in hoc autem versiculo intelligimus fortitudinem, quia verba hebraica diuersa sunt, & illud exercitū, hoc fortitudinem significat. Quod si in bello corporali verum est in solo Deo confidendum esse, tamquam in auctore præcipuo; multò magis id verum est de bello spirituali, quo Ecclesia pugnat aduersus hæreticos, schismaticos, Ethnicos, & Iudæos: & contra spiritualia nequitia in cœlestibus.

XI. Nonne tu Deus qui repulisti nos? & non egredieris Deus in virtutibus nostris.

Respondet interrogationi per aliam interrogationem, quasi dicat, non est aliud, qui me introducere possit in ciuitatem munitissimā Idumææ, nisi tu Deus, qui repulisti nos, & non egredieris ad bellum confusus in virtutibus, id est, in exercitibus nostris: sicut enim te repellente, & deferente vincebamus, ita te solo præsentē, & adiunante vincere poterimus non confidentes in viribus exercituum nostrorum, sed in tua soliū omni potentissima virtute.

XII. Da nobis auxilium de tribulatione, quia vana salus hominis.

Ergo, inquit, tu qui solus potes, & in quo solo confidimus, da nobis auxilium, quo de omni tribulatione, & angustia liberemur, quia vana est salus, quæ ab hominibus expectari potest.


XIII. In Deo faciemus virtutem, & ipse ad nihilum deducet tribulantes nos.

In Dei auxilio confisi faciemus virtutem, id est, fortiter agemus: & ipse erit, qui vt principalis auctor per instrumenta manuumstrarum profligabit omnes inimicos, qui nos tribulant. Nomine virtutis in versu vñdecimo intellexi-Bellarin. in Psalm.

PSALMVS LX.

Titulus, & Argumentum
Psalmi.

In finem, in hymnis David.



Argumentum huius Psalmi ex sententia recentiorum quorundam est oratio Davidis in exilio positi. Ex sententia Theodoret, & Euthymij est oratio populi apud Babylonem captiui. Sed ex sententia Sanctorum Hilarij, Hieronymi, & Augustini, quos nos sequimur, est oratio hominis iusti, siue Ecclesiæ Christianæ in peregrinatione inter tentationes varias laborantis, & ad patriam cœlestem, & quietem perpetuam suspirantis.

Explicatio Psalmi 60.

Exaudi Deus deprecationem meam, intende orationi meæ.

Præfatio breuissima hæc est, quia vir iustus, siue populus Christianus petit audientiam a Deo, vt exaudiat deprecationem suam, & ab ea audita non auertatur, sed benignè potiùs eam consideret. Vox hebraica, rinna, significat clamorem, non simplicem deprecationem, proinde per deprecationem intelligere debemus

רִנָּה

Z

debemus orationem magno affectu prolatam, & cum ingenti clamore cordis; & ideo meritò petit audiri, & attendi: oratio enim frigida, & solis labijs fusca non penetrat nubes, ne dum cælum cælorum.

II. A finibus terræ ad te clamaui dum anxietur cor meum: in petra exaltasti me.

Numquam fuit David exul in finibus terræ, neque captiui ducti sunt vnquam filij Israel in fines terræ: quare vox hæc Ecclesiæ est, quæ occupauit orbem terræ vsque ad vltimos terminos eius, iuxta illud Psal. 1. Postula a me, & dabo tibi gentes hæreditatem tuam, & possessionem tuam terminos terræ. Ait igitur, Ego, pagata vsque ad fines terræ, ex ipsis finibus terræ, id est, ex toto orbe simul per voces membrorum meorum ad te clamaui, vbi per verbum, clamaui, declarauit vocem illam, deprecationem, nihil esse aliud, nisi ingentem clamorem. Potest etiam per fines terræ, intelligi distantia maxima ab eo, qui clamat, ad eum cui clamatur. Deus enim cui clamatur est in finibus cæli, id est, in summo cælo; is verò qui clamat est in finibus terræ, id est, in ima terræ, vt hæc sit ratio tantissimi clamoris. Quomodo in Psal. 129. dicitur, De profundis clamaui ad te Domine. Magna enim voce clamare debet, qui in imo positus exaudiri vult ab eo, qui sedet super Cherubim in altissimo cælo, id est, qui intelligens infinitam distantiam inter suum nihil, & diuinas perfectiones, tamen cum ipso Deo colloqui in oratione præsumit. Dum anxietur cor meum, in petra exaltasti me. Reddit rationem, cur magna fiducia clamet ad Deum, quia videlicet, aliàs expertus est, auxilium diuinum sibi in tribulatione non defuisse. Dum aliàs, inquit, non raro anxietur cor meum, ob varias tentationes deprimentes me: tu clamantem exaudisti, & in petra exaltasti me, id est, in altissimo, & munitissimo loco collocasti: quem locum paulò post, turrim fortitudinis appellabit. Porro petra ista subli-

mis Christus est, in quem quicumque per contemplationem exaltatur: & quanta ipse prior passus sit, & quem exitum passionis eius habuerint, diligenter cogitat, faciliè vincit, & contemnit omnia. In hebræo habetur, in petra exaltabitur supra me. quæ verba nullum sensum faciunt; ideo credibile est, Septuaginta non legisse, iarum mimmeni, exaltabitur supra me: sed iisdem literis, vna dempta, ieromeméni, exaltabit me, siue exaltauit me, vt habetur in Psalmo 26. nam futurum sæpè accipitur pro præterito. parum autem refert quod ad sensum attinet, siue dicatur, in petra exaltasti me, siue Deus in petra exaltauit me.

יְרֹמֶנִי
מִמֶּנִּי
יְרֹמֶנִּי

Deduxisti me, quia factus es III. spes mea turris fortitudinis a facie inimici.

Declarat quod dixit, in petra exaltasti me. Deduxisti me, inquit, id est, Dux mihi fuisti, cum fugerem ab hoste, tentationibus me impugnante. Quia factus es spes mea, id est, hoc fuit me deducere & Ducem mihi se præbere, implere me bona spe, quæ fecit, vt non caderem, sed magno animo omnia tolerarem. Itaque tu factus es spes mea, & turris fortissima a facie inimici mei: qui enim confidit in Deo, & recogitat, quid Christus ipse sit passus, & ad quantam gloriam resurgendo peruenerit, & ipsum esse caput nostrum, quem intuendo discimus, quid in terris agere, & pati; & quid in cælo expectare, & desiderare debeamus: ille sine dubio turrim munitissimam ascendit, vbi non solum iacula hostium vitare, sed etiam in hostes tela iaculari poterit.

Inhabitabo in tabernaculo tuo II. in secula, protegar in velamento alarum tuarum.

Docet, turrim illam fortissimam non esse cælestem habitationem, sed peregrinantium tabernaculum: nam, & vox hebræa gur, & græca, *παροικία*, quæ hic habentur, significant propriè, habitare

גִּיר

more peregrinorum. Ait igitur, Inhabito in tabernaculo tuo in secula, id est in turri illa fortitudinis inhabito tamquam peregrinus in tabernaculo; atque interim protegar in velamento alarum tuarum, ut pullus sub alis Gallinæ, ne moribus Miluorum pateam. Sanctus Hilarius exponit hanc habitationem tabernaculi, de habitatione domus celestis, propter illud verbum, in secula. Sed S. Augustinus exponit de habitatione peregrinantium; cui fauēt proprietates vocabulorum, & etiam metaphoræ, quibus Propheta utitur; Turris, quæ defendit ab impetu hostium; tabernaculi, quod defendit a pluuijs, & sole; & velamenti alarum, quod defendit a moribus Milui. Illud, in secula, significat hoc loco, assidue, perpetuo, semper, ut sensus sit, ab hoc tabernaculo non recedam, quamdiu periculum tentationis erit: quod verbis proprijs dicere potuisset, in tua protectione semper confidam, quamdiu vixero in hac carne mortali; vel, ut S. Augustinus exponit, illud, in secula, significat, usque ad finem seculi. Ecclesia enim, quæ hic loquitur, durabit usque ad Mundi consummationem, in velamento alarum Dei; quamuis enim vndique ab hostibus impetatur, tamen portæ inferi non praualebunt aduersus eam, Matth. 16.

V. Quoniam tu Deus meus exaudisti orationem meam: dedisti hæreditatem timentibus nomen tuum.

Ratio fiduciæ meæ est, quia tu Deus meus semper exaudisti, id est, semper exaudire consueuisti orationem meam. exaudisti autem orationem meam, quia inter filios tuos numerasti me, quibus hæreditatem iam dedisti, id est, firmiter promissisti: si enim Deus timentibus se filijs suis, hæreditatem æternam seruat, quo modo non defēdet illos in via? quo modo non exaudiet eos de quacunque tribulatione clamantes ad se? quis enim Pater filios probos vnquam despexit, aut deseruit? Et si Deus pro nobis, quis

contra nos? Itaque de hæreditate in cælis, & de protectione in terris omnino securi, & certi sumus, si verè timuerimus eum.

Dies super dies Regis adijcies: VI. annos eius usque in diem generationis, & generationis.

Quia Propheta meminit hæreditatis Sanctorum, quæ est vita æterna, declarat hanc hæreditatem toti Ecclesiæ promissam, inchoandam esse in capite: & ideo dicit, Dies super dies Regis adijcies id est, Christo Regi multiplicabis dies super dies sine vilo fine, & similiter annos eius multiplicabis usque in diem generationis, & generationis, id est, usque in diem æternitatis, qui dies, quamuis vnus sit, tamen æquiualeat generationi, & generationis, seculo, & seculo; temporibus, & temporibus sine fine. Hæc phrasi æternitatem significari, perspicuum est ex Psalmo 118. vbi dicitur, In æternum Domine, verbum tuum permanet in cælo, in generatione, & generationem veritas tua. Cui simile est quod dicitur in Psalmo 134. Domine nomen tuum in æternum, Domine memoriale tuum in generatione, & generationem. In quibus locis pro eodem accipitur, in æternum, & in generatione, & generatione. Ex his aperte colligitur, hunc Psalmum non conuenire Regi David, sed soli Regi Christo. David enim non vixit vltra septuaginta annos: neq; Regnum permansit in domo eius, nisi ad certum, ac definitum tempus. Itaque æternitas Regis, & Regni in scripturis sanctis prædicta, in Christo adimpletur: nam & Regni eius non erit finis, ut dicitur Luc. 1: & ipse resurgens a mortuis iam non moritur, mors illi vltra non dominabitur, Rom. 6.

Permanet in æternum in conspectu Dei, misericordiam, & veritatem eius quis requiret? VII.

Rex Ecclesiæ Christus permanet in æternum

æternum in cōspectu Dei; ad hoc enim introiuit in cælum, vt appareat vultui Dei pro nobis, Apostolo teste, ad Heb. 9. In hebræo est, sedebit, siue sedet in æternum in conspectu Dei; vt intelligamus, Christum permanere sedendo, vt decet Regem, non assistendo more Ministrorum. Misericordiam, & veritatē eius quis requireret? id est, misericordiam, qua redemit genus humanum; & veritatem qua promissa seruauit, & seruat, quis inuestigabit? Sunt enim abyssus multa, ac vt Apostolus dicit ad Ephes. 3. Charitas Christi supereminet scientiā, id est, maior est, quā intelligi possit. Ita exponunt Theodoretus, & Euthymius. S. Hilarius, & S. Hieronymus hunc sensū esse volunt, Misericordiam, & veritatē eius nemo requireret, quia præsto erit omnib. In hebræo habetur, Misericordiā, & veritatem para, seruabunt eum. Sed septuaginta vocem man, para, legerunt, mi, qs. & verbum, nat̄sar, quod significat seruare, ipsi interpretari solent, scrutari, vt p̄spicuum ex Psal. 118. v. 2. & alibi sap̄. Ita q̄. dubium esse non debet, quin significet etiam quærere, inuestigare, scrutari: alioqui non tam constanter Septuaginta viri doctissimi ita redderent: sed mirum est, quā variè legāt Patres pronomen additum in hebræo. nam S. Hilarius legit, Quis requireret eorum. S. Augustinus, Quis requireret ei. S. Hieronymus in commentario, Qui requireret eius; at in versione ex hebræo legit, eū. Septuaginta omiserunt pronomen in fine verbi; sed addiderunt ad nomen, veritatis, veritatem eius quis requireret. Et sine dubio versio Septuaginta Interpretum optima, & clarissima est. Ad literam ex hebræo sic verti deberet, Misericordiam, & veritatem quis requireret eum? & sensus est, Misericordiam, & veritatem quis requireret ab eo, vel in eo? quem sensum optime reddiderunt Septuaginta, dices, Misericordiam, & veritatē eius quis requireret?

VIII. Sic psalmū dicam nomini tuo in seculum seculi: vt reddam vota mea de die in diem.

Quia misericordia Domini Christi tā abundanter mihi adest, & veritas eius tā certa est, vt non sit opus eam requirere; ego sic psallam nomini tuo in seculum seculi, id est, laudabo te Deum meum, non hic in terris tantum, sed etiam in cælis, æternis himnis, & canticis celebrabo: vt hoc modo reddam vota gratiarum actionis de die in diem, id est, omnibus diebus presentibus, & futuris, vsque ad eum diem, cui nox nulla succedet. Potest etiam sic accipi, sic psallam voce nomini tuo semper, vt etiam opere impleā promissā mea, legem tuam semper, & ubiq̄. seruādo; sed prior expositio, quæ sancti Hilarij est, magis probatur.

PSALMVS LXI.

Titulus, & Argumentum
Psalmi.

In finem pro Idithum, Psalmus
David.



E hoc titulo diximus in explicatione Psalmi tricesimi octauī. Argumentum Psalmi est exhortatio ad patientiam in aduersis, & & confidentiam in Deo; cuius occasione agitur de vana confidentia in diuitijs.

Explicatio Psalmi 61.

Nonne Deo subiecta erit anima mea? ab ipso enim salutare meum.

Vir iustus grauiter impugnatus a concupiscentijs varijs, quarum quolibet animum humanum sibi subicere satagit, fortiter reluctans clamat, Nonne Deo subiecta erit anima mea? id est, nōne æquum est, & mihi vtilius, vt Deo subijciar,

subijciat, quàm dominatui auaritiæ, vel superbiæ, vel luxuriæ ab ipso enim salutare meum. Nam concupiscentiæ, quæ mihi dominari affectant, nullum stipendium aliud polliceri possunt, nisi mortem sempiternam. Deus autem salutem pollicetur, & certissimè præstabit, si fidelè illi subiectionem, & obedientiam exhibeo. In hebræo ad litteram legitur, Attamen ad Deum silebit anima mea, quia ab ipso salus mea. sed idem est sensus; est enim ac si dicat, quamuis multa mihi dominari velint, tamen anima mea soli Deo subiecta ad omne mandatum, siue, ad omne eius beneplacitum, vt vera obediens silebit, non contradicet, nõ murmurabit.

II. Nam & ipse Deus meus, & salutaris meus; susceptor meus, non mouebor ampliùs.

Non solùm, inquit, ab ipso pendet salus mea, sed ipse est Deus meus, & salutaris meus. In hebræo pro voce, Deus, est, **צור**, quod propriè petram, siue fortitudinem significat. Itaque sensus est, Ipse Deus mihi in hac vita est petra, ac robur, in alia erit Salus mea; in vtraque, Susceptor meus est, quippè qui nunc suscipit protegendum, tunc suscipiet coronandum. Ideò non multùm mouebor, non nutabo, sed fortis permanebo, quàmuis tentationibus quatiar. Illud, ampliùs vt ex hebræo cognoscitur, non significat, deinceps, aut in posterum, sed multùm, siue valdè.

III. Quousque irruiis in hominè? interficitis vniuersi vos: tamquam parieti inclinato, & maceræ depulsæ?

Postea quàm de se locutus est, conuertitur ad deplorandum stragem animarum, quam per arma variarum concupiscentiarum maligni spiritus quotidie faciunt. Verè enim innumerabiles sunt homines, quos demones deiiciunt in peccatum, quod est mors animæ, per a-

uaritiam. ambitionem, luxuriam, iracundiam, inuidiam, & alias eiusmodi passionem. Itaque indignabundus aduersus malignos spiritus, dicit, Quousque irruiis in hominem? & quia vox hebraica propriè, insidiari significat: intelligimus, Prophetam per, irruere, significare voluisse, irruere per desiderium, & astutiam, vt sensus sit, Quousque non cessatis, insidiando generi humano irruere in hominem impetu astutiæ, & insatiabilis desiderij vestri? Interficitis vniuersi vos, id est, vndique stragem editis animarum vniuersi vos maligni spiritus diuersis quidem in locis, & modis variis, sed ad malefaciendum coniuncti. Tamquam parieti inclinato, & maceræ depulsæ. hic subintelligitur verbum accommodatum, vt sensus sit, vim facitis humano generi ex peccato originis fauciato, & ad malum prono, tamquam parieti inclinato, & parieti non solido, sed ex luto, & paleis composito, vt maceria potius, quàm murus dici possit. Quibus verbis miro modo descripsit Propheta, tum Dæmonum potentiam, & crudelitatem erga genus humanum, tum debilitatem & fragilitatem ipsius generis humani. Verè enim homines post corruptam naturam similes facti sunt maceræ impulsæ, & inclinatæ, quæ facillimè deiici potest, cum & fragiles sint, & propensi ad malum ab adolescentia sua, vt dicitur Gen. 8. proinde merito clamat Apostolus, Infelix ego homo, quis me liberabit de corpore mortis huius? & mox addit de potentia gratiæ Gratia Dei per Iesum Christum Dominum nostrum, Rom. 7.

Veruntamen precium meum IIII. cogitauerunt repellere, cucurri in siti, ore suo benedicebāt, & corde suo maledicebant.

Reuertitur vir iustus ad causam, vnde digressus erat ad apostrophem contra inimicos, atque ostendit, finem hostibus spiritualibus propositum, dū iustos impugnant, esse, vt priuent eos æternis honoribus, quos videlicet illis imul-

Z ; dent,

dent, quoniam ipsi inde culpa sua exciderunt. Veruntamen, inquit, precium, meum cognauerunt repellere, id est, ideò tentant, ideò impugnant, ideò concupiscentias excitant: ut precium, quo redemptus sum, repellant a me, & dignitatem, atque honorem illum magnum æternæ gloriæ mihi auferant. Sed ego contra, cucurri in siti, id est, tanto ardore cucurri ad brauium supernæ vocationis, quanto illi cucurrerunt ad illud a me repellendum. Ore suo benedicebant, & corde suo maledicebant, id est, ore suo blandiebantur hortantes ad voluptates vitæ præsentis, tamquam res bonas, atq; viles: atque interim corde maledicebant scientes, eas ipsas voluptates venenum esse animæ, atque ad impediendam lætitiā sempiternam instrumenta esse aptissima. In hebræo, ut nunc legitur secundum puncta Rabinorum, sic habetur, Veruntamen exaltationem eius cogitauerunt repellere, complacuerunt mendacio, ore suo benedicebant, corde suo maledicebāt. Itaque de quatuor vocibus est difficultas, quæ sunt, precium, meum, cucurri, in siti. Vox precium, in hebræo est, **מַסְעוֹת** maseoth; quàm vocem sanctus Hieronymus vertit, partem, Septuaginta verterunt precium, alij vertunt exaltationem, in græco est, **τιμή**, quæ honorem, & præciū significat. Hilarius, Augustinus, Theodoretus, Euthymius, & Hieronymus in commentario legunt, honorem, & satis concordat vox hebraica, quæ exaltationem significat. Basilus, & Ambrosius legunt, precium, & exponunt de precio redemptionis Christi. Sed vox, præciū, significat etiam dignitatem; proinde possumus per precium intelligere dignitatem, honorem, & exaltationem. Et quod attinet ad sensum in idem recidit, siue accipiamus precium pro dignitate, siue pro precio redemptionis, siue pro utroque, ut supra in nostra explicatione ostendimus. Vox, meum, sine dubio recte posita est hoc loco, & eam habent omnes codices græci, & latini, & omnes tractatores. proinde illud, eius, quod est in hebræo, indicat vocem hebraicam esse corruptam vitio scripto-

rum, quod facillè fuit, cum litera quæ significat, meum, sit Iod, litera quæ significat eius, sit Vau, quæ non differunt, nisi quòd vna, est paulò longior altera. Vox, cucurri, vel cucurrerunt, ut alij legunt, bene posita est, & cum hebraica concordat, si remoueantur puncta Rabinorum, Rabini enim legunt irzu complacuerunt: sed Septuaginta viri longè doctiores legerunt, iaruzu, cucurrerunt, vox græca **ἰαρεύω**, ambigua est, & tam cucurri, quam cucurrerunt significare potest. Et quidem Hilarius, Augustinus, & Hieronymus in Commentario legunt cucurri. Basilus, Theodoretus, & Euthymius, legunt, cucurrerunt. Ambrosius utramque lectionem probat, & exponit, ut & nos in nostra explicatione fecimus: nam uterque sensus est verus. Vox, in siti, habetur in textu græco, & in omnibus latinis, & legitur ab omnibus expositoribus. Quid autem legerint Septuaginta in hebræo, ut verteret, in siti, fateor me ignorare: nam vox hebraica, **עָזָב** eazab, in mendacium significat, neque est vlla literarum similitudo inter sitim, & mendacium in lingua hebraica, sitis enim dicitur, **זָמָא** zama. S. Ambrosius conatur concordare hanc diuersitatē textuum, dicens, mendacium sitim habere, veritatem vbertatem. Sed verisimile est Septuaginta Interpretes aliter legisse, & in voce, eazab, pro, eaph, legisse, beth, quæ sunt literæ similes, & sic habuisse præpositionem, in, pro aliis duab. literis, vel aliquid aliud legisse, vel sciuisse ea voce, sitim, significari.

Veruntamen Deo subiecta esto v. anima mea, quoniam ab ipso patientia mea.

Quia ipse Deus meus, & sa'ua vi. tor meus adiutor meus, non emigrabo

In Deo salutare meum, & gloria mea, Deus auxilij mei, & spes mea in Deo est. VII.

Redit ad primos duos versiculos, eos que

que repetit, ut ostendat, magnas quidē esse tentationes, quibus urgetur, sed tamen se in Dei amore fundatum, atque eius auxilio fretum nihil metuere. Veruntamen, inquit, Deo subiecta esto anima mea, id est, quantumvis hostes frement, tu anima mea tacita, & subiecta obedias Deo. Est enim hoc loco eadem vox hebraica, quæ in primo versiculo, nimirum, Deo silebit anima mea. Quoniam ab ipso patientia mea, id est, tace Deo, quoniam ipse tibi præstabit auxilium. Nam hoc loco nomine patientiæ significatur, patiens expectatio auxilij diuini, ut ex verbo hebraico, & græco constat. Quia ipse Deus meus, &c. hic versiculus sextus, est omnino idem cum secundo: quamvis enim Interpres latinus vocabula variauerit, tamen in hebræo sunt omnino eadem. Ita quæ illud, Deus meus, est etiam hoc loco, petra mea; & illud, Saluator meus, est salus mea, siue salutaris meus: & illud, adiutor meus, est susceptor meus; & denique illud, non emigrabo est eadē vox, quæ antea verba est, non mouebo: proinde non emigrabo, significat hoc loco, non deiciar de statu meo, non emigrabo ad partes hostium, sed innotus in castris Dei permanebo. Concludit in septimo versiculo, se omnia a Deo expectare, finem videlicet & media. Finis est liberatio ab omnibus malis, & adeptio summi boni: illud significatum est per salutem, hoc autem per gloriam: media sunt auxilium Dei, & spes nostra quæ propriè nominata sunt. In Deo, inquit, salutare meum, & gloria mea, id est, a Deo expecto salutem, id est, liberationem a malis, & gloriam æternam, quæ est summum bonum: nam cum Deum videbimus, & similes ei erimus, perfectèque illi adhærebimus, tunc verè salui, & beati erimus: potest tamen etiam cum S. Basilio exponi: In Deo solo, non in vlla re alia gloriari: non in diuitijs, nō in honoribus, non in potentia humana quia nihil excellentius cogitari potest: quàm filium esse Dei. Nec solum in Deo finem vltimum repositum habeo: sed ipse etiam est Deus auxilij mei, id est, ipse est fons gratiæ, qua aditus perueniam

ad finem illum: & ideo tota spes mea in eo est. In hebræo habetur, petra roboris mei, pro Deum auxilij mei.

Sperate in eo omnis congregatio VIII.
populi, effundite coram illo
corda vestra: Deus adiutor noster
in æternum.

Hortatur nunc ceteros ad virtutem, quam ipse Dei dono acceperat: ac primum monet, sperandum esse in Deo, deinde addit, non esse sperandum in rebus creatis. Sperate, inquit, in eo, id est, in Deo: omnis congregatio populi, id est, omnis cœtus, omnis populus, omnes homines; non Iudæi solum; sed etiam gentes. In hebræo est: Sperate in eo omni tempore: sed manifesta est corruptio in textu hebræico per defectum vnius literæ, nūc enim legitur, heth, quod significat tempus, sed esse debet, hadath, quod significat congregationem, & sic legērunt Septuaginta. Effundite coram illo corda vestra: effundi dicitur vas, cum euacuatur, & etiam liquor cum ex vase eijcitur. Itaque si cor accipitur pro vase, ut accipit sanctus Basilius, effundere cor, est euacuare cor a vitijs, affectibus malis, peruersis cogitationibus, & similibus quasi liquoribus noxijs: non enim impleri potest cor gratia Dei, sanctisque cogitationibus, & desiderijs, nisi euacuetur contrarijs. pulchrè notat sanctus Ambrosius, admonitos esse homines, ut effundant corda euacuantes ea sordibus; quia scriptum est, Effundam de spiritu meo super omnem carnem. Si cor accipitur pro actu cordis, id est, pro cogitationibus, & affectibus, tunc effunditur cor, quomodo effunditur aqua, vel vinum. Et hoc modo accipit S. Augustinus, qui vult effundendum esse cor, id est, non retinendum cor in corde, sed effundendum ad Deum, ut cogitationes nostræ, & affectus sint in Deo non in nobis. Significat etiam effusio cordis: secundum Ambrosium confessionem sinceram, & apertam, qua confitemur peccata, & miseria nostras, & ex intimo corde oramus Deum, ut misereatur;

quomodo dixit Anna 1. Reg. 1. Effudi animam meam in conspectu Domini. Et de hac effusione videtur hic locus præcipuè intelligendus: nam sequitur, Deus adiutor noster in æternum: id est, securè confitemini Deo ærumnas vestras, & orate eum, nam adiutor noster est, & nō despicit orationes sperantium in se. Illud in æternum, in hebræo est, selah, quod græci vertunt, *διὰ παντός*, noster autem Interpretēs aliquando omittit, aliquando vertit, semper, aut, in æternum: hæc est ratio cur Hilarius, Augustinus, & alij non legant in æternum.

IX. Verumtamen vani filij hominū, mendaces filij hominum in stateris, vt decipiant, ipsi de vanitate in idipsum.

Quoniam animaduertit Propheta, paucos esse, qui consilium suum sequi velint, ideò inuehitur in multitudinem iniquorum. Verumtamen, inquit, vani filij hominum, mendaces filij hominum. In hebræo significantius dicitur, vanitas filij hominū, quia maxima pars hominum vacua est vera sapientia, & si apparenti sapientia, quam prudentiam carnis Scriptura sacra appellat, plenissima sit: ideò autem plerique homines vani, insipientes, & imprudentes sunt, quia mendaces sunt in stateris ad decipiendum, id est, in stateris dolosis, & fraudulentis. Nam, vt rectè observat sanctus Basilius, non agitur hic de stateris propriè dictis, quibus pauci vtuntur, illi videlicet soli qui vendunt carnes, aut lanas, aut alia id genus; sed de stateris communibus toti humano generi, id est, de iudicio rectæ rationis, quod nobis datum est a Deo, vt discernamus, & quasi in statera appendamus vera bona, & vera mala, apparentia bona, & apparentia mala, & eligamus vera bona, & vitemus vera mala. Porro maxima pars hominum mentitur sibi, & alijs, decipitque se, & alios vtens stateris dolosis, & quod miserius est, voluntariè stateris vtitur dolosis, iuxta illud, Video meliora, proboque, deteriora sequor.

Nemo est enim, qui negare audeat, maximum, verissimumque malum esse peccatum, & gehennam; maxima, verissimaque bona esse iustitiam, & beatitudinem: & tamen cum appenduntur in statera lucrum temporale, & offensio Dei; lucrum præponderat, & præeligitur: & cum appenduntur temporale detrimentum, & mors æterna, temporale detrimentum præponderat, atque vt illud euitetur, ignis gehennæ contemnitur. Addit Propheta, Ipsi de vanitate in idipsum, id est, ipsi vani, & mendaces, licet varijs modis vani sint, & mendaces, tamen in idipsum conueniunt, vniti, & cōiuncti sunt in hoc vt vani sint, & mendaces: vel breuius, Ipsi de vanitate in idipsum, id est, ipsi ex vanitate habent, vt vnum sint. In hebræo habetur paulò aliter, Vanitas filij hominum, mendaces filij hominum in stateris ad ascendendum ipsi præ vanitate in idipsum, id est, filij hominum non solum vanitas sunt, & mendacium, sed etiam positi in statera cum ipsa vanitate, ascendunt præ vanitate, ac per hoc leuiore, & magis vani sunt, quàm ipsa vanitas; quæ est elegantissima amplificatio. Sed tamen non existimo hunc esse literalem sensum; sed eum, quem paulò ante tradidimus: nam vox illa hebraica, laaloth, *לעלות*, ad ascendendum, cum alijs puncti legi potest, laoloth, ad iniquitatem, siue ad deceptionem, & sic legerunt Septuaginta: immò etiam S. Hieronymus eodem modo legit, cum verterit, in stateris dolosis: & omnes Patres græci, & latini sic legunt, & interpretantur. Illud, vt decipiant, non debere coniungi cum, ipsi, perspicuum est ex hebræo, & græco textu. Sic enim legendum est, mendaces in stateris, ad decipiendum, ipsi de vanitate in idipsum.

Nolite sperare in iniquitate, & rapinas nolite concupiscere: diuitiæ si affluant nolite cor apponere.

Redit ad exhortationem, ac præcipuè, vt caueatur avaritia, quæ est radix om-

omnium malorum. Nolite, inquit, sperare in iniquitate, & rapinas nolite concupiscere, per iniquitatem intelligitur calumnia, vt propriè significat vox hebraica: proinde prohibetur lucrum iniustum, tum ex occulta iniustitia, quale est calumniantium, tum ex manifesta, quale est rapientium. & additur, Diuitiæ si affluent, nolite cor apponere, id est, ad opes etiam iusto titulo acquisitas nolite affectum ponere. Pulchrè notat S. Augustinus, eos qui rapinis delectantur, videre quid rapiant, sed non videre à quo rapiantur. rapiunt enim pecuniâ fratri, & rapit illis Diabolus animam. notat etiam idem Augustinus, cum S. Basilio, diuitias fluere dum affluent: cæcos autem cupidos considerare quod affluant, & non cogitare quod fluât. Ideo autem dictum esse, nolite cor apponere, ne videlicet cum fluentibus fluat, & pereat. Oportet igitur cum affluunt diuitiæ, corde immoto, & stabilito apud Deum, disponere fluxum earum, vt utiliter fluant: quomodo prudens agricola disponit fluxum aquarum ad irrigandû hortum, ad molam vertendam, & ad alia eiusdem generis opera, sed non labitur ipse cum aquis labentibus.

XI.

Semel locutus est Deus: duo hæc audiui, quia potestas Dei est & tibi Dñe misericordia; quia tu reddes vnicuiq; iuxta opera sua.

Concludit rationem reddens, cur nō sint appetendæ diuitiæ, & cur ab omni peccato canendum sit. Semel, inquit, locutus est Deus, duo hæc audiui. In hebræo est, Vnum locutus est Deus; quod non videtur cohærere cum sequentibus, Duo hæc audiui: sed illud, semel, vel vnum, significat immobilitatē verbi Dei, vt docet S. Hieronymus in Commentario huius Psalmi, quasi dicat, Semel Deus loquitur, & fit omnino quod loquitur, obediunt .n. omnia Deo ad nutum, vt non sit opus repetere. Vel per vnum, quod Deus locutus dicitur, non intelligitur vnum verbū, sed vnus sermo, quo multa continentur, vt do-

cet S. Basilius. Vel per, vnum, intelligitur verbum æternum, vt S. Augustinus exponit, Deus enim vnum verbum tantum dixit ab æterno, & illud manet in æternum, & æquiualeat innumerabilibus verbis. Duo autem, quæ David audiuit, & nobis omnibus nunciauit, hæc sunt: Vnum, quod potentia, & misericordia in Deo sint; illa vt timeatur, ista vt ametur: alterum, quod vnicuique reddet secundum opera sua, ita vt neque iniuste oppressurus sit aliquos per potentiam, neque misericordia eius sit præiudicatura iustitiæ. Et verè, qui ista duo seriò cogitant, atque illis cor suum apponunt sapientissimi sunt.

PSALMVS LXII.

Titulus, & Argumentum.

Psalmus David, cū esset in deserto Idumææ.



On legitur David latuisse vnquam in deserto Idumææ, sed in deserto Iudææ. 1. Reg. 22. & 23. & in textu hebraico, & græco habetur, in deserto Iudææ: tamen quoniam Sancti Patres Hilarius, Hieronymus, & Augustinus in Commentario legunt, in deserto Idumææ: non est cōtemnenda lectio vulgatæ editionis. Euthymius conatur cōcordare has lectio num varietates, dicens, Desertū in quo latuit David olim ad Idumæam pertinuisse, postea ad Iudæam: sed hoc diuinare est. probabilius videtur, desertum Iudææ vocatū esse desertum Idumææ amplificandi gratia: quomodo Hierusalem aliquando vocatur Sodoma. Nam desertum Idumææ est longè maius deserto Iudææ; imò tota Idumæorum regio in montibus, & solitudine est, vt intelligi potest ex cap. 1. Malachiæ, vbi loquēs Deus de possessione Edom, Posui, inquit, montes eius in solitudinem, & hæreditatem eius in dracones deserti. Idem

Idem colligitur ex lib. 4. Reg. ca. 3. ubi describitur desertum Idumææ itineris septem dierum, & carens aqua, &c. Argumentum Psalmi est oratio Davidis, qui occasione deserti in quo tunc latebat, deplorat peregrinationem suā, & sibi similitum iustorum, & desiderium suum ostendit migrandi aliquando ex deserto Mundi huius ad patriam cœlestem.

Explicatio Psalmi 62.

- I. **D**eus Deus meus ad te de luce vigilo.
- II. Sicut in te anima mea, quam multipliciter tibi caro mea?

Describit vir iustus, quæ sint prima opera sua oriente die, ac dicit esse, quæ rere Deum, desiderare Deum, miseras suas confiteri Deo. Deus Deus meus, id est, Tu Deus est fortitudo, & robur meum quia sine te nihil sum, & nihil possum: in hebræo sunt duo nomina, vnum significat Deum, alterum significat fortem, sed verti solet etiam per vocem, Deus. Itaque editio græca, & latina quæ habent, Deus Deus, reprehendi non possunt: tamen sensus est, quem diximus, quia vox, El, significat Deum, ut fortem. Ad te de luce vigilo, id est, cum primum lucem aspicio corporalibus oculis, aperio pariter oculos mentis ad te lucem spirituales, & increatam; atque ita ad te querendum vigilare incipio, non ad opera mundi huius. Id autem facio, quia sitiuit in te anima mea, id est, quia anima desiderat te, ut cibum, & potum suum, ut lumen, & lætitiā suam. Ipsa etiam caro mea multis modis sitiit ad te fontem omnium bonorum quamvis enim caro non proprie Deum sitiāt tamen sitire dicitur, quia indiget eius misericordia ob multiplices suas miseras: quomodo dicitur terra arida sitire pluuiam, sine qua nihil boni producere potest. Quot sint autem carnis huius corruptibilis necessitates, & miseriæ, quibus ille solus mederi potest, de quo dicitur in Psal. 102. Qui sanat omnes

infirmittates tuas; nemo est, qui non experiatur. In hebraico codice post illa verba, Deus Deus meus, est pronomen, tu: quod Septuaginta omiserunt, sed subintelligi debet, ut sensus sit, tu es Deus meus, & ideo confidenter ad te confugio, & te alloqui præsumo. Illud autem Ad te de luce vigilo, in hebræo est unica dictio, asciacharecha, quæ significat sub auroram te quero, siue in crepusculo matutino, cum incipit miseri lux auroræ tenebris noctis, ego euigilio, ut te quæram: ex quo intelligimus continuum, & vehemens fuisse in Dauide desiderium Dei: & merito, cum ipse sit omne bonum nostrum; & ingrati sint omnes homines, qui obliuiscuntur Deum, iuxta illud Luc. 6. qui benignus est super ingratos, & malos. Denique illud, quam multipliciter, est in hebræo, camah, quæ vox non habetur nisi hoc loco. S. Hieronymus vertit, desiderauit, sed frustra laboramus de significatione vocis, quæ nusquam habetur alibi, & nemo potest reprehendere primos Interpretes.

In terra deserta, inuia, & inaccessa, sic in sancto apparui tibi, ut viderem virtutem tuam, & gloriam tuam.

Describit proprietates deserti, quæ tres sunt, terra deserta ab habitatoribus, terra inuia, terra sine aqua: quarum secunda est effectus, & tertia est causa primæ: nam terra aliqua deseri solet ab habitatoribus præcipue propter carentiam aquæ, quæ carentia terram aridam, & sterilem reddit; sed cum terra deseritur, & inhabitabilis efficitur, hoc ipso fit inuia: quamvis hoc loco, inuia, non est solum terra sine via, sed terra inaccessa, & per quam difficulter ambulari potest: nam vox græca ἀβυσσος, inaccessibleis significat, & vox hebræa, aieph, significat lassum, fatigatum, laboriosum, ac per hoc significat terram, quæ magno cum labore, & fatigatione transmittitur. Videtur autem Propheta significare voluisse, terram illam incultam, & rebus necessarijs, ne dum delicijs carere

tem

tem vtilem sibi fuisse ad inueniendum Deum. Anima enim quo magis destituitur carnalibus bonis, vel certè quo magis affectum remouet à rebus terrenis, & se in quodam deserto mentis constituit; eò facilius ascendit ad cœlestia cōtemplanda, & gustanda. Ego, inquit, in terra ista deserta, inuia, arida, & sitiens constitutus, sic apparui tibi, id est, sic apparui coram te per ascensionem mentis, quasi in sanctuario tuo essem; ita vt desertū loco sanctuarij mihi fuerit. Apparui autem coram te, vt viderem virtutem tuam, & gloriam tuam, id est, potentiam tuam, & maiestatem tuam. Illud enim, in sancto, in hebræo est, in sanctitate, per quam sanctuarium hebræi significare solent. S. Augustinus paulò aliter exponit, & eum sequentes dicere possumus, per desertum intelligi mundum, qui desertus est à veris hominibus, & inhabitatur à bestijs, hominibus, videlicet carnalibus, & animalibus, vt eos vocat Apostolus: item est inuius, quia difficillimum est inuenire viam, qua exeat: deniq; est in aquosus quia, quamuis lacunæ habeat aquæ putrefactæ, quæ est sapientia carnalis, caret tamen aqua de cœlo, quæ est sapientia vera: nisi Deus ex magna gratia sua peregrinationibus in hoc deserto viam ostendat, & rorem de cœlo aspergat. Ait igitur David in persona sua, & sanctorum peregrinorum, comitum suorum; Ego in hoc deserto positus, & sitiens aquam de cœlo, & exitum inuenire cupiens, de mane nigrans mente conscendi ad sanctuarium tuum cœleste, & sic in sancto apparui coram te, vt meditando, & cōtemplando viderem virtutem tuam, & gloriam tuam; quoniam in deserto mundi non videmus nisi temporalia, fragilia, & vilia. Vt viderem, inquit, virtutē tuā, qua de nihilo omnia fecisti, & portas ea verbo virtutis tuæ: viderem quoque gloriam tuam, qua longe, ac longe supereminus vniversis, & nihil est simile tibi, & omnia velint, nolint, seruiunt tibi, & ex hac visione irrorari cōpi, & mīna gustare, & viam, quæ Christus est, inuenire.

Quoniam melior est misericordia tua super vitas, labia mea laudabunt te.

Illud, quoniam, non videtur referendum esse ad superiora; sed ad sequentia, vt sensus sit, Non solum videbo virtutē tuam, & gloriam tuam: sed etiam laudabunt te assidue labia mea, quoniam misericordia tua melior est mihi prae ipsa vita: nam misericordia tua vitam dedit, eadem ipsa misericordia vitam conseruat, & si ipsam vitam propter te perdidero, misericordia tua illam mihi multo feliciorē restituet: sed si vt vitam conseruem à misericordia tua, & gratia excidero, & vitæ & misericordiæ iacturam faciam. In hebræo habetur quidē, chaijm, vitas, in numero multitudinis, חַיִּים, sed vox illa etiam pro vita in singulari accipitur: quo modo multa vocabula habent formam numeri multitudinis, & significationem numeri singularis: & in versiculo sequenti, Sic benedicam te in vita mea, habetur eadē vox in numero multitudinis, & tamē Interpretes verterunt in numero singulari. Itaque possumus hoc loco simpliciter per, vitas vitam interpretari, vt interpretantur sancti Petres Hilarius & Hieronymus in Commentario: & sicut legit in textu S. Hilarius: tamen si magis placeat accipere in significatione numeri multitudinis, per vitas accipiemus varias functiones viuientium, vt vitas mercatorum, vitas militum, vitas clericorum, vitas agricolarum, & similes, vt accipit S. Augustinus: vel vitas quantum libet longas, & felices in hoc mundo: vel denique vitas, tum nostras, tum nobis coniunctorum, & charorum, vt parentum, fratrum, filiorum.

Sic benedicam te in vita mea, v. & in nomine tuo lenabo manus meas.

Sic laudando assidue benedicam te in vita mea, id est, quicquid mihi acciderit, siue prosperum, siue aduersum, benedi-

medicam tibi in omni tempore, & in nomine tuo leuabo manus meas, id est, in inuocatione nominis tui leuabo in oratione manus meas, à te solo expectans auxilium in aduersis. Et tibi vicissim gratias agens in prosperis. Porro ritus leuandi manus in oratione, in vtroque testamento in vſu fuit, Nam cum Moses Exod. 17. leuaret manus ad Deum, populus vincebat, cum deponeret vincebatur. Et Apostolus 2. Timoth. 2. Leuantes, inquit, puras manus. Monet autem S. Augustinus, eos qui leuant manus ad Deum in oratione, si impetrare velint, debere etiam leuare manus ad opera bona facienda. Significat etiam in Scripturis leuare manus, idem quod iurare per Deum. sic legimus Gen. 14. dicentem Abrahamum, Leuo manum meam ad Deum possessorem cœli, & terræ, quod à filo subtegminis vsq. ad corrigiam caligæ non accipiam ex omnibus quæ tua sunt. Et Apoc. 10. Angelus leuauit manum suam ad cœlum, & iurauit per viuentem in secula seculorum. Posset igitur illud, In nomine tuo leuabo manus meas, exponi hoc modo, per nomen tuum iurabo, ac per hoc te solum pro vero Deo colā: sed prior expositio communior est.

VI. Sicut adipe, & pinguedine repleatur anima mea, & labijs exultationis laudabit os meum.

Hoc est quod petebat cum leuaret in oratione manus suas ad Deum. Hoc, inquit, peto, vt anima mea repleatur quasi adipe, & pinguedine, id est, repleatur adipe, & pinguedine spiritali quæ non est adeps, & pinguedo propriè (idenim corporale quid est) sed quasi adeps, & pinguedo. Nam sicut qui adipe bona, & pinguedine naturali præditi sunt, non autem inflati, aut ventro distenti, sani, fortes, rubicundi, & hilares sunt: & contra macie confecti, aridi, debiles, tristes, deformesq. sunt: sic qui gratia spiritali, quasi bona adipe pleni sunt, deuoti, feruentes, ac semper gaudentes sunt: & contra qui spiri-

tu carent, ad omnia spiritualia nauseant accidia consumuntur, infirmi, ac debiles nihil boni facere, nihil mali tolerare valent. Sed vt rectè monet Sanctus Augustinus, in hoc eremo saginam sapientiæ, & iustitiæ desiderare, & petere possumus; sed tunc demum obtinebimus cum ad patriam peruenerimus: tunc enim implebitur illud Psalm. 147. Frumenti adipe satiat te Dominus. & illud Matthæi 5. Beati qui esuriunt, & sitiunt iustitiam: quoniam ipsi saturabuntur: & tunc verè, ac perfectè, & sine vſo fine, vel tædio labijs exultationis, id est, labijs exultationem resonantibus laudabit Deum os nostrum: tunc enim succedet orationi laudatio, quando ita pleni erimus, vt nulla re indigeamus, qd. fiet cum Deus erit omnia in omnibus: nunc autem nunquam tam multa habemus, quin pluribus egeamus; ac per hoc oratione assidua opus habemus.

VII. Si memor fui tui super stratū meum, in matutinis meditabor in te, quia fuisti adiutor meus.

Ostendit, in hac etiam vita se perpetuò recordaturum Dei, & beneficiorū eius, & non solum in patria, quando repletus adipe, labijs exultationis laudabit Deum. Si, inquit, memor fui tui nocte etiam profunda, dum adhuc iacerem super stratum meum, multo magis interdiu, atque adeo tempore matutino surgens meditabor in te, id est, de te cogitabo, & considerabo potentiam tuam, & gloriam tuam: quia tu semper fuisti adiutor meus, id est, ideo sēper recordabor tui in gratiarū actione, quia tu semper recordatus es mei in auxilio & protectione. Sanctus Augustinus colligit ex hoc loco vtilissimum documentum, vt si quis velit inter operādum recordari Dei, atque eius amorem, & timorem semper ante oculos habere, dū operatur: necesse esse, vt antea super stratū, id est, in quiete recorderetur Dei, & beneficia eius, ac promissa cōsideret. Ideo enim plerique mortales inter operandum ita se gerunt, ac si Deum non ha-

haberent; quia non habent tempus aliquod feriatum, in quo colligant se, & meditationis rerum coelestium vacent. Quidam Codices latini habent; Sic memor fui, sed recte habet nostra lectio, Si memor fui: quoniam sic legunt codices hebraici, & graeci, & sancti Patres Hilarius, & Augustinus.

VIII. Et in velamento alarum tuarum exultabo, adhæsit anima mea post te, me suscepit dextera tua.

Quia, dixerat, tu fuisti adiutor meus; ne putaretur iam securus, & de Dei protectione non amplius laborare, subiungit, Et in velamento alarum tuarum exultabo, id est, contigebo me sub umbra alarum tuarum, & in protectione tua sperans, exultabo, securus à Miluo, dum sub omnipotentis Aquilæ pennis latebo. Adhæsit anima mea post te. Ex hac protectione, & tam ingentibus beneficijs prouocata anima mea adhæsit glutino fortissimæ charitatis post te, id est, vestigijs tuis inhæsit, ab illis nulla tentationum vi separari se patiens. Porro adhærere vestigijs Domini glutino charitatis, non est sterili quodam affectu Deum diligere, sed eius præcepta ex charitate seruare; nam qui diligit me, ait Dominus, sermo neminem seruabit: ideo non dixit, adhæsit tibi, sed post te, tibi videlicet obediens, ac subiecta. Ac ne videatur sibi tribuere, quod tam ardentè Deo inhæserit, addit, me suscepit dextera tua; id est, ideo sequor te, quia tu me traxisti: ideo te diligo, quia tu prior dilexisti me, ac ut te diligerem, tu me diligendo fecisti. Beatus planè, qui quantumvis in virtute proficiat, sub Deo proficere se intelligit, & semper ut paruulum, & quasi pullum Gallinæ sub alis Dei se collocat. Beatior autem, qui verè dicere potest, Adhæsit anima mea post te; qui non solum sperat in velamento alarum Dei: sed etiam ex toto cordo ita diligit, ut cum Apostolo dicere possit, Quis nos separabit à charitate Christi? Rom. 8.

Beatissimus verò, qui proprio experimento, vel potius testimonio reddente spiritu Dei spiritui suo, dedit, se à dextera Dei esse susceptum: ipse enim Dominus de talibus dicit Ioan. 10. Non rapiet eos quisquam de manu mea. Et nemo potest rapere de manu Patris mei. Ego, & Pater vnum sumus.

Ipsi verò in vanum quæsierunt IX. animam meam, introibunt in inferiora terræ, tradentur in manus gladij, partes vulpium erunt.

In duobus vltimis versiculis prædicit Propheta interitum, & exterminium vltimum eorum, qui persequuntur iustos; & felicitatem, ac beatitudinem sempiternam iustorum. Ipsi verò, videlicet impij persecutores, in vanum quæsierunt animam meam: nam ideo impij persequuntur iustos, ut ipsi soli securè possideant terram, & fruantur delicijs, & imperio terreno: sed frustra laborant; nam ipsi non possidebunt terram, sed à terra absorbebuntur; & absorpti à terra, & in inferno constituti, non ibi delicijs, aut imperio fruuntur, ac ne quiescent quidem, sed addicti erunt perpetuis supplicijs, & subiecti erunt dæmonibus, quasi lupis, & vulpibus crudelissimis. In vanum quæsierunt animam meam, id est, frustra conati sunt vitam meam tollere, meq. interficere. Hoc dicere potest quilibet Iustus, siue Christus pro se, & pro membris suis. Introibunt in inferiora terræ; ecce cur in vanum quæsierunt, nam finis eorum erat, liberè terram possidere, sed infra terram deiciuntur, in corde terræ, in inferno ipfioriore cogentur perpetuò habitare. Tradentur in manus gladij, id est, in inferno non quiescent, multò minus fruuntur bonis terræ, sed tradentur in manus gladij, id est, in potestatem tormentorum: supplicia enim, ut instrumenta Dei Iudicis supremi, & irati in im-
seros

feros sine cessatione deservient. Partes vulpium erunt, id est, non dominabuntur amplius super homines iustos, sed ipsi subiecti erunt daemonibus iniustis, quasi pars, & hæreditas ipsorum. Vocatur autem vulpes potius quam lupi, vel leones, ipsi daemones, quia magis verusutia vulpina, quam ut leonina peccatores capiunt, si quoque subiiciunt. In hebraeo nunc habetur, Ipsi verò interficere quaesierunt animam meam; pro eo quod nos habemus, Ipsi verò in vanum quaesierunt animam meam. Sed facile est videre, quid nostri Interpretes secuti sint. Eadē enim vox hebraica, lesoah, si legatur cum alijs punctis, & ultima littera tollatur, fiet, lesaue, in vanum: & hæc videtur esse verissima lectio, quam habuerunt in suis codicibus Septuaginta Interpretes.

לְשׂוֹאָה
לְשׂוֹאָה

- x. Rex verò letabitur in Deo, laudabuntur omnes, qui iurant in eo, quia obstructum est os loquentium iniqua.

Ecce quomodo omnino in vanum impij laboraverunt: nam non solum ipsi non consequentur bona, quæ optabāt, sed neque potuerunt iustos bonis suis priuare. Nam Rex ipsorum Christus, de quo dixerunt Iudæi, Tolle tolle crucifige eum, & cuius nomen pagani de lere totis viribus laborarunt, & cui oēs impij contradicebant: viuet, & regnabit in secula, & lætabitur in Deo, sedens in dextera Patris gloriosus: & laudabuntur (in die iudicii) omnes qui iurant in eo, qui videlicet hoc tempore, non obstantibus persecutionibus, eum tanquam verum Deum religiosè colunt, & per nomen eius iurant, siue illi fidelem obedientiam iurant. Laudabuntur, inquam omnes Christi fideles, quoniam obstructum est os loquentium iniqua, id est, obstruxerunt in die novissimo os omnium iniquorum: tunc enim veritas manifesta erit, & nemo erit, qui eam inficiari possit: proinde impij dicent, ut habetur in lib. Sapientiae cap. 5. Ergo errauimus à via veritatis. & Hi

sunt quos habuimus in derisum, & in similitudinem improprij. Nos insensati vitam illorum æstimabamus insaniam, & finem illorum sine honore. Ecce quomodo computati sunt inter filios Dei, & inter Sanctos fors illorum est. Itaque laudabuntur Iusti etiam ab inimicis, quando veritas per diuinum iudicium patefacta, obstruet ora omnium, qui nunc blasphemantes, maledicentes, calumniantes detrahentes, conuiciantes, metientes iniqua loquuntur. Hos duos versiculos aliqui exponunt de Dauide, aliqui de Christo. Verè enim Saul, & ceteri inimici Davidis, qui eum interficere cupiebant, ut ipsi securè regnarent, in vanum laborauerunt: nam, & ipsi extincti sunt, & Dauid gloriosè regnavit. Sic etiam Iudæi, qui Christum occidere satagebant, ne venirent Romani, & tollerent locum eorum, & gentem, ut dicitur Ioan. 11. Noluerunt Agnum habere Regem, & habuerunt vulpem simul, & leonem: nam, & Romani ciuitatem eorum euerterunt, & Regnum abstulerunt, ipsis maxima strage ferme deletis; & Christus resurrexit, & gloriosissimè regnauit, & regnat, & Regni eius non erit finis. Nos tamen sanctum Hilarium, & sanctum Augustinum sequuti, exposuimus de Iustis in vniuersum, & eorum capite, ac Rege Christo: ut doctrina, & consolatio Scripturarum ad plures per tineret.

PSALMVS LXIII.

Titulus & Argumentum
Psalmi.

In finem Psalmus Dauid.



Hinc Psalmum de solo Dauide aliqui explicāt, qui liberari à persecutoribus cupiebat: aliqui ad solū Christum referunt, cuius passio in hoc Psalmo ex parte describi videtur, Sed nihil impedit, quominus de Dauide, & de Christo cuius

cuius typum Dauid gerebat Psalmum intelligamus; imò etiam de Martyrib. alijsq. iustis, quorum caput Christus est, & in Psalmis, nunc in persona sua, nunc in persona membrorum suorum loquitur. Nos tamen persequemur expositionem sanctorum Patrum, qui de Christo potissimum totum hunc Psalmum explicauerunt.

Explicatio Psalmi 63.

1. **E**Xaudi Deus orationem meam, cum deprecor, à timore inimici eripe animam meam.

More suo Propheta primum petit exaudiri deinde exponit, quid capiat. Exaudi, inquit, orationem meam cum deprecor, id est, fac obsecro ne frustra deprecor. Sanctus Hilarius legit, Cum tribulor, pro eo, quod nos habemus, cum deprecor: sensus est idem: sed nescio quid sequutus sit: nam vox hebraica significat, submisit loqui, quod est signum humilitatis, & reuerentiae: & sic Anna orabat. 1. Reg. 1. ut tantum labia mouerentur: & vox penitus non audiretur: vox etiam graeca precari, non tribulari significat. A timore inimici eripe animam meam: haec est petitio, quae duobus modis intelligi potest, primum, ut petat liberari à timore inimici volentis occidere, tollendo materiam timoris; efficiendo videlicet, ut inimicus non possit, vel non velit occidere: & haec videtur literalis expositio: secundo, ut petat liberari ab ipso timore humano, non tollendo materiam timoris; sed augendo charitatem, & constantiam, ut non timeat mortem carnis; sed timeat mortem peccati: siue, ut non timeat homines, qui possunt corpus occidere, & post haec non habent amplius, quid faciant: sed timeat Deum, qui potest, & corpus, & animam perdere in gehennam, ut Dominus monet Matth. 10. Et haec expositio sancti Augustini spiritualis, & utilissima: nam liberari à timore mundano, & radicari in timore diuino in omni tribulatione, optimum est. Sed in hoc

posteriore sensu Christus in persona membrorum suorum infirmorum locutus est: in priore autem, in persona etiam sua locutus esse videtur: sicut. n. in horto pridie passionis timere, & pauere dignatus est, & orare, Pater si fieri potest, trasfer calicem hunc à me; sic hoc ipsum per Prophetam praedicere voluit.

Protexisti me à conuentu malignantium, à multitudine operantium iniquitatem. II.

In hoc versiculo exauditum se fuisse Christus ostendit, & quod de se dicit in praeterito, idem membris suis promittit in futurum. Protexisti, inquit, me à conuentu malignantium. Notum est ex Evangelio, quam saepe conuenerint Principes Iudaeorum aduersus Iesum, ut eum morti traderent, ac doctrinam eius, & nomen extinguerent: nec solum Principes in Concilium conuenerunt ad consultandum, sed et multitudo militum, ac satellitum conuenit ad operandum iniquitatem, ad Christum videlicet, illudendum, flagellandum, & crucifigendum. Sed protexit eum Deus, ut neque conuentus malignantium Iudaeorum, neque multitudo gentilium operantium iniquitatem illi noceret. Permisit quidem Deus Christi carnem flagellari, & caedi; sed, & flagella, & mors mundi salutem operata, in gloriam, & triumphum versa sunt; & quod in capite praecessit, in membris quoque factum est, & fiet. Martyres. n. protexit Deus, ut occisio corporis non solum non eis obesset: sed etiam prodesset ad gloriam sempiternam; & pios omnes Deus proteget, ut tribulatio, ac persecutio cooperetur eius semper in bonum. Illud protexisti, in hebraeo est, proteges, siue abscondes: in graecis plerisque est, protege: & sic legunt Theodoretus, & Eutymius. Tamen Hilarius, Hieronymus, & Augustinus in Commentario, legunt, protexisti: quae lectio, facile cum hebraica concordatur: nam apud hebraeos saepe futurum ponitur pro praeterito, & contra: sed in sensu nulla varietas est.

Quia

III. Quia exacuerunt, ut gladium linguas suas, intenderunt arcum, rem amaram, ut sagittent in occultis immaculatum.

Hæc referuntur ad conuentum malignantium, qui lingua pugnarunt, non manibus nimirum consultando, accusando, insistendo apud Iudicem Pilatū, ut Christum de medio tollerent: comparat autem Propheta verba malignantium Iudæorum gladio, & sagittis; quoniam gladius de proximo ferit, & præsentem sagitta longè positum, & absentem vulnerat: sic igitur Iudæi palam præsentem Christum gladio linguæ occiderunt, cum eum coram in concilium suum adductum accusarunt, & quasi cōuictum damnarunt dicentes, Reus est mortis; & postea ad tribunal Pilati iterum accusarunt, quasi seductorem, & ut crucifigeretur sæpè, ac sæpius institerūt; & hoc modo gladio linguæ iterum interfecerunt. Quia, inquit, exacuerūt, ut gladium linguas suas, ut acutis interrogationibus eum ferirent, dum eum examinarent, & lethifero ictu eum occiderent, dum condemnarent. Intenderunt arcum rem amaram; non solum palam quasi gladio ferierunt; sed etiam in absentem ex occulto per insidias, quasi sagittas tetēderunt, cum tam sæpè ad eum miserunt, qui eum caperent in sermone, & cum proditore Iuda occulta colloquia miscuerunt, & cum falsos testes instruxerunt. Intenderunt arcum, rem amaram, id est, insidias retēderunt, quæ insidiæ res amara, ac lethifera erant; ut sagittent, id est, ut sagittarent in occulto, id est, ex insidijs immaculatum; hic enim erat finis, & quasi scopus insidiarum, ut Christum maculatum, & peccatorem, id est, blasphemum, & seductorem falsis testimonijs, & accusationibus ostenderent; qui tamē re vera immaculatus erat, & ad hoc venerat in mundum, ut maculas peccatorū ab alijs abstergeret. Illud, quia, non est in omnibus Codicibus: nam in græcis, & quibusdā latinis habetur,

qui res est parui momenti; & vox hebræa ambigua est, & tā qui, quā quia significare potest. Sanctus Hilarius legit, qui: sanctus Hieronymus, & Sanctus Augustinus, quia.

Subito sagittabunt eum, & nō timebunt, firmauerunt sibi sermonem nequam. IV.

Dixerat, conuentum malignantium iam intendisse arcum, ut sagittarent immaculatum: nunc addit, omnino id futurum, eo, quod obfirmati, & obdurati sint in malo: præuidebat enim Spiritus sanctus, & prædicebat obstinationem penè incredibilem Iudæorum, quam et clarissimè prædixit Isaias, cap. 6. Cuius vaticinijs meminit sanctus Ioannes, c. 12. Subito, inquit, sagittabunt eum, id est, de improviso sagittas insidiarum emittent; & non timebunt, id est, audacter sagittabunt, non cogitantes timorem Domini, non formidabunt diuinum iudicium, non reuetebunt oculos Dei oia videntis. Firmauerunt sibi sermonē nequam, id est, ideò non timebunt sagittare immaculatum, quia obstinati, & obdurati sunt, & iam stabilierunt firmiter sententiam illam plenā iniustitiæ, qua semel dixerunt, Reus est mortis: hinc. n. postea cum Pilatus multis rationib. conaretur eos à scelere reuocare, semper obstinatè clamauerunt, crucifigatur.

Narrauerunt, ut absconderent laqueos, dixerunt, quis videbit eos V.

Addit Propheta ad obstinationem malignantium Iudæorum, etiam hypocrisis, qua tegere voluerunt inuidiā, & malignitatem suam sub tegumento obsequij ad Cæsarem. Christum enim propter inuidiam persequēbātur, quod Pilato quoque notū erat. Sciebat enim (inquit sanctus Matthæus cap. 27.) quod per inuidiam tradidissent eū: sed illi hanc inuidiam tegebant dicentes, Hunc inuenimus subuertentem gentē nō.

nostram, & prohibentem tributa dari Cæsari: & rursum, Si hunc dimittis, non es amicus Cæsaris: omnis .n. qui se Regem facit, contradicit Cæsari. Hoc. ergo est, quod dicit Narrauerunt ut absconderet laqueos, id est, dixerunt intra se, abscondamus insidias, fingamus nos moueri ob iniuriam Cæsaris: quis videbit hanc simulationem? quis propterea nos puniet? quasi verò Deus non omnia videat: vel parum sit videri à Deo, qui supremus est Iudex:

VI. Scrutati sunt iniquitates, defecerunt scrutantes scrutinio.

Pergit Propheta in explicanda, & amplificanda malignitate Iudaica; ac dicit, Iudæos non contentos insidijs, & hypocrisi; addidisse, ut diligentissime scrutarentur, & inuestigarent iniquitates, si quas inuenire possent in Christo. Hinc enim Principes sacerdotum, & omne concilium quærebant falsum testimonium contra Iesum, & quamuis testimonia conuenientia non erant, dicebant tamen, Nihil respondes ad ea, quæ isti contra te testificantur? Matthæi 26. Id enim est scrutari iniquitatem, quærere falsa testimonia, & ijs quasi veris, scilicet abuti. Defecerunt autem scrutantes scrutinio; quia nihil inuenerunt, quod vel colorem veritatis habere videretur: & quia Dei iudicio tanta cæcitate percussi sunt, ut non aduerterent se ab omnibus deridendos, quod etiam dormientes testes adduxissent, cum ad custodes sepulchri dixerunt, Dicite quia vobis dormientibus venerunt discipuli noctu, & furati sunt eum. quam cæcitatem notauit, & expendit sanctus Augustinus. Parum autem refert, siue legamus, scrutantes scrutinio, siue scrutantes scrutinia, siue scrutantes, scrutationes: omnia enim in idem recidunt.

VII. Accedet homo ad cor altum, & exaltabitur Deus.

Exposita peruersitate malignantium inimicorum; prædicit nunc Propheta quid Christus egerit tempore tantæ persecutionis. Accedet, inquit homo ad cor altum, id est, Christus, quia homo Bellarm. in Psalm.

est, accedet, offeret, atque obijciat se quasi infirmus, & quasi nesciens; & tamen verè penetrans profunda cordis ipsorum: accedet ad illas omnes passiones, quas in occulto corde suo disposuerunt; id est, perferet patienter, & humiliter iniurias, quas illi alto, profundo, & prauo corde machinati sunt. Potest etiam per cor altum, intelligi cor ipsius Christi, ut sensus sit, Accedet homo Christus ad cor altum, id est, ingreditur cor suum profundum, & secretum, quo disposuit obicere Iudæis formam serui percussam, & celare intus formam Dei, per quam resuscitandus erat. Vtranque expositio non attingit sanctus Augustinus. Et exaltabitur Deus, id est, humiliabit se, ut homo, exaltabitur ut Deus, quia tunc maxime demonstrabitur Sapientia diuina vincens malitiam hominam, quando apparebit, Christum moriendo mortem destruxisse, & resurgendo vitam reparasse. Hæc est expositio verborum editionis nostræ vulgatæ, sed sciendum est, hanc lectionem nostram à multis oppugnati, & reijci; quoniam textus hebraicus, & græcus repugnare videntur. In hæbreo sic legitur ad verbum, Et cogitatione viri, & corde profundo, & sagittabit eos Deus; pro eo quod nos habemus, Accedet homo ad cor altum, & exaltabitur Deus. Sed facile conciliabitur hic textus cum nostra editione: nam vox hebraica, chereb, quæ intimum, siue cogitationem significare potest, si legitur cum alijs punctis, charab, significabit, accessit, siue accedet: & sic legerunt Septuaginta Interpretes, qui verterunt, Accedet homo. Illud autem, & corde alto, potest etiam legi, & cor altum, quia non habent hebræi diuersos casus, & tota difficultas est in particula, & pro qua nos habemus, ad, & quamuis in græcis libris, qui nunc extant habeatur, & cor altum: tamen cum veteres patres Hilarius, Hieronymus, & Augustinus legant in Comentario, ad cor altum, credibile est, eos ita in græcis textibus inuenisse: nam erant periti linguæ græcæ, & ex ijs Hieronymus in Comentario Psalmos exponit ex Interpretatione Septuaginta virorum. Mirum autem

Aa est,

קרב
קרב

est, quod Cornelius Iansenius, vir doctissimus, conetur ostendere, ab Augustino lectum fuisse, & cor altum: cum Augustinus sapientissime repetat, ad cor altum, & ne semel quidem, & cor altum: corruptum autem fuisse textum Augustini in tam multis locis, & in omnibus editionibus, verisimile non est. credibilius autem est corruptum fuisse textum hebraicum post Interpretationem Septuaginta virorum, in particula, & sicut corruptum esse constat in particula, chereb, ut ostendimus, praesertim cum ista lectio (Accedet homo, & cor altum) nullum ferè sensum commodum recipiat: quid enim significat, Accedet homo, & cor altum? Illud autem, & sagittabit eos Deus, pro, & exaltabitur Deus, ex errore Rabinorum natum esse videtur: nam vox hebraica, vaiorem, si deducatur à verbo, iarah, significat, sagittabit eos: si deducatur à verbo, rum, in coniugatione, hophal, significat, exaltabitur: & sic acceperunt eam vocem Septuaginta viri Rabinis omnibus doctiores.

וְיָרֵם
יָרֵם
וְיָרֵם

VIII. Sagittæ paruulorū factæ sunt plagæ eorum, & infirmatæ sunt contra eos linguæ eorum.

Hoc fecit potentia, & sapientia Dei, de qua dictum est, & exaltabitur Deus, ut plagæ ab aduersarijs Christo inflictæ tam parum illi nocuerint, ac si factæ essent à sagittis infantium paruulorū: nam, & tela infantium leues festucæ sunt, & manus eorum infirmæ, ac teneræ, quæ nihil detrimenti adferre possunt. Et verè quales plagas Christo intulerunt Iudæi, cum triduo, vel potius in momento post triduum, ita curatæ sint, ut corpus eius impassibile, & immortale surrexerit; Sagittæ, inquit, paruulorum fuerunt, quibus factæ sunt plagæ, ac vulnera eorum. Et infirmatæ sunt contra eos linguæ eorum, id est, & calumniæ, ac blasphemias eorum infirmatæ sunt, quia nihil ei nocere potuerunt, ac si gladij plumbei fuissent, sed

infirmatæ sunt contra eos, id est, in detrimentum, & poenam ipsorum calumniantium, & blasphemantium. Alludit Propheta ad illud, quod supra dixerat, Exacuerunt ut gladium linguas suas, intenderunt arcum rem amaram; ac si diceret, laborauerunt, ut gladium linguæ exacuerunt, atque ut sagittas lethales ex arcu iacerent; sed linguæ, gladius plumbeus, & sagittæ, tela infantium euaserunt. Atque hoc ipsum de persecutoribus Martyrum, omniumque iustorum dici potest: dies enim Iudicij ostendet, quàm parum, ac potius nihil eis nocuerit crudelitas persecutorum, quando stabunt in magna constantia aduersus eos, qui se angustiauerunt. Ex hebræo iuxta puncta Rabinorum non legitur, sagittæ paruulorum, sed, sagittæ repentina. Facile autem est videre, unde sit nata diuersitas: nam vocem hebraicam legerunt, pitheom, quod significat, repente, aut repentinum: cum Septuaginta legerint, pethaim, quod paruulos significat.

פְּתָאִים
פְּתָאִים

Conturbati sunt omnes, qui IX.
videbant eos, & timuit omnis homo,

Explicat Propheta, quid cōsecutum sit ex eo quod per Christi resurrectionem factæ sint Iudæorum sagittæ, sagittæ paruulorum, & infirmatæ sint, ac prorsus euanuerint calumniæ, & contumeliæ eorum. Conturbati sunt, inquit, omnes, qui videbant eos, Iudæos videlicet, attonitos, & confusos, quando ab Apostolis audiebant, eum, quem occiderant surrexisse à mortuis, in cælum ascendisse, & venturum Iudicem viuorum, & mortuorum: & ea quæ audiebant, signis magnis, ac diuinis approbati cernebant: & tunc timuit omnis homo id est, omnes, qui recta ratione utebantur, coeperunt contremiscere, & expanescere, & dicere, Quid faciemus viri fratres? De hoc timore sancto, sic scribit sanctus Lucas Act. 2. Fiebat autem omni animæ timor; multa quoque prodigia, & signa per Apostolos in Hierusalem

77. salem fiebant, & metus erat ingens in vniuersis, Parum autem refert, quòd sanctus Hieronymus ex hebræo vertit, Fugerunt omnes, qui videbant eos: nam vox hebraica, nadad, quæ hoc loco habetur, vtrunque significat, & fugere, & commoueri: & omnis qui commouetur, ac turbatur fugit, si non pedibus, saltem affectu: contrahit enim se, & latebras quærit: timor enim fuga quædam est hominis ad se ipsum: sicut è cōtrariò desiderium, & amor effundunt hominem extra se.

X. Et annunciauerunt opera Dei, & facta eius intellexerunt.

Illi, qui sancto timore corrupti sunt, ac in primis Apostoli, qui primi Christo resurgente, atque eius apparente timuerunt, vt dicitur Luc. 24. Illi, inquã, annunciauerunt opera Dei, id est, prædicare cœperunt Christi Incarnatione, passionem, resurrectionem, doctrinã, miracula, & similia. Et facta eius intellexerunt, particula enim, & passum in scripturis accipitur pro, quia. Apostoli ergo edocti tum ab ipso Christo, qui post resurrectione aperuit illis sensum vt intelligerent scripturas Luc. 24. tum à Spiritu sancto, qui superueniens in eos, docuit illos omnem veritatem Ioan. 16. facta eius intellexerunt, & eadem ipsa toti mundo annunciauerunt.

XI. Lætabitur iustus in Domino, & sperabit in eo, & laudabuntur omnes recti corde.


Ex illa Apostolica prædicatione id cōsequetur, vt omnis verè iustificatus, id est, iustus ex impio factus, lætetur deinceps in Domino, & speret in eo, deposito metu seruili, & mundano; fructus enim spiritus iustificantis est charitas, gaudium, pax. Gal. 5. Et tandem in fine seculorum laudabuntur omnes recti corde; omnes, qui in iustitia per-

seuerauerunt, & per hoc rectum cor habuerunt ad Deum, non sapientes, neque volentes, nisi quæ Deo placet, illi à Deo laudabuntur in theatro totius Mundi, quando è cōtrario omnes praui corde in theatro eodem cum summa ignominia confundentur.

PSALMVS LXIV.

Titulus, & Argumentum

In finem Psalmus David. Canticum Hieremia, & Ezechielis populo transmigrationis, cum inciperent exire.



Titulus huius Psalmi in codicibus hebraicis, non continet nisi prima illa verba, In finem Psalmus David. Apud Hilarium quoque nō habentur alia verba.

Theodoretus autē affirmat, nihil aliud haberi in editione græca Septuaginta Interpretum; cætera addita esse à posterioribus. Tamen non videtur contemnendum, quod additur, Canticū Hieremiæ & Ezechielis populo transmigrationis cum inciperent exire: nam hæc verba habentur in antiquis codicibus, & leguntur à sanctis Hieronymo, & Augustino in Commentario huius tituli. Quicunque autem addidit hanc partem tituli non voluit significare re ipsa cantatum fuisse hunc Psalmum à Hieremia, & Ezechiele, quando populus incipiebat exire ex captiuitate Babylonica. Nam Hieremias nūquā fuit in Babylonia; & sine dubio mortuus erat quando cœpit solui captiuitas. Credibile est etiam Ezechielem tunc fuisse defunctum, vt Epiphanius testatur in vita Ezechielis. Tribuitur, igitur hic Psalmus (qui reuera Davidis est) Hieremiæ, & Ezechie

Aa 2 li,

li, quoniam isti duo Prophetae prædixerunt reuersionem populi de Babylone in Hierusalem: & fingitur decantatus ab his Prophetis initio egressionis Hebræorum de captiuitate, vt intelligeremus hunc Psalmum exponi debere de reditu filiorum Israel à captiuitate in patriam. Et quoniam ea liberatio de captiuitate typus fuit liberationis generis humani de captiuitate Diaboli altiore sensu Psalmus prædicit conuersionem infidelium ad Ecclesiam, & reditum spiritualium peregrinorum ad patriam caelestem: nã, & Ecclesia, & caelestis patria per Hierusalem in sacris literis significari solent.

Explicatio Psalmi 64.

I. **T**E decet hymnus Dens in Sion, & tibi reddetur votum in Hierusalem.

Incipit Propheta in persona populi Dei à quodam verissimo principio, ex quo colligitur desiderium iustum redundi ad patriam. Principium verissimum est, conueniens esse, vt populus Deum laudet, & vota illi offerat in Hierusalem. Laus enim debetur bono, & summa laus summo bono, quod est Deus: & hæc laus debet exhiberi, vbi bonum, quod laudatur, est notum. Deus autem notus non erat in Babylone; sed in Hierusalem, ideo in Hierusalem Deus à populo laudandus erat. Sic etiam vota, ac præsertim sacrificiorum, ibi soluenda sunt, vbi templum, & altare inuenitur: templum Dei, & altare non erat nisi in Hierusalem; igitur in Hierusalem vota populi Dei soluenda erant. Ex hoc principio rectè colligitur, populum Dei iure desiderare, ac petere reditum in patriam. Et si hoc erat verum de reditu ad terrenam Hierusalem, multo verius est de reditu ad caelestem Hierusalem, vbi multo notior est magnitudo diuinæ bonitatis, & vbi est tabernaculum non manufactum, & altare aureum, in quo igne perfectissimæ charitatis sese totos offerunt omnes ciues Hierusalem in ho-

locaustum Deo. Veniamus ad verba Psalmi: Te decet hymnus Deus in Sion, id est, cõuenit omnino, vt populus tuus tibi Deo suo laudes canat in Sion, id est, vbi nota est magnitudo tua, non in terra aliena, vbi Dij lignei, & lapidei, aurei, & argentei laudantur. Et ibi reddetur votum in Hierusalem, id est, conuenit quoque vt idem populus tibi soluat vota gratiarum actionis in Hierusalem, vbi nota sunt beneficia tua; & vota sacrificiorum, vbi est templum, & altare tuo nomini dicatum, non in Babylone, vbi nec agnoscuntur beneficia tua, neque sunt templa, & altaria, nisi Idolorum, vel Dæmonum: nam omnes Dij gemitum Dæmonia, vt dicitur in Psal. 95. In hebræo pro verbo, decet, est nomen, silentium. Sic enim vertit S. Hieronymus, Tibi silentium, laus Deus in Sion. Sed Septuaginta Interpretes viri doctissimi per vocem, dumia, non existimauerunt significari silentium, quod deducitur à verbo, dum; sed cõuenientiam, vt sic loquar, à verbo, damã, quod significat assimilari. Similitudo enim nihil est aliud, nisi conformitas, & conuenientia vnus ad aliud. Laus autem conuenit maxime bonitati, & ideo soli Deo propriissime conuenit laus, quia solus Deus propriissime bonus est; dicente Domino. Nemo bonus, nisi solus Deus, Luc. 18. Sed tamen vox, silentium, quamuis non sit ex mente Septuaginta Interpretum, tamen utilissimum documentum continet: nam laus Dei, quæ ore cantatur, deberet sequi ex præcedenti silentio, atque attenta admiratione magnitudinis Dei: qui enim cantant absque præuio tali silentio, labijs Dei honorant, cor autem eorum longe est à Deo. Itaque rectè dicitur, Tibi silentium, laus Deus in Sion, id est, tibi Deus primum conuenit tacita admiratio magnitudinis tuæ: deinde constituto corde in hoc silentio, debetur tibi laus in Sion, & votum in Hierusalé. Porro vox, Hierusalem, non habetur in hebraico codice: sed vel excidit vitio librariorum: vel addita est ab Interpretibus explicandi gratia.

רמיה
דום
רמה
ד

Exau-

II. Exaudi orationem meam: ad te omnis caro veniet.

Ex eo quòd debetur Deo laus in Hierusalem, orat populus, ut sibi concedatur ex captiuitate redire in Hierusalem ad ipsum Deum laudandum: & non solum optat sibi reditum concedi, sed ut omnes homines conuertantur ad Deum, & veniant per fidem in Hierusalem, quæ est in terris, id est, ad Ecclesiam, & postea per visionem in Hierusalem, quæ est in cælis. sicut enim Deus vult omnes homines saluos fieri, & ad agnitionem veritatis venire, 1. Timot. 2. sic etiã populus Dei cupit, & orat, ut omnes homines veniant ad Deum agnoscendum, & laudandum. Exaudi, inquit, orationem meã; quæ est, ut te auxiliante, quã citissimè canam tibi hymnum in Sion; & reddam tibi votum in Hierusalẽ. Ad te omnis caro veniet, id est, si me exaudieris, non ego solus, sed omnes homines ad te laudandum, & vota tibi reddenda venient. Id enim cupio, & peto, & quod in me erit, verbis, & exemplo ut id fiat laborabo. Quod omnis caro per figuram intellectiois omnes homines significet; perspicuũ est ex multis Scripturæ locis. Gen. 6. Ois caro corruerat viam suam. Ioel. 2. Effundam de spiritu meo super omnẽ carnem. Isai. 40. Videbit ois caro salutare Dei. Matth. 24. Nisi breuiati fuissent dies illi, nõ fieret salua ois caro. Ioan. 17. Dedisti ei potestatem ois carnis. S. Augustinus per omnem carnem intelligit omne genus hominum, quia de omni genere aliqui veniunt ad Deum per fidem, & saluantur, videlicet, ex diuitibus, ex pauperibus, ex doctis, ex indoctis, ex viris, & fæminis ex Iudæis, ex Romanis, ex Græcis, ex Barbaris, &c. Non enim oĩum est fides, neq. oĩum est salus; sed eorum, qui præordinati sunt ad vitam æternam, ut dicitur Act. 13. In hebræo habetur, Donec tibi ois caro veniat: sed Septuaginta interpretes nõ legerũt, adecha, donec tibi: sed alecha, ad te: & hæc est verior lectio.

Verba iniquorum præualuerunt super nos. & impietatibus nostris tu propitiaberis.

Hæc est altera ratio, cur populus Dei petat à Deo liberationem de captiuitate, & reditum in patriam, quia videlicet ex peccatis parentum traditus sit in captiuitatem: qui enim erant in Babylone cum soluta est captiuitas, ferè omnes in captiuitate nati erant, ac per hoc parentum peccatis captiuitatem suam tribuere poterant: sicut nos omnes captiuitatem sub Diabolo primis parentibus debemus. Verba iniquorum præualuerunt super nos, id est, mala opera iniquorum parentum nostrorum præualuerunt super nos filios eorum, nosq. grauauerunt iugo durissimæ captiuitatis: sed tu, Pater misericordissimus propitiaberis impietatibus nostris, quas à parentibus hæreditauius, & quas ipsi eorum exempla imitati super addidimus. Quod aut per verba, iuterpretati sumus, opera, nemo mirabitur, qui in Scripturis versatus sit. Sic Luc. 2. Videamus hoc verbũ, quod factum est, quod fecit Dominus, & ostendit nobis. Psal. 21. Verba delictorum meorum. Psal. 104. Posuit in eis verba signorum suorum. 2. Reg. 1. Quod est verbum, quod factum est, indica mihi.

Beatus quem elegisti, & assumpsisti: inhabitabit in atrijs tuis.

Hæc est tertia ratio, cur populus Dei desideret, & oret reuocari in patriam: quæ ratio ducitur à fœlicitate patriæ. Beatus inquit, est omnis ille, quem tu elegisti ab æterno, & assumpsisti in tempore ad tantam dignitatem, ut sit ciuis Sanctorum, & domesticus Dei. Is enim inhabitabit in atrijs tuis, id est, in domo tua manebit: ponitur enim pars pro toto, atrium pro palatio.

V. Replebimur in bonis domus
tuæ: sanctum est templum tuum,
mirabile in æquitate.

Bona spe frater populus Dei, iam nūmerant se inter beatos illos, qui habitabunt in domo Dei, ac dicit in ea domo se bonis omnibus abundaturus, imò ita satiandum, ut nihil desideret amplius. hic enim versiculus etiam si utcumque conuenire possit terrenæ Hierusalem, vel Ecclesiæ militanti; tamen absolute soli cœlesti patriæ conuenit. Replebimur, inquit, in bonis domus tuæ, id est, replebimur ex bonis domus tuæ, ut nihil nobis desit, quod foris quaerendum sit. Quid enim boni deesse poterit in domo illius, qui fecit omnia, cui seruiunt omnia, qui erit omnia in omnibus, in quo sunt thesauri bonorum infiniti? De hoc dicitur in Psal. 102. Qui replet in bonis desiderium tuum. & in Psal. 16. Satiabimur cum apparuerit gloria tua. Sanctum est templum tuum, mirabile in æquitate. In illa sancta ciuitate Hierusalem hoc erit prorsus mirabile, & amabile, quod nos in Deo habitabimus, tamquam in domo, & ipse habitabit in nobis tamquam in templo; ipse erit domus nostra, & nos domus eius: iuxta illud, Manete in me, & ego in vobis, Ioan. 15. Et illud, Qui manet in charitate in Deo manet, & Deus in eo, 1. Ioan. 4. Et si hæc reciproca mansio inchoatur in via, certè multo magis perficitur in patria. Porro templum hoc Dei sanctum, est mirabile in æquitate, id est, in iustitia, ut vox hebræa demonstrat. Mirabile enim valdè erit, videre homines in peccato natos, & peccatis ita obnoxios, ut de illis diceretur, Corrupti sunt, & abominabiles facti sunt in iniquitatibus, non est qui faciat bonum: & septies in die cadet iustus; & non iustificabitur in conspectu tuo omnis viuens: qui tamen postea ad illam sanctitatem, iustitiamq. perueniunt, ut neque peccatum ullum habeant, neque habere possint, & euadant in templum sanctum, cuius sanctitatem, & iustitiam ipsi etiā

sancti Angeli admirentur in cœlis. In hebræo, pro, mirabile, habetur terribile. Sed quoniam admirabilia terrorem venerationis incutiunt, rectè Septuaginta Interpretes, mirabile, posuerunt, ut indicarent, terribile, quod legitur in hebræo, non esse terribile, quia terreat, sed quia admirationem magnā pariat.

Exaudi nos Deus salutaris noster, VI.
spes omnium finium terræ, &
in mari longe.

Redit ad orationem, & adfert nouū motiū, ut exaudiri debeat, videlicet, quia Deus Saluator est, & in eo sperant omnes gentes. Exaudi, inquit, nos Deus dum à te petimus liberationem à captiuitate, & reuocationem in patriā; exaudiri autem petimus confidenter, quia tu es Saluator noster, quippe qui sæpe ab hostibus, & persecutoribus nos saluasti: tu etiam es spes omnium finium terræ, id est, in te sperant omnes gentes totius terræ usque ad vltimos eius fines: necnon tu spes es in mari longè, id est, omnium habitantium Insulas maris longissimè positas. Hæc dicit Propheta præuidens conuersionem omnium gentium ad cultum veri Dei: & dicit in præsentī, Tu es spes omnium finium terræ, quia Prophetis erant præsentia, quæ in se futura erant.

Præparans montes in virtute VII.
tua, accinctus potentia qui con-
turbas profundum maris, sonum
fluctuum eius.

Addit aliam rationem à potētia Dei maxima, cui facile est, si velit, populum suum de captiuitate liberare, atque ad patriam, vnde pulsus fuerat, reducere. Ostendit autem omnipotentiam Dei ex duobus contrarijs: nam Deus omnipotentia sua ita firmiter stabiliiuit terram, ut montes eius nulli venti commouere possint: & contra ita fecit elementum aquæ liquidum, & mobile, ut quauis aura moueatur. Præparans montes in vir-

virtute tua, id est, tu es Deus, qui præparasti, siue stabilisti (vtrunque enim כון significat vox hebraica, cun) montes altissimos in veritate tua; Accinctus potentia, id est, potentia tua firmasti montes, quia accinctus es potentia, id est, ab omni parte circumdatus, & armatus potentia. Qui conturbas profundum maris, sonitum fluctuum eius. In hebræo habetur, Qui mitigas sonitum maris, sonitum fluctuum eius. Sed Septuaginta videntur non legisse, masbiach, quod est mitigans, siue compescens, sed, maughith, quod est conturbans. & tunc sensus erit, tu conturbas profundum maris, excitans sonitum fluctuum eius. At si nō videatur verisimile Septuaginta legisse, maughith, pro, masbiach, ut textus græcus, & latinus cum hebræo cōueniant, & vnus explicetur per aliū; per illud verbum conturbas, non erit intelligenda commotio, & concitatio tempestatis maris, sed comminatio, & terrefactio, qua compescatur fremitus maris: quo modo Dominus comminatus est mari turbato dicens, Tace, obmutesce, Marc. 4. Confirmatur hæc expositio ex eo, quod idem verbum, conturbas, refertur etiam ad sonitum fluctuum eius. Qui conturbas, inquit, profundum maris, & conturbas sonituum fluctuum eius: non rectè autem diceretur, qui conturbas sonitum fluctuum, nisi sensus esset, Qui terrendo, & comminando compescis sonitum turbati maris. In hebræo eadem vox habetur, cūm dicitur in latino, profundum, & cūm dicitur, sonitus; quare per profundum intelligere debemus hoc loco, fremitum maris, qui ex imo mari erumpit: deinde per sonitum fluctuum, altiore vocem, quam fluctus turbati maris emittunt. Illud etiam non est omittendum, in habræo haberi omnia in tertia persona, Præparans montes in virtute sua, Deus videlicet, accinctus potentia, conturbans, siue compescens fremitum maris, sonitum fluctuum eius. In editione latina habetur in secunda persona, sed sensus est omnino idem.

Turbabuntur gentes, & timebunt, qui habitant terminos à signis tuis, exitus matutini, & vespere delectabis. VIII.

Quemadmodum versiculo superiore potentiam Dei Propheta ostendere ex montium stabilitate, & fluctuatione maris: ita in hoc versiculo demonstrat sapientiam Dei, qui cælestibus signis nunc terret, nunc exhilarat humanū genus. Turbabuntur, inquit, gentes omnes videlicet gentes vniuersæ terræ. Id quod explicat clarius, cūm subiungit, & timebunt, qui habitant terminos, id est, turbabuntur, & timebunt omnes homines, usque ad illos, qui habitant terminos terræ. Turbabuntur autem, & timebunt à signis tuis, id est, à coruscationibus, tonitruis, & fulminibus cælestibus, iuxta illud 1. Reg. 2. Formidabunt Dominum aduersarii eius, super ipsos in cælis tonabit: nihil est enim horribilius, & formidolosius, & quod fortissima etiam pectora metu cōcutiat, & dissoluat, quàm fulmen cæleste. Sed idem Deus per ortum, & occasum solis humanum genus mirificè recreat: nam oriente sole refectis artubus homines læti ad opera exeunt, & occidente sole fatigati respirare incipiunt; & rursus nihil iucundius ortu fulgētissimi, & pulcherrimi luminis; nihil item delectabilius conspectu cæli sideribus innumerabilibus, quasi gemmis preciosissimis ornati. Existit inquit, matutini, & vespere delectabis, id est, ex ortum auroræ, & crepusculi vespertini delectabiles facies. In hebræo, pro, turbabuntur gentes, habetur, multitudo gentium; sed Septuaginta Interpretes non legunt, hamon, quod multitudinem significat; sed hamu, quod significat turbati sunt. Illud autem, delectabis, in hebræo est, laudare, siue iubilare facies: quod intelligi debet efficienter, nō formaliter dicitur enim aurora, & vespere laudare. seu iubilare, quia facit homines præ lætitia exultare, & laudare. Sicut etiā cūm dicitur in textu latino,

Aa 4 De-

Delectabis exitum matutini, & vespere, intelligi debet per figuram, quia exortus auroræ, & vespere delectat homines illa varietate, & vicissitudine noctium, ac dierum. Miratus sum, cur quidam ex recentioribus, vir doctus scripserit pro, voce exitum, in hebræo esse vocem, quæ ad solum diei exortum referatur, & non possit referri etiam ad exitum noctis: nam, moza, exitum in genere significat, à verbo, iaza, qd est exire. Et si exitus in hebræo significaret ortum diei, non fuisset opus addere, bocher, quod tempus matutinum significat, vt re vera in textu hebræo est additum. Sic enim habetur ad verbū, exitus ipsius mane, & ipsius vespere laudare facies.

יֵצֵא
מִן
בֹּכֶר

IX. Visitasti terram, & inebriasti eam, multiplicasti locupletare eam.

Laudauit potentiam, & sapientiam Dei, nunc adiungit laudes bonitatis, siue beneficentiae eiusdem, quæ maximè ostèditur in admisione terræ, & aquæ, ex qua oriuntur omnes fructus terræ, sine quibus hæc vita non ducitur. Terra enim si non irrigetur aquis, & aqua nisi misceatur terræ, nihil omnino producit. Visitasti, inquit, terram, quæ per se erat inanis, & vacua; sed visitatione tua facta est fecunda, & plena. Visitatio enim Dei efficax est, & non simplex visio, sed prouisio. Explicat quomodo visitauerit terram, dum adiungit, & inebriasti eam, id est, aquis ad satietatem irrigasti, & hac irrigatione multiplicasti locupletare eam, id est, multum valde illam locupletem, & copijs omnibus refertam reddidisti.

X. Flumen Dei repletum est aquis, parasti cibum illorum: quoniam ita est præparatio eius.

Explicat id ipsum clarius. per flumen riuu aquarum intelligendi sunt: nam in hebræo est, pheleg, quod diuisionem

significat. Itaque sensus est, Flumen Dei, id est, riuu aquarum à Deo effecti ad irrigandam terram, pleni sunt aquis ex diuina prouidentia, & benignitate: sic enim ita tu Deus præparasti cibum eorum, id est, hominum, & animantium cæterorum. quoniam ita est præparatio eius, id est, quoniam sic fundata, & disposita est terra, vt per aquarum irrigationem fecundetur, & fructus suos pariat.

Riuos eius inebria, multiplica XI. genimina eius, in stillicidijs eius lætabitur germinans.

Rursus alijs atque alijs verbis idem beneficium Dei extollit. Sed hoc loco per riuos intelliguntur sulci terrarum, vt ex hebræo textu perspicitur; & textus, quem sanctus habuit Augustinus, sulcos eius legit. Ait igitur, Riuos eius inebria, id est, perge Domine, & sulcos terræ abundanter riga fluentibus aquis, & sic multiplica genimina eius, herbas, fruges, plantas: in stillicidijs eius, id est, pluuiæ Dei de super cadente lætabitur terra germinans.

Benedices coronæ anni benè XII. gnitatis tuæ, & campi tui replebuntur vbertate.

Benedicendo benefacies totius anni reuolutioni, quæ instar coronæ varijs floribus ornata à tua benignitate quasi semper reuocatur: & ex hac benedictione campi tui à te conditi, & fecundati replebuntur abundantia omnium bonorum.

Pinguescent speciosa deserti, XIII. & exultatione colles accingentur.

Nec solum campi aratione, & satione culti replebuntur vbertate frugum; sed etiā loca deserti, quæ solis pascuis de-

deserviunt, & speciosa præ cæteris sunt ex multitudine, & varietate herbarum, & florum, quæ sponte funduntur a terra; pinguescent cœlesti rore, & colles pariter deserti, & inculti herbescente viriditate ita vestientur; vt ex omni parte lætari, & exultare videantur.

XIIII. Induti sunt arietes ouium, & valles abundabunt frumento: clamabunt, etenim hymnum dicent.

In summa fecunditas erit maxima, & multiplicatio tum pecorum, tum frugum. In hebræo sic legitur ad verbum, Induti sunt agni pecore, id est, pusillus grex, qui quasi nudus ob paucitatem videbatur, tanta multitudine pecoris circumdabitur, vt vestitus multiplici indumento videatur. Induti sunt arietes ouium, id est, ouibus multiplicatis vestiti sunt arietes, siue agni, qui pauci antea erant. Alij tamen referunt hæc verba ad vellera, quibus induuntur pecora, quando bona pascua inueniunt. Sed qui ita exponunt, non considerant verba hebraica, quæ non habent, arietes ouium, sed, arietes, siue potius agni pecore, siue oue induti sunt. Et valles abundabunt frumento; id est, loca deserta abundabunt pecore, & valles cultæ abundabunt frumento: omnia autem, siue colles, siue valles, siue campi exculti, siue deserti; siue pecora, siue fruges, suo modo clamant in laudem Dei, immo etiam quodammodo hymnum cantabunt conditori, & benefactori suo. Porro res omnes creatæ specie sua clamant, & canunt: vt homines, quorum vsui deserviunt, & mente, & voce Deum laudent, eique perpetuò gratias agant. Hæc omnia sanctus Propheta in laudem potentia, & sapientia, & bonitatis Dei cecinit; vt inde argumentum duceret, quo probaret, sperandum esse, & cum fiducia petendam liberationem a captiuitate, & reuocationem in patriam. Sed posunt etiam mysticè exponi de vocatione gentium, & beneficijs Dei in Ecclesiam, vt sanctus Augustinus, & Theodo-

retus tradit: qui Theodoretus rectè Iudæos redarguit, quod fabulentur, hæc omnia impleta fuisse in terra Palestinæ post reuersionem ex captiuitate: tantum enim abest, vt post reditum ex Babilone terra illa fecundior fuerit, & beator; vt potius in deterius semper abierit.

PSALMVS LXV.

Titulus, & Argumentum
Psalmi.

*In finem, Canticum Psalmi
Resurrectionis.*



Non habetur in hebræo nomen resurrectionis neque legitur apud Hilarium; & Theodoretus testatur non esse in editione Septuaginta Interpretum, sed postea additum. Legitur tamen a Sanctis Patribus Hieronymo, & Augustino in Commentario huius Psalmi: & videtur hæc vnica vox a quocunque addita sit, prudenter addita, vt indicaret argumentum Psalmi. Argumentum enim Psalmi est gratiarum actio pro beneficijs Dei, sed potissimum pro perfecta felicitate post omnes finitas calamitates: quod sine dubio in resurrectione erit.

Explicatio Psalmi 65.

Iubilate Deo omnis terra: psal. I.
Imum dicite nomini eius: date gloriam laudi eius.

Inuitat ad iubilandum, & psallendum Deo omnem terram, id est, omnes Electos ex vniuersa terra vocatos, quia communis erit causa lætandi in communi resurrectione iustorum. Tria vult exhiberi, iubilum, sonum psalterij, & vocem

vocem humanam. Iubilum, quod magis in affectu, quàm in verbis positum est, rectè tribuitur Deo, Iubilare Deo. Deo enim, qui spiritus est, spirituale desiderium maximè conuenit. Sonitus Psalterij debetur nomini, id est, famæ, siue gloriæ Dei: psalmum dicite nomini eius, vel vt clarius habetur in hebræo, psallite gloriæ eius, id est, pulsate psalterium in gloriam eius. Denique vox humana diuinæ laudi tribuenda est. Date gloriam laudi eius, id est, nolite gloriam vobis sumere, vel tribuere, sed totam date laudi eius; vel vt habetur in hebræo, ponite gloriam in laude eius, id est, hæc sit gloria vestra Deum perpetuo laudare, & in eius laudibus gloriari.

II. Dicite Deo, quàm terribilia sunt opera tua Domine! in multitudine virtutis tuæ mentientur tibi inimici tui.

Hæc est materia laudis Dei, opera suæ potentia, & sapientia. Dicite Deo, dum eum laudare vultis, quàm terribilia sunt opera tua Domine? id est, opera tua præ magnitudine sua terrorem omnibus incutiunt. In multitudine virtutis tuæ mentientur tibi inimici tui, id est, tanta est virtus, & potentia tua, vt mendaces ostendant omnes inimicos tuos, qui te multo etiam minora non posse iactabant: exempla sunt in scripturis non pauca. Psal. 77. Malè, inquit, locuti sunt de Deo: dixerunt, Nūquid poterit Deus parare mensam in deserto? Deus autem in multitudine potentia suæ, fecit, vt tanta multitudo conturnicum deferretur in desertum, vt omnibus abundè sufficeret atque hoc modo mendaces eos ostendit, & vt mendaces terribiliter puniuit, vt dicitur in eodem Psalmo, & fusius in libr. Num. c. 11. Item libr. 4. Reg. 7. cū Elisæus Propheta tempore grauissimæ famis dixisset, Audite verbum Domini, cras modius similæ statere vno vendetur in porta Samariæ: Dux quidam respondit, etiā si Deus faciat cataraetas in cælo, non poterit verum esse quod dicis. Sed Deus in multitudine virtutis suæ mendacem

illum ostendit: Verè enim sequente die tanta fuit abundantia rerum omnium vt modius similæ statere vno in porta Samariæ venderetur; & Dux, qui contra Deum mentitus fuerat in ipsa porta cōculcatus a populo transeūte miserrimè periit. Simile est mendacium Iudæorum aduersus Christum, cū pēdehti in Cruce insultarent, Si filius Dei es, descende de Cruce. Ille autem in multitudine virtutis suæ fecit miraculum longè maius, quia surrexit de sepulchro, quod est multò maius, quàm de Cruce descendere. Itaque mendacij coarguit inimicos suos potentia virtutis suæ. Posset etiam cum Theodoro dici, in multitudine virtutis tuæ mētientur tibi inimici; hoc significare, multos fore, qui mentiantur Deo se illius esse cultores ob metū terribilium operum ipsius: multos item Christi fidem, non sincero, sed ficto corde suscepturos propter eandem rationem.

Omnis terra adoret te, & psal. III.
lat tibi, psalmum dicat nomini tuo.

Venite, & videte opera Dei terribilis in consilijs super filios hominum.

Iterum excitat Propheta vniuersos homines, qui terram incolunt ad Deum vero corde adorandum, & laudandum. Atque vt maiore affectu id faciant, hortatur ad consideranda opera Dei, qui terribilis est in consilijs rerum agendarum supra omnes filios hominum.

Qui conuertit mare in aridam, V.
in flumine pertrāsibunt pede: ibi lætabimur in ipso.

Ponit duo exempla operum mirabilium Dei, quæ nullo humano consilio vnquam fieri potuissent. Qui conuertit, inquit, mare in aridam; hoc est primum opus, quod narratur Exo. 14. Fecit enim Deus, vt siccaretur mare rubrum, vt filij

lij Israel liberè pertrāsirent. In flumine pertransibunt pede; hoc est alterum, quod refertur, Iosue 3. Rursus. n. Deus fecit, vt Iordanis fluius siccaretur, vt filij Israel non ponte, aut nauicula, sed pede flumen trajicerent. Ibi lætabimur in ipso, id est, vbi hæc facta sunt, ibi lætati sumus in ipso; non in nobis gloriati sumus, quasi nostra hæc essent opera; sed in Deo lætati, & gloriati sumus, Deumque laudauimus, vt narratur Exo. 15. Vtitur autem Propheta tempore futuro, pro præterito; nisi fortè hoc loco vti voluerit verbo futuri temporis, vt indicaret, miracula illa præterita fuisse figuras maiorum miraculorum futurorum. Maius enim miraculum est, quod homines transcant mare amarum huius seculi, quod in maligno positum est, & transmittant flumen temporalitatis, & mortalitatis huius, quæ nunquam stat, & plurimos absorbet, & suffocat; & perueniant viui, & salui ad terram æternæ promissionis, & ibi lætentur in ipso Deo ipsum videntes facie ad faciem: & tamen hoc maius miraculum ita facit per gratiam suam Deus, vt multi iam transeant per hoc mare, quasi per aridam, & flumen pertranseant pede, id est, facillimè, temporalia omnia, siue bona, siue mala despicientes, id est, nec bonis adhaerentes, nec mala pertimescentes, vt securi perueniant vsque ad ipsam cælestem Hierusalem, vbi lætabimur in ipso, non spe gaudentes, sed ipso in æternum fruantes.

VI. Qui dominatur in virtute sua in æternum oculi eius super gentes respiciunt. qui exasperant nō exaltentur in semetipsis.

Hæc videtur digressio ad impios, qui Deo subijci, eumque laudare contemnūt. Eos enim admonet omnipotētiae, & omniscientiæ Dei, vt vel timore pœnæ respiscant. Qui dominatur, inquit, in virtute sua in æternum, id est, ille qui ex potestate sua, non aliunde accepta, sed sibi propria, dominatur æterno imperio, is quoque videt omnes gentes, & ex alto spe-

culatur omnia. Ideò qui exasperat tam potentem, & sapientem Dominum, non exaltentur in semetipsis, non superbiāt, non glorientur de suis viribus, quia non effugient manus omnipotētis, & omnia videntis Dei.

Benedicite gentes Deum nostrum. VII. strum, & auditam facite vocē laudis eius.

Illā digressionē præmissā, repetit exhortationem, quam in primo, & in tertio versiculo posuerat. Itaque tertio iam inuitat omnes gentes ad benedicendum Deo nostro, qui solus est verus Deus, & ad prædicandas laudes eius tam clara voce, vt ab omnibus audiat.

Qui posuit animam meam ad vitam, & non dedit in commotionem pedes meos. VIII.

Aperit nunc causam, cur tanto ardore cupiat, Deum ab omnibus laudari, quia videlicet de maximis periculis vitam suam liberauerit. Qui posuit animam meam ad vitam, id est, laudari cupio Deum, qui fecit vt anima mea non periret, & qui me titubare, & labi non permisit. Hæc dicuntur ab electis, qui post multas, variasque tentationes ad portum salutis tandem aliquando perueniunt. Per animam, intelligitur totus homo; quod frequens est in Scripturis sanctis: ac vt alia loca omittamus in lib. Gen. cap. 46. Plusquam sexies ponitur anima pro toto homine. Illud autem, posuit, significat, ordinauit, siue præordinauit, vel prædestinauit, vt sensus sit, Qui me præordinauit ad vitam; siue qui me posuit in numero eorum, qui victuri sunt in æternum. Quod autem sequitur, Et non dedit in commotionem pedes meos, ad donum perseverantiæ pertinet, quod est proprium prædestinatorum ad vitam; quos enim Deus prædestinauit, eos etiam conseruat, protegit, ac dirigit, vt non cadant ad dexteram, vel sinistram. In hebræo habetur animam

animam nostram, & pedes nostros, in numero multitudinis. Sed idem est sensus; nam per, animam meam, & pedes meos, non intelligitur vnus tantum homo, sed vnus populus, cœtus videlicet omnium Electorum.

Quoniam probasti nos Deus, igne nos examinasti, sicut examinatur argentum.

Varijs metaphoris explicat Prophetæ tribulationes iustorum; ac primùm metaphora fornacis probantis argentum, vt significet, iustis a Deo permitti tribulationes, non vt lædantur, sed vt probentur, vel probati, & puri, sinceri, si deles ostendantur. Ignis enim paleas consumit, argentum, & aurum purius reddit: & palea in igne fumat, argentum in igne lucet. Hinc Angelus sanctus dicit Tob. 12. Quia acceptus eras Deo, necesse fuit, vt tentatio probaret te. & Sap. 3. Deus tentauit illos, & inuenit eos dignos se, tamquam aurum in fornace probauit illos. Et Ecclesiastici 27. Vasa figuli probat fornax, & viros iustos tentatio tribulationis, Et 1. Petri 1. Vt probatio vestræ fidei multò preciosior auro, quod per ignem probatur, inueniatur.

IX. Induxisti nos in laqueum posuisti tribulationes in dorso nostro, imposuisti homines super capita nostra.

Descendit nunc ad particulares afflictiones sub alijs metaphoris. Induxisti nos in laqueum, id est, in captiuitatem nos tradidisti hostibus nostris, in vincula, in catenas, in compedes, in carceres. Sicut enim aues, & feræ cum laqueis comprehenduntur, libertate sua priuantur; ita dici possunt homines induci in laqueos cum captiui effecti carceribus includuntur, vel catenis, & vinculis constringuntur. Posuisti tribulationes in dorso nostro, id est, nos more iumentorum onerari, & cœdi verberibus permisi

sti: quibus oneribus, & verberibus intelliguntur varij labores, & dolores quos Sancti in hoc mundo ab impijs pertulerunt; vt cum ad metalla fodienda, ad marmora secanda, ad onera pro extruendis ædificijs portanda, aliaque id genus laboriosa opera facienda, non sine flagellis, & verberibus adigebantur. Imposuisti homines super capita nostra, id est, fecisti vt homines pedibus suis capita nostra calcarent, quasi nobis iure belli deuictis, & triumphatis. Sed hæc etiã metaphora est, qua per similitudinem: conculcationis capitum deuictorum significatur tyrannica, & crudelis potestas Principum in miseros subditos. Nā Principes modesti, & æqui præsident quidem capitibus subditorum, sed ita leuiter premunt, vt onus obedientiæ suauiter ferri possit. Tyranni verò, & sæui, atque inhumani Principes, quales erant persecutores Christianorum, & quondā Pharaon Aegyptius, & Nabuchodonosor Assyrius ita premunt subditos exactiōibus, edictis, pœnis, vt respirare nō possint. Hoc versiculo Prophetæ miro artificio personas Iustorum toto corpore afflictas, demonstrauit; nam laquei ad manus, & pedes, onera & verbera ad dorsum, conculcatio ad capita pertinent.

Transiimus per ignem, & a. X. quam, & eduxisti nos in refrigerium.

Hæc est vltima metaphora, qua Prophetæ pulcherrimis similitudinibus sub aspectum ponit supplicium Sanctorum. Ignis enim & aqua contraria sunt; ignis ardet, aqua congelatur; ille acerrimus, ista mollissima; ignis deæccat aquam, & aqua extinguit ignem: quare si ignis dolore afficit hominem, aqua consolari, & mulcere deberet. Et tamen in pœnam iustorum fœnorum Dei, ignis, & aqua coniurasse videntur, ignis consumendo, aqua suffocando. Igitur per ignem, intelliguntur acriora supplicia, flagella vulnera, cædes, combustio; per aquam supplicia lenta, sed diuturna, vt exilia, carceres,

ceres, nuditas, fames. Sanctus tamen Augustinus per ignem, intelligit omne genus angustiarum, & molestiarum contristantium hominem: per aquam verò omne genus voluptatum, & abundantiam temporalium bonorum, quæ spiritum suffocant. Sed sicut ignis consumit lignum, non aurum; sic etiam aqua corrumpit, & putrefacit lignum, non aurum: & sicut aurum per ignem purgatur a scoria, sic idem aurum per aquam lauitur a sordibus. Itaque iusti, & sancti qui sunt auro similes, sine detrimento transeunt per ignem, & aquam; quia in tribulatione patientiam, in prosperitate modestiam seruant. Sed filij huius seculi similes ligno putrido in igne consumuntur, in aqua suffocantur; quia impatientes in tribulatione murmurant, maledicunt, blasphemant: dissoluti in prosperitate mollescent, luxuriantur, superbiunt. Dicunt igitur Flecti, transiuimus per ignem, & aquam, & eduxisti nos in refrigerium: quoniam etiam si in cælesti patria non deerunt ignis, & aqua, tamen ille ignis calefaciendo recreabit, non cōburēdo consumet, & illa aqua sitim extinguet, non vitam. Ita vtrunque suo modo refrigerabit, id est, erunt in cælo ardores charitatis, erit ignis diuinus feliciter consummans, non consumens; perficiens, non destruens; transformans in Deum, non conuertens in cineres: erit aquarum abundantia, erit vbertas bonorum æternorum, erunt gaudia immensa, & ineffabiles iucunditates, sed non mollem, aut pigrum efficiant animum, non carnis aduersus spiritum concupiscētia nutriant, denique refrigerando delectabunt, non obruendo suffocabunt.

XII. Introibo in domum tuam in holocaustis, reddam tibi vota mea, quæ distinxerunt labia mea.

Hæc videtur esse conclusio ex ijs, quæ dicta sunt, quasi dicat, tu eduxisti nos in refrigerium, postquam transiuimus per ignem, & aquam. Introibo igitur in domum tuam, ad quam te Duce, te defen-

fore perueni. Introibo autem in holocaustis, id est, offeram sacrificium gratiarum actionis: holocaustum est enim propriè ad gratias agendas pro acceptis beneficijs. Et verè holocaustum nusquam perfectius offertur quàm in cælo, vbi sancti omnes totos se offerunt Deo in igne perfectæ charitatis, nulla parte animæ repugnante. tota enim actio, totum negocium in cælo erit laudare Deum. Reddam tibi vota mea, quæ distinxerunt labia mea, id est, ista oblatio holocausti debita est; quoniam id voui, dum essem in tribulatione positus. Itaque introibo in domum tuam cum holocaustis, vt sic reddam vota mea, quæ nō alius pro me, sed ego ipse labijs meis distinctè promisi. S. Augustinus more suo ad ædificationem populi psalmos exponens, notat, illud, distinxerunt, significare distinguenda esse vota, vt placeant Deo. Distinctio autem talis esse debet, vt confiteamur nos Deo indigere, Deū bonorum nostrorum non egere; nos mutabiles, illum immutabilem; nos creaturas, illum creatorem; nos ex nobis nihil esse, illum ex se perfectum esse.

Et locutum est os meum in tribulatione mea. **X III.**

Holocausta medullata offeram tibi cum incenso Arietum: offeram tibi boues eum hircis. **XIIII.**

Explicat quæ vota vouerit in tribulatione sua; & dicit se vouisse sacrificia pingua omnium pecorum, quæ in holocaustum secundum legem offerri possunt. Ea verò tria tantum erant, Arietes, Boues, & Hirci. Sed nomine Arietum intelliguntur etiam Agni, & nomine Bouum intelliguntur etiam Vituli, & nomine Hircorum, intelliguntur etiam Hædi. Et locutum est os meum in tribulatione mea, id est, hoc est quod dixi, Reddam vota quæ distinxerunt labia mea, quia locutum est os meum dum tribularet, & auxilio Domini indigerem, atq; illius opem cum lacrymis implorarem.

Holo-

Holocausta medullata offeram tibi cum incenso Arietum, id est, immolabo tibi agnos pingues, & medullis plenos cum bono odore ex Arietibus pariter in holocaustum oblati: offeram tibi Boves cum Hircis, id est, ad holocaustum Agnorum, & Arietum addam holocaustum vitulorum, & Hircorum. In textu græco legitur, holocausta medullata offeram tibi cum incenso, & Arietibus: & sic legit etiam S. Augustinus: & per incensum intelligit thus. Sed S. Hieronymus in epist. ad Suniam & Eretellam improbat hanc lectionem, & veram lectionem esse se dicit, cum incenso Arietum (vt nos in nostra latina editione habemus) cui concordat lectio hebraica: per incensum autem non intelligitur thus, sed odor, qui ex incensis Arietum carnibus emanat, qui odor suauissimus dicitur Leuitici 1. Odor autem ex incensis carnibus sacrificiorum suauissimus dicebatur, quoniam figura erat odoris verè ac propriè suauissimi patientiæ, & humilitatis, obedienciæ, & charitatis filij Dei, qui vt Patrem glorificaret, & Mundum redimeret, humiliatus est vsque ad mortem, mortem autem Crucis. Dicuntur verò holocausta medullata, quæ offeruntur in cœlis, actiones gratiarum, confessiones, & laudes ex intimo corde, & ex pinguedine veræ charitatis profectæ.

XV. Venite, audite, & narrabo omnes qui timetis Deum, quanta fecit animæ meæ.

Hortatur in fine Psalmi propheta in persona beatorum electorum Dei. nos omnes, vt intelligamus beneficia Dei in Sanctos collata, & quid illi contra repederint, vt eos imitantes similia beneficia recipiamus, & ad eandem quietem, & gloriam aliquando perueniamus. Venite, inquit, audite, & narrabo, omnes, qui timetis Deum, quanta fecit animæ meæ, id est, venite omnes, qui timetis Deum, & audite, & ego narrabo vobis, quanta fecit animæ meæ: oratio enim in hebræo, & græco textu perturbata est quantum ad ordinem verborum, & lati-

nus Interpres non est ausus ordinem eodum originalium commutare. Vocat timentes Deum, quoniam timor Domini initium est sapientiæ, ipse soluit pedes, ipse aperit aures: proinde, qui nullo Dei timore tangitur, frustra vocatur vt veniat, vel vt audiat.

Ad ipsum ore meo clamaui, & XVI. exaltaui sub lingua mea.

Hoc est primum donum Dei, quod animæ suæ datum dicit electorum cœtus, qui in hoc Psalmo loquitur. Hoc, inquit, fecit Deus animæ meæ: dedit fidem, & spiritum orandi. Quomodo enim inuocabunt in quem nō crediderunt? inquit, Apostolus. Rom. 10. Igitur ex dono Fidei cognoui miseram captiuitatem, in qua detinebar, cognoui liberatorem, & Redemptorem, & sic ad ipsum ore meo clamaui. Addit deinde secundum beneficium, & exaltaui sub lingua mea, id est, non solum oraui, sed etiam laudaui Deum meum, & pro acceptis beneficijs gratias egi, vt rursus alia mererer accipere quæ mihi deerant. Atque hoc totum, vt laudarem, & orarem, ipse fecit, vt facerem. Quamuis autem illud, sub lingua mea, vel in lingua mea, idem sit quod lingua mea, vel in lingua mea: tamen annotauit S. Augustinus fortasse dictum, sub lingua, vt intelligeremus, iustum non solum lingua ad aures hominum, sed etiam sub lingua, in silentio ad aures Dei, exaltare solitum ipsum Deum.

Iniquitatem si aspexi in corde XVII. meo, non exaudiet Dominus.

Hoc est beneficium tertium, quod accepit a Domino, vt videlicet Deo illuminante cognosceret, quid sit quod impedit, ne oratio exaudiat. Iniquitatē, inquit, si aspexi in corde meo, non exaudiet Dominus. Aspicere iniquitatem in corde, est in secreto cordis diligere iniquitatem, siue aspicere ad concupiscendum eam, quomodo dicitur in Euangelio, Qui viderit mulierem ad concupiscendam

dant eam. Multi enim, & verbis, & factis videntur odibile peccata, reprehendunt, & puniunt peccatores; & ipsi tamen in secreto cordis, ubi nemo videt, quidagatur, cum delectatione aspiciunt iniquitatem, & si impune possent, exercerent. Hos hypocritas non exaudit Dominus, sed eos exaudit, qui ex corde iniquitatem odio habent, & si forte peccant, confitentur peccata sua, & Medicum quaerunt a quo sanentur. Et quoniam tales sunt omnes electi, ideo subiungit Prophetam in persona populi electi.

orare, & nunquam deficere. Est autem insigne donum Dei perseverantia in oratione, quia securum reddit hominem de perseverantia miserationis. Cum videris, inquit S. Augustinus, non a te amotam deprecationem tuam, securus esto, quia non est a te amota misericordia eius.

PSALMVS LXVI.

XVIII. Propterea exaudiuit Deus, & attendit voci deprecationis meae.

Propterea exaudiuit Deus, quia ipse scrutatur corda, & vidit mihi serio displicere peccata, meque non aspicere iniquitatem in corde; sed faciem cordis auertere ab omni iniquitate. Et attendit voci deprecationis meae; quia vidit, me attendere voci praeceptorum suorum, non voci serpentis praeuaricatione suadentis.

XIX. Benedictus Deus qui non amouit orationem meam, & misericordiam suam a me.

Ergo benedictus sit, & in perpetuum laudetur Deus, qui tanta fecit animae meae, quorum summa est, quod non amouit a se orationem meam, nec amouit a me misericordiam suam. Ita misericordia eius perseverante mecum, perseveravi, & ego in via mandatorum ipsius, & perseverantiae premium iam obtinui, liberationem a captiuitate, & reditum in caelestem Hierusalem. Sanctus Augustinus paulò aliter exponit, & quamvis fortasse non omnino ad literam, tamen vtilissimè ad mores. Vult igitur, illud, non amouit deprecationem meam, sic intelligi, non amouit a me deprecationem meam, id est, fecit, ut non intermitterem vnquam orationem, & per hoc implerè dominicum praeceptum, Oportet sepe

Titulus, & Argumentum.

In finem, in hymnis Psalmus cantioi David.



N hebraeo codice non habetur nomen David, & ideo non desunt, qui auctorem huius Psalmi nolint esse Dauidem: sed cum in codice graeco, & latino habeatur, & sic legant Hilarius, Hieronymus, Augustinus, & alij in commentarijs in Psalmos: credibile est, aut ex codice hebraico vocem illam excidisse, vel a Septuaginta Interpretibus additam fuisse, ne quis suspicaretur Psalmum non esse a Dauide compositum, quia non legatur nomen eius in titulo. Argumentum Psalmi est expressio desiderij vehementis, quo David tenebatur videndi aduentum Messiae, & redemptionem generis humani, iuxta illud Luc. 10. Multi Prophetæ, & Reges voluerunt videre, quæ vos videtis, & non viderunt: existimo enim Dominum loqui de Prophetis, qui simul etiam Reges fuerunt; alioquin non dixisset, multi Prophetæ, sed omnes Prophetæ. Nomine autem Regis intelligendi videntur omnes Principes, qui Regium ius in populum suum habebant, quales fuerunt Adam, Noè, Abraham, Isaac, Iacob, Moses, Iob, & alij, qui simul Prophetæ fuerunt, & Christum videre desiderauerunt: sed inter omnes excellit

lit David, qui propriè Rex, & Propheta fuit, & desiderium Messie in multis Psalms expressit, sed in hoc potissimum, qui totus in hoc desiderio explicando consumitur.

Explicatio Psalmi 66.

I. **D**eus misereatur nostri, & benedicat nobis: illuminet vultum suum super nos, & misereatur nostri.

Vox optantis & desiderantis est, quasi dicat, Utinam Deus misereatur nostri secundum magnam illam misericordiam, qua mittat ad nos, quem missurus est. Et ex hoc affectu misericordie paternae, benedicat nobis; benedictio autem sit non solum vbertas temporalium rerum, sed illuminatio vultus sui super nos. Illuminatio vultus Dei super nos, multa significare potest. Primum enim dicitur Deus illuminare vultum suum super nos, quando remotis nubibus irae, & indignationis sereno vultu nos respicit ut filios, ut amicos, ut ad gratiam revocatos. Deinde dicitur etiam illuminare vultum suum super nos, quando nos illuminat, & calefacit, sapientiam, & charitatem infundens, quomodo Sol iste corporalis facere solet, quando nullis nubibus tegitur. Denique dicitur illuminare vultum suum super nos, quando praestat, ut eum, quasi remoto velamine, intueamur: quod maximè praestitit, quando per Incarnationis mysteriū in terris visus est, & cum hominibus conuersatus est. Atque hoc videtur, hoc loco petere sanctus Propheta, ut Deus vultum suum, si non in forma Dei, saltem in forma hominis nobis ostendat. Quod etiā petijt, cum ait in Psalmo 79. Qui sedes super Cherubim, manifestare coram Ephraim, Benjamin, & Manasse. Et quoniam hæc est misericordia, quam initio petijt, ideo repetit, Et misereatur nostri, id est, & sic, illuminando videlicet vultum suum super nos, misereatur nostri. In hebræo non habetur hæc repe-

titio, & misereatur nostri, neque legitur a S. Augustino, & S. Hieronymo: tamen habetur in codice græco, & legitur a S. Hilario, ab Euthymio, & alijs.

Vt cognoscamus in terra viam tuam in omnibus gentibus salutare tuum.

Hæc est ratio, cur tanto ardore desideretur illuminatio vultus Dei, ut in lumine illo diuino cognoscamus in hac terra tenebrosa viam Dei, id est, viam ad patriam, a qua tamdiu peregrinamur ambulantes in tenebris, & umbra mortis. hæc autem via sine dubio Christus ipse est, qui ait, Ego sum via; & non solum via, sed etiam lux, qua via ipsa cognoscatur; de qua dixit Isaias cap. 9. & explicuit S. Matthæus cap. 4. Populus, qui ambulabat in tenebris vidit lucem magnam, sedentibus in regione umbræ mortis lux orta est eis. In omnibus gentibus salutare tuum, hæc est explicatio verborum superiorū. Vt cognoscamus in terra viam tuam, id est, ut cognoscatur inter omnes gētes Saluator tuus: clariùs habetur in hebræo, Vt nota fiat in terra via tua, in omnibus gentibus saluator tuus: quod etiam Isaias prædixit, cū ait, Videbit omnis caro salutare Dei, ut refert S. Lucas, cap. 3.

Confiteantur tibi populi Deus. III. confiteantur tibi populi omnes.

Quoniam desiderium Prophetæ secundum veram charitatem ordinatum erat, cupiebat Christum venire in terras, primum propter gloriam Dei, deinde propter utilitatem generis humani. Ideo de gloria Dei dicit, Confiteantur tibi populi Deus: deinde adiungit, Lætentur, & exultent gentes, &c. Ait igitur confiteantur tibi populi Deus, confiteantur tibi populi omnes, id est, ob hoc tam insigne, & tam vniuersale donum, omnes populi confiteantur tibi confessionem laudis, & gratiarum actionis.

Cesset

Cesset cultus, & veneratio falſorū Deorum, tibi vni vero Deo ab omnibus populis honor diuinus habeatur.

IV. Latentur. & exultent gētes, quoniam iudicas populos in æquitate, & gentes in terra dirigis.

Post laudem Dei agnoscat etiam utilitas populorum, ideo latentur, & exultent gentes, omnes videlicet homines gaudeant, quoniam tu Deus per Christum tuum, iudicas populos in æquitate id est, ablato iugo tyrannicæ potestatis Principis tenebrarum harum, Regnum iustissimum in Ecclesia tua constituisti. Et gentes in terra dirigis, regens eas, & dirigens per saluberrimas leges tuas ad portum æternæ salutis. In hebræo, & græco codice hæc habentur in futuro, Quoniam iudicabis populos in æquitate, & gentes in terra diriges. Sed non ideo falsum est, quod habetur in latino, quoniam & si hæc futura erant, tamen Propheta spiritu Dei videbat ea tamquam præſentia. S. Augustinus refert ad ultimum iudicium id quod dicitur, Iudicabis populos in æquitate; & ad præſentis vitæ directionem, quod additur, Gentes in terra diriges: ut sensus sit, Latentur, & exultent gentes, quoniam si quid mali hic ab hominibus patiantur veniet tempus quo tu Deus iudicabis populos in iustitia: & interim gentes tibi subiectas, & deuotas in terra diriges.

V. Cōfiteantur tibi populi Deus, confiteantur tibi populi omnes: terra dedit fructum suum.

Iterum repetit exhortationem, ut populi omnes Deum laudent, & addit nouam rationem, quoniam terra dedit fructum suum, id est, quoniam iam tandem terra protulit fructum illum, cuius gratia facta erat, id est, Christum in carne. Hic est .n. fructus terræ sublimis, de quo dicitur in e. 4. Isaia, Erit germen Dñi in magnificentia, & gloria, & fructus terræ sublimis. Et in Psalmo 84. Et terra nostra dedit fructum suum: tantus enim hic fructus

Beilarm. in Psalm.


fuit, ut comparatione eius nihil in qua terra nostra protulisse videatur, nisi spinas, & tribulos. Vitur autem Propheta tempore præterito pro futuro, quoniam in eius prænotione iam factum erat, quod nobis futurum prædicebat. Potest tamen hic versiculus cum S. Augustino exponi de fructu bonorum operum, quem homines habitantes in terra facturi erant per gratiam Christi reconciliati, & iustificati; de quo dicit Apost. ad Tit. 2. Qui tradidit semetipsum pro nobis, ut nos redimeret ab omni iniquitate, & munderet sibi populum acceptabilem seculo rem bonorum operum. Terra .n. olim arida, & sterilis, id est, genus humanum per peccatum primi hominis gratia Dei destitutum, non nisi spinas, & tribulos, id est, peccata, vel opera inutilia ad salutem germinare nouerat: sed a Sole iustitiæ postea calefacta, & imbre doctrinæ celestis compluta per Iesum Christum, qui & Sol, & Verbum est, fecunda effecta producere cepit fructum bonum iustitiæ fidei, & operum sanctorum, quibus merces deberetur corona iustitiæ, & brauium salutis æternæ.

Benedicat nos Deus Deus noster. VI. Benedicat nos Deus; & metuant eum omnes fines terræ.

Ergo deinceps hæc sit grata vicissitudo, ut Deus aperiat manum suam, & impleat nos omnes benedictione, id est, copia bonorum omnium, præcipue spiritualium, & celestium: & contra omnes homines usque ad ultimos terræ fines habitantes, Deum verum timeant timore sancto, reddentes ei tributum obediætiæ, & laudis usque in æternum. Porro trina illa repetitio nominis Dei, quæ in hoc versiculo habetur, quamuis affectum Prophetæ significet, tamen insinuat etiam mysterium sanctissimæ Trinitatis, quæ per Christum & Apostolos manifestissime prædicata est.

PSALMVS LXVII.

Titulus, & Argumentum.

*In finem Psalmus Cantici ipsi
David.*

Argumentum huius Psalmi volūt aliqui esse victoriam Ezechiae de Assyrijs, aut aliquam aliam similem, quæ post tempora Davidis contigerit: quoniam in hoc Psalmo fit mentio templi Domini, dum dicitur, A templo tuo quod est in Hierusalem, quod tamen post mortem Davidis a Salomone eius filio extructū fuit. Sed hoc argumentum non conuincit: nam tabernaculum Dñi, quod erat in Silo, & postea in Hierusalem, téplum dicitur. 1. Reg. 3. vers. 3. Samuel dormiebat in templo, & habetur eadem vox hebraica, quæ habetur in hoc Psalmo. Alij volunt, Psalmum compositum, & decantatum, quando translata est arca Dñi in Hierusalem, quod ea ratione confirmāt, quia verba primi versus, Exurgat Deus, & dissipentur inimici eius; dici solebāt, qñ eleuabatur Arca, vt aliò transferretur, vt notum est ex c. 10. Num. Alij totū Psalmum referunt ad Christum resurgētem, & ascendentem in cælum, & ad Ecclesiam, quæ est corpus eius, vt S. Augustinus, & Euthymius. Sed S. Hilarius, & qui eum sequitur S. Hieronymus, docēt in hoc Psalmo decantari mysteria vtriusq. Testamenti, quod verissimū nobis esse videtur, cū negari non possit, in hoc Psalmo describi descensum Dñi in montem Sina ad legem populo dandā; & Christi Ascensionem in cælum, & alia id genus mysteria. Est aut Psalmus plenus figuris, & metaphoris, & poeticis descriptionibus admirabilibus, vt propterea quanto est pulchrior, tanto fit et

difficilior: augent verò obscuritatem lectionum varietates, & diffisiones, quæ inter codices hebraicos, & græcos, ac latinos esse videntur.

Explicatio Psalmi 67.

Exurgat Deus, & dissipentur inimici eius & fugiant qui oderunt eum a facie eius.

Hæc sunt verba quæ a Mose dici solebāt, cū eleuaretur Arca, & populus migrare inciperet: quibus verbis Moses precabatur Deum, vt Arca exurgente, & præcedente populum, ipse quoq. surgere dignaretur, & defensione sua, ac protectione securum populum redderet. David igitur Mose imitatus, & præuidens Christi resurrectionem, per quā Arca humanitatis eius eleuanda erat, & ipse Dux futurus erat omnibus Electis ad terram veræ promissionis, dicit Exurgat Deus, id est, resurgat a mortuis Christus Deus, & sic eleuetur Arca, & populum Dei præcedat ad cœlestem Hierusalem. sic exponunt communiter Patres, Hilarius, Hieronymus, Augustinus, & alij. Et dissipentur inimici eius, id est, Iudæi, qui dixerunt, Nolumus hunc regnare super nos. Atque hoc iam impletum videmus: nulla enim gens magis dissipata est per omnes terras, quam Iudæorū. Et fugiant, qui oderunt eum a facie eius id est, & Dæmones inimici eius iam deuicti, & superati fugiāt a facie Dei, Christi videlicet, triumphantis, & per resurrectionem verum se Deum esse demonstrantis.

Sicut deficit fumus deficiant si II.
cut fluit cera a facie ignis: sic pereant peccatores a facie Dei.

Celeritas, & facilitas, qua præsentia Christi dissipat peccatores, non poterat aptius depingi, quā similitudine fumi, qui a vento dispergitur; & ceræ, quæ coram igne liquefcit, atque consumitur: Quod si per peccatores intelligantur Dæmo-

Dæmones, quod dicitur, pereant, significat interitum virium, & roboris, nō substantiæ: & hoc modo intellexisse hos duos versiculos sanctum Antonium testis est sanctus Athanasius, qui describens vitam eius, dicit eum, cū a Dæmonibus oppugnaretur, cantare solitum, Exurgat Deus, &c. quod si ad homines referatur hæc snia: tunc sensus erit, homines peccatores, qui iustos iniuste persequuntur, maxima celeritate, & facilitate a Deo tollendos de medio.

III. Et iusti epulentur, & exultent in conspectu Dei, & delectentur in lætitia.

Iniquis persecutoribus deturbatis hoc sequitur, ut iusti fruētes præsentī auxilio Dei, securi epulentur, id est, reficiantur alimonia tū corporali, tū spiritali. Et exultent coram Deo, id est, gestiāt præ gaudio, sed ea modestia, & gravitate, quæ decet eos, qui sciūt se a Deo semper videri, ut potē in conspectu eius iugiter constitutos. & delectentur in lætitia, id est, & ex ea lætitia delectationē capiant, ut non sit eis necessarium ob inopiam consolationis cœlestis, carnalem atque mortiferam querere voluptatem.

I III. Cantate Deo, psalmum dicite nomini eius; iter facite ei, qui ascendit super occasum Dominus nomen est illi.

Hæc dicuntur ad Apostolos, aliosque primos fideles ex sententia non solum veterum Latinorum, sed etiam Græcorum, Theodoretī, & Euthymij. Cantate Deo vos primitiæ credentium. Psalmum dicite nomini eius, laudate Deum voce, & opere vos, qui digni facti estis cognitione tantorum mysteriorum. Iter facite ei, qui ascendit super occasum, id est, parate viam Domino prædicationibus vestris, ut is qui iam ascendit super occasum, qui super gressus est omnem corruptionem, & mortalitatem, & habitatu-

rus est per fidem in cordibus omnium gentium, per vestras prædicationes aditum apertum, & paratum inueniat. Dominus enim nomen est illi, & ideo iure suo regnare debet. Dominus autem est, quia condidit, & redemit. Quod attinet ad verba, iter facere, hoc loco non est, ambulare, sed ponitur iter pro via, ut sensus sit, facite viam, ubi non est, parate transitum liberum remouendo impedimentā, quomodo dicitur Isa. 40. Parate viam Domino: & declaratur cū additur, Omnis vallis implebitur, omnis mons, & collis humiliabitur: quod spiritualiter significat, debere pusillanimes erigi in spem salutis, & superbos deprimi ad humilitatem terrore diuini iudicij: Illud, qui ascendit, non significat ascendere in altum, sed equitare, siue curru vehi, id est, ascendere super rem aliquam eam conculcando pedibus equorum, aut rotis currus. Id patet ex hebraica voce, rochetu. Illud, super occasum, hebraicè est, super vesperam, siue tenebras noctis, vel etiam super desertum: quæ omnia significant corruptionem mortalitatis, quæ plena est tenebris, & ariditate. Dicitur igitur Christus resurgens ascendere super occasum, quia quodammodo equitat, & curru inuehitur super omnia mortalia, triumphans de morte, de tenebris, de deserto Mundi huius inferioris. & sic exponunt non solum Patres citati, sed etiam S. Gregorius in Homilia de Ascensione Domini.

Exultate in conspectu eius: V. turbabuntur a facie eius, patris orphanorum, & iudicis viduarum.

Vos qui paratis viam Domino, exultate in conspectu eius: nec timeatis eos, qui vos turbant persecutionibus suis: nā & ipsi turbabuntur a facie eius, id est, tempore suo; cū dies Iudicij venerit, aut etiam antea, quando tempus opportunum Deo esse videbitur, grauissime turbabuntur a facie iræ Dei, qui est Pater orphanorum, & Iudex viduarum, id est, omnium desolatorum, & afflictorum.

Bb z In

In hebraico textu defunt illa verba, Turbabitur a facie eius, & legitur, Exultate in conspectu eius, Patris orphanorum, & Iudicis viduarum. Vnde aliqui existimant in græcis, & Latinis codicibus esse duplicem interpretationem illius sententia, Exultate in conspectu eius: nam verba hebraica literis paululum immutatis possunt etiam facere hanc sententiam, Turbentur a facie eius. Sed non video, cur non possimus dicere, exultasse ex textu hebraico illa verba, turbabitur a facie eius. id enim facilius est, quam vt Septuaginta Interpretes in eodem loco duplicem interpretationem posuisse credantur.

protegit. Potest etiam sensus esse secundum alios, Qui habitare facit vnicos in domo, id est, facit vt qui vnicus erat, multa prole procreata, amplam familiam habere incipiat. Denique non est absurdus sensus eorum, qui hæc referunt ad Monachos, qui relictis mundi curis solitarij habitant. Isti sensus veri sunt omnes, & vnus alium non destruit: sed primus videtur maximè literalis, & eum sequuntur omnes ferè Patres, Græci, & Latini, qui hunc locum tractauerunt, qui etiam per, vnus moris, interpretantur, vnanimes. Sic exponit S. Hilarius, sic etiam S. Augustinus, Theodoretus, Euthymius, & alij.

VI. Deus in loco sancto suo, Deus qui inhabitare facit vnus moris in domo.

Qui educit vinctos in fortitudine **VII.** ne similiter eos, qui exasperant, qui habitant in sepulchris.

Quia dixerat Propheta, Deum esse Patrem orphanorum, & Iudicem viduarum, vt ostendat se potissimum loqui de orphanis, & viduis spiritualibus, de ijs videlicet hominibus, qui non agnoscunt in terris Patrem, neque Sponsum, sed Deum solum habent pro Patre, & Sponso, & in illo solo confidunt, eum solum diligunt, ad eius visionem suspirant: ideo addit, Deum habitare in loco sancto suo, id est, in mentibus horum orphanorum, & viduarum, horum peregrinorum in terra aliena: & ipsum esse, qui facit sibi hanc domum, dum habitare facit vnus moris in domo. Verbum hebraicum, pro quo nos habemus, vnus moris, est, iechidim, quæ vox propriè significat vnitos, & ideo rectè verterunt Septuaginta, vnus moris, id est, vnus sensus, vnus voluntatis, vnus fidei, spei, dilectionis, quales erant in Hierusalem primi Christiani, qui dicebantur esse cor vnum, & anima vna, Act. 4. Sed potest etiam eadem vox significare vnicos, & solitarios, vt S. Hieronymus vertit, & tunc sensus erit, Qui habitare facit vnicos, & solitarios, destitutos aliorum auxilio, facit, inquam, habitare in domo sua sine timore, & periculo, quia ipse Pater orphanorum, eos

Declarat magnam pietatem Dei, qui non solum vnanimes facit habitare in domo, sed etiam educit vinctos in fortitudine, id est, ligatos vinculis peccatorum educit de captiuitate in fortitudine brachij sui; & quod magis est admirandum, eos qui exasperant per incredulitatem ipsum Deum, & qui habitant quasi iam mortui in sepulchris profundissimæ iniquitatis, eos quoque potètia gratiæ suæ educit de sepulchris, reducit ad vitam, & habitare facit vnanimes in domo. Notat autem S. Augustinus discrimen inter vinctos, & sepultos: vincti enim dicuntur, qui ligati quidem sunt vinculis concupiscentiæ, & in peccatis hærent, sed cupiunt liberari: & petunt auxilium. Sepulti autem dicuntur illi, qui cum in profundum malorum venerint, contemnunt salutem, & incredulitate sua Deum valde exasperant. Et tamen vtrosque interdum magna Dei pietas emollit ad poenitentiam, & liberat a miseria illa diabolicæ captiuitatis, qua maior non inuenitur. Possunt etiam hæc intelligi de liberatione a malis temporalibus, vt a captiuitate Aegyptiaca, & Babylonica, & similibus, & per sepulchra metaphoricè intelligenda erunt loca arida deserti, vt sonat vox hebraica

צחיה

hebraica hoc loco posita, zechiha, quæ locum arentem propriè significat; vel ipsa terra captiuitatis, per sepulchra, intelligenda erit: quomodo Ezechiel cap. 37. captiuitatem Babylonicam non semel appellat sepulchra Hebræorum.

VIII. Deus cùm egredereris in conspectu populi tui, cùm pertransires in deserto.

IX. Terra mota est, etenim cœli distillauerunt a facie Dei Sinai, a facie Dei Israel.

Iam vt credibilia faciat Propheta beneficia redemptionis Christi, comme morat beneficia antiqua, quæ figura erant futurorum beneficiorum. Deus, inquit, cùm egredereris in conspectu populi tui, id est, cùm coram populo tuo præcederes in columna nubis per diem, & in columna ignis per noctem; eo tempore cùm pertransires in deserto, post transitum maris rubri: tunc terra mota est, & etiam cœli distillauerunt, sed terra mota est a facie Dei Sinai, & cœli distillauerunt a facie Dei Israel. Sic enim ordinanda sunt verba huius versiculi.

Porro terra mota est, quando tremere cepit a conspectu Dei descendantis in montem Sinai, vt perspicuum est ex lib. Exodi cap. 19. vbi dicitur, Eratque omnis mons terribilis: nam pro voce, terribilis, est in hebræo, tremens, siue saliens. Dicitur autem Deus Sinai, Deus qui apparuit in monte Sinai. Cælum autem distillauit, quando pluit manna, & dicitur distillasse a facie Dei Israel, quoniam Deus in gratiam populi sui Israel fecit vt manna de cœlo descenderet.

X. Pluuiam voluntariam segregabis Deus hæreditati tuæ; & infirmata est, tu verò perfecisti eam.

Patribus in deserto cælum distillauit re iuhente pluuiam quandam, id est, manna: sed hæreditati tuæ, id est, Ecclesiæ tuæ, quæ tibi tamquam propriam hæredita-

té vindicasti, segregabis pluuiam voluntariam, id est, pluuiam spontaneam, quæ ex se descendit: hæc verò pluuiæ, gratia est Spiritus sancti, quæ voluntaria, siue spontanea dicitur, quia non descendit ex meritis operum, quasi vaporibus terræ sursum eleuatis, sed spontè sua Spiritus sanctus infundit corda fidelium aqua cœlesti: & dicitur segregata hæreditati Dei; quia bona temporalia sunt cõia fidelibus, & infidelibus, sed gratia Spiritus sancti segregata est, vt detur solùm fidelibus in Ecclesia, extra quæ non est salus. Posset etiam per pluuiam voluntariam intelligi doctrina cœlestis; quæ non solum voluntaria est respectu Dei, sed et (vt Theodoretus obseruauit) respectu hominum, qui eam recipiunt, si volunt, reiiciunt, si nolunt. Et infirmata est, tu verò perfecisti eam. Illud, &, ponitur pro, quia, vt sensus sit, pluuiam voluntariam segregabis hæreditati tuæ; quia hæreditas tua infirmata est iam dudum, videlicet ob ignorantiam Dei, & inualecentes concupiscentias debilitata erat, cùm idolis seruiret, & vitijs omnibus laboraret: sed tu per gratiam Spiritus sancti, tamquam per pluuiam salutarem confirmasti, & roborasti eam.

Animalia tua habitabunt in ea: XL. parasti in dulcedine tua pauperi Deus.

In ea hæreditate, id est, Ecclesia, quæ irrigatur aqua cœlesti, habitabunt animalia tua, id est, oues pascuæ tuæ, quas pascendas, regendasque suscipies: tu enim Deus parasti, cibum videlicet pauperi, id est, egeno populo tuo, in dulcedine tua, id est, iuxta bonitatem, & misericordiam tuam, quæ dulcissima est miseris & egentibus.

Dominus dabit verbum euan- XII. gelizantibus virtute multa.

Declarat quis sit cibus, quem parauit Deus pauperi populo suo, ac dicit esse verbum suum. Dominus, inquit, dabit verbum euangelizantibus, id est, effe-

Bb 3 ciet

ciet Deus, vt qui annunciant verbum Dei, quod est cibus animarum, abūdent copia sermonis, virtute multa, id est, multa cum efficacia, & libertate, vt non possint resistere, & contradicere omnes aduersarij eorum. Posset etiam per multam virtutem, intelligi efficacia signorum, & prodigiorum, quibus Deus prædicationem Euangelij confirmabat. In hebræo habetur in feminino genere, annunciantibus, sed non est inusitatum apud hebræos ponere genus femininū pro masculino: nam in libro Ecclesiastæ cap. 1. iuxta hebraicum textum legitur, Verba concionatricis filij Dauid, Regis Hierusalem: Vanitas vanitatum dixit concionatrix. vbi ponitur concionatrix pro, concionator. Itaque Septuaginta, qui hæc non ignorabant, rectè verterunt, euangelizantibus. Illud autem, virtute multa, contendunt nonnulli vertendum fuisse, exercitiis multis. Sed non est necesse ita vertere: **זבא** nam vox, zava, significat exercitum, sed significat etiam robur, & fortitudinem: immo credibile est, exercitum dici, zava, siue virtutem, quia exercitus res est magnæ fortitudinis, & multarum virium. Denique non solum Septuaginta hoc loco verterunt, multa virtute, siue potentia, sed etiam S. Hieronymus vertit fortitudinis plurimæ. Quare inepta videtur expositio illorum, qui docent, in hoc versiculo significari, datum esse sermonem feminis hebræis, vt concinendo annuntiarent victoriam exercitibus multis.

: XIII. Rex virtutum dilecti, dilecti & speciei domus diuidere spolia.

Hoc loco ridet Ioan. Caluinus hæresiararcha in antidoto Concilij Tridentini hanc lectionem editionis latinæ vulgaræ, & vult ipse legendum esse, Reges exercituum fugerunt, fugerunt, & habitatrices domus diuiserunt spolia. Sed Interpres latinus non ex hebræo, sed ex græco traduxit Psalmos: græcus autem textus (qui Septuaginta Interpretum es

se censetur) habet id ipsum, quod iatinus Interpres fideliter reddidit. Sanctus quoque Hieronymus non vertit fugerunt, fugerunt, sed fœderabuntur, fœderabuntur. Proinde Caluinus ridere potuisset non solum editionem vulgatam, sed etiam interpretationem S. Hieronymi, & Septuaginta virorum sapientissimorum: ipse pro tam impia temeritate descendendus potius, quàm ridendus. Adde quod non est difficile videre quid in textu hebraico legerint Septuaginta Interpretes, & eos rectè vertisse hunc locum, & latinum interpretem eundem locum fideliter reddidisse: ac primum pro, Rex virtutum, in hebræo sunt duo verba, quæ si legantur, malchi zebaoth, significant, Rex virtutum, vt noster Interpres vertit: si legantur cum alijs punctis, malche zebaoth, significant, Reges virtutum, siue exercituum. Sed vt sapiens diximus, credibile est melius legisse Septuaginta Interpretes, quæ Rabinos, qui puncta literis addiderunt. Illud autem dilecti, in hebræo nunc est, Iddodū, quod significat, fugient: sed Septuaginta Interpretes non habuerunt hanc vocem in suis codicibus, vt neque etiam S. Hieronymus: videntur enim Septuaginta legisse, iedidoth, quod significat dilectum: hæc enim vox habetur in titulo Psalmi quadragesimi quarti, quam Septuaginta verterunt, dilecto, & S. Hieronymus, amantissimo. Denique illud, neuath bait, significat quidem habitati-
cem domus, sed significat etiam mulierem speciosam, & delicatam, quæ fere semper domi manet: & inde translato vocabulo, significat speciem, & pulchritudinem, vt hoc loco non solum Septuaginta, sed etiam B. Hieronymus reddiderunt, quibus maior fides debetur, quàm Rabinis, aut Caluino. Sensus igitur ex Patrum expositione hic erit, Rex virtutum, id est, Rex exercituum multorum dilecti, dilecti, id est, dilectissimi, Christi videlicet, dilectissimi Deo, & hominibus; ipse dabit speciei domus, id est, ad speciem, & decorem domus Dei, quæ est Ecclesia, diuidere spolia, gentium videlicet ad fidem Christi conuersarum per euangelizantes Apostolos. Vbi verbum, dabit,

מלכי
צבאות
מלכי
צבאות
ידדון
ידדון
נבת בית

dabit, subintelligitur ex versiculo præcedenti, ut hic sit integer sensus, Dominus dabit verbum euangelizantibus virtute multa, & ipse idem Dominus Rex virtutum dilectissimi, dabit ad speciem domus diuidere spolia. Illud autem dilectissimi, coniungitur cum nomine, virtutum, Rex virtutum, id est, exercituū, qui exercitus sunt Christi filij Dei dilectissimi. Neque obstat, quod nomine Regis, idem Christus intelligatur, nā phrasi hebraica consuetum est dicere, Christus Rex exercituum Christi, pro quo nos diceremus, Christus Rex exercituū suorum, ut notat S. Augustinus, & sunt exempla in Scripturis plurima, ut Ro. 1. Qui prædestinatus est Filius est Dei in virtute secundum spiritum sanctificationis ex resurrectione mortuorum Iesu Christi, id est, ex resurrectione eius a mortuis. & Exodi 16. Dixit Moyses ad Aaron, Sume vas, &c. sicut præcepit Dominus Moyse, id est, sicut præcepit Dominus mihi. Denique in Pentatheuco sæpe legitur, fecit Moyses hoc, aut illud, sicut præcepit Dominus Moyse, id est, sicut ei Dominus. Porro rectissime dicitur Christus Rex exercituum: nam Apo. 19. Vidit Ioannes quendam insignem requiem, qui habebat vestem sanguine aspersam, & nomen eius erat Verbum Dei, & sequebantur eum exercitus, qui sunt in cælo.

XIIII. Si dormiatis inter medios cleros, pennæ columbæ deargentatæ & posteriora dorsi eius in pallore auri.

Hunc versiculum fateor obscurissimum esse: sed interim mirari satis non possum temeritatem recentiorum, quorum vnus Calvinus est, qui sequuti Rabinos legendum esse contendunt, Si dormiatis inter medias ollas, eritis sicut pennæ columbæ, quæ tecta est argento, & cuius alæ tectæ sunt auro. Ad refutandam horum temeritatem sufficere deberet auctoritas S. Hieronymi, & Se-

ptuaginta Interpretum, quibus istæ ollæ nunquam in mentem venerunt. Sed accedit, quod eadem vox habetur in Genesi cap. 49. vbi dicitur, Isachar Afinus sortis accubans inter terminos: quo loco Septuaginta verterunt, inter medios cleros, ut hoc loco: S. Hieronymus vtrobiq; vertit, inter terminos. Et huic loco nullo modo ollæ interferi possunt; cum sequatur, Vidit requiem quod esset bona, & terram, quod optima, & supposuit humerum suum ad portandum, & factus est tributis seruiens. Vbi per, cleros, siue, terminos, intelliguntur sortes, siue possessiones duæ, inter quarum terminos contigit Isachar possessio, siue hæreditas: & quoniam ea visa est illi satis fecunda, & pinguis, maluit laborare in cultura terræ, & tributa pendere, quàm bello excutere iugum dominantium. Adde etiam quod vox hebraica, sephataim, habet numerum dualem, quo non vtuntur hebræi nisi ad significandas res geminas, ut duo labia, duas manus, duos pedes, duos oculos, duas aures, duas malas, & similia: ollæ autem, non sunt geminæ ex natura sua, sed & vna, & plurimæ esse possunt. Denique qui inter ollas dormiunt, non solent instar argenti dealbari, sed instar fuliginis denigrari. Igitur Caluino cum Rabinis inter suas ollas dimisso, existimamus sensum huius versiculi hunc esse. Si dormiatis inter medios cleros, id est, si vos, qui euangelizatis verbum Domini, dormiatis, id est, quiescatis in medio duorum testamentorum, noui, & veteris, acquiescentes videlicet veritati diuinitus inspiratæ Prophetis, & Apostolis; tunc pennæ columbæ, id est, Ecclesiæ fides, & mores erunt deargentatæ puritate sapiētiae, & deauratæ feruore charitatis. Nam per duos cleros intelligenda esse duo testamenta, scribunt communi consensu latini, & græci expositores, sanctus Augustinus, & sanctus Hieronymus, Theodoretus, & Euthymius. Neque absurdum est, per duos cleros, intelligi duo testamenta, quoniam clerus sortem, possessionem, & hæreditatem significat. Sunt autem Scripturæ diuinæ possessio quædam, & hære

סֵפְתַּיִם

ditas Ecclesiæ. Quod si etiam per cleros intelligamus cum S. Hieronymo, terminos; rectissime duo testamenta duo termini erunt, extra quos egredi non licet, nisi veritatis semitam perdere velimus. Possent etiam per duos cleros, intelligi possessio cœlestis, & terrena. Debent. n. prædicatores Euangelij non toti esse affixi contemplationi cœlestium bonorū; neque toti adiecti vitæ actiue, & operibus charitatis erga proximos, sed in medio vtriusq. sortis quiescere, & nunc per contemplationem erigi in Deum, nunc per charitatis obsequium descendere ad proximos. Potest denique cum S. Augustino sic exponi versiculus, Si dormiatis inter medios cleros, si moriamini inter fœlicitatem terrenam contemptam, & fœlicitatem æternam speratam, & nondum adeptam, tunc erunt pennæ columbæ deargentatæ: quia quādo sancti Prædicatores perseverant usque ad mortem contemnentes terrenam fœlicitatem, & sperantes æternam, & sic dormientes dormitione mortis inter has duas hæreditates constituti, tunc fama Ecclesiæ quasi pennis deargentatis volat ubique, & exaltatur, ac magnificatur.

XV. Dum discernit cœlestis Reges super eam niue dealbabuntur in Selmon, mons Dei, mons pinguis

XVI. Mons coagulatus, mons pinguis: ut quid suspicamini montes coagulatos?

XVII. Mons in quo beneplacitum est Deo habitare in eo: etenim Dominus habitabit in finem.

Descripsit Propheta prædicatores per similitudinem dormientium inter cleros, & Ecclesiam per similitudinem colubæ deargentatæ, & deauratæ: nunc describit eosdem prædicatores per similitudinem Regum a summo Rege constitutorum, & Ecclesiam per similitudinem montis altissimi candidi propter niues, & vberissimi propter abundantiam lactis. Sel-

mon. n. mons est altissimus, & ideo niuib. in vertice coopertus, sed in imo fertilis, cuius fit mentio in libro Iudicū c. 9. Ait igitur, Dum discernit cœlestis Reges super eā, id est, Dum cœlestis, vel, ut est in græco, supercœlestis, & ut est in hebraico, Sadai, omnipotens Deus videlicet Christus, Rex cœlestis, & omnipotēs, discernit, id est, diuidit, ac segregat unicuiq. provinciæ suam, Reges super eā, id est, Apostolos super Ecclesiam, per columbam antea designatam: eos. n. constituit Principes super omnem terram, ut regant, ac dirigant populos. Niue dealbabuntur in Selmon, id est, tunc populi multi iustificabuntur, & nigrore peccatorum in candorem iustitiæ commutato, super niuem dealbabuntur in Selmon monte altissimo, qui Ecclesiam significat. Qui mons Selmon est mons Dei, mons pinguis, quoniam Ecclesia est mons propter excellentiam dignitatis, & est mons Dei, quia in ea Deus habitat, elegit enim eam in habitationem sibi, & est mons pinguis ob abundantiam gratiæ, & donorum Spiritus sancti. Et est etiam mons coagulatus, & per hoc pinguisissimus, quia lac diuinæ gratiæ non defluit, sed quasi coagulatum in ea semper manet. Ut quid suspicamini montes coagulatos? id est, quare igitur suspicamini, vel opinamini esse alios montes æquæ coagulatos, & pingues? quasi dicat, Non est, quod existimetis esse alios montes æquæ pingues, atque hic Selmon. Hic enim est vnicus mons, in quo beneplacitum est Deo habitare in eo: nec in eo habitabit ad tempus, ut fecit in monte Sina, sed habitabit in finem, id est, semper. Hæc videntur dici aduersus hæreticos, qui alias ecclesias erigere conantur. Pro voce, suspicamini, legunt aliqui, emulamini, vel, contenditis, sed idem est sensus. Significant enim illæ voces, frustra alios montes contendere cum isto monte, vel ei invidere. De hoc monte legimus apud Isaiā cap. 2. Erit in nouissimis diebus præparatus mons domus Domini in vertice montium, & eleuabitur super colles; & fluent ad eum omnes gentes, & ibunt populi multi, & dicent, ascendamus in

טרי

in montem Domini, & ad domum Dei Iacob, & docebit nos vias suas, & ambulabimus in semitis eius: quæ sine controuersia intelliguntur de Ecclesia.

XVIII. Currus Dei decem millibus multiplex millia latantium: Dominus in eis in Sina, in sancto.

XIX. Ascendisti in altum, cepisti captiuitatem, accepisti dona in hominibus.

XX. Etenim non credentes inhabitare Dominum Deum.

Nunc cōparat Propheta descensum Dei in montem Sina, vt daret regem veterem populo Iudaico, cum ascensione Christi in cœlum, vt inde mitteret, donum Spiritus sancti, & legem nouam populo Christiano: quam comparationem facere videtur Propheta, vt ostendat, vnde tanta abundantia lactis, & tantus candor Ecclesiæ data sint. Currus Dei decem millibus multiplex, id est, curus quo vehebatur Deus cū descēderet in montem Sina, erant multa millia sanctorum Angelorum: quæ oīa non erant gementia sub pondere, sed latantia, & plaudentia præ voluptate vehendi Dominum. Dominus. n. in eis sedēs fuit in Sinai, in monte sancto. Quod aut sancti Angeli sint, qui cū Deo descēderint in montē Sinai, dicitur apertius in Deut. cap. 33. Dñs de Sinai venit, & de Seir ortus est nobis, apparuit de monte Pharan, & cum eo sanctorum millia. Quod aut currus Dei sint Angeli, Scriptura passiū docet, cū ait, Qui sedes super Cherubim. Porro illud, decē millibus multiplex in hebræo est vnica vox, rabbothaim, quæ propriè significat, bis decē millia, sed accipitur pro plurimis millibus. Itaque decem millibus multiplex, significat, plus decem millibus, id est, innumabilis multitudo. Illud, millia latantium, vertit S. Hieronymus, millia abundantium, & sic legit etiā ex græco Euthymius, & interpretatur, millia abundantium virtute, & gratia, & oībus bonis, quales sunt Angeli beati, qui cū bo-

nis omnibus abundant latissimi semper sunt. Sed vox hebræa, Sinaan, est vox quatuor literarum, & valde obscura, vnde alij ex hebræis putāt significare Angelos, alij duplicata millia, alij et vertunt nobiscum, millia latantium. Quod sequitur, Ascendisti in altum, S. Paulus de Ascensione Christi interpretatur ad Ephes. 4. Itaq. sensus est, Dñs olim descendit in montē Sina cū multis millibus Angelorum; sed tu Messias ascendisti in altum, id est in summū cœlum, cepisti captiuitatem, id est, captiuos Diaboli fecisti captiuos tuos; miseram captiuitatem, in captiuitatem felicissimam commutasti: & sic triumphator multis millibus Sanctorum, quos ab inferis eduxisti, comitatus in Regnum tuum intrasti. Accepisti dona in hominibus, id est, accepisti à Patre dona Spiritus sancti in hominibus, id est, pro hominibus à te redemptis, & ea dona à Patre accepta dedisti hominibus. Sic explicat S. Paulus, qui hunc locum his verbis refert, Ascendens in altum captiuam duxit captiuitatem, dedit dona hominibus. Et est, expositio conformis Euangelio. nā Ioan. 14. dicitur, Ego rogabo Patrem, & alium Paraclitum dabit vobis. Et cap. 15. Cū venerit Paraclitus, quem ego mittam vobis à Patre. Porro inter dona à Christo in terras effusa, præcipuum est charitas, quæ est lex noua, dicte Apostolo ad Rom. 5. Charitas Dei diffusa est in cordibus nostris per Spiritum sanctum, qui datus est nobis. Et ad Gal. 5. Fructus autem Spiritus est charitas, gaudium, pax, &c. Denique illud, Etenim non credentes inhabitare Dominum Deum, significat, etiam incredulos per dona Spiritus sancti conuersos esse ad Christum, & ad bonā captiuitatē pertinere cœpisse. Vbi illud, etenim, ponitur pro, etiam: nam in hebræo nō est, chi sed, aph, quod significat, etiam, verumtamen, insuper. Vnde Sanctus Hieronymus vertit, Insuper, & non credentes inhabitare Dominū Deum. Itaque sensus est, cœpisti captiuitatem, accepisti dona, in hominibus, etiam eos cœpisti captiuos, & pro ijs accepisti dona, qui antea non credebant Domi-

nium

num Deū inhabitare in homine, id est, non credebant, Verbum carnem factū esse, & inhabitasse in nobis: vel, non credebant Dominum Deum inhabitare in monte sancto, id est, in Ecclesia Christianorum,

XXI. Benedictus Dominus die quotidie: prosperum iter faciet nobis Deus salutarium nostrorum.

XXII. Deus noster, Deus saluos faciendi, & Domini, Domini exitus mortis.

Græci coniungunt duo verba præcedentia cum hoc versiculo, hoc modo, Dominus Deus benedictus Dominus, & finiunt præcedentem versiculum in illis verbis, Etenim inhabitare. Et sic legunt etiam S. Augustinus, & S. Hilarius. Sed noster Interpres vertit conformiter ad hebraicum codicem. Et S. Hieronymus in epist. ad Suniam, & Fretellam reprehendit lectionem græcorum, & confirmat nostram, ut veriore. Igitur Propheta posteaquam descripsit Ascensionem Christi, qui nobis Dux fuit ad patriam cælestem: agit gratias Deo, ac dicit, Benedictus sit Dominus per singulos dies. id enim significat, die quotidie: nam Interpres latinus reddidit ad verbum quod inuenit in græco; sed in hebræo est, die, die, id est, omni die: siue de die in diem, Benedicimus aut Deū omni die, quia omni die nobis benefacit. Prosperum iter faciet nobis, id est, benefaciet nobis omni die, quia nō deseret nos in hoc itinere, quod facimus omni die, donec ad æternitatis diē peruerimus. Vox hebraica, iahamos, significat portabit, quam vnam vocem expressit interpres tribus vocibus, prosperum iter faciet; verè enim prosperè ambulat, qui portatur à Deo. In græco est etiam vnicum verbum, quod significat prosperare iter, complanando videlicet viam, & impedimenta remouendo. Itaque promittitur hoc loco continua assistentia gratiæ Dei, dum peregrinamur à Domino. Deus salutarium no-

strorum, id est, prosperabit nobis iter Deus, qui est auctor totius nostræ salutis: non enim indigemus simplici salute sed multiplici, qui multiplici periculo sumus obnoxij. Deus noster, Deus saluos faciendi, id est, non sine causa dixi, Deum prosperaturum iter nobis, & salutes multas allaturum: nam hoc est illi proprium; hæc est eius natura; ipse .n. Deus noster, est Deus saluans, Deus misericors, & pius. Et Domini, Domini exitus mortis, id est, & ab ipso provenit euasio mortis, siue egressio à morte. Pro illud, Domini, Domini, in hebræo sunt duo nomina: vnum quatuor litterarum, quod est proprium Dei, & in Scripturis non pronunciatur, sed loco, eius legitur, Adonai; alterum nomē est Adonai, quod Dominum significat. Itaque sensus est, & Dei nostri, qui est verus Dominus omnium rerum, sunt exitus mortis, id est, liberatio à morte, siue euasio mortis. Ipse enim est vita æterna, & eam nobis communicabit, cum finita peregrinatione transferret nos de morte ad vitam,

XXIII. Verumtamen Deus confringet capita inimicorum suorum: verticem capilli perambulantium in delictis suis.

Docuit, quid faciet Dominus amicis suis: docet nunc, quid faciet inimicis, qui increduli permanserint, atque à Regno eius alieni esse voluerint. Confringet, inquit, Deus capita inimicorum suorum, id est, superbiam inimicorum suorum humiliabit, dū eos ad inferos æternis cruciatibus puniendos damnabit. Verticem capilli perambulantium in delictis suis. idē alijs verbis reperit ac declarat, more suo Propheta: nam quod dixerat, capita, nunc dicit, verticem capilli, id est, verticem crinitum superbū, ac vanum confringet. quod dixerat inimicorum, nunc dicit perambulantium in delictis suis; illi enim soli sunt inimici Dei, qui non ambulant in lege Domini, sed in delictis suis, hoc est, qui tempus vitæ suæ peccando consumunt.

Paulò

ד'ימ'י

יחזק

מ'ד'י

XXIII.

Paulò aliter exponit sanctus Hilarius: vult enim per capita inimicorum Dei, intelligi Principes tenebrarum, id est, Principes dæmonum, quos Dominus dicit perambulare verticem capilli, id est infidere, & dominari capitibus hominū peruersorum; in delictis suis, quia ad hoc solum infident, & dominantur capitibus hominum impiorum, vt eos ad varia delicta alliciant.

XXIV. Dixit Dominus, ex Basan conuertam, conuertam in profundū maris

XXV. Vt intingatur pes tuus in sanguine, lingua canum tuorum ex inimicis ab ipso.

Confirmat Deus sententiam Prophetæ de perditione impiorum. Dixit Dominus, ex Basan cōuertam, conuertam in profundum maris, id est, Ego Dominus abstraham inimicos meos ex Basan, regione vberima, & pinguisima, & projiciam in profundum maris, vt olim egi cum Pharaone. Conuertam videlicet impios à delicijs, & voluptatibus in vltimam perditionem, tantaq. erit hostium strages, vt pes tuus o popule meus, tingatur in sanguine occisorum, & lingua canum tuorum tingatur ab ipso sanguine ex inimicis esulso. Hæc mihi videtur sententia aptè cohærens ceteris superioribus. In hebræo habetur, ex profundis maris, quæ videtur lectio cōtraria lectioni nostræ editionis vulgaris, quam tamen habuerunt S. Hilarius, S. Augustinus, & S. Hieronymus in commentario. Et quamuis in hebræo sit præpositio, *min*, quæ significat ex, vel, ab: tamen ponitur aliquando pro, *be*, quæ significat, in, & contra, in, ponitur pro, ab: nam Ecclesiastæ 1. vbi legimus, Cogitavi abstrahere à vino carnem meā: in hebræo est, in vinum. Sed Sanctus Hieronymus rectè iudicauit, in, positum esse pro, a, vel, ab; & cōtra, Deuteron. 33. vbi legimus, Dominus de Sina venit, Rabbi David existimauit positum esse, de, pro, in, quia Dominus in Sina mon-

tem venit, non de Sina, quando legem dedit. Scio hos versiculos variè explicari, & tot esse expositiones, quot sunt auctores. Ideò in tanta obscuritate licitum mihi esse duxi, nouam expositionem excogitare, quam lectorum iudicio permitto.

Viderunt ingressus tuos Deus, XXVI. ingressus Dei mei, Regis mei, qui est in sancto.

Explicata victoria, & triumpho Christi de hostibus eius, docet Propheta, eos qui testes fuerunt tantarum rerum, cœpisse illa toti Mundo cum cantu, & lætitia publicare. Viderunt, inquit, ingressus tuos Deus, id est, non desunt qui viderint itinera tua, Christe Deus, actiones tuas, prælia tua, victorias tuas. Ingressus, inquam, tuos, qui es Deus meus, & Rex meus; qui nunc es in sanctuario tuo: siue summum cœlum, siue Ecclesia sanctum habitaculum eius dicatur: nā vtrumque est verum; est enim Christus in cœlo per præsentiam visibilem, in Ecclesia per fidem, & providentiam.

Præuenerunt Principes conisul. XXVII. cti psallentibus, in medio iuencularum tympanistiarum.

Alludit Propheta ad id quod fecerūt filij Israel, quando Deus liberauit populum suum de manu Pharaonis: tunc enim Moses Princeps populi cum alijs filijs Israel cantauit canticum illud, Cātemus Domino, gloriōse enim magnificatus est. Et Maria soror Moysis cum sequentibus se mulieribus sumpsit tympanum, & ludebat laudans Deum. Exod. 15. Sic igitur quando viderunt principes Ecclesiarum Christi victoriā, & triumphum, quo de potestate Sathanæ liberati sumus, præuenerūt ipsi alias gētes, & populos, vt Christi laudes prædicarēt, & resonarent. Coniuncti psallentibus, id est, coniuncti sanctis Angelis in cœlo psallentibus ob eandem victoriā, in medio iuencularum tympani-

in

c.

panistriarum, id est, psallentibus Angelis in medio animarum sanctarum, quæ cum Christo in cælum ascenderunt, quæ dicuntur iuuentulæ, quoniam recens vitam beatam ducere, & cum Angelis Deo assistere, ei quæ psallere, & cantare ceperunt.

XXVIII. In Ecclesijs benedicite Deo , Domino de fontibus Israel.

Hic versiculus est quasi parentesis, qua Propheta prævidens futuram lætitiā Principum Ecclesiæ, hortatur eos, ut in Ecclesijs, quas fundaturi erant, pergant benedicere Dño Deo, de fontibus Israel materiam laudis haurientes; vocat autem fontes Israel promissiones Dei ad Patriarchas, & vaticinia Prophetarum prædicentium ea, quæ nunc impleta esse videmus, & gaudemus. Illud, Deo Domino, legi debet cum distinctione hoc modo, In Ecclesijs benedicite Deo, Domino de fontibus Israel, id est, benedicite Deo in Ecclesijs, benedicite, inquā, Domino de fontibus Israel. Sic enim distinguitur hic versiculus in codicibus hebraicis, & hoc modo distinctus maiorē habet venustatem.

XXIX. Ibi beniamin adolescentulus^s in mentis excessu

XXX. Principes Iuda . duces eorum, Principes Zabulon , Principes Nephtalim,

Redit ad superiorem narrationem, & explicat, qui sint illi Principes, de quibus dixit, Præuenerunt Principes. Isti, inquit, sunt Beniamin adolescentulus, Principes Iudæ, & Principes Zabulon, & Nephtali; per quæ nomina intelligunt cōmuniter latini Patres, Hilarius, Hieronymus, & Augustinus, & græci expositores Theodoretus, & Euthymius sanctos Apostolos, qui constituti sunt à Deo Principes super omnem terram: ac primo loco nominatur Beniamin adolescentulus, per quem intelligitur

Apostolus Paulus, qui erat de tribu Beniamin, & qui nouissimus fuit vocatione, sed plus omnibus laborauit prædicando, & laudando victoriam Christi: & is in mentis excessu ita coniunctus fuit psallentibus in tertio cælo, & in paradiso, ut nesciret an tunc in corpore esset, vel extra corpus, ut ipse testatur 2. Corin. 12. Per Principes Iuda, intelliguntur Apostoli, qui erant de tribu Iuda, & Christi fratres dicuntur in Evangelio, quod essent filij Cleophae fratris Ioseph sponsi B. Virginis, ut ex Egesippo refert Eusebius lib. 3. hist. cap. 11. iuxta versionem Ruffini, videlicet Iacobus, Simeon, Iudas. Principes Zabulon, & Nephtali, dicuntur Apostoli ceteri, Petrus, & Andreas, Iacobus, & Ioannes, Philippus, Matthæus, & ceteri, qui erant à Bethsaida, vel Capharnaum, & vicinis ciuitatibus, ad sortem Zabulon, & Nephtali pertinentibus: quod colligitur ex Euangelio sancti Matthæi, qui scribit cap. 4. Cum autem audisset Iesus, quod Ioannes traditus esset, secessit in Galilæā, & relicta ciuitate Nazareth habitauit Capharnaum maritima in finibus Zabulon, & Nephtali, ut adimpletur quod dictum est per Isaiam Prophetam, Terra Zabulon, & terra Nephtali via maris trans Iordanem Galilææ gentium, populus qui sedebat in tenebris vidit lucem magnam, sedentibus in regione umbræ mortis lux orta est eis: sed quoniam ex captiuitate non redierunt decem tribus, sed sola tribus Iuda, & Beniamin, cum Leuitis, ut colligitur ex lib. 1. Esdræ: Apostoli dicuntur Principes Zabulon, & Nephtali, vel quia in fortibus horum duorum Patriarcharum habitabant: vel quia forte pauci aliqui ex his tribubus redierint admixti Iudæis: quod cogimur dicere de Anna prophetissa, quæ dicitur fuisse de tribu Aser, Luc. 2. Miratur Calvinus hæresiarca in antidoto Concilij Tridentini, quid cogitauerit Interpres noster Latinus, quando vertit, Beniamin adolescentulus in mentis excessu, cum in hebræo non habeatur, in mentis excessu, sed, dominator eorum. At nos miramur, Calvinum non cogitasse, à latino Interprete red-

redditum fidelissimè fuisse, quod est in græco: vulgata enim latina editio Psalterij ex græco expressa est, non ex hebraeo. Sed neque dissentit lectio græca, vel latina ab hebraica bene intellecta, ut eam intellexerunt Septuaginta Interpretes. Vox enim hebraica, *radem*, si deducatur à verbo, *rada*, significat dominator eorum, ut Calvinus dicit secutus Rabinos. Sed si deducatur à verbo, *radam*, ut eam deduxerunt Septuaginta Interpretes, significat, altissimè dormiens, siue mentis excessum patiens. Pro illo autem, duces eorum, vertunt alij, in purpura fura: sed vox hebraica utroque modo reddi potest, & sensus est idem.

םרר

ררר

ררר

XXXI.

Manda Deus virtuti tuæ; confirma hoc Deus, quod operatus es in nobis.

Descripta victoria Christi, & lætitia Apostolorum; petit à Deo Propheta, ut potentiam suam, quam exercuit in superandis hostibus, & constituenda Ecclesia, iterum exerceat in confirmando, & conseruando opere suo. Manda, inquit, virtuti tuæ, id est, impera potètiæ tuæ, ut operi inchoato assistat, illudque conseruet, & augeat. Explicat deinde hoc ipsum clarioribus verbis, dicens, Confirma hoc Deus, quod operatus es in nobis, id est, liberaisti nos de potestate satanæ, transulisti in Regnum filij tui; plantasti Ecclesiam sanguine eiusdem filij tui; effudisti in nos spiritum adoptionis filiorum; confirma hæc omnia, quæ opera sunt misericordiæ tuæ. In hebræo habetur, Mundauit Deus tuus virtuti tuæ: sed vox hebraica, *zittach*, potest esse præteritum, mandauit, & imperatum, manda. Sed illud pronomen additum nomini Deus, cum dicitur, Deus tuus, totam sententiam obscurat. Itaque suspicor esse addititium, & non fuisse in codicibus, quos habuerunt Septuaginta Interpretes: nam omnes veteres, græci, & latini legunt, Manda Deus virtuti tuæ, dum exponunt hunc versiculum ex interpretatione Septuaginta. San-

ררר

ררר

ctus enim Hieronymus vertit quidem ex hebræo, præcepit Deus tuus de fortitudine tua: tamen in commentario legit, & exponit cum alijs Patribus, Manda Deus virtuti tuæ,

A templo tuo in Hierusalem, tibi offerent Reges munera. XXXII.

Potest hic versiculus intelligi de Regibus, qui in cælo cum Christo regnāt, & tunc sensus est, A templo, quod est in cælesti Hierusalem, tibi Deo sancti, qui regnant cum Christo offerent munera, id est, sacrificia laudis perpetuæ. Potest etiam intelligi de Regibus spiritualibus, id est, de sacerdotibus Ecclesiæ, de quibus paulò ante dictum est, Dum discernit cælestis Reges super eam; & tunc sensus est, A templo quod est in Ecclesia Catholica, tibi Deo sacerdotes, qui sunt ministri Regni tui, & populum vice tua regunt, offerent munera, id est, sacrificia eucharistica, sacrificia item laudum, & precum, sacrificia denique conuersionis animarum. Postremo potest intelligi de Regibus temporalibus, & tunc illud, à templo, exponendum est propter templum, id est, propter sanctitatem templi tui, quod est in Ecclesia offerent tibi Reges terræ munera preciosa ad ipsius templi ornatum, & ad alendos templi ministros: de qua oblatione Regum multa prædicit Isaias cap. 60. & 66.

Increpa feras arundinis, congregatio taurorum in vaccis populorum, ut excludant eos, qui probati sunt argento. XXXIII.

Conuertit nunc orationem ad hostes Ecclesiæ, qui pacem eius perturbare satagunt, ne munera laudum, & sacrificia bonorum operum offerantur Deo: ac primum loquitur de hostibus inuisibilibus, ut exponunt Sanctus Hilarius ex latinis, & Euthymius ex Græcis. Attingitur, increpa, id est, exterre, coerce, reprimere

me

me feras arundinis: per feras arundinis intelliguntur bestię sylvestres, quę latent inter arundinetas: & per has bestias describuntur Dæmones, qui libenter versantur inter homines vanos, & loquaces; & in locis humentibus, vbi regnat luxuria. Sic enim de Diabolo sub figura Behemoth loquitur Dominus in libro Job. cap. 40. Sub vmbra dormit, in secreto calami, & in locis humentibus. Deinde addit de hominibus, Congregatio taurorum in vaccis populorum, id est, Congregatio Principum impiorum saeuientium, instar taurorum. In vaccis populorum id est, in medio populorum insipientium, & insipientium instar vitulorum, siue iuuenearum; (nam in hebræo exprimitur non solum genus femininum, sed etiam iuuetus.) Congregatio, inquam, facta est, vt excludant eos, qui probati sunt argento, id est, cõuenerunt Principes, & populi impij, Satana instigante, & impellente, vt excludant, reiciant, ad nihilum redigant, prædicatores Fidei, qui probati sunt instar argenti in fornace ignis, & inuenti purissimi, & fidelissimi. Itaque significatur his verbis persecutiones grauissimæ tum Iudæorum, tum Paganorum, quę exortę sunt post Christi Ascensionem in cælum. S. Augustinus per feras arundinis, siue calami, vt ipse legit, intelligit hæreticos, qui calamo, id est, scriptura vexant Ecclesiam. Et illud, vt excludant eos, qui probati sunt argento, exponit in hunc sensum, vt faciant eminare eos, qui probati sunt, vt argentum excluditur ab artificibus, quando ex massa impolita excludunt vas argenteum, id est apparere, & eminere faciunt. Hæretici enim exercent Ecclesiam, & occasionem præbent, vt multi viri docti, & probi emineant in intelligentia scripturarum.

XXXIV. Dissipa gentes, quę bella volunt: venient legati ex Aegypto, Aethiopia præueniet manus eius Deo,

Prædicat nunc victoriã aduersus persecutores. Dissipa, inquit, gentes, id

est, tu dissipabis omnes, qui bella mouent aduersus populum tuum: & tunc venient legati ex Aegypto pacem petentes, & subiectionem profitentes: & Aethiopia, quę longius distat, præueniet manum eius Deo, id est, præueniet apud Deum manum Aegypti offerentis munera. Nominat Propheta Aegyptum, & Aethiopiam, illam, vt valde inimicã verę religionis, istam, vt valde longinquam. Volunt autem Patres, per Aethiopiam præuenientem, significari Eunuchum Candacis Reginae Aethiopum, qui ad fidem Christianam adiunctus est multo antea, quàm eadem fides ad Aegyptum, aliasq. gentium regiones peruenisset: de qua re lege caput 8. Actuum Apost.

Regna terrę cõtate Deo psal xxxv. lite Domino, psallite Deo, qui ascendit super cælum cœli ad orientem.

Pergit prædicare, per modum exhortantis conuersionem Gentium ad fidem Christianam. Regna terrę, id est, totius terrę, non solum Regnum Israel, aut Iuda, cantate Deo, ex fide agnoscentes verum Deum, cantate laudes eius: psallite Domino, non solum verbis cantate, sed etiam bonis operibus psallite Domino, qui ascendit super cælum cœli ad orientem. i. qui posteaquam ascendit in altum, sedet in summo cœlo ad fontem lucis, vnde oriatur omne lumen. In hebræo, & græco codice non sunt illa duo verba, psallite Deo; & S. Hieronymus in epistola ad Suniam, & Fretellam dicit esse superuacanea; tamen nihil obest, quod in nostra editione legatur, cum nihil sint, nisi repetitio præcedentium verborum. Illud autem, ascendit super cælum cœli, non significat, ascendit in cælum, sed sedet super cælum; vox enim hebraica est, rocheu, quę non significat, sursum ascendere, sed equitare vel curru vehi, vt supra diximus ad illa verba, Qui ascendit super occasum. Itaque significat Propheta, Christum Dominum post ascensionem in

in cœlum, de qua locutus est, cùm ait, Ascendisti in altum: esse cœpisse ipso cœlo altiore, & superiorem, quippè qui sedet super cœlum, vt eques super equum, vel auriga super currum, vel Rex super solium. Illud autem, ad orientem, optimè cohæret cum eo quod supra dictum est, Qui ascendit super occasum; id est, quia sub se habet tenebras omnes, ipse est in luce, vel ad lucem inaccessibilem, vnde oritur lumen omne, qd̄ communicatur Angelis, & hominibus. S. Hieronymus vertit, Qui ascendit super cœlum cœli à principio: & verè vox hebraica, chedem vtrunque significat, & orientem, & principium, & vtrunq. est verum. Christus enim, vt Deus, à principio sedit super cœlum cœli, & vt homo, post resurrectionem ascendit in cœlum, & nunc est super cœlum cœli ad orientem, assistens æterno, & supremo Orienti, id est, fonti lucis.

XXXVI. Ecce dabit voci suæ vocem virtutis: date gloriam Deo super Israel: magnificentia eius, & virtus eius in nubibus.

XXXVII. Mirabilis Deus in sanctis suis Deus Israel, ipse dabit virtutem, & fortitudinem plebi suæ, benedictus Deus.

Hos duos versiculos referunt Græci, Theodoretus, & Euthymius ad missionem Spiritus sancti, quando post Ascensionem Domini, induti sunt Apostoli virtute ex alto. Sed latini, Hilarius, Augustinus, & Hieronymus referunt ad secundum aduentum Christi: & hoc magis probo. Hic enim Psalmus (vt initio diximus) omnia mysteria vtriusque testamenti complectitur. Ecce, inquit, dabit voci suæ vocem virtutis, id est, ille, qui humilis apparuit, & sicut Agnus coram tondente obmutuit, tunc sedet super cœlum cœli, & paulò post dabit voci suæ vt sit vox virtutis, id est, vox potentissima, & efficacissima: quod fiet qñ omnes mortui audient vocem filij Dei, & resurgent qui bona fecerunt in resur-

rectionem vitæ, qui verò mala egerunt in resurrectione Iudicij. nulla. n. vox potentior cogitari pōt. Vox quidē virtutis fuit, quæ dixit, Adolescens tibi dicō surge; & Lazare veni foras. Sed vox quæ cineres omnium hominum ab initio Mundi defunctorum, subito formabit, animabit, excitabit, quantæ tandē virtutis erit? Vox item maximæ virtutis erit, quæ dicet, Ite maledicti in ignē æternum; & Venite benedicti, posside te paratum vobis Regnum; cui voci absque vlla resistantia, vel retractatione respondebit effectus. Certè compa- ratione ad hanc vocem, omnia omniū Principum edicta, & imperia nullius virtutis existimanda sunt. Rectè igitur subiungit, Date gloriā Deo super Israel id est, glorificate Deum super beneficia in electos eius collata. Omnia. n. propter electos, inquit Apostolus: Magnificencia eius, & virtus eius in nubibus, id est, date gloriam Deo super Israel, quoniam magnificentia Dei, & potētia Dei manifestabitur maxima super Israel in nubibus cœli; quando videlicet, rapien- ture electi in nubibus obuiam Christo, & in ipsis nubibus erunt sedentes quasi in solijs cœlestibus, & sublimissimis omnes electi Dei à dextris, & à sinistris Iudicis omnipotentis. Quare exclamare licet, Mirabilis Deus in sanctis suis: tūc enim verè totus Mūdus intelliget, Deū in sanctis suis prouehendis ab imo ad summum, à summa humilitate ad summam, & celsissimam gloriā, planè admirabilem fuisse: nam Deus Israel, Deus electi populi sui, tunc dabit virtutem, & fortitudinem plebi suæ, cū electos suos vera immortalitate, & impassibilitate donabit. Neque obstat, quòd in hebræo legatur, Mirabilis Deus in sanctuarijs: ipsi enim sancti viri sunt verissima sanctuaria Dei; neque etiā quòd in hebræo sit in secunda persona, in sanctuarijs tuis. Videtur enim errore scriptorū id accidisse. Nam non solum Septuaginta verterunt in tertia persona, sed etiā sanctus Hieronymus vertit, sanctuario suo. Denique parum refert, quòd in hebræo sit, Terribilis Deus, pro quo nos habemus, Mirabilis Deus: nam vtrunque est

est verum, & vna lectio explicat aliam: discimus enim ex lectione hebraica, Christum in die nouissimo fore mirabilem in sanctis suis, cum magno terrore impiorum: quamquam omnis admiratio terrorem quendam incutere solet. Concludit propheta illis verbis, Benedictus Deus: idem sequitur ex prædictis in toto Psalmo, vt omnes Deum benedicere debeant, cum eius misericordia, & iustitia, potentia, & sapientia, ex tot mysterijs mirifice declarata sint.

& illa, Fiat habitatio eorum deserta, & non sit qui habitet in ea. Act. 1.

Explicatio Psalmi 68.

Saluum me fac Deus, quoniam I. intrauerunt aquæ vsque ad animam meam.

Infixus sum in limo profundi. II. & non est substantia.

Veni in altitudinem maris, & III. tempestas demersit me.

PSALMVS LXVIII.

Titulus, & Argumentum

*In finem, pro ijs, qui commutabuntur
David.*



DE hoc titulo dictum est in explicatione Psal. 44. quæ non sunt repetenda. Consentit ferè omnes expositores veteres, vt Hilarius, Augustinus, Hieronymus: & recentiores, vt Genebrardus, Iansenius, Agellius, & alij, in hoc Psalmo prædici passionem Christi planè ad literam, nec non euerisionem Iudæorum, & ædificationem Ecclesiæ, quæ constat ex ijs, qui feliciter commutabuntur de iniquitate ad iustitiam, & de miseria temporali ad gloriam sempiternam. Vnus est Theodoretus, quem sequitur Euthymius, qui psalmum exponendum censuit de captiuitate Baby Ionica Iudæorum: sed beatus Augustinus constanter reprehendit eos, qui audet aliter exponere, quàm Apostoli exposuerint. Apostoli enim de Christo prædicta esse affirmant illa, Qui oderunt me gratis, Ioan. 15. & illa, Zelus domus tuæ comedit me, Ioan. 2. item illa, Opprobria exprobrauerunt tibi ceciderunt super me, Rom. 15. & illa, In siti mea potauerunt me aceto, Ioan. 19.

Passio Domini nostri Iesu Christi in Euangelijs ita describitur, vt non multa dicantur de vehementia doloris eius. Voluerunt enim Euangelistæ declarare, passionem illam fuisse voluntariam, & summa cōstantia toleraram à Christo. Sed quoniam oportebat etiam, vt Mundus intelligeret acerbiter doloris in Christo fuisse maximam, atque inde tolleretur quantum debeat Redemptori: ideo Spiritus sanctus hanc doloris vehementia multò antea Prophetis reuelauit, ac per eos, vt testes fide dignissimos, & ab omni adulatione alienos, scribi voluit. Itaq. multa de hac re scripsit Isaias, multa Hieremias, sed nullus plura quàm David. Igitur in primis tribus huius Psalmi versiculis, describitur passio Christi per similitudinem demersionis in aquas lutulentas, & profundissimas. Saluum me fac Deus, salutem petit Saluator à Deo Patre, non salutem animæ, quam habebat, & perdere non poterat cum beatus esset: sed salutem corporis, eamq. non absolutè petit, sed vt ostendat magnitudinem doloris, & contrarietatem naturalis appetitus ad mortem, eo prorsus modo quo in horrore dixit, Pater, si vis transfer calicem hunc à me, Luc. 22. Quoniam intrauerunt aquæ vsque ad animam meam. Hic incipit similitudo demersionis in quas, Quoniam, inquit, similis factus sum ei, qui proiectus in aquas, incipit sentire aquas penetrantes ad vitalia, vt iam respirare, & viuere non possit. Infixus sum in limo profundi, & non est substantia,

27
 28
 29
 30
 31
 32
 33
 34
 35
 36
 37
 38
 39
 40
 41
 42
 43
 44
 45
 46
 47
 48
 49
 50
 51
 52
 53
 54
 55
 56
 57
 58
 59
 60
 61
 62
 63
 64
 65
 66
 67
 68
 69
 70
 71
 72
 73
 74
 75
 76
 77
 78
 79
 80
 81
 82
 83
 84
 85
 86
 87
 88
 89
 90
 91
 92
 93
 94
 95
 96
 97
 98
 99
 100
 101
 102
 103
 104
 105
 106
 107
 108
 109
 110
 111
 112
 113
 114
 115
 116
 117
 118
 119
 120
 121
 122
 123
 124
 125
 126
 127
 128
 129
 130
 131
 132
 133
 134
 135
 136
 137
 138
 139
 140
 141
 142
 143
 144
 145
 146
 147
 148
 149
 150
 151
 152
 153
 154
 155
 156
 157
 158
 159
 160
 161
 162
 163
 164
 165
 166
 167
 168
 169
 170
 171
 172
 173
 174
 175
 176
 177
 178
 179
 180
 181
 182
 183
 184
 185
 186
 187
 188
 189
 190
 191
 192
 193
 194
 195
 196
 197
 198
 199
 200
 201
 202
 203
 204
 205
 206
 207
 208
 209
 210
 211
 212
 213
 214
 215
 216
 217
 218
 219
 220
 221
 222
 223
 224
 225
 226
 227
 228
 229
 230
 231
 232
 233
 234
 235
 236
 237
 238
 239
 240
 241
 242
 243
 244
 245
 246
 247
 248
 249
 250
 251
 252
 253
 254
 255
 256
 257
 258
 259
 260
 261
 262
 263
 264
 265
 266
 267
 268
 269
 270
 271
 272
 273
 274
 275
 276
 277
 278
 279
 280
 281
 282
 283
 284
 285
 286
 287
 288
 289
 290
 291
 292
 293
 294
 295
 296
 297
 298
 299
 300
 301
 302
 303
 304
 305
 306
 307
 308
 309
 310
 311
 312
 313
 314
 315
 316
 317
 318
 319
 320
 321
 322
 323
 324
 325
 326
 327
 328
 329
 330
 331
 332
 333
 334
 335
 336
 337
 338
 339
 340
 341
 342
 343
 344
 345
 346
 347
 348
 349
 350
 351
 352
 353
 354
 355
 356
 357
 358
 359
 360
 361
 362
 363
 364
 365
 366
 367
 368
 369
 370
 371
 372
 373
 374
 375
 376
 377
 378
 379
 380
 381
 382
 383
 384
 385
 386
 387
 388
 389
 390
 391
 392
 393
 394
 395
 396
 397
 398
 399
 400
 401
 402
 403
 404
 405
 406
 407
 408
 409
 410
 411
 412
 413
 414
 415
 416
 417
 418
 419
 420
 421
 422
 423
 424
 425
 426
 427
 428
 429
 430
 431
 432
 433
 434
 435
 436
 437
 438
 439
 440
 441
 442
 443
 444
 445
 446
 447
 448
 449
 450
 451
 452
 453
 454
 455
 456
 457
 458
 459
 460
 461
 462
 463
 464
 465
 466
 467
 468
 469
 470
 471
 472
 473
 474
 475
 476
 477
 478
 479
 480
 481
 482
 483
 484
 485
 486
 487
 488
 489
 490
 491
 492
 493
 494
 495
 496
 497
 498
 499
 500
 501
 502
 503
 504
 505
 506
 507
 508
 509
 510
 511
 512
 513
 514
 515
 516
 517
 518
 519
 520
 521
 522
 523
 524
 525
 526
 527
 528
 529
 530
 531
 532
 533
 534
 535
 536
 537
 538
 539
 540
 541
 542
 543
 544
 545
 546
 547
 548
 549
 550
 551
 552
 553
 554
 555
 556
 557
 558
 559
 560
 561
 562
 563
 564
 565
 566
 567
 568
 569
 570
 571
 572
 573
 574
 575
 576
 577
 578
 579
 580
 581
 582
 583
 584
 585
 586
 587
 588
 589
 590
 591
 592
 593
 594
 595
 596
 597
 598
 599
 600
 601
 602
 603
 604
 605
 606
 607
 608
 609
 610
 611
 612
 613
 614
 615
 616
 617
 618
 619
 620
 621
 622
 623
 624
 625
 626
 627
 628
 629
 630
 631
 632
 633
 634
 635
 636
 637
 638
 639
 640
 641
 642
 643
 644
 645
 646
 647
 648
 649
 650
 651
 652
 653
 654
 655
 656
 657
 658
 659
 660
 661
 662
 663
 664
 665
 666
 667
 668
 669
 670
 671
 672
 673
 674
 675
 676
 677
 678
 679
 680
 681
 682
 683
 684
 685
 686
 687
 688
 689
 690
 691
 692
 693
 694
 695
 696
 697
 698
 699
 700
 701
 702
 703
 704
 705
 706
 707
 708
 709
 710
 711
 712
 713
 714
 715
 716
 717
 718
 719
 720
 721
 722
 723
 724
 725
 726
 727
 728
 729
 730
 731
 732
 733
 734
 735
 736
 737
 738
 739
 740
 741
 742
 743
 744
 745
 746
 747
 748
 749
 750
 751
 752
 753
 754
 755
 756
 757
 758
 759
 760
 761
 762
 763
 764
 765
 766
 767
 768
 769
 770
 771
 772
 773
 774
 775
 776
 777
 778
 779
 780
 781
 782
 783
 784
 785
 786
 787
 788
 789
 790
 791
 792
 793
 794
 795
 796
 797
 798
 799
 800
 801
 802
 803
 804
 805
 806
 807
 808
 809
 810
 811
 812
 813
 814
 815
 816
 817
 818
 819
 820
 821
 822
 823
 824
 825
 826
 827
 828
 829
 830
 831
 832
 833
 834
 835
 836
 837
 838
 839
 840
 841
 842
 843
 844
 845
 846
 847
 848
 849
 850
 851
 852
 853
 854
 855
 856
 857
 858
 859
 860
 861
 862
 863
 864
 865
 866
 867
 868
 869
 870
 871
 872
 873
 874
 875
 876
 877
 878
 879
 880
 881
 882
 883
 884
 885
 886
 887
 888
 889
 890
 891
 892
 893
 894
 895
 896
 897
 898
 899
 900
 901
 902
 903
 904
 905
 906
 907
 908
 909
 910
 911
 912
 913
 914
 915
 916
 917
 918
 919
 920
 921
 922
 923
 924
 925
 926
 927
 928
 929
 930
 931
 932
 933
 934
 935
 936
 937
 938
 939
 940
 941
 942
 943
 944
 945
 946
 947
 948
 949
 950
 951
 952
 953
 954
 955
 956
 957
 958
 959
 960
 961
 962
 963
 964
 965
 966
 967
 968
 969
 970
 971
 972
 973
 974
 975
 976
 977
 978
 979
 980
 981
 982
 983
 984
 985
 986
 987
 988
 989
 990
 991
 992
 993
 994
 995
 996
 997
 998
 999
 1000
 1001
 1002
 1003
 1004
 1005
 1006
 1007
 1008
 1009
 1010
 1011
 1012
 1013
 1014
 1015
 1016
 1017
 1018
 1019
 1020
 1021
 1022
 1023
 1024
 1025
 1026
 1027
 1028
 1029
 1030
 1031
 1032
 1033
 1034
 1035
 1036
 1037
 1038
 1039
 1040
 1041
 1042
 1043
 1044
 1045
 1046
 1047
 1048
 1049
 1050
 1051
 1052
 1053
 1054
 1055
 1056
 1057
 1058
 1059
 1060
 1061
 1062
 1063
 1064
 1065
 1066
 1067
 1068
 1069
 1070
 1071
 1072
 1073
 1074
 1075
 1076
 1077
 1078
 1079
 1080
 1081
 1082
 1083
 1084
 1085
 1086
 1087
 1088
 1089
 1090
 1091
 1092
 1093
 1094
 1095
 1096
 1097
 1098
 1099
 1100
 1101
 1102
 1103
 1104
 1105
 1106
 1107
 1108
 1109
 1110
 1111
 1112
 1113
 1114
 1115
 1116
 1117
 1118
 1119
 1120
 1121
 1122
 1123
 1124
 1125
 1126
 1127
 1128
 1129
 1130
 1131
 1132
 1133
 1134
 1135
 1136
 1137
 1138
 1139
 1140
 1141
 1142
 1143
 1144
 1145
 1146
 1147
 1148
 1149
 1150
 1151
 1152
 1153
 1154
 1155
 1156
 1157
 1158
 1159
 1160
 1161
 1162
 1163
 1164
 1165
 1166
 1167
 1168
 1169
 1170
 1171
 1172
 1173
 1174
 1175
 1176
 1177
 1178
 1179
 1180
 1181
 1182
 1183
 1184
 1185
 1186
 1187
 1188
 1189
 1190
 1191
 1192
 1193
 1194
 1195
 1196
 1197
 1198
 1199
 1200
 1201
 1202
 1203
 1204
 1205
 1206
 1207
 1208
 1209
 1210
 1211
 1212
 1213
 1214
 1215
 1216
 1217
 1218
 1219
 1220
 1221
 1222
 1223
 1224
 1225
 1226
 1227
 1228
 1229
 1230
 1231
 1232
 1233
 1234
 1235
 1236
 1237
 1238
 1239
 1240
 1241
 1242
 1243
 1244
 1245
 1246
 1247
 1248
 1249
 1250
 1251
 1252
 1253
 1254
 1255
 1256
 1257
 1258
 1259
 1260
 1261
 1262
 1263
 1264
 1265
 1266
 1267
 1268
 1269
 1270
 1271
 1272
 1273
 1274
 1275
 1276
 1277
 1278
 1279
 1280
 1281
 1282
 1283
 1284
 1285
 1286
 1287
 1288
 1289
 1290
 1291
 1292
 1293
 1294
 1295
 1296
 1297
 1298
 1299
 1300
 1301
 1302
 1303
 1304
 1305
 1306
 1307
 1308
 1309
 1310
 1311
 1312
 1313
 1314
 1315
 1316
 1317
 1318
 1319
 1320
 1321
 1322
 1323
 1324
 1325
 1326
 1327
 1328
 1329
 1330
 1331
 1332
 1333
 1334
 1335
 1336
 1337
 1338
 1339
 1340
 1341
 1342
 1343
 1344
 1345
 1346
 1347
 1348
 1349
 1350
 1351
 1352
 1353
 1354
 1355
 1356
 1357
 1358
 1359
 1360
 1361
 1362
 1363
 1364
 1365
 1366
 1367
 1368
 1369
 1370
 1371
 1372
 1373
 1374
 1375
 1376
 1377
 1378
 1379
 1380
 1381
 1382
 1383
 1384
 1385
 1386
 1387
 1388
 1389
 1390
 1391
 1392
 1393
 1394
 1395
 1396
 1397
 1398
 1399
 1400
 1401
 1402
 1403
 1404
 1405
 1406
 1407
 1408
 1409
 1410
 1411
 1412
 1413
 1414
 1415
 1416
 1417
 1418
 1419
 1420
 1421
 1422
 1423
 1424
 1425
 1426
 1427
 1428
 1429
 1430
 1431
 1432
 1433
 1434
 1435
 1436
 1437
 1438
 1439
 1440
 1441
 1442
 1443
 1444
 1445
 1446
 1447
 1448
 1449
 1450
 1451
 1452
 1453
 1454
 1455
 1456
 1457
 1458
 1459
 1460
 1461
 1462
 1463
 1464
 1465
 1466
 1467
 1468
 1469
 1470
 1471
 1472
 1473
 1474
 1475
 1476
 1477
 1478
 1479
 1480
 1481
 1482
 1483
 1484
 1485
 1486
 1487
 1488
 1489
 1490
 1491
 1492
 1493
 1494
 1495
 1496
 1497
 1498
 1499
 1500
 1501
 1502
 1503
 1504
 1505
 1506
 1507
 1

VI. Confortati sunt, qui persecuti sunt me inimici mei iniuste; quæ non rapui tunc exolvebam.

Explicat nunc Propheta in persona Christi, proprijs verbis, quæ hæcenus dixit per similitudines. Comparauit. n. persecutores Christi multitudini aquarum, & violentiæ répestatis: nunc aperte dicit inimicos suos fuisse propè innumerabiles, & violentissimos; & absque vlla iusta causa, imò sine vlla causa ita sœuissse. Multiplicati sunt super capillos capitis, id est, plures fuerunt, quam sit numerus capillorum capitis, qui numerari vix possunt. Qui oderunt me gratis, id est, plurimi fuerunt, qui oderunt me absque vlla causa. Quod plurimi fuerint, perspicuum est ex Evangelio: nam præter concilium Seniorum, Pontificum, Scribarum, & Phariseorum accessit turba populi maxima, quæ clamauit, crucifige eum Accesserunt integre cohortes militum paganorum; spreuit enim eum Herodes cum exercitu suo. Et in domo Pilati conuenit vniuersa cohors militaris ad Christum illudendum. Accessit etiam Iudas super numerum odientium Christum. Quod autem gratis eum oderint, dubitari non potest, cum pertransierit bene faciendo, & sanando omnes oppressos à Diabolo, & neminem vnquam læserit. Causa verò, quam allegabant in concilio, Si dimittimus eum sic, venient Romani, & tollent locum nostrum, & gentem: euentus docuit, quàm fuerit vana, & ex falsa prudentia prodierit: nam non dimiserunt eum, imò impediuerunt, quantū potuerunt Evangelij progressum, & tamen venerunt Romani, & tulerunt locum eorum, & gentem: quod non accidisset, si Christū, qui pacis, & mansuetudinis, & charitatis doctor, & auctor erat, fideliter recepissent. Addit Propheta de violentia inimicorum Christi, Cōfortati sunt, qui persecuti sunt me inimici mei iniuste, id est, iniusti persecutores mei roborati sunt, fecerunt sibi animum, præ-

ualuerunt: & ideo iniusti fuerunt, quia coegerunt vt soluerem, quæ non rapui, id est, pœnam darem sine merito culpæ. Omnis iniquus, raptor dici potest, quia rapit gloriam Dei, & ideo cū punitur, soluit quod rapuit: sed Christus nihil rapuit, quia nunquam peccauit: & tamen pœnas grauissimas dedit. Agnouit id latro pendēs in cruce, cū ait, Nos quidem iuste (crucis vedilicet supplicium patimur (nam digna factis recipimus, hic autem nihil mali gessit, Luc. 23.

Deus tu scis insipientiam meam. VII.
& delicta mea à te non sunt abscondita.

Quia dixerat, iniuste se pati, & solvere quæ non rapuit: reddit nunc rationem, cur voluerit pati, cū facile posset ab iniusta persecutione se liberare. causam autem esse dicit insipientiam suam, & delicta sua, quæ Deo notissima sed mundo occultissima erant. Insipientiam suam vocat, insipientiam Adami, quam in se suscepit, & delicta sua vocat delicta eiusdem Adami, & cæterorum hominum, quæ portauit, non commisit. Deus, inquit, tu bene nosti, quæ sit insipientia mea, & quæ delicta mea, id est, tu scis me pati propter insipientiam primi hominis, qui seductori credidit, similem Deo se futurum si ligno vetito vesceretur: & propter inobedientiam eiusdem, quæ insipientiam illam consecuta est. Addit sanctus Augustinus, insipientiam Christi dici posse eam, quæ apud homines insipientia visa est, cū tamen sapientia esset maxima, videlicet quòd cum posset vnico verbo à morte se liberare; voluit tamen pati acerbissima tormenta, & mortem ipsam crucis, vt seruulos, & ipsos inimicos à tormentis, & morte redimeret. Hæc stultitia visa est hominibus, sed Deus nouit, hoc genus stultitiæ sapientius esse omni humana sapientia. Quomodo stultitia videri potest ignorantibus artem agriculturæ, cum grana optima proijciuntur in campos

pos, & amitti irreparabiliter videntur sed cum eadem grana multiplicata colliguntur in messe, tunc apparet, non stultitiam, sed sapientiam fuisse projicere eo modo grana in sulcos terræ.

VIII. Non erubescant in me, qui expectant te Domine, Domine virtutum.

IX. Non confundantur super me, qui quærent te Deus Israel.

X. Quoniam propter te sustinui opprobrium operuit confusio faciem meam.

Sollicitus pro membris suis, orat, ut hæc ipsius passio, non sit scandalum fidelibus suis, aut certè non desperent: nam ipse dixit, Beatus qui non fuerit scandalizatus in me, Matth. 11. & ad Discipulos passione iam imminente, Omnes vos scandalum patiemini in nocte ista, Matth. 26. Ideo nunc ait, Non erubescant in me, qui expectant te Domine, id est, non erubescant propter me, qui sperant in te, quasi ego derelictus à te sim, & spes mea vana fuerit: ne dicant, Quis audebit expectare Dominum, id est, sperare in Domino, si filium suum Dominus ita negligit, ita deserit? Ac deinde repetit, & declarat, addens, Non confundantur super me, qui quærent te Deus Israel: nam qui confunduntur, erubescunt, & qui sperant, querunt: quod ergo dixerat, Non erubescant in me, declarat per illa verba, Non confundantur super me, id est, mei causa. Et quod dixerat, qui expectant te, explicat per illa, Qui quærent te, id est, qui sperantes in te quærent auxilium tuum: & ad id quod dixerat, Domine virtutum, addit, Deus Israel, ut ostendat, meritò homines confidere in Deo, quia Dominus est virtutum, id est, exercituum, ac per hoc potentissimus: & simul est Deus Israel, id est, amator, & protector populi sui, ac per hoc benignus, & qui non solum potest, sed etiam vult, & solet defendere suos. Reddit postremo causam, cur id iuste petat,

Quoniam, inquit, propter te sustinui opprobrium, id est, hæc iuste peto, quia ignominiam, quam passus sum, non propter culpas meas, sed propter honorem tuum passus sum. Propter, id est, tuam, operuit confusio faciem meam, id est, propter gloriam tuam, ego sustinui contumelias, flagella, irrisiones, sputa in faciem, & alia id genus, quæ verecundia, ac rubore vultum meum impleverunt.

Extraneus factus sum fratri- XI.
bus meis, & peregrinus filijs matris meæ

Quoniam zelus domus tuæ XII.
comedit me, & opprobria exprobrantium tibi, ceciderunt super me.

Explicat Propheta in persona Christi occasionem persecutionis Iudæorum. Occasio enim fuit, quia Dominus reprehendebat mala opera eorum: sic enim ipse ait Ioann. 7. Non potest Mundus odisse vos, me autem odit, quia ego testimonium perhibeo de illo, quod opera eius mala sunt. Et in libro Sapient. capit. 2. dictum est, Circumveniamus iustum, quoniam inutilis est nobis, & contrarius operibus nostris, & improperat nobis peccata legis, & diffamat in nos peccata disciplinæ nostræ, &c. Dicit igitur, Extraneus factus sum fratribus meis, id est, tanquam extraneum me reputaverunt fratres mei, Iudæi: & peregrinus filijs matris meæ, id est, & tanquam hospes, vel alienigena existimatus sum a filijs matris meæ synagogæ. Et hoc est quod initio Evangelij scripsit Sanctus Ioannes, In propria venit, & sui eum non receperunt: nam etiam si dixerant Ioan. 7. Hunc scimus vnde sit: & Dominus eis, Et me scitis, & vnde sim scitis: tamen Ioannis 9. dicunt, Scimus quia Moyse locutus est Deus hunc autem nescimus vnde sit, id est, non novimus eum, extraneus est nobis. Reddit autem rationem, cur tanquam

extraneum illum habuerint, cūm addit, Quoniam zelus domus tuæ comedit me. Zelus enim domus Dei tum corporalis, id est, templi, quod prophabāt Iudæi negociacionibus, tum spiritalis, id est, congregationis fidelium, quam vitijs varijs inquinabant, comedit, id est, consumebar, vrebat, dolore afficiebat ipsum: ac propterea ipse zelo illo permotus grauissimè Iudæos arguebat, vt perspicuum est ex cap. 23. Matth. & cap. 11. Luc. & cap. 8. Ioan. & sicut ipse iustè eos arguebat, vt amē daret: sic vicissim illi eum blasphemabant, eique conuiciabantur, dicentes, Dæmonium habes, Samaritanus es; & In Beelzebub Principe dæmoniorum eijcit dæmonia; & Scimus quia hic homo peccator est: & ideò subiungit in Psalmo, Opprobria exprobrantium tibi ceciderunt super me. Dicit autem opprobria exprobrantium tibi; quia iniuriæ Filij pertinent ad Patrem, præsertim cūm in diuinis, Pater, & Filius vnum sint in essentia: & quamuis communes esset omnes iniuriæ Patri, & Filio; tamen ex præcipuè pertinebant ad Patrem, quæ ad miracula pertinebant, quæ sunt opera diuina, de quibus ipse dicebat, Opera quæ dedit mihi Pater, vt faciam, testimonium perhibent de me, Ioan. 5. & Pater in me manens ipse facit opera, Ioan. 14. Illa ergo calumnia, In Beelzebub Principe dæmoniorum eijcit dæmonia, ppriissimè ad Patrem pertinebat, cūm opera Dei, quæ Filius faciebat in nomine Patris sui, & quæ Pater per Filium operabatur, ipsi tribuerent Diabolo. Ita ergo opprobria exprobrantium Patri, cadebant super Filium, tum quia intentio Iudæorum erat Filium calumniari, non Patrem: tum quia ipse Filius libenter super se accipiebat iniurias, quæ ad Patrem pertinebant; & in hoc sensu allegatur hic versiculus ab Apostolo ad Rom. 15.

XIII. Et operui in ieiunio animam meam, & factum est in opprobrium mihi.

Et posui vestimentum meum **XIV.**
cilicium & factus sum illis in parabola m.

Prior versiculus obscurissimus est, tam quo ad verba, quam quo ad sententiam. Et obscurior etiam esse videtur iuxta verba hebraica, vbi legimus, Et fleui in ieiunio animam meam: neque satisfaciunt, qui contendunt lectionem puram esse in quodā codice Vaticano, vbi legitur, Et incuruui in ieiunio animam meam: & verba hebraica esse immutata, & pro, euche, legendum esse, echpe. Isti, inquam, non satisfaciunt, tum quia vulgata editio habet, & operui, tum quia omnes tractatores græci, & latini legunt, & operui. Neque vox hebraica echpe, significat incuruari, vt ipsi volunt. non enim,

אכפה

אכפה

כפה

כפה

chapha, sed, chaphaph, significat incuruare. Igitur his omissis, primo anima ponitur pro toto homine, & operui animam meam, significat, operui me id est, operui caput meum ieiunans. Operire autem caput ieiunando, est cum luctu, & mœrore in signum humilitatis, & pœnitentiæ ieiunare. vnde dicitur in alio Psalmo, Humiliabam in ieiunio animam meam. Quod autem lugentes, & mœrentes solerent operire caput, perspicuum est ex multis locis Scripturæ sacræ, lib. 2. Reg. cap. 15. Porro Dauid ascendebat clium oliuarum, scandens, & flens, nudis pedibus, & operto capite. Et eodem lib. ca. 19. Porro Rex operuit caput suum, & clamabat voce magna, Fili mi Absalon, Absalon fili mi. Esther. 6. Amant festinauit in domum suam lugens, & operto capite. Et de ritu ieiunandi Isaïæ 58. Nunquid hoc est ieiunium quod elegi, per diem affligere hominē animam suam? nunquid contorquere quasi circulum caput suum, & sacco, & cinerem sternere? vbi contorquere caput quasi circulū, est, caput cooperire vndique, & tegmen arcū constringere. Atque hinc conciliari potest lectio hebraica cum græca, & latina. Quod enim habetur in hebraico, Et fleui in ieiunio

ieiunio animam meam: exstimauerunt Septuaginta Interpretes, intelligendū esse non proprie de fletu, sed de signo, & ritu fletus, & doloris, & ideo vertērunt, operui in ieiunio animam meam. Neque est nouū quod fletus accipiatur pro signo fletus: nam in Scriptura passim legimus, defletos fuisse mortuos multis dieb. quod significat, signa mōroris multis diebus portata. Et quod legimus in Genesi cap. vltimo, qđ Aegyptus fleuerit Iacobi Patriarchæ mortē septuaginta diebus, sine dubio de signis luctus intelligitur, vt notat sēctus Hieronymus. Iam quod attinet ad sententiam, non legimus Christum ieiunasse operto capite, neque sacco induisse; multo minus ea causa fuisse derisum: sed contra legimus, dictum de eo, Ecce homo vorax, & potator vini, & discipulos eius reprehensos, quod non ieiunarent, vt discipuli S. Ioannes, & Pharisæorum ieiunabant. Ieiunauit quidem Dominus quadraginta diebus in deserto, sed hoc fuit occultum ieiunium, vt non potuerit inde opprobrium pati. Ieiunauit quoque sēpissime totos dies occupatus in prædicatione, quemadmodū vigilabat sēpē totas noctes orationi vacans, sed non inde opprobriū illi accessit. Denique ieiunauit in passione sua à vesp̄a feriæ quintæ, vsque ad horam nonam feriæ sextæ, & ob defatigationem, & flagella sine dubio esuriuit, & sitiuit: nec defuit ritus operiendi caput: nam spino galero coopertus ieiunauit, nec sine opprobrio, cū in fame sua felle cibus, & in siti aceto potatus fuerit: tamen de cilitio, siue sacco nihil in Euangelio legimus. Quare cum sancto Augustino duo isti verticuli exponendi esse videntur spiritualiter vt per ieiunium cum fletu, & mōrore, intelligamus esuriem, & sitim ardentissimam salutis animarum, pro quibus agebatur, & gemebat: per cilicium verò intelligatur caro mortalis, & passibilis, qua Verbum indutum mundo apparuit, vt humilitate sua mortales adduceret ad contemptum rerum transeuntiu. & desiderium æternarum: & ob ista opprobrium factus est, & fuit Iudæis in

parabolam, id est, in irrisionem, inquit S. Augustinus. Parabola enim est similitudo, quæ potest esse in bono, & in malo, sed hoc loco intelligitur in malo, quomodo Sap. 5. dicuntur sancti fuisse in similitudinem improprij. Fuisse autem Christum irrisum in terris, manifestum est: nam Marci 5. cū diceret, Nō est mortua puella, sed dormit; irridebant eum. Et Luc. 16. cū loqueretur de eleemosynis largē faciendis, audiebant Pharisei auari, & deridebant eū. In passione autem irrisus fuit à militib. ab Herode, à Principibus Sacerdotum, ab alijs.

Aduersum me loquebantur, **XV.**
qui sedebant in porta, & in me psallebant, qui bibebant vinum.

Hæc est quasi appendix ad ea quæ dicta sunt, quasi dicat, Accidit præterea, quod aduersum me loquebantur, qui sedebant in porta, id est Principes, ac Iudices in concilijs suis de intentu nro consultabant, & falsa testimonia querebant, ac me denique ad mortem condēnabāt. Iudicia enim in portis ciuitatum apud hebræos exercebantur; vnde est illud Prouerb. 31. Nobilis in portis vir eius cum sederit cum senatoribus terræ. Et in me psallebant qui bibebant vinum, id est, non solum publicē in concilijs, sed etiam priuatim in domibus tempore conuiuiorum inter pocula de me garriebant, & cantabant laudantes & irridentes.

Ego verò orationem meam ad te Domine tempus beneplaciti Deus. **XVI.**

Exposuit hætenus Propheta magnitudinem passionis dominicæ; nūc exponit orationem Christi ad Patrem pro liberatione à tantis malis, de qua scribit Apostolus ad Hebr. 5. Qui in diebus carnis suæ preces, supplicationesq; ad eū

qui posset illum saluum facere à morte cum clamore valido, & lacrymis offerens exauditus est pro sua reuerentia. Ex quo intelligimus, orationem Christi absolutam non fuisse, vt nō pateretur, aut non moreretur, sed vt in passione, vel morte non detineretur, in quo exauditus fuit; nam oratio illa fusa est in cruce, & mox emisso spiritu liberatus est à passione, & post triduum resurgens gloriosus liberatus est omnino à morte, & omni tribulatione. Ego verò, inquit, orationem ad te Domine, id est, illi mihi insultabāt, & opprobria in me iaciebant; ego verò orationem pro illis, & pro me tibi Deo Patri cum lacrymis offerebam dicens, Tempus beneplaciti Deus, id est, iam aduenit tempus beneplaciti, tempus à te definitum, vt cōplaceat tibi me ab his cruciatibus liberare, & Mundum hoc tanto oblato sacrificio reconciliare. hoc idem legimus Ioan. 17. Pater venit hora, clarifica Filium tuum, & Ioan. 19. Consummatum est.

XVII. In multitudine misericordiarum tua exaudi me, in veritate salutis tue.

Pergit in oratione, ac petit, vt quandoquidem iam venit tempus beneplaciti, exaudiat orationem eius in multitudine misericordiarum, & in veritate salutis, id est, propter multitudinem misericordiarum, ex qua motus est ad promittendam reconciliationem per passionem Filij sui, & propter veritatem, id est, veracitatem, & fidelitatem salutis, quia Deus, non minus pius, & misericors est in promittenda salute, quàm fidelis, & iustus in præstanda salute, quam promisit.

XVIII. Eripe me de luto, vt non infigar; libera me ab ijs qui oderunt me, & de profundis aquarum.

XIX. Non me demergat tempestas aquarum, neque absorbeat me profundum: neque vrgeat super me puteus os suum.

Petit liberationem sub eadem metaphora aquarum, & luti, & tempestatis, de qua dixerat in primis tribus versiculis. Eripe me de luto, vt non infigar, id est, vt non tam altè infigar, vt non emergam. dixerat enim, Infixus sum in limo profundis; nunc petit, non detineri in eo luto. Libera me ab ijs, qui oderunt me, id est, ab iniquis persecutoribus, & de profundis aquarum, id est, de magnis tribulationibus, in quas illi me coniecerunt. Nō me demergat tempestas aquarum. antea dixerat, tempestas demersit me; ideò nunc petit, non demergi, id est, non detineri in illa immersione: quod declarat, dicens, Non ita me absorbeat profundum, vt nunquam emergam. Et non vrgeat super me puteus os suum, id est, non claudat puteus in quem cecidi os suum: nam dum patet os putei, spes est euadendi, sed clauso atque obturato ore putei, nihil nisi desperatio superest. Verbum hebraicum, atar, propriè significat, claudere, & sic legit sanctus Augustinus, Non coarctet puteus os suum; & exponit, non claudat. Sanctus Hilarius legit, Non contineat, S. Hieronymus, Non coronet. Quare nostra lectio, quæ habet, Non vrgeat, exponenda est, non comprimat os suum, id est, non claudat. Quomodo etiam exponunt græcam vocem *σφικτιν* Theodoretus, & Euthymius, id est, non concludat. In summa petit celerem resurrectionem à mortuis, & liberationem ab omni malo, primum sibi, deinde mèbris suis.

Exaudi me Domine, quoniam benigna est misericordia tua secundum multitudinem miserationum tuarum respice in me. **XX.**

Et ne auertas faciem tuam à puero tuo, quoniam tribulor, velociter exaudi me. **XXI.**

Intende animam meam, & libera eam, propter inimicos meos eripe me. **XXII.**

Mul-

Multiplicat Propheta verba orationis in persona Christi patientis, ut ostendat magnitudinem passionis. Exaudi me Domine, quoniam benigna est misericordia tua: proponit tres rationes, ob quas debet exaudiri, vnam ex parte misericordiae Dei: alteram ex parte magnitudinis doloris sui; tertiam ex parte inimicorum persequentium. Prima ratio est in hoc versiculo, ubi dicitur misericordia Dei benigna, & multa esse. S. Augustinus legit, Quoniam suavis est misericordia tua; & dicit, misericordiam miseris suauissimam esse, quemadmodum cibis suavis est esurientibus, non autem saturis, à quibus contemnitur. Itaque vult sensum esse, Exaudi me Domine, quoniam mihi in tribulatione constituto, suavis est misericordia tua: iam enim incipio experimento discere, quam dulciter sapiat misericordia tua. In hebraeo est vox generalis, nimirum, bona est misericordia tua: quae vox potest, & benignam, & suauem significare. Altera ratio est in sequenti versiculo, Et ne auertas faciem tuam à puero tuo, quoniam tribulor velociter exaudi me. Nunquam Deus faciem suam auertit à filio suo, sed visus est auertisse, quando eum in cruce pendentem in summis doloribus dereliquit, dicente ipso Domino, Deus meus, Deus meus, ut quid dereliquisti me? Huc igitur respicit; cum dicit, Ne auertas faciem tuam à puero tuo, id est, ne diutius in his doloribus derelinquas. Per vocem, puerum, S. Augustinus intelligit, paruulum, quia Christus humiliavit se usque ad mortem, & sic paruulum, abiectum, & humilem se fecit. Vox hebraica, seruum significat, & est hoc loco valde ad rem, ut ostendat, Christum in forma serui orasse, & dixisse, quoniam tribulor, vehementissima videlicet, & intolerabili passione, velociter exaudi me. Tertia ratio est in sequenti versiculo, Intende animam meam, & libera eam, propter inimicos meos eripe me. Quid petierit, cum ait, Velociter exaudi me, explicat persequentia verba, Intende animam meam, id est, vitam meam ad extremum perductam,

& libera eam per celerem resurrectionem Et subiungit rationem, quae tertia est, ut diximus, cum ait, Propter inimicos meos eripe me, id est, eripe me à doloribus, & à morte resuscitans me in vitam immortalem, ut inimici mei videntes se praevalere non potuisse, vel confundantur, vel conuertantur: quod factum esse legimus Act. 2. ubi audientes populi Christum resurrexisse, & videntes id manifestissimis signis, & prodigijs confirmari, multi compuncti dicere coeperunt, Quid faciemus viri fratres, & conuersi sunt ad tria millia. Alij obstinati in malo ita confusi sunt, ut diceret Act. 4. Quid faciemus hominibus istis? quoniam notum signum factum est per eos, omnibus habitantibus Hierusalem, manifestum est, & non possumus negare.

Tu scis improperium meum, **XXIII.**
& confusionem meam, & reuerentiam meam

In conspectu tuo sunt omnes, **XXIV.**
qui tribulant me. improperium expectauit cor meum, & misericordiam.

Vocat ipsum Deum in testem passionis suae, ac praecipue eius passionis, quae in ignominia consistit: nobiles enim animi pluris faciunt ignominiam, quam dolorem corporis. Tu, inquit, scis improperium meum, id est, quae impropria in me iaciant aduersarij: & confusionem meam, id est, confusionem, quae nascitur ex opprobrijs: confunditur enim apud alios, non solum, qui culpam veram agnoscit, sed etiam qui sine culpa est, sed videt credi ab alijs crimina, quae sibi falso obijciuntur. Et reuerentiam meam, id est, verecundiam, quae ex confusione oriri solet: erubescunt enim qui apud alios confunduntur, etiam si iniuste confundantur. In hebraeo est vox, celimma: quae verecundiam significat, & verecundiam hoc loco legunt Sanctus Hilarius, Sanctus Augustinus, Euthymius. & alij:

Cc 4 quare

כלמה

quare vox, reuerentia, quæ habetur in
nostra editione, non significat reueren-
tiam, quæ debebatur Christo, sed reue-
rentiam, quam ipse in se habebat, id
est, erubescitiam, & verecundiam.
In conspectu tuo sunt omnes, qui tribu-
lant me, id est, sicut non te laet affli-
ctio mea, ita non te latent, qui me affli-
gunt: à quibus nihil expectare possum,
nisi improprium, & miseriam; sicut
semper expectauit cor meum, multò
antea quàm aduenirent. Ex hebræo
Sanctus Hieronymus vertit, Oppro-
brio contritum est cor meum, & despe-
ratus. Sed facile est videre quid Septua-
ginta legerint, vt verterent, Impro-
perium expectauit cor meum, & mise-
riam: nam, sciabar, si legatur cum pun-
cto in dextro cornu, significat, contri-
tum est, vt vertit sanctus Hieronymus,
sed si legatur, fabar, cum puncto in si-
nistro, significat expectauit, & sic lege-
runt Septuaginta. Sic etiam vox he-
braica, abusa, & nomen esse potest, &
verbum; si nomen sit, vt Septuaginta
crediderunt, significat grauem afflictio-
nem, quam ipsi miseriam dixerunt: si
verbum sit, vt credidit sanctus Hiero-
nymus, significat valdè dolui, vel etià
vt ipse vertit, desperatus sum. Itaque
lectio græca, & latina non discordat ab
hebraica, si legatur, vt eam Septuagin-
ta Interpretes legerunt.

XXV. Et sustinui, qui simul contrista-
retur, & non fuit, & qui consola-
retur, & non inueni.

XXVI. Et dederunt in escam meam
fel, & in siti mea potauerunt me
aceto.

Addit ad extremum, in tantis passio-
nibus suis, non solum in se nullum habuif-
se consolatore, & compatiemem, sed
in fame fel sibi datum in escam, & in si-
ti acetum in potum. Non defuerunt,
qui contristarentur in morte Christi,
sed defuerunt, qui simul cum illo contri-

starentur, id est, ob eam causam trista-
rentur, vnde ipse tristabatur. Nam Apo-
stoli, & piæ mulieres tristabantur ob
mortem Christi temporalem; ipse ve-
rò tristabatur ob mortem spiritualem,
& spiritualem cæcitatem Iudæorum,
qui insaniebāt in Medicum, qui venerat
curare eos. Sic etiam quæ fuit conso-
lantem, & non inuenit; quia consolatio
quam quærebat erat conuersio impio-
rum. In passione autem eius multi per-
uersi sunt, pauci, aut nulli conuersi.
Nam Iatro conuersus quidem est, sed
sub finem passionis: at in ipsa passione
turbæ clamarunt, Tolle, tolle, crucifi-
ge eum; Apostoli scandalum passi, fuge-
runt; Petrus negauit, Iudas desperauit.
Quod autem dicitur de felle dato in
escam, ad literam non legitur in Scri-
ptura, quia Matth. 27. fit quidem men-
tio fellis, sed dati in potum, non in escā.
Dederunt, inquit, ei bibere vinum cum
felle mixtum: & fortasse non fuit pro-
priè fel, sed dictum est fel, quia erat po-
tio amara. Marcus enim cap. 15. hoc idē
referens dicit, Dabant ei bibere myr-
rhatum vinum. & hæc est causa fortas-
se, cur Matthæus non allegauerit scri-
pturam istam Psalmi, vt semper solet di-
ligenter notare, quando scriptura ali-
qua impletur in actionibus, & passioni-
bus Christi. Probabile igitur est, escam
istam fellis intelligendam esse spiritua-
liter, vt per escā fellis intelligatur ama-
ritudo peccatorum, quæ Christo in pas-
sione ieiunanti loco cibi ingesta est.
Quod denique dicitur de potu aceti,
non solum spiritualiter, sed etiam ad li-
teram impletum est, vt perspicuum est
ex capite 19. Ioannis, vbi notat Euange-
lista, Christum dixisse, Sitio, & accepit
se acetum sibi in spongia porrectum, vt
impleretur Scriptura. Scriptura autem
implenda hæc erat, In siti mea potaue-
runt me aceto.

Fiat mensa eorum coram ipsis **XXVII.**
in laqueum, & in retributiones,
& in scandalum,

Ob-

XXVIII. Obscurentur oculi eorum ne videant, & dorsum eorum semper incurua.

XXIX. Effunde super eos iram tuam, & furor iræ tuæ comprehendat eos.

XXX. Fiat habitatio eorum deserta, & in tabernaculis eorum non sit, qui inhabitet.

Incipit nunc Propheta per modum imprecationis, prædicere mala, quæ euentura erant Iudæis, ob ingratitudinem, & crudelitatem in Christum, qui ad eos missus fuerat Saluator, & Redemptor. Describit autem pœnas spirituales, & corporales, quas in Iudæis manifestissime cernimus. Fiat mensa eorum coram ipsis in laqueum: per mensam intelligunt Patres lectionem scripturarum, vnde pascuntur animæ fideiunt veritate diuina. Vocat autem mensam, vt opponat escæ fellis, quasi dicat, Illi mihi dederunt fel in escam; tu facies, vt eorum mensa, & esca vertatur eis in laqueum: hæc mensa coram Iudæis est, quia assidue legunt Moysen, & Prophetas, sed facta est illis in laqueum, quia perperam intelligentes capiuntur laqueo infidelitatis, & illa ipsa Scriptura, quæ fideliter considerata poterat eis salutem adferre, adfert eis perditionem, quia detinet illos in incredulitate. Eadem facta est illis in retributiones, quia quod mensa scripturarum versa sit illis in laqueum, permisit Deus, vt retribuere illis quod merebantur. Nam iustum est, vt qui lucem aspicere noluerunt, in tenebris maneant. Facta quoque est illis in scandalum, quia lapidæ angularem a Deo missum, non agnouerunt sed in eum potius impegerunt, & offenderunt, vnde factus est illis lapis offensionis, & petra scandali, Isaia 8. & Rom. 9. Obscurentur oculi eorum ne videant, & dorsum eorum semper incurua. Hæc est radix malorum supradictorum, quia permittente Deo deprauatus est intellectus, & affectus eorum. Obscurati sunt oculi eorum interiores, imò velamen est

super cor eorum, teste Paulo 2. Cor. 3. imò excæcati sunt, vt dicitur Isaia 6. Matth. 13. Ioan. 12. & Rom. 11. Deprauatus quoque est eorum affectus, vt nihil appetant, nisi terrena, quod significat illud, Dorsum eorum semper incurua, id est, te permittente, ac per hoc puniente eorum ingratitudinem, semper curui incedent, vt nihil nisi terram aspiciant. Vt autem intelligamus hanc eorum cecitatem, & prauitatem de ira Dei descendere, subiungit Propheta, Effunde iram tuam super eos, id est, effundes super eos iram tuam: quod Apostolus confirmat. 1. Th. 2. Qui Dominum occiderunt Iesum, & Prophetas, & nos persecuti sunt, & Deo non placent, &c. & paulo post, Peruenit. n. ira Dei super illos vsque in finem. Ex hac ira Dei processit spiritualis plaga primum, deinde etiam temporalis, qua expulsi de terra promissionis toto orbe exules, & profugi vagantur. quod subiungit Propheta, dicens, Fiat habitatio eorum deserta, & non sit qui in tabernaculis eorum inhabitet: id impletum est ad literam, cum Tito Imperatore iubente euerfa est Hierusalem, & inhabitabilis reddita: postea verò reedificata quidem est, & habitari cœpta, sed a Gentilibus, vel Christianis, vel Saracenis, non autem a Iudæis. Vnde quod ad Iudæos attinet, adhuc deserta est, quia ibi non permittuntur habitare, nisi pauci admodum. prædixit hoc etiam Dominus Matth. 23. Ecce relinquetur vobis domus vestra deserta.

Quoniam quæ tu percussisti, p. **XXXI.** secuti sunt, & super dolorem vulnerum meorum addiderunt.

Appone iniquitatem super iniquitatem eorum, & non intrent in iustitiam tuam. **XXII.**

Deleantur de libro viuentium, **XXIII.** & cum iustis non scribantur.

Quemadmodum paulo ante propter escam fellis Christo exhibitam, Iudæi puniti sunt, vt mensa eorum fieret illis in laqueum: ita nunc dicit Propheta, **Iudæos**

Iudæos sic puniendos, vt apponantur peccata ad peccata eorum, quemadmodum ipsi addiderunt Christo pœnas ad pœnas, & dolores ad dolores. Sed explicandum est quomodo sit intelligendum, Iudæos persecutos esse quem Deus percussit, & addidisse dolores super dolores vulnerum Deo percutiente acceptorum: Deus enim non videtur percussisse Christum, nisi permittendo, vt a Iudæis percuteretur: proinde videntur eadem omnino vulnera fuisse, quæ Christus a Deo, & a Iudæis accepit. Sciendum igitur est, quandam percussione, & quandam vulnera a solo Deo inflicta fuisse Christo sine vlla cooperatione Iudæorum: aliam fuisse percussione, & alia vulnera a Iudæis propriè Christo inflicta, Deo permittente, & vt illa Christus pateretur, decernente, & volente. Percussio, & vulnera a Deo inflicta, sine cooperatione Iudæorum, fuit assumptio carnis passibilis, & mortalis, vnde secuta est fames, sitis, fatigatio, frigoris, & æstus perperessio, & alia permulta incommoda. Porro incarnatio, vnde ista secuta sunt, facta est opera Spiritus sancti, ac per hoc Deus solus Christum percussit, dum sine culpa eius propria, tā multas peccati originalis pœna, illum subire voluit. Ad has pœnas, siue percussiones addiderunt Iudæi persecutiones, & vulnera. Nam etiam si Deus definito cō filio voluerit Christum illa pati, & bene vsus sit mala voluntate Iudæorum: tamen verè, & propriè Iudæi ex propria malignitate, & inuidia Christum persecuti sunt, & vulneribus, ac morte affecerunt. Ait igitur Propheta, Quoniā quem tu percussisti, mittens in Mundum in similitudinem carnis peccati, fami, & siti, frigori, & æstui, alijsque innumerabilibus incommodis obnoxium, persecuti sunt calumnijs, conuicijs, falsis testimonijs. Et super dolorem vulnerum meorum addiderunt, id est, super dolorem, quem capiebam ex consideratione innumerabilium peccatorum, quæ quasi vulnera mea essent, curanda & purganda susceperam, addiderunt dolorem flagellorum, spinarum, clauorum: & cum iam mortuus essem, addiderunt vulnus late

ris mei: & cum ex sepulchro surrexissem & in me quid amplius facerent, non haberent, addiderunt persequi, & vulnera re me in membris meis, discipulos meos lapidando, & occidendo. In hebræo habetur, Et super dolorem vulnerum tuorum narrauerunt, vel numerauerunt. Sed idem est sensus: nam vulnera illa dici possunt a Christo vulnera mea, & vulnera tua; mea, quia mihi inflicta, tua, quia a te inflicta. Illud autem narrauerunt, vel numerauerunt, a Septuaginta acceptum est, in significationem numerationis, non narrationis: & ideò verterunt, addiderunt: quia idem est addere ad numerum percussionum, seu vulnerum; & numerare super vulnera, & percussiones. non enim quis potest numerare super vulnera inflicta, nisi addendo noua vulnera. Appone iniquitatem super iniquitatem eorum. Quoniam, inquit, illi addiderunt vulnera super vulnera, ideò tu iustus Iudex, appone iniquitatem super iniquitatem, id est, iusto iudicio tuo nō eos liberares a prima iniquitate, sed sine vt addant iniquitatem ad iniquitatem, sine vt impleant mensuram Patrum suorum vt veniat super illos omnis sanguis iustus. Dicitur enim Deus facere quando permittit fieri id quod sine eius permissione non fieret, & hoc non casu, sed ex certo decreto ad punienda peccata eorum, qui merentur sic deferri, & excæcari. Nulla enim est pœna grauior, quàm cum peccatum est pœna peccati. De qua re vide S. Augustinum lib. 4. in Iulianū. Et non intrent in iustitiam tuam. Hæc est explicatio superiorum verborum: illi enim, qui non intrant in iustitiam Dei, id est, qui non admittuntur ad iustificationem, quā Dei gratia gratis operatur in vasis misericordiæ, illi de peccato in peccatum ruunt, & peccata peccatis apponunt. Deleantur de libro viuientium. Aliqui hæc exponunt de libro vitæ temporalis, vt deleri de libro viuientium, nihil sit aliud, nisi interfici. Sed huic expositioni repugnant verba sequentia, Et cum iustis non scribantur: nam ex vsu Psalmorum vna pars versiculi alteram explicat: proinde idē esse videtur, deleri de libro viuientium, & non scribi in libro

bro iustorum, ut per deleri, vel non scribi, intelligatur non computari: & per viuentes intelligantur iusti, qui soli verè viuunt, cum iniusti mortui sint in peccatis, & delictis suis. S. Augustinus intelligit hæc omnia de libro æternæ prædestinationis, de quo deleri dicuntur, qui tamen intelligunt, se in eo scriptos non fuisse. Sed quoniam liber ille vitæ ante merita præuisa scriptus fuit, ut ipse in primis S. August. affirmat; non video, quo modo in pœna istorum nunc dicatur, Deleatur de libro viuentium, & cum iustis non scribantur. Probabilior videtur eorum sententia, qui per librum viuentium, & iustorum, intelligunt librum populi Dei, in quo scripti sunt veri cultores Dei, quibus solis vera iustificatio contingit, & qui sunt filij, & hæredes. Verè. n. Iudæi, qui olim erant populus Dei, nunc deleti de libro viuentium, & istorum non sunt amplius populus Dei, neque partem habent in hereditate filiorum Dei: & contra, gentiles qui non erant populus Dei, per fidem in Christum coeperunt esse populus Dei & partem habere in Regno Dei. Hoc prædixit Ezechiel cap. 13. In concilio populi mei non erunt, & in scriptura domus Israel non scribentur. Et Daniel c. 9. Non erit eius populus, qui eum negaturus est. Et Osæ 1. Non populus meus, & ego non ero vesler Deus. Et Dominus in Euangelio sæpius hoc prædixit Iudæis, fore ut auferretur ab eis Regnum Dei; & filij Regni eijcerentur foras; & in locum eorum venirent gentes ab oriente, & occidentem, & recumberent cum Abraham, Isaac, & Iacob in Regno cælorum. Hanc expositionem attingit breuiter S. Hilarius; sed fusius S. Hieronymus, qui dicit, Iudæos persecutores Christi deletos esse de libro in quo scribebantur Patriarchæ, & Prophetæ, & non esse scriptos in libro eorum, qui iustificatur per fidem Christi, quorum nomina scripta sunt in cælis.

XXXIV. Ego sum pauper: & dolens: salus tua Deus suscepit me.

Nunc tandem in fine Psalmi prædicit

Propheta Christi gloriam, & Ecclesiæ ædificationem. Loquitur autem in persona ipsius Christi, ut etiam in superioribus fecit. Ego, inquit Dominus, sum pauper, & dolens, id est, in cruce fui pauper, & dolens, nudus vestibus, cooperatus plagis. Ita nihil habuit ex hoc nostro Mundo exiens, nisi mala nostra, exemplum nobis præbens, ut sequamur vestigia eius, contemnentes cum gaudio bona Mundi, & tolerantes cum patientia mala Mundi. Salus tua Deus suscepit me, cum talis essem, egens bonis, diues malis, salus tua me resuscitans a mortuis absterfit omnia mala, repleuit omnibus bonis. Quid. n. mali hæere possit in eo, quem ipsa salus suscipit, & undique completitur? In hebræo non est verbum, sum, sed, Ego pauper, & dolens; debet autem illud verbum explicari commodatè ad sententiam, ut sensus sit, Ego pauper, & dolens eram. vel cum essem pauper, & dolens, vel, Ego sum ille pauper, & dolens, quem salus tua suscepit.

I laudabo nomen Dei cum cantico, & magnificabo eum in laude. **XXXV.**

Christus in forma hominis resuscitatus, & glorificatus a Deo Patre, gratias illi agit, & aget in æternum; ideo dicit, Laudabo nomen Dei cum cantico, defunctus videlicet laboribus, & doloribus, non cessabo laudare nomen Dei, id est, potentiam Dei, cum cantico, id est, cum lætitia, & gaudio. Et magnificabo eum in laude: quod est idem alijs verbis repetitum, ad affectum iudicandum.

Et placebit Deo super vitulum nouellum, cornua producentem, & vngulas. **XXXVI.**

Sacrificium laudis in cælo exhibitum Deo multò est excellentius sacrificijs, quæ in lege præstantissima habebantur: sacrificium enim omnium præstantissimum

mum erat immolatio vituli iuuenis, incipientis cornua, & ungulas emittere. Ided dicit, Et placebit Deo canticum meum super vitulum nouellum, id est, magis quàm placeat immolatio vituli iuuenis; atque ad significandum non de hilem, ac tenerum, sed perfectum, & validum adiungit, cornua producentem, & ungulas. In hebræo est elegans allusio nominum: nam canticum vocauit, scir, vitulum vocauit, scior, quasi dicat, magis placebit scir, quàm scior, id est, canticum, quàm vitulus; siue, sacrificium laudis, quàm sacrificium pecoris.

שיר
שיר

XXXVII. Videant pauperes, & lætetur: quærite Deum, & viuet anima vestra.

Laudationi admiscet exhortationē. Videant, inquit, id est, intelligant, & considerent hæc pauperes, & lætentur in paupertate sua. Alloquitur autem pauperes, sibi similes, qui magis voluntate, quàm necessitate sunt pauperes; qui si diuitias fortè possideat, habentes eas ad dispensandas secundum voluntatē Dei, vt economi, non vt Domini: ad promerendum, non ad superbiendum; ad opera charitatis, non ad passionē desiderij: denique, qui non minori lætitia dicant, Sit nomen Domini benedictum, cū egēt quàm cum abundant. Quærite Deum, & viuet anima vestra. O vos pauperes spū, qui terrena despiciatis omnia, tanto onere leuati, erigite animum, quærite Deū, & anima vestra, quæ ex rebus caducis viuere non potest, verè viuet. Cauete (inquit Dominus Luc. 12.) ab omni auaritia, quia non in abundantia cuiusquam vita eius est ex his quæ possidet. Contra autem, de Deo dicitur, In ipso vita erat, Ioan. 1. & in Psal. 35. Apud te est fons vitæ. Et Ecclesiastici primo, Fons sapientiæ Verbum Dei in excelsis. & Prouerb. 8. Qui me inuenerit, inueniet vitam. Nam animæ rationali viuere, sapere est: tunc autem sapientissima erit anima, ac per hoc perfectissime viuet, cū primam, atque altissimam causam in seipsa sine

ullo medio cernet. Ergo quærite Deum per viam mandatorum eius incedendo, & non declinando ad dexteram, vel sinistram, & cū perueneritis, viuet anima vestra.

Quoniam exaudiuit pauperes XXXVIII. Dominus, & victos suos nō despexit.

Reddit rationem, cur bonum sit quærire Deum, vt viuamus: & ratio sumpta est ab experimento sanctorum Patrum, quos Christus descensu suo ad inferos, viuificauit. Illi enim diu quæsierunt Deum, & primi fuerunt qui eum, per Christum vitæ æternæ aditu patefacto, inuenerunt, & ex eius visione vitam æternā acceperunt. Quoniam, inquit, exaudiuit pauperes Dominus: Patriarchæ enim, & Prophetæ omnes pauperes spiritu fuerunt, & in hoc Mundo, tanquam hospites, & peregrini habitauerunt, patriam cœlestem inquirentes, vt dicit Apostolus ad Hebr. 11. Hos ergo pauperes exaudiuit Dominus; & quia exaudiuit, victos suos non despexit. Idem. n. ipsi victi erant, & quasi compediti, quoniam ex inferno ad cœlestem patriam transire nō poterant, nisi Christus inferni claustra perrumperet, vectesq. ferreos suā morte confringeret.

Laudent illum cœli, & terra, mare, & omnia reptilia in eis. XXXIX.

Ob communia beneficia ipsa rerum vniuersitas ad agendas gratias inuitatur. laudent illum (Deum videlicet) cœli, terra, & mare, & omnes qui habitant in eis. Meminit autem propriè reptiliū, quæ degunt in aquis: non autem Angelorum, qui degunt in cœlis, & hominum, qui viuunt in terris: quoniam dubium esse non poterat, an Angeli, & homines ad laudem Dei excitarentur.

Quo-

XL. Quoniam Deus saluam faciet Sion, & ædificabuntur ciuitates Iuda.

Hic iam prædicitur ædificatio Ecclesiæ, quæ passionem, & resurrectionem Christi consecuta est: vel ut alij volunt, ædificatio cælestis Hierusalem, vel utrūque simul. Quoniam Deus saluam faciet Sion, id est, Ecclesiam suam primitiuam ex Iudæis collectam, id est, cœtum illū Apostolorum, ac Discipulorum primorum saluabit ab omni periculo, & persecutione in terris, & postea saluabit illā perfectā salute in cœlis. Et ædificabuntur ciuitates Iuda, id est, propagabitur prima illa Ecclesia, dum multi lapides viui accedent, & multæ Ecclesiæ toto orbe ædificabuntur, quæ dicuntur ciuitates Iudæ, id est, confessionis; quia confessio veræ Fidei Ecclesiam ædificat, & propagat. Iuda enim confessionem significat.

XLI. Et inhabitabunt ibi, & hæreditate acquirant eam.

XLII. Et semen seruorum eius possidebit eam, & qui diligunt nomē eius habitabunt in ea.

Hic verò prædicitur firmitas, & beatitudo Ecclesiæ. Nam ciuitates Iuda, id est, ciues ciuitatum Iuda habitabunt ibi, id est, in Sion. Et hæreditate acquirant eam: omnes enim veri fideles Ecclesiarum particularium adhærent Ecclesiæ Apostolicæ, quæ est Sion, & hæreditate acquirunt eam. Ad quam hæreditatem non pertinent sectæ hæreticorum, & schismaticorum. Et isti iidem veri fideles, si permanserint in Fide, quæ per dilectionem operatur, inhabitabunt quoque Sion cælestem, & hæreditate acquirant eam, quia, si filij, & hæredes. Et semen seruorum eius possidebit eam; id est, istam Sion, siue in terris, siue in cœlis, non soli primi fideles possidebunt,

sed etiam posteri eorum. Non enim perit Ecclesia Christi, quæ fundata est supra firmam petram. Et qui diligunt nomen eius habitabunt in ea, id est, illi ex posteritate fidelium permanenter habitabunt in Ecclesia, & peruenient ad cælestem Sion, qui diligunt nomē eius. Qui enim sine charitate inueniuntur in fine, tanquam paleæ segregabuntur a frumento, & igni tradentur, ut comburantur. Salus enim æterna charitatis est præmium, dicente Apostolo Iacobo, capit. 1. Beatus vir qui suffert tentationē, quoniam cum probatus fuerit, accipiet coronam vitæ, quam repromisit Deus diligentibus se. Poterunt igitur ad tempus cum sola fide, absque charitate, peccatores cum iustis esse in Ecclesia, ut paleæ cum tritico in area, & pisces boni cum malis in rete; sed non permanebunt usque in finem, neque hæreditatem acquirant cælestem Sion, ut in æternum habitent in ea.

PSALMVS LXIX.

Titulus, & Argumentum.

In finem Psalmus David, in remembrance, quod saluum fecerit eum Dominus.



N hoc titulo apud hebræos habetur tantū, In finem David in remembrance: sed Septuaginta Interpretes addiderunt, explicandi gratia, illa verba, quod saluum fecerit eum Dominus. Quod enim quidam bonus auctor, sed modernus, scripsit, a Septuaginta Interpretibus posita fuisse in titulo aliqua verba primi versiculi, non est probabile, tñ quia in hebræo non ponitur in titulo pars vlla primi versiculi; tñ quia in primo versiculo

men-

mentio fit auxiliij, non salutis; quæ tamē expressè nominatur in titulo; tūm denique quia si vlla pars primi versiculi pertineret ad titulum, certè prima esset: at prima pars, videlicet, Deus in adiutorium meum intende, in omnibus codicibus, hebraicis, græcis, & latinis inuenitur in principio Psalmi, non in titulo. Argumentum Psalmi idem est cū argumento psalmi trigesimi noni, cuius sex vltimi versiculi sunt isdem cum sex vltimis versiculis huius Psalmi. Igitur continet hic Psalmus orationem Christi in cruce pendentis pro salute sua, id est, pro celeri resurrectione corporis sui, & pro salute populi sui, quod est etiā corpus ipsius, sed mysticum. Dicitur autem Psalmus compositus in rememorationem salutis acceptæ; quoniam David spiritu prophetico, vt præuidit orationem Christi pro salute fundendam; sic etiam præuidit salutem sine dubio securam, & in eius memoriam Psalmum Deo cecinit.

Explicatio Psalmi 69.

I. **D**eus in adiutorium meum intende: Domine ad adiuuandum me festina.

Hic versiculus in Ecclesia Catholica celeberrimus est: inde enim incipiunt officia diuina omnium horarum. Quāuis enim præcipuè cōueniat Christo in cruce pendentem, potest tamen vsurpari ab omnibus fidelibus in periculo versantibus: & quoniam semper in multis magnisque periculis versamur dum peregrinamur a Domino, & dum aduersarius noster Diabolus, tanquam leo rugiens circuit quærens quem deuoret: ideo nō solum licet, sed etiam expedit assidue hunc versiculum frequentare, ad quod faciendum hortatur monachos Io. Cassianus collatione 10. cap. 9. vbi fusillimè persequitur vtilitatem, & virtutem huius versiculi. Petitur igitur in hoc versiculo auxilium Dei magnum, & velox ad uertendum malum graue, & imminens: de priore dicit, Deus in adiutorium meum intende, id est, incumbe diligēter

in me iuuādo, vt grauitas mali requirit: de posteriore dicit, Domine ad adiuuandum me festina, id est, non solum diligēter incumbas in me iuuando, sed etiam velociter, & nulla interposita mora, quā periculum imminet. S. Hilarius, & S. Augustinus exponunt solum prima illa verba, Deus in adiutorium meum intende. Reliqua eiusdem versiculi omittūt: quæ fuit causa, cur auctor ille, de quo supra loquuti sumus, existimauerit, posteriora verba huius versiculi non fuisse apud Hilarium, & Augustinum in ipso Psalmo, sed in titulo. Sed apud Hilarium inuenitur integer titulus, & integer Psalmus descriptus, & in primo versiculo non desunt illa verba, Domine ad adiuuandum me festina. Cur autem non exposuerint hæc verba S. Hilarius, & Augustinus ratio est, quia sunt eadem, vel ferè eadem cum superioribus, præsertim si quis consulat hebræum textum, vbi vnicum est verbum, hoc modo, Deus ad me liberandum, Domine ad me adiuuandum festina.

Confundantur, & reuereantur II. qui quærent animam meam.

Hic versiculus idem est cum versiculo decimonono Psalmi trigesiminoni, & sensus est, vt per Christi resurrectionem, & fidelium liberationem de potestate Inimicorum, inimici videntes se frustra laborasse confundantur, & erubescant: quod partim iam est factum, partim complebitur in nouissimo die.

Auertantur retrorsum & erubescant, qui volunt mihi mala. II.

Idem est hic versiculus cum vigesimo versiculo Psalmi trigesiminoni, nisi quod hic dicitur, Auertantur, ibi, cōuertantur. Sed idem est sensus, repetitio videlicet eiusdem precatōnis ad rem magis explicandam, & confirmandam.

Auer-

IIII.

Auertantur statim erubescen-
tes, qui dicunt mihi, euge, eu-
ge.

Et hic versiculus idem est, quo ad sen-
sum, cum versiculo vicesimoprimo Psal-
mi trigesiminoni: vbi res eadem tertio
repetitur, vt videlicet hostes Christi, &
Ecclesiæ cito confundantur, qui nunc
exultant dicentes inter se, Euge, euge,

V. Exultent, & latentur in te om-
nes, qui quærunt te, & dicant sem-
per magnificetur Dominus, qui
diligunt salutare tuum:

Idem est hic versiculus cum versicu-
lo vicesimosecundo Psalmi trigesimi no-
ni, in quo per modum precationis præ-
dicatur victoria, & exultatio Christi, &
Ecclesiæ.

VI. Ego verò egenus, & pauper sū,
Deus adiuua me.

Hic quoque idem est cum versiculo
vicesimotertio Psalmi trigesimi noni, in
quo reuertitur Christus ad statum illū
describendum, quem habuit in cruce, cū
verè pauper, & nudus Patri dicebat, De-
us meus, vt quid dereliquisti me?


VII. Adiutor meus, & liberator
meus es tu, Domine ne mo-
reris.

Hic denique versiculus idem est cum
ultimo versiculo Psalmi trigesimi-
noni, in quo repetitur prima
petitio celeris auxiliij. Vi-
de plura in explica-
tione Psalmi
trigesimi
noni.

PSALMVS LXX.

Titulus, & Argumentum
Psalmi.

*Psalmus Dauid, filiorum Io-
nadab, & priorum
captiuorum.*



Ic Psalmus titulo caret
apud Hebræos: sed in
terpres aliquis titulū
supra scriptum addi-
dit; ad quem intelligē-
dum sciendum est, fi-
lios Ionadab fuisse ho-
mines ab obedientia celebres. Scribit. n.
Hieremias cap. 35. eos habuisse præce-
ptum parentis sui, vt vinum non bibe-
rent, & in domibus non habitarent, idq.
diligentissimè obseruasse. Sciendū præ-
terea filios Israel bis fuisse captiuos fa-
ctos a Rege Nabuchodonosor, semel tē-
pore Ioachin Regis Hierusalem, & ite-
rum tempore Sedechiæ; sed priores cap-
tiuos ad verbum Domini per Hieremiā
prædicatum, sponte se tradidisse in cap-
tiuitatem; posteriores vi coactos fuisse,
vt perspicuum est ex quarto libro Regū,
& ex ipso Hieremia. Credibile autē est
filios Ionadab fuisse ex primis qui obe-
dierunt Deo ad verbum Hieremiæ, vt se
traderent Regi Babylonix, cæteros au-
tem eorum exemplum esse secutos: Et
cōgruit ethimologia nominis: Ionadab
& cæterorum qui sponte in priorem ca-
ptiuitatem cum Rege Ioachin profecti
sunt. Vtrum autem Dauid ad hanc capti-
uitatem respexerit, an interpret; aut ip-
sa Ecclesia testamenti veteris accommo-
dauit Psalmum ad hanc captiuitatem,
quo modo Ecclesia Christiana accom-
modat Psalmos varios ad varias celebri-
tates, incertum est. Tractatores vt pluri-
mum volunt hunc Psalmum a Dauide
compositum ob persecutionem, quam
ab

ab Absalone filio in senectute sua per-
pessus est. Quod etiam confirmari po-
test ex eo, quod hic Psalmus idem habet
principium, quod Psalmus trigesimus,
& in cæteris partibus cum eodem satis
conuenit. Psalmum autem trigesimum
nos etiam cum alijs exposuimus de per-
secutione Absalonis. Neque titulus re-
pugnat: David enim sponte in exilium
profectus est, agnoscens illam esse Dei
voluntatem, ut electionem illam è Re-
gno, & fugam atque exilium patienter
ferret; & gratiam liberatoris, cum pau-
lò post in Regnum reduceretur, agno-
scret. Quod exemplum Davidis secuti
postea sunt filij Ionadab, & priores cap-
tiui, de quibus titulus loquitur. S. Augu-
stinus monet, in hoc Psalmo mirificè cõ-
mendari gratiam Dei, & sub exemplo
Davidis, omnes pios debere in hoc Psal-
mo cantare laudes gratiæ Dei, per quã
liberamur a captiuitate Diaboli, & gra-
tiam iterum, atque iterum implorare, ut
proficiamus, & perseueremus in bono,
non præsumentes de proprijs viribus,
sed de adiutorio Dei in omni tentatione
confidentes. Sic enim tutissimè ad perfe-
ctam libertatem, quæ est libertas gloriæ
& filiorum Dei perueniemus.

Explicatio Psalmi 70.

I. **I**n te Domine speraui non con-
fundar in æternum; in iustitia
tua libera me.

Memor sanctus Propheta promissio-
num Domini erga sperantes in eum, &
de suis proprijs viribus non præsumes,
ait, In te Domine, non in me, vel in alia
creatura speraui, ideò securus quòd non
confundar in æternum, ad te in præsen-
ti tribulatione confugio, ac peto, ut in
iustitia tua, id est, secundum iustitiam
tuam, qua impios punire, & innocentes
liberare soles, liberares me, & eripias de
manibus persequentium me.

II. **I**nclina ad me aurem tuam, &
salua me.

Coniungitur hic versiculus cum secũ-
da parte versiculi superioris. Id ipsum. n.
repetit ad affectum ostendendum. Inclina
aurem tuam, id est, audi vocem humi-
lem, siue de imo sonantem, & salua me
a præsentis periculo.

Esto mihi in Deum protectore III.
& in locum munitum, ut saluum
me facias.

Explicat clariùs. quid a Deo desideret
nimirum, ut Deus eum protegat instar
arcis munitissimæ, ad quam hostes sui
penetrare non possint. Nam in hebræo
pro, in Deum protectorum, habetur in
petram fortissimam; sed Interpretes ex-
plicauerunt metaphoram, & dixerunt,
in Deum protectorem, id est, in Deum
protegentem instar arcis in petra subli-
mi locatæ; quod exponitur per verba
sequentia, & in locum munitum. Verè
autem nulla est facilius via euadendi
omnes tribulationes, quàm si quis sciat
mente conscendere in Deum, & bona æ-
terna contemplari: inde enim omnia hu-
mana faciliè despiciet. Sic B. Paulus vo-
cat momentaneas, & leues tribulatio-
nes suas, quæ alioqui grauissimæ videri
poterant, quia subiungit, Non contem-
plantibus nobis quæ videntur, sed quæ
non videntur, quæ enim videntur tem-
poralia sunt, quæ non videntur æterna
sunt. 2. Cor. 4. In hebræo pro, in locum
munitum, habetur, ad ingrediendum iu-
giter iussisti, sed apparet corruptio ex
loco simili in Psalmo trigesimo: nam
pro, labo, ad ingrediendum, est in Psal-
mo trigesimo, lebeth, in domum, siue in
locum, ut Septuaginta hic, & ibi verte-
runt: pro, tamid ziuita, iugiter præcepi-
sti, est in Psalmo trigesimo, mezudoth,
quæ sunt eadem literæ, sed aliter dispo-
sitæ, & significant munitionem. Itaque
ex Psalmo trigesimo, & ex interpreta-
tione Septuaginta videtur manifestè
colligi, lectionem hebraicam hoc loco
esse mutatam.

לְבוֹא
לְבֵית
תָּמִיד
עֵינֶיךָ
מִצִּדּוֹת

Que-

**IIII. Quoniam firmamentum meū,
& refugium meum es tu.**

Esto mihi, inquit, tu Domine in Deus protectorem, & in locum munitū, quoniam tu solus es firmamentum meum, id est, domus firma, & stabilis, ut potē la pidea (ut clarius habetur in hebræo) ad quam confugere possim. Cætera enim omnia, siue respiciam ad fauores hominum, siue ad industriam meam, domus sunt luteæ, & super arenam ædificatæ, siue baculus arundineus. Quid enim sunt mortalia omnia, nisi res caducæ, & fragiles, in quibus non nisi stulti confidunt. Beati qui hæc intelligunt, beatiores qui experiuntur.

v. Deus meus eripe me de manu peccatoris, & de manu contra legem agentis, & iniqui.

Descendit magis ad particularia, ac petit liberari de manu, id est, de potestate peccatoris, contra legem agentis, & iniqui; quibus nominibus intelligit ad litteram Absalonem, Achitophelē, & ministros eorum; nam hic Psalmus conuenit omnino cum Psalmo 30. in quo omnium consensu agitur de persecutione Absalonis. S. Augustinus, per peccatorem, intelligit peccatorem in genere, quem dicit diuidi in præuaricatorem legis, quales sunt Iudæi, & Christiani, qui legem a Deo sibi datam non seruant; & iniquum non præuaricatorem, quales sunt Pagani, qui legem scriptam a Deo non acceperunt, & ideo iniqui sunt, quia malè agunt, & peccant contra rationem naturalem, sed præuaricatores legis scriptæ non sunt, quia ubi nō est lex, nec præuaricatio. Sed verba hebraica non recipiunt istam explicationem: nam vox hebræa, pro qua habemus, iniquum, significat propriè violentum raptorem; & pro qua habemus, contra legem agentis, significat iniquum simpliciter. Videtur igitur Propheta per peccatorem, intelligere hominem præ-

Bellarmin. in Psalm.

uum, siue improbum, qualis erat Absalon; per iniquum, eum, qui occultè, & ex insidijs nocet, quales sunt fraudulentus, Achitophel, & alij; per raptorem, eū qui palam, & apertè opprimit, qualis erat tunc populus armatus contra Regē suum. Spiritualiter per peccatorem intelligere possumus Diabolum, per iniquos, hæreticos, per raptores tyrānos, & persecutores. Cupit autem vir iustus liberari non solum a vexatione corporali, sed multo magis a periculo spirituali, ne fortè consentientes peccato ob persecutionum immanitatem incidat in periculum mortis æternæ.

**Quoniam tu es patientia mea VI.
Domine, Domine spes mea a iuuentute mea.**

**In te cōfirmatus sum ex utero VII.
de ventre matris meæ tu es protector meus.**

S. Augustinus per patientiam, intelligit tolerantiam dolorum, & persecutionum, ut sensus sit, Eripe me de manu peccatorum, dando mihi patientiam, ne per impatientiam consentiam peccato. Et quidem verbum græcum, & latinum hanc expositionem patiuntur; sed vox hebraica significat expectationem, & spem, ac per hoc patientia hoc loco, significat patientiam in expectando potius, quàm in tolerando dolores: iuxta illud, Per patientiam expectamus Rom. 8. & Iacobi 5. Ecce Agricola expectat preciosum fructum terræ, patienter ferens, donec accipiat temporaneū, & serotinum: patientes estote, & vos, & confirmate corda vestra, quoniam aduentus Domini appropinquabit. Ait igitur, Eripe me de manu peccatoris, quoniam tu es patientia mea, id est, quoniam a te patienter expecto auxilium. Tu es spes mea a iuuentute mea, id est, quia semper in te speraui ab eo tempore, quo te noscere cœpi; sed tamen multo ante, quam ego in te sperare inciperem, tu pro tua misericordia protector meus fuisti: nam ex utero matris meæ in

Dd 16

te confirmatus sum, id est, in te stabilitus robur accepi, cum ex me infirmissimus essem; ex utero matris meae protector meus es, id est, vix natus protectione tua frui coepi, cum adhuc te inuocare non possem. Hæc beneficia Deus omnibus hominibus conferre solet, præsertim in ea ætate, qua sibi ipse homo nullam opem adferre potest: sed pauci admodum sunt, qui hæc beneficia agnoscant, & pro ijs debitas Deo gratias agant. Ideo Propheta, qui Spiritus illustratione hæc agnoscebat, magno cum animi sensu dicit, In te firmatus sum ex utero, & ab utero matris meae protector meus es: quasi dicat, Scio Domine, & confiteor me tibi curæ fuisse ab ipso primo ortu; ideo fiduciam habeo, multo magis te mihi protectorem fore cum te inuocauero.

VIII. In te cantatio mea semper, tamquam prodigium factus sum multis, & tu adiutor fortis.

His de causis, & ob tanta beneficia, in te erit cantatio mea semper, id est, te semper laudibus celebrabo in prosperis, & in aduersis, in hoc seculo, & in futuro. Et nunc quidem tamquam prodigium factus sum multis, id est, expulsus a Regno a proprio filio; & dum miserè fugio, qui antea gloriosè hostes fugabam, factus sum admirationi omnibus hominibus, præsertim cum a te desertus videar, quem semper colui, & in quo sperauis; sed tamen tu adiutor fortis, & confians es: & quamuis ad tempus secundum consilium sapientiarum tuarum, hostes in me præualere permiseris, tamen tempore suo mihi adiutor eris. Sanctus Augustinus spiritualiter exponens dicit, illum fieri prodigium, siue portentum multis, qui contemnit temporalia, & patienter fert iniurias, & per hoc ambulat contraria via, atque ambulent ceteri homines. Talis fuit Ioannes Baptista, talis Christus ipse: talis sanctus Petrus, sanctus Paulus, Apostoli ceteri: tales Martyres omnes, & plerique sancti Confessores, sanctus Antonius, sanctus Hila-

rian, sanctus Franciscus, & alij, qui a sapientibus Mundi stulti habiti sunt: sed verè dicere poterant, etiam si prodigium factus sim multis, tamen tu adiutor meus fortissimus es, quo duce viam angustam perambulabo, & Regno cælorum vim inferam, & tunc apparebit, stultus an sapiens fuerim.

Repleatur os meum laude, vt IX. cantem gloriam tuam tota die magnitudinem tuam.

Ergo, inquit, quicquid homines de me sentiant, & dicant, ego opto, vt os meum repleatur laude tua, vt nihil mihi aliud placeat, nihil me delectet, nisi te diligere, & laudare gloriam tuam, & tota die, id est, omni tempore decantare magnitudinem tuam. Porro illi soli, & omnes similes sunt huic sancto Regi, & Prophetæ, qui verè cogitant, & sentiunt, ac intima consideratione penetrant, & persuadentur, nihil esse magni, nihil admirandum, præter Deum.

Ne proijcias me in tempore senectutis: cum defecerit virtus mea, ne derelinquas me.

Cum David persecutionem Absalonis pateretur, senex erat: ideo memor victoriarum, quas in iuuentute, & in ipsa pueritia obtinuerat, dicit, Ne proijcias me in tempore senectutis; id est, ne deferas in hoc ultimo tempore, quem adhuc semper iuuiisti. Cum defecerit iam virtus mea, robur, ac vires meæ debilitatæ sint, ne derelinquas me, qui auxilio tuo magis egeo, quam aliàs vnquam eguerim. Possunt hæc omnia spiritualiter accommodari homini, qui a seruire charitatis, quo aliquando flagrauit, tepescere incipit, & tamen cupit in eodem studio perfectionis perseverare.

Quia dixerunt inimici mei mihi XI. hi, & qui custodiebant animam meam consilium fecerunt in vnum.

Dicen-

XII. Dicentes, Deus dereliquit eū, persequimini, & comprehendite eum quia non est, qui eripiat.

Hæc ad litteram Daudi conueniunt, aduersus quem populus Absalone ducce, & Achitophel consiliario rebellauit, quoniam vidit iam senuisse, & debilem effectum, atque a Deo destitutum esse credidit. Quia dixerunt inimici mei mihi id est, de me. Et qui custodiebant animam meam, id est, qui antea custodes mei erant, vel consilio, vel armis, illi consilium fecerunt in vnum, id est, simul vniti inter se consultauerunt de perditione mea, dicentes, Deus dereliquit eum. Ad hoc refertur illud, Inimici mei dixerunt mihi, id est, dixerunt de me, Deus dereliquit eum: & hoc dixerunt consultantes simul, Persequimini, & comprehendite eum, quia non est qui eripiat. Hoc fuit consilium Achitophelis, quod non habuit effectum, quia Deus non permisit. vide lib. 2. Regum capit. 17. Illud, qui custodiebant animam meam, potest etiam significare, qui obseruabant animam meam, vt illam perderent. & hic sensus conuenit homini iusto in temptationibus posito. Dæmones enim, inimici nostri, qui perpetuò vigiliant, & obseruant occasiones nos perdendi, consilium faciunt inter se, tunc maxime, cum nos a Deo gratia destitutos existimant.

XIII. Deus ne elongeris a me, Deus meus in auxilium meum respice.

XIIII. Confundantur, & deficiant detrahentes animæ meæ, operiantur confusione, & pudore, qui quærent inala mihi.

Illi consultant aduersus Dauidem, & ille recurrit ad Deum, qui nullo negotio potest dissipare consilium eorum, vt re ipsa fecit. Deus, inquit, ne elongeris a me, vt illi iactant, te iam fecisse; immo

potius in auxilium meum respice, id est, per auxilium tuum mihi propinqua. Illud, respice, in hebræo est, festina: in græco, intende. Fieri potest, vt Septuaginta non legerint, chuscia, id est, festina, sed, chasciob, id est, confidera, siue attende; sed tamen sensus est idem, & vna lectio explicat aliam. quod enim hebraica lectio habet, festina, intelligitur per prouidentiam: Deus enim vbique est, neque propriè festinare debet, vt alicubi esse incipiat. Festinare per prouidentiam, idem est, quod attendere, & respicere. Confundantur, & deficiant detrahentes animæ meæ, id est, te in auxilium meum festinante, confundantur consiliarij Absalonis, & deficiant in consilijs suis, euanescant, infatuentur, detrahentes animæ meæ, id est, calumniâtes me. Operiantur confusione, & pudore qui quærent inala mihi. Idem alijs verbis repetit. pro verbo, detrahentes mihi; in hebræo est, aduersantes mihi, sed idem est sensus: nam qui calumniatur, sine dubio calumniando aduersantur. Sanctus Augustinus legit, Confundantur, & deficiant, qui committunt animam meam; & sensum esse vult, confundantur, qui committunt cum Deo animam meam, id est, qui faciunt, vt cum Deo contendam, quasi ille iniuste mecum agat, dum tribulationibus me affligit: sed non video vnde eam lectionem acceperit.

חושב
חשב

Ego autem semper sperabo, & **XV.** adijciam super omnem laudem tuam.

Os meum annunciabit iustitiam tuam, tota die salutare tuum. **XVI.**

Illi confundantur, & deficiant: ego autem semper sperabo, magis, ac magis in te confidam, experimento edoctus quanta sit virtus auxilij tui: & semper adijciam laudes ad laudes, pro nouis beneficijs novos hymnos tibi decantans. Os meum non cessabit annunciare iustitiam tuam, qua punis impios, & to-

D d 2 ta

radie, id est, assidue prædicabo salutare tuum, quo innocentes liberas, & saluas. Sanctus Augustinus quærit hoc loco quomodo possit fieri, ut adijciatur aliquid super omnes laudes Dei. Et respondet omnes laudes, dici perfectam laudem cui nihil desit: qualis fuisset, si Deus totum genus humanum post lapsum Adami dānare voluisset: fuisset enim ea perfecta laus iustitiae, cui perfectæ laudi nihil adijci potest, quod ad iustitiam attinet; sed tamen adijci potest nova laus misericordiae, quia placuit Deo gratis iustificare impios. Cæterum facilius dici potest, Prophetam adijcere velle laudem ad omnes laudes Dei, non ad omnes simpliciter, sed ad omnes, quas ad illud usque tempus cecinerat.

AVII. Quoniam non cognoui literaturam, introibo in potentias Domini. **D** mine memorabor iustitiarum tuarum solius.

Hic sunt duæ difficultates, prior, an illa verba, Quoniam non cognoui literaturam, debeant coniungi cum superiore versiculo, ut coniunguntur in textu hebraico, an potius cum sequentibus verbis, ut coniunguntur in græco, & latino. Sed nos existimamus distinctionem hebraicam non esse attendendam, quando discrepat a græca; quoniam distinctionem addiderunt in textu hebraico Rabini posteriores, qui non sunt illo modo comparandi cum Septuaginta Senioribus, qui aliter legerunt, & distinxerunt. Accedit, quod hoc loco sunt quædam similiter cadentia ita posita in textu hebraico, ut videatur omnino Prophetam voluisse legi hunc versiculum, ut nos cum Græcis legimus, non ut alij cum Rabinis legunt. Sic enim ait, Quoniam non cognoui sopheroth, introibo in gheburoth: ac si nos diceremus, quoniam non cognoui literas adibo potentias. Posterior quæstio est, de nomine literaturæ: nam vox hebraica saphar, unde est nomen, sopheroth, significat scribere, nar-

rare, numerare, & alia, ac per hoc nomen sopheroth, potest significare scripturas numerationes, libros, literas, siue literaturas, & similia. Aliqui igitur volunt, ut literatura accipiat pro numeratione, & hic sit sensus, Quoniam non cognoui numerationem mirabilium tuorum, id est, quoniam non possum assequi numerum, cum sint innumerabilia, introibo, id est, ingrediar ad narrandas potentias, siue fortitudinem, & vires Domini potentissimas, & robustissimas. Sed hanc expositionem probare non possum: nam, & Septuaginta Interpretes, & S. Hieronymus bene nouerant vim hebraicæ vocis, & tamen non verterunt numerationem, sed literaturam: neque deerant illis voces græcæ, vel latinæ, quibus numerationem exprimeret, si voluissent. Alij simpliciter, dicunt, Dauidem non nouisse literaturam, id est, doctrinam, quæ literis continetur, quoniam pastor ouium erat, & ex pastore illo munere assumptus fuit ad militiam, & ad Regnum, ut dicitur in Psal. 77. de post fortantes accepit eum pascere Iacob populum suum. Sed huic expositioni repugnat, quod ipse de se dicit in Psal. 118 Super omnes docentes me intellexi; & si per Psalmorum indicat eum excultum fuisse oī doctrina diuina, & humana: quamuis enim pastor ouium, & postea miles esset, non tamen ita totus intentus erat pascendis ouibus, aut bellis gerendis, quin etiam studiis, & contemperationi vacaret. Existimo igitur, Dauidem hoc loco per literaturam, intelligere humanam sapientiam, & astutiam, quali abundabat Achitophel, qui contra ipsum consilium dederat; & per verbum, cognoui, non accepisse scientiam simpliciter, sed approbationem, & usum. Quomodo dicimus, non noui te, & quomodo Apostolus dicit, se nihil scire, nisi Christum, & hunc crucifixum. Itaque sensus est, non cognoui literaturam, id est, non noui sapientiam huius mundi, non confido in humanis consiliis, non approbo astutiam, & prudentiam seculi: sed introibo in potentias Domini, id est, adhærebo penitus omnipotentiae Dei, in illa confidam, in illa quasi in arcem munitionis abscondar: Et sic memorabor iu-

ספרות

נבורות

ספר

ספרות

iustitiæ tuæ solius, id est, non recordabor humanorum consiliorum, aut viriū mearum, vel amicorum meorum, sed recordabor, & mente retinebo iustitiam tuam, qua servas promissa, qua punis impios, qua pios coronas. Sanctus Augustinus legit, non cognoui negotiationes: verisimile enim est in aliquo græco codice pro, *πραγματῆς*, fuisse, *προφητῆς*, & inde fluxisse in latinum aliquem codicem, negotiationes. Fatetur tamen idem S. Augustinus in alijs codicibus legi, literaturam: & exponit tam per negotiationem, quam per literaturam, confidentiam in operibus factis ex proprijs viribus, quasi ad iustitiam faciendam sufficiat litera legis sine gratia, aut negotiatio liberi arbitrij sine adiutorio Dei, & ided ponderat illud, Memorabor iustitiæ tuæ solius, id est, non meæ iustitiæ, sed tuæ solius, quam dare soles per gratiam tuam, cum iustificas impiū. Quæ sententia, ut est optima ad ædificationem, ita parum videtur facere ad sensum literalem.

XVIII. Deus docuisti me a iuventute mea, & usque nunc pronuntiabo mirabilia tua.

Tu, inquit, docuisti me, ut contempta literatura humana, considerem in potentia tua, docuisti autem a iuventute mea; & secundum hanc doctrinam eruditus pugnavi cum vrsō, & leone, & cum gigante Goliath, inermis adolescens, & victoriam reportavi. Et usque nunc pronuntiabo mirabilia tua, id est, & dum vivam, usque ad ultimum finem vitæ meæ pronuntiabo hæc mirabilia tua, quæ per me fecisti a iuventute mea.

XIX. Et usque in senectam, & senium Deus ne derelinquas me.

XX. Donec annunciem brachiū tuum generationi omni quæ ventura est.

Et simul rogo, ut usque ad senectam non derelinquas me, sed mihi semper adsis auxilio tuo, donec annunciem, id est, donec perficiam librum Psalmorum per quem annunciem brachium tuum, id est, fortitudinem tuam, omni posteritati. per senectam, & senium, idem significari videtur: nam in hebræo est, usque ad senectutem, & canos: cani enim indicant senectutem. Quomodo autem David dicat, se annunciatum potētiam Domini omni posteritati, sæpe diximus, quia videlicet prævidebat, Psalmos a se compositos in toto orbe usque ad consummationem seculi decantandos.

Potentiam tuam, & iustitiam **XXI.** tuā Deus usque in altissima, quæ fecisti magnalia: Deus quis similis tibi?

Explicat quid sit brachium, quod se annūciaturum dixit generationi venturæ, & ait, Potentiam tuam, & iustitiam tuam, id est, annuntiabo brachium tuum, quod est potentia tua coniuncta cum iustitia tua. Omnipotens Deus est, sed simul iustissimus est: potest quicquid vult, sed nihil iniuste vult. Hæc autem potentia cum iustitia extenditur usque in altissima magnalia, quæ Deus fecit: non enim Deus potentia sua creavit solum terram, & maria, & habitantes in eis, sed etiam creavit cælum, & cælos cælorum, & habitantes in eis millia millium Angelorum. Itaque usque ad hæc altissima magnalia extenditur brachium potentia Dei. Neque solum iustitia Dei punit homines peccatores, qui sunt pulvis, & cinis. Sed puniuit etiam altissimos Angelos, quos de cælo ob superbiam præcipitavit in abyssum: proinde brachium diuinæ iustitiæ usque ad altissima magnalia pervenit, ut exclamare liceat, Domine quis similis tibi? Neque hoc repugnat Scripturæ, quæ dicit, Fecit Deus hominem ad imaginem, & similitudinem suam, Gen. 1. Et scimus quia cum apparuerit, similes ei erimus, quia videbimus eum sicuti est. 1. Ioan. 3. Nam cum dicitur, Quis similis tibi,

Dd 3 acci-

accipitur similitudo pro æqualitate, ac si dictum esset, Quis est similis tibi in potentia, id est, æquè potens, ac tu? Quis est similis tibi in essentia, id est, qui a nullo pendeat, & a quo omnia pendeant, qualis es tu?

XXII. Quantas ostendisti mihi tribulationes multas, & malas: & conuersus uiuificasti me, & de abyssis terræ iterum reduxisti me.

XXIII. Multiplicasti magnificentiam tuam, & conuersus consolatus es me.

Consolatur Dauid præsentem calamitatem suam ex eo, quòd alias calamitates, Deo iuuante feliciter euaserit. Quantas, inquit, ostendisti mihi tribulationes, multas, & malas, id est, magnas varietate, & amaritudine, quas pertuli in persecutione Saulis. Et conuersus uiuificasti me, cum penè ad portas mortis peruenissem. Et de abyssis terræ iterum reduxisti me, id est, & de extremis malis, cum penè ad inferos descendissem liberaisti me. Multiplicasti enim magnificentiam tuam secundum multitudinem dolorum meorum, & conuersus ad misericordiam, cum me paternè castigasses, magnificè consolatus es me, cum ex misero exule Regem beatissimum feceris. Spiritualiter significat hic locus, hominem peccatorem cum Christo resurrexisse a morte peccati, & mirificè consolatum spe vitæ æternæ.

XXIIII. Nam & ego confitebor tibi in vasis Psalmsi veritatem tuam Deus, psallam tibi in cithara sanctus Israel.

XXV. Exultabunt labia mea cum cantauero tibi: & anima mea, quam redemisti.

XXVI. Sed & lingua mea tota die me

ditabitur iustitiam tuam: cum confusi, & reueriti fuerint, qui quærunt mala mihi.

In finem Psalmi prædicit ipse sibi Propheta Dauid liberationem de manu Absalonis, & pollicetur gratiarum actionem corde, & ore, & instrumentis musicis psalterio, & cithara. Nam & ego, adepta scilicet victoria, confitebor tibi veritatem tuam, id est, laudabo iustitiam tuam, siue fidelitatem tuam, in vasis psalmsi, id est, in instrumento psalmsi concinendi, quod psalterium vocatur. Ad dam etiam psallere tibi o sanctus Israel, in instrumento citharæ. Illud, sanctus Israel, est cognomen Dei, qui vocatur sanctus Israelis, quoniam sanctificari debeat a populo Israel, sanctificatione cultus, & honoris, & ipse sanctificabat populum Israel sanctificatione gratiæ. Neque solum per psalterium, & citharam tibi gratias agam, teque laudabo; sed etiam exultabunt labia mea, id est, os meum iubilabit cum cantabo tibi; & ipsa anima mea, & vita mea, quam redemisti ab interitu, exultabit tibi, id est, exultans laudabit te. Denique non semel, aut iterum lingua mea laudabit iustitiam tuam; sed tota die, omni tempore meditabitur, id est, exercebit se in decantanda iustitia tua, quando confusi erubuerint omnes inimici mei, qui quærunt nocere mihi. Hæc omnia multo verius conueniunt homini iusto, qui toto corde, & pleno ore, & per totam æternitatem laudabit Deum, cum in die Iudicii confusi


fuerint omnes persecutores eius, & ipse redemptus fuerit, & liberatus ab omni malo corporis, & animæ.

similitudinibus aduentum Christi, & propagationem Regni eius, necnon re-
stitutionem gubernationis eius.

P S A L M V S LXXI.

Titulus, & Argumentum.

In Salomonem.



Hic Psalmus videtur esse omnium postremus, quamuis non sit collocatus in postremo loco. Scriptus est enim eo tempore, quo Dauid vicinus morti tradidit Regnum Salomoni filio suo. Vnde etiam ad finem huius Psalmi leguntur hæc verba, Defecerunt laudes Dauid filij Iesse. Cur autem non sit positus hic Psalmus in fine libri, fortasse causa fuit, quia visum est ei, qui Psalmorum ordinem disposuit, vt librum concluderent Psalmi, qui solas Dei laudes continent, & incipiunt, & desinunt in vocem, Alleluia, quales hymni continuabuntur post hanc vitam in seculum seculi. Titulus est, In Salomonem, quia occasio scribendi, vel canendi hunc Psalmum fuit, vt bene precaretur Salomoni filio suo, quem in Regni solum extulerat. Et verè primi versiculi satis appositè Salomoni conueniunt. Sed mox a Spiritu sancto eleuata mens, & lingua Prophetæ transtulit sermonem ad Christum, qui per Salomonem significabatur. Fuit enim Salomon apertissima Christi figura; & tria nomina Salomonis, Salomon, id est, pacificus, Ecclesiastes, id est, concionator, & Idida, id est, dilectus Domino; magis propriè Christo conueniunt, quàm Salomoni. Ipse enim est pax nostra, qui reconciliavit mundum Deo; ipse est, Verbum incarnatum ad euangelizandum pauperibus missum; denique ipse est de quo Pater non semel dixit, Hic est Filius meus dilectus, in quo mihi bene complacui. Vide sanctum Augustinum in lib. 17. de Civitate Dei cap. 8. Describit autem Dauid in hoc Psalmo elegantissimis

Explicatio Psalmi 71.

Deus iudicium tuum Regi da, & iustitiam tuam filio Regis.

Iudicare populum tuum in iustitia, & pauperes tuos in iudicio.

Hæc est bona precatio, qua precatur Dauid Salomoni filio suo gratiam Dei ad iuste iudicandum. Vir enim sanctus, non precatur filio suo abundantiam auri, & argenti, neque propagationem imperij, vt filij huius seculi facere solent: sed precatur ei gratiam bene fungendi officio suo. Sciebat enim Regem esse propter populum, non populum propter Regem: & ideo illum esse bonum Regem, qui benè regit populum iuste iudicando. Quod ipsum & Salomon filius a Davide Patre edoctus postulauit a Deo, Reg. 3. cap. 3. Ait igitur, Deus iudicium tuum Regi da, id est, da Salomoni Regi recens instituto, iudicium tuum, id est, iudicium tale, quale est tuum, rectum, sapiens, iustum; siue gratiam iudicandi, vt tibi placet, vel secundum leges tuas. Et idem repetens addit, & iustitiam tuam filio Regis, id est, da Salomonis, qui est Rex, & filius Regis, iustitiam tuam, id est, iustitiam talem, qualis est tua, vt iuste iudicet ad imitationem tuam, qui semper iustissime iudicas. Da, inquam, Salomoni iudicium tuum, & iustitiam tuam. Iudicare populum tuum in iustitia, id est, iusto iudicio, & pauperes tuos, id est, eundem populum tuum in iudicio. Est enim hic etiam repetitio eiusdem sententiæ. Vocat autem populum Dei, pauperes Dei, quia omnes homines quantumuis diuites esse videantur, tamen pauperes Dei sunt. Egent enim auxilio eius in omnibus rebus, & quicquid habent a Deo ha-

Dd 4 bent,

bent, non tam donatum, quam commo-
datum, unde & repetere, & auferre sine
vlla iniuria Deus potest: & quamuis po-
puli gentium hæc non intelligant, ta-
men populus Dei intelligere, & profite-
ri debet. Hic mihi videtur sensus litera-
lis: tamen non repugno, quin possit etiã
hic locus intelligi de auctoritate Re-
gia, & iudiciaria, vt sensus sit, Da Deus
Regi a me electo, & filio meo iudicia-
riam potestatem, vt iustè iudicet popu-
lum tuum. Vel si de Christo hos etiam
primos versiculos exponere placeat,
sensus sit, Da Deus Pater Regi Christo
filio tuo potestatem iudicandi: iuxta il-
lud Ioann. 5. Pater non iudicat quem-
quam, sed omne iudicium dedit filio.
Porro inter iudicium, & iustitiam est
quidem differentia, quòd iustitia est vir-
tus, iudicium autem actus est iustitiæ,
tamen hoc loco accipiuntur pro eodẽ,
videlicet pro iudicandi potestate, vel
pro gratia benè iudicandi, vel pro ipso
actuali iudicio. Siquidem, vt obseruat
hoc loco S. Augustinus, & confirmat ex
alijs locis, in singulis ferè versiculis re-
petitur bis eadem sententia: neque so-
lum hoc loco, sed etiam alibi passim ac-
cipiuntur pro eodem iudicium, & iusti-
tia, vt 1. Reg. 8. Faciebat Dauid iudiciũ,
& iustitiam oĩ populo suo. & Psal. 118.
Feci iudicium, & iustitiam, non calum-
nientur mihi superbi.

III. Suscipiant montes pacem po-
pulo, & colles iustitiam.

IV. Iudicabit pauperes populi, &
saluos faciet filios pauperum, &
humiliabit calumniatorem.

Hi quoque versiculi pertinent ad ho-
nam imprecationem Regi Salomoni:
quasi dicat Dauid, Precor Deum, vt re-
gnante filio meo Salomone descendat
pax, & iustitia in oẽm terram huius Re-
gni, & ad omnes populos qui habitant
in ea: & quia terra illa maxima ex parte
in montibus, & collibus sita erat; ideo
dicit, Suscipiant montes pacem popu-

lo. i. descendat pax ad omnes montes
huius terræ promissionis, & suscipiatur
ab eis pro populo in eis habitante. &
colles huius terræ suscipiant iustitiam,
quæ est causa pacis: nam ex iniustitia
oriuntur bella, & seditiones, ex iustitia
oritur pax. Isaia 32. Erigetur opus iustitiæ
pax. Vel per montes intelligi possunt
homines Regni maiores, & nobiliores;
per colles verò viliores, & humiliores:
nam cum maiores inter se pacem habent,
& communi consilio Rempublicam ge-
runt, facilè continent humiliores intra
cancellos iustitiæ. Itaque si montes su-
sceptant pacem, colles quoque suscipient
iustitiam. Iudicabit pauperes populi,
id est, si pax & iustitia vigeat, in Regno,
ita vt pauci admodum inueniantur op-
pressores aliorum, facilè Rex ipse iudi-
cabit pauperes populi a calumnijs, &
oppressionibus paucorum potentiorũ,
qui in tanta multitudine deesse nõ pos-
sunt. Iudicabit, Rex videlicet, paupe-
res populi. & iudicio suo saluabit filios
pauperum de manu calumniatorum, &
ipso calumniatores humiliabit, depri-
met, & confundet.

Et permanebit cum Sole. & v.
ante Lunam in generatione, &
generationem.

Iam incipit Propheta trãsitum facere
a Salomone ad Christũ dicit. n. Salomo-
nem Regem permanfurum in Regno
quãdiu Sol & Luna permanebunt in co-
lo. i. quamdiu tẽpus durabit. Et qm de
přona Salomonis hæc dici non possunt,
cogit nos Spiritus Sanctus, vt hæc intel-
ligamus de Salomone, non per se, sed p
Christum, vt sensus sit, Continuabitur
Regnum Salomonis per Christũ, qui ex
progenie eius nascetur vsq; ad mundi
cõsummationẽ. Et permanebit Rex Sa-
lomon in filio suo, q verissimus erit pa-
cificus, & amabilis Domino, cum Sole,
id est, quamdiu Sol erit, & ante Lunam,
id est, & coram Luna, in generatione, &
generationem, id est, vsque ad finem
seculi. Hic multa notanda sunt: primo
illud, Et permanebit, in hebræo habe-
tur,

tur, timebunt te, sed Septuaginta vi-
 dentur legisse, viatoch, & prolongabit,
 וְיִתְּנֶנּוּ אֶתְּךָ אֲרוֹךְ vitam videlicet, quod est idem cū per-
 manebit, pro, viracha, & timebunt te.
 וְיִתְּנֶנּוּ אֶתְּךָ Solū enim vna litera mutat locum, &
 fit lectio; quam habemus; sensus tamē
 est idem: nam timebunt te, significat, ti-
 mendum Salomonem, vt Regem a po-
 pulis, ac per hoc permanfurum in Re-
 gno. Secundo illud, cum Sole, non so-
 lū significat, permanfurum Regem,
 quamdiu Sol erit, sed permanfurum in
 terris Regnum eius, dūm Sol peragit
 dies. i. vsque ad mundi consummati-
 onem: nam post mundi consummati-
 onem, non erit Regnum Christi cū Sole,
 sed supra Solem, neque Sole vllō modo
 indigebit. Tertio illud, ante Lunam,
 לִפְנֵי in hebræo est, liphne, coram Luna, siue
 ante faciem Lunæ, quod rectē cohæret
 cum illo, cum Sole: quasi dicat, perma-
 nebit in conspectu Solis, & Lunæ, quā-
 diu Sol, & Luna dies, noctesq; distin-
 guent: tamen in græco, est ἔμπροσθεν, id
 est, antequam esset Luna; & hinc colligunt
 S. Augustinus, Euthymius, & alij, hic
 significari æternitatē Christi, qui
 fuit ante Lunam. Cæterum nō desunt,
 qui illud, ἔμπροσθεν, velint significare ante,
 id est, coram, vt cōcordet græca lectio
 cū hebraica, præsertim cum non cohæ-
 reat verbum permanebit, cum illo, an-
 tequam Luna esset, sed bene cohæreat
 cū illo, corā Luna. Rectissimē enim di-
 cimus permanebit coram Luna, sed nō
 nisi absurdē, diceremus, permanebit
 antequam esset Luna. S. Hieronymus
 vertit, vltra Lunam, sed fateor me igno-
 rare quid sequutus sit: nam neque vox
 hebraica, neque græca hoc significat.
 Quarto, illud, in generatione, & gene-
 rationem, potest accipi pro æternitate,
 vt alias notauimus, sed hoc loco acci-
 piendum est propriē pro spacio tēporis
 quo durat sub Sole vicissitudo gene-
 rationum. Neque hinc sequitur, Chri-
 stum, aut eius Regnum non permanfu-
 rum, nisi vsq; ad finem generationū, &
 Mundi consummationem. Solū. n. hic
 significatur, Christum, & eius Regnum
 duraturum vsq; ad finem seculi, sed nō
 significatur, ibi finem esse habiturum:

quomodo intelligimus illud Matth. 28.
 Ecce ego vobiscum sum vsque ad Mundi
 consummationem. Hinc enim signifi-
 catur, Christum futurum nobiscum
 vsque ad mundi consummationem per
 gratiam, & auxilium: sed in æternū fu-
 turum per gloriam, & felicitatem. Sic
 etiam Christus, & eius Regnum perma-
 nebit in terris coram Sole, & Luna per
 temporum vicissitudines, donec Sol, &
 Luna mouebuntur super terram, & ge-
 nerationes præteribunt, & generatio-
 nes aduenient. Sed his finitis Christus,
 & Regnum permanebit supra Solem,
 & supra Lunam sine vlla varietate in
 æternum: nam Regni eius nullus erit
 finis, Daniel 2. & Luc. 1.

Descendet sicut pluuia in vel-
 lus, & sicut stillicidia stillantia
 super terram.

Quia dixerat, Regem Salomonem
 permanfurum vsq; ad finem Mundi, &
 hoc intelligendum erat non in persona
 propria: sed in filio suo Christo: ideo
 nunc Propheta describit aduentū Chri-
 sti, & propagationem, ac proprietates
 Regni eius. Aduentum Christi ad Iu-
 dæos primū, deinde ad Gentes descri-
 bit similitudine pluuiæ, velleris, & ter-
 ræ iuxta signum liberationis populi da-
 tum olim Gedeoni Iud. 6. nam petente
 Gedeone signū a Deo, factū est, vt vel-
 lus in area positum impleretur rore cœ-
 li, area tota sicca permanente; deinde
 sequenti nocte area tota cōpluta est, so-
 lo vellere in medio areæ remanēte ari-
 do: sic igitur descendit primo Christus
 ad Iudæos per vellus significatos, tota
 reliqua terra remanēte arida, dicēte ip-
 so, Non sum missus, nisi ad oues, q̄ perie-
 runt domus Israel. Matth. 15. Deinde ve-
 nit ad gentes per Apostolorū prædica-
 tionem, & sic compluta est terra pluuiā
 doctrinæ salutaris, & gratia Baptismi:
 dicente eodem Domino, Euntes doce-
 te oēs gentes, baptizantes eos in nomi-
 ne Patris, & Filij, & spūs s̄cti. Matt. 26.
 & solū vellus remansit aridum, ari-
 ditate incredulitatis, vt etiam hodie
 cer-

cernimus. Ita S. Augustinus. Addit S. Bernardus serm. 2. Super, Missus est, Christum descendisse sicut pluuiam in velus, per incarnationem, & sicut stillicidia stillantia super terram, per prædicationem; quia sicut ros cadit de cælo in vellus cum maximo silentio, ita Christus descendit in Virginem, ut lanam purissimam, maximo cum silentio, & celesti solum virtute: & sicut stillicidia stillantia super terram magno sonitu guttas dimittunt in terram; sic idem Christus venit per prædicationem suam, & Apostolorum cum magno strepitu verborum, & miraculorum.

VII. Orietur in diebus eius iustitia, & abundantia pacis, donec auferatur luna.

Hic erit primus fructus aduentus Christi, vera iustificatio, & verissima pax cum Deo, & cum omnibus hominibus. Orietur in diebus eius iustitia, id est cum venerit Saluator, abolebitur peccatum, & in locum eius adducetur iustitia sempiterna, ut prædixit Daniel cap. 9. Quamuis enim non defuerint ab initio Mundi multi verè iusti, ut Abel, Henoch, Noe, Abraham, & alij; tñ omnes iniustificati sunt ex meritis Christi præiis. Verè enim dixit Angelus Iosepho, Luc. 1. Vocabis nomen eius Iesum: ipse enim saluum faciet populum suum à peccatis eorum: & hoc est gaudium, quod Angelus euangelizauit Pastoribus. Luc. 2. Quia natus est vobis hodie Saluator. Orietur ergo iustitia in cordibus hominum, per fidem Iesu Christi: & inde sequetur abundantia pacis; quia vera iustitia in charitate consistit, charitatis autem proles est pax, & pax quam mundus dare non potest, sed vera stabilis, & in tanta copia, ut cælum, & terram repleat. In cuius rei signum nascente Christo quieuerunt bella in toto orbe terrarum sub Augusto Cæsare. Durabit autem hæc iustitia, & pax in terris donec auferatur Luna, id est, durabit iustitia Fidei, & pax conscientiarum, non sine externis persecutionibus, donec tollatur

è medio omnis corruptio, & mortalitas, quæ per Lunam significatur: siue donec tollatur Lunæ varietas, & transmutatio: nam post mundi consummationem Luna semper erit plena, & iustitia Fidei mutabitur in iustitiam gloriæ, & pax, non solum erit in corde, sed & in corpore interior, & exterior, sine vilo hoste. In hebræo, pro, oriatur iustitia, habetur, oriatur iustus, sed facile est Septuaginta legisse, zedech, iustitia, non ut nunc legitur, zadich, iustus: sensus tamen est idem: nam cum oritur iustitia, oritur iustus: neque iustus oriri potest, nisi in eo oriatur iustitia: pro, Donec auferatur Luna, in hebræo est, donec non sit Luna, ex quo tollitur ambiguitas vocis græcæ, nam, ut sanctus Augustinus notauit, vox græca significare potest, Lunam tollendam, ut non sit: & Lunam extollendam, ut altior sit. Sed vera sententia est, tollendam, ut non sit. Id enim cohæret cum lectione hebraica, & latina. Intelligimus autem, Lunam tollendam, ut non sit qualis nunc est, modo clara, modo obscura, modo magna, modo parua: sed, & illa lectio, Donec extollatur Luna, optimum sensum habet, videlicet, donec Ecclesia per Lunam significata, extollatur per resurrectionem, & glorificationem.

Et dominabitur à mari usque ad mare, & à flumine usque ad terminos orbis terrarum. VIII.

Describitur nunc propagatio Regni Christi, quod est ipsa Ecclesia toto orbe diffusa. Videtur autem hic describi terra habitabilis secundum longitudinem à mari Indico, siue Orientali, usque ad mare Gaditanum, siue Occidentale: & per latitudinem à flumine Tanai Septentrionali usque ad fines Aethiopiæ, quæ est vltima prouincia ad Meridem. Alij existimant per flumen intelligi Eufratem, qui erat vltimus terminus Regni Salomonis. Sed hoc non est probabile, quoniam Regnum Christi non incipit ab Eufrate, neque terminatur ad Eufratem, sed vltra, & citra Eufratem exten-

tenditur. Melius S. Augustinus, & Theodoretus per flumen intelligunt Iordanem, in quo dictum est Christo, Hic est Filius meus dilectus: & in quo Baptisma dedicatum est, & circa quem prædicatione Domini, ac per hoc propagatio Regni initium habuit. Itaque secundum Augustinum illa verba, A flumine usque ad terminos orbis terrarum; explicant quod antea dictum erat, à mari usque ad mare: quasi dicat, Dominabitur per totam terram à mari usque ad mare, quia terra undique cingitur mari Oceano; id autem fiet, quia à Iordane flumine incipiet prædicatione, & diffunderetur per omnes terras usque ad mare Oceanum, quod undique terminat orbem terræ.

IX. Coram illò procident Aethiopes, & inimici eius terram lingent.

Nominantur Aethiopes in particulari, vel quia paulò ante dictum erat, à flumine usque ad terminos orbis terrarum, & secundum latitudinem ipsi Aethiopes sunt in finibus orbis terræ, ut supra diximus, vel quia primus fuit Eunuchus Candacis Reginae Aethiopum, qui ad fidem Christi conuersus est ex ijs, qui extra terram promissionis habitabant. Vel quia Aethiopes, ut nigerissimi corpore, ita feri moribus, longissimè videbatur abesse à cultu veri Dei. Quod autem subditur, Et inimici eius terram lingent explicatio est verborum superiorum: nā procidere est prosterni usque ad terram, quod faciunt, qui terram labere volunt. Itaque significatur humillima subiectio, & adoratio quæ proprie debetur Deo: & quam deferent Christo inimici eius, id est, infideles, & peccatores conuersi ad fidem, & penitentiam. Et qui noluerint sponte procidere Christo, eumque pie, & fideliter adorare cogentur in nouissimo die inuiti procidere, & subijci sub scabellum pedum eius.

Reges Tharsis, & Insulæ munera offerent, Reges Arabum, & Saba dona adducent.

Quia dixerat, Christum dominaturum à mari usque ad mare, id est, per vniuersam terram, quæ mari cingitur: ne putaremus ab eius dominio excludendas insulas; quæ sunt in medio mari, adiungit, Reges Tharsis, & insulæ munera offerent. Quid significat Tharsis, diximus in explicatione Psal. 47. Probabilissima sententia est, ea voce significari Insulas maris orientalis, quæ plurimæ, & maximæ sunt, & vnde tertio quoque anno adferebatur Salamoni maxima copia auri, & aromatum, ut legimus 3. Reg. 10. Sensus igitur est, Reges Tharsis, id est, Insularum orientalium, & ipse etiam Insulæ, id est, populi earum munera preciosa Regi Christo offerent. Adiungit deinde his Regibus, & insulis, Reges Arabum, & Saba, quia hæc sunt loca, vnde eruitur copia rerum preciosarum, auri, argenti, lapidum preciosorum, & omnis generis aromatum. Nam ut legimus loco citato 3. Reg. 10. Regina Saba attulit Salamoni infinitam copiam auri, argenti, lapidum preciosorum, & aromatum. In hebræo est, Reges Scheba, & Seba, quæ solùm differunt, quod prior habent, s, durius, nimirum Schim, posterior, s, mollius, samech. Quamuis autem aliqui velint, priorem Sabam hoc loco nominatam significare Aethiopiam, posteriorem, Arabiam: tamen Septuaginta Interpretes, & S. Hieronymus, per priorem intellexerunt Arabiam per posteriorem ipsam Sabam, quo nomine vtuntur etiam græci, & latini. & nisi ego valde decipior, Saba, per schim, est Arabia felix. Nam etiam paulo post, cum dicitur, Dabitur ei de auro Arabiæ, in hebræo est, scheba: & Isaia 60. cum dicitur, Omnes de Saba venient, aurum, & thus deferentes; in hebræo est, scheba: Saba autem per samech, latius patet, & significat Arabiam, Madian, & Ephraim, ut S. Hieronymus indicat in commentario ad caput 60. Isaia. Itaque Reges

שְׁבָא

סְבָא

שְׁבָא

שְׁבָא

סְבָא

Reges Arabum, & Saba, significat Reges Arabiæ, & totius regionis quæ dicitur Saba. Atque huius totius regionis Reginam fuisse existimamus Reginam Saba, quæ venit ad Salomonem lib. 3. Reg. cap. 10. Nam dicitur Regina Saba per schin, id est, scheba, & hoc nomine Septuaginta Interpretes, & S. Hieronymus in versione huius Psalmi intelligunt Arabiam. & rursus idem Hieronymus in commentario Isaïæ cap. 43. & cap. 60. dicit Reginam Saba fuisse Reginam Saba, quæ scribitur per samech, Isaïæ 60. proinde fuit Regina Arabiæ felicitis, & præterea Madian, & Ephraïm, & totius regionis Sabæorum. Neque his repugnat, quod Regina Saba dicitur, Matth. cap. 12. Regina Austri, & venisse à finibus terræ: nam Arabia felix ad Austrum porrigitur, & pertinet ad mare Aethiopicum, & ad zonam torridam: proinde rectissime dicitur Regina Austri venisse à finibus terræ. Quod autem quidam dicit, Reginam Saba imperasse Aegypto, & Aethiopiæ, cuius regia est Meroë; nescio unde probari possit: nam tempore Salomonis regnabat Pharaon in Aegypto, cuius filiam Salomon duxit uxorem: non igitur Regina Saba, quæ venit ad Salomonem regnabat in Aegypto. Sed his omissis, illud utilius considerandum est, munera, quæ Christo Regi offerenda sunt, quæq. illi maxime placent, esse aurum charitatis, thus orationis, & myrrham patientiæ, siue, esse fidem cum inuocatione, spem cum desiderio rerum supernarum, charitatem cum fructibus bonorum operum; ex qua charitate fit, ut qui ea flagrant, non difficulter omnes terrenas opes, nec non duos corporis labores, & ipsam vitam Christo offerant.

XI. Et adorabunt eum omnes Reges terræ, omnes gentes seruient ei.

Hæc omnia in Christo impleta sunt in aliquo sensu, & in alio sine dubio implebuntur. Nam si intelligantur de adoratione, & seruitute fidelium, impleta

sunt per figuram intellectus: scriptura enim tribuit omnibus ea, quæ conueniunt multis. Gen. 6. Omnis caro corrumperat viam suam: & tunc ibidem dicitur, Noe vir iustus, atque perfectus. Matth. 2. Turbatus est Herodes, & omnis Hierosolyma cum illo: & tamen non deerat Simeon iustus, & Anna prophetissa, & cæteri iusti, qui non turbati cum Herode, sed gaudio magno cum Magis affecti sunt. Sic igitur dicuntur omnes Reges adoraturi Christum, & omnes gentes ei seruituræ, quia plurimi Principes cum populis suis ad Christi cultum & obsequium conuertendi erant: Sed si intelligatur hic locus de adoratione siue spontanea, siue coacta, in die iudicii adimplebitur perfectissime: tunc enim Christo curuabitur omne genu. denique si intelligatur de potestate Christi, quæ habet in omnes Reges, & populos, ut siue ipsi sciant, siue nesciant, & siue velint, siue nolint, ipse de ipsis agat quicquid sibi placet, ac per hoc seruiant omnes eius voluntati; adimpletur semper hæc prophetia: Data enim illi est omnis potestas in cælo, & in terra. Matth. 28. Et ipse est Princeps Regum terræ. Apocal. 1. Et habet in sinu suo scriptum, Rex Regum, & Dominus Dominantium, Apocal. 19.

Quia liberabit pauperem à potente, & pauperem, cui non erat adiutor.

Hæc est ratio, cur Reges, & populi seruiant Christo, quia per ipsum liberantur à potestate Diaboli, à crudelissima tyrannide Principis tenebrarum, & transferentur in pacatissimum Regnum eius. Per pauperem, intelligitur genus humanum spoliatum à Diabolo omnibus bonis suis, quibus in statu innocentiae abundabat: per potentiam, intelligitur Diabolus, quem ex astuto potentem fecit iniquitas nostra: si enim homo persuasioni eius consentire nolisset, nunquam eum Diabolus debellare potuisset. Sed post peccatum captius Diaboli factus est homo, & Diabolus po-

potentiam in eum acquisiuit. Incipit autem homo liberari, cum incipit cognoscere paupertatem suam, ac per hoc humiliari, & non in se, sed in Domino confidere. Liberabit ergo pauperem hominem à potente Diabolo, & pauperem cui non erat adiutor, id est, quem neque alius homo, neque Angelus, neque vlla creatura poterat adiuuare. In hebræo, pro, à potente, est, clamantem, vt sit adiutium pauperis. Sed Septuaginta non legerunt, *mesaueag*, sed cum alijs punctis, *misuag*, à potente siue diuite clamoso. & hoc eodem modo legit sanctus Hieronymus qui vertit, à potente.

משוע
משוע

XIII. Parcet pauperi, & inopi, & animas pauperum saluas faciet.

Explicat modum, quo Christus liberabit homines à Diabolo: modus enim erit condonando eis peccata, & restituendo gratiam; cum enim remittuntur peccata, rumpitur catena, quæ captiuos tenebat sub Diaboli potestate. Parcet ergo Rex noster pauperi, & inopi, id est, condonabit delicta agnoscantibus debita sua, & confitentibus paupertatem suam, ob quam soluendo non erant: nec solum ignoscet peccatis, sed etiam donabit gratiam, siue iustitiam, & per hoc animas pauperum saluas faciet.

XIV. Ex usuris, & iniquitate redimet animas eorum, & honorabile nomen eorum coram illo.

Homo per originale peccatum debitor factus est mortis æternæ. Atque hoc est debitum capitale; sed dum huius debiti solutio differtur, iniquus exactor Diabolus

exigit usuras, impellens quotidie ad noua peccata, quæ sunt pœnæ primi peccati; & dum horum peccatorum pœna differtur, usuræ transeunt in sortem principalem. Ita quò diutius peccator uiuit, eò magis debitum crescit. Christus ergo benignissimus Dominus, non solum peccatum originis, quod fuit primum capitale debitum, per gratiam suam remittet; sed etiam ab usuris, id est, ab actualibus peccatis, & ab iniquitate tam duri exactoris redimet. Hoc prædixit etiam Isaias capit. 9. cum ait, Iugum enim oneris eius, & virgam humeri eius, & sceptrum exactoris eius superasti. Sanctus Augustinus, dicit peccati pœnam reddi cum usura, quia plus peccator reddit, quam accepit. Homicida occidit carnem proximi, ipse peribit in corpore, & in anima: fur accipit pecuniam; & perdet vitam æternam: fornicator sumit modicam, & breuem voluptatem; reddet supplicia grauissima, & sempiterna. Et honorabile nomen eorum coram ipso: hæc est causa tantæ pietatis Domini, quia nomen istorum pauperum fuit honorabile coram Deo. Vbi, &, accipitur pro, quia; & nomen significat naturam humanam creatam ad imaginem Dei: quamuis enim homo per peccatum vici, & despectus valdè factus sit, tamen natura humana, & nomen hominis, non est vile apud Deum, neque despiciat Deus imaginem suam. Et verè incarnatio filij Dei manifestè ostendit, quam preciosa sit natura humana apud Deum: quod certè deberet omnes homines rapere in amorem Dei, a quo tanti fieri præter omne meritum suum intelligunt. In hebræo habetur, San-

Sanguis eorum, pro eo quod nos habemus, Nomen eorum. Sed idem est sensus: nam Deus magni fecit sanguinem nostrum, id est, vitam nostram, quā ideo de interitu redemit; quia preciosum fuit coram eo nomen nostrum, natura nostra, genus nostrum,

xv. Et viuet, & dabitur ei de auro Arabiæ, & adorabunt de ipso semper: tota die benedicent ei.

Quoniam dicens, Redimet animas eorum, insinuauerat mortem Christi, quæ fuit redemptio, & propitiatio pro animabus nostris: addere voluit etiam resurrectionem, & vitam eius æternā; ideo subiunxit, Et viuet, id est, & postea quam per mortem redemerit, iterum viuet. Et dabitur ei de auro Arabiæ, id est pretiosis muneribus coletur. quod aut S. Augustinus legit, Dabitur ei de auro Abrahæ, videtur manifesta corruptio. Et adorabunt de ipso semper, id est, & redempti ab ipso adorabunt Deum verū ex ipsius ritu, doctrina, & institutione usque ad mundi consummationem, Et tota die, id est, iugiter, & assiduè benedicent ei, hoc est, laudabunt, & glorificabunt eum. In hebræo habetur in numero singulari, ithpallel, orabit. Sed Septuaginta, & S. Hieronymus vertunt in numero multitudinis, orabunt; & omnes tractatores exponunt verbū in numero multitudinis. Quare videndum est, an fortasse in verbo hebraico vna litera in fine, videlicet, vau, desideretur. Quod autem in hebraico, & græco sit verbum, orabunt, in latino, adorabunt, non variat sensum: nam qui orat, adorat, & qui adorant, ut plurimum id faciunt, ut orent: ergo adorabunt, exponendum est, adorantes orabunt, vel, orantes adorabunt. Illud, de ipso, variè exponitur. aliqui enim volunt, de ipso, significare, pro ipso, id est, pro felici progressu ipsius, vel Regni eius. Alij, de ipso, hoc est, pro salute, quæ est ab ipso. Alij, de ipso, id est, per ipsum, orabunt Patrem: sed si præpositio, de, propriè

accipienda sit, ut eam accipiendam esse arbitramur, iam diximus, quis nobis sensus esse videatur.

Et erit firmamentum in terra XVI. in summis montium, super extolletur super Libanū fructus eius: & florebut de ciuitate sicut fœnum terræ.

Hic iam describitur fructus Apostolicæ prædicationis post Christi resurrectionem, & ascensionem in cœlum. Sed primum declaranda est vox firmamentum, pro qua in hebræo est, pissath bar. Rabini, & qui eos sequuntur volunt, pissath bar, significare pugillum frumenti, siue quātum vola manus potest capere frumenti, vel etiam placentulam panis: sed non possunt ex Scripturis hanc suam expositionem probare. Sanctus Hieronymus vertit ex hebræo contrariam sententiam, videlicet, memorabile triticum, id est, abundantiam optimi frumenti. & potest confirmari hæc expositio ex cap. 37. Genesis, ubi dicitur, Iacob fecisse Iosepho filio suo vnicè dilecto vestem egregiam variorum colorum: & habetur vox hebræa ex hac eadem radice, vnde hic habemus, pissat: quomodo ergo in eo loco non significatur vestis angusta, aut breuis; sed talaris, & pulcherrima: ita hoc loco significatur frumentum non modicum, quod pugillo, aut vola contineatur, sed abundans, & memorabile, ut S. Hieronymus rectè vertit. Atque huc respexerunt Septuaginta, qui transtulerunt, firmamentum, id est, firmamentum panis, ut dicitur in Psalmo 104. Omne firmamentum panis contriuit. Est enim abundantia frumenti firmamentum familiæ, ut non cogatur medicare, iuxta illud Gen. 27. Frumento, vino, & oleo stabiliui eum. Per abundantiam autem frumenti, hoc loco non intelligitur abundantia frumenti corporalis, sed, abundantia Verbi Dei, ut colligitur ex illis verbis, Et florebut de ciuitate sicut fœnū terræ; ubi explicatur metaphora superiorum verborum.

פסח בר

יתפלל

borum. Hic igitur est sensus huius loci, alioqui valde obscuri. Erit in terra firmamentum, id est, abundantia frumenti spiritualis, quod est Verbum Dei. In summis montibus, id est, etiam in locis ex se sterilibus; valles enim, non montes abundare solent frumento. Super extoletur fructus eius, id est, crescet, & multiplicabitur fructus huius frumenti in terra sati, super Libanum, id est, fructus huius frumenti excrescet supra altitudinem cedrorum Libani, vel supra fructum Libani, qui producit arbores plurimas, & altissimas. Et florebunt de ciuitate sicut fœnum terræ, id est, & hic fructus frumenti, non consistet in spicis corporalibus, sed in multiplicatione credentium: nam ex ciuitate Dei, quæ est Hierusalem, de qua dictum est ab Isaia cap. 2. De Sion exibit lex, & Verbum Domini de Hierusalem: florebunt, & germinabunt credentes in tanta copia, ut fœnum in terra germinare solet. Et quod ita factum sit docet S. Lucas Act. 6. ubi dicit, Et Verbum Dei crescebat, & multiplicabatur numerus credentium valde. Scio quid Paulus Burgensis ex paraphrasi Caldaica adferat ad probandum ex hoc loco sacrificium Missæ: sed scio etiam quam multis fabulis Iudaicis paraphrasis illa scateat. Ideo piget, ex lacunis expositionum Iudaicarum haurire, quæ nobis ex purissimis fontibus sacrarum Scripturarum abundant.

XVII. Sit nomen eius benedictum in secula ante, Solem permanet nomen eius.

Concludit Psalmum Propheta orando, & laudando futurum Messiam. Sit, inquit, nomen eius benedictum in secula, id est, ab omnibus ubique, & semper benedicatur nomen Christi: quod nomen ante Solem permanet, id est, coram Sole, siue quoad Sol erit, permanebit. Conabuntur quidem persecutores illud extinguere, sed non praevalerunt. In hebræo non habetur illud, benedictum, sed simpliciter legitur, Erit nomen eius in secula. & idem alijs verbis repetitur,

quamdiu sol erit, nomen eius permanebit. Testatur quoque Theodoretus à nullo interprete, id est, neque ab Aquila, neque à Simmacho, neque à Theodotione illud, benedictum, in textu esse positum, neque haberi in Exéplis apud Septuaginta Interpretes: tamen habetur in græcis, & latinis antiquis libris, & legitur in commentarijs Hieronymi, Augustini, & Euthymij. Illud, permanet, seu permanebit, in hebræo est, in-¹²¹ non, quod verbum, filiabitur, dici posset, id est, propagabitur: quod satis propriè conuenit nomini Christi, quod per prædicatores propagatur, & propagabitur usque ad mundi consummationem.

Et benedicentur in ipso omnes tribus terræ, omnes gentes magnificabunt eum. **XVIII.**

Hoc desumptum est ex Genesi cap. 22. In semine tuo benedicentur omnes gentes terræ. Et explicatur ab Apostolo ad Gal. 3. Non dictum est, inquit, in seminibus, tanquam in multis, sed tanquam in vno, & semini tuo, quod est Christus. Omnes ergo gentes benedicentur à Deo in Christo, id est, nemo benedicetur, nisi in Christo, & in ipso benedicentur, quotquot ex ipso renati fuerint, & in ipso perseuerauerint. Ipsis enim dicitur in Iudicio, Venite benedicti Patris mei, possidete paratum vobis Regnum à constitutione mundi, Matth. 25. Proinde benedictio ista, est iustificatio, & adoptio filiorum per Christum. Sicut autem in ipso benedicentur omnes tribus terræ: sic etiam vicissim omnes gentes magnificabunt, id est, laudabunt, & glorificabunt eum.

Benedictus Dominus Deus **XIX.** Israel, qui facit mirabilia solus.

Hæc est laus, qua magnificabunt eum omnes gentes: agnoscent enim, & prædicabunt hæc mirabilia, quæ fecit Deus Chri-

Christus iustificando impios, & eruen-
do eos de potestate tenebrarum, &
transferendo in Regnum suum, ab ipso
solo fieri potuisse.

XX. Et benedictum nomen maie-
statis eius in æternum, & replebi-
tur maiestate eius omnis terra :
fiat, fiat.

Optat in fine Propheta, ut nomen di-
uinæ Maiestatis in æternum ab omnib.
benedicatur, non in cælo tantum, ubi
semper ab Angelis benedicatur; sed et
in terra, ita ut repleatur omnis terra
gloria Domini; & omnes homines agno-
scant, & laudent Dominum. Addit ex
magno affectu, fiat, fiat, siue hebraicè,
Amen, Amen; verè ita sit, verè ita sit.
Atque hic est finis libri secundi secun-
dum Hebræos.

PSALMVS LXXII.

Titulus, & Argumentum

Psalmus Asaph.



DE hoc Titulo diximus
aliquid in explicatio-
ne Psalmi quadrage-
siminonni, & in præfa-
tione. Argumentum
est exhortatio ad in-
firmos fideles, ut non
scandalizentur, si videant improbos in
hoc Mundo florere: quæ adhortatio
semper utilis, sæpè etiam necessaria est;
tum videlicet cum populus Dei, vel iu-
stus quicunque persecutionem
patitur, & iniusti maxi-
ma pace, & tran-
quillitate fru-
untur.

EX.

Explicatio Psalmi 72.

Quam bonus Israel Deus,
his qui recto sunt corde?

Explicaturus Dauid tentationem, &
scandalum pusillorum, quorum perso-
nam in hoc psalmo induerat; primo ia-
cit fundamentum rectæ Fidei, ut intel-
ligamus, neque ipsum, neque illos, quo-
rum personam induerat, circa fidem
diuinæ prouidentiae naufragasse. Quod
idem fecit Propheta Hieremias cap. 12.
primum enim ait, Iustus quidem tu es
Domine si disputem tecum; deinde hoc
fundamento posito, subiungit, Verum-
tamen iusta loquar ad te: quare via im-
piorum prosperatur? bene est omnib.
qui præuaricantur, &c. Sic igitur hoc lo-
co Dauid primum affirmat, Deum bonum
esse, ac per hoc iustum; sed bonum ut
est, videri bonis, qui sano iudicio prædi-
ti sunt; quamuis peruersis peruersus vi-
deatur. Ait igitur, non interrogando,
sed affirmando, Quam bonus Israel Deus,
his qui recto sunt corde, id est, Per quam
bonus est Deus Israeli, Israelitis, in-
quam, qui recto sunt corde. In hebræo
sic legitur ad verbum, Certè bonus est
Deus Israeli his qui puro sunt corde.
Itaq. Deus, qui in se semper est bonus,
rectus, & iustus; est etiam talis Israeli
iudicio, non tamen omnis Israelis, sed
ijs ex Israele, qui purum cor habent, id
est, liberum à fumo passionum, ut rectè
possint iudicare, siue ijs, qui recto sunt
corde, ut conforme sit rectitudini Dei,
distortis enim quod rectum est, distor-
tum esse videtur.

Mei autem penè moti sunt pe-
des, penè effusi sunt gressus mei.

Incipit nunc exponere tentationem
infirmorum, quorum personam, ut dixi-
mus, in hoc Psalmo gerit. Boni, inquit,
fideles, qui puro, & recto sunt corde,
bonum, & iustum Deum esse non dubi-
tant, quicquid illis accadat; sed ego in-
firmus,

firmus, & qui cor habeo non usquequaque purum, & rectum, penè cecidi in dubitatione de iustitia Dei. Hanc enim dubitationem metaphoricè significat motio pedum, & effusio gressuum. Sicut enim qui nutare incipit pedibus, & qui labitur dum ambulat, deficit à firmitate, & stabilitate sua; sic ille, qui agitur dubitationum tentationibus contrarijs veritati, deficere incipit, & quasi nutat constantia Fidei. Mei autem, inquit, pene moti sunt pedes, id est, nutare cœpi non tamen omnino cecidi. Penè effusi sunt gressus mei, id est, labi cœpi, dum ambulare, non tamen rui usque ad terram: denique significat se parum abfuisse à lapsu in dubitationem circa iustitiam, & providentiam Dei.

III. Quia zelavi super iniquos, pacem peccatorum videns.

Apertit causam suæ tentationis, ac dicit esse, quia viderit iniquos, quos puniri à Deo oporteret, frui altissima pace, alijsq. bonis permultis. Illud, zelavi super iniquos, significat, zelo indignationis exarsi super iniquos, id est, adversus iniquos, quos vidi prosperitate, & pace gaudere, quam non merentur.

IV. Quia non est respectus mortis eorum, & firmamentum in plaga eorum.

Pergit in explicanda felicitate iniquorum; ac dicit, eos frui pace, & prosperitate, quoniam tanta sanitate utuntur, ut de morte nō cogitēt, quasi sēper essent victuri; & si fortè plaga aliqua, siue morbus illis contingat, ea plaga non habet firmamentum, sed continuo evanescit. Illud, non est respectus mortis eorū, hunc sensum habere videtur, non respiciunt iniqui in mortē suā, neq; alij, qui eos vident, in mortē ipsorum, id est, nō videntur unquā morituri, propter diuturnam, & stabilem sanitatē, qua fruuntur. In textu græco legitur, non est abnutio mortis eorū, vel, ut legit S. Augustinus Bellarm. in Psalm.

stinus, non est declinatio mortis eorū: quæ verba eundem sensum facere possunt, videlicet, Iniqui non declinant, neque abnuunt mortem, quia de ea non cogitant, confidentes in optima constitutione corporis sui. Ex hebræo S. Hieronymus vertit, Non cogitant mortem suam: quæ lectio nihil ferè differt à nostra. Alij ex hebræo vertunt, non sunt vincula in morte ipsorum; & potest sensus esse, Non trahuntur iniqui ad mortem vinculis variorum morborū, ut sæpè accidit iustis: Hæc nobis videtur explicatio loci obscurissimi, quia cohæret cū verbis sequentibus: quod. n. sequitur, Et firmamentum in plaga eorum; sine dubio requirit repetitionem negatæ particulæ initio positæ, ut sit sensus, & non est firmamentū, id est, firmitas, & stabilitas in plaga eorum, quia si qua plaga illis accidit, facillimè curatur.

V. In labore hominum non sunt, & cum hominibus non flagellabuntur.

Ad sanitatem iniquorū, quæ est pax cum morbis, & plagis corporalibus: accedit etiam abundantia omnium rerum ut non necesse habeant conflictari cum inopia, fatigue, litibus, angoribus, alijsq. tribulationibus, quibus flagellantur plerique hominum, qui in sudore vultus sui vescuntur pane suo, & calūnijs potentiorum opprimuntur. Sed rectè admonet S. Bernardus in declamatione sua, qui cum hominibus in hac vita non flagellantur, cum demonibus flagellabuntur in gehenna: nam generale est quod dicit Apostolus 2. Timoth. 3. Omnes, qui volūt piè vivere in Christo Iesu persecutiones patientur, & ad Heb. 12. Quem diligit Deus castigat, flagellat autem omnem filium, quem recipit.

VI. Ideò tenuit eos superbia, operati sunt iniquitate, & impietate sua.

Ecce De-

Declarat Prophetā, quem fructum producat prosperitas in impijs; superbiā videlicet, & cumulum iniquitatum. Utuntur enim copia rerum temporalium ad explemtas libidines suas, & ad opprimendos debiliores: cum è contrario viri pii valde timeant, & humiliantur, cum aridet prosperitas: suspectam enim habent prosperitatem, ne forte sit merces eorum, & excidant à mercede sempiterna, quam toto corde sitiunt: sed notanda sunt verba. Tenuit, inquit, eos superbia: non enim superbi superbiam tenent, sed tenentur à superbia, quasi vinculo quodam. Nam qui facit peccatum seruus est peccati. Ioan. 8. & vox hebræa hoc sonat, Circumdedit eos superbia, velut torques collo alligatus. Et operti sunt iniquitate, & impietate. Hoc significat, iniquos in prosperitate non habere peccatū solum intus in corde, ut sæpè habent pauperes, & miseri, qui corde concupiscunt furta, adulteria, pompas seculi; sed opere non implent, quod libenter implerent, si possent; itaque latet intus peccatum eorum. Iniqui autem rebus omnibus abundantes toti cooperti sunt iniquitate, quia non solum cogitatione, & desiderio, sed oculis, manibus, pedibus, lingua, visu, verbo, & opere peccant.

VII. Prodiit quasi ex adipe iniquitas eorum, transierunt in affectum cordis.

Offendit originem iniquitatis natā esse ex malo vſu rerum temporalium abundanter illis à Deo concessarū: quoniam enim nō dispensarunt diuitias magis egentibus, ut par erat; sed ipsi sibi omnia retinuerunt, inde pingues effecti, velut tauri, aut equi indomiti pauperes oppresserunt. Pulchrè notat S. Augustinus in pauperibus ex macie prodire iniquitatem, in diuitibus ex adipe: pauperes enim interrogati cur furerentur, respondent, ob inopiam rerum necessariarū: diuites interrogati, cur alienum agrum inuadant, respondent, si tamen respondere dignantur, quia mul-

tos habent agros vicinos, quibus hunc etiam adiungi congruum est. Sic Achab Rex, 3. Regum 21. abstulit vineam Naboth, non quod ipse vineis indigeret, sed quia vicina erat palatio suo. Porro abundantiam esse causam iniquitatum, quando non fiunt inde eleemosynæ pauperibus, docet Ezechiel cap. 16. Hæc fuit, inquit, iniquitas Sodomæ, id est, occasio, siue causa iniquitatis grauissimæ, ob quā igne de cœlo cōsumpta fuit, superbia, saturitas panis, & abundantia, & ocium ipsius, & filiarum eius, & manum egeno, & pauperi non porrigebant: & eleuatæ sunt, & fecerunt abominationes coram me, & abstulisti eas. In hebræo nō legitur, iniquitas, sed oculus: & hunc sensum esse volunt hebræi, Prodiit quasi ex adipe oculus eorum, id est, ex nimia pinguedine, oculus eorum prominebat, quasi exire vellet: Sed Septuaginta Interpretes viri doctissimi non legerunt, ain, quod significat oculū, sed, auon, quod significat, iniquitatem. Facile autem fuit vitio librorum mutari vau in iōd, cum non differant, nisi quod vna litera est paulo longior, quā altera. Quod sequitur, Transierunt in affectum cordis, difficile ad modum est: nam in hebræo secundum versionē S. Hieronymi pro, affectu, ponitur, cogitatio; secundum alios, pictura: in græco est, dispositio, & sic legit S. Augustinus. Aliqui tollunt præpositionem, in, & legunt transierunt affectum, siue cogitationē cordis; & sensum esse volunt iniquos transgressos esse, quo ad abundantiam bonorum temporalium, ipsum desiderium, & cogitationē suam, id est, plus accepisse, quā desiderarent, vel cogitarent. quæ expositio non placet: experientia enim docet, iniquos amatores Mundi, non satiari rebus temporalibus; nec fieri posse, ut habeant plus, quā desiderant, cum res temporales sint modicæ, & cito finiantur; & desiderium humanum vastissimū sit, nec satiari possit, nisi summo, & infinito bono, ut dicit S. Augustinus lib. 1. Conf. c. 1. Adde quod propositio in, non debet tolli cum habeatur in textibus oibus græcis, & latinis. Existimo igitur,

sur, transire in affectu cordis, esse transmutari, & conuerti in carnales passion-
nes, & effici hominem totum carnalē,
& animale: quod alijs verbis dicitur
ad Rom. 1. Tradidit eos Deus in deside-
ria cordis sui. & infra, Tradidit eos in
passiones ignominia. & ad hanc expo-
sitionem accommodari possunt omnes
lectiones. nam affectus, & cogitatio cō-
iunctissimæ sunt, & pro eodem accipiū-
tur. Nihil enim homo desiderat, nisi qđ
cogitat, & cognoscit. Sed significantius
est nomen picturæ, quam dicunt periti
linguæ hebraicæ propriè significare vo-
cem, maschioth, quam nomen cogita-
tionis; quia Mundi amatores non desi-
derant quod verum bonum, & pulchrū
est, sed quod ipsi sibi pingunt, & fingūt
in corde suo perverso bonum, & pul-
chrum esse. Adulter enim, qui summo
affectu diligit adulteram, & eam rebus
omnibus anteposit, etiam æternæ feli-
citati, nō id facit, quia reuera illa sit res
pulcherrima, & preciosissima; sed quia
ita ipse iudicat, & talem sibi ipse eam
in corde pingit, & fingit. Itaque transie-
runt iniqui abundantes rerum tempora-
lium in affectum, & cogitationem, & pi-
cturas cordis sui; quia conuersi sunt, &
transformati in concupiscentias, & fig-
menta cordis sui: quod etiam referri pōt
vox græca *διαθεσις* id est, dispositio,
nam tales effecti sunt, qualis est disposi-
tio cordis ipsorum, id est, toti carnales.

VIII. Cogitauerunt, & locuti sunt
nequitiam, iniquitatem in excel-
so locuti sunt.

Pergit in explicanda peruersitate ini-
quorum abundantium rebus tempora-
libus, ac dicit, eos cogitasse apud se ini-
quitatem aduersus Deum, & homines,
& non timuisse eam palam etiam prædi-
care, irridendo Dei maiestatem, & qui
illum colunt. Illud, cogitauerunt, S. Hie-
ronymus vertit, irriserunt. & potest
fieri, vt vox hebraica, mik, vtrunq.
significet; nam rarō hoc verbū occurrit
in sacris libris. Fortasse etiā significat,
irridendo in corde suo cogitasse nequi-

tiam, quam postea loquendo propala-
uerunt. Quam autem audacter locuti
sint nequitiam, explicat Propheta, di-
cens, Iniquitatē in excelso locuti sunt,
id est, iniquitatem, siue blasphemiam
iniquissimam in excelso loco positi pa-
lam, & apertē locuti sunt. Illud enim,
in excelso, hebraicē est, de excelso, siue
ex excelso: proinde sensus est, istos ini-
quos diuites in sublimi locatos, vt su-
perbiam eorū decebat, de excelso illo
loco blasphemiam protulisse: sed hæc
clariora erunt in versu sequenti.

Posuerunt in cœlum os suum, IX.
& lingua eorum transiuit in ter-
ra.

Hæc est nequitia impiorum. Posue-
runt in cœlum, id est, supra cœlum, os
suum, non timentes Deum, & Angelos
blasphemare. Et lingua eorum transiuit
in terra, id est, & lingua eorum peram-
bulauit (vt sonat vox hebraica) in ter-
ra detrahens cultoribus Dei, eosq. irri-
dens, quasi vana sit spes eorum.

Ideo conuertetur populus X.
meus hic & dies pleni inuenien-
tur in eis

Et dixerunt, quomodo scit XI.
Deus, & si est scientia in excel-
so?

Reuertitur Propheta in persona in-
firmorum in Fide, ad explicandam tēpa-
tionem, & scandalum ipsorum ex felici-
tate, qua fruuntur peccatores. Ideo, in-
quit, conuertetur populus meus hic, id
est, propter tanta scelera, & tantam fe-
licitatem iniquorum populus meus,
qui est populus fidelis, & timens Deū,
conuertetur hic, id est, conuertet se ad
consideranda hæc. Et dies pleni inue-
nientur in eis, id est, considerando inue-
niet, verè felices esse impios, ita vt
etiam diuissimè vivant, & impleant
dies suos peruenientes ad ultimā sen-
ectutem. Et dixerunt, Quomodo scit Deus, &

si est scientia in excelsis? id est, & titubantes in fide dixerunt, Quomodo potest fieri, ut Deus hæc sciat, & permittat? est ne scientia in Deo excelsis? an potius hæc ignorat, vel non considerat? Hanc existimo veriorē esse huius loci explicationem. Theodoretus enim docet verba versiculi decimi dicta esse per parentē suū in consolationem populi iusti, & verba versiculi vndecimi, esse verba iniquorum, qui posuerunt os suū in cælum. Quam expositionem non reprobo, sed priorem, ut faciliore, & magis connexam cum sequentibus, & præcedentibus præfero. In hebræo non habetur, populus meus, sed populus eius, videlicet Dei. Sensus est idem, sed lectio nostra est clarior, & credibile est Septuaginta Interpretes non legisse, ammo, populus eius, sed ammi, populus meus. Facile enim fuit librarij errorem committere in scribendo vau, pro, iod, quæ sunt literæ similes: sic etiam in hebræo non habetur nunc, dies pleni, sed vel, ut S. Hieronymus vertit, quis plenus, vel ut alij legunt, aquæ pleni, supple calicis. Sed Septuaginta Interpretes non erant tam imperiti, ut per aquas intelligerent, & vertent, dies. ergo necesse est dicere, eos non habuisse in suis codicibus, mi, id est, quis; neque, me, id est, aquæ, sed, ieme, id est, dies. Neque mirum est, si tam longo tractu temporis exciderit vna litera, quæ minima est omnium literarum. Illud est verum, legendum esse ex hebræo, dies plenitudinis potius quàm, dies pleni: sed dies plenitudinis, significat dies plenissimos, vel plenos, ut verterunt Septuaginta.

XII. Ecce ipsi peccatores, & abutun-
dantes in seculo, ob inuerunt
diuitias.

XIII. Et dixi ergo sine causa iustificauit cor meum, & laui inter innocentes manus meas.

XIV. Et fui flagellatus tota die, & castigatio mea in matutinis.

Aperit causam dubitationis, an Deus sciat quæ aguntur in terris: & loquitur in persona infirmorum, quasi vnus esset ex illis, vt facilius eorum infirmitati medeatur. Ecce, inquit, ipsi peccatores, & abundantes in seculo obtinuerunt diuitias, id est, hæc ratio est, cur incipiam dubitare de prouidentia Dei; quia peccatores, qui flagellari deberent, abundantes sunt in seculo, & obtinent diuitias magnas. Et dixi apud me ista considerans, Ergo sine causa iustificauit cor meum, id est, frustra cor meum purum à peccatis seruire studui, & frustra laui manus mecum innocentibus, innocenter operans, & viuens: frustra, inquam, quoniam Deus non benefacit iustis, sed peccatoribus: imò non solum Deus non benefacit iustis, sed eos affligi patitur. Ego. n. qui iustitiæ studeo, fui flagellatus tota die, id est, semper in tribulationibus versor. Et castigatio mea in matutinis, id est, summo mane incipit vexatio, & tribulatio mea, non differtur saltem ad tempus, vt vel modicum requiescam. Hæc est sententia horum versiculorum sed verba consideremus. Illud, abundantes in seculo, in hebræo significat propriè pacem, & quietem habentes, ac per hoc abundantes sanitate robore, amicis, & similibus rebus. Illud obtinuerunt diuitias, poterat etiam verti, multiplicauerunt, & coaceruarunt substantiam: quo declaratur id quod nos legimus, obtinuerunt diuitias: nam qui multiplicant diuitias, illi verè eas obtinent, id est, tenent ne dilabantur; tenuis enim substantia facilè euanesceat. Illud, iustificauit cor meum, in hebræo est, purificauit cor meum, id est, maculas peccatorum terpsi per pœnitentiam, vel mundum, & iustum conseruaui. Illud, laui inter innocentes manus meas, significat, vnum ex innocentibus me probaui, vt verè innocens eram opere, & purus corde. Nam lotio manuum signum erat innocentie, cùm quærebatur reus homicidii, vt legimus Deuteron. 21. ex quo etiam Pilatus lauit manus coram populo Matth. 27. vt se innocentem demonstraret in passione Christi.

Si

XV. Si dicebam, narrabo sic, ecce nationem filiorum tuorum reprobavi.

Incipit adhibere medicinā infirmis. Exposuit hactenus eorum querelas, & causam scandali, quod patiebantur ex prosperitate impiorum, & aduersitatibus piorum: nunc quasi compunctus, & pœnitens ait, Si dicebam, narrabo sic, id est, si dicebā apud me, narrabo, id est, pergā narrare prosperitates impiorum, quasi iniustas, & hanc iniustitiā in Deū referre. Ecce nationem filiorum tuorū reprobavi, id est, hoc ipso reprobavi, & damnaui oēs filios Dei, Abrahā, Isaac, Iacob, Mosē, & ceteros. Omnes enim confitebantur, habere Deum providentiā rerum humanarum, & iusto iudicio peccatoribus interdum dare prosperitates, & iustis afflictiones. Vel, rebrobaui, & damnaui omnes filios Dei, quasi insipientes, qui frustra iustitiā studeāt. Vel deniq. reprobavi omnes filios Dei, quia iudicaui eos omnes à Deo derelictos esse: quæ omnia falsa sunt, & reprehensione dignissima. Atque hæc est prima ratio, qua persuadet Propheta infirmis, ut non dubitent de providētia Dei, ne videlicet contrarij sint omnibus filiis Dei, sanctis videlicet Patriarchis, & Prophetis; ne ve illos insipientes fuisse credant, aut à Deo derelictos. Vox hebræa, bagadti, pro qua habemus, reprobavi, significat spernere, relinquere, deficere, præuaricari, fidem fallere. Itaque S. Hieronymus vertit, generationem filiorum tuorum reliqui, id est, ab eis defeci. S. Augustinus legit non concinui, dissonui, id est, nō contēni in sententiā cum filiis Dei. In eundem sensum exponendum est, reprobavi, id est, spreui eos, neque fidem eis seruaui, quam debebam.

בגדתי

XVI. Existimabam ut cognoscerem hoc labor est ante me.

XVII. Donec intrē in sanctuariū Dei, & intelligam in nouissimis eorū.

Ad primam illam rationem addit secundam petitiā à difficultate huius questionis, quæ deterere deberet homines ne prompti essent ad reprehendendā quæ non intelligunt. Existimabam, inquit, ut cognoscerem hoc, id est, reputabā mecū, & cogitando inuestigabā, ut ad huius rei cognitionem peruenirem: sed labor magnus, & difficultas mihi obijciebatur, donec intrare in sanctuariū Dei, & per orationem à Deo lumē obtinerem: & eo lumine ad nouissima iniquorum abundantium adspicerem. nam ex nouissimis, id est, ex diuino iudicio, quod post mortem impios manet, manifestē declarabitur, illos non fuisse verē felices. Illud existimabam, ut cognoscerem hoc, obicurum est ex ambiguitate verbi, existimabam: nam hoc loco nō significat opinabar, vel arbitrabar, sed reputabam, siue discutiendo iudicabam, quomodo dicimus, ex præteritis futura existimare possumus. Verbum hebræum, chafab, quod hoc loco habetur, significat cogitare, existimare, reputare, & S. Hieronymus vertit, cogitavi, ut intelligerem hoc, id est, cogitavi apud me discutiens quæstionem istā; ut eius solutionem inuenirem. Illud, labor est ante me, in hebræo habetur, labor in oculis meis hoc, id est, dū inquirō notitiā huius rei, opponitur oculis mentis meæ labor penetrandi, quasi murus quidam impenetrabilis. Illud, intelligam in nouissimis eorum; vel significat intelligam solutionem quæstionis in nouissimis eorum, id est, considerando nouissima eorum cognoscam, Deum habere providentiā rerum humanarum: vel significat, intelligā nouissima eorum, id est, considerando vitam eorum perueniam ad intelligendum exitum, & vltimum finem ipsorum; & inde colligam quæstionis solutionem.

חשב

Verumtamen propter dolos posuisti eis, deiecasti eos, dum alleuarentur.

XVIII.

Hic iam Propheta ostendit, ex nouissimis intelligi posse iniquos abundantes
Ecce in

in seculo non esse felices, & Deum iustum esse Iudicem. Sed quia lectio nostra, quæ fideliter ex græco translata est, multum dissentire videtur ab hebraica, quoad verba, licet in sensu conueniant, vtramq. explicemus. Verumtamen, inquit, propter dolos posuisti eis, subintellige dolos, aut mala, vt addunt aliqui textus græci, id est, propter dolos, quibus vsi sunt erga proximos suos illi iniusti, vt multiplicaret diuitias; tu Domine secundum prouidentiam tuam fecisti, vt ipsi doli ipsorum verterentur ipsi in dolos longe maiores: nam dum per dolos lucrati sunt pecunias, aut agros, aut vestes; per eosdem dolos imprudentes ipsi iacturam fecerunt æternæ vitæ. Et deiecisti eos, dum alleuarentur, id est, & dum extollerentur ad honores, & dignitates, per eas deiecti sunt in præcipitiū mortis æternæ iusto iudicio tuo. Hebraica lectio, quæ est apud Sanctū Hieronymum, sic habet, Verumtamen in lubrico posuisti eos, deiecisti eos in interitum, id est, dum iniustis dedisti magnas diuitias, posuisti eos in loco, vnde facile labi possent in interitum, & quia non sciuerunt in lubrico cautè ambulare, lapsi sunt iusto iudicio tuo in interitum. Vtraque lectio congruit cum Apostoli sententia in epist. 1. ad Timoth. cap. 6. Qui volunt diuites fieri, incidunt in tentationem, & laqueum Diaboli, in desideria multa inutilia, & nocua, quæ mergunt hominem in interitum, & perditionem. Quod si velim⁹ concordare lectionem latinam cum hebraica; sciendum est, propter dolos, in hebraico esse, bachalacoth, quæ vox non significat propriè, propter dolos, neque, in lubrico, sed significat in rebus lenibus, politis, blandis, quales sunt lapides valde politi, specula, & similia: nam calach, est diuidere, lenire, &c. Ita que potuisset verti hic locus, In blanditijs, vel propter blanditias, quales sunt doli, & insidie decipientium, & huc respexerunt Septuaginta Interpretes. potuit etiam verti, in lubrico loco, quia locus lubricus, blandus, & lenis est; & hanc significationē secutus est Sanctus

Hieronymus. Illud autē, dum alleuaretur, non difficulter inuenitur in textu hebraico. Nam vox illa, massuoth, si scribatur cum scin, habente punctum in sinistro cornu, deriuabitur à verbo, nasa, quod eleuare significat, & huc respexerunt Septuaginta Interpretes: si verò scribatur cum scin, habente punctum in dextro cornu, deriuabitur à verbo, nascia quod significat desolare, & hanc lectionem secutus est Sanctus Hieronymus.

משואת

נשא

משואת

נשא

Quomodo facti sunt in desolationem? subito defecerunt perierunt propter iniquitatē suam. XIX.

Declarat quod obscurè dixerat, & admirans celerem ruinā iniquorū, quorum felicitas vix exorta arescit; vix apparuit, & euanescit: Quō, inquit, facti sunt in desolationem subito? id est, quomodo, qui videbantur rebus omnibus abundare repente facti sunt instar ciuitatis desolatæ, vbi præter ruinas nihil cernitur? defecerunt, qui videbātur in æternum super terram victuri? perierunt propter iniquitatem suam. Illud, subito, in hebræo, græcoq. textu coniungitur cum verbis, Facti sunt in desolationem; & sic etiam legunt S. Augustinus, & Euthymius. Dicuntur autem iniqui subito periisse, quia prosperitas eorum breuissima est, si cū futura æternitate pœnarum comparetur. Videtur quidem prosperitas eorum diuturna esse dum permanet; sed cum finē acceperit, tunc sentietur, quā brevis, & momentanea fuerit. Illud, propter iniquitatē suam, S. Hieronymus vertit ex hebræo, Quasi non sint, id est, ad nihilum reducti sunt. Alij vertunt ab horrib. vel terroribus. Sed vox illa, ballahoth, obscuræ significationis est, & in tanta varietate versionum, sua remanere debet Septuaginta Interpretibus auctoritas.

בלחות

Velut somnium surgentium XX. Domine, in ciuitate tua imaginē ipsorum ad nihilum rediges.

Com-

בחלקות

חלק

Comparat Propheta eleganti similitudine prosperitatem iniquorum somnio. Somnium non est res vera, sed apparatus: qui somniat se diuitem esse, cum euigilat, intelligit, se delusum inani spectro fuisse. Sic omnes iniqui abundantes in seculo, felices sibi esse videntur, sed cum transierit nox huius seculi, intelligent verè se felices non fuisse, & tunc imago ipsorum, id est, imaginaria eorum felicitas ad nihilum redigetur; quia in ciuitate Dei. vbi vera, & sempiterna felicitas est, nullum locum habebit felicitas ista imaginaria, & momentanea, quæ in auro, & argento; in famulis, & equis; in palatijs, & hortis; in honoribus, & dignitatibus in conuiujs, & luxuria posita est. hæc enim omnia peribunt, & amatores suos infelicissimos reddent. Ideò rectissimè admonet Apostolus Paulus, vt qui habent bona huius Mundi, tamquam non habentes sint, non de ijs gloriantur, non in illis confidunt, quia præterit figura huius mundi. 1. Corinth. 7. Velut somnium, inquit, surgentium, quod euigilando euanescit; sic tu Domine in ciuitate tua, quæ in nouissimo demonstrabitur, & aperietur, imaginem impiorum, id est, imaginariam eorum felicitatem ad nihilum rediges; umbratilis enim felicitas euanescet, cum vera felicitas apparebit. Iustè, inquit S. Augustinus, Deus in ciuitate sua cœlesti imaginem iniquorum ad nihilum rediget, qui in ciuitate sua imaginem Dei ad nihilum redigere fategerunt.

XXI. Quia inflammatum est cor meum & renes mei commutati sunt, & ego ad nihilum reductus sum, & nesciui.

XXII. Vt iumentum factus sum apud te & ego semper tecum.

XXIII. Tenuisti manum dexteram meam, & in voluntate tua deduxisti me, & cum gloria suscepisti me.

Exponit nunc Propheta, vnde noue-

rit solutionem questionis, & apud Deum multum profecerit. Quia inflammatum est cor meum. Causalis ista vox, quia, non reddit rationem superiorum, sed inferiorum, quæ habetur versiculo 13. Tenuisti manum dexteram meam. Quia, inquit, inflammatum est cor meum, in Deum videlicet, & renes mei commutati sunt, id est, affectio mea carnalis mutata est in spiritualem. Et ego ad nihilum reductus sum, & nesciui, id est, humiliatus sum, & ignorantiam meam confessus sum. Imò vt insipiens iumentum factus sum apud te, id est, obedire tibi sine contradictione constitui, & onus quodcumque portare decreui, more iumentum. Et ego semper tecum, id est, à fide, & charitate tua non recedam: propter has omnes virtutes meas, quæ dona tua sunt, tenuisti manum dexteram meam, ne fortè tentatio illa grauisima me aberrare faceret à te. Et in voluntate tua, id est, secundum beneplacitum tuum deduxisti me per viam rectam, & cum gloria suscepisti me in ciuitatem tuam, nunc quidem in spe, suscepturus postea in re. Illud, inflammatum est cor meum, aliqui exponunt in deteriorem partem, id est, exarsit indignatione cor meum; & sic etiam illud, ad nihilum reductus sum, & nesciui: exponunt de peccato, & ignorantia Dauidis; vt etiam illud, vt iumentum factus sum, exponunt de stultitia eiusdem, quod more brutorum non intellexerit mysteria diuina: sed nos in bonam partem cum S. Hieronymo, qui hæc omnia tribuit Christo, & ex parte cum S. Augustino, interpretati sumus, non præiudicantes aliorum commentarijs, si fortè lectoribus magis arrideant. Quod attinet ad verba, Sanctus Hieronymus ex hebræo vertit, Quia contractum est cor meum; nos cum græcis legimus, inflammatum est: & verisimile est Septuaginta Interpretes, non habuisse in suis codicibus hebraicis, itchamez, sed, itchanem. vltima litera immutata, hoc. n. significat calefactum est. Illud, renes mei commutati sunt. Sanctus Hieronymus ex hebræo vertit, Lubi mei velut ignis fuagis, quia

Ec 4 for-

יתחמץ
יתחמץ

אשתונן fortasse deriuauit vocem, est onan, ab, es, quod significat ignem. Sed eadem vox, est onan, rectius deriuatur à verbo, scianah, quod est mutare, & significat commutari sunt, vt Septuaginta Interpretes reddiderunt. Illud, & ego ad nihilū redactus sum, ex hebræo vertit S. Hieronymus, Et ego insipiens. & verè in hebræo non est nisi vna vox trium literarū, baar, pro trib. illis vocib. ad nihilum redactus sum. Significat autem, baar, insipientem, quasi iumentum. proinde illud, ad nihilū redactus sum, videtur exponendum, ad nihilum sapientia redactus sum, quasi iumentum factus sum ex homine, ac per hoc nihil hominis in me remansit: & videtur explicatio hæc confirmari per sequentia, & nesciui, & vt iumentum factus sum; quæ omnia dicuntur à Dauide ex profunda humilitate, qua se coram Deo insipientissimum esse iudicabat: quare nō repugnat hæc expositio accommodata ad verba hebraica, cum ea quam supra tradidimus ex simplici lectione latina, & græca.

X. XIV. Quid enim mihi est in cælo: & à te quid volui super terram?

Quia dixerat, cum gloria suscepisti me; oculo cordis in gloriam illam defixio ita raptus à spiritu est, vt iam omnia creata despiciat. Quid mihi, inquit, est in cælo? quid pulchri, quid preciosi est, quod appetam in cælo? aut à te quid volui super terram? quid pulchri, quid preciosi est, quod appetam, & à te expectem super terram? quasi dicat, Nihil creatū inuenio, quod mihi satisfaciat, nihil in quo cor meum penitus acquiescat, neque in cælo, neque in terra. In hebræo legitur, mi, non, ma, id est, quis mihi est in cælo, non, quid mihi est in cælo. Sed cum Septuaginta Interpretes, & ipse etiam S. Hieronymus verterint, quid; omnino retinenda est nostra lectio, ac dicendum in antiquis codicibus fuisse, ma, non, mi. Quod autem in hebræo sequitur, & tecum non volui

super terram. hunc sensum facit, nihil mihi est in cælo quod cupiam, super terram autem non volui quicquam etiam tecum, quia te solū habere desidero. Sensus igitur idem est, etiam si verba diuersa sint.

Defecit caro mea, & cor meū : XXV.
Deus cordis mei, & pars mea
Deus in æternum.

Redditerationem, cur nihil cupiat præter Deum, quia vbicunque posuerit cor suum, aut carnem suam, putrescent, & deficient, nisi quieuerint in Deo. Defecit, inquit, caro mea, & cor meum, si quando per amorem ea collocaui in creatis rebus, putruerunt, & corrupta sunt. Deus cordis mei, & pars mea Deus in æternum. In hebræo est petra cordis mei, & pars mea Deus in æternum, id est, Deus solus est petra, in qua quiescit securè cor meum, vt neq; cadere, neque deficere possit, ipse est centrum omnium desideriorum meorum: ipse est pars mea, portio mea, hæreditas mea, id totum quod præterdere possum in æternam: habeant alij partes alias, siue aurum, & argentum; siue delicias carnis; siue superba palatia: siue Regna, & Imperia; mihi Deus sufficit in hac vita, & in futura.

Quia ecce qui elongant se à te peribunt perdidisti omnes, qui fornicantur abs te. XXVI.

Rectè elegit consistere in Deo, petra sua: quoniam omnes, qui per iniquitatem separantur à Deo, peribunt omnino: quo modo perit corpus, cum separatur à spiritu; & ruit ædificium, cum subducitur fundamentum. Perdidisti omnes, qui fornicantur abs te: non solū pereunt, qui auertuntur à Deo, quia carent hoc ipso gratia Dei, quæ dat vitam animæ: sed etiam Deus zelotes est, & animas sibi prius desponsauit: & ideo grauissimè punit morte sempiterna eos, qui fornicantur.

micantur a Sponso tam bono, & tam potente.

XXVII. Mihi autem adhærere Deo bonum est, ponere in Domino Deo spem meam.

XXVIII. Ut annunciem omnes prædicationes tuas in portis filia Sion.

Concludit Psalmum dicens, Mihi adhærere Deo bonum est, id est, viderim alij quid eis bonum sit, mihi certè bonū est, vtile, iucundum, honorificum, adhærere Deo: & quoniam adhærere per amplexum in hac vita non datur; bonum mihi nunc est ponere in Domino Deo spem meam, id est, adhærere per spem, & in spe perfectæ adhæſionis interim gaudere. Ut annunciem omnes prædicationes tuas in portis filia Sion, id est, ut per hanc adhæſionem ad Deum, liberatus ab omni cupiditate terrena, totus occuper in laudibus eius, idque in portis filia Sion, coram multitudine fidelium, ut multos erudiam, quàm sit inane, & noxium adhærere temporalibus bonis, & quam bonum adhærere Deo, & ponere in Domino Deo spem suam. Illud, omnes prædicationes, in hebræo est, omnia opera tua: ex quo intelligimus, sensum esse, ut annunciem prædicationem operum tuorum, siue, ut prædicem omnia opera iustitiæ, & misericordiæ tuæ, unde, & tu lauderis, & populus erudiatur. Illud, in portis filia Sion; non est in hebræo, proinde, vel excidit, ut quædam alia, vel huc translatus

est ex Psalmo nono ver-

sic. 14. ubi habetur,

Ut annunciem

omnes

laudationes tuas in portis
filia Sion.

PSALMVS LXXIII.

Titulus, & Argumentum
Psalmi.

Intellectus Asaph.



In hoc Psalmo prædicitur, & deploratur desolatio Hierosolymæ: & ideo dicitur in titulo, Intellectus, siue, ut alij vertunt, eruditio Asaph; ut admo-

neantur Iudæi diligenter cogitare, & intelligere quæ in hoc Psalmo de ipsis dicuntur. Quæstio est inter expositores, an Psalmus intelligi debeat de persecutione Nabuchodonosor, an Antiochi: an Titi, & Vespasiani, an Diocletiani, & Maximiani, an Antichristi: nam his omnibus persecutionibus aliquo modo verba Psalmi applicari posse videntur. Sed verior sententia omnibus consideratis videtur eorum, qui hunc Psalmum exponunt de persecutione Antiochi illustris, de quo agitur in libris Machabæorum: aliæ enim aliorum sententiæ non videntur commodè sustineri posse. Nam tempore captiuitatis Babylonicæ non deerant Prophetæ: & tamen hic dicitur, Iam non est Prophetæ. Tempore Diocletiani non fuit populus Christianus repulsus a Deo, & derelictus in finem; sed contra multis miraculis illustratus, & propagatus. quod idè dici potest de tempore Antichristi: eminebit enim tunc Ecclesia in fortissimis Martyribus suis. hic autem dicitur, Ut quid Deus repulisti in finem? In tempore Titi, & Vespasiani omnia conuenire videntur: nam tunc nulli amplius erant Prophetæ in Israel, & templum incensum fuit; & facta est desolatio, quæ durabit vsque in finem, & ideo hanc expositionem amplexi sunt S. Augustinus, Theo-

Theodoretus, & Euthymius. Sed verba huius Psalmi non conueniunt Iudæis perfidis, qui non erant oues pascuæ Dei, neque verè confitebantur Domino; sed erant inimici, & rebelles: & tamen in hoc Psalmo dicitur, Iratus est furor tuus super oues pascuæ tuæ. & infra, Ne tradas bestiis animas confitentium tibi, & animas pauperum tuorum, ne obliuiscaris in finem: neque Ecclesia frequenter hunc Psalmum, si contineret voces infidelium Iudæorum. quare improbabilis est expositio Theodoreti, & Euthymij, qui verba Psalmi tribuunt populo Iudaico. Sanctus autem Augustinus aliqua tribuit Apostolis, aliqua Iudæis, alia alijs. Itaque si quis vniformem explanationem velit, & liberam ab omni scrupulo, eligat sententiam, quæ totum Psalmum ad literam exponit de persecutione Antiochi.

Explicatio Psalmi 73.

I. **V**T quid Deus repulisti in finem? iratus est furor tuus super oues pascuæ tuæ.

Deplorat sanctus Propheta in persona populi Iudaici vniuersalem illam calamitatem, qua totus populus Iudaicus miserrimè oppressus fuit a gentilibus sub Antiocho Rege, qui dictus est Epiphanes. Vt quid, inquit, tu Deus repulisti, supple, populum, in finem, id est, in æternum, & generaliter, quasi non amplius curaturus eum, aut pro populo tuo habiturus. Iratus est furor tuus, id est, accensus est furor tuus, super oues pascuæ tuæ, id est, contra populum tuum, quem singulari prouidentia regere solebas, vt Pastor proprias oues pascit, & regit. Illud, repulisti in finem; non significat re vera Deum, fixo decreto, repulisse in æternum populum suum; sed populum dubitasse, ne fortè reiectus esset in finem; & ideo lamentando dixisse, Vt quid repulisti in finem, id est, quare ita te geris, vt videaris repulisse in finem. Nam versu 20. cum dicitur in eodem Psalmo, Animas pauperum tuorum ne

obliuiscaris in finem; satis apparet, non fuisse certum, an essent repellendi in finem. Illud autem; Iratus est furor tuus; in hebræo. eleganti metaphora dicitur, Fumauit nasus tuus, quam metaphoram rectè explicauerunt Septuaginta Interpretes.

Memor esto congregationis tuæ, quam possedisti ab initio.

Orat idem populus Deum, vt non repellat in finem, adducens pro argumento, quod olim, id est, in egressu de Aegypto, ipse idem Deus populum Iudaicum congregauerit in formam populi, dās eis magistratus, & leges, & iudicia: quasi dicat, non videri bonum vt Deus dispergat, & abijciat eum populum, quem ipse congregauit, & cui formam Reipublicæ tribuit. Memor, inquit, esto congregationis tuæ, id est, populi a te congregati, quem possedisti ab initio, id est, qui nullum habuit Regem, & Dominum ante te, sed tu primus ab initio congregationis tuæ in vnā quasi Rempublicā, eum possedisti, vt Rex, & Dominus eius. Posset etiam illud, ab initio, referri ad Abraham, qui fuit Pater hebræorum: vel ad Seth, qui cœpit inuocare nomen Domini, & cuius filij dicebantur filij Dei ad distinctionem filiorum Cain, qui erant filij huius seculi. Sed congregatio, siue Synagoga propriè initium habuit sub Mose, vt dictum est.

Redemisti virgam hæreditatis tuæ, mons Sion, in quo habitasti in eo.

Hoc est alterum argumentum, quo probatur, æquum esse, vt Deus non repellat populum suum: quia non solum primus congregauit, & possedit eum; sed etiam in Regnum exaltauit, eijciēs Chananæos ex terra promissionis, & dans eam populo suo. Redemisti virgā hæreditatis tuæ, id est, acquisiisti bellādo sceptrum Regni terræ promissionis, & propriè redemisti eijciendo iniustos possessio-

possessores ab ea terra, quam promiserat Abraham, & nepotibus eius, filiis Israel. Dicitur autem, Virga hereditatis Domini; quia sceptrum illud, & Regnum terrae promissionis acquisiuit Deus pro hereditate sua, id est, pro populo suo peculiari, quem ut propriam hereditatem, possessionem, & partem sibi vendicabat. Alij tamen volunt hac parte versiculi significari, redemptum fuisse populum a servitute Aegyptiaca, & per virgā hereditatis suae, intelligi sceptrum Regni in populum Iudaicum, quem Deus in hereditatem sibi elegerat. Non desunt, qui per, virgam hereditatis, accipiant virgam dimensoriam, qua distinguebantur possessiones. Sed veteres, Augustinus, Theodoretus, & Euthymius, per virgam, nihil aliud nisi sceptrum Regium intelligi voluerunt. Illud, Mons Sion, in quo habitasti in eo; potest referri tum ad virgam, tum ad hereditatem. Itaque sensus erit, Mons Sion est virga, quam redemisti, id est, Mons Sion est Regnum, siue caput Regni tui, in quo habitasti, ut Rex in Regia ciuitate sua. Vel, Mons Sion est Regnum, siue caput Regni tui, in quo habitasti, ut Rex in Regno. prior sensus confirmatur ex Psalm. 109. Virgam virtutis tuae emittet Dominus ex Sion; posterior ex Psalm. 2. Ego autem constitutus sum Rex ab eo super Sion montem sanctum eius.

IV. Leua manus tuas in superbias eorum in finem, quanta malignatus est iniquus in sancto!

Propter causas iam dictas orat populus Dei, ut Deus conuertat manum suā in hostes populi sui, & confundat superbiam eorum in perpetuum, ut non audeant ultra erigere se contra seruos Dei. Fuisse autem Regem Antiochum superbissimum, testatur liber primus Machabaeorum cap. 1. Et intrauit, inquit, in sanctificationem cum superbia. & paulo post, Et locutus est, inquit, cum superbia magna. Quod attinet ad verba, S. Hieronymus ex hebraeo vertit, Sublimitas pedum tuorum dissipata est usque ad finem.

Et sensus esse videtur, quod arca Dei, vel sanctuarium, in quo tamquam in scabello excelsi solij stabant pedes Dei, dissipatum fuerit ab inimicis, & verba hebraica eum sensum ferre possunt. Sed rectè etiam verterunt Septuaginta, unde nostra lectio translata est. Nam vox, harima, significat eleua & etiam sublimitas; vox peamecha, significat, pedes tuos, vel pedum tuorum. Septuaginta verò transtulerunt, manus tuas, magis ad sensum quam ad verba respicientes. Et semper idem sensus est, siue dicamus, eleua pedes tuos, & contere superbiam eorum, siue eleua manum tuam, & depreme superbiam eorum. Vox, lemasuoth, si scribatur per scin ש, significat, ad dissipationes, & sic legit S. Hieronymus; si scribatur per sin ש, significat, superbias, & eleuationes, & sic legunt Septuaginta Interpretes. sequitur, Quanta malignatus est inimicus in sancto. Vbi redditur ratio, cur iustum sit, ut Deus compri-
mat superbiam inimici, quoniam multa mala fecit in sanctuario Dei: quae conueniunt aptissime Regi Antiocho, qui, ut legimus 1. Machab. 1. Spoliavit, & profanauit sanctuarium Dei, quod hoc loco sanctum appellatur. In hebraeo est, omne malum fecit inimicus in sanctuario. Sed Septuaginta expresse-
runt hunc sensum per admirationem, Quanta malignatus est, id est, quanta mala fecit inimicus in sancto: id est, in Sanctuario.

Et gloriati sunt, qui oderunt te V. in medio solemnitatis tuae.

Ex hoc loco praecipue deducunt aliqui, Psalmum hunc esse intelligendum de Tito, & Vespasiano, quoniam obsidere coeperunt Hierusalem in sollemnitate paschali: sicut enim Iudaei Christum occiderunt in Paschate, sic & ipsi occisi sunt in Paschate. Sed haec ratio non conuincit, tum quia non constat de qua sollemnitate loquatur hoc loco Dauid, nam multae erant Iudaeorum sollemnitates: tum quia vox hebraica, mohad, non solum significat tempus solemne, sed etiam locum sacrum, imò etiam pactum, ut Sā

חרמה
פ. עמך

למשואה

מועד

עליו

Etus Hieronymus vertit. Deniq; Titus, & Vespasianus non oderunt Deum Iudæorum, quem non nouerant, sed oderunt Iudæos factiosos, & rebelles, & sine dubio non euerterunt Hierusalem propter odium Dei, sed propter odium Iudæorum; quod idem dici potest de Rege Babylonis. Antiochus autem Deum Iudæorum oderat, & ceremonias legis, & conabatur omnes Iudæos peruertere, & inducere ad cultum idolorum, ut legimus 1. Machab. 1. Itaque de Antiocho, & militibus eius propriè dicitur, Et gloriati sunt, rugitu, & fremitu planè barbaro, ut sonat vox hebraica. Qui oderunt te, id est, qui oderunt sacra tua, & ceremonias legis tuæ; idque in medio solemnitate tuæ, id est, ingressi templum, & sanctuarium tuum, dum sacra solemniter peragerentur, ibi gloriati sunt, & fremuerunt (ut vertit S. Hieronymus) quasi victores capta præda.

Posuerunt signa sua signa, & (non cognouerunt) sicut in exitu super summum.

Clariùs hæc omnia vertit S. Hieronymus. Posuerunt, inquit, signa sua in trophæum, manifesta in introitu desuper, id est, posuerunt vexilla sua, quasi trophæa manifesta, in suprema parte portarum, vel turrium ciuitatis, unde intratur in urbem. Illud, non cognouerunt; legèdum est per parentesim, & in hebræo caret particula negante, & positum est secundum formam participij, ut S. Hieronymus vertit. Sed Septuaginta Interpretes in libris suis hebraicis inuenerunt negationem, & mutatis punctis, ac una litera transposita, pro, iuadag, legerunt, iadegu, cognouerunt, & addita negatione, non cognouerunt. Significat autem, non cognouerunt; hostes Dei non cognouisse quid facerent cum ciuitatem, & templum Dei omnipotentis ita prophanarent. Illud autem, quasi in exitu; in hebræo est, in introitu, sed exitus, & introitus idem sunt, nam unde intratur, inde etiam exitur. Aduerbiū, sicut, nō est in hebræo, sed additum est ab inter-

pretibus declarandi causa: verè enim signa non sunt posita in exitu, siue in introitu, sed quasi in exitu, id est, quasi in portis ipsis, id est, in locis publicis & notissimis.

Quasi in silua lignorum securibus exciderunt ianuas eius in idipsum in securi, & ascia deiecerunt eam. VII.

Pergit explicare mala, quæ fecerunt hostes in Hierusalem, ac dicit, ebs euerisse portas eius quasi in silua lignorum versarentur, securibus exciderunt ianuas eius, videlicet ciuitatis Hierusalé, in idipsum, id est, omnes simul, vno animo, vno conatu. In securi, & ascia deiecerunt eam, videlicet ipsam Hierusalé. Id autem fecit Antiochus, qui deiecit portas, & muros Hierusalem. Illud, exciderunt, in hebræo est, veat, quod S. Hieronymus vertit, & nunc; Septuaginta Interpretes venterunt, exciderunt: sed nisi aliquid addatur, vel mutetur, vox illa non significat, exciderunt, neque, & nunc. Itaque confiteendum est aliquid erroris esse in textu hebraico, qui vitio librariorum irrepserit. Et quidem qui vertunt, & nunc, addant vnam literam, & faciant, veatta, & nunc. Qui vertendum existimant, exciderunt, cum Septuaginta Interpretibus non conueniunt inter se, sed alij legunt, hathathu, alij, patth, alij aliter, quæ sunt valde diuersa ab illa voce, quæ est in textu hebraico: proinde existimarem posse legi, hauat, transponendo solum primam literam in secundum locum. Significat enim, hauat, inuertere, siue euertere, & peruertere, & sensus erit, Quasi in silua lignorum evertit, hostis videlicet, ianuas eius in idipsum, id est, simul & coniunctim.

Incenderunt igni sanctuarium tuum, in terra polluerunt tabernaculum nominis tui. VIII.

Hic vnicus locus videtur impedire, quominus Psalmus intelligatur de per-

secutione Antiochi, cui alioqui reliqua omnia aptissimè conueniunt. Sed meo iudicio hic locus non impedit: quamuis enim tempore Nabuchodonosor, & tpe Titi totum templum crematum, & euer sum fuerit, quod factum non est sub Antiocho: tamen tempore Antiochi portæ templi exustæ fuerunt: sic enim legimus 1. Machab. 4. Et viderunt Machabæi sanctificationem desertâ, & altare prophatum, & portas exustas, & in atrijs virgulta nata sicut in saltu, vel in montib., & pastophoria diruta. & paulò post loquens Scriptura de renouatione tēpli; Dedicauerunt, inquit, portas, & imposuerunt ianuas. Illud igitur, incenderunt igni sanctuarium; potest intelligi de parte, non de toto: & videtur id satis apertè colligi ex sequentibus: nam si totū sanctuarium concremassent, non diceret Dauid in altera parte versiculi, In terra polluerunt tabernaculum nominis tui; quod. n. crematum fuisset, pollui nō potuisset. Incenderunt ergo portas, & ipsū templum, seu tabernaculum polluerunt, ponentes in eo idolum abominationis, & sacrificantes idolis, vt dicitur 1. Mach. 1. Adde etiam quod in hebræo ad verbum dicitur, Posuerunt ignem in sanctuariū: quæ verba non significant totum sanctuarium fuisse exustum, sed aliquid eius: quid autem sanctuarij ex igne applicato consumptum fuerit: declaratur, (vt diximus 1. Machab. 4.) vbi dicuntur portæ fuisse exustæ, & a Machabæis reparatæ. Ait igitur, Incenderunt igni sanctuarium tuum, id est, hostes nostri tpe Antiochi iniecerunt ignē in sanctuariū, & portis eius exustis polluerunt idem sanctuarium, quod est habitaculum nomini tuo dicatum: polluerunt autem in terra, id est, polluerunt sanctuarium, quod habes in terra; quia cœleste tabernaculum polluere non potuerunt. Aliqui existimant, polluere tabernaculum in terra, esse, deijcere tabernaculū in terram, id est, funditus destruere: sed neque S. Hieronymus ex hebræo vertit, in terram, sed, in terra: & vox hebræa, chalal, nō significat deijcere, siue euertere, sed polluere, & contaminare, vt græci, latiniq. verterunt.

Dixerunt in corde suo cognatio eorum simul. Quiescere faciamus omnes dies festos Dei a terra. IX.

Hæc propriè conuenire videntur paganis, qui tempore Antiochi conati sūt totis viribus delere religionem veri Dei vt patet ex lib. 1. Machab. 1. Dixerunt, inquit, in corde suo, id est, decreuerunt apud se tota natio Gentilium, qui Antiocho seruiebant, dicentes, Quiescere faciamus omnes dies festos Dei a terra, id est, contamine mus sanctuarium, repleamus omnia idolis, tollamus omnia signa religionis, & hoc modo quiescent id est, deficient, & cessabunt omnes solemnitates Dei in terra Israel. Quod attinet ad verba, Sanctus Hieronymus in epist. ad Suniam, & Fretellam, testatur, se vertisse ex græco, vt habet nostra editio, Quiescere faciamus omnes dies festos Dei a terra; quamuis non ignoraret in hebræo esse, Incenderunt omnes dies festos Dei a terra: & in exaplis Origenis, versionem Septuaginta habere, Incendamus omnes dies festos Dei a terra; & monet has varias lectiones notandas fuisse ad marginem; sed antiquā lectionem non debuisse mutari. Itaque constat ex verbis Sancti Hieronymi, vnam lectionem græcam fuisse καταπαύσωμεν, quiescere faciamus: aliam autem κατακαύσωμεν, incendamus: sed quoniam Septuaginta Interpretes per vocem hebraicam, moad, non intellexerunt synagogas, vt nunc recentiores intelligunt, sed dies festos ^{ἡμέρας}; probabilissimum est, eos non vertisse, incendamus (vt sonat vox hebraica) sed, quiescere faciamus, vt verbum conueniret cum nomine; non. n. dies festi propriè incendi possunt, sed cessare, & tolli possunt: ac per hoc Septuaginta Interpretes non reddiderunt verbum, sed sensum, explicantes metaphoram verbi hebraici: neq. improbabile est, lectionem græcam postea fuisse mutatam, vt cum voce hebraica consentiret. At in exaplis erat, incendamus: & illa erat purissima lectio Septuaginta Interpretum. Respondeo, in exaplis,

exaplis, vt plurimum fuisse lectionem purissimam: sed non est necesse, vt vbi-que esset purissima: certè Ecclesia antiqua, & moderna magis probauit aliam lectionem; & S. Hieronymus apertè dicit, se vertisse ex editione Septuaginta, Quiescere faciamus; & sic monet esse psallendum, vt Septuaginta transulerunt.

X. Signa nostra nō vidimus, iam non est Propheta, & nos non cognoscet amplius.

Ponit nunc verba populi fidelis in tā afflictione penè desperantis de auxilio Dei. Et propriè conueniunt hæc in tempora Antiochi, quando & miracula antiqua, & Prophetarum oracula defecerant, vt videretur Deus non amplius cognoscere populum suum. quod de Babylonica captiuitate dici non potest eū eo tempore esset Hieremias in Hierusalem; & Daniel, & Ezechiel in Babylone. Neque possum probare quod aliqui dicunt, verba huius Psalmi, non dici a populo Iudaico, sed a Gentilibus. hæc enim est nimis dura expositio. At, inquit, Dan. 3, dicunt tres pueri, Et non est in tempore hoc Princeps, & Dux, & Propheta: igitur in captiuitate etiā Babylonica, non erat Propheta, ac per hoc de illa captiuitate possunt intelligi hæc verba, iam non est Propheta. Respondeo, antequam Hierusalem euerteretur a Nabuchodonosor, tempore Regis Ioachim, non fuisse in Babylone vllum Prophetam, & de illo tempore, & loco posse intelligi verba trium puerorum: sed eodem tempore erat in Hierusalem Hieremias Propheta, & post captam, & euersam Hierusalem, toto tempore captiuitatis fuerunt in captiuitate Babylonica Daniel, & Ezechiel Prophetæ: Ezechiel enim cœpit prophetare anno quinto captiuitatis Ioachim Regis, qui fuit annus sextus ante euerfionem Hierosolymæ, & perseuerauit prophetare vsq; ad annum vicesimum quintum captiuitatis, vt dicitur Ezechiel. 40. Daniel autem Propheta fuit in Babylone ab anno

primo Nabuchodonosor, vsque ad annum primum Cyri, id est, toto tempore captiuitatis, vt dicitur Dan. 1. & prophetare cœpit adhuc adulescens; successerunt autem Danieli Aggæus, & Zacharias propheta. Porro Psalmus præsens eū dicit, iam non est Propheta, loquitur de tempore post Hierusalem vastatam, & templum prophanatum, ac per hoc non loquitur de captiuitate Babylonica, in qua nunquam defuerunt Propheta post ciuitatem vastatam, & templum incensum: sed de persecutione Antiochi, quo tempore defecerunt omnino Propheta.

Vsquequo Deus improperebit XL inimicus? irritat aduersarius nomen tuum in finem.

Pergit populus Dei exorare Dei clementiam, vt memor populi sui conuertat iram in aduersarios, qui improperebant Deo infirmitatem, quasi non valeret saluare populum suum. Hæc videtur dici de Nicanore, qui superbè irridebat populum Dei, & irritabat nomē Domini, vt dicitur lib. 1. Machab. cap. 7. Et de ipso Rege Antiocho, & Rege Demetrio, & Ducibus eorum inimicis Dei, & populi sui, vt cognosci potest, ex 1. & 2. lib. Machab.

Vt quid auertis manum tuam XII & dexteram tuam de medio sinu tuo in finem?

Orauerat populus Deum, vt irasceretur in hostes suos: nunc orat, vt completur populum suum, vt antea faciebat & nō excludat a sinu suo paterno filios suos. Vt quid, inquit, auertis manum tuā sinistram videlicet, & dexteram tuā de medio sinu tuo, vt videlicet finas nos cadere a sinu tuo, vel non completaris in sinu tuo, in finem, id est, in perpetuum: qui enim completitur aliquem, admouet vtramque manum ad sinum: qui reijcit, vel non vult completi, manus a sinu remouet. hæc mihi videtur literalis expositio.

expositio. Alij existimant, auertere manum a sinu, significare, non velle bona, quæ sunt in sinu, communicare cū alijs, intelligentes per sinum Dei, thesaurum bonorum omnium, qui est apud Deum. Omitto aliam expositionem, quod auertere manum a sinu, sit manus post tergū conuertere, in signum negantis auxiliū. Pro, in finem, in hebræo est, calle, quam vocem S. Hieronymus vertit, consumens: sed potest optimè verti perfectè, & absolutè, quod est idem cum, in finē, præsertim si deducatur a verbo, calal, quod est perficere. vnde, calla, sponsa, quia perfectæ omni decore, & ornatu esse solet.

כלל
כלל
כלל
XIII.

Deus autem Rex noster ante secula, operatus est salutem in medio terræ.

Communis expositio literalis est, in hoc versu, & quinque sequentibus explicari potentiam, quam olim Deus ostendit tum in liberatione filiorum Israel de Aegypto, tum in creatione mundi; vt ostendat, posse Deum, si velit, liberare eosdem filios Israel a presenti calamitate. Deus, inquit, Rex noster a seculo, id est, Deus Rex noster, qui est ante secula Deus, operatus est salutem, Iudæorum videlicet, in medio terræ, id est, in terra promissionis, in quam eos introduxit, ex captiuitate Pharaonica. Illud, ante secula, coniungit quidam auctor cum verbo operatus est salutem: sed repugnant omnes codices hebræi, græci, & latini. Omnes enim distinctionem ponunt post vocem, secula: neque intelligi potest quomodo Deus ante secula operatus sit salutem in medio terræ, cū terra nō fuerit ante secula: neque testimoniū, quod ille adducit ex Isaia pro ipso facit: aliud enim est a seculo, quod habetur in Isaia, aliud, ante secula, quod hic habetur. Multo aptius Sanctus Augustinus coniungit cum voce, Deus, vt sensus sit, Rex noster, qui est ante secula Deus. Illud, in medio terræ, exponunt nonnulli, publice, & palam, quod non improbo. Sed etiam verum est, Palæstinam esse in me-

dio terræ olim notæ, & habitabilis: nam est in finibus Asiæ, Africa, & Europæ; vt verè dici possit esse in medio Asiæ, Africa, & Europæ. Vnde etiam opus Redemptionis operatus est Saluator noster in medio terræ, vt commodissimè deferretur eius prædicatio ad omnes tres partes orbis terrarum.

Tu confirmasti in virtute tua mare, contribulasti capita draconum in aquis.

Explicat, quomodo Deus operatus sit salutem Iudæorum, & ait, Tu Deus confirmasti mare in virtute tua, id est, potentia tua fecisti, vt mare rubrum firmissimè quasi murus confisteret, dum transirent per medium eius diuina virtute siccatum filij Israel. Et eadem potentia obruisti in aquis eiusdem maris, ad locum suum reuocatis, capita Aegyptiorum, qui instar draconum filios Israel insequabantur. In hebræo habetur, Dissipasti, siue rupisti, & diuisti in virtute tua mare: sed Septuaginta Interpretes docere voluerunt, mare rubrum ita diuisum, & disruptum fuisse, vt firmissimè diuisum maneret dum transiret populus Dei, quasi dicerent, Tu diuisum mare confirmasti. Illud, contribulasti, est in hebræo, contriuiisti, siue confregisti: sed Septuaginta Interpretes explicauerunt metaphoram: qui enim suffocantur in aquis, non propriè pereunt ex contritione capitis: quod ergo hebraice dictū est, Contriuiisti capita draconum, id est, intermisti draconem; Septuaginta dixerūt, Contribulasti capita draconum, id est, mortifera tribulatione affecisti capita draconum.

Tu confregisti capita draconis, dedisti eum escā populis Aethiopum.

Hunc versum propriè ad Pharzonem referunt ferè omnes expositores: nam in hebræo, non est idem nomen draconis in hoc versu, & in superiore. In hoc enim

enim versiculo est, *Leuiatan*, qui draco maximus, & princeps draconum marinarum est. Illud autem, *Dedisti eum escam populis Aethiopum*, significat secundum aliquos, Regnum Aegypti post submersionem Pharaonis datum fuisse in praedam Aethiopibus: secundum alios, ipsum Pharaonem, & capita eius, id est, Principes eius mortuos, & ad littus eiectos fuisse spoliatos ab Arabibus, qui in Scriptura Aethiopes dicuntur. Denique secundum alios, ipsum Pharaonem mortuum, & in littore expositum factum esse escam coruis, qui a nigrore dicuntur populi Aethiopum. Non multum refert quid propriè his verbis significetur, dum constet explicari penam de Pharaone sumptam.

catus es auroram, & solem, id est, tu fecisti initio lucem, similem auroræ, deinde quarto die fecisti Solem, ut distingueret dies, & noctes. In hebræo non est nomen auroræ, sed nomen luminis, siue lucis, ut etiam in græco textu. Et quidem multi per lumen hoc, intelligunt Lunam, ut sensus sit, Tu fecisti Lunam & Solem: & quoniam hic videbatur inuersus ordo, correxerunt aliqui & fecerunt, Solem, & Lunam, & sic legit S. Augustinus: sed Interpres noster rectissimè vertit Auroram, & Solem: quoniam explicare voluit, lucem, quam Deus initio creauit, non fuisse Solis, neque Lunæ, sed simplicem lucem, quæ præcedebat Solis creationem, quasi quædam aurora mundi.

XVI. Tu dirupisti fontes, & torrentes, tu siccasti fluuios *Ethan*.

Hic iam describitur potètia Dei, quæ paulò post in deserto ex petra excitauit fontem, & riuum aquæ iuxta fluminis: & deinde siccauit Iordanem, ut populus transiret in terram sibi promissam. Tu dirupisti fontes, id est, dirupta petra fecisti scaturire fontes, & torrentes. Tu siccasti fluuios *Ethan*, id est, siccasti flumen Iordanis, quod flumen maximum est. *Hethan* enim, fortem significat, unde S. Hieronymus vertit, flumina fortia. Sed Interpretes cæteri relinquere maluerunt ipsam vocem hebraicam non interpretatam.

XVII. Tuus est dies, & tua est nox, tu fabricatus es auroram, & solem.

Transit ad potentiam, quam Deus in creatione monstrauit: & quoniam creatio in summa complectitur duas partes principales, cælum, & terram, iuxta illud, In principio creauit Deus cælum, & terram: de his duabus partibus tantum loquitur. Tuus, inquit, est dies, & tua est nox, & reddens rationem addit, tu fabri-

Tu fecisti omnes terminos terræ, æstatem, & ver tu plasmasti ea. **XVIII.**

Attigit creationem cæli mentione facta lucis, & Solis: nunc attingit creationem terræ, dicens, Tu fecisti omnes terminos terræ, id est, tu fecisti totam terram usque ad omnes eius ultimos fines, id est, ab ortu ad occasum, ab Aquilone ad Austrum. *Æstatem*, & *Ver* tu plasmasti, id est, tu fecisti vicissitudines temporum, in quibus terra nunc fructus concipit, nunc parit: nam in fine æstatis, id est, in Septembri in terra promissionis reconduntur omnes fructus: & tunc incipit terra iterum concipere, & præparare se ad nouum partum: & initio Veris iterum incipit parere flores, ac deinde fructus. Sanctus Hieronymus vertit, *Æstatem*, & *Hiemem* tu plasmasti: & verè vox hebraica, *choreph*, *Hiemem* significat, ut perspicuum est ex capit. 8. versic. 22. *Genesios*. Et ideo existimamus hic accipiendam esse æstatem, pro fine æstatis, quæ terra deposito onere iterum concipere incipit: & *Ver* pro fine hiemis, siue initio Veris, quando flores apparere incipiunt.

הָרַף

Memor

XIX. Memor esto huius, inimicus improperauit Domino: & populus insipiens incitauit nomen tuum.

Explicata potentia Dei,redit ad orationē,ac precatur, vt Deus dignetur recordari, quemadmodum inimicus blasphemauerit Deum, quasi impotentem, & infirmum. Videntur autē verba huius versiculi, & ceterorum vsque in finem alludere ad superbiam Antiochi, de qua dicitur lib. 1. Machab. cap. 1. Et locutus est cum superbia magna. & lib. 2. cap. 5. cum dixisset Scriptura, Antiochum indignē contrectasse sacra vasa, & templum diripuisse, addit, Igitur Antiochus mille, & octingentis ablatis a templo talentis, velociter Antiochiam reuersus est, existimans se prae superbia terram ad nauigandum, pelagus verò ad iter agendum deducturum propter mentis elationem. Ait igitur Psalmista, Memor esto huius, id est, recordare Domine huius rei, quam dicturus sum. Inimicus improperauit Domino: id est, hostis noster improperauit tibi Domino impotentiam: & populus eius insipiens incitauit blasphemando nomen tuum.

XX. Ne tradas bestiis animas confitentes tibi, & animas pauperum tuorum ne obliuiscaris in finem.

Hinc etiā cognosci potest hunc Psalmum scriptum esse magis contra Antiochum, quàm contra Nabuchodonosor, vel Titum, aut Vespasianum: siquidem tempore Antiochi saepe fuerunt in maximo periculo Iudaei, ne omnino in manus eius deuenirent, & vel occiderentur omnes, vel captiui abducerentur: & ideò orabant, vt non traderentur bestiis deuorandi, id est, Antiocho, & militibus eius penitus destruendi; sicut reuera nunquam fuerunt vniuersaliter ab Antiocho subiugati. At Nabuchodonosor, & Titus, & Vespasianus vniuersaliter. Beilarm. in Psalm.

ter Iudaeos oppresserunt partim occidendo, partim captiuos abducendo. Ne tradas, inquit, bestiis, id est, hominibus insipientibus, & crudelibus more ferarum, animas confitentes tibi, id est, homines, qui te colunt, & confitentur laudes tuas: & easdem animas pauperum tuorum ne obliuiscaris in finem, id est, ne obliuiscaris defendere, & liberare animas pauperum tuorum, qui ad ianuā misericordiae tuae panem mendicant. In hebraeo, pro, confitentes tibi; nunc est, thoreca, quod S. Hieronymus vertit, Eruditos in lege tua, alij, Turturis tuae: sed Septuaginta Interpretes non legunt, thoreca, sed, thodecha, fuit autem facillimum librarijs ob similitudinem litterarum, res, & daleth, scribere, thoreca, pro, thodecha: neque est causa, cur anteponamus textum, quem nunc habemus, textui, quem habuerunt Septuaginta Interpretes: neque est in sensu diuersitas: nam per turturem posset intelligi populus Dei gemens, & confitens Deo tribulationem suam.

תור
חורף

Respice in testamētum tuum, XXI. quia repleti sunt qui obscurati sunt terrae domibus iniquitatum.

Adducit duo alia argumenta ad placandum Deum, vnum ex parte fœderis initi cum Patribus, alterum ex iniquitate aduersariorum, qui cum essent homines vilissimi obtinebant iniuste palatia ipsorum. Respice, inquit, in testamētum tuum, si non vis nos respicere, saltem respice pactum, siue testamētum, quod fecisti cum Patribus nostris, vt esses nobis in Deum, nosq. protegeres, atque defenderes in terra, quā nobis dedisti. Quoniam qui obscurati sunt terrae, id est, qui obscuri sunt in terra, viles, & barbari homines. Repleti sunt domibus iniquitatum, id est, abundant iam domibus, siue palatijs iniquē nobis ereptis. Illud, obscurati terrae, obscurum est, & ideò varijs modis exponitur; sed res non est magni momēti, & facile est, vt latinus Interpres dixerit, obscurati,

rati, pro, obscuro. Obscuro autem terra, iudicantur, qui non sunt ullius nominis in terra. Illud autem domibus, in hebræo, non est domibus, sed habitationibus desiderabilibus, & pulchris, qualia sunt egressa palatia.

XXII. Ne auertatur humilis factus confusus: pauper, & inops laudabunt nomen tuum.

Pergit in oratione, ac petit ne humilis populus cogatur reuerti ab orando Deo confusus, si non impetrauerit, quod postulat: & rationem reddit cur non debeat dimitti confusus, quoniam ipse est, qui laudare solet nomen Domini. Ne auertatur, quasi a te repulsus, & reiectus, humilis factus confusus, id est, ne auertatur confusus is qui se humiliat coram te. Illud enim, factus, coniungitur cum voce, humilis; vnica enim vox est tum in hebræo, tum in græco, pro eo quod nos habemus, humilis factus. Pauper, & inops laudabunt nomen tuum, id est, ne dimittas humilem confusum, quoniam humilis, qualis est pauper, & inops, laudabunt nomen tuum, quod a diuitibus, & superbis despicitur.

XXIII. Exurge Deus iudica causam tuam, memor esto imperiorum tuorum, eorum quæ ab insipiente sunt tota die.

Addit aliam rationem, quoniam causa populi est causa Dei; quoniam impropria, quæ dicuntur ab inimicis, in ipsum Deum recidunt. Exurge, inquit, Deus, iudica causam tuam, id est, defende causam tuam: nam in hebræo est ad verbum litiga litem tuam, hoc est, sis tu patronus causæ tuæ. Memor esto imperiorum tuorum, quæ ab insipiente sunt tota die, id est, quæ iugiter in te iactantur ab insipientibus populis, inimicis tuis. Illud, iudica causam tuam, quamuis ad litteram ex hebræo significet, litiga litem tuam; tamen quia Deus non potest litigare nisi apud tribunal iustitiæ suæ, cum

non habeat superiorem, ideo ad ipsum pertinet iudicare, id est, iudicium ferre de lite, quam habet cum iniquis: proinde rectè versio Septuaginta, & vulgata editionis habet, iudica causam tuam. Sanctus Augustinus legit, Iudica causam meam: sed nescio quid secutus sit: nam hebræus, & græcus codex habet secundam personam, & sic inuenitur in latinis libris.

Ne obliuiscaris voces inimicorum tuorum: superbia eorum qui te oderunt, ascendit semper.

Concludit rogans Deum, ut non obliuiscatur punire hostes suos, quia illi non obliuiscuntur peccare. Ne obliuiscaris, inquit, voces inimicorum tuorum, id est, ne impunitas dimittas blasphemias inimicorum tuorum: quoniam superbia eorum, qui te oderunt, ascendit semper, id est, superbiæ voces inimicorum tuorum, nunquam cessant, sed iugiter ascendant a linguis eorum, tamquam scintillæ a fornace maligni cordis eorum. Illud, inimicorum, in græcis libris est, seruorum, siue supplicum tuorum; & sic etiam legit S. Augustinus. Sed in hebræo est, inimicorum, & sic etiam vertisse Septuaginta Interpretes testatur sanctus Hieronymus in epist. ad Suniam, & Fretellam: proinde necesse est in textibus græcis irrepsisse errorem, & positum esse *seruorum*, pro, *inimicorum*.

Illud, superbia eorum, in hebræo est, sonitus, siue tumultus insurgentium in te. Ex quo intelligimus, per, superbiam, hoc loco accipiendam esse vocem superbam, & elatam, ut diximus.

SPALMVS LXXIII.

Titulus, & Argumentum.

In finem, ne corrumpas, Psalmus
cantici Asaph.



Mnes partes huius tituli sunt alibi explicatae; si tamen planè explicari possunt. Tanta est enim titulorum obscuritas, ut diuinatore opus sit potius, quam explicatore. Argumentum est admonitio ad humanum genus, ut iuste viuant omnes, & superbiae tumorem deponant, quoniam imminet iudicium Dei seuerissimum, atque iustissimum. Videtur autem Psalmus compositus per modum dialogismi: quamuis non indicetur mutatio personarum, nisi per ipsa verba, quae nunc populi iustorum, nunc Prophetæ, nunc Dei esse ipsa se produnt.

Explicatio Psalmi 74.

- I. Confitebimur tibi Deus: confitebimur, & inuocabimus nomen tuum.
- II. Narrabimus mirabilia tua.

Vox est populi electi, qui ex notitia Dei, quam habet præ cæteris hominibus, dicit, suum officium esse laudare, orare, & prædicare Deum. Confitebimur, inquit, tibi, id est, laudabimus te; confitebimur, & inuocabimus nomen tuum, id est, non solum laudabimus in hac vita, sed etiam inuocabimus: pura enim laudatio non est vitæ præsentis, sed futuræ. Narrabimus mirabilia tua, id est, non solum laudabimus in corde

nostro, & orabimus, sed etiam prædicabimus alijs omnibus mirabilia opera tua, ut etiam cæteri discant timere, & amare te. Quod attinet ad verba, non levis difficultas est. Nam in hebræo pro, inuocabimus nomen tuum; legitur ad verbum, Et propinquum nomen tuum. Verisimile est Septuaginta legisse, vērō besimacha, & inuocare in nomine tuo: non autem, ut nunc habetur, vērōb scemecha, & propinquum nomen tuum. Facile enim fuit librarijs coniungere literam primam vocabuli sequentis cum vltima præcedentis. Cum accepere tempus. ego iustitias iudicabo. Hæc est pars versiculi secundi, & continet verba Dei summi Iudicis, qui approbat verba iustorum, promittit suo tempore, se redditurum illis præmium, ut etiam impijs non confitentibus, nec inuocantibus, pœnam. Cum, inquit, accipere tempus, id est, cum venerit hora ab æternitate determinata iudicij mei, tunc ego iustitias iudicabo, id est, iustissime, siue rectissime iudicabo. Diem iudicij, ut etiam horam, esse certò definita, docet Apostolus Act. 17. Nunc, inquit, annunciat hominibus, ut omnes ubique pœnitentiam agant, eo quod statuit diem, in quo iudicaturus est orbem in æquitate in viro, quem statuit, fidem præbens omnibus suscitans eum a morte: docet S. Ioannes in Apocalypsi cap. 14. Time Deum, & date illi honorem, quia venit hora iudicij eius. Magnæ gratiæ, ut inquit S. Augustinus, agendæ sunt Deo, quod non statim post peccatum iudicat sed expectat homines ad pœnitentiam, interim exhortari, & inuitare non cessans multis, & varijs modis, donec statuta dies, & hora adueniat. Illud, iustitias iudicabo, non significat, Deum iudicatum opera iusta, ut aliqui existimant, sed Deum rectè iudicaturum: nam eadē vox hebræa, mesciarim, habetur in Psalmo 75. Si verè utique iustitiam loquimini recta iudicate filij hominum. Quod hic dixit iustitias, ibi dixit, recta, & sicut ibi sensus est, Iustam sententiā proferetis: ita hic sensus est, Iustam sententiā proferam.

וְקָרַב
בְּשֵׁמֶךְ
וְקָרַב
שֵׁמֶךְ

מִשְׁתָּרִים

III. Liquefacta est terra, & omnes qui habitant in ea ego confirmaui columnas eius.

Iterum loquitur populus iustorum dicens, Si iuste iudicabis Domine, quis sustinebit? nam liquefacta est terra, id est, defluxit, corrupta est, dissipata est propter iniquitates habitantium in ea; & omnes habitantes in ea defluerunt, & corrupti sunt, non est qui faciat bonum, non est usque ad vnum. Respondet Dominus, Ego confirmaui columnas eius. Quasi dicat, non omnis terra omnino corrupta est: nam ego confirmaui columnas eius, viros perfectos, ob quos terra subsistit. semper enim habuit Deus seruos suos electos & perfectos. Nā Gen. 6 ubi dicitur terra corrupta ob iniquitates inhabitantium; ibi dicitur, Noe vir iustus, atque perfectus.

IIII. Dixi iniquis, nolite iniquè agere, & delinquentibus, nolite exaltare cornu.

V. Nolite extollere in altum cornu vestrum, nolite loqui aduersus Deum iniquitatem.

Nunc iam loquitur Propheta vt vnus de numero iustorum, & admonet iniquos vt desināt ab iniquitate, cum adhuc spes remaneat salutis; & propterea differatur iudicium, vt locus sit penitentiae. Dixi, inquit, iniquis, nolite iniquè agere, id est, nolite perseuerare in iniquitate. Verba hebraica possent etiam verti, Dixi stultis, nolite stultescere: sed quamquā interpretatio Septuaginta Seniorum optima est, quam etiam in sua versione secutus est S. Hieronymus, tamen vtrāque vera est. Omnes. n. iniqui stulti sunt, cum errent a vero itinere, & ridentes, ac ludentes ruant in praecipitium. Addit Propheta, Et delinquentibus, nolite exaltare cornu, id est, dixi delinquentibus, nolite gloriari in iniquitate, nolite superbe defendere peccata vestra. Cornu. n.

superbiam significat, & illi longius a salute recedunt, qui nō solum peccāt, sed etiam gloriantur, cum malefecerint, & laudari volunt in sceleribus suis. Nolite extollere in altum cornu vestrum, id est nolite in profundum malorum tam altè descendere, vt etiam Deum contemnatis, & in ipsum Deum verba blasphemiae euomatis. Vox hebraea, vt nunc legitur, non habet, aduersus Deum, sed, vt S. Hieronymus vertit, in ceruice veteri, vel vt alij legunt, collo duro. Sed Septuaginta nō videtur legisse, betsauar, sed, betsur, quod est vnum ex nominibus Dei, & propriè significat petram, quia Deus fortissimus est: & per vocem, athac, quae significat durum, non intellexerunt Septuaginta collum durum, sed verba dura, & iniqua, & ideò verterunt, Nolite loqui aduersus petram verba dura, & iniqua, id est, aduersus Deum fortissimum verba dura, id est, iniqua, quales sunt blasphemiae. Et sanè eleganter alludit Propheta a verbis duris ad petram duram; quasi dicat, Nolite contendere verbis duris cum Deo, qui est petra durissima, quia petra conteret vos, & verba vestra inania esse monstrabit.

בצור
בצור
ע. ת. ק.

Quia neque ab oriente, neque VI ab occidente, neque a desertis montibus; quoniam Deus Iudex est.

Reddit rationem, cur non oporteat aduersus Deum loqui iniquitatem; quia videlicet ab illius iudicio nunquam erit effugium: non enim ab oriente iudicabit vt possis fugere in occidentem: neque ab occidente, vt possis latere in oriente: neque a desertis montibus, vt abscondas te in aliqua valle inter arborum ramos. Iste enim Iudex Deus est, qui vbiq̃ue est & nullo excluditur loco, cum nullū occupet locum. Ita sanctus Augustinus. Alij exponunt, quia neque ab oriente expectandum est auxilium, neque ab occidente, neque a desertis montium, quia Deus Iudex est, cui nemo resistere potest.

Hunc

VII. Hunc humiliat, & hunc exaltat quia calix in manu Domini vini meri plenus mixto.

VIII. Et inclinavit ex hoc in hoc: verumtamen fœx eius non est exinanita: bibent omnes peccatores terræ.

Dixerat non esse effugium a iudicio Dei; nunc declarat dicens, Hunc humiliat, superbum videlicet; & hunc exaltat, scilicet humilem. Quia calix in manu Domini vini meri, id est, quia in potestate Dei est iustitia vindicativa, quæ dñ peccatores superbos punit simul exaltat, & consolatur iustos humiles, quos ab oppressione impiorum liberat. Porro calix vini meri, dicitur iustitia vindicativa in Scripturis passim, vt Isaia 51. Hieremias 15. Threnorum 4. Ezechielis 23. Apocalypsis 14. & alibi. Ratio huius metaphoræ est, quoniam vinum merum eorum debilitat adeo totum hominem, vt nec sciat, nec possit se iuuare: ebrius enim amittit iudicium, tremat, cadit, soporatur. Qui punitur ab homine sæpè remedium habet, vel fauoris, vel fugæ, vel violentiæ: qui autem punitur a Deo, tamquam multo vino mero inebriatus repente cadit, & omni prorsus remedio caret. Addit Propheta, Plenus misto, id est, plenus est calix Domini non simplici vino vnius generis, sed mixture variorum generum vini meri, qua mixture non temperatur visum, sed fortius redditur. Id significat, iustitiam Dei vindicativam abundare multitudine, & varietate peccatorum. Ignis, & sulphur, & spiritus procellarum pars calicis eorum, Psal. 10. Alij dicunt, vinum calicis Dei dici mistum, quia turbidum, aut fæculentum. Alij mistum interpretantur, infusum, quia miscere vinum, aliquando significat, infundere. Alij fingunt duos calices, vnum plenum mero, alium plenum misto. Sed quod nos diximus probabilius videtur, & plures habet auctores. Et inclinavit ex hoc in hoc, id est, iam Deus propinavit multis hunc calicem iræ suæ, inclina-

vit calicem ex hoc ore in hoc os, transfudit ad varias gentes, puniuit Sodomitas, Chaldaeos, Aegyptios, & alios. Verumtamen fœx eius non est exinanita, id est, adhuc remanet grauissima pars iustitiæ vindicativæ, quæ seruatur in diem ultimi Iudicii: & tunc ex ea bibent omnes peccatores terræ. Tunc enim non erit amplius locus misericordiæ, sed omnes, qui peccatores in illa die inuenientur, cogentur bibere fœces calicis iræ Domini.

Ego autem annuntiabo in seculum, cantabo Deo Iacob.

Vox hæc Propheta est, qui descripto iudicio Dei, & supplicio impiorum, pollicetur se annuntiaturum laudes Dei in æternum. Illi, inquit, bibent calicem iræ Dei: ego autem liberatus per gratiā Dei, annuntiabo in seculum. deinde declarans, quomodo annuntiabit, Cantabo, inquit, Deo Iacob: hæc erit annuntiatio mea hymnus laudis, & gratiarum actionis Deo Iacob, quem in æternum cantabo.

Et omnia cornua peccatorum confringam, & exaltabuntur cornua iusti.

Hæc verò Dei vox est, qui subiungit, & concludit Psalmum, dicens, Et ego confringam omnia cornua peccatorum, omnem superbiam, omnem gloriam, omnem potentiam. Et exaltabuntur cornua iusti; & faciam, vt exaltetur gloria, & potentia iusti cuiuscunque, sed præcipue Christi, qui sic fuit eminenter iustus, vt multos iustificauerit, vt dicitur Isaia 53. Iustificabit ipse iustus seruus meus multos. Posset hic versiculus coniungi cum superiore, ita vt Propheta intelligatur vtrumque dicere, Annuntiabo in seculum, & omnia cornua peccatorum confringam. Dicitur enim confringere cornua peccatorum non solum, qui re ipsa peccatores humiliat, sed etiam qui denunciat peccatores hu-

miliados esse; ad quem modum dicitur Hieremias constitutus super gentes, & Regna, ut destruat, & euellat, & aedificet, & plantet. Hierem. 1. Videtur tamē prior expositio magis accommodata huic Psalmo, qui secundum formam dialogismi compositus est, ut S. Hieronymus in Commentario docet.

PSALMVS LXXV.

Titulus, & Argumentum.

In finem, in laudibus Psalmus Asaph, canticum ad Assyrios.



Propter vltima verba Tituli, canticum ad Assyrios, quæ nō sunt in codice hebraico; existimant Theodoretus, Euthymius, & multi recentiores in hoc Psalmo prædici victoriam, quam obtinuit Ezechias de Sennacherib Rege Assyriorum. Sed non dubium est, altiore sensu prædici victoriam electorum Dei aduersus omnes hostes tum visibiles, tum inuisibiles.

Explicatio Psalmi 75.

Notus in Iudæa Deus, in Israel magnum nomen eius.

Propter hæc verba valdē superbiunt carnales Iudæi, sed frustra. Notus enim erat Deus in Iudæa terrena, quando in ea degebant Prophetæ, & populus Prophetis aequiescens: & pari ratione in Israel secundum carnem magnum erat nomen Dei, quando populus Israel non solum carne, sed etiam corde circumcidebatur: sed posteaquam Dei filium, quem omnes Prophetæ annuntiauerant, negauerunt, & eius populus esse desierunt; non est amplius in Iudæa terrena notus

Deus; neque in Israel secundum carnem, magnum est nomen eius. Quia tamen hic Psalmus in titulo habet, in finem, & ideo respicit Christum, qui est finis legis, & usque in finem mundi canendus est: nunc etiam verum est, & semper erit verum, quod hic dicitur, Notus in Iudæa Deus, in Israel magnum nomen eius. Sed per Iudæam Ecclesia accipienda est, in qua sunt veri Iudæi, circumcisi corde, non carne. de quibus Apostolus ad Rom. 2. Non qui in manifesto Iudæus est, neque, quæ in manifesto in carne est circumcisio: sed qui in abscondito Iudæus est, & circumcisio cordis in spiritu, non litera. Et capit. 9. Non omnes, qui ex Israel, hi sunt Israelitæ, &c. In Ecclesia igitur Christiana notus Deus est, & in populo Christiano magnum est nomen eius. maior enim sapientia est in paruulis Christianis callētibz breuissimum Catechismum, quam olim fuerit in Philosophis Gētiū, vel in magistris in Israel. Sed præcipuē notus Deus est viris perfectis in Ecclesia Dei, qui totos se contemplationi rerum diuinarum dediderūt, & ex contemplatione in confessionem diuinæ magnitudinis toto corde erumpunt. Iudæa enim confessionem significat.

Et factus est in pace locus eius II.
& habitatio eius in Sion.

Ad literam redditur ratio, cur in Iudæa potius, quā in alijs locis olim Deus notus esset: quia videlicet Hierusalem, Quasi Regiam suam, & Sion, quasi arcē sibi Deus elegerat. Et factus est, inquit, in pace locus eius, id est, Deus elegit sibi locum peculiarem, in quo tabernaculum suum collocaret, in ciuitate Salem, quæ pacem significat. Et habitatio eius in Sion, id est, elegit sibi habitationem in Sion, quæ est pars altissima, & nobilissima ciuitatis Hierusalem. In hebræo pro, in pace, habetur, in Salem, quod est nomen ciuitatis Hierosolymæ: sed Septuaginta interpretati sunt nomen, & ideo verterunt in pace: nam, ut dicitur ad Hebr. 7. Rex Salem, est Rex pacis. Itaque

Itaque hoc loco ad literam, in pace, non significat virtutem, sed ciuitatem: quod satis facile intelligitur ex verbis sequentibus, Et habitatio eius in Sion. Sed altiore sensu significatur, ideo Deum notum esse viris perfectis, quia Deus præcipue habitat in mentibus pacem habentium, & contemplantium: nam vt Salem significat pacem: ita Sion speculam. Et nisi quis per mortificationem carnis pacem habeat ad Deum, ad proximum, & ad seipsum: non facile per contemplationem transcendit res omnes creatas, & vni Deo coniungitur.

III. Ibi confregit potentias arcuum, scutum, gladium, & bellum.

Hic iam describit victoriam aduersus Assyrios, de quibus in titulo Psalmi. Historia huius victoriæ habetur lib. 4. Reg. 19. Vbi Deus liberauit Hierusalem ab obsidione Regis Sennacherib sine vlla pugna Iudæorum. Angelus. n. Domini vna nocte occidit octogintaquinque millia Assyriorum, & eo modo confregit Deus potentias arcuum, id est sagittas, quas Assyri parauerant, vt iacerent in Hebræos, & scutum quod parauerant, vt se defenderent ab Hebræis. & gladium, quem exacuerant, vt cominus pugnarent aduersus eos, aduersus quos sagittis eminus pugnant; denique bellum totum confregit, id est, auertit ab vrbe Hierusalem. In hebræo pro vocibus, potentias arcuum, habetur, rispecheseth, quæ voces propriè significant carbones arcuum, id est, iacula ignita arcuum: sed Septuaginta verterunt, Potentias arcuum, quia potentia arcus in sagittis eiaculandis consistit. Altiore sensu per iacula ignita, & gladios, significatur tentationes demonum, & persecutiones hominum. Per scuta intelliguntur prætextus varij, quibus se tegunt hostes nostri spirituales cum nos oppugnant: sed in animis perfectorum seruum suorum Deus victorias maximas

obtinet, vt perspicuum est ex historijs sanctorum Martyrum, & perfectorum Monachorum.

III. Illuminans tu mirabiliter a montibus æternis: turbati sunt omnes insipientes corde.

Ostendit Propheta, vnde potissimum orta sit victoria hebræorum aduersus Assyrios; id autem facit per apostrophè ad Deum, Illuminans, inquit, tu mirabiliter a montibus æternis, id est, confregit Dominus in Hierusalem arma offensiva, & defensiva Assyriorum: ille autem Dominus tu es, qui hæc fecisti, dum ex cælis, tamquam æternis quibusdam montibus tuis, ac veluti altissima specula, & arce tua, mirabiliter fulgurasti, & Angelum tuum tamquam celeste fulmen misisti in exercitum Assyriorum. Vnde turbati sunt omnes illi milites Sennacherib, tamquam amissio iudicio obtenebrati, & præ stupore mentis insipientes corde effecti. Quod ad verba attingit, in hebræo pro voce, æternis, est, tereph, quæ prædam significat, vel captiuitatem, nõ æternitatem. Sed omnino necessarium est, vt Septuaginta Interpretes aliquid aliud legerint: neque enim fieri potest, vt viri doctissimi, & vtriusque linguæ peritissimi verterent, a montibus æternis, vel græce ἀπο τῶν αἰώνων, si legissent, meharere tereph. Itaque suspicor eos legisse, terem, non tereph; significat autem, terem, ante, vel, antequam, siue priusquam; & fieri potest, vt non solum sit aduerbium, sed etiam nomen, & significet, antiquitatem, vel antiquam: quomodo, chedem, significat, ante, & significat etiam antiqua, vt patet ex Psalmo 78. versu 6. Cogitavi dies antiquos. Et Psalmo 43. ver. 2. Quod operatus es in diebus antiquis. Idem autem est, A montibus æternis, & a montibus antiquis; quemadmodum Dan. 7. Antiquus dierum dicitur Deus, quia æternus est. Illud autem, turbati sunt omnes insipientes corde, S. Hieronymus vertit ex hebræo, Spoliati sunt superbi corde. Sed Septuaginta

Ff 4 Inter-

Interpretes sensum verterunt. Illud enim, spoliati sunt, non significat, spoliati sunt vestibus, sed spoliati sunt iudicio errauerunt, stupefacti sunt: quod est, idē cum illo, turbati sunt. Pro, insipientes corde, S. Hieronymus vertit, superbi corde, quia legit, abbire leb: Septuaginta legerunt, abbide leb: facile autem fuit mutari vnam literam in aliam similem, id est, dalet ר, in res ר. Iam verò in sensu spirituali significat hic versiculus, principium victoriae aduersus hostes inuisibiles esse illuminationem internam Dei per quam videre nos facit Deus tum ipsos hostes, tum ipsorum fraudes; necnō bona inuisibilia, quae preparauit Deus diligentibus se; & mala inuisibilia, quae preparauit odio habentibus se. Et quem admodum Deus illuminans mirabiliter a montibus aeternis caelestis habitaculi sui, fortissimos reddit seruos suos: sic e contrario conturbat hostes suos, insipientes corde, qui videntes viros sanctos, & perfectos contemnere visibilia, condonare iniurias, bonum pro malo reddere, durissima quaeque propter Deum libenter pati, obstupescunt, & irascuntur; sed in fine dicturi sunt, Nos insensati vitam illorum aestimabamus insaniam, & finē illorum sine honore. Sap. 5.

V. Dormierunt somnum suum, & nihil inuenerunt omnes viri diuitiarum in manibus suis.

Communis expositio est, quod Propheta describat mortem Assyriorū, qui ab Angelo interfecti sunt, vt hic sit sensus. Dormierunt somnum suum, id est, somno mortis soporati sunt, qui Hierusalem desiderabant inuadere, & se breuiter capturos, & spoliaturos esse sperabant: & omnes viri diuitiarum nihil inuenerunt in manibus suis, id est, & isti Assyrii, qui ditissimi erant, & maiores diuitias appetebant, post mortem illam repentinam in infernum detrusi, nihil inuenerunt in manibus suis, neque ex ijs, quae habebant, neque ex ijs quae sperabant. Sed altiore sensu doctrina gene-

ralis traditur aduersus insipientes corde, qui magnificiunt bona temporalia, & despiciunt viros sanctos, & perfectos, qui ista contemnunt. Dormierunt, inquit, insipientes corde somnum suum, id est, toto tempore vitae huius quasi sopore graui concupiscentiae, & ignorantiae oppressi quietē dormierunt, somniantes se diuites, & beatos esse: sed vbi per mortem euigilauerunt (pœna enim aperit oculos, quos culpa clauferat) nihil inuenerunt in manibus suis: & tunc intellexerunt, bona huius vitae non vera bona, sed ludibria somniantium fuisse; & ex ijs nihil sibi remansisse, nisi vermem conscientiae, & pœnae sempiternae reatum.

Ab increpatione tua Deus Iacob dormitauerunt, qui ascenderunt equos.

Declarat mortem Assyriorum, non fuisse naturalem, sed ab ipso Deo irato immissam. Ab increpatione tua Deus Iacob dormitauerunt, illi videlicet de quibus dictum est versu superiore, Dormierunt somnum suum, illi, inquam, dormierunt somnum suum ab increpatione tua prostrati, & interfecti sopore mortis acceperunt: nam increpatio Dei efficacissima est, & eam continuo effectus sequitur. Si enim B. Petri increpatio Ananiam, & Saphiram occidit. Act. 5. quanto magis increpatio Dei omnipotentis? Illud, qui ascenderunt equos, est descriptio superbiae, & arrogantiae Assyriorum, qui in equitatu suo confidebāt. In hebræo ad verbum habetur, currus, & equus: sed Septuaginta non legunt, receu, id est, currus, sed, roceu, id est, eques; vt sensus sit, Coniopiti sunt eques, & equus. In sensu autem spirituali significatur, morte sempiterna plectēdos ab irato Deo, & dæmonem tamquam equitem, & hominem peccatorem tamquam equum, qui dæmonem sibi infidere, & ab eo regi se turpiter passus est.

רכב
רכב

Tu

VII. Tu terribilis es, & quis resistet tibi ex tunc ira tua.

Alloquitur nunc Propheta Deum, & ex ultione, & supplicio Assyriorum admiratur potentiam Dei erudiens nos, ut similiter admiremur, & timeamus. Tu, inquit terribilis es, & quis resistet tibi, quando iratus fueris? illud enim, ex tunc ira tua, significat, ex quo tempore incipit ira tua, & coniungendum est cum precedentibus, ut coniungit etiam S. Augustinus. Sed in textu latino ponitur distinctio, & interpunctio sæpe ob commoditatem canentium. Illud, Quis resistet tibi, in hebræo est ad verbum, Quis stabit ante faciem tuam, quod aliquid amplius significat, quam resistantiam, quasi dicat, Quis audebit faciem tuam iratam intueri? Sed Septuaginta sensum verum transtulerunt.

VIII. De cælo auditum fecisti iudicium, terra tremuit, & quieuit.

IX. Cum exurgeret in iudicium Deus, ut saluos faceret omnes mansuetos terræ.

Occasione accepta ex ira Dei in Assyrios, transitum facit ad iram, quam ostendit idem Deus in die Iudicii generalis: tunc enim verè, & propriè nemo impiorum sustinere poterit vultum irati Iudicis. loquitur autem de rebus futuris per verba temporis præteriti more Prophetico. De cælo auditum fecisti iudicium, id est, de cælo annunciabis per varia signa, quæ erunt in Sole, & Luna, & stellis, & tandem per horribilem tubam Angelicam, ad iudicium nouissimum te esse venturum: & tunc terra commotissima tremiscent, & præ timore silebit, id est, omnes habitantes in terra silebunt, arescentes præ timore, & expectatione eorum, quæ superuenient vniuerso orbi. Luc. 21. Illud, quieuit, non significat requiem à labore, sed taciturnitatem, &

silentium ob timorem. S. Hieronymus optimè sensum vertit, Terra timens tacebit: sed Septuaginta verterunt ad verbum, Terra tremuit, & quieuit, sic enim est in hebræo: Cum exurgeret in iudicium Deus, id est, de cælo auditum facies iudicium, cum tu Deus exurges in iudicium, surges de solio tuo cælesti, & venies ad iudicandum orbem terrarum ut saluos facias omnes mansuetos terræ: hic enim erit finis Iudicii, ut omnes mansueti, qui sunt in terra, non amplius vexentur à crudelibus, & superbis persecutoribus, sed omnibus impijs, & peccatoribus iusto iudicio condemnatis, omnes pii, & iusti salutem æternam, requiem videlicet, & felicitatem sempiternam possideant. Illud, omnes mansuetos terræ, satis apertè significat, non posse referri ad liberationem hebræorum de manu Sennacherib Regis Assyriorum, sed referenda esse ad vniuersalè liberationem omnium iustorum. Vocat autem Scriptura mansuetos, eos qui liberabuntur, quoniã mansuetudo opponitur crudelitati persecutorum; & quoniam mansuetudo propria est discipulorum Christi, qui ut Agnus mansuetus in hoc mundo versatus est, & coram tondente, & iugulante se obmutuit; denique quia mansueti non resistunt Deo reuelanti quæ credenda sunt, neque promittenti quæ speranda sunt, neque iubenti quæ facienda sunt, ac per hoc mansuetudo omnes virtutes includit.

Quoniam cogitatio hominis X. confitebitur tibi: & reliquæ cogitationis diem festum agent tibi.

Hoc sequetur ex Iudicio ultimo, ut mansueti liberati ab omni oppressione persecutorum, hoc tantum beneficium cogitantes perpetuò Deum laudent, & festos dies celebrent in cælo, memoria retinentes hæc Dei magnalia. Illud, quia, non reddit rationem hoc loco, sed accipitur p, quare, vel, propter quod, ut sensus sit, Quare cogitatio hominis liberati confitebitur tibi laudes, imò ipsa iugis cogitatio tanti beneficii erit iugis, & af-

& assidua laudatio: & reliquæ cogitationum, id est, perpetua memoria, quæ in ipsis relinquet cogitatio tantæ rei, diem festum aget tibi, in æternum tibi cantabit, & iubilabit. Quod attinet ad verba S. Hieronymus ex hebræo vertit quia ira hominis confitebitur tibi, reliquiis iræ accingeris: quæ verba nullum commodum sensum facere videntur, cū re vera satis aptè respondeant verbis hebraicis, quæ nunc in Biblijs excusis habentur. Sed sciendum est vocem, chama, posse deduci à verbo, nacham, quod pœnitere, & consolari, & secundum Septuaginta etiam cogitare significat: nā Gen. 6. vers. 6. ubi nos habemus, Pœnituit Deum, quod hominem fecisset in terra; Septuaginta Interpretes vertunt, Cogitavit Deus, quod hominem fecisset in terra. Quare illud, chama, nō solum significat iram, sed etiam cogitationem ex sententia Septuaginta Interpretum, quibus maior fides habenda est, quā omnibus dictionarijs. Illud autem, thaggor, quod significat, accingeris, à verbo, chagar, Septuaginta Interpretes legerunt sine vllō dubio, thichgor, à verbo, chagag, quod festum agere significat. Imperitissimi enim fuissent, si vertissent, festū agere, & dictionem, quam inueniunt non deriuassent à radice, charag, sed à radice, chagar, quæ similes sunt, & facilè per errorem librorum mutari potuerunt. Itaque retinenda est lectio, & interpretatio Septuaginta Seniorum, quam fideliter Interpres latinus expressit.

XI. Vouete, & reddite Domino Deo vestro omnes, qui in circuitu eius offertis munera.

XII. Terribili, & ei, qui aufert spiritum Principum, terribili apud Reges terræ.

Concludit Propheta Psalmum exhortans fideles populos, ad vouendum, & reddendum, ut eo modo placatū habere possint Deum, qui terribilis est, adeo ut ipsi etiam Regibus vitam adi-

mat, qñ ei libitum fuerit. Vouete, inquit, & reddite, id est, promittite Deo sacrificia, & dona, quæ illi grata sunt, sed simul fideliter reddite quæ promissis. Vouete inquam, & reddite vos omnes, qui in circuitu eius offertis munera, id est, vos omnes, qui frequentatis aras dominicas, & in circuitu altaris consistentes offerre soliti estis munera: vouete autem, & reddite Deo vero, qui terribilis est in iudicijs suis, & à nemine irrideri, aut falli potest: nec solū terribilis est erga priuatos homines, sed etiam in Reges, & Principes, qui alijs hominibus terribiles esse solent. Ex illis verbis, Vouete, & reddite, refellitur hæres modernorum hæreticorum, qui vota rerum non imperatarum à Deo, omnino contemnunt. Sanctus enim Augustinus exponens hunc locum scribit, rectissime voueri Deo perpetuam virginitatem, spontaneam paupertatē, & alia id genus, quæ à Deo non imperantur. Illud, in circuitu eius sunt; exposuimus de circuitu altaris, iuxta illud Psal. 25. Circundabo altare tuum Domine. S. Augustinus docet, illos esse in circuitu Dei qui communem habent Deum; qñ enim commune, & publicum est, in medio ponitur, ut omnes ex eo participet. illi autem non sunt in circuitu Dei, qui si quid sciunt de Deo, quasi proprium habere volunt. Illud, offertis munera, in hebræo, & græco legitur in tercia persona, qui in circuitu eius sunt, offerunt illi munera, sed idem est sensus. Illud qui aufert spiritum Principum; exponunt aliqui de spiritu superbiæ, id est, qui humiliat Principes. Sed nostra expositio confirmatur ex Psalmo 103.

Auferes spiritum eorum, & deficient, & in puluerem suum reuertentur: & in hoc verè ostenditur terribilis Deus, quod potentissimos Reges ad nutum in momento interimere possit.

PSAL-

PSALMVS LXXVI.

Titulus, & Argumentum
Psalmi.

*In finem pro Idithun, Psalmus
Asaph.*



Utr dicatur in titulo,
pro Idithun Psalmus
Asaph, omnino diffi-
cile est diuinare. Eu-
thyminus existimat,
Psalmum datum esse
ad decantandum ipsi

Asaph, pro Idithun, id est, vice Idithun,
qui fortè cantare impediebatur. nimis
humilis explicatio est, neque vox he-
braica, hal Ieduthun, patitur, ut pro, si-
gnificet, vice; cum ad literam sonet, su-
per Idithun Psalmus Asaph. Alij existi-
miant, Psalmum cōpositum ab Asaph,
& datum ipsi Idithun ad canendum. Sed
neque id probabile est, cum Idithun
fuerit vnus ex Principibus cantorum,
non minus quā Asaph. Alij volunt Psal-
mum cantatum esse alternatim ab Idi-
thun, & Asaph. Alij denique nomen
Idithun hoc loco volunt non esse no-
men cantoris, sed instrumenti musici,
vel certi generis modulationis, ad cuius
formam Psalmus canendus esset; at-
que huic expositioni satis conuenit illa
phrasis, Psalmus Asaph super Idithun.
Argumentum est oratio aduersus tribu-
lationes: quæ sit autem tribulatio de
qua Psalmus hic loquitur, non cōuenit
inter auctores: alijs existimantibus hic
agi de captiuitate Babylonica; alijs de
persecutione Antiochi, quæ contigit
tempore Machabæorum: alijs de incer-
ta, & nobis incognita tribulatione: sed
S. Augustinus vtilissimè exponit Psal-
mum de miseria humana generatim, ac
praesertim de ea, quam sentiūt viri per-
fecti, cui dum anhelant ad patriam cœ-
lestem, molestissimè ferunt morā exi-
lij, & peregrinationis.

Explicatio Psalmi 76.

Voce mea ad Dominum cla-
maui, voce mea ad Deum,
& intendit mihi.

Indicat hoc primo versiculo anima
viri sancti, quā molestè ferat morā, &
pericula huius peregrinationis. Dicit
enim, voce mea, id est, nō per nuncios
non per amicos, non etiam per linguā
corporis mei, sed voce mea, proprio
animæ desiderio pulsaui aures Dei. Di-
cit, ad Dominum, vel ut est in hebræo,
ad Deum, & repetit secundo, ad Deum,
quia videbat à nulla re creata posse ob-
tineri quod cupiebat, ideò transfiliens
omnia ad ipsum Deum accessit. Dicit,
clamaui, quia se videbat in regione dis-
similitudinis longè separatum à Deo,
magna voce, magno affectu sibi opus es-
se, ut de tanto profundo, ad tantam sub-
limitatem vocem suam transmitteret.
Addit, & intendit mihi, ostendens sibi
profuisse eiusmodi clamorem. In he-
bræo ad verbum est, & aures mihi præ-
buit.

TILA

In die tribulationis meæ Deū
exquisui, manibus meis nocte
contra eum, & non sum dece-
ptus.

Declarat, cur, & quomodo Deus quæ
sierit, & inuenerit. In die tribulationis
meæ Deū exquisui, id est, in tempore
huius vitæ mortalis, quæ est tota tenta-
tio, ut dicit Sanctus Iob cap. 7. vel, ut in
nostro textu habetur, militia, id est,
perpetua colluctatio cum vitijs, & con-
cupiscentijs, nec non cum principibus,
& potestatibus aereis, ut dicitur ad
Ephes. 6. vnde exclamat Apostolus
Rom. 7. Quis me liberabit de corpore
mortis huius? Manibus meis nocte con-
tra eum, id est, in nocte huius vitæ ma-
nibus contra Deum extēsis illum qua-
sui attingere, & apprehendere, & non
sum deceptus. tempus huius vitæ non
est

נחמיה

est dies, sed nox, quia per fidem ambu-
lamus, & nō per speciem. 2. Corinth. 5.
& opus habemus attendere ad lucernā
scripturæ lucentem in caliginoso loco
ut dicitur 2. Pet. 2. Noctu autē melius
quærimus manibus tentādo, quam ocu-
lis vestigando; unde dicit Apostolus
Act. 17. Quærere Deum si fortē attrē-
tent eum, aut inueniant. Porro mani-
bus quærere Deum in nocte, nihil est al-
liud, nisi per opera bona, per obediē-
tiam mandatorum, per vitæ puritatem
in hoc exilio caliginoso Deum quære-
re: & sæpē contingit, ut qui ita quærūt,
Deum attingant, quem speculādo, vel
legendo inuenire non potuerant. testi-
monium enim conscientia bonæ, & pa-
tientia in tribulationibus, & frequentes
victoriæ aduersus tentationes, efficiūt
ut anima experimento quodam dulce-
dinem Dei sentiat, & testimonium spi-
ritus in se habeat, quod sit filius Dei.

In hebræo pro, contra eum, habetur,
נִגְגֶּרָה, id est, extenta, ut sensus sit, no-
cte manus mea extenta est ad eum; &
נִגְגֶּרָה, idem est sensus, sed Septuaginta non vi-
dentur legisse, נִגְגֶּרָה, sed, נִגְדָה, id
est, contra, vel ē regione; voces enim
simillimæ sunt, ut patet. Rursus ubi
nos habemus, & non sum deceptus; ex
hebræo vertunt alij, & nō quiescit, vel
non remittitur, manus mea videlicet, id
est, manus mea extenta, & non debilita-
ta, aut fatigata quiescit. Sed Septuaginta
verterunt sensum non verba. Signifi-
carunt enim, manum viri iusti ad Deum
quærendum extentam non quiescisse
præ lassitudine, quia inuenit cito quod
quærebat, & ideo virum iustum mani-
bus quærendo non fuisse deceptū, hoc
est spe sua frustratum. Multi hunc ver-
siculum exponunt de extensione manus
in oratione tempore nocturno, quorū
expositionem non reprehendo, sed ma-
ius S. Augustinum sequi, qui etiam satis
aptē adducit hoc loco factum S. Tho-
mæ Apostoli, qui manibus tangendo
Christi cicatrices, Deum quæsiuit in no-
cte dubitationis, & non est deceptus:
nam inuento Deo exclamauit, Domi-
nus meus, & Deus meus. Ioan. 20.

Renuit consolari anima mea, III.
memor fui Dei, & delectatus
sum: & exercitatus sum, & defe-
cit spiritus meus.

Quia quærens Deum non fuit decep-
tus; renuit deinceps anima eius con-
solationem accipere à rebus mundi hu-
ius, quoniam videbat in omnibus esse
deceptionem. Renuit, inquit, consolari
anima mea, id est, quantumuis blandirē-
tur carnales voluptates, noluit inde
gaudere anima mea, sciens eas secum
trahere grauiiores tristitias. Memor fui
Dei, & delectatus sum, id est, ne tamen
sine omni consolatione essem, memor
fui Dei, qui nullum decipit, & in quo so-
lo solidum gaudium reperitur, quod
nemo potest tollere à nobis; & delecta-
tus sum. Magnum est hoc arcanum sa-
pientiæ Dei, quod in hoc exilio plus de-
lectet memoria Dei, quàm præsentia
carnalium voluptatum: & si in medio il-
lecebrarum carnalium tātum delectat
memoria Dei, quantum delectabit ip-
sa præsentia Dei, quando nullæ erunt
carnales illecebræ? Et exercitatus sum,
& defecit spiritus meus, id est, post me-
moriā Dei, & voluptatem inde hau-
stam, exercitatus sum meditādo, & me-
cum ipse colloquendo de meroribus
exilij, & de iucunditate patriæ, & præ-
desiderio defecit spiritus meus. In he-
bræo, pro, delectatus sum, habetur, וַאֲנִי
מַאֲנָה, quod propriè significat, & sonui, si-
ue clamaui: quod potest intelligi de
clamore lætitiæ, ut Septuaginta intel-
lexerunt, & de clamore turbationis, ut in-
tellexit S. Hieronymus, qui vertit, con-
turbabar. Pro illo, exercitatus sum; S.
Augustinus legit, garriui, quod vox græ-
ca significare videtur; sed vox hebræi-
ca, אִשְׁחָה, quæ frequens est in Psalmis,
significat summisse loqui, siue secum lo-
qui, quod est proprium meditantium, &
se in consideratione exercentium. Il-
lud, defecit spiritus meus, exponūt nō
nulli de defectu ob ingruentes tribula-
tiones, quasi eas diutius ferre non pos-
set; sed non minus propriè dicitur spiri-
tus

וַאֲנִי מַאֲנָה

אִשְׁחָה

ritus deficere quando magno desiderio alicuius rei tenetur, quo modo etiam languere, & liquefieri dicitur, iuxta illud Psal. 83. Concupiscit, & deficit anima mea in atria Domini.

VI. Anticipauerunt vigilias oculi mei, turbatus sum, & non sum locutus.

Declarat quod dixit, exercitatus sum, & ait, Anticipauerunt vigilias oculi mei, id est, noctu surgebam ad meditandum, antequam excubiæ militares vigilare inciperent: nam per vigilias intelliguntur custodiæ, siue excubiæ, vt perspicue habetur in codice hebraico, & græco. Similis est locus in Psalm. 118. Præuenerunt oculi mei ad te diluculo, vt meditarer eloquia tua. Quod sequitur, Turbatus sum, & non sum locutus; significat ex meditatione periculorum huius vitæ, Prophetam turbatum fuisse, sed non fuisse ausum aliquid loqui, quod sciret, iudicia Dei esse iustissima, quamuis occulta. In hebræo pro, Anticipauerunt vigilias oculi mei, habetur, tenuisti custodias oculorum meorum. Sanctus autem Hieronymus vertit, Prohibebam suspectum oculorum meorum. Sanctus denique Augustinus legit, Anticipauerunt vigilias inimici mei. sed illud, inimici mei, non habetur in hebræo, neque in græco, neque in latina editione vulgata, proinde facile contemni potest. Vox hebræa, achasta, quæ significat, tenuisti, non fuit in codice sancti Hieronymi, neque Septuaginta Interpretum. Manifestè enim est verbum temporis præteriti secundæ personæ à radice, achaz, quæ significat tenere, apprehendere, possidere, & similia: quare S. Hieronymus, qui vertit, prohibebam, & Septuaginta qui verterunt, anticipauerunt sine dubio aliquid aliud legerunt. In re autem tam obscura nihil est tutius, quàm antiquissimæ versioni Septuaginta Interpretum adhærere, quam nobis fideliter Interpres latinus expressit. Verum est tamen, hebraicam lectionem, qua-

lis nunc est, in sententia non discrepare à lectione editionis vulgatæ. Illud. n. tenuisti custodias oculorum meorum; ita exponi potest, tu Deus tenuisti palpebras oculorum meorum, ne clauderentur in somnum, ac per hoc fecisti, vt tota nocte vigilarem, & sic vigilias omnium excubiarum anticiparem.

Cogitavi dies antiquos, & annos æternos in mente habui.

Ecce quid meditaretur quando præueniebat vigilias. Cogitabat dies antiquos, id est, dies huius vitæ temporalis à principio vsque ad finem. & simul cogitabat annos æternos vitæ futuræ, qui non prætereunt, sed stabiles permanent: neque sola spatia cogitabat, sed quæ habemus, & quæ agimus in his diebus, qui mox antiquantur, & pereunt; & quæ habebimus, & agemus in annis æternis, qui semper in eodem statu permanent, Digna planè cogitatio, quæ totas noctes occupet meditantem.

Et meditatus sum nocte cum corde meo, & exercitabar, & scopebam spiritum meum.

Id ipsum alijs verbis repetit, & inculcat, dicens, Et meditatus sum nocte cum corde meo, id est, & consumpsi integras noctes mecum ipse colloquendo, non ore, sed corde: & exercitabar, cogitando videlicet, ac mecum ipse discurrendo. Et scopebam spiritum meum, id est, & hoc modo quasi scopis cogitationum versabam huc atq. illuc spiritum meum. In hebræo pro, & meditatus sum; habetur, neghinathi, quod significat canticum meum, vel psalmum meum, vt vertit sanctus Hieronymus. Sed Septuaginta sine dubio legerunt, vt infra versiculo duodecimo, vehagithi, quod significat, & meditat⁹ sum: & facile fuit librarijs in hac re errare cum similes voces sint; nec sit vlllo modo credibile Septuaginta viros, aut vllum alium interpretem redditurum, & meditatus sum,

אחז

אחז

נ.י.ת.

ו.י.ת.

W B N. si legisset neghinathi. Illud autem, & scopebam, S. Augustinus legit, Et scrutabar spiritum meum; & hoc propriè significat vox hebraica, iacappes, quæ hoc loco habetur: tamen S. Hieronymus nouo, & inusitato vocabulo verte re maluit, scopebam spiritum meum. Intelligimus autem ex vtraque lectione illud, scopebam, non significare, scopis mundabam, aut purgabam sed scopis verrebam, & agitabam: vt enim mulier illa de Euangelio domum verrebat, vt drachmam perditam inueniret: sic iste spiritum suum scrutabatur, & quasi scopis verrebat, vt veritatem absconditam inueniret. Idem S. Hieronymus in commentario, dicit, scopebam, id est, fodiebam: & in epist. ad Suniam, & Fretellâ dicit, scopebam, idem esse, quod sarcu lo sarriebam: quare perspicuū est, scopebam, non esse mundabam, sed versabam. In hebræo habetur, scopebat, vel scrutabatur spiritus meus; tamen S. Hieronymus vertit in prima persona, scopebam; & in epist. ad Suniam, & Fretellâ dicit Septuaginta vertisse in prima persona non in tertia *scouta Me*, non *scouta Mi*, sic etiam legit S. Augustinus. Proinde videtur error librariorū esse tum in hebraico, tum in græco codice, quo ad mutationem personæ.

VII. Nunquid in æternū proijciat Deus? aut non apponet, vt complacitior sit adhuc?

VIII. Aut in finem misericordiam suam abscindet à generatione in generationem?

IX. Aut obliuiscetur misereri Deus? aut continebit in ira sua misericordias suas?

Hæc est meditatio, & agitatio mētis in qua noctu exercebatur. Videns enim multitudinem hominum peccatorum propè infinitam, & quod vix inueniretur qui faceret bonum, dicebat intra se, num Deus proijciat omnes homines in interitum sempiternum? ubi est igitur infinita misericordia eius? Sed his inter

rogationibus contrariam sententiam concludere intendit; videlicet futurum aliquando tempus redemptionis generis humani, quo per misericordiam Dei non solum reliquæ Iudæorum, sed etiā multitudo gentium saluaretur. ait igitur: Nunquid in æternū proijciat Deus? id est, nunquid Deus tantam multitudinem generis humani in æternum proijciat à misericordia sua, & in infidelitate, & cæcitate dimittet? quasi dicat, nō proijciat, sed tēpore suo visitabit. Aut non apponet, vt cōplacitior sit adhuc, id est, nunquid Deus non addet aliquādo ad iram suam misericordiam suam, vt incipiat sibi complacere in gentibus quas nunc odio prosequi videtur? addet omnino propitiationem. Aut in finem misericordiam suam abscindet, & generatione in generationē? id est, nunquid remouebit misericordiam suam ab hominibus in æternum? non remouebit. Aut obliuiscetur misereri Deus? aut continebit in ira sua misericordiam suam? id est, non obliuiscetur, & non continebit. Facilius est enim Deo continere iram suam, quā misericordiam suam: & ideo quamuis iuste irascatur in peccatores, tamen in ipsa ira non continebit misericordiam suam, sed effundet misericordiam, quæ iram mitiget.

Quod attinet ad verba, illud, non apponet vt complacitior sit adhuc; S. Hieronymus ex hebræo clarius reddit, nō propitiabitur vltra? ad verbum enim in hebræo habetur, non addet ad complacendum adhuc? id est, non addet complacentiam, siue propitiationem aliquando? Illud, non abscindet misericordiam suam, S. Hieronymus ex hebræo vertit, ergo non complebit misericordiam suam? quæ sententia omnino contraria videtur, sed non est: nam vox hebraica, aphe, significat consumere, vel consumi, deficere, perire, & similia: quare S. Hieronymus verbum, complebit, non accepit in bonam partem, pro eo quod est, perficere; sed in malā, pro eo quod est, finire, vt nō vltra pergat: quomodo dicitur Danielis 5. Numerauit Deus Regnum tuum, & compleuit illud, id est, finiuit Regnum tuum, iam non

DD N.

non ultra regnabis. Additur in hebræo, Consummabitur verbum; sic enim habetur ad litteram in hebræo, Nunquid peribit in finem misericordia eius, consummabitur verbum a generatione in generationem? vbi illud, Consummabitur verbum, omittum est a Septuaginta Interpretibus, & ab omnibus antiquis interpretibus, & vt testatur Sanctus Hieronymus in epist. ad Suniam & Fretellâ, qui etiam addit, rectè non haberi in latino. Ex quo intelligimus, duo illa verba additicia esse non solum in græco, sed etiam in hebræo. Theodoretus quidem scribit, haberi hæc duo verba apud Symmachum; sed nos maiorem fidem habemus S. Hieronymo, quàm Theodoro. Denique illud, Continebit in ira sua misericordias suas, S. Hieronymus ex hebræo vertit, complebit in furore suo misericordiam suam. Sed non sunt contraria, quia S. Hieronymus per complere, intelligit, finire, & verbum, caphaz, qd̄ habetur hoc loco, significat claudere, ac per hoc continere, ne exeat, ne fluat. Idem autem est, complere misericordiam, id est, finire, vt iam non sit; & continere, vt non fluat, & claudere, vt non exeat.

X. Et dixi nunc cœpi, hæc mutatio dexteræ excelsi.

Præuisa, & prædicta redemptione, dicit Propheta, se respirare cœpisse a tædio, & mœrore, quo antea tenebatur. Et dixi, inquit, nunc cœpi, id est, nunc incœpi respirare posteaquam meditando, & vigilando, Deo reuelante cognoui, misericordiam Domini effundendam super genus humanum. hæc est mutatio dexteræ excelsi, id est, mutatio, quam præuideo, & prædico, iræ diuinæ in misericordiam, iniquitatis hominum in iustitiam; captiuitatis in redemptionem; pœnæ sempiternæ in gloriam æternam; mutatio est admirabilis, quam nemo poterat efficere nisi dexteræ excelsi, quæ Christus est: ipse enim placauit iram Patris, & in beneuolentiam commutauit, ipse iustificauit impios, ipse redemit captiuos, ipse

glorificauit miseros: & quod mirabilius est, hanc mutationem fecit dexteræ excelsi quodammodo per suam mutationem, vt notat S. Hieronymus in Commentario. ipsa enim dexteræ excelsi infirmata est, vt nos roboraret; & cum esset in forma Dei formam serui accepit, vt nos a seruitute redimeret. Pro, nunc cœpi, S. Hieronymus vertit ex hebræo, imbecillitas mea: alij, dolor meus; alij aliter. Sed vox hebraica ambigua est, & omnes interpretationes admittit: in re autem ambigua, mirum est cur non ante ponatur omnibus interpretibus auctoritas Septuaginta Seniorum, qui sapiëntia, antiquitate, & admirabili inter se concordia omnibus præstant.

Memor fui operum Domini, XI.
quia memor ero ab initio mirabilem tuorum.

Et meditabor in omnibus operibus tuis, & in adinventionibus tuis exercebor. **XII.**

Respirans iam Propheta in spem futuræ redemptionis, dicit, se memorem futurum operum Domini mirabilem; & incipit enarrare mirabilia quædam opera. Memor fui, inquit, operum Domini, quia memor ero ab initio mirabilem tuorum, id est, antea quidem memor fui aliquorum operum Domini, quæ fecit in Aegypto coram Patribus nostris; sed nunc o Domine memor ero ab initio Mûdi omnium mirabilem tuorum. Et meditabor in omnibus operibus tuis, considerans videlicet opera iustitiæ, & misericordiæ; opera potentiæ, & sapientiæ; opera naturæ, & gratiæ: & in adinventionibus tuis exercebor, mente reuoluens, & admirans arcana consilia, & admirabiles rationes curandi genus humanum, quas sapientia tua adinuenit. Illud quia, non est semper particula causalis, sed ex hebraica phrasi interdum redundat, interdum exponenda est iuxta exigentiam loci. hoc loco videtur exponenda per, sed, vel, etiam, vel, quin etiam. Illud, adinventionibus, hebraicè, hali-

הלילי haliloth, significat opera, & cogitationes: sed opera egregia, & cogitationes prudentes. hoc loco, vt etiam Isaiæ 12 & 2. Paralip. 16. accipitur pro adinventionibus sapienter, & subtiliter exco- gitatis ab ipso Deo, quæ nunquam venissent hominibus in mentem, nisi eas opere compleras vidissent. talis adin- uentio fuit incarnatio Verbi, passio Chri- sti, mysterium Eucharistiæ, & similia.

ne posita, secundum Augustinum, san- ctus est Christus, & via Dei dicitur esse in sancto, quia per Christum imus ad Deum, & Deus per Christum venit ad nos: secundum Hieronymum via est Christus, & Christus in sancto habitat, quia in maleuolam animam nō introi- bit sapientia, proinde sanctus fit, qui Christum in se habitantem habere de- siderat.

XIII. Deus in sancto via tua; quis Deus magnus, sicut Deus noster? tu es Deus, qui facis mirabilia.

Incipit laudare opera Domini mira- bilia, in quibus cogitandis exerceri so- lebat; ac primum generatim dicit ope- ra Domini esse sancta, magna, & mirabi- lia, id est, facta sanctè, potenter, & sa- pienter, sicut ipse sanctus, omnipotēs, & sapientissimus est. Deus, inquit, in sã- cto via tua, id est, actio tua, siue opera- tio tua, per quam ad nos quodammodo exis, in sanctitate efficitur: nihil enim agis, quod non rectum, & iustum sit. In
קדש hebræo est, chodes, quod propriè san- ctitatem significat: proinde exponen- dū est, in sanctitate, quod nos legimus, in sãcto. Quis Deus magnus sicut Deus noster? id est, non solum Deus noster sanctus est, & sancta via eius; sed etiã magnus, & magna opera eius. Tu es Deus, qui facis mirabilia, id est, non mo- do sancta, & magna; sed etiam mirabi- lia sunt opera tua ob sapientiæ profun- ditatem, quæ in ipsis cernitur. Sanctus Augustinus legit, Qui facis mirabilia so- lus. Sed nostri codices hebraici, græci, & latini non habent hanc vocem, solus. Verissimum tamē est, Deum solum mi- rabilia facere, quia solus ipse non eget auxilio aliorum: & omnes alij, qui mi- rabilia faciunt, vt Apostoli, & Prophe- tæ, & alij sancti viri dono miraculorū præditi, nunquam faciunt mirabilia so- li, quia sine Deo nihil facere possunt. Illud, in sancto via tua, potest etiam congruere cum textu hebraico ad lite- ram, si mutantur puncta, & legamus,
שדך chados, non, chodes. Et hac lectio-

Notam fecisti in populis vir- XIV.
tutem tuā: redemisti in brachio tuo populum tuum, filios Iacob, & Ioseph.

Descēdit ad particulare opus Dei ma- gnum, & mirabile, videlicet ad libera- tionem populi sui de Aegypto. Notam inquit, fecisti in populis virtutem tuā, id est, potentiam tuam manifestasti po- pulis Aegyptiorum, atq. aliarum gen- tium, quæ audierunt plagas Aegypti. Redemisti in brachio tuo populum tuum, qñ per multa signa, & prodigia libera- sti populum tuum, qui nūsera seruitu- te seruiebat in Aegypto. Liberaisti autē in brachio tuo, id est, propria tua po- tentia, & fortitudine, quia non egēs aliorū auxilio. Filios Iacob, & Ioseph, id est, liberaisti populum tuum, qui con- stat, ex filiis Iacob, & Ioseph. Nomina- tur autem Ioseph cum ipso Iacob pa- tre suo: quia populus Israel cōstabat ex tredecim tribub. quarū vndecim descē- debāt ab vndecim filiis Iacob, duæ autē a filiis Ioseph, Ephraim videlicet, & Manasse. Spiritualiter notā fecit Deus virruten, id est, potentiam suam in po- pulis omnium gentium; quia, redemit ex omnibus gentibus populum suum à tyrannide Diaboli, in brachio suo, qđ est Christus. De quo dicitur Isaiæ 53. Brachium Domini cui reuelatum est? Sunt autē in populo Dei filij Iacob, & fi- lij Ioseph, id est, vt S. Augustinus expo- nit, Iudæi, & Gentiles ad finem conuer- si. Per filios. n. Iacob intelliguntur car- nales Israēitæ, per filios Ioseph ij, qui in Christo renati sunt. Ioseph enim in- uidia fratrum in Aegyptum venditus,
ibi q.

ibiq; primū humiliatus, deinde exaltatus Christum significat, qui inuidia Iudæorum extra Synagogam eiectus, venditus, & humiliatus deinde per resurrectionem, & Ascensionem ita exaltatus est, ut impletum sit, quod in Psalmo dicitur, Adorabunt eum omnes Reges terræ, omnes gentes seruiant ei.

XXV. Viderunt te aquæ Deus, viderunt te aquæ, & timuerunt, & turbatae sunt abyssi.

Describit scissionem maris rubri, quæ facta est, quando Deus liberauit populum suum à seruitute Pharaonis. Describit autem more poetico, tribuens aquis & sensum, & tremorem, quasi ob timorē præsentiae Dei aquæ recesserint: quō etiam dicitur in Psal. 113. Mare vidit, & fugit. Viderunt, inquit, te aquæ Deus, viderunt te aquæ, & timuerunt, id est, aquæ maris rubri ita siccatae sunt iubente te, ac si maiestatem tuam vidissent, & ob timorē, & reuerentiam fugissent. Et turbatae sunt abyssi, id est, nō solum in superficie, sed etiam in imo profundo existentes aquæ, quasi à præsentia tua conturbatae, recesserūt. Abysus enim nihil est aliud, nisi altitudo, siue profunditas aquarum. Spiritualiter aquæ populos significant. Iuxta illud Apocal. 17. Aquæ multæ, sunt populi multi. Aquæ igitur, id est, populi geniū viderunt Deum, quando liberauit Dominus populum suum, quia vidit omnis caro salutare Dei; viderunt autem per fidem non per speciem, & timuerūt agnoscētes peccata sua, & iudicia Dei; nam per Euangelium (ut dicit Apostolus ad Rom. 1.) sicut reuelatur gratia Dei super penitentes, & credentes; ita reuelatur ira Dei super omnē impietatem, & iniquitatem. Et præcipue turbatae sunt abyssi, id est, maiores, & altiores in gentibus, quia per fidem agnouerunt iudicia Dei esse abyssum multā, & potens potentes tormenta passuros. Unde in Actis Apostolorum cap. 24. Prædicauit Paulo de iniuria, & castitate, & iudicio futuro, Praefes Romanorum Felix tremefactus est.

Bellarmin. in Psalm.

Multitudo sonitus aquarum, XVI. vocem dederunt nubes:

Etenim sagittæ tuæ transeunt, XVII. vox tonitruī tui in rota.

Descripserat mirabile opus Dei in scissione maris rubri: nunc describit reuersionem maris, & tempestatem ad obruēdos Aegyptios: quod fuit etiā opus mirabile eiusdem Dei. Multitudo, inquit, sonitus aquarū, id est, maximus sonitus, & fremitus aquarum postea successit, cum iubente te Deo, aquæ maris, quæ steterant instar murorum, dum transiret populus Dei, magno impetu cadētes submerferunt, & suffocauerunt Aegyptios. quando etiam sagittæ tuæ caelestes, id est, fulmina discurrentia transibant super eos, & vox tonitruī tui super rotas currum Pharaonis, eas subuertebat, & in profundum disciebat. Habetur hæc historia in Exodo ca. 14. Quod attinet ad verba, illud, Multitudo sonitus aquarum, ex hebræo vertit S. Hieronymus, Excesserunt aquas nubila; & hunc sensum manifestè recipiunt hebraica verba, Possunt tamē tres illæ voces hebraicae, zoremu main hauoth, esse tria nomina distincta, & in casurecto, si solum mutetur vnum punctum primæ vocis, & pro, zoremu, legatur, zoremu, quæ sic commodè redduntur, Inundatio eius, aquæ, nubila. & sic videntur legisse Septuaginta Interpretes, & accepisse, per inundationem Dei, multitudinem aquarum obruentium Aegyptios; per aquas, & nubila, accepisse causas illius inundationis, quæ fuerūt aquæ maris reuertentes in locum suum, & nubila desuper fundentia aham aquas, ut facilius inuolueretur in aquis Aegyptij. Hæc autem omnia significantur breuiter per illa verba, Multitudo sonitus aquarum: nam & aqua maris redeunt, & quæ descendentes è nubibus magnū sine dubio sonitum edebant. Illud, vox tonitruī tui in rota, variè ac modum exponitur. Sanctus Hieronymus ad litteram dicit, vocem tonitruī in rota, esse sonitum tonitruorum in orbe terrarū, & hoc dicit confirmari ex verbis sequē-

G g tribus,

זרעו מים
עבות
ורכו

tibus, Illuxerunt coruscationes tuæ orbi terræ. Alij volunt dici vocem tonitruui in rota, id est, in æthere, siue in cœlo, quod rotundum est. Posset etiam dici vox tonitruui in rota, id est, in nube, quæ est quasi rota, siue currus Dei, vt ostendimus in explicatione Psal. 17. Sed communior expositio est, quam supra posuimus, vt per, rota, intelligatur rotæ curruum Pharaonis; quam expositionem tradit Theodoretus, & eam plurimi alij sequuntur. Spiritualiter sonitus aquarum, est confessio populorum; vox nubium est vox Prædicatorum Euangelij; fulmina, & tonitrua, sunt prohibitæ vitæ, & miracula, quibus veritas Fidei confirmatur. Sed illud, Vox tonitruui in rota, pulchrè admodum exponitur à S. Hieronymo, qui notat vocem tonitruui Euangelici tunc valde commouere populos, quando est in rota, id est, in homine planè spirituali, & contemptore rerum terrenarum, qui terrâ vix tangat, & transeat, quomodo currens rota in puncto terram cōtingit, & mox deserit, & ad altiora defertur.

XVIII. Illuxerunt coruscationes tuæ orbi terræ, commota est, & contremuit terra.

Addit Propheta animaduersionem Dei in Pharaonem, non solum innotuisse Iudæis præsentibus, sed etiam instar coruscationis cœlestis notam factam esse orbi terrarum, & inde commotione, & tremore gentib. longè positis attulisse. quod verum esse testatur liber Iosue cap. 2. vbi Raab dicit, Audiuimus quod siccauerit Dominus aquas maris rubri ad introitum vestrum, & pertimui- mus, &c. Illuxerunt inquit, coruscationes tuæ orbi terræ, id est, hæc mirabilia magna, hæc coruscationes, hæc signa, hæc miracula illuxerunt non solis Aegyptijs, & Iudæis, sed orbi terrarum longè, lateq. nota facta sunt, & ideo commota est, & contremuit terra, id est, habitantes in terra perturbati sunt, & populum Israeliticum formidare cœperunt. Spiritualiter significatur his verbis, qd

in Psalmo 18. clarius habetur de prædicatoribus Euangelicis, In omnem terram exiuit sonus eorum, & in fines orbis terræ verba eorum.

In mari via tua, & semitæ tuæ in aquis multis, & vestigia tua non cognoscentur. **XIX.**

Hic apertè describitur transitus filiorum Israel duce Deo, per nouam, & inusitatam viam, id est, per medium mare sicco vestigio. In mari via tua, id est, in mari, nouo & insolito modo inuenisti populo tuo viam, & semitæ tuæ in aquis, multis, id est, & semitam fecisti eidem populo inter aquas multas. Et vestigia tua non cognoscentur, id est, sic admirabili ratione duxisti populum tuum per medium maris, vt nullus deinceps vestigia tua, & eandem viam inuenire potuerit. Spiritualiter significatur his verbis, opera Domini non solum esse admirabilia, sed etiam inuestigabilia, quomodo via in mari inuestigabilis est, quia nulla in ea vestigia relinquuntur.

Deduxisti sicut oues populum tuum in manu Moyfi, & Aaron. **XX.**

Hic fuit finis omnium operum mirabilium Dei in Aegypto, & in mari rubro, vt populum suum inde liberaret, & in terram promissionis introduceret: quod fecit per Moysen, & Aaron primos pastores Synagogæ. Deduxisti, inquit, sicut oues populum tuum, id est, magna facilitate, magna charitate, indefessa prouidentia deduxisti per desertum, & vsq. ad promissionis terram, quasi ad pascua vberima populum tuum; in manu Moyfi, & Aaron, id est, sub potestate, & regimine duorum optimorum Principum. Spiritualiter admonemur, eos, qui ad terram promissionis, id est, cœlestem patriam peruenturi sunt, deducendos esse sicut oues in manu Moyfi, & Aaron: ita vt sint mites, & patientes sicut oues in medio luporum: nam, Beati mites, quoniam ipsi possidebunt terram.


Et

Et in patientia vestra possidebitis animas vestras. Item, vt finant se regi à Magistratu Ecclesiastico, & ciuili; Deus. n. etiam si paucos quosdam per se doceat, & regat; tamen ordinariè per Vicarios suos regit, & docet, & filios obediètiæ vult esse electos suos. Nominat autem hoc loco Moses ante Aaronem, nò quod Princeps politicus tantum esset Moses, & Princeps Ecclesiasticus Aaron: sed quia Moses primarius erat Princeps Ecclesiasticus, & politicus, Aaron autem solum erat Princeps Ecclesiasticus, & à Mose, vt maiore consecratus, & ordinatus. Quod enim Moses Sacerdos esset, perspicuum est ex Psal. 98. Moyse, & Aaron in Sacerdotibus eius: & ex plurimis actionibus Sacerdotalibus, quas exercuit cõsecrans Sacerdotes & tabernaculũ, offerens sacrificia, imò instituens ritus sacrificandi, & omnes ceremonias diuini cultus.

PSALMVS LXXVII.

Titulus, & Argumentum
Psalmi

Intellectus Asaph.



Hic titulus admonet, Psalmum non esse ita facilem, & apertum vt in superficie apparet. Videtur .n. Psalmus totus historicus esse, atque ad hoc solum compositus, vt populus agnoscens beneficia Dei, & ingratitude veterum Israelitarum, qui propterea grauius puniti sunt, discat sequi potius legem Dei, quàm exempla maiorum. Cæterum non hoc solum Dauidi propositum est in hoc Psalmo; sed etiam adumbrare Regnum Christi, qui ex tribu Iuda, & familia Dauid existens finem dedit veteri testamento, & nouum longè excellentius, & felicius inchoauit. Id enim significat Dauid in extremo Psalmo, vbi posteaquam varia peccata, & varia flagella populi enarrauit: tandem con-

cludit, Deum elegisse Iudam, nò Ephraim, & ex Iuda ipsum Dauidem, qui deinceps magna tranquillitate populum Dei regeret, & gubernaret. Hoc igitur admonet titulus, Intellectus Asaph, vt nimirum Asaph, cui Psalmus cantandus dabatur intelligeret, & alios intelligere faceret mysterium futuri Messiae. & hoc indicant nomina parabolarum, & propositionum, quæ habentur in secundo versiculo Psal.

Explicatio Psalmi 77.

Attendite popule meus le. I.
gem meam, inclinate aurem vestram in verba oris mei.

Dauid hortaturus populum longissimo sermone, caprat initio attentionem, ostendens, se vtilia, & magna loquuturum. Attendite, inquit, legem meam, id est, preceptiones meas, quæ vos dirigere poterunt ad veram felicitatem, instar legum optimarum, & sapientissimarum. Atque id ipsum repetens, & declarans addit, Inclinate aurem vestram in verba oris mei: quæ dixerat, Attendite, nunc dicit, Inclinate aurem vestram; & quod dixerat, legem meam, nunc dicit, verba oris mei; proinde per legem non intelligit legem Moysi, quæ proprie dicitur lex; sed verba sua, quibus populum instruere, & exhortari volebat. quomodo accepit nomen legis Dominus cum ait Ioan. 15. Vt adimpleatur sermo, qui in lege eorum scriptus est, quod odio habuerunt me gratis. Porro inclinare aurem, significat obedienter, & humiliter audire, quando dicitur populo, inclina aurem tuam; sed cum dicitur Deo, inclina aurem tuam, significat clementer, & misericorditer audire. S. Augustinus hunc primum versiculum tribuit Deo, nò Dauidi; quia Deus legem suam dedit populo, non Dauid. Sed, vt diximus, hic non agitur de lege proprie dicta, sed de sermone hortatorio. S. Hieronymus hunc eundem versiculum vult esse verba Christi, non Dauidis: quia S. Matth. cap. 13. scribit, Christum loqui solitum in parabolis, vt adimpleretur, quod scriptum est, Aperiam in parabolis os meum,

G g 2 eru-

eructabo abscondita, à constitutione Mundi: quæ verba habentur in secundo versiculo huius Psalmi: sed S. Matthæus allegauit hunc locum, non vt ostenderet, verba huius Psalmi esse verba Christi, non Davidis: sed vt significaret, Dauidem loquentem in parabolis figuram fuisse Christi, qui in parabolis loquutus erat: quemadmodum cum Ioannes dicit cap. 19. Facta sunt hæc vt Scriptura impleretur, Os non comminuetis ex eo: non vult negare de agno Paschali dicta esse verba illa Exod. 12. Os non comminuetis ex eo: sed iudicare vult, agnū paschalem figurā Christi fuisse, & ideo Deo providente factum esse, vt non frangerentur crura Christi crucifixi, quando confracta sunt crura duorum latronū, qui cum ipso crucifixi fuerant. Quod autem nos diximus, secuti Theodoretū ex veteribus, & multos recentiores, verba huius versiculi, vt etiam sequentiū, esse Davidis colligitur ex tertio versiculo, vbi Propheta continuans sermonem suum addit, Quanta audiuius, & cognouimus ea, & Patres nostri narrauerunt nobis, quæ certè neque Deo, neque Christo conueniunt.

II. Aperiam in parabolis os meū, loquar propositiones ab initio.

Hæc est ratio; cur David petat attentè, & humiliter audiri verba sua, quia videlicet verba huius Psalmi continent res obscuras, & secretas, quæ non possunt intelligi, nisi attentè, & humiliter audiantur. Per parabolas intelliguntur hoc loco similitudines, siue proueria, quæ breuia, & motaphorica esse solēt. Per propositiones, intelliguntur ænigmata, quæ obscurissima sunt: id enim significat vox hebraica, chidoth, & græca προβλήματα, vt prespicuum est ex ca. 14. Iudicum, vbi ænigma illud Sampsonis, De comedente exiuit cibus, & de forti egressa est dulcedo: vocatur hebraicè, chidà, & græcè problema. Multa sunt autem in hoc Psalmo proueria, & ænigmata, vt suis locis videbimus: sed illud potissimum ænigma hic significa-

ri videtur, quo per Regnum Davidis figuratur Regnum Christi, & per montem Sion adumbratur Ecclesia. Per illud, ab initio, si corticem Psalmi respiciamus, videtur intelligi tempus liberationis populi à captiuitate Aegyptiaca, quo tempore cœpit populus Israel sub Mose formam habere Reipublicæ, & regi legibus, & iudicijs. Sic enim habetur versu sexto, Et suscitauit testimonium in Iacob, & legem posuit in Israel: sed sanctus Matthæus cap. 13. citans hunc locum, declarat hoc initium intelligendum esse de initio Mundi, dicens, Vt adimpleretur quod scriptum est, Aperiam os meum in parabolis, eructabo abscondita à constitutione Mundi. Itaque sensus est, Proferam sententias, quæ fuerunt absconditæ, & quasi ænigmata à principio Mundi: quamuis enim mysteria Christi omnī tempore prædicta, & adumbrata fuerint, tamen velata erant, & paucissimis apertè reuelata. De qua re sic loquitur Apostolus ad Ephes. 3. Mihi autem omnium Sactorum minimo data est gratia hæc, in gentibus euangelizare inuestigabiles diuitias Christi, & illuminare omnes, quæ sit dispensatio sacramenti absconditi à seculis in Deo. Propriè autem Sanctus Matthæus dixit, eructabo: nam vox hebraica hoc loco posita, abigàh, non significat loqui quocumque modo, sed ebullire, profundere, ex imo corde proferre: quod per vocem eructare satis apertè explicatur. rectus. n. ex plenitudine oritur.

ערוך

Quanta audiuius, & cognouimus ea: & Patres nostri narrauerunt nobis. III.

Non sunt occultata à filiis eorum in generatione altera IV.

Narrantes laudes Domini, & virtutes eius, & mirabilia eius quæ fecit.

Narraturus historiam rerum gestarum, sub quibus tegebantur mysteria abscon-

חידות

חידה

ſcondita à conſtitutione Mundi ; docet eam hiftoriam accepiffe ſe à Patribus, qui, & ipſi à maioribus ſuis acceperant. Loquar, inquit, propoſitiones ab initio, quanta videlicet audiuiſimus, & cognouiſimus: quoniam Patres noſtri narrauerunt nobis, tum ſcriptis literis, tum ore proprio: non enim occulta eſſe voluerunt ea filiis ſuis, quos poſt ſe in generatione altera relinquebant: qui quidem Patres narrantes erant laudes Domini, & virtutes eius, id eſt, potentiam eius admirabilem, & mirabilia opera, quæ fecit: ob quæ digniſſimus eſt omni laude. Illud, quanta, in hebræo eſt, quæ quare in græco, & latino codice ponitur, quanta, pro, quantacunq. vel quocunq. Illud, ea, redundat apud latinos, ſed uſitatè ponitur apud hebræos. Illud, Et Patres noſtri, videtur poſitum, pro, Nam Patres noſtri. Si quidem, &, ſæpiſſimè uſurpatur apud hebræos, pro. n. ut alias admonuiſimus. Illud, nō ſunt occultata, nō repugnat verbis S. Matthæi, Eructabo abſcondita: nā res geſtæ non ſunt occultatæ à filiis narrantiū eas: ſed myſtica ſignificatio abſcondita erat ab eis. Deniq. illud, narrantes coniungitur cum nomine, Patres, ut S. Auguſtinus notauit: ac per hoc verba interpoſita deberent claudi per parentheſim hoc modo. Patres noſtri narrauerunt nobis (non ſunt occultata à filiis eorum in generatione altera) narrantes laudes Dñi, &c. poſſet et illud participium, narrantes, coniungi cū pronomine ſubintellecto, hoc nō. Nos igitur narrantes erimus laudes Dñi, & virtutes eius, &c.

- VI. Et ſuſcitauit teſtimonium in Iacob, & legem poſuit in Iſrael.
- VII. Quanta mandauit Patribus noſtris nota facere ea filiis ſuis, ut cognoscat generatio altera.
- VIII. Filij qui naſcentur, & exurgēt, & narrabunt filiis ſuis.

Hic incipit narrare res geſtas à Deo, quas à Patribus accepit, ac primo loco

ponit, quod Deus dederit populo Iſraelitico legem, & mandata per Moſem: & iuſſerit eam legem, & mandata tradi filiis à parentibus, & ſic propagari ad poſteritatem. Illud, &, potuiſſet omitti ut S. Hieronymus omiſit: nam habetur quidem in hebræo, ſed nihil coniungit. Additur enim ornatus gratia non ſolum in principio periodorum, ſed etiam in principio librorum, ut initio Leuitici, Numeri, Iſue, Ruth, Ezechielis, & aliorum. Illud, ſuſcitauit, ſumptum eſt ad verbum ex hebræo; ſed potuiſſet etiam verti, ſtare fecit, ſive conſtituit, ſive poſuit. Vox, teſtimonium, nihil aliud hoc loco niſi legem ſignificat. Vocatur autem lex Dei teſtimonium, quia teſtificatur hominibus quæ ſit volūtas Dei, ut fuſius diximus in explicatione Pſalmi decimioctauī, verſiculo octauo. Itaque idem omnino eſt, ſuſcitauit teſtimonium in Iacob, cum eo quod ſequitur, Legem poſuit in Iſrael, id eſt, dedit Deus legem ſuam filiis Iacob, qui & Iſrael dictus eſt. Illud, quanta mandauit, in hebræo eſt, quæ mandauit: proinde vox, quanta, accipienda eſt, pro quā tacunque, ſive quocunque: ex quo intelligimus nomine legis ſignificari hoc loco non ſolum legem Decalogi, ſed omnia mandata moralia, ceremonialia, & iudicialia, quæ habentur in quinque libris Moſis.

Vt ponant in Deo ſpem ſuā, & non obliuiſcantur operū Dei, & mandata eius exquirant. IX.

Ne fiant ſicut Patres eorum generatio praua, & exaſperans. X.

Generatio, quæ nō direxit cor ſuum, & non eſt creditus cū Deo ſpiritus eius. XI.

Explicat Propheta, cur Deus legem dederit populo ſuo, & mādaauerit ut parentes docerent filios ſuos, & illi nepotes Patrum ſuorum, Ratio enim fuit, ut filij Iſrael non ſperarent in Dijs falſis, & idolis gentium; ſed in Deo vero, qui

legem sanctam de cœlo illis dederat, non sine ingentibus prodigijs: nec nō ut nunquam obliuiscerentur mirabilium operū Dei, quæ fecit in liberatione eorum de seruitute Pharaonis. Præterea ut sollicitè quærerēt quid vellet ab eis Deus, atque id opere implerent. Denique ut non imitarentur ingratitude, & infidelitatem maiorum suorum, qui affecti maximis beneficijs à Deo per Mosem, ingratiſſimi fuerunt. Nam, & in Aegypto cū essent ægrè adduci potuerunt, ut crederent Moſi: & egressi de Aegypto, sapissimè defecerunt ab obedientia Moſis, & Dei assidue murmurantes, & (quod grauius est) vitulos aureos adorantes. Illud generatio, quæ non direxit cor suum: significat, populum hebræorū, non habuisse cor directum firmiter ad Deum, sed ad varia auxilia respexisse. Illud, autem, & non est creditus cum Deo spiritus eius, clarius est in hebræo codice: sic enim verti potest ad verbū, Et non fuit fidelis ad Deū spiritus eius. Vox autem latina accipiēda est in significatione non passiua, sed actiua, ac si esset deponentis cōiugationis. Non est creditus cum Deo, id est, nō credidit Deo spiritus eius: sic enim exponit S. Augustinus. vel accipiendū est verbum, creditus, pro fidelis, ut accipiunt verbū græcum *πιστός*, Theodoretus, & Euthymius. Itaque sensus erit, non fuit fidelis spiritus populi cū Deo, quia sæpè defecit à fide, & obedientia.

XII. Filij Ephrem intendentes, & mittentes arcum, conuersi sunt in die belli.

Plerique notari putant in hoc versiculo pugnam aliquā infelicem hebræorum de tribu Ephraim; sed neq. facile est inuenire in diuinis literis, quæ illa pugna fuerit: neque credibile est, Prophetā quasi ex abrupto inferere voluisse hoc loco particulare aliquod factū, cū generatim describit vitia totius populi de Aegypto mirabiliter eduēti, ac de seruitute liberati: Igitur probabilius est, per quandam similitudinem expli-

cari quod dictum est, populum hebræum non fuisse constantem in fide, & obedientia Dei; ut sensus sit. Filij Ephre id est, Israelitæ similes fuerunt militibus incipientibus præliari cum hostibus. & mox dimisso prælio terga vertentibus. sic enim Israelitæ in deserto, non semel promiserunt, se Deo parituros, & facturos quæcunque ille mandasset: & statim mutata voluntate cogitabant de reditu in Aegyptum, & contra Deū, & Moſem murmurabant. Nominat autem Dauid filios Ephrem, id est, tribum Ephraim, & per illam intelligit totum cœtum Israelitarum; quia tribus Ephraim erat numerosissima, & potentissima post tribum Iuda: & per hoc æmula tribui Iuda: & in Scripturis ut plurimum reprehenditur tribus Ephraim, & laudatur tribus Iuda; & ideo mala vniuersi populi describuntur potius sub nomine Ephraim, quam sub nomine aliarum tribuum. & in fine huius Psalmi dicit, tribum Ephraim non elegit: sed elegit tribum Iuda. Vide Oſeam Prophetam.

Non custodierunt testamentum Dei, & in lege eius noluerūt ambulare. **XIII.**

Et obliti sunt benefactorum eius, & mirabilium eius, quæ ostendit eis. **XIV.**

Coram patribus eorum fecit mirabilia in terra Aegypti, in campo Taneos. **XV.**

Explicat quod metaphoricè dixerat, filios Ephraim, id est, Israelitas, conuersos fuisse retrorsum. nam cum professi essent, se obedituros Deo, non seruauerunt pactum, nec legem Dei impleuerunt, & cito obliti sunt beneficiorum Dei, & mirabilium operum, quæ Deus fecerat in Aegypto pro ipsis, quæq. à Patribus suis narrari audierant. Illud, non custodierunt testamentum Dei, significat, non steterunt promissis, siue non seruauerūt pactum: nam in hebræo est vox, berith, quæ significat pactum; sed

ברית

Septuaginta Interpretes verterunt, testamentum, ut aliàs sæpè diximus. Illud, in campo Taneos, significat in planitie Aegypti, cuius regia dicitur Tanis. Mirabilia enim, quæ fecit Moses coram Pharaone, non facta sunt in loco obscuro, sed in loco celeberrimo, & aptissimo, in agro videlicet Urbis regis.

- XVI.** Interrupit mare, & perduxit eos, & statuit aquas, quasi in vtre
XVII. Et deduxit eos in nube diei, & tota nocte in illuminatione ignis.
XVIII. Interrupit petram in Eremo, & adaquavit eos velut in abyssu multa.
XIX. Et eduxit aquam de petra, & deduxit tamquàm flumina aquas.
XX. Et apposuerunt adhuc peccare ei, in iram excitauerunt excelsum in inaquoso.

Posteaquam attigerat Dauid mirabilia facta in Aegypto coram Pharaone: describit alia facta in egressu, id est, diuisionem maris rubri, ut transiret populus sicco vestigio per medium maris: & alia patrata post egressum de Aegypto in solitudine, videlicet columnam nubis, quæ præeundo ostendebat iter per diem, & columnam ignis, quæ ostendebat iter per noctem; ac postea sitiienti populoeductas aquas de petra in maxima copia. Addit verò Dauid post hæc omnia mirabilia, populum incredulū iterum prouocasse Deum ad iracundiā in deserto inaquoso ob aquæ penuriā. Quæ iterumeducta est de petra, ut habetur Num. 20. Nam illa prioreductio contigerat anno superiore, ut habetur Exodi. 17. Illud, statuit aquas quasi in vtre: significat Deum ea facilitate fecisse, ut mare cōsisteret, & non operiret Hebræos, qui per fundū maris iter faciebant, qua facilitate potest homo continere modicam aquam inclusam in vtre, ut non defluat in terram. Illud, in nube diei, potuisset clarius verti, in nu-

be per diem: nam in hebræo non habet formam genitiui. In græco est quidem *ἐκ τῆς πέτρης*, in genitiuo, sed accipitur pro ablatiuo, quo græci carent. Illud, veluti in abyssu multa, significat ex petra fluxisse tantam copiam aquarum, ac si petra conuersa fuisset in lacum profundissimum, vel in magnum, & profundū flumen, ut dicitur in sequenti versiculo: abyssus. n. est profunditas magna. Denique illud, & apposuerunt adhuc peccare; pōt referri ad secundam eductionē aquæ ex petra; ut sensus sit, olim peccauerunt murmurātes ob inopiā aquæ; & Deus dedit illis aquā de petra, Exod. 17. & obliti illius miraculi apposuerūt secundo murmurare, & de potētia Dei dubitare, ob similem aquæ penuriam, ut habetur Num. 20. ubi rursus dedit eis Deus aquam de petra. Potest etiam, ut alij volunt coniungi cū sequenti versiculo, ut cōmemoretur peccatum murmurationis de inopia panis, non de penuria aquæ. Sed prior expositio mihi magis placet, tū propter vocabulū, inaquoso, quod denotat carentiā aquæ; tū ne desit in hoc psalmo memoria peccati illius celeberrimi, quo populus his murmurauit cōtra Deū, & Mosē ob aquæ penuriā. Et secundū hanc expositionem, illa verba, & eduxit aquā de petra; continent repetitionem sententiæ versiculi superioris: non aut narratiōne secundæ eductionis aquæ ex petra.

Et tentauerūt Deum in cordibus suis, ut peterent escas animabus suis. **XXI.**

Et male locuti sunt de Deo: dixerunt, Nunquid poterit Deus parare mensam in deserto? **XXII.**

Quoniam percussit petram & fluxerunt aquæ & torrentes inducuerunt. **XXIII.**

Nunquid, & panē poterit dare, aut parare mensā populo suo? **XXIV.**

Ideò audiuit Dominus, & distulit, & ignis accensus est in Iacob, & ira ascendit in Israel. **XXV.**

Gg 4 Quia

- XXVI.** Quia non crediderunt in Deo,
nec sperauerunt in salutare
eius.
- XXVII.** Et mandauit nubib. desuper,
& ianuas cœli aperuit.
- XXVIII.** Et pluit illis Manna ad man-
ducandum, & panem cœli dedit
eis
- XXIX.** Panem angelorum manduca-
uit homo cibaria misit eis in
abundantia.
- XXX.** Transtulit austrum de cœlo, &
induxit in virtute sua Africum.
- XXXI.** Et pluit super eos sicut pulue-
rem carnes, & sicut arenam ma-
ris volatilia pennata.
- XXXII.** Et ceciderunt in medio castro
eorum circa tabernacula eo-
rum.
- XXXIII.** Et manducauerunt, & satura-
ti sunt nimis: & desiderium eorū
attulit eis, non sunt fraudati à de-
siderio suo.

Coniungit Propheta beneficium pa-
nis cœlestis cum beneficio aquæ produ-
ctæ ex petra: quoniam hæc erat figura
insignis passionis Christi, & sacrosactæ
Eucharistiæ; vt explicat Dñs ipse Io-
ann. 6. & Apostolus. 1. Corinth. 10.
Aqua enim ex petra, est sapientia ex
stultitia. Non enim minus contraria est
sapientia stultitiæ, quàm aqua res mol-
lis, & fluida petræ arenti, & duræ. sapi-
entia ex stultitia est mysterium crucifixi.
Christus .n. crucifixus, id est, petra per
cussa, gentibus stultitia erat, & Iudæis
scandalum: & tamen hominibus fide il-
lustratis producit altissimam sapientiā.
Et quia non cognouit Mundus per sa-
pientiam Deum, placuit Deo per stulti-
tiam prædicationis saluos facere cre-
dentes. Panis autem de cœlo verus, nō
erat manna pluens ex cœlo aereo; sed
caro Christi, qui de cœlo cœlorum de-
scendit, & dat vitam Mundo. Manna ta-

men hunc panem verum adumbrabat:
& hoc significauit Propheta, cū initio
Psalmi se parabolas, & ænigmata canta-
turum pollicebatur: sed veniamus ad
expositionem verborum. Propheta po-
steaquam commemorauerat beneficiū
aquæ de petra eductæ, & infidelitatem
populi: transit ad beneficia panis, & car-
nis, & ad nouam populi incredulitatē
explicandam. Sciendum autem est,
bis à Deo datum fuisse hebræis cibum
carnium, semel vna cum manna. Exodi
16. & rursum carnis solius. Num. 11. &
manna cū carnibus datum est antequā
aquæ producerentur ex petra; sed cib-
carnis solius datus est post educationem
aquæ ex petra. Sed David coniungit
vtrūque beneficium, & vtramque mur-
murationem simul; & ideò nascitur in
verbis aliqua obscuritas, quæ faciliè tol-
li potest. Ait igitur, Et tentauerunt Deū
in cordibus suis, id est, experiri volue-
runt, an Deus verè esset omnipotens,
& curam gereret populi sui: & ideò pe-
tierunt escas animabus suis, quas vide-
licet anima ipsorum desiderabat, vt pa-
nes, & carnes: sic enim narrat Moyses
Exodi 16. & Num. 11. Et malè loquuti
sunt de Deo, dubitantes videlicet, an
posset in deserto pascere populū suum,
sicut potare potuerat. hæc pertinent
ad secundam murmurationē. Nā prior
præcessit priorē educationem aquæ ex
petra, vt patet ex libro Exodi cap. 16.
& 17. Ideò audiuit Dominus, & distulit
id est, audiuit murmurationē ex incre-
dulitate procedentem: & distulit, hoc
est lōgè fecit à se populum suum, amo-
uit à beneuolentia sua, quin potius con-
uertit beneuolentiam in iram, & indi-
gnationem, & immisit ignem in castra,
& multos occidit, vt dicitur Num. 11.
Et tamen voluit conuincere populum
infidelem, & demonstrare potētiā suā;
& ideò mandauit nubibus desuper, &
ianuas cœli aperuit, & pluit illis māna
ad manducandum, & panem cœli dedit
eis, panem Angelorum manducauit ho-
mo. Hæc pertinent ad priorem mur-
murationem: manna enim datum est an-
te productionem aquæ ex petra. Porro
māna dicitur panis de cœlo, quia ex cœlo
aereo

aereo pluebat; & panis Angelorū; quia opera, & ministerio Angelorum fiebat. Vocabulum autē, manna, ductum est ab admiratione populi, qui videns terram coopertam nouo illo cibo dixit, Man hu
 77 10 quod significat, quid hoc? Inde positum
 10 est illi cibo nomen, mar, & græcè Μαννα. erat autem manna simile pruinæ, Exodi 16. & sicut semen coriandri, quod in mortario contusum, & coctum igni, sapore habebat panis oleati, Num. 11. Deinde, Transtulit Deus Austrum de cælo, & induxit in virtute sua Africum; & pluit super eos sicut puluerem carnes, id est, effecit, ut ventus vehementissimus deferret coturnices in desertum, ubi Iudæi morabantur, in tanta copia, quanta est copia pulueris i littore maris. In hebræo habetur, Transtulit ventum orientalem: ex quo intelligimus per Austrum, intelligendum esse Austrum Orientalem, qui dicitur Euris: sed quia Auster Orientalis non est contrarius Africo, siue Libico, ut vocatur in textu græco, sed potius ei vicinus & coniunctus; ideo Theodoretus, & Euthymius, & alij per vocem, transtulit, non intelligunt amouit, siue cessare fecit; sed excitaui, & flare iussit, ac si dictum esset transtulit de cælesti thesauro, & emisit in terram, ut etiam exponit S. Augustinus, ut simul cum Africo adduceret coturnices in desertum. Itaque non vnus, sed duo venti ex duabus vicinis regionibus adducerent copiam maximam coturnicum. Non tamen est improbabilis aliorum sententia, quod ventus Australis orientalis, id est, Euris remotus sit, & prohibitus flare; & solus Africus, siue Libicus impulerit coturnices in castra Hebræorum: nam Num. 11. dicitur ventus a Domino adduxisse coturnices trans mare ad castra Hebræorum. Vbi vnus venti solus mentio fit, & venti, qui per mare Libicum transiret, ut adduceret coturnices ad desertum. Eiusmodi autem ventus, non est Euris, sed Libicus. Adde quod S. Hieronymus vertit, Abstulit Eurum de cælo, & induxit in fortitudine sua Africum. Denique verba græcæ, & latinæ editionis faciliè explicantur in hanc sententiam, & duriusculè in priorem.

Adhuc escæ eorum erant in ore XXXIV.
 ipsorum: & ira Dei ascendit super eos.

Et occidit pingues eorum, & XXXV.
 electos Israel impediuit.

In omnibus his peccauerunt XXXVI.
 adhuc, & non crediderunt in mirabilibus eius.

Et defecerunt in vanitate dies XXXVII.
 eorum, & anni eorum cum festinatione.

Cum occideret eos quærebant XXXVIII.
 eum, & reuertebantur, & diluculo veniebant ad eum

Et rememorati sunt, quia Deus XXXIX.
 adiutor est eorum, & Deus excelsus redemptor eorum est.

Et dilexerunt eum in ore XL.
 suo, & lingua sua mentiti sunt ei.

Cor autem eorum non erat re. XLI.
 ctum cum eo, nec fideles habitati sunt in testamento eius.

Demonstrat in his versiculis Prophetam, Deum magno miraculo satisfecisse desiderio Hebræorum, ut ostenderet potentiam suam: sed non dimisisse impunitam infidelitatem, & contumaciam eorum: Hebræos autem tum ob miraculum, tum ob flagellum conuersos fuisse ad obedientiam, & fidem, sed non stabili corde, neque perseueranter, ut par erat. Adhuc, inquit, escæ erant in ore eorum, id est, nondum consumpserant coturnices, & ira Dei excitata est aduersus eos; & occidit ex eis partem maximam, ita ut appellaretur locus ille, sepulchra concupiscentiæ, ut dicitur Num. 11. Quomodo eos Deus occiderit, Scriptura non docet; sed credibile est morbo aliquo ex nimia auiditate, & saturitate comedentium exorto. Occidit autem Deus præcipue pingues, & electos, id est, magis deditos voluptatibus, & iuuetute

ac

ac viribus robustiores: quos electos dicit impeditos, quia morbus deiecit eos, & impediuit, ne a morte fugere possent quāuis alioqui robustissimi essent. Hoc autem illis accidit, quia peccauerunt in Deum infidelitate sua, non credentes mirabilia illa a Dei omnipotentia fieri, sed casu accidisse, vt coturnices ad eos deferrentur. Ideo morte puniti sunt tanta **velocitate**, vt defecerint dies eorum in vanitate, id est, velut fumus, aut vmbra, quæ celerrimè transit, & vestigium nullum relinquit. Ipsi autem cum flagellarentur a Deo, & morte afficerentur, redibant ad cor, & quærebant adiutorium Dei, & diluculo, id est, continuò, statim, cum primum flagellum sentire inciperent, veniebant supplices ad misericordiam Domini implorandam: & tunc ad memoriam reuocabant beneficia Dei priora: sed non erat stabilis, & vera conuersio eorum; sed metu extorta & ficta: nam ore quidem amorem, & deuotionem erga Deum profitebantur, sed mentiebantur; quia cor eorum non erat verè directum ad Deum, neque fideles permanebant in seruanda promissione, & pacto cum Deo inito. Vtinam nõ imitaremur & nos Christiani hanc Hebræorum inconstantiam. quàm multi enim sunt ex nobis, qui in periculo vitæ constituti promittunt, & vouent Deo, & Sanctis eius morum emendationem; & periculo euitato, redeunt ad pristinam vitiorum consuetudinem; sed Deus non irridetur, & qui tales sunt, non effugient iudicium Dei.

XXX XII. Ipse autem est misericors, & propitius fiet peccatis eorum: & non disperdet eos.

XXX XIII. Et abundauit vt auerteret iram suam & non accendit omnē iram suam.

XL II. Et recordatus est quia caro sunt, spiritus vadens, & non rediens.

XXX XV. Quoties exacerbauerunt eum in deserto? in iram concitauerunt eum in inaquoso?

runt eum in inaquoso?

Et conuersi sunt, & tentauerunt **XXX XVI.** Deum, & sanctum Israel exacerbauerunt.

Nõ sunt recordati manus eius, **XXX VII.** die qua redemit eos de manu tribulantis.

Confert nunc Propheta bonitatem Dei cum nequitia hominum, ac dicit, Deum quidem flagellasse populum suum, sed non esse oblitum misericordis naturæ suæ: & ideò non tam seuerè in illos animaduertisse, vt eorum peccata merebantur. Nam propitius erit peccatis eorum, & non disperdet omnino populum suum. Ipsi quidem digni erant ultimo exterminio, sed misericordia Dei fecit, vt aliqui remanerent: vt re vera ex numero eorum, qui exierant ex Aegypto duo remanserunt Iosue, & Caleb: qui figuram gerebant Electorum, qui salui fient: nam vt Apostolus loquitur ad Romanos. 11. Non repulit Deus plebem suam, quam præsciuit: sed reliquæ secundum electionem gratiæ saluæ factæ sunt. Ita quæ non repugnat hic versiculus dispersioni Hebræorum, quàm videmus: nam impleta est hæc promissio in Apostolis, qui ex hebræis erant, & non solum dispersi non sunt, sed collegerunt multitudinem magnam Deo in populum electum: de quo prophetauit Osee cap. 1. & 2. & explicat Apostolus Petrus 1. epistola. cap. 2. Qui aliquando non populus Dei, nunc autem populus Dei; qui non consecuti misericordiam, nunc autem misericordiam consecuti. Pergit Propheta, ac dicit, Et abundauit vt auerteret iram suam, id est, abundanter, & copiosè auertit iram suam, quia multum remissit de pœna, quàm populi peccata merebantur. & hoc modo temperauit, siue auertit iram, quia non accendit omnem iram suam, vt iustè facere potuisset. Et recordatus est, quia caro sunt, spiritus vadens, & non rediens. accessit ad rationem miserendi naturam hominis post peccatum primi hominis infirma, & mortalis, obnoxia carnalibus concupiscentiis.

Ipse

Ipse enim nouit figmentum nostrum, quod caro sumus, id est, carnales, infirmi, ac debiles; & quod spiritus sumus uadens, & non rediens, id est, vitam habemus mortalem, quæ continuò progreditur a pueritia ad iuuentutem, & non reuertitur ad pueritiam: progreditur a iuuentute ad senectutem, & non reuertitur ad iuuentutem, sed breui compendio tendit ad mortem. Itaque similis est floribus, alijsque rebus caducis: non autem soli, & lunæ, & stellis, quæ in circulos suos reuertuntur, & semper sunt eadem, quia solidæ sunt, & æternæ. Non desunt qui uelint, hoc loco per spiritum, intelligi animum, qui exit de corpore per mortem, & non reuertitur uisus ad corpus: Sed non uidetur ad rem præsentem facere tractatio de resurrectione, ubi solum describitur infirmitas, & breuitas humanæ uitæ. Proinde hoc loco per spiritum intelligendus est spiritus vitalis corporis nostri, siue corporalis uita, quæ progrediendo consumitur, & mutabilis, atque instabilis est. Quod autem sit talis uita hominis, probat Propheta sequentibus versiculis. Quoties, inquit, exacerbauerunt eum in deserto? in iram concitauerunt in iniquo? instabilitate sua uidelicet nunc promittendo fidem & obedientiam; nunc contra obloquendo; & recalcitrando: nam conuersi sunt a bono proposito, & promissis, & tentauerunt Deum experiri uolentes, an uerè Deus omnipotens esset: & hoc modo sanctum Israelis, id est, Deum, exacerbauerunt. Vocatur autem Deus Israelis, sanctus, non solum a Dauide, sed etiam ab Isaia in plurimis locis; quoniam solus Deus uerè est propriè sanctus, id est, purus, & inuolabilis: Dijs enim gentium immundi Dæmones sunt. Denique tanta fuit mutabilitas, & stultitia Hebræorum, quos Deus eduxit ex Aegypto, ut statim obliti sint signorum, & prodigiorum maximorum, & plurimorum, quæ manus Dei fecit, cum eos de seruitute Aegyptiaca liberaret.

Sicut posuit in Aegypto signa XXXXVIII sua, & prodigia sua in campo Thaneos.

Et conuertit in sanguinem flumina eorum, & imbres eorum ne biberent. XXXXIX.

Misit in eos cænomiam, & comedit eos; & ranam, & disperdidit eos. L.

Et dedit ærugini fructus eorum, & labores eorum locustæ. LI.

Et occidit in grandine uineas eorum, & moros eorum in pruina. LII.

Et tradidit grandini iumenta eorum, & possessiones eorum igni. LIII.

Misit in eos iram indignationis suæ indignationem & iram, & tribulationem immisiones per angelos malos. LIV.

Viam fecit semitæ iræ suæ: non pepercit a morte animabus eorum, & iumenta eorum in morte conclusit. LV.

Et percussit omne primogenitum in terra Aegypti: primitias omnis laboris eorum in tabernaculis Cham. LVI.

Et abstulit sicut oues populum suum, & perduxit eos tamquam gregem in deserto. LVII.

Et eduxit eos in spe, & non timore: muerunt, & inimicos eorum operuit mare. LVIII.

Occasione versiculi quadragésimi septimi, ubi dixerat Propheta, non fuisse recordatos Hebræos mirabilium, quæ fecit Deus, cum educeret eos de Aegypto: describit his undecim versiculis signa, & prodigia, quæ fecit Deus aduersus

sus Pharaonem, donec tãdem eum cum exercitu suo demersit in mare. Quæ omnia narrantur in Exodo a capit. 7. ad 14. Porro Dauid non meminit omnium signorum, sed præcipuorum, neque ordine illa enumerat, sed vt sibi visum est. sic igitur loquitur, Non sunt recordati Hebræi in deserto, manus Domini, id est, potentia vel operis Domini, quo liberauit eos de manu Pharaonis tribulantis. Sicut posuit in Aegypto signa, id est, non sunt recordati, quemadmodum statuerit Deus ingentia miracula, signa potentia suæ in Aegypto, ac potissimum in parte nobiliore Aegypti, vbi est Tanis Regia Pharaonis. Et conuertit, id est, quia conuertit in sanguinem flumina eorum, & imbres eorum, ne biberent. De hoc signo scribit Moses Exod. cap. 7. Vocat Propheta flumina Aegypti varios ramos fluminis, qui per Aegyptum flunt. per imbrem, non intelligitur pluuia, quæ in Aegypto videri non solet, sed ponitur imber pro aqua, species videlicet pro genere. Quomodo Virgilius lib. 1. Aeneidos dixit,

Accipiunt inimicum imbrem, rimisq.
fatiscunt.

Vbi per imbrem intelligit aquam marinam, quæ in nauim per rimas ingrediebatur. Itaque Dauid more suo idipsum bis repetit, & quod in priore parte versuli vocauit flumina, in posteriore vocat imbrem. Misit in eos cœnomyiam, & comedit eos, & ranam, & disperdidit eos. de hoc agitur Exodi cap. 8. Vulgaris quaestio hic est, an sit legendum cœnomyia, id est, musca communis, siue omne genus muscarum, an cynomyia, id est, musca canina. Vulgata editio correctâ habet, cœnomyiam, cui fauet Sanctus Hieronymus tum in versione sua ex hebræo, tum in epistola ad Suniam, & Fretellam. Græci tamen libri communius habent cynomyiam, & sic legit, & exponit idem S. Hieronymus in commentario. Vox hebræa, arôb, missionem significat, & satis conuenit lectioni vulgatæ correctæ: sed res nō est magni momenti. Et dedit ærugini fructus eorum,

& labores eorum locustis. hoc signum habetur Exod. 10. vbi fit tantum mentio locustarum: proinde per æruginem intelligendæ sunt locustæ, vel bruchi (vt vertit S. Hieronymus) quæ animantia deuorant herbas ad modum æruginis. Itaque nomen æruginis, quod propriè significat vitium æris, hoc loco accipitur metaphoricè. Et occidit in grandine vineas eorum, & moros eorum in pruina. de hac re agitur Exodi 9. vbi non fit mentio pruinae, sed solius grandinis. S. Hieronymus vertit, & sycomoros eorum in frigore: vbi per frigus posset intelligi frigus grandinis, vt sit repetitio eiusdem rei: vel certè grandine, & pruina afflixit Deus vineas, & arbores Aegypti: sed Dauid addidit quod Moses omiserat. Et tradidit grandini iumenta eorum, & possessiones eorum igni. Grando enim cum igne fulgurum, & fulminum descendebat, nec solum herbas, sed etiam iumenta perdebat, vt ibidem legimus. Misit in eos iram indignationis suæ, indignationem, & iram, & tribulationem, immisiones per Angelos malos. In hoc versiculo generatim complectitur Propheta omnes alias plagas, quas omiserat, vt vlcera, vesicas, & alia id genus; & simul attingit postremam, & grauissimam plagam occisionem videlicet primogenitorum omnium, quæ facta est per Angelum percutientem, vt dicitur Exodi 12. Non finam, inquit, percussorem ingredi domos vestras, &c. Misit iram indignationis suæ, id est, esse: lumen iræ furoris sui, tribulationem videlicet magnam. & hoc idem repetens, ait, Iram, & indignationem, id est, effectum iræ, & furoris, qui effectus est tribulatio. Immisiones per Angelos malos, id est, quæ tribulatio fuit per immersionem Angelorum malorum. Ex quo intelligimus, plagas Aegypti, ac præcipuè occisionem primogenitorum factas esse opera Angelorum, qui non nocent, nisi quantum Deus permiserit, cum Dei summi Iudicis administrati sint. Possunt autem Angeli mali dici Angeli sancti, qui dicuntur mali ab effectu quia puniunt quos Deus vult puniri. Possunt etiam dici Angeli mali, Demones impuri, qui sunt verè mali malam volun-

voluntatem gerentes. Deus enim vtrisque vitur: nam per Angelos sanctos puniuit Sodomitas igne cœlesti: & per Angelos impuros flagellauit Iobum, igne pariter cœlesti. Vide Sanctum Augustinum in hunc locum. Viam fecit semitæ iræ suæ, non pepercit a morte animabus eorum. Insignis metaphora est, quasi dicat, Ira diuina ultionem parans detinebatur a diuina misericordia, ne vsque ad mortem defuisset: sed tandem remoto obice misericordiæ, viam aperuit iræ suæ, & non pepercit vitæ ipsorum a morte: sed occidit omnia primogenita hominum, & iumentorum, quæ erant primitiæ laborum eorum, id est, Aegyptiorum: laborant enim plurimum homines in educandis filiis suis, & iumentorum suorum; sed primitiæ laboris erga primogenita exercentur: ac per hoc dicuntur primogenita primitiæ laborum. Illud, in tabernaculis Cham, significat in Aegypto. Cham enim fuit filius Noe, & Mizraim fuit filius Cham: & ab hoc filio Chæ dicta est Aegyptus, Mizraim. Itaque dicitur Aegyptus tabernaculum Cham a parente primi habitatoris, & possessoris Aegypti. Et abstulit sicut oues populū suum, & perduxit eos sicut gregem in deserto. Occisis primogenitis Aegyptiorum dedit Pharaon facultatem Hebræis abeundi ex Aegypto, vt habetur Exodi 12. & tunc Deus eduxit populum suum ex Aegypto, & duxit in desertum Arabiæ. Et eduxit eos in spe, & non timuerunt, id est, cum fiducia magna, & inimicos eorum operuit mare: quæ fuit vltima plaga Aegyptiorum, & in qua finem accepit captiuitas filiorum Israel, vt habetur Exodi 14.

LIX. Et induxit eos in montem sanctificationis suæ, montem quem acquisiuit dexter eius.

LX. Et eiecit a facie eorum gentes, & sorte diuisit eis terram in funiculo distributionis.

LXI. Et habitare fecit in tabernaculis eorum tribus Israel.

Et tentauerunt, & exacerbauerunt Deum excelsum, & testimonia eius non custodierunt.

Et auerterunt se, & non seruauerunt pactum: quemadmodum Patres eorum, conuersi sunt in arcum prauum.

In iram concitauerunt eum in collibus suis, & in sculptilibus suis ad æmulationem eum prouocauerunt.

Transit nunc Propheta ad historiam libri Iosue, & Iudicum, atque ostendit, fuisse hebræos introductos a Deo in terram promissionis, quam vocat montem sanctificationis suæ, quia erat terra motuosa, & quam Deus sibi ipse sanctificauerat, & dedicauerat, vt in ea coleretur a populo suo. dicit quoque eam terram acquisitam a Deo, quia Deus fecit euidē tibus miraculis, duce Iosue, vt Israelitæ vincerent bello, & expellerent pristinos habitatores cultui Idolorum addictos. Addit verò Propheta, Hebræos in terram promissionis introductos non fuisse meliores Patribus suis, qui in deserto perierant: nam ipsi quoque tentauerunt, & exacerbauerunt Deum seruientes Idolis, & verum Dei cultum deferentes. Illud conuersi sunt in arcum prauum, significat, eos imitatos esse arcum distortum, qui non iacit sagittas, quò iaciendæ sunt, sed in aliam partem vbi non oportebat. Sic enim Hebræi promittebant obseruantiam legis Dei, ac videbantur sagittas operum suorum dirigere ad cultum veri Dei; sed interim sacrificabant Dijs alienis; id quod proprijs verbis explicat Propheta in sequenti versiculo, cū ait, In iram concitauerunt eum in collibus suis, & in sculptilibus suis ad æmulationem eum prouocauerunt. siquidem in excelsis collibus, præsertim frondosis collocabant altaria Idolorum, ibique eis sacrificabant.

Audiuit

- LXV.** Audiuit Deus, & spreuit, & ad nihilum redegit valde Israel.
- LXVI.** Et repulit tabernaculum Silo, tabernaculum suum, ubi habitauit in hominibus.
- LXVII.** Et tradidit in captiuitatem virtutem eorum, & pulchritudinem eorum in manus inimici.
- LXVIII.** Et conclusit in gladio populum suum, & hereditatem suam spreuit.
- LXIX.** Iuuenes eorum comedit ignis, & virgines eorum non sunt lamentatae.
- LXX.** Sacerdotes eorum in gladio ceciderunt, & viduae eorum non plorabantur.

Hic iam explicat Propheta vltionem diuinam in peccata populi sui: ac precipue commemorat tempus illud, quo Philistaei fuderunt exercitum populi Dei, & Arcam Domini captiuam duxerunt, Sacerdotibus occisis, qui eam custodiebant: quae historia narratur in 1. Reg. cap. 4. Ait igitur, Audiuit Deus, id est, cognouit peccata populi sui clamantia in caelum: & spreuit populum suum tamquam inutilem, & tamquam morte dignissimum, redegit valde ad nihilum, id est, valde humiliavit, concessa victoria maxima hostibus eorum. Et repulit tabernaculum Silo, id est, abiicit tabernaculum, in quo erat Arca, quod tabernaculum tunc erat in Silo: & in quo tabernaculo Deus quodam modo habitabat inter homines, quia inde dabat responsa hominibus. Et tradidit in captiuitatem virtutem eorum, & pulchritudinem eorum in manus inimici, id est, permisit circumueniri, & vndique circundari gladijs hostium populum suum, quem elegerat sibi in hereditatem, id est, in populum peculiarem,

& proprium. Iuuenes eorum comedit ignis, id est, ardor belli, siue ignis irae Dei consumpsit praestantissimos quosque, quales solent esse homines in flore iuuentutis: & virgines eorum non sunt lamentatae, id est, occisis iuuenibus in bello, virgines eis desponsatae non habuerunt, qui earum sortem lugerent, quoniam in communi strage quisque habuit, quod domi suae lugeret. Itaque illud, lamentatae, passiuè accipiendum est, vt indicat sanctus Hieronymus, qui vertit, Et virgines eius nemo luxit. Rabini legunt, Et virgines eorum non sunt laudatae, carmine videlicet nuptiali. Sed vox hebraea, hullalu, וְהָלְלוּ, vtrunque significare potest, desletae, & laudatae. nos autem anteponimus Septuaginta Seniores, & S. Hieronymum omnibus Rabinis. Sacerdotes eorum in gladio ceciderunt, videlicet Ophni, & Phinees filij Heli, qui nominatim referuntur inter mortuos. 1. Reg. 4. Et viduae eorum non plorabantur, id est, relictas vxores eorum nemo fuit, qui deslendo consolaretur, quoniam, vt dictum est, omnes occupati erant in proprijs consanguineis deplorandis, quos ruina communis oppresserat. In hebraeo, & graeco habetur in futuro, non plorabuntur: sed sanctus Hieronymus intelligens futurum poni pro praeterito, vertit, non sunt desletae, & eum secutus noster Interpres, vertit, non plorabantur.

Et excitatus est tamquam dormiens Dominus, tamquam potes crapulatus a vino. **LXXI.**

Et percussit inimicos suos in posteriora, opprobrium sempiternum dedit illis. **LXXII.**

Et repulit tabernaculum os Sese, & tribum Ephraim non elegit. **LXXIII.**

Sed elegit tribum Iuda, monte Sion, quem dilexit. **LXXIV.**

Et edificauit sicut Vnicorniū **LXXV.**
san-

sanctificium suum in terra, quam fundavit in secula.

LXXVI. Et elegit David servum suum, & sustulit eum de gregibus ovium, de post foetantes accepit eum.

LXXVII. Pascere Iacob servum suum, & Israel hereditatem suam.

LXXVIII. Et pavit eos in innocentia cordis sui. & in intellectibus manuum suarum deduxit eos.

In hac postrema parte Psalmi, David ostendit, Deo placuisse afflictionem populi sui, quatenus poena erat peccatorum; sed non placuisse superbiam, & iniquitatem Philistinorum, qui eos afflixerunt: & ideo vindictam ab ipso Deo sumptam de Philistinis, ut narratur in eodem 1. lib. Reg. capit. 5. Deus enim saepe utitur mala voluntate impiorum ad aliquos puniendos; & deinde punit eosdem impios, non tam attendens quod per illos ipse fecit bonum, quam malam nocendi cupiditatem, quam in eis ipse non fecit. Addit deinde, noluisse Deum, ut tabernaculum esset amplius in Silo, ciuitate de tribu Ephraim, neque ut summa Imperij esset in tribu Ioseph, sed voluisse, ut tabernaculum statueretur in monte Sion, & Imperium pertineret ad tribum Iuda, & ex tribu Iuda Davidem elegeret Regem populo suo: quod est vaticinium de Christo, & Ecclesia, ut initio Psalmi diximus. Nam ut hoc loco diligenter obseruauit Sanctus Augustinus, non repulit Deus Ioseph, & elegit Iudam ob meritum personarum. Nam Ioseph melior fuit multo, quam Iudas, siue castitatem, siue patientiam, siue sapientiam, siue prudentiam, siue dilectionem inimicorum consideres: sed elegit Iudam propter Davidem, & Davidem propter Christum; & Synagogam destruxit, ut Ecclesiam edificaret. Sed ipsa verba explicemus; Et excitatus est tamquam dormiens Dominus, id est, praeualuerunt Philistini

in Hebraeos, non ob Philistinorum potentiam, vel Domini impotentiam; sed quia Dominus dormiebat, & dormiebat sopore graui, tamquam crapulatus a vino. Ebrietas enim altè dormire facit. Sed a sopore illo excitatus, potentiam suam in Philistinos mirifice demonstrauit. Dicitur autem Deus dormire metaphoricè, quando ita se gerit, ac si non aduerteret iniurias, quas illi faciunt iniqui; & dicitur dormire ut crapulatus a vino, quando patienter agit erga grauissimos peccatores, ac si ita altè dormiat, ut non aduertat iniurias maximas contra se fieri, qualis iniuria fuit captiuitas Arcæ. Non desunt, qui metaphoram ebrietatis ita explicent, ut sensus sit, Deum excitatum a somno potenter, & furiosè egisse in aduersarios, ut solent ebrij, qui valentissimi, & audacissimi sunt, cum non aduertant, quid faciant. Sed non placet ista expositio, tum quia ebrietas facit quidem audaces homines, sed non potentes, imò debilitat potius; & qui a somno exurgunt non surgunt ebrij, sed sobrij. maneat ergo prior expositio, quæ Sancti Augustini est. Et percussit inimicos suos in posteriora: immisit enim morbum grauissimum, & pudendum in posteriora corporis Philistinorum, ac, ut Scriptura loquitur, in secretiore parte natiui, ut simul cruciarentur dolore & rubore, ut legitur primo Reg. cap. 5. Opprobrium sempiternum dedit illis: quia prouidentia Dei fecit, ut ipsi Philistini anulos aureos appenderent arcæ ad memoriam sempiternam morbi pudendi, quo Deus illos affecerat, 1. Reg. c. 6. & repulit tabernaculum Ioseph, id est, noluit deinceps tabernaculum sacrum, in quo seruabatur Arca, esse in Silo, quæ est ciuitas in tribu Ephraim, qui filius erat Ioseph. Et tribum Ephraim non elegit, id est, constituturus Regnum in populo suo; non elegit Regem ex tribu Ephraim, quæ erat una ex duabus tribubus Ioseph, & quidem numerosissima, & potentissima. Sed elegit tribum Iuda, montem Sion, quem dilexit: id est, elegit tribum Iuda, ex qua daret populo suo Principes: & elegit montem Sion, in locum

locum tabernaculi, & postea templi, in quo seruaretur Arca, & fieret sacrificia. Et ædificauit sicut vnicornium sanctificium suum in terra, quam fundauit in secula, id est, ædificauit Deus in monte Sion, siue in Hierusalem, quæ est terra duratura in æternum, sanctuarium suum firmissimum, quasi cornu Monocerotis. Hæc est parabola præcipua, & propositio, siue ænigma potissimum, quod initio Psalmi Propheta promissit. neque enim sanctuarium testamenti veteris fuit firmum vt cornu Monocerotis, nisi in typo sanctuarij testamenti noui: neque mons Sion, aut Hierusalem fuit terra fundata in secula cum breui euersa fuerit, nisi in figura Ecclesiæ Christianæ aduersus quam porz inferi non præualebunt, & cuius religio & sacramenta non mutabuntur vsque ad Mundi consummationem. Vox vnicornium, græcè monocerotum; i hebræo legitur, ramim quod significat excelsus; sed Septuaginta, & sanctus Hieronymus non legerunt, ramim, sed, renim, quod monocerotes, id est, bestias, quæ solum vnum cornu, firmissimum, & robustissimum gerunt: & sine dubio hæc est vera lectio. Et elegit David seruum suum, & sustulit eum de gregibus ouium, de post factantes accepit eum: pascere Iacob seruum suum; & Israel hæreditatem suam. Omisit Propheta Regnum Saulis, quia modicum duraturum erat, & quia quasi extortum fuit a Deo clamoribus populi; sed Regnum Davidis posuit, qui Christi figuram gererat, & ex propria Dei voluntate duraturum in æternum erat. Elegit ergo David seruum suum; & sustulit eum de humili loco, ne fortè eius virtuti tribueretur tanta exaltatio. Sustulit, inquam, de gregibus ouium, id est, de officio, & munere pastoritio, quod re ipsa exercebat, cum oues factas sequeretur. Pascere Israel seruum suum, & Iacob hæreditatem suam, id est, transtulit de ministerio pascendi oues, ad ministerium pascendi homines: præposuit enim illum Regem populo suo, & hæreditati suæ, quæ Israel, & Iacob appellatur. In hebræo habetur, Iacob populum suum, non vt nos ha-

mus, seruum suum. Aliqui suspicantur Septuaginta interpretes vertisse ^{επλόν}, non ^{δούλο}. At cur non verisimilius sit in hebræo olim fuisse audo, seruum suum, & postea successu temporis a sciolis mutatum in, ammo populum suum? In sensu nulla est dissensio. Populus enim Israeliticus populus Dei, & seruus Dei dici potest. Et paut eos in innocentia cordis sui, & in intellectibus manuum suarum deduxit eos, id est, optimam fuisse diuinam electionem euentus probauit. Dauid enim paut, & rexit populum Dei in innocentia cordis, & sapientia operis: in innocentia cordis, quia cor purum, & immaculatum gerens non affectabat gloriam suam, sed Dei, non utilitatem suam, sed populi; cupiebat non tam præesse, quàm prodesse; pascere oues, non vt suas, sed vt Domini sui, vt minister, non vt hærus: in sapientia operis, vel, vt Dauid loquitur, in intellectibus manuum deduxit populum, quia cōsideratè agebat, quicquid agebat: non temerè, non sine consilio, non absque maturitate. Quæ omnia etiam si vtrunque Dauidi conueniunt; absolutè tamè & perfectè non nisi Christo conueniunt. Alioqui non reprehēderetur in Scriptura Dauid, quod uxorem alienam concupierit, quod adulterium, & homicidium perpetraverit; quod populum sine causa numerari voluerit; quod Miphibosech inauditum damnauerit, & bona ipsius imprudens calumniatori donauerit. Christus autem verè innocens corde, & sapiens in opere fuit; qui peccatum non fecit,

nec inuentus est dolus in ore eius,
1. Petri 2. Qui ne audacter
dicere poterat, Quis
ex vobis arguet me
de peccato?
Ioan. 8.

PSALMVS LXXVIII.

Titulus , & Argumentum
Psalmi .

Psalmus Asaph.



DE hoc Titulo nihil dicendum occurrit. Argumentum est deploratio calamitatis, quæ accidit Hebræis sub Antiocho, & cæteris Regibus tempore Machabæorum, ut communiter docent S. Augustinus, Theodoretus, Euthymius, & multi recentiorum; & ipse etiam auctor libri Machabæorum primi capit. 7. allegat hunc Psalmum, tanquam vaticinium earum calamitatum. Potest tamen accommodari idem Psalmus, ut eum accommodat S. Augustinus, ad persecutiones, quas passa est Ecclesia a Regibus, & Imperatoribus paganis. In hoc Psalmo concordant textus hebraici, græci, & latini, & totus Psalmus facillimus est.

Explicatio Psalmi 78.

- I. **D**Eus venerunt gentes in hæreditatem tuam: polluerunt templum sanctum tuum, posuerunt Hierusalem in pomorum custodiam.

Alloquitur Propheta Deum, & in persona populi Dei, qui futurus erat tempore Machabæorum, conqueritur de vastatione templi, & ciuitatis. Narrat autem hic Propheta Deo, non ut eum doceat, quasi ignorantem, cum potius ab eo sibi reuelata didicerit: sed ut hac commemoratione moueat ipse se ad orandum ardentius. Deus, inquit, venerunt

Bellarm. in Psalm.

gentes, pagani videlicet Idololatæ, & hæreditatem tuam, id est, in eam ciuitatem, & prouinciam, quam elegisti de toto orbe terrarum in propriam possessionem. Hæreditas enim, & possessio in Scripturis pro eodem accipiuntur. Explicat deinde ad quid venerint gentes in hæreditatem Dei; Polluerunt, inquit, templum sanctum tuum. Quod factum est sub Antiocho, ut dicitur lib. 1. Machab. cap. 1. tunc enim Idolum in templo collocatum est, & altaria prophana ta, atque Idolis consecrata. Posuerunt Hierusalem in pomorum custodiam, id est, ipsam regiam ciuitatem adeo desolauerunt, ut non videretur amplius ciuitas, sed tugurium desertum, qualia sunt quæ eriguntur ad custodiam pomorum in hortis, aut vineis, & pomis collectis deferuntur. Id accidisse sub Antiocho testatur lib. 1. Machab. cap. 3. vbi sic legimus, Et Hierusalem non habitabatur, sed erat sicut desertum. Vox hebræa, pro qua habemus, pomorum custodiam significat vastationem, desolationem, desertum, & similia. Sed Interpretes Septuaginta, ut rem declararent per similitudinem, dixerunt, In pomorum custodiam; Sanctus Hieronymus verit, In aceruum lapidum. Sed melior videtur interpretatio prior, quam latinus Interpretes secutus est. Ciuitas enim reducitur in aceruum lapidum, quando omnino destruitur, & lapides domorum in locum vnum colliguntur: at Hierusalem non ita funditus euerisa fuit, ut habitari non posset; sed muri deiecti fuerunt, & ciuitas ex parte incensa, & habitatores fugati, ut habetur lib. 1. Machab. cap. 1. Sed tamen adhuc retinebat formam ciuitatis, & habitari potuisset, ut colligitur ex eodem lib. 1. cap. 3. & 4. proinde rectius comparatur pomorum custodiæ, id est tugurio semidiruto, & deserto, quam acervo lapidum.

Posuerunt morticina seruorum
tuorum escas volatilibus cœli:
carnes sanctorum tuorum bestiis
terræ.

H h Effu-

III. Effuderunt sanguinem eorum, tamquam aquam in circuitu Hierusalem, & non erat qui sepeliret.

Deplorauit vastationem templi, & ciuitatis: nunc deplorat cædem hominum & barbariem, ac feritatem hostium, qui cadauera sepeliri non pariebantur. Posuerunt, inquit, morticina, id est, cadauera occisorum Iudæorum non dederunt sepultura, sed exposuerunt in eâ corpus, & canibus. Morticina propriè dicuntur cadauera eorum, qui morbo interierunt: tamen hoc loco extenditur vocabulum ad cadauera occisorum. Nam in sequenti versiculo explicatur, quæ sint illa morticina cum additur, Effuderunt sanguinem eorum, id est, seruorum tuorum, siue sanctorum tuorum, id est, hominum tibi sanctificationum per fidei professionem. In circuitu Hierusalem tanquam aquam, id est, in magna copia, sine delectu personarum, sine timore aliquo; & non erat, qui sepeliret: & ideo relinquebantur cadauera illa a uibus cælis, & bestiis terræ. Hoc impletum est tū in alijs multis, tum potissimum in illis sexaginta uiris primarijs, quos una die curauit occidi Alcimus prope Hierusalem ut dicitur lib. 1. Machab. c. 7. Ibi enim citatur hic versiculus, ubi cædes illorum describitur.

IIII. Facti sumus opprobrium vicini nostris, subfannatio, & illusio his, qui in circuitu nostro sunt.

Deplorat nunc etiam infamiam, quæ ex persecutione illa est sequuta. Facti sumus, inquit, opprobrium vicinis nostris, id est, vicinis Regnis Idumæorum, Moabitarum, Ammonitarum, & aliarum gentium, quæ despiciunt, & irridebant Hebræos, ut homines imbelles, & contemptibiles.

Vsquequo Domine irasceris in finem? accendetur velut ignis furor tuus?

Videbat Propheta iram Dei in populum suum accensam adeo vehementer, ut videretur periculum imminere, ne populus funditus interiret; ideo in persona populi precatur finem tantæ indignationis. Vsquequo, inquit, irasceris in finem? id est, quousque crescat ira tua, & crescendo minabitur nobis vltimum exterminium? Id ipsum repetens addit, Vsquequo accendetur velut ignis zelus tuus? ubi comparat indignationem Dei igni, qui nisi celeriter extinguatur, crescere solet in immensum, & in cinerem omnia redigere. Per iram non intelligitur perturbatio, sed voluntas exigendi spiritualem castitatem, & puniendi eos, qui fornicantur ab ipso.

Effunde iram tuam in gentes, VI. quæ te non nouerunt, & in Regna, quæ nomen tuum non inuocauerunt.

Orat, conuerti iram Dei in hostes populi sui, quasi dicat, Nos etsi mali filij sumus, tamen filij sumus, te nouimus Deum verum, te colimus, & inuocamus. Effunde igitur potius iram tuam in hostes tuos, qui te non nouerunt, id est, non habent pro Deo, & non inuocant nomen tuum, quia omnipotentem te esse non credunt. Sed occurrit quæstio ex capite 12. Lucæ, ubi dicitur, Seruus, qui non nouit voluntatem Domini sui vapulabit paucis; qui autem nouit, & non fecit, vapulabit multis. Respondet sanctus Augustinus, Euangelium loqui de seruis, qui sunt in eadem familia: inter eos enim grauius peccant, & seuerius puniuntur, qui scientes peccant, quam qui peccant nescientes: sed vtriusque multo grauius peccant, & longè asperius puniendi sunt, qui de familia non sunt, sed hostes iurati sunt, & seruiunt creaturæ potius quam creatori, & familiam totā gra-

grauissimè persequuntur, quales erant illi, de quibus in hoc Psalmo agitur versiculo sequenti.

VII. Quia comederunt Iacob, & locum eius desolauerunt.

Non solum enim isti Deum non inuocarunt, verum etiam populum eius, quasi panem consumpserunt, spoliantes, fugantes, interficientes, vel etiam minis, & terroribus in corpus suum traijcentes per Fidei abnegationem: quomodo è contrario dicitur S. Petro Act. 10. *Macta, & manduca*, id est, in corpus Ecclesie recipe per conuersionem ad veram Fidem. Et locum eius desolauerunt, id est ciuitatem Hierusalem desolantes in solitudinem redegerunt. In hebræo habetur, *decorem eius, siue pulchram habitationem eius desolauerunt.*

VIII. Ne memineris iniquitatum nostrarum antiquarum: cito anticipent nos misericordie tue, quia pauperes facti sumus nimis.

Ne videretur populus Dei, dum hostes accusat, & dignos pœna esse iudicat, se ipsum voluisse iustificare, quasi non meritis pœnas daret, & quasi potentia aduersariorum, non iustitia Dei attereretur; confitetur in hoc versiculo peccata sua, & parentum suorum, & misericordiam Patris, non iustitiam Iudicis appellat. Ne memineris, inquit, iniquitatum nostrarum antiquarum, id est, ne punias nos, ob iniquitates antiquas, tum nostras, tum parentum. Solet enim Deus aliquando reddere iniquitatem patrum in filios in tertiam, & quartam generationem, ut dicitur Exod. 20. Immo & Dominus dicit Matth. 23. *Implete mensuram patrum vestrorum.* & paulò post, *Ut veniat super vos omnis sanguis iustus, qui effusus est super terram a sanguine Abel iusti vsque ad sanguinem Zacharie filij Barrachie, &c.* Neque contraria est hæc sententia Ezechiel cap. 18. qui dicit, *Filius non portabit iniqui-*

tatem Patris. filius enim propriè puni-
tur ob peccata sua, sed dicitur aliquando
puniri ob peccata parentum, quoniam
Deus non puniisset illum, quamuis ius-
tè eum punire potuisset, nisi iratus pec-
catis parentum. Quod autem filius non
portet iniquitatem patris, nisi sequatur
iniquitatem patris; docent SS. Patres,
Hieronymus in cap. 18. Ezechielis, Au-
gustinus in Psal. 118. Greg. li. 15. Moral.
cap. 22. & Chrysostomus homil. 29. in
Genesim. Cito anticipent nos misericor-
diæ tuæ, id est, iam ruimus in interitum,
nisi velocissimè misericordia tua præue-
niant nos: anticipare enim hoc loco, est
præoccupare, siue præuenire vltimam
ruinam, ad quam velocissimè currimus.
Addit, & declarat, cur tanta celeritate
auxilij sit opus, Quoniam, inquit, paupe-
res facti sumus, Vbi per pauperes, intel-
liguntur afflicti, humiliati, attenuati, e-
geni non solum diuitiarum, sed etià vi-
rium, & auxilij.

Adiuua nos Deus salutaris noster IX.
ster, & propter gloriam nominis
tui Domine libera nos, & propi-
tius esto peccatis nostris propter
nomen tuum.

Explicat, quomodo misericordia Dei
anticipet nos; explicat autem per mo-
dum orantis, non per modum docentis.
Adiuua, inquit, nos Deus salutaris no-
ster, id est, anticipent nos misericordie
tuæ adiuuando nos in facienda iustitia,
ad euitanda peccata futura, & in agēda
pœnitentia ad expianda peccata præ-
terita. Dicit autem, adiuua, ut ostendat,
non tolli arbitrij libertatem per auxi-
lium gratiæ, sed stabiliri: non enim pro-
priè adiuuatur, nisi qui aliquid agit co-
operando gratiæ. Declarat deinde utrū-
que. Et propter gloriam nominis tui li-
bera nos, id est, non propter merita no-
stra, sed propter gloriā tuam libera nos
a morte peccati futuri, quod facis dum
adiuuas in facienda iustitia. Et propitius
esto peccatis nostris propter nomen tu-
um, id est, & propter eandem gloriam
H h 2 tuam,

tuam, non propter merita nostra remitte peccata præterita, quod facis dum adiuuas in agenda pœnitentia. Potest etiam sic exponi, & fortasse magis ad literam, Adiuua nos Deus salutaris noster in hac præsentī calamitate, quod ut facias duo sunt necessaria, & ut liberes nos a persecutione, & ut ignoscas peccatis, propter quæ in persecutionem incidimus. Vtrumque autem petimus non propter iustitiā, & merita nostra, sed propter nomen, & gloriam tuam.

- X.** Ne fortè dicant in gentibus, ubi est Deus eorū? & innotescat in nationibus coram oculis nostris.

Ecce cur dixerit in præcedenti versiculo, propter gloriam nominis tui; nimirum, ne fortè dicant in gentibus, Vbi est Deus eorum, id est, ne fortè dicant gentes; sic enim habent hebræi, & græci codices; vel (quod est idem) ne dicatur inter gentes, Vbi est Deus, qui solebat adesse Iudæis; & blasphemetur potentia, vel sapientia Dei, quasi fugerit, aut absconderit se tamquam imbecillus; aut ignorauerit quid acciderit populo suo. Et innotescat in nationibus coram oculis nostris, id est, & non solum aliqui ita blasphement, sed diuulgetur hæc blasphemia inter nationes, nobis ipsis videtibus, & audientibus, ac per hoc etiam grauiter erubescantibus.

- XI.** Vltio sanguinis seruorum tuorum, qui effusus est, introeat in conspectu tuo gemitus compeditorum.

Ergo ne blasphemetur nomen tuum, introeat in conspectu tuo vltio sanguinis seruorum tuorum tam immaniter effusi: introeat etiam gemitus seruorum tuorum captiuorum, & in compedibus constitutorum, id est, respice aliquando sanguinem effusum seruorum tuorum occisorum, & vlciscere: respice, & vlciscere seruos tuos, qui reliqui sunt, & in

compedibus viuentes gemunt ad te Domine in codicibus græcis, coniungitur illud, vltio sanguinis, cum verbo præcedente, innotescat in nationibus; ut sensus sit, Innotescat in nationibus vltio sanguinis seruorum tuorum, qui effusus est & introeat in conspectu tuo gemitus compeditorum: sed quia in textu originali verbum, innotescat, est generis masculini, & verbum, introeat, est generis feminini, & nomen, vltio, ut etiam gemitus, sunt generis feminini apud hebræos; oportet coniungere nomen, vltio, cum verbo, introeat, non cum verbo, innotescat, ut rectè coniunxit latinus Interpres; & credibile est, sic etiam coniunxisse Septuaginta Interpretes, quamuis postea interpunctionem mutauerint, qui hæc non aduerterunt. Vtræque tamen lectio verum sensum continet, & posset dici pro lectione græca, non esse vniuersale, ut nomen generis feminini semper coniungatur cum verbo generis feminini apud hebræos. Nā ipse etiam S. Hieronymus coniunxit nomen, vltio, cum verbo, innotescat.

Secundum magnitudinem brachij tui, posside filios mortificatorum. **XII.**

Et redde vicinis nostris septuplum in sinu eorum: improperiū ipsorum quod exprobrauerunt tibi Domine. **XIII.**

Duo supra petierat Propheta in persona populi Dei, ut vlcisceretur sanguinem occisorum, & ut liberaret captiuos morti destinatos: nunc eadem duo petit, sed ordine conuerso, primū enim petit conseruationem viuorum, deinde vltionem interemptorum. Secundum magnitudinem, inquit, brachij tui posside filios mortificatorum, id est, quemadmodum brachium tuum robustissimum est, ita fortiter resiste persecutoribus nostris, & posside, ut propriam hæreditatem, reliquias populi tui, filios videlicet eorum, qui ab hostibus occisi sunt. Et redde vicinis nostris septuplum in sinu eorum,

eorum, id est, retribue vicinis hostibus nostris pœnam longè maiorem, quam pœnam reconde in sinu eorum, ut non facilè eam excutere possint. Retribue, inquam, illis improprium, quod exprobrauerunt tibi Domine, id est, sicut exprobrauerunt tibi imbecillitatem, & insipientiam, quasi verus Deus non esses sic ostende illos verè fuisse imbecilles, & insipientes, & non tam homines, quàm vermiculos terræ, aut puluerem, & cinerem. Illud, posside, in hebræo est, reliquos fac, siue, fac ut supersint, & remaneant: quare Septuaginta verterunt sensum, non verbum. Illud, filios mortificatorum, in hebræo est, filios mortis, quod potest significare homines morti destinatos, & sic multi exponunt: tamen Septuaginta Interpretes per filios mortis, intellexerunt filios occisorum, vel, ut habet alia lectio, filios morte punitorum. & hanc putamus veram huius loci sententiam: nam non solum hoc loco, sed etiam in Psalm. 101. vbi legimus, Ut audiret gemitus compeditorum, ut solueret filios interemptorum; habentur eadem verba in hebraica, quæ ad litteram significant, filios mortis: & tamen Septuaginta constanter verterunt, filios interemptorum. & sic exponunt Hieronymus, Augustinus, & alij veteres. Per illud, vicinis nostris, aliqui intelligunt, Idumæos, & Philisthæos, & alios vicinos qui videbant ærumnas Iudæorum, & nō miserebantur: sed verius exponunt alij, qui per vicinos intelligunt Antiochenos, qui cum Antiocho Rege Syriæ incenderunt Hierusalem, templum profanauerunt, & Iudæos a vera religione crudelissima persecutione abstrahere conati sunt: isti enim, & vicini erant, & hostes iurati. Illud, septuplum, non propriè septuplum, sed generatim manus, & multiplex significat. Denique illud, in sinu eorum, significat punitiōem inimicorum non futuram exterio-rem, & breuem sed internam, & perpetuam, quam velint, nolint intra se retinere debeant.

Nos autem populus tuus, & o- **XIII.**
ues pascuæ tuæ, confitebimur tibi
in seculum.

In generationem, & generatio- **XV.**
nem annuntiabimus laudem
tuam.

Verè scribit S. August. illa verba, Red de vicinis nostris septuplum, & similia, esse potius prædictionē, quàm imprecationē: ex illa. n. certissima prædictione concluditur Psalmus, promittens Deos æternam laudem. Illi inquit, ut meriti sunt, recipient in sinum suum grauissimā ultionem: nos autē confitebimur tibi in æternum, id est, laudabimus te, & prædicabimus gloriā tuam in secula. Quod quidem adumbratum est in Hebræis, apud quos Machabæi utcumq; lōgo tempore post persecutionem Antiochi principatum feliciter tenuerunt. Sed verius multo implebitur in Ecclesia Christiana, quæ post superatas multas & varias persecutiones, videbit in die Iudicii oēs persecutores suos recipere in sinum suum mercedem iniquitatis, & ipsa cum Rege suo Christo in cœlesti Hierusalem in secula seculorum laudabit Dominum.

SPALMVS LXXIX.

Titulus & Argum. Psalmi.

*In finem pro his, qui commutabuntur,
testimonium Asaph, Psalmus.*



De hoc Titulo, quoad particulā, in finē, & pro his, qui cōmutabuntur, diximus in explic. Psalmi 44. & alibi. Illud, testimoniū Asaph, significat, hūc Psalmū esse testimoniū per Asaph decantatū, quo Spūs s̄ctus testificatur captiuitatē Israel, & liberationē.

Hh 3 In

In græco additur, pro Affyrijs, quoniā captiuitas, de qua agitur in hoc Psalmo, fuit primum sub Rege Affyriorum Salmanasar, qui transtulit decem tribus in Affyriorum regionem captiuas, vt scribitur lib. 4. Reg. cap. 17. & deinde sub Rege Nabuchodonosor, qui captiuum duxit reliquum populum in Babylonē, vt dicitur eodem lib. 4. Reg. cap. 24. & 25. Argumentum ex titulo cognoscitur: prædicitur enim captiuitas, & liberatio hebræorum. Quæ figuræ sunt captiuitatis generis humani per Diabolum, & liberationis per Iesum Christum Saluatorem nostrum.

Explicatio Psalmi 79.

I. **Q**ui regis Israel, intende; qui deducis velut ouem Ioseph.

Incipit Propheta ab inuocatione Dei atque orat, vt exaudiat orationem, & respiciat populum suum. Qui regis Israel intende, id est, tu Deus, qui es proprius Rector, & pastor populi Israelitici audi orationem, quam fundo pro ipso populo tuo. Deinde repetit primam partem, & subintelligit secundam. Qui deducis velut ouem, Ioseph, id est, tu Deus qui deducis ad pascua velut ouium gregem, populum descendentem ex Ioseph, audi orationem, quam fundo pro ipso populo tuo, qui & Ioseph dicitur. Illud, qui regis, in hebræo ad literam est, qui pascis: tamen hoc verbum non significat solum pascere corporali cibo, sed etiam regere, quod est officium Principis. nam in Psal. 2. vbi legimus, Reges eos in virga ferrea: habetur hoc idem vocabulū. illud, intende, significat, intende aurib., siue ausculta. nam vox hebraica propriè sonat, auribus percipe. Cur autem meminerit Propheta Israel, & Ioseph, & non aliorum filiorum Israel, ratio est, quia per Israel intelligitur, totus populus Dei. Per Ioseph similiter intelligitur hoc loco totus populus Dei. Nam in secunda parte versiculi, repetitur quod di-

ctum est in prima parte, vt aliàs cum S. Augustino admonuimus. Et quidē cur Israel totum populum significet, notū est, quia omnes Israelitæ Israelē vt patrem agnoscunt. Cur autem Ioseph, qui vnus erat ex duodecim filijs Israel, totū populum significet, ratio est, quia Ioseph in Aegypto totum populum paut, & toti populo præfuit: & postea duo eius filij, Ephraim, & Manasse duas trib. constituerunt, quod nulli alijs contigit. Singuli enim filij Israel singulas tribus fecerunt, excepto Ioseph, qui singulari prærogatiua duas fecit: denique diuiso Regno post mortem Salomonis, in Regnum Israel, & Regnum Iuda, primus Rex Israel, qui præfuit decem tribubus, Hieroboam fuit de tribu Ephraim filij Ioseph.

II. **Q**ui sedes super Cherubim manifestare coram Ephraim, Benjamin, & Manasse.

Rogauit Propheta Deum, vt intenderet aurem ad orationem populi sui: nūc addit, vt regat, & intendat etiam oculos, & piè respiciat, atque ostendat serenam faciem populo suo. Dicitur autem Deus respicere aliquem, vel faciem illi ostendere, quando ei placatur: contra autem dicitur auertere oculos, vel tegere faciem suam nube, quando irascitur. Qui sedes, inquit, super Cherubim, id est, tu Deus, qui sedes in cælo super primarios Angelos, qui Cherubim appellantur, & in typum huius rei in sacramento tuo super imagines Cherubim propitiatorium, quasi thronum tuum habes, vbi & arca est quasi scabellum pedum tuorum; manifestare coram Ephraim, Benjamin, & Manasse, id est, ostende faciem tuam, & respice, hoc est, placare populo tuo, filijs Israel. Cur autem populum Israel significet per Ephraim, & Manasses, & Benjamin, ratio esse videtur, quia Ephraim, & Manasse erant filij Ioseph, per quem diximus paulo ante totum populum significari: Benjamin erat frater vterinus Ioseph, & ideo ab illo

Io separandum non esse duxit; præsertim, cum in castris, quoniam Hebræi armati ordine procedebant, simul incederent tribus Ephraim, tribus Manasse, & tribus Beniamin. vide lib. Num. c. 2. & c. 10. fortasse et nominauit Propheta hos tres potissimum, ut comprehenderet præcipuas partes terræ promissionis. Nam in tribu Ephraim erat Samaria caput Regni Israel; in tribu Beniamin, erat Hierusalē, caput Regni Iuda; in tribu Manasse erat regio trans Iordanē. Cur autem inter Ephraim, & Manasse fratres, posuerit Propheta medium Beniamin, fortasse causa fuit ut Nepotes patrum honorare viderentur. Erant enim Ephraim, & Manasse filij Ioseph fratris vterini Beniamin.

III. Excita potentiam tuam, & veni: ut saluos facias nos.

Explicat clarius, cur velit Deum intendere aurem, & oculos ad populum suum, ut videlicet eum de tribulatione liberet. Excita, inquit, potentiam tuam, id est, potentia tua quasi sopita videtur, dum nos affligi sinis ab iniustis persecutoribus nostris: ideo excita potentiam tuam, & veni per auxilium tuum potentissimum ut saluos nos facias.

IV. Deus conuerte nos; & ostende faciem tuam, & salui erimus.

Cur Deus sæpe non respiciat, causa est, quia nos auertimus ab eo faciem, & conuertimus ad res creatas: sed quia sine auxilio Dei non possumus ad eum conuertere, ideo Propheta vtrumque petit in persona populi Dei. Deus, inquit, conuerte nos, id est, inspira nobis amorem tuum, ut auersi a rebus creatis ad te iterum conuertamur. Et ostende faciem tuam, id est, & simul conuerte ad nos faciem tuam, ut hoc modo sanctæ charitatis vinculo tecum vniti ab hostibus omnibus, qui nos impugnant, salui esse possimus: te enim auertente faciem ægrotamus, & perimus; te conuertente faciem resurgimus, & sanamur.

Domine Deus virtutum, quousque irasceris super orationem serui tui?

Videbat Propheta magnam iram Dei exarsisse in populum peccatorem, & ideo se non facile posse exaudiri: ideo vehementius orat, & precatur, dicens, Domine Deus virtutum, id est, Domine Deus exercituum, id enim sonat vox hebraica, qui terribilis es, militia cœlesti innumerabili circumdatus, quousque irasceris etiam mihi oranti? sic etiam legimus dixisse Hieremiam, Thren. 3. Opposuisti nubem tibi, ut non transeat oratio. In hebræo non habetur, serui tui, sed populi tui: sed idem est sensus, Propheta enim seruus Dei in persona populi orabat; ac per hoc Deus nolens exaudire irascebatur super orationem serui sui, qui eam fundebat, & super orationem populi sui, quæ per Prophetam ipsius populi nomine fundebatur: potest etiam fieri, ut Septuaginta non legerint, ammecha, populi tui, sed audecha, serui tui. In græcis quibusdam legitur, seruorum tuorum, & sic legit Euthymius: tamen S. Augustinus, & Theodoretus legunt, serui tui. Illud, irasceris, in hebræo est fumabis; sed Septuaginta declarare voluerunt metaphoram; fumus enim narium indignationis est signum, & ideo per fumum ira significatur.

Cibabis nos pane lacrymarum, VI. & potum dabis nobis in lacrymi in mensura?

Coniungitur hic versiculus cum superiore, & subintelligitur illud, quousque, ut sensus sit, quousque irasceris super orationem serui tui? quousque cibabis nos pane lacrymarum, & potum dabis nobis in lacrymis, id est, quousque fines nos in tanta afflictione morari, ut nihil magis quam lacrymari nobis libeat, & sic lacrymis quasi cibo, & potu sustentemur? Illud autem, in mensura, non significat, ut aliqui putant, cum moderatione,

Hh 4 sed

וְהִשְׁתַּחֲוִיתָ sed è contrario in mensura plenissima, & supereffluente: nam vox hebræa, **שֶׁלִּשׁ**, significat aliquid magnum, & triplicatum; & cum ad mensuram refertur, significat mensuram magnam, vel potius, ter magnam, id est, maximam.

VII. Posuisti nos in contradictione vicinis nostris, & inimici nostri subsannauerunt nos.

Explicat populus Dei causam tanti mœoris, & lacrymarum, ac dicit esse, quia vndique a vicinis gentibus oppugnatur, & superatur, & victus deridetur & subsannatur. Posuisti, inquit, in contradictionem vicinis nostris, id est, cum nos auxilio tuo destitueris, fecisti, ut omnes vicinæ gentes auderent nobiscum contendere, & pugnare: nam illud, in contradictionem, in hebræo est, in contentionem, ac per hoc significat, contradictionem non verborum tantum, sed etiam factorum, id est, concertationes, & prælia. Et inimici nostri subsannauerunt nos, id est, inimici nostri nobiscum contententes vincunt, & debellat nos, atque ut victis insultant, & exprobrant debilitatem. In hebræo est, subsannaue runt eos, sed omnino credibile est, textum esse mutatum vnius literæ corruptione: nam & ipsi Septuaginta, & S. Hieronymus verterunt ex hebræo, subsannaue runt nos. Itaque legerunt, **לאנו**, non ut nunc legitur, **לאמו**.

VIII. Deus virtutum conuerte nos, & ostende faciem tuam, & salu erimus.

Verficulus hic est idem cum quarto, qui repetitur etiam in fine Psalmi, sed hic additur vox virtutum, id est, exercituum, & in fine additur, Domine. Hæc repetitio significat hunc verficulum esse conclusionem præcipue intentam in toto Psalmo. Et verè nihil melius peti potest a Deo, quàm ut conuertat nos ad se, & ipse conuertatur ad nos. Hæc enim gratia fons est omnium bonorum. Il-

la verò additio vnius vocis in prima repetitione, & duarum in secunda, signum est crescentis affectus, & desiderij in oratione.

Vineam de Aegypto transtuli **IX.** Isti, eiecisti gentes, & plantasti eam.

Vt impetret quod petit, commemorat beneficia Dei erga populum Iudaicum, quem de captiuitate Aegyptiacali berauit, & in Regna Chanæorum introduxit. Vititur autem metaphora vineæ, qua vsi sunt postea etiam Isaias c. 5. & Ezechiel cap. 15. & 19. & postremo etiam Dominus in Euangelio Matth. 21. Est autem aptissima similitudo vineæ ad populum Dei significandum propter multa: sed præcipue, quia sicut lignum vitis, aut producit fructum optimum, & dulcissimum; & ideo gratissimum est Dño suo, & diligentissime colitur; aut si sterile sit, ad nullum opus utile est, & ideo in ignem projicitur: sic vnusquisq. nostrum. aut ad Regnum æternum perueniet, si fructum bonorum operum adferat: aut in ignem æternum mittetur, si bonis operibus careat. Vineam, inquit, de Aegypto transtulisti, id est, populum tuum, quasi vineam de terra sterili Aegypti in terram fecundam Palestinæ transtulisti. Et quoniam terra illa optima occupabatur ab inutilibus, & syluestribus vitibus eiecisti gentes idololatrias tamquam inutiles vites, & plantasti eam, vineam tuam videlicet.

Dux itineris fuisti in conspectu **X.** eius: plantasti radices eius & impleuit terram.

Vt intelligeremus de vinea rationali, id est, de hominibus sermonem hoc loco haberis admiscet Propheta aliqua verba propria multis metaphoricis. Dux, inquit, itineris fuisti in conspectu eius, id est, cum transferres vineam de Aegypto in Palestinam, & vinea ipsa, utpote rationalis, progredereetur, tu viam ostendebas

debas quasi Dux itineris præcedens eam per diem in columna nubis, & per noctem in columna ignis, ut dicitur in Exodo cap. 13. & Num. 14. Moraliter est Dux itineris fuit Deus vineæ suæ, id est, populo suo ad terram promissionis pergenti, dum ei legem dedit. Plantaſti radices eius, & impleuit terram, id est, confirmaſti populum tuum in terra promissionis, & propagaſti eum, ita ut totam illam terram habitatoribus repletet.

Operuit montes umbra eius,
& arbuſta eius cedros Dei.

XII. Et extendit palmites ſuos uſq. ad mare, & uſque ad flumen propages eius.

Deſcribit hoc loco incrementum, & propagationem populi Iſraelitici quo ad altitudinem, & latitudinem, id est, quo ad gloriam, & multitudinem, & ad miſcet metaphoris hiperboles. Operuit inquit, montes umbra eius, id est, creuit in altum hæc vinea adeo ſublimiter, ut eſſet altior montibus, eoſq. umbra ſua tegetet, imò etiam in tantam altitudinem eleuata eſt, ut eius palmites eſſent altiores Cedris Libani, quæ ſunt arbores celſiſſimæ, in vertice montis altiſſimi, ita ut palmites huius vineæ, Cedros Dei, id est, Cedros altiſſimas obumbrarent. Significat autem hæc altitudo potentiam, & gloriam Regni Iſraelitici, quæ ſuperauit potentiam, & gloriam multorum Regnorum. Nam ſub Moſe populus Iſrael debellauit Amorrhæos; ſub Iofue vicit triginta, & vnum Reges; ſub Dauide domuit Philiſtæos, Idumæos, & Moabitas. Deſcribit poſtea propagationem, dicens, Extendit palmites ſuos uſque ad mare, & uſque ad flumen propages eius, id est, propagata eſt gens Iſraelitica, & multiplicata valde, ut repletet terram promiſſionis ad occidentem uſque ad mare Mediterraneum, & ab oriente uſque ad flumen magnum Euphratem. Et ſic imple

ta eſt promiſſio Dei Deuter. 11. A flumine magno Euphrate uſque ad mare occidentale erunt termini veſtri.

Vt quid deſtruxiſti maceriam XIII. eius, & vindemiant eam omnes, qui prætergrediuntur viam?

Explicata magnitudine, & excellentia populi Iudaici per ſimilitudinem vineæ; nunc perſiſtens in eadem ſimilitudine, deplorat miſeriam eiſdem populi, in quam incidit ex indignatione Dei. Vt quid inquit, deſtruxiſti maceriam eius? id est, quare remouiſti ab hoc populo auxilium tuum, quod erat quaſi maceria claudens vndique vineam. Et vindemiant eam omnes, qui prætergrediuntur viam? id est quare ſinis, ut omnes inimici huius populi in illum præualeant eumq. diripiant, quo modo diripiuntur vineæ ab omnibus iter facientibus quædo deſtructa eſt maceria? Sæpè enim Regnum Iſraelitarum, deferente eos Domino ob peccata populi prouocato datum eſt in prædam Philiſtæis, aut Madianitis, aut alijs vicinis gentibus.

Exterminauit eam Aper de ſyl. XIV. na, & ſingularis ferus depaſtus eſt eam.

Deplorat nunc in particulari ſub eadem vineæ metaphora, grauiffimam captiuitatem, quæ contigit ſub Rege Aſſyriorum, ſiue Salmanaſar, qui totas decem tribus, ſiue Nabucodonosor, qui reliquas duas captiuas tranſtulit in Aſſyrios, euerſa penitus ciuitate Regia, incenſo templo, & regni ſolio deturbato: hunc enim Regem vocat Aprum ſylueſtrem, & ſingularem ferum, qui non vindemiauit, ſed eradicauit penitus vineam. Aprum ſylueſtrem inimicum eſſe vitibus ſcribit hoc loco Theodoretus; & Nabucodonosor Regem ob carnalia vitia porco ſimilem fuiſſe ſcribit Euthymius: vtraque de cauſa rectiſſimè perſecutorem populi Dei Apro comparatum dicere poſſumus. Illud autè, ſingulari-

י"ט, י"ז

laris ferus, in hebræo ziz sadai, de qua voce diximus in explicatione Psal. 49. hoc loco verti potest, bestia agri, quod idem est cum Apro de sylua: nam id ipsum esse repetiuit Propheta vt solet. In græco est, *μῆτις, ὄμιος*, id est, porcus agrestis: proinde vbi nos habemus in iatino, singularis ferus, illud, singularis, est potius ethymologia nominis quàm significatio. Dicitur enim bestia illa monios, quia solitaria esse solet. Ita que per vocem, singularis, hoc loco, intelligendus est porcus syluester, qui singularitate, & solitudine gaudet. Per vocem, ferus, intelligendum est, quod porcus ille ferus, & agrestis sit, & in capis sylvarum, nō in stabulis, & domib. habitet.

XV. Deus virtutum conuertere, respice de cælo, & vide, & visita vineam istam.

Hic iam prædicit per modum orantis Propheta aduentum Christi, qui vineam reformauit, & alijs colonis custodiendam tradidit, sicut legitur Matt. 21. Malos male perdet, & vineam suam alijs locabit: & clarius explicante Domino parabolam, Auferetur à vobis Regnū Dei, & dabitur genti facienti fructus eius. Non enim Ecclesia veteris Testamenti, quæ erat vinea Dei, funditus perijt, sed mutata est in melius. Primitiæ enim Ecclesiæ Apostoli fuerunt, qui vtique ex Israel erant. Et multa illa millia quæ initio prædicante Petro conuersa sunt ad Dominum, ex Israel etiā erant. Et Apostolus Paulus ad Rom. 11. aperte demonstrat, gentes esse veluti ramos insertos in bonam oliuam, id est, adiunctos ad Ecclesiam ex Iudæis initio congregatam. Ait igitur, Deus virtutum conuertere, id est, Deus exercituum, cui multa millia Angelorum, imo omnes res creatæ militant, ac per hoc potentissimus es, conuertere per misericordiam ad vineam tuam, ad populum tuum, à quo per indignationem iustam iam dudum auersus es. Respice de cælo, & vide, id est, quando longe recessisti à vinea tua, saltem de cælesti habitaculo

respicere dignare, & vide, quàm deformata sit vinea tua ab Apro syluestri. Et visita vineam istam, id est, & veni, ac visita per te ipsum vineam istam. De hac visitatione dixit Zacharias Luc. 1. visitauit, & fecit redemptionem plebi suæ. Et Christus ipse Luc. 19. quando flevit Hierusalem illam terrenā, & prædixit ruinam illius; addidit rationem, Eo quod non cognoueris tempus visitationis tuæ.

Et perface eam, quam planta- **XVI.**
uit dextera tua, & super filium hominis quem confirmasti tibi

Clarius prædicit aduentum Messiae.

Et perface, inquit, eam quam plantauit dextera tua, id est, inchoatum opus perface: Ecclesiam testamēti veteris penē destructam, reforma, & meliorem redde, quoniam tu eam initio fundasti, & quasi vineam plantasti, non vt periret, sed vt fructum faceret. Et super filium hominis, quem confirmasti tibi, id est, & respice etiam super Messiam, qui filius hominis dicetur, cū sit etiā verus filius tuus, quem confirmasti tibi in colonum præcipuum vineæ tuæ, id est, in Ducem, & Principem Ecclesiæ tuæ: hunc enim locum de Christo intelligunt ad literam, non solum SS. Hieronymus, & Augustinus, sed etiam Theodoretus, & Euthymius græci, Arnobius & alij, & ipse quoq. Paraphrastes Chaldaus: & accedit manifesta ratio: nam post captiuitatem Babylonicam non fuit melior Resp. Iudæorum, quā antea sed longè deterior, vt S. Augustinus demonstrat in lib. 18. de ciuit. Dei, cap. 45 quare si hæc prophetia de perficienda vinea, impleta sit, oportet eam ad Christum necessario referre. Scut etiam refertur illa Aggæi cap. 2. Magna erit gloria domus huius nouissimæ plus quam primæ. Quod autem ad verba attinet, Illud, & perface, ex hebræo S. Hieronymus reddit, & radicem: sed vox hebraica, vecanna, quamuis possit esse nomē, & significare radicem, aut plantulam: tamen potest etiam esse verbum à radice,

וְכָנָה
כֹּן

ce, cun, quod stabilire, & perficere significat, & sic intellexerunt hanc vocem Septuaginta Interpretes. Illud, & super filium hominis, in hebræo est, & super filium; sed quoniam paulò infra habetur, super filium hominis, visum est Septuaginta Interpretibus, hic etiam addere, hominis, explicationis gratia. Incertum autem est, an sensus sit, Respice super filium hominis, ut nos exposuimus, an, perice super filium hominis; sed utrumque rectè dici potest. Orat enim Propheta, ut Deus impleat promissionem suam de mittendo Messia; & quoniam si genus hebræorum omnino periisset, Messias sine dubio non venisset; ideo rogat; ut non permittat vineam istam omnino destrui: sed respiciat super Messiam futurum de semine Abraham, & ideo conseruet gentem hebraicam, unde tantum bonum expectatur: vel, perficiat super Messiam, id est, adimpleat, quod promissum sit circa Messiam, quem ipse sibi ab æternitate stabilivit.

XVII. Incensa igni, & suffossa ab increpatione vultus tui peribunt.

Declarat effectum, quem pariet aduentus Messia, futurum videlicet esse, ut vinea Domini incensa, & eradicata continuo iterum virescat, & floreat: nam increpante Deo vastatio illa vineæ subito evanescet: quomodo quando Dominus increpabat tempestates, statim evanescente tempestate succedebat tranquillitas maris, & quando imperabat morbis, & morti, statim evanescente morbo succedebat sanitas, & evanescente morte succedebat vita. Incensa, inquit, & suffossa, id est, vinea incensa igni, & suffossa ab hostibus eradicantibus vites; ab increpatione vultus tui peribunt, id est, imperante te ut cesset vastatio, & quasi increpante ipsam vastationem, continuo peribunt incensio, & suffusio, & redibit viriditas, & integritas vineæ. S. Augustinus more suo exponit per incensio nem cupiditatem malam; per suffusio nem, timorem malum: nam amor inflam-

mat, timor humiliat: sunt autem cupiditas & timor radices omnium peccatorum. Quicumque enim peccat, aut id facit, ut lucretur bonum temporale, quod amat, vel ut euitet malum temporale, quod timet. Porro Christus adueniens increpauit, & increpando expulit cupiditatem, & timorem, & contra accendit amorem bonum, & introduxit timorem bonum, id est, amorem Dei, & bonorum æternorum, & timorem iræ Dei, & malorum æternorum. Dixit enim, Ignem veni mittere in terram, Luc. 12. & Nolite timere eos, qui occidunt corpus, Matth. 10. Neque est aliud remedium potentius ad pellendum amorem mundi, vel timorem mundi, quam si quis serio cogitet, & firmissimè credat, multo maiora bona daturum esse Deum amantibus se, & multo maiora supplicia offendentibus se, quam ea sint, quæ Mundus polliceri, aut minari potest. Alij versiculum præsentem ita exponunt, Incensa igni, & suffossa vinea tua est; sed hostes eius ab increpatione vultus tui peribunt. Alij incensa igni, & suffossa vinea tua est; & si ita pergas indignari vineæ tuæ, omnes filij Israel ab increpatione vultus tui peribunt: sed facilior, & planior videtur expositio, quæ attulimus. Illud certum est, incensa, & suffossa, non esse generis neutri, & numeri multitudinis: sed generis fœminini, & numeri singularis tam in hebraico textu, quam in græco, ut ad vineam omnino referri debeant.

Fiat manus tua super virum dextera tuæ: & super filium hominis, quem confirmasti tibi.

Securus de aduentu Messia, fausta illi præcatur Propheta. Fiat, inquit, manus tua super virum dextera tuæ, id est, fiat manus tua ad protegendum semper, & ubique virum dextera tuæ, virum, quem dextera tua sola propriè formavit, & præfecit Ecclesiæ. Christum enim, ut hominem, non cooperatio viri, sed sola diuina virtus in utero Virginis formauit. Sic enim dicitur Luc. 1. Spiritus

tus sanctus superueniet in te, & virtus Altissimi obūbrabit tibi. Et eundē Christum non electio humana, sed sola voluntas diuina Regem Ecclesie fecit; vt ipse dicit in Psalm. 2. Ego autem constitutus sum Rex ab eo super montem sanctum eius,

XIX. Et non discendimus à te, viuificabis nos, & nomen tuum inuocabimus

Christo nos regente, non amplius discedemus à te; quia Regnum Christi æternum erit, & portæ inferi non præualebunt auersus Ecclesiam. Viuificabis nos vita gratiæ hic in terris, & vita gloriæ postea in cælis; & nos tributum reddemus inuocationis, & laudis, & actionis gratiarum in æternum.

XX. Domine Deus virtutum conuertere nos: & ostende faciem tuā, & salui erimus.

Hæc est vltima conclusio Psalmi, de qua supra diximus in versiculo octauo.

PSALMVS LXXX.

Titulus, & Argumentum
Psalmi

*In finem pro torcularibus, Psalmus
ipsi Asaph.*



Vid sit pro torcularibus. diximus in explicatione Psalmi 8. hoc solū addēdum videtur hoc loco, non esse probabile quā Theophylactus scribit ad cap. 7. S. Iōannis, hunc Psalmum inscribi, pro torcularibus, quōd in eo gratiæ agantur Deo pro collectione vuarum, & aliorum fructuum, quæ fit mense Septembri. Hoc,

inquam, non est probabile, quoniam in toto hoc Psalmo, vt etiam annotauit S. Augustinus, nulla fit mentio collectionis vuarum, aut aliorum fructuum. Deinde non solum huius Psalmi, sed etiam Psalmi octauī, & octogesimalterij titulus est, pro torcularibus, in quibus Psalmus nulla mentio fit Septembris, aut collectionis vuarum. His ergo omīssis, argumentum est cohortatio ad festos dies ritè celebrandos: & simul commemoratio beneficiorum Dei, ob quæ dies festi celebrantur; & reprehensio negligentiae, & ingritudinis Hebræorum. In quibusdam codicibus additur ad titulum, quinta Sabbati, sed in hebraicis codicibus, & in correctioribus græcis, & latinis non habetur.

Explicatio Psalmi 80.

Exultate Deo adiutori nostro, iubilate Deo Iacob. I.

Hortatur Propheta, vt cum Deum laudamus, cum magna cordis lætitia id agamus: hilarem enim datorem diligit Deus, vt ait Apostolus in 2. Cor. 9. & si hilarem datorem, multo magis hilarem laudatorem. Hilaritas autem cordis ex desiderio, & amore nascitur; proinde qui cum accidia psallit, & qui diuinum officium, non dulce canticum, sed graue onus iudicat; indicat se parum amare cui psallit. Exultate, inquit, Deo adiutori nostro, id est, cum exultatione laudate Deum, qui potens est, & fortis ad nos in omnibus rebus iuuandos. Iubilate Deo Iacob, id est, magna, & læta voce canite laudes Dei nostri. In hebræo, pro adiutori nostro, est, fortitudini nostræ; sed idem est sensus: nam fortitudinem Dei celebramus, quam in nostro auxilio quotidie experimur.

Sumite psalmum, & date tympanum psalterium iucundum cū cithara. II.

Hor.

Hortatur ut non solum voce sed etiam instrumentis musicis Deum celebremus, quod etiam si ad litteram de corporalibus instrumentis intelligatur; tamen in nouo testamento precipue intelligi debet de sonitu bonorum operum, quæ verbis laudatorijs quasi ex altera parte respondere, & consonare debet. S. Augustinus exponit prima verba, quasi sacerdotes dicant plebi, Sumite psalmum à nobis, & date nobis tympanum, id est, sumite à nobis spiritualia, & date nobis carnalia. Sed quamquam id iustissimum sit, & confirmatum ab Apostolo 1. Cor. 9. Si nos spiritualia vobis seminabimus: magnum est si carnalia vestra metamus? tamen hoc loco secundum litteram, sumite psalmum, & date tympanum; eisdem personis dicitur, Leuitis videlicet, quorum officium erat canere Psalmos, & pulsare tympana, psalteria, & citharas. Itaque sumite Psalmum, significat, assumite psalmum, & incipite canticum: date tympanum, significat, proferte tympanum, & incipite pulsationem: nec solum tympanum, sed etiam psalterium, & citharam proferte, & iucundè pulsate. In hebræo legitur inuerso ordine, Citharam iucundam cum psalterio; pro quo græci, & latini habent, Psalterium iucundum cum cithara; sed in sensu nulla diuersitas est. Illud iucundum, videtur opponi sono graui, & rudi tympanorum; psalterium enim & cithara iucundè, & dulciter sonant, tympanum asperè, & incōditè.

III. Buccinate in neomenia tuba in insigni die solemnitatis vestræ.

Explicat, quo tempore sit precipue iubilandum, & ait, Buccinate in neomenia tuba, id est, initio mensis, quod græcè dicitur *neomenia*, quasi noua luna; quia in nouilunijs Hebræi incipiebant menses, & festa celebrabant. In insigni die solemnitatis vestræ, id est, buccinate in neomenia, quæ est insignis dies solemnitatis vestræ. Disputant hoc loco tractatores, an Propheta hoc loco loqua-

tur de omnibus neomenijs, an de neomenia Septembris: nam omnes neomeniæ, id est, omnia initia mensium lunarium erant dies festi apud Hebræos, & in illis clangebatur tubis, ut habetur in lib. Num. cap. 10. tamen neomenia Septembris erat celeberrima omnium, quia in eam diem incidebat festum tubarum, ut habetur Leuit. 23. & Num. 29. Qui voluit, Prophetam loqui de sola neomenia Septembris, nituntur potissimum sequentibus verbis, In insigni die solemnitatis vestræ. Vbi videtur restringi nomen neomeniæ ad vnam neomeniam insignem & solemnem, in qua potissimum erat usus tubarum, quæ sine dubio erat neomenia Septembris, quæ dicitur Num. 29. Dies clangoris, & tubarum: & Leuit. 23. dicitur sabbatum memoriale clangentibus tubis celebrandum, & vocandum sanctum, atque in eo ab omni opere seruii esse vacandum. Qui autem existimant, Prophetam loqui de Neomenia cuiuscunque mensis, dicunt verba sequentia, In insigni die sollemnitatis vestræ, non intelligi de Neomenia, sed de alijs festis, ut Pascha, Pentecoste, tabernaculum, & alijs, ut sensus sit, Buccinate tuba in neomenia, & buccinate etiam tuba in omni alia insigni die sollemnitatis vestræ. Res est parui momenti: tamen prior sententia mihi probabilior videtur, quoniam ut plurimum in Psalmis, quod passim obseruat S. Augustinus posterior pars versiculi repetit, aut declarat partem priorē. Quod atinet ad verba, illud, in insigni, hebraicè est, *bachse*, quod proprie significat, in operimento siue regmine; vel, ut alij dicunt, in tempore constituto, siue sollemni; & ad verbum sic verti posset hæc sententia, Buccinate in neomenia tuba, in tempore sollemni ad diem festum vestrum: quod idem est cum eo quod vertunt Septuaginta quantum ad sensum attinet; idem enim est, in insigni die festiuitatis, & in tempore sollemni ad diem festum, nisi quod in hebræo est prima persona pronominis, in græco, & latino est secunda. Nam in hebræo est, solemnitatis nostræ, in græco, vestræ. Sed vtrunq. est verum & fortasse Septuaginta legerunt in secunda

בכסה

cunda persona, etiam in hebræo; aduertimus enim nō rarō aliter legisse hebraei cum textum Septuaginta interpretes, quā nunc habeatur in nostris libris.

IV. Quia præceptum in Israel est, & iudicium Deo Jacob.

V. Testimonium in Ioseph posuit illud, cum exiret de terra Aegypti linguam, quam non nouerat audiuit.

Reddit rationem, cur oporteat cum exultatione cantare, & instrumenta musica pulsare in die festo: quia videlicet, hoc Deus ipse mandauit, quando eduxit populum de captiuitate Pharaonis. vult enim Deus qui nulla re indiget hoc tributum laudis, & memoriæ beneficiorum suorum. Quia, inquit, præceptum in Israel est, id est, psallere, & tympana cum alijs instrumentis pulsare oportet in signum lætitiae, & gratiarū actionis; quia hoc præcepit Deus populo suo Israel; & hoc præceptum habetur, & conseruatur in Israel, id est, in populo Dei, qui à parente dicitur Israel. Et iudicium Deo Jacob; idem repetit alijs verbis: idem enim est præceptum, & iudicium hoc loco, vt etiam in Psal. 18. & 118. & alibi. Idem quoque est Israel, & Jacob. ait igitur, Et iudicium Deo Jacob, id est, & hoc ipsum est decretum, quod seruandum est, à populo Jacob erga Deum suum. Testimonium in Ioseph posuit illud, cum exiret de terra Aegypti. Id ipsum secūdo repetit, cum additione temporis. Idem enim intelligitur per Israel, per Jacob, & per Ioseph, populus videlicet Dei, qui totus cōstabat ex filijs Jacob, & Ioseph, vt supra diximus in Psalmo 76. & Psal. 79. Idem quoque est præceptum, iudicium, & testimoniū, vt dictum est in Psal. 18. & 118. Posuit, inquit, testimonium in Ioseph, id est, constituit hoc præceptum in populo suo, qui Ioseph dictus est à Patriarcha Ioseph, qui pater fuit naturalis duarum tribuū, & pater protectione, & prouidentia in Aegypto omnium filiorum Israel.

Posuit aut hoc præceptū Deus in populo suo, quando eduxit eum de Aegypto. Siquidem omnia præcepta, & hoc vnum cū cæteris data sunt à Deo per Mosem in deserto, paulò post egressionem de Aegypto, vt notum est ex libro Leuit. & Num. Linguam, quam non nouerat audiuit. Hæc pars vltima versiculi duobus modis exponi solet. Prior expositio est veterum scriptorum Hieronymi, Augustini, Theodoret, Euthymij, & aliorū, quod per linguam, quam non nouerat populus Dei; intelligatur vox audita de monte Sina: non enim audierat vquam antea populus vocem Dei loquentis: & spiritualiter intelligitur vox Euangelij, quam incipiunt audire, & credere qui exeunt de Aegypto, & seriò conuertuntur ad Deum. Posterior expositio est aliquorum recentiorum, quod per vocem, quam nō audierat; intelligitur lingua Aegyptiaca, vt sensus sit, linguā quam non nouerat audiuit, id est, populus Dei in Aegypto, vnde per gratiam Dei eductus fuit, linguam, quam non nouerat, audiuit, ac per hoc cum barbaris ignotæ linguæ conuersatus est. In hebræo habetur in prima persona, Linguam quam non noueram, audiui. Sed credibile est Septuaginta Interpretes legisse in tertia persona, & sic fuisse in antiquis codicibus.

Diuertit ab oneribus dorsum eius, manus eius in cophino seruierunt. VI.

Hoc est alterum beneficium Dei erga Hebræos in exitu eorum de Aegypto. Siquidem Aegyptij Hebræos cogebant seruiliter laborare in operibus duris laterum faciendorum, & coquendorum, vt perspicuum est ex lib. Exod. cap. 1. 2. & 3. Ait igitur, Diuertit ab oneribus dorsum eius, id est, Deus diuertit ab oneribus dorsum Israel siue Jacob, siue Ioseph, id est, dorsum populi sui, liberās eum ab oneribus duris luti, & laterum, quibus opprimebatur ab Aegyptijs. Manus eius in cophino seruierunt, id est,

est, diuertit Dominus ab oneribus dorsum populi sui, cuius populi manus longo tempore in gestandis cophinis plenis luto, vel lateribus seruierunt. In hebræo habetur in prima persona, Diuer-
ti ab onere dorsum eius: & quamuis sensus idem sit, siue loquatur Propheta, siue Deum loquentem introducat. tamé omnino credibile est, in codicibus antiquis, quos habuerunt Septuaginta Interpretes, fuisse in tertia persona; nulla enim est ratio, cur vertere voluerint aliter quàm in textu inuenerint. Illud autem, in cophino seruierunt, in hebræo est, à cophino recesserunt. Sed manifesta est ratio diuersitatis ob vnius literæ similitudinem: nam Septuaginta legunt, ta auodena, quod est seruierunt: & nunc legitur, ta auorena, quod est, recesserunt, sunt enim literæ simillimæ ד, & ר.

תַּעֲבֹדָה
תַּעֲבֹרָה

VII. In tribulatione inuocasti me, & liberaui te: exaudiui te in abscondito tempestatis: probaui te apud aquam contradictionis.

Ab hoc versiculo vsque ad finem vicissim commemorat Deus beneficia sua in populum; & ingratitudinem populi in Deum. In tribulatione inuocasti me, & liberaui te, id est, dum in Aegypto tribulationem grauissimam pateris, inuocasti me, & liberaui te, educés de terra illa, & liberans de durissima seruitute. Exaudiui te in abscondito tempestatis, id est, exaudiui te non solum cum timeres iram Pharaonis; sed etiam cum timeres tempestates & plagas, quibus percussus Aegyptum: tunc enim abscondi te, & protexi, ne plagæ illæ tibi nocerent. Vel, vt alij volunt, exaudiui te, cum transires per mare rubrum, & Pharo cum curribus, & equitibus te sequeretur, ego latens in columna nubis, & ignis excitaui tempestatem in mari, & subuertere rotas currum Pharaonis, & vniuersum exercitum interfeci. Itaque illud, in abscondito, potest referri tum ad populum absconditum à Deo, tempore tempestatis; tum etiam ad ipsum

Deum absconditum in columna nubis, & inuisibiliter pugnante cū Pharaone, & exercitu eius. Probaui te apud aquam contradictionis, id est, post hæc tam magna beneficia tentauit te per aquæ penuriam, vt explorarem fidem, & patientiam tuam: sed inueni te impatientem, & infidelem. Scribitur hæc historia Exod. 17. & Num. 20. vbi Deus permisit ad modicum tempus, vt populus aquæ penuria laboraret; & populo murmurante, & verso in seditionem, De^{us} ex petra eduxit aquas largissimas. Vocata est autem aqua illa contradictionis, quoniam propter aquam populus contradicere cœpit Mosi, atque eius imperium detrectare.

Audi populus meus, & con- VIII.
testabor te, Israel si audieris me, non erit in te Deus recens, neque adorabis Deum alienum.

Ego enim sum Dominus Deus IX.
tuus, qui eduxi te de terra Aegypti, dilata os tuum, & implebo illud.

Refert Propheta in persona Dei, quæ æquas cōditiones Deus populo suo proposuerit, & quæ amplas pollicitationes addiderit, si pactis conuentis stare voluisset. In quo apparet ineffabilis benignitas Dei. Audi, inquit, tu gens Hebræa, quæ es populus meus: & palā admonebo te, siue testatū faciā tibi, quid à te requirā, & quid tibi redditurus sim. Israel si audieris me, nō erit in te Deus recens, id est, si me audire, & mihi obedire volueris; hoc à te requiro, hoc in primis tibi mando, vt non sit apud te Deus recens, id est, Deus quē non coluerunt patres tui, sed recens introductus. Sic. n. hoc explicatur in cantico Mosi, Deut. 32. Verè tñ scribit S. Augustinus, omnes Deos falsos esse Deos recentes, quia non sunt æterni, nec sine principio, sed nuper in officina sculptoris effecti, vel in cerebro humanæ vanitatis for-

formati. Neque adorabis Deum alienū: est declaratio, vel repetitio eiusdē rei: dicuntur. n. Dij alieni, Dij aliarum gentiū, quos non coluerunt Patriarchæ Hebræorum. Ego. n. sum Dñs Deus tuus, qui eduxi te de terra Aegypti. Optima ratio, cur non debeat gens Iudaica colere Deos alienos, quoniā, inquit, Ego sum Dñs Deus tuus, quia redemi te de captiuitate, ac transtuli à seruitute Pharaonis ad seruitutem meā. Quæ ratio multò etiam magis conuincit Christianos, non debere colere Deos alienos: quia Deus verus, atq. æternus, non solū nos cum cæteris creauit, sed per Christum filium suum liberauit de captiuitate Diaboli, & transtulit in Regnum filij dilectionis suæ. Dilata os tuum, & implebo illud. Hæc est promissio amplissima Dei cultoribus suis, quæ sumpta est à metaphora cibi. Dilata, inquit, quantum potes, os, & fauces desiderij tui, quia replebo cibo suauissimo famem tuam. Hanc promissionem solus Deus implere pōt. Quicquid .n. creatum nobis datur, non satiat, neque explere potest appetitum cordis humani, Sola Dei visio, atque fruitio, quæ bonum est infinitū, & omnia oīno bona comprehendit, satiare nos poterit. Recentiores referunt hunc versiculum ad orationem, vt sensus sit, Aperi os tuum, & pete quod vis, & implebo petitionē tuā. Sed vereres, S. Hieronymus, S. Augustinus, Theodoretus, & Euthymius referunt ad cibum, vt nos exposuimus, & verè dilatare os, & implere os ad comestionē potius pertinet, quàm ad locutionem. Sensus autem idem est.

- X. Et non audiuit populus meus vocem meam, & Israel non intendit mihi.

Queritur nunc Deus de ingratitude populi sui, quòd tam æquis conditionibus non acquieuerit. Et mirum est valde, quod cum in terris seruuli ambulant gratiā Dñi sui, & pro magno beneficio reputent, si cum eis Dñs loqui, vel eos respicere dignetur: Israel tamen, id est, puluis, & cinis Deum Deorum audi-

re, & in eum intendere dedignetur. Sed verè dixit in Euangelio Dominus, Prudentiores esse filios huius seculi filijs lucis in generatione sua. Vox hebraica pro eo, quod nos habemus, nō intendit mihi, habet, lo auali, non voluit me, id est, reiecit me, contempsit me, in me respicere non est dignatus.

לא
אברהלי

Et dimisi eos secundum desideria cordis eorum, ibunt in adinventionibus suis.

Horrendum, sed iustissimum flagellum minatur Deus contemptorib. suis; vt videlicet fiat eis peccatū pœna peccati, id est, sinantur in peccata semper grauiora prolabi, donec ad profundum malorum deueniant. hoc est quod dicit Apostolus ad Rom. 1. tradidit illos De⁹ in desideria cordis eorū. & paulo post, Tradidit illos in passionēs ignominia. & iterum, Tradidit illos in reprobū sanctum, vt faciant quæ nō conueniūt. Hæc est illa obduratio cordis, de qua dicit Ecclesiastes c. 7. Considera opera Dei, quia nemo pōt corrigere, quem ille despexerit. Et dimisi inquit, eos secundum desideria cordis eorū, id est, permisit vt ambularent, & operarentur iuxta concupiscentias suas: non dedi eis, vt filijs, disciplinā; sed vt alienos dimisi vt precipitarentur, & colliderentur. Ibunt in adinventionibus suis, id est, sequentur non semitas Patrum suorum, nō vias rectas legis meæ, sed cogitationes cordis sui in cultu Deorum, quos humana curiositas adinuenit; & in omni genere turpitudinis vitiorum, quibus corrūpi solet humana natura, cum Dei lumine non dirigitur, & Dei dextera non teneatur, & Dei efficaci gratia non iuuatur.

Si populus meus audisset me, Israel si in vijs meis ambulasset

Pro nihilo forsitan inimicos eorum humiliassem: & super tribulantes eos misissem manum meam.

Itē

Iterū redit ad promissiones per modum optantis, ut ostēdatur innata Deo nostro misericordiæ affluentia. Verē enim Deus noster Pater misericordiā est, & Deus totius consolationis. Nam ubi legimus, Si populus meus audisset me, in hebræo est, *lu*, quæ est particula optatis, Vtinam populus meus audisset me. Sed quia in Deum propriē nō cadit talis affectio, & est ea metaphorica locutio, Septuaginta Interpretes verterunt, Si populus meus audisset me, & in vijs meis, id est, in legibus meis ambulasset. Pro nihilo forsitan inimicos eorū humiliasset, id est, facillimē, & celerimē omnes hostes populi mei, qui nunc eum tantopere vexant, humiliasset, & deiecisset, ut caput attollere nō valerent. Et super tribulantes eos misisset manum meam id est, quia super persecutores populi mei misisset manū potentie meæ, atque eos contriuissem. Illud, pro nihilo, in hebræo est, quasi modicum, vel, ut sanctus Hieronymus vertit, quasi nihilum. Et sensus est, Deo nō esse difficile debellare quoslibet inimicos, quoniam omnis humana potentia, quasi nihil est coram Deo; ac per hoc pot facillimē, & velocissimē id agere, quia nihil ei resistit. Itaque illud, pro nihilo, exponendū est, ac si nihil essent omnes inimici, ita eos humiliasset. Illud, forsitan, nō habetur in hebræo, sed additū est à Septuaginta declarationis gratia, ut intelligeremus, Deum nō necessario, sed liberē agere, & posse pro arbitrio, si velit, non agere..

XIV. Inimici Domini mentiti sunt ei, & erit tempus eorum in secula.

Hic iā loquitur Propheta, & confirmat quod Deus dixerat, Et non audiuit populus meus vocem meā: proinde per inimicos intelligit Iudæos, qui ex filijs inimici facti sunt, ac tūm præsertim cū Christum negauerunt coram Pilato, Regem suum esse, de qua re Daniel cap. 9. disertē ait, Et non erit eius populus, qui eū negaturus est. Ita exponunt Bellarm. in Psalm.

omnes veteres, Hieronymus, Augustin., Theodoretus, Euthymius, & alij. Recentiores nonnulli cum Rabinis, exponunt de inimicis Iudæorum: sed nos malumus Patres nostros, quā Rabinos sequi. Ait igitur, Inimici Domini, id est, Iudæi rebelles, & increduli mentiti sunt ei, quia promiserunt ad radices Montis Sinai, se facturos omnia, quæ Dominus imperasset. Exod. 24. Omnia verba, inquiunt, quæ locutus est Dominus, faciemus: & tamen nihil eorum opere compleuerunt. Ex hebræo posset etiam verti, negauerunt ei, vel eum: sed rectissimē etiam vertitur, mentiti sunt ei. Et erit tempus eorum in secula, id est, & erit tempus defectionis, & rebellionis eorum in secula, quia vix in fine mundi reliquæ Iudæorum conuertentur. vel, iuxta S. Augustinum, erit tempus supplicij eorum in secula, quia ignis gehennæ non extinguetur. Theodoretus, & Euthymius notāt apud Syros per tempus interdum significari supplicium, siue calamitatem: quod S. Augustini expositionem confirmat.

Et cibavit eos ex adipe frumenti, & de petra melle saturavit eos. XV.

Hic notatur maxima Iudæorum ingratitudo, qui mēti sunt Domino cū tantis eos beneficijs affecisset. Possunt autem hæc verba referri ad manna, quod pluebat Iudæis in deserto, & aquam, quæ in eodem deserto scaturiuit de petra. nam cibus ille rectē dicitur ad eum frumenti, quia erat panis Angelorum, ut dicitur in Psalm. 77. & habebat omnem saporem, ut dicitur Sap. 16. Mel de petra non absurdē dicitur aqua illa, quæ de petra Moses eduxit, quia, ut Theodoretus dicit, sitiētibus Hæbræis instar mellis videbatur. Potest tamen etiam referri totus hic versiculus ad vbertatē tritici, vini, & olei, quæ erat in terra promissionis, quamvis magna ex parte montuosa, & saxosa esset. Sic enim scribit Moses Deuteron. 32. Constituit eum super excelsam terram, ut comede

Ii ret

ret fructus agrorum, ut sugeret mel de petra, oleumq. de saxo durissimo. Vbi per fructus agrorum, intelligitur præcipue trumentum, de quo paulo infra dicit, Et hircos cum medulla tritici. Per, mel de petra, intelligitur mel ipsum, quod Apes in cavernis petrarum producebant necnon ficus, vva, & reliqua dulcia, quæ in montibus illis petrosis gignebantur. Sed adeps frumenti, & mel de petra multo pretiosiora sunt apud Christianos, quibus adest sub specie panis corpus Redemptoris, & mel sapientiæ celestis de petra, quæ idem Christus est; & tamen non pauci post abrenunciationem Diabolo, & pompis, & operibus eius factam in Baptismo, mentiuntur Deo reuertentes ad ea, quibus renunciauerant: & post gustatum panem de cælo, & mel de petra, reuertuntur, ut canes immundi, ad vomitum suum. Qui timere debent æternitatem futuri supplicij, ignis, qui non exstinguitur, & vermis, qui non moritur.

PSALMVS LXXXI.

Titulus, & Argumentum

Psalmus Asaph.



Argumentum huius Psalmi est exhortatio ad Iudices, ut iuste iudicent. Sed ut maiorem efficaciam habeat exhortatio, inducitur Deus summus Iudex increpans Iudices minores.

Explicatio Psalmi 81.

I. **D**eus stetit in synagoga Deorum, in medio autem Deos diiudicat.

Pronunciat sanctus Propheta, Deum sepe adesse, cum Iudices sententias ferunt, & de ipsis eorum sententijs iudi-

care, recte ne, an iniquæ sint. Quod certe multum prodesset Iudicibus, si serio cogitarent, in conspectu summi Iudicis omnes causas iudicari. Deus, inquit, stetit, id est, semper assistit præsens inuisibili maiestate, in synagoga Deorum, id est, in conuentu, & confesso Iudicum, dum causas populi iudicant: & dum illi iudicant populos, Deus in medio eorum præsens assistens iudicat ipsos iudices. Hic sunt aliqua dubia breuiter dissoluenda. Primum est, quia in hebraico textu ubi dicitur, Deus stetit vox Deus est, Elohim, quæ est numeri multitudinis, & significat Deos, siue Iudices; vox autem, Deorum, cum dicitur in synagoga Deorum, est numeri singularis, El, & significat Deum. Quare videntur Septuaginta Interpretes non rectè vertisse, Deus stetit in synagoga Deorum. Respondetur primo, fieri posse, ut verba illa in nostris codicibus sint transposita, & in codicibus antiquis fuerit in primo loco, El, & in nouissimo, Elohim, ut Septuaginta reddiderunt. Secundo, posse hunc locum hebraicè ita legi, Deorum stetit in synagoga Deus; carent enim hebræi casibus; tamen Septuaginta Interpretes, ut sensum clariorem redderent, vertisse, Deus stetit in synagoga Deorum. Tertio, posse verti cum sancto Hieronymo, Deus stetit in synagoga Dei, id est, in synagoga sua: tamen Septuaginta Interpretes vertisse, In synagoga Deorum, quia synagoga Dei nihil est aliud, nisi conuentus Iudicum à Deo constitutorum, quibus etiam nomen suum imperitiuit, quia communicauit cum illis auctoritatem iudicandi, quæ est ipsius propria, dicente Sancto Iacobo cap. 4. Unus est legislator, & Iudex. Neque obstat, quod, Elohim, sit numeri multitudinis; recipi enim vsitate significationem numeri tum singularis, tum multitudinis. Alterum dubium est, cur dicatur in præterito, Deus stetit, & non potius, Deus stat. Sanctus Augustinus quærit, si Deus stetit in synagoga Deorum quando id fuit? quando stetit? & non inueniens, quando Deus Pater steterit, refert hunc locum ad Deum filium, qui

אלהים

אל

אלהים

in carne stetit in synagoga Scribarum, & Phariseorum. Sed non est necesse restringere hæc verba ad tempus Christi, cum hoc perpetuum sit, ut Deus semper assistat iudicantibus: unde etiam sequitur, In medio autem Deos dijudicat vel, ut est in hebræo, dijudicabit. Itaque illud, stetit, significat, ab initio stare consuevit, siue, constituit se præsentem. Et quia Deus non muratur, sicut ab initio stetit, ita semper stat, & stabit, & semper iudicabit. Tertia dubitatio, cur dicit, stetit, & non potius sedit? Iudicis enim sedere est, non stare. Sed facilis est responsio; nam vox illa, stetit, non significat hoc loco stare, ut distinguitur contra sedere, sed ad esse, ut distinguitur contra abesse, & præsertim hoc significat vox hebraica יָצַב, ut perspicuum est ex lib. Iud. cap. 3. versic. 22. nam ubi legimus, Infixit sicam in ventrem eius tam valide, ut capulus sequeretur ferrum in vulnus, in hebræo est, ut sequeretur, quod stetit post ferrum. ubi describitur capulus, qui est in gladio post ferrum, quo loco vox, stetit, quam etiam hic habemus, non significat stare, id est, non sedere, sed adesse, vel manere.

II. Usquequo iudicatis iniquitatem? & facies peccatorum sumitis?

Vtrum hæc dicantur à Propheta, qui reprehendit Iudices, propterea quod non cogitent, Deum assistere iudicijs ipsorum, & ideo iniuste iudicent; an potius dicantur à Deo, qui assistens iudicantibus, & sententias eorum diligenter examinans, arguit malos Iudices de præcipuo, & frequentissimo eorum crimine, videlicet de acceptione personarum, ob quam plerunque iniuste iudicant; incertum est; sed siue Propheta, siue Deus hæc dicat, divina reprehensio est, quia per os Prophetæ Spiritus sanctus sine dubio loquebatur: & quia raro accipitur persona hominis pauperis, & iusti; frequentissime,

autem persona diuitis, & iniusti; ideo de hac acceptione potissimum eos reprehendit. Usquequo, inquit, iudicatis iniquitatem, id est, quamdiu perseverabitis in hoc peccato inique iudicandi? & addit causam præcipuam iniquorum iudiciorum dicens, Et facies peccatorum sumitis, id est, quia facies, siue personas peccatorum accipitis: hinc enim oriuntur iniqua iudicia, quia Iudices non attendunt ad merita causæ, sed ad gratiam hominum diuitum, & potentium, qui hoc ipso peccatores sunt, quod cupiant à Iudicibus gratiam suam iustitiæ anteponi. Porro sumere faciem alicuius in iudicio, nihil est aliud, nisi talem sententiam ferre, non qualem iustitia exigit, sed qualem requirit amicus, vel benefactor, vel cognatus. Et hoc idem est respicere in faciem hominis, non in regulam iustitiæ.

Iudicate egeno & pupillo, humilem, & pauperem iustificate. III.

Reprehendit Deus, siue Propheta primo loco vitium acceptionis personarum: nunc secundo addit vitium oppressionis pauperum, quos Iudices opprimunt, tum quando differunt eis iustitiam facere, tum quando damnant eos iniuste, ut aduersarijs potèntioribus non displiceant. Iudicate, inquit, egeno & pupillo, id est, causam pauperis, & præsertim pupilli libenter admittite, diligenter discutite, sollicitè expedite, ne cogantur bona sua litigando consumere: humilem, id est, hominem abiectum, atque afflictum, & pauperem iustificate, id est, absolute, & iustum declarate. Hoc tamen intelligitur si verè iustus sit. scriptum est enim Levit. 19. Non consideres personam pauperis nec honores vultum potentis: iuste iudica proximo tuo. Sensus igitur non est, ut semper pro paupere, siue in fauorem pauperis iudicetur: sed ut quando pauper iustus est, & iniuste

li 2 ac-

accusatur, Iudex efficiat, ut iustitia pauperis emineat, & non opprimatur potentia aduersariorum.

IV. Eripite pauperem, & egenum de manu peccatoris liberate.

Non satisfacit Iudex officio suo, si solum proferat iustum iudicium, nisi etiam cogat diuites, & potentes, ut pauperibus, & egenis re ipsa satisfaciant, siue restituendo ablata, siue resarciendo detrimenta, quæ ob calumnias, & lites passi sunt. Ideo siue Deus, siue Propheta adiungit, dicens, Eripite pauperem, videlicet de manu potentis, & egenum de manu eiusdem potentis libera te. Idem enim bis repetit more suo, ut res menti altius infigatur. Eripere autem pauperem de manu potentis, est sententiam aduersus potenterem pro paupere iuste pronunciata executioni mādare, & re ipsa efficere ut pauper nihil detrimenti à potentiore inimico patiatur. In hoc igitur potissimum deberent Iudices, & Principes auctoritatem suam demonstrare. Sic enim, & gratiam Dei, & benevolentiam populorum sibi compararent: sed quoniam ut plurimum id non faciunt, sequitur Prophetia, & dicit,

V. Nescierunt, neque intellexerunt: in tenebris ambulant, mouebuntur omnia fundamenta terræ.

Deplorat Propheta voluntariam cecitatem Iudicum, ob quorum iniustitias rotas orbis terrarum conturbatur. Nam, ut Dominus dicit in Euangelio, Si sal euaueris, in quo salietur? & alibi, Si lux, quæ in te est, tenebræ sint, ipsæ, tenebræ quantæ erunt? Sic etiam dicere possumus, si apud eos, qui ex officio iustitiam administrant, iustitia non inuenitur, ubi tandem inuenietur? nonne iniquitas omnia confundet? Nescierunt, inquit, neque intellexe-

runt, id est neque cognouerunt quid facti, neque intellexerunt quid iuris esset in causa. Hoc enim interest inter duo verba hebraica, quæ hic habentur, quod inter cognoscere, & intelligere apud Latinos. Cognoscere latius patet, ut etiam ad nouitiâ sensuum pertineat, intelligere proprium est mentis, & rationis: quare propriè dixit Propheta Isaïas cap. 1. Cognouit bos possessorem suum, & Asinus praesepe Domini sui; non autem propriè dixisset, Intellexit Bos possessorem suum, & Asinus praesepe Domini sui. Ex hac ignorantia Iudicum fit, ut in tenebris ambulent, id est, errent in iudicando, quomodo cæci errant inter ambulandum. Ex hoc autem errore, & iniustitia sequitur perturbatio, & tumultus, seditio, & defectio populorum; quod significatur verbis sequentibus, Mouebuntur omnia fundamenta terræ, id est, totus orbis terrarum turbabitur, & quasi fluctuabit: neque alia fuit causa, cur totum Regnum Israël deficeret à Rege Dauid, nisi quia persuasit Absalon populis; Regem Dauidem non intendere causis cognoscendis, ut patet ex lib. 2. Regum cap. 15. Cur autem Iudices permulti cæci sint, causam refert Scriptura in cupiditatem munerum. Isaïa. 1. Omnes diligunt munera, sequuntur retributiones, pupillo non iudicant, & causa viduæ non ingreditur ad eos. Exod. 23. Nec accipias munera, quæ excæcant prudentes. Deut. 16. Munera excæcant oculos sapientum. Ecclesiastici 20. Dona excæcant oculos Iudicis.

Ego dixi dii estis, & filij excelsi omnes. **VI.**

Reprehendit haecenus Propheta, siue Deus ipse, Iudices, acceptionis personarum; iniustitiam, & ignorantiam; nunc ostendit quam indigna sint hæc vitia eo sublimi honore, in quo Deus illos constituit. Ego inquit, dixi, pronunciaui, asserui, Di estis, & filij excelsi omnes vos Iudices, & Principes terræ. Vocat autem filios excelsi, vel comparans eos cum

cum Angelis, qui apud Iob cap. 1. & 38 Filij Dei dicuntur: vel, vt ostendat, Iudices non esse Deos propriè, vt est verus, & summus Deus, qui caret principio: sed esse Deos, quia filij Dei, id est, ab vno vero Deo, Dijs constituti per participationem auctoritatis iudicandi, & iubendi. In Euangelio Ioan. cap. 10. Dominus hunc locum adducens dicit, vocari Deos, quia sermo Dei ad illos factus est. Si illos, inquit, dixit Deos, ad quos sermo Dei factus est, quem Deus sanctificauit, & misit in mundum, vos dicitis, quia blasphemas quia dixi, filius Dei sum? Sermone Dei ad aliquem fieri, est, Deum committere alicui officium aliquod. sic enim dicitur, factum verbum Dei ad Prophetas, quos mittebat ad prædicandum. Et Luc. 3. dicitur, Factum est verbum Dei super Ioannem Zachariæ filium in deserto: & mox adiungitur executio, Et venit in omnem regionem Iordanis prædicans, &c. Et quod Lucas dixit, Factum est verbum Dei super Ioannem, Ioannes cap. 1. explicuit dicens, Fuit homo missus à Deo, cui nomen erat Ioannes. Atq. hinc manifestè colligitur vis argumèti Christi, Si illos dixit Deos Scriptura, ad quos sermo Dei factus est, id est, quos Deus misit ad aliquid faciendum, communicas illis auctoritatem suam; quantò magis ego Filius Dei, & Deus dici possum, què de cælo Pater æternus misit in Mundum cum plenaria potestate? Neque ex hoc loco colligi debet, omnes Iudices, & Principes habere à Deo immediatè potestatem suam. Satis enim est, si eam habeant, vel immediatè, vt habuit Moyses in testamento veteri, & S. Petrus in nouo; vel mediante consensu populi, vt habent Reges, & Principes terræ, in quos transtulit populus auctoritatem suam, quam accepit à Deo iure naturæ: non enim est potestas nisi à Deo, vt Apostolus scribit ad Rom. 13.

VII. Vos autem sicut homines moriemini, & sicut vnus de Principibus cadetis.

Ego, inquit, dixi quid estis dignatione Dei, sed nunc addam quid sitis vitio vestro. ex Dei munere Dijs estis, & Angelis similes, sed ex peccato, quod habetis ex primo homine, sicut ceteri homines moriemini, & ex proprio vestro vitio, quo abutimini potestate vobis tradita, sicut vnus de Principibus cælestibus, i. de Angelis apostaticis cadetis, & sic de summo gradu ad imum, de magna gloria ad extremam miseriam præcipitabimini. Illud, sicut homines, in hebræo est, sicut Adam, & Sanctus Hieronymus in commentario exponit, Sicut primus homo mortuus est, ita, & vose ius filij secundum carnem peccatricem moriemini. Non potest tamen Septuaginta interpretum versio improbari, quoniam vocabulum, Adam, ita proprium est primi hominis, vt etiam sepe toti generi humano accommodetur. Illud autem, sicut vnus de Principibus, refertur ad Diabolum, non solum à Sancto Hieronymo, sed etiam à Sancto Augustino, Theodoro, Eutymio, & alijs.

Surge Deus iudica terram, quoniam tu hæreditabis in omnibus gentibus. VIII.


Hæc Psalmi conclusio duplicem habet sensum: vnum, vt Propheeta imploret auxilium Dei aduersus iniusticias Principum, & Iudicum terræ; vt videlicet ipse, qui est verus Dominus, & possessor totius orbis, emendet iudicia hominum, puniat improbos Iudices, & pauperes oppressos subleuet iuxta sapientiã, & potentiam suam: alterum, vt hæc sit prædictio per formam precationis, qua prædicatur aduentus Messie, qui sicut hæreditabit orbem terræ, ita etiam iudicabit terram iusto iudicio per suos administratos, id est, fideles Pontifices, & Reges, dum seculum durat, & postea per se in nouissimo die. Surge Deus iudica terram, id est; quandoquidem abutuntur Iudices potestate sua, tu Deus summe Iudex exurge, & iudica terram exercens iudicia in ipsos Iudices, & liberans pauperes innoxios ab oppressione

potentium iniquorum . Quoniam tu hæreditabis in omnis gentibus , id est , quoniam possessio tua semper erit , sicut fuit , in omni humano genere . Non enim sic distribuis Regna filiis hominū , vt tu supremam potestatem non semper retineas . Vel , surge Deus Christe , veni in terras , iudica terram , vindica eam à potestate tenebrarum , trade eam ministris tuis fidelibus , quoniam tu eris hæres vniuersorum , vt verus , & naturalis Filius Dei . Et demum surge iterum , & veni de cælo cum Sanctis tuis , & iudica terram iudicio vltimo , à quo nulla dari poterit appellatio ; quia hæreditabis in omnibus gentibus , quando omnes inimici tui subiecti erunt sub scabellum pedum tuorum ; & sublato omni principatu , & potestate , tu solus pacificè cum Patre , & Spiritu sancto regnabis per omnem æternitatem .

PSALMVS LXXXII.

Titulus, & Argumentum
Psalmi.

Canticum Psalmi Asaph.



HIC est postremus Psalmus ex ijs , qui inscribuntur Asaph . De argumēto tres inuenio sentētiās . Recentiores volūt in hoc Psalmo describi orationem

Regis Iosaphat aduersus Moabitas , Ammonitas , & Idumæos , qui aduersus eū conspirauerant , vt dicitur 1. Paralip. 20. Sed contra hanc sententiam facit , quod in hoc Psalmo non tantū nominantur tres illæ gentes , sed aliæ sex , vel septem . Theodoretus , & Euthymius existimant , hunc Psalmum continere bella gentium quæ erant in circuitu terræ promissionis aduersus Iudæos , qui redierant ex captiuitate Babylonica . Sed neque illæ gentes tam multæ erāt ,

quàm multæ hic numerantur ; solum enim 2. Esdræ 4. nominantur Ammonitæ , Arabes , & Azotij . Probabilius est hæc omnia contigisse tempore Machabæorum , vt colligitur ex lib. 1. cap. 5. Machab. Sanctus Augustinus omnino contendit hunc Psalmum intelligendum esse de bellis Antichristi aduersus Ecclesiam . quæ sententia probabilissima videtur . Nam sine dubio cum Antichristo conuenient omnes barbaræ nationes , ac præsertim orientales Agareni , & Ismaelitæ , à quibus Mahumetani originem ducunt . Sed quicquid sit de sensu historico , non potest , nec debet negari , quin præcipua intentio Spiritus sancti ad Christum , & Ecclesiā dirigatur .

Explicatio Psalmi 82.

DEus quis similis erit tibi ? I. ne taceas , neque compescaris Deus .

Precatur Deum Propheta in persona populi , vt quoniam ipse est potentior omnibus inimicis , non amplius dissimulet vindictam sumere de persecutoribus populi sui . Deus , quis similis erit tibi ? id est , nemo tibi comparari poterit in potentia , & robore , cum tu solus sis omnipotens : ideo ne taceas , id est , ne dissimules , neque compescaris , id est , ne te ipse mitiges , & compescas à sumēda vindicta , tu qui Deus es , cui nemo resistere potest . Sanctus Augustinus satis aptè ad Christum accommodat , qui in hoc Mundo similis alijs hominib. videbatur , sed in die Iudicii nemo similis illi erit , quando apparebit in gloria Patris sui , & sedebit i sede maiestatis suæ . Qui etiam tempore passionis tacuit , sicut Agnus mansuetus , & cōpescuit ipse se sed in die Iudicii non tacebit , neque iustissimam iram compescet , quando dicet , Ite maledicti in ignem æternum . Qd attinet ad verba , ex hebræo S. Hieronymus sic vertit totū hūc versiculū , Deus ne taceas , ne fileas , & nō quiescas Deus . Et quidem voces hebraicæ hunc sen-

sensum facere possunt, sicut etiam hūc, Deus ne silentium tibi sit. Sed etiā recipiunt hunc alium sensum, Deus nō similis tibi. i. nemo similis tibi est: quod 70. per interrogationem eleganter expresserunt, Deus quis similis erit tibi? vox n. domi, deducitur a verbo, damah, qđ & similem esse, & filere significat. Illud neque compescaris, in hebræo propriè est, neque quiescas. Sed idem est sensus. Ultima vox, Deus, in hebræo est, El, quæ vox Deum significat, vt fortem, & robustum, ex qua intelligimus, illud, Quis similis tibi, accipiendum esse de similitudine in potentia, & robore.

- II. Quoniam ecce inimici tui sonuerunt, & qui oderunt te, extulerunt caput.

Magna ratio cur Deus filere non debeat hic adducitur; quoniā inimici eius tumultum insolitum excitauerunt conuenientes ex varijs nationibus in maxima multitudine aduersus populū Dei, & qui aliquñ dissimulauerant, apertè se hostes professi sunt: Illud, sonuerunt, non significat sonitum tubæ, aut tympani tantummodo, sed tumultum grauem, vnde existit sonitus incōditus multitudinis: id. n. propriè significat vox hebraica, hamah, quare S. Hieronymus vertit, Quoniam ecce inimici tui tumultuati sunt. Illud, extulerunt caput: sanctus Augustinus refert ad Antichristū, qui erit caput hostium Christi: ipso. n. apparente, plurimi, qui non audebant se hostes Ecclesiæ profiteri, palam se Antichristo adiungent, & tum ipsi essent audacter caput suum proprium, tum etiam extollent caput commune omnium iniquorum, idest, Antichristū.

- III. Super populum tuum malignauerunt consiliū, & cogitauerunt aduersus sanctos tuos.

- IV. Dixerunt, venite, & disperdamus eos de gente, & non memoretur nomen Israel vitra.

Hic explicat magnitudinem periculi, vt Deus non expectet diutius, neque differat auxilium: qm̄ hostes non moliantur excursionem, aut deprædationem aliquā, sed vltimum exterminium, & perfectam desolationem Ecclesiæ Dei. Ex hoc loco probabile fit, hæc adimpleri esse vtcunque, id est, tamquam in typo, & figura tempore Machabæorum. Dicitur enim lib. 1. cap. 5. conuenisse omnes gentes, quæ erant in circuitu, vt tollerent genus Iacob. Sed propriè pertinent hæc omnia ad tēpus Antichristi. tunc enim omni conatu contendunt omnes impij simul congregati delere castra Sanctorum. Sed verba consideremus. Super populum tuū malignauerunt consiliū, id est, malignū consiliū inierunt aduersus totum populum tuum: sed per malignū intelligi debet malitiosum, & astutum: nam verbum, iaharimu, propriè significat, astutē, & secreto consultaerunt, sicut et vox, sed, quam consiliū verterunt Septuaginta, significat secretum, ac per hoc consiliū, quatenus secretum esse solet. Hoc autem consiliū astutum, & secretum erit multiplex apud Antichristum: nam & consiliū secretū habebit cum Diabolo, quem occultē collet: & astuto consilio finget se Christū esse, vt Christianos decipiat; & simul circumcisionem, & sabbata probabit, vt seducat Hebræos. Et cogitauerunt aduersus sanctos tuos, id est, malitiosum illud consiliū excogitauerunt in perniciē fidelium tuorum, qui sanctificati sunt per sanguinē Unigeniti, & tibi propriè sanctificati, & dedicati sunt; vel certē sancti tui sunt per sanctam fidē, & religionem, qua susceperunt. In hebræo legitur, aduersus absconditos tuos, vel abscondita tua, vel arcana tua: proinde nō desunt qui intelligant per hanc vocem, sanctuarii interiora: neque ab hac expositione dissentit graecus, οἱ κρυπτοι, tā significare potest sancta tua, q̄ sanctos tuos. Cæterum editio latina vulgata antiquissima, quæ sine variatione legit, sanctos tuos, declarauit ambiguitatē, q̄ in hebræo, & graeco esse poterat. Rectē aut fideles Dei, dicuntur

יְעָרִימוּ
סוד

absconditi Dei, quoniā Deus sub vmbra alarū suarū protegit eos; & quoniā (vt Apostolus dicit ad Coloss. 3.) abscondita est vita nostra cum Christo in Deo, & Cū apparuerit Christus vita nostra, tūc, & nos apparebimus cum illo in gloria. cui subscribit S. Ioann. in epist. 1. c. 3. dicens, Nunc filij Dei sumus, & nondū apparuit quid erimus. Itaque sancti Dei rectē dicuntur absconditi, quoniam et si Fidei professio non sit abscondita, tamen gloria, & precium inestimabile huius professionis, abscondita sunt, & suo tempore reuelanda. Venite, & disperdamus eos de gente, id est, efficiamus, vt non sint amplius gens, & populus. vel, vt S. Augustinus exponit, Disperdamus eos de gente, id est, de gētibz, vt inter gentes, siue homines nullum locum habeāt. Et nomen Israel non memoretur amplius, id est, ne nomen quidem populi Dei supersit. Iam .n. sēpē monuimus per Israelem intelligi populum Dei siue secundū carnem, siue secundū spiritum ab Israele descendat.

V. Quoniam cogitauerunt unanimiter simul, aduersum te testamētum disposuerunt tabernacula Idumæorum, & Ismahelitæ.

VI. Moab, & Agareni, Gebal, & Ammon, & Amalec: alienigenæ cum habitantibus Tyrum.

VII. Etenim Assur venit cum illis, facti sunt in adiutorium filijs Loth.

Describit gentes, quæ delere nitebantur populum Dei de terra. Quoniam, inquit, cogitauerunt unanimiter simul, id est, consilium cœperunt vno animo omnes inimici Israel simul: vbi enim nos legimus, cogitauerūt, in hebræo est consultauerunt, ac per hoc illud, cogitauerunt, significat, inito consilio cogitauerunt. Aduersus te testamentum disposuerunt, id est, fœdus inierunt aduersus populum tuū, vox enim, testamentū, in sacris literis pactum significat, &

in textu hebraico expressè pactum, siue fœdus legitur. Tabernacula Idumæorum, & Ismahelitæ, &c. Isti sunt, qui cōsultando inter se cogitauerūt, & pactū inierunt aduersus populum Dei. Primū quidem Idumæi, siue potius tabernacula Idumæorum, id est, integra castra Idumæorum. Sūt autem Idumæi populi qui descendunt ab Esau, qui alio nomine dicebatur Edom. Deinde Ismahelitæ, id est, populi, qui descendunt ab Ismahele filio Abraham ex Agar ancilla. Tercio Moab, id est, populus qui descendit à filio Loth, qui dictus est Moab. Quarto Agareni, id est, populi, qui descendunt ex Agar ancilla Abraham, sed ex alio marito cui nupsit posteaquā dimissa fuit ab Abraham. Quinto, Gebal, id est, populus, qui descendit à Gebal. Vtrū autem Gebal sit nomen viri, an regionis, incertum est, cū hoc nomē nō inueniatur in scripturis, nisi hoc loco, fortasse idē est Gebal cū Gebelē, cuius fit mentio lib. 2. Reg. cap. 8. vbi dicitur, Fecit quoq. sibi Dauid nomē, cū reuerteretur capta Syria in valle salinarū, cœsis decem, & octo millib. & in Gebelē ad viginti tria millia: vel est idē cum Gaba. de qua dicitur lib. 2. Esdræ cap. 12. de domo Galgal, & de regionibus Geba. Theodoretus, & Euthymius dicunt, Gebal fuisse gentem vicinā Idumæis. Sexto Ammon, id est, populus, qui descendebat ab Ammon filio Loth, fratre Moab: hos enim duos genuit Loth, ex filiabus suis. Gen. 19. Septimo Amalech, id est, populus, qui descēdebat ab Amalech, q. fuit nepos Esau, vt legitur Gen. 36. Octauo alienigenæ, id est, populus Philistinorum, de quib. frequentissima mentio est in libris Regum. In hebræo habet, Palæstina; sed Septuaginta hanc vnam gentem perpetuō alienigenas vocare solent. Nono habitantes Tyrū, id est, Tyrij, qui sunt populi ad mare, sic dicti à Tyro ciuitate atque emporio nobilissimo. Decimo Assur, qui venit in auxilium filijs Loth, id est, populus Assyriorum, qui iuuabant Moabitas, & Ammonitas aduersus Iudæos. Per hos Assyrios, rectē Theodoretus interpretatur Samaritanos, id est, Assyrios, quos cōstituit

tuit Salmanasar Rex Assyriæ in Samaria quando transtulit decem tribus in Assyriam, vt habetur lib. 4. cap. 17. Non enim legitur in scripturis, quòd aliquando venerint aliqui ex Assyria in adiutorium filijs Loth, id est, Moabitibus, & Ammonitis: sed legimus in primo libro Machabæorum cap. 5. quòd gentes, quæ erant in Galilæa, & Samaria coniunxerint arma cum Moabitibus, & Ammonitis aduersus Iudæos. Porro isti decem populi significant, vt supra diximus, gentes, quæ pugnaverunt cum Machabæis, vel potius multitudinem orientalium barbarorum, qui cum Antichristo grauissimam persecutionem mouebunt aduersus Ecclesiam.

VIII. Fac illis sicut Madian, & Sifaræ, sicut Iabin in torrente Ciffon.

Prædicit nunc Propheta per modum imprecationis exterminium gentium, quæ cum Machabæis præliabantur. sed præcipue Antichristi, & exercitus eius; comparans illos alijs persecutoribus, qui similiter perierunt. Fac illis, inquit, sicut Madian, id est, disperde eos, sicut olim tempore Gedeonis Iudicis dispersisti, ac penitus profigasti Madianitas. Historia hæc habetur in lib. Iud. cap. 6. & 7. Et Sifaræ, id est, sicut tempore Barach Iudicis perdidisti Sifaram Principem militiæ Iabin Regis. Et Iabin in torrente Ciffon, id est, & sicut deleuisti ipsum Iabin Regem Chanaam cum exercitu suo prope torrentem, qui dicitur Ciffon. Habetur hæc historia in lib. Iud. cap. 4. & 5. Meminit autem Propheta horum Principum præter cæteros; quoniam deuicti sunt, non sine miraculo a paucis hominibus, & magis terrore a Deo immisso, quàm viribus Iudæorum.

IX. Disperierunt in Endor, facti sunt, vt stercus terræ.

Describit locum, vbi perierunt Iabin, & Sifaræ cum exercitu suo; locus enim

fuit Endor, cuius sit mentio in libro Iosue cap. 16. Ibi ergo perierunt, & facti sunt vt stercus terræ, quia insepulti compuerunt, & a maxima gloria ad summam ignominiam reducti sunt.

Pone Principes eorum, sicut X. Oreb, & Zeb, & Zebeç, & Salmana.

Reuertitur ad historiam Gedeonis, qui non solum exercitum Madianitarum profigauit: sed etiam paulo post interfecit duos Principes Madianitarum Oreb & Zeb, & duos Reges Zebeç, & Salmana. vide in lib. Iud. cap. 7. & 8.

Omnes Principes eorum qui XI. dixerunt, Hæreditate possideamus sanctuarium Dei.

Pone, inquit, sicut Reges, & Principes Madianitarum. omnes Principes eorum populorum, qui dixerunt, Hæreditate possideamus, id est, tanquam hæreditatem, & propriam possessionem vindicemus nobis sanctuarium Dei, id est, ciuitatem Hierusalem, quæ erat sanctificata Deo, vt proprium eius habitaculum. Significat autem Hierusalem (vt sæpè diximus) Ecclesiam Dei, quam totis viribus sibi subicere, & captiuare conabatur Antichristus. In hebræo pro, sanctuarium, habetur, nehor, quam vocem sanctus Hieronymus vertit, pulchritudine נְהוֹר Dei, sed commodius verti posset, pulchra habitacula Dei. Septuaginta verterunt sensum. Habitacula enim Dei, sanctuaria sunt.

Deus meus pone illos, vtro - XII. tam, & sicut stipulam ante faciem venti.

Altissima similitudine describit Propheta instabilitatem, & interitum impiorum, quæ procedunt ex iusto iudicio Dei. Rota enim semper circumuoluitur,

tur, cum ruit in præceps, nec ad punctum temporis consistere potest, & tandem tota confringitur; sicut etiam stipulae flante vento huc, illucque iactantur, donec dissipatae non amplius compareant. Ad hunc modum prædicit Propheta per modum imprecationis, Deum acturum esse cum impijs persecutoribus iustorum: & re vera sic fieri experientia testis est; nihil enim instabilius est prosperitate impiorum, & finis eorum mors æterna erit.

XIII. Sicut ignis, qui comburit sylva
& sicut flamma comburens montes.

XIV. Ita persequeris illos in tempestate tua, & in ira tua turbabis eos.

Prædixit supplicium impiorum, instabilitatem in hoc seculo, & interitum in futuro: nunc prædicit velocitatem, & facilitatem, qua Deus illos puniet: nam non contentus similitudine venti dissipantis stipulas: comparat iram Dei igni comburenti ligna sylvarum, aut fenum camporum. Sicut, inquit, ignis qui comburit ligna sylvarum, inter quæ multa sunt arida, & velocissime absumuntur, & sicut flamma comburens montes, id est, scænum in montibus, præcipue cum siccum fuerit, Ita persequeris eos, id est, pari facilitate, & celeritate persequeris, & perdes eos in tempestate tua: quod declarans addit, & in ira tua turbabis eos. Idem enim est tempestas, & ira; vtrunq; enim iustum Dei iudicium significat, quod in star vehementissimæ tempestatis, & turbinis, cui resisti nullis viribus potest, impios percellit, cõturbabit, & dissipabit. Sanctus Augustinus notat impios comparari montibus propter elationem, ac superbiam; & lignis sylvarum propter sterilitatem, & carentiam fructuum bonorum, ob quæ iure sempiternus ignis illis debeatur.

Imple facies eorum ignominia, & quærent nomen tuum Domine.

Erubescant, & cõturbentur in seculum seculi, & confundantur, & pereant.

Et cognoscant, quia nomen tibi Dominus, tu solus altissimus in omni terra.

Prædicit in fine Psalmi, alios ex persecutoribus per flagella erudiendos, & conuertendos ad Deum; quales erunt plurimi Iudæi, qui tunc demum agnoscent errorem suum, & pudefacti conuertentur ad Deum: alios in pertinacia, & obstinatione sua permansuros; sed eos quoque confundendos, & vel inuitos cognituros potentiam Dei singularem; & quod ipse solus sit verus Dominus omnium rerum. Imple, inquit, facies eorum ignominia, id est, confusione, ut ignominiam suam intelligentes verecundati quærant nomen tuum, id est, quærant te. sæpe enim nomen ponitur pro persona: vel quærant nomen tuum. i. inuocent nomen tuum; vel quærant nomen tuum, id est, quærant gloriam tuam, non amplius suam, ex inimicis amici facti, & ex seruis filii: Illi autem, qui ex flagellis non molliuntur, sed obdurantur ad imitationem Pharaonis, erubescant, & confundantur in seculum seculi, id est, æterna confusione repleantur; nec solum confundantur, sed etiam pereant in æternum. Et cognoscant inuiti quia nomen tibi Dominus, id est, iam propria experientia edocti intelligant, tibi soli nomen Domini propriè conuenire, cui ad nutum seruiunt omnia, & tu nulli necessitati seruis, qui nulla re indiges, in te ipso habens omnia: Cæteros autem, qui dicuntur Domini, vel vsurpasse nomen alienum, vel impropriè Dominos dici, cum & ipsi multis rebus indigeant, ac per hoc multis necessitatibus seruiant. Tu solus altissimus in omni terra, id est,

&

& cognoscant, quia tu solus præmines potestate super omnes Principes vniuersæ terræ, neque ullus est, qui tecum contendere, vel tibi vlllo modo comparari possit. Hæc Prophetia nunc ex parte impletur, sed in die iudicii omnino, & absolute implebitur.


Explicatio Psalmi 83.

Quā dilecta tabernacula tua I. Domine virtutum! concupiscit, & deficit anima mea in atriis Domini.

PSALMVS LXXXIII.

Titulus & Argumentum.

*In finem pro torcularibus, filijs Core
Psalmus.*



E hoc titulo alibi diximus. Argumentum idem ferè est, quod Psalm. 41. cuius initium est, Quæ admodum desiderat Ceruus ad fontem aquarum. Vtrunque

Psalmum videntur nonnulli nimis humiliter exponere, dum docent, vel Dauidè vel populum in hoc Psalmo exprimere desiderium redeundi ad terrenam Hierusalem, vt tabernaculum Domini visitare posset. longè autem humiliter exponunt, qui docent Coritas in hoc Psalmo proferre desiderium suum redeundi ex Babylone in Hierusalem, vt possent deservire tabernaculo, vnde victum capiebant. Nos cum Patribus exintimamus, tã ardens desiderium, quale in hoc Psalmo legimus, etiam ad literam, ad cœlestia tabernacula pertinere, & nihil terrenum, nihil humanum, nihil corporale Spiritû sanctum his suis vocibus exprimere voluisse: & idè ab Ecclesia Catholica peregrinante cantica ista frequentari, etiam si tabernaculum, quod erat in Hierusalem, iam dudum conflagrauerit, & ipsa Hierusalem funditus euerfa fuerit.

Hæc vox est hominis pij peregrinantis ad patriam, & desiderium peruenienti declarantis. nascitur autem hoc desiderium, tum ex felicitate, quæ est in patria, tum ex miseria, quæ est in peregrinatione. Vir enim pius, quantumuis in hoc exilio abundare videatur terrenis rebus, intelligit tamen se miserum esse, & persecutionem pati, vt Apostolus dicit 1. ad Timoth. 3. Quoniam ipsa etiam terrena prosperitas magna tentatio & persecutio est. Ait igitur, Quam dilecta tabernacula tua Domine virtutum. vox est admirâtis, quasi dicat, ô quantum diligunt omnes pij tabernacula tua, cœlestes videlicet mansiones tuas ô Domine exercituum: vocat autem Dominum exercituum, quia hoc ipsum facit pulchra valde, & amabilia tabernacula cœlestia quod ibi sint innumerabiles exercitus Angelorum, id est, ciuium sapientissimorum, optimorum, potentissimorum, pulcherrimorum; quorum vel vnus sufficeret lætificare peregrinationem nostrâ, si cum toto suo decore nobis appareret. sed præter exercitum tantum tantorum Principum, ibi videtur facie ad faciem Dominus virtutum, cuius comparatione fulgor omnium Angelorum tenebræ sunt. Rectè notat hoc loco Theodoretus, non fuisse in terrena Hierusalem plura tabernacula Dei, sed vnicum: ac propterea non de illo vno ligneo, & deaurato, ac manibus hominum constructo tabernaculo, Prophetam hoc loco intelligendum esse, sed de cœlestibus tabernaculis, non manufactis, de quibus Dominus dicit Ioann. 14. In domo Patris mei mansiones multæ sunt. Concupiscit, & deficit anima mea in atriis Domini. Dixerat in genere, tabernacula Domini multum diligere a pijs peregrinis: nunc

nunc se in eorum numero ponit, ac dicit Concupiscit, & deficit anima mea, quasi dicat, Ego certè ita desidero atria illa, ut præ amore langueam, & anima mea deficiat, ac deliquium patiat, in atria Domini intendens, & pulchritudinem eorum considerans.

II. Cor meum, & caro mea exultauerunt in Deum viuum.

Declarat vim amoris, & desiderij sui per effectum; qui enim vehementer amat, & desiderat; corde recogitat, & ore laudat quod desiderat. Cor meum, inquit, & caro mea, id est, mens & lingua exultando laudauerunt Deum viuum; ipse enim est pulchritudo increata, & infinita, cui suspiro. In hebræo pro exultauerunt est, ierannenu, iubilauerunt, siue magna voce laudauerunt; proinde illud exultauerunt, non debet accipi pro sola lætitia, sed pro lætitia prorumpente in vocem iubilationis. Neque repugnat hic versiculus cum superiore, etiamsi ibi anima deficiat, hic exaltet; varij sũt enim amantium affectus. nunc desunt absentiam rei amatae, & præ amore deficiunt: nunc exultant ob spem potiundæ rei tam pulchræ, & in laudes eius erumpunt. Deum viuum, seu viuentem appellat, non solum ad distinctionem Idolorum, quæ oculos habent, & non vident, aures habent, & non audiunt, quia res inanimatæ sunt: sed etiam, quia Deus solus propriissime viuit; viuere enim est moueri non ab alio, sed a se; res autem creatæ, quæ viuere dicuntur, quia habent in se principium aliquod motus, tamen sine Deo non mouentur; in illo enim viuimus, mouemur, & sumus Act. 17. Solus Deus ita viuit, ut a nullo moueatur, id est, a se solo habet intelligere, & velle. & ideo ipse solus est vita, ipse fons vitæ, non aliunde accipiens, sed omnib. tribuens. In ipso, inquit Ioan. cap. 1. vita erat, & vita erat lux hominum.

Etenim passer inuenit sibi domum, & turtur nidum sibi ubi ponat pullos suos. III.

Altaria tua Domine virtutum, Rex meus, & Deus meus. II.

Hi versiculi obscuri sunt, & ab alijs aliter exponuntur. Sanctus Hieronymus, & Theodoretus videntur satis commode eos explicuisse. Eos secutus hunc sensum esse existimo, optauerat sanctus peregrinus domum cœlestem; sed interim dum eius possessio differtur, consolatur se quod vel nidulum in terris inuenit, altaria videlicet Domini sui: nihil enim habemus in terris, quod melius nobis repræsentet tabernaculum cœleste, quàm sacrum altare. Ibi enim adest multiplex memoria rerum cœlestium; ibi quotidie immolatur Agnus Dei, qui sanguine suo aperuit credentibus regna cœlorum; ibi futuræ gloriæ nobis pignus datur; ibi Deo propius astamus, ei que intentius supplicamus; ibi effundimus corda nostra, & diuinas laudes deuotius & attentius, quàm vsquam alibi decantamus. Ait igitur, etenim passer inuenit sibi domum, id est, omnia animantia quarunt sibi locum aliquem quietis, & ipse etiam passerulus inuenit sibi domum, id est, nidulum aliquem: & turtur nidum sibi, id est, non solum animalia, quæ delectantur frequentia, ut passeres; sed etiam animalia solitaria, ut turtures, parant sibi nidos ubi ponant pullos suos, & cum eis quasi securæ quiescant. Altaria tua Domine, id est, mihi verò, siue actiuam vitam ducam, more passerum, siue contemplatiuam more turturum, altaria tua nidi sunt, ubi interim paulisper quiescam, & ubi vota mea, & casta desideria, piaque meditationes, & preces, & laudes, quasi pullos, reponam. Altaria, inquam, tua, Rex meus, & Deus meus, id est, qui me regis, dum ut passer huc, & illuc vagor, & qui me consolaris, dum ut turtur solitarius gemo. siue, Rex meus, cui milito, dum aucupes mihi, ut passerem laqueos

laqueo tendunt, & Deus meus, cui vado dum vt turtur viduus diuina contem-
plor. In hebræo non habetur propriè
nomen turturis, id est, thor, sed,
deror, quod propriè libertatem signi-
ficat, & quia auicula liberè volant per
aerem, hebræi hoc nomine, auem, si-
gnificari volunt. Cæterū fieri potest, vt
תור Septuaginta legerint, thor, non, der-
ror, faciè enim fuit successu tempor-
ris, vt ex litera ת, sint factæ duæ lite-
ræ ת, ד. vel si hoc non placeat, dice-
mus, Septuaginta Interpretes nomen
generale, auis, restrinxisse ad turtu-
rem; quomodo nunc Rabini illud
idem nomen restringunt ad hirundi-
nem: nunc enim minus liberè volant
per aurem turtures, quàm hirundines,
& mystica significatio requirebat, vt no-
men turturis hoc loco, non hirundinis
poneretur.

V. Beati qui habitant in domo
tua Domine, in secula seculo-
rum laudabunt te.

Dixerat, se inuenisse nidum, vbi inte-
rim requiesceret: sed ex ipso nido ad-
monitus quanto melior sit domus æter-
na nidulo temporali, exclamat, Beati,
qui habitant in domo tua Domine, id
est, ego quidem in hoc nidulo paulum
quiesco, sed illi verè beati sunt, illi feli-
cissimè requiescunt, qui habitant in do-
mo tua, vbi diuitiæ, & gloria, vbi man-
siones nultæ, vbi pax, & securitas sem-
piterna est. Et quoniam non habent ne-
cesse in sudore suo vesci pane suo, neq.
in aliorum gratiam laborare, vbi nulli
sunt egentes, id solum illis superest ne-
gocium, vt in secula seculorum laudēt
te: neque periculum est, vt tædeat sem-
per laudare, quem nunquam tædebit
semper amare: & quem sine labore, sine
fatigatione, sine satietate laudabunt.

VI. Beatus vir cuius est auxilium
abs te, ascensiones in corde suo
disposuit: in valle lacrymarum,
in loco quem posuit.

Dixit, beatum esse, qui habitat in do-
mo Domini: nunc addit, beatum etiam
esse, si non in re saltem in spe, eum, qui
fretus diuino auxilio decernit finiter
in corde suo non hære in valle, sed
ascendere semper magis, ac magis per
gradus virtutum, donec ad locum per-
ueniat, quæ posuit Deus finem omnium
laborū, quæ est æterna beatitudo. Duæ
sunt aut huius versiculi expositiones;
vna si solum latinum contextū inspiciamus;
altera, si eum cū græco, & hebræo
concordare velimus. Prior hæc est, Bea-
tus ille vir est, cuius auxilium nō in pro-
prijs viribus, sed in te Domine est: hic
enim ascensiones in corde suo dispo-
suit, in valle lacrymarum, id est, dispo-
suit, semper ascendere, ad maiorem vir-
tutis perfectionem, dum est in hac mor-
tali vita, quæ est vallis lacrymarum. In
loco quæ posuit, id est, in valle lacryma-
rum, quæ locum ipse sibi peccando con-
stituit. Deus. n. in Paradiso eum posue-
rat, sed ipse sibi locū posuit in valle la-
crymarū. Posterior expositio hæc est,
Beatus vir, cuius est auxilium abs te, id
est, qui non confidit in virib. suis, sed à
te auxilium expectat. Ascensiones in
corde suo disposuit, id est, Deus dispo-
suit in corde eius nunquam stare, vel re-
trocedere, sed de gradu inferiore ad su-
periorē ascendere. In valle lacrymarū,
id est, per vallem lacrymarum, dū vide-
licet peregrinat in hac valle plena peri-
culis, & tentationibus. In loco quæ po-
suit, id est, vsque ad locū, sine habitacu-
lum, qd idem Deus statuit, in metā, &
finē peregrinationis. Quod attinet ad
verba, in hebræo multo aliter legitur
hic versiculus: ac primum pro illis ver-
bis, cuius est auxilium abs te, in hebræo
habetur, fortitudo ei in te. sed idē om-
nino est sensus. Idem enim est, cuius au-
xilium abs te est, & cuius fortitudo in
te est. Pro ascensiones, in hebræo habe-
tur, semitas, sed per semitas, intelligen-
tur altæ semitæ, vel et exaltationes, &
gradus, nā, salal, exultate significat: in-
de, mehiloth, ascensiones, & altæ semi-
tas significat. Pro, in corde suo, in he-
bræo est, in corde eorum; tamen, & Se-
ptuaginta, & S. Hieronym⁹ verterūt in
sin-

סלל
מסלול

singulari, in corde eius: & sic etiam legit S. Augustinus, qui refert verbum, disposuit, & verbum, posuit, ad Deum. Ipse enim disponit in corde nostro ascensionem ad locum, quem ipse posuit: & non est nouum, ut in latina editione accipiat, suo, pro eius: sicut etiam aliquando accipitur eius, pro, suo, ut Ioa. 8. Patrem eius dicebat Deum, id est Patrem suum. Pro, disposuit, in hebræo est, transeūtes: sed Septuaginta vocem hebraicam, hōuere, non deduxerūt a verbo, hāuar, quod est transire, sed a verbo, hāuad, quod est seruire, facere, operari; & legerunt sine vltima litera, hāuad, operatus est, quod est idem cum verbo, disposuit. sic legendum esse hanc vocem, non solum colligimus ex literarum similitudine, & ex conuenientia cum textibus græcis, & latinis, sed etiam quia si legeremus, transeūtes, vix diuinari posset, quis esset sensus huius loci. Denique pro, loco, in hebræo est, fontem. Sed Septuaginta Interpretes non legerunt, maian, id est, fontē sed, maon, locum, siue habitaculum; ex quo etiam intelligimus, per, locum non intelligi quemlibet locum, sed locum commodum ad habitandum; & recte a S. Augustino referri ad mansionem cœlestem, & quod nos legimus, In loco, quē posuit, clarius habetur in græco, ἐν τόπῳ, in locum, quem posuit, & sic legit S. Augustinus. Interpres enim latinus aliquando non seruat construtiones grammaticales: nam & apud Ioan. cap. 7. legimus, Ambulabat Iesus in Galilæam: non enim volebat in Iudæam ambulare: pro, in Galilæa, & in Iudæa.

עברי
עבר
עבר

מעין
מעון

VII. Etenim benedictionem dabit legislator: ibunt de virtute in virtutem, videbitur Deus Deorum in Sion.

Declarat Propheta, quomodo vir iustus ascendens per vallem lacrymarum perueniet ad locum quietis, quē Deus posuit: ac demonstrat initium, medium, & finem huius ascensionis. Initium est iustificatio, sine qua lex impleri non potest; medium est impletio legis; finis est

visio Dei, in qua beatitudo consistit. Etenim benedictionem dabit legislator, id est, legislator Deus, qui dedit legem, & eam viam esse voluit ad vitam, iuxta illud Matth. 19. Si vis ad vitam ingredi serua mandata; dabit et benedictionē, abundantem videlicet gratiam per Sp̄m sctm iustificando a peccatis, infundendo charitatem, pellendo timorem. Ibunt de virtute in virtutem, id est, accepta gratiæ benedictione proficient quotidie in melius, magis ac magis roborabuntur, superantes omnem difficultatem, & resistentes omni tentationi: per virtutem enim hoc loco intelligitur robur, & potentia. Videbitur Deus Deorum in Sion, id est, & sic tandem peruenient ad montē Siō cœlestem, vbi videbitur facie ad faciem Deus vnus, & verus, qui est Deus, nō solum cœli, & terræ, sed et Angelorum, & Beatorum, qui participatione sunt Dī. In hebræo, & græco textu habetur, in numero multitudinis, benedictiones, ut intelligamus multiplicem esse gratiam Dei, quæ non solum delet peccata, sed et iuuat ad opera bona facienda, & legē implendam. Illud aut, dabit legislator, S. Hieronymus ex hebræo vertit, amicitur Doctor, ut sensus sit, Benedictionibus vestietur, qui docet legem Dei. Sed Septuaginta Interpretes verbum, iagte, acceperunt actiue, ut re vera est, nō passiuē; ut sensus sit, Benedictionibus vestiet Legislator ascendentes in conualle lacrymarum. Idem aut est, dare benedictionē, & vestire benedictionibus, nisi quod prior snia est propria, posterior metaphorica. Solent. n. Septuaginta Interpretes vertendo verba hebraica in græca, explicare metaphoras, ut snia facilius intelligatur. De voce Legislatoris, & Doctoris, non debet fieri quæstio: oīs enim Legislator est Doctor, quia dum leges condit, & præbet, hoc ipso docet quæ sit recta via: & qm hoc loco de Deo sermo est, maluerunt Septuaginta vertere, Legislatorem, q simpliciter Doctore quia Deus non docet explicando legē ab alio datam, sed ipse dedit leges, ipse explicat, ipse iuuat, ut impleantur. Illud ibunt de virtute in virtutem; quamvis sit explicandum de vi, & robore, vt sonant

יגת.

nant voces hebraica, & græcæ hoc loco positæ: tamen non malè S. Augustinus exponit de virtutibus moralibus, iustitia, prudentia, fortitudine, & temperantia; & de virtute contemplationis diuinæ, quia istæ virtutes roborant animum aduersus tentationes, & vitia: vt sensus sit, Ibunt de virtute in virtutem, id est, de virtute actionis ad virtutem contemplationis, siue, de virtutibus necessarijs in via, ad virtutem, quæ habebitur in patria, vbi non erit necessaria ista prudentia, cum nulla mala vitanda occurrent; neque iustitia ista, cum nulla sit futura iniustitia; neque ista fortitudo, cum nullus instabit timor; neque ista temperantia, cum nulla erit frenanda libido.

VIII. Domine Deus virtutum, exaudi orationem meam, auribus percipe Deus Iacob.

Reuertitur ad gemitum suum cupiens esse ex illis, qui ascendunt ex conualle plorationum, & pergunt felici itinere de virtute in virtutem. Domine Deus virtutum, tu qui fortissimus, & potentissimus, ac virtute plenissimus es, exaudi orationem meam, qua peto gratiam ambulandi de virtute in virtutem, & virtute corroborari in interiori homine. Auribus percipe Deus Iacob, tu, inquā, qui es Deus fidelium tuorum, quorū Pater est sanctus Iacob, exaudi orationem meam, qui vnus sum ex populo tuo, ex filijs Iacob secundum spiritum.

IX. Protector noster aspice Deus, & respice in faciem Christi tui.

Implorauit Dei auxilium, sumens argumenta ad impetrandum, quod ipse poterissimus sit, & curam gerat populi sui: nunc eadem repetit alijs verbis, sed maiori efficacia. Quod enim dixit, Deus virtutum, nūc dicit protector noster, & in hebræo clypeus noster. vbi ostendit, Deum esse potentissimum ad protegendum populum suum, esse videlicet Deū

quasi fortissimum clypeum populi sui. Ibi dixerat, exaudi orationem; hic dicit aspice, quasi dicat, non solum audi me, sed tu ipse vide, & considera pericula, in quibus versor. Ibi dixerat, auribus percipe Deus Iacob; hic dicit, respice in faciem Christi tui, id est, respice verū principem populi tui, Messiam videlicet, Agnum sine macula, qui tollit peccata mūdi, ac propter eum protege nos. S. Augustinus exponit, respice in faciem Christi tui, id est, fac vt oēs respiciant in faciem Christi, agnoscant eum, credāt in eum, obediant ei. Sed prior sensus est magis literalis, & magis cōis. Neque obstat quod tempore Dauidis nondū esset Verbum incarnatum, neque mediator Dei, & hominum homo Christus Iesus interpellare cōpisset pro nobis. Merita .n. Christi ab æternitate fuerunt in conspectu Dei. vnde dicitur in Apoc. 13. Agnus occisus ab origine mundi; quoniā ab origine Mundi Deus propter merita passionis Christi præuisa, multa beneficia, præsertim spiritualia seruis suis concessit. Qui benedixit nos, inquit Apostolus ad Ephes. 1. omni benedictione spirituali in cœlestibus in Christo, sicut elegit nos in ipso ante Mundi cōstitutionē.

Quia melior est dies vna in atrijs tuis super millia.

Elegi abiectus esse in domo Dei mei, magis quā habitarē in tabernaculis peccatorum.

Vt ostendat sanctus peregrinus Dei, se non petiuisse protectionē aduersus temporalia mala: sed aduersus tentationes, & pericula spiritualia, quæ impediunt ascensum ad domū Dei; subigit, tā esse cœlestis patriæ felicitatē, vt optabilius sit vnū diē tantū ibi manere, q̄ mille diebus alibi: & melius sit in eo loco inter vltimos sedere, q̄ alibi inter primos: quæ duæ comparationes si seriō cogitentur magnum affectum in corde puro gignere possunt. Illud, quia, reddit causam, cur tanto affectu uixerit, Protector noster aspice, &c. quasi dicat, Ideo cupio

cupio valde protectionem tuam in hac
ascensione ad patriam, quia nimis magna
esset iactura, si ad patriam illam non per-
uenirẽ. Melior est enim habitatio vnius
diei in atrijs illis cœlestibus, quàm mil-
le, id est, innumerabilium dierum alibi.
sic exponit S. Augustinus in lib. 3. de li-
ber. arb. cap. vi. Tanta, inquit, est pulchri-
tudo iustitiar, tanta iucunditas lucis æter-
næ, hoc est incommutabilis veritatis, at-
que sapientiæ, vt etiã si non liceret am-
plius in ea manere, quàm vnius diei mo-
ra, propter hoc solũ innumerabiles anni
huius vitæ pleni delicijs, & circũfluentia
tēporalium bonorũ recte, meritoq. con-
temnerẽtur: non enim falso, aut paruo
affectu dictum est, Quoniam melior est
dies vna in atrijs tuis super millia. Idem
tamen S. Augustinus, & hoc loco, i. in cõ-
ment. huius Psal. & in lib. citato de li-
ber. arbit. scribit per vnã diem intel-
ligi posse diẽ æternitatis, quæ vna est, &
eadẽ semper manens: per, millia dierũ,
tempora volubilia, & instabilia huius
vitæ, quæ quantũuis multiplicentur, sē-
per longẽ inferiora erunt diẽ semper
manẽtis æternitatis. Sed prior sensus est
magis literalis, & magis cohæret cũ se-
quẽti cõparatione. Elegi, inq̃t, abiectus
esse in domo Dei mei, id est, tanta est di-
gnitas domus æternæ in cœlis, vt ma-
ximũ ibi sedere ad ianuã cũ vltimis, quã
habitare in tabernaculis peccatorum:
vox .n. hebraica, quã noster interpres
vertit, abiectus esse, est, astopheph, quæ
propriẽ significat, sedere ad ianuã, mo-
re ianitoris: nã, saph, limen, significat, &
ducta est similitudo à ianitorib. taber-
naculi, qui erant infimi oĩum ministro-
rum domus Dei, vt patet ex lib. 1. Para-
lip. cap. 9. Recte autem vocat Propheta
palatia huius mundi, tabernacula pec-
catorum; tum quia in domo cœlesti nul-
la inuenitur iniquitas, hic autem nemo
est, qui non peccet: tum quia respectu
domus cœlestis, sunt veluti tentoria
quædam, quæ faciliẽ mutantur, & funda-
mento carent: non enim hæc est eadem
vox, quæ in principio Psalmi. Ibi enim
vox, hebræa propriẽ significat taberna-
cula, siue tentoria, quæ transferuntur
de loco ad locum.

ה כתיב
ק

Quia misericordiam, & verita XII
tem diligit Deus, gratiam, & glo-
riam dabit Dominus.

Consolatur hoc versiculo, & sequen-
ti Propheta virum iustum ascendentẽ
in valle lacrymarum, atque ad patriam
anhelantem: promittit enim illi à Deo
gratiam, & gloriam: gratiam per quam
iustificetur, & in iustitia proficiat, dũ de
virtute in virtutem ascendit: & gloriã,
per quam glorificetur, cũ ad Sion
montem peruenerit, vbi Deus Deorum,
non iam per fidem, sed per spetiem se
videntem præbebit. Probat autem, gra-
tiam, & gloriam dandam à Deo iustis
hominibus, quia misericordiam, & veri-
tatem diligit Deus. Quia enim miseri-
cordiam diligit, miserebitur, & miseren-
do gratiam dabit: quia veritatem, id est
iustitiam diligit, reddet fideliter quod
promisit diligentibus se, vt S. Iacob. scri-
bit cap. 1. In hebræo, pro his verbis, Mi-
sericordiam, & veritatem diligit Deus,
habetur, Sol, & scutum Dominus Deus.
& quidem probabile est Septuaginta
Interpretes, pro voce, scemus, quæ So-
lem significat, legisse scemem, quæ si-
gnificat, oleum. Sic etiam pro voce,
יחזק, quæ significat Dominus, probabi-
le est eos legisse, ieue, quæ significat, di-
liget. Denique probabile est, eos per
oleum, & scutum, intellexisse miseri-
cordiam, & veritatem: quia oleum miseri-
cordiam significare solet, & de verita-
te scriptũ est in Psal. 90. Scuto circum-
dabit te veritas eius. Tamen si quis con-
tẽdat, omnino esse legendũ in hebræo,
Quia Sol, & scutum Dominus Deus, gra-
tiam, & gloriam dabit Dominus; idem
sensus erit: nimirum, quia Dominus Deus
Sol, & scutum est, vt scutum dabit gra-
tiam protectionis in via, vt Sol dabit
gloriam manifestæ visionis in patria.

שמש
שמן
יהוה
ואוה

Non priuabit bonis eos, qui XIII
ambulant in innocentia; Domi-
ne virtutum, beatus homo qui
sperat in te.


Con-

Confirmat quod dixit, & restringit promissionem gratiæ, & gloriæ ad eos, qui ambulant in innocentia; quasi dicat, Deus misericors, & iustus, non priuabit bonis gratiæ, & gloriæ, quæ sola sunt verè, & absolutè bona, eos qui semel iustificati ambulant in innocentia, perseuerantes, & proficientes in Fide, Spe, & Charitate. Alioqui enim si retrocedant, & ambulent in iniquitate, a gratia excident, & pro gloria confusionem accipient. Concludit Psalmum conuersus ad Deum, Domine, inquit, virtutum, id est, exercituum, beatus erit, qui in te cōfidit, confidentia vera, ac solida, quam fides vera, & conscientia bona gignere solet.

PSALMVS LXXXIV.

Titulus, & Argumentum.

In finem filijs Core Psalmus.



DVæ sunt de argumento huius Psalmi tractatorum sententiæ. Alij. n. volūt commemorari a Propheta liberationem populi ab vna captiuitate, & inde argumento sumpto orari pro liberatione ab alia captiuitate, cōmemorari videlicet liberationem a captiuitate Aegyptiaca, & orari pro liberatione a captiuitate Babylonica; vel cōmemorari liberationē a captiuitate Aegyptiaca, & Babylonica, & orari pro liberatione a captiuitate Diaboli, quæ per illas figurata fuerat. Alij, & fortasse rectius, existimāt, in hoc Psalmo de vna tantum captiuitate agi, id est, de captiuitate generis humani sub Principe tenebrarum, a qua liberamur per Christum Dominum nostrum; sed in primis tribus versiculis prædici liberationem ab hac captiuitate, in reliquis orari pro executione prædictionis. Cur Bellarm. in Psalm.

autē prædictio de re futura exponatur per verba temporis præteriti, causa est, quoniam quæ nobis futura sunt, in Dei præscientia, & decreto iam facta sunt.

Explicatio Psalmi 84.

Benedixisti Domine terram tuam, auertisti captiuitatem Iacob.

Initio Psalmi Propheta, Spū sancto reuelante, æternum Dei decretum de futura liberatione nobis aperit: ac primū docet primā causam, & vltimū effectū nostræ liberationis. Prima causa fuit dilectio, qua Deus dilexit genus humanū: Cur. n. Deus sic mundum dilexerit, vt filium suum vnigenitum daret, per quem redimeremur, & omni benedictione benediceremur, vt loquitur Dñs Ioā. 3. & Apostolus ad Ephes. 1. nulla ratio reddi pōt, nisi ipsa Dei bona voluntas, siue beneplacitum, & misericordia. Vltimus effectus erit perfecta liberatio a captiuitate, quam habebimus ī Resurrectione, qñ perueniemus ad libertatem gloriæ filiorum Dei. Nunc enim ex parte liberati sumus, sed expectamus redemptionē corporis nostri, per quā liberabimur ab omni corruptione, & necessitate. Ait igitur, Benedixisti Domine terram tuā, id est, propter peccatum primi hominis maledixisti terræ, quam ipse feceras, & hominibus inhabitandam dederas: sed scio etiam, te reuelante, quod in mente tua, in decreto tuo, benedixisti terram tuam; decreuisti enim in æterno beneplacito tuo terram tuam, quam fecisti, visitare, & benedicere omni benedictione, & gratia, mittens ad eā vnigenitum tuum plenum gratiæ, & veritatis. Hebræus, & græcus codex clarius explicāt hanc primam causam omnium bonorum nostrorum, quæ est bona voluntas Dei. Vox hebræa est, *ratšita*, quæ significat propriè, bene tibi placuisti in terra tua, siue bene voluisti terræ tuæ. Vox græca *εὐδοκία* significat, bene voluisti terræ tuæ. Inde est *εὐδοκία*, quam sapissimè legimus in Euangelio, & in

רצית

KK Apосто-

Apostolo commendatam, ut initium, & radicem omnium beneficiorum Dei. Sicut autem maledixit Deus terræ, non propter ipsam, sed propter inhabitantes: sic etiam benedixit terram propter habitantes: quare tota ista benedictio ad homines referenda est. Auertisti captiuitatem Iacob. Hic exprimitur ultimus effectus misericordiae Dei, qui erit perfecta liberatio a captiuitate, in quam incidimus per peccatum. Auertisti, inquit, captiuitatem Iacob, id est, iam in æterno decreto tuo per mortem filij tui præuisam placatus, remouisti, siue dissoluisti captiuitatem populi tui Iacob, ut deinceps fruatur libertate gloriæ filiorum Dei. Ex hebræo pro, auertisti, sanctus Hieronymus vertit, reduxisti, sed idem est sensus. Nomine autem Iacob, intelligitur, teste sancto Augustino, totus populus Dei, siue ex Iacob descendat secundum carnem, quales sunt Iudæi credentes in Christum, siue secundum spiritum fidei, quales sunt gentiles conuersi ad Christum, qui sunt quasi rami oleastri inserti in bonam oliuam & quasi lapides viui superædificati super fundamentum Apostolorum, & Prophetarum, ut Apostolus docet ad Ro. 9. & 11. & ad Ephes. 2.

II. Remisisti iniquitatem plebis tuæ, operuisti omnia peccata eorum.

Declarat nunc modum, quo Deus benedicens terræ suæ dissoluit captiuitatem Iacob: ad idcirco eum fecisse remittendo peccata populi sui. Sicut enim peccatum fuit causa captiuitatis, ita remissio peccati fuit causa liberationis a captiuitate. Remisisti, inquit, iniquitatem plebis tuæ, id est, in mente, & decreto tuo condonasti iniquitatem populo tuo, ob quam iniquitatem tradideras eundem populum Diabolo, tanquam administro iustitiæ tuæ. Operuisti omnia peccata eorum. hæc est repetitio, & declaratio eiusdem rei, Operuisti, id est, abscondisti a facie tua, ut non videres ad puniendum. quia verò Deus non potest non

videre id, quod re vera est, quantumuis abscondatur, & tegatur; ideo quando Deus tegit peccata, omnino illa delet, & remittit, ut nusquam sint; & ut alibi diximus, tegit Deus peccata, quando ea remittit, non quasi velo occultante, sed quasi emplastro curante, & sanante. Dicit autem omnia peccata eorum, ut explicet quod dixerat, iniquitatem plebis tuæ, non significare unicam iniquitatem communem toti plebi, quale est peccatum originis, sed omnem iniquitatem tum communem omnibus, tum propriam singulis. In græco habetur, Remisisti iniquitates, sed in hebræo habetur in singulari, iniquitatem; sed idem est sensus.

Mitigasti omnem iram tuam, IV. auertisti ab ira indignationis tuæ.

Hic verò reddit causam, cur Deus dimiserit iniquitatem plebi suæ; ac dicit, ideo dimisisse, quia placatus fuerat, & iram deposuerat. Quemadmodum enim ira Dei causa erat ultionis, sic etiam placatio Dei causa fuit remissionis: placauit autem iram Dei, id est, iustitiam punitiuam Dei, Agnus occisus ab origine Mundi. Agnum autem immaculatum dedit nobis misericordia, & bona voluntas illius, qui sic dilexit Mundum, ut filium suum unigenitum daret. Hic igitur est ordo liberationis, Benedictio, siue bona voluntas Dei dedit filium liberatorem: filius morte sua placauit iram Dei, satisfaciendo iustitiæ pro peccatis totius Mundi: placatus Deus remisit peccata: remissio peccati soluit captiuitatem. Atque hoc totum mysterium absconditum in mente Dei reuelauit Spiritus sanctus Prophetæ suo, & ille nobis in tribus his versiculis descripsit. Illud, omnem iram tuam, significat, Christi redemptionem sufficientissimam fuisse ad plenam satisfactionem. Significat etiam, libertatem, quam habebimus tempore suo, id est, in nouissimo die, futuram omnino plenam, & absolutam, ut nihil por-

nz, nihil miseriæ relinquatur: omnis. n. pœna ex ira Dei procedit. Illud, auertisti ab ira indignationis tuæ, id ipsum repetit, & hunc sensum habet, Auertisti te ab ira, & indignatione tua. In hebræo habetur, conuertisti te, siue conuersus es ab ira furoris tui.

tur, ideo rectè Septuaginta Interpretes eam exprefferunt.

Deus tu conuersus viuificabis VI. nos, & plebs tua lætabitur in te.

III. Conuerte nos Deus salutaris noster, & auerte iram tuam a nobis.

Incipit nunc Propheta in persona populi Dei orare pro executione, atque adimpletione decreti diuini. Ac primum petit, vt Deus incipiat mitigare iram suam, cuius mitigationis primus effectus est, initium salutis nostræ, id est, auxilium diuinum, per quod incipiamus conuerti ad Deum. Neque enim cõuerti possumus ab iniquitate ad Deum, nisi gratia eius præueniat nos, & vocando, illuminando, adiuuando, mouendo conuertat. Ait igitur, Cõuerte nos Deus salutaris noster, id est, incipe salutem nostram operari tu Deus saluator noster, quod facies, si nobis bonam voluntatem conuersionis inspires. Et vt hoc misericorditer facere incipias, auerte iram tuam a nobis, id est, reconciliare nobis, oblitus offensionum, quæ te nobis inimicum reddiderunt.

V. Nunquid in æternum irasceris nobis? aut extends iram tuam a generatione in generationem?

Persistit in eadem petitione, quasi dicat, satis diu iram tuam portauimus, ne differas misericordiam impertiri, & pacem nobis reddere. Nunquid in æternum irasceris nobis? id est, num æterna erit inimicitia tua ad genus humanum? num a generatione in generationem sine fine extendetur ira tua? quasi dicat, id non conuenit infinitæ clementiæ, & bonitati tuæ. In hebræo non habetur particula, aut: sed omnino subintelligi-

Declarat effectum, qui sequetur ex recõciliatione; inde enim fiet, vt homo lucretur vitam, & Deo reddatur laus. Deus tu conuersus ad nos per depositionem iræ, & reconciliationem viuificabis nos: nam stipendium peccati mors gratia autem Dei vita æterna, Rom. 6. & plebs tua viuificata, & respirans ob tam ingens beneficium, lætabitur in te, ac lætabunda cantabit laudes tuas. In hebræo pro voce, Deus, habetur, nonne: & sic vertit S. Hieronymus, Nonne tu reuersus viuificabis nos? Sed facilè est videre quid Septuaginta habuerint, & legerint in suis codicibus. non enim tam imperiti erant, vt verterint, Deus, si habuissent, halo, sed habuerunt, eloha, qd significat Deus: & sunt eadem literæ, sed transpositæ. Pro, conuersus, S. Augustinus legit, conuertens, vt etiam sonat vox græca *ἐπιστρέφω*, sed sensus non est, Tu conuertens nos, viuificabis nos: sed tu conuertens te ad nos, viuificabis nos; & hoc modo conciliatur hæc lectio cū hebraica, & latina.

Ostende nobis Domine miseri VII. cordiam tuam, & salutare tuum da nobis.

Petit Propheta mitigationem iræ diuinæ, petit reconciliationem, & viuificationem, quæ fit cū per gratiam remittuntur peccata: petit nunc ad ætærum Saluatoris, per quem factum est, vt planè perspiceremus, & videremus Dei benignitatem, & misericordiam erga nos. De qua manifestatione dicit Apostolus, Apparuit gratia Dei omnibus hominibus, ad Tit. 2. & rursus, Benignitas & humanitas apparuit Saluatoris nostri Dei. Ad Tit. 3. Quis enim dubitare pōt, an Deo curæ sit genus humanum, nosq.

KK 2 verissi-

verissimè Deus diligat, posteaquam misit Filium suum unigenitum, ut nos precioso sanguine suo de diabolica captivitate redimeret? Ostende, inquit, nobis misericordiam tuam, id est, fac, ut plane cernamus, & experimento certo discamus misericordiam illam, qua in morte tua ab æterno benedicere decreuisti terram tuam. Et salutare tuum da nobis, id est, & mitte nobis Salvatorem filium tuum; tunc enim verè ostendes omnibus hominibus misericordiam & benignitatem, & gratiam tuam. Ex hebræo verti posset, & Iesum tuum da nobis: nomen enim, Iesus, Salvatorem significat, ut notum est. Potest etiam hic versiculus exponi rectissimè, & ad litteram de salute perfecta, quæ erit in Resurrectione; tunc enim propriissimè ostendet nobis Deus misericordiam suam, ita ut eam videamus, & quasi tangamus, quando coronabit nos in misericordia, & miserationibus, & sanabit omnes infirmitates nostras, & replebit in bonis desiderium nostrum, & renouabit, ut Aquila, iuventutem nostram, ut dicitur Psal. 102. Et tunc dabit possidendum in æternum salutare suum, quando manifestabit nobis seipsum. Sed prior expositio pertinet ad Patres testamenti veteris, qui expectabant Christum in carne venturum: posterior pertinet ad nos, qui expectamus Christum venturum in gloria, ut reformet corpus humilitatis nostræ configuratum corpori claritatis suæ. Sanctus Augustinus utiliter ad mores dicit, tunc Deum ostendere misericordiam suam, quando persuadet nobis, nosque intelligere, & quasi cernere facit, nihil nos esse, aut posse ex nobis, sed ex misericordia eius esse quod sumus, & posse quod possumus. Ita enim non extollimur, nec superbius, sed humiles sumus in oculis nostris: humilibus autem datur gratia Salvatoris.

VIII. Audiam quid loquatur in me Dominus Deus: quoniam loquetur pacem in plebem suam.

Ut certos nos reddat Propheta eorum quæ dicturus est, admonet in hoc ver-

siculo, se non loqui ex se, sed ex revelatione Domini; & ea solum canere, quæ ipse prius à Domino audit. Audiam, inquit, quid loquatur in me Dominus Deus, id est, ego quod audio à Deo, hoc loquor, ideò, & nunc exposita petitione, audiam quid Dominus respondeat, ut id ipsum cæteris manifestem. Dicit autem, Quid loquatur in me; ut significet, loquutionem Dei ad Prophetas, esse interiorē, & spiritualement. Spiritus enim sanctus Prophetas inhabitans in illis loquebatur, quod ipsi primi aures cordis audirent, & deinde per ipsorum linguam ad aures corporis aliorum perveniret. Non habetur quidem in textu hebraico illud, in me, sed Septuaginta Interpretes addiderunt, ut explicarent modum loquendi Dei in Prophetis, iuxta illud Osee 1. Principium loquendi Domino in Osee. & Zachar. 1. Et dixit ad me Angelus, qui loquebatur in me. Porro illud, audiam, significat præterea attentionem, & desiderium audiendi, quasi dicat, libenter, & attentissimè audiam, quoniam Deus more suo loquetur bona, & utilia. Quoniam, inquit, loquetur pacem in plebem suam, id est, scio Deum locuturum esse pacem in plebem suam, ideò libenter, & attentè audiam quid loquatur in me Dominus Deus. Itaque summa verborum Dei est, annuntiatio, & promissio pacis per adventum Messiae, quem Propheta petierat dicens, Ostende nobis Domine misericordiam tuam, & salutare tuum da nobis. Dabit igitur Deus Salvatorem, & per eum annuntiabit, et præstabit verissimam pacem; unde & Princeps pacis dicitur Isaia 9. Et pacificabit omnia, siue quæ in caelis, siue quæ in terris sunt, ut dicitur ad Coloss. 1. Pax autem complectitur complementum omnium beneficiorum Dei, neque antea perfectam pacem habebimus, quam perveniamus ad celestem Hierusalem, quæ interpretatur visio pacis. Pax enim opponitur bello, bello autem non carebimus donec absorpta fuerit mors in victoria, & mortale hoc induerit immortalitatem; tunc enim cessabit bellum cum vitijs, & concupiscentijs, cum Principibus terrenarum

rum harum, cum necessitatibus, & difficultatibus omnibus. Dum autem hic viuimus, militia est vita hominis super terram, quantumuis quod in nobis est, pacem cum omnibus habere cupiamus.

IX. Et super sanctos suos, & in eos qui conuertuntur ad cor.

Explicat quod dixit, in plebem suā. promittit enim Deus pacem plebi suæ, sed non toti: nam in plebe Dei sunt boni, & mali. malis autem pax non conuenit, sed bonis; Pax enim multa diligentibus legem Domini. Psal. 118. & Non est pax impijs, dicit Dominus Isaia 48. Qui autem sint sancti, quibus promittitur pax, explicatur per verba sequentia, Et in eos qui conuertuntur ad cor. Tūc enim incipit sanctitas, & consequenter inchoatur pax, cum homo ab exterioribus ad interiora conuertitur. vnde dicitur, Redite prauaricatores ad cor, Isa. 46. & de filio prodigo dicitur Luc. 15. In se autem reuersus. Tunc autem incipit homo reuerti ad se, siue redire ad cor, quādo apud se cogitare incipit vanitatem rerū temporalium, & quā sit breuis, & modica dulcedo peccati; & contra, quanta sit nobilitas virtutis, quā ingens precium honorum æternorum: sed proficit postea paulatim homo, cum secum habitare incipit, & de rebus, quæ foris sunt, non credit iudicio sensuum externorum, neque sermonibus filiorum huius seculi; sed cōuersus ad cor consulit de omnibus rectam rationem, consulit fidem diuinitus inspiratā, consulit veritatē ipsam, quæ Deus est. Denique perfectē ad cor suum ille conuertitur, & pacem, quæ superat omnem sensum, gustare incipit, qui in corde suo tabernaculum erigit Deo, & ex imagine, quæ est anima rationalis, ad exemplar, quod est ipse Deus, alis contemplationis ascendit: & ibi pulchritudinem infinitam Creatoris attendēs, in eius amorem ita rapitur, & accenditur, vt omnia quæ foris sūt nihili ducat; ita vni Deo vinculo charitatis inhæret, vt rerum aliarum penitus obliuiscatur.

Hominis autem sic affecti nulla mundi pressura pacem, quā in Deo habet, perturbare potest. sed veniamus ad verba, Codex latinus in secunda parte huius versiculi, neque cum hebraico, neque cum græco cōcordare videtur. Hebraicus codex sic habet, Et super sanctos, & non reuertentur ad stultitiam. Græcus autem, Et super sanctos suos, & in eos, qui conuertunt cor ad ipsum. Lectio tamen nostræ latinæ vulgatæ editionis antiquissima est, & eam sequitur. S. Hieronymus in textu, & in Commentario Psalmorum: nec non S. Bernardus in sermone super hæc verba, Audiam quid loquatur in me Dominus Deus. neque in sensu vlla diuersitas est, Conuerti enim ad cor, & conuerrere cor ad Deum, idē significant; siquidem qui cōuertitur ad cor, desinit attendere ad externa, & visibilia, quæ temporalia sunt, & incipit considerare interna, & inuisibilia, quæ æterna sunt, in quibus primum locum obtinet Deus. sic etiam cōuerti ad cor, & non conuerti ad stultitiā pro eodem accipi possunt. Neque difficile est, si quis velit voces hebraicas cum latina editione concordare: nam vox, al, quæ significat, non, potest legi, el, solius pūcti facta mutatione, & significat, in. sic etiam vox, le chilla, quæ significat, ad stultitiam, potest legi, leb selah, & significat, cor, selah enim adiungitur passim in Psalmis: & vel nihil significat, vel significat, semper, quod hoc loco optime quadrat, vel significat aliquid nobis incognitum, vnde ab interpretibus omitti solet. Itaque sic reddi possunt verba hebraica. Et in eos, qui conuertuntur corde, siue ad cor, semper.

אל
אל
לבסלה
לבסלה

Vetuntamen prope timentes eum salutare ipsius, vt inhabitet gloria in terra nostra. **X.**

Adueniēte Messia prædicabitur pax, sed diu postea exhilarabitur: verūtamen salus, id est, gratia sanitatis, & aliorum miraculorum præsentissima erit, & vicinissima omnibus credentibus in eum, ac timentibus eum timore reuerentiæ, & pietatis.

pietatis. Inde verò maxima gloria Deo exurget, laudantibus, & magnificentibus Deum omnibus, qui mirabilia eius videbunt. cuius rei plurima testimonia legi possunt apud Euangelistas. Hoc igitur est, quod nunc Propheta subiungit, Veruntamen prope timentes eum saluare ipsius, id est, salus Dei, siue Christus ipse Saluator prope erit ad sanandum per omnipotentiam suam omnes timentes eum, omnes videlicet colentes eum timore sancto, ut inhabitet gloria in terra nostra, id est, sicut ista magnalia saluatoris frequentissima, ut gloria Dei manifestetur, & inhabitet in terra promissionis, ad quam propriè saluator mittetur. Sed si corporalis salus vicina erit timentibus eum, & inde gloria Dei magnificè orietur: multò magis salus spiritualis prope timentes eum erit: quot quot. n. recipient eum, dabit eis potestatem filios Dei fieri, & inde manifestabitur gloria eius quasi vnigenita Patre, pleni gratia & veritate.

XI. Misericordia, & veritas obuiauerunt sibi: iustitia, & pax osculatae sunt.

Aperit hoc loco Propheta mysteriū aliud in aduentu Messiae complendum; misericordiam videlicet, & iustitiā, quae contrariae videntur, cum vna ignoscat, altera puniat, simul esse coniungendas. Futurum enim erat per Christi passionem, ut & genus humanum misericorditer liberaretur, & tamen diuinæ iustitiæ plenissimè satisficeret. Misericordia, inquit, & veritas obuiauerunt sibi, id est, obuiabunt sibi tempore Messiae cū alias in diuersa pergere viderentur. Iustitia, & pax osculatae sunt, id est, iustitia punitiua, quae paulò ante veritas nominata est, & pax sub nomine misericordiae significata, amicissimè coniungentur, & quasi inter se osculabuntur. Hunc sensum, qui mihi literalis videtur, eleganter prosequitur sanctus Bernardus in ser. i. de Annunciatione. S. Hieronymus in Commentario, & S. Augustinus per misericordiam, intelligunt misericordiam,

qua usus est Deus erga gentiles, quibus dedit Saluatorem, quem non promiserat; per veritatem autem intelligunt iustitiam, siue fidelitatem, qua exhibuit Iudæis Messiam, quem patribus eorum pollicitus fuerat. unde est illud Apostoli Rom. 15. Dico Christum Iesum ministrum fuisse circumcisionis ad confirmandas promissiones patrum: gentes autem super misericordia honorare Deū: tunc enim misericordia, & veritas obuiauerunt sibi, cum in vnam Ecclesiam conuenerunt gentiles, & Iudæi, illi per misericordiam, illi per veritatem adducti. Per iustitiam, quae osculatur pacem, intelligit idem S. Augustinus iustitiam, quae reddit unicuique suum, ex cuius obseruatione pax oritur, quemadmodum ex violatione iustitiæ oritur bellum; & rectissimè admonet, frustra illos querere pacem, qui sororem pacis iustitiam complecti recusant. Alij hunc versiculū exponunt de virtutibus, quae floreant in populis tempore Messiae, vel de virtutibus, quae in ipso Messia maximè eminebunt.

Veritas de terra orta est, & iustitia de cælo prospexit.

Hic iam explicat Propheta mysteriū incarnationis, vtens verbo temporis præteriti pro verbo temporis futuri more Prophetarum. Veritas, inquit, de terra orta est, hoc est, Christus, qui veritas est, de Virgine Maria nascetur. Et iustitia de cælo prospexit, id est, & tunc iustitia de cælo manifestabitur, tum quia nato Christo cœpit vera iustitia de cælo descendere, & homines per fidem Christi iustificare; tum quia per aduentum Christi reuelari cœpit ira Dei de cælo super omnem iniquitatem, ut dicitur ad Rom. 1. Nunquam enim plenè cognitū fuisset, quanta sit ira Dei aduersus peccatum, nisi expiari Deus voluisset illud morte vnigeniti Filij sui: & etiam nunquam plenè cognitū fuisset, quanta sit ira Dei futuram die iudicij aduersus iniquos, nisi vidissemus quanta fuerit Christi passio pro peccatis alienis expiandis.

nam

nam si in ligno viridi hæc faciunt, in arido quid fiet? ait ipse Dominus, Luc. 28.

XIII. Etenim Dominus dabit benignitatem & terra nostra dabit fructum suum.

Pergit explicare mysterium incarnationis, atque ostendit veritatem ex terra nascituram, non quomodo nascuntur fruges ex terra arata, & sata opera hominum, sed quo modo nascuntur flores in campis sylvestribus sine cultura humana ex pluvia de cælo, & radijs solis in eam cadentibus. Etenim, inquit, Dominus dabit benignitatem, id est, emittet de cælo Spiritum sanctum suum, qui Virginem obumbrabit, & sic terra nostra neque arata, neque sata, sed omnino Virgo intacta dabit fructum suum. Vnde in Cantico canticorum ipse dicit, Ego flos campi, & lilium conuallium.

XIV. Iustitia ante eum ambulabit, & ponet in via gressus suos.


Concludit Propheta demonstrans, Christum omnino iustum, & sanctum futurum, ita ut radios iustitiæ suæ ante se præmittat, & luce sua sibi viam aperiat ad omnem progressum in hac valle tenebrosa huius nostræ mortalitatis. Iustitia, inquit, ante eum ambulabit, id est, Christus quasi sol quidam, & verè lux Mundi radios iustitiæ, & sapientiæ suæ præmitter. sicut etiam scriptum est in Ps. 88. Misericordia, & veritas præcedet faciem tuam. & Isaia 58. Anteibit faciem tuam iustitia tua; & sic ponet in via gressus suos, id est, aggredietur iter peregrinationis suæ, ut multos peregrinos perducatur ad patriam. Possunt hi tres versiculi exponi etiam de iustificatione, & bonis operibus hominum credentium in Christum: nam utroque modo exponit S. Augustinus. Veritas de terra orta est, & iustitia de cælo prospexit, id est, veritas confessionis peccatorum, & laudis Dei cæpit per Christum oriri ex ore hominum terrenorum, & tunc iustitia

Dei de cælo prospexit, ut confitentes peccata sua, & laudem dantes gratiæ Dei iustificaret. sed hæc ipsa veritas confessionis non orietur ex terra per vires ipsius terræ, sed per auxilium gratiæ Dei præuenientis. nam Dominus dabit benignitatem, qui dulcescere faciet iustitiā in corde peccatorum, & sic terra nostra dabit fructum suum. Porro iustificatus homo per Christi gratiam, semper iustitiam ante oculos suos habebit, ut omnia faciat iuxta regulam iustitiæ: sic iustitia ante eum ambulabit præferens illi quasi faciem, legem Domini, ne ambulet in tenebris, & sic securus, & gaudens ponet in via gressus suos, ut feliciter ad patriam aliquando perueniat.

PSALMVS LXXXV.

Titulus, & Argumentum.

Oratio ipsi David.



Titulus indicat, hunc Psalmum nihil esse aliud, nisi orationem Davidi a Deo inspiratam, cum amaro esset animo, & consolatione diuina indigeret. David enim, ut erat homo spiritualis, & in schola Spiritus sancti eruditus, cum varijs tribulationibus præmeretur, non quærebat consolationem a rebus creatis, in quibus vera consolatio animæ inueniri non potest, sed ad Deum fontem omnis suauitatis per contemplationem & orationem confugiebat. Proinde nos etiam hoc Psalmo uti debemus, cum tentationibus varijs, undecunque illæ veniant, fatigati, mœrore tabescimus.

KK 4 Expli-

Explicatio Psalmi 85.

Inclina Domine aurem tuam,
& exaudi me, quoniam inops,
& pauper sum ego.

Incipit orationē a magnitudine Dei, & utilitate sua: quæ est optima ratio precandi apta ad impetrandum: oratio enim humiliantis se penetrat nubes, Eccl. 35. Inclina, inquit, aurem, id est, tu qui excelsus es, inclina ad me, qui in imis iaceo aurem tuam. Exaudi me quoniam inops & pauper sum ego; hæc est ratio, cur dixerit, inclina. quoniam, inquit, inops & pauper sum ego, id est, quoniam mendicus iaceo ad portam diuitis: inclina ex alto aurem tuam ad humilem seruulum, & quia talis est, exaudi eum. Pauper. n. & inops hoc loco dicitur is, qui siue habeat, siue non habeat opes terrenas, nō in illis confidit, non inde superbit, non alios contemnit, sed ipsas potius opes contemnit, si habet, neque se meliorem aut maiorem reputat ijs, qui non habēt. Rectissime admonet S. Augustinus, Lazarum non delatum fuisse ab Angelis in sinum Abraham propter inopiam, sed propter humilitatem: neque diuitem Epulonem sepultum fuisse in inferno propter diuitias, sed propter superbiam. Alioquin ipse etiam Abraham, qui ditissimus fuerat, in inferno sepultus fuisset. Sed quoniam Abraham cinerem, & puluerem se esse arbitrabatur, & mandata Domini ita diligenter obseruabat, ut nō solum opes, sed ipsum filium vnigenitū cui seruabat opes, propter Deum sacrificare promptissimus erat; ideo non solum in locum refrigerij post mortē ductus fuit, sed etiam ad eius sinum congregabantur omnes, qui eo tempore in Domino moriebātur. Ipse etiam Dauid diues erat, quod ad terrenam substantiam attinet: sed quoniam non inde superbiebat, neque eam magnificiebat, & totus a Deo pendebat, in quo spem suam, & vires suas, & omnia bona sua collocauerat, & sine quo nihil se esse, aut posse sciebat, ideo se verē pauperem, & inopē prædicabat.

Custodi animam meam, quo- **II.**
niam sanctus sum: saluum fac ser-
uum tuum Deus meus sperantem
in te.

Explicat in quo cupiat exaudiri; ac primum proponit id quod est verē primum in intentione, & quod ipse Dominus primum queri iussit, cum ait: Primum querite Regnum Dei, & iustitiam eius, & hæc omnia adjicientur vobis, Matth. 6. Custodi, inquit, animam meā, id est, conserua vitam animæ meæ, cui tam multi hostes in hoc exilio insidiantur. Quoniam sanctus sum, id est, ideo peto conseruari vitam animæ meæ a te, quoniam tu mihi eam dedisti, tu me in sanguine Filij tui iustificasti, & sanctificasti, & per hoc viuificasti, qui in peccatis mortuus eram. Nam, ut rectē dicit S. Augustinus, cum quis per sacramenta Christi iustificatum se esse confidit, & ex gratia Dei sanctum se nominat, non est superbia elati, sed confessio non ingrati; quod si quis dicere non audeat, sanctus sum, id est, iustificatus, & mundatus: saltem dicere potest, sanctus sum id est, fidelis sum, sanctæ religionis, & fidei professor sum, Deo per baptismum dedicatus, & sanctificatus sum. Saluum fac seruum tuum Deus meus sperantem in te. Idem repetit alijs verbis. Ideo enim cupit custodiri animam suam, ut non perdat salutem æternam; sic enim loquitur S. Petrus in epist. 1. cap. 1. Qui in virtute Dei custodimini per fidem in salutem paratam reuelari in tempore nouissimo. Peti igitur salutem, quam ne amitteret, petierat custodiam. Addit rationem, cum dicit, Seruum tuum sperantem in te, quia cum Deus saluum facit seruum suum, saluum facit rem suam: & cum saluum facit sperantem in se, fidelem, & iustum se demonstrat, quia implet quod promissit.

Misc.

III. **Miserere mei Domine, quoniā ad te clamaui tota die : lætifica animam serui tui, quoniam ad te Domine animam meā leuauī.**

Petit in secundo versiculo summum bonum, id est, salutem animæ, quæ est finis omnium desideriorum: nunc recto ordine petit medium ad finem, lætitiā, videlicet, spiritualem, qua fortiter toleret tentationes, & pericula exilij, donec ad salutē perueniat, ubi nullæ erūt tentationes, nulla pericula. Miserere mei Domine, id est, misericorditer exaudi orationem meam, quoniam ad te clamaui tota die, id est, quoniam ardēter, & perseveranter orauī; nihil enim magis requiritur ad impetrandum, quā si oratio fundatur ex accēso desiderio, quod significatur in verbo, clamaui; & cum perseverantia, quæ significatur in vocibus illis, tota die. Lætifica animam serui tui; hæc est petitio, quam misericorditer exaudiri petit, & pro qua tota die clamauit. Lætifica, inquit, animam serui tui, id est, vndique angustijs tentationum premor, nihil mihi in hac valle lacrymarum occurrit, nisi amarum, dñi non minus prosperitas terret, quā aduersitas ipsa contristet. Ideo lætifica animam serui tui, quoniam ad te Domine animam meam leuauī, id est, quoniā non inueniens requiem in vlla recreata, ad te creatore pēnis cogitationis, & desiderij animam meam leuauī. Amor animam nostram portat, & verē dictum est, Anima magis est ubi amat, quā ubi animat. Alæ amoris sunt cogitatio, & desiderium; qui .n. amat, cogitando assidue, & desiderando rem amatā, in illam fertur, & in illa manet. Qui verē, & ex corde Deum amat, cogitando, & desiderando Deum, animam suā ad Deum leuat. Contra qui terrā amat, cogitando, & concupiscendo terram, animam suam ad terram deprimit. Itaque ille solus cum Propheta verē dicere pōt, ad te Domine animam meam leuauī, & iure suo petere potest consolationem spiritus, ac dicere, Lætifica ani-

ma serui tui; qui nulla tenetur concupiscentia rei creatæ, nec vllō terreno luto affixus inhæret. Rectè S. Bernard⁹ serm. 6. de Ascensione Domini, explicans illa verba Dñi Ioan. 16. Nisi ego abiero, paraclitus non veniet ad vos; Quid est, inquit, Nisi ego abiero Paraclitus non veniet? nisi carnis præsentia vestris subtrahatur aspectibus, spiritualis gratiæ plenitudinem occupata mens non admittit, non recipit animus, non capit affectus. Quid vobis videtur fratres? si hæc ita sunt, imò quia ita sunt, audeat qui huic sterquilinio semper inhæret, qui carnē fouet, carnem sapit, illā nihilominus cōsolationem supernæ visitationis sperare, quā ne cū ipsa quidē Verbi carne percipere vllaten⁹ Apostoli potuerūt. Errat omnino si quis cælestem illam dulcedinem huic cineri, diuinum illud balsamū huic veneno, charismata illa spiritus misceri huiusmodi illecebris arbitratur.

Quoniam tu Domine suavis, IV. & mitis, & multæ misericordiæ omnibus inuocantibus te.

Hæc est ratio cur animam suam ad Deū leuauerit pro cōsolatione recipiēda, quia Deus suavis est, & dulcis; & sicut dicit Ioannes, Deus lux est, & in eo tenebræ non sunt vllæ: sic dicere possumus, suavis est Deus, & in eo amaritudo non est vlla: cū ē contrario in carnalibus cōsolationibus, suauitas sit modica, & amaritudo plurima. Nec solum Deus suavis est, sed etiam mitis, vt ad se accedentes non repellat, & imperfectum nostrum toleret. Notat S. Augustinus, in eo planē perspici mansuetudinē Dei, quod orantes nos patiatur, cū tam sæpē inter orādum ad alia cogitanda mētē auertamus; certe enim Iudex homo, non pateretur reum, si dū causam agit, ad colloquendum cū amicis, de rebus præsertim nullius momenti, auerteretur. Nec solum Deus suavis est in se, & mitis; quia non repellit accedentes ad hunc fontem suauitatis; sed etiam multæ misericordiæ est, quia

facile admittit, & recipit, & se gustandum præbet, omnibus inuocantibus se, non accipiens personas diuitum, aut pauperum: Iudæorum, aut Gentilium. Omnis. n. quicumque inuocauerit nomen Domini saluus erit. Rom. 10. Quod si aliquos orantes non exaudit, neque eorum miseretur, causa est, quia non verè Deum inuocant, aut non sicut oportet, inuocant. Saepè et exaudit, sed tempore opportuno, & non raro exaudit orantis desiderium, non verba loquentis, quando videlicet qui orat id petit, quod sibi non expedire ignorat, & si non ignoraret oïno non peteret. Quod attinet ad verba,

טוב

illud, suavis, in Hebræo est, *טוב*, quod significat, bonum; & multi exponunt benignum, siue beneficium. Et quavis Deus sit vere bonus, benignus, & beneficus: tamen noster interpret, non solum hoc loco, sed etiam in Psal. 33. & 99. eandem vocem vertit, suavis; & hæc interpretatio concordat cum verbo, gustate. Gustate, & videte, inquit, quoniam suavis est Dominus: gustatur. n. propriè suauitas, non benignitas. & huc alludens S. Petrus in epist. 1. cap. 2. ait, Si tamen gustastis, quoniam dulcis est Dominus; illud autem mitis, in hebræo est, *סלה*, quod propriè significat propitiabilis, & sic vertit S. Hieronymus, & in sensu non est discordia; mitis enim facile propitiatur, & facile ignoscit: & sic exponit S. Augustinus, cum dicit, Deum esse mitem, quia facile ignoscit euagationibus nostris cum oramus.

V. Auribus percipe Domine orationem meam, & intende voci deprecationis meæ.

Repetit primam partem primi versiculi, sed alijs verbis idem significantibus, ad affectum ostendendum erga rem desideratam, & petitam.

VI. In die tribulationis meæ clamaui ad te, quia exaudisti me.

Videtur hic versiculus additus esse

ad explicationem superioris; quia enim dixerat, Auribus percipe orationem meam: poterat Deus interrogare, quoniam orabis? quando vis percipiam auribus orationem tuam? respondet Propheta, omni die orauit, & omni die oro, & orabo, dum viuam in hoc exilio. Omnis. n. dies peregrinationis, dies tribulationis meæ est; cui enim dulcis est patria, non potest non amara esse peregrinatio. In die ergo tribulationis meæ, id est, omni tempore peregrinationis tribulationem, & dolorem inueni, & ideo semper clamaui ad te: & ea fiducia clamaui, quia tu semper exaudisti me, id est, semper me exaudire solitus es.

Et non est similis tui in Dijs VII. Domine, non est secundum opera tua.

Reddit rationem, cur ad solum Deum confugiat, illum inuocet, atque ad eum animam suam leuare conetur; quia videlicet, nemo sit Deo similis, neque in essentia, neque in potentia, neque in sapientia, neque in bonitate, non tantum inter homines, sed et inter Deos. quod si per Deos intelligamus Deos falsos, nimirum Idola, & dæmones, de quibus dicitur in Psal. 95. Dijs gentium dæmonia; absolute verum est, quod hic dicitur, Non est similis tui in Dijs Domine: quoniam Idola oculos habent, & non vident, & ab hominibus pendent, ut sint; & ut custodiantur, & moueantur: Deus autem verus sine oculis corporalibus videt, & a nullo pendet, sed omnia ab ipso pendent. In ipso enim viuimus, mouemur, & sumus, Act. 17. Dæmones autem ad imaginem quidem, & similitudinem Dei facti sunt, sed per peccatum similitudinem perdiderunt. si verò per Deos intelligamus Deos per participationem potentiam, & auctoritatis, quales sunt Principes, & Iudices terræ: vel per participationem sapientiam, & iustitiam, quales sunt omnes homines iusti; vel per vtranque participationem, quales sunt Angeli sancti: tunc id quod dicitur, non est similis tui in Dijs Domine, intelligi-

dum erit de similitudine perfecta, quæ requirit aequalitatem: illi. n. sunt perfectè similes in potentia, vel sapientia, vel iustitia, qui sūt æquè potētes, æquè sapientes, & æquè iusti. Cōstat autem, Deum esse infinito modo potētiorem, sapientiorem, & iustiorē omnibus Angelis, & hominibus: proinde verum est, nō esse vllum similem Deo in Dijs participatione, nisi imperfecta, & inæquali similitudine. Et non est secundum opera tua; non solum nemo ex Dijs est perfectè similis Dño Deo nostro: sed neq. est vllum opus Deorum quorumcunq. quod possit cōparari cum operibus Dei nostri. Deus enim fecit ex nihilo cælū, & terram, & oīa quæ in eis sunt: Dijs aut cæteri intra Mundum operantur, & ex ijs quæ Deus fecit materiam operandi sumunt. Ergo non est opus vllum, secū dum opera Dei, id est, quod comparari possit operibus Dei.

VIII. Omnes gentes quascunque fecisti venient, & adorabunt corā te Domine, & glorificabunt nomen tuum.

Ex hoc versiculo intelligimus, versiculum superiorem accipiendum esse de Dijs falsis, qui ab errantibus adorabantur tanquam veri, & summi Dijs: probat enim Propheta, nullum ex Dijs esse similem Dño Deo nostro, ex hoc quod aliorum Deorum cultus tandem aliquādo cessabit, & manifestè apparebit falsitas, & vanitas eiusmodi Deorum: cultus autem Domini Dei nostri sempiternus erit. Quod aut hic dicit Propheta partim impletū est in Ecclesia Christi, partim implebitur in die Iudicii: nam quamvis tēpore Dauidis alij essent Dijs Moabitarum, alij Ammonitarū, alij Philistinorum, alij aliarum gentium; tamē adueniente Christi Evangelio in omnibus gentibus Idololatria cessare, & veri Dei cultus introduci cepit. Itaque omnes gentes venerunt, id est, ex oībus gentibus venerunt; & relictis Dijs falsis Deum verum adorauerunt; sed in die Iudicii omnes omnino homines, nullo

excepto, apertissimè cognoscent, Deos gentium fuisse Dæmonia, vel inania simulachra, & velint nolint curuabūt genua coram Domino. & implebitur illud Isa. 45. Mihi curuabitur omne genu qd applicatur Christo, vt vero Deo ab Apostolo Rom. 14. & Philip. 2. Illa phrasis, adorabunt coram te Domine, hebraica est: vox enim, istachauu propriè significat, prosternent se. Hoc autem verbum requirit particulam, corā, prosternimur enim corā eo, quem adorare volumus. Itaque illud, adorabunt coram te, exponendū est, adorādo prosternent se coram te. Illud, & glorificabunt te, ad omnes pertinet, sed vario modo; iusti enim ex amore, & libētes; iniusti ex timore, & inuiti glorificabūt in die iudicii Dominum; ac dicent, Iustus es Domine, ac rectum iudicium tuum.

ישתחו

Quoniam magnus es tu, & faciens mirabilia, tu es Deus solus. IX.

Hæc est ratio cur cessabit cultus inanium Deorum, & omnes gentes adorabunt, & glorificabunt Dominum quoniam ipse solus est Deus verè magnus, & Deus faciens mirabilia, quæ nullus alius facere potest: quod in die iudicii potissimum cognoscetur cum ad nutum Domini omnes mortui resurgent, & cōgregabuntur ante tribunal Christi, & sine vllō impedimento, & resistantia iusti exaltabuntur ad Regnū; iniusti deprimuntur ad supplicium sempiternū. Hinc & Apostolus vti tur voce, magni Dei, eī de iudicio loquitur, quia in iudicio magnitudo Dei apertissimè demonstrabitur. Expectantes, inquit, beatam spem, & aduentum gloriæ magni Dei, & Saluatoris nostri Iesu Christi. ad Tit. 2.

Dedne me Domine in via tua, x. & ingrediar in veritate tua: lateatur cor meum, vt timeat nomen tuum.

Reuertitur ad orationem, qua postulat

lat dirigi in hac peregrinatione, & exilio, ne fortè aberret à via, quæ ducit ad patriam: & simul postulat consolationem spiritualem, quasi refectiorem, ne deficiat in via. Deduc me Dñe in via tua id est, per auxilium gratiæ tuæ ostende mihi viam tuam, nec solum ostende illuminando mentem, sed etiam mouendo voluntatem; & sic ingrediar iter in veritate tua, id est, iuxta veritatē fidei tuæ, & legis tuæ. Lætetur cor meum, hoc est, quod supra dixit, Lætifica animam meam; ergo lætetur te lætificāte, & cōsolante cor meū, vt timeat nomen tuū, id est, non affecto consolationem propter consolationem, sed vt per eā quasi cibo recreatus, perseuerem in timore sancto tuo; & timendo offensionē tuā pergā recto itinere per viam mandatorum ad patriam, vbi sine timore feruiam tibi. Non displicet S. Augustini expositio, Lætetur cor meum, sic tamē, vt etiam timeat nomen tuum; hic enim exultandum est, sed cum tremore, dum ad dulcem patriam, sed inter perreulationum currimus. In hebræo, pro, lætetur cor meum, legimus, iachad leuabbi, quod verti potest, vnitū, vel vnicum sit cor meum; vel, vni cor meum, siue cum S. Hieronymo, vnicum fac cor meum, vt timeat nomen tuum: ex qua lectione colligitur optimus sensus, vt videlicet optet Propheta, cor suū vniri in timore Domini, vt totum cor suum timeat Dominum, & non pars Dominū, pars Mundum timeat. Cæterum nostra versio ex græca fideliter deriuata est. Græci autem interpretes viri Septuaginta antiquissimi, & doctissimi nunquam sic vertissent, si legissent, qđ nos in nostris Codicibus habemus: credibile igitur est, eos non legisse, iachad, sed iechadade, cum ipsdem literis, sed diuersis pñctis, qđ significat, lætabitur, à verbo, chadà, & habetur hæc ipsa vox, Exodi 18. v. 9. & eam reddit S. Hieronymus, lætatus est, accipiēdo futurū, pro, præterito, propter literam, vau, præcedentem. Sed hoc loco vbi non est, vau, præcedens, rectissimē vertit noster interpres, lætetur, & potuisset etiam vertere, lætabitur.

Confitebor tibi Domine Deus **XI.**
meus in toto corde meo, & glorificabo nomen tuū in æternum.

Orationi adiungit gratiarum actionem: nihil enim vtilius est ad impetrandā noua beneficia, quā memorem, & gratum se ostendere præteritorum. Cōfitebor, inquit, tibi Domine Deus meus confessionem laudis, & gratiarum actionis in toto corde meo, id est, ex vero, & pleno cordis affectu. Et glorificabo nomen tuum, id est, potentiā tuā, in æternum, donec vixero, sine intermissione.

Quia misericordia tua magna est super me, & eruisti animam meam ex inferno inferiore. **XII.**

Hoc est beneficium pro quo gratias agit: quia videlicet: x magna misericordia sua Deus, non ex meritis ipsius hominis supplicantis, eruerit animam eius ex inferno inferiore, id est, iustificauerit eum à peccatis, ob quæ ad infernum inferiorem descensus erat, nisi per gratiā liberaretur. Et verè tam magna misericordia Dei est ea, qua nos ex iniustus iustos facit, quā magna est pœna gehennæ perpetuæ à qua liberamur, & quā magna est felicitas sempiterna ad quam ius accipimus, & aditum apertū habemus. Vnde & Apostolus Petrus dicit, Secundū misericordiam suam magnam regenerauit nos in spem viuā. 1. Pet. 1. Cur gehenna dicatur infernus inferior, duplicē rationē reddit S. Augustinus, vnā, quod terra hæc plena periculis sit infernus quidā respectu cœli, sed superior respectu gehennæ. Alteram, qđ in ipso inferno subterraneo sit pars superior, in qua erat Lazarus in sinu Abrahæ requiescens, & inferior, in qua diues Epulo cruciabatur in flammis. Addit S. Hieronymus infernum inferiōre dici gehennam respectu peccati, qui est infernus quidam, sed quasi superior. Non desunt ex recentioribus, qui hoc loco per, infernum inferiōre, intelligāt gra-

לֵבִי

יָחַד

יָחַד יָחַד

יָחַד

graves calamitates, & pericula vitæ huius temporalis. Sed nos maluimus sequi sanctos Patres Hieronymum, & Augustinum, quibus addi potest S. Bernardus in 2. Sermon. de Assump. qui per, infernum inferiorem, intelligit illum, ubi nemo confitetur Domino, & unde nondatur egressus: præsertim cum magna misericordia, non ad res temporales, quæ parvæ sunt, & breves, sed ad sempiternas pertinere videatur.

XIII. Deus iniqui insurrexerunt super me, & synagoga potētium quæsierunt animam meam. & non proposuerunt te in conspectu suo.

Post actionem gratiarum reuertitur ad orationem, qua petit liberari à multitudine hostium, qui vitæ eius insidiabatur. & quamvis nonnulli exponant hæc omnia de hostibus corporalibus David, vel Ezechiae: alij de hostibus Christi, qui mortem illius procurauerunt: tamē magis cohæret cum superioribus partibus Psalmi expositio S. Augustini, qui docet, hæc omnia esse intelligenda de membris corporis Christi, id est, de hominibus iustis, de quolibet homine iusto qui patitur varias tribulationes ab hostibus animarum, siue sint hæretici, siue schismatici, siue in ipsa Ecclesia perditē viuentes; quibus addere possumus, & dæmones, qui istis omnibus præsunt. At igitur homo Dei liberatus per gratiam Christi ab inferno inferiore, & interim præliis cum hostibus animæ suæ, & grauiter ingemiscens; o Deus meus, ecce iniqui insurrexerunt aduersus me; neque pauci, aut debiles sunt, sed synagoga potentium. congregatio magna fortissimorum hostium quæsierunt animam meam, ut eam perdant: & excæcati, atque obdurati non proposuerunt te ante conspectum tuum. id est, non cogitauerunt te esse protectorem iustorum, & quod non cum homine infirmo, sed cum Domino Deo exercituum bellare audeat. In hebraeo pro voce, iniqui, est, zedim, quæ proprie superbos significat; sed idē est sensus. Superbi, præter ceteros oēs iniquissimi sunt.

Et tu Domine Deus miserator, XIV. & misericors, patiens, & multæ misericordiæ, & verax.

Dixit, quot, & quales hostes haberet: nunc petit aduersus eos auxilium, ac primum prædicat multis nominibus bonitatem Dei, ut ostendat, se non temerè à tam bono Domino auxilium sperare. Et tu, inquit, Domine Deus miserator, & misericors, patiens, & multæ misericordiæ, & verax. Miserator hebraicè, rachum, significat proprie pio, & paterno affectu miserantem filios. Misericors, hebraicè, chamnun, significat proprie gratiæ largitorem, siue gratificantem, ut loquitur Apostolus ad Ephes. 1. Qui gratificauit nos in dilecto filio suo, id est, gratos nos sibi fecit, siue in gratiam recepit. Patiens hebraicè, longanimis, erech appaim, proprie longus naribus, id est, longus siue tardus ad iram; nares enim pro ira accipiuntur apud hebræos. Multæ misericordiæ hebraicè, rab chesed, id est, multus misericordiæ, siue multus in misericordia: Verax hebraicè, emeth, veritatis, siue fidelitatis; & coniungitur cum voce multus, ut sit sensus, multus misericordiæ, & veritatis, id est, multus in misericordia, & veritate, siue fidelitate. Ex his habemus, Deum esse amantem affectu paterno; inde esse facilem ad gratiam; inde esse tardum ad iram; inde denique esse multum, id est, liberalem, & promptum ad misericorditer promittendum, & fideliter ad implendum, quæ omnia adferunt ineffabilem consolationem, & fiduciam hominibus pijs, & ipsi Deo ex corde adherentibus; hæc enim dicuntur timentibus Deum, ut clarius explicatur in Psal. 102 qui enim Dei benignitate abutuntur, et thesaurizant sibi iram in die iræ, & reuelationis iusti iudicii Dei, ut dicit

Apostolus ad Rom. 2. quibus etiam dicit ad Heb. 10. Horrendum est incidere in manus Dei viuentis.

Re-

רחום

חנון

אפיים

ארך

רב חסד

אמת

ד'ל

XV. Respice in me, & miserere mei,
da imperium tuum puero tuo, &
saluum fac filium ancillæ tuæ.

Explicata tot nominibus Dei benignitate, nunc petit, eam in se conuerti. Respice, inquit, in me oculis tantæ bonitatis tuæ, & miserere mei tu qui tam multus es ad miserendum. Da imperiū tuum puero tuo, id est, in hoc peto, vt miserearis mei, vt nō præualeāt hostes tam multi in seruum tuum, sed contra des seruo tuo robur, & fortitudinem, ad eos vincendos, & subiiciendos: & hoc modo saluum fac me filium ancillæ tuæ ab eorum siue occultis insidijs, siue manifestis persecutionibus. Pro vo cē, imperium, in hebræo est, robur, siue potentiam: ex quo intelligimus, non peti hoc loco Regnum aliquod, aut Imperium, prout sonat verbum latinum, sed peti gratiam fortiter resistendi hostibus, & illos subiiciendi, atque vincēdi.

XVI. Fac mecum signum in bonum,
vt videant, qui oderunt me, & cō
fundantur, quoniam tu Domine
adiuisti me. & cōsolatus es me.

Concludit petens aliquod externū signum, vnde constet etiam apud aduersarios, Deum adiutorium, & consolatorē esse seruorū suorum fidelium. Fac mecum signum in bonum, id est, ostende in me signum aliquod, quod rem bonam, id est, gratiam & fauorem tuū manifestet: vt videant illud signum, qui me oderunt, & confundantur, diffidentes videlicet de victoria. Quoniam tu Domine adiuuisti me, & consolatus es me, id est, quoniā reuera iam adiuuisti me in certamine, & consolatus es me in tribulatione per internam gratiam tuā, ostende etiam exterius signum aliquod fauoris tui erga me, vt qui oderunt me videant hoc signum, & confundantur. Posset etiam cum Euthymio sic exponi, Vt videant qui me oderunt, quoniā tu Domine adiuuisti me, & consolatus

es me; & confundantur. sed prior expositio videtur faciliior, & conformis est interpunctioni hebraicæ, græcæ, & latinæ, quæ non videtur admittere hyperbaton. Quærunť scriptores, quod sit illud signum, quod hoc loco Propheta requirit. S. Hieronymus dicit esse signū crucis Christi; illud enim est signum in bonum, quia signum redemptionis; & cū illud aspiciunt dæmones, qui nos oderunt, sine dubio confunduntur. S. Augustinus exponit hunc locum de signo, quod apparebit in die nouissimo, quod erit in bonum electis: & eo viso confundētur omnes inimici nostri. Alij intelligunt de signo, quod accepit ab Isaia Rex Achaz, cū ei dictum est, Dabit Dominus ipse vobis signum, Ecce virgo concipiet, & pariet Filium. &c. Isa. 7. Hoc enim signum verē fuit in bonum Dauidi, cuius filius futurus erat Messias, & toti Mundo, qui per Christū ab omnibus hostibus liberandus erat. Fortasse vocatur hoc loco, signum in bonum, lætitia spiritualis, quam initio petiuit Dauid, cū ait, Lætifica animā serui tui; hæc enim lætitia in homine iusto, atque in tribulatione posito signū clarissimum est gratiæ Dei; & hoc signo conspecto confunduntur non solum dæmones, sed etiam omnes alij persecutores. & tunc sensus erit, Fac mecum signum in bonum, id est, da mihi gratiam spiritualis lætitia, quæ etiā in ipsa vultus mei serenitate resplendeat & videant qui oderunt me hoc signum patientiæ, & tranquillitatis animæ meæ, & confundantur: quoniam tu Domine adiuuisti certantem, & consolatus es morientem, & tristitiam in gaudium internum iam conuertisti.

PSAL-

PSALMVS LXXXVI.

Titulus, & Argumentum
Psalmi.

Filijs Core Psalmus Cantici.



N hoc Psalmo cantatur laus ciuitatis Hierusalem, per quam Ecclesia Christiana sine dubio intelligi debet, terrenæ siquidem ciuitati Hierusalem, et si conuenit quod initio dicitur, Fundamenta eius esse in montibus; tamen non conueniunt cætera, ac præsertim, quod in ea sit habitatio Babyloniorum, Aegyptiorum, & Tyriorum. Ecclesiæ autem siue militanti, siue triumphanti omnia conueniunt.

Explicatio Psalmi 86.

I Fundamenta eius in montibus sanctis, diligit Dominus portas Sion super omnia tabernacula Iacob

Incipit Propheta laudare ciuitatem Hierusalem à fundamentis, quæ sunt montes sancti. sed antequam progrediamur, soluenda est quæstio communis, quæ statim unicuique occurrere potest. quid igitur significat pronomen, eius? non enim videtur posse referri ad Hierusalem, vel Sion, tum quia non est antea nominata ciuitas Hierusalé, vel Sion; tum quia in textu hebræo, & græco illud, eius, est generis masculini; Hierusalem autem, & Sion sunt generis fœminini. Respondeo, illud, eius, referri ad nomen subintellectum Ciuitatis; quamuis enim nomen Ciuitatis sit regulariter generis fœminini: tamen habet terminationem ad modum mascu-

linorum; dicitur enim, hir, & in numero multitudinis, hirim, & non desunt viri doctissimi, qui velint, esse etiam generis masculini. præterea sicut inueniuntur multa nomina, quæ præter ordinem coniunguntur cum verbis diuersi generis, ut ostendimus in Institutionibus lingue hebrææ p. 4. c. 4. sic etiam fieri potest, ut pronomen generis masculini præter ordinem coniungatur cum nomine generis fœminini; non enim ista sunt ita rata in lingua hebræa, ut sunt in græca, & latina. Itaque sensus est, Fundamenta eius Ciuitatis, quam mente intueor, & cuius laudes prædicare incipio, sunt in montibus sanctis. Omisit autem Propheta nomen ciuitatis, & dixit, Fundamenta eius, ut ostenderet, se continuare verba externa cum interna admiratione: contemplans. n. & admirans magnitudinem, & pulchritudinem ciuitatis nouæ descendentes de cælo, prorumpit in verba illa, Fundamenta eius in montibus sanctis. Non placet autem quod aliqui dicunt, illud, eius, referri ad Christum; neque enim Christus pendet à fundamentis, sed omnia fundamenta pendent ab ipso, qui est, ut rectè monet Sanctus Augustinus Fundamentum fundamentorum, sicut est Pastor pastorum, & Rex regum, & Dominus dominantium. Ad Ephes. 2. In quo omnis ædificatio constructa crescit in templum sanctum in Domino. Multo minus placet quod dicunt Rabini, illud, eius, referri ad Psalmum, & coniungi priorem partem huius versiculi cum titulo hoc modo, Canticum Psalmi, Fundamenta eius in montibus sanctis, id est, fundamenta huius Psalmi sunt in montibus sanctis. hoc, inquam, non placet, quia Septuaginta Interpretes, viri doctissimi, apertè distinxerunt titulum à Psalmo, & Psalmum inchoarunt in illis verbis, Fundamenta eius in montibus sanctis. distinctio, & interpunctio Rabnorum, est multò posterior, ac per hoc minorem habere debet fidem. Porro nomine fundamentorum, iuxta varias considerationes, res varias accipere debemus: si cogitemus eos, qui primi ad Ecclesiam conuenerunt, &

pri-

דמיון ד

primi eam propagarunt, fundamenta sunt Apostoli duodecim, iuxta illud Apoc. 21. & Ciuitas habebat fundamenta duodecim, & in eis nomina duodecim Apostolorum Agni. si consideremus doctrinam, in qua fundatur fides Ecclesie, fundamenta sunt Apostoli, & Prophetæ, qui fuerunt immediati Ministri Verbi Dei. & de his dicit Apostolus ad Ephes. 2. Super ædificati supra fundamentum Apostolorum, & Prophetarum. si denique respiciamus auctoritatem, & potestatem Ecclesiasticam, secundum quam id est fundamentum in domo, quod caput in corpore; fundamenta sunt Christus, & Petrus: Christus fundamentum primum, Petrus secundarium. De Christo dicit Apostolus 1. Cor. 3. Fundamentum aliud nemo potest ponere præter id quod positum est, quod est Christus Iesus. De Petro dicit Christus, Matth. 16. Tu es Petrus, & super hanc petram ædificabo Ecclesiam meam. Isti sunt ergo montes sancti, super quos fundata est Ciuitas Dei. qui dicuntur montes propter altitudinem, & excellentiam: sancti autem, quia non fuerunt alti altitudine superbiæ, sed altitudine sanctitatis, & sapientiæ, & auctoritatis. Neque obstat, quod Christus dicatur lapis angularis superpositus ædificio, Psal. 117. Lapidem quem reprobauerunt ædificantes, hic factus est in caput anguli. & ad Ephes. 2. Ipso summo angulari lapide Christo Iesu; Nam lapis angularis est duplex, vnus in fundamento, & alius in summo ædificio, & vterque connectit duos parietes. sed quauis in ædificio corporali non possit esse idem lapis angularis in fundamento sustentans totum ædificium, & in vertice sustentatus à toto ædificio: tamen in fabrica spiritali vnus, & idem lapis, id est, vnus, & idem Prælatatus sustentat, & portat auctoritate sua totum ædificium, & simul præstet, & portatur per obedientiam à toto ædificio, .i. ab omnibus lapidibus viuis: quæ duo officia conueniunt principaliter Christo, qui est absolutè caput, & Princeps Ecclesie totius; sed conueniunt summo Pontifici, vt Vicario Christi generali; & suo modo omnibus alijs

Prælati respectu eorum, quibus præstet; debent enim omnes Prælati portare, & portari, portare infirmitates subditorum, & portari ab eis, dum imperant vel corripiunt. Sequitur alia laus ciuitatis Dei ducta à portis, Diligit, inquit Propheta, Dominus portas Sion super omnia tabernacula Iacob. Dixerat, ciuitatem Dei fundatam esse supra montes sanctos, ac per hoc non posse ruere, vt solent ædificia fundata super arenam: nunc addit, non solum non posse ruere, sed nec posse expugnari ab hostibus. quia munita est portis fortissimis, de quibus dicitur in Psal. 147. Quoniam confortauit seras portarum tuarum. Diligit ergo Deus portas Sion, id est, diligit Deus Sion ob firmissimas eius portas, quæ eam faciunt inexpugnabilem: super omnia tabernacula Iacob, id est, magis quam diligat quæcunque tabernacula Iacob, quoniam etiam si tabernacula illa pulchra essent, & miro ordine disposita, quæ iter faciebant Hebræi ab Aegypto in terram promissionis; tamen erant sine fundamento, & sine portis, ac per hoc mutabilia, & temporaria. Significatur igitur his verbis stabilitas, & firmitas Ecclesie aduersus quæ portæ inferi non præualebunt, ac præsertim, quando peruenit ad patriam cælestem, ad quam etiam suspirabant Patriarchæ de quibus dicit Apostolus ad Heb. 11. Expectabant enim fundamenta habentem Ciuitatem, cuius artifex, & conditor Deus. In Apocalypsi cap. 21. dicuntur duodecim esse portæ ciuitatis nouæ Hierusalem, & in illis scripta esse nomina duodecim tribuum filiorum Israel. Per duodecim portas intelligunt communiter expositores illius loci, & S. Augustinus in expositione huius Psalmi, duodecim Apostolos, quia per illorum verissimam, & firmissimam prædicationem intramus omnes in Ecclesiam Dei, neque obstat, quod paulo post dicuntur Apostoli duodecim, esse duodecim fundamenta eiusdem ciuitatis; sunt. n. Apostoli & portæ, & fundamenta; portæ prædicando, fundamenta sustinendo. Neque etiam obstat, quod Ioann. 10. Christus dicit, Ego sum ostium, per me si quis introierit

introierit saluabitur. Nam Christus porta est ratione meriti, siquidem per eius meritum omnes intramus, & saluamur. Præterea (ut dicit S. Augustinus) huius ciuitatis vna porta est, & duodecim portæ sunt; quemadmodum vnum fundamentum est, & duodecim fundamenta sunt. Christus enim in Apostolis erat, & per Apostolos loquebatur, ut dicit Apostolus 2. ad Cor. ultimo, An experimentum queritis eius, qui in me loquitur Christus? Itaque cum intramus per Apostolos, per Christum intramus, quia Apostoli non se ipsi, sed Christum prædicabant: & Christus per eos prædicabat: & cum in Apostolis fundamur, & super eos ædificamur, in Christo fundamur, & super eum ædificamur. Quod autem in portis scripta erant nomina duodecim tribuum filiorum Israel: id significatur, primos qui intrarunt in Ecclesiam per Apostolorum prædicationem, fuisse filios Israel, ex quibus etiam ipsi Apostoli erant; deinde intrasse gentium plenitudinem: nam, & Apocalypsis 5. ubi describuntur electi, & saluandi, primo loco numerantur duodecim millia ex singulis tribubus filiorum Israel; deinde additur turba magna, quam dinumerare nemo poterat ex omnibus gentibus, tribubus, & linguis.

II. Gloriosa dicta sunt de te, Ciuitas Dei.

Propheta David spiritu ebrius, & excellentiam huius ciuitatis admirans, sicut ex abrupto cœpit, Fundamenta eius &c. sic mutat continuò formam dicendi, & ipsam ciuitatem alloquitur dicens, Gloriosa dicta sunt de te ciuitas Dei, id est, non mireris o sancta ciuitas si ex abrupto loqui cœpi, quoniam obruor copia encomiorum tuorum; multa enim gloriosa, magnifica, præstantissima dicta sunt mihi à Spiritu sancto de te. Et verè quis posset ordine seruato narrare laudes illius ciuitatis, ubi erit Deus omnia in omnibus, & ubi bona illa seruantur electis, quæ oculus non vidit, auris non audiuit, & in cor homi-

nis non ascenderunt? Quamuis autem propriè gloriosa dicta sint de ciuitate Dei, quæ est in cœlis, & suo modo etià de illâ, quæ est in terris toto orbe diffusa; tamen de terrena etiam Hierusalê, ut typum gerebat Ecclesiæ, gloriosa dicta sunt, quòd videlicet, ciuitas esset Regia, & sacerdotalis; quòd in ea templum Domini, arca testamenti, & alia id genus multa conseruarentur; & quòd omnium maximum est, quòd in ea Rex Angelorum, & Dominus omnium docuerit, miracula fecerit, redemptionem generis humani operatus sepulchrum suum reliquerit, Spiritum sanctum de cœlo miserit, & Ecclesiæ suæ perpetuò duraturæ fundamenta iecerit.

Memor ero Raab, & Babylo- II I.
nis, scientium me.

Ecce alienigenæ, & Tyrus, & IV.
populus Aethiopum, hi fuerunt illic.

Laudat nunc Propheta sanctam ciuitatem à multitudine, & varietate nationum, quæ ad illam inhabitandam cõuenerunt; non enim soli Iudæi, ut in testamento veteri ad Hierusalem pertinent; sed omnes nationes Ecclesiam Catholicam, quæ est vera Hierusalem in hoc Psalmo laudata, inhabitaturi erant: nominat autem Raab, & Babylonem, Palestinos, Tyrum, & Aethiopes, quæ erant nationes gentilium, sed notæ Iudæis. Per Raab intelligunt scriptores veteres Hieronymus, Augustinus, Theodoretus, Euthymius, & alij in hunc locum, meretricem illam, quæ dicebatur Raab, & excepit exploratores Iosue in ciuitate Hierico, ut habemus Iosue 2. Sed recentiores rectè aduertunt, meretricem illam, & in hebræo, רהב, & in græco vocari Rahab, cū aspiratione graui רהב; in hoc autem loco scribi per lenem aspirationem, רהב: per Raab autem intelligunt Aegyptum, siue regem Aegypti, vox enim hebraica

LI Raab,

Raab, significat superbum, & sic vertitur in Psal. 88. & Iai. 5. 1. & in utroque loco per superbum, intelligunt scriptores Aegyptum. Hic igitur erit sensus, Memor ero Raab, & Babylonis scientium me, id est, ego Deus conditor ciuitatis Hierusalem, in aduocandis, & conscribendis electis ciuib. Hierusalé; memor ero non Iudæorum tantum, sed et Aegyptiorum, & Babyloniorum, qui scient me, per fidem videlicet, & religiosorum cultum cognoscent me. Ecce enim etiā alienigenæ, id est, Palæstini, & Tyrus, id est, populus Tyri, & populus Aethiopum, fuerunt illic, id est, istæ quoque gentes, me vocante, & adducte erunt in ciuitate sancta Hierusalem. Ponitur enim præteritum pro futuro, morte Prophetico. In hebræo, pro, scientium me, habetur, scientib. me; & eodem modo habetur in græco. Sed articulus, *le*, qui habetur hoc loco, non solum deseruit datiuo, sed etiam genitiuo, imò, & accusatiuo, ut grāmatici docent. Quare si græcam interpretationē sequi velimus, non erit vertendum, Memor ero Raab, & Babylonis, sed, Cō memorabo Raab, & Babylonem scientibus me. i. fidelibus meis. Sed quia latinus Interpres vertit, ut iure potuit, memor ero Raab, & Babylonis; rectissimè addit, scientium me. & est hæc lectio antiquissima apud Latinos, ut pspicuum est ex commentario S. Hieronymi in hunc Psalmum. Illud autem, hi fuerunt illic, in hebræo est, iste natus est ibi. In græco habetur in numero multitudinis hi nati sunt illic. & idem est sensus, nimirum, vnusquisq. horū natus est illic. Quare latina interpretatio explicari debet hoc mō, hi fuerunt illic. i. hi oēs populi enumerati, fuerunt siue erunt in Hierusalem per nouam generationem: per antiquam enim generationē ciues erāt Aegypti, vel Babyloniz, vel Tyri, vel Palæstinæ, vel Aethiopiz, sed per nouā generationem renati ex Deo per Christum, erunt omnes ciues vnus atq. eiusdem ciuitatis sanctæ Hierusalé, vbi non est gentilis, aut Iudæus, Barbarus, & Scythæ, seruus, & liber, sed omnia, & in omnibus Christus. Coloss. 3.

Nunquid Sion dicet homo, & V. homo natus est in ea, & ipse fundauit eam Altissimus.

Addit Propheta præcipuam laudem sanctæ ciuitatis, qđ in ea natus sit, qui fundauit eā altissimus Filius Dei. Hinc enim potissimum gloriosa dicta sunt de ea, quod ciues eius esse voluerit secundum naturam humanam, qui fundator eius est secundum naturam diuinam. Sic enim intelligunt hunc locum sancti Patres, Hieronymus, & Augustinus, & post eos Theodoretus, & Euthymius Doctores Græci, & ante hos omnes vetustissimus Latinorum Tertullianus in libro aduersus Praxeam. Nunquid Sion dicet homo, id est, num fieri poterit, ut homo aliquis dicat Sioni rem tam nouam, & tam admirandam, & inauditam à seculo. Et homo natus est in ea, & ipse fundauit eam Altissimus, id est, nunquid significabit aliquis ipsi Sioni, quod homo natus sit in ea, & ipse idem fundauerit eam; cum sit Altissimus? Hanc tam euidentem prophetiam nonnulli cum Iudæis obscurare nituntur. Sed nos maiorem fidē habemus sanctis Patribus, quā omnib. Iudæis. Quod attinet ad verba, illud, nūquid, in hebræo est, & sed fortasse textus hebraicus corruptus est vitio scriptorum; & pro, *va* legendum est, *he*, quod significat, nunquid. Cæterum etiā si maneat particula, & idem est sensus: Si accipiatur per modum interrogandi. idem est enim, Et Sion dicet homo? & Nunquid Sion dicet homo? In textu græco nō habetur, nunquid neque, & sed, Mater, & sic legit etiam S. Augustinus, Mater Sion dicet homo: sed B. Hieronymus in commentario apertè docet, textum græcū esse corruptum, & Septuaginta vertisse *μὴ*, qđ est, nunquid, sed ab aliquo scio lo additum esse, & factum esse *μή*, Illud, Sion, est in casu dandi, ut ex articulo hebraico notum est: & etiam ex eo, quod verbum, dicet, in hebræo est generis masculini, & Sion est generis feminini. Itaque homo dicet Sioni, non ipsa

יאמר ipsa Sion dicet. Illud, dicet, in hebræo est, **יאמר** : dicetur; sed remotis punctis eadem literæ faciunt, iomar, quod significat. dicet, & sic legerunt Septuaginta, qui verterunt **יאמר**, dicet. Illud, homo, & homo, Rabini, & qui eos sequuntur, ita coniungunt, ut sensus sit, homo, & homo, id est, multi homines. Sed in textu hebraico, & græco primū homo, coniungitur cum verbo, dicet, ut sensus sit, Dicet homo ad Sion: alterum, homo, coniungitur cum verbo, natus est, & hæc est vera interpunctio, & lectio; neq. debemus propter Rabinorum glossas pervertere textum, & relinquere Patrum expositionem. Illud, & cum dicitur, Et homo natus est in ea, pōt accipi pro, quia, ut sapissimè alias in scripturis. Si quis quærat, quō Christus dicatur natus in Sion, cum constet eum natum esse in Bethlehem. Respondimus, hoc loco per Sion significari Ecclesiam, siue populum Dei; Christū autem natum esse secundū humanitatem in populo Dei, siue in Ecclesia, quæ cœpit in Abel; cuius Ecclesiæ ipse est conditor secundū diuinitatem. Addimus, rectè etiam posse dici, Christū natum esse in Sion, ratione parentū suorum, Dauidis, Salomonis, & aliorum qui Sedem suam posuerunt in Sion.

VI. Dominus narrabit in scripturis populorum, & Principum: horum qui fuerunt in ea.

Respondet ad interrogationem, quæ dixerat, Nunquid Sion dicet homo: dicit enim Propheta, Dominum ipsum hoc dictorum, imō scripturum ad æternam memoriam, in libro, in quo scribit populos, & Principes populorum, qui per nouam natiuitatem fuerunt in ipsa ciuitate. Dominus, inquit, narrabit, id est, annunciabit, quod in Sion natus sit homo, qui ipse idem sit fundator Sionis; narrabit autem in scripturis populorum, & Principum, qui fuerunt in ea, id est, narrabit in illis scripturis, in quibus continentur nomina populorū, & Principum renatorum in ipsa ciuitate

te: caput enim horum omnium est ille homo, qui simul est fundator Sionis, ac per hoc in capite libri scribetur. Porro publicatio huius libri fiet in die Iudicii: tunc enim aperientur libri, & alius liber, qui est vitæ, ut dicitur Apocal. 20 de quo libro dicitur Luc. 20. Gaudete autem, quia nomina vestra scripta sunt in cælo. Per, Principes, intelligit Sanctus Augustinus, Apostolos, quos constituit Dominus Principes super omnē terrā. Quod attinet ad verba. In hebræo, pro, narrabit, est verbum, **יספר**, qđ S. Hieronymus vertit, numerabit. Verbum. n. **ספר**, utrunq. significat, & narrare, & numerare: & utraque significatio hic locum habet: in libro enim vitæ narrantur res gestæ electorum, & eorum numerus describitur. Pro voce, in scripturis, in græco habetur, in scriptura, sed numerus non mutat sensum. In hebræo habetur ad verbum, in scribendo populos, id est, narrabit, vel numerabit, dū scribet populos: atq. hinc exposuimus verba vulgatæ editionis latinæ, in scripturis populorum, id est, in scripturis, in quibus scribuntur populi, siue nomina populorum: vna enim editio aliam explicat. Illud, & Principum, in hebræo habetur transpositum post illa verba, Horum qui fuerunt in ea; imō, sequens versiculus, apud hebræos incipit per ista verba, Et principum. Sed nos sequi debemus lectionē Septuaginta Interpretum, qui emendatiōres libros habuerunt: ista enim transpositio videtur facta negligentia libroriorum, & totum sensum obscurat. Illud, horum qui fuerunt in ea, in hebræo est in singulari hic natus est in ea; sed idem est sensus, hic videlicet, Dominus narrabit cum describit populos, & Principes, quorū vnusquisque per nouam natiuitatem fuit in ea.

Sicut lætantium omnium habitatio est in te.

Hæc est conclusio Psalmi, quæ continet summam felicitatem habitantium in illa ciuitate, cuius fundamenta initio

L I 2 Psal-

יספר
ספר


Psalmi descripta sunt. Hæc est enim felicitas propria ciuitatis sanctæ Hierusalem, quod in ea nullus est miser, nullus moriens, nullus gemens: quoniam Absterget Deus omnem lacrymam ab oculis eorū. & quamuis hæc impleta sint re ipsa in cælesti Hierusalem: tamen etiā in Ecclesia militante, qui sunt descripti ciues in cælo, omnes sunt spe gaudentes; & illis dicit Saluator, Gaudium vestrū nemo tollet à vobis: & Apostolus, semper gaudere. & re vera si serui Dei gaudent etiam in tribulatione, quando mausti esse poterunt? Notat autem S. Augustinus, non esse dictum, lætantium, sed, quasi lætantium, ne putaremus lætitiā patriæ esse lætitiā, qualem hic videmus in filiis huius seculi, qui lætantur in acquisitione auri, & argenti, vel in carnalibus delicijs, aut alijs eiusmodi rebus. Erit ergo habitatio in cælesti Hierusalem similis habitationi, vbi conuiuium, vel nuptiæ cum lititia, & canticis iucundè celebrantur, sed non erit eadem causa lætitiæ hic, & ibi. ac si dicere tur, Non erit habitatio tripudientium, vel potētium, sed sicut tripudientium, & potentium; neque erit habitatio lætantium in nuptiali conuiuium, sed sicut lætantium in nuptiali conuiuium. Ex hebræo S. Hieronymus vertit, Et cantores quasi in choris, omnes fontes mei in te. Sed vt supra diximus, Septuaginta Interpretes habuerunt codices magis correctos, & verba illa, vefarim, q̄ S. Hieronymus legit in hoc vltimo versiculo, & vertit, Et cantores, ipsi legerunt in versiculo superiore, & verterunt, Et Principum. nam vox, farim, si legitur cum puncto in dextro cornu primæ literæ, significat, cantores, à verbo, sur; si legatur cum puncto in sinistro, significat Principes, à verbo, sarah, & sic legerunt Septuaginta Interpretes. Illud, quasi in choris, cecholelim, potest et rectè verti, Sicut tripudantium, vel lætantium, vt notum est. Deniq. illud, Omnes fontes mei in te, non habet difficultatem, nisi ratione duorum vocabulorū, fontes mei: sed vox hebraica, maiani, fontes mei, lecta videtur à Septuaginta Interpretibus, maoni, cum Iod paragogi-

co, quæ significat habitationem: neq; enim tam imperiti erant Septuaginta, vt pro, fontibus, ponerent, habitationē nisi legissent verbū, quod ita verti posset, Sed quamuis vera lectio sit, quam ex Septuaginta Interpretes noster latinus expressit. tamen lectio quoque illa verum sensum habet, quam S. Hieronymus ex hebræo transtulit. Vere .n. beati omnes in cælis sunt quasi cantores in choris laudantes Deum, quoniam oēs fontes bonorum diuinorum in cælesti Hierusalem inueniuntur.

PSALMVS LXXXVII.

Titulus, & Argumentum
Psalmi.

*Canticum Psalmi filijs Core, in finem
pro Maheloth, ad respondendum intellectu
Ezraite.*



Biscurus titulus est, vt ferè tituli cæteri esse solent. Illud, pro Maheloth, est ipsa vox hebraica, quā Septuaginta Interpretes in tantam reliquerunt, vt Amen, Alleluia, & similes. S. Hieronymus vertit, per chorum, alij volunt esse instrumentum musicum, Illud, ad respondendum, S. Hieronymus vertit, ad præcinendum: vox tñ hebraica, respondere significat. Videtur autē Eman Ezraitæ ille esse, qui cantor dicitur lib. i. Paralip. c. 6. & nepos Samuelis fuisse describitur quamuis, & alij fuerint, qui hoc nomine dicti sunt. Igitur sensus erit, Canticū Psalmi filijs Core datum ad canendū, & frequentandū vsq. in finē super choros vel super instrumento Maheloth appellato, ad respondendū alternatim canēdo in quo explicatur eruditio, siue intelligentia mysterio plena Emā Ezraitæ, siue ipse, siue Dauid in eius persona Psalmū cōposuerit. Argumētū Psalmi ex Hieronymi

וְשָׁרִים
שָׁרִים
שׁוֹר
שָׁרִים
שָׁרָה
בְּחִלְלִים
מִעֲנֵי
מִעֲנֵי

nymo, Augustino, & Euthymio, est passio Domini nostri Iesu Christi, quæ hoc loco manifestè prædicatur, vt in alijs multis Psalmis.

Explicatio Psalmi 87.

I. **D**omine Deus salutis meæ, in die clamaui, & nocte coram te.

Propheta in persona Christi, vt ostendat magnitudinem passionis, multis, & varijs modis repetit, & inculcat, quod Dominus in Cruce pendens dixit, Deus meus, Deus meus, vt quid dereliquisti me. Incipit autem ab oratione inuocans Deum Patrem, ac dicens, Domine Deus salutis meæ, id est, à quo salutem expecto per celerem resurrectionem, in die clamaui, & nocte coram te; clamaui enim in die passionis ex cruce dicēs, Deus Deus meus, vt quid dereliquisti me? & nocte præcedente in horto ter clamaui, Pater mi, si fieri potest, transfer calicem hunc à me.

II. Intret in conspectu tuo oratio mea, inclina aurem tuam ad precem meam,

Exaudiatur, inquit, obsecro oratio mea: id .n. significat omnia verba huius versiculi, sed metaphoris multis poeticè admixtis. Intret in conspectu tuo oratio mea, id est, admittatur quasi orator quidam ad præsentiam tuam hæc oratio mea. Inclina aurem tuam ad precem meam, id est, posteaquam oratio admissa fuerit ad præsentiam tuam, præbe illi benignam aurem, vt cum fiducia exponat petitionem suam. In hebræo, pro verbis, Ad precem meam, habetur, **לרנתי** lerinnathi, id est, ad laudationem meam, siue ad hymnum meum. Est enim oratio cum admixta laude. Laus autem est in primis verbis Psalmi, vbi dicitur, Domine Deus salutis meæ.

Quia repleta est malis anima III. mea, & vita mea inferno appropinquauit,

Hæc referri possent ad verba illa, Tristis est anima mea vsq; ad mortem; sed magis aptè respondent illis, quæ dicta sunt in Cruce, Deus meus, vt quid dereliquisti me: tunc .n. planè repleta erat malis anima Christi ob ingentes dolores totius corporis sui, & astantis Matris suæ, & vita ipsius propinquissima erat morti, ac per hoc inferno, ad quem tunc omnes animæ defunctorum descendebant. Non desunt, qui hæc omnia, & sequentia referant ad morbum corporalem Dauidis, aut Ozia Regis: sed si ita esset, nihil mysterij in hoc Psalmo esset; neque in titulo diceretur, Intellectus Eman, neque Ecclesia Psalmum hunc cum cæteris frequentaret.

Aestimatus sum cum descendentibus in lacum: factus sum sicut homo sine adiutorio, inter mortuos liber.

Commemorauit dolores grauissimos corporis sui, ob quos iam vicinus erat morti, commemorat nunc ignominiam, & contemptum, quem patiebatur iam mortuus ex opinione hominum: existimabant enim homines illum esse quasi vnum de cæteris, qui inuitus descendisset in mortem, nec posset villo modo seipse iuuare, neque haberet a quo iuaueretur, cum tamè ipse verè esset inter ipsos etiā mortuos liber à dominatu mortis, & à captiuitate Diaboli, & posset quā vellet mori, & quando vellet, resurgere. Aestimatus sum, inquit, cum descendentibus, in lacum, id est, putauerunt homines me descendisse in locum animarum, sicut alij descendunt, inuitum videlicet, & coactum; ac per hoc existimauerunt, me esse vnum de numero infirmorum mortalium; factus sum, opinione hominum insipientium, quasi homo sine adiutorio; nam ideo insul-

tabant mouentes capita sua, & dicentes, Alios saluos fecit, seipsum non pōt saluum facere. Inter mortuos liber, id est, ego qui inter morti addictos, & potestati eius subiectos solus liber sum, vt nemo me ad mortē cogere possit, & qui potestatem habeo ponendi animā meam, & potestatem habeo iterum sumendi eam, Ego, inquam, existimatus sum sicut homo sine adiutorio, infirmus, & imbecillus, vt cætera turba mortalium.

V. Sicut vulnerati dormientes in sepulchris, quorum non es memor amplius, & ipsi de manu tua repulsi sunt.

Pergit explicare opinionem hominū de morte sua. Existimatus, inquit, sum sicut vulnerati dormientes in sepulchris, id est, sicut alij vulneribus occisi, & in sepulchris iacentes sopore mortis oppressi. Quorum non es memor amplius, id est, quorum tu Deus curā, quā de hominibus habes, deposuisti, cū amplius non sint inter homines. Quod idē repetit, & declarat dicens, & ipsi de manu tua repulsi sunt, id est, ideo tu Deus oblitus es eorum, neq. de illis amplius cogitas, quoniam à manu prouidentiae tuæ repulsi sunt, cū non sint amplius in rerum natura. Vbi non dicit, Propheeta, corpora defunctorū non pertinere ad curam Dei, sed homines mortuos; quia homines mortui, nō sunt homines neque indigent victu, vestitu, alijsq. rebus, quibus indigent homines. Porro Christus etiam si in triduo mortis non fuerit homo, & verē vulneribus occisus iacuerit in sepulchro: tamen valdē dissimilis erat alijs omnibus, quoniam ipse se resuscitare poterat, quod nulli alij possunt. Sanctus Augustinus exponit illud, quorum non es memor amplius, in hunc sensum, Non es memor aliorum mortuorum, vt eos cōtinuō resuscites: sed memor eris in fine seculi: & illud, & ipsi de manu tua repulsi sunt; exponit de Iudæis existimantibus Christum similem fuisse alijs mortuis, non autem

de mortuis iacentibus in sepulchris. Nō reiicio expositionem; sed quam supra posuimus, ea nobis videtur magis textui inhaerere. Qui Psalmum exponunt de agrotatione Dauidis, vel alijs eius calamitatibus, cogūt hæc omnia explicare per tropos, & similitudines, cū tamen Christo Domino propriè, & ad literam aptissimè conueniant.

**Posuerunt me in lacu inferio VI
ri, in tenebrosis, & in vmbra mortis.**

Hæc referuntur ab Euthymio ad sepulchrū Christi, qđ lapide superposito tenebrosus erat. Sed de sepulchro dictū est in versiculo superiore: & sepulchrū tenebrosus quidē dici pōt, sed nō profundum instar lacus. Itaq. melius referentur ad limbum, qui est locus subterraneus, & infernus et dici solet, & sic exponit S. Hieronymus. S. Augustinus per locum inferiorem, siue infirmū vt ipse legit, intelligit summā miserā qua maior non sit, vt in Psal. 39. Eduxisti me de lacu miseræ. Posuerūt me in lacu inferiore. i. inimici mei, qui me occiderunt, fecerunt, vt descenderē ad inferiores partes terræ secundū animā, qui iacebā secundū corpus occisus in sepulchro; describit aut locū inferni, dicens, In tenebrosis, & in vmbra mortis, id est, in locis tenebrosis, & in vmbra densissima, qualis est vmbra mortis, vide in explicatione Psal. 12. vers. 4. In hebræo habetur, Posuisti me sed Septuaginta legerunt cū alijs punctis nō, שַׁתְּנִי
sattani, posuisti me, sed, satani, posuerūt me: sed et si legeretur, posuisti me, שַׁתְּנִי
sensus esset verus: siquidem Deus Pater rectē dici pōt, posuisse Christum in limbo, quemadmodum et in cruce, & in sepulchro, quia proprio filio suo non percipit, sed pro nobis omnibus tradidit illum. Illud etiam, in vmbra mortis, in hebræo habetur, bimzoloth, in profundis. בְּמַצְלוֹת
Sensus est idem, & fortasse, vt alij ante nos obseruarunt, literæ sunt transpositæ, & Septuaginta legerunt, bizal-maueth, quod significat, vmbra mortis. בִּזְאֵל מָוֶת
Sunt enim literæ omnino eadem.

Su-

VII. Super me confirmatus est furor tuus, & omnes fluctus tuos induxisti super me.

Duabus metaphoris declarauit Dauid in persona Christi magnitudinē passionis. Super me confirmatus est furor tuus, id est, furor tuus, quo indignabaris peccatis generis humani, siue zelus iustitiæ, quo peccata omnia vindicari volebas, super me nō solū effusus est, sed etiam confirmatus, & roboratus, ut non inde recederet, donec plenissima satisfactio existeret. Hæc est prima metaphorā, ex qua intelligimus, tantam fuisse acerbitem Dominicæ passionis, quantā requirebat furor Dei omnipotentis in peccata totius Mundi. Digna planē res, quam oēs redempti attentissimē contemplantur, Et oēs fluctus tuos induxisti super me. Hæc est altera metaphorā, qua comparatur passio Dominica omnibus fluctibus totius maris obruentibus, siue agitantibus, & allidentibus ad varios scopulos hominem in mare præcipitatū. Sicut .n. Dominus Iesus Christus omnia peccata hominum super se diluenda suscepit; sic etiam nō vnus, aut alter fluctus pœnalis, sed omnes omnino in eum irruerunt.

VIII. Longè fecisti notos meos à me; posuerunt me abominationem sibi.

Addit ad cæteras passiones auersionem notorum ab ipso. Per notos autem intelliguntur, qui cum nouerant inter ipsos conuersantem, & docentem, sed non credebant esse Deum, aut Messiam; de quibus dicitur Ioan. 1. In propria venit, & sui eum non receperunt. Longè fecisti, inquit, notos meos, .i. permisisti, ut qui me nouerant, longè recederent à me; posuerunt me abominationē sibi id est, non solū recederent, tanquam si me nō nossent, sed etiā execraretur ut seductorem, & Samaritanum, & dæmoniacū, & amicū publicanorum, &

peccatorum: hæc enim omnia leguntur in Euangelio dicta esse à Pharisæis de Christo. Posset tamē hic versiculus exponi de discipulis Domini, qui propriè noti eius dicuntur. Luc. 23. Strabant, inquit, omnes noti eius à longe. Et Matt. 26. Tunc Discipuli oēs relicto eo fugerunt. Quod autem additur de abominatione, impletum videtur in S. Petro, qui Matt. 17. cœpit detestari, & iurare, quia non nouisset hominem; ubi quamuis re vera S. Petrus in corde suo non abominaretur Christum, tamen visus est abominari, cum iuraret cum iuramento execratorio, se non nouisse illum. Deniq. Discipuli eius cum nondum intelligerent sacramentum Dominicæ passionis, & apprehenderent passionē, & mortem Domini, ut rem noxiam, & sibi, & Christo; non mirū est, si tunc eā abominarentur. Vnde etiā ei dicebant, Nunc te quærebant Iudæi lapidare, & iterum vadis illuc? Ioan. 11. Et S. Petrus audita prædictione passionis, abominatus eam dixit, Absit à te Domine, non erit tibi hoc. Matth. 16. Vtranque expositionem attingit Sanctus Augustinus, sed anteponit primam. S. Hieronymus per notos, intelligit Apostolos; per abominantes, intelligit Iudæos: ut & Euthymius: Sed difficile est ita diuidere, cum pronomen, sibi, referatur ad notos: illi enim posuerunt eum abominationem sibi, qui longè facti sunt ab eo, quamuis noti eius essent.

Traditus sum, & non egredie bar, oculi mei languerunt præinopia.

Clamaui ad te Domine tota X. die, expandi ad te manus meas.

Explicata passionis magnitudine, reuertitur ad initium passionis, & ad initium Psalmi, id est, ad orationem, qua deprecatur mortem corporalem, ut fecit in hortō, vel certē longiorem morā in morte. Traditus sum, inquit, & nō egrediebar, id est, traditus sum quasi in carcerem, & conculsus vndique in de-

cretam a te passionem, unde egredi nō potero; & ideo oculi mei, lacrymis multis effusis, languerunt, vt quasi siccati sint præ inopia humoris. Illud enim, traditus sum, in hebræo significat, traditus sum in carcerē, siue cōclusus sum in carcere. Sed per carcerem intelligimus angustias passionis, & quoniam videbat, Dei præscientia, & prædefinitione, se traditum in eiusmodi angustias; ideo dicit, Et non egrediebar, id est, nō poteram, nec volebam egredi, stante decreto Patris æterni. Clamaui ad te Domine tota die. hoc idem habetur in principio Psalmi, & declaratur ab Apostolo ad Hebr. 5. Qui in dieb. carnis suæ preces, supplicationesq. ad eū, qui posset illum saluum facere à morte, cum lacrymis, & clamore valido offerens, exauditus est pro sua reuerētia. Dicitur autem clamasse tota die, quia, & die, & nocte clamaui, vt dicitur in primo versiculo; nam ex die, & nocte completur dies naturalis, ac per hoc tota dies dicitur vtraq. pars diei, quamuis nō vtraque pars integra sit. Expandi ad te manus meas, orando videlicet, vel expandi in cruce manus meas, vt tanto oblato sacrificio facilius impetrarem, & mihi celerem resurrectionem, & corpori meo mystico liberationē à morte sempiterna. Neque obstat, quod non expandit Christus manus tota die: illud enim, tota die, refertur solū ad clamorem, non autem ad expansionem manuum. S. Augustinus exponit omnia mysticē, quoniam non existimabat posse ad litteram ostēdi, quō Christi oculi potuerint languere præ inopia; neq. quō tota die clamauerit, & extenderit manus suas.

- XI.** Nunquid mortuis facies mirabilia, aut Medici suscitabunt, & confitebuntur tibi?
- XII.** Nunquid narrabit aliquis in sepulchro misericordiam tuā, & veritatem tuam in perditione?
- XIII.** Nunquid cognoscentur in tenebris mirabilia tua, & iustitia tua in terra obliuionis?

Reddit rationem Propheta in persona Christi, cur à morte saluari petierit. Possunt autem hi tres versiculi tribus modis exponi, primum de morte æterna, quam Christus à membris suis, id est fidelibus suis amoueri orauerit: & in hoc sensu facilē est intelligere hos tres versiculos. Redditur enim ratio, cur petendum, & optandum sit, vt hæc mors amoveatur à fidelibus; quia Deus erga damnatos ad mortem æternam, non ostendere solet, nec debet mirabilia sua: neque illi vnquam resurgere debent ad vitam beatam; neque narrabūt cum laude misericordiam, & veritatē Dei: denique quia non solū non narrabunt ista, sed neq. cognoscent. Contra hanc expositionē facit, quod hic nominantur sepulchra, & Medici: sepulchra. n. sunt corporum mortuorum, non animarum damnatarum, & Medici si experimentum vllum facere audeant, circa corpora, non circa animas audent. Secunda expositio est, quod per mortuos, & sepultos intelligantur obstinati in peccato, apud quos parum valent mirabilia Dei, & quos Medici spirituales, quantumuis magni, non resuscitant. Hanc persequitur S. Augustinus, & ex parte etiam S. Hieronymus: sed mystica est interpretatio, non literalis. Tertia est Theodoretī, & Euthymij, quod intelligantur hæc omnia de morte corporali, quam Christus à se, & suis deprecatur, optans, & petens celerem resurrectionē; & tunc sensus hic erit, Nunquid mortuis facies mirabilia? id est, horreo mortem, cupio vitam conseruari, aut breui restitui mihi, & fidelibus meis: quoniam mortuis, qui non viuunt, nec sentiunt frustra ostenderes mirabilia opera tua, quæ tamen mirabilia honorificum est te facere, & iustū est, vt agnoscantur, & tibi gratiæ agantur. Nunquid Medici suscitabunt, & confitebuntur tibi? id est, mortui non solū non viuunt, nec sentiunt, sed neque arte vlla humana suscitari possunt, vt sentiant, & viuant, & tibi confiteantur confessionem laudis. Nunquid narrabit aliquis in sepulchro misericordiam tuam, & veritatem tuam

in perditione? id est, ideò non facis mortuis mirabilia tua, quia illi in sepulchris iacent sine sensu, & mirabilia tua narrare non possunt, quæ mirabilia sunt misericordiæ, & veritatis tuæ opera. Perditio autem hoc loco amissionem vitæ corporalis significat: proinde iacere in sepulchro, & in perditione idem est: soli enim in sepulchris iacent, quorum vita perditæ, & extincta est. Nunquid cognoscentur in tenebris mirabilia tua, & iustitia tua in terra obliuionis? id est, ideò non narrabunt mortui in sepulchris mirabilia tua, quia non ea cognoscunt, neque cognoscere possunt, cum degant in tenebris mortis, & in terra obliuionis, vbi nulla est memoria rerum præteritarum, sicut nec sensus rerum præsentium. Hæc expositio confirmari potest ex verbis Regis Ezechiae apud Isaiam cap. 38. qui sine vilo dubio petebat vitam corporalem sibi conseruari a Deo, & dicebat, Quia non infernus confitebitur tibi, neque mors laudabit te; viuens, viuens ipse confitebitur tibi, sicut & ego hodie. Similia habentur in Psal. 113. Non mortui laudabunt te Domine, neque omnes qui descendunt in infernum, sed nos qui viuimus benedicimus Domino. Quod attinet ad verba, in hebræo pro illis verbis, aut Medici suscitabunt, habetur, aut Gigantes resurgēt. Sed hæc varietas nata est ex ambiguitate vocis hebraicæ, vt etiam sanctus Augustinus admonuit: nam vox, rephaim, quæ significat Gigantes, vel mortuos: si scribatur, ropheim, vno puncto duntaxat mutato, significat Medicos. Sic autem legisse Septuaginta Interpretes certissimum est. Quod autem rectè legerint, & verterint, ex hoc etiam cognosci potest, quòd radix huius vocabuli est, rapha, quæ significat, mederi, siue sanare. Quando enim, rephaim, accipitur pro Gigantibus, vel mortuis, debet sumi aleph, pro, he: nam radix est, raphaph, quæ significat, dissoluere, vnde dicuntur mortui, rephaim, quasi resoluti in cineres, & Gigantes dicuntur, rephaim, quasi qui terribili aspectu suo dissoluant intuentes. Illud autem, יָקִים iacumu, similiter est ambiguum, & po-

test significare, tam resurgent, quàm suscitabunt: & ideò Interpretes accommodatè transtulerunt, siue resurgent, siue suscitabunt. Illud, & confitebuntur tibi, aliqui referunt ad Medicos, quasi dicat Propheta, Nunquid Medici suscitabunt mortuos, & laudabunt te, quod tantam virtutem medicinæ tradideris? Sed rectius refertur ad mortuos, vt sensus sit, Nunquid Medici suscitare poterunt mortuos, & ipsi mortui laudabunt te? Et sic exponit sanctus Augustinus. Denique illud, in terra obliuionis, ambiguum est: potest enim significare in loco, vbi est obliuio omnium rerum, & talis est regio mortis: vel in loco oblito, cuius loci videlicet nemo amplius recordatur. Codex hebræus ambiguus est; Septuaginta Interpretes, & S. Hieronymus interpretati sunt posteriore modo. Consequentia autem sermonis videtur requirere priorem sensum: sed vterque sensus in idem recidit. Terra enim obliuioni data, est terra deserta, & desolata, ad quam nemo viuens accedit: proinde nemo est ibi, qui vilius rei recordetur, cum nemo sit ibi viuens, & sentiens.

Et ego ad te Domine clamaui, XIIIIL
& mane oratio mea præueniet te.

Vt quid Domine repellis orationem meam? auertis faciem tuam a me? XV.

Demonstrat in fine Psalmi diuino decreto confirmatam fuisse Christi passionem, vt mutanda omnino non esset: & pluribus verbis (vt initio diximus) explicatur illud in cruce breuissimè dictum a Domino, Deus meus, vt quid dereliquisti me. Et ego ad te Domine clamaui, vt videlicet, calix passionis transfret a me, & mane oratio mea præueniet te, id est, satis tempestiuè, in ipso exortu passionis oratio mea præueniet te: nam etiam si oratio Christi in horto fusa, nocturno tempore fuerit fusa, tamen dicitur mane fusa, quia
tunc

tunc oriri incipiebat ipsa passio, & erat illud tempus quasi aurora passionis. Ut quid repellis orationem meam, id est, quare non exaudis? quare non facis, ut calix iste transeat a me? Auertis faciem tuam a me? id est, quare auertis faciem tuam a me, quasi alienus? quare derelinquis me? Hæc autem dicuntur, ut intelligatur magnitudo passionis, quam natura humana naturaliter horrebat: alioquin enim absolute Dominus ipse, passionem, ut remedium ad tollenda peccata generis humani, omnino volebat, & eligebat, & Pater eum semper exaudiuit in eo, quod absolute petijt. In hebraico, & græco textu habetur, Ut quid Domine repellis animam meam? pro eo quod nos habemus, Ut quid Domine repellis orationem meam? sed etiam veteres Patres, Hieronymus, & Augustinus legunt, orationem meam. Proinde latina vulgata lectio non est noua; & una lectio aliam declarat. Sensus enim est, Ut quid Domine repellis orationem animam meam.

XVI. Pauper sum ego, & in laboribus a iuuentute mea: exaltatus autem humiliatus sum, & conturbatus.

Ne putarent homines Christi passionem trium horarum, aut vnius diei tantum fuisse: reuelat hic nobis Spiritus sanctus, Christum in diebus carnis suæ nunquam sine passione vixisse. Nam præter calicem mortis amarissimæ, quem semper ante oculos mentis habuit, in omni ætate sua in laboribus & ærumnis fuit. Pauper, inquit, sum ego, & in laboribus a iuuentute mea, id est, cum in forma Dei essem beatus, & diues propter vos homines egenus factus sum, & in laboribus a iuuentute mea, siue a pueritia mea, quod significat vox hebraica. Poterat etiam verè dicere, ab infantia mea, vel a natiuitate mea; quod præsepe, & spelunca Bethlehemitica, & in Aegyptum fuga, exiliumque testantur. Exaltatus autem in cruce, tanquam in solio Regni, habens super caput titu-

lum scriptum, Iesus Nazarenus Rex Iudæorum, humiliatus sum usque ad mortem, & conturbatus ob cæcitatem, & ruinam populi mei. Vel, exaltatus autem a populis clamantibus, & dicentibus, Benedictus, qui venit Rex in nomine Domini, ut habetur Luc. 19. vel, Benedictus qui venit in nomine Domini Rex Israel, ut dicitur Ioan. 12. humiliatus eadem causa usque ad flagella, & mortem crucis, & conturbatus sum videns cæcitatem populi mei. In hebræo, pro, exaltatus autem humiliatus sum; habetur ex versione sancti Hieronymi, Portaui furorem tuum. Sed Septuaginta Interpretes aliter acceperunt verbum ambiguum *nasathi*, nam & portare, & exaltare, vel exaltari significat. Itaque S. Hieronymus unam significationem, aliam Septuaginta Interpretes sequuti sunt. *אִמֵּךְ* Vocem autem, *emecha*, furorem tuum, Septuaginta legisse videntur a verbo, *macac*, quod humiliari, & depauperari significat. *נִשְׁאַתִּי* *אִמֵּךְ* *מִכָּה* *אִמֵּךְ*

In me transierunt iræ tuæ, XVI. & terrores tui conturbauerunt me.

Reddit causam, cur exaltatus humiliatus sit; quia videlicet, iræ Dei in peccata multa, & multiplicia totius generis humani, in ipsum Christum transierunt: nam propter scelus populi sui percussit eum Deus. Et ipse (ut S. Petrus ait) peccata nostra pertulit in corpore suo super lignum. In me, inquit, transierunt iræ tuæ, quæ super iniquos casuræ erant; & terrores tui, quibus iniqui percellendi erant, conturbauerunt me; inde est enim, quod in horto cœpit pauere, & cadere, & mœstus esse, quia terrores Dei conturbabant eum, ut qui peccata totius Mundi expiaturus, diuinæ iustitiæ satisfactorus erat.

Circūdederunt me sicut aqua tota die, circūdederunt me simul. XVIII.

Declarat iram illam, & terrores Dei fuisse

fuisse instar maris deglutientis, & absorbentis hominem, quod supra breuiter dixerat, Repleta est malis anima mea. Circumdederunt me terrores tui, sicut aqua tota die, id est, vndique & semper me opprimebant, & absorbebant. Idem repetit, dicens, Circumdederunt me simul. vbi in hebræo est aliud verbum, sed idem significans.

XIX. Elongasti a me amicum, & proximum, & notos meos a miseria.


Hoc denique ad cumulum malorum accedebat, quod solus calicem illum amarum bibere opus illi erat, nullo particeps, & socio tantæ calamitatis. Elongasti, inquit, tempore passionis, a me amicum, & proximum, Iudam videlicet, qui longissimè ab illo recessit factus proditor, & hostis ex amico, & proximo. Et omnes notos, Apostolos videlicet, elongasti a miseria mea: nam relicto eo omnes fugerunt. Et quamuis postea mulieres, & Ioannes accesserint: illi non dolo rem minuebant, sed augebant. Verè enim apud Isaïam loquitur Dominus, Torcular calcaui solus, & de gentibus non est vir mecum, circumspexi, & non erat auxiliator, quæsiui & non fuit, qui adiunaret. Isaia 63. In hebræo pro, a miseria, habetur, a tenebris: sed idem est sensus: tenebræ siquidem miseriam significant, ut lux prosperitatem. Sæcælus

Augustinus a versu quintodecimo vsque in finem exponit omnia de corpore Christi, quod est Ecclesia, non de ipso Christo in se.

PSALMVS LXXXVIII.

Titulus, & Argumentum
Psalmi.

Intellectus Ethan Ezraitæ.



DE Ethan Ezraitæ metio fit li. 3. Reg. c. 4. Vbi is ponitur inter viros sapientes. Est etiam Ethan vnus ex Principibus Cantorū li. 1. Paral. c. 6. Vtrum autē isti sint vnus, & idē, an diuersi; & si diuersi, quis eorum in hoc titulo ponatur, incertum est. Græci legunt, Ethā Israelitæ; sed videtur id vitio librariorum irrepsisse: codices. n. hebraici, & latini habent, Ethan Ezraitæ. Argumentum Psalmi continet desiderium populi Dei in captiuitate positi, ut cito Christus tanto ante promissus adueniat. Itaque primo loco ab initio Psalmi vsque ad versiculum tricesimum septimum explicatur promissio facta Dauidi de perpetuitate Regni ipsius. Deinde a versiculo tricesimo septimo vsque ad versiculum quadragesimum quintum, ostenditur, eam promissionē non fuisse adimpletam in filiis carnalibus, & Regno temporali Dauidis. Denique a versiculo quadragesimo quinto vsque ad finem, ponitur desiderium, & oratio, ut promissio adimpleatur in Christo, vero, & sempiterno Rege, de quo intelligenda erat; non autem de terreno Regno. Nam vt S. Augustinus fusè docet in lib. 17. de ciuit. Dei cap. 9. 10. 11. 12. & 13. ea præcipuè de causa voluit Deus Regnum terrenum Dauidis finire in Lechonia, & Sedechia, ut promissio de Christo Iesu Domino nostro intelligeretur atq; hoc admonet vox, intellectus, in titulo posita.

Expli-

Explicatio Psalmi 88.

L Misericordias Domini in æternum cantabo.

Hæc est propositio, & argumentum totius Psalmi. Dicit enim Propheta, se in hoc Psalmo cantaturum misericordias Domini stables, & firmas, id est, beneficia misericorditer promissa, quæ nunquam deficient. quæ apud Isaiam dicuntur cap. 55. Misericordiæ David fideles. Illud ergo, in æternum, non coniungitur cum verbo, cantabo, sed cum nomine, misericordias. Nō enim David in æternum cantare poterat, qui paulō post moriturus erat: sed cantaturum se dicit misericordias Domini in æternum permansuras, id est, beneficia firma, & stabilia in æternum. Parū autem refert, quōd in græcō codice legatur, Misericordias tuas Domine: in hebræo autem, & latino, Misericordias Domini: nā idem est sensus, & priorem lectionem habet sanctus Augustinus, posteriorem S. Hieronymus.

II. In generatione, & generationē annuntiabo veritatem tuam in ore meo.

Hic secundus versiculus est repetitio & explicatio primi: idem enim est, in æternum, quod, in generationem, & generationem: idem quoque est, cantabo, quod, annuntiabo in ore meo: idem denique est, misericordias fideles, quod, veritatem tuam. Itaque in primo versiculo dicit, se cantaturum misericordias Domini, quæ in æternum erunt: in secundo dicit, se cantaturum veritatem Domini, id est, fidelitatem in seruandis promissis, quæ in generationem, & generationem permanebit. Quod autem hoc loco illud, In generationem, & generationem, debeat coniungi cum nomine, veritatem tuam, non cum verbo, annuntiabo; perspicuum est ex illa additione,

in ore meo: ne fortè enim existimaremus, voluisse Dauidem dicere, se cantaturum, & annuntiaturum in æternum per ora fidelium, qui perpetuō Psalmos eius cantabunt, addidit, in ore meo, id est, ego ipse ore meo cantabo, & annuntiabo misericordiam, & veritatem Dei sempiternam. Sed hunc esse sensum horum versiculorum, manifestius intelligitur ex versiculo sequenti.

Quoniam dixisti, In æternum III. misericordia ædificabitur in cœlis; præparabitur veritas tua in eis.

Probat, æternam esse misericordiam, & veritatem Dei, id est, in æternum duraturas; quoniam Deus ipse hoc dixit, qui mentiri non potest. Ego, inquit, cantabo misericordiam, & veritatem tuam, quæ in æternum erit, quoniam tu dixisti & mihi Propheta tuo reuelasti, In æternum misericordia ædificabitur in cœlis, id est, beneficia misericorditer Davidi promissa in æternum ædificium in cœlis consurgent, id est, firma, & stabilia erūt, vt ædificium immobile, quod nulla temporum duratione destrui potest. In cœlis autem hoc misericordiæ ædificium erit, vbi sunt omnia æterna. Non. n. euentus pendeat a voluntate hominū mortalium, neque consilijs, & decretis mutabilibus nitetur; sed in cœlis fundamentum suū habebit. Præparabitur veritas tua in eis, id est, in ijsdem cœlis fidelitas tua, qua promissa adimplet, præparabitur. Vox hebraica ducitur a verbo, cun, quod significat, parare, firmare, dirigere, ordinare. Itaque sensus est, Fidelitas tua non poterit impediri ab vlla inferiore causa, quoniam in cœlis firmabitur, & stabilietur: & similis erit ipsis cœlis, qui permanent in seculum seculi. In hoc versiculo est aliqua varietas lectionis: nam in hebræo legitur in prima persona, Quia dixi: in græco, & latino in secunda, Quoniam dixisti: sed in hebræo vnius solius literulæ, quæ scribitur sic, ך, differentia est inter primam, & secundam personam. Itaque facillè fuit literu-

terulam illam addere, vel demere librarijs. Sensus est idem: nam si legatur, dixi, sensus erit, te inspirante dixi: si legatur, dixisti, sensus erit, per os meum dixisti, vel mihi dixisti. Illud, in cœlis, in græco coniungitur cum verbo, præparabitur, & omittitur illud, in eis, hoc modo, In cœlis præparabitur veritas tua: sed quoniam in hebræo habetur, in eis, distinctio, & lectio communis vulgaræ editionis retinenda est, quæ coniungit, in cœlis, cum verbo ædificabitur: & non omittit, in eis. Hebræus codex non concordat neque cum græco, neque cum latino: sic enim Sanctus Hieronymus ex hebræo reddit, Cœlos fundabis, & veritas tua in eis. Et quidem hanc lectionem voces hebraicæ patiuntur: sed sententia non videtur apte cohærere cum præcedentibus, neque facile intelligi posse. Quid enim est, Misericordia præparabitur: cœlos fundabis, nōne cœli ab initio fundati sunt? cur debent iterum fundari? & quemadmodum de misericordia dicitur, ædificabitur; nonne aptum erat, ut de veritate diceretur, præparabitur, vel, firmabitur, aut, fundabitur? Et vox תכין, hebraica, tachin, facile potest per mutationem punctorum, & iod in vau, verti in תיחון, quod est, præparabitur, vel firmabitur. & sic legisse credibile est Septuaginta Interpretes. De voce, in cœlis, non est facienda difficultas, quoniam etiam si in hebræo desit præpositio, in, & ideo sanctus Hieronymus verterit, cœlos: tamen sæpe Hebræi præpositionem omittunt, eamq. subintelligunt: & Septuaginta Interpretes eam addere solent, ut hoc loco fecerunt.

IV. Disposui testamentum electis meis: iuravi David seruo meo, usque in æternum præparabo semen tuum.

V. Et ædificabo in generationem & generationem sedem tuam.

Explicat nūc misericordiam fidelm,

quam initio cantaturum se dixit. Est autem hæc misericordia, promissio quædam pacto, & iuramento firmata de posteritate Davidis, & Regia dignitate sempiterna. quæ promissio habetur 2. Reg. 7. ubi David cupiuit ædificare domum Domino, id est, templum, ubi requiesceret Arca Dei, & sacrificijs Deus coleretur. Deus autem hoc bonum Davidis desiderium remuneravit p Nathan Prophetā, promissione domus eius ædificandæ, id est, propagandæ posteritatis, & Regni in domo eius stabiliendi usque in sempiternum. Hoc igitur significat, cum ait, Disposui testamentum electis meis, id est, percussis frædus cum populo meo electo. Iuravi David seruo meo, id est, promisi cum iuramento Davidi Principi populi mei electi, Usque in æternum præparabo semen tuum, id est, hoc erit pactum iuratum, ut stabiliam sobolē eius usque in æternum, ut nunquam desit filius aliquis Davidis. Aedificabo in generationem, & generationem sedem tuam id est, & multiplicabo tempora Regni tui in æternum. Quemadmodum enim ædificare domum, hebraica phrasi, est multiplicare sobolem: sic etiam ædificare sedem Regni, est multiplicare tempora Regni, siue efficere, ut Regnum diuturnum, vel potius æternum sit. Hæc omnia sine dubitatione in Christum solum conveniunt, qui futurus erat de semine David, & regnaturus in æternum. Declaravit hoc Isaias cap. 9. ubi ait, Multiplicabitur eius imperium, & pacis non erit finis: Super solium David, & super Regnum eius sedebit, ut confirmet illud & corroboret in iudicio, & iustitia, a modo, & usque in sempiternum. Id etiam declaravit Angelus Gabriel Luc. 1. Dabit ei Dominus Deus sedem Davidis patris eius, & regnabit in domo Iacob in æternum, & Regni eius non erit finis. Neque possunt hæc intelligi de Regno temporali, quod iam dudum eversum est, sed de Regno spirituali, & sempiterno, in quo Iudæi valde hallucinantur, & errant expectantes Messiam, qui Hierosolymis temporaliter regnet. In hebræo legitur in singulari, electo meo, sed

sed Septuaginta verterunt in numero multitudinis, electis meis: nam populus electus per vtrunque numerum significari potest. In eodem hebraico codice legitur ad verbum, *Pepigi pactum, pro quo nos habemus, Disposui testamentum.* Sed Septuaginta plerumque pactum, testamentum vocant. Vulgatus quoque *Interpres lib. i. Machab. cap. i. scribit, Disponamus testamentum in gentibus: quod nihil aliud est, nisi pactum faciamus cum gentibus.*

VI. Confitebuntur cœli mirabilia tua Domine, etenim veritatē tuā in Ecclesia Sanctorum.

Exposita summa promissionis Dei, an tequam fufius illam explicet, excurrit in laudes eiusdem Dei, vt offerat sacrificium gratiarum actionis: ac primum sanctus Dauid videns se non esse idoneum ad agendas gratias pro tanto beneficio, dicit, Angelos in cœlo Deum laudaturos, gratiasq. acturos. Confitebuntur, inquit, cœli mirabilia tua, id est, ego par non sum tantæ laudi, quanta pro hac re tibi debetur, sed confitebuntur, id est, laudabunt cœli, id est, Angeli habitâtes in cœlis, mirabilia tua, id est, admirabilem misericordiam tuam; etenim veritatem tuam in Ecclesia sanctorum, id est, confitebuntur etiam laudes veracitatis, & fidelitatis tuæ in cœtu sanctorum Angelorum, qui tibi innumerabiles semper assistunt. Illi enim melius nouerunt magnitudinem misericordiæ, quæ in æternum ædificatur in cœlis, quàm nos, qui in terra iacemus. Illud, et enim, non est particula rationalis hoc loco, sed coniunctiua, idem valens, quod, &, vel, etiam: nam in hebræo est, *af*, quod significat, etiam.

VII. Quoniam quis in nubibus æquabitur Domino: similis erit Deo in filiis Dei?

Probat Angelos non recusaturos offi-

cium laudandi Deum, quoniam sunt ipso Deo longè inferiores. Quoniam, inquit, quis in nubibus æquabitur Domino? id est, Quis eorum, qui super nubes cœli degunt, æquabitur Domino? quasi dicat, nullus cœlitum conditori cœli æqualis est, omnes subiecti, omnes serui: ac deinde id ipsum repetit, dicens, Similis erit Deo in filiis Dei: id est, quis ex filiis Dei, quales sunt Angeli sancti, qui cum sint filij Dei, consequenter etiam *Dij* sunt, similis erit similitudine æqualitatis, ipsi vni vero Deo, qui Deus est per naturam, non per gratiam; per essentiam, non per participationem. Illud, in nubibus, idem est, ac si dictum fuisset, in cœlo. Vox enim hebraica vtrunque significat; & tum Septuaginta, tum sanctus Hieronymus eandem vocem hebraicam, *sciachac*, hic verterunt, nubes, & paulò infra verterunt, cœlum, vbi dicitur, *Et testis in cœlo fidelis.* Itaque non significatur hoc loco, quod Angeli propriè sint in nubibus, sed quod sint in cœlo. Nubes enim pro cœlo ponuntur. Sanctus Augustinus existimauit, sensum esse, nullam ex nubibus æquari posse Deo; & quia videbatur nimis humilis esse comparatio nubium ad Deum; per nubes significari voluit prædicatores, per Dominum verò, Deum incarnatum, id est, Christum: sed prior expositio est magis literalis.

Deus qui glorificatur in consilio VIII. Sanctorum, magnus, & terribilis super omnes, qui in circuitu eius sunt.

Ostendit, verè nullum Angelorum sanctorum cōferri posse cum Deo; quoniam Deus est, qui glorificatur in consilio Sanctorum, id est, qui in cœtu supernarum potestatum gloriosus agnoscitur; Magnusque est potentia, & sapientia, & ideò reuerendus, & metuendus super omnes Angelos, qui in circuitu eius sunt, vt milites in circuitu Regis, & serui in circuitu Domini sui. Verbum, glorificatur, in hebræo propriè significat, robustus

710 bustus est, praeuallet, eminent. sanctus Hieronymus vertit, inclutus est. Illud, in consilio, accipitur pro loco consilij secreti: nam in hebraeo est, sod, quod secretum significat. Sunt autem Angeli, quasi secretum consilium Dei, non quod Deo consilium dent, (Quis enim eius consiliarius fuit? inquit Isaias cap. 40. & Apostolus Rom. 11.) sed quod Deus secreta consilia sua eis reuelet, & per eos exequatur: atque in hoc consilio sanctorum Deus mirifice glorificatur, admirantibus supernis illis Senatoribus consilia, & iudicia infinitae sapientiae Dei. Illud, In circuitu eius sunt, non repugnat immensitati Dei, quae omnia ambit, & replet: nam quamuis Deus sit ubique, tamen non extenditur per loca, sed est ubique totus, & ideo possunt Angeli esse in circuitu Dei, quatenus omnes illum intuentur, & totum vident, quamuis & ipse sit in circuitu Angelorum, eosque vndique circumspiciat, & conseruet. Similis sententia est Apoc. 11. Et omnes Angeli erant in circuitu throni.

IX. Domine Deus virtutum quis similis tibi? potens es Domine, & veritas tua in circuitu tuo.

Quod Propheta dixit in laudibus Dei per modum narrantis: nunc idem dicit ipsum Deum alloquendo, & copiosius laudes eius percurrendo. Domine, inquit, Deus virtutum quis similis tibi? id est, tu Domine es Deus exercituum, multorum videlicet millium Angelorum, sed in his omnibus ita emines, ut nullus sit perfecte tibi similis. Potens es Domine, & veritas tua in circuitu tuo, id est, ideo nullus est perfecte similis tibi, quia tu solus es potens, non potens facere hoc, aut aliud, sed absolute potens, quia omnia potes, & nihil potestati tuae resistit: nec solum potes omnia facere, sed etiam re ipsa facis quod promittis te facturum; fidelis enim es in omnibus verbis tuis. Dicitur autem veritas, id est, veracitas, & fidelitas esse in circuitu Dei, quoniam est veluti cingulum Dei: dicitur enim

turenim Isaia 11. Et erit iustitia cingulum lumborum eius, & fides cintorium renum eius; ut enim cingulum adstringit vestes ut corpori firmiter adhaereat; sic veracitas adstringit verba promissionum, ut non mutantur sed impleantur. & quemadmodum cingulum facit hominem expeditum ad ambulandum, unde dicitur Tobiae 5. Angelum Raphaelé apparuisse, ut iuuenem praecinctum, & paratum ad ambulandum: sic veracitas facit, ut omnibus remotis impedimentis homo expedite progrediatur ad implenda promissa.

Tu dominaris potestati maris x. motum autem fluctuum eius tu mitigas.

Dixit Deum esse potentem, & fidelé: nunc probat Deum esse potentem ex eo quod dominatur mari, & motus eius mitigat. Mare siquidem horrendum in modum aliquando turbatur, & fremit; & quia latissimum, & profundissimum est, & fluctus suos usque ad caelum extollere videtur, ideo creatoris omnipotentia in eo sedando, & cōpescendo cernitur. De qua re sic loquitur Dominus, Iob. 38 Circumdedit illud terminis meis, & posui vectem, & ostia, & dixi usque huc venies, & non procedes amplius, & hic cōfringes tumentes fluctus tuos. & Hier. 5 Me ergo non timebitis, & a facie mea non dolebitis, qui posui arenam terminum mari praecceptum sempiternum, quod non praeteribit; & intumescant fluctus eius, & non transibunt illud. sed maxime Deus ostendit potentiam suam super mare quando siccauit mare rubrum, & motum eius ita mitigavit, ut staret quasi murus hinc atque inde, dum transiret populus hebraeus per medium sicci maris, ut dicitur Exod. 14. Illud, potestati maris, significat elationem, & quasi superbiam maris; ut sensus sit, Tu dominaris superbiae maris, elationes eius comprimendo. Quod explicatur in verbis sequentibus, & motum fluctuum eius tu mitigas.

Tu

XI. Tu humiliasti sicut vulneratum superbum: in brachio virtutis tuæ dispersisti inimicos tuos.

Hæc ad literam videntur intelligenda de Pharaone, & exercitu eius: & rectè coniunguntur cum superioribus verbis. Eodem enim tempore Deus mitigavit mare, usque ad siccationem, & interfecit superbum Pharaonem, quasi vulneratum, & debilem, & dispersit exercitum eius. Quod clarius legitur apud Isaiam cap. 51. Nunquid non tu percussisti superbum, vulnerasti draconem? nūquid non tu siccasti mare, aquam abyssi vehementis, ut transirent liberati? Ergo, inquit, tu humiliasti superbum, deiiciens illum in profundum maris, humiliasti autem nullo negotio, quemadmodum prosternitur facillimè is qui graviter vulneratus est, In brachio virtutis tuæ, id est, brachio tuo potentissimo dispersisti per mare rubrum inimicos tuos, exercitum videlicet Pharaonis. Possunt etiam hæc omnia referri ad Diabolum, qui per Pharaonem in scripturis significatur, & ad Angelos eius. Deus enim initio Mundi dominatus est potestati maris, & mitigavit motum fluctuum eius, quando sedavit seditionem, & tumultum malorum Angelorum, quasi maris turbati, & æstuantis, cuius fluctus, id est, superbia usque ad solium Dei eleuabatur, humiliavit superbum Diabolum, quasi hominem præ vulneribus debilem, & imbecillum, & dispersit omnes inimicos suos, qui Diaboli superbiam imitati fuerant.

XII. Tui sunt cæli, & tua est terra, orbem terræ, & plenitudinem eius tu fundasti: Aquilonem & mare tu creasti.

Docet, non esse mirum, si Deus tam facile compefecit mare, & humiliavit superbum, quia Dominus est vniuersorū, & ideo Dominus, quia omnia fecit. Tui sunt cæli, & omnes habitantes in eo:

tua est terra, id est, Mundus inferior, & quidquid in eo est; solet enim scriptura per cælum, & terram mundum vniuersum significare. ut Gen. 1. In principio creauit Deus cælum, & terram. Et Matth. 11. Confitebor tibi Pater, Domine cæli, & terræ. Orbem terræ, & plenitudinem eius tu fundasti, id est, ideo tu absoluti iuris est orbis terræ cum omnibus rebus, quibus plenus est, quia tu eum fundasti, id est, a fundamentis fecisti, nullo præsupposito fundamento ab alio Architecto constituto. Aquilonem & mare tu creasti, id est, tu fundasti orbem terræ, cum omnibus suis partibus, septentrionali, australi, orientali, & occidentali. Per Aquilonem intelligitur pars orbis septentrionalis omnium consensu, sic dicta a vento, qui ab illa parte flare sentitur. Per mare aliqui intelligunt occidentem, sed refelluntur ab ipso Propheta in Psal. 116. A solis ortu, & occasu, ab Aquilone & mari. Igitur per mare intelligitur pars orbis australis, quoniam mare oceanum maxima ex parte iacet ad Austrum. In hebræo non est, iam, quod significat mare, sed, iamin, quod significat dextrum; ideo vel dicendum est Septuaginta Interpretes legisse, iaminim, quod est maria, ut etiam legit S. Augustinus: vel reddidisse sensum non verba. Mare enim, siue Austrum, dextra pars mundi censeretur, Aquilo sinistra, Oriens anterior, Occidens posterior. Sed cur Propheta tam accuratè meminit creationis orbis terræ, & partium eius, & de creatione cæli nihil dicit? Opinor, quia de hominibus habitatoribus terræ magis sollicitus erat, ut eis persuaderet, Deum esse verum eorum dominum, quàm de Angelis habitatoribus cæli, quibus ea persuasio necessaria non erat; quamquam etiam ab vna parte de toto iudicium fieri poterat.

Thabor, & Hermon in nomine XIII.
tuo exultabunt: tuum brachium cum potentia.

Dixerat, Deum creauisse Aquilonem, & mare, id est, Austrum: nunc addit orientem,

tem, & occidentem. Sed more poetico describit orientem, & occidentem per montes Thabor, & Herimō, quorū vnus est terræ promissionis ad oriētem, alius ad occidētem: sicut ēt poetico more describit creationem per effectum exultationis, ac si diceret, oriens, & occidens a te creati exultabunt, & gestiēt, & in laudes tuas suo modo prorumpent, ob tam insigne beneficiū creationis. His dictis concludit, tuum brachiū cum potentia, id est, ex creatione cœli, & terræ, vt ēt ex eo quod dominaris potentia maris, & humiliasti superbum, & dispersisti inimicos tuos, colligimus, tuum brachiū esse fortissimum, coniunctum videlicet non cum debilitate, vel infirmitate, sed cum absoluta omnimodaq. potentia.

XIIII. Firmetur manus tua, & exaltet dextera tua; iustitia, & iudiciū præparatio sedis tuæ.

Duo quædam prædicauerat de Deo sanctus Propheta in octauo versiculo, potentiam, & veritatem; ac de potentia multa dixit in quinque versiculis nono, decimo, vndecimo, duodecimo, & tertio decimo: nunc incipit explicare, & laudare veritatē, quæ iudiciū ēt, & iustitia dicitur, & cum misericordia semper coniuncta esse solet. Ait igitur, firmetur manus tua, & exaltet dextera tua: iustitia, & iudiciū præparatio sedis tuæ, id est, opto quidē, & gaudeo quod manus tua firmetur, id est, roboretur, siue potens, & robustissima sit: & eadem dextera tua exaltetur, id est, laudetur, & magnificetur ab omnibus, vt æquū est; sed simul iustitia, & iudiciū, sit præparatio sedis tuæ, id est, misericordia, & iustitia præparent, ornent, & stabiliant thronū tuum. Existimamus hoc loco per, iustitiam, intelligi bonitatem, & misericordiam, quo modo accipitur nomen iustitiæ, Matth. 5. Nisi abundauerit iustitia vestra plusquam Scribarum, & Phariseorum &c. & Matth. 6. Attendite ne iustitiam vestram faciatis coram hominib⁹. Vbi per iustitiam significatur eleemosyna. & ibidem, Primum quærite Regnum

Bellarmin. in Psalm.

Dei, & iustitiam eius. Nam hoc idē repetitur alijs verbis in sequenti versiculo, Misericordia, & veritas præcedent faciem tuam. Est autē hoc loco metaphora desumpta a corporali folio Regum: quemadmodum. n. antequam Rex procedat ad solium iura daturus, præcedunt famuli, qui solium præparant, stabiliunt, & ornant; sic ad iudiciū Dei præsupponuntur misericordia, & iustitia, quæ faciunt vt iudicia Dei iustissima sint, nec possint villo modo esse iniqua. Deus. n. primo exhibet misericordiam magnam hominib⁹. omnibus, docendo per leges, iuuando per gratiam, incitando ad bonum per præmiorum promissionem, absterrendo a malis per comminationem pœnarum; & postea exhibet iustitiam remunerando bonos, & puniendo malos: nisi. n. misericordia præcederet iustitiam, omnes periremus. Hinc etiam admonentur Reges, & Principes terreni, thronos eorum multo melius ornari, & stabiliri misericordia, & iustitia, quàm auro, & gémis; nec minus debere bonos Principes dare operam, vt peccata non fiant, quàm vt puniantur, cum facta sunt: non enim de sunt aliquando si non Principes ipsi, at certē aliqui ipsorum Ministri, qui lætentur multiplicatione delictorum, vt habeant occasionem lucri in exercenda iustitia: quiq. molestē ferant, cum a viris pijs excogitantur remedia ad impedienda, vel minuenda delicta, quasi hoc redundet in detrimentum causidicorū, & iudicum: sed vbi misericordia, & iustitia præparant thronum, cupiditas, & iniquitas locum non habent.

Misericordia, & veritas præcedent faciem tuam: beatus populus, qui scit iubilationem. **XV.**

Prior pars huius versiculi apud hebræos, coniungitur cū superiori versiculo; nihil enim est aliud, nisi repetitio illorum verborum, iustitia, & iudiciū præparatio sedis tuæ. Itaq. sensus est, misericordia, & veritas, id est, iustitia, præcedent faciem tuam, vt præparent sedem tuam, cum ad iudiciū venturus

Mineris,

eris, id est, certi sumus, te non iudicaturum, nisi iustissime, & præmissa misericordia, ut minus inuenias quod punias, & fideliter reddas unicuique secundum opera eius. His explicatis de potentia, & veritate Dei cum misericordia coniuncta: applicat hæc ad populum Israeliticum, & in particulari ad ipsum Dauidem; ostendens in populo Dei, & in persona Dauidis maxime locum habere potentiam, misericordiam, & iustitiam Dei. Beatus, inquit, populus, qui scit iubilationem, id est, verè præ omnibus populis felix est populus Israeliticus, qui scit per notitiam, & experientiam has laudes Dei, & scit iubilare, id est, magno affectu laudare Deum. Hinc intelligimus non esse beatum, qui voce tantum Deum laudat, nisi etiam verè intelligat, & cogitet Deum esse laude dignissimum, imò digniorem quam verbis exprimi possit, & ideo ad iubilum cordis recurrendum esse, dum utcumque voce, & cantu eum laudamus.

XVI. Domine in lumine vultus tui ambulabunt, & in nomine tuo exultabunt tota die & in iustitia tua exultabuntur.

Explicat quare beatus sit populus, qui scit iubilare: quoniam, inquit, homines eius populi, non ambulabunt in tenebris, sicut gentes, quæ ignorat Deum, sed conuersi ad Deum in lumine vultus eius ambulabunt viam huius vite: significat autem lumen vultus Dei tum illuminationem intellectus per notitiâ legis, & voluntatis Dei, tum etiam fauorem gratiæ, qua inflammatur affectus; lux enim illuminat, & calefacit. Ex hac autem ambulatione in lumine vultus Dei, sequitur lætitia bonæ conscientie, & gratiarum actio, & ideo in nomine Dei exultabunt tota die, id est, iugiter exultabunt Deum laudantes, & gratias agentes. Et quoniam qui ita ambulant, quotidie magis, ac magis proficiunt, & ascendunt ad maiorem Dei notitiam, & amicitiam, & inde donis maioribus cumulantur, ideo

addit, & in iustitia tua exultabuntur, id est, exultabuntur ad maiorem vite perfectionem, & postea ad gloriam sempiternam, in iustitia Dei, qua seruat promissa, siue in iustitia, quam Deus nobis donat, cum nos quotidie magis, magisque iustificat, id est, iustiores facit. Vbi adinonemur, non in nostra scientia, aut viribus confidendum esse, siue cum incipimus ambulare, siue cum proficimus ambulantes: illud enim in lumine vultus tui, opponitur presumptioni de proprio lumine; & illud, in nomine tuo, opponitur vanæ gloriationi de proprio nomine; & illud in iustitia tua, opponitur superbie Pharisæicæ, qui ignorantes iustitiam Dei, propriam iustitiam statuere volunt, & ideo iustitiæ Dei non sunt subiecti.

Quoniam gloria virtutis eorum XVII.
tu es, & in beneplacito tuo exaltabitur cornu nostrum.

Pergit humiliare superbiam humanam quæ valde facile sibi tribuit quæ Dei sunt & inde meretur amittere, quæ accipiat. Dixi, inquit, in iustitia Dei exaltabitur, quoniam gloria virtutis eorum tu es, id est, virtus, & robur eorum, unde proficiunt, & ascendunt, a te est, non ab illis, & ideo in te, non in se gloriari debet: tu enim es qui das illis virtutem, & gloriosos eos facis. Id autem facis, non quia illi merentur, sed quia tibi placet: nam in beneplacito tuo, id est, in bona voluntate tua erga nos, a qua bona omnia procedunt, exaltabimus cornu nostrum, id est, robusti, & fortes erimus aduersus inimicos nostros.

Quia Domini est assumptio XVIII.
nostra, & sancti Israel Regis nostri.

In hoc enim apparuit beneplacitum Dei, quod ex omnibus populis terrarum placuit illi assumere populum Israel in suum, ac proprium. Domini est assumptio nostra, id est, Dominus ex beneplacito suo, non ex meritis nostris nos assumpsit

in

in populum peculiarem, ac Rex noster esse dignatus est; ideo. n. subiungit, Et sancti Israel Regis nostri. vbi Israel est genitui casus, vt apparet ex textu Hebraico. Dicitur autem Deus a Dauide, & ab Isaia, & alijs Prophetis, sanctus Israelis, quoniam a populo Israel peculiariter sanctificari, id est, sanctus haberi, & dici, & nomen suum nulla blasphemia, aut maledictione, pollui volebat. In hebraeo pro, assumptio nostra, habetur, protectio nostra: sed idem est sensus. Deus enim assumpsit populum Israel, vt eum protegeret, & defenderet.

XIX. Tunc locutus es in visione sanctis tuis, & dixisti posui adiutorium in potente, & exaltaui electum de plebe mea.

Hic iam incipit descendere ad personam suam, tanquam caput populi a Deo peculiariter dilecti. Sed oritur hoc loco grauis quaestio, An haec verba, & sequentia debeant exponi de Dauide, an de Christo, an partim de Dauide, partim de Christo. S. Augustinus exponit omnia de Christo: sed repugnat huic expositio ni quod Apostolus Act. 13. exponit de ipso Dauide illa verba, Inueni Dauid filium Iesse, virum secundum cor meum; quae verba sumpta sunt, partim ex hoc loco, partim ex lib. 1. Reg. cap. 13. Praeterea, quod dicit infra, Et ponam in seculum seculi semen eius; non videtur ad litteram conuenire Christo, qui proprie non reliquit semen, id est, filios: sed optime conueniunt Dauidi, cui Deus promissit. 2. Reg. 7. quod post mortem eius poneret de semine ipsius in throno Regni, & Regnum per ipsum semen aeternum esset. Alij exponunt omnia de Dauide in persona sua; sed repugnant huic expositioni illa verba, Ego primogenitum ponam eum, excelsus pra Regibus terrae, & alia multa, vt infra demonstrabimus. Euthymius exponit partim de Dauide, partim de Christo: sed huic expositioni repugnat continuatio verborum, omnia enim verba ita contexta sunt, & continuata, vt ad eundem pertineant.

Existimo igitur omnia exponenda esse ad litteram de Dauide, sed implenda magna ex parte per Christum, ita vt dicatur Dauid primogenitus Dei, & excelsus pra Regibus terrae, non in se, sed in Christo filio suo. & haec videtur esse Theodoretii sententia. Sed si hoc non placeat, adharendum erit omnino sententiae S. Augustini: quod enim omnia dicantur de Dauide in persona propria, Iudaicus error est. Tunc, inquit, quando assumpsit populum Israel in populum peculiarem, prouidisti etiam ei Regem peculiariter tibi placitum: nam locutus es in visione, siue, reuelatione sanctis tuis Prophetis, videlicet Samueli primum, & postea Nathan, vt intelligi potest ex lib. 1. Reg. 16. & lib. 2. cap. 7. Et dixisti, posui adiutorium in potente, id est, posui, siue, constitui auxilium populo meo in homine robusto, & forti corpore, & animo, qui facile poterit liberare populum ab omnibus hostibus eius. Et exaltaui electum de plebe mea, id est, constitui adiutorium populo meo in viro potente, quia exaltaui in Regem & protectorem, ac defensorem populi hominem electum a me de omni plebe mea. Sanctus Augustinus haec etiam exponit de Christo, qui proprie potentissimus fuit, & electus, ac dilectus pra omnibus. In graeco pro, sanctis tuis, habetur filijs tuis, sed Sanctus Hieronymus in Epist. ad Suniam, & Fretellam, dicit omnes Interpretes vertisse, sanctis tuis, vt habetur in hebraeo; excepto auctore sextae editionis, quae habet, Prophetis tuis, & auctore communis editionis, quae habet, filijs tuis. Theodoretus tamen scribit, Simmachum vertisse, filijs tuis: sed in sensu nulla est diuersitas; idem enim & Prophetarum, & filij Dei, & sancti dici possunt.

Inueni Dauid seruum meum, **XX.**
oleo sancto meo unxi eum.

Explicat quis sit ille vir potens, ac dicit, esse ipsum Dauidem, quem inuenit dignum, qui eligeretur, & ungeretur in Regem: & quidem de Dauide ad litteram

Mm 2 haec

hæc exponi possunt, quem constat unicum fuisse a Samuele. Sed etiam per Dauidem hoc loco S. Augustinus intelligit Christum, quem Ezechiel cap. 34. & 37. expresse Dauidem nominat: de cuius vñctione legimus Psal. 44. Vñxit te Deus Deus tuus. Quod autem dicitur, Deum inuenisse Dauidem, metaphoricum est: non enim Deus eget inquisitione, qui omnia quantumvis occulta, vno intuitu respicit: sed dicitur quærere, & inuenire, quia non eligit casu, neque accipit obuium quemque, sed facit sine labore inquirendi, quod facere solent homines, cum post longam, & maturam inquisitionem inveniunt quod optimum est, id est, eligit eum, qui dignissimus, atque aptissimus est.

XXI. Manus enim mea auxiliabitur ei, & brachium meum confortabit eum.

XXII. Nihil proficiet inimicus in eo, & filius iniquitatis non apponet nocere ei.

XXIII. Et concidam a facie ipsius inimicos eius, & odientes eum in fugam conuertam.

Hæc quoque de Dauide utcumque exponi possunt, qui Dei auxilio multas victorias de inimicis suis obtinuit: tamen longe verius exponuntur de Christo. Nam in Dauide profecit inimicus Diabolus, eumque decepit, cum ad crimen adulterij, atque homicidij eum perduxit: profecit quoque in eo inimicus Absalon, & circumuenit, cum eum de Regno expulit, & ad fugam compulit. Sed manus, & brachium Domini, quod est ipsum Dei Verbum, potentia, & sapientia Patris, ita corroborauit humanitatem Christi hypostaticè sibi unitam, ut nihil in eo homine proficere potuerit ullus inimicus: neque eum villo modo decipere, aut circumuenire; sed contra potius, omnes qui eum oderant a facie eius cæsi, & victi in fugam conuersi sint. quamuis enim Christus

flagellis cæsus, & cruci affixus fuerit ab inimicis: tamen hæc passus est, quia voluit, & hac ipsa passione Diabolus vicit & captiuos illi eripuit, & de illo gloriosissimè triumphauit. Iudæos quoque inimicos Christi, videmus hodie dispersos per orbem terrarum, quasi exercitum fuscum, & fugatum.

Et veritas mea, & misericordia XXIV.
mea cum ipso & in nomine meo exaltabitur cornu eius.

Hæc quoque in Dauide vix adumbrata, in Christo perfectissimè impleta sunt: nam veritas, & misericordia Dei cum Christo semper perseuerauerunt. misericordia fuit assumptio humanitatis ad unionem hypostaticam, quæ nunquam dirumpi potuit, ne per ipsam quidem mortem: veritas autem fuit, in eo quod fideliter impleuit Deus, quod Angelus promisit, Luc. 1. Regnabit in domo Iacob in æternum, & Regni eius non erit finis. Ex hoc autem quod veritas, & misericordia semper cum eo perseuerauerunt, factum est, ut in nomine Dei exaltaretur cornu eius, id est, potentia eius eò usque ut in nomine eius omne genu flectatur cælestium, terrestrium, & infernorum. Dicitur autem exaltari potestas Christi in nomine Dei, quia gloria eius est tanquam unigeniti a Patre, & ab omnibus adoratur, ut Filius æterni Patris, & ipse venit in nomine Patris sui, & Deus Pater exaltauit illum, & dedit illi nomen, quod est super omne nomen. Philipp. 2.

Et ponam in mari manum XXV.
eius, & in fluminibus dexteram eius

Ab hoc loco conueniunt fere omnes Augustinus, Hieronymus, Theodoretus & multi recentiorum, non posse exponi verba Psalmi, nisi de Christo, vel de Dauide per filium eius Christum, ita ut tribuatur Dauidi, quod in Christo eius filio impletum est, non enim Dauid habuit potestatem in mari, sed in terra tantum,

tum, eaq. satis angusta. Terra. n. promissionis extendebatur vsque ad mare Palestine, & vsque ad flumen Euphratem, & non ultra. De hoc aut nostro Rege dicitur, ponam in mari manū eius, id est, dabo ei potestatem, et in ipso mari, & in omnibus fluminibus, ac per hoc in oī orbe terrarum: mare siquidem est in finib. terræ circumiens totam terram, flumina autem sunt in medio terræ. Itaq. per mare, & flumina, intelliguntur oīa, fines, & mediterraneum. quod alijs verbis dictū est in Psal. 71. Dominabitur a mari vsq; ad mare, id est, ab vno extremo ad aliud. Possunt et per mare, & flumina intelligi oēs populi, gentiles, & Iudæi: nam aquæ multæ, populi multi Apoc. 17. & mare amarum, & vastissimum, significat gentilitatem, quæ maximam partem generis humani tunc comprehendebat: flumina aquæ dulcis, & modicæ, si comparentur ad mare, significant populum hebraicū, qui tunc erat populus Dei electus, & peculiaris.

XXVI. Ipse inuocabit me Pater meus es tu, Deus meus, & susceptor salutis meæ.

Adhuc apertius loquitur Propheta de Christo, nō de se, nisi, vt diximus, hæc conueniant Dauidi ratione Christi, filij eius. Dauid. n. in toto Psalterio nusquā inuocat Deum sub nomine Patris: proinde non de ipso dicitur, Ipse inuocabit me, Pater meus es tu. Et fortasse particulari prouidentia Dei factum est, vt Dauid nunquam inuocaret Deum sub nomine Patris, vt fecit Isaias, & alij Prophetæ, vt hic locus non acciperetur de Dauide, nisi ratione Christi. Christus. n. initium verborum suorum, quæ in Euangelio leguntur, inde sumpsit, Nesciebatis quia in hijs, quæ Patris mei sunt oportet me esse? Luc. 1. sic etiam vltima verba eius fuerunt in hac vita, Pater in manus tuas commendo spiritum meum. Lu. 23. In toto autem progressu vitæ, frequētissime Deum appellat, sub nomine Patris. Ipse, inquit, inuocabit me, Pater meus es tu, quo ad diuinitatem; Deus meus,

quo ad humanitatem; susceptor salutis meæ, quo ad mortalitatem. In hebræo pro voce, susceptor, habetur, zur, quod petram, siue arcem, siue fortitudinem, & robur significat. Itaq. sensus est, tu es susceptor salutis meæ, id est, tu suscepisti salutem meam custodiendam, vt propugnaculum, siue arx munitissima.

Et ego primogenitum ponam **IXVII.** illum, excelsum præ Regibus terræ.

Hic verò apertissimè de Christo Propheta loquitur: Christus enim, qui secundum diuinitatem Unigenitus est, secundum humanitatem primogenitus est inter multos fratres. Dicitur autem primogenitus tribus rationibus. Primo, quia primus est in prædestinatione: in illo. n. tanquam in capite nos prædestinauit Deus, vt dicitur ad Ephes. 1. Secundo, quia primus est in secunda generatione ad vitam immortalem, vnde dicitur primogenitus ex mortuis, Coloss. 1. & primogenitus mortuorum, Apoc. 1. Deniq; quoniam ipse habuit iura primogenitorum, quem constituit Pater heredem vniuersorum, Hebr. 1. Nec solum posuit illum Pater primogenitum, sed etiam excelsum præ Regibus terræ, id est, Principem Regum terræ, & Regem Regum, vt exponit S. Io. in Apoc. 1. & 19. Habetur in hebræo vox, helion, quod est vnū ex nominibus Dei, & significat excelsū, siue altissimum, nec facilè inuenietur tributum creaturis. hoc nomen habetur in Psalm. 81. Tu solus altissimus in omni terra. & in Psalm. 90. Qui habitat in adiutorio altissimi. Sunt igitur omnes Reges terræ subiecti Christo, vt Regi altissimo quo nihil altius inuenitur. At certè hæc de Dauide, vel Salomone nullo modo dici possunt, nisi ratione Christi, qui ab illis descendurus erat. Non solum. n. non erant altissimi absolute, sed erant inferiores multis Regibus terræ, ac præcipue Regibus Assyriorum, qui eo tempore Monarchiam tenebant.

XXVIII. In æternum seruabo illi misericordiam meam, & testamentum meum fidele ipsi:

Hic iam prædicat Propheta æternitatem Regni Christi, quemadmodum antea prædixerat excellentiam: quam æternitatem non habuit Dauid neque in se, neque in Salomone, neque in alijs filiis, vel nepotibus, qui temporaliter regnarunt in Hierusalem; defecit enim Regnum illud in Iechonia. In æternum, inquit, seruabo illi misericordiam meam, id est, misericordia, qua motus promissi Dauid filium, per quem Regnum eius æternum esset: semper manebit: nam testamentum meum, id est, pactum, & promissio facta illi per Nathan, 2. Regum. 7 fidelissime conseruabitur. Sed si de Christo sint exponenda hæc omnia verba, hic erit sensus, In æternum seruabo illi misericordiam meam, id est misericordia, qua illum prædestinaui, & elegi ante secula, vt esset filius Dei in virtute, primogenitus, & excelsus præ Regibus terræ, semper manebit; non enim soluetur vnquam vnio hypostatica humanitatis cum verbo, ac per hoc semper erit ille homo Christus, filius Dei, primogenitus, & excelsus præ Regibus terræ. Et testamentum meum fidele ipsi, id est, pactum meum cum ipso de stabiliendo Regno eius in æternum, fideliter semper obseruabitur. Expressit hanc promissionem Angelus Gabriel. Luc. 1. cum ait, Regni eius non erit finis.

XXIX. Et ponam in seculum seculi semen eius, & thronum eius sicut dies cæli.

Explicat modum, quo veller Deus conseruare Dauidi misericordiam suam in æternum: modus autem erit, quia dabit illi semen, id est, filium Christum, qui manebit, & regnabit in seculum seculi, ac per hoc thronus eius, id est, Regnum Dauidis nunquam finem habebit, sed tempora eius erunt sicut dies cæli,

id est, sicut tempus, quo durabit cælum: quod quidem Deus ipse statuit in æternum, & in seculum seculi, vt dicitur in Psal. 148. S. Augustinus per, semen, hoc loco, intelligit filios Christi regeneratos ex aqua, & Spiritu sancto, qui post resurrectionem manebunt in Regno Dei in seculum seculi. Sed magis conuenit literæ, vt per semen intelligatur ipse Christus: iuxta illud Psal. 131. Iurauit Dominus Dauid veritatem, & non frustrabitur eum, de fructu ventris tui ponam super sedem tuam. & in hoc Psalmo paulo infra, Semel iuravi in sancto meo si Dauid mentiar, semen eius in æternum manebit.

Si autem dereliquerint filij XXX. eius legem meam, & in iudicijs meis non ambulauerint.

Si iustitias meas prophanant XXXI. rint, & mandata mea non custodierint.

Visitabo in virga iniquitates XXXII. eorum, & in verberibus peccata eorum:

Misericordiam autem meam XXXIII. non dispergam ab eo, neque nocebo in veritate mea.

Neque prophanabo testamentum XXXIV. meum, & quæ procedunt de labijs meis, non faciam irrita.

Respondet obiectioni, quæ fieri potuisset, ac dicit, quod si filij Dauidis iram Domini malis suis operibus prouocauerint; ipsos quidem peccantes puniendo corripiet, non tamen irritum faciet quod iureiurando promissit. Si autem dereliquerint filij eius, id est, Dauidis posterij, legem meam, siue iudicalem, siue ceremonialem, siue moralem. Et in iudicijs meis non ambulauerint, id est, si vel solam iudicalem legem sequi noluerint: si iustitias meas prophanauerint, id est, si vel solam ceremonialem legem polluerint. & mandata mea non custodierint, id est, si vel solam moralem

ralem legem non obseruauerint; Visita bo in virga iniquitates eorum, & in verberibus peccata eorum, id est, non relinquam eorum scelera impunita, sed castigabo paterno flagello. Misericordiā autem meam, non dispergam ab eo, id est, non propter peccata filiorum, remouebo a Patre beneficium, quod misericorditer promisi: neque nocebo in veritate mea, id est, neque offendam veritatem meam quam utiq. offenderem, ei q. nocerem, si irritum facerem quod promisi. Illud nocere in veritate, accipiendum est, pro, nocere veritati. In hebræo clarius habetur, neque mentiar contra veritatem meam. Neque prophanabo testamentum meum, id est, non polluam pactum meum illud non obseruando: & quæ procedunt de labijs meis non faciam irrita, id est, non irritabo promissa mea. Hic duo sunt obseruanda. Vnum est per filios Davidis, intelligi posteros Davidis secundum carnem, si per Dauidem accipiat persona ipsa Davidis filij Iesse, ut nos ad literam accipimus: si autem per Dauidem intelligatur Christus, ut ad literam intelligit S. Augustinus, & nos spiritualiter intelligi posse existimamus: tunc per filios Davidis, accipiendus erit populus Christianus, qui per baptismum in Christo regeneratur. Alterum est, ex hoc loco non esse colligendum, filios Davidis siue Iudæi, siue Christiani sint, non posse perire in æternum, si mali sint, quemadmodum hæretici aliqui docuerunt; non enim dicit per Psalmistam Deus, Misericordiam meam non dispergam ab eis, sed non dispergam ab eo. Itaq. si mali filij flagello paterno correpti corrigi voluerint, hæreditatem non amittent, imò in gratiam instar filij prodigi amantissimè recipientur: sed si obstinate in malo perseverauerint, ipsi quidem ab hæreditate paterna excident; sed veritas Domini stabit, neque Regnum Christi peribit, quoniam potens est Deus de lapidibus suscitare filios Israel. quamquam qui præcogniti sunt, & prædestinati in Christo ante Mundi constitutionem, sine dubio ad finem usque in fide, spe, & charitate perseverabunt.

Semel iuravi in sancto meo, si **XXXV.**
David mentiar, semen eius in æternum manebit.

Et thronus eius sicut Sol in cō- **XXXVI.**
spectu meo, & sicut Luna perfecta in æternum, & testis in cœlo fidelis.

Reddit rationem, cur velit adimplere promissionem de stabiliendo Regno Davidis, etiam si filij eius non adimpleant præcepta ipsius. & ratio est, quia iuravit, id est, firmissimè, & sine retractatione promisit. Semel, inquit, iuravi in sancto meo, id est, irrevocabiliter, & immutabiliter iuravi per sanctitatem meam. Illud, semel, significat immutabilitatem, quia vnicum Dei iuramentum æquivalet innumerabilibus aliorum iuramentis. Illud, in sancto meo, potuisset verti, in sanctitate mea, sed idem est sensus, in sancto meo, id est, in sancto nomine meo, siue in sancto numine meo; qd Genes. 22. dicit, Per me ipsum iuravi. Si David mentiar: existimant aliqui hæc esse verba iuramenti, quasi dicat, si Davidi mentiar, hoc aut illud mihi contingat. Sed improbable est, Deum iurare iuramento execratorio. Verius est, illud, si, æquivalere particulæ neganti, & sensum esse, si David mentiar: id est, non mentiar Davidi quomodo dicitur in Psalm. 131. Iuravit Dominus David veritatem, & non frustrabitur eum. Similis locutio est apud Isaiam cap. 22. Si dimittetur iniquitas hæc vobis, donec moriamini, dicit Dominus exercituum. Verba iuramenti sunt quæ sequuntur, Semen eius in æternum manebit, Et thronus eius sicut sol & c. id est, Iuravi, & non mentiar Davidi, quod filius eius Christus in æternum viuet, & Regnum quoque eius sempiternum erit. Illustrat autem hanc iuratum promissionem tribus similitudinibus, Solis, Lunæ plenæ, & arcus cælestis. Thronus, inquit, eius in conspectu meo in æternum manebit, sicut Sol, sicut Luna perfecta, & sicut testis in cœ-

Mm 4 lo

Io fidelis: quæ significant Regnum Christi, ac per hoc Ecclesiam eius, fore semper illustrem, & perspicuam; non obscuram, vel inuisibilem, vt hæretici somniant; nihil enim clarius, & pulchrius Sole interdiu; nihil item clarius, & pulchrius Luna plena nocturno tempore: denique nihil clarius, & pulchrius in nubibus arcu cœlesti, qui testis est fidelis a Deo datus hominibus, nunquam amplius fore diluuium aquarum. Per testem in cœlo fidelem aliqui ipsam Lunam intelligunt; sed videtur probabilius, vt intelligatur Iris. siquidem hoc loco vox, in cœlo, non est, sciamaim, sed sciachaK, quod nubes aut cœlum aereum proprie significat, vt perspicuum est ex illo Psalmo 17. Tenebrosa aqua in nubibus aeris. & ex illo Deuteronomio 33. Magnificetia eius discurrent nubes. Porro Regnum Christi in communi prosperitate lucet vt Sol in die vndique sereno: in communi persecutione fulget vt Luna plena in tenebris noctis. Vbi vero admixta est persecutioni prosperitas, similis est Iris in nubibus. Illud, Luna perfecta, in hebræo est, iccon, stabilietur, siue præparatur. Ex quo intelligimus vocem, perfecta, explicandam esse, ac si dictum esset, Luna stabilis, siue præparata: & siquidem agatur de stabilitate luminis, vt idem sit Luna perfecta, quod Luna plena, tunc id, quod sequitur, in æternum, non est coniungendum cum Luna, sed cum thronus tuus: vt sit sensus, thronus tuus erit in conspectu meo in æternum, sicut Sol, & sicut Luna plena: & hunc sensum supra persecuti sumus; sed si agatur de stabilitate substantiæ Lunæ, quæ incorruptibilis est: tunc, in æternum, iungi poterit cum, Luna perfecta, vt sensus sit, thronus tuus erit in conspectu meo sicut Sol, & sicut Luna, quæ perfecta est quo ad substantiam, & stabilis in æternum.

XXXVII.

Tu verò repulisti, & despexisti, distulisti Christum tuum.

Hæc est altera pars Psalmi, in qua Prophetæ in persona populi tui captiui, præ-

pro adimpletione promissionis diuinæ; quamuis. n. Deus firmiter, & cum iuramento promiserit, vult tamen rogari, vt faciat quod promissit. sic Isaac Ge. 25. Deprecatus est Dominum pro vxore sua eo quod esset sterilis; & tñ Gen. 22. Promiserat Deus Abraham sobolem copiosam ex filio. Multiplicabo, inquit, semen tuum, sicut stellas cœli. & ibidem, In semine tuo benedicentur omnes gentes. Orata autem Propheta Deum, illum quodammodo admonendo, quod si tamdiu differat implere promissum, videbitur non velle seruare pactum, & iuramentum suum. Itaque sensus est huius versiculi, & sequentium, Tu Domine promissisti cum iuramento filium Davidis perpetuo regnaturum: nunc autem videmus Regnum ablatum esse a filiis David, & occupatum a Rege Assyriorum, ergo, vt confirmes verbum tuum, mitte filium illum Davidis quem promissisti, & da illi Regnum sempiternum, vt iurasti. alioqui ridebunt nos inimici nostri, & in te redundabit opprobrium nostrum; Tu verò repulisti, & despexisti, id est, promissisti bona, nunc verò reddis mala, quia repulisti nos a protectione tua, & despexisti nos, quos magnificare videbaris. Distulisti Christum tuum, id est, elongasti a te Regem populi tui Iechoniam videlicet, & Sedechiam, qui captiui ducti sunt in Babylonem. Sanctus Augustinus aliter exponit, videlicet, distulisti mittere ad nos Christum tuum, illum qui perpetuo regnaturus est. Vox hebraica, hithabarthahum me scicheca, vertitur a Sancto Hieronymo, & hebræis, iratus es cum Christo tuo: cum qua sententia cohæret prior expositio; distulisti Christum tuum, id est, elongasti Regem a fauore tuo, & a Regno suo, quod est signum iræ, & indignationis in eum: tamen sententia Sancti Augustini, quæ est conformis græcæ, & latinæ lectioni, potest etiam concordari cum voce hebraica: nam eandem vocem in Psalmo 77. Sanctus Hieronymus vertit, vt hoc loco vertit Septuaginta Interpretes versi. 59. alias 62. vbi nos legimus, Audiuit Deus, & sperauit, S. Hieronymus ex hebræo vertit,

תעברת
עם
אלהם

vertit, Audiuit Deus, & distulit. Itaque videmus eandem vocem hebraicam, & à Septuaginta, & à S. Hieronymo nunc verti, differe, nunc spernere, nunc irasci. Illa verba repulisti, & despexisti; non necessario coniunguntur cum sequentibus, ut sit sensus, repulisti Christum tuum, despexisti Christum tuum, distulisti Christum tuum; nam in hebraico ponitur interpunctio post verbum, despexisti: & ideo potest facile defendi expositio Sancti Augustini, qui vocem Christum tuum, solum coniungit cum verbo, distulisti: non cum antecedentibus, repulisti, & despexisti, ad quæ subintelligitur, nos, aut, populum tuum, aut aliquod eiusmodi. ut sensus sit, repulisti, & despexisti populum tuum; & distulisti mittere Christum tuum. Vtraque expositio bonum sensum habet.

XXXVIII.

Euertisti testamentum serui tui, prophanasti in terra sanctuarium eius.

Explicat, quomodo Deus repulerit, & despexerit populum suum; ac primò dicit, Deum euertisse testamentum serui sui. i. retractasse pactum initum cum seruo suo David: quod intelligendum est de euerfione, siue retractatione, quoad apparentiam, non quoad veritatem. Videbatur enim Deus non velle Regnum Davidis esse perpetuum, quia permiserat occupari ciuitatem Hierusalem, & totâ Palestinam à Rege Assyriorum. Sed re vera non de illo terreno Regno intelligenda erat promissio, sed de spirituali, & cœlesti. Prophanasti in terra sanctuarium eius, id est, proiecisti in terram, & hoc modo prophanasti sacrum diadema eius, quod factum est quando cessauit Regnum Davidis, deturbatis de solio Iechonia, & Sedechia & ablato eius Regio diademate: nam in hebræo habetur, nizro, quod propriè significat diadema Regium, quod sanctum, sacrum habebatur, in græco est, *ἁγίασμα*, quod sanctitatem, & sanctuarium, & sanctificationem signi-

ficat: Noster interpres hoc loco vertit sanctuarium, sed in Psal. 131. vertit sanctificationem. vbi apertissimè loquitur Propheta de diademate, non de templo; sic enim loquitur, Super ipsum effloreat sanctificatio mea. Itaque per sanctuarium, videtur intelligenda sanctitas diadematis. Si tamen quis velit Theodoreti, & Euthymij expositione sequi, qui per sanctuarium prophanatū intelligunt templum Salomonis per Nabuchodonosor Regem euerfisse, & incensum; dicere poterit, ipsum templū vocatum esse diadema populi Iudaici, quoniam re vera erat illis instar coronæ gloriosissimæ, & eo maximè, tanquā insigni diademate gloriabantur.

XXXIX.

Destruxisti omnes sepes eius posuisti firmamentum eius formidinem.

Diripuerunt eum omnes transeuntes viam, factus est opprobrium vicinis suis.

XL.

Comparat populum Iudaicum, per Davidè significatum, vineæ, quæ destructa sepe fit omnium transeuntium prædæta enim populus ille, Deo non protegente, factus est in direptionem Assyrijs non semel, sed sæpius eapientibus, & spoliantibus Hierusalem. Historia nota est ex 4. lib. Regum. Destruxisti, inquit, omnes sepes eius, id est, tu Deus nos auxilio, & protectione tua destituens, in causa fuisti, ut instar vineæ, destructa sepe, diriperetur ab hostibus. Posuisti firmamentum eius formidinem, id est, fecisti, ut in locū munitiois firmissimæ succederet in Davidis Regno, & ciuitate, formido; erant enim antea in eo Regno fortissimi milites, sed Deo deferente facti sunt timidi, & imbelles, ut hostibus nullo modo resistere possent. Tribuit autem populus Deo causam horum malorum, quoniam intelligebat, sine Dei voluntate non fieri, & facillimum esse Deo, si velit, omnia impedire. Diripuerunt eum omnes transeuntes viam, id est, diripuerunt populum Dei

173

Dei hostes eius sine vlla prohibitione, quò diripiunt vineas omnes transeuntes per viam, quò disiectæ sunt sepes, vel maceriz, quæ aditum prohibebat. Factus est opproprium vicinis suis. i. inde factum est, ut oēs populi vicini irrideant populum Dei, qui tam imbellis factus est, ut nulli hosti resistere valeat.

XL I. Exaltasti dexteram deprimentium eum, lætificasti omnes inimicos eius.

XL II. Auertisti adiutorium gladij eius, & non es auxiliatus ei in bello.

Pergit narrare calamitates populi Dei, in quas incidit desertus ab adiutorio diuino. Exaltasti dexteram deprimentium eum, id est, iuisti hostes populi tui, ut facilius deprimerent populum tuum. Exaltare, hoc loco, significat magnificare, roborare, excelsam facere. Inde vero secuta est lætitia magna apud hostes, ob tam facilem victoriā; ideo subiungit, lætificasti omnes inimicos eius. Contra verò auertisti adiutorium gladij eius. i. auertisti adiutorium tuum à gladio eius, Regis videlicet, vel exercitus populi tui; quod clarius explicat dicens; & non es auxiliatus ei in bello; ideo Reges Iuda resistere nequierunt Assyrijs, hostibus suis.

XL III. Destruxisti eum ab emundatione, & sedem eius in terram collidisti.

Obscurus est hic locus, sed ex posteriore parte versiculi apparet sermonē esse de priuatione cultus Regij, qui mūdistimus, & splendidissimus esse solebat. Hebræus textus est clarior: sic. n. ad literam verti posset, Cessare fecisti munditiam eius, & thronum eius in terram detraxisti. Græcus autem sic verti potest, Dissoluisti eum à munditia sua, & sedem eius in terram collidisti. Igitur hic videtur esse sensus, Spoliasti Re-

gem vestib. regijs, & hoc modo destruxisti, & cessare fecisti munditiam eius, induens illum sordidis, & atris vestib. & thronum Regni eius detraxisti in terram, & confregisti, ut neque cultus neque thronus regius illi superesset. Alij volunt, per, emundationem, intelligi templum, in quo per sacrificia mundabantur Iudæi. S. Augustinus intelligit hunc locum de emédatione cordis per fidem Christi, à quo destructi sunt Iudæi, qui in Christum credere noluerunt. Sed ad literam probabilius est accipere mundationem pro munditia, & nitore vestium regiarum, quas cū throno Reges illi amiserunt.

Minorasti dies temporis eius: XL IV,
perfudisti eum confusione.

Hæc est vltima, & principalis calamitas, quod cum Deus promississet Dauidi regnum perpetuum, iam videretur illam promissam æternitatem ad breuissimum tempus contraxisse: nam in Iechonia, & Sedechia finitum est Regnum illud temporale Dauidis, quod sperauerat nullum finem habiturum: ex hac autem diminutione temporis repletus est Daud in posteris suis magna confusione. In hebræo habetur, Abbreuiasti dies adolescentiæ eius. Sed Septuaginta non videntur legisse, alumau, quod est adolescentiæ eius, ut S. Hieronymus vertit, sed, olamau, vnica litera transposita, quod significat, seculorum eius ubi etiam indicatur promissio seculorum, sed abbreviata postea, & contracta: qui autem legi volunt, adolescentiæ eius, intelligunt per adolescentiam, tēpus virentis, & florentis Regni, quasi Deus non permiserit Regnum saltem peruenire ad senectutē, sed in ipso quasi flore ætatis illud occubere voluerit.

עליו
עליו

Vsquequò Domine auertes in XL V.
finem? exardescet sicut ignis ira tua?

Hic iam incipit oratio pro acceleratione

tione aduentus Messia, vt impleatur promissio iurata Dei. Vsq̃uequò Domine auertes in finem, id est, quādiu auertes te, aut faciem tuam, vsq̃. in finem, .i. vsquē ad vltimam perniciem, & consumptionē, sine spe reconciliationis? quādiu exardescet indignatio tua, quasi ignis, qui non cessat, donec in cinerē redegerit quod cremādum suscepit. In hebræo habetur, Vsq̃uequò absconderis; ex quo intelligim⁹ illud, vsquequò auerres, requirere, vt subintelligatur, faciem tuam, vel, te; tūc enim Deus abscondi dicitur, cum auertit à nobis faciem suam, & sic cessat nos illuminare, & calefacere lumine gratiæ suæ, quæ est vita vera animarum.

XLVI. Memorare quæ mea substantia, nunquid enim vanè constituisti omnes filios hominum?

XLVII. Quis est homo qui viuet, & non videbit mortem? eruet animam suam de manu inferi.

Nonnulli sic exponunt hos versiculos, vt sensus sit, Vita nostra breuissima est, & mors omnibus viuentibus imminet: proinde, nisi in vanum constituisti filios hominum, da nobis Domine solatium aliquod dum viuimus, & accelera cōsolationem, ne ante rapiamur à morte, quàm adueniat consolatio tua. Nimis humilis videtur hæc interpretatio, & iudaismus sapit, cum vltra præsentis vitæ bona non assurgat. S. Augustinus de Christo exponit, vt sēsus sit, Memorare Dñe, quòd Christo natura humana, mea substantia est, & propter illum non vanè constituisti filios hominum: ille est, qui viuet, & non videbit mortem, quia ipse solus eruet animam suam de manu inferi, & resurgēs à mortuis viuet, & non videbit amplius mortem. Sed hæc expositio non est literalis, nam vox, substantia, hoc loco non significat, naturam, sed tempus vitæ, siue substantiam: nam in hebræo ad verbum sic legitur, Memorare ego quanti tēporis sim. .i. quàm sit brevis vita mea,

quàm breui tempore subsistam in viuis, cui sententiæ rectè connectitur quod sequitur, Quis est homo qui viuet, & non videbit mortem? id est, nemo viuit in terris, qui non sit moritūrus: & non est diuturnum, quod finem habet. Idem repetitur, cum additur, eruet animā suā de manu inferi. .i. quis est homo, qui nō sit iturus ad locum mortuorum? quasi dicat, nemo viuit super terram, qui possit euadere mortem, per quam descendunt corpora sub terram, & animæ ad inferos. Eo siquidem tempore nundum apertum erat cœlum, quò nunc ascendant animæ iustorum perfectōrū. Existimo igitur Prophetam, qui spiritualis erat, ex breuitate vitæ humanæ, & caducitate rerum humanarum exarxisse in desiderium vitæ futuræ æternæ in cœlis, ac Deum precari voluisse, vt Messia cito mitteret, Patrem futuri seculi, qui aperiret credentibus Regna cœlorum; nisi. n. saltem pars aliqua generis humani ad vitam illam æternam, & beatam per Christum perueniret: verè in vanū condidisse videretur Deus oēs filios hominum. Ait igitur, memorare, quæ sit mea substantia. .i. quàm brevis, quā fragilis, quā ærumnosa sit substantia mea in terris. Nunquid enim vanè constituisti omnes filios hominum? id est, num constituisti, & creasti filios hominum, vt solū hanc vitam viuerent, eamq̃. tam breuem, & ærumnis plenam? id. n. esset frustra condidisse genus humanū. si nulla eius pars finem vltimum attingeret. Quis est homo, qui viuet, & non videbit mortem? id est, quòd sit brevis, & ærumnosa hæc vita nostra, vel ex eo constat, quòd nemo potest mortē euadere: nemo eruet animam suam de manu inferi; inferus enim sine vlla exceptione, omnes mortales ad se trahit.

XLVIII. Vbi sunt misericordiæ tuæ antiquæ Domine, quas iurasti Dauid in veritate tua?

Hic iam apertè Deū precatur, vt impleat promissum de rege mittendo ex semine Dauid, qui populū suū in æternum

num regat. Vbi sunt misericordiae tuae antiquae Domine, id est, promissiones ex misericordia tua magna olim factae Dauidi, quas etiam iuramento confirmasti per ipsam tuam veritatem iurās, ac dicens, Semen eius in æternum manebit, & thronus eius sicut dies cæli.

XLIX. Memor esto Domine opprobrij seruorum tuorum, quod continui in sinu meo multarum gentium.

Addit aliam rationem, cur tanto affectu postulet aduentum Messiae: quoniam populi infideles exprobrare non cessant populo Dei, quod frustra sperauerit Regem æternum ex semine Dauid. Memor, inquit, esto Domine opprobrij seruorum tuorum, id est, vituperationis, quam patiuntur serui tui ab infidelibus. Quod cōtinui in sinu meo multarum gentium, id est, quod opprobrii ego populus tuus continui, siue portavi, ut sonat vox hebraica, in sinu meo, multarum gentium, id est, à multis gentibus: dicitur autem portari in sinu, siue contineri in sinu opprobrium, quando non potest excuti per manifestam responsionem. Ita populus ille tacens, & dolens ferebat opprobrium à multis gentibus sibi obiectum, quia non poterat ostendere promissionem Dei fuisse impletam, vel breui, ac certò impledam.

L. Quod exprobrauerunt inimici tui Domine, quod exprobrauerunt commutationem Christi tui.

Hoc videlicet est opprobrium, quod portabat in sinu suo; quod inimici Domini exprobrarent populo Dei commutationem Christi sui, id est, qualem cōpensationem habuisset Dauid à Deo pro tam amplis promissis, destructionem videlicet Regni sui: nam commutatio hoc loco accipitur; pro compensatione, ut Matth. 16. Quam commuta-

tionem dabit homo pro anima sua? nā vox hebraica, hikuoth, significat propriè calcaneum, & inde accipitur pro vestigio: nec desunt qui hic vertant, vestigia Christi tui: denique significat et mercedem, quæ datur in compensationem, siue commutationem meriti; ac per hoc pro compensatione, & commutatione accipi potest. Atque hæc facilis ratio est concordandi textum græcum cum hebraico; qui enim vertunt, vestigia, siue itinera Christi tui, nullā rationem reddere possunt, cur Septuaginta verterint commutationem.

קבוח

Benedictus Dominus in eternū fiat, fiat LL

Hæc Psalmi conclusio, satis apertè docet, Prophetam intellexisse, promissionem factam Dauidi stabilem, & firmam fuisse, & omnino implendam tempore suo, quantumuis contrarium suadere viderentur quæ fiebant tempore Nabucodonosor. Imò etiam eadē hæc conclusio docet, cognouisse Dauidē, ideò diuinam providentiam effecisse, ut Regnum illud terrenum euerteretur, ne putarent carnales Iudæi in Salomone, aut alio ex Regibus Iuda, promissionem diuinam impletam fuisse. Ait igitur, Benedictus Dominus in æternum, id est, laus, & gratiarum actio semper Domino deferatur, quoniam omnia benefacit, & iustus est in omnibus verbis suis, & sanctus in omnibus operibus suis. Fiat, fiat. In hebræo, Amen, Amen, id est, sic est, & sic opto ut fiat, ut videlicet Dominus benedicatur in æternum. Atque hic est finis libri tertij secundum Hebræos.

PSALMVS LXXXIX.

Titulus, & Argumentum

Oratio Moysi hominis Dei.

Sanctus Hieronymus in epistola ad Cyprianum constanter affirmat, hunc Psalmum cum alijs decem sequentibus à Mose fuisse compositos: id colligit ex titulo. Sanctus tamen Augustinus hunc Psalmum exponens, constanter id negat, ea ratione, quia si hic Psalmus à Mose compositus fuisset, haberetur in eius libris, id est, in Pentateucho, ubi habentur alia cantica eiusdem auctoris. Addere possumus aliam rationem; quoniam in hoc Psalmo definitur vita hominis, ut plurimum, annis septuaginta, & in robustioribus, annis octoginta: at Moysi tempore plurimi centesimum annum transcendebant: ipse enim Moses obiit annorum centum viginti, ut dicitur Deuteronomio. ult. & octoginta annorum erat, quoniam fecit eum Dominus Ducem populi sui, & Aaron frater eius erat annorum octogintatrium antequam fieret summus Sacerdos, ut intelligi potest ex cap. 7. Exodus; & tamen non est credibile electum fuisse aut Moysen Ducem populi, aut Aaronem summum Sacerdotem, homines decrepitos, & morti proximos. Itaque ætas octoginta annorum non erat tunc extrema decrepitas, sed ætas matura, & viciens, atque ad res maximas gerendas aptissima. Neque probabile est, quod reliqui decem Psalmi sequentes sint compositi à Mose, cum in Psalmo 98. fiat mentio Samuelis, qui diu post mortem Moysi natus est. Neque satisfacit huic obiectioni S. Hieronymus dicens, nomen Samuelis fuisse prophetatum à Mose, ut li. 3. Regum. cap. 13. prædicitur nomen Iosia Regis: nam de Iosia sic loquitur Propheta, Nascetur filius domui David, Iosias nomine, &c. ubi est manifesta prædictio de

futuro: at in Psalmo 98. narrantur res præteritæ, his verbis, Moyses, & Aaron in sacerdotibus eius, & Samuel inter eos, qui inuocant nomen eius. Inuocabant Dominum, & ipse exaudiebat eos, custodiebant testimonia eius, &c. Non igitur hic prædicitur nomen Samuelis, quemadmodum nec Moysi, aut Aaronis, sed narrantur res ab ipsis gestæ, antequam hic Psalmus scriberetur. Quare videtur nobis, titulum huius Psalmi inscribi Moysi, quod Moysen loquentem David introducat. Introducitur autem Moyses fortasse, quod ipse scripserit creationem Mundi, peccatum primorum parentum, & penas inde secutas. Argumentum enim huius Psalmi est oratio ad Deum pro humano genere, quod ob peccatum primorum parentum in maximas incidit calamitates, & auxilio gratiæ assidue indiget, tum ut æumnas huius vitæ facilius toleret, tum ut ad gaudia sempiterna perueniat.

Explicatio Psalmi 89. I.

Domine refugium factus es nobis à generatione in generationem,

Orditur Propheta orationem à gratiarum actione pro acceptis beneficijs: hæc enim est Spiritus sancti utilissima rhetorica, ut gratum se gratiæ ostendat, qui noua beneficia petit. Domine, inquit, refugium factus es nobis. id est, fatemur nos multis, varijsque periculis esse obnoxios; sed in nobis te protectorem, & adiutorem experti sumus; idque non semel, aut iterum, sed omni tempore per omnes generationes sibi inuicem succedentes. Vox hebraica mahon, propriè habitationem significat. Itaque per refugium hoc loco, intelligitur domus bene munita, & loco edito posita, ad quem qui refugiunt, tutissimi sunt ab omni iniuria siue hostium, siue bestiarum, siue pluuiæ, aut ventorum. Et verè qui confugiunt ad Deum, & in eo tanquam in arce munita per Fidem, Spem, & Charitatem, cogitatione assidue, & iugi desiderio habitant: securissimi sunt ab omni incurfu malo, quoniam eis omnia cooperantur in bonum.

Priusquam

II. Priusquam montes fierent, aut formaretur terra, & orbis: à seculo, & vsque in seculum tu es Deus.

Probat eundem ipsum Deum in omni generatione, & generatione refugium esse potuisse sperantibus in eum; quoniam ipse semper est, videlicet æquè potens, æquè sapiens, æquè benignus. Ut autem ostendat, Deum esse ante omnes res creatas, in quibus homines confidere solent, primum nominat montes; Priusquam, inquit, montes fierent. Mōtes enim cū altissimi, & solidissimi sint, multis modis refugium hominibus præbent. Fortasse etiam primo loco nominat montes, quia primi apparuerunt, cū terra discooperiri cōpisset ab aq̃s, à quibus initio creationis vndiq̃ coopeiebatur: vel deniq̃ quia montes sunt pars terræ maximè eminens, & conspicua. Deinde subiungit formationē terræ, cuius partes quædam sunt montes. Sed obseruanda est proprietas vocum hebraicarum: nam de mōtibus dicit, הרים fierent, in hebræo, nascerentur, iuladū, de terra dicitur, in hebræo, parturiretur, הרלה theolel, itaque sensus est, Priusquā mōtes nascerentur, imō priusquam ipsa terra parturiretur. Parturitio .n. natiuitatem præcedit. Addit, & orbis, nimirum habitabilis: hoc .n. significat, הכל chebel, ex quo intelligimus per terram hoc loco intelligi terram incultam, & desertam; per orbem, terram cultam, & habitabilem: montes enim in vtraque parte terræ inveniuntur. Addit vltimo, à seculo & vsq̃. in seculum tu es Deus, id est, nō solum tu es ante montes, & terram tū incultam, tum habitabilem, sed es à seculo, id est, ab æterno, & vsque in seculum, id est, vsque in æternum. Nec dicit tu eras à seculo, & eris vsq̃. in seculum, sed tu es, ut ostendat veram æternitatem Dei quæ est duratio sine vlla varietate, & mutatione, quod in Psal. 101. dicit, Tu antem idem ipse es, & anni tui non deficient. Vox, Deus in græco codice non habetur, sed in hebræo habetur,

tur, & S. Hieronymus testatur in epist. ad Suniam, & Fretellam, haberi apud Septuaginta, & apud alios quoque Interpretes. Videtur autē esse vocatiuū casus ut sit sensus, Tu o Deus à seculo, & vsq̃. in seculum es, & idem ipse semper es.

Ne auertas hominem in humilitatem & dixisti, Conuertimini filij hominum.

Hic incipit oratio, qua precatur Propheta Deum, ut non sinat genus humanum abire in extremam vilitatem, & ruinam. Videbat enim hominē per peccatum primi hominis auersum à Deo præcipitem ruere in deterius; idē clamat, Ne auertas hominem in humilitatem, id est, ne finas auerti humanum genus à lumine vultus tui ad vilitatem, & abiectionem extremam, ut oblitum veri boni amplectatur terram, & solum secularium desideriorum, & per ea demergatur in interitum sempiternum. Nam vox hebraica non significat virtutem humilitatis, sed attenuationem, & miseriam. Addit rationem cur conueniat, ut Deus non sinat perire tam nobilem creaturam. Nam, inquit, tu dixisti, conuertimini filij hominum, id est, tu hortatus es per Prophetas tuos externa prædicatione, & per internam quoque tuam inspirationem ad conuersionem peccatores: decet igitur, ut potenti auxilio gratiæ tuæ iuues hominem ad conuersionem, & non sinas eum auerti ad extremam vilitatem. Illud, &, ponitur pro, quia, cū dicitur, & dixisti, conuertimini filij hominum, id est, quia tu dixisti, & inuicasti ad conuersionem; non enim vis mortem peccatorum, sed ut conuertantur, & viuant: In hebræo nō habetur negatio; sed affirmatio, Conuerteres hominem in abiectionem. Nisi s̃ctus Hieronymus diceret Septuaginta Interpretes posuisse in versu superiore vocem illam, Deus; possemus suspicari, Septuaginta non legisse, אל el, qd̃ est, Deus sed al, quod est, ne; & posuisse hanc vocem in principio huius versiculi; sed quoniam non audemus S. Hieronymo

nymo contradicere, existimamus vel excidisse ex codice hebraico particulam illam negatam, quod facile fieri potuit cum eadem litera bis repeterentur: vel esse legendam literam hebraicam cum interrogatione, Conuerteres, vel auertes hominem in humilitatem? quae sententia eadem est cum illa, Ne auertas hominem in humilitatem.

IV. Quoniam mille anni ante oculos tuos, tanquam dies hesternae, quae praeteriit

V. Et custodia in nocte, quae pro nihilo habentur, eorum anni erunt.

Describit abiectiōem generis humani post peccatum primi hominis ex breuitate vitae comparatae cum aeternitate Dei: nam Dei aeternitas sic immensa est, ut mille anni apud Deum, sint ut unus dies, vel una pars diei apud nos: & tamen vita nostra post peccatum, non est mille annorum, neque centum, sed vix septuaginta, aut in robustioribus octoginta. Quare vita nostra comparata cum aeternitate Dei, minor est quam unus dies, aut notabilis aliqua pars diei proinde ferè nihil est: & tamen si homo non peccasset, sine vilo sine in aeternum vixisset. sed explicemus verba, Quoniam inquit, mille anni ante oculos tuos tanquam dies hesternae, quae praeteriit, id est, in vilitatem maximam conuersi sumus, quoniam tu quidem aeternus es, ita ut apud te mille anni sint velut una dies quae statim praeterit, aut veluti custodia in nocte, id est, una nocturna vigilia, quae tribus horis absoluitur: hominum autem, qui ad tuam imaginem creati sunt, ac per hoc semper viuere deberent, anni tam breues erant, ut in nihilum reputari possint. sic enim intelligimus illa verba, quae pro nihilo habentur, eorum anni erunt, id est, anni hominum post peccatum erunt numerandi inter ea, quae pro nihilo habentur, id est, breuissimi, ac penè nulli. In textu graeco habetur, *et*, id est, adhuc, & sic legit Euthymius,

adhuc, erunt; sed verior lectio est *et*, .i. anni erunt; nam in hebraeo habetur, *sanim*, quod annos significat, nō, adhuc. Ex hebraeo sic vertit S. Hieronymus haec vltima verba, Percutiente te eos in somnium erunt. Pro quo nos habemus quae pro nihilo habentur eorum anni erunt. Et quidem de voce *somni*, & annorum, non magna est difficultas: nam eadem vox hebraea, si legatur, *scenà*, significat somnum, siue somnium: & sic legit S. Hieronymus, & legitur hodie in textu hebraico, iuxta puncta Rabinorum: sed si legatur, *sanà*, significat annum, & sic legerunt Septuaginta, & vulgaris noster interpres. Illud autem, Percutiente te eos, in hebraeo est, *zeram tam*, quod ad literam reddi potest inundaisti eos. Sed potest etiam legi cum alijs punctis, *zirmatam*. i. inundatio eorum, siue fluxus eorum: & sic legisse videntur Septuaginta, qui nomen, nō verbum viderunt, *ταῖς ἡμέραις αὐτῶν*, id est, contemptibilia ipsorum, quod rectè noster Interpres latinè reddidit, Quae pro nihilo habentur eorum: vertunt autem Septuaginta non tam verbum, quam sensum. Illa enim quae fluunt, & transeunt, pro nihilo habentur, quia innox evanescent. Illud pronomen, eorum, in hebraeo coniungitur cum nomine, inundatio, siue fluxus, non cum nomine, anni. Quare sensus est, inter ea quae fluunt, & pro nihilo habentur eorum, id est hominum, anni sunt. vel clarius anni vitae, siue tempora vitae computantur inter eas res humanas, quae contemptibiles sunt, quia celerrimè finiuntur.

Mane sicut herba transeat, mane VI.
ne floreat & transeat: vespere decadat, induret, & arescat.

Declarat annos vitae esse verè contemptibiles per similitudinem fœni, quod una die oritur, viret, floret exarescit, & perit. In hebraeo sunt verba futuri temporis, & eodem modo videntur accipiēda verba latina, ut hic sit sensus, Mane, id est, prima parte diei homo quasi herba virens apparebit in pueritia, &
non

שנים

שנה

שנה

זרמתם

זרמתם

non ibi sistet, sed mox transibit. Mane item in eadem prima parte diei florebit in iuuetute, & nec ibi cōsistet, sed mox transibit. Vespere in altera parte eiusdem diei decidet in virilitate, flore scilicet iuuentutis cadente; indurabitur in senectute, amisso vigore virilitatis: & arescet in morte, siccato humore vitæ. Vel, vt exponit S. Augustinus, mane virefcet, & florebit in vita, & vespere decidet in morte, indurabitur in caduere, arescet in puluere; & qui de puluere factus est, in suum puluerem contiuo reuertetur, vt non sit aliud tempus nostrum, quā nasci, & mori, incipere, & finire. Vt cæcitati hominum, qui vitam vnius diei, quæ pro nihilo duci deberet, sic amant ac si esset æterna: & vitam verè sempiternam sic contemnant, ac si esset vnius diei, & pro nihilo habenda. Neque solus David hæc docet sed ante eum sanctus Iob cap. 14. Homo natus de muliere breui viuens tempore, repletur multis miserijs, qui quasi flos egreditur, & conteritur, & fugit velut umbra, & nunquam in eodem statu permanet. Et post eum Isaias cap. 40. Omnis caro fœnū, & omnis gloria eius quasi flos agri. Exiccatur fœnum, & cecidit flos, quia spiritus Domini sufflauit in eo. Quod si non placeat accipere verba illa, transeat, & floreat, pro transibit, & florebit: oportebit aliquid subintelligere, vt, tu Deus iussisti, vt homo sicut herba transeat, & floreat, &c. Vel, Ergo homo iuxta sententiam Dei, sicut herba transeat, &c.

VII. Quia defecimus in ira tua, & in furore tuo turbati fumus.

Reddit causam breuitatis vitæ nostræ, ac dicit esse iustissimam iram Dei, quam iniquitas humana succendit. Defecimus, inquit, in ira tua; id est, consumpti fumus, & mortales effecti, quoniam irritauimus iram tuam: & conturbati fumus mortis horrore, & terrore, ob furorem tuum, qui securi, & quieti antea vivebamus. Non est in Deo propriè furor, vel ira, vel alia perturbatio,

sed metaphoricè dicitur ira, & furor in Deo, quando non parcat peccatori, sed eum pro meritis punit.

Posuisti iniquitates nostras in conspectu tuo: seculum nostrum in illuminatione vultus tui.

Dixerat causam breuitatis vitæ nostræ fuisse irā Dei; nunc dicit, causam iræ Dei fuisse iniquitates nostras. Vocat autem nostras iniquitates peccatū primorum parentum, quod nobis commune fuit, & in quo multæ fuerunt iniquitates, iuxta doctrinā sancti Augustini in Enchiridio cap. 45. & alijs in locis. Fuit. n. in eo peccato superbia, inobedientia, infidelitas, curiositas, & alia. Fortasse et respicit David ad iniquitates posterorum, ob quas magis contracta est breuitas humanæ vitæ: nam vique ad diluuium vivebant homines ad nongentos annos: deinde post diluuium ad ducentos vel trecentos. Postea tempore Moysi ad centum viginti. Denique tempore David ad octaginta. Ait igitur, Posuisti iniquitates nostras in conspectu tuo, i. noluisti parcendo abscondere peccata nostra à facie tua, sed ea ante conspectum tuum posuisti, vt ea diligenter considerares, & punires. Quod enim Deus intelligatur ignoscere, quando auertit faciem à peccatis, docet idem Propheta, cum ait in Psal. 50. Auerte faciem tuā à peccatis meis, & oēs iniquitates meas dele. Quod autem additur, seculum nostrum in illuminatione vultus tui, est repetitio eiusdem rei: nam per seculum nostrum intelliguntur iniquitates vitæ, siue temporis nostri, quas ne laterent posuit Deus in illuminatione vultus sui, id est, luce vultus sui, detexit, & illuminauit, vt earum turpitudine nota esset, & iusto Dei iudicio puniretur. Vox hebraica alumen, tria significare potest, occulta nostra, adolescentiam nostram, & seculum nostrum. Omnia enim hæc deriuantur à verbo, alam, quod est occultare. Addit sanctus Hieronymus, etiam quartum, videlicet, negligentias nostras: sed omnia

על
על

nia in idem recidunt. Nam multa sunt propriè peccata cordis, vel etià omnia peccata, quatenus à corde exeunt: & huic voci aptissimè respondet illud, In illuminatione vultus tui: nam qui malè agit odit lucem; sed Deus luce sua omnia detegit. Vnde dicit Apostolus 1. Co rin. 4. Illuminabit abscondita tenebrarum, & manifestabit consilia cordium. Per adolefcētiā, intelliguntur peccata adolefcētiæ. i. primum peccatum Adami, quod factum est in prima adolefcētia generis humani. Denique per seculum nostrum (vt diximus) significantur peccata temporis nostri.

IX. Quoniam omnes dies nostri defecerunt: & in ira tua defecimus.

Quod Deus viderit, & condemnauerit peccata nostra; pœna ipsa mortis nobis inflicta demonstrat. Quoniam omnes dies nostri defecerunt, id est, omnes dies nostri abierunt, vt nulli iam supersint. Et in ira tua defecimus, id est, non solum dies nostri abierunt, sed & nos cum illis consumpti fuimus. Nam si Adam non peccasset, dies quidem præterijissent, sed nunquam fluere cessassent, neque nos cum illis defecissemus: at nunc dies nostri ita fluunt, vt finē accipiant, morte illorum cursum interrumpente, & nos ipsi cum illis finem viuendi accipimus, & consumimur, ira Domini peccatum illud iustissimè puniente.

X. Anni nostri sicut aranea meditantur; dies annorum nostrorum in ipsis septuaginta anni.

XI. Si autem in potentatibus, octoginta anni, & amplius eorum labor, & dolor.

Dixit, mortem esse pœnam peccati: nunc addit, vitam ipsam, quam agimus ante mortem esse miseram, & breuem: iuxta illud Patriarchæ Iacob Gen. 47.

Dies peregrinationis meæ, anni centum

Beilarm. in Psalm.

triginta sunt, parui, & mali. De miseria dicit, Anni nostri sicut aranea meditantur. In hebræo solum habetur, Anni nostri sicut meditatio. i. anni nostri nihil sunt, nisi quædam cōtinua exercitatio, & laboriosa meditatio. Sed Septuaginta Interpretes, vt clarius re explicarent, addiderunt, sicut aranea, & pro, meditatio, posuerunt, meditabuntur, & sensus est, Anni nostri, i. tempus vitæ nostræ exercebitur vanis laboribus, & doloribus, timoribus, suspicionibus in temporalibus bonis procurandis, & temporalibus malis cauendis, sicut aranea exercetur in texendis retibus omni re fragilioribus, non sine propriæ substantiæ cōsumptione. Transit postea à miseria ad breuitatem dicens, Dies annorum nostrorum in ipsis septuaginta anni, id est, tempus vitæ nostræ in seipso conclusū, & definitum, non transcendit ultra septuaginta annos: & in robustioribus vsque ad octoginta: & si quid ultra sit, erit labor, & dolor, ætas videlicet infirma, & varijs malis, & ærumnis obnoxia. Hic aliqua notanda sunt. Primum illud, in ipsis, obscurum est propter phrasim propriam linguæ hebraicæ, quæ interdum ponit casum nominandi, cui nullū verbum responderet, vt in Psalm. 10. Dñs, in cælo sedes eius: nos diceremus, Dñs in cælo sedē habet, vel, Domini sedes in cælo est. sic etiam in Psalm. 17. Deus, impoluta via eius: nos diceremus, Dei impoluta via est. Sic igitur hoc loco nos diceremus, Dies annorum nostrorum septuaginta anni sunt: vel in diebus annorum nostrorum septuaginta anni. Itaque absolutè legendum est, Dies annorum nostrorum; & postea subiungendum, in ipsis, diebus videlicet annorum nostrorum, septuaginta anni numerantur. Vel dicendum est, illud, in ipsis, redundare, vt in Psalm. 121: redundat pronomen, eius, cum dicitur, Curus participatio eius in id ipsum. Secundo illud, in potentatibus, in hebræo est, in fortitudine, siue robore, id est, in homine robusto: in græco est, ἐν δυναμει, quod significare posset in Principatibus, siue Imperijs; sed hoc loco ista significatio, non facit ad propositum: non enim Princi-

N n pes

pes diutius viuunt, quàm alij: quin potius cōtra scriptum est in Ecclesiastico cap. 10. Omnis potentatus brevis vita. Ergo hoc loco vox illa, significat vim, & potentiam complexionis, & sic exponunt omnes Interpretes. Tertio illud, & amplius eorum, communiter exponitur vt nos diximus, de vita, quæ producitur vltra annos octoginta: quidam tamen minus probabiliter intelligunt, qđ potissima pars vitæ intra ipsos septuaginta, vel octoginta annos sit labor, & dolor. Prior expositio est Hieronymi, Augustini, Theodoret, & aliorū grauium auctorum. Quarto S. Augustinus videtur subdubitare, an ad literam hic locus intelligi debeat de vita contracta ad septuaginta, vel octoginta annos, tum quia multi robusti inueniuntur vltra annum octogesimum, & pluri valde infirmi ante annum septuagesimum: tum quia ante diluuium viuebant homines vsque ad annos nongentos; & tamen illi grauissimè peccarunt in Deum, & prepter ipsos potissimum contrahi debuit humanæ vitæ tempus. Ceterum communis sententia Hieronymi, Theodoret, Euthymij, & recentiorum est, quod ad literam hic definitur vita hominis septuaginta, vel octoginta annis. quæ vtcunque longa est, si cōparetur ad vitam multarum bestiarū tamen breuissima, si ad æternitatem cōferatur. Neque mirum est, aliquos vltra annum octogesimum robustos inueniri: nam, & paucissimi sunt, & omnis regula patitur exceptionem. Multo minus est mirum, quod aliqui reperiantur infirmi ante annum septuagesimum: nā etiam ante annum quadagesimum, & trigessimū ob complexionis vitium plurimi reperiuntur imbecilli. Propheeta verò loquitur de solo vitio ætatis, & dicit secundum communem, & ordinarium cursum homines viuere consueuisse integris viribus, & sensibus vsque ad annum septuagesimum, vel octogesimum. Tempore sancti Augustini credibile est communem, & ordinarium vitæ robustæ cursum fuisse paulo breuiorem: nunc verò experimur communem, & ordinarium cursum vitæ robu-

stæ, & integræ ad quinquagesimum annum, & in robustioribus ad sexagesimū pertinere. & ex eo tempore laborem, & dolorem; quamuis non desint hoc et tempore pauci quidam satis vegeti, & robusti annorum septuaginta, vel octoginta, vel etiam nonaginta. Quod autē ante diluuium, & proximè post diluuiū homines diutissimè vixerint, factū est ex prouidentia Dei, vt genus humanū facilius propagaretur, quemadmodum postea pertinuit ad prouidentiam Dei, vt contraheret tempus humanæ vitæ, tum quia æquum est, vt sicut multiplicantur peccata, sic contrahatur tempus vitæ: tum etiam quia si propagato humano genere adhuc homines diutissimè viuerent; mundus eos non caperet.

Quoniam superuenit mansuetudo, & corripiemur. XII.

Ex ærumna senectutis hoc boni cōsequimur, vt deposita superbia, & fastu iuuenili humiliemur, & mansuescamus conscijs propriæ infirmitatis, & miseræ & corripiamur, id est, erudiamur ad subiectionem sub potenti manu Dei. Illud, quoniam, accipitur hoc loco pro, verumtamen, aut certè: non enim apud hebræos semper est particula causalis. At igitur David, Verumtamen, ex labore, & dolore senectutis superuenit in nos mansuetudo, humilitas, & modestia; & inde corripiemur, & discemus subiecti esse Deo, & id parum temporis, quod superest, in eius timore, & amore consumere. Aliqui per mansuetudinem intelligunt, mansuetudinem Dei, qua nos in senectute, laboribus, & doloribus clementer erudit. Sed prior expositio videtur anteponenda, cum in sequenti versiculo dicatur, Quis nouit potestatem iræ tuæ, & præ timore tuo iram tuam dinumerare? non enim rectè coniunguntur mansuetudo, & ira. In hebræo, vt nunc se habet, longè alius est sensus: sic. n. ad verbum legitur, Quoniam confio celeriter, & auolabimus; & sensum esse uolunt, quod senes, ac præsertim decrepiti facillimè extinguuntur, quomodo for-

ALIA

amaridū facile demetitur, & auolat. Miratur S. Hieronymus in epist. ad Cyprianum, quid legerint in codicibus hebraicis Septuaginta Interpretes, ut, vertere potuerint, Quoniā superuenit mā fuetudo, & corripiemur. Sed aliqd eos legisse quod rectē in eam sententiā verti posset, dubitare non debemus, cū viri doctissimi, & fidelissimi essent, & cū eis consentiant Theodotio, & sexta editio, eodem S. Hieronymo teste.

XIII. Quis nouit potestātē iræ tuæ: & præ timore tuo iram tuam dinumerare?

Ex grauitate pœnæ redditæ peccato primi hominis, colligitur Propheta, magnā valdē esse iram, & seueritatem Dei aduersus peccata; sed poetico more; & eleganti metaphora ita magnitudinem iræ diuinæ describit, Quis nouit potestatem iræ tuæ, id est, quis cogitādo poterit assequi quanta sit vis, potentia, & efficacia iræ tuæ Dñe? & præ timore tuo irā tuam dinumerare. i. & quis poterit te tantum timere, quantum timendus es, & iuxta hunc timorem mensurare magnitudinem iræ tuæ, vel oēs eius puniendi modos enumerare? Nā ex eo quod propter vnum peccatum primi parentis Deus iratus est vniuerso humano generi, & omnes homines ad vitā laboribus, & doloribus plenam, & postea ad mortem damnauit, ac voluit, ut omnes homines post multas ærumnas in puluere suum redirent: certē rectē colligitur immentam esse indignationem diuinā contra peccatum, & infinitos esse in ipsa diuina indignatione modos puniēdi peccatores. Ac si ex morte ista corporis rectē colligitur magnitudo iræ diuinæ contra peccatum: quanto magis colligi deberet ex eo, quod animas, & corpora iniquorum post diē iudicii mittet Deus in ignem inextinguibilem, & sempiternū id. n. omnem humanam intelligētiā lōgē superat. In hebræo illud, dinumerare, coniungitur cum versiculo sequenti: sed nos non sequimur interpunctionem Rabinorum recentiorum, sed Se-

ptuaginta Interpretes antiquissimorū. Illud, præ timore tuo, aliqui ita exponunt, Quis impeditus timore, & terrore tuo poterit mensurare iram tuā? Sed prima expositio videtur melior: quoniā propositum Prophetæ est ostēdere magnitudinem iræ Dei: non autem ostenditur ex eo quod aliquis perturbatus timore, non pōt in eum intēdere aciem mentis; sed ex eo, quod homo valdē timet; & ex magno timore colligit magnitudinem iræ. Itaque illud præ timore, accipiendū est pro, à timore, vel, propter timorem, vel secundū, aut, iuxta timorem, ut clarius habetur in hebræo.

XIV. Dexteram tuam sic notam fac, & eruditos corde in sapientia.

Ab hoc versiculo vsq. ad finem orat Propheta pro genere humano, ut sicut illud Deus iustē puniuit pœna mortalitatis, ita misericorditer respicere, & ad iuuare dignetur in huius vitæ mortalis peregrinatione. Dexteram tuam sic notam fac. i. fac Deus, ut iam tandem innorescat nobis dextera tua, qua nos suscipias, & sustentes, & qua munera gratiæ tuæ nobis abundanter tribuas. Fortasse etiam per dexteram significatur Christus, quem Propheta promissum sciebat & ut cito veniret, assidue precabatur. Et eruditos corde in sapientia, i. & simul notos fac nobis hoies eruditos corde in sapiētia, id est, Prophetas, & Apostolos, qui habebant cor vera sapientia eruditū, nō verō sapientes huius mundi, qui vel habent linguam eruditā, non cor; vel si cor eruditum gerunt, non sapientia diuina, & salutari, sed sapientia humana, & perniciosa, quæ inflat, non ædificat. In hebræo, ut nunc legitur, sic habetur, Dies nostros sic notos fac, & veniemus corde sapienti. Sed facile est videre quid legerint Septuaginta Interpretes: nam non legerunt, iamenu, dies nostros, sed, iaminecha, dexteram tuam nec legerūt, nabi, veniemus, sed, nehim Prophetas: tamen sensus, qui ex hebræo colligitur, non est contemnendus; rogat enim propheta, ut notos faciat

ימין
ימין
נביא
נביא

N n 2 ciat

oīat nobis Deus dies nostros, id est, faciat ut intelligamus breuitatem dierū vitæ nostræ, & non ipsi nos fallamus iudicantes diuturnum, id quod est breuissimum: nam si hoc intellēxerimus veniemus ad Deum corde sapienti; & inquiremus bona futura, quæ sunt æterna & contemnemus præsentia, quæ sunt breuissima.

XV. Cōuertere Domine vsquequò & deprecabilis esto super seruos tuos

Id ipsum petit, sed oratione magis generali. Conuertere Domine vsquequò, id est, tu Domine auertisti à nobis faciē tuam, iratus nobis propter peccata nostra; sed aliquando tandem placatus cōuertere ad nos, & respice nos oculo benignitatis tuæ, & deprecabilis esto super seruos tuos, id est, exorabilis esto, si ne te exorari à seruis tuis, quos ipse formasti, & alis, ac sustentas in obsequium tuum. Illud, vsquequò, posset accipi separatim, & cū interrogatione hoc mō, Conuertere Domine, vsquequò, non cōuerteris? Sed nulla est distinctio in textu hebræo, vel græco, vel latino inter cōuertere, & vsquequò: idēo præstat illud, vsquequò, accipere pro aliquando, ut supra diximus.

XVI. Repleti sumus mane misericordia tua, exultauimus, & delectati sumus omnibus dieb nostris.

XVII. Lætati sumus pro diebus, quibus nos humiliasti, annis, quibus vidimus mala.

Hi duo versiculi possunt ex hebræo verti per tempus præteritum, ut vertunt Septuaginta Interpretes: possunt et verti partim per modum imperandi, seu deprecandi, partim per tempus futurum, ut vertit S. Hieronymus, qui sic habet, Imple nos matutina misericordia tua, & laudabimus, & lætabimur in cunctis diebus nostris: lætifica nos pro die-

bus, quibus afflixisti nos, & annis quibus vidimus mala. Sed cū vertuntur per tēpus præteritum, vel subintelligendū est aliquid, in hunc sensum, Conuertere Domino aliquando, & deprecabilis esto super seruos tuos, ut aliquando dicere possimus, Repleti sumus mane misericordia tua, &c. vel certē, ut explicat S. Augustinus, Propheta prædicat res futuras per verba temporis præteriti propter certitudinē prædictionis. Ita que versiculi isti non ad tēpus viæ, sed ad tempus patriæ pertinent: tunc enim dicemus, Repleti sumus mane misericordia tua. i. initio veræ illius diei, quo solem iustitiæ aspicere cœpimus sine vilius nubis interpositione; & nocte, ac tenebris huius vitæ recedentibus, repleti sumus magna illa misericordia tua, quæ nullum locum miseriæ relinquit, de qua scriptum est in alio Psalmo, Qui coronat te in misericordia, & miserationibus. qui sanat oēs languores tuos, qui replet in bonis desiderium tuum: idēo exultauimus, & delectati sumus, hoc. n. solum restat hominibus beatis, & liberatis à malis omnibus. ut exultent laudantes Deū, & delectentur fruētes Deo. Nec solum lætati sumus ob tantum cumulum bonorū, sed et lætati sumus pro diebus. quibus nos humiliasti, & pro annis, quibus passi sumus mala: tum quia dulciora sunt bona post experientiam malorum; tum etiam quia patientia in malis hæc nobis tanta bonis promeruit, iuxta illud Apostoli, Quod momentaneū est, & leue tribulationis nostræ, supra modum in sublimitate æternæ gloriæ pondus operatur in nobis. Itaq. nunc benedicimus dies illos, & annos, qui nobis materiam patiendi præbuerunt, & Deo gratias agimus, qui nobis in tempore non pepercit, ut parceret in æternum.

Respice in seruos tuos, & in XVIII. opera tua, & dirige filios eorum.

Posteaquam petiuit summum bonū, quod est finis vltimus humanæ naturæ, & omnium actionum nostrarum: nunc petit media, id est, gratiam bene operandi.

Primum enim, iuxta præceptum Domini, quærendum est Regnum Dei, deinde iustitia eius. Ait igitur, Respice in seruos tuos, id est, illumina seruos tuos, atque accende ad amorem tuum. Deus enim Sol est increatus, qui respiciendo illuminat, & calefacit. item, Respice in seruos tuos, id est, oculo beneuolentiæ, & fauoris tui respice illos, ut tuos, dirige, protege, auge; & in opera tua, id est, in opera bona, quæ tu operari cœpisti in illis. Omnia enim bona opera nostra dicitur Deus operari in nobis, quia ipso excitante, & adiuuante fiunt, & sine illius gratia præueniente, & comitante nulla essent. Nec solû seruos tuos, sed etiam filios eorum, siue naturales, siue spirituales respice, & dirige, ut parêtes cum filiis, te dirigente, in via mandatorum perseuerent, & ad patriam pertinere mereantur æternam. In hebræo legis paulô aliter, videlicet, Appareat ad seruos tuos opus tuum, & gloria tua super filios eorum: sed Septuaginta nō legerunt, ira he, appareat, siue videatur sed, re he, dempta prima litera, quod significat, vide, siue respice: deinde explicandi gratia addiderunt coniunctionē, & verterunt, Respice in seruos tuos, & in opera tua: quamuis enim in hebraico sit, opus tuum, licuit tamen interpretibus id exprimere numero multitudinis. Illud autem, & gloria tua, hebraicè, hadarecha, legerunt Septuaginta, hadrech, solis punctis mutatis, quod est, dirige à verbo darac. Itaque lectio græca non dissidet ab hebraica, quam habuerunt Septuaginta Interpretes. Sed & ipsa lectio hebraica, quam sequitur. S. Hieronymus, bonum sensum habet, Appareat opus tuum super seruos tuos, id est operare in seruis tuis per gratiam tuâ opera bona; & sic manifeste operare, ut etiam alij videant opera eorû bona, & glorificent te patrem eorum, qui in cœlis es, & qui opera bona operaris in eis: & gloria tua similiter appareat super filios eorum, ut etiâ in illis opereris opera bona, & per illos nomen tuum glorificetur.

Et sit splendor Domini Dei nostri super nos, & opera manuum nostrarum dirige super nos, & opus manuum nostrarû dirige.

Idipsum petit alijs verbis, ut ostendat se valdè optare quod petit. Quod enim dixit, Respice in seruos tuos; repetit nunc dicens, Et sit splendor Domini Dei nostri super nos. Deus enim, ut diximus, respiciendo illuminat, auertendo faciem, in tenebris nos relinquit. Quod autem dixit, Et in opera tua, nimirum, respice: nunc repetit dicens, Et opera manuum nostrarum dirige super nos; id est, tu præficens nobis fac ut rectè operemur, & regulam rectissimam, quæ est lex tua, & voluntas tua, semper sequamur. Addit, Et opus manuum nostrarû dirige, ut ostendat, omnia opera reuocari ad vnum opus, quod est radix omnium & in quo continentur omnia: hoc autem est opus charitatis: nam qui diligit, legem impleuit, Rom. 13. Et charitas patiens est, benigna, &c. Cor. 13. In hebræo pro vocè, splendor, est, naam, quod significat decorem, & dulcedinem: sed decor, & splendor in idem recidunt: & rectè Septuaginta verterunt, sit splendor, quoniam decor lucis splendor est. Deus autem lux est, & tenebræ in eo non sunt vllæ, 1. Ioan. 1. & Pater luminum est, Iacobi 1. Item pro verbo, dirige, est in hebræo, conena, quod non solum dirigere, sed etiam stabile significat.


Itaque sensus erit, opus manuum nostrarum perseueranter dirige; ut non solum directio in bonis operibus, sed etiam perseuerantia postulatur.

ctis, vt Deo protegente, nocturna pericula hoc armati clypeo ppulsemus.

PSALMVS XC.

Titulus. & Argumentum.
Psalmi.

Laus Cantici David.



Hic Titulus non habetur in codice hebraico, neq. in omnibus codicibus graecis; & S. Hilarius in prologo Psalmorum, S. Hieronymus, Theodoretus, & Euthymius in commentario huius Psalmi disertis verbis dicunt, eum carere titulo. S. Ioannes Chrysostomus, & S. Augustinus nullam tituli mentionem faciunt. Quare credibile est, titulum fuisse postea additum, vt intelligeremus, hunc Psalmum à Dauide fuisse compositum; non à Mose, vt Hilarius, & quidam alij tradiderunt, Et certè ratio, qua nonnulli adducti sunt, vt existimarent, hunc Psalmum non Dauidis esse, sed Mosis, infirma oïno est. Dicunt. n. Psalmos qui carent titulo, illius, esse cuius est Psalmus præcedens; Psalmum aut præcedentem esse Mosis, probant ex titulo illo, Oratio, Moyse hois Dei. At nos in explicatione Psalmi superioris ostēdimus, Psalmum illū inscribi Moyse, non quod ille fuerit auctor, sed quod Dauid Mosē loquentem introduxerit: & rationē adduximus, cū probabile nō sit, Psalmos qui carēt titulo, eius auctoris esse, cuius nomen inuenitur in Psalmo præcedente. Argumentum Psalmi est cohortatio ad fiduciā in Dei auxilio firmissimè collocandam. Id. n. in principio ponitur, & per totum Psalmum varijs rōnibus confirmatur. Forma Psalmi est dramatica: nūc. n. loquitur Propheta, nunc homo iustus, nunc ipse Deus. Psalmus est plenus metaphoris, & ideo non minus elegans quā difficilis. Quā verò sit utilis, & ad mores formandos accommodatus, vel ex eo cognosci pōt, quod ex vetusto Ecclesiae instituto, quotidie in diuino officio frequentatur; idq. ad initium no-

Explicatio Psalmi 90.

Qui habitat in adiutorio Altissimi, in protectione Dei. I. cœli commorabitur.

Hoc primo versiculo continetur insignis promissio, per quā Spiritus sanctus certos nos reddit, auxiliū diuinum nunquam defuturum ijs, qui verè spem suā in Deo repositam habent. Sed verba singula explicemus. Qui, hæc prima vox significat promissionem esse generalē; quasi dicat. Propheta, Quicumque sit, siue diues, siue pauper, siue doctus, siue indoctus siue patricius, siue plebeius, siue iuuenis, siue senex: non. n. Deus personam accipit, sed diues est in oēs, qui inuocant illum. Habitat. hoc significat promissionem hanc tam liberalem non requirere quamlibet fiduciam, sed assiduam, constantem, firmam ita, vt homo per fidem, & fiduciam faciat sibi quāsi domum in Deo, in quo habitet, & quiescat, & eam quocunque ierit, circumferat, quo modo testudines faciunt. Vox hebræa, iasab, habet aliquid maioris energiz, quā verbum, habitat; significat. n. et sedere, quiescere, durare; itaq. sensus erit, qui habitat. cum quiete, & perseuerantia. In adiutorio, vox hebræa besether, propriè significat, in abscondito, siue in loco secreto: sed Septuaginta Interpretes explicauerunt metaphoram, cū dixerunt, in adiutorio; adiutorium. n. Dei non est visibilis aliqua turris, sed arx inuisibilis, & secretissima, quæ sola fide inuenitur, & penetratur. Vocabulum tamen græcum, & latinum admonet, confidendum quidem firmissimè esse in Deo, sed non esse negligēda ea, quæ studio & labore humano adhiberi possunt. exēplo nobis esse possunt agricolæ, qui sperant in eo, qui dat pluuias de cœlo, & solem suum oriri facit: sed interim laborat arando, serendo, metendo, quia sciunt eos adiuuari, qui aliquid cooperando faciunt. Altissimi. multa sunt nomina Dei, sed nomē Altissimi.

simi hoc loco aptissime ponitur; nam quia Deus est altissimus. i. in altissimo loco sedet, ideo oia videt, & nullum nostrum periculum eum latet. Rursum, quia non solum est altissimus, quia oia speculatur; sed etiam quia in altissimo throno sedet, & oia subiecta habet, ideo poterit oibus periculis nos eruere. In protectione Dei cœli commorabitur. hæc est altera pars versiculi, in qua promittitur merces confidentibus in Deo: & sensus est, qui verè confidit in auxilio diuino, spe sua non frustrabitur, sed oino à Dño protegetur. Et pulchrè respondent verba singula singulis; verbo, habitat, respondet, commorabitur, verbo in adiutorio; respondet, in protectione; verbo, Altissimi, respondet, Dei cœli: sed singula considerare mus. In protectione, vox hebraica, bezel proprie significat, in umbra, siue in umbraculo, vt S. Hieronymus vertit. Septuaginta Interpretes explicare voluerunt metaphoram, & ideo verterunt, In protectione. De^{us}; enim, sub umbra alarum instar Aquilæ, vel Gallinæ protegit confidentes in se: potest et umbra significare gratiā & fauorem Principum, quæ umbra facillimè, & longissimè protegit; vt et ceruus quidam ubique securus liberè vagaretur, quia scriptum gerebat ad collum, Cæsaris sum, noli me tangere; sic veri serui Dei ubique tuti sunt, inter Leones, Vrsos, Serpentes, ignes, aquas fulmina, tempestates, quoniam oēs creaturæ umbram Dei cognoscunt, & reuerentur. Sed etiam vox latina, protectio hoc loco valde ad rem facit: protegere .n. est procul tegere: potest autem homo procul tegi duobus modis, si vel protector prope adstans sagittas procul venientes repellat; vel si protector quidē procul absit, sed tamen repellat tela vicina vt gladios, vel pugiones. Vtrumq. facit Deus; ipse enim manens in nobis repellit sagittas longissimè venientes; videt enim prima initia periculorum, & ea, si vult, mirabili virtute in ipso primo exortu extinguit: sic et ipse in cœlo sedens pericula nobis quantumuis proxima remouet; habet enim oculos acutissimos, & manus longissimas, vt omnia mala nobis inminētia præuenire pos-

sit: oculus eius intelligentia eius; manus eius potentia eius, & potentia eius voluntas eius. Dei cœli: S. Hieronymus vertit, omnipotentis. sed vox hebraica, sadai, non solum omnipotentem, sed sibi sufficientem. i. in se, & per se omnipotentem significat: nam, & Apostolus se omnipotentem esse dixit, sed in Deo, non in se, Omnia inquit, possum in eo qui me confortat Philip. 4. Septuaginta Interpretes verterunt, Dei cœli, quia nullus est sibi sufficiens, nullo egens, & per se, atque in se omnipotens, nisi Deus verus, qui cœlum ex nihilo fecit, Diu gentium dæmonia, Deus autē cœlos fecit, Psal. 95. Et quamuis etiam terra, & mare, & aer sint opera Dei magna, & mirabilia: tamen nihil est in rebus corporalius maius, & mirabilius cœlo, siue molem, siue pulchritudinem, siue efficaciam siue velocitatem, siue stabilitatem consideres. Quare idem Propheta de cœlis singulariter dixit, Cœli enarrant gloriā Dei. Psal. 18. Commorabitur: hoc significat, confidentem in Deo non semel, aut iterum, sed assidue protegendum à Deo; erit enim ei protectio Dei non turgurium in via. sed quasi domus paterna ac propria. In hebræo est, ithlonan, id est, pernoctabit; quia videlicet protectio nobis necessaria est in nocte, ac tenebris huius vitæ: non autem in cœlesti patria, ubi nox nulla est, sed perpetuus dies, vt dicitur in Apoc. cap. 21. Hic admirari cogimur insipientiam hominum, qui tantam promissionem tam paru faciunt. certē enim Principes terræ multa insumunt in custodes corporis sui, aut arcium suarum: & tamen ab eis sæpe produntur. At nunc non homo mendax, & fragilis, sed Deus omnipotens & verax dicit, Confide, & protegā: & vix inuenitur, qui sicut oportet, illi se credere velit.

Dicet Domino, susceptor meus II.
es tu, & refugium meum, Deus meus, sperabo in eum.

Explicat, & probat Propheta propositionem suam testimonio iusti confide

tis in Deum, qui de experimento suo te
 statur. Dicet, inquit, Domino, id est, gra-
 tias agens iustus, qui habitat in adiutorio
 Altissimi, confitebitur Dño benefi-
 cium protectionis acceptum. In hebræo
 אָמַר est, amar, quod significat, dicam; sed S.
 Hieronymus vertit, dicens; videtur. n.
 legisse omer. Septuaginta Interpretes
 verterunt dicent, quia legerunt, amar,
 & acceperunt præteritum pro futuro:
 sensus semper est idē, siue legamus, di-
 cam ego in persona oīum iustorum; siue
 dicens iustus: siue dicet iustus. Dño.
 absolute vocat Deū, Dñm, quia verē ac
 propriē solus Deus, Dñs est: tum quia
 non habet superiorem, neque parem;
 tum quia nulli necessitati seruit, cū nul-
 la re indigeat; tum quia omnia seruiunt
 illi ad nutum, sine quo neque esse, neq.
 moueri possunt; tum deniq. quia solus
 pōt res oēs mutare, destruere, reparare
 pro arbitrio. Susceptor meus es tu. ex
 Hebræo S. Hierony. vertit, spes mea.
 Et quidem vox hebraica, machsi, pōt
 quidem significare, spes mea, sed pōt ēt
 significare, susceptor meus; nam verbū,
 chasa, vnde est illud nomen, significat
 sperare, & etiam recipere se in aliquē
 locum tutum; denique Septuaginta vi-
 ri doctissimi non ignorabant vim huius
 vocis. & videntur tria ista vocabula, su-
 sceptor meus, refugium meū, & Deus
 meus, continere tria beneficia Dei, pro
 quibus iustus gratias agit, vnum præte-
 ritum, alterum præsens, tertium futurū.
 Primum ergo beneficium est ineffabilis
 misericordia Dei, qua suscepit hominē
 iam lapsum in lethale peccatum, & ad
 gehennam ruentem. de quo dicitur in
 Psal. 117. Impulsus euerlus sum, vt ca-
 derē, & Dominus suscepit me; sic enim
 hunc locum exponit S. Bernardus serm.
 2. in Psal. 90. Signum huius susceptionis
 est, quando qui ceciderat, resurgit hu-
 milior, & fortior, & cautior vt David,
 vt Petrus, vt Magdalena. Hoc primum
 beneficium commemorat homo iustus,
 & confidens in Deo, non quod oriatur
 ex fiducia (præcedit enim fiduciam, nō
 sequitur) sed quia dicit apud se, Si tam
 bonus est Deus, vt suscipiat inimicum
 non confidentem, eique pœnitentiam,

& confidentiam inspiret; quā bonus,
 & fidelis erit erga amicum, & filium cō-
 fidentem? Alterum beneficium est præ-
 sens, & continetur in illo verbo, Et re-
 fugium meum. Deus enim quem susci-
 pit per gratiam iustificationis, non sta-
 tim assumit in cœlum, vbi nulla sunt pe-
 ricula; sed constituit in acie præliantū
 militum suorum: sed si confidat in Dño,
 Dominus illi refugium erit in omni ten-
 tatione; & refugium optimum, atque
 firmissimum; vox enim hebræa, mezura
 quæ hoc loco habetur, significat muni-
 tionem, siue arcem munitam. Tertium
 beneficium est futurum, & maximum,
 & significatur in illis verbis, Et Deus
 meus. Deus enim est summum bonum:
 & quidem Deus semper in se est Deus,
 ac per hoc summum bonum: sed no-
 bis tunc propriē erit Deus quando vi-
 debimus eum, sicuti est; tunc enim sum-
 mo bono fruemur. Iust⁹ igitur, quia co-
 gitat, & confitetur, Deum sibi fuisse ali-
 quando susceptorem, nunc esse refu-
 gium, & post hanc vitam fore beatitudi-
 nem; ideò concludit, sperabo in eum,
 id est, firmirer statuo semper sperare
 in eum in omni periculo & tentatione.
 qđ B. Iob faciebat, cū diceret, Etiam si
 me occiderit, in ipso sperabo. Iob 13.

Quoniam ipse liberauit me de
 laqueo venantium, & à verbo
 aspero.

Variant hoc loco codices: nam in he-
 bræo, & græco legimus, liberabit te...
 S. Hieronymus, & S. Augustinus in Cō-
 mentario huius Psalmi, & S. Gregorius
 lib. 6. Moralium cap. 13. legunt, libera-
 bit me. Editio nostra vulgata habet li-
 beravit me: quomodo legit etiā S. Ber-
 nardus serm. 3. in hunc Psalmum. Res
 non est magni momenti: sed si legatur
 in secunda persona, verba erunt Pro-
 phetæ, & continuabuntur cum sequen-
 tibus: si legatur in prima persona, erunt
 verba hominis iusti, & continuabuntur
 cum præcedentibus: sic etiam, si lega-
 tur verbum temporis futuri, erit pro-
 missio; si tēporis præteriti, erit cōfessio.
 be-

beneficium autem, quod hic commemoratur, idem omnino est, siue exprimat in prima persona, siue in secunda: siue in praeterito, siue in futuro. Nos editionem nostram sequimur. Ergo vir iustus, qui dixerat, sperabo in eum, subiungit rationem, Quoniam ipse liberauit me de laqueo venantium, & a verbo aspero. Quibus verbis duo beneficia continentur, vnum temporale, spirituale alterum: beneficium temporale est liberatio ab insidijs, dolis, fraudibus malorum hominum, ex quibus detrimenta temporalia oriuntur; fraudes enim sunt laquei, verbum asperum est detrimentum quod inde sequitur; verbum enim apud hebraeos passim accipitur pro ipsa re. Et quoniam fraudes, & doli plerumque sunt per instrumentum linguae; ideo Ecclesiasticus cap. 5. r. dicit, Liberasti me a laqueo linguae iniquae. Deus igitur singulari providentia sua fecit, & faciet deinceps, vt iustis confidentibus in adiutorio Altissimi non obfint fraudes, & insidiae implorum. Alterum beneficium est longe maius, liberatio videlicet a temptationibus daemonum: tanta est enim daemonum versutia, vt non immerito homines quantumvis prudentes cum demonibus comparati bestiolarum esse videantur. Igitur venatores, daemones sunt, de quibus Apostolus dicit, Qui volunt diuites fieri, incidunt in temptationem, & in laqueum Diaboli. 1. Tim. 6. & Resipiscant a diaboli laqueis, a quo captiui tenentur. 2. Tim. 2. Sunt autem daemones, & plurimi numero, vt aeris istum caliginosum ferme torum repleat, teste S. Hieronymo in cap. 6. ad Ephes. & potentissimi, ac ferocissimi, vt in scripturis leonibus, & draconibus conferantur. 1. Petri 5. & Apoc. 12. neque aliud negotium habent, quam assidue rugiendo circumire quarentes quem deuorent. quae si serio, & attente cogitarem, cum timore & tremore magno vigilarem in orationibus, non minus, quam fecisse Danieli credibile est, cum esset in lacu leonum, & tres pueros in camino ignis ardentis. Laquei sunt omnes res creatae, quae sensus humanos oblectare possunt, siue quae concupiscentiam carnis, vel concu-

piscentiam oculorum, vel superbiae vitae irritare solent. de quibus dicit sapiens, Creaturae factae sunt in mulcipula pedibus insipientium, Sap. 14. & In medio laqueorum ingrederis. Eccles. 9. Verbum asperum, est mors animae, quam incurrit qui laqueis istis capitur; Sic enim vertit ex hebraeo S. Hieronymus, Liberabit te de laqueo venantium, & de morte insidiarum: nam, vt supra diximus, per verbum res ipsa intelligi debet. quod si quis velit per verbum asperum, proprie verbum ipsum accipere; poterimus per verbum asperum intelligere sententiam iudicis supremi. Ire maledicti in ignem aeternum; vel, vt docet S. Bernard. serm. 3. in hunc Psalmum, Tollatur impius ne videat gloriam Dei; hoc. n. verbo nihil asperius cogitari potest, cum eo significetur priuatio omnium bonorum, & cumulus omnium malorum, non temporalis, sed aeternus; hanc. n. sententiam iustissimi Iudicis Dei iuste merentur, qui voluntarie laqueis venatorum daemonum se implicari sinunt.

Scapulis suis obumbrabit tibi, IV.
& sub pennis eius sperabis.

Incipit nunc Propheta ipse loqui, & confirmat verba hominis iusti, ac si dicat, Merito dixisti, sperabo in eum, quoniam ipse liberauit me de laqueo venantium, & a verbo aspero. Verè enim liberauit te, & deinceps semper liberabit ab omni periculo: nam dum eris paruulus, & impar hostibus tuis, fouebit te sub alis suis, quomodo aquila, vel gallina fouet pullos suos: quando autem creueris, & per te pugnare poteris, dabit tibi scutum firmissimum, per quod invulnerabilis esse poteris: sed in hoc versiculo explicatur solum prior similitudo, in sequenti explicatur posterior. In scripturis sanctis duabus auius comparatur Deus, aquila, & gallina. Deuter. 32. Sicut aquila prouocans pullos suos, & super eos volitans. Matth. 23. Quoties volui congregare filios tuos, quemadmodum gallina congregat pullos suos. Aquila erat Deus autem incarnatio-

tionem.

tionem, gallina factus est post incarnationem; vel si placeat ad Christum oia referre, Christus vt Deus, est aquila; vt homo, gallina; vel Christus homo tempore mortalitatis suæ gallina fuit, post resurrectionem aquila. Ait igitur, Scapulis suis obumbrabit tibi, id est, Deus instar aquilæ, vel gallinæ sub alis suis te colliget, & sic scapulis suis obumbrabit tibi, vt neque ab ardore solis neq; a pluuia, & ventis; neque a moribus miluorū timeas: quare tutissimè sub pennis eius, id est, sub eius protectione, & defensione constitutus, sperare poteris liberationem, & incolumitatem,

V. Scuto circumdabit te veritas eius, non timebis a timore nocturno.

VI. A sagitta volāte in die, a negotio perambulante in tenebris, ab incursu & dæmonio meridiano.

Explicat nunc Propheta alteram similitudinem pro maioribus, qui per se pugnare possunt; hos. n. Deus armat scuto admirabili. Finxerunt Poetæ, Achillem, & Aeneam scuto quodam cœlesti donatos fuisse, vt inuulnerabiles fieret; sed illæ fabulæ sunt. Hic autem clypeus, de quo loquitur Dauid, verè clypeus cœlestis est, & inuulnerabiles reddit eos, qui ipso bene vti sciunt: & dicit Propheta, Scuto circumdabit te, quoniam scutum non est simile galeæ, quæ solum caput tegit; vel lorice, quæ regit petus, & scapulas; sed est generalis quædam defensio, cum possit attolli, demitti, conuerti ad omnes partes, & opponi omnibus iēlibus. In omnibus (inquit Apostolus ad Ephes. 5.) sumentes scutum Fidei, in quo possitis omnia tela nequissimi ignea extinguere. Sanctus Hieronymus ex hebræo vertit, scutum & protectio veritas eius. Sed facillè est videre, quæ fuerit causa diuersæ translationis: nam Sanctus Hieronymus legit, vesochera, & protectio. Septuaginta verò יסחר Interpretes legerunt, ischorecha, circū-

dabit te. Facillè autem fuit negligentia librariorum mutari primam, & vltimam literam. Melior est autem lectio, quam Septuaginta Interpretes habuerunt, quàm ea sit, quàm habuit Sanctus Hieronymus: nam verbum, sachar, circuire, סחר & circumdare significat: nomen, socher, סחר, scutum rotundum propriè designat; non est autem verisimile, Prophetam scripsisse, scutum & scutum; ad quam repetitionem vitandam, Sanctus Hieronymus vertit, scutum & protectio: quamuis illa vox propriè non protectionem, sed scutum significet. Porro scutum hoc veritas est; sicut enim dictum est, Scuto circumdabit te veritas eius; ac si dictum esset, Circumdabit te veritas Domini instar scuti, vel clypei. Veritas Domini in Scripturis sacris duobus modis accipitur, vno modo pro veracitate, & constantia in seruandis promissis, vt in Psalmo 88. Veritas mea, & misericordia mea cum ipso. & infra, Misericordiam meam non dispergam ab eo, neque nocebo ei, id est, non decipiam eum in veritate mea: altero modo oro veritate Fidei reuelata per Apostolos, & Prophetas: de qua dicitur Ioan. 17. Sermo tuus veritas est. & Prouerb. 31. Omnis sermo Dñi clypeus ignitus est. & ad Ephes. 6. In omnibus sumentes scutum Fidei, id est, veritatis, quæ sola Fide percipitur, cum sit veritas supernaturalis. Vtraque veritas clypeus est optimus ad propulsanda iacula oia inimici, siue in prosperis, siue in aduersis: nam veritas promissionum Dei est immobilis, & firma, vnde ea dici possit, Cælum & terra transibunt, verba autem mea non præteribunt. Lucæ 21. Est enim veritas Dei, quasi terra solida, in qua anchora Spei tutissimè figitur. Anchora, dum per aquam descendit, non firmat nauim, quoniam aqua est elementum liquidum, & instabile: at dum terræ adhæret, firmissimè nauim retinet. Sic spes nostra dum adhæret promissionibus hominum, non potest non semper nutare: sed cum in Dei veritate figitur, firmissima permanet. Est enim Deus verax, omnis autem homo mendax, inquit Apostolus ad Rom. 3. Et quis ei nocere poterit, cui protectio-

nem

nam promittit Deus, qui mentiri nō potest? Nec minus veritas Fidei, instar scuti protegit, dum nos certos reddit, esse post hanc vitam paratam iustis felicitatem æternam, & impijs supplicia sempiterna: futurum iudicium in nouissimo die, in quo singuli homines rationem exactissimam reddent Iudici Deo omnium operum, verborum, cognitionum, desideriorum, omissionum, denique oculos cuiuslibet, breuissimique sermonis. Hæc enim, & similia, quæ veritas Fidei nobis ostendit, facile protegere nos possent ab omni tentatione tam in rebus prosperis, quàm in aduersis, si hoc scuto assidue vteremur, id est, si veritates Fidei assidue, & fideliter cogitaremus. Quis enim non fortiter aduersus terrores omnes persistet, si attentè cogitet illa verba Domini, Matth. 10. Nolite timere eos qui occidunt corpus, animam autem non possunt occidere; sed potius time re eum, qui potest corpus & animam perdere in gehennam? Et quis vana blandimenta seculi, & iniusti lucri occasiones non facile spernet, si verba illa cœlestis Magistri serio considerare voluerit, Matth. 16. Quid prodest homini, si Mundum vniuersum lucretur: animæ verò suæ detrimentum patiatur? aut, Quam dabit homo commutationem pro anima sua? Sequitur, Non timebis a timore nocturno, &c. In quibus verbis Propheta explicat generatim pericula, in quibus auertendis scuto veritatis opus habemus. Sunt autem verba valdè obscura, & a scriptoribus variè exponuntur. Dug videntur expositiones præcipuæ. Vna sancti Augustini, qui per, timorem nocturnum, intelligit tentationem leuem, sed occultam: per, sagittam volantem in die, tentationem leuem, sed manifestam; per, negocium perambulans in tenebris, tentationem grauem, sed occultam; per, dæmonium meridianum, tentationem grauem, sed manifestam. Altera est Sancti Bernardi sermon. 6. in hunc Psalmum, qui per timorem nocturnum intelligit tentationem pusillanimitatis; per, sagittam volantem in die, tentationem vanæ gloriæ; per, negocium ambulans in tenebris, tentationem ambitio-

nis, vel avaritiæ; per, dæmonium meridianum tétationem operis mali sub specie boni. Possumus addere tertiam expositionem, quæ ex parte S. Ioannis Chrysostomi esse videtur, vt per noctem intelligatur tempus aduersitatis, per diem tempus prosperitatis: & hic sit sensus, Non timebis a timore nocturno, id est, in nocte aduersitatis non timebis ab ijs rebus, quæ non lædunt, si non timeatur: talia sunt detractiões, conuicia, contumeliæ, quæ nocent illi, a quo dicuntur; non illi, in quem dicuntur, nisi ipse timeat, & eas magnificiēdo se ipsum lædat. A sagitta volāte in die, id est, in die prosperitatis non timebis verba laudantium & adulantium, quæ superbiam gignunt, & instar sagittarum occidunt incautos. A negotio perambulante in tenebris, id est, in tenebris aduersitatis non timebis veras calamitates, & persecutiones, quas homines impij negociando negocia iniquitatis inferunt iustis. Ab incurſu, & dæmonio meridiano, id est, in meridie prosperitatis, non timebis a grauissimis, & notissimis sceleribus, ad quæ nimia opulentia, vel potentia, illos impellit. Possumus & quartam expositionem adiungere, quæ præter cœteras simplex & literalis esse videtur, vt sensus sit, Nō timebis vlla pericula, neque nocturna, neque diurna. Illud enim, Non timebis a timore nocturno, significat, non afficeris timore ab vlla re, quæ nocturno tempore timorem incutere potest. Accipitur enim timor pro re quæ timetur, vt 1. Petri 3. Timorem eorum ne timueritis. Sicut spes accipitur pro re sperata; & desiderium pro re quæ desideratur. ad Tit. 2. Expectantes beatam spem, id est, beatitudinem, quæ speratur: & Psal. 77. Desiderium eorum attulit eis, id est, re, quam desiderabant. Illud autem, A sagitta volante in die, significat, non timebis offensionem, siue calamitatem vllam diurnam. Ponitur enim sagitta pro quacumque re, quæ lædere potest interdiu, species videlicet pro genere. Illud verò, A negotio perambulante in tenebris, est repetitio, & explicatio illorum verborum, non timebis a timore nocturno: significat enim negocium perambulans

in.

in tenebris nocturnis. Vox hebraica, דבר *davar*, significat propriè verbum, sed accipitur pro re quacunque; quomodo etiam accipitur negotium pro quacunque actione, quæ lædere potest. S. Hieronymus vertit, a peste in tenebris ambulante, quia legit, *deuer*, quod significat pestem: sed Septuaginta Interpretes legunt, דבר *davar*, quod significat verbum, id est, rem omnem. Illud denique, ab incursum, & dæmonio meridiano, est repetitio & explicatio illorum verborum, A sagitta volante in die; significat enim incursum, & dæmonium meridianum, omnem occursum malum, siue omnem læsionem, omnem æruinam, quæ accidere potest in die, atque adeò in ipso tempore meridiano. S. Hieronymus vertit, A morsu insanientis meridie. Sed verbum קטב *hebraicum*, Keteb, significat morsum, & excidium, & ruinam: ideo Septuaginta Interpretes non male verterunt incursum, ut designarent generatim omnem occursum malum. Vox autem, יאסוד *iasud*, quam Sanctus Hieronymus vertit, insanientis; videntur Septuaginta Interpretes legisse literis transpositis, vesed, quod significat, & dæmonio. Vocat autem Dauid Dæmonium meridianum, siue meridianum, omnem aggressorem robustum, & potentem, qui non timet in ipso meridie nocere, & lædere. Quoriam enim Dæmon princeps est omnium iniquorum, & malefactorum; rectè transtertur hoc nomen ad omnes iniquos, & malefactores, præsertim audaces, & robustos. In summa, continetur in omnibus his verbis generalis promissio, qua securi redduntur ab omni periculo nocturno, & diurno qui confidunt in Deo, & armati sunt clypeo veritatis: nam si Deus pro nobis, quis contra nos? Rom. 8. Et quis est, qui vobis noceat, si boni æmulatores fueritis? 1. Petr. 3.

VII. Cadent a latere tuo mille, & decem millia a dextris tuis; ad te autem non appropinquabit.

Pergit Propheta, & describit victoriâ hominis iusti confidentis in Deo, & ritè

utentis clypeo veritatis. Possunt autem illa verba, Cadent a latere tuo, exponi de sagittis, ut vult Euthymius; vel de hostibus, ut docent Theodoretus, & Sanctus Bernardus; vel de commilitonibus, ut indicat S. Augustinus. Omnia sunt vera, sed expositio sancti Augustini videtur anteponenda. Nam sagittæ quidem percussæ a scuto, cadent in magna copia; sed non satis est ad victoriam, sagittas repellere, nisi etiam occurratur timori nocturno, negotio perambulanti in tenebris, & dæmonio meridiano. Itaq. prima expositio non plenè hunc locum explicat. Altera expositio melior, duobus modis potest intelligi: vno modo, ut hostes dicantur casuri felici casu: quod tunc fit, cum infideles conuertuntur ad fidem, & peccatores conuertuntur ad iustitiam, & sic prosternuntur, & occiduntur, ut moriantur peccato, & de hostibus fiant amici. Altero modo, ut hostes dicantur casuri infelici casu; quod fit cum hostes iustorum, siue dæmones, siue homines mali, repelluntur a iustis, & non solum non obtinent victoriam, sed etiâ victi prosternuntur & cadunt: nec solum non lucrantur noua gaudia, sed grauiora sibi ipsi præparant supplicia. Tertia expositio verissima est, & simplex, ac literalis: vult enim Propheta iustos admonere, ut magnificent gratiam huius victoriæ, cum rara sit, & ad paucos omnino pertineat. Cadent enim in hoc prælio ex commilitonibus mille a latere, & decem millia a dextris: ad ipsum autem non appropinquabit neque timor nocturnus, neque sagitta volans in die, neque negotium perambulans in tenebris, neque dæmonium vastans, & sauiens in meridie. Porro per laus videtur intelligi sinistra, cui opponitur dextera: & quidem mille dicuntur casuri a latere, id est, a sinistra, & decem millia a dextris; quoniam per sinistram intelligitur aduersitas, per dextram prosperitas. Multò autem plures ex hominibus cadunt, & pereunt ex prosperitate, quàm ex aduersitate. Prosperitas enim dat occasionem superbix, delicijs, licentiæ, audaciæ, & alijs id genus malis: aduersitas verò reddit homines humiles, castos,

stos, patientes. Tribulatio. n. (vt ait Apostolus ad Ro. 5.) patiētiam operatur. Iā verò numerus ille mille, & decē milliū, nihil aliud significat, nisi multos casuros a sinistris, sed multo plures a dextris. Quo modo accipiuntur hi numeri lib. 1. Reg. cap. 18. Saul perculit mille, & Dauid decem millia. Et Deuter. 32. Quomodo persequatur vnus mille, & duo fugēt decem millia.

VIII. Verumtamen oculis tuis considerabis, & retributionem peccatorum videbis.

Hæc est noua causa lætitiæ homini iusto, cui non solum promittitur victoria, sed etiam quod sit cum magna voluptate visurus proprijs oculis inimicos suos iacentes, & pro meritis punitos. Quæ promissio impletur aliquando in hac vita. Sic. n. viderunt filij Israël Aegyptios mortuos, & iacentes in littore maris rubri, Exod. 14. Sic viderunt Moses, & Aaron absorberi viuos a terra Dathan, & Abyron, Num. 16. Sic Ezechias vidit cadauera prostrata exercitus Sēnacherib, 4. Reg. 19. Sic Iudith, & populus Dei vidit caput Olophernis amputatum, & exercitum eius rufum, & fugatū, Iud. 15. Sed plenissimè implebitur hæc pmissio in die nouissimo: tunc. n. videbimus oēs inimicos nostros humi iacentes, inermes & nudos, & sine vllis viribus, & pænæ sempiternæ addictos. Verumtñ, inquit Propheta, oculis tuis, id est, non ex auditu, & fama cognosces, sed tu ipse cernes, illis ipsis oculis, quibus vidisti arma hostium, & pericula; qui quidem oculi tūc propriè tui erunt post resurrectionem; nunc enim quomodo tui sunt, quos te inuito, curiositas aperit, somnus claudit, fumus affligit, senectus obscurat, mors extinguit? Considerabis, id est, non obiter, & per transitum videbis, sed diligenter, & accuratè considerabis omnes hostes tuos, qui sint, quot sint, quid meruerint, quid patiantur. Et retributionem peccatorum videbis, id est, & tunc planè perspicies quam mercedem habeant omnes impiorum labores. Ex quo existet

pulcherrima species rerum: nunc enim omnia confusa, & perturbata esse videntur: nam cum pœna debeat culpæ, & præmium virtuti, sæpè accidit, vt iusti affligantur, & iniqui honorentur, & per hoc iustitiæ copuletur dolor, & iniquitati coniungatur gaudium: sed in die nouissimo omnia ponentur suo loco, & pœna retribuetur culpæ, eique iūgetur insolubili nexu, & maior pœna maiori culpæ reddetur, & minor minori: & contra, nexu paritèr insolubili præmium adiungetur iustitiæ, & maiori iustitiæ maius præmium, & minus minori reddetur: & tunc implebitur, quod dicitur in Psalmo 57. Lætabitur iustus, cum viderit vindictam, id est, cum retributionem peccatorum viderit: non quidem lætabitur ob calamitates miserorum; sed ob decorem iustitiæ, & sapientiæ diuinæ, quæ splendet mirum in modum in supplicijs impiorum.

Quoniam tu es Domine spes mea, Altissimum posuisti refugium tuum.

Hic versiculus facilis est quo ad verba, quæ sunt omnia declarata in explicatione primi, & secundi versiculi: sed de connexionione non leuis quæstio est: nam in verbis præcedentibus loquebatur Propheta cum hoīe iusto, dicens, Oculis tuis considerabis, & retributionem peccatoris videbis: nunc videtur loqui cum Deo, nam ait, Quoniam tu es Domine spes mea: & non apparet, quorsum hæc dicat. Et rursum verba sequentia, Altissimum posuisti refugium tuum, ad hominem iustum dirigi videntur, sed non apparet vlla connexio. Theodoretus, & quidam alij volunt subintelligi verbum dixisti, vt hic sit sensus, Quoniam dixisti, tu es Domine spes mea; ideo altissimum posuisti refugium tuum. Euthymius, & alij nihil existimant subintelligi debere; sed verba priora huius versiculi esse hominis iusti, verba posteriora esse Prophetæ; iam enim admonuimus Psalmum esse dramaticum, & ad formā dialogi factum, vt quamuis non design-

gnentur nominatim personæ, tamen nunc Propheta, nunc homo iustus, nunc Deus loqui intelligatur. Igitur posteaquam Propheta viro iusto dixit, Scapulis suis obumbrabit tibi Deus, ut gallina pullo; & scuto circumdabit te, ut Imperator militem; & non timebis a timore nocturno, vel diurno, & multi hinc inde a dextris, & a sinistris cadent; sed tibi malum non appropinquabit, quin potius deuictos hostes oculis videbis: iustus vir his auditis interloquitur, & ad Deum euersus dicit, Quoniam tu es Domine spes mea, id est, vera sunt, quæ audiui; sed ideo vera sunt, quoniam tu es Domine spes mea, non confido in viribus, & armis meis; non in viribus & armis amicorum meorum, sed in te vno confido, qui es vnica, & tota spes mea. dicitur autem Deus ipse spes iustorum, quoniam iusti non sperant solum auxilium a Deo, sed ipsum Deum sperant sibi fore veluti arcem munitissimam, ad quam confugietes tempore persecutionis, & in qua per fidem, spem, & charitatem, perque orationem, & contemplationem habitantes, nihil aduersi pati possint. Atque hoc bene Propheta intellexit, & ideo subiunxit, Altissimum posuisti refugium tuum; quasi diceret, rectè, ac sapienter posuisti Deum spem tuam; sic. n. refugium tuum constituisti in arce omnium altissima, & munitissima, ad quam (ut in versiculo sequenti dicitur) nullum malum pertingere poterit. Vbi obseruandum est, per Altissimum, non intelligi rem aliquam altissimam, sed ipsum Deum, cuius vnum ex nominibus est, Altissimus: nam in hebræo habetur, *elgion*, quod est vnū ex decem nominibus Dei, & significat Altissimum siue excelsum: & in Græco habetur *υψιστος*, generis masculini, *υψιστος*, generis feminini. Ex quo intelligim⁹ nomē, Altissimum, non esse adiectiuum, quod cum substantiuo, refugium, concordari debeat, ut sc̄sus sit, posuisti tibi refugium altissimum; sed elegisti tibi Deum, qui dicitur, & est Altissimus, in domum, siue arcem refugij.

Non accedet ad te malum, & X.
flagellum non appropinquabit
tabernaculo tuo.

Explicat nūc Propheta, quid boni consequatur iustus ex eo, quod refugium sibi constituit in Altissimo; ac dicit, eū tutissimum fore ab omni malo. Duplex est malum, culpæ, & pænæ. Malum culpæ absolute, & simpliciter malū est, ideo de malo culpæ intelligimus, Non accedet ad te malum. malum pænæ non est simpliciter malum, propterea de malo pænæ explicandum existimamus id quod sequitur, Et flagellum non appropinquabit tabernaculo tuo. Malū culpæ esse malū absolute & simpliciter, malum pænæ non item; ex eo constat, quod malum culpæ facit hominem malum; malū pænæ non facit malum, sed miserum: malo culpæ nemo bene uti potest; malo pænæ bene uti possumus: malum culpæ non potest dici bonum, quia non est iustum, cum sit iniquitas: neque est utile, cum is qui peccat semper plus perdat, quam lucretur; malum pænæ bonum dici potest, cum saepe sit iustum, & utile. mali culpæ non est auctor Deus, qui est auctor omnis boni; malum pænæ a Deo est Iudice iusto. Denique id etiam colligitur ex verbis Prophetæ: nam cum dicit, non accedet ad te malum, loquitur de malo, quod in nobis est, & extra nos esse non potest, & tale est malum culpæ, quod non nisi intra nos, id est, in libero nostro arbitrio esse potest; cum addit, & flagellum non appropinquabit tabernaculo tuo, loquitur de malo, quod potest locum habere in rebus nostris, in liberis, in seruis, in domo, in agris, in substantia reliqua, & tale est malum pænæ. Sed existit non leuis dubitatio, de veritate huius promissionis: nam David vnus erat ex iustis, & confidentibus in Deo; & tamen ad eum accessit malum culpæ, adulterium, & homicidium; & flagellum, immo flagella multa appropinquauerunt tabernaculo eius: sic enim ipse dicit in Psalm. 72. Laui inter innocentes manus meas, & fui flagellatus tota die: quod idem dici potest de Iob, Tobia, Prophetis, & Apostolis, & de

de ipso Christo, quod ad flagellum attinet: omnes enim flagellati sunt: immo Deus ipse flagellat omnem filium, quem recipit, ad Hebr. 12. Dux sunt responsiones, quæ dari possunt ad hanc dubitationem. Prior est, hanc promissionem non pertinere ad hanc vitam, sed ad futuram, quando impletum erit illud, Oculis tuis considerabis, & retributionem peccatorum videbis: tunc enim in tabernaculū cœleste ingressi tutissimi erimus ab omni malo tam culpæ, quam pœnæ: nā ideo confortauit Deus seras portarum cœlestis Hierusalem, vt dicitur in Psal. 147. & posuit fines eius pacem, vt flagellum ad ipsum appropinquare non possit. Posterior solutio est, pertinere quidem hanc promissionem ad tempus huius vitæ; sed sano modo esse intelligendam: nam non accedet malum culpæ ad electos iustos, & in Deo confidentes, non quod peccare non possint, sed quia per diuinam, & singularem prouidentiam ipsum etiam peccatum ipsis cooperabitur in bonum: quoniam permittet Deus eos in peccatum labi, vt inde fiant humiliores, & cautiore, & tantò magis accendantur in amorem Dei, quanto se agnoscunt eius gratiæ, & misericordiæ magis debitores: sic de S. Petro dicit B. Gregorius hom. 21. in Euangelia. quod idem de Sancto Apostolo Thoma, & Sancta Maria Magdalena, alijsque permultis dici potest. Flagellum verò, id est, malum pœnæ non appropinquabit tabernaculo ipsorum, quoniam ipsi habitantes per desiderium in cœlesti tabernaculo, & conuersantes cum Apostolo Paulo, per assiduam contemplationem in cœlo, mala ista temporalia vix sentient, & omnino contemnent; imò mala esse non reputabunt, sed bona, cum materiam patientiæ, & segetem gloriæ illis præbeat: hoc certè sentiebat Apostolus cum diceret, Repletus sum consolatione, super abundo gaudio in omni tribulatione nostra. 2. Corinth. 7.

XI. Quoniam Angelis suis mandauit de te, vt custodiant te in omnibus vijs tuis.

Hunc versiculoni, & sequentem allegauit Diabolus in disputatione cū Christo, Matth. 4. sed perperam; quoniam Christus non eguit custodia Angelorum, vt S. Thomas docet in 1. p. q. 113. art. 4. ad primum. Christus enim ratione diuinitatis custos est Angelorum, & hominum, & omnia portat verbo virtutis suæ, ad Hebr. 1. Ratione animæ, beatus erat, ac per hoc custodia non egebat, quemadmodum neque nos egebimus, cum beati erimus. Denique ratione carnis, eguit quidem tempore mortalitatis suæ protectione aliqua, sed eam illi exhibebat Verbum diuinum, cum quo hypostaticè vnita erat. sed his omissis, quoniam poterat homo iustus dicere, Jam quidem securus sum nihil mihi mali euenturum, cum ero in cœlesti tabernaculo; sed audire cupio, quis me custodiet in via, ne fortè errem a recto itinere, vel incidam in latrones, aut in foueam aliquam tuam: respondet Propheta, Ne timeas, quoniam Angelis suis mandauit de te, vt custodiant te in omnibus vijs tuis. Sed verba singula consideremus. Quoniam. hæc particula reddit rationem verborum sequentium, nō præcedentium; est enim sensus, quoniam Deus mandauit Angelis, vt custodiant te in via, ideo ipsi Angeli in manibus te tollent, ne vnquam offendas ad lapides pedem tuum. Angelis. Angeli sunt spiritus beati, & Principes nobilissimi, & eorum custodia tutissima est, quoniam potentissimi, sapientissimi, & optimi sunt: ex quo admonemur, quanti Deus faciat genus humanum, cui tam magnos Principes attribuit quasi pædagogos: sed cur dicit, Angelis, & non potius Angelo? quoniam habemus quidem singuli singulos Angelos custodes proprios, vt colligitur ex verbis Domini, Matth. 18. Angeli eorum semper vident faciem Patris mei. & ex Actis Apost. cap. 12. Angelus eius est: tamen habemus etiam Angelos alios custodes communes, eos videlicet, qui præsunt ciuitatibus, aut Regnis. de quibus vide Danielem ca. 10. & S. Basilium lib. 3. in Eunomium. Suis hoc additur, quoniam sunt etiam Angeli mali, de quibus dicitur Apocal. 12. Et Draco

Draco pugnabat, & Angeli eius: Deus ergo mandauit Angelis suis, ut te custodiant, non mandauit Angelis alienis, qui non custodire, sed perdere tantum nouerunt. Origenes hom. 35. in Lucam, & ex eo Io. Cassianus collatione 13. docent, Deum unicuique nostrum duos Angelos attribuisse, vnum bonum, qui nos protegendo custodiat, alterum malum, qui nos tentando exerceat. Sed falsa ista sententia est: Deus enim intentator malorum est, Iacob. 1. & mali Angeli non egent mandato Dei, ut nos tentent; satis enim per se ad hoc agendum prompti sunt. Mandauit. hæc est præcipua causa, cur Angeli diligentissime nos custodiant, quia videlicet Deus ideis mandauit; quamuis enim libenter id faciant, quia nos amant, & quia malos Angelos oderunt, & quia cupiunt instaurari sedes cœlestis Hierusalē, & quia sciūt id esse gratissimum Regi suo Christo Domino: tamen nihil magis eos mouet, quàm præceptum Domini: intelligunt enim se esse ministros Dei, & Deum nihil magis requirere a ministris suis, quàm promptam, ac simplicem obedientiam. De te. hoc significat, Deum quidem omnium hominum prouidentiam gerere, & omnibus ac singulis hominibus Angelū custodem dedisse: tamen peculiari affectu prosequi homines iustos, atque in se confidentes, & ideò peculiari studio mandauit Angelis suis de te, id est, de te homine iusto, & cōfidente in auxilio eius. Ut custodiant te. hoc est, quod Deus Angelis bonis mandauit, ut custodiant iustum ab hoste inuisibili, id est, ab Angelis malis; quandoquidem homo, qui carne circumdatus est, & nihil cernere potest, nisi quod oculis carnis manifestatur, impar est ad prælium cum dæmonibus, nisi a potentiore adiuuetur. In omnibus vijs tuis. non dicit in via, sed in vijs, & in omnibus vijs; quia multæ sunt viæ hominis, & in omnibus auxilio Angeli custodis eget. Via est lex, iuxta illud Psalm. 118. Beati immaculati in via, qui ambulant in lege Domini: & ibidem, Viam mandatorum tuorum cucurri. Via quoque est operatio iuxta illud Prouerb. 8. Dominus possedit me in ini-

rio viarum suarum. Denique vita præstata est quædam via, ut S. Basilii pulchrè docet in explicatione Psalmi primi. Via legis est multiplex, quia multæ sūt leges; via operationis est etiā multiplex, quia multæ sunt operationes; via quoque vitæ est multiplex, quia multæ sunt partes vitæ, multæ ætates, multi status. In omnibus ergo istis vijs egemus custodia, quoniam labi possumus in omni lege, in omni operatione, in omni ætate, & statu vitæ nostræ.

In manibus portabunt te, nè XII. forte offendas ad lapidem pedem tuum.

Hic versiculus plenus est metaphoris, sed alioqui facillimus est. Itaq. solum explicandum est, quæ sint manus Angelorum, qui lapides in via, qui pedes hominum. Manus Angelorum sunt intellectus, & voluntas; siue sapientia, & potentia: nam intelligendo, & volendo, omnia faciunt. Lapidés in via sunt omnia impedimenta, quæ occurrunt in hac vita, siue temporalia, siue spiritualia; scđdala, tentationes, persecutiones, & similia. Pedes, quibus ad lapides offendere solemus, sunt affectus humani. Pes tuus, inquit sanctus Bernardus serm. 13. affectio tua. & sanctus Augustinus in Psalm. 94. Pedes nostri, inquit, in hoc itinere affectus nostri sunt. Duo sunt autem principales affectus, quasi duo pedes, amor, & timor: & quocunque homo operando, loquendo, desiderando pergit; vel amore mouetur, vel timore: amore acquirendi aliquid boni, vel timore illud amittendi; siue amore cauendi malum, vel timore in illud incidendi. Tunc autem offendimus pedem ad lapidem, cum oblata occasione temporalis boni acquirendi, vel temporalis mali euadendi labimur in peccatum, vnde bonum æternum amittimus, & sempiternum supplicium incurrimus: sed qui habitant in adiutorio altissimi, ab Angelo custode ita iuuantur, ut vel occasio illa tollatur, id est, lapis ille de via remoueat; vel animus ita illustretur ad vera bona, &

vera

vera mala internoscenda, ut pede, id est affectu eleuato a terra, occasio temporalis boni, quod sine peccato acquiri non potest, facile contemnatur; & malum temporale, quod sine peccato vitari non potest, patientissimè toleretur.

XIII. Super aspidem, & Basiliscum, ambulabis, & conculcabis Leonem, & Draconem.

Posteaquam Propheta locutus est de Angelis bonis, qui iustum in Deo confidentem custodiunt: adiungit de Angelis malis, ac dicit, eos iusto confidenti non præualituros, sed è contrario ab eo conculcandos, & conterendos iuxta illud Apostoli, Rom. 16. Deus autem pacis cõterat Satanam sub pedibus vestris velociter. Vocat autem Satanam Propheta serpentem propter astutiam, & leonem propter ferociam: & quoniam multa sunt genera serpentium, vocat eum aspidem, basiliscum, & draconem, quoniam eum astutia, quæ omnibus serpentibus communis est, habet aspis coniunctam obstinationem, basiliscus crudelitatem, & draco potentiam, & vires maximas: quæ omnia Diabolo mirificè conueniunt. Neque solum hoc loco Diabolus vocatur serpens, & leo sed etiam alibi sæpe: nam Iob. 26. & Isaia 28. Serpens siue anguis tortuosus nominatur, Apoc. 12. dicitur draco, & cap. 20. Serpens antiquus. 1. Petri 5. Leo rugiens. atque hæc videtur esse expositio literalis, quam sequuntur SS. Patres Chrysostomus, & Augustinus, & alij. tamen reiiciendæ non sunt aliæ tres expositiones, quæ ad hunc locum adferri solent. Vna est Theodoretij, & Euthymij, quod hoc loco promittatur subiectio verorum serpentium, & leonum hominibus iustis, atque in Deo confidentibus. Scimus enim Danieli non nocuisse leones, neque S. Paulo viperam. & in historijs SS. Patrum a S. Gregorio, Sulpitio Palladio, alijsque bonis auctoribus descriptis, non rara sunt exempla subiectionis exhibitæ sanctis viris a leonibus, & serpentibus, alijsque syluestrib. feris. Altera est, per ista quatuor nomina in-

Bellarm. in Psalm.

telligi quatuor persecutiones Ecclesiæ: persecutionem Iudæorum, qui instar aspidum surdarum obstinatissimi sunt; persecutionem hæreticorum, qui per basiliscum designantur; persecutionem Paganorum, qui leonibus comparari possunt; & persecutionem Antichristi, qui satis aptè draco nominari potest. Hanc explanationem ex parte indicauit S. Augustinus. Tertia est S. Bernardi, & aliorum, qui per quatuor ista animalia quatuor vitia significari docent; per aspidem videlicet obstinationem, vel auaritiam; per basiliscum inuidentiam; per leonem superbiam; per draconem iracundiam. Sed vir iustus, & non suis viribus, sed auxilio Dei fretus facile per charitatem super aspidem, & basiliscum ambulabit; & per humilitatem conculcabit leonem, & draconem.

Quoniam in me sperauit liberabo eum; protegam eum, quoniã cognouit nomen meum.

Quoniam in ore duorum, vel trium testium stat omne verbum: Propheta sanctus tribus testimonijs probare voluit quod initio promisit, eos omnes protegendos a Deo, qui verè cõfidunt in Deo. Primum testimonium fuit hominis iusti, qui ex proprio experimento testimonium reddidit veritati, dicens, Quoniam ipse liberauit me de laqueo venantium, &c. Alterum testimonium fuit ipsius Prophetæ, qui vt Spiritus sancti tuba, vel præco dixit, Scapulis suis obstruabit tibi, &c. Testimonium tertium est ipsius Dei, qui in tribus vltimis versiculis confirmat omnia, quæ supra dicta sunt, & multa etiam addit. Sunt enim in his tribus versiculis octo promissa Dei, quæ optimo ordine incipiunt a liberatione a malis, & procedunt vsque ad exaltationem ad summum bonum: & quidem quatuor pertinent ad hanc vitam, Liberabo eum, protegam eum, exaudia eum, cum ipso sum in tribulatione: quatuor reliqua ad vitam futuram, eripiam eum, glorificabo eum, longitudine dierum replebo eum, ostendam illi salutarem meum.

Oo Ait

Ait igitur, Qm̄ in me sperauit, liberabo eum libertas, quæ hic promittitur, siue liberatio, pōt intelligi generatim ab oībus malis, & pōt referri ad liberationes supra dictas per Angelos, per scutum, & per alias res, vt sensus sit, non putet iustus liberari se posse per scutum, vel per Angelos sine me; illa. n. sine me nihil pos sunt: sed ego liberabo eum per scutum, per Angelos, & sæpe etiam per me ipsū siue illis, qm̄ in me, non in illis potissimū sperauit. Cæterum pōt etiam altiore sē su significari hoc loco libertas a tyranni de vitiorum, quæ est libertas propria hominum iustorum perfectorum, & pter cæteras oēs maximè expetenda. de qua Dñs dicit in Euangelio. Ioā. 8. Qui facit peccatum, seruus est peccati. & Si vos filius liberauerit, verè liberi eritis. Hæc verò libertas non datur oībus, sed sperantibus in Deo. Qm̄, inquit, in me sperauit, liberabo eum. vbi vox hebræa, chasak, ad hære, diligere, placere, significatq; uare non quæcunque spes, sed ea fiducia, quæ oritur ex bona conscientia, & ex dilectione, & filiali adhæsione nascitur, liberat hominem a tyrannide vitiorum. nam quemadmodum cupiditas ligat, & captiuum facit, ita charitas soluit, & liberum facit, & quo magis charitas crescit, eo magis cupiditas minuitur: & cum perfectissima erit charitas, & adhæsio ad summum bonum, tunc perfectissima erit libertas, quæ ab Apostolo dicitur libertas gloriæ filiorum Dei ad Rom. 8. Sequitur altera promissio, Protegam eum, quoniam cognouit nomen meum. Nam qui liberatur in hac vita a tyrannide vitiorum, non perfectè liberatur, sed eget protectione Dei, tum vt non iterū captiuus ducatur ab hostibus, tum vt p̄ficiat in acquisita libertate gratiæ, donec perueniat ad libertatem gloriæ; iō Deus protectionem continuam pollicetur ijs, qui cognouerunt nomen eius: dicitur autem cognoscere nomen Domini, qui eius potentiam, & sapientiam, & bonitatem cognoscit, vnde in spem, & fiduciam firmissimam erigitur. Dicitur etiam cognoscere nomen Domini, qui ex intima familiaritate nouit Deum vt pastorem, amicum, & patrem: de qua no

titia dicitur in Euangelio Ioan. 10. Ego sum pastor bonus, & cognosco oues meas, & cognoscunt me meæ. & contra de alijs dicitur Matth. 25. Non noui vos. & 2. Thess. 1. Dantes vindictam ijs, qui non nouerunt Deum. Ineffabilis omnino benignitas Dei est, qui non solum innotescere dignatus est, vt Dominus, sed etiam vt amicus. quod miratur Dauid, cum ait, Quid est homo, quia innotuisti ei?

Clamabit ad me, & ego exau- xv.
diam eum; cum ipso sum in tribu
latione, eripiam eum, & glorifica
bo eum,

In hoc versiculo quatuor alia promissa continentur. Primum est exauditio generalis, quæ soli Deo, qui omnipotēs est, conuenire potest: quod autem hæc sit promissio generalis exaudiendi omnes preces confidentium in Deo; verispicuum est ex eo quod nulla restrictio adhibetur, sed absolutè dicitur, exaudiam eum. Deinde alia loca Scripturæ confirmant hanc promissionem. Deuter. 4. Non est alia natio tam grandis, quæ habeat Deos appropinquantes sibi, sicut Deus noster adest omnibus obsecrationibus nostris. Io. 5. Quodcunque volueritis, petetis, & fiet vobis. Marci 11. Oīa quæcunque orantes petitis, credite quia accipietis, & euenient vobis. 1. Ioā. 3. Fiduciam habemus ad Deum, & quicquid petierimus, accipiemus ab eo. Quamuis autem conditiones nonnullæ requirantur, vt semper oratio exaudiat: tamen præcipua est, quæ habetur hoc loco, cū dicitur, Clamabit ad me; clamor enim significat vehementiam desiderij ex dilectione, & fiducia procedentem. Sequuntur tria promissa, Cum ipso sum in tribulatione, eripiam eum, & glorificabo eū. quæ promissa aptissimè respondent tribus diebus totius anni celeberrimis; Feriæ sextæ, in qua Dominus in cruce pendens in maxima tribulatione fuit; Sabbato, in quo erutus de omni tribulatione suauiter requieuit; & diei Dominico, in quo resurgens ex mortuis gloriosissimè trium

p̄m

triumphauit. Eiusmodi tres dies ad omnes iustos, & electos pertinent: omnes enim cum Christo tribulationes ferre debemus Feria sexta, id est, in hac vita, quæ breuissima est, & pro vno die computatur: deinde requiescere in sepulchris die sabbati: denique resurgere die dominica, & cum Christo in æternum glorificari. Ait igitur Dominus, Cum ipso sum in tribulatione. qui enim clamabat, ante omnia donum patientiæ postulabat, quæ necessaria est, vt reportemus promissiones Dei, ad Heb. 10. Dñs autē, qui dixit, exaudiam eum, primo loco promittit donum patientiæ dicēs, Cum ipso sum in tribulatione: in qua sententia singula verba suum pondus habent. Illud, cum ipso, significat Deum quidē esse cum rebus omnibus multis modis, sed speciali quodam modo, per internā consolationem, & influxum ineffabilis dulcedinis esse cum ijs, qui tribulantur. quo modo mater ægrotanti filiolo maiora signa beneuolentiæ exhibet quā cæteris filiis bene valentibus: & nos omnes membrum malē affectum diligētius fouemus, quā cætera membra sana. Illud, sum, est verbum temporis præsentis, cum cætera omnia sint temporis futuri, liberabo, protegam, exaudiam, eripiam, glorificabo, replebo, ostendam: hoc autē significat, tribulationem huius vitæ esse momentaneam; quia de tempore præsentis nihil habemus, nisi momenta impartibilia: proinde propriē Apostolus dixit, quod in præsentis est momentaneū & leue tribulationis nostræ, supra modum in sublimitate æterni gloriæ pōdus operatur in nobis. Itaque misericordia Dei nostri facit, vt tribulatio non nisi guttatim instilletur nobis: cum futura gloria sit quasi flumen inundans, iuxta illud Psal. 36. Torrente voluptatis tuæ potabis eos. Illud, in tribulatione, significat, Deum in hac vita donare quidem consolationes multas amicis suis, siue corporales, siue spirituales, sed non sine admixtione tribulationis. S. Basiliius homil. 5. in Exameron, scribit, in statu innocentie nasci solitas in campis rosas sine spinis; sed post pēti inuentas quidē fuisse spinas sine rosis, sed non rosas sine spinis, vt

impleretur illud, Gen. 3. Spinæ & tribulos germinabit tibi. Sed quicquid sit de veritate historiæ, moralis significatio verissima est: nā tribulationes sine consolationibus aliqui habent, præsertim ex impijs: sed cōsolationes sine tribulatione in hac vita nulli habent, neque impij, neque pii: sed hoc est discriminē inter pios, & impios, quod pii cum tribulationibus veras, & solidas a Spiritu sancto cōsolationes habent; impij cum consolationibus breuibus, & apparentibus magis, quā veris veras, & solidas tribulationes habent. Fructus spūs est charitas, & gaudiū ex Apostolo ad Gal. 6. qui autem spiritum non habent, quo modo fructum eius habere possunt? Sequitur, Eripiam eum. quæ promissio propriē spectat ad vitam futuram; iusti enim in morte liberantur ab omni tribulatione præsentis, & futura. sic. n. scribit S. Ioannes Apoc. 14. Beati mortui, qui in Domino moriuntur; iam enim dicit spiritus, vt requiescant a laboribus suis. & Apoc. 21. Absterget Deus omnem lacrymam ab oculis eorum, & mors ultra non erit, neque luctus, neque clamor, neque dolor erit ultra. In pii vero videntur quidem eripi per mortem a tribulationibus huius vitæ, sed non verē eripiuntur a tribulatione, sed transeunt de tribulatione temporali ad æternam: quo modo, non dicuntur propriē de carcere liberari, qui educuntur de carcere ad patibulum. Aliqñ tamen sancti viri etiam in hac vita eripiuntur ab aliqua tribulatione, vt contigit Patriarcha Ioseph Iob, Dauid, Tobia, Danieli, trib. pueris, Susannæ, & alijs: sed illa modica, & temporalis liberatio fuit. Restat quarta promissio, Et glorificabo eum. quæ interdū in hac vita vtunque adimpletur: sanctus enim Iob post grauissimam tribulationem non solum ab illa ereptus, & liberatus fuit, sed etiam valdē glorificatus. qđ idem legimus de Patriarcha Ioseph, & de Rege Dauid. Cæterum vera glorificatio ad aliam vitam sine dubio pertinet: tunc enim iusti fulgebunt sicut sol in Regno patris eorum, Matth. 13. Et sedebunt super sedes iudicantes mundum vniuersum, Matth. 19. & 1 Cor. 6. de quorum gloria Prophetia canit Psal. 138. Milia autem

tem nimis honorificati sunt amici tui Deus, nimis confortatus est principatus eorum. Et Apostolus concinit ad Ro. 8. Non sunt condignæ passionēs huius temporis ad futuram gloriam, quæ reuelabitur in nobis.

XVI. Longitudine dierum replebo eum, & ostendam illi salutare meum.

Hæc sunt duo postrema beneficia, quæ promittuntur ijs, qui habitant in adiutorio altissimi; & continent explicationem beneficii sexti, in quo dictum est, glorificabo eum. gloria. n. sanctorum nascetur ex adeptione summi boni: summum verò bonum est æterna fœlicitas: nam fœlicitas sine æternitate, est fœlicitas misera, & æternitas sine felicitate est æterna miseria. Primum ergo describit in hoc versiculo vera æternitas, cum dicit, Longitudine dierum replebo eum: deinde vera felicitas, cum additur, Et ostendam illi salutare meum. Per longitudinem dierum, intelligitur diuturnitas temporis, sed tanta, ut planè repleat desiderium humanum; hoc. n. promittit, qui dicit, Longitudine dierum replebo eum. quia verò non potest repleti desiderium humanum, nisi æterna duratione, ideò per hæc longitudinē dierum significatur æterna duratio. Vtitur autē scriptura eiusmodi verbis in designanda æternitate, quia nobis loquitur, qui non nouimus aliam longam durationem, nisi in diebus multis, aut longis; alioqui enim in vera æternitate non erit successio dierum, sed vna dies semper manens, vel potius vnū momentum semper durans absq. vlla mutatione, aut vicissitudine. At, inquires, vicissitudo temporum mirificè delectat; & videmus homines varijs oblectationibus fallere tædium longitudinis dierum in æstate, & longitudinis noctium in hieme. Respondeo, id accidere, quia tempora huius vitæ sunt omnia varijs incommodis plena, & ideò semper anhelamus ad futura: sed quando veniet illa dies, qua nulla expectari poterit melior, vultum omnium erit, ut illa semper duret.

Et ostendam illi salutare meum. si per salutare intelligamus salutem, sensus erit, ostendam illi salutem meam, id est, efficiam, ut vir iustus non amplius ex fide viuatur, credendo quod non videt: sed planè videat, & sentiat, atque experimento proprio cognoscat salutem, quæ ex me est: est autem salus hæc, quæ nobis promittitur, ipsa Dei visio, quæ perfecta, & perpetua sanitas totius hominis erit. tunc. n. sanabitur mens ab omni errore, & ignorantia, cum ad summam sapiētiam perueniet, quæ in visione supremæ, atq; altissimæ causæ posita est. Et illa sapiētia nascetur in voluntate amor erga summum bonum ardentissimus, & stabilis unde perfectè sanabitur affectus ab omni mala cupiditate. Redundabit autē hæc sanitas in partem inferiorem, quæ superiori sine vlla resistentia, vel rebellionē subiicietur, & in ipsum corpus, quod immortale, impassibile, formosissimum, & sole fulgētius resurget. Quod si per salutare intelligatur Saluator, ut S. August. magis probat; tunc sensus erit, Ostendam illi Saluatorem meum, id est, Saluatorem, quem ego misi, & faciam ut vir iustus oculis mentis cernat eum, quia Deus est; & oculis corporis cernat eundem, quia homo est: quam ostensionem suæ diuinitatis promissit Christus, Ioan. 14. cum ait, Qui diligit me, diligetur a Patre meo, & ego diligam eum, & manifestabo ei me ipsum. Hæc autem manifestatio diuinitatis, ipsa est vita æterna, & summum bonum, & salus, siue sanitas perfecta totius hois. Quare snia huius loci in idem recidit, siue per salutare, intelligamus salutem, siue Saluatorem. Sed libet in fine huius Psalmi admirari cecitatem generis humani: nam cum omnes cupiāt fœlicitatem æternam, neque possint eam non vehementer optare: tamē pro temporali, & parua prosperitate siue in diuitijs acquirendis, vel cumulandis; siue in honoribus, & dignitatibus adipiscendis, vel conseruandis; siue in delectationibus carnis, ac sensuum vndecunq; captandis, nihil non faciunt, currunt, discurrunt, vigilant, laborant, sudant, ingenium acuunt, linguam expolunt, animam intendunt: & pro vera, & solida, & sempiterna

piterna felicitate, pro veris diuitijs, pro summis honoribus, pro ineffabili iucunditate, quæ parata sunt diligentibus Deum, ita pigri sunt, ut pro his vix digitum mouere dignentur. Horror est omnino cogitare, hominem ratione, & intelligentia præditum, ijs rebus consecrandis toto vitæ suæ tempore occupari, quibus sæpe aditum ad æterna & summa bona sibi ipse præcludit. Orandus est Deus, ut qui promittere dignatus est tam ingentia bona, idem spiritum bonum nobis infundat, & illuminatos oculos cordis habere nos faciat, ut sciamus quæ sit spes vocationis eius, & quæ diuitiæ gloriæ hereditatis eius in sanctis, ut Apostolus admonet Ephes. 1.

P S A L M V S XCI.

Titulus, & Argumentum.

Psalmus Cantici in die Sabbati.



Hic titulus habetur in omnibus codicibus hebraicis, grecis, & latinis: & continet argumentum Psalmi; est. n. compositus Psalmus ut cæteretur in die sabbati, ad erudiendum populum, ut discat die sabbati vacare laudibus Dei, præsertim ob creationem, & gubernationem mundi. Errant Iudæi, qui otium sabbati sibi datum esse existimant ad vacandum conuiujs, & deambulationi. Et Iudæos imitantur Christiani, quando ignorantes sabbatum cordis, in sola abstinētia ab operibus, & labore manuum sanctificationem festorum constituunt; hæc. n. oportet facere, & alia grauiora non omittere. hoc est, sanctificandi sunt dies festi abstinendo ab operibus seruilibus, sed otium illud ponendum est in considerandis operibus Dei. ex qua consideratione accenditur amor diuinus & fit in corde quies, & tranquillitas ineffabilis, quæ dicitur sabbatum cordis, sabbatum verè delicatum, & sanctum.

Explicatio Psalmi 91.

Bonum est confiteri Domino, & psallere nomini tuo altissime,

Hæc est exhortatio ad laudandum Deū, & psalterio, & voce. Bonū, inquit, est confiteri Dño, id est, iustū, vtile, delectabile, & honorificum est cōfiteri Dño confessionem laudis. iustum, quia debitum; vtile, quia meritorium; delectabile, quia dulce est amanti laudare dilectum; honorificum, quia munus est quasi proprium cœlestium potestatum. Et psallere nomini tuo altissime, id est, non solum bonum est confiteri corde, & lingua, sed etiam instrumentis musicis, quæ in primis psalterium est, laudes personare nomini tuo, id est, gloriæ tuæ o altissime.

Ad annunciandum mane misericordiam tuam, & veritatē tuam per noctem.

Hæc est materia confessionis, de qua dictū est, bonum est confiteri. Bonū igitur est confiteri, ad annunciandum mane misericordiā tuam, id est, ut annuncietur, & prædicetur omnib. misericordia tua; qua mundum creasti, & veritas, siue iustitia, qua mundū gubernas: & qm̄ opus misericordiæ manifestum est, annuncietur de die; quis. n. ignorat, cœlum, & terram & quicquid in eis est a Deo fuisse cōditū ex misericordia, & bonitate, non ex necessitate, vel debito? Quia verò opus iustitiæ occultum est, cum arcano Dei iudicio sæpe iusti affligantur, & iniqui exaltentur, ideo hoc opus annūciatur per noctem, in obscuro fidei, non in luce cognitionis. Item annuncietur mane misericordia, & per noctem iustitia; ut homines in luce prosperitatis gratias agāt misericordiæ Dei, & in tenebris tribulationis gratias agant iustitiæ Dei: nam, ut Sanctus Augustinus hoc loco docet, nō minus Pater amat filios, quando blandi-

00 3 tur,

nur, quàm quando minatur: nec minus grati esse debemus Deo disciplinam correctionis danti tempore tribulationis, quam beneficia cōferenti tempore prosperitatis. Quare imitari debemus hunc eundem Prophetam, qui alibi canit, Benedicam Dominum in omni tempore: semper laus eius in ore meo.

III. In decachordo psalterio cum cantico, in cithara.

Explicuit materiam confessionis, de qua dictum erat, Bonum est confiteri Domino: nunc explicat quod adiunxit, & psallere nomini tuo: dicit enim psallendum esse in psalterio, & cithara, sed non sine dulci cantico vocis humanæ. In hebræo videtur distingui decachordū a psalterio: sic enim vertit sanctus Hieronymus, i dechacordo, & in psalterio; & verè habetur distinctio in Codice hebraico: sed tamen constat psalterium fuisse instrumentum decem chordarum sic enim legimus in Psal. 32. Confitemini Domino in cithara, in psalterio decem chordarum psallite illi. & in Psalm. 143. In psalterio decachordo psallam tibi; & concordat textus hebraicus cum græco, & latino. quare hoc loco ubi dicitur in hebræo, in decachordo, & in psalterio; vel abundantillæ particulæ, &, in, & eas Septuaginta in suis libris non inveniunt: vel certè significant non distinctionem, sed explicationem, ac si dictum esset, In decachordo, in psalterio inquam; sed res non est magni momenti. Quid spiritualiter significet psalterium & cithara, diximus in explicatione Psalmi tricesimi secundi v. 2.

IV. Quia delectasti me Domine in factura tua, & in operibus manuum tuarum exultabo.

Incipit nunc prædicare opus creationis, quod ad misericordiam pertinet. cōtemplatus, inquit, pulchritudinē, varietatem, excellentiam, virtutes, utilitates facturarū tuarū, cæli, terræ, aquarum, syde-

rum, animalium, plantarum; admirabilē animo voluptatem percepi: sed in his omnibus non ipsa factura tua me delectavit, quoniam non substiti in ea, sed tu me delectasti in factura tua; ex ea. n. ascendit animus ad infinitam pulchritudinem tuam considerandam, & in amorem tantæ pulchritudinis raptus cœpi vehementius admirari, & delectari. ac propterea iugiter exultabo, & exultans laudabo te in operibus tuis. Nota diligenter, non dixisse Prophetam, delectavit me factura tua; sed delectasti me in factura tua; quando. n. sistimus in delectatione creaturarum, fiunt creaturæ muscipulæ pedibus insipientium. quō facta est Bethsabeæ pulchritudo muscipula pedibus eiusdem Prophetæ, quando eā videns in ea delectari voluit. Nota præterea pro voce, exultabo, in hebræo esse, arannen, quod significat, exclamabo; 378 quare exultabo, exponendum est, præ lætitia, & admiratione exultans cātabo laudes tuas magna voce, cordis, & corporis.

Quàm magnificata sunt opera tua Domine! nimis profundæ factæ sunt cogitationes tuæ.

Quia dixerat, se valde delectatū esse in operibus Dñi; ne quis existimaret, eū planè comprehendisse, ac penitus inspexisse omnem excellentiam operum Dñi addit opera Dñi maiora, & sapientiā, quam facta sunt, profundiorē esse, q̄ ut ad eorum perfectam cognitionē pervenire in hac vita possimus. Quàm magnificata, inquit, sūt opera tua Domine, id est, admiror magnitudinem, & excellentiam operum tuorum: non comprehendendo animo, vel cognitione tātam magnitudinem; verè enim dixit Ecclesiasticus cap. 1. Arenam maris, & pluviz guttas, & dies seculi quis dinumeravit? Altitudinem cæli, & latitudinem terræ, & profundum abyssi quis dimensus est? Sed hæc licet magna sint valdè, tamen si ne comparatione maior est sapientia opificis, de qua subiungit Ecclesiasticus, sapientiam Dei præcedentem oīa, quæ
invenit

inuestigauit? & Dauid hoc loco, nimis profunda facta sunt cogitationes tuæ, id est, sapientissimæ illæ cogitationes, quibus adinuenisti res tam mirabiles, & tam perfectas, quibus nihil addi, vel de trahi potest, tam sunt occultæ ut omnē intelligentiam superent. Ac ut in rebus minimis, & vulgaribus exemplum ponamus: quis capiat quo modo in exiguo semine lateat tanta proceritas arboris, varietas ramorum, viriditas frondium, decor florum, utilitas fructuum, & ipsum etiam semen ad speciem propagandam? quis comprehendat, qua arte Dominus in minimis animalculis inseruerit vitā, & sensum, & motum? & præterea in formicis prudentiam, astutiam in araneis, in culicibus, & pulicibus tantam vim fodiendi instrumento tam fragili?

Transit nunc Propheta ad opus gubernationis, & prouidentia diuinæ, in qua præcipue iustitia, siue veritas elucet. In hoc autem summa prouidentia consistit, quod impij ad tempus florere permittuntur, ut æterna ariditate damnentur: Iusti contra, ad tempus ariditate mulcantur, ut in æternum florent. Cū exorti fuerint peccatores sicut fœnum, id est, cū repente, & in magna copia germinauerint, & creuerint peccatores, ut solet fœnum, quod statim, & multum crescit. Et apparuerint omnes, qui operantur iniquitatem, id est, cū non solum germinauerint, sed etiam floruerint, ut sonat vox hebraica, ziz, & valde conspicui apparuerint, in sublimitate videlicet positi; & in diuitijs abundantes.

VI. Vir insipiens non cognoscer, & stultus non intelliget hæc.

Concludit hanc partem Psalmi, quæ ad creationem rerum pertinet, affirmans non esse hominum insipientium, sed sapientium cognoscere, quā sint magna & inscrutabilia opera Domini. Stulti. n. non cogitant in rebus creatis nisi voluptatem, vel utilitatem, quam ex illis capiunt: quod illis commune est cum iumentis insipientibus, quæ neque intelligentiam habent, neque ignorantiam suam norunt. Sapientes autem tametsi nō assequuntur magnitudinem operum Dei, tamen intelligunt ea se assequi non posse, & ignorantiam suam intelligunt, & quo perfectius ignorantiam suam intelligunt eo magis admirantur opera Dei, & ad veram sapientiam propinquant. Vir, inquit, insipiens non cognoscer, quā videlicet magnificata sint opera Domini; & stultus non intelliget, quā profundæ factæ sint cogitationes eius; hæc enim docta ignorantia sapientium tantū est.

Ut intereant in seculum seculi **VII.** tu autem altissimus in æternum Domine.

Pendet sententia versiculi superioris ab hoc versiculo; & subintelligitur aliquid, ut, hoc fiet, vel, hoc diuina prouidentia permittet, ut intereant in seculum seculi, id est, ideò dabit iniquis Deus prosperitatem temporalem, ut remuneretur aliqua bona opera eorum, & propter scelera sua iustè puniantur morte sempiterna. Tu autem altissimus in æternum Domine, id est, tu Domine valde dissimilis es iniquis; quoniam illi ad breue tempus emergunt ad aliquam altitudinem, tu autem in æternum altissimus es.

Quoniam ecce inimici tui Dñe, **IX.** quoniam ecce inimici tui peribunt, & dispergentur omnes, qui operantur iniquitatem.

VII. Cū exorti fuerint peccatores sicut fœnum: & apparuerint oēs, qui operantur iniquitatem.

Probat iniquos ad tempus solum, id est, breue prosperandos. Ecce, inquit, inimici tui, ecce, inquam, inimici tui peribunt. Illud, ecce, significat repentinam mutationem;

tionem; quasi dicat, Qui virebant, & flore-
bant, subito peribunt. Illa verò repeti-
tio, Ecce inimici tui, ecce inimici tui, au-
get execrationem; quemadmodum è
contrario illud Psalm. 115. O Domine
ego seruus tuus, ego seruus tuus, & filius
ancillæ tuæ; auget pietatis affectum. Ve-
rè enim valdè execrandus est, qui vt ami-
cus sit huius Mundi, non timet inimicus
Dei constitui: sic enim scribit sanctus Ia-
cobus in 4. cap. Epistolæ suæ, Quicumq;
voluerit amicus esse seculi huius, inimi-
cus Dei constituitur. Quanta autem per-
uerfitas est propter amicitiam rei crea-
tæ contemnere amicitiam Creatoris?
Et dispergentur omnes, qui operantur
iniquitatem. Hæc posterior pars versicu-
li est repetitio, & declaratio prioris.
Quos enim vocauit inimicos Dei, nunc
vocat operantes iniquitatem: & quos
dixit perituros, nunc dicit dispergēdos:
nam hoc ipso fiunt homines inimici
Dei, quòd contrarij esse incipiunt vo-
luntati eius, quæ nobis per legem diui-
nam declarata est. Illi autem contrarij
sunt legi Dei, qui operantur iniquita-
tem. Lex enim Dei rectissima est, & re-
ctitudinis regula: iniquitas autem cur-
uitas est, & recessus a regula. Porro dis-
pergendi dicuntur impij ad similitudi-
nem aridi fœni, cui paulò ante compa-
rati sunt. Sicut enim fœnum aridum a
vento ita raptatur, & dispergitur, vt
non amplius compareat; sic impij
vbi modicum creuerint, & floruerint,
volente Deo exciduntur, & de terra
tolluntur, vt etiam memoria eorum
pereat.

**X. Et exaltabitur sicut Vnicornis
cornu meum, & senectus mea in
misericordia vberi.**

Opponit nunc iustos impijs, atque
ostendit eos tandem a diuina prouiden-
tia, & iustitia verè exaltandos; loquitur
autem in persona sua, bene sperans
de se, quòd videlicet sit ipse vnus de
numero iustorum. Et exaltabitur sicut
Vnicornis cornu meum, id est, cornu

meum, potentia videlicet, & gloria;
ac fœlicitas mea crescet in altum, non
sicut fragile fœnum, sed vt cornu Vni-
cornis; Vnicornis enim animal est ge-
rens in fronte cornu vnicum, sed excel-
sum, & robustum valde. Et senectus
mea in misericordia vberi, id est, non
solum potentia mea, & gloria, ac fœli-
citas magna erit, sed etiam diuturna, &
constans vsque ad vltimam senectutem:
nam & senectus mea erit in abun-
danti misericordia apud Deum. Sanctus
Augustinus mysticè per senectutem intel-
ligit vitam futuri seculi, quæ erit post
hanc vitam temporalem, sicut senectus
est post iuuentutem. Verè enim vita fu-
tura sanctorum erit in misericordia vbe-
ri, tollente omnem ab eis miseriam: &
erit similis senectuti ob maturitatem iu-
dicii, & vacuitatem passionum, & habe-
bit caput ab omni parte caudidum, vbi
ne vnus quidè capillus niger, id est, nul-
la cogitatio, nulla cupiditas, nulla volū-
tas tetra inueniri poterit. In hebræo pro
misericordia, habetur, scemen, oleo, &
senectus mea in oleo vberi. In græco
quoque legitur, ἐν ἔλαιῳ, id est, in oleo.
Sed noster Interpres videtur legisse, ἐν
ἐλεῶ, in misericordia. Dicitur autem sene-
ctus in oleo vberi, quando abundat hu-
more, qui facit eam esse diuturnā: quia
verò per oleum misericordia intelli-
gitur: rectè Interpres vertit, in mise-
ricordia vberi, etiam si fortè legerit in
oleo.

**Et despexit oculus meus ini- X I.
micos meos, & in insurgentibus
in me malignantibus audiet au-
ris mea.**

Adiungit Iustus ad fœlicitatē suam,
quæ non timebit amplius inimicos suos.
Et despexit oculus meus inimicos meos
id est, vidi, & contempsi præsentēs ini-
micos, quoniam diuina prouidentia fe-
cit, vt mihi nocere non possent. Et in
insurgentibus in me malignantibus au-
dient auris mea, id est, & quantum ad ini-
micos absentes, qui maligni cum sint,
in me insurgere cogitant, audiet auris
mea

mea nuncium interius eorum. In hebraeo pro, despexit, est respexit, sed idem est sensus: significatur enim eo verbo, quod iustus aspexit liberè, & sine timore inimicos suos. Qui enim timent vim inimicorum, non audent eos aspicere, sed oculos demittunt, & fugiunt: qui verò eos contemnit, liberè illos intuetur: & eodem modo posset exponi quod sequitur, videlicet, quod iustus sine timore audiet aggressionem malignantium in se futuram, quoniam non dubitat de victoria.

XII. Iustus vt palma florebit, sicut Cedrus Libani multiplicabitur.

Quod de se Propheta dixerat, transfert nunc ad alios iustos, quos eleganti similitudine comparat Palmæ, & Cedro, vt opponat iniquis, quos comparauerat fœno. Nam fœnum mane floret vespere arefcit, & nullo negotio secatur à messoribus, vel à vento dispergitur, & ad nihil vtile est nisi ad ignem. Palma verò stabilis est, & longo tempore flores, & fructus conseruat: sicut etiam Cedrus Libani celsissima, & robustissima est, & ex ea ornantur palatia, & laquearia Regum; sic impij breuissimo tempore virent, & florent, & paulò post in clibanum gehennæ mittuntur. Isti verò instar palmæ in æternum virebunt, & afflorescent, & fructus dulcissimos adferent: nec facillè succumbent oneribus, sed virtute omnia superabunt: nec non vt Cedri Libani multiplicabuntur, id est, augebuntur, & crescent in maximam altitudinem; multiplicatis ramis bonorum operum, & firmissimis radicibus perseuerantiæ innixi nullo tempe rationum vento deicientur: & tandem vtilis erunt instar ligni cedrini ad ornanda laquearia Regis Regum in cœlesti Hierusalem.

XIII. Plantati in domo Domini, in atrijs domus Dei nostri florebunt.

Reddit rationem, cur iusti instar Palmarum, & Cedrorum sint futuri: quoniam non in campis sylvarum, aut in desertis montibus, sed in domo Domini plantati erunt, & in atrijs Dei nostri florebunt: id est, in Ecclesia Dei per rectam Fidem plantati, & aquas Sacramentorum & Verbi Dei rigati, in charitate fundati, & radicati flores honestatis, & fructus bonorum operum parient. Siquidem extra Ecclesiam, & sine fundamento Fidei omnis plantatio eradicabitur, quippè quam non plantauit Pater cœlestis.

XIV. Adhuc multiplicabuntur in senectâ vberi, & bene patientes erunt, vt annuncient.

Quod de se paulò ante dixerat Propheta, quod habiturus esset senectâ in misericordia vberi; idem nunc dicit de alijs iustis, quod non solum sint prosperandi in iuuentute, & ætate matura sed etiam senectutem bonam, & diuturnam habituri sint. Adhuc, inquit, multiplicabuntur in senectute vberi, .i. præterea iusti multiplicabuntur in diebus vitæ, id est, multiplicabuntur diebus vitæ suæ, vsque ad senectutem pinguem humore vitali, id est, viridem senectam; & bene patientes erunt, id est, in ipsa quoque senectute facillè patientes erunt laborum, ob firmam corporis constitutionem. Illud, vberi, sanctus Hieronymus cum hebræis iungit cum sequentibus sic legens, Fructificabunt in senectute: pingues, & frondentes erunt. Sed vox, defenim, quæ significat, pingues, potest etiam rectè coniungi cum superioribus, vt Septuaginta voluerunt, vt hæc sit translatio ad verbum, Multiplicabuntur pingues in senectâ, id est, conseruantes pinguedinē vitalis humoris in ipsa senectute, quod est idem cum nostra lectione, Multiplicabuntur in senectâ vberi. Illud autem bene patientes, sanctus Hieronymus vertit, frondentes: & verè vox hebraica, raananim, significat propriè videntes, & florentes, ac per hoc etiam fron-

וְיִשְׁכְּחוּ

לִפְנֵי

frondentes; sed Septuaginta Interpretes explicauerunt metaphoram, & verterunt, *ioan. 3. 12.*, quod significat homines bene affectos; Interpres verò latinus vertit, bene patientes, quia magis respexit ad significationem vocis, quàm ad proprietatem sermonis: sed sensus semper est idem. Illud, vt annuncient, pertinet ad versiculum sequentem.


XV. Quoniam rectus Dominus
Deus noster & non est iniquitas
in eo.

Hæc omnia, inquit, euenient iustis, vt annuncient, & notum faciant omnibus aut verbo, aut exemplo suo, quòd Dominus Deus noster iustus, & rectus est, & nulla est in eo iniquitas, quoniam etiam si ad tempus impios prosperari finit; tamen suo tempore iustitiæ suæ iudicia exercet, remunerando iustos, & puniendo iniquos.

PSALMVS XCII.

Titulus, & Argumentum
Psalmi.

*Lauds cantici ipsi David in die ante
Sabbatum quando fundata
est terra.*



Titulus huius Psalmi nō habetur in hebraicis codicibus, sed solum in græcis, & latinis, ijsq. non omnibus. Videtur autem qui titulum addidit, voluisse Psalmum decantari feria sexta, quæ est dies ante Sabbatum; propterea quòd in hoc Psalmo narretur, terram à Deo fuisse firmatam vel, vt alij codices habent, inhabitatam: quod rectè dicitur factum esse feria sexta. Illo enim die formatus est homo dominus terræ, ac per hoc tunc primum stabilita est terra, quæ propter hominē creata fuerat. Eodem die non solum homo,

sed etiam animantia cætera, quæ tunc incolunt, creata sunt, proinde illo die primum inhabitari cœpta est terra. Eodem die per Christi passionem, & mortem renouata ac reparata est terra, & stabilita in Regnum Christi, deuicta, ac triumphato Mundi Principe, iuxta illud Nunc iudiciū est Mundi, nunc Principes huius Mundi eijciuntur foras, & ego si exaltatus fuero à terra, omnia traham ad me ipsum, *Ioan. 12.* Porro Ecclesia Christiana Psalmum hunc canere solet in aurora diei Dominicæ, ad Laudes; quoniam Christus etsi Regnum acquisierit per passionem, & fundamēta nouæ terræ iecerit feria sexta: tamen possessionem Regni accepit quando resurrexit, & tunc induit decorem, & fortitudinē: quod in aurora Dominicæ diei factum esse credimus.

Explicatio Psalmi 92.

Dominus regnauit decorem
indutus est, indutus est Do-
minus fortitudinem, & præcin-
xit se.

Hoc principium Psalmi rectè potest etiam ad creationem, tum ad redemptionem accommodari: neque nouum est, vt sententiæ Scripturæ diuinæ plures habeant sensus literales. Dñs regnauit, idem est, ac si dictum fuisset, Dñs regnum acquisiuit, siue regnare cœpit. Decorē indutus est, gloriam videlicet, & maiestatem regiam. Indutus est Dominus fortitudinem, id est, non solum gloriam, sed & potentiam, ac robur accepit, quod regie maiestati necessarium est. Et præcinxit se. i. accinxit se ad regnandum, & gubernandum. Quod si hæc ad creationem referantur, dicitur Deus regnare cœpisse quoniam Mundum creauit, quoniam tunc primum cœpit habere subditos: si referantur ad reparationem, Christus in Resurrectione Regnum accepit, & tunc indutus est decorē gloriosi corporis, & fortitudinem quoque indutus est, quia data est illi omnis potestas in cælo, & in terra

terra, vt deinceps nulli creaturæ subiectus sit, sed omnia habeat sub pedibus suis. Denique præcinxit se ad propagandum Regnum suum per Apostolorum prædicationem vsque ad fines terræ.

II. Etenim firmavit orbem terræ, qui non commouebitur.

Regnare cœpit Deus ab initio Mundi, quia tunc cōstituit ab imis fundamētis orbem terræ, & firmavit, ac stabilivit, vt commoueri nō possit; ac per hoc præbuit hominibus, qui Deum Regem agnoscere, eiq. seruire debent, stabilē mansionem. Christus quoq. per passionem, & resurrectionem suam orbē terræ, qui varijs motibus à Dæmonib. agitabatur, dum alij alijs Dijs seruiebant, firmavit, ac stabilivit in vna, ac verissima religione, & fide.

III. Parata sedes tua ex tunc: à seculo tu es.

Quamuis, inquit, sedes Regni tui parata sit ex tunc. i. ex rerum creatione; vel ex resurrectione: tu tñ non tunc esse cœpisti, sed à seculo, ab æternitate, si ne principio es. vbi illud, es, non significat simplicem existentiam naturæ diuinæ, sed plenitudinem essendi, in qua omnia continentur: non. n. Deus antequam Mundum conderet, pauper erat, aut aliqua re indigebat; neq. posteaquam Mundum condidit, ditior, aut locupletior factus est. Mundum. n. Deus creauit, non vt ipse cresceret, sed vt nobiscum bona sua cōmunicaret. Itaq. nō coactus aliqua necessitate, sed charitate, & misericordia motus, Mundū creauit, & eadē charitate, & misericordia Mundū reparauit. Sic .n. Deus dilexit Mundū, vt filiū suum vnigenitū daret, vt oīs qui credit in ipsum nō pereat, sed habeat vitam æternam. Ioan. 3.

IV. Eleuauerunt flumina Dñe, eleuauerunt flumina vocē suam.

V. Eleuauerunt flumina fluctus suos, à vocibus aquarū multarū.

Mirabiles elationes maris, mirabilis in altis Dominus. VI.

Hæc omnia, si ad creationem referantur vt referri debent iuxta priorē sensum, significant modū, quo Deus terrā habitabilem fecit, vt esset firma sedes generi humano. Initio .n. creationis, aquæ terram vniuersam operiebant, & magno motu inundationes aquarum eleuabantur; sed Deus altior, & excelsior, & in infinitum potētiior increpuit, & conspescuit aquas, easq. in cauernas terræ conclusit, eisq. præcepit, vt non reuerterentur operire terram. Hoc dicitur clarius in Psal. 105. Qui fundasti terram super stabilitatem suam, non inclinabitur in seculum seculi, Abyssus, sicut vestimentū amictus eius, super montes stabunt aquæ, id est, ita initio terra formata est, vt abyssus aquarum illā vndique tegeret, ita vt super ipsos montes starent aquæ. Ab increpatione tua fugient, à voce tonitru tui formidabūt id est, sed tu Deus omnipotens increpasti aquas, & quasi tonitru imperij tunc illas ita turbasti, vt fugerent, & absconderent se intra profunda loca terræ. Terminum posuisti, quem non transgredientur, neque conuertentur operire terram. Eadem descriptio habetur in lib. Iob cap. 38. sed hic breuissimè Prophetæ hæc omnia illis verbis cōplexus est. Mirabiles elationes maris, mirabilis in altis Dominus, id est, omnes aquæ maris, atque omnis abyssus aquarum magno fremitu eleuabatur super terram; sed mirabilis Deus in excelsis habitans, & omni altitudine superior aquas conspescuit, & terrā habitabilem reddidit. Sed quo ad sensum posteriorē, describitur hoc loco magnitudo persecutionum Iudeæorum, & Paganorum aduersus Christi Regnum in Resurrectione inchoatum, & victoria Christi de oib. hostibus suis. Eleuauerunt, inquit, flumina voces suas, & fluctus suos: Per flumina intelligo persecutiones Iudeæorum, qui continuo cœperunt eleuare voces suas aduersus Euangelium, illiq. vbiq. contradicere. Mirabiles elationes maris: per mare, quod fluminibus multo est

est maius, intelligo persecutiones Neronis, Domitiani, aliorumq. Principū Romanorum. Mirabilis in altis Dominus, id est, sed Dominus in altis habitas mirabilior apparuit, cum de omnibus persecutoribus victoriam reportauerit, & inuitis omnibus Regnum suum per omnes terras propagauerit. Sanctus Augustinus per flumina intelligit Apostolos, qui pleni Spiritu sancto tanquam cœlestia flumina per Mundum discurrerant, & voces prædicando liberimè eleuabant. Per maris eleuationes, intelligit infidelium persecutiones: quæ admodum .n. cum flumina intrant in mare, aquæ illæ salæ ad introitū aquarum dulcium intumescunt, & fremunt; sic infideles ad prædicationem Apostolorum tanquam contrariam doctrinæ, & moribus ipsorum fremere, & tumultuari cœperunt. Vtraq. expositio optima est.

VII. Testimonia tua credibilia facta sunt nimis; domum tuam decet sanctitudo Domine in longitudine dierum


Quantum attinet ad sensum priorē, respondet Propheta tacitæ obiectioni quæ occurrere poterat: vnde videlicet sciamus ea, quæ dicta sunt de fundatione terræ, de abyssu aquarum, & reductione aquæ in loca humiliora, quibus rebus nullus testis adfuit, cum præcesserint hominum omnium creationē. Respondet igitur Propheta, id haberi ex testimonio Dei, qui hæc reuelauit seruo suo Moyse: & testimonium illud valde credibile esse, cum Moses multis signis, & prodigijs, alijsque modis seruū Dei fidelem, & Prophetam verum se esse probauerit. Idem dici potest de sensu posteriore; testimonia .n. Christi per Apostolos ad nos delata credibilia facta sunt nimis, tum ob signa, & prodigia Christi, & Apostolorum; tum quia videmus impleta, quæ prædicta sunt: tum ob infinita alia, quæ Fide Christianam omnino credibilem faciunt, vt nemo possit, posteaquam prædicatores

audierit, sine magna temeritate non credere. Ex quibus cōcludit Propheta, domum Dei, id est, Ecclesiam Dei, in qua talia testimonia continentur, & prædicantur, debere sanctam, & inuiolabilem conseruari vsque ad Mundi consummationem. Domum tuam, inquit, decet sanctitudo, id est, decet, vt eam omnes vt sanctam venerentur: item decet, vt qui in illa sunt, sancti sint, & moribus sanctis respondeant sanctitati doctrinæ testimoniorum tuorum: Deniq. decet, vt à te Domine inuiolata, & sancta conseruetur in longitudine dierum, vt portæ inferi nunquam præualeant aduersus eam.

PSALMVS XCIII.

Titulus & Argumentum.

Psalmus ipsi David, quarta Sabbati.



N hebræo nullus est titulus. Legunt tamen hunc titulum, tanquam olim vel à Septuaginta, vel ab alijs adiectum S. Hieronymus, S. Augustinus, Theodoretus, Euthymius, & alij omnes: habetur .n. in græcis, & latinis codicib. Illud, quarta Sabbati, significat cantari solitum ab hebræis, quarta die post Sabbatum, id est, in medio hebdomadæ. Reprehendit occasione huius nominis S. Augustinus homines Christianos, qui ex antiqua paganorum consuetudine diem quartum vocant diem Mercurij, vt etiam diem tertium, diem Martis; diem quintum, diem Iouis; diem sextum, diem Veneris; & diem Sabbati, diem Saturni: cum deberent Christiano more dicere, secundam feriam, tertiam feriam, &c. quamuis enim illa sint nomina stellarum: tamen apud Paganos stellæ illæ à certis hominibus nomina acceperunt, quos homines beneuolentia populorum Deos fecit, & in cœlum transtulit. Argumentum

tum huius Psalmi providentia Dei punientis tandem malos, & remunerantis bonos, quâvis aliquandiu iusto iudicio sinat, p̄perari malos, et opprimere bonos.

Explicatio Psalmi 93.

I. **D**eus ultionum Dominus :
Deus ultionum liberè egit.

Ponit initio David propositionem unam, ex qua possent oēs, si vellent, planè cognoscere nullos malos impunitos fore. Propositio hæc est, Dñs Deus Iudex summus, iustissimus, & potentissimus est, ut ei nemo resistere possit. Nā vindicta ad Iudicē pertinet, & ideo privatis hoibus prohibetur. Rom. 12. Nō vos defendentes. i. vindicantes, charissimi, sed date locū iræ: scriptum est. n. Mihi vindicta, & ego retribuam. Et quamvis ad oēs Iudices ptineat vindicta scelerum, tñ absolutè dicitur vindicta Dei esse, quia ipse supremus Iudex est, & vindictam sumet de oibus scelerib. non solum populorum, sed et Iudicium, Principum, & Regum omnium. Ait igitur, Deus ultionum Dominus. i. Dñs noster qui propriè solus Dñs est, cui omnia serviunt in cœlo, & in terra: hic, inquam, Dñs, est Deus ultionum. i. summus Iudex, ad quem ultio scelerum omnium pertinet. Deus ultionum liberè egit quandoq. punire voluit peccatores; quia neminem timer, nullius personam accipit, nemo illum impedire, nemo ei resistere pōt. Id patuit in deiectione Diaboli, & Angelorū eius de cœlo; in diluvio quo genus humanū exiit, exceptis paucis, quos ipse saluos esse voluit; in incendio Sodomæ, & Gomorræ; in demersione Pharaonis in mari rubro: in alijs iudicijs eius permultis. Quod attinet ad verba, vox Deus, in hebræo est, **El**, quod significat Deum, ut fortem, & robustum, & rectè coniungitur cum ultione, ut significetur, Deum esse fortissimum ultorem scelerum. Vox ultionū, vel ponitur loco superlativi, quo modo Deus scientiarum. i. scientissimus; Deus misericordiarum, id est, misericordissimus: vel significat, Deum esse auctore ultionum, quomodo ab Apostolo dici-

tur Deus pacis, Deus spei, Deus salutis. Verè enim Deus, ultionū Deus est, quia non solum ipse per se iudicando vlciscitur scelera, sed etiam per creaturas suas innumerabilibus, & occultissimis modis ultionum causa est: nam & peccatū sæpè ex diuino iudicio est p̄na peccati & ea quæ maximè homines aliquando appetunt, & quærunt, Deus facit, ut p̄nalit̄a ipsis reddantur. Illud liberè egit, in hebræo est, **hophiag**, quod S. Hieronymus vertit in imperatiuo, ostendere: sed potest etiam verti, ostensus est, siue apparuit, splenduit, illuxit: quod est idē cum illo, liberè egit: nam qui timet, tenebras quærīt: sed qui nihil timet, & liberè ultionem facit, palam, & apertè illam facit. Itaque sensus est, Deus ultionis auctor apparuit, siue ultionem scelerum liberrimè, & in luce coram oibus fecit. Potest etiam fieri, ut Septuaginta non legerint, **hophiag**, sed, **hophiach**, **חופיח** ultima litera mutata. Hanc enim vocē **חופיח** habemus in Ps. 11. vers. 6. sed in futuro: & Septuaginta verterunt, **παρρησιασθήσεται** fiducialiter agam, & poterat etiam latine reddi liberè agam. Nam hoc loco habemus in græco idem verbū, sed in præterito, **παρρησιασάμενος**, & noster Interpres vertit, liberè egit:

Exaltare qui iudicas terram, II.
redde retributionem superbis.

Quia dixit, Dominum esse ultorem scelerum: precatur nunc consequenter, ut officio suo fungatur, & puniendo impios claudat ora eorum, qui providentiam eius in dubium reuocant. Exaltare, inquit, qui iudicas terram, id est, ascende solium tuum, qui Iudex es vniuersæ terræ; & redde retributionem superbis, id est, profer sententiam damnationis in homines superbos, & hoc modo vindictam sume de præcipuo scelere generis humani. Superbia enim est Regina vitiorum; & ea debellata, vniuersitas vitiorum debellata erit. Nominat quoque Psalmus superbos, quoniam illi soli tandem puniuntur in Iudicio, qui

noluerunt humiliari ad pœnitentiam : omnes enim peccauerunt, & egent gloria Dei; sed qui humiliantur sub potenti manu Dei, & cor contritum, & humiliatum gerunt, saluantur : qui ceruicem erigunt, & peccata sua defendunt, retributionem vindictæ accipient.

III. Vſquequò peccatores Domine, vſquequò peccatores gloriabuntur?

IV. Effabuntur, & loquentur iniquitatem. loquentur omnes, qui operantur iniustitiam?

Reddit causam, cur petet iudicium in impios superbos: & causa est, quia nimirum diuiniam videtur superbia, & impietas eorum durasse. Sed precatio ista Prophetæ, prædictio est per modum precationis; ad consolationem. n. iustorum afflictorum, prædicit sanctus Prophetæ, breui futurum, vt superbi, atque impij dispareant, quamuis in præſenti tempore diuturna videatur eorum potentia. Vſquequò peccatores, Domine, vſquequò peccatores gloriabuntur de viribus suis, de prosperitate sua, de sceleribus suis? Effabuntur, & loquentur iniquitatem, id est, iactabunt, & prædicabunt iniusta opera sua? Loquentur omnes, qui operantur iniustitiam, id est, liberè, & sine timore vſlo loquentur de rebus suis gestis, vel gerendis homines impij, qui operantur iniustitiam. Illud, effabuntur, in hebræo habet maiorem vim: significat enim fundent sermonē, siue diffluent eloquio, quasi dicat, ex abundantia cordis fluet in eis abundantia verborum; itaque rectè S. Hieronymus vertit, garrient. Pro voce, iniquitatem, cum dicitur, loquentur iniquitatē, in hebræo est, hatac, quod vetus, & durum significat. Sed Septuaginta non solum hoc loco, sed etiam in Psalmo 74. vers. 6. verterunt hanc vocem, iniquitatem; Nolite loqui aduersus Deū iniquitatem. Quare, vel hæc vox, iniquitatē etiam significat, vel Septuaginta explicare voluerunt vocem hebraicam: verè

enim nihil est durius iniquitate, quæ facit cor lapideum ex carneo: nec malè dicitur iniquitas antiqua, quia hominē ex nouo veterem fecit, mortiq. addixit, quia quod antiquatur, & senescit, prope interitum est, ad Hebr. 8.

Populum tuum Domine humiliauerunt, & hæreditatem tuam vexauerunt.

Viduam, & aduenam interfecerunt, & pupillos occiderunt.

Explicat iustitiam, quam operantur impij, dum furere promittuntur. Populum, inquit, tuum humiliauerunt, id est, cœtum piorū, qui propriè populus tuus est à te electus, & segregatus, & tibi vni dedicatus, humiliauerunt affligentes, & persequentes. Et hæreditatē tuam vexauerunt, id est, eundem cœtum piorum, quem tuam possessionem, & hæreditatem esse voluisti, vexauerunt iniuste opprimentes. Nec solum populum in comune vexauerunt, sed in personas miserabiles, & omni auxilio destitutas furorem suum præcipue effuderunt occiderunt enim viduas maritorū solatio destitutas: & aduenas, qui procul à patria inter ignotos versantur; & pupillos, qui parentibus, dum adhuc auxilio eorum indigerent, orbiati sunt. In græcis libris legitur, Viduam, & pupillum occiderunt, & aduenam interfecerunt; sed nostra lectio conformis est hebraico textui; & sensus est idem.

Ex dixerunt, non videbit Dominus, nec intelliget Deus Iacob,

Reddit rationē cur iniqui tam audacter peccent: quia videlicet, ita stulti sunt, vt existiment Deū non habere prouidentia rerū humanarū, & nullū esse Iudicē, cui rōnem operū suorū reddere teneantur. Et dixerunt. i. quia dixerūt apud se, Non videbit Dñs, nec intelliget Deus Iacob, id est, neque sensu vidēdi, aut audiendi cognoscet opera nostra;

stra; neque mentis intelligentiâ illa cōsiderabit, vel examinabit. Et quidē possent hęc intelligi hoc sensu, vt iniqui existiment Deū quidem posse, si velit, videre, & intelligere opera nostra; sed ea non curare, neq; ad ea attendere: tñ verba sequentia cogunt, vt dicamus, iniquos in tantam cæcitatem animi aliquando deuenire, vt confidentissime peccent, ac si existimarent, Deum neque videre, neque audire, neque intelligere. Sequitur enim,

VIII. Intelligite insipientes in populo, & stulti aliquando sapite.

IX. Qui plantauit aurem, non audiet? aut qui finxit oculum, non considerat?

X. Qui corripit gentes, non arguet, qui docet hominem scientiam?

Illud, qui plantauit aurem, non audiet? aut qui finxit oculum non considerat? est refutatio eius, quod supra dictum est, Non videbit Dominus; vbi videre, positum est pro cognoscere sensu exteriori, p aures videlicet, aut per oculos. Probat autem Propheta, Deum audire, & videre; quia ipse dedit hominibus aures, quibus audiunt, & oculos quibus vident: proinde multo magis ipse audit, & videt: nemo .n. dare potest, qđ non habet. Quod autem sequitur, Qui corripit gentes non arguet? qui docet hominem scientiam? est refutatio eius, quod impij dixerant, Nec intelliget Deus Iacob. Probat autem Propheta, Deum intelligere, ac per hoc mente, & intelligentia præditum esse, quia ipse auctor est hominibus, vt intelligant: ipse enim eos erudit, ipse docet, dum in creatione dat eis mentem rationis capacem, & intelligentiæ lumen infundit. Quod attinet ad verba, illud, insipientes in populo, significat, iniquos esse homines insipientiores toto reliquo populo: quod verissimum est, cum falsa bona veris anteponat, & temporalia sempiternis. Illud autem, qui plantauit au-

rem; est insignis metaphora significans, sensum audiendi, vt etiam alios sensus non nasci ex corpore terreno, sed plantari a Deo: quemadmodum arbores nō oriuntur a terra, vi ipsius terræ, quæ inanima est, sed plantantur ab hominibus in terra, & in ipsa terra crescunt. Itaque aures accipiuntur hoc loco non pro solo organo, sed pro organo, & sensu audiendi, qui in eo insertus est. Quod sequitur, non audiet? non significat, Deū habere sensum audiendi corporalē, sed Deum conoscere per suam essentiā, quæ nos per sensum audiendi cognoscimus? ideo .n. non dixit, Qui plantauit aurem, non habet aures? sed, Qui plantauit aurem, non audiet? Illud, qui finxit oculū, est alia metaphora, per quam intelligimus, mirabilem structuram oculi, & mirabiliorem vim, quæ in ipso viget ad res vidēdas, a Deo factam esse ea facilitate qua figulus vas quodcūq; fingere solet. Illud, non cōsiderat, poterat etiā verti, non videt: hoc .n. significat vox hebraica, iabbat, sed Septuaginta Interpretes maluerunt vertere, non considerat, vt intelligeremus, Deum nō videre oculis carnis, sed mente cōsiderare. Illud, qui corripit gentes, potuisset etiā verti, qui erudit gentes: nam hanc significationē optimē patitur verbum hebraicum, & græcum. Rectē tamen noster Interpres vertit, Qui corripit gentes, qui sequitur, non arguet; & sensus est, Qui corripit omnes gentes, dum perfindere sim in eorū animis insertam, eos admonet, vt a malo desistant; sæpē etiam manifesta ultione peccata eorum punit: non arguet etiam populum suum, castigans eum per verba Prophetarum, vel etiam per flagella tribulationum? & si Deus corripit, & arguit, certē intelligit, & cognoscit, quæ ab hominibus aguntur: & falsō dicunt impij, Non intelliget Deus Iacob.

יָבִיב

Dominus scit cogitationes hominum, quoniam vanæ sunt. XI.

Posteaquam refutauit Propheta verba illa iniquorum, Non videbit Dominus,

nus, nec intelliget Deus Iacob; addit, hanc calumniam impiorum Deo non esse nouam ipse enim scit cogitationes hominum, quod vanæ sint. Homo .n. post corruptam naturam peccato primi hominis, vanus factus est, & similis iumentis insipientibus. quæ non cogitant, nisi præsentia. Quare admonemur, hoc versiculo, non de nobis præsumere, sed humili prece à Deo sapientiâ petere. Vani enim sunt omnes homines, in quibus non subest scientia Dei. Sap. 13. & ideo monet sanctus Iacobus ca. 1. Siquis indiget sapientia postulet à Deo, qui dat omnibus affluenter, & non improperat, id est, nunquam exprobrat importunitatem, quasi nimium sæpè, & nimis multa petamus. Diues enim est in misericordia, & usque adeo liberalis, & magnificus, ut non solum libenter tribuat quæ postulamus, sed etiam mercedem reddat, quia postulamus, Ora Patrem tuum in abscondito, & Pater tuus, qui videt in abscondito, reddet tibi. Matth. 6.

XII. Beatus homo, quem tu erudiris Domine, & de lege tua docueris eum.

Hoc sequitur ex versiculo superiore: nam si cogitationes hominum vanæ sunt, quas nimirum ex se habent: certè sequitur, ut ille solus beatus sit, id est, non vanus, seu inani vëto distentus, sed plenus veris, & solidis bonis, quæ Deus erudire dignatur, id est, cui Deus oculos aperit ad ea, quæ verè bona sunt, aspicienda; atque ut ad ea perueniat, de lege sua docet eum, id est, intimè illi persuadet, obedientiam legis diuinæ toto affectu mentis amplexandam esse: non enim didicit propriè legem Dei, qui solum nouit quæ sint, & quæ legis diuinæ præcepta; sed qui per diuinam illustrationem, & charitatis infusionem ita affectus est erga legem Dei, ut libentissimè illam impleat amore iustitiæ, non timore pænæ, & sit illi eadem ipsa lex iugum suauis, & onus leue. Illud, De lege tua; in græco est, ex lege tua: ex hebræo possiet verti, A lege tua, siue, ex lege tua, siue, de lege tua. Sensus igitur est,

Beatus est, quem tu, Deus, docueris ex lege tua, quasi dicat, ex libro tuo: ut non solum Deus sit Doctus, sed ex libro suo doceat, librum legis suæ ipse explanet, & illam ipsam legem obseruandam esse ei, qui verè beatus esse velit, intus per gratiam loquendo persuadeat.

Ut mitiges ei à diebus malis, **XIII.** donec fodiat peccatori fouea.

Subiungit Propheta vnum ex fructibus doctrinæ diuinæ, qui est, ut homo doctus à Deo moderatius ferat persecutiones impiorum, donec adueniat impiorum ruina. Ut mitiges ei à diebus malis, id est, ad hoc vtilius erit doctrina tua diuina homini iusto, ut mitiges ei tristitiam, quæ oritur à diebus malis, à tempore videlicet persecutionis, & tribulationis; & quamdiu mitigatione ista opus erit? donec fodiat peccatori fouea, id est, donec perficiatur effossio foueæ, in quam dei iei cedi sunt impij tunc enim cessabit mitigatio doloris, quia nulli erunt, qui dolore afficiant iustos, cum omnis dolor fugiet à iustis, & recidet in iniustos. Notandum est hoc loco delectationem legis, & gaudium spirituale, quo fruuntur in hac vita iusti, non esse purum, & simplex, ut erit in patria cælesti, sed admixtum tristitiæ: mitigatur .n. hic nobis tristitia, sed non tollitur omnino. Audi Apostolum 2. Corinth. 1. Sicut abundant passionibus Christi in nobis, ita, & per Christum abundat consolatio nostra. & capit. 6. Quasi tristes, semper autem gaudentes: ubi non dicit, tristes absolute, sed, quasi tristes, quia gaudium superabundat, ut dicitur cap. 7. Repletus sum consolatione, superabundo gaudio in omni tribulatione nostra. Notandum præterea, eodem tempore texti coronam iustis, & fodi foueam impijs: & non esse mirandum, si non statim impij puniantur, quoniam nondum est fouea eorum planè effossa: quemadmodum nec mirandum est, si non statim iusti coronantur, quia nondum finita est coronæ ipsorum textura. Sed hoc verè mirandum est, quod felicitas, & exaltatio impiorum sit effossio foueæ

fouet ipsum; & quo altius euehuntur, eo profundius fouea fodiatur. Impij. n. quo magis exaltantur, eo magis superbiunt, & hoc ipso corā Deo profundius cadunt, iuxta illud. Deiecisti eos, dum alleuarentur.

XIV. Quia non repellet Dominus plebem suam: & hæreditatem suam non derelinquet.

Reddit rationem, cur dixerit, Donec fodiatur peccatori fouea. Præparatur .n. interitus peccatorib. à prouidentia diuina, qm̄ Dñs non repellet plebem suam; quamuis ei videatur ad tempus iratus, & affligi eam sinat. Atque idem alijs verbis repetit, dicens, Et hæreditatem suam non derelinquet. Vocatur autem plebs, & hæreditas Dei cætus piorum electorum. Illi enim verè sunt populus Israel electus in hæreditatem.

XV. Quoadusque iustitia conuertatur in iudicium, & qui iuxta illam omnes qui recti sunt corde.

Declarat Propheta, cætum iustorum non repelliendum, nec derelinquendū à Deo vsque ad diē vltimi Iudicij. i. quādiu versamur in periculis tentationum. Quoadusque, inquit, iustitia conuertatur in iudicium. i. vsque ad illum diem, in quo iustitia diuina, quæ nunc videtur esse quasi in habitu, vel in potentia, dū nō punit impios, nec remuneratur pios prodibit in actū iudicij, & quæ erat iustitia quasi habitualis, fiet iustitia actua lis reddens omnibus pro meritis siue coronam iustitiæ, siue stipendium mortis æternæ. Et qui iuxta illam omnes qui recti sunt corde. i. & tunc iuxta diuinā iustitiā, quæ in nubibus admirabilis apparebit qui proximi sedebunt, erunt omnes eius amatores, qui eam nō timebunt, sed diligunt, cum sint recti corde, id est, conformes rectitudini eius, ac p hoc iusti. S. Hieronym⁹ ex hebræo vertit, Quā ad iustitiā reuertetur iudiciū, i. iudicium, qđ nunc sapē iniustum esse perspicitur, tunc reuertetur ad iustitiā, i. iustissimum erit, quia tunc non iudicabunt amplius homines mortales, sed iudicabit Christus Iudex supremus, & iu-

Bellarm. in Psalm.

stissimus, quia omnia iudicia iniusta retractabit, & irritabit, & vltimum iudicium cū exactissima iustitia copulabit. Hic sensus verus est, neq. à superiore dissentiens: & verba hebraica vtrunque sensum ferre possunt. Illud. n. chi ad, significare pōt quousq. quemadmodū si dictiones inuertantur, & legamus, ad chi, significabit, vsquequō. Sequētia verba æquē bene legi possunt cum Septuaginta, Iustitia conuertatur in iudicium; & cum S. Hieron. Ad iustitiā reuertatur iudicium. Nam in hebræo non habetur particulæ illæ, in, vel, ad & nomina non recipiunt varietatē casuū, Deniq. illud, Et qui iuxta illā, oēs qui recto sunt corde: clarius est in hebræo, & græco: nam in hebræo ad verbū sic legitur, Et post illud, iudicium videlicet, oēs recti corde. In græco verò sic, Et qui habent eā, iustitiā videlicet, oēs recto sunt corde. Sed in latina editione si subintelligatur interrogatio, Et qui iuxta illā? oēs qui recto sunt corde: vel si addatur verbum, qđ sapē apud Hebræos omittitur & legamus, Et qui iuxta illam sedent, sunt illi oēs qui recto sunt corde: vel denique si detrahatur pronomen relationum, quod in hebræo nō habetur, & legatur, Et iuxta illam oēs, qui recto sunt corde; sententia præspicua erit.

XVI. Quis confurget mihi aduersus malignantes? aut quis stabit mecum aduersus operātes iniquitatē?

Dixerat in vltimo iudicio cessaturā oēm iustitiā, & cōtra perpetuō regnaturam esse iustitiā; nunc dicit, interea temporis, dum videlicet differtur conuersio iustitiæ in iudicium, valde necessarium esse diuinum adiutorium aduersus iniustorum persecutiones. Quis, inquit, confurget mihi. i. pro me aduersus malignantes? Quis me à tanto numero malignorum hominum, ac dæmonum proteget? aut quis stabit mecum, vt me videlicet defendat, aduersus operantes iniquitatem? Vbi posterior pars versiculi prioris repetitio, & explicatio est. Illud, mihi, S. Hieronymus rectē interpretatur, pro me.

Pp Nisi

XVII. Nisi quia Dominus adiuuit me, paulò minus habitasset in inferno anima mea.

Declarat magnitudinem periculi, in quo versamur ob multitudinem malignantium, qui vndiq. nobis, occurrūt. Induit aut Popheta personam omniū piorum, & ait, Nisi quia Dominus adiuuit me. i. nisi Dñs adiuuisset me; paulò minus habitasset in inferno anima mea, id est, parum abfuissem à morte sempiterna: quia videlicet tentationibus succubuissem, & de ipsa diuina providentia dubitasset. Phrasis illa, Nisi quia Dñs adiuuit me, hebraica est, & Dauidi familiaris, vt prespicuum est ex Psalmo 123. & supplenda est hoc modo, Nisi id accidisset, quod Dñs adiuuit me, &c. & planius, Nisi Dominus adiuuisset me. Illud autem, paulò minus habitasset in inferno anima mea: potest intelligi de morte corporali, per quam eo tempore oēs animæ descendebant ad aliquā mātionem subterraneam: sed verius existimo, vt intelligatur de morte animæ, & de inferno damnatorum. At, inquires, ex hac sententia videtur sequi, vt auxilium Dei non sit necessarium ad superandas tentationes, sed solū ad facilius superandas: quod est dogma Pelagianū ex S. Augustino lib. de gratia Christi c. 27. Si enim nisi Dñs iuuisset, vix mortē animæ euasisset: certè sequi videtur, vt nisi Dñs iuuisset, mortē quidē animæ euadere potuissem, sed valde ægrè, & difficulter. Respondeo, paulò minus, non referri hoc loco ad difficultatem rei, sed ad breuitatem temporis, vt sensus sit, Nisi Dñs adiuuisset me, paulò post habitasset in inferno anima mea. Vox enim hebraica, & græca hunc sensum faciunt, & iuxta eum explicāda est vox latina, paulò minus. i. paulò post habitasset in inferno anima mea, siue parum abfuisset à casu in infernū anima mea.

XVIII. Si dicebam, motus est pes meus, misericordia tua Domine adiuuabat me

Explicit, in quo consistat auxilium

illud, sine quo in inferno habitasset anima eius. Si dicebam, inquit, motus est pes meus, id est, si agnoscebam, & confitebar infirmitatem meā, & me ex meipso non sufficere ad superandas tentationes: tunc misericordia tua adiuuabat me, illuminans intellectū, & purificās affectum, & vires tribuens voluntati, quæ sufficerent ad stabiliendos pedes animæ meæ in via mandatorū tuorum.

Secundū multitudinem dolorum meorum in corde meo, consolationes tuæ lætificauerūt animam meam.

Non solū Deus iustis per providētiā suā tribuit patientiā, sed etiā consolationem magnā, & ineffabilē, quæ non tollit tribulationes, sed cum ijs consistit, easq. vertit in materiā gaudiorum. Sic enim dicit Apostolus 2. Corint. 7. Superabundo gaudio in omni tribulatione nostra: quia videlicet vir iustus, dum tribulatur, intelligit se purgari à scoria vitiorum, si adest, vel, se probari à Domino, si ea non adest: intelligit se cōformem fieri Christo patienti, vt cū eo postea gloriificetur; intelligit deniq. magnum esse, & supra modū excellens prēmium patientiæ, iuxta illud Apostoli 2. Corin. 4. Quod in presenti est momentaneum, & leue tribulationis nostræ, supra modum in sublimitate æterni gloriæ pondus operatur in nobis. Ait igitur, Secundū multitudinem dolorum meorum in corde meo. i. iuxta mensuram dolorū, qui tristitiam in corde meo gignebant; consolationes tuæ lætificauerunt animā meā non. n. iuxta mensuram dolorū in carne, reddit Deus iustis in hac vita consolationes in carne. neque. n. simul esse possunt dolores in carne, & consolationes in carne: sed iuxta mensuram dolorum in carne, tribuit Deus consolationem in anima, quæ mitigat tristitiā cordis ex doloribus carnis proveniente. Neque repugnat hoc dictū Prophetæ, Secundū multitudinem, &c. cum illo dicto Apostoli, Superabundo gaudio, &c. verè

verè. n. gaudii spirituale maius est omni tristitia corporali, sed maius est seruata proportionē, vt minori tribulatio ni minus gaudium, & maiori maius respondeat. S. Hieronymus ex hebræo vertit, In multitudine cogitationū mearum; pro eo quod nos habemus ex versione Septuaginta Interpretum, Secundum multitudinem dolorum meorum.

שרעף vox hebraica, sciaraph, est vox inusitata quatuor literarum, quæ fortè nō habetur nisi hoc loco. Videtur deduci à verbo, sciarah, quod est exrescere, & secundum Rabinos significat summas frondes arborum, quæ exrescunt in magna copia, & ab omni flatu ventorū mouentur. Metaphoricè igitur hoc loco significant dolores cordis. i. cogitationes affligentes, & torquentes ipsum eor, quæ quidem multæ, & molestæ nasci solent ex inopia infamia, morbo, alijs ærumnis corporalibus; & ideò rectè dicitur, Secundum multitudinem, quia plurimæ sunt; & rectè comparatur frondibus exrescentibus in arbore, quia vanæ sunt, & instabiles.

xx. Nunquid adhæret tibi sedes iniquitatis, qui fingis laborem in præcepto?

Reddit rationem, cur Deus consoletur iustos in tribulationibus eorum: & rō est, quia Deus iustissimus cum sit, & præcepta laboriosa hominib. dederit, æquū fuit, vt iugum legis alicui asperum, & durum, oleo consolationis lini-ret, & suaue redderet. Nunquid adhæret tibi sedes iniquitatis, id est, nūquid adhæret, siue adiungitur tibi tanquam socius thronus iniquè indicantium. Qui fingis laborem in præcepto, id est, tibi qui in præcepto tuo obseruando laborem inferis, siue facis vt præcepta tua nō sine magno labore possint impleri? Hæc mihi videtur huius loci satis ob-scuri literalis expositio: sunt tamē duæ aliæ expositiones. Vna est eorum, qui considerantes illud, qui fingis, in textu hebræo, & græco esse participiū, omit-tunt relatiuum, qui, & coniungunt participiū, fingens, cū sede; siue throno iniquitatis. Itaque sensum esse volunt,

Nūquid adiungitur tibi thronus iniquitatis. i. nunquid particeps es iniqui iudicij, quod fingit laborem in præcepto. i. quod iudicium iniquorum facit præcepta diuina nimis laboriosa, & impossibilia, & ideò non punit præuaricatores. Hæc expositio repugnat editioni vulgata, quæ per pronomen, qui, declarauit participiū, quod est in textu hebræo, & græco: & illud fingens, voluit referri ad Deum, non ad thronum, siue ad secundum personam, non ad terciā. Alia est expositio S. Augustini, qui dicit Deum fingere laborem, siue dolorem in præcepto, quia facit, vt ex laboribus, & doloribus, quos in hac vita patiuntur iusti, erudiamur, & intelligam⁹ quo supplicio afficiendi sint iniusti à Deo, q̄ iustos sic affligi permittit. Itaq. S. Augustinus ita exponit, quasi dictum esset, Qui fingis laborem in præceptum, id est, ex labore facis præceptū; & per præceptum, non intelligit mādātum, sed eruditionem, quia sunt præcepta Sapientiu, non mandata Principū.

Captabunt in animam iusti, **xxi.**
& sanguinem innocentem condemnabunt

Cōcludit Psalmum affirmans, impios iniquè acturos aduersus iustos: sed prouidentiam Dei vigilaturā, & vtriusq. pro meritis retributuram. Captabunt, inquit, in animam iusti. i. homines iniqui more suo insidiabuntur iustis, vt capiant eos, vt venatores prædā capiūt. Et sanguinem innocentem condemnabunt. i. & posteaquam laqueo suo irriterint, morti eum addicent, quamuis innoxium esse non ignorent. Hæc possunt intelligi tum de malis Iudicibus, tum de malis accusatoribus, tum et de quibusuis sceleratis homicidis, & de eorum magistris, & Principib. Dæmonijs. Verbū, captabūt, in græco est, *ἐπινοοῦν* qđ significat, venabuntur; & ideò sensus est, captabunt per insidias, vt venatores faciunt: in hebræo est, *יִגְחֶדְדוּ*, i. cōuenient, siue congregabuntur aduersus animam iusti, sed credibile est, Septuaginta Interpretes legisse, *יִגְדְּדוּ*

una litera mutata, quod significat, vena buntur: particula, in, abundat apud latinos, cum dicitur, Captabunt in animam iusti. Proinde sensus est, captabunt, id est, venando capient animam, id est, vitam iusti.

XXII. Et factus est mihi Dominus in refugium: & Deus meus in adiutorium spei meæ.

Loquitur Propheta in persona iustorum; & sicut dixerat in numero singulari, captabunt in animam iusti: sic etiam introducit iustum loquentem in numero singulari; ac si dicat, illi quidem insidiabuntur mihi homini iusto, meque ad mortem condemnabunt: sed Dominus factus est mihi, refugium, ut non mihi noceant insidiae illorum. Et Deus meus factus est in adiutorium spei meæ. i. Deus factus est quasi petra solida, in qua tuto innititur spes mea: sic enim habetur in hebræo, Deus meus, letetur, id est, in petram spei meæ. Itaque posuerunt Septuaginta, & nosse interpretis vocem, adiutorium spei, pro fundamento spei: adiuvat enim fundamentum ipsam spem, dum facit, ut non vacillet.

XXIII. Et reddet illis iniquitatem ipsorum. & in malitia eorum disperdet eos; disperdet illos Dominus Deus noster.

Hæc est iustissima providentia Dei, ut tandem iustos adiuvet, & iniquos disperdat. Reddet illis, inquit, iniquitatem ipsorum, id est, Deus facit, ut iniquitas impiorum reuertatur in caput ipsius impiorum, dum iusto non nocet, qui ob patientiam coronatur: & ipsi impio nocet, qui ob malitiam puniuntur. Quod explicatur sequentibus verbis, In malitia eorum disperdet eos: ubi notat S. Augustinus, rectè dici, in malitia: quia Deus non tam punit eos ob id, quod fecerunt, quam propter malitiam, qua id fecerunt. Tradidit enim Christum ad mortem Iudas, tradidit et Deus Pater: sed Patri gratias agimus, quia ex nimia charitate proprio Filio non pepercit, sed pro nobis tradidit illum: Iudam de testamur, quia

ex cupiditate, non ex charitate; & pro pecunia sua non pro salute nostra tradidit illum. Addit Propheta, Disperdet illos Dominus Deus noster, ut explicet quis sit, qui disperdet impios. dixerat enim. Reddit illis iniquitatem ipsorum, & in malitia eorum disperdat eos; & non dixerat, quis hæc facturum esset. explicat igitur, ac dicit, Disperdet illos Dominus Deus noster, cuius providentiâ, aut negauerant, aut contempserant.

PSALMVS XCIV.

Titulus & Argumentum.

Lans cantici ipsi David



IN CODICE hebræo nullus est titulus: sed vel excidit vel hunc titulum addiderunt Septuaginta viri, ut indicarent, argumentum huius Psalmi esse laudem Deo, voce, non instrumentis musicis decantatam. Theodoretus censet, Psalmum compositum esse à Davide in persona Iosif Regis, quem spiritu præviderit repurgaturum templum, & altare remotis cultibus idolatricis, & ipsis Sacerdotibus. Idololatrias interfectis: sed non est necesse ad Iosiam recurrere: Psalmus enim omni tempore, omnibus locis, & omnibus fidelibus, tum Iudeis, tum Christianis, conuenit. Continet enim inuitationem ad laudandum Deum, corde, voce, & opere. Quare Ecclesia Catholica rectissime hunc Psalmum esse voluit initium nocturnæ Psalmodiæ, quæ ut longissima est, ita ista præparatione, & exhortatione indigebat.

Explicatio Psalmi 94.

Venite exultemus Dño, iubillemus Deo saluatori nostro.

Inuitatio, & exortatio est ad laudandum Deum. Illud Venite, est exhortatio, & excitatio ad coniungendos animos, & voces in laudem Dei, quomodo. Gen. 11. est exhortatio, & excitatio, ad coniungenda studia, & operas in ædificanda ciuitate, & turri, Venite faciamus lateres: & ibidem, Venite, faciamus

no-

nobis ciuitatem: & ibidem, Dominus dicit, Venite descendamus, & confundamus ibi linguas eorum. Exultemus Domino, inuitat primum ad exultationem spiritus, deinde ad iubilationem vocis non enim recte iubilamus voce, nisi prius mens excitata sit in Deum per internam letitiam, & admirationem. Vnde & de Dño scriptum est, Luc. 10. Exultauit spiritu, & dixit, Confiteor tibi Pater. & Mater Dñi de se dixit, Luc. 1. Magnificat anima mea Dñm, & exultauit spiritus meus. Ait igitur, Venite exultemus Dño, iubilemus Deo salutari nostro. i. oēs simul vniti exultemus spiritu, coram Domino præ letitia gestientes, & voce iubilemus Deo, qui est salus nostra. S. Augustinus per iubilationem, intelligit vocem letitiæ, quæ non potest exprimere quod intelligit. Sed vox hebræa significat potius magnum clamorem, lætum tamen, qui magnus clamor magnum potius affectum, quam magnū strepitum hoc loco significat.

II. Præoccupemus faciem eius in confessione, & in psalmis iubilemus ei.

Duobus modis potest hic versiculus intelligi. Vno modo, vt Propheta admo-
neatur, vt summo mane appareamus coram Dño ad laudandum eum. quasi dicat, ante quā alij surgant, nos primi sumus ante faciem Dñi. & hoc satis conuenit tempori, quo hunc Psalmum in Ecclesia canimus. Altero modo, vt Propheta doceatur, miscendam esse confessionem propriæ miseriæ cum confessione misericordiæ Dei, vt sensus sit, Præoccupemus faciem eius in confessione, id est, antequam Dñs ad iudicium veniat, & vindictam de peccatisumat, præueniamus eum confitendo peccata nostra vel præueniamus iram eius (potest enim facies in hebræo sumi pro ira) & ante quā Deus irascatur, confiteamur peccata; & simul iubilemus in psalmis, magnis vocibus extollendo misericordiam eius. Et videtur hæc posterior expositio magis ad mentem Patrem, S. Hieronymi,

S. Augustini, Theodoret, & Euthymii in Commentario Psalmorum, & S. Gregorij Nazianzeni in oratione de plaga grandinis.

Quoniam Deus magnus Dominus, & Rex magnus super omnes Deos. III.

Reddit quinque rationes, cur Deus à nobis laudandus sit. Prima est, quia Dñs noster est magnus Deus super alios oēs Deos, & magnus Rex super alios oēs Reges, qui et Dij dici solent. Quo loco pro voce, Dñs, est in hebræo nomen quatuor litterarum, quod est proprium Dei veri, & ideo nomen appellatiuum, magnus, non debet coniungi cum, Dñs, sed cum, Deus, vt diximus. Porro per, Deos, intelligendi sunt primo loco Dij falsi, id est, Dæmonia, quæ sibi apud gentes usurpabant cultum veri Dei, vt dicitur in Psalmo 95. Omnes Dij gentium dæmonia. Deinde intelligendi sunt Reges, & Iudices terrarum, de quibus dicitur in Psalmo 81. Ego dixi Dij estis. In græco legitur, super omnem terram; & sic legunt Theodoretus, & Euthymius. sed in hebræo est, super oēs Deos: & sic legunt S. Hieronymus, & Augustinus. credibile est græcum esse corruptum.

Quia in manu eius sunt omnes fines terrarum, & altitudines montium ipsius sunt. IV.

Altera ratio est, quia Dñs habet in potestate sua orbem terrarum, siue longitudinem, & latitudinem; siue et altitudinem consideres; proinde oēs, qui terram incolunt illi subiecti sunt, & sacrificium laudis illi debet. Quia, inquit, in manu eius. i. in potestate eius sunt oēs fines terrarum. i. tota terra usque ad ultimos eius fines. Et altitudines montium ipsius sunt, id est non solum longitudo, & latitudo terrarum, sed et omnis altitudo usque ad altissimos montes ad eius ditionem pertinet. In Codice quodam antiquo, ex quo legitur hic Psalmus communiter in Ecclesia, præmittitur huic versiculo, Quia non repellet Dñs plebem suam, & hæc

verba leguntur, & exponuntur à S. Hieronymo, & Augustino in Commentario Psalmorum. Sed in codice hebræo, & græco, & in latina vulgata editione non habentur, & verè hoc loco superuacanea esse videntur, sed in Psalmo superiore locum suum habent, & inde huc translata sunt. verissima autem esse dubitari non potest. In eodem antiquo codice legitur, altitudines montium ipse conspiciat, pro, ipsius sunt. Sed in hebræo, & græco habetur, ipsius sunt, & sic legunt Patres. Cæterum illa lectio, altitudines montium ipse conspiciat, nihil aliud significat, nisi Dominum esse quolibet altissimo monte altiozem, ita ut cõmodè respiciat ea quæ sunt in verticibus montium altissimorum, ad quos nullus vnquam hominum penetrauit. In hebræo pro fines terræ, habetur, חקר inuestigationes terræ à verbo, חָקַר, quod est inuestigare, & scrutari. Inde aliqui existimant significari profundas terræ cauernas, quæ opponuntur altitudini montium, ut sensus sit, in manu Dei esse tum profunditatem, tum altitudinem terræ. S. Hieronymus vertit, in cuius manu fundamenta terræ, & excelsa montium ipsius sunt. cum qua lectione pòt cõcordari lectio græca, & latina, si per fines terræ, intelligamus fines, quo ad profunditatem, non quo ad longitudinem, vel latitudinem. sed vterque sensus est verus.

V. Quoniam ipsius est mare, & ipse fecit illud, & siccam manus eius formauerunt.

Tertia ratio est, quoniam Deus noster non solum terræ, sed etiã maris Dominus est, quippè, qui fecit illud, & arenam siccam illi circumdedit in qua tanquam in vase continetur. Quare æquū est, ut homines, qui ex mari maxima comoda percipiunt, illi gratias agant eumq. laudibus efferant.

VI. Venite adoremus, & procidamus, & ploremus ante Dominū, qui fecit nos.

Quarta ratio est, quia idē Dominus

non solum fecit terram, & maria, sed etiam nos homines fecit: nos autem factorem nostrum peccatis nostris offendimus. Venite, inquit, adoremus, & procidamus, & ploremus descentes ingratitude, & peccata nostra ante Dominum, qui fecit nos, ac per hoc omni iure Dominus noster est, atque illi omnem obediētiā debemus. Ex hebræo. S. Hieronymus vertit, genua flectamus, pro eo quod nos habemus, ploremus. Sed omnes codices græci, & latini habent, ploremus, & sic legunt, & explicāt omnes veteres tractatores. neque est verisimile, Prophetam dicturum fuisse, genua flectamus, posteaquā dixerat, adoremus, & procidamus. nam adorare in hebræo significat prosterni, & procumbere, quod explicatur per vocē sequentem, procidamus. Plus est autem procidere, & toto corpore prosterni, quā genua flectere. Itaq. probabile est veram hebraicam lectionem, quam habuerūt Septuaginta fuisse, נייחה, quod significat, ploremus: sed successu temporis irreplisse vnam literam, & factum esse, נייכה, quod est genua flectamus. Neque vllō modo credibile est Septuaginta Interpretes, hoīes doctissimos reddituros fuisse, ploremus, si ita legissent, ut nunc in codicibus hebraicis legimus.

Quia ipse est Dominus Deus VII. noster, & nos populus pascuæ eius, & oues manus eius.

Hæc est quinta, & vltima ratio, quia Dominus non solum nos fecit, sed particulari prouidentia nos regit, quo modo pastor proprium gregem. Obseruat S. Augustinus elegantem transpositionē verborum; videtur enim Propheta cōiungere debuissē oues cum pascua, & populum cum manu, ac dicere, & nos populus manus eius, & oues pascuæ eius: sed cōiunxit populum cū pascua, & oues cum manu, ut significaret, populum esse respectu Dei instar ouium, quæ potestate indigent: & tamen non esse oues expertes rationis, quæ baculo cogi debeant: dicuntur autē oues istæ, oues manus Dei, vel quia Deus eas fecit, ut

ex-

exponit S. Augustinus, vel ut alij communiter docer, quia Deus quasi manu propria eas regit; quamvis enim populus Dei habeat Pastores, & Doctores, à quibus pascitur, & regitur: tñ ipse etiā Deus peculiarem curam illius habet, & non sinit, ut negligentia, vel ignorātia, vel etiam malitia Pastorū illis noceat. Ex quo intelligimus, debere populum Dei in Deo summo pastore fiduciam ponere, atque ad illum per orationem recurrere, quando pastor minus idoneus illis contingit; ipse .n. per Ezechielem cap. 34. dicit, Ego pascam oves meas.

VIII. Hodie si vocem eius audieritis, nolite obdurare corda vestra.

Hæc est secūda pars Psalmi, qua Propheta exhortatur populum Dei, ut non solum voce, sed etiam opere Deum laudet. Sacrificium autem operis Deo gratissimum est obedientia, quam exhibemus præceptis eius, iuxta illud primi Reg. 15. Nunquid vult Deus holocausta, & victimas, & non magis ut obediat voci Dñi? Introducit autē Propheta Deum loquentem, ut exortatio maiorē vim habeat. Neque obstat illud eius: nā in scriptura sæpe Deus loquitur de se, ac si de alio loqueretur, ut in loco proxime citato, Nunquid vult Deus holocausta, & non magis, ut obediat voci Domini. sic igitur hoc loco dicit Spiritus sanctus, Hodie si vocem eius, id est, Domini, audieritis, id est, si vocē meam audieritis, qui Dominus vester sum, nolite obdurare corda vestra. Illud, hodie, significat, hoc tempore. &, ut Apostolus declarat ad Hebr. 3. habet locum hæc exhortatio, donec hodie cognominatur, id est, dum tempus huius vitæ durat; nam post hanc vitam nō erit amplius tempus, sed æternitas. Illud autē, si, videtur significare, Deum non singulis momentis nobis loqui, sed pro loco & tempore nos admonere, vel per internas inspirationes, vel per voces prædicatorum, vel per lectionem scripturarum, vel alio quocunq. modo nobis voluntatem suam patefacit. Illud, nolite obdurare corda vestra, significat, parū

prodesse audire vocem Domini, nisi ea vox penetret intima cordis, & inflectat ad fidem, & obedientiam. cur autē vox Dei non penetret, causa est durities cordis. Induratio autem cordis aliquando tribuitur homini, aliquando Deo; nam Exod. 7. dicit Dominus, Ego indurabo cor Pharaonis. & 1. Reg. 6. dicitur, Cur aggravatis corda vestra, sicut aggravavit Aegyptus, & Pharaon cor suum? Porro Deus indurat corda non impartiendo malitiam, sed non impartiendo misericordiam, ut S. Augustinus dicit in Epist. 105. ad Sixtum. qui etiam tractatu 53. in Ioannem scribit, sic obdurat Deus, deferendo, & non adiuuando, quod occulto iudicio facere potest, iniquo non potest. Cui subscribit S. Gregorius lib. 11. Moral. cap. 5. Obdurare per iniquitatem dicitur Deus, quando cor reprobum per gratiam non emollit. Homo autem obdurat cor suum, quando resistit inspirationibus, & vocibus Dei, iuxta illud act. 7. Vos semper Spiritui sancto resististis; inducit autē hominem ad resistendum Deo, & claudendas aures interiores, peccati præsens dulcedo quam Apostolus ad Heb. 3. vocat fallaciam peccati, cum ait, ut non obduretur quis ex vobis fallacia peccati. In hebraico textu verba illa, Hodie si vocē eius audieris, coniunguntur cum superioribus, nos autem populus pascuæ eius, & oves manus eius hodie si vocem eius audieritis. Deinde incipit alius versiculus, Nolite obdurare corda vestra, sicut in irritatione. Sed Apostolus ad Heb. 3. citat hunc locum, ut nos in codicibus græcis, & latinis habemus. Itaque Apostolo Iudice melior est lectio Septuaginta, & nostræ vulgatæ editionis, quam hebraica, ut nunc se habet quicquid hæretici moderni blaterent.

Sicut in irritatione secundum IX. diem tentationis in deserto; ubi tentauerunt me Patres vestri, probauerunt me, & viderunt opera mea.

Ponit exemplum obdurationis: nam

Pp 4 Pa-

Patres antiqui educti per Moſem de Aegypto, dū in itinere eſſent, & deſertum pertranſirent, nō ſemel obduraerunt cor ſuum nolētes credere promiſſis Dei, neque illi obedire; vnde irritauerunt eum, & exacerbauerunt, vt habet alia lectio: tentarunt etiam potentiam eius, & experti ſunt, ac viderunt mirabilia opera eius, qualia fuerūt manna de cœlo pluens, & aqua de petra ſcaturiens. vide Num. 14. Sicut, inquit, in irritatione. i. quando Deum ad iracundiam prouocauerunt, ſecundum diem tētatōnis in deſerto, id eſt, iuxta diem illum quo Deum tentauerunt: tunc .n. tentantes Deum, illum irritauerunt. nō eſt neceſſe vnā diem particularem hic notari, cū multis vicibus Deū Iudæi tentauerint in deſerto, ſed poteſt accipi dies pro tempore, vt ſenſus ſit, ſicut in irritatione, quæ facta eſt in tēpore illo, quo me ſæpius tentauerunt in deſerto. Vbi tentauerunt me, id eſt, vbi explorare voluerunt, vtrum ego verè Deus eſſem, poſſemq. illis in deſerto panem, & aquam, & carnes parare, quibus rebus deſertus locus ille carebat. Probauerunt me, & viderunt opera mea, id eſt, vbi etiam experti ſunt me eſſe omnipotentem, quia viderunt opera mea, qualia ſolus Deus verus, vereque omnipotens facere poteſt.

x. Quadraginta annis offeſus fui generationi illi, & dixi, ſemper hi errant corde.

Explicat clarius tempus irritationis, & tentationis in deſerto. Quadraginta annis, inquit offeſus fui generationi illi, id eſt, toto tempore, quo duxi eos per deſertum, vt introducerem in terram promiſſionis, offeſus fui generationi illi, id eſt, offeſus fui ab illis, ſive inſenſus illis fui. vt explicat Apoſtolus Hebr. 3. vox hebraica, acut, ſignificat litigauit cum illis, vel abominatus ſum illos: ſed omnia in idem recidunt. in quē ſenſum explicanda eſt etiā lectio Pſalterij Romani, Quadraginta annis proximus fui generationi huic, id eſt, pro-

pinquaui illis, vt de proximo illorum querelas audirem, eosq. varijs plagis flagellarem: & quia de proximo vidi, & audiui quid agerent, aut loquerentur, dixi, ſemper hi errant corde, id eſt, ducuntur varijs deſiderijs, & ideò errant, & vagantur extra rectam viam ſalutis. Apoſt. ad Heb. 3. aliter diſtinguit, probauerunt, inquit, & viderūt opera mea quadraginta annis: propter quod inſenſus fui generationi huic. Sed quia neq. hebræi, neque græci, neque latini ita diſtingunt; dicendum eſt Apoſtolum declarare voluiſſe verba huius Pſalmi, & ideò addidiſſe illud, propter quod, vt ſenſus ſit, Viderunt opera mea quadraginta annis, propter quod totidem annis inſenſus fui generationi huic.

Et iſti non cognouerunt vias meas; vt iurauit in ira mea ſi introibunt in requiem meam.

Declarat, cur corde errauerint; quia non cognouerunt vias, id eſt, leges meas, quæ ſunt rectæ viæ, per quas qui incedunt, errare non poſſunt: Loquitur autem de cognitione approbationis, non de ſimplici notitia. Vt iurauit in ira mea, ſubintelligitur, non peruenerunt ad requiem, ſicut iurauit in ira mea, ſi introibunt in requiem meam. Itaque ſenſus eſt, Iſti, qui ſemper errant corde, non cognouerunt vias meas, quib. itur ad requiem, ac per hoc in illam non introierunt, prout iurauit in ira mea, ſi introibunt; id eſt, quod non introibunt, in requiem meam. Per requiem in ſenſu hiſtorico intelligitur terra promiſſionis, in quam non introierunt niſi pauciſſimi ex illis, qui exierunt ex Aegypto, ſicut Dominus iurauit illis. Num. 14. Vivo ego dicit Dominus, ſicut loquuti eſtis audiente me, ſic faciam vobis, in ſolitudine hac iacebunt cadauera veſtra. In ſenſu anagogico, Apoſtolo teſte ad Hebr. 4. intelligitur cœleſtis patria, vbi erit perfectæ requies. Iuramentum autem Dei ſignificat, rem eſſe certiffimam, & immutabilem. In hebræo habetur, aſar, quod rectè verti poteſt, אֲשֶׁר
vt,

ut, quàm quibus. In græco habetur, ut etiam in Epistola græca Sancti Pauli ad Hebræos: tñ in editione latina eiusdem Epist. ca. 3. habetur, quibus iuravi; sed cap. 4. sicut iuravi. In Psalterio Romano, & apud Augustinũ, habetur, quibus iuravi. Sensus semper est idem. tñ cõmunior lectio est, quæ habetur in editione vulgata. & sic legit Apostolus qñ ppriè citat verba Psalmi dicens, Quæadmodũ dixit, sicut iuravi, &c. ad Hebr. 4.

PSALMVS XCV.

Titulus, & Argum. Psalmi.

Canticum ipsi David, quando domus adificabatur post captiuitatem.



HIC Psalmus apud hebræos titulo caret: neque mirum est, qm̃ videtur esse pars quædã Psalmi 104. vt perspicuum est ex lib. 1. Paralip. cap. 16. vbi in reductione Arcæ Dñi canitur Psalmus, cuius prior pars est principiũ Psalmi 104. posterior est Psal. 95. Videtur enim Esdras, vel si quis alius fuit, qui librum Psalmorum collegit, & ordinauit, vt numerum centũ quinquaginta Psalmorũ completeret, ex parte Psalmi 104. fecisse hũc Psalmum 95. quemadmodũ ex fine Psal. 56. & ex fine Psal. 59. composuit Psal. 107. qui incipit, Paratum cor meum, & ex fine Psalmi 39. fecit Psalmum 69. qui incipit, Deus in adiutorium meum intende. Titulum ergo quem habemus in codicibus græcis, & latinis, vel addiderunt Septuaginta Interpretes, vel quod verius reor, Esdras ipse addidit, & iussit cantari cum templum reedificabatur post captiuitatem Babylonicam. Quamuis autem David hunc Psalmum composuerit occasione reductionis Arcæ Domini, & Esdras eundem Psalmum cantari iusserit in reedificatione templi: tamen certum

est, intentionem primariam Davidis, & ipsius Spiritus sancti fuisse prædicere aduentum Christi, & Regnum eius, qñ Deus eripuit nos de potestate tenebrarum, & transtulit in Regnum filij dilectionis suæ, vt scribit Apostolus ad Coloss. 1. Rectè. n. obseruauit S. Augustinus, in toto hoc Psalmo nullam fieri mentionem ædificationis templi, nec reductionis arcæ, ac per hoc, vel Psalmum non conuenire cum titulo, vel exponendum esse vt verba sonant de Regno Christi in toto terrarum orbe propagando; hoc est de Ecclesia in omnibus gentibus ædificanda. Atque in hanc sententiam conueniunt scriptores veteres, Hieronymus, Augustinus, & Ambrosius latini; Chrysostomus, Theodoretus, & Euthymius græci.

Explicatio Psalmi 95.

Antate Domino canticum nouum, Cantate Domino omnis terra.

Incipit ab exhortatione, vt pro comuni beneficio cõmuniter ab vniuersa terra gratiæ agantur Deo. ter autem repetit Cantate, vt etiam infra ter repetit, asserte Domino, vt obscure insinaret mysterium sanctissimæ Trinitatis, quod apertè in testamento nouo prædicandum erat. Cantate, inquit, Domino canticum nouũ, id est, laudate, & gratias agite cum cantu, & lætitia. Vocat autem canticum nouum, canticum pulchrum, & sapienter compositum: item canticum pro nouo beneficio: item canticum, quod a renouatis hominibus cani debet, in quibus non amplius regnet cupiditas, sed charitas. Denique, vt exponit Chrysostomus, canticum, non quale fuit canticum Moysis, aut Deborah, aut alia vetera cantica, quæ non poterant cantari extra terram promissionis, iuxta illud, Quomodo cantabimus canticum Domini in terra aliena? sed canticum nouum, quod per vniuersam terram celebrari queat. Ideo enim subiungitur,

tur, Cantate Domino omnis terra, id est non solum Iudæa, sed orbis terrarum vniuersus.

Ihm Creatoris, sed etiam Redemptoris, & sanctificatoris, id est, Patris, & Filij, & Spiritus sancti.

II. Cantate Domino, & benedicite nomini eius: annunciate de die in diem salutare eius.

Præmissa exhortatione generali, incipit explicare materiam cantici, & laudationis, quæ est Saluatoris aduentus. Cantate, inquit, Dño, & benedicite nomini eius, i. cantando laudate potentiã eius, q̃ per nomen significatur. nisi fortè per nomen insinuetur nomen Saluatoris de quo clarius fit mentio in verbis sequentibus; Annunciate de diem in diem salutare eius, i. prædicate cum cantu, & laudibus venturam salutem, idq̃. de die in diem id est, oĩ die: quemadmodum. n. sine cessatione dies diei succedit, sic æquũ est, vt laudatio laudationi sine cessatione succedat. Verbum hebraicum, basseru, significat bonum nuncium afferre: qđ Septuaginta rectè verterunt, *ἠγγέλλετε*, & interpretes noster vertere potuisset, euangelizate, vel bene nunciate, vt legit S. Augustinus; Itaq̃. ex hebræo & græco exponi debet verbum latinum, annunciate, id est, bonum nuncium afferte.

III. Annunciate inter gentes gloriam eius, in omnibus populis mirabilia eius.

Dixit Deum ob tam ingens beneficiũ oĩ tpe laudandum: addit nunc et in oĩ loco laudandum. Annunciate, inquit, inter gentes gloriam eius, id est, notam facite non solum Iudæis, vt faciebant Prophetæ veteres, sed et gentilibus gloriã Dei; & hoc ipsum clarius explicans ait, annunciate in oĩbus populis, id est, oĩbus gentibus, mirabilia eius, id est, admiranda opera Dei, ex quib. manifestatur gloria eius. Quamuis aut̃ hæc exhortatio pertineat ad oēs, qui nouerunt mirabilia Dei: tñ p̃cipuè pertinet ad Apostolos Dñi: illi em̃ sunt, qui oĩbus gentibus notã fecerunt gloriam Dei, & mirabilia opera non so-

Quoniam magnus Dominus, IV. & laudabilis nimis: terribilis est super omnes Deos.

Quoniam omnes Dij gentium v. Dæmonia, Dominus autem cœlos fecit.

Declarat, quæ sit gloria Dñi, quæ mirabilia opera eius, quæ paulo ante prædicada semper, & ubiq̃. esse dicebat. Qm̃ magnus Dñs, & laudabilis nimis, terribilis est sup̃ oēs Deos. Hæc est gloria Dñi, quod magnus sit absolute, siue potetiã, siue sapientiam, siue bonitatem, siue imperium, siue diuitias, siue quæcunq̃; alia consideres; quod iuxta hanc magnitudinem sit laudabilis valde, & re ipsa ab oĩbus laudetur: hinc. n. pleni sunt cæli, & terra gloria eius; quod denique terribilis sit super oēs Deos, id est, quod vsque adeo emineat super oēs, qui vllō modo dicuntur Dij, vt non solum non audeant ei se conferre, sed vt serui, vel potius m̃cipia Maiestatem eius contremiscant: ñ de bonis Angelis, qui sunt Dij per participationem canit Ecclesia, Maiestati et̃uã laudant Angeli, adorant Dominationes, tremunt Potestates. De malis Angelis, q̃ sunt Dij per errorem gentium dicit B. Iacobus in Epist. cap. 2. Dæmones credũt, & contremiscunt: & qm̃ p̃cipuè de falsis Dijs loquitur hoc loco Dauid, id subiungit rōnem, cur Deus noster terribilis sit super oēs Deos, dicēs, Qm̃ oēs Dij gentium Dæmonia, Dñs aut̃ cœlos fecit, id est, propterea Dñs terribilis est sup̃ oēs Deos, falsos videlicet, & a gentibus per errorem adoratos, qm̃ Dij gentium non sunt veri Dij, sed Dæmonia, id est, spūs mali, qui a Deo creatore per superbiam recesserunt, & ab eodem æternis suppli- cijs destinati sunt: Dñs aut̃ non est spūs creatus, sed spūs creator, qui cœlos fecit corpora omnium maxima, & pulcherrima, & oĩa, quæ cœli ambitu continẽtur, id est, res oēs creatas. Ex hebræo S. Hierony-

ronym⁹ vertit, oēs Dij populorū sculpti-
 bilia. Sed sciendum est, vocem hebraicā,
 אֱלִילִים ^{אֱלִילִים} quæ hic habetur, elilim, non significare
 propriē neque Dæmonia, neque sculpti-
 bilia. Dæmon. n. dicitur, sed, sculptibile
 פֶּסֶל ^{פֶּסֶל} pesel, vox autem, elilim, significare vř
 אֱלִילִים ^{אֱלִילִים} Deiculos, vt sit diminutiuum ab, el, qā si-
 gnificat Deum. vt sensus sit, Dij gērium
 non sunt Dij, sed Deiculi, vel Deastri inu-
 tiles, & vani: Dñs autē est Deus verus, &
 potens, qui cœlos fecit. Itaq. vocem illā
 Septuaginta Interpretes retulerunt ad
 Dæmonia potius, q̄ ad simulacra; qñ
 Dæmonia habitabant in simulacris, &
 erant ij, qui potissimum a gentibus ado-
 rabantur, iuxta illud Apostoli 1. Cor. 10
 Quæ. n. gentes immolant, Dæmonibus
 immolant, & non Deo.

VI. Confessio, & pulchritudo in
 conspectu eius: sanctimonia,
 & magnificentia in sanctifica-
 tione eius.

Dixerat, Deum esse magnum, & terri-
 bilem: nunc addit, eundem esse vndique
 laudabilem, pulcherrimum, gloriosum,
 & sanctissimum; idq. præcipuē cerni in
 cœlesti sanctuario, vbi spectandum se
 præbet oculis angelorum, alijsq. spiri-
 tibus beatis. Illustrabit hūc versiculum,
 alioq. i satis obscurum, versiculus secun-
 dus Psalmi centesimi tertij, Confessionē
 & decorem induisti amictus lumine, si-
 cut vestimento. dñ. n. Deus induisse con-
 fessionem, & decorem, quia ab oī parte
 conspicitur laudabilis, & ideo laudabilis
 quia pulcher, & decorus totus, siue quis
 essentiam, siue attributa, siue iudicia, siue
 cogitationes, siue opera ei⁹ attēdat.
 quod breuissimē dixit S. Ioan. 1. Epist. c. 1
 Deus lux est, & in eo tenebræ non sunt
 vllæ. Dicit ergo Propheta de Deo, Con-
 fessio, & pulchritudo in conspectu eius,
 id est, laus, seu materia laudis, & pulchri-
 tudo, siue decor, & gloria, est in circuitu
 Dei, quia confessionem & pulchritudinē
 induit; ac per hoc vndique conspicit lau-
 dem, & pulchritudinem suam, & vndiq.
 conspicitur decorus, & laudabilis: quō
 sol, si sensum videndi haberet, vndique

conspiceret radios lucis suæ, sicut vndi-
 que conspicitur micans, & lucidus. San-
 ctimonia, & magnificentia in sanctifica-
 tione eius, id est, sanctitas, siue puritas,
 & magnificentia, siue maiestas, & glo-
 ria, quibus Deus, quasi vestimentis indu-
 tus est, conspicitur in sanctificatione
 eius, id est, in sanctuario, siue in templo
 sancto, quod in cœlis ipse Deus habet.
 Posset etiam hic versiculus sic exponi.
 Confessio, & pulchritudo in conspectu
 eius, id est, offeratur in conspectu Dei
 cōfessio laudis, & pulchritudo iustitiæ,
 sanctimonia, & magnificentia in sancti-
 ficatione eius, id est, sanctitas vitæ, &
 magnificentia operum bonorum in sancto
 templo eius similiter offeratur. San-
 ctus Augustinus per confessionem intel-
 ligit confessionem peccatorum, per quā
 homo deformis incipit pulchrescere, &
 sanctificari, & placere sponso cœlesti, q
 pulcherrimus, & sanctissimus est. Quod
 attinet ad verba, pro vocabulo, sancti-
 monia, in hebræo est, oz, quod propriē
 robur, & fortitudinem significat; sed ac-
 cipitur etiam pro gloria, honore, substā-
 tia, opibus. Videntur igitur Septuaginta
 Interpretes, eam vocem accepisse pro
 gloria, & puritate, quæ sanctitatis pro-
 pria est: vt in sequenti versiculo accepe-
 runt pro honore, & coniunxerunt cum
 gloria. Pro vocibus, in sanctificatione
 eius, in hebræo habetur, in sanctuario
 eius, & sic etiam vertit S. Hieronymus.
 Neque est nouum in scripturis, vt sancti-
 ficatio accipiat pro sanctuario: sic. n.
 legitur lib. 1. Machab. cap. 1. Et intrauit
 in sanctificationem cum superbia, & ac-
 cepit altare aureum, &c.

Afferte Domino patriæ gentiū
 afferte Domino gloriam & hono-
 rem, afferte Domino gloriam no-
 mini tuo. VIII.

Prædixerat, prædicandam esse notitiā
 Dei omnibus gentibus per Christi adue-
 tum: nunc prædicit conuertēdas esse oēs
 gentes, & glorificaturas Deum. Sed si-
 cut illud prædixerat per modum hortā-
 tis dicens, Annunciate inter gentes glo-
 riam

riam eius; sic etiam nunc prædicit hoc per modum hortantis dicens, Afferte Domino patriæ gentium, id est, o familiæ gentium toto orbe diffusæ, cum vobis annunciata fuerit gloria Dñi, qui de cælo ad terram descendit, & peracta redemptione iterum ad cælum gloriosus ascendit: nō sitis duræ ad credendum, nec pigre ad operandum, sed accurrite ad tabernaculum Domini, & afferte gloriā, & honorem, glorificando, & honorificando verbis, & operibus Deum, & sanctum nomen eius. Illud, patriæ gentium, hebraicè est, mispechoth, quod propriè significat familias. Sed latinus interpretis reliquit hoc loco vocem græcam, *γενεα*, quæ significat familiam. Quare per, patrias gentium, non debemus hic accipere id, quod significat nomen latinum, sed quod significat græcum. Cur autem Propheta nomet familias, ratio esse videtur, ut alluderet ad ritum hebræorum, qui distincti per familias suas ascendebant festis diebus ad templum Domini, quod erat in Hierusalem. Significat igitur Spiritus Sæctus, quod faciebant familiæ Iudæorum corporaliter, faciendum esse à familijs omnium gentium spiritualiter, ut videlicet omnes ad Ecclesiam veniant, & Deo tribuant gloriam, & honorem omnium mirabilium, quæ facta sunt in redemptione generis humani; non enim nostra industria, aut meritis euecti sumus ad filiorum Dei adoptionem, & gratiam; sed ex misericordia Dei, cui proinde debetur omnis honor, & gloria. Pro illa voce, gentium, in hebræo est populi. sed Septuaginta Interpretes maluerunt vertere, gentium, quam populi, ne Iudæi dicerent, de populis suis tantum Prophetam esse loquutum. Itaq; sustulerunt ambiguitatem vocis, & docuerunt, Spiritum Sanctum locutum esse de populis gentium, de quibus paulo ante dixerat, Annunciate inter gentes gloriam eius. & paulo infra, Dicite in gentibus, quia Dominus regnauit: nam utrobique in hebræo habetur vox, goim, quæ propriè significat gentiles.

Tollite hostias, & introite in atriaria eius, adorate Dominum in atrio sancto eius.

Hic etiam alludit ad morem hebraicum, iuxta quem Iudæi cum ascendebant ad templum, offerebant victimas, & adorato Deo reuertebantur in ciuitates suas. Sed quia hoc loco inuitantur gentiles, ut ad Ecclesiam Dñi veniant; intelligenda est hæc oblatio de spiritualibus hostijs, de quibus loquitur Sanctus Petrus in prima Epistola cap. 2. Offerre spirituales hostias, acceptabiles Deo per Iesum Christum. Sunt autem spirituales hostiæ, sacrificiū cordis contriti, confessio peccatorum, oratio, ieiunia, eleemosynæ, & similia. Potest etiā hic locus intelligi de sacrificio Misæ, quod successit omnibus sacrificijs hebræorum, & quod, iuxta prophetiam Malachiæ, offertur Deo ab ortu solis vsque ad occasum à gentibus conuersis ad Deum per manus Sacerdotum testamenti noui. Nam non sine mysterio in hebraico textu non habetur vocabulū, zebach, quod significat hostiam, quæ occiditur, dum immolatur, qualia erant sacrificia ouium, & bouum: sed, mincha, quod significat hostiam incruentam, ac præsertim ex farina confectam. Parum autem refert quod pro, atrio sancto, in hebræo habetur in decore sanctitatis; nam idem est sensus; vocat enim scriptura, decorem sanctitatis, ipsum sanctuarium, quod esset decore, & sanctitate plenum.

Commoueatur à facie eius vniuersa terra, dicite in gentibus, quia Dominus regnauit.

Hactenus quasi longè præuidit Regnum Messie, & hortatus est prædicatores ad annunciandum, & populos ad recipiendum nouum Regem: tunc quasi propius intueatur, & ipsum venientem cernat, spiritu exultat, & hortatur ad venerationem, & lætitiā, non solum gentes, sed etiam terram, cælum, maria,

maria, arbores ipsas: non quòd ista sensu prædita sint, sed vt declaret affectum suum, & vniuersalem lætitiā, quæ in toto mûdo futura erat in Aduentu Christi. Quamuis autem aliqui hæc referant ad secundum aduentum, quando veniet iudicare viuos, & mortuos. alij ad primum aduentum, quando venit quærere, & saluum facere quod perierat; tamen SS. Patres Hieronymus, & Augustinus, nec non græci scriptores, Theodoretus, & Euthymius ad vtrunque aduentum referunt. quod & nobis probabilius esse videtur. At igitur, Commouetur a facie eius vniuersa terra, id est, commouetur commotione timoris, & reuerentiæ habitatores terræ ante faciem Domini venientis. In hebræo est, paueant a facie eius omnis terra. vbi numerus multitudinis indicat, per terram, non intelligi elementum terræ, sed habitantes in terra. Dicite in gentibus, quia Dominus regnauit, id est, vt cōmouetur terra, prædicare gentibus omnibus, quod Dominus adueniens regnum suum auspicatus est. Intelligitur autem nomine Regni, Regnum spirituale, quo regnat per fidem in cordibus hominum: semper. n. Deus regnat in cælo, & in terra regno potentia, & maiestatis: sed per fidem regnare cœpit in gentibus ab aduentu Messia. antea siquidem Diabolus regnabat per errores Idololatriæ: vnde, & Dominus Ioan. 12. ait, Nunc Princeps huius mundi eiicietur foras. S. Augustinus legit, quia Dominus regnauit a ligno: quam lectionem fuisse olim in Septuaginta virorum interpretatione, & ab hebræis fuisse abratam, & sublatā, testatur S. Iustinus in dialogo cum Triphone; & Fortunatus in hymno, qui ab Ecclesia frequenter tempore passionis, ex hac lectione accepit illud,

In plæta sunt quæ concinit.

David fideli carmine,

Dicens in nationibus

Regnauit a ligno Deus.

quamuis autem hæc lectio optimum sensum habeat; tamen in libris græcis, hodie non habetur nec habebatur tempore Sancti Hieronymi, Theodreti, & Euthymij, vt ex eorum commentarijs

perspicuum est: nec habetur in codicib⁹ hebraicis, nec in editione latina vulgata.

Etenim correxit orbem terræ, X. qui non commouebitur; iudicabit populos in æquitate.

Hoc Regnum meritò conuenire Christo, probat duplici ratione. Primum quia ipse est, qui cum in forma Dei esset, orbem terrarum condidit, confirmauit, & stabiliiuit, vt commoueri non posset; iustum enim est, vt ipse regnet in terra, qui terram ipsam condidit. In hebræo est, ticcon, a verbo, cun, quod est 717 stabilire, firmare, dirigere. & hoc idem 717 verbum habetur in Psalmo 92. vbi legimus, Etenim firmavit orbem terræ, qui non commouebitur. Itaque potest referri hæc pars versiculi ad creationem mundi: & tunc, correxit, idem erit, quod, ita directè fundauit, vt nutare nō possit: potest etiam idem verbum exponi de correctione morum per optimas leges, & instituta; & tūc sensus erit, Christum iure, ac meritò regnare debere in orbe terrarum, quia orbem terræ nutantem ob prauas institutiones gentilium, ita correxit per legem suam Euāgelicam, quæ prohibet omnia vitia, vt iam commoueri non possit, si leges illas sequatur, & obseruet. Vnicum enim Domini præceptum de dilectione, si obseruetur, totum orbem terrarū corrigit, & in summa pace constituit. Secunda ratio est, in verbis sequentibus, Iudicabit populos in æquitate, id est, non solum correxit orbem terræ sanctissimis legibus suis; sed etiam tempore suo iudicabit orbem iustissimè; tribuet

enim ijs, qui legem Euangelij

seruauerint, amplissima

præmia; & ijs, qui

seruare no-

luerint,

iustissimas pœnas. -

...

Latet-

XI. Latentur cœli, & exultet terra, commoueat mare, & plenitudo eius: gaudebunt campi, & omnia quæ in eis sunt.

XII. Tunc exultabunt omnia ligna sylvarum a facie Domini, quia venit, quoniam venit iudicare terram.

Excitat ad lætitiā omnes res creatas propter aduentum Domini, tum primum, tum secundum. Primus. n. aduētus oīa consecrauit; secundus oīa glorificabit: nunc. n. oīs creatura ingemiscit, & parturit subiecta corruptioni, sed postmodum liberabitur a seruitute corruptionis, in libertatem gloriæ filiorū Dei, vt dicitur ad Rom. 8. Latentur ergo cœli, & exultet terra, quæ sunt partes mundi principales: commoueat etiam mare motu exultationis, & plenitudo eius, id est, omnia quæ continentur in eo, siue insulæ, siue pisces. Gaudebunt campi, & omnia, quæ in eis sunt, id est, sic erit, vt optauit: nam optauit, vt terra exultaret; ipsa vero omnino exultabit, quia gaudebunt campi, & omnia quæ in eis sunt, siue pecora, siue plantæ: imò etiam ipsa ligna sylvarum quantumuis sterilia, & inculta exultabunt a facie Domini, ad præsentiam videlicet conditoris; exultabunt autem, quia venit Dñs redempturus orbem terræ in misericordia; & quoniam iterum venit iudicare orbem terræ in iustitia. Sic. n. exponunt S. Hieronymus, S. Augustinus, Theodoretus, & Euthymius, qui referunt illud, quia venit, ad primum aduentum, illud, quoniam venit iudicare terram, ad secundum aduentum. Sed si magis placeat iuxta morem hebraicū, vtrunq; referre ad iudicium, quæ est simplicior, & fortasse magis literalis explicatio, tunc dicendum erit, Iudicium nouissimum fore simul, & terribile, & lætissimum; terribile impijs, lætissimum iustis. Nam ea de causa in scripturis nunc describitur, vt quid lugubre; horroris, & timoris plenum iuxta illud Luc. 21. Erunt

signa in sole, & luna, & stellis, & in terris pressura gentium præ confusione sonitus maris, & fluctuum, arescentibus hominibus præ timore, & expectatione quæ superueniet vniuerso orbi; nam & virtutes cœlorum movebuntur: nunc vero describitur, vt quid iucundum, & lætum propter gloriam electorum, quæ redundabit in ipsum cœlum, & terram, & maria, quæ renouabuntur, & statum omnino meliorem acquirerent. vnde dicitur paulo infra in eodem loco Euangelij, His autem fieri incipientibus, respicite, & leuate capita vestra, quoniam appropinquat redemptio vestra.


Iudicabit orbem terræ in æquitate, & populos in veritate sua. XIII.

Concludit, prædicens quale futurum sit iudicium. Iudicabit, inquit, orbem terræ in æquitate, id est, in iustitia; id. n. sonant vox hebraica, & græca. proinde non est accipiēda hoc loco æquitas propriè, sed pro vera iustitia. Repetit, & declarat hoc ipsum cum addit, & populos in veritate sua. vbi quod dixerat, iudicabit orbem terræ, explicat cum dicit, Iudicabit populos; non. n. terram ipsam, sed populos habitantes in ea iudicabit. Quod autem dixerat in æquitate, explicat, cum dicit in veritate sua, id est, in ea veritate, & fidelitate, qua semper adimplet quod promisit. promisit autem, se redditurum vnicuique secundum opera sua, non accepturum personas, iuste denique iudicaturum. Hoc igitur modo iudicabit, & non aliter. Hæc certè sententia deberet somnum, & torporem mortalium excutere, neque quia differtur iudicium, & Deus interim patienter agit; credere debemus, iudicium non esse futurum. Qui. n. tam multa promisit antequam fierent, & re ipsa præstitit: non decipit nos in hoc vno, quod tanti momenti est. An verò, inquit, Sanctus Augustinus, exhibuit nobis Deus omnia quæ promisit, & de solo die iudicii nos fefellit? Vide explicationē S. Augustini ad Psalmum septuagesimum tertium prope finem, vbi copiose de hac re tractat.

PSAL-

PSALMVS XCVI.

Titulus, & Argumentum.

Hic David, quando terra eius restituta est.

Hinc titulum non habent hebraei codices; proinde vel excidit incuria scriptorum, vel eū addiderunt Septuaginta Interpretes: habetur .n. in græcis, & latinis editionibus, & ab antiquis Patribus exponitur. Et quamvis in libris græcis non sit propriè restituta, sed constituta: tñ idem est sensus; cum .n. restituta fuit terra Davidi, quam ei Absalon filius abstulerat, tunc ipsa terra constituta fuit, id est, confirmata, & stabilita, quæ antea quodammodo fluctuauerat. vocatur .n. terra hoc loco, possessio terræ, siue Regnum terrenum. Sed non videtur Psalmus ad literam intelligendus de restitutione, aut constitutione Regni Davidis; nihil .n. eiusmodi in Psalmo legimus, sed videtur sanctus Propheta occasione terræ a se recuperatæ, Spū sancto afflatus cecinisse restitutionem, & constitutionē perfectam Ecclesiæ, quæ futura est post ultimum iudicium, qñ remotis persecutionibus omnibus, & omnibus inimicis Christi sub pedibus eius constitutis, Ecclesia pace perpetua, & tranquillitate fruatur, & Christus ipse pacificè in vniuersa creatura regnabit.

Explicatio Psalmi 96.

I. **D**ominus regnavit, exultet terra, latentur insulæ multæ.

Duobus modis ad literam potest hic Psalmus exponi, primū de Regno Dei

absolutè, deinde de Regno Christi post Resurrectionem, vt exponunt Augustinus, Theodoretus, & Euthymius: Iuxta priorem intelligentiam hic sensus erit, Dñs regnavit, id est, Dñs Deus est verus, & supremus Rex; & omnes alij Reges serui eius sunt: ideo exultet terra, latentur insulæ multæ, id est, exultent, & latentur omnes habitantes orbem terrarum, siue habitent continentem terram, siue insulas, quæ plurimæ sunt in mari: quia si fortè opprimantur a Regib. terrenis, non deerit illis Dñs, qui Rex est supremus, & inferiores Reges nullo negotio coercere, & in ordinem redigere potest. Iuxta posteriorem intelligentiam hic sensus erit, Dñs Christus, qui aliquādo humilis ante Reges iudicandus stetit iam regnavit: quia data est ei omnis potestas in cælo, & in terra, vt iam nulli potestati nec de iure, nec de facto subijciatur; sed omnibus præsit, vt Princeps Regum terræ, & Rex Regum, ac Dominus dominantium: ideo exultet terra, & latentur insulæ multæ, quia Dominus, qui regnum Mundi adeptus est, frater noster est dignatione, quamvis, & Deus noster sit creatione, & Dominus redemptione.

Nubes, & caligo in circuitu eius. II. us, iustitia, & iudicium correctio sedis eius.

Iuxta priorem sensum explicatur natura Dei, qui cum inuisibilis sit, tamen gubernat, & regit mundum visibilem, summa iustitia. Nubes, & caligo in circuitu eius, id est, Dominus Rex noster inuisibilis est, quia lucem habitat inaccessibleem, & similis est soli, qui quando nube, & caligine tectus est, non potest videri, & tamen lumen, & calorem eius sentimus. sic in Psal. 17. describitur Deus posuit, inquit, tenebras latibulum suum, in circuitu eius tabernaculum eius tenebrosa aqua in nubibus aeris. sic in monte Sina apparuit tectus nubibus, & caligine, vt dicitur Exod. 20. Iustitia, & iudicium correctio sedis eius, id est, quāvis inuisibilis sit, verè tamen adest, & iudicat

cat populos iustissimo iudicio. Illud, correctio, potuisset etiam verti, firmamentum, ut vertit S. Hieronymus, nec non stabilitas, rectitudo, præparatio, ut alibi vertunt iidem Septuaginta Interpretes: nam hæc omnia significat vox hebraica, *mecon*, à verbo, *cun*, ut diximus in explicatione Psalmi superioris. Itaque illud, correctio, significat hoc loco rectitudinem, siue directionem, ut sensus sit, rectitudo, siue directio sedis Dei consistit in iustitia, & iudicio: rectissima .n. est potestas iudiciaria Dei, quæ per sedem significatur, quia Deus semper iuste iudicat, nec potest vlllo modo iniuste iudicare, cum sit ipsa sapientia, & iustitia. est autem hoc proprium Dei; nam sedes aliorum Regum non carent obliquitate aliqua, cum facile illis error obrepit, vel ex ignorantia, vel ex falsa informatione vel ex passione. Iuxta posteriorem sensum, significatur aduentus Christi ad Iudicium: veniet enim in nubib' cœli, splendore magno circumdatus, ut ipse dixit in Evangelio Matth. 24. & 26. & ut Ioânes scripsit Apoc. 11.

III. Ignis ante ipsum præcedet, & inflammabit in circuitu inimicos eius.

Iuxta priorem sensum significatur admirabilis potentia, efficacia, & celeritas punitionis, quam Deus exercet in impios, quando vult eos punire in hoc Mûdo. Ignis ante eum præcedet, id est, quodcumque voluerit iudicare, & punire impios, ignem a sede sua emittet, id est, virtutem efficacissimam, & velocissimam, quæ subito inflammabit, & consumeret in circuitu vndique, ut non sit vllum effugium, omnes inimicos eius. Potest etiam per ignem intelligi Angelorû ministerium: nam ut dicitur in Psal. 103. Facit Angelos suos spiritus, & ministros suos ignem vrentem. De hoc igne dicitur in Psal. 17. Ignis a facie eius exarsit, & Danielis 7. Fluuius igneus, rapidusq; a facie eius egrediebatur. Iuxta sensum posteriorem significatur ignis ille, qui præbit ante Iudicium, & comburet om-

nia quæ in terra sunt, homines, domos, hortos, vineas, animantia, & cætera: de qua re scribit Apostolus Petrus in 2. Ep. cap. ultimo, quemadmodum tempore Noe mundus aquis inundatus periit; ita in aduentu Christi ad iudicium, terram, & omnia quæ in ea sunt, igni exurenda, & consumenda esse. Quod autem dicit Psalmus, solos inimicos Dei illo igne inflammandos; ideo dicit, quia solis impijs ignis ille nocebit, quippe qui thesaurum suum, & cor suum habent in terra. Illi .n. molestissimè ferent, per illum occidi, & absumi opes omnes terrenas, quas diligebat: Iustis autem nō nocebit, quia bona terrena iam spreuerant, seq. ad meliora transferri per mortem videbunt.

Illuxerunt fulgura eius orbi ter IV. ræ, vidit & commota est terra.

Iuxta priorem sensum pergit David explicare potentiam Dei in impios. Deus enim non solum igne virtutis suæ, aut Angelorum sanctorum; sed etiam corporalibus fulguribus terret, quando ei placet, vel etiam tanta velocitate interimit hostes, ut tela eiusmodi nulla arte præcaueri, aut repelli possint. De hoc etiam dicit in Psal. 17. Intonuit de cœlo Dominus, & altissimus dedit vocem suā, misit sagittas suas, & dissipauit eos, fulgura multiplicauit, & conturbauit eos. ait igitur, Illuxerunt fulgura eius orbi terræ, id est, quando placuit illi, in promptu habuit sagittas fulgurum iacere, & vbi illa alluxerunt orbi terræ, terra ipsa, quasi sensum haberet, & videret horrendam speciem cœlestium iaculorum, tota contremuit, & tremore commota est. Est hæc poetica descriptio, qua vis maxima fulgurum demonstratur. Iuxta sensum posteriorem declaratur modus, quo ante iudicium ignis maximus exorietur, & consumeret omnia; id .n. fiet per instrumenta fulgurum, quæ frequentissima erunt. sic legimus Sap. cap. 5. Ibunt directæ emissiones fulgurum, & tanquam a bene curuato arcu nubium exterminabuntur, & ad certum locum insilient.

Mon-

V. Montes sicut cera fluxerunt a facie Domini, a facie Domini omnis terra.

Hic explicat Propheta iuxta vtrunq. sensum potētiam Domini per effectum; & persistit in eadem similitudine ignis: quomodo enim cera non potest subsistere ante faciem ignis, quin statim liquefiat, & pereat: sic montes, quantumvis maximi, & durissimi sint, immo omnis terra, quæ solidissima est omnium elementorum, vim diuinæ potentiae sustinere non posset, si Deus eam repente consumere, & ad nihilum redigere vellet. Itaq. verba huius versiculi non ita sunt accipienda, quasi re ipsa montes fluxerint, sicut cera; sed quia ita fieret, si Deus vellet. Alij exponunt, montes fluxisse veluti ceram, per apparentiam, quia visi sunt liquefcere, & consumi, quāuis re vera non consumerentur. Alij volut, per montes, significari homines superbos, qui in iudicio præ timore liquefcunt instar ceræ ante faciem ignis. Illud, omnis terra, in græco est, omnis terræ, & sic legit Sanctus Augustinus, & concordat cum hebraica lectione, quā sic reddit Sanctus Hieronymus a facie dominatoris omnis terræ. Fieri pōt vt nostra lectio vitio librariorum sit mutata, quod facillimè contingere potuit: vterq. tamen sensus est verus, neque est varietas hæc alicuius momenti.

VI. Annunciauerunt cœli iustitiā eius, & viderunt omnes populi gloriam eius.

Iuxta priorem sensum cœli annunciauerunt iustitiam eius, quia ex conspectu Solis, & Lunæ, & Stellarum, & continuis conuersionibus eorum, potuerunt homines intelligere Deum esse moderatorem iustissimum orbis terræ. Sicut etiam dicitur in Psalm. 18. Cœli enarrant gloriam Dei. & idem affirmat Apostolus ad Ro. 1 & Sapiens in lib. Sap. cap. 14. Possunt e-

Bellarm. in Psalm.

tiam, per cœlos annunciatōres iustitiæ Dei, intelligi Apostoli, & Prophetæ, ex quorum prædicatione viderunt omnes populi gloriam eius, id est, cognouerūt, vel certè cognoscere potuerunt magnitudinem potentiae, sapientiae, bonitatis Dei, ex quibus consequitur gloria, id est claritas nominis eius. Iuxta sensum posteriozem, significatur his verbis angelica tuba, quæ de cœlo annunciabit venturum Iudicem Mundi totius, & rigorem iustitiæ eius in eos, qui misericordem Redemptorem suscipere noluerunt; & tunc videbunt omnes populi gloriam Domini, cum apparebit in nubibus cum omnibus Angelis in maiestate sua. De hoc aduentu scribit Apostolus 1. Thessal. 4. Ipse Dominus in iussu, & voce Archangelis, & in tuba Dei descendet de cœlo. Ipse etiā Dominus Matth. 24. Mittet, inquit, Angelos suos cum tuba, & voce magna. & Apocalypsis 1. scribit Ioannes, Ecce venit cum nubibus, & videbit eum omnis oculus, & qui eum pupugerunt. Annunciabunt ergo cœli, id est, Angeli de cœlo, iustitiam eius, qui veniet reddere unicuiq. secundum opera eius: & tunc videbunt omnes populi, omnes omnino nullo excepto, gloriam eius, qñ omne genu flectetur ei cœlestiū, terrestrium, & infernorum. Philip. 2.

Confundantur omnes, qui adorant sculptilia, & qui gloriantur in simulacris suis.

Iuxta priorem sensum colligit Propheta ex iam dictis, meritò confundi debere omnes Idolorum cultores, cū iam satis constet vnum solum esse verum Deum, qui dominatur, & regnat in cœlo, & in terra, quique summa potentia, sapientia, & iustitia præditus gubernat omnia. Confundantur omnes, qui adorant sculptilia, quæ Dijs sunt inanes, & nec se, neque alios iuuare possunt; & multo magis confundantur, qui gloriantur in simulacris, id est, in Idolis suis; cū errore decepti gloriantur in ea re, ob quam maxime erubescere deberent.

Q9

Iuxta

Iuxta sensum posteriorem, per inodum impræcationis prædicitur confusio maxima, quæ operiet in die Iudicii omnes Idololatrias: tunc enim apertissimè cognoscet, Idola nihil fuisse, & Idolorum habitatores fuisse spiritus immundos, cum quibus ad æterna supplicia damnabuntur.

VIII. Adorate eum omnes Angeli eius: audiuit, & lætata est Sion.

IX. Et exultauerunt filia: Iudæ, propter iudicia tua Domine.

Iuxta priorem sensum, ut probet Propheta merito se dixisse, Confundantur qui adorant sculptilia, conuertit se ad Angelos, & inuitat eos ad adorandum Deum. Si enim Angeli, qui sunt nobilissima creatura, non debent adorari tanquam Di, sed ipsi Deum adorare debent, ut eius serui: quāto minus Dæmones, vel Idolacolēda sunt? Audiuit, & lætata est Sion, id est, audiuit populus Dei, Deum ubique regnare, Idola nihil esse, ipsos etiam Angelos subiectos esse Deo nostro: & idcō his auditis valde lætatus est quod tantum habeat Regem: & exultauerunt filia: Iudæ propter iudicia tua Domine, id est, idem populus Dei, qui & nomine Sion, & nomine filiorum Iudæ intelligitur, exultauit propter iudicia tua, id est, quia tu Deus iudicas omnes iusto iudicio. Iuxta sensum posteriorem, demonstrat Propheta maiestatem Christi venientis ad iudicium, ex eo quod in iudicio manifestè apparebit, Christum verè esse Deum ex ministerio, quod illi exhibebunt omnes Angeli. Astabunt enim Angeli, ut ministri, eumque adorabunt, & obediunt missi ab ipso ad diuersa ministeria: ex quo sequetur maxima lætitia, & exultatio in veris fidelibus, cum viderint tanta gloria coram toto Mundo affici Dominum suum. Vtitur autem Propheta apostrophe ad Angelos, & quasi exhortans ad faciendum, quod sua sponte facturos eos præuide-

bat. Adorate, inquit, eum, id est, Christum pro tribunali sedentem, omnes Angeli eius. Confirmat hanc expositionem Apostolus ad Hebr. i. dicens, Et cum iterum introducit Primogenitum in orbem terræ, dicit, & adorent eum omnes Angeli Dei. Videtur enim Apostolus per illud, iterum, significare voluisse secundum aduentum Christi, & ad illum aduentum applicare ista verba Psalmi, Adorate eum omnes Angeli eius: non enim alibi similia verba inueniuntur. Certè Theodoretus ex hoc Psalmo Apostolum accepisse testimonium illud, disertè affirmat. Quod autem quidam auctor dicit, verba citata ab Apostolo, sumpta esse ex ultimo versiculo cantici Moysi, quod habetur in Deuteronomio cap. 32. non videtur probabile, cum neque in textu hebraico, neque in versione Septuaginta fiat mentio adorationis. Per filias Iudæ, aliqui intelligunt oppida subiecta ciuitati Hierusalem: sed quicquid sit de verbis, certum est, sensum pertinere ad populum Dei electum.

Quoniam tu Dominus altissimus super omnem terram, nimis exaltatus es super omnes Deos.

Reddit rationem, cur populus Dei exultare cœperit auditis illis, quæ dicta sunt: ratio autem est, quia ex illis colligitur, Dominum populi Dei esse verè supremum Dominum, altissimum super omnem terram, id est, super omnes Reges, & Principes terræ, & eleuatum, & exaltatum nimis, id est, maximè, super omnes Deos, id est, super omnes Angelos, qui sunt Di per participationem, & super omnes Deos falsos, qui per errorē colebantur a gentibus. Et quamuis hæc sint vera iuxta priorem sensum, quia varijs miraculis Deus noster se superiorem omnibus Regibus terræ, & omnibus Dijs manifestè probauit: tamen iuxta sensum posteriorem non minus vera, & magis clara sunt. Nunquam enim Deus manifestauit gloriam suam apertius, quam faciet in nouissimo die, quando,

ut supra diximus, omnes omnino homines, & Angeli tam boni, quàm mali curabunt genua ante illum.

XI. Qui diligitis Dominum, odite malum, custodit Dominus animas Sanctorum suorum, de manu peccatoris liberabit eos.

Concludit Psalmum exhortans populum Dei ad sectandam vitæ puritatem, & sanctitatem, quæ, & in hoc tempore, & in futuro magnum præmiū habebit. Qui diligitis Dominum, odite malum. Non poterat brevius, & plenius exhortari Propheta sanctus, populum Dei electum: nam cum ait, Qui diligitis Dñm, appellat omnes verè iustos: charitas. n. Dei complectitur omnes virtutes: nam qui diligit, legem impleuit; & plenitudo legis est dilectio, Rom. 13. Itaque illud, Qui diligitis Dominum, significat, o vos omnes, qui verè non fiētē, qui non ore tantum, sed etiam corde, qui secundum legis intimum, non secundum externam superficiem iusti, & sancti, & Deum timentes estis. Illud, odite malum, comprehendit summam perfectæ exhortationis, quoniam non ait, fugite malum, vel, declinate a malo, quod utcumque actu externo fieri potest: sed, odite malum, quod nisi corde fieri non potest. Cor autem fons est omnium actionum bonarum, & malarum: ut. n. ex corde procedit amor summi boni, ita ex corde procedunt cogitationes malæ, homicidia, adulteria, fornicationes, furta, falsa testimonia, blasphemix. Matth. 15. Subiungit deinde præmiū, dicens, Custodit Dominus animas sanctorum suorum, de manu peccatoris liberabit eos, id est, custos est Dominus fidelis, & diligens, fortis, & prudens diligentem se, ut vitā ipsorum defendat, & liberet de potestate iniquorum, qui ordinariē inimici sunt hominum iustorum. Hæc autē promissio impletur quidem in hac vita secundum priorem sensum: quoniam Deus custodit sæpē vitam corporalem sanctorum suorum: semper autem custodit vitam spirituales, quod est beneficium longè

maius; & ideo fortasse dixit, custodit animas. Facit. n. ut omnia cooperētur in bonum his qui secundum propositum vocati sunt sancti, Rom. 8. Sed iuxta sensū posteriorem, custodiet animas sanctorum suorum in die nouissimo, ut nihileis noceant accusationes inimici: & perfectissimè de manu peccatoris liberabit eos; quia post ultimam illam sententiam nihil amplius poterunt peccatores aduersus iustos.

Lux orta est iusto, & rectis corde XII. de lætitia.

Hoc est alterum præmiū iustorum, quod non solum liberabuntur a malis, sed etiam implebuntur bonis. Per lucem hoc loco potest intelligi lux fauoris diuini, vel, quod verius videtur, lumen iustitiæ, & intelligentiæ, de quo dicitur Sap. 5. Ergo errauimus a via veritatis, & lumen iustitiæ non luxit nobis, & sol intelligentiæ non est ortus nobis. Dicitur autem lux iustitiæ, & intelligentiæ oriri alicui, quando cognoscere incipit non theoricè tantum, sed etiam practicè iustum, & iniustum, bonum, & malum; & illud iudicat, & eligit quod verè iustum & bonum est; non quod apparet iustum & bonum menti malè affectæ ex perturbatione passionum. Hæc igitur lux orta est iusto, sine qua nō esset iustus; & quia gaudium est iusto facere iustitiam, ut Philosophus docet, rectè subiungitur, Et rectis corde lætitia: iustitia. n. dirigit cor, & recto cordi ineffabilis infunditur lætitia ex eo quod conforme redditur voluntati Dei, & omnia ei placent, quæ placent Deo, a cuius nutu pendent omnia. Itaque nihil est, quod iustum contristare possit; sed inter ipsas etiam grauissimas tribulationes, gaudet, & gaudium eius nemo tollit ab eo. In hebræo legitur, Lux seminata est iusto: sed corrupta videtur litera hebraica vnius literæ mutatione, ram, zarag, significat seminare, ורר זרע & sic legitur hodie: zarach, significat oriri, & sic legerunt Septuaginta Interpretes, & S. Hieronymus: & id ipsum confirmat ratio metaphoriæ, non. n. lux rectè

Qq 2 dici-

dicatur seminari, sed oriri rectissime dicitur. Itaque lectio nostræ vulgatæ editionis non est corrigenda ad hebraicā; sed contra, hebraica ad nostram.

XIII. Latamini iusti in Domino, & confitemini memoriæ sanctificationis eius.


Hoc sequitur ex ijs, quæ dicta sunt in superiori versiculo. Si enim lætitia orta est rectis corde; utique hoc sequitur, ut recti corde, id est, iusti lætentur, non in vanitatibus seculi, in quibus lætantur iniusti; sed in Domino, qui eis iustitiam, & lætitiā donat; imo qui est ipsorum gaudium verum, & solidum, cum sit lux pulcherrima oculis interioribus, & dulcedo maxima interno palato. Nec solū lætari debent iusti in Domino, sed etiam confiteri memoriæ sanctificationis eius, id est, laudibus celebrare memoriā sanctificationis a Deo acceptæ: non enim decet vnquam obliuisci tanti beneficii, quo Deus nos ex impijs, & iniquis sanctos, & iustos effecit. Potest etiā per sanctificationem intelligi sanctitas Dei, qua ipse sanctus est, quæ est summa, & excellentissima sanctitas. vnde dicitur Isaia 6. Sanctus, sanctus, sanctus. Est autem, confiteri memoriæ sanctitatis Dei,

cum laudibus semper recordari Deum nostrum sanctissimum esse, ac per hoc debere nos summo studio sanctitati studere. hæc est enim voluntas Dei sanctificatio nostra, 1. Thessal. 4. Et sancti estote (inquit Dominus) quoniam ego sanctus sum. Leuit. 11. & 1. Petri 1.

PSALMVS XCVII.

Titulus, & Argumentum
Psalmi

Psalmus ipsi David.



N hebræo non habetur nomen David, sed simpliciter legitur, Psalmus. Quis addiderit, ipsi David, ignoratur; credibile est Septuaginta Interpretes addidisse. Argumentum est idem ferè, quod Psalmi nonagesimi quinti. Prædicit enim David Christi aduentum primū & secundum, illum ad saluandum, istum ad iudicandum.

Explicatio Psalmi 97.

CAntate Domino canticum nouum, quia mirabilia fecit.

Inuitat homines ad Deum laudandum ob mirabilia quæ fecit. Cantate, inquit, Domino canticum nouum, quia videlicet nouum offertur argumentum carminis, nec solū nouum, sed magnum, & admirabile. Quia mirabilia, inquit, fecit Dominus: mirabiliter enim & nouo modo conceptus de Spiritu sancto, natus de Virgine, peccatum nullum fecit, peccatores iustificauit, surdos fecit audire, & mutos loqui: quin etiam cæcos videre, claudos ambulare, ægrotos bene valere, mortuos viuere, & quod omnium est maximè nouum, & mirabile mortuus ipse se tertia die viuum exhibuit, cælum cum corpore penetrauit, Spiritum sanctum de cælo misit, per homines idiotas, & viles, sapientibus, & prudentibus.

dentibus persuasit Crucifixum colere, præsentia spernere, futura desiderare; denique (vt loquitur S. Augustinus) domuit orbem, non ferro, sed ligno. Possunt etiam hæc referri ad Deum Patrem, qui in Filio suo, & per Filium suum hæc mirabilia fecit; ait enim Dominus Ioan. 14. Pater in me manens ipse facit opera.

II. Saluauit sibi dextera eius, & brachium sanctum eius.

Explicat quæ sint illa mirabilia, & proponit vnum, in quo continentur omnia. Hoc mirabile fecit Dominus, quod ipse solus virtute sua saluauit Mundum, non eguit socijs, non exercitu, non armis: ipse solus Principem Mundi eiecit foras, & vniuersitatem generis humani de ipsius potestate liberauit. Hic finis erat omnium mirabilium, quæ paulò ante numerauimus, ac per hoc in isto vno intelliguntur omnia. Illud, saluauit, potest referri ad Filium, qui sua virtute mundum saluauit; & ad Patrem, qui per dexteram suam, id est, per Christum Mundum saluauit: sed in idem recidunt omnia. Illud, sibi, secundum hebraicam phrasim, idem significat, quod ipsa, ac si dixisset Propheta, Dextera ipsius ipsa saluauit, siue ipsa salutem Mundi operata est. Sic legimus in Canticis cap. 1. Abi post vestigia gregum tuorum; vbi est in hebræo, abi tibi. & cap. 2. Imber abiit; in hebræo, imber abiit sibi: sed illud, tibi, & illud, sibi, omissum est ab Interprete, quia redundat, & in ipso verbo subintelligitur. Sed Isaia 59. expressit Interpres illud sibi, cum ita vertit, Saluauit sibi brachium suum. & cap. 63. Saluauit mihi brachium meum. Alij tamen volunt illud, sibi, positum esse pro, eum, vt sensus sit, Saluauit eum dextera eius, quia propria virtute resurrexit a mortuis. Sanctus Augustinus refert illud, sibi, ad Christum, vt ad finem, vt sensus sit, Saluauit Christus homines, sed sibi, id est, ad gloriam suam. Omnes sunt expositiones veræ, sed prima est maximè literalis. Quod additur,

Et brachium sanctum eius, est repetitio, & declaratio præcedentium. idem enim est dextera, & brachium, id est, virtus & potentia; sed additur, sanctum, vt intelligamus, robur huius brachij non esse aliquid carnale, sed spirituale. nõ enim Christus armis, aut viribus corporis hostem deiecit, sed charitate, & patientia, humilitate, & obedientia, meritis vitæ sanctissimæ, sanguine precioso ex charitate fuso; non hasta, & gladio victoriam de hoste potentissimo reportauit. Sic, n. ait Apostolus Philip. 2. Humiliauit semetipsum factus obediens vsque ad mortem, mortem autem Crucis.

Notum fecit Dominus salutem suam: in conspectu gentium reuelauit iustitiam suam.

Potest hic etiam versiculus referri ad Patrem, qui notum fecit salutare suum, id est, Saluatorem, quem misit, primo per Prophetas, deinde per Apostolos; & per eosdem reuelauit iustitiam suam. Potest etiam referri ad ipsum Filium, qui salutem, quam operatus est, ipse idem per se, & suos notam fecit: prædicauit enim ipse palam totos tres annos, & amplius: deinde misit Apostolos, qui omnibus gentibus euangelium annunciauere. Itaque Dominus ipse prædicando, notum fecit salutare suum, id est, salutem suam, quam attulerat, & dabat credentibus in eum. deinde in conspectu gentium per Apostolos suos reuelauit iustitiam suam, id est, mysterium absconditum, & velatum a seculo reuelauit, & manifestauit Gentibus: est autem hoc mysterium, iustitia sua, id est, adimpletio promissionis olim factæ patribus de Redemptione generis humani. Sic enim intelligendam puto hoc loco iustitiam, quoniam in versu sequenti declaratur hæc iustitia per nomen veritatis, vt mox videbimus. Si quis tamen velit, per iustitiam accipi hoc loco satisfactionem Christi ex rigore iustitiæ pro peccatis totius mundi, non repugno; siue hæc referantur ad Patrem, siue ad

Q 3 Filium.

Filium. Verè enim Pater per passionem Filij, & Filius per passionem suam reuelauit, quanto zelo puniendâ sit iniquitas, & quanto rigore iustitiæ eam ipse expiare voluerit. De hoc mysterio scribit Apostolus ad Ephes. 3. Mihi omnium Sanctorum minimo data est gratia hæc, in gentibus euangelizare inuestigabiles diuitias Christi, & illuminare omnes, quæ sit dispensatio Sacramenti absconditi a seculis in Deo.

IV. Recordatus est misericordiarum suarum, & veritatis suarum domui Israel.

Reddit rationem, cur Deus notum se gerit salutare suum, & reuelauerit iustitiam suam. Ratio autem est, quia promiserat hoc Patribus: & quamuis aliquandiu distulerit implere: tandem tamen recordatus est, id est, fecit, quod faciunt ij, qui recordantur: non enim in Deo cadere potest obliuio, sed metaphoricè dicitur recordari, cum implet, quod distulerat implere, quasi oblitus esset. Eadem metaphora vtitur passim Scriptura, vt Gen. 8. Recordatus est Dominus Noë Luc. 1. Recordatus misericordiarum suarum. Recordatus est igitur Deus Pater misericordiarum suarum, quæ promissit Patribus Saluatorem; & recordatus est Deus Filius misericordiarum suarum, quæ venturum se esse pollicitus est: & simul recordatus est vterque veritatis suarum, id est, fidelitatis, & iustitiæ in adimplenda promissione. Addit Propheta, Domui Israel, promissio enim domui Israel facta est, non gentibus; tamen gentium quoque misereri Deus decreuerat, & per Prophetas sæpè prædixerat. Hinc Dominus Matth. 15. dicit, Non sum missus, nisi ad oues, quæ perierunt domus Israel. & Apostolus Ro. 15. Dico, Christum Iesum ministrum fuisse circuncisionis propter veritatem Dei ad confirmandas promissiones Patrum, gentes autem super misericordia honorare Deum, sicut scriptum est, Propterea confitebor tibi in gentibus Domine.

V. Viderunt omnes termini terrarum salutare Dei nostri.

Hic declaratur fructus prædicationis Apostolicæ; non enim frustra notum fecit Dominus per euangelicam prædicationem salutare suum. Audierunt enim gentes prædicatores Dei, & crediderunt, atque eo modo purificato cordis oculo per Fidem, & experimentum gratiæ, viderunt omnes termini terrarum, id est, tota terra vsque ad terminos suos, salutem, siue saluatorem. Illud, viderunt, energiam habet: significat enim fidem actualem, cum notitia coniunctâ, quæ mouet voluntatem ad amandum, & desiderandum: non enim dici possunt vidisse salutare Dei, qui fide habituali contenti de Salvatore non cogitant, neque de salute (quæ ab ipso est) acquirenda solliciti sunt. Illud, omnes termini terrarum, non significat omnes, & singulos homines, sed multos ex omni natione, & gente.

VI. Iubilate Deo omnis terra, canite, & exultate, & psallite.

Signum fidei est gratias agere Deo, & præ lætitiâ spirituali exultare, & iubilare. Sic ille, qui inuenit thesaurum, Matth. 13. abiit, & præ gaudio vendidit omnia, quæ habuit. Sic Act. 8. cum prædicasset Philippus in Samaria, & recepissent Samaritani Verbum Dei; factum est gaudium magnum in illa ciuitate. & ibidem conuersus, & baptizatus Eunuchus ibat per viam suam gaudens. Sic Petri 1. Credentes exultabitis lætitiâ inenarrabili, & glorificata. Hoc igitur gaudium prædicat nunc Propheta per modum inuitantis, & cohortâtis, Iubilate, inquit, omnis terra, id est, omnes fideles ex vniuersa terra conuersi de tenebris ad lumina admirabile, ad notitiam veri Dei, & Saluatoris Iesu Christi, magna voce laudate, & gratias agite, cantate linguis, exultate animis, psallite moribus: & quia mores,
suo

sive virtutum opera multiplicia sunt: ideo multa hic subiunguntur genera instrumentorum.

mos illos edebat sonos, Habentes vitulum, & quibus tegamur, his contenti sumus. &, Esca ventri, & venter escis, Deus autem hunc, & has destruet. &, verè magnus quæstus est pietas cum sufficientia.

VII. Psallite Domino in cithara, in cithara, & voce psalmi, in tubis ductilibus, & voce tubæ corneæ.

Iubilate in conspectu Regis Domini: moueatur mare, & plenitudo eius, orbis terrarum, & qui habitant in eo.

Quatuor instrumenta numerantur, quibus Deo psallere debent, qui viderunt salutare Dei per fidem, & videre cupiunt per speciem; cithara, psalterium (idem enim significat, in voce Psalmi, & in sonitu psalterij) tuba ductilis, & tuba cornea. Hæc instrumenta erant in usu apud hebræos secundum literam: sed a nostris variè explicatur eorum significatio spiritualis. Mihi videntur posse satis commodè applicari quatuor virtutibus cardinalibus; cithara prudentiæ, psalteriū iustitiæ, tuba ductilis fortitudini, tuba cornea temperantiæ. Cithara variarum chordarum sonos miscēs vnum dulcem concentum efficit: Sic prudentia varias circumstantias operis boni coniungens perfectum opus reddit. Psalterium decem chordis instructum decalogum nobis repræsentat, id est, omnia præcepta iustitiæ. Tuba ductilis malleorum ictibus extenditur, & formatur, ut sonum suauissimum edat: Sic fortitudo tribulationes, & angustias patienter ferendo ita extendit, & perficit hominem Dei, ut suauem illum sonum edat cum sancto Iob, Si bona suscepimus de manu Domini, mala quare non sustineamus? Denique temperantia quasi durum cornu carnem mollem excedens, & superans, id est, corpus castigans ieiunijs, atque vigilijs, & in seruitutem spiritus redigens, tubam spiritualem efficit: qualis erat præcursor Domini, qui melle sylvestri, & locustis contentus, & pilos camelorum indutus, ac zona pellicea præcinctus dicebat, Ego vox clamantis in deserto. qualis & beatissimus Paulus, qui diuturna temperantiæ exercitatione edoctus, dulcissi-

Quoniam aduentus Domini communiter omnibus utilis erit; ideo Propheta inuitat ad iubilandum non solum terram in genere, sed omnes partes eius. Iubilate, inquit, in conspectu Regis Domini, id est, cum aduenerit Rex magnus, qui Dominus omnium est, utpote verus Deus, iubilate in conspectu eius, id est, ipso vidente, & audiente. Moueatur ergo mare motu exultationis, ac si sensu prædictum esset, & simul exulter plenitudo eius, id est, quicquid in eo est aquarum, insularum, piscium. Moueatur quoque similis exultationis motu orbis terrarum, & vniuersi qui habitant in eo, id est, omnes homines; quia Dominus Saluator est omnium hominum, maxime fidelium, ut Apostolus loquitur. 1. Timoth. 4. Et S. Leo serm. 1. de natali Domini, Pro liberandis omnibus venit.

Flumina plaudent manibus, si I. mul montes exultabunt a conspectu Domini, quoniam venit iudicare terram.

Mare, & terram inuitauit: inuitat nunc flumina & montes, ut similiter signa lætitiæ edant: sed de mari dixit, Moueatur mare, & in hebræo, tonet mare, id est, magno fremitu quasi tonet: de fluminibus dicit, Flumina plaudent manibus; quia sonitus fluminum multo leuior est, quam fremitus maris; proinde rectè ille

Qq 4 com-

comparatur tonitruo, iste complosioni manuum. Quod autem dicitur, montes exultabunt, in hebræo est, Montēs laudabunt, sed omnia sunt metaphorica, siue dicantur montes exultare, siue laudare, & semper idem significant, videlicet Prophetam ex amore, & desiderio erga Messiam venturum, optare, vt omnes res creatæ lætentur, & laudent eo modo quo possunt. Illud, quoniam venit iudicare terram, potest referri tam ad primum, quàm ad secundum aduentum, vt diximus in explicatione Psalmi nonagesimi quinti. Si ad primum aduentum referatur, sensus erit, Exultent, & lætentur terra, & mare, montes, & flumina, quoniam Dominus venit iudicare, id est, regere, & moderari optimis, & iustissimis legibus orbem terrarum, non solum, vt olim maiestate inuisibilis diuinitatis, sed etiam corporali, & visibili forma, in similitudinem hominum factus, & habitu inuentus vt homo. Si referatur ad secundum, sensus erit, Exultet terra, & mare, montes, & flumina, quoniam Dominus venit iudicare terram, & exterminabit omnes peccatores de ea, & renouabit omnia elementa, & liberabit ea de seruitute corruptionis, sub qua nunc ingemiscunt, & parturiunt, vt ait Apostolus ad Rom. 8.

X. Iudicabit orbem terrarum in iustitia, & populos in æquitate.


Hæc conclusio eadem est cum conclusione Psalmi nonagesimi quinti, ex cepto vltimo vocabulo. Ibi enimerat, in veritate; hic est, in æquitate: & per æquitatem intelligitur hoc loco directio, siue rectitudo, vt sonat vox hebraica: & est repetitio, siue declaratio, vocabuli iustitiæ. Quod enim dixit, in iustitia, repetit, & declarat, cum dicit, in æquitate, siue rectitudine; quemadmodum quod dixit, orbem terrarum, repetit, & declarat, cum dicit, populos. Itaque sensus est, Iudicabit orbem terrarum, id est,

omnes populos, in iustitia, id est, in rectitudine iudicii, in quo nihil erit obliquum, nihil iniquum.

PSALMVS XCVIII.

Titulus, & Argumentum
Psalmi.

Psalmus ipsi David.



IN hoc Psalmo nullus omnino titulus est apud Hebræos; apud Græcos, & Latinos titulus est, Psalmus ipsi David, quæ eundem titulum inuenimus in Psalmo superiore. Argumentum est cohortatio Prophetæ ad agnoscendum Regnum Dei, eundemq. Deum adorandum, & inuocandum, vt fecerunt magna cum sua vtilitate Moses, Aaron, & Samuel. Est autem duplex sensus in verbis huius Psalmi; vnus deseruiens tempori David, cum Regnum stabilitum esset in domo David; neque enim negari potest, quin in hoc Psalmo sermo sit de vero monte Sion, de vera arca Dei, de Patribus illis, qui hic nominantur. Alter sensus est de Regno Christi, de sacrosancta eius Ecclesia, & de glorioso corpore eius: quorum typi fuerunt Regnum David, mons Sion & arca testamenti. Vtrunque sensum breuiter aperimus, vt fecimus in explicatione Psalmi

96.

Expi-

Explicatio Psalmi 98.

I. Dominus regnavit irascantur populi: qui sedet super Cherubim, moueatur terra.

Iuxta priorem sensum significatur in hoc primo versiculo, stabilitum fuisse Regnum Dei in Hierusalem tempore Davidis, quantumvis inimici eius Idololatraz indignarentur, & turbarentur. Dominus, inquit, regnavit, id est, iam Dominus expulsis Iebusæis, & Chananzæis Idololatris Regnum suum stabilivit in Hierusalem. Quamvis enim David Rex esset, tamen sub Deo regnabat, & ipsi Deo principaliter Regnum suum attribuebat. Irascantur populi, id est, Dominus regnavit inuitis, & repugnantibus populis idololatris; regnavit, inquam, quantumvis irascatur, & indignentur populi: vel, ut exponit Sanctus Augustinus, prophetia est, non iussio, & sensus est, Regnavit Dominus, irascantur populi, qui regnum eius ferre non possunt. Qui sedet super Cherubim, moueatur terra, id est, ille Dominus regnavit, qui sedet super Cherubim, moueatur licet, & turbetur terra. Dicitur Dominus ad literam sedere super Cherubim, quia sedem sibi elegerat propitiatorium, quod sustinebatur à duobus Cherubim ligneis, sed deauratis, sub quibus erat arca, quasi scabellum pedum Domini. Dicebatur autem Dominus sedere inuisibiliter in propitiatorio, quia inde responsa dabat. Vnde dicitur 1. Paralip. 13. Arca Dei sedentis super Cherubim. Sed altiore sensu dicitur Deus sedere super Cherubim, quia præfidet spiritibus Angelicis: vel, ut sanctus Augustinus exponit, quia Cherubim interpretantur plenitudo scientiæ, & Deus supereminet omnem scientiæ plenitudinem. Vbi etiam monet, posse nos fieri Cherubim, & habere in nobis præfidentem Deum, si habuerimus plenitudinem scientiæ, non cuiuscunque,

sed eiusquam in nobis Deus requirit, quæ est scientia voluntatis eius, id est, scientia legis ipsius. Et quoniam plenitudo legis est dilectio; tunc erimus Cherubim, & habemus præfidentem Deum, si dilectionem habuerimus, sicut scriptum est, Anima iusti sedes est sapientiæ. Illud, moueatur terra, declaratio est verborum præcedentium, irascantur populi: Voluit enim Spiritus sanctus ostendere, eos qui irascuntur contra Deum nihil esse, nisi terram; & ideo nihil posse aduersus Deum; qui sedet in cælo super Cherubim, neque esse timendos à nobis, si & ipsi fuerimus Cherubim, & Deum in nobis sedentem habuerimus. Iuxta sensum posteriorem, significatur hoc loco, Regnum Christi declaratum post eius resurrectionem, & Ascensionem: tunc enim prædicari cœpit per omnem terram, & continuo irati sunt populi, & commota est terra pugnantibus pro idolis suis contra Dñm suum: sed illis inuitis, & repugnantibus regnavit Dominus Christus, & contrita sunt idola. Quamvis autem ira populorum infidelium videatur præualuisse aduersus corpora Sanctorum Martyrum: reuera tamen non prævaluit, quoniã corpora illa reformabuntur ab eo, qui mortem in se ipse occidit; & vivent in æternum: idola verò semel contrita nunquã reficientur.

Dominus in Sion magnus, & II. excelsus super omnes populos.

Iuxta priorem sensum redditur ratio, cur frustra irascantur populi aduersus Deum, qui Regnum suum stabilivit in Sion. Ratio enim est, quoniam Dominus in Sion regnans, magnus est, & excelsus super oēs populos, id est, excelsus omnes magnitudine, potentia, & sapientia, ut nullo modo superari possit. Iuxta sensum posteriorem significatur, Christum qui regnat in Ecclesia tum militante, tum triumphante, quæ per Sion, & Hierusalẽ intelligitur, magnū esse, & excelsū super omnes populos, ut nullus ei resistere valeat.

Con-

III. Confiteantur nomini tuo magno, quoniam terribile, & sanctum est, & honor Regis iudicium diligit.

Iuxta utrumq. sensum hortatur Propheta populos, ut non solum non irascantur aduersus Dominum, sed potius ad illum conuersi laudibus celebrent nomen eius, quoniam terribile, & sanctum est. Dicitur autem nomen Domini terribile, & sanctum, quoniam nomen est Iudicis, siue Regis potentissimi, & iustissimi: & qua potentissimi Regis nomen est, terribile est, & qua iustissimi, sanctum, ac venerabile. Id quod sequitur, Et honor Regis iudicium diligit; est quasi ratio quædam, cur nomen Dei, siue Christi sit terribile, & sanctum. hic enim est sensus, Terribile, & sanctum est nomen Domini, qui Rex iustissimus est, quoniam dignitas Regia, vel sanctitas Regia, vel auctoritas Regia id propriè requirit, ut Rex iudicium diligat, hoc est, amore iustitiæ rectè iudicet, non timore, aut necessitate aliqua, vel passione coactus. Itaque illud, & ponitur pro, quia, ut alibi passim in Scripturis. Illud autem, honor Regis, significat Regiam dignitatem, siue auctoritatem: vox enim hebræa, hoz, multa significat, robur, auctoritatem, honorem, sanctitatem, substantiam, & similia.

IV. Tu parasti directiones, iustitiam, & iudicium in Iacob tu fecisti.

Ostendit verum esse, quod paulò antè dixit, Honor Regis iudicium diligit: ostendit autem per apostrophen ad Deum, siue Christum quasi dicat, Verè tu, ut Rex optimus, & iustissimus iustitiam diligis: nam tu parasti directiones, id est, leges rectissimas, & ad dirigendos mores hominum aptissimas parasti, & confirmasti: & præterea tu non solum leges ferendo, sed et iudicia rectissima exer-

cendo demonstrasti, te iustitiam diligere: nam in populo tuo Iacob iustitiam, & iudicium fecisti, puniendo peccata, & remunerando benefacta; cuius rei multa sunt exempla in utroque testamento: quamuis enim ad tempus patitur Deus pios affligi, & impios exaltari: tamen postea pios liberat, & coronat, impios damnat, & cruciat; sæpè hic in terris, semper autem in seculo futuro.

V. Exaltate Dominum Deum nostrum, & adorate scabellum pedum eius, quoniam sanctum est.

Ex his colligit Propheta, adorandum esse Deum, & hortatur ad id studiosè faciendum; & quidem iuxta priorem sensum hortatur ad Deum adorandum non solum in seipso, sed etiam in arca fœderis, quæ scabellum erat pedum eius: sic enim legimus 1. Paralip. 28. Ut requiescat arca Domini, & scabellum pedum eius: Neque mirum est. quod arca dicatur scabellum pedum Domini, cum propitiatorium, quod sustentabatur à duobus Cherubim esset sedes Dei, ut in primo versiculo dictum est: erat enim arca sub ipso propitiatorio, quasi scabellum subpedaneum sub folio. At igitur, Exaltate Dominum Deum nostrum, corde videlicet, & voce laudando, & magnificando maiestatem eius; & adorate scabellum pedum eius, corpore scilicet incuruantes, & prosternentes vos ad Arcam fœderis, quæ est scabellum pedum eius. Quoniã Arca, siue scabellum huiusmodi sanctum, est propter relationem ad Deum, cui dicata est, & propter eius honorem adoratur. Ex hoc loco satis apertè colligitur aduersus hæreticos nostri temporis, res sacras, ut imagines Christi, & Sanctorum, reliquias eorundem, & altaria, sacra vasa, & similia propter relationem ad Deum, vel Sanctos, sanctas esse, & honoraria adoratione dignas. Neque obstat, quod in hebræo ad verbum legatur, adorate ad scabellum, non, adorate scabellum. Nam vox hebraica,

ca, histachauu, pro qua habemus, adorare, significat propriè prosternere se: idem est autem, prosternite vos ad scabellum, & adorete scabellum. Neque etiam obstat, quod in græco legatur, Quoniam sanctus est, non autem, quoniam sanctum est: nam vox hebraica ambigua est, & potest referri ad scabellum, & verti, Quoniam sanctum est: & potest etiā referri ad Deum, & verti, Quoniam sanctus est. utroque autem modo significatur, scabellum esse adorandum propter relationem ad Deum, qui sanctissimus est; & sanctitatem impertit ijs, quæ ad eum pertinet, quatenus ipsius sunt. Nostra autem lectio reprehendi non potest: nam sanctus Hieronymus in commentario, ubi exponit Psalmos iuxta versionem Septuaginta, legit in textu, & in commentario, Quoniam sanctum est: & sanctus Augustinus quamuis vno in loco legat, Quoniam sanctus est: tamen in textu, & in commentario pluribus in locis, legit, Quoniam sanctum est. ex quo intelligimus, græcum textum varium fuisse. Neque obstat, quod in fine Psalmi dicitur, Quoniam sanctus Dominus Deus noster: nam in fine Psalmi non dicitur, adorete montem, sed in monte: & iam dictum erat, In monte sancto, unde non erat opus iterum repetere, quoniam sanctus mons est. Iuxta sensum posteriorem, hortatur Propheta, ut omnes adorent humanam Christi naturam, quæ scabellum est diuinitatis longè nobiliore modo quàm esset arca lignea. In illa enim erat verbum Dei scriptum in tabulis lapideis, in hac autem est ipse Deus Verbum illi coniunctæ erant tabulæ legis sola vnione extrinseca, quia continebantur in illa, ut in vase: isti vnitum est Verbum hypostaticè, ut verè dictum sit à Ioanne, Verbum caro factum est. Neque solum adorandam esse Christi humanitatem, ut est in propria forma, sed etiam ut latet sub speciebus sacramentalibus in Eucharistia; docent ex hoc loco Psalmi sanctus Ambr. lib. 3. de Spiritu sancto cap. 12. & sanctus Augustinus in explicatione huius versiculi. Ex quo refellitur alius error hæreti-

corum, qui negant, Christum in Eucharistia esse adorandum.

Moyfes & Aaron in Sacerdo vltimis eius, & Samuel inter eos, qui inuocant nomen eius.

Hic iam ponit Propheta exemplum, quod imitemur, trium insignium virorum, qui Dominum exaltauerunt, & adorauerunt scabellum pedum eius, atque adorantes inuocauerunt Dominum, & audiuit eos Dominus, & mirabilia per eos operatus est. Nominat autem tres Principes viros, qui super omnes eminuerunt post Rempublicam Iudaicam constitutam; Moses enim fuit summus Princeps politicus, & summus Sacerdos Hebræorum; Aaron fuit summus Sacerdos tantum; Samuel summus Princeps politicus tantum. Quamuis enim nonnulli Patres Samuelem Sacerdotem appellent, ut sanctus Ignatius in epist. ad Magnesianos, sanctus Cyprianus in epist. 65. ad Rogatianum, sanctus Athanasius in homil. de semine, sanctus Ioannes Chrysostomus hom. 2. in epist. 2. ad Timotheum, & sanctus Augustinus lib. 17. de ciuit. Dei cap. 4. & lib. 2. Retract. cap. 43. & in explicatione huius Psalmi. contra tamen sanctus Hieronymus lib. 2. in Iouinianum, & auctor quæstionum veteris Testamenti, (apud Augustinum tomo 4.) quæstione 46. constanter docent, Samuelem non fuisse Sacerdotem, sed simplicem Leuitam, & probant his argumentis. Primo, quia non erat de filiis Aaron, ut manifestum est ex genealogia ipsius lib. 1. Paralip. cap. 6. versu 34. quæ est conformis genealogia patris sui Elcanæ lib. 1. Reg. cap. 1. versu 1. constat autem solos posteriores Aaronis fuisse Sacerdotes: ceteros verò Leuitas, ministros Sacerdotum, Num. 16. & 18. Deinde quia Samuel ministrabat amictus ephod lineo, ut patet ex lib. 1. Reg. cap. 2. Is verò habitus proprius erat Leuitarum, non Sacerdotum. Tercio quia Elcana pater Samuelis, erat Leuita, non autem Sacerdos. Quarto, quia Dauid in hoc Psalmo dicitur.

tinguit Samuelem à Mose, & Aaron Sacerdotibus, dum eum non numerat in Sacerdotib⁹, sed in ijs, qui inuocabāt nomen Domini, id est, qui studiosè Deum colebant, & inuocabant pro se, & populo.

VII. Inuocabant Dominum, & ipse exaudiebat eos, in columna nubis loquebatur ad eos.

Ostendit, viros istos fuisse amicos Dei: nam inuocabant Dominum pro se, & pro populo, & ipse vt amicos fideles exaudiebat eos. Id constat ex testimonio scripturarum, de Mose quidem Exod. 32. de Aaron Num. 16. de Samuele 1. Reg. 7. Quod autem in columna nubis loqueretur Deus ad Mosē, constat ex lib. Exodi c. 33. quod etiam ad Aaronem, constat ex lib. Num. cap. 12. de Samuele nusquam legitur. Itaq. vel illud, Loquebatur ad eos in columna nubis, intelligendum est, ad aliquos eorum: vel, vt exponit S. Augustinus, per columnam nubis significatur obscura locutio, quomodo certum est, ad Samuelem quoque Deum esse loquutum. Nam 1. Reg. 3. Deus in tenebris noctis Samueli loquebatur, ita vt vocem Dei loquentis audiret, neminem autem loquentem videret.

VIII. Custodiebāt testimonia eius, & præceptum quod dedit illis.

Hæc est ratio, cur Deus promptè audiret Mosē, Aaronem, & Samuelem, quoniam obedientes erāt imperio eius. Nam, vt Dominus ait in Euangelio, Si quis diligit me, sermonem meum seruabit: & ideò qui vult audiri à Deo in orationib. suis, debet audire Deum in præceptis ipsius. Custodiebant; inquit, testimonia eius, id est, omnia mandata, quæ communia erāt omnibus. Et præceptum quod dedit illis, id est, non solum custodiebant præcepta communia toti populo de non colendis Idolis, de sanctificando Sabbato, de parentibus

honorandis, de non occidendo, non mœchando, & cætera eiusmodi; sed etiam præceptum de rectè gubernanda, & docenda multitudine, quod propriè ad ipsos, vt Principes populi pertinebat. Principes enim non sunt exempti à præceptis diuinis, imò debent in ijs custodiendis toti populo præluce-
re.

Domine Deus noster tu exau- IX.
diebas eos: Deus tu propitius
fuisti eis, & vici scens in omnes
adinuentiones eorum.

Hæc verba dupliciter exponi solēt, sanctus Augustinus ita exponit, vt velit hic significari, viros etiam perfectos in conspectu hominum habere aliquid purgandum coram Deo, & Deum hoc ipso beneuolentiam erga illos ostendere, quòd non fuit impunita eorum errata, quamuis leuia. Ponit exemplum in opificijs, quæ oculis imperitorū videntur omnino perfecta, & tamen ab artifice adhuc poliuntur, quoniam aliter iudicat peritus artifex, aliter imperitus inspector. Sic igitur exponit Sanct. Augustinus, Domine Deus noster tu exaudiebas eos, cum iusta peterent, Deus tu propitius fuisti, facilis ad ignoscendum cum in te peccarent: & vici scens in omnes adinuentiones eorum, non sinens impunita peccata eorum. Quia verò Samuelis peccatum nullum legitur in Scriptura, vt neque etiam aperta vindicta: Sanctus Augustinus recurrit ad communem pœnam omnium Prælatorum Sanctorum, quam patiuntur dum vident peccata populorum, & coguntur tolerare infirmitates eorum, & cum Apostolo dicere, Quis infirmatur, & ego non infirmor? quis scandalizatur, & ego non vror? Posset etiam dici, quod hic legimus de propitiatione, & vindicta peccati, referendum esse ad Mosē, & Aaronem tantum, quemadmodum ad eos tantum propriè referendum est, quod supra dictum est, In columna nubis loquebatur ad eos. Nam Mosi, & Aaronis peccatum, & pœna pec-

peccati legitur Num. 20. vbi cum non nihil hæsitaſſent in educenda aqua de petra, dixit Dominus ad Moſem, & Aaron, Quia nõ credidiſtis mihi, vt ſanctificaretis me coram filiis Iſrael, non introducetis hos populos in terram, quam ego dabo eis. Altera expositio eſt Græcorũ Theodoretĩ, & Euthymij, qui non admittunt hoc loco reprehẽdi villo modo Moſem, Aaronem, & Samuelem. Sic igitur exponunt, Deus tu propitiuſ fuiſti eis, quando te inuocabant pro peccato populi; nam in eorum gratiam toti multitudini parcebas: & vlciscens in omnes adinventiones eorum, .i. & vlciscens fuiſti oẽs iniurias, quas ipſi patiebantur ab iniquis, qui adinuenebant varias calumnias, & infidias aduerſus ſanctos Principes ſuos. Vbi illud, adinventiones eorum, volunt accipi paſſiuẽ, id eſt, adinventiones, quas Moſes, Aaron, & Samuel, non faciebãt ſed patiebantur. Vtraq. expositio probabilis eſt, ſed prior videtur ſimplicior, & facilior.

X. Exaltate Dominum Deum noſtrum, & adorate in monte ſancto eius: quoniam ſanctus Dominus Deus noſter.

Concludit Propheta repetens verſiculum quintum, quoniam in hoc verſiculo continetur ſumma totius Pſalmi, ſive finis, & quaſi ſcopus, quo omnia diriguntur. Hoc ſolum intereſt, quod in quinto verſiculo dicebatur, Adorate ſcabellum pedum eius, quoniam ſanctum eſt: hic dicitur, Adorate in monte ſancto eius, quoniam ſanctus Dominus Deus noſter: in hebræo, ſicut in quinto verſiculo, dicebatur ad verbũ, Proſternite vos ad ſcabellum pedum eius. .i. ad arcam: ita hic dicitur, Proſternite vos ad montem ſanctum eius: & potuiſſet latinẽ verti, Adorate montem ſanctum eius, id eſt, montem Sion, vbi erat tabernaculum, & arca. Sed latinus interpres imitari voluit græcam interpretationem: Græci enim de ſcabello dixerãt, Adorate ſcabellum; de monte autẽ di-

xerant, Adorate in mote. Nec ſolum græci, ſed etiam ſanctus Hieronymus in ſua verſione ex hebræo poſuit, Adorate ſcabellum; & poſtea, Adorate in monte ſancto eius. Quare credere debemus verſiculum hebraicum non debere in vtreque loco eodem modo accipi: & retinendam eſſe lectionem vulgata latinæ editionis, quæ, & à græca, Septuaginta Interpretum, & à S. Hieronymo teſtimonium habet. Igitur iuxta priorem ſenſum hortatur David Hebræos, vt adorent Dominum in monte Sion, vbi erat tabernaculum, & vbi futurum erat templum. Iuxta ſenſum poſterioreſ hortatur Chriſtianos, vt adorent Deum in Eccleſia Catholica, quæ mons eſt ſanctus, & Sion ſpiritualis, & fugiant conuenticula ſchiſmaticorum, & hæreticorum: quoniam ſanctus eſt Dominus Deus noſter, ac per hoc odit montes pollutos ſordibus falſarum religionum, & ſicut ipſe ſanctus eſt, ita in monte ſancto, in cœtu fidelium adorari vult.

PSALMVS XCIX.

Titulus, & Argumentum

Pſalmus in confeſſione.



Vic titulo, qui eſt in hebraicis codicibus, græci addunt nomen David. Argumentum ex titulo cognoscitur. Hortatur .n. Propheta populum Dei, vt frequenter, & diſigenter Deo confiteatur confeſſionem laudis, tum quod Deus nos condiderit, tum quod paſcat, tum quod dulciſſima ſit eius commemoratio, & perſetua erga nos eius miſericordia, & fidelitas.

EX.

Explicatio Psalmi 99.

I. **I**ubilate Deo omnis terra: seruite Domino in lætitia.

Iubilare, vt sæpè diximus, est magna, & læta voce laudare; seruire autem in lætitia, est non ex timore, sed ex dilectione obedire. Iubilate Deo omnis terra, id est, omnes qui Deum verum colitis, vbicunque sitis in vniuersa terra, Deum laudate, nam, & boni, & mali sunt in vniuersa terra; admixta .n. sunt zizania tritico, & spinis lilia. Et sicut in vniuersa terra blasphemant, & murmurant contra Deum mali, si quid eis non pro voto successerit: ita par est, vt in vniuersa terra laudent, & benedicant Dñm boni, quicquid illis acciderit: qñ omnia cooperantur in bonum his, qui secundum propositum vocati sunt sancti. Seruite Dño in lætitia. i. seruite obediendo Deo, non coactè, sed spōtanè, non cum amaritudine, vt mancipia, sed cum lætitia, vt liberti: nam vt pulchrè dicit S. Augustinus, Veritas nos liberauit, sed charitas seruos fecit: & qui seruit ex charitate, cū lætitia seruit. Causa verò potissima, cur Deo cum lætitia seruiendum sit, ea est, quia summa præceptorum eius dilectio est, & dilectione nihil dulcius: accedit, quod seruitus Dei nobis utilis est, non Deo; vt verè dictum sit, Seruire Deo regnare est.

II. **I**ntroite in conspectu eius in exultatione.

Vbique quidem Deum laudare debemus, sed præcipuè cum intramus in domum eius, quæ domus orationis est; vbi, & ipsum Deum in sacris rebus conspiciamus, & ipse nos speciali providentia respicit, & audit iuxta illud 1. Paralip. 7. Erunt oculi mei aperti, & aures meæ erectæ ad orationem eius, qui in loco isto orauerit. Idcirco igitur monet Propheta, Introite in conspectu eius, in domum Dei, vbi peculiari modo con-

spicitis Deum, & conspiciat vos Deus; sed introite in exultatione cordis, animo erecto, & inflammato, vt Deus vos præ desiderio sui exultantes videat.

Scitote, quoniam Dominus **III** ipse est Deus, ipse fecit nos, & non ipsi nos.

Ad excitandam deuotionem, quæ in domo Dei requiritur, nihil magis prodest, quàm attenta consideratio magnitudinis Dei, & beneficiorum eius. Scitote, inquit, quoniam Dominus ipse est Deus, id est, considerate, & attenta cogitatione cognoscite, quoniam Dominus quem colitis, & ad quem orandum, & laudandum acceditis, ipse est verus Deus, quo nihil maius, vel melius cogitari potest. Ipse est etiam, cui vitam vestram, & totum quod estis debetis. Ipse enim fecit nos, & non ipsi fecimus nos, .i. non caremus principio efficiente, neque aliud habemus, quàm ipsum Deum: quamuis enim parentes gignant filios, tñ prima causa, sine qua parentes nihil efficerent, Deus est. Quàm multi dant operam liberis, & nullum gignere possunt? quam multicontra vellent satiare libidinem, & liberos non gignere, quibus tñ licet inuitis liberi nascuntur? Rectè mater sanctorum Machabæorū filiis suis dicebat, Nescio qualiter in vtro meo apparuistis: neque enim ego spiritum, & animam donavi vobis, & vitæ, & singulorum membra non ego ipsa compegi: sed .n. mundi creator formauit hominum natiuitatem; & omnium inuenit originem. 2. Machab. S. Hieronymus ex habreo vertit, Ipse fecit nos & ipsius nos. Sed videtur corruptum textum habuisse, codices enim nostri habent, lo, per aleph, quod significat non: & sic legerunt Septuaginta Interpretes, qui verterunt ad verbum, Ipse fecit nos, & nō ipsi nos. S. Hieronymus videtur legisse, lo, per vau, quod significat ipsius, siue ipsi in datiuo: & ideo vertit, Ipse fecit nos, & ipsius nos. Quidam recens auctor reprehendit vulgatam latinam editionem dicēs, aliquem scioli con-

coniunxisse in latino codice duas hebraicas lectiones, & fecisse, Et non ipsi nos; & sic omnia confudisse. sed immérito reprehendit hanc lectionem, quæ optima est, & quam habent S. Augustinus, & ipse S. Hieronymus in commentario huius loci, & alij ferè oēs. Latinus enim Interpres, addidit illud, ipsi, ad vitam cacothoniam, quæ sentitur, cū dicitur, Ipse fecit nos, & nō nos. nec volunt illud, ipsi, accipi in datiuo, vt iste scriptor existimat, sed in nominatiuo. Itaque non coniunxit sciolus duas lectiones: sed interpres vnam expressit, quam inuenit in græco, quæq. congruit cū hebraico magis correcto. At, inquit aliqui, nemo nescit, se non esse à se factum, proinde non erat quod admoneret nos Spiritus sanctus, dicens, Ipse fecit nos, & nō ipsi nos. proinde melior est illa lectio, Ipse fecit nos, ipsius nos. Respondeo, etiā si nemo ignorare possit, se non esse sibi vitæ auctore: tñ multos esse, qui non cōsiderent, à quo facti sint, & qui ita se gerant, ac si neq. Deū, neq. vllum alium auctorem haberent, propterea vtilissimū fuisse, vt serio admonerentur homines cogitare, se non esse sibi auctores vitæ, sed vitam, & omnia vni debere Deo.

IV. Populus eius, & oves pascuæ eius, introite portas eius in confessione, atria eius in hymnis cōfitemini illi.

Commemorat alterum beneficium Dei, ob qd iustum est, vt ei confessionē laudis persoluamus; quia videhet nō solum fecit nos, sed etiā regit, & pascit nos. Populus eius, id est, populus, quem Deus peculiari puidētia regit. & oves pascuæ eius, i. & quos veluti rationales oves in pascuis suis doctrinæ pabulo reficit, & corporalibus etiā alimentis pascit; introite portas domus eius, siue tabernaculi eius in confessione laudis: & atria eius in hymnis, & sic continemini illi, vt omnia ei debere, ac de manu eius bona omnia suscepiſſe.

Laudate nomen eius, quoniā V. suavis est Dñs, in æternum misericordia eius, & vsq. in generationem, & generationem veritas eius.

Addit Propheta tres proprietates Dei, quasi tres rationes, cur dignus sit, vt ab omnib. laudetur, quia suavis, quia misericors, quia verax; quæ tria ita connexa sunt, vt vnū nascatur ab alio. Suavis est Deus, & quia suavis facillē miseretur; quia miseretur promittit liberationem; quia verax, implet promissa. Laudate, inquit, nomen eius. i. laudate Deum: nomen enim pro re nominata poni solet in scripturis. Laudate autem quoniam suavis est Dominus. Mira proprietas omnipotentis, ac tremendæ Maiestatis, quæ lucem habitat inaccessibilem, & quæ terribilis est super oēs Deos, & aufert spiritum Principum, & de quo Apostolus dicit, Horrendum est incidere in manus Dei viuentis: & tamē verissimē dictum est, Quoniam suavis est Dominus. quod non semel in Psalmis, alijsq. diuinis Scripturis repetitur Psal. 34. Gustate, & videte quoniā suavis est Dñs. Psal. 83. Qm̄ tu Domine suavis, & mitis, & multæ misericordiar. 1. Pet. 2. Si tamen gustastis, qm̄ dulcis est Dñs. 2. Cor. 2. Pater misericordiarū, & Deus totius cōsolationis. Sed facillē concordantur ista quæ videntur contraria: Deus. n. suavis est rectis corde, ac timētib. eum; asper autem, & terribilis distortis corde, & continentibus eum, Quā bonus Israel Deus his, qui recto sunt corde, inquit Dauid in Psalmo 72. nam planum, asperum videtur distorto, quia coniungi non possunt: Sunt autē distorti siue prauī corde, qui nolunt cōformari rectissimæ voluntati diuinæ: quales sunt contemptores. & ideo dicitur in Psal. 102. Sicut miseretur pater filiorum, misertus est Dominus timentibus se; & misericordia eius ab æterno, & vsque in æternum super timentes eum quod etiā in Cantico s. Virgo Deipa

ra posuit dicens, Et misericordia eius a progenie in progenies timentibus eum. Itaq. si quis incipiat cor suum dirigere, & conformare ad beneplacitum Dei, & nihil magis timere, quàm ne Deum offēdat; mox gustare incipiet, quam dulcis sit Dominus: & implebitur erga eum qđ sequitur, In æternum misericordia eius, & vsque in generationem, & generatio nem veritas eius, id est, veracitas & fidelitas eius.

etauerit, & proximum suum contempserit Luc. 18. Adde, quod Dauid, ideò incipit Psalmum ab illis verbis, Misericordiā & iudicium cantabo tibi Dñe, vt ostēdat bonorum operum suorum causam efficientem fuisse tum misericordiam Dei, cuius dona sunt opera nostra bona: tum iudicium Dei, cuius timore adductus iustitiam coluit.

Explicatio Psalmi 100.

P S A L M V S C.

Titulus, & Argumentum
Psalmi.

Ipsi Dauid Psalmus.



N hoc Psalmo Dauid explicat exēplo suo qualis debeat esse bonus Princeps, tū erga familiares, & priuatam suam domum; tum erga Rem publicam. Et quidem in textu hebraico oīa dñr per verba tēporis futuris; ex quo intelligimus, Prophetam Regium nō tā cantare laudes proprias, q̄ optare, & petere a Deo gratiam bene imperandi, & proponere, ac statuere sic viuere, vt piū Regem decet. Sed qm̄ Septuaginta Interpretes verterunt serē oīa in tempus prætēriti imperfecti, & eorum interpretationem sequutus est latinus interpres; non oportet negare, quin ēt Propheta Regius narret bona opera sua ad informādos successores, ac potissimum filiū; neque id superbiæ, vel arrogantiæ tribui debet, qm̄ vera dñr coram Deo, & ad finē bonū. sic. n. idem Dauid in Psal. 17. multa cecinit de sua innocentia. Sic Iob cap. 29. plurima de suis benefactis prædicauit. Sic Hester cap. 14. sic Nehemias cap. 6. sic Ezechias 4. Reg. 20. sic alij. Porro Phariseus in Euangelio, non reprehenditur quod gratias egerit Deo de suis operibus bonis; sed quod superbē illa ia-

Misericordiam, & iudiciū cā. I.
tabo tibi Domine.

Hæc est quasi præfatio totius Psalmi, qua significat Propheta, se cum cantu celebraturum, misericordiam, & iudiciū Domini. cuius rei multæ sunt causæ: prima, vt omnes intelligant benefacta Dauidis, quæ in Psalmo commemorantur, esse dona misericordiæ Dei, coronanda postea per iustum iudicium Dei: secūda, vt Principes admoneātur, Deo maximē placere misericordiam, & iudicium, & ideò ipsi quoq. misericordes sint, sed nō iniusti; iusti, sed non crudeles: tertia, vt omnes homines sperent de misericordia Dei, & timeant iudicium Dei: nō ita sperent, vt præsumant; non ita timeant, vt desperent. Posuit autem Dauid primo loco misericordiam, deinde iudicium, quia hoc tempus præsens misericordiæ est, futurum erit iudicij; & ideò nemo miretur, si hoc tempore Deus solem suū oriri facit super bonos & malos, & pluit super iustos, & iniustos.

Pfallam, & intelligam in via im
maculata, quando venies ad
me.

Hic versiculus pars est præfationis. dicit. n. Propheta, se non solum voce cātaturum misericordiam, & iudiciū Dei, sed et per instrumentum, id est, psalteriū celebraturum; & mente consideraturū, & contemplaturum. Pfallam, inquit, id est, psalterium manu pulsabo, vt voce mea, & voce psalterij decātem misericordiā,
&

& iudicium: & intelligam in via immaculata, id est, considerabo, attendā, cogitabo viam immaculatam, & perfectā quæ consistit in misericordia, & iudicio nam oēs via Domini misericordia, & veritas. similis est locutio in Psal. 40. Beatus qui intelligit super egenum, & pauperem. i. qui attente considerat miseriam pauperis, vt eam subleuet. Sic igitur hoc loco dicitur, intelligā in via immaculata. i. attente considerabo viam immaculatam, vt ambulem per eam. Quando venies ad me. i. id autem faciā nō viribus meis, sed auxilio gratiæ tuæ quando venies ad me, vt me illumines, & doceas, & accendas, & moueas. Hāc ultimam particulam aliqui legunt cum interrogatione, quando venies ad me? sic S. Hieronymus in Commentario, & Theodoretus, atq. Euthymius. & textus hebraicus, & græcus huic lectioni fauēt & tunc vox est optantis, vt sensus sit, intelligam in via immaculata, O quando venies ad me, vt perfectē intelligam, & intelligens ambulem in via immaculata? Sed quamuis hæc lectio verū sensum contineat: non tamen est necessarium ita legere, neque reiicienda est latina, & vulgata lectio: siquidem vox hebraica, matai, significat, quando, & potest cum interrogatione, & sine interrogatione legi. certē S. Hieronymus in sua versione ex hebræo, ita reddidit, Erudiar in via perfectā, quando venies ad me.

III. Perambulabam in innocentia cordis mei in medio domus meæ.

Hic iam incipit explicare mores suos laudabiles, vt cæteri imitentur, tum successores, tum subditi. Ad hoc enim Princeps in sublimi loco sedet, vt tantum lucerna in candelabro posita omnibus luceat. Ac primū declarat qualis fuerit apud se, & in oculis Dei: Deinde qualis fuerit erga alios, & in oculis populi. Ait igitur, Perambulabam in innocentia cordis mei, id est, vitam ducebam, siue perambulabam viam huius præsentis vitæ, conseruans in primis

Bellarmin. in Psalm.

cordis innocentiam; cogitabam bona, appetebam bona, delectabar in bonis; cauebam ne cor meum vitijs cogitationib. aut desiderijs inquinarem: sciebam enim à corde vitam, mortemque procedere. Hinc filius eius Salomon à patre institutus postea scripsit Proverb. 4. Omni custodia serua cor tuum, quoniam ab ipso vita procedit. Illud, in medio domus meæ, significat, in penetralibus domus meæ, vbi non erat, qui me reprehendere posset. Multi enim in foro, & plateis modeste, & temperate se gerunt; sed in cubiculo, ac præsertim in cubiculo cordis per omnia scelera volutantur: sed David etiam in penetralibus domus, etiam in cubiculo cordis innocentiam custodiebat.

Non proponebam ante oculos meos rem iniustam; facientes prauaricationes odiui.

Dixit de innocentia cordis, nunc addit de innocentia oculorum, & manuum. Non proponebam ante oculos meos rem iniustam, id est, auertebam oculos tum mentis, tum corporis ab omni iniustitia, siue in iudicando subditos, siue in distribuendis honoribus, & præmijs; siue in comutationibus, & contractibus. Potest etiam latius hic locus explicari, vt sensus sit, auertebam oculos ab omni spectaculo vicioso, à laudis illicitis, à choreis impudicis, ab omni aspectu rerum, quæ mentem inquinare possunt. Codex hebræus pro re iniusta, habet verbum Belial, vbi verbum pro re ponitur, & Belial significat absque iugo, quibus duabus vocibus significatur omne genus vitij. Dicuntur viri Belial homines indisciplinati, immorigerati, peruersi. Facientes prauaricationes odiui, id est, non solum oculos auerti à rebus illicitis, nec tantum prauaricationem legū operari nolui; sed odio habui omnes prauaricationes facientes; ac per hoc ipsam prauaricationem maximè detestatus sum. In hebræo clarius dicitur, facere prauaricationē odiui. i. ego rem iniustam nec videre, nec facere volui.

R r Non

V. Non adhæsit mihi cor prauū,
declinantem à me malignum nō
cognoscebam.

Docuit, qualis esset apud se; docet
nunc qualis esset apud alios; ac pri-
mum dicit talem se fuisse, vt peruersi
homines non auderent se illi adiunge-
re. Magna virtus hæc est, cum tanta est
apud homines opinio de sanctitate ali-
cuius, vt iniqui non audeant coram il-
lo apparere: & tales omnino esse de-
berent Principes, & Prælati, qui sunt da-
ti à Deo alijs in exemplum. Non adhæ-
sit mihi cor prauum, id est, non adiun-
xit se mihi homo prauicordis. sic inter-
pretatur Theodoretus. Alij per cor pra-
uum intelligunt affectum viciosum: sed
de cordis puritate, & innocentia supra
dictum est, neque verisimile est idem
hoc loco repeti: & sequentia verba me-
lius coherent cum expositione Theo-
doreti; neque est inusitatum, vt homo
valde peruersus dicatur cor prauum, &
homo scelestus dicatur scelus, & homo
carnalis dicatur caro. Declinantem à
me malignum non cognoscebam, id est
declinabant à me maligni etiā me igno-
rante. vel, si declinabat à me malignus,
non curabam, nihilq. faciebam. vel, de-
clinantem à me malignum, non cognos-
cebam, id est, non approbavam, neq.
amabam, ac per hoc non liberabam, vt
rediret ad amicitiam meam. Sanctus
Hieronymus aliter ex hebræo distin-
guit, & vertit, Cor prauū recedet à me:
malum non cognoui. Sed voces hebrai-
cæ in utroque distinctionem, & versio-
nem recipiunt. & sensus in eandem sen-
tentiam recidit: tractatores autem græ-
ci, & latini editionem nostram commu-
niter sequuntur.

VI. Detrahētem secretò proximo
suo: hunc persequebar.

Alia virtus plane Regia hic aperitur,
in qua mirificè lucent misericordia, &
iudicium; quoniam enim Reges pote-

statem habent puniendi iniquos: nisi
non zelo iustitiæ, sed odio proximorū,
deferunt ad Reges, quasi noxios eos
quos perdere volunt, & falsis quere-
lis, vel potius calūnijs eos grauant: Da-
uid Rex sapiens, & iustus eiusmodi dela-
tores iniquos grauissimè puniebat; &
eo modo misericordiam exercebat in
iniuste delatos, & iudiciū in delatores
iniustos. Detrahentem, inquit, secreto
proximo suo, id est, eum, qui falsi crimi-
nis accusabat proximum suum, & secre-
tò apud me detrahebat de fama eius,
eum, inquam, non modo non audiebam
sed grauiter persequebar, & puniebam.
In hebræo pro voce persequebar, est, magn
azmith, quam S. Hieronymus vertit, in-
terficiam. propriè autem significat ex-
cindam, siue excindebam, & potest ex-
poni varijs modis pro varietate crimi-
nis delatorum, vt sensus sit, excindā ab
amicitia, vel ab aula, vel à ciuitate, vel
à prouincia, vel denique à vita: non
enim ois iniusta delatio meretur mor-
tem. Itaque prudenter Septuaginta In-
terpretes posuerunt verbum generale,
persequebar, quod potest exponi, vsq.
ad exilium, vel vsque ad necem, vel ad
pœnas mitiores pro grauitate, vel leui-
tate criminis. Extra etiam apud Ethni-
cos laus Imp. Traiani, quod delatorib.
operam non daret: & contra, Maximini
reprehensio, quod delatorious nimium
indulgeret.

Superbo oculo, & insatiabili VII.
corde, cum hoc non edebam:

Non solos detractores, sed etiam su-
perbos, & cupidos Dauid detestabatur;
& merito: Nihil enim tristius accidere
populis potest, quàm si ministri Regū
superbi, aut auari sint; abutuntur enim
eiusmodi ministri publica potestate ad
explendas cupiditates proprias non si-
ne magno detrimento subditorum. Ait
igitur, superbo oculo, & insatiabili cor-
de cum hoc non edebam, id est, non con-
uescebar quasi domestico, & familiari,
homini superbo oculo, id est, homini
qui oculis, vel supercilijs elatis super-
biam

Diam offendit. neque conuescebar homini insatiabili corde, cuius cupiditas nullis opibus satiatur. S. Hieronymus, & Euthymius per insatiabilem corde, avarū intelligi volunt. Alij cum S. Augustino, per insatiabile corde, & superbum oculo, eundem significari docent, hominem videlicet elatum, & tumidū.

כח לב Vox hebraica vtrunque sensum recipit nam nechau leuau, propriè significat, latum corde. dicitur autem latum cor, qđ impleri non potest, siue id referatur ad diuitias, siue ad honores. Pro, non edebam, S. Hieronymus, ex hebræo vertit, non potero. Sed Septuaginta Interpretes vocem, vcal, deduxerunt à verbo, achal, quod significat comedere, & legerunt, ocal, S. autè Hieronymus eandem vocem deduxit à, iocal, quod significat, posse. Quod autem solerent ministri principales comedere in eadē mensa cum Rege apud hebræos, intelligi potest ex lib. 1. Regum cap. 20. Vbi David, qui tunc Dux militiæ erat, sedere solitū se dicit de more in mensa iuxta Regem: & ibidem dicitur Abner, qui erat etiam Princeps militiæ, sedisse in mensa ad latus Saul Regis.

VIII. Oculi mei ad fideles terræ, vt sedeant mecum; ambulans in via immaculata, hic mihi ministrabat.

Explosis detractoribus, superbis, & avaris à familiaritate, & ministerio suo: David adiungit, eligere se fuisse solitū fideles, & probos; hæc enim duo præcipuè requiruntur in bonis ministris, vt fideles sint Domino suo, & probi ad propriam, & aliorum salutem. Sepè à Principibus ministri retinentur, & chari habentur, qui fideles sunt; quāuis alio qui impuri, & scelesti, & se ipsi perdant propria culpa, & alios malo exemplo; sed sanctus David non solūm fideles sibi ministros quærebat, sed etiam omni ex parte innocentes, & probos, ac sibi per omnia similes. Ait igitur, Oculi mei ad fideles terræ, id est, oculi mei quærebant, & inuestigabant fideles, qui erant

in terra, siue, ad eos, quos tales nonerā benignè respiciebam, eosq. eligebam, vt sederent mecum in mensa, vt domestici, & familiares. Ambulans in via immaculata, hic mihi ministrabat, id est, si quis erat in ciuitate, vel in Regno meo non solūm fidelis, sed etiam perfectè conuersans, innocenter viuens, immaculatis moribus vitam ducens, is mihi præcipuus minister erat.

Non habitabit in medio domus meæ, qui facit superbiam, qui loquitur iniqua, non direxit in conspectu oculorum meorum.

Supra eos detestatus est qui superbo oculo arrogantiam ostentabant: hic iam detestatur eos, qui manibus superbi sunt, id est, qui superbe alios opprimunt. sic etiam supra reprehendit eos, qui detrahebant secreto proximo suo; nunc reprehendit, & à suo consortio reiecit eos, qui loquuntur mendacia ad fallendos quoscunque homines. Non habitabit in medio domus meæ, id est, non erit inter intimos familiares meos, qui facit superbiam, id est, qui facit opera superba, qui superbe insultat alijs, vel opprimit alios. Qui loquitur iniqua id est, mendacia, quib. iniuste alios fallat, siue in commercijs, siue in alijs negocijs, non direxit in conspectu oculorum meorum, id est, non placuit oculis meis, siue non direxit cursum desiderij sui, non prosperatus est coram me; non enim inuenit gratiam in oculis meis. In hebræo pro, superbia, dolus legitur. Sic enim vertit S. Hieronymus, non habitabit in medio domus meæ faciens dolum. Sed septuaginta viri non videntur legisse, remija, quæ vox significat, dolum, sed, rama, quæ significat, alta, siue excelsa. nisi fortè ipsum, remija, deduxerint à verbo, rum, quod significat, exaltari & ideo verterint superbiam.

Re s la

I. In matutino interficiebā omnes peccatores terræ, vt disperderem de Ciuitate Domini omnes operantes iniquitatem.

Concludit Psalmum demonstrans zelum suum in purganda ciuitate Domini in qua purgatione faciebat misericordiā erga bonos ciues, quos liberabat ab oppressionibus, & scandalis iniquorum, & iudicium erga malos, quos meritis pœnis afficiebat. In matutino, id est, matuturè, celeriter, antequam mala radicarentur, interficiebam omnes peccatores terræ, eos videlicet, qui morte digni erant; & quibus vita concedi non poterat sine periculo innocentium. Id autē faciebam, vt disperderem de ciuitate Domini, omnes operantes iniquitatē, id est, vt ciuitati sanctæ, & pacificæ pacem suam, & tranquillitatem restituerē exturbatis inde omnibus perturbatoribus. Hæc omnia quæ dicta sunt in persona Davidis, aptius conueniunt Christo regi, ac præsertim hic vltimus versiculus: David enim conabatur disperdere de ciuitate Domini omnes operantes iniquitatem: sed non poterat, nec potuit vnquam. Christus autem in matutino futuri sæculi verè, & propriè disperdet omnes operantes iniquitatē, & deinceps ciuitas sancta Hierusalē cœlestis erit secundū nomen suum visio pacis.

PSALMVS CI.

Titulus, & Argumentum

*Oratio pauperis, cum anxius fuerit,
& in conspectu Domini effuderit precem suam.*



Vnc titulum habent omnes codices hebraici, græci, & latini: ex quo titulo habetur argumentū Psalmi. Est enim hic Psalmus formula quædam orandi, qua vt pote-

rit vnusquisq. pauper, & afflictus etiam valdè anxius fuerit, & effundere voluerit precem suam ad Deum. S. Augustinus, & S. Gregorius per pauperem hoc loco, intelligunt Christum, qui partim in sua persona, partim in persona corporis sui loquatur, eo modo quo caput loqui solet pro toto corpore. Theodore tus, & Euthymius per pauperem, intelligunt populum captiuum in Babylone, & petentem liberationem à captiuitate. Alij volunt, pauperem, qui in hoc titulo ponitur, fuisse sanctum aliquem virum, qui anxius abatur pro liberatione populi, qualis fuit Daniel. Et quidem ad hos omnes accommodari possunt verba Psalmi: sed tamen Prophetæ generationi instruere voluisse videtur omnes oratores in afflictione positos: non enim ait, Oratio pauperis cuiusdā cum anxietate: sed, oratio pauperis, cum anxius fuerit. Et hoc videtur sensisse B. Hieronymus, qui in Commentario scribit, Prophetam loqui in persona peccatoris. Verè enim nullus est pauperior, & miserior eo, qui indiget gratia Dei. Vnde, & Ecclesia hunc Psalmum numerat inter septem pœnitentiales. Hic igitur erit sensus tituli. Oratio pauperis, cum anxius fuerit, id est, Hic Psalmus docet formam orationis, qua vt poterit omnis pauper, ac præcipuè is, qui ob admissa peccata, debitor est decem millium talentorum, & non habet unde reddat, anxietur stimulante conscientia, timens iudicia Dei, anhelans ad reconciliationem. Et in conspectu Domini effuderit precem suam, id est, hac formula orandi vt debet pauper anxius, non quocumque tempore, neque apud quemcunque Iudicem, sed cum in conspectu Domini Dei, supremi Iudicis, & Patris omnium, effundere voluerit ex vase cordis contriti, & humiliati cum abundanti fletu preces suas, vel, vt habetur in hebræo, sci-cho, eloquium suum.

III

IX-

Explicatio Psalmi 101.

I. Domine exaudi orationem meam: & clamor meus ad te veniat.

Hunc versiculum assidue pronūciat Ecclesia, tanquam præparationem ad reliquas petitiones; didicit enim ex Propheta, petendam esse à Deo audientiam, antequam petitiones particulares explicentur; non quòd Deus quasi ad alia intentus egeat excitari ad audiendum: sed quia nos egemus, ut Deus det nobis spiritum precū, imò spiritus eius sit, qui postulet pro nobis gemitibus. inenarrabilibus, id est, faciat nos clamare, & postulare cum inenarrabili gemitu. Domine, inquit, exaudi orationem meā id est, fac me sic orare, ut dignus sim exaudiri. Et rursus idem repetit ad iudicandum affectum: & clamor meus ad te veniat, id est, fac me sic orare, ut oratio mea sit vehemens clamor cordis, & ita vehemens, & accensus, ut non deficiat in via, sed ad te, qui in altissimo throno sedes, quamuis profecta ex imo profundo, tandē perueniat. Multa sunt enim, quæ impediunt, ne oratio nubes penetret, ut sunt defectus fidei, fiducia humilitatis, desiderii, & similia. Itaque petit gratiam bene orandi, hoc est, aptè ad impetrandum.

II. Non auertas faciem tuā à me in quacunque die tribulor, inclina ad me aurem tuam.

III. In quacunque die inuocaue- ro te, velociter exaudi me.

Hæc est prima, & principalis petitio pauperis tribulati, siue peccatoris penitentis: nemo enim potest corrigere quem Deus despexerit, ut dicit Sapiens Eccles. 7. Et prima gratia, & fons gratiarū est respectus Dei: idē iste primū omnium petit respici à Deo, quasi dicat

Non auertas faciem tuam à me, quantumuis fœdus, & turpis sim; & si nō pro uocat te ad me respiciendū imago tua, quoniam fœdaui eam; prouocet misericordia tua, quia quo turpior sum, eo miserior, & miserabilior sum; & nisi me respexeris, nunquam ego ad te respiciē dum conuertar; sed quotidie magis ac magis in peccatis tabescam, & semper fœdior, ac turpior fiam. Itaque qui hæc dicit, iā cœpit respici à Deo, sed à Deo adhuc suspirato, & subinde faciē auertente: idē gustata utcunque gratia luminis, & respectus Dei, clamat, Non auertas faciem tuā à me, ne proicias me à facie tua: perfice quod cœpisti, conuertens te ad me, ut ego perfectē conuertar ad te. In quacunque die tribulor, inclina ad me aurem tuam. Hæc est altera petitio, sed consequens ad primam: nam ex respectu vultus Dei, incipit homo agnoscere turpitudinem, & nuditatem, ac per hoc veram paupertatem suā. Inde incipit affligi, & tribulari, & medicum supremum, qui diues est in misericordia, inuocare. Scit enim à Deo cor contritum, & spiritum contribulatum nunquam despici. Ait igitur confidenter, In quacunque die tribulor, inclina ad me aurem tuam, id est, quando cunque ex respectu gratiæ tuæ spiritum contribulatum gero, & inde clamo ad te; peto ut benignè exaudias me. Et id ipsum explicans addit, In quacunque die inuocaue ro te, velociter exaudi me, id est, quando cunque tribulor, & ex tribulatione inuoco te medicū omnipotentem; exaudi me, & quidem velociter, ne si fortē tardaueris, non inuenias quem sanes.

IV. Quia defecerunt sicut fumus dies mei, & ossa mea sicut cremium aruerunt.

Reddit rationem, cur dixerit velociter exaudi me. Ratio enim est, quia vita humana velocissimè tendit ad interitū, & idē nisi peccati vulnus velociter curretur, periculum est, ne plaga incurabilis fiat. Quia defecerunt sicut fumus

R r 3 dies

dies mei, id est, tempus vitæ meæ hucusque transactum, velocissimè præterijt, instar fumi, qui quamvis in magnam molem intumescendo excrescat, tamè subito dispergitur, & evanescit in auras & sine dubio sic transibit id quod super est. & ossa mea, quæ sunt quasi columnæ totius corporis, brevissimo tēpore aruerunt, ac per hoc debilitata sunt, ut brevi ruinam minentur. Per cremium intelligitur lignum seu virgultum aridum, quod facile cremari potest, ut Sanctus Hieronymus docet in commentario ad cap. 10. Osee; vel, ut alij volunt, lignum semiuustum, ac ferè crematum. Vtrunque autem fragile est, ac debile, ut pondus superpositum diu sustinere non possit. S. Augustinus legit, ossa mea sicut in frixorio confixa sunt. quam lectione inuenimus in editione antiqua Romana. S. Hieronymus ex hebræo verfit, ossa mea, quasi frixa contabuerunt. Vox hebraica, moked, non habetur, nisi hoc loco, ideò unusquisque pro suo arbitrio eam interpretatur. Septuaginta verterunt, *ὡς ἐν φρύγιον καὶ ἐν φρύγισαν* quæ verba vtrunq. significare possunt, nimirum, quasi cremium aruerunt; & quasi in frixorio confixa sunt. Possunt hæc referri etiam ad deplorandum tempus in peccatis miserè consumptum, ut sensus sit, Dies mei, in quibus videlicet voluntatem meam faciebam, & quos pro arbitrio, sine timore Dei, in voluptatibus consumebam, illi inquam dies defecerunt sicut fumus, quia tenebri-cosi, & brevissimi fuerunt, neque vllum sui vestigium reliquerunt. Et ossa mea, id est, fundamenta, & quasi columnæ prosperitatis meæ, sicut cremium aruerunt: citissimè enim transit omnis mundana felicitas, neque aliquid post se relinquit, nisi tetrum odorem quasi rei cō crematæ, aut frixæ, malam videlicet famam, & nominis execrationem.

V. Percussus sum ut fœnum, & aruit cor meū, quia oblitus sum comedere panem meum.

Pergit deplorare statum suum præte-

ritum, ac dicit, percussus sum ut fœnū, id est, à sole prosperitatis mūdane percussus sum, ut fœnum, quod facillimè exarescit; & aruit cor meum, quia occupatus in curis huius mundi oblitus sum comedere panem meum, panem videlicet veritatis cœlestis, qui propriè panis noster est, non communis cum bestiis: namcibus corporalis non est propriè panis noster. Verissima sententia, & ab ijs, qui prosperitate fruuntur, assidue considerata; nisi enim, qui in prosperitate sunt, sub umbra alarum Dei commorentur, vel imbre diuinæ gratiæ continuo perfundantur, fieri non potest, quin ut fœnum percutiantur, & cor eorum nauseans ad cœlestem panem, non penitus exarescat. Videte, Dñs ait Luc. 21. ne grauentur corda vestra in crapula, & ebrietate, & curis huius vitæ; qui enim tales sunt, obliuiscuntur comedere panem verum; & ab omni deuotionis gratia aridi fiunt.

A voce gemitus mei, adhæ. VI. sit os meum carni meæ.

Explicat nunc dolorem vitæ præteritæ, & fructus dignos pœnitentiæ. quæ admodum enim antea virebat caro in delicijs, & arescebat cor oblitum comedere panem suum: ita nunc è contrario à voce gemitus sui, id est, à contrario fletu obliuiscitur caro comedere panem suum, & sic adhærent ossa carni, id est, pelli suæ; accipitur enim hoc loco caro pro pelle, ut S. Hieron. admonet. Itaq. commendantur hoc loco fletus, & ieiunia, quæ veræ pœnitentiæ fructus, & signa sunt.

VII. Similis factus sum Pelicano solitudinis; factus sum sicut nyctocorax in domicilio.

Vigilaui, & factus sum sicut VIII. passer solitarius in tecto

Addit ad fletum, & ieiunia solitudinem, & vigilias; quæ propria sunt verè pœni-

pœnitentium; nisi enim quis à frequentia hominum ad tempus se subducatur, & serió vigilas recogitet magnitudinem, & multitudinem peccatorum suorum, vix fieri potest vt ea dignè defleat. Tres aues commemorat Propheta, quib. pœnitentem similem facit. Pelicanus, alias Onocrotalus, auis est in solitudine degens; Nycticorax, alias, nostra, siue bubo degit in domibus dirutis, siue parietibus tecto carentibus: & quod nos legimus, in domicilio, supplendum est, diruto. Sic .n. habetur in textu hebraico.

S. Augustinus legit, in parietinis, & explicat, in ædificijs; vbi muri stant sine habitatione: Passer solitarius habitat quidem in domibus, sed in parte domus suprema, vt magis supra domus, quàm in domibus habitare dicendus sit. In græco habetur *ἐν τοῖς οὐρανοῖς* notat S. Hieronymus in Epist. ad Suniam, & Fretellâ, in Palestina, & in Aegypto non esse in vsu tecta acuminata, sed plana, quæ et solaria dicuntur, in quibus frequenter conueniunt homines ad fabulandum, apicandum, & conuescendum; proinde idē esse in domate, & in tecto, quia quod Romanis est tectū, Palestinis est doma: & quod dicitur Matth. 10. Prædicate super tecta; intelligendum esse de eiusmodi solarijs, siue domatibus; vt et quod dicitur Act. 11. de S. Petro, Ascendit in superiora domus, vt oraret. Significant autē hæ tres aues tria genera pœnitentium: aliqui enim omnino loca desertæ petunt, vt Maria Magdalena, Maria Aegyptiaca, Paulus primus Eremita Antonius, Hilarion, & alij plurimi, qui dicere possunt cum Propheta, Elongauit fugiens, & mansi in solitudine. & quemadmodum Pelicanus cum venenatis animantibus, ac potissimum cū serpentibus bellum gerit, vt S. Hieronymus scribit: sic a achoritæ cum daemonibus assidue luctatur, & ex victorijs aduersus daemones quasi pascuntur. Alij pœnitentiam agunt intra ciuitates, sed in cenobijs, & exigujs cellulis, quasi in tugurijs, & à Mundo separati quasi nycticoraces ex magnam noctis partem in diuinis laudibus decantandis consumunt: nycticorax .n. dicitur, quasi noctu cla-

mans. & sicut nycticoraces ex timore clamant; ita pœnitentiam agentes ex timore iudiciorum diuinorum in orationibus, & hymnis, & canticis spiritalibus clamant. Denique alij, qui vel alligati vxoribus, vel officio publico fungentes non possunt corpore ab hominū frequentia separari, veluti passer solitarius in tectis habitant, eminentes animo non solum super turbas, sed et super ipsas domos. Hi quidem in mundo sunt, sed de mundo non sunt, dum non subiiciuntur opibus, aut honoribus, aut seculi negocijs; sed ea sibi subiiciunt, illis præsumunt, eaque disponunt, atque dispensant, & non sinunt se ita capi, aut illaqueari, quin animus liberè in solitudine degat, & in cœlis subinde versetur. Horū est proprium vigilare, & prædicare super tecta; vigilare aduersus tentationes, & pericula sua, & suorum; & verbo atque exemplo prædicare iis, quib. præsumunt. Estque hoc genus utilissimæ pœnitentiæ, in sublimi loco humilitatem seruare; in amplis opibus sobrio victu & tenui vestitu contentum esse, vt abundatur tribui possit iis, qui necessitatē patiuntur; in magna peccandi licentia corpus castigare ieiunijs, & vitæ asperitate in seruitutem redigere, deniq. proximis ex charitate seruire, eorum infirmitatibus compati, eorum molestias, & scandala sustinere.

Tota die exprobrabant mihi **IX.**
inimici mei, & qui laudabant
me aduersum me iurabant.

Semper vita eorum, cui serió pœnitentiam agunt, displicet peccatoribus, qui in peccatis harere volunt, Grauis est nobis, inquit impij Sap. 2. etiam ad videndum, quoniam dissimilis est alijs vita illius, & immutata sunt via eius: quamuis enim hæc dicantur de iusto: tamen conueniunt etiam in peccatorem pœnitentem, qui ad iustitiam anhelat. Aut igitur, Tota die exprobrabant mihi inimici mei, id est, qui mihi erant amici ob communia studia iniquitatis, iam mihi in alterum hominem mutato, facti

Rr 4 sunt

sunt inimici, & omni tempore exprobrabant mihi hanc mutationem, quasi insipienter agerem: & qui antea laudabant me, vt prudentem, & fortem socium eorum, quia laudatur impius cum malè fecerit; postea aduersum me iurabant, id est, iuramento inter se præstito conspirabant. S. Hieronymus ex hebræo vertit, per me iurabant. Sed vox hebraica, bi, significat propriè, in me. ac per hoc recte habet nostra editio, aduersum me. idem enim est, in me iurabāt, & aduersum me iurabant.

I. Quia cinerem tāquam panem manducabam, & potum meum cum fletu miscebam.

Reddit causam cur exprobrarent ei inimici ipsius. Quia, inquit, cinerem tanquam panem manducabam, & potum meum cum fletu miscebam, id est, quā insipientiam esse arbitrabantur tantam asperitatem vitæ spontè assumptam. Porro cinerem tanquam panem manducare est vesci pane sordido, & cinere asperso. quod præcipuè contingit, cum comeditur panis subcinericus non diligenter excusso cinere. quod solent pœnitentes, vesci videlicet cibis male præparatis, pane hordeaceo, vel furfureo, & admisto cinere, vel terra. quod de S. Francisco testatur S. Bonauentura cap. 5. vitæ ipsius, Cocta, inquit, cibaria, tempore sanitatis vix admittebat, admissa vero cōficiebat cinere, &c. potum autem cum fletu miscere, nihil aliud est, nisi inter bibendum vinum, quod lætificat cor hominis, non lætari, sed flere ob memoriam admissæ offensionis diuinæ. Posset etiam per, cinerem, intelligi pœnitentia ipsa, & sensus esset, cinerem tanquam panem manducabam, id est, actione pœnitentiæ reficiebam animam, vt pane refici solet corpus: & potum meum cum fletu miscebam, id est, lacrymarum effusione sitim internam reconciliationis temperabam quomodo potu aquæ, aut vini temperatur sitis corporalis. Denique quomodo dicitur in Psal. 41. Fuerunt mihi lacrymæ meæ panes, die ac nocte; & Thren. 3.

Cibauit me cinere: ita potest hic locus intelligi, vt sensus sit, Quotidie in amaritudine eram, & ipsa amaritudo, quæ per cinerem significatur, erat mihi panis quotidianus: & assiduus fletus erat mihi quotidianus potus: fustētabar amaritudine, reficiebar lacrymis doloris, & desiderij.

A facie iræ, & indignationis tuæ, quia eleuans allisisti me:

Ecce cur verus pœnitens cinere saturari, & lacrymis refici eligat, non ex insipientia, non ex inopia, sed quia cogitat indignationem altissimi, cui per hanc humiliationem, & veræ pœnitentiæ signa aliquo modo satisfacere cupit. Manducabam, inquit, cinerem tanquam panem, & potum cum fletu miscebam a facie iræ, & indignationis tuæ, id est, quia conspiciebam iram, & indignationem tuam aduersus me succensam ob admissa peccata. Cernebam autem iram & indignationem tuam, quia eleuans allisisti me, id est, quia eleuans ex gratia tua ad maximam dignitatem amicitiae, & filiationis tuæ, postea merito peccati mei allisisti me ad terram, deturbans de dignitate amici, & filij ad sortem inimici, & serui rebellis, & fugitiui. Ne putarent homines peccatores modicam esse iacturam gratiæ, quam peccando faciunt: vtitur scriptura verbo allisionis: vas enim quod ex alto loco in terram alliditur, non solum amittit dignitatem loci, sed omni ex parte confringitur, vt nihil sani, nihil boni remaneat. Sic homo peccator, quamuis amore carnali cæcatus non videat detrimentum animæ suæ: verè tamen totum amittit, cum & corpus, & anima eius deputata sit ad gehennam ab eo, cui nemo resistere potest.

Dies mei sicut vmbra declinauerunt, & ego sicut fœnum arui.

Signum, & pars quædam allisionis est hæc

hæc ipsa nostra mortalitas: nam cum primus homo elenatus esset ad gloriam magnam, ut posset in æternum vivere; per peccatum tamen allisus est cum tota posteritate, & mortalis effectus, declinans diebus eius, velut umbra, ipse quoque sicut fœnum aruit. Ait igitur Propheta in persona pœnitentis, non solum ego ab ira tua allisus sum in terrâ ob mala merita mea propria, sed etiam ex antiqua, & communi allisione dies mei sicut umbra declinauerunt, id est, velociter, & sine quiete vlla, insensibiliter transierunt, quomodo umbra insensibiliter, & continuo mouetur, donec occidente sole, penitus euanescat, & in tenebras noctis quodammodo transeat. Et ego sicut fœnum arui, id est, qui creatus eram, ut semper sicut palma virerem; nunc allisus in mortalitatem, sicut fœnû quod facillime siccat, exarui.

XIII. Tu autem Domine in æternum permanes, & memoriale tuum in generationem, & generationem.

Hæc est altera pars Psalmi, in qua Propheta in persona pauperis pœnitentis post explicatam miseriam suam, spem reconciliationis concipit, & spiritu diuino illustratus prædicit reparationem, & renouationem Ecclesiæ futuram per Christum: & verba sua ad ipsum Christum dirigit, ut Apostolus exponit ad Hebr. 1. volens enim Apostolus eo loco demonstrare Christi diuinitatem, allegat primo loco verba Psalmi 44. Thronus tuus Deus in seculum seculi. deinde Psal. 95. Adorent eum omnes Angeli Dei. postremo Psalmi huius 101. Tu Domine initio terram fundasti, &c. quæ verba ad eundem dicuntur ad quem dicuntur ista, Tu autem Domine in æternum permanes. proinde si illa dicuntur ad filium Dei, ista quoq. dicuntur ad filium Dei. Neque videntur satisfacere huic rationi, qui dicunt, hæc verba dici ad Deum simpliciter sed posse tribui filio, quia filius Dei Deus est, si. n. ita esset, Apostolus nõ probaret,

sed poneret ut concessum, Christum Deum esse. Igitur sensus erit, Ego quidem ut fœnum arui: tu autem Dñe, quem expectamus Messiam, in æternû permanes; & nostra quidem memoria cum sonitu perit, memoriale autem tuum, id est, memoria tua propagabitur semper in generationem, & generationem, quia semper erunt per temporum successiones qui recordentur mirabilium operum tuorum.

Tu exurgens misereberis Sion, **XIIII.** quia tempus miserendi eius, quia venit tempus.

Ideo memoriale tuum propagabitur in generationem, & generationem, quia tu quoque non obliuisceris misereri populi tui; sed exurgens quasi a longo somno misereberis Sion, & misertus aduenies, & saluabis nos: quia per spiritum video, quia tempus miserendi iam venit, id est, iam prope est ut veniat, iam propinquat, imò in mente mea iam venit. quoniam rem futuram ex certitudine luminis Prophetici cerno ut præsentem. Hoc est tempus de quo Apostolus ad Gal. 4. Cû venit plenitudo temporis misit Deus filium suum. & de quo Isaias cap. 49. Tẽpore accepto exaudiui te, & in die salutis adiui te. quod explicans Apost. 1. ad Corinth. 6. ait, Ecce nunc tempus acceptabile, ecce nunc dies salutis.

Quoniã placuerunt seruis tuis **XV.** lapides eius, & terræ eius miserabuntur.

Præuidit, & prædixit Propheta renouationem sanctæ Sion, ex eo quod præuidit, seruos Dei iam desiderio accensos ad Ecclesiæ ædificationem; præuidit videlicet, sanctos Apostolos, qui antea persecutioni, & rebus vilissimis intendebant, postea a Christo edoctos, & Spiritu sancto repletos relictis omnibus alijs curis totos se dedisse Ecclesiæ ædificationi. Quoniam, inquit, placuerunt seruis tuis, id est, ijs, quos tibi in seruos elegisti, & prædestinasti, placuerunt lapides eius, id est,

id est, placuit ædificatio nouæ Hierusalem, placuit colligere, & congregare lapides viuos, qui super fundamentum iā positi superædificarentur; & terræ eius miserebuntur, & terram ipsam nouæ Hierusalem fouebunt, & amabunt, vt mater fouet & diligit infantem vteri sui: nam in Scriptura verbum, miserendi significat paterno, vel materno affectu diligere. Isaia 49. Nunquid obliuisci potest mulier infantem suum, vt non misereatur filio vteri sui? Per lapides intelliguntur viri constantes, & perfecti; per terrā siue puluerem, vt sonat vox hebraica, haphar, intelliguntur infirmi, & instabiles: de quibus Apostolus Rom. 14. Infirmum in fide assumite. & Rom. 15. Debemus nos firmiores imbecillitates infirmorum sustinere. & 2. Corint. 11. Quis infirmatur & ego non infirmor?

XVI. Et timebunt gentes nomē tuū Domine; & omnes Reges terræ gloriam tuam.

Ex hoc loco intelligimus, minus rectè exponi hunc Psalmum ab ijs, qui docēt in versiculis præcedentibus prædicā reuerſionem Iudæorum ex captiuitate Babylonica, & reædificationem Hierusalē euerſæ a Rege Nabuchodonosor; nō. n. tunc omnes gentes terræ timuerunt nomen Dei, neque oēs Reges gloriā eius. Siquidem hæc aduentui, & glorificationi Messie reſeruabantur, & vt prædictū fuit, sic & adimpletum fuisse constat. Ait igitur, Et timebunt gentes, id est, & tunc cū ædificabitur noua Sion, gentiles conuertentur, & timebunt timore sancto, piaq. veneratione nomen tuū Dñe Iesu Christe, & oēs Reges terræ pariter conuertentur, & timebunt gloriam tuā, id est, Maiestatem tuam, vt Regis Regū, & Principis Regum terræ sedētis ad dexteram Patris, donec subijciantur sub scabellum pedum tuorum oēs inimi tui, & postea venturi Iudicis omnium viuorum, & mortuorum, & reddituri singulis secundum opera ipsorum.

Quia ædificauit Dominus Siō, **XVII.**
& videbitur in gloria sua.

Ecce cur timebunt omnes gentes, & omnes Reges gloriam Christi. Quā ædificauit Siō, id est, in præſenti, inuitis licet, & repugnantibus gentibus, & Regibus, ædificauit Ecclesiam suam, aduersus q. portæ inferi non præualebunt; & in futuro videbitur in gloria sua, quando veniet cum omnibus Angelis, in nubibus cœli, cum potestate magna iudicare seculum. Quā cœpit ædificare Sion, visus est in humilitate sua, dicente Isaia. c. 53. Vidimus eum, & non erat ei species: sed quando veniet iudicare, tum planè videbitur in gloria sua.

Respexit in orationem humilium, **XVIII.**
& non spreuit preces eorum.

Hæc referuntur ab aliquibus ad preces sanctorum Prophetarum, & piorum virorum testamēti veteris, qui expectabant aduentum Messie. sed fortasse rectius sentiunt qui referunt ad preces sanctorum Martyrum, qui dicunt in Apoc. cap. 6. Usquequō Dne non iudicas, & nō vindicas sanguinem nostrum de his, qui sunt in terra? Videbitur ergo filius Dei in gloria sua, quia respexit in orationem humilium Martyrum, aliorumq. piorum seruorum suorum, & non spreuit preces eorum, & ideò veniet iudicaturus, & vindicaturus sanguinem eorum de his qui sunt in terra. hæc expositio melius connectit verba Psalmi: nam secundum priorem expositionem, præſens versiculus reddit rationem verborum illorum, Tu exurgens misereberis Sion, quæ habentur in versic. 14. at secundum expositionem posteriorem reddit rationem verborum, quæ habentur in versiculo proximè præcedenti, imò in secunda parte versiculi, videlicet, Et videbitur in gloria sua.

Scri-

XIX. Scribantur hæc in generatione altera, & populus, qui creabitur, laudabit Dominum.

Ne Iudæi sibi tribuerent hanc Prophetiam, & ne fortè intelligerentur, quæ supra dicta sunt de solutione captiuitatis Babylonicæ, & ædificatione Hierusalém terrenæ; placuit Spiritui sancto disertis verbis admonere, quod postea scripsit S. Petrus in epist. priore cap. 1. Prophetæ de futura in vobis gratia prophetauerunt; & infra, quibus reuelatum est, quia non sibi metipsis vobis autem ministrabant ea, quæ nunc nuntiata sunt vobis per eos, qui euangelizauerunt vobis. Ait igitur Spūs sanctus per os David, scribatur hæc in generatione altera, id est, notentur hæc mysteria pro generatione olim futura: dicitur enim, in generatione altera, pro, in generationem alteram, vt habetur in græco. vel, pro, generationi alteri, siue ad generationem alteram, vt verti potest ex hebræo. Neque multum refert, quòd i hebræo, & græco habetur in numero singulari, scribatur hoc: nam idem omninò est sensus. Et populus, qui creabitur, id est, populus, qui erit futuris temporibus, laudabit Dominum, cum viderit impleta quæ tanto antea prædicta sunt. Fortasse etiam, vt notat S. Augustinus, insinuat per populum, qui creabitur noua creatura, de qua dicit Apostolus ad Gal. 6. In Christo Iesu neque circumcisio aliquid valet, neque præputiū, sed noua creatura. & ad Ephes. 2. Creati in Christo Iesu in operibus bonis.

XX. Quia prospexit de excelso sancto suo: Dominus de cælo in terram aspexit.

Hæc est ratio, cur populus noui testamenti laudabit Dominum, quia Dominus de excelso sanctuario suo dignatus est aspicere vallem nostræ miseriæ, id est, de cælo in terram aspexit, non ocioso intuitu, sed vt de excelso fieret humilis, & in terris videretur, & cum hominibus versaretur.

Vt audiret gemitus cōpeditōrū, **XXI.** vt soluēret filios interemptorum.

Cur autē Dñs excelsus vsq. ad terram humiliaretur, ea causa fuit, vt de proximo audiret gemitus compeditorū, quos Princeps huius Mundi captiuos fecerat, & cōpeditos retinebat: & vt audito gemitu solueret eos, liberosq. dimitteret. qđ impletum fuisse in suo aduentu Dñs testatus est Lucæ 4. In hebræo pro, cōpeditorum, habetur, vincti, vt audiret gemitus vincti, sed idem est sensus. Pro, filios interemptorum, habetur in hebræo, filios mortis, id est, hoies ad mortem dānatos quō et habetur in Psal. 78. vbi nos legimus, filios mortificatorum. sed, vt eo loco diximus, Septuaginta Interpretes p filios mortis intellexerunt in his locis filios parentum occisorum. Pōt et fieri, vt Septuaginta i hebraico suo textu haberint interemptorum, qđ per vnius literæ mutationē fieri potuit. Porro per, cōpeditos, hoc loco intelligimus hoies opera Diaboli alligatos ppijs cōcupiscētijs, & gemētes sub iugo passionū suarū. Per, filios interemptorū, intelligimus filios veteris Adami, & Heuæ, qui fuerunt primi occisi ab astutia serpentis: nam vt dī Sap. 2. Inuidia Diaboli mors introiuit in orbem terrarum. & Dñs in Euangelio de Diabolo dicit, Io. 8. Ille homicida erat ab initio, & in veritate non stetit.

Vt annunciēt in Sio nomē Dñi, **XXII.** & laudem eius in Hierusalem.

Venit Dñs saluare cōpeditos, & eruere de potestate tenebrarū, vt annunciēt in Sion nomē Dñi, id est, vt cōuersi ad Deū viuū, & verum, glorificent nomē Dñi in spūali Sion, qđ est Ecclesia. qđ idē repetit dicens, & laudē eius, supple annūcient, i Hierusalem, laudantes, & benedicentes Deum, gratiasq. agentes pro tam insigni beneficio in Ecclesia Catholica, quæ est noua Hierusalem. Exponit hoc S. Petrus in priore epist. c. 1. vbi dicit, Vos autē genus electum, regale sacerdotiū, gens sancta,

sta, populus acquisitionis, ut virtutes annuncietis eius, qui vos de tenebris vocavit in admirabile lumen suum.

XXIII. In conueniendo populos in vnum, & Reges, ut seruiant Domino.

Explicat tēpus quo liberati a potestate tenebrarum laudare debeant nomē Dñi. In conueniendo, inquit, populos in vnū, id est, qñ populi nationum, qui antea diuisi erant ambulantes post varios Deos, conuenient in vnum, & efficiētur vnum corpus, & erit eis vnus spūs, vnus Deus, vna fides, vnum baptisma, imò et p charitatem erunt cor vnum, & aīa vna: qñ non solū populi, sed et Reges eorū cōuenient in vnū corpus Ecclesiā, ut & ipsi seruiant Dño. In hebræo habetur, Regna, & sic legit etiam S. Augustinus; tñ in græco habetur, Reges, & sic legunt in commētario S. Hieronymus, & S. Greg. & alij. Sensus est idem: nam cū dicitur, Regna seruiant Domino, sensus est, Reges cum populis seruiant Dño. Fortasse etiam Septuaginta legerunt, melacim, Reges, non mamlacorh, Regna.

פליים
ממלכות

XXIV. Respondit ei in via virtutis suæ, paucitatem dierum meorum nuncia mihi.

Hic versiculus obscurissimus est, quo ad verba, & quo ad sensum. S. Hieronymus ex Hebræo vertit, Afflixit in via fortitudinem meam. Sed facile est videre rationē diuersitatis: nā vox hebræa, hinne deducitur a verbo, hana, quod & respondere, & affligi significat; ac per hoc si legatur cum puncto in secunda litera, ut legit S. Hieron., significabit, afflixit: si legatur sine puncto, ut legerunt Septuaginta Interpretes significabit, respōdit. Sic et illud, cochi, si legatur cum, Iod, ut legit S. Hieronymus, significat fortitudo mea: si legatur cum, Vau cocho, ut legerunt Septuaginta significat, fortitudo eius, siue virtutis eius. Neque refert, si veritas, In via virtutis eius, siue, In via vir-

tutem eius, quia nomina hæbreorum nō declinantur per casus. Itaque recta est nostra lectio, Respondit ei in via virtutis suæ. sed difficile est iudicare, cū quo nomine coniungatur verbum, respōdit. S. Hieron. in commentario scribit, sensū esse, Respondit Dñs ad Hierusalem. Sanctus August. cōtra vult sensum esse, Respōdit Hierusalem ad Dominum. Euthymius dicit, respondiisse pauperē, de quo in titulo Psalmi. Quid si addamus quartam expositionem, & dicamus respondiisse Prophetam ad eum, qui imperauit illi, ut scriberet hæc in generationem alteram? Videtur. n. hæc esse cōtextio horum versiculorum. Dixit Dñs Prophetæ, scribantur hæc in generationem alterā, & populus qui creabitur, laudabit Dñm &c. Respondit ei Prophetæ, In via virtutis suæ, id est, in flore ætatis suæ, cū esset in via vitæ suæ robustissimæ: paucitatem dierum meorum nuncia mihi, id est, fac, ut intelligam, & serio mihi persuadeam, paucos fore dies vitæ meæ, ne forte deceptus hoc flore ætatis, arbitrer me longissimā vitam habiturum, & rapiar hinc quando minus cogito immaturus, & imparatus, & non pertineam ad populum, qui creabitur, & qui perpetuo te laudabit in cœlesti Hierusalem.

Ne reuoces me in dimidio dierum meorum: in generationem, & generationem anni tui.

Dimidia pars huius versiculi pertinet ad versiculum superiorem: quia. n. dixerat, Paucitatem dierum meorum nuncia mihi, addit orans, Ne reuoces me in dimidio dierum meorū, id est, ne reuoces me de curriculo vitæ in medio cursu, qñ minus expecto mortem, qñ nihil minus cogito, qñ paratum me non inuenires. In hebræo distinguuntur aliter isti versiculi, ideō S. Hieronymus vertit, Dicam, Deus meus, ne rapias me in medio dierum meorum. Sed illud, Dicam, Deus meus, mutatis punctis, potest legi, dic ad me, & sic legerunt Septuaginta, & coniungentes cum superiore versiculo verterunt, nuncia mihi: neque vlla ratio est, cur nō sequa-

אמר אלי
אמר אלי

ענח
ענח
כה כה

sequamur distinctionē, & lectionē græcam, & latinam, cū eam optimē ferant verba hebraica, demptis punctis, quæ a Rabinis addita fuerunt. Quod sequitur, in generationem & generationem anni tui ratio est, cur æquum sit, ut Deus hominem permittat tamdiu vivere, quamdiu necesse est, ut benè, & sanctè moriatur. quasi dicat, Anni tui Domine æterni sunt, & generationi, ac generationi co-existent sine ullo fine: æquum igitur est, ut imagini tuæ spatiū viuendi indulgeas amplum, & commodum, ut requiritur ad salutem æternam acquirendam.

XXVI. Initio tu Domine terram fundasti, & opera manuum tuarum sunt cæli.

XXVII. Ipsi peribunt, tu autem permanes, & omnes sicut vestimentum veterascent.

XXVIII. Et sicut opertorium mutabis eos, & mutabuntur: tu autem idē ipse es, & anni tui non deficient.

Probat Deum solū esse æternum ex eo quod solus ipse est immutabilis: quæ est ratio planè theologica, & a priori, ut scholæ loquuntur. Deum autem solū esse immutabilem, probat ex eo quod ipse idem semper manens mutauit cælos de non esse ad esse, & rursus mutabit de esse ad non esse: & quod de cælo dī, de toto Mundo intelligitur, cuius maxima, & nobilissima pars est cælum. Initio tu Dñe terram fundasti, id est, a principio antequam Mundus esset, tu Dñe eras, & terram, quæ est inferior Mundi pars, a fundamentis fecisti, nō super fundamentum aliquod præexistens posuisti. Et opera manuum tuarum sunt cæli, id est, non solum terram, sed etiā cælos, qui sunt Mūdi pars superior, tu solus nō per Angelos, aut alios quoscunque opifices, sed manibus propriis, id est, propria potentia, & sapientia condidisti. Itaque Mundum vniuersum ex non esse ad esse

perduxisti. Ipsi, cæli videlicet, peribunt, tu autē permanes. Duobus modis hæc intelligi possunt. Primū ex hypothēsi hoc modo, et si cæli veterascerent, mutarentur, & perirēt: tu idem semper maneres. Sic in Euangelio quod dicitur Matth. 5. Donec transeat cælum, & terra, iota vnū aut vnus apex non præteribit a lege, donec omnia fiant; exponitur Luc. 16. Facilius est cælum, & terram præterire, quā de lege vnum apicem cadere. Deinde absolute, sed de mutatione nō quoad substantiam, sed quoad modum. Peribūt. n. cæli, veterascent, & mutabuntur, quoad motum stellarum, quoad influxū caloris quoad generationes rerum inferiorum: quo etiam terra peribit quoad productionem herbarum, & animalium, & Mundus totus consummabitur quoad figuram, & statum, quem nunc habet; scribit enim Apostolus, Præterit figura huius Mundi, 1. Corinth. 7. & Quæ videtur temporalia sunt, quæ non videntur æterna sunt, 2. Cor. 4. Vbi omnia quæ videntur, temporalia esse dicit, quia ipsa etiam elementa, & cæli secundum eum modum, qui nunc a nobis conspicitur, finem habitura sunt. Videmus enim terram vestitam arboribus, plenam pecudibus, ornatam edificijs: videmus aquas fluentes, & sæpè turbatas: videmus aerem nunc serenum, nunc nubilum; videmus sydera in perpetuo motu: quæ omnia temporalia sunt, & finem habitura: novos autem cælos, & nouam terram secundum promissionem eius expectamus, ut B. Petrus scribit in epist. posteriore cap. 1. Et omnes sicut vestimentum veterascent, id est, omnes cæli, quoad externam figuram, & modum consumentur. Et sicut opertorium mutabis eos, & mutabuntur, id est, sicut pallium aliquod vetus, remouebis a cælis externum istum habitum cælorum, & nouo indues: sic mutabuntur cæli, quomodo mutatur homo cū vestimenta mutat, quoad externam faciem, non quoad internam substantiam. Tu autem idem ipse es, & anni tui non deficient, id est, tu nullo modo mutaberis quantauis longitudine annorum. Cur autem Deus nulla ratione mutari possit, ratio manifesta

manifesta est, quoniam omne quod mutari potest, est in potentia ad aliquid aliud acquirendum: Deus autem ætæternus est purus, & perfectissimus, imò infinitæ perfectionis: proinde nihil acquirere potest, cum nihil ei desit.

& Luna. En Lector, quod perducatur verum pœnitentia, quæ initio Psalmi descripta est: perducit. n. ad æternam fœlicitatem cum Deo; sine qua peccator in æternis supplicijs mansisset cum Diabolo.

XXIX. Filij seruorum tuorum habitabunt, & semen eorum in sæculum dirigetur.

Descripta æternitate Dei, & Mundi consummatione, ac renouatione, prædicit, in Mundo renouato participes fore æternitatis eius seruos ipsius, & filios, ac filios seruorum vsque in sempiternum; nō quod in futuro sæculo sit futura propagatio filiorum; sed quod ad beatam illam requiem peruenturi sint omnes fideles serui Dei cum omnibus posteris, qui eorum pietatem imitati fuerint: atque hæc est promissio facta olim ad Abraham, Gen. 17. Statuam pactum meum inter me, & te, & inter semen tuum post te fœdere sempiterno. Per, seruos Dei, intelligimus Patriarchas; per filios eorum Apostolos: per filios Apostolorum reliquos pios Christianos. Filij seruorum tuorum habitabunt, id est, Apostoli; cum parentibus eorum Patriarchis habitabunt in Regno tuo, in renouatis cœlis, in cœlesti Hierusalem: & semē eorum in sæculum sæculi dirigetur, id est, neq. illi solū, sed etiam quotquot illi per Euangelium genuerint, si in Fide, & in dilectione permāserint, in sæculum dirigentur, id est, in æternum recti, & stabiles in omni prosperitate permanebunt. In hebræo habetur, Et semen eorum ante faciem tuam perseverabit: sic. n. vertit S. Hieronymus. Sed vox hebraica, **יכון לפניך** iccon, amplissimæ significationis est, vt dirigi, stabiliri, permanere, & perseverare, significare possit. Illud autem, **lephanecha**, propriè nō significat, in æternum, sed, corā te, siue, ad faciem tuam. Sensus tamen est idem: nam permanere ante Deum, est permanere, quamdiu manebit Deus, quod erit sine fine. Similis habetur loquutio in Psalm. 71. Permanet cum Sole, & ante Lunam, id est, quamdiu manebunt Sol,

P S A L M V S II.

Titulus, & Argumentum.

Ipsi David.



Titulus significat, Psalmum hunc ipsi Dauidi a Spiritu scto inspiratum, vt cum ad solatium timentium Deum in hac lacrymarū valle decantaret. Et sane necesse fuit nobis reuelari, hunc Psalmum de cœlo allatum fuisse: alioqui nemo facile fidem haberet promissionibus diuinis, quæ in hoc Psalmo declarantur: superant enim longissimo intervallo capacitatem animi nostri. Primum igitur exponit Propheta beneficia Dei erga electos suos, quæ in hac vita inchoantur, & in alia perficiuntur: deinde ostendit, vnde veniant ista beneficia, & ad quos pertineant; quod videlicet sint opera ineffabilis misericordiæ diuinæ erga timentes Deum. Denique cum impar sibi esse videretur ad agendas gratias; inuitat omnes Angelos, imò omnes creaturas, vt benedicant Dominum, eique pro nobis gratias agant. Psalmus dulcissimus est, & ad fiduciam in Deum erigendam, & collocandam aptissimus; modo post actam de peccatis quantumuis grauibus pœnitentiam, Deum verè & ex corde timeamus.

Expli-

Explicatio Psalmi 102.

I. Benedic anima mea Domino & omnia quæ intra me sunt nomini sancto eius.

David piè credens, vnum se esse de numero Electorum Dei, excitat ipse se in persona omnium Electorum ad benedicendum Dominum. Benedic, inquit, anima mea Domino cogita beneficia, lauda benefactorem, tu potissimum anima mea, quæ non solum beneficia recipere, sed etiam ea cognoscere ex dono Dei meruisti. Neque tu sola anima mea laudes Dominum, sed omnia quæ intra me sunt, vertantur in linguas, & benedicant nomen sanctum Dei. Per ea, quæ intus sunt, sanctus Augustinus animam ipsam intelligit, ut sit repetitio, vel expositio eiusdem sententiæ; & quod dictum est, Benedic anima mea Domino, repetatur, & explicetur per sequentia, Et omnia interiora mea, id est, omnes cogitationes, & affectiones, quæ in imo corde latent, benedicant nomē sanctū eius. Rectè hæc dicuntur; sed non est absurdum, si per interiora, intelligamus totum quod est in homine, & exteriore hac nostra pelle contegitur: nam & alibi dicitur, Cor meum, & cor mea exultauerunt in Deum viuum: & alibi, Omnia ossa mea dicent, Domine quis similis tibi? tribuitur autem laus Dei rebus inanimis, & non sentientibus Deum, vel eo modo, quo omnia opera opificis laudare dicuntur, vel ex affectu animæ quæ si fieri posset, opraret, ut omnia Deum cognoscerent, & laudarent.

II. Benedic anima mea Domino: & noli obliuisci omnes retributiones eius.

Iterum repetit, Benedic anima mea Domino, tum ut vehementiā affectus ostendat; tum quia nouit infirmitatem cordis humani, quod facillimè frigescit in ijs, quæ per sensus corporis non per-

cipiuntur, qualis in primis est Deus, qui lucem habitat inaccessibilem. ideo adiungit, Et noli obliuisci omnes retributiones eius. Vocat autem beneficia Dei, retributiones, quoniam non sunt beneficia simplicia, sed (ut sic loquar) sunt omnia duplicia: nam, & beneficiū est, quod non tribuit nobis debitas pœnas, ut peccata nostra quotidiana meretur; & rursus beneficium est, quod pro tot malis nostris tanta bona nobis retribuit. Qui numerare poterit peccata hominum, quibus assidue retribuimus Deo mala pro bonis: is fortasse aliquo modo intelliget quanta sit pietas Dei, quæ assidue nobis retribuit bona pro malis; iuxta illud Domini Luc. 6. Qui benignus est super ingratos, & malos.

Qui propitiatur omnibus iniquitatibus tuis, qui sanat omnes infirmitates tuas.

Incipit enumerare beneficia Dei, & ordine progreditur à primo vsq. ad vltimum. Primum est remissio peccatorum qua nos de iniustis iustos, & de inimicis amicos, & de mancipijs filios facit. Qui propitiatur, inquit, omnibus iniquitatibus tuis, id est, gratis debita condonat, quantumuis multa: gratis ignoscit culpis quantumuis ingentibus, quantumuis innumerabilibus. Nec solum propitiatur iniquitatibus, sed sanat omnes infirmitates, ut abscindat radices peccatorum. Radix enim peccatorum cupiditas est, siue, ut sanctus Ioannes loquitur, Concupiscentia carnis, concupiscentia oculorum, & superbia vitæ. Porro infirmitatem hanc, siue languorem ex peccato primi hominis in natura humana relictum curat Deus in nobis in hac vita, sed perfecta sanitas post hanc vitam erit. Attendat vnusquisque, an hanc infirmitatem in se minui sentiat, & an manus Medici cœlestis æquo animo ferat. qui enim Medici manus reuellunt, & concupiscentiæ languorem in se nutriunt, non possunt animæ suæ verè dicere, Qui sanat omnes infirmita-

tes tuas: & qui hoc dicere nequeunt, frustra ad sequentia Dei dona aspirant.

III. Qui redimit de interitu vitam tuam, qui coronat te in misericordia, & miserationibus.

Transit a beneficijs gratiæ ad beneficia gloriæ, Qui redimit de interitu vitam tuam, id est, qui per redemptionem, quæ est in Christo, liberat vitam tuam a morte sempiterna, & transfert in Regnum suum, coronans te corona gloriæ in misericordia, & miserationibus: nam ut coronam iustitiæ accipere mereris, præuenit te misericordia gratis iustificans, & miserationes plurimæ dirigentes, & protegentes in via, sine quibus in accepta iustitia non perseuerares. Nonnulli, præsertim recentiores, per, coronat te, intelligunt protectionem circumdātem nos, ut sit misericordia Dei quasi clypeus vndique nos tegens aduersus tela inimicorum: sed nos sequuti sumus veteres expositores Hieronymum, Augustinū, Theodoretum, Euthymium, & alios, qui de corona gloriæ hunc locum exponūt; quæ corona redditur meritis, sed merita dona sunt miserentis Dei.

V. Qui replet in bonis desiderium tuum, renouabitur ut aquilæ iuuentus tua.

Explicat quid in se contineat corona gloriæ. Duo enim continet, satietatem desiderij, & corporis immortalitatem; siue plenam felicitatem animi, & corporis: tunc enim desiderium animæ conquiescet, & fames cordis satiabitur, cum fruatur summo bono, quod ita continet omnia bona, ut animus eo bono plenus non habeat quod appetat, vel requirat amplius. Accedet autem per gloriosam resurrectionem renouatio corporis in beatam, & nunquam fescientem iuuentutem. Comparatur autem hæc renouatio renouationi Aquila-

rum, non quòd Aquila per innouationem, vitam perpetuare possit, sed quòd utcumque adumbrare soleat corporum beatorum resurrectionem, præsertim cum Aquila altissimè volet, acutissimè videat, & diutissimè viuat; quæ erit beatorum hominum felicitas, ut supra cælos conscendant, & ipsam lucem inaccessibilem cernant, & æuo sempiterno fruantur. Quomodo autem Aquilæ renouentur, incertum est. Sanctus Hieronymus in capit. 40. Isaïæ, scribit, Aquilas renouari crebra mutatione pennarum. Sanctus Augustinus in hunc locum narrat, Aquilas renouare rostrum, quod cum nimium creuerit impedit sumptionem cibi, & interitum adfert, nisi ad petram allidatur, & reformetur. Rabini more suo fabellas texunt. Quod attinet ad verba, illud, qui replet in bonis desiderium tuum, a sancto Hieronymo sic redditur, Qui replet bonis ornamentum tuum. Vox hebraica, hedeck, ambigua est: nam & ornamentum, & os significare potest. Sanctus Hieronymus priorem significationem sequutus est, & videtur ornamentum ad coronam retulisse, ut sensus sit, qui coronam tuam ornatissimam reddit, replens eam auro purissimo, & lapidibus preciosissimis. & verè corona gloriæ Beatorum incomparabili varietate decoratur. Tamen Septuaginta Interpretes posteriorem significationem magis probauerunt, & per os, siue buccam, nō os corporis, sed animæ intellexerunt. nimis enim abiectè, & humiliter hunc locum exponunt, qui volunt, sensum esse, Qui replet optimis cibis os tuum corporale. Ergo per os rectè Interpres noster vertit, desiderium, & nos per, desiderium, famem cordis accipimus, quæ tunc satiabitur bonis, cum apparuerit gloria Domini.

Faciens misericordias Domini. VI. nus. & iudicium omnibus iniuriā patientibus.

De-

Declaravit Propheta bona, quæ iustis parata sunt: declarat nunc fontem horum bonorum esse misericordiam Dei; ne quis cum Pelagio hæresiarcha delirans sibi tribuat, quæ Dei sunt, & hoc ipso per superbiam amittat, quæ humilis accepisset. Faciens, inquit, misericordias Dominus, idest, Dominus noster ipse est, qui benefacit, qui largitur munera, qui liberaliter tribuit bona sua: & idem ipse ex bonitate sua liberat omnes oppressos de manibus inimicorum. In hebræo habetur ad litteram, Faciens iustitias Dominus; & sic etiam vertit S. Hieronymus. Sed iustitia hoc loco accipitur pro opere bono, siue pro actu charitatis, quo modo Matth. 6. Dominus eleemosynam vocat iustitiam, dicens, Attendite ne iustitiam vestram faciatis coram hominibus, ut videamini ab eis: alioqui mercedem non habebitis apud Patrem vestrum, qui in caelis est: cum ergo facis eleemosynam, noli tuba canere ante te, &c. quo sensu scripsit S. Augustinus in lib. de natura, & gratia cap. vlt. Inchoata charitas, inchoata iustitia est, perfecta charitas, perfecta iustitia est. Non ergo errauerunt à propria significatione, neque græcus, neque latinus Interpres, qui verterunt, Faciens misericordias Dominus, idest, qui facit eleemosynas multas, & magnas Dominus est. Vna verò ex præcipuis eleemosynis eius est, quod facit iudicium omnibus iniuriarum patientibus: nam & ipsos patientes iniurias, liberat; & facientes iniurias, non relinquit impunitos.

VII. Notas fecit vias suas Moyfi, filijs Israel voluntates suas.

Explicat quod dixit in versiculo superiore: nā Moyfi, singulari seruo suo, notas fecit Deus vias suas, quæ sunt misericordia, & veritas, iuxta illud, Vniuersæ viæ Domini misericordia, & veritas. Notas autem fecit vias suas, quia dedit ei legem sanctissimam, per quam tum ipsi Moyfi, tum omnibus filijs Israel declaravit voluntates suas; quæ sunt, ut sicut ipse misericors est, & ius-

Card. Belarm. in Psal.

tus; ita & nos simus: & hæc ipsa fuit magna Dei misericordia, quod nos ita instruere dignatus sit. Sed præterea notas fecit Moyfi vias suas, & filijs Israel voluntates suas, quia liberavit populum suum de captiuitate Pharaonis misericorditer, & Pharaonem cum exercitu suo interfecit iuste: ita misericordiam, & iustitiam suam euidenti facto demonstravit.

Miserator & misericors Dominus, longanimis, & multum misericors.

Hæc nomina Dei, quæ veracissima scriptura nobis insinuat, mirum in modum consolari possunt homines bonæ voluntatis. Dicitur Deus miserator, hebraicè, rachum, quia paternum affectum habet ad homines pios: siquidem rachani, significat tenerè, & ex visceribus diligere. Dicitur quoque misericors, hebraicè, channum, idest, gratiæ, & donorum largitor, qui enim diligit affectu paterno, non potest non multa liberaliter donare. Sic igitur Deus, qui ab æterno complacuit sibi in electis suis, eosque præsciuit, & predestinauit conformes fieri imaginis filij sui: in tempore plurima eis beneficia contulit, tum nature, tum gratiæ. Dicitur tertio, longanimis, idest, tolerans, patiens, tardus ad iram: sustinet enim Deus infirmitatē, & imperfectionem nostram in hoc itinere ad patriam; quo modo parentes, ac matres potissimum tolerant insipientiam & nugas, offensiones, & ingratitude infantium; & pueritiæ filiorum suorum. Quis ennumeret euagationes nostras, dum cum Deo in oratione colloquimur? quis instabilitates cordis, appetitiones varias, ingratitude, lapsus, delicta dignè consideret? & tamen tolerat nos bonitas Dei: pro qua Dei longanimitate certè par esset, ut frequentissimè, & intentissimè gratias ageremus. In hebræo habetur, erech appain, quod propriè significat, longus naribus. sed natus accipitur pro ira; & ideo rectè vertitur, longanimis, siue tardus ad iram. Dicit ultimo, Et multum misericors:

Sf quod

רחום
רחם
חנן

אריך
אפי

quod referendam videtur ad magnam illam, & ineffabilem misericordiam, qua nos Deus euehet ad æqualitatem Angelorū, & similitudinem Dei, quam tunc accipiemus, cum videbimus eum sicuti est. Itaque quatuor ista nomina significant omnia beneficia Dei à primo vsque ad vltimum. Primum est gratia prædestinationis, siue æternus amor Dei: deinde sequuntur dona iustificationis, & remissionis offensionum variarum. postremo accedit corona gloriæ.

IX. Non in perpetuum irascetur, neque in æternum comminabitur.

Explicat per partes nomina illa Dei, quæ in superiore versiculo posuit: ac primo loquitur de pio affectu Dei erga timentes se. Non in perpetuum, inquit, irascetur, idest, irascetur quidem interdū Deus peccantibus electis suis, eosque flagellabit: sed breui reconciliabitur eis. Manet enim in corde patris paterna pietas, vnde, & ipsa flagella procedunt. Id ipsum alijs verbis repetit, dicens: Neque in æternum comminabitur, idest, non semper iratus minas intentabit, sed vicissim eos blandè consolabitur. Hæc autem promissio non fauet vllō modo errori illorum, qui damnatorum pœnas aliquando finem habituras existimant: non enim ad omnes pertinet, sed restringitur ad Electos timentes Deum timore filiali, vt nō semel in hoc Psalmo explicatur. In hebræo sunt alia verba, sed idem est sensus. sic enim ad verbum sonat hebraicus textus, Non vsque in finem litigabit, neque in perpetuum reseruet, idest, non semper contendet nobiscum obiurgans, & reprehendens facta nostra, neque in perpetuum reseruet iram semel conceptam.

X. Non secundum peccata nostra fecit nobis, neque secundum iniquitates nostras retribuit nobis.

Transit ad secundum nomen, ac di-

cit, Deum ex infinita misericordia sua, non reddidisse nobis pœnas, quas merebamur, sed dona multiplicasse, quæ non merebamur. quid enim meretur iniquus, & peccator nisi mortem? nam stipendium peccati mors. Deus autem non solum non retribuit mortem, sed vitam gratiæ tribuit, & vitam æternam promisit, & interim adiecit abundanter omnia, quibus in hac peregrinatione indigemus.

Quoniam secundum altitudinem cæli à terra, corroborauit misericordiam suam super timētes se.

Quantum distat ortus ab occidente, longè fecit à nobis iniquitates nostras.

Hæc pertinent ad idem nomen secundum: probat enim Propheta, Deum non retribuisse Electis secundum peccata ipsorum, quoniam corroborauit misericordiam suam in beneficijs cumulandis, & in iniquitatibus longissime remouendis. Vtitur aut in cōparationibus mēsurā distantiae cæli à terra, & ortus ab occasu, siue maximæ altitudinis, & maximæ longitudinis, vt offendat remissionem peccati, & infusionem iustitiæ esse verissimam, & maximam: non autem (vt Lutherani somniant) esse solam non imputationem peccati, & imputationem iustitiæ. Secundum altitudinem, inquit, cæli à terra, idest, secundum mensuram distantiae cæli à terra, quæ est maxima, & verissima, Deus confirmavit, & stabilivit misericordiam veræ, summæque iustificationis, & gratiæ super timentes se: & quantum distat ortus ab occidente, idest, secundum mensuram distantiae ortus ab occasu, quæ est verissima, & maximæ, longè fecit Deus à nobis timentibus eum omnia peccata nostra, verè ac propriè illa delens, & remittens, ac si nunquam commissa fuissent.

Quomodo miseretur pater filiorum, misertus est Dominus timentium.

mentibus se: quoniam ipse cognouit figmentum nostrum.

Explicat Propheta hoc versiculo, & duobus sequentibus tertium nomen, videlicet, longanimis. & vitur aptissima comparatione: nulli enim hominum magis patientes & longanimes sunt, quam parentes in tolerandis ineptijs, & leuitatibus infantium filiorum. Siquidem amor paternus, vel maternus cogit parentes assiduus, & incredibili labore seruire paruulis filijs, atque eorum ingratitude, atque iniurias inuicto animo tolerare. Quomodo, inquit, miseretur pater filiorum: misertus est Dominus timentibus se, idest, quomodo parentes carnis nostrae intimo, & inuicto quodam affectu miserentur miseriarum infantium suorum, eorumque infirmitates, & insipientiam tolerant: sic Dominus noster miseretur timentium se, dum eorum errata quotidiana non vt iniurias suas respicit, sed vt aegritudines filiorum considerat. Ipse enim nouit figmentum nostrum, idest, quia probe nouit, nos ex terra plasmatos, carnem mortalem, & concupiscentijs varijs obnoxiam gerere: ac per hoc valde miserabilem esse.

XIIII. Recordatus est, quoniam pulvis sumus; homo sicut fœnum dies eius tanquam flos agri sic efflorescit.

XV. Quoniam spiritus pertransibit in illo, & non subsistet, & non cognoscet amplius locum suum.

Declarat quod dixit, nos esse figmentum, ac dicit, Recordatus est quoniam pulvis sumus, idest, considerauit, misericordia nos dignos esse, quoniam ex puluere compositi, & plasmati sumus, & per hoc pulvis sumus, quantum ad materiam ex qua ipse nos finxit: & cum pulvis simus, instabiles, & fragiles sumus. Dicitur autem Deus recordari, non quod vnquam obliuisci possit, sed quod aliquando ita se gerat, ac si oblitus esset. Addit ad maiorem fragilita-

tis nostrae declarationem aliam similitudinem dicens, Homo sicut fœnum dies eius, idest, hominis dies breuissimi sunt, ac persimiles diebus, quibus fœnum in agro perseverat. nūquam enim fœnum integrum annum permanet: nascitur enim in Vere, & mox in æstate proxima metitur, & colligitur: & sicut fœnum non in toto illo tempore, quo est in agro, floret, sed mane floret, & vespere arescit: sic etiam homo breui tempore viuit, sed multo breuiore durat in flore adolescentiæ, & mox arescit in senectute. Verba textus seruant phrasim hebraicam, sed hoc modo suppleta sunt, Homo sicut fœnum dies eius, idest, homo sic se habet, vt dies eius sint veluti dies fœni, vel duratio vitæ eius similis sit durationi viriditatis fœni. Tanquam flos agri sic efflorescit, idest, & idem homo florebit flore adolescentiæ, sicut floret flos fœni in agro, idest, tempore breuissimo. Quod additur de spiritu transeunte, significat, vitam hominis, non solum esse breuissimam, sed etiam semper mutari, donec extinguatur. hic igitur est sensus, Quoniam spiritus pertransibit in illo, & non subsistet, idest, spiritus vitalis, siue ipsa vita corporalis non permanebit in homine, sed transiens in eo erit, & nunquam subsistet in eodem statu, quia semper mutabitur de infantia ad pueritiam, de pueritia ad adolescentiam, de adolescentia ad iuuentutem, de iuuentute ad maturitatem, de maturitate ad senectutem, de senectute ad mortem. Et non cognoscet amplius locum suum, idest, non redibit ad locum, vnde discessit, nec videbit amplius ætatem, quam semel dimisit. In quo multum distant corruptibilia ab incorruptibilibus, cælestia a terrenis: siquidem Sol & Luna, & stellæ oriuntur mane in oriente, & occidunt vespere in occidente: sed iterum reuertuntur in circulos suos, & nihil immutatæ vident locum, vnde discesserunt: quæ verò oriuntur ex terra cursum suum peragunt, sed currendo mutantur, & non redeunt vnquam ad locum, vnde cursum inchoarunt, sed senescunt & pereunt.

S f 2 reunt.

reunt. Itaque per, spiritum, hoc loco non intelligo, animam rationalem, quæ immortalis est, & in die nouissimo redibit ad corpus: sed spiritum vitalem, siue, vt dixi, vi tam corporalem. Quod si quis velit per, spiritum, hic significari animam rationalem: dicere debet, eiusmodi spiritum non rediturum ad locum suum, idest, ad corpus, vi sua, sed omnipotentia Dei: nec cognosciturum amplius locum suum, quia immutatum inueniet, videlicet corpus immortale reperiet, cum mortale reliquerit. sic Euthymius. Ex hebraeo Sanctus Hieronymus sic vertit, Quia spiritus pertransiuit eum, & non subsistet, & non cognoscat eum ultra locus eius. Quam sententiam Rabini sic exponunt, spiritus, idest, ventus pertransiuit eum, idest, florem feni, & non subsistet flos feni, sed mox vento flante siccabitur, & non cognoscat eum ultra locus eius, idest, non apparebit, vbi fenum floruerit: flos enim a resolis nullo vestigium pulchritudinis suæ relinquit. At nos sequimur Septuaginta Interpretes, qui verba hebraica, quæ ambigua sunt, & vtrunque sensum recipere possunt, non de vento & flore, sed de spiritu vitali, & corpore humano intellexerunt. Ad quam sententiam corroborandam multum valet similis locus ex Psal. 77. Recordatus est, quia caro sunt, spiritus vadens, & non rediens. Vbi per spiritum, non potest intelligi ventus, sed vita humana.

VI. Misericordia autem Domini ab æterno, & vsque in æternum super timentes eum.

Hic tandem explicatur quartum nomen versiculi octauæ, Et multum misericors. pertinet autem quartum hoc nomen ad beneficium glorificationis, quod est postremum, & maximum. Igitur misericordia Domini, quæ fuit ab æterno super timentes eum in prædestinatione, durabit vsque in æternum in glorificatione: atque ita erit Deus multum misericors, siue multitudinem beneficiorum, siue magnitudinem, si-

ue durationem consideremus. Quis autem dignè recogitet quid sit, quod Dominus vniuersorum, qui bonorum nostrorum non eger, iam inde ab æterno misereri decreuerit pulueris huius, id est, hominis, eumque celestibus spiritibus coarquare, atque in æternum sibi summo bono felicissimè inhærere voluerit? certè par esset vt tantæ misericordiae, ne ad momētum quidem obliuisceremur, & perpetuas ei gratias ageremus.

Et iustitia illius in filios filiorum, his qui seruant testamentum eius. VII.

Et memores sunt mandatorum ipsius ad faciendum ea. VIII.

Hæc est quasi-appendix magnæ illius misericordie, quam exercet Deus erga timentes se. Addit enim Propheta, non solum timentes Deum exaltandos, & protegendos ab æterna misericordia Dei: sed etiam eam misericordiam extendendam esse ad posteritatem timentium Deum, modo ipsi parentum, & maiorum suorum pietatem imitentur. Et iustitia illius, idest, veracitas, & fidelitas Dei, qui semper reddit quod promittit; conseruabitur in filiis filiorum his qui seruant testamentum eius, idest, qui obseruant pactum cum Deo initum, vt sint ipsi populus Dei, & Deus sit eorum Deus. Et memores mandatorum eius, non vt solum ea mente, & cogitatione reuoluant, sed vt ea diligenter adimpleant. Sanctus Augustinus per filios timentium Deum, intelligit opera bona ipsorum, & per filios filiorum, mercedem, quæ debetur operibus bonis. Iusti enim pariunt opera iusta, & opera iusta pariunt coronam iustitiæ.

Dominus in cælo parauit sedem suam, & Regnum ipsius omnibus dominabitur. IX.

Demonstrat Propheta, posse Deum facere quæ promisit timentibus se, & filiis filiorum ipsorum, quoniam Deus

Iudex

Iudex est omnium, & ideo parauit, & stabilivit (vtrunque significat vox hebræa) sedē suam, idest, thronum suum iudicarium, in altissimo loco, idest, in summo cælo, vnde omnes prospicere, & iudicare possit: & ne forte suspicemur, Deum esse Iudicem ab aliquo Rege constitutum, addit, Et regnum ipsius omnibus dominabitur, idest, sedem habet in cælo, non vt Iudex sub Rege, sed vt Iudex supremus, & Rex super omnes Reges. Regnum enim ipsius, idest, regia eius potestas omnibus omnino rebus creatis dominabitur.

XX. Benedicite Domino omnes Angeli eius; potentes virtute, facientes verbum illius, ad audiendam vocem sermonum eius.

In extrema parte Psalmi inuitat Propheta omnes alias creaturas ad benedicendum Domino, & prædicandas laudes eius, quoniam videbat, se non esse vllō modo parem ad agendas gratias tanto benefactori: ac primum inuitat Angelos, qui sunt nobilissimæ creaturæ, & idonei maximè ad Deum laudandum. Nos enim minus idonei sumus, tum quia debiles, ac fragiles sumus; tum quia frequenter peccamus, & non est speciosa laus in ore peccatoris. Angeli verò fortissimi sunt, neque vnquam fatigantur; & semper obediunt Deo, ac per hoc numquam peccant, semper grati, & amici sunt. Benedicite Domino omnes Angeli eius, idest, laudate communem Dominum vos Angeli, qui propius illi assistitis, & magnitudinem eius perfectius nostis: & non vnus, aut duo, sed omnes omnino, quotquot estis, qui propè innumerabiles estis, cōuenite ad laudandum: omnes, inquam, qui Angeli eius estis, qui ab illo non solum conditi fuistis, sed etiam cum illo, ceteris cadentibus, permanistis, illiq. in æternum felicissimi inhæretis. Potentes virtute, idest, præditi robore maximo ad exequenda omnia mandata Dei, quique casum nullum timetis, neq. est, qui vos à laudibus Dei prohibere possit. Facientes

Card. Belarm. in Psal.

verbum illius, idest, qui Dei mandata semper accuratè perficitis. Ad audiendam vocem sermonum eius. Hæc vltima particula duobus modis potest intelligi. Vno modo, vt sensus sit, Facientes verbum illius ad audiendam vocem sermonum eius, idest, mox vt audierint vocem sermonum eius: ita vt significetur celeritas obediendi, ac si dictum esset, Facientes verbum illius in audiendo vocem sermonum eius. Altero modo, vt significetur causa finalis executionis mandatorum Dei, quæ est desiderium obediendi Deo; & sensus sit, Facientes verbum illius ad audiendam vocem sermonum eius, idest, exequentes mandata Dei ad hunc finem, vt obediant voci eius, & se fideles seruos probent; non ob aliquam suam vtilitatem, vel necessitatem. Atque hæc videtur expositio literalis: nam textus hebræus, & græcus, non facile admittunt illum sensum, Ad audiendam vocem, idest, in audiendo vocem.

Benedicite Domino omnes virtutes eius, ministri eius, qui faciunt voluntatem eius. XXII.

Ne fortè per Angelos, qui inuitantur ad benedicendum Deum, intelligeremus solos Angelos vltimi chori; addit Propheta in hoc versiculo, omnes virtutes Domini, idest, omnes exercitus cælestes, videlicet Archangelos, Principatus, Dominationes, & cæteros ordines superiores: nam in hebræo habetur, omnes exercitus eius; & quod Angeli sint militia cælestis exercitus, docet sanctus Lucas cap. 2. Sunt quidem milites, & ministri Dei omnes res creatæ: sed in Scriptura, vt plurimum per virtutes, intelliguntur Angeli, ac præsertim in Psalm. 148. Laudate eum omnes Angeli eius, laudate eum omnes virtutes eius. & hunc locum ita exponunt Theodoretus, Euthymius, & alij. Nam de alijs rebus creatis agitur in sequenti versiculo. Ait igitur, Benedicite Dominum omnes virtutes eius, idest, non solum Angeli propriè dicti, sed omnis militia cælestis exercitus:

Sf 3 qui

qui omnes ministri Dei estis, & impletis diligenter, & assidue, quicquid ille vobis mandat.

XXII. Benedicite Dominum omnia opera eius, in omni loco dominationis eius. Benedic anima mea Domino.

Posteaquam inuitauit Propheta ad laudes Dei homines, & Angelos, qui Dei notitiam habent, & cum propriè laudare possunt: inuitat etiam omnes alias res creatas, quamuis mente, vel sensu, vel vita careant, vt etiam ipsæ suo modo opificem suum laudent. Ac ne quis exciperet aliquid, & intelligeret Prophetam loqui de omnibus operibus, quæ sunt in cælo, aut in terra, aut in mari, addit, In omni loco dominationis eius, idest, benedicite Dominum omnia opera eius, omnia omnino vbicunque sitis: nam omnia ipse fecit, & omnibus dominatur, & ipse cum eis vbique est, omnia replens, omnia portans, omnia conseruans, omnia mouens. Tu verò anima mea, quæ omnia ad laudem inuitasti, benedic Dominum in omni tempore; semper laus eius in ore tuo sit.

PSALMVS CIII.

Titulus, & Argumentum.

Ipsi David.



HIC Psalmus apud hebræos non habet titulum. Apud Græcos inuenitur hic titulus, Ipsi David pro Mundi constitutione. Sed eiusmodi titulum, neq; sanctus Hieronymus, neq; sanctus Augustinus, neque Theodoretus in suis codicibus inuenerunt. Proinde à recentioribus additus videtur. In latinis codicibus habetur, Ipsi David, vel, Psalmus David. Videtur autem hic Psalmus recto ordine positus post Psalmum præcedentem: in illo enim aguntur gratiæ Deo pro beneficijs gratiæ, in isto pro beneficijs naturæ: ibi

laudatur Dei misericordia, hic prædicatur Dei sapientia. Ac primum cantatur gloria Dei ex mirabilibus, quæ sunt in cælo: deinde ex ijs quæ sunt in aere: tum ex ijs, quæ sunt in terra: postremò ex ijs, quæ sunt in mari.

Explicatio Psalmi 103.

Benedic anima mea, Domino, Domine Deus meus magnificatus es vehementer.

Excitat Propheta animam suam ad benedicendum, idest, laudandum Deum. & mox anima excitata exurgit in admirationem, & laudem dicens: Domine Deus meus magnificatus es vehementer, idest, ex operibus tuis magnus valde factus es in oculis omnium, qui quoquomodo gloriam tuam aspicere possunt: non enim Deus in se crescere potest, cum sit immensus, & infinitus; sed apud Angelos, & homines tanto fieri potest maior, quanto magis notitia eius crescit ex contemplatione potentiz, & sapientiz, & bonitatis, quæ lucet in operibus eius.

Confessionem, & decorem induisti, amictus lumine, sicut vestimento.

Declarat, quomodo Deus magnificatus sit, adhibita insigni similitudine vestimenti: quomodo enim ex gloriosa veste cognoscimus Pontificem, Regem, atque alias sublimes potestates: sic etiam ex gloria, qua Deus quasi circumdatus est, cognoscimus eius potentiam, & sapientiam. & quidem Deus in se lux est, & tenebræ apud eum non sunt ullæ, vt scribitur 1. Ioannis 1. tamen ea lux inaccessibilis est, & eam nullus hominum vidit, sed nec videre potest, vt dicitur 1. Timoth. 6. Sed præter eam lucem, est alia quædam lux gloriæ, idest, splendor, qui ex operibus eius micat: & de hoc loquitur Propheta, cum ait, Confessionem, & decorem induisti, idest, confessionem laudis, quam assidue decantant opera tua, tibi quasi

et c.

vestimentum vndique circundedisti : & quoniam nihil pulchrius est luce , siue gloria ; ideò induisti decorem , & pulchritudinem , dum amictus es lumine gloriæ , quod ex operibus tuis emicat. Hic admonendi sumus mirum valde esse , quòd oculi corporis nostri , etià si Solem ipsum intueri nequeat : tamen ex lumine quo cinctus est Sol , facillimè & adesse , & pulcherrimum esse iudicèt : & oculi cordis nostri tam difficulter erigantur ad Deum , & eius immensam pulchritudinem vix tenuiter sentiant , cùm tamen vndique cinctus sit splendore maximo , & pulcherrimo , qui ex admirandis eius operibus lucet , & ipse sit , qui illuminat omnem hominem venientem in hunc mundū . Sed huius rei nulla videtur esse alia ratio , nisi quia cor gerimus puluere carnalium cogitationum , & affectionum quasi cæcatum . Beati enim mundo corde , quoniam ipsi Deum videbunt . Certè enim si cor mundum haberemus , Deum in operibus suis , & gloriam eius omnia replentem facillè intueremur ; & cum Abrahamo , Elia , & Eliseo diceremus , Deus in cuius conspectu sto . vide Genes. 24. 3 . Reg. 17. & 4 . Reg. 3 .

III. Extendens cælum sicut pellē , qui tegis aquis superiora eius.

Incipit demonstrare lumen potentia , & sapientia Dei , quod cernitur in creatione firmamenti , siue cæli ; & duo quædam valde admiranda in eo considerat , & à nobis considerata proponit . Vnum est , quòd Deus tanta facilitate extenderit immensam molem firmamenti , & eo circundederit omnia corpora inferiora ; quanta solent homines extendere tabernaculum vnum , siue tentorium ex pellibus confectum . Alterum est , quòd Deus miro artificio posuerit aquas supra cælū , quasi aquas super ignem , & tamen neque aquæ extinguant ignem , neque ignis consumat aquas . De his aquis multa Scholastici disputant : sed communis Patrum sententia esse videtur , aquas esse super æthereum cælum , quod Firmamentum

dicitur ; non autē supra cælum æreum tantum , vbi sunt nubes . Vide inter cæteros Basilium homilia 3 . Hexameron , Chrysostomum homilia 4 . super Genesim , Ambrosium lib. 2 . Hexameron cap. 3 . & 4 . Augustinum lib. 2 . super Genesim cap. 4 . & in hunc Psalmum 103 . Eucherium libro 1 . in Genesim cap. 3 . Procopium in primum cap. Genesim , Theodoretum quæst. 11 . in Genesim , Bedam lib. de natura rerum cap. 7 . & 8 . Quod ad verba attinet , illud , Extendens , valde propriè dictum est , quoniam Firmamentum hebraicè dicitur , rachiag , idest , extensio , siue expansio . Illud , qui tegis , contendunt aliqui recentiores , legendum esse , qui tegit ex textu hebraico , & græco : & mirantur , quòd latini codices habeant , qui tegis . At hebræi , & græci codices habent participium , tegens aquis , quod ambiguum est , & potest referri tam ad secundam personam , quàm ad tertiam . Congruentius autem est , vt ad secundam referatur , cùm præcesserit , Confessionem , & decorem induisti , vbi est expressa secunda persona , etià in codicibus græcis , & hebraicis . Alloquitur ergo Propheta Deum , & illi dicit , Tu qui induisti confessionem , & decorem ; tu extendis cælum sicut pellem : tu tegis aquis superiorem partem cæli , &c. Adde quod sanctus Hieronymus vertit ex hebræo , Qui tegis , & sic etià legit in textu , quem exponit ex versione Septuaginta Interpretum ; & in epist. ad Suniam , & Fretellam contendit , hunc locum , & sequentes esse legendos in secunda persona , vt nos in editione latina vulgata legimus .

קִיִּי

Qui ponis nubem ascensum tuum , qui ambulas super pennas ventorum.

II II.

De cælo æthereo descendit Propheta ad cælum æreum : & canit admirabilem Dei sapientiam in velocitate nubium , quæ vi ventorum stupenda celeritate transeunt ab vna parte mundi ad aliam . Aliquando enim serenum ærem cōspiciamus , & mox in ictu ocu-

Si 4 li fian

li flante austro cernimus eundem aerem obductum nubibus: & contra, videmus interdum aerem nubibus vndique coopertum, & mox flante Aquilone cernimus nubes omnes in puncto temporis dissipari. Describit autem hæc omnia more poetico, ac si Deus infideat nubibus, quasi in curru, & vtatur ventis, quasi equis pennigeris. Sed hac metaphora nihil significatur aliud, nisi Deum esse principalem auctorem omnium rerum, & eius nutu ventos moueri, & nubes adduci, vel abduci. In hebræo, & græco habetur in tertia persona, Ascensum eius, siue currum eius. Sed sanctus Hieronymus ex hebræo vertit, Currum tuum; ex quo apparet eum sic legisse in suo codice hebraico. Sic etiam legit in commentario; & sic docet esse legendum in epist. ad Suniam, & Fretellam. proinde nostra lectio non est mutanda, cū à tanto Doctore præponatur cæteris.

V. Qui facis Angelos tuos spiritus, & ministros tuos ignem vrentem.

Nisi obstaret auctoritas Apostoli, potuisset hic locus intelligi de procellis, & fulgoribus, quæ sunt in aere; vt sensus esset, Qui facis, vt spiritus procellarum sint Angeli tui, idest, nuncij tui ad homines admonendos, & vt ignis vrens, idest, cælestia fulgura aut fulmina sint ministri tui ad homines puniendos. Sed quoniam Apostolus ad Hebræos 1. exponit hunc locum de Angelicis spiritibus, & hinc argumentum ducit ad probandam Christi diuinitatem, & præstantiam super Angelos: dicendum est, Prophetam loqui de veris Angelis, ac dicere voluisse, non solos ventos, ac nubes velocissimè discurrere per aerem, vt Deo iubilianti seruiant; sed habere Deum ministros longè sublimiores, & potentiores, Angelos videlicet, quos mittat ad homines vel admonendos, vel puniendos. Potest autem duobus modis intelligi hæc sententia. Vno modo sic, Qui facis Angelos tuos spiritus, idest, qui facis,

vt spirituales creaturæ, quæ tibi in celo semper assistunt, fiant Angeli tui, idest, fiant nuncij tui ad homines instruendos; & ministros tuos ignem vrentem, idest, qui facis, vt eadem illæ spirituales creaturæ, quæ charitate semper ardent, fiant ministri tui ad efficienda celerrimè, & efficacissimè quæcunque iusseris. Atque hæc est expositio Sancti Augustini hoc loco, & Sancti Gregorij homil. 34. super Evangelia. Altera expositio faciliior, & fortasse magis literalis est Theodoret in hunc locum, & sancti Thomæ in cap. 1. ad Hebræos, qui sic exponunt, Qui facis Angelos tuos spiritus, & ministros tuos ignem vrentem, idest, facis vt Angeli ministri tui habeant velocitatem spirituum, idest, ventorum, & efficaciam ignis vrentis: atque ita sint veluti quidam venti spirituales in discurrendo, & veluti quidam ignes diuini in operando. Comparat autem Prophetam sanctos Angelos ventis, & ignibus, non quòd non sint velociores ventis, & potentiores ignibus; sed quia nos nihil nouimus inter hæc corporalia, quibus aptius Angelorum velocitas, & efficacia conferri possit. Fauet huic expositioni etiam sanctus Hieronymus in commentario huius loci: & quod maius est, textus græcus tum in Psalmo, tum in Apostolo ad Hebræos cap. 1. nam in vtroque loco videmus articulum addi ad nomina, Angelos & ministros, non autem ad nomina, spiritus & ignem. Vna restat difficultas, quòd apud Apostolum etiam in editione latina vulgata legitur in tertia persona, Qui facit Angelos suos spiritus; quo modo etiam legitur in textu hebræo, & græco in libris quos nunc habemus. In editione autem latina vulgata legitur in hoc Psalmo in secunda persona, Qui facis Angelos tuos spiritus: quam lectionem probat Sanctus Hieronymus in epistola ad Suniam, & Fretellam. Sed responderi potest, Apostolum non fuisse sollicitum de verbis, sed de sensu: sensus autem idem est, siue illum exprimamus alloquendo Deum, siue narrando.

Qui

VI. Qui fundasti terram super stabilitatem suam, non inclinabitur in seculum seculi.

Ab aere descendit ad terram Prophe-
ta; & quoniam ea est sedes nostra, &
nobis notior quam sint aliæ partes mū-
di, diutius in ea consideranda, & admi-
randa opera Dei, quæ in ea conspiciun-
tur, describenda immoratur: ac pri-
mum incipit ab eius creatione, & con-
siderat admirabilem Dei potentiam,
quæ terram, molē utique maximam,
& grauissimam sine ullo fundamento
posuit in medio mundi, ita ut ipsa non
in fundamento aliquo, sed in sua sta-
bilitate nitatur. Qui fundasti, inquit,
terram super stabilitatem suam, id est,
non crexisti terram super aliquod fun-
damentum, sed voluisti, ut suo pon-
dere niteretur. Non inclinabitur in
seculum seculi, id est, præceptum tuum
solidius est omni fundamento, & ideo
quia sic iussisti, sic fiet, ut videlicet ter-
ra suo pondere innixa æterna stabili-
tate consistat.

VII. Abyssus sicut vestimentum ami-
ctus eius, super montes sta-
bunt aquæ.

VIII. Ab increpatione tua fugient,
à voce tonitruui tui formidabunt.

IX. Ascendunt montes, & descen-
dunt campi, in locum quem fun-
dasti eis.

X. Terminum posuisti, quem non
transgredientur, neque conuer-
tentur operire terram.

Deinde considerat Propheeta, qualis
fuerit terra initio creationis suæ; quod
videlicet fuerit vndique cincta aquis,
quasi vestibulis: & tamen solo imperio
voluntatis suæ Deus aquas concluderet
in locis terræ humilioribus, & poten-
tia, ac sapientia sua fecerit, ut magna
ex parte terra emineret, & redderetur
apta ad gignendas herbas, & fruges,
& ad animantia sustentanda, & alen-
da. Id autem factum est ex condensa-
tione aquarum: initio enim aquæ non

tam erant perfectæ aquæ, quàm vapo-
res aquei, qui condensati descenderunt
ad concauitates terræ: & fortasse hoc
significauit Sapiētia apud Eccles. c. 24.
cū ait, Ego sicut nebula texi omnem
terram. Sed Dauid more poetico hæc
describit. Abyssus, inquit, sicut vestimē-
tum amictus eius, id est, initio creatio-
nis terra erat cincta, & veluti amicta
profunditate aquarum, quasi vestimen-
to quodam vndique cooperta. Abyssus
enim vocat profunditatem aqua-
rum, de qua dicitur Gen. 1. Tenebræ e-
rant super faciem abyssi: & tunc super
montes stabant aquæ, id est, vapores
aquei, siue nebula illa altissima ipsos
etiam montes cooperiebat: dicit au-
tem stabunt, pro stabant. Hanc enim
vim habet futurum apud Hebræos, ut
significet cōtinuationem, qualis apud
nos significatur per præteritum imper-
fectum. Ab increpatione tua fugient,
à voce tonitruui tui formidabunt, id est,
aquæ, quæ vndiq; terram operiebant,
solo Dei nutu condensatæ descende-
runt ad loca decliuiora; fuit enim nu-
tus diuinus aquis instar terribilis in-
crepationis, & quasi tōnitruum rebus
sentientibus. Ascendunt montes, &
descendunt campi in locum quem fun-
dasti eis, id est, tunc cœperunt appare-
re montes in loco sublimi, quasi ascen-
dissent; & simul cœperunt apparere
campi in loco humili, quasi descendis-
sent: omnia verò constiterunt in lo-
co, quem constituisti eis. vel ascendunt
montes aquarum, & descendunt cam-
pi aquarum, dum ab increpatione Dei
timentes aquæ magno fremitu attol-
lunt fluctus suos, & deponunt, donec
ad locum sibi paratum perueniant:
nam & Poeta dixit, Quanti montes
voluuntur aquarum. Terminum posui-
sti, quem non transgredientur, neque
conuertentur operire terram, id est, a-
quis recedentibus, & in cauernis ter-
ræ conclusis terminum posuisti, quem
non transgredientur neque conuer-
tentur ex se, aut vi sua, cooperire terram.
Nam quod tempore diluuii conuersæ
sint, & terram cooperuerint; id factū
est diuino iussu, & virtute. Porro ter-
minus,

minus, quem Deus posuit aquis, est arena ex Iob cap. 39. & ex Hierem. cap. 5. arena videlicet littoris altioris: tunc autem Deus hunc terminum posuit, quando instituit naturas elemētorum: aquarū siquidem, cum fiat naturaliter grauiorē aere, semper descendunt ad loca decliuiora, & relinquunt aeri loca sublimiora.

- XI. Qui emittis fontes in conualtibus, inter medium montium pertransibunt aquarū.
- XII. Potabunt omnes bestię agri, expectabunt onagri in siti sua.
- XIII. Super ea volucres cœli habitabunt, de medio petrarum dabunt voces.

Tertio considerat Propheta, mirabilem Dei sapiētiam in productione fontium, & fluminum: nam si aquarū recedentes à terra, aridam illam omnino dimississent, animantia terrę siti consumerentur; ideo sapiētia Dei produxit fontes aquarum dulcium, & ex fontibus fluuios, qui vbique discurrant, & potui animantium omnium deseruiāt. Porro fontes in mōtibus originem habent; sed aquarū fontium ad conualles defluunt, & hic videtur esse sensus verborum, Qui emittis fontes in conualtibus, id est, qui facis, vt aquarū fontium ad conualles defluant, & inter medios montes riuuli earum pertranseant. Potabūt omnes bestię agri, & præsertim onagri, Asini videlicet syluestres, qui in montibus degunt, & natura siticulosi sunt, anhelabunt ad eiusmodi aquas. Nec solum animalia quadrupedia de fontibus bibent; sed etiam volucres cœli iuxta aquas in locis editioribus nidos suos ponent, vt iisdem aquis frui possint, & ex cauernulis suis voces dabunt, canētes quomodo possunt laudes Domino. Illud, onagri expectabūt in siti sua; ex hebræo S. Hieronymus vertit, Onager reficiat sitim suam. Sanctus Augustinus verò legit, Suscipient onagri in sitim suam. Vox hebraica, isberu, vt nunc legitur cum puncto in sinistro cornu significat, frangēt sitim,

id est, sedabunt, & reficient: sed Septuaginta legerunt cum puncto in dextro cornu, quod significat, sperabunt, siue expectabunt, & sensus est, Onagri ad sitim suam sedandam expectabūt, hoc est, desiderabunt, sperabunt, quærent, aquas fontium. In græco nunc legitur προσδέσονται, id est, suscipient, vel verisimile est eos scripsisse προσδεχόμενται, id est, expectabunt. certè noster interpretas ita omnino legisse videtur. Illud super ea, refertur ad fontes, & aquas inter montes discurrentes. Illud de medio petrarum, S. Hieronymus vertit, medio nemorum. Vox hebræa, haphaim, significat frondes, & ramos arborum. sed Septuaginta Interpretes aut legerunt, cephaim, quod significat petrarum: aut quod verius censeo, sensum respexerunt, non verba: volucres enim inter frondes quidem, & ramos arborum, sed in rupibus, & petris montium nidulos ponunt. proinde vtrunque est verum, & quod ex medijs frondibus, & quod ex medijs petris cantus suos edant.

וְיִשְׁכְּבוּ

וְיִשְׁכְּבוּ

Rigans montes de superiori- XIV.
bus nostris: de fructu operum
tuorum satiabitur terra.

Producens fœnum iumentis, & XV.
herbam seruituti hominum.

Vt educas panem de terra, & XVI.
vinum lætificet cor hominis.

Vt exhilaret faciem in oleo, & XVII.
panis cor hominis confirmet.

Quarto considerat, & canit Prophe-
ta aliam admirabilem prouidentiam
Dei, qui præter fontes, & flumina, quæ
non possunt irrigare loca superiora
montium, & collium, neque ad omnes
agros deriuari, excogitauit pluuias,
quæ ex nubibus, tanquam fontibus cœ-
lestibus omnia omnino loca terrestria
irrigare possunt, vt inde satiata terra
possit herbas, & fruges producere in
alimenta viuientium super terram. Ri-
gans, inquit, montes de superioribus
suis, id est, Deus rigans est, siue irrigat
mon-

יִשְׁכְּבוּ

יִשְׁכְּבוּ

montes, ad quos flumina non pertinent, de superioribus suis, idest, de nubibus, quæ sunt in aere superiore. De fructu operum tuorum satiabitur terra, idest, de aquis, quas tu ex nubibus tuis exprimis, terra arida, & sitibunda satiabitur. Producentis fœnum iumentis, & herbam seruituti hominum, idest, per hanc providentiã tu Deus producentis, siue producis ex terra fœnũ in cibum iumentorum: & herbam, unde fruges, & vites, & arbores existunt, in cibum hominum. Ut educaſ panem de terra, idest, ut hac ratione producaſ ex terra cibum. Panis enim sæpe accipitur in scriptura pro cibo generatim sumpto: hoc autẽ loco dicimus accipi pro cibo, tum quia ita explicat Theodoretus, tum quia de pane propriẽ dicto paulò infra fit mentio: subiungit enim Propheta, Et vinum lætificet cor hominis, idest, & vinum à te productum lætificet cor hominis. Ut exhilaret faciem in oleo, idest, ut homo exhilaret faciem suam in oleo à te producto; & panis cor hominis confirmet, idest, panis sustentet, & roboret vitam humanã. Hoc loco pauca quædam annotanda sunt. Primum, Deum esse auctorem omnium bonorum, quæ ad vitam corporalem sustentandam, & delectandam pertinent; quamvis enim laborent homines fodiendo terram, seminando fruges, plantando arbores, ponendo, ac putando vites: tamen nisi Deus solem suum oriri faceret, & nisi de cœlo plueret, & nisi fœcunditatem terræ præberet, & nisi vires hominibus suppeditaret, & cum ijs cooperaretur, nihil omnino fieret. & quoniam potest Deus sine causis secundis omnia facere, ut fecit initio mûdi; & secundæ causæ nihil sine Deo possunt efficere; verissimẽ dicit Apostolus, Neque qui plantat est aliquid, neque qui rigat, sed qui incrementũ dat Deus, 1. Cor. 3. &, non sine testimonio semetipsum reliquit benefaciens de cœlo, dans pluuias, & tempora fructifera, implens cibo, & lætitia corda nostra. Actorum 14. & rursus, Ipse dat omnibus vitam, & inspirationem, &

omnia. Et in ipso vivimus, movemur, & sumus. Act. 17. Verissimẽ quoque canit hoc loco Psalmographus, Deum esse, qui producit fœnum iumentis, panem, vinum, & oleum hominibus. Ex quo apparet incredibilis multorum hominum ingratitudo, qui cum tanta bona, imò omnia bona à Deo recipiant, nunquam tamen erigunt oculos mentis in cœlum, ut agnoscant Patrem amantissimum à quo tanquam filij ex paternis bonis aluntur, & sustentantur. Secundò notandum est, Deum, ut Parentem verè pium, & amantem filiorum, non solum nobis dedisse, quæ necessaria sunt ad vitam sustentandam, panem videlicet, & aquam: sed etiam addidisse quæ iucundiores, & suaviores potum, & cibum facere poterant, ut solatium aliquod in laboribus haberemus: dedit enim vinum ad cor lætificandum, iuxta illud, Prouerb. 31. Date vinum his, qui amaro sunt animo: dedit, & oleum, vel ad vngendam, & illustrandam faciem, vel etiam ad cibum, ut Theodoretus docet: ut videlicet admixtum herbis, & leguminibus suaviorem cibum efficiat, & homo exhilaret faciem suam in eo cibo percipiendo; vel, ut Deus exhilararet faciem hominis in oleo, dum ei cibum oleo conditum porrigit; facies enim nitidior apparet cum homo nutritur ijs, quæ sapiunt. Hinc Monachi veteres apud Cassianum in collationibus, ut hospitibus lautiores cibum apponerent, olera, vel legumina oleo condiebant. Tertiò notandum est, hinc admoneri homines, frugali victu, & potu sobrios contentos esse debere: moderata enim iucunditas à Deo est; supernacaneæ delicie, & varia irritamenta gulæ, ac multò magis crapula, & ebrietas à Diabolo sunt.

Saturabuntur ligna campi, & Cedri libani, quas plantauit: illic passeret nidificabunt. XVIII.

Herodij domus dux est eorum, XIX. montes excelsi Ceruis, petra refugium herinacij.

Quia-

Quinto, considerat Propheta diuinam prouidentiam in eo quod Deus ipse sine vlla opera hominum producit, & nutrit arbores valde proceras, quales sunt cedri libani: quæ arbores deseruiunt habitationi, & latibulo auium quarundam; quemadmodum montes refugium præstant ceruis, & petra herinacijs. Saturabuntur, inquit, ligna campi, idest, ex pluuijs humorem sibi debitum sument arbores syluestres, & præcipue cedri libani, quas Deus ipse plantauit. In hebræo legitur, ligna Domini. sed Septuaginta Interpretes explicare voluerunt, cur dicantur ligna Domini, & ideo posuerunt ligna campi; dicuntur enim ligna Domini, quia non plantantur, nec irrigantur ab hominibus; sed iubente Domino sponte nascuntur in campis, & irrigantur pluuijs de cælo cadentibus. Et cedri libani, quas plantauit. In hebræo, & græco textu non habetur, &, sed explicatur, quæ sint illa ligna campi, siue Domini, & dicitur, cedri libani, quas plantauit, idest, ligna illa Domini, sunt cedri libani, quas Dominus ipse plantauit in campis: quare vel in textu latino irrepsit, &, vitio scriptorum: vel explicandum est, vt nos diximus, ligna campi, & præcipue cedri libani, quas Dominus plantauit, idest, sponte nasci voluit absque hominum industria. Illic passerres nidificabunt, idest, in his agrestibus arboribus nidos suos ponent aues, vt tutiores sint ab aucupibus. Nā apud Hebræos nomine passerum intelliguntur omnes auiculæ. Herodij domus dux est eorum, idest, milui, aut fulicæ, aut ardeæ, aut ciconiæ nidus præminet nidulis aliarum volucrum, tum magnitudine, tum altitudine. vox hebræa, chasidā, & græca Herodius significat miluum apud Hieronymum, fulicam apud Augustinum, ciconiā apud Suidam; ardeam apud Plinium. certe magna auis significatur, quæ nidum maiorem, & altiorem habeat, quam aues cæteræ. In hebræo habetur, Herodio abietes domus ipsius, idest, Herodius in abiete nidum ponit. Cæterum Septuaginta Interpretes non vi-

dentur legisse, beroscim, idest, abietes, sed, beroscem, idest, dux eorum, siue in ducem eorum: sed res non est magni momenti. Montes excelsi ceruis, petra refugium herinacijs, idest, sicut magnæ arbores præbent refugium volueribus, sic montes ceruis, & lapideæ cauernæ herinacijs. In græco habetur leporibus pro, herinacijs, & sic legit S. Augustinus: sed S. Hieronymus in Epistola ad Suniam, & Fretellam dicit, voce hebraica significari animal quoddam simile muri, & vrsi, non minus ericio, quod in Palestina frequens est, & in caueruis petrarum habitat.

נְרוֹסִים
מִאֲשֵׁם

Fecit Lunam in tempora, Sol xx.
cognouit occasum suum.

Posuisti tenebras, & facta est xxi.
nox: in ipsa pertransibunt omnes
bestiæ sylvarum.

Catuli Leonum rugientes, vt xxii.
rapiant, & quærant à Deo escam
sibi.

Ortus est Sol, & congregati xxiii.
sunt, & in cubilibus suis collocantur.

Exibit homo ad opus suum, & xxiv.
ad operationem suam vsque ad
vesperam.

Sexto considerat, & laudat Propheta diuinam prouidentiam, quæ diuisit tempora operibus hominum, & ferarum. Siquidem feris attribuit noctem, vt quærant sibi prædam in cibum; hominibus attribuit diem, vt operando victum sibi parent. Fecit, inquit, lunam in tempora, sol cognouit occasum suum, idest, Dominus Deus ad vsum hominum, & animantium cæterorum fecit lunam in tempora, idest, vt tempore opportuno luceret, per noctem videlicet; nā vox hebraica, mohadim, & græca μηνός, non significant quælibet tempora, sed tempora opportuna, & apta ad opera facienda. Sol cognouit occasum suum, idest, sol quoque nō semper est super terram, sed nouit suo
tem-

מִן הַיָּמִים

חֲסִידָה

tempore occumbere, vt det locum nocti, quemadmodum diuina prouidentia disposuit. Posuisti tenebras, & facta est nox, in ipsa pertransibunt omnes bestię syluę, id est, ex hac vicissitudine solis, & lunę, tu Domine fecisti, vt suo tēpore occumbente sole existerent tenebrę, & sic fieret nox: & ipsam dedisti syluestribus animantibus, vt per syluas discurrerent: & potissimū catuli leonum rugientes prę fame, in rapinam incumbant, & hoc modo querant à Deo escam sibi, id est, querant sibi cibum eo modo, quem diuina prouidentia statuit. Ortus est sol, & congregati sunt, & in cubilibus suis collocabuntur, id est, diuina prouidentia facit, vt oriente sole ferę syluestres, per noctē dispersę ad prędam, congregentur in speluncis suis, & in suis quasi cubilibus collocentur. Exhibet homo ad opus suū, & ad operationem suam vsq; ad vespēram, id est, exorto sole, & teras in antra sua cogente, surget homo, & in agrum exhibet ad opus suum, ad agriculturā videlicet, & ad operationem suā, id est, ad laborem suum, siue vt habetur in hebręo, ad seruitutem suam vsque ad vespēram. Hinc admonemur, bestijs, quę ratione, & manibus carēt, datum esse à Deo, vt per insidias nocturnas ex raptu viuant: hominibus vero, qui ratione, & manibus ornatī sunt, prohibitas esse rapinas, & insidias, cum possint ex iusto labore manuum suarum terram exercendo, vel mercaturā faciendo viuere. Proinde fures, & latrones, & quicumque insidians, decipiendo, mentiendo, rapiendo vitam ducunt, ordinem diuinę prouidentię, quantum in se est, perturbant, & de illis rectē dici potest, Homo cum in honore esset, non intellexit, comparatus est iumentis insipientibus, & similis factus est illis.

XXV.

Quam magnificata sunt opera tua Dñe? oīa in sapientia fecisti; impleta est terra possessione tua.

Hęc est exclamatio ex admiratione operum Dei circa terram, & quasi confusio sex considerationum pręceden-

tium. miratur autem Propheta excellentiam, rationem, & numerum operum Dei. de excellentia dicit, Quam magnificata sunt opera tua Dñe, id est, quam sunt eximia, pręstantia, & laude, ac prędicatione digna. Ex hebręo S. Hieronymus vertit, quam multiplicata sunt; sed vox hebraica, rabbu, vtrunq; significat, multiplicata sunt, & etiam magna, siue magnificata sunt, quasi multę excellētīę. Quomodo nomen, Rabbi, significat Magistrū, quasi multę scientię, siue magnū in sciētia. Rectē autē Septuaginta Interpretes, quos latinus sequutus est, verterūt, magnificata sunt, nō multiplicata sūt; quoniam de multitudine agitur in fine versiculi. De ratione dicit, Omnia in sapientia fecisti, id est, nihil in operibus Dei factū est temere, aut casu, sed omnia facta sunt cū maxima ratione, & iudicio. nihil deest, nihil abundat, nihil denique est, cuius non sit ratio in sapientia Dei. Demonstrat hoc Galenus in libro de partibus, vbi stupore maximo admiratur artificiū authoris naturę in fabricatione manus & aliorum membrorū corporis humani. de numero dicit, Impleta est terra possessione tua, id est, hęc opera tam eximia, & tam sapienti artificio condita, non pauca sunt, sed fere innumerabilia, ita vt terram vniuersam repleuerint. vocat autem Propheta res creatas, quibus plena est terra, possessionem Dei, quoniam Deus est Dñs omnium rerū, & ideo Dominus, quia oīa fecit; hanc enim vim habet vox hebraica, kinianechea. deriuatur enim à verbo kanā, quod significat possidere ex pductione. vt Gen. 4. Possedi hoīem per Deum, id est, genui filium, & sic possedi illum. Impleta est ergo terra possessione Dei, quia plena est rebus, quas Deus possidet, & possidet, quia fecit.

רבו

קניניה

קננה

Hoc mare magnum & spatio-
sum manibus: illic reptilia quorum non est numerus.

XXVI.

Animalia pusilla cum magnis, illic naues pertransibunt.

XXVII.

Draco

XXVIII.

Draco iste, quem formasti ad illudendum ei: omnia à te expectant, ut des illis escam in tempore.

Laudauit Propheta Dei sapientiam ex operibus eius in cœlo, in aere, & in terra: nunc tandem descendit ad mare, & decantat sapientiam Dei ex amplitudine maris, ex multitudine, & varietate piscium, ex utilitate quam adfert nauigatio, & ex inusitata magnitudine ceti, qui in eo degit; & concludit, omnia illa animalia, quin etiam omnia omnino animalia, quamuis innumerabilia à Deo nutriri, & conseruari. Hoc mare magnum & spatiosum manibus, idest, spectandum præterea se offert in operibus mirabilibus Dei, hoc mare, quod est magnum profunditate, & extensum latitudine: illud enim, spatiosum manibus, metaphoricum est, & metaphora sumpta est à similitudine hominis, cuius latitudo sumitur ab extensione brachiorum, & distantia unius manus ab altera; quemadmodum longitudo sumitur à distantia verticis à planta pedis. declarauerunt hanc metaphoram Septuaginta Interpretes, qui verterunt ^{ἡ πλάτος} idest, amplas habens regiones: dicitur igitur mare spatiosum manibus, quia est latissimum, & maximum spatium intercedit inter eius extremas regiones. Quod alij volunt, per manus maris, intelligi sinus angustiores, qui multi inueniuntur in medio terræ, ut mare ligusticum, mare adriaticum, mare rubrum, mare ponticum, & alia quæ sunt veluti brachia, vel manus maris oceanis; non improbo; sed verius existimo quod supra dixi: hæc enim est ratio, cur in textu græco desit vox, manibus, quæ expresse habetur in hebraico; omiserunt enim illam vocem Septuaginta Interpretes, quia intellexerunt per eam non significari aliud, nisi magnam extensionem. Illic reptilia, quorum non est numerus: hoc est alterum Dei opus valde mirabile, quod in mari, ubi nullus homo dat operam conseruandis piscibus, sed potius dat operam capiendis: inueniatur,

& perpetuo conseruetur tanta multitudo piscium, ut à nullo hominum numerari possint. Hanc fecunditatem significauit benedictio illa conditoris, de qua dicitur Gen. 1. Benedixit illis Deus, & ait, crescite, & multiplicamini, & replete aquas maris. Nec solum viuit in mari infinita multitudo, sed etiam propriè infinita varietas piscium, quod significatur in verbis sequentibus, Animalia pusilla cum magnis. Addit tertio Propheta, Illic naues pertransibunt: est enim admirandum opus Dei, quod per elementum liquidum deferantur naues onustæ grauissimis rebus, & inde afferantur humano generi maxima commoda, dum summa celeritate transmutantur merces. tribuitur autem Deo adinuētio nauium, tum quia ipse primus docuit Noe ædificationē arcis: tum quia ipse dedit aquis eam naturam, ut naues ferre possint, & homini ingenium, quo naues aptè componeret. Adiungit quarto, Draco iste, quem formasti ad illudendum ei. quasi dicat, non solum naues quantumuis magnæ, & onustæ per liquidum elementum maris transibunt: sed etiam draco, idest, piscis quidam maior, & grauior omni naui, non solum pertransibit per aquas maris, sed etiam in illis ludet, huc, atque illuc se circumuoluēs. Hunc piscem, quem græcus & latinus interpres vocat draconem, hebraica lectio vocat leuiathan; esse autem leuiathan piscem maximum, & horrendum valde, scribit Iob cap. 40. & inde hoc nomen tribuit Diabolo Isaias c. 27. vocans eum leuiathā serpentem tortuosum. Significantur igitur hoc nomine cetera grandia, siue balenæ, quæ magnitudinem tam immoderatā habent, ut Olaus magnus scribat, balenā quandam, insulam fuisse creditam. Illud autem, ad illudendum ei, varijs modis exponitur tum à Rabinis, tum à nostris: sed simplicissima expositio videtur, ut sensus sit, ad ludendum in eo, idest, in mari: nam in hebræo sic habetur ad verbum, Leuiathan, quem formasti ad ludendum in eo; & sic exponit Theodoretus, & Euthymius verba græca ^{ὁ δὲ}

309

leviathan; & notat Theodoretus, mare apud græcos esse generis feminini, tamen interpretem vertisse *leviathan*, quia sic inuenit in hebræo, ubi tam nomen maris, quam pronomen ibi positum, est generis masculini. adde quod expositio eorum, qui volunt sensum esse, leuiathan formatum esse à Deo, ut illudatur ei ab hominibus, dum eum capiunt, & inter se diuidunt; videtur repugnare scripturæ in lib. Iob cap. 40. ubi Deus ipse describit magnitudinē leuiathan, & ostendit, difficillimum esse illum capere, aut ex aquis extrahere: & formatum potius esse, ut potentia Dei per eum agnoscat, quam ut ei illudatur ab homine. Addit postremo Propheta, ista omnia animalia, quæ viuunt in mari, non solum à Deo condita fuisse, sed etiam à Deo nutrirī. Omnia, inquit, à te expectant, ut des illis escam in tempore: Deus enim tempore congruo, admirabili ratione, & modo, cibum procurat, unde animalia ista viuunt.

quæ plane demonstrant, omnium bonorum auctorem esse Deum, sine quo nihil valeret terræ fecunditas, & humana industria. Illud, replebuntur bonitate, significat, replebuntur bono, siue bonis, ut aperte est in hebræo. Itaque bonitas hoc loco non significat probitatem, sed substantiam, unde homines, & animalia cætera sustentantur. Vox græca *χρηστότης*, ambigua est: nam & utilitatem, & benignitatem significat: hoc autem loco ad priorem significationem referenda est, si cum voce hebraica conuenire debeat. Auertente autem te faciem, turbabuntur. Contra vero, inquit, si tu auertas faciē, & quasi iratus desinas ea respicere fauore tuo, & subtrahas auxilium: continuo turbabuntur, & quasi languebunt, & mox deficient; auferes enim spiritum tuum, id est, spiritum vitalem, quem eis dedisti: & illa in puluerem suum reuertentur, id est, redibunt in puluerem aridum & inanimem, ut antea erant.

XXIX. Dante te illis, colligent, aperiēte te manum tuam, omnia implebuntur bonitate.

XXX. Auertente autem te faciem, turbabuntur; auferes spiritum eorum, & deficient, & in puluerem suum reuertentur.

Declarat Propheta paulò fufius, vitam omnium animalium ita pendere à Deo, ut si Deus aperiat manus, & cibos distribuat, omnia viuunt: si Deus auertat faciem, & alimenta dare renuat, omnia intereant. Et quamuis propriè loquatur de aquatilibus, tamē ad omnia omnino animalia hæc verba pertinent, cum sit eadem omnium ratio. Dante te illis, colligent, id est, si tu cooperando cum secundis causis, vel potius mouendo secundas causas, illasque in omnibus adiuvando, dederis animalibus cibum ipsis congruentem; colligent, & inde viuunt: aperiēte te manum tuam, omnia implebuntur bonitate. Idipsum repetit alijs verbis,

Emittes spiritum tuum, & creabuntur, & renouabis faciem terræ. **XXXI.**

Ostendit potentiam Domini inde etiam valdè laudandam, & prædicandam esse, quod potest etiam restituere spiritum vitæ ijs rebus, quibus abstulerat. & quamuis possit Deus restituere spiritum in indiuiduo, ut verè restituet hominibus in resurrectione mortuorum: tamen hoc loco loquitur Propheta ad literam de restitutione in specie. Deus enim aufert spiritum vitalem ab animantibus, cum ea varijs modis interire sinat: & rursus emittit spiritum vitalem in animantia per nouam generationem, & sic renouat faciem terræ, cum terra iterum repletur animalibus omnium generum. Vox illa, & creabuntur, non est accipienda propriè pro educatione ex nihilo, sed pro formatione, siue productione in genere. Quamuis autem hæc sit expositio literalis, non repugnat tamen veritati, ut hic versiculus exponatur mysticè vel pro resurrectione corporum humanorum.

norum: vel pro inspiratione Spiritus sancti, ut qui mortui fuerant peccato, viuere incipiant Deo per gratiam.

XXXII.

Sit gloria Domini in seculum; lætabitur Dominus in operibus suis.

Explicatis admirandis operibus Dei in cælo, in aere, in terra, & in mari; cōcludit Psalmum oratione. ac primum petit, ut sanctificetur nomen Domini, quæ est etiam prima petitio in oratione Dominica. Sit, inquit, gloria Domini in seculum, id est, semper laudetur Dominus, non solum voce, sed etiam vita, & moribus seruorum suorum. Lætabitur Dominus in operibus suis, id est, & inde fiet, ut Deus semper lætetur in operibus suis, & non habeat occasionem dolendi, & pœnitendi, quod fecerit ea: dicitur enim Genes. 6. Vicens Deus malitiam hominum, tactus dolore cordis intrinsecus delebo, inquit, à facie terræ ab homine vsque ad animalia, à reptili vsque ad volucres cæli: pœnitet enim me fecisse eos. Et quidem in Deum neque dolor, neque pœnitentia, neque noua lætitia cadere potest: sed hæc dicuntur more humano ad significandum, Deum in pœnam peccatorum destruere opera sua; quod faciunt ij, quos pœnitet ea fecisse: & contra, fouere, & augere opera sua in præmium iustorum, quod faciunt ij, qui ea se fecisse lætantur.

XXXIII.

Qui respicit in terram, & facit eam tremere, qui tangit montes, & fumigant.

Quia dixerat, res creatas esse opera Domini: id breuiter probat ex eo quod tanta est pœnitentia Dei in res creatas, ut solo aspectu minaci terram concutiat, & solo contactu montes ardere faciat. Alludit David ad caput decimum nonum Exodi, ubi describitur mons Sinai terribilis, & fumigans descendente Domino.

XXXIV.

Cantabo Domino in vita mea, psallam Deo meo quandiu sum.

Iucundum sit ei eloquium meum: ego verò delectabor in Domino. XXXV.

Hæc est altera petitio, ut placeat Deo laus eius. Ego, inquit, quemadmodum opto, ut ab omnibus Deus laudetur: sic ipse cantabo Domino dum viuerò; & non sola voce, sed etiam Psalterij sonitu celebrabo laudes eius. hoc autem oro, & peto, ut iucundum sit ei eloquium meum, id est, hymnus, quem in eius laudem assidue decanto, gratus maiestati eius. & ego quoque delectabor in amore Dei, & deliciæ meæ erūt meditatio assidua bonitatis eius.

XXXIV.

Deficiant peccatoris à terra, & iniqui ita ut non sint. Benedic anima mea Domino.

Hæc est vltima petitio, ut peccatores, qui Deum laudare nesciunt, deficiant de terra, ita ut vel cōuersi ad Dominum non sint amplius peccatores, vel si conuerti noluerint, deiiciantur infra terram, & vltra non cōpareant.

PSALMVS CIV.

Titulus, & Argumentum
Psalmi.



ITVLVS huius Psalmi est Alleluia. Quāuis enim non habeatur apud hebræos Alleluia in principio Psalmi: habetur tamen in fine Psalmi superioris: sed Septuaginta Interpretes posuerunt alleluia in principio huius Psalmi, non in fine superioris. & idem fecerunt in Psalmis 106. 113. 114. 116. 117. 135. & 146. semper enim posuerunt in titulo alleluia, cum in hebræo habeatur in fine Psalmi superioris: credibile autē est Septuaginta Interpretes ita inuenisse in suis codicibus hebraicis. Certē S. August. monet in Præfatione Psalmi sequētis, celeberrimam Ecclesiæ consuetudinē habere, ut alleluia ponatur in titulo Psalmorum potius q̃ in fine. Rectissimē autē conuenit alleluia in titulo huius Psalmi, & duorum sequētium: qm̃ alleluia significat,

ficat, laudate Dominum, & in his Psalmis narrantur beneficia præstita populo Dei, ob quæ omni laude dignus est. Habentur primi quindecim versiculi huius Psalmi in lib. 1. Paralipom. cap. 16. deinde subnectuntur eo loco duodecim versiculi ex Psal. 95. & rursum tres alij versiculi adduntur in fine ex Psalmo 105. Hic autem post quindecim versiculos, qui habentur in lib. Paralipomenon subiiciuntur alij viginti octo versiculi.

Explicatio Psalmi 104.

I. **C**onfitemini Domino, & inuocate nomen eius: annunciate inter gentes opera eius.

Inuitat Propheta spiritu feruens populum Dei ad laudandum, & inuocandum Deum, & ad annuncianda cæteris gentibus mirabilia opera eius, ut per hoc multiplicetur laus, & inuocatio Dei: non enim contentus est verus amator, si solus ipse cognoscat, & laudet dilectum; sed cupit à multis, vel ab omnibus omnino cognosci, & laudari. Ait igitur, Confitemini confessionem laudis vos populi Dei, & inuocate nomen eius, ut rectè laudare possitis; neque enim sine auxilio gratiæ eius id præstare sufficitis. Annunciate inter gentes, idest, spargite inter alias gentes sermonem de mirabilibus operibus Dei, ut illæ quoque ex operibus incipiant cognoscere, laudare, & inuocare factorem.

II. **C**antate ei, & psallite ei: narrate omnia mirabilia eius.

Explicat quod supra dixit, Confitemini, dicens, cantate & psallite, idest, confitemini laudes Dei cantando vocibus, & psallendo instrumentis musicis, siue laudando verbo, & opere; bene dicendo, & bene viuendo. explicat quoque quod supra dixit, annunciate inter gentes opera eius, dicens: Narrate omnia mirabilia eius, idest, annunciate gentibus opera Dei, quæ sunt omnia valde admirabilia, & laude dignissima.

Card. Belarm. in Psal.

Laudamini in nomine sancto eius: latetur cor quærentium Dominum.

Inuitauit ad laudem, & cantum exteriorè: nunc inuitat ad lætitiā, & exultationem interiorē. ac primum dicit, Laudamini in nomine sancto eius, idest, gloriamini in corde vestro, quod Deum noueritis, auctorem omnis boni. Vox hebræa, hitallelu, ad verbum reddi potest, laudate vos ipsos: sed quæ sequitur, in nomine sancto eius, sensus est, laudate vos ipsos, & bene fortunatos vos dicite: siue, quod est idem, gloriamini non in vobis, non ex virtute vestra, sed ob nomen sanctum Dei, vobis manifestatum: iuxta illud Apostoli, 2. Corinth. 11. Qui gloriatur, in Domino gloriatur. Potest etiam vox illa accipi pro lætitiā, & exultatione; ut idem sit, laudamini, quod, lætamini. sic enim vertit S. Hieronymus, Exultate in nomine sancto eius. per nomen Dei significatur notitia Dei, siue etiam ipse Deus. Latetur cor quærentium Dominum, idest, cum lætitiā & exultatione, non cum tædio, & mœrore quærite Dominum, quia tantum bonum est Dominus, ut melius sit illum quærere, quàm cætera omnia possidere. vel, latetur cor quærentium Dominum, idest, lætabitur valde cor quærentium Dominum, quia desinet anxie quærere, quæ sunt mundi, & per hoc liberabitur à mordacibus curis, & sollicitudinibus multis: deponet quinque iuga bouum, & tollet iugum suæ & onus leuæ, & inueniet requiem animæ suæ.

חיתחללו

Quærite Dñm, & confirmamini: quærite faciem eius semper.

Id ipsum vrget, ut seriò, & assidue quærat Deus: illud enim, confirmamini, significat propriè, roboramini, idest, non defatigemini in quærendo Domino; sed cõfirmate vires animi, & infatigabiliter quærite. S. Hieronymus vertit, Quærite Dominum, & virtutem eius; quia legit huzò, quod significat robur, siue virtutē eius: sed Septuaginta Interpretes, quos latinus Interpres

Tt secutus

secutus est, legerūt, hozzu, cum iisdem litteris, mutatis tantum punctis; & ideo rectè verterunt, confirmamini, siue roboramini. Quod sequitur, quærite faciem eius semper, duobus modis exponi potest. Si respiciamus ad homines testamenti veteris, sensus erit, Quærite præsentiam Domini per gratiam, & fauorem, idest, procurate, vt Deus vos placido vultu semper aspiciat, benefaciat vobis de cælo, non auertat faciem à vobis, neque vos iratus despiciat, & affligat. Sed si ad homines testamenti noui referantur hæc verba, vt præcipuè referri debent, sensus erit, Quærite faciem eius semper, idest, ascendite semper corde, amando, & desiderando faciem Domini; donec ad eam vidèdam aliquando perueniatis. & quia nemo quærit, quod non nouit, & quod aliquo modo per notitiam nō inuenit: rectè dicit sanctus Augustinus, eos, qui quærunt faciem Domini, iam inuenisse per fidē, & adhuc querere per spem, & desiderium. Ex quo intelligimus, ab illis non quæri faciem Domini, qui fidem vel non habent, vel non exercent. proinde initium quærendi faciem Domini, sumendum esse ab exercitatione fidei, cogitando, & meditādo eminentiam summi boni, sibi que firmiter persuadendo ex diuinis literis, veram felicitatem, in qua sola quiescere possit desiderium nostrum, non esse nisi in visione infinitæ pulchritudinis Dei: & ad hanc visionem posse hominem pertinere, si quærat, sicut oportet, faciem Dei. Porro quærere, sicut oportet, in duabus rebus positum est, videlicet in remouendis impedimētis, & adhibendis medijs: quod Apostolus docuit ad Titum secundo, Abnegantes impietatem, & secularia desideria; sobriè, iustè, & piè viuamus in hoc seculo, expectantes beatam spem. Impedimenta ergo sunt, prauæ cupiditates, affectusque rerum terrenarum. quantum enim minuitur cupiditas, tantum crescit charitas. Itaque qui cupiunt diuites fieri, ac vt opes cumulent, non tribuunt necessitatem patientis, quiq. seruiunt gula, aut luxuria: ij non ascendunt ad fa-

ciem Domini quærendam, sed descendunt, & elongantur ab ea; quia non remouent, sed multiplicant impedimenta. Medium ad faciem Domini inueniendam, est vera iustitia, siue diuinæ legis impletio; dicente Domino, Matthæi 5. Quærite primū Regnum Dei, & iustitiam eius; illud vt finem, istam vt medium. & Si vis ad vitam ingredi, serua mandata, Matthæi 19. Quare ille quærit faciem Domini semper, qui fidem cogitando, & meditādo exercet, qui que mortificat membra sua, quæ sunt super terram; & secularibus desiderijs abnegatis, corde puro, & conscientia bona semper iustè viuit; & ad faciem Domini videndam semper anhelat.

Mementote mirabilium eius, v. quæ fecit: prodigia eius, & iudicia oris eius.

Docet nunc Propheta materiam laudis Dei, & quasi scalam ad ascendendum ad amorem, & desiderium Dei; ad quæ duo nos inuitauerat in tribus versiculis præcedentibus. Materia laudis sunt opera Dei mirabilia, quæ nobis indicant omnipotentiam, & summam sapientiam, & suauissimam bonitatem Dei: quæ eadem, si vt par est, piè, fideliterque cogitentur, euehunt mētem ad amorem, & desiderium Dei. Mementote, inquit, mirabilium eius, quæ fecit, idest, reuocate ad memoriā, & recogitate mirabilia opera, quæ à Deo facta fuisse cognouistis. Prodigia eius, & iudicia oris eius, idest, mementote mirabilium, quæ fecit; quæ mirabilia sunt prodigia, & iudicia eius. Per prodigia intelliguntur miracula, quæ fecit Deus per Moysen, & Iosue, & Samuelem, & alios, quæ naturæ viribus fieri nequeunt. Per iudicia oris eius, possunt intelligi horrēda flagella, quibus Deus iusto iudicio puniuit Pharaonem, & alios persecutores populi Dei; vt sint eadem prodigia, & iudicia, quia prodigia illa facta sunt, vt per ea iudicaretur, & puniretur superbia, & iniustitia Pharaonis. sic enim exponit Theodo-

Theodoreti. Possunt etiam per iudicia oris eius, intelligi sanctissimæ leges, quas Deus populo suo dedit; iuxta illud Psalmi 147. Qui annunciat verbum suum Jacob, iustitias, & iudicia sua Israel; ut prodigia pertineant, ad potentiam Dei manifestandam, iudicia ad sapientiam. Sic videtur exponere sanctus Augustinus, & sic exponunt aliqui recentiores.

VI. Semen Abraham serui eius, filij Iacob electi eius.

Declarat, quibus dixerit, Memento mirabilium eius: quasi dicat, Vobis loquor Hebræi, qui estis semen Abraham, & filij Iacob, idest, qui propagati estis ab Abraham per Iacob, ac per hoc etiam per Isaac, non per Esau, aut Ismaelem. Vos enim estis serui eius, & electi eius, quia vos elegit Deus in priores, & peculiare servos, quibus legem daret, & quos doceret, quo ritu coli veller. Recte autem admonet sanctus Augustinus, hæc non pertinere solum ad filios carnis Abraham, & Iacob; sed potissimum pertinere ad filios fidei Abraham, & Iacob. dicit enim Apostolus, ad Romanos 4. Signum accepit (Abraham) circumcisionis, signaculum iustitiæ fidei, quæ est in præputio: ut sit Pater omnium credentium per præputium, ut reputetur & illis ad iustitiam: & sit Pater circumcisionis non ijs tantum, qui sunt ex circumcisione; sed & ijs, qui sectantur vestigia fidei, quæ est in præputio Patris nostri Abraham. & ad Rom. 9. Non omnes, qui ex Israel, ijs sunt Israelitæ, neque qui semen sunt Abraham, omnes filij; sed in Isaac vocabitur tibi semen; idest, non qui filij carnis, ijs filij Dei; sed qui filij sunt promissionis, æstimantur in semine. & ad Galath. 3. Cognoscite, inquit, quia qui ex fide sunt, ijs sunt filij Abraham. & infra, Providens autem scriptura, quia ex fide iustificat gentes Deus, prænunciavit Abraham, Quia benedicentur in te omnes gentes: igitur qui ex fide sunt, benedicentur cum fidei Abraham. & infra, Si autem vos Christi estis, ergo semen Abraham estis, secundum promissionem hæredes.

Quod attinet ad verba, illud; serui eius, in hebræo est genitius singularis; & sensus est, Semen Abraham serui eius, idest, qui Abraham est servus eius. sed in græco est, nominativus numeri multitudinis, & refertur ad filios Abraham, qui sunt serui Dei. & hæc est verior lectio. nam quod sequitur, electi eius, tam in græco, quam in hebræo, est numeri multitudinis. Quod igitur nunc est in hebræo, audo, quod significat, serui eius, in genitivo singulari: legerunt Septuaginta Interpretes, audau, serui eius, in numero multitudinis.

עבדיו

עבדיו

Ipse Dominus Deus noster: in VII. vniuersa terra iudicia eius.

Memor fuit in seculum testamenti sui: verbi, quod mandauit in mille generationes. VIII.

Incipit narrare mirabilia opera Dei; ac primo loco ponit, quod Deus vniuersæ terræ imperans, elegerit Abrahamum, & cum eo fœdus æternum percussit, de terra promissionis in perpetuum tradenda semini eius. quæ promissio in Christo impleta est, cuius Regnum nullum habebit finem: terrena enim possessio Palæstinæ non semper apud filios Abrahami permanfit. Ipse, inquit, Dominus Deus noster, in vniuersa terra iudicia eius, idest, Deus, cuius iudicia sunt in omni terra, qui quæ omnem terram ut summus Rex, & Monarcha iudicat; ipse, inquit, Deus tam magnus memor fuit in seculum testamenti sui; idest, memor fuit fœderis sui ut illud impleret, quod æternum esse voluit. Verbi sui, idest, promissionis suæ, quam mandauit, idest, iussit, & voluit stabilem esse in mille generationes; idest, in æternum: ponitur enim numerus millenarius, qui longè excedit numerum omnium generationum, quæ fuerunt ab initio mundi, pro quadam perfecta duratione, quæ non habet finem. Sic sanctus Augustinus hoc loco, & S. Gregorius lib. 9. moral. cap. 3. & perspicuum est tum ex præcedentibus, & sequentibus, ubi dicitur, Testamen-

T t 2 tum

tum in seculum, & eternum: tum ex eo quod quocunque modo accipiat generatio, etiam si solum pro quindecim annis, in qua ætate homo incipit posse generare, quæ est minima duratio; credibile est, mundum à prima conditione, usque ad ultimam consummationem non duraturum mille generationibus, idest, quindecim millibus annorum. Siquidem sanctus Ioannes in prima epistola, cap. 2. dicit, nouissimam horam nunc esse: & tamen nondum effluxerunt sex millia annorum.

VIII. Quod disposuit ad Abraham, & iuramenti sui ad Isaac.

IX. Et statuit illud Iacob in præceptum, & Israel in testamentum æternum.

X. Dicēs, Tibi dabo terram Chanaā, funiculū hæreditatis vestræ.

XI. Cū essent numero breui, paucissimi, & incolæ eius.

Id ipsum repetit, & declarat pluribus verbis, ad confirmationem veritatis. Quod disposuit ad Abraham, idest, memor fuit eiusdem pacti, quod disposuit ad Abraham; & memor fuit eiusdem pacti, quod cum iuramento confirmauit Isaac filio Abraham: & statuit illud pactum, siue promissum iuratum ipsi Iacob in præceptum, idest, in decretum, & statutum; & in testamentum æternum, hoc est, scdus in æternum duraturum. Verba autem promissionis, in pacto, siue decreto diuino inclusæ, fuerunt, Tibi dabo terram Chanaam, quæ dicitur terra promissionis, in qua Chanaanæ tunc habitabant. Funiculum hæreditatis vestræ, idest, quæ possidebunt filij tui, tanquam hæreditatem funiculo illis diuisam. Pro illo verbo, in præceptum, in hebræo habetur *le choc*, quod propriè statutum, & decretum significat. Porro hæc promissio Dei ad Abraham habetur Gen. 17. ad Isaac habetur Genes. 26. ad Iacob, qui & Israel dicebatur, habetur Genes. 28. Facta est autem hæc promissio Hebræis, cū essent numero breui, idest, paucissi-

mi; & cū essent incolæ, idest, peregrini, & aduenæ in ipsa terra Chanaam. Quo magis admirandum est consilium Dei, & potentia, ac sapiētia eius, & dignatio erga Patriarchas; quod elegerit ex toto mundo familiam vnā, eamque exiguam, cui promitteret, & postea re ipsa traderet regionem amplissimam, in qua multi Reges solium suum habebant. Sed multo magis admirandum est, quod pusillum gregem electorum ex vniuerso genere humano idem Deus elegerit, cui daret Regnum cælorum in æternam hæreditatem; cuius Regni sempiterni figura erat terra promissionis. Pro verbo, incolæ, in hebræo est *garim*, quod propriè peregrinos, & aduenas significat.

Et pertransierunt de gente in gentem, & de Regno ad populum alterum. XII.

Non reliquit hominem nocere eis, & corripuit pro eis Reges. XIII.

Nolite tangere Christos meos, & in Prophetis meis nolite malignari. XIII.

Hic recenset Propheta alterum beneficium Dei, quod videlicet Patriarchas singulari prouidentia custodierit, atque protexerit. attingit autem historiam Gen. cap. 12. & 20. vbi Abraham bis in periculo fuit, propter pulchritudinem Vxoris suæ. & cap. 26. vbi Isaac simile periculum adiit. & cap. 31 & 32. vbi Iacob parum absuit, quin multa pateretur, primū a Laban, deinde ab Esau. Sed ab omnibus periculis eruit eos prouidentia Dei. Et pertransierunt, Patriarchæ videlicet, Abraham, Isaac, & Iacob cum familia sua, de gente in gentem, de vna prouincia in aliam; & de Regno vno ad populum Regni alterius, vt de Regno Palæstinæ ad populum regni Aegypti. Non reliquit, idest, non permisit Deus, hominem vllum nocere eis; imò etiam corripuit pro eis Reges, Pharaonem videlicet Regem Aegypti, & Abimelech Regem Gerar. dixit enim Deus Regibus istis, Nolite tangere Christos meos, Abraham vide-

videlicet, Isaac, & Iacob: & in Prophetis meis nolite malignari, idest, & in eosdem istos, qui Prophetæ mei sunt, ac per hoc vncti, mihiq̃ue consecrati, nolite aliquid mali perpetrare, nolite eis nocere, nolite illos vexare. Prophetas fuisse sanctos Patriarchas non dubium est: nam Abraham præuidit captiuitatem populi Israelitici in Aegypto, & quamdiu duratura, & quem exitum habitura esset; vt constat ex c. 15. Genesis. Isaac paulò ante mortem prædixit Esau filio suo, quòd seruiturus esset Iacob fratri suo, & quòd aliquando excussurus esset iugum illud seruitutis. quæ omnia prædicebantur de posteris eorum, non de personis ipsorum, vide cap. 27. Gen. quæ impleta esse testantur libri Regum. Denique Iacob plurima prædixit, quæ euentura erant singulis filiis, ac præsertim Iudæ, ex cuius tribu Messiam venturum prophetauit. vide cap. 49. Genes. Itaque Patriarchæ illi rectè Prophetæ dicti sunt; & ea de causa dicti sunt Christi, idest, vncti, non quòd vncti fuerint oleo visibili, quomodo postea Sacerdotes, Reges, & aliqui Prophetæ vngi cœperunt; sed quòd spiritali, atque interna vnctione spiritus delibuti fuerint: de qua vnctione dicitur Isa. 61. Spiritus Domini super me, eo quòd vnxit me.

- XV.** Et vocauit famem super terram, & omne firmamentum panis contriuit.
- XVI.** Misit ante eos virum, in seruum venundatus est Ioseph.
- XVII.** Humiliauerunt in compedibus pedes eius, ferrum pertransiit animam eius donec veniret verbum eius.
- XVIII.** Eloquium Domini inflammavit eum, misit Rex, & soluit eum: Princeps populorum, & dimisit eum.
- XIX.** Constituit eum Dominum domus suæ, & Principem omnis possessionis suæ.

Card. Belarm. in Psal.

Vt erudiret Principes eius sicut semetipsum, & senes eius prudentiam doceret.

Et intrauit Israel in Aegyptum, & Iacob accola fuit in terra Cham.

Hoc est tertium beneficium Dei erga populū suum, in quo est ingens materia laudis propter admirabilem Dei sapientiam, qui ex magnis malis erueret nouit maxima bona. narrat igitur Propheta famem grauissimam, quæ orta est super terram tempore Iacob: cuius occasione idem Iacob transmigravit in Aegyptum, vbi vixit cum tota familia sua tempore illius famis. Historia nota est ex lib. Gen. cap. 37. & seq. Ait igitur Propheta, Et vocauit famem super terrā, idest, Deus auctor fuit per prouidentiam suam, vt grauissima famines ex penuria frumenti opprimeret terram: loquitur autem more poetico cū ait, Vocauit famem super terram; quasi famines esset exercitus aliquis armatus, qui de vno loco ad aliū vocari posset. sed hæc metaphora significat, omnia Deo seruire ad nutum, & quæ videtur nobis fortuita, ex decreto Dei iustissimo prouenire. Idipsum repetit & declarat addens, & omne firmamentum panis contriuit, idest, famines illa exorta est super terram, quia Deus contriuit firmamentum panis, stabilimentum videlicet victus humani, qui in pane consistit. Fecit enim, vt annis septē, nec arari, nec seri, nec meti posset, vt dicitur in Gen. cap. 45. In hebræo pro firmamentum panis, est matte lechem, idest, baculum panis. Sed Septuaginta Interpretes explicauerunt metaphorā baculis; dicitur enim baculus panis, sustentatio vitæ ex pane. Misit ante eos virum, idest, occasione illius famis venturæ præmisit Deus in Aegyptum ante filios Israel, virum magnum, idest, Iosephum, qui liberaret ab ea fame Israel cum omni familia sua. Historia Genesis testatur cap. 37. S. Iosephum venditum fuisse à fratribus ex inuidia mercatoribus pergentibus in Aegyptum:

It 3 sed

מטה
לחם

77 sed David rectè dicit, eū missum fuisse à Deo, quia Dei prouidentia permisit eum vendi, & asportari in Aegyptum, vt per eum mirabili ratione, & modo introduceretur Iacob cum filijs in Aegyptum. Explicat autem idem Prophe- ta, quo modo Ioseph missus fuerit in Aegyptum, subdens, In seruum venun- datus est Ioseph, idest, venditus à fra- tribus Ioseph mercatoribus euntibus in Aegyptum, sic in Aegyptum ipse quoque peruenit. Humiliauerunt in compedibus pedes eius, idest, in Aegy- pto positus Ioseph, & accusatus falsi criminis ab vxore domini sui, coniec- tus fuit in carcerem, pedes compedi- bus ferreis alligatus. Ferrum pertran- sijt animam eius, donec veniret ver- bum eius, idest, ferrum compedum do- lore afflixit animam Ioseph, & quo- dammodo eam pertransiuit, per mul- tos dies, donec impleretur vaticinium eius, quo prädixit pincernæ regis Pha- raonis, liberationem ex carcere: nam ex adimpletione vaticinij processit li- beratio ipsius etiam Ioseph, vt patet ex Gen. cap. 40. Illud, ferrum pertran- sijt animam eius; in græco legitur, fer- rum pertransijt anima eius. in hebræo utroq; modo legi potest: nam verbum, נַפְשׁוֹ naphso, significare potest, animā eius, & anima eius, & quamuis sensus idem sit, tamen clarior est oratio, ferrum pertransijt animam eius, & similis illi, Luc. 2. Tuam ipsius animam pertransi- bit gladius. & sic legerunt SS. Hiero- nymus, & Augustinus in commētorio, & alij latini. proinde non rectè aliqui recentiores legere maluerunt, ferrum pertransijt anima eius, corrigentes si- ne causa latinum textum ex græco. Il- lud, donec veniret verbum eius, S. Hieronymus in cōmentario refert ad ver- bum Domini, quo Iosephum liberare constituit: sed planior sensus est, si re- feratur ad verbum ipsius Ioseph, qui prädixit liberationem pincernæ Pha- raonis, quæ expositio est S. Augustini, & communior. Eloquium Domini in- flammavit eum, idest, verbum illud Io- seph, quo prædicebat futura, non orie- batur ex eius ingenij sagacitate, sed

ex virtute Dei, qui eloquium ignitum, & lucidum, & efficax illi tribuebat. Eloquium enim Domini, idest, à Domi- no immisum, & inspiratum, cum esset quasi facula ardens, vt dicitur de elo- quio Eliæ Prophetæ, Eccles. 48. & vt lingua ignea, quæ sedit super Aposto- los Act. 2. Inflammatiuit pectus eius, vt liberè loqueretur, quæ per spiritū Do- mini præuidebat. Sæctus Hieronymus ex hebræo vertit, eloquium Domini probauit eum. Et quidein vox hebrai- ca, זֶרַפְּהֵטוּ zeraphateu, significat, probare; sed Septuaginta Interpretes legerunt, se- raphatheu, per scin, quod significat, inflammare, & hanc existimamus ve- ram esse lectionem, quæ postea incuria librorum mutata sit. Misit Rex, & soluit eum; Princeps populorum & di- misit eum, idest, Rex Pharaon Princeps omnium populorum terræ Aegypti, au- dita sapientia Ioseph per pincernam suam, misit qui eum liberaret de carce- re, & auctoritate sua soluit eum com- pedibus, & liberum dimisit. Constituit eum Dominum domus suæ, & Princi- pem omnis possessionis suæ, idest, non solum liberavit eum de carcere, sed cōstituit eum præpositum Domus suæ, & totius Regni sui, vt omnia, quasi Princeps, & Dominus administraret. Vt erudiret Principes eius sicut semet- ipsum, & senes eius prudentiam doce- ret, idest, ea de causa præposuit Rex Pharaon Iosephum domui suæ, non so- lum, vt corporibus alendis tempore fa- mis operam daret; sed etiam, vt erudi- ret principes Regni, & seniores consi- liarios, qui cum Rege negotia Regni tractare solebant, ea sapientia, & pru- dentia, qua ipse pollebat. Illud, sicut semetipsum, Sanctus Hieronymus ver- tit ex hebræo, secundum voluntatem suam. Vox hebraica, בְּנַפְשׁוֹ benaphso, ad ver- bum significat, in anima sua; & potest sensus esse, in volūtate sua; sed Septua- ginta videntur legisse per caph, cēna- phso, non per beth; & tunc sensus est, secundum animam suam, idest, ad simi- litudinem sapientiæ, quæ erat in ani- ma sua; quod propriè dictum est, sicut semetipsum. Et intrauit Israel in Aegy- ptum,

זֶרַפְּהֵטוּ
תהו
זֶרַפְּהֵטוּ
תהו

נַפְשׁוֹ

בְּנַפְשׁוֹ
בְּנַפְשׁוֹ

ptum, idest, hac occasione ingressus est Patriarcha Iacob cum omni familia sua in Aegyptum; vocauit enim eum Ioseph, vt habetur Genes. 45. Et Iacob accola fuit in terra Cham, idest, hoc modo Iacob, idest, populus congregatus ex filiis, & nepotibus Iacob, cœpit habitare in terra Aegypti, quæ dicitur terra Cham, quia Mizraim filius Cham filij Noe, prius fuit, qui habitauit in terra Aegypti.

XXII. Et auxit populum suum vehementer: & firmavit eum super inimicos eius.

XXIII. Conuertit cor eorum, vt odirent populum eius: & dolum facerent in seruos eius.

XXIIII. Misit Moysen seruum suum: Aaron quem elegit ipsum.

XXV. Posuit in eis verba signorum suorum, & prodigiorum in terra Cham.

Sequitur quartum beneficium Dei erga populum suum, quem diuina providentia crescere fecit, & multiplicari valde in Aegypto: & cum à Rege Pharaone opprimeretur idē populus Dei, misit Deus Moysen, & Aaronem cum potestate magna in signis, & prodigijs faciēdis; ob quæ tandem populus Dei gloriosè discessit ex Aegypto. Ait igitur Propheta, Et auxit populum suum vehementer, & firmavit eum super inimicos eius. quid hoc significet, potest intelligi ex cap. 1. Exodi, vbi sic legitur, Filij Israel creuerunt, & quasi germinantes multiplicati sunt, ac roborati nimis impleuerunt terram. Surrexit interea Rex nouus in Aegypto, qui nō nouerat Ioseph, & ait ad populum suum, Ecce populus filiorū Israel multus, & fortior nobis est. Vbi illud, germinauerūt, in hebræo est, isrezu, quod significat, producere reptilia in maxima copia: proinde cōparatur hebræorum multiplicatio in Aegypto multitudini formicarum, aut vermium, qui ita ebulliunt ex aliquo loco, vt numerari

non possint. Conuertit cor eorū, idest, Deus conuertit cor Aegyptiorum inimicorum Israelitarum, vt odirent populum eius, & dolum facerent in seruos eius, idest, vt astutē, & fraudulenter illos opprimerent. Porro Deus dicitur conuertisse cor Aegyptiorum in odium, & ruinam Hebræorum; non inferendo in cordibus eorum malam voluntatē (Deus enim non est causa peccati) sed benefaciendo populo suo, & fecunditatem insolitam illi donando, occasione quodammodo præbuit peruersis cordibus Aegyptiorum, vt inuiderēt alienæ felicitati, & inde illos opprimere desiderarent. benefecit autem Deus populo suo, præsciens inuidiam, & odium in Aegyptijs ea occasione nascitura, quia poterat, & volebat mala eorum voluntate, quam ipse non fecerat, benè vt ad puniēda peccata Aegyptiorum, & ad populum suum de captiuitate liberandum. Sic exponit S. Augustinus. Si cupiat lector plenius explicari, quomodo Deus conuertat corda aliquorum, vt alios odio prosequatur, & tamen non sit causa peccati; videat, quæ scripsimus lib. 2. cap. 13. de amissione gratiæ, & statim peccati, tom. 4. cōtrouersiarum. Misit Moysen seruum suum, & Aaron, quē elegit ipsum; idest, occasione afflictionis populi sui misit Deus in Aegyptum Moysen, & fratrem eius Aaronem legatos ad Pharaonem. Illud, quem elegit ipsum, in græco habetur, quem elegit sibi. ex hebræo verti posset, quem elegit ei, idest, Mosi; vt sensus sit, Misit Deus Moysen seruum suum, & Aaronem, quem elegit ei socium, & adiutorem. Potest tamen vox hebraica bo, quæ propriè significat, in eo, siue in ipso, verti, ipsum; vt legunt hoc loco S. Augustinus, S. Hieronymus in commentario, & alij: & vt habent omnes codices vulgatę editionis; ac vt rectè monet S. Augustinus, apud Latinos redundat illud, ipsum, quod apud Hebræos eleganter additur. Similis est locus in Psalmo sequenti, vers. 5. ad videndum in bonitate electorum tuorū: vbi in hebræo est eadē præpositio, in, vt etiam in græco, & latino; & S. Hieronymus

Tt 4 ronymus

יִשְׂרָאֵל

13

ronymus vertit, vt videam bona electorum tuorum. Posuit in eis verba signorum suorum, & prodigiorum in terra Cham, idest, mittens Deus ad liberandos filios Israel, Moysen, & Aaron; posuit in eis verba signorum, potestatem videlicet edendorum miraculorum in terra Aegypti, vt tunc filij Israel, tum etiam Aegyptij crederent, Moysen, & Aaron missos esse à Deo; & illis obedi- rent, vt nuncijs veri, atque omnipoten- tis Dei. Vox illa, verba, apud Hebræos latissimè patet, vt non solum verba, sed etiam res quascunque significare pos- sit. Itaque hoc loco verba signorum, sunt vel ipsa signa, vel, vt dixi, potestas signorum faciendorum.

XXVI. Misit tenebras, & obscurauit, & non exacerbauit sermones suos.

In hoc versiculo, & sequentibus octo describit in particulari prodigia edita in Aegypto, quibus Deus Pharaonem, & Aegyptios flagellauit. vbi notandum est, Prophetam non recensere omnes plagas, neque eodem ordine, vt habentur in Exodo: quoniam non historiã texit, sed carmen scribit, ad laudandum Deum. quod etiam obserua- uimus in Psal. 71. Incipit igitur à pro- digio tenebrarum, quæ tres integros dies occupauerunt Aegyptum, quæ pla- ga est vna ex postremis in Exodo, c. 10. Misit, inquit, tenebras, idest, immisit te- nebras in Aegyptum, & obscurauit eam regionem. Fuerunt autem illæ tenebræ tam horribiles, & crassæ, vt nemo al- terum agnosceret: & quod mirabilius est, nemo se moueret de loco, in quo erat. quod sequitur, Et non exacerba- uit sermones suos, variè legitur in co- dicibus hebraicis, græcis, & latinis. In hebræo sic habetur, *ve lo marus*; & non exacerbauerunt sermones eius: vel, vt S. Hieronymus vertit, Et non fuerunt increduli verbis eius, idest, Moyses, & Aaron audacter impleuerunt manda- ta Domini faciētes signa, & prodigia; quorum vnum fuit, immissio tenebra- rum. In græcis verò sic habetur, *ὅτι πα- ραμυθισαὶ τὸς Αἰγύτιοις αὐτοῦ*, quoniam exacer- bauerunt sermones ipsius, idest, misit

Deus tenebras, quoniam Aegyptij ex- acerbauerunt sermones eius, obstina- tē resistentes mandatis ipsius. In lati- nis varia lectio erat, tempore S. Augu- stini; nam, vt ipse dicit, plerique codi- ces habebant, exacerbauerūt; nonnul- li, non exacerbauerunt. Sanctus Hie- ronymus in commentario Psalmorum legit, Et exacerbauit sermones eius, idest, populus exacerbauit sermones Dei, illis non parendo. Nostra lectio, quæ habet, Non exacerbauit sermones suos, videtur repugnare omnibus alijs codicibus; sed facilè conuenire potest cū hebraica, & græca: nam in hebrai- ca expressè habetur negatio. in græca verisimile est, pro *ὅτι*, legendū esse *οὐκ*, quod est neque; & sic legisse videtur Theodoretus, & sic absque dubio no- ster Interpres legit, non enim vertisset, & non, si legisset *ὅτι*, nisi imperitissimus fuisset. Quod autem latinus habeat in singulari, non exacerbauit; græcus, & hebræus in plurali, non exacerbaue- runt, non mutat sensum; nam iuxta la- tinam lectionem sensus est, Non exacerbauit Moyses, aut Aaron sermones suos, idest, Dei. Cōfundit enim latinus Interpres pronomen, suum, cum pro- nomine, eius, quemadmodum in græ- co & hebræo confunduntur: at iuxta lectionem hebraicam, & græcam sen- sus est, non exacerbauerunt Moyses, & Aaron sermones suos, idest, eius, Dei videlicet, qui iussit eos mirabilia signa facere. Cū igitur lectio, quæ nunc ha- betur in omnibus libris vulgatæ edi- tionis latinæ, concordet cum græca, & hebraica, nullo modo corrigenda, aut mutanda est, vt aliqui nimis auda- cter faciunt.

Conuertit aquas eorum in san XXVII. guinem: & occidit pisces eorum.

Edidit terra eorum ranas, in XXVIII. penetralibus Regum ipsorum.

Dixit, & venit Cœnomyia, & XXIX. cinifes in omnibus finibus eorū.

Posuit pluuias eorum grandi- XXX. nem, ignem comburentem in ter- ra ipsorum.

Et

וְלֹא מָרָסוּ
רַב. רַב.

XXXI. Et percussit vineas eorum, & ficulneas eorum, & contriuit lignum finium eorum.

XXXII. Dixit, & venit locusta, & bruchus, cuius non erat numerus.

XXXIII. Et comedit omne fœnum in terra eorum, & comedit omnem fructum terræ eorum.

XXXIV. Et percussit omne primogenitum in terra eorum, primitias omnis laboris eorum.

Hæc omnia, quæ ad plagas Aegypti pertinent, explicata sunt in explicatione Psalmi septuagesimi septimi, à versiculo quadragesimo nono, & deinceps. & nota sunt ex lib. Exod. cap. 7. & sequentibus: neq; est in his octo versiculis vlla dissensio inter codices.

XXXV. Et eduxit eos cum argento, & auro, & non erat in tribubus eorum infirmus.

Hoc est beneficium quintum, quo Deus affecit populum suum, quia non solum liberauit eum de captiuitate Pharaonis, sed etiam ditauit eum magnis opibus; iussit enim vt Hebræi peterent à vicinis suis Aegyptijs, viri à viris, & mulieres à mulieribus vasa argentea, & aurea, & vestes pretiosas, & simul dedit gratiam populo suo corā Aegyptijs, vt faciliè illis crederent, & commodarent omnia, quæ petebant, vt habetur Exod. 11. & 12. atque hoc est, quod Propheta commemorat, dicens, Et eduxit eos, de Aegypto videlicet, cum argento, & auro, idest, cum ingenti copia vasorum aureorum, & argenteorum, quæ commodato acceperant ab Aegyptijs. Disputant Theologi, an dispensauerit Deus in præcepto, Non furaberis, quando iussit Hebræis, vt per speciem mutui, vel commodati spoliarent Aegyptios. sed non opus erat dispensatione in præcepto naturali, cum Deus, vt Dominus absolutus rerum omnium potuerit transferre bona illa Aegyptiorum in Hebræos: & etiam quia potuit, vt summus Iudex tradere

bona illa Aegyptiorum Hebræis loco mercedis, quam illis debebant Aegyptij ob labores, in quibus eos seruire coegerant. Sic Sanctus Augustinus q. 39. in Exodum, & lib. 22. contra Faustum cap. 71. & videtur hoc ipsum affirmare liber Sapientiae cap. 10. in illis verbis, Et reddidit iustis mercedem laborum suorum, & deduxit illos in via mirabili. His accessit aliud beneficium, quod cum Aegyptij varijs morbis affecti fuerint, & tandem primogenita omnia eorum occisa; apud filios Israel nulla plaga defauit. & hoc est, quod cantat hoc loco Propheta, cum addit, Et non erat in tribubus eorum infirmus.

XXXVI. Lætata est Aegyptus in profectioe eorum, quia incubuit timor eorum super eos.

Hoc pertinet ad cumulum beneficii superioris: quia non solum Aegyptij non retinuerunt Hebræos propter vasa aurea, & argentea, quæ illis commodaauerant: sed lætati sunt in eorum discessu ob timorem maioris mali, ne videlicet omnes perirent, sicut iam perijisse viderant omnia primogenita; sic enim legitur in Exodo cap. 12. Urgebant Aegyptij populum de terra exire velociter, dicentes, Omnes moriemur. Itaque non est opus cum sancto Augustino anxie quærere, cur lætata sit Aegyptus in profectioe Hebræorum, cum antea semper resisterit eorum profectio: & cur non saltem repetierit vasa, quæ commodauerat: neque opus est hoc referre ad tempus illud, quod secutum est post demersionem Pharaonis in mari: nam tantus timor mortis incubuerat super Aegyptios, cum viderunt vna nocte occisa fuisse omnia primogenita hominum, & iumentorum; vt existimauerint paulò post omnes Aegyptios occidendos, & delendam omnino Aegyptum, nisi Hebræi subito dimitterentur.

XXXVII. Expandit nubem in profectioe eorum, & ignem vt lu ceret eis per noctem.

ex-

Sextum beneficium fuit columna nubis per diem, & columna ignis per noctem, quam Angelorū ministerio erexit Deus populo suo, cum exisset de terra Aegypti. Quod autem hic dicitur, expandit nubem in protectionem; nō videtur significare, nube tectos fuisse Hebræos, ne lederetur à sole per diem; ut multi existimant, & in eis Theodoretus: nam columna nubis præcedebat populū interdiu, & columna ignis noctu; non autē operiebat eos inftar nubis super eos expansa, alioqui viam ostendere non potuisset, neque figuram columnæ prætulisset. Sic autē legimus Exodi 13. Dominus præcedebat eos ad ostendendā viam, per diem in columna nubis, & per noctē in colūna ignis; ut dux esset itineris utroque tempore nunquā defuit columna nubis per diē, nec columna ignis per noctem coram populo. quid ergo sibi vult illud, expandit nubem in protectionem? explicatur hoc in Exodo, cap. 14. vbi, cum Pharaō, & exercitus eius persequeretur Hebræos recedentes, Angelus Domini cū columna nubis interposuit se inter exercitum Pharaonis, & populū Israel, ut ad se inuicem accedere non possent: & hoc modo expansa nubes illa inter vtrunque populum, protexit Hebræos, ne laderentur ab Aegyptijs. atque hæc dicta sint, si per nubem hoc loco intelligatur colūna nubis, de qua fit sermo in Exodo, cap. 13. & 14. nam potest etiam dici, præter illā nubis columnam, fuisse aliam nubem, quæ expansa super Hebræos protegeret illos ab æstu in itinere; cuius nubis non fit mentio in Exodo. atque hanc intelligentiam iuvat lectio hebraica, quam sic vertit S. Hieronymus, Expandit nubem in tentorium. & liber Sapientiæ, cap. 10. Et fuit illis in velamento diei, & luce stellarum per noctem.

XXXVIII

Petierunt, & venit coturnix, & pane cœli saturavit eos.

Septimum hic recolitur beneficium, quo Deus pavit in deserto populū suū pane cœli, id est, manna, quod pluebat e cœlo; & carnibus coturnicum, quas

Deus ministerio venti in desertum adduxit. Vbi notandū est, bis Deum dedisse populo coturnices, semel Exodi 16. & iterū Num. 11. & prima vice nō fuisse populum à Deo punitum, ob petitionem carniū; sed altera vice gravissimè fuisse punitū. In hoc ergo Psalmo, vbi sola beneficia commemorantur, mentio fit prioris tantum petitionis, quæ habetur Exodi 16. non posterioris, quæ habetur Num. 11.

Dirupit petram, & fluxerunt aquæ: abierunt in sicco flumina. XXXIX.

Octauum beneficiū hic adiungitur, quo Deus ex petra copiam aquarum eduxit in solitudine, ex qua riui instar fluminum decurrebant. Vide cap. 17. Exodi, & cap. 20. Numerorum.

Quoniā memor fuit verbi sancti sui, quod habuit ad Abraham puerum suum. XL.

Ratio præcedentium, & futurorum beneficiorum tribuitur promissioni factæ ad Patriarcham Abraham, singularem puerum, id est, seruum Domini: quamvis enim hæc nō fuerint illi promissa in particulari: tamen continentur in genere in illis verbis Gen. 15. dictis ad Abraham, Scito prænosces, quod peregrinū futurum sit semen tuū in terra non sua, & subicient eos seruituti, & affligent quadringētis annis. Veruntamen gentem, cui seruituri sūt, ego iudicabo; & post hæc egredientur cum magna substantia.

Et eduxit populū suum in exultatione, & electos suos in lætitia. XLI.

Nonum est hoc beneficiū, quo Deus submerso Pharaone in mari rubro, eduxit de seruitute populū suum canentem cū exultatione, & lætitia magna, Cantemus Domino, gloriosè enim magnificatus est. Exod. 15.

Et dedit illis regiones gentiū, & labores populorū possederūt. XLII.

Hoc est beneficium vltimum, introductio videlicet duce Iosue Hebræorū in regiones gentium multarū, & in labores

bore earum, id est, in vrbes, quas adificauerunt; & arua, quæ coluerant gentes illæ. Apostolus, Actor. 13. narrat, fuisse gentes septem, quas Deus eiecit e terra promissionis, vt in eas introduceret populum suum.

XLIII. Vt custodiant iustificationes eius, & legem eius requirant.

Hoc est quasi tributum, quod Deus requirit à suis, pro tam multis bonis in eos collatis: nimirum, vt obediant mandatis eius; quæ obedientia ipsis obedientibus vtilissima est, quia perducit ad bona multo maiora, quàm sit terræ promissionis adeptio. Per, iustificationes, intelliguntur hoc loco cerimonie, & iudicia, quæ multa erant. Per, legem, intelligitur lex moralis, quæ reducitur ad vnum præceptum, quod est dilectio. In hebræo habetur, Et legem eius seruarent. sed idem est sensus. nam legem requirere, nihil est aliud, nisi in omni actione legem consulere, eamque scrutari, vt iuxta eam omnia fiant.

P S A L M V S CV.

Titulus, & Argumentum.

Alleluia.

A L L E L U I A huius Psalmi est Alleluia. & iuxta hunc titulum laudatur Deus; non vt in superiore, ob sola beneficia; sed etiã ob misericordiam præstitã erga ingratos, qui præuenti à Deo in benedictionibus tantæ dulcedinis, Deo frequenter inobedientes, & rebelles fuerunt; & tamèn per penitentiam reconciliati in gratiã redierunt. Huius quoque Psalmi mentio fit in lib. 1. Paralipomenon, cap. 16. vbi ponitur prima pars Psalmi superioris; & in fine adduntur tres vltimi versiculi huius Psalmi.

Explicatio Psalmi 105.

- I. C** onfitemini Domino, quoniam bonus: quoniam in seculum misericordia eius.

Loquitur Propheta in persona fidelis populi pœnitentis, & gratias Deo agentis. Inuitat autem omnes ad laudes Dei: tum quia bonus est, & præuenit homines, beneficia multa in illos conferens; tum quia misericordia eius in recipiendis peccatoribus ad pœnitentiam renertentibus semper inuicta manet. vincit enim misericordia Dei miseras nostras; ad quas miseras pertinent præcipue scelera nostra. & quidem miseriæ nostræ, Deo propitio, breui euanescent; sed misericordia eius manet in seculum seculi.

Quis loquetur potentias Domini? auditas faciet omnes laudes eius?

Inuitauit omnes ad confessionem laudis: nunc obijcit sibi, vix inueniri qui sit idoneus ad prædicandas laudes Dei. Quis (inquit) loquetur, id est, loqui sufficit, potentias Domini, id est, opera potentie, siue potius omnipotentie eius? & mox idem repetit alijs verbis, Quis auditas faciet, id est, quis loquendo faciet, vt audiantur omnes laudes eius? Quæ videlicet laudes ex cognitione operum potentie eius oriuntur. Nominat hoc loco Dei potetiam Propheta, cum de omnibus operibus Dei laude dignis loquitur; quia omnia opera Dei mirabilia ad potentiam reuocari possunt. Nam de sapientia scriptum est, Sap. 8. Attingit à fine vsque ad finem fortiter, & disponit omnia suauiter. & verè fortissima est Dei sapientia, quæ in sua dispositione impediri non potest; & quia impediri non potest, ideò nec falli potest. Pari ratione opera misericordie ad potentiam reuocantur, quoniam ideò Deus solus absolutè misericors est, quia solus potest omnes miseras tollere; ac per hoc ideò solus propriè misericors est, quia solus omnipotens est. Ergo qui loqui posset omnes potentias Domini, posset etiam auditas facere omnes laudes eius. Sed quis ad hæc idoneus erit? Vir iustus in hac vita vtcunque, & pro modulo suo: sed longè melius, & plenius, qui beatus erit in vita futura.

ra. Ideo subiungit Propheta, respondens interrogationi suæ, ac dicit.

III. Beati qui custodiunt iudicium; & faciunt iustitiam in omni tempore.

Quasi dicat, soli illi beati sunt, ac per hoc loqui possunt potentias Domini, & auditas facere omnes laudes ei, qui custodiunt iudicium, & faciunt iustitiam in omni tempore, id est, qui semper rectè iudicant de omnibus rebus, quas agunt, quia regulam diuinæ legis in omnibus sequuntur, & semper iustè viuunt, declinantes à malo, & facientes bonum. Potest etiam hic versiculus ita exponi, ut idem bis repetatur, & idem sit custodire iudicium, & facere iustitiam: nam pro eodem accipiuntur in multis locis Psalmorum, iudicium, & iustitia. Porro iusti soli loqui possunt laudes Domini; tum quia ipsi non solum lingua, sed etiam vita laudant Dominum, ut scriptum est in Psal. 32. Rectos decet collaudatio; tum quia ipsi soli beati sunt, & habitant in domo Domini, vel in spe, dum hic viuunt, vel in re cum ad patriam perueniunt; & tallium officium est Deum laudare, iuxta illud Psal. 83. Beati, qui habitant in domo tua Domine, in secula seculorum laudabunt te. Quod autem hic dicitur, Beati qui custodiunt iudicium, & faciunt iustitiam in omni tempore, potest intelligi de vtrisque, id est, tam de beatis in spe, quam de beatis in re: beati enim in spe custodiunt iudicium, & faciunt iustitiam in omni tempore, pro modo fragilitatis humanæ viuentes sine crimine, & pro peccatis quotidianis veniam precantes: beati autem in re custodiunt iudicium, & faciunt iustitiam in omni tempore tanta perfectionis plenitudine, ut peccare nullo modo possint. Atque utrosque quidem decet collaudatio, sed pro modo perfectionis iustitiæ, & iuxta differentiam beatitudinis.

IV. Memento nostri Domine in beneplacito populi tui; visita nos in saluati tuo.

Ad videndum in bonitate electorum tuorum, ad latandum in lætitia gentis tuæ: ut lauderis cum hæreditate tua.

Posteaquam Propheta dixit, iustorum, ac beatorum esse officium laudandi Deum: optat, & precatur sibi, & suis hanc felicissimam sortem; & breuiter attingit prædestinationem, iustificationem, & glorificationem, quæ sunt initium, medium, & finis beatitudinis humanæ. Memento, inquit, nostri Domine in beneplacito populi tui, id est, adimple Domine beneplacitum illud, quo tibi complacuisti in populo tuo, in cœtu videlicet electorum, quos elegisti ante mundi constitutionem ex bona voluntate tua, in qua complacuit tibi dare pusillo gregi tuo Regnum sempiternum. Visita nos in saluati tuo, id est, ut impleas beneplacitum æternæ prædestinationis visita nos in Christo Salvatore, iustificas nos à peccatis per merita eius; siue, Visita nos per gratiā iustificationis, quæ est salus inchoata, & veluti semen salutis æternæ. Nam salutare vtrumque significat, & Salvatorem, & salutem, & vna significatio alteram includit. Vera enim salus siue inchoata per gratiam, siue consummata per gloriam, non potest haberi nisi per Salvatorem Iesum Christum Dominum nostrum: non enim est aliud nomen sub cœlo datum hominibus, in quo oporteat nos saluos fieri, ut dicit S. Petrus Act. 4. Ad videndum in bonitate electorum tuorum, id est, ut prædestinati, & iustificati perueniamus ad videndum bonum electorum tuorum, quæ est ipsa facies Domini conspicua: tunc enim similes ei erimus, cum videbimus eum, sicuti est. Per, bonitatem electorum, non intelligitur hoc loco probitas, sed ipsum bonum: & S. Hieronymus rectè vertit, Ut videam bona electorum: id enim significat, toua. Ad latandum in lætitia gentis tuæ, id est, ad participandam inenarrabilem illam lætitiā, quæ nascitur ex visione diuina, quæ est lætitia propria gentis tuæ, populi quæ tu electi, quam extranei gustare

stare non possunt, de qua dicitur in Evangelio, Intra in gaudium Domini tui. Ut lauderis cum hereditate tua, id est, ut finis ultimus sit omnium beneficiorum tuorum, perpetua laus tua, & hereditatis tuæ, ut sine fine lauderis tu, ut opifex, & hereditas tua, ut opificium; tu ut summus, potentissimus, sapientissimus, & optimus artifex, cui nullus est similis: & hereditas tua, ut opus egregium, & incomparabile, cui nullum est simile. Per hereditatem autem intelligitur cætus iustorum, quem sibi Deus elegit quasi propriam possessionem. Hereditas enim, & possessio pro eodem accipiuntur in Scripturis. Hic duæ sunt difficultates, una quod in hebræo sunt omnia in numero singulari, Memento mei, visita me, ut videā, ut læter, ut lauder: in græco, & latino sunt omnia in numero multitudinis, Memento nostri, visita nos, &c. sed facilis est concordia; quia in his verbis loquitur populus Dei, qui & unus est, ut possit loqui in numero singulari, & multitudinem continet, ut possit loqui in numero multitudinis. Præterea non est improbabile Septuaginta Interpretes legisse voces hebraicas in numero multitudinis, quæ nunc habentur in numero singulari; sola enim differentia est inter hos numeros, quod in singulari est in fine litera Iod, in plurali est litera Vau, quæ solum differunt, quod una est paulo breuior, quam altera; sic enim scribitur iod י, & sic scribitur vau ו: itaque facile fuit librarijs mutare unam in alteram. Altera difficultas est in illis verbis, ut lauderis cum hereditate tua: nam in hebraico, & græco sunt tria verba modi infiniti, ad videre, ad lætari, ad laudari, quæ nos latini efferimus per gerundia, ad videndum, ad lætandum, ad laudandum: noster autem interpretes vertit per gerundia, duo priora verba, & retulit ad nos, quasi diceret ad videndum, id est, ut videamus ad lætandum, id est, ut lætemur; & tertium variauit, dicens, Ut lauderis, cum debuisset vertere, ad laudandum, id est, ut laudemur, siue gloriamur. Hanc difficultatem notauit S.

Augustinus, & miratur valde, cur interpretes latini tertium membrum sententiæ ita variauerit. Ad hanc difficultatem respondemus, interpretem latinum variasse modum interpretationis, ut sententiæ redderet clariorem: nam si vertisset, ad laudandum cum hereditate tua ambiguum fuisset, quid significaret illud, ad laudandum, an ut laudemur, vel ut lauderis: & elegit hoc posterius, ut non solum clarior, sed etiam magis indubitata sententia esset. Cæterum quicquid sit de verbis, sensus semper est idem, nam si interpretes vertisset, ut laudemur, vel, ut magis sonat vox hebraica le hitallel, ut laudemus nos ipsos, siue ut gloriemur; oporteret subintelligi, in Domino, iuxta illud Psalmi superioris, Laudamini in nomine sancto eius: & illud Apostoli, Qui gloriatur in Domino gloriatur: quare omnis laus tandem ad Dominum referenda est, & ideo recte vertit interpretes, Ut lauderis cum hereditate tua; ut omnis obscuritas, & ambiguitas tolleretur. Fateor, hos duos versiculos potuisse etiam exponi de bonis temporalibus, qualia promittebantur, & expectabantur in testamento veteri, sed malui persequi sensum altiore, & magis intentum à Spiritu sancto, & ab ipso Propheta, in quem sensum accepit hæc verba S. Bernardus serm. 23. super Cantica.

להללנו

Peccauimus cum Patribus nostris iniuste egimus, iniquitatem fecimus. VI.

Patres nostri in Aegypto non intellexerunt mirabilia tua; non fuerunt memores multitudinis misericordiæ tuæ. VII.

Et irritauerunt ascendentes in mare rubrum. VIII.

Et saluauit eos propter nomen suum, ut notam faceret potentiam suam. IX.

Et increpuit mare rubrum, & exiccatum est, & deduxit eos in abyf-

X.

abyssis, sicut in deserto.

XI. Et saluauit eos de manu odientium, & redemit eos de manu inimici.

XII. Et operuit aqua tribulantes eos, vnus ex eis non remansit.

XIII. Et crediderunt verbis eius, & laudauerunt laudem eius.

Hic iam incipit Propheta in persona aliorum fidelium minus perfectorum, sed verè pœnitentium confiteri peccata sua, & peccata Patrum ab egressu de Aegypto vsq; ad sua tempora; vt simul commemoret laudes misericordiæ Dei, quæ nunquam finem pœnitentibus claudit. Sunt autem hi octo versiculi satis noti ex historia libri Exodi, & ex Psal. 77. neq; est hic vlla dissensio inter codices latinos, græcos, & hebraicos. Illud, peccauimus cum Patribus nostris, significat, socij fuimus Patrum nostrorū in peccatis, quia imitati sumus peccata eorum, & sic impleuimus mensuram eorum. Illud, non intellexerunt mirabilia; refertur ad illud tempus, quo filij Israel egressi de Aegypto cum vidissent exercitum Pharaonis post se venientem, adeo desponderunt animum, vt etiam quererentur de Mose, qui eos eduxerat de Aegypto. vide cap. 14. Exodi. Nam si intellexissent mirabilia Dei tam multa, quæ præce-

ferant, omnino cōfisi fuissent de potentia, & auxilio Domini. Illud, & irritauerunt, significat, filios Israel in angustijs illis constitutos, cum ante se cerne-

rent mare rubrum, post se Pharaonis exercitum, irritasse Deum diffidentia, & incredulitate sua. Illud, ascendentes in mare, mare rubrum, difficile est; nā mare est inferius terra, ac per hoc descenditur in mare vel ad mare, non ascenditur. S. Augustinus respondet, illud, ascendentes, referri ad Aegyptum;

vt sensus sit, ascendentes ex Aegypto, & in mari rubro, idest, ad litus maris rubri constitutos, ibi irritasse irā Dei, itaq; notandam esse virginem post vocem, ascendentes. Sed quia in textu latino non habetur in mari, sed in mare,

& additur mare rubrum; diuersum est, illud, in mare, positum esse pro ad mare, vt sensus sit, Hebræi ascendentes de Aegypto irritauerunt Deum ad mare rubrum, siue ad litus maris rubri. In hebræo clarior est sensus, vbi sic legitur ad verbum, Irritauerunt super mare, mare rubrum, idest, irritauerunt Deum, cum essent super mare rubrum, idest, proximi mari rubro. Illud, increpuit mare, metaphoricum est. significatur autem, mare recessisse ad nutū Dei, quo modo recedit velociter, qui timet indignationem & minas viri potentis. Illud, in abyssis, sicut in deserto; est locutio similis illi, Cæci vident, surdi audiunt, idest, qui erant cæci nunc vident, & qui erant surdi, nunc audiunt. Abyssus enim significat profunditatem aquarum, quæ contraria est locis desertis, & arentibus. Itaque sensus est, deduxit eos in abyssis, idest, in locis vbi solebāt esse aquæ profundissimæ, ac si eos deduceret per desertū, vbi nullæ sunt aquæ. Illud, laudauerunt laudem eius; in hebræo est, cantauerūt laudem eius: proinde laudauerunt, quod nos habemus, significat, celebrauerunt concinentes laudem eius: quid autem cantauerint, habetur Exod. 15. vbi ponitur canticum illud, Cantemus Domino, gloriose enim magnificatus est. &c.

Cito fecerunt, obliti sunt operum eius, & non sustinuerunt consilium eius. XIV.

Et concupierunt concupiscentiam in deserto: & tentauerunt, Deum in inaquoso. XV.

Et dedit eis petitionem ipsorum, & misit saturitatem in animas eorum. XVI.

Pergit Propheta in enarranda ingratitudine populi, qui cum vidisset miraculum tam insolitum in mari rubro, & Deum tam eximie inde laudasset: mox occurrente penuria panis, & aquæ, obliti sunt omnipotentis & prouidentis Dei, & in verba impatientia, & infidelitatis proruperunt. Cito fecerunt, idest,

ideſt, feſtinaverunt, ſive acceleraverunt, ut clarius habetur in textu hebraico, & græco. Quid autem citò fecerint, & in quo feſtinaverint, explicat dicēs, obliſi ſunt operum eius, ideſt, feſtinaverunt obliſiſci operum Dei mirabiliū, quæ viderant. Et non ſuſtinuerunt conſilium Dei, ideſt, non patienter expectaverunt finem diuino conſilio conſtitutum. Deus enim permit- tens illos ad tempus affligi, tentabat fidem, & ſpem, & dilectionem ipſorū: ſed ipſi non intelligentes conſilium Dei, murmurabant, quaſi Deus curam illorum non gereret, aut eos iuuare nō poſſet. Explicat deinde in particulari, in qua re impatientes fuerint, dicēs, Et concupierunt concupiſcentiam in deſerto, & tentauerunt Deum in inaquoſo, ideſt, non potuerunt, vel ad modicum tempus tolerare famem, & ſitim in deſerto inaquoſo, ubi deerant panis, & aqua. Illud, concupierunt concupiſcentiam, eſt phraſis non omnino inuſitata etiam apud latinos; ſic enim dicimus, viuere vitam, & ſeruire ſeruitutem. ſed apud hebræos frequens eſt ponere concupiſcentiam pro re concupita, deſiderium pro re deſiderata, & petitionem pro re petita. vnde ſunt illa, Deſiderium eorum attulit eis. Pſal. 77. & dabit tibi petitiones cordis tui. Pſal. 36. & in hoc ipſo Pſalmo, verſiculo ſequenti, Et dedit eis petitionem ipſorum, ideſt, panes, carnes, & aquam, quæ petierant. Et miſit ſaturitatem in animas eorum, ideſt, ſatiauit appetitum ipſorum abundantia panum, & carnum, & aquarum copia, ut perſpicuum eſt ex cap. 16. & 17. Exodi. & ex cap. 14. & 20. Numeri. In hebræo pro, ſaturitatem, habetur, tenuitatem, ſive maciem. Sed Septuaginta Interpretes non legerunt, raron, quod ſignificat, maciem, ſed ratſon, quod ſignificat complacentiam. quod rectè poſitum eſt pro ſaturitate, quia illis cibis ſaturamur, qui nobis valdè placent. & hæc eſſe veram lectionem perſpicuum eſt; quia eſt conformis hitoriæ; ſic enim legimus. Exod. 12. Veſpere comedetis carnes, & mane ſaturabimini pani-

bus. & in Pſal. 77. legimus, Comederunt, & ſaturati ſunt nimis: deſiderium eorum attulit eis, & non ſunt fraudati à deſiderio ſuo.

Et irritauerunt Moysen in caſtris, Aaron ſanctum Domini. XVII.

Aperta eſt terra, & deglutiuit Dathan, & operuit ſuper congregationem Abiron. XVIII.

Et exarſit ignis in ſynagoga eorum, flamma combuſſit peccatores. XIX.

Attingit hoc loco Propheta hitoriā Dathan, & Abiron, quæ habetur cap. 16. libri Numeri. Et irritauerunt Moysen in caſtris, ideſt, Core, Dathan, & Abiron irritauerunt Moysen, obijcientes ei, quòd imperium ſibi uſurpaſſet ſuper filios Iſrael. Aaron ſanctum Domini, ideſt, non ſolum Moſem, ſed etiam Aaron fratrem eius irritauerunt, quem Deus ſibi ſanctificauerat, ut ſacerdotio fungeretur. Aperta eſt terra, & deglutiuit Dathan cum ſocijs eius Core, & Abiron, & omni familia & ſubſtantia eorum. Et operuit ſuper congregationem Abiron, ideſt, terra diſrupta poſteaquam deglutiuit ſchiſmaticos, iterum clauſa eſt, & cooperuit omnem congregationem Abiron, & ſociorum eius. Illud, ſuper, redundat, quamuis enim habeatur in hebræo, tamen S. Hieronymus vertit, Et operuit ſynagogam Abiron: ſed latinus interpres imitari voluit phraſim hebraicam, quod etiam fecerunt Septuaginta Interpretes. Et exarſit ignis in ſynagoga eorum, flamma combuſſit peccatores: nam, ut narratur in eodem cap. 16. Numeri, cū degluſſet terra Core, Dathan, & Abiron cum tabernaculis ipſorum, diuino iuſſu excitatus eſt ignis, qui combuſſit ducentos quinquaginta viros, qui præſumpſerant incenſum offerre Deo; quod ad eorum officium non pertinebat: & paulò poſt cū murmuraret populus contra Moſem, quaſi ipſe viros illos occidiſſet, iterum exarſit ignis immiſſus à Deo, qui cremauit quatuordecim milia,

רשעים

lia, & septingētos viros. Pro voce, peccatores, in hebræo est, *resahim*, quod impios significat. Itaque non significantur hoc loco quicunque peccatores, sed grauissimi, schismatici videlicet, & eorum fautores.

XX. Et fecerunt vitulum in Horeb, & adorauerunt sculptile.

XXI. Et mutauerunt gloriam suam in similitudinem vituli comedentis fœnum.

XXII. Obliti sunt Deum, qui saluauit eos, qui fecit magnalia in Aegypto, mirabilia in terra Cham, terribilia in mari rubro.

XXIII. Et dixit, vt disperderet eos, si non Moyses electus eius stetisset in confectione in cōspectu eius.

XXIV. Vt auerteret iram eius, ne disperderet eos: & pro nihilo habuerunt terram desiderabilem.

Detestatur nunc Propheta Idololatriam populi, qui vitulum aureum fieri iussit, eumque tanquam Deum adorauit: & simul laudat misericordiam Dei, qui ad preces Moysis placatus, tam immane peccatum populo condonauit. habetur hæc historia in lib. Exodi cap. 32. Et fecerunt vitulum in Horeb, idest, vitulum aureum ad similitudinē Idoli Aegyptiaci fieri curauerunt ab Aarone, qui metu compulsus obtemperauit vocibus populi. Fecerunt autem illud idolum in Horeb, idest, in regione adiacente monti, qui vocatur Horeb, & idem est cum monte Sinai, vt Theodoretus docet, & notum est ex Deuterou. cap. 4. vers. 15. & Exod. cap. 19. vers. 20. Et adorauerunt sculptile; vitulum videlicet aureum: quamuis enim vitulus ille opere potius confectoris, quam sculptoris factus fuerit, vt habetur in textu hebraico; tamen sculptile dictum est significatione generali, vt comprehendit omnes imagines solidas, siue ligneas, & marmoreas, quæ propriè sculptuntur, siue aureas, & ar-

genteas, quæ propriè conflantur. Meminit autem Dauid montis Horeb, & sculptilis, cum notat idololatriam populi, quia in monte Horeb non multo antea Deus apparens initio diuinæ legis dixerat, non facies tibi sculptile, non adorabis ea, neque coles. Itaque multum auget crimen Hebræorum, quod in ipso loco fecerint, & adorauerint sculptile, siue conflatile, vbi hoc ipsum præcisè vetitum fuerat. Et mutauerunt gloriam suam in similitudinem vituli comedentis fœnum. Exaggerat Propheta stultitiam Hebræorum, quod substituentes idolum in forma vituli Deo vero, commutauerint gloriam suam, idest, Deum verum, qui erat gloria ipsorum, in imaginem animantis bruti: nec dicit, Deum in vitulum, sed quod vilius est, in imaginem vituli, idest, rem preciosissimam in rem vilissimam. Obliti sunt Deum, qui saluauit eos, qui fecit magnalia in Aegypto, mirabilia in terra Cham, terribilia in mari rubro. Hoc etiam pertinet ad augendam stultitiam Hebræorum, qui obliti sunt Dei, qui eos saluauerat de captiuitate Pharaonis, vt colerent Deum, qui neque se, neque alios saluare poterat: nam Moses contriuit vitulum aureum, & redegit in puluerem; ipso vitulo non se defendente, ac ne sentiente quidem. Item obliti sunt Hebræi Dei omnipotentis, qui fecit magnalia in Aegypto, idest, mirabilia signa, & prodigia in tota terra Aegypti, quæ etiam dicitur terra Cham, & terribilia in mari rubro, siccans mare illud, vt transirent filij Israel, & iterum aquis replens, vt suffocarentur Aegyptij, & coluerunt Deum inanem, & imbellem, simulachrum videlicet mutum & inutile. Hic notanda est temeritas Io. Caluini hæresiarchæ, qui scripsit, Hebræos in vitulo aureo coluisse Deum verum; cum Dauid apertè dicat, Obliti sunt Deum, qui saluauit eos. Et paulò ante, Mutauerunt gloriam suam in similitudinem vituli comedentis fœnum. Vide quæ scripsimus in libro de Reliquijs, & imaginibus cap. 13.

Et

Et dixit, vt disperderet eos, si non Moyses electus eius stetisset in confectione in conspectu eius, id est, tunc Deus dixit, ac pronunciauit voluntatem suam esse, vt disperderet populum Hebræorum; & fecisset, nisi Moyses electus famulus eius intercessione sua obstitisset, vt auerteret iram eius, ne disperderet eos. Illud, in confectione, in hebræo est, **בפרץ**, quod significat, in diuisione, siue in disruptione. S. Hieronymus secutus priorem significationem vertit, nisi Moyses stetisset medius contra faciem illius, id est, nisi opponens se medium diuisisset Deum à populo, & eo modo fecisset ne gladius iræ Dei ad populum perueniret: sed Septuaginta Interpretes secuti posteriorem significationem, verterunt, **ἐν τῇ ἀπάρσει**, nisi stetisset in fractura, & disruptione, hoc est, nisi opposuisset se ruinæ imminenti: vel, nisi disruptio iam muro stetisset in medio, vt impediret irruptionem iræ Dei. Itaque metaphora sumpta est vel ab eo, qui sustinet ruentem fabricam, & impedit, ne penitus ruat: vel ab eo, qui disrupto iam muro opponit se loco muri, vt arceat ingressum hostium: summa est, magnam vim habere intercessionem Sactorum apud Deum, vt hoc loco sanctus Augustinus annotauit. Et certè si non essent preces assidue seruorum, & amicorum Dei, quibus Deus placari se patitur, Mundus, qui totus in maligno positus est, non tandiu subsisteret.

Et pro nihilo habuerunt terram desiderabilem.

- XXV. Non crediderunt verbo eius, & murmurauerunt in tabernaculis suis: non exaudierunt vocem Domini.
- XXVI. Et eleuauit manum suam super eos, vt prosterneret eos in deserto.
- XXVII. Et vt deiiceret semen eorum in nationibus, & dispergeret eos in regionibus.

Card. Belarm. in Psal.

In parte versiculi vigesimi quarti, in qua nouum versum incipiunt hebræi, & tribus sequentibus versiculis, commemorat Propheta peccatum illud populi Hebræi, quo spreuerunt terram promissionis, quam Deus esse dixerat, fluentem lacte, & melle. Habetur hæc historia in lib. Num. cap. 13. & 14. & clarius Deuter. 1. Et pro nihilo, inquit, habuerunt terram desiderabilem, id est, terram promissionis, quam vti felicissimam desiderare debuissent, ipsi contempserunt, & pro nihilo habuerunt, dicentes, Terra hæc deuorat habitatores suos. S. Hieronymus vertit, Et despexerunt terram desiderabilem. Non crediderunt verbis eius, id est, Dei, qui toties dixerat, terram esse optimam: & murmurauerunt in tabernaculis suis aduersus Dominum, qui de Aegypto illos eduxerat, vt in terram promissionis induceret. Non exaudierunt vocem Domini, id est, non obediuerunt præceptis eius. Et eleuauit manum suam super eos, vt prosterneret eos in deserto: Et vt deiiceret semen eorum in nationibus, & dispergeret eos in regionibus, id est, leuauit manum suam gladio iustitiæ armatam super peccatorem populum suum, vt eos qui tunc murmurauerant, occideret in deserto: & filios eorum deieceret, & abiectos dispergeret inter gentes, vt non essent amplius populus, aut Resp. Et quidem illud prius executioni mandauit Deus: omnes enim, qui murmurauerant, mortui sunt in solitudine, vt Scriptura refert Num. 14. Illud autem posterius non mandauit tunc executioni propter preces Moysi: sed postea irritatus maioribus sceleribus omnino impleuit tum sub Rege Babylonis, tum præcipue sub Tito, & Vespasiano, vt nos videmus. Quo loco notandum est, quàm grauius irascatur Deus in eos, qui spernunt Regnum cælorum nobis à Dei filio prædicatum, & promissum: si tam grauius iratus est Hebræis, quod spreuerint terram promissionis prædicatam à Mose, quæ nihil aliud, nisi terra erat, & figura Regni cælorum.

Vu Et

- XXVIII. Et initiati sunt Beelphegor, & comederunt sacrificia mortuorum.
- XXIX. Et irritauerunt eum in adinventionibus suis, & multiplicata est in eis ruina.
- XXX. Et stetit Phinees, & placuit, & cessauit quassatio.
- XXXI. Et reputatum est ei in iustitiā, in generationem & generationem usque in sempiternum.

Attingit hoc loco David aliud peccatum populi, cuius historia habetur Num. 25. Nam ut ibi legimus, filij Israel decepti à filiabus Moab, cœperunt fornicari cū eis, & colere Idolum earum, dictum Beel phegor: ex quo iratus Dominus iussit suspendi in patibulis omnes Principes populi. Sed cū Phinees filius Eleazari, nepos Aaronis Sacerdotis, zelo Dei ductus, occidisset vnum de filijs Israel vna cum muliere Madianitide, in ipso actu fornicationis, placatus fuit Deus, ob meritum zeli ipsius, toti populo. Et initiati sunt Beelphegor, idest, & addiderunt filij Israel ad alia peccata, ut initiarentur, siue conscrarentur in honorem idoli Moabitarum, quod vocabatur Beelphegor. Dicebatur autē idolum Moabitarum Beel Phegor à monte Phogor, cuius montis mentio fit Num. 23. quasi diceretur, Dominus Phegor. Baal enim Dominum significat. Baal, & Beel idem sunt: sed hebræi dicunt, Baal Phegor, Græci, Beel Phegor. Et comederunt sacrificia mortuorum, idest, comederunt sacrificia oblata Dijs mortuis, non Deo viuo, qui vnus verus est Deus: dicuntur autem Dijs mortui, vel ipsa idola, quæ veluti mortua oculos habent, & non vident; aures habent, & non audiunt: vel homines mortui, qui à paganis referebantur in Deos, quales erant in Aegypto Apis, & Serapis; apud Græcos Iuppiter, & Apollo; apud Romanos Romulus, & alij. Et irritauerunt eum in adinventionibus suis, & multiplicata est in eis ruina, idest, irritauerunt Deum in cultu nouorum Deorum, quem ipsi ex-

cogitauerunt, non quòd ipsi primi fuerint inuentores Idoli Beelphegor, sed quòd fuerint primi, qui cultum illius idoli à Moabitis acceptum introduxerunt in populum Israeliticum. Et multiplicata est in eis ruina; idest, propter hoc peccatum multiplex ruina facta est in populo, plurimis videlicet miserè interemptis. Et stetit Phinees, & placuit, & cessauit quassatio, idest, Phinees zelo diuini honoris accensus stetit intrepidus aduersus inpios desertores antiquæ religionis, & placuit zelo suo Deum, & sic cessauit inchoata strages in populo Dei: vox hebraica, palal, ambigua est: nam & iudicare, & orare, atque oratione placare significat. Sanctus Hieronymus primam significationem secutus vertit, Stetit Phinees, & dijudicauit. Septuaginta Interpretes secuti tertiam significationem verterunt, Stetit Phinees, & placuit: vterque sensus est verus. Phinees enim dijudicando, & damnando, ac puniendo impios, hoc factò quasi sacrificio Deo gratissimo Deum placauit. Et reputatum est ei ad iustitiam, idest, à Deo, qui scrutatur corda, & qui probè nouit optimam intentionem Phinees, reputatum est hoc factum non iniusta cædes, sed iusta punitio; quæ non pœnam mereretur, sed laudem, & præmium: idque in generationem & generationem usq. in sempiternum. Hoc dicit Propheta, quia propter meritum illius facti, ut habetur Numeri 25. Stabiliuit Deus dignitatem summi Sacerdotij ipsi Phinees, & posteris eius in æternum, idest, toto tempore, quo duraret Resp. Iudaica.

Et irritauerunt eum ad aquas ^{XXXII.} contradictionis: & vexatus est Moyses propter eos, quia exacerbauerunt spiritum eius.

Transit Propheta ad aliud peccatum Iudæorum, quod habetur in lib. Num. cap. 20. Vbi populus altercari cœpit cum Mose propter aquæ penuriam: Moyses autem perturbatus non nihil hesitasse videtur dicens, Num de petra hac aquam vobis poterimus eiicere? percussit

fit tamen bis virga petram, & egressæ sunt aquæ in maxima copia. Sed Deus subiratus Mosi propter hæsitacionem, puniuit illum ea pœna, vt non introduceret ipse populum in terram promissionis, sed. ioreretur in itinere. Et irritauerunt eum, idest, hebræi Deum, ad aquas contradictionis, idest, in eo loco vbi propter aquæ penuriam contradixerunt Mosi, & iurgati sunt aduersus eum. Et vexatus est Moyses propter eos, idest, & anxius est, atque afflictus Moses propter iurgia populi. Quia exacerbauerunt spiritum eius, idest, quia iurgando, & murmurando aduersus Mosem, ad amaritudinem, & tristitiam adduxerunt spiritum eius, qui alias alacer, & promptus esse solebat ad omnia Dei mandata sine vlla hæsitacione complenda.

XXXIII. Et distinxit in labijs suis; non disperdiderunt gentes, quas dixit Dominus illis.

XXXIV. Et commixti sunt inter gentes, & didicerunt opera eorum, & seruierunt sculptilibus eorum, & factum est illis in scandalum.

Aliqui coniungunt primam partem versiculi trigesimi tertij, cum versiculo superiore, vt sensus sit, Moses non plena fide imperauit petræ, vt aquas funderet, quemadmodum iusserat Deus dicens Mosi, & Aaroni, loquimini ad petram, & ipsa dabit aquas: sed cum distinctione, & dubitatione dixit, Num de petra hac vobis aquam poterimus eijcere? Itaque illud, distinxit in labijs suis, significare volunt, Mosem non absolute imperasse petræ, sed distinguendo, & diuidendo verba, hæsitasse; sic enim hunc locum intellexit S. Augustinus, & auctores græci Theodoretus, & Euthymius. Cæterum aduersus hanc expositionem duo pugnant. Vnum quod verba sic exposita non cohærent cum sequentibus, non disperdiderunt gentes, &c. Alterum, quod verbum græcum, tum hebraicum, tum etiã latinum, distinguere labijs, in alijs locis Scripturæ, non significat, dubitare, vel

hæsitare, sed absolute pronunciare. Psal. 65. Reddam tibi vota mea, quæ distinxerunt labia mea. vbi habetur idem verbum græcum, διακρίνω, quod habetur hoc loco: vt etiam habetur Num. 30. & Leuit. 15. vbi agitur de promissione voti, vel iuramenti. Sic etiam vox hebraica, bara, quæ habetur hoc loco, significat loqui, promittere, pronunciare, vt patet ex cap. 5. Leuitici, & cap. 30. Num. supra citatis: nusquam autem dubitare, vel hæsitare. Denique vox latina, distinguere labijs, & distinctè loqui, non videtur ad ambiguitatem, sed ad perspicuitatem potius pertinere. Existimo igitur, saluo meliore iudicio, in hoc versiculo inchoari aliã historiam, quæ habetur in libro Iudicum, vbi legimus, Hebræos non disperdidisse omnes gentes idololatrias ex terra promissionis, quemadmodum Dominus iusserat, sed habitasse cum illis, & didicisse superstitiones, & sacrilegia eorum. Ait igitur David, Et distinxit in labijs suis, idest, Deus apertè pronunciauit, & reprehendit hebræos, quod non exterminauerint gentes quas dixit Dominus illis, idest, quas ipse idem Dominus iusserat exterminari, Deuter. 7. Videtur David alludere ad verba Angeli, qui in persona Domini sic loquitur in cap. 2. Iudicum, Eduxi vos de Aegypto, & introduxi in terram pro qua iuraui patribus vestris, & pollicitus sum, vt nõ facerem irritum pactum meum vobiscum in sempiternum, ita dumtaxat, vt non feriretis fœdus cum habitatoribus terræ huius, & aras eorum subuerteretis; & noluitis audire vocem meam. Et commixisti sunt inter gentes, & didicerunt opera eorum, & seruierunt sculptilibus eorum. Id notum est ex toto libro Iudicum. Et factum est illis in scandalum, idest, in ruina: ea enim causa fuit, vt traderentur à Deo in potestatem diuersorum Regum idololatrarum, vt patet ex cap. 2. Iudicum, vel potius ex toto libro. Iustum enim fuit, vt qui Diabolum pro Deo elegerant, traderentur in seruitutem eorum, quibus Diabolus dominabatur.

Vu 2 Et

XXXV. Et immolauerunt filios suos,
& filias suas Dæmonijs.

XXXVI. Et effuderunt sanguinem innocentem, sanguinem filiorum suorum, & filiarum suarum, quas sacrificauerunt sculptilibus Chanaan.

XXXVII. Et infecta est terra in sanguinibus, & contaminata est in operibus eorum, & fornicati sunt in adinventionibus suis.

Hæc non habentur in libro Iudicũ: tamen vera esse necesse est, cùm à Spiritu sancto per Prophetam dicantur. & credibile est, ea per traditionem à maioribus ad Dauidem peruenisse. Semel Deus verus imperauit Abrahamo, vt filium immolaret; quod tamen perfici noluit, contentus præparatione mentis ad obediendum: Dij verò falsi, dæmones videlicet, inimici crudelissimi generis humani, inuidentes Deo tantam serui sui Abrahami obedientiam, non contenti promptitudine voluntatis, re ipsa filios, & filias sibi sacrificari à proprijs parentibus voluerunt. Et tanta erat cæcitas hominum, vt non agnoscerent tyrannidem dæmoniorum, & quantum interesset inter iugum suauis conditoris, & compedes ferreas, & durissimas destructoris. Illud, infecta est terra in sanguinibus, in græco est, *ἡ γῆ ἐκτεταμένη*, idest, interfecta est terra. Sed in hebræo est, *thechenaph*, idest, infecta, siue polluta. Sensus autem idem est: dicitur enim terra interfecta, idest, destructa in sanguinibus, quando ob multitudinem interfectorum, & copiam sanguinis effusi desolatur. siue autem dicatur terra destructa, siue polluta sanguine, significatur cædes facta filiorum, & filiarum in sacrificium dæmoniorum, sed per verbum, destructa, siue desolata, significatur maior cædes, quàm per verbum, infecta. Illud verò, & fornicati sunt in adinventionibus suis, significat spirituales fornicationes, quam committebat synagoga Iudæorum, quæ Deo desponsata fuerat, cùm adorabat

idola, illisque tanquam adulteris viris se subiciebat. Dicitur verò cultus idolorum; propria ipsorum adinuentio, quia non eam didicerant à Mose legislatore, sed ipsi per se cogitauerant bonum esse imitari gentes idololatrias.

Et iratus est furore Dominus in populum suum, & abominatus est hæreditatem suam. XXXVIII

Et tradidit eos in manibus gentium, & dominati sunt eorum, qui oderunt eos. XXXIX.

Et tribulauerunt eos inimici eorum, & humiliati sunt sub manibus eorum, sæpe liberauit eos. XL.

Ipsi autem exacerbauerunt eum in consilio suo: & humiliati sunt in iniquitatibus suis. XLI.

Et vidit, cùm tribularentur, & audiuit orationem eorum. XLII.

Et memor fuit testamenti sui, & pœnituit eum secundum multitudinem misericordiæ suæ. XLIII.

Et dedit eos in misericordias, in conspectu omnium, qui ceperant eos. XLIV.

In his septem versiculis decatat Propheta historiam libri Iudicam, in qua narratur, hebræos ob peccata sua, quibus Deum ad iracundiam prouocabant, traditos fuisse à Deo frequenter in potestatem hostium, Moabitarum, Ammonitarum, Philistinorum, & aliorum: sed cùm ad pœnitentiam redirent, solum quoque fuisse Deum, excitare virum aliquem strenuum, per quem liberarentur, vt Iephthæ, Gedeonem, Sampsonem, & alios. Versiculus 41. vbi dicitur, exacerbauerunt eum in consilio suo: non significat in consilio Dei de liberandis hebræis, vt multi existimant; sed in consilio ipsorum Iudæorum, qui sæpe consilium inibant recedendi à Deo: nam in hebræo habetur expressè, In consilio ipsorum. proinde illud, suo, quod apud latinos est ambiguum, explicandum est per textum he-

hebraicum, ubi nulla est ambiguitas. Ultimus versiculus, Et dedit eos in misericordias in conspectu omnium, qui ceperant eos; duobus modis exponi potest. Primum, ut sensus sit, fecit Deus per providentiam suam, ut qui captivos duxerant hebræos, eorum misererentur, & vel relaxarent, ut fecit Cyrus, & Darius: vel benignè tractarent, ut fecit Nabuchodonosor cum multis hebræis. Ita exponit Theodoretus. sed exempla huius misericordiae non facile inueniuntur, nisi post tempora Davidis. & præterea David dicit, in conspectu omnium, qui ceperant eos. non est autem verum, omnes qui ceperant Hebræos, habuisse erga eos misericordiam, neque ante tempora Davidis, neque postea. Videtur igitur probabilior sententia S. Augustini, quam etiam attingit Euthymius, ut sensus sit, dedit eos in misericordias, idest, fecit cum eis Deus misericordiam, siue posuit eos in finem misericordiae suae, in conspectu omnium qui ceperant, idest, videntibus, & mirantibus ijs, qui eos ceperant; semper enim Deus tam evidenti signo misericordiae suae liberavit populum suum siue de Aegypto, siue de potestate Moabitarum, vel Philistinorum, vel aliorum, ut ne hostes quidem negare possent, Deum pugnare pro populo suo. reliqui versiculi nullam habent difficultatem.

- XLV.** Saluos nos fac Domine Deus noster, & congrega nos de nationibus.
- XLVI.** Ut confiteamur nomini sancto tuo: & gloriemur in laude tua.
- XLVII.** Benedictus Dominus Deus Israel à seculo, & usque in seculum: & dicet omnis populus, fiat, fiat.

Hæc est conclusio Psalmi, qua precatur Deum Propheta, ut omnem populum fidelem congreget de nationibus, idest, reducat omnes dispersos ad certum piorum, ut omnes simul gratias

Card. Belarm. in Psal.

agent Deo, eumque laudent, & glorientur in laude ipsius. Existimant quidam aliqui, Davidem loqui de dispersione, & captiuitate Babylonica, quam per spiritum prævidebat futuram. sed credibilius est, eum loqui de dispersione inter gentes, quæ adhuc supererant in terra promissionis, initio Regni Davidis, aduersus quas gentes multa ipse bella gessit, ut perspicuum est ex lib. 1. & 2. Regum. Concludit postremo David Deum laudans, & dicens, Benedictus sit Dominus Deus Israel omni tempore, vel potius in æternum. & omnis populus confirmet benedictionem dicens, fiat, fiat, siue Amen, Amen. Atque hic est finis libri quarti secundum hebræos.

P S A L M V S CVI.

Titulus, & Argumentum.

Alleluia.



ITVLVS est, Alleluia, quam vocem codices hebraici nunc habent in fine Psalmi superioris. Sed Septuaginta Interpretes ponunt eam initio huius Psalmi, quoniam ita in suis codicibus hebraicis inueniunt. Rectè autem titulus Psalmi est, Alleluia, idest, laudate Dominum; quoniam in hoc Psalmo laudatur primo misericordia Dei, quæ liberat homines à quatuor communibus miserijs, quas paulo post enumerabimus. & ideo quater repetuntur duo versiculi, Clamauerunt ad Dominum cum tribularentur, & de necessitatibus eorum liberavit eos. &, Confiteantur Domino misericordiae eius, & mirabilia eius filijs hominum. Deinde in altera parte Psalmi laudatur omnipotentia Dei, quæ solo nutu mutat rerum naturas. Dissensio quidem est inter expositores de quatuor illis miserijs: alij enim volunt eas esse corporales, & ad populum hebræorum propriè pertinere.

Vu 3 Alij

Alij existimant corporales esse, sed pertinere ad humanum genus vniuersum, non ad solos Iudæos. Alij spirituales esse censent, & liberationem ab illis, esse propriam Electorum. Alij denique spirituales esse dicunt, & liberationem ad omnes pertinere. Sed videntur sententiæ istæ facile posse ad concordiam redigi, si dicamus ad literam de miserijs corporalibus agi, mysticè de spiritualibus: & ad genus humanum vniuersum pertinere, sed exempla poni in ijs rebus, quæ populo Hebræorum propriè contigerunt: liberationem verò perfectam ad solos electos; imperfectam ad omnes pertinere.

Explicatio Psalmi 106.

- I. **C**onfitemini Domino, quoniā bonus; quoniam in seculum misericordia eius.
- II. Dicant, qui redempti sunt à Domino, quos redemit de manu inimici, & de regionibus congregauit eos.
- III. A solis ortu, & occasu, ab aquilone & mari.

Hæc est præfatio totius Psalmi, in qua Dauid hortatur omnes, qui experti sunt misericordias Domini, vt confiteantur laudes Domini; ac potissimum confiteantur ipsi Domino, quod ipse sit verè bonus, & misericors, & misericordia eius nunquam deficiat. Et quidem maximè propriè inuitat fideles, quos redemit sanguine Unigeniti sui de manu inimici potentissimi, à quo captiui tenebantur ad ipsius volūtatē, idest, Principis tenebrarum; quosque congregauit in vnum populum, in vnam Ecclesiam, in vnum Regnum filij dilectionis suæ, non ex Aegypto, vel Babylone, vt olim Hebræos, sed ab ortu solis, & occasu, ab aquilone, & mari, idest, à quatuor Mundi partibus, siue ex toto orbe terrarum, iuxta illud Ioan. 10. Alias oves habeo, quæ non sunt ex hoc ouili, & illas oportet me adducere, &

vocem meam audient, & fiet vnum ouile, & vnus Pastor. & Ioan. 11. Quia Iesus moriturus erat pro gente, & non solum pro gente, sed vt filios Dei, qui erant dispersi congregaret in vnum. Quamuis autem maximè propriè inuitentur fideles, siue ex hebræis, siue ex gentibus: tamen inuitantur etiam generatim omnes homines, quos quocunq. loco, & tempore liberauit Dominus de quacunque vexatione: nam redemptio in Scripturis accipitur passim pro liberatione, etiam si non fiat pretio interueniente: item quos liberauit de manu, idest, potestate cuiuscunque inimici: denique quos liberauit de quocunque exilio, de quacunque dispersione, de quacunque extremitate terræ, & reuocauit in patriam, atque ad populum suum congregauit. Porro illa descriptio à Solis ortu, & occasu, ab aquilone, & mari, continet, vt notum est, longitudinem, & latitudinem terræ: nam longitudo incipit ab ea regione, vnde oritur Sol, & definit in eam, vbi Sol occidit: latitudo incipit ab ea parte, vnde fiat ventus, qui dicitur Aquilo, & definit in eam, quæ alluitur mari magno, quod Oceanus vocatur, quæ pars australis etiam dici solet, quia ventus Aufler, Aquiloni oppositus, inde oritur.

Errauerunt in solitudine, in IV. inaquoso, viam ciuitatis habitaculi non inuenerunt.

Esurientes, & sitientes: anima V. eorum in ipsis defecit.

Et clamauerunt ad Dominum VI. cum tribularentur, & de necessitatibus eorum eripuit eos.

Et deduxit eos in viam rectam, VII. vt irent in ciuitatem habitationis.

Confiteantur Domino misericordie eius, & mirabilia eius filiis VIII. hominum.

Quia satiauit animam inanem: IX. & animam esurientem satiauit bonis.

Hæc

Hæc est prima pars Psalmi, in qua explicatur liberatio à prima miseria. Quatuor sunt miseriæ communes corporales, & quatuor etiam spirituales. Corporales miseriæ sunt, primo fames & sitis, quæ oriuntur à sterilitate terræ, vel penuria pluviæ cælestis, idest, à principio extrinseco naturali: secundo captivitas, quæ oritur ab aliena violentia, idest, à principio extrinseco voluntario: tertio morbus, siue ægrotatio, quæ oritur ab interna mala constitutione, idest, à principio interno naturali: quarto periculum naufragij, quod oritur à principio externo naturali, idest, ab impulsu ventorum, & à principio interno voluntario, idest, à curiositate hominum, qui non contenti solido elemento terræ, per liquidum etiam iter facere voluerunt. Miseriæ quatuor spirituales ex sunt, quæ à Theologis dicuntur vulnera naturæ, relicta in nobis ex peccato originali, ignorantia in mente, concupiscentia in appetitu concupiscibili, infirmitas in appetitu irascibili, & malitia in voluntate: quorum vulnerum contraria sunt, prudentia in mente, temperantia in appetitu concupiscibili, fortitudo in irascibili, iustitia in voluntate, quæ dicuntur virtutes quatuor Cardinales. vide S. Thomam in p. 2. q. 85. art. 3. Igitur in hac prima parte Psalmi cantatur à Propheta misericordia Dei liberans à prima miseria tam corporali, quam spiritali. Videtur autem alludere ad famem, & sitim, quam passi sunt Hebræi in deserto: sed tamen doctrina communis est, atque ad omnes pertinens, vt supra diximus. sic igitur ait, Errauerunt in solitudine, in inaquoso, idest, multi homines quærentes patriam suam errauerunt aliquandiu per inuiam, & inaquosam solitudinem, quod Iudæis contigit per annos quadraginta; & viam ciuitatis habitaculi non inuenerunt, idest, longo tempore vagantes non inueniebant viam, quæ ducit ad ciuitatem propriæ habitationis, vbi tuto habitare, & requiescere possent. Esurientes, & sitientes, anima eorum in ipsis defecit, idest, errauerunt in solitudine esu-

rientes, & sitientes, quia neque panis ibi reperitur, neque aqua: & ideo anima, idest, vita eorum in ipsis præ fame, & siti deficiebat. Et clamauerunt ad Dominum, cum tribulareretur, idest, deficiente omni humano auxilio conuersi sunt ad implorandum adiutorium Dei: & de necessitatibus eorum eripuit eos, idest, non defuit inuocatus Deus, sed pro innata sibi misericordia liberauit eos. Et deduxit eos in viam rectam, vt irent in ciuitatem habitationis, idest, hoc modo eripuit eos de necessitatibus suis, quoniam ostendit eis viam rectam, imò in eam eos deduxit, vt per eam breui itinere peruenirent ad ciuitatem suæ habitationis. Confiteantur Domino misericordiarum eius, idest, iustum est igitur, vt tanta beneficia misericorditer præstita hominibus, confiteantur Deo laudem, siue agnoscantur ab omnibus vt verè beneficia Dei: & mirabilia eius filijs hominum, idest, mirabilia opera Dei exhibita filijs hominum ad eorum liberationem, confiteantur Deo auctori laudem suam; in textu hebraico clarius habetur, Confiteantur Domino misericordiam eius, idest, homines liberati confiteantur Domino misericordiam eius. textus græcus utroque modo intelligi potest, cum vox, *ἐν*, possit esse tam in casu nominandi, quam accusandi: sed res non est magni momenti. Quia satiauit animam inanem, idest, quia mirabili modo alimoniam parauit in solitudine, & inde repleuit animam inanem, homines videlicet ieiunos; & esurientes saturauit bonis, idest, & eosdem homines valde esurientes non solum paut, sed etiam satiauit optimis cibus, pane de cælo, Angelorum manibus allato. Hæc omnia, vt dixi, de cibo corporali Iudæis præstito, possunt satis commodè exponi; sed non dubium est, quin hoc exëplo docere velit Propheta, omnes alios, qui de errore viæ, & à miseria famis, & sitis liberantur, à Deo liberari, & misericordiarum eius gratias debere. Neque dubium esse potest, quin Propheta respexerit præcipuè ad ignorantiam salutis, qua plurimi laborant, & quasi

extra viam in deserto vagantur, esurientes, & sitientes veritatis cognitionem, fontem sapientiae, & prudentiae. Omnes enim naturaliter bonum appetunt; neque ullus est, qui non optet beatitudinem, ac per hoc etiam notitiam viae, quae ad illam ducit: sed tamen plurimi praecipue occupati cognitione, & concupiscentia temporalium bonorum, beatitudinem quaerunt ubi non est, imò etiam beatitudinem esse opinantur eam, quae verè non est: & ignorantes finem, viam quoque ad eum ignorare coguntur. Ita vagantes, & errantes civitatem veræ habitationis non inveniunt, & semper esuriunt, ac sitiunt, quia bona terrena, exigua, & temporalia cum sint, desiderium animae immortalis, & capacis infiniti boni, satiare nullo modo possunt. Sed ij, quos Deus redemit de manu inimici, & de varijs regionibus congregavit, ex magno misericordiae divinae munere agnoscere incipientes cecitatem suam, clamant ad Dominum, & exaudiuntur ab eo; diriguntur in viam rectam, quae ducit ad civitatem; intelligunt, finem ultimum esse Regnum Dei; & medium ad finem, esse iustitiam eius. inde esurientes, & sitientes iustitiam, ad fontem gratiae currunt, eoque fonte interim repleti ad civitatem caelestem perveniunt, ubi replentur & satiantur bonis omnibus, ut nunquam amplius esuriant, neque sistant in aeternum.

- X. Sedentes in tenebris, & umbra mortis, vinctos in mendicitate, & ferro.
- XI. Quia exacerbaerunt eloquia Dei, & consilium altissimi irritaverunt.
- XII. Et humiliatum est in laboribus cor eorum: & infirmitati sunt, nec fuit, qui adiuuaret.
- XIII. Et clamaverunt ad Dominum, cum tribularentur, & de necessitatibus eorum liberauit eos.
- XIV. Et eduxit eos de tenebris, &

umbra mortis; & vincula eorum dirupit.

Confiteantur Domino misericordiae eius, & mirabilia eius filijs hominum. xv.

Quia contrivit portas aereas, xvi.
& vestes ferreos confregit.

Hæc est altera pars, in qua proponitur liberatio à secunda miseria tam corporali, quam spiritali. Secunda miseria corporalis est captivitas, per quam miseri homines clauduntur in obscuris carceribus alligati vinculis, & onerati ferro. Et videtur Propheta alludere ad captivitatem hebræorum sub diuersis persecutoribus tempore Iudicum, vel etiam tempore Pharaonis. David enim in Psalmis non multum laborat, ut historias ordine temporum commemoret, sed tamen hæc eadem transferri, & accommodari possunt omnibus captiuis, & in vinculis, & compedibus constitutis, quos misericordia Domini postea liberauit. Explicemus verba, Sedentes in tenebris, & umbra mortis, vinctos in mendicitate, & ferro, id est, noui alios, qui capti ab hostibus, & tetricis carceribus inclusi sedebant in tenebris, & tenebris valde densis, quales significantur in scripturis per umbram mortis, ut diximus in explicatione Psalmi 22. vers. 4. & Psalmi 43. v. 21. qui simul erant alligati vinculis, redacti ad mendicitatem, & onerati ferreis catenis, & compedibus. Illud, sedentes cum sit accusatiui casus, non habet, unde regatur. Ideo supplendum, noui, aut aliquid simile: nam quod alij dicunt, iungi posse cum verbo præcedente, satiauit bonis; vel cum sequente, liberauit, nimis durum mihi esse videtur. Illud, vinctos in mendicitate, & ferro, existimo legendum cum distinctione, ut tria sint membra, & sensus sit, sedentes vinctos, sedentes in mendicitate, & sedentes in ferro, id est, in compedibus ferreis. Quia exacerbaerunt eloquia Dei, & consilium altissimi irritauerunt, id est, meritò traditi fuerant in captiuitatem, & afflicti carcere,

re, tenebris, vinculis, mendicitate, & compedibus, quoniam non obtemperauerunt praeceptis Dei, & consilium eius contempserunt. Exacerbare eloquia Dei, significat hoc loco, ad iram prouocare Deum loquentem, siue praecipientem, quod facit qui praecepta eius non seruat. Potest etiam dici, exacerbare eloquia Dei, qui prouocat ad iram ipsa Dei praecepta; quemadmodum enim praecepta Dei coronant obseruantes, ita puniunt praeruaricantes; ac per hoc qui praecepta praeruaricantur, prouocant aduersus se ipsa praecepta. Itaque in his verbis figura quaedam necessario admitenda est, vel in verbis eloquia Dei, quae accipiuntur pro Deo loquente, & praecipiente; vel in verbo, exacerbauerunt, quasi eloquia, idest, praecepta Dei dicantur prouocari ad iram, dum praeruaricantes puniunt. similis est figura in verbis sequentibus, & consilium altissimi irritauerunt: nam vel consilium altissimi accipiendum est pro ipso Deo altissimo bene consulente, quem irritauerunt, idest, ad iram concitauerunt, qui consilio eius aduersati sunt: vel irritauerunt, positum est pro contempserunt, siue spreuerunt. qui enim aliquem contemnit, hoc ipso eum irritat, idest, prouocat ad iram. Et humiliatum est in laboribus cor eorum, idest, superbia cordis eorum humiliata est ob labores captiuitatis, vinculorum, & compedum. Captiui enim, velint nolint, humiles esse coguntur. Infirmati sunt, nec fuit, qui adiuuaret, id est, debiles facti sunt, vt non possent resistere aduersarijs; neque fuit qui eos iuuaret, ne ab hostibus caperentur, & captiui abducerentur, & in ipsa captiuitate duriter haberentur. Et clamauerunt ad Dominum, cum tribularentur, &c. Hic iam ponitur imploratio diuini auxilij, & liberatio tum a carcere tenebroso, tum a vinculis, & compedibus. Ac vt ostendat magnitudinem beneficii, addit, cotriuit portas aereas, & vectes ferreos confregit. qua metaphora significatur liberatio a captiuitate tali, qualis est eorum, qui clausi sunt intra portas aereas, quarum vectes

ferrei sunt, ita vt non nisi maxima vi reserari possint. In summa describitur liberatio a captiuitate durissima, & maxima. Porro secunda spiritualis miseria est concupiscentia rerum terrenarum, idest, honorum, opum, voluptatum. quae concupiscentia instar cathenae, & vinculorum, ac compedum hominem ita constringit, vt quamuis non ignoret veram felicitatem esse quaerendam in Deo, & mortificanda esse membra quae sunt super terram: tamen captiuus maneat, & progredi non possit, nisi gratia Dei vincula illa dirumpat. Initium liberationis ducendum est ab humilitate, vt homo intelligens captiuitatem suam, & debilitatem virium suarum, humiliatum habens cor in laboribus, & videns non esse alium, qui adiuuet, praeter vnum caelestem Patrem, corde contrito, & humiliato cum intimo gemitu dicat, Domine vim patior; respice, & miserere. Infelix ego homo, quis me liberabit de corpore mortis huius? Aderit enim sine dubio misericordia Patris, & educet vincitum de carcere, & vincula dirumpet, vt homo per gratiam Dei liberatus cum laetitia dicat, Dirupisti Domine vincula mea, tibi sacrificabo hostiam laudis. Vide exemplum huius liberationis, maxime a concupiscentia carnalium voluptatum, in Sancto Augustino in fine libri octauo, & in principio libri noui Confessionum.

Suscepit eos de via iniquitatis **XVII.**
eorum: propter iniustitias enim
suas humiliati sunt.

Omnem escam abominata est **XVIII.**
anima eorum: & appropinquauerunt
vsque ad portas mortis.

Et clamauerunt ad Dominum, **XIX.**
cum tribularentur: & de necessi-
tatibus eorum liberauit eos.

Misit verbum suum, & sanauit **XX.**
eos, & eripuit eos de interitioni-
bus eorum.

Confiteatur Domino misericor **XXI.**
diae

diæ eius, & mirabili eius filijs hominum.

XXII. Et sacrificent sacrificium laudis, & annuncient opera eius in exultatione.

Hæc est pars tertia Psalmi, in qua narratur tertia miseria corporalis, quæ est morbus, & languor grauissimus, qualis fuit filiorum Israel, cum percussit eos Dominus plaga magna per serpentes ignitos, ita ut plurimi continuo morentur; sed cum clamarent ad Dominum, liberati sunt: & eodem modo qui cunque à morbis, & plagis varijs cruciantur, si Dominum serio ex corde, firma fide, & cum alijs requisitis inuocauerint, sine dubio liberabuntur. Sed verba consideremus, atque ea præcipue, quæ non sunt antea explicata. Suscepit eos de via iniquitatis eorum: propter iniustitias enim suas humiliati sunt. Hic aliquid necessario subintelligendum est, ut, Vidit Deus quosdam prostratos iacere, & suscepit eos, idest, erexit de via iniquitatis eorum, in qua miseri iacebant: nam propter iniustitias suas humiliati sunt usque ad terram. In hebraico textu legitur secundum versionem S. Hieronymi, Stultos propter viam sceleris eorum, pro eo quod nos habemus, Suscepit eos de via iniquitatis eorum. Sed vox, auilim, vel, euilim, quæ stultos significat, non videtur fuisse in libris antiquis, quos habuerunt Septuaginta Interpretes, sed vox, aialem, quod est, suscepit eos; quamuis enim à radice, aial, in dictionarijs deducatur, fortitudo, aries, cernus, & alia id genus: tamen apud Septuaginta Interpretes ea vox etiam suscipere significat. Hinc enim in titulo Psalmi vigesimi primi posuerunt, pro susceptione, quod est in hebræo, aieleth: & sanè maior fides habenda est Septuaginta Interpretibus, quam omnibus dictionarijs. Omnem escam abominata est anima eorum, & appropinquauerunt usque ad portas mortis. Hoc demonstrat grauissimum morbum, qui cum cibum non admittat, quo vita su-

stentatur, mors immineat necesse est. Misit verbum suum, & sanauit eos. explicat modum, quò sanauit ægrotos illos, dicens, eos sanatos verbo, idest, iussu Domini, siue Dei voluntate, non à serpente æneo, vel aliqua alia re creata: non quòd res creatæ, ut pharmaca, & medicamenta cætera nullam vim habeant, sed quia vim suam à Deo habent, & sine Dei cooperatione nihil efficere possunt; Deus autem sine illis solo verbo, & imperio suo omnia sanare potest. & hoc modo intelligimus illud Sap. 16. Etenim neque herba, neque malagma sanauit eos, sed tuus Domine sermo, qui sanat omnia. Et paulò ante loquens de ijs, qui per aspectum serpentis ænei curabantur à moribus serpentum ignitorum, Qui enim, inquit, conuersus est, non per hoc quod videbat, sanabatur, sed per te omnium saluatorem. Vtitur autem David figurata locutione cum ait, Misit verbum suum, & sanauit eos, quasi verbum, siue imperium Dei sit persona aliqua de cælo missa ad sanandos ægrotos. Nisi fortè prædicere voluerit missionem Verbi incarnati ad homines, per quod plurimi sanati sunt à corporali morbo: & à morbo spirituali, idest, à peccato, nemo sanatur, nisi per ipsum. Non enim est aliud nomen sub cælo datum hominibus, in quo oporteat nos saluos fieri, ut dicitur Act. 3. Tertia verò miseria spiritualis est infirmitas, siue debilitas, & fragilitas humanæ naturæ per peccatum corruptæ. Multi sunt enim, qui factis intelligunt quid sit agendum, & cupiunt interdum illud perficere: sed vires non habent, vel infirmas habent, donec induantur virtute ex alto. Sæpè etiam tadio, vel languore quodam affecti, omnem cibum renuit anima eorum; quia quamuis iam eos neque error seducat, neque concupiscentia mala illiciat: tamen non delectat eos verbum Dei, neque ad cælestia suspirare norunt; & periculum est, ne fames eos non ex inopia, sed ex fastidio perimat: neque leuis, aut rara hæc tentatio est. Ideò & isti clamare debent ad Deum, ut sanetur palatum cordis eorum, & assuescat lac

אוילים
אוילים
אוילם
אויל
אוילת

lac diuinæ consolationis concupiscere: & cùm inceperint sapere, quæ sursum sunt, & gustare quàm dulcis sit Dominus, non sibi hoc tribuant, sed confiteantur Domino misericordias eius: & sacrificent ei sacrificium laudis, & annuncient opera eius in exultatione. Diuinum enim planè opus est, non humanum, cùm homo solis visibilibus, & terrenis assuetus incipit inuisibilia, & cælestia dulciter sapere, & ardentè requirere.

- XXIII.** Qui descendunt mare in naui-
bus facientes operationem in a-
quis multis.
- XXIV.** Ipsi viderunt opera Domini, &
mirabilia eius in profundo.
- XXV.** Dixit, & stetit spiritus procel-
læ; & exaltati sunt fluctus eius.
- XXVI.** Ascendunt vsque ad cælos, &
descendunt vsque ad abyssos: ani-
ma eorum in malis tabescebat.
- XXVII.** Turbati sunt, & moti sunt sicut
ebrius, & omnis sapientia eorum
deuorata est.
- XXVIII.** Et clamauerunt ad Dominum,
cùm tribularentur, & de neces-
sitatibus eorum eduxit eos.
- XXIX.** Et statuit procellam eius in au-
ram: & siluerunt fluctus eius.
- XXX.** Et lætati sunt, quia siluerunt:
& deduxit eos in portum volun-
tatis eorum.
- XXXI.** Confiteantur Domino miseri-
cordiæ eius, & mirabilia eius fi-
lijs hominum.
- XXXII.** Et exaltent eum in Ecclesia
plebis, & in cathedra seniorum
laudent eum.

Hæc est pars quarta Psalmi, in qua laudatur Deus ob liberationem periclitantium in mari. Huius miseriæ non occurrat exemplum in Scripturis ante tēpora Dauidis; sed post illa tempora habemus exemplum in libro Ionæ cap. 1.

& in Evangelio S. Matthæi cap. 8. & 14. & in Actis cap. 27. Explicemus verba, Qui descendunt mare in naui-
bus facientes operationem in aquis multis, ipsi viderunt opera Domini, & mirabilia eius in profundo, id est, qui nauigant mare, ac per hoc operantur in aquis remigando, vel vela tendendo, vel contrahendo, experimento cognoscunt multa mirabilia opera Dei, quæ alijs plurimis nota non sunt, nisi fortè ex relatione aliorum; videlicet quanta sit vis procellæ; quanta eleuatio vndarum, & fluctuum; quanta vastitas, & profunditas maris; quàm ingentia, & frequentia mortis pericula; quantus deniq. timor, & horror inuadat pectora hominum, etiam fortissimorum. Propriè autem dictum est qui descendunt mare in naui-
bus; non enim, vt quidam interpretes Psalmorum hoc loco ait, ratione probatum est, altius esse mare, quàm terram: sed contra, probatum est manifesta demonstratione, inferius esse mare, quàm terram; quoniam alioqui terram operiret aqua, cùm natura sua ad loca semper decliuiora descendat. Dixit, & stetit spiritus procellæ, id est, dixit Deus, & dicendo iussit, vt ventus procellæ existeret, & continuo procella obediens creatori stetit, id est, extitit, exurrexit, exorta est: non enim, stetit, hoc loco significat quietem, sed exortum: & inde exaltati sunt fluctus eius, id est, maris, & ascendunt vsque ad cælos, & descendunt vsque ad abyssos. poetica hyperbole est. quomodo etiam latinus Poeta dixit, Fluctusque ad sidera tollit. Anima eorum in malis tabescebat, id est, ijs visis anima nauigantium, spiritus videlicet vitalis, vigor omnis in ipsis existens præ timore, & horrore tabescebat. Turbati sunt, & moti sunt, sicut ebrius, & omnis sapientia eorum deuorata est. Aprissimis similitudinibus describit Propheta, quid animi gerant homines imminente naufragio. nam neque vires, neque consilium suppetit. Vacillant pedes, nutat iudicium, imò omnis sapientia, id est, ars & peritia nauigandi à timore nimio quasi absorpta videtur. Et clamauerunt ad Do-
mi-

רמח
קפ

minum; & hic est versus intercalaris, supra explicatus, & versiculi sequentis facillimi sunt; nisi fortè aliquem moueat illud, & statuit procellam in auram. quod significat Deum conuertisse ventum furiosum in ventum placidum, siue tempestatem in tranquillitatem, vt magis propriè sonat vox hebraica demama'. Illud, statuet, ex voce hebraica iakem significat propriè, surgere fecit, idest, fecit, vt procella surgeret in auram, hoc est, mutaretur, in auram leuem, siue, vt paulò ante dixi, in tranquillitatem. Iam verò quarta miseria spiritualis est, vt supra diximus, malitia voluntatis, quæ præcipuè fita est in superbia, quæ Regina est vitiorum. Et verè cum ventus superbiæ exagitare incipit mare cordis humani, tunc extolluntur fluctus desideriorum vsque ad cælum. notæ sunt voces illius, qui est Rex super omnes filios superbiæ, In cælum conscendam, super astra Dei exaltabo solium meum: ascendam super altitudinem nubium similis ero Altissimo, Isaia 14. Ab illo didicerunt antiqui Gigantes turrim Babel ædificare, quæ cælum contingeret Gen. 11. Horum nepotes sunt, qui Regna Regnis, & Imperia Imperijs adiungere satagunt, neque vllus est finis cupiditatis eorum. quod si illi ipsi intrarent in corda sua, & attentè considerarent quantis cogitationum, suspicionum, timorum, desideriorum, præsumptionis quoque, & desperationis procellis continuo agitentur, & tandem demergantur in abyssum: sine dubio clamarent ad Dominum, & ipse misericors, & pius de tantis periculis liberaret eos: mitteret enim spiritum filij sui in corda eorum, vt doceret eos mansuetudinem, & humilitatem, & eo modo sedatis fluctibus desideriorum inuenirent requiem animabus suis, & deducerentur in portum voluntatis suæ, idest, in portum tranquillitatis, quem omnis homo naturaliter cupit. Et quoniam hoc est maximum beneficium misericordiæ Dei, iure optimo cantarent, Confiteantur Domino misericordiæ eius, & mirabilia eius filijs hominum. Et exaltent efi,

Deum videlicet, in Ecclesia plebis, id est, in cætu populi totius congregati ad laudes Domini celebrandas, & non solum in cætu plebis, sed etiam in cathedra seniorum, idest, in confessu maiorum, principum videlicet populi, & sapientium Senatorum laudent eum.

Posuit flumina in desertum, & exitum aquarum in sitim. XXXIII. XXXIV.

Terram fructiferam in falsuginem à malitia inhabitantium in ea.

Hæc est altera pars huius Psalmi, in qua post decantatas misericordias Domini in depulsione quatuor miseriarum: laudat Deum ab omnipotentia & providentia, qua naturas rerum aliquando permutat. qua mutatione manifestè indicat, se verum, & solum esse illarum conditorem, & gubernatorem. Ac primum dicit, Deum aliquando posuisse flumina in desertum, & exitum aquarum in sitim, idest, quando illi placuit, sicasse flumina, & fecisse, vt vbi riui aquarum abundanter decurrebant, ibi fieret desertum aridum, & siticulosum. Terram quoque fructiferam vertisse in falsuginem, idest, in terram sterilem, qualis est terra operta sale, à malitia inhabitantium in ea, idest, in pœnam peccati eorum, qui terram illam incolabant. Exemplum huius mutationis habemus in Genesi cap. 13. vbi dicitur, Eleuatis Loth oculis vidit omnem terram circa regionem Iordanis, quæ vniuersa irrigabatur, antequam subuerteret Dominus Sodomā, & Gomorram, sicut paradisus Domini, hanc verò terram irriguam, & fructiferam, instar paradisi, Deus sulphure, & igne de cælo demisso totam siccauit, & sempiterna sterilitate damnavit, vt legitur in eodem libro cap. 19.

Posuit desertum in stagna aquarum, & terram sine aqua in exitus aquarum. XXXV.

Et collocauit illic esurientes, XXXVI. &

& constituerunt ciuitatem habitationis.

XXXVII. Et seminauerunt agros, & plan-
tauerunt vineas, & fecerunt fru-
ctum natiuitatis.

XXXVIII. Et benedixit eis, & multipli-
cati sunt nimis; & iumenta eorum
non minorauit.

Hec est altera mutatio in contrarium: secundum quam Deus, quando voluit, posuit desertum in stagna aquarum, id est, fecit, vt in locis desertis, & arentibus existerent flumina; & terra, quæ erat sine aqua, abundaret riuus aquarum. Et in ijs locis, alias incultis, & desertis fecit vt frequentes homines habitarent, ciuitates construerent, terram colerent, fructus inde perciperet, multiplicarentur denique valde tum homines, tum iumenta ipsorum: hoc enim significat illud, non minorauit iumenta ipsorum, id est, fecit, vt non esset exiguus numerus iumentorum, sed plenus, & copiosus. Ad quam historiam respiciat hoc loco Propheta, non est adeo certum, nam fecit quidẽ Deus in deserto propter filios Israel ex rupe saxea nasci flumina, vt habemus Num. 11. sed non collocati illic populum suum, neque sunt illic vrbes ædificatæ, neque seminati agri, neque plantatæ vineæ. In terra vero promissionis collocauit quidem populum suum Deus, sed iam antea erant in ea terra flumina, Vrbes, agri culti, & vineæ. Existimo igitur Prophetam respicere ad antiquas historias, & primordia propagationis generis humani post diluuium. quemadmodum enim mutauit terram Sodomorum ex irrigua & fertili in aridã & desertam, sic etiam in alijs locis fecit existerẽ flumina, & ædificari ciuitates, & coli campos, & plantari vineas, & propagari homines, & iumenta. Quia verò Isaias Propheta cap. 41. hũc locum Psalmi notare videtur, cum ait, Ponam desertum in stagna aquarum, & terram inuiam in riuos aquarum. & verba Isaiæ à S. Hieronymo, & alijs intelliguntur de gentilitate, quæ olim de-

serta, & inculta, sine fide, sine lege, sine Prophetis, sine sacerdotio; futura erat per Christum irrigua Spiritus sancti donis; ideo totum hunc locum rectè S. Augustinus in sensu vel literali, vel certè allegorico exponit de synagoga Iudæorum, & Ecclesia gentium: synagoga enim quæ olim abundabat aquis verbi Dei, & veluti terra fecunda, & culta proferebat Prophetas, & Sacerdotes, & habebat altaria, sacrificia, miracula, visiones: nunc deserta, & arida versa est in falsuginem, & his tribus caret. contra vero gentilitas, quæ deserta, & inaquosa erat, conuerſa est in stagna aquarum, & facta est fecunda, ac fructibus omnium generum refertissima, id est, cœpit esse populus Domini, Ecclesia Dei viui, gens sancta, Regnum sacerdotale, in quo solo verum est sacrificium, veri sacerdotes, vera miracula, vera sanctificatio, vera sapientia, denique Spiritus sancti charismata omnia.

Et pauci facti sunt, & vexati **XXXIX.**
sunt à tribulatione malorum, & dolore.

Effusa est contemptio super **XL.**
Principes, & errare fecit eos in
inuias, & non in via.

Et adiuuit pauperem de inopia, & posuit sicut oues familias. **XLI.**

Videbunt recti, & lætabuntur, **XLII.**
& omnis iniquitas oppilabit os
suum.

Docet nunc Propheta, nihil in terris esse perpetuum, aut stabile. Nam illi, quos Deus aliquando benedixit, & benedicendo multiplicauit: paulò post exigentibus peccatis eorum, imminuti sunt, & ad paucitatem redacti; & qui paulò ante florebant omnibus bonis, iidem cœperunt angustijs, & persecutionibus premi. nec solum priuatis hominibus hoc accidit, sed etiam Principibus, quos Deus propter eorum peccata contemptibiles reddidit, quoniã sapientia, ac prudentia eos priuatos, permisit in multis, magnisque rebus errare.

errare. Sed eodem tempore non defuerunt viri probi, quos Deus subleuauit de inopia, & pauit, ac rexit vt proprias oues. Ex quo factum est per diuinam prouidentiam, vt tandem viri iusti lætarentur, & iniqui confusi remanerent. Hoc autem, quod dictum est generatim de prouidentia Dei erga genus humanum, potest etiam dici de prouidentia Dei speciali erga Ecclesiam, quæ breui tempore creuit, & paulò post per schismata, & hæreses imminuta est, & vexata, atq. afflicta, & Principes eius, idest, Episcopi, & sacerdotes contemptibiles redditi, quia multi eorum longè recessissent à via maiorum suorum, qui in omni sanctitate, & iustitia populo suo præluxerant. Cæterum non sic imminuta est Ecclesia, quin multi etiã manserint tum ex principibus, tum ex priuatis; tum ex sacerdotibus, tum ex laicis, viri sancti, quos Deus bonis spiritualibus ditauit, & vt proprias oues ad optima pascua duxit, & crescere fecit. sed verba consideremus. Et pauci facti sunt, idest, & postea cùm multum creuissent, vicissim minui cœperunt: & vexati sunt à tribulatione malorum, & dolore, idest, & cùm aliquandiu prosperitate vigente læti fuissent, cœperunt vexari à tribulatione, & dolore ob mala, quæ illis aduenerunt. Illud enim, malorum, non significat malorum hominum, sed malarum rerum, idest, calamitatum, ærumnarum, infortuniorum. Effusa est contemptio super Principes. Rectè editio, vulgata correctæ est hoc loco: nam vitio librariorum legebatur contentio in omnibus ferè latinis codicibus. Sed ex textibus græcis, & hebraicis, & ex lectione veterum Hieronymi, Augustini, & aliorum certum est legi debuisse, Effusa est contemptio. accedit etiam, quòd hic idem versiculus legitur apud Iob cap. 12. v. 21. Effundit despectionem super Principes; & credibile est, Dauidem ex Iob hunc versiculum accepisse. Grauis hæc pœna est, tum populis, tū Principibus, & magni criminis præcedentis indicium, quãdo Deus effundit contemptum in Principes, idest, prouidentia sua facit,

vt Principes siue Ecclesiastici, siue seculares sint valdè contemptibiles. (illud enim verbum, effundit, significat abundantiam siue magnitudinem contemptum) tunc enim laxatur disciplina, & omnia in deterius ruunt. Et errare fecit eos in inuio, & non in via. hæc est causa contemptus, quia Principes ob sua, & populi peccata deserti lumine sapientiar, & gratiar per deuia incedunt, & non per vias rectas, idest, vitiose viuunt, exemplo malo populum scandalizant, vel etiam leges iniquas constituunt, fauent malis, vexant bonos. Dicitur autem Deus eos errare facere, quia in pœnam peccati non eos illuminat, neque bonam voluntatem eis inspirat. S. Augustinus in epist. 105. ad Sixtum, Non obdurat Deus impartiendo malitiam, sed non impartiendo misericordiam, & tract. 53. in Ioan. Sic ex cecat, sic obdurat Deus, deferendo, nec adiuuando, quod occulto iudicio facere potest, iniquo non potest. & lib. 1. ad Simplic. quæst. 2. Non ab illo irrogatur aliquid, quo sit homo deterior, sed tantum quo sit melior non erogatur. Denique lib. de gratia, & libero arbitrio c. 23. Quando auditis dicentem Dominum, Ego Dominus seduxi Prophetam illum; in eo quem seduci permittit, mala eius merita credite. Et adiuuit pauperem de inopia, idest, sicut Deus superbos Principes errare permittit, & contemptibiles reddit: sic è cōtrario pauperes & humiles adiuuat, & de inopia siue temporali, siue spiritali subleuat. Et posuit sicut oues familias, idest, posuit Deus familias pauperum iustorum sicut oues, ita vt eas & multiplicauerit, & in vnum congregauerit, & Pastorem eis dederit, & singulari prouidentia gubernauerit. Videbunt iusti, & lætabuntur, & omnis iniquitas oppilabit os suum, idest, ex hac prouidentia Dei tandem fiet, vt iusti lætentur, & ex lætitia exulrèt & laudent Deum: & omnis iniquitas, idest, omnes iniqui obmutescant, nec audeant villo modo cōtradecere. Id verò quous aliquando cōspiciatur in particularibus iudicijs: tñ absolutè, & vniuersè apparebit in iudicio vniuersali.

Quis

XLIII. Quis sapiens, & custodiet hæc, & intelliget misericordias Domini?

Hæc est conclusio totius Psalmi, in qua colligit Propheta ex dictis illum esse verè sapientem, qui observabit, & custodiet in corde suo supra dictas vicissitudines rerum, & intelliget, quemadmodum in omnibus appareat ineffabilis misericordia Domini erga pios homines, & timentes Deum. dicit autem, Quis sapiens. quoniam paucorum est ista sapientia, & stultorum infinitus est numerus.

PSALMVS CVII.

Paratum cor meum Deus.

HIC Psalmus non eget explanatione: constat enim ex parte extrema Psalmi quinquagesimi sexti, & quinquagesimi noni. Cur autem Psalmus hic additus sit ad alios, cum nihil novi contineat, ratio videtur fuisse, ut compleretur numerus centum quinquaginta Psalmorum: nisi fortè subest aliqua ratio magis recondita, quam mihi fateor, notam non esse.

PSALMVS CVIII.

Titulus, & Argumentum.

In finem Psalmus David.

NON desunt ex recentioribus, qui hunc Psalmum exponant ad literam de persecutoribus David, qualis fuit Doeg Idumeus, Achitophel, & alij: sed cum nulla fiat in titulo mentio persecutorum David; & veteres expositores, Chrysostomus, Hieronymus, Augustinus, Theodoretus, & Euthymius simpliciter de Iuda proditore, & Iudeis exponant; & S. Petrus in Actis Apostolo-

rum cap. i. de Iuda proditore Psalmum hunc scriptum esse confirmet: nos quoque de Iuda, & Iudeis Psalmum totum simpliciter exponemus. Igitur argumentum Psalmi est Prophetia per modum imprecationis aduersus Iudam, & Iudæos Christi persecutores.

Explicatio Psalmi 107.

DEUS laudem meam ne taceas. I. Quia os peccatoris, & os dolosi super me apertum est.

Verba Christi sunt, similia illis, quæ habentur in Euangelio Ioannis 17. Clarifica me tu Pater. Rogat igitur Christus homo Deum patrem, ut laudè eius, id est, innocentiam, charitatem, aliasque virtutes non taceat. quod impletum est per Apostolos Spiritu sancto plenos, qui omnibus linguis toti mundo Christi laudes prædicauerunt. impletum quoque est per sequentes Martyres, & Confessores, & Doctores, qui vel sanguine, vel moribus, vel literis, vel miraculis, vel præconio vocis Christi encomia omnibus sæculis, & omnibus gentibus nunciauerunt. Reddit deinde causam cur gloriam istam à Deo petat; quoniam non desunt, qui eam falsis criminationibus obscurare conentur. Quia, inquit, os peccatoris, & dolosi, Caiphæ videlicet, & Iudæ, vel generatim populi Iudaici, super me apertum est: dicit autè peccatoris, & dolosi, quoniam persecutores Christi odio, & invidia pleni erant, & tamen dolo simulabant amicitiam, cum dicerent, Magister scimus, quia verax es, & viam Dei in veritate doces, &c. Itaque peccatores erant, quia oderant, quem diligere debuissent; & dolosi erant, quia fingentes amicitiam capere volebāt in sermone. vel, alij peccatores erant manifesti, qui apertè blasphemabant eum seductorem esse, & in Belzebub ejicere Dæmonia; alij dolosi erant, ac per hoc peccatores occulti, qui sub specie interrogationum, quasi discere cupientes, insidiabantur famæ, & vitæ eius. Ex hebræo nonnulli vertunt, Deus laudis meæ. quia legūt in hebræo,

אלהי
אלהים

bræo, elohe, non elohim. sed falluntur; nam vox, elohe, non semper est in regimine, sed est vnum ex nominibus Dei, vt Sanctus Hieronymus docet in Epistola ad Marcellam. adde quod nec Septuaginta Interpretes, nec Sanctus Hieronymus agnouerunt istud regimè in nomine Dei, vt patet ex versionibus ipsorum. Sanctus Hieronymus ex hebræo vertit, Deus laudabilis mihi ne taceas. Sed vox hebræa, theillati, significat, laus mea, vel laudem meam. non enim hebræi declinant nomina per casus. Septuaginta Interpretes intellexerunt ea voce significari, laudem meam. Sanctus Hieronymus autem significari credidit, laus mea, & ideo reddidit, laudabilis mihi; idem enim est, Deus est laus mea, &, Deus est laudabilis mihi. Latinus interpres græcam lectionem secutus est, quæ reprehendi non potest, cum hebraicæ lectioni aptissime conueniat. Illud, Ne tacueris, opponitur illis, os peccatoris apertum est; æquum enim est, vt veritas non taceat, quando falsitas clamat.

II. Locuti sunt aduersum me lingua dolosa, & sermonibus odij circundederunt me, & expugnaverunt me gratis.

Declarat quod dixit, os peccatoris, & os dolosi apertum est super me. Apertum est, inquit, os dolosi, quia locuti sunt aduersum me lingua dolosa laudantes, vt Magistrum bonum, & interim insidiantes mihi, vt caperent in sermone. apertum quoque est os peccatoris, quia sermonibus odij circundederunt me, manifestantes verbis apertis odium, quod gerebant in corde, dicentes, Non est hic homo à Deo; ecce homo vorax, & potator vini: Tolle, tolle, crucifige eum. Sed siue dolosa lingua, siue sermonibus odij me oppugnarent, gratis me oppugnabant, quia sine vlla iusta causa, cum redderent mala pro bonis. Illud, expugnaverunt, positum est pro, oppugnaverunt. Verbum enim hebraicum, & græcum bellare, & pugnare significat.

In eadem significatione ponitur hoc verbum in Plal. 128. Sæpe expugnaverunt me à iuuentute mea; etenim non potuerunt mihi. vbi illud, Non potuerunt mihi, demonstrat, expugnaverunt, positum esse pro pugnaverunt.

III. Pro eo vt me deligerent detrahebant mihi: ego autem orabam.

Explicat vltimam illam particulam gratis: nam cum rependere deberent amorem amori, illi vice dilectionis detrahebant mihi; ego tamen non reddidi mala pro malis, sed orabam Deum pro illis. Id apertè fecit Dominus in cruce, cum ait, Pater ignosce illis: sed credibile est, id eum occultè fecisse, quotiescunque detractiones audiebat. Ex hebræo Sanctus Hieronymus vertit, Pro eo quod eos diligebam, vbi nos habemus, pro eo vt me deligerent. Sed vox hebraica ambigua est; potest enim esse nomen, vt est in sequenti versiculo, & significare, dilectio mea: & potest esse verbum, & significare, dilexi, vel diligebam. nam à verbo, ahab, quod est diligere, fit, ahati, quod dilexi, &, dilectio mea, significare potest. græca vox, ἀγαπή μου, quæ significat, diligere me; est etiam ambigua, & potest accipi tam actiue, quam passiue; pro diligere me, idest, pro dilectione, quam eis impendebam; & pro diligere me, idest, pro dilectione, quam mihi debebant. sed latinus interpres sustulit istam ambiguitatem, & vertit, pro eo, vt me deligerent; & hanc intelligentiam sequuti sunt expositores veteres, tum græci, vt Chrysostomus, & Theodoretus, tum latini vt Hieronymus, & Augustinus. Itaque veteres expositores vulgatam latinam versionem suis expositionibus probauerunt.

IV. Et posuerunt aduersum me mala pro bonis, & odium pro dilectione mea.

Id ipsum clarius repetit; quasi dicat, rependerunt mihi maledictionem pro bene-

benedictione, odiū pro amore, vulnera multa pro curationibus multis, mortem corporalem pro vita spirituali.

V. Constitue super eum peccatorem, & Diabolus stet à dextris eius.

Transitum facit Propheta ad Iudam, quem prauidebat ducem futurum eorum, qui comprehenderunt Iesum, vt loquitur Sanctus Petrus Act. 1. & per modum imprecantis prædicit, quæ illi euentura prospiciebat. Ac primum, inquit, constitue super eum peccatorem, idest, noluit Iudas super se Christum, Dominum vtrique iustissimum, & mitissimum; ideo constitues super eum spiritum auaritiæ, cui seruiet infelicitè vsque ad mortem. Iudas enim seruire voluit Mammonæ, ac per hoc seruire non potuit Christo. quia nemo potest duobus Dominis seruire. Porro spiritus auaritiæ iniquissimus est, cū honorem Deo debitum idolo tribuat, dicente Apostolo ad Ephes. 5. de auaritia, quod est idolorum seruitus. Et Diabolus stet à dextris eius, idest, & Diabolus erit Dux eius in operibus malis, & illi perpetuò assistet, vel potius tanquam canem alligatum vinculo cupiditatis illum trahet; & ad nocendum proprio etiam Magistro incitabit. Sanctus Augustinus per peccatorem præpositum Iudæ, intelligit eundem Diabolum, qui tanquam eius Dominus stabat à dextris eius. Idem Sanctus Augustinus rectè monet, Iudam gessisse personam totius synagogæ; quemadmodum Sanctus Petrus gerebat personam totius Ecclesiæ: & ideo, quæ hic dicuntur de Iudæ, illa quidem conuenire, sed conuenire etiam & illustrius, toti synagogæ, quæ recusans habere Christum Regem, habuit Diabolum, & Cæsarem, & eius loco Pilatum.

VI. Cū iudicatur exeat condemnatus, & oratio eius fiat in peccatum.

Prædicit nunc Propheta infelicissimum exitum Iudæ. ad quam Prophetæ
Card. Belarm. in Psal.

tiam respexisse videtur Dominus Ioá. 17. cū ait, Quos dedisti mihi custodiri, & nemo ex eis periit, nisi filius perditionis, vt scriptura impleatur. Ergo, inquit, cū iudicatur à Deo in exitu de hac vita, exeat, idest, exhibet cōdemnatus. & si fortè orauerit Deum, oratio eius non solum non impetrabit remissionem peccati; sed ipsa oratio fiet illi in peccatum. Cur oratio Iudæ facta sit illi in peccatum, rationem reddit Sanctus Hieronymus, quia orauit sine spe indulgentiæ, & desperans laqueo se suspendit. S. Augustinus dicit, factam esse in peccatum, quia non est facta per Christum mediatorem. Euthymius addit, factam esse in peccatum, quia Iudas, vt etiam cæteri persecutores Christi, orabant Deum pro exterminatione nominis Christiani. Posset etiam addi, Iudæ orationem factam esse in peccatum, quia Iudas non à Deo, sed à Diabolo auxilium petiit, Diabolus autem suspendium illi suaserit. Quo loco admonendi sunt lectores, orationem peccatoris, non semper esse peccatum, sed sæpe multum valere ad remissionem peccatorum, vt intelligi potest ex oratione Publicani Luc. 18. tunc autem fieri in peccatum, & verè esse peccatum, cū is, qui orat, vel non orat quem debet orare, idest, Deum verum, sed Idola, vel Diabolum: vel non orat pro re bona, quam æquum est à Deo peti, sed pro re mala, quæ Deo displicet, vt pro ruina inimicorum: vel non orat per vnicum Mediatorem, qui est Christus, sed per merita sua, quæ superbè se habere præsumit: vel denique non orat cum spe, aut fide, aut alijs necessarijs bonæ orationis comitibus. Eadem quæ hic dicuntur de Iudæ conueniunt Iudæis, quorum ille typū gerebat. Iudæi enim qui credere nolunt in Christum, exeunt de hac vita condemnati ad mortem sempiternā; & oratio eorum, quam assidue fundunt in synagogis suis, fit illis in peccatum: quia non orant patrem per filium, cū nec filium, nec patrem norint; & quia postulant quæ Deo non placent, excidium videlicet Christianorum, &

X x cele-

celerem aduentum Antichristi. hunc enim illi pro Christo recipient, ut dicitur Ioan. 5.

VII. Fiant dies eius pauci, & Episcopatum eius accipiat alter

Hic est locus, quem Sanctus Petrus allegauit Act. 1. ut ostenderet, necessarium fuisse ut in locum Iudæ aliquis substitueretur; & cum omnes Apostoli, & discipuli iudicio Sancti Petri acquieuerint, ac per hoc vnanimi consensu locum istum Psalmi de Iuda intellexerint, nemini licet aliter exponere. Oportet, inquit, Apostolus Petrus Act. 1. Impleri scripturam, quam prædixit Spiritus sanctus per os Dauid de Iuda, qui fuit dux eorum, qui comprehenderunt Iesum. Videmus autem impletum fuisse hoc vaticinium in Iuda perfectissime: nam facti sunt dies eius pauci, siue cum Sancto Augustino intelligamus dies Apostolatus; siue cum Sancto Hieronymo dies vitæ; siue cum Euthymio, dies eius post peccatum commissum. Et Episcopatum, idest, Apostolatam eius accipiat alter, Matthias videlicet, qui omnibus modis erat alter, idest, non consanguineus, non familiaris, non amicus, non similis vitæ, ac morum. Nomen, Episcopatus, in hebræo מִקְרָה est, pecuda, quod ab inspiciendo, & visitando deducitur. Debet enim Episcopus assidue inspicere, & visitare oues suas, de quibus rationem Domino redditurus est. Id quod qui longè absunt ab Episcopatu suo, certè præstare non possunt. Hoc idem impletum est in Iudæis: nam post Iudæ peccatum pauci fuerunt dies Iudæorum in Episcopatu, idest, in Sacerdotio, siue Pontificatu: & Episcopatum eorum accepit alter, quia translatus est sacerdotium Aaronicum ad sacerdotium secundum ordinem Melchisedech, & nulli sunt hodie Pontifices Iudæorum; & multi sunt Pontifices Christianorum.

VIII. Fiant filij eius orphani, & vxor eius vidua.

Ne quis fortè existimaret, Iudam condemnandum ad pœnam aliquam,

vita durante; & ut fieret dies eius pauci in Episcopatu, non in corpore; Propheta declarat, dies eius futuros etiam paucos ob imminentem veram mortem, per quam filij eius orphani, & vxor vidua remaneret. Quod impletum est, quia eadem die laqueo se suspendit, & non diu postea in excidio Hierosolymæ omnes ferè viri interierunt: & relictæ sunt plurimi orphani, & plurimæ viduæ.

IX. Nutantes transferantur filij eius & mendicent; & eijciantur de habitationibus suis.

Explicat ærumnas filiorum Iudæ, ac dicit, eos instabiles vagaturos, & mendicatuos in aliena regione; quoniam ab habitatione sua eijcientur. In hebræo paulò aliter leguntur vltima verba huius versiculi. Sic enim vertit Sanctus Hieronymus; Et quærantur in parietinis suis. Sed Septuaginta Interpretes, quos latinus sequitur, non legerunt in hebræo, dare su, quod significat quærere, sed, garesu, quod significat, eijcere. Et, ut sæpè diximus, lectio quam habuerunt in suis codicibus Septuaginta seniores omnino præferenda est lectioni Rabinorum. Illud, in parietinis suis, optimè translatus est à Septuaginta Interpretibus, בֵּי תֵּיבֵי הַחֲרָבָה, idest, ex ruinosis habitationibus suis. Nam idem significant parietina, idest, domus dirutæ, vbi soli remanent parietes. Particula, ex, quam habent Septuaginta Interpretes, habetur satis apertè in hebræo, quamuis Sanctus Hieronymus verterit, in: quoniam particula, min, vtrunque significare potest, sed frequentius accipitur pro, ex, vel, ab. Itaque sensus nostræ lectionis est, quod Iudæ filij, & cæteri Iudæi, non solum non permittentur habere integras domos, quia Hierusalem euertenda erat, sed eijcientur etiam de habitationibus dirutis, ut ne ruinas quidem domorum suarum possidere eis liceat. quod impletum esse res ipsa testatur.

Scru-

- X.** Scrutetur fœnerator omnem substantiam eius: & diripiant alieni laboris eius.

Redditur hoc loco ratio, cur filij Iudæ, & Iudæi cæteri sint futuri pauperimi, ac planè mendici: quia videlicet creditores eorum, quibus soluendo nō erunt diligentissimè quærent, & accipiant substantiam eorum, & si quid superfuerit ex labore eorum quæsitum, diripient alieni, milites scilicet Titi Imperatoris, qui (vt scribit Iosephus liber sextus, de bello Iudaico cap. 15.) scrutabantur aurum etiam in visceribus hominum, ad hunc finem illos dissecantes. Et hæc quidem olim passi sunt Iudæi; sed nunc fœneratores effecti ex bonis pauperum Christianorum ditescunt. Illud, scrutetur, nunc est in codice hebraico, ienaches, quod illaqueare, vel irretire significat. Sed Septuaginta, & Sanctus Hieronymus, qui verterunt, scrutetur, videntur legisse, ieuaches, quod est diligenter quærere. proinde post tempora S. Hieronymi, locus hic vitio librariorum corruptus videtur.

- XI.** Non sit illi adiutor, nec sit qui misereatur pupillis eius.

Et hoc manifestè impletum est in Iuda, & Iudæis. Iudas enim ad Principes Sacerdotum accessit, & pecunias retulit, ac se peccasse confessus nihil auxilij, vel consolationis accepit. responderunt enim, Quid ad nos? tu videris, Matth. 27. Quare reiectus à Sacerdotibus, & à Christo veniam non sperans, abiens laqueo se suspendit. Porro Iudæi à Romanis obsessi neminem habuerunt, qui eos iuuare auderet.

- XII.** Fiant nati eius in interitum, in generatione vna deleatur nomen eius.

Prædicit Propheta, filijs Iudæ mortuis, delendum omnino nomen eius in generatione vna, quia videlicet non remanebunt filij filiorum, idest, secunda, vel tertia generatio. Et hoc quidem de filijs carnis Iudæ impletum est.

se credimus: sed scimus etiam id impletum in filijs spiritualibus. Nam aliorum Apostolorum multi numerati sunt filij filiorum, quos illi per Euangelij prædicationem in Christo genuerunt; & posteritas eorum in æternum manebit. Iudæ verò spiritualis posteritas nulla est. Iudæi verò quamuis nō omnino extincti sint, periit tamen in generatione vna Regnum, siue Respublica eorum: nam post euersam Hierosolymam dispersi fuerunt in gentes, & nunc impletur in eis quod prædixit Osee Propheta cap. 3. Quia dies multos sedebunt filij Israel sine Rege, & sine Principe, & sine sacrificio, & sine altari, & sine Ephod, & sine Thera-raphim. Itaque illud, interitum, significat in interitum populi, siue Regni, vt non sint amplius vnus populus, siue Regnum, sed homines dispersi per omnes populos & Regna. Ex hebræo Sanctus Hieronymus vertit, Fiat nouissimum eius interitus, in generatione altera deleatur nomen eius. Sed Septuaginta non male verterunt, Fiant nati eius in interitum; in generatione vna deleatur nomen eius. Nam vox hebræa, acharitho, significat ad literam, reliquæ eius, siue, quod post eum remanet. Et quamuis possit hoc significare, nouissimum eius, vt vertit Sanctus Hieronymus, quia nouissimum postea erit: tamen rectissimè verterunt Septuaginta Interpretes, nati eius, idest, reliquæ eius, siue posteritas eius. Illud quoque, in generatione vna, rectè interpretatum est: quoniam Septuaginta non legunt, acher, idest, altera, vt legit Sanctus Hieronymus, sed, achad, idest, vna. literæ enim simillimæ sunt, & facile fuit librarijs vnā literam pro alia ponere.

- In memoriam redeat iniquitas Patrum eius, & peccatum matris eius non deleatur. **XIII.**

Addit Propheta, ad calamitates Iudæ, & Iudæorum: vt peccata parentum in eis puniantur. Vocat autem Patres non solum patrem eius naturalem,

Xx 2 lem,

sem, sed omnes eos hebræos, qui peccauerunt in deserto, & postea in terra promissionis. vocat verò matrem non tantum matrem propriam, sed integram Synagogam, siue ipsam ciuitatem Hierusalē, de qua dicitur Thren. 1. Peccatum peccauit Hierusalem. Quod autem hic dicit Propheta, significauit etiam Dominus Matth. 23. cum ait, Ut veniat super vos omnis sanguis iustus, qui effusus est super terram à sanguine Abel iusti, vsque ad sanguinem Zachariæ filij Barachia, quem occidistis inter templum, & altare. Amen dico vobis, venient hæc omnia super generationem istam. Et hoc ipsum imprecati sunt impij Iudæi filijs suis, Matth. 27. Sanguis eius super nos, & super filios nostros. Neque repugnat hæc sententia verbis Ezechielis cap. 18. Filius non portabit iniquitatem patris: Ezechiel enim loquitur de filijs, qui non imitantur peccata parentum; Psalmus autem loquitur de filijs, qui peccata parentum imitantur. Deus enim irritatus peccatis parentum expectat quidem filios ad pœnitentiam, sed si illi pergant parentum iniquitates imitari, & sic implere mensuram Patrum suorum, tandem omnes exterminat, non solum considerans peccata præsensium, sed etiam præteritorum. Atque hoc est quod Exodi 20. Deus dixit, cum legem populo daret, Ego sum Deus tuus fortis zelotes, visitans peccata parentum in filios in tertiam, & quartam generationem eorum, qui oderunt me. Vide de concordia harum Scripturarum Sanctum Thomam in 1. 2. quæst. 87. artic. 8. & Theologos cæteros apud Magistrum Sententiarum lib. 2. dist. 33.

XIV. Fiant contra Dominum semper, & dispereat de terra memoria eorum, pro eo quòd non est recordatus facere misericordiam.

Repetit quod dixit de peccatis parentum, & eleganter opponit memoriam peccatorum memoriam gloriæ Iu-

da, & Iudæorum: quasi dicat, Viuet coram Deo memoria peccatorum patris, & matris ipsorum, vt pœna semper maneat: & contra, dispereat de terra memoria gloriæ, & felicitatis ipsorum. Illud enim contra Dominum, significat coram Domino, siue ex opposito oculorum Domini, vt semper videantur à Domino peccata illa: hæc enim est vis vocis hebraicæ, neghed, & græcæ *παρὰ*. Illud autem, memoria eorum, non significat simplicem memoriam personarum, sed faustam commemorationem. Viget enim commemoratio aliorum Apostolorum, quæ quotannis renouatur cum honore, & laudibus ipsorum: Iudæ commemoratio nulla fit, & si quando nomen eius pronunciandum est, cum execratione & horrore pronunciatur. sic etiam gentis Iudæorum nulla fit commemoratio nisi cum contemptu, vt gentis vilissimæ, quæ vbique seruit. Addit Propheta causam tot calamitatum Iudæ, & Iudæorum, Quoniam, inquit, non est recordatus facere misericordiam: nam, vt scribit Beatus Iacobus cap. 2. Iudicium sine misericordia illi, qui non facit misericordiam. Hoc enim fuit peccatum Iudæ, quòd cum videret Principes Iudæorum furere aduersus Christum, ipse nulla misericordia motus erga innocentem magistrum, & Dominum suum, crudelissimè illum tradidit capiendum & occidendum.

Et persecutus est hominem inopem, & mendicum, & compunctum corde mortificare. **XV.**

Explicat Propheta, in quo sita fuerit crudelitas Iudæ, & populi Iudæorum; quia videlicet persecutus est Christum, hominem inopem, & mendicum, & compunctum corde mortificare, id est, ad eum morti tradendum. Sanctus Augustinus non audet hæc de Christo exponere, quia Christus non potest dici compunctus corde, cum compunctio sit propria eorum, quorum est pœnitentia. Ideò per hominem compunctum corde intelligit Apostolos, & alios fide-

fideles, quos Iudæi vsque ad mortem persecuti sunt. Sed quia Sanctus Hieronymus, Theodoretus, Euthymius, & alij de Christo hæc omnia intelligunt, & textus ipse quodammodo nos cogit, vt hunc versiculum de Christo potissimum exponamus; dicendum est, Christum dici hominem inopem, quia cum esset diues, propter nos egenus factus est, vt nos inopia sua locupletaret, vt dicit Apostolus 2. Corinth. 8. Dicit etiam mendicum, quia ex aliena misericordia in hoc mundo viuere voluit, vt verbo Dei prædicando, & orationi pro nobis faciendæ totus incumberet; dici denique compunctum corde, non compunctione culpæ, sed compunctione pænæ, & anxietatis, ac sollicitudinis, quam pro salute generis humani assidue in corde gerebat. Notatur autem in his verbis summa crudelitas: nam qui hominem occidere quærent, vel moueri solent ab iracundia ob iniuriam acceptam, vel à cupiditate spoliandi diuitem, vel ab inuidia alienæ felicitatis. Christus autem mitis, & humilis corde nemini faciebat iniuriam; & cum esset adeo contemptor bonorum huius mundi, vt voluntariè mendicus factus esset, non habebat vnde oculos cupidorum prouocaret. Denique cum assidue hominum peccata desereret, & ad pœnitentiam agendam, ad felicitatem mundi spernendam, ad bona cælestia desideranda hortaretur, nulla erat causa, cur eum ad mortem vllus quæreret.

XVI. Et dilexit maledictionem, & veniet ei, & noluit benedictionem, & elongabitur ab eo.

Nemo est qui diligere possit maledictionem, vel odio habere benedictionem, si sub ratione maledictionis, & benedictionis voluntati proponatur: sed dicitur homo diligere maledictionem, & nolle benedictionem, quando ipse sibi causa est malis suis operibus, cur maledicatur, & non benedicatur. Sic Iudas tradendo Christum Iudæis ob cupiditatem modicæ pecuniæ, dilexit maledictionem, quia ipse sibi cau-

Card. Belarm. in Psal.

sa fuit, cur malediceretur à Deo: & ipse idem deferendo Christum, in quo benedicendæ erant omnes generationes; noluit benedictionem, quia ipse sibi causa fuit, cur non benediceretur à Deo. Quod idem de populo Iudæorum dici potest. Venit enim filius Dei de cælo, vt benediceret populum suum, sed illi Christum occidendo, sibi ipsi causa fuerunt, cur pro benedictione maledictionem acciperent, & benedictio ad gentes transferretur. Porro benedictio Dei cumulum bonorum omnium significat, quemadmodum, & maledictio cumulum omnium malorum. Videmus autem hæc impleta fuisse primum in Iuda, qui continuo & pecunias, quas acceperat, & vitam temporalem, & sempiternam amisit: deinde in populo Iudæorum, qui Regnum, & Sacerdotium perdidit, & excæcatus, atque obstinatus in incredulitate viuit, donec ad tenebras exteriores, quæ sunt in gehenna descendat.

Et induit maledictionem sicut vestimentum, & intrauit sicut aqua in interiora eius, & sicut oleum in ossibus eius. **XVII.**

Declarat Propheta pulcherrimis similitudinibus, maledictionem diuinam esse cumulum omnium malorum tum externorum, tum internorum, ita vt homo maledictus à Deo cunctis malis ita repleatur, vt nulli bono relinquatur locus. Primum comparat maledictionem diuinam vestimento, quod totum corpus vndique tegit: & quia vestimentum non intrat ad viscera, comparat etiam aquæ, quæ hominem demersum in mari, non solum exterius abluit, sed etiam intrat ad stomachum, ad ventrem, ad pectus, ad omnia interna corporis humani: & quoniam aqua non penetrat ossa, inio neque carnes, venas, nervos: addit comparisonem olei, quod subtilissimum est, & non solum carnes, & venas, & nervos, sed ipsa etiam ossa peruadit. Sic igitur diuina maledictio, non solum Iudæ, & Iudæorum, sed omnium illorum, quibus dicitur, *Ite maledicti*, replebit malis corpus, &

Xx 3 om-

omnia eius membra; replebit animā, & omnes eius sensus; replebit, & mentem, & usque ad intima intelligentiæ & voluntatis penetrabit. Quæ certè si homines mortales seriò cogitarent, non sine magno horrore viuerent.

XVIII. Fiat ei sicut vestimentum quo operitur, & sicut zona, qua semper præcingitur.

Addit Propheta, maledictionem illam non solum vbiq; penetraturam, sed etiam sempiternam futuram. Fiat, inquit, ei, Iudæ videlicet, & populo Iudæorum, ea maledictio sicut vestimentum quo operitur, idest, semper illi adhæreat, quemadmodum vestis semper adhæret homini, ne turpitudine eius appareat. Et sicut zona, qua semper præcingitur, idest, non solum maledictio illi adhæreat, sed etiam firmissimè adhæreat, quo modo cingulum firmissimis, & multiplicibus nodis adstringi solet. Quis dignè cogitare valeat, qualis sit nodus, quàm firmus, quàm insolubilis, decretum immutabile omnipotentis voluntatis Dei?

XIX. Hoc opus eorum, qui detrahunt mihi apud Dominum; & qui loquuntur mala aduersus animam meam.

Concludit Propheta prædictionem miseriarum Iudæ dicens, Hoc opus eorum, idest, hæc erit merces operis eorum. Accipitur enim in Scriptura opus pro mercede operis, vt Leuit. 19. Non morabitur opus mercenarij tui apud te usque mane. Qui detrahunt mihi, idest, qui me seductorem vocāt, qui filium Dei esse negant, &c. apud Dominum, idest, hæc erit merces eorum apud Dominum, siue à Domino, vt clarius habetur in textu hebraico, quem Sanctus Hieronymus sic reddidit, Hæc est retributio à Domino his qui mihi aduersantur, & qui loquuntur mala aduersus animam meam, idest, qui obloquuntur de me mala. Est enim hæc pars posterior versiculi, repetitio, & explicatio prioris.

Et tu Domine Domine fac me. XX.
cum propter nomen tuum, quia suavis est misericordia tua.

In vltima parte Psalmi precatur Christus pro se, & pro corpore suo, quod est Ecclesia; & precando prædicit multa bona: quemadmodum in superioribus partibus per modum imprecationis prædixit multa mala Iudæ, & Iudæis. Primum igitur orat Dominum, vt sibi semper adfit, seq; & corpus suū adiuuet propter gloriam nominis sui. Et tu, inquit, Domine Domine. Prima vox continet nomen quatuor litterarum, quod est proprium Dei, & deducitur ab esse, quia Deus est fons essendi: secunda continet aliud nomē, quod propriè Dominum significat. Itaq; sensus est, Tu fons essendi, qui es Dominus omnium rerum, fac mecum, idest, mecum operare, mihi te adiunge; propter nomen tuum, idest, ad gloriam tuam. Quia suavis est misericordia tua, idest, quia misericordia tua benigna est, & facilè inclinatur ad succurrendum miseris. Vbi loquitur tum pro se, tum pro corpore suo, quod est Ecclesia. & poscit auxilium Dei aduersus persecutores ex tribus capitibus: primo, quia Deus est Dominus omnium rerum, ac per hoc potest, si velit, hostes reprimere: secundo, quia hoc postulatur propter nomen Dei extollendum: tertio, quia Dei misericordia benigna est, ac per hoc Deus, non solum potest, sed etiam vult misereri. Et quoniam, vt dixi, hæc est prædictio per modum precationis, vel simul precatio, & prædictio; ideo certi sumus, Ecclesiam Christi semper à Deo protegendam, & iuuandam esse, vt portæ inferi nō præualeant aduersus eam.

יְהוָה
אֱדַבְרֵי

Libera me, quia egenus & pauper ego sum: & cor meum conturbatum est intra me. XXI.

Pergit in oratione Propheta in persona Christi, & videtur respicere tempus illud, quod Christus dixit Ioan. 12. Nunc anima mea turbata est, & quid dicam, Pater saluifica me ex hac hora: vel

vel cū in horto precatus est Patrē, & Apostolis dixit, Tristis est anima mea usque ad mortem. Libera, inquit, me ab imminente morte, quoniam egenus & pauper ego sum, idest, omni humano auxilio destitutus, non habeo, qui pugnet pro me; & anima turbata est intra me, idest, tristitia & horror ex cōsideratione mortis futuræ turbauit me. Hæc autem Christus dicebat, vt ostenderet, se verē esse hominem, qui mortem absolutē consideratam, vt naturæ contrariam exhorrebat; cū tamen eandem mortem, vt precium redemptionis à Patre decretum, & ordinatum maximē desideraret. Quare Ioan. 12. cū dixisset, Saluifica me ex hac hora: subiunxit. Sed propterea veni in horam hanc. & Matth. 26. cū dixisset, Transeat à me calix iste: continuo addidit, Sed nō sicut ego volo, sed sicut tu. Porro quod attinet ad corpus Christi, quod est Ecclesia: petitur liberatio à persecutionibus, & tentationibus, quia cētus Ecclesiæ egenus, & pauper est, idest, non nititur viribus suis, aut meritis suis, sed tanquam verē mēdicus, in solo Deo confidit.

XXII. Sicut vmbra cum declinat, ablatum sum, & excussus sum sicut locustæ.

Hæc pertinent ad comprehensionē Domini, quæ facta est post orationem in horto. Comparat verō Propheta comprehensionem vmbre deficienti, quoniam vmbra sine vllō strepitu deficit, & maximo cum silentio. Sic enim & Dominus auulsus est à Discipulis, & captiuus ductus, imō etiam ad varia tribunalia, & ad ipsam Crucem adductus sine murmure, sine resistentia, sine defensione. Sicut vmbra, inquit, cū declinat, ablatum sum, idest, ablatum sum à conitatu Discipulorum ad tribunal Caiphæ, Pilati, & Herodis eo silentio, quo declinans vmbra deficere solet. Et excussus sum, idest, iactatus ab vno tribunali ad aliud; sicut locustæ, vilissima scilicet animalia, à vento iactari solēt ab vno loco ad alium. S. Augustinus priorem partem versiculi re-

fert ad Christum in persona propria, posteriorem ad Christum in persona Discipulorum. Ille enim ablatum est, sicut vmbra; illi excussi velut locustæ.

Genua mea infirmata sunt à ie iunio, & caro mea immutata est propter oleum. XXIII.

Hic videtur describi debilitas Christi ex ieiunio, adiuncta vigilia & labore illius noctis, & sequentis diei, quo passio peracta est. Quamuis etiam toto vitæ tempore Dominum frequentissimē ieiunasse credendum sit. Genua mea, inquit, infirmata, idest, debilitata sunt à ieiunio; & caro mea immutata, idest, macie, & pallore confecta apparuit propter oleum, idest, propter pinguedinem suam amissam. In hebræo clarius habetur, Caro mea immutata est, niscemen, idest, à pinguedine, idest, ex pingui macilentia reddita est. Variè hic locus ab alijs explicatur; sed hæc nobis explicatio literalis maximē visa est.

Et ego factus sum opprobrium illis, viderunt me, & mouerunt capita sua. XXIV.

Hic concludit passionem: nam post illam summani debilitatem factus est Dominus opprobrium Iudæis; cū eū in medio latronum crucifixum viderunt, & viso eo mouerunt capita sua stantes ante crucem, & dicentes, Vah qui destruis templum Dei, &c.

Adiuua me Domine Deus meus, saluum me fac secundum misericordiam tuam. XXV.

Precatur Dominus de corpore exiēs auxilium Patris ad celerem resurrectionem, vt diximus in explicatione Psal. 21. & 68. & simul precatur corpori suo mystico, idest, Ecclesiæ veram salutem corporis, & animæ.

Et sciant quia manus tua hæc, & tu Domine fecisti eam. XXVI.

Ne putarent homines, Christum ad passionem, & mortem ignominie ple-

nam inuitum peruenisse, & ne iactaret Iudæi, se potētia sua in Christum præualuisse; admonet Propheta in persona Christi, hoc totum à Deo factum esse, iuxta illud S. Petri Act. 3. Deus, qui prænuñciauit per os omnium Prophetarum, impleuit sic. Aut igitur, Et sciāt homines omnes, ac præsertim Iudæi, quia manus tua hæc, idest, quia hæc res, hæc passio, hæc mors mea à manu tua, hoc est voluntate, & potestate tua processit: & tu Domine fecisti eam. Neque enim potuissent Iudæi, aut Gentes Christo præualere, eumque affligere, & occidere, nisi Deus voluisset. Neque tamen excusantur à grauissima culpa, qui Christum occiderunt, quasi voluntatem Dei adimpleuerint. ipsi enim non voluntatem Dei, sed odium cordis sui implere voluerunt: Deus autem mala eorum voluntate, quam ipse non fecerat, usus est ad Mundum redimendum per obedientiam, & charitatē, patientiam, & humilitatem vnici sui. Sanctus Augustinus per manum Dei, hoc loco intelligit Christum, quem Deus fecisse dicitur, quia humanitatem eius fecit. Alij per manum Dei, intelligunt potentiam Dei, sed per particulas illas, hæc, & eam, intelligunt salutem. Sed nos Theodoretū secutus sumus, cuius expositio maximè literalis nobis visa est.

XXVII. Maledicent illi, & tu benedices, qui insurgunt in me confundantur, seruus autem tuus lætabitur.

Persequutores ignorantes hæc, quæ dicta sunt, maledicent mihi, & Ecclesia meæ: vt reuera vsque ad hanc diem Iudæi blasphemare, & maledicere pergunt: sed tu benedices, non solum mihi, me glorificando, & exaltando ad dexteram tuam, sed etiam propter me benedices omnes gentes, eas per Fidem, & Baptismum in filios adoptando. Ex quo fiet, vt illi, qui me persequuntur, & mihi maledicunt, tandem confundantur; seruus autem tuus, ego & fratres mei lætitia sempiterna fruamur.

Induantur, qui detrahunt mihi pudore, & operiantur sicut di- XXVIII. ploide confusione sua.

Confirmat quod dixit, & per modū imprecationis prædicit, omnes Christi, & Ecclesiæ aduersarios tandem cooperiendos confusione, & pudore instar vestimenti duplicis vndique hominem operientis. Quod quidem in die Iudicij omnino implebitur. Vox hebraica, *mehil*, significat vestem amplā, & honorificam, qualis erat tunica sacerdotalis, quæ describitur Exod. 28. Sed Septuaginta Interpretes verterūt *διπλοῖσα*, vel quia vestis erat tam ampla, & longa, vt duplicari posset: vel quia reuera, ea vox significat vestem suffultam alia veste, ac per hoc duplicem, vt sunt apud nos vestes permultę. Sensus autem est, confusionem damnatorum in nouissimo die fore maximā, ita vt pleni sint futuri erubescencia, & pudore. Et certè quæ maior confusio cogitari potest, quàm ingratitude, insipientiam, aliæque vitia damnatorum in theatro mundi totius, coram angelis, & hominibus, qui ab initio seculi fuerunt, apertissimè detegi?

Confitebor Domino nimis in ore meo, & in medio multorum laudabo eum. XXIX.

Hoc opponitur confusione impiorum. Illi enim præ confusione obmutescunt: Christus autem, & electi eius confitebuntur laudes Deo, nimis in ore suo, idest, magno clamore, magnoque iubilationis affectu, idque in medio multorum, in theatro orbis terrarum in die iudicij, & postea in theatro ælestis Hierusalem in æternum.

Quia astitit à dextris pauperis, vt saluam faceret à persequentibus animam meam. XXX.

Hæc est ratio tantæ confessionis, & laudis. quoniam Deus auxilio suo astitit à dextris pauperis Christi, & populi eius, vt saluaret à persequentibus Iudæis vitam temporalem Christi, quod factum est per celerem resurrectionē, &

מפני

& à persequentibus tum hominibus, tum Dæmonibus, vitam æternam electorum eius. In hebræo est, misciophete, idest, à iudicibus, pro eo quod nos habemus, à persequentibus. & quidem quod attinet ad Christum, præcipui persecutores Christi fuerunt Caiphas, & Pilatus, qui Christum morti adiudicauerunt. Sed sapientia Dei astitit Christo, tanquam optimus Patronus, & sententiam iniquam reuocare fecit à diuina potentia, quæ Christum ad vitam reuocauit. Quod verò attinet ad Ecclesiam, iudices qui persequiebantur Ecclesiam, erant tum Imperatores, & Reges, ac magistratus Paganorum, qui multa millia Sanctorum Martyrum morti adiudicauerunt, tum præcipue dæmones, qui sententiam Dei in genus humanum latam proferebant, & ex illa genus humanum morti æternæ adiudicabant: sed adstitit aduocatus potentissimus Christus, qui tulit de medio chirographum, quod erat contrarium nobis, illudq. deleuit, & affixit cruci; & pauperum animas saluas fecit, vt scribit Apostolus ad Colossenses 2. Hic illud annotandum est, Deum assistere à dextris pauperum, idest, eorum, qui agnoscunt paupertatem suam, debilitatem videlicet virium suarum, & ideo assidue pulsant ad ostium Dei, qui diues est in misericordia. Item à dextris pauperum, idest, eorum, qui exuerunt affectum rerum omnium creatarum, & spiritu pauperes effecti in solo Deo diuitias suas posuerunt.

PSALMVS CIX.

Titulus, & Argumentum.

Psalmus David.



Ic Psalmus celeberrimus est tum magnitudine mysteriorum, tum obscuritate sententiarum. Sed quamuis excæcati Iudei multa fabulatur, tamen apud Christianos nulla dubitatio est, quin hic Psalmus de Chri-

sti Regno, & sacerdotio intelligatur, ita explicante Spiritu sancto in multis locis sanctarum Scripturarum, Matt. 22. Act. 2. 1. Cor. 15. ad Hebr. 1. 5. 7. & 10.

Explicatio Psalmi 109.

Dixit Dominus Domino meo: I. sede à dextris meis.

Vidit in spiritu David, Messiam post mortem, & resurrectionem ascendentem in cælum, & refert ad nos verba Dei Patris ad Filium, quibus eum inuitat ad consedendū, & corregnandum. Dixit, in hebræo est, nehum, quod proprie significat, dictum, & coniunctum cum nomine sequenti, verti potuisset, Dictum Domini ad Dominum meum. Sed sensus est idem, & gratia claritatis verterunt Septuaginta, Dixit Dominus. Quamuis autem, dixit, sit temporis præteriti, & tēpore Davidis id tempus nondum aduenisset, tamen rectè vtitur David verbo temporis præteriti, quia vidit rem futuram, tanquam præteritam. Dominus in hebræo est nomen quatuor literarum, quod proprie soli Deo vero conuenit; quod quamuis à modernis pronuncietur, Ichoua, tamen ab antiquis non solebat pronunciarī; sed loco eius pronuntiabatur aliud nomen, quod Dominum significat. Ita Septuaginta Interpretes vbiunque hoc nomen proprium Dei inuenerunt, verterunt κύριος, idest, Dominus. de qua re scripsimus in exercitatione grammatica ad primum versiculum Psal. 33. Domino meo. In hebræo est, Ladoni, quod proprie Domino meo significat. quamuis autem Rabini per Dominum hoc loco intelligant Abraham, vt S. Hieronymus refert in commentario ad cap. 22. Matthæi; vel Ezechia, vt refert Iustinus in dialogo contra Triphonem, & Tertullianus lib. 5. in Marcionem: tamen certum est, non alium hoc loco Dominum vocari, nisi Messiam, qui fuit filius David secundum carnem, & Dominus David secundum diuinitatē. totus enim Psalmus id clamat, cum neque Abraham, neque Ezechias

נאם

יהוה

לארני

chias federint ad dexteram Dei, neq; geniti sint ante luciferum, neque sacerdotes fuerint secundum ordinem Melchisedech. Quare Iudæi interrogati à Christo Matth. 22. quomodo David in spiritu vocet Messiam Dominum suum; non sunt ausi negare psalmum intelligendum esse de Messia. Cur autem non repetatur hoc loco nomen proprium Dei, non est ratio, quia filius non sit verus Deus, ut est Pater, ut Ariani docebant, sed quia hic non agitur de filio Dei simpliciter, sed de filio Dei incarnato. Filius autem Dei incarnatus in scripturis passim Dominus appellatur, & Pater Deus, cum simul nominantur. cuius rei ratio est, quia nomen Domini conuenit filio secundum utranque naturam; nomen autem Dei, non conuenit ei nisi ratione naturæ diuinæ. Itaque si hoc loco idem nomen tributum fuisset Patri, & Filio, suspicari possemus, hæc dici filio tantum, ut Deus est. Quod autem Filius Dei incarnatus, qui etiam Christus dicitur, in scripturis passim appelletur Dominus, & Pater Deus dicatur, perspicuum est ex illo 1. Corinth. 8. Unus Deus Pater, & unus Dominus Iesus Christus. & 2. Corinth. 1. Gratia vobis & pax à Deo Patre, & Dño Iesu Christo. & ad Eph. 6. Pax fratribus, & charitas cum fide à Deo Patre, & Domino Iesu Christo. & in ipsis Euangelijs, atque Actis Apostolorum, & Epistolis eorundem Apostolorum cum ubiq. Christus dicatur Dominus, vix in vno, aut altero loco dicitur Deus. quia videlicet, ut diximus, nomen Dei conuenit Christo solum ratione diuinæ naturæ, nomen Domini conuenit secundum utranque naturam; unde etiam in Symbolo dicimus, Credo in Deum, Patrem omnipotentem, & in Iesum Christum filium eius unicum, Dominum nostrum. Sede à dextris meis. Sessio quietem, & auctoritatem, præcipue regiam denotat. hæc autem Christi sessio, est ineffabilis quies, & summa regia potestas. Illud autem, à dextris meis, significat æqualitatem, & consortium Regni Dei Patris super omnes creaturas. Quam æqualitatem

semper habuit filius Dei ratione diuinæ naturæ, sed ad eam eleuatus est ratione naturæ humanæ, post humiliationem vsque ad mortem, mortem autem crucis. Sic enim loquitur Apostolus Philippen. 2. Propter quod & Deus exaltauit illum, & dedit illi nomen, quod est super omne nomen, ut in nomine Iesu omne genu flectatur, cælestium, terrestrium, & infernorum, & omnis lingua confiteatur, quia Dominus Iesus Christus in gloria est Dei Patris. Idem enim est esse in dextera Dei, & in gloria Dei, hoc est in maiestate Dei. hæc autem gloria est, quod habeat nomen super omne nomen, & illi omne genu flectatur. sic etiam 1. Cor. cap. 15. ait idem Apostolus, Oportet illum regnare, donec ponat omnes inimicos sub pedibus eius. ubi explicat Apostolus illud, sede à dextris meis, ut idem sit, quod regna mecum, donec ponam, &c. Idem quoque Apostolus ad Hebr. 1. Cui dixit Angelorum, sede à dextris meis? nonne omnes sunt administratorij spiritus in ministerium missi, &c. Vbi per sedere à dextris Dei significatur differentia inter Christum, & Angelos, quod isti sint ministri, & serui, & ideo non sedeant, sed mittantur in ministerium: Christus autem ut Rex, & Dominus sedeat cum Patre, creaturis omnibus superior. Denique Sanctus Petrus Act. 2. Dextera, inquit, Dei exaltatus effudit hoc donum, quod vos videtis, & auditis; non enim David ascendit in cælum; dicit autem ipse, Dixit Dominus Domino meo sede à dextris meis, donec ponam inimicos tuos scabellum pedum tuorum. Certissime sciat ergo omnis domus Israel, quia & Dominum & Christum fecit Deus hunc Iesum, quem vox crucifixistis. Vbi sanctus Petrus docet, sedere à dextris Dei, esse ascendisse in cælum; dominari, & regnare ubique ut dominatur, & regnat Deus.

Donec ponam inimicos tuos II.
scabellum pedum tuorum.

Hic versiculus continuatur cum primo apud hebræos, iuxta Rabinorum distin-

distinctiones: sed Septuaginta Interpretes, qui Rabinos omnes præcesserunt, nouum versiculum esse debere iudicarunt. Significat autem his verbis Propheta, Regnum Christi nunquam finiendum, neque periculum esse, ut ab inimicis euertatur, cum Deus statuerit, paulatim omnes omnino inimicos illi subiicere, ut pacificè postea dureret in æternum. Itaque illud, donec, non significat, Christum non amplius sessurum, ubi fuerint omnes hostes debellati, sed significat Christi Regnum semper propagandum magis, & magis, donec nullus omnino supersit inimicus, qui illi genua non flectat. quasi dicat, perge regnare mecum, nec desistas propagare Regnum, donec omnes hostes debellantur. Porro ista propagatio quotidie impletur, dum alij conuertuntur ad fidem, & obedientiam, & spontè subiiciuntur pedibus Christi, ut in eis, tãquam in scabello quiescat; & tandem finito exilio pergunt ad patriam, ubi feliciter sub Deo requiescunt: alij, vel peruertuntur, vel in peruersitate perdurant, & tandè per mortem ad iudicium rapiuntur, & damnati ad inferos detruduntur, ubi Christi pedibus perpetuo comprimuntur. In nouissimo die propagatio complebitur, & tum Christo flectetur omne genu, cælestium, terrestrium, & infernorum. At cur dicit Pater, donec ponam? nõne etiam filius ponit inimicos suos scabellum pedum suorum? Omnino quod Pater operatur, etiam Filius operatur: sed tribuitur hæc actio Patri, quia per eam redditur merces obedientiæ Filij, ut paulò ante Apostolum dicentem audiuius, Propter quod, & Deus exaltauit illum. Præterea omnis actio quæ ad potentiam pertinet, Patri solet tribui, quamuis etiam Filio sit communis, quoniam à Patre Filio communicatur, non Patri à Filio. & Filio quidem, ut Deus est, comunicatur per generationem; eidè Filio, ut homo est, comunicatur per gratiam hypostaticę vnionis. Quod autè filius Patri cooperetur in hac actione subiiciendi cõs hostes, dicitur in sequenti versiculo.

Virgam virtutis tuæ emittet III.
Dominus ex Sion: dominare in medio inimicorum tuorum.

Propheta David cum in spiritu audiisset Patrem loquentem ad Filium, ac dicentem, Sede à dextris meis, donec ponam inimicos tuos scabellum pedum tuorum; cõuertit se ad Filium, & eodem spiritu reuelante demõstrat, vnde incipienda esset propagatio Regni Christi in terris. Virgam, inquit, virtutis tuę emittet Dominus ex Sion, idest, Dominus Pater ut ponat inimicos tuos scabellum pedum tuorum, sceptrum Regalis potentię tuę ex ciuitate Hierusalem, & ex ipso monte Sion extendere incipiet, & propagabit vsq; ad vltimum terrę. Concordat cum hac Prophetia verbum Domini, Lucæ 24. Oportebat Christum pati, & resurgere à mortuis tertia die, & prædicari in nomine eius penitentiam, & remissionem peccatorum in omnes gentes incipientibus ab Hierosolyma. & Act. 1. Eritis mihi testes in Hierusalem, & in omni Iudæa & Samaria, & vsque ad vltimum terrę. Virga hoc loco sceptrum significat, & per sceptrum intelligitur Regalis potestas: per virtutem autem significatur robur, & fortitudo, ut clarius habetur in textu originali. Itaque virga virtutis est sceptrum potentię. dicitur autem hæc virga emittenda ex Sion, quasi ex mōte illo germinauerit, quoniam in Hierusalem cæpit Regnũ Christi spirituales; ibi enim fuerunt primi credentes, & ibi cæpit propagatio fidei per Apostolos. Dominare in medio inimicorum tuorum. est quasi fausta acclamatio, & exhortatio ad propagandum imperium per omnes gentes. quasi dicat, tu igitur perge feliciter, infer vexillum crucis tuę in mediũ paganorũ, & Iudæorum, ubi sunt confertissimi hostes tui, ibiq; in medio eorum dominare, idest, illis inuitis, & repugnantibus regnum tuum constitue. Quod certè breui factũ videmus: nam intra paucos annos, frustra Iudæis, & Paganis reluctantibus, Ecclesiæ Christi in toto orbe terrarum constitutæ fuerunt.

fuerunt. Scribit enim Apostolus ad Collossen. 1. Euangelium in vniuerso mundo est, & crescit, & fructificat. & sanctus Irenæus vicinus Apostolicis temporibus lib. 1. cap. 2. Ecclesia, inquit, per vniuersum orbem vsq; ad fines terræ seminata est. & cap. 3. meminit Ecclesiarum Germaniæ, Iberorum, Lybiæ, Aegypti, Galliarum, Oriëtis, & earum quæ in medio mundi erant, per quas intelligit Ecclesias Græciæ, & Italiæ. Rectè autem dicit Psalmus, in medio inimicorum tuorum, quia quantumlibet Ecclesia propagetur, & crescat, sæper erit in medio inimicorum, idest, Iudæorum, Paganorum, Hæreticorum, & falsorum Christianorum, dum in terris peregrinatur. Sed in consummatione seculi fiet separatio bonorum à malis, & non erit amplius Regnum Christi in medio inimicorum suorum, sed eminebit, & exaltabitur super omnes inimicos suos.

IIII. Tecum principium in die virtutis tuæ in splendoribus sanctorum: ex vtero ante luciferum genui te.

Dixerat, dominare in medio inimicorum tuorum, quod intelligitur in hoc tempore, dum Regnum Christi ab inimicis oppugnatur: declarat nunc quid erit in nouissimo die, quando omnes inimici subiecti erunt vt scabellum, pedibus eius. Tecum, inquit, principium in die virtutis tuæ, idest, tecum erit principatus manifestus, tunc apparebit omnibus, tuum esse Regnum, & apud te solum esse verum principatum. In die virtutis tuæ, in die videlicet nouissimo, quando potentia tua cælum mouebit, solem obscurabit, terram concutiet, mortuos excitabit, & omnes ad tribunal tuum adducet. In splendoribus sanctorum, idest, quando circumdatus eris sanctis tuis, qui omnes fulgebunt sicut sol. Ex vtero ante luciferum genui te, idest, ideo tecum erit tantus principatus, quia ego Deus Pater omnipotens genui te, non ex nihilo, vt res creatas, sed ex vtero meo, vt filium ve-

rum, naturalem, & consubstantialem, idque ante luciferum, idest, ante quam stellas crearem, ante omnem creaturam, ante omnia secula. Hæc est communis expositio Patrum, Hieronymi, Chrysostomi, Augustini, Theodoret, & Euthymij. Sed consideremus singula verba. Tecum. ex hebræo S. Hieronymus vertit, populus tuus. Sed verbum hebraicum potest legi ammecha, & significat populus tuus; potest etiam legi, immecha, & significat, tecum, & sic legerunt Septuaginta Interpretes, & rectè verterunt. Principium. in hebræo est, nedaboth, quod propriè significat Principes, sed Septuaginta videntur legisse, nedaba, principatus. & sic exponit Chrysostomus hoc loco vocem græcam ἀρχή, quæ & principium, & principatū significare potest. Quod si placeat, non accipere principium pro principatu, sed simpliciter pro principio; exponere poterimus, Tecum principium, idest, tecum est principium primum omnium rerum, quia tu es in Patre, & Pater in te. Sed prior expositio videtur præferenda, vt magis consentanea textui hebraico. In die virtutis tuæ. in his verbis nulla est discrepantia inter codices, nisi quod in hebraico per virtutē significatur propriè fortitudo, & potētia. In splendoribus sanctorum. in hebraico legitur, in montibus sanctitatis. Sed videntur Septuaginta Interpretes non legisse, habere per ה, quod significat montes, sed habere per א, quod significat splendores. Idem autem est, in splendoribus sanctitatis, & in splendoribus sanctorum; dici siquidem possunt sancti homines splendores sanctitatis, quia sanctitas in eis resplendet. Ex vtero. ex hoc verbo probant sancti Patres efficacissimè Christi diuinitatem: nam si Christus creatura esset, non posset dici genitus ex vtero: nemo enim dicit, se genuisse ex vtero domū, vel scamnum, vel aliud quidpiam ex arte factum: neque Deus vnquam dixit, se genuisse ex vtero cælum, aut terram. Porro per vterum intelligitur essentia Dei secreta, & intima; & quamuis vterus propriè ad matrem,

עמך

עמך

מרבית

נרכה

הררי

אורי

trēm, non ad Patrem pertineat: rectè tamen Deus Pater dicitur ex vtero genuisse, tum vt clarius ostendatur filius consubstantialis genitori (clarius enim filius est ex substantia matris, quam ex substantia patris) tum quia Deus non opus habuit vxore ad filium gignendum, & pariendum. Ipse enim genuit, ipse peperit. vnde dicit Isaia vlt. Nunquid ego, qui alios parere facio, ipse non pariam? Ante luciferum. hinc significatur æternitas filij, qui genitus fuit ante luciferi creationē, ac per hoc ante omnes creaturas. Sed posuit nomen luciferi, quoniam ipse etiam filius Dei, est quidam lucifer increatus. Est enim lux vera, quæ illuminat omnem hominem, & omnem Angelum. In hebræo habetur mischar, quod S. Hieronymus vertit, ex aurora. Sed potest etiam verti, præ aurora, idest, ante auroram. Septuaginta Interpretes posuerunt luciferum pro aurora, siue quia cū aurora solet oriri lucifer, siue quia ipsa aurora etiā est lucifer. quare Sanctus Hieronymus Iob 11. v. 12. vertit, orieris vt lucifer. cū tamē in hebræo sit, mane; Itaque luciferū accepit pro mane, siue pro aurora. Genui te. in hebræo nunc legitur, Tibi ros natiuitatis tuæ. Sed Septuaginta non habuerunt illa duo vocabula, Tibi ros, & pro, natiuitatis tuæ, legerunt, genui te; quia verba hebraica mutatis punctis utroque modo legi possunt, iadutheca, est, natiuitatis tuæ. iadadthica, est, genui te. Potest etiam fieri, vt Septuaginta Interpretes legerint, tibi ros natiuitatis tuæ, sed verba obscura declarare voluerint per suam versionem, & ideo dixerint, genui te. Id enim obscurè significant illa verba, ex vtero ante luciferum tibi ros natiuitatis tuæ, idest, ex vtero ante luciferum fuit tibi natiuitas ex me, vt est rori ex cælo. Sanctus Augustinus addit aliam expositionem minus principalem, quod videlicet Dauid Christo filio suo secundum carnem dicat, Ego genui te ex vtero Virginis Mariæ, filia mea, antequam lucifer oriretur, idest, media nocte. Tertullianus quoque lib. 5. in Marcionem exponit

de partu Virginis, sed tribuit Deo illud, genui te, hoc modo, Ego Deus Pater genui te ex vtero Virginis, nocturno tempore antequam lucifer oriretur.

Iuravit Dominus & non pœnitebit eum, tu es Sacerdos in æternum secundum ordinem Melchisedech. V.

Transit nunc à dignitate Regia ad sacerdotalem, atque ostendit, Christum esse sacerdotem æternum, non succedentem Aaroni, sed immediate à Deo institutum, cuius figura fuerat sacerdotium Melchisedech. Iuravit Dominus, & non pœnitebit eum. Iuramentum Dei promissionis stabilimentum est; id quod declarauit addens, & non pœnitebit eum, idest, firmissimè statuit, nunquam mutaturus: significat enim Dauid his verbis, sacerdotiū Aaronicum fuisse mutandum, sed sacerdotium Christi nunquam esse mutandum. Pœnitentia enim Dei dicitur per metaphoram, cū Deus facit id, quod faciunt homines, cū eos pœnitet facti. mutāt enim quod eos fecisse pœnitet. sic Gen. 6. dicit Deus, Delebo hominem, quem creauī, à facie terræ, ab homine vsq; ad animalia, pœnitet enim me fecisse eos. & 1. Regum 15. Pœnitet me (ait Deus) quod constituerim Regem Saul. Tu es sacerdos in æternum. dicuntur hæc à Deo, non à Dauide; Apostolus enim ad Hebræos cap. 5. non semel repetit, hæc esse verba Patris ad Filium. dicitur autem Christus sacerdos in æternum, tum quia effectus vnici sacrificij, quo corpus suum obtulit in cruce, manet in æternum, iuxta illud Apostoli ad Hebræos 10. Vna oblatione consummauit in sempiternum sanctificatos: tum quia viuens ipse in æternum sacrificium quotidie offert per manus ministrorum sibi inuicem in Ecclesia succedentium. quod idem Apostolus ad Hebræos 7. confirmat, dicens, Et alij quidem plures facti sunt sacerdotes, idcirco quod morte prohiberentur permanere: hic autē eo quod maneat in æternum, sempiternū habet sacerdotium.

Secun-

מִשְׁכָּר

יְלֻדְתָּ
יְלֻדְתָּ

Secundum ordinem Melchisedech. per ordinem intelligitur ritus, lex, traditio, consuetudo; hæc enim significat vox hebraica. opponitur autem ordo Melchisedech ordini Aaron secundum Apostolum ad Hebr. 7. Distinguitur vero ordo Melchisedech ab ordine Aaron in multis. primò Melchisedech non legitur successisse alteri, neque ei successisse alter legitur; nam ideò dicitur sine patre, sine matre, sine genealogia, neque initium dierum, neque finem vitæ habens, ut dicitur ad Hebr. 7. in sacerdotio autè Aaronis vnus alteri succedebat, quia singuli moriendo sacerdotium filijs relinquebant. secundò, Melchisedech erat sacerdos, & Rex; Aaron, simplex sacerdos. tertio, Melchisedech obtulit panem, & vinum; Aaron oues, & boues. quartò, Melchisedech erat sacerdos vniuersalis, non vnius gentis tantum; Aaron erat sacerdos duntaxat Hebræorum. quintò, Melchisedech non egebat tabernaculo vel templo ad sacrificandum; Aaron egebat, & ideò nunc apud Hebræos cessauit sacrificium, quia euersum est templum. Christus igitur sacerdos est secundum ordinem Melchisedech, quia re vera nulli successit, neque alius ei successit in amplissima dignitate sempiterni sacerdotij: & ipse verè ac propriè non habet Patrem ut homo, neque matrem ut Deus. idem Christus Rex est, & sacerdos, & obtulit panem, & vinum in cœna, idest, corpus suum sub specie panis, & sanguinem suum in specie vini. & non est sacerdos hebræorum tantum, sed hebræorum, & gentium. neque alligatur sacerdotium eius vni templo, vel tabernaculo, sed, ut prædixit Malachias cap. 1. à Solis ortu usque ad occasum in omni loco sacrificatur, & offertur oblatio munda. Ex his satis apertè conuincitur hæresis Lutheranorum, qui negat sacrificium verum, proprièque dictum extare in Ecclesia Dei. vel ostendant Lutherani, si possunt, quo modo prædictio sit adimpleta de sacerdotio secundum ordinem Melchisedech instituendo, & nunquam mutando.

Dominus à dextris tuis confre VI.
git in die iræ suæ Reges.

Sanctus Ioannes Chrysostomus, quæ Græci sequuntur, per Dominum, hoc loco intelligit Patrem: Sanctus Augustinus intelligit filium. Sanctus Hieronymus dicit quidem Dominum hoc loco nominatum esse Patrem, tamen statim addit, illum, qui confregit Reges, iudicabit in nationibus, implebit ruinas, & bibit de torrente, esse filium. Videtur autem nobis sententia sancti Augustini esse aptior, & facilior; non enim debet rationem reddere quo modo Pater sit à dextris filij, cum paulò ante dictum sit filium sedere à dextris Patris. neque quomodo Pater de torrente biberit, & caput exaltauerit. Denique melius continuatur contextus verborum Prophetæ, si expositionem sancti Augustini sequamur. Igitur Propheta postea quam dixerat, filium à Patre sacerdotem æternum appellatum fuisse: conuertit sermonem ad Patrem, ac dicit, Christum verè fore sacerdotem æternum, quoniam etiam si multi Reges terræ conspirabunt, ut sacerdotium, totamque eius Religionem euertant: ipse tamen sedens à dextris Patris confringet Reges aduersarios, & illis omnibus inuitis sacerdotium, & sacra sua perpetuabit. Dominus à dextris tuis, idest, Christus à dextris tuis sedens, sicut illi dixisti, sede à dextris meis, confregit in die iræ suæ Reges, idest, in die qua irascetur inimicis suis, Regibus terræ, Ecclesiam suam persequentibus, confringet eos, & iam in prænotione mea confregit; iam enim præuideo per spiritum prophetiæ Herodem ab Angelo percussum, Neronem destitutum sibi manus iniecisse, Domitianum, Maximinum, Decium, & cæteros interfectos; Valerianum captiui in manus barbarorum deuenisse; Diocletianum, & Maximianum præ desperatione Imperium deposuisse; Iulianum, Valentem, Hunnericum, & omnes denique inimicos Reges miserè perisse & atque in gehennam detructos meritas penas dare.

Iudi-

VII. Iudicabit in nationibus, implebit ruinas, conquassabit capita in terra multorum.

Dixit, quid faciet Christus in præsentī tempore aduersus hostes suos, Reges & Principes terræ: nunc addit, quid faciet in die nouissimo aduersus omnes inimicos suos. Iudicabit, inquit, in nationibus, idest, is, qui hoc tempore cōfregit impetum Regum, & cōseruauit Ecclesiam suam tempore persecutionum, postea in fine seculi iudicabit omnes nationes, siue iudicium exercebit in nationibus omnibus; & condemnatis omnibus impijs, implebit ruinas, idest, consummabit vltimum exterminium, completum ruinæ impiorum perficiet. ex hebræo S. Hieronymus legit, implebit foueas. quod etiam est verum, quia tunc implebuntur foueæ inferorum, omnibus malis hominibus, & dæmonibus eo detrufis, & conclusis: & hoc modo conquassabit capita in terra multorum, idest, humiliabit, & conteret omnes superbos, qui nunc erecto capite aduersus Deum incedunt; tunc enim conculcabit superbiam eorum, cū coram toto mundo ostendet infirmitatem eorum, & contemptibiles, atque confusos efficiet: & hoc erit conquassare, & conterere capita eorum. Dicit autem, multorū in terra, quia in terra paucissimi inueniuntur veri humiles, & pii, respectu superbiorum, & impiorum, qui propē infiniti sunt. In hebræo habetur, in terra multa, idest, in magna parte terræ; sed idem est sensus, siue quis dicat, superbos multos inueniri in terra, siue, superbos occupare multum terræ. S. Augustinus exponit hæc omnia de præsentī tempore, & in bonam partem, vt implere ruinas, sit instaurare quod cecidit, & cōquassare capita, sit humiliare ad salutē per contritionem. quæ pia est, & utilis expositio, sed mystica: nam ad literam exponunt de vltimo iudicio Theodoretus, Euthymius, & alij communiter.

VIII. De torrente in via bibet, propterea exaltabit caput.

Hunc vltimum versiculum exponunt magno consensu oēs veteres de Christi humilitate in carne mortali, & exaltatione in gloria cælesti, tum illi, qui verba superiora exponūt de ipso Christo, tum qui exponunt de Patre. Quare mirum est aliquos recentiores aliter sēsisse. Reddit igitur David rationem cur tanta sit Christi potētia, vt Reges confringere, nationes iudicare, implere ruinas, & conquassare capita possit; & dicit, De torrente in via bibet, propterea exaltabit caput; ac si diceret cū Apostolo, Humiliauit semetipsum factus obediēs vsque ad mortem, mortem autem crucis, propter quod, & Deus exaltauit illum, & dedit illi nomen, quod est super omne nomen. Torrentem appellat cursum rerum humanarum: quomodo enim torrens magno impetu, & sonitu fluit, & turbidus, ac turbatus incedit, & paulō post cessat, & ne vestigium quidem sui relinquit: sic sunt res humanæ tēpore huius mortalitatis; transeunt enim omnia, & vt plurimum turbida, & turbata: audiuntur sæpē maxima prælia, & turbationes gentium, & populorum, vt tempore Alexandri Magni, & postea Caesaris, & aliorum similium. Sed paulō post finem accipiunt tum ipsi, tum posterī eorum, & vix inueniuntur vestigia potentiae ipsorum. Ad hunc torrentem descendit filius Dei per incarnationem suam, & in via, idest, in spatio vitæ suæ mortalis, & transeuntis, bibit aquam turbidā huius torrentis, pertulit ærumnas nostræ mortalitatis; imō etiam in profundum torrētis descendit per passionem, ita vt nō biberit aquam ad refrigerium, & delectationem; sed biberit molestissimam aquam, vt illi faciūt, qui demerguntur in aquis, iuxta illud Psalm. 68. Intrauerunt aquæ vsque ad animam meam. Infixus sum in limo profundi, & non est substantia: veni in altitudinem maris, & tēpestas demersit me. Merito igitur huius tantæ humiliationis spōte susceptæ pro gloria Patris, & salute generis humani, exaltauit postea caput suum ascendens in cælum, & sedēs ad dexteram Patris cōstitutus

ſtitutus Iudex viuorum, & mortuorum. Aliqui legunt, in præterito, bibit: ſed textus hebraicus, & græcus habent in futuro, bibet: proinde noſtra communis lectio cum textibus originalibus concordat.

P S A L M V S - C X.

Titulus, & Argumentum.

Alleluia.



IC Psalmus, vt etiam multi ſequentes, nihil habet in titulo, niſi, Alleluia, quod ſignificat, Laudate Dominum: ex quo intelligimus, argumentum Pſalmi eſſe laudationem Dei. Notat ſanctus Hieronymus, hunc eſſe primum Pſalmum perfectè alphabeticum: nam Pſalmus 24. 33. & 35. alphabetici ſunt, ſed non perfectè, quia in eis aliqua litera deeſt, & eius loco altera ponitur. Pſalmus etiam trigeſimus octauus alphabeticus eſt, ſed non ita perfectè, vt hic qui nunc eſt in manibus: nã in illo ſub vna litera modo ponitur vnus verſiculus, modo duo, modo tres: in hoc autem Pſalmo tot ſunt parui verſiculi, quot ſunt literæ alphabeti. Itaque Pſalmus continet vigintiduos verſiculos, quales ſunt apud Latinos verſiculi iambici, & apud Italos verſiculi ſeptem ſyllabarum. Sed Septuaginta Interpretes magis ad ſententias, & ad ſimilitudinem aliorum Pſalmorum, quàm ad literas reſpicientes, partiti ſunt Pſalmum in decem verſus.

Explicatio Pſalmi 110.

Aleph. **C**onfitebor tibi Domine in toto corde meo:
Beth. In conſilio iuſtorum, & congregatione.

David ſanctus incipit hymnum ab inuocatione, & ſimul explicat modum, quo vtiliter laudari debet Deus. Confitebor tibi Domine, ideſt, laudabo,

ſiue confeſſionem laudis offeram tibi. In toto corde meo; hæc eſt conditio bonæ laudationis, vt nõ fiat ſolum voce, ſed etiam corde: & non ſolum corde, ſed toto corde, ideſt, toto affectu, nihil magis, vel æquè diligendo, & laudando. Eſt etiam, toto corde, ſumma attentione, nihil aliud cogitando: indignum eſt enim verſantem in laude omnipotentis Dei, quem Cherubim, & Seraphim cum tremore adorant, mentem ad inferiora deſcendere. In conſilio iuſtorum, & congregatione, ideſt, laudabo te toto corde, tum inter paucos iuſtos, tum in cœtu multorum, & eorum promiſcua multitudine: nam per conſilium iuſtorum videtur intelligendus locus ſecretus, vbi ſoli conueniunt ſapiētes ad conſilium. Vox enim hebraica, ſod, ſecretum ſignificat, ſiue conſilium, quod ſecretum requirat. Vox autem, heda, ſynagogam ſignificat, ſiue congregationem, ad quam totus populus venire ſolebat.

Gimel. Magna opera Domini;
Daleth. Exquiſita in omnes voluntates eius.

Laudat primum ab operibus in commune, quod videlicet Deus laude dignus ſit, quod omnia opera eius magna ſint, & quod ſint ita perfectæ, vt ad omnem vſum Deo ſeruiant. Magna laus, quod artifex nõ faciat alia opera magna, alia parua, alia precioſa, alia vilia, ſed quod omnia omnino, quæ ab eius ingenio, vel manu prodeunt, magna ſint. Talia eſſe opera Dei certè cognoscet, qui cogitabit, in omnibus, etiam ſi nobis præ multitudine viluerint, infinitam Dei potētiam, & ſapientiam elucere, & nullum à nobis perfectè comprehendere. Verè enim ſcripſit Eccleſiaſtes cap. 1. Cunctæ res difficiles, non valet homo eas explicare ſermone. & cap. 8. Intellexi, quod omnium operum Dei nullam poſſit homo inuenire rationem. Neque ſolum magna ſunt opera, ſed exquiſita in omnes voluntates eius, ideſt, quæſita, & parata in omnem vſum Deo placitum, vt Deus de

de illis faciat quicquid voluerit, iuxta illud Psalm. 118. Quoniam omnia seruiunt tibi: nam, vt S. Augustinus rectè disputat, nihil est, quod magis Dei voluntati repugnare videatur, quàm liberum arbitrium, quo fiunt peccata, quæ Deus prohibet: & tamen de ipso libero arbitrio Deus facit, quod vult. vel enim reformat illud per gratiam, vel punit per iustitiam; & nisi ipse permetteret, liberum arbitrium non peccaret. Præclarissima laus, & soli Deo propria, facere opera, quæ in omnē vsum quæri, aptari, & accommodari possint, & de quibus Deus quicquid velit, possit efficere. Vide commentarium Sancti Ioannis Chrysostomi, qui hæc omnia mira eloquentia tractat, descendens ad singula opera Dei. In hebræo habetur in numero multitudinis, Exquisita in omnes voluntates eorum: sed fortasse Septuaginta aliter legunt, vel certè ad insinuandam Trinitatem diuinarum personarum, in vna essentia diuinitatis, positum est pronomen in numero multitudinis cum nomine Domini, numeri singularis.

He. Confessio, & magnificentia opus eius,

Van. Et iustitia eius manet in seculum seculi.

Transit nunc Propheta ab opere creationis ad opus gubernationis, & ostendit, hoc etiam opus omni laude esse dignissimum. Confessio, inquit, & magnificentia opus eius, idest, operatio eius, qua regit, & gubernat Mundum à se creatum, est confessio, idest, materia confessionis laudis, & gratiarum actionis; & etiam materia magnificentiae sue omnibus declarandæ. Simili modo loquitur Sapiens, cum ait, Gloria filiorum patres eorum, Prouerb. 17. Et dedecus huius Pater sine honore, Ecclesiastici 3. Hic enim accipitur gloria, vel dedecus pro matris gloriæ, vel dedecoris. Et iustitia eius manet in seculum seculi, idest, non solum Deus magnificè gubernando operatur, quia prospicit omnibus abundanter, sed etiam iustissimè, vt nunquā magnificentia eius

Card. Belarm. in Psalm.

à iustitia disuncta inueniatur. semper enim Deus seruat promissa, & nulli facit iniuriam. Id quod videtur præcipue additum propter vulgarem illam querimoniam, cur Deus finit impios exaltari, & pios ærumnis, & calamitatibus premi? Iudicia enim Dei occulta esse possunt, iniusta esse nō possunt. Quantumuis igitur nobis aliter videatur, semper tamē opera Dei iusta sunt, & omni laude digna.

Zain. Memoriam fecit mirabilium suorum,

Cheth. Misericors, & miserator Dominus.

Descendit ad particulare quoddam opus prouidentiae diuinæ, quando videlicet pluit manna de cælo; quod fuit opus magnæ misericordiae non solum præsentibus, quos aluit in deserto, sed etiam posteris, quibus reliquit vnam manna plenam in memoriam miraculorum, quæ patrauerat in deserto. Sic enim habetur Exod. 16. & ad Hebr. 9. Manna verò illud figura fuit sacramenti Eucharistiae, quod datum est populo Christiano in cibum spirituale, & in memoriam mirabilium, quæ operatus est Christus in terris, quorum præstantissimum est gloriosa passio, quæ mortem nostram moriendo destruxit, & de Principe huius mudi triumphauit. Ait igitur, Memoriam fecit mirabilium suorum misericors, & miserator Dominus. Misericors, & miserator distinguuntur apud Latinos, quod misericors ad habitum, miserator ad actum pertineat: sed in hebraico textu differunt in eo, quod channun, significat simpliciter misericordem; rachum, addit affectum paternum, ac tenerum, qualis est patris in filium. Itaq; misericors, & miserator, hoc loco significant, misericors. & paternè misericors.

חנן
רחום

Teth. Escam dedit timentibus se,
Iod. Memor erit in seculum testamenti sui.

Hæc esca est manna, quod Deus pluit de cælo, & dedit timentibus se, idest,

Y y culto-

cultoribus suis hebræis: quamuis enim plurimi in eo populo peccatores esset, tamen Deum verum colebant: nam, timere Deum, in Scripturis colere significat. Et sicut Deus volebat, ut populus memor esset mirabilium suorum, quæ fecit, quando eduxit populum de Aegypto, & per desertum in terram promissionis introduxit: ita vicissim promittebat, se memorem futurum pacti sui, quod cum illis inierat: ideo addit, memor erit in seculum testamenti sui, idest, ostendet continua prouidentia, & protectione se memorem esse fœderis, & promissorum suorum.

Caph. Virtutem operum suorum
annunciabit populo suo,
Lamed. Ut det illis hæreditatem
gentium.

Præcipuum caput fœderis, quod cum Abraham pepigit Deus, fuit, ut daret posteris eius Hebræis terram Chananæorum, quæ ideo postea dicta est terra promissionis. Explicat igitur quomodo memor erit testamenti sui, dicens, Virtutem operum suorum annuntiabit populo suo, idest, memor pacti sui notam faciet populo suo virtutem, hoc est, potentiam, & fortitudinem operum suorum, conuertendo Iordanem retrorsum, clangore tubarum euerendo muros Hierico, sistendo Solem, & Lunam ad imperium Iosue, lapides de cælo super hostes Hebræorum pluendo, & similia multa mirabilia operando. Ut det illis hæreditatem gentium, idest, ut daret illis, fidelibus suis terram Palestinæ, quam gentiles Chananæi tanquam propriam hæreditatem, & possessionem obtinebant.

Mem. Opera manuum eius veritas, & iudicium.

Nun. Fidelia omnia mandata eius,

Samech. Confirmata in seculum
seculi,

Hayn. Facta in veritate, & æquitate.

Ac ne quis iniustitiam suspicaretur in eo quod Deus terram Palestinæ ab-

stulit Chananæis, & donauit Iudæis; addit, opera manuum eius veritas, & iudicium, idest, omnia opera Domini, & in ijs hoc particulare opus expulsionis Chananæorum, & introductionis Iudæorum, facta sunt cum magna fidelitate, & iustitia. Veritas enim hoc loco, ut etiam alibi passim fidelitatem significat seruandi promissa. Quoniam igitur promiserat Deus Abraham terram illam se daturum posteris eius, hoc opus Dei factum est in veritate: & quoniam idem Deus non ante expulit Chananæos, quam impleta esset mensura peccatorum, ob quæ expelli mererentur; ideo hoc idem opus factum est cum iustitia, quæ hoc loco dicitur iudicium, quod est iustitiæ actus. Opera ergo manuum eius veritas & iudicium, idest, fideliter & iuste fiunt. Quod autem mererentur puniri Chananæi, & in penam priuari terra Palestinæ, probat Propheta, quia non seruauerunt præcepta Dei naturalia, quæ sunt omnibus communia, & immutabilia, quia continent prima principia iustitiæ: nam Leuit. cap. 18. prohibet Deus incestum, adulterium, vitium contra naturam, idololatriam, & similia, & addit, Omnes execrationes istas fecerunt accolæ terræ, qui fuerunt ante vos, & polluerunt eam: cauete ergo ne & vos similiter euomat, cum paria feceritis, sicut euomit gentem, quæ fuit ante vos. Ait igitur, fidelia omnia mandata eius, idest, omnia præcepta Dei, præsertim naturalia, fidelia sunt, quia neminem decipiunt, cum sint rectissima, & iustissima, & per hoc pœnam adferant præuicatoribus, & præmia obseruatoribus. Nec solum fidelia sunt, sed etiam immutabilia, & indispensable, cum in nullo casu inueniri possint iniusta, ideo addit, Confirmata in seculum seculi, facta in veritate, & æquitate, idest, stabilita sunt æterna firmitate, quia condita sunt in veritate, idest, in rectitudine, & æquitate, idest, iustitia: nam, ut diximus, rectitudinem, & iustitiam absolutam continet. Vide Sanctum Thomam in 1. 2. quæst. 100. artic. 8.

Pſe. Redemptionem misit populo suo,

Thſade. Mandauit in æternum testamentum suum.

Non defunt etiam ex veteribus, qui hæc referant ad literam ad liberationem populi de Aegypto: sed videtur omnino Propheta altiorē redemptionem intelligere, vt exponunt sanctus Augustinus, & Euthymius. nam de Iudæis iam dixerat, datū illis fuisse manna de cælo, & hæreditatem gentium; neque vlla erat ratio, cur reuerteretur ad antiquiora. Igitur post decantata beneficia Dei erga Patres testamenti veteris; transit ad beneficium longè excellentius testamenti noui, quo vera, atque æterna redemptio continetur. Redemptionem, inquit, misit populo suo, quasi dicat, post hæc misit Redemptorem tam sæpè promissum, & tamdiu expectatum, de quo prophetauit etiam Zacharias, cū ait Luc. 1. Benedictus Dominus Deus Israel, quia visitauit, & fecit redemptionem plebis suæ. Redemit autem Christus populum suum de captiuitate, & seruitute peccati, & potestate tenebrarum pretio sanguinis sui. Et hoc modo verè, & propriè Mandauit in æternum testamentum suum, idest, iussit (hoc enim significat vox hebræa) & statuit, vt testamentum, siue pactum esset æternum, de vera & æterna salute, & possessione cælestis patriæ. nam testamentum vetus, quo promittebatur terra Palestinæ, non fuisse æternū experientia docet. Quare & Hieremias cap. 31. ait, Ecce dies veniunt, dicit Dominus, & feriam domui Israel, & domui Iudæ fœdus nouum, non secundū pactum, quod pepigi cum patribus eorum, vt educerem eos de terra Aegypti. pactum quod irritum fecerunt, & ego dominatus sum eorum, dicit Dominus: sed hoc erit pactum, quod feriam cum domo Israel post dies illos, dicit Dominus, Dabo legem meam in visceribus eorum, & in corde eorum scribam eam, & ero eis in Deum, & ipsi erunt mihi in populum.

Coph. Sanctum & terribile nomen eius,

Res. Initium sapientiæ timor Dñi.

Docet consequenter modum permanendi in testamento Domini, vt assequamur promissiones eius, ac dicit, Sāctum & terribile nomen eius, idest, is qui mandauit in æternum testamentum suum, sanctus, & terribilis est, & idē odit pollutionē, & immunditiam peccati, quia sanctus est, & dicit: Sancti estote, quia sāctus sum Dominus Deus vester: & simul punit pollutos, & immundos, quia terribilis est, & horrendum est incidere in manus Dei viuētis. & propterea, Initium sapientiæ timor Domini, idest, illi verè incipiunt sapere, qui timent Dominum, & ex timore illo cauēt à peccatis, obseruant legem, operātur bona, vt paulatim ex timore ad amorem perueniant, & incipiant odisse malum non timore pœnæ, sed amore iustitiæ. Potest etiam hic locus intelligi de timore sancto, quo timeamus offensionem Dei, quia diligimus Deum: qui timor dicitur initium sapientiæ, quia pertinet ad primam, & magis necessariam partem sapientiæ. Sapientia enim perfectā duo requirit, cognitionem & amorē Dei; sed in hac vita priores partes tribuuntur amori, siue timori sancto filiali. Vnde Ecclesiastes c. 1. vbi dixit, Initium sapientiæ timor Dñi; addit, plenitudo sapientiæ est timere Deum: vt intelligamus timorem Dñi sanctum dici initium, quia est quasi caput, idest, pars prima, & potissima, vt dici possit etiam tota sapiētia.

Scin. Intellectus bonus omnibus facientibus eum.

Tan. Laudatio eius manet in seculum seculi.

Declarat, quod dixit, initium sapientiæ esse timorem Domini. Est enim, ac si dicat, intelligentia quidem, quæ pars est sapientiæ, bona est, sed facientibus eam, idest, ex timore sancto facientibus, quod scientia docet esse faciendū: alioqui intelligentia sine timore, inutilis, vel pernicioſa est: nam scienti bo-

num facere, & non facienti, peccatum est illi, Iacobi 4. Nomine intellectus, significatur hoc loco ipsa intelligētia, siue scientia, aut doctrina, vt voces hebraica, & græca clarius sonant: pronomen, cum, cum dicitur, facientibus eū, refertur ad intellectū, vt referūt Chrysostomus, & Augustinus. in hebræo habetur, Facientibus ea, nimirum ea, quæ intelliguntur esse facienda. Itaque sensus in idem recidit. Quod aut sequitur, Laudatio eius manet in seculum seculi, aliqui referūt ad Deum, vt sensus sit, Laudatio eius, cuius nomen est sanctū & terribile, sēper manebit: ita S. Chrysostomus. Sed videtur melius cōtinuare textum expositio S. Augustini, qui hunc versiculum refert ad illum, qui timet Dominum, & qui facit quod intelligit esse faciendum: illius enim præmium erit, vt inhabitet in domo Domini omnibus diebus vitæ suæ, & sit vnus ex illis, qui laudabunt Deum in seculum seculi. Quare laudatio eius, est laudatio, qua ipse homo timens Deum, perpetuò laudabit Dominum. Potest etiam satis commodè intelligi versiculus de laude, qua ipse timens Deum, & faciens quod intelligit esse faciendum, laudabitur à Deo, vt seruus bonus, & fidelis, & consequenter laudabitur ab Angelis, & alijs Sanctis, & eiusmodi laus erit æterna, quia vt dicitur in Psalmo 111. In memoria eterna erit iustus, ab auditione mala non timebit.

PSALMVS CXI.

Titulus, & Argumentum.

Alleluia, reuerſionis Aggai, & Zacharia.



Hic Psalmus rectè coniungitur superiori, quia laudat virum iustum, vt ille laudabat Deum. & est alphabeticus, continens viginti duos versiculos incipientes à literis alphabeti ordine positis. Eundem quoq; habet titulum, Alleluia, apud Hebræos, & Græcos: sed apud Latinos, teste Augustino, addūtur hæc verba, Alleluia, reuerſionis Aggai, & Zachariæ. Videtur

enim David in spiritu præuidisse, Aggaum, & Zachariam post expletū tempus captiuitatis, rediisse ad populum, cumq; admonuisse, quanta sit felicitas viri iusti, & timentis Deū; vt hoc exemplo exhortetur alios ad probitatem, vt non incidāt in similem captiuitatem.

Explicatio Psalmi 111.

Aleph. **B**eatissimus vir, qui timet Dominum:

Beth. In mādatis eius volet nimis.

Hæc est propositio, quam per totum Psalmum varijs argumentis probat, vt suadeat omnibus pietatem. Beatus, inquit, est quicumque timet Dominum. Sed quia non quicumque timor facit beatum, addit declarans, In mandatis eius volet nimis. vbi repetendum est, qui, vt hic sit sensus. Beatus est vir ille, qui timet Dominum, qui ex eo timore in mandatis eius libentissimè implendis versabitur: nam in mandatis velle nimis, nihil est aliud, nisi mandata valde diligere, & ad mandata multum esse affectum, siue in adimplendis mandatis magnam habere voluntatem. In summa ille dicitur felix, qui & interiorius timet Deum timore sancto, & exteriorius promptus est ad implenda mandata, ac per hoc iustus, & pius est.

Gimel. Potens in terra erit semen eius,

Dalet. Generatio rectorum benedicetur.

Hæc est prima felicitas hominis timentis Deum, quod multam prolem consequetur. Potens, inquit, in terra erit semen eius, id est, robusta erit eius posteritas ob multitudinem filiorum; & rationem reddit, cum addit, Generatio rectorum benedicetur, quia videlicet generatio iustorum ex diuina benedictione fecundissima erit. Benedictio enim in testamēto veteri, vt plurimum ad fecunditatem pertinet. Hæc prima felicitas non erat in viris iustis perpetua, sed frequens. Scimus enim Abrahamum longo tempore in matrimonio sine liberis vixisse, vt etiam filium eius Isaac,

Isaac, & postea non paucos alios. Sed si exponatur Psalmus de fructu bonorum operum ex semine gratiæ cælestis prodeunte, felicitas erit omnino perpetua: nemo enim est verè pius, & iustus, qui non assidue serat opera bona, ex quibus magnam omnino messem tempore suo collecturus sit.

He. Gloria, & diuitiæ i domo eius,
Van. Et iustitia eius manet in seculum seculi

Secunda felicitas est honorum, & opum abundantia, quæ tamen non inducant ad peccatum, neque iustitiam corrumpant. Sæpè enim accidit, ut honores, & diuitiæ superbiam gignant, vel carnalibus voluptatibus deseruiant, & tum non felicitati, sed calamitati potius deputandæ sunt. Ait igitur, Gloria, & diuitiæ in domo eius, idest, non solum multitudine filiorum, sed etiam honoribus, & diuitijs abundabit iustus, & tamè (quod est omnium felicissimum) non corrumpetur animus eius istis fortunæ bonis, sed iustitia, & probitas eius perseverabit usque in finem. Hæc etiam felicitas non est perpetua, si agatur de gloria, & diuitijs temporalibus: sed si de gloria interna, de bonæ conscientiæ testimonio, & de diuitijs fidei, ac de illo quæstu magno intelligatur, de quo Apostolus 1. Timot. 6. Quæstus magnus est pietas cum sufficientia, idest, pietas sine sollicitudine temporalium, ita ut animus sit contentus ijs, quæ habet; perpetua felicitas erit: nam, ut ille dixit, animus diues debet esse, non arca: tunc autè animus diues est quando alimentis, & tegumētis contentus, nihil optat amplius; sed sibi ipse sufficit. quod Apostolus dixit pietas cum sufficientia, & græcè significantius *εὐσυνείνη*, quod declarauit idem Apostolus Philippen. 4. cum ait, Didici in quibus sum sufficiens esse: scio & abundare, & penuriam pati.

Zain. Exortum est in tenebris lumen rectis,

Cbeth. Misericors, & miserator, & iustus.

Card. Belarm. in Psal.

Tertia felicitas timentium Deum, est lumen prudentiæ, & consilij diuinitus affulgens in tenebris dubitationum, quæ passim occurrunt in rebus gerendis, itè in discernendis fraudibus falsorum fratrum, denique lumen consolationis in omnibus calamitatibus, & ærumnis huius vitæ. Exortum est in tenebris lumen rectis, idest, affulsi rectis hominibus; quales sunt timētes Deum, lumen consilij, & consolationis in tenebris dubitationum, & tribulationum; quod lumen est ipse Deus misericors, & miserator, & iustus, qui misericordiā facit viris misericordibus, quia iustum est, ut misericordes misericordiam consequantur.

Teth. Iucundus homo, qui miseretur, & commodat,

Iod. Disponet sermones suos in iudicio,

Caph. Quia in æternum non commouebitur.

Quarta felicitas est lætitia spiritualis, quæ residet in corde timentium Deum. Qui enim Deum timent, facile indulgēt offensiones miserando fragilitates humanas, facile etiam commodant egentibus, & sic implent Dñicum præceptum, Dimittite, & dimittemini: date, & dabitur vobis. Hæc autè bona opera maximam lætitiā pariūt: sicut è contrario qui retinēt offensiones, vel negant proximo beneficium, semper amaro sunt animo, tum quia conscientia pungit, tum quia cogitant se odio haberi. Illud, miseretur, à nonnullis refertur ad eleemosynas, quæ dantur egentibus; sed quia de eleemosyna paulò post fit specialis mentio, cum dicitur, Dispersit dedit pauperibus; ideo malui muscum S. Augustino, referre ad indulgentiā offensionum, quod est genus eleemosynæ spiritualis. Quinta felicitas est prudentia in loquendo, propter quam euitantur incōmoda maxima, inimicitia, rixæ, detractiones, & similia. Qui enim timet Deum disponet sermones suos in iudicio, idest, dispēsabit verba sua cum maturitate iudicij, ut neminè lædat, & inde plurima bona lucrabitur.

Yy 3 Alij

Alij per sermones, intelligūt rationes, & negotia. Sed quamuis vox hebræa, & græca id patiantur, tamen vox latina nō patitur; & verisimile est, Prophe tam varia bona timentium Deum enumerare, non eadem sæpius repetere. De prudentia in negotijs supra iam dixerat: de prudentia in loquendo nihil hæcenus dixit. Reddit autē rationem, cur disponet sermones suos in iudicio, cūni addit, Quia in æternum non commouebitur, idest, quia vir est constans in propositis suis, & stabilis, & præiudet prudenter omnia, vt quicquid accidat, eum commouere non possit.

Lamed. In memoria æterna erit iustus:

Mem. Ab auditione mala non timebit.

Sexta felicitas timentis Deū est, quod viuet semper in hominum memoria; & viuet non per memoriam insignis alicuius flagitij, quomodo viuunt Iudas, & Cain, Herodes, & Pilatus, Annas, & Caiphas, sed viuet per memoriam gloriosam: nam laudes eius enarrabit omnis Ecclesia sanctorum: neque solum in memoria æterna erit apud mortales, sed etiam nomē eius scriptum erit in libro vitæ, quod nūquam delebitur, & eo modo verē, ac propriē in memoria æterna erit apud Angelos in cælo; & ab auditione mala nō timebit, idest, non timebit à detractionibus, & reprehensionibus hominum impiorum: neque etiam timebit à sententia illa formidolosa Iudicis æterni, videlicet, *Ite maledicti in ignem æternum, &c.*

Nun. Paratum cor eius sperare in Domino,

Samech. Confirmatū est cor eius, non commouebitur,

Hayn. Donec despiciat inimicos suos.

Septima felicitas timentis Deum est, firma, atque stabilis diuina protectio, qua fretus nihil vnquam malorū timebit. Paratum cor eius sperare in Domino, idest, in omni aduersitate, siue pe-

riculo imminenti cor eius paratum habet refugium ad Deum; quia semper est promptum, & paratum sperare in Domino; nunquam obliuiscitur adiutorium Dei, nunquam diffidit, nunquam hæsitat. Confirmatum est cor eius in hac fiducia, vt nullum ei sit periculum, ne ab illa fortē deficiat. Non commouebitur donec despiciat inimicos suos idest, nunquam timebit, dum periculū ab inimicis durabit. Multo autem minus timebit, cū eos vt prostratos, & deuictos despiciet. In hebræo pro, non commouebitur, habetur, Non timebit: sed idem est sensus: pro, despiciat, habetur, videat, ex quo sequitur, vt despiciere hoc loco non sit propriē contemnere, sed videre ex altiore loco, vt sit despiciere quasi deorsum inspicere, iuxta illud Virgilij, Despiciens mare veliuolum. Sed quia respicere inimicos ex alto, contingit illis, qui vident inimicos deiectos, & prostratos, ac per hoc illos contemnunt: rectē potest exponi, Donec despiciat, idest, donec contemnat, vt iam deuictos, & profligatos; quamuis vox illa immediatē non contemnere, sed inspicere significet, si cum voce hebraica conuenire debeat. Et quoniam durante hac vita mortali nunquam cessabunt pericula ab hostibus pietatis, nec videbimus eos omnino prostratos, nisi cū in cælesti sede positi, longissimē abiectos despiciemus; ideo illud, donec, tandiu durabit quandiu præsens vita durabit.

Thc. Disperfit, dedit pauperibus,
Tsade. Iustitia eius manet in seculum seculi,

Coph. Cornu eius exaltabitur in gloria.

Octaua felicitas est, gratia bene vten di diuitijs: nā ex dono Dei habet amici Dei, vt intelligant, quanta sapientia sit per eleemosynas transferre thesauros suos in cælum, vbi nec tinea demolitur, nec fures effodiunt, nec furantur. Disperfit, inquit, dedit pauperibus, id est, iste homo timens Deum, opes suas non abscondit, neque augere studuit, sed

sed sparsit in pauperes, idest, abundanter effudit, sed ea prudentia, vt dederit potius multis parum, quàm paucis multum, vt multis prouideret necessaria, nullis daret superflua. Simile est, quod habetur Isai. 58. Frange esurienti panem tuum. & 1. Cor. 13. Si distribuero in cibos pauperum omnes facultates meas. Nec tamen negamus, quin aliquando melius sit multum vni dare, quàm multis parum; vt cum virgo pauper tradenda est viro, vel Ecclesia exedificanda, vel captiuus redimendus. Vide S. Thom. in 2.2. quæst. 32. art. 10. & S. Gregoriū de cura pastoralis par. 3. admonitio. 21. Ex hac liberalitate duo bona lucratus est, vnde verè beatus dici potest: primū, si pecunias diminuit, iustitiā auxit, & iustitia eius, idest, bonum opus eius manet in seculum. seculi, conseruandum apud Deum, vt suo tempore mercedem plenam accipiat: nam Qui miseretur pauperis, foeneratur Deo, inquit Sapiens Prouer. 19. Deinde cornu eius exaltabitur in gloria, idest, non solum mercedem habebit in vita futura, sed etiam in hoc seculo potetia, & gloria augebitur. cornu in Scripturis potentiam & robur significat. Dicitur autē exaltari cornu alicuius, quando ille sit potentior, & fortior. Exaltari autem cornu in gloria, est, hominem fieri non solum potentem, sed etiam gloriosum, quales sunt viri celebres & honorati, quibus alij deferunt, & cedunt. Significat igitur hic versiculus per eleemosynas non fieri homines tenuiores, & despectos, sed augeri diuitijs, potentia, & gloria: cuius rei multa sunt exempla in diuinis literis, præsertim in libro Iob, & in libro Tobie: & non pauca legi possunt in vitis Sanctorum, ac præcipuè in vita Sancti Ioannis Eleemosynarij, & in Prato spirituali Sophronij.

Res. Peccator videbit & irasceat,
Scin. Dentibus suis fremet, & tabescet,
Tau. Desiderium peccatorum peribit.

Postrema felicitas est, quod timens Deum omnē inuidiam superabit. Peccator videbit, idest, considerabit bona opera timentis Deum, & eius felicitatem, & inuidia torquebitur, & irascetur forti eius. Et instar rabidi canis fremet aduersus illum, & præ dolore tabescet: sed interim desiderium impij, quod cupit perditionem iusti, non adimplebitur, sed vna cū ipso impio breui peribit. Ergo beatus, & felix est, qui timet Dñm; miser & infelix, qui non timet.

P S A L M V S CXII.

Titulus, & Argumentum.

Alleluia.

Hic Psalmus brevis & facilis hortatur cultores Dei ad ipsum Deum laudandum, ob id potissimum, quod cum sit altissimus, tamē non dedignatur ad nos oculos inclinare, & multis nos beneficijs afficere.

Explicatio Psalmi 112.

Laudate pueri Dominum, laudate nomen Domini. I.

Nomine puerorum intelliguntur serui Dei, qui eum purè colunt: quamuis enim vox græca παῖδες, & latina, pueri, sint communes ad seruos, & ad paruulos significandos: tamen vox hebraica, aude, nihil significat, nisi seruū, & clarius etiam id apparet ex eo quod in hebræo vox, Domini, est in casu gignendi, Laudate serui Domini, laudate nomen Domini. Magna tamen est affinitas seruis cum paruulis, vt non immerito serui dicantur pueri, & pueri serui; quoniam serui finire debent se regi à Dominis, quomodo paruuli reguntur à maioribus: vnde etiam B. Paulus ait ad Gal. 4. Quanto tempore hæres paruulus est, nihil differt à seruo. Admone mur igitur voce puerorum, seruos Dei simplices, & pueros esse debere, & ad nutum Domini sine tergiversatione

Yy 4 pro-

procedere. Laudate pueri Dominum, laudate nomē Domini, idest, o vos omnes, qui serui estis Dei, in hoc præcipue illi seruite, vt pura mente cogitetis magnitudinem Domini vestri, & toto cordis affectu laudetis nomen eius, potentiam videlicet, & gloriam eius infinitā. Similis exhortatio habetur in Psalmo 133. Ecce nunc benedicite Dominum omnes serui Domini. & in Psalmo 134. Laudate nomen Domini, laudate serui Dominum.

II. Sit nomen Domini benedictū, ex hoc nunc, & vsque in seculum.

Declarat modum, quo serui Dei laudare debent nomen Domini, ac dicit, affectu saltem, & desiderio laudandum esse, quandoquidem re ipsa nos humi repentes laudare, vt oportet nescimus. Dicite ergo, ait, intimo cordis affectu, Sit nomen Dni benedictum, & nunc à presentibus, & vsq; in æternum à futuris, vt ab eius laudibus nunquam cesserur, vel potius, ex hoc nunc incipite laudare, & vsque in seculum laudate, idest, semper laudate, siue prospera, siue aduersa contingant, siue in hac vita, siue in futura, semper laus eius sit in ore vestro; & cum sancto Iob semper dicite, Sit nomē Domini benedictum.

III. A solis ortu vsque ad occasum, laudabile nomen Domini.

Declarat hoc versu, & sequentibus materiam laudis Dei, ac dicit, vbique inueniri materiam laudis Dei, cum omnia sint plena operibus eius magnis, & mirabilibus, quæ diligenter considerata laudabilem reddunt artificem. A solis ortu vsque ad occasum, idest, per totam mūdi amplitudinem à principio vsque ad finem laudabile est nomen Domini propter opera eius, quibus ab omni parte plenus est Mundus.

IIII. Excelsus super omnes gentes Dominus, & super cælos gloria eius.

Nec solum per amplitudinem Mundi, sed etiam per altitudinem vbique inuenitur materia laudis Dei: nam

etiam si multi sint in terra magni Principes, & potentissimi Reges: tamen super omnes longè eminet Deus: neque solum super omnes gentes terræ, sed etiam super omnes Angelos cæli excelsus est Deus, & gloria eius cælos omnes, & qui habitant in eo, transcendit. Sanctus Ioannes Chrysostomus in his duobus versiculis vult contineri prædictionem Ecclesiæ Christianæ; per quam factum est, vt nomen Domini, quod in sola ferè Iudæa notum erat, nunc à Solis ortu vsque ad occasum laudetur, & omnes gentes illi subiciantur, & eo modo sit excelsus Dominus super omnes gentes.

Quis sicut Dominus Deus noster, qui in altis habitat, & humilia respicit in cælo, & in terra. V.

Laudat nunc Deum ab admirabili benignitate, quæ coniuncta cum tanta sublimitate mirabilior apparet. Quis, inquit, est sicut Deus noster, qui in altis habitat, videlicet in summo cælo, & tamen humilia respicit, homines videlicet, qui iacent in terra. Nam sic explicandus videtur ad literā hic versiculus iuxta distinctionē hebraicam, & modum loquēdi Scripturæ; vt illud, in cælo, referatur ad illa verba, in altis habitat: & illud, in terra, referatur ad illa, humilia respicit: præsertim cum in hebræo sint duo participia contraria, Quis sicut Dominus Deus noster exaltans se ad sedendum, & humilians se ad respiciendum, in cælo, & in terra, idest, ad sedendum in cælo, & ad respiciendum in terra. Similis est sententia illa in primo capite Canticorum, Nigra sum, sed formosa filia Sion, sicut tabernacula Cedar, sicut pelles Salomonis: vbi, sicut tabernacula Cedar, coniungitur cum, Nigra sum: & sicut pelles Salomonis, coniungitur cum, sed formosa. Significatur autem hac phrasi, Deum per excellentiam naturæ omnia sub se habere; & tamē per clementiam rebus omnibus quamuis humillimis adesse, ac præcipue hominibus mitibus, & corde humilibus se inclinare.

Quod

Quod si non placeat hæc distinctio, potest etiam rectè exponi, quod Deus quamvis naturæ sit excellentissimæ & sublimissimæ, tamen à superbis, & tumidis oculos auertere, ad humiles, & mites libenter aspicere soleat; idque tam in cælo, quam in terra: nam & in cælo superbos Angelos detestatus, humiles respexit, & ad gloriæ suæ participationem euexit: & in terra superbis Pharaonibus, Saulibus, alijsque similibus contemptis, ad Mosem, Dauidem, aliosque mites, & humiles respexit. Sed altiore, & prophetico sensu significatur his verbis, Deum in cælo sedentem non neglexisse genus humanum in terra humiliter abiectum.

VI. Suscitans à terra inopem, & de stercore erigens pauperem.

VII. Vt collocet eum cum Principibus, cum Principibus populi sui.

Declarat, cur Deus respiciat humiles: ac dicit, id eum facere, ut eos exaltet. Quamvis autem hæc applicari possint singulis hominibus, quos ex infimo gradu Deus euexit ad summum, quales fuerunt Ioseph Patriarcha, Moyses, Dauid, & similes: tamen aptissime conueniunt hi duo versiculi humano generi, idest, toti gregi pusillo electorum, quibus Saluator ait, Luc. 12. Nolite timere pusillus grex, quia complacuit Patri vestro dare vobis Regnum: nam genus humanum iacebat in terra, & in stercore peccati originalis, & consequentium miseriarum: & tamen Deus sedens in cælo respexit in terram, & inde suscitauit inopem, hominem videlicet spoliatum à latronibus, & relictum semiuiuum, & iacentem in stercore miseriarum, ut collocaret eum cum Principibus, non quibuscunque, sed cum Principibus populi sui, possessoribus cælestis Hierusalem, & participibus Regni cælorum. Nam exaltatio à paupertate temporali ad opes Regni temporalis, etiam si nobis magna esse videatur: verè tamen exigua, ac penè nulla exaltatio est, cum opes

Regni caducæ sint, & ad dispensandum traditæ, & cum obligatione reddendæ rationis in die iudicii, & coniunctæ cum magna afflictione spiritus, & periculo æternæ salutis amittendæ. At exaltatio à statu peccati, & mortis, ad statum gloriæ, & beatæ immortalitatis, ad æqualitatem Angelorum, ad consortium boni illius, quod ipsum Deum beatum facit; hæc vera, & verè magna, & appetenda maxime exaltatio est.

Qui habitare facit sterilem in domo, matrem filiorum lætantem.

Quemadmodum infelicitas virorum est status humilis, & despectus: ita infelicitas mulierum est sterilitas. Sed quomodo Deus respicit viros humiles, ut de statu infimo erigat ad Regnum; ita respicit humiles feminas, ut de sterilitate perducatur ad fecunditatem. Potest autem hoc totum referri ad singulas feminas, ut Saram, Rebeccam, Rachelem, Annam, & similes. Sed altiore sensu pertinet ad Ecclesiam ex gentibus congregatam, quæ longo tempore mansit sterilis, sed in senectute peperit plurimos, iuxta illud Apostoli ad Gal. 4. ex cap. 34. Isaie, Lætare sterilis, quæ non paris, erumpe, & clama quæ non parturis, quia multi filij desertæ magis, quam eius, quæ habet virum. Quod autem ad verba attinet, cum dicitur, Qui habitare facit sterilem in domo; per domum intelligitur familia, siue abundantia filiorum, ut sensus sit, Qui facit, ut sterilis, quæ manebat solitaria, iam habitet inter multas proles, in magna familia. Id quod explicatur per verba sequentia, Matrem filiorum lætantem; id enim est habitare in domo, esse matrem filiorum; ac per hoc esse lætantem, ob filiorum multitudinem, quæ erat mœsta ob sterilitatem, & solitudinem.

PSALMVS CXIII.

Titulus, & Argumentum
Psalmi.

Alleluia.

DEcantat in hoc Psalmo Dauid mirabilia opera Dei, dum educeret filios Israel de Aegypto in terram promissionis: idque ad eum finem, vt hortetur populum ad permanendum in confessione vnius veri Dei, & sperandum continuo in eius protectione.

Explicatio Psalmi 113.

- I. **I**n exitu Israel de Aegypto: domus Iacob de populo barbaro.
- II. Facta est Iudæa sanctificatio eius, Israel potestas eius.

Narrat initio Psalmi quemadmodum populus Hebræorum in egressu de Aegypto cœperit habere formam populi peculiariter Deo subiecti, & à Deo singulari prouidentia gubernati, ac si Deus esset proprius eorum Rex. Nam antequam ingrederetur Aegyptum, erant vna familia, non vnus populus: dum autem manserunt in Aegypto, multiplicati sunt valde, sed admixti erant Aegyptijs, & Regi Pharaoni seruebant: sed egressi de Aegypto formam proprię Reipub. habere cœperunt, Moise, tanquam Dei Vicario & interprete, summum Magistratum apud eos gerente. Hoc igitur est quod dicit, cum ait, In exitu Israel de Aegypto, domus Iacob de populo barbaro. vbi cum dicitur, Domus Iacob, reperendum est, in exitu, hoc modo. In exitu Israel de Aegypto, in exitu, inquam, domus Iacob de populo barbaro: quæ pars secundi versiculi est explicatio primi, declarat enim per nomen, Israel, se non intellexisse

hominem illum, qui proprio nomine dicebatur, Israel, sed totam familiam Iacob, id est, totam illam gentem, quæ à Iacobo Patriarcha, qui etiam Israel vocabatur, per carnalem generationem originem ducebat. Per populum barbarum intelligitur Aegyptus, significat autem vox hebræa, loc7, loquentem lingua ignota, & barbarus dicitur, cuius lingua nõ intelligitur, iuxta illud Apostoli 1. Cor. 14. Si nesciero virtutem vocis, ero cui loquor barbarus, & qui loquitur mihi barbarus. Dicitur igitur populus barbarus, populus Aegypti, quia alia lingua utebatur ab ea, qua utebantur Hebræi. Facta est Iudæa sanctificatio eius, hoc est, tunc primum, cum egressi sunt filij Israel de Aegypto, Deus sanctificauit, siue dedit sibi in populum peculiarem, populum Iudaicum. Israel potestas eius: idem repetit alijs verbis, id est, tunc assumpsit peculiarem potestatem, ac dominium super filios Israel. Quod attinet ad verba, per Iudæam, intelligi debet hoc loco non terra, quæ dicitur Iudæa, sed gens Iudaica: nam in hebræo est, Iudas, sicut paulo post, Israel. Solet autem Scriptura populum Hebræum, nunc vocare Iudam de nomine principalis filij Israel, nunc Israel, de nomine patris: vnde etiam vocantur Iudæi, vel Israelitæ. Per illud autem, sanctificatio, & potestas, intelligitur quasi materia sanctificationis, & potestatis, vt sensus sit, Facta est gens Iudaica, siue Israelitica, gens sanctificata Deo, & peculiariter subiecta potestati eius. Pronomen relatiuum, eius, refertur ad Deum, siue Dominum, qui nominatus est in titulo, Alleluia, laudate Dominum: quasi dicat, Laudate Dominum, quia cum egrederentur filij Israel de Aegypto, tunc factus est populus Israel, populus sanctificatus ei, & subiectus peculiariter potestati eius.

Mare vidit, & fugit, Iordanis III. conuersus est retrorsum.

Montes exultauerunt, vt arietes, & colles sicut agni ouium.

Nar-

Narrat mirabilia, quæ acciderunt in egressu filiorum Israel de Aegypto, & commoratione in deserto, & ingressu in terram promissionis, vt hinc ostendat, Deum Hebræorum esse verum Deum omnipotentem, quem iure ipsi colere, & timere debeant: ac primum narrat miraculum, quo mare, iubente Deo, diuisum est, vt populus transiret: vt habetur Exod. 14. sed narrat poetica venustate tribuens ipsi mari sensum, quasi videns maiestatem Domini ex timore & reuerentia se subduxerit. Coniungit deinde aliud miraculum circa Iordanem, quoniam ad idem elementum pertinet, quamuis multo posterius, id est, post annos quadraginta contigerit. Iordanis enim fluuius diuisus quoque est tempore Iosue, vt populus per siccum aluenm transiret, vt habetur Iosue 4. Deinde commemorat miracula, quæ acciderunt in terra, quando acceperunt legem, descendente Deo in montem Sinai: tunc enim terra mota est, & tremore concussa à maiestate Domini quasi trepidare, & saltitare videbatur. Quod enim legimus Exodi 19. Erat totus mons terribilis; significat montem tremore suo terrorem alijs incussisse, vt ex textu hebraico, & græco clarius colligitur. Postremò addit aliud miraculum de aquis in magna copia ex petra eductis, Qui conuertit petram in stagna aquarum, & rupem in fontes aquarum. sed veniamus ad verba. Mare vidit, & fugit, idest, ita recessit de loco suo pars illa maris rubri, ac si à conspectu Domini territa fugisset. Iordanis conuersus est retrorsum. In libro Iosue legitur, quòd steterit flumen, & in altum instar montis excreuerit; sed ex interpretatione Dauidis intelligimus, non solum in altum creuisse, sed etiam ex parte refluxisse. & refluxus iste confirmari potest ex eo, quòd longissimo spatio temporis cessauerit fluere, donec videlicet totus populus commode transiret, qui multa centena milia hominum complectebatur. Itaque si solum in altum creuisset, & non etià simul ex parte refluxisset, nò solum ad montis, sed in altitudinem multò ma-

iolem excreuisset. Simul igitur refluabat, vt David canit, & simul erigebatur, & stabat, ne fluere in partem illà, per quam Israelitæ transibant. Montes exultauerunt, vt arietes, & colles sicut agni ouium, idest, montes Sinai, partes videlicet maiores illius montis, & colles, partes minores eiusdem montis còtremiscere, & subfilire visæ sunt instar arietum, vel agnorum repentino terrore saltantium, & fugientium: quamuis enim vox, exultare, significare soleat gestire præ lætitiâ; tamen hoc loco videtur omnino referendum ad tremorem; tum quia eadem est causa mari, vt fugiat, & monti vt saliat; fugere autem timoris est, non lætitiæ: tum quia paulò infra dicitur, A facie Domini mota est terra: quæ verba terrorem indicât, & hunc locum exponunt.

Quid est tibi mare, quòd fugisti? & tu Iordanis, quia conuersus es retrorsum? V.

Montes exultastis sicut arietes. & colles sicut agni ouium. VI.

A facie Domini mota est terra, à facie Dei Iacob. VII.

Qui conuertit petram in stagna aquarum, & rupem in fontes aquarum. VIII.

More poetico interrogat mare, quare fugerit, & Iordanem, quare conuersus sit retrorsum, & montes, & colles, quare tremuerint: & responderet, id fecisse præsentiam virtutis Dei, qui non solum hoc fecit, vt mare fugeret, & terra tremere, sed etiam, quòd est mirabilius, vnum elementum in alterum transmutauit: conuertit enim terream rupem stantem, atque durissimam in aquas mollissimas, & velocissimè discurrentes. Quid est, inquit, tibi mare quòd fugisti? & tu Iordanis, quid habes, quòd conuersus es retrorsum? & vos montes quare exultastis vt arietes, & vos colles, quasi agni ouium? A facie Domini mota est terra. Hac nimirum est causa, quia Dominus apparuit, & vim suam, & potentiam manifesta-

uit,

uit, & ideò terra conspectum eius non sustinens, tota contremuit. Qui Dominus conuertit petram in stagna aquarum, quādo Mose percutiente petram Num. 20. egressæ sunt aquæ largissimæ; quod factum est, quia petra, iubente Domino, conuersa est in fontem aquarū, quod repetitur, & declaratur, cum additur, Et rupem in fontes aquarum. Significatur enim his verbis, non paruam aliquam, & mollem petram, sed rupem saxeam, duramque instar filicis conuersam fuisse in fontem aquarum.

IX. Non nobis Domine, non nobis, sed nomini tuo da gloriam.

Hic incipit secundum Hebræos alius Psalmus: sed nos sequimur distinctionem antiquam Septuaginta Seniorū; quam etiam sequitur Sāctus Hieronymus in sua versione ex hebræo: quod est argumentum, non in omnibus hebraicis codicibus diuidi hunc Psalmū in duos. Igitur explicatis mirabilibus Dei, quæ facta sunt in exitu Israel de Aegypto; precatur Propheta Deum nomine totius populi, ut non respiciat demerita populi, sed gloriam suam, & pergat protegere cultores suos. Non nobis, inquit, non nobis, idest, non meritis nostris, quæ nulla sunt, gloriam, siue laudem petimus, sed nomini tuo da gloriam, idest, propter gloriam nominis tui protege nos, non propter merita nostra.

X. Super misericordia tua, & veritate tua: ne quando dicant gentes, ubi est Deus eorum.

Indicat breuissimè tres rationes, cur Deus debeat nominis sui gloriam querere in conseruando populo suo. prima est, quia ipse misericors est. secunda, quia verax est, & fidelis in promissione seruanda. tertia, ne detur occasio gentibus blasphemandi, si cultores Dei destitutos videant. Ait igitur, super misericordia tua, & veritate tua, nimirum funda gloriam tuam, siue da gloriam nomini tuo; inde enim gloria tua demonstrabitur, si ostendes misericordiam erga populum tuum, & rur-

sus si implebis veritatem promissorum tuorum, quæ fecisti Patribus nostris. Ne fortè dicant gentes, ubi est Deus eorum? idest, ne detur occasio gentibus incredulis detrahendi de potetia, vel etiam de existentia tua.

Deus autem noster in cælo, XI. omnia quæcunque voluit, fecit.

Simulacra gentium argentum, XII. & aurum, opera manuum hominum.

Os habent, & non loquentur, XIII. oculos habent & non videbunt.

Aures habent, & non audient, XIV. nares habent, & non odorabunt.

Manus habent, & non palpabunt, XV. pedes habent, & non ambulant: non clamabunt in guttore suo.

Propter id, quod dixerat, Ne fortè dicant gentes ubi est Deus eorum; adiungit pulcherrimam antithesim Dei veri, & falsorum Deorum. Quasi dicat, non est dāda occasio gentibus blasphemandi: sed tamè si fortè dixerint, ubi est Deus eorum? nos respondebimus, Deum nostrum esse in cælo, idq; testari mirabilia eius, quia fecit quicquid voluit. sed contra, Dij eorum iacent in terra, & vsque adeò nihil possunt facere, ut ne possint quidem exercere actiones membrorum, quæ habere videntur: nam cum habeant figuram humanam, & videantur habere membra omnia, & sensus omnes; tamen nec vident, nec audiunt, nec olfaciunt, nec palpant, nec ambulant, nec loquuntur, ac ne vocem quidem vllam ex gutture emittunt, si non ut homines, saltem, ut iumenta.

Similes illis fiant, qui faciunt XVI. ea, & omnes qui cōfidunt in eis.

Hæc prædictio est per modum imprecationis pronunciata, ut moris est Prophetarum. Verè enim qui faciunt idola, & qui confidunt in eis, similes illis fiēt in vita futura post resurrectionem:

nem: nam etiam si habebunt sensus, & membra, tamen sic habebunt, quasi non haberent, imò etiam cupient non habere; nihil enim videbunt, nihil audient, nihil olfacient, nihil palpabunt, nisi quod nollent: ligatis manibus, & pedibus, proiecti in tenebras exteriores se commouere non poterunt. In hac etiam vita similes sunt idolis, quia videntur potius videre, & audire, quàm re vera videant, & audiant, cùm non videant neque audiant, quæ ad salutem pertinent, & quæ vera bona sunt, ut magis somnare, quam videre, vel audire dicendi sint. iuxta illud Marci 8. Oculos habentes non videtis, & aures habentes non auditis. Quod si etiam placeat hæc exponere per modum imprecationis, non poterunt Pagani conqueri, quia non fit illis iniuria, si eos fieri cupiamus similes Dijs ipsorum. Monet autem S. Augustinus hæc quæ supra dicta sunt, pertinere ad eos Paganos, qui credunt ipsa idola esse Deos. quia verò nonnulli dicebant, non ipsa idola, sed numen in illis habitans esse colendum: ideo in alio Psalmo videlicet 95. dicit, Dij gentium dæmonia, Dominus autem cælos fecit. & apud Apostolum 1. Cor. 10. Quæ immolant gentes, dæmonibus immolant, & non Deo. Ex his autem colligimus, Imagines Sanctorum non esse Idola, neque earum venerationem esse idololatriam: quoniam neque ipsas imagines Deos esse credimus, neque Sanctos Viros, quos repræsentant, pro dijs habemus.

- XVII. Domus Israel speravit in Domino, adiutor eorum & protector eorum est.
- XVIII. Domus Aaron speravit in Domino, adiutor eorum & protector eorum est.
- XIX. Qui timent Dominum speraverunt in Domino, adiutor eorum & protector eorum est.

Quia dixerat, similes illis fiant, qui confidunt in eis, adiungit per antithe-

sim, filios Israel confidisse in Domino, & ideo habuisse Deum protectorem. nominat autem primo domum Israel, idest, totam gētem hebraicam: deinde domum Aaronis, idest, tribum sacerdotalem, quia sacerdos cum Levitis cæteris peculiaris portio Domini erant, & specialiter in Deo confidere debebant. addit postremo omnes timentes Deum, quoniam non deerant aliqui extra filios Israel, qui Deum colerent, & timerent, quamvis ij pauci essent. in his numerari solent Iob & amici eius. & postea Naman Syrus, & alij.

Dominus memor fuit nostri, XX.
& benedixit nobis.

Benedixit domui Israel, benedixit domui Aaron. XXI.

Benedixit omnibus qui timēt Dominū, pusillis cum maioribus. XXII.

Confirmat quod dixerat, Deum adiutorem, & protectorem esse sperantium in se. Ac se ipse constituit in numero confidentium in Deo, quippe qui præter cæteros auxilium Dei, & protectionem expertus fuerat. Deinde eodem ordine confirmat Deum benedixisse domui Israel, domui Aaron, & omnibus timentibus Deum, siue magnis, siue parvis. quod intelligi potest de omni magnitudine, & parvitate, siue ætatis, siue potestatis, siue sapientiæ, siue diuitiarum. Memoria Dei significat hoc loco singularem providentiam erga cultores suos. Memor, inquit, fuit nostri, idest, singulari providentia demonstravit, se memorem esse nostri, & benedixit nobis, idest, benefecit nobis adinuando, & protegendo. Explicat autem quid sit illud, nobis, cùm addit domui Israel, domui Aaron, & omnibus timentibus eum.

Adijciat Dominus super vos, super vos, & super filios vestros. XXIII.

Benedicti vos à Domino, qui fecit cælum, & terram. XXIV.

Ex abundantia cordis os loquitur. quia pectus sancti Prophetæ ardebat desiderio gloriæ Dei, & salutis proximo-

mo-

morum; ideo multiplicat verba, nunc prædicando, nunc exhortando, nunc bene precando, ut hac ratione accendat homines ad Deum timendum timore sancto, & ad spem omnem in eo collocandam. Igitur conuersus ad timentes Deum, quibus dixit, Deum benedixisse, ait, Adiciat Dominus super vos, nimirum benedictionem suam, id est, omnium bonorum copiam: nec solum, inquit, super vos, sed etiam super filios vestros. Et hoc modo fitis vos benedicti, plena, atque perfecta benedictione, à Domino, qui fecit cælum, & terram, id est, ab eo, in cuius manu est ros cæli, & pinguedo terræ. Solebant enim sancti testamenti veteris precari suis à Domino rorem cæli, & pinguedinem terræ, quia omnes fructus terræ nascuntur ex fecunditate terræ, & ex pluuia cæli. Sed altiore sensu Deus benedicit de rore cæli, & de pinguedine terræ, quos bonis cælestibus, & terrenis cumulat, quod fecit erga Abrahamum, Isaacum, Iosephum, Dauidem, & similes.

XXV. Cælum cæli Domino, terram autem dedit filiis hominum.

XXVI. Non mortui laudabunt te Domine, neque omnes qui descendunt in Infernum.

XXVII. Sed nos qui viuimus benedicimus Domino, ex hoc nunc, & usque in seculum.

Hi tres versiculi duplicem sensum habent: vnum accommodatum Hebræis secundum vetus testamentum: alterum accommodatum Christianis secundum testamentum nouum. Igitur priore sensu posteaquam dixerat, Benedixi vos à Domino, qui fecit cælum, & terram; docet æquum esse, ut ij, qui benedicti sunt à Domino, benedicant ipsi quoque Dominum, dum viuunt super terram, quam à Deo incolendam acceperunt, relinquentes Angelis officium benedicendi in cælo, ubi est domicilium Dei, & Ministrorum eius, qui illi coram assistunt. Cælum, inquit, cæli Domino, id est, summum cælum, quod est super cælum æereum, Domino pro-

prie dicatum est, & familiaribus ministris eius Angelis sanctis: terram autem cum elementis, quæ illi coniuncta sunt, dedit filiis hominum habitandam; ac pro tam insigni parte mundi debet filij hominum Deo assidue gratias agere, dum viuunt, & bonis terræ fruuntur. Nam non mortui laudabunt te Domine: mortui enim, cum sensibus corporis careant, neque fruuntur amplius terrenis bonis, imò nec viuunt secundum corpus; non laudant Dominum ore corporali, neque pro rebus terrenis gratias agunt. Neque omnes, qui descendunt in infernum, id est, non solum mortui, qui iacent in sepulchris, non laudant Dominum, sed neque illi, qui descendunt in infernum, id est, spiritus mortuorum, qui descendunt in varias inferni regiones Dominum benedicent pro terrenis bonis, quæ ad illos iam non pertinent: sed nos, qui viuimus in terris, & fruimur terrenis bonis, benedicimus Domino, ex hoc nunc, & usque in seculum per generationes sibi inuicem succedentes. At sensu Christianis accommodato secundum promissiones testamenti noui, dicendum est, per cælum cæli, intelligi supremam partem cæli, ubi est domus filiorum Dei, de qua dicit Apostolus 2. Corinth. 5. Scimus, quoniam si terrestris domus nostra huius habitationis dissoluatur, ædificationem ex Deo habemus domum non manufactam æternam in cælis. vel cum Sancto Augustino per, cælum cæli, intelligere possumus mentes iustorum Angelorum, & hominum, in quibus Deus habitat per cognitionem, & amorem. hanc domum sibi Deus elegit; terram autem, id est, mundum hunc visibilem dedit filiis hominum, prout distinguuntur à filiis Dei: & ideo subiungitur. Non mortui laudabunt te Domine, id est, qui mortui sunt morte peccati, etiam si viuant vita naturæ, non laudabunt te Domine, neque omnes, qui descendunt in infernum, qui in morte peccati confirmati sunt, & ad penas æternas descenderunt: sed nos qui viuimus vita gratiæ, qui per fidem,

&

& charitatem tibi inhæremus, & iam cœlestis patriæ ciues sumus, quamvis interim ad tempus habitemus, in terra. nos, inquam, benedicimus tibi, & benedicemus vsque in æternum. Vide Chrysostomum hanc expositionem eleganter persequentem.

PSALMVS CXIV.

Titulus, & Argumentum.

Alleluia.

PSALMVM hunc exponit aliqui cum hebræis de temporalis aliqua pressura, vel morbo à quo liberari cupiebat Propheta. Sed nos cum Sanctis Patribus Basilio, Chrysostomo, Hieronymo, & Augustino, existimamus intelligendum Psalmum esse de homine spirituali sitiente salutem æternam, & gemente propter tentationes, & pericula.

Explicatio Psalmi 114.

I. **D**ilexi, quoniam exaudiet Dominus vocem orationis meæ.

Anima ardens desiderio Domini absolute dicit, Dilexi, & non explicat, quem: quoniam existimat, omnes alios similiter amare rem vndeunque amabilem, ac proinde scire quem dicere velit. Sic Beata Maria Magdalena Ioã. 20. interroganti, Quem quæris; respondit, Domine si tu sustulisti eum, dicito mihi. & non declarat quem quærat, & quem sublatum doleat, quia putabat omnes amare quæ ipsa amabat, & sollicitos de illo esse, de quo ipsa sollicita erat. Et verè cum omnia bonum appetant, vt dicitur initio Ethicorum, & in solo Deo sit omnis ratio boni, & absit ab eo omnis ratio mali, quod significauit Beatus Ioannes cum ait in prima Epist. cap. 1. Deus lux est, & in eo tenebræ non sunt vllæ: deberent homines

solum Deum absolute amare; & cum audiunt, Dilexi, intelligere deberent dilectionem summi boni significari. Sed tamen David ex ratione, quæ reddit, satis indicat se de dilectione Dei esse loquutum. ait enim. Dilexi, quoniam exaudiet Dominus vocem orationis meæ, idest, dilexi Dominum, quoniam benignus & misericors est, & ex naturali sua benignitate exaudiet vocem orationis meæ. Magna causa diligendi, quod altissimus Dominus, & qui rerum nostrarum non indiget, tam facilis sit ad audiendas preces vilissimorum seruorum, vt securè promittere nobis possimus audientiam. quod in Psal. 85. clarius exprimitur cum dicitur, Quoniam tu Domine suavis, & mitis, & multæ misericordiæ omnibus inuocantibus te. Sensus igitur est, Dilexi Dominum, quoniam certus sum, quod exaudiet vocem orationis meæ.

Quia inclinavit aurem suam mihi, & in diebus meis inuocabo. II.

Declarat, vnde didicerit, Deum exauditurum preces suas dicens; inde scio, quia ipse præuenit me, ipse inuitauit, dum inclinavit ad me aures suas. quorsum enim inclinaret ad os meum aurem suam, nisi me audire paratus esset? Porro Deus inclinat aures ad nos, quando inspirat nobis orationem. neque enim nos oraremus, nisi Deus per gratiam præuenientem inspiraret desiderium orandi. Igitur David assuetus internis vocationibus, ex desiderio orandi sibi cœlitus inspirato intellexit, aurem Domini ad se inclinatam; & ideo etiam adiungit, & in diebus meis inuocabo, idest, dum affulgent mihi dies gratiæ Dei, & in hac luce video aurem Domini ad me inclinatam, non omittam occasionem, sed inuocabo Dominum. Vocat enim dies suos, dies illos, quibus luce præuenientis gratiæ fruebatur. absente enim luce gratiæ nox succedit diei, de qua dicitur; Venit nox, in qua nemo potest operari. Ioã. 9. S. Ioannes Chrysostomus per illud, in diebus meis, intelligit omnibus diebus vitæ meæ. S. Augustinus per

dies

dies meos, intelligit dies huius mortalitatis, qui nostri dies dicuntur, quia nos ipsi peccando nobis illos fecimus.

III. Circundederunt me dolores mortis, & pericula inferni inuenerunt me.

Explicat nunc materiam suæ orationis, quæ sunt tentationes, & pericula salutis æternæ, quas solas tribulationes magnipendit anima verè Deum diligens. In Psal. 17. similia verba exposuimus de periculis mortis corporalis; quoniã titulus Psalmi ad id cogebat. sed hic Psalmus, qui nihil habet in titulo, nisi Alleluia, ad sublimiorem intelligentiam nos inuitat. Ait igitur, Circundederunt me dolores mortis, idest, vndique tentationes mortiferæ me circunstant, vt compellar clamare, Quis me liberabit de corpore mortis huius? In hebræo est vox ambigua, quæ & funes, siue laqueos, & dolores significare potest. & verè tentationes mortiferæ funes sunt, siue laquei mortis, & etiam dolores mortis, quia ex illis viri p̃rdolorem concipiunt, qualis est in illis, qui mortem sibi vident imminere. declarat paulò apertius cùm addit, pericula inferni inuenerunt me: nam ex hoc periculo omnium periculorũ maximo concipiunt dolores mortis, qui in illo adhuc se versari cogitant. Vox hebraica propriè angustias inferni significat. qua voce designatur locus angustus, per quem qui gradiuntur, in periculo præcipitij versantur, nisi singulos gressus vigilantissimè obseruent. & talis est via salutis, arcta, atque angusta, vnde nullo negotio in præcipitium inferni ruunt, qui non cautè ambulant. Vnde monet Apostolus, Videte quo modo cautè ambuletis, ad Ephes. 5.

IV. Tribulationem & dolorem inueni, & nomē Domini inuocaui.

Multi sunt, qui circumdati sunt laqueis mortis, & periculis inferni, & nō aduertunt, occupati sortasse prosperitatibus seculi, & quo magis circumdati sunt eiusmodi periculis, eo minus ea

considerant, & ideo neq; timent, neq; dolent: David autem ea considerabat, & cōsiderando inuenerat vbi esset, & ideo tremens, ac dolens dicebat, tribulationem, & dolorem inueni, & nomē Domini inuocaui, idest, Tribulationē, & dolorem inueni, quia blandiente licet seculi prosperitate, & felicitate, tamen aduertit me circumdatum esse funibus, & doloribus mortis, & periculis inferni expositum esse; ideo gemēs nomen Domini inuocaui, & dixi, O Domine libera animam meam. S. Basilii paulò aliter exponit, vt sensus sit, Circundederunt me dolores mortis, & pericula inferni inuenerunt me, idest, peccatum mortale commisi, vnde in mortem animæ incidi, & inferno propinquavi: sed ego tribulationem & dolorem pœnitentiæ salutaris inueni, & hoc modo corde contrito, & animo contribulato nomē Domini inuocaui dicēs, ò Domine libera animam meam.

O Domine libera animam meam. V. am: misericors Dominus, & iustus. & Deus noster miseretur.

Dixerat, nomen Domini inuocaui: nunc subiicit ipsa verba inuocationis. O Domine libera animam meam, nimirum de doloribus mortis, & periculis inferni. In hebræo est particula non solum vocantis, sed etiam obsecrantis, nimirum ana. Itaque potuisset verti, NM Obsecro Domine libera animam meam, sed idem est sensus. Deinde, vt ostendat se bona spe inuocasse Dominum, addit quasi rationem, dicens, Misericors Dominus, & iustus, supple, est, & Deus noster miseretur. misericors Dominus est, quia præuenit peccatorem gratia sua, dum ei pœnitentiam, & orationem inspirat: Ipse enim prior dilexit nos, vt dicit Apostolus Ioannes. Iustus etiam est, quia non sine flagello dimittit, flagellat enim omnem filium quem recipit, & ijs ignoscit, qui sibi ipsi non ignoscunt, & tandem Deus noster miseretur, quia recipit quem flagellauit & nō solum peccata indulget, sed hæredem facit. S. Ioannes Chrysostomus scribit, Deum dici misericordem,

dem, & iustum, quia semper admiscet misericordiam iustitiae, & iustitiam misericordiae, & addit, Deus noster miseretur, quia Deus magis pronus est ad miserandum, quam ad puniendum.

VI. Custodiens paruulos Dominus, humiliatus sum & liberauit me.

Miseretur Dominus, ut paulo ante dictum est, sed praecipue paruulis timentibus eum: id enim in Psal. 102. clarius habetur, cum dicitur, Secundum altitudinem caeli à terra corroborauit Dominus misericordiam suam super timētes se. item, Sicut miseretur pater filiorum, misertus est Dominus timentibus se. Quod idem legimus in cantico Virginis Deiparae, Et misericordia eius à progenie in progenies timētibus eum. Quoniam igitur verba illa vltima versiculi superioris, Et Deus noster miseretur, intelliguntur de miseratione paterna, ut sonat vox hebraica, merachem, ideo nunc declarat quos respiciat ista paterna misratio, ac dicit respicere paruulos, id est, mites, & humiles, ac timentes Deum filiali timore. Custodiēs paruulos Dominus, id est, Dominus ex paterna miseratione custodiens est paruulos suos, quasi teneros filios, quibus aeternam hereditatem parauit. Et quoniam David non ignorabat, testimonium reddente Spiritu sancto spiritui eius, se vnum ex illis esse, addidit, humiliatus sum, id est, ex paruulis esse studui, & tandem conclusit, liberauit me. quod de liberatione in spe intelligi debet, praesertim cum in hebraeo sit in futuro, & liberauit me.

VII. Conuertere anima mea in requiem tuam, quia Dominus benefecit tibi.

Liberatus homo iustus in spe, gratulatur sibi ipse tantum bonum dicens, Conuertere anima mea in requiem tuam, id est, festina passibus desiderij ad locum verae ac sempiternae quietis, ad caelestem Hierusalem, ad sinum veri Abraham; quoniam Dominus benefecit tibi. In hebraeo habetur, Quoniam Dominus retribuit super te; quo verbo si-

Card. Belarm. in Psal.

gnificatur vita aeterna esse corona iustitiae, & merces operum bonorum, ut hoc loco notauit sanctus Basilius. Itaque textum vulgati interpretis ex hebraica proprietate explicare licebit.

Quia eripuit animam meam de morte, oculos meos à lacrymis, pedes meos à lapsu.

Declarat, quid sit bonum illud magnū, siue magna illa retributio, de qua dictum est, benefecit tibi, siue retribuit tibi. ac dicit esse vitam beatam, & sempiternam, Quia eripuit animam meam de morte, id est, eripuit à morte, & donauit vitam: oculos meos à lacrymis, id est, dedit vitam non subiectam vlli malo, sed cumulata omni bono; absterget enim Deus omnem lacrymam ab oculis eorum, ut dicitur Apocal. 21. Et pedes meos à lapsu, id est, dabit vitam non solum felicem, sed etiam securam, ac sempiternam, ut ab ea excidere nunquam possim. Ita liberabit à doloribus mortis, & à periculis inferni, & in vitae felicissimae aeternitate, & securitate constituet.

Placebo Domino in regione viuorum.

Concludit Psalmum dicens, quem admodum ipse securè possidebit vitam optimam, & dulcissimā, quae vehementer ipsi placebit: ita etiam placebit ipse Domino vehemēter, & securè in regione viuorum. dicitur regio viuorū, ubi oēs ab omni parte viuunt, & ideo placent omnibus modis Deo viuēti: nam in hac peregrinatione multi mortui sunt, & qui viuunt, secundum spiritum viuunt, non secundū corpus, quod propter peccatum mortuum est, Rom. 8. vnde clamat Apostolus Rom. 7. Quis me liberabit de corpore mortis huius? In hebraeo habetur, Ambulo corā Deo in terra viuētiū. sed idem est sensus: nam ambulare coram Deo, est placere oculis Dei rectè, & iustè viuendo. Sic legimus Gen. 5. Ambulauit Henoc cū Deo. & Genes. 6. Noe fuit vir iustus, atque perfectus, cum Deo ambulauit. &

Zz


Gen.

Gen. 17. Ambula coram me, & esto perfectus. & Luc. 1. Vt sine timore de manu inimicorum nostrorum liberati seruiamus illi, in sanctitate, & iustitia coram ipso omnibus diebus nostris.

PSALMVS CXV.

Titulus, & Argumentum.

Allaluia.



Vnc Psalmum hebraei partem esse volunt Psalmi superioris: sed nos distinctio nem Septuaginta Seniorum sequimur: nec tamen negamus, hunc Psalmum immediate subiungendum esse superiori, vt sanctus Basilius monet. Agit enim Propheta gratias Deo. & vota se persolutorum pollicetur pro salute æterna, quam bona spe iam possidere cepit.

Explicatio Psalmi 115.

I. Credidi propter quod locutus sum: ego autem humiliatus sum nimis.

Respicit ad verba illa, Placebo Domino in regione viuorum. & quasi aliquis interrogasset, vnde nosti regionem viuorum? respondet se nouisse per spiritum fidei. Credidi, inquit, esse regionem viuorum quandam, licet oculis ea non videatur, & propter hanc fidem dixi, Placebo Domino in regione viuorum. Citauit hunc locum Apostolus 2. Corint. 4. Habentes, inquit, eundem spiritum fidei, sicut scriptum est, Credidi propter quod locutus sum, & nos credimus propter quod & loquimur, sciētes quoniam, qui suscitauit Iesum, & nos cum Iesu suscitabit, & constituet vobiscum. Vbi beatus Paulus docet, ex spiritu fidei, non ex vlla humana demonstratione, cognosci resurrectionem corporum, & veram viuorum regionem, in qua cum Domino Iesu con-

stituendi sumus. Et quoniam hæc fides requirit animam verè humilem, quæ se Spiritui sancto plene subiiciat ad obedientiam fidei, subiungit, Ego autem humiliatus sum nimis, id est, ego verò ideo credidi, quia non ingenio meo nitior, sed valdè humilem, ac docilem me Spiritui sancto præstui. Sic enim & Dominus ait Matth. 11. Confiteor tibi Pater, Domine cæli & terræ, quia abscondisti hæc à sapientibus, & prudentibus & reuelasti ea paruulis. & in alio loco, Quomodo vos potestis credere, qui gloriam ab inuicem accipitis, Ioannis 1.

Ego dixi in excessu meo, omnis homo mendax. **II.**

Variè admodum hunc versiculum exponunt Auctores, vt alij referant ad quandam quasi desperationem Regni obtinendi, quod Samuel Dauidi promiserat, & in excessu quodam turbatus dixerit, Omnis homo mendax, videlicet, vt etiam Samuel mentitus videatur: alij referant ad populum in captiuitate Babylonica constitutum, & desperantem de promissis Prophetarum: alij aliter exponant. Sed non video, quomodo ista, & alia id genus coherere cum reliquis partibus huius Psalmi. Idè magis probo sententiam Euthymij, qui hæc refert ad excessum mentis, per quem Propheta ascenderit ad notitiam regionis viuorum, & dixerit in comparatione eius regionis mendacium esse quicquid homines loquuntur de felicitate humana. Ego, inquit, qui humiliavi me valdè, exaltatus à Domino ad mentis excessum, in eo excessu videns, quàm falsa, & fallacia sint, quæ videntur hominibus vera, & solida bona; dixi, Omnis homo mendax, id est, omnis homo, qui humano affectu loquitur de felicitate, & magni æstimat bona mortalia, & caduca, mendax est: vera enim, & stabilia bona non inveniuntur, nisi in regione viuorum. Ex hac expositione cessat obiectio, quam nomine sophistarum sibi ipse proposuit magnus Basilius: Si omnis homo mendax: igitur & Dauid, qui est homo, mendax est:

est: ergo mentitur, cum dicit, omnis homo mendax; ac per hoc sibi ipse contra dicit, & dictum suum ipse destruit. hoc, inquam, sophisma cessat, quia per hominem intelligitur hoc loco homo humano affectu loquens, non autem homo loquens spiritu diuino afflatus. Posset etiam dici, aliud esse, hominem semper mentiri, aliud esse mendacem: potest enim homo mendax aliquando vera loqui, præsertim si non ex se, sed spiritu Dei loquatur: mendax enim dicitur homo, quoniam ex natura sua obnoxius est errori, & falsitati. Quomodo intelligitur, quod scribit Apostolus ad Rom. 3. Est autem Deus verax, omnis autem homo mendax, idest, solus Deus mentiri nequit, homines autem omnes mendacio sunt obnoxij, sed non continuo sequitur, ut perpetuo mentiantur.

III. Quid retribuam Domino, pro omnibus quæ retribuit mihi?

Animaduertens tantis se bonis cumulatum, cum, & regionem viuorum Dei beneficio agnouerit, & in eam se ingressurum sperare cæperit, imò ac si iam ingressus esset, præ lætitia exultauerit: quærit, quid Domino retribuere possit. Quid, inquit, retribuam Domino pro his quæ retribuit mihi? ille me de nihilo fecit, ille de iniquitate redemit, ille regionem viuentium demonstrauit, ille mihi etiam se daturum promissit: quid igitur illi retribuam? Quod autem dicit, retribuit mihi, potest simpliciter accipi, pro, tribuit, ut exponit Euthymius: vel cum S. Augustino, notari liberalitas, & misericordia Dei, qui tanta bona tribuit pro tantis malis.

IV. Calicem salutaris accipiam, & nomen Domini inuocabo.

Non desunt, qui hunc calicem exponant de sacrificio legis veteris, quod liquoribus, & libaminibus cõtinebatur: vel de calice conuiuiali, quo in memoriam salutis acceptæ utebantur. sed ista leuia sunt & Sancti Patres Basilii, Chrysostomi, in 2. expositione, Hieronymus, Augustinus, & cum ijs Theodoretus, & Euthymius magno consensu de calice patientiæ, & passionis hunc locum intelligunt. de quo calice Dominus Matth. 20. dixit, Potestis bibere calicem, quem ego bibiturus sum? & Matth. 26. Transeat a me calix iste. & Ioannes 18. Calicem quem dedit mihi Pater, non vis, ut bibam illum? Nec solum in testamento nouo, sed etiam apud Prophetas passim accipitur calix pro amara potione tribulationis, ut Psalm. 94. Quia calix in manu Domini vini meri plenus misto. & Isaia 51. Eleuare Hierusalem, quæ bibisti de manu Domini calicem iræ eius. & Hier. 25. Summe calicem vini furoris huius de manu mea. & Ezech. 23. Hæc dicit Dominus Deus, calicem sororis tuæ bibes profundum; & latum: eris in derisum, & in subsannationem & bibes illum, & epotabis usque ad fæces. & Habac. 2. Repletus es ignominia pro gloria: bibe tu quoque, & consopire, circumdabit te calix dexteræ Domini, & vomitus ignominia super gloriam tuam. Dicit igitur vir iustus, & amator Dei, Cum nihil habeam præstantius, quod offeram Deo meo, pro tam multis bonis, quæ retribuit mihi, calicem salutaris accipiam, idest, bibam libenti animo calicem Domini, quantumuis amarum, siue tribulationes, siue pericula, siue mortem ipsam pro suo honore sustinere me velit: scio enim calicem hunc amarum quidem, sed salutarem futurum. Et quia de meis viribus non confido, sed in Domini adiutorio omnia possum; ideo nomen Domini inuocabo, ut det mihi calicem suum intrepide haurire. Vocat Propheta calicem salutaris, calicem salutis, idest, calicem salutiferum. Confirmat hanc expositionem consuetudo Ecclesiæ, quæ hunc Psalmum in Martyrum solemnitatibus cantare solita est.

Vota mea Domino reddam coram omni populo eius: pretiosa in conspectu Domini mors sanctorum eius.

Vota mea Domino reddam coram omni populo eius: pretiosa in conspectu Domini mors sanctorum eius.

Paratus ad calicem passionis bibendum securus dicit: sacrificium laudis, & confessionis Domini, non in angulis solum, & in cubiculis, sed palam & publice coram omni populo eius, inimicis etiam presentibus immolabo, etiam si mortem inde mihi imminere intelligam. pretiosa enim est in conspectu Domini mors sanctorum eius, idest, magnæ stimulat Dominus mortem sanctorum pro suo honore, & confessione susceptam; quomodo apud homines magni fiunt gemæ pretiosæ, quibus Regum diademata ornari solent, & quibus nihil charius apud homines inuenitur. Expendit hoc loco Sanctus Basilius gloriam Martyrum, quorum non solum animæ mox coronantur in cælis: sed etiam reliquæ corporum in maximo pretio habentur in terris. antea siquidem qui tangebatur cadauer hominis immundus erat: nunc autem, qui ossa Martyrum contingit, sanctificationem acquirit,

VI. O Domine, quia ego seruus tuus, ego seruus tuus, & filius ancillæ tuæ.

Non superbit vir sanctus, qui se totum Deo in sacrificium offert, sed agnoscit debitum seruitutis, & iuxta mandatum Domini dicit seruus inutilis sum; quod debui facere feci. O Domine, inquit, quid magnum feci, quod vota mea publice reddidi, neque ob timorem mortis confessionem tuam omisi? quod debui facere feci, quia ego seruus tuus sum, redemptus de captiuitate diaboli pretioso sanguine filij tui; ego, inquam seruus tuus sum, non solum redemptionis gratia, sed etiam dono creationis: sed & filius sum ancillæ tuæ, idest, non emptitijs tantum, sed & vernaculus, quia & mater mea ancilla tua est, duplici illo nomine, creationis & redemptionis. Dicit autem, filius ancillæ tuæ, non filius serui tui; quia seruitus sequitur ventrem: nam si liber ex ancilla gignat filium, ille filius serui nascitur. Vnde Sara Abrahamo dixit, Ejce ancillam & filium eius: non enim erit hæres filius ancillæ

enim filio meo Isaac; Genes. 21. Itaque Ismahel seruus erat, quia matrem habuit ancillam, quamuis Patrem haberet liberum, videlicet Abrahamum. Sanctus Augustinus per ancillam, intelligit Ecclesiam, quæ est mater nostra, ancilla ex naturæ debito, & libera ex gratiæ munere.

VII. Dirupisti vincula mea, tibi sacrificabo hostiam laudis, & nomen Domini inuocabo.

Docet, seruum se Domini esse, sed seruitute bona, erutum autem à seruitute mala. Quomodo Dominus in Euangelio hortatur eos qui laborant, & onerati sunt, vt tollant iugum suum, quia iugum ipsius suaue est, & onus eius leue, Matth. 23. non liberat omnino à iugo, & onere, sed tollit iugum asperum, vt imponat iugum suaue, & auferat onus graue, vt imponat onus leue. Ita omnino dirupit Deus vincula, quibus à Satana alligabamur; vincula peccatorum, & onera cupiditatum, quibus ad inferos deprimebamur: & alligat iugo suaui legis diuinæ, & onere leuissimo charitatis, quo in altum euehimur, & exaltamur ad cælum. Dirupisti, inquit, vincula mea, idest, libera sti à seruitute durissima, & seruum tuum esse voluisti, cui seruire, regnare est. Ideo tibi sacrificabo hostiam perpetuæ laudis, & non amplius inuocabo falsos Deos, mammonam videlicet, & ventrem, opes, & honores, quibus antea seruebam; sed nomen Domini, qui solus verus est Deus, assidue inuocabo.

VIII. Vera mea Domino reddam in conspectu omnis populi eius, in atrijs domus Domini, in medio tui Hierusalem.

Hæc repetitio est quinti versiculi, Vera mea Domino reddam coram omni populo eius, additur autem in atrijs domus Domini in medio tui Hierusalem, ad significandum, vt Sanctus Augustinus monet, debere seruum Dei offerre vota sua, confessionem suam, & se ipsum Deo, intra Ecclesiam, quæ per Hierusalem significatur, qui enim

extra

extra Ecclesiā id faciunt, mihi faciunt: nam, vt scribit Sanctus Cyprianus in libro de vnitāte Ecclesiæ, Heretici occidi possunt, coronari non possunt: & eorum mors non est fidei corona, sed pœna perfidiæ. Posset fortasse hic versiculus referri ad cælestem Hierusalem, vt sicut supra dictum est, Vota mea Domino reddam coram omni populo eius, de confessione in terris: ita nunc in fine Psalmi tale aliquid dicatur de confessione laudis, & votis gratiarum actionis, quæ reddetur in cælis, vt hic fit sensus, Vota mea Domino reddam, id est, & tandem disruptis vinculis omnibus, & ad perfectam libertatem filiorum Dei vocatus, sacrificium laudis, & gratiarum actionis immolabo in conspectu omnis populi eius, iam glorificati in cælis; in atrijs domus Domini, id est, in ingressu domus Domini, de qua dicitur in alio Psalmo, Beati qui habitant in domo tua Domine, in secula seculorum laudabunt te. nec solum in atrijs, sed etiam in domo, quæ domus in medio tui est o superna & gloriosa Hierusalem, quæ patria nostra es, ad quam ex peregrinatione quotidie suspiramus.

Deum, quod misericordiam, & veritatem erga eam ostenderit. Sed obseruandum est, cum Apostolus dicit, gentes super misericordia debere honorare Deum, ad Iudæos autem pertinere veritatem, quā Deus ostendit confirmando promissiones Patrum; non esse sensum, ad Iudæos non pertinere misericordiam; sed ad gentes pertinere solam misericordiam, ad Iudæos autem misericordiam & veritatem; quia licet miserit Deus ad Iudæos Messiam, vt impleret promissiones Patrum, tamen promissiones non ex meritis eorum, sed ex mera misericordia processerunt. Sic enim cecinit Zacharias Luc. 1. Ad faciendam misericordiam cum Patribus nostris, & memorari testamenti sui sancti. & hoc tractat, ac demonstrat Apostolus ad Rom. 3. Omnes peccauerunt, & egent gloria Dei. & persequitur hoc argumentum vsque ad finem capitis vndecimi; vbi dicit, Concluserunt Deus omnia in incredulitatem, vt omnium misereatur. & idem docet in tota Epistola ad Galatas: & ad Ephes. 2. Eramus, & nos natura filij iræ, sicut & cæteri.

Explicatio Psalmi 116.

PSALMVS CXVI.

Titulus, & Argumentum.

Alleluia.

H VNC Psalmum omnium breuissimum declarat Apostolus ad Rom. 15. vbi dicit, Christum fuisse ministrum circumcisionis ad confirmandas promissiones Patrum: gentes autem super misericordia honorare Deū. & allegat hæc verba, Laudate Dominum omnes gentes, & magnificate eum omnes populi. Ex quo intelligimus, Prophetam hoc loco alloqui totam Ecclesiam ex gentibus, & Iudæis congregatam, eamque hortari ad laudandum

L Audate Dominum omnes gē I. res, laudate eum omnes Populi.

Ecclesiam, vt dixi, totam alloquitur, & ad laudandum Dominum cohortatur. intelligit autem per gentes, vt Apostolus monuit, gentilitatem conuersam ad fidem, quam primo loco posuit, quia videbat, multo maiorem partem Ecclesiæ ex gentibus, quā ex Iudæis congregandam. Per populos autem intelligere videtur populos, siue tribus Iudæorum, similiter ad fidem conuersorum, vt hoc loco notauit in commentario Sanctus Hieronymus; & similia verba Psal. 2. Quare fremuerunt gentes, & populi meditati sunt inania; exposuerunt Apostoli Act. 4. per gentes gentiles, & per populos, Iudæos intelligentes.

Card. B. clarm. in Psal.

22 3 Quo-

II. Quoniam confirmata est super nos misericordia eius: & veritas Domini manet in æternum.

Ratio laudandi Deum est, quoniam misericordia Domini stabilita est per aduentum Messie super gentes, & super Iudæos. Fundata enim est Ecclesia, aduersus quam portæ inferi non præualebunt, & constitutum est Regnum, cuius non erit finis. Nec solum misericordia confirmata est, sed etiam veritas promissionum adimpleta, in æternum amplius non mutabitur.

PSALMVS CXVII.

Titulus, & Argumentum.

Alleluia.



PSALMVS hic de Dauide exponi potest ad literam, ut facit Sæctus Ioannes Chrysostomus; tamen conuenit etiam toti populo Christiano, cuius figuram Dauid gerebat; & hanc expositionem persequitur S. Augustinus. Canit autem tum Dauid, tum populus Dei multa beneficia Dei, sed illud potissimum, quo Christum, lapidem angularem, extulit in summum ædificium, ut duos parietes connecteret, & contineret. quod factum est in die Resurrectionis, & ideo Ecclesia canit hunc Psalmum in Dominica die ad Primam: & verba illa ex hoc Psalmo, Hæc dies, quam fecit Dominus, exultemus, & lætemur in ea, Resurrectioni applicat, & per octauam Paschæ frequentissimè cum iubilo canit.

Explicatio Psalmi 117.

I. **C**onfitemini Domino, quoniam bonus, quoniam in sæculum misericordia eius.

Inuitat Dauid omnes ad laudandum Deum, & rationem reddit, quoniam

bonus: nihil breuius, nihil grandius dici potuit: nam solus Deus propriè, & simpliciter bonus est, & nihil iure laudari potest, nisi bonum. addit, Quoniam in sæculum misericordia eius, ut ostendat ab effectu, Deum esse bonum, ac per hoc etiam laudabilem. Nam bonitas Dei nulla in re magis cognosci potest à miseris, quàm in misericordia. Misericordia enim nos creauit, misericordia redemit, misericordia protegit, misericordia coronabit. ita vsque in sæculum misericordia eius.

Dicat nunc Israel quoniam bonus, quoniam in sæculum misericordia eius.

Dicat non domus Aaron, quoniam in sæculum misericordia eius.

Dicant nunc qui timent Dominum, quoniam in sæculum misericordia eius.

Explicat, qui sint, quos inuitauerat ad laudandum Deum, & nominat primo loco Israel, id est, populum Israeliticum, quoniam inde fuerunt omnes Apostoli, qui primi crediderunt, & Ecclesiam inchoarunt. Secundo nominat domum Aaron, quia post Apostolos magna turba sacerdotum obedire cepit fidei, ut dicitur Act. 6. denique addit, omnes, qui timent Dominum, quales fuerunt omnes gentiles, qui crediderunt, & Ecclesie iam inchoatæ se adiunxerunt. Itaque totam Ecclesiam ex Iudæis, & gentibus collectam inuitat ad laudandum Deum.

De tribulatione inuocaui Dominum, & exaudiuit me in latitudine Dominus.

Incipit declarare materiam laudis diuinæ. quod in angustia positus cum esset, inuocaui Dominum, & Dominus continuo exaudiens posuit illum in latitudine; opponit enim pulcherrimè angustias latitudini. Ego, inquit, de tribulatione inuocaui Dominum, id est, cum essem in tribulatione, siue in angustia, ut sonat vox hebræica, inuocaui Dominum,

num, idest, non merita mea iactaui, non conquestus sum, quod iniuste paterer persecutionem, sed ad misericordiam Dei confugi, & exaudiuit me in latitudine Dominus, idest, exaudiuit me, & de angustiis in latitudinem transtulit. Sicut autem per angustias significatur tribulatio, ita per latitudinem, significatur liberatio à tribulatione. Quod autem id possit Dauid de persona sua merito dicere, notissimum est ex Psalmo 17. & 53. & ex alijs multis. Quod idem etiam conueniat Ecclesiae non minus est notum. Certè initio nascentis Ecclesiae, cum Herodes S. Petrum Ecclesiae totius Pastorem, & Principem inclusisset in carcerem, oratio fiebat ab Ecclesia sine intermissione ad Deum pro eo: & continuo exaudita est, & maximo miraculo de summis angustiis tribulationum in latitudinem magnae consolationis educta est. & quoties de angustiis variarum persecutionum Neronis, Decij, Diocletiani, & similium Tyrannorum ad latitudinem pacis, & quietis Deo miserante transiuit; toties dicere potuit, De tribulatione inuocaui Dominum, & exaudiuit me in latitudine Dominus.

VI. Dominus mihi adiutor, non timebo quid faciat mihi homo.

VII. Dominus mihi adiutor, & ego despiciam inimicos meos.

Experimento proprio doctus Dauid, siue populus Dei magna fiducia exultat, & non dicit, Dominus mihi adiutor est, nihil deinceps patiar; scit enim se adhuc peregrinum inter hostes multa passurum: sed dicit, Dominus mihi adiutor, supple est, non timebo quid faciat mihi homo, idest, non turbabor propter mala, quae mihi infert homo: quia Dominus omnia conuertet in bonum. Sic enim Dominus monuit, Nolite timere eos, qui occidunt corpus, & post hæc non habent amplius quid faciant. Matth. 10. Nam capillus de capite vestro non peribit, Luc. 11. & Apostolus, Momentaneum & leue tribulationis nostrae æternum gloriæ pondus operatur in nobis 1. Cor. 4. Quare meritò ad-

dit, & ego despiciam inimicos meos, quippe qui scruendo in corpus, gloriæ meae deseruiunt.

Bonus est confidere in Domino, VIII. quàm confidere in homine.

Bonum est sperare in Domino, IX. quàm sperare in Principibus.

Deducit ex dictis vtilem admonitionem, de spe collocanda in Deo, non in hominibus, quantumuis potentibus. Deus enim & potest, & vult confidentes in se iuuare: homines autem sæpe non possunt, sæpe etiam varijs passionibus acti nolunt. Quod expertus fuerat Dauid, qui aliquando sperauit in Saule Rege suo, aliàs in Achis Rege Gethæo, aliàs in Achitophel consiliario prudentissimo, aliàs in alijs, & in nullo fidem inuenit. in Deo autem nunquam sine prospero euentu sperauit. Ait igitur monens omnes, Bonum est confidere in Domino, quàm confidere in homine, idest, magis quàm confidere in homine. Bonum est sperare in Domino, magis quàm sperare in Principibus, terrenis videlicet. Hæc comparatio accommodata est infirmitati humanæ, cui nota est potètia hominum, & maxime Principum; Dei autem potestas occulta est plurimis, qui neque vident, neque considerant, fortasse etiam non credunt magnitudinem Dei. alioqui dicendum fuisset, Bonum est sperare in Domino, malum autem sperare in homine. Sic enim ait Hieremias cap. 17. Maledictus homo qui confidit in homine. Neque tamen malum est spem aliquam collocare in adiutorio. Angelorum, vel hominum bonorum, quia hæc spes ad Deum refertur, qui non solum per se, sed etiam per suos, adiuuat confidentes in se.

Omnes gentes circuiuerunt me, X. & in nomine Domini, quia vltus sum in eos.

Circundantes circundederunt me, & in nomine Domini, quia XI. vltus sum in eos.

Circundederunt me sicut apes, XII.

22 4 &

& exarserunt sicut ignis in spinis,
& in nomine Domini, quia ultus
sum in eos.

Ostendit exemplo suo, quàm sit bonum confidere in Domino, cum ipse nõ semel, sed sæpius obsessus à magna multitudine hostium, Dei adiutorio ita liberatus fuerit, vt hostes suos prostratos viderit. notum est, si de persona David agatur, quàm sæpe à Saule cum magna manu obsessus fuerit, & mirabiliter liberatus: sed notius est, quàm sæpe populus Dei à Regibus potētissimis, & à populis innumerabilibus persecutiones grauissimas perpeffus, diuinam vltionem viderit. Verba sunt paulò obscuriora, quoniam vulgatus interpretes voluit omnes voces hebraicas exprimere, & phrasis hebraica phrasi latinæ non respondet. Clarius reddidisset, vt græci fecerunt, si omisisset illud, quia, & illud, in, ac dixisset, omnes gentes circuierunt me, & in nomine Domini ultus sum eas. Illud enim, quia, & illud, in, redundant, & illud, eos, est masculini generis, quia vocabulum hebraicum, quod gentes significat, est etiam generis masculini. Itaque interpretes fideliter vertit, & quod in græco deerat, addidit ex hebræo. Sensus autem hic est, Omnes gentes, idest, tota ferè multitudo gentium circumdederunt me, & in nomine Domini ultus sum eas, idest, in virtute Dei vidi vltionem, quia Deus ultus est innocentiam meam dum hostes prostrauit, ac deleuit. addit autem, Circundantes circumdederunt me, vt ostendat, non quomodocunque se fuisse circumdatum, sed ita arcte obsessum, vt nullum pateret effugium. addit etiam, Circundederunt me sicut apes, & sicut ignis in spinis: vt ostendat multitudinem, & vehementiam hostium: nam apes in tanta copia circundant fauum; vt numerari non possint: & ignis tanto impetu corripit spinas aridas, vt in puncto temporis eas consumat. In hebræo habetur, Extinctæ, vel consumptæ sunt, gentes videlicet, sicut ignis in spinis. Sed non est verisimile Septuaginta In-

terpretes, vel auctorem vulgatæ editionis latinæ reddidisse contrarium sensum. neque satisfaciunt, qui dicunt, nõ esse contrarium sensum, exardescere ignem in spinis, & consumi ignem in spinis; quia vtraque lectione significatur celeritas actionis ignis in spinas, qui mox, vt exarserit, extinguitur. Qui hoc dicunt, ideo non satisfaciunt, quoniam David subiungit, & in nomine Domini ultus sum in eos, quod non diceret, si inimici eius antea fuissent extincti, siue consumpti. Existimo igitur Septuaginta Interpretes, vocem illa doacò, accepisse in significatione actiua, qualem habet in cõingatione Piel, יכר & Poal, non in passiua: & ideo non vertisse, extinctæ, vel consumptæ sunt, sed consumere cupierunt, siue exarserunt ad consumendum sicut ignis in spinis.

Impulsus euersus sum vt caderem, & Dominus suscepit me. XIII.

Fortitudo mea & laus mea Dominus, & factus est mihi in salutem. XIV.

Amplificauit hætenus multitudinẽ, & atrocitatem inimicorum: nunc confitetur infirmitatem suam, quæ tanto robori par esse non poterat, vt hinc magis agnoscatur gloria Domini. Ego, inquit, tantę violentiæ resistere non poteram, ideo ab hostibus impulsus in ruinam iam euersus ruere cœperam, sed Dominus in tempore occurrens sustentauit me. Referri potest hoc ad pericula amittendæ vitæ corporalis, in quæ sæpe incidit David. Referri etiam potest ad pericula spiritualia grauissimarum temptationum, in quæ incidebat populus Christianus tempore persecutionum. qui propterea agnoscens, & confitens non suis viribus, sed ex gratia Dei vicisse, dicit, Fortitudo mea & laus mea Dominus, idest, Dominus est fortitudo mea, quia viribus eius vinco, & ipse idem est laus mea, quia semper cum laudare debeo, & ipse factus est mihi in salutem, ipse Saluator meus fuit.

XV. Vox exultationis, & salutis in tabernaculis iustorum.

Ex liberatione Davidis gauisi sunt iusti, qui eam liberationem scire potuerunt: sed multò magis ex liberatione populi Christiani de ingenti persecutione orta est vox exultationis, & vox salutis, idest, salutem annuncians in tabernaculis iustorum. vbiq̃ue enim resonat vox lætitiæ, & nuncius salutis. Notat S. Chrysostomus, iustos hic in terris non habere domos stabiles, sed tabernacula peregrinorum, vel militantium.

XVI. Dextera Domini fecit virtutē, dextera Domini exaltauit me; dextera Domini fecit virtutem.

Hæc est vox exultationis, & salutis, quæ resonat in tabernaculis iustorum, quod dextera Domini, idest, virtus, & potentia Filij Dei fecit virtutem, idest, operata est fortiter, ac potenter: nam Filius Dei dicitur in Scripturis brachium Domini, siue manus eius dextera, quia Pater per Filium omnia fecit, & facit. Omnia per ipsum facta sunt, Joan. 1. Per quem fecit & sæcula, ad Hebr. 1. & Isaia 53. Quis credidit auditui nostro, &, Brachium Domini, cui reuelatum est. Luc. 1. Fecit potentiam in brachio suo. Dextera Domini exaltauit me, idest, in hoc dextera Domini fecit virtutem, quod depressit inimicos meos, & me exaltauit: siue id de Dauide, siue de populo Dei intelligatur. Dextera Domini fecit virtutem. id repetitur lætitiæ causa. In hebræo non habetur, Dextera Domini exaltauit me, sed, Dextera Domini excelsa, vt vertit Sanctus Hieronymus, vel, Dextera Domini exaltans; vtrunque enim significat vox, romema. Hanc secundam significationem secuti sunt Septuaginta Interpretes, & addiderunt, me, vt sensus sit, Dextera Domini exaltans me fuit: quod est idem cum illo, Exaltauit me.

רוממה

XVII. Non moriar, sed viuam, & narrabo opera Domini.**Castigans castigauit me Dominus, & morti non tradidit me.**

Pergit idem, siue David, siue populus Domini, commemorare beneficium Domini, qui persecutiones permittit, vt Pater, non vt hostis; ad purgationem, non ad mortem, quasi diceret, quantumuis magnas persecutiones passus sim, & fortè iterum patiar: tamen non moriar, sed viuam, idest, non exterminabor, non deficiam omnino, vt aduersarij vellent; sed permanebo, & narrabo opera Domini, qui castigans castigauit me paterno flagello, sed morti non tradidit me.

Aperite mihi portas iustitiæ, ingressus in eas confitebor Domino. Hæc porta Domini, iusti intrabunt in eam.

Ex acceptis beneficijs sumit animum aspirandi ad maiora, ac petit introduci tandem in cælestem Hierusalem, in qua nulli iniusti habitant. Aperite, inquit, mihi portas iustitiæ, idest, portas Regni cælorum, quæ ex iustitia constant. Porta enim gloriæ iustitia est. Quærite, inquit Dominus Matth. 6. primum Regnum Dei, & iustitiam eius. Ingressus in eas confitebor Domino: quoniam qui habitant in domo Domini, in secula seculorum laudabunt te. Psal. 83. Hæc porta Domini iusti intrabunt in eam. Hæc porta iustitiæ est vera porta, & vnica, quæ ducit ad Dominum: & ideò iusti soli intrabunt in eam. Alij aliter exponunt, videlicet de portis templi, vel ciuitatis Hierusalem. Sed nos sequuti sumus Augustinum, Chrysostomum, & Hieronymum: neque verum est, quod per portas templi, vel ciuitatis terrenæ Hierusalem, soli iusti intrarent.

Confitebor tibi, quoniam exaudivisti me, & factus es mihi in salutem.

Declarat quod dixit, ingressus in eas confitebor Domino. Dicit enim, Confitebor tibi, quando videlicet ingressus ero in cælestem Hierusalem per portas

XIX.

XX.

portas iustitiae, quoniam exaudisti me: nam etiam multa, & varia iusti petant in hoc mundo, tamen omnia tendunt ad unam petitionem, de qua dicitur in Psal. 26. Unam peti à Domino, hanc requiram, ut inhabitem in domo Domini omnibus diebus vitae meae. De hac igitur petitione dicit, Confitebor tibi, quoniam exaudisti me. & clarius adhuc exponit, dicens, Et factus es mihi in salutem, id est, qui eras spes mea, factus es salus mea: qui eras viaticum, factus es praeium.

XX. Lapidem, quem reproba-
runt aedificantes, hic factus est in
caput anguli.

XXI. A Domino factum est istud, &
est mirabile in oculis nostris.

Hos versiculos aliqui recentiores de Dauide exponunt ad literam, quem dicunt factum fuisse in caput anguli, quam do factus est Rex super Israel, & Iudam; sed Dauidem figuram gessisse Christi, qui factus est in caput anguli, cum factus est caput Ecclesiae ex Iudaeis, & Gentibus congregatae. Ceterum SS. Patres absolute exponunt de Christo, nulla mentione facta Davidis. Imò S. Ioannes Chrysostomus, qui priores partes de Dauide exponit ad literam, hoc loco scribit, Prophetam de improviso mutasse argumentum, & de Christo prophetasse. Adde quod Christus ipse publice hunc locum tanquam ad se proprie spectantem allegauit Matth. 21. Marc. 12. & Luc. 21. neque ullus respondit, de Dauide haec verba esse intelligenda. Sanctus etiam Petrus Act. 4. iterum coram omni populo hunc locum allegauit tanquam proprie de Christo scriptum, neque ullus contradixit. Sanctus etiam Paulus ad Rom. 9. & S. Petrus 1. epist. cap. 2. allegant Isaiam cap. 28. de hoc lapide angulari, summo, electo, probato, &c. Denique idem Apostolus Paulus ad Ephes. 2. vocat Christum angularem lapidem summum. Certè non auderem, Scripturam ita celebrem, & decantatam à Christo, & Apostolis explicatam, vilo modo cum Davidis persona communicare. Ac-

cedit, quod Dauid non fuit primus, neque solus Rex super Israel, & Iudam, ut idem meruerit dici lapis angularis: nam ante ipsum fuit Saul Rex super utrumque populum, & post eum Salomon: neque Israel, & Iudas erant proprie duo populi, siue duae gentes diuerse, ut sunt Hebraei, & Gentiles. Igitur omissa illa expositione, dicendum est, quod cum Dauid in persona sua, & populi Dei decantasset liberationem à temporalibus malis, & petisset introitum in eternam salutem; declarat nunc quomodo Deus aperuerit viam ad hanc eternam salutem, & sine dubio auctus maiore lumine prophetico hos versiculos scripsit. Lapidem, quem reproba-
uerunt aedificantes, hic factus est in caput anguli, id est, misit Deus lapidem viuum, preciosum, electum in terras; sed Iudaei, ad quos tunc pertinebat officium aedificandae Ecclesiae, hunc lapidem reprobauerunt, dicentes de Christo, Non est hic homo à Deo, qui Sabbatum non custodit, & non habemus Regem, nisi Caesarem; & Seducor ille dixit, Post tres dies resurgam, & similia. Sed hic idem lapis ab aedificantibus reprobatus, quasi inutilis ad aedificium spirituale, à Deo principali Architecto factus est in caput anguli, id est, constitutus est super duos parietes, ut eos coniungeret, & contineret, id est, factus est caput totius Ecclesiae ex Hebraeis, & Gentibus congregatae, & tale caput, ut qui sub eo non aedificatur, saluus esse non possit: & omnis qui sub ipso tanquam lapis viuus aedificatur, omnino saluandus sit. Atque hoc à Domino factum est, id est, electione, & potestate diuina, non consilio, vel ope humana, & ideo mirabile est in oculis nostris. Quis enim non miretur, hominem crucifixum, & mortuum, ac sepultum, post tres dies resurgere immortalem cum amplissima potestate; & caput ac Principem declarari omnium hominum, & Angelorum; & per eum aditum patefieri hominibus mortalibus ad Regnum caelorum, ad societatem Angelorum, ad beatam immortalitatem?

Hæc

XXII. Hæc est dies, quam fecit Dominus, exultemus, & lætemur in ea.

Hæc dies, qua id factum est, est propriè dies, quam fecit Dominus; & ideo ob tantum beneficium, exultemus, & lætemur in ea. Hæc sine dubio est dies Resurrectionis Dominicæ; quâvis enim ab ipsa conceptione propter vnionem hypostaticam Dominus Iesus fuerit Christus, & caput Ecclesiæ: vnde Pastoribus ab Angelo dictum legimus, Annuncio vobis gaudium magnum, quia natus est vobis hodie Saluator, qui est Christus Dominus in ciuitate Dauid: tamen debuit prius reprobari ab hominibus, & humiliari vsque ad mortem crucis, & postea exaltari per resurrectionem; & tunc declarari summus angularis lapis, & prædicari per omnes gentes, quod non esset in alio aliquo salus, vt dicitur Act. 4. Vnde ipse etiam dixit Matth. 28. Data est mihi omnis potestas in cælo, & in terra. Eunt ergo docete omnes gentes, baptizantes eos in nomine Patris, & Filij, & Spiritus sancti. Dicitur autem dies resurrectionis, dies quam fecit Dominus, vel quia Christus resurgens, vt Sol iustitiæ, nouo modo fecit eam diem: vel quia peculiariter Deus eam diem sibi consecrauit: vel, hæc est dies, quam fecit Deus ad hunc finem, vt exultemus, & lætemur in ea.

XXIII. O Domine saluum me fac, ò Domine bene prosperare; benedictus qui venit in nomine Domini.

Has laudes Christo dixerunt turbæ in die Palmarum, vt S. Hieronymus annotauit in Commentario ad cap. 23. Matthæi. Quod enim illi dixerunt, Oïanna, benedictus qui venit in nomine Domini, in hoc versiculo nos habemus: sed in Euangelio relinquitur vox hebraica, Oïanna, hic explicatur per illa verba, ò Domine saluum me fac. Itaque Dominus in die Palmarum voluit visibiliter exhibere, & quasi præoccupare triumphum, quem acturus

erat inuisibiliter in die Resurrectionis. Nō enim poterat illi iuste obijci, quod triumphū ageret ante victoriam, quoniam de victoria certissimus erat. Propheta autem sicut præuidit, & prædixit, Christum vt lapidem reprobandum tempore passionis; & postea à Deo exaltandum in caput anguli tempore resurrectionis: ita præuidit, & prædixit ipsa verba, quæ turbæ dicturæ erant in die triumphi Christi in die Palmarum, quo significaretur triumphus Resurrectionis: & optimè accidit, quod vtraque dies, & Palmarum, & Resurrectionis esset dies Dominica. Ait igitur, Exultemus, & lætemur in hac die, dicentes, O Domine saluum me fac: in hebræo non est illud, me, sed simpliciter, Oïanna, idest, salua obsecro. Græci tamen addiderunt explicandi gratia, O Domine bene prosperare, nimirum in inchoato isto Regno tuo, benedictus qui venit in nomine Domini, idest, benedicatur ab omnibus Messias, Rex noster, factus in caput anguli, qui venit in nomine Domini, idest, non à seipso venit, non sibi Regnum vsurpauit, vt faciet Antichristus: sed venit missus à Patre suo, Domino cæli, & terræ. sic enim explicauit Christus ipse, Ioan. 5.

Benediximus vobis de domo Domini: Deus Dominus, & illuxit nobis. XXIV.

Constituete diem solemnem in condensis, vsq; ad cornu altaris. XXV.

Explicata tota propheta aduentus Christi, & triumphus eius: conuertitur Propheta ad populum, atq; illum exortatur ad celebrandum diem festum solemnem in gratiarum actionem. Benediximus, inquit, vobis de domo Domini, idest, nos Propheta benediximus vobis populis fidelibus annunciantes mysteria diuina in salutem vestram: benediximus autem de domo Domini, idest, vobis qui estis de domo Domini; vel nos ex domo Domini, vnde hæc ex reuelatione didicimus, benediximus vobis. Summa autem est, Deus Dominus & illuxit nobis, idest, Dominus noster ipse

ipse est verus Deus, & ipse illuxit nobis, ostendens nobis lucem miserationum suarum. Propterea constituite diem solemnem, idest, agite diem solemnem in condensis, idest, densos virides ramos adferentes, & ornantes templum usque ad cornu altaris. Ista varietate exponuntur secundum ritus Iudaeorum, quæ ad nos nihil pertinent.

XXVII. Deus meus es tu, & confitebor tibi, Deus meus es tu, & exaltabo te.

XXVIII. Confitebor tibi, quoniam exaudivisti me, & factus es mihi in salutem.

XXIX. Confitemini Domino, quoniam bonus, quoniam in seculum misericordia eius.

Hæc est repetitio dictorum, affectum Prophetæ demonstrans.

PSALMVS CXVIII.

Titulus, & Argumentum.
Psalmi.

Alleluia.

HIC Psalmus tribus in rebus omnibus alijs antecellit. Primo utilitate; est enim totus moralis, & hortatorius ad vitam secundum legem Domini instituendam, & ea causa est, cur quotidie ab Ecclesia frequentetur. Secundo longitudine; continet enim versus centum septuaginta sex, cum Psalmus septuagesimus septimus, qui ex reliquis longissimus est, non ascendat ultra versus septuaginta octo. Causa huius tantæ longitudinis fortasse fuit, ut populus haberet in quo pie, & cum fructu occuparetur, dum ter in anno ex omni parte ad tabernaculum ascenderet: videtur enim Psalmus compositus, ut in itinere caneretur, quo Psalmo finito sequuntur Psalmi Graduales, qui

in ascensione graduum tabernaculi canebantur. Tertio elegantia, & artificio alphabetico: siquidem primi octo versus incipiunt singuli à prima litera alphabeti, sequentes octo à secunda, & sic deinceps, ita ut octies totum alphabetum repetatur. Huius rei causam non aliam esse arbitror, nisi ad memoriam adiuuandam, cum hic Psalmus memoriter recitandus, vel concinendus esset. Explicant hunc Psalmum diligenter sancti Patres, Hilarius, Ambrosius, Augustinus, Hieronymus, & innumerabiles alij tum veteres, tum recentiores. Argumentum Psalmi est encomium legis divinæ, & exhortatio ad eam servandam, sed interim admiscuntur varij affectus, & preces ad Deum.

Explicatio Psalmi 118.

Aleph.

BEATI immaculati in via, qui ambulant in lege Domini.

Rectissimo ordine primum argumentum ad suadendam præstantiam, & utilitatem divinæ legis, ducit Propheta à beatitudine, quæ est ultimus finis hominis. nam in scientia morali idest finis, quod sunt prima principia in scientia naturali. Est autem hic sensus primi versiculi, Beati sunt, qui in via huius vitæ non inquinantur luto, vel sordibus peccatorum; illi autem sunt, qui non inquinantur, ac per hoc beati sunt, qui ambulant in lege Domini, idest, qui dimissis alijs vijs, eligunt viam legis Domini, quæ sola mundissima, & nitidissima est. Sed singula verba expendamus. Illud, beati, significat tum felicitatem æternam, quæ sola est perfecta beatitudo; tum felicitatem temporalem, qualis in hac vita haberi potest. Itaque sensus est, Beati erunt æterna felicitate, & nunc etiam beati sunt, idest, læti, atque quieti, nihil in hoc mundo cupientes, qui viuunt sine macula peccati, eo quod ambulent in lege Domini. Quod enim recta via ad caelestem beatitudinem sit observantia legis Dei; docet Christus Matt. 19. Si vis ad vitam ingredi, serua-

man-

mandata. Quod etiam in hac vita nulli sint feliciores ijs, qui rectè, ac piè viuunt; notum est tum experientia, tum ratione: nam beatus est, qui habet quicquid vult, & nihil mali vult. Viri iniqui multa mala volunt, & multa non habent eorum, quæ volunt. Viri iusti nihil mali volunt, & habent quicquid volunt, quia solum Deum volunt, & eius voluntatem implere cupiunt. Illud, immaculati, non significat carentiam omnis peccati, etiam venialis. Sic enim nulli essent in hac vita immaculati; sed significat carentiam peccati lethalis, quod solum propriè inducit maculam. Videtur autem sumpta metaphora à maculis quæ contrahuntur inter ambulandum, cum iter facimus per vias lutas, aut puluerulentas, aut alio modo sordidas. Illud, in via, significat in vita hac mortali, quæ aptissimè dicitur via, cum semper mutetur, & ut ait Iob, nunquam in eodem statu permaneat, sed ab initio nascendi decurrat sine intermissione usque ad metam moriendi. Denique illud, in lege Domini, significat legem Domini esse quandam viam rectam, & mundam, cum peccatum omne prohibeat. Opponitur autem lex Domini legi carnis, de qua Apostolus ad Rom. 8. quæ est via cupiditatum, & plena pulvere superbiæ, ceno luxuriæ, & aqua sordida auaritiæ.

II. Beati qui scrutantur testimonia eius, in toto corde exquirunt eum.

Declarat priorem versiculum, ac docet, non sufficere quancunque legis obseruantiam ad beatitudinem acquirendam. Multi enim superficialiter obseruant legem, dum non occidunt, non fornicantur, non mœchantur, sed non verè ambulant, ut oportet ad acquirendam scilicet in lege Domini, quia fortè oderunt proximum suum, retinent opes superfluas, cum meretricibus fornicantur. Oportet igitur, si quis beatus esse velit, ut scrutetur omnia testimonia Domini, id est, consideret diligenter sensum totius legis, quæ dicitur testimonium, quia testificatur no-

bis Dei voluntatem; qui enim scrutatur legem, inuenit, non solum prohiberi homicidium, per legem, non occides, sed prohiberi etiam odium, & iram, ut Dominus exposuit Matth. 5. imò iuberi amorem, quia finis omnis legis est dilectio; & qui dicit, non occides, ideò dicit, ne lædatur dilectio, & hoc idem intelliget de alijs præceptis, qui ea scrutabitur. Ille autem scrutatur testimonia eius, qui ex toto corde exquirat eum: qui enim seriò Deum quærit, & toto corde desiderat eius gratiam in hoc mundo, & eius præsentiam in futuro: is sine dubio in omni opere suo diligenter scrutatur quæ sit voluntas eius, & secundum eam ambulare conatur. Exemplum habemus in viatoribus: qui enim ad aliquam ciuitatem quam citissimè peruenire cupiunt, ij sollicitè scrutantur, & quærunt à quibuscunque obuijs, quæ sit recta, & comoda via ad eam ciuitatem: qui verò deambulant animi gratia, neq. propositum habent locum, quò ire cupiant, non multum laborant de via. Ait igitur Propheta, Beati, qui scrutantur testimonia eius, id est, dixi beatos, qui ambulant in lege Domini: sed explico, me beatos dicere voluisse illos, qui ita ambulant in lege Domini, ut diligenter scrutentur sensum totius legis, & voluntatem legislatoris: id quod illi soli faciunt, qui ex toto corde exquirunt Deum, nihil creatum illi anteponentes, vel æquantes, neque amorem cordis inter Deum, & creaturam diuidentes; sed solum Deum diligentes in se, & creaturas propter ipsum.

Non enim qui operantur iniquitatem, in vijs eius ambulauerunt.

Probat quod supra dixit, eos esse immaculatos, qui ambulant in lege Domini. Probat autem, quoniam nullus eorum, qui operantur iniquitatem, ac per hoc inquinati inueniuntur in itinere, in vijs, id est, legibus Domini ambulauit. id enim manifestum signum est, solam viam Domini præstare imma-
cula-

culatos ambulantes in se. Erit igitur argumentum à contrario sensu, qui operantur iniquitatem, & consequenter maculati inveniuntur, non ambulauerunt in vijs Domini: igitur qui ambulant in vijs Domini non operantur iniquitatem, & proinde immaculati sunt. Mouet hoc loco S. Augustinus quæstionem, ut ipse dicit, grauissimam, Quomodo qui operantur iniquitatem, non ambulant in vijs Domini; cum omnes sancti ambulent in vijs Domini, & tamen dicant cum S. Ioanne 1. epist. c. 1. Si dixerimus, quia peccatum non habemus, ipsi nos seducimus. & omne peccatum sit iniquitas, eodẽ Ioanne teste 1. epist. cap. 3. Sed responderi potest, eos qui operantur iniquitatem, non ambulare in vijs Domini, quatenus operantur iniquitatem: qui enim operantur iniquitatem lethalem, ambulant contrariam viam vijs Domini: qui operantur iniquitatem venialem, ambulant præter viam Domini. Porro sancti viri ambulant in vijs Domini, quia voluntatem habent in lege Domini, & in ea semper habitualiter manent, & si quando diuertunt à via, quia operantur præter legem Domini; mox per pœnitentiam, & confessionem redeunt in viam.

IV. Tu mandasti mandata tua custodiri nimis.

Alterum argumentum ducit Prophetam ab excellentia legislatoris, quasi dicat, hæc mandata non sunt mandata hominum, sed Dei, & Dei, qui omnino vult à seruis suis debitam obediẽtiam. Sed ut argumentum maiorem vim habeat, alloquitur ipsum Deum, dicens, Tu mandasti mandata tua custodiri nimis, idest, tu Domine, qui liberè potes seruis imperare, & qui potes, inobediẽtiam seuerissimè vlcisci, & qui non potes ignorare, vel obliuisci præuaricatores, tu, inquam, mandasti non consilium dando, sed planè imperando, mandata tua custodiri, non negligenter, & oscitanter, sed diligentissimè, & summo zelo. Quis igitur erit, qui non continuò applicet animum ad parendum?

Vtinam dirigantur viæ meæ ad V. custodiẽdas iustificationes tuas.

Ex auctoritate tanti legislatoris, & tam seuerè iubentis, motus Propheta, optat quàm diligentissimè Dei mandata seruare. Sed hoc proponit in persona sua, ut exemplo suo persuadeat omnibus alijs obediẽtiã exhibere Deo. Si enim ipse Rex, & Princeps supremus, ita tremit ad mandata Domini, & tanto affectu cupit illa implere; quid facere debent homines priuati? Vtinam, inquit dirigantur viæ meæ, idest, actiones meæ, consilia mea, sermones mei, dirigantur, idest, conformentur rectitudini legis tuæ. Ad custodiẽdas iustificationes tuas, idest, ad obseruandas leges tuas: lex enim Domini varijs nominibus in Scripturis, atque in hoc potissimum Psalmo appellatur, ut quoniam sæpissimè mentio eius facienda est; verborum varietate Lectoris fastidium minuatur. Igitur nunc dicitur lex, nunc præceptum, nunc mandatum, nunc sermo, nunc eloquium, nunc verbum, nunc alia, quæ perspicua sunt: interdum dicitur testimonium, ut supra monuimus, quoniam lex testificatur voluntatem Dei: interdum iustificatio, ut hoc loco, quia iustificat obseruatores suos, idest, iustiores facit, iuxta illud Apostoli Rom. 2. Factores legis iustificabuntur. Dixi autem, iustiores fieri, qui legem obseruant, quoniam prima iustificatio, qua ex peccatoribus effici-mur iusti, non potest legi tribui, sed gratiæ, dicente eodem Apostolo Gal. 2. Si ex lege iustitia, ergo Christus gratis mortuus est.

Tunc non confundar, cum per- VI. spexero in omnibus mandatis tuis.

Colligit magnum fructum ex directione viarum suarum ad custodiẽdas iustificationes Domini. Qui enim attendunt magnitudinem tanti legislatoris, si fortè dum operantur, non respiciant ad regulam diuinæ legis, & inueniant postea opera sua distorta, &

non

non conformia rectitudini legis Dei; miro modo confunduntur, & erubescunt, neque audent oculos ad Deum leuare, dicentes intra se, Quis ego sum, qui opera mea, aut verba mea, aut cogitationes meas ausus sum non conformare rectitudini mandatorum summi legislatoris, qui ea tanto zelo custodiri iussit? Dauid igitur magnum fructum existimat, ut verè est, non habere causam tantæ confusionis: ideò dicit optati dirigere vias meas ad custodiendas iustificationes Domini, quia tunc non confundar, neque erit cur erubescam coram te Domine cum perspexero in omnibus mandatis tuis, idest, cum respexero in omnibus actionibus meis ad regulam mandatorum tuorum, ut rectitudini eius conformem omnes actiones meas. Porro phrasis est linguæ hebraicæ; perspicere in mandatis, pro eo quod nos dicimus, perspicere ad munda. Ex his intelligimus quantum distent à spiritu, & pietate Dauidis, qui tam multa faciunt opera distorta, & nullo modo conformia legibus Dei; & tamen confusionem illam internam non concipiunt, quia magnitudinem legislatoris non considerant.

VII. Confitebor tibi in directione cordis, in eo quod didici iudicia iustitiæ tuæ.

Addit, quod non solum non confundetur, sed etià gratias ager Deo, quod eius gratia, & adiutorio didicerit obseruantiam legis diuinæ. Confitebor, inquit, tibi, idest, laudabo te, & gratias agam tibi, siue confitebor laudes tuas, & gratiam tuam: in directione cordis, idest, in rectitudine cordis, siue rectissimo corde; confitebor autem laudes tuas, in eo quod didici, idest, propterea quod gratia tua adiuuante didici, iudicia iustitiæ tuæ, idest, iustissimas leges tuas. Est autem hoc loco obseruandum, illud, didici, non significare simplicem cognitionem, quæ ad intellectum pertinet; sed certam persuasionem, & approbationem, quam illi soli habent, qui re ipsa legem obseruare

firmissimè apud se constituunt: quomodo accipitur vox discendi Ioan. 6. vbi Dominus ait, Omnis, qui audiuit à Patre, & didicit, venit ad me: illi enim discunt à Patre cælesti, qui intus in corde per infusionem Spiritus sancti certo persuadentur, bonum esse credere, vel conuerti, vel legem seruare, &c. nascitur autem hæc persuasio ex rectitudine cordis, quia rectis corde optimus videtur Deus, iuxta illud, Quam bonus Israel Deus his, qui recto sunt corde: quibus autem placet Deus, non possunt non placere omnes voluntates Dei, quæ per precepta manifestantur: quare & ipsa præcepta mirificè placent. Porro per iudicia iustitiæ, intelliguntur eadem præcepta legis diuinæ, quæ nunc dicuntur iudicia, nunc iustitiæ, nunc etiam iudicia iustitiæ. Iudicia dicuntur, quia sunt quædam sententiæ à Deo iudicatæ optimæ, siue quædam decreta, & statuta diuina: dicuntur etiam iustitiæ, quia sunt regulæ iustitiæ continent: dicuntur denique iudicia iustitiæ, quia sunt iudicia, & decreta iustissima. Itaque sensus versiculi est, Laudabo te recto corde, ex eo quod persuasus sum leges tuas esse iustissimas, & omnino custodiendas; quod totum non ex me, sed ex gratia tua me habere confiteor.

Iustificationes tuas custodiam, VIII. non me derelinquas vsquequaque.

Hæc est conclusio primi octonarij, quasi dicat, Igitur cum lex tua custodita faciat beatos, & à te summo legislatore sit proposita, & seuerissimè obseruari mandata; ego iustificationes tuas custodiam, idest, decreui, & statui omnibus viribus custodire: sed tu quoque vicissim non me deseras auxilio, & gratia tua, sine qua nihil possum: & si fortè iusto tuo iudicio ad modicum deseras me, ut intelligam infirmitatem meam, & ad te confugere, atque in te confidere discam, saltem non me derelinquas vsquequaque, idest, omnino, & in perpetuum. In hebræo habetur, Vsque nimis, siue, vsque valdè: quod

quod in eandem sententiam recidit. Sanctus enim David benenouerat, nulum esse in hac peregrinatione, qui aliquando non sentiat gratiæ subtractionem: ait enim in alio loco, Ego dixi in abundantia mea, non mouebor in æternum; Auertisti faciem tuam, & factus sum conturbatus, Psalm. 29. & in hoc ipso Psalmo 118. sæpè David repetit, se didicisse mandata Domini, & non minus sæpè rogat doceri eadem mandata.

Beth.

1. In quo corrigit adolescentior viam suam? in custodiendo sermones tuos.

Laudauit Dei legem à fine, & ab auctore; nunc laudat ab utilitate, quam adfert ei, cui datur. & quoniam nullus magis indiget lege, quam ingrediens iter vitæ, idest, adolescens, idè de illo peculiariter loquitur. Adolescens enim primo indiget lege Dei, quia in ipso maxime viget lex membrorum: secundo, quia nondum acquisiuit prudentiæ proprio experimèto: tertio, quia sicut viatori maxime prodest initio itineris inuenire rectam viam, ne posteaquam diu errauerit, cogatur maiore labore, & dispèdio reuerti ad principium viæ: sic etiam optimum est in adolescentia assuescere mandatis Domini, vt conseruet innocentiam. Bonum est viro, inquit Hieremias Thren. 3. cum portauerit iugum ab adolescentia sua. Quæritur hoc loco quid intelligendum sit per adolescentiorem. Non existimo Dauidem loqui de adolescente lapsò in varios errores, qualis erat filius prodigus de Euangelio: nam ad corrigendos similes errores necessaria est gratia pœnitentiæ, neque sufficit notitia, vel custodia legis: neq; videtur David loqui de iuniore, vt distingui potest, contra hominem veterem, idest, de homine renouato per gratiam; hic enim agitur de corrigendis erroribus, qui in homine renouato correcti censentur. Existimo igitur Dauidem simpliciter loqui de adolescente ratione ætatis, qui indiget remedio contra naturales

impetus naturæ corruptæ, quæ prona est ad malum ab adolescentia sua. Est igitur sensus, In quo corrigit, idest, qua arte, quo modo, quo remedio corrigit adolescentior viam suam, idest, actiones, siue vitam suam corruptam naturali deprauatione ex peccato originis, & propensam ad malum? In herbario, & græco habetur in futuro, in quo corrigit: sed in sensu nulla dissensio est: nam illud, in quo corrigit, idem est ac si dictum esset, in quo corrigere potest, siue quid habet, vnde corrigat errores, quos committet in adolescentia sua. Respondet, In custodiendo sermones tuos: qui enim ab adolescentia assuescit timere Deum, & ex eo sancto timore, sermones Dei, diuinas videlicet leges diligenter custodire; is haud dubiè multos vitabit errores. cuius rei exemplum habemus in Tobia iuniore, quem pater eius ab infantia timere Deum docuit, & abstinere ab omni peccato, Tob. 1.

In toto corde meo exquisui te: ne repellas me à mandatis tuis.

Ex hac tanta utilitate motus David, petit à Deo gratiam seruandi mandata, & proponit omnino illa seruare; & exemplo suo idem nos facere docet. ac primum ponit rationem, cur exaudiri debeat; quæ est ratio Euangelij, Quærite & inuenietis. & Omnis qui quærit, inuenit, Luc. 11. In toto corde meo, inquit, exquisui te. Hæc est ratio exauditionis, quia exquisuit Dominum toto corde, idest, quæsiuit gratiæ eius, & cupiuit illi placere, eiusque voluntatem adimplere. Ne repellas me à mandatis tuis; hæc est mira petitio, quasi Deus, qui mandauit madata sua custodiri nimis, repellere velit aliquem à madata suis custodiendis. Sed hic modus loquendi significat necessitatem gratiæ, quam illi soli cognoscunt, qui cupiunt mandata seruare, & viri uerum imbecillitatē experiuntur. Igitur, ne repellas me à mandatis tuis, hunc habet sensum, Ne deseras me gratia tua; alioquin idem

idem esset, ac si repelleres me ab impletione mandatorum tuorum, cum sine auxilio gratiæ illa seruari non possint.

III. In corde meo abscondi eloquia tua, ut non peccem tibi.

IV. Benedictus es Domine: doce me iustificationes tuas.

Addit aliam rationem, cur exaudiri debeat; & rursus petit gratiam legis implendæ. Ratio, cur exaudiri debeat, est magnum desiderium non peccandi, ac per hoc legis custodiendæ. In corde meo, inquit, abscondi eloquia tua, id est, in intimo recessu cordis posui legem tuam, siue, quod est idem, eloquia tua, ut nunquam obliuiscar eorum. Finis autem huius absconsionis est, ut non peccem tibi. Itaque desiderium non peccandi, facit, ut nunquam obliuisci velim legis diuinæ, & ut nunquam obliuiscar, abscondi eam in intimo corde, ut nulla res inde mihi illam eripere possit. Præmissa ratione exauditionis, addit petitionem, Benedictus es Domine, doce me iustificationes tuas; ubi illud, doce, ut supra diximus, non significat simplicem notitiam: hanc enim se habere testatur, cum dicit, in corde se abscondisse eloquia Domini; & supra dixit, Didici iudicia iustitiæ: sed significat gratiam implendæ legis. Tunc enim Deus docet iustificationes suas, cum per gratiam intus in animo inspirat delectationem legis, & facit, ut homo planè persuasus omnino velit legem seruare. Illud autem, benedictus es Domine, additur ad confirmandam rationem exauditionis, quasi dicat, tu Domine doce me iustificationes tuas, qui ab omnibus rebus creatis benediceris, quia implet omnia benedictione, & inde viuunt & florent. unde dicitur in Psalmo 83. Etenim benedictionem dabit legislator. Itaque Deus benedicitur, & benedicit; benedicitur dum laudatur, benedicit dum beneficia præstat.

V. In labijs meis pronunciaui omnia iudicia oris tui.

VI. In via testimoniorum tuorum
Card. Belarm. in Psal.

delectatus sum, sicut in omnibus diuitijs.

In mandatis tuis exercebor, & VII. considerabo vias tuas.

In iustificationibus tuis meditabor, non obliuiscar sermones tuos. VIII.

In his quatuor reliquis versiculis declarat amorem suum erga legem Domini; quia fortasse mox benedictionem legislatoris acceperat, quam paulo ante petierat. Dicit enim se habere legem Dei in ore, in voluntate, in intelligentia, & memoria, ac per hoc in omnibus partibus animæ. De ore dicit, In labijs meis pronunciaui omnia iudicia oris tui, id est, assidue loquutus sum, & prædico præcepta tua omnibus, qui audire volunt: per iudicia enim præcepta intelligimus, & per id quod additur, oris tui, intelligimus præcepta illa non esse humana, sed diuina, cum ore Domini manifestata sint. De voluntate, & affectu dicit, In via testimoniorum tuorum delectatus sum, sicut in omnibus diuitijs, id est, delectatus sum ambulare in via testimoniorum tuorum, sicut delectantur auari in omni copia diuitiarum. Magnus sanè affectus, & rarus apud homines: cum è contrario soleant plerique pro tenui lucro contemnere omnia mandata Dei. De intelligentia, siue cogitatione, dicit, In mandatis tuis exercebor, & considerabo vias tuas: nam, exercebor, hoc loco significat, exercebor meditando, ut ex voce hebraica manifestum est, unde etiam subditur idem alijs verbis, Et considerabo vias tuas. Est igitur sensus, In mandatis tuis ruminandis, & sæpè mecum submissa voce repetendis, & diligenter considerandis exercebor. De alio affectu cordis dicit, In iustificationibus tuis meditabor. Illud enim, meditabor, non est idem hoc loco cum, exercebor, quod rectè verti potuisset, meditabor: sed significat, delectabo ne ipsum ludendo in iustificationibus tuis decan-

Aaa tan-

וְשִׁמְרָנִי tandis. vox enim hebraica, est agasag, significat ludere, & oblectare seipsum. Supra dixerat, Delectatus sum in via testimoniorum tuorum, sicut in omnibus diuitijs, ubi mentionem facit delectationis ex re utili: nunc dicit, Oblectabo me ipsum ludendo in mandatis tuis, ut ostendat ex lege Domini sumi etiam delectationem, tanquam ex re dulci, & suavi. Quomodo etiā in Psal. 18. comparata est lex Domini auro, & melli, rei utili, & dulci. Hic igitur est sensus huius versiculi, In iustificationibus tuis meditabor, idest, in praeceptis tuis decantandis exercebor, ut inde delectationem animo percipiam, qualis iucundè ludendo percipitur. Addit vltimo de memoria, Non obliuiscar sermones tuos, idest, ex tam crebra meditatione, & suavi decantatione fiet, ut sermones tuos, idest, legem tuam nunquam obliuiscar. Hinc colligimus legem Domini habentibus benedictionem Legislatoris, idest, spiritum veræ charitatis, non esse grauem, neque difficilem, sed esse, ut Dominus ait in Euangelio Matth. 11. Iugum suauis, & onus leue.

Gimel.

1. Retribue seruo tuo, viuifica me, & custodiam sermones tuos.

In hoc octonario enumerat impedimenta legis custodiendæ, & orat ut à se remoueantur. Primum impedimentum est mors animæ: non enim possunt homines mortui seruare mandata vitæ, eo modo, quo oportet, ad vitam æternam acquirendam. Dauid autem etiam si sperare poterat, se esse viuum, tamen quia nemo scit vtrum odio, vel amore dignus sit, & quia transfigurabat personas peccatorum in se; ideo vel pro se, vel pro illis orat, & dicit, Retribue seruo tuo, viuifica me, & custodiam sermones tuos, idest, restitue seruo tuo, si fortè in peccatis mortuus sit, vitam animæ, & tunc sermones tuos custodire poterit. Illud, retribue, posset etiam explicari, pro, tribue, nam vox hebraica id facillè patitur: tamen hoc loco seruare possumus pro-

priam significationem latinam, si per, retribue, intelligamus, restitue, vel redde. Illud, viuifica me, in hebræo, & græco est, viuam, & tunc sensus est, Retribue, ut viuam, idest, restitue, vel redde vitam. Verba nostræ editionis sunt paulò obscuriora, sed in eundem sensum explicanda sunt; nimirum sic, Retribue seruo tuo, idest, iterum tribue mihi seruo tuo per gratiam, quod amisi per peccatum; & mox explicat, dicens, Viuifica me: hoc enim est, quod amisi, & vitæ restitutus ambulare incipiam viam mandatorum tuorum, & sic custodiam sermones tuos.

Reuela oculos meos: & considerabo mirabilia de lege tua. II.

Alterum impedimentum sunt passionis animi, amor, timor, desiderium, ira, & similes perturbationes, quæ sæpè faciunt, ut homo non rectè iudicet. de hoc dicit, Reuela oculos meos, idest, tolle per infusionem luminis tui velamen passionum ab oculis mentis meæ, & tunc oculo interiore purificato considerabo mirabilia de lege tua, idest, mirabilem æquitatem, mirabilem sapientiam, mirabilem vtilitatem, & alia id genus mirabilia, quæ de lege tua emicant.

Incola ego sum in terra, non abscondes à me mandata tua. III.

Tertium impedimentum est terrena peregrinatio; nam qua parte peregrinamur in terra, carnales, & terreni sumus: lex autem tota spiritualis est, ut dicitur Roman. 7. Quare nisi Deus per gratiam nos spirituales efficiat, legem spiritualement implere non possumus. Incola, inquit, sum in terra, idest, homo terrenus sum, animalis sum, in terra habito, dum peregrinor à patria; ideo peto, ut non abscondas à me mandata tua, idest, per gratiam efficias, ut capax fiam mandatorum tuorum. Potest etiam hoc referri ad ignorantiam viarum: vox enim hebraica, gher, propriè aduenam, & peregrinum significat; peregrini autem, & aduenæ

uenæ ignorantes sunt viarum, & facile decipiuntur à ciuibus regionis. Petit igitur aduena & peregrinus, vt Deus illi viam bonam ostendat, ac dicit, Non abscondas à me mandata tua, id est, fac vt me non lateat via mandatorum tuorum, quæ sola est recta via, quæ ducit ad vitam.

VI. Concupiuit anima mea desiderare iustificationes tuas in omni tempore.

Quartum impedimentum est imperfectio. Pauci enim sunt viri perfecti, qui toto corde diligant legem Dei, & ex amore iustitiæ operentur bona. Plurimi autem bonis desiderijs tanguntur, sed ultra non perficiunt. In horum persona Propheta dicit, Concupiuit anima mea desiderare iustificationes tuas in omni tempore. non potuit dicere, Concupiuit anima mea implere mandata tua, sed imperfectiorem suam confessus, ait, Concupiuit desiderare: & hæc ipsa confessio imperfectiōis, est petitio perfectiōis, quam Deus concedit, cum facit hominem ardentem desiderare custodiam mandatorum. Rectè docet Sanctus Augustinus, aliud esse concupiscentiam desiderij extra potentiam concupiscentem: aliud concupiscentiam desiderij intra eandem potentiam: concupiscentia enim prior potest esse sine desiderio eius rei, quæ concupiscitur; posterior non potest. exempli gratia: ægrotus, qui laborat inappetentia cibi, concupiscit desiderare cibum, & tamen non habet desiderium cibi, quia concupiscentia desiderij est in voluntate rationali, desiderium cibi deberet esse in faucibus & palato, vbi tamen non est, dum ibidem manet in appetentia cibi. At concupiscentia desiderij mandatorum Domini, in voluntate rationali est, & in eadem esse debet desiderium mandatorum: quare fieri non potest, vt homo concupiscat desiderare, & non desideret; quia ipsa concupiscentia est desiderium mandatorum. Intelligendum igitur est, per concupiscentiam desiderij, si-

gnificari imperfectum desiderium, vt paulò ante diximus; qui enim imperfectè desiderat, vult, & non vult, cupit & non cupit: & eiusmodi sunt plurimi, qui desiderant beatitudinem Regni cælorum, sed ita frigidè, ac tenuiter, vt nullus inde sequatur effectus: qui si ardore illo desiderarent, quo res tanta desideranda est, sine dubio non quiescerent, donec ad illam peruenirent: sed qui tales sunt, cum Dauide imperfectum suum in oratione Domino manifestent, ac dicant, Concupiui desiderare iustificationes tuas; adiua vt perfectè, ardentèrque desiderem, vt desiderium in opus transeat; & mandata tua custodiam omni tempore.

Increpasti superbos, maledicti, V. qui declinant à mandatis tuis.

Quintum impedimentum omnium maximum superbia est, quæ non sinit collum iugo submittere; sed hoc impedimentum in se Dauid nò agnoscebat, neque in sui similibus, sed solum in hostibus Dei; ideò simpliciter illud execratur. Increpasti, inquit, superbos, qui videlicet ex contemptu mandata non seruant. Talis fuit initio mudi Lucifer, quem Deus increpatione sua ad inferos tato impetu deturbauit, vt Dominus dicat, Videbam Satanam sicut fulgur de cælo cadentem, Luc. 10. Talis fuit & Adam, qui ex superbia, qua fieri voluit sicut Deus, Deo nò obediuit, & à Domino increpatus tulit sententiam mortis, pro se, & pro toto humano genere. Vide S. Augustinum tract. 4. in epist. Ioānis, & in Psal. 68. vers. 6. & lib. 14. de ciuit. Dei cap. 13. Deniq; superbos omnes terribili increpatione Deus in iudicio feriet: & ideò subiungit Dauid, Maledicti qui declinant à mandatis tuis, nimirum, qui declinant potissimum ex superbia, & contemptu Legislatoris: illis enim præcipuè dicetur, Ite maledicti in ignem æternum.

Aufer à me opprobrium, & VI. contemptum, quia testimonia tua exquisiui.

Aaa 2

Ete-

VII. Etenim sederunt Principes, & aduersum me loquebantur; seruus autem tuus exercebatur in iustificationibus tuis.

Superbi non solum obedire Deo recusant sed etiam contemnunt, & contumelijs afficiunt eos, qui obediunt: sed tandem contemptus, & opprobrium in eos recidet, vt hoc loco Dauid prädicit: nam vt sapè ex Augustino monuimus, ex quæ videntur in Psalmis imprecationes, prædictiones sunt per modum imprecationis. Ait igitur, Aufer à me opprobrium, & contemptum, idest, tempus erit, cum auferes à me opprobrium, & contemptum, & in superbos inobedientes reijcies: quia ego testimonia tua exquisiui, quæ illi videlicet exquirere contempserunt. In hebræo habetur, quia testimonia tua custodiui: sed Septuaginta verterunt, exquisiui, quod exponi debet, exquisiui vt custodirem. Declarat autem sequenti versiculo, cur dixerit, Aufer à me opprobrium, & contemptum, dicens, Etenim sederunt Principes, & aduersum me loquebantur, seruus autem tuus exercebatur in iustificationibus tuis. Principes enim superbi sederunt, vel congregati in concilium, vel in thronis suis iudicantes, vel quiescentes in diuitijs, & potentia sua, & aduersum me loquebantur exprobrantes obedientiam mandatorum Dei. Ego autem seruus tuus, non respiciens ad minas, vel opprobria eorum, exercebar in iustificationibus tuis, videlicet considerandis, prædicandis, & adimplendis. De quibus Principibus Dauid loquatur ad literam, incertum est: mysticè autem hæc referuntur à Patribus ad Principes infideles, qui Martyres persequebantur.

VIII. Nam & testimonia tua meditatio mea est, & consilium meum iustificationes tuæ.

Explicat quod dixit, Exercebar in iustificationibus tuis. Dicit enim, Testimonia Domini, & iustificationes

Domini, hoc est, præcepta Domini, fuisse sibi loco dulcis consolationis in rebus aduersis, in dubijs autem loco fidelis consiliarij. In hebræo habetur, Nam testimonia tua, gaudium meum, viri consilij mei, idest, lex tua mihi gaudium adferebat, & erat quasi vir consiliarius: nam in ea cogitanda oblectabar, & cum ea consultabam negotia mea. Ad hunc sensum reducenda sunt verba nostræ editionis, vt coherereant cum textu originali. Hic igitur erit sensus: nam & testimonia tua meditatio mea est, idest, lex tua est mihi dulcis exercitatio, quasi ludi, vel cantici, vnde consolationem accipio in rebus tristibus: & consilium meum iustificationes tuæ, idest, & consilium meum, quasi senatus meus, quem consulo in rebus dubijs, sunt mihi iustificationes tuæ, idest, eadem lex tua.

Valet.

Adhæsit pauimento anima mea; viuifica me secundum verbum tuum.

In hoc etiã octonario Dauid induit personam hominis imperfecti, qui ex carnali concupiscentia retardatur à perfecta impletionem mandatorum, & petit gratiam, & adiutorium ad seruanda mandata. Adhæsit, inquit, pauimento anima mea, idest, adhæsit terræ, hoc est terrena substantia per amoris affectum anima mea. Viuifica me secundum verbum tuum, idest, da mihi vitam conformem legi tuæ: nam adhærendo terræ factus sum terrenus adhærendo carni factus sum carnalis; sed si vixero secundum legem tuam, quæ spiritualis est, adhærebo Deo, & vnus spiritus fiā cum eo. In hebræo habetur, Adhæsi pulueri; sed idem est sensus: nam pauimentum est terra, vel ex terra. Itaque qui adhæret pauimento, adhæret terræ. Notat S. Augustinus, nunc animam adhærere carni, siue terræ, & ideò fieri carnalem, & terrenam, & impediri ab obseruatione perfectæ legis: sed post resurrectionem gloriosam, caro adhærebit animæ, & anima Deo, & ideò tunc caro fiet spiritualis, & anima quodam-

dammodo deificabitur, & sine vlla difficultate perfectissime legem observabit, imò non egebit lege, quia sine lege, ea, quæ sunt legis implebit.

II. Vias meas enunciaui, & exaudisti me; doce me iustificationes tuas.

Pergit in confessione miserix, & petitione gratix. Ego, inquit, vias meas enunciaui, idest, actiones malas, quæ propriè meæ sunt, non erubui confiteri, sed palam enunciaui, & tu exaudisti me parcens mihi, solita misericordia tua. Doce me iustificationes tuas, idest, nunc reconciliatus peto, vt doceas me iustificationes tuas, idest, præcepta tua seruare me facias. Illi enim, vt supra diximus, in hoc Psalmo doceri intelliguntur, qui ita persuadentur, vt faciant.

III. Viam iustificationum tuarum instrue me, & exercebor in mirabilibus tuis.

Proficere cupit in via Domini, idè magis, & magis precibus instat, vt doceatur à Deo. Viam, inquit, iustificationum tuarum instrue me, idest, diligentius doce me, quæ sit via præceptorum tuorum, quomodo videlicet ambulare debeam in lege tua. Et exercebor in mirabilibus tuis, idest, in schola tua edoctus exercebor in custodiendis illis etiam præceptis, quæ tam mirabilia sunt, vt præ altitudine vix per ea incedi posse videatur, qualia sunt, Diliges Deum ex toto corde; &, Non concupisces; &, Diliges inimicum tuum, & similia.

III. Dormitauit anima mea præ te, dio, confirma me in verbis tuis.

Iterum redit ad infirmitatem carnis confitendam, & misericordiam postulandam. Nam in hac peregrinatione vix inuenitur, qui non aliquando laxetur, & præ tædio continuè luctæ, quam habet spiritus cum carne, dormitet, & tepidior fiat. Dormitauit, inquit, anima mea præ tædio, dum videlicet tædet ambulare viâ laboriosam,

Card. Belarm. in Psal.

carne concupiscente aduersus spiritum. Confirma me in verbis tuis, idest, in præceptis tuis sectandis confirma me, addito seruire gratiæ tuæ, quo excitatus ambulare non cessem. In hebræo pro verbo, dormitauit, est verbum, distillauit. Non est improbable Septuaginta Interpretes vertisse, ἵσταται, quod est, distillauit, & postea errore libræriorum factum esse, ὕσταται, quod est, dormitauit. Certè Sanctus Ambrosius vtriusque lectionis meminit. In hebræo autem nulla est similitudo literarum inter dormitauit, & distillauit: nam distillauit, scribitur, dalepha; dormitauit scribitur, ianus: sensus tamen in idem recidit: nam distillauit anima mea, significat, defecit anima mea instar earum rerum, quæ liquefiunt, & distillant humorem suum. Qui autem deficiunt, & liquefiunt præ tristitia, solent etiam deficiendo dormire, Luc. 22. Inuenit eos dormientes præ tristitia. Vox tædium græcè est, ἀκidia; acidia autem est tristitia de bono opere faciendo.

דלפה
יגוס

Viam iniquitatis, amoue à me, v. & de lege tua miserere mei.

Declarat pluribus verbis, quod vno verbo dixerat, confirma me. Viam inquit, iniquitatis amoue à me, idest, fac per gratiam tuam, vt longè recedam à via iniquitatis, idest, à lege peccati, quam ingredi incipiebam dormitando præ tædio: & contra, de lege tua miserere mei, idest, misericorditer operare, vt ambulem per legem tuam. In hebræo habetur, Viam mendacij amoue à me; & opponitur ei, quod dicitur in sequenti versiculo, Viam veritatis elegi; sed sensus est idem: nam via iniquitatis est via mendacij, quia est via falsa, & fallax, & potius deuium, quàm via, & per eam ambulare, non est viam carpere, sed deuiare. Illud autem de lege tua miserere mei, est clarius in hebræo, Legem tuam dona mihi. sed idem est sensus: est enim ac si dixisset, miserere mei donando legem tuam.

Aaa 3 Viam

VI. Viam veritatis elegi, iudicia tua non sum oblitus.

Haftenus confessus est miseriam, quam ex se habet: nunc in sequentibus versiculis declarat, quid possit ex misericordia Dei, quasi dicat, ex me viam mendacij elegi: sed ex misericordia tua, qua de lege tua misertus es mihi, viam veritatis elegi, idest, iam serio proposui veram viam, quæ est via mandatorum tuorum, ambulare: & ex misericordia tua, iudicia tua, idest, legem tuam non sum oblitus, quamvis caro aduersus spiritum vehementer concupisceret.

VII. Adhæsi testimonijs tuis Domine, noli me confundere.

Ex me adhæsi pauimento: sed ex misericordia tua adhæsi testimonijs tuis. & quamvis carne seruiam legi peccati, tamen mente seruiam legi tuæ, & ideo noli me confundere: quod fieret, si auxilio tuo me destitueres.

VIII. Viam mandatorum tuorum cucurri, cum dilatasti cor meum.

Ex me dormitavi præ tædio, sed ex misericordia tua viam mandatorum cucurri, idest, alacriter, expedite, cum delectatione legem tuam seruauimus, cum dilatasti cor meum per infusionem charitatis, quæ facit iugum suaue, & onus leue.

He.

I. Legem pone mihi Domine viam iustificationum tuarum: & exquiram eam semper.

In hoc octonario petit ordine quodam primo desiderium obseruandæ legis, deinde lumen ad eam intelligendam, tertio gratiam ad implendam: postea vero petit remotionem contrariorum. Dauid enim in hoc lógissimo Psalmo rem eandem sæpius repetit, sed sub varijs verborum formis ad excitandum affectum, & tollendum fastidium. primi versiculi hic sensus est, Fac Domine, vt nullam aliam legem velim, nisi legem tuam. Legem pone mihi Domine

viam iustificationum tuarum, idest, stae tue mihi pro lege viam iustificationum tuarum, idest, pone mihi in corde desiderium solius legis tuæ. In hebræo clarius habetur, Doce me viam præceptorum tuorum. Sed Septuaginta Interpretes considerantes quòd à verbo, iarah, fit vocabulum, thorah, quod legem significat, prudenter intellexerunt verbum, horeni, quod hoc loco habetur, non solum docere, sed etiam legem ferre significare posse, & ideo verterunt νομοδιδασκαλος, quod latinus vno verbo exprimere nō potuit, & ideo sensum obscuriorem fecit. Hinc cessant quæstiones, cur dicatur, legem pone, cum iam dudum lex tradita sit. & cur iustus roget, vt sibi lex ponatur, cum Apostolus dicat, Iusto non est lex posita. hæc quæstiones cessant, quia non petit Prophetæ sibi legem absolutè poni, Sed petit, vt per gratiam Dei fiat, vt sibi non placeat lex peccati, vel mundi, vel carnis, sed sola lex Dei. illam solam sibi in corde, in desiderio, in affectu poni cupit. & ideo subdit, & exquiram eam semper, idest, si illam solam ex munere tuo desiderabo, fiet, vt in omni mea actione quæram quid iubeat lex tua. S. Hieronymus vertit, vestigium, pro eo, quod nos habemus, semper, sed vox hebræa est ambigua, & vestigium, & finem significat. & vtræque modo sensus est bonus, siue dicat, exquiram vestigium, nimirum legis, hoc est, sequar eam: siue exquiram vsq; in finem, idest, semper.

**II. Da mihi intellectum, & scruta-
bor legem tuam, & custodiam illam in toto corde meo.**

Postea quam petiuit desiderium siue affectum legis, petit etiam intellectum, vt rectè illam intelligat, & scrutari possit eius vtilitates, & præstantiam, ac cæteras eius laudes. idque vt custodiat illam in toto corde suo; non enim cupit intelligere ad curiositatem, sed ad obseruantiam.

**III. Deduc me Domine in semitam
mandatorum tuorum, quia ipsam volui.**

Nunc

ירה
תורה
הורה

Nunc tertio postulat gratiam implendi legem. Deduc me Domine in semitam mandatorum tuorum, idest, fac me implere mandata tua, id enim est, incedere per semitam mandatorum. Vocantur autem semitæ, quia semitæ sunt viæ angustæ, breues, rectæ, mundæ, per quas non solent incedere nisi homines pedites; non equi, non cursus. & talis omnino est lex Domini, si comparetur ad leges carnis, & mundi, quæ sunt viæ latæ, sordidæ, obliquæ, & per eas animalia expertia rationis, id est, homines animales, & carnales incedunt. Ratio autem cur debeat exaudiri, est in illis verbis, quia ipsam volui, idest, quia hanc semitam elegi, & per eam ambulare desideravi, ex munere Dei. decet enim, ut qui dedit velle, det etiam perficere, iuxta promissionem Apostoli Philip. 2. Qui operatur in vobis velle, & perficere.

IV. Inclina cor meum in testimonia tua, & non in avaritiam.

Hic versiculus respondet primo. ibi enim orauerat pro affectu cordis erga legem Dei: hic orat pro remotione affectus avaritiæ, qui maximè impedit affectum erga legem Dei. Inclina cor meum in testimonia tua, idest, infunde cordi meo copiosam gratiam, per quā inclinetur in custodiam legis tuæ, & non in avaritiam, idest, & non inclines cor meum in avaritiam. Dicitur autem Deus inclinare aliquem in malum, quando deferendo gratia sua, finit illum inclinari in malum. Itaque isto modo loquendi Scriptura sancta demonstrat potentiam gratiæ, non autem quod Deus propriè inclinet aliquando ad malum. similia sunt illa Rom. 1. Tradidit illos in reprobum sensum. & Isaïæ 63. Quare nos errare fecisti de via tua?

V. Auerte oculos meos ne videant vanitatem, in via tua viuifica me.

Hic etiam versiculus recto ordine respondet secundo: nam ibi petijt donū intelligentiæ, ad considerandam legem:

hic petit, ne oculi mentis auertantur à lege ad vanitates. Auerte oculos meos, ne videant vanitatem, idest, ne occupentur in cogitandis temporalibus rebus, quæ vanæ sunt: sed potius effice, ut totus intendam legi tuæ, & sic in via tua viuifica me, idest, in via tua ambulanti, hoc est, legem tuam custodienti viuifica, refice, & conserua.

Statue seruo tuo eloquium tuum, in timore tuo. VI.

Nonnulli significari existimant per eloquium Domini promissa Domini, & volūt sensum esse, Statue eloquium tuum, idest, imple promissa tua. Nos autem existimamus cum Sancto Augustino, per eloquium, intelligi legem, & sensum esse, Statue seruo tuo eloquium tuum in timore tuo, idest, fac ut per sanctum timorem tuum statuatur, confirmetur, solidetur lex tua in seruo tuo, ut immobiliter in illo hæreat, & perseveret. Itaque respondet hic versiculus tertio versiculo: ibi enim petitur gratia legis implendæ; hic petitur remotio instabilitatis, & petitur gratia perseverantiæ.

Amputa opprobrium meum, quod suspicatus sum: quia iudicia tua iucunda. VII.

Magnum erit opprobrium in die iudicii, & nunc est etiam in conspectu Angelorum, non perseverasse in lege seruanda, cum lex Domini non solum utilis, sed etiam suavis sit, & iucunda. Ideò cum petijisset gratiam perseverantiæ, addit quasi rationem, timorem videlicet opprobrii, quod sequetur non perseverantes. Amputa, inquit, opprobrium, quod suspicatus sum, idest, quod timui si non perseverarem in lege tua, cum tam bona sit: iudicia enim in hoc Psalmo præcepta significant.

Ecce concupiui mandata tua, in æquitate tua viuifica me. VIII.

Concludit petitiones huius octonarij dicēs, iam satis patere, quòd ex corde cupiat mandata seruare. Ecce, inquit,

quit, concupiui mandata tua, quasi dicat, Ecce apparet, quod serio cupiam mandata tua: ideo in æquitate tua, id est, in ipsis mandatis tuis, id est, in observatione mandatorum viuifica me, id est, auge, & conserua mihi spiritua-lem vitam. Iustus enim iustificatur adhuc, dum mandata custodit.

Vau.

- I. Et veniat super me misericordia tua Domine, salutare tuum secundum eloquium tuum.

Illud, & nihil cōtinuat, sed additur ad initium librorum vel capitulorum ornatus gratia apud hebræos, sic enim incipit liber Leuitici, liber Ruth, liber Ezechielis. sic incipiunt multa capita- la, vt Illa 7. Et factum est. & cap. 8. Et dixit Dominus. In hoc autem octona-rio ad singulos versus additur, Et, quo- niam debet omnes versus incipere per Vau, & per hanc literam nulla ferè vo- cabula incipiunt excepta coniunctiua particula, & Petit autem Propheta ini- tio octonarij misericordiam Dei, ac deinde in reliquis versibus declarat ef- fectus huius misericordiae, qui potissi- mum pertinent ad legis diuinæ custo- diam. quem finem, & quasi scopum to- tus Psalmus respicit. Ait igitur, Veniat super me misericordia, id est, descēdat ex alto gratia tua, & misericordia sup- me. Declarat autem quæ sit hæc miseri- cordia, addens, salutare tuum secundum eloquium tuum, id est, salus tua, siue mi- sericordia sanans animam, secundum eloquium tuum, quo promissisti miseri- cordiam, & salutem sperantibus in te.

- II. Et respondebo exprobranti- bus mihi verbum, quia speraui in sermonibus tuis.

Et cum venerit super me miseri- cordia tua secundum promissionem tuam, non timebo aduersarios exprobrantes mihi, q̃ frustra Deum timeam: nam re- spondebo illis verbum verum, cui non poterunt contradicere, quod videlicet sperauerim in sermonib⁹ tuis, qui pro- missa tua seruare potes, quia es omni- potens, & seruare vis, quia bonus es.

Et ne auferas de ore meo ver- bum veritatis vsquequaque: quia in iudicijs tuis supersperaui.

Oro autem, vt hoc verbum veritatis, quo gloriatur aduersus exprobrantes mi- hi, non auferas de ore meo, id est, nō ef- ficias, me destituendo gratia tua, vt nō audeam hoc verbum loqui, non clau- das ora de te confidentis, & promissa tua prædicantis. vel si auferas ad modi- cum, vt probes me, non auferas vsque- quaque, non auferas omnino, vel in æ- ternum. Quia in iudicijs tuis superspe- raui, id est, quia in tua iustitia & fide- litate multum omnino speraui. S. Augu- stinus refert hoc ad electos Martyres, qui si ad tempus permisi sunt negare veritatem, non tamen vsquequaq; ne- gare permisi sunt, sed post negationē fleuerunt, & post confessionem coro- nam meruerunt, quales fuerunt S. Pe- trus, S. Marcellinus, & alij permulti.

Et custodiam legem tuam sem- per, in seculum, & in seculum seculi.

Hic iam subiicit effectum miseri- cordiae sanantis animam, qui est perpetua legis diuinæ custodia.

Et ambulabam in latitudine, quia mandata tua exquisiui.

Et loquebar de testimonijs tuis in conspectu Regum, & non confundebar.

Et meditabar in mandatis tuis, quæ dilexi.

Et leuaui manus meas ad man- data tua, quæ dilexi, & exerce- bar in iustificationibus tuis.

His quatuor versiculis explicat per partes, quæ sit perpetua legis custodia, quam promissit in quarto versiculo, di- cens, se corde, verbo, mente, & opere in lege Domini semper futurum! & quidem in hebraico textu hæc omnia habetur in futuro, ambulabo, loquar, meditabor, leuabo, exercebor. Sed quia

quia tempora variant significationes apud Hebræos, non debent reprehendi Septuaginta, & Latinus interpres, qui per præteritum imperfectum ista reddiderunt. Videtur autem Propheta ut mox exauditus mutasse modum loquendi. Dicit enim, Et ambulabam in latitudine, idest, veniente misericordia Domini super me, iam ambulabam non in angustiis timoris, sed in latitudine dilectionis, idest, libenter, cum gaudio magno affectu cordis legem seruabam, quia illam exquisiui, ut rem valde desideratam, & amatam. & loquebatur liberè, & sine timore de iustitia sanctissimæ legis, etiam coram Regibus iniquis & non confundebar. & assidue cum animo meo de ipsa lege cogitabam, & eius mysteria meditando considerabam. & leuaui manus meas ad implenda mandata sublimia, & excelsa, idest, valde perfecta, & ardua. vel, ut exponit Sanctus Augustinus, Leuaui manus ad opera legis, quia propter finem altissimum legem custodiui; qui enim propter mercedem temporalem legem custodiunt, non leuant, sed deprimunt manus, dum operantur, neque dicere possunt, ad mandata tua, quæ dilexi. non enim diligunt mandata, qui legislatorem non diligunt. denique his omnibus modis, idest, corde, mente, verbo, & opere exercebar in iustificationibus tuis.

Zain.

In hoc octonario canit Propheta æternam retributionem, quam Deus legem seruantibus repromisit. ac propter eam spem dicit, se & legem seruasse, & in tribulatione consolationem accepisse, & de iniquorum præuaricatione doluisse.

I. Memor esto verbi tui seruo tuo, in quo mihi spem dedisti.

Non potest obliuisci Deus, nec voluntatem mutare, neque sententiam retractare: sed per figuram quandam sermonis humani dicitur Deus obliuisci, quando differt implere, quod promisit, quasi promissi sui esset oblitus. Differt autem aliquando Deus imple-

re promissa sua, non obliuione, sed iudicio. & quamuis facturus sit omnino Deus, quod facere decreuit, vult tamè rogari à fidelibus seruis suis, & hæc oratio est vnū ex medijs, per quæ Deus promissa sua adimplere decreuit. Orat igitur Dauid in persona sua, & aliorum fidelium dicens: Memor esto verbi tui, idest, promissi tui, in quo mihi spem dedisti, cum dixisti seruo tuo Abraham, & in illo omnibus filiis eius, Ambula coram me, & esto perfectus, ego ero merces tua magna nimis.

Hæc me consolata est in humilitate mea, quia eloquium tuum viuificauit me.

Illud, hæc, non potest propriè referri ad spem, ut communiter exponitur, quoniam in textu hebraico, unde cæteræ editiones translatae sunt, non habetur nomen spei, sed verbum, & verti potuisset, Memor esto verbi tui, in quo me sperare fecisti. Sensus igitur est, Hæc res, siue, hoc me consolatione affecit in humilitate mea, idest, in afflictione, & despectione mea. quia eloquium tuum, idest, promissio tua viuificauit me, idest, vitam, & spiritum mihi tribuit, vel roborauit, & auxit.

Superbi iniquè agebant vsquequaque: à lege autem tuam non declinaui.

Vita, & vigor, quem mihi tribuit promissio tua, in causa fuit, ut non declinarem à lege tua, etiam si superbi irrisores iniquè agerent valde, cum me irrisoribus suis à legis custodia auertere conarentur. In hebræo, pro, iniquè agebant, habetur, irridebant me. Sed idem est sensus.

Memor fui iudiciorum tuorum à seculo Domine, & consolatus sum.

In humilitate, & irrisoribus inemor fui iudiciorum tuorum à seculo, idest, iudiciorum, quæ ab initio seculi exercuisti exaltans humiles, & superbos deprimens, reddens custodientibus legem tuam præmia magna, & præuaricatoribus

ribus magna supplicia; & hinc accepi in omni tribulatione mea solatium.

- V. Defectio tenuit me pro peccatoribus derelinquentibus legem tuam.

Eadem illa spes tantæ mercedis fecit, ut misereretur hominum peccatorum, qui derelinquentes legem tuam tanto bono priuantur. vox hebraica pro qua nos habemus, defectio, significat horrorem, siue tremorem, ardorem, siue æstum. Sed noster Interpres vertit, defectionem, ut significaret tantum esse horrorem, & æstum de quo agit Propheta, ut defectionem inducat. magnæ charitatis indicium est, contremiscere, ardere, deficere ex misericordia erga peccatores, vel ex dolore offensionis diuinæ. nam de vtraque defectione versiculus iste potest exponi.

- VI. Cantabiles mihi erant iustificationes tuæ in loco peregrinationis meæ.

Iniqui legem derelinquunt, quia insuauem esse iudicant: mihi autem scienti quanta merces reposita sit custodientibus legem tuam, iustificationes tuæ, idest, præcepta tua usque adeo dulcia, & suauia erant, ut in hac peregrinatione, qua peregrinamur à patria, dulce canticum fuerint. In hebræo legimus, Carmina mihi fuerunt præcepta tua. quare illud, cantabiles significat, leges Domini non fuisse sibi graues, quæ cum labore portandæ essent, sed suauis, quæ instar carminum, oblectare possent.

- VII. Memor fui nocte nominis tui Domine, & custodiui legem tuam.

Illa beata spes tantæ promissionis non solum interdiu, sed etiam noctu mihi nomen tuum in memoriam reuocabat: & ex affectu nominis tui, idest, ex ardenti amore tuo perseueraui in custodia legis tuæ.

- VIII. Hæc facta est mihi, quia iustificationes tuas exquisiui.

Quærunter Interpretes, quid sit illud, hæc, an hæc spes, an hæc lex, an hæc

promissio, an quid aliud. Sed apud hebræos genus femininum ponitur pro neutro, quo illi carent. Itaque sensus est, Hoc totum mihi euenit, nimirum, ut promissiones Dei considerarem, & spem inde conciperem, & cætera bona, quæ inde nata sunt, quia iustificationes tuas exquisiui. Vult enim Propheta in hoc Psalmo, qui est encomium legis, omnia referre ad ipsam legem diligenter inuestigandam, & amandam; ut hac ratione excitet homines ad considerationem, & impletionem legis.

Cheth.

Portio mea Domine, dixi custodire legem tuam.

In hoc octonario ponitur initio hæc propositio, Dominus est portio mea; inde deducitur desiderium legis diligenter custodiendæ, & preces ad Deum pro gratia legis implendæ, non obstantibus quibuscumque impedimentis. Portio mea Domine, subintelligitur, tu es. Quamuis enim aliqui coniungant cum sequentibus, ut sensus sit, Portio mea, o Domine, dixi erit, custodire legem tuam: tamen multo verius est, sensum esse, Portio mea tu es Domine. nam in græco additur verbum, es: & in hebræo ponitur distinctio post vocabulum, Domine, & posset etiam legi, portio mea Dominus. estque id conforme alijs locis, ut Psal. 15. Dominus pars hereditatis meæ. & Psalm. 72. Pars mea Deus in æternum. & Thren. 3. Pars mea Dominus. & sic exponunt hunc locum sancti Patres, Hilarius, Ambrosius, Hieronymus, Augustinus. Felix anima, quæ ex corde dicere potest, Portio mea tu es Domine, idest, omnibus rebus creatis abrenuncio, nihil iuris in eis habere cupio, occupet ea quicumque voluerit, mihi tu Domine solus sufficis, neque aliud requiro, aut requiram in æternum: & quia, ut te aliquando possideam, tibi soli placere cupio, ideo dixi, statui, firmiter proposui custodire legem tuam. scio enim, quia non dignaris esse portio eorum, qui legem tuam non custodiunt.

Depre-

- II.** Deprecatus sum faciem tuam in toto corde meo, miserere mei secundum eloquium tuum.

Dixit, custodire legem Domini; sed quia sine adiutorio Dei vires humanæ non sufficiunt, ideo deprecatur faciem Domini in toto corde suo, & dicit, miserere mei secundum eloquium tuum, idest, secundum promissionem tuam miserere mei, vt te adiuuante impleam, quod te inspirante decreui.

- III.** Cogitavi vias meas, & conuer-
ti pedes meos in testimonia tua.

Non satis est Deum orare, sed oportet etiam cooperari auxilio Dei, ideo Propheta posteaquã precatus est Deum, addit, Cogitavi vias meas, rectè ne, an secus ambulare, item consideraui actiones meas, an legi Dei conformes essent, & conuertere pedes meos in testimonia tua, idest, & conuertere affectus meos à lege carnis, & peccati, ad legem tuam Domine, quæ sola est via recta.

- IV.** Paratus sum, & non sum turbatus, vt custodiam madata tua.

Nec solum legem custodire decreui, sed promptus fui statim aggredi opus iustum, neque vlla perturbatio me retardare potuit à custodia legis tuæ. In hebræo legitur, Festinaui, & non tardaui custodire mandata tua. Sed idem est sensus: nam qui imparatus est non potest festinare, & qui turbatur, hære solet, & moram facere. Ideo, illud, paratus sum, sic explicandum, Nullum tempus obseruandæ legis me imparatum inueniet, vt festinare non possim, sed semper paratus sum, & expeditus ad opus celeriter implendum: & nunquam turbatus sum, vt propterea moram facere me oporteat.

- V.** Funes peccatorum circumplexi sunt me, & legem tuam non sum oblitus.

Non defuerunt tamen qui me perturbare, & retardare conarentur: nam funes peccatorum, idest, laquei, siue

retia variarum tentationum, quæ peccatores homines, siue Dæmones tendere solent, circumplexæ sunt me: & tamen legem tuam non sum oblitus, idest, facere non potuerunt tentationes illæ, vt legis tuæ obliuiscerer, & ab ipsa implenda retardarer.

- VI.** Media nocte surgebam ad confitendum tibi super iudicia iustificationis tuæ.

Quia tu es Domine portio mea, non solum interdiu, sed etiam noctu, imò etiam media nocte, quando summa quies est in terris, vacaui legi tuæ considerandæ; surgebam enim media nocte ad confitendum tibi, idest, ad te laudandum super iustissima, & sapientissima præcepta tua. Sanctus Augustinus interpretatur hunc versiculum de tempore persecutionis, quod per noctem significari solet. Sed ad literam videtur omnino intelligendus Propheta de laudibus nocturnis, vt exponunt Hilarius, Ambrosius, Hieronymus, Theodoretus, & alij ferè omnes. Atque hinc didicit Ecclesia surgendum esse media nocte ad nocturnam Psalmodyam; huc enim locum allegant auctores, qui de diuinis officijs scripserunt.

- VII.** Particeps ego sum omnium timentium te, & custodientium mandata tua.

Hoc etiam deducitur ex prima illa propositione, Portio mea Dominus: omnes enim timentes Deum, & custodientes mandata eius, colligantur tanquam membra viua in vnum corpus, glutino charitatis, quæ dicit, portio mea Dominus. & hoc modo singuli sunt participes omnium, quia charitas facit omnia communia. & si gaudet vnum membrum congaudent omnia membra, & si dolet vnum membrum, condolent omnia membra. Sanctus Augustinus exponit hunc versiculum de Christo, qui per assumptionem carnis humanæ factus est particeps omnium timentium Deum, iuxta illud Apostoli ad Hebr. 2. Quia pueri communicauerunt carni & sanguini, & ipse

& ipse participauit eisdem. & paulo ante; Vnde, inquit, non confunditur fratres eos vocare. sed prior expositio est communis, & magis literalis.

VIII. Misericordia tua Domine plena est terra: iustificationes tuas doce me.

Ego quidem particeps sum omnium timentium te: sed misericordie tue participes sunt omnes qui habitant in terra, & boni, & mali; & homines, & iumenta; & animata, & inanimata. Proinde miserere mei, vt doceas me iustificationes tuas. hæc enim summa miseria est non scire legem tuam, vt sciunt, qui illam implent. Hanc miseriam tollat à me misericordia tua. quia hoc vnum ambio, hoc concupisco, cum tu sis portio mea Domine.

Teth.

I. Bonitatem fecisti cum seruo tuo Domine, secundum verbum tuum.

II. Bonitatem, & disciplinam, & scientiam doce me, quia mandatis tuis credidi.

In hoc octonario petit à Deo Propheeta tria dona necessaria ad custodienda præcepta Domini: & ostendit ex effectis, horum donorum necessitatem. Primum igitur utitur quodam quasi proœnio dicēs: Bonitatem fecisti cum seruo tuo Domine, idest, suauitatem, & benignitatem, siue mansuetudinem tuam exhibuisti seruo tuo. secundum verbum tuum, idest, iuxta promissiones tuas. quamuis enim in hebræo legatur, tob, quod significat bonum, & verti possit, vt vertit Sanctus Hieronymus, Benefecisti seruo tuo: tamen Septuaginta Interpretes legerunt, tub, bonitatem, vt etiam in sequenti versu; & utrobique verterunt, *χρησθέντα*, idest bonitatem, siue suauitatem. sequitur postea, Bonitatem, & disciplinam, & scientiam doce me, idest, sicut Domine bonitatem, siue suauitatem erga seruum tuum ostendisti; ita rogo, vt doceas me eandem bonitatem, siue sua-

uitatem, quam exhibeam proximis meis, ita vt nulli nocere, nullum decipere, nullum fraudare velim: sed addas etiam, vt doceas me disciplinam, idest, prudentiam, vt caueam deceptores, & fraudulentos; & sic habeam suauitatem & bonitatem columbæ, vt nõ desit mihi consilium & prudentia serpentis. Intellego autem per vocem, disciplinam, virtutem prudentiæ, quia hoc requirit vox hebraica, taham, quæ significat propriè saporem, & consilium. neque vox græca, & latina hanc significationem respuunt, cum sint vocabula generalia. Denique post bonitatem, & prudentiam, peto etiam scientiam, qua agnoscam mysteria legis tue, quæ scientia, sicut sine bonitate & prudentia inflat, ita habentibus bonitatem, & prudentiam vtilissima est. sequitur, Quia mandatis tuis credidi, idest, quia credidi mandatorum tuorum promissionibus, siue credidi mandata tua diuina esse, & dignissima, quæ diligentissimè custodiantur. Obseruandum est hoc loco, plerisque homines scientiam querere, vel prudentiam, de bonitate parum laborare; sed Propheeta à Spiritu sancto edoctum rectum ordinem esse secutum, vt primò bonitatem, deinde prudentiam, vltimò scientiam postularet.

III. Priusquam humiliarer, ego deliqui: propterea eloquium tuum custodiui.

IV. Bonus es tu, & in bonitate tua doce me iustificationes tuas.

Declarat necessitatem trium illorum donorum, quasi dicat, non sine causa peto bonitatem, disciplinam, & scientiam: nam ex defectu horum donorum deliqui, & propter delicta humiliatus sum à Deo iusto iudice. Priusquam humiliarer per immissionem tribulationum, ego deliqui per ignorantiam, quia scientia carui: nam vox hebræa, sagag, quæ hoc loco habetur, significat ignorare, siue delinquere ex ignorantia. sequitur, Propterea eloquium tuum custodiui, idest, propterea deinceps

deinceps attentius custodiui legem tuam: sed tu qui bonus, idest, suavis, & benignus es, in hac tua bonitate, idest, iuxta hanc mansuetudinem tuam doce me iustificationes tuas, vt non amplius delinquam.

V. Multiplicata est super me iniquitas superborum: ego autem in toto corde meo scrutabor mā data tua.

VI. Coagulatum est sicut lac cor eorum, ego vero legem tuam meditatus sum.

Hic significatur necessitas alterius doni, videlicet prudentiæ. Multiplicata est super me iniquitas superborum, id est, superbi prauaricatores multiplicarunt super me mendacia sua, vt me ad transgressionem inducerent. vnde prudentiæ donum mihi necessarium fuit, quo dono adiutus in toto corde meo scrutabor mandata tua. In hebræo pro vocabulo, iniquitas, habetur שקר scecher, idest, mendacium. vnde intelligimus per, iniquitatem, ipsum mendacium, quod sine dubio quadam iniquitas est, præcipue si mendacium sit perniciosum. Coagulatum est sicut lac cor eorum, idest, superbi illi induratum cor habent, sicut induratur caseus ex lacte coagulato cōfectus; ideo illis dimissis, legi tuæ meditandæ vacauit. In hebræo legitur, adeps pro lacte: sed eadem literæ mutatis punctis vtrunque significant: nam, chalab, est lac, & cheleb, est adeps.

VII. Bonū mihi quia humiliasti me, vt discam iustificationes tuas.

VIII. Bonum mihi lex oris tui super millia auri, & argenti.

Ex abundantia primi doni, quod iam consecutus erat, dicit, bonum mihi, quia humiliasti me, neque enim hoc dicere potest nisi homo verè mitis, & humilis corde, ac per hoc verè bonus, qui per experientiam iudicium de bono ferre potest. Existimat enim is, qui verè bonus est magnum donum humiliationem ex tribulatione venientem,

quoniam causa est custodiæ legis, quæ quantum sit bonum, explicatur in versiculo sequenti, Bonum mihi lex oris tui super millia auri, & argenti. & verè ita est, quoniam per custodiam legis acquiritur vita æterna, cui nulli thesauri comparari possunt.

Iod.

Manus tuæ fecerunt me, & plasmauerunt me, da mihi intellectū vt discam mandata tua.

In hoc octonario multis nouis argumentis poscit gratiam legis custodiendæ. ac primum ex eo, quod cum sit signum summam obedientiam. Manus tuæ fecerunt me, & plasmauerunt me, idest, potetia tua, & sapientia tua, quasi duæ manus tuæ fecerunt me, cum non essem, & plasmauerunt me ordinantes membra, & potentias, cū essem initio quasi massa luti. vel fecerunt me quo ad animam, & plasmauerunt quo ad corpus. Ideo cum totus sim tuus, debeamq. tibi summam obedientiam, peto vt des mihi intellectum, vt discam mandata tua, non vt solum sciam, sed etiam faciam. In hebræo pro plasmaui, habetur, parasti, siue firmasti, per quod intelligitur perfecta formatio, & distinctio membrorum, vnde fit, vt homo subsistat. Item pro, da mihi intellectū, in hebræo, & græco est vna vox tantū, quæ significat intelligentem facere. Itaque illud, da mihi intellectum, non significat, da mihi vim intelligendi, quasi sine ea formatus esset, sed, da mihi lumen diuinum, quo mens mea perfectè discat mandata tua, & sibi persuadeat optimum esse illa complere.

Qui timent te, videbunt me, & lætabuntur, quia in verba tua supersperavi.

Hæc est secunda ratio, quæ sumitur ab ædificatione proximorum. Qui timent te, videbunt me seruantem mandata tua, & lætabuntur: quia videbunt me sperantem valde in verbis tuis, id est, in promissis, quæ continentur in lege tua.

Cogno.

III. Cognoui Domine, quia æquitas iudicia tua: & in veritate tua humiliasti me.

Tertia ratio à confessione propriæ culpæ. Cognoui, inquit, quia æquitas iudicia tua, idest, quod iudicia tua iustissima sunt, & si quando me humiliasti destituens gratia tua; in veritate, idest, in iustitia tua fecisti, quia ita commerui; ideò non conqueror de tua iustitia, sed ad misericordiam tuam confugio, & dico:

IIII. Fiat misericordia tua vt consoletur me, secundum eloquium tuum seruo tuo.

Consolatio, quâ petit, est gratia seruandæ legis. qui enim dolet se humiliatum, quia destitutus gratia in peccatum incidit; consolationem magnam accipiet, si copiosa grâta perfusus legem Dñi perfectè, integreque seruabit.

V. Veniant mihi miserationes tuæ, & viuam, quia lex tua meditatio mea est.

Petijt gratiâ seruandæ legis, vt consolationem acciperet: explicat nunc, quæ sit vera consolatio, quam desiderat. Veniant mihi miserationes tuæ, & viuam, idest, miserere mei secundum multitudinem miserationum tuarum, vt acquiram veram vitam, quæ sola est vita beata, & sempiterna. Rectè enim monet sanctus Augustinus, vbi sine addito ponitur nomen vitæ, vt plurimum intelligi vitam æternam, quæ sola est simpliciter vita. Ioannis 1. In ipso vita erat. Ioan. 5. In resurrectionem vitæ. Matth. 19. Si vis ad vitam ingredi, serua mandata. Quia lex tua meditatio mea est. hæc est ratio, cur audeat petere misericordias Domini: decet enim, vt Deus misericorditer respiciat in eum, qui assidue meditatur in lege.

VI. Confundantur superbi, quia iniuste iniquitatem fecerunt in me, ego autem exercebor in mandatis tuis.

Quarta ratio ad obtinendam gra-

tiam seruandæ legis sumitur à confessione iniquorum, sicut secunda sumebatur ab ædificatione piorum. Confundantur superbi, idest, da mihi gratiam, per quam perfectè leges tuas custodiam, vt hinc confundantur superbi præuaricatores, qui vexando, & persequendo iniuste efficere conantur, vt etiam alij præuaricentur. Interim autem dum illi confunduntur, & erubescunt, ego multo alacrius exercebor in mandatis tuis cogitandis & implendis. Illud, iniuste, significat superbos iniquitatem fecisse scienter, & studiose, non casu, non ex ignorantia, non ex inaduertentia, vnde ab iniquitate immunes videri possent.

Conuertantur mihi timentes VII. te, & qui nouerunt testimonia tua.

Hortatur pios, vt si qui sunt, qui à præuaricatoribus decepti ad illos respicere ceperint, ad se redeant, & cum ipso iungantur. Conuertantur mihi, idest, conuertantur ad me, & mecum iuncti legem Dei custodiant, timentes te, & qui nouerunt testimonia tua, id est, illi omnes, qui timorè Dei, & scientiam legis habent. Ex græco textu legunt nonnulli, Conuertant me. Sed antiqua lectio id habebat, quod nos habemus, vt perspicuum est ex Patribus, Hilario, Ambrosio, Hieronymo, Augustino. & S. Hieronymus vertit ex hebræo, Reuertantur ad me.

Fiat cor meum immaculatum VIII. in iustificationibus tuis, vt non confundar.

Concludit petens gratiam sæpe, ac sæpius postulatam, qua corde perfectò mandata diuina custodiat, vt neque in hoc sæculo, neque in futuro iudicio, confusionis opprobrium timeat.

Caph.

Defecit in salutare tuum anima mea, & in verbum tuum superperaui.

In hoc octonario inducit Dauid personam cupientis seruare mandata, & tamen

tamen inter tentationes grauiter laborantis, atque auxilium de cælo miserabiliter postulâti. Sanctus Augustinus totum octonarium Ecclesiæ Christum expectanti, & sanctis Martyribus accommodat. piè omnino, verè: sed quia totū Psalmum ad legis custodiam commendandā video pertinere, ideò hunc etiam octonarium ad literam de legis custodia explicare decreui. Defecit in salutare tuum anima mea, idest, anima mea præ magnitudine desiderij salutis æternæ iam penè defecit. Deficere enim in salutare, nihil est aliud, nisi expectando, & desiderando salutem, laborare, languere, deficere. Et in verbum tuum supersperaui, idest, & ego tamen valdè speraui in verbum promissionis tuæ. Itaque dilatio salutis deficere facit, sed spes firma promissionis erigit, & confortat.

II. Defecerunt oculi mei in eloquium tuum dicentes, Quando consolaberis me?

Mira Prophetæ loquutio, quæ oculis officium aurium & linguæ tribuit. Sed oculi interiores, & aures interiores, & lingua interior idem sunt. Intellectus enim videt, audit, loquitur. Defecerunt oculi mei in eloquium tuum, idest, mens mea attendendo auxilium promissum, dum diutius differtur, deficit præ desiderio, quo modo deficiunt oculi corporales cum nimis diu respiciunt ad locum, vnde persona desiderata ventura speratur. Dicentes, quando consolaberis me? idest, oculi interiores defecerunt præ expectatione, & defectum suum explicant dicentes, quando veniet cōsolatio illa perfectā, vt non amplius timeam casum, & legis sanctæ prauaricationē? Possent etiam hæc explicari de oculis exterioribus, qui cælo inhærentes videtur quasi deficere, & dicere Domino, Quando veniet auxilium de cælo promissum? sic enim Sanctus Hieronymus in epistola ad Eustochium de seruanda virginitate de se loquitur, Post multas lacrymas, post cælo inhærentes oculos, &c. Videtur dicere debuissē Prophetæ se-

cundum leges grammaticæ, Quando consolaberis nos. Sed quia oculi sunt instrumenta animæ, de qua dictum erat, defecit anima mea, ideò per oculos quæritur consolatio non tam oculorum, quàm animæ, quæ per illos respicit. Est igitur sensus, Quando consolaberis me animam, cuius oculi deficiunt attendendo, & expectando.

Quia factus sum sicut vter in pruina, iustificationes tuas non sum oblitus.

Non sine causa dico quando consolaberis me: quia præ desolatione, & angustijs tētionum, factus sum aridus, & destitutus humore gratiæ consolantis; vt est vter tempore frigidissimo in medio pruinæ constitutus. Similis est illa vox in Psalmo 142. Anima mea facta est sicut terra sine aqua tibi. Sed quamquam tanta spiritus ariditate laborem, tamē iustificationes tuas, idest, præcepta tua non sum oblitus. S. Ambrosius, & S. Augustinus per virem in pruina, intelligunt carnem mortificatam, & castigatam, & pruina cælesti respersam, vt spiritui subiiciatur. quasi dicat Prophetæ, carnem castigaui & legem tuam non sum oblitus: æquum igitur est, vt cōsoleris animam meam.

Quot sunt dies serui tui? quando facies de persequentibus me iudicium?

Instat eidem petitioni optans consolationem & liberationem à tentationibus. Quot sunt dies serui tui, quibus afflictio durabit? quando finietur dies tentationis, & miseræ? quando facies de persequentibus me iudicium? quando rudicabis, & condemnabis persequentes, & tētantes me, vt ijs condemnatis persecutio conquiescat? Non curiosè quærit, quot anni supersint, aut vitæ suæ, aut durationis mundi; sed explicat his verbis desiderium æternæ vitæ, quando omnes impij ad inferos detrusi cessabunt vexare pios, & pij summa, atque æterna pace fruētes in sanctitate, & iustitia Domino seruient sine vilo timore cadendi.

Narra-

V. **Narrauerunt mihi iniqui fabulationes, sed non ut lex tua.**

Hæc est causa, cur maximè cupiat ab iniquorum consortio liberari; quoniam iniqui tétantes pios narrant delectationes mundi, quæ sunt meræ fabulæ, idest, delectationes sordidæ, fugaces, magis confictæ, quàm veræ; & nihil habent simile cum lege Domini, quæ piè custodita delectationes stabiles, & solidas adfert. Potest etiam fabulatio referri ad hæreticorum colloquia, ut referunt Ambrosius, & alij. Sanctus Hieronymus ex hebræo vertit, Foderunt mihi superbi foueas. sed sciendum est vocem, scichoth, esse ambiguum, & posse significare fabulationes à verbo, suach, & foueas à nomine, sacha. Sanctus Hieronymus ut verteret consequenter ad verbum, foderunt; transtulit foueas. non enim coherent fabulationes cum verbo foderunt. At Septuaginta Seniores, quia per nomen scichoth intellexerunt fabulationes, noluerunt vertere foderunt, ne nimis impropria, & obscura esset oratio, sed sequentes non verba, sed sensum, maluerunt vertere narrauerunt. & verè sensum expresserunt: nam fodere, in hebraica lingua significat emere, acquirere, præparare, eruere. igitur sensus est, foderunt mihi fabulationes, idest, emerunt fabulationes, ut mihi eas venderent; vel parauerunt fabulationes, ut mihi eas narrarent; vel foderunt, & eruerunt ex fodina vanitatis fabulationes, ut eas mihi præberent. Sanctus Augustinus legit, Narrauerunt mihi delectationes. Sanctus Ambrosius exercitationes, alij aliter. Sed verbum hebraicum significat propriè confabulationem, & submurationem submissa voce editam, quæ ad colloquia clandestina hæreticorum, vel impudicorum hominum rectè accommodari potest. vox græca ἀσχηταία ab Ambrosio dicitur esse superflua loquacitas, ab Augustino delectabilis in sermone exercitatio, ab Euthymio garrulitas, & nugacitas.

Omnia mandata tua veritas; VI. iniquè persecuti sunt me, adiuua me.

Quia dixerat, non sicut lex tua: dicit nunc, Omnia mandata tua sunt ipsa veritas, idest, verissimas promissiones continet, & inde verissimas delectationes obseruantibus legem tuam adferunt. Ideò iniusti narrantes suas fabulationes iniquè persecuti sūt me. & tu Deus contra eorum insidias adiuua me.

Paulo minus consummauerunt VII. me in terra, ego autem non dereliqui mandata tua.

Tam grauis fuit persecutio istorum, qui per dulces sermones me subuertere nitebantur, ut penè me perdiderint in terra, & ad cælum aspirare nequirem: & tamen non obtinuerunt, quoniam non dereliqui mandata tua.

Secundùm misericordiam tuā VIII. viuifica me, & custodiam testimonia oris tui.

Redit ad primā petitionem, & concludit octonarium dicens, secundùm misericordiam tuam magnam viuifica me vita beata, & sempiterna, & tunc demum perfectissimè custodiam legem tuam. potest etiam hoc intelligi de vita gratiæ, per quam mandata Dei custodiuntur.

Lamed.

In æternum Domine verbum I. tuum permanet in cælo.

In generationem, & generationem II. veritas tua, fundasti terram & permanet.

Ordinatione tua p̄seuerat dies, III. quoniam omnia seruiunt tibi.

In hoc octonario à firmitate promissionum diuinarum sumit Propheta argumentum ad exhortandos homines ad legem seruandam, quæ habet promissiones vitæ præsentis, & futuræ. In æternum Domine verbum tuum, idest, promissio tua, permanet in cælo: nam etiam si in terris videatur non permanere,

nere, dum iusti opprimuntur, & iniusti exaltantur: tamen in cælo apud Deum omnino permanet. Deus enim quod promissit, implebit. Faciet enim, ut iustis breues tribulationes vertantur in gaudium sempiternum, & brevis gloria impiorum vertatur in opprobrium, & supplicium sine fine duraturum. Idem autem repetit, vel explicat, dum addit, In generationem & generationem veritas tua, supple permanet, idest, semper manet veritas promissionum, dum semper verbum promissionis impletur, in omni generatione, & generatione, idest, ab initio usque in finem, quod est idem, quod in æternum. Probat autem Propheta stabilitatem promissionum à stabilitate ordinationum diuinarum duobus exemplis. Fundasti terram, & permanet. hoc est primum exemplum, quasi dicat, fundasti terram immobilem, & semper manet immobilis, ut ordinationi tuæ obediat. Ordinatione tua perseverat dies. hoc est alterum exemplum. Ordinavit enim Deus, ut è contrario cælum siue sol moueretur semper, & motu suo diem efficeret; & obtemperat, & sic semper ordinatione diuina perseverat dies. In hebræo coniungitur verbum numeri multitudinis cum nomine numeri singularis hoc modo, Perseuerant hic dies, siue hodie; ad significandum diem transeundo, & fluendo permanere. transeunt dies, & nunquam stant, & tamen semper, hodie, permanet. ad quod alludens Apostolus, Hebr. 3. Adhortamini, inquit, vosmetipsos per singulos dies, donec hodie cognominatur. Ratio huius tantæ firmitatis est, quod sequitur, Quoniam omnia seruiunt tibi: nihil enim est in rebus creatis, quod Deo creatori ad nutum non pareat.

IIII. Nisi quòd lex tua meditatio mea est, tunc fortè periissem in humilitate mea.

Nisi, inquit, in lege tua assidue meditatus fuisset, ubi veritatem promissionum tuarum didici, fortè periissem in afflictione mea, temptationibus aduersariorum superatus. Pro, medita-

Card. Belarm. in Psal.

tio, in hebræo est, delectatio, ex quo intelligimus hic agi de iucunda, & dulci meditatione quæ valdè recreat animum hominis in tribulatione constituti, dum promissa diuina ob oculos interiores ponit, & cordi intimè infigit. Per humilitatem autem hoc loco non significatur virtus humilitatis, sed afflictio, siue pressura, ut sanctus Hieronymus ex hebræo transtulit.

In æternum non obliuiscar iustificationes tuas, quia in ipsis viuificasti me. **V.**

Confortatus ex meditatione promissionum, quæ in lege continentur confideret iam dico, In æternum non obliuiscar iustificationes tuas, quia in ipsis, idest, super eorum obseruationem viuificasti me, vitam gratiæ augendo, & vitam gloriæ promittendo.

Tuus sum ego, saluum me fac, quoniam iustificationes tuas exquisiui. **VI.**

Scriptum est in Psal. 23. Domini est terra, & plenitudo eius, orbis terrarum, & vniuersi, qui habitant in eo: ego tamè propriè tuus sum, quia agnosco me tuum esse, & volo tuus esse, & nullius alterius Domini volo esse, cum nulli cupiditati seruire decreuerim; idè rectè peto, ut me saluum facias, idest, rem tuam conserues, ne pereat. Quoniam iustificationes tuas, exquisiui, idest, quoniam tuus sum, & tanquam tui solius mancipium nihil aliud quero, nisi mandata tua, ut illa perficiam. Verè pauci sunt, qui dicere possint, tuus sum ego, quia pauci sunt, qui per affectum nulli rei seruiant, nisi Deo.

Me expectauerunt peccatores, ut perderent me testimonia tua intellexi. **VII.**

Non sine causa dixi, saluum me fac, quoniam peccatores in loco opportuno ad capiendum, me expectauerunt, ut tentationi consentire me facerent, & sic perderent me: sed ego gratia tua adiutus testimonia tua intellexi, idest, intellexi, quid lex tua in tali articulo

Bbb

pra-

præciperet, quid promitteret, quid minaretur.

VIII. Omnis consummationis vidi finem, latum mandatum tuum nimis.

Intelligens testimonia tua, ex eis cognoui, & vidi finem consummationis omnium rerum, iudicium videlicet nouissimum, in quo consummatis meritis, bonis, & malis, reddentur præmia bonis, & supplicia malis. Verè igitur latum mandatum tuum nimis, idest, verè amplum, & secundum est mandatum tuum, siue lex tua, cum in ea conspiciantur regulæ bene viuendi, & præmia custodiendum legem, & contra regulæ declinandi vitia, & supplicia præuaricatorum. Posset etiam sic exponi versiculus iste, Intelligens testimonia tua, idest, legem tuam, vidi finem omnis consummationis, idest, omnis perfectionis vitæ esse, mandatum tuum, idest, præceptum dilectionis, quod est latum nimis, cum omnia mandata comprehendat, & cum ad Deum, & omnes Angelos, & omnes homines, etiam inimicos extendatur. Alij aliter exponunt, & vnusquisque propriam expositionem adfert. Ambrosius, & Hieronymus, finem omnis consummationis dicunt esse Christum. Augustinus, finem omnis consummationis dicit esse coronam Martyrij, quia consummata perfectio est mori pro Christo. Theodoretus dicit, omnia humana, opes, honores, & similia, quantumvis consummata & perfecta habere finem. Euthymius per, omnem consummationem, intelligit omnem interitum, tum bonorum, tum impiorum. Vidit enim Propheta finem mortis omnium, esse pœnam, vel gloriam.

Mem.

I. Quomodo dilexi legem tuam Dñe: tota die meditatio mea est.

In hoc octonario iterum redit ad encomium legis, eamq. laudat à multiplici vtilitate, & delectatione, quam secum adfert. Ac primū testatur amorem suum erga diuinam legem, deinde

reddit causam amoris enumerans eius vtilitates. Quomodo dilexi; idest, quā vehemēter dilexi legem tuam: signum amoris est continua conuersatio cum re amata. Tota die, inquit, meditatio mea est. nihil aliud cogito, nihil aliud loquor, nihil aliud ago.

Super inimicos meos prudentem me fecisti mandato tuo, quia in æternum mihi est.

Hæc est prima vtilitas legis; quia diligenter considerata, & factis adimpleta prudentem facit hominem, vt sciat quid, & quomodo, & quando, & vbi debeat loqui, & agere, vel silere, & quiescere: quam prudentiam non habent præuaricatores, qui regulam hæc rectissimam inter loquendum, & agendum non respiciunt. Ait igitur super inimicos meos, præuaricatores videlicet legis, prudentem me fecisti mandato tuo, idest, per mandatum tuum, dum illud assidue meditor, & adimpleo. Quia in æternum mihi est, quia perpetuo mihi adest ante oculos mentis, neque vnquam illius obliuiscor.

Super omnes docentes me intellexi, quia testimonia tua meditatio mea est.

Super senes intellexi, quia mandata tua quæsiui.

Hæc est altera vtilitas legis: quia non solum prudentiam, sed etiam sapientiam gignit. Sed quoniam tamen videtur David nimium sibi tribuere anteponendo sapientiam suam sapientiæ omnium, qui illum præcesserunt in quibus erat Adam, Noe, Abraham, Isaac, Iacob, Ioseph, Moses, Samuel, & alij. S. Augustinus docet hæc dici in persona Christi, qui cum esset annorum duodecim, & videretur quasi discipulus audiens legis doctores, & seniores: tamē super omnes docentes se intelligebat. S. Ambrosius in persona populi Christiani. Sed fortasse non erit necesse ad ista confugere: nam per omnes docentes intelligere possumus eos solos, qui Dauidem puerum, vel adolescentem

docuerunt, parētes videlicet, & pædagogos suos familiares. Quamuis enim non sit discipulus super Magistrū, dum discipulus est: potest tamē is, qui discipulus fuit, diligentia & studio superare eum, qui Magister ipsius aliquando fuerat. Sic David facillē sapientia magistrōs suos vicit, propter continuam meditationem in lege Dñi. Idem etiam intelligimus de senibus: non enim voluit David dicere, se sapientem fuisse super omnes senes, qui fuerāt ab initio mundi, sed se adhuc iuuenem sapientiorē fuisse multis senibus ob studium suum assiduum in lege Dñi meditanda.

V. Ab omni via mala prohibui pedes meos, vt custodiam verba tua.

VI. A iudicijs tuis non declinaui, quia tu legem posuisti mihi.

Hæc est tertia vtilitas legis Domini, quia facit multa vitare peccata. Ab omni via mala prohibui pedes meos, idest, caui ne ambulare per vias iniquorum, qui pro lege habent cupiditatem suam, quæ est lex carnis, & peccati, idest, caui ne aliqua in re delinquerem: idque vt custodirem verba tua, idest, legem tuam, quæ contrarium iter ostēdebant. A iudicijs enim tuis, idest, à iustissimis mādatis tuis non declinaui, quia tu legem posuisti mihi, idest, quia hanc sanctam legem tu Dominus meus mihi dedisti: siue, vt exponit Sanctus Augustinus, Quia tu legem in corde mihi posuisti, tu fecisti per spiritum tuum, vt legem sanctam ex intimo corde meo diligam.

VII. Quàm dulcia faucibus meis eloquia tua, super mel ori meo.

Hæc est quarta vtilitas, quod summam adfert lex Domini se custodiētibz voluptatem. Eloquia enim Domini, idest, mandata Domini dulcia sunt faucibus animæ, magis quàm mel faucibus corporis: nihil iucundius bona conscientia, & spe supernæ beatitudinis, quam parit obseruantia legis diuinæ.

A mandatis tuis intellexi, propterea odiui omnem viam iniquitatis.

Probat ex lege Domini magnam voluptatem se percepisse, eo quod lex Domini bonam conscientiam pariat. Nam, inquit, à mandatis tuis intellexi, idest, à mandatis tuis, eruditus, prudens, & sapiens factus sum: clarior est hæc sententia in hebræo, & græco textu. Propterea odiui omnem viam iniquitatis, idest, ex hac sapientia, & prudentia acquisita ex assidua meditatione legis non solum abstinui à peccatis, sed etiam magnum odium concepi aduersus omnes iniquas actiones. Hoc autem odium mirificè conseruat animi puritatem, & sanctitatem, & gignit magnam fiduciam in Domino, vnde oritur ineffabile gaudium, pax & tranquillitas omnibus thesauris, & voluptatibus anteponenda.

Nun.

Lucerna pedibus meis verbum tuum, & lumen semitis meis.

In hoc octonario laudat legem diuinam Propheta ab eximia quadam vtilitate: deinde promittit se eam obseruaturum, non obstante qualibet tribulatione. Vtilitas eximia est, quod lex Domini sit nobis in via vitæ huius, instar lucernæ ambulātibus in tenebris. Lex enim peccati, idest, cupiditas excæcat homines, siue maximas tenebras effundit, vt vera bona, & vera mala nō internoscantur; & hinc ij, qui hanc legem sequuntur, idest, qui passionibus animi rapi se sinunt, in varia præcipitia ruunt: sed lex Domini has tenebras dissipat, & vera bona, ac vera mala demonstrat; & ideò, qui eam sequuntur non errant, neque cæcutiunt, sed recto tramite ad patriam cælestem iter faciūt. Ait igitur, Lucerna pedibus meis verbum tuum, idest, lex tua est lucerna pedibus meis. Et hoc ipsum repetens, & declarans addit, Et lumen semitis meis. Lucerna enim dum illuminat semitas per quas incedendum est, diri-

Bbb 2 git

git pedes ambulantium: sermo est metaphoricus, sed facillè intelligitur:

- II. Iuravi, & statui custodire iudicia iustitiæ tuæ.

Quia lex est lux, ac proinde res optima, & vtilissima, Propheta iurat, & statuit, idest, firmissimè apud se constituit custodire ipsam legem, quam vocat iudicia iustitiæ, idest, iudicia iustissima.

- III. Humiliatus sum vsquequaque Domine: viuifica me secundum verbum tuum.

Humiliatus, idest, afflictus, & vexatus sum valde, occasione legis seruandæ: quia omnes qui volunt piè viuere, persecutionem patiuntur, vt dicit Apostolus 2. Timoth. 3. sed tu Domine viuifica me, idest, veram vitam, quæ malis omnibus libera erit, mihi aliquando tribue secundum promissum tuum, Si vis ad vitam ingredi, serua madata, Matthæi 19. Posset etiam hic locus exponi de virtute humilitatis. Qui enim humiliant se ipsos, vt iugo legis se omnino subiciant, illi secundum promissionem merentur exaltari ad vitam beatam, & sempiternam.

- IIII. Voluntaria oris mei beneplacita fac Domine, & iudicia tua doce me.

Quod iuravi, & statui custodire legem non obstante qualibet persecutione, est voluntarium sacrificium oris mei: hoc igitur voluntarium sacrificium oro, vt tibi sit beneplacitum, & quia ex se id non meretur, tu Domine fac illud beneplacitum, dum benignè ex gratia tua illud approbare dignaris: ac vt ritè hoc sacrificium offeram, doce me iudicia tua, idest, doce me perfectè legem tuam obseruare. Alij referunt hæc voluntaria ad sacrificia votiua ouium, & hircorum, alij ad sacrificia laudis, & confessionis: sed continuatio Psalmi videtur requirere, vt per voluntaria intelligamus spontaneum iuramentum legis custodiendæ.

Anima mea in manibus meis V. semper: & legem tuam non sum oblitus.

Quàm seriò iurauerim custodire legem tuam, & hoc tibi sacrificium spontè obtulerim, ex hoc intelligi potest, quòd quotidie de vita periclitor propter legis tuæ custodiam, & tamen ipsam legem non sum oblitus. Sanctus Ambrosius, & sanctus Augustinus dicunt, in plerisque libris legi, Anima mea in manibus tuis, & hanc veriore lectionem esse iudicant. Eodem modo legunt sanctus Hilarius, & sanctus Hieronymus in commentario Psalmorum: & sensus optimus, & verissimus est, Animas nostras in manu Dei esse, à quo pendet vita nostra, & in cuius potestate est, vt viuamus, vel moriamur. Sed in hebræo textu apertè est, In manibus meis, vt nos in editione vulgata legimus. & sanctus Hieronymus non solum in sua versione posuit, in manibus meis, sed etiam in epistola ad Suniam, & Fretellam dicit, Septuaginta Interpretes vertisse, In manibus meis, & omnes veteres græcos tractatores explicasse hoc modo, Anima mea in manibus meis est, idest, in periculo vitæ sum. Quod enim manibus tenetur, facillè potest cadere, vel eripi, nisi fortiter custodiatur, & defendatur: & sic intelligitur illud Iudic. 12. Posui animam meam in manibus meis. hoc enim dicit Iephte dum ad prælum valde periculosum pergit. & illud 1. Reg. 19. de Dauide, Posuit animam suam in manu sua, & percussit Philistheum. Itaque credibile est, Septuaginta Interpretes vertisse, In manibus meis, sed postea à sciolo aliquo textum fuisse mutatum, q̃ videretur lectio clarior, & facilior.

Posuerunt peccatores laqueum VI. mihi, & de mandatis tuis non erravi.

Non sine causa dixi, animam meam in manibus meis semper fuisse, quia peccatores posuerunt laqueum mihi, vt me caperent, & occideret, & tamen

ego

ego de mandatis tuis non erravi, idest, non aberravi à mandatis tuis. Hoc impletum est cum David quæreretur à Saule ad mortem, & tamen ipse David semel, & iterum, cum facile posset Saulem occidere, seque ab omni periculo liberare, noluit id facere, ne peccaret in Deum. Vide lib. 1. Regum cap. 23. & 26.

VII. Hereditate acquisivi testimonia tua in æternum, quia exultatio cordis mei sunt.

Cur de mandatis tuis non erraverim, ea causa est, quia hereditate acquisivi testimonia tua in æternum, idest, elegi mihi in hereditatem æternam ipsam legem tuam, quia iucundissima, & dulcissima mihi est, & summæ delectationis, & exultationis causa.

VIII. Inclinaui cor meum ad faciendas iustificationes tuas in æternum propter retributionem.

Porro causa tantæ delectationis est merces copiosissima, quam feci adfert legis custodia. Inclinaui cor meum ad faciendas iustificationes tuas, idest, cum ab una parte lex peccati traheret me, ab altera lex tua, ego inclinaui cor meum, tamquam staterem, aut balancem ad legem tuam faciendam, propter retributionem, quia videlicet consideravi stipendium legis tuæ esse vitam sempiternam. Sanctus Hieronymus ex hebreo vertit, Inclinaui cor meum ad faciendas iustificationes tuas propter æternam retributionem. textus hebraicus utranque lectionem admittit.

Samech.

I. Iniquos odio habui, & legem tuam dilexi.

In hoc octonario Propheta detestatur pravaricatores legis diuinæ, & se contrarium eis esse demonstrat. Monet autem sanctus Augustinus, non dixisse Prophetam in primo versiculo, Iniquitatem odio habui, & legem tuam dilexi, ut videbatur requirere ordo verborum, sed dixisse, Iniquos odio habui, & legem tuam dilexi, ut ostenderet, se non solum iniquitatem, sed etiam

Card. Belarm. in Psal.

iniquos odisse: & rursum non dixisse, Iniquos odio habui, & iustos dilexi, sed, & legem tuam dilexi, ut indicaret, se non odisse iniquos, nisi quia contrarij sunt legi diuinæ, quam dilexit. Itaque odio habuit iniquos, non ratione naturæ, sed ratione iniquitatis: sicut contra diligebat inimicos, ac per hoc iniquos, non ratione iniquitatis, sed ratione naturæ.

Adiutor & susceptor meus es tu, & in verbum tuum super speravi.

Ut non timeam iniquos, quos odi, & legem adimpleam quam dilexi, Adiutor & susceptor meus es tu: adiutor in lege custodienda, & susceptor in eadem persecutione iniquorum. Et ego vicissim in verbum promissionis tuæ valde speravi.

Declinate à me maligni, & scrutabor mandata Dei mei.

Vna ex causis, cur odio habeat iniquos Propheta, est, quia eorum consortium valde impedit meditationem Verbi diuini, quæ quietem & pacem animi desiderat. Ideo cupit eos à se recedere, ut muscas molestissimas.

Suscipe me secundum eloquium tuum, & viam: & non confundas me ab expectatione mea.

Ut cupio iniquos à me recedere, ita cupio ut tu Domine ad me accedas, & in sinum tuum suscipias secundum eloquium promissionum tuarum, & tum verissime viam, cum tibi, qui vita es, coniunctus ero. Et quia de benignitate tua, non de meritis meis, id expecto, non confundas me ab expectatione mea.

Adiuua me, & saluus ero: & meditabor in iustificationibus tuis semper.

Idem alijs verbis repetit: idem enim est, Suscipe me & viam, & Adiuua me & saluus ero. Fructus autem huius susceptionis erit, ut sine impedimento sepe meditari valeat in lege Domini.

Bbb 3 Spre-

VI. Spreuisti omnes discedentes à iudicijs tuis, quia iniusta cogitatio eorum.

Ostendit nunc, quod si ipse odio habet iniquos, & à se recedere cupit, id facit exemplo Dei, qui iniquos iustissime execratur. Spreuisti, inquit, tanquam rem nullius momenti, omnes discedentes à iudicijs tuis, idest, omnes iniquos, qui discedunt à via legis diuina. Quia iniusta cogitatio eorum, idest, quoniam ipsi cogitant, se non debere subdi legi Dei, nec ab ea pendere; quia cogitatione nihil iniquius esse potest, cum omnis creatura summo iure Creatori subijci debeat. Hæc fuit cogitatio Luciferi, qui similis altissimo, non autem ei subditus esse voluit. Eadem fuit cogitatio primorum parætorum, qui cupierunt esse sicut Dij. Eadem est cogitatio omnium superbiorum, qui dicunt in corde suo, Quis noster Dominus est? Hos igitur spernit Deus, & non multum curat, si multa millia eorum pereant in æternum, quia quanto plures ipsi se æstiment, tanto minoris, fiunt à Deo.

VII. Præuaricantes reputaui omnes peccatores terræ: ideò dilexi testimonia tua.

Mouet hoc loco magnam questionem sanctus Augustinus, Quomodo omnis peccator præuaricator dici possit, cum Apostolus dicat, Vbi non est lex, nec præuaricatio Rom. 4. & rursum, Qui sine lege peccauerunt, sine lege peribunt, Rom. 2. Respondet, illud, Vbi non est lex, nec præuaricatio; intelligi de lege in vniuersum: illud autem, Qui sine lege peccauerunt; intelligi de lege scripta tantum: proinde omnes peccatores dicendi sunt præuaricatores, quia omnes præuaricantur legem naturalem scriptam in cordibus. Sed cur Propheta hoc dicit? ut ostendat peccatum, quod est maximum malorum, non aliunde nobis accidere, nisi ex præuaricatione legis. Subiungit, Ideò dilexi testimonia tua, idest, ut tam magnum malum effugiam, dilexi legem tuam,

Sanctus Hieronymus ex hebræo vertit, Quasi scoriam reputasti omnes peccatores terræ. Sed Septuaginta Interpretes, per vocem, sighim, non intellexerunt scoriam à voce, sig, sed, recedentes, quod est idem cum, præuaricantes: nam verbum, sug, significat recedere, inde, sighim, significat recedentes. Iod autem & vau sunt literæ permutabiles. sic etiam non legerunt, chisbatta, quod est, reputasti, sed, chisbatti, quod est reputaui.

סוים סיו

סו

סוים

חושבת
חושבת

Cōfige timore tuo carnes meas, VIII. à iudicijs enim tuis timui.

Postulat in fine confirmationem in timore Dei, ut in custodia legis per eum timorem perseueret. Confige, inquit, quasi clavis, timore tuo carnes meas, idest, cupiditates meas carnales, ut se commouere non possint, iuxta illud Apostoli, Qui autem sunt Christi carnem suam crucifixerunt cum vitijs, & concupiscentijs, Galat. 5. A iudicijs enim tuis timui, idest, quoniam iam ceppi timere à iudicijs tuis penas horribiles comminantibus, ideò cupio stabiliri in hoc sancto timore, ut ab eo nunquam diuellar. Ex hebræo sanctus Hieronymus vertit, Horripilauit caro mea: sed sciendum, quod verbum, samar, non solum significat horrere, sed etiam clavis configere: nam ex hoc verbo deducitur nomen masmer, quod significat clauum. Parum autem refert, quod hic ponatur verbum præteriti temporis, & modi indicatiui: nam eadem literæ mutatis punctis faciunt imperatiuum: proinde rectè Septuaginta verterunt, confige, vel, ut Patres legunt, confige clavis.

סמר

ססמר

Hain.

Feci iudicium, & iustitiam, non intradas me calumniantibus me.

In hoc octonario petit gratiam liberationis à calumniatoribus, & auxilium ad legem perfecte adimplendam. Feci, inquit, iudicium, & iustitiam, idest, reddidi unicuique suum, ideò æquum est,

est, vt non tradas me calumniantibus mihi: calumniatores nostri perpetui, Dæmones sunt, quib^{us} tradimur a Deo, quando permittimur tentari ab illis, vel potius quando Deo deferente superamur, & tentantibus consentimus.

II. Suscipe seruum tuum in bonū, non calumnientur me superbi.

Feci, inquit, iustitiam, sed vt semper faciam, & non deficiam faciēdo, suscipe seruum tuum in bonum, illum dirigendo. Clarius est textus hebraicus, vbi habetur, Dirige, siue ordina, & apta seruum tuum ad bonum, vt semper placeat illi bonum: & hinc fiet, vt non calumnientur mihi superbi, siue homines, siue dæmones. Qui enim bene confirmatus est in bono, & bene aptatus, vt vbique, & semper bonum illi placeat, ita perseueranter bene se gerit, vt nihil sit cur timeat calumniatores.

III. Oculi mei defecerunt in salutare tuum, in eloquium iustitiæ tuæ.

Confirmat, se valde ardentem desiderare perfectam illam directionem ad bonum, quæ in vita æterna dabitur electis. Oculi mei defecerunt præ desiderio respicientes assidue in salutem tuā, quæ de cælo nobis adueniet, & in eloquium iustitiæ tuæ, idest, in promissionem tuam fidelissimam. Vide quæ dicta sunt ad versiculum primum, & secundum literæ Caph.

IV. Fac cum seruo tuo secundum misericordiam tuam: & iustificationes tuas doce me.

Pergit in oratione, ac petit, vt Dominus operetur secum non secundum meritum ipsius, sed secundum misericordiam suam, quæ in eo potissimum consistit, vt doceat iustificationes suas, idest, intimè persuadeat, bonum esse implere, & custodire legem Domini, atque hoc modo doceat non tam scire, quàm facere. Quod fit quando Deus infundit magnam charitatem, non quando solum donat scientiam, quæ sine charitate inflat, non ædificat.

Seruus tuus sum ego, da mihi V. intellectum, vt sciam testimonia tua.

Ista tam frequens petitio eiusdem rei, signum est magni desiderij. Seruus tuus sum ego, ac per hoc teneor mandatis tuis obedire: da mihi igitur intellectum, idest, fac me intelligere testimonia tua, vt illa perfectè addiscam. Vide primum versiculum literæ Iod, qui est huic similis.

Tempus faciendi Domine: dissipa- VI. uerunt legem tuam.

Hic versiculus duobus modis exponi solet. Sæcili Patres Hilarius, Ambrosius, & Augustinus exponunt de gratia Saluatoris, vt sensus sit, O Domine iam tempus est faciendi, quia satis docuisti verbis, satis mandasti; nunc tempus est, vt facias, vt exemplo doceas, vt carnem sumas, vt obedientiam usque ad mortem crucis exhibeas, vt gratiam dones, qua iustificatio legis impleri possit a nobis: nam dissipauerunt legem tuam, Iudei videlicet, quibus data erat. At Græci, Theodoretus, & Euthymius, quos plerique recentiores sequuntur, exponunt de punitione sceleratorum, vt sensus sit, Tempus est, Domine, vt facias iudicium aduersus impios, eosque punias, quoniam dissipauerunt legem tuam, idest, non solum vt cunque violauerunt, sed penitus dissipauerunt, cum nihil eius obseruent. Vtraque bona est expositio, sed videtur illa magis mystica, hæc magis literalis. Sanctus Augustinus legit, Tempus faciendi Domino. Sanctus Ambrosius, Tempus faciendi Domine, vt habet editio nostra vulgata. Sanctus Hilarius utroque modo hunc versiculum legit. In hebraico, & græco textu habetur, Domino: sed idem est sensus, dummodo illud, faciendi, tribuatur Deo, non homini, & sensus sit, Tempus est, vt tu Domine facias.

Ideò dilexi mandata tua super VII. aurum, & topazion.

Propterea ad omnia mandata VIII.

Bbb 4 non

tua dirigebar: omnem viam iniquam odio habui.

Quia multi dissipauerunt legem tuam, & ob hoc video illis grauissimum imminere supplicium: ideo ego ex aduerso magis incensus sum amore legis tue, & pluris illam facio quam aurum, & lapides pretiosos: ideo etiam non solum legem diligebam, sed etiam custodire satagebam; dirigebar enim ad omnia mandata tua, idest, recte ambulabam per viam mandatorum tuorum, non declinans ad dexteram, vel sinistram: imo etiam omnem viam iniquitatis, idest, omnem legem carnis, & peccati odio habui, & declinaui. Porro per vocem, topazion, quod est in hebræo, ¹² paz, significatur lapis pretiosus, quem dicunt aurei coloris esse, & valde lucidum. vide Strabonem libro 6. & Plinium lib. 37. cap. 8. eandem vocem habemus in Psal. 18. vbi Septuaginta Interpretes, & Sanctus Hieronymus verterunt, lapidem pretiosum: quia videbant Prophetam in vna specie intellexisse genus ipsum lapidum pretiosorum.

Phe.

I. Mirabilia testimonia tua, ideo scrutata est ea anima mea.

In hoc octonario iterum Propheta reuertitur ad laudandam legem, & ad petendam gratiam ad eandem legem perfecte seruandam. Laudat igitur legem, quod admirabilis sit, & ideo eam scrutatus sit diligenter. At Deuter. 30. vbi legimus, Mandatum hoc non supra te est; in hebræo habetur, Mandatum hoc non mirabile est. Respondeo, leges Domini siue morales, siue iudiciales, siue ceremoniales non esse mirabiles, quod attinet ad sensum literalem; nam apertæ sunt, & faciles; & qui eas non seruant, non possunt excusari ab ignorantia. & hoc affirmat Moses in Deuteronomio. At, quod attinet ad mysticos sensus, presertim legum ceremonialium, mirabiles, & obscurissimæ sunt, cum per illas figurentur omnia mysteria Christianæ religionis: atque hoc significare videtur hoc loco Propheta. Pre-

terea Decalogus, quo lex Domini potissima continetur, hoc ipso valde mirabilis est, quod tam clavis, & apertis sententijs conscriptus sit, cum tamen in summa breuitate complectatur omnia principia iustitiæ, ad quæ reducuntur omnes leges, quæ factæ sunt, & quæ fient. Omnes enim alix leges, quæ sunt innumerabiles, & maxima volumina repleuerunt, & deinceps replebunt; omnes, inquam, vel sunt conclusiones, vel determinationes legum decalogi. Itaque sicut parua semina mirabilia sunt, quia virtute continent magnas arbores: sic Decalogus mirabilis est, quia virtute continet omnes leges totius mundi.

Declaratio sermonum tuorum illumina- minat, & intellectum dat paruulis.

Quia dixerat, mirabilia esse mandata diuina, nunc addit, quod si declarantur vel ab ipso Deo per infusionem luminis diuini, vel ab aliquo perito doctore, mirifice mentem illustrant. Declaratur autem lex, tum quando aperiantur mysteria figurarum, quæ in lege ceremoniali continentur: tum quando deducuntur conclusiones ex lege morali: tum denique quando decreta legis iudicialis ad facta particularia applicantur. Ex hebræo vertit sanctus Hieronymus, Ostium sermonum tuorum: sed vox, petach, non solum ostium, ^{na} sed etiam apertionem, ac per hoc declarationem significat. Quod sequitur, Et intellectum dat paruulis, significat, legis declarationem paruulis esse necessariam, idest, simplicibus, & ignorantibus. Fortasse etiam, ut Sanctus Augustinus monet, per paruulos, intel ligere debemus humiles. Isti enim facilius res diuinas addiscunt, iuxta illud Matthæi 11. Confiteor tibi Pater, quia abscondisti hæc à sapientibus, & prudentibus, & reuulasti ea paruulis, ijs videlicet, qui non sunt in oculis suis sapientes, nec prudentes.

Os meum aperui, & attraxi spiritum, quia mandata tua desiderabam.

Et

Et ego, ut vnus ex paruulis, os meum interius aperui orando, & petendo, & attraxi spiritum bonum, spiritum scientiæ, & pietatis, quo mandata intelligere, & implere possem. Nam ipsa mandata tua intelligere, & implere desiderabam. Sumpta est metaphora à respiratione corporali: cum enim grauamur aliquo magno labore, ac penè suffocamur, tum aperiētes os, & anhelantes respiramus, & melius habemus.

IV. Aspice in me, & miserere mei secundum iudicium diligentium nomen tuum.

Aperiendo autem os ad orandum ita dixi, Aspice in me, & miserere mei, idest, aspice in me oculis pietatis, & miserere mei laborantis sub onere præceptorum tuorum, quæ meis viribus implere non possum: miserere, inquā, mei secundum iudicium diligentium nomen tuum, idest, iuxta consuetudinem, qua vteris erga amicos tuos, qui te in veritate diligunt. Vox enim נבואה hebraica, mispat, significat iudicium, morem, consuetudinem, modum, habitum, & alia. Sed quia Septuaginta Interpretes verterunt, ἐπίσκοπος & noster interpres, iudicium, in eundem sensum exponere debemus hoc modo, Miserere mei secundum iudicium, quo vteris in iudicandis amicis tuis, qui te diligunt.

V. Gressus meos dirige secundum eloquium tuum, & non domine-
tur mei omnis iniustitia.

In hoc misereberis mei secundum iudicium diligentium nomen tuum, si direxeris gressus meos secundum eloquium tuum, idest, si per gratiam tuam feceris, ut ego rectam viam ingrediar ambulans secundum directionem legis tuæ; & sic non domine-
tur mei omnis iniustitia, idest, nullam iniustitiam committam, quæ me captiuum teneat: nā, ut Dominus dicit Ioann. 8. Qui facit peccatum seruus est peccati.

VI. Redime me à calumnijs hominum, ut custodiam mandata tua.

Gressus meos dirige tunc potissimū, cum periculum est, ne perturbatus calumnijs declinem à recta via. Calumnia enim perturbat sapientem, & perdit robur cordis illius, ut dicit Ecclesiastes cap. 7. Redime me à calumnijs hominum, idest, libera me à calumnijs hominum, ut animo tranquillo custodiam mandata tua. Non est facienda vis in verbo, redime, nam apud Hebræos passim accipitur pro, libera.

Faciem tuam illumina super seruum tuum, & doce me iustificationes tuas.

Quod supra dixerat; Aspice in me, idem alijs verbis repetit, dicens, Faciem tuam illumina super seruum tuum. Sicut enim Sol cum interpositione nubium obscuratur, priuat nos calore, & lumine: ita Deus cum nos gratia sua non adiuvat, videtur abscondere faciem suam; vel tenebris cooperire; & contra, cum nos gratiæ suæ lumine collustrat, videtur nubium obstacula dissipare, & nobis serenam faciem ostendere. Ait igitur, Faciem tuam illumina super seruum tuum, idest, sereno me vultu respice, & lumine ad me transfuso doce me iustificationes tuas, idest, legem tuam intelligere, & seruare.

Exitus aquarum deduxerunt oculi mei, quia non custodierunt legem tuam.

Quam vehementer David legem dilexerit, ostendit hactenus tot precibus toties repetitis pro gratia seruandæ legis: nunc demonstrat ex magno dolore, quem concepit ex preuaricatione. non enim dicit, se vnā vel alteram lacrymam fudisse, sed riuos aquarum, idest, lacrymarum ex oculis, quasi ex fontibus produxisse, quia non custodierunt legem Domini. Tametsi enim peccatum, idest, transgressio legis, procedat à voluntate, siue à corde: tamen instrumenta peccati nunc sunt oculi, nunc lingua, nunc manus. Peccati autem grauissimi, quod David aliquando commisit, & pro quo laubatur per singulas noctes lectum suum, instru-

instrumenta fuerunt oculi. Vidit enim nimis curiosè mulierem nudam, dum se lauaret; inde exarsit in concupiscentiam, inde processit ad adulterium, & homicidium. Theodoretus, & Euthymius, quos aliqui recentiores sequuntur, dicunt, Dauidem fleuisse peccata aliorum, & sic exponunt illud, Quia non custodierunt legem tuam. Sed sancti Patres nostri Hilarius, Ambrosius, Hieronymus, & Augustinus constanter affirmant, Dauidem loqui de peccato suo, non de alieno.

Trfade.

I. Iustus es Domine, & rectum iudicium tuum.

In hoc octonario laudatur lex Domini à summa rectitudine, & iustitia: ac primum demonstrat Dauid esse iustissimam legem, quoniam auctorem habet iustissimum, in quem iniustitia cadere non potest. Ait igitur, Iustus es Domine, idest, iustus per antonomasiam, & solus iustus ea iustitia, cū qua admisceri iniustitia nequeat, iuxta illud 1. Ioannis 1. Deus lux est, & in eo tenebræ non sunt ullæ. Et rectum iudicium tuum, idest, & consequenter rectum, ac iustum est iudicium, decretum, mandatum tuum. Nam in hoc Psalmo per iudicium, ferè semper ipsa lex intelligitur. Quanquam etiam illud verum est, iudicium Dei, quo distribuit pœnas, & præmia, semper esse iustum, licet interdum non appareat eius iustitia.

II. Mandasti iustitiam testimonia tua, & veritatem tuam nimis.

Ostendit legem Dei non solum esse iustam, quia procedit à Deo iusto, sed etiam quia continet ipsam iustitiam. Mandasti, inquit, iustitiam testimonia tua, idest, præcepisti nobis testimonia tua, quæ sunt ipsa iustitia: & veritatem tuam nimis, idest, & sunt ipsa veritas omnino. S. Th. 1. 2. q. 100. art. 8. ex hoc principio colligit, legem Decalogi esse omnino indispensabilem, quia continet ipsum ordinem iustitiæ. quomodo si quis iuberet, vt nullus peccet;

vel, vt nemo sit iniquus, lex esset omnino indispensabilis, quia non potest dari casus, in quo liceat peccare, vel iniquum esse.

Tabescere me fecit zelus meus, quia obliti sunt verba tua inimici mei. III.

Propter hanc tantam æquitatem legis tuæ dolore afficiebar, ita vt etiam tabescerem, & lāguerem præ zelo cū viderem homines, etiam si inimicos meos, obliuisci verborum tuorum, id est, tam vtilium præceptorum tuorum. In græco legitur, Zelus tuus, & sic legunt Hilarius, Ambrosius, Hieronymus, Augustinus, & Theodoretus in commentario Psalmorum. Sed nostra lectio conformis est hebraico textui, nec desunt antiqui codices, qui nostræ lectioni faueant. Sanctus enim Augustinus testatur, alios codices habere, zelus meus, alios, zelus tuus, alios, zelus domus tuæ: sensus autem semper est idem, vt notatum est.

Ignitum eloquium tuum vehementer, & seruus tuus dilexit illud. IV.

Iterum docet Propheta legem Dei esse iustissimam, & purissimam, ex similitudine ad aurum igne probatum. Dicitur enim eloquium Dei ignitum vehementer, quia similis est lex Dei auro in fornace ignis constituto, vbi non laeditur, quia purum est ab omni sorde. Nam in textu hebraico habetur, zerupha, quod significat, probatum, & examinatum igne. Neque dici potest Septuaginta Interpretes non legisse, zerupha, sed, scerupha, quod propriè ignitum significat: nam in hoc octonario singuli versus incipiunt per litteram trfade, & hoc vocabulum est initium versiculi. Itaque certum est hoc loco per ignitum, intelligi probatum, & examinatum igni, ac per hoc significari legem Domini esse purissimam ab omni iniustitia, vt est aurum igne examinatum. Simile habetur in Psalmo 11. Eloquia Domini casta, argentum igne examinatum. Vnde etiam sequi-

צדופת
שרופת

sequitur, ut eadem lex summo amore diligenda sit. & merito David adiungit, Et seruus tuus dilexit illud. Neque tamen est falsum, sed verissimum, legē Domini esse etiam igneam, ut dicitur Deuter. 33. In dextera eius ignea lex; tum quia instar ignis illuminat, & purificat: tum quia finis eius est charitas, quæ est ignis diuinus.

- V. Adolescentulus sum ego, & contemptus; iustificationes tuas non sum oblitus.

Hoc refert David ad comparationē fratrum suorum, quasi dicat, Ego sum minimus inter fratres meos (hoc enim propriè significat vox hebræa *zahir*) & contemptus à patre, & fratribus; & tamen exaltatus ad Regnum, & à Deo præ omnibus honoratus, quia iustificationes tuas nō sum oblitus. Vide lib. 1. Reg. 16. S. Ambrosius, & S. Augustinus exponunt mysticè de populo Christiano, qui est frater iunior respectu fratris senioris populi Iudaici, & ab illo contemptus, sed à Deo magis dilectus, quia iustificationes Domini nō est oblitus, quas populus Iudaicus oblitus est.

- VI. Iustitia tua iustitia in æternū, & lex tua veritas

Hæc est repetitio, & declaratio secundi versiculi. Iustitia enim Domini, idest, iustissima lex Domini est iustitia æterna, quia immutabilis, & indispensable, & simul est veritas, quia nihil falsi continet; promissiones enim eius, & comminationes omnino impleri debent.

- VII. Tribulatio, & angustia inueniunt me, mandata tua meditatio mea est.

Ex hac veritate fit, ut in omni tribulatione consoletur me legis tuæ assidua meditatio. Tribulatio, & angustia inueniunt me, idest, quotiescunque tribulatio & angustia inueniunt me, mandata tua meditatio mea est, idest, id remedij accipio, ut mediter, & oblecter in mandatis tuis considerandis.

Aequitas testimonia tua in æternum, intellectum da mihi, & viam.

Idem alijs verbis dicit, quod in secundo, & sexto versiculo: nam per æquitatem hoc loco iustitia accipienda est, ut ex textu hebraico constat. Aequitas testimonia tua in æternum, idest, præcepta tua sunt æterna iustitia, quia semper iustissima sunt: ideo peto, ut des mihi intelligentiam præceptorum tuorum, ut ea custodiendo viam, quæ si non custodirem, continuo morerer.

Coph.

Clamaui in toto corde meo, I. exaudi me Domine, iustificationes tuas requiram.

In hoc octonario Propheta desiderium suum erga diuinam legem ardenti oratione demonstrat: ac in primo quidem, & secundo versiculo exprimit vehemētiam desiderij per clamorem; in tertio, & quarto per horam intempestiuam. Clamaui, inquit, in toto corde meo, idest, toto affectu, totisque viribus clamaui: ideo exaudi me Domine. Sicut enim vocem corporalem submissam non faciliè exaudimus, clamorem autem non possumus non exaudire: ita Deus orationem frigidam, & remissam, quasi non audierit, non admittit: ardentem autem, & magno desiderio emissam, quasi non possit non audire, faciliè admittit. Iustificationes tuas requiram, idest, exaudi me, ut iustificationes tuas, idest, præcepta tua diligenter requiram: vel, exaudi me, & ego gratia tua adiutus præcepta tua requiram, quod in idem recidit.

Clamaui ad te, saluum me fac, II. ut custodiam mandata tua.

Potest hoc intelligi de salute in spe, quæ habetur per gratiam in hoc seculo, & de salute in re, quæ habetur per gloriam in futuro seculo. Clamaui ad te, idest, magno desiderio oraui: saluum me fac per gratiam, quæ est salus inchoa-

choata, vt custodiam mandata tua, quātum in hoc seculo fragilitas humana permittit. & rursus, saluum me fac in æterna vita, vt custodiam mandata tua sine vllō timore prauaricandi.

III. Præueni in maturitate, & clamaui: quia in verba tua super-speraui.

Hunc locum corruptum esse aliqui putant, quia S. Augustinus legit, Præueni in immaturitate. Sed credendum est potius corruptum fuisse codicem, quem habuit Sanctus Augustinus: nam Sanctus Hilarius, Sanctus Ambrosius, & Sanctus Hieronymus in commentario, & alij legunt, vt nos habemus, in maturitate. Sciendum est autem verbum, maturare, esse ambiguum, & aliquando significare, perficere, vt cum dicimus, maturari fructus, aliquando, accelerare, & festinare, qua notione dixit Poeta, Maturate fugam, lib. 1. Æneid. &, maturè venisti, tam significat, tempore opportuno venisti, quàm satis citò venisti. Hoc igitur loco maturitas, non est opportunitas temporis, sed acceleratio, & anticipatio horæ, & sensus est, Præueni in maturitate, id est, præueni tempus surgendi, & in acceleratione, & festinatione antequam dies illucesceret, cum adhuc tempus dormiendi esset, ego præ desiderio anticipaui vigilias, & in oratione mea clamaui; quia valde speraui in verba promissionum tuarum.

IV. Præuenerunt oculi mei ad te diluculo: vt meditarer eloquia tua.

Idem repetit alijs verbis. Præuenerunt, inquit, oculi mei tempus vigilandi, & diluculo, id est, valde mane, ante ortum Solis ad te respicere cœperunt, vt gratia tua adiuuante meditarer eloquia tua.

V. Vocem meam audi secundum misericordiam tuam Domine, & secundum iudicium tuum viuifica me.

Pergit in oratione, quam diluculo,

remotis curis temporalibus, in magno silentio rerum omnium, attentissimo animo faciebat. Vocem meam, inquit, audi non secundum merita mea, sed secundum solitam misericordiam tuam: & secundum iudicium tuum quo reddis quod promissisti, viuifica me conseruans, & augens vitam spirituales, quam dedisti, & in futuro seculo perficiens, & consummans, vt amplius mori non possim.

Appropinquauerunt persequentes me iniquitati, à lege autem tua longè facti sunt.

Non sine causa peto viuificari; quoniam non desunt persecutores, qui tentationibus assiduis mortificare me fatagunt. qui persecutores, siue homines, siue dzmones, appropinquauerunt iniquitati, & à lege tua longè facti sunt, id est, iniquitatem diligunt, illi adherent, illam persuadere alijs conantur: sicut è contrario legem tuam oderunt, illam fugiunt, illam omnibus inuisam reddere student. Sanctus Augustinus, Sanctus Ambrosius, & Sanctus Hieronymus in commentario legunt, Appropinquauerunt persequentes mihi iniquè, siue iniquitate, id est, cum iniquitate: ita vt appropinquatio sit ad hominem, vt ei noceant, non ad iniquitatem, vt illi coniungantur. Et quidem vox græca ambigua est, & tam iniquitate, quàm iniquitati reddi potest. vox hebræa, vt nunc se habet, fauet lectioni S. Augustini: nam ad verbum sic reddi potest, Appropinquauerunt persecutores iniquitatis, id est, persecutores iniquissimi appropinquauerunt, supple ad me. Tamen omnino credibile est verba hebraica non esse legenda, rodephe zimma, id est, persecutores iniquitatis, sed, rodephai zimma, id est, persecutores mei iniquitati, quæ lectio est nostræ editionis vulgata, & habetur apud Sanctum Hilarium, & cum lectione græca bene cohæret: & optimè respondet verbis sequentibus, A lege autem tua longè facti sunt: vbi Propheta opponit iniquitatem legi, & dicit, Persecutores suos appropinquasse ini-

רדפי זימא
רדפי זימא

se iniquitati, & recessisse a lege: tamen vterque sensus bonus est.

VII. Prope es tu Domine; & omnes vię tuę veritas.

Quamvis persecutores mei à lege tua longè facti sint, tñ à te longe fieri non potuerunt; quia tu prope es illis per iustitiã, & omnes vię tuę veritas, idest, omnes leges, omnia iudicia tua iustissima sunt. Itaq; manum tuam punientē ipsorum scelera fugere non potuerūt. Mihi quoq; prope es tu Domine per auxilium, & quia omnes vię tuę veritas, non patieris, vt mihi noceant persecutores: nam & si fortè dabis illis potestatem in corpus meum, non dabis in animam meam, & tandem omnis persecutio in coronam glorię conuertetur.

VIII. Initio cognoui de testimonijs tuis, quia in æternum fundasti ea.

Quòd autem omnes vię tuę sint veritas, imò etiam æterna veritas, Initio cognoui de testimonijs tuis, idest, iam inde à primo tempore, quo primum cępi intendere in mandata tua, cognoui ex ipsis dum ea attentè considerarem, quia in æternum fundasti ea, idest, quòd sint æternę veritatis, & planè immutabilia, & indispensabilia. Nam iam supra dictum est, ea esse immutabilia, quia continent ordinem iustitię, & ipsam legislatoris intentionem.

Res.

I. Vide humilitatem meam, & eripe me, quia legem tuam non sum oblitus.

II. Iudica iudicium meum, & redime me, propter eloquium tuum viuifica me.

In hoc octonario rursum Propheta orationem fundit ad Deū pro liberatione ab inimicis, siue dæmonibus, siue hominibus, qui eum temptationibus suis ad prauaricationem legis pertrahere nitebantur. Vide, inquit, humilitatem meam, idest, afflictionem, & tribula-

tionem meam, & eripe me, quia legem tuam non sum oblitus, idest, quamvis legem non perfectè custodiam, tamen nō post tergum meum eam abieci, sed recordor, & recogito eam, & custodire desidero, idèo æquum est, vt eripias me à tentantibus inimicis, & perficias in me, quod per gratiam tuam cępisti. Iudica igitur iudicium meum, idest, iudica causam meam, & redime me per iudiciariam sententiam tuam de manu inimicorum meorum, propter eloquium tuum viuifica me, idest, propter promissionem tuam, siue propter legem, quam constituisti de præmijs bonorum, & supplicijs malorum, viuifica me, vitam gratię augendo, & vitam glorię suo tempore largiendo.

Longe à peccatoribus salus, III. quia iustificationes tuas non exquisierunt.

Dixi viuifica me, quia legem tuam non sum oblitus. Scio enim longè esse à peccatoribus salutem, quia iustificationes tuas non exquisierunt. Nam in primis Dæmones, qui per antonomasiam peccatores dici possunt, longissimè absunt à salute, quia nunquam ad eam peruenient, eo quòd legem Domini non exquisierint; sed eam potius superbiendo contempserint. Alij quoque peccatores tam longè à salute absunt, quàm longè absunt à lege Domini exquirenda: neque enim frustra dictum est à Domino, Si vis ad vitam ingredi, serua mandata, Matth. 19.

Misericordię tuę multę Domine; secundum iudicium tuum viuifica me. IV.

Quamvis seuerissimè punias eos, à quibus longè fecisti salutem tuam: tamen multę sunt etiam misericordię tuę, idèo peto, vt secundum iudicium tuum, quo misericorditer iudicas eos, qui faciunt misericordiam, & qui diligunt legem tuam, viuifices me.

Multi qui persequuntur me, & tribulant me, à testimonijs tuis non declinaui. V.

Non

Non sine causa postulo, vt viuifices me, quia multi sunt hostes mei visibiles, & plures inuisibiles, qui me mortificare contendunt: & tamen ego gratia tua adiutus à testimonijs tuis, hoc est, à praeceptis tuis, quæ sunt quasi rectissima via, non declinaui, neque ad dexteram, neque ad sinistram.

- VI. Vidi prauaricantes, & tabescebam: quia eloquia tua non custodierunt.

Ostendit in hoc versiculo Propheta verum spiritum charitatis, quia non tam moleste ferebat persecutores ob propriam afflictionem, quam ob iniuriam Dei: quod idem antea dixerat illis verbis, Defectio tenuit pro peccatoribus dereliquentibus legem tuam. & rursus, Tabescere me fecit zelus meus, quia obliti sunt verba tua inimici mei.

- VII. Vide, quoniam mandata tua dilexi Domine, in misericordia tua viuifica me.

Ego videns prauaricantes, tabescebam; æquum est, vt tu videns me diligentem mandata tua, misericorditer me viuifices.

- VIII. Principium verborum tuorum veritas, in æternum omnia iudicia iustitiæ tuæ.

Duobus modis potest intelligi præsens versiculus. Vno modo, vt sensus sit, verba tua procedunt à veritate, vt à suo principio, & quasi fonte, & ideo verissima sunt, & in æternum manent iudicia iustitiæ tuæ, quæ sunt vt pios maneat præmium, & impios pœna: ita exponit Sanctus Augustinus. Altero modo, vt sit sensus, Principium verborum tuorum, quando videlicet cœpisti loqui cum Adamo, & iubens sub pœna mortis, ne tangeret lignum scientiæ boni, & mali; veritas fuit, idest, verumum fuit, & iudicia iustitiæ tuæ, quibus peccata tunc punire cœpisti, sempiterna sunt: ita exponit Euthymius.

Scio.

Principes persecuti sunt me gratis, & à verbis tuis formidauit cor meum.

In hoc octonario demonstrat Propheta constantiam suam in custodienda lege Domini, & desiderium cauendi ab omni prauaricatione. Principes, inquit, persecuti sunt me gratis, idest, Saul Rex sine vlla causa me persecutus est, reddens mala pro bonis: vt etiam postea fecit Isboset filius Saulis, qui duce Abner iniuste mecum bella gessit; & tandem idem fecit filius meus Absalon, qui Regnum sibi vsurpare, meque de solio exturbare conatus est. Et à verbis tuis formidauit cor meum, idest, ego tamen tantis tentationibus non succubui, vt eis nocerem, sed timens mandata tua, semel atq; iterum Sauli peperci, & mortem Isboset vltus fui, & Absalonem defleui, reddens bona pro malis. Sanctus Ambrosius, & S. Augustinus hæc verba accommodant sanctis Martyribus, qui persecutione iniustissimam passi ab Imperatoribus infidelibus, plus timuerunt Deum, vt fidem conseruarent, quam minas Principum, vt fidem negarent.

Lætabor ego super eloquia tua, sicut qui inuenit spolia multa.

Non solum timui à verbis tuis, sed etiam dilexi verba tua, & ideo lætabor super eloquia tua, cum dabitur occasio illa adimplendi, sicut lætatur, qui peracto prælio inuenit multa spolia hostium deuictorum. Aptissima similitudo, tum quia Dauid vir bellicosus erat, & assuetus prælijs, tum quia in præceptis Dominicis obseruadis cum diabolo acriter pugnandum est, & ex ea pugna, qui victor reuertitur, inuenit illustres coronas à Deo paratas omnibus hostium spolijs pretiosiores.

Iniquitatem odio habui, & abominatus sum, legem autem tuam dilexi.

Iterum repetit amorem suum erga legem diuinam, & odium erga iniquitatem.

tehr. Quodd erat manifestum iudicium amoris Legislatoris: nam & Dominus in Euangelio dicit, Si quis diligit me, sermonem meum seruabit, Io. 14. & ibidem, Qui habet mandata mea, & seruat ea, ille est qui diligit me. Felix, qui Spiritu sancto reddente testimonium spiritui eius, dicere potest, Iniquitate odio habui, & legem tuam dilexi.

IIII. Septies in die laudem dixi tibi, super iudicia iustitiæ tuæ.

Et hoc est charitatis signum, sine intermissione Deum laudare, & iudicia eius iustissima sint, & leges ipsius summam iustitiam in se contineant. Quamuis per numerum septennarium intelligatur hoc loco frequentissima laus, quomodo intelligitur frequens lapsus, cum dicitur, Septies in die cadit iustus, Prou. 24. tamen non sine causa ex hoc loco Ecclesia usum septem horarum canonicarum instituisse videtur. Nam cum ad imitationem tam sancti Regis vellet filios suos frequentissime Deum laudare, determinauit septennarium numerum, cui si addatur octaua hora, de qua dictum est supra, Media nocte surgebā ad cōfitendum tibi, fiet, ut tertia quaque hora Trinitas Deus à fidelibus laudetur, ut S. Cyprianus notauit in serm. 6. qui est de oratione Dominica.

v. Pax multa diligentibus legem tuam, & non est illis scandalum.

Magna, & verissima laus est dilectionis legis diuinæ: nam qui diligit legem, diligit Deum legislatorem: qui autem diligit Deum, diligit omnia in Deo, ac per hoc nullum habet ex parte sua inimicum, sed cum omnibus ex parte sua pacem habet. Deinde, Diligentibus Deum omnia cooperantur in bonum, ut dicit Apostolus Ro. 8. Nemo autem nocere potest ei, cui omnia cooperantur in bonum. quare qui diligit Deum cum omnibus pacem habere debet. & ideo Apostolus ad Gal. 5. dicit, Charitas, gaudium, pax, &c. Pari ratione non est scandalum diligentibus legem Domini, sed sine offensione currit ad patriam: nam scandalum actuum non cadit in eum,

qui diligit legem, cum scādālizare peccare sit, & peccare sit legem præuaricari. Scandalum autem passuum, vel est pusillorum, qui ex ignorantia existimant, illicitum esse, quod licitum est, & offenduntur cum vident illa fieri, quæ ipsi arbitrantur illicita: vel est Pharisæorum, qui ex propria malitia in peiorem partem interpretantur, quæ interpretanda erant in meliorem. At qui diligunt legem Domini, perfecti sunt in charitate, pinde nec pusilli, nec Pharisæi sunt, ac per hoc non est illis scandalum. vide S. Th. q. 43. art. 5. & 6. in 2. 2.

Expectabam salutare tuum Domine, & mandata tua dilexi. VI.

Induit personam perfectorum hoc loco Propheta, & ideo cum fiducia dicit, Expectabam salutare tuum, id est, salutem æternam, quæ à te est. & rationem reddit, Et mandata tua dilexi, id est, quia mandata tua dilexi. Quo modo dicit Apostolus 1. Tim. 4. Cursum consummaui, fidem seruauit, in reliquo reposita est mihi corona iustitiæ, quam reddet mihi in illa die iustus Iudex.

Custodiuit anima mea testimonium tua, & dilexit ea vehemēter. VII.

In eadem perfecti persona loquitur, ac testatur, se mandata seruasse, quoniam ea vehemēter amauit. Verè enim amor, ut scripsit S. Gregorius, operatur magna, si est; si autē operari renuit, amor non est. & Dominus in Euangelio Io. 10. Qui nō diligit me, sermones meos non seruat. & Apostolus ad Ro. 16. Dilectio malum non operatur, plenitudo ergo legis est dilectio. & ibidem, Qui diligit legem impleuit.

Seruauit mandata tua, & testimonia tua, quia omnes viæ meæ in conspectu tuo. VIII.

Iterum in persona perfectorum, se omnia mandata, & testimonia seruasse affirmat: sed ex alio motiuo, quod proprium est perfectorum. videlicet quia in omnibus actionibus suis cogitabat Deum esse præsentem. id enim significat illud, quia omnes viæ meæ in conspectu

specu tuo, idest, quicquid agebam, in conspectu tuo agebam, sciens, & cogitans, te omnia conspiciere. Hæc enim cogitatio mirabilem vim habet ad moderandas actiones humanas: nam si conspectus Principis terreni id efficit, ut subditi coram eo peccare non audeant, imò etiã desides, & negligentes, vel timidi & parui animi videri erubescant: quid faceret conspectus Principis celestis, atque omnipotentis, si ante oculos mentis perpetuo versaretur? Hinc Dominus Abrahamo dicebat, Ambula coram me, & esto perfectus, Gen. 17. & Abraham dicebat, Dominus in cuius conspectu ambulo. Gé. 24. & Helias, ac Elias dicebant, Vivit Dominus, in cuius conspectu sto. 3. Reg. 17. & 4. Reg. 3.

Tau.

I. Appropinquet deprecatio mea in conspectu tuo Domine: iuxta eloquium tuum da mihi intellectum.

In hoc ultimo octonario concluditur Psalmus oratione ad Deum pro gratia, & salute sæpius petita; sciebat enim Propheta, quod postea in Evangelio Dominus admonuit, perseverantiam in oratione esse ad impetrandum longè utilissimam. Luc. 11. Ait igitur, Appropinquet deprecatio mea in conspectu tuo Domine, idest, deprecatio mea, quæ suis meritis non confidit, eleuetur, & ascendant aspirante gratia tua, & appropinquet tibi, ita ut eam propius aspicere, & admittere digneris. Illud, in conspectu tuo, positum est pro, ad conspectum tuum, siue conspectui tuo. Quid autem contineat deprecatio, explicatur in verbis sequentibus, Iuxta eloquium tuum da mihi intellectum, idest, iuxta promissum tuum, quod audiui in Psal. 31. Intellectum tibi dabo, & instruam te; da mihi intelligere mandata tua eo modo, quo intelligunt, qui ea opere adimplent, & qui adimplendo ad vitam perveniunt.

II. Intret postulatio mea in conspectu tuo, secundum eloquium tuum eripe me.

Repetit alijs verbis eandem petitionem; illud autem eripe me, signifi-

cat finem, cur petierit intellectum sibi dari: nam finis illuminationis est liberatio à peccatis, iuxta illud Evangelij, Cognoscetis veritatem, & veritas liberabit vos, Ioan. 8.

Eruſtabunt labia mea hymnum, cum docueris me iustificationes tuas.

Promittit gratiarum actionem, si obtinerit gratiam tam sæpe imploratam. Cum docueris me iustificationes tuas, ita ut gratia tua illuminante, & iuvante perficiam mandata tua, tunc ex plenitudine lætitiæ interioris, & agnitionis magni huius beneficii, eruſtabunt labia mea hymnum laudis, & gratiarum actionis: nam ructus ex repletionem oritur, & ex abundantia cordis os loquitur.

Pronunciabit lingua mea eloquium tuum, quia omnia mandata tua æquitas.

Non solum dicit se laudaturum Deum, sed etiam docturum homines, ac demonstraturum, quanta sit æquitas mandatorum Dei. Pronunciabit, inquit, in lingua mea eloquium tuum, idest, loquar hominibus præcepta tua, & docebo, quod omnia mandata tua æquitas sunt, idest, æquissima sunt, ac proinde æquus est, ut ab omnibus diligentissime observentur. Nisi magis placeat, hunc versiculum esse repetitionem versiculi superioris, ut sensus sit, Laudabit lingua mea eloquium tuum, idest, præcepta tua, quia æquissima sunt. Sed prior expositio est S. Augustini, & communior.

Fiat manus tua, ut saluet me: quoniam mandata tua elegi.

Pergit in oratione sua David petens, quod unice petendum est, æternam salutem, quæ est finis mandatorum. Fiat manus tua, ut saluet me, idest, sit potentia & sapientia tua ad me saluandum. Sic enim ex hebreo verti posset, ex quo intelligimus, illud, fiat, positum esse pro, fit; quomodo etiam in 1. capite Genesis, ubi dicitur, Fiat lux, fiat firmamentum, fiant luminaria; semper in hebreo est verbum substantivum, fit. Et quoniam

Dei Christum esse docet Apostolus 1. Corint. 1. rectè exponunt Patres, sit Christus tuus ad me saluandum. Quoniam mandata tua elegi. Optima ratio, cur prætendat salutem, qui madata elegit, quoniam scriptum est, Si vis ad vitam ingredi, serui mandata, Matth. 19.

VI. Concupiui salutare tuum Domine; & lex tua meditatio mea est.

Reddit rationem, cur tantopere petat salutem; quia videlicet illam præ omnibus desideratis concupiuit. Sicut re vera super omnia bona concupiscenda est, cum sola desiderium nostrum possit implere. & quoniam non satis est concupiscere salutem, si quis ad eam peruenire velit, sed necesse est ambulare per viam præceptorum Dei; ideo subiungit, & lex tua meditatio mea est, idest, de lege custodienda semper cogito, & in illa custodienda me semper exerceo.

VII. Viuet anima mea, & laudabit te; & iudicia tua adiuuabunt me.

Viuet anima mea, cum salutem concupitam obtinuerit, & manus tua fuerit ad saluandum eam: & tunc officium eius erit, & solum negotium laudare te: nam Beati qui habitant in domo tua Domine, in secula seculorum laudabunt te. Psal. 83. Et iudicia tua adiuuabunt me, idest, & mandata tua à me custodita adiuuabunt me, vt aliquando etiam corpore viuam, cum resurrexero in resurrectionem vitæ. vel, iudicia tua, quibus in nouissimo die iudicabis pro meritis viuos & mortuos, adiuuabunt me, vt corpore quoq. vitam sempiternam possideam.

VIII. Erraui sicut ovis, quæ periit, quære seruum tuum, quia mandata tua non sum oblitus.

Erraui enim à patria expulsus, & adhuc exul erro propter culpam parentis primi toti humano generi communicatam, & erraui, sicut ovis, quæ seducta periit, non sicut Diabolus Leo rugiens, qui ex malitia cecidit. Quære ergo seruum tuum: quamuis enim ex parte quæ

Card. Belarm. in Psal.

seris & inueneris, quatenus animam iustificasti à peccato, & reconciliasti Deo; tamen adhuc quærenda est ovis perditæ, quatenus expectat redemptionem corporis sui, vt tota ad montes cælestes, & vberima pascua, vbi relictæ sūt nonaginta nouem, quæ non errarunt, perducatur. confidenter autem peto salutem animæ, & corporis, quia mandata tua non sum oblitus. In libris græcis varietas est propter vocabulorum similitudinem, vt notarunt Sancti Patres Ambrosius, & Augustinus; nam alij codices habent *quære*, idest, quare, alij *seru*, idest, viuifica: imò sanctus Hilarius legit solum viuifica. sed in hebræo nulla est varietas, neque literarum similitudo, & habetur vocabulum, quod nihil significat, nisi, quære. Non desunt ex recentioribus, qui hunc versiculum exponant de Davide errante in montibus, quando persecutiones Saulis, vel Absalonis, fugiebat. Sed nimis humilis videtur sensus, & ab expositione veterum Patrum alienus.

PSALMVS CXIX.

Titulus, & Argumentum.

Canticum Graduum.



PSALMI quindecim, qui proximè sequuntur post Psalmum ceterisimum decimum octauum, omnes in titulo habent, Canticum Graduum, & quamuis gradus tam ad ascensum, quam ad descensum referri possit; tamen hoc loco non nisi ad ascensum pertinet: nam hebraica vox, amhaloth, ascensionem significat, & similiter vox græca *ἀναβήματα*. Igitur Psalmi isti quindecim, cantica quædam ascensionum sunt, siue cætica eorum, qui per gradus quosdam sursum ascendunt. & quidem græci, Theodoretus, & Euthymius, docent cantica ista intelligenda esse ad literam de ascensione Iudæorum

מַעֲלוֹת

Ccc de

de Babylone in Hierusalem, Spiritu sancto per os David præcinente calamitatem captiuitatis Babylonicæ, & latitiam liberationis. Alij malūt hos quindecim Psalmos compositos fuisse, vt canerentur in ascensione quindecim graduum templi Salomonis: tot enim fuisse gradus templi non solum scribunt Nicolans Lyranus, & alij recentiores, sed etiam Sanctus Augustinus tractatu in Psalmum postremum, Tot sunt, inquit, Psalmi, qui appellantur graduū, quoniam tot fuerunt etiam templi gradus. Sed quicquid sit de his opinionibus, illud certum est, ascensiones istas siue de Babylone in Hierusalem, siue per gradus templi Salomonis, figuras fuisse ascensionis electorum, qui per gradus virtutum ac præcipuè charitatis ascendunt de valle lacrymarum ad caelestem Hierusalem; & de hac ascensione Spiritum sanctum potissimum esse loquutum. Certè Psalmi sunt pleni affectibus in Deum, & proprij eorum, qui se peregrinos, atque exules in terra inimicorum esse intelligunt; & nunc ærumnas exilij desunt, nunc ad requiem patriæ suspirant; semper autem se ad ascendendum, & in via Domini proficiendum accendunt.

Explicatio Psalmi 109.

I. AD Dominum cū tribularer clamaui, & exaudiuit me.

Inter varias huius exilij calamitates, vna est maximè deploranda; videlicet, lingua dolosa eorum, cum quibus versari cogimur. ab hac se liberari petijisse, & impetrasse canit Propheeta, vt exemplo suo instruat ceteros peregrinos. Ego, inquit, cū tribularer nō respexi ad auxilium hominum, sed clamaui in oratione ad Dominum, & ille pro sua pietate exaudiuit me. Verba sunt clara, codiceque hebraici, graeci, latini conueniunt.

II. Domine libera animam meā à labijs iniquis & à lingua dolosa. Declarat quid orauerit clamando,

Dixi, inquit, Domine libera animam meam à labijs iniquis, & à lingua dolosa, quod est vnum ex maioribus, & frequentioribus malis huius nostræ peregrinationis. labia iniqua proferunt detractiones, conuicia, calumnias, falsa testimonia, & similia verba contra legem iustitiæ: lingua dolosa proferit verba deceptionis, adulatoria, simulatoria, fraudulenta. & possunt inueniri labia iniusta sine lingua dolosa, vt cū quis aperte conuiciatur, vel detrahit; sed cū lingua dolosa adiungitur ad labia iniusta, malum est grauissimum, adeo vt nihil ferè addi possit, vt dicetur in sequenti versiculo. Quod attinet ad verba, illud, animam meam, positum est pro me, quasi diceret libera me: sed nominatur anima, vel quia est pars nobilior, vel quia lingua dolosa parum nocet, nisi vulneret animam, inducendo videlicet eam ad peccandum. Illud autem, à labijs iniquis, S. Hieronymus legit ex hebræo à labio mendacij. Sed vox hebræa, sceker, vtrunque significat, mendacium, & prauaricationem. proinde rectè vertunt etiam Septuaginta à labijs, *de iniquis*, idest, iniquis, & sententia est plenior, & grauior, vt etiam in Psalmo 42. Ab homine iniquo, & doloso eripe me.

Quid detur tibi, aut quid apponatur tibi ad linguam dolosā? III.

Reddit rationem, cur petierit liberari à lingua dolosa, quia videlicet sit tale malum, vt nihil ei addi possit. quasi dicat, Quid enim aliud dari, aut addi posset supra linguam dolosam? sed difficultas est in verbis, tum quia in hebræo legitur actiue, Quid dabit, aut quid apponet: tum quia illud pronomen, tibi, videtur cogere, vt hæc sententia non referatur ad Deum, & proinde non continuetur cum superioribus verbis. Quod attinet ad primam difficultatem, Verba hebraica legi possunt etiam passiuè, si mutantur puncta, præsertim illud, itten, quod potest legi, iurtan, & legenda esse passiuè perspicuum est, quia non solum Septuaginta verterunt passiuè, sed etiam Sanctus

Hiero.

Hieronymus reddidit ex hebræo passivæ, Quid dabitur tibi, aut quid apponetur tibi ad linguam dolosam? Illud, tibi, potest esse ociosum, ex phrasi hebraica, ut in Canticis cap. 1. Egredere tibi, & cap. 2. Veni tibi, surge tibi, imber abiit sibi, & in hoc ipso Psalmo, multum incola fuit anima mea sibi; quod, sibi, ut redundans omiserunt Interpretes. & tunc tota sententia continuabitur hoc modo, Domine libera animam meam à labijs iniquis, & à lingua dolosa: quid enim mali dari, aut apponi potest ad linguam dolosam, id est, supra linguam dolosam? Quod si non placeat esse hoc loco ociosum illud, sibi: potest ita exponi, ut Prophetam post orationem ad Deum, vertat se, vel ad se ipsum, vel ad incertam personam dicens, Domine libera animam meam à labijs iniquis, & à lingua dolosa: quid enim o anima mea, vel o quicumque hic ades, tibi dari mali, aut addi potest ad linguam dolosam? id est, super malum linguæ dolosæ?

IV. Sagittæ potentis acutæ cum carbonibus desolatorijs.

Declarat elegantissima similitudine quale malum sit lingua dolosa; ac dicit esse verba eius, quasi sagittas, quæ natura sua longè feriunt, & celeriter, ut vix caueri possint. & addit amplificationem admirabilem dicens, non esse qualescunque sagittas, sed potentis, id est, à robusta manu cum impetu emissas, & præterea ab artifice benè politas, & acutas; & denique adeò ignitas, ut quiduis desolare, & vastare possint, qualia sunt fulgura cælestia, quæ ab omnipotenti manu mittuntur, & sunt verè ignita, & acutissima. Igitur talia sunt verba dolosa, præsertim quando sunt instrumenta Diaboli ad occidendas animas, quæ vocantur ab Apostolo ad Ephes. 6. Tela nequissimi ignea. Sanctus Augustinus hos duos versiculos multo aliter exponit, nimirum vult esse dialogismum. ut primum homo in tribulatione positus oret, Domine libera animam meam à labijs iniquis, & à lingua dolosa. deinde Do-

minus respondeat, Quid detur tibi, aut quid apponatur tibi ad linguam dolosam? id est, quid remedij tibi dari poterit, aut apponi contra linguam dolosam? hoc videlicet vnicum tibi remedium erit. Sagittæ potentis acutæ cum carbonibus desolatorijs, id est, verba Dei cum exemplis charitatis igne succensis: vivus enim est sermo Dei, & penetrabilior omni gladio ancipiti, cui si accedat exemplum ex vera charitate prodiens, quasi carbo ignitus, nihil ei resistere poterit. Vtræque expositio ad ædificationem facit, sed prior videtur magis literalis. Quod attinet ad verba, illud desolatorijs, in hebræo est, rethamim, quod Sanctus Hieronymus rectè vertit, iuniperorum. Sed Septuaginta explicaverunt metaphoram. Carbones enim iuniperorum sunt valdè solidi, & ideò aptissimi ad incendendum, & desolandum.

תמים

Heu mihi quia incolatus meus prolongatus est: habitavi cum habitantibus Cedar: multum incola fuit anima mea.

Ex occasione tam magni mali, & tã frequentis in hac peregrinatione, suspirat ad patriam, & sic verè, & ex corde cantat canticum ascensionis. Heu mihi, inquit, quia incolatus meus, vel ut ex hebræo vertit Sanctus Hieronymus, peregrinatio mea, prolongata est. Cupit enim verus peregrinus cum Apostolo magis peregrinari à corpore, quàm à Domino, & ideò nimis longam iudicat præsentem vitam, in qua peregrinatur à Domino. Habitavi cum habitantibus Cedar. Non mirum videatur, si longam nimis queror esse hanc habitationem: habitavi enim hucusque cum habitantibus Cedar, id est, cum barbaris, & efferatis gentibus, quæ non habitant in ciuitatibus, sed in tentorijs, iisque nigris, & rusticis, quales sunt Arabes. In hebræo, & græco codice habetur, Habitavi cum tabernaculis Cedar. sed idem est sensus. quid enim est aliud habitare cum tabernaculis, quàm habitare cum habitantibus in tabernaculis? Vox

Ccc 2 Cedar

Cedar hebraica est; & nigredinem tenebrasque significat. unde Cantico- rum 1. opponuntur tabernacula Cedar pellibus Salomonis, idest, tentoria nigra, & rustica, tabernaculis pretiosis, & splendidis. Verè autem ciuitates, & palatia Regum huius mundi nihil sunt, nisi tabernacula rusticorum, comparata ad mansiones caelestis Hierusalem. Ideò rursum lamentatur peregrinus Dei dicens, Multum incola fuit anima mea, idest, nimis longus fuit iam incolatus meus in terra aliena. In hebræo additur, sibi. sed, vt supra diximus, ex phrasi hebraica otiose additur, & propterea ab interpretibus sepe omittitur: idem enim est habitauit sibi, & habitauit. Hinc potest colligi, paucos hodie reperiri, qui ex corde cantent canticum graduum, cum plerique omnes diligant adeò peregrinationem, & tabernacula Cedar, vt nihil tristius audiant, quam sermonem de discessu ab hac vita.

VI. Cum his, qui oderunt pacem eram pacificus: cum loquebar illis, impugnabant me gratis.

Concludit rationem reddens, cur sit malum tandiu peregrinari, & simul declarans metaphoram tabernaculorum Cedar. quod enim metaphoricè, & obscure dixit, habitauit cum habitantibus in tabernaculis Cedar: clarè exponit dicens, Habitauit cum his, qui oderunt pacem, ego, qui nihil diligo magis, quàm pacem, idest, habitauit cum mihi dissimilibus, cum peruersis, & adeò iniustis, vt non solum cum hostibus, sed etiam cum amicis belligerare soleant: & si fortè loqui de pace incipiebam ad illos; ipsi sine vlla causa magis me impugnabant. In textu hebræo est alia interpunctio, quam etiam sequitur S. Hieronymus. sic ibi legitur, Multum incola fuit anima mea cum his qui oderunt pacem. Ego pacem loquebar, & illi ad bellum. Sed melior est interpunctio Septuaginta Interpretum, quæ est etià antiquior: nam in hebræo non est simpliciter, Ego pacem loquebar, sed hoc modo, si verbum verbo reddamus, Ego pacem, &

cum loquebar. Ex quo intelligimus, recte Septuaginta post pacem, posuisse punctum. & quod diximus ex hebræo reddi, ego pacem, potest etiam reddi, ego pax, vt sit sensus, cum his qui oderunt pacem, ego pax eram, idest, adeò pacificus eram, vt ipsa pax dici possem; & postea sequitur alius versiculus, Et cum loquebar, illi ad bellum, nimirum prouocabant. quod in sententia conuenit cum eo, quod verterunt Septuaginta, & nos in nostra editione latina legimus, Cum loquebar illis, impugnabant me. Quod autem additur, gratis, positum est à Septuaginta explicationis gratia. Totus hic Psalmus conuenit quidè omnibus electis, sed præcipuè capiti electorum Christo, quatenus viator erat, secundum carnis passibilis conditione. Verè enim clamauit ipse ad Dominum patrem suum pernoctans in oratione Dei, & postea in horto, & demum in cruce. & verissimè exauditus est, cum exaltauerit illum Deus, & dederit ei nomen super omne nomen. Verè quoque passus est labia iniqua, & linguas dolosas vsque ad mortem, vt ex toto decursu Euangeliorum patet. Verissimè dicere potuit, Incolatus meus prolongatus est; cum in Euangelio dixerit, Generatio adultera, & incredula, quam diu apud vos ero, quam diu vos patiar? Verè habitauit cum habitantibus Cedar, quia licet ipse lux esset, ac per hoc in Cedar, idest, in tenebris non habitaret, sed in lumine: tamen cum habitantibus Cedar visus est, & inter eos conuersatus est. Denique verè cum ijs, qui oderunt pacem, erat pacificus; quia cum malediceretur non maledicebat, cum pateretur non comminabatur: & cum loqueretur illis de pace, de charitate, de Regno Dei; ipsi contra, eum impugnabant sine vlla ratione, vel causa. quod Ioan. 15. ipse idem notauit, cum ait, Sed vt impleatur sermo, qui in lege eorum scriptus est, quia odio habuerunt me gratis.

PSALMVS CXX.

Titulus, & Argumentum.

Canticum Graduum.



SECUNDVS Psalmus ex gradualibus consolatur peregrinos ascendentes in Hierusalem promittens perpetuam Dei custodiam. ac primum loquitur Propheta in persona peregrini: deinde loquitur in persona propria, & consolatur peregrinum.

Explicatio Psalmi 120.

I. **L**euauit oculos meos in montes: vnde veniet auxilium mihi.

Peregrini nihil frequentius aspiciunt, quam locum, ad quem tendunt, si is conspici possit; sin minus, locum aliquem viciniorem. inde enim consolationem magnam percipiunt: quæ consolatio vires, & auxilium præbet ad ambulandum. & quia terrena Hierusalem in montibus erat, & cælestis Hierusalem supra omnes cælos est, ideo peregrinus, siue vmbaticus, siue verus dicit, Leuauit oculos meos in montes, vbi sedet ciuitas sancta, vnde veniet mihi auxilium consolationis. In hebræo est verbum temporis futuri. Leuabo. sed sepe variantur tempora apud hebræos, & præterea quod ad sensum attinet, non multum refert, siue peregrinus dicat, Leuauit iam oculos meos, siue leuabo iam oculos meos. Sanctus Augustinus mysticè more suo, per montes, intelligit Sanctos Apostolos; sicut enim oriente sole primi sunt montes, qui lumen recipiunt, sic veniente Christo, iustitiæ sole, primi fuerunt Apostoli, qui lumen receperunt.

II. **A**uxilium meum à Domino, qui fecit cælum, & terram.

Declarat peregrinus, se non expecta-

Card. Belarm. in Psal.

re auxilium à montibus, ad quos oculos leuauit, sed ab eo, qui præfidet sanctæ ciuitati in montibus positæ. quod clarius explicat initio Psalmi 112. Ad te leuauit oculos meos, qui habitas in cælis, describit autem verum Deum per opus creationis cæli, & terræ. sicut in alio Psalmo, Dij gentium dæmonia Dominus autem cælos fecit.

Non det in commotionem pedem tuum, neque dormitet, qui custodit te.

Mutat Propheta personam, & loquitur in persona propria, & respondet, peregrino, quasi dicat, Bene, & sapienter leuasti oculos tuos in montes, & non respexisti vanitates, quæ occurrunt in via. sed ijs prætermisiss à conditore cælestis patriæ auxilium, & consolationem expectasti; ideo ego opto, vt Deus non det in commotionem pedem tuum, id est, non sinat te labi, & cadere in via, sed roboret pedes tuos, vt stabiles in cursu ad patriam perseuerent. Et non dormitet, qui custodit te, id est, opto etiam, & rogo, vt Pater, qui est custos tuus, semper vigilet in tua custodia, & nunquam sinat commoueri pedes tuos. Obserua primò circa hunc versiculum, quod Deus metaphoricè dicitur dormire, quando permittit nos cadere, ac si non aduerteret, quomodo qui dormitat non aduertit quid fiat. Secundò, phrasim hebraicam est, commoueri pedes, siue nutare, pro eo quod est labi peccatum. vt Psal. 17. Non sunt infirmata vestigia mea. & Psal. 72. Mei autem penè moti sunt pedes, penè effusi sunt gressus mei. Tertiò, in hebræo habetur in futuro, Non dabit ad mouendum pedem tuum. iuxta quam lectionem, esset prædictio, & promissio. Sed tamè vt diximus, tempus vnum in hebræo sepe ponitur pro alio tempore. vnde non solum Septuaginta sed etiam S. Hieronymus vertit, non det. Sanctus Augustinus legit, Non des commoueri pedem meum. Sed nescio quem codicem sequutus sit. nostri enim hebraici, græci, & latini habent tertiam personam, non det, vel, non dabit commoueri pedem tuum.

Ccc 3 Ecce

IV. Ecce non dormitabit, neque dormiet, qui custodit Israel.

Promittit Propheta peregrino impetrationem gratiæ, quæ petebatur. quasi dicat, oro, ut Pater non dormitet, qui te custodiendum suscepit. & sine dubio non dormitabit: nam nunquam dormitat, neque dormit, qui custodit populum suum peculiarem, qui per Israellem significatur, & in quo populo omnes illi continentur, qui tanquam peregrini in hoc mundo versantur, & ad patriam cælestem ascendere festinant. Quod dicitur, non dormitabit, neque dormiet, hunc habet sensum, non dormitabit subinde oculos claudendo, & aperiendo; & mulio minus se tradet profundo somno. Itaque semper vigilabit, neque oculos ad momentum claudet. Sanctus Augustinus pulchrè dicit, homines dormire, quando carnem infirmitatis portant, dormire, quando moriuntur; & ideo non esse fidendum custodiæ hominum. Domino autem fidelissimo custodi tuto credere nos posse, cum ipse neque dormitet unquam in infirmitate, neque dormiat in morte. Monet etiam idem Augustinus, rectè fideles homines per Israellem significari, quia Israel, Deum videns interpretatur, & fideles, Deum nunc per fidem vident, visuri postea etiam per speciem.

V. Dominus custodit te, Dominus protectio tua super manum dexteram tuam.

VI. Per diem sol non vret te, neque luna per noctem.

Dixit paulò ante Propheta, peregrinum in Deo confidentem, custodiendum esse, ne cadat in via: addit nunc aliam consolationem, custodiendum videlicet, etiam esse, ne fatigetur ab æstu solis per diem, neque à lumine lunæ per noctem. quoniam Deus erit illi quasi umbraculum, quod manu dextera tenebit, eoque tum caput, tum etiam reliquum corpus regere poterit. Dominus, inquit Propheta, non solum custo-

dit Israellem, id est, populum suum universè, sed te quoque in particulari custodit, custodit autem, quia est protectio, siue umbraculum, ut propriè sonat vox hebraica, super manum dexteram tuam. ex quo fiet, ut te tali umbraculo, ministerio dexteræ manus, tectum, neque sol vret per diem, neque luna per noctem. In textu græco est tempus futurum, Dominus custodiet te. sed in hebræo non est propriè tempus præsens, neque futurum; sed participium Dominus custodiens te, siue custos tuus: sensus autem idem est. Illud autem, Dominus protectio tua super manum dexteram tuam, posset continere metaphoram, ut alij volunt, hominis armati, & ad dexteram stantis, ut sensus sit, Dominus erit, vel est protectio tua, quia stat quasi miles armatus ad dexteram tuam. Sed quod nos diximus, magis convenit literæ, tum quia in hebræo pro voce protectio, est, *zet*, *lx* umbra, siue umbraculum: tum quia, & in hebræo, & in græco est, super manum, non ad manum; unde videtur Prophetam respexisse ad umbraculum, quod super manum ponitur, & manu geritur: tum denique quia sequitur, neque sol per diem vret te, neque luna per noctem: à calore autem, vel lumine solis, & lunæ non defendit miles ad dexteram constitutus, sed umbraculum manu dextera super caput extensum. Porro metaphoram umbraculi, & solis ac lunæ, diei, & noctis, significat gratiam Dei, quæ peregrinum custodit tempore prosperitatis, & aduersitatis. neque enim minus lædere tolet in hoc itinere dies prosperitatis, quam nox aduersitatis. S. Augustinus more suo mysticè exponit dexteram, & sinistram, ac dicit, Deum protegere dexteram, non sinistram, quia læpe permittit hominem lædi in temporalibus, quæ significatur per sinistram, & non finit lædi in bonis spiritualibus, quæ significantur per dexteram.

Dominus custodit te ab omni malo, custodiat animam tuam Dominus.

Addit Propheta aliam consolationem,

nem, eamque generalem; quasi dicat, non solum te Dominus custodiet, ne cadas, & ne fatigeris, sed ab omni alio malo, quod in itinere occurrere possit, te Dominus proteget, atque custodiet. ex quo fiet, vt anima tua, seu vita tua incolumis omnino toto in itinere conseruetur. In hebraico, græcoque textu habetur in tempore futuro, Dominus custodiet te. sed in sensu nulla differentia est: Dominus enim & custodit nunc, & custodiet postea. & hanc continuationem significare solet tempus futurum apud hebræos.

VIII. Dominus custodiat introitum tuum, & exitum tuum ex hoc nunc, & vsque in sæculum.

Concludit Propheta, addendo vltimam, & optatissimam consolationem, quasi dicat, non solum in aliqua parte itineris peregrinus Dei, qui ascensiones disposuit in corde suo, custodietur: sed in toto itinere semper custodietur: omne enim iter consistit in introeundo, & exeundo. dum enim progredimur, intramus vnā viam, & ea finita eximus: deinde intramus aliam; & postea eximus. sic etiam intramus vnā Provinciam, vnā ciuitatem, vnā domum, & deinde eximus, & intramus aliam, & eximus donec finito itinere ad patriam peruenimus. Sic igitur in via vite progredimur dum inchoamus, & perficimus opera bona: inchoare enim, intrare; perficere, exire est. Illud autem, ex hoc nunc, & vsque in sæculum, idem est, quod nunc, & semper; quasi dicat, ex hoc nunc, idest, ex hoc præsentī tempore, incipiat Dominus introitum, & exitum tuum custodire, & vsque in sæculum non desinat custodire. Sanctus Augustinus per introitum, & exitum, intelligit introitum in tentationem, & exitum ex tentatione. Alij generalius initium, & finem omnium negotiorum, siue omnium actionum nostrarum; siue omnem humanā consuetudinem, iuxta illud Act. 1. Ex quo intrauit, & exiuit inter nos Dominus Iesus, idest, ex quo nobiscum cepit conuersari Dominus Iesus. Parum

autem refert, quòd in hebræo legatur in futuro, custodiet: nam significationes temporum facillè variantur. Vnde ipse etiam Sanctus Hieronymus vertit ex hebræo, custodiat, vt nos in editione vulgata legimus.

PSALMVS CXXI.

Titulus, & Argumentum.

Canticum Graduum.

HIC est tertius Psalmus Gradualis, in quo Propheta describit pulchritudinem, & nobilitatem ciuitatis sanctæ Hierusalem; ad quam reuerti cupiebant hebræi ex babylonica captiuitate. Sed vt ciuitas illa typus erat cælestis patriæ, ita redeuntes hebræi ex captiuitate ad terrenam Hierusalem, figura erant peregrinationis, & ascensionis nostræ ad eam quæ sursum est, Hierusalem. Itaque totus Psalmus de vtraque ciuitate, & de peregrinis vtrisque intelligi debet: sed primaria intentio Spiritus sancti ad primarium finem sine dubitatione dirigitur.

Explicatio Psalmi 121.

Lætatus sum in his, quæ dicta sunt mihi, in domum Domini ibimus.

Verba sunt populi Dei, qui lætari se dicit de optimo nuncio accepto reuersionis in patriam. Et quidem nuncius, qui significauit hebræis, reuertendum iam esse in Hierusalem, Hieremias fuit, qui prædixerat post septuaginta annos soluendam esse captiuitatem, & ciuitatem, ac templum reedificandum, Hierem. 25. & 29. sed clarius id ipsum nunciauerunt Daniel, Aggeus, & Zacharias, qui vixerunt illo ipso tempore, quo soluta est captiuitas. Isti igitur magno gaudio populum replerunt, cum euolutis iam septuaginta annis, dicebant,

Ccc 4 In

In domum Domini ibimus, id est, ad patriam reuertemur, vbi montem Sion, & locum domus Domini videre nobis dabitur, ibiq. templo reedificato, in domum Domini rursus ingrediemur. Sed nuncius sine comparatione villa felicior Christus fuit, qui in Euangelio nobis loquitur, & dicit, Pœnitentiam agite; appropinquabit enim Regnum cœlorum, Matth. 4. & clarius, In domo Patris mei mansiones multæ sunt. si quominus dixissem vobis, quia vado parare vobis locum. & si abiero, & paraero vobis locum, iterum veniam, & assumam vos ad me ipsi, vt vbi ego sum, & vos sitis, Ioann. 14. Hic autem nuncius ineffabili lætitia replet eos, qui didicerunt, quàm bonum sit in domum Domini ire, & in ea domo non esse hospitem, & aduenam, sed ciuem sanctorum, & domesticum Dei. Id autem nouit, qui attentè cogitauit illud eiusdem Prophetæ, Inebriabuntur ab vbertate domus tuæ, Psal. 34. & rursus, Replebimur in bonis domus tuæ, Psal. 64. & illud Apostoli ad Ephes. 1. Vt sciatis, quæ sit spes vocationis eius, & quæ diuitiæ gloriæ hæreditatis eius in sanctis. Iste ex corde cupit in domum Domini ire, & idè ex corde cantat, Lætatus sum in his quæ dicta sunt mihi, in domum Domini ibimus: animalis autem homo non percipit quæ Dei sunt, & idè propinquante morte, id est, exilij, & peregrinationis fine non hilarescit; sed turbatur, & gemit. & merito, quia sicut non disposuit ascensiones in corde suo, dum viueret, ita non sperat in domum Domini, quæ sursum est, ascendere; sed ad carcerem damnatorum in æternum puniendus descendere timet. Parum autem refert quòd hebræus, & græcus textus pro, his quæ dicta sunt, habent participium actiuum, videlicet, in dicentibus mihi: vulgatus enim interpres sensum expressit latina phrasi, vt facilius intelligeretur.

11. Stantes erant pedes nostri in atrijs tuis Hierusalem.

Explicat cur hebræi lætentur de reditu in patriam; & rationem esse dicit,

quoniam recordabantur eius temporis, quo fuerant in patria ante captiuitatem, & viderant pulchritudinem, & magnitudinem Hierusalém: multi enim, qui pueri, vel adolēcentes abducti fuerant in Babylonem, facilè recordari poterant se fuisse antea in ciuitate Hierusalem. multos autem rediisse ex ijs qui ante captiuitatem fuerant in Hierusalem, & viderāt ciuitatem, & templum, scribit Esdras lib. 1. cap. 3. dicunt igitur, Stantes erant pedes nostri in atrijs tuis Hierusalem, id est, quia recordamur temporis, quo stantes erant pedes nostri in atrijs tuis, id est, in portis tuis, vt expressè habetur in hebraico codice. Nominat autem Propheta portas, siue atria, & quasi vestibula ciuitatis, potius quàm fora, vel plateas, quoniam eo tempore præcipui conuentus, & negocia fiebant in portis ciuitatum, ibiq. erat maxima hominū frequentia. vt colligitur ex illo Prouerb. 31. Nobilis in portis vir eius, quando sederit cū Senatoribus terræ. Constat etiam ex lib. 2. Reg. cap. 18. fuisse in Hierusalem non simplices portas, sed duplices, & inter vtrasque satis magnum spatium, quod hoc loco fortasse vocatur, atrium. Dauid autem, inquit scriptura, sedebat inter duas portas. & Hierem. 39. Et ingressi sunt omnes Principes Regis Babylonis, & sederunt in porta media. certè magnum spatium debuit esse in illa porta media, vt tot Principes cum adiutoribus suis capere posset. Sed quomodo nos Christiani dicere poterimus, Stantes erāt pedes nostri in atrijs tuis Hierusalem; qui in cœlestis patriæ atrijs nunquam fuimus? Imò fuimus in atrijs patriæ cœlestis, alioqui exules, & peregrini non essemus; neque nos Christus de captiuitate redemisset, nisi à patria extorres, & in terra aliena captiui fuissemus. Fuimus igitur in atrijs cœlestis Hierusalem, quando in parente nostro Adamo Paradisum terrestrem incoluimus, qui Paradisus terrestris, quasi vestibulū erat Paradisi cœlestis; & status ille innocentie quasi atrium, & porta erat status gloriæ: & fortasse hac de causa Spiritus sanctus scribi non voluit,

luit, Stantes erant pedes nostri in plateis Hierusalem, sed in atrijs, vel portis, vt intelligeremus in hoc Psalmo precipue sermonem fieri de cælesti Hierusalem, non de terrena. Igitur latati sumus ad vocem dicentium, In domum Domini ibimus, quia recordamur temporis illius, quo stantes erant pedes nostri in paradiso terrestri, ac per hoc in atrijs paradisi cælestis; & ex bonis illis coniecturam facimus de bonis longè melioribus, quæ nobis in ipsa domo Domini conseruantur. & quamuis paulò ante domus Domini nominata sit; nunc autem ciuitas Hierusalem nominetur, tamen vnus, & idem locus est. Patria enim cælestis nunc Regnum, nunc ciuitas, nunc domus dicitur: quoniam si respicias multitudinem, & varietatem incolarum, Regnum erit, cum in eo viderit Ioânes Apoc. 7. turbam magnam, quam dinumerare nemo poterat ex omnibus gentibus, & populis, & tribubus, & linguis. Si consideres societatem, & familiaritatem, quæ est inter sanctos, & beatos, ciuitas est; quamuis enim multiplicetur numerus electorum, omnes se inuicem noscent, & diligunt vt eiusdem ciuitatis ciues. Denique si cogites, omnes electos vnum habere patrem, vnamque hæreditatem; domus sine dubio erit, in qua omnes erunt quasi fratres sub vno Patre Deo.

III. Hierusalem, quæ ædificatur, vt ciuitas, cuius participatio eius in idipsum.

Hic iam incipit Propheta sub nomine peregrinorum ad Hierusalem prope rantium, laudes eiusdem Hierusalem numerare, vt ex ijs se magis ac magis ad ascendendum sine inremissione inflamment. prima laus est, quod sit ciuitas pacatissima, ita vt ex charitate incolentium omnibus omnia sint communia. Stantes, inquiunt, erant pedes nostri in atrijs tuis Hierusalem, quæ Hierusalem ita ædificata est, & quotidie magis ac magis ædificatur, vt sit ciuitas, cuius participatio est in idipsum, idest, simul, & communiter participa-

tur ab omnibus. Vbi notandum est illud, eius, redundare, ex phrasi hebraica. idem est enim, cuius participatio, & cuius participatio eius. Aduerte præterea, interpunctionem in hebraico codice positam esse post vocem, ædificatur, non post vocem, vt ciuitas: proinde non est sensus, Hierusalem ædificatur vt ciuitas, quasi possit aliter ædificari, quàm vt ciuitas; sed ædificatur, vt ciuitas talis, cuius participatio simul est. Aduerte postremò illud, in idipsum, quod à Sancto Augustino refertur ad æternitatem Dei, quæ semper est eadem; ad literam nihil aliud significare, nisi, simul, vel coniunctim, vt ex voce hebraica perspicuum est, vt etiam alibi diximus. Iam verò in sensu posteriore tota hæc sententia multo est clarior, & sublimior: siquidem cælestis Hierusalem verè ædificatur vt ciuitas, quia non est propriè ciuitas, neque sunt in ea lapides propriè dicti, sed ædificatur vt ciuitas, dum quotidie lapides viui à summo artifice expoliti, & conquadri adiunguntur cælestis habitaculi ædificationi. ex quo sequitur, vt qui hæc intelligunt, non modo persecutiones æquo animo ferant, sed gaudeant, & glorientur in tribulationibus, cum sciant, eo modo se præparari ad cælestem ædificationem. Omne gaudium, inquit vnus ex his viuis lapidibus, existimate fratres, cum in tentationes varias incideritis. Deinde in cælesti patria verissimè est participatio in idipsum. Nam in terrena Hierusalem non tam fuit, quàm esse debuit, participatio in idipsum, id faciente charitate, vt amicorum omnia sint communia. qualis participatio ad breue tempus fuit in Ecclesia, quæ erat Hierosolymis, vbi nemo dicebat, aliquid suum esse, sed erant illis omnia communia. Act. 4. Et nunc etiam cernitur in familijs ordinum Religiosorum, vbi regularia instituta in suo vigore persistunt. Sed in cælesti Hierusalem summa est participatio in idipsum, cum sit Deus vnus omnia in omnibus, idest vnus, & idem Deus sit honor, & diuitiæ, & deliciae omnibus habitantibus in

in domo Domini. & ea felicissima, & summa vbertas sit verè semper idipsum, cum nullam patiatur diminutionem, vel alterationem.

IV. Illuc enim ascenderunt tribus tribus Domini, testimonium Israel, ad confitendum nomini Domini.

Hæc est secunda laus Hierusalem, frequentia videlicet incolarum. & coniungitur hic versiculus cum secundo. Reddit enim rationem hoc loco populus Dei, cur dixerit, Stantes erant pedes nostri in atrijs tuis Hierusalem. quamvis non omnes fuissent ciues Hierosolymitani, sed diuersarum ciuitatum incolæ, tamen omnes ascendebant in Hierusalem ter per annos singulos. Dicit igitur, Santes erant pedes nostri in atrijs tuis Hierusalem, quoniam illuc ascenderunt tribus tribus Domini, idest, multæ tribus, siue omnes tribus, & ideo maxima multitudo conueniebat in Hierusalem: hebraismus est enim, tribus tribus, pro multæ tribus. vbi enim legimus Gen. 14. Vallis autem syluestris habebat puteos multos bituminis, in hebræo est, puteos puteos bituminis. quod sequitur, Testimonium Israel, ad confitendum nomini Domini; explicat cuius rei gratia tanta multitudo conflueret in Hierusalem: id enim fiebat iuxta testimonium, idest, legem datam Israeli, quæ præcipiebat, vt non obliuiscerentur visitare templum Domini, quod vnicui erat in tota terra promissionis, atq. ibi cõfiterentur nomini Domini, confessionem laudis, & gratiarum actionis. Sed in posteriore sensu, quem diximus esse à Spiritu sancto magis intentum, redditur ratio, cur dictum sit, Hierusalem, quæ ædificatur vt ciuitas; ideo enim ædificatur vt ciuitas, quia illuc iam ascenderunt, & quotidie ascendunt tribus tribus Domini, idest, animæ sanctæ ex omni tribu, & natione, vt tanquam lapides viui super ædificentur in domos spirituales, vt dicit S. Petrus in 1. epist. cap. 2. Ascenderunt autem animæ illæ sanctorum in caelestem Hierusalem, ad confi-

tendum nomini Domini, quoniam hoc est totum quod agitur in illa domo, & ciuitate, cessantibus omnibus negocijs alijs. Beati, inquit idem Propheta, qui habitant in domo tua Domine, in sæculum sæculi laudabunt te. & Tobias cap. 13. de caelesti Hierosolyma loquens, Per vicos, inquit, eius alleluia cantabitur. & hoc est testimonium, idest, præceptum datum Israeli, idest animæ videnti Deum, vt nunquam cesset à laude, quæ nunquam cessat ab amore. Quod autem testimonium idem sit, quod præceptum, ostendimus in explicatione Psalmi decimi octauæ, & perspicuum est ex toto Psalmo 118. vbi frequentissimè accipitur testimonium pro lege, siue præcepto.

Quia illic sederunt sedes in iudicio, sedes super domum David. V.

Hæc est tertia laus Hierusalem, quòd illic sit sedes Regia, & supremum tribunal. & potest continuari hic versiculus cum superiore propter illam particulam causalem, quia: videtur enim reddi ratio cur Deus voluerit in Hierusalem esse templum, ad quod ter in anno veniret omnis populus Israel, quia illa erat ciuitas Regia, & quasi metropolis totius Regni. Dicit igitur, Quia illic, idest, in Hierusalem, sederunt sedes in iudicio, idest, sedes Regum sibi inuicem succedentium, quorum proprium est iudicare populum, sederunt, idest, quieuerunt immobiliter constitutæ, & fixæ. quod dicitur ad differentiam sedis Saul primi Regis, quæ fuit in Gabaa Benjamin; sed ibi non quieuit, cum paulò post translata fuerit. & similiter ad differentiam sedium Iudicum, qui fuerunt ante Reges, quæ non sederunt alibi, sed frequenter transmutabantur de loco ad locum: at sedes Regum de familia David sederunt in Hierusalem immobiliter, & ideo subiungit, Sedes super domum David, idest, sedes Regni quæ super familiam David fundatur, quietem, & stabilitatem inueniunt. sic enim dictum est David à Deo 2. Reg. 7. Fidelis erit domus tua, & Regnum tuum vsque in æternum, & thronus

nus tuus erit firmus iugiter. Igitur non dicuntur sedes super domū Dauid, quia regerēt domum Dauid: regebant enim totam domum Iacob, idest, omnes duo decim tribus Israel, non solum familiam Dauid, sed dicuntur sedes fundatæ super domum Dauid, quia ex illa domo nascebantur Reges populi Dei. In hebræo non habetur, super domum Dauid: sed domui Dauid, idest, sedes datæ domui Dauid. Sed hæc omnia longè melius in Christum, & in cælestem Hierusalem conueniunt. Nam ne fortè Iudæi crederent, verba Psalmi intelligenda esse principaliter de terrena Hierusalem, ac non potius de ea, ut cælestis Hierusalem figuram gerebat; permisit Deus, ut non solum sedes Regia de Hierusalem tolleretur, sed ipsa etiā Hierusalem euerteretur. Promissio igitur illa ad Christum, & ad Hierusalem, quæ sursum est, pertinet, iuxta varicinium Isaia cap. 19. & Danielis cap. 9. & Angeli ad Virginem Luc. 1. Dabit ei Dominus sedem Dauid patris eius, & regnabit in domo Iacob in æternum, & Regni eius non erit finis. Verè enim ac propriè in cælesti Hierusalem sederunt sedes in iudicio, tum quia firmissimè stabiliti sunt in cælo thronus Christi, & throni eorum, qui cum ipso regnant: tum quia ipsi sancti cum Christo regnantes & iudicantes sunt sedes Dei: nam anima iusti sedes est sapientiæ, & ista sedes verè etiam sedent in iudicio, iuxta promissionem Domini Matth. 19. Vos qui sequuti estis me sedebitis super sedes duodecim iudicantes duodecim tribus Israel: Et sedes sunt super domum Dauid fundatæ, quia omnis Sanctorum potestas, Regia, & iudiciaria à Christo dependet, qui filius Dauid in Evangelio dicitur, & accepit sedem Dauid patris sui, & regnabit in domo Iacob in æternum, & Regni eius non erit finis.

VI. Rogate quæ ad pacem sunt Hierusalem, & abundantia diligentibus te.

Hortatur iam Propheta peregrinos de captiuitate reuerentes, ut saluent

saltem à longe ciuitatem Hierusalem, benè precantes ei pacem, & abundantiam, quæ sunt duo potissima bona, quæ faciunt beatas ciuitates: nam pax sine abundantia, est secura possessio miseriæ; abundantia sine pace est dubia & incerta felicitas; sed quando abundantia cum pace iungitur, nihil deest ad statum felicissimæ ciuitatis. Dicit igitur, Rogate, quæ ad pacem sunt Hierusalem, idest, precamini patriæ vestræ à Deo veram, & solidam pacem. & ut sit abundantia non solum ipsi ciuitati Hierusalem, sed omnibus diligentibus te ciuitas sancta. In hebræo habetur simpliciter, Rogate pacem ipsi Hierusalem; proinde illa verba, quæ ad pacem sunt, nihil sunt aliud, nisi periphrasis pacis.

Fiat pax in virtute tua, & abundantia in turribus tuis. VII.

Ponit Propheta ipsa verba, quæ dicenda sunt ab ijs, qui salutantes Hierusalem, precantur illi pacem, & abundantiam. quasi dicat, cum salutatis Hierusalem dicite, Fiat pax in virtute tua, & abundantia in turribus tuis. Per, virtutem, rectè S. Hieronymus vertit, muros: vox enim hebraica, significat propriè virtutem, hoc est, robur, & vires. Sed accomodatur etiam ad omnia, in quibus robur consistit, ut ad muros, in quibus consistit robur ædificij; item ad exercitum, in quo consistit robur armorum; item ad multitudinem populi, in qua consistit robur ciuitatis. Sed hoc loco accomodari debet ad muros, ut cohereat cum sequentibus verbis, ubi turres nominantur. Itaque Septuaginta Interpretes, qui verterunt virtutem, expresse runt significationem verbi hebraici, ut sonat generatim, sed B. Hieronymus expressit significationem, ut hoc loco accomodanda erat. Dicitur autem, fiat pax in virtute tua, idest, in muris tuis fortissimis, quia quando pax est in muris, idest, quando muri non oppugnantur ab hostibus, tota ciuitas est in pace. Per turres autem de quibus dicitur, & abundantia in turribus tuis, significantur magna palatia, quæ turri-

ta esse solent: nam vox hebraica significat palatia potius quàm turres; & S. Hieronymus vertit, in domibus tuis. Porro vox, abundantia, tum in hoc versiculo, tum in superiore, deducitur à voce hebraica, quæ significat pacem, sed cum Septuaginta viri, & Sanctus Hieronymus verterint, abundantiam, dubitare non debemus quin hoc verè significet. neque absurdum est à vocabulo pacis deriuari vocabulum abundantia, cum verè sit pax quasi mater abundantia, vt bellum pater est caritatis, & inopiz. Porro duo isti versiculi, quatenus pertinent ad cælestem Hierusalem, continent quidem salutationem, & imprecationem pacis, & abundantia: sed non significant, periculum esse, ne ciuitati illi supernæ desit vnquam vel pax, vel abundantia, cum de ea scriptum sit in Ps. 147. Qui posuit fines tuos pacem, & adipe frumenti satiat te. Exprimunt igitur solum pium affectum, & lætitiā, quam habemus de bonis cælestis Hierusalem, quo modo etiam dicitur in Apocalypsi cap. 7. Salus Deo nostro, qui sedet super thronum, & Agno.

VIII. Propter fratres meos, & proximos meos loquebar pacem de te.

IX. Propter domum Domini Dei nostri quæsiui bona tibi.

Claudit Psalmum Propheta, dum breuiter explicat, ob amorem ciuium sanctæ ciuitatis, quos fratres & amicos suos agnoscit, & multo magis ob amorem Dei conditoris, & habitatoris eiusdem ciuitatis, vel domus, se impulsus fuisse, vt precaretur eidem ciuitati pacem, & abundantiam omnis boni. In hebræo codice verba illa, loquebar, & quæsiui, futuri sunt temporis: sed qui periti sunt lingue hebraicæ, sciunt, tempus futurum sapissimè poni pro perfecto, vel imperfecto: sapè etiam significare continuationem actionis, quæ ita facta est, vt sit etiam futura.

PSALMVS CXXII.

Titulus, & Argumentum.

Canticum Graduum.

O Rationem continet hic Psalmus hominis peregrinantis ad cælestem Hierusalem, & in exilio, vel itinere pressuram patientis.

Explicatio Psalmi 122.

AD te leuavi oculos meos, qui habitas in cælis.

Loquitur Propheta tum in persona peregrini, tum etiam in persona sua, qui vnus erat ex veris peregrinis; ac dicit, se in quibuscunque pressuris non respicere ad alium adiutorem, nisi ad Deum, tum quoniam ipse solus habitat in summo cælo, & inde omnia inferiora conspicit, & moderatur: tum quia ipse est, qui per malos nos flagellat; ac propterea frustra confugimus ad alios, cum sit nemo, qui de manu Dei nos possit eripere.

Ecce sicut oculi seruorum in II. manibus dominorum suorum.

Sicut oculi ancillæ in manibus III. dominæ suæ, ita oculi nostri ad Dominum Deum nostrum, donec misereatur nostri.

Explicat cur oculos ad Deum leuaue rit, vt videlicet respiciat Deum flagellantē, vt eo aspectu miserabili moueat ipsum ad misericordiam, & flagellare desinat. Id quod illustrat similitudine seruorum, qui dum caduntur à Dominis, respiciunt mæsti ad manus cadentium, ipso aspectu quasi petentes, vt miseri ipsorum cessent à plagis. Illud autem, sicut oculi seruorum in manibus dominorum suorum; clarius est in hebræo, vbi habetur, Ad manus dominorum suorum. & respondet applicatio, Ita oculi nostri ad Dominum Deum nostrum. Posita est autem similitudo non ser-

feruorum tantum, sed etiam ancillarū, vel quia non soli viri, sed etiam feminæ peregrinantur ad patriam, & in peregrinatione flagellantur; vel quia viri fortes, propriè viri sunt; viri debiles, & delicati feminæ dici possunt: & vtrique tamen sua flagella in hoc itinere patiuntur. Ad flagella verò, quibus à Domino castigamur, non solum pertinent manifestæ persecutiones, & calamitates, sed etiam tentationes occulte, quibus anima vexatur assiduè; item timores, angores, tristitiæ, quibus nemo caret in hac vita: & ideo non dicit Psalmus, oculos nostros aliquo certo tempore leuandos ad Deū, sed sine intermissione, donec misereatur nostri; quod non fiet, nisi cum ad patriam peruenerimus: tunc enim coronabit nos Deus in misericordia, & miserationibus, cum sanauerit omnes languores nostros, & repleuerit in bonis desiderium nostrum, ut dicitur in Psalmo 102.

IV. Miserere nostri Domine, miserere nostri, quia multum repleti sumus despectione.

Non contentus Propheta oculis ad Deum fixis misericordiam implorasse; voce etiam cordis, & corporis clamat, & clamorem ingeminat pro se, & pro socijs peregrinationis, dicens, Miserere nostri Domine, miserere nostri. Et sane qui rectè aduerteret, atque attentè consideraret, quid sit quod sequitur, Quia multum repleti sumus despectione, planè intelligeret tantam esse nostram miseriam, ut cessare ab isto clamore non posset. Homo enim ad imaginem Dei creatus, & super omnia opera Domini constitutus, sepe etiam ab ipso Deo, in filium adoptatus, & ad Regnum celorum prædestinatus; ita in hac peregrinatione, non solum à dæmonibus, & prauis hominibus; sed etiam ab animalibus, etiam minimis, & ab ipsis elementis despicitur, & assiduè vexatur, ut Propheta verissimè dixerit, quia non despicimur solum, sed etiam repleti sumus despectione, nec solum repleti sumus, sed multum repleti sumus. Quid enim est quod hominem, etiam iustum & san-

ctum, in hac lacrymarum valle non despicit? sed præcipua tamen despectio, de qua propriè loquitur hoc loco Propheta, est ea, quam patiuntur boni à malis, & iusti ab iniquis. Verissima enim, & vniuersalis est illa Apostoli sententia, Omnes qui volunt piè viuere in Christo Iesu, persecutiones patientur. & illa Domini, Si de Mundo fuissetis, Mundus quod suum erat diligeret, sed quia de Mundo non estis, propterea odit vos Mundus: & ratio est manifesta, quoniam bonum & malum contraria sunt, & contraria pacem inter se habere non possunt. Et quoniam iusti patientes sunt, & mites, & didicerunt à Domino non resistere malo, & percutienti maxillam, præbere etiam alteram, ideo ab improbis superbè despiciuntur, & conculcantur, vexantur, & iridentur.

Quoniam multum repleta est v. anima nostra opprobrium abundantibus, & despectio superbis.

Docet hoc ultimo versiculo Dauid contemptum, ac despectionē, de qua supra loquebatur, accidere pauperibus; & humilibus peregrinis ab hominibus copiosis & superbis. Quamuis enim aliqui auctores velint, illud, opprobrium abundantibus, & despectio superbis, esse imprecationem, ut sensus sit, Opprobrium recidat super abundantes, & despectio super superbos: tamen si respiciamus textum originalem, & velimus concordare versionē S. Hieronymi cū versione Septuaginta Interpretum, cogemur sequi S. Augustinum, & dicere sensum hunc esse, Multū repleta est anima mea, confusione videlicet, quia factus sum opprobrium abundantibus, & despectio superbis. Sanctus enim Hieronymus ex hebræo rectè vertit, Multū repleta est anima opprobrio abundantium, & despectione superhorum: cum qua versione rectissimè coheret quod habent Septuaginta Interpretes, & latina editio vulgata, si subintelligatur verbum, factus sum, & cōtinuerunt opprobrium, &c. Ait igitur Propheta, Multū repleta est anima mea, quod est idē cū

eo quod supra dixit, Multum repleti sumus despectione. Sed hoc loco explicandi gratia nominat animam; quoniam despectionis sensus propriè ad animam intelligentem pertinet. quæ enim anima intelligente caret, sentire possunt dolorem, sed non despectionem. Illud autem, repleta est, in hebræo legitur, satiata est: quæ vox mirum in modum auget significationem: si enim qui multum satiantur, idest, ultra satietatem replentur, etiam si bonis cibis repleantur, magnum dolorem percipiunt: quid sentient, qui nimium satiantur malis cibis, qualia sunt opprobria, & despectiones? Quod verò sequitur, Opprobrium abundantibus, & despectio superbis; idem omnino significat: idem sunt enim opprobrium, & despectio; & iidem etiam sunt, abundantes, & superbi. Omnes enim superbi inflati sunt, & proinde abundantes sunt: sed abundant vento, non solido bono, idest, abundant opinione & existimatione sui. Nam si diuitias terrenas habeant, putant suas esse, neque cogitant Deo reddendam esse de earum dispensatione rationem. Si in dignitate & honore constituti sint, arbitrantur sibi illa omnia deberi, & sua bona esse; & non intelligunt data esse ad aliorum vtilitatem, & rationem grauissimam de ea dignitate reddendam; neq. ad se aliud, quàm onus pertinere. Proinde non minus desipiunt, si de tali onere insentur, quàm si baiulus gloriaretur, quòd valdè oneratus incederet. Si virtutes aliquas, si ingenium, si doctrinam habeat, sibi persuadent multo maiora esse quàm sint, & sibi tribuunt, quæ sunt Dei dona. Denique si carent diuitijs, dignitatibus, honoribus; & contra si puniuntur & flagellantur, existimant sibi fieri iniuriam, & de Deo murmurant, & blasphemant: quod totum inde oritur, quia pleni sunt, vel potius inflati vento propriæ existimationis. Sed veniet tempus quo opprobriū, & despectio in ipsos reuertetur, quando videlicet in die nouissimo dicent, quod scriptum est in libro Sapientiæ cap. 5. Hi sunt quos aliquando habui-

mus in derisum, & in similitudinem impropertij. Nos insensati vitam illorum æstimabamus insaniam, & finem illorum sine honore. Ecce quomodo computati sunt inter filios Dei, & inter sanctos fors illorum est. & infra, Quid nobis profuit superbia sicut diuitiarum instantia quid contulit nobis? transierunt illa omnia tanquam umbra.

PSALMVS CXXIII.

Titulus, & Argumentum.

Canticum Graduum.



HIC Psalmus continet exultationem eorum, qui de grauissimis tribulationibus liberati fuerant. Et quidem filij Israel, qui de captiuitate Babylonica redierunt in Hierusalem, in itinere nullas graues persecutiones passi fuisse leguntur; sed solum dum captiui detinerentur, & inter ædificandam ciuitatem, & templum, vt ex vtroque libro Esdræ intelligi potest. Itaque Psalmus hic quatenus ad carnales Israelitas pertinet; referendus est ad eas afflictiones, quas passi sunt, vel dum essent in captiuitate, vel dum templum, & ciuitatem iterum ædificarent: quatenus autem ad spirituales Israelitas, idest, ad Christianos ad caelestem Hierusalem ascendentes pertinet; referendus est ad persecutiones Paganorum, aliorumque impiorum, à quibus liberati sunt Martyres sancti, & electi ceteri quotidie liberantur.

Explicatio Psalmi 123.

Nisi quia Dominus erat in nobis, I. bis, dicat nunc Israel, nisi quia Dominus erat in nobis.

Sermo imperfectus, & interruptus, initio Psalmi, signum est magnæ, atque insolitæ exultationis, quæ loquentem, non sinit perficere sententias inchoatas. Dicit igitur multitudo Sanctorum de

de magnis tērationibus liberatorū, Nisi quia Dominus erat in nobis, idest, nisi Dominus omnipotens nobiscum fuisset, nūquam euadere potuissemus. Sed antequam compleat sententiam, prælatitia gestiens inuitat Israelem, idest, totum populum Dei ad confessionem, & laudem, dicens, Dicat nunc Israel, & iterum repetit, Nisi quia Dominus erat in nobis. Quod attinet ad verba, illud, quia, in hebraico textu habetur post verbum, Dominus, hoc modo, nisi Dominus quia erat in nobis. Sed Interpretes Septuaginta, vt sententia esset clarior, ordinem verborum immutasse videntur. S. Hieronymus eam particulam, vt redundantem, & ociosam ex hebraica phrasi, in sua versione omisit. Sic enim vertit, Nisi Dominus fuisset in nobis. Si quis tamē velit eā retinere, ita supplere poterit, Nisi Dominus, quia erat in nobis, nos liberasset; vel secundū Septuaginta, Nisi liberati essemus, quia Dominus erat in nobis. Quid autem factum fuisset, nisi Dominus nos liberasset, explicatur in sequentibus.

II. Cū exurgerent homines in nos, fortē viuos deglutissent nos.

III. Cū irasceretur furor eorum in nos, forsitan aqua absorbuisset nos.

Ecce quid accidisset nobis, nisi Dominus fuisset in nobis, neque iuuisset potentissima sua virtute. Cū exurgerent homines in nos, fortē viuos deglutissent nos, idest, cū nostri persecutores exurgerent aduersus nos, periculum fuit, ne tanta velocitate nos perderent, quanta solet mare, vel flumen viuos deglutire eos, qui in illud fortē præcipitantur. Tria sunt hoc loco considerata. Primum, vocantur homines, persecutores piorum, quia ducuntur sola ratione humana, qualis remanet in natura per peccatum corrupta: ratio enim humana post naturæ corruptionem, nihil altum sapit, nihil diuinum, nihil spirituale, neque alium finem propositum habet, nisi conseruationem, & augmentum propriæ tempo-

ralis felicitatis. de his dicit Apost. 1. Cor. 3. Cū sit inter vos zelus, & contentio, nonne carnales estis, & secundū hominem ambulatis? & paulō infra. Nonne homines estis? vbi pro eodem Apostolus accipit, carnalem esse, & hominem esse: secundū carnem ambulare, & secundū hominem ambulare. Deinde difficultas non exigua est de particula, fortē, quæ etiam bis repetitur paulō infra. Videtur enim hæc particula non benè posita in editione vulgata, cū potius affirmatiua, vt, certē, vtique, sanè poni debuisset. Nam si legamus, forsitan, sequetur, non necessarium esse auxilium Dei in magnis tērationibus superandis, quādoquidem Propheta non audet certē affirmare, sed sub dubio relinquit, an grauissima tentatio nos deiectionura sit, si Deus non sit in nobis. Sed quamquam non desint ex recētoribus, quibus ista particula non placeat, & verbum tum hebraicum, azai, tum græcum, ἄρα, nō velint reddi per, fortē, aut forsitan, sed per vtique, aut, certē: nos tamen non audemus vllō modo à lectione vulgatz editionis recedere: nam Sanctus Hieronymus vir doctissimus, & vtriusque linguæ peritissimus fuit; & maior ei fides quàm vllis dictionarijs habenda est. Is autem ex hebræo constanter vertit, forsitan; & in expositione Psalmorum in qua editionem Septuaginta interpretatur, similiter legit, forsitan; denique in emendatione Psalterij ad Suniam, & Fretellam, nihil in hoc loco emendat. Sanctus quoque Hilarius, Origenem sequutus, S. Ioannes Chrysostomus, S. Augustinus magno consensu, forsitan legerunt, neque in Biblijs hoc loco vlla est varietas lectionis. Neque timendum est, vt particula ista detrahens nos cogat aliquid de gratia Dei. non enim illud, forsitan, significat, potuisse nos fortē resistere inimicis in nos irruentibus sine auxilio gratiæ protegentis: sed, potuisse fieri, vt non viui deglutiremur, quia forsitan inimici non eō vsque desinissent. Sed quoniam periculum erat etiam vt vsque ad interuersionem crudelissimam desinissent,

rent,

rent, ideo dicitur. Nisi Dominus fuisset in nobis, forsitan viuos deglutissent nos. Postremo diximus, illud, viuos deglutissent nos, sumptum esse à similitudine maris, vel fluminis deglutientis, siue absorbentis eos, qui cadunt in aquas: tum quia nullæ sunt ferè bestię, quamuis crudelissimæ, quę viuos deglutiant homines, sed lacerant ac discerpunt, vt notum est; tum etiam quoniam hoc requirit versiculus sequens, qui de more Psalmorum, id ipsum alijs verbis repetit. sic enim habet, Cum irasceretur furor eorum in nos, forsitan aqua absorbuisset nos: sensus enim est, forsitan vt aqua absorbuisset nos, idest, furor hostium nostrorum instar aquę profundissimæ repente absorbuisset nos. Neque in hoc solo versiculo, sed etiam in sequentibus persistit Propheta in similitudine aquarum, vt mox videbimus.

IV. Torrentem pertransiuit anima nostra, forsitan pertransisset anima nostra aquam intolerabilem.

Persistit in eadem similitudine comparans aduersariorum persecutiones torrenti rapido, & profundo, qui sine potentissimo auxilio pertransiri non potest. Et si quis cogitet, quales fuerint persecutiones Paganorum, & hereticorum in sanctos Martyres, & tentationes demonum aduersus sanctos Eremitas, aliosque Christi Confessores, videbit simillimas fuisse torrenti violentissimo, quoniam licet sancti Martyres, & sancti Confessores gloriosi euaserint: tamen plurimi, ac ferè sine numero, quasi vi torrentis abrepti, & absorpti perierunt, vt cognosci potest ex Cypriano in Sermon. de lapsis, & Eusebio Cæsariensi in lib. 8. hist. cap. 1. ex versione Ruffini. Dicit igitur Propheta in persona Sanctorum, Torrentem pertransiuit anima nostra, idest, persecutio nem, quasi torrentem pertransiuit anima nostra: caro enim succubuit, & cessit persequutorum furori, sed anima gloriosè pertransiit: sed, nisi Dominus fuisset in nobis, forsitan pertransisset anima nostra aquam intolerabilem, id

est, intrasset torrentem nimis profundum, vnde euadere non potuisset. Itaque illud, pertransisset, non significat, transiisset, vel euasisset, sed intrasset, & pertransire cœpisset, siue pertransire coacta fuisset. Illud autem, intolerabilem, rectè verterunt Septuaginta, *διυπόστατον*, idest, sine substantia, sine hypostasi, sine fundamento, sine fundo, vbi pedes figi possent: quo verbo significatur profunditas aquarum, quæ transmitti non potest. Sed occurrit hoc loco contrarietas aperta inter codicem hebraicum, & versionem Septuaginta Interpretum. Codex enim hebraicus disertè habet, Torrens pertransiit super animam nostram; & editio Septuaginta habet, Torrentem pertransiuit anima nostra: & paulò post hebraicus textus habet, Forsitan pertransissent super animam nostram aquæ intolerabiles; editio autem Septuaginta habet, Forsitan pertransisset anima nostra aquam intolerabilem. Et quidem sanctus Hieronymus in expositione huius loci non tacet, meliorem esse lectionem hebraicam. Sed existimamus posse conciliari has lectiones duobus modis. Primum enim fieri potest, vt Septuaginta Interpretes non habuerint in suo texto particulam, αλ, quę significat, super, remota autem illa particula, quæ determinat vocabulum animæ ad casum accusandi, remanet ambiguum, vtrum vocabulum animæ, sicut etiam vocabula torrentis, & aquarum, sint casus nominandi, aut accusandi. Proinde vtranque lectionem patiuntur verba hebraica, illam videlicet sancti Hieronymi, Torrens pertransiuit animam nostram, & illam Septuaginta, Torrentem pertransiuit anima nostra. Et quoniam Septuaginta Interpretes meliores codices habuisse credibile est, quàm sanctus Hieronymus habuerit, & fidelissimè trāstulerunt, quod inuenerunt: sequitur vt lectio Septuaginta, quæ est etiam nostræ vulgatæ editionis retinenda, & hebraicæ, quæ nunc extat, anteporenda sit. Deinde potest etiam fieri, vt Septuaginta legerint quidem, vt legit sanctus Hieronymus, sed maluerint sensum potius transferre, quam

quam verba. Nam cum aliquis pertranseat profundum torrentem. simul fit, ut & ipse transeat torrentem, & torrens pertranseat super eum. Sed clarior sententia esse videtur, si dicatur homo pertransire torrentem, quam si dicatur torrens super eum transire. Potest enim torrens transire super hominem, etiam immobilem, & iacentem in profundo; sed non potest homo transire per torrentem, quin torrens transeat super eum. Ut ergo significarent Septuaginta, torrentem transire super hominem non iacentem, sed ambulantiem, vel natantiem; maluerunt dicere hominem transisse per torrentem, quam torrentem per hominem.

V. Benedictus Deus, qui non dedit nos in captionem dentibus eorum.

VI. Anima nostra, sicut passer erepta est de laqueo venantium: laqueus contritus est, & nos liberati sumus.

Aggreditur Propheta aliam similitudinem, ex qua magis adhuc illustretur, & intelligatur magnitudo beneficii divini. Comparat igitur persecutionem, siue tentationem laqueo aucupis, ac dicit, gratias esse Deo agendas, Deumque benedicendum, quod non dederit nos in captionem dentibus adversariorum, id est, non permiserit capi, & occidi, ac deuorari. Quomodo autem id fecerit, explicat, dicens, Anima nostra sicut passer erepta est de laqueo venantium, id est, anima nostra incidit quidem in persecutionem, & tentationem, sicut passer, aut quaecunque alia avis (nomen enim hebraicum, zippor, generatim aues significat) in laqueum venatoris, siue aucupis: sed tamen liberata est ab illa tentatione, & persecutione, antequam caperetur a tentatore, & occideretur; quomodo aliquando avis capitur quidem laqueo, sed eripitur inde, antequam ab aucupe capiat manibus, & occidatur, & manducetur. Id autem factum est, quia laqueus contritus est, & nos liberati sumus, id

Card. Belarm. in Psal.

est, quia tentationi per gratiam Dei finis impositus est, antequam anima fidem negaret, vel alio modo in peccatum consentiret; quomodo aliquando laqueus, qui auem comprehenderat, frangitur, & avis auolat, & spem aucupis in praedam inhiantis frustratur.

Adiutorium nostrum in nomine Domini, qui fecit celum, & terram. VII.

Concludit cum laude Dei humiliter agnoscens, victoriam tantam, & liberationem de tam periculosis tentationibus, non viribus suis tribuendam; sed adiutorio caelesti Dei omnipotentis: cuius omnipotentiae manifestum est argumentum, quod fecerit caelum, & terram. Modus autem, quo Deus solet de magnis tentationibus eripere seruos suos, insinuat dum dicitur, Laqueus contritus est: laqueus enim frangi solet, quando avis vel exterrita aliquo clamore, vel allecta meliore esca, vim facit, & sic laqueum frangit. Quando enim avis quamvis laqueo irretita, inharet escae ab aucupe propositae, nec intelligit se comprehensam, non conatur auferre, & eo modo facile capitur, & occiditur. Sic igitur anima hominis in tentatione posita, cum primum a Deo illustrata, & vel clamore Iudicii divini, & gehennae exterrita, vel promissionibus caelestis gloriae allecta, incipit cogitare, dura quidem esse tormenta praesentia; sed duriora sine comparatione vlla tormenta futura, & sempiterna: vel dulcem esse vitam praesentem, dulcem voluptatem, dulces diuitias; sed dulciora sine comparatione praemia vitae futurae; incenditur amore bonorum supernorum, & metu suppliciorum gehennae, atque eo igne diuinitus accenso vires concipit, & magno impetu firmissimae deliberationis non peccandi in Deum, laqueum tentationis frangit, & liberata volat, & cum iubilatione canit, Adiutorium nostrum in nomine Domini, qui fecit caelum, & terram. De hoc modo euadendi scribit S. Cyprianus in lib. de exhortatione martyrii cap. ultimo. Has cogitationes, quae persecutio potest vincere; quae tormenta superare;

D d d

PSAL-

PSALMVS CXXIV.

Titulus, & Argumentum.

Canticum Graduum.

N hoc Psalmo cōsiliū bonū dat Sanctus Prophetā peregrinis ascendentibus in patriam tum terrenā, tum cōlestem. Cōsiliū autem est, vt in Deo totā spem ponant. Deus enim potentissimus, & fidelissimus est, neque vnquam confundet sperantes in se, atque ad se toto desiderio properantes.

Explicatio Psalmi 124.

- I. **Q**ui confidunt in Domino, sicut mons Sion, non cōmouebitur in æternum, qui habitat in Hierusalem.

Ponit initio Prophetā generalem atque certissimā promissionem, eamq; bis repetit ad maiorem veritatis afferuerationē. Dicit igitur, Qui confidunt in Domino, sicut mons Sion, id est, omnes qui verē confidunt in Domino, erunt immobiles & securi, quæcunque tandem ingruat tempestas, sicut est ipse mons Sion, qui non solum immobilis est, quia mons est, sed etiā quia Deo sacer, & charissimus est. Addit repetēs, & quasi explicans quod dixerat, Non commouebitur in æternum, qui habitat in Hierusalem; vbi quod dicitur, non commouebitur in æternum, respondet illis verbis, Erit immobilis sicut mons Sion; quod sequitur, qui habitat in Hierusalem, respondet illis, qui confidunt in Domino. Illi enim qui habitant cogitatione, & spe in cōlesti Hierusalem, ipsi sunt qui confidunt in Domino. Sic enim explicatur fiducia in Deum in Psal. 90. Qui habitat in adiutorio altissimi, in protectione Dei cōli commorabitur. Quod attinet ad verba, in hebræo codice habetur alia in-

terpunctio, & proinde alia ordinatio verborum. Sed quia interpunctio non erat in antiquis codicibus, sed à Rabinis addita est, ideò non tanti faciendā est, vt propter eam contemnāmus interpunctionem Septuaginta seniorū, & latinæ nostræ vulgatæ editionis. Præterea illud, qui habitat in Hierusalem, ambiguum est in hebræo, vtrum ad montem Sion, an potius ad hominem confidentem in Deo referendum sit: sed Interpretes Septuaginta declarauerunt referri ad hominem, non ad montem: nam mons græcè *ὄρος*, est generis neutri, & illud, qui, tam græcè quā latinè est generis masculini. Adde quod mons non tam propriè dicitur habitare in ciuitate, quā homo. Quia verò non omnibus, qui habitant in terrena Hierusalem, conuenit non commoueri in æternum, cum ipsa Hierusalem stare non potuerit in æternum; & quia habitare in Hierusalem, hoc loco, idem est, quod confidere in Domino: ideò diximus cum Sancto Augustino, hic agi de habitatore cōlestis Hierusalem per spem, & desiderium, quo modo habitabant, qui dicebant, Conuersatio nostra in cōlis est, Philip. 3.

Montes in circuitu eius, & Dominus II.
minus in circuitu populi sui, ex hoc nunc, & vsque in seculum.

Probat quod dixit, montem Sion securum, & stabilem esse; sed multo magis eos, qui confidunt in Domino. Siquidem Sion mōtes habet in circuitu, quasi pro muro; sed qui confidit in Domino, ipsum Dominum omnipotentem habet in circuitu: & montes, qui Sion montem circundant, complanari possunt, & cadere; sed Dominus in circuitu est populi ex hoc nunc, & vsque in seculum. Sententia igitur horum duorum versiculorum est, Omnes qui confidunt in Domino, securos esse debere, quia Dominus protegit eos ab omni malo; & quamuis interdum temporaliter affligantur, id etiā cooperatur illis in bonum; & si fortē permittit Deus illis auferri diuitias, vel sanitatem, vel aliquid eiusmodi, reponit aliquid me-

melius, idest, patientiam & consolationem cum merito gloriæ sempiternæ. Sed hoc loco per confidentiam non debet intelligi vana præsumptio, sed fiducia illa, quæ ex fide non ficta, ex corde puro, ex conscientia bona, ex dilectione feruenti nasci solet.

III. Quia non relinquet Dominus virgam peccatorum super sortem iustorum: vt non extendant iusti ad iniquitatem manus suas.

Explicat paulò clarius, qua ratione Dominus protegat cōfidentes in adiutorio ipsius. Quod si, inquit, permittet Dominus aliquādo, iustis de causis, in quos dominari pijs, nō diu hoc permittet. ne pij desperantes incipiant etiam ipsi facere opera impiorum: sic igitur ait, Quia non relinquet Dominus virgam peccatorum super sortem iustorum, idest, dabit quidem aliquādo Dominus impijs virgam idest, sceptrum, quod est insigne potestatis, super sortem, idest, super hereditatem, siue partem, & portionem iustorū; sed non diu relinquet virgam in manu impiorum: in hebræo est ad verbum, Non requiescet virga peccatoris super sortem iustorum, quæ verba eundem habent sensum; sed metaphora quietis eleganter explicat breuitatem tēporis, quo peccatores permittuntur regnare super iustos. quamuis enim tēpus, quo regnant impij super iustos, lōgum videri possit ijs, qui non cogitant æternitatem; tamē ijs, qui certi sunt ex diuina promissione Regnum Sāctorum cum Christo sine fine duraturum, momentaneum videtur omne quod finem habet. Ait igitur, non requiescet virga peccatoris super sortem iustorum, idest, erit quidem potestas peccatoris aliquando super iustos ad eorum probationem, vel exercitationem, vel correctionem; sed erit quasi stans, non sedens; transitura, non manens; temporalis, non æterna. Vt nō extendant iusti ad iniquitatem manus suas, hoc est, ne iusti non perseuerent in iustitia, si videant felicitatē iniquorum tam esse diuturnam, vt credi possit nullum finem habitura,

Benefac Domine bonis, & re- IV.
tis corde.

Quia dixerat, periculum esse ne iusti scandalum paterētur ex nimis diuturna potestate iniquorum; conuertit se ad Deum, atq; precatur, vt benefaciat bonis, liberando videlicet eos velociter à potestate impiorum, aut certè patientiam illis, & consolationem internam copiosè suppeditando; & simul admonet, ac docet, illos verè esse bonos, qui sunt recti corde, idest, qui non scandalizantur de iudicijs Dei; sed in bonam partem accipiunt omnia, quæ Deus facit, etiam si permittat impios dominari, quantumuis diuturno tempore. Illi enim sunt recti corde, qui cōformant cor suum, idest, iudicium, & voluntatem cum rectissima regula iudicij, & voluntatis Dei, etiam si non intelligant, cur Deus hoc, aut illud faciat, vel fieri permittat: de his scribitur in alio Psalmo, Quàm bonus Israel De⁹ his qui recto sunt corde! Isti enim acquiescunt in omnibus Deo, & placet illis Deus, & illi placent Deo, quomodo lignum rectum in pauimento recto optimè collocatur, & quiescit; lignum autem distortum non potest collocari, nec quiescere nisi in loco distorto.

Declinantes autem in obligationes, adducet Dominus cum operantibus iniquitatem, pax super Israel.

Occasione vltimi verbi versiculi superioris, quo bona optabantur rectis corde; subiungit Propheta terribilem comminationem ijs, qui declinant à rectitudine eordis, ac dicit eos, qui declinant à rectitudine ad tortuositatem, & in persecutione, vel tribulatione perdunt sustentiam, ac vel fidem negāt, vel de Deo queruntur, ac murmurant, eos cum operantibus iniquitatem, id est, cum ipsis persecutoribus, atque impijs hominibus in iudicium adducendos: quoniam, vt Sanctus Iacobus ait cap. 2. Qui totam legem seruauerit, offendat autem in vno, factus est omniū reus: & tum demum separatis omni-

Ddd 2 bus

bus malis de medio bonorum, pax vera, & sempiterna erit super Israel, id est, super populum Dei. Hoc loco magna est quaestio de verbo illo, obligationes: & quidem alij alia dicunt, sed ego, ut permitto vnumquemque abundare in sensu suo, ita si debeat hic versiculus coherere cum superiore, & si conciliandi sunt codices latini cum graecis, & hebraicis; nihil dubito, quin latinus Interpres scripserit obligationes, non tam respiciens ad rem, quae ligatur, & stringitur per obligationem, quam ad ipsam obliquitatem, & tortuositatem, quae cernitur in fune, dum aliquid ligatur: neque enim obligari potest aliquid, nisi funis, alioqui directus torqueatur, & in circulos ducatur. Id ita esse primo colligitur ex voce graeca, quam Euthymius explicat, per obliquitatem, & peruersitatem. Denique ex ratione continuationis; nam si per obligationes, intelligamus obligationes ad aliquid faciendum, ut sunt vota, iuramenta, promissa, pacta, & similia; vix percipi poterit, quid sibi hoc loco Propheta velit: si vero per obligationes intelligantur nodi, & tortuositates, quae opponuntur rectitudini cordis, de qua proximè fuerat loquutus, omnia optimè cohaerebunt. Interpres igitur vulgatus obscurè quidem, sed verè, & propriè loquutus est.

PSALMVS CXXV.

Titulus, & Argumentum.

Canticum Graduum.

PSALMVS hic apertissimè loquitur de reuersione à captiuitate, & ascensione ad patriam, & conuenit propriè in tempus illud, quo decretum Cyri de soluenda captiuitate Iudæorum primum promulgatum est: quod quidem figura fuit Euangelij, quo nobis annunciata est remissio peccatorum, & ascensio ad caelestem Hierusalem.

Explicatio Psalmi 125.

IN conuertendo Dominus captiuitatem Sion, facti sumus sicut consolati.

Latinus Interpres voluit ad verbum reddere verba graeca, & ideo minus latine loquutus videtur. Sanctus Hieronymus sententiam non verba sequutus ita reddidit, Cum conuerteret Dominus captiuitatem Sion, facti sumus sicut somniantes. Verè enim vox hebraica, *cholemim*, somniantes significat, & sensus est, cum primum auditum est à nobis decretum relaxationis, & reuersionis in patriam, praegaudio vix credere potuimus quod dicebatur, & nobis non videre, & audire, sed somnare videbamus. Simile quid accidit Patriarchae Iacob Gen. 45. qui cum audisset filium suum Ioseph viuere, què iam dudum mortuum luxerat, quasi de graui somno euigilans non credebat. Sanctus etià Petrus Act. 12. de carcere praeter spem mirabiliter liberatus, existimabat se visum videre. Porro Septuaginta Interpretes verterunt, consolati, quia ex nimia consolatione fiebat, ut sibi Iudaei somnare viderentur. Sed perspicua erit lectio, si vtrunque iungamus hoc modo, Cum conuerteret Dominus captiuitatem Sion, facti sumus ex nimia consolatione, & laetitia quasi somniantes, nos liberatos: vel si placeat, hic esse potest sensus, Facti sumus sicut consolati, id est, facti sumus, ut sunt ij, qui consolationem post magnam tribulationem accipiunt, id est, hilares, & iucundi ex tristibus, & morientibus. Hanc ineffabilem consolationem verè experiuntur, qui seriò conuertuntur ad Deum, & contempta spe seculi, atque omnium rerum terrenarum cupiditate deposita, dirigunt pedes suos in viam pacis. Intelligunt enim quàm ineffabile bonum sit, erui de captiuitate Diaboli, & de profundo gehennae, & ad veram libertatem, atque aeternam pacem in caelesti patria possidendam Deo vocante, & ducente preparati.

חלמים

Tunc

II. Tunc repletum est gaudio os nostrum, & lingua nostra exultatione.

Ex consolatione interna prodijt lætitia externa, quæ in hilaritate vultus, & in voce exultationis agnoscitur. Tunc, inquit, idest, ubi auditus est bonus nuncius liberationis, repletum est gaudio os nostrum, idest, facies nostra hilaris, & iucunda apparuit, & lingua nostra prorupit in verba lætitiæ, & iubilationis. In hebræo, pro, gaudio, habetur risus: sed in idem recidit sententia: risus enim lætitiæ signum est. Si quis autem velit per, os, non intelligere faciem, sed quod propriè dicitur os, sensus erit, repletum est os nostrum lætis vocibus, & laudibus, & idem significabitur per verba sequentia, & lingua nostra exultatione, quæ repetitio est in Psalmis frequentissima.

III. Tunc dicent inter gentes, magnificavit Dominus facere cum eis.

Nuncius bonus huius liberationis sicut eos, qui liberati sunt affectit ingenti lætitiâ; ita etiam alios, qui hoc audierunt, magna admiratione replevit, & ideò dixerunt, Magnificavit Dominus facere cum eis, idest, magnificè gessit se Dominus cum populo suo: quamvis enim Cyrus fuerit, qui populum hebræorum ex tam longa captivitate liberauit; tamen omnes faciliè intelligebant, id factum esse diuino instinctu: nam liberatio facta est ipso tempore, quo Deus per Hieremiam prædixerat esse faciendam, idest, post annos septuaginta. & Cyrus ipse lib. 1. Esdræ cap. 1. agnoscit Imperium orbis terræ à Deo cœli sibi tributum, & ab eodem Deo iussu se templum in Hierusalem ædificare, populumque dimittere: & denique nunquam sperandum erat, ut Rex vllus sponte sua, & sine vlllo pretio tot millia captiuorum dimitteret, nec solùm dimitteret, sed etiam magnis donis oneratos dimitteret. Itaq; meritò gentes omnes tam magnum beneficium diuinæ providentiæ tribuebant. Sed cur Propheta vtitur hoc lo-

Card. Belarm. in Psal.

co tempore futuro, cùm paulò ante v-
sus sit tempore præterito? dixit enim,
Tunc repletum est gaudio os nostrum:
vnde consequens erat, ut diceret, Tunc
dixerunt inter gentes. cur igitur ait,
Tunc dicent inter gentes? Hebræus co-
dex vtrunque verbum ponit in tempo-
re futuro, quod tamen secundum con-
suetudinem linguæ hebraicæ, vtrunq;
verti potest in tempus præteritum. Sed
codex græcus, quem secutus est Inter-
pres latinus, primum posuit in præte-
rito, secundum in futuro. Fortasse igi-
tur hic est hebraismus, & accipiendum
est tempus futurum pro præterito. For-
tasse etiam illud, tunc, hoc loco non si-
gnificat tempus liberationis iam præ-
teritum, sed tempus diuulgationis hu-
ius rei ad gentes etiam longè positas,
quod erat futurum, ut sensus sit, Cùm
perueniet fama huius rei ad gentes lon-
gè positas, tunc dicent inter se gentes,
Magna fecit Deus cum populo Iudæo-
rum. Neque minus hæc admiratio gen-
tium locum habet, cùm homines, qui
de hoc mundo sunt, vident aliquos,
qui de Mundo erant, Mundo terga ver-
tere, & ad patriam cœlestem per viam
veræ virtutis, & Christi imitationis a-
scendere. Mundus enim non diligit
quidem eos, qui de Mundo non sunt,
sed miratur tamen, & Deum in illis, &
cum illis esse negare non potest.

Magnificavit Dominus facere IV. nobiscum, facti sumus lætantes.

Approbant liberati quod gentes di-
cunt, quia vera dicunt, ac si ita subiun-
geret, Verè Dominus magnificè se no-
biscum gessit, & præter meritum, &
spem nostram egit nobiscum, cùm de
tam miserabili captivitate nos ad dul-
cissimam patriam reuocauit: & ideò fa-
cti sumus lætantes, qui sub iugo capti-
uitatis gemebamur mœrentes.

Conuerte Domine captiuitatē v. nostram, sicut tortens in Austro.

Quoniam non statim omnes captiui
reuerſi sunt, sed primum aliqui cum
Esdra, deinde alij cum Nehemia: ideò
qui primi redierant precantur Deum

Ddd 3 pro

pro plena, atque integra reuersione captiuorum. Utuntur verò similitudine torrentis, qui flante Austro plenissimè, & velocissimè fluere solet. Dicunt igitur, Conuerte Domine captiuitatem nostram, idest, fac vt reuertantur captiui nostri, qui adhuc remanent in terra aliena, planè omnes, & quam citissimè, vt sit plena, & velox reductio, qualis esse solet earum rerum, quas torrens secum abripit, & deuoluit, quando flante Austro tum pluuijs de cælo cadentibus, tum niuibus liquefactis, & de montibus fluentibus impletur. Sed multo magis spiritualibus peregrinis hæc precatio necessaria est: quamuis enim iam aliqui ad patriam peruenierint, tamen uultu adhuc peregrinantur: plurimi etiam amare cœperunt captiuitatem, & affixi rebus temporalibus de patria nihil cogitant; ideo necesse est, vt Deus instar torrentis Austro flante violenter eos compellat, & quasi cogat ascendere. Denique tum isti, tum illi, adhuc ex parte captiui tenentur. omnes enim expectant, vt liberetur omnis creatura à seruitute corruptionis, & ipsi etiam in cælo Beati expectant redemptionem corporis sui. Pro hac igitur perfecta libertate filiorum Dei, de qua loquitur Apostolus ad Rom. 8. rectè precamur, Conuerte Domine captiuitatem nostram, sicut torrens in Austro. Quod attinet ad verba, in hebraico, & græco codice habetur, torrentes, siue riuos aquarum in numero multitudinis, & casu accusandi: sed probabile est in græcis antiquis & magis correctis fuisse, *καταβήκων*, idest, torrens, non *καταβήκων*, idest, torrentes. Nam Sanctus Hieronymus in commentario, vbi exponit editionem Septuaginta legit, torrens, & Sanctus Augustinus similiter legit, torrens. verbum autem hebraicum potest intelligi tam in casu nominandi, quam accusandi: sed in sensu nulla difficultas est. Nam idem est sensus, siue dicamus, Conuerte captiuitatem nostram, vt torrens conuertit, & trahit omnia secum: siue, Conuerte captiuitatem nostram, vt torrentem protrudis, & im-

pellis, quando Austro flante impletur aquis. Maior quæstio est de nomine Austri; siquidem recentiores quidam accurati, & docti contendunt nomine Austri non debere intelligi ventum, sed regionem Australem desertam, & aridam, qualia sunt deserta Arabiæ: ac sensum huius loci esse volunt, Conuerte captiuitatem nostram, sicut torrentes fluunt in locis aridis & desertis: sic enim lætificabit nos reuersione captiuorum, quomodo lætificantur loca arida fluentibus aquis. Sed nobis veneranda est Patrum auctoritas: nam Septuaginta Interpretes sine dubio per Austrum intellexerunt ventum: id enim propriè significat *אֵרֶס*, qua voce hoc loco vsi sunt: deinde Sanctus Hieronymus, Sanctus Augustinus, Theodoretus, Euthymius, & alij veteres tū græci, tum latini agnoscunt hoc locum similitudinem venti Australis liquefacientis niues, & congregantis nubes, atque eo modo torrentes implentis. Ratio etiam connexionis, & nomen torrentis huic expositioni fauere videtur. Vtitur enim Propheta nomine torrentium, vt significet plenitudinem reuersionis captiuorum: per loca verò deserta, & arida riuuli quidam fluere solent non autem torrentes pleni, & magni, quos ingentes pluuiæ, vel niues de montibus fluentes faciunt. At, inquit, vox hebraica, *negheb*, non significat ventum, sed australem plagam, vel loca arida, & deserta. Respondeo, quod sæpè respondi, nõ debere restringi significationes vocum hebraicarum ad hebraica dictionaria: maior enim fides habenda est Septuaginta Interpretibus, & Sancto Hieronymo, quàm omnibus dictionarijs; & quemadmodum vox græca *αἶρος*, significat propriè ventum Australem, & inde transfertur aliquando ad significandam regionem, vnde ventus ille spirat: sic etiam fieri potest, vt vox hebraica, *negheb*, quam ipsi volunt significare plagam australem, transferatur etiam ad significandum ventum australem; & hoc loco ita ac ipiendam esse hanc vocem, veterum auctoritas satis nobis persuadet,

Qui

VI. Qui seminant in lacrymis, in exultatione metent.

Posteaquam rogauit Propheta Deū, vt reducat ad patriā omnes captiuos; exhortatur ipsos captiuos, vt libenter suscipiant laborem ambulandi, & ascendendi, neque retineantur amore earum rerum, quas in terra aliena possidebant: quoniam in patria sua, multo plura, & meliora inuenient. Vtitur autem similitudine aptissima seminantis, & metentis. Seminans enim ordinariē in lacrymis seminat, idest, cum dolore, & gemitu; quia cogitur triticum suum proijcere in terram, neque scit, an vnquam illud recuperabit, ac proinde videtur laborare, & fatigari, vt opes suas amittat: sed quando messis venit, cum magno gaudio metit, quia videt triticum suum, quod videbatur dum seminaretur, amissum, non solum non perijisse, sed cum maximo fœnore redditū sibi fuisse. Sed hæc exhortatio apud spirituales peregrinos præcipuē locū habet. Qui enim captiuitatem diligūt, & amore mundi capti, de cœlesti patria nihil cogitant, ij existimant, iustorum iter ad cælum nihil esse aliud, nisi iacturam, & detrimentum. Qui enim verē peregrini sunt, & ad patriam cœlestem ascendunt, opes suas pauperibus largiuntur, qui nunquam restituent: sine pretio vel præmio laborant, vt fratres suos doceant, vt Apostolus faciebat; sponte seipsi voluptatibus, & delectationibus priuant; quæ stultitia esse videtur ijs, qui nesciunt quid ista pariant. Sed hoc nihil est aliud, nisi seminare in lacrymis, vt postea in tempore suo cum exultatione metāt; quod si ij, qui captiuitatem adhuc amant, attentē considerarent, certē ipsi etiam mutato consilio ascendere inciperent, & sua omnia, licet cum sensu aliquo doloris interim seminant, vt paulō post in cœlesti patria cum exultatione meterent.

VII. Euntes ibant, & flebant, mittentes semina sua.

VIII. Venientes autem venient cum

exultatione portantes manipulos suos.

Describit paulō fufius, & clarius morem seminantis, & metentis. Euntes, inquit, ibant, idest, rustici ex domo sua exeuntes ibant ad agrum, & flebant mittentes semina sua, idest, cum dolore spargebant triticum suum in terram, videntes se priuari interim opibus suis non sine sudore quæsitis. Sed postea venientes ex agro tempore messis, venient domum cum exultatione portantes manipulos suos, idest, referentes pro paucis granis integros manipulos spicarum. Neque curauit Propheta similitudinem applicare; quia facile erat vnicuique id per se facere. Vtitur hac eadem similitudine Apostolus 1. Corint. 9. Qui parce seminat, parce & metet. Et quoniam similitudo admirabilis est, non erit inutile considerare quibus in rebus semētis cum eleemosyna comparetur, vt magis animetur qui ascensiones in corde suo disponunt, ad opes suas libentissimē cum pauperibus communicandas. Primum igitur granum, quod seminatur, res est exigua, & tamen producit tantam granorum multitudinem, vt incredibile videatur: sic etiam eleemosyna res est in se vilis, cum sit actio humana, & temporaria, & per organum corporis corruptibilis facta; & tamen producit nō multas pecunias, aut panes, aut vestes, sed Regnum sempiternum; quomodo si granum tritici seminatum nō produceret spicam triticeam, sed spicam auream plenam gemmis pretiosis loco granorum. Deinde granum seminatum debet corrumpi, & perdi, alioqui non nasceretur, iuxta illud Euangelij, Nisi granum frumenti cadens in terram mortuum fuerit, ipsum solum manet: sic eleemosyna debet donari, non commutari, & donari ijs, qui non possunt retribuere, denique debet amitti, ac perdi sine vlla spe recuperationis in hac vita: ita enim corrupta, & perdita iterum nascitur, & fructum plurimum parit in æterna vita. Denique seminatum granum eget sole, &

Ddd 4 plu.

pluuia, vt germinare possit: sic etiam eleemosynæ, vt alia omnia bona opera, egent sole diuinæ gratiæ, & pluuia sanguinis Mediatoris, idest, requirunt, si meritoria esse debeant, vt fiat ex gratia Dei, quæ nascitur ex Christi sanguine: tunc enim res in se minima efficitur maxima ratione virtutis, quam ex gratia recipit: & sic non solum meritoria, sed etiam de condigno, vt scholæ loquuntur, meritoria est vitæ æternæ. Sed hoc interest inter sationem tritici, & distributionem eleemosynæ ritè faciendam; quod plurima sunt, quæ facere possunt, vt qui seminauit in lachrymis triticum, in exultatione non metat: nam & potest seminatum granum deficiente humore non nasci; & potest natum à bruchis, vel nebulis corrumpi; & potest iam maturum à furibus diripi, vel incendio perdi. At eleemosyna ex charitate facta, salua est, quippe in cælo reconditur, vbi neque bruchi, neque nebula, neque fures accessum vllum habent. Igitur qui spirituale semen in lachrymis seminat, in exultatione fructum magnum sine vlla dubitatione metet.

PSALMVVS CXXVI.

Titulus, & Argumentum.

Canticum graduum Salomonis.



PSALMVVS hic semper mihi visus est supra modum obscurus, & nunc etiam post longum studium fateor me non perfectè assequi literalem sensum. Probabilior expositio videtur esse illa, quam tradiderunt Græci, S. Ioannes Chrysostomus, Theodoretus, & Euthymius; quod videlicet pertineat hæc Prophetica exhortatio, siue admonitio ad populum hebræorum post reuersionem à captiuitate Babylonica, quando laborabat in ædificanda domo Dei, & restauranda ciuitate Hierusalem, & à vicinis gentibus toto fere

illo tempore vexabatur, & impediiebatur. Huc etiam pertinere videtur, titulus, Canticum graduum Salomonis: tribuitur enim Salomoni hæc adhortatio, quoniam ipse prior ædificauit domum Domini, & ciuitatem Hierusalem amplificauit, & multis bonis repleuit. Ipse igitur commodè introducit, qui admoneat Zorobabelem, qui fuit quasi alter Salomon, quomodo se gerere debeat in domo, & ciuitate reedificanda, custodienda, & amplificanda. Sed altiore sensu verus Salomon, idest, pacificus, Christus, qui est pax nostra iuxta Apostolum, admonet eos, qui ad veram pacem aspirant, & aspirando ascendant de valle lacrymarum ad visionem pacis, Hierusalem caelestem, quomodo debeant ædificare, & custodire domum, siue ciuitatem Ecclesiæ: tum etiam vnusquisque sibi per bona opera domum ædificare in cælo, eamque custodire, vt ad eam suo tempore feliciter inhabitandam, perpetuoque possidendam, ascendat. Scio nonnunquam in Scripturis per ædificationem domus, intelligi fecunditatem, siue copiam filiorum. Sed hunc Psalmum communis expositio Patrum de vera domo Dei, idest, de templo siue materiali, siue mystico, non de carnali filiorum copia intelligendum esse docuit.

Explicatio Psalmi 126.

Nisi Dominus ædificauerit domum, in vanum laborauerunt qui ædificant eam.

Hæc dicuntur Iudæis ædificantibus domum Dei, idest, templum, quando in feliciter opus procedebat, impredientibus vicinis gentibus, vt scribitur in primo libro Esdræ. Admonentur autem, vt cogitent, nihil valere opera hominum, nisi primarius ædicator Deus adsit, & ideo non solum operentur manibus, sed etiā corde, & ore Deum inuocet, & in eius adiutorio præcipuè fidat. Nisi Dominus ædificauerit domum, id est, Nisi Dominus inuocatus cum fiducia, operantibus adfuerit. In vanum labora-

borauerunt qui ædificant eam, idest, omnis labor frustra consumptus est, & frustra etiam deinceps consumetur. Hæc eadem dicuntur Præpositis Ecclesiæ, qui prædicatione verbi Dei conuertere nituntur homines ad Deum, & ex ijs templum Domino, idest, Ecclesiam ædificare. iuxta illud 1. Corint. 3. Dei ædificatio estis. & ibidem. Vt sapiens architectus fundamētum posui, alius autem superædificat: sed nisi adfit ille principalis architectus, qui dixit Matth. 16. Super hanc petram ædificabo Ecclesiam meam, in vanum ædificant homines, frustra prædicant doctores verbi Dei, dicente Domino, Si ne me nihil potestis facere, Ioan. 16. Denique dicuntur eadem unicuique nostrum, qui domum nobis per actus fidei, spei, & charitatis in cælo ædificare debemus: domus enim Dei, vt sanctus Augustinus ait *serm. 22. de verbis Apostoli*, credendo fundatur, sperando erigitur, diligendo perficitur, neque vllus in cælesti patria ciuis admittitur, qui talem domum non ante parauerit. Sed hæc domus magis orando, & gemendo, quàm operando fabricatur, quia non sumus sufficientes cogitare aliquid ex nobis, tanquam ex nobis 2. Corinth. cap. 3.

II. Nisi Dominus custodierit ciuitatem, frustra vigilat, qui custodit eam.

Cum ciuitas Hierusalem post captiuitatem ædificaretur, simul ædificanda, & simul custodienda erat, vt testatur Scriptura in lib. 2. Esdræ. Gentes enim quæ in circuitu erant, non solum impedire conabantur ædificationem, sed etiam demoliri quod ædificatum fuerat, & ideo filij Israel vna manu gladium tenebant, altera faciebant opus; & multi eorum dispositi ad custodiendum perpetuas agebant excubias. Sed nihilominus tot vigilijs suis nihil profecissent, nisi Dominus ciuitatem custodire voluisset. Hoc idem contingere certum est Præpositis Ecclesiæ, qui simul ædificare Ecclesiam, & simul custodire debent: yersamur enim in me-

dio inimicorum, qui nihil magis oderunt, quàm Ecclesiæ amplificationem. Et quamuis Episcopis ad hoc detur in Ecclesia locus altior, vt quasi è specula omnia prospicere, & populum custodire possint; tamen neque corda penetrant, neque vbique cum omnibus esse possunt; ideo Nisi Dominus custodiat ciuitatem, frustra vigilat qui custodit eam. Hoc ipsum singulis nobis accidere solet, vt dum per bona opera domum nobis ædificamus, non desint hostes, qui varijs tentationibus destruere moliantur ædificium inchoatum. vnde nos Apostolus armat scribens Ephesijs cap. 6. dum dicit, Accipite armaturam Dei, vt possitis resistere in die malo. & infra, In omnibus sumentes scutum fidei, in quo possitis omnia tela nequissimi ignea extinguere. Sed nisi Dominus nobis adsit, & nos sæpe dormitantes custodiat, & pro nobis pugnet, frustra erit omnis labor noster.

Vanum est vobis ante lucem III. surgere: surgite postquam sederitis, qui manducatis panem doloris.

Filij Israel præ nimia sollicitudine, dum in angustijs essent, ante lucem opus ædificationis aggrediebantur; ideo monet illos Spiritus sanctus, nihil profuturum, quod ante lucem operari incipiant, nisi Dominus illis adfuerit: sed si Dominum adiutorem habuerint, & in illo spem suam posuerint, opus prospere successurum, etiam si post necessariam quietem, orto iam sole operi se accingāt. Vanum, inquit, est vobis ante lucem surgere, ad opus videlicet ædificationis prosequendum; vbi subintellegendum est, nisi Dominus ædificauerit domum, vel custodierit ciuitatem. & ideo confidentes in Domino, & illum assidue inuocantes surgite postquam sederitis, idest, post nocturnam, ac necessariam quietem, surgite ad opus. qui manducatis panem doloris, idest, vos, qui in angustia, & oppressione nunc viuitis propter infestationem continuam inimicorum.

Sed

Sed in sensu magis intéro à Spiritu sancto, monetur Præpositi Ecclesiæ, & singuli etiam fideles, vt in ædificanda domo, siue communi, siue particulari, nõ magis fidant operationi, quàm orationi: sed imitentur Dominum, qui per noctes vigilabat in oratione iuxta illud Lucæ 6. Erat pernoctans in oratione Dei: & interdum consionabatur, & miraculis sermonem confirmabat; nec non Apostolos imitetur, qui in Actis cap. 6. dicunt, Nos autem orationi, & ministerio verbi instantes erimus. Vanum, inquit, vobis est ante lucem surgere, idest, totum tempus consumere in ædificatione, vel custodia. Surgite postquam sederitis, idest, surgite ad opus, postquam sederitis vacantes quieti contemplationis, & orationis. Qui māducatis panem doloris, idest, vos, qui præ desiderio cælestis patriæ assidue gemitis, & dicitis, Fuerunt mihi lacrymæ meæ panes die, ac nocte, dū dicitur mihi quotidie, vbi est Deus tuus? Qui enim valde amant, dum non possunt frui præsentia rei amata, sustentantur interim desiderio, & gemitu, & eo modo lacrymæ fiunt illis panes die, ac nocte, idest, in prandio, & cœna. In hebræo non habetur illud, surgite, sed videntur Septuaginta legisse, paulò aliter, quàm nunc habeatur in nostris codicibus. vbi enim nunc est, cum, idest, surgere, קום ipsi videntur legisse, cum, surgite. & קמו quamuis Euthymius ex græco codice, legat, surgere, tamen veteres Patres, legunt, surgite, vt sanctus Hieronymus, & sanctus Augustinus in commentario. & videtur etiam sanctus Ioannes Chrysostomus ita legisse. denique ita legit sanctus Hilarius, qui vt sanctus Hieronymus scribit in lib. de Scripturibus Ecclesiasticis, imitatus est Origenem in explanatione Psalmorum. certum autem est Origenem, & alios veteres græcos, & latinos habuisse codices correctiores, quàm vnus Euthymius habuerit. nisi fortè Euthymius etiam legerit, surgite, sed corrigendum putauerit esse textum, vnus literarum mutatione: nam קמו, est surge, & קמו, est surgite.

Cum dederit dilectis suis somnum, ecce hæreditas Domini filij, merces fructus ventris. IIII.

Post exhortationem, & admonitionem, addit Propheta consolationem, prædicens fore, vt post præsentibus tribulationes, det Dominus pacem, & quietem populo suo, & tunc filios Israel manifeste futuros Dei hæreditatem, & potentissimos, atque fortissimos, vt nullos deinceps hostes passuri sint. quæ Prophetia respicit nouum populum, idest, Ecclesiam Christi, cuius typus erat templum, & ciuitas ipsa Hierusalem. Nam vt sanctus Augustinus demonstrat lib. 18. de ciuitate Dei cap. 45. Iudæis post ciuitatis, & templi instaurationem omnia in deterius prolapsa sunt, donec per Vespasianum & Titum iterum ciuitas euerfa, & templum incensum fuit. Ait igitur, Cum dederit dilectis suis somnum, idest, cum pacem, & quietem Dominus populo suo dederit, mittens ad illos verum Salomonem, qui templum verum, idest, Ecclesiam suam, fundabit, & propagabit, atque ipsos etiam Imperatores orbis terræ illi subiiciet; ecce hæreditas Domini filij, merces fructus ventris, idest, ecce tunc apparebit, quod hæreditas Domini erunt filij plurimi, iuxta illud Psalmi 2. Postula à me, & dabo tibi gentes hæreditatem tuam; & possessionem tuam terminos terræ: & merces eiusdem Christi Domini erit fructus ventris, filij videlicet plurimi, iuxta illud Isaia 53. Si posuerit pro peccato animam suam, videbit semen longæuum. Nam, vt sæpe monuimus, frequentissimè in Psalmis idipsum bis repetitur. Itaque idem est, hæreditas Domini, filij; & merces, fructus ventris, idest, Christi Domini hæreditas, & merces erunt multi filij, qui nihil aliud sunt, nisi fructus ventris. Atque hæc expositio est conformis hebraico textui, vbi vox illa fructus, est nominatiuus casus, non genitiuus. Sed in editione græca vox, fructus, est casus genitiui, & idè iuxta græcum codicem sensus erit, quod filiorum multitudo erit hæreditas Domini,

mini, & merces Christi, qui Christus verè, proprièque fructus ventris fuit, cum non ex viro, sed ex sola Virgine ortum habuerit. & hæc fortasse verior est expositio, quoniam verbum hebraei cum potest mutatis punctis reddi per genitium; sed verbum græcum, non potest reddi per nominatium. Proinde si codices omnes conciliandi sint, hæc posterior expositio priori anteponenda erit. Iam verò si Psalmus explicetur secundum altiore sensum, in hoc versiculo prædicetur felicitas cælestis Hierusalem, que post somnū mortis temporariæ in resurrectione manet eos, qui sicut oportebat ad patriā sempiternā passibus amoris, & fidei ascendere properarunt. Ait igitur, Cum dederit dilectis suis somnum, idest, cum post varios labores, & certamina dederit Deus omnibus dilectis suis, tã Præpositis Ecclesiæ ædicatoribus, quàm priuatis fidelibus domum sibi per opera bona fabricantibus, somnum beatæ mortis, ecce hæreditas Domini filij, merces fructus ventris, idest, tunc apparebit in die vltimi Iudicii, quòd filij Dei sint ipsius Dei hæreditas, quia tunc dilecti salutem æternam consequentur, & per hoc transibunt in æternam Dei possessionem, & hæreditatem, & iidem filij erunt merces Christi, qui est fructus ventris, quia salus electorum est Christi merces: ipse est enim, qui gratiam, & gloriam electis suis patiundo, & moriendo promeruit. Non multum autem refert, quòd in hebræo habetur, sic dabit dilecto suo somnum, pro eo quod nos habemus in græca, & latina versione, cum dederit dilectis suis somnū: nam particula hebraica, chen, significat multa, nimirum, sic, vere, tunc, &c. Itaque reddi potest, tunc dabit, idest, post illas tribulationes dabit, & sensus in idem recidit. vox autem, ledido, dilecto suo, potest etiam legi, ledidau, dilectis suis, & sic legerunt Septuaginta & S. Hieronymus, qui habuerunt codices sine punctis, quæ à Rabinis postea addita sunt. & si fortè necessario legèdum esset, dilecto suo, exponeremus vnicuique dilecto suo, vel

dilecto populo suo, quod est idem cum eo, quod nos habemus, dilectis suis.

Sicut sagittæ in manu potentis, ita filij excussorum.

Declarat his verbis Propheta potentiam filiorum Christi, qui sunt eius hæreditas, & merces. ac dicit fore potentissimos, quales sunt sagittæ in manu viri robustissimi, quæ maximo impetu iaciuntur, & omnia perrumpunt. loquitur autem de spiritali potètia seruorum Christi, quæ non minus cernitur in actione, quàm in passione. nam & cum instar tonitruī, & fulguris terrefaciunt, & conuertunt infideles ad fidem, vel peccatores ad pœnitentiam efficacia prædicationis, splendore sanctitatis, & miraculorū virtute; & quando tormenta omnium generum, incredibili patientia, & fortitudine, ad mortem vsque decertantes pro fide, & pietate tolerant, quid sunt aliud nisi sagittæ in manu potentis? sed cur filij isti tam fortes dicuntur filij excussorum? quia filij sunt hominum electorum, & expulsorum à mūdo, quasi quisquiliæ, & reiectamenta; videlicet filij Prophetarum, & Apostolorum: nam de Prophetis Apostolus dicit Heb. 11. Alij vero ludibria, & verbera experti, insuper & vincula, & carceres, tentati sunt, lapidati sunt, secti sunt, in occisione gladij mortui sunt, circuierunt in melotis, & in pellibus caprinis, egentes, angustiat, afflicti, quibus dignus nō erat mundus. De Apostolis dicit idem Paulus 1. Corinth. 4. Puto quòd Deus nos Apostolos nouissimos ostendit, tanquā morti destinatos. quia spectaculum facti sumus mundo, & Angelis, & hominibus. vsq; in hāc horam & esurimus, & sitimus, & nudi sumus, & colaphis cædimur, & instabiles sumus; & laboramus operantes manibus nostris. Maledicimur, & benedicimus, persecutionem patimur, & sustinemus, blasphemamur, & obsecramus, tanquam purgamenta huius mundi facti sumus, omnium peripsenia vsq; adhuc. Et tamen isti ita excussi, & reiecti fortissimi fuerunt,

לירידו
לירידו

runt, & de mundo, & de dæmonibus mirabiliter triumpharunt. Horum filij sunt omnes electi, qui sicut sagittæ in manu potentis hostes vulnerarunt, & vicerunt. Scio locum istum variè tam à veteribus, quàm à recentioribus exponi, sed, vt aliàs dixi, vnusquisque in suo sensu abundet, vbi nullum subest fidei periculum. Neq; refert quòd sanctus Hieronymus ex hebræo vertit, filij iuuentutis, vbi nos habemus, filios excussorum, & versionem suam defendit in epistola ad Marcellam de quaestionibus super hunc Psalmum: nam

נערים vox hebraica, neharim, vtrunque significat, & iuuetutem, & excussorum. proinde versio Septuaginta & nostra vulgata editio nō repugnat textui originali. Neque reprobamus sancti Hieronymi intelligentiam. siquidem electi vt sunt filij excussorum, quia filij Prophetarum, & Apostolorum à mundo reprobatorum: ita sunt etiam filij iuuentutis, quia sunt per regenerationem, & renouationem iuuenes facti, ac per hoc alacres, & fortes, & expediti ad bellum contra spirituales hostes. Sed in futuro seculo, ac præsertim in die resurrectionis, & vltimi iudicii, maximè apparebit, quàm sint potentes isti filij excussorum: qui tunc per resurrectionem gloriosam erunt veri filij iuuentutis; quia renouabitur, vt aquilæ iuuentus eorum. stabunt enim in magna constantia aduersus eos, qui se angustiauerunt, vt dicitur Sapient. 5. & aduersarij videntes turbabuntur timore horribili, & dicent, Hi sunt quos aliquando habuimus in derisum, &c. & Psal. 149. Gladij ancipites in manibus eorum ad faciendam vindictam in nationibus, increpationes in populis, ad alligandos Reges eorum in compedibus, & nobiles eorum in manicis ferreis, vt faciant in eis iudicium conscriptum, gloria hæc est omnibus sanctis eius.

VI. Beatus vir, qui impleuit desiderium suum ex ipsis: non confundetur cum loquetur inimicis suis in porta.

Concluditur Psalmus per epiphonema acclamando ipsi Domino Christo, Beatus vir, qui impleuit desiderium suum ex ipsis, idest, verè felix est ille, Christus videlicet, qui impleuit desiderium suum ex ipsis filiis, quoniam perduxit ad finem desiderium suum, quod erat videndi salutem, & gloriam filiorum suorum, pro quibus tam multa fecit, & pertulit. & ideo non confundetur, cum loquetur inimicis suis in porta, idest, in vltimo iudicio, quod exercebitur in amplissima porta, idest, in conuentu totius mundi, non confundetur cum loquetur inimicis suis dæmonibus, & hominibus iniquis, sed eos potius confundet, & conuincet iniustitiæ, & imbecillitatis: tota enim contentio Christi cum diabolo, & ministris eius ab initio mundi vsque ad finem, fuit circa salutem generis humani, quod totum ad inferos secum diabolus pertrahere semper conatus est. Atque ad hunc finem singulis ætatibus persecutiones Iudæorum, paganorum, hæreticorum, iniquorum omnis generis, aduersus Ecclesiam excitauit. Sed cum in die Iudicii conspiciantur tot millia Electorum cum Christo gloriosè regnantium, & triumphantium, & iustissimè coronatorum: & cōtra, sublata erit iniquis omnis potestas, & ad æterna supplicia iustè damnatis nulla spes erit bella renouandi; tunc ipse Christus non confundetur, sed confundet omnes inimicos suos. In hebræo habetur, Beatus vir, qui impleuit pharetram suam ex ipsis, sagittis videlicet. Sed Septuaginta Seniores maluerūt explicare metaphoram: & quia, implere pharetram sagittis, significat, implere domum fortissimis filiis; ideo maluerūt vertere, Beatus vir, qui impleuit desiderium suum ex ipsis, hoc est, pro voto, & desiderio impleuit donum suum filiis optimis, & robustissimis. Illud autem, non confundetur cum loquetur inimicis suis, in hebraico, & græco codice habetur in numero multitudinis, non confundentur cum loquentur. Non est improbabile in aliquo textu vitio scriptorum esse

nume-

numerus variatum: non enim verisimile est interpretem latinum, vel græcum de industria numerum mutasse. Et cum S. Hieronymus, & S. Augustinus in commentario legant in singulari, non confundetur cum loquetur; & contra S. Hilarius, & S. Ioannes Chrysostomus legant in numero multitudinis, non confundetur, cum loquentur; necesse est, ut græci codices fuerint varij, sicut etiam latini codices vulgati varij sunt. sed vtraque lectio vera est; nam & de Christo verè dicitur, non confundetur, cum loquetur inimicis suis in porta, & de electis filiis Dei verè etiam dicitur, non confundentur, cum loquentur inimicis suis in porta, cum scriptum sit Sapient. 5. Tunc stabunt iusti in magna constantia aduersus eos, qui se angustiauerunt. Illud autem, in porta, interpretati sumus in ultimo iudicio, quoniam, ut diximus in explicatione Psalmi 121. apud hebræos in portis ciuitatum conueniebat multitudo populi ad iudicia. & præterea ex doctrina S. Augustini in expositione huius versiculi, in porta loqui, est publicè loqui, sicut loqui in cubiculo, est loqui occultè, & secretè. Quoniam igitur vltimum iudicium palam & publicè, & in conspectu omnium hominum, & Angelorum fiet, rectissime dicitur in porta fieri, & Christus, atque electi eius rectè, inimicis suis loqui dicuntur in porta.

PSALMVS CXXVII.

Titulus, & Argumentum.

Canticum Graduum.



Videtur hic Psalmus S. Hilario, & S. Augustino iuxta literæ corticem ita de temporalibus bonis, quorum promissio propria testamenti veteris est, agere, ut necessarium sit mysticum sensum inuenire, si ad Christianorum mores accommodari debeat. Sed fortasse non erit difficile ita illum exponere, ut simul ad testamentum ve-

tus, & ad nouum, ad bona Hierusalem terrenæ, & cælestis pertineat. Est igitur argumentum huius Psalmi, exhortatio ad pietatem, proposita ingenti mercede virtutis.

Explicatio Psalmi 127.

BEati omnes, qui timent Dominum, qui ambulant in vijs eius.

Docet Propheta redeuntes à captiuitate quomodo se gerere debeant, si nolint iterum in captiuitatem reuerti, sed perpetuo frui bonis Hierusalem. quæ doctrina vtrisque peregrinis conuenit, tam ijs, qui peregrinabantur à patria terrena, atque ad eam ascendere cupiebant, quàm ijs, qui peregrinantur à patria cælesti, atque ad eam redire festinant. Ait igitur, Beati omnes, qui timent Dominum, idest, illi omnes siue viri, siue feminae, siue magni, siue parui, siue nobiles, siue ignobiles, siue domini, siue serui, siue docti, siue indocti, denique omnes omnino nullis exceptis, tunc solum verè beati erunt, idest, fortunati, contenti, hilares, in optimo statu constituti, quem statum omnes desiderant, si Deum verè timuerint, idest, si Deum offendere formidauerint, atque eo timore muniti, à Dei gratia, quæ fons est omnium bonorum, nunquam exciderint. Signum autè sancti huius timoris est, si in vijs eius, idest, in præceptis eius ambulauerint. Nam timor iste sanctus ex amore procedit, & Dominus ait Ioan. 14. Si diligitis me, mandata mea seruate. & iterum, Qui habet mandata mea & seruat ea, ille est, qui diligit me. & iterum, Qui non diligit me, sermones meos non seruat.

Labores manuum tuarum quia manducabis, beatus es, & bene tibi erit.

Incipit enumerare felicitates hominis timētis Deum, atque ad eum ipsum sermonem dirigit, dicens, prima felicitas tua erit, quod manducabis labores manuum

manuum tuarum, idest, frueris ijs bonis, quæ labore manuum, siue operum tuorum acquireris. Quo loco diligenter considerandū est, non ponere Prophetam felicitatem piorum in magna copia diuitiarum; sed in ijs bonis, quæ proprio labore acquiruntur, quæ ordinariē modica esse solent: Magnæ enim diuitiæ, vel ex hæreditate parentum, vel ex rapina, & vsura, alijsq. malis artibus plerunque habentur. Laudat sanctus Hieronymus in epistola ad Hedibiam, quæst. 1. vulgatam illam sententiam, Diues aut iniquus, aut iniqui hæres. Quare idem Propheta in Psal. 36. dicit, Melius est modicum iusto super diuitias peccatorum multas. & in Psalmo 72. Ecce ipsi peccatores, & abundantes in seculo obtinuerunt diuitias. & in Psalmo 143. Promptuaria eorum plena eructantia ex hoc in illud, oues eorum fœtosæ abundantes in egressibus suis, boues eorum crassæ, non est ruina maceriarum. neque clamor in plateis eorum. Beatum dixerunt populum cui hæc sunt. Beatus populus, cuius Dominus Deus eius. Itaque sanctus Dauid non hebræis tantū, sed etiam Christianis concionatur, cum non ponat felicitatem in magnis diuitijs; sed in eo solum, quod viuant de suis iustis laboribus: vbi duo vitia extrema reprehendit: vnum eorum, qui labores aliorum manducant: alterum eorum, qui ne suum quidem laborem māducant, sed auarē recondunt, vt diuitias augeant: illi igitur soli beati sunt, qui labores manuum suarum manducant. Quod si fortē aliqui timentes Deum, & ambulantes in vijs eius, non possint frui bonis suis; sed esurire, & sitire cogantur, quod bona sua ab alijs direpta fuerint; nō propterea falsa erit promissio, quæ hoc loco habetur: nam si Deus quibusdam amicis suis permittit, vt cupiant saturari de micis, quæ cadunt de mensis diuitum, vt de Lazaro mendico legimus Luc. 16. & nemo illis eas micæ tribuit: dat sine dubio illis Deus aliquid longē melius, videlicet gaudium de tribulatione, vt Apostolus dicit ad Hebr. 10. Rapinam bonorum vestro-

rum cum gaudio suscepistis. & de se ipse dicit 2. Corint. 7. Superabundo gaudio in omni tribulatione nostra. & tūc sensus huius versiculi hic erit, Laborem manuum tuarum quia manducabis, beatus es, & bene tibi erit, idest, nunc manducabis laborē, idest, de gaudio laboris, & tribulationis reficeris; postea vero de fructu ipso laboris, idest, de præmio bonorum operum saginarius; & ideo nunc beatus es in spe, & postea bene tibi erit in re. Atque hoc propriē pertinet ad spirituales peregrinos, qui gaudent in tribulatione inopiæ, & ærumnarum, scientes, quod tribulatio patiētiam operatur, patientia vero probationem, probatio vero spem, spes autem non confundit, quia charitas Dei diffusa est in cordibus nostris, Rom. 5. Quod attinet ad verba, in hebræo est, labores manuum, vt nos habemus; sed in græco videtur esse, labores fructuum, & sic plurimi vertunt, & legunt ex græco. Sed vox græca *κατὰ*, & fructus, & volas manuum significat. proinde Septuaginta propriissimē verterunt hebræicam vocem, cappecha, quæ propriē volas manuum significat. Igitur nostra editio vulgata planē concordat cum originali hebræico, & cum editione Septuaginta.

Vxor tua sicut vitis abundans III.
in lateribus domus tuæ.

Hæc est altera felicitas timentis Deū, & ambulantis in vijs eius, quod si fortē vxorem ducere voluerit, vnam tantum ducet, eamque non ad libidinem explendam, sed ad filiorum procreationem accipiet, vt Angelus Tobiam monuit dicēs, Accipies Virginem cum timore Domini, amore filiorū magis, quàm libidine ductus. & ipse Tobias verē dixit, Domine tu scis, quia non luxuriæ causa accipio sororem meam coniugem, sed solo posteritatis amore. Tob. 6. & 8. Ait igitur, Vxor tua, nō vxores, non concubinæ tuæ, sicut vitis abundans, idest, multos pariens filios, vt vitis fœcunda multos racemos, in lateribus domus tuæ, idest, intus manens, vt modesta & pudica, & curam domus

domus interioris habens, dum vir de his quæ foris sunt, cogitat. Sanctus Hieronymus vertit, in penetralibus domus, quoniam de lateribus interioribus hoc loco agitur. Sed quamvis hæc, felicitas quædam sit, tamen ut intelligamus, non magnam esse felicitatem, Deus multis, magnisq. amicis suis, etiâ coniugatis, hanc felicitatem non dedit, ut Abrahamo, & Saræ, Isaaco, & Rebecca, Zachariæ, & Elizabethæ: multis etiam inspiravit desiderium, & propositum sanctæ virginitatis, ut creditur de sanctis Prophetis Elia, & Hieremia, & scitur de beata Virgine Maria, S. Ioâne Baptista, S. Ioseph, & alijs propè infinitis, quos certè Deus non priuasset felicitate coniugij, & fecunditatis carnalis, si non esset virginitas donum longè excellentius. Adde quòd sancti viri, qui vel coniuge caruerunt, vel sterilem sortiti sunt, non fuerunt priuati felicitate fecunditatis, sed eam habuerunt alterius generis, & sine comparatione maiorem. Christus in primis, qui caput est omnium Sanctorum, non habuit carnalem uxorem, neque filios carnales, sed habuit tamen sponsam Ecclesiam, & filios spirituales innumerabiles. Sic etiam Abraham vnū habuit filium ex Sara, sed per fidem factus est pater multarum gentium: omnes enim fideles filij Abraham dicuntur ab Apostolo Rom. 4. & quod mirabile est, viri sancti non solum patres, sed etiam matres sunt eorum, quos ad fidem, vel ad pœnitentiam conuertunt: patres enim sunt prædicando verbo aut exemplo, & matres gemendo pro eis, & orando. Idem enim Apostolus patrem se dicit 1. Corint. 4. cum ait, Non ut confundam vos hæc scribo, sed ut filios meos charissimos moneo, nam & si decem millia pedagogorum habeatis in Christo, sed non multos patres, nam per Euangelium ego vos genui. alibi verò se matrem dicit, cum ait ad Galat. 4. Filioli mei, quos iterum parturio, donec formetur Christus in vobis. Quod si placet spiritualibus filijs assignare patrem, & matrem, quamvis ab eodem homine generentur, & pa-

riantur; dicere poterimus, patrem esse amorem Dei, & proximi, matrem esse sapientiam; verè enim amor est, qui filios gignit, sed per sapientiam gignit, dum sapienter loquens, & scripturas explanans persuadet auditoribus fidem, aut pœnitentiam. Sic enim de sapientia scribitur Sapient. 8. Hanc amavi, & exquisivi, à iuuentute mea, & quæsiui sponsam mihi eam assumere, & amator factus sum formæ illius.

Filij tui sicut nouellæ oliuarum IIII. in circuitu mensæ tuæ.

Tertia felicitas hic describitur, educatio videlicet filiorum. Viri enim timentes Deum, & ambulantes in vijs eius, non tantum filios multos, sed etiam bonos, & bene moratos habebunt, quoniam ab infantia illos docebunt timere Deum, & ambulare in vijs eius. Sic igitur ait. Filij tui sicut nouellæ oliuarum, id est, similes erunt arbusculis optimis, quales sunt oleæ, quæ semper virent, & fructum dulcissimum faciunt; non autem similes erunt rubis, aut spinis, aut sterilibus plantis. erunt autem in circuitu mensæ tuæ, ut eos omnes simul videns, & cum eis conuiuens, & conuescens maiorem ex illis delectationem capias. Quæ omnia conueniunt etiam in filios spirituales, quos cum pater Verbo Dei pascit, & proficere videt, mirificè gaudet, & cum Apostolo dicit, Gaudium meum, & corona mea, sic stete in Domino charissimi. Philip. 4.

Ecce sic benedicetur homo, qui V. timet Dominum.

Benedicat tibi Dominus ex Sion, VI. & videas bona Hierusalem omnibus diebus vitæ tuæ.

Et videas filios filiorum tuorum, VII. pacem super Israel.

Quarta est hæc felicitas, quòd videlicet vir timens Deum non solum de bonis proprijs gaudiū habere debeat, sed etiam de communibus. Ideò addit, quòd ita sit à Deo, qui habitat in Sion bene-

benedicendus, ut videat ciuitatē suam Hierusalem abundantem omnibus bonis, toto tempore vitæ suæ; & videat in ea ciuitate filios filiorum similiter beatos, & felices; & denique pacem, quæ omnia bona conseruat, & custodit, stabilem videat super populum Israel. Sed altiore sensu, & magis proprio, atque à Spiritu sancto intento, hic describitur felicitas tanto maior tribus superioribus, quantum distat cælum à terra, & Deus à creaturis. & propterea non eam narrando, sed imprecando Propheta proponit. Ecce, inquit, præter omnia quæ dicta sunt, sic benedicetur homo, qui timet Dominum, nimirum dicetur illi; Benedicat tibi Dominus ex Sion, idest, non solum benedicat tibi Dominus de terra, temporalia bona tribuens, sed etiam benedicat ex monte sancto suo, ex altissimo habitaculo suo, tibi quæ præstet, ut videas bona Hierusalem omnibus diebus vitæ tuæ, idest, videas Deum, in quo sunt omnia bona Hierusalem, omnibus diebus vitæ tuæ, idest, in æternum, & in seculum seculi: nam cum anima sit immortalis, & corpus etiam post breuem somnum mortis temporalis, sit resurrecturum ad vitam immortalem; certè bona quæ hic videmus, non videmus omnibus diebus vitæ nostræ, sed per minimam partem dierum vitæ nostræ, ut verè cum Iacob dicere possimus, dies vitæ nostræ, quibus in terra peregrinamur pauci sunt, & mali; sed bona cælestis Hierusalem verè videbimus omnibus diebus vitæ nostræ, qui sine fine erunt: sicut etiam omnes iniqui videbunt mala Babylonis omnibus diebus æternæ mortis suæ. Neque mirum est, quod non dixerit Propheta, ut possideas bona Hierusalem, sed, ut videas: quoniam vera bona Hierusalem videndo possidentur; siquidem in visione Dei perfecta beatitudo consistit. Similes, inquit Ioannes in prima epistola cap. 3. ei erimus, idest, beatissimi, & felicissimi, & quasi Dei quidam, quoniam videbimus eum sicuti est. Accedet ad gaudium beatorum quod videbunt in patria illa cæle-

sti filios filiorum suorum, idest, non solum illos, quos ipsi per se Deo genuerunt, sed etiam, qui per filios suos spirituales, & per filios filiorum, usque ad mundi consummationem ad Deum adducti fuerint; & de omnibus tanquam de proprijs, & ad se pertinentibus gaudebunt. Denique accedet ad consummationem felicitatis, quod videbunt pacem super Israel, pacem firmam, & stabilem, quæ securissimos reddet omnes habitatores Hierusalem usque in æternum. videbunt enim omnes suos inimicos perfectè subiectos sub scabello pedum Christi, idest, in profundam gehennam detrusos, æternis vinculis alligatos. terra enim scabellum est pedum Dei, iniqui autem omnes sub terram conclusi iacebunt per secula sempiterna.

PSALMVS CXXVIII.

Titulus, & Argumentum.

Canticum Graduum.



IN Psalmis Gradualibus, & initio admonuimus, vicissim Propheta nunc deplorat ærumnas peregrinationis, nunc bona patriæ cælestis laudat, ut tam illæ, quàm ista ad ascendendum, & festinandum hortentur. Quoniam igitur in præcedenti Psalmo multa dixit de bonis Hierusalem; nunc redit ad mala Babylonis, in qua exules sumus & peregrini.

Explicatio Psalmi 128.

SAepe expugnauerunt me à iuventute mea, dicat nunc Israel.

Consolatur se populus Dei in tribulatione positus, quod iam sit assuetus talibus angustijs, & semper Deo adiuvante liberatus fuerit. conueniunt autem hæc verba populo Iudæorum dum in reedificatione templi, & ciuitatis, à vicinis gentibus oppugnaretur; & conueniunt etiam Ecclesiæ Christi, quæ vix vnquam

vnquam ab oppugnatione paganorū,
vel hæreticorum, vel falsorū Christia-
norum respirare potuit. Ait igitur, Sæ-
pe expugnauerūt me à iuuentute mea,
dicat nūc Israel, idest, populus Dei, qui
Israel vocatur, non miretur si ab hosti-
bus oppugnatur, quia nihil noui pati-
tur, sed reuocet ad memoriam præteri-
tas angustias, & dicat, Sæpe expugna-
uerūt me inimici mei iam inde à prima
mea ætate: nam vix nata Ecclesia passa
est in Abele persecutionē Cain; ac de-
inceps sæpissimē similia pertulit. Quod
attinet ad verba, id solum notandum
est, verbum, expugnauerunt, positum
esse, pro, oppugnauerunt: nam vox he-
braica, zarar, significat, angustiare, &
vox græca significat, bellauerunt. &
ex versiculo sequenti manifestē collig-
itur, non præualuisse hostes in popu-
lum Dei, proinde pugnasse, sed nō ex-
pugnasse; bellasse, sed non debellasse:

II. Sæpe expugnauerunt me à iu-
uentute mea, etenim non potue-
runt mihi.

Reddit rationem, cur sæpe hostes re-
petierint prælium, siue pugnam; ac di-
cit, causam esse, quia nunquam præua-
luerunt: nam si semel præualuissent,
& populum Dei penitus extinxissent,
non fuisset opus tot prælijs toties reno-
uatis. Verissimum esse quod hic asseri-
tur, Ecclesiastica historia testatur. Il-
lud, non potuerunt mihi, vel positum
est pro, non potuerunt in me, vel sub-
intelligitur aliquid, vt, non potuerunt
mihi nocere, vel præualere.

III. Supra dorsum meum fabrica-
uerunt peccatores, prolongaue-
runt iniquitatem suam.

Quod proprijs verbis Propheta di-
xerat; id nunc per similitudines, & me-
taphoras repetit, & confirmat. dicit
igitur populus Dei de persecutoribus
suis, Supra dorsum meum fabricaue-
runt peccatores, idest, supra dorsum
meum artē fabrilem exercuerunt vten-
tes dorso meo pro incude, quam fabri
ferrarij assidue percutiunt. In hebræo

Card. Belarm. in Psal.

habetur verbum, charas, quod Septua-
ginta verterunt, fabricare, & sanctus
Hieronymus, arare: sic enim ad ver-
bū reddidit, Supra dorsum meum ara-
nerūt arantes. & verē vtrunque signi-
ficare potest: quamuis enim non ha-
beamus locum in scripturis (quod ego
sciam) vbi charas, significet, fabricare,
habemus tamen Genes. 4. vers. 22. & 3.
Regum 7. vers. 14. vocem chores, ab ea-
dem radice, quod significat fabrū fer-
rarium. ex quo sequitur vt charas si-
gnificet fabrilem artē exercere. Ne-
que dubium esse potest, quin Septua-
ginta Interpretes, homines doctissimi,
ex nomine fabri, deduxerint verbum,
fabricare, quod hoc loco non signifi-
cat, ædificium erigere ex lapidibus, &
lignis (inepta enim similitudo videret-
ur, si quis diceret super dorsum homi-
nis domum, vel ædificium quodlibet fa-
bricari) sed, vt diximus, significat iux-
ta proprietatem vocis hebraicæ, fabri-
care instrumenta ferrea super dorsum,
quasi super incudem; quæ similitudo
significat assiduam & durissimam per-
secutionem: nihil enim crebrius, & for-
tius percuti solet, quàm incudo à fa-
bris. Idem significatur verbis sequen-
tibus, prolongauerunt iniquitatem
suam; prolongatio enim iniquitatis,
est continuatio persecutionis, quam
semper boni patiuntur à malis. San-
ctus Hieronymus vertit, prolongaue-
runt sulcum suum. Sed quamuis vox
hebraica, quæ nunc habetur in hebrai-
co textu, significet sulcum; tamen si
vna litera postponatur, vel altera an-
teponatur, significabit iniquitatem.
& hoc modo sine dubio legerunt Se-
ptuaginta Seniores; & quod litera,
vau, debeat anteponi, perspicuum est
ex eo, quod vbi nunc est, ociosa est, &
superuacanea. Itaq; Septuaginta non
legerunt, lemaauotam, sulcum suum,
sed, lemaauonitam, iniquitatem suam
à voce auon, quod est iniquitas. Sed
licet nos hoc modo concordemus le-
ctionem græcam, & latinam cum he-
braica, & sententiam vulgatæ lectio-
nis, omnino sequendam esse existi-
memus: tamen non negamus lectio-
nem

לפניות
לפניות

E e e nem

nem Sancti Hieronymi habere etiam bonum sensum, si ita exponatur, Supra dorsum meum arauerunt arantes, prolongauerunt sulcum suum, idest, supra dorsum meum iugum grauissimum posuerunt, & me quasi boue abusi arauerunt arantes, & non paruo tempore me iugum ferre compulerunt, sed tempore longissimo. quoniam longissimum sulcum ducere voluerunt.

IIII. Dominus iustus concidet ceruices peccatorum confundantur & conuertantur retrorsum omnes qui oderunt Sion.

Consolatur nunc Propheta populum Dei prædicens non procul abesse vindictam diuinam in impios persecutores iustorum. quasi dicat, bono animo estote iusti, quoniam persecutores quidem vestri iniuste dorsum, siue ceruicem vestram nunc premunt: sed paulo post Dominus iustus iuste ceruices ipsorum non premet, sed concidet, & in frustra comminuet gladio suo; ut nunquam amplius vobis nocere possint: & tunc demum confundentur, qui antea superbe exultabant, & conuertentur retrorsum fugientes, & cadentes omnes illi, qui oderunt, & persequuntur populum Domini. Obserua primo, illud, concidet, in textu græco, & hebraico esse in præterito concidit. Sed tamen sanctus Hilarius, & sanctus Augustinus legunt, & exponunt, concidet; proinde videtur fuisse varia lectio in textu græco, quam illi sequuti sunt. Hebraica verò lingua facile patitur mutationem temporum, ut possimus præteritum accipere pro futuro. Itaque non est facile mutanda lectio nostra latina. Sed siue legamus, concidit, siue concidet, sensus constat. Deus enim iam cōcidit ceruices multorum persecutorum, ut Pharaonis, Nabuchodonosor, Balthazaris, Antiochi, Neronis, Domitiani, Diocletiani, & similium: & in futuro etiam cōcidet ceruicem omnium aliorum, qui similiter persecutores piorum, vel erunt, vel sunt. Obserua secundo, pro verbo, ceruices, in hebræo

esse, laqueos, siue funes; sed verisimile est, Septuaginta non legisse habbot, ut nunc est in hebræo, sed gabbot; quod ceruices significat, siue dorsum. nec minus verisimile est, Dauidem conseruasse eandem similitudinem, & sicut dixerat supra dorsum meum, gabbot, ita postea addidisse, concidet dorsa, gabbot, ut ostendat simili poena puniendos peccatores sed grauiore. Obserua tertio, quod dicitur, Deus concidere ceruices peccatorum, intelligi de peccatoribus superbis, vel obstinatis; nam peccatoribus, qui humiliter confitentur peccata sua, & emendare cupiunt, Deus non concidit ceruices, sed medetur languoribus ipsorum. Obserua quarto, illa verba, confundantur, & conuertantur retrorsum, non esse proprie imprecationem, sed prædictionem, ut sæpe monuimus. Sed si quis velit accipere, ut verba sonant, poterit pie imprecationem exponere, ut nimirum sit imprecatio bonæ confusionis, quæ penitentiam adducit, & conversionis à peccatis ad Deum. sed prior expositio est magis ad literam.

Fiant sicut fœnum tectorum, v. quod priusquam euellatur, exaruit.

De quo non implebit manum suam, qui metit, & sinum suum, qui manipulos colligit. VI.

Alia est imprecatio, quæ similiter prædictionem notat: significat enim breuissimam fore persecutorum felicitatem, & mirabili amplificatione comparat eam fœno, quod est res per se vilis, & fragilis, & sicut dicitur in Evangelio, hodie est, & cras in clibanum mittitur; sed non contentus fœno comparasse, addit, similem esse fœno, quod non in campis, sed in tectis domorum nascitur, idest, herbarum minutissimarum, quæ nascitur super tecta, quæ nullius est pretij, nullique vsui apta: ac propterea nemo illam metit, neque in manipulos redigit, sed arescere, & perire permittit. Sed quamuis hæc amplificatio sit apud nos, qui nihil videmus vilius & fragilius: tamen cum ad iudicium nouissimum venerimus, fortasse hæc

עבת
גבת

גבת גבת

177 hæc non amplificatio, sed extenuatio nobis videbit. quid enim erit tunc cer nere viros quondam potentissimos, & diuissimos, & qui se domos suas Regnis, & Imperijs stabilivisse crediderant, cernere inquam, abiectos proi- ci in locum torius mundi infimum, & qui delicijs & voluptatibus assueti, ne leuissimum quidem incommodum ferre poterant, sempiternis cruciatibus addictos videre, sine ulla consolatione in æternum perseveraturos.

VII. Et non dixerunt qui præteri- bant, Benedictio Domini super vos: benediximus vobis in no- mine Domini.

Quia dixerat, fenum testorum non solere meti, & colligi, addit non futurum etiam, ut messoribus eius prætereuntibus benedicatur, quo modo benedici solet messoribus tritici, vel se- ti, quod in campis nascitur, & crescit, quod pertinet ad maiorem confusio- nem iniquorum, qui feno nascenti in rectis comparati sunt. Dicit igitur, non contigit vobis, neque contingeret, ut qui transeunt per vias benedicant ijs, qui vos metunt, nulli enim vos me- rent, sed qui testa purgant, proijcient vos in ignem, vel in cloacam. Quam- vis autem benedictio prætereuntium propriè ad messores pertineat, tamen redundat etiam in id, quod metitur. precantur enim prætereuntes, ut co- piofa, & matura sit messis. sic igitur be- nedictionis carentia, & privatio re- dundabit in ipsos iniquos quibus in iu- dicio nouissimo nemo benedicet, ne- mo eorum miserebitur, sed ab omni- bus despicientur, & contemnentur, quod ad maximam eorū ignominiam pertinebit. Nemo igitur illis dicet, Be- nedictio Domini super vos, neque di- cet, & Benediximus vobis in nomine Domini, sed contra potius à Chri- sto Iudice, & ab omnibus san- ctis eius dicitur, Ite ma- ledicti in ignem æternum.

PSALMVS CXXIX.

Titulus, & Argumentum.

Canticum Graduum.

Beuus hic Psalmus est, sed plenus saluberrima doctri- na; ut non sine causa in Ec- clesia præter ceteros fre- quenteretur. vnus est ex gra- dualibus, quia deplorat miseriam exi- lij, vnus est etiam ex penitentialibus, quia docet rationem agendi veram pe- nitentiam. pro defunctis quoque reci- tari solet in Ecclesia frequentissimè, quoniam si dicatur in persona animæ in purgatorio detentæ, omnia optimè quadrant, nam & animæ illæ sunt in quodam profundo, & ascendere cu- pisse, & expectant misericordiam Dei per Redemptoris nostri pretium. In summa tria continet, orationem ad Deum, exhortationem ad populum, & prædictionem redemptionis futuræ.

Explicatio Psalmi 129.

DE profundis clamaui ad te I. Domine: Domine exaudi vo- cem meam.

Oraturus Propheta Deum primo po- stulat audientiam, deinde exponit pe- titionem suam. Audientiam postulat in primis duobus versiculis. Incipit au- tem similitudine hominis iacentis in ima valle, vel in profundo putei, qui nisi magna voce clamet, non potest exaudiri ab ijs, qui sunt in altissimo monte. & verè aptissima similitudo est. nam licet Deus sit vbique per essen- tiam, & potentiam, tamen ratione dis- similitudinis homo peccator longissi- me distat à Deo. Deus enim semper est iustus, & beatus, & in altis habitat; homo peccator semper est malus, & miserrimus, & similis Ionæ Propheta, qui eam Deo nolisset obedire, deiectus fuit non solum in profundum maris, sed etiam in profundum ventrem Ce-

Ecc 2 tis

tis & tamen inde clamās exauditus est: oratio enim feruens omnia perfrangit, & penetrat. Dicit autē David, De profundis, nō de profundo, quia verus perfrangens ex duobus profundis clamare debet, ex profundo miserie, tanquam ex valle lacrymarū, siue vt in alio Psalmo dicitur, ex luto fecis, & profundo lacus; & ex profundo cordis, idest, ex intima consideratione, & cognitione propria miserie: qui enim nō cogitat, & nō cognoscit profundū, in quo est, nōn curat inde ascendere, sed contemnit, & sic in maius profundum cadit, iuxta illud, Proverb. 18. Impius cū in profundum venerit, contemnit: qui autem profunda consideratione intelligit, se exulem esse, & peregrinum, & in magno periculo versari, ne forte ad patriam nūquam perueniat, &, quod infinita miserie est, se iam in inferno inferiore, si non præsentiā, certē merito peccatorum suorum iam locum habere cōpisse; non potest non toto corde horrere, & pauere, & magno affectu clamare ad eum, qui solus potest eum ex tam horrendo profundo eripere, & manū ad ascendendum porrigere. Sequitur, Domine exaudi vocē meam, idest, quamuis in profundo sim, & tu in altis habites, tamen quia magna voce clamo, potes me exaudire; ideo peto vt exaudias vocem meam.

II. Fiant aures tuæ intendentēs, in vocem deprecationis meæ.

Non sufficit, vt quis magna voce clamet, vt audiatur, sed requiritur, vt is, ad quem clamatur, attendat. Sæpe enim fit, vt quis, ita animum defixum habeat in alia re, vt nō attendat ad vocem loquentis secum: & tunc frustra sonitus verborū pulsat ad aures eius. Deus autem omnia quidem semper videt, & audit; sed quando nō facit quod petimus, videtur ita se gerere, ac si nō attenderet ad vocem orantis, quasi alia cogitaret; ideo David omnino audiri cupiens, nō contentus magna voce clamasse, rogat etiam vt Deus dignetur attendere, idest, admittere preces, & donare quod petitur,

Si iniquitates obseruaueris Domine, quis sustinebit? III.

Capitata iam audientia, exponit petitionem suam, quæ est, vt deus non iudicio vtatur secum, sed misericordia: nō rigide quærat rationem debitorum, sed misericorditer ea condonet. Sed hanc petitionem nō simpliciter proponit, ne nimis audax videatur, sed illam inuoluit in ratione propter quā Deus moueri potest ad eam concedendam. quæ est mirabilis rethorica, & ab ipso Spiritu sancto hausta. Sic igitur loquitur, Domine si iniquitates hominum obseruare volueris, omnes condemnabis; nō decet autem infinitam bonitatem tuam omnes omnino perdere igitur nō debeo nimis audax videri, si peto, vt peccata mihi condones, & de hoc profundo eripias, in quod me iniquitas sola demersit. Quod attinet ad verba, nomen, iniquitates; significat omnia genera peccatorum, vt sit peruariatio legis, vt dicitur 1. Ioan. 3. & peccatū est iniquitas; alioqui enim nō omnia peccata propriè sunt iniquitas, idest, iniustitia, cū alia sint peccata luxuriæ, alia superbiæ, &c. illud, obseruaueris, in textu originali, & in editione Septuaginta propriè significat, custodire, vt sensus sit, Si iniquitates, quæ sunt debita quædam nostra, in tuo libro rationum, diligenter custodias, vt exigas de illis rationem, nemo nostrum tibi satisfaciens; ideo peto, vt eas de libro tuo deleas, & misericorditer indulgeas, cū soluendo nō sumus. Illud autem, quis sustinebit, nō significat patienter expectare, vt paulo infra, propter legem tuam sustinuite Domine; sed significat, sustinere in iudicio, siue in reddenda ratione nō deficere: quāuis enim in latina editione idem sit verbum in hoc versiculo, & in sequenti, tamen in textu hebraico, & græco sunt verba diuersa. Verè autem si Deus sine misericordia nos iudicare velit, nemo omnino subsistet: nam offensio in Deum est infinita magnitudinis, & nos sine gratia eius nō solum condignè satisfacere nō possumus, sed

sed neque sufficientes sumus ad peccati gravitatem agnoscendam, vel ad dolorem pro admisis concipiendum, vel ad pœnitentiam ipsam inchoandam: præterea nos nō scimus numerum neque gravitatem peccatorum nostrorū, nam delicta quis intelligit? Deus autem scit exactissimē numerum peccatorum, & in libro suo omnia scripta tenet. Tu quidem, inquit Iob, gressus meos dinumerasti: idem etiam scit, & solus cognoscit gravitatem infinitam peccati mortalis. quomodo ergo poterit homo tam ignorans, & tam infirmus reddere rationem tam sapienti calculatori, & tam potenti exactori? Itaque sicut potest homo se in puteum deicere, sed non inde ascendere; ita potest peccare, sed non satisfacere, nisi misericorditer adiuvetur.

IIII. Quia apud te propitiatio est, & propter legem tuam sustinui te Domine.

Vera pœnitentia, quam in hoc Psalmo Pœnitentiali Propheta nos docet, dup potissimum requirit, cognitionem propriæ miseriæ, & cognitionem misericordiæ divinæ: qui enim miseriam propriam ignorat, non quærit medicinam, nec agit pœnitentiam; qui misericordiā Dei nescit, desperat veniam, & pœnitentiam inutilem agit. Igitur Propheta in tribus versiculis præcedentibus ostendit, se planē cognoscere miseriam suam, cum de profundo clamer, & cum dicat, peccata eiusmodi esse, ut si Deus ex solo iudicio agere velit, nemo subsistere possit: nunc ostendit; se nosse etiam misericordiam Dei maximam, & ideo non obstante magnitudine, vel multitudine peccatorū se sperare veniam, & salutem. Sic igitur ait, Quia apud te propitiatio est, & propter legem tuam sustinui te Domine, idest, quamvis nemo subsistere possit, si observare velis iniquitates nostras; ego tamen quia novi te ex natura misericordem esse, & scio apud te inveniri propitiationem, & quia tu legem posuisti tibi, ut cum impœnitentibus severissimē te geras, cum pœniten-

tibus misericorditer, & suaviter, ideo propter hanc legē tuam sustinui te Domine, sperans, & expectans indulgentiam peccatorum. Nota, illud, quia, nō reddere rationem superiorum, sed sequentium, nimirum eius quod dicitur, sustinui te Domine. Nota præterea, illud, apud te propitiatio est, ab Augustino referri ad pretium sanguinis Redemptoris, qui verē est propitiatio pro peccatis totius mundi; tamen hoc loco simplicior intelligentia esse videtur, ut sensus sit, quia tu facile propitiaris pœnitentibus: nam de pretio redemptionis agitur in fine Psalmi, ut paulō post videbimus. Illud autē, propter legem tuam, nō significat legem, quam nobis dedit, (nam secundum illam nos condemnaret, non absolueret) sed legem suam, quam ipse servare solet, iuxta illud, Omnes viæ Domini misericordia, & veritas. & alibi, Misericordiam & iudicium cantabo tibi. Itaque Deus iuxta legē suam, idest, quam sibi ipse præscripsit, primo peccatoribus misericordiam offert, ut pœnitentiam agant, deinde iustitiam, si impœnitētes esse perseuerent. Recte ergo S. Augustinus, dicit, hic agi de lege charitatis, non de lege iustitiæ. Sed mira est in codicibus varietas: nam in hebræo est, ut timearis, vel ut S. Hieronymus reddit, cum terribilis sis; in græco, propter nomen tuū. in latino, propter legem tuam. Quæ tamen varietas faciliē tolli poterit, si verbum hebraicum, tiuare, legatur cū alijs punctis, torah. & sine dubio Septuaginta Interpretes legerunt, torah, idest, legem. neque obstat, quod, torah, in fine habeat literam he, & tiuare, habet literam, aleph, nam illæ sunt literæ permutabiles, & sæpe vna ponitur pro alia. Porro græca exemplaria variant; ut Chrysostomus notavit, & alia habent, propter nomen tuum, alia propter legē tuam, quæ lectio optima est, & eam habet S. Hilarius, S. Hieronymus, S. Augustinus, & S. Gregorius in Commentarijs huius loci. neque difficile fuit in græco textu ponere nomē, pro lege, cū in græco idiomate nomē, & lex iisdem ferē scribantur literis. Itaque lectio

תורה
תורה

Card. Belarm. in Psal.

Ecc 3 latina

latina vulgata editionis omnino conseruanda est, cum à vero textu hebraico, & græco non discordet; & habeatur in Commentarijs Sanctorum Patrum; & sensum optimum faciat. Verbum, *sustinui*, in hebraico, & græco clarius est: significat enim expectare, siue sperare. quod etiam declaratur in verbis sequentibus huius Psalmi.

V. Sustinuit anima mea in verbo eius, sperauit anima mea in Domino.

Hic iam incipit exhortatio ad alios, quos exemplo suo hortatur ad spem in Deo ponendam. Ego, inquit, in profundo miseriarum fui; sed non desperaui de misericordia Dei. siquidem anima mea peccatorum vulneribus faucibus sustinuit, id est, expectauit medelam, in verbo eius, id est, iuxta promissionem eius. Sæpe enim Deus per Moysen in Deuteronomio, & alibi promisit indulgentiam penitentibus. Cum quæsieris, inquit Deuter. 4. Dominum Deum tuum inuenies eum, si tamen toto corde quæsieris, & tota tribulatione animæ tuæ. hinc ipse Dauid in Psalm. 118. dicebat, Memento verbi tui seruo tuo, in quo mihi spem dedisti. Quod autem paulò obscurius dixerat, iterum repetit verbis clarissimis dicens, Sperauit anima mea in Domino; nimirum indulgentiam se accepturam, quam petebat. Multum autem valere debet Dauidis exemplum: fuit enim ipse in profundo miseriarum, siue culpam, siue pœnam respicias; culpa eius grauissima fuit, nam adulterium commisit, cum abundaret vxoribus; occidit militem innocentem, qui sibi fidelissimè seruebat; offendit Deum, à quo acceperat Regnum, & donum prophetiæ, item robur, pulchritudinem, prudentiam, diuitias, &c. Sed etiam in profundo miseriæ fuit, quando persequabatur eum Rex Saul, ut sæpe in periculo mortis fuerit: & tamen quia non desperauit, sed sperauit potius, liberatus est.

VI. A custodia matutina usque ad noctem, speret Israel in Domino.

Quod ego, inquit, facio, totus Israel, id est, omnis populus Dei faciat; speret videlicet in Domino, cum in quocunque profundo fuerit: siue peccatis, siue peccatorum pœnis prematur; in Dei adiutorio confidat. A custodia matutina usque ad noctem, id est, tota die à summo mane, usque ad noctem extremam, ita ut nullo tempore desinat sperare in Domino. Dicitur autem custodia matutina, siue vigilia matutina, tempus auroræ: nam veteres diuidebant noctem in quatuor partes, quarum qualibet tres horas continebat: & dicebantur custodiæ, siue vigiliæ, quia custodes, siue vigilantes ciuitatum, vel castrorum tribus horis vigilando custodiebant ciuitatem siue castra, ac deinde tradebant alteri officium vigilandi, & custodiendi. Custodia igitur matutina est tempus à nona hora noctis usque ad exortum solis. In codice hebraico, & græco bis repetitur custodia matutina: & in hebræo non habetur, usque ad noctem. Ex quo videtur latina vulgata editio partim esse mutila, partim redundans, cum non habeat bis, à custodia matutina, ut habet hebraica veritas; & habeat, usque ad noctem, quod non habet eadem veritas hebraica. Sed si quis diligenter omnia consideret, videbit, lectionem latinæ vulgata editionis cum hebraica veritate planè congruere. Nam Sanctus Hieronymus ex hebræo ita reddidit, A custodia matutina usque ad custodiam matutinam; & vulgatus latinus interpret hoc ipsum significauit, cum posuit, A custodia matutina usque ad noctem. non enim dixit, A custodia matutina usque ad vespeream, quasi per diem tantum, & non per noctem sperare debeamus in Deo, sed usque ad noctem, totam videlicet, quæ terminatur in custodiam matutinam, siue aurorâ, quæ in Euangelijis dicitur, quarta vigilia noctis. Itaque idem est, ac si dixisset, A summo mane, usque ad summam noctem, siue ab initio diei, usque ad finem noctis: & hoc modo acceperunt hanc sententiam, Chrysostomus, & Euthymius, qui scripserunt, admoneri hoc loco

loco fideles, vt tota die, & tota nocte sperent in Domino. Ratio cur tota die, & nocte sperandum sit, duplex est, vna, quia semper in periculis versamur, nec est momentum in quo Dei auxilio non egeamus: altera quia in omni tempore licet sperare in Domino, & semper accepta est conuersio, & penitentia, siue id fiat mane, idest, in adolescentia, siue in meridie, idest, in virilitate, siue ad vesperam, idest, in senectute, & siue fiat de die, idest, tempore prosperitatis, siue de nocte, idest, tempore aduersitatis. Scio textum hebraicum paulò aliter distingui, quàm textum græcum vel latinum: sed quoniam id accidit ex punctis recens à Rabinis additis, non est difficile, remotis punctis, distinctionem eandem in codicibus omnibus inuenire. Fateor quidem græcos codices, qui habent, A custodia matutina vsque ad noctem, à custodia matutina speret Israel in Domino; non omnino concordare cum codice hebraico, & cum latina vulgata editione; sed credibile est, in codice græco aliquid redundare, quod fortè relictum est ex adiunctione alicuius alterius versionis ad versionem Septuaginta Interpretum. Fortasse etiam variæ sunt lectiones editionis græcæ: nam Chrysostomus videtur omnino legisse in codice græco, vt nos legimus in latino.

VII. Quia apud Dominum misericordia, & copiosa apud eum redemptio.

Reddit rationem, cur oporteat semper in Deo confidere, & simul prædicat redemptionem generis humani, quæ futura erat per Iesum Christum Dominum nostrum. Merito sperare possumus in Domino tota die, & nocte, quoniam apud ipsum misericordia est. Sunt quidem extra Deum opera misericordiæ; vnde dictum est, Misericordia Domini plena est terra; & alibi, Misericordia tua vsque ad nubes: est etiam in pijs hominibus participatio quædam misericordiæ; sed ipsa misericordia apud Deum tantummodo reperitur, inque

solo eius sinu requiescit: misericordia enim miseras tollit: quis autem potest miseras tollere, nisi qui miser esse non potest? quis potest defectus omnes curare, nisi qui defectu omni caret, & omnipotens est? Deo soli propriè conuenit, quod idem Propheta dicit, Tu Domine suavis, & mitis, & multæ misericordiæ omnibus inuocantibus te. Itaque rectissimè sancta mater Ecclesia in precibus Deum appellans dicere solet, Omnipotens & misericors Deus. Neque solum sperare debemus in Deum, quoniam apud eum misericordia est; sed etiam quoniam apud eundem copiosa redemptio est: nam misericordia Dei, quæ generi humano misereri decreuerat, vt iustitiæ quoque satisfaceret, inuenit ipsa pretium magnum, sanguinem videlicet Vnigeniti, qui redimeret copiosissimè omnes omnino captiuos; potuit enim homo seipse vendere sub peccato, & à diuina iustitia subijci Diabolo tanquam tortori, cui homo consenserat ad peccatum. Sed non potuit vlllo modo seipse redimere, neque de potestate Diaboli eruere. Ergo quod homo non potuit, misericordia diuina fecit, vt per sanguinem Vnigeniti fieret. Sed hæc redemptio apud Deum erat, cum Psalmus iste scriberetur, idest, in consilio, & decreto Dei, nunc autem misericordia Domini plena est terra, quando quotidie pretium illud in redemptionem captiuorum expenditur. vnde ab Apostolo dicitur, Empti estis pretio magno, glorificate, & portate Deum in corpore vestro 1. Corinth. cap. 6. & clarius à beato Petro, Non corruptibilibus auro, vel argento redempti estis, sed pretioso sanguine quasi Agni immaculati, & incontaminati Christi, 1. Petri cap. 1. Dicitur autem hæc redemptio copiosa, tum quia propitiatio est pro peccatis nostris, & non tantum nostris, sed etiam totius mundi. 1. Ioan. cap. 2. tum quia non solum hoc pretio redimimur à captiuitate, sed etiam euehimur ad participationem hereditatis, & Regni, vt simus hæredes Dei, cohæredes autem Christi, Rom. 8.

Ecc 4 Et

VIII. Et ipse redimet Israel ex omnibus iniquitatibus eius.

Redemptio quæ erat apud Deum, tum planè manifestabitur, cum redimetur Israel, idest, populus Dei, non ut Iudæi eam tales expectant à potestate Regum temporalium, sed ab omnibus iniquitatibus suis. Quod Angelus de Iesu Christo exposuit, cum ad sanctum Ioseph ait, Matthæi 1. Vocabis nomen eius Iesum, ipse enim saluum faciet populum suum à peccatis eorum. Hæc redemptio iam quidè inchoata est, sed perfectissimè complebitur in die nouissimo, cum liberabimur non solum à peccatis, sed etiam à pœnis omnibus peccatorum, & à periculo deinceps peccandi, quod significauit Dauid in Psalmo 102. cum ait, Quantum distat ortus ab occidente, longe fecit à nobis iniquitates nostras. & initio Psalmi, Qui propitiatur omnibus iniquitatibus tuis, qui sanat omnes infirmitates tuas, qui redimit de interitu vitam tuam, qui replet in bonis desiderium tuum, &c. & perspicuè Daniel cap. 9. Ut cõsummetur præuaricatio, & finem accipiat peccatum, & deleatur iniquitas, & adducatur iustitia sempiterna.

PSALMVS CXXX.

Titulus, & Argumentum.

Canticum Graduum.



Antat in hoc Psalmo Dauid humilitatis suæ virtutem, & cantat nō coram tribus, aut quatuor hominibus, sed in theatro orbis terræ; & tamen cū hoc sit vehementer se laudare, non facit contra præceptum illud Prouerb. 20. Laudet te alienus, & non os tuum, extraneus, & non labia tua. Siquidem, ut laudare se turpe est, cū absque necessitate id fit: sic non se laudare, quando necessitas id requirit, stultum est. Itaque beatus Paulus, qui dixerat, Non qui seipsum commen-

dat ille probatus est, sed quem Deus commendat; seipse mirificè commendauit in 2. ad Cor. 12. quia vidit id necessarium esse ad pseudoapostolorum calumnias retundendas. Dauid igitur in hoc Psalmo humilitatis virtutē sibi ipse tribuit, quoniam sæpè accusatus fuerat superbiæ & ambitionis, à quo vitio maximè abhorrebat. 1. Reg. 17. dicit ad eum frater eius, Ego noui superbiam tuam, & nequitia cordis tui. lib. eodem cap. 22. & alibi sæpè Saub queritur de Dauide, quod illi insidiaretur, & 2. Reg. 16. Semei maledicens Dauidi, obiecit ei, quod Regnum Saulis inuaserit. Dauid igitur ad eiusmodi calumnias refellendas Deum vocat in testem summiæ suæ humilitatis, ac modestiæ singularis. Præterea etiam si nulla calumnia præcessisset, poterat humilitatem suam prædicare, non ut virtutes suas iactaret, sed ut ostenderet, se quamuis robore, potestate, sapientia, & opibus omnibus hominibus sui temporis in Palestina excelleret, tamē non in suis viribus fiduciam vnquam posuisse, & idē debere omnes alios ad ipsius exemplum in solo Deo sperare, ut in fine Psalmi dicitur. Est autem hic Psalmus ex gradualibus vnus, quoniam docet in quo humilitas vera consistat, & nulla est via securior ad ascendendum humilitate, dicente Domino, Omnis qui se humiliat exaltabitur.

Explicatio Psalmi 130.

Domine non est exaltatum i. cor meum, neque elati sunt oculi mei.

Securus Propheta, quod vera dicturus esset, Deum ipsum alloquitur, quē nemo fallere potest: dicit autem coram Deo, se vitio superbiæ nunquam fuisse obnoxium, siue cor internum, siue signa oculorum externa considerentur. Multi enim occultè superbi sunt in corde suo, magni se æstimantes; tamen extrinsecus humilitatē simulant: multi etiam non minus elato supercilio despiciunt proximos suos, quā eos corde tumido, atque

atque inflato contemnant. David autem neque cor elatum, neque elatos oculos gerebat; sed erat humilis corde, & eam humilitatem oculis præferbat.

II. Neque ambulavi in magnis, neque in mirabilibus super me.

Dixit de superbia cordis & oculorum: nunc addit de superbia verborum, & operum: aliqui enim iactant se posse facere, vel fecisse, aut esse facturos maiora & mirabiliora, quam re vera possint, & hoc modo ambulant, siue ascendant super se inter loquendum: aliqui etiam re ipsa præsumunt aggredi opera, quæ superant vires ipsorum, & isti ambulant, siue ascendunt supra seipsos opere & factis. David autem stabat in gradu suo, in vera humilitate fundatus, & ideo neque loquendo, neque operando ambulabat super seipsum in magnis & mirabilibus, id est, neque gloriabatur se magna & mirabilia fecisse supra vires suas; neque tentabat facere, quæ sciebat se non posse perficere.

III. Si non humiliter sentiebam, sed exaltaui animam meam.

IV. Sicut ablactatus est super matre sua: ita retributio in anima mea.

Non contentus Propheta, ipsi Deo, qui corda scrutatur dixisse, se ab omni superbia semper abhorruisse: id ipsum confirmat iuramento execratorio, ut tanto maior fides ipsius verbis ab omnibus habeatur. Dicit igitur, Si non humiliter sentiebam de me ipso, sed exaltaui animam meam; vel, ut significantius loquitur textus originalis, Si non composui me ad æqualitatem cum cæteris, sed supra cæteros me extuli. Sicut ablactatus est super matre sua, id est, sicut infans recens ablactatus manet in sinu, vel super genua matris suæ mæstus & plorans, quia priuatus est dulcedine lactis, quæ pro illo tempore summæ deliciæ ipsius erant: ita retributio in anima mea sit, id est, sic anima mea priuetur dulcedine consolationis diuinæ, quæ mea potissimæ, ac penè solæ deliciæ sunt. Quantum sit hoc supplicium, quod sibi Propheta sanctifi-

mus imprecatur, soli illi intelligere possunt, qui eodem spiritu repleti gustauerunt, quàm dulcis sit Deus. Quod enim David nihili faceret opes, & delicias terrenas, & ipsam regiam celsitudinem, ac maiestatem præ amore diuinæ suauitatis; Psalmi ab ipso compositi, tanquam amatoria cantica, manifestè testantur. Quàm magna, inquit, Psalmo 30. multitudo dulcedinis tuæ Domine, quam abscondisti timentibus te? & rursum Psalmo 33. Gustate, & videte, quoniam suavis est Dominus. & Psalmo 26. Tibi dixit cor meum, exquisiuit te facies mea, faciem tuam Domine requiram, ne auertas faciem tuam à me. & Psalmo 76. Renuit consolari anima mea, memor fui Dei, & delectatus sum. & Psalmo 85. Lætifica animam serui tui, quoniam ad te Domine animam meam leuavi, quoniam tu Domine suavis, & mitis. & Psal. 103. Ego verò delectabor in Domino. & Psalmo 62. In velamento alarum tuarum exultabo, adhæsit anima mea post te. Denique in Psalmo 72. Quid mihi est in cælo? & à te quid volui super terram? Deus cordis mei, & pars mea Deus in æternum. & ibid. Mihi autem adhærere Deo bonum est; quasi dicat, quærant alij bona quæcunque, siue in cælo, siue in terra: mihi adhærere Deo, summum est bonum, ipse Deus est cordis mei, ipse pars, hereditas, portio, omne meum bonum, ipso vno contentus sum, & in æternum ero. Cum ergo David humilis, & simplex, quasi infans lactaneus in lacte diuini amoris omne suum bonum haberet, non poterat sibi maius aliquod malum imprecari, quàm ut fieret, sicut infans ante tempus ablactatus, qui consolationem nullam admittit, cum se ab uberibus matris remoueri videt. Quod attinet ad verba, illud, Si exaltaui animam meam, ex hebræo vertit Sanctus Hieronymus, Si filere feci animam meam. Sed Septuaginta non legerunt, domamthi, quod רוממתי est, filere feci, sed romamthi, quod est רוממתי, exaltaui: nam literæ, d, & r, in hebræo simillimæ sunt: neque dubitare debemus, quin libros correctiores habuerint

rint Septuaginta Interpretes, quàm Sanctus Hieronymus habuerit. Sic etiam, ita retributio in anima mea; Sanctus Hieronymus ex hebræo reddit, Ita ablactata ad me anima mea. Sed in hebræo eadem vox ablactatum, & retributionem significat, punctis paululum immutatis: nam, gamul, est ablactatus, gemul, retributio. Igitur Septuaginta, ubi habetur, ablactatus, legerunt, gamul, ubi habetur retributio, legerunt, gemul. Sanctus autem Hieronymus utrobique legit, gamul: sed lectio Septuaginta, cui concordat nostra vulgata editio, est longè melior, tum quia vix intelligi potest quid sit, ita ablactata ad me anima mea: tum quia secundum lectionem Septuaginta habetur in hebræo elegantissima allusio vocis retributionis ad vocem similem, ablactati.

v. **Speret Israel in Domino, ex hoc nunc, & vsque in seculum.**

Ex hac Psalmi conclusione intelligi potest, quò tendat illa humilitatis prædicatio: non enim vir verè humilis propositum habuit se laudandi, sed admonendi populum suum, quàm parum de se præsumere, & quàm multum in Deo confidere debeat. Ait igitur, Speret Israel in Domino, id est, si ego Rex, & Propheta, non me efferre audeo, propter potentiam, & sapientiam, neque de me ipse præsumo, sed omnem spem meam in Deo collocatam habeo; certè par est, ut populus meus Israel, qui etiam populus

Dei est, non se existimet aliquid esse, cum nihil sit, neq; in viribus suis confidat, sed speret in Domino, & non hodie solum, aut cras, sed omni tempore speret.

PSALMVS CXXXI.

Titulus, & Argumentum.

Canticum Graduum.



PSALMVM hunc vel Salomon composuit, cum ædificato templo, intulit arcam Domini in locum ei præparatum, vel certè compositum à Davide, sibiq; datum ad concinendum post templi ædificationem Salomon cecinit: id perspicuum est tum ex fine capitis sexti in 2. lib. Paralipomenon, tum ex tota serie huius Psalmi, ac præcipue ex illis verbis, Propter David seruum tuum non auertas faciem Christi tui. Continet autem ad literam Psalmus hic, primo commemorationem ardentissimi desiderij, quo tenebatur David ædificandi templi: secundo petitionem ad Deum, ut stabiliatur Regnum in domo David, ut sanctificentur ministri Domini, & alia id genus, iuxta promissiones Dei, quas multo ante David acceperat. Numeratur hic Psalmus inter graduales, tum quia cani debebat à populo redeunte à captiuitate, ut excitaretur ad imitandum desiderium Davidis, & diligentiam Salomonis in templo reædificando; tum, ut admoneatur spiritualis peregrinus quanto feruore flagrare debeat in ædificando spirituali templo, tum in corde suo, tum in cœlesti Hierusalem, cum pro templo lapideo in quo arca lignea locum quietis acceptura erat, tam ingenti desiderio arserit cor Davidis, & sumptus propè infinitos fecerit Salomon, & tantos labores susceperint longissimo tempore multa hominum millia. Nam ut legimus in lib. 3. Regum cap. 5. Erant octoginta millia latomorum, & septuaginta millia portantium onera, & tria millia trecenti præfecti operum. Neque tamen superuacanea, aut nimia dicenda sunt, cum ad illius honorem pertineant, cuius magnitudinis non est mensura, vel finis.

Ex-

Explicatio Psalmi 126.

I. **M**emento Domine David, & omnis mansuetudinis eius.

Verba Salomonis hæc sunt, qui Deū orat per merita patris sui David. Memento, inquit, Davidis amici tui, & meritorum eius, inter quæ præcipuū fuit studium mansuetudinis. Illud, memento, non arguit obliuionem in Deo, sed significat, Deum, quando non miseretur filiorū viri iusti, ita se gerere quasi non recordaretur, quid apud se vir ille iustus meruerit. Nihil igitur isto modo loquendi significatur, nisi Deum orari velle per merita hominum iustorum; & propter eadem merita multa concedere, quæ alioqui minimè concessisset: id cognosci potest ex lib. 3. Reg. cap. 11. vbi Deus per Prophetam loquitur ad Hieroboam, ac dicit, se valde irritatum esse peccatis Salomonis, sed tamen conseruaturum illi Regnum omnibus diebus vitæ suæ, propter David seruum suum, qui custodivit mandata & præcepta sua: ex quo loco apparet, orationem huius Psalmi fuisse exauditam. Meminit autem Salomon mansuetudinis Davidis, omis- sis alijs virtutibus, tum quia mansuetudo in Dauide potissimum eluxit, vt patuit ex eo, quod noluit Saulem occidere, cum posset, cum tamen ab eo sine vlla causa quæreretur ad mortem, libro 1. Reg. cap. 24. tum etiam quia mansuetudo mirabiliter placet in oculis Dei, quia indiuidua comes est humilitatis, & charitatis, & quia similem facit hominem Deo, qui suavis, & mitis est, & multæ misericordiæ omnibus inuocantibus eum, Psal. 85. Itaque ante Davidem, Moyses amicus Dei maximus fuit, quia mitissimus erat super omnes homines, Num. 12. & post Davidem Christus Dominus, plenus gratia, & veritate, non aliam virtutem magis in se imitandam esse docuit, cum ait, Discite à me, quia mitis sum, & humilis corde, Matth. 11. Neque repugnat mansuetudini Davidis, vel Moysis, quod vterque

multos homines occiderit; neque mansuetudini Christi, quod eiecerit ex templo euentes & vendentes, mensasque eorum subuerterit: nam mansuetudo non est contraria iustitiæ, imò soror est zeli honoris Dei; & qui facile tolerat iniurias proprias, quod est mansuetudinis, aptior est ad vindicandas iniurias Dei, & proximi, tum quia omnes vident eum non moueri ex affectu proprio, sed ex solo iustitiæ zelo, tum quia oblitus quodammodo sui, totus occupari potest in Dei honore quærendo, & propugnando. S. Hieronymus ex hebræo vertit. Memento Domine David, & omnis afflictionis eius. Sed vox hebraica, hunnotho, quam hebræi humiliari cum, reddere solent, potest cum alijs punctis legi, hanauatho, quod significat, mansuetudinis eius: & sic legerunt Septuaginta Interpretes.

ענותו
ענותו

Sicut iurauit Domino, votum II. vouit Deo Iacob.

Si introiero in tabernaculum III. domus meæ, si ascendero in lectum strati mei.

Si dederò somnum oculis meis IV. is, & palpebris meis dormitationem.

Et requiem temporibus meis, V. donec inueniam locum Domino, tabernaculum Deo Iacob.

Effectū exponit Salomon mansuetudinis, & humilitatis David patris sui: quoniam enim mitis erat, & humilis corde, indignum putabat, vt ipse haberet domum ad habitandum, & lectum ad quiescendum; & arca Dei non haberet sedem stabilem, templum videlicet, in quo honorifice permaneret, sed huc & illuc transferretur: propterea iurauit, & vouit, se nō intraturum domum suam, nec in lectum ascensurum; imò etiam neq; extra lectum dormiturum, aut quietem vllam capturū, donec inueniret locū quietis arcæ Dei. Quando David hoc votum voverit, nō habetur expressè in diuinis literis; sed tamen colligi videtur ex lib. 2. Regum cap. 7.

cap. 7. vbi Dauid dicit ad Nathan Prophetam, se constituisse ædificare templum Domino, eo quod erubesceret ipse habitare in domo cedrina. dum arca Dei maneret in tentorio. Sed eadem nocte iussit Deus per Nathan significari Dauidi, non velle, vt ipse ædificaret templum, sed hanc prouinciam filio suo relinqueret; quod ipsum repetit ipse Dauid in 1. lib. Paralip. cap. 22. & 28. Sed quaestio est, quid propriè Dauid vouerit. Qui hebræos sequuntur, existimant, Dauidem ignorasse, vbi Deus vellet sibi erigi templum, & ideò vouisse se non accepturum vllam quietem, donec sibi à Deo locus templi reuelaretur; ac ne nimis longo tempore cogant Dauidem extra domum sub dio manere; addunt, hoc votum susceptum fuisse à Dauid, quando vidit Angelum percutientem populum, & illo ipso die reuelatum ei fuisse per Gad Prophetam, velle templum sibi ædificari in area Areunæ Iebusæ in monte Moria, 2. Reg. 24. Sed ista sine fundamento dicuntur, & ad fabulas Rabinorum fortasse reijci possunt: non enim de situ templi, sed de ipso templo ædificando sollicitus erat Dauid: neque vouisset quod non erat in sua potestate, quale est, habere Dei reuelationem; sed quod ipse præstare poterat suo sumptu, & labore. Quando igitur dicit, Donec inueniam locum Domino, per locum, non intelligitur situs, sed templum, quod erat futurum locus, idest, habitaculum Dei: quod explicatur per vocem sequentem, tabernaculum Deo Iacob, idest, donec tale templum extruxero, vt in eo dignè possit arca Domini collocari. Verum est quidem situm templi fuisse à Deo demonstratum Dauidi, vt dicitur in 2. Paralipomenon, cap. 3. sicut etiam demonstrata fuerant omnia, quæ ad templum pertinebant, vt dicitur 1. Paralipomenon 28. Omnia, inquit, venerunt scripta manu Domini ad me: sed nulla sit eo loco mentio iuramenti, aut voti; neque verò, si Dauid iurauit, se non ingressurum in domum suam, donec extrueret templum, periculum erat ne nimis diu pernoctaret sub dio;

verba enim illius iuramenti amplificationem continent Scripturæ diuinæ familiarem: propriè autem significant sollicitudinem magnam rei faciendæ. Simile est illud in primo Psalmo, Sed in lege eius meditabitur die ac nocte. & illud Psalmi 33. Benedicam Dominum in omni tempore, semper laus eius in ore meo. & clarius Isaia 61. Super muros tuos constitui custodes, tota die, & tota nocte in perpetuum non tacebunt. & Prouerb. 6. præscribit Salomô talem sollicitudinem ei, qui promittit aliquid proximo suo, qualè hoc loco tribuit Dauidi, dicens, Discurre, festina, suscita amicum tuum, ne dederis somnum oculis tuis, nec dormitent palpebræ tuæ. Simile est illud in testamento nouo, Oportet semper orare, & nunquam deficere, Luc. 18. & cap. 21. Vigilate itaque omni tempore orâtes. Neque enim ista significant, omni hora, & omni momento esse orandum, sed habendam esse orationem in maximis negotijs, & non permittendum, vt ab alijs terrenis occupationibus impediatur. Sic igitur iuramentum illud intelligimus, Si introiero in tabernaculum domus meæ; idest, iuro me non intraturum in domum meam, ita vt obliuiscar domum Deædificandæ: si ascendero in lectum strati mei, idest, iuro me non ascendurum in lectum strati mei, ita vt non cogitem de lecto, idest, de loco templi, vbi propriè arca Domini requiescat: si dederò somnum oculis meis, & palpebris meis dormitationem, idest, iuro me non dormiturum, neque dormiturum, ita vt non vigilem circa templum Domini erigendum: & requiem temporibus meis, idest, iuro, me non compositurum caput meum ad quiescendum, ita vt quiescam à sollicitudine domus Domini præparandæ. Quod iuramentum, & votum, quod in se fuit accuratissimè adimpleuit, vt intelligi potest ex verbis eius, 1. Paralip. 29. Ego, inquit, totis viribus meis præparavi impensas domus Domini Dei mei: aurum ad vasa aurea, argentum in argentea, æs in ænea, ferrum in ferrea, lignum in ligneis; & lapides onichinos, & quasi stibinos,

&

& diuerforum colorum, omnemq; pretiosum lapidem, & marmor parium abundantissimè, & super hæc, quæ obtuli in domum Dei mei, de peculio meo aurum, & argentum do in templū Dei mei, exceptis his, quæ præparauī in ædem sanctam, tria millia talenta auri de auro ophir, & septem nullia talentorum argēti probatissimi ad deaurandos parietes templi. Ac præter has ingentes opes, parauit etiam idem Dauid descriptionem omnium partium templi, atriorum, porticum, cœnaculorum, exedrarum, & similium rerum, ac præterea omnium ornamentorum, ut habetur 1. Paralip. c. 28. Hæc omnia typi fuerunt, ac figuræ veri Davidis Christi, qui, ut templum viuum, & tabernaculum æternū Deo pararet, pernoctans in oratione, verè nō intrabat in domum suam, neque ascendebat in lectum suum, neque dabat oculis somnum, neque temporibus requiē; & non corruptibilibus auro, vel argento, sed pretioso sudore, ac sanguine pretiosissimo parauit sibi gloriosam Ecclesiam non habentem maculam, neq; rugam; & ciuitatem illam ædificauit in cœlis, quam vidit S. Ioannes in Apocalypsi ornata omni lapide pretioso, Apoc. 21. Ex his denique vnusquisque nostrum intelligere debet, quanta vigilantia, sumptu, & labore sit opus, ut in corde nostro templum Domino erigamus.

VI. Ecce audiuiamus eam in Ephrata, inuenimus eam in campis syluz.

Adfert rationem, cur Dauid optauerit templum Domino ædificare; quoniam arca Domini sedem propriam, & stabilem non habebat. Ecce, inquit, audiuiamus eam, arcam videlicet, fuisse in Ephrata, idest, in terra Ephraim, quando videlicet erat in Silo tempore Samuelis, 1. Reg. 4. deinde inuenimus eam in campis syluz, 1. Reg. 6. quando dimissa à Philistæis inuēta est in agro Iosue Bethsamitæ, quem esse locum syluofum perspicuum est ex proxima ciuitate Cariathiarim, quō fuit transportata ex agro Iosue: nam Cariathiarim

dicitur ciuitas syluarum. sed singula verba consideremus, per pronomen, eam, dicimus significari arcā, ut Chrysostomus, Euthymius, & alij docent, tamen significata est implicite in illis verbis, Donec inueniam locum Domino, tabernaculum Deo Iacob: neque enim Dominus, & Deus Iacob eger loco pro se, sed pro arca sua, in qua ipse tanquam in sede sua manere, vel tanquam in scabello pedes habere videbatur, cū inderesponsa daret. Quod autē S. Hieronymus reddit ex hebræo, Audiuiamus eū in Ephrata, inuenimus eum in campis syluz, nos mouere non debet. Nam fieri potest, ut S. Hieronymus incidit in textum corruptum: nunc enim in hebræo habetur eam, nō eum, ut etiam in codice græco, & latinis omnibus; & hoc modo Patres legunt. Per vocabulum, Ephrata, exposuimus terrā Ephraim, in qua erat Silo, vbi lōgo tempore mansit arca: quāuis enim Ephrata in vno, vel in altero loco Scripturæ significet Bethlehem, tamen hoc loco non potest Bethlehem significare, cū in ea non legatur vnquam fuisse arca Domini. & cum minore fundamento alij quidam per, Ephrata, hoc loco intelligi volunt Hierusalem, quōd non longè absit a Bethlehē. Per, campos syluz, non desunt, qui intelligant aream Ornan Iebusæi, quæ erat in monte Sion, quos irridet S. Hilarius, quia nihil simile habeat arca cum sylua. Alij intelligunt Cariathiarim, quæ interpretatur ciuitas syluarum: sed Scriptura non dicit, inuentam fuisse arcam in ciuitate, sed in campis; & verbum, inuenimus, significat casu inuentam, cū esset amissa: cū autē esset in Cariathiarim, non erat quaerenda, vel inuenienda tanquā amissa, cū in ea ciuitate studiosè collocata fuisset. Respicit igitur Scriptura, ut nos diximus, ad illud tempus, quo arca iamdudum à Philistæis capta; inuēta est in agro Iosue Bethsamitæ, quō eam detulerant vaccæ indomitæ, quibus à Philistæis fuerat alligata. Verba illa, audiuiamus, & inuenimus, volunt quidam signi-

gnificare, arcam fuisse in Silo ante tempora Davidis, sed Davidis tempore fuisse in Cariathiarim: ideo enim de prioris mansionis dictum esse audiuius, quia non ipse viderat, sed à maioribus acceperat: de posteriore dictum esse inuenimus, quia tempore suo id acciderat. Sed nos existimamus, non esse verum, Davidis tempore fuisse arcam inuentam in campis sylvarum: fuit enim eo loco inuenta post septem menses à captiuitate sua, ut patet ex lib. 1. Reg. c. 6. quo tempore David nondum natus erat, ut ex collatione temporum manifestè colligitur. Itaque verba illa non dicuntur à Davide, vel à Salomone in persona sua, sed in persona populi, & idcirco dicitur in numero multitudinis, Audiuius eam in Ephrata, inuenimus eam in campis sylvarum, quasi dicat, Audiuius à maioribus nostris arcam aliquando fuisse in Silo, in terra Ephraim, & rursum postea inuenimus, & vidimus eam in campis sylvarum; non enim deerat senes, qui ei rei meminisse potuissent: ex quo refellitur argumentum, quo nonnulli demonstrari putant, hunc Psalmum non fuisse compositum à Salomone, quia videlicet ipse nondum natus erat, quando arca inuenta est in campis sylvarum. Si enim hoc argumentum concluderet, demonstraretur etiam Psalmum non fuisse à Davide compositum: nam neque ipse natus erat, quo tempore arca Dei reperta est in campis sylvarum.

VII. Introibimus in tabernaculum eius, adorabimus in loco, ubi steterunt pedes eius.

Exposito voto, & desiderio patris sui Davidis, reducturus Salomon arcam in templum à se ædificatum, ait, Introibimus in tabernaculum eius, id est, fuit hactenus Dominus quasi hospes in varijs locis, sed nunc habebit stabilem domum, & ideo nos introibimus in tabernaculum eius iam erectum, & constructum in monte Sion; & adorabimus in loco ubi steterunt pedes eius, id est, adorabimus conuersi ad arcam sanctam, quæ est scabellum, ubi steterunt, ac stare solent pedes eius. Sic enim

sanctuarium in interiore parte tabernaculi constructum erat, ut arca esset quasi scabellum pedum Domini, & super arcam esset propitiatorium, quasi sedes Domini, quæ tenebatur à duobus Cherubim. Itaque illud, adorabimus in loco, positum est pro, adorabimus ad locum, vel adorabimus locum, ut in hebræo clarius est, Adorabimus scabellum pedum eius. Adorabāt enim Hebræi arcam, non ut Deum, sed ut scabellum pedum eius. Unde dicitur etiam in Psalmo 98. Adorate scabellum pedum eius, quoniam sanctum est. Est autem hoc loco notandum, verbum adorandi in hebræo, istachauē, propriè significare, incuruare se, & ideo constructum cum datiuo, vel cum accusatiuo addita præpositione, ad, ut incuruate vos arcam, vel ad arcam: & non rectè diceretur, incuruate vos arcam? & hæc est ratio, cur aliquando Interpretes vertant, Adorate ad scabellum, aliquando, adorate scabellum; quia aliquando seruant phrasim hebraicam, aliquando latinam.

Surge Domine in requiem tuam, tu & arca sanctificationis tuæ.

Introducitur Salomon arcam in templum magnificentissimè ædificatum, poetico more eam inuitat ad templum ingrediendum, & inhabitandum. Surge, inquit, Domine de loco, ubi hactenus, quasi hospes habitasti, & ingredi in domum tuā propriam, in qua deinceps requiesces, id est, unde non transibis de loco ad locum, ut usque modo fecisti. Explicat autem se loqui Domino, non ut est in se, sic enim cæli & celorum Deum non capiunt, ut idem Salomon alibi dicit; sed ut peculiari modo in arca testamenti erat, quia ex illa responsa dabat, & ideo addit, Tu & arca sanctificationis tuæ, id est, tu cum throno tuo, & scabello pedum tuorum: quod scabellum est arca sanctificationis tuæ, id est, arca in qua, & per quam tu ab omnibus, qui illam sciunt, sanctificaris, & honoraris. In hebræo habetur, Arca fortitudinis tuæ, &

& hoc modo legitur in 2. Paralip. c. 6. nō solum in textu hebraico, sed etiam in græco, & latino. Videntur igitur Septuaginta Interpretes hoc loco voluisse se nō tam reddere verbū verbo, quā explicare sententiam. Arca enim fortitudinis Dei dicitur, quia per eam ostendit Deus fortitudinem suam in hac re sue 3. cū arca intrasset Iordanē, portantibus eam Sacerdotibus, continuo aquæ Iordanis conuersæ sunt retrorsum. item Iosue 6. cū arca septies circumtatem Hierico circuisset, muri Hierico corruerunt. Item lib. 1. Reg. c. 5. cū arca capta fuisset à Philistæis, & posita in templo idoli Dagon, manes sequenti inuentus est Dagon iacens pronus in terra coram arca; & quocunque circumferretur arca à Philistæis, interficiebat innumerabiles homines, ita ut Philistæi dicerent, Non maneat apud nos arca Dei Israel, quia dura est manus eius super nos, & super Dagon deū nostrum. Denique Bethiāmītæ cū arcam Dei ad se delatam curiosè inspexisset, occisi sunt supra quinquaginta millia ex ipsis, ut habetur lib. 1. Reg. cap. 6. & cū Oza tetigisset arcā Dei, continuo à Deo occisus est, 2. Regum cap. 6. Sed hæc ipsa fortitudo Dei, quæ per arcam demonstrabatur, efficiebat, ut Deus ab omnibus sanctificaretur, timeretur, & honoraretur. Siquidem Bethsanitæ cū interficerentur ob arcam Dei à se visam, dixerunt, Quis poterit stare in conspectu Domini Dei sancti huius? in idem igitur recidit, arca fortitudinis tuæ, ut habetur in hebræo, & arca sanctificationis tuæ, ut habetur in codice græco, & latino.

IX. Sacerdotes tui induantur iustitiam, & sancti tui exultent.

Introducēta iam arca in templum, orat Salomon primo pro Sacerdotibus, secundo pro Rege, id est, pro se: nam ab his dependet salus totius populi. Sacerdotes enim regunt populum in spiritualibus, & Reges in temporalibus. Pro Sacerdotibus duo quædam postulat, ut sint iusti & sancti, quales esse debent, ut rectè fungantur officio suo, &

ut alacriter Deum laudent, quod est proprium eorum munus. Debent enim pro se, & pro toto populo reddere Deo tributum laudis, & gratiarum actionis, pro beneficijs, quæ omni tempore accipimus à Deo, & gratias agendo, ac laudando benefactorem, prouocare benignitatem eius ad continuanda & augenda beneficia. Dicit igitur, Oro Domine, ut per gratiam tuam Sacerdotes tui induantur iustitiam, id est, non solum iusti sint intus in corde, & animo, sed etiam exterius in omni eorum vita, in verbis, & operibus cernatur iustitia, & nihil turpe in eis appareat, qui tibi ministraturi, & populum tuum docturi sunt. Metaphora enim induimenti ad hoc adhibetur, ut intelligamus quemadmodum vestis regis turpitudinem, & ornat hominem, ac distinguit à cæteris: ita debere Sacerdotes per opera iustitiæ id efficere, ut nihil turpe in eis appareat, & per eximiam sanctitatem discernantur à reliquo populo, & non possit dici, Sicut populus sic Sacerdos. Et sancti tui exultent, id est, & iidem Sacerdotes, qui Sancti tui propriè sunt, cū ad ministrandum tibi sanctificati, & dedicati sint, exultent alacriter laudando te, & sic benefungantur munere suo. In hebræo habetur, Et sancti tui laudent te, siue iubilent tibi: ex quo intelligimus, exultationem, quam in nostro textu habemus ex græco, non esse quancunque exultationem, sed exultationem in laudando Deo, & gratias agendo illi, siue dum sacrificant, siue dum psallunt. Et si tanta iustitia, & sanctitas, & alacritas requirebatur in Sacerdotibus illis, qui sacrificabant oves, & boues, & laudabāt Deum pro temporalibus beneficijs; quid quæso requiritur in Sacerdotibus illis, qui sacrificant diuinum agnum, & gratias agunt pro beneficijs sempiternis? vix nobis miseris, qui ministerium altissimum sortiti, tam procul absumus à seruire, quem Salomon in umbraticis Sacerdotibus exigebat.

Propter David seruum tuum, X. non auertas faciem Christi tui.

Orat

Orat nunc pro Rege, idest, pro se Salomon, & vt facilius impetret, adducit merita patris sui Dauidis. Orat autem, vt quandocunque accesserit ad precandum Deum, Deus exaudiat orationem eius. Propter Dauid, inquit, seruum tuum, idest, propter fidele obsequium, quod tibi præstitit pater meus dum in terris vixit; ne auertas faciem Christi tui, idest, nō facias, vt ego, qui loco patris mei vnctus sum in Regem populi tui, cōfusus recedam à te, reiecta videlicet prece mea, & eo modo facias me auertere faciem meā à te. Quod enim auertere faciem orantis, sit eum nō exaudire, sed confusum dimittere, perspicuum est ex lib. 3. Reg. cap. 2. vbi cū mater Salomoni dixisset, Petitionem vnam paruulam ego deprecor à te, ne confundas faciem meam: respondit Salomon, Pete mater mea, neq; enim fas est, vt auertam faciem tuā. Sed quamuis hæc vera sint, tamen videor mihi altiorem sensum in his verbis videre. Omne bonum nostrum in duplici respectu positum est, in respectu pio Dei ad nos, & in respectu nostro pio ad Deū, vt videlicet ille nos patris pietate respiciat, & nos, illum filiorum pietate respiciamus. mutuus enim iste pietatis aspectus fons est, & origo bonorum omnium; sed prior est respectus Dei, & ab illo respectus noster oritur. In hoc (inquit Ioan. in prima Epistola c. 4.) est charitas, non quasi nos dilexerimus Deum, sed quoniam ipse prior dilexit nos. Itaque Deus dum nos diligit, facit etiam nos diligere, & dum nos respicit vt filios; facit, vt eum respiciamus vt patrem: quamuis autem nos peccando liberè auertamus faciem à Deo; tamen si Deus respicere nos voluerit, & misereri; respiciendo, & miserendo faciet, vt peccare non libeat, & vt faciem à Deo non auertamus; vel si auerterimus, iterum conuertamus. Quomodo Luc. 22, quando conuersus Dominus respexit Petrum iam auersum, continuo illum conuertit, ita vt egressus foras amarè fleuerit: atque hoc est, quod Dauid orat in Psalmo 24. Respice in me, & miserere mei; & hoc loco

Salomon, Ne auertas faciem Christi tui, idest, ne finas auerti à te faciem meam, quod faciēs si non auertis à me faciem tuam.

Iurauit Dominus Dauid veri- **XI.**
tatem, & non frustrabitur eum:
de fructu ventris tui ponam super sedem tuam.

Hic iam incipit commemorare promissiones factas à Deo Dauidi patri suo, vt ijs commemoratis facilius impetret quod petit, cū quasi debitum reposcere videatur. Iurauit, inquit, Dominus Dauid veritatem, quasi dicat, iurauit Dauid Domino, se domum illi ædificaturum; & Dominus vicissim iurauit Dauidi, se Regnum in domo eius in sempiternum stabiliturum: Deus enim vinci se liberalitate non patitur, & non solum opera, sed etiam voluntates, & desideria cumulatissimè remuneratur. Iuramentum Dei significat rei immobilitatē, & hoc loco præsertim, vbi dicitur, Iurauit Dauidi veritatem, idest, rem per se veram ex Dei promissione, certiore, & firmiorem reddidit iuramento. Addit postea aliam firmitatem dicens, Et non frustrabitur eum, idest, non faciet irritum iuramentum, quod alias dicere solet, Iurauit Dominus, & nō pœnitebit eum. Quo loco rectè admonet S. Augustinus, pœnitentiam in Deum cadere non posse, sed metaphoricè dici, pœnitere, quando rem aliquā mutat; non pœnitere quando non mutat, sed stabilem & firmā esse decernit. Ponit exemplū ex lib. 1. Reg. c. 15. vbi Dominus dicit, Pœnitet me, q̄ constituerim Saul Regem: & in eodem capite dicit Samuel, Deum nō esse vt hominem, vt pœnitentiā agat. Ergo, inquit Augustinus, cū Deus immutabili suo consilio aliquid mutat, propter ipsam rei, non consilij mutationem, pœnitere dicitur. Neque multum refert, quod in hebræo, & græco legatur, Non frustrabitur eam, idest, veritatem promissam, & in latino textu legamus, Non frustrabitur eum, idest, Dauidem, vt legit etiam Sanctus Hilarius: nam sensus est idem. Pergit Salomon, ac docet, quæ

quæ sit veritas promissa, & iuramento confirmata a Deo, & ait, De fructu ventris tui ponam super sedem tuam, id est, dabo tibi successorem in Regno filium tuum: quæ verba videntur intelligenda ad literam de Christo, non de Salomone, nisi forte de Salomone dicantur, ut typum Christi gerebat. nam de hoc eodem iuramento dñ in Psalmo 88. Semel iuravi in sancto meo, si David mentiar, semē eius in æternum manebit, & thronus eius sicut Sol in conspectu meo, & sicut Luna perfecta in æternum, & testis in cælo fidelis. Itaq. illud, ponam, cum dñ, De fructu ventris tui ponam super sedem tuā; non significat, simpliciter ponam, sed cōstituiam, & firmabo. quæ certē Salomoni non conueniunt. adde, quod B. Petrus Act. 2. dicit de Dauide, Propheta cum esset, & sciret quia iureiurando iurasset illi Deus, de fructu lumbi eius sedere super sedem eius; prouidens loquutus est de Resurrectione Christi, quia neque derelictus est in inferno, neque caro eius vidit corruptionem. Vbi S. Petrus vnā scripturam Psalmi quindecimi exponit ex alia Psalmi cētesimi trigessimiprimi, quē nunc explicamus. Atque hoc est, quod Luc. 1. Angelus dicit ad Virginem, Dabit ei Dñs sedem David patris eius, & regnabit in domo Iacob in æternum.

XII. Si custodierint filij tui testamētum meū, & testimonia mea hæc, quæ docebo eos.

XIII. Et filij eorum vsque in sæculū sedebunt super sedem tuam.

Iuramentum, & promissio sine poenitentia est de vno filio, id est, de Christo, cuius Regni nullus vnquam erit finis: sed de alijs filiis promissio conditionata est, id est, si custodierint testamentum, i. fœdus Dñi de non habendis Dijs alienis; & si custodierint testimonia, id est præcepta Dei, sedebunt super sedem tuam, sin minus, projicientur. Sic. n. expressius dicit ipse David Salomoni, 1. Paralip. 28. Si quæsieris Dñm, inuenies eum: si autem

Bellarm. in Psalm.

dereliqueris eum, projiciet te in æternum. & paulò ante de eodem Salomone dicit Deus, Firmabo Regnum eius vsque in æternum. si perseuerauerit facere præcepta mea, & iudicia, sicut & hodie. & in Psalmo 88. vbi legimus, Si dereliquerint filij eius legem meam, visitabo eos in virga virorum; non addit, misericordiam meā non dispergam ab eis; sed, non dispergā ab eo, id est, a Dauide, quia videlicet thronus David erit firmus iugiter, propter æternum Christi Regnum; etiam si Regnum terrenum Salomonis, & Roboam, & similia deficiat, & destruat. Quod attinet ad verba, in hebræo pro testamento, est, pactum, siue fœdus; sed Septuaginta vertere solent illam vocem hebraicam, berith, per vocem græcam, διαθήκη. quæ testamentum significat, nec solū Septuaginta, sed etiam B. Paulus ad Roma. 9. ad Gal. 4. & alibi testamentum vocat, quod hebræi dicunt fœdus. Verisimile igitur est, vocem illam hebraicam vtrunque significare, vel etiam præcipuè testamentum: maior enim fides habenda est Septuaginta Interpretibus, quā Rabinorum dictionarijs. constat autem ex Sancto Hieronymo in cap. 2. Malachiae, Septuaginta Interpretes semper vertisse, testamentum. Fortasse autem diuina prouidentia voluit, ut in Ecclesia extaret duo ista vocabula, testamenti, & pacti: quoniam re vera pactum Dei cum populo non est simplex pactum, sed habet conditiones testamenti, cum sit pactum de hæreditate danda, & quod non habuit vim, nisi intercedente morte testatoris Christi, ut dicitur Hebr. 9. ad hoc enim significandum Moses asperfit sanguinem cum pactum nomine Dei cum populo sanciuit, Exod. 24. Et præterea testamentum hoc non est simplex testamentum, sed habet rationem pacti, cum requirat conditionem de obseruantia mandatorum, & perseuerantia in fide. Est igitur testamentum simul & pactum. Illud autem, vsque in sæculum, non coniungitur cum, sedebunt super sedem tuam, sed cū verbis præcedentibus, si custodierint filij tui, & filij eorum, ut aperte colligitur ex textu hebraico. Igitur sensus est,

F f i Si

כִּי

Si filij tui, & filij eorum custodierint praeceptum, & praecepta usque in saeculum, id est, si perseverauerint in timore Dei, non deturbabuntur a solio Regni tui, si autem non perseverauerint, Regnum ipsorum ad alios transferetur, ut factum est, & experientia docet.

XIII. Quoniam elegit Dominus Sion, elegit eam in habitationem sibi.

XV. Haec requies mea in saeculum saeculi, hic habitabo, quoniam elegeram.

Possent aliquo modo haec accommodari ad arcem, siue ciuitatem Sion terrenam, ut figura erat Ecclesiae nunc militantis, & postea triumphantis: elegit. n. Deus ciuitatem illam pro tpe, ut esset ciuitas Regia, & Sacerdotalis, ita ut ibi esset thronus regius, & et templum Dñi. Sed tñ quia breui diruenda erat, & euertenda, & Regnum ex ea tollendum, & templum ipsum incendendum; dicendum est haec pertinere ad Ecclesiam, quae est Regnum Christi, & ipsa est Hierusalem, & Sion, de qua dicitur in Psalmo 2. Ego autem constitutus Rex ab eo super Sion montem sanctum eius. & continuantur haec verba cum illis, Iurauit Dñs David veritatem, & non frustrabitur eum, de fructu ventris tui ponam super sedem tuam, id est, iurauit Dauidi, se positurum, & stabiliturum filium eius Christum super sedem eius, quae est Sion, quae ideo dicitur ciuitas David, quia elegit Dominus Sion, id est, Ecclesiam, in habitationem suam perpetuam; & de ea dixit, Haec requies mea in saeculum saeculi, id est, non deferam unquam hanc Ecclesiam, sed in ea perpetuo requiescam, quoniam transferam eam ad perfectam beatitudinem in caelis, & ibi habitabo in ea in sempiternum, quoniam firmissimo, atque aeterno decreto elegeram. Dicitur autem Deus requiescere, ut S. Augustinus notat, quando facit nos requiescere; tunc autem perfecte requiescemus, quando pars Ecclesiae peregrinans in terris perueniet

ad eam partem, quae gloriosa triumphat in caelis.

Viduam eius benedicens bene xvi. dicam, pauperes eius saturabo panibus.

Hic versiculus cum sequentibus promittit ciuitati David, quae est Sion, multa bona, quae utcuque applicari possunt terrenae ciuitati, ut figura erat Ecclesiae; sed ipsi Ecclesiae proprie & perfecte conueniunt. Primum igitur promittit abundantiam rerum temporalium tantam, ut et viduae, quae solent esse maxime destitutae, & alij pauperes satiari possint: benedictio. n. Dei abundantiam in Scripturis significare solet. Sed haec abundantia in sensu altiore significat copiam cibi spiritualis verbi Dei, & Sacramentorum, quibus abundant filij Ecclesiae, illi praesertim, qui sunt spiritus pauperes. Antiqua haereticorum calumnia occurrit hoc loco breuiter refellenda. Ridet. n. Calvinus editionem nostram vulgatam, quod pro, victu substituerit, viduam. Dicit. n. presbyterum aliquem lusciosum existimasse e, & t, esse vnum, d, & sic pro victum, legisse vidum, & quia vidum nihil significat, addidisse, a, & fecisse viduam; & neminem fuisse in Ecclesia nostra, qui hanc corruptionem aduertere potuerit. Sed facile est, calumniam refutare. Latinus. n. Interpres rectissime vertit, quod inuenit in graeco: in graeco autem sine dubio inuenit, וַיִּשְׁבֹּר, quod viduam significat omnium consensu: neque solus noster Interpres in graeco legit, וַיִּשְׁבֹּר, sed etiam Patres, Hilarius, Ambrosius, Augustinus, Chrysostomus, Prosper, Cassiodorus, & alij. Imò S. Hilarius meminit vtriusque lectionis, & contendit, veram lectionem esse, viduam, & sic lectum fuisse antequam Christus nasceretur. Verum quidem est in hebraeo non haberi, viduam, sed venationem, vel victum, neque ullam esse similitudinem literarum, ob quam suspicari quis possit illos scripsisse viduam: siquidem vidua hebraice dicitur, אלמנה; & victus, seu venatio dicitur, ציד, & hanc vocem in omnibus codicibus inuenimus: sed in graeco idiomate αλμνη

mate magna similitudo literarum est inter *vidua*, quod significat viduā, & *vi*, quod significat victum. Igitur necesse est, vel in hebræo mutatum esse textum & Septuaginta legisse longè aliter, quā modo se habet, & hæc sententia S. Hilarij est; vel in græco textu esse corruptionem factam vitio scriptorum, quia vnam literā legerunt pro alia, vt S. Hieronymus putat. Sed in sensu nulla ferè diuersitas est, cum per vtrunque vocabulum significetur, abundantiam ciborum fore in ciuitate Dei. Et quoniam, vt idem Hieronymus dicit, vñs obtinuit, vt legeretur, vidua, non est lectio latina vñlo modo mutada, cum non a luscio Sacerdote, vt Caluinus dicit, sed a veneranda antiquitate eorum habuerit.

XVII. Sacerdotes eius induam salutari, & sancti eius exultatione exultabunt.

Alterum bonum sanctæ ciuitatis erit, quod Sacerdotes eius sanctitate, & iustitia conspicui erunt. Salus. n. animæ iustitia est, sicut morbus animæ iniquitas est: & quia precatus fuerat Salomon, vt Sacerdotes induerentur iustitiam; ideo nunc Deus dicit se id effecturū, vt sacerdotes induantur salutari, id est, salute, quæ est eadem cum iustitia, cum de salute spiritali agatur. Fortasse etiam altiore sensu per, salutare, intelligitur hoc loco Saluator Christus, vt in Canticis Simeonis, Quia viderūt oculi mei salutare tuū; & ab hoc loco Psalmi accepit fortasse B. Paulus modum illum loquēdi ad Ro. 13. Induimini Dominum Iesum Christū, .i. facite vt in vestris moribus conspiciatur sanctitas, & iustitia Christi. Illud aut, & sancti eius exultatione exultabunt; respondet ei quod antea dictum erat, & sancti eius exultent: nam vt eo loco per exultationem intelligebatur laus Dei cū alacritate; ita hic quoq. intelligitur, & vt ibi per Sanctos intelligebantur Sacerdotes, ita & hic. Eadem. n. verba sunt in textu hebraico in vtroq. loco.

Illuc producam cornu David, **XVIII.** paraui lucernam Christo meo.

Tertium bonum, & quidem maximū sanctæ Sion erit, quod ibi oritur Regnū David: nam pro voce, illuc, in hebræo, & græco est, ibi. Accipiendum est igitur, illuc, pro, illic, id est, in Sion. Per, cornu, significatur metaphoricè potestas, & excellētia Regia: vt. n. cornu est durissimū, & eleuatum, ita Regia dignitas est potens, & supereminens. Significatur autē ad literam per, cornu David, Regnū Messiae, quod erat inchoandum in Sion, & inde per totum mundum propagandum. Explicuit hoc Zacharias in suo Cantico Luc. 1. cū ait, Erexerit nobis cornu salutis in domo David pueri sui. & idē prædixerunt oēs Prophetæ. Isaïas c. 9. Super solium David, & super Regnum eius sedebit, vt confirmet, & corroboret illud vsque in æternum. Hieron. c. 23. Ecce dies veniunt, & suscitabo David germē iustū & regnabit Rex, & sapiens erit, & faciet iudicium & iustitiam. Ezechiel c. 1. nō solum prædicit Regnum Christi, sed etiā currum eius triūphalem, qui vehebatur a quatuor animalibus, hoīe, leone, vitulo, & aquila: quæ sunt quatuor Euangelistæ. Dan. c. 2. In diebus Regnorū illorum suscitabit Deus cæli Regnum, qđ in æternum nō dissipabitur. Zacharias c. 9. Exulta satis filia Sion, ecce Rex tuus venit tibi iustus, & Saluator ipse pauper, & ascēdens super asinam, &c. Ex quo manifestē apparet, non posse intelligi versiculum istū Psalmi de Salomone, nec de Regno eius: tunc. n. Salomon regnabat, & florebat: hic autē de futuro dicitur, Illic producam, id est, oriri faciam, & quasi germinare cornu David: quasi apertē prædiceret euersionem Regni temporalis, qđ tunc vigeat, & suscitandum postea in eadem ciuitate Regnum æternum Messiae. Qđ autem sequitur, Paraui lucernā Christo meo; pōt duobus modis intelligi. Primū. n. per lucernam pōt intelligi Messias, & per, Christum, David. Scriptura. n. passim vocat lucernam, filium siue posteros: nā in filiis parentes viuunt, & lucent. vido

Fff 2 lib. 3.

lib. 3. Reg. cap. 11. & 15. & tunc sensus erit. Illic producam cornu Dauid, quia paravi lucernam, id est, filium, succelloremq. eius Messiam Christo meo Dauidi. & erit quasi explicatio eius, quod antea dixerat, De fructu ventris tui ponam super sedem tuam. Vt. n. hoc non intelligerent carnales Iudæi de Salomone, explicatur hoc loco de Messia futuro. Pōt tñ etiam aptissimè intelligi, vt S. August. exponit, de Præcurfore Dñi, & ipso Dño, vt lucerna sit Ioānes, & Christus sit Dñs Iesus. qm̄. n. Messias venturus erat sine opibus, & comitatu regio, non facilè a Iudæis expectantibus Messiam, Regem temporalem, agnosci potuisset, nisi præcessisset Ioannes, qui singulari sua sanctitate, & vitæ austeritate omnium oculos in se conuerteret instar lucernæ lucētis in caliginoso loco. dicit igitur. Illic producam cornu Dauid, id est, Regnū æternum Messia, & iam præparavi lucernam id est Præcurforem, qui erit quasi lucerna, Christo meo, id est, ipsi Messia. atque ad hunc locum videtur Dominus aspexisse, cum ait Ioan. 5. Ipse erat lucerna ardens, & lucens.

XIX. Inimicos eius induam confusione, super ipsum autem effloret sanctificatio mea.

Prædicit, Christum multos habiturū inimicos, vt reuera habuit Iudæos, qui dixerunt, Nolumus hunc regnare super nos Luc. 19. & ad Pilatum, Nō habemus Regem, nisi Cæsarem, Io. 19. Sed prædicit quoq. pœnam inimicorum Christi. Inimicos, inquit, eius induam confusione, id est, implebo ignominia maxima; qđ etiam impletum esse scimus, & oculis nostris videmus. Nam paulò post Christi mortem, venerunt Romani, & ciuitate illorum euerfa, ipsos magna strage affecerunt, & eorum qui supererant, alios vilissimo pretio vendiderunt, alios in publicis ludis bestiis obiecerunt. & ab illo tempore gens Iudæorum ubiq. seruit, ubiq. contemnitur: Sed in die nouissimo, non solum Iudæi, sed etiam oēs pagani, & hæretici, & oēs falsi fratres, qui Chri-

sto in membris eius inimici fuerunt, induentur confusione. Super ipsum autē, id est, super Christum, effloret sanctificatio mea. Illi induentur confusione, Christus induetur gloria: nam sanctificatio, quæ in hoc mundo erat quasi semen in terra absconditum, tūc floret in gloriam, id est, germinabit flores sanctificationis. Nec solum Christus, sed etiā omnia membra eius induentur gloria, quia tunc sanctificatio emittet flores incredibilis pulchritudinis, qñ gratia vertetur in gloriā. In hebræo vox est, nizro, quæ significat diadema eius. sed quamuis Exod. 24. illa vox significet thiamam pontificis, & lib. 4. Reg. cap. 11. accipiatur pro corona regia: tamen potest etiam significare sanctificationem, vt hoc loco verterunt Septuaginta Interpretes. nam venit a verbo, nazar, quod significat, se-

parare, & consecrare, vnde dicuntur, nazarei, quasi sanctificati, & consecrati Deo: & corona pontificia, vel regia dicitur, nezer, quia consecrat quodammodo Pontificem, vel Regem, & a vulgo separatur. Sed in sensu non est, diuersitas, nam gloria sanctificationis rectissime, corona, vel diadema dici pōt. nec multum interest, si dicatur, floret sanctificatio, id est, sanctificatio emittet flores gloriæ; siue, floret sanctificatio, id est, micabit diadema gloriæ. Neque etiam multum refert quod nos legamus, sanctificatio mea, & in hebræo sit sanctificatio, siue diadema eius: nam Septuaginta legerūt, iod, vbi nunc est, vau. & eadem sanctificatio, vel diadema, & Dei est, quia

ab illo datur, & nostra est, quia nobis datur, proinde vtræque lectio veritatem continet; sed nostra præponenda est, cum sit in codicibus græcis, & latinis, quibus Ecclesia semper vsa est.

quàm de suo; quod pertinet ad iucunditatem.

PSALMVS CXXXII.

Titulus, & Argumentum.

Canticum Graduum.



Compositus videtur hic Psalmus, ut a Iudæis cantaretur, quoniam post reditum a captiuitate, & reedificata ciuitate, ac templo, coeperunt simul pacifice habitare, & esse vnus populus remota distinctione, vel schismate, quod erat ante captiuitatem inter Regnum Israel, & Regnum Iuda. Sed conuenit etiam omni multitudini, ubi viget concordia, & communio, quales sunt multitudines seruorum Dei in monasterijs, ubi regularis obseruantia viget. Sed potissimum locum habet hic Psalmus in celesti patria, & cantatur ab ijs, qui finita peregrinatione ad eos perueniunt, ubi omnes sunt consummati in vnum, ut loquitur Dominus Io. 17. & ubi Deus est omnia in omnibus iuxta Apostolum 1. Cor. 15.

Explicatio Psalmi 132.

I. **E**cce quàm bonum, & quàm iucundum habitare fratres in vnum.

Vox est eorum, qui iam experiri, & gustare coeperunt utilitatem, & dulcedinem perfectæ charitatis. Vocat. n. bonum, id quod est utile; & iucundum, id quod est dulce. quamuis. n. aliqua sint bona, quæ non sunt iucunda, ut labor penitentiae; & quædam iucunda, quæ non sunt bona ut voluptas peccati; tamen in concordia & pace fratrum simul habitantium hæc duo coniuncta inveniuntur. Nam virtus vnita est maior, & fortior, & melius, ac facilius conseruatur; quod pertinet ad utilitatem; & ubi per charitatem multi sunt cor vnum, & anima vna, vnusquisque gaudet de bono aliorum non minus

Sicut vnguentum in capite, quod II. descendit in barbam, barbam Aaron.

Quod descendit in oram vestimenti eius: sicut ros Hermon, qui descendit in montem Sion.

Duabus similitudinibus explicat iucunditatem, & utilitatem habitantium in vnum. ac primo iucunditatem comparat vnguento pretioso, quo vngebatur caput summi Pontificis, quod erat odoris suauissimi, ut patet ex c. 3. Exodi. quod quidem vnguentum effusum in caput Pontificis, inde defluebat ad barbam, & a barba in oram vestimenti, id est, in illam partem quæ circumdat collum, quæ immediate subiecta est barbæ. non. n. per, oram, intelligitur extremitas vestis, sed summitas, ut notauit S. Augustinus: & ut sonant vox hebraica, & græca, & ut ratio ipsa demonstrat: non. n. tantum vnguenti effundi solebat in caput, ut vsque ad extremas vestes deflueret. Sed illud hoc loco notandum est, vnguentum non communicari a capite, nisi partibus unitis: nisi. n. barba capiti adhereret, sed abscissa alicubi maneret, sine dubio defluxum vnguenti non participaret, & nisi vestis vnita esset corpori, sed plicata maneret in arca, similiter vnguento non perfunderetur; sic igitur, nisi fratres habitarent in vnum, & inter se glutino charitatis coniuncti essent, dona celestia a capite Christo defluentia non descenderent in barbam, id est, in Prælatos, neque a barba in vestimenta, .i. in reliquum populum. Ait igitur, sicut vnguentum in capite, quod descendit in barbam, id est, iucunditas fratrum habitantium in vnum, & inter se coniunctorum, ac debita proportionem inuicem subiectorum, est sicut vnguentum pretiosum, & fragrantia suauissima, quod in capite effusum descendit in barbam. In barbâ Aaron, id est, non loquor de quocunque vnguento, sed de illo, quod descendit in barbâ Aaronis, tempore consecrationis suæ:

Fff 3 quod

quod et descendit in oram, superiorem videlicet partem vestimenti eius. Deinde comparat utilitatem eorundem fratrum habitantium in vnum, rori, qui descendit in montem. neque. n. montes ex rore iucunditatem ullam percipiunt, sed utilitatem magnam. quoniam pluvia ad montes vel non descendit, vel non haeret, sed ex montibus ad valles continuo descendit: ros autem haeret in montibus, eosque infundit, & germinare facit. nominat autem duos montes, Hermon, & Sion, qui quamvis loco coniuncti non essent, cum mons Hermon esset trans Iordanem ad orientem; & mons Sion citra Iordanem ad occidentem: tamen coniuncti erant quoad similitudinem qualitatum, cum uterque sit verus mons, & vnus maior & altior, videlicet Hermon, alius minor, & humilior, id est, Sion. Ex quo voluit nos Spiritus sanctus admonere, coniunctionem fratrum habitantium in vnum debere esse cordium magis, quam corporum: nam de primis fratribus habitantibus in vnum scriptum est, Erat autem multitudinis credentium cor vnum, & anima vna Act. 4. Dicit igitur, sicut ros Hermon, qui descendit in montem Sion, id est, bonum utilitatis habitantium in vnum est sicut ros Hermon, qui descendit in montem Sion, siue ut est in hebraeo, in montes Sion. Quo autem ros montis Hermon qui longe distat a Sion, descendat in montem Sion, varijs modis exponunt interpretes. Mihi videtur, Prophetam considerasse montem Hermon esse altissimum, & amplissimum, atque in eo magnam esse roris abundantiam: montes autem Sion esse multo humiliores, & aridiores: & ideo more poetico dixisse, ex monte Hermon descendere rorem in montes Sion, quasi communicet mons Hermon rorem, quo abundat, cum montibus Sion, qui eo carent. non quod idem omnino ros, qui est in monte Hermon descendat in montes Sion, sed quod similis ros descendens in montes Sion videatur quodammodo ex monte Hermon descendere. Et aptissime convenit haec similitudo in conuentum fratrum habitantium in vnum: sunt. n. fratres concordantes, quasi tot montes, siue colles Sion in quos descendit ros caelestis a Christo, qui est quasi Hermon altissimus

& rore caelesti plenissimus. vnde dixit Ioannes, Et de plenitudine eius omnes accipimus, Ioan. 1. Non communicat autem Christus nobiscum eam ipsam gratiam, & gloriam numero, quam in se habet; sed aliam similem, & minorem.

Quoniam illic mandavit Dominus I V. benedictionem, & vitam usque in seculum.

Reddit rationem, cur tantis bonis abundet conuentus fratrum concorditer, pacificeque. viuentium, Quoniam, inquit, illic mandavit Dominus benedictionem, id est, illuc misit Dominus benedictionem suam, quae est fons omnium bonorum; Domino. n. benedicere, benefacere est. quoniam igitur Deo gratissima est concordia, & charitas fraterna, ideo replet eam copia bonorum omnium; idque. non ad breue tempus, sed in aeternum; nam ideo cum benedictione misit ad eos vitam usque in saeculum; quae omnia hic in terris habentur in spe, sed in patria habentur in re. Recte igitur initio diximus, hunc Psalmum ab illis proprie cantari, qui ex peregrinatione perueniunt ad patriam. Ibi. n. perfecta est concordia, ibi vnguentum perfectae charitatis continuo defluit a capite Christo in omnia membra, & ros luminis gloriae a monte Hermon in omnes colles Sion. dicitur. n. Hermon, lumen eleuatum; &

Sion, specula. proinde recte ab altissimo lumine descendit participatio eius in eos, qui digni sunt speculari Deum facie ad faciem.

ibi

est benedictio Domini, id est, affluentia omnium aliorum bonorum. ibi denique est vera vita usque in saeculum, quae nunquam deficiet.


PSAL.

exteriorem vbi videntur creaturæ, quæ sunt veluti atria, felicissimi habeatis.

PSALMVS CXXXIII.

Titulus, & Argumentum.

Canticum Graduum.



Hic est Psalmus postremus gradualium, qui eos qui iam feliciter ascenderunt, hortatur, vt vacent perpetuis laudibus. quod est officiū habitantium in domo Domini, iuxta illud Psalmi 83. Beati qui habitant in domo tua Dñe, in sæcula sæculorum laudabunt te. Pertinet tñ suo modo hic Psalmus ad eos, qui post ædificationem templi, in illo habitabant; & ad eos, qui dñ peregrinantur in terra, corde habitare nituntur in cælo, & cum Apostolo dicere possunt, Conuersatio nostra in cælis est, Philipp. 3.

Explicatio Psalmi 103

I. Ecce nunc benedicite Dominum omnes serui Domini.

Ecce, inquit, nunc liberati a tentationibus, & persecutionibus, tps est, vt toti intenti sitis laudibus Dñi, proinde bñdicite Dñm vos oēs serui Dñi, qui non habetis aliud in quo illi iam seruiatis, nisi in persoluendo tributo perpetuæ laudis & gratiarum actionis.

II. Qui statis in domo Domini, in atrijs domus Dei nostri.

Vos, inquam, qui statis in domo Dñi, i. qui permanentem habetis domū, & non amplius tanquam peregrini in tentorijs habitatis. & præterea statis, id est, securi consistitis non timentes casum quo ille, qui in veritate non stetit, Io. 8. Nec solū domū, sed et atria possidetis, ita vt & interiorem domum, vbi Deus videtur, &

In noctibus extollite manus vestras in sancta, & bñdicite Dñm.

Tempus maximè opportunum orādī, & laudādi Deum nox est, qñ quies vbiq. esse solet. Itaq. David Psal. 118. mediano cte surgebat ad cōfitendum Dño; & Isaias cap. 26. dicit, Anima mea desiderauit te in nocte. & Hieremias Thren. 2. hortatur, Confurge lauda in nocte, in principio vigiliaru. Et ipse Dñs noster Lu. 5. pernoctabat in oratione Dei. & Apostolus cum Sila Act. 16. in ipso carcere media nocte orātes laudabant Dñm. Rectè igitur admonet Propheta seruos Dei, vt nocturno potissimum tpe extollentes manus in Sancta, id est, ad Sancta Sæctorum, vbi erat propitiatoriu, & arca Dei, benedicāt Dñm. Moraliter aut significat hic versiculus, seruos Dei debere benedicere Deum, non solū in die prosperitatis, sed et in nocte aduersitatis. Sed in se su præcipuè intento, significatur hoc loco in cælesti patria, sicut semper est dies si de luce, & tenebris agatur, ita semper esse noctem si agatur de labore, & quiete. Intransib. n. in illam requiem dicit spūs, vt requiescant a laboribus suis, qz opera eorum sequuntur illos; & illa est nox de qua dicitur in Psal. 138. Et nox illuminatio mea in delicijs meis. & de qua dicit Dñs Ioā. 3. Venit nox, in qua nemo pōt operari, & proinde solis Dei laudib. vacare oportet. In his igitur quietissimis sed lucidissimis noctibus extollite manus vestras beati serui Dei, & ad sanctuariū verum, vbi Deus ipse residet conuersi, benedicite Dominum.

Benedicat te Dominus ex Sion IV. qui fecit cælum & terram.

Hortatus est Propheta sanctos Dei seruos, vt assiduè Dñm benedicant: nunc viciissim benedictionem illis a Dño precatur, sed vtitur numero singulari, quia videbat eos ita esse glutino veræ charitatis

Fff 4 tis

tis vnitos, vt essent vnum in Dño. Illi igitur vnitati seruorū Dei, dicit, benedicat te Dñs ex Sion, qui fecit cælum & terrā. Quod ad verba attinet, in hebræo codice defunt illa verba, in atrijs domus Dei nostri. Sed verisimile est, in codicibus correctioribus, quos habuerunt Septuaginta Interpretes, illa verba non defuisse. præsertim cum in Psalmo 134. idem versiculus repetatur, & in eo verba illa legantur et in codicibus hebraicis. Illud verò, in noctibus, hebræus codex coniungit cum superioribus, hoc modo, qui statis in domo Dñi in noctibus. & postea incipit aliū versiculū ab illis verbis, Extollite manus vestras, &c. Sed interpunctio Rabinorū modernorū, qualis nunc est in codicibus hebraicis, nō debet præiudicare auctoritati grauissimæ Septuaginta interpretū, qui illud, in noctibus, principium esse versiculi, & cum sequenti bus verbis coniungi debere censuerunt.

PSALMVS CXXXIV.

Titulus, & Argumentum.

Alleluia.



Duo Psalms sequentes eiusdem sunt argumenti; hortantur. n. fideles ad laudes Dei. quod argumentum in titulo demonstrat. & recte subiunguntur Psalmis gradualibus, quā optinē conueniunt ijs, qui ex captiuitate in patriam redierunt, quiq; iam gradus perfectionis Deo iuuante vel ascenderunt, vel in ascensione non modicum profecerunt.

Explicatio Psalmi 134.

- I. **L**audate nomen Domini, laudate serui Dominum.
- II. Qui statis in domo Domini, in atrijs domus Dei nostri.

Hi duo versiculi habentur etiam in initio Psalmi superioris. sed ideo repetuntur, vt continuetur laudatio, quæ ibi fuerat inchoata. Alloquitur igitur Prophetæ seruos Dñi, eosq; hortatur, vt laudēt nomen Dñi, & ipsum Dñm: hic. n. est sensus, vt colligitur ex principio Psalmi ceterisimi duodecimi, Laudate pueri, id est, serui, Dominum, laudate nomen Domini. Qui sint autem serui, quibus indicitur laudatio, explicat dicens, Qui statis in domo Domini, in atrijs domus Dei nostri, id est, qui non estis exules, nō in via positi, non peregrini, quibus oratio magis quàm laudatio necessaria sit, sed iam peruenistis, iam statis in domo Domini, de qua dicitur in alio Psalmo, Beati qui habitant in domo tua Domine, in sæcula sæculorum laudabunt te. Itaq; videtur hic Psalmus præcipuē conuenire ijs, qui ad cœlestem patriam peruenerūt, & domum Dñi non manufactam, sed æternā in cœlo introierunt. Conuenit tñ illis et, qui spe, ac desiderio in ea domo degere incipiunt, & cum Apostolo dicere possunt, Nostra autem conuersatio in cœlis est. Conuenit denique speciali quadam ratione sacerdotibus, quorum officium est stare in domibus Deo sacris, & ipsi Deo immediatē, & propriē ministrare. Sunt quidem omnes fideles serui Dñi, sed illi præter cæteros, qui toti sunt Dñi obsequio addicti, & mancipati. Ex hebræo legunt aliqui, Laudate serui Dñi, quia vox, serui, aude, secundum regulas grammaticæ regit genitiuum. Sed hoc non est perpetuum, & legendum esse, Laudate serui Dñm, perspicuum est, ex versione nō solum Septuaginta, sed etiam S. Hieronymi. Sunt etiam qui stare in domo, tribuunt Sacerdotibus, stare in atrijs, tribuant laicis. Sed probabilius est, pro eodem accipi hoc loco domum Domini, & atria domus Domini; nam vt plurimum secunda pars versiculi repetit, & explicat priorem; vnde sensus est, Qui statis in domo Domini, qui statis, inquam, in atrijs domus Dei nostri.

עבדי

Lau-

III. Laudate Dominum, quia bonus Dominus, psallite nomini eius quoniam suaue.

IV. Quoniam Iacob elegit sibi Dominus, Israel in possessionem sibi.

Hortatus est Propheta populū Dei ad laudandum Dñm: nunc adducit tres rationes, quib. persuadeat, ita esse faciendum; primam, qm̄ Deus dignissimus est oī laude; secundam, quia id nobis bonū & iucundū erit: tertiam, quia tenemur, cum nos præter cæteras gentes Deus maximis beneficijs affecerit. Laudate inquit, Dominum, qm̄ bonus est Dñs. bonum enim laude, malum vituperatione dignum est. Deus aut̄ ita bonus est, ut solus sit absolutē bonus, & omni ex parte bonus, & non aliunde, sed ex se ipso sit bonus, & nihil sit bonum, nisi participatione, & dono eius; denique cætera sunt bona in certa specie, & cum addito, ut bonus homo, bona domus, bona vestis: Deus aut̄ ipsa bonitas, omnem omnino boni rationem continēs. Psallite nomini eius, qm̄ suaue. hæc est secunda ratio, quasi dicat, psallite nomini eius, qm̄ istud psallere, & laudare, non erit vobis opus molestum, & laboriosum, sed dulce, iucundum suaue. Vox hebraica, nahim, significat dulce, & dulcis, & ideo referri pōt tum ad Dñm, tū ad nomen, tum ad psallere. & sensus esse potest, psallite nomini eius, qm̄ suauius est Dñs: item, quoniam suaue est nomen Domini: denique suaue est psallere nomini Domini. Sed vox græca, & latina, quæ sunt generis neutri, non possunt referri ad Dominum, sed, vel ad nomen, vel ad psallere. & hæc postrema acceptio videtur esse magis propria. Cæterum in sententia nulla dissensio est. Ideo enim laudare Deum suaue est, quia Deus suavis est: quō dulces cibos comedere dulce est, quoniam ipsi cibi dulces sunt. Et quidem beatis in cælo psallere Deo suauissimum est, & ideo ne ad momentum quidem cessant à lau-

dibus quoniam dulcedinem Dei in ipso fonte suauitatis sine intermissione degustant. nobis autem nunc dulce est canere Deo, nunc laboriosum, quoniam nō super gustamus, quā suauius sit Dominus; sed tunc solum, cū ex gratia Dei, & præcedente meditatione assurgimus ad cognitionem, & accendimur ad amorem. Quoniam Iacob eligit sibi Dominus, elegit, inquam, Israel in possessionem sibi. hæc est tertia ratio, quæ ducitur à debito, & iure obligationis: cū enim Deus singulari dono gratiæ suæ filios Iacob in populum peculiare sibi delegerit, certē iustum est, ut is populus præter omnes alias gentes Deum laudet. Hic sunt aliqua notanda. Primo, Deum conditorem vniuersitatis omnium gentium prouidentiam gerere, & omnibus dedisse lumen rationis, & legem naturalem scriptam in codicibus; & Angelos custodes tum singulorum hominum, tum etiam Prouinciarum, & Regnorum: sed præter hæc omnia, quæ communia sunt populo Israelitico cum alijs populis: suscepisse Abrahamum, & posteros eius per Isaac, & Iacob descendentes in proprium populum, qui esset quasi eius hæreditas, & portio, & possessio, eisq. dedisse legem scriptam in tabulis, & ceremoniam, quibus coli volebat, & Prophetas, quasi internuncios à quibus de notitia Dei erudirentur. Secundo, hoc fuisse admirabile beneficiū Dei: elegit enim Deus populum illum in possessionem sibi, ut eis beneficeret, eosq. diligenter excoleret, quasi vineam dilectam. addo, fuisse hoc beneficium gratis omnino illi populo collatum, non enim elegit Deus populum illum ob eorum merita, sed quia sibi ita placuit: quod perspicuum est ex prædestinatione æterna, cuius meminit Malachias cap. i. & Apostolos ad Rom. 9. Nam antequam nati essent Iacob, & Esau, & cū nihil boni, vel mali egissent, dictum est, maior seruiet minori; quoniam Iacob dilexi, Esau odio habui. Tertio, hoc idem, & etiam maius beneficiū collatum esse populo Christiano, ex gentibus congregato: nam, ut Apostolus docet Rom. 11. Gentiles erāt quasi olea-

oleasti respectu Iudæorum, qui erant naturales rami oliuæ: sed cum fracti esset multi rami naturales ob incredulitatem, Deus assumpsit oleastros, & inseruit in bonam oliuam, id est, super fundamentum Apostolorum, & Prophetarum super ædificauit gentiles, vocans eos per fidem ad populum suum, & faciens ciues Sæctorum, & domesticos Dei. Nobis igitur conuenit, & ex debito obligationis tenemur, laudare Deum: sed propriissime Iacob, siue Israel electus in possessionem, & cælestis Hierusalém, cætus uidelicet beatorum, cui dicitur, Lauda Hierusalem Dominum, lauda Deum tuum Sion.

V. Quia ego cognoui, quod magnus est Dominus, & Deus noster præ omnibus dijs.

VI. Omnia quæcunque voluit Dominus fecit in cælo, in terra, in mari, & in omnibus abyssis.

Respondet Propheta obiectioni, quæ fieri poterat, cur ipse tanto ardore inuitat populum Dei ad laudes Domini. Quia, inquit, ego cognoui, quod magnus est Dñs: & non solum magnus super oēs homines, sed etiam super oēs Deos; & ideo filere non possum, ideo clamo, ideo canto, & psallo, & ad canendum, & psallendum oēs inuito. Deinde probat utrunque, nimirum Deum esse magnum Dominum: & esse maiorem omnibus Dijs. ac primum, quod sit magnus Dñs, probat ab omnipotentia, quia oia quæcunque voluit, fecit in vniuersa creatura, in cælo, in terra, in mari, & in omnibus abyssis; ubi per mare intelligit mare oceanum, per abyssos intelligit maria mediterranea, quasi diceret, in mari magno, & in alijs aquarum profunditatibus. Ita Chrysostomus. sed possunt et per abyssos intelligi loca subterranea inferiorum, ubi est gehenna; de quibus legimus in Euangelio, rogatum fuisse Dominum à dæmonibus, ne eos mitteret in abyssum. Sic. n. comprehendetur omnia loca, summum cælum, imi infe-

ri, media, terra & mare. Sed placet breuiter conferre nostram infirmitatem cum Dei potentia. Ille fecit omnia, quæ voluit; nihil enim impossibile est illi: nos autem multa volumus facere, & non possumus. Item Deus fecit, quia voluit, id est, libera voluntate fecit, non aliqua necessitate; quia nulla re indiget: nos maxima ex parte operamur, quia indigemus, & nisi cogeret necessitas, ociaremur. Denique Deus in omnibus rebus fecit quæcunque voluit, quia Dominus est rerum omnium: nos ne in nobis quidem facere possumus omnia, quæ volumus, quanto minus in alijs rebus? Aequum igitur est, ut non nos ipsi, sed Deum nostrum assidue laudemus.

Educens nubes ab extremo VII. terræ, fulgura in pluuiam fecit.

Ponit exempla aliquot eorum, quæ Deus facit, quando vult, in aere, in terra & in aquis. Facit quidem Deus mirabilia in Angelis, & in cælis superioribus, & rursum in abyssis subterraneis. Sed quia incognita nobis sunt; ponit exemplum eorum, quæ facit in cælo aereo, in terra, & in aquis, quæ à nobis videntur, quamuis causas ignoremus. Primum igitur ponit exemplum in nubibus, quæ oriuntur ex terra, sed formantur in cælo aereo, & conuersæ in aquas reuertuntur ad terram. Educens, inquit, nubes ab extremo terræ. i. qui educit nubes ab extrema parte terræ. Accommodat se Spiritus sanctus in scripturis sensibus nostris: nos autem videmus ordinariè nubes ascendere vel ab oriente, vel ab occidente, vel à meridie, vel à septentrione, quæ sunt quatuor extrema terræ, sed varia pro varietate regionum. & quauis ista assiduitate viluerint, tñ omnino mirabile est, unde tanta copia vaporum repente existat, ut totum cælum in puncto ferè temporis nubibus quasi velo cooperiat: nisi ideo mirabile esse desinat, quia ab omnipotente fit. Sed mirabilius est, quod sequitur, Fulgura in pluuiam fecit. ubi, in pluuiam, positum est, pro, in pluuiam, quo 2. Corinth. ra-

di-

dicat Apostolus, Nocte, & die in profundum maris sui, pro in profundo maris sui. Sensus autem est, Deus in pluuia fecit fulgura, id est, inter pluiam miscuit fulgura, quæ res est omnino mirabilis: nam fulgura sunt ardentia, arentia, acutissima, & pluuia est res humida, frigida mollis; & tamen nec fulgura absumunt aquam, nec pluuia extinguit fulgura. Ita exponunt antiquissimi Patres, Hilarius, & Chrysostomus, & confirmari potest eorum expositio ex cap. 9. Exodi, Grando, & ignis mista pariter ferebantur. ad quem locum videtur allusisse Propheta David. omitto alias expositiones recentiorum, quæ minus probabiles sunt.

VIII. Qui producit ventos de thesauris suis, qui percussit Primogenita Aegypti ab homine usque ad pecus.

IX. Et misit signa, & prodigia in medio tui Aegypti; in Pharaonem & in omnes seruos eius.

Tertium exemplum magnitudinis Dei sumitur à generatione ventorum venti .n. notissimi sunt, & quotidie sentiuntur à nobis: & tamen nihil est obscurius generatione ipsorum. unde, & Dominus Ioan. 3. ait, Spiritus ubi vult spirat, & vocem eius audis, & nescis unde veniat, aut quò vadat, id est, audis strepitum venti & nescis, unde veniat, aut quò vadat, id est, quo modo oriatur, & quomodo desinat præsertim quoniam repente ventus existit, & paulò post repente cessat. Illud autem, de thesauris suis, metaphoricum est; non enim venti inclusi manent in speluncis, aut abditis locis, ut fabulantur Poetæ, sed ita repente producuntur à Deo, quasi educerentur de thesauris. id est de locis absconditis. Verè autem educuntur de thesauris Dei, id est de potentia Dei secretissima, & ditissima, quæ nunquam exhaustiri potest. Cum hoc tertio exemplo coniungit Propheta quartum de occisione omnium primogenitorum Aegypti tam hominum, quam iumentorum, quæ habetur Exodi 12. coniungit

autem hanc occisionem cum productione ventorum, quia quemadmodum venti, spiritus quidam sunt corporales, qui non videntur ob nimiam subtilitatem, & tamen maximas edunt strages arborum in campis, domorum in ciuitatibus. & nauium in mari: sic spiritus angelici inuisibiles oculis hominum, incredibili celeritate ad nutum Domini interfecerunt omnia primogenita Aegypti, tum hominum, tum iumentorum: neque enim occisio illa poterat tribui pesti, aut morbo naturali, cum eadem nocte perierint omnia, & sola primogenita Aegyptiorum, tum hominum, tum pecorum: & apud hebræos, qui in Aegypto degebant nullus omnino homo, aut bestia perierit. Adiungit denique in summa omnia signa, & prodigia, quæ fecit Deus per Moysen in Aegypto. quæ legi possunt in Exodo cap. 7. 8. 9. 10. 11. & 12.

Qui percussit gentes multas, **X.** & occidit Reges fortes.

Sehon Regem Amorrhæorum, **XL** & Og Regem Basan, & omnia Regna Chanaan.

Et dedit terram eorum hæredi **XII.** tatem, hæreditatem Israel populo suo.

Post mirabilia Dei edita in Aegypto aduersus Pharaonem; addit mirabilia edita in itinere aduersus duos potentissimos Reges, Sehon, & Og, quos populus Dei debellauit magis extraordinario auxilio Dei, quam armis. vide lib. Num. cap. 21. Et denique addit mirabilia, quæ fecit Deus in ipsa terra promissionis aduersus triginta, & unum Reges qui regnabant in illis prouincijs. Vbi multa miracula acciderunt, ac præter alia, ut muri Hiericho ad sonitum tubarum Sacerdotalium corruerint: & sol, & luna steterint ad imperium Iosue, vide librum Iosue cap. 6. 10. & 12. Ipse igitur Deus dedit totam illam terram possidendam, & quasi propriam hæreditatem populo suo Israelitico: quomodo etiam Regnum cælorum per terram promissio.

missionis significatum, vult quidem Deus à fidelibus suis bellando, & laborando capi, sed quia nisi ipse praeueniret, & comitaretur, & subsequeretur gratia sua labores nostros, nihil omnino facere possemus; ideo ipse est, qui nos saluat, ex captiuitate liberat, & hanc reditatem æternam donat.

XIII. Domine nomen tuum in æternum, Domine memoriale tuum in generatione, & generationem.

XIV. Quia iudicabit Dominus populum suum, & in seruis suis deprecabitur.

Concludit Propheta priorem partem suæ probationis, qua demonstrare instituerat magnitudinem Dei: ea enim factis aperte demonstrata, dicit, Domine nomen tuum in æternum, id est, propter hæc tanta mirabilia, nomen tuum, memoria tua, fama tua in æternum vigebit. & id ipsum more suo repetens, Domine, inquit, memoriale tuum, id est, recordatio nominis tui in generatione, & generationem permanebit. Quia iudicabit Dominus populum suum, id est, semper manebit celebris memoria Dei, quoniam Deus semper, ut hactenus fecit, iudicabit populum suum, id est, iusto iudicio vindicabit de persequentibus eum, puniens iniquos hostes eius. Et in seruis suis deprecabitur. i. erga seruos suos exorabilis erit: accipiendum enim est passivè illud, deprecabitur, pro, exorabitur. In cantico Moïsi Deuter. 32. eadem sententia sic vertitur à latino interprete, Iudicabit Dominus populum suum & in seruis suis miserebitur.

XV. Simulachra gentium argentum & aurum, opera manuum hominum.

XVI. Os habent, & non loquentur, oculos habent, & non videbunt.

XVII. Aures habent, & non audiunt, neque non est spiritus in ore ipsorum.

Probat his versiculis David, Deum non

strum magnum esse præ omnibus Dijs; quod erat alterum, quod affirmaverat in quinto versiculo. Quamvis enim non magnum sit Deo maiorem esse Dijs aureis, & argenteis, ut S. Hilarius admonuit; cum longe maior sit Regibus, demonibus, & Angelis: tamen voluit Propheta conferre Deum cum simulachris ut clarius ostenderet infirmitatem Deorum gentilium; tum etiam quoniam licet Dijs gentium essent demonia, ut dicitur in Psal. 95. tamen, multi gentilium hoc non sciebant, sed arbitrabantur ipsa simulachra esse Deos, ut perspicuum est 1. Reg. de statua Dagon. Denique, quia ex his argumentis colligitur etiam infirmitas ipsorum demonum, qui simulachris suis non potuerunt dare sensum, & vitam, quomodo Deus verus simulachro suo, quod est homo, dedit spiritum vitam, sensum, & motum, & quod est excellentius, dedit rationem, & arbitrij libertatem. Rectè igitur David probat, Deum esse magnum præ omnibus Dijs, quia simulachra gentium, siue ipsa siue inhabitatores eorum habeantur pro Dijs, oculos habent, & non vident; aures habent, & non audiunt: os habent, & non loquuntur; manus, & pedes habent, & nec mouere, nec moveri possunt: quia non est spiritus vitam in facie ipsorum. ubi alludit Propheta ad id quod dicitur Gen. 2. de simulachro veri Dei, Inspiravit in faciem eius spiraculum vitam. Cætera, quæ ad hos versiculos pertinet vide in explicatione Psalmi 113.

Similes illis fiant, qui faciunt **XVIII.**
ea, & omnes qui confidunt in eis.

Domus Israel benedicite Domino. **XIX.**
domus Aaron benedicite Domino.

Deus Levi benedicite Domino. **XX.**
no, qui timetis Dominum, benedicite Domino.

Facta collatione Dei veri cum Dijs falsis, confert cultores falsorum Deorum cum veri Dei cultoribus, & illis prædicit per modum imprecationis, similitudinem

dinem Deorum suorum, videlicet illos fore mutos, cæcos, & surdos quo ad vera bona intelligenda, & querenda, & laudanda. cultores autem Dei, inuitat ad benedicendum Dñm, quoniam cultores Dei vident, audiunt, loquuntur, ut imagines viuæ Dei viuentis, & ideo debent exercere linguam ad laudandum Deū, à quo habent sentire, viuere, intelligere. Inuitat autem primum in genere domū Israel. i. populi Dei, deinde per partes, domum Aaron in primis, quia illa erat domus Sacerdotalis; tum domum Leui, vnde erant Leuitæ, qui sacerdotib. ministrabant; denique oēs timentes Deū, i. laicos oēs. Porro quamuis hæc comparatio cultorum Dei ad cultores Idolorum, propriè conueniat Idololatris Paganis respectu Christianorum: tñ cōuenit et ijs, qui sequuntur auaritiā, quæ est Idolorū seruitus, & ijs quorū Deus venter est, & denique illis oibus, qui fatentur se nosse Deum, factis autem negāt; respectu hominum verè piorum, quorum conuersatio in cælis est. Illi enim veluti simulachra Idolorum, non vidēt vera bona, nec vera mala, quamuis oculos habere videātur: neq. audiunt, quid loquatur in illis Deus, quamuis aurib. non careant; denique non loquūtur laudes Dei, quamuis ore, & lingua præditi sint. contra, viri pii, & qui cor habent in cælo, oculos interiores habent, & vident; aures cordis apertas habent, & intelligunt; os, & linguam soluta, & libera habent, ut Deum benedicant in omni tempore, & semper laus eius sit in ore ipsorum. lege Psal. 113.

XXI. Benedictus Dominus ex Sion, qui habitat in Hierusalem.

Concludit orās, ut ex Sion procedat benedictio Domini, qui habitat, tanquā in propria regia sua, in Hierusalem. i. ut oēs ciues Sion, & Hierusalem non cessent benedicere Dño, qui Rex magnus est, & in ipsa Hierusalem sedem Regni sui collocauit. quæ conueniunt Ecclesiæ Christianæ militanti, sed multo magis triumphanti, quæ oī labore vacua,

& ab omni molestia libera vnicum habet negocium, vacare, & videre quoniā Dominus ipse est Deus.

PSALMV S CXXXV.

Titulus, & Argumentum

Alleluia.



Salmus iste idem habet argumentum, quod Psalmus superior. Inuitat enim populum Dei ad laudem misericordiæ Dei. & in singulis versiculis repetit,

Quoniā in æternum misericordia eius; ut ostendat, oīa opera Dei, siue ad creationem, siue ad providentiam, siue ad redemptionē pertineant, ex misericordia Dei profecta esse. Deus. n. qui nulla re indiget, & rerum omnium absolutus Dominus est, nihil facit ex necessitate, nihil ex debito: sed omnia ex misericordia, quia placuit illi bonitatem suā effundere, & communicare. In hebræo non habetur, Alleluia, in principio huius Psalmi, sed solum in fine superioris. Cæterum Septuaginta Interpretes initio Psalmi posuerunt, Alleluia, vel quia inuenerunt in suis hebraicis codicibus in principio huius Psalmi, & nō in fine superioris: vel, quod credibilis est, inuenerunt in utroque loco, ut habetur in fine Psalmi 104, & in principio Psal. 105, qui idem habet initium cum 135. videlicet, Confitemini Domino, qm̄ bonus quoniam in sæculum misericordia eius; & postea negligentia scriptorum excidit ex hebraico codice in principio huius Psalmi, Allel. Ut ut se res habeat, aptissimè ponitur initio huius Psalmi, titulus, Alleluia.

Explicatio Psalmi 135

Confitemini Dño, quoniam bonus, quoniam in æternū misericordia eius.

Con-

- II. Confitemini Deo deorū, quoniam in æternum misericordia eius.
- III. Confitemini Domino domino rum, quoniam in æternum misericordia eius.

III. In primis tribus versiculis laudatur Deus Trinitas ab his, quæ in se habet: in sequentibus autem laudatur ab operibus suis. In primo versiculo habetur nomen quatuor litterarum, quod soli Deo vero proprium est, & nunquam communicatur cum rebus creatis: significat autem hoc nomen, ipsum esse, ut Exo. 3 ipse Deus explicuit, cum ait, Ego sum, qui sum. Et quoniam esse, & bonum conuertuntur, & omne quod est, bonum est: & quod summe est, summum bonum est: ideo hic adiungitur bonum absolute ei qui absolute est. Confitemini, inquit, Domino, id est, confitemini confessionem laudis ei qui est, quoniam absolute bonus est: nec solum in se bonus est, sed etiam in æternum misericordia eius est: nam ipse qui est summum bonum, nullum habet admixtum malum, nullam miseriam, & ideo solus potest mala, & miseras aliorum tollere, & re ipsa semper tollit, & tollet in æternum. magna miseria est nihil esse; Deus igitur dum conseruat esse rerum quarundam in æternum, in æternum erga eas misericors est. & dum beatos facit sanctos Angelos, & homines in æternum, misericordiam æternam illis exhibet, non tollendo miseriam infelicitatis, quæ sit, sed quæ esset, nisi beatitudinē æternam illis donaret. Porro hæc prima confessio tribui potest personæ Patris, quoniam Pater fons est essendi, & communicat ipsum suum esse Filio per generationē, & Spiritui sancto per spirationem, sibi filiosque communem. Secunda confessio potest tribui personæ filij, nam dicitur Filius Deus Deorum, quoniam Dij creati dicuntur Angeli, & homines, quia sunt filij Dei, iuxta illud Psalmi. 81. Ego dixi Dij estis, & filij excelsi omnes. Filius autē Dei vnigenitus est Deus Deorum, quia filius est Dei naturalis, cæteri

adoptati, ille natus est Deus de Deo, isti sunt Dij facti, ac per hoc tanto inferiores Deo filio, quanto res creata inferior est Creatore. Et quamuis aliquo modo dicantur Dij respectu inferiorum. tamen respectu filij vnigeniti non sunt Dij, sed creaturæ. Ergo confitemini confessionem laudis Deo Deorum, id est, filio Dei vnigenito, cuius participatione dicuntur Dij, filij Dei adoptiui. Quoniam in æternum misericordia eius, id est, quoniam ipse cum Patre in æternum miseras tollit à rebus creatis. Tertia confessio tribui potest Spiritui sancto. dominium enim fundatur in natura liberi arbitrij. illi sunt Domini, qui faciunt, quod volunt; illi serui, qui aliorum voluntati subiiciuntur. Princeps autem libertatis Spiritus sanctus est, de quo dicitur, Vbi spiritus Domini, ibi libertas 2. Cor. 3. & Spiritus vbi vult spirat Ioann. 3. & Hæc omnia operatur vnus, atque idem spiritus diuidens singulis prout vult. Ait igitur Dauid, Confitemini Domino Dominorum, id est, laudate Spiritum sanctum, Amorem increati, & omnipotentem, cui omnia seruiunt, quoniam in æternum misericordia eius. Notat hoc loco S. Io. Chrysostomus, in Psalmo superiore dictum esse, Deum magnum præ omnibus. Dij, sed in hoc Psalmo multum accessisse ad laudes Dei, quod appellatus sit Deus Deorum, & Dominus Dominorum, ut non solum cæteri Dij minores sint Deo nostro, sed eius sint creaturæ, atque mancipia.

IV. Qui facit mirabilia magna solus, quoniam in æternum misericordia eius.

Ad hunc versiculum, ut ad cæteros omnes sequentes subintelligendum est, Confitemini Domino. Incipit igitur laudare Deum ab operibus magnis, & mirabilibus, quæ solus ipse facere potuit, qualia sunt opera creationis. nam in cæteris usus est Deus opera Angelorum, vel aliarum creaturarum: In his autem operibus laudatur præcipue misericordia, quia, ut supra diximus, nihil fecit Deus

Deus ex necessitate, quasi egeret creaturis, sed ex misericordia sua magna, & ineffabili.

V. Qui fecit cœlos in intellectu, quoniam in æternum misericordia eius.

Primum opus Dei fuit cœlum, ut notum est ex cap. 1. Gen. Fecit autē Deus cœlum, siue cœlos in intellectu, id est, in sapientia sua, siue per sapientiā suam. Fecit autem, quoniam in æternum misericordia eius, id est, quia placuit ei, cœlos ex nihilo educere, & simul parare æternam domum Angelis, & hominib. Fecit igitur cœlos per sapientiam, & bonitatem suam, intelligendo, & volēdo, quæ sunt quasi duæ manus eius. Itaque non laborauit, non fatigatus est, non eguit in ora temporis, non instrumentis vacuis, non materia circa quam operaretur, non adiutoribus ministris.

VI. Qui firmavit terram super aquas, quoniam in æternum misericordia eius.

Alterum opus principale fuit terra. Fecit enim in principio Deus cœlum, & terram. Cœlum enim factus est, ut esset palatium immortalium ciuium, terra ut esset mensio mortalium. Aer, & aqua sunt elementa intermedia, quæ in vsum hominum deferuiunt. Porro dicitur terra stabilita super aquas, non quod aqua sit infra terram in imo loco mundi; sed quod superficies terræ magna ex parte sit altior superficie aquæ, ut possint in superficie terræ homines, & cætera animalia vivere. Quod enim terra sit in imo loco mundi scribit idem David in Psalmo 103. Qui fundasti terram super stabilitatem suam, non inclinabitur in sæculum sæculi. Itaq. terra intra cavitates suas ita continet aquas, ut ex vna parte aquæ super terram quiescant, & tamen ex altera parte terra supereminet aquis. In hebræo pro, firmavit, est, exaudivit, ut sensus sit, terram, quæ initio

erat cooperta vndique aquis, & erat minus extensa, quàm aquas; Deus congregando aquas in cavitates terræ, extendit super aquas, id est, fecit, ut latius pateret, quàm aqua. Vterque sensus est verus, & iuxta vtrunque sensum in hoc facto triplex cernitur misericordia Dei: vna respectu terræ, quam eduxit ex nihilo; altera respectu aquæ, cui sedem stabilem preparauit; tertia respectu hominum, quibus dedit terram aquis discoopertam, & tamen aquis irrigatam ut possent in ea degere, eam colere, & frugiferam reddere.

Qui fecit luminaria magna, VII. quoniam in æternum misericordia eius.

Solem in potestatem diei, quoniam in æternum misericordia eius. VIII.

Lunam, & stellas in potestatem noctis, quoniam &c. IX.

Tertium opus magnum, & mirabile fuit fabricatio Solis, Lunæ, & Stellarū, quæ ad cœlum, & terram pertinent: siquidem cœlum mirificè exornāt, & terræ mirificè profunt. dicuntur autem omnia luminaria magna, quia re vera maiora sunt, quàm ut à nobis eorum magnitudo mente comprehendi possit, cum stellæ firmamenti, quæ nobis ob longinquitatem perexiguæ videntur, totum orbem terræ molis magnitudine superēt: dicitur autem sol factus in potestatem diei, & luna cū stellis cæteris in potestatem noctis; quia lucendo, & illuminando terram, præsumt operibus nostris tum diurnis, tum nocturnis, ut dicitur cap. 1. Geneseos duo sola dicuntur luminaria magna, sol, & luna, quia ista dō maius lumen in terras effundunt, quàm omnes aliæ stellæ simul: tñ hoc loco videtur David, non solem tantum & lunam, sed omnes stellas appellare luminaria magna, quia in se talia sunt, & si Astronomis credimus, longè maiores sunt stellæ firmamenti, quàm luna sit.

Qui

- X. Qui percussit Aegyptum cum Primogenitis eorum, quoniam in æternum misericordia eius
- XI. Qui eduxit Israel de medio eorum, quoniam &c.
- XII. In manu potenti & brachio excelso, quoniam &c.
- XIII. Qui diuisit more rubrū in diuisiones. quoniam &c.
- XIV. Qui eduxit Israel per medium eius, quoniam &c.
- XV. Et excussit Pharaonem, & virtutem eius in mari rubro, quoniam in æternum &c.
- XVI. Qui traduxit populum suum per desertum, quoniam &c.
- XVII. Qui percussit Reges magnos, quoniam &c.
- XVIII. Et occidit Reges fortes, quoniam &c.
- XIX. Schon Regē Amorrhæorum, quoniam &c.
- XX. Et Og Regem Basan, qm̃ &c.
- XXI. Et dedit terram eorum hæreditatem, quoniam &c.
- XXII. Hæreditatem Israel seruo suo, quoniam &c.

In his versiculis laudatur Deus ab opere prouidentiae. & sunt omnia perspicua tū ex libro Exodi, tum ex Psalmo superiore. Illud quæri posset, cur dicantur opera misericordiae, percussio Aegypti, occisio primogenitorum, interfectio Regum, & cætera quæ videntur ad iustitiam potius, quàm ad misericordiam pertinere. Respondetur, opera illa fuisse respectu impiorum percussorum, & occisorum, opera iustitiae; sed respectu populi Dei fuisse opera misericordiae; & quia liberatio populi erat præcipuè à Deo intenta, ideo illa omnia tribuuntur simpliciter misericordiae. Quandam etiam impijs misericordiam fecit Deus, cum eos cito de hoc mundo

tollit, ne diutius viuendo grauius peccent, & grauiorem iram sibi ipsi thesaurizent in die iræ, & iusti iudicij Dei. Circa verba horum versiculorum pauca notanda sunt. Vers. 12. In manu potenti, & brachio excelso; metaphora est significans Deum grauius puniisse Aegyptū plagis multis, vt cogeretur dimittere liberum Dei populum, quomodo si vir bellator robusta manu, & brachio fortissimo vteretur ad eiusmodi opera. Vers. 13. illud, in diuisiones, fabulantur hebræi significare duodecim diuisiones maris rubri factas fuisse, vt vnaquæque tsibus per suam diuisionem transfret. Sed fabula sine fundamento est: nam Exodi 14. dicitur Deum immisisse ventum validum, qui tota nocte flaret, & siccaret partem quandam maris, ita, vt à dextera, & à sinistra essent aquæ stantes instar murorum, & in medio esset terra arida, per quam transiit populus Dei. Itaque, in diuisiones, significat diuisionem maris, in duas partes. Vers. 15. illud, & virtutē eius, significat, & exercitum eius. id enim sonat vox hebraica, & aperte dicitur, Exo. 15. Currus Pharaonis, & exercitum eius proiecit in mare.

Quia in humilitate nostra me XXII. mor fuit nostri, quoniam in æternum misericordia eius.

Et redemit nos ab inimicis XXIV. nostris, quoniam in æternum misericordia eius.

Hæc referri possunt ad liberationem Iudæorum à seruitute Pharaonis, Philistinorum, & Nabuchodonosoris; item ad liberationem Ecclesiae à persecutionibus Tyrannorum, & hæreticorum: denique maximè propriè ad liberationē Electorum à captiuitate Diaboli, & omnibus periculis huius sæculi. Illud, quia, non refertur ad versiculos immediatè præcedentes; sed ad illa verba, quæ in singulis versib⁹ subintelliguntur, nimirum, Confitemini Dño, vt sensus sit, Laudate Deum, quia in humilitate

no-

PSAL.
nostra, id est, in afflictione, & tribulatione, &
humiliatione nostra memor fuit nostri, &c.

CXXXV.

833

XXV. Qui dat escā omni carni, quoniam in æternum misericordia eius.

Hunc versiculum adiunxit Propheeta pro ijs, qui non patiuntur persecutio-
nes; ne putarent, sibi nec esse confiteri
Domino. Dicit igitur, Confitemini Do-
mino omnes omnino, quia ipse est, qui
nutrit, & conseruat omnem creaturam
viventem ac præcipue omnes homines.
Id quod facit, quoniam in æternum mi-
sericordia eius. In hebræo est, Qui dat
panem omni carni: sed panis accipitur
pro omni cibo apud hæbreos.

XXVI. Confitemini Deo cæli, quoniam in æternum misericordia eius.

XXVII. Confitemini Domino Domi-
norum, quoniam in æternum mi-
sericordia eius.

Concludit repetendo duos ultimos
versiculos ex primo ternario; nam per
Deum cæli intelligit, Deum Deorum, vt
notat S. Augustinus: Dicitur enim Deus
cæli, tum quia ipse solus verus Deus cæ-
lum fecit, iuxta illud Psalmi 95. Di-
gentium demonia, Dominus autem cælos
fecit: tum qui residens in summo cælo
tanquam in proprio throno, hoc ipso
demonstrat, se Deum Deorum esse. Ulti-
mus versiculus non habetur in hebræo
nec in græco, nec apud Hilariū, & Chry-
sostomum, sed habetur apud Augusti-
num, & Hieronymum in commentario:
& apud Chrysostomum habetur repeti-
tio primi versiculi loco tertij. Ad extre-
mum huius explicationis reddenda est
causa, cur à S. Augustino dissentire co-
ætus sim in expositione verborum illo-
rum, Qm̄ in æternū misericordia eius.
Existimat S. Augustinus, hæc verba non
esse referenda ad singula opera Dei, quæ
narrantur in toto Psalmo, sed solum ad
prima illa verba Confitemini Domino:
& vult hunc esse sensum totius Psalmi,
Bellarm. in Psalm.

Confitemini Domino, qui est bonus, qui
est Deus Deorum, qui est Dñs Domino-
rum, qui fecit mirabilia, qui fecit cælos
in intellectu, qui firmavit terram super
aquas, &c. qm̄ in æternum misericordia
eius est in peccatores, quos redimit à
seruitute peccati, &c. Ratio est, quoniā
opera quæ narrantur, vt effectio mirabi-
lium, formatio cæli, & terræ, & similia,
non sunt opera misericordiæ, sed boni-
tatis, & benignitatis Dei. At nos sequu-
ti sumus Hilarium, & Chrysostomum,
qui verba illa, Quoniam in æternum
misericordia eius, accommodant ad sin-
gula opera, quæ in singulis versiculis
narrantur alioqui enim frustra repe-
rentur in singulis versiculis, si ad opera
illa non pertinerent. Accedit, qđ vox
misericordia, in diuinis literis, & hebrai-
ce, *chesed*, non restringitur ad misERICOR-
diam, quæ tollit miseriam propriè di-
ctam, sed extenditur ad bonitatem, &
benignitatem. Adde vltimo, quod non
est difficile in singulis operib. Dei inue-
nire veram misericordiā, vt nos ostendi-
mus: & comprobatur ex verbis illis, Vni-
uersa via Dñi misericordia, & veritas.

PSALMVS CXXXVI.

Titulus, & Argumentum.

Psalmus David Hieremia.



Ic titulus non habetur in
hebræo, & à Theodoro
confictus dicitur ab aliquo
audaculo. Sed exrat in li-
bris græcis, & latinis, ne-
que ratio Theodoret conuincit, titulu
esse confictum, quia Hieremias non fue-
rit vnquam in Babylone. titulus enim
non significat, Hieremiam in Babylone
fuisse, sed Psalmum compositum fuisse
à Davide præuidente, & prædicante ca-
ptiuitatem Babylonicam, quam postea
Iudæis imminente Hieremias prædica-
uit, & præsentē deplorauit, & finē eius
post Septuaginta annos futurū denun-
tiauit.

G g g

tiauit.

tiauit. Fieri quidem potest, vt hunc titulum Dauid non addiderit presenti Psalmo, sed postea additus fuerit vel à Septuaginta Interpretibus, vel ab aliquo alio; tñ non ideo reiiciendus est, quasi falsam historiam contineret. Argumentum Psalmi continet lamentationem captiuorum, & desiderium patriæ, ac prædictionem seuerissimæ animadversionis in Babylonios, & Idumæos: quæ à Dauide scripta sunt, non tam vt simplicem historiam futurâ narraret, quâ, vt admoneret Hebræos, vt quando in Babylonem ducerentur captiui, non afficerentur rebus Babylonis, sed assidue ad patriam suspirarent. Et quoniam Propheta spiritualis erat, & nouerat, Babylonicam captiuitatem figuram esse captiuitatis humani generis, & terrenam Hierusalem figurâ esse cœlestis patriæ; simul admonet omnes electos, quomodo se gerere debeant in exilio, & captiuitate. Et sine dubio ad hunc præcipuè finem Ecclesia cantica ista spiritualia frequentat, vt ex his intelligere possint homines, an sint ciues Babylonis, an Hierusalem, id est, an sint cum electis in cœlesti patria regnaturi, an cū reprobis, & hoc Mundo damnandi.

Explicatio Psalmi 136

I. **S** Vper flumina Babylonis illic sedimus, & fleuimus, cum recordaremur Sion.

Verba sunt captiuorum, qui ab Hierusalem in Babylonem abducti fuerant: qui quidē, vt Chrysostomus docet, non in ipsa ciuitate primaria habitabant; sed in agris ad varia opera vilia deputati degebant, & ad ripas fluminum, quibus ea prouincia abundat, aliquādo sessi sedebant, & ex recordatione, & desiderio patriæ flebant. Dicuntur autem flumina Babylonis, non quod omnia per ipsam ciuitatem labantur (solus. n. Eufrates per Babylonem fluit) sed quæ ad ditionem Babylonis pertinerent; nisi placeat per Babylonem, totam prouinciam hoc loco significari: quo-

modo Samaria ciuitas est, quæ toti etiâ regioni nomen dedit. Sed spiritualiter verba sunt electorum Dei, qui corpore captiui tenentur in mundo, quamuis corde à mundo separati, ciues se nouerint cœlestis Hierusalem: isti enim sancti peregrini super flumina consistunt, non in fluminibus demersi voluuntur; & præcipitantur ad mare. Flumina Babylonis sunt bona temporalia huius mundi, quibus qui affixi sunt per desiderium, vt auari, ambitiosi, voluptarii, magno sonitu contentionum, & litium alliduntur ad saxa, & cum ipsis aquis voluuntur in præceps, donec ad abyssum magni maris æternum puniendi præcipitentur. Hæc igitur est prima conditio ciuium supernæ patriæ, & primum signum, vnde quisque intelligat, ad quem populum pertineat: qui enim supereminent rebus temporalibus, & corde in cœlum defixo, non abripiuntur desiderio rerum terrenarum; hi sunt qui non ab Babyloniam, sed ad Hierusalem pertinent. Deinde iidem ciues Sanctorum, sedent ad ripas fluminum, id est, in humili loco se ponunt, non erigunt se ad excelsa, non ambiunt dignitates, non superbè sapiunt: & si forte contingat eos eleuari ad regimen Babylonis, at verè contigit Danieli, & nō paucis sanctis Christianis Regibus; isti in alto positi non alta sapiunt, neque existimant exaltationem suam, esse honorem; sed onus, sub quo gemant, non in quo gloriantur; ac semper quod ad se attinet, discumbunt in nouissimo loco, si verè spiritum illius habent, qui mitis fuit, & humilis corde. Tertio, non solum in humili sedent, sed gemunt, ac plorant, non iacturam temporalium rerum, sed captiuitatem suam, dum recordantur dulcissimæ patriæ, quæ est in sancto monte Sion. qui enim obliuiscuntur patriæ, exaltant cum filiis Babylonis: qui autem desiderant, & ex desiderio recordantur patriam; etiam tunc cum abundant rebus temporalibus, non in eis lætantur, sed gemunt ex desiderio patriæ. neque vllum manifestius signum habere possumus, vnde cognoscamus, vtrum ciues Babylonis, an Hierusalem.

Ierusalem simus, quàm si attentè confideremus, quid nos delectet, quid ve nobis cordi sit. Vbi enim thesaurus noster est, ibi & cor nostrum erit, Luc. 12.

II. In salicib. in medio eius suspendimus organa nostra.

Captiui Hebræi organa lætitiæ, citharas videlicet, ut est in hebræo, suspendebant in salicibus in medio Babylonis id est, palam, & publicè Babylonijis videntibus abiciebant à se instrumenta lætitiæ, ut ostenderent, sibi fletum magis cordi esse, quàm cantum. Quod ipsi imitantur viri Dei, qui intelligentes captiuitatem, & exilium suum, dicunt cū eodem Propheta, Renuit consolari anima mea: memor sui Dei, & delectatus sum. quamuis enim non delectet ciues Ierusalem cantare, & lætari Cum Babylonijis, & de bonis Babylonis; tamē cantant in cordibus suis Domino, & gaudent in spe futuræ beatitudinis. Illud, in salicibus in medio eius, id est, Babylonis, significat in salicibus, quæ sunt ad ripas fluminum, quæ per mediani regionem Babylonicam fluunt. Suspendere autem citharas in salicibus fluminum Babylonis, nihil est aliud, nisi relinquere instrumenta lætitiæ hominibus huius sæculi, qui tanquam arbores infructuosæ irrigantur assidue aquis Babylonis, & fructum nullum ferunt: ipsi pulsent citharas, ipsi cantent in hoc sæculo quib. manet in alio luctus sempiternus.

III. Quia illic interrogauerunt nos, qui captiuos duxerunt nos, verba cantionum.

IV. Et qui abduxerunt nos: hymnum cantate nobis de canticis Sion.

Non solum ob mœstitiam suspendebant citharas suas in ramis arborum captiui Iudæi, sed etiam ne obsequeretur Babylonijis audire, & irridere cupientibus sacros hymnos, quos in celebra-

tibus Domini cantare soliti erant. Vbi notat S. Ioannes Chrysostomus, ex tribulatione illa Iudæos factos esse meliores, id est, magis religiosos, & magis timentes Deum. antea siquidem ridebant Prophetas, imò & occidebant: nunc autem captiui in terra aliena, non audent hymnos sacros gentilium irrisioni exponere. Aiunt igitur, Quoniam illic interrogauerunt nos, qui captiuos duxerunt nos, verba cantionum, id est, suspendimus organa nostra, & nolimus illis uti, ne sacra cantica irrisioni gentilium exponeremus: quia ij, qui nos captiuos duxerunt, illic in sua regione interrogauerunt nos verba cantionum, id est, de verbis cantionum, & dixerunt, qui abduxerunt nos, hymnum cantate nobis de canticis Sion. Per verba cantionum, intelliguntur cantica, id est, verba ad cantum accommodata: quasi dicant, Interrogauerunt nos de canticis nostris, cur videlicet non caneremus, ut in patria nostra faciebamus. Posset etiam illud, interrogauerunt, verti, rogauerunt ut sensus sit, Rogauerunt nos verba cantionum, id est, petierunt, ut caneremus. Illud autem, Et qui abduxerunt nos, quod in hebræo est tholalenu, aliqui vertunt מוללנו spoliauerunt nos, volentes, n, positum esse more Caldaico pro, w, alij, affligerunt nos, quasi eiulare fecerunt, a verbo, ialal: sed non video cur non possit ללנו verti, Extulerunt nos, quod est idem, cum, asportauerunt nos, vel abduxerunt nos, ut Septuaginta verterunt; nam, thalal, est eleuare, extollere, suspēdere. Extollere autem, non solum significat, tollere in altum, sed etiam tollere ex vno loco, & asportare in alium, & hoc modo acceperunt hanc vocem Septuaginta Interpretes. Illud, hymnum cantate, in hebræo est, lætitiā cantate: sed sensus est idem: nam hymnus est carmen lætum, proinde lætitiā hoc loco accipienda est pro cantico lætitiæ. Denique parum refert, quod pro illo, de canticis Sion, sit in singulari de cantico Sion; accipitur enim numerus singularis pro numero multitudinis.

Ggg • Quo.

V. Quomodo cantabimus canticū
Domini in terra aliena?

Hæc est responsio captiuorum ad petitionem illam, Cantate nobis de canticis Sion. Aliqui existimant, legendum esse, in terra alieni, id est, in terra Dei alieni: atque ideo noluisse Iudæos cantare, ne honorem Dei veri tribuerent falsis Dijs. Sed quamuis secundum regulas grammaticæ illa vox, in terra, regat post se genitium: tñ Septuaginta Interpretes, & ipse etiam S. Hieronymus verterunt, in terra aliena: quia vel sciebant regulas grammaticæ non esse infallibiles, vel acceperunt illud, in terra alieni, pro, in terra alieni populi, quod est idem cum, in terra aliena. Sensus igitur est, respondisse Iudæos ob mœrorem captiuitatis, nō se potuisse cantare cantica læta, ut in patria sua solebant. Quamuis. n. ut supra diximus, ideo cantare nolebant, ne sacri hymni ab infidelibus riderentur: tñ non hoc responderunt, ne Dñs suos offēderent; sed quod iustæ causæ speciem habere poterat. Spiritualiter, viri iusti, ciues supernæ Hierusalem, scientes lætitiā propriam esse patriæ, gemitum exilij, & captiuitatis, dicūt, Quo possumus lætis canticis operam dare, inter tot pericula & tentationes? risum reputavi errorem, & gaudio dixi, cur frustra deciperis? Sed illi quoque cantant canticū Dñi in terra aliena, qui sacros hymnos, & psalmos ita decantant, ut carnalem aurium voluptatem solum, aut præcipuè quærant: quiq. audientium carnales aures delectare varijs vocum inflexionibus satagunt. cantica. n. sacra instituta sunt ad mentem erigendam in Deum, & spiritum potius, quàm corpus recreandum. Contra autem nonnulli sunt, qui canticum Babyloniz in domum Dei, & sanctam Sion inducūt, illi videlicet, qui verba sacra modulis prophanis ita vestiunt, ut qui audiunt, non tam verba considerent, quàm prophanam modulationem attendant.

Si oblitus fuero tui Hierusalē, VL
obliuioni detur dextera mea.

Adhæreat lingua mea faucibus VII.
meis, si non meminero tui.

Si non proposuero Hierusalem VIII.
in principio lætitiæ meæ.

Qui dixerant, Quomodo cantabimus canticum Domini in terra aliena; nunc una voce, quasi vnus homo, totus populus introducit iurans, & firmiter statuens, se nunquam obliuioni mandaturū patriam: & quia signum obliuionis fuisset, pulsare citharam, & capere canticū Domini in terra aliena, ideo imprecatur sibi per iuramentum execratorium, ut manus qua pulsari solet cithara, exarescat, & lingua, quæ cantui deferuit, adhæreat immobilis faucibus, si ynquam obliuiscetur patriam, & in signum obliuionis pulsare citharam, vel canere canticum Domini in terra aliena decreuerit. Si oblitus, inquit, fuero tui Hierusalem, quod fiet si pulsare incipiam citharam in terra aliena. Obliuioni detur dextera mea, id est, pereat dextera mea, areseat, non sit vlli vsui: quorum enim obliuiscimur ea non amplius curamus, neq. conseruamus. S. Hilarius, & S. Augustinus legunt actiue, Obliuiscatur me dextera mea; & sic putant recentiores verendam esse vocem hebraicam, תשכח: sed vox hebraica rectissime accipitur etiam passiuè, vnde Sanctus Hieronymus ex hebræo vertit, In obliuione sit dextera mea: & sanctus Hilarius testatur vocem græcam passiuè accipiendam, & dum reprehendit lectionem sui codicis, laudat lectionem nostram, quæ respondet græcæ, & hebraicæ voci. Adhæreat lingua mea faucibus meis, ut moueri nequeat, si non meminero tui Hierusalem, id est, si cantando in terra aliena demonstrabo, me tui non amplius meminisse. Imò etiam obliuioni detur dextera mea, & adhæreat lingua mea faucibus meis, si non solum obliuiscar, & non meminero tui Hierusalem; sed etiam nisi proposuero te in principio lætitiæ meæ, id est, nisi

אעלה nisi initium, & summa latitiae meae fuerit ciuitas sancta Hierusalem. In hebræo pro verbo, proposuero, est, ahale, quod significat, ascendere faciam, siue extolam: pro nomine, in principio, est alrosc, ad caput, quod, & initium, & summam significat. Itaque sensus est, Nisi extulero Hierusalem super omnes iucunditates meas, ut ipsa mihi prima, & summa latitiae sit. Hæc verò propria qualitas est ciuium patrie cœlestis, & certa nota electorum Dei, si neq. in prosperis, neque in aduersis obliuiscantur patrie supernae; & si optent carere manu, & lingua, si gloriæ Dei, atque æternæ salutis deseruire non debeant; & si nulla in re seriò lætari nouerint, nisi in desiderio, & spe cœlestis illius domus non manificet, ubi est gaudium Domini, de quo dicitur in Euangelio, Intra in gaudium Domini tui, Matth. 25.

- IX.** Memor esto Domine filiorum Edom, in die Hierusalem
X. Qui dicunt, Exinanite, exinanite usque ad fundamentum in ea
XI. Filia Babylonis misera, beatus qui retribuet tibi retributionem tuam, quam retribuisti nobis.
XII. Beatus qui tenebit, & allidet paruulos tuos ad petram.

Prædicit Dauid in fine Psalmi perditionem Idumæorum, & Babiloniorum, qui persecuti sunt filios Israel; Babylonij enim sub Rege Nabuchodonosor euerterunt Hierusalem, & transtulerunt Hebræos captiuos in Babyloniam, ut notum est ex lib. 4. Regum, & lib. 2. Paralipom. in fine. Idumæi autem, qui descendebant ab Esau fratre Iacob, qui & Edom dictus est, hortati sunt Babylonios, ut euerterent Hierosolymam, & populum captiuum abduceret. Id aperte narrat Abdias Propheta, & multo ante id futurum prædixit Dauid hoc loco. Incipit igitur Dauid ab Idumæis, vel quia ipsi incitauerunt Babylonios ad-

uersus Israelitas, vel, ut à minoribus ad maiora procedat: multo .n. minus nocuerunt Hebræis Idumæi, quàm Babylonij. Memor, inquit, esto Domine filiorum Edom, in die Hierusalem, id est, memor esto filiorum Edom, quid videlicet egerint in die Hierusalem, id est, qñ Hierusalem affligebatur, & euertebatur à Babylonijs. Quid autem egerint, explicat, in sequenti versiculo. Qui dicunt, .i. qui dicebat Babilonijs, Exinanite, euacuate, effodite usque ad fundamentum, in ea, .i. euertite eam à fundamentis. Illud, memor esto, intelligitur ad puniendum. Deus enim dicitur non recordari, quando non punit, & recordari, quando punit, Ezech. 18. Iniquitatum eius non recordabor amplius. & Tob. 3. Ne reminiscaris delicta mea, vel parentum meorum. Transiit deinde ad Babyloniam, & per modum imprecationis prædicit eius ruinam. Filia, inquit, Babylonis misera, id est, ciuitas Babylon, quæ ego miseram esse præuideo, licet nunc tibi felicissima videaris: Beatus qui retribuet tibi retributionem, quam retribuisti nobis, id est, Rex Medorum, & Persarum beatus erit, quia prosperabitur aduersus te, & retribuet tibi mala, quæ tribuisti nobis. Quod factum esse testatur Daniel cap. 5. & Isaias cap. 13. prædixit, quod hoc loco Dauid etiam prædicit, tanta crudelitate scituros Medos, & Persas in Babylonios, ut etià infantes eorum ad parietes allisuri sint, & sine ulla miseratione interfecturi. Illud, paruulos tuos, in hebræo, & græco & in multis latinis libris manuscriptis legitur, paruulos tuos; neque est incredibile in nostram editionem impressorū vitio irreplisse, suos, pro, tuos, proinde rectè correctus est hic locus Apostolica auctoritate. Sensus autem est idem si illud, suos accipiat non ut reciproci secundum proprietatem lingue latinæ, sed iuxta phrasim græcam, & hebraicam accipiat pro, eius, ut significantur paruuli Babylonis. Spiritualiter hæc omnia dupliciter intelligi possunt. Primo allegoricè, ut per Idumæos intelligantur Iudæi, per Babylonios Pagani: verè enim Pagani sunt,

G g g 3 qui


qui præcipue conabantur Ecclesiam Christianam à fundamētis diruere, sed Iudæis exhortantibus, incitantibus, & gaudentibus. Nam ipsum etiam Christum Iudæis accusantibus, Pagani crucifixerunt. Iacobum occidit, & Petrum vinculis alligauit Herodes, quia videbat id placere Iudæis. Apostolum Paulum Iudæi apud Romanos reum mortis facere conati sunt. Alias etiam Iudæi concitauerunt animos gentilium aduersus Christianos, teste sancto Luca Act. 14. sed memor fuit Deus, vt utroque puniret. Nam Iudæorum urbem primariam evertit, regnum destruxit, & ipsos per totum orbem terrarum dispersit. Paganorum quoque, qui toto ferè orbe imperabant, potentiam, & Regna ita sustulit, vt iam paucissimi restant Pagani Reges. Et quoniam Idololatria, & potètia Paganorum nō armis, & violentia, sed prædicatione verbi Dei superata est; ideo dicit Propheta, Beatus qui retribuet tibi, &c. nam Pagani infelicitè persequiebantur Christianos, sed felicem persecutionē à Christianis passi sunt. Vtilissimū enim illis fuit, vt Idololatria extincta ipsi morentur peccato, & iustitiæ viuere inciperent: quod præcipue paruulis eorum cōtigit, id est, ijs, qui minus radicati erant in errorib. & vitijs Paganorum. Scimus. n. maximā multitudinem puerorum, & puellarum aliorumq. simplicium hominum facillimè conuersam ad Christum, & ad martirium vsq. decertasse pro Christi gloria aduersus paternam Idololatriam: quod significatur illis verbis, Beatus qui tenebit, & allidet paruulos tuos, siue paruulos eius, ad petram, id est, qui admovebit paruulos Babyloniz ad petram Christum, vt feliciter allisi moriantur homini veteri, & resurgant in hominem nouum. Secundo possunt hæc intelligi moraliter, vt per Idumæos intelligentur carnales homines, vt Augustinus exponit, per Bapylonios, intelligentur Demones; quod est magis cōforme principio Psalmi: Bapylonica enim captiuitas figura fuit, vt initio diximus, captiuitatis generis humani, quæ captiuitas adhuc ex parte durat, dum caro

concupiscit aduersus spiritum, & electi clamant, Quis me liberabit de corpore mortis huius? Rom. 7. & Apostolus dicit, Nos ipsi intra nos gemimus, adoptionem filiorum Dei expectantes redemptionem corporis nostri, Rom. 8. & denique hospites, & peregrini habitamus in terra aliena, & in Mundo damnabili sumus, licet de mūdo non simus. Retribuet ergo Deus Bapylonia retributionem, quam retribuit nobis, quoniam sicut Rex Bapylonia Diabolus captiuos nos fecit, & alligauit vinculo culpæ, quo vinculo alligati nascuntur omnes filij Adam: sic in die Iudicii captiuum faciet Christus Rex Hierusalē, Diabolum, & alligabit vinculis æternæ pænæ, vt nulli amplius nocere possit, de quo dicit Beatus Iudas, Angelos qui non seruauerunt suum principatū, sed dereliquerunt suum domicilium, in Iudicium magni diei vinculis æternis sub caligine reservabit. Neque solum Diabolum ligabit Christus vinculis æternis sed et omnia membra eius, siue omnes ministros eius, mundanos videlicet homines, qui pios persequiebantur, & captiuos tenebant, alligabunt Angeli in fasciculos ad comburendum, vt dicitur Matth. 13. Sicut autem Rex Bapylonia seducit præcipue, & captiuos facit paruulos Christi, id est, eos, qui non creuerunt, nec profecerunt in Christo; quibus semper lacte opus est: sic è contrario beatus est, qui paruulos Babyloniz, id est, qui minus creuerunt in vitijs mundi, feliciter allidit ad petram, occidens peccato, vt iustitiæ viuant. Nō est omittenda spiritualis expositio sanctorum Patrum, Hilarii, Hieronymi, & Augustini, qui per paruulos, Babyloniz, intelligunt initia tentationum, quæ facile superari possunt, si continuo exortæ allidantur ad petram, quæ Christus est. Verè enim beatus dici potest, qui semper vigilat, & incensura tentationum crescere non finit.

PSALMVS CXXXVII.

Titulus, & Argumentum.

David.



N Græcis libris, quos nunc habemus, inuenitur titulus, Aggæi, & Zachariæ; sed videtur additus à recentiorib. nam nō solum in hebræo nihil est, nisi, David: sed neque vllus veterum legit, Aggæi, & Zachariæ, nec Hilarius, nec Hieronymus, nec Chrysostomus, nec Augustinus, nec Theodoretus, nec Euthymius. Itaque meritō contemni pōt. Argumentum est gratiarū actio, quod exaudiuerit Deus humilem orationem suam: pro qua re autē orauerit, & quid acceperit, alij aliter sentiunt: sed nobis videtur petiisse aduentum Messiz, & gratias agere, quod exauditus prauiderit, & prædicere potuerit Christi gloriam, & conuersionem gentium.

Explicatio Psalmi 137.

I. **C**onfitebor tibi Domine in toto corde meo: quoniam audisti verba oris mei.

Initio Psalmi pollicetur Propheta sacrificium laudis, & toto corde, quia pro beneficio omnium maximo gratias acturus erat, pro salute sua, & totius populi sempiterna. Contebor tibi Dñe confessionem laudis, & gratiarum actionis, nō verbis tantum, sed ex intimo corde, summa attentione, & ardore mentis, eo qđ ex audieris verba oris mei, orationem videlicet meam. In hebræo non habentur hæc verba, quoniam audisti verba oris mei. Sed credibile est excidisse, & esse debere: habetur .n. apud antiquos Patres, Hilarium, Hieronymum, & Augustinum in commentarijs huius Psal-

mi. Apud Græcos autem habentur quidem, sed per verba, In conspectu Angelorum psallam tibi. sensus semper est idem.

In conspectu Angelorum psallam tibi, adorabo ad templum sanctum tuum, & confitebor nomini tuo.

Declarat confessionem suam fore talenti, qualem requirit excellentia auditorum. In conspectu Angelorum psallam tibi. i. scio me psallentem tibi, ab Angelis, qui tibi assistunt, videri, & attēdi, & ideo ita considerate me geram in psallendo, vt qui intelligam in quo theatro consistam. Et certē si nos quoq. cū Psalmos recitamus, intelligeremus, vel cogitarem ab Angelis sanctis videri, & audiri, & nostram attentionem, & deuotionem laudari, vel contra, euagationes & negligentiam reprehendi, profecto longē aliter caneremus, quā nūc facimus. S. Io. Chrysostomus addit, illi lud, in conspectu, significare, ē regione, vt vera significat vox hebraica, neged, & vult sensum esse, Psallam ē regione Angelorum, quasi vnum chorum faciant Angeli, alterum homines: vt non solum nobis canendum sit audientibus, & videntibus Angelis, sed etiam illis ex altera parte concinentibus, & respondentibus. Quare multum omnino prodesset ad attentionem, & diligentiam, si recitaturi diuinum officium, intra nos cogitando diceremus, In conspectu, vel ē regione Angelorum psallam tibi: id .n. efficeret, vt verē in toto corde confiteremur Domino. Adorabo ad tēplum sanctum tuum, id est, in tēplo manufacto, quod est orationis domus, psalmos decantans, adorabo, hoc est, incuruabor, & prosternar ad templum sanctum tuū quod est non manufactum, sed æternū in cælo: & in eo templo animo, & contemplatione positus, confitebor laudes nomini tuo. In hebræo, pro, Angelorū, habetur, Deorum: sed Septuaginta Interpretes intellexerunt per, Deos, hoc loco significari Angelos, vt etiā in Psal

Ggg 4 mo

mo octauo, Minuisti eum paulò minus ab Angelis : & videmus ab Apostolo hanc interpretationem approbari ad Heb. 2. proinde verissima interpretatio censenda est. Illud autem, adorabo ad templum; potest accipi de templo, siue tabernaculo, in quo erat arca Dei, & pòt sensus esse, Adorabo ad templum, .i. in templo; vel etiam, Adorabo ad tēplum. .i. versus templum, quod faciebāt Hebræi, quando aberant à Hierosolyma; tunc enim adorabant, & orabant conuersi ad eā partem Mundi, vbi erat tabernaculum Domini, vt intelligi potest ex cap. 6. Danielis. Sed qm̄ Dauid dixerat, se in toto corde laudaturum, & in conspectu Angelorum Psalmos cantaturum, credibile mihi est, eum de tēplo cœlesti esse loquutum, vbi sunt Angeli, & vbi præsidet ille, qui intuetur corda.

III. Super misericordia tua, & veritate tua, qm̄ magnificasti super omne nomen sanctum tuum.

Antequam exponatur hic versiculus constituenda est litera ex concordia codicum, In hebræo habetur sic, Super misericordia tua, & veritate tua qm̄ magnificasti super omne nomen tuum, verbum tuum. In græco illud, sanctum tuū est generis neutri, τὸ ἅγιόν σου, nec desunt, qui existiment, græcum textum esse corruptum, & legendum esse, λόγος σου, pro, ἔλεος σου, id est, eloquium, siue verbū, pro, sanctum. Sed cum antiqui Patres, Hilarius, Augustinus, Chrysostomus, Theodoretus, & alij in commentario; & ipse S. Hieronymus in epist. ad Suniā, & Fretellam ex græco legant, Sanctum tuum: non faciliè adducor, vt credā textum græcum esse corruptum. Existimo igitur sic textum hebraicum cū græco, & latino esse concordandum, vt per sanctū tuum, intelligamus Filiū Dei Dñm nostrum Iesum Christum, vt S. Hieronymus admonet loco citato epist. ad Suniam, & Fretellam. Ipse enim est verbū Dei, vt dicitur in hebraico codice, & est sanctus Dei, vt dicitur in græco, &

latino: neque refert, quod in græco, sanctum sit generis neutri; nam Angelus quoque Gabriel Luc. 1. dixit, Quod nascetur ex te sanctum, vocabitur Filius Dei. Dicitur autem Filius Dei, sanctum absolute, quia res est sanctissima, neque est in cœlo, vel in terra aliquid eo sanctius. His ita constitutis, sensus versiculi erit, Confitebor nomini tuo super misericordia tua, & veritate tua, .i. hæc erit materia canticorum meorum, In toto corde laudabo te super magna illa misericordia tua, & fidelitate tua, qua sicut promissisti Patrib. misertus generis humani, magnificasti Christum tuū, qui est Verbum tuum, & sanctum tuū, super omne nomen, quia dedisti illi nomen, quod est super omne nomen. Nam hoc facto misertus es generis humani misericordia, prorsus ineffabili, & ab oīb⁹ in æternū prædicanda, cū genus humanum depressum per peccatum vsque ad inferos, exaltaueris in Christo super omnes cœlos, & super oēs res creatas; & sic impleuisti cumulatissimè veritatem tuā, qua promissis tuis stare solitus es. Quia verò in hebræo non est absolute, Super omne nomen, sed, Super omne nomen tuū; dupliciter potest accipi nomen Dei. Primo, pro potentia, & gloria, quam Deus cōmunicare solet cum creaturis; & tunc sensus est, Magnificasti filium tuum, super omne nomen tuum, id est, super omnem potentiā, & gloriam, quā alij à te acceperunt, qđ est idem cum illo, Dedit ei nomē, quod est super omne nomen, vt in nomine Iesu omne genu flectatur. Secundo, vt nomen Dei accipiatur pro fama, & gloria quæ redundat ex operib. Dei, & tunc sensus est, Magnificasti filium tuū super omne nomen tuū, .i. ex nullo alio opere acquisiisti maius nomen, & famā, & gloriam, quā ex glorificatione Filij tui.

IV. In quacunque die inuocauero te, exaudi me: multiplicabis in anima mea virtutem.

Ex eo quòd magnificasti sanctū tuū, confidenter peto, vt semper per illum aduocatum nostrum exaudias me, in qua-

quacunque die, id est, quocunque tempore inuocauero te ille. n. dixit, Quicquid petieritis Patrem in nomine meo dabit vobis. Multiplicabis in anima mea virtutem. Hoc autem est quod peto inuocans te, vt multiplices, siue dilates, vt proprie sonat vox hebraica, non annos vitæ corpori meo, aut opes, aut filios, aut alia eiusmodi, sed virtutem in aia mea, id est roborem animam meam (virtus. n. hoc loco robur significat, vt vox hebraica & græca demonstrant) vt resistam cupiditatibus, vt tolerem patienter aduersa, vt ambulem sine fatigatione in via iustitiæ vt vim inferam Regno cælorum, vt ad eum, quem magnificasti, aliquando perueniam.

& eorum populi in vijs Dñi, quæ sunt misericordia, & veritas: istis. n. vijs Deus ad nos descendit, & nos ad illum ascendimus; ille misericorditer cōdonando peccata pœnitentium, & iustè puniendo impœnitentes, & coronando iustos; nos misericorditer condonando peccata proximorum, & iustè cum omnibus conuersādo, atque Deo, & proximo reddēdo qđ debemus: ambulabunt aut non inuiti, & mœsti, sed læti, & volentes cātando, quā magna est gloria Dñi. Cognoscent. n., & admirabuntur quotidie magis, ac magis, quā magna Dñs fecerit, & quā magnificè glorificauerit Christum suum, caput nostrum, & quæ sint diuitiæ gloriæ hæreditatis eius in sanctos.

V. Confiteantur tibi Domine omnes Reges terræ, quia audierunt omnia verba oris tui.

Quoniam excelsus Dominus, & VII. humilia respicit, & alta a lōge cognoscit.

Quemadmodum paulò ante dixit, Magnificasti sanctum tuum, prædicēs futurum per verbum præteriti temporis, qm̄ videbat per spiritum rem futurā, quasi præsentem, vel præteritam more prophetico: sic nunc prædicit futuram conuersionem gentium, per modum imperātis. Confiteantur, id est, magnificato sancto tuo per Resurrectionem, & Ascensionem eius, confitebuntur tibi confessionem laudis omnes Reges terræ, quoniā per Apostolorum prædicationem audierunt omnia verba oris tui, id est, quicquid Mundo revelare dignatus es per Prophetas, & Apostolos tuos. quæ verba oris Dñi antea in sola Iudæa erant, vt dicit Apostolus Rom. 3. Illis tradita sunt eloquia Dei: sed postea per Apostolos audierunt omnes Reges, & omnes populi terræ: nam In omnem terram exiuit sonus eorum.

VI. Et cantent in vijs Domini, quoniam magna est gloria Domini.

Hæc est magna gloria Dñi, quodd cū excelsus imò altissimus sit natura, dignitate, potentia, sapientia, imperio; tñ humilia de proximò respicit; qm̄ ad humiles descendit: & verè in filio suo in terris visus est, & cum hominibus conuersatus est: alta aut a longè cognoscit; quoniam a superbis longè recedit, vel eos longè a se proijcit: quò Regem superborū Diabolum de cælo ad inferos præcipitauit. Hæc doctrina sanctæ humilitatis omnibus quidem necessaria est, sed præcipuè Regibus, & alijs in sublimitate constitutis: ipsis. n. maximum periculum est a spū superbiæ. At cur Deus excelsus, non diligit excelsos, sed humiles, cū omne simile diligat sibi iimile? Diligit Deus excelsos vera celsitudine præditos, nō elatos celsitudine falsa: illi. n. similes Deo sunt, isti dissimiles. Porro humiles, qui se nihil esse ex se agnoscunt, implentur a Deo veris bonis, & exaltantur ad celsissimam dignitatem: superbi autem, qui se existimant esse quod non sunt, inanes remanent, & solo vento distenti, & inflati procul abijciuntur.

Pergit Propheta explicare mysteriū vocationis gentium. Et cantent, inquit, in vijs Domini, id est, ambulabūt Reges,

VIII. Si ambulauero in medio tribulationis, uiuificabis me: & super iram inimicorum meorum extendisti manum tuam, & saluum me fecit dextera tua.

Quoniam Deus excelsus humilia benignissimè respicit. Dauid conscius propriæ humilitatis, cum fiducia sibi pollicetur auxilium Dñi in omni tribulatione. Si ambulauero, inquit, in medio tribulationis, ita ut undique tribulantibus, & tentantibus circumdatus sim; tu tamen uiuificabis me, id est uiuum, illa sum, incolumemque seruabis. Et super iram, id est nam super iram (& pro, quia, passim legitur in scripturis, ut sæpè monuimus) inimicorum meorum me undique circumstantium, & deuorare cupientium, tu extendisti manum tuam, ut eorum furorem compesceres, & conatus impedires; & sic saluum me fecit dextera tua, id est potentia & virtus tua, quæ Christus est. In hebræo habentur omnia in futuro, uiuificabis, extendes manum tuam, saluum me faciet dextera tua: sed idem est sensus. S. Augustinus more suo utiliore, sed spirituali sensum excogitauit: Si ambulauero in medio tribulationis, id est, si ex amore cælestis patriæ inuenero præsentem uitam esse laboriosam peregrinationem, & sic inuenero tribulationem, & dolorem, quæ non inueniunt, qui uitam præsentem amant; tunc uiuificabis me, uita gratiæ tuæ: & super iram inimicorum meorum extendisti manum tuam, id est in medio tribulationis ambulo, quia tu extendisti manum tuam ad me feriendum magis, quam ira inimicorum ferire me possit. Inimici possunt spoliare, vulnerare, occidere, amplius non possunt: tu differs reditum in patriam, & adoptionem cælestis beatitudinis, quod mihi grauius est omni tribulatione corporali: sed tamen non despero, quia saluum me fecit dextera tua, spe, & promissione; postea quoque re ipsa, & uisione saluum me faciet eadem dextera tua.

IX. Dominus retribuet pro me; Dñe misericordia tua in sæculum opera manuum tuarum ne despicias.

Explicat modum, quo dextera Dñi saluos nos facit. Dñs, inquit, qui est dextera tua, retribuet pro me, retribuet autem tibi Deo Patri pretium pro peccatis meis, sicut alibi dicit, Quæ non rapui, tunc exoluebam: retribuet et vindictam inimicis meis, quæ ego retribuere non possum. Dñe misericordia tua in sæculum durat, finem non habet; ideo peto, ut opera manuum tuarum ne despicias, id est quæ tu misericorditer, inchoasti opera, inspirans fidem, spem, & charitatem, non deseras, sed conseruando, augendo, perficiendo consummes. Rectè autem dicit, opera manuum tuarum, non opera manuum nostrarum; quia quidquid boni habemus, illius dono habemus; sine quo non solum nihil possumus facere, sed neque sufficientes sumus cogitare aliquid ex nobis, quasi ex nobis.

PSALMVS CXXXVIII.

Titulus, & Argumentum.

In finem Psalmus David.



Ad hunc titulum additur in græcis codicibus, Zachariæ in dispersionem. Sed hæc uerba non habentur in hebræo, & Theodoretus monet, non haberi apud Septuaginta, neque apud ullum interpretum: neque ea nos inuenimus apud ueteres tractatores. De argumento magna controuersia est, S. Hilarius totum Psalmum ad Christum accommodare nititur. S. Augustinus partim de Ecclesia, partim de Christo exponit. Theodoretus, prophetiam esse dicit de rebus gestis Iosæ Regis. Alij uolunt Dauidem de se propriè loqui, & Deum scientem omnia in testem adducere, quod ipse amicos Dei amauerit, inimicos oderit. S. Ioannes Chrysostomus quem Euthymius sequitur, exponit maximè secundum litteram, de scientia, & prouidentia Dei. Chrysostomum præter cæteros sequens, existimo, Dauidem uoluisse admonere genus humanum, Deum esse magnum remuneratorem operum bonorum,

norum, & contra, seuerum Iudicem operum malorum, atque vt id persuadeat, prolixè disputare de scientia Dei, quæ exactissimè, & profundissimè omnia nostra nouit, naturam, opera, verba, cogitationes; vt nemo dicere possit, Deus non nouit, aut non considerat res nostras, idè vel iudicium eius non effugiemus, vel pro meritis coronabimur.

Explicatio Psalmi 138

I. Domine probasti me, & cognouisti me: tu cognouisti sessionem meam, & resurrectionem meam.

Hæc David non de se solum dicit, sed assumit personam generis humani, & in persona omnium affirmat, Deo nos, & nostra oia esse notissima. Dñe, inquit, probasti me, id est, examinasti, & scrutatus es me: id. n. sonat vox hebraica. Dñ autè Deus examinare, & probare, per metaphoram, quia vult perfectissimè, & exactissimè cognoscere oia, vt re vera cognoscit: & quia qui volunt exactissimè cognoscere, diligenter scrutantur, examinant, & probant: idè David vtitur hoc modo loquendi, non quòd Deus eget examine, & scrutinio. Itaq. sensus est, Tu Dñe non es contentus quacunque cognitione rerum nostrarum, sed voluisti accuratissimè cognoscere, vt faciunt, qui examinant, & probant, & re ipsa accuratissimè cognouisti me. Tu cognouisti sessionem meam, & resurrectionem meam. Quod dixerat generatim, nunc per partes explicat. Tu, inquit, cognouisti ab æternitate, qñdo, & qñ, & qua de causa sedere, vel surgere deberem: nec solum corporaliter, sed etiam moraliter id est, qñ, cur, & qñ humiliandus, vel exaltandus essem. Et si Deus hæc de omnibus hominibus nouit, multo magis nouit de Christo, qui est caput hominum, & Angelorum: & idè rectè Ecclesia in die Resurrectionis Christo accommodat hæc verba, Cognouisti sessionem, & resurrectionem meam.

Intellexisti cogitationes meas II. de longe, semitam meam, & funiculum meum inuestigasti.

Docet, Deum non solum cognoscere humiliationem, & exaltationem, quæ ad totam vitam pertinent; sed etiam in particulari omnes cogitationes, omnia consilia, omnem euentum. Vel cū docuisset David, Deum cognoscere exteriora nostra, humiliationem, & exaltationem; nunc docet, Deum cognoscere etiam interiora, cogitationes, & desideria. Intellexisti, inquit, cogitationes meas de longe, id est, multo antea quam cogitare inciperè, tu nosti quid essem cogitaturus; item nosti de longè semitā meam, id est, progressum meum, itinera mea tum corporalia, tū multo magis spiritualia, quæ sunt consilia, & deliberationes; denique funiculum meum inuestigasti, id est, finē & metam, ad quam peruenturus essem, quā hereditatem, quā quietem assecuturus. In summa intellexisti ab æternitate principia, media, & finem actionum mearum. Ex hebræo S. Hieron. vertit, malū meum, pro, cogitationes meas: sed S. Hieron. existimauit vocem hebraicam deduci a ruah, & legit, rohi, malum meum: sed Septuaginta Interpretes duxerunt eandem vocem a raha, & legērunt, rehi, quam vocem etiam si aliqui vertendam putent, amicum meum, tū rectè vertere possumus, cogitationē meā, vt ipsi etiam Iudæi fatentur. De voce, funiculum meum, magna cōtrouersia est: in hebræo habetur, ruihi, accubitus meus, siue accubationem meam, vt vertit S. Hieron. vt sensus sit, Cognouisti ambulationem meam, & accubitū meū. S. August. legit, Semitam meam, & limitem meum; & rectè, quia finis itineris est limes, siue terminus, & quia in termino homo quiescit, rectè dixit David, semitam meam, & accubitus meum. Hoc idem significare voluerunt Septuaginta Interpretes per funiculum: nam secundum scripturas funiculus significat hereditatem, siue possessiones, quæ funiculis diuidebantur. Ezechielis 47. Ioseph dupli-

duplicem funiculum habet, id est, duplicem hereditatem, siue possessionem, quia Ioseph duas tribus habuit, Ephraim, & Manassem. Omitto eos, qui per funiculū intelligunt, itinera longa, vel distorta, & alia id genus, quæ cum voce hebraica nulla ratione coherent.

III. Et omnes vias meas præuidisti, quia non est sermo in lingua mea.

Dixerat, Deum præuidisse cogitationes, consilia, & euentus: nunc addit generatim omnes alios motus, etiam ociosos, ut verba permultra. Præuidisti omnes alios motus meos usque ad verba inutilia, & ociosa: quia non est sermo in lingua mea, supple, quem tu non præuideris. hinc. n. Dñs in Euangelio testatur, homines de omni verbo ocioso reddituros esse rationem in die Iudicii; quia Deus omnia obseruat, omnia considerat, ut omnia in tempore suo in iudicium adducat. Vnde & S. Iob perterritus dicebat, Job. 14. Tu quidem gressus meos dinumerasti, sed parce peccatis meis. In græcis codicibus legitur, Non est dolus in lingua mea: sed videtur esse nostra lectio verior. Nam S. Hieron. in epist. ad Suniā, & Fretellam testatur, non solum in hebraico esse, milla, eloquium, sed etiam Septuaginta Interpretes vertisse, λόγος, id est, sermonem. Sanctus etiam Chrysost. varias lectiones adducit, quarum alia habet, Non est sermo, alia, Non est dolus.

IV. Ecce Domine tu cognouisti omnia nouissima, & antiqua: tu formasti me, & posuisti super me manum tuam.

Peruadet Propheta duobus argumentis, Deum oia scire, quæ ad nos pertinent: primo, quia nouit oia præterita, & futura, unde non est mirum, si etiam res humanas exactè sciat, quæ inter cætera non ultimum locum obtinent: secundo, quia ipse fecit hominem, ipse gubernat, ergo

dubitari non debet, quin sciat oia, quæ ad illum pertinent. Ecce, inquit, Dñe tu cognouisti oia nouissima & antiqua, id est, futura in nouissimis diebus, & præterita ab antiquissimo tempore. Tu præterea formasti me, tu fecisti hominem, & postea quam fecisti, non dimisisti, ut cæteri opifices faciūt, sed posuisti super me, super hominem a te formatum, manum tuam, ut eum regeres, cōseruares, & quasi portares, alioqui. n. in suum puluerem, imò in suum nihilū reuerteretur. In hebræo, quod nos legimus, nouissima, & antiqua; possunt et legi, retro, & ante, & sic legit S. Hieron. Ratio cur ita legat, est, quia coniunxit illa verba cum sequentibus, formasti me; non cum præcedentibus, cognouisti oia: non autem coherent, nouissima, & antiqua, cum formasti me, sicut coherent, retro, & ante. Cōtra autē Septuaginta Interpretes quia coniunxerunt cum præcedentibus, idēo verterūt; Cognouisti oia nouissima, & antiqua. Quamuis asit recentioribus quibusdam valdē placeat illud, retro, & ante formasti me; tñ vulgata editio præferenda est, tum quia maxima est auctoritas Septuaginta Interpretum, tum quia sic legunt oēs Patres græci & latini: tum quia non est res magna, neque mirabilis, quod qui formauerit hominem, formauerit partes, & membra oia, anteriora, & posteriora: id. n. omnes artifices statuarum, & picturarum, & edificiorum faciunt. Sed quod Deus sciat omnia nouissima & antiqua, id verē magnum, & mirabile, & soli vero Deo proprium, & prophetica cōmemoratione dignissimum est.

Mirabilis facta est scientia tua v. ex me, confortata est & non poterō ad eam.

Quia demonstrauerat Propheta duobus illis argumentis, scientiam Dei ad oia, quæ hominis sunt se extendere: ne quis putaret, scientiam Dei nobis iam satis cognitam, & perspectam esse, subiunxit hunc versiculū, ut intelligeremus, scientiam Dei notissimam esse, quo ad existentiam, id est, quod sit scientia maxi-

maxima in Deo, sed obscurissimam esse, & planè incognitam, quo ad modum, i. incomprehensibile esse, quomodo Deus prævideat futura, præsertim libera, quæ pro arbitrio hominis possunt esse, & nō esse, qualia sunt cogitata, desideria, verba, & pieraq. opera hominum. Idē dici pōt de essentia, & attributis Dei. Deum esse, & esse potentem, sapientem, bonū, iustum, misericordem, &c. notissima sūt quid autem sit Deus, & quomodo tot at tributa sint vna simplicissima res, vna essentia, vnum esse, quis nouit? quis dicere poterit. At igitur, Mirabilis facta est scientia tua ex me, id est, mirabilior, q̄ ego assequi possim. Illud enim, ex me, phrasi hebraica, significat, præ me, vel super me: quod explicatur per verba sequentia, Confortata est, & non potero ad eam, id est, præualuit supra capacitatem meam, siue eleuata est altius, quàm ego conicendere possim, vt rem apprehendam. Duæ sunt aliz, quæ dantur a Patribus ad hūc versiculum expositiones. Prima est S. Basilij oratione nona in Hexameron, quod illud, ex me, significet, ex ijs, quæ sunt in me, vt sensus sit, Ex fabrica humani corporis, mirabilem ostendi scientiam, & sapientiam Dei, nō minus, quam ex fabrica cœli, & stellarū. Hæc expositio veram doctrinam continet, sed non est ad mentem Prophetæ, vt intelligi potest ex verbis sequentibus, Confortata est, & non potero ad eam. Altera est S. Ioannis Chrysostomi, qui existimat Dauidem loqui de sciētia naturæ, & attributorum Dei, vt sensus sit, Mirabilis est scientia tua, id est, de te, de tua essentia, & attributis; quamuis. n. sciamus te esse, & esse bonum & misericordem, tamen non capimus quid sis. Hæc expositio vera est, sed debet restringi ad vnum solum attributum, id est, ad scientiam, quæ est in Deo; de hac enim Propheta loquitur. Imò in textu hebraico non habetur pronomen, tua, sed mirabilis facta est scientia præ me, id est, ista scientia, de qua supra dictum est, Tu cognouisti omnia nouissima, & antiqua: & omnes vias meas præuidisti: & intellexisti cogitationes meas de longe: ista, inquam, scientia mirabilis facta est præ

me, id est, mirabilior, quàm ego cognoscere possim.

Quò ibo a spiritu tuo, & quò a VI. facie tua fugiam?

Si ascendero in cœlum, tu illic VII. es, si descendero in infernum a. des.

Si sumpsero pennas meas dilu VIII. culo. & habitauero in extremis maris.

Etenim illuc manus tua dedu. IX. cet me, & tenebit me dextera tua.

Addit aliud argumentum ad probandum, neminem esse, qui possit latere sciētiam Dei, quia videlicet Deus vbiq. est, & omnia penetrat. Quò ibo a spiritu tuo, vt videlicet abscondar a te, a tua mente, & intelligentia? & id ipsum clarius repetit, dicens, Quò a facie tua, id est, ab oculis tuis fugiam? si ascendero in summum cœlum, tu illic es: si descendero in infernum, in profundum abyssi longissimè a cœlo situm, ibi quoque tu ipse idem ades. Si sumpsero pennas meas, id est, si dentur mihi pennæ, & mane surgens velocissimè fugiam ab oriente, & habitem in extremis maris, id est, in vltimo occidente: non tamen effugere te potero: nam manus tua deducet me, & tenebit me: quia sine Dei auxilio moueri non possumus, & quocumque imus, Deo nos portante imus. In ipso enim (vt ait Apost. Act. 17.) viuimus, mouemur, & sumus. In hebræo habetur pulcherrima figura poetica. sic enim habetur ad litteram, Si sumpsero pennas auroræ, & habitauero in extremis maris. Aurora. n. mox vt apparuerit in oriēte, spargit radios suos vsque ad occidentem, vt videatur quasi pennis velocissimè ferri ab ortu vsq. ad occasum. Porro per, extrema maris, intelligimus vltimum occidentem,

dentem, non ut quidam volunt, quia scriptura soleat per mare intelligere occidentem; sed quia hoc loco extrema maris opponuntur orienti, ubi oritur auro-
ra: nam absolute Scriptura per mare intelligit Austrum, non occidentem. Psalmi 106. A solis ortu, & occasu, ab aquilone & mari: & quamvis terra promissionis habeat ad occasum mare mediterraneum, habet tamen ad austrum mare rubrum, & mare oceanum. Et hoc loco non terram promissionis, sed totum mundum Propheta describit, a summo cœlo usque ad infernum, & a mari orientali, usque ad mare occidentale, quo spatio totus orbis terrarum continetur, ut diximus in explicatione Psalmi 71. Denique observandum est, illa verba, Si ascendero in cœlum, si descendero in infernum, si sumpsero pennas; esse accipienda conditionaliter, non absolute, in hunc sensum, Etiam si ascendere possum in cœlum, vel descendere in infernum, vel volare a ortu ad occasum; non possem a te abscondi, vel a te fugere.

X. Et dixi, Forſitan tenebræ conculcabunt me; & nox illuminatio mea in delicijs meis.

XI. Quia tenebræ non obscurabuntur a te, & nox sicut dies illuminabitur; sicut tenebræ eius, ita & lumen eius.

Obiecit ipse sibi, posse fieri, ut abscondatur a Deo, beneficio tenebrarum. Et respondet id non posse fieri, quia tenebræ apud Deum non sunt tenebræ. Deus enim lux est, ut scribit S. Ioannes 1. episto. 1. lux autem in tenebris lucet, & tenebræ eam non comprehenderunt, ut idem scribit in 1. capite Evangelij. Sicut enim lux solis corporalis non potest obui tenebris, quia tenebras præsentia sua fugat, & ubicunque sol est, dies est: sic etiam lux spiritualis, & increata, quæ Deus est, nullis tenebris impediri potest quia præsentia sua tenebras omnes dissipat. Itaque nullum omnino latibulum homini relinquitur, in quo ab oculo Dei

abscondi queat. Et dixi, forſitã tenebræ conculcabunt me, id est, forſitan tenebræ densissimæ operient me, & sic effugiam oculos Dei. Vbi illud, conculcabunt non significat, conterent, sed tegent, & obscurabunt sua densitate: id enim sonat vox hebraica, quam S. Hieronymus recte vertit, operient me. Verbum autem græcum, & latinum metaphoricum est; quod enim calcatur, in profundo ponitur, & absconditur. Et nox illuminatio mea in delicijs meis. Hæc est responsio ad objectionem factam. quæ responsio in codice hebraico clarissima est, secundum versionem S. Hieronymi, videlicet; Et nox lux est circa me, id est, nox respectu oculorum Dei non est nox, sed illuminatio circa me. Septuaginta Interpretes non verterunt circa me, sed in delicijs meis. quia vocem hebraicam, baha בָּהָא dani, duxerunt ab eden, quod est voluptas, & rectissime reddiderunt, in delicijs meis. sed quia hæc interpretatio obscurior est, S. Ioannes Chrysostomus, & alij multi, qui eum sequuntur, confugiunt ad metaphoram, & volunt per, noctem, & tenebras significari tribulationes, & hunc sensum esse horum verborum, forſan tenebræ tribulationum conculcabunt me; sed per gratiam Dei consolantem me, nox ipsa erit mihi illuminatio, tribulatio vertetur in consolationem in delicijs meis spiritualibus. Sed non est opus ad metaphoram confugere; & totus contextus Psalmi melius continuabitur, & cohærebit, si de veris tenebris hic versiculus explicabitur. Hic igitur est sensus literalis, Nox illuminatio mea in delicijs meis, id est, nox ipsa per se obscura, coram oculis Dei, non erit nox, neque obscura, sed erit illuminatio mea, id est, illuminabit, & patefaciet me in delicijs meis nocturnis versantem: nam, qui delicijs impuris vacant, tenebras noctis quærun, existimantes se a nemine videri, & ita securius peccare. unde, & Apostolus ait, qui dormiunt, nocte dormiunt, & qui ebrij sunt, nocte ebrij sunt. & poterat addere, Qui in cubilibus, & impudicitijs delicias quærun, in noctibus eas quærun. Sed frustra: nam oculus Domini sole ipso lucidior tenebras omnes penetra-

netrat, & nihil est ei absconditum. Induit autem hoc loco personam impiorū Prophetā sanctius, dum hæc dicit; & in sequentibus clarius idem repeti. Quia tenebræ, inquit, non obscurabuntur a te. In hebræo elegantius, Quia tenebræ non tenebrescent apud te. Et nox sicut dies illuminabitur, id est, & nox non erit obscura, ut solent noctes, sed erit lucida, ut lucidi sunt dies. Sicut tenebræ eius, ita & lumen eius. In hebræo paulo clarius, Sic tenebræ, sicut lumen. Sed addiderunt Septuaginta pronomen, eius, generis fæminini *αὐτῆς*, & sensus est, Sicut tenebræ eius, id est, noctis, ita, & lumen eius, id est, diei; perinde. n. est apud Deum, siue sint tenebræ noctis, siue lumen diei: quia non minus videt in tenebris noctis, quàm in luce diei.

XII. Quia tu possedisti renes meos: suscepisti me de vtero matris meæ.

Probat, Deum in tenebris videre, & nihil ei esse absconditum, quamvis occultissimum, ex formatione membrorū nostrorum internorum in vtero matris adhuc reconditorum. duplex. n. hic est obscuritas, vna quia membra sunt interna, altera, quia sunt in vtero matris. Quia tu possedisti renes meos, id est, hinc apparet, tibi perinde esse noctem, & diem, tenebras, & lucem: quia tu formasti, & formando tuos effecisti renes meos, partes videlicet secretas, & absconditas, ubi est sedes internæ cupiditatis. proinde affectus mei, & desideria mea in manu tua sunt: neque solum renes meos, sed me totum in vtero latentem suscepisti formandum, & fouisti formatum. Illud, possedisti, est in hebræo, *נָפַח*, quod significat producere, & ratione productionis possidere, ut rem suam. Sic Gen. 2. dicit Eva, Possedi hominem per Deum, quando genuit Cain. & Prouerb. 8. dicit Sapientia Dei, Dominus possedit me in initio viarum suarum. Vtrobique est idem verbum hebraicum. illud autem suscepisti me, non signifi-

cat suscipere quomodocunque, sed suscipere formandum, siue fouere, & te gere. Vnde S. Hieronymus vertit, Orsus es me; & alij obumbrasti me. Illud denique de vtero, in hebræo est, in vtero, & colligitur ex versiculis sequentibus, omnia hæc intelligenda esse de conformatione humani corporis in vtero. Quare, ut verba græca, & latina concordent cum hebraicis, & cum sensu ipso Prophetæ, illud suscepisti me de vtero; non debet exponi de egressu ab vtero, sed de tempore quo erat in vtero, in hunc sensum, Suscepisti me formandum, & fouendum de ipso vtero, id est, antequam exirem de vtero, dum adhuc essem in vtero. Sicut intelligitur illud Isaia 49. Dñs ab vtero vocauit me, de ventre matris meæ recordatus est nominis mei. siue. n. hoc intelligatur de Christo, siue de S. Ioanne Baptista, id significat, Deum vocasse nomen eius, & destinasse illum ad magnum officium ab ipsa conceptione, dū adhuc esset in vtero.

Confitebor tibi, quia terribiliter magnificatus es: mirabilia opera tua, & anima mea cognoscebat nimis.

XIII.

Interrumpit Propheta narrationem de opificio humano per apostrophē ad Deum, & admirans magnitudinem scientiæ, & sapientiæ Dei in hoc opere, Confitebor, inquit, tibi, id est, cogitans hæc opera tua, confitebor tibi confessionem laudis, quia terribiliter terrore admirationis, & reuerentiæ magnificatus es. Declarat autem in quo sita sit hæc admirabilis magnificentia, dicens, Mirabilia opera tua, & anima mea cognoscebat nimis, id est, admiranda sunt opera tua in formatione hominis in vtero matris tam recondito, & obscuro, & anima mea valde sataget, ut cognoscat magnitudinem horum operum tuorum. Vbi non significatur perfecta cognitio operum Dei, sed cognitio, quod magna, & mirabilia sint. Quomodo non videmus, nec scimus, quanta sit magnitudo maris, sed cognoscimus

gnosceamus mare esse amplissimum, & ex hoc ipso cognosceamus, esse amplissimum, quod ex nullo loco totum cernere possumus. Quomodo etiam solem aduersum intueri nequimus, sed hoc ipso intelligimus, solis lucem esse maximam. In hebræo nunc legimus, magnificatus sum; sed Septuaginta legerunt in secunda persona, non in prima. Sensus autem est idem, nam ideo Deus magnificatus est valde in hoc opere, quia magnificum opus fecit, cum nos ita magnificauit.

XIV. Non est occultatum os meum a te quod fecisti in occulto & substantia mea in inferioribus terræ.

Reuertitur ad scientiam, & sapientiam Dei in opificio humano. Non est occultatum, inquit, a te os meum, id est, non latet scientiam tuam ossatura mea, ut sic loquar, id est, qualia, & quam multa ossa lateant intra carnem humanam, quia tu ipse ea fecisti, & in occulto fecisti, videlicet in utero matris, & intra pellem & carnem nostram. Idem repetit alijs verbis dicens, Et substantia mea in inferioribus terræ, id est, non est occultata a te substantia corporis mei, adhuc etiam latet in profundo utero, quasi metallum in visceribus terræ. vel si non placeat per, inferiora terræ, intelligere uterum matris: possumus exponere proprie de ipsa terra, quæ infima est inter elementa: nam ad admirationem eperum Dei pertinet, quod tam nobilem substantiam formauerit in hac infima terra. Porro qui viderunt anatomiam corporis humani, satis mirari non possunt sapientiam Dei in fabrica tot ossium, magnorum, paruorum, minimorum, mirabiliter inter se connexorum, atque id totum sine instrumentis in loco angustissimo, & obscurissimo peractum. Potest etiam hoc intelligi simul de ossibus corporis, & animæ, id est, de robore, & fortitudine animi humani, quod tantum est, ut homo natus inermis, & nudus audeat, auxilio Dei fretus, non solum bestias, sed &

iplos demones ad bellum prouocare: In hebræo, pro, quod fecisti, habetur, quod factus sum. sed credibile est Septuaginta legisse hasita, fecisti, non hufeti, factus sum. & sensus interpretationis Septuaginta est longe clarius. Pro illo autem, & substantia mea, in hebræo legitur, ruchamti, id est, variegatus sum, ut sensus sit, non occultatum est a te os meum, quod fecisti in occulto, neque etiam occultatum est a te, quo modo variegatus sum a te varietate membrorum, & potentialium, & partium similarium, in inferioribus terræ, id est, in utero matris, siue in hac ima terra, in qua degimus. quæ sententia elegans est, & vera. Sed Septuaginta non legerunt, ruchamti, sed vnica litera paululum immutata, & alijs punctis subintellectis, vecomati, & erectio mea; siue exaltatio a non esse ad esse, quod est ipsa substantia. & sic legerunt omnes veteres.

Imperfectum meum viderunt XV. oculi tui, & in libro tuo omnes scribentur: dies formabuntur, & nemo in eis.

Pergit in ostendenda scientia Dei erga humani corporis opificium: & per, imperfectum, intelligit, corpus informe, quod vocant embriorem, in quo nondum apparet forma, & distinctio membrorum. Hoc, inquit, imperfectum meum viderunt oculi tui, nec simpliciter viderunt, sed cognouerunt, quid inde fieri deberet, & quo tandem euasurum esset. Reddit mox rationem subiiciens, Et in libro tuo oēs scribentur, id est, quia habes apud te exemplaria, siue Idæas omnium, quomodo pictor, vel sculptor scit ex informi materia, quid futurum sit, quia videt exemplar. Itaque illud, & accipitur pro quia. Quia, inquit, in libro tuo, id est, in mente tua omnes homines, immo etiam res omnes descriptæ inuenientur. Dies formabuntur, & nemo in eis. Sanctus Hilarius legit, Die formabuntur, & in græco textu est casus accusatiuus, ac per hoc subintelligitur aliquid, ut sensus sit, In dies formabuntur informia corpora, &

& perducentur ad perfectionem suam, ut in exemplari relucet. Et nemo in eis, supple, deerit, vel, ut est in hebræo, nihil in eis, deerit. Ordinariè siquidem nullus homo conceptus in utero, ad perfectionem suam non pertingit, neque aliquid ex ijs, quæ naturaliter requiruntur, in eis deficit. cum enim secus accidit, ut in abortiujs, vel ijs, qui nascuntur cæci, aut muti; id non accidit ex defectu primæ causæ, sed secundarum. Possent hæc omnia intelligi etiam de perfectione hominis quantum ad animam, id est, de sapientia, prudentia, virtutibus moralibus, gratia, & gloria. Nouit enim Deus imperfectum nostrum, & nos ex nobis nihil esse, nisi massam informem, sed iuxta descriptionem in libro vitæ, in dies formamur, & perficimur, donec efficiamur conformes imagini Filij Dei, & configuremur corpori claritatis eius. Atque ad hanc perfectionem tam excellentem corporis, & animæ, ad quam ex tanta imperfectione perducuntur amici Dei, respiciens Propheta: exclamat id quod sequitur.

XVI. Mihi autem nimis honorificati sunt amici tui Deus, nimis confortatus est principatus eorum.

Exclamatio ob admirationem nascitur, ut dixi, ex eo quod Propheta considerauit ex quanta abyssu imperfectionis Deus perducatur ad summam & eminentissimam perfectionem, in qua simul ostenditur prouidentia Dei considerantis, & curantis res humanas, ut maximè proprias, & merita hominum altissimè remunerantis, & demerita seuerissimè punientis. Mihi autem, inquit, id est, apud me, siue meo iudicio, nimis honorificati sunt amici tui Deus, id est, valdè omnino, & supra quàm intelligam, honorificati sunt amici tui, valdè omnino confortatus est, roboratus, & stabilitus principatus eorum. nam educti ex massa perditionis, & ex diabolica captiuitate, transferuntur ad Regnum æternum, facti Angelis æquales, Filij Dei, & hæredes, fratres autem, & cohæredes Vni-

Card. Belarm. in Psal.

geniti, quem constituit Deus hæredem vniuersorum. Non desunt, qui illud, mihi, interpretentur, à me, ut sensus sit, à Dauide honoratos semper fuisse amicos Dei. Sed prior expositio, est communior, & verior, & melius coheret cum verbis sequentibus, nimis confortatus est principatus eorum. Qui enim honorificauit amicos Dei, ille idem confortauit principatum eorum; Deus autem, non David confortauit principatum omnium amicorum suorum. In hebræo, & græco habetur in numero multitudinis, confortati sunt principatus eorum. Sed idem est sensus; principatus enim iustorum & vnus est, & multi, vnus, quia vnum est Regnum Dei commune omnibus Sanctis; multi, quia omnes & singuli Reges sūt, & Principes magni, eius enim naturæ, & conditionis est Regnum cæleste, ut sine contentione, vel emulatione, vel detrimento, à singulis possideri possit in solidum. Quod autem dicitur, confortatus est, non solum referri debet ad robur, sed etiam ad multiplicationem subditorum: tunc enim confortatur principatus, cum crescit, & propagatur. & hoc declaratur in sequenti versiculo.

Dinumerabo eos & super arenam multiplicabuntur, exurrexi & adhuc sum tecum. **XVII.**

Declarat, quo modo confortatus sit principatus amicorum Dei, & dicit, confortatū esse, quia mirificè breui propagatus est. Quod quidè verissimum est, tum quia ipsi Principes tot sunt futuri, ut S. Ioānes dicat Apoc. 5. Vidi turbam magnā, quā dinumerare nemo poterat ex omnibus gentibus, & tribubus, & linguis, &c. tum etiā, quia omnes res creatæ, & ipsi etiam dæmones, & homines reprobi subiecti erūt post iudiciū pedibus Sæctorum, atq. ad principatum eorum pertinebunt. Ait igitur. Dinumerabo eos, id est, conabor numerare vel amicos Dei, qui principatu fruuntur, vel subditos eorum, & præ multitudine numerare non potero, quia super arenam multiplicabuntur, id est, plures erūt, quā

Hh h grana

grana arenæ in littore maris. Est autem hæc amplificatio quædam, sed familiaris diuinæ scripturæ. Gen. 13. dicit Dominus Abraham, Faciam te, sicut puluerem terræ, id est, multiplicabo posteritatem tuam secundum multitudinem granorum pulueris terræ, quæ numerari non possunt. Gen. 22. Crescere te faciam, sicut arenam, quæ est in littore maris. His dictis Propheta de se loquitur, atque ostendit ex cognitione tam ingentis gloriæ Sanctorum amicorum Dei, se quoque exarsisse in affectum Dei, & desiderium participandæ eiusmodi gloriæ. Exurrexi, inquit, siue, ut sonat vox hebraica, euigilaui, ad hanc nouam lucem, & surrexi per amorem, & desiderium in te: & adhuc, id est, usque ad hoc tempus tecum sum, tibi inhæreo, à te pendeo, cupidus perseverandi usque in finem. Scio hæc pauca verba mille modis exponi à veteribus, & recentioribus, sed piguit ea describere, quæ alij dicunt, cum in ipsorum libris legi possint. SS. Patres Hilarius, & Augustinus exponunt de Resurrectione Christi; quos sequuta Ecclesia in Missæ introitu hæc verba posuit, Resurrexi, & adhuc tecum sum, posuisti super me manum tuam, mirabilis facta est scientia tua. Sed nimis difficilis est continuatio verborum, si hæc ad literam intelligantur de Christi Resurrectione; idèò dicendum videtur, hæc posse applicari ad Christum, quia illi maxime proprie conueniunt, quamuis de alio dicta sint: quomodo exposuimus illud, tu cognouisti sessionem meam, & resurrectionem meam, de humiliatione & exaltatione omnium hominum; & tamen admonuimus, Christi passioni, & resurrectioni potissimum conuenire. quo modo etiam Ecclesia in Missa de Assumptione applicat B. Virgini Deiparæ illa verba, Optimam partem elegit sibi Maria, quæ non auferetur ab ea: quoniam in eam optimè conueniunt; quamuis de Maria Magdalena dicta esse constet ad literam, Luc. 7.

XVIII. Si occideris Deus peccatores,
viri sanguinum declinate à me.

Quia dicitis in cogitatione, et XIX.
accipient in vanitate ciuitates tuas.

Dixerat Propheta, Iustos Dei amicos valdè honoratos esse à Deo, & optauerat consortium eorum: nunc è contrario dicit, Impios inimicos Dei interficiendos iusto Dei iudicio, & recusat amicitiam, & consortium ipsorum. Si occideris Deus peccatores, id est, si tu Deus iusto tuo iudicio, ut probos honorificabis, & exaltabis, ita peccatores reprobabis, & ad interitum sempiternum damnabis; ego nolo consortium istorum, idèò dico vobis, Impijs, Viri sanguinum declinate à me. Vocat autem viros sanguinum, non solum homicidas, qui sanguinem humanum iniuste fundunt, & propriè dicuntur viri sanguinum; sed omnes alios improbos, & scelestos, qui alijs nocere cupiunt, vel nocent, & occidunt animas proprias per peccatum, & animas aliorum per scandalum, & verè etiam odio habentes proximum homicidæ dici possunt, quia odium principium est homicidij. Quare S. Ioannes in Epist. 1. cap. 3. dicit, Qui odit fratrem suum homicida est. Quia dicitis in cogitatione, id est, quia cogitatis apud vos, & in corde vestro dicitis, Accipient, iusti videlicet, in vanitate, id est, frustra, & in vanum, ciuitates tuas, id est, ciuitates Dei, frustra, inquam, accipient, quia breui auferemus ab eis. Hæc referuntur ad id quod supra dictum erat, nimis confortatus est principatus eorum, id est, valdè propagatus per conuersionem infidelium ad fidem, & impiorum ad iustitiam. Quoniam igitur per propagationem Ecclesiæ, ciuitates, id est, cætus plurimi ablati fuerant à dæmonum seruitute, & idololatriarum dominio; idèò dicebant impij, qui reliqui erant, in corde suo, inuidentes propagationi Regni Christi; Accipient in vanum ciuitates, quoniam sperabant, breui fore, ut eas recuperarent. Obseruanda sunt aliqua hoc loco. Primo magnam esse in græcis textibus varietatem, quod pertinet ad illud, quia dicitis in cogitatione: sed cum lectio vul-

gata

gataz latinæ editionis concordet cum hebraica lectione; non dubitamus, illam ex græcis veriorē esse, quæ cum hebraica, latinaque concordat. Secundo, in hebraico haberi, Quia dicunt tibi, sed in nostra lectione omis- sum esse illud, tibi, quia facile subin- telligi poterat: qui enim dicunt in co- gitatione, non verbis externis; illi non audiuntur ab hominibus, sed a solo Deo; idē dicunt tibi Deo, non nobis hominibus. Tertio, illud ciuitates tuas, rectē correctum esse, cū antea habe- retur, suas: nam, tuas, habetur in tex- tibus non solum hebraicis, sed etiam græcis, & in manuscriptis latinis; & er- rore librariū mutatum erat in im- pressis, tuas, in suas.

XX. Nonne qui oderunt te Domi- ne, oderam: & super inimicos tuos tabescebam?

XXI. Perfecto odio oderam illos, & inimici facti sunt mihi.

Qui euigilauit in Deum, & illi pleno corde adhæsit, nihil mirum est, si pro- fiteatur se odisse eos, qui Dominum oderant: & si tabescebat ex tædio, & dolore, cū videbat offendi ab impijs Dominum suum. Quod autem dicit, Perfecto odio, S. Augustinus refert ad virtutem charitatis, quæ diligit perso- nas, & odit iniquitatem. Sed potest etiam significare odium consumma- tum, & inimicitiam irreconciliabilem: quo tamen odio vir iustus persequeba- tur peccata, non personas: idē enim adiungit, inimici facti sunt mihi, quasi dicat, non ego illis, cū eos diligam, & emendari cupiam, sed illi mihi, qui oderunt increpationem, & conuerti ad iustitiam nolunt.

XXII. Proba me Deus, & scito cor meum: interroga me, & cogno- sce semitas meas.

XXIII. Et vide si via iniquitatis in me est, & deduc me in via æterna.

Quod initio dixerat, Deum fecisse: nunc ipse rogat, vt faciat, idē, vt per-

gat scrutari, & examinare cor, & semi- tas eius, idē, cogitationes, desideria, progressus, & actiones eius. Finem au- tem scrutationis esse cupit, vt si Deus videat in ipso viam iniquitatis, quæ du- cit ad acquirenda temporalia; abstra- hat eum inde, & deducat in viam æter- nam, idē, ad ea cogitanda, desideran- da, & facienda, quæ pertinent ad bo- na sempiterna.

PSALMVS CXXXIX.

Titulus, & Argumentum.

In finem Psalmus David.



Recentiores sequuti Theodo- retum Psalmi huius argu- mentum esse docent preca- tionē Davidis aduersus Sau- lem Regem, & ministros eius. Sed veteres Patres, Hilarius, Hie- ronymus, Chrysostomus, Augustinus, argumentum esse volunt precationem Corporis Christi aduersus Diabolum, & iniquos homines, qui instrumenta, vel satellites Diaboli sunt. Sanctus au- tem Hilarius non solum ita exponit, sed etiam refellit expositionem, quam recentiores sequuntur: dicit enim hūc Psalmum non debere exponi de Dau- de persecutionem patiēte à Saule, tum quia nihil propriē in hoc Psalmo de Saule, vel Dauide dicatur; tum quia non desint multa, quæ non possunt Sau- li, & Dauidi accomodari, vt illud, tota die constituebant prælia: nō enim quo- tidie Saul aduersus Davidem bella con- stituit; imō nunquam Saul prælium ad- uersus Davidem constituit, si propriē loqui velimus: sed fugientem perseque- batur, vel delitescētem perscrutaba- tur. bella enim, & prælia inter duos exercitus constituuntur, non inter vnum insequentem, & alium fugien- tem. Adde, quod, quando placuit Da- uidi de suis persecutoribus Psalmos ca- nere, in titulo nomina eorum posuit, quod videamus in Psal. 141. 142. 143.

Hhh 2 &

& alijs plurimis. & quia hic factum non est, dicamus cum Patribus, Psalmo presenti doctrinam generalem tradi.

Explicatio Psalmi 139.

I. Eripe me Domine ab homine malo, à viro iniquo eripe me.

Christus loquitur secundum Hilarium in persona sua, & membrorum suorum: vel quod est ferè idem, loquitur corpus Christi, idest, cœtus fidelium, ut alij Patres dicunt. Per, hominem malum, intelligit Sanctus Augustinus Diabolum, qui dicitur Matth. 13. inimicus homo: alij intelligunt homines malos, quia à Diabolo excitantur, & reguntur. Vtrunque est verum, & simul coniungi potest, ut sensus sit, Eripe me ab homine malo, siue Diabolus, qui est inimicus homo, per se, siue per homines sibi subiectos me infestet. Et quemadmodum illud, me, non significat vnum certum hominem patientem, sed cœtum iustorum; sic etiam illud, ab homine malo, non significat vnum certum hominem infestantem, sed cœtum iniquorum, siue omnem iniquum. Quod sequitur, à viro iniquo eripe me, est repetitio eiusdem rei: quamvis enim aliqui sint mali, qui non videntur esse iniqui, idest, iniusti: tamen aliquo modo omnis malus est iniustus, quia nocet saltem ipse sibi, nocet etiam alijs saltem exemplo. & S. Ioannes in Epist. 1. c. 3. dixit, Qui facit peccatum, iniquitatem facit, & peccatum est iniquitas.

II. Qui cogitauerunt iniquitates in corde, tota die constituebant prœlia.

Reddit rationem, cur dixerit, eripe me, & dicit, rationem esse, quia patitur infestationem cogitationum, verborum, & factorum, & infestationes tales, quæ dici possint prœlia assidua, ut nullæ dentur induciæ, nulla intermissio: proinde non sine causa hortatur Apostolus ad Ephes. 6. ut sumamus armaturam Dei, græcè *ἐνδύσασθε*, idest,

omne genus armorum, galeam, loriam, scutum, gladium, ut possimus resistere, & in omnibus perfecti stare. Ac primum de prœlio cogitationum, qui cogitauerunt, inquit, iniquitates in corde. illud, cogitauerunt, demonstrat verum esse quod supra diximus, per hominem malum, non intelligi vnum certum hominem, ut Saulem, sed cœtum iniquorum dæmonum, & hominum. Porro, cogitare iniquitates in corde est, meditari deceptiones, parare insidias, ordiri stratagemata. Tota die constituebant prœlia, idest, per omne tempus sine vlla intermissione instruebant prœlia, quæ in corde meditati fuerant. Possent hæc fortasse præcipuè intelligi de prœlijs internis cogitationum malarum, quæ opera Principis tenebrarum nobis immittuntur, qualia sunt desideria impudica, tentationes infidelitatis, scrupuli, & perplexitas mentis, quæ miro modo nos cruciant, & perturbant.

Acuerunt linguas suas sicut serpentis: venenum aspidum sub labijs eorum.

Hoc est alterum malum, quod patimur ab inimicis, malum verborum, videlicet, calumniarum, detractionum, conuictorum, fraudum, & aliorum id genus malorum. & quidem finis hominum malorum conuictantium, detrahentium, fraudantium, est lucrum temporale, vel vindicta temporalis. Sed finis Diaboli est pertrahere hominem ad impatientiam, vel iracundiam, vel odium proximi, & ad peccata, quæ inde sequuntur: potest etiam per linguam serpentium intelligi prædicatio hæreticorum, quæ molliter serpit, sed letale virus inspirat, & occidit. Acuerunt, inquit, viri illi mali linguas suas, sicut serpentis, ut facilius penetrarent in aures, & in corda: venenum aspidum, nocentissimum, sub labijs eorum absconditum est, quod per linguam iaculantur in auditores. Illud, sicut serpentis, antea legebatur, sicut serpentes: sed merito correctum est, quia in hebræo erat ambiguum, an esset legendum, sicut

sicut serpens, an sicut serpentis: sed textus græcus declarauerat ambiguitatem, & posuerat, sicut serpentis, serpentes autem in numero multitudinis, neque in hebræo legebatur, neque in græco, sed in sensu nulla diuersitas est.

IV. Custodi me Domine de manu peccatoris, & ab hominibus iniquis eripe me.

Hoc est tertium malum, quod ad rem ipsam pertinet, ac primum petit cætus iustorum protectionem, ne manus peccatoris appropinquet, & noceat: ubi videtur per peccatorem intelligere Principem ipsum tenebrarum, deinde addit ad petitionem, ut etiam eripiat ab hominibus iniquis, qui membra sunt Diaboli, ne & ipsi nocendi potestatem accipiant. Quid autem mali potissimum timeat, & à quo liberari cupiat, explicat in duobus versiculis sequentibus.

V. Qui cogitauerunt supplantare gressus meos; absconderunt superbi laqueum mihi.

VI. Et funes extenderunt in laqueum: iuxta iter scandalum posuerunt mihi.

Qui cogitauerunt supplantare gressus meos. Hic est finis Principis tenebrarum, ut nos impediat à via salutis, ex qua ille irreparabiliter excidit. Itaque ipse, & Angeli eius in hoc vnum semper intenti sunt, ut supplantent gressus nostros, ut non ambulemus in via Domini, ut cadamus in ea, ut retrocedamus, ut saltem lente progrediamur. Id autem faciunt abscondendo, & multiplicando laqueos, eosque iuxta viam constituendo. Absconderunt, inquit, superbi laqueum mihi. non poterant dæmones aptius designari, quam nomine superbiorum: siquidem peccatum eorum non est ortum ex concupiscentia carnis, idest, luxuria, vel concupiscentia oculorum, idest, auaritia, sed ex sola superbia vitæ, quia similes altissimo esse voluerunt. Tob. 4. Superbiam in tuo sensu, aut in tuo verbo nunquam dominari permittas; in ipsa enim sum-

Card. Belarm. in Psal.

psit initium omnis perditio. & Iob. 41. dicitur Diabolus, Rex super omnes filios superbiæ. Abscondit autem Diabolus laqueos, quando in actionibus humanis manifestat bonum, abscondit malum, idest, facit, ut homo cogitet utilitatem, aut voluptatem, non cogitet iacturam, & amaritudinem adiunctam. manifestat adultero pulchritudinem mulieris, abscondit turpitudinem peccati. manifestat furi lucrum pecuniarum, abscondit iacturam Regni cælorum. manifestat ambitioso excellentiam gradus altioris, abscondit periculum lapsus grauioris. denique manifestat dulcedinem culpe, abscondit amaritudinem pœnæ. Extendit autem funes in laqueos, dū multiplicat laqueos, quasi dicat, extendit funes, ut inde multiplices efficiantur laquei: nam cui tendit laqueum adulterij, tendit paulò post laqueum homicidij, ut adulterium tegatur. & cui tetenderat laqueum homicidij, tendit postea laqueum periurij, ut iustam sententiam Iudicis euadat. Denique, iuxta iter ponit scandala, idest, laqueos. id enim sonat vox hebraica, mochescim, laqueos, & offendicula: quia in ipsa via, quæ est lex Domini, nulla offendicula, siue laquei esse possunt, iuxta illud Psal. 118. Pax multa diligentibus legem tuam, & non est illis scandalum. Sed cum incipimus declinare à via, ibi continuo inueniuntur laquei, & offendicula. Quare vnicum remedium est, cautè ambulare, ut Apostolus monet, & pedem extra viam legis Domini nunquam ponere.

Dixi Domino, Deus meus es tu, exaudi Domine vocem deprecationis meæ.

Domine, Domine virtus salutaris meæ, obumbrasti super caput meum in die belli.

Aduersus tot pericula inuocat auxilium Dei, sine quo nihil possumus facere. Dixi, inquit, Domino, Deus meus es tu, ac per hoc ego sum populus tuus; Dominus meus es tu, seruus tuus sum

H h h 3 ego:

ompio

ego : quare ad te pertineo, ideo exaudi vocem deprecationis meæ . Deinde, ut ostendat præsentia, & vrgentia pericula, iterum clamat Domino, Domine virtus salutis meæ, idest, ideo confidenter te rogo, quia tu solus es robur, unde pendet salus mea : tu es virtus, idest, potentia, & fortitudo, per quam ab inimicis saluus esse potero . Obumbrasti super caput meum in die belli, idest, iam aliàs protectionem tuam expertus, iterum ad te confugio . tu enim in die belli, cum videlicet grauiter ab hostibus oppugnarer, tu fuisti mihi instar galeæ, nam obumbrasti, & texisti auxilio tuo caput meum, ut mortem, quæ mihi instabat, euaderem . Sed potest etiam hoc intelligi de umbraculo ad refrigerandum caput, & totum hominem in die belli interioris, quod in æstu concupiscentiarum consistit : homo enim fatigatus, & æstuans tentationibus mali desiderij omnino aresceret & inflammaretur, nisi Deus obumbraret illi .

IX. Ne tradas me Domine à desiderio meo peccatori : cogitauerunt contra me, ne derelinquas me, ne forte exaltentur .

Consequenter ad superiora petit, semper obumbrari ab æstu mali desiderij : nisi enim concupiscentia mala nos ceperit, frustra dæmones tentant, frustra homines sæuiunt . Ne tradas, inquit, me Domine, idest, ne finas me tradi à desiderio meo peccatori, dæmoni videlicet, vel homini tentanti . Tunc enim à desiderio nostro tradimur inimicis, quando concupiscentia mala nos captiuos facit, & in potestatem Sathanæ tradit : exempli gratia, cum vides mulierem ad concupiscendam eam, concupiscentiæ te reum facit, & tentationi subiicit : cum persecutor mortem minatur, nihil potest tradere te Diabolo, nisi desiderium vitæ temporalis : cum tentator offert occasionem lucri per fraudes, nihil te tradit peccatori tentanti, nisi desiderium lucri . & idem de cæteris dici potest . Cogitauerunt contra me, ne derelinquas me, idest, ideo cupio ut non derelinquas me sine vna

braculo gratiæ tuæ, quia inimici cogitauerunt contra me, idest, meditati sunt insidias, & si fortè ceperint me, triumphabunt, & gloriabuntur, & exaltabuntur, quasi non me solum, sed etiam te superauerint . In hebræo longè aliter habetur hic versiculus . sic enim ad verbum reddi potest, Ne tradas Domine desideria impio, scelus eius ne effundas, exaltabuntur . Sed Septuaginta Interpretes legerunt easdem voces hebraicas alio modo, quàm Rabini legant . nam vox illa, maauaie, quæ significat desideria, potest legi, meaui, & significat à desiderio meo, & sic legerunt Septuaginta . sic etià illa vox, zemamo, quæ significat scelus eius : potest legi, zamemu, idest, cogitauerunt . denique illud, al thephoch, potest significare, ne effundas, & etiam, ne auertaris, supple, à me, quod est idem cum illo, ne derelinquas me . Et quamuis lectio Septuaginta Interpretum, & vulgatæ latinæ editionis verior sit, quippe antiquissima, & quam recipiunt SS. Patres : & expositio à nobis tradita, quæ est S. Augustini, & Euthymij, optima nobis videatur : tamen sensus qui eruitur ex hebraico textu, quem nunc habemus secundum puncta Rabinorum, est etiam verus, & videtur à S. Ioanne Chrysostomo traditus . hic autem est sensus, Ne tradas Domine desideria sua impio, idest, ne permittas impium satiare desiderium suum, quod de me perdendo habet . Ne scelus eius effundas, idest, ne finas scelus eius effundi super me, ne impij exaltentur, & triumphum canant .

X. Caput circuitus eorum, labor laborum ipsorum operiet eos.

Ab hoc loco Propheta prædicit penas, quas dabunt impij, qui persecuti sunt iustos . Quod autem in hoc versiculo dicitur obscure, idem est cum eo quod dicitur clarius in Psalmo 7 . Conuertetur dolor eius in caput eius : & incidit in foueam quam fecit, idest, afflictio, quam parauerunt impij iustis, super eos reuertetur eoque obruet . Id impij experiuntur in morte, & in die iudicij

מאוי
מאוי
זממו
זממו
אלתפק

cij omnibus manifestum erit: tūc enim omnis pœna iustorum conuertetur in gloriam, & omnia peccata impiorum conuertentur in miseras sempiternas. Caput, inquit, circuitus eorum, idest, summa insidiarum, quibus impij quasi per vias distortas circuibant, vt iustos perderent, quomodo Diabolus, vt leo rugiens circuit querens quem deuoret, tota, inquam, summa talium insidiarū operiet eos, in eosque recidet. & hoc idem repetens Propheta addit, Labor laborum ipsorum operiet eos, idest, labor, siue afflictio, & miseria, quam labijs suis procurabant iustis, similiter operiet eos, in eosque recidet, & ipsos operimet. In hebræo habetur in prima persona, caput circuitus mei, siue circuituum meorum. sed non dubium est, quin Septuaginta Interpretes habuerint in suis hebraicis codicibus in vltima litera, vau, non iod, & legerint mesibbau, quod significat circuitus eorū, non, vt nunc legitur, mesibbai, circuitus mei. & veriore esse lectionem quam habuerunt Septuaginta facile vnusquisque sibi persuadebit. S. Hieronymus vertit ex hebræo, Amaritudo conuiuarum meorum, pro, caput circuitus eorum. & quidem verba hebraica hanc etiam sententiam ferre possūt, quoniam, ros, & caput, & venenum significat, sed vt plurimum pro capite, siue principio accipitur. Sic etiam, mesibai, significare potest circundantium me, siue accubantium in circuitu meo: sed tamē hęc sententia nec benē coheret cum sequentibus verbis, & vera lectio, vt diximus, est ea quam habuerūt Septuaginta, quę lectio hanc sententiā non recipit. S. Augustinus per, caput circuitus, intelligit superbiā, quę est principium peccatorum; & per, laborem laborum, intelligit mendaciū, quia laborant, qui mentiri volunt, non laborant, qui vera simpliciter dicunt. Sed hęc spiritualis potius, quam literalis expositio est. Nos Chrysostomum sequuti sumus.

XI. Cadent super eos carbones, in ignem deijcies eos, in miserijs non subsistent.

Pergit explicare pœnas impiorum. Cadent, inquit, super eos carbones; per carbones ignis intelliguntur acerrima supplicia, per verbum, cadent, significatur, ea supplicia ab alto descendere, & iudicio videlicet Dei Iudicis supremi. Ac ne putaremus, paucos, aut paruos futuros eos carbones, addit, In ignem deijcies eos, idest, tanta erit copia carbonum super eos cadentium, vt obruantur, & opprimantur ab eis. Sic enim Deus in ignem deijcet impios, quia cooperiet eos igne de cælo cadente. atque ad maiorem explicationem addit, In miserijs non subsistent, idest, oppressi miserijs, ita iacebunt, vt se attollere, & surgere, ac subsistere non possint. In græco legitur in datiuo, in igne deijcies eos, idest, igni de cælo demisso deijcies. sed idem est sensus. Ex hebræo, pro, in miserijs non subsistent, Sanctus Hieronymus vertit, in foueas, vt non consurgant. At Septuaginta reddiderunt sensum: deiectio enim in foueas profundissimas gehennæ, intolerabilis miseria est, præsertim cum inde nulla consurgendi spes maneat. Alij exponunt, non subsistent, idest, non tolerabunt, & ideò deficient, & morientur, sic tamen, vt nunquam mortem finiat. Sed prior expositio est conformior verbis textus hebraici.

Vir linguosus non dirigitur in terra, virum iniustum mala capient in interitu. XII.

Prædixit Propheta pœnas æternas impiorum: nunc addit de pœnis etiam huius vitæ. Vir, inquit, linguosus non dirigitur in terra, idest, vir promptus ad loquendum, mendax, adulator, detractor, conuicijs assuetus, rixosus, non prosperabitur in terra: eiusmodi enim odio, vt plurimum, habentur tum à bonis tum à malis. Ideò præcipit S. Iacobus, Sit autem omnis homo velox ad audiendum, tardus autem ad loquendum, & tardus ad iram. Virum iniustum mala capient in interitu. non solum non dirigitur, nec prosperabitur vir linguosus, ac per hoc iniustus; sed mala, quæ illum capient,

H h h 4 non

non erunt ad præmium patientiæ, ut iustis esse solent, sed ad interitum sempiternum. Illud, capient, in græco, & in hebræo est, venabuntur, proinde exponendum est, capient, ut prædam, vel ut venationem, de improbitate, & non expectata. Sic enim viri iniusti dum intenti sunt, ut capiant, & spolient iustos; ipsi nihil tale metuentes capiuntur à Diabolo, ut fera à venatore; nec solum à Diabolo, sed etiā miserijs multis, anxietatibus, sollicitudinibus, timoribus, amoribus capiuntur: sed hoc interest inter bonos & malos, quod bonis omnia cooperantur in bonum, & ad vitam: malis omnia cooperantur ad interitum, & miseriam sempiternam. Illud, in interitu, in hebræo, & græco habetur, in interitum: proinde vel in latina editione est error librariorum, vel in interitu, debet accipi pro, ad interitum. Posset quidem sic exponi hic locus, iniustum mala capient in interitu, idest, quando morietur iniustus, tunc, cum mala capient. & sic videtur intellexisse S. Hilarius, qui ex ponit hunc locum de Iuda, quem mala ceperunt in interitu, quia se ipse suspendio enecavit. prior tamen expositio, quæ est sanctorum Chrysostomi, & Augustini, magis conuenit textui græco, & hebraico. Quidam modernus per vocem hebraicam, lemadche-photh, contendit esse, vertendum, celeriter, ut sensus sit, iniustum mala capiet celeriter, & allegat quandam versionem apud Chrysostomum. Sed Septuaginta & S. Hieronymus verterunt interitum. & moderni etiam linguæ hebraicæ periti vertunt, ad expulsionem, quod idem est cum interitu, in quo anima expellitur à corpore, & homo expellitur à vita. Omnes Patres, imò omnes alij tractatores intelligunt per eam vocem, in interitum, aut ruinam. denique S. Ioannes Chrysostomus non adducit illam nouam translationem ad hunc versiculum, sed ad superiorem. quare caret omni fundamento expositio moderni, sed alioqui docti expositoris.

XIII. Cognoui quia faciet Dominus iudicium inopis, & vindictam

pauperum.

Veruntamen iusti confitebuntur nomini tuo, & habitabunt recti cum vultu tuo. XIV.

Concludit, certam esse liberationem, & felicitatem iustorum, ut etiam supplicia, & miseriam impiorum. Cognoui, inquit, quia faciet Dominus iudicium inopis, idest, certo scio tum ab experimēto proprio, tum ab exemplis maiorum, tum ab ipsa Dei iustitia, & promissis, curæ esse Deo viros humiles & pauperes, qui etiam si diuitiæ fortè affluant, non apponunt illis cor ut ad res proprias, sed æconomos Dei se esse intelligunt. Cognoui, inquit, quod Dominus sine dubio iustissime iudicabit causas pauperum suorum, & vindictam faciet illorum, puniens digna animaduersione persecutores eorum. Ipsi autem iusti confitebuntur nomini Domini, non sibi tribuentes innocentiam, sed gloriam dantes gratiæ eius: vel etiam confitebuntur, idest, laudabunt in æternum Dominum, sicut in æternum habitabunt in domo eius cum vultu ipsius; videntes facie ad faciem, & fruētes visione eius. habitare cum vultu Dei, est cum videre, & cognoscere sicuti est: ex vultu enim persona cognoscitur. nam si totum hominem videas, vultu solo excepto, non eum cognosces. si autem vultum solum videas, reliquum corpus non videas, omnino cognosces.

PSALMVS CXL.

Titulus, & Argumentum.

Psalmus David.



IC Psalmus eiusdem argumenti est cum superiore. notat autem S. Ioannes Chrysostomus, decreto Patrum, dici solitum hunc Psalmum, quotidie ad Vesperas, quemadmodum Psal. 62. dicitur quotidie ad laudes matutinas. Vterque igitur est ardens oratio ad Deum, sed ille matutinus fugat tene-

tenebras noctis, & conciliat nobis solem iustitiæ: iste vespertinus abstergit maculas peccatorum interdictu contritæ, ut securi requiescamus in nocte.

Explicatio Psalmi 140.

- I. Domine clamaui ad te, exaudi me, intende voci meæ, cū clamauero ad te.

Verba sunt corporis Christi, sine cœrens fidelium inter hostium agmina constituti. Domine clamaui ad te, ut auxilium ferres inter tot pericula laboranti; & quia clamaui, id est, magna voce in terriori, magnoque affectu cordis, inuocaui te, exaudi me. In hebræo est, festina mihi, id est, ad adiuuandum me festina, & sic ipsa, & factis exaudi me. Neque solum hodie clamantem, exaudi me, sed intende voci meæ, cū clamaui ad te, id est, quotiescunque clamauero ad te, tu quoque intende voci meæ aures tuas.

- II. Dirigatur oratio mea, sicut incensum in conspectu tuo; eleuatio manuum mearum sacrificium vespertinum.

Explicat nunc quid petat, & in quo velit exaudiri à Deo. Ac primum recto ordine, petit, ut Deus adiuuet eum in bene orando: nam ut Apostolus dicit, quid oremus nescimus, & pari ratione, quomodo oremus nescimus, nisi spiritus adiuuet infirmitatem nostram. Petit ergo, ut Deus illi auxilio gratia sue adsit, ut bene oret. Qualitates autem bonæ orationis declarat similitudine thimiamatis, quod offerebatur in templo ex præcepto Dei, mane, & vespere, Exo. 30. Dirigatur, inquit, oratio mea sicut incensum, id est, hoc primum peto, ut per gratiam tuam oratio mea dirigatur ad te ad modum thimiamatis. Porro thimiamata illud has habebat qualitates. Primo, constabat ex quatuor generibus aromatum, thure, galbano, onyche, stacte, ut S. Hilarius monet: hinc efficiebatur odor suauissimus. Secundo, offerebatur in templi

parte nobilissima, & interiore, quæ dicebatur Sancta Sanctorum, vbi erant tabulæ testamenti, & altare aureum. Tercio, offerebatur per summum sacerdotem. Quarto, ponebatur super ignem, & inde excitabatur fumus recta sursū ascendens. quatuor aromata sunt quatuor virtutes, fides, fiducia, charitas & humilitas. ex his cōponitur oratio Deo gratissima. Tēplum Dei est homo. Vos estis, inquit, Apostolus templum Dei 1. Cor. 6, sed pars interior est anima in cuius mēte est lex Domini digito Dei scripta: & in cuius voluntate est altare aureum, cor videlicet mundum, & ornatum gratia Dei. Summus Sacerdos est Christus. per illum enim, ut aduocatū nostrum, sēper orare debemus, & ideo singulas preces concludimus per Dominum nostrum Iesum Christum. Deniq. ignis, qui fumum suauissimum, & directē sursū ascendentem excitat, est ser uor desiderij: sed in recta ascensione notatur recta intentio, & iugis attentio. qui enim orant ut videantur ab hominibus, illi aura tēporali detorquent incensum, ut nō recta ascendat. illi etiam qui euagationes mentis habent, non dirigunt orationem ut debent: euagationes enim veluti flatus ventorum distrahunt, & dissipant fumum orationis, ut non recta sursū ascendat: & quia valde difficile est liberari ab omni euagatione mentis, ideo Propheta huius rei propriē meminit dicens, Dirigatur oratio mea, sicut incensū in conspectu tuo. Quod sequitur, Eleuatio manuum mearum sacrificium vespertinum, eiusdem rei repetitio est: nam per eleuationem manuum, oratio significatur, quia eleuando manus, orare solebant hebræi, ut etiam nos facimus. Psal. 133. In noctibus extollite manus vestras in sancta, & benedicite Dominum. & Apostolus 1. Tim. 2. Leuantes puras manus sine ira, & disceptatione. Itaq. à ritu eleuandi manus significatur oratio. Per sacrificium vespertinū, intelligitur oblatio incensi, quæ vespere fiebat. Est igitur sensus, eleuatio manuum mearū, id est, oratio, quam eleuatis manibus fundo, sit veluti sacrificiū incensi, quod ad vespere

ram

ram offerebatur. Nisi magis placeat, per sacrificium vespertinum, intelligi mactationem Agni immaculati, quæ vespere fiebat. Cur autem Propheta optet, orationem suam similem esse sacrificio vespertino potius, quam matutino, cū tam oblatio thimiamatis, quam Agni mactatio fieret mane, & vespere ratio est, vel quia Psalmum hūc cecinit David ad vespem, vt etiam Ecclesia Christiana in vespere eundem Psalmum canit; vel quia sacrificium vespertinum nobilius erat, quia figura erat sacrificij Crucis, quod ad vespem factum est.

III. Pone Domine custodiam ori meo, & ostium circumstantiæ labijs meis.

Hæc est secunda petitio, quam exaudiri cupit à Domino, vt videlicet detur sibi donum loquendi, & tacendi, quando oportet: nam qui non offendit verbo, hic perfectus est vir, vt dicit S. Iacobus. & aliud est tempus loquendi, aliud tacendi, vt dicitur Eccles. 3. Sumit autem Propheta, vt hæc explicet, metaphoram à custodia portarum domus, vel ciuitatis: duo enim sunt necessaria ad hoc, vt exeant, qui debent exire, & non exeant, qui non debent exire; Ianitor, & ostium: nam ostium sine ianitore non sufficit, quia vel semper erit apertum, vel semper clausum: Ianitor sine ostio nō facile potest custodire portam, nisi semper vigilet, & vires habeat ad impediendum, ne quis ingreditur, vel egrediatur ipso inuito: sed cū ostium, & ostiarius adsunt, omnia sunt curata, & facilia. Ait igitur, Pone Domine custodiam ori meo, id est, os meum est quasi porta vnde exeunt verba, & per verba exeunt cogitata, & facta; ideo rogo, vt adhibeas custodiam, ianitorem videlicet, qui diligenter custodiat. Et ostium circumstantiæ labijs meis, id est, quia solus ianitor egrè custodire potest hanc portam; rogo etiam vt apponas ostium circumstantiæ, id est, ostium circumstans, siue ostium munitionis, id est, munitum, & fortè, vt expugnari non possit. in hebræo ad verbum legitur, Custodiā super ostium labiorum meo-

rum, vt sensus sit, pone custodiam ori meo, custodiam, inquam, super ostium labiorum meorum: sed eadem sententia est. Porro ostiarius, & ostium significat in presenti duo dona Spiritus sancti: vnum ex parte intellectus, vt sciat homo quādo, & quomodo, & quid loqui, vel tacere debeat: alterum ex parte voluntatis, vt audeat loqui, quod oportet, & timeat loqui quod non oportet. quæ dona dicuntur Itala 11. Spiritus consilij, & fortitudinis. quæ sunt ferè eadem cum virtutibus prudentia, & charitate. Non autem hæc ita petuntur à Deo, vt non debeamus etiam nos diligentiam adhibere, vt custodiamus os nostrum; sed vt intelligamus, ipsam etiam diligentiam nostram donum esse Dei, & in nullo gloriemur, quando nostrum nihil est, vt monet Sanctus Cyprianus lib. 3. ad Quirinum cap. 41. *multo sup*

IV. Non declines cor meum in verba malitiæ, ad excusandas excusationes in peccatis.

Hæc est tertia petitio, vt quoniam adhibita etiā omni custodia, tamen fragilitas humana facit, vt septies in die cadat iustus, & in multis offendamus omnes: Deus auxilio suo nobis concedat, vt peccata liberè confiteamur, ne dū excusando sanī videri volumus, à celesti medico non sanemur. Non declines, inquit, cor meum in verba malitiæ, id est, non permittas, vt quando peccauimus, cor nostrū declinet in verba mendacij, & simulationis. Ad excusandas excusationes in peccatis, id est, ad excusanda peccata varijs pretextibus: nā excusare excusationes, phrasi hebraica, est facere excusationes, id est, texere pretextus, quomodo dicunt, præliari prælia, pro facere prælia; & iudicare iudicia, pro facere iudicia. In hebræo est verbum generale, halal, quod operari significat. itaq. verti poterat, ad operandas operationes in peccatis. Sed Septuaginta declarauerūt, per, operari, hoc loco significari, pretextere, quod est idē cū excusare. Ipsi etiam Rabini docent, halal, non esse operari quomodocunque, sed operari ex occasione, & pretextu. Cum

V. Cum hominibus operantibus iniquitatem, & non communicabo cum electis eorum.

Quarta petitio est, vt custodiat nos Deus à consuetudine, & familiaritate impiorum: multi enim innocentia conseruarent, nisi in peruersos amicos, & sodales inciderent. Porro pars prima huius versiculi pendet à versiculo superiore, & hic est sensus, Nō declines cor meum in verba malitiæ ad excusandas excusationes in peccatis, cum hominibus operantibus iniquitatem, idest, non patiaris me querere excusationes peccatorum, vt ij faciunt, qui iniqui sunt, vt non fiam socius eorum. Et non communicabo cum electis eorum, idest, & sic per gratiam tuam adiutus non communicabo cum conuiuijs eorum, sed fugiam ipsorum consortium. Illud, non communicabo, in græco est, non combinabo, & sic legunt S. Hilarius, & Augustinus. sed idem est sensus, nam combinare est coniungi binos, & binos, vt cum duo socij coniunguntur in mensa, vel in opere aliquo. In hebræo est, non comedam, idest, non conuiuabor, non assidebo in mensa. Itaque vnus textus alium declarat. ac per hoc, non communicabo, idem est, ac si dixisset, non communicabo in mensa; & hoc ipsum magis declaratur ex verbis sequentibus. nam cum electis eorum, non significat, vt ij existimant, qui verba hebraica non legerunt, cum viris electis; sed cum electis cibus, siue, vt vox hebraica sonat, cum dulcibus cibus eorum. Itaque sensus est, Nō communicabo cū electis cibus eorum, idest, non ero particeps familiaritatis, conuiuiorumque ipsorum. Quamuis enim vbiq. noceat malorum conuersatio, sed nusquam magis, quàm in conuiuijs, & comotationibus.

VI. Corripiet me iustus in misericordia, & increpabit me: oleum autem peccatoris non impinguet caput meum.

Quinta petitio est, vt ex gratia Dei incidamus in amicos ex charitate corripientes, non in adulatōres falsis laudi-

bus blandientes, & decipientes. Et hoc vnum ex magnis Dei beneficijs est, vt inueniamus fideles amicos, qui vera nobis de nobis dicant, & nos ex magno Dei beneficio libenter eos audiamus, & ex corde gratias agamus. Nam apud eos qui de Mundo sunt, & qui hoc Dei donum non acceperunt, obsequium amicos, veritas odium parit. Corripiet, inquit, me iustus in misericordia, idest, reprehendet, ac vt vox hebræa sonat, feriet me peccantem vir iustus, vt sanet, non iniustus, vt occidat; in misericordia, in charitate, quia misereatur languentis, non in iracundia, & felle amaritudinis, quia vlisci cupit iniuriā. Iste, inquam, increpabit me, seuerius castigans delicta mea, oleum autem peccatoris non impinguet caput meū. Oleum peccatoris, idest, vnguentum, quo suauiter & cum voluptate perungitur caput; significat blandiloquentiam adulatoris, qui peccata extenuat, vel excusat; imò etiam sub aliquo colore, vt benefacta laudat. In hebræo explicatur vtrumque simul, & suauitas, & perniciēs adulationis: dicitur enim, oleum veneni, siue amaritudinis, vt vertit S. Hieronymus: & est in verbis elegans allusio: nam venenum, & caput eadem voce significantur: ros enim & caput, & venenum significat. Itaque ait, oleum ros, non impinguet meum ros. Neque est admittenda eorum expositio, qui vtroq. loco per ros, intelligi volunt caput, & per oleum capitis, accipiunt oleum principale, & pretiosum, & sensum esse volunt, Corripiet me iustus in misericordia, quia correptio fraterna est oleum principale, quod non destruit caput. Hæc, inquam, expositio non est admittenda, quia non solum repugnat vulgare editioni, sed etiam versioni S. Hieronymi, & Septuaginta Interpretum, & expositioni omnium veterum Patrum latinorum, & græcorum: neq. obstat, quod pro, impinguet, in hebræo est, franger: nā non est certum, verbum, iani, significare, franger, cūm desit litera aleph in fine, & cūm Septuaginta, & S. Hieronymus verterint, impinguet. Adde etiā, quod

vox,

vox, impinguet, non repugnat voci hebraica, quæ frangere, & destruere significare dicitur, imò cum ea optimè cohæret: nam ideò Septuaginta Interpretes non dixerunt, liniat, aut perfundat, quæ verba in bonum sonant, sed, impinguet, quod sonat in malum; pinguedo enim deformat, & destruit caput: & prudentissimè considerauerunt Septuaginta viri, oleo non posse frangi, aut destrui caput, quasi malleo contunderetur, sed destrui per deformationem, quam pinguedo adfert; ideò non dixerunt, non destruat, sed non impinguet caput meum.

VII. Quoniam adhuc & oratio mea in beneplacitis eorum: absorpti sunt iuncti petrae Iudices eorum.

Hic versiculus omnium iudicio obscurissimus hunc sensum ex Chrysostomo habere potest, Non solum non communicabo cum impijs; sed adhuc oratio mea ad Deum est in beneplacitis, eorum, idest, aduersus eorum vitia, & scelera, in quibus ipsi sibi placent. Sed ipsi breui peribunt, sicut Iudices eorum, idest, Principes eorum, & Duces aliorum ad malum, absorpti sunt iuncti petrae, idest, allisi ad petras perierunt. In hebræo est, Precipitati sunt ad manus petrae, & sensus est idem: significatur enim velox interitus impiorum, qualis est eorum, qui absorbentur à fluctibus marinis, dum agitati ab vndis alliduntur ad scopulos. Sanctus Augustinus existimat prædici conversionem infidelium superbiorum, ut sensus sit, Veniet tempus, quando oratio mea, quæ est, Dimitte nobis debita nostra, erit in beneplacitis eorum, idest, placebit, & frequentabitur ab eis: nam Iudices eorum, Philosophi gentiles, qui de virtutibus, & vitijs iudicabant, iuncti petrae, idest, comparati ad Christum, absorpti sunt, euanuerunt, & nihil sciuisse ostensi sunt. sed prior expositio est magis literalis, & communius recepta.

VIII. Audient verba mea, quoniam potuerunt, sicut crassitudo terræ erupta est super terram.

Redit ad id quod dixerat, Oratio mea in beneplacitis eorum; & addit, multos impios, qui sibi ipsi in peccatis complacebant, audituros verba sua, & per ea conuertendos esse ad Deum: quomodo enim terræ durities aratro scinditur super terram; sic humanum cor scinditur potentia, & efficacia verbi Dei. Audient, inquit, illi pro quibus oratio à me fiebat, verba mea, quoniã ea verba potuerunt, siue, ut legit S. Augustinus, præualuerunt, efficacissima fuerunt ad conterenda corda eorum; sicut crassitudo terræ erupta est super terram, idest, sicut durities, & crassities terræ erumpi solet vi ligonis, aut aratri super terram. In hebræo, & aliquis grecis habetur, Audient verba mea, quoniam dulcia, siue decora fuerunt. sed idem est sensus, verba enim tunc sunt potentia, & efficacia, & prævalent in animis hominum, quando dulcia, & decora sunt, atque adeò placent, & delectant, & persuadent.

Dissipata sunt ossa nostra secus IX. infernum: quia ad te Domine, Domine oculi mei, in te speravi, non auferas animam meam.

Hæc est vltima petitio, quam exaudi ri initio Psalmi postulauerat, ut videlicet Deus liberet animas nostras ab omni periculo temptationum. Dissipata sūt, inquit, ossa nostra secus infernum, idest, propter multitudinem, & gravitatem temptationum, virtus & fortitudo nostra, quæ per ossa significatur, ita dispersa, infirmata, & debilitata est, ut ad os inferni penè peruenierit, ut videlicet penè ad nihilum redacta sit: & quia in his omnibus ad te Domine sunt oculi mei, ad auxilium tuum respexi, in te speravi; oro ut non auferas animam meam, idest, non sinas tolli vitam meam, non patiaris me perire. Iuxta interpunctionem hebraicam coniunguntur illa, Sicut crassitudo terræ erupta est super terram, dissipata sunt ossa nostra secus infernum; ut sensus sit, Quemadmodum terra scinditur aratro, & rumpitur, ita ut partes terræ hinc inde spargantur, ita dissipata sunt ossa nostra

stra secus infernum in hac magna tribulatione: sed nos interpunctionem græcam, & latinam sequuti sumus, quoniam interpunctio non est ab ipso Propheta apposta, sed ab interpretibus addita.

- X. Custodi me à laqueo, quem statuerunt mihi, & à scandalis operantium iniquitatem.

Declarat, unde timeat mortem; ac dicit, se timere à laqueis, & à scandalis, idest, à tentatione Diaboli, & à malis exemplis hominum. Custodi me à laqueo, quem statuerunt mihi insidiatores, siue is laqueus sit concupiscentia carnis, siue concupiscentia oculorum, siue superbia vitæ: & à scandalis operantium iniquitatem, idest, ab exemplis carnalium, cupidorum, & superbiorum: quamuis in hebræo sit potius repetitio eiusdem rei, idest, à laqueo, quem posuerunt mihi, & à musculis, siue laqueis operantium iniquitatem: tamen in sensu non est discrepantia: nam scandalum quoque est genus laquei, & musculæ.

- XI. Cadent in retiaculo eius peccatores: singulariter sum ego, donec transeam.

Docet in fine, illos tandem casuros esse in retia Diaboli, qui amant peccata: se autem, & sui similes, qui oderunt peccata, liberos euasuros: quæ admonitio demonstrat, hominem esse liberi arbitrij, & simul valde consolatur eos, qui timent Deum. Cadent, inquit, in retiaculo eius, idest, in rete principis venatorum qui est Diabolus, peccatores, idest, qui delectantur peccatis, qui sunt, & esse volunt peccatores. Singulariter sum ego, donec transeam, idest, ego autem solitarius ero, donec transeam omnes laqueos, & retia; de Mundo non ero, quamuis in Mundo, ut peregrinus esse cogar, donec transeam ad patriam, ubi nulla erunt pericula. Per pronomen, eius, aliqui intelligunt Deum, ut sensus sit, peccatores capiendos retibus Dei ad supplicium. Ita Chrysostomus, & Theodoretus: sed

quia illud, eius, est relatiuum ad aliquid antea nominatum, & Dei nulla mentio facta est; ideo probabilius est, referri ad Diabolum Principem peccatorum, ut sanctus Hilarius exponit. Illud autem, singulariter sum ego, sanctus Augustinus exponit de Christo, qui in passione fuit relictus solus, cum omnes discipuli fugerint, & in rete Diaboli per negationem, vel prodicionem, vel nimium metum, vel scandalum acceptum aliquo modo inciderint. Ipse enim Dominus, ait, Omnes vos scandalum patiemini in me in nocte ista, Matth. 26. & futurum est, ut dispergami in propria, & me solū relinquantis, Ioan. 16. Sed hæc expositio vera, & pia non videtur literalis; & ideo Chrysostomus potius in expositione literalis sequuti sumus: qui S. Ioannes Chrysostomus rectissime monet, non satis esse, si aliquo tempore singulares simus, & solitarij, ac penitus segregati à moribus peccatorum; sed necesse esse, ut tales simus donec transeamus, perseueranter usque ad vitæ finem.

PSALMVS CXLI.

Titulus, & Argumentum.

Intellectus David cum esset in spelunca, Oratio.



ITVLVS demonstrat tempus, & locum, & occasionem, & materiam Psalmi. Tempus, fuit cum fugisset à Saule ad Regem Achis, & ab illo etiam male habitus, contulisset se in speluncam Odollam solus, atque in maximo vitæ periculo constitutus, ut habemus lib. 1. Reg. c. 22. Locus est, ipsa spelunca Odolla: nam quod alij dicunt de spelunca Engaddi, de qua lib. 1. Reg. c. 24. non est probabile: quia in hac secunda spelunca Saul potius in periculo vitæ fuit, quàm David. Occasio, fuit persecutio Saulis, & periculum à Rege Achis. Deniq. materia, siue argumentum, est oratio ad Deū, qua liberationem petit à peri-

periculo imminente. Sensus tituli hic est, Intellectus Dauid, idest, in hoc Psalmo declaratur prudentia, & sapientia Dauid, qui cum esset delitescens in spelunca, sapienter cogitauit, vnicum remedium in tantis malis esse orationem ad Deum. Rectè autem totus hic Psalmus altiore sensu refertur ad Christum filium Dauid, cum oraret in horto, vel in cruce desertus ab omnibus, & in mortis præsentissimæ periculo constitutus.

Explicatio Psalmi 141.

- I. **V**oce mea ad Dominum clamaui, voce mea ad Dominum deprecatus sum.
- II. Effundo in conspectu eius orationem meam, & tribulationem meam ante ipsum pronuncio.

Hoc principium Psalmi nihil aliud continet, nisi argumentum, quod videlicet Dauid orationem fundat ad Deum: sed verba singula considerata sunt. Illud, voce mea, significat, Dauidem non orasse solâ voce corporis sui, vt faciunt, qui non intelligunt, vel non attendunt quid dicant; sed orasse voce sua, quam ipse in corde formabat, & per organum corporis etiam foris emittebat. Illud, clamaui, significat, vt alias diximus, vehementiam desiderij. Illud, deprecatus sum, est explicatio clamoris: clamant enim ad Dominum etiam qui blasphemant, & maledicunt, sed non orant: hic autem precando, & inuocando clamabat. Illud, effundo orationem in conspectu eius, significat orationem illam factam fuisse, vbi solus Deus videbat, in spelunca, quasi in clauso cubiculo, vt Dominus postea monuit esse orandum: sed præterea significat, præcipuum clamorem fuisse in corde, vbi re vera solus Deus conspicit. Illud, & tribulationem meam ante ipsum pronuncio, est explicatio præcedentium verborum: nam effundere orationem in conspectu eius, & tribulationem ante ipsum pro-

nuntiare, idem sunt: tunc enim effunditur oratio, cum tota paulatim ex vase cordis producitur, vt ab aliquo videatur: hoc autem fit, cum tribulatio in oratione per partes ad aures audientis pronuntiatur.

In deficiendo ex me spiritum III. meum, & tu cognouisti semitas meas.

Explicat, cur, & quando pronuntiauerit tribulationem suam coram Deo. In deficiendo, inquit, ex me spiritum meum, cum ex me ferè discederet spiritus meus vitalis; cū deficeret vita mea, & in vicinia mortis essem. Vox hebraica, significat angustiari, deficere, constringi, & operire seipsum, vt faciunt qui valde timent. Id autem optimè Dauidi in spelunca latitanti, & in magno vitæ periculo constituto; sed verius conuenit Christo in horto, vel in cruce oranti. S. Augustinus applicat sanctis Martyribus pro Fide agonizantibus. Et tu cognouisti semitas meas, idest, oraui cum deficeret spiritus meus, & oraui ad te, quia tu omnium optimè cognouisti semitas meas, actiones, & studia mea, & nosti, quâ sine vlla iustâ causa hæc patior.

In via hac, qua ambulabam, ab IV. absconderunt laqueum mihi.

Docet, afflictionem suam primum incepisse ab insidijs inimicorum, deinde ab aperta violentia. Saul enim sæpè procurauit mortem Dauidis per insidias, mittens eum ad prælia, & sperans in prælijs occidendum, sed cum id non succederet, aperta vi illum aggressus est. Sic etiam Dominum nostrum sæpissimè tentarunt capere in sermone, vt eum perderent, sed cum sapientia vinceret malitiam; violenter ceperunt, & per Pilatum crucifigi postularunt. In via hac, qua ambulabam, idest, in via iustitiæ, & mandatorum Dei, in qua ambulabam, in ipsis semitis, quas tu optimè nosti, absconderunt laqueum mihi. Explicemus hoc exemplis. Saul obtulit filiam suam Dauidi in coniugem, modo ille interficeret ducentos Philistæos, cum quibus tunc bellum iustum erat

erat populo Dei. Id autem fecit Saul, sperans Dauidem in eo praelio interficiendum: sed ille à Deo adiutus obediuit Regi, & progressus ad praelium ducentos Philistæos interfecit. Sic etiam Pharisei obseruabāt Christum, an Sabbatho curaret, ut postea dicerent, Non est hic homo à Deo, qui Sabbathum non custodit: ita ponebant laqueos in via mandatorum Dei: sed ille curabat, & ostendebat, ea curatione non violari Sabbathum; sicut verè non violabatur, cum essent illa opera non seruilia, sed diuina. sic alias oblata adultera ponebant laqueos in via iustitiæ dicentes, Hanc mandauit Moyses lapidare, tu quid dicis? Notat hoc loco sanctus Augustinus, in ipsa via Domini non posse poni laqueos, sed iuxta viam, ut dictū est in Psalmo 139. iuxta iter scandalum posuerunt mihi; unde, & Ecclesiasticus cap. 9. dicit, Ignoras, quia in medio laqueorum ingrederis. Sunt enim laquei à dextris & à sinistris, in medio est via iustitiæ. Quod ergo hic dicitur, In via absconderunt laqueos, intelligendum est, opinione ipsorum, nō re vera; nam cum illi sint extra viam, & existiment se esse in via, ponunt laqueos iuxta viā, existimantes se ponere in via: sed vir iustus non declinans à via iustitiæ, neque ad dexteram, neque ad sinistram, laqueos omnes euadit.

V. Considerabam ad dexteram, & videbam; & non erat qui cognosceret me.

Hæc iam pertinent ad violentiam. Inimici enim, quibus insidiæ non profuerunt, cōuertunt se ad vim apertam. In illa autem pressura, Considerabam, inquit, ad dexteram, idest, ad auxilia amicorum, & videbam, num quis mihi socius, & amicus adesset: & non erat, qui cognosceret me, idest, nullus mihi notum se esse confiteri ausus est. Hæc Dauidi conueniunt, qui Saulis persecutionem fugiens ad Regem Achis peruenit, sed & ille inimicum se ostendit; proinde solus in speluncam se contulit. Sed apertius Christo accommodantur, qui in passione multos videbat à sinistris,

idest, inimicos, & aduersarios: à dextris autem, idest, amicos, & notos nullos habuit. Nam & Euangelista dicit, Strabāt autem omnes noti eius à longe. & Petrus ipse, qui præcipuus erat amicorum, cum iuramento dixit, Non noui hominem hunc. Rectè igitur Dominus dicebat, Non erat, qui cognosceret me. In hebræo sunt verba infinitiui modi, considerare, & videre: sed modus infinitus deseruit etiam alijs modis, ac præsertim indicatiuo: & sensus etiam esse potest, seruato modo infinito, Erat mihi considerare, & videre, idest, considerabam, & videbam, quo modo Germani, & Turcæ, qui non tenent perfectè linguam Italicam, vel Latinam, dicunt, Io stare Todeſco, Io stare Turco, & passim vtuntur modo infinito pro indicatiuo.

Perijt fuga à me, & non est qui VI. requirat animam meam.

Ostendit, se in ijs angustijs fuisse, ut non solum ab alijs auxilium habere non posset, sed neque fuga seipse iuuare posset. Perijt, inquit, fuga à me, idest, nullum remanet effugium. Et non est qui requirat animam meam, id est, non inuenitur, qui sollicitus sit de vita mea, ne pereat. Et quidem Dauid querebatur sibi aditum ad fugam corporalem non patere, quia fugere non poterat: sed Christus dicit, perijsse à se fugam, quia fugere nolebat, & ipse sibi, & Pater ei fugam interdixerat. Fuga enim non minus perit ab illo, qui non potest, quàm ab illo, qui non vult fugere. Et verè non erat, qui requireret vitam Christi, ut eam seruaret, cum ipse idem dixisset, Ego pono animam meam: & Bonus Pastor animam suam dat pro ouibus suis, Ioan. 10. & Patri dixerit, Deus meus ut quid dereliquisti me? Matth. 27.

Clamaui ad te Domine, dixi, VII. tu es spes mea, portio mea in terra uiuentium.

Exclusus Dauid ab omni humano auxilio, ad Deum recurrit, cui nihil difficile est; & quoniam vir erat spiritualis,

&

& nouerat Deum aliquando amicos suos in terra peregrinationis huius asilgere, vt in patria gloriosius coronetur; dicit, Clamaui ad te Domine, dixi, tu es spes mea, hic in peregrinatione; portio mea, hæreditas uidelicet, in terra uiuentium. Sed cum ad Christum hæc referuntur, accipienda sunt pro corpore eius, quod est Ecclesia; vel si in persona propria Christus loquitur, accipienda sunt de expectatione resurrectionis, & gloriæ corporis: quasi dicat, Quia non est qui requirat animam meam, idest, vitam meam corporalem, ne pereat; clamaui ad te Domine Pater, dixi, tu es spes mea, idest, expectatio mea, vt non des sanctum tuum videre corruptionem; sed ostendas illi vias vitæ: tu quoque es portio mea in terra uiuentium, idest, tu facies, vt caro mea glorificata per resurrectionem, adipiscatur per ascensionem hæreditatem suam in superna Hierusalem, quæ est terra uiuentium.

VIII. Intende ad deprecationem meam, quia humiliatus sum nimis.

IX. Libera me à persecutoribus meis, quia confortati sunt super me.

Duplici argumento petit à Deo liberationem, tum quia ipse nimium depressus sit, tum quia inimici eius nimium sint exaltati, & aduersum se innocentem viribus præualuerint. Intende ad deprecationem meam, & tandem exaudi me, quia humiliatus, idest, depressus, & afflictus sum valde. Libera me à persecutoribus meis, quia confortati sunt, idest, roborati sunt, & viribus aucti, vt facile præualere possint. Hæc David merito dicebat, cum ipse solus lateret in spelunca, & hostis eius Saul exercitum armatum duceret. Christus autem plane ad literam dicere poterat, Humiliatus sum nimis, quia humiliavit semetipsum factus obediens usque ad mortem, mortem autem crucis. Item humiliatus erat nimis, cum penderet inter latrones, cui iure conuenit sedere super Cherubim. Verè etiam inimici eius confortati erant valde, quando venit hora ipsorum, & potestas data, est te-

nebris, vt in ipsum Solem iustitiæ ad tempus præualere viderentur.

Educ de custodia animam meam x. ad confitendum nomini tuo: me expectant iusti, donec retribuas mihi.

Quod attinet ad Dauidem, sanctus Ioannes Chrysostomus intelligit per custodiam, tribulationes, & afflictiones, ob quas se in speluncam abdiderat, vt sensus sit, Educ me de his afflictionibus, vt de hac spelunca egressus, & liberè vbique discurrens, laudem nomen tuum. Id enim expectant omnes iusti, vt à tua prouidentia tribuatur mihi innocenti liberatio. Sed fortasse Dauid, vt vir sanctus, & à Deo mirificè illustratus altius aspirabat, & de mortali corpore, tanquam de custodia educi desiderans, cum Apostolo dicebat, Quis me liberabit de corpore mortis huius? Illi enim verè confitentur nomini Domini, qui illuc ascendunt, vbi qui habitant, in secula seculorum laudant Dominum: quod confirmatur verbis sequentibus, Me expectant iusti donec retribuas mihi: expectabant enim Prophetam iustum animæ sanctorum Patriarcharum in Limbo, donec requies tribueretur ei: & Angeli sancti in cælo, donec vera, atque æterna felicitas retribueretur meritis eius. Sed quod attinet ad Christum, orat educi de custodia corporis passibilis & animalis, & induere per resurrectionem corpus impassibile & spirituale, ad confitendum nomini Domini, vt qui laborauerat prædicando populis, deinceps requiescat laudando Patrem. Atque vt sanctus Augustinus, sanctus Hieronymus, & sanctus Hilarius docent, Christo maxime propriè conuenit quod sequitur, Me expectant iusti, donec retribuas mihi: omnes enim iusti, & qui mortui fuerant ab origine Mundi, & qui vivebant in carne, vt Apostoli, alijque fideles discipuli; expectabant maximo desiderio Christum resurgentem, & debita retributione gloriæ exaltatum; quia ex plenitudine gloriæ eius omnes accepturi erant: nā quæ admo-

admodum dicit S. Ioannes cap. 7. Nondum erat Spiritus datus, quia nondum Iesus erat glorificatus: sic etiam dicere possumus, nondum animæ Sanctorum ex carcere Limbi ad Regna cælorum ascenderāt, quia Rex gloriæ Christus, in gloriam suam nondum introierat. Ex hebræo aliqui vertunt, Me coronant iusti, pro me expectāt, sed vox, כתר cathar, non solum coronare, sed etiam expectare, & sustinere significat, vt perspicuum est ex cap. 36. Iob, vers. 2. nam quod legimus, Sustine me, in hebræo est, cather li.

כתר לי

PSALMVS CXLII.

Titulus, & Argumentum.

Psalmus David, quando eum filius suus persequabatur.

IN hebræo solum habetur, Psalmus David, cætera verba explicandi argumenti gratia Septuaginta Interpretes addiderunt, vt S. Hilarius affirmat. Quamuis autem Patres Latini hunc Psalmum exponāt de passione Christi, quem quasi alterum Dauidem persequabatur Iudas, vt alter Absalon secundum Augustinum, vel populus Iudaicus secundum Gregorium: tamen dubitari non debet, quin ad litterā exponi possit de ipso Dauide, qui persecutionem Absalonis, pœnani peccati sui esse agnoscens, peccata sua deplorat, & misericordiam à Deo postulat. Hinc enim Ecclesia Catholica hunc Psalmum inter septem Pœnitentiales numerat, quia præscribit David exemplo suo formam precandi veris pœnitentibus, atque hunc sensum persequitur S. Ioannes Chrysostomus.

Explicatio Psalmi 142.

I. **D**omine exaudi orationem meam, auribus percipe obsecrationem meam, in tua iustitia, vbi per iustitiam intelligit fidelitatem, quæ est pars iustitiæ, quam paulò ante veritatem vocauit. Sanctus Ioannes Chrysostomus, intelligit per iustitiam, benignitatem, qua vtitur Deus erga veros pœnitētes: idè enim notat, Prophetam non dixisse, Exaudi me in iustitia, sed, in tua iustitia, qua videlicet vt soles erga pœnitentes, quæ non tam iustitia, quàm ineffabilis benignitas est. Siquidè Deus vbi viderit pœnitentiam, vbi audierit confessionem, continuò indulget offensas. Dic tu prior, inquit per Isaiam cap. 43. iniquitates tuas, vt iustificeris. Iudices homines quærunt confessionem Rei, vt eum damnent. Deus quærunt, vt absoluat. Denique pater filij prodigi, per quem intelligitur Deus, mox vt vidit reuertentem filium, & audiuit, Pater peccaui in cælum, & coram te; cecidit super collū eius, & osculatus eum iussit afferri stolam primam, annulum, calceos, occidi vitulum saginatum.

secrationem meam in veritate tua: exaudi me in tua iustitia.

Postulat initio Psalmi David exaudiri in veritate, & in iustitia, & nō explicat, in qua petitione exaudiri velit, quia præsupponit, Deum intelligere, peti à se remissionem culpæ commissæ, ob quam puniebatur. Intelligebat autem Deus hoc eum petere, & in hoc exaudiri velle, tunc quia videbat desiderium cordis eius, tum etiam fortasse ex gemitu, & suspirijs veræ contritionis. Sic enim Sancta Maria Magdalena non legitur postulasse verbis remissionem peccati; sed ex lacrymis, quibus pedes Domini rigabat, intellexit Dominus quid peteret, & ait, Remittuntur tibi peccata tua. Ergo corde contrito David, & interno genitu petens culpæ remissionem dicit, Domine exaudi orationem meam, quam tu bene intelligis, quæ sit: & id ipsum repetēs addit, Auribus percipe obsecrationem meam, in veritate tua, id est, iuxta fidelitatem tuam, qua seruas promissa tua de remissione pœnitentibus danda. Quod ipsum iterū repetit, cum addit, Exaudi me in tua iustitia, vbi per iustitiam intelligit fidelitatem, quæ est pars iustitiæ, quam paulò ante veritatem vocauit. Sanctus Ioannes Chrysostomus, intelligit per iustitiam, benignitatem, qua vtitur Deus erga veros pœnitētes: idè enim notat, Prophetam non dixisse, Exaudi me in iustitia, sed, in tua iustitia, qua videlicet vt soles erga pœnitentes, quæ non tam iustitia, quàm ineffabilis benignitas est. Siquidè Deus vbi viderit pœnitentiam, vbi audierit confessionem, continuò indulget offensas. Dic tu prior, inquit per Isaiam cap. 43. iniquitates tuas, vt iustificeris. Iudices homines quærunt confessionem Rei, vt eum damnent. Deus quærunt, vt absoluat. Denique pater filij prodigi, per quem intelligitur Deus, mox vt vidit reuertentem filium, & audiuit, Pater peccaui in cælum, & coram te; cecidit super collū eius, & osculatus eum iussit afferri stolam primam, annulum, calceos, occidi vitulum saginatum.

Iii gina-

ginatum, &c. Hæc expositio ferè eadem est cum ea, quam supra attulimus: nam iustitia illa, qua Deus promissam indulgentiam pœnitentibus exhibet, nihil est aliud, nisi fidelitas præstandæ benignitatis eximie. Sanctus Augustinus per iustitiam Dei, intelligit iustitiam, quam non ex nostris meritis, sed ex gratia Dei habemus: quæ sententia vera est, sed prior magis conuenit literæ.

II. Et non intres in iudicium cum seruo tuo, quia non iustificabitur in conspectu tuo omnis viuens.

Petijt remissionē peccati ex promissione, & fidelitate Dei: nūc addit aliud argumentum ex conditione & fragilitate generis humani. Non intres in iudicium cum seruo tuo, idest, noli mecum iudicio contendere, neque enim ego resistere audebo, neque me iustum dicā; sed peccatum meum confitebor. Quia non iustificabitur in cōspectu tuo omnis viuens, idest, quia non ego solus, sed omnis viuens cadet causa, si tecum iudicio contendere voluerit. Omnis enim viuens, aut est peccator, aut iustus in via, aut iustus in patria. Qui peccatores sunt, vt homicidæ, adulteri, & similes, poterunt quidem iustificari coram hominibus, apud quos aliorum crimina sæpè occulta sunt, vel iuridicè probari non possunt: sed in conspectu Dei non iustificabuntur, quia Deus videt corda, & conscientias, & ex ipsius conscientie testimonio conuincet eos. Qui iusti sunt, sed adhuc in via, non iustificabuntur in conspectu Dei, quoniam non audebunt se iustificare; sed cum Apostolo dicent, 1. Corinth. 4. Nihil mihi conscius sum, sed non in hoc iustificatus sum, qui enim iudicat me Dominus est. Fortasse enim ille videt in me, quod ego non video: & cum Iob cap. 9. dicere debeo, Si habuero quidpiam iustum, non respondebo, sed meum iudicem deprecabor. Item non iustificabuntur in conspectu Dei, quoniam intelligunt iustitiam suam, non à se acquisitam, sed à Deo donatam esse, & ideo non se iustificabunt coram Deo,

quasi ex se iusti sint, sed gratias agent iustificatori suo. Denique non iustificabuntur in conspectu Dei, quoniam etiam si iusti sint, quia criminibus carent, tamen etiam peccatores se esse intelligunt, quia peccatis quotidianis non carent, & dicunt cum alijs sanctis, Dimitte nobis debita nostra, Matth. 6. & si dixerimus, quia peccatum non habemus, nos ipsos seducimus, 1. Ioan. 1. Qui iusti sunt in patria, & criminibus, & peccatis non solum carent, sed etiam inquinari non possunt; non iustificabuntur in conspectu tuo, tum quia iustitiam suā non sibi tribuunt, sed Deo, à quo illam habent, tum quia tanta est puritas Dei, vt comparatione eius omnis alia iustitia iniustitia esse videatur. Stellæ enim non sunt mundæ in conspectu eius, Iob 25. Sed quoniam hæretici Lutherani, & Calviniani, ex hoc loco probare contendunt, nullam esse in homine iustificato veram iustitiam, sed solum impuritatē, & omnia opera iustorum esse peccata mortalia, & digna supplicio æterno, si à Deo imputarentur: obseruandum est, Dauidem non dixisse, nullum esse verè iustum; sed contra dixisse in Psalm. 17. Et retribuet mihi Dominus secundum iustitiam meam, & secundum puritatem manum mearum retribuet mihi: Quia custodiui vias Domini, nec impiè gessi à Deo meo: Et ero immaculatus comeo, &c. Et in Psalm. 118. Beati immaculati in via, qui ambulant in lege Domini. Neque hoc loco dixisse eundem Dauidem, nullus verè iustificabitur, sed, non iustificabitur in conspectu tuo: quod intelligunt Patres. Vel quia iustitia iustorum vera quidem est, sed ab ipsis non est, quasi proprijs viribus acquisita, sed à Deo gratis donata. Ita Sanctus Augustinus hoc loco. Vel quia iustitia eorundem iustorum vera, sed non pura est, cum admista sit peccatis venialibus. Ita Sanctus Gregorius hoc loco, Sanctus Hieronymus in epistola ad Ctesiphonem, & Sanctus Augustinus in libro de perfectione iustitiæ. Vel denique quia etiam si vera, & pura esset absolutè, ta-

men

men comparata ad iustitiam Dei increatam, & infinitam, iustitia esse non videtur, quomodo lux lucernæ coram Sole non lucet. Ita Sanctus Hilarius, Sanctus Hieronymus, & alij hoc loco, & Sanctus Bernardus serm. 5. de verbis Isaia. Atque hoc est quod legimus Iob 4. Nunquid homo Dei comparatione iustificabitur? & cap. 9. Verè scio quod ita sit, & quod non iustificabitur homo compositus Deo. In quem locum vide Sanctum Augustinum in lib. ad Orosium contra Priscillianistas, & Origenistas cap. 10.

III. Quia persecutus est inimicus animam meam: humiliavit in terra vitam meam.

Hæc est tertia ratio, quam adducit ad impetrandam remissionem peccatorum, quæ sumpta est ex gravitate re-tationis: non enim sponte sua, & nullo tentante peccavit, ut fecerunt Angeli reprobj, qui propterea remissionem peccati non inuenerunt: sed gravissima persecutione inimici nostri Diaboli, qui tanquam leo rugiens circuit querens quem devoret, prostratus fuit, & deiectus ab altitudine innocentiae ad ignem peccati lethalis. Itaque illa particula causalis, quia, iungenda est cum verbis illis, exaudi me in tua iustitia: quasi dicat, Exaudi me, quia es iustus promissa adimplens: quia non iustificabitur in conspectu tuo omnis vivens: quia persecutus est inimicus animam meam sollicitando ad adulterium, & tentando ad homicidium, & humiliavit, prostravit, abiecit vitam meam usque ad terram, quia me vilem, & contemptibilem reddidit in conspectu tuo, & sanctorum Angelorum: & rursus humiliavit ad terram, quia terræ amatorem fecit, qui antea in cœlestibus cōversabar. Hæc expositio communis est SS. Patrum, Chrysostomi, Augustini, Gregorij, & aliorum.

IV. Collocavit me in obscuris, sicut mortuos sæculi: & anxius est super me spiritus meus, in me turbatum est cor meum.

Pergit in explicatione calamitatum, quas Diabolica persecutio per peccatum adfert. Postquam enim animam humiliavit ad terrā, id est, terrenis cupiditatibus implicavit, in obscuris eā collocat, in tenebris videlicet spiritualibus, excæcans oculos interiores; ut falsa bona amplectatur pro veris; ut voragines, & præcipitia non advertat: ut viam, quæ ducit ad vitam, omnino non videat; denique in ijs tenebris collocat, in quibus versantur mortui sæculi, id est, iam dudum mortui, siue à sæculo mortui, vel ut vertit S. Hieronymus, antiqui mortui, in quibus ne vestigiū quidem oculorum remanet. Est enim hæc amplificatio tenebrarum spiritualium in quibus versantur amatores mūdi. De quibus tenebris loquitur Apostolus ad Ephes. 4. Tenebris obscuratū habentes intellectum, alienati à via Dei, propter ignorantiam, quæ est in illis, propter cæcitatem cordis ipsorū. & cap. 6. Non est nobis colluctatio adversus carnem, & sanguinem, sed adversus principes, & potestates, adversus Mundi rectores tenebrarum harū. quamvis fortasse non sit dicenda amplificatio tenebrarum spiritualium, cum tantæ sint, ut nihil addi posse videatur. Quæ enim maior obscuritas mentis, quam propter momentaneam voluptatem cōtemnere felicitatem æternam? Sequitur, Et anxius est super me spiritus meus; quibus verbis indicat, se ex diuino lumine cœpisse videre tenebras suas, & abiectionem animæ ad res terrenas diligendas: & inde consecutam esse anxietatē spiritus ex terrore diuini iudicij, & ex misero statu, in quem cecidit propter peccatum. Atque hoc est initium pœnitentiæ. Anxius est super me spiritus meus; in hebræo est eadem vox, quæ in Psalmo superiore, In deficiento spiritum meum. Itaque significat magnam anxietatē, quæ ferè ad defectum vitæ perducebat, nisi spes misericordiæ consolationem attulisset. Illud, super me, significat, super meam miseriam, super maximum languorem meum anxius est spiritus meus. Deinde idē repetit alijs

verbis, In me turbatum est cor meum : nisi quod, in me, non est idem, quod super me; sed significat hoc loco, in medio mei, siue, intra me. Itaque sensus est, Spiritus meus hanc miseriam considerans, valde anxius est, & cor meum in intimis meis conturbatum est, non leuiter, aut in superficie, sed serio, & in profundo cordis expauescere, & conturbari cœpi. Ad huius pœnitentis imitationem debent, qui liberari cupiunt, serio, & profundè cogitare detrimenta peccati.

V. Memor fui dierum antiquorum, meditatus sum in omnibus operibus tuis, & in factis manuum tuarum meditabar.

Docet nunc, vnde ex tanta anxietate respirare cœperit, & nobis exemplo suo viam ostendit ad reparationem post lapsum. Memor, inquit, fui dierum antiquorum, id est, recogitare cœpi misericordiam tuam, quam ab initio Mundi Patribus nostris exhibuisti, portans infirmitates eorum, sanans languores, & parcens iniquitatibus. Nec solum obiter memor fui, sed meditatus sum in omnibus operibus tuis, id est, diligenter consideraui omnia opera tua siue naturæ, siue gratiæ, & in omnibus misericordiam tuam eminere vidi : & id ipsum iterum repetens addit, In factis manuum tuarum meditabar, id est, in operibus tuis considerandis exercebar. Possent hæc cum Sancto Gregorio referri ad antiquos dies, quibus in statu innocentie homo fruebatur delicijs paradisi, & inde magis intelligitur miseria captiuitatis : sed prior expositio, in qua Chrysostomum secuti sumus, videtur literæ magis inherere.

VI. Expandi manus meas ad te : anima mea sicut terra sine aqua tibi.

Spe concepta, ex consideratione misericordiæ ad Deum aspicere, & suspirare incipit. Expandi, inquit, manus meas in oratione ad te : quoniam anima mea ita sitit gratiam tuam, vt terra

arida pluuiam. Quæ aptissima similitudo est. Nam sicut terra sine aqua, neque consistentiam habet, neque vestitur herbis, neque ornatur floribus, neque producit fructus, sed est inanis & vacua : sic anima sine gratia Dei non resistit tentationibus, sed sicut puluis iactatur à facie venti, neque vestem habet iustitiæ, neque ornamentum sapientiæ, neque fructus operum bonorum : quod totum intelligit pœnitens experimento suo, & ideo magis sitit, quod melius cognoscit.

Velociter exaudi me Domine, VII. defecit spiritus meus.

Turpitudine peccati, quam agnouit, & desiderium gratiæ vrget animam pœnitentis, vt non possit ferre moras reconciliationis ; atque hoc est signum veræ contritionis, quando peccator non differt confessionem, & alia remedia de die in diem ; sed cito currit ad medicum anime, quomodo ægrotus in periculo constitutus cito medicum accersiri iubet, & sitibundus cito currit ad aquas. Velociter, inquit, exaudi me, non possum diutius ferre turpitudinem meam, cito laua me ab iniquitate mea ; sana velociter languorē meū, quia defecit spiritus meus, id est, in extremis ago, vex spiritum duco : ponitur enim præteritum pro præsentī, amplificandi gratia.

Non auertas faciem tuam à VIII. me, & similis ero descendantibus in lacum.

Idem petit alijs verbis, Non auertas faciem tuam à me, id est, ne recuses reconciliari mihi, ne fias inexorabilis, conuertere faciem benignitatis tuæ ad me misericorditer respiciendum : ne fiam similis pereuntibus, qui descendant in lacum profundissimum gehennæ. Quibus enim Deus non ignoscit, neque donat vitam gratiæ, ij pereunt in æternum. Illud, &, sumitur pro, quia, vt sæpè notauimus, & sensus est, Non auertas faciem tuam à me, quia si auerteris similis ero descendantibus in lacum.

Audi-

IX. Audiam fac mihi mane misericordiam tuam, quia in te speravi.

Rursus ad idem redit, sed alia ratione. Audiam fac mihi mane, id est, cito, velociter, incipiente die, misericordiam tuam: vel per, mane, intelligit lumen gratiae, quod succedit tenebris peccati in reconciliatione, quasi dicat, satis diu fui, te irascente, in nocte peccati: incipiat te miserante dies gratiae, & audiam in corde meo vocem tuam dicentem mihi, Salus tua ego sum. Quia in te speravi, id est, gratia spei, quam iam accepi, mereatur gratiam remissionis. quamvis enim peccator ex se non mereatur aliquid apud Deum, tamen ipsa gratia mereatur augeri, ut aucta mereatur, & perfici, ut loquitur Sanctus Augustinus in epist. 106. & quemadmodum eo loco Sanctus Augustinus dicit, per Fidem impetrari iustificationem: ita etiam dei potest de Spe, quod videlicet impetret iustificationem.

X. Notam fac mihi viam, in qua ambulem, quia ad te leuavi animam meam.

Pœnitens David accepta iustificatione, timens ne iterum cadat, in hac extrema parte Psalmi petit sollicitè gratiam cognoscendi viam iustitiae, & per eam ambulandi. Atque hoc etiam signum est veri pœnitētis, quando post recōciliationem, studet vitam instituire, ut decet amicum & filium Dei. Notam, inquit, fac mihi viam, in qua ambulem, id est, illumina mentem meam, ut cognoscam viam iustitiae, in qua ambulare debeo, ut ad te perueniam. Si quidem ad te leuavi animam meam, id est, ad te direxi cursum meum, renuntiavi secularibus desideriis, te vnum desidero; ideo lumen sapientiae quero, ne aberrerem à te. Potest etiam cum Chrysostomo, illud, ad te leuavi animam meam, intelligi per spem, ut sensus sit, à te pendo, in te confido.

XI. Eripe me de inimicis meis Domine, ad te confugi, doce me.

Le Card. Belarm. in Psal.

cere voluntatem tuam, quia Deus meus es tu.

Perfistit in eadem petitione, rogans liberari à tentationibus Diaboli, qui sapè conatur obscurare mentem, ne videat viam iustitiae. Concupiscentiae siquidem à Diabolo excitatae faciunt, ut res aliter appareant, quam sint, & inde contingat error iudicii. Eripe me, inquit, de inimicis meis, id est, eripe me à tentationibus inimici; quoniam ad te confugi, & illi renunciaui. Doce me facere voluntatem tuam, id est, adiuna lumine tuo, ut repulsis tentationibus veram viam inueniam, & sic intelligam; quæ sit voluntas tua bona, beneplacens, & perfecta. Quoniam Deus meus es tu, id est, debeo, & cupio tibi vni seruire; quoniam tu es Deus meus, principium & finis omnium bonorum meorum, à quo naturam, & cætera bona animæ, & corporis accepi, & à quo beatitudinem, & gloriam sempiternam expecto.

XII. Spiritus tuus bonus deducet me in terram rectam: propter nomen tuum viuificabis me in æquitate tua.

Petit sapientiam, quæ ad intelligentiam pertinet: nunc petit charitatem, quæ pertinet ad voluntatem: tunc enim verè ambulamur per viam iustitiae, quando scimus, & volumus bene agere. Spiritus tuus bonus, id est, non spiritus meus, sed tuus, qui bonus est, & de quo Saluator dicit Luc. 6. Quanto magis Pater vester dabit spiritum bonum petentibus se? Spiritus bonus est Spiritus sanctus, essentialiter bonus, per quem diffunditur charitas in cordibus nostris, Rom. 5. & hic facit, ut velimus, & operemur, & de hoc dicitur Ezech. 36. Ponam spiritum meum in medio vestri, & faciam ut ambuletis in præceptis meis. Hic igitur Spiritus deducet me in terram rectam, id est, in viam planam, & directam, quæ est lex Domini rectissima & planissima. Posset etiam per terram rectam, intelligi patriam coelestem, quæ est terra viuentium,

Iii 3 in

in qua iustitia inhabitat, & in qua obliquitas vitiorum nullum locū habet. Sequitur, Propter nomen tuum viuificabis me in æquitate tua; ut ostendat, iustificationem, quæ est quædam viuificatio spiritualis, non ex meritis proprijs, sed ex dono gratiæ Dei nobis cōtingere. Propter nomen tuum, inquit, id est, propter gloriam tuam ex gratia tua viuificabis me, in æquitate tua; id est, in iustitia tua; sic enim est in hebræo. Per iustitiam autem potest intelligi veritas, siue fidelitas in seruandis promissis: potest etiam intelligi iustitia, quæ nos iustificat. Denique potest intelligi lex Domini iustissima quomodo intelligitur illud Psalmi 118. vers. 40. In æquitate tua viuifica me.

XIII. Educes de tribulatione animam meam, & in misericordia tua disperdes inimicos meos.

XIV. Et perdes omnes, qui tribulant animam meam, quoniam ego seruus tuus sum.

Concludit prædicens salutem, & liberationem suam, & perditionem omnium inimicorum suorum: quod sine dubio adimplebitur in ultimo Iudicio: & quod de se Dauid Propheta dicit, dici etiam potest de omnibus veris Dei seruis, qui vel innocentiam custodierunt, vel per veram poenitentiam ad viam iustitiæ redierunt.

PSALMVS CXLIII.

Titulus, & Argumentum.

Psalmus David aduersus Goliath.



N hebræo habetur solum, Psalmus David: quæ sequuntur, addita esse à Septuaginta Interpretibus testatur S. Hilarius: sed quoniam Psalmus videtur meminisse Regni ipsius David versu tertio, ubi dicit, Qui subdit populum meum sub me; existimant aliqui, verba illa, aduersus Go-

liath, non esse conformia Psalmi: & liberius etiam putant hæc verba posse contemni, quod Theodoretus testetur ea non haberi in exaplis Origenis, ac proinde non esse ex interpretatione Septuaginta Seniorum. Sed respondere possumus, Psalmum scriptum esse proprie pro victoria aduersus Goliath, & verba illa, Qui subdit populum meum sub me; non intelligi de Regno, sed de principatu militiæ: fuit enim Dauid Dux belli multo antea quam Rex fieret: neque verum est, quod aliqui dicunt, hunc Psalmum esse eiusdem argumenti cum Psalmi septimo decimo, ut patet ex versu octauo huius Psalmi. Itaque existimamus, hunc Psalmum compositum fuisse paulo post victoriam aduersus Goliath, ut habet titulus. Quod autem attinet ad versionem Septuaginta, maiorem fidem habere debemus S. Hilario, qui affirmat, hæc addita à Septuaginta viris, quam Theodoro, qui negat. Sanctus enim Hilarius in explicatione Psalmorum Origenem sequutus est, ut testatur S. Hieronymus in lib. de Scriptoribus Ecclesiasticis: quare credibile est, Hilarium in Origene legisse, verba illa addita fuisse à Septuaginta viris: nemo autem melius nouit, quid esset in versione Septuaginta, quæ habetur in exaplis, quam Origenes, qui exapla collegit. Adde quod cum hic titulus legatur in omnibus libris latinis, & à Sancto Augustino, & alijs exponatur, non est vlla ratione tollendus, aut contemnendus: Argumentum Psalmi ex Hilario, est victoria Christi aduersus Diabolum: ex Augustino, victoria Ecclesiæ aduersus eundem Diabolum: ex Theodoro, victoria Machabæorum aduersus Antiochum. Sed nos cum Sancto Ioan. Chrysostomo existimamus, ad literam cani victoriam Davidis aduersus Goliath, ut titulus docet: spiritualiter prædici victoriā Christi, & Ecclesiæ aduersus Diabolum.

Explicatio Psalmi 143.

Benedictus Dominus Deus meus, qui docet manus meas
ad

ad prælium, & digitos meos ad bellum.

Laudat Propheta Deum, & gratias illi agit, quia dono singulari eius vicerit Gigantem, unde initium duxit omnis ipsius gloria. Dicit autem, Qui docet manus meas ad prælium, & non dicit, Qui robustam fecit manum meam; quoniam in eo genere prælij, quo vicit Gigantem, plus valuit ars, quam robur. Præualuit enim; ut Scriptura dicit, in funda & lapide aduersus Philistæum. Iacere autem lapidem ex funda, ita ut recta attingat frontem hominis, maxime artis est. quam tamen victoriam sapiens Propheta non suæ arti, aut exercitationi, sed Dei dono tribuit. Pari ratione in prælio spirituali aduersus Diabolum magis indigemus arte, quam robore, & Christus ipse per Dauidem figuratus non potentia, sed sapientia Diabolum vicit. Patientia enim, & humilitate superbum, & crudelem hostem prostravit: & ideo non dixit Propheta, Qui armat manus meas, sed, Qui docet manus meas. Quod additur, Et digitos meos ad bellum; id ipsum est alijs verbis repetitum.

II. Misericordia mea, & refugium meum, susceptor meus, & liberator meus.

III. Protector meus, & in ipso speravi, qui subdit populum meum sub me.

His quinque vocibus docet Propheta, quo ordine dederit illi Deus victoriam: quo etiam ordine nobis quoque dabit, si in illo spem nostram totam posuerimus. Primum Deus misericorditer Dauidem respexit. Misericordia enim Dei prima origo est omnium bonorum nostrorum, & omnia omnino merita præuenit: hinc igitur primo dicit, Misericordia mea. Deinde Dauid misericorditer præuentus, & vocatus respexit ad Deum, atque ad eum sperando, & inuocando confugit: hinc subiungit, Et refugium meum. Tertio, Deus confugientem à se non despexit,

sed manum illi porrigens suscepit eum protegendum, & adiuuandum: inde subiunxit, Susceptor meus. Quarto, susceptum liberauit de captiuitate, & ab imminente periculo vitæ: hinc subiunxit, Et liberator meus. Denique liberatum, ne iterum caperetur, aut vulneraretur, protexit, & protegere pergit, dum prælium durat: ideo subiunxit, Protector meus; addit, Et in ipso speravi, qui subdit populum meum sub me, id est, Deus quidem mihi est misericordia, refugium, susceptor, liberator, & protector: & ego vicissim in ipso sperabo, qui fecit plus quam petere, aut optare potuissem: nam non solum liberauit me de manu Goliath, sed etiam subiecit mihi populum meum, cum fecit me Principem militiæ super omnem populum meum: nam 1. Reg. 18. paulo post victoriam de Goliath, fecit Saul Rex Dauidem Tribunum super mille viros: nec solum illis, sed vniuerso populo præerat Dauid. Sic enim legimus ibidem, Omnis Israel, & Iuda diligebat Dauid: ipse enim ingrediebatur, & egrediebatur ante eos. quod repetitur 2. Regum 5. Nec solum subiecit, sed etiam nunc subdit, cum dono gratiæ suæ facit, ut populus quietè, & pacificè regi se sinat.

Domine quid est homo, quia IV. innotuisti ei? aut filius hominis quia reputas eum?

Ex tot beneficijs prorumpit Dauid in magnam admirationem, quod tantus Deus, quo nihil maius cogitari potest, dignetur tanti facere hominem, qui ferè nihil est, ut etiam velit ab illo cognosci, & amari. Et si hæc Dauid dicit, & tanto sensu pietatis dicit, quid nos facere, sentire, & dicere par esset, quibus Deus non solum innotuit, sed formam serui accepit, & in ea forma humiliavit semetipsum factus obediens usque ad mortem, mortem autem crucis: & victoriam nobis tribuit, non aduersus carnem, & sanguinè, sed aduersus Principes, & potestates, aduersus mundi Rectores tenebrarum harum, contra spiritualia nequitia in cœlestibus;

Iii 4 bus;

bus; & qui nobis non populum vnum subiicit, sed euectos ad participationē Regni sui constituit cum Christo super omnia bona sua? sed verba considerare mus. Domine quid est homo, quia innotuisti ei? ex hebræo aliqui vertunt, quid est homo, quia cognoscis eum. Sed S. Ioānes Chrysostomus affirmat, rectē vertisse Septuaginta Interpretes, innotuisti ei? nam & vox hebraica hunc sensum patitur, & est multo admirabilius, quod Deus dignetur cognosci ab homine, quā quod hominem cognoscat: imō nihil admirationis habet, quod Deus hominem cognoscat, qui hominem fecit, & nihil ignorare potest. Obseruat quoque idem Chrysostomus, rectē dictum esse, quia innotuisti ei, non autem, quia cognitus es ab eo: cognitio enim Dei in homine ab ipso Deo est, qui ei se reuelare, & demonstrare dignatur. Aut filius hominis, quia reputas eum? Repetitio eiusdem admirationis est: nam in hoc apparet, quāti Deus hominem estimet, quia voluit ei innotescere, & cum eo familiaritatem, amicitiamque contrahere.

V. Homo vanitati similis factus est, dies eius sicut umbra prætereunt.

Explicat causam suæ admirationis; quia videlicet homo sit res modica, & id modicum breui desinat esse. Non poterat magis extenuari vilitas hominis comparata ad magnitudinem Dei. Deus plenitudo est omnium bonorum, & plenitudo semper stans, & manens in æternum sine vlla imminutione, aut mutatione: Homo non est quidem vanitas, quia aliquid est, sed vanitati similis, quia modicū quid est, & capax magnorum bonorum, si à Deo impleatur; sed donec impleatur, similis est vasi vuoto, & inani. Id autem quod est, semper mutatur, & transit donec deficiat: quomodo interdū umbra montiū insensibiliter transit, donec nocte superueniente, penitus euanescat. Atq; hæc dicit Propheta de homine, quo ad vitam corporalem, & comparatione facta cum Deo: alioqui enim homo ma-

igna res est, ad imaginem & similitudinem Dei creatus, & ad ipsum Deum intelligendum, & amandum factus; propter quem Vnicus Dei sanguinem profundere non dubitauit, qui denique si Deo per fidem, spem, & charitatem in hac peregrinatione inhaerit, futurus sit in patria æqualis Angelis, semperq; felicissimus. Itaq; quemadmodum puluerem, & cinerē se reputare debet cū Deo collatus; ita dignitatem suā agnoscere debet, cū ei bestiales voluptates à Diabolo suggeruntur; vt dedigne tur delectari voluptatibus pecorū, qui ad Angelorum æqualitatem aspirat.

Domine inclina cælos tuos, & VI. descende; tange montes, & fumigabunt.

Fulgura coruscationes; & dissipabis eos; emitte sagittas tuas, VII. & conturbabis eos.

Propheta Sanctus ex beneficijs Dei prorumpit in admirationē misericordiæ Dei, quod tanta Maiestas tantam vilitatem aspicere dignaretur: nunc vero considerans ex aduerso superbiam; & cæcitatem multorum hominum, qui Deo contempto toti essent occupati in opprimendis hominibus pijs, & in cumulandis terrenis diuitijs, precatur Deum, vt ostendat potentiam suam in eiusmodi homines; vt saltē timore peccata cessent, qui amore iustitiæ, & reuerentia cōditoris bene agere nesciunt. Domine, inquit, inclina cælos tuos, & descende, id est, quādoquidem humana superbia ex beneficijs te non agnoscit, nec timet; ostende præsentiam tuam per nubes tenebrosas, per ignem de cælo demissum, per fulgura, & tonitrua, aliaque id genus, quibus homines terreri, & expauescere cogantur. dicitur autem Deus inclinare cælos, quando demittit nubes, & densas caligines, quæ videntur partes cæli aerei; & eo modo descendere dicitur, quia demonstrat per eos effectus præsentiam suā. sic dicitur Exodi 20. Deus descendisse in montem Sina, quando impleuit montem illum tenebrosa nube, & caligine den-

densissima; & simul montem calefecit, ut totus fumigare videretur. & hoc est, quod addit, tange montes; & fumigabunt: sed præcipue Deus præsentiam, & potentiam suam demonstrat fragore horrendo tonitruorum, & coruscatione fulgurum, ac vibratione fulminum, quibus nihil velocius, subtilius, efficacius, horribilius. Ideo addit, fulgura coruscationem, & dissipabis eos, superbos videlicet hostes piorum. Emitte sagittas tuas, id est, cælestia fulmina, & conturbabis eos; nemo enim est tam ferox, & audax, qui non expauescat fulmina de cælo, aduersus quæ nihil valet humana defensio. Vnde dicitur 1. Reg. 2. Dominum formidabunt aduersarii eius, & super ipsos in cælis tonabit.

VIII. Emitte manum tuam de alto, eripe me, & libera me de aquis multis, de manu filiorum alienorum.

Ex hoc versiculo apparet, Psalmum hunc non esse scriptum à Davide post Regnum adeptum. neque esse eiusdem argumenti cum Psalmo septimo decimo: nam in eo Psalmo gratias agit de liberatione à manu Saul, & omnium aliorum inimicorum: in hoc autem Psalmo adhuc pugnabat cum filiis alienis, id est, Philistæis, & orat Deum pro liberatione, & victoria. Itaque postquam rogauerat Deum generatim aduersus impios, & superbos, rogat pro se in particulari. Emitte, inquit, manum tuam de alto, id est, de cælo potentiam tuam ostende, & eripe me, & libera me de aquis multis, id est, à multitudine hostium infidelium, cum quibus quotidie bellum gero. & declarans ipse metaphoram, addit, de manu filiorum alienorum. Itaque, aquæ multæ, significant multitudinem filiorum alienorum, qui ad literam erant Philistæi: spiritualiter sunt hæretici, ut vult S. Ioannes Chrysostomus, vel generalius omnes filij huius seculi, siue foris, siue intus sint, ut docet S. Augustinus, & conformis est versiculo sequenti, & à versiculo duodecimo vsque ad finem.

Quorum os loquutum est vanitatem, & dextera eorum dextera iniquitatis.

Describit filios alienos, atque ait, illos esse, qui & ore, & opere iniqui sunt. Quorum os locutum est vanitatem, non veritatem, non legem tuam, non boni aliquid: & dextera eorum non operatur, nisi rapinas, oppressiones pauperum, adulteria, homicidia, &c.

Deus canticum nouum cantabo tibi, in psalterio decachordo psallam tibi.

Qui das salutem Regibus, qui redemisti David seruum tuum de gladio maligno: eripe me.

Et erue me de manu filiorum alienorum, quorum os loquutum est vanitatem, & dextera eorum dextera iniquitatis.

Interponit duos versiculos, quasi parenthesis ex affectu in Deum: deinde reuertitur ad describendos filios alienos. Deus, inquit, canticum nouum cantabo tibi, id est, peto alia multa beneficia, sed non sum oblitus acceptorum, ideo canticum nouum, præclarum, nondum auditum, cantabo tibi, & simul in psalterio decem chordarum psallam tibi, iungens sonitum psalterij cum laudatione vocis; id autem faciam, quia tu das salutem Regibus, ut paulo ante dedisti Sauli Regi per ministerium meum; & tu redemisti me Davidem seruum tuum de gladio maligno, id est, de gladio iniusto Gigantis Goliath. tu igitur, sicut hætenus fecisti, eripe me, Erue, inquam, me de manu filiorum alienorum, qui & verbo, & opere scelestissimi sunt.

Quæru filij sicut nouellæ plantationes in iuuentute sua.

Declarat filios alienos ab affectu, & opinione ipsorum: illi enim sunt filij alieni, qui non nouerunt, neque diligunt nisi terrenam felicitatem, in secunditate,

tate, & prosperitate filiorum, & filiarum; in abundantia frumenti, vini & olei; in armis pecorum, & fructibus eorum; in pace, & securitate omnium quæ possident. Sed hoc loco observandum est, ex hebræo hæc omnia nunc legi in prima persona, non in tertia, & sensum facere omnino contrarium, nimirum hunc, Eripe me de manu filiorum alienorum, ut sint filij nostri, sicut novellæ plantationes, filiarum nostrarum compositæ, ut similitudo templi, promptuaria nostra, &c. sed cum omnes græci, & latini codices habeant in tertia persona, & omnes Patres ita exponant; non possumus approbare lectionem hebraicam, nisi dicamus, ut Genebrardus indicavit, hic introduci loquentes ipsos filios alienos, & Davidem non ex suo sensu, sed in persona eorum hæc dicere; ut hic sit sensus, Eripe me de manu filiorum alienorum, quorum os locutum est vanitatem, & dextera eorum dextera iniquitatis, qui videlicet locuti sunt vanitatem dicentes, Sint filij nostri sicut novellæ plantationes, &c. Posset etiam facile fieri, ut verba hebraica tempore Septuaginta Interpretum fuerint in tertia persona, & postea successu temporis incuria librario rum mutata sint in personam primam, quod facillimum fuit, cum discrimen personarum primæ, & tertiæ in literis non in syllabis consistat: nam si desit litera, nun, erit persona prima; si adsit, erit persona tertia. præterea vox, ascer, quæ potest verti, quorum, ut nostri legunt, & potest etiam verti, ut, quomodo legunt hebræi: videtur hoc loco verba, quorum, non, ut: nam in versu 9. & 12. ubi legimus, Quorum os locutum est vanitatem, eadem est vox, & ab omnibus vertitur, quorum: cur ergo non etiam hoc loco vertatur, quorum, & legamus, quorum filij? Quare lectio nostra omnino retinenda est. Ac primo loco inter humanas felicitates ponuntur filij, quoniam illi super omnia alia desiderantur, & propter eos quaeruntur cætera. Ideo Propheta dicit, Quorum filij sicut novellæ plantationes in iuventute sua, id est, tunc ha-

bentur felices filij huius seculi, quando filij eorum sunt in iuventute sua similes novellis plantationibus arborum, id est, bene radicati, & fundati, & virides, ac florentes, ut spes sit, eos longissimo tempore superuicturos.

Filiarum eorum compositæ circumornatæ, ut similitudo templi. XIIIII.

Hæc est secunda felicitas temporalis, filiarum formosæ, & ornatae, ut facile viros inueniant, quibus nubant. Illud, compositæ videtur referendum ad naturalem pulchritudinem, quæ ex compositione, siue conformatione membrorum constat: ex hebræo vertunt aliqui, Filiarum ut anguli incisæ: sed credibile est, Septuaginta Interpretes deduxisse vocem hebraicam à, zlu, quod splendor significat, ut sensus sit, filiarum compositarum, id est, splendidarum, & speciosarum. Quod sequitur de similitudine templi, videtur intelligendum de ornatu tabernaculi, in quo erant multa ornamenta purpuræ, byssi, auri, gemmarum, ut nihil pulchrius in tota ea regione inueniretur.

Promptuaria eorum plena, erant ex hoc in illud. XV.

Hoc est tertium genus felicitatis filiorum alienorum, promptuaria ita plena variarum frugum, aliarumque rerum ad huius vitæ usum, ut necesse sit ex uno in aliud exonerare copiam rerum. Quæ felicitas describitur in Evangelio, cum dicitur, diuitem quendam cogitasse intra se, Quid faciam, quia non habeo ubi congregem fructus meos? scio quid faciam, destruam horrea mea, & maiora faciam, &c. Lucæ 12. Id verò potissimum contingit, quando superuenientibus novis frugibus, adhuc supersunt veteres, quæ in aliud promptuariam refundendæ sunt, ut detur locus novis.

Oves eorum fætosæ abundantes in egrediensibus suis: boues eorum crassæ. XVI.

Hoc

Hoc est quartum genus bonorum temporalium, oves fecundæ, & plurimæ, abundantes in egressibus suis, id est, quæ plurimæ conspiciantur, cum egrediuntur ad pascua: & simul cum gregibus omnium armenta bouum, & quidem pinguium.

XVII. Non est ruina maceræ, neque transitus, neque clamor in plateis eorum.

Hoc est ultimum bonorum temporalium, ut non solum domus, & palatia ruinam nullam minentur, sed ipse etiâ maceræ, quæ ex vili materia eriguntur, integræ maneant: & nullus sit tumultus, neque rumor in plateis eorum, sed omnia tranquilla, & pacata. Illud, neque transitus, potest significare transitum per diruptas maceræ, vel transitum latronum, aut militum cum tumultu circumcursantium.

XVIII. Beatum dixerunt populum cui hæc sunt: beatus populus cuius Dominus Deus eius.

Hæc est conclusio sancti Prophetæ, qui refert ex sententiâ filiorum alienorum beatum esse populum cui hæc sunt, quæ paulo ante descripsimus: sed ex propria sententiâ dicit, beatum esse populum, non cui hæc sunt, sed cuius Deus est Dominus, id est, qui habet pro Deo verum Deum: nam vox, Dominus, hoc loco scribitur quatuor literis, quæ nomen proprium Dei significant, quod nunquam tribuitur, nisi vero Deo, qui fecit cælum, & terram. Ad finem huius Psalmi diligenter annotandum est, non facere differentiam inter filios Dei, & filios alienos copiam, vel inopiam rerum temporalium: multi enim filij Dei his bonis abundarunt, & Dominus Matth. 19. promittit centuplum eorum, quæ dimittimus, in hoc mundo, & postea vitam æternam: & contra multi filij huius seculi miserè perierunt in egestate, in exilio, in irremediis, in patibulis. Sed quod differentiam facit inter filios Regni, & filios gehennæ, filios huius seculi, & filios lucis, est affe-

ctio: qui enim bona temporalia magna bona esse ducunt, & ipsi ita afficiuntur, ut præ illis æterna bona contemnunt; & contra, qui detrimenta temporalia magna mala esse ducunt. eaq. ita timent, ut pro ipsis euadendis Deum offendere, & vitam æternam perdere non formidant; illi sunt filij tenebrarum, huius seculi, & gehennæ: & hoc significatur in illis verbis, beatum dixerunt populum cui hæc sunt, id est, qui tanti faciunt hec temporalia, ut in illis beatitudinem sitam esse arbitrentur. Qui vero bona temporalia parua bona, & lætitudinem eorum parua mala esse ducunt, ut res veræ sunt: contra autem gratiam Dei, & cælestem patriam in maximis bonis reponunt: & offensionem Dei, ac vitæ æternæ detrimentum, mala gravissima putant; illi sunt filij lucis, filij Dei, filij Regni; qui non surda aure audierunt, Primum querite Regnum Dei, & iustitiam eius, & hæc omnia adjicientur vobis. Matth. 6. & hoc significatur in illis verbis, Beatus populus, cuius Dominus Deus eius, id est, bona temporalia, bona sunt, sed beatum non faciunt: quod autem verè facit beatum, est possessio summi boni, quod in Dei visione consistit.

PSALMVS CXLIII.

Titulus, & Argumentum.

Laudatio David.



Titulus indicat argumentum: est enim hic Psalmus perpetua laudatio Dei, quæ partim sumitur ab ipsa Dei magnitudine, partim ab operibus eius, partim à qualitatibus Regni ipsius, partim à virtutibus Regijs, quæ in ipso perfectissime inveniuntur. Est autem Psalmus alphabeticus, ut facilius memoriæ commendetur, & delectabilius canatur. Sanctus Hilarius, & sanctus Augustinus ita exponunt titulum, Laudatio David, id est, laudatio, qua laudatur David. & per Davidem intel-

intelligunt Christum, qui filius est David secundum carnem. Sed communior expositio est, ut sit sensus, laudatio, qua laudatur Deus à Davide. Neque obstat, quod in græco dicatur in datiuo, laudatio ipsi David. est enim sensus, laudatio Dei inspirata, & dictata à Spiritu sancto ipsi Davidi. Vide titulum Psalmi tertij.

Explicatio Psalmi 144.

- I. *Aleph.* **E**xaltabo te Deus meus Rex, & benedicam nomini tuo in seculum, & in seculum seculi.
- II. *Beth.* Per singulos dies benedicam tibi, & laudabo nomen tuum in seculum, & in seculum seculi.

In his duobus primis versiculis continetur proœmium, in quo Propheta docet, quid in hoc Psalmo canere proposuerit; sed hoc docet more poetico, per apostrophē ad Deum. Exaltabo, inquit, te, id est, in hoc Psalmo celebrabo te versibus meis, ut tu qui altissimus es, altissimus etiam habearis & prædicēris ab hominibus. Vocat autē Deum Regem suum, vel ut ostēdat, se Regem esse sub Rege Deo, qui omnes regit, & à nullo regitur. vel quia Deum celebrare intendit ob ea præcipuē attributa, vel opera, quæ illi conveniunt, ut Rex est, & gubernator hominum, & cæterarum rerum creaturarum. Et benedicam nomini tuo, repetitio est eiusdem rei. idem enim est, Exaltabo te, & benedicam nomini tuo, id est, laudabo nomen tuum, celebratio gloriam tuam. Quod autem additur, in seculum, & in seculum seculi; significat laudationem hanc fore perpetuam, ita ut hic incipiat, & perseveret per successiones hominum canentium hos Psalmos usque ad mundi consummationem; & deinde in cælesti patria nunquam omnino deficiat. Beati enim, qui habitāt in domo tua Domine, ait ipse idē in Psal. 83.

in secula seculorum laudabunt te. Hoc idem clarius repetitur, & explicatur in secundo versiculo, Per singulos dies benedicam tibi, id est, perpetuo laudabo te, siue in prosperis, siue in adversis, dum hic vivam, & postea quoque in cælesti patria laudabo nomen tuum in seculum, & in seculum seculi.

Gimel. Magnus Dominus, & laudabilis nimis, & magnitudinis eius non est finis. III.

Quatuor sunt quasi partes magnitudinis, latitudo, longitudo, sublimitas, & profundum, quæ suo modo in Deo quoque considerari possunt, iuxta illud Apostoli ad Ephes. 3. Ut possitis cōprehendere cum omnibus Sanctis, quæ sit latitudo, longitudo, sublimitas, & profundum. Igitur Propheta incipit laudare Deum a magnitudine, & potest hæc laus intelligi de magnitudine essentia diuinæ, quæ est magna quod ad latitudinem, quæ est immensa; quod ad longitudinem, quia æterna; quod ad sublimitatem, quia altissima; quod ad profunditatem, quia incomprehensibilis. vel si placet, Prophetam explicare de magnitudine Dei, ut Rex est, magnus Rex est Dominus, quod ad latitudinem, quia omnia serviunt illi à summo Angelo usque ad ultimum vermiculum; quod ad longitudinem, quia Regni eius æterna duratio est; quod ad sublimitatem, quia potestate summa, & absolutissima regnat; quod ad profunditatem, quia non solum corpora, sed etiam corda regit, & moderatur intimas omniū cogitationes, & affectiones, denique nihil est tam abditum, & reconditum, quod virga Regni eius non penetret. Magnus ergo Dominus, ideo laudabilis nimis, id est, valde: & magnitudinis eius non est finis, quia & latitudo infinita est, & longitudo, & sublimitas, & profundum pariter infinita sunt. Vox hebraica propriè inuentionem, siue inuestigationem, non finem significat. Sed Septuaginta sensum vertorunt: Ideo enim magnitudinis Dei nulla est inuentio, quia finis eius non inuenitur,

tur, nec inueniri potest, cum non sit. Itaque magnitudo Dei est infinita, & ideo à nobis, qui finiti sumus est omnino inuestigabilis. dicitur autem à nobis inuestigabilis, non quod ignoremus, magnum esse Deum, & magnitudinis eius nullum esse finem, sed quia magnitudinem illam totam non capimus, non comprehendimus. Admonet autem nos hæc magnitudo infinita Dei, ut sicut magnitudinis eius non est finis, sic etiam laudationis nullus sit finis. Ita sanctus Augustinus. Item, ut nos quoque non simus contenti angustiis nostris, sed quotidie magis ac magis in vera magnitudine, quæ in virtutibus posita est, crescere studeamus; iuxta illud, Psal. 83. Ascensiones in corde suo disposuit in valle lacrymarum; ibunt de virtute in virtutem, &c. nam qui crescere student potentia, vel diuitijs, ut alios supergrediantur; isti non magni, sed inflati sunt; non succo pleni, sed vëto distenti; aliud enim superbia, aliud animi magnitudo est. Ita sanctus Ioannes Chrysostomus.

IIII. *Daleth.* Generatio, & generatio laudabit opera tua, & potentiam tuam pronuntiabunt.

Ab essentia Dei magni Regis, quæ inuestigari non potest, transit Propheta ad opera ipsius mirabilia ex quibus potentia eius intelligi potest. & non dicit, ego laudabo opera tua, sed generatio, & generatio laudabit opera tua, quasi dicat, ego solus non sufficio laudare, sed omnes generationes laudabunt opera tua, quia nunquam deerunt qui ea considerent, admirentur, & laudent. Et potentiam tuam pronuntiabunt, idest, omnes generationes laudabunt opera tua, & inde potentiam tuam, quæ in illis relucet, assidue prædicabunt. In hebræo habetur ad verbum, Generatio generationi laudabit opera tua, ut in Psalmo 18. Dies diei cruciat verbum. quæ phrasi significatur, generationes sibi inuicem succedere, ut dicitur Ecclesiastæ 1. Generatio aduenit, & generatio præterit, &

sicut vna alteri succedit quo ad subsistentiam, ita etiam vnâ alteri succedere in laudandis operibus Dei, quasi vna, defuncta munere suo, tradat alteri munus Deum laudandi, & hoc modo generatio, & generatio, idest, omnes generationes laudabunt opera Dei. Itaque lectio hebraica non est contraria lectioni græcæ, & latinæ, sed eas explicat, & illustrat.

Hc. Magnificentiam gloriæ sanctitatis tuæ loquentur, & mirabilia tua narrabunt.

Dixit in genere de operibus Dei mirabilibus: nunc distinguit tria genera operum Dei, quædam gloriosa, & pulcherrima, ac per hoc mirabilia ob eximiam speciem & splendorem; quædam terribilia, & ob terrorem maximum valde mirabilia; quædam denique amabilia, & ob ingentis benignitatis Dei significationem, non minus, quam cætera mirabilia. In hoc igitur versiculo laudantur opera mirabilia ob splendorem, & gloriam operis, qualia sunt cæli superiores quibus nihil maius, & pulchrius. de quibus dicitur Psal. 18. Cæli enarrant gloriam Dei. ad idem opus pertinent ea, quæ in cælo conspiciamus, sol, luna, stellæ cæteræ, & earum varietas, multitudo, splendor, & perpetui sine vlla intermissione, vel fatigatione discursus. Magnificentiam, inquit, gloriæ sanctitatis tuæ loquentur, idest, omnes generationes laudando loquentur excellentiam gloriosi operis magnificentiæ tuæ. & quia multa sunt in opere mirabilia, ideo laudantes gloriosum hoc opus, mirabilia tua multa, & magna narrabunt. per magnificentiam non intelligitur hoc loco actio virtutis, quæ dicitur magnificentia, sed qualitas operis magnificentissimi, quæ dici potest excellentia, siue præstantia, siue decor & pulchritudo. hæc enim omnia significat vox hebræa, quæ hoc loco ponitur. per gloriam intelligitur claritas, & splendor, & per claritatem, & splendorem ipsum opus gloriosum, & splendidum. denique per san-

sanctitatem Dei, si respiciamus vocem hebraicam, intelligenda est maiestas, siue magnitudo, siue magnificentia Dei, quæ etiam sanctitas dici potest, quia maiestas Dei sanctissima est. vox hebraica non est chodes, idest, sanctitas, קדש sed hod, quàm vocem in Psalmo 8. verterunt Septuaginta magnificentiam; & hoc loco vertit sanctus Hieronymus magnitudinem: & potest etiam verti maiestas, siue decor, siue etiam robur, ac potentia. Itaque sensus erit, omnes generationes præstantissimum, & clarissimum opus maiestatis Dei, quæ sancta, idest, inuiolabilis, & purissima est, decantabant.

VI. Van. Et virtutem terribilium tuorum dicent, & magnitudinem tuam narrabunt.

Hoc est alterum genus operum Dei, quo terror diuinæ maiestatis in puniendis impijs demonstratur. Et virtutem, inquit, terribilium tuorum dicent, idest, robur, & potentiam terribilium flagellorum, quibus impios castigare solitus es, dicent; & ex eis magnitudinem potentiae tuæ enarrabunt. Ad hoc opus pertinent diluuium generale tempore Noe: combustio, quinque ciuitatum igne de caelo demisso: plagæ Aegypti, & Pharaonis: hiatus terræ ad absorbendos viuos seditiosos, Dathan, & Abyron: denique terræ motus, pestilentia, fulmina caelestia, eluiones aquarum, procellæ ventorum, & alia, quæ non raro ex diuino iudicio terris inmittuntur.

VII. Zain. Memoriam abundantiae suauitatis tuæ eructabunt, & iustitia tua exultabunt.

Hoc est tertium genus operum Dei, quod ad misericordiam pertinet quod quidem pluribus verbis, & maiori significatione grati animi explicatur, quoniam ad pios Dei seruos maxime pertinet. Memoriam, inquit, abundantiae suauitatis tuæ eructabunt, idest, omnes generationes repletæ abundantia

suauitatis, & benignitatis, & misericordiae tuæ, quoniam misericordia Domini plena est terra, ex hac plenitudine eructabunt memoriam huius abundantissimæ suauitatis, idest, mandabunt posteritati memoriam horum tantorum, & tam multiplicium beneficiorum. nec solum eructabunt hanc memoriam posteris, sed ipsi exultabunt iustitia tua, idest, ob fidelitatem, quæ promissa beneficia præstitisti. Ad hoc genus pertinent innumerabiles consolationes, quas toti generi humano diuina bonitas tribuit ex vicissitudine dierum, & nocturnum, ex pluuijs de caelo, ex fecunditate terræ, ex infinita multitudine pecorū, auium, piscium, quæ generi humano seruiunt, ex amenitate sylvarum, pulchritudine hortorū, commoditate maris, & fluminaum, alijsque id genus plurimis. Sed hæc leuia, & parua sunt, si comparentur ad dona gratiæ, ad incarnationem Verbi diuini, ad passionem, resurrectionem, & ascensionem Christi, ad missionem Spiritus sancti, vocationem gentium, ædificationem Ecclesiæ, iustificationem impiorum, prædicationem, promissionem, & exhibitionem Regni caelorum. Quæ omnia cum suauitate meditatione quasi comeduntur, mirum non est, si ex tanta plenitudine pij omnes eructent memoriam abundantiae suauitatis Dei.

Cheth. Misericors, & misericors VIII. Dominus, patiens, & multum misericors.

Teth. Suauis Dominus vniuersis, IX. & miserationes eius super omnia opera eius.

Non contentus dixisse, tantam esse abundantiam suauitatis Dei, ut omnes generationes eructaturæ sint memoriam huius suauitatis: ipse eructat primus, & prædicat dicens, Misericors, & misericors Dominus, patiens, & multum misericors Dominus est, quia tollit miseras creando, gubernando, iustificando, glorificando: nec solum misericors est, sed etiam misericors, idest, paternè

מנחם paternè misericors, id enim significat vox hebraica, rachum, nec solum affectu paterno misericors, sed etiam patiens, siue longanimis, vt est in hebræo, idest, perseveranter misericors; etiam si enim sæpe à nobis prouocetur ad iram, ille tamen non subito irascitur, sed expectat ad poenitentiam. denique hæc misericordia nō modica, non exigua, sed multa & copiosissima est. Id explicatur in sequenti versiculo, Nam suavis est Dominus omnibus, idest, omnibus benignus, & misericors, & ex se suavis, licet nō omnibus videatur suavis, sed ijs tantum, qui sanum palatum habent. nec solum erga omnes suavis, & bonus, ac per hoc misericors est: sed etiam misericordia eius extenditur super omnia opera eius. nullum enim est opus Dei, in quo misericordia eius locum suum non habeat. sic enim intelligimus illud, super omnia opera eius, idest, in omnia opera eius, vt exponit SS. Chrysostomus, & Augustinus, & vt vertit ex hebræo sanctus Hieronymus, & vt requirit proprietas linguæ græcæ. Sanctus tamen Hilarius exponit super omnia opera eius, idest, excellit omnibus operibus eius, & hanc expositionem patitur textus hebraicus, & hinc Theologi disputant, quomodo intelligendum sit, misericordiam esse excellentiorem omnibus virtutibus, de qua re vide sanctum Thomam, & Caietanum in 22. quæst. 30. art. 4. Illud autem, suavis Dominus vniuersis, verum est absolute, quia Deus solem suū oriri facit super bonos, & malos, & pluit super iustos, & iniustos, vt dicitur Matth. 5. Et ne daemones quidem Deus excludit à misericordia sua, cum eis vitam, & intelligentiam tribuat, & conseruet: tamen magna misericordia, quæ ad salutem æternam perducit, de qua dicit David Psalm. 50. Misere mei Deus secundum magnam misericordiam tuam, & Iacobus cap. 2. Iudicium sine misericordia ei qui non fecit misericordiam; restringitur ad timentes, & inuocantes Deum: nam Psalm. 85. dicitur: Tu Domine suavis, & mitis, & multæ misericordiæ omnibus inuocantibus te.

& Psalm. 102. Quoniam secundum altitudinem cæli à terra corroborauit misericordiam suam super timentes se. & Quomodo miseretur Pater filiorum misertus est Dominus timentibus se. & Misericordia Domini ab æterno, & usque in æternum super timentes eum: quod etiam significauit beata Virgo Luc. 1. cum ait, Et misericordia eius à progenie in progenies timētibus eum.

104. Confiteantur tibi Domine X. omnia opera tua, & sancti tui benedicant tibi.

Caph. Gloriam Regni tui dicent, XI. & potentiā tuam loquētur.

Lamed. Vt notam faciant filijs hominum XII. potentiam tuam, & gloriam magnificentiæ Regni tui.

Mem. Regnum tuum, regnum omnium XIII. seculorum, & Dominatio tua in omni generatione, & generationem.

Cecinit hætenus opera Dei gloriosa, terribilia, & amabilia: nunc transit ad qualitatem Regni Dei, cantaturus etiam postea qualitates ipsius Regis. Confiteantur, inquit, tibi Domine omnia opera tua, idest, laudent te opera tua, de quibus hætenus te laudaui: opera enim opificem laudant, quando pulchra sunt, & bona. Opera autem Dei talia sunt, vt nihil eis addi, vel minui possit. Vidit enim Deus omnia quæ fecit, & erant valde bona Genes. cap. 1. & Magna opera Domini, exquisita in omnes voluntates eius Psalm. 110. Atque his verbis concludit narrationem præteritam. Addit deinde inchoans nouam laudationem, Et sancti tui benedicant tibi, idest, opera tua, quæ patet oculis omnium, generatio, & generatio laudabit, vt supra dictum est, sed qualitatem Regni, de qua nunc dicturus sum, non nouerunt nisi sancti tui, quibus per Spiritum sanctum reuelata est, ideo sancti tui, fideles tui, populus tuus peculiaris benedicant tibi, laudent
te.

te. In quo autem laudaturi sint, subiungit, cum ait, Gloriam Regni tui dicet, & potentiam tuam loquentur. Gloria Regni est potentia Regni. Potentia Regni consistit in multitudine subditorum, & in magnitudine diuitiarum, quibus subditi ali, & sustentari possunt. Gloria, siue potentia Regni Dei cognosci potest ex differentia inter Regnum Dei, & Regnum hominum. est autem quadruplex differentia. Prima, quod homines Reges habeant subditos paucissimos, & opes tenuissimas, homines videlicet, & opes vnus, aut plurium prouinciarum: Deus autem subditos habet omnes Angelos, omnes homines, omnes demones: & quicquid in celo, in terra, & in mari est, opes eius sunt. Altera differentia est, quod Reges terreni sic dominantur subditis, ut etiam illis seruiant, quia pendent ab illis, & sine illis nihil possunt: & pari ratione sic abundant opibus, ut semper egeant, & cogantur a subditis exigere vectigalia, & tributa, & ut plurimum grauati sunt aere alieno: Deus autem dominatur omnibus, & nulli seruit, quia non eget opera illorum: abundat opibus sine vlla inopia, quia potest in momento producere ex nihilo multo plura, quam habeat. Tertia differentia sequitur ex secunda; Reges enim terreni gaudent honore, ac dignitate sua, sed simul anguntur assidua sollicitudine, & formidine, ut propterea inuenti sint, qui sponte Imperium deposuerint: Deus autem nulla premittitur sollicitudine, nullo metu, sed cum tranquillitate, & securitate regnat. Quarta est, quod Reges terreni breui tempore regnant: Deus autem in aeternum. Prima differentia attingitur in versiculo illo, Gloriam Regni tui dicet, & potentiam tuam loquentur, idest, sancti tui predicabunt gloriam, & potentiam Regni tui, quae in multitudine innumerabili subditorum, & abundantia infinita opum tuarum consistit. Secunda & tertia attinguntur in versiculo sequenti, Ut notam faciant filijs hominum potentiam tuam, & gloriam magnificentiae Regni tui; quae verba

indicant maximum discrimen inter regna hominum, & Regnum Dei. Ideo enim dicit, ut notam faciant filijs hominum, idest, ut faciant filios hominum intelligere, regna sua terrena nihil esse, si comparentur ad Regnum Dei. & non contentus dixisse, ut notam faciant potentiam tuam, addidit, & gloriam, & hoc non contentus, addidit, magnificentiae Regni, idest, gloriam excellentissimi Regni tui. Denique quarta differentia habetur in versiculo sequenti, Regnum tuum regnum omnium seculorum, &c.

Nun. Fidelis Dominus in omnibus verbis suis, & sanctus in omnibus operibus suis. XIII.

Hic iam incipit explicare Propheta virtutes proprias Regis, quae in Deo perfectissime inueniuntur, ut etiam in Christo homine; & ad quas quasi speculum, vel exemplar Reges omnes respicere deberent. Prima virtus regia est probitas vitae, & praecipue veracitas in verbis: nam totus componitur orbis Regis ad exemplum. & de Christo Rege dicitur, Qui peccatum non fecit, nec inuentus est dolus in ore eius 1. Petri 2. & hoc ipsum dicit hoc loco Propheta; Fidelis Dominus in omnibus verbis suis, idest, verax, non mendax, non decipiens, non fallens, promissa omnia constanter obseruans. & sanctus in omnibus operibus suis, innocens, impollutus, immaculatus in omni opere suo. Hunc versiculum non habet codices hebraici; sed hoc ipso conuincuntur esse corrupti: nam Septuaginta viri nullo modo ausi fuissent verba sua, ac praecipue integrum versiculum inferere verbis Dei. praeterea cum totus hic Psalmus alphabeticus sit nulla ratio reddi potest, cur Dauid vnā literā omittere voluerit. Itaque non dubitamus in hebraico textu quae habuerunt Septuaginta Interpretes, fuisse hunc versiculum, cuius prima litera erat nun, ut re vera vox hebraica, quae fidelem significat, a litera ista principium habet: dicitur enim neeman, idest, fidelis.

1013

5a

**XV. Samech. Alleuat Dominus omnes
qui corruunt, & erigit omnes
elisos.**

Hæc est altera virtus Regia, & Pastoralis: nam Regis, & Pastoris idem est officium. regere subditos, ne corruant, & erigere eos qui fortè corruerunt. Misericordia hæc virtus dicitur, & Regibus maximè necessaria. Illud, alleuat in hebræo est, sustentat, siue confirmat. proinde alleuare hoc loco non est erigere eos, qui corruerunt, sed sustentare, & alleuare ne cadant, cum in proximo sunt ut cadant, iuxta illud, Impulsus euersus sum ut caderem, & Dominus suscepit me. At quomodo verum est, à Deo sustentari omnes cadentes, & erigi omnes elisos? nonne pluri cadunt, & eliduntur quotidie, siue corporaliter, siue spiritualiter hoc intelligatur? Dicitur Deus omnes alleuare, ne cadant, & erigere elisos: quia quicumque in tentatione non cadunt, Deo iuuante non cadunt, & qui ex casu resurgunt, Deo erigente resurgunt: qui autem cadunt, aut ex casu non resurgunt, ex se habent, non ex Deo, ut cadant, vel non resurgant. Quod alij verbis dixit Osee cap. 13. Perditio tua ex te Israel, tantummodo in me auxilium tuum. Quod autem non velit Dauid dicere, omnes omnino corruentes alleuari, siue sustentari, perspicuum est ex verbis sequentibus, ubi dicit, erigi à Deo omnes elisos: nam si Deus sustentaret omnes cadentes, nemo caderet, aut certè nemo cadens elideretur; quomodo ergo verum esset, illud, erigit omnes elisos? Atque hæc de spirituali casu dicta sunt. de corporali autem casu dicimus, Deum omnes alleuare, & erigere, quia ex natura pronus est ad alleuandum, & erigendum, quod si multos non alleuat, neque erigit; imò sæpe ipse deiicit, & præcipitat in ruinam: id facit vel ad probationem, & coronam, ut cum iustos affligit, & hoc non est propriè deiicere, sed exaltare: vel ad pœnam, & supplicium, & tunc id exigunt peccata hominum, ac per hoc prima radix malorum ex quo

Card. Belarm. in Psal.

bis est, & semper vera est Prophetæ sententia, Perditio tua ex te Israel: tantummodo in me auxilium tuum.

Ain. Oculi omnium in te sperant XVI.
Domine, & tu das escam illorum in tēpore opportuno.

Phe. Aperis tu manum tuam, & XVII.
imples omne animal benedictione.

Tertia virtus Regia, liberalitas est. pertinet enim ad Reges non expilare subditos, non emungere pecunias varijs artibus, eosque ad egestatem redigere: sed contra, liberaliter alere, ut filios; sic tamen ut tempore suo comedant, non totos dies in comestationibus cōsumant. Oculi omnium, inquit, in te sperant Domine, idest, oculi omnium viuentium ad te respiciunt, sperantes à te cibum, ut inde alantur, & viuant. Et tu das escam illorum, idest, & tu per creaturas tibi subiectas, terram, solem, pluuias, producis fructus copiosos in escam omnium viuētium: das autem escam illorum in tempore opportuno, quando tempus opportunum est, ut comedant; non enim semper comedere debent. Itaque qui comestationibus superfluis vacant, non accipiunt escam à Deo, sed à cupiditate sua. Item dat escam Deus in tēpore opportuno, idest, quando esuris, quando eges, quando necesse habes. proinde qui recondunt, & multiplicant superflua, non à Deo accipiunt, sed furantur bona communia, & ideò mirū non est, si multi egeant, & esuriant. Item dat escam in tempore opportuno, quia dat quando æquum est dari: aliquando enim æquum est tolli, quia id merentur peccata hominum, quomodo medicus præscribit cibi inediam, & abstinentiam vini. hinc sæpe Deus immitit sterilitates, & penuriam, ut flagellet peccatores. Deniq; iuxta Chrysostomum dat escam in tempore opportuno, quia non omnes fructus dat omni tempore, sed per temporum varietates varios fructus ex terra producit. Ut autē intelligas primam causam

omnium

omnium bonorum esse Dei liberalitatem, addit, Aperis tu manum tuam, & imple omne animal benedictione. in qua sententia omnia verba sonant liberalitatem. Aperis, inquit, manum, idest, nō stricta manu, sed larga atque aperta, summa liberalitate; imple, id est, abunde satias, omne animal, non solum hominem, sed omnia animalia; benedictione, idest, abundanti refectione. Sic enim accipit benedictionē Apostolus 2. Cor. 9. Vt benedictionem, non vt avaritiam, idest, largam eleemosynam. In hebræo non est propriè, benedictione, sed, razon, beneplacito. sed idem est sensus; significat enim Prophe-
 pxx ta, impleri omnia animalia cibo sibi conuenienti, qui eis placet, & quem cupiunt. Sanctus Hieronymus vertit, generalius, refectione. Septuaginta adhuc generalius, benedictione. At si Deus larga manu implet omne animal benedictione; vnde tot mendici? tot famelici? tot nudi? Iam supra indicaui-
 mus id accidere ex iniustitia diuitum, qui multo plura volunt, & conseruant, quàm necesse habent, & multa effundunt in vanitates, quæ pauperibus dari debuissent. addidimus etiam, id aliquando euenire ex iudicio Dei, quia id exigūt peccata hominum. denique adiungimus, ipsos pauperes sæpe esse in causa, quia vel confidunt in astutia sua, & malis artibus, non in Deo; vel non sunt contenti victu, & vestitu statui suo congruenti; vel quod lucrantur per integram hebdomadam, vno die comessando, vel ludendo perdunt.

XVIII. Tjadich. Iustus Dominus in omnibus vijs suis, & sanctus in omnibus operibus suis.

Quarta virtus Regia est iustitia, quæ omnino necessaria est, vt populi pacē, & quietem habeant. Iustus Dominus in omnibus vijs suis, idest, Dominus in omnibus actionibus suis externis, quibus quodammodo exit ab interno clauisuo ad nos, iustissimus est. tribuit enim omnibus, quod illis debetur. & hoc idem significant verba sequentia, Et sanctus in omnibus operibus suis.

Coph. Prope est Dominus omnibus inuocantibus eum: omnibus inuocantibus eum in veritate. XIX.

Quinta virtus Regia est facilem se præbere omnibus accedentibus, atque auxilium implorantibus. Hoc mirificè præstat Deus noster, qui prope est omnibus inuocantibus eum, idest, quamuis Deus excelsior cælo sit; tamen appropinquat facile omnibus inuocantibus eum, neque vnquam audientiam negat. hinc gloriatur Moses Deuter. 4. Non est alia natio tam grādis, quæ habeat Deos appropinquantes sibi, sicut Deus noster adest cunctis obsecrationibus nostris. addit Propheta declarans, quomodo intelligendum sit, omnibus inuocantibus eum, & ait, omnibus inuocantibus eum in veritate. quæ particula, in veritate, includit omnes condiciones bonæ orationis: nam qui sine vera fide orat, non inuocat Deum in veritate, quia non inuocat Deum, sed Idolum capitis sui. & qui sine spe, & fiducia orat, non inuocat Deum in veritate, quia non potest serio, & ex animo inuocare eum, à quo non sperat se audiri. & qui sine charitate, vel sine dilectione saltem inchoata orat, non inuocat Deum in veritate, quia nemo inuocat serio eum quem odit, & à quo se odio haberi credit. & qui sine affectu, ac desiderio orant, vt qui recitant Psalmos, & orationem dominicam absq; desiderio consequendi, quæ petunt, non inuocant Deum in veritate, sed inuocare videntur. denique qui sine attentione orant, nec sciunt quid dicāt, ij, voce tantum, non mēte orant, & ideo non inuocant Deum in veritate, quia non ipsi verè inuocant, sed signum inane inuocationis ostendunt.

Refc. Voluntatem timentium se faciet, & deprecationem eorum exaudiet, & saluos faciet eos. XX.

Sexta virtus Regis est benignitas, qua nō solum facile admittit subditos ad

ad audientiam; sed etiam benignè concedit, quæ ipsi petunt, modo ea petant, quæ deceat Regem concedere. Voluntatem, inquit, timētium se faciet, idest, audita oratione præstabit quod ipsi volunt. Sed addit, timentium se, quia hoc iustum est, vt Deus faciat voluntatem eorum, qui faciunt voluntatem ipsius. Illi autem faciunt voluntatem Dei, qui timore sancto metuunt offendere Deum, & quidlibet potius amittere volunt, quàm gratiam Dei. Id ipsum more suo, repetit, cum addit, & deprecationem eorum exaudiet. Addit postremo, & saluos faciet eos, vt declarat, quomodo Deus semper exaudiat deprecationes timentium se. Sæpe enim Deus videtur non exaudire orationem timentium se, vt cum Apostolum non liberauit à stimulo carnis, pro qua reter Dominum rogauerat 2. Corint. 12. & tamen verè semper exaudit primum desiderium timētium se, quod est salutis æternæ desiderium. Sicut enim Dominus iussit, Primum quærite Regnum Dei, & iustitiam eius, idest, gloriam, & gratiam: sic omnes timentes Deum timore sancto, primo, & principaliter in omni oratione petunt salutem inchoatam, quæ est gratia, & perfectâ, quæ est gloria. Deus igitur exaudit semper timentes se, quia saluos faciet eos, idest, exaudit quando, & quomodo expedit ad salutem.

XXI. Scin. Custodit Dominus omnes diligentes se, & omnes peccatores disperdet.

Vltima virtus, sed maximè necessaria Regi est prouidentia, qua protegit iustos, ne à multitudine peccatorum opprimantur; & peccatores dissipat, ne iustis noceant, aut non tantum noceant, quantum vellent. tametsi enim aliquando finit iustos à peccatoribus multa pati; tamen custodit eos, ne passio illis noceat, imò gratia sua facit, vt multum profit. Permisit Deus Martyres sanctos flagellari, & occidi; sed custodiuit eos tribuens illis constantiam in fide, & patientiam in doloribus, vt

animæ gloriam mox adipiscerentur, & paulò post corpus etiam reciperent gloriosum & verum esse intelligerent, quod eis veritas promisit, Capillus de capite vestro non peribit. Quòd autem dicit, omnes peccatores disperdet, ideò verum est, quia vel peccatores conuertentur ad iustitiam, & non erunt amplius peccatores; vel iniusti permanebunt vsque ad finem, & disperdentur per detractionem in gehennam, vt ad iustos in æternum appropinquare non possint.

Tau. Laudationē Domini loquetur os meum: & benedicat omnis caro nomini sancto eius in seculum, & in seculum seculi.

Concludit Propheta Psalmum, iungens finem cum principio, quasi dicat, propter hæc omnia, quæ dixi de magnitudine Dei, de operibus eius, de perpetuitate Regni ipsius, ac de virtutibus regijs, quæ in ipso perfectissimæ, & absolutissimæ inueniuntur, laudationem eius semper loquetur os meum. nec solum ego laudare cupio, sed opto, vt omnis caro, omnis homo, omne quod spirat, & viuit, nomen Dñi semper laudet.

PSALMV S CXLV.

Titulus, & Argumentum.

Alleluia, Aggai, & Zacharia.



Vnc titulum non habent codices hebraici, excepta prima voce, Alleluia; sed habent codices græci, & latini, etiam antiquissimi. Sanctus Hilarius docet, nomina Aggai, & Zachariæ addita esse ab interpretibus, quoniam duo illi Prophetæ prædixerunt renouationem Hierusalem; & captiuos consolabantur, & hortabantur ad reditum in patriam, & ad ipsam ciuitatem instaurandam. Hic autem Psalmus, vt etiam duo sequentes, caelestem

Kkk 2 Hieru-

Hierusalem prædicant, atque ad iter suscipiendum ad eam inuitant. & quoniam nihil est, quod magis retardet Peregrinos ab hoc itinere, quam spes felicitatis terrenæ, quæ ab amicitia, & obsequio magnorum Principum dependet, hortatur grauisimis verbis, ut in nullo homine, quantumvis magno spem ponamus, sed totam fiduciam nostram in Domino collocemus.

Explicatio Psalmi 145.

I. **L**auda anima mea Dominum : Laudabo Dominum in vita mea ; psallam Deo meo quamdiu fuero.

Incipit per dialogismum. Peregrinus enim homo animaduertens carnem suam gemere in labore peregrinationis, hortatur animam suam, ut ipsa saltem, quæ spe beata esse cœpit, Deum laudet, & canendo reficiat totum hominem. Lauda, inquit homo ad animam suam, anima mea Dominum. Respondet anima, laudabo Dominum in vita mea, id est, tunc verè laudabo, quando veram vitam viuam, nunc enim gemendum, & orandum est, potius quàm canendum, & laudandum. quamuis enim & nunc Deum laudemus, tamen non est hæc simplex, & plena laudatio, sed admixta lacrymis, & precibus : tunc autem erit sola, & perpetua, ac iucundissima laudatio. Repetit hoc idem, dum addit, Psallam Deo meo quamdiu fuero, id est, cum ad vitam æternam peruenero, sine intermissione psallam Deo meo. Nunc enim non possum psallere quamdiu sum, quia multa nimis psallentem interrumpunt ; sed tunc ab omnibus negotijs liber & expeditus psallam Deo meo, quamdiu ero, id est, toto spatio veræ illius vitæ ; & sicut semper ero, sine timore moriendi, ita semper psallam sine periculo deficiendi. Ita sanctus Hilarius, & sanctus Augustinus exponunt. Non tamen reiicimus expositionem aliorum, qui de præsentis laude hunc versum exponunt.

Nolite confidere in Principibus, in filiis hominum, in quibus non est salus.

Videt sanctus Propheta multos retardari ab itinere ad salutem, quia mirantur Præfecturas humanas, Principatus, & Regna ; quasi possint, qui ea possident, beatos facere quos volunt ; & miseratus cæcitatem ipsorum exclamat, Nolite confidere in principibus ; & mox declarat, in filiis hominum, id est, in Principibus, qui sunt hominum filij : nam vnus est Princeps verus, qui est conditor hominum, in quo confidere licet. Adiungit rationem, cur in Principibus filiis hominum, non sit fidendum, cum dicit, in quibus non est salus. Potest autem intelligi efficienter, & formaliter : siquidem in Principibus terrenis non est salus, quia saluare non possunt alios, neque ipsi salui sunt, sed saluandi cum cæteris si digni erunt. At, inquires, Saluator noster filius hominis est ; sic enim in Euangelio se vocat Saluator noster Dominus Iesus Christus. quo modo ergo in filio hominis non est salus ? Rectè sanctus Augustinus respondet, In Christo salutem esse, non quia filius hominis est, sed quia filius Dei, ac per hoc Deus super omnia benedictus in secula. ubi S. Augustinus non negat, Christi humanitatem concurrere ad salutem nostram, ut instrumentum coniunctum ; sed significat originem, & fontem salutis in Christo esse, non ex eo quod sumpsit ex homine, sed ex eo quod erat in principio apud Patrem ; & eundem Christum non fore Saluatorem si filius hominis esset, & filius Dei non esset.

Exibit spiritus eius, & reuertetur in terram suam : in illa die peribunt omnes cogitationes eorum.

Nō esse salutē in filiis hominum multis rationibus demonstrare potuisset Propheta, quia videlicet infirmi sunt, mutabiles, fallaces, sæpe nō possunt quod volunt, sæpe non volunt quod possunt ; sed vnicam rationem attulit, cui nemo contra-

contradictum potest; videlicet à morte communi petitam. quomodo enim saluare potest alios, qui se ipse saluare non potest? nam, velit nolit, etiam in arce munitissima constitutus, & exercitu armato vallatus; etiam si orbis terrarum Monarcha fuerit, exhibet spiritus eius ex corpore, & corpus spiritu recedente, in terram, unde sumptum est, reuertetur. & tunc peribunt omnes cogitationes eorum, qui videlicet in illo spem suam posuerunt: nam qui Principis favore gaudent, magnas cogitationum fabricas erigunt, & ipsi sibi diuitias, honores, dignitates ex illius Principis favore promittunt. sed cum Deus auferat spiritum Principis, concidunt omnia illa palatia, quæ cogitando fabricauerant, & sic illo pereunte pereunt omnes cogitationes eorum. Illud, in terram suam reuertetur, non potest villo modo referri ad spiritum, de quo dicitur, exhibet spiritus eius. nam in codice hebraico spiritus est generis feminini, vt etiam verbum exhibet. sed verbum, reuertetur, est generis masculini. Ideo vel exponendum est cum S. Augustino, exhibet spiritus eius, & caro, siue corpus in terram suam reuertetur: nã & vox, caro, & vox corpus hebraicè sunt generis masculini; vel, vt alij volunt, exhibet spiritus eius, & ipse homo in terram suam reuertetur. Illud quoque, in illa die peribunt omnes cogitationes eorum, posset intelligi de cogitationibus Principum morientium: vt sensus sit, exhibet spiritus eius, idest, vniuscuiusque Principis, ac per hoc omnium. & singulorum Principum, & tunc peribunt omnes cogitationes ipsorum. Neque explicatio, quam supra posuimus, huic explicationi repugnat; sed vtraque vera est, & simul consistere potest; non enim repugnat scripturæ diuinæ, vt plures habeat sensus literales.

IIII. Beatus cuius Deus Iacob, adiutor eius: spes eius in Domino Deo ipsius, qui fecit cælum, & terram, mare, & omnia quæ in eis sunt.

Card. Belarm. in Psal.

Reiecta vana confidentia in Principibus terrenis, docet Propheta fiduciam ponendam esse in solo Deo vero, si quis ad veram, atque æternam salutem peruenire desideret. Beatus, inquit, est, spe videlicet beatus, & in via recta, & secunda ad ipsam beatitudinem in re: cuius Deus Iacob adiutor eius, idest, qui adiutorem, & protectorem in hac via Deum verum habet. Vocat enim Deum verum, Deum Iacob, quia familia Iacob Deum verum colebat, cum Moabitæ, Ammonitæ, Philistæi, & ceteræ gentes vicinæ Deos falsos colerent. Illud autem, eius, superuacaneum est in lingua nostra, sed apud hebræos in vsu est, vt alibi monuimus. Declarat cõtinuo Propheta, quis habeat Deum adiutorem, ac dicit, Spes eius in Domino Deo ipsius, idest, beatus est cuius adiutor est Deus Iacob, beatus, inquã, cuius spes est in Domino Deo ipsius. Nam hoc loco subintelligitur relatiuum cuius, & superfluum est pronomen, eius. Esse autem Deum adiutorem omnium in se sperantium, Scriptura diuina passim docet. Ecclesiastici 2. Nullus sperauit in Domino, & confusus est. & Psal. 113. Domus Israel sperauit in Domino, adiutor, & protector eorum est: & ibidem hoc sæpius repetitur. Probat denique Propheta optimum esse sperare in Domino, quoniam, inquit, ipse fecit cælum, & terram, mare, & omnia quæ in eis sunt; ex quo sequitur, vt sit potentissimus, & Dominus omnium rerum, & omnia sint ei subiecta, ac per hoc qui ab eo protegatur, nihil timere debeat.

Qui custodit veritatem in seculo V. lum, facit iudicium iniuriam patientibus, dat escam esurientibus.

Poterat Peregrinus dicere, Deum omnipotentem esse scio, & posse si velit, me protegere, & iuuare; sed vnde intelligam illum velle? Huic respondet Propheta, ac demonstrat, Deum velle, quia iustus, & misericors est. Et quidem quia iustus est, custodit veritatem in seculum, idest, semper obseruat pro-

K k k 3 missa

missa: promittit autem auxilium sperantibus in se. Item quia iustus est, facit iudicium iniuriis patientibus, id est, iuste iudicat causam, quam habent iusti aduersus iniquos, & iniquos punit, iustos coronat: quia verò misericors est, dat escam esurientibus, id est, per admirabiles vias providentiae suae prospicit inopiam tum spirituali, tum corporali eorum, qui sperant in se.

VI. Dominus soluit compeditos,
Dominus illuminat cæcos.

VII. Dominus erigit elisos, Dominus diligit iustos.

Quia non sufficit peregrinantibus ad patriam protegi à latronibus, & alimonia refici: sed necesse est habere pedes solutos, & oculos illuminatos, & totum corpus sanum: ideo adiungit, ut ostendat Deum omnino velle iuvare sperantes in se, Dominus soluit compeditos à compedibus concupiscentiae malae, mortificans paulatim omnes cupiditates: & quia concupiscentia excæcat, Dominus illuminat cæcos, præbens lumen sapientiae, & prudentiae interioris: & quoniam ex peccato non sola cupiditas, & cæcitas, sed etiam infirmitas orta est, & homo per peccatum similis illi factus est, qui descendens ab Hierusalem in Hierico incidit in latrones, & spoliatus, ac vulneratus semiuius relictus est; ideo addit Prophetam, erigit elisos. Denique adiungit, Dominus diligit iustos, ut homo per gratiam sanatus, solutus, & illuminatus speret perseverantiam de Dei benignitate. Sanctus Augustinus legit, Dominus sapientes facit cæcos: & notat, non esse dictum, Illuminat cæcos, sed, sapientes facit cæcos, ne putaremus, Prophetam loqui de illuminatione corporali. Sed sciendum est, in hebraeo esse, Dominus illuminat cæcos, ut habet nostra lectio, Septuaginta autem vertisse, Dominus sapientes facit cæcos, ut explicarent hebraicam lectionem non esse intelligendam de cæcitate corporali, sed spirituali. proinde utraque lectio laudanda est.

Dominus custodit aduenas, pu-
pillum, & viduam suscipiet, &
vias peccatorum disperdet.

Alia metaphora docet Prophetam Deum esse adiutorem, & protectorem peregrinorum suorum, qui per viam angustam tendunt ad patriam. Dominus custodit aduenas, qui non sunt ciues Babylonis, nec filij huius seculi; sed peregrini in terra aliena, pupillum, & viduam suscipiet. pupilli sunt homines iusti, destituti humano presidio, qui Patrem non habent in terris, neque confidunt in vlla re temporali; vidua autem dicitur Ecclesia, quia est quasi vidua, cum virum suum non videat in terris, & multis iniurijs, & calamitatibus exposita sit. Hos pupillos, & hanc viduam suscipiet Dominus in domum suam, tempore suo: & tunc vias peccatorum disperdet, id est, prosperitates Mundi, per quas ambulant peccatores, ut per vias latas, quae ducunt ad perditionem, Deus in consummatione seculi omnino disperdet, ac destruet.

Regnabit Dominus in secula, IX.
Deus tuus Sion in generationem,
& generationem.

Denique peregrinatione finita, & vijs peccatorum cum impijs peccatoribus exterminatis, adueniet Regnum Christi sempiternum. Regnabit enim Dominus cum Sanctis suis in secula: regnabit, inquam, o sancta Sion, Deus tuus cum filijs suis in secula seculorum. Amen.

PSALMVS CXLVI.

Titulus, & Argumentum.

Alleluia.



ITVLVS, Alleluia, in hebraicis codicibus ponitur in fine Psalmi praecedentis secundum distinctionem Iudaeorum, sed Septuaginta Interpretes posuerunt in principio Psalmi,

mi,

mi, vt credibile est, se habuisse codices hebraicos tempore Septuaginta Interpretum. Addunt aliqui Interpretes ad vocem, Alleluia, Aggæi, & Zachariæ, vt in Psalmo præcedente. Argumentum Psalmi est exhortatio ad laudandum Deum, propterea quod Deus sit dignissimus laude ob eius beneficentiam, sapientiam, potentiam, prouidentiam, iustitiam, & misericordiam.

Explicatio Psalmi 146.

I. **L**audate Dominum, quoniam bonus est psalmus, Deo nostro fit iucunda, decoraque laudatio.

Hortatur Propheta omnes ad laudandum Deum, quoniam laudatio Dei, & nobis utilissima, & Deo gratissima est. Hunc sensum apertius facit litera hebraica, quæ ad verbum sic reddi potest, Laudate Dominum, quoniam bonum psallere Deo nostro, quoniam iucundum, decora laudatio. Vbi post, iucundum, subintelligitur, Deo nostro, vt sensus sit, Laudate Dominum, quoniam bonum est vobis psallere Deo nostro, & iucundum est Deo, quando psallitur, sicut oportet. Septuaginta Interpretes paulo aliter verterunt, sed erit idem sensus, si hoc modo exponamus, Laudate Dominum, quoniam bonus est psalmus, idest, quoniam nobis utile est psallere Domino: Deo nostro fit iucunda, decoraque laudatio, idest, sed efficit, vt laudatio quam offertis Deo, dum psallitis, sit illi iucunda, vt re vera erit, si sit etiam decora, idest, qualis decet eius Maiestatem, pulchra, ornata, virtutum omnium choro stipata. Porro bonum nobis esse psallere Deo, dubitari non potest: primo enim mercedem non parvam accipit diuina laudatio: nam si is qui orat, mercedem accipit, vt Dominus dicit Matth. 6. cur non magis qui laudat? secundo, eadem laudatio animum à terrenis ad celestia eleuat: tertio, est præ gustatio celestis beatitudinis, nosque cum Angelis, & beatis coniungit: quarto dulcissima

est, cum ex charitate procedit, nihil enim iucundius amanti, quam laudare dilectum: quinto utilis est, quia per eam soluimus debitum tributum. Iustum enim est, vt laudemus bonorum omnium fontem, & gratias agamus summo benefactori. Hinc enim in diuino sacrificio, cum Sacerdos dicit, Gratias agamus Domino Deo nostro: respondetur, Dignum & iustum est: & Sacerdos addit, Verè dignum, & iustum est, æquum, & salutare, &c. Quod autem iucunda sit Deo decora laudatio, vel ex eo intelligi potest, quod ipse non alia de causa creauit Angelos, & homines, nisi vt essent, qui bonitatem eius cognoscerent, & laudarent. Isaia 43. Omnem, qui inuocat nomen meum, in gloriam meam creauit eum: neque hæc est ambitio, sed iustitia. Iustus autem Deus est, & iustitiam dilexit, æquitatem vidit vultus eius. Præterea delectatur Deus sacrificio, vt odore gratissimo, & suauissimo: sacrificium autem laudis sacrificiorum præstantissimum est, iuxta illud Psalmi 49. Sacrificium laudis honorificabit me. Denique iucunda est Deo decora laudatio, quia delectatur bonis nostris, ac præcipue bonis magnis, quales sunt virtutes: in laudatione autem Dei exercetur Fides, Spes, Charitas, Religio, Deuotio, Humilitas, &c.

Aedificans Hierusalem Dominus, dispersiones Israelis congregabit.

Incipit materiam diuinæ laudis ostendere, vt sciamus, vnde Deum laudare possimus. ac primum dicit, Laudandum esse Deum ex beneficentia erga populum suum: quasi dicat, Laudate Dominum, quoniam ipse ædificauit Hierusalem, & ad eam congregabit dispersiones Israelis, idest, filios Israel in locis varijs dispersos. Potest autem hoc intelligi cum Chrysostomo, & Theodoro de terrena Hierusalem, quæ post euersionem à Nabuchodonosor cepit iterum ædificari tempore Cyri, & Darij Regum Persarum, & captiui-

tate soluta redierunt in patriam dispersi Iudæi : hoc autem praudivit David futurum spiritu prophetiæ . Potest etiam intelligi de ædificatione Ecclesiæ per Apostolorum prædicationem , & cōgregatione disperforum filiorum Dei , iuxta illud Ioan. 11 . Iesus moriturus erat pro gente , & non tantum pro gente , sed ut filios Dei , qui erant dispersi congregaret in vnum . Denique potest intelligi cum sanctis Hilario , & Augustino , de cælesti Hierusalem , quæ quotidie ædificatur ut ciuitas , ascendentibus ad eam lapidibus viuis : ad quam congregandi sunt omnes peregrini , qui nunc dispersi sunt per regiones Babyloniz .

III. Qui sanat contritos corde , & alligat contritiones eorum.

Docet , quo modo dispersiones Israelis congregabit : & quidem si hunc locum intelligamus de dispersis in captiuitate Babylonica , contriti corde dicuntur illi , qui magnitudine calamitatum humiliati erant , & in se non amplius confidebant , ut exponit sanctus Ioannes Chrysostomus . Hos ergo calamitosos , & mæstos , & inde humiliatos ex corde , Deus sanauit , varijs consolationibus illos erigendo , & latificando : & alligauit contritiones eorum , quando per Cyri beneuolentiam effecit , ut calamitas non procederet ulterius , & ad perfectam liberationem disponderetur . Sed altiore sensu colligit Deus dispersos Israelis , quando sanat contritos corde , id est , quando cor contritum , & humiliatum non despicies sanat à morbo peccatorum : sic enim explicat ipse idem David in Psalmo 103 . Qui propitiatur omnibus iniquitatibus tuis , qui sanat omnes infirmitates tuas . Quod autem hic additur , Et alligat contritiones eorum , significat modum quo Deus sanat contritiones . Id enim facit more Chirurgorum colligando vulnera . Sunt autem , ex Augustino , alligamenta peccatorum , sacramenta visibilia , per quæ Deus peccata curare solet : & quemadmodum

curatis perfecte vulneribus alligamenta tolluntur : sic in resurrectione corporum , curatis omnino languoribus nostris , omnia sacramenta cessabunt .

Qui numerat multitudinem stellarum , & omnibus eis nomina vocat.

Secundo laudandum esse dicit Prophetam Deum à sapientia . Et quidē sancti Patres Hilarius , & Augustinus dicunt , non esse magnum Deo numerare stellas , quod etiā homines tentare ausi sunt : & ideo exponunt hunc locum de stellis spiritualib⁹ , id est , de electis , qui veluti stellæ fulgebunt in cælesti Hierusalem . Electorum enim numerum solus Deus nouit , sed nos quemadmodū expositionem horum Patrum libenter amplectimur , sic etiam ad literam existimamus hunc locū de veris stellis accipi posse , Nam etiam si non sit difficile Deo stellas numerare , cui non fuit difficile eas creare : tamen absolute magnum est , & multæ sapientiæ multitudinem stellarum numerare : alioqui nō diceret Deus Abrahamo Genes. 15 . Numeras stellas si potes : neque conferret Gen. 22 . multitudinem stellarum cum multitudine arenæ , quæ est in liore maris . de qua dicitur Ecclesiastici 1 . Arenam maris quis dinumerauit ? præterea non solum hic dicitur , Qui numerat multitudinem stellarum : sed etiam additur , Et omnibus eis nomina vocat : quod significat , notitiam distinctæ naturæ , & proprietatum singularum stellarum . Neque hoc solum significat , sed etiam obedientiam stellarum , quæ vocatæ nominatim , cū non essent , esse ceperunt . Deus enim vocat ea quæ non sunt , & vocando facit , ut sint . Baruch 3 . Stellæ vocatæ sunt , & dixerūt , adsumus , & luxerunt ei cum iucunditate , qui fecit illas . Denique significat etiam , stellam , quæ similiter exercitum , vocari ut præcediantur , quæ velocissime obediunt vocanti . Item 40 . Leuate in excelsis oculos vestros , & videte quis creauit eos , qui reducit in numerum milia eorum , & omnes ex nomine vocat : Recte dicitur Iungit Prophetas

Magnus

V. **Magnus Dominus noster, & magna virtus eius, & sapientie eius non est numerus.**

Vbi non solum sapientia, sed etiam virtus, idest, potentia Dei laudatur, quia non solum Deus nouit numerum, & naturas, & proprietates stellarum: sed etiam vocando eas nominatim, dedit illis esse, & moueri. Illud autem, Sapientie eius non est numerus, significat, non esse numerum earum rerum, quas Deus per sapientiam suam cognoscit. Nouit enim sapientia Dei omnia quae sunt, quae fuerunt, quae futura sunt, & quae esse possunt, quamuis nunquam futura sint; item, omnia verba, omnes cogitationes, omnia desideria praeterita, praesentia, & futura usque in aeternum; denique nouit omnia, quae sunt in Deo, idest, in essentia sua perfectiones, & attributa, usque ad intima, & profunda Dei, quae sunt sine mensura, & numero.

VI. **Suscipiens mansuetos Dominus, humilians autem peccatores usque ad terram.**

Tertia laus Dei sumitur à iustitia, & misericordia. Dominus enim, ut pius & misericors suscipit humiles, & mansuetos in protectionem suam, eosque exaltat usque ad caelum: contra autem, ut iustus Iudex superbos peccatores, qui se ipsi exaltant super sydera, ut fecit Rex eorum Satanas, humiliat, & deprimit, ut humi iaceant, & viles, atque abiecti viuant.

VII. **Præcinite Domino in confessione, psallite Deo nostro in cithara.**

In medio Psalmi, antequam pergat ad laudem prouidentiae diuinæ, iterum hortatur ad canendum, & psallendum Deo. Præcinite, inquit, Domino in confessione, idest, præmittite confessionem laudis canendo hymnum, deinde etiam psallite in cithara, addite ad hymnum, sonitum citharæ. Spiritualiter significat, post verba laudis Dei, debere sequi sonitum operum bo-

norum, ut manus non discedat à lingua, neque de nobis dici possit, Dicunt, & non faciunt.

Qui operit caelum nubibus, & VIII. parat terræ pluuiam.

Materia confessionis esse docet prouidentiam Dei generalem, qua suis temporibus cogit aerem in nubes, non ut caelum obscuraret, sed ut pluuiam necessariam terræ tribuat, sine qua nihil omnino in terra nasceretur. Spiritualiter operit Deus caelum nubibus, cum serenitatem prosperitatis subducit, ut ex tribulatione pluuiæ gratiae Dei, per patientiam, & humilitatem ad nos descendat, vel secundum S. Augustinum, operit Deus caelum nubibus, cum scripturas, figuris, & metaphoris obscurat, ut ijs explicatis per Doctores, pluuiæ intelligentiae gratissima descendat.

Qui producit in montibus fœnum, & herbam seruituti hominum. IX.

Declarat cui vsui deseruiat pluuiæ, nimirum, ut producat in montibus fœnum, & herba seruituti hominum. Illud, qui producit, significat, non sufficere terram, & pluuiam ad producendam herbam, nisi Deus auxilio suo cooperetur; imò nisi Deus ut principalis auctor, sicut per nubes exprimit pluuias; ita per pluuias tanquam per instrumenta sua producat herbas. Illud, in montibus, significat, montibus maxime necessarias esse pluuias, quoniam valles, & campi per aquas fluviorum irrigari possunt: montes autem, nisi de caelo pluuias acciperent, omnino arcescerent. Quod sequitur, Et herbam seruituti hominum; non habetur in hebraeo, sed vel excidit, cum ibi fuisset tempore Septuaginta Interpretum, vel ab aliquo alio positum est hoc loco ex Psal. 103. ubi dicitur, Producent fœnum iumentis, & herbam seruituti hominum. significatur autem his verbis, fœnum agreste nafei in montibus in pastum iumentorum; herbam autem, quæ satione & cultura

gigni-

gignitur, produci in cibum hominum, vel ut exponit S. Io. Chrysostomus, scilicet esse herbam iumentorum, ut iumenta homini deferuiant. Vide versiculum 8, Psal. 103.

X. Qui dat iumentis escam ipsorum, & pullis coruorum inuocantibus eum.

Pergit in explicanda providentia Dei erga bestias, & volatilia, ut inde intelligat homo, quanto magis sperare debeat se à Dei providentia nunquam esse deserendum. Quod argumentum habetur etiam in Evangelio Matth. 6. & Luc. 12. Quod autem hic dicitur de pullis coruorum, valde probabiliter Sanctus Gregorius Nazianzenus in epist. prima, ad Cledonium Presbyterum, intelligit de omnibus auiibus, ut posita sit species pro genere: nam & Matth. 6. dicitur, Respicite volatilia cœli. & Luc. 12. dicitur, Considerate coruos; & tamen res eadem ab utroque Euangelista narratur. Expositores tamen explicant hunc locum de coruis in specie; & quoniam corui non possunt inuocare Deum necesse est vel coruos, vel inuocationem accipere per metaphoram. Sancti Patres Hilarius, & Augustinus accipiunt inuocationem Dei propriè, & coruos metaphoricè. Dicunt enim per coruos significari paganos, per filios coruorum Christianos, qui inuocant Deum, quem patres eorum inuocare nescierunt. Alij communius accipiunt filios coruorum propriè, & inuocationem impropriè. Dicuntur enim filij coruorum inuocare Deum dum crocitant quærentes cibum, non quòd Deum agnoscant, sed quia Deus est, qui providentia sua illis cibum desiderantibus procurat. quomodo etiam dicitur in Psalmo 103. de catulis leonum, Quærent à Deo escam sibi. Cur autem Propheta dicat potius, Deum providere pullis coruorum, quàm ipsis coruis; ratio est, quia corui iam assueti sunt cibum quærere; sed pulli cor-

uorum cito deseruntur à parentibus, & insueti per se cibum quærere, vagantur crocitando, quasi destituti omni auxilio, ut dicitur Iob 38. Quod si Deus pullis coruorum, auiibus immundis, inutilibus, rapacibus, tanta benignitate prospicit, quid præstabit hominibus; si in eius pietate sperare voluerint?

Non in fortitudine equi volum ratem habebit, nec in tibijs viri beneplacitum erit ei. XI.

Beneplacitum est Domino super timentes eum, & in eis qui sperant super misericordia eius. XII.

Quia dixerat, Deum providere pullis coruorum inuocantibus eum; concludit Psalmum dicens, Deo non esse gratos superbos, qui in suis viribus confidunt; sed humiles, qui timent Deum, & confidunt in Deo, qui similes sunt pullis coruorum infirmis, de se diffidentibus, & qui crocitando a Deo auxilium petunt, Non in fortitudine equi voluntatem habebit, id est, non placet Deo, siue, non amat Deus fortitudinem equi, quatenus, de ea superbiunt homines. Neque in tibijs viri beneplacitum erit ei, id est, neque complaceat sibi Deus in tibijs robustis hominum, quatenus in illis ipsi confidunt, ut Dei auxilio sibi egere non videantur ad euadenda pericula: sed beneplacitum est Deo super timentes eum, id est, super humiles, & tremantes ad mædata Dei, & qui non in suis viribus, sed in Dei misericordia totam spem suam ponunt. Sanctus Hilarius, & S. Augustinus pro illis verbis, Neque in tibijs viri, legunt, Neque in tabernaculis viri: sed in hebraicis codicibus habetur, tibijs, non tabernaculis.



PSALMVS CXLVII.

Titulus, & Argumentum.

Alleluia.

HIC Psalmus apud hebræos non habet titulum, quia non est nouus Psalmus, sed continuatio Psalmi superioris: nos autem sequimur Septuaginta Interpretes, qui hinc incipiunt nouum Psalmum cum titulo, Alleluia, & credibile est in codicibus hebraicis antiquis, quos ipsi Septuaginta viri habuerunt, hunc fuisse nouum Psalmum cum suo titulo. Quod autem ad argumentum attinet, hortatur Propheta populum Dei ad ipsum Deum laudandum ob multa beneficia in ipsum collata: & quæ hic dicuntur, conueniunt primo terrenæ Hierosolymæ, ut sanctus Chrysostomus docet, sed magis perfectè conueniunt Ecclesiæ Christianæ, ut idem sanctus Chrysostomus, & sanctus Hieronymus admonent; sed perfectissime quadrant in cælestem Hierusalem, de qua hunc Psalmum exponunt sanctus Hilarius, & sanctus Augustinus.

Explicatio Psalmi 147.

I. **L**auda Hierusalem Dominum: lauda Deum tuum Sion.

Hierusalem ciuitas sancta est: Sion, pars eius ciuitatis nobilior, ubi templum Domini ædificatum erat, & pro ipsa tota ciuitate accipitur; proinde idem est, lauda Hierusalem, & lauda Sion. Si de cælesti Hierusalem hæc accipiantur, nihil potuit magis appositè dici: nam ciuitas illa cælestis, nullum habet negocium, vel ut sibi prospiciat, quæ ad vitam sustentandam necessaria sunt, vel ut in alios exerceat opera charitatis, cum ibi nullus sit egens, nullus miser: ideo tota, & semper vacare potest, ut re vera vacat laudibus Dei. Recte igitur illi dicitur, lauda Dominum, quæ ab omni alio negotio libera es;

lauda Deum tuum, quoniam præ omnia alia ciuitate beneficijs Domini frue- ris; lauda denique, quia singulariter tibi pulchritudinem, & præstantiam Domini speculari, vel potius cernere datum est. Ecclesia, quæ peregrinatur in terris, laudare quidem Dominum debet, sed nec tota, nec semper id facere potest, cum sæpè sollicita esse, & circa plurima turbari necesse habeat. Et si Ecclesia non potest tota, & semper laudare: multo minus Iudæorum synagoga poterat.

Quoniam confortauit seras II. portarum tuarum, benedixit filiis tuis in te.

Hæc est ratio, cur debeat Hierusalem laudare Dominum, quia dedit illi securitatem, & abundantiam, in quibus summa bonorum omnium consistit: nam securitas sine abundantia, est securitas egestatis, abundantia sine securitate, est abundantia plena timoris & periculi. Deus igitur confortauit seras portarum Hierusalem, ut nulla vi expugnari possint, & qui intus sunt securi sint, quia nihil mali intrabit, nihil boni exibat, nullus admittetur inimicus, nullus excludetur amicus: atque in hanc tam munitam ciuitatem benedictio diuina copiam omnium bonorum intulit: non enim benedixit Deus filiis Hierusalem hac, aut illa benedictione, sed benedictione absoluta, id est, ut Apostolus loqui solet, omni benedictione spiritali in cælestibus, Ephes. 1. Sed hæc duo perfectè conueniunt cælesti Hierusalem, ubi securitas est æternitas, & benedictio est fruitio summi boni. Ecclesiæ peregrinanti in terris conueniunt etiam suo modo, sed non omnibus modis: nam portæ inferi non præualebunt aduersus eam; & non defunt ei bona plurima: sed interim tamen multi in eam intrant mali, multi ex ea deficiunt boni; paleas cum tritico, pisces malos cum bonis, hædos cum agnis admixtos habet. Denique conueniunt etiam utcumque, sed valde imperfectè terrenæ Hierusalem: nam

in

in montibus sita; & montes in circuitu habens satis munita videri poterat, & plena populo, atque opibus aliquando fuit: sed tamen non semel euerfa, & succensa satis ostendit, non de illa potissimum intelligendum esse, quod hic dicitur, Confortauit feras portarum tuarum: sed illud potius, quod dicitur Thren. 2. Defixæ sunt in terra portæ eius, perdidit & contriuit vinctes eius, luxitque antemurale, & murus pariter dissipatus est. Quo tempore ita non abundauit copia bonorum, vt in eodem legamus, Matribus suis dixerunt, vbi est triticum & vinum, cum deficerent quasi vulnerati, in plateis ciuitatis, cum exhalarent animas in sinu matrum suarum.

III. Qui posuit fines tuos pacem; & adipe frumenti satiat te.

Non solum munitissima est ciuitas sancta Hierusalem, sed immunis à bellorum periculis, vnde & nomen habet Hierusalē, idest, visio pacis. Qui enim initio pacem turbare tentauit, tanto impetu mox expulsus fuit, vt Dominus dicat, Videbam satanain tanquam fulgur de cælo cadentem, Luc. 10. Qui posuit, inquit, fines tuos pacem, idest, pacem diffudit per vniuersam regionem tuam vsque ad vltimos eius fines: vel, fines, siue terminos tuos pacem esse voluit, vt nullo modo ad te bellum penetrare possit. Nec solum hæc ciuitas abundat copia bonorum, sed habet bona optima, & exquisitissima, atque adeo ipsam medullam bonorum. Et adipe, inquit, frumenti satiat te: vbi notatur excellentia ciborum in verbo, adipe frumenti, & vbertas maxima in verbo, satiat te. Hæc omnia propriè, & absolutè soli patri cœlesti conueniunt: ibi enim pax summa erit partis inferioris cum superiore; & superioris cum Deo: necnon inter omnes ciues sanctæ illius ciuitatis maiores, & minores. Erunt enim verè cor vnum, & anima vna, & vt Dominus dicit Ioan. 17. consummati in vnum. Ibi quoque satiabuntur omnes adipe frumenti; quoniam ci bus animæ veritas, & sapientia est: ha-

bebunt autem veritatem in se ipsa, nō in figuris, & ænigmatibus; gustabunt dulcedinem æterni Verbi, sine cortice Sacramenti, vel Scripturarum; apponent os ad fontem sapientiæ, non ad ri uulos, aut stillicidia stillantia super ter ram: Ita verò satiabuntur, vt non esuriant, neque sitiant in æternum. In Ecclesia peregrinante, quæ etiam Hierusalē quædam est, habemus pacem ad Deū, sed simul in Mundo pressuram sustinemus. Cum omnibus, quantum in nobis est, pacem habere curamus; sed in medio versamur eorum, qui oderunt pacem. Proinde foris pugna, intus timores nunquam desunt: & adipe quidem frumenti pascimur, sed non sine integumentis varijs: Verbum Dei habemus, sed in carne, & ipsam carnem Verbi verè manducamus. sed sub cortice Sacramenti. Aquas sapientiæ bibimus; sed ex stillicidio Scripturarum; & adeo non satiamur his bonis, vt nostra beatitudo interim sit esurire, & sitire. Multo minus ista conueniebant terrenæ Hierusalem, antiquæ Synagogæ Iudæorū, quibus omnia contingebant in figuris.

IV. Qui emittit eloquium suum terræ, velociter currit sermo eius.

Hortatus est Propheta sanctam ciuitatem, vt Deum laudet pro beneficijs sibi præstitis: nunc hortatur, vt laudet etiam pro beneficijs præstitis alijs nationibus, ex quibus cognoscet, quanto maiora dona sibi, quam alijs concesserit Deus. Hortatur igitur vt laudet Deum, qui emittit eloquium suum terræ, idest, qui præcepta, & decreta prouidentia suæ dat vniuersæ terræ; & eius sermo velocissimè currit, idest, cuius præcepta, & decreta celerrimè deferuntur ad omnes res creatas, mox penetrant omnia, & executioni mandantur. Significatur his verbis ordo prouidentia diuinæ, qui se ad omnia extendit, idque summa velocitate, quia Deus ubique est, & omnia portat verbo virtutis suæ, vt dicitur Hebr. 1. & attingit à fine vsque ad finem fortiter, & disponit omnia suauiter, Sap. 8. vnde David Deo dicit Psal. 118. Omnia seruiunt tibi.

bi. Expédit S. Augustinus verba græca, quæ pro eo, quod nos habemus, velociter, habent, *וְיָרֵד*, usque in velocitatem, & sensum esse dicit. sermonem Dei tanta celeritate ferri, ut non modo aues, ventos, fulmina, quæ velocissimè mouentur, sed ipsam velocitatem currendo æquent. iuxta illud Sap. 7. Omnis mobilibus mobilior est sapientia; non quæ sapientia, vel sermo Dei propriè moueatur, sed quæ omnibus in locis adsit præsens, ac si velocissimè accurrisset.

V. Qui dat niuem, sicut lanam, nebulam sicut cinerem spargit.

VI. Mittit crystallum suam sicut buccellas, ante faciem frigoris eius quis sustinebit?

Ab vniuersali prouidentia descendit ad effectum vnum particularem, in quo apparet admirabilis potentia, & sapientia Dei, ob quam merito laudari debeat Dominus etiam ab illis, qui in superna Hierusalem extra, vel supra mutationes temporum degunt. Effectus mirabilis potentia, & sapientia Dei, qui tamen sensu percipitur, & omnibus notissimus est, in frigore & calore aeris cernitur. Aliquando enim in certis regionibus tanta niuium, pruinæ, & glaciæ copia repente existit; ut lacus, & flumina, & ipsa maria congelentur, & ita congelentur, ut super lacus & flumina ducantur plaustra bene onusta, ut per campos duci solebāt: cuius rei testis est S. Basilius oratione in Quadraginta Martyres: & nos ipsi in Gallia Belgica aliquid huiusmodi vidi mus. Et cū ea glaciæ ferreis ligonibus vix dirumpi queat, Deus tamē, cū ei placet, ventum calidum repēte ex thesauris suis aduocat, & dicto citius soluitur glaciæ omnium fluminum, & lacuum, & marium simul, & vbiq; ex tectis domorum, ex mōtib; & collibus desluunt aquæ. Ita ferè in momento Deus rigorem frigoris maximum cum caloris suauitate commutat: sed verba singula explicemus. Qui dat niuem, sicut lanam, idest, niuem demittit è cælo tantæ magnitudinis, ut frusta singu-

la floccos lanæ imitari videantur. Comparatur enim hoc loco nix lanæ, non solum ob similitudinē leuitatis, & candoris, sed ut magnitudo niuis ostendatur: aliquādo enim ita modicè ningit, ut frustula niuis videantur similia atomis, sed alias, ut diximus, ita granditer ningit, ut frusta niuium lanarum floccos imitentur. Nebulam sicut cinerem spargit. Sanctus Hieronymus in commentario huius loci reprehendit latinum Interpretem, quod nebulam verterit, cū pruinam vertere debuisset: sed latinus Interpres nō verba hebraica, sed græca traduxit in latinum idioma. Verbum autem græcum hoc loco positum *νεφέλη*, nebulam propriè significat. quamuis autem vox hebraica, chephor, pruinam significet, & sit ad propositum huius loci, vbi de frigore agitur: tamen textus faciliè conciliantur. Siquidem quādo densa pruina decidit, nebulosum, siue caliginosum aerem reddit, & ipsa pruina ex caliginoso vapore concrefcit. Porro comparatio pruinæ cum cinere ad densitatem pruinæ pertinet, sicut diximus de comparatione niuis cum lana. Itaque sensus est, tanta densitate pruinam caliginosam, siue nebulam ex pruina diffundit, ut cinerem spargere videatur: cinis enim fufus obscurissimam nebulā facit. Mittit crystallum suam sicut buccellas: crystallus vox est græca, & non solum quam vulgo crystallū dicimus, sed etiam glaciem significat: & hoc loco glaciem significare apertè colligitur ex voce hebraica. Aliqui per crystallum hoc loco grandinem significari volunt, quæ est aqua in aere congelata; sed grando non habet similitudinē buccellæ, neque dicitur hebraicè *קרח*, sed *ברד* barad, hoc autem loco est, *כרחו* recho, glaciem suam, non berado, grādinem suam: denique grando in æstate potissimum descendere solet, proinde non efficit in aere frigus, de quo hic dicitur, Ante faciem frigoris eius quis sustinebit? Illud igitur, qui mittit crystallum, non significat, qui de cælo descendere facit; sed qui iussu suo causa est, ut glaciæ frigidissima in terra existat.

stat. quomodo dicebatur Deus mittere Prophetas, & Ioānes dicitur homo missus à Deo, qui tamen nō de cœlo cadebat. Illud, sicut buccellas, significat fragmenta glaciei, quæ tempore frigidissimo passim inueniuntur in terra, vbiq; aliquid aquæ fuerat, similia esse buccellis panis, quia figuram habent fragmentorum panis. Ante faciem frigoris eius quis sustinebit? Hæc est apostrophe Prophetæ admirantis frigoris vehementiam, quasi dicat, Quis tantum frigus tolerare poterit? Ante faciem frigoris eius, idest, coram tanto frigore, siue ad præsentiam tanti frigoris quis sustinere poterit? quis non congelabitur, & peribit? est enim hebraica phrasis, ante faciē, pro, coram, vñtatissima.

VII. Emittet verbum suum, & liquefaciet ea; flabit spiritus eius, & fluent aquæ.

Descripsit hætenus vehementissimū frigus ex niue, pruina, & glacie: nunc ostendit quanta facilitate, & celeritate Deus illud recedere faciat. Emittet, inquit, verbum suum, idest, mandatum suum, & liquefaciet ea. Iubebit Deus, & mox liquefcent nix, pruina, & glacies. & continuo frigus remittetur. Modus autem quo id faciet Deus, explicatur, cum subiungitur, Flabit spiritus eius, & fluent aquæ, idest, iubente Deo surget ventus australis, perflabit vndique aerem, & nix, pruina, & glacies soluentur in aquas.

VIII. Qui annunciat verbum suum Iacob, iustitias, & iudicia sua Israel.

IX. Non fecit taliter omninationi, & iudicia sua non manifestauit eis.

Concludit ostendens, quantum interfit inter prouidentiam Dei erga populum suum, & alias nationes. Alias enim nationes docuit Deus per effecta naturalia, vt ex rebus creatis agnoscerent creatorem: sed populum suum ipse docuit per Prophetas suos. Qui annunciat verbum suum Iacob, idest, lau-

da Hierusalem Dominum, qui annunciat verbum suū populo suo Iacob, loquens illi per Mosem, & Prophetas; & qui demonstrauit iustitias, & iudicia sua Israeli per Mosem, cui Deus ipse legem dedit, vt eam traderet populo suo Israel: & ex hoc intelliges, quia non fecit taliter omni nationi, quia tibi soli, non alijs iudicia sua, leges videlicet suas manifestauit. Porro ista conclusio conuenit quidem terrene Hierusalem, cui Deus misit Prophetas, qui annunciant verba eius, & docerent leges eius: sed multo magis conueniunt spirituali Hierusalem, quæ est Ecclesia, quæ recepit ipsum Verbum Dei incarnatū per Apostolorum prædicationem, & multo sublimiorem legem, iustitias, & iudicia didicit: sed perfectissime conueniunt cœlesti Hierosolymæ, cui Deus ipse coram annunciat Verbum suum, & in ipso Verbo vident omnes habitatores Hierusalem iudicia Dei, ordinē, ac dispositionem, & rationes prouidentie diuinæ; quæ nobis sunt abyssus multa. Verè igitur, non fecit Deus taliter omni nationi, sed cœlestis patriæ habitatores præ omnibus alijs hominibus, dilexit, & diligendo felicissimos fecit. Hæc mihi visa est literalis expositio huius obscurissimi Psalmi, in qua S. Ioannem Chrysostomum ex Patribus præcipuè imitatus sum, quantum ad illos versiculos, Qui dat niuem sicut lanam, &c. Quia tamen hæc pars obscurissima est, indicabo breuissimè quid S. Hilarius, & S. Augustinus senserint. Igitur S. Hilarius existimat, & in illis verbis, Qui dat niuem sicut lanam, &c. Prophetam declarare, quæ sit via ad cœlestem Hierusalem, de qua dixerat, Lau-da Hierusalem Dominum. Viam autē esse dicit per multas tribulationes, & angustias, easq; significari per niuem, pruina, & glaciem, & frigus feruē intolabile: sed ex his omnibus tandem liberandos peregrinos Dei, flante spiritu consolationis, & refrigerij. Sanctus Augustinus paulò aliter exponit. Dicit enim, Prophetam post commemorata bona cœlestis Hierusalē in tribus versiculis, commemorare bona peregrin-

regri-

regnantium in sequentibus versiculis, & eius expositio satis prolixa nota est in libris eius: nos ad eius imitationem, aliam similem adiungemus. Igitur illud, Qui emittit eloquium suum terræ, exponi potest de consolatione scripturarum, quā hic habemus, quasi manna de cælo pluate in desertum. Illud autem, qui dat niuem, sicut lanā; potest exponi de consolatione, quam accipiunt Sancti ex tribulationibus, iuxta illud Apostoli, Repletus sum consolatione, superabūdo gaudio in omni tribulatione nostra: nam nix quidē frigore affligit, sed lana calore suo fouet, & calefacit. Itaque Deus, dat niuem sicut lanam, quia dat niuem, ac si daret lanam; dat enim tribulationem, quæ Sanctis conuertitur in cōsolationem. Illud, Nebulam sicut cinerem spargit; referri potest ad pœnitentiam, ad quā pertinet cinis: Deus enim spargit nebulam, siue pruina tribulationis, ex qua multi compunguntur ad pœnitentiam, atque ita Deus dat nebulam sicut cinerem, quia dat nebulam, ac si daret cinerem, quia tribulatio ad pœnitentiam adducit. Illud denique, mittit crystallum suum, sicut buccellas; exponi potest de maxima consolatione, quam Deus in tribulatione concedit: tunc enim mittit crystallum sicut buccellas, quando ita dat glaciem, ac si daret panem, quia in ipsa glacie tribulationis infundit panem consolationis.

PSALMVS CXLVIII.

Titulus, & Argumentum.

Alleluia.



RES postremi Psalmi, quī habent in titulo, Alleluia, inuitant omnes res creatas ad laudandum creatorem; & quidem in Psalmo 148. enumerantur ordine res omnes creatæ, & quasi vocantur ad chorum, vt modo omnes canant in Psalmo sequē-

ti iniungitur hominibus, vt ij potissimum Deum laudent, qui plura, & maiora beneficia receperunt: in postremo mandatur ijsdem hominibus, vt non solum Deum laudent, sed per omne genus instrumentorum musicorum laudent.

Explicatio Psalmi 147.

Laudate Dominum de cælis: I. laudate eum in excelsis.

Laudate eum omnes Angeli eius, laudate eum omnes virtutes eius.

Primo loco inuitantur Angeli, qui in summo cælo, tanquam in ipsa Regis æterni aula residēt. Porro vox illa, laudate, non est imperantis, neq; propriè exhortantis, quasi Angeli desint officio suo, sed est inuitantis per affectum complacentis, & optantis, quasi dicat Propheta Dei amore vehementer accensus, Vtinam omnes res creatæ creatorem laudent, & vos Angeli, qui primi estis in ordine rerum creatarum, pergite, vt facitis, laudate Dominum. Illud, de cælis, significat locum, vbi Angeli degunt, vt sensus sit, Laudate Dominum de habitaculo vestro cælesti vos omnes, qui estis in cælo. Idem verò repetitur cū additur, Laudate eum in excelsis. Deinde clarius explicatur, qui sint qui habitant in excelsis, cū dicitur, Laudate eum omnes Angeli eius: & idem alijs verbis repetitur, cū additur, Laudate eum omnes virtutes eius, idest, omnis exercitus eius, vt habetur in hebræo. Per virtutes Dei, siue exercitum, & militiam Dei, intelligi debere Angelos, non Solem, & Lunam & Stellas, vt aliqui volunt, perspicuum est primo ex consuetudine Dauidis, qui frequentissimè idē repetit alijs verbis: secundo ex Patribus, qui hunc locum exponunt, ac præsertim ex Chrysostomo, qui virtutes hoc loco dicit esse Cherubim, & Seraphim, & cæteros Angelos: tertio ex cap. 2. Lucæ, vbi Angeli dicuntur multitudo

titudo militiæ cœlestis : quarto ex Psalmo 102. vbi clarius Angeli dicuntur virtutes Dei, & ministri qui faciunt verbum eius.

- III. Laudate eum Sol & Luna, laudate eum omnes stellæ, & lumen.
IV. Laudate eum cœli cœlorum, & aquæ omnes quæ super cœlos sunt, laudent nomen Domini.

Ab Angelis, qui mente, & intelligentia præditi Deum propriè laudant; descendit ad corpora cœlestia, quæ non laudant mente, vel intelligentia, quæ carèt, sed laudant magnitudine, velocitate, efficacitate, splendore, & pulchritudine admirabili; quomodo omne opus egregium, opificem laudare dicitur. Ac primo nominat Solem, qui omnium consensu princeps est luminum reliquorum: deinde addit Lunam, quæ vel absolutè, vt Patres velle videntur, præsertim S. Augustinus lib. 2. de Gen. cap. 16. vel certè quo ad apparentiam, & efficaciam in corpora inferiora, maior est omnibus alijs stellis: postea adiungit stellas ceteras: postremo subiungit lumen, per quod intelligimus lumē à Sole, Luna, & stellis diffusum in corpora inferiora, ac potissimum in aerē, vnde nos omnes mirificè recreat. His enumeratis, quæ continentur in cœlo, transit ad ipsum cœlum, & vocat cœlos cœlorum, id est, cœlos superiores, quibus subiecti sunt cœli inferiores, in quibus nubes concresecunt, & aues volant. vnde in Scripturis legimus nubes cœli, & volucres cœli. His cœlis superioribus adiungit aquas, quæ super cœlos sunt, vt nihil omnino sit in parte Mundi superiore, cuius non meminerit. Porro de aquis istis aliqua videntur extra controuersiam esse debere, alia disputationi hominum permittuntur: primo certum esse debet, aquas esse corporales, non spirituales; in quo errasse Origenem conuincit Sanctus Epiphanius in epist. ad Ioannem Episcopum Hierosolymæ, quam Sanctus Hieronymus latinam fecit, nec non Basilus, & Am-

brosius de opere sex dierum. Secundo esse super cœlum æthereum, non vt quidam voluerunt, in cœlo aereo: nam hoc loco indicat Propheta, eas esse super cœlos cœlorum; quia cum dixisset, Laudate eum cœli cœlorum, mox adiungit, Et aquæ omnes, quæ super cœlos sunt, illos videlicet, quos immediate nominauerat cœlos cœlorum. & in Psal. 102. de cœlo eodem loquens Propheta dicit, Extendens cœlum, sicut pellem, qui tegis aquis superiora eius. & apertè in primo capite Geneseos, ponit Moses aquas super Firmamentum, in quo firmamēto paulò post stellas posuit. Et apertissimè in hymno trium puerorum Danielis cap. 3. enumerantur ordine omnia opera Domini: & primo loco ponuntur Angeli, deinde cœli, & aquæ quæ super cœlos sunt, postea Sol & Luna, & stellæ, & cetera inferiora, atque hæc est sententia veterum Patrum, vt notauimus in Psalmo 103. vers. 3. tertio esse aquas incorruptibiles, & sempiternas: nam de ijs, quæ hucusque numerata sunt, dicitur in sequenti versiculo, Statuit ea in æternum, & in sæculum sæculi.

Quia ipse dixit, & facta sunt, V.
ipse mandauit, & creata sunt.

Statuit ea in æternum, & in sæculum sæculi; præceptum posuit, & non præteribit. VI.

Hæc est ratio cur omnia, quæ hæcenus nominata sunt, Deum laudare debeant: quoniam ab illo facta sunt, & in æternum incorrupta permanebunt: & quod est admirabilius, non magno labore, nec multo tempore, sed verbo, atque imperio fecit vt essent, & in æternum essent. Ipse dixit, Fiat lux, & facta est lux. Ipse mandauit rei non existenti, vt existeret, & mox obediens cœpit existere, quæ antea nihil erat. Statuit ea in æternum, & in seculum seculi, id est, cōstituit, vt semper maneāt, & non ad morem inferiorum corporum oriantur, & occidant. Præceptum posuit, id est, decretum de hac re fecit Deus.

Deus, & non præteribit, idest, & hoc decretum non præteribit, non abibit in auras, sed manebit, & manens res ipsas conseruabit, vt nec ipsæ prætereant. per hoc præceptum intelligitur natura incorruptibilis, quam Deus Angelis, & cælestibus corporibus in creatione attribuit. Potest etiam per præceptum positum, intelligi præceptum datum rebus cælestibus, idest, Angelis, vt semper Deum laudent, Soli, & Lunæ, & stellis, vt circum eundo, & illustrando seruiant humano generi, quod præceptum non præteribit, idest, vt ex ponit S. Hilarius, non irritum erit, vt re vera non irritum fuisse experimento didicimus. Euthymius legit, non præteribunt: sed codices hebraici, græci, & latini omnes, quos videre potui, habent, non præteribit.

VII. **Laudate Dominum de terra, dracones, & omnes abyssi.**

Transit nunc ad elementa corruptibilia, & Mundum inferiorem, vbi sunt terra, aqua, & aer, & animantia terrestria, aquatica, & volatilia: nec non tonitrua, fulmina, grandines, vèti, & alia id genus. Ex quo apertissimè refelluntur Manichæi, qui res istas inferiores non à Deo bono, sed à malo quodam principio condita fabulabantur. Laudate, inquit, Dominum de terra: dixerat, Laudate Dominum de cælis: nunc dicit, Laudate Dominum de terra: quoniam Dominus in principio creauit cælum, & terram: & sicut ad cælum, quod est sedes Angelorum, omnia superiora reuocauit: sic ad terram, quæ est sedes hominum, omnia inferiora reuocare voluit. Hæc videlicet est causa, cur non primo loco nominauerit ignem, aut aerem, aut aquam: quoniam terra est altera pars Mundi, & homini habitatori terræ cætera omnia, siue ignis, siue aer, siue aqua deseruiunt. Sed posteaquam dixit, Laudate Dominum de terra, id est, omnia, quæ estis in terra, vel pertinetis ad terram: incipit particularia numerare, & primo loco meminit aquarum, & piscium, quæ sunt in locis terre decliuioribus: nam per Dracones intel

Card. Belarm. in Psal.

liguntur hoc loco magni pisces, & per abyssos intelliguntur aquarum profunda, in quibus pisces habitant: ita S. Io. Chrysostomus, qui id probat ex Psal. 103. Draco iste, quem formasti ad illudendum ei, idest, mari. & Psal. 73. Contribulasti capita Draconum in aquis.

Ignis, grando, nix, glacies, spiritus procellarum, quæ faciunt verbum eius. VIII.

Ab aquarum abyssu transit ad aerem, vbi inueniuntur ignes, idest, fulgura, fulmina, coruscationes: item grando, nix, glacies, item spiritus procellarum, idest, venti vehementes, qui tempestates excitant, & ingentes pluuias secum ferunt, quæ omnia faciunt verbum eius, idest, obediunt præcepto eius: quod postremum addi voluit Spiritus sanctus, ne Manichæus aliquis, aut Atheus suspicaretur, vel hæc mala esse, quod sæpè magnas calamitates hominibus inducât, vel casu fieri, vt fulmine quis percellatur, vt grando vineas vrat, vt vi procellarum nauigia pereat. Deus igitur vtitur his rebus, vt instrumentis iustitiæ, vel misericordiæ suæ, ad malos puniendos, vel bonos admonendos, ac per hoc non casu eueniunt, neque res malæ dici debent, sed bonæ cum bono Deo seruiant.

Montes & omnes colles, ligna IX. fructifera, & omnes Cedri.

Bestiæ & vniuersa pecora, serpentes, & volucres pennatæ. X.

Nunc tandem ab aere ad terram reuertitur, & enumerat primo partes ipsius terræ eminentiores, Montes & colles, ex quibus subintelliguntur campi patentes, & valles: neque enim montes, & colles sine campis, & vallibus esse possunt. Deinde transit ad ea quæ nascuntur ex terra, & primo nominat ligna fructifera, deinde infructifera, quales in primis sunt Cedri, quæ tamè ad edificandas domos, & naues necessaria sunt. Postea cōuertit orationem ad animantia, quæ terram inhabitant, & ipsa genera breuiter attingit, bestias syluestres, iumenta, & pecora domestica:

LII ser-

serpentes qui per terram repunt; & aues, qui per aerem volant. Atque ista omnia ad Deum laudandum prouocat, non quod ista Deum nouerint cogitare, nedum laudare; sed ut homines considerantes utilitatem, quæ ex illis capitur, Deum laudent, eique debitas gratias agant. At, inquit, quæ utilitas ex agrestibus feris, ex serpentibus, leonibus, muscis, & culicibus capitur? Magna omnino utilitas ex animantibus illis capitur, quæ nobis vel terrorem incutunt, quales sunt leones, & serpentes; vel molestiam adferunt, quales sunt culices, & muscæ. Nam erudiunt nos ad humilitatem, dum in memoria nobis reuocant inobedientiam & superbiam parentum primorum in nos generatione transfusam, ob quam imperium in animantia, magna ex parte perdidimus.

XI. Reges terræ, & omnes populi: Principes, & omnes iudices terræ.

XII. Iuuenes, & virgines: senes cum junioribus laudent nomen Domini, quia exaltatum est nomen eius solius.

Postremo genus humanum citat ad laudes Dei, atque ut omnes homines comprehendat, tres differentias hominum enumerat, potestatis, sexus, & ætatis. Reges, inquit, & populi, id est, qui imperant, & qui parent: & quoniam, qui imperant, non sunt eiusdem ordinis, sed alij alijs præsumt, addit, Principes, supremi videlicet, & omnes iudices, qui à Principibus auctoritatem habent, atque hæc est differentia potestatis. Iuuenes, & virgines, id est, viri, & feminae, quod pertinet ad differentiam sexus. Senes cum junioribus, quæ est differentia ætatis. Omnes igitur siue Principes, siue priuati; siue viri, siue feminae; siue senes, siue adulescentes laudent nomen Domini, quoniam exaltatum est nomen eius solius, id est, quoniam non est aliud nomen, verè sublime, & altum, & omni laude dignum, nisi Dei nomen. Res enim creatæ quam

uis magis, si ad magnitudinem Dei comparentur, nihil sunt. & quicquid magnitudinis, & excellentiæ habent, ab illo habent, qui solus altissimus iure nominatur & est.

Confessio eius super cælum, & terram, & exaltauit cornu populi sui. XIII.

Reddit rationem, cur dixerit, exaltatum est nomen eius solius; quoniam, inquit, confessio eius est super cælum, & terram; id est, quia omnia quæ in cælo, & quæ in terra sunt consentiunt laudes eius: ita pleni sunt cæli, & terra gloria eius; vel ut ait Habachuc; Operuit cælos gloria eius, & laudis eius plena est terra: ideo exaltatum est nomen eius solius. & exaltauit cornu populi sui, id est, ipse per se solus sublimis, & excelsus exaltauit potentiam, & gloriam populi sui Israel, quia elegit eum sibi in populum peculiarem, & deditque illi diuinas leges proprio digito scriptas; ac singulari prouidentia curam illius gerit.

Hymnus omnibus sanctis eius, filijs Israel, populo appropinquanti sibi. XIV.

Hæc est conclusio Psalmi, quasi dicat, Igitur hymnus Deo canendus præcipue conuenit omnibus sanctis eius, id est, omnibus Deo dicatis, & consecratis, filijs Israel videlicet, qui populus est præter ceteros omnes Deo ipsi propinquans vera cognitione, & fide, verò cultu, & adoratione, vera filiali fiducia, & dilectione. Sed rectissime admonet S. Augustinus, hæc non dici de filijs Israel secundum carnem, sed de filijs Israel secundum spiritum, siquidem filij Israel secundum carnem dura ceruicibus essent, Deo non propinquabant. Sic enim loquitur S. Prothomartyr Stephanus Act. 7. Vos semper Spiritui sancto resististis: sicut Patres vestri, ita & vos: quem Prophetarum non sunt persequuti Patres vestri? & occiderunt eos, qui prænuntiabant de aduentu iusti, cuius vos nunc proditores, & homicidæ fuistis. Apostolus autem ad Rom.

Rom. 9. demonstrat, qui sint veri filij Israel appropinquantēs Domino, cū ait, Non omnes qui ex Israel, hi sunt Israelitæ: neque qui semen Abraham, omnes filij; sed in Isaac vocabitur tibi semen, idest, non qui filij carnis, hi filij Dei, sed qui filij sunt. promissionis æstimantur in semine. & ad Rom. 4. scribit, eos ad filios Abraham pertinere, qui sectantur vestigia fidei Patris nostri Abraham, siue ex circumcisione, siue ex præputio sint. Neque enim excludere debemus omnes Israelitas secundum carnem, alioqui etiam Prophetas, & Apostolos excluderemus, sed eos tantum excludimus, qui solum secundum carnem Israelitæ sunt, & non secundum spiritum, quales erant ij, de quibus loquitur S. Stephanus loco citato, & quibus Præcursor Domini dicebat, Genimina viperarum, quis vobis demonstravit fugere a ventura ira? & nolite dicere, Patrem habemus Abraham Luc. 3. & quibus Dominus ipse dicebat, Si filij Abraham estis, opera Abraham facite. & Vos ex patre diabolo estis Ioan. 8. Denique tales sunt, qui post abnegatum Dominum dispersi sunt inter gentes, & sine Rege, sine Sacerdotio, sine Deo viuunt in hoc mundo.

laudare Dominum suum præter cæteras gentes, ob gloriam sempiternam sibi promissam, & ad quam finito præsentis exilio sine dubitatione perueniet.

Explicatio Psalmi 149.

CAntate Domino canticum I. nouum, laus eius in Ecclesia sanctorum.

Primus hæc versiculus alloquitur eos, quibus dictum est in fine Psalmi superioris, Hymnus omnibus sanctis eius, populo appropinquanti sibi. Sunt enim hi tres vltimi Psalmi inter se connexi, & vnus continuatur cum alio. & ea causa est fortasse, cur in officio Ecclesiastico in fine laudum matutinarum quasi vnus Psalmus tres isti Psalmi concinantur. Ait igitur, o vos Sancti, qui populus estis Deo propinquans, Cantate Domino canticum nouum, idest, ceteræ creaturæ cantant canticum ratione creationis, quod est canticum vetus; vos autem cantate canticum ratione renouationis, iustificationis, glorificationis, quod est canticum nouum, super noua materia, à nouis hominibus decantandum. Laus eius in Ecclesia sanctorum. hæc est ratio verborum superiorum, quasi dicat Propheta, Vos sancti cantate Domino canticum nouum, quia decet, vt laus Dei potissimum audiatur in congregatione Sanctorum.

PSALMVS CXLIX.

Titulus, & Argumentum.

Alleluia.

PSALMVM hunc exponunt græci de victorijs Machabæorum, alij de victorijs ipsius Dauidis. Sed nescio vbi legatur vel tempore Dauidis, vel tempore Machabæorum fuisse ab hebræis alligatos Reges nationum in compedibus. Alij mysticè exponunt omnia de victoria spirituali Ecclesiæ aduersus infideles. Quas expositiones vt non reiicio, ita existimo ad litteram Psalmum esse exponendum de obligatione, qua tenetur populus Dei

Latetur Israel in eo, qui fecit eum, & filij Sion exultent in Rege suo.

Canticum nouum magnam habet letitiam, quoniam annunciat beneficia perfectæ felicitatis, & quia ex ardentissimo amore procedit. Igitur Israel, populus Dei electus, qui cantat canticum nouum, lætetur cantando in eo, qui fecit eum, in ipso conditore suo, qui non solum creauit naturam, sed etiam donauit gratiam, & sic fecit non solum vt esset, sed vt esset Israel. & filij Sion exultent in Rege suo. est repetitio per

LII 2 alia

alia verba; nā filij Sion, ipse est Israel. Rectè in Biblijs recognitis sublatum est, filiar, & repositum, filij: quoniam in hebræo, & græco habetur, filij Sion, & sic legunt S. Augustinus, S. Hieronymus, S. Chrysostomus, Euthymius, & alij. neque deerant textus latini, qui haberent, filij, vt videri possit typographorum vitio irrepsisse vox, filiar, pro filij.

III. Laudent nomen eius in choro, in tympano & psalterio psallant ei.

Neque solum cantent canticum novum cum lætitia, & exultatione; sed etiam instrumenta musica ad voces suas adiungant, idest, non solum ore, sed etiam opere, non lingua tantum, sed etiam manu, hoc est vita, & moribus cantent. per chorum, intelligunt aliqui instrumentum musicum, vt etiā per tympanum, & psalterium. quod clarius colligi videtur ex Psalmo sequenti. dicunt autem chorum, cum accipitur pro instrumento, tibiā significare. sed possunt etiam per chorum intelligere multitudinem cantorum simul canentium, vt sonat vox græca, & latina; & vt Patres intellexerunt. Ait igitur, laudent eum in choro vocibus consonis simul concinentes, in tympano, & psalterio manibus psallentes lætitiæ sonitum edant.

IV. Quia beneplacitum est Domino in populo suo, & exaltabit mansuetos in salutem.

Hæc est ratio cantici noui, quia complacuit sibi Dominus, in populo suo, idest, amauit eum ab æterno ex mera benignitate sua. hoc beneplacitum Dei, græcè *ἡδονή*, est fundamentum, & prima radix omnium bonorum nostrorum: nam ideò prædestinauit, ideò vocauit, ideò iustificauit, ideò glorificauit; quia complacuit sibi in populo suo. de hoc dicit Dominus Luc. 12. Nolite timere pusillus grex, quia complacuit Patri vestro dare vobis Regnum. hoc beneplacitum passim in suis Epistolis B. Paulus prædicat. Merito

ergo materia est cantici noui. & exaltabit mansuetos in salutem. Non complacuit solum sibi Deus in mente sua, sed hoc beneplacitum re ipsa implebit, quia exaltabit mansuetos in salutem, idest, populum suum humilem, & mitem, vt vera membra diu, qui dixit mitis sum, & humilis corde, exaltabit vsque ad summam excellentiam, quæ est æterna salus. quidam latini codices habent, exaltauit: sed emendata lectio habet, exaltabit. nam & in græco, & in hebræo habetur, in futuro; exaltabit: vtrunque est verum, nam exaltauit in spe, & exaltabit in re.

Exultabunt Sancti in gloria, læta V. buntur in cubilibus suis.

Hic iam describit futuram gloriam electorum, ob quam toto corde cantare debebant canticum novum. Exultabunt, inquit, sancti in gloria illa celesti, ad quam non perueniunt nisi verè sancti: & simul lætabuntur in cubilibus suis, in loco illo summæ quietis. Amodo enim dicit spiritus, vt requiescant à laboribus suis Apoc. 14. Itaque Sancti in gloria requiescent à laboribus, sed non requiescent ab actione laudationis. erunt in cubilibus, vt quiescant; non vt dormiant.

Exaltationes Dei in gutture VI. eorum, & gladij ancipites in manibus eorum.

In illa superna felicitate adeo non sunt ociosi sancti, vt & ore cantent, & manibus gladijs vibrent. In textibus hebraicis, & græcis habetur Exaltationes Dei, vt etiam legitur in Biblijs recognitis. tamen S. Augustinus, & quidam alij legunt, Exultationes Dei. facile fuit vnius literæ mutatione inducere hanc varietatem: sed in sensu nulla dissensio est: nam Sancti cum gaudio magno laudant, & exaltant magnitudinem Dei. proinde simul exaltant, & exultant. Per gladios autem intelligimus potestatem iudiciariam, qua Sancti omnes in die nouissimo ferient persecutores suos, iuxta illud Deuter. 32. Si acuerō vt fulgur gladium meum, & si ar-

si arripuerint iudicium manus meæ.

VII. Ad faciendam vindictam in nationibus, increpationes in populis.

Ad hoc vtentur sancti gladijs bis acutis, vt in die iudicij vindictam fumant de hostibus suis, & eos increpent, atque eis exprobrent iniquitates suas: Stabunt enim tunc iusti in magna constantia aduersus eos, qui se angustiauerunt. Sap. 5. Ex hoc loco intelligi potest, paulo duriores esse eorum expositionem, qui hæc referunt ad conuersionem iniquorum, qui dicuntur occidi gladio verbi Dei: nam qui conuertunt iniquos, eosque feliciter occidunt gladio verbi, occidentes in eis peccatum, & resuscitantes iustitiam; non sumunt de eis vindictam, sed beneficio maximo illos afficiunt.

VIII. Ad alligandos Reges eorum in compedibus, & nobiles eorum in manicis ferreis.

Diximus per gladios, intelligi iudiciariam potestatem, ideo non debet absurdum videri, si dicantur sancti habere gladios in manibus ad faciendam vindictam; & ad alligandos Reges in compedibus. potestas enim iudiciaria vtrunque facere potest, & ferire condemnando, & alligare in compedibus, sententiam per ministros suos exequendo. tunc igitur Sancti alligabunt Reges gentium in compedibus, & nobiles eorum, idest, Principes terre in manicis ferreis, quando cum Christo in extremo die iudicij sententiam ferent aduersus Antiochos, Herodes, Neronem, Diocletianos, & ceteros Principes infideles, ac dicent, ligatis manibus, & pedibus projiciantur in tenebras exteriores, Matth. 22.

IV. Vt faciant in eis iudicium conscriptum; gloria hæc est omnibus sanctis eius.

Hic aperte declarat Propheta quorsum dixerit, Ad faciendam vindictam, & Ad alligandos Reges in compedibus. Vt faciant, inquit, sancti, qui in

terris iniuste iudicati sunt, iustum iudicium, iam olim conscriptum, decretum, & firmatum, & quasi in columna, inquit Chrysostomus, incisum, vt mutari non possit. Gloria hæc sedendi cum Christo in nubibus, & iudicandi mundum, & Principes eius, erit omnibus sanctis eius. Quamuis enim Beata in sermone de Sancto Benedicto dicat, in iudicio duos ordines futuros electorum; vnum iudicantium cum Christo, alterum misericorditer iudicandorum: tamen illi qui misericorditer iudicati fuerint, postea etiam iudicabunt cum Christo persecutores suos, vt constat ex Beato Paulo 1. Cor. 6. Nescitis, quia sancti de hoc mundo iudicabunt? si ergo in vobis, idest, à vobis iudicabitur mundus, indigni estis; qui de minimis iudicetis? Verè igitur gloria hæc est omnibus sanctis eius.

PSALMVS CL.

Titulus, & Argumentum.

Alleluia.

IN hoc postremo Psalmo inuitatur populus Dei ad laudes Domini in summo caelo habitantis, cum omnibus musicis instrumentis, vt hoc modo aemonstret ardentissimum affectum suum.

Explicatio Psalmi 150.

Laudate Dominum in sanctis eius, laudate eum in firmamento virtutis eius.

Laudate Dominum in sanctis eius, idest, o vos electi, & sancti laudate Dominum in sanctuario caelesti habitantem. Nam vox hebræa, chodes, sanctitatem proprie, & sanctuarium significat. & quamuis cum alijs punctis legi posset, in sancto eius, & in numero multitudinis, in sanctis eius, & exponi de sanctis hominibus, vt ferè Patres exponunt; tamen

tamen quia in secunda parte versiculi idem repeti solet, & ibi expressè legitur, laudate eum in firmamento virtutis eius, & per firmamentum intelligitur cælum ex 1. cap. Genesios, idè ad litteram videtur omnino per vocem, in sanctis eius intelligendum esse sanctuarium cæleste, quod ad Hebræos 9. vocatur sancta, in numero multitudinis, Introiuit, inquit, semel in sancta. Quia tamen sanctuarium Dei supremum sunt animæ iustorum, imò ipsi sancti sunt templum Dei: idè potest etiam cum Patribus simpliciter hic locus exponi de sanctis hominibus, quatenus in eis Deus habitat, vt in præcipuo sanctuario suo. Laudate eum in firmamento virtutis eius. vox, firmamentum, eadem est hoc loco etiam in textu hebraico, quæ est in 1. cap. Gen. proinde non est dubium, sensum esse, laudate eum in firmamento virtutis suæ, idè, in fortissimo palatio suo, quod est cælum, habitantem vel in firmissimo throno suo cælesti residentem: nam Dominus ait Matth. 5. Nolite iurare per cælum, quia thronus Dei est. & quemadmodum paulò ante diximus, sanctuarium Dei esse sanctos homines, sic etiam dicere possumus, per firmamentum sideribus plenum, intelligi posse Ecclesiam sanctorum, qui veluti stellæ fulgent, & in quibus Deus sedet, vt in præcipuo solio suo. Anima enim iusti sedes est sapientiæ.

II. Laudate eum in virtutibus eius, laudate eum secundum multitudinem magnitudinis eius.

Docet, Deum esse laudandum, non quia in cælo simpliciter habitat; sed quia in eo habitat, vt omnipotens Imperator, & Dominus omnium rerum: nam per virtutes hoc loco non intelliguntur virtutes morales, neque exercitus Angelorum, sed robur, ac potentia: & per multitudinem magnitudinis intelligitur excellens magnitudo: quo modo alibi dixit idem Propheta, Quàm magna multitudo dulcedinis tuæ; & alibi, Secundum multitudinem miserationum tuarum, idè, quàm magna ex-

cellentia dulcedinis tuæ; & secundum eximiam misericordiam tuam. est enim phrasis hebraica, per vocem, rab, significare multum, & excellens. Ergo, inquit, laudate eum in virtutibus eius, idè, ob magnas vires, & magnum robur eius: laudate eum secundum multitudinem magnitudinis eius, idè, magnificè laudate eum, quoniam eximia est magnitudo eius, cum sit absolute, & simpliciter magnus.

Laudate eum in sono tubæ, laudate eum in psalterio, & cithara. III.

Tria sunt instrumentorum musicorum genera, vox, flatus, & pulsus. omnium meminit hoc loco Propheta: nā in hoc versiculo nominantur tubæ, quæ flatu sonitum reddunt, psalterium, & cithara, quæ pulsu chordarum resonant. Psalterium enim esse instrumentum decem chordarum, non semel legitur in Psalmis.

Laudate eum in tympano, & choro, laudate eum in chordis, & organo. IV.

Hic numerantur omnia genera: nam tympanum, & chordæ pulsantur, chorus est vt alibi diximus, vel instrumentum musicum nobis incognitum, vel concentus vocum humanarum; organum inflatur quamuis enim ignotum sit quid organum hoc loco significet: tamen probabiliter dici potest, esse instrumentum plurium tiliarum simul coniunctarum; ad cuius postea imitationem facta sunt ea, quæ nos organa vocamus.

Laudate eum in cymbalis bene sonantibus, laudate eum in cymbalis iubilationis: omnis spiritus laudet Dominum. X.


Cymbala quatuntur, & tinnitum reddunt. Dicuntur autem cymbala iubilationis, quæ magnum, lætumque sonitum reddunt, quales sunt campanæ apud Christianos. Mystice à Patribus instrumenta ista exponuntur, vel pro sensibus corporis, vt à Chrysostomo, vel pro virtutibus animi, vt à sancto

Au-

Augustino. Concludit Psalter, Omnis spiritus laudet Dominum. Sunt autem quatuor huius loci explicationes. Prima sancti Augustini est, qui per Spiritum intelligit spirituales vim, ut opponitur carni. Quia, inquit, sapere secundum carnem, mors est: Omnis spiritus laudet Dominum, idest, omnis qui spiritualis est, & de Spiritu sancto uiuit, laudet Dominum. Sed Beatus Augustinus non obseruauit proprietatem linguæ hebraicæ: nam in hebreo est, kol nesema, quæ vox non significat spiritum, ut opponitur carni, sed ut opponitur non spiranti, & non uiuenti. Itaque, omnis spiritus hoc loco ponitur pro omni quod spirat, & uiuit. Altera explicatio est Theodoret, & Euthymij, qui per omnem spiritum intelligi volunt omnem hominem; quomodo accipitur illud Psalmi 144. Benedicat omnis caro nomini sancto eius: sapè enim in Scriptura per carnem, vel per animam intelligitur totus homo. Sed mirum esset, si Dauid restringere uoluisset laudis officium ad solos homines, cum paulò ante inuitauerit Angelos, homines, bestias, Solem, Lunam, stellas, ignem, grandinem, niuem, & cætera omnia. Tertia explicatio est aliquot recentiorum, qui per omnem spiritum intelligunt omnia animalia. sed si Dauid loquitur de laudatione propriè dicta, frustra bestias inuitat ad laudes: si de laudatione etiam impropria, non debuit excludere ea, quæ non spirant. Potest igitur quarta explicatio adferri, ut per, omnem spiritum, intelligamus generatim omnia quæ uiuunt, siue spiritali uita, ut Angelos; siue animali, ut bestias; siue utraque, ut homines; siue metaphorica uita, ut cætera omnia, quæ licet in se inanima

sint, tamen Deo uiuere dicuntur, quoniam ita seruiunt, & obediunt Deo, ac si uiuerent, & sentirent, & Creatoris mandata perciperent: unde est illud Ecclesiasticum, Regem cui omnia uiuunt: in quem sensum accipiendum est illud Baruch. 3. Vocatæ sunt stellæ, & dixerunt, adsumus: & illa ex Euangelio, Imperauit febri, & dimisit eam, Luc. 4. & , Conminatus est vento, & dixit mari, tace, obmutesce, & cessauit ventus, & facta est tranquillitas magna, Marc. 4. Ergo Propheta cum multa percurrisset, & uideret se non posse omnia singillatim enumerare, & ad laudandum Deum inuitare, uoluit compendio omnia comprehendere, & ait, Omnis spiritus laudet Dominum. Sed si omnia comprehendere volebat, cur non apertè dicebat, Omne quod subsistit, laudet Dominum. Ratio est, quoniam laudatio ad uiuentes pertinet, & absurdum uidetur, res mortuas, aut inanimas vocare ad chorum, præsertim cum idem Propheta dixerit in Psalm. 113. Non mortui laudabunt te Domine. Et Ezechias apud Isaiam cap. 38. Viuens, uiuens ipse confitebitur tibi. Voluit ergo Dauid potius dicere, Omne quod uiuit, quàm omne quod subsistit laudet Dominum; ut declararet, se inuitare omnes res ad Deum laudandum, quatenus aliquo modo uiuunt, ut supra explicatum est. Atque hic sit finis huius Commentarij. Precor autem Deum, ut quemadmodum dedit, ut has diuinas laudes utcunque explicare possimus; ita ex magna misericordia sua donet, ut aliquando de peregrinatione perueniamus ad patriam, ubi præsentem præsentem toto corde diligamus, & sine ullo fine laudemus. Amen.



L A V S D E O.



I N D E X

R E R V M N O T A B I L I V M .

Prior numerus paginam indicat ,
Posterior Psalmi versiculum .



- A** **ARON** Princeps Ec-
clesiasticus tantum ,
minor Mose pag. 466
vers. 20.
Abimelech nomen e-
rat commune Regi-
bus Philistinorum. 172
- Abyssus**, quid. 165. 15
Abyssus abyssum invocare multiplici-
ter intelligi potest. 245. 9
Abyssus nomine, aquarum profunda si-
gnificantur. 898. 7
Abraham per fidem factus est Parens
multarum gentium. 798. 3
Abundantia sine securitate, est plena ti-
moris. 891. 2
Abundantia, & pax, beatas faciunt Ci-
uitates. 779. 6
* **Accidia** eius qui psallit indicat, ab ip-
so parum amari cui psallit. 492. 1
* **Adam**, & **Eua** primi a Serpente inter-
empti. 635. 21
Adipem claudere, significat, non mise-
reri. 165. 11
Adiutorium omnium maximum, & po-
tentissimum, est vultus Dei. 274. 4
Adolescens, cur indigeat, doceri legem
Dei. 736. 1
Adorare Dominum, & coram Domino,
idem. 100. 30
* **Aduentus** Christi primus omnia conse-
cravit, secundus omnia glorificabit.
112. 12
* **Aetas** hominis quanta Davidis, ac Mo-
sis tempore. 557. 560. in tit. & 711
Card. Belarm. in Psal.
- Aeternitas** Dei. 559. 560. 4. 5
* **Affectus**, per renes significantur, co-
gitationes, per cor. 60. 7. & 118. 2
* **Altitudo** dici, pro Diuino iudicio su-
mitur. 331. 3
Altaria, iustorum niduli. 508. 4. 5
* **Ambulare** coram Deo, quid. 721. 9
Amici Dei dicuntur mortui seculi, ini-
mici, mortui Dei. 66. 15
Amicus fraudulentus, peior est manife-
sto inimico. 326. 12
Amicitia specie decipere maxima ini-
quitas. 189. 22
Amor Sponsi Christi ineffabilis erga
Sponsam suam. 267. 12
Amor animam portat, eius alia cogita-
tio, & desiderium. 521. 3
Amorem accendere solent tria, quae in
Deo reperiuntur. 241. 2
* **Angeli** significatur per aues Caeli. 34. 8
Angeli dicuntur Dij. 34. 8
Angeli an cognouerint, Christum esse
Regem gloriae. 108. 8
Angeli cur dicant esse in nubibus. 342. 7
Angeli custodes hominum, & regionum
575. 11
Angeli nunquam desunt officio suo. 896. 2
Angeli ad Deum laudandum maxime
idonei. 645. 19
Angeli nunquam fatigantur. 645. 19
Angeli ventis comparati. 648. 5
Angeli, aurigae currus Dei. 70. 12
Angeli mali significantur per pisces ma-
ris. 34. 8
Angeli reprobi cur peccati remissione
non inuenerunt. 867. 3
Angolorum mira potentia. 174. 7

M m m

Ange-

I N D E X.

- Angelorum præsentia attentionem in oratione conciliat. 83. 9. 2
- Angelos in Cælo præcedit Ecclesia, & Beata Virgo. 265. 11
- Angelos multos præcedent in Cælo multi Sancti homines. 265. 11
- Angelus vnus vicem exercitus supplet. 174. 7
- * Anima voluntatem significat, oculus intellectum, venter memoriã. 147. 11
- Anima pro homine sæpe vñtata in Psalmis. 101. 33. 170. 20.
- Anima quare, & quomodo dicatur vnica. 188. 20
- Anima quò magis destituitur carnalibus bonis, eò facilius ascendit ad Cælestia gustanda. 362. 3
- Anima spoliata gratia Dei, est sicut terra arida. 868. 6
- Anima nostra imago Dei quoad essentiam, & Personarum Trinitatem. 242. 243. 4
- Anima nostra Scala aptissima ad cognoscendum Deum. 243. 4
- Animæ ante corpora nõ fuerunt. 168. 15
- Animæ salus nemini datur sine præueniente, comitante, & subsequente gratia Dei. 169. 17
- Animæ sterilitas duobus modis accipitur. 185. 14
- Animam effundere in se, tribus modis accipi potest. 242. 4
- Animam primi hominis cum Deus creauit, non creauit in confuso omnes animas. 168. 15
- Animam in manibus esse, est, periclitari de vita. 756. 5
- Animam adhærere Deo, quid sit, & quanti faciendum. 365. 8
- Animalis homo propinquante exiliij fine, cur gemat. 775. 1
- Animalia omnia hominibus vñtia. 899. 10
- Animus diues debet esse, nõ arca. 175. 9
- Animus aliquando gaudet, cum corpus dolet. 184. 12
- Animus non omnino quærit Deum, dum aliquid habet in terra, quod amet. 236. 3
- Antichristi astutia, & consultatio cum Diabolo. 503. 2. 3
- * Apostoli dicuntur montes. 773. 1
- Apostolica prædicationis fructus. 430. 16
- Apostoli verè Sapientes. 563. 14
- Apostoli primi Ecclesiæ filij, toti Orbis leges dederunt, quod nullus Monarcha ante eos fecit. 170. 18
- Apostoli, & Martyres licet interfecti, de omni tamen tribulatione verè liberati sunt. 178. 17
- Apostoli cur Cedris similes. 135. 6
- Apostoli cur dicantur Cæli. 80. 4
- * Aquæ pro tribulationibus sumuntur. 159. 8
- Aqua Spiritualis quæ nam. 102. 2
- Aquæ initio creationis non tam aquæ, quam vapores aquei erant. 649. 7
- Aquæ verè corporales, & incorruptibiles supra Cælum. 896. 4
- Aquila quomodo renouetur. 646. 5
- * Arbitrij libertas. 704
- Arca fœderis scabellum pedum Dei. 618. 5
- Arma Christi quænam sint. 260. 5
- Arma Dei defensiva, & offensiva. 181. 2. 3
- Arma Diaboli, astutia, & malitia. 260. 5
- Arrogantiæ proprietas. 42. 25
- * Asaph quis, & quid significet. 297. in ti.
- Ascendere super Cherubim, quid. 70. 12
- Aspectus Dei ad nos, & nostri ad Deum, quomodo sit necessarius. 816. 10
- Aspicere iniquitatem in corde, quid sit. 382. 17
- * Attentionem exigit Deus, vt nobis loquatur. 300. 8
- Attributa Dei notissima, & obscurissima. 844. 5
- * Auaritia. 56. 6

B

- B**aptismus, cur dicatur Illuminatio. 174. 5
- * Beatitudo Cælestis, qualis. 195. 9
- Beati qui nam in hoc seculo. 509. 6
- Beatitudo in operatione intellectus consistit. 211. 8
- Beatitudo huius vitæ, in quo consistit. 1. 1
- Beati expectant redemptionem corporum. 789. 5
- Beatitudinem iustis Deus cõseruat. 59. 5
- Beatitudinem assequimur, si quatuor præstemus. 106. 4
- * Benedicere Deum, ad quos pertineat. 718. 27

Bene-

I. N D O E X.

Benedicere Deum in omni tempore,
quid sit. 172. 1
Benedictio Dei qualis. 717. 24
Benedictio Dei in scripturis abundan-
tiam significat, & fecunditatem. 747.
& 983. 16
Beneficia Dei celebranda. 376. 1
Beneficia Dei, quæ pauci agnoscunt.
417. 7
Beneficiorum diuinorum summa, quæ
sit. 334. 13
Beneficium magnum, Deum memorem
esse nostri. 140. 4
Beneficia omnia diuina quomodo du-
plicia sint. 646. 1
Beneficiorum Dei memoria qualis esse
debeat. 73. 22
Beneplacitum Dei fundamentum om-
nium bonorum. 899. 4
Beneuolentia Dei radix omnium bono-
rum. 12. 13
* Bona quandoq. Deus Sanctis tribuit,
quandoq. aufert. 256. 28
Bona temporalia umbræ sunt veri bo-
ni. 221. 9
Bona celestis Hierusalem. 373. 3.
800. 7
Boni omnis ratio in solo Deo est. 719. 1
Bonum omnia appetunt. 719. 1.
Bonorum omnium auctor Deus. 18. 8.
24. 4
Bonorum omnium principium lumen
Dei. 75. 31
* Brachium significat potentiam. 44. 39

C

Cecitas humana in vera felicitate
quærenda. 380. 16
Cælum est domus nostra. 152. 7
Cælum, primarius est effectus potentie
Dei. 164. 6
Cælum cur opus digitorum Dei, non
brachiorum. 33. 4
Cælum dicitur templum Dei. 69. 8
Cælum tribus modis prædicat Deum.
80. 2
Cælum Beatorum mons Domini. 106. 3
Cælorum regnum à Christo promissum
spernentibus quam grauius irasca-
tur Deus. 695. 696. 257. 261. 27
Cæli cælorum, qui sint. 896. 4

Cæli quomodo laudent Deum. 895. 2
Cæli quomodo peribunt, aut vetera-
scent. 645. & dein. 28.
Cæli dicuntur Apostoli & prædicato-
res, & quare. 80. 4
Cælum inclinare, quid. 70. 11
Cælorum sonus non concentus corpo-
ralis, sed quid. 80. 4
Celestis hæreditas quæ via acquiren-
da. 409. 30
* Calix vini meri, quid. 457. 7
Calix idem atque hæreditas, portio, &
pars. 47. 7
Calumniarum, & persecutionum mor-
bo quæ medicina facienda. 199. 6
Cantica Dei quomodo canenda, & au-
dienda. 836. 3. 241. in tit.
Canticum vetus veteris hominis est, no-
uum noui. 163. 3
Cantare Deo canticum nouum, & ve-
tus, quid sit. 898. 1
Cantare in tympano, & psalterio, quid
sit. 131. 2
Canticum gradum pauci ex corde can-
tant. 771. 5
* Captiuitas Babylonica figura capti-
uitatis generis humani sub peccato.
837. 12
* Carnales, licet ociosi, Deo vacare non
possunt. 276. 10
Carnalem esse, & hominem esse aliquan-
do pro eodem in script. 783. 3
Caro quomodo dicatur scire Deum.
362. 1. 2
Causæ secundæ defectus tribuendi sunt,
non primæ. 848. 15
Causæ secundæ sine Deo nihil possunt.
650. 17
* Cedri Libani qui nam. 135. 5
Cervi proprietates. 91. in tit.
Cervi cum amatore Dei similitudo ap-
tissima. 241. 1
* Charitas Dei bonorum omnium no-
strorum causa, & origo. 513. 115. 143
Charitas in Deum ardens, radix confi-
dentie in eum. 122. 7
Charitas perfecta vchementissime ti-
met, ne in aliquo dilectum offendat.
175. 9
Charitas dicitur simbria aurea. 269. 15
Charitas præcipuum est inter dona à
Christo in terras effusa. 393. 20

M m m 2 Cha-

I. N. D. E. I. X. I

Charitas Dei virtutes omnes complecti

117. 611. 11

Charitatis verus spiritus molestius fert iniuriam Dei, quam propriam. 766. 6

Charitatis signum est, Deum sine intermissione laudare. 767. 4

Charitatis magnæ indicium, misericordia erga peccatores. 746. 5

Christus, lapis angularis, cur dicatur.

527. 1. 722. 20

Christus, cur in Sion dicatur natus.

330. 5

Christus, cur dicatur primogenitus.

349. 27

Christus, quomodo fuerit pauper. 335.

336. 1

Christus, cur dicitur puer & seruus.

407. 2

Christus non Redemptor solum, sed & Doctor, & Magister humani generis.

231. 12

Christus, cur dicitur dilectus. 335. 6

Christus, cur dicitur vitulus. 136. 6

Christus quomodo dici possit arbor.

5. 7

Christus peccata nostra sibi tribuere potuit. 92. 1

Christus resurgens comparatur Ceruo, & Stellæ. 91. in tit.

Christus Aduocatus potentissimus.

696. 30

Christus Sacerdos æternus. 701. 5

Christus supra homines formosus dicitur, cur non supra Angelos. 359. 3

Christus nunciatus futuri ingressus in cælum. 818. 1

Christus superauit sapientia, & iustitia Diabolum. 261. 5

Christus nos docuit exemplo suo clauso ostio Patrem orare. 276. 10

Christus Dominus, & cum eo iusti omnes ab impijs, & inimicis aliquando laudandi. 366. 10. 370. 8

Christus quomodo dicatur inops, mendicus, compunctus corde. 691. 15

Christus non eguit custodia Angelorum

375. 11

Christus Rex iure dicitur, & regnare.

605. 10

Christus quid retribuerit Iudæis post Resurrectionem suam. 339. 11

Christi amor erga inimicos excellen-

tior, quam Dauidis erga Saulem.

187. 17

Christi affectus erga persecutores non solum est re frateris ad fratrem, sed & pateris ad filium. 187. 17

Christi arma quæ nam sint. 261. 3

Christi mors, & resurrectio. 13. 5

Christi mors quare dicitur somnus. 13. 5. 238. 9

Christi vita qualis. 261. 4

Christi beneuolentia erga electos. 52. 2

Christi passio holocaustum. 86. 13

Christi dona in instanti conceptionis.

89. 3

Christi reliquæ sunt electis in omni

Christi passionis fructus. 100. 3

Christi persecutores quomodo Deus accipit. 7. 4

Christi generatio triplex. 8. 7

Christi potestas in omnes gentes. 9. 8. 91

Christi iudicium rectissimum significatur per visgam ferream. 9. 9

Christi morientis, & resurgentis prophetia. 128. in tit.

Christi Mortis, Resurrectionis, Ascensionis, &c. prophetia Psal. 119. toto.

139

Christi anima nil ignorabat in passionibus. 142. 19

Christi passionibus cur plurimæ fuerunt. 232. 16. 17

Christi proditiõnis indignitas. 239. 20

Christi Aduentus primus fructus. 426. 17

Christi figura Salomon, & eius in omnia. 423

Christi passionis, & doloris vehementiam per Prophetas, eius constantiam per Euangelistas cur spiritus sanctus exprimi voluit. 400. 3

Christi Regnum adumbrat Prophetæ.

467. 10

Christi Regnum æternum. 541. 550. 3

Christi patientis figuram gerebat Dauid in passionibus suis. 337. 11

Christi ascensus in cælum describitur.

279. 5

Christi iniuriæ aliquæ peculiariter ad Patrem pertinebant. 403. 11

Christi Natiuitas ex Virgine. 700. 4

Christi generatio æterna. 700. 4

Christi humilitas in carne, & exaltatio in

in

I N D E X.

- in gloria. 703. 8
 Christi passio describitur, eiusq; dolores. Psal. toto. 403. 703. 8
 Christi virtutes, quas in passione spirauit dicuntur mirrha, aloe, & cassia. 264. 10
 Christi humanitas vestis, & donus dicitur. 264. 10
 Christi virtutum fragrantia. 264. 10
 Christi sponsa Ecclesia est, B. Virgo, & reliquæ Virgines. 265. 11
 Christi Regnum consumet omnia Regna. 274. 6
 Christi innocentia quomodo Mundo innotuit. 678. 1
 Christi cum Diabolo contentio circa quid fuerit. 796. 6
 Christi Aduentu omnis creatura exultabit. 606. 12
 Christi mirabilia quæ. 612. 1. 2
 Christi salutare, & iustitia in quo sita sit. 613. 3
 Christi humanitas scabellum Diuinitatis. 618. 5
 Christi corporis beneficia propter passionem quæ nam. 89. 4. 5. 6
 Christi Sacerdotium per coronam auream. 89. 3
 Christo conuenit ieiunare, & cilicio indui prout est in membris suis. 186. 16
 Christo quomodo conueniant verba Psal. 39. Comprenderunt me iniquitates meæ, & non potui, vt viderē. & illud Marci 6. Et non poterat ibi virtutem vllam facere, & mirabatur propter incredulitatem eorum. 232. & 233. 16. & 17
 Christianorum persecutio ab Imperatoribus illata describitur. 252. 11. 18
 * Cicatrices quid in Psal. 37. significant. 211. 1
 Cilicium quid. 286. 16
 Cilicium & ieiunium Christi. 404. 14
 Ciuitas Dei cur æterna stabilitate solidabitur. 273. 4
 Ciuitatis muri, viri perfecti dicuntur. 287. 11
 Ciuium cælestium conditiones & signa. 834. 1
 Ciuium Babylonix conditiones & signa. 834. 1
 * Cogitare quomodo tribuatur lingua. 315. 2
 Cogitatio mirabilium Dei radix omnium bonorum. 130. 7
 Cogitationes significantur per consilia. 41. 23
 Cogitationes per cor, desideria per renes significantur. 60. 7
 Cognoscere, pro approbare sumitur. 420. 17
 Columbe aptissimè comparatur Iustus. 324. 6
 Commoueri pedes, in Scriptura sumitur pro labi in peccatum. 773. 3
 Concupiscentiæ dicuntur necessitates. 115. 18
 à Concupiscentia rerum terrenarum vacandum præcipuè. 276. 10
 Concordia fratrum bona & iucunda. 821. 3
 Confessorum tentationes torrenti rapidissimo similes. 368. 4
 Confidentia in Deo est firma allegatio ad misericordiam impetrandā. 335. 1
 Cōfidentes in Domino qui sint, & quòd verè sint montes. 827. 1
 Confidentes in Domino quàm securi esse debeant. 787. 2. 3
 Confidentia in Deo cooperationem nostram non excludit. 329. 25
 Cōfiteri in Ecclesia magna, quid. 189. 21
 Confiteri, & laudare idem. 189. 21
 Coniunctio fratrum magis esse debet cordium quàm corporum. 821. 2
 Conscientiæ stimulus per spinam significatur. 157. 4
 Consilium Dei mirabile in paucitate electorum suorum. 660. 8. 9. 10. &c.
 Cōsolatio Diuina quibus datur. 151. 23
 Cōsolatio interna prodit in externam, & hæc ex quo agnoscitur. 789. 2
 Consolatio Diuina dolori carnis correspondet. 394. 19
 Constantes viri lapides, infirmi verò puluis dicti. 634. 15
 Contemplatio rerum diuinarum requirit animum liberū à tumultu perturbationum rerum secularium. 276. 10
 Contemplationis materia qualis. 20. 4
 Contemnentis temporalia præmium. 16. 4

I N D E X.

Contritio Dauid quanta fuerit. 864. 4
 Contritionis signa. 868. 7
 Contritionis cordis efficacia. 859. 1
 Contritionem quomodo consolatio subsequi debeat. 868. 5
 Conuertentes se serio ad Deum, quantū consolationem experiuntur. 788. 1
 Conuerti ad uesperam quid sit. 344. 7
 Cor mundum creare quomodo dicatur Deus. 310. 11
 Cordis dilatationis effectus. 746. 6
 Corda quomodo Deus obduret. 599. 8
 Corda effundere quid sit. 359. 8
 Corda feriunt sermones fraudulentī licet aures delectent. 328. 24
 Cornu significat potestatem regiam. 819. 18
 Cornu pro superbia. 452. 4
 Cornu Dauid regnum Messiae dicitur. 819. 18
 Corona gloriae caelestis duo continet. 640. 5
 Corporis salus non contingit homini sine auxilio Dei. 169. 17
 * Creaturae omnes instrumenta iustitiae & misericordiae Dei. 898. 8
 Creaturae quantumuis magnae collatae cum Deo nihil sunt. 899. 12
 Creaturae omnes excitant ad laudem Creatoris. 377. 14
 Creaturae omnes sunt milites Dei. 175. 7
 Crux est thronus. 36. 4
 * Cupiditas radix omnium malorum ostenditur. 376. 10

D

Daemones per Antonomasiā peccatores dici possunt. 765. 3
 Daemones sunt perpetui calumniatores. 759. 1
 Daemones significantur per pisces maris. 34. 8
 Daemones exultant, si quem iustum ad inchoandum peccatum induxerint. 51. 5
 Daemones sunt infidiatores. 126. 17
 Daemones venatores, laquei res creaturae. 572. 3
 Daemonem nos odisse odio iniquo, quid 216. 20

Daemones peccant superbia. 853. 5
 Daemonis artes. 853. 5. 6
 * Dammati quomodo dicantur non esse, & non uiuere. 225. 18
 Dammati semper in penis uiuunt, ut semper moriantur. 329. 26
 Dauid in Regem cur de humili loco eligitur. 478. 76
 Dauid non solum res, sed etiam uerba praenouit, & praedixit. 97. 18
 Dauid affectus erga inimicos quantus, & qualis. 187. 17
 Dauid in aduersis ad Deum solitus confugere. 519
 Dauid figura Christi. 547. 19. & deinceps.
 Dauid cur uocet Ecclesiam filiam. 267. 12
 Dauid exemplum iustitiae, & misericordiae posteris. 311. 14
 Dauid magis arte, quam robore uicit Goliath. 871. 1
 Dauidi facta promissio de Regno aeterno in Christo impleta. 540. 3
 Dauidici peccati deformitates, & circumstantiae. 210. 4
 Dauidis, & Prophetarum mos in Psalmorum versiculis. 1. 1
 * Decalogus uirtute continet omnes leges Mundi. 760. 1
 Delatores iniquos punire grauissime, regium est. 626. 6
 Delectari in Domino, quid. 198. 4
 Deliciae superuacuae a Diabolo, iucunditas moderata a Deo. 650. 17
 Delinquere in semetipso, quid. 152. 1
 Delinquere varijs modis accipitur. 179. 21

Desideria impiorum nunquam expletur. 50. 9
 Desiderium tribuere, & similia, quid. 88. 2
 Detrahentium linguę instar sagittae longē feriunt. 336. 6
 Deus solus uerē magnus est. 173. 3
 Deus uigilat pro iustis. 178. 15
 Deus aliquibus modis iustum exaudit in tribulatione. 15. 1
 Deus auctor omnium bonorum. 18. 870
 Deus quando orantem contemnit. 10. 2

Deus

I N D E X.

- Deus vult solum à paruulis, idest, humilibus cognosci, & laudari. 33. 9
- Deus laborem oppressorum, & opprimentium furorem considerat. 44. 37
- Deus cum irascitur quid operetur. 69. 9 & sequen.
- Deus nunc videtur in Tabernaculo, in cælis videtur in domo propria. 81. 7
- Deus Pastor. 101. 1
- Deus cur dicatur Dominus exercituum. 108. 10
- Deus quomodo laudandus. 162. 1
- Deus quibus placeat, quibus non placeat. 162. 1
- Deus non solum verbis, sed etiam operibus laudandus. 162. 1
- Deus & singillatim, & coniunctim laudandus. 162. 1
- Deus laudandus ex cognitione creaturarum, & ex reuelatione diuina. 163. 2
- Deus cur summo affectu laudandus. 163. 4
- Deus cur solus timendus. 166. 9
- Deus cur omnia fecerit verbo. 166. 9
- Deus ideò beatus, quia videt se sicuti est. 167. 12
- Deus aliter vigilat super iustos, aliter super iniustos. 178. 15
- Deus quem amat, securus est. 181. 2
- Deus quibus armis se defendit, & nos protegit. 181. 2
- Deus quomodo, & quare dicatur salus animæ. 182. 3
- Deus quare fons sapientiæ, & scientiæ. 195. 10
- Deus ordinariè per Vicarios suos regit, & docet. 466. 20
- Deus quo sensu dormiat. 478. 71
- Deus respicit aliquem, cum ei placatur; auertit oculos, cum irascitur. 486. 1
- Deus à nobis oculos auertit, cum nos ab eo faciem auertimus. 487. 4
- Deus quâdo ab omnibus cognoscetur. 506. 17
- Deus propriè viuus est, & vita. 508. 2
- Deus protector iustorum, & clypeus. 511. 9
- Deus qua ratione loquebatur ad Prophetas. 516. 8
- Deus affectu paterno nos amat. 525. 14
- Deus cum iniquis innocentes puniri, cur sinat. 556. 28
- Deus Pater quomodo vnxit Deum Filium. 267. 12
- Deus magnus, & laudandus in foundatione Ecclesiæ. 282. 1. 286. 9
- Deus Deorum quomodo dicatur Dominus. 296. 1
- Deus, vt nobis loquatur, attentionem exigit. 300. 8
- Deus in se eminenter omnia continet. 300. 12
- Deus in periculis vnicum refugium. 320. 1
- Deus non minus est bonus cum flagellat, quam cum parcat. 321. 6
- Deus quomodo errare faciat, excæcet, obduret, &c. 865. 39. 40
- Deus quomodo cōuertat corda aliquorum, vt alios odio prosequantur; & tamen non sit causa peccati. 663. 21. 23. & sequen.
- Deus quomodo dicatur protector bonorum, quamuis tribulatione eos permittat probari. 367. 2
- Deus quando non videt, nec audit. 804. 2
- Deus quando queratur. 38. 10
- Deus Sol increatus. 564. 18
- Deus cur dicatur Dominus absolutè. 558. 27
- Deus cur Aquilæ, & Gallinæ comparatur in scripturis. 369. 4
- Deus remuneratur opera bona ex iustitia. 73. 23
- Deus regnare dicitur multipliciter. 604. 9
- Deus quomodo inuisibilis. 607. 2
- Deus dupliciter dicitur custos animarum sanctarum. 653. 11
- Deus quomodo sedeat super Cherubim. 617. 1
- Deus quomodo dicitur loquutus in columna nubis. 620. 7
- Deus solus æternus, quia immutabilis, & cur immutabilis. 637. 28
- Deus non solum necessaria, sed etiam incunda præbet. 650. 17
- Deus quomodo lætari, dolere, & obli-

I N D E X.

- uisci dicatur. 656. 31. 811. 1
 Deus passionibus subdi non potest.
 656. 32
 Deus quomodo magnus iuxta quadrup-
 licem dimensionem. 876. 3
 Deus quomodo escam omnibus imper-
 riat; & tamen quosdam esurire per-
 mittat. 881. 16. 17
 Deus quomodo orandus, vt preces no-
 stras exaudiat. 882. 19
 Deus præsentiam suam quibus modis
 demonstret. 872. 7
 Deus non semper minatur, sed aliquan-
 do iram effundit. 30. 12. 13
 Deus nobis est robur, petra, arx muni-
 tissima, munitio, scutum, clypeus, cor
 nu salutis. 68. 1. 2
 Deus petra cur dicatur. 76. 34
 Deus iustus per antonomasiam. 762. 1
 Deus prope est malis per iustitiam, bo-
 nis per auxilium. 765. 2
 Deus cæli quomodo dicatur filius Dei.
 833. 26
 Deus cur absolutè bonus. 830. 1
 Deus excelsus cur non diligat excelsos.
 841. 7
 Deus quomodo dicatur examinare cū
 non egeat examine. 843. 1
 Dei beneuolentia radix omnium bono-
 rum. 12. 13
 Dei protectio est velut tentorium.
 22. 14
 Dei respectus causa omnium bonorum,
 sicut sol. 24. 4. 654. 2. 761. 7
 Dei gladius, & sagitta, quid. 30. 13. 182.
 2. 3. 262. 7
 Dei incarnatio fuit visitatio. 34. 5
 Dei studia, quid. 38. 11
 Dei promissa, qualia. 50. 7. 8
 Dei amici, & inimici qui nam. 66. 15
 Dei currus, equi, aurigæ, sagittæ, quæ.
 71. 12
 Dei præsentia quid operetur, eiusq. po-
 tentia. 69. 9. & seq.
 Dei mos cum tepidis. 103. 5
 Dei protectio in tribulatione. 12. 3
 Dei potentia, laudes. 132. 1. & seq.
 Dei vocis efficacia. 134. 3
 Dei opera mouent homines ad fidem.
 163. 4
 Dei misericordia latius patet, quàm iu-
 stitia. 164. 5
 Dei cogitatio vna, & simplex continet
 eminenter innumerabiles cogitatio-
 nes. 166. 11
 Dei arma offensiuæ, & defensiuæ. 162.
 2. 3
 Dei pietatem experiri quàm dulce.
 194. 8
 Dei veritas, & iudicia quàm profunda.
 163. 4. 193. 6. 859. 1
 Dei misericordia erga pios & impios.
 194. 6. 7. 8
 Dei memoria plus delectat, quàm præ-
 sentia carnalium voluptatum. 460. 3
 Dei indignatio igni comparatur. 482. 4
 Dei suauitas, misericordia, & mansue-
 tudo. 521. 4. 712.
 Dei nomen quatuor literarum. 738. 1
 Dei iuramentum. 701. 5
 Dei veri, & Deorum falsorum antithe-
 sis. 716. 15
 Dei rectitudo in quo consistat. 607. 2
 Dei mira in puniendis impijs celeritas,
 & aliquando tarditas. 608. 3. 188. 26
 Dei nomen quare sanctum, & terribile.
 618. 3
 Dei magnitudinem quomodo laudare,
 & imitari possimus. 876. 3
 Dei perfecta laudatio non nisi in Patria
 exhiberi potest. 884. 1
 Dei filius, cur peculiariter Deus Deo-
 rum. 830. 2
 Dei opera omnia ex misericordia pro-
 fecta sunt. 829. in tit.
 Dei omnipotentia in extremo iudicio
 quanta. 608. 4. 5
 Deo qui nam honor debeatur. 133. 13
 Deo quomodo fruemur in Patria. 195. 9
 Deo cur nemo possit comparari. 228. 8
 Deo quomodo conueniat penitentia.
 701. 5
 Deum hominis recordari, quid sit. 34. 5
 Deum furere, & irasci, quid sit. 7. 5
 Deum memorem esse nostri, magnum
 beneficium. 140. 4
 Deum pro Deo suo, quis habeat. 167. 12
 Deum videntes, similes sunt Deo; nun-
 quàm videntes, semper dissimiles. 167. 12
 Deum pugnare pro nobis necesse est, vt
 nobis innotescat. 182. 3
 Deum semper laudat, qui semper bene
 agit. 191. 32
 Deum quomodo nunc videamus. 195. 20
 Deum

I N D E X.

Deum refugium suum, & virtutem pauci ex vero affectu pronuntiant. 272. 1
Deum cognosci ab hominibus, quàm sit admirabile. 871. 4
Dij Gentilium, vani Deiculi. 602. 5
Dextera, Christum aliquando significat. 853. 4
Diabolus non robore, sed arte, scilicet patientia vincendus. 871. 1
Diabolus rex superbix. 853. 5
Diaboli arma, astutia, & malitia. 260. 5
Diabolus, Pharaoni similis. 544. 11
Diabolus, vnde in nos potens, & quod effugium. 428. 12
Dies, prosperitatis; nox, tribulationis tempus aliquando significat. 60. 7
Dies, vitæ; nox, mortis tempus aliquando significat. 93. 2
Dies huius seculi, dies peregrinationis, & doloris. 522. 6
Dies transeundo, & fluendo, quomodo permanere dicantur. 752. 1
Dilectionis præceptum, finis perfectionis. 754. 8
Disciplina paterna, castigatio. 77. 39
Disciplina virtutem prudentiæ aliquando significat. 748. 2
Discordix fratrum damna. 821. 2
Ditissimi peccatores cur sæpe laborent ære alieno grauati. 204. 23
Diues esse debet animus non arca. 709
Diuitijs bene vtendi gratia. 710
Diuitiæ non perdunt homines, sed superbia. 520. 1
Diuites, dum Deum non timent, inopes fiunt. 176. 10
Diuites impij cur dicantur Leones. 176. 10
Diuites mali, non raro ad extremam inopiam rediguntur. 176. 10
Diuitijs non caret, qui diuitias non desiderat. 175. 9
Diuitiæ instabiles sunt, & fallaces. 176. 10
Diuitiæ multis periculis sunt expositæ. 176. 10
Diuitias temporales qui diligunt, semper egent. 177. 10
Diuitijs, aut potentiæ fidere vanum, & stultum est. 290. 6. 291. 10
Diuitiæ fluunt, dum affluunt. 361. 10
Doeg quomodo dicatur mentitus di-

cendo verum. 323. 3
Dolosi in sua lingua confidunt. 49. 4
Dolosorum, & mendacium merces iusta. 237. 6
Dominus exercituum, & Rex gloriæ soli Deo in scriptura tribuitur. 109. 10
Domus spiritualis quomodo erigatur, & perficiatur. 783. 1
Domum spiritualem ædificando, non magis fidere debemus operationi, quàm orationi. 193. 3
Dormire Dei, quid sit. 28. 6. 771. 3
Dormitare, & dormire quomodo dicantur homines. 778. 4

E

Eccllesia, cur Columba sit. 20. in tit.
Ecclesia, quare, & quomodo magna. 189. 21
Ecclesia Christi semper à Deo protegenda. 735. 20
Ecclesia, soli, lunæ, Iridi comparatur. 551. 36
Ecclesia, quomodo ancilla, quomodo libera dicatur. 733. 6
Ecclesia breui tēpore propagata. 699. 3
Ecclesia ex gentibus diu sterilis. 713. 8
Ecclesia sponsa Christi. 265. 11
Ecclesia dicitur assistere in cælo, non sedere. 265. 11
Ecclesia Dei, duobus capitibus mirabilis apparet. 282. 1
Ecclesia cur dicatur mons Sion, latera Aquilonis, ciuitas Domini virtutum. 285. 7. 622. 10
Ecclesia Dei mons coagulatus, mons pinguis &c. 392. 15. 16. 17
Ecclesia vix nata in Abel persecutionem patitur. 801. 1
Ecclesia sanctorum firmanentum Dei. 153. 1
Ecclesia Catholica noua Hierusalem. 635. 22
Ecclesia cur dicatur fundari, non fundata. 282. 2. 278. 11
Ecclesiæ ædificatio ex quibus lapidibus. 413. 40
Ecclesiæ & Christi Regni propagatio. 426. 8
Ecclesiæ fundamenta, quæ. 529. 1
Ecclesiæ persecutores. 696. 30
Eccle-

I N D E X.

Ecclesiæ dignitas præcedit Angelos.

267. 11

Ecclesiæ contra inimicos suos, victoria mystice designata. 352. 10

Ecclesiæ pugna aduersus hostes Deo præcipue auctore. 353. 13

Ecclesiæ firmitas, Beatitudo, successio.

429. 42

Ecclesiæ cur vocet filiam David.

267. 12

* Ecstasis, quid significet. 144. in tit.

* Effundere frameam, quid. 182. 3

* Electi Dei sunt oues. 102. 1

Electi, reliquæ sunt Christi. 90. 12

Electis Deus multa bona præstat. 102. 1

Electorum propria qualitas, & nota.

836. 8. 124. 6.

Electorum salus est Christi merces.

795. 4

Eleemofina quæ bona pariat. 711. 374. 6

Eleemofina quas circumstantias habere debeat. 374. 6

Eloquium Dei est scutum. 75. 33

Eloquium Dei cur dicatur ignitum.

762. 4

* Eman Ezraita quis. 532. in tit.

* Epistolæ, historiarum, & Prophetiarum sacrarum quomodo differant. 258. 1

Episcopi longe abesse ab Episcopatu suo non debent. 690. 7

Episcopo quare in Ecclesia detur locus altior. 793. 2

* Et, particula, in oratione hebraica sæpe redundat. 75. 32

Et, sæpe in scriptura ponitur pro, quia. 213. 17. 842. 8

Ethan quis. 559. in tit.

* Euangelica prædicatio dicitur vox Domini. 132. 1. & seq.

Euangelica prædicatio quomodo diuidat flammam ignis. 136. 7

Euangelicæ prædicationis vis. 132. 1. & sequen.

Euangelij vis in hominibus spiritualibus, & nationibus barbaris. 137. 13. 8.

7. 8. 10

* Exitum impiorum hoc tempore in Iudæis impletur, sed manifestius in die Iudicij. 183. 2

Exultatio Iusti qualis. 184. 13

184. 13

F Abulationes sunt hæreticorum colloquia. 252. 5

Facies aliquando in hebreo sumitur pro ira. 97. 2

Facie auertere quomodo dicatur Deus. 256. 26

Facultas exequendi non erit in inferno, licet futura sint desideria malorum. 339. 2

* Fideles significantur aliquando per oues & boues. 34. 8

Fideles infidelium esca. 481. 7

Fideles populi, quomodo vocentur, commutandi & lilia. 257. in tit.

Fidelibus non promittitur carentia inopie, sed consolatio spiritualis. 179. 19.

Fidelium numerus magnus. 99. 14. 15

Fides requirit hominem verè humilem. 722. 1

Fidei tempus auroræ comparatur; infidelitas tenebris noctis. 273. 4

Fidei diuinæ signum quod nam sit. 614. 3

Fidei propagatio cepit per Apostolos in Hierusalem. 699. 3

Fidem ad iustitiam reputari, quid. 156. 3

Fiducia in potentia propria aut diuitijs vana ostenditur. 290. 6

Filij inter humanas felicitates primo loco numerandi. 874. 13

Filius se habet ad patrem, vt radix ad arborem. 316. 5

Filij Hierusalem quæ sint. 386. 10

Finis consummationis, diuersimode à Patribus intelligitur. 754. 8

Firmamentum variè accipitur. 436. 16

* Flagella quibus à Domino castigamur. 780. 3

Fletus, & ieiunia verè penitentiarum signa. 630. 7

Fletus, cur tribuatur nocti, lætitia verbis dici. 141. 6

Fletus in scriptura sæpe ponitur pro signo fletus. 404. 14

Flumina Babylonis bona sunt temporalia. 834. 1

* Fodere in hebraica lingua varia significat. 752. 5

Felicitas iniquorum magna est tentatio. 200. 7

Feli-

I N D E X.

Felicitas vera quæ nam. 874. 18
 Felicitas mundana cito pertransit.
 629. 4
 * Frangere sitim, quid sit. 650. 13
 Fraudulentus amicus peior est inimico
 manifesto. 326. 12
 * Fulgura sagittæ Dei. 70. 12
 Fulgura & tonitrua præsentiam Dei ma-
 ximè demonstrant. 872. 7
 Funiculus in scriptura pro hæreditate
 sumitur. 843. 2

G

Gehenna cur dicatur Infernus infe-
 rior. 524. 12
 Gens non sancta quæ nam sit. 246. 1
 Gentes omnes tam fideles, quàm infide-
 les Christi sunt hæreditas. 9. 8
 Gentium ad Deum conuersio. 523. 8
 Gentiles Deus docuit per naturalia.
 894. 9
 * Gladius, & lancea Dei, quid. 182. 3
 Gloria Domini, quæ sit. 602. 4
 Gloriari, quando malum. 172. 2
 Gloriam Dei Sol præcipue prædicat.
 81. 5
 Gloratio non semper vitiosa. 172. 2
 Gloriæ cælestis corona, duo continet.
 640. 5
 * Gratia prædestinationis dicitur sors.
 60. 6
 Gratia Dei scutum. 22. 15
 Gratia, lux est, peccata, tenebræ. 141. 6
 & 155. 1. 719. 2
 Gratia est animæ vita; peccatum mors.
 169. 19
 Gratia adiuuans non tollit libertatem
 arbitrij, sed confirmat. 483. 9
 Gratia, cur aliquando subtrahatur.
 775. 1
 Gratia præueniens, quid. 720. 5
 Gratia Dei ad exterminandum pecca-
 tum multò plus, quàm studium no-
 strum valet. 323. 3
 Gratia Dei pinguedo animæ, & eius ef-
 fectus. 364. 6
 Gratia excitans, & comitans, bonorum
 operum causa. 565. 18
 Gratia Dei in anima, est veluti aqua in
 terra arida. 868. 6
 Gratia est salus inchoata. 763. 2

Gratiæ effectus. 59. 3
 Gratiæ Dei necessitas. 16. 2. 21. 9
 Gratiæ auxilia varia. 103. 3
 Gratias Deo agere qui nam debeant.
 718. 27
 * Gubernatio aliorum difficilis. 147. 12
 Gubernatio Dei qualis. 705

H

Habitus mali, & vitia sunt hostes ho-
 minis. 25. 7
 * Hæreditas cur dicatur calix. 47. 7
 Hæreditas malorum, & iustorum. ibid.
 Hæresis modernorum hæreticorum, qui
 vota rerum non imperatarum à Deo
 omnino contemnunt, refellitur.
 458. 12
 Hæreticorum dogmata de peccatorum
 iustificatione. 154. 1
 Hæreticorum prædicatio, lingua serpen-
 tum. 852. 3
 * Hebræus populus aliquando Iudas,
 aliquando Israel dicitur. 714. 2
 Hebræi vtuntur genere feminino pro
 neutro. 159. 7
 Hebræi ponunt futurum quando signifi-
 catur quædam continuatio. 13. 5
 Hebræi orantes manus extollebant in
 altum. 129. 2
 * Hierosolymæ desolatio per Antio-
 chum facta deploratur. 441. & deinceps.
 Hierusalem muri qui nam sint. 313. 19
 Hierusalem filia quæ nam sint. 286. 10
 Hierusalem cælestis portæ quæ. 528. 1
 Hierusalem terrestris prærogatiuæ.
 529. 2
 Hierusalem cælestis, ac terrestris lati-
 tia. 532. 7
 Hierusalem euertunt Titus, & Vespasia-
 nus propter odium Iudæorum, non
 propter odium Dei. 443. 5
 Hierusalem typus cælestis patriæ. 775.
 in tit.
 Historiæ, Prophetiæ, & Epistolæ sacræ
 quomodo differant. 258. 1
 * Holocaustum gratius quod nam.
 86. 3
 Holocaustum perfectum. 381. 12
 Holocausta medullata quæ nam dican-
 tur. 381. 13. 14

Holo-

I N D E X.

Holocausta spiritualia, & oblationes
quæ dicendæ sint. 314. 20
Homo quomodo imago Dei. 18. 7
Homo ex naturæ corruptæ viribus quid
facere possit. 53. 2
Homo à creaturis omnibus despicitur
in hac peregrinatione. 781. 4
Homo sine adiutorio Dei, similis mor-
tuo. 128. 1
Homo propria virtute liberari non po-
test à malis. 168. 16
Homo cur similis floribus, alijsque ca-
ducis, non autem soli, & lunæ, & stel-
lis. 474. 44
Homo exaltatus à Deo. 713. 7
Homo quàm modica res sit respectu
Dei, respectu sui magna. 872. 5
Homo sicut ovis seductus perijt; Dia-
bolus sicut leo ex malitia cecidit.
769. 8
Hominem in iudicio quid poterit red-
dere securum. 289. 5
Homines dicuntur aliquando Dij. 34. 8
Homines sunt vasa lutea recentia. 9. 9
Homines cur per infantes, & lactentes
significentur. 33. 3
Homines iniqui membra sunt Diaboli.
853. 4
Homines fideles per Israellem signifi-
cantur. 774. 4
Homicidæ dicuntur viri sanguinii. 120. 9
Horæ Canonicæ quomodo recitandæ.
163. 3
Horarum septem Canonicarum vsus in
Ecclesia vnde. 767. 4
Hostiæ spirituales quænam. 604. 8
* Humanitas Christi vestis, & domus
dicitur. 264. 10
Humanæ naturæ post peccatum corru-
ptæ status. 783. 3
Humanarum rerum cursus, dicitur tor-
rens. 703. 8
Humilitas gratissima Deo. 74. 30
Humilitas salcondiens recte facta. 17. 6
Humilitatis doctrina Regibus, & Prin-
cipibus præcipuè necessaria. 841. 7
Humiliatio ex tribulatione veniens, ma-
gnus donum est. 749. 7
Humiliati vsque ad terram, quid sit.
256. 27
Humilis oratio non reuertitur vacua.
186. 16

Humiles Deus respicit. 712. 5
Humiles spiritu, quomodo saluentur.
179. 19
Humiles significantur nomine lacten-
tium, & infantium. 32. 3

I

Iacula, tentationes aliquando signifi-
cant. 74. 32
* Ideæ diuinæ res omnes repræsentant.
848. 15
Idithun, quis fuerit. 218. in tit.
Idolorum vanitas indicatur. 523. 7. 8
Idololatræ similes Idolis. 716. 16
* Ieiunium & saccus, sunt alæ oratio-
nis. 186. 16
Ieiunare & cilicio indui convenit Chri-
sto, prout est in membris suis. 186. 16
Ieiunando caput operire, quid sit.
404. 13
* Illuminatio vultus Dei, multiplex su-
per nos. 384. 1
Illuminationis Dei finis, est liberatio à
peccatis. 768. 2
* Imagines Sanctorum. 716. 16
Impedimenta in quarendo Deo. 657. 4
Imperatorum persecutio in Christia-
nos describitur. 252. 1 L & seq.
Impius, adeptus gloria mundana, quam
quæsiuit, iuste priuatur cœlesti, quam
non quæsiuit. 295. 20
Impius aperte, & occultè insidiatur Iu-
sto. 31. 16
Impius quasi leo. 65. 13
Impij sunt simulacra Idolorum. 828. 18
Impij cum Iustos offendunt, Deum po-
tius offendunt. 22. 12
Impij timent vbique. 44. 45. 9. 10
Impij quomodo in exitium præcipitan-
tur, & qualis via illorum. 183. 7
Impij cur trepidant timore, vbi non est
timor. 318. 7
Impij omnes mendaces esse conuincun-
tur, & cæci. 338. 1
Impij tandiu Deum laudant, quandiu
eis benefacit. 295. 19
Impij in hoc seculo Iustis; Iusti in futu-
ro dominabuntur Impijs. 293. 15
294. 18
Impij quàm breui tempore regnent su-
per iustos. 787. 3

Im-

I X N D C E V X.

- Impiorum status in hac vita.** 226. 2
Impiorum miseria. 4. 5
Impiorum mala illata iustis, ipsis solum nocent. 31. 15. 16. 17
Impiorum desideria nunquam expletur. 50. 9
Impiorum exitium hoc tempore in iudicijs impletur, sed manifestius in die Iudicij. 189. 7
Impiorum prosperitas, quasi somnium. 435. 8
Impiorum mors nunquam finienda. 193. 14
Impiorum iusta retributio est, ut male pereant qui alios perdere student. 316. 5
Impiis facit Deus misericordiam, cum cito eos de hoc mundo tollit. 83. 10
Improbi omnes, viri sunt sanguinum. 850. 18
*** Incarnatio Dei, fuit visitatio.** 34. 5
Indignatio significat aliquando iustum Dei iudicium. 141. 5
Infernus accipitur aliquando pro purgatorio. 61. 10
Infernus cur aliquando pro morte accipitur. 68. 6
Inferni pericula qui non aduertant. 720. 4
Infideles sunt ciuitates diaboli. 37. 6
Infidelitatis tepus e nebris noctis comparatur. 316. 4
Infirmittis nostrę cum Dei potentia collatio. 826. 6
Inimici Dei, sunt inimici Iustorum. 28. 6
Inimici iustorum latrare possunt, mori non possunt. 13. 7
Inimici nostri nihil magis oderunt, quę Ecclesię propagationem. 793. 2
Inimico manifesto, peior est fraudulentus amicus. 326. 12
Iniquitatis origo in pauperibus, & diuitibus. 434. 7
Iniquitates cogitare, quid sit. 852. 2
Iniqui feno, Iusti palmę, ac cedro comparantur. 585. 12
Iniqui quomodo odio habendi, & diligendi. 757. 1
Iniquorum insidie dicuntur laquei. 68. 6
Iniquorum finis. 583. 9
Iniquorum consortium impedit meditationem verbi Diuini. 757. 3
Iniquis Deus miseretur vt pater, non vt iudex. 344. 6
Innocentia cordis in quo consistat. 625. 3
Innocentia oculorum, quę. 625. 4
Innocentia, & robur rarissime coniunguntur. 76. 55
Innocentes cum iniquis cur Deus puniri sinat. 256. 28
Insidie quomodo nocent insidiatoribus. 183. 9
Insipiens a stulto, quomodo discrepet. 291. 9
Instrumentis omnibus musicis laudari se, Deus pręcepit. 895. 1
Inuidia, & odium nomine doloris, cur. 30. 15
Inuidiam superat, qui timet Deum. 711. 1
*** S. Ioannes lucerna fuit Christo venturo.** 819. 18
*** Ira Dei dupliciter accipitur.** 209. 1
Ira Dei vnde colligatur. 563. 13
Ira cur nobis a Deo data. 17. 5
Ira, cos virtutis. 17. 5
Ira significat aliquando poenam, & castigationem. 141. 5
Ira proprietatis. 42. 25
*** Israelitę carnales, & spirituales, qui nam sint.** 899. 13
Israelitę in portis ciuitatum conueniebant ad pręcipua negocia. 778. 2
Iucunditas moderata a Deo est, superuacaneę deliciae a diabolo. 650. 17
Iudęorum Ecclesia, oliua bona fuit. 278. 2
Iudęi occisi in Paschate. 442. 5
Iudęi quo sensu dispersi, & non dispersi. 474. 42
Iudęorum dispersionis causa fuit superbia. 347. 18. 01. 1
Iudęorum sera conuersio. 347. 16
Iudęi, & Iudęorum in Christum crudelitas. 692. 15. 693
Iudaicus populus, cur dicatur hereditas Domini. 442. 3
Iudas, cur in Psalmo vocatus sit, homo pacis. 239. 10
Iudaicę Synagoga fecunditas Ecclesię gen-

I. X N D O E X . I

- gentium sterilitate commutata. 683.
35. & sequen.
- Iudices excrucantur donis. 497. 4
- Iudices reprehensi à Deo ob acceptationem personarum. 499. 2
- Iudicium falsum, radix peccatorum cordis. 56. 3
- Iudicium inter homines ex nouissimis faciendum. 438. 18
- Iudicium, ad quos præcipue spectet. 299. 6
- Iudicium extremum terribile simul, & latissimum. 606. 12
- Iudicium iniustitia quid pariat. 300. 4
- Iudicij dies. 703. 7. 2161. 3
- Iudicia Dei occulta, non possunt esse iniusta. 698. 193. 6
- Iudicij extremi apparatus, & effectus. 11. 12. 609. 6. & sequen. 629. 9. & sequen.
- Iudicia in portis apud Hebræos. 350. 6
- Iudicium & iustitia quomodo differat. 423. 8
- Iuramentum Dei significat rei immobilitatem. 816. 11
- Iustus quomodo perpetuo legem Dei medietur. 2. 2
- Iustus peccata leuia magna existimat. 113. 12
- Iustus cur sapienter loquatur. 306. 31. 33
- Iustus aptissime comparatur columbæ. 324. 6
- Iustus olivæ fructifera, impius ligno arido similis. 317. 8
- Iustus quomodo dicatur lavare manus suas in sanguine peccatoris. 342. 10
- Iusti studium præcipuum. 20. 3
- Iusti vitam æternam merentur ex condigno. 123. 5
- Iusti timentis Deum boni. 113. 12. & sequen.
- Iusti peculiariter respiciuntur à Deo. 169. 18. 170
- Iusti timent, & sperant. 169. 18
- Iusti egent semper nova Dei misericordia. 171. 22
- Iusti semper Deum laudant. 172. 1
- Iusti pro se Deum habent vigilantem. 178. 18
- Iusti exultatio, qualis. 184. 12
- Iusti contra persecutores defensio, est oratio. 186. 16
- Iusti, filij hominis, impij iumenta. 196. 12
- Iusti non multum debent formidare infidias impiorum. 202. 12. 13. 200.
- Iusti non aliop habent inimicos, nisi impios. 343. 12. 781. 4
- Iusti quoniam sint. 668. 3. 173. 11. 174. 11
- Iusti solatium ex tribulationibus capiunt. 844. 9
- Iusti ab ipso Deo temporalia subministrantur. 176. 9
- Iustitia interdum misericordiam significat. 545. 14
- Iustitia & Sapientia Christus diabolum superavit. 261. 3
- Iustitia, & veritas Regi necessaria. 181. 6
- Iustitia Dei, quid. 819. 1
- Iustitia Iustorum vera est, non imputata, ut hæretici volunt. 860. 2
- Iustitia Iustorum respectu Iustitiæ Dei nulla. 860. 2
- Iustitia pro opere bono, & charitate ponitur. 641.
- Iustitiæ viam ambulare, quid sit. 869. 12
- Iustitiam iudicare, quid. 36. 4
- Iusto spes est tutissima domus. 19. 10
- Iusto melius est modicum, quam ingentes diuitiæ peccatoris. 203. 17. & sequen.
- Iustorum merita ex misericordia Dei. 123. 5
- Iustorum auxilium à Domino. 68. 2
- Iustorum in hac, & altera vita præmiu. 313. 4
- Iustorum clypeus. 12. 3. 511. 9
- Iustorum mors, qualis. 180. 22
- Iustorum preces à Deo semper exaudiuntur. 178. 15
- Iustorum prosperitas diuturna, impiorum brevis. 197. 2. 204. 21. 307. 37. 38
- Iustorum magna tentatio est, felicitas iniquorum, & quomodo superetur. 200. 7
- Iustorum principatus vnus est, & multiplex. 849. 16
- Iustos perpetuo respicit Deus. 178. 15
- Iustos de tribulatione quomodo liberet Deus. 16. 1. 179. 18
- Iustum iustitiam suam prædicare, presumptio, quando non est. 73. 23

I N D E X.

- Iustificationis impij ordo.* 24. 4
Iustificatio fit cum gratiæ infusione.
 154. 1
Iustificationis initium non nisi à Deo.
 917. 4
- L**
- L** *Acus quid.* 31. 16
Laus Dei quomodo à sacrificio lau-
dis internoscatur. 302. 16
Laus propria aliquando non mala, &
quando mala. 172. 2
Laus Dei vnde sumenda. 887. 2
Laudari vtiliter quomodo debeat Deus
 704
Laudationis bonæ conditio. 705
Laudari in Deo, quid sit.
Laudis Dei materia, quæ nam sit. 658. 5
 712. 32
Laudis sacrificium summam salutis cõ-
plectitur. 304. 24
Laudes Dei omnia consentunt. 899. 13
Laudem Dei, quæ ore cantatur, præce-
dere debet silentium. 372. 2
Lauare manus, signum innocentie.
 436. 13
Lætitia spiritualis vnde oriatur. 710
 * *Lex Dei multis modis nominatur in*
scripturis. 82. 8
Lex Domini quibus modis soluitur
 2. 1
Lex Dei qualis sit impijs, & iustis. 6. 3
Lex alia charitatis, alia iustitiæ. 805. 4
Lex Domini quomodo dicatur ignea
 762. 4
Lex Domini terra sancta est, in quam
ducimur à Spiritu sancto. 869. 12
Lex peccati, siue cupiditas excæcat ho-
mines. 755. 1
Lex Decalogi cur sit indispensabilis.
 762. 2
Legis diuinæ sex encomia. 81. 8
Legis diuinæ obseruatio à Dei timore
promanat. 177. 13
Legis Dei sedes, est cor iusti. 2. 2
Legis diuinæ nomina diuersa. 735. 4. 7
Legis diuinæ amor qualis esse debeat.
 737
Legis Dei obseruantiam, quæ impe-
diant. 738. 1. & seq.
Legis consideratio, quæ bona pariat.
 756. 2
Leges Dei mirabiles in sensu mystico,
quænam sint. 760. 1
Legis ad obseruantiam quatuor à Deo
petenda. 742. 1
 * *Liberalitas, regia virtus est, ac diui-*
na. 881. 16. 17
Liberalitas, Dei bonorum omnium cau-
sa. 882. 16
Liberatio à malis, & à vitijs. 578. 16
Liber viuentium, & iustorum quis dica-
tur. 409. 33
Ligna Domini quæ sint. 651. 18
Limbus, locus inferior. 594. 6
Lingua quomodo meditatur iustitiam
Dei. 191. 32
Lingua loqui iudicium, & ore meditari
sapientiam, quid. 198. 32
Lingua dolosa eorum quibuscum ver-
samur, valde magna calamitas.
 770. 1. 2
Lingua dolosa parum nocet, nisi indu-
cat ad peccatum. 770. 2
Lingua dolosa sagittæ similis, & eius re-
media. 771. 4
Lingua dolosa, & iniqua descriptio, &
differentia. 770. 2
Lingua peccata alijs frequentiora, diffi-
cillimè cauentur. 177. 13
Lingua quomodo tribuatur cogitare.
 315. 2
Lingua detrahentium instar sagittæ lon-
ge feriunt. 336. 6
Literaturâ cognoscere, quid sit. 420. 17
 * *Locorum mutatio vana.* 45. 1
Loquendi prudentia euitantur maxima
incommoda. 710
 * *Lucerna in scriptura passim vocan-*
tur sibi, siue posteri. 819. 18
Lumen Dei principium bonorum om-
nium. 75. 31. 174. 5
Lumen gloriæ, ad videndum Deum, ne-
cessarium. 195. 10
Lumen vultus Dei quod dicatur. 546. 16
Lumine cælesti iustè priuantur, qui ra-
tionis lumine vt noluerunt. 296. 21
Luna aliquando significat corruptio-
nem, & mortalitatem. 426. 7
Lux interdum pro lætitia ponitur.
 174. 5
Lux gratiam, & misericordiam sæpe si-
gnificat. 247. 3

Lux

K N D E X.

Lux, quam Deus initio creauit, qualis
fuerit. 449. 17.
Lux iustitiæ, quomodo oriri dicatur.
611. 12

M.

Magnificencia Dei qualis. 33. 2.
Maheleth quid. 53. 2. in tit.
Mala naturæ corruptæ. 52. & seq.
Maledictio diuina omnium malorum
cumulus aptis similitudinibus osten-
ditur. 691. 17. 18.
Malum simpliciter, est malum culpæ.
574. 10.
Malorum omnium initium, mentem à
Deo auertere. 511. 3.
Malorum conuersatio nunquam magis
nocet, quàm in conuiujs & compo-
sitionibus. 859. 5.
Mandatum Dei, quomodo dicatur la-
rum. 752. 8.
Manichæorum hæresis circa rerum crea-
tionem refellitur. 197. 7.
Manna Eucharistiæ figura. 472. 28.
706.
Manfuetudinis virtute excellentes viri.
811. 1.
Manus peccatoris, quid. 196. 11.
Mare ostendit Dei potentiam. 543. 10.
Mare & flumina aliquando pro Genti-
bus & Iudeis sumuntur. 545. 25.
Mare, quomodo manus habere, dicatur.
654. 25.
Martyrum Christi fides, & constantia.
766. 1. 785. 4. 349. & seq.
Martyrum Christi de tribulationibus
victoria. 178. 17.
Maturare ambiguum est, & varia eius
significata. 762. 3.
Maximè reprehensus quòd delatori-
bus nimis indulserit. 626. 6.
Medici, & Gigantes iisdem literis scri-
buntur hebraicè. 536. 11. & seq.
Media querendi Deum. 657. 4.
Memoria Dei plus delectat, quàm præ-
sentia carnalium voluptatum. 460. 3.
Memoria Dei inter operandum quomo-
dò haberi possit. 364. 7.
Mendacium perniciosum, multorum
malorum est causa. 177. 13.
Mendacium dicitur iniquitas. 749. 1.

Médaces filij hominum in stateris quò-
modo. 697. 9.
Mendacium est ordinariè primum pec-
catum in pueris. 339. 3.
Mendacij coarguit Deus diffidentes po-
tentia virtutis suæ. 378. 2.
Mendacium, & doloſorum merces ius-
ta. 740. 6.
Mensa sumitur aliquando pro lectione
sacrarum scripturarum. 409. 27.
Messias quomodo filius, & Dominus Da-
uid. 697. 1.
Messiæ aduentum Dauid efflagitat. 553.
& seq.
Milites Christi fugiendo, & toleran-
do vincunt tentationes. 172. 1.
Milites Dei sunt creaturæ omnes. 317. 7.
Miseriæ corporales communes quatuor.
& totidem spirituales. 678. 4. & seq.
679.
Miseriæ propriæ consideratio utilis.
803. 1.
Miseretur Deus iniquis vt pater, non vt
iudex. 344. 6.
Misericordia Dei latius patet, quàm ius-
titia. 164. 5.
Misericordia à miseratione quomodo
differat. 111. 6.
Misericordia perfecta solius Dei pro-
pria est. 164. 5.
Misericordia Dei in quo potissimum
constat. 759. 4.
Misericordia Dei quam magna, & quan-
ta erga pios, & impios. 193. & seq.
Misericordia est simul corona iustitiæ.
196. 11.
Misericordia Dei præcedit iusticiam.
523. 15.
Misericordia Domini præ vita diligen-
da. 363. 4.
Misericordia in solius Dei sinu requi-
scit. 807. 7.
Misericordiæ est, tollere miseriam &
defectum. 164. 5.
Misericordiam Dei imitari debemus.
118. 3.
Misericordiæ diuinæ affluentia. 305. 2.
Misericordiæ nomen omnia beneficia
complectitur. 348. 20.
Missæ sacrificium. 99. 17.
Mites facile Deum habent adiutorem b.
113. 10. 175. 2.

Mona.

I N D E X.

Monachi veteres hospitibus ad lautitiâ
legumina oleo condita apponebant.
650. 17

Mons Sion quare immobilis fuerit.
786. 1

Montes terræ qui dicantur. 273. 3

Montis Sion variz significationes. 286.
10.

Montium creatio. 558. 2.

Mortalitas, & passibilitas in Beatis con-
scindenda, non deponenda. 144. 15

Mors peccatorû, quare pessima. 179. 21

Mors iustorum, quare pretiosa, & qualis.
179. 180. 21. 22.

Mors Christi quare dicitur somnus. 135.
238. 9

Mors impiorum nunquam finienda. 293
14

Mortis tempus, nocte; vitæ, die signifi-
catur. 93. 2

Mortui cur Deum laudare negentur. 536.
11. & seq.

Mortuorum an Deus curam gerat. 534.
5

**Moses Princeps Ecclesiasticus, & politi-
cus** simul. 466. 20

Moses, an auctor aliquorum Psalmorû.
557. in tit.

Motus pravi reprimendi, & timendi.
17. 5

***Mulierum infelicitas,** est sterilitas.
679. 8

Mulieris Christianæ ornamentum ad in-
tus esse debet. 269. 15

Mundus sine intercessione Sanctorum
non tandiu subsisteret. 672. 20. 21

Mundus miratur, non diligit eos, qui de
mundo non sunt. 789. 3

Mundus, terra deserta, inuia, & inaquo-
sa. 362. 3

Mundi vanitatem agnoscentes, quid pe-
rant à Deo. 225. 18

Mundum obliuisci, quid sit. 267. 12

Munera quæ Christo placent. 427. 10

Munerum acceptio, causa iniquitatis.
120. 10

Muri ciuitatis, dicuntur viri perfecti.
287. 11

Muri Hierusalem quinam. 313. 19

Mutatio locorum vana. 45. 1

N

Nasus pro iracundia cur. 79. 51

Nationes barbaræ desertæ cur di-
cantur. 136. 7

Natura humana non vilis apud Deum.
429. 14

Natura humana propter fragilitatem
infanti à parentibus neglecto compa-
ratur. 126. 16

Naturæ humanæ corruptio describitur.
211. 7. & seq.

Naturæ corruptæ mala. 52. per totum
Psalmum.

Naturæ vulnera quatuor, & eorum con-
traria. 678. & 679. 4

Nazarei quomodo dicantur consecrati.
820. 19

***Necessitas Gratiae Dei.** 16. 2. 21. 9

***Nomen Domini** cur dicatur sanctum.
170. 21

Nomen Domini inuocare, & in nomine
Domini inuocare, idem 87. 8

Nox, quomodo reperiatur in cælo.
823. 3

Nox, orandi tempus maximè opportu-
num. 823. 3

Nox, occasio occulta peccandi. 62. 4

Nox, aliquando significat tempus tri-
bulationis. 60. 3

Nox, aliquando significat tempus quo
abest lux Gratiae. 720. 4

Nox, aliquando significat mortis tem-
pus, sicut dies, tempus vitæ. 93. 2

Noctis diuisio in quatuor partes apud
veteres. 806. 6

Nubes, currus Dei, domus, tentorium.
70. 12

Numerus septenarius sumitur pro, fre-
quenter. 767. 4

Nuptiarum sponsi, & sponsæ cælestis,
quis sit finis. 271. 19

O

Obedientia summa debetur Domino,
quod simus figmentum manuum
eius. 749. 1

Obedientia, à Deo requisita. 598. 8

Obedientia mandatorum, tributum est.
Nnn quod

I N D E X.

quod Deus pro collatis in suos bonis,
requirit. 667. 43. 7
Oblationes spirituales, & holocausta,
quæ sint dicenda. 314. 20
Obliuio Dei, radix peccatorum. 46. 18
Obliuisci, quomodo conueniat Deo.
295. 25
Obliuisci mundum, quid. 267. 12
Obstinati, & superbi, cur cedro similes.
135. 6
* Octaua, quid. 23. intit.
Oculus intellectum aliquando significat,
anima voluntatem, veterem memoriam.
147. 13
Oculos mentis auertere à Deo, malorum
omnium initium. 320. 3
Oculis officium, aurium, & linguæ tribui-
tur. 751. 2
* Odor ex oblati arietum carnibus, cur
suauissimus diceretur. 382. 13. 14
* Oliuæ fructiferæ Iustus comparatur;
Impius ligno arido. 735. 8
* Opera bona sacrificium sunt Iustitiæ.
17. 6
Opera mala laboriosa. 31. 16
Opera consona esse debent cordi, & ori.
52. 6
Opera Infidelis, qualia. 53. 2
Opera bona remuneratur Deus ex Iusti-
tia. 73. 23
Opera Dei mouent homines ad fidem.
163. 4
Opera Dei conformia sunt verbis illius.
163. 4
Opera quæ Deo placet, sunt in fide, vt
in radice. 163. 4
Opera Domini inuestigabilia. 466. 19
Opera nostra minima vnde valorem ex-
cipiant. 374. 6
Operum bonorum venenū, præsumptio.
17. 6
Operibus Deus laudandus. 161. 2
* Oratio quomodo facienda. 20. 1. 2
Oratio est domus Dei. 21. 8
Oratio verbalis, & realis, quæ. 86. 3
Oratio quæ peccata remittat. 711. 7
Oratio humilis non reuertitur vacua.
186. 16
Oratio est defensio Iusti contra persecu-
tores. 186. 16
Oratio feruens, & assidua, ad impetran-

dum apta. 521. 3. 763. 1. 804. 1
Oratio eadem ter à Psalmista iterata,
quod mysterium contineat. 323. 4
Oratio peccatoris, quando non sit pec-
catum. 689. 6
Orationis alæ ieiunium, & saccus.
186. 16
Orationis donum effectus tribulationis.
151. 25
Orationem Deus inspirat. 719. 2
Orationem, quando Deus contemnat.
20. 1. 2
Orantes, quare Deus non semper exau-
diat. 521. 4
Orando manus leuare, quid significet.
363. 5
Orationis perseverantia, insigne donum
Dei. 383. 19
Ordo Melchisedech. 701. 5
Ore meditari Sapientiam, quid sit.
206. 32
Ornamentum mulieris Christianæ ad in-
tus esse debet. 269. 15
* Ossa, robur significant. 147. 13
Ossa Iustorum, quomodo Deus custo-
diat, & quid sint. 179. 20
Ossa pro viris perfectis; caro pro infir-
mis, aliquando sumitur. 184. 12
Ossium exultatio perfectam lætitiā si-
gnificat. 184. 185. 12.

P

PAbula omnium Dei, quæ nam sint
102. 1
Palatia huius mundi, cur dicantur ta-
bernacula peccatorum. 513. 11
Panis pro quolibet cibo in Scriptura po-
nitur aliquando. 650. 16
Paradisus terrestris, atrium fuit celestis
778. 2
Paruuli in Scriptura, vel simplices, vel
ignorantes, vel humiles, intelliguntur.
760. 2
Paruuli dicuntur aliquando amici huius
 sæculi. 82. 8
Passeres pro omnibus auiculis, hebræa
locutio est. 652. 19
Passio Christi holocaustum. 86. 3
Passio Christi à voluntate, & potestate
Dei processit, sed non sine culpa In-
dzo-

I N D E X.

- drotum . [696. 26](#)
 Passio Christi ab infantia cœpit. [338. 16](#)
 Passiones Christi, cur plurimæ fuerunt. [232. 16. 17](#)
 Passionis Christi magnitudo. [335. 7](#)
 Passionis Christi prædictionem, Vide [Psal. 63. toto](#) ; [67. & Psal. 68. toto](#) [490.](#)
 Passionem Christi, quomodo abhominarentur discipuli. [335. 8](#)
 Passionis Christi meditatione contemnantur omnia. [354. 2. 3](#)
 Pater æternus generando Filium, cruciatu Verbum dicitur. [258. 1](#)
 Patientia melior est, quàm liberatio de calamitate temporali. [278. 17](#)
 Patientia longè melior est diuitijs. [175. 2](#)
 Patientia in malis causa bonorum. [564. 17](#)
 Patientes faciliè experiuntur in se Dei auxilium. [173. 2](#)
 per Patientiam Deus est cum iustis tribulatis. [179. 18](#)
 Patria cœlestis, Regnum, Ciuitas, Domus dicitur. [776. 2](#)
 Patriæ gentiũ Græca lectio, & [cur. 603. 7](#)
 Pauperi quomodo Deus assistat à dextris. [696. 30](#)
 Pauperi qui miseretur, sœneratur Deo. [711.](#)
 Pauperes voluntate, vt Deum quærant. [412. 37](#)
 Paupertatis fructus. [40. 19. & seq.](#)
 Pauperes quos exaudit Deus. [412. 38](#)
 Pax non solum habenda cum omnibus, sed operanda, & quærenda. [261. 14](#)
 Pax quomodo in hac vita quærenda sit. [177. 14](#)
 Pax perfecta haberi nequit in hac vita. [177. 14](#)
 Pax cœlestis Hierusalẽ est inquirenda ibi.
 * Peccatum veniale propriè non relinquit maculam. [56. 2](#)
 Peccatum mortale cur dicatur maximũ. [84. 14](#)
 Peccatum mors est animæ; gratia, vita eiusdem. [169. 19](#)
 Peccatum solum miseros facit. [300. 1](#)
 Peccatum primum in pueris, vt plurimũ, est mendacium. [339. 3](#)
 Peccatum est interdum pœna peccati, & grauissima. [10. 11. & 223. 14. 15. & 408. 33. & 498. 12](#)
 Peccati fuga è Dei timore proficiscitur. [177. 13](#)
 Peccati remissionem, & infusionem iustitiæ, Lutherani malè dixerunt, non imputationem peccati, & imputationem iustitiæ. [641. 12](#)
 Peccati instrumenta sunt membra externa. [761. 8](#)
 Peccans grauiter, præsertim peccato luxuriz, miser, & curuus. [221. 6](#)
 Peccati radices duæ. [182. 1](#)
 Peccata recogitanda nocte. [17. 5](#)
 Peccata quot modis cõmittuntur. [20. 6. 7](#)
 Peccata, miseriæ sunt. [23. 1](#)
 Peccata, laquei sunt. [47. 7](#)
 Peccata leuia, magna iustus existimat. [153. 12](#)
 Peccata sunt tenebræ, sicut gratia lux est. [113. 1](#)
 Peccata, quæ magis misericordiam merentur. [111. 7](#)
 Peccata Christianorum causa persecutionum in Ecclesia. [349. 1](#)
 Peccata parentum in filijs, quomodo Deus castiget. [691. 13](#)
 Peccata quomodo Deus operiat. [514. 2](#)
 Peccata parentum Deus punit in filijs, ac posteris, cum similia peccata non videntur. [482. 8](#)
 Peccata tegi, & non imputari, quid. [254. & seq. 2](#)
 Peccata nostra Christus sibi tribuere potuit. [92. 1](#)
 Peccatorum pœnitentia. [25. 6](#)
 Peccatorum cognitionis effectus. [24. 3](#)
 Peccatorum remissio optanda. [153. 1](#)
 Peccatorum causa, cur vita hominis breuior sit. [560. 7](#)
 Peccatorum radix, quæ. [40. 18. & 639. 3](#)
 Peccator omnis quomodo dicatur prævaricator. [757. 7](#)
 Peccator dum iusto vult nocere, magis sibi nocet. [176. 12. & seq.](#)
 Peccator Aranæ pulchrè assimilatur. [235. 14](#)
 Peccator Aspidi surdæ similis. [339. 5](#)
 Peccator quomodo dicitur longè distare à Deo. [804. 1](#)
 Peccatoris execrati malicia. [42. 26](#)

I N D E X.

- Peccatoris manus**, quid. 196. 12
Peccatoris salus, quod habeat initium. 227. 5
Peccatoris furor, ut furor serpentis, qui nulla arte mansuefieri potest. 339. 4
Peccatores iustificari possunt in conspectu hominum, sed non in conspectu Dei. 859. 1
Peccatores, licet ditissimi, cur sæpè laborant ære alieno grauati. 294. 23
Peccatores ex peccatis suis sensum doloris, quæ par esset, cur pauci percipiant. 209. 4
Peccatorum vsuræ. 429. 14
Peccatorum potentia torrenti, vel pluuiæ velocissimè transeûti similis. 340. 7
Peccatorum multorum ceruices concidit Deus. 802. 4
Peregrinis cœlestis patriæ Deus est vmbraculum in die, & nocte. 774. 5
Perfecti Deum timent timore filiali. 175. 9
Perfecti etiam viri semper aliquid habent, quod sibi petant ignosci. 222. 12
Perfecti viri ciuitatis muri dicuntur. 285. 11
Periculum salutis æternæ maximum. 720. 3
Pericula Inferni, qui non aduertant. 720. 4
Pericula ab hostibus pietatis semper sūt in hac vita. 710
in Periculis Deus vnicum refugium. 320. 1
Pericula vitæ præsentis, soli spirituales viri norunt. 245. 9
Perpetuum in terris nihil. 685. 39. 34. 41
Persecutor, quos persequitur facit ægro tare morbo pœnæ, se ipsum verò morbo culpæ. 186. 16
Persecutores iustorum, cur vocentur homines sine addito. 783. 3
Persecutiones cur Deus permittat. 728. 13
Persecutionis Imperatorum in Christianos descriptio. 252. 11. & seq.
de Persecutione Sancti quandoque quæruntur. 256. 18
Persecutionum tria genera, quibus Iustos affligunt impij. 183. 9
Persecutionum, & calumniarum morbo, quæ medicina facienda. 199. 6
Perseuerantia in oratione, insigne doni. 383. 19
Perseuerantiæ donum, proprium Prædestinatorum. 370. 8
Pes superbix, quid. 196. 12
Peti nihil melius potest à Deo, quàm ut conuertat nos ad se, & ipse conuertatur ad nos. 488. 8
***Pharao**, figura Diaboli. 544. 11
***Pij & humiles**, paucissimi respectu impiorum. 703. 7
Piorum honores & opes. 406.
***Plaudere manu**, quid significet. 277. 1
Plenitudo temporis in Scripturis, quid. 633. 13
Pluuia voluntaria, quid sit. 389. 10
***Pœna aperit oculos**, quos culpa clauserat. 456. 5
Pœna peccati in hac vita. 632. 12
Pœnitentia. 720. 4
Pœnitentia vera, quæ requirit. 805. 4
Pœnitentia Deo semper grata. 806. 6
Pœnitentiæ & Confessionis efficacia. 117. 1
Pœnitere dicitur Deus, quando rem mutat, non pœnitere quando non mutat. 816. 11
Pœnitentium genera tria tribus animi generibus comparantur. 630. 8
Pœnitentium vita peccatoribus displicet. 631. 9
Pœnitentium officium. 214. 19.
Populus Dei regendus à Magistratu Ecclesiastico, & civili. 466. 20
Populus Dei, aptissimè vineæ comparatur. 488. 8
Populus Dei nil timere debet. 275. 7
Populus Dei, quid cupiat & oret. 373. 2
Portæ mortis, quid. 39. 14
Portæ Sion, quid. 39. 14
Postulanda à Deo. 748. 2
Potentix Dei laudes. 132. 1. & seq.
Potentix Dæmonum, & fragilitatis humanæ descriptio. 357. 4
ad Potentiam omnia opera Dei mirabilia reuocantur. 667. 2
***Prædestinationis gratia dicitur fors**. 60. 6
Prædicatores cur dicantur cœli. 80. 4
Præ-

I N D E X.

Prædicationis Apostolicæ fructus. 430. 16
 Præmium contemnens temporalia. 16. 4
 Prælati portat & portatur. 527. 1
 Præsentia Dei mirabilem vim habet ad moderandas actiones. 767. 8
 Præsumptio, venenum operum bonorum. 17. 6
 Præuorum sodalitas cauenda. 84. 13. 15.
 Principium malorum pœnæ. 10. 12
 Principes operam dent, ne peccata fiant. 537. 14
 Prodigium fieri alicui, quid sit. 818. 8
 Progressus in viâ vitæ, aptè describitur per introitum & exitum. 775. 8
 Prophetæ etiam sancti Patriarchæ fuerunt. 660. 12. 13. 14
 Promissa Diuina sunt dulcis meditatio in tribulatione. 752. 1
 Promissiones diuinas consequendi modus. 710.
 Promissa Dei qualia. 50. 7. 8
 Principum contemptus, magni criminis præcedentis indicium, & pœna. 33
 Prosperitas impiorum quasi somnium. 435. 8
 Prosperitas iniquorum, magna tentatio iustorum, & quomodo superetur. 200. 7
 Prosperitatis effectus. 121. 1
 Prosperitatis fructus in impijs. 433. 4
 Prosperitatis tempus, dies significat; nox tribulationis. 60. 7
 Protectio Dei. 121. 2. 566. 1. 716. 10. 717. 19
 Protegere dexteram, quomodo dicitur Deus non sinistram. 774. 5
 Prouidentia Dei singularis erga iustos. 205. 24. & seq. 705
 Prouidentia diuina in Ecclesia præsertim timet. 685. 39. & seq.
 Prouidentia Dei mira erga animalia. 890. 10
 Proximorum auxilio vacans facillè colligit animum cum voluerit, si nihil desideret eorum, quæ videntur. 276. 10
 * Psalmi nonnulli, cur Alphabetici scribantur. 109. in tit.

Psalmi Graduales vnde dicti. 769. in tit.
 Psalmi Graduales cuius rei figuræ. 769. in tit.
 Psallere sapienter, quid sit. 279. 7
 Psallendi Deo genera quatuor. 614. 7
 in Psalmis significatio primi verbi est regula significationis secundi. 5. 1
 Psalmodia omnibus operibus anteponenda. 163. 3
 * Pulchritudo spiritualis, quæ nam sit. 261. 5
 Pulchritudo Sponsæ Christi, quæ nam. 268. 14
 Purgatorij ignis non contemnendus. 209. 1
 Purgatorij locus aliquando Infernus dicitur. 61. 10

Q

Quærere faciem Dei, quid sit. 657. 4
 Quærendi Deum, vnde initium sumatur. 657. 4
 Quærere Deum in duobus positum est. 658. 4
 Quiescere quomodo dicatur Deus. 818. 15
 Quoniam, particula in oratione hebraica sæpe redundat. 75. 32
 Quoniam, sæpe pro &, vel autem. 95. 9

R

Rapinæ cur homini, non bestiis prohibita. 652. 24
 Ratio naturalis, cur dicatur lumen vultus Dei. 18. 7
 * Recordari, & obliuisci quomodo dicitur Deus. 34. 5. 614. 4. 837. 9
 Redemptio, & Redemptor. 708
 Redemptio nostra perfectissimè complebitur in die Iudicij. 808. 8
 Redemptionis humanæ excellentia. 229. 9. 10
 Redemptionem cur operatus sit Saluator in medio terræ. 447. 13
 Regi duo sunt necessaria, Veritas, & Iustitia. 262. 6
 Regnum Christi consumet omnia Regna.
 N n n 3 gna.

I N D E X.

Regni Dei ab hominū Regno quadruplex discrimin. 879. 11. & seq.
 Regnum Cœlorum bellando, & laborando capitur. 817. 10
 Regnum Dauidicum æternum in Christo impletur. 541. 550. 5
 Renquatio corporis in Resurrectione, cur Aquilæ comparetur. 640. 5
 Religioſæ vocationis beneficia expreſſa in electione Populi Iſraelitici. 825. 4
 Rerum humanarū curſus dicitur Tortrens. 703. 8
 Restreata, poſſeſſio Dei dicuntur. 653. 25
 Res ſacræ quomodo adoranda. 618. 5
 Reſurrectionis Chriſti dies, cur a Domino facta dicatur. 731. 22
 Res magnæ, dicuntur res Dei. 193. 6
 Reuerentia pro verecundia ſumitur. 325. 23
 Rex bonus quis. 413. 1
 Robur & Innocentiâ rariffimè coniunguntur. 76. 35

S

Sacerdotum Aarō, & Melchifodechi differentia. 702. 5
 Sacerdotum officium quod nam ſit. 814. 7
 Sacramenta viſibilia ſunt alligamenta peccatorum. 888. 3
 Sacrificium veſpertinum, figura ſacrificij Crucis. 857. 2
 Sacrificium laudis à Dei ſande quomodo internoscatur. 308. 16
 Sacrificium laudis ſummam ſalutis cōplectitur. 304. 24
 Sacrificium magis acceptum Deo. 410. 36
 Sacrificium verum, & propriè dictum extat in Eccleſia Dei. 702. 5
 Sagittæ Domini quid, & earum effectus. 209. 2. 3
 Sagitta vocantur verba Dei. 862. 7
 Salomontypum Chriſti gerebat. 413. in tit. 815. 9
 Saluare alios nullus poteſt, qui ſe ſaluare non poteſt. 885. 3
 Salus corporis non contingit hominī

ſine auxilio Dei. 169. 17
 Salus animæ nemini datur, ſine præueniente, comitante, & ſubſequentegratia Dei. 169. 17
 Salutem concupiſcere non ſufficit. 769. 6
 Salutis peccatoris, quod ſit initium. 217. 5
 Salutis via arcta, & anguſta. 710. 3
 Samuel Sacerdos non fuit, ſed tantum Leuita. 619. 6
 Sancti, & fideles in hac vita abſconditi. 503. 4
 Sancti appellari poſſunt fideles, & iuſti. 720. 2
 Sancti quandoq; de perſecutione queruntur. 156. 28
 Sancti quomodo dicantur tranſire per ignem, & aquam. 380. 18
 Sancti viſi Patres ſunt, & Matres eorum, quos ad fidem, & poenitentiam conuertunt. 798. 3
 Sancti omnes vna cum Chriſto Mundum iudicabunt. 899. 7
 Sanctificatio pro Sanctuario aliquando ponitur in ſcriptura. 603. 6
 Sancti cum Chriſto regnantes, ſunt ſedes Dei. 778. 5
 Sanctis quandoq; Deus bona tribuit, aliquando aufert. 256. 28
 Sanctuarium, quid. 553. 38
 Sanctorum opera quibus ſtultitia ſint. 791. 6
 Sanctus Iſrael, eſt cognomen Dei. 412. 24
 Sapere ſapientibus eſt viuere. 195. 15
 Sapientiz, & ſcientiæ inundatio in Beatis vnde. 195. 10
 Sapientes huius Mundi, nomine inimicorum aliquando ſignificatur. 33. 3
 Sapientia perfectæ duo requirit. 707. 1
 Scandalum puſillorum, & Pharizæorum actiuum, & paſſiuum. 765. 5
 Sceptrum aliquando ſignificat potestatem Regiam. 715. 3
 Scientes Deum, notitia amicitiz, quæ nam dicantur. 196. 11
 Scientia Dei tenebras omnes penetrat. 846. 11
 Scientia Dei mirabilis in opificio humano. 747. 11. & ſeq.
 Scientia Dei mirabilis in opificio ſpiritali.

I N D E X.

- tuali, & corporali. 841. 15
 Scientiæ Divinæ mirabiles effectus describuntur. Psal. 138. toto. 842.
 Scientia Dei notissima, & obscurissima. 844. 5
 Scientiam Dei nemo latere potest. 845. 6
 Scriptura sacra facta est Iudæis in laqueum. 409. 27
 Scuta hostium spiritualium, quæ nam sint. 455. 3
 * Securitas, & benedictio Cælestis Patris, quæ nam. 891. 2
 Secunda sabbati, quæ nam dies apud Iudæos. 281. in tit.
 Semei, quomodo intelligendū sit, præceptum fuisse, ut malediceret Davidi. 223. 13.
 Septenarius numerus sumitur pro, frequenter. 751. 4
 Septuplū in sacris litteris, significat generatim maius, & multiplex. 484. 13
 Sermo Dei velocissimus. 892. 4
 Servi Dei, qui nam, qui filij, & qui filij filiorum. 588. 29
 Servi Dei quales esse debeant. 711. 1
 Servorum & puerorum magna affinitas. 711. 1
 Sessio Christi à dextris Patris. 700. 5
 * Sion, Ecclesiæ typus. 530. 4
 Sion Mons, caput regni populi Iudæi. 442. 3
 Similitudines sacræ Scripturæ cautè usurpandæ. 340. 5
 Sibi, particula sæpè redundat in scriptura. 771. 22. 5
 * Sodalitas pravorum cauenda. 84. 13. 14. 15
 Sollicitudo Dei erga homines, pulchra metaphora exprimitur. 335. 3
 Sol cur dicatur factus in potestate diei & luna in potestatem noctis. 830. 8
 Sol præcipuè gloriam Dei prædicat. 81. 5
 Somnus, mors temporalis, & spiritualis. 51. 4
 * Spes est iustissima domus iusto. 19. 10
 Spes propriè dicta in Christo non fuit, sed fiducia. 58. 1
 Spes cum timore iungenda. 169. 18
 Spes firma in Deo quomodo habetur. 190. 4
 Spes viua ad obtinendam vitam eternam necessaria. 180. 22
 Spei utilitates. 806. 5
 Sperans in Deo quomodo pascitur in diuitijs. 198. 4
 Sperantes in Domino cur aliquando plus affligantur. 198. 4
 Sperare in nomine Domini qd. 170. 21
 * Spina aliquādo significat tribulationem, & stimulum conscientie. 157. 4
 Spiritus variè exponitur. 902. 5
 Spiritui sancto quomodo conveniat peculiariter dici Dominum dominorum. 830. 3
 Spiritus sancti schola nulla utilior. 176. 11
 Spiritus aliquādo significat cor, & os. 153. 2
 Spiritus principalis, quis. 312. 15
 Spiritus contribulatus, quis. 313. 18
 Spirituales filij, quo cibo pascantur. 797. 4
 Spirituales oblationes, quæ nam dicendæ. 314. 20
 Spiritualibus filijs, quis sit pater, & mater. 798. 3
 Spiritualis pulchritudo, quæ. 260. 5
 Spiritualis potestas servorum Christi nō minus cernitur in actione, quàm passione. 795. 5
 * Sponsa Christi Ecclesia, B. Virgo, & aliæ Virgines. 265. 11
 Sponsæ vestis deaurata, & amictus varius, quid. 265. 11
 Sponsæ Christi per prærogativam dicuntur qui virginitatem in Ecclesia voverunt, non extra. 269. 16
 * Stellæ sunt veluti castrorum cælestium acies ordinata. 164. 6
 Sterilitas animæ duobus modis accipitur. 185. 14
 Sterilitas quædam incredibilis post hanc vitam. 203. 19. 20
 Studium præcipuum iusti. 20. 3
 Stulti vocantur, qui confidunt in diuitijs suis. 292. 10
 * Substantia pro fundamento, aut substantia sumitur. 400. 2
 Superbia fuit causa dispersionis Iudæorum. 346. 13
 Superbia initium omnis perditionis. 197. 13

Superbi,

I N D E X.

Superbi, & obstinati, cedro similes. 135. 6
 Superbiæ obnoxij sunt magni viri. 196. 12
 Superbiæ pes, quid. 196. 12
 Superbi potentes montes terræ vocantur. 273. 3
 Superbia cordis, oculorum, verborum, & operum. 812. 2
 Superbi omnes véto inflati sunt. 781. 5
 Superbi, non tenent superbiam, sed à superbia tenentur. 434. 6
 Superbos Deus spernit. 758. 6
 Susannæ innocentia manifestata. 199. 6
 Susceptio matutina, quid. 91. in tit.
 Sustinere Dominum, quid. 110. 2. 207. 9
 * Synagogæ initium sub Mose. 142. 2

T

T Abernaculum Arcæ cur domus Dei, & locus habitationis gloriæ eius. 38. 8
 Tabernaculum erat figura Ecclesiæ. 132. in tit.
 * Temporalia contemnens prodigium fit multis. 418. 8
 Tenebræ spirituales, quæ nam sint. 867. 4
 Tentationes diaboli sunt gladij, & tela ignea. 37. 6
 Tentationes vbique. 45. 1
 Tentatio magna iustorum, est felicitas iniquorum, & quomodo superetur. 200. 7
 Tentationes vincunt milites Christi fugiendo, & tolerando. 272. 1
 Tentationes quomodo dissoluat Deus. 785. 7
 Tentationis tempore quid faciendum. 111. 5
 Tentare proprium hypocritarum. 188. 19
 Tentationum initia, paruuli sunt Baby loniæ. 838. 12
 Tentatus liberatur à tentatione dupliciter. 51. 4
 Tentatus duo mala patitur. 50. 1
 Tempestas passionis Christi varia significat. 400. 3
 Temporalia bona sunt verorum bonorum imagines, & umbræ. 221. 9
 Temporalibus anxie quæredis, & con-

seruandis frustra insudant homines. 559. 9. 10
 Temporalia contemnentis præmium. 16. 4
 Terra quomodo in incarnatione Verbi dederit fructum suum. 385. 5
 Terræ amatores, terra nuncupantur. 273. 3
 Terrena bona, quæ sint. 16. 3
 Testimonia iniquorum peruersa arguuntur quinque capitibus. 185. 14
 Testamētum, & pactum quomodo conueniant in promissionibus Christi. 819. 12
 * Tharsis, quid significet. 284. 4. & sequen.
 Thesaurus nunc res pretiosas, nunc earum locum designat. 165. 7
 Thymiamatis, quod offerebatur in templo qualitates. 857. 2
 Thymiamatis qualitates habere debet oratio. 857. 2
 * Timere Deum, in Scriptura aliquando sumitur pro colere. 99. 24. 705.
 Timor Dei idem, ac pietas. 83. 10
 Timor filialis. ibidem.
 Timor, & spes coniungi debent. 169. 18
 Timor cum spe veræ charitatis indicium est. 169. 18.
 Timor Domini veram vitam felicem parit. 176. 11
 Timor Domini quomodo faciat beatum. 703. 7
 Timor Dñi, securitas maxima. 355. 5
 Timoris sancti signum. 797. 1
 Timore filiali Deum timent perfecti. 175. 9
 Timorem Domini ante oculos quomodo semper habere possimus. 364. 7
 Timorem Dei abijcere quàm malum. 54. 7
 Timentis Dominum præmium. 708
 Timentis Deum felicitates. 707
 Timentes se Deus protegit. 709
 * Tonitrua, cur voces Dei. 72. 15
 Torcular, quid. 32. in tit.
 Torrens voluptatis, quid. 195. 9
 * Traianus laudatus, quod delatoribus operam non daret. 626. 6
 Tribulatio significatur per spem. 168
 Tribulationis tempus nox significat; dies tempus prosperitatis. 60. 7
 Tribu-

I N D E X

- Tribulationes** sunt sacrificia. 86. 3
Tribulationis effectus. 121. 1. 150. 14. & seq.
Tribulationes aliquando dicuntur aquæ. 159. 8. 400. 1
Tribulationes euadendi via facilior. 416. 3
Tribulatione correptus, quid facere debeat. 731.
Tribulationes iustorum minores sunt, quam carnalibus videantur. 350. 3
Tribulationes, quibus purgantur electi, signa sunt grauissimarum poenarum, quas luent impij post hanc vitam. 350. 4
Tribulationem iustorum variæ metaphoræ. 380. 9. 10
Tribulatio ad poenitentiam adducit. 896. 9
Tribulatio, gutta est; gloria flumen. cum Tribulatis quomodo sit Deus. 578. 15
Tribulationum utilitas. 842. 8
Trinitas Diuinarum Personarum. 705.
Trinitas opera indiuisa. 164. 6
***Turpia verba** factor. 53. 5
- V**
- V**anitas varia significat. 246. 7
Vaticinium de Christo, & Ecclesia. 479.
***Veniale peccatum** propriè non relinquit maculam. 56. 2
Ventorum cū Angelis similitudo. 827. 9
Ventus dispergens impios dicitur Angelus. 183. 6
Venti, equi currus Dei. 70. 12.
Verbum asperum mors æterna, vel iudicij sententia. 568. 3
Verbum Domini, quod sit. 163.
Verba pro operibus aliquando intelliguntur. 373. 3
Verba præcipationis, quæ. 399. 4
Verba Dei sagittæ vocantur. 262. 7
Verbo offendere facile, ac periculosum, & quando. 219. 1. 2. 3
Verborum Christi vis. 259. 3
Verecundia, quæ prohibetur à Domino. 253. 17
Veritas Dei quanta. 193. 6
Veritas passim fidelitatem significat seruandi promissa. 707
Veritas, & Sapientia cibus animæ. 892. 3
Veritas nos liberauit, Charitas seruos fecit. 622. 1
***Via duplex** qua Deus ad nos descendit. 841. 6
Via Resurrectionem, vita Beatitudinem quando significat. 61. 11
Via Domini variæ significatiões. 112. 18
Victoria nobilissima, quæ sit. 218. in tit.
Victoria Iusti in hac, & alia vita. 573. 8
Videntes Deum similes sunt Deo; nunquam videntes semper dissimiles. 167. 12
Videre in lumine lumen, quid sit. 195. 10
Viribus suis nemini fidendum. 546. 16
Virga pro sceptro Regio. 442. 3
Virtus alia in via, alia in Patria. 510. 7
Viri sanguinum, & dolosi quomodo pleantur. 329. 27
Viri Belial, qui dicantur. 625. 4
Viri constantes lapides; infirmi vero puluis dicti. 634. 15
Virginitas longè excellentior coniugio. 798. 3
Virtutum quatuor Cardinalium mystica significatio. 614. 7
Virtute propria homo liberari non potest à malis. 169. 16
Vita Christi qualis. 16. 4
Vita fundamentum est omnium bonorum. 169. 19
Vita hominis ob peccatum contractior facta. 560. 7
Vita mortalis cur vocetur via. 732. 1
Vita æterna corona Iustitiæ, & merces operum bonorum. 721. 7
Vita humana spiritus dicitur. 643. 15
Vita æterna Christo est Iustitia, nobis misericordia. 123. 5
Vita sine addito in scriptura passim significat vitam æternam. 750. 5
Vitæ Christi descriptio Prophetica. 772. 6
Vitæ humanæ breuitas. 220. 5. 6. 7. 8
Vitæ præsentis pericula soli spirituales viri norunt. 245. 9
Vitæ beatæ, & sempiternæ descriptio. 721. 8
Vitia,

I N D E X.

Vicia, & habitus mali, sunt hostes homi-
nis. 25. 7

* Umbra mortis, quid sit. 103. 4

* Unicornis filius dilectus cur dicitur.
135. 6

* Voluptuariorum in die iudicij angus-
tia. 802. 6

Vota distinguere, quid sit. 381. 12

* Vfurx peccatorum. 429.


* Vter in pruina, quid sit. 751. 3


* Vultus Dei, ira Dei. 90. 9. 91. 12

Vultus Dei adiutorium omnium maxi-
mum, & potentissimum. 273. 4

Z

Z Elare super iniquos, quid sit.
197. 2





Regestrum .

a b A B C D E F G H I K L M N O P Q R S T V X Y Z
 Aa Bb Cc Dd Ee Ff Gg Hh Ii Kk Ll Mm Nn Oo
 Pp Qq Rr Ss Tt Vv Xx Yy Zz . Aaa Bbb Ccc
 Ddd Eee Fff Ggg Hhh Iii Kkk Lll Mmm Nnn.

Omnes sunt Quaterniones , præter a b , & Lll qui
 sunt Duerniones , & Nnn Ternus .



BRIXIAE, MDCXI.

APVD PETRVM MARIAM MARCHETTVM.

1-0-2.



